


Awajún [Aguaruna]



Aguaruna: Awajún [Aguaruna] (Bible)

Awajún [Aguaruna]

Aguaruna: Awajún [Aguaruna] (Bible)

copyright © 2020 Wycliffe Bible Translators, Inc.

Language: Aguaruna

Translation by: Wycliffe Bible Translators

Contributor: Wycliffe Bible Translators, Inc.

Aguaruna

agr

Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Aguaruna

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

PDF generated using Haiola and XeLaTeX on 11 Nov 2022 from source files dated 29 Jan 2022
83ecbfd-5af5-5abb-945b-1213bf2b2b18

Contents

Génesis	1
Éxodo	88
Levítico	130
Números	138
Deuteronomio	157
Josué	189
Jueces	202
Rut	225
1 Samuel	231
2 Samuel	274
1 Reyes	304
2 Reyes	334
Esdras	359
Nehemías	365
Job	374
Salmos	401
Proverbios	476
Eclesiastés	493
Isaías	497
Jeremías	557
Ezequiel	591
Daniel	603
Oseas	621
Joel	633
Amós	640
Jonás	654
Miqueas	658
Habacuc	667
Zacarías	673
Malaquías	675
Mateo	680
Marcos	739
Lucas	775
Juan	835
Takasbau	879
Romanos	931
1 Corintios	957
2 Corintios	979
Gálatas	994
Efesios	1002
Filipenses	1010
Colosenses	1016
1 Tesalonicenses	1021

2 Tesalonicenses	1026
1 Timoteo	1029
2 Timoteo	1036
Tito	1041
Filemón	1044
Hebreos	1046
Santiago	1064
1 Pedro	1070
2 Pedro	1077
1 Juan	1081
2 Juan	1087
3 Juan	1088
Judas	1089
Iwainakbau	1091

Nagkamnamu Génesis

Génesis tawa nunak “nagkamnamu” taku tawai. Apajuí chichame yama nagkamchaku agagbau Génesis tawa nuwi augmatuí nayaimpish, nugkash, aentsush, tuja ashí tikich waji aidaú ii wainainag dusha wajuk najaneakukita nuna. Israel aents aidaush tuwiya jijnjauwaita nunashkam augmatuí.

Juju yama nagkamchaku agagbauwa juwi dekaji Apajuí aentsun najanauwa nujash wajuk antugdainuk ayi. Tuja wajuk nagkamdaukita pegkegchau takatash dushakam juwi agagbauwai. Apajuí chichamen umigtsuk dita wakegamun takasu asagmatai, waitut nagkamnamu.

Nunik dita pegkegchau takamsamujin senchi waituidau asagmatai, Apajuí aentsun agkanmitkatatus nagkamauwai.

Aents aidaú Apajuín umigtsuk shiig pegkegchaun takaidau asagmatai, Apajuí nugkanum yumin yutumtikag aentsun kuntin aidaújai ijinak Noék Apajuí wakegamun takau asamtai, niina nuwen, uchiji aidaun, uchiji nuwe aidaun, niina aatus uwemtikjauwai.

Dutikamshakam aents aidaú nuna de kayatak ima Apajuínak umigtsuk, ataku nagkamawag pegkegchaun takainak makichik kumpin muuntan najaniagtai, Apajuí dita anentain dekaju asa nuna kumpinan tsaikui. Dutika aents aidaun suwimkan suwak maki makichik chichamtin antugdaimainchau emakui.

Aatus Apajuí yama nagkamchak ashí waji aidaun najankauwa nuna pachis augmatuí, dutika nuigtushkam Apajuík niina aentsji aidaunak kajimakig idaisashtina nuna pachis augmatus inagnawai.

Yama nagkamchaku najankamu

¹ Yama nagkamchakug, Apajuík nayaimpin nugkajai najanauwai. ² Nugka niimeg atsau, ayatak nayants kuna, suwe ijiamu aajakui. Nuna awanken Apajuín Wakani* buchitu au.

³ Nuadui Apajuí chichaak: “¡Tsaaptin weti!” tusa tamawaik, tsaaptin wajasui. ⁴ Nuna Apajuí diis “tsaaptin aku ima pegkejai”, tusa tsaaptinun suwenmayan akankauwai. ⁵ Duwi tsaaptinun adaikauwai “tsawai”, tuja suwen adaikauwai “kashi” juna takas ejeyuwai makichik tsawantan.

⁶ Nuigtu Apajuí chichaak: “Agkaju múun wajasti, nuniak yumin akanjati”, tiuwai. Tamawaik imanisag uminkauwai. ⁷ Dutika Apajuí agkajun najana, yumi nugkaya atinun tuja yakiya atinjai akankauwai. ⁸ Dutika Apajuí agkajua nuna adaikauwai “nayaim”. Juna umik kintamag tsawak jimag tsawantan ejeyuwai.

⁹ Nuna ashimak Apajuí chichaak: “Nayaimpi nugkaan yumi ayá juka makichik ijunbaunmag ijunjati, nunitai buku wantinkati”, tiuwai. Tamawaik imanisag uminkauwai. ¹⁰ Yumi makichik ijunbaunmak ijunjamtai buku juwakua nuna Apajuí adaikauwai “nugka”, untsu yumi piyajua nuna adaikauwai “nayants”. Nuna Apajuí shiig pegkeg diisui. ¹¹ Nuna umika Apajuí chichaak: “Ashí nugkanum dek asak aidaú, dupa nejen aidaush,

* **1:2** “Apajuín Wakani” tawa nunak “Wakani Pegkejin” taku tawai. Duwi Nuevo Testamentonmak tutupnik Wakani Pegkeji tawai. Tuja Wakani Pegkejiya duka Apajuíyai.

nuigtush numi nejen aidaushkam tsapakti”, tiuwai. Tamawaik imanisag uminkauwai. ¹² Nugkanmak ashí ajak aidau tsapakui, dupa nejen aidaush antsag numi nejen aidaushkam, nejenak mantamsawag ijuntsauwai. Nuna Apajú shiig pegkeg diisui. ¹³ Juna aatus kampatum tsawanta duwi umikui.

¹⁴ Tuja nuigtushkam Apajú chichaak: “Agkaju múun wigka weaja juiyash, etsantug nugkan tsapmitkau aidau aitnume, nunú etsantak akankati tsaptinun suwenmayan, dutikam tsawan, nantu, mijan aina nunú dekaapatina iwainau agtinun. ¹⁵ Nunú nayaimpin agkajujin nanamsag etsantuinak ashí nugkan tsapmitkau agtinme”, tiuwai. Tamawaik imanisag uminkauwai. ¹⁶ Nuadui Apajú dekas jimag etsantin agtinun najanauwai: Tsawai etsanjatnun ima muuntan najanak, kashi etsanjatnunak yaijan najanauwai. Nuigtushkam yaya aidaunashkam najankauwai. ¹⁷⁻¹⁸ Dutika Apajú nugkan tsawai kashijai tsapmitkatnun, etsantin aina nuna apusauwai agkaju múun wigka weaja nuwi. Nuna Apajú shiig pegkeg diisui. ¹⁹ Juna taka takakua kintamag, ipak usumta juu tsawantan ejeyuwai.

²⁰ Nuna ashí umiku asa, Apajú chichaak: “Namaka batsamsatin aidaush ditashkam yujaktinme, nuniagtai nugka awanken, nayaimpin agkajuijina juwi yujasagtin aidaushkam, chigki wegantu aidaush yujaktinme”, tiuwai. Tamawaik imanisag uminkauwai. ²¹ Nuigtushkam Apajú najankauwai nayantsanmaya kuntin dekas múun aina nuna, nuigtushkam tikich namak yaig aidaun nagkamas ashí najankauwai. Chigki wegantu aidaunashkam imatiksag najankauwai. Nuna Apajú shiig pegkeg diisui. ²² Juna najanak Apajú pegkegnum yumigkiak: “Yujaktajum imaniakjum nayantsanum piaktajum, tuja chigki wegantu aidautigmeshkam imanishumek yujaktajum, imaniakjum ashí nugka jamagtajum” tiuwai. ²³ Makichik uwejan amua tsawanta duwi junak najanauwai.

²⁴ Nuigtushkam Apajú chichaak: “Nugkanmashkam yujakti kuntin maki makichik niimtin aina nunú, kuntin tagkumtai aidau, tagkumchatai aidaujai, tuja tikich kuntin japiinas yujau aidaushkam”, tiuwai. Tamawaik imanisag uminkauwai. ²⁵ Apajú juu kuntin aidaun najankauwa nunak, ashí pegkeg diisui.

²⁶ Ashí juna umik chichaak: “Yamai aents iina niimejai betek najanami, nii nugkanum pujusmatai, namak nayantsanmaya aidaush, nanamtin aidaush, kuntin aidaush, kuntin japiinas yujau aina dushakam ima niinak umigtinme” tiuwai.

²⁷ Apajú aentsun najadauwa nunak niina niimejai betek, aishmagkun nuwajai najanauwai.

²⁸ Dutika pegkegnum yumigkiak:
 “Yujaktajum, nuniakjum nugkak ashí jamagtajum,
 tuja nayantsanmaya namak aidauk ashí atum kuitamkatajum,
 tuja agkajunum chigki nanamin aidaush,
 kuntin wegantu nugkanum yujaka
 dushakam ashí atumin umigtamtinme”, tiuwai.

²⁹ Tusa Apajú chichaak: “Yamai atum shiig antuktajum; ashí ajak juu nugkanmaya nejen aina nunak, numi neje yujutai aina nujai, atum yuwatnun umigkajime. ³⁰ Unstu, ashí kuntin nugkanum ayá nunash, chigki wegantu aidaunashkam, japiinas yujau aina nujai, ashí pujutji ajamu aina nunak, ashí dupa samekbau aina nuna dita yuwatnujin umigkajai”, tiuwai.

Tamawaik imanisag uminkauwai. ³¹ Apajuí ashí nii najankamujin ijumag diis tiki pegkeg wakejumain diisui. Juna najanak ashimak juinia uwejan makichik ijuk tsawantan ejejuwai.

2

¹ Juna Apajuí aatus nayaimpin, ashí nayaimpinum ayá nujai najana, nugkanash ashí nugkanum ayá nujai najanak ashimkauwai. ² Ashí najanak umik, tsawan sieteya juwi Apajuí ayamjauwai. ³ Nuadui nunú tsawantan Apajuí etegkauwai, tsawan pegkejam tuke takashtai, ayamtai atin ati tusa. ⁴ Jujuwai Apajuí nayaimpin nugkajai najanamua nunú pachisa aughbattsamu.

Nugka pegkeg Edén tutainum Apajuí aentsun apusamu

Apajuí nayaimpin nugkajai najanauwa nunú tsawantaik, ⁵ makichik numikesh, dupagkesh tsapaichu aajakui. Wagki eke Apajuí yumin yutumtikchau asamtai. Nuigtushkam aents nuna takai ajakmamainkesh atsujakui. ⁶ Ayatak nugka initkenia yumi bukuiti jiinki nugkan ukatujakui. ⁷ Nuwiyen Apajuí, nugka yukukuntun juki aentsun najanauwai. Dutika najana aepes, dujinum umpua mayain egketuk, aents iwaku ema inankiuwai.

⁸ Nuna dutika, Apajuí etsa minitaijiya atú Edén nugkanum yujagken ajatuuwai, dutika nuwi nii aents najanamujin apusauwai. ⁹ Apajuí ashí numi pegkeg aidaun yujág yutai aidaunash uyujkauwai. Untsu nuna ejapeen ajatuuwai jimag ajakan. Makichik ajak nuna neje yuwakuik tuke jachatai tabaun, tikich ajakan neje yujuai, pegkejash pegkegchaujai dekatai tabaujai.

¹⁰ Nunú nugka Edégnum makichik namak jiiniuwai ajak aidaun ukatkatín. Nunik nuwiya ipak usumta imajin namak tsegkejui. ¹¹ Makichik tsegkeakun daaji Písón tutai aajakui. Nunú namakak nugka Havilá tutai dekas oro pujamua nuna tentea apajakui. ¹² Nuiya oro ima shiig pegkejai. Nuanuig ayawai numi bedelio daagtin puwaji kugkuin, tuja kaya ónice tutaishkam ayawai. ¹³ Tuja tikich tsegkeakbaun daajiyai Guihón tutai. Nunú Cus nugkan ashí tentea apajakui. ¹⁴ Kampatuna nunuwai namaka daaji Tigris. Duka Asiria nugka, etsa minitaiya nuni awa aatus nagkaemakui. Untsu ipak usumta nuna daajiyai namak Eufrates.

¹⁵ Apajuí aentsun Edégnum: “Juwi pujusam takakum ajakmata, dutikakjum kuitamkata ashí wi najankag juka”, tusa apusauwai. ¹⁶ Dutika chichajak: “Ashí yujág juju ajanum ayá juka yuwata. ¹⁷ Untsu yujág pegkeg, pegkegchaujai dekatai ajá ejapeen waja duka yuwawaipa, nunú yuwakmek dekas jakattame”, tiuwai.

¹⁸ Nuna tusa Apajuí chichaak: Aishmag ima nigki pujakug pegkegchauwai, dekas niijai tsanias pujusa yainimainun najanatjai, tiuwai. ¹⁹ Apajuí ashí nugkanmaya kuntin aidaun najankauwai, ashí chigki wegantu aidaunashkam najanak aentsun juki itan awajus: Ame maki makichik kuntin aina juna daajig adajjata, tusa tima nii imatiksag adajjauwai. ²⁰ Ashí kuntu daaji aidaunak, chigki wegantu aina nunashkam nii adajjamua nunisag juajui. Nuna aents dutika takak pujakushkam, niijai atuesa yainimainjinak igkugchauwai.

²¹ Nuadui Apajuí aishmagkun kajan ipatuk senchi ikanag niina pagaen makichik jujukiuwai, dutika agkau tepeamta nigki esantikauwai. ²² Nunú

aishmagkun pagae jujukbauwai Apajuí nuwan najanauwai, dutika aishmagkun ejetiuiwai. ²³ Nuna wainak aishmag chichaak:

“Juka mina iyashjuiya pagae juki najanamui, nuadui niina daajig nuwa tutai atatui, wagki Apajuí aishmagnumian juki najadau asamtai.”

²⁴ Nuadui aishmag nuwenkug makichik iyashik weawai. Nuniau asa apajinak niina dukujijai ukuak ima niina nuwejaig pujumainai.

²⁵ Aishmagkuk, niina nuwejai mai wisu batsamajaku ainawai, tujash nuniakush datsaamajakchaju ainawai.

3

Adán Evajai Apajuí chichame intimjukiagbau

¹ Apajuí ashí kuntin tagkumchatai aidaun najankauwa nuwiya, dapi ima senchi kajinkachu, tsanumtan yacha asa, nuwan tajua iniak:

“¿Apajuísh wajinjutpagmae, juju yujág aina duka makichkish yuwawaigpajum tujamiagmaka?” tau.

² Tama nuwa ayaak:

“Yujagkek ashí yumainaitji. ³ Untsu Apajuí iina chichagtamak, tikich yujág ejapeen waja auna nejeg yuwawaigpa, antiitkesh antigkaigpa, auna neje yuwakjume jakattajume, tusa tujamaji” tau.

⁴ Tutai dapi nuwan chichajak:

“Auk wainak tujamne, jakashtatjume. ⁵ Apajuí shiig dekawai, au yujág yuwakjume, atum wajukua ainagme nunú wainmamkajum Apajuíjai betek wajasum, pegkeg, pegkegchaujai dekamainaitjum nuadui aunak tujabiugme”, tiuwai.

⁶ Tama nuwa yujagken diistakama shiig senchi wakejukui. Nuniak dekas yuwatjai, nunikan Apajuí wainbau yacha iman atajai tusa, akaka juki yuwauwai. Nunik aishinashkam susam, niishkam juki yuwauwai. ⁷ Nuna yuwawag wajanbauwaik, mai wisu wajamun wainmamkajui, nunikag makichik ajak higuera tutaya nuna dukeen apajag itipjuawajui.

⁸ Nunikag batsatai aagkú dase dasenbaunum Apajuí wekagun antukag, waipakai tusag tupikakiag numi ijunbaunum uumkajui. ⁹ Tujash Apajuí aishmagkun untuka iniak:

“¿Tuwi amesh pujame?” tau.

¹⁰ Tama nii ayaak:

“Wika ame minamun antukan ishamkajame, núnikan wisu pujau asan uumjukjame”, tau.

¹¹ Tutai Apajuí aishmagkun chichajak:

“¿Ya ame wisu pujamunash dekamtijamame? ¿Wagka wi amina yujág yuwawaipa timajam dusha yuwamume?”

¹² Tama aishmag Apajuín ayaak:

“Ame wijai tsaniasa pujasa yainikti tusam nuwa sujusmaum nunú yujagken sujusmatai, wika yuwamjai” tau.

¹³ Tutai Apajuí nuwan iniak:

“¿Amesh wagka dutikamume?”

Tama nuwa ayaak:

“Minak dapi tsanujamtai, yujagken yuwamjai”, tiuwai.

¹⁴ Timatai Apajuí dapin chichajak:

“Amek juju dutikau asam, ashí kuntin aidaun nagkaesau tikima shiig pegkegchau atinaitme. Yamai nagkamsamek japiintsam wekaesam nugka yukukuntu yuu wekaetinaitme. ¹⁵ Amek yamai nagkamsamek nuwajaig

tuke shiwag atinaitme, nuadui amina uchijum wegantu agtina dusha, nuwa uchiji wegantu agtina nujaish tuke shiwajak agtinai. Nuwiya makichik amina buukmin dekenjamkatnai, tujash amek ayatak niina sagkani esattinaitme”, tiuwai.

¹⁶ Nuna tusa nuwan chichajak:

“Amek ejapjukmesh najaimakum senchi waittsam uchigbau atinaitme. Imanika waitiakmesh tuke amina aishjumjai pujutak waketinaitme, nuniakmeshkam amina aishjum tabau tuke umigtinaitme”, tiuwai.

¹⁷ Tusa aishmagnashkam chichajak:

“¿Wagka nuwemin chichame antugkumesh, wi juju yujág yuwawaipa tusa timajam dusha yuwamume? Ame umishtaimin yamai nagkamsag nugkak shiig pegkegchau wajastatui. Amek nuwiya waittsam ajakmam yuwatnaitme, ima imaniakuam ame jakum ukuktinaitme. ¹⁸ Nugkanmak jagki, ashí numi, dupa jagkigtin aidaush yujaktatui. Imanikmatai ikamia ajak aidau yutinaitme. ¹⁹ Amina senchigmin takasa yuwa pujusam ataktu nugka najaneakum ukuktinaitme, wagki amek nugka najanamu asam. Nuadui ame jakmeshkam nugka juki najanamu asam, nunismek nugka najaneatnaitme”, tiuwai.

²⁰ Tusa tima Adán niina nuwe daajin adaikauwai Eva: Nii ashí aentsun dukuji atin asamtai.

²¹ Tuja Apajuí dita nukujagtinun kuntinu duwapen najatua anujauwai.

²² Dutika Apajuí chichaak: “Yamaik aentsuk jutii ainag nujai betekmamtin wajasaje, iman asag ditashkam pegkejan pegkegchaujai dekainawai. Nuniau asag yamai nagkamsag yujág pujutan sukagtina auna yuwawag, tuke jatsuk pujusainum tajai”, tiuwai.

²³ Nuadui Apajuí aentsun Edégnum pujaun jiiki juki yamaik nugka najanamua juwi takasa yuwa pujustinme tusa apusauwai. ²⁴ Dutika jiiki ajapeak, Apajuí niina aentsjin querubin aidaun etsa minitaiya aatuni awaantauwai. Dutikak yujág pujuta sukagtina nuna waya yuwawainum tusa puyag kegaun apujutusui. Nunú Edégkan tentea apajakui.

4

Caín Abeljai pachisa augmattsamu

¹ Adánka nuwe Eva ejapjukui, nunik pujus tsawanji jegajim aishmagkun uchigmakui, nunik adaikauwai Caín. Nunak: “Makichik uchin aishmagkun uchigmakjai, junak Apajuí minak sujuse”, taku tiuwai. ² Duwi pujus Eva tikichin uchin Abelan Caígka yachin uchigmakui. Abelak uwijan kuitamajakui, untsu Caín ajakan ajakbau aajakui.

³ Kuashat tsawan nagkaemakui ai, makichik tsawantai, Caín Apajuí anentag susatnun ajaka nejen juuka juki ejentauwai. ⁴ Tuja Abelchakam makichik uwig yama nagkamchak petsakbau shiig duwegman achika juki Apajuín emematak ejetiuwai. Dutikamtai Apajuí Abelnak shiig anenjauwai, nuadui Abeldaunak shiig anentus jukiuiwai. ⁵ Untsu Caígnak shiig anenjachui, tuja nii anentag susamunashkam shiig anentsag jujukchauwai. Dutikam Caín senchi kajekui, nunik kajekbautak wekagu.

⁶ Nunittaman Apajuí chichajak: “¿Wagka imanika kajekmesh wekaeme? ⁷ Amesh pegkeg takakmek, shiig aneamas wekaemainaitme, amek nunitatum duwi amina tudaujum wagagtamkittak awagtamui. Tujash amek tudauwa duka depetmainaitme”, tiuwai.

⁸ Makichik tsawantai Caín yachin chichajak: “Ajanum wemi” tusa yachin juki weuwai. Nunik atushat akanak yachi Abelan mauwai. ⁹ Dutika yachin maamtai, Apajuí Caíngkan chichajak:

“¿Dusha amina yatsum Abelash wajukame?” tusa tama, Caín ayaak: “Achah, wikaitag mina yatsuju kuitamnun”, tiuwai.

¹⁰ Tutai Apajuí chichajak:

“¿Wagka yatsumesh aikaume? Ame yatsum maakum numpe nugkanum ukagbauwa nunú mina untsujui, suwimak susata tusa. ¹¹ Nuadui amek shiig pegkegchaunum juwaktatme, juju nugka yatsumi numpe ukagbaun uwaja nunú nugkanmak amek pujuschattame. ¹² Ajakak ajattame, tujash tsapaishtatui. Emetnaja pujamugmek atsugtamtinai, ayatak wainkam tikich nugkanum wekaetinaime, imaniakmesh ame pujusa ayamainuk igkugchatnaitme”, tiuwai.

¹³ Tusa tama Caín Apajuín ayaak:

“Mina suwimkajuk shiig katsunmainchawap atatura. ¹⁴ Yamaik juju nugkanmak ajapjame, nuadui wi amijai pujamunak idaikun, tikich nugkanum machikish ayamtsuk wainkan wekaetatjai, nuni wekagai mina yaki igkunkat nunú minak mantuatin ati”, tiuwai.

¹⁵ Tutai Apajuí chichajak:

“Aents amina mantamuk, sieteya imania suwimkan jukiagtinai”, tiuwai.

Nuna tusa Apajuí Caígka iyashin maam amainchau apujtus akupkauwai.

¹⁶ Dutikam nii pujusa Apajuíjai chichasbaunak ukuak Nod nugkanum wee pujusui. Nod nugkak Edégnum wajasa diismak etsa minitaiya nuni aajakui.

Caín wegantu aidau

¹⁷ Caígka nuwe ejapjuk aishmagkun uchigmakui, dutika Enoc adaikauwai. Dutikamtai Caín nuwi yaaktan najana niina uchiji daajin Enoc adaikauwai.

¹⁸ Tuja Enoc akiauwai Irad. Irad akiauwai Mehujael, Mehujael akiauwai Metusael, Metusael akiauwai Lámec.

¹⁹ Lámec jimag nuwan: Adá daagtinun, Silá daagtinjai nuwatkauwai.

²⁰ Adá uchigmakui Jabalan. Tuja Jabal wegantu aidauk aakchinum batsamin, tagkun kuitamin aajaku ainawai. ²¹ Jabala yachi aajakui Jubal. Nuna uchiji wegantu aidauk arpan awatin, pigkui umpuin aajaku ainawai.

²² Siláshkam uchigmakui Tubal-caín. Nigka jiju bronze, hierro aina nuna najanajaku aidaun apaji aajakui. Tubal-caígka umayi aajakui Naamá.

²³ Lámec niina nuwe aidaun chichajak:

“Mina duwag aidauwah, antuktajum: Makichik aents mantuatag tusa ijutkui wi maamjai.

²⁴ Caígka mauk sieteya imania suwimka jukitnai tibauwai. Tuja mina mantauk setenta y sieteya imania suwimkanak jukitnai”, tiuwai.

Adán niina nuwe Evayai uchiji kampatuma nuna akiamu

²⁵ Adánka nuwe ataktu ejapjuk uchi aishmagkun uchigmakui, dutika adaikauwai Set. Nunak: “Mina uchig Abelan Caín mauwa duwi minak juna Apajuí sujuse”, taku tiuwai.

²⁶ Setchakam makichik uchin akia adaikauwai Enós. Duwi nagkamas aents aidauk Apajuín emematuinak niina daajin adaitus segajaku ainawai.

5

*Adán wegantu aidau**(1 Cr. 1.1-4)*

¹ Juju ainawai Adán wegantu aidau daaji agatkamua duka. Apajui yama nagkamas aentsun najankug niina niimejai betekmamtinun najanauwai. ² Aishmagkun nuwajai najanauwai. Dutika yama najanbauwaik shiig yumi yumigkis juna daajig aents ainawai, tuu adakauwai.

³ Dutikam Adán ciento treinta mijan ejeyi pujus akiauwai Set, niijai betekmamtinun. ⁴ Nuna akia pujusui ochocientos mijan, tuja nuigtushkam tikich uchiji aishmag aidau, nuwa aidaujai akigkui. ⁵ Ashí ijumjamak novecientos treinta mijan pujus jakauwai.

⁶ Set ciento cinco mijan ejeyi pujus uchiji aishmagkun Enósan akiauwai. ⁷ Nuna akia pujusui ochocientos siete mijan, tuja nuigtushkam uchiji aishmag aidau, nuwa aidaujai akigkui. ⁸ Ashí ijumjamak, novecientos doce mijan pujus jakauwai.

⁹ Enós noventa mijan ejeyi pujus uchiji aishmagkun Cainágkan akiauwai. ¹⁰ Nuna akia pujusui ochocientos quince mijan, tuja nuigtushkam tikich uchiji aishmag aidau, nuwa aidaujai akigkui. ¹¹ Ashí ijumjamak, novecientos cinco mijan pujus jakauwai.

¹² Cainán setenta mijan ejeyi pujus uchiji aishmagkun Mahalaleelan akiauwai. ¹³ Nuna akia pujusui ochocientos cuarenta mijan, tuja nuigtushkam tikich uchiji aishmag aidau, nuwa aidaujai akigkui. ¹⁴ Ashí ijumjamak novecientos diez mijan ejeyi pujus jakauwai.

¹⁵ Mahalaleel sesenta y cinco mijan ejeyi pujus uchiji aishmagkun Jéredtan akiauwai. ¹⁶ Nuna akia pujusui ochocientos treinta mijan, tuja nuigtushkam tikich uchiji aishmag aidau, nuwa aidaujai akigkui. ¹⁷ Ashí ijumjamak ochocientos noventa y cinco mijan ejeyi pujus jakauwai.

¹⁸ Jéredtak ciento sesenta y dos mijan ejeyi pujus uchiji aishmagkun Enokan akiauwai. ¹⁹ Nuna akia pujusui ochocientos mijan, tuja nuigtushkam tikich uchiji aishmag aidau, nuwa aidaujai akigkui. ²⁰ Ashí ijumjamak novecientos sesenta y dos mijan ejeyi pujus jakauwai.

²¹ Enoc sesenta y cinco mijan ejeyi pujus uchiji aishmagkun Matusalégkan akiauwai. ²² Nuna akia pujus Enoc trescientos mijan Apajui wakegamun takajak pujusui. Tuja nuigtushkam tikich uchiji aishmag aidau, nuwa aidaujai akigkui. ²³ Ashí ijumjamak trescientos sesenta y cinco mijan pujusui. ²⁴ Enokak Apajui wakegamun takak pujau, makichik tsawantai ayatak megkaekauwai. Apajui niinak jukiuiwai.

²⁵ Matusalén ciento ochenta y siete mijan ejeyi pujus uchiji aishmagkun Lámekan akiauwai. ²⁶ Nuna akia pujusui setecientos ochenta y dos mijan, tuja nuigtushkam tikich uchiji aishmag aidau, nuwa aidaujai akigkui. ²⁷ Ashí ijumjamak novecientos sesenta y nueve mijan ejeyi pujus jakauwai.

²⁸ Lámecc ciento ochenta y dos mijan ejeyi pujus makichik uchiji aishmagkun akiauwai. ²⁹ Dutika adakauwai Noé. Nunak: “Apajui nugkan pegkegchaunum yumigjau asamtai, shiig senchi takainaku waituinag nunak, juju uchi ayamtijamjattawai”, taku tiuwei. ³⁰ Noé akiinamtai nuigtushkam Lámecc pujusui quinientos noventa y cinco mijan. Tuja nuigtushkam tikich uchiji aishmag aidau, nuwa aidaujai akigkui. ³¹ Ashí ijumjamak setecientos setenta y siete mijan ejeyi pujus jakauwai.

³² Noék niina uchiji: Sem, Cam Jafet aatus aajaku aina nunak quinientos mijanan ejeyi pujus akigkui.

6

Aents aidau ayatak pegkegchaunak takajaku aidau

¹ Aents ashí nugkanum kuashat kaweahtai, nawanji aidaushkam akiinkauwai. ² Nunú nuwa shigmauch aidau, Apajuín uchiji aidau nuna diisag etegke dita wakejamun nuwatkaaju ainawai. ³ Nuniagtai Apajuí chichaak: “Aentsuk ayatak tudauk asag yamai nagkamsag tuke pujuschatin ainawai, ayatak ciento veinte mijan pujusa jagtinai”, tiuwai.

⁴ Tuja Apajuí uchiji aidau, aentsu nawanji aidaun nuwatuk uchi akiamu aidau gigante senchi maanin wajasu aajaku ainawai.

⁵ Aents aidau nugkanum batsamas senchi tunamainak, ima pegkegchaunak anentaimtus yujajuidaun Apajuí wainkauwai. ⁶ Imaniagtai Apajuí wake besemag anentaimak, najanmainchunas najanawabiagtai, tusa awake anentaimjauwai. ⁷ Nuna tusa Apajuí chichaak: “Ashí aents aidaun wi najanawaitag nunak, aentsnum nagkamsan, kuntinnash, tuja japiinas yujau aina nunash, chigkinash ashí betekmasan ijinatjai. Najanmainchunas najanawabiagtai, tusan awake anentaimjai”, tiuwai.

⁸ Tujash Apajuík Noénak ima nigki puyatjusa umigbau asa, shiig anenjauwai.

Noé arca najanamu

⁹ Jujuwai Noé pachisa augmattsamu. Noé aajakui aents shiig pegkeg, ima Apajuí wakejamunak takajaku, tuja tikich aents batsamajakua nujai ijumjamash niig dekass pegkegam aajakui. ¹⁰ Noé akiauwai kampatum uchiji aishmagkun, duka: Sem, Cam, Jafet aatus aajakui.

¹¹ Tujash nugkanmak Apajuí diismak ayatak tudauk, pegkegchau takat aina duke piyak aajakui. ¹² Ashí aents aidauk ayatak pegkegchaunak taka batsatun Apajuí wainkauwai. ¹³ Nunik Apajuí Noén chichajak: “Yamaik ashí nugkanum aents batsata nunak ijinatasan anentaimtugjai. Dita pegkegchaujin kuashat maaniamu ayawai. Duwi ditanak ashí tikich nugkanum ayá nujai ijinattajai. ¹⁴ Nuadui numi puwagtin aina nunú dakajam arca najanata, dutikam tesaka umikta. Tuja nuigtushkam yumi wayawai arca tuntupe, tuja initkenishkam ashí pegkaejata. ¹⁵ Arca najankumek jujai betek dekapam najanata: Esanti ciento treinta y cinco dekapamu atatu, utsu wegkanti veintidos dekapamu nuigtu jimaituk atatu, antsag yakintig trece dekapamu nuigtu jimaituk atatu. ¹⁶ Tuja kampatuma imajin ekenim najanata. Utsu arcan jeega nuna nugkaan jimaituk dekapam makichik niimtai ujaitame, aikasmek nuna yantamen makichik waiti ujaita. ¹⁷ Wi yumin yutumtjattajai, dutika ai nunú ashí nugkanum piyagtatui, nuniak nugkanum pujutji ajamu batsatana nunak ashí ijinattawai. ¹⁸ Tujash amejag chichaman umiktatjai. Tuja amek, amina nuwem, uchijum aidau, uchigmi nuwe aidau, aatsajum arcanmak chimpimattame. ¹⁹ Tuja kuintin ashí nugkanmaya aidau, aishmag nuwajai arcanum chimpiattame, ditashkam jinutsuk amejai betek uwemkatnume. ²⁰ Ashí chigki wegantu aina duka, kuintin tagkumtai wegantu aina dushkam, japiinas yujau aina nujai, jima jimagchik apatdayas amejai arcanum chimpimattawai. Ame uwemtai ditashkam uwemjatnume. ²¹ Nuigtushkam ashí yutai aidau juukam ijumjata, nuna kuintinush yuwatnume, tuja atumshakam nuwiyag yuwattagme”, tiuwai.

²² Tusa tima Noé Apajuí tibaunak imatiksag umikui.

7

Yumi yutug dujajua ashí nugkanum piyagbau

¹ Apajuí Noén chichajak: “Ashí tikich aents aidaujai diismash, amek imá wi wakegamua duke umiakum pujame. Nuadui ame amina pataim uchijum aidaujai arcanum egkematajum. ² Nuniakjum kuntin pegkeg aina nunú siete aishmag, siete nuwa aajam yajuakam chimpiata, untsu kuntin yuchatai aina duka makichik aishmag, makichik nuwa aajam egkeattame. ³ Nuigtushkam chigki wegantu aina dushakam jinaa megkaejai siete aishmag, siete nuwa aaja yajuakam chimpiata. ⁴ Siete tsawan asan yumin yutumtjattajai. Duka cuarenta tsawan, nuigtu cuarenta kashi yutugtatui. Wi najankamu aidau nulgá batsata nunak ashí ijinattajai”, tiuwai. ⁵ Tusa tima Apajuí tibaunak imatiksag Noé umikui.

⁶ Yumi ashí nugka utuja piyajua nunak Noénak seiscientos mijanji ajai nunikui. ⁷ Tsawan yumi yutugtin jegamtai, nujagken uwemtugtasag Noé, niina nuwe, uchiji aidau, uchiji nuwe aidau aatus arcanum chimpimauwai. ⁸ Nunitai kuntin pegkeg aidaush, kuntin yuchatai aidaujai, tuja chigki aidaushkam, nulgá japiinas yujau aidaujai, ⁹ Noé egkemamtai ditashkam nunisag Apajuí tibaunak imanisag jima jimagchik arcanum aishmag nuwajai chimpimauwai.

¹⁰ Arcanum chimpima siete tsawan wegai, nagkamdauwai yumi yutug dujajua nugkanum pimutan. ¹¹ Noé seiscientos mijan ejeyu ai, jimag nantu taka, diesisiete tsawan wegai, yumi nagkamna nayaimpinmaya senchi yutau. Imaniai, initkanmaya yumi piyag teenak aushkam, ashí nugkanum pukuni shiig múun jijnajui. ¹² Nunik cuarenta tsawan, nuigtu cuarenta kashi tuke yutuu au. ¹³ Nunú tsawantinig Noé niina uchiji Sem, Cam, Jafet aatus aajakua nujai, tuja niina nuwe, nuigtu kauptum niina uchiji nuwe aidau aatus arcanum egkemawajui. ¹⁴ Nuigtushkam kuntin tagkumtai aidau, kuntin tagkumchatai aidau, japiinas yujau aidau, chigki wegantu aidau aatus ditajai betek chimpimauwai. ¹⁵ Tuja Noé arcanum egkemtai, ashí kuntin aina duka ditashkam jimag apa apatdayas chimpimauwai. ¹⁶ Ashí kuntin aidauk aishmag nuwajai apatdayas chimpimamtai, Apajuí Noén dutikata tusa tibaunak imatiksag umikui. Nunik ashí chimpimamtai Apajuí arca waitijin epenuiwai.

¹⁷ Nunikmatai, yumi nagkamna cuarenta tsawan, cuarenta kashi mijamtsuk tuke yutuu au. Imaniau asa nujag dujajua nugkanum pimak, arca kukag tepaun inanmiuwai. ¹⁸ Nujagkek neetsuk ayatak dujaju au. Imanik dujajak arcanak aan yakí takuiniuwai. ¹⁹ Imanik dujajuu asa, ashí nugkanum muja tsakaku aidaunak yutua emegkakui. ²⁰ Ashí yutua emegkak, nuigtushkam sieteya imajin yakintin ewagak piyajui. ²¹ Imaniku asamtai aents nugkanum batsatuk ashí jinawajui, tuja chigki wegantu, kuntin tagkumtai wegantu, kuntin tagkumchatai aidaushkam, kuntin japiinas yujau aidaujai ashí jinawai. ²² Pujutji ajamu aidau nugkanum batsatuk ashí jinawai. ²³ Ima Noék, tikich niijai arcanum chimpimauu aina nujajug uwemjauwai. Untsu arcanum egkemachajuu aina duka ashí jinawai. Aents, kuntin tagkumtai wegantu, chigki wegantu aidaushkam, kuntin japiinas yujauu aina nujai ashí jinawai. ²⁴ Nujagkek ashí nugkanum piyag kuyutsuk ciento cincuenta tsawan asauwai.

8

Abau mijaakbau

¹ Imanik tsawan atai, Apajuí Noén ashí kuntin niijai arcanum chimpí-jaidaujai wait anenjauwai. Nuadui Apajuí abau kuyuati tusa dasen nugká ajunjauwai, dutikam nunú umpuam kuyutan nagkamdauwai. ² Tuja nugkanum waa múun ujanjamtai, yumi initkanmaya jiinaidaushkam ashí epennajui. Antsag nayaimpinmaya yumi senchi yutaushkam ashí mijaakui. ³ Nunikmatai duwi diipas kuyutan nagkamdauwai. Nunik ciento cincuenta tsawan ejegak nuni senchi kuyuu. ⁴ Nunik siete nantu taka nuigtu diecisiete tsawan wegai, muja Araratnum arca patamiuwai. ⁵ Tuja nujagkek tuke kuyu aig, diez nantu taka nuigtu makichik tsawan tsawaju ai, muja shiig múun aidaun titiji wantinjauwai.

⁶ Tuja cuarenta tsawan nagkaemai, arcanum egkema niimtain Noé ujainiuwai. ⁷ Dutika cuervon juki akupkauwai, tujash ekemainji atsau asamtai, kuyuati tusa dakak ayatak nanaak wainak wekagu. ⁸ Nuna dutika duwi pujus, kuyua buku weatsuash tusa dekatatus makichik pauman akupkauwai. ⁹ Tujash nugkak eke buku wantinchau asamtai, paumak nii ekema ayamainjin wainkachu asa wakitki arcanum tauwai. Nunikmatai Noé uwejen awentun pauman juki arcanum awayauwai.

¹⁰ Dutika ataktu siete tsawan dakasui, nunik awentsag pauman akupkauwai. ¹¹ Dutikamu etsa akagai, olivo dukeen tsujig apas tauwai. Nunikmatai Noé anentaimas, dekas nugkak bukuap weawa tiuwai. ¹² Tuja nuigtushkam siete tsawan dakasui, nunik awentsag pauman akupkauwai; tujash paumak ataktu wakitkig tachui.

¹³ Tuja nujag kuyua buku wajasua nunak Noék mijanjinak seiscientos ejeyi nuigtu makichik mijanan achiku ai nunikui. Mijan nagkamnamu yama nagkamchak nantu taka makichik tsawan tsawaju ai, Noé arca jeen chigkainiuwai. Dutika diikma kuyua nugka buku wajasun wainkauwai. ¹⁴ Tuja jimag nantua nuna achika veinti siete tsawan wegai, namakak shiig kuyua buku wajasui.

Noé arcanum egketu jiinkimu

¹⁵ Ashí kuyua buku wajasmatai Apajuí Noén chichajak: ¹⁶ “Arcanum ame, amina nuwem, uchijum aidaun, uchigmin nuwe aidaujui chimpígum nunú ashí jiinjatajum. ¹⁷ Tuja ashí kuntin: chigki aidaun, kuntin tagkumtai aidaun, kuntin japiinas yujau aidaun amejai chimpíja dushakam ashí jiigta. Dutikawamin ashí yantannum shiyaktinme, nunik yujaktinme, nuniak ashí nugkanum piyaktinme”, tiuwai.

¹⁸ Tusa tima Noé jiinak niina nuwen, niina uchiji aidaun, tuja uchijin nuwe aidaun aatus ashí jiiui. ¹⁹ Tuja ashí kuntin aidaushkam, tuja kuntin tagkumtai aidaush, tagkumchatai aidaujui, kuntin japiinas yujau aidaushkam, chigki aidaushkam ashí jiinjauwai. ²⁰ Noé arcanmaya jiinki kuntin patasa apeaku Apajuí ememattinun kaya ekenag najanauwai.* Dutika kuntin aidaun, chigki aidaujui Apajuí diisam pegkeg aidaun yajuak nuna nejen ashí apeak† Apajuín emematiuwai. ²¹ Nunú Apajuín shiig awagmakui. Nuadui Apajuí chichaak: “Yamai nagkamsanuk aents aidaun

* **8:20** “Kaya ekenag najanauwai” tawa nunak apach chichamnum “altar” tawa nuna tawai.

† **8:20** “Ashí apeak” tawa nunak “holocauston” taku tawai. Holocausto tawa nunak kuntu maawag ampujin jujuki nejenak ashí apeaku ainawai.

tudaujinig nugkanak ataktuk pegkegchaunmak yumigjashtatjai, wagki aents aidauk yama datsameamuik pegkegchau takatnak anentaimtin ainawai. Tuja nuigtushkam ataktu awagkinuk yamai ijinag aikanuk pujutji ajamu aina nunak ijinashtinaitjai.

²² “Juju nugka awa junisag aigkik, ajakma yutak tuke atinai, tuja nimpain, tsetsek, yumi tepeau, esat, tsawai, kashi aina duka ashí imanisag atinai”, tiuwai.

9

Apajuí Noéjai chichaman umikbau

¹ Apajuí Noén niina uchiji aidaujai pegkegnum yumigkiak aatus tiuwai: “Yujaktajum, imaniakjum nugka pampankajum pimutkatajum.

² Ashí kuntin nugkanum batsamin aidauk atumin ishamjamainak kujaitin ainawai. Chigki wegantush, kuntin aidauk, nayantsanmaya aidauhkam atumnak ashí umigtamiagtinaí. ³ Nuadui atumek ashí kuntin aidau, nuigtu dupa duke yujutai aina dushakam atum wakegamu yutinaitjume. Nunú aidauk wi atumin ashí amaajime. ⁴ Untsu kuntin maa yuwakjumesh numpe yuwawaigpajum, wagki numpanum pujut au asamtai. ⁵ Aentsnak aishmagnash, tuja nuwanash wijai betekmamtinun najanauwaitjai. Nuadui makichik aentskesh tikich aentsun maunak niinashkam dutiksag maawagtinaí, tuja kuntinkesh atumin mantamuk dushakam dutiksaik maam agtinaí.

⁶ “Tuja makichkikesh tikich aentsun maunak, niinashkam dutiksag maatin ainawai, wagki aentsuk wijai betekmamtin najanamu asamtai.

⁷ Tujash atumek uchi akigjum yujaktajum, nuniakjum ditajai ashí nugkanum piyaktajum”, tiuwai.

⁸ Tuja nuigtushkam Apajuí Noén niina uchiji aidaujai chichajak: ⁹ “Wi yamai atumjai chichaman umiktatag duka, atakea duish atumi uchijum wegantu agtina nujashkam tuke asatnun umiktatjai. ¹⁰ Nunak ashí kuntin atumjai arcanum chimpju jijnjau aidau: Chigki wegantu, kuntin tagkumtai aidau, kuntin tagkumchatai aidau, ashí kuntin nugkanmaya aidaujaish umiajai. ¹¹ Atumjai wi chichaman umikag duka makichkish yapajinashtinaí, nuadui atak awagkinuk aentsnak, tuja kuntin aina nuinashkam yumin yutumtjanuk ijinashtinaitjai. Atakea duish yumi yutug nugkanmayanuk ijinashtinaí”, tiuwai.

¹² Tusa Apajuí chichaak: “Juwai chicham tuke atinun, wi atumjai, tuja kuntin aidaujaishkam umikbau iwainamua nunú. ¹³ Yujagminum apusajai arco iris*, juju diisjum adeagtinaítjume wi chichaman nugkanmaya aidaujai umikag duka. ¹⁴ Wi nugkan yujagkim ematai, nuwi arco iris wantintinaí. ¹⁵ Nuna wainkun wi atumjai, tuja kuntin aidaujaishkam chichaman umikag nuna tuke aneetnaitjai. Nuadui ataktu awenag yumi yutug piyajag iijpachagtinaí. ¹⁶ Nunú arco iris yujagminum wantinkui, wi waintinaitjai, nuniakun ashí aents aidaujai, tuja kuntin ashí nugkanum batsatana nujashkam chicham tuke atinun umikag nuna tuke aneasnuke atinaitjai. ¹⁷ Chicham tuke atinun ashí aents aidaujai, tuja kuntin aidau nugkanum batsatana nujashkam umikag, nunú iwainamuk arco irisa jujuwai”, tusa aatus Apajuí Noéjai chichasui.

* **9:13** “Arco iris” tawa nunak jutii muunji “pagki wajae” tuwama nuna taku tawai.

Noé uchiji aidau

¹⁸ Noé uchiji arcanmaya jijnjau aina duka: Sem, Cam, Jafet aatus aajakui. Cam aajakui Canaágka apaji. ¹⁹ Juju kampakatuma nunú aajaku ainawai Noé uchiji aidau. Juna uchiji wegantu aidau atak nagkamawag dita ashí nugkan pampantuk batsamsau ainawai. ²⁰ Noé ataktu ajakmatan nagkama uva numijin ajakui. ²¹ Tuja makichik tsawantai, Noé uva yumiji najanamun vinon uwag nampekui. Nunik niina aakji ejapeen wisu iyan kanag tepesui. ²² Nunik wisu tepettaman, Cam Canaágka apaji aajakua nunú wainak ukuak, weuwai yachi jimag agá batsatun ujaktatus. Tusa ujakam, ²³ Sem Jafetjai, nugkutaijin yakayin awagkek, apaji wisu tepaun wainakaig tusa, ukunmataik jegantag apajin dukukajui.

²⁴ Dutika ukukim tepa tepakua nampekbaulin sakapag shintaag, niina uchiji ekeu Cam dutika ukukbaun dekauwai. ²⁵ Nuna dekaa pegkegchaunum yumigkiak:

“Canaágkak yachi jimaja nuna inake atinai”, tiuwai.

²⁶ Tusa nuigtu chichaak:

“Semnak mina Apajuújua nunú shiig anentinai.

Dutikamu asa nii inatnai Canaágnak.

²⁷ Apajuú Jafetan shiig kuashat nugkentin emati, dutikam nigka tajimtamea Sem aakmagbaunum pujú atatu.

Untsu Canaan niina inake atinai”, tiuwai.

²⁸ Tuja yumi yutug aentsun ijinauwa duwi nagkamas Noé trescientos cincuenta mijan pujusui. ²⁹ Aatus ashí ijumjamak novecientos cincuenta mijan pujus jakauwai.

10*Noé wegantu aidau*

(1 Cr. 1:5-23)

¹ Noé uchiji, Sem, Cam, Jafet aina nunú, yumi yutug nugkanum piyag aentsun ijinauwa duwi pujus uchin akigkaju aina nuna daaji aidauk juju ainawai:

² Jafeta uchiji aidauk: Gómer, Magog, Madai, Javán, Tubal, Mésec, Tírás, aatus aajakui. ³ Gómeran uchiji aidaushkam: Asquenaz, Rifat, Togarmá, aatus aajakui. ⁴ Javánka uchiji aidaushkam: Elisa, Tarsis, Quitim, Rodanim, aatus aajakui. ⁵ Juu aajaku ainawai Jafeta uchiji wegantu aidau, juka maki makichik tikich chichaman chichaku aajakajui. Nunidau asag dita patayi aidaujaig etegdayag, nayantsa pakajin nugka muunnum, tuja ajuntainmashkam batsamsaju ainawai.

⁶ Cam aajakua nuna uchiji juju aajaku ainawai: Cus, Mizraim, Fut, Canaan aatus. ⁷ Cus aajakua nuna uchiji aidaushkam: Sebá, Havilá, Sabta, Raamá, Sabteca aatus aajaku ainawai. Untsu Raamá uchiji aajakui Sebá, Dedán aatus. ⁸ Cusak nuigtushkam uchijin Nimrotan akiauwai. Duka apu ashí nugkanum nigki wagaku aajakui. ⁹ Nimrotak Apajuú yayamu asa senchi kuntu main aajakui. Nuwiya chicham jinkiun chichainak: “Nimrod Apajuú yayasam, kuntu main wajasu aajakua imanai”, tinu ainawai. ¹⁰ Nii apu pujusmataig yaaktak juju aajaku ainawai: Babel, Erec, Acad, Calné aatus. Juju yaakat aina juka Sinar nugkanum aajaku ainawai. ¹¹ Nunú nugkanum pujau juwaki, Asiria nugkanum weuwai. Nunik jegaa nuwi yaaktan najankauwai. Nuna daaji aidauk: Nínive, Rehobot-ir, Quélah aatus aajakui. ¹² Nuigtushkam najanauwai yaakat

dekas múun, Resen tutaya nuna. Duka yaakat Nínive Quélahjai niniaku aajakua nuna ejapeen aajakui.

¹³ Untsu Misraím aents wegantunmaya jijnjauwai: ludeo aidau, anameo aidau, lehabita aidau, naftuhíta aidau, ¹⁴ patruseo aidau, casluhíta aidau, caftorita aidau. Untsu juwiya jijnjauwai filisteo aidau.

¹⁵ Untsu Canaán niina uchiji aishmagkun iwain Sidógkan akiauwai, duwi pujus Het aajakua nuna akiauwai. ¹⁶ Tuja Canaán wegantunmaya jijnjauwai: Jebús aents aidau, amorreo aidau, gergeseo aidau, ¹⁷ heveo aidau, araceo aidau, sineo aidau, ¹⁸ arvadeo aidau, semareo aidau, nuigtu amateo aidaushkam. Juju Canaán nugkanum aents aidau dita patayi aidaujai pampagkajui. ¹⁹ Cananeo aents aidaun nugkeg yaakat Sidón nagkamna nugka Guerar tutaya nuni juwaki, yaakat Gazanum nagkatkau aajakui. Tuja nuwi nagkamna yaakat Sodoma, Gomorra, Admá, Seboím aatus aajakua, nuni juwaki yaakat Lesa tutaya imanui nagkatkau aajakui. ²⁰ Cam aajakua nuna uchiji wegantu aidauk juju ainawai. Ditak maki makichik nugkentin, nuigtushkam maki makichik chichamtin aajaku ainawai. Nuadui ditá patayi aidaujaig etegdayag batsamajaku ainawai.

²¹ Jafetan yachi iwai Sem aajakua dushakam uchijinak akigkui. Tuja Heber aajakua nuna uchiji aidauk Sem wegantu aajaku ainawai. ²² Seman uchiji aidauk: Elam, Asur, Arfaxad, Lud, Aram aatus aajakui. ²³ Araman uchiji aidauk: Us, Hul, Guéter, Mas aatus aajaku ainawai. ²⁴ Arfaxad aajakui Sélah apaji, untsu Sélah aajakui Heberan apaji. ²⁵ Heberak jimag uchijin akiauwai. Nuwiya makichik Péleg daagtin aajakui. Nunak nii pujusmatai, ashí aents aidau pampagkag maki makichik nugkentin wajasajua duwi tuu adaikau ainawai. Tuja niina yachig Joctán aajakui. ²⁶ Joctánkan uchiji aidauk: Almodad, Sélef, Hazar-Mavet, Jérach, ²⁷ Hadoram, Uzal, Diclá, ²⁸ Obal, Abimael, Sebá, ²⁹ Ofir, Havilá, Jobab aatus aajaku ainawai. ³⁰ Dita batsamsamu aidauk nugka Mesá tawa nuwi nagkamnas Sefar nugka aajakua imanui nagkatkau aajakui. Duka etsa minitaiya nuni nugka múun aajakua nuwiya ainawai ³¹ Seman uchiji wegantu aidauk maki makichik nugkentin, maki makichik chichamtin aajaku ainawai. Nunidau asag ditá ditak patayi aidaujaig etegdayag batsamsaju ainawai.

³² Juju adaijag nunú ainawai Apajú yumin yutumtikag aentsun ijinawa duwi batsamas Noé uchiji wegantu akighbau aina duka. Nuniyatak ditash kanakag tikich nugkanum pampagkag batsamsaju ainawai.

11

Apajú chichaman pachimkamu

¹ Nunú tsawantin ashí aents batsamajaku aina duka makichik chichamnak chichajaku ainawai. ² Etsa minitaijiya nuni batsatu jijnag shima shimakua Sinar nugka pakajin wainkag nuwi batsamsajui.

³ Makichik tsawantai ditá ditak chichainak: “Ladrillo najanka jinum jiya inagkagmi”, tusag kayajai takamainnak idayinak ladrillon ekenag takainak, cemento pachimja takamain atsau asamtai, pegkae jukiag nujai achimtikag ekenag takaidau. ⁴ Dutikainak: “¡Kaunatajum yaakat najanawagmi, dutikaku kumpin jiika, nuwi eke ekenkawa nayaimpinum iwakmi! ¡Ibaw umiku asaja, eme anentsa diitai atin amí! Tuja pampagka tikich nugkanmak shimutsuk juwig tuke batsamsatin agmi”, tuí dau.

⁵ Tujash Apajuí Tuke Pujuu nugkanum taa diikma aents aidau yaak-tamawag, kumpin muuntan apujawag batsamtiagtatman wainkauwai. ⁶ Nunik anentaimas: “Ditak makichik wegantu ainawai, antsag chicham-nash makichik chichaman chichaaku ainawai, nuadui juna nagkama ijuntutajag takainawai, tuja juna idaimitkamainuk shiig atsaawai, tusa, ⁷ dekas akaetukmi, dutika ditá chichame pachimjukmi, dutika ajin pempeentunikiag antugdaimainchau wajastinme”, tiuwai. ⁸ Aatus tusa, Tuke Pujuu chichaman pachimjuk, ashí nugkanum dapampaak ishiakui. Dutikamu asag yaakat najantanak idaisaju ainawai.

⁹ Nuadui nunú yaaktanak Babel adaikau ainawai. Wagki nunú nugkanum Tuke Pujuu aents aidau chichaman pachimjuk dapampaak ashí nugkanum ishiaku asamtai.

Sem wegantu aidau (1 Cr. 1.24-27)

¹⁰ Juju aajaku ainawai Sema uchiji wegantu aidau. Apajuí yumin yutumtikag aents aidau inajauwa nunú jimag mijan nagkaemai, Sem niina mijanjin cien ejeyi pujus akiauwai niina uchijin Arfaxad. ¹¹ Nuna akia nuigtushkam quinientos mijan pujusui. Tuja nuigtushkam uchiji aishmag aidau, nuwa aidaujai akigkui.

¹² Arfaxad treinta y cinco mijanjin ejeyi pujus akiauwai Sélah. ¹³ Nuna akia nuigtushkam cuatrocientos tres mijan pujusui. Tuja nuigtushkam tikich uchiji aishmag aidau, nuwa aidaujai akigkui.

¹⁴ Sélah treinta mijanjin ejeyi pujus akiauwai Heber. ¹⁵ Nuna akia nuigtushkam cuatrocientos tres mijan pujusui. Tuja nuigtushkam tikich uchiji aishmag aidau, nuwa aidaujai akigkui.

¹⁶ Heber treinta y cuatro mijanjin ejeyi pujus akiauwai Péleg. ¹⁷ Nuna akia nuigtushkam pujusui cuatrocientos treinta mijan. Tuja nuigtushkam tikich uchiji aishmag aidau, nuwa aidaujai akigkui.

¹⁸ Péleg treinta mijanjin ejeyi pujus akiauwai uchiji aishmagkun Reú. ¹⁹ Nuna akia nuigtushkam pujusui doscientos nueve mijan. Tuja nuigtushkam tikich uchiji aishmag aidau, nuwa aidaujai akigkui.

²⁰ Reú treinta y dos mijanjin ejeyi pujus akiauwai uchiji aishmagkun Serug. ²¹ Nuna akia nuigtushkam pujusui doscientos siete mijan. Tuja nuigtushkam tikich uchiji aishmag aidau, nuwa aidaujai akigkui.

²² Serug treinta mijanjin ejeyi pujus akiauwai uchiji aishmagkun Nacor. ²³ Nuna akia nuigtushkam pujusui doscientos mijan. Tuja nuigtushkam tikich uchiji aishmag aidau, nuwa aidaujai akigkui.

²⁴ Nacor veintinueve mijanjin ejeyi pujus akiauwai uchiji aishmagkun Térá. ²⁵ Nuna akia nuigtushkam pujusui ciento diecinueve mijan. Tuja nuigtushkam tikich uchiji aishmag aidau, nuwa aidaujai akigkui.

²⁶ Térá uchiji aidauk: Abram, Nacor, Harán aatus aajakui. Junak sesenta mijanjin ejeyi pujus akigkui.

Térá wegantu aidau

²⁷ Juju aajaku ainawai Térá uchiji wegantu aidauk: Térá akiauwai Abram, Nacor, Harán aatus. Untsu Harán akiauwai Lotan. ²⁸ Harágkak Caldea nugkanum yaakat Ur tutai nii akiinamua nuwi pujus, apaji Térá eke iwaku pujaig niyá jakauwai.

²⁹ Untsu Abram Sarain nuwatkauwai. Tuja Nacor nuwenauwai Milcájai. Milcák Harágkan nawanji iwai, Iscá tawa nuna kai aajakui. ³⁰ Untsu Saraik kaga asa uchigtuchu aajakui.

³¹ Térash caldeo aents aidau nugken yaakat Ur tutainum pujau ukuki Canaán nugkanum weuwai. Nuwi weak uchiji Abragkan, niina tijaji Lotjai ayauwai. Tuja nuigtushkam niina uchiji nuwen Sarain ayauwai. Tujash eke Canaán nugkanmak jegatsuk, yaakat Harán jegawag nuwi batsamsajui. ³² Nuwig batsamas Térash doscientos cinco mijanjin ejeji pujus jakauwai.

Abraham pachisa augmattsamu

12

(12—50)

Apajuí Abragkan untsukbau

¹ Makichik tsawantai Apajuí Abragkan chichajak: “¡Amina nugkem, pataim aidau, apa jeshkam ukukta, nunikam wi ame pujustinun nugkan inaktustatjam nuwi wetá! ² Ame uchijum wegantu aidaunak wi shiig kuashat uyujkatnaitjai, dutika ai shiig kuashat agtinai. Wi aminak pegkegnum yumigsattagme, tuja nuigtush eme anentsa chichagtai atatme, nuadui aminian tikich aidaush pegkeg yumigkin jukiagtinai. ³ ¡Amina pegkegnum yumigtamaidaunak wishakam dutiksanuk pegkegnum yumigsagtinaitjai! ¡Untsu amina pegkegchaunum yumigtamunak wishakam dutiksanuk pegkegchaunum yumigjatnaitjai! Nuadui ashí nugka muunn-umia aidaunash amina daagmin pegkegnum yumigsagtinaitjai”, tiuwai.

⁴ Tusa tima nuna umiak Abragkak Harán pujau nuwi juwaki weuwai. Abram Canaán nugkanum weuwa nunak setenta y cinco mijanji ajujukui ⁵ Nunik weak niina nuwe Sarain, nuigtu niina yachi uchijin Lotan ayauwai. Nunik shimuinak ashí ditá wajiji aidaunak tagkuji aidaujai yajuakajui. Tuja aents inataiji aidau Harágnunia sumakbau aidaunashkam yajuakui. Nunik wea weakua Canaán nugkanum jegauwai. ⁶ Nunik jegaa, nuwi juwaki tikich nugkan amaka nagkagag wea weakua yaakat Siquemnum jegaa Moré tutainum numi encina ayaunum amamak, canaágnunia aents aidau batsatbaunmak niishkam nuwi pujusui. ⁷ Nuwi pujaun Tuke Pujuu Abragkan wantintuk chichajak: “Amina uchijum wegantu aidaun juju nugkanak susagtinaitjai”, tiuwai.

Tusa tima Abram Tuke Pujuu emematku kuntin maa patasa apeatnun kaya ekenag najanauwai, wagki nuwi Tuke Pujuu wantintukbau asa.

⁸ Nuwi juwaki muja tepaju yaakat Betel* tutaya nuna yantamen etsa minitaijiya nuni shiyakajui. Nuwi jegaa niina aakjin aakmakui. Abram pujusua nuwi pujusa diyamak Betelak etsa akaetaijiya nuni aajakui, untsu yaakat Hai tawa nunú etsa jiiintaijiya nuni aajakui. Tuja nuishkam kuntin maa patasa apeaku Apajuí ememattinun kaya ekenag ataktu najanauwai. Dutika Tuke Pujuu daajin adaitus untsuka segauwai. ⁹ Nunik nuwi pujau Néguev nugkanum wegak aakjin tegaja yajuak, diipas jintá kanag waja wajakua weuwai.

Abram Egipto nugkanum webau

¹⁰ Nunú tsawantin ashí nugkanum senchi yapajut tepeauwai. Nuadui Abram niina patayi aidaujai Egipto nugkanum pujustatus weuwai, wagki nii pujamunmag makichik yumainkesh shiig atsau asamtai. ¹¹ Egipto nugkanum jegattak wesa, Abram niina nuwe Sarain chichajak: “Antukta nijah, amek nuwauch shigmauchitam nunak wika shiig dekajai, ¹² nuadui

* 12:8 “Betel” tawa nunak hebreo chichamnumak “Apajuí jee” taku tawai.

egiptunmaya aents waipakag chichainak: ‘Juka nuwak juna nuwegai’ tusag, mina mantuinak aminak jujamain ainawai. ¹³ Nuadui amina inimpainakuish, wait aneamam mina ubajui tujutta, amina shigmatjumin mina mantuawainum, wisha utugchat atsaunum jegatjai”, tiuwai.

¹⁴ Tusa Egipto nugkanum jegawagmatai, nuwiya aents aidau Sarai shigmauch wajaknun wainkajui. ¹⁵ Antsag faraóŕkan atuwe aidaushkam wainkajui, nunik nuwa shigmauch tae tusa faraóŕkan ujakagtatus wejiajui. Dutika ujakag nuadui Sarain jukiajui faraóŕka jeen.

¹⁶ Sarai shigmauch asamtai, faraón wakejuk juwak Abragkan shiig awagmakui. Dutikak susauwai uwig aidaun, baka aidaun, burro aidaun, camello aidaunashkam, tuja nuigtushkam inak aishmag aidaun nuwa aidaujui susauwai. ¹⁷ Tujash Sarai jukimunum Apajui faraóŕkan ashí niina patayi aidaujui suwimkan suwak, jata ishamainun ajunjauwai. ¹⁸ Dutikam waitiak, faraón Abragkan untuka itan chichajak: “¿Wagka minash jusha jutijuaume? ¿Wagka juju nuwa jusha mina duwajui tusamesh tujutchamume? ¹⁹ Ame chichaakum mina ubajui tichamkum, tau asamin wi jukin nuwatmain awajkashjak. Jujuwai nuwemek, ¡Juju jukim wamak wetá!” tiuwai. ²⁰ Nuna aatus tusa faraón† niina aentsji aidaun ishitkauwai, Abram nuwejai Egipto nugkanum puja duka, ashí niina wajiji aidaujui jiiki awematajum, weti tusa.

13

Abram Lotjai kanakbau

¹ Abram niina nuwejai Egipto nugkanum pujau Néguev nugkanum wakitkiuwai. Nuwi weak ashí niina wajijinak yajuak weuwai. Nunik weak niina yachi uchijin Lotan ayauwai. ² Abragkak shiig wiakuch aajakui. Niinak aajakui oro, jiju plata tutai najanamau aidau, tuja nuigtushkam niina tagkui aidauk ¡shiig kuashat! ajujakui. ³ Néguev pujau wakitki diipas jintá kanag waja wajakua jegauwai yaakat Betelnum. Tuja nuwi juwaki yaunchuk nii pujujakbau yaakat Betelan nagkaiki, yaakat Hai tawa nuwi jegatsuk ejapeen aajakua nuwi weuwai. ⁴ Nunú nugkanum yaunchuk Abram Apajuin emematak kuntin maa patasa apeatnun altaran najanauwai. Nuwi Apajui daajin adaitus segauwai.

⁵ Tuja Lotchakam antsag shiig wiakuch aajakui. Niina apaji yachi Abrajai betek ¡shiig kuashat! uwigi, bakajishkam imanisag, tuja niina inake aidaushkam ¡shiig kuashat! ajujakui. ⁶ Nuadui nugka dita batsatbaunmag kuntin piyakui, nuniak yutaiji ayugmain atsau asamtai, nuwig ijunja pujumainchau aajakui. ⁷ Nuigtushkam aents Abragkan tagkujin kuitamin aidau, Lotan tagkujin kuitamin aidaujui maanijaku ainawai. Tuja canaáŕnumia aents aidaush, ferezeo aents aidaujui nuwig ditashkam batsamajaku ainawai.

⁸ Nuadui makichik tsawantai, Abram Lotan chichajak: “¡Amek mina yatsujun uchijiyaitme, nuadui iik pempeentunikik kajegdaimaitsuji! Tuja amina tagkugmin kuitamin aidaush, mina tagkujun kuitamin aina nujaiŕ kajegdaya yujamaisui. ⁹ Juju nugka múun weaja nunú diisam ame wakegamu etegkam, wait aneamam kanakta. Ame tsumunum weakminig, wi nujinum wetajai. Untsu ame nujinum weakminig, wi tsumunum wetajai”, tiuwai.

† 12:20 “Faraón” tawa nunak egiptunmaya aents aidau chichamenig “apu” taku tawai.

¹⁰ Tusa tama Lot namak Jordágkan pakaji weajun diikma pegkeg yumi kuashat ayau, nugka piipich Sóar tutai aajakua imanui jegaku, nugka Edén pegkeg aajakua iman, nuigtush Egipto nugka pegkeg aajakua nujai betekmantinin wainkauwai. (Juka iman aajakui Apajúi yaakat Sodoman Gomorrajai eke tsayatsaig) ¹¹ Imanun Lot wainak ashí namak Jordágkan pakajinak nii etegkauwai. Dutikau asa dita batsatbaun ukuak etsa minitaijiya nuni weuwai. Aatus Abram Lotjai kanakajui. ¹² Abragkak Canaán nugkanum juwakui. Untsu Lot Jordágka pakajin yaakat Sodomanum jegattak pujusui. ¹³ Nunú yaakat sodomanmaya aentsuk shiig pegkegchau, Tuke Pujuu dakitamun ayatak katsek aina nuna takajaku ainawai.

¹⁴ Lot weu ai, Apajúi Abragkan chichajak: “Ame anú wajam nuwi nagkamam nujiya aatu, tsumunma aatu, etsa minitaijiya aatu, tuja etsa akaetaiya aatushkam shiig diista. ¹⁵ Juju ashí nugka ame wainam junak wi amina amastatjai, juka aminu, tuja amina uchijum wegantu agtina nudau tuke atinai. ¹⁶ Amina uchijum wegantu aidaunak nugka yukukuntujai betek awajattajai. Nugka yukukuntu dekapamainchawa iman amina uchijum wegantushkam dekapamainchau agtina. ¹⁷ ¡Wajakim weme juju nugka juna esanti wegkantijai ashí diista, junak ashí amina amastatjame!” tiuwai.

¹⁸ Tusa tima Abram aakjin tegaja yajuak makichik aents Mamre daagtindau ikam encinar tutai, yaakat Hebrógnum jegattak awa nuwi pujusui. Nuwi pujus kuntin maa apeaku Tuke Pujuu ememattinin altaran najanauwai.

14

Abram Lotan ayamjuk awagkimu

¹ Nunú tsawantin Amrafel aajakui Sinar nugka apuji, untsu Arioc aajakui Elasar nugka apuji, tuja Quedorlaómer aajakui Elam nugka apuji, nuigtushkam Tidal aajakui Goím nugka apuji. ² Nunú apu aidau: Bera Sodoman apuji, Birsá Gomorran apuji, Sinab Admán apuji, Seméber Seboíman apuji, Bela Sóar tuuta awagtaya nuna apuji aatus aajaku aina nujai maaniamun aepjuniauwajui. ³ Makichik uwejan amua apu aina juju ashí dita suntaji aidaun nugka Sidiman pakajin nayants yapaku* tutaiya nuwi ijmajui. ⁴ Tuja doce mijanai, apu Quedorlaómer ditan depetuk pujuju. Tujash trece mijan wegai, makichik uweja amua apu aidau ataktu apu Quedorlaómerjai maanitan nagkamawajui. ⁵ Tikich mijanan achiak, apu Quedorlaómer niina suntajijai, nuigtu tikich kampatum apu niijai atunidaun, nugka Astarot Carnaim tawa nuwi maaniawagtatus shiyakajui. Nuwi refaita aents aidaun depetuk amukajui. Tuja nuigtushkam zuzita aents yaakat Ham tutaya nuwian depetkau ainawai. Tuja nuigtushkam emita aents aidaun nugka paka Save-quiriataim tawa nuwi batsatun depetkau ainawai. ⁶ Untsu horeo aents aidaun muja Seírnun batsatun depetkau ainawai. Dutikawag pisagmatai pataetukag yaakat El-Parán tutai uwegshun ijus awa imanui wakajui. ⁷ Nuwiya apu Quedorlaómer nii ijunja yujamujijai waketak, yaakat En-mispat tutai Cades tuuta awagmatia nuwi jegawajui. Nunik nuwi juwakiag wenak Amalec aents aidau batsamtainian, amorreo aents aidau batsamtainian, tuja Hasesón-tamar tawa nuna batsamtaijinianashkam ashí dita wainbaunak tsaikajui.

* **14:3** “Nayants yapaku” tawa nunak apach chichanum “Mar Muerto” tawa nuna taku tawai.

⁸ Dutikiagtai Sodoma, Gomorra, Admá, Seboím, Bera Sóar tutaya nuwiya apu aidau ijunag chichaman umikag, Sidiman pakajin shiyakajui. ⁹ Nuwi makichik uwejan amua apu aina nunú apu Quedorlaómerjai Elam nugka apuji, Tidal Goím nugka apuji, Amrafel Sinar nugka apuji, Arioc Elasar nugka apuji aina nujai maaniau ainawai. ¹⁰ Dutika maaniamunum Sidima pakajin waa ayaunum nuwi pegkae pimasua weakunum Sodoman apuji Gomorran apujijai pisakma chimpimawajui. Nuniai tikich apu aidauk mujá pisajajui.

¹¹ Nunikagmatai, ipak usumat apu depetmakaju aidau ditá suntaji aidaujai, Sodomanmayan, Gomorranmayajai yutaiji aidau, wajiji aidaujai ashí yajutkag ukukiajui. ¹² Nuninak Abragka yachi uchiji Lotnashkam Sodomanum pujuttaman achikag ashí wajijinak tagkujijai jukiag shiyakajui. ¹³ Lotan dutika jukiagmatai, makichik aents maaniamunum uwemjau Abragkan hebreo aentsua nuna jegajua ujakui. Abragkak Mamre nugke ikam encinas tutai, amorreo aentsu nugke aajakua nuwi pujujakui. Mamren yachi aidauk Escol, Aner aatus aajakui. Juju aidau Abraman atuidau.

¹⁴ Abram niina yachi uchijin achika jukiagbaun dekaa, ashí niina inake niijai yujas akiidau kajitssa anentai aidau ipaa, trescientos dieciocho aentsun ijumjauwai. Dutika ditajai atuegak apu aidau pataetuk yaakat Dan tawa nuwi jegawajui. ¹⁵ Nunikag kashi pachiachbau Abram niina aentsijai jetekag ipisig yaakat Hobá tutai yaakat Damasco nujiin awa nuwi ejegawajui. ¹⁶ Dutikainak ashí waji yajuakbaujinak awagtujajui. Aatus Abram Lotan ayamjuk agkanmitkauwai, dutika ashí niina wajiji aidauak imatiksag awagtujui. Dutikak nuawa aidounashkam ayamjukui. Tuja aikasag niina aentsji tikich aidounashkam ayamjukui.

Sacerdote Melquisedec Abragkan pegkegnum yumigjamu

¹⁷ Abram apu Quedorlaómeran tikich apu aidaujai ashí depetuk waketak, nugka paka Save tutai apu nugke tuuta awagmatia nuwi minittaman igkug kumpamatatus Sodomanmaya apu, jiintukiuwai. ¹⁸ Dutika igkug juki inimatman Melquisedec yaakat Saleman apuji, sacerdote niig Apajuí nayaimpinum pujuuwa nunú etegkamu pujau pagkan vinojai juki, ¹⁹ Abragkan igkug pegkegnum yumigkiak aatus tiuwai: “Abragkah, Apajuí nayaimpinum pujuuwa nunú pegkegnum yumigtamsatin ati.

²⁰ Apajuí nayaimpinum pujuuwa nunú amina shiwajumin depetmitkagmaka nunú tuke ememattai ati”, tiuwai.

Tusa tima Abram maania depetmak maki makichik waji yajuakbaunmayan diezmon susauwai.

²¹ Dutikantai Sodomanmaya apu Abragkan chichajak:

“Aents aina anka mina sujasta, untsu waji aina duka ame jukita”, tiuwai.

²² Tusa tama Abram niina ayaak:

“Wika Tuke Pujau yaki nayaimpinum pujuuwa nunú nayaimpin nugkajai najanauwa nuna wi dutikatnujun juni dutikattajai tusan ujakjai. ²³ Tiu asan aminunak makichik hilonakesh, sapat jigkataichinakesh ashí amina wajijum wegantunak jukishtajai. Atakea duikish ame mina chichagtakmek: ‘Wi Abragnak wiakchamtikawabiajai’, tusamek tujutchatnatme.

²⁴ Wika wajjinak shiig dakitajai, untsu mina inakeg aidau yutain yuwawaja duka maake, untsu mina uyuntuidau Aner, Escol, Mamre aatus yuja nunú ditanu amainun jukiagtatu”, tiuwai.

15

Apajuí Abragjai chicham umikbau

¹ Nunú ashí nagkaemaju ai, Apajuí Abragkan wakanmantun wajantun* chichajak:

“¡Abragkah, ishamjukaipa, witjai amina kuitamnunuk! Amek shiig kuashat wajigtin atatme”, tiuwai.

²⁻³ Tusa tama Abram ayaak:

“Apu Tuke Pujuuwah, ¿wisha nunash itugkatnunak ibaunash waketaja? Amek, mina uchig atsugta duka shiig dekame. Amek minak makichik uchikesh sujuschaume, nuadui ashí mina wajiig aidaunak, nugkajai nagkamas, wi tsakapagbau Eliezer Damasconmayaya nudau atinai” tiuwai.

⁴ Tutai Tuke Pujuu ayaak:

“Antukta nijah, juju ashí amina wajijum aina duka amina uchigminu atinai, tikich aents amina uchigmichuk jukishtinai”, tiuwai.

⁵ Nuna tusa Abragkan agá jiiki chichajak:

“Yamai nayaim shiig diista, dutikam yaya ayá nunú ame dekapamainaitkumek dekapagta. Juju dekapamainkait, iman atinai amina uchijum wegantu aidauk”, tiuwai. ⁶ Tusa tama Abragkak Tuke Pujuuwai kajinas anentaimu asa dekaskeap tujutua tiuwai. Nuadui Apajuí Abragnak aents ima pegkegnak takauwa iman diisui. ⁷ Tuja nuigtushkam chichajak:

“Witjai Tuke Pujunuk, wi aminak yaakat Urnum caldeo aents aidaujai pujaumin, juju nugkan ame wegantu agtina nudau tuke atinun amastasan jiikbajame”, tiuwai. ⁸ Tusa tama:

“Tujash, Apu Tuke Pujuuwah ¿wisha wajak shiijash dekamainaitja, wi wegantu aidauwap juju nugkanum batsamsatin ainawa tusanush?” tusa aatus Abram aiku.

⁹ Tusa tama nii ayaak:

“Makichik baka tsakat, makichik cabra, makichik uwig aishmag, kampaum mijanji ajamu aidau, nuigtushkam makichik yampits, makichik paum tsakat aajam itagtuata”, tiuwai.

¹⁰ Tusa tima Abram ashí nuna yajuak Apajuín ejetuauwai, dutika jimai jimaituk dakaja igkumtikjattak batsakui, untsu chigkinak dakagchauwai.

¹¹ Dutika pujai chuwaq, kuntin dakaja batsasbaun kakeetiagtai, nuna yuwawai tusa Abram jiyaka ishimu.

¹² Dutiká pujujai, etsa akaegak suwe wegau, nunitai Abram senchi kanag tepesui. Nuniaig shiig senchi suwe wajasmatai, senchi ishamkauwai.

¹³ Imanik suwe wajasbaunum Tuke Pujuu Abragkan chichajak:

“Juju yamai shiig antukta, ame uchijum wegantu agtina duka nugken ukukiag, tikich nugkanum batsamas wainka inaku waitkam cuatrocientos mijan waitu batsamtin ainawai. ¹⁴ Tujash tuu nugkanmayag nunash inakush waitkastin ainawa, nunak wi ditanashkam suwimkan susatnaitjai, duwi ame uchijum wegantu aidauk waitu batsatu agkanmagawag, shiig wiakuch wajasag jiinjagtinai. ¹⁵ Tuja untsu amek shiig muumpakim agkan pegkegnum jakattame. Nunikamin amina uchijum aidau ukugmasagtinai.

¹⁶ Tuja amina uchijum wegantu akiinak, nuna tijaji aidaush, nuigtush nuna tijaji aidaush akiinkatna nunú, juju nugka juwi waketug kaunatin ainawai. Wagki amorreo aents aidaushkam nunú tsawantinig tikima shiig katsekak achagtinai”, tiuwai.

* **15:1** “Wakanmantun wajantun” tawa nunak juju versículonum apach chichamnum “visión” tawa nuna taku tawai.

¹⁷ Imanik suwe wajasu ai, ichinkanmaya jii bukuitau wantinkauwai, nunú wantinai shijikap ayai ekemakbauwa nunin kegak kuntin dakaja batsasbaunum ejapeena nagkaemattaman Abram wainkauwai. ¹⁸ Nunú tsawantai, Tuke Pujuu Abragjai chichaman umikui. Nunak aatus tiuwai:

“Juju nugka junak amina uchijum wegantu aidaun susatnaitjai. Tuja namak Egipto nugkanum awa nuwi nagkamsan, namak múun Eufratesa aatsan susattajai. ¹⁹ Tuja juju nugka juka quenita aents aidaun, quenizita aents aidaun, cadmoneo aents aidaun, ²⁰ hitita aents aidaun, ferezeo aents aidaun, refaita aents aidaun, ²¹ amorreo aents aidaun, cananeo aents aidaun, gergeseo aents aidaun, Jebús aents aidaun nugke ainawai. Tujash wi nunak ashí amastatjame”, tiuwai.

16

Agar niina uchiji Ismaeljai

¹ Sarai kaga asa niina aishi Abragkan uchijin ejapjumainchau aajakui, untsu niina jeen inake Egipto nugkanmaya nuwa Agar daagtin pujujukui.

² Nunik pujai Sarai Abraman chichajak:

“Nijah, amek Apajuí mina uchigmachu ati tusa tujutiuwa duka shiig dekame. Nuadui wait aneasam mina inakeg Agar puja au jukita. Nunikamin nuwi uchi akiinamtai, wi nuna jukin uchijimachainjash”, tiuwai. Tusa tama Abram niina nuwe tabaun antujus, ayu, tiuwai.

³ Nunik pujus Sarai Agaran juki Abragkai sujukui. Nunak Canaán nugkanum jegawag diez mijan pujusua duwi dutikauwai. ⁴ Abram Agaran juki pujus ejapmitkakui, dutikam pujus, Sarai ejapjuchu asamtai, dushikiak chichaman umigchau. ⁵ Nunitai, Sarai Abragkan chichajak:

“iMina inakeg Agar dushiktak chichaman umigtatsu duka utugchatak aminui! Wi amina nuwem ati tusan amasbaijame, dutikamaitak, yamai amina uchigmin ejajuk mina nagkaetasu ememawai. Tujash ima Apajuíya duke tujamti, yakita juna utugchatan apujush wiyashitag, atsa ameashitam”, tiuwai.

⁶ Tusa tama Abram ayaak:

“Yamai nagkamsanuk amina inakminak amina idaitajame, ame itugkatag tame, dutikata”, tiuwai.

Tusa tima Sarai Agaran shiig senchi inak waitkau, imatika waitkam Agar tupikakiuwai. ⁷ Nunik tupikaki Shur nugkanum wetainum uwegshunum jintá yumi pukuni jiiinbaunum ayaumas pujuttaman, Apajuí ángela nunin wajas wantintukui. ⁸ Dutika iniak:

“Agar Sarain inakegah, ¿amesh tuwiyamea miname? ¿Tuu weakmea aniname?” tau. Tama nii ayaak:

“Sarain wi takagnaitag nunú dakitjugmatai tupikajai”, tiuwai. ⁹ Tusa tutai, Apajuí ángel tumain chichajak:

“Wakitkita amina takagtaigmin, nunika jegaam Saraiyai sumimkata”, tiuwai.

¹⁰ Nuna tusa nuigtushkam chichajak:

“Amina uchijum wegantunash shiig kuashat ikauntuktinaitjame, dutika ai makichkish dekapamainchau atinai.

¹¹ Nijah, juju uchi ejapjukum nunú uchigmakam,

adaikattame Ismael,* wagki ame

wekaesa waitiakum wake besemag anentaima

* **16:11** “Ismael” tawa nunak “Apajuí antugtamkae” taku tawai.

wekaegam nuna wi antugkajam duwi.

¹² Tuja niig kakajus yunumtukchamin, caballo unuinakchamua iman atinai, iman asa ashí aentsjai maanitnai, nunitai niina shiwaaji aidauk ima niijaig maaniagtinaí. Niina yachi aidaujaishkam shiwag atinai, nuniau asa ima niina nugkenig pujustinai”, tiuwai.

¹³ Tusa tima, Apajuíjai chichasu asa, dekás amek “Apajuí wainbauwaitme” tusa puyatuk nigki anentaimas: “¡Apajuínap wainkaja, imanun wainkanush jakachjapi, iwaakjapi!” tiuwai. ¹⁴ Nuadui nuwi yumi piyag aajakua nuna “Iwaku pujuuwa nunú mina waita nunuwai” tuu adaikauwai. Nunú yumi piyajua duka yaakat Cades Béredjai niniaku awa nuna ejapeen awai.

¹⁵ Agar tsawanji jegajim uchi aishmagkun Abragka uchijin uchigmakui, nunikmatai Abram uchi daajin Ismael adaikauwai. ¹⁶ Agar niina uchiji Ismaelan uchigmakua nunak Abraqnak ochenta y siete mijan ajujakui.

17

*Apajuí Abraqjai ataktu chicham apakbaunum uchi aishmagkuch aidaun katiuchiji chuchuke tsupijatajum tibau**

¹ Abraqkan noventa y nueve mijanji ajai, Tuke Pujuu wantintuk chichajak:

“Antukta nijah, witjai Apajuí ashí senchigtinnuk. Nuadui amek mina emtijuig pegkegchau takamtsuk pujusta. ² Wi amijai yamajam chichaman umiktatjai. Tuja amina uchijum wegantunak shiig kuashat ikaugkatnaitjai”, tiuwai.

³ Tusa tama Abram Apajuín eme anentus tsuntsuma nijayin nugkan antig pujusmatai, Apajuí chichajak:

⁴ “Jujuwai wi amejai chichaman umiag duka. Amek kuashat aents aidaun muunji atinaitme. ⁵ Nuadui amek Abram tamak achattame. Tuja yamai nagkamsamek Abraham tama atatme, wagki wi aminak kuashat aents aidaun muunji awajsatnaitjame. ⁶ Amina uchijum wegantu aidaunak shiig kuashat ikaugkattajai. Nuadui ame wegantunmaya apu agtinai, tuja ame wegantu aidaun kuashat aents nugka muunnum yujakagtinaí. ⁷ Nuadui wi amejai chichaman umikag duka ajumaya duish ame wegantu aidaujaish tuke atinai. Wika tuké amina Apajuíjum, tuja amina uchijum wegantu aidaunashkam Apajuí atinaitjai. ⁸ Juju nugka Canaágka juwi ame pujam nunak ashí amina, nuigtu ame wegantu agtina nudaun tuke atinun amastatjai, tuja wi ditá Apajuíjig atinaitjai”, tiuwai.

⁹ Tuja nuigtu Apajuí Abraqkan chichajak:

“Juna wi chichaman umikag duka imatiksamek umikta, tuja amina uchijum wegantu agtina dushakam umikagtin atinme. ¹⁰ Amejai chichaman umikag duka jujuwai: Ashí amina uchijum wegantu aidaunsh ima junak umikagtinaí. Ashí aishmag aidaun atumjai batsatuk tsupigkamu agtatui. ¹¹ Tuja ashí atum aishmag aidautigminuk tsupimamainaitjume, nuni iwainmamkattagme wi atumjai chichaman umikag nunú. ¹² Yamai nagkamsagmek, ashí uchi aishmag aina duka ocho tsawan akiina wegauk katiuchiji chuchuke tsupigkattajume. Tuja amina wainka inataijum

* **17:** “Uchi aishmagchin katiuchiji chuchuke tsupijatajum tibau” tawa nunak apach chichamnum “circuncisión” tawa nunuwai.

amina jemin akiinau aidaush, kuichik kayai tikich nugkanmaya sumakbaushkam tsupigkatajum. ¹³ Ashí uchi aishmag aidauk makichkish idaitsuk tsupigkamu agtatui. Wi chichaman umikag nunú iwainamu aatus atumi iyashin juwaktatui tuke atinun. ¹⁴ Tujash makichik aishmagkesh nuna tsupimatan dakitauk atumjai ijunjag pujumatsui. Duka ayatak jiiki ajapeam atatui, wagki wi chicham umikbaun ajaantus diyachu asa”, tiuwai.

¹⁵ Tuja nuigtushkam Apajuí Abrahaman chichajak:

“Amina nuwemi daajig Sarai tamak achattawai, yamai nagkamsag niina daajig Sara atatui. ¹⁶ Niina pegkegnum yumigsattajai, dutikakun niyai makichik uchin amastatjai. Dekaskenum wi niinak pegkegnum yumigsattajai. Nuadui kuashat aents nugka múun aidaunmayan dukuji atinai. Tuja ame uchijum wegantushkam nugka múun aidaun apuji agtinai”, tiuwai.

¹⁷ Tusa tama Abraham tsuntsuma nijayin nugka antig pujus, niina anentainig chichas: “¿Aents cien mijanji ajamush uchinash akiimainashit? ¿Sarash noventa mijanji aja ibaush ejapjumainkait?” tusa dushiau.

¹⁸ Nuna tusa Abraham Apajuín chichajak:

“iUntsu utusamek Ismael kajimatjutsuk ame pegkegnum yumigtugsam tajai!” tau.

¹⁹ Tama Apajuí Abrahaman ayaak:

“Amina nuwem Sara uchigmin uchigmaktatui tusan timagme, nunikmatai ame niina daaji Isaac adaikattame. Nunú akiinamtai wi amina anagkuajam duka uminkattawai. Tuja nii uchiji wegantu agtina nujashkam wi chicham umikbauwa nunak tuké yapajiashtinaitjai. ²⁰ Ame mina Ismael pachisam tujutam nunashkam antugkajame, nuniku asan wi pegkegnum yumigsattajai. Niina uchijish kuashat atinai, tuja niina uchiji wegantunmayanash kuashat uyujkatnaitjai. Ismaelak doce apu agtina nuna apuji atinai. Aatus nugka muunnum batsamsatin ainawai. ²¹ Untsu wi chichaman umikag nunak amina nuwem Sara yamai nagkamas tikich mijan jegatta duwi Isaakan uchigmatjamkatta nujai umiktatjai”, tiuwai.

²² Nuna aatus Apajuí Abrahamjai chichas ashimak, wakitkiuwai.

²³ Nunik Apajuí wakitkimtai, nunú tsawantinig Abraham niina uchiji Ismaelan juki, ashí niina inake niijai batsamas akiinau aidaunash, tuja kuichik kayai sumakbau aidaujai, ashí aishmag niina aakjin batsamin aidaunak betekmas yajuak tsupijauwai, Apajuí tibaun imatiksag umiak.

²⁴ Abrahamak noventa y nueve mijanji ajamu asa tsupimakui. ²⁵ Untsu Ismaelnak trece mijanji ajamun tsupigkauwai. ²⁶ Aatus tsupimatai ati tibaun Abraham umiak, nunú tsawantaik niina uchiji Ismaeljai tsupimakajui.

²⁷ Ashí aishmag niina aakjin akiinkau aidauk, tikich nugkanmaya kuichik kayai sumakbau aidaujai, betekmasag tsupimajajui.

18

Tuke Pujuu Abrahaman uchi akiattame tibau

¹ Makichik tsawantai Abraham Mamrenum ikam encinar tutainum niina aakji waitijin etsa tajajai eketun Tuke Pujuu wantintukui. ² Abraham pagkas niimsatakama kampatun aents ijunun wainkauwai. Nunik wainmawaik wamak wejiuwai igkug jukitatus. Nunik jegantun tikishmag nijayin nugkan antig pujusa, ³ chichajak:

“Mina Apujuh, wi amina eme anentsan tajame, wait aneam wamak wepa. ⁴ Atumnash shiig awajtamkuig, yumi itagtuatajum tusan dawemin

dijajatjime, dutikamtai numi wakenti bikintua juwi pujusjum machik ayamjatajum. ⁵ Atumek dekas wi atumin inakmin pujag nuwi taugme. Nuniku asagmin atum yuwatnun wi amastajime. Nunú yuwajum ichich-mamjajum wetajum”, tiuwai. Tama dita ainak:

“Ayu, ame tame duke ati”, tiajui.

⁶ Tusa tiagmatai Abraham niina aakjin waya nuwe Saran chichajak:

“¡Harina pegkeg diisam veinte kilo jukim wamkesam pag najanata!” tiuwai.

⁷ Tusa ukuak, tupikaki toro tsakat batsatun jegantun duwegman etegka, niina inake aidaun chichajak: “Juju maajum wamak inagtuajatum”, tusa tima ditashkam imatiksag umikajui. ⁸ Dutikawagmatai Abraham baka muntsuji ijugbaun, kantekujai, neje inajuamun aatus juki ejeentun apujtusui. Dutikam nuna numi wakentin pujusag yuwagtai, dakak pujau.

⁹ Nuna yuwawag inagnakag Abrahaman iniinak:

“¿Amina nuwem Sarash tuwi pujawa?” tama Abraham ayaak: “Au aaka awi pujawai” tau.

¹⁰ Tusa timatai nuwiya makichik chichaak:

“Tikich mijan atata duwi ataktu tajuan ijagsattajame, tujash nunú tsawantinig amina nuwem Sara uchiji ajittawai”, tiuwai. Tusa tutai Sara aaknum Abrahaman ukujin waitinum wajasa, antu wajau. ¹¹ Tuja Abrahamak Sarajaig shiig muumpakiaju ainawai, nuadui Sarak nantutin nuwach jau aina nunash nagkankau aajakui. ¹² Nunin asa dita chichainamun Sara antuk, nigki anentaimas dushiak: “¿Wi mina aishjujai shiig múuntuch wajasag nunash, wajuk mina aishjujaish wakejunikan pujusnuk uchigmaktaja?” tau. ¹³ Tusa tabaun Tuke Pujuu antuk Abrahaman chichajak:

“¿Wagka Sarash dushiawa? ¿Nigka dekaskeap tawa, tuja wi múuntuch ataish, Apajuiyap sujustatua tumainchauk dekaapea? ¹⁴ ¿Apajui makichik waji tujinka dutiktsuk idaimainush awak? Tikich mijan atata duwi amina ijagsatasan ataktu tajuattajame. Nunú tsawantin Sara uchiji ajittawai”, tiuwai.

¹⁵ Tusa tutai nuna Sara antuk senchi ishamkauwai, nuniak dekas tsanugtjai tusa chichaak:

“Wika dushigchamjai”, tau.

Tusa tutai Apajui ayaak:

“Wika dekajai ame dushiamunak”, tiuwai.

Aents pegkeg aidau Sodomanum batsatun ijinawai tusa Abraham Apajuin segau

¹⁶ Nuna tusag ijag aidau Sodomanum shimutai, Abrahamshakam ditan kumpama ishiaktatus uyuniuwai. ¹⁷ Nunitai Tuke Pujuu anentaimas:

“Dekas wi dutikattag nuna pachisan Abrahaman ujaktajai, ¹⁸ wagki niig dekas kuashat aents agtina nuna apaji atalui. Nuigtushkam wi niinak, aents ashí nugkanmaya aidaunmayash ima niinig pegkegnum yumigkiam atinme tusan anagkuawaitjai. ¹⁹ Wi niinak etegkauwaitjai, ashí niina uchiji wegantu aidaunash mina chichamjun jintintuati, dutikam minák umigtuktinme, nuninak ima pegkeja nunak takastinme tusan. Nuna aatus uminkui, wi anagkuawaitag nunak imatiksasuk umiktatjai”, tiuwai.

²⁰ Nuna tusa Tuke Pujuu chichaak:

“Aents yaakat Sodomanmaya, nuigtu Gomorranmaya aidauk ayatak pegkegchauk tikima shiig katsek ainawai tabaun antajai. ²¹ Nuadui wi

yamai wejijtjai ditan, núnikan dekaatjai ditá pegkegchauji shiig múuntai tabau minai wajuta dusha dekaskeashit”, tau.

²² Tusa jimag aents Sodomán wejutai, Abraham Apajuújai ukuunum juwakui. ²³ Nunik Apajuín jegantun iniak:

“¿Aents pegkegchaun takau aina nunú ijinkumesh, pegkejan takau aina nujai ijinattamek? ²⁴ Tuja namputchawame cincuenta aents pegkegchaun takaschau aidau yaaktanum batsatkuish, ¿nunú batsataigkik yaaktash tsaiktatam, atsa tsagkujashtatmek? ²⁵ ¿Aents pegkegchaun takaschau aidau, pegkegchau takasu aina nujai ijumjamek pegkegchaun takasua numamtukek ijinmaitsume! ¿Dekas wait aneasam dutikawaipa! Amek Apu chicham epegkin asam ashí nugkanmaya apu aina nuna Apujiyaitme, nuadui, ¿aents pegkegchaun takaschau aina duka ayamjukchattamek?” tiuwai.

²⁶ Tusa tama Tuke Pujuu Abrahaman ayaak:

“Cincuenta aents pegkeg yaakat Sodomán pujaun wainkanuk, dita tsagkujakun ashí tikich aidaunash tsagkujattajai”, tiuwai.

²⁷ Tusa timatai, ataktushkam Abraham Apajuín chichajak:

“¿Wait aneasam tsagkugtugta! Amek Apajuúyaitme nuniaminig wika aents wainkauchitkun juna iniajame. ²⁸ Tujash namputchawame cuarenta y cinco aents pegkejam akuish, ¿ashí yaaktash tsaiktatmek?” tama Apajuí ayaak:

“Atsa, cuarenta y cinco aents pegkejam akuishkam ijinashtatjai”, tiuwai.

²⁹ Awentsag Abraham Apajuín iniak:

“Namputchawame ¿ima cuarentak akuish itugkattame?” tau.

Tusa tama Apajuí ayaak:

“Atsa cuarenta pegkejam pujakuish tsaikehattajai”, tiuwai.

³⁰ Tujash Abraham ataktu awentsag iniak:

“Apuh, wi kuashat iniimkuish, wait aneasam kajegtukaipa. Tujash ¿treinta aentskesh pegkeg akuish, itugkattame?” tau. Tama nii ayaak:

“Treinta aents pegkeg yaaktanum pujakuishkam yaaktanak tsagkujattajai”, tiuwai.

³¹ Tusa timatai nuigtushkam awentsag iniak:

“Mina Apujuh, wika aents wainkauchitkun aajan iniajame. Tujash, ¿ayatak veinte aents pegkeg akuish itugkattame, tsaiktatmek?” tau. Tama nii ayaak:

“Veinte aents pegkeg akuishkam, yaaktanak tsaikehattajai”, tiuwai.

³² Tuja nuigtu iniak: “Mina apujuh, wait aneasam kajegtukaipa, yamaik inagnamun iniastatjame, nuigtu awagkin iniaknuk waitkaschattajame. ¿Tujash ayatak diez aents pegkeg akuish itugkattame?” tau.

Tama nii ayaak:

“Diez aents pegkeg akuishkam, yaaktanak tsaikehattajai”, tiuwai.

³³ Juna aatus Apajuí Abrahamjai chichas ukuak, weuwai. Nunikmatai Abrahamshakam niina aakjin wakitkiuwai.

19

Apajuí Sodománmayan Gomorranmayajai jii ajuntug apea ijinamu

¹ Etsa akagai Apajuín aentsji nayaimpinmaya jimag yaakat Sodománun jegawajui. Tuja Lotchakam yaakat tentea apakbaunum nuna waitijin, aents ijunajaku aina nuwi eketu. Nunik eketu niimsatakama jimag aents minidaun wainkauwai. Nunik wajaki wejiuwai igkugtatus. Nunik jegantun tsunsuma nijayin nugkan antig pujusui. ² Nunik chichaak:

“Mina apug aidauwah, wika atumin inakegaitjai, nuadui wait aneasjum mina jegajui wayatajum, nunikagmin wi dawemin dijajatjime, dutikamtai mina jegajui kanagjum, kashin kashikmasjum wetajum” tau. Tama dita ayaak:

“Atsah, nunikchattaji, juwi agá pujusa tsawagtatji”, tuidau.

³ Tusa tiagtaishkam: “Atsah, wait aneasjum tiigpa”, tusa imatjau niina jeen awayatatus. Tusa imatjam ayu tusag Lota jeen wayawajui. Nuwi wayawagmatai, Lot inamjamtai yutai pegkejan umikajui dita yuwatnun. Dutikak lewadurajai pachimtsuk pag inajuumun yuwawajui.

⁴ Nuna yuwawag eke kajinatsaig, Sodomannaya ashí aents aishmag aidau, datsa aidanum nagkamas múuntuch ai aidaujai, jeganak ten-teawajui. ⁵ Imanikag senchi pampaidau, imatuinak:

“¿Tuwi batsatua aents amina jemin utsaanama dusha? ¡Wamak jiikta! ¡Dita aikatasa wakegaji!” wajaidau.

⁶ Tusa imatiagtai ditajai chichastatus Lot jüintuki, waitin shiig epeni tuntupek wajas, ⁷ ditan chichajak:

“Mina kumpag aidauh, wait aneasjum atum anentaimjum duka dutikawaigpa, shiig pegkegchauwai. ⁸ Juwi mina nawantug jimag aentsun takashtai pujawai, auna jüigkitjime, dutikamtai atum wakegamu umikatum. Tujash juju aents aidauk aikawaigpajum, wagki ditak wi ipaamu ainawai”, tau.

⁹ Tusa tutai dita aínak:

“¡Amek menasta! Ame iina apuji najaneamek juka aikawaigpa tusamek tikich nugkanmayayaikukumek tukagtumaitsume. ¡Yamaik, amina dita dutikmainaitag nuni senchi dutikattajame!” tusag Lotnak suwimaidau waitijin tegagkatag tusag. ¹⁰ Imatikiagtai jimag aents nayaimpinmaya Lota jeen waya pujau waitin ujainiag kuntujin etsaptiag Lotnak japiki waitin ujati awayak waitin openiuwai. ¹¹ Dutika agá ijununak ashí datsa aidanum nagkamas múuntuch aidaujai wainmachu emakui, dutikawajam waitin wainkatatus egai egainakua yawekajui.

¹² Nuna dutikawag, nunú ijag aidau Lotan chichajuinak:

“¿Tikich pataim aidaush juwish ajutjamtsumek? Nuniakuig amina uchi-jum aidau, nawanjum aidau, nuigtu nawanjumin aishi atin aidaushkam, ashí amini aidau juju yaaktanum atsuak duka ashí yajuakam atushat tupikakta. ¹³ Juju nugka juka tsaiktatji, juju yaaktanmaya aents aina juna pegkegchaujig shiig kuashtai, iman asamtai Tuke Pujuu awetamaji tsaiktajum tusa”, tiuwai.

¹⁴ Tusa tima Lot niina nawanji aishi agtinun ujaktatus weuwai, nunik ditan chichajak:

“¡Wamak nantagjum juju yaaktanum pujutsuk jüinjatajum, juju yaaktanak Apajui tsaiktatui!” tau. Tusa tamaitak, wainkas tuu wekagatai tuidau asag antugkachaju ainawai. ¹⁵ Nuniaig tsawau asamtai, Apajui aentsji ángel nayaimpinmaya aidau Lotan chichajak:

“¡Wamkesam nantakim amina nuwem nuigtu jimag nawanjumea nujai jukita! Juju yaaktanmaya aidau suwimak suwaku tsayajin atumesh jakatag tachakjumek”, tau.

¹⁶ Tusa tamaitak Lot emetnatai, ángel aidau, Tuke Pujuu niina wait anenjau asamtai, japikiag jüikiajui. Tuja nuwenashkam nawanji aidaujai jukiag jüikiajui, wagki yaaktan ukumtikiag uwemtijatag tau asag.

¹⁷ Dutikawag yaaktan ukumtikiag makichik ángel chichajak:

“¡Wamak tupikakum uwemjata! Ukuujum diisaipa, tuja juju paka aina juigkik makichkish wajatash wajantaipa, ayatak mujanum wetá jakatasam wakegashkumek”, tiuwai.

¹⁸ Tusa tama Lot chichaak:

“¡Atsah, mina apug aidauwah, tikima nunak nunikhchattajai, wait aneamam antugtukta! ¹⁹ Atum minak wait anenjugjum jakai tusajum jiiigkiugme, tujash wika tikima mujanmak wemaitsujai, wagki nuni wekagai juju yaakat tsayamu minash amaintuk mantuawai tajai. ²⁰ Untsu tikijua juwi yaakat piipich awa atú tupikaumainaitjai. ¡Wait aneamam ayu tutajta, yaakat piipichia awi pujusan uwemjatjai!” tau.

²¹ Tusa tutai nuwiya makichik ángel ayaak:

“Ame segatam nunak antugkajame duka imanisag uminkati. Nuadui au yaaktanak tsaikchattajai. ²² Tujash ¡wamak wetá! ¡Juwi pujutsuk ame tame nuwi wetá! Wagki ame eke jegatsminkik juju nugkanak tsaikchattajai”, tiuwai. Nuadui nunú yaaktan daajinak Sóar* adaikauwai.

²³ Tuja tsawak etsa puwau jiiinai, Lot Sóarnum jegau ai, ²⁴ Tuke Pujuu nayaimpinmayan jii azufre tawa nujai pachimjamun yaakat Sodomanum Gomorranmashkam yutumtjauwai. ²⁵ Dutika, ashí aents nunú yaaktanum batsataidaunak ijinauwai, nuigtushkam nugka paka weajunum batsatun ashí ajak aidaujai ijinauwai. ²⁶ Untsu Lota nuweshkam niig wegayatak, ukujin ayampas diikma, wee najanea wajasui.

²⁷ Nuna Apajuí tsauku ai kashikmas Abraham nii Tuke Pujuujai chichaaku wajasbaunum weuwai. ²⁸ Nunik nuwi jegan wajas Sodoman Gomorrajai diistakama ashí nugka paka aidauk yaakat aidaujai nagkamas ekemaka tsaukbaui asa, senchi bukuiti jiiinak yujagkim akijua atatman wainkauwai. ²⁹ Aatus Apajuí yaakat nugka pakanum aajaku aina nuwi Lot pujujukua nunak ashí tsaukui. Tujash Apajuí Abrahamnak kajimatkichui. Nuadui niina yachi uchiji Lotan jiiiki uwemtikjauwai.

Lot niina nawanji aidaujai

³⁰ Lot Sóarnum pujutan ishamak jiiinki mai nawanjin juki mujá weuwai. Nunik nuwi waa pagkakunum kempatuma duka nunisag utsanawag batsamsauwai. ³¹ Nuwi pujus makichik tsawantai Lota nawanji emkau kai ekeun chichajak:

“¡Ina apajig muumpakni, tuja tuke nunitai asamtai aishmag nuwan nuwatin aina dutika iina nuwatjamainuk juwig makichik aishmagkesh shiig atsawai. ³² Nuniau asamtai dekas iina apaji enamkami, dutika enamka nijjai ankami. Nunika iina apaji uchiji jukimi”, tiuwai.

³³ Nuadui nunú kashia duik apajin vinon aajag enampek aepes, nawanji emkau iyanti niina apajijai ankauwai. Tujash apajig nawanji tepesa nantaki wegaunakesh machikish dekapjachui. ³⁴ Nunik tsawag, kai emkau ekeun chichajak:

“Wi yamai kashia iina apajijai ankamjai, tuja yamai kashia duwi ataktu enamkami, dutika ameshkam nijjai ankata; aatsa mai iina apaji uchiji jukishpash”, tau.

³⁵ Tsag nunú kashia duwi ataktu enamkag aepes, nawanji ekeu iyanti niishkam niina apajijai anik ukukiuwai. Tujash Lotak nawanji tepes nantaki wegaunakesh machikish dekapjachui. ³⁶ Nunik batsamas Lota nawanji mai ejapjukui, niina apajinunak. ³⁷ Emkau uchigmakui uchi aishmagkun, dutika adaikauwai Moab. Nuwiya jiiinjawai Moab aents

* **19:22** “Sóar” tawa duka “piipich” taku tawai.

aina duka. ³⁸ Tuja ekeushkam uchigmakui aishmagkun dutika adaikauwai Ben-amí. Nuwiya jünjauwai Amón aents aina nunú.

20

Abraham Abimelecjai

¹ Abraham nii pujamun ukuak Néguev nugkanum weuwai. Nunik nuwi jegaa yaakat Cades, Shur nugkajai niinis awa nuwi ejapena yaakat Guerar tawa nuwi pujusui. ² Nuwi jegaa pujus niina nuwen, juka mina ubajui, tiuwai. Timatai Abimelec Guerar nugkan Apuji niina aentsjin awemauwai, Sara utugtatajum wi nuwatkatjai tusa. ³ Tusa timatai itajuawajui, dutikawagmatai kanittaman kajanum Apajui chichajak: “Anú nuwa jukium duka aishintin jukiume, nuadui amek jakattame”, tiuwai.

⁴ Tusa tama eke nuwajaig tsanigchau asa, chichaak: “Mina Apujuh, ¿eke wi nuwan dutikachu aigkik mantuatag tame? ⁵ Abraham chichaak juka mina ubajui tujutmae, nuwashkam dutiksag mina ubajui timae, nuadui uyumat aneakas wika jukimjai, tujash pegkegchaunak dutikachjai”, tiuwai.

⁶ Tutai Apajui kajanmak ayaak: “Wika shiig dekajai ame pegkegchau dutikachum nunak. Nuadui ame nuwa antigkam mina emtijui tunamajaim tusan wika aminak idaitsugme. ⁷ Tujash yamaik, anú nuwak awagkim aishi susata, wagki niig mina etsegtugkati tusa etegkamui. Nuniau asa amina pachipas mina segatti jatsuk pujusminum. Untsu awagtutsuk pujakmek duka dekas ashí aents amina jemin batsata nujai jinattagme”, tiuwai.

⁸ Tusa Apajui ujakam, kashikmas Abimelec nantaki niina inake aidaun untsuka ikaunman, niina kajanum tibaunak ashí ujakui. Nuna antukag senchi ishamkajui. ⁹ Nuna etsejuk Abrahaman untsuka itan chichajak:

“¿Amesh wagka jutikagtame? ¿Wisha aminash wajinma pegkegchau awajkam asamea mina gegajuish tudaush ibaush itagtuaume? Juka tikima jutikdaichatia”, tusa ¹⁰ awentsag chichajak: “¿Waji anentaiyaiya jusha jutikagtame?” tau.

¹¹ Tama Abraham ayaak:

“Wika juiyag makichkish Apajui nemagchaus ainawa timajai. Tau asan ishamkagtakun mina nuwajui tichamjai, wagki mina mantuinak duwajun jujutkinum tusan. ¹² Tujash auk dekas minak ubajui. Wagki niig mina apaju nawanji asa, tujash mina dukujuig akiinachui, nuadui wika nuwatkauwaitjai. ¹³ Apajui chichagtak: ‘Amina apa jeen pujam duka jüinkim wetá’ tujutmatai, Saran chichagkun makichik yaaktanmakesh gegakuik mina ubajui tujutta tusan tiuwaitjai”, tiuwai.

¹⁴ Tusa tutai, Abimelec Saran awagtuki susauwai. Dutikak nuigtushkam uwig aidaun, baka aidaun, aents wainka inatai aishmag aidaun, nuwa aidaui susauwai. ¹⁵ Dutika chichajak:

“Nijah, juju nugka juka ashí mina nugkajui. Tuwi ame ima shiig pujumain dekaepeame, nunú etegkam nuwi pujusta”, tiuwai.

¹⁶ Nuna tusa Saranashkam chichajak:

“Wi amina umaimin susag duka mil kuichik plata najanamu akikega imanun susajai. Nunuwai ii pegkegchau takaschamunum tikich aents aidaunmash ayamjumaktina duka. Tuja makichik aentskesh pegkegchaun chichagtamainuk atsutnai”, tiuwai.

17 Nuadui Abraham Abimelekan pachis Apajuín tsagkujata tusa segauwai. Tusa tima Apajuí Abimelekan etsagag, niina nuween, nuig-tushkam niina inake nuwa aidau, nuwi batsatunak uchi uchigbau atinme tusa ashí etsagakui. 18 Wagki Apajuí Sara jukimunum niina ayamjak, ashí nuwa Abimelekan jeen batsamin aidaunak uchin uchigmakchamin emaku asa, nunak etsagaak ataktu uchigbau emakui.

21

Isaac akiinamu

1 Apajuí Saran anagkuamunak imatiksag umikui. 2 Nuadui Sara ejapjukui. Nunik muumpatnum Abrahaman uchijin aishmagkun uchigmatkauwai. Uchik Apajuí chichaak nunú tsawantin akiinattawai tibaunak imanisag akiinawai. 3 Nunikmatai Abraham uchiji daajin adaikauwai Isaac. 4 Nunú uchi akiina ocho tsawan ejematai, Apajuí tibaun umiak uchiji katiuchijin chuchuken tsupigkauwai. 5 Abragnak cien mijan ajamu ai niina uchiji Isaac akiinawai. 6 Nunikmatai Sara anentaimas: “Apajuí minak dushimtijuje shiig aneasti tusa, nuadui wi uchigmakbaun ashí aents aidau dekawajag shiig aneenak dushijagtin ainawai”, tiuwai. 7 Tuja nuigtushkam Sara anentaimas: “Makichik aentskesh minak Abrahamnap uchin uchigmatkattawa tusa tujutiuk atsawai. Tujash yamaik muumpatnum uchigmatkajai, niishkam múuntuch wajasu ai”, tiuwai.

Agar niina uchiji Ismaeljai Abrahamaa aakjin pujaun jiiki awemamu

8 Isaac muumpak muntsun tsujagkauwai. Nunikmatai Abraham yutain kuashat umika uchijin jüstamjuauwai. 9 Nuna imatikiagtai, Abragkan uchiji egiptunmaya nuwanum akiinauwa nunú Isaakan kajajak, pegkegchaun chichajun Sara antukui. 10 Nunik Abrahaman chichajak: “Juju nuwa inaka juka uchijijai jiiki awemata! wagki uchi inaknum akiinauwa duka mina uchijua jujai betekak amina wajijum aina nunak jumait sui”, tiuwai.

11 Tusa tama Abraham senchi wake besemag anentaimsauwai, wagki dushakam niina uchiji asamtai. 12 Tujash Apajuí niina chichajak: “Juju uchua nuig, tuja nuwa inaka anuishkam imanikmek anentaimsaipa. Sara tujama duke umikta, wagki amina uchijum Isaakai uchi akiinak weagtina nunú ame wegantuk agtainai. 13 Tujash amina uchijum inaknum akiinauwa nuwiyannashkam amina uchijum asamtai, kuashat ikauntuka ai yaakat múun wajastinai”, tiuwai.

14 Tusa tima Abraham tsawag kashikmas, pagkan juki nuigtu duwap apagbaunum yumin aimjuk Agaran susauwai. Agaran aentsek, uchiji Ismaelnashkam susa kumpama, awemauwai. Dutikam Agarchakam niina uchijijai uwejush Beersheba nugka jega atsamunum wainak wagaka wekagu. 15 Nuwi wekagas yumi jukimujin amuekamtai, uchijinak numi wakentin awayag aipkiuwai. 16 Dutika aepeak, nigka tupaan ekemas anentaimas: Mina uchig jau waintanak dakitajai, tau. Nunik eketai uchijishkam buutu.

17 Nunik uchi buutun Apajuí antugkauwai. Nunik Apajuí ángel tumain Agaran chichajak: “¿Wagka Agarah amesh aniname? Ishamkaipa, Apajuí uchi buutun antuke. 18 Nuadui wamak weme uchi jukim akuptuk takusta, wagki anú uchua anuiyan wi kuashat aentsun uyujkatnaitjai, dutika ai shiig kuashat agtainai”, tiuwai.

¹⁹ Nuna tusa Apajuí Agaran yumi pukini jinin iwaintukui. Dutikam Agarchakam yumi aimtai duwap apagbaun juwakug weji yumin aimak itanta, uchin aajui. ²⁰⁻²¹ Aatus Apajuí uchinak yaigkui. Dutikamu asa tsakaja uwegshunum nugka Parán tutaya nuwi pujusui. Nunik nunú uwegshunum pujaun niina dukuji egiptunmaya nuwan egatuk nuweauwai. Tuja nigka shigki apunbaunum shigki etsakamu ekenka nagkintain shiig yacha aajakui.

Abraham Abimelecjai dita dutikatnun chichasagbau

²² Nunú tsawan aajakua duwi Abimelec niina suntaji aidaun apuji Ficol aajakua nujai uyunis Abrahamjai chichastatus weuwai. Nunik jegawag Abimelec Abrahaman chichajak:

“Ame ashí takam nunak Apajuí yaimpa duka dekaji. ²³ Nuadui, Apajuísh antugtamaí minash tujutta. Juju nugka juwi mina uchig aidaush, ame uchijum wegantu aidaush wi amijai shiig awagdayag aiksamek shiig awajkatnujum pachisam tujutta”, tiuwai. ²⁴ Tusa tama Abraham ayaak:

“Ayu, Apajuísh shiig waitui, wika ame tujutam nunak imatiskanuk umiktatjai.

²⁵ “Dutikatin asamtai ame amina inakem aidaun yumigmatan jukiu aina nunú awagtugkita”, tusa tiuwai. ²⁶ Tama Abimelec ayaak:

“Achah, wika nunak makichkish dekatsjai, amek minak: Juka mina yumigmatjui, tusamkesh tujutchauwaitme. Wika yaki yumigmatnash jukiuwaita nunak yamaikish dekatsjai”, tiuwai.

²⁷ Timatai Abraham uwig aidaun, baka aidaujui juki Abimelekan susauwai. Dutika nunú tsawantinig mai chichaman umikajui.

²⁸ Nuna umikag Abraham siete uwijan juki akanak awajsauwai. ²⁹ Nuna dutikamtai Abimelec iniak:

“¿Wagka jusha siete uwig akankam ijumjaum dusha aikaume?” tau.

³⁰ Tama Abraham ayaak:

“Juju siete uwijan amaajam nunú jukim dekattame wi juna yumigmatan tainiuwaitag duka”, tiuwai.

³¹ Nuadui nunú dutikamunum nuna nugka daajin Bersheba adaikauwai, wagki nunú nugkanum chichaman umikaju asag. ³² Dutika chichaman bershebanum umikag, Abimelec Ficoljai filisteo aents aidaun nugken wakitkijui.

³³ Nunik wakitkiagmatai Abraham numi tamarisco tutain bershebanum ajauwai. Dutika nuwi Apajuí Tuke Pujuuwa nuna daajin adaitus emematiuwai. ³⁴ Aatus nuwi filisteo aents aidaun nugken Abraham kuashat tsawan pujusui.

22

Apajuí Abrahaman anentuash tusa dekapsamu

¹ Kuashat tsawan asa, Apajuí Abrahaman niyai kajinas anentaimak dekaskeapi tabaujin dekapsatatus niina daajin adaitus untsukui. Tusa untsuam nii ayaak:

“Juwi pujajai”, tiuwai. ² Tutai Apajuí chichajak:

“¿Amina uchijum makichkiuch asamtai, senchi aneam nunú jukim nijjai Moria nugkanum wetá! Nuwi jegam wi mujan iwaintuktatjam nuwi uchijum maa apeakum mina emematjita”, tiuwai.

³ Tusa tima tsawak shiig kashikmas nantaki, nii ekemi wetinun burronum patai umika ukuak, chigkimin jigka umik nunú burronum pataja

jukiag Apajuí nuwi wetá tibaunum niina uchiji Isaakan juki, nuigtu jimag inaken juki weuwai. ⁴ Nunik we wenakua kempatuma juna tsawampag wesa diikma, atushat nii jegatnujin wainkauwai. ⁵ Dutika nuna wainak, Abraham niina inake aidaun chichajak:

“Atumek juwi burro kuitamkujum juwaktajum. Nuniagmin wi mina uchigjai wetajai, núnikan niijai Apajuín emematin ukuakun taatjai, nunikmatai wakitkiagmi”, tiuwai.

⁶ Nuna tusa Abraham chigkimin niina uchijin aentsek tuja ekemaktinun jii akaamun kuchijai nii juki, niina uchijijai weuwai. ⁷ Nunik wesag, Isaac apajin iniak:

“¡Apawah!” tiuwai. Tama nii ayaak:

“¿Waji wakegame uchuchih?” tau. Tusa tama Isaac chichaak:

“Jii juki, chigkimish umika wegaji. Tujash ¿tuwi pujawa uwig aishmag tsakat maa apeaku Apajuí ememattinush?” tau.

⁸ Tutai Abraham ayaak: “Apajuí uwig aishmag tsakatan sujamsattawai, nunú maa apeaku nigka ememattatji”, tiuwai.

Aatus tusa uchijijai tsanias wegau. ⁹ Nunik Apajuí tibaunum jegantag, nuwi Abraham kaya ekenag najanauwai kuntin patasa apeaku Apajuí ememattinun. Dutika chigkimin patag nuadui niina uchiji Isaakan achika jigkag juki patainiuwai. ¹⁰ Dutika patai uchijin maatatus kuchijin jutatman, ¹¹ Apajuí ángel tumain nayaimpinum pujus untsuak:

“¡Abraham! ¡Abraham!” Tama nii ayaak:

“Juwi pujajai”, tiuwai.

¹² Tutai nii chichajak:

“Uchigmek makichkish antigkaipa. Ame Apajuí ima senchi umijam nunak yamaik dekajuajame, wagki, amina uchijum makichkiuch aigkish, sujimtsuk mina sujastasam umiku asamin”, tiuwai.

¹³ Tusa tima niimsatakama, uwig tsakat aishmag numi kanawen niina kachujin tutinak wajaun wainkauwai. Nunik uchijin maatag tabaun idayak, nuna weji achika juki maa nuna nejen ashí apeak Apajuín emematiuwai. ¹⁴ Nuna dutikau asa Abraham nunú nugka daajin: “Apajuik atsumamun sukagtawai” tuu adaikauwai. Nunú tibaunum yamayajuikish: “Apajuik mujanum atsumamun sukagtawai”, tinu ainawai.

¹⁵ Tuja awentsag Apajuí ángel tumain nayaimpinmaya Abrahaman untsuka, ¹⁶ chichajak:

“Tuke Pujuu chichaak juna timae: ‘Ame wi tabau umiakum amina uchijum makichkiuch aigkish sujitjukchau asamin, wiki wi chicham umiktinjun tumamjai’ tujamui. ¹⁷ Aminak dekias pegkegnum yumigsattajame: Ame uchijum wegantuk yaya nayaimpinum ayá iman, nuigtu kayam nayantsanum ayá iman agtinai. Ditak shiwaajinash tuke depetin agtinai.

¹⁸ Aents ashí nugkanmaya aidauk ame uchijum wegantu agtina nuna daajin pegkegnum yumigkiam agtinai, wagki ame wi tabau intimjutsuk umiku asamin”, tiuwai.

¹⁹ Tusa tima Abraham Isaakjai wakitkiuwai niina inake batsakbaunum. Nunik jegantag ditajai betek waketug bershebanum jegawajui. Nunik nuwi Abrahamak pujusui.

Nacoran uchiji aidau

²⁰ Nuwi kuashat tsawan pujus, Abraham niina yachi Nacoran nuwe Milcá, niina aishinak kuashat uchin uchigmatkauwai tabaun dekauwai.

²¹ Iwaijig Us daagtinai, nuwi patatkauwai Buz, nuwi patatkauk Quemuel,

tuja nunuwai Araman apaji. ²² Untsu Quemuelai patatkau aidauk Quésed, Hasó, Pildas, Idlaf, Betuel aatus ainawai. ²³ Betuelan nawanjiyai Rebeca. Juju ainawai Abrahaman yachi Nacor niina nuwe Milcáyai ocho uchin akiinkauwa nunú.

²⁴ Tuja nuigtushkam niina ikaa nuwe Reumá aajakua nuwishkam akiauwei: Teba, Gáham, Tahas, Maacá, aatus, tusa tabaun dekauwai.

23

Sara jakamtai ukusbau

¹ Sara cientoveintisiete mijan pujusui. ² Nunik yaakat Quiariat-arbá, Hebrón tuuta awagmatia nuwi Canaán nugkanum pujus jakauwai. Nunikmatai Abraham Saran aneak buutiuiwai, nunik kuashat tsawan anentaimak pujusui.

³ Nunik nuwe jakamtai aepes pujau ukuak, hitita aents aidaun apujijai chichastatus weuwai. ⁴ Nunik jegaa ditajai chichaak:

“Wika atum wegantuchuitjai, nuniagkish wait aneasjum makichik ukumatai sujstajum sumaktajai, dutikan nuwi mina duwajun ukustajai”, tiuwai.

⁵ Tusa tama makichik nuwiya ayaak:

⁶ “¡Apuh, wait aneasam antugkgagtukta! Jutii ainag nuwiyamek ametme dekas Apajuí etegkamumek. Nuadui iina ukumataiji dekas pegkeg aina nuwi nuwemik ukusta. Makichkish jutii ainag juwiyag ukumatain sujitjamainuk shiig atsawai”, tiuwai.

⁷ Tutai Abraham wajaki hitita aents aidau emtin ditan eme anentus tsuntsuma wajas pagkainiuwai. ⁸ Nunik chichaak:

“Atumesh mina duwag jaka nuna ukusti tusa wakegakjumek Efrón Sóharan uchijiya nuna ukumatai awa nunú segatjitajum. ⁹ Tuja Macpelánum waa niina nugke nagkatkamunum awa nuna sujusti. Wi nuna akikenak ashí akiktajai. Dutikau asantai, juju nugka juwi makichik waa ukumatai midaush ajuttí tajai”, tiuwai.

¹⁰ Tutai Efrón hitita aents nii nuwi pachitkau asa, nii wegantu aidaush ijunbaunum, ashí aents yaaktan waitijin utsaanaidaush betek antuinamunum chichaak:

¹¹ “¡Atsah, mina apujuh, wait aneasam antugtukta! Wi yamaik ashí mina pataag aidaush antuinamunum tajame: Au nugkak ame jukita amina amaajame, tuja waaya aushkam aminu ati, nuwi amina nuwem ukusta”, tiuwai.

¹² Tusa tima Abraham aents nugkentin ijunbaunmanini ataktu tsuntsuma pagkainiuwai, ¹³ nunik dita emtin Efrógkan chichajak:

“¡Wait aneasam antugtukta! Wi kuichkin nugka akiken amaag duka wait aneasam jukita. Dutikawamin wisha anentag mina duwag jajutka nunash ukustajai”, tau.

¹⁴ Tama Efrón Abrahaman ayaak:

¹⁵ “¡Mina apujuh antugtukta! Nugkak akikai cuatrocientos plata najanamu. Tujash juna akikega duka chichamjuk pujuchmi. Dekas nuwem jaka duka ukusta”, tiuwai.

¹⁶ Tima nunak antusag Abraham Efrón hitita aents aidaun emtin imaan akikai tibaunak imatiksag kuichkin juki akikmakui. ¹⁷ Dutikau asa, Efrógkan nugke Macpelá Mamrenum etsa minitaiya nuni awa nunak ashí niinu emauwai. Tuja nuigtushkam nunú nugkanum waa aunak, ashí numi múun aidaujai, ¹⁸ ashí Abrahamdauk wajasui. Tuja Abraham nugkan

sumakua nunak hitita aents aidau emtin nuigtushkam tikich aents nunú yaaktanum utsanaidaush antuinamunum sumakui.

¹⁹ Nuna ashí umika, Abraham niina nuwe jakaun juki, Mamrenum wajasa diyam etsa minitainini Hebrón tutai Canaán nugkanum waa Macpelánum awa nuwi ukusui. ²⁰ Aatus nunú nugkak, waajai, hitita aentsun nugke aajakun, Abraham sumakua duka, niina ukumatai wajasui.

24

Abraham niina inaken Isaaka nuwe atin egatkata tusa awemamu

¹ Abrahamak shiig múuntuch wajasui. Tuke Pujuu niinak ashí pegkegnum yainkui. ² Makichik tsawantai Abraham niina inake chichintan, ashí niina wajiji aidaunash kuitamin atinaitme tusa tibaun untsuka chichajak: “Amina uwejum mina bakuju wakentin yununkata, wagki ame chicham umiktinjum dekaskenum tujuttin asam, ³ nunikam Tuke Pujuu Apajuí nayaimpinum nugkanmashkam inamna nunú antugtamai, ame chicham umiakum mina uchig canaágnum wi pujag juwiya nuwan nuwat kai tusam kuitamkatnujum pachisam tujutta. ⁴ Juwiya nuwak egattsuk, mina nugkajui weme mina pataajuiya Isaaka nuwe atin egatkata”, tiuwai.

⁵ Tusa tama niina inake ayaak:

“Ayu, tujash nuwa wijai minitan dakitakuish ¿wisha utugmainaitja? ¿Amina uchigmin jukinuap ame pujaum ukukiuwaitam nuwi eman nuweattaja?” tau.

⁶ Tama Abraham ayaak:

“¡Atsah, mina uchijuk awi jukimek emaiapa! ⁷ Tuke Pujuu Apajuí nayaimpinmayaya nunú mina pataju nugkeen mina apaju jeen pujai jiijak, mina, tuja mina uchijun uchiji wegantu agtina nunú batsamsatnun susatjai tusa juju nugkan anagtuauwa nunú Apajuí niina aentsjin nayaimpinmayan emtikak awemattawai. Nuadui mina uchijun nuwe atinuk nii yaimpasmatai juki itaattame. ⁸ Untsu nuwa amijai minitan dakitakuig, wi tajam duka amek agkan juwaktatme. Tujash ¡makichkish mina uchijuk awi jukimek emaiapa!” tiuwai.

⁹ Tusa tima nunú inak niina apuji Abrahaman bakui wakentin uwejen yununak pujus chichaak:

“Dekas ame mina tujutam nunak imatiksasuk umiktajai”, tiuwai.

¹⁰ Nuna tusa niina apuji wajiji aidaunmayan, shiig pegkeg aidaun etegkeg nuwa susatnun, tuja nuwa patayi aidau susatnunashkam jukiuwai. Dutikak nuigtushkam niina apuji tagkujinian diez camellon jukiuwai. Dutika juki Mesopotamia nugkanum Nacora yaaktajin weuwai.

¹¹ Nunik wea weakua yaaktanum jegauwai, tujash eke wayatsaig etsa akagu. Nuniai nuwiya nuwa aidau yumin aimainak yumigmatnum shimuidau. Nuninai nunú inakshakam camello aidau ayamtikak yumigmatnum ayaunas batsasui. ¹² Dutika nuwi wajas Apajuín aujak: “Mina apujun Abrahaman ememattai Apajuí Tuke Pujuuwah, wait aneasam yamai mina apug Abraham wait anenjata, dutikakum minash shiig pegkegnum wekaegas wakitkiti tusam yainkata. ¹³ Tuja juwiya nuwauch aidau yumin shikinak mininai, juju yumigmata juwi ayaumsan pujustajai.

¹⁴ Nunikan pujai nuwauch yumin shikika waketkui: ‘Wait aneasam anú yumi aimka juki weam nunú apusam shikisam ajampusta uwagtajai’ tai, nii aijak: ‘Pai uwagta, nuniakmin amina camellojum aidaunash aaktajai, tusa tujuttata nunú, dekas Isaaka nuwe atin ame etegkamu ati.

Nunú betek uminkamtai, ame mina apug wait anentamunak shiig wika dekattajai' ", tiuwai.

¹⁵ Tusa Apajúi augbaun eke ashimtsaig, makichik nuwauch yumi aintai yanas minaun wainkauwai. Duka Rebeca Betuela nawanji aajakui. Betuelak Abrahamana yachi Nacoran uchiji Milcáyai akiamu aajakui. ¹⁶ Rebecak shigmauch, nuigtush makichik aentskesh takaschamu aajakui. Nunú nuwa yumi shikitaijin apujus yumi aimak wakitki wetatman, ¹⁷ Abrahamana inakeshkam tupikatki jegantun chichajak:

"Wait aneam, minash yumi machik ajampusta uwagtajai", tiuwai.

¹⁸ Tusa tama:

"Ayu uwagta apuh", tiuwai. Nuna takug yumi aintaijin apujus susauwai, dutikam niishkam uwajui. ¹⁹ Nunikmatai Rebeca chichajak:

"Amina camellojum aidaunash yumin shikikan susatjai dita wakegamun uwagtinme" tiuwai.

²⁰ Tusa waujus yumi aimka takakbaujinak tagku amutainum yajatua ukuak, tupikaki kuashta yumin shikika ashí tagku aidau umumainun aimjukui. ²¹ Imanitai inakak takamtak wajas dii wajau, dekask juwashit Tuke Pujuu etegkamush tusa nuna ejetatus. ²² Camello yumin uwakagmatai, makichik oro dujinum nenatai najanamun seis gramo kijinji ajamun juki Rebecan detauwai. Dutika nuigtushkam jimag kuntunum patakumtain oro najanamun cien gramo kijinji ajamun juki nunashkam susauwai. ²³ Nuna susa iniak:

"Wait aneam tujutiah ¿amesh yana nawanjiyaitpa? ¿Amina apa jenish agkanchaukai wi mina aentsug aidaujai kanumainush?" tau.

²⁴ Tusa tama nii ayaak:

"Wika Nacor Milcáyai Betuelan akiauwa nuna nawanjiyaitjai. ²⁵ Iina jenig atum kanumainuk awai, nuigtushkam chijichi camello yumainchakam kuasht awai", tiuwai.

²⁶ Tusa timatai nii Apajúi segamunak ashí imanisag uminkamtai, tikishmag pujus Tuke Pujuu emematak: ²⁷ "¡Tuke Pujuu mina apug Abrahamana Apajúijig pegkegnum chichagtai atin ati! Dekas amek mina apug wait anentau asam anagkuamugmek umitskek idaisachume. Ame minashkam jinta inaktugsam, mina apug Abrahamana patayin itajuaume", tiuwai.

²⁸ Aatus inak Apajújai chichaak pujai, Rebeca tupikaki niina dukuji jeen jegaa nuna pachis dukujin ashí ujakui. ²⁹ Tusa etsegkamtai Rebeca umayi iwai Labán nunú aents yumi aintaiyum ayaumas pujaun wainkatatus tupikaki weuwai. ³⁰ Wagki niina umayi kuntunum patakumtain dujinum nenataijai ayatak orok najanamun susamun wainkau asa. Tuja nuigtushkam Rebeca chichaak: "Nunú aents minak aatus tujutmae", tusa etsejun antuku asa, nunú aents yumi aintaiyum ayaumas camellojin batsas pujaun shiig wainkatatus wejiuwai. ³¹ Nunik jegantun, chichajak:

"¿Wagka agaash pujame? Amek Tuke Pujuu pegkegnum yumigjamuitme, anui pujutsuk wegajai mina jegajui wemi. ¡Wi ame kanumainnak amina camellojum batsamsatin aidaujai umikmajai!", tiuwai.

³² Tusa tima ayu tusa juga weuwai. Nunik jegantai, camellonum waji aidau pataja ejegamun ashí Labán akaja ijumag duwi camellon ayujauwai. Tuja nuigtushkam yumin shikika nunú inakan, niijai yujaujai susauwai nawen nijaktinme tusa.

³³ Nuna dutika, yutain inajuk umika apujtusui. Dutikamtai Abrahaman inake chichaak:

“Eke wi chichaman tumain ajuta nuna amina ujatskek yumaitsujai”, tiuwai. Tama:

“Ayu, waji tame tita”, tiuwai.

³⁴ Timatai inak chichaak:

“Wika Abrahaman inakegaitjai. ³⁵ Mina Apug Abrahamnak Tuke Pujuu shiig kuashat pegkegnum yaigkui. Dutikak uwijan, bakan, platanash, oronash, inak aishmag aidaun, inak nuwa aidaujui, nuigtu camellon, burro aidaun aatus ashí susa wiakuch awajsae. ³⁶ Tuja niina nuwe Sarashkam muumpatnum uchin uchigmatkabi. Mina apujuk niina wajiji aidaunak, juka mina uchigdau agtinai tiuwai. ³⁷ Nunú mina apug wi chicham umiktinun chichagtak: ‘Mina uchiju nuwe atinuk Canaán nugkanum wi pujag juwiya nuwak egatkaipa, ³⁸ juwiyag egattsuk dekash mina apaju patayin wetá, nunikam nuwiya mina uchiju nuwe amainuk egatkata’, tusa tujutmae. ³⁹ Tujutkui wi ayaakun: ‘Mina apujuh, ¿tujash nuwa wijai minitan dakitakuish itugkattajah?’ timajai. ⁴⁰ Tusa tai nii mina aijak: ‘¡Apajuín wi emematkun umijag nunú, niina aentsji nayaimp-inmayan emtika awemattawai, wagki nii uyuntamsamtaí pegkegnum wekaesamnum tusa! Duwi amek mina uchiju nuwe atinuk yupichu mina apaju patayinia jukittame. ⁴¹ Untsu ame mina pataajui jegaam nuwa sumamin sujitjamkagmataig, wi ame chicham umiktinun tajam duka agkan juwaktatme’, tujutmae.

⁴² “Tusa tujutiu asamtaí, yamai yumi aimentainum taa wajasan, Tuke Pujuu mina apujun Apajujiya nuna augkun:

“¡Amesh dekash minash shiig pegkegnum wekagash nii dutikatag tabaunak betek umika wakitkiti tujutkumek yainkata! ⁴³ Tuja nunú betek uminkuig wi yamai juju yumi aimentainum wagaj juwi wajasan, nuwauch yumi shikik waketkui wi chichagkun: “Wait aneamash yumi shikikam machik ajampusta, uwagtajai”, tusan tai, ⁴⁴ nii aijak: “Ayu, uwagta, nunikamin camellojum uwagtinnash shikigkatjai”, tusa tujuttata nunú dekash atin ame mina apujun uchiji nuwe atin egatkamuk”, tusan timajai.

⁴⁵ Tusan Apajuji chichamunak eke ashimtsaig, Rebeca yumi aimentajin yanaki midaun wainkamjai. Nunik yumi akaetuki shikika iwakmatai, wi niina chichagkun: ‘Minash wait aneamash yumi ajampusia uwagtajai’, timajai. ⁴⁶ Tusa tai ayu tusa, yumi aimka juwamujin akaki apujus chichagtak: ‘Amea uwagta, nunikamin amina camellojum aidaunash yumin shikigkan aaktajai’, tusa mina yumin sujus idaitak, mina camellojum aidaunashkam dutiksag susame, ⁴⁷ dutikamtaí duwi wi niina iniakun: ‘¿Amesh yana nawanjiyaitpa?’ tusan tai nii aijak: ‘Wika Nacoran uchiji Betuel Milcáyai akiinauwa nuna nawanjiyaitjai’, tujutmae. Timatai niina nujiin nenatain detuamjai, tuja nuigtu jimajan kuntuunum patakumtain patakuamjai. ⁴⁸ Nuna dutikan nuwig tikishmaja pujusan Tuke Pujun emematmajai, wagki Apajuí mina apug Abrahaman ememattaiya nunú minak jintan inaktujus, mina apug Abrahama uchiji nuwe atinun niina patayi nawanji pujamunum itajuau asamtaí. ⁴⁹ Nuadui yamai atumesh dekashenun tsanumtsuk mina apug Abraham tibaun uajajim nunú tujuttajum. Untsu atsa dutikmaitsujai takugminig wi anentaímsatjai wajinak dutikatja”, tiuwai.

⁵⁰ Tutai Labán Betueljai niina ayaak:

“Juka ashí Tuke Pujuu wakegamua nunuwai, nuadui iik ayu tusaikish, nuniachkuish atsa tusaikish tumaitsuji. ⁵¹ Pai nijah, juwai Rebeca, juju

jukijum wetajum. Amina apugmi uchijiya nuna nuwe ati. Tuke Pujuu wakegamua nunisag uminkati”, tiuwai.

⁵² Tusa tutai Abrahaman inake tikishmag nijayin nugkan antig pujusui Tuke Pujuun emematak. ⁵³ Apajuin ememati idayak, kuashat waji takatai akik aidaun, plata najanamu aidaun, oro najanamu aidaun, tuja jáanch nügkurai aidaunashkam juki Rebecan susauwai. Dutika nuigtushkam niina umayin niina dukujin aatus waji aidaun susauwai.

⁵⁴ Nuna dutikai aents nijai uyuunis yujauk betek ijuntujag yutain yuwawag, umutnash uwajag kajigkajui.

Nunik tsawainak nantakiag nunú inak chichaak:

“Wisha yamai wakitkitjai mina apuju pujutaijin”, tiuwai.

⁵⁵ Tutai Rebeca umayi dukujjai chichainak:

“Eke yamaikik Rebecak jukipa, dakasta jutjai diez tsawan pujusti, nunik duwi atumjai weti”, tuidau.

⁵⁶ Tujash inak ditan ayaak:

“Nuigtuk minak emetjuawaigpajum. Tuke Pujuu minak pegkegnum wekaesati tusa tujutbaunum shiig umikjai, nuadui wika mina apuju pujutaijin wakitkitag tajai”, tau.

⁵⁷ Tusa tutai dita ainak:

“Jasta, Rebeca utsuka dekajuami wajintig”, tuidau.

⁵⁸ Tusag Rebecan unsukag itan iniinak:

“¿Amesh juju aentsjai wetasamesh wakegamek?” tama, nii aimak:

“Ehe wetatjai”, tiuwai.

⁵⁹ Tusa timatai Abrahamana inake shimamunum Rebecan, tuja nuwa nii uchuch asamtai kui kuitamkawa tsakapajua nujai akupkajui.

⁶⁰ Dutikainak, Rebecan pegkegnum yumigkinak aatus tiajui:

“Iina umayi yamai akupkami: ‘Chah, ubajuh,
¿Amek shiig kuashat aentsun dukujimtai atin ata!

¿Nuigtushkam amina uchijum wegantu aidauk,
ditá shiwaajin depetkatin atinme!’ tusa wakegaji”, tiajui.

⁶¹ Aatsa pegkegnum yumigjam, Rebeca niina inake nuwa aidaujai camellonum pekamiag, Abrahaman inake wetai nijai shiyakajui. Aatus Abrahamana inake Rebecan juki wakitkiuwai.

⁶² Tuja Isaakak Néguev nugkanum pujujakui. Nuniayatak makichik tsawantai yumigmat “Iwaku pujuuwa nunú minak waitui” tutainum weuwai. ⁶³ Nunak nunikui wagki tuke ayamak Apajuin aujak wekaesatatus. Nuwi wekagu pagkas niimsatakama camello miniagtatman wainkauwai. ⁶⁴ Tuja Rebecashkam niimkama wainkauwai Isaakan, nunik camellonum eketu akaikiuwai. ⁶⁵ Nunik akaiki inakan iniak:

“¿Aush yaita ikama awiya ii weamunmanini mina dusha?” Tusa iniam, inak ayaak:

“Auk mina apujui”, tiuwai.

Tima jáanchin juki dukumak yapiin ejaka wajasui.

⁶⁶ Nuniai inak Isaakan igkug nii wekaesa dutikamujinak ashí ujakui.

⁶⁷ Dutikam Isaac Rebecan juki niina dukuji aajakua nuna aakjin awayauwai, dutika nuwi nuwatkauwai. Aatus Isaakak dukuji jakamtai, wake besemag pujau Rebecan aneak anentain ichichiajui.

25

Abraham Ceturayai uchin akigkua nunú wegantu aidau
(1 Cr. 1.32-33)

1 Abraham tikich nuwa Cetura daagtinun jukiuwai. 2 Dutika nunú nuwanum imajin uchijin akigkui: Zimráam, Jocsán, Medán, Madián, Isbac, Súah, aatus. 3 Jocsán akiauwai Sebánkan Dedánjai. Untsu Dedánkan uchiji wegantu aidauk: Asureo, letuseo, leumeo aatus aajakui. 4 Tuja Madiágka uchijishkam: Efá, Éfer, Hanoc, Abidá, Eldaá aatus aajakui. Ashí juju aina juka Cetura uchiji wegantu aajakui. 5 Tujash Abrahamak niina wajiji aidaunak ashí niina uchiji Isaakan susauwai. 6 Tuja tikich nuwanum akigbau aidaunak ayatak anenjauch wajichin susa, Isaac pujamun ukumtiki atushat ishiakui. Tuja nigka nuwig pujayatak nugka etsa jiintaiya nuni ishiakui.

Abraham jakamtai ukusbau

7 Abrahamak ashí ijumjamak ciento setenta y cinco mijan pujusui. 8 Nunik shiig múuntuch wajas, jakauwai. Nunikmatai ukusaju ainawai. 9 Nunik jakamtai, niina uchiji aidau Isaac Ismaeljai jukiag Efrógka nugke Macpelá Mamrenum etsa minitaiya nuni awa nuwi ukusajui. 10 Nunú nugkanak Abraham hitita aents aidaun nugken sumakua nuwi niina nuwe Sara ukusbaunmak ayaunas ukusajui.

11 Abraham jakamtai, niina uchiji Isaac yumigmatan daaji “iwaku pujuwama nunú minak waitui” tutainum ayaumas pujaun, Apajuí pegkegnun yumigjauwai.

Ismaelan uchiji wegantu aidau (1 Cr. 1.28-31)

12 Sara inake egiptunmaya nuwa Agar aajakua nuwi Abraham Ismaelan akiauwa nuna uchiji wegantu aidauk: 13 Nebaiot aajakui iwaiji, nuwi patatkau ainawai: Quedar, Adbeel, Mibsam, 14 Misma, Duma, Masá, 15 Hadar, Temá, Jetur, Nafis, Quedmá aatus. 16 Juju ainawai Ismaelan uchiji doce aajakua duka. Juju aina juka maki makichik nugkentin aakan aakmajag yaaktamkajui. Dutikawag nunú yaakta daajinashkam dita daajinak adajiau ainawai. Dutikawag maki makichik dita yaaktajin apuji wajasaju ainawai.

17 Ismaelak ciento treinta y siete mijan pujus, jakauwai, nunik jakamtai ukusajui. 18 Nunikmatai nii wegantu aidauk nugka Havilá tutai, Shurjai niniaku awa nuna ejapeen, jinta asirianum juwaki Egipto wetaya nuwi ditá yachi aidau dakitamaitak batsamsajui.

Jacob Esaújai akiinamu

19 Jujuwai Abrahama uchiji Isaac pachisa augmattsamu. 20 Isaac cuarenta mijanji ajamu asa, Betuela nawanji Rebeca Labágka umayi arameo aents aidau, Padán-aram batsamajaku aina nuwiyan nuwatkauwai. 21 Rebeca kaga asamtai, uchi akiatjai tusa Isaac Apajuín senchi segauwai. Tusa segam Apajuí Isaakan antugkauwai, nuadui Rebeca ejajjukui.

22 Tuja jimag uchi asa inital egkemsag maanidau. Imaniagtai Rebeca nigki anentaimas: “Juju imaninaku, wika iwaku pujutnak dakitajai. ¿Wagka minash jusha jutijawa?” tusa Apajuín iniasui. 23 Tusa iniam Tuke Pujuu ayaak:

“Amina ampugminig jimag uchi egketui, nunú akiinawag atakea duwi yujakag maaniawagtinai. Nuadui uchik eke akiintsuk inital egkemsag maaninawai. Tikichia nuna aentsji ima kuashat agtinai.

Untsu iwaiya nunú yachi awanin umigtinai.
Nuni kanakagtin asag imatijamainawai”, tiuwai.

²⁴ Tusa tima pujus tsawan nii uchigmaktin jegantai jimajan uchigmakui.
²⁵ Yama nagkamchak uchi jinkiuwa duka intashi kapantu uje wajakin akiinauwai. Nuna adaikauwai Esaú.* ²⁶ Nuniai tikishchakam patatkau, niina yachi Esaú sagkanin achitkau akiinauwai. Nuniku asamtai, nunak Jacob† adaikauwai. Juju uchi aidaun jimagma Rebeca uchigmakua nunak, Isaakan mijanji sesenta ai uchigmakui.

Esaú nii iwai asa jumainun puyatjutsuk sujukbau

²⁷ Nunú uchi aidauk mai muumpajajui. Esaú kuntin mautan yacha aajakui, untsu Jacob batajuch aajakui, niinak ayatak jega pujut shiig awagmajakui. ²⁸ Isaakak Esaún ima senchi anejakui, wagki egakbaun yuu asa, untsu Rebeca Jacopan ima senchi anejakui.

²⁹ Makichik tsawantai Jacob yutain inajak pujai, Esaú kuntinun maatatus weu pimpiki minau. ³⁰ Nunik minis Jacob inajak pujaun wainak chichajak: “¡Wait aneasam minash anú yutai pachimjam kapantu emam inajam nunú ajamjusta, nujantai jajai!” tiuwai. Nuadui Esaú tawa nunak kapantu taku, tawai.

³¹ Tusa segam Jacob Esaún chichajak:

“¡Kame amesh yapajakmek, eke yutain amatsaig ame iwai asam jumainaitam nunú mina ashí sujusta!” tiuwai.

³² Tusa tama Esaú chichaak:

“¡Nijah, wi iwai asan jumainaitag dusha, waji pegkegnumak yainkati! ¡Nuna sujimaknuk nujantai jakattag jama! ¡Duka dekas ame jukitin ata!” tiuwai.

³³ Timatai Jacob ayaak:

“Dekas takumek yamaikiuchia juwik ame tame nunú umiktinjum chichaakum: ‘Duka dekas ame jukitin ata’ tusam tujutta”, tau. Tusa tama Esaú chichaak:

“Nunak dekas tajai”, tiuwai. Nuni susauwai Jacopan ashí nii iwai asa jumain aidaunak. ³⁴ Tusa tima Jacob, Esaún pagkan lenteja pachimja inagkamujai susauwai. Dutikam nuna yuwa, umutainashkam uwag uminak weuwai. Tuja nii iwai asa jumainjinak puyatjachu asa, dutikaujuk niig wainak juwakui.

26

Isaac yaakat Guerar webau

¹ Yaunchuk Abraham iwaku pujai, yapajut tepeauwa nuna nagkaesau, Isaac pujusmataishkam yapajut tepeauwai. Nunikmatai Isaac yaakat Guerar filisteo aents aidaun apuji, apu Abimelec pujamunum weuwai.

² Nuwi jegaa pujaun, Tuke Pujuu wantintuk chichajak: “Egiptunmak wepa, dekas wi amina titatjam nuwi weme pujusta. ³ Tuja yamaikik juju nugka juwig pujusta, wi aminak kuitamkattagme. Wi aminak pegkegnum yumigsattagme. Tuja amina uchijum wegantu aidaun ashí juju nugka aina juna susattajai. Wi amina apa Abrahaman anagkuawaitag nunak, nuni umiktatjai. ⁴ Amina uchijum wegantu aidaunak nayaimpinum yaya dekapamainchauwa iman awajsattajai. Dutikakun juju nugka junash ashí

* **25:25** “Esaú” tawa nunak hebreo chichamnumak “ujentin” taku tawai. † **25:26** “Jacob” tawa nunak hebreo chichamnumak “yachi sagkanin achitkau akiinau” taku tawai.

ditanak susattajai. Tuja nuigtushkam, ashí tikich nugkanmaya aidaush amina uchijum wegantu aidaunum yunumas pegkeg yumigkin jukiagtinaí. ⁵ Nunak dutikattajai, wagki wi Abrahaman mina chichameg, wi jintinjam jujai betek umikta tusa tibaanuk imatiksag umigtuku asamtai”, tiuwai.

⁶ Tusa tima Isaac Guerarnumak pujusui. ⁷ Nunik pujaun nuwiya aents aidaun Rebecan pachis: “¿Jusha yaita?” tusa inidau. Tusa iniam Isaac mina nuwajui tutan ishamak: “Mina ubajui”, tiuwai. Nunak tiuwai wagki Rebecak shigmauch asamtai niina shigmatin juinak mantuawainum tusa.

⁸ Kuashat tsawan nagkaemai Abimelec makichik tsawantai niina jeen wajasa niimtainum niimkama Isaac niina nuwe Rebecan achika wasugtatman wainkauwai. ⁹ Dutika wainak Abimelec Isaakan untsuka itan chichajak:

“Dekas au nuwa amina nuwemiapih. Nuniaish, ¿wagka mina ubajui timaume?” tau. Tama, Isaac ayaak:

“Niina juinak mantuawainum tusan timajai” tiuwai.

¹⁰ Tutai Abimelec chichajak:

“¿Wagka jusha jutikagtame? Mina aentsug aina nuwiya makichikesh amina nuwemin aikauwaitkuig, amek jutiik pegkegchau takasua iman ekagtumain awajkagtukume”, tiuwai.

¹¹ Nuna tusa ashí niina aentsji aidaun chichajak:

“¡Juju aentsun waitkauk, tuja niina nuwenakesh waitkauk mantamnat-tawai!” tiuwai.

¹² Tuja nunú mijantin Isaac Guerar nugkanum pujus ajakan ajakbauwai, dutika Apajuí yayasam ¡shiiig kuashat! juukui. ¹³ Imatikau asa ¡shiiig kuashat wajigtin! wiakuch wajasui. ¹⁴ Uwiggjish, bakajish kuashat, nuigtush inake aidaush shiiig kuashat ajujukui, iman asamtai, filisteo aents aidaun kajejuidau. ¹⁵ Dutikaidau asag Abraham pujusmatai, niina inake aidaun yumigmat aidaun taimu aina nuna yututkajui. ¹⁶ Tuja Abimelecshakam Isaakan chichajak:

“¡Wetá juwi pujam duka, amek juti nagkaekagtasu shiiig wiakuch wajasume!” tiuwai.

¹⁷ Tusa tima Isaac jiinag Guerar nugka pakajin shiyakag nuwi batsamsauwai. ¹⁸ Nuwi niina apaji iwaku pujusa yumigmat aidaun tainiuwa nuna apaji jakamtai, filisteo aents aidaun yutukagbaun ataktu tai iwajauwai. Dutika iwajug, nii apaji adaikamu aajakunak dutiksag niishkam adaikauwai.

¹⁹ Makichik tsawantai Isaaka inake aidaun nugka pakanum yumigmatan tau batsamkamá yumi pukuni jiinun ejeyu ainawai. ²⁰ Tujash nuna wainkagmatai, Guerarnumia aents uwijan kuitamin aidaun, Isaaka uwigjin kuitamin aidaujui: Juka yumik iinui tusag maanitkajui. Nuadui Isaac nuna adaikauwai “Esek”,* wagki nuna maanitkaju asag. ²¹ Nunikag Isaaka inake aidaun, tikichin yumigmatan tainiaujui, dutikawagmatai nunashkam dutiksag maanitkajui. Untsu Isaac nuna adaikauwai “Sitna”. Nunak “shiwagmagat” taku tawai.

²² Dutika ukuak Isaac atushat weuwai, nunik nuwi tikich yumigmatan tainiaujui. Tujash nunak maanitkachaju asag, adaikajui, “Rehobot”. Nunak “agkanmagamu” taku tawai. Nunak “yamaik Tuke Pujuu agkanmitkagmae juju nugka juwi takainak emkatnume” taku tuu adaikauwai.

²³ Nuna ashí umika nuwi pujau, Isaac bershebanum pujustatus weuwai.

²⁴ Tuja nunú kashia duik Tuke Pujuu Isaakan wantintuk chichajak: “¡Witjai amina apa

* 26:20 “Esek” tawa nunak hebreo chichamnumak “maaniamu” taku tawai.

Abrahama Apajuíjinuk,
makichkish ishankagtukaipa,
wi aminak kuitamjame!

Abraham mina chichamjun umigtukua duwi
aminash aikasnuk pegkegnum yumigsan,
amina uchigmin uchiji wegantu agtinashkam
ikauntuktatjame”, tiuwai.

²⁵ Aatsa tima kuntin maa patasa apeaku Apajuí ememattinun nuwi najanauwai, dutika nuwi Apajuín niina daajin adaitus emematiuwai. Dutika nuwi aakmag pujusajui. Tuja nuwi niina inake aidau tikich yumigmatan tainiajui.

Isaac Abimelecejai chicham umikbau

²⁶ Makichik tsawantai Abimelec Guerar pujau Isaakjai chichastatus weuwai. Nuwi wetai niina kumpaji Ahuzat, Ficol suntajan apuji aajakua nujai uyuunajui. ²⁷ Nunik kaunawagmatai Isaac chichajak:

“Atum mina dakitjakjum, atumin nugkemin pujai jiiigkijum ajapjuamujum dusha, ¿wagka wijai chichastasagmesh minagme?” tau.

²⁸ Tusa tama dita ainak:

“Iik dekaji Apajuí amina kuitamjama duka, nuadui anentaimsa dekas iish amijai mai ikdaisa chicham umigdaikatna nunú chichasmi tusa minaji. Tuja ii tabauk jujuwai: ²⁹ Amesh jutiish pegkegchau awajkagtukaipa, wagki iik amek waitkatsuk, ayatak pegkegnum kuitamka apusa jiyakuish utugchat atsaunum agkan jiiki awemabiagme. Tuja aminak yamai Apajuí pegkegnum yumigtamsae”, tiuwai.

³⁰ Tusa aatus chichasag, Isaac yutain umikmatai nuna yuwinak, umutain umuinak jiiistamawajui. ³¹ Nunik tsawajag kashikmas Isaac, ditajai mai ikdaikag chicham umigdaikagtinun chichasag umikajui. Dutika umikag Isaac ditan kumpamak awakjauwai.

³² Tuja nunú tsawantinig Isaaka inake aidau yumigmatan tagak batsatu yumin chigkawag, yumi chigkaji tusag ujaktatus kautuawajui.

³³ Nunikagmatai Isaac nunú yumigmata daajin Sebá† adaikauwai. Nuadui nunú yaakta daajig Beersheba tama awai.

³⁴ Esaú cuarenta mijanji ejeyi pujus, hitita aents Beerí aajakua nuna nawanjin Juditan nuwatkauwai. Nunik pujus tikich nuwa Basemat daagtin tikich hitita aents Elón aajakua nuna nawanjinashkam nuwatkauwai.

³⁵ Juju jimag nuwa aina nuna pujutji pegkegchau asagmatai nuna diisag, Isaac Rebecajai shiig pujuschamin wake besemag pujujakajui.

27

Isaac uchiji Jacopan Esaújai yumigjamu

¹ Isaakak shiig muumpakiu asa wainmatnash wainmamainchau wajas pujujakajui. Nunik pujau makichik tsawantai niina uchiji iwain untsuka chichajak:

“¡Uchuchih!” tau. Tusa untsuam nii ayaak:

“Juwi pujajai apawah, waji tame, tujutta”, tiuwai.

² Tama nii ayaak:

“Nijah, wika yamaik shiig muumpakjai, pachiachbaunum jamainaitjai.

³ ¡Nuadui kuntin mautaijum jukim ikam weme kuntin maam, ⁴ shiig

† 26:33 “Sebá” tawa duka hebreo chichamnumak “chichasbau ewaetsuk umigdaikatin” taku tawai.

pachimjam, mina yutaijuama nunú yutai pegkeg inagkam itagtuata, yuwatjai! Nuna yuwakun wi eke jatsug duwik amina pegkegnum yumigsatjame”, tiuwai.

⁵ Nuna aatus Isaac tabaun Rebeca antukui. Nunik Esaú apaji yuwatnun kuntinun egak wematai, ⁶ uchiji ekeu Jacopan chichajak:

“Antukta nijah, amina apa yamai amina yatsumjai chichaak: ⁷ ‘Kuntin maata, dutikam yutai pegkeg pachimja inagkam itagtuata, nuna yuwan, eke jatsuk Tuke Pujuuush antai amina pegkegnum yumigsatjame’ taun antukmajai. ⁸ Nuadui uchuchi wi titatjam nunú shiig antukta: ⁹ Wamak tagku batsamtain weme, jimag chivo tsakat pegkeg jukim itagtuata, wi wamak maan amina apa yaitaijiyama nuna pachimjan inagtuktajai. ¹⁰ Dutikamtai ame jukim ejetuata nuna yuwati, nuna yuwa nii dekas iwaaka awik, amina pegkegnum yumigtamsati”, tiuwai.

¹¹ Tusa tama Jacob dukujin ayaak:

“Tujash mina yatsug Esaún iyashig uje wajasuwe, wika aannuchitjai.

¹² Namputkama mina apag achigkama dekapjug, dushiktakpap jutijawa tusa, pegkegnum yumigtutsuk pegkegchaunum yumigtujai tajai”, tiuwai.

¹³ Tusa tutai dukuji ayaak:

“iUchuchi amina pegkegchaunum yumigtamjamtaish duka minai juwakti! ¡Amek ayatak wi tajam duke umikta, nuniakum wamkesam weme, jimag chivo tsakat jukim itagtuata!” tau.

¹⁴ Tusa tima ayu tusa weji, jimag chivo tsakatan juki dukujin itajuauwai. Dutika itajuam nuna maa Isaakan yaitaijin imatiksag pachimag yutai pegkejan inagtukui. ¹⁵ Dutika umika, Esaú nugkutajai jáanch dekas shiig pegkeg jegaa ataman juki, niina uchiji ekeun Jacopan anugjauwai.

¹⁶ Dutika nuigtushkam chivo duwapen juki, niina kuntujin pempenjauwai, dutikak, kuntujenchakam uje atsuju asamtai, nuwishkam anugjauwai.

¹⁷ Dutika nii yutai pachimja pegkeg inagkamun pagjai juki apajin susati tusa susauwai.

¹⁸ Dutikam nuna juki niina apaji pujamunum waya, chichajak:

“¡Apawah!” tiuwai.

Tama: “Juwi pujajai, ¿yaa uchijuitpa amesh?” tusa Isaac iniasui.

¹⁹ Tusa iniam Jacob ayaak:

“Wika amina uchijum iwai Esaúwaitjai. Ame mina segatmaum nunak umikjai. ¡Wait aneasam nantakim juwi ekemsam yuwata wi kuntin maamua nunú, núnikam pegkegnum yumigtugta!” tiuwai.

²⁰ Tusa tama, Isaac uchijin iniak:

“¿Uchuchi itugsamea kuntinush wamkesmesh wakemkaume?” tau.

Tama Jacob ayaak:

“¡Tuke Pujuu Apajui ame emematnum nunú minak yainkamtai, wamak igkugmajai!” tiuwai.

²¹ Tujash Isaac niina chichajak:

“Ayu, ame dekas mina uchig Esaúwaitkumek adjitukta achikan dekap-satjame”, tiuwai.

²² Tusa tama Jacob apajin jegaantauwai, achijuk dekapjusti tusa. Nuna achika dekapes, Isaac chichajak: “Chichamjumek Jacopan chichamejai betekai, tujash untsu kuntujum Esaún kuntujijai”, tiuwai. ²³ Niina kuntujinig niina yachi Esaún kuntujijai betek uje wajakin asamtai, dekapjachui. Tujash pegkegnum yumigjattak, ²⁴ ataktu awena iniak:

“¿Dekas amesh mina uchig Esaúkaitam?” tau. Tama nii ayaak:

“Ehe witjai, Esaúwaitjai”, tiuwai.

25 Tusa timatai niina apaji chichajak:

“¡Ayu uchuchih, ame kuntin maa inagkamu sujusta yuwatjai, nuna yuwan pegkegnum yumigsatjame!” tiuwai.

Tama Jacob ayu tusa yutai umikbaun juki apajin susauwai. Dutikak nuigtushkam umutai vino uva najanamun ejetuauwai. Dutikam Isaac nuna yuwa umutainashkam uwajui. 26 Nunik chichaak:

“¡Uchuchih, juwi tantam kugkuntsata!” tiuwai.

27 Tama Jacob niina apajin kugkuastatus jegaantam, Isaac niina uchiji Esaún jáanchji kugkuntin dekapjuui. Nuna dekapjug pegkegnum yumigkiak:

“Juju juni kugkua juka mina uchig emkaun kugkuntiyai. Ikaman kugkuntijai betekai, Tuke Pujuu aan yumigjamu asa.

28 ¡Uchuchi aminak Apajuí yumi

nayaimpinmayan amastí,
dutihjamantai amek nugkanum ajakmamesh
trigo shiig kuashat juutnaitme,
tuja vinoshkam umumain kuashat ajutjamtinai!

29 ¡Kuashat aents aidau aminak takagtamiagtinai,
nuigtushkam nugka muunnumia aidaush
ima aminak antugtamaainak umigtamiagtinai!

¡Ame apu wajasamin, yatsumshakam amina umigtamtinai!

¡Amina pegkegchaunum yumigtamidauk,
ditashkam dutiksaik pegkegchaunum yumigkiam agtinai!

¡Untsu amina pegkegnum yumigtamidauk,
ditashkam dutiksaik pegkegnum yumigkiam agtinai!” tuu yumigjauwai.

30 Tusa pegkegnum yumigjam Jacob apajin pujau jiinki wegaig, Esaúshkam kuntinun maatatus weu tauwai. 31 Nunik niishkam apaji yaitaijin, yutai pegkejan pachimag inajuk, juki jegan apajin chichajak:

“¡Apawah, nantakim, wi kuntinun maa inagtukjam nunú yuwata, núnikam pegkegnum yumigtusta!” tiuwai.

32 Tusa tama Isaac iniak:

“¿Yaitpa amesh?” Tama:

“Wika amina uchijum iwai Esaúwaitjai”, tiuwai.

33 Tutai, Isaac anentai jegagchauwai, nunik kujakjatun chichaak:

“Tujash ¿ya minash kuntinun maa yutain umikash itagtuame? Nuna wika ame eke tatsminig ashí yuwamjai. Dutikan niina ashí pegkegnum yumigjamjai. Nuadui nú yamaik pegkegnum yumigjamu juwake”, tiuwai.

34 Tusa apaji tutai Esaú antuk, kajeka buutak:

“¡Apawah, minash wait aneam pegkegnum yumigtujah!” tau.

35 Tusa tama Isaac ayaak:

“Amina yatsum tajutua, tsanujug aminu pegkeg yumig atinuwe nunak ashí jujutjamkine”, tiu.

36 Tutai Esaú chichaak:

“¡Awis niina daajinak Jacob adaikau ainatai! ¡Aniau asa jimajá tsanumag midau amainun atanjukne! Nagkamchakush wi iwai asa ju-mainun atanjukmae, tuja yamaish wi pegkegnum yumignamainjun nigki atanjukne. ¿Tujash mina yumigtumainuk makichkish ukugtuschaumek?” tau.

37 Tama Isaac Esaún ayaak:

“Antukta nijah, wi Jacopan amina apujum ati tusan tijai, dutikakun ashí niina patayi aidaushkam niina umijin atinme, timajai. Nuigtushkam trigo aidaush, umutai vino aina nujai kuashat ajiti, timajai. ¿Tujash uchuchi yamaish aminash, itugkatjamki?” tau.

³⁸ Tusa tama Esaú atak awagki segaak:

“¿Apawah, makichkiuchikesh mina yumigtumainuk shiig atsugtamuak? ¡Minash apawah, pegkegnum yumigtujah!” tusa senchi buutu.

³⁹ Imattai Isaac niina chichajak:

“¡Antukta nijah, amek atushat weme, juju nugka pegkeja juka ukuakum, nugka pegkegchaunum yumish yutachbaunum pujustinaitme!

⁴⁰ Amek amina puyaajumjai depetmasam pujakum amina yatsum umigtinaitme, tujash ame senchijinkum nii umiju pujaum agkanmagatnaitme”, tiuwai.

Esaú maatag tama Jacob tupikakbau

⁴¹ Jacob kasagkamu asa, Esaú niina senchi kajegkauwai, wagki nii yumignamainun, apaji Jacopan susau asamtai. Nunik anentaimas: “Mina apajuk jatanak namput wajaschae, nii jakamtai agkan wajasan mina yatsug Jacobnak maatjai”, tiuwai.

⁴² Tusa chichaman umiamun Rebeca dekaa, Jacopan untsuka itan chichajak:

“Antukta nijah, amina yatsum Esaú mantamatag tawai, ame nii yumignamainji atankiu asamin. ⁴³ Nuadui uchuchi yamai antugtukta: Amek yamaik yaakat Harágnum tupikakta, núnikam mina ubag Labágka jeen jegata. ⁴⁴ Nunikam amina yatsum kajegtamka nuna sakapai, nuwi níijai pujusta. ⁴⁵ Ame atankim kajegtamka nuna tsagkugmatai, duwi wi chichaman akuptuktatjame, dutikamtai nunú dekaam wakitkim taamnum. ¡Dakitajai mina uchig maaninak mai jaka megkaekai! tusan”, tau.

⁴⁶ Nuna tii idayak, Rebeca Isaakan chichajak:

“Hitita nuwa, Esaún nuwe aina nuna pegkegchaujin shiig aneasan pujumainchau, jamain dekapeajai. Tuja juju hitita nuwa aidau Canaágnum pujuina juninjai Jacob nuwenkuig, wika jakatjastai”, tiuwai.

28

¹ Nuna aatus Rebeca timatai, Isaac Jacopan untsuka pegkegnum yumigkig, nii umiktinjin chichajak: “¡Juju nugka Canaágka juwiya nuwajaig makichkish nuwenatin aipa! ² Dekas Padán-aram amina apachjum Betuela jeen wetá. ¡Nunikam nuwi pujusam duku umayi iwai Labágka nawanji nuwatkata! ³ Apajuí ashí senchigina nunú pegkegnum yumigtamsati, dutijamak nigki ame uchijum wegantunash shiig kuashat uyujkati. Imatikam nugka múun aidaunum batsamsagtin atinme. ⁴ Nuigtushkam Abrahaman pegkegnum yumigkiak anagkuauwa nuna amina amastí, tuja amina uchijum wegantu aidaunashkam dutiksag susati. Nuadui ii yamai juju nugkanum iina nugke ukuaku kauna batsatag juwig pujustin atinme, wagki Apajuí Abrahaman juju nugkan anagkuau asamtai”, tiuwai.

⁵ Aatus Isaac Jacopan chichajuk nugka Padán-aramnum akupkauwai. Dutikam Jacob niina dukuji umayi Labán pujamunum atushat weuwai. Labágkak arameo aents Betuelan uchiji aajakui.

Esau nuwenamu

⁶ Isaac Jacopan pegkegnum yumigkiak: Makichkish canaágnumia nuwajaig nuwenatin aipa, dekas Padán-aram weme nuwenata tusa tima, ⁷ niina apaji dukujijai tibaun umiak Jacob Padán-aramnum webaun Esau dekauwai. ⁸ Aatus Esau niina apaji canaágnumia nuwan dakitamun dekauwai. ⁹ Nuadui Abrahamama uchiji Ismael pujamunum weuwai. Nunuk nuwi jegaa, canaágnumia nuwa aidau jimajan ayakiatak, Ismaela nawanji Mahalat Nebaiotan umayi aajakua nuna nuwatkauwai.

Apajuí Jacopan Betelnum kajanum wantintukbau

¹⁰ Jacob Beershebanum pujau jiinki Harán nugkanum weuwai. ¹¹ Nunik wesa eke jegatsuk jintá etsa akaetai kanagtatus, kaya juki nuna atamjuk tepesui. ¹² Nunik kanukma kajanum, watai jigkaka najanamu nugkanum awaja juki nayaimpinum iwakbaunum, nuwi Apajuín aentsji nayaimpinmaya aidau, nugka akagag, yaki wajag ataktu nugka akagag wajaidaun wainkauwai. ¹³ Tuja apu Tuke Pujushkam niyai ayaumas wajaun wainkauwai. Nunik wajas chichajak: “iWitjai Tuke Pujuu, Apajuínuk, amina apachjum Abraham, nuigtu amina apa Isaac emematujaku aina nunuwaitjai! iJuu nugka juwi ame tepam junak amina, tuja amina uchigmin uchiji wegantu agtina nudau atinun amastatjai! ¹⁴ Dita aidauk kuashat yujakag, nugka yukukuntu dekapamainchauwa iman agtinai. Iman asag ashí nugka pampankag etsa minitaiya aatus, etsa akaetaijiya ajashkam, tsumujiya aatus, nujinmaninishkam ashí yujakagtin ainawai. Ashí aents nugkanum batsatuk aminí, nuigtu ame uchijum aidau wegantu agtina nuwishkam, pegkeg yumigkin jukiagtina. ¹⁵ Untsu wi amijaig pujajai. Nuniau asan tuwig wekaetam nuniakminish wi kuitamkattagme, dutikakun awagkin juu nugka juwi itattajame. iMakichkish wi amina anagkuajam nunak umitskek idaisashtatjai!” tiuwai.

¹⁶ Tusa Apajuí tima Jacob shintaag, anentaimas: “iDekas Tuke Pujuk juimpap pujawa, nunaigkiap wika nunak dekachmaja!” tiuwai. ¹⁷ Nuna tusa senchi ishamkauwai, nunik anentaimas: “iJuu nugka juka Apajuí etegkamu dekas shiig pegkegmai, juwi dekas Apajuí jeeg awai! iJuu dekas nayaimpin waitijiya duka awai!” tiuwai.

¹⁸ Nunik kanag tsawak kashikmas nantaki, kaya nii atamjukbaujin juki inantai apujus, aceiten juki ukatuk, juka Apajuínu atin ati, tusa ukukiuwai. ¹⁹ Nunú nugkanum aajakui yaakat Luz daagtin, nuna Jacob yapagtua Betel* adayak ukukiuwai.

²⁰ Nunú nugkanum Jacob nii umiktinjin juna aatus tiuwai: “Apajuí mina uyuuntakug, wi yamai wetatag duwish nigki kuitamjak, wi yuwatnunash sujus, wi nugkumainnashkam sujustatui. ²¹ Tuja wi iwaku jatsuk pegkeg ataktu wakitkin mina apaju jeen taanuk, Apajuíya nuna emematkun umigkattajai. ²² Wi juna kayan awajain apusag juka, atakea duwish Apajuín jee tama atinai. Tuja Apajuíjuh, ame mina sujustinaitam nuwiyank aminu atinun diezmon tuke amasnuke atinaitjai”, tiuwai.

* 28:19 “Betel” tawa nunak hebreo chichamnumak “Apajuí jee” taku tawai.

29

Jacob yaakat Harán pujusbau

¹ Jacob Betelnum pujau ukuki, etsa minitaiya nuni weuwai. ² Nunik wesa yumigmat taimunum ayaumas kampatum aents uwigjintin aidau, uwig nuwiyen yumin umin asagmatai, maki makichik ditá uwigji aidaun ijumag ayamainak batsatun wainkauwai. Nunú yumigmatak kaya múuntai dukukbau aajakui. ³ Tuja nuwi ashí uwig aidau tuwakmatai, uwijan kuitamin aidau nuna kayan ujakag yumin shikik dita uwigjin aajag, nuadui ataktu kaya juki dukukag ukujaku ainawai. ⁴ Nunú uwija kuitamin aidau nuwi batsatun Jacob wainak iniak:

“¿Mina kumpag aidauh, atumesh tuwiya ainagme?” tau. Tama dita ainak:

“Jutiik yaakat Harágnunia ainaji”, tuidau.

⁵ Tiagtai Jacob ataktu ditan iniak:

“¿Atumesh Labán Nacoran uchijiya dusha wainchaukujum?” tau.

Tama nii ayaak:

“Ehe wainnuji”, tuidau.

⁶ Tusa tiagtai Jacob ataktu iniak:

“¿Niish pegkejak puja?” tau.

Tama uwija kuitamin aidau:

“Ehe, Labágkak pegkeg pujawai. Nijah diisia, juwi Raquel niina nawanji uwijan yajuak minawai”, tiajui.

⁷ Tiagtai Jacob chichaak:

“Etsa atushat awa nuniaigkik uwajak chimpia epenik ukumaitsui. ¿Wagka yumi aakjum duwi yajuakjum ataktu chijichin egakag yuwatnume tatsugme?” tau.

⁸ Tama dita chichainak:

“Atsa dutikmaitsuji. Eke dakaji ashí uwig tuwakmatai, nuna kuitamin aidaushkam kaunantai, duwi yumigmat kaya múuntai dukukmawa nunú ijuntuja shitaki ekeka, uwig yumi aaka nuadui shiyaktatji”, tuidau.

⁹ Aatus Jacob ditajai chichaak ijunai, Raquel niina apaji uwigji aidaun kuitamjin asa, uwijan saas tantauwai. ¹⁰ Nunik tatatman wainmawaik, Jacob yumigmatan jegantun, kaya múun apujtuam aun, shitaki eketuk, nigki yumi shikijuk niina dukuji umayi tagkujin aakui. ¹¹ Nuna dutika Jacob Raquelan jegantun niina yapiin kugkuas kumpama shiig aneamunum buutiuiwai. ¹² Tuja Jacob chichaak: “Wika Rebeca uchiji Labágka awegaitjai”, tusa Raquelan ujakui. Tusa ujakam, Raquel tupikaki weuwai niina jeen apajin ujaktatus.

¹³ Nuna Labán antuk, niina umayi Rebecan uchiji asantai, tupikatki jiin-tukiuiwai kumpamatatus, nunik igkug pagkuk yapinum kugkuas kumpama duwi niina jeen jukiuiwai. Dutikam Jacob niina diichjin ashí nii wajukaya tupikaki wekaewa nunak betek ujakui. ¹⁴ Dutika ashí ujakam Labán niina chichajak:

“Amek dekas minak shiig pataajuitme”, tiuwai.

Jacob Raquelan Leajai jukitatus takasbau

Jacob makichik nantu Labágkai pujusui. ¹⁵ Nunik pujusmatai Labán Jacopan chichajak:

“Amek mina pataag akumesh, tikima wainkamek takagtuk pujumaitsume. ¿Wajupa akigkati tusamea wakegame? nunú tujutta”, tiuwai.

¹⁶ Tuja Labágka nawanjig jimag aajakui: iwai daajig Lea aajakui, untsu ekeu daaji Raquel aajakui. ¹⁷ Leak imanikag shigmachu aajakui, untsu Raquel ashí niina iyashijai shigmauch aajakui. ¹⁸ Jacob Raquelan senchi wakejuku asa, chichaak:

“Wika amina nawanjum ekeuwa nuna jukitag tau asan, takagsatjame siete mijadai”, tiuwai.

¹⁹ Tusa tutai Labán niina ayaak:

“Tikich aentsun sumainaitag nuna dekas amina amastajai. Amesh jutijai pujustin ata”, tiuwai.

²⁰ Tusa tima Jacob Raquelan jukitag tau asa siete mijan takasui. Tujash imaan mijan takakush niig Raquelan senchi wakegau asa, ujumchik tsawanta nunin diisui.

²¹ Nuna mijanan ejeyi Jacob Labágkan chichajak:

“Yamai nawanjum sujusta, nuwatkatjai! Wi niina jukitasan imaan mijan takastajai tibaunak betek ejejai”, tiuwai. ²² Tusa tima Labán ayu tusa, ashí aents nuwiya aidaun ipauwai nawanji aishinbaunum jüstamatag tusa. ²³ Tujash Labágkak kashi niina nawanji Lean juki ejetiuwai. Dutikam Jacob juki niijai kanajui. ²⁴ Dutika nuigtushkam niina inataiji aidaun makichik Zilpá daagtinun Lean susauwai niina yaigtinun.

²⁵ Nunik Jacob kanag tsawak, wainkauwai Leajai kanagbaun. Nuadui kajeka Labágkan chichajak:

“¿Wagka minash jutijame? ¿Wi Raquelan jukitag tau asan amina takagsachmakjam? Dutikamu ayatkumesh ¿Wagka minash tsanujaume?” tiuwai.

²⁶ Tusa tama Labán ayaak:

“Juwia aidaulik iina nawanji iwai aishintsaignik ekeuwa duka sujuchu ainaji. ²⁷ Kame ii nuwenku tuke nunitaiya nunú makichik semana ejeta. Nunikamin ame siete mijan nuigtushkam takastajai takuminig, Raquelnashkam amastajai”, tiuwai.

²⁸ Tusa tama Jacob ayu tusa makichik semanan ejeyuwai. Nunikmatai Labán Raquelnashkam susauwai. ²⁹ Dutika nawanji Raquelan sujuk, nii inagtinun nuwa Bilhá daagtinun susauwai, niina yaigtinun. ³⁰ Aatus Jacob Raquelan nuwatkauwai. Nunik niina ima senchi, Lean nagkesau aneau. Nunik pujus nuigtushkam siete mijan Raquel jukimunum Labágkan takajak pujusui.

Jacopan uchiji aidau

³¹ Jacob Lean imatikas aneachun Tuke Pujuu wainkauwai. Nuadui Leanak Apajuí uchi uchigbau awajsauwai, untsu Raquelan uchigmachu ema apusauwai. ³² Tuja Lea ejajjuk aishmagkun uchigmakui. Dutika Rubén* adaikauwai, wagki nuna uchigmak chichaak:

“Wi wake besemag pujamun Apajuí waitkau asa wait anenjuje. Nuadui yamaik mina aishjuk anentatui”, tiuwai.

³³ Nunik pujus ataktushkam patasag uchigmakui, dutika adaikauwai Simeón.† Nuna uchigmak chichaak:

“Tuke Pujuu mina dakitjuinamun dekau asa, minak tikich uchinash sujuse”, tiuwai.

* **29:32** “Rubén” tawa duka hebreo chichamnumak “wainkamu” taku tawai. † **29:33** “Simeón” tawa duka hebreo chichamnumak “antugkamu” taku tawai.

34 Tuja nuigtushkam ejapjuk uchigmakui, dutika adaikauwai Levi.† Nunak:

“Yamaik mina aishjuk wijai ijunag pujuttawai, wagki kampakum uchin uchigmatkag duwi”, taku tiuwai.

35 Nuigtushkam ipak usumta nuna ejapjuk uchigmakui, dutika adaikauwai Judá.‡ Nuna uchigmak chichaak:

“Yamaik Tuke Pujuum ememattatjai”, taku tiuwai. Tuja Leak nunák uchigmak nagkankauwai.

30

1 Raquel Jacopa uchijin uchigmatchau asa, niina kai Lea uchigmatu asamtai kajejujakui, nuadui niina aishin chichajak:

“Minash uchi sujusta, sujachkuminig jakattajai”, tiuwai.

2 Tusa tama Jacob Raquelan kajejuk chichajak:

“¿Wikaitag Apajuin? Apajuí aminak uchinak amatsui”, tiuwai.

3 Tusa tama nii ayaak:

“Nijah, untsu mina inakeg Bilhá nuwatkata; dutikawamin nii uchigmak-matai, nuna wi uchigmakmawa dutikan uchijimatjai”, tiuwai.

4 Tusa Raquel Jacopan niina inake Bilhájai nuweauwai, ikaa nuwe atinun. Dutikam Jacob Bilhán nuwatak, 5 pujus ejapmitkakui, dutikam pujus Jacopa uchijin uchigmakui. 6 Nunikmatai Raquel chichaak: “Apajuín wi segamag nuna antugtuk pegkegchau takachbaun diigtus juna uchin midau atinun sujuse. Nuadui juju uchi daajig Dan atatuí”, tiuwai.

7 Tuja ataktushkam Bilhá ejapjuk jimaja juna Jacopan uchigmatkauwai.

8 Nunikmatai Raquel chichaak: “Mina kaijun depetkatag tusan maa maaniakuan yamaik depetkajai, nuadui juju uchik Neftalí atatuí”, tiuwai.

9 Tuja Leashkam uchin uchigbauwaitak, uchigmamainchau dekapeak, niina inake Zilpán Jacopan susauwai, niina ikaa nuwe atinun. 10 Dutikam pujus Zilpáshkam ejapjuk Jacopan uchigmatkauwai. 11 Nunikmatai Lea chichaak:

“¡Yajau jukichjai! Nuadui juju uchi daajig Gad atatuí”, tiuwai.

12 Nuigtushkam tikichin uchin Jacopan uchigmatkauwai. 13 Nunik uchigmakmatai Lea chichaak:

“¡Chah, shiig anejai! Yamaik tikich nuwa aidau chichagtuinakush, Leak shiig aneas pujawai tujutiagtinaí. Nuadui juju uchi daajig Asher* atatuí”, tiuwai.

14 Tsawan trigo juutai jegamunum, makichik tsawantai Rubén ikam weuwai, nunik nuwi wekagas yujág mandrágora tutain wainak juuka niina dukuji Lean itajuauwai. Nuna Raquel wainak Lean chichajak:

“Minash wait aneasum uchijum mandrágoran juuka itagtama nunú ajampusta”, tiuwai. 15 Tusa tama Lea ayaak:

“Ame mina aishjuk atanjukmayum duke nagkanmainchawk, ¡yamaish mina uchig yujág mandrágoran juuka itaa dusha atanjuktag tame!” tau. Tama Raquel ayaak:

“Kame amina uchijum yujág mandrágoran juuka itaa anú minash sujusta, juju kashia duwi amesh Jacobjai kanagminum”, tiuwai.

† 29:34 “Levi” tawa duka hebreo chichamnumak “wijai pujuttawai” tawai. § 29:35 “Judá” tawa duka hebreo chichamnumak “emematut” taku tawai. * 30:13 “Asher” tawa nunak hebreo chichamnumak “dakunkut” taku tawai.

¹⁶ Tusa tima, nunú kashia duwi Jacob ikam weu wakitki minittaman, Lea jiintuki igkug chichajak:

“Yamaik amek wijai kanagtatme, wagki mina uchig mandrágoran juuka itagtuamtai nujai sumakjame”, tiuwai.

Tusa tima Jacob Leajai kanajui. ¹⁷ Nunik nii Apajuí segamunak betek antugkamu asa ejapjuk, cinco uchua nuna uchigmakui. ¹⁸ Nuna uchigmak Lea chichaak: “Juju uchua juna daajig Isacar† atatui, wagki wi mina aishjun mina inakjujai nuweamag, duwi minak Apajuí juju uchin sujuse”, taku tiuwai.

¹⁹ Tuja nuigtushkam Lea Jacopan seis uchua nuna uchigmatkauwai.

²⁰ Nunik chichaak:

“Junak Apajuí minak shiig anenjus wainkauch sujuse. Nuadui yamai mina aishjuk ima shiig eme anenjittawai, wagki seis uchin uchigmatkag duwi. Nuadui juju uchua juka Sabulón‡ atatui”, tiuwai.

²¹ Duwi pujus Lea inagnamun makichik nuwauchin uchigmakui, dutika Dina adaikauwai.

²² Tujash Apajuík Raquelnashkam kajimatki idaisachui, nuadui nii segamunashkam antugkau asa uchin susauwai. ²³ Dutikam uchigmachu pujau uchigmak chichaak:

“Uchi uchigmachkun datsaama wekaenuweg nunak datsannak Apajuí emegkatjuke. ²⁴ Ataktush Tuke Pujauk tikich uchinash sujumainapi tajai”, tau. Nuadui uchi daajin José§ adaikauwai.

Labán Jacopan tsanugbau

²⁵ Raquel Josén uchigmakmatai pujus. Jacob Labágkan chichajak:

“Minash wait aneasam agkan idaitusta, mina nugkajui wakitkitjai.

²⁶ Mina uchig aidau, tuja duwag aidaushkam sujusta, wika ditan jukitag tau asan amina takagsamjame, nuadui minash agkan idaitusta, wakitkitjai. Amek shiig dekame, wi wajuk amina takagsajame duka”, tiuwai.

²⁷ Tusa tama Labán ayaak:

“Wait aneasam wetsuk jutijaig pujusta. Ame pujau asamin, Tuke Pujuu minash pegkegnun yainkae, minak wika makichik aents anentaimas dekamin tujutmatai dekjai”, tau. ²⁸ Tusa nuigtu chichajak: “Untsu tujutta wajupa akigkati tusamea wakegame, nuna akiktajame”, tiuwai.

²⁹ Tusa tama Jacob niina chichajak:

“Wi wajuk amina takagsajame, tuja nuigtush wajuk amina kuintinjunash kuitamjukjame dushakam amek shiig dekame. ³⁰ Tuja wi juwi tatsaigkik tagkugmek kuashtachu ayi, tujash wi taa pujusa kuitamam kuashat tagkujum kawenjamkae. Tuke Pujuu aminak yaimpake; tujash ¿wajutiya wisha mina uchigdau agtinnash takastatja?” tiuwai.

³¹ Tutai nii ayaak:

“¿Tujash wajupa akigkati tusamea wakegame?” tusa ataktu awagki iniasui. Tama nii ayaak:

“Minak makichkish akigkaipa. Untsu wi amina titatjam nunú ayu takuminig, wisha amina uwigjumin kuitamjuktatjame. ³² Dutikatin asan wi ame takagsamunum akigmainaitam nuna dekasa amina uwigjumin batsata nuwi yamai wenu uwig tsakat aidaun, chivo tsakat aidaujui

† **30:18** “Isacar” tawa nunak hebreo chichamnumak “wainkauch susamu” taku tawai. ‡ **30:20**

“Sabulón” tawa duka hebreo chichamnumak “wainkauch suwamu, eme anentamu” taku tawai.

§ **30:24** “José” tawa duka hebreo chichamnumak “Apajuí aan kuashat susatin” taku tawai.

bukusea aidaun, tuja bukusea apujtugbau aidaunashkam, nuigtu utsak aidaujui ashí ijumjan jukitjai. ³³ Tuja wi nuna uwig tsakat bukusea aidaun, nuigtu chivo tsakat utsak aidaujui ijumjamtai, nunú diisam dekaskeapi tujuttatme, untsu nunú diikman, nuninchaukesh pachitkau wainkamek kasagtukeapi tujutta”, tiuwai.

³⁴ Tusa tama Labán: “Ayu, ame tame duka nunisag ati”, tiuwai. ³⁵ Tujash nunú tsawantaik Labán chivo painch aidaun, utsak aidaujui, nuigtushkam chivo nuwa utsak aidaunak, tuja bukusea apujtugbau aidaujui, nuigtu uwig bukusea aidaun aatus yajuak ijumag niina uchiji aidaun tinamkauwai kuitamkatajum, tusa.

³⁶ Nuna dutika idayak, niina uchiji aidaujui, Jacopak eke dekatsaig, ashí nuna yajuakag uumak jiinkiag, kampatum tsawan atushat shiyakajui.

Nuna Labágkak dutikak wekagai, Jacopak tikich uwig Labágdau aidaun kuitamak pujau. ³⁷ Nunik pujus numi álamo, almendro, castaño kanawen tsupig yajuak, saepenak ashí pakatsuk, ayatak piipichin tsentsaja yajutkauwai painch wajasti tusa. ³⁸⁻³⁹ Dutika umika kuntinun batsamtain nuwi yumi amutaiji aunum nuna ijus ajigkui. Dutikamunum nuwi entsamjunidau asagmatai, uchiji painch aidaui, bukusea apujtugbau aidaujui, nuigtu utsak aidaui aatus akiinaidau. ⁴⁰ Nunik Labágka uwigji petsainamu utsak aidaui, bukusea aidaui aatus akiinaidauak Jacob yajuak niinu atinun akanak ijumjauwai. Dutika yajuak niishkam kuashat kuntinjintin wajasui. Nuadui Labágdauash akanak ijumag, niinunashkam akanak ijumjauwai. ⁴¹ Dutika nuigtushkam uwig dekas duwejam aidaui entsamjuniagtaik, nunú entsamjuninak wainkatnume tusa Jacob payagkun juki, uwig aidaui yumi umuinak ijuntaijin aepjukajui.

⁴² Tujash uwig watsaju minitaik, payagnak aepjukachauwai. Nuadui kuntin watsaku aidaui Labágdau aajaku ainawai, untsu kuntin duwejam aidaui Jacobdau aajaku ainawai. ⁴³ Dutika yaju yajumkawa Jacopak shiig wiakuch wajasui. Niig kuashat uwigjintin, tuja inake aishmag aidaush, nuwa aidaush shiig kuashat, tuja camellojishkam imanisag, burrojishkam ;shiig kuashat aajakui!

31

Jacob Labágkai pujau tupikakbau

¹ Labágka uchiji aidaui Jacopan pachis augmatuinak: “Jacopak, iina apajinu aajaku nuna ashí yajuaku asa, imanik shiig wiakuch wajase” tusa chichaidaun dekauwai. ² Tuja Jacobshakam Labán niina yaunchuk shiig anentujakua nunak, imanis shiig awagmachbaun wainkauwai. ³ Nuadui Tuke Pujuu Jacopan chichajak: “Amina apa nugken pataim aidaui batsata nuwi wakitkita, wi aminak uyuntsattajame”, tiuwai.

⁴ Tusa tima Jacob niina inaken awemauwai Raquel, Leajai ujakam itagtuatajum, wi uwija kuitamkun pujag juwi kaunatnume tusa. ⁵ Tusa timatai ujakam, nuwe aidaui kaunamtai chichajak:

“Atumin apa yaunchuk mina shiig anenjuya nuniachun wainjai; tujash mina apaju Apajujiya nunú tuke minak uyuntawai. ⁶ Atumek shiig deka-jume, wi atumi apapun shiig kuitamsan pegkejan takagsauwaitag duka.

⁷ Imatika takagmaitak, nii minak imaan akiktajame tujutbaunak tsanujug, nuna yapajia midau amainnak sujatsui. Tujash nii dutijutaishkam, Apajujiya duka minak tukek idaituschae, Labán pegkegchau awajkai tusa.

⁸ Nuadui Labán chichaak: aminak kuntin bukusea apujtugbau aidaun

petsagtata nuna akiktajame tusa tujuttaik, ashí kuntin nuwa aidauk imanisag bukusea apujtugbaun petsagmayi; nuniagtai ataktu yapajia chichaak: yamaik dekas kuntin painchin petsagtata nuna akiktajame tusa tujuttaishkam imanisag petsagmayi. ⁹ Nunak Apajuí Labágka kuntinjin antatug mina sujustatus dutikmayi.

¹⁰ “Makichik tsawantai uwig entsamjunit jegamunum, kajanum waink- abiajai kuntin aishmag painch aidau, bukusea apujtugbau aidau, nuigtu utsak aidau aatus uwig nuwa aidau entsamjuidaun. ¹¹ Nuna dii wajai, Apajuí ángel tumain* kajanum mina daajun adayak untsugkabi, tujutkui wi ayaakun: ‘Juwi pujajai’ tibajjai.

¹² “Tusan tai nunú ángel chichagtak: ‘Yamai juu shiig diista, ashí kuntin aishmag nuwan entsamjuina duka bukusea apujtugbau aidau, painch aidau, nuigtu utsak aidau aatsam wainkattame. Wi junak amina Labán shiig akigmatsu nuna wainu asan jutikajai’, tujutmajai. Tusa nuigtu chichagtak: ¹³ ‘Witjai Apajuí, amina Betelnun wantintukmajam nunú, nuwi ame kaya jukim juka Apajuínu ati tusa timayume. Dutikakum ame umiktin aidaushkam anagtuabiume. ¡Wamkesam juju nugka juka ukuakum ame akiinamugmia nuwi wakitkita!’ tusa tujutmae”, tiuwai Jacob.

¹⁴ Tusa tutai Raquel Leajai ayaak:

“Tik iina apaji jakush niinu aina aunakesh juju atumdau ati tusa ukugtamkimtaig jukishtin ainaji. ¹⁵ Iina apajig tikich nugkanmaya nuwa amaina anin yamaik anenjamji. ¡Iina sujupakush, waji akik sujutia dutika sujupaku asa, ame takagsam niig pujawai! ¹⁶ Nuadui dekas Apajuí ashí iina apajinun yajutuk amina amasa auk iinu ainawai, tuja iina uchijinu aidaujui, nuadui amina Apajuí wajinjutpame duka dutiksamek ashí umikta”, tiajai.

Jacob Padán-aram pujau webau

¹⁷⁻¹⁸ Aatus nuwe aidau tiagmatai, duwi Jacob umintsauwai, niina apaji Isaac Canaán pujujukua nuwi wakitkitatus. Nunik weak niina uchiji aidaun, nuwe aidaujui, camellonum pekainiuwai, tuja wajiji aidaunashkam ashí jukiuiwai, nunik Padán-aram pujusa takaku kuntin jukimu aidaun yajuak jintanum amanag ashí umikui wetatus. ¹⁹ Tuja Labágkak tikich yantamnum uwija ujen tsupijatatus weu ai, Raquel niina apaji apajuímtajiji dakumka najanamu atatman kasamak juki ukukiuiwai. ²⁰ Aatus Jacopak Labán amorreo aents aajakua nuna wika tupikatsjai tusa tsanug ukukiuiwai. ²¹ Nunik weak ashí niina wajiji aidaunak yajuak tupikakuwai. Nunik shiig wamak, namak Eufratesan nagkaiki muja Galaad tutaya nuni weuwei.

Labán Jacopan pataetukbau

²² Nunik Jacob tupikaki kampakum tsawan wegai Labán dekauwai. ²³ Nunik niina patayi aidaun ipaa pataetuk wea weakua siete tsawanta duwi muja Galaadnum batsamtatman amaigkauwai. ²⁴ Tujash nunú kashia duwi Apajuí kajanum Labán arameo aentsua nuna wantin- tuk chichajak: “¡Antukta nijah, Jacob augkumesh pegkegnum ausata, wainkam pegkegchauk chichagkaipa!” tusa tiuwai. ²⁵ Tusa tima wea weakua muja Galaadnum aakan aakmajag batsamtatman amaigkauwai.

* **31:11** “Apajuí ángel tumain” tawa duka apach chichamnum agagbau “ángel del Señor” tawa nunuwei. Tuja duka tikich ángelan tatsui, Apajuí nigki tumamiatak tawai.

Dutika niishkam nuanuig ashí niina patayi aidaujai aakan aakmakag pujusajui.

²⁶ Nunik nuwi Labán Jacopan chichajak:

“¿Wagka amesh jusha juniame? ¿Wagka minash tsanujaume? ¡Amek mina nawantug aidauk nuwa maaniaku bisatkama yajumtaya numamtuk awajkaume! ²⁷ ¿Wagka tsanujamesh uumjuktamesh mina aujtuskesh tupiakiume? Wi dekauwaitkunuk, shiig anentsan kantamjugin tampujan arpajai awatuinakui, shiig jiistamjuan akupmain awajkashjamek. ²⁸ Amek minak niish nawanjinash, niina tijaji aidaujai shiig kugkuas kumpama akupkati tusamesh dakagsachume. ¡Duka nunitsuk aents anentainkachu wajukmaina numamtuk wajakume! ²⁹ Nuadui wika atumnak pegkegchau awagmamaainaitkun, amina apa Apajujiya nunú kajanum chichagtak: ‘Jacob augkumesh shiig ausata, wainkam pegkegchau chichagkaipa’ tujutma nuadui pegkegnum augjame. ³⁰ Amek yaunchuk nagkamsam amina apa jeen wakitkitasam wakemaum duwi miniume, tujash nunika minakmesh ¿wagka mina apajuimtaig aidash kasagtukmesh miniume?’ tau.

³¹ Tusa tama Jacob Labágkan ayaak:

“Wika amina ujamainnash, namputchawame niina nawanjin japiki emetjutuawai tusan ishamkagtakun ujakchamjame. ³² Untsu amina apajuimtaijum aidau kasamkaume tujutam dusha ya takakuk wainkatam, dutikawaminig duka, ¡mantamnati! Iina patayi aidau ijunas waipainai, wisha wajina aminunash jujukjame nunú egakam jukita”, tiuwai. Nunak Jacopak Raquel niina apaji apajuimtaiji kasagkamunak dekachu asa tiuwai.

³³ Aatus Jacob timatai, Labán Jacopa aakji carpa aakmakbaunum waya egaka, nuigtu Lea aakjin waya egaka, tuja jimag nuwa inak aidau aakjinchakam ashí egakui. Tujash imatika egakush wainkachui. Nunik ashí egaka wainkacha Lea aakjin pujau jinki wayauwai Raquela aakjin.

³⁴ Nunik apaji waitai, Raquel dakumka najanamu jukimujin camello tuntupen patai nuwi waka nuna ekeemtuk ekemsauwai. Nunik eketai Labágkak ashí egakui, tujash makichkish wainkachui. ³⁵ Nuna egak wegagun Raquel chichajak:

“Apawah, kajekaipa, wi juwi eketag nuna akaikin kumpamtsujam nunak, mina tsawanjui jau asan aniajai”, tiuwai.

Tuja Labágkak imatika egakushkam niina apajuimtaijinak wainkachui.

³⁶ Nunikmatai Jacob kajeka niina chichajak:

“¿Wajina wisha pegkegchaunash dutikaja? ¿Tuna wisha pegkegchaunash takamsamtaiya imanikmesh wakeketash pataetugkaume? ³⁷ Ame mina aakjui wayam mina wajiig aidau ashí diisum duwish, ¿amina wajijum aidau jukimush tuu wainkaume? ¡Nunú wainkamek amina pataim ijuna juna emtin juwi itantam aepsata, tuja mina pataag ijuna nuna emtinishkam! Nuna wainak dita titinme yaki waitjawa, ameash waitjam, atsa wiyash waitjag nuna.

³⁸ “Wi amina veinte mijadai takagsamjam nuaduik, amina uwigjum aidauk tuja cabrajum aidaukesh makichkish uchijinak pegkegchaun petsakag ajapachui; tuja wikish makichik uwig tsakatchinakesh maanuk aminunak yuwachuitjai. ³⁹ Nuigtushkam makichik kuntinjunakesh ikamyawa maamunak itajuachuitjame, tuja kuntin megkaekuish, nunak wi akiyajame; tuja tsawaijkish nuniachkush kashikesh kuntinun kasamk-agmataish, mina segatkumin wi akiyajame. ⁴⁰ Tsawai takaknush et-sayai jamain dekapijai; tuja kashi takaknushkam tsetsekai waitiajai,

jimaniakun shiig aneasa kanumainchau dekapiajai! ⁴¹ Imanikan waitiaknush veinte mijan amina jemin takakun pujusuitag duika ¿mina jutik akijam? Amina nawanjum jimaja juna jukitasan takagsawaitjame catorce mijadai; tuja amina kuntinjamin kuitamkunchakam seis mijan takagsawaitjame. Imaniaish amek imaan akiktagme tusa anagtuawaitkum betek akigtsayume. ⁴² Abrahama Apajuíjin, mina apag Isaac emematia nunú mina yainchakuig, amek minak dekaw takasbaunmak makichkish akigtsuk akupjumain awajtukume. Tujash wi senchi takaku wake besemag pujamun Apajuí waitjuku asa, aminak nii kajanum jiyapakume”, tiuwai.

Jacob Labágjai chicham umikbau

⁴³ Tusa tama Labán Jacopan ayaak:

“Juju jimag nuwa aina juka mina nawantug ainawai; tuja uchi aina jushakam mina tijagkig ainawai; tuja uwig aina jushakam midau ainawai, nuadui ¿ame ashí juju wainam juka midau ainawai! Tujash ¿wisha mina nawantug ainakuish, nuigtu mina tijagkig ainakuish itugkatjaki? wika emetmaitsujai. ⁴⁴ Nuadui amesh taata, núnikamin juwi amejai chicham umikmi, ii umigdaikatna nunú”, tiuwai.

⁴⁵ Tusa timatai Jacob kaya juki inantai apujus, ⁴⁶ niina patayi aidaun chichajak: “¿Kaya juuktajum!” tusa tima kaya juukag ijumag tsakapiajui, dutikawag nunú kaya ijumja tsakapimunum ayaumas pujusag dita chicham umikbau iwainainak yutain yuwawajui. ⁴⁷ Nunik nagkanainak Labán nunú nugka daajin adaikauwai niina chichamen “Jegar Sahadutá”, tuja Jacobshakam niina chichamen adaikauwai “Galaad”. Nunak kaya ijumjamu taku tiuwai. ⁴⁸ Nuna dutika inagnakag Labán chichaak:

“Ti yamai chicham umikag juka juju kaya ijumjamua nunú wainku tuke aneasaiki atinaitji”, tiuwai. Nuna taku nunú nugkanak Galaad adaikau ainawai. ⁴⁹ Tusa nuigtushkam “Mispá” ati tiuwai, wagki nunak Labán chichaak:

“ ‘Apajuí iina mai atushat pujajinchakam diigmaku ati’ taku tiuwai.

⁵⁰ Tuja ame mina nawantug shiig kuitamtsuk waitkamunash, nuniachkumesh dita ayakiatkum tikich nuwa aidaujai nuwenmin amina waipak etsegtugmamain atsutaish, ima Apajuíya duke nii waipau asa ame wajuk pujuttame nunak ashí nigki dekaatin ati”, tiuwai.

⁵¹ Nuna tusa nuigtushkam ataktu awena Jacopan chichajak:

“Antukta nijah, juju kaya ijumjamu aina nunú, tuja tikichin kayan inantain apusag juju ⁵² nagkaikimek amesh wayashtinaitme, tuja wishakam antsanuk juna nagkaikinuk wayashtinaitjai, nunú nuniakuik waitkanimain asamtai. ⁵³ Amina apachjum Abrahaman Apajuíjiya nunú, nuigtu mina apachug Nacorán Apajuíjiya nunú ii umikag nunak diistin atinme”, tiuwai. Tusa Labán timatai, Jacob niina apaji Isaac Apajuín emematujakua nuna pachis nii umiktinjin niishkam dutiksag: “Aatus ati”, tiuwai. ⁵⁴ Nuna umika, nuadui, Jacob kuntinun maa nunú mujanum nuna apeak Apajuín emematuiwai. Dutika nuna nejen ashí apeachu asa patayi aidaun ipaa ashí ijuntujag yuwawajui, nunikag nunú mujanmak kajigkajui.

⁵⁵ Nunik kajigkag tsawamunum, Labán kashikmas nantaki, niina nawanji aidaun tijaji aidaujai yapinum kugkuas kumpamak, pegkegnum yumigkig nuadui niina nugken wakitkiuwai.

1 Nunik Labán wakitkimtai Jacob nuwi nagkaemaki wegau. Nunik wetatman Apajuín aentsji ángel aidau jiintujajui niina igkugtatus. 2 Nunik minidaun Jacob wainak chichaak: “Juka Apajuín suntaji ainawai”, tiuwai. Nuadui nunú nugka daajin adaikauwai Mahanaim.*

3 Dutika ukuak nuwi juwaki wesa niina yachi Esaú nugka Seír tutai Edom nugkanum awa nuwi pujuttaman, yatsum minawai tusajum ujatjuktajum tusa, niina aentsji chichama etsejin aidaun ishitkauwai. 4 Dutika ishimak aatus akatmamjauwai:

“Wika nii tabaun umiktasan, kuashat tsawan Labágkai pujaun ukukin minajai. 5 Tuja baka aidau, burro aidau, uwig aidau, nuigtu iinak aishmag aidau, nuwa aidaushkam kuashat ajutui, juna susatjai dutika ai mina apug wait anenjugmatai, nijai kumpamdayatjai tajai”, tiuwai.

6 Tusa akatja ishiakam chichama etsejin aidaushkam shimutuk Esaún ujaka ukuinak, waketug kaunawag, Jacopan chichajuinak: “Amina yatsum Esaúk ame akatmamjamum duka imatiksaik ujakmaji, dutika ujaka ajin, ayu igkugtajai tusa, cuatrocientos aentsun yajuak minitjamae”, tajui.

7 Tusa ujakam Jacob senchi ishamkauwai, nunik kuashat anentaimu. Nuniak aents nijai yujaidaun jimajan akanak ijumjauwai, dutikak uwig aidaun, baka aidaun, camello aidaunashkam dutiksag akanag ijumjauwai.

8 Nunak nii anentaimas: “Yaja aneas Esaú jetepataish, juju aents aidau akanka ijumjamua nunú maaniaimpap, tikich aina au tupikakiag uwe-main ainawa”, tusa dutikauwai.

9 Nuna dutika Apajuín segaak:

“Tuke Pujuuwah, mina apachug Abrahaman, tuja mina apag Isaakan Apajuíiyah, ame mina chichagtakum, amina nugkemin pataim batsata nuwi wakitkita, wi yaigtatjame tujutmaume. 10 Wika tikima wainkauch aig, ame minak wait anenjau asam yainkaume. Yaunchkek wika juju namak Jordágka junak ima mina ushujutaignak takusan katigkabajai, tujash yamaik ame yaintsamin kuashat aents aidaush ajutui, tuja kuntin aidaushkam imanisag ajutui, nuadui kuashat asamtai, jimajan akanak ijumjajai. 11 ¡Wait aneasam agkanmitkajuata mina yatsug Esaú mantu-awai! Wika ishamajai, mina jetetak ashí mina duwag aidaun, mina uchig aidaujai amutkai tusan, tajame. 12 Ame chichaakum, wi aminak kuita-mkattagme, dutikakun amina uchijum wegantunak nayantsa kamatkaji dekapamainchauwa iman awagsatnaitjai tujutmayume”, tiuwai.

13 Jacob nuna aatus Apajuín segaa kiitai, nuwig tepes kanajui, nunik tsawag, niina tagkuji aidaunmayan akanjauwai yachi Esaú susatnun.

14 Dutikak doscientos chivo nuwa aidaun, veinte chivo aishmag aidaun, doscientos uwijan, nuigtu veinte uwig tsakat aidaun, 15 treinta camello nuwa yama petsaku aidaun ashí uchijijai, cuarenta baka, diez toro aidaun, veinte burro nuwa aidaun, nuigtu diez burro aishmag aidaun aatus akanag ijumjauwai.

16 Dutika duwi niina inake aidaun, maki makichik kuntin akanjamun tinamkauwai, dutika chichajak:

“Atum emkatajum, tujash betek ijutkau wetsuk, makichik kuntinun ujuikimtai, duwi tikich kuntin aidaushkam saaktajum”, tiuwai. 17 Nuna tusa aents eemak wetinun chichajak:

* 32:2 “Mahanaim” tawa nunak hebreo chichamnumak “jimag aakmaja batsamsamu” taku tawai. Jacopan aakji aidau, tuja Apajuí aentsji ángel aidaun aakji aatus aajakua nuna taku tawai.

“Mina yatsug Esaú amina igkumpak: ‘¿Yaita amina apugmesh? ¿Tuja tuu weakmea aniname? ¿Juju tagku yajuaka minam jusha yanau ainawa?’
 18 Tusa tujamkuig ame ayaakum:

“ ‘Apujuh Esaú, juju kuntin aina juka aminu ainawai, junak Jacob amina inakmea nunú awetugmame. Tuja niishkam iina ukujin minime’ tusam ujakta”, tiuwai. 19 Nuna tusa, tikich aidau kuntinun yajuak wedaunashkam chichajak:

“Atumshakam Esaú igkumpakuig dutiksagmek chichaktajum. 20 Tuja nuigtushkam: ‘Amina inakem Jacob iina ukujin minime’ tusajum titajum”, tiuwai. Nuna tiuwa nunak Jacob anentaimas, dekas kuntinun emtikan ishitkatjai dutikan nii kajekbaujin etsagjan, nuadui wisha niijai wainiak-tajai. Namputchawame nuna wainkash shiig anenjus jujukchaintash, tusa dutikauwai.

21 Aatus ashí emtika ishiak, nigka wetsuk niina aakjinig kanajui.

Jacob ángeljai maanikbau

22 Nunú kashia duik, Jacob nantaki, niina nuwen mai juki tuja jimag nuwa inake aajakua nunashkam mai juki, uchiji once aajakua nujai ashí yajuak namak Jaboc tawa nuna amain ikatiajui. 23 Dutikak, ashí niina wajaji aidaujai ijumag ikatiajui.

24 Nuna ashí ikatiag nigki juwak pujai, makichik aents tajuam niijai maa maaniakua tuke tsawampau; 25 nunik tsawautai nunú aents Jacopan depetmainchau dekapeak, nantagnum awati manchamitkakui. 26 Dutika chichajak:

“¡Akupjukta tsawawai!”, tau.

Tusa tama Jacob ayaak:

“¡Ame mina pegkegnum yumigtatsminigkik akupkashtatjame!” tiuwai. Tusa tama nunú aents Jacopan iniak:

27 “¿Amina daagmesh yaita?” tau. Tama:

“Wika Jacopaitjai”, tiuwai. 28 Tutai nunú aents chichajak:

“Amek yamai nagkamsamek Jacob tutaig achattame. Amina daagmek Israel atatui, wagki amek Apajuíjai maaniakmesh, tuja aentsjai maaniakmesh, depetmaku asam”, tiuwai. 29 Tusa timatai Jacob niina iniak:

“¿Amina daagmesh yaita?” tau. Tusa iniam nunú aents ayaak:

“¿Wagka mina daag dekaatasamesh wakegame?” tau.

Aatus tusa nunú aents Jacopan pegkegnum yumigjauwai. 30 Dutika ukukim, Jacob nunú nugka daajin Penuel† adaikauwai, nunak:

“Dekas Apajuínak shiig paantap wainkaja, imanun wainkanush jakach-japi iwakuap pujaja” taku tiuwai.

31 Tusa ukuak Penuelan nagkaiki wegai etsa jiiniuwei; tujash niina nantajen najaimak shutus wegau. 32 Nuadui Israel wegantu aidauk yamaya juikish baku wajakbaunum neje achitka nunak yuchau ainawai, wagki nuwi Jacopan awati manchamitkakbau asantai.

33

Jacob Esaújai igkunikag chicham epegtuniamu

1 Nunik wesa Jacob wainkauwai niina yachi Esaú cuatrocientos aentsun yajuak minittaman. Nunik wainak niina uchiji aidaun yajuak, niina

† 32:30 “Penuel” tawa nunak hebreo chichamnumak “Apajuín niime” taku tawai.

nuwe Leayai, Raquelai, nuigtu jimag nuwa inak aajakua nuwi aatus yununjauwai. ² Dutika jimag nuwa inake aidaun uchiji aidaujai emtikauwai, dutika nuna ukuujin Lean niina uchijijai awantauwai, untsu inagnamunum Lea ukujin Raquelan Joséjai awantauwai. ³ Nuna dutika ijumag ukuak nii eemak wajan, sieteya imania tikishmag tsuntsuma nijayin nugka antig waja wakakua yachi midaun jegantauwai.

⁴ Tujash Esaú tupikaki yachin igkug kuntujen achik kajut pagkuk kugkuasui. Nunik wajasag eganijajui. ⁵ Nunik Esaú niimkama nuwa aidau uchijijai ijunun wainak Jacopan iniak:

“Jusha ¿ya ainawa?” tau.

Tutai nii ayaak:

“Aanka amina inakmin Apajuí uchin susauwa nunú ainawai”, tiuwai.

⁶ Timatai nuwa inak aidau uchijijai tikishmag tsuntsuma nijayin nugka antig pujusajui Esaún eme anentus. ⁷ Nunikagmatai Leashkam niina uchiji aidaujai Esaún jegantag ditashkam nunisag pujusajui. Nunú nuninai inagnamunum José Raqueljai jeganta ditashkam nunisag pujusajui. ⁸ Nuniagtai Esaú Jacopan iniak:

“¿Wajuk anentaimesamea juju tagku aidaush emtikamesh ishiakmaume, dutikamunash wisha wai wainkawanush minaja?” tau.

Tutai nii ayaak:

“Juju aina juna juwak tsagkugtugti tusan ishitkamjame”, tiuwai.

⁹ Tama Esaú chichaak: “¡Atsa yatsuju, minak kuashat tagkuk ajutui, aminu aina duka aantsag aminuk agtinme, sujusaipa!” tiuwai.

¹⁰ Tutai Jacob ayaak:

“¡Atsa, tutsuk wait aneamam yukita. Wika ame shiig aneasa jukiuu asamin, Apajuí wainka anentaimeina iman dekapeajai! ¹¹ Nuniau asamtai, wait aneamam wi ikautuajam juka yukita, Apajuí minak yaintsamtai wiakuch wajasjai, nuadui makichik atsumamukesh atsugtawai”, tiuwai.

Tusa imatjam Esaúshkam ayu tusa jukiuwai. ¹² Nuna juki Esaú Jacopan chichajak:

“Ayu wemi, wi emkatjai”, tau.

¹³ Tusa tama Jacob ayaak:

“Yatsuju mina aneetaijuh, amek shiig dekame uchi piipich aina juka kakachau ainawai, tuja nuigtush uwig aidau, baka aidau yama petsaju asag uchiji piipichin saakuaske aina nuna puyatju wajajai; wagki wí senchi wetaik makichik tsawantaik uwig aidauk ashí jinumainai. ¹⁴ Nunimain asamtai mina apujuh, amek emkata, wika diipasan mina tagkug aidaun, mina uchig aina nujai saasan mina minakuan ame pujamunum Seírnun taatjai”, tiuwai.

¹⁵ Tutai Esaú ayaak:

“Ayu dekas tame, untsu wi aentsun saakag juna akankan amina yaimpaktinun ukugkitjame”, tiuwai.

Tutai Jacob ayaak:

“¡Atsa, wait aneamam tsagkugtugta! Yamaik imanikmek puyatjutkaipa”, tiuwai. ¹⁶ Tutai ayu tusa ukuak, nunú tsawantaik Esaú Seírnun wakitkiuwai.

¹⁷ Yachi wakitkimtai Jacobshakam Seírnunmak wetsuk, nugka Sucot tawa nuwi weuwai. Nunik nuwi jegaa niina jeen jegamak, nuigtushkam kuntin

aidau aakjinashkam aakmatjauwai. Nuna dutikau asa nunú nugka daajin Sucot* adaikauwai.

¹⁸ Jacob Padán-aram pujau wakitki Canaán nugkanum jegauwai pegkeg, jamamtuchu utugchat atsaunum, nunik nuwi yaakat Siquem tawa nujai niinis pujusui. ¹⁹ Nuwi pujus Hamor Siquema apaji aajakua nuna uchiji aidau nugken cien kuichik plata najanamun akikmak sumakui. Dutika nuwi niina jeen jegamag yaaktamauwai. ²⁰ Nuwi pujus, Apajuí emematku kuntin maa patasa apeatnun altaran najanauwai. Dutika adaikauwai El-ehé-Israel. Nunak Israelan Apajuí taku tiuwai.

34

Dina pegkegchau awajkamunum ayamjaku amujatkamu

¹ Jacob Leayai akiamu Dina, makichik tsawantai niina jeen pujau nunú yaaktanmaya nuwauch aidau ijagsatatus weuwei. ² Nunittaman nunú yaaktan apuji Hamor heveo aents aajakua nuna uchiji Siquem wainak dakimaunak waitkas achika juki niina jeen awaya nuwi ikanak pegkegchau awajkauwai. ³ Dutikauwaitak senchi wakejuku asa, niina wakemitkaktatus shiig pegkegchin ausauwai. ⁴ Dutika niina apaji Hamoran chichajak: “Juju nuwan nuwatkatasan wakegajai, ame weme sumagtukta”, tiuwai.

⁵ Nuna Jacob niina nawanji Dinan Siquem pegkegchau awajkamun dekauwai. Dutika dekaayatak niina uchiji aidau tagkun kuitamainak ikam batsatu asamtai, dita kaunawagmatai chichastajai tusa pachikchauwai.

⁶ Nunik pujai, Siquema apaji Hamor Jacobjai chichastatus weuwei.

⁷ Nuniai Jacopa uchiji aidau tagkun kuitamak batsatu kaunkama, Siquem Jacopa nawanjin pegkegchau awajkae tabaun dekawajui. Nunik senchi kajekajui, wagki Israelan dushikiak Siquem makichkish nunimainchoun dutikau asamtai. ⁸ Tuja Hamor ditajai chichaak:

“Mina uchig Siquem atumi umayin senchi wakejuku; nuniau asamtai segajime, wait aneasjum umaim sujimkaigpajum mina uchigjai aishinati.

⁹ Nunik mina uchig nuwenamtaig atumesh jutii patayi waigtajum. Aatsa ii aidautish atumi nawanji aidaujai nuwenawagmi, tuja atumshakam iina nawanji aidaujai nuwenamnujum. ¹⁰ Nuniakjum atumesh jutijai batsamsatajum. Nugkak atumdau atatui, nuwi pujusjum takasjum sujuktajum, nuniakjum atumdau nugka sumaktajum”, tiuwai.

¹¹ Tusa tutai, Siquemshakam Dina apajin, niina umayi aidaujai ijunun chichajak:

“Minash wi sumamua nunú umigtuktajum, wisha atum wajig segattajum nunak imatksanuk umigkatjime. ¹² Atum wi nuwan juwakui wajupa akigkati tujutmainaitjume, nunashkam imatksanuk umiktajai, untsu nuwak idaitugsatajum wijai aishinati”, tau.

¹³ Tusa tutai Jacopan uchiji aidau Siqueman niina apaji Hamorjai, umayi pegkegchau awajtukbau asa tsanuinak, ¹⁴ juna aatus tiajui:

“Jutiik iina umayig aishmag tsupimakchou aidauk sumaitsuji, duka iniig shiig pegkegchou datsan amain asamtai. ¹⁵ Untsu atumesh jutijai betek atag takugmek, ashí aishmag aidautijum tsupimagtatum.

¹⁶ Nunikagmin duwi jutii nawanji aidau atumjaish aishinmain ainawai, tuja ii aidautishkam atumi nawanjumjaish nuwenmain ainaji. Nunikaja

* **33:17** “Sucot” tawa nunak hebreo chichamnumak “aak” “numi kanawe tsupija aakmakbau” taku tawai.

dekas atumjaish nunú wegantu aidauk yaaktamawag ijunas batsamaina nunin amainaitji. ¹⁷ Tuja atum nunú dakitakjuminig iina umayig juki yaja wetatji”, tiajui.

¹⁸ Tusa tama Hamor niina uchiji Siquemjai chichainak: “Ayu, kame duke ati” tiajui. ¹⁹ Tusa tiajam nunú datsauchik Jacopan nawanjin senchi wakejuku asa, waugtus tsupimakui. Niina apaji jenig Siquem aajakui dekas eme anentsa diitai. ²⁰ Nuna nunika niina apaji Hamorjai yaakta waitijin aents aidau ijunag chichatainum jegantag ditan chichajuinak:

²¹ “Juju aents aina juka iina kumpaji ainawai, nunin asag ditak juju nugka juwi batsamas takasa nuwiyan jukiag sujiagtatui. Dita batsamainuk nugkak shiig múuntai, tuja ii aidauti dita nawanji aidau nuwatkgatjaji, nuniajin ditashkam iina nawanji aidau nuwatkgatjaji. ²² Nuigtushkam ditajai ijunja makichik yaaktakea nunin wajasa pujusmi tama ayu tuinawai. Nuniktin asajin dita chichainak ashí iinia aishmag aidauk, tsupimagtinme tujamainawai, dita wajuku ainawa nuninuk ami tusag. ²³ Tuja ditá wajiji aidauk kuntinji aina nujai iinu agtatui. Nuadui yamaikik nii segapamua duke umigkagmi, aatus ditashkam jutijai juwakag batsamsatnume”, tuidau. ²⁴ Tusa Hamor niina uchiji Siquemjai tiagtai, tikich aidaushkam, ayu duke ati tusag aimkajui. Tiagmatai ashí aishmag suntagbaemain aidauk tsupimajaju ainawai.

²⁵ Tujash kauptum tsawanta duwi, Jacopa uchiji Dina umayi aidau: Simeón Levíjaji puyagjin jukiag yaaktanum wayawag ashí aents tsupimajaju aidau nuna najaimainak ayamjumamainchau wajas batsatan ashí kajekajui. ²⁶ Dutikainak Hamornashkam Siquemjai apatuk puyajai ijuag maawajui. Dutikawag Dina Siquema jeen pujuttaman juki ukukiajui. ²⁷ Dutikawaju ai Jacopan uchiji tikich aidau kauna shimutuk aents jinaa batsatbaunum utsanawag dita umayi pegkegchaw awajkamunum aents jinawu aina nuna wajiji aidauk ashí yajuakajui. ²⁸ Dutikainak nuigtushkam yaaktan ukuki uwig aidau, baka aidau, burro aidau aatus ashí tikich waji ayaunak yajuakajui. ²⁹ Tuja nuigtushkam waji jegaya aidauk kasamkajui, dutikainak uchi aidau nuwa aidaujai achija yajuakajui.

³⁰ Dutikawagmatai Jacob Simeógkan Levíjaji chichajak:

“Atum minak utugchat itagtuangme. Nuadui yamai cananeo aents, ferezeo aents aina nunú minak kajegtukagtatui, dutijuinak mina aentsug aidauk kuashtachua duwi dita ijunag mina mantuinak mina uchig aidaujai mantumain ainawai”, tiuwai.

³¹ Tutai dita aimainak:

“Tujash ¿wagka niish iina umayinash, nuwa wainka takatai itugmaina dutikae? Nuadui iishkam aikaji”, tiajui.

35

Apajú Jacopan Betel pujuttaman pegkegnum yumigjama

¹ Apajú Jacopan chichajak:

“Wetá Betelnun, núnikam nuwi jegam pujusta. Nuwi pujusam amina yatsum Esaú mantamatag takui tupikamin, Apajú wantintugmakua nunú emematku kuntin maa patasa apeatin altar najanata”, tiuwai.

² Tusa tima Jacob niina nuwe aidau, uchiji aidau, niina aentsji aidaujai ijumag chichajak:

“Atumi apajuímtaijum dakumka najanamu ajutjamaina duka ashí utsagtajum, dutikajum maijum tikich jáanch nugkugtajum. ³ Nunikagmin wamak Betelnum shiyakagmi, nuwi jegaan, wi wake besemag wekagai, Apajuí mina yainkauwa nunú emematku kuntin maa patasa apeatnun altaran najanatjai. Nii mina yaja wekagaish uyuuntusmatai wekae-sauwaitag nuadui”, tiuwai.

⁴ Tusa tiajam ditashkam ayu tusag, dakumka najanamu apajuímtai ajuinamunak, kuishnum akiitai aidaujai yajuakag ashí Jacopan susajui. Dutikam nii juki numi Encina tutai, Siquem nugkanum jegattak wajaunum nuna wajautin yutua ukukiuwai.

⁵ Dutika ukuwa jiiinag shimutai, nuwiya aents aidaun Apajuí senchi sapigmitkakui ditan pataetukainum tusa. Dutikamu asag Jacob niina uchiji aidaujai shimutaish pataetukchajui. ⁶ Nunik we wenakua ashí niijai aents aidau yujaunak imanisag yaakat Almendro tutai tuja Betel tuuta awagmatia nunú Canaán nugkanum awa nuwi jegawajui. ⁷ Nunik nuwi jegawag kuntin maa patasa apeaku Apajuí ememattinun altaran Jacob najanauwai. Dutika nunú nugkan El-Betel adaikauwai. Yachi maatag tama tupikaki wesa kanittaman Apajuí wantintukua nuwi.

⁸ Nunú nugkanum Débora Rebecan kuitamajakua nunú jakauwai. Nunikmatai Betel jegattak numi Encina wakentin ukusajui. Dutika Jacob nunú nugkan, “Encinanum buutbau” adaikauwai.

⁹ Tuja Jacob Padán-aram pujau wakettatman Apajuí ataktu wantintuk pegkegnun yumigjauwa nunak, ¹⁰ aatus tiuwai:

“Amek Jacopaitme, tujash tuke Jacob tamak achattame; yamai nagkamsamek ‘Israel’ tutai atatme”, tiuwai.

Nuna tusa Jacopan daajin Apajuí yapagtua ataktushkam ¹¹ chichajak:

“Witjai dekas Apajuí ashí senchigtinnuk;
amek kuashat uchigtin atatme,
nuadui ame wegantu aidaush imanisag agtinai.
Nuadui ame wegantu aidau nugka muuntan
yaaktamawag batsamsagtinai.
Tuja ame uchijum wegantunmaya
apu waigkagtin ainawai.

¹² Wi Abrahaman Isaakjai nugkan susauwaitag nunak amina yamaik amaajai,

untsu ame jakamin amina uchijum wegantu aidaun
susatnaitjai”, tiuwai.

¹³ Aatus Apajuí Jacobjai chichas ukuak wakitkimtai, ¹⁴ nuwig Jacob kayan juki inantai apujus aceiten vinojai juki ukatkauwai, juju nugkak Apajuínu atin ati tusa. ¹⁵ Nuna dutika ashimak Jacob nunú nugkan Betel adaikauwai.

Raquel jakamu

¹⁶ Jacob Betelnum pujau jiiinki Efrata jegattak wegai, Raquel uchin najaima shiig senchi waitus uchigmakui. ¹⁷ Nunik uchigmak ashí jaka tepaun, uchi uchigmitkau chichajak: “Ishamkaipa, jushakam aishmag uchigmakume”, tau.

¹⁸ Tusa tima ashí jaka tepes niina uchiji daajin Ben-oní adayak jakauwai. Dutika adaikamu aig, apaji dekas Benjamín ati tusa adaikauwai.

¹⁹ Aatus Raquelak jakauwai. Nunik jakamtai Efrata jintanum yamai yaakat Belén taji nuwi ukusajui. ²⁰ Jacob nuwen ukusa pempeenak kaya

muuntan juki eketi ukukiuwai. Nunú kaya eketi ukukmawa nunuwai yamaikish, juwi Raquelak ukusbauwai tutai awa nunú.

²¹ Israel nuwen ukus ukuak jiinki, kumpin jikkbau Eder tawa nuna ukuki weuwai. Nunik nuwi jeen jegamag pujusui. ²² Nuwi Israel jegaa pujai, Rubén niina apaji awan nuwe Bilhájai ikagmakui. Nuna dekaa Israel senchi kajekui.

Jacopan uchiji aidau (1 Cr. 2.1-2)

Jacopa uchijig doce aajakui.

²³ Leayai akiamuk: Rubén aajakui iwai, nuigtu Simeón, Leví, Judá, Isacar, Sabulón aatus aajakui.

²⁴ Raquelai akiamuk: José Benjamíggjai aajakui.

²⁵ Raqela inake Bilhá aajakua nuwi akiamuk: Dan, Neftalíjai aajakui.

²⁶ Untsu Lea inake Zilpá aajakua nuwi akiamuk: Gad, Asher aatus aajakui. Juju ainawai Jacopan uchiji Padán-aramnum pujusa akigbau aidauk.

Isaac jakamu

²⁷ Nuwi pujau niina apaji Isaakan Mamrenum yaakta daaji Arbá tuuta Hebrón tuuta awagmatia nuwi Abraham yaunchuk pujujakbaunum pujau asamtai, niina wainkatatus weuwai. ²⁸ Nuwi Isaakak ciento ochenta mijan ejeyi pujus jakauwai. ²⁹ Nunik shiig múuntuch wajas jakamtai, niina uchiji Esaú Jacobjai jukiag ukusajui.

36

Esaú uchiji wegantu aidau (1 Cr. 1.34-54)

¹ Juju aajaku ainawai Esaú, Edom tutaya nuna uchiji wegantu aidauk.

² Esaú jimag nuwan Canaán nugkanmaya aidaun nuwatkauwai. Jeteke aajakui Adá, hitita aents Elón aajakua nuna nawanji, untsu awan nuwe aajakui Oholibamá, Aná nawanji heveo aents Sibón aajakua nuna tijaji.

³ Nuigtushkam Ismaela nawanjin Nabaiota umayi Basemat aajakua nuna nuwatkauwai. ⁴ Adá Esaún uchigmatkauwai uchi aishmagkun Elifazan, untsu Basemat uchigmatkauwai uchi aishmagkun Reuel. ⁵ Tuja Oholibamá uchigmatkauwai uchi aishmag aidaun: Jeús, Jaalam, Coré aatus. Juju aajaku ainawai Esaú uchiji nii Canaán pujusmatai akiinkaju aidau.

⁶ Canaán pujau Esaú niina nuwe aidaun, uchiji aidaun, nawanji aidaujai ashí aents niina jeen batsamin aidaunashkam imatiksag yajuak weuwai tikich nugkanum niina yachi Jacobjai pujamun ukuki kanak pujustatus. Nuigtushkam niina tagkuji aidaun Canaán pujusa uyugkamunak wajijijai ashí yajuak weuwai. ⁷ Ditak kuashat tagkugtin asag, nunú nugkanmakek mai pujumainchau aajakui; nuigtushkam nunú nugkanmak tagku ayug-mainchakam atsujakui. ⁸ Nuniau asamtai, Esaú Edom tutaya duka, nugka Seír tawa nuna mujajin pujustatus weuwai.

⁹ Juju aajaku ainawai Esaú wegantu aidau, edomnumia aents aajaku aina nuna apaji. Ditak nugka Seír tawa nuna mujajin batsamajakajui.

¹⁰ Tuja Esaú uchiji aajaku aina nuna daaji aidauk juju ainawai: Elifaz Adáyai akiidau, Reuel Basematai akiidau. ¹¹ Tuja Elifazan uchiji aidauk: Temán, Omar, Sefó, Gatam, Quenaz aatus aajaku ainawai. ¹² Elifaz tikichin

ikaa nuwen Timná daagtinun nuwatkauwai. Dutika nuwi akiauwai makichik uchi aishmagkun dutika adaikauwai Amalec. Juju aajaku ainawai Esaún nuwe Adá aajakua nuna uchiji wegantu aidau.

¹³ Untsu Reuelan uchiji aidauk: Náhat, Zérah, Shamá, Misá aatus aajaku. Tuja juju aina juka Esaún nuwe Basemat aajakua nuna uchiji wegantu ainawai.

¹⁴ Tuja Esaún tikich nuwe Oholibamá Aná nawanji, Sibógkan tijaji aajakua nuwi uchi akiinkau aidauk: Jeús, Jaalam, Coré aatus aajakui.

¹⁵ Tuja Esaún uchiji aidaunmaya apu aajaku aina duka juju ainawai: Esaú uchiji iwai Elifaza uchiji wegantu aidaunmaya apu aajaku aina duka juju ainawai: Temán, Omar, Sefón, Quenaz, ¹⁶ Coré, Gatam, Amalec aatus. Juju aajaku ainawai Elifaz wegantunum akiinawu aina nuna apuji, Edom nugkanum batsamajaku aina nunú. Juju aina juka ashí Adá wegantu ainawai.

¹⁷ Untsu Esaún tikich uchiji Reuel aajakua nuna uchiji apu aidauk: Náhat, Zérah, Shamá, Misá, aatus aajakui. Juju ainawai Reuel wegantunum akiinawu aina nuna apuji Edom nugkanmaya. Juju aina juka ashí Basemat wegantu aajakui.

¹⁸ Untsu Esaú nuwe Oholibamá Aná nawanji aajakua nuna uchiji aidaun apujig: Jeús, Jaalam, Coré aatus aajakui. ¹⁹ Esaú Edom tutaya nuna uchiji wegantu aidaun apuji aajaku aina duka juju ainawai.

²⁰ Tuja Seír horeo aents aajakua nuna uchiji aidauk: Lotán, Sobal, Sibón, Aná, ²¹ Disón, Éser, Disán aatus aajakui. Juju aajaku ainawai Seíra uchiji wegantu aidau horeo aents wegaunum akiinawu aina nuna apuji aidau Edom nugkanum batsamsau aina nunú.

²² Tuja Lotánka uchiji aidauk: Horí, Hemamjai aajakui. Untsu Timná aajakui Lotánkan umayi.

²³ Tuja Sobala uchiji aidauk: Alván, Manáhat, Ebal, Sefó, Onam aatus aajakui.

²⁴ Sibógka uchiji aidauk: Aiá, Aná aatus aajakui. Nunú Aná mujanum niina apaji Sibógka burrojin kuitamak uwegshunum wekaekama yumi pukuni initkanmaya jiinun ejeyuwai.

²⁵ Aná uchijishkam: Disón, nuigtu nawanji Oholibamá aatus aajakui.

²⁶ Disónkan uchiji aidaushkam: Hemdán, Esbán, Itrán, Querán aatus aajakui. ²⁷ Tuja Ésera uchiji aidaushkam: Bilhán, Zaaván, Acán aatus aajakui. ²⁸ Disánka uchiji aidaushkam: Us, Aránjai aajakui. ²⁹ Tuja horeo aentsun apuji aidauk: Lotán, Sobal, Sibón, Aná, ³⁰ Disón, Éser, Disán aatus aajakui. Juju aajaku ainawai horeo aents aidaun apuji, maki makichik wegantu aidau Seír nugkanum batsamsau aina nunú.

³¹ Nunú apu aajaku aina nuu, inamajaku ainawai Edom nugkanum, Israel aents* aidaunmayag eke apu atsau asamtai. ³² Beoran uchiji Bela aajakui Edoma apuji. Tuja niina yaaktajig Dinhaba aajakui. ³³ Bela jakamtai, Jobab Zérah uchiji yaakat Boshránmaya aajakua nunú apu wajas inamjauwai. ³⁴ Untsu Jobab jakamtai, Husam Temán nugkanmaya aajakua nunú apu wajas inamjauwai.

* **36:31** "Israel aents" tawa nunak apach chichamnum "israelita" tawa nunuwai. Israel aents tawa duka Jacopan tikich daaji Israel tawa nunú wegantu ainawai. Yaunchuk "Jacob" daagtin aajakua nuna Apajúi yapagtua "Israel" adaikauwai.

³⁵ Husam jakamtai, Hadad Bedatan uchiji madiágnumia aents aidaun Moabnum amukua nunú apu wajas inamjauwai. Nigka yaakat Avit tawa nuwiya aajakui. ³⁶ Hadad jakamtai, Samlá Masrecánmaya aajakua nunú apu wajas inamjauwai.

³⁷ Samlá jakamtai, Saúl yaakat Rehobot tutai namak Eufratesa ijus awa nuwiya apu wajas inamjauwai.

³⁸ Saúl jakamtai, Baal-hanán Acbora uchiji aajakua nunú apu wajas inamjauwai.

³⁹ Untsu Baal-hanán jakamtai, Hadad yaakat Pau tawa nuwiya apu wajas inamjauwai. Hadata nuwe aajakui Mehetabel, Matred aajakua nuna nawanji, tuja Mezaapa tijaji.

⁴⁰ Tuja Esaú wegantu aidau maki makichik daagtin patayi aidaujai juunik ditash nugkentin batsamsaju aina duka juju ainawai: Timná, Alvá, Jetet, ⁴¹ Oholibamá, Elá, Pinón, ⁴² Quenaz, Temán, Mibsar, ⁴³ Magdiel, Iram aatus. Tuja Esaún tikich daajig Edom aajakui. Juju ainawai Edoman apuji aajaku aidau, maki makichik ditash nugkentin batsamajaku aina nunisag apumeak inamjau aina nunú.

37

¹ Jacopak niina apaji Canaán pujujukua nuwi pujusui. ² Juju agagbauwa juka Jacopan patayi aidau pachisa augmattsamui.

José niina yachi aidaujai pachisa augmattsamui

Josék diecisiete mijan ajamaitak, niina apaji ikaa nuwe aidau Bilhá Zilpájai aajakua nuwi niina yachi akiinawu aidaujai ijunas uwijan kuitamajakui. Nuniau asa niina yachi aidau pegkegchaw wajagtai apajin jegajua ujakui.

³ Tuja Israelak Josén ima senchi tikich yachi aidaun nagkaesau anejakui, nii múuntuch wajas pujayatak akiau asa, José nugkugtinun jáanchin shiig pegkejan najatua susauwai. ⁴ Tujash José yachi aidauk, iina apajig Josén ima senchi aneak iinak imatikas anempainatsji tuidau asag, kajejuinak makichikish kumpamainachu.

⁵ Dutikam pujus José kajanum kajamjauwai. Nunik wagkanuk juni kanagja tusa yachi aidaun ujakui. Dutika ujakam nuna antukag, nuni senchi kajekajui. ⁶ Dutikainam José ditan chichajak:

“¡Antuktajum, wi kajanum kajamjag nuna ujaktajime! ⁷ Kajanum ii aidauti ashí ajá ejapeen trigo tsupija jigkaka ijumku batsamaji. Nuniajin wi jigka aepsamua nunú nantaki tutupit wajasmae; nunikmatai untsu atum jigkamu aidau nantajag nunú midau wajattaman tentea apakag eme anentuinak tsuntsuma ijuntsagmae”, tau.

⁸ Tusa ujakam, yachi aidau niina chichajuinak:

“¿Amekaitam iina apuji wajasam inajajatnum?” tuidau.

Nuna tusing nuni senchi kajekajui, wagki nii kajamjamujin imatiksag ujakajam.

⁹ Dutikam pujus ataktushkam tikichin kajamjauwai, nunik nunashkam yachi aidaun ujaak:

“Antuktajum tikichnashkam ataktu kajamjajai. Kajanum wainkamjai etsan, nantun, nuigtu once yayan. Nunú aidau mina tententuawag eme anenjusag tsuntsumjutiagmae”, tau.

¹⁰ Tusa niina apajin, yachi aidaujai ujakui, tusa uchiji ujaam apaji chichajak:

“¿Wajimpaya dusha nunin kajabaush? ¿Wika amina dukujai, ashí yatsum aina nunú aatsan amina tikishmatjan ememattinaitjam?” tiuwai.

¹¹ Nuadui niina yachi aidau senchi kajejuidau. Tujash niina apajig wajuk asag nunash nuni kajamjae tusa kuashat anentaimu.

Josén niina yachiuchiji aidauk sujukagbau

¹² Makichik tsawantai José yachi aidau ditá apaji uwigji ayujatnun chijichin egainak Siquemnum shiyakajui. ¹³ Nunik shiyakmatai pujusa Israel Josén chichajak:

“Amina yatsum aidau uwijan kuitamainak Siquem batsata nunú wejim diista”, tiuwai.

Tama José ayaak:

“Ayu apawah, ame tame nunak imatiksasuk umiktajai” tiuwai.

¹⁴ Timatai Israel: “Ayu wetá, nunika jegaam yatsumesh wajuk batsatainawak nunú diista, nuniakum uwig aidaushkam diista. Dutikam ditash wajintuk chichainawa nunú minash taam ujatkata”, tiuwai.

Tusa, José Hebrógka pakajin pujaun Israel akupkauwai, dutika akupkam Siquem wekama, ¹⁵ wagaka wainak wekaetatman makichik aents wekagu wainak iniak:

“¿Waji egakmea amesh wekaeme?” tiuwai.

Tama José ayaak: ¹⁶ “Wika mina yatsug aidaun egajai” tiuwai. Tusa nuna iniak: “Wait aneasam minash ujatkata tuwi dekaskesh uwijan kuitamkush batsatua”, tau.

¹⁷ Tama nunú aents ayaak:

“Amina yatsumik juwig atsuinawai, juwi batsatu ukuak shiyakmae, tuja dita chichainak, Dotágnun weagmi tuidaun antukmajai”, tiuwai.

Tusa tima Joséshkam yachi aidaun egak yaakat Dotágnun jegauwai, nunik nuwi yachi aidau batsatun wainkauwai. ¹⁸ Nuwi jegattak wegaun, yachi aidau wainkag, maami tusag eke jegatsaig chichaman umigkaju ainawai. ¹⁹ Dutika umigkaju asag chichainak:

“¡Diisjua au kajamkagtinuwe nunú minawai!” tuidau. ²⁰ Nuna tusag: “Kaunatajum maami, dutika waanum egkea ajapami. Dutika iina apaji jegaji ujakuishkam, ikamia kuintin yuwae timi. ¡Dutika ajinish nii kajamkagtugbauji aidaush wajuk uminkatig!” tuidau.

²¹ Tusa tuidaun Rubén antuk ayamjuktajai tusa chichaak:

“Dekas tikima mautak maachmi”, tau. ²² Nuna tusa nuigtu chichaak: “Ayatak mautsuk, juju uwegshunum waa awa juwi egkeatajum, tujash makichkish awattsuk egkeatajum”, tiuwai. Rubén juna tiuwa nunak niina yachin uwentikag juki apajin awagkitatau asa tiuwai.

²³ Tusa imatu batsatai Joséshkam niina yachi aidau batsatbaunum jegantui, nunnittaman jáanch nugkuagbaujin awituk jujukag, ²⁴ achika jukag waa yumi atsamunum egkeawajui.

²⁵ Dutika waanum egkea idayinak, yutain yuwinak batsatu, nunik batsatu niimsatakama Ismael aents aidau Galaad nugkanmaya camelloji aidaunum kugkuin bálsamo tutain, kugkuin mirra tutai aidaun aatus yuaukag Egipto nugkanum shimuidaun wainkajui.

²⁶ Nuna wainak Judá niina yachi aidaun chichajak:

“¿Waji imana jukittajai iina yachi, maa uuka idaikuish? ²⁷ Dekas ayatak juki Ismael aents shima au sumakta tusa sujukmi, dutikaku tikima mautak maachmi, iina yachiya jamah”, tiuwai.

Tusa tama tikich yachi aidaushkam duke ati tusag tiajui. ²⁸ Nuadui Madián aents waji sujin aidau nagkaemainai, Josén yachi aidau waanmayan jiiki jukiag diitai sujukajui veinte kuichik plata najanamun juyinak. Dutikawagmatai dita sumak jukiag Egipto nugkanum ejegawajui.

²⁹ Dutika sujuk awemaju ai, Rubén wakitki taa waanum José egkeamun jegantun diikma atsaun wainkauwai, nunik jáanchjin japiki ichigkui wake besemag dekapeamunum. ³⁰ Nunik wakitki yachi aidaun chichajak:

“¡Uchik atsawai! ¿Yamaish wisha wajukatjaki?” tau.

³¹ Tusa tutaish pachitsuk idayinak, José jáanchji awitka jujukbaun jukiag, chivo tsakatan maawag nuna numpejai jáanchin numpeajajui. ³² Nuna dutikawag ditá apajin akuptukajui, dutikamun juki ejetuawag chichajuinak:

“Juju wainkaji ame shiig diista, amina uchigmi jáanchjichuashit”, tiajui.

³³ Tama Jacob diistakama niina uchiji nugkutaijin wainkauwai, nunik chichaak:

“¡Ehe juju jáanchia juka mina uchigdauwai!” tiuwai. Tusa chichaak: “¡Kuntin kajen pegkegchau aina nunú yuwae imatika shiig ichiajana!” tau.

³⁴ Nuna tusa Jacob niina jáanchjin japiki ichigkui, nunik wake besemag dekapeaku nugkutain nugkujui. Nunik pujus uchijin aneak kuashat tsawantai tuke buutu pujau. ³⁵ Imani pujutai ashí niina uchiji aidau, nawanji aidaujai anentain ichichtuinak kautuawajui. Tujash nigka dakitau anentaijun ichichtujatnume tusag. Nuniau asa: “¡Wika tuke buu buutkawa jakan nijai wainiakun, duwi wake besemag dekapeamugnak nagkaankattajai!”, tiuwai.

³⁶ Tuja Madián aents aidauk dita sumaku ainayatak, Egipto nugkanum ejegawag suntag yaaktan utuawainum tusa kuitamin aidaun apuji faraógka atuwe Potifar aajakua nuwi sujukajui.

38

Judá Tamarjai pachisa augmattsamu

¹ Tikich tsawantai Judá niina yachin ukuak weuwai makichik aents Hirá daagtin yaakat adulamnumia aajakua nuna jeen pujustatus ² Nuwi jegaa pujus canaágnumia aents Súa aajakua nuna nawanjin wainak nujai nuwenauwai. Nunik pujusa, ³ ejapmitkakui, dutikam pujus tsawanji jegajim aishmagkun uchigmakui. Nunikmatai Judá uchiji daajin Er adaikauwai.

⁴ Nuna uchigmak pujus ataktu ejapjuk uchigmakmatai nunak Onán adaikauwai. ⁵ Nuigtushkam ataktu ejapjuk uchigmak nuna untsu Selá adaikauwai. Nunak Judák yaakat Quezib pujai uchigmakui.

⁶ Nuwi pujus Judá niina uchiji iwai Er aajakua nuna nuwa Tamar daagtinjai nuweauwai. ⁷ Tujash Era pujutjig Apajuí emtinig shiig pegkegchau aajakui, nuniau asantai, Apajuí niina pujutjinak jujukiuwai. ⁸ Dutika jujukim jakamtai Judá Onágkan chichajak:

“Ame yatsumin nuwe wajemea au jukim, yatsum uchi akiitsuk jaka nunú uchi akiintuata, dutikam aminiya niina uchiji wegantu aidaush yujakti”,* tiuwai.

⁹ Tujash Onágkak nii uchi akiamua duka niinuchu agtinun dekau asa, yachi nuwe wajejai tsaniakush ejapmitkakaig tusa kuitamamajakui.

* **38:8** Judío aents aidaunmak yachi jakamtaig, nuna nuwen tikich yachi juki uchi akiamua duka jakauwa nudau uchik aajakui.

Nunak nii akiamunmaya yachi uchiji wegantu aidau yujakai tusa dakitak nunijakui. ¹⁰ Nunittaman Apajuí wainak shiig pegkegchau diisui, dutikau asa niinashkam dutiksag wamak pujutin jujukuiwai.

¹¹ Dutikam jakamtai, Judá niina uchiji nuwe Tamar aajakua nuna chichajak:

“Yamaik wajemeaume, junismek amina apa jeen weme pujusta, mina uchig Selá tsakagti”, tiuwai. Tusa tima Tamarshakam niina apaji jeen wee pujusui. Nunak Judá anentaimas tikich yachi aidau jakaja nunik jusha jakachaintash, tau asa tiuwai.

¹² Tuja kuashat tsawan nagkaemakui ai, Judá nuwe Súa nawanji aajakua nunú jakauwai. Nunik nuwe jakamtai wake besemag pujamun sakapag niina kumpaji Hirá adulam aents uyuuntsam yaakat Timnatnum niina uwigji ujen tsupijuinak batsatbaunum weuwai.

¹³ Tuja Tamarchakam niina aishi aajakua nuna apaji yaakat Timnatnum niina uwigji ujen tsupijak wee tabaun dekauwai. ¹⁴ Nunik dekaa waje nugkutai nugkuagbaujin awimak ukuak, waitkainum tusa jáanchin juki dukumak yapin ejak, jinta Timnat wetainum ayaumas yaakat Enaim awa nuna waitaijin ekemsauwai. Nunak Selá tsakaju aigkiap awi nemakta tusagkesh tujutchaé tusa nunikui.

¹⁵ Nunik ekematman Judá wainak, yapiin dukuka eketu asamtai, juka nuwak wainka takatai aina nuwapi tiuwai. ¹⁶ Nuadui niina uchiji nuwe aajakua nuwapi tachau asa jegantun chichajak:

“¿Minash wi amijai aankatjai taish ayu tujutmainchaukaitam?” tiuwai.

Tusa tama nii ayaak: “¿Tujash ame mina dutijakmesh waji minash sujustatme?” tiuwai.

¹⁷ Tusa tama Judá ayaak:

“Makichik chivo tsakatan awetitjame”, tau.

Tama nuwa ayaak: “Ayu, dekas takumek makichik waji ukugtukta, ame nunú chivo tsakat awetujiamin nuna juwakun awagtuktagme”, tau.

¹⁸ Tusa tama Judá iniak:

“¿Tujash wajina ukugtukti tusamea wakegame?” tau. Tama nuwa ayaak:

“Ame patakumtaijum, nugkutaijum, nuigtu numi amina ushujutaigmia nunú aatsa ukugtukta”, tiuwai.

Tama Judá ayu tusa ashí susa nuadui nijjai tsanigkui, dutikam Judá uchijin ejapjukui. ¹⁹ Nunik Tamar wakitki jeen jegaa, jáanch dukumakbaujin juki ukuak, wajemea nugkutain nugkug pujusui.

²⁰ Nunik pujai Judá niina kumpaji adulam aentsun chichajak:

“Ame makichik chivo tsakatan amasmatai jukim nuwa ejetuam suwakum, mina wajig aidaun susan ukukmayag nunú segam isagtuata”, tusa awemauwai. Tusa tima niina kumpaji nuwan jegajua usatakama wainkachui. ²¹ Dutika wainkacha nuwiya aents aidaun iniak:

“¿Tuwi pujawa nuwa wainka takatai Enaimnumia jintá ayaumas pujuma dusha?” tau.

Tama dita ainak:

“Juwig nuwa wainka takataig makichkish shiig atsawai”, tiajui.

²² Tusa tima Judá pujamunum wakitki jegaa chichajak:

“Nuwanak shiig wainkachmajai, awiya aents aidaushkam juwig nuwa wainka takataig shiig atsuwe tujutiagmae”, tau.

²³ Tusa ujaam Judá ayaak:

“Nunú waji aidauk niini juwakti, tikima shiig dushikiam aig; wika chivo tsakatan amastajai tibaugnak awetijai, tujash amesh wainkachu asam susachume”, tusa idaisauwai.

²⁴ Tusa idayas pujus kampatum nantu nagkaemai, Judán kautuawag chichaman ujainak:

“Tamar amina uchigmi nuwe aajakua duka wainak aentsjai takama wekaekama ejapjuke”, tiajui.

Tusa tama Judá senchi untsumak chichaak:

“iNuwak jiki jukijum apeatajum!” tiuwai.

²⁵ Tusa timatai jegaji juwam, niina aishi aajaku apajin chichaman akuptak: “Wika juju wajiin takakag judaun ejapjukjai. ¿Amesh juju diisah, jusha patakumtai, nugkutai, numi ushujutain wi takakag jusha yanawaita?” tiuwai.

²⁶ Nuna dekaa nuigtu niina wajijin wainak wajaka Judá chichaak:

“Niig dekas shiig anentaimui, midauwai utugchata duka, wagki wi mina uchig Selájai nuweachbau asa junak jutijuae”, tusa ayatak idaisauwai.

Nuadui ataktu awagkig nuwanak makichkish wejichui.

²⁷ Duwi pujus Tamar uchigmati jegamtai, jimag uchi aishmagkun uchigmakui. ²⁸ Dutika uchigmam makichik uchi uwejen eemtika jikiuwai. Dutikamtai uchi uchigmatkau uwegnum hilo kapantun tsujig juki jigkauwai. Dutika chichaak: “Juju dekatkauk akiinae”, tiuwai.

²⁹ Tujash nunú uchik niyá akiinachui ayatak kuntujin awagkiuwai, nuniai niina yachi tikich eemak akiinuwai. Nunikmatai uchi uchigmatkau chichaak: “¿Amesh wajuk eetemamea jiinkiume?” taku nuna daajin Fares† adaikauwai. ³⁰ Nunú akiinamtai uchi uwegnum jigkamushkam akiinuwai. Nunikmatai nunak Zérah‡ adaikauwai.

39

José apu Potifara nuwejai pachisa augmattsamu

¹ Josén Ismael aents aidau sumakag Egipto nugkanum ejegawajui, dutikawagmatai nuwiya aents Potifar daagtin sumakui. Potifarak suntag yaakta utuwainum tusa kuitamin aidaun apuji, faraórgan atuwe aajakui.

² Tujash Josénak Tuke Pujuu kuitamajakui. Dutikamu asa nii egiptunmaya aentsu jeen pujus takasua duwik pegkeg pujusui. ³ Nuadui niina apujishkam anentaimas, Tuke Pujuuwap junak dekas yayawa dutikamu asampap takat susamash shiig umika emawa tiuwai. ⁴ Nuadui Josék apu shiig anentam asauwai, duwi Josénak ame dekas mina jegajuiya aina nunú kuitamin ata tusa ashí niina wajiji aidaunak susa idaisauwai. ⁵ Apu Potifar ashí niinu aidaunak Josén ame yamaik diista tusa susamunum nagkamas, Tuke Pujuu Potifaran pegkegnum yaigkui, dutikak niina jenianash, ajajinianashkam aikasag kuashat ikauntukui. ⁶ Imatikamu asa, Potifarak shiig kajitus, Josénak ashí niinu aidaunak idaitusui. Dutikau asa niig ayatak yuwatnujinak anentaimtujakui.

Josék shiig iwajamu, yantsaptin wajakin aajakui. ⁷ Iman asamtai, tikich tsawantai apu Potifaran nuwe Josén senchi wakejukui, nunik makichik sawantai chichajak:

“Ilijai kanagmi!”, tiuwai.

⁸ Tujash Josék dakitau asa niina chichajak:

† 38:29 “Fares” tawa duka hebreo chichamnumak “eteema jiinkiu” taku tawai. ‡ 38:30 “Zérah” tawa nunak hebreo chichamnumak “winchamtin” taku tawai.

“Amesh anentaimsata, mina apug shiig kajitjus ashí niina jenia aidaunak mina idaitugsau asa, nigka makichkish puyatjutsuk shiig aneas pujawai.

⁹ Tuja juju jega juwig tikich aents mina nagkaetasuk atsawai; makichik wajigkesh wi takamainchawk atsawai, ima ameketme wi atimainchawk, wagki niina nuwe asam. Nunin aish, ¿wisha wajukeaknuk amejai kanaknush Apajuí emtinish pegkegchaunash takastaja?” tiuwai.

¹⁰ Tusa tamashkam nuwak Josénak antugtsuk kashi kashinig iijai kanagmi tusa waitkau. Imatjamashkam Josék nuwa chichamenak antugkachui.

¹¹ Tujash makichik tsawantai José niina takatji aidaun umiktatus jegaa wayauwai. Nunik wayaun makichik aentskesh nuwig atsau asamtai,

¹² nuwa Josén jáanchjin achika emetua chichajak:

“¡Iijai kanagmi!” tau. Tujash Josék dakitau asa tupikaki jiiinak, niina jáanchjin awimak ukukiuwai.

¹³ Dutika jáanchin awimak ukukmatai, nuwashkam nunú jáanchin juki wajan, ¹⁴ nunú jeganum tikich inak aidau batsatun untuka ikaunman chichajak:

“¡Diistajum atumesh, mina aishug hebreo aentsun juwi itagtamama nunú, iina dushiktamak mina jutijawai! Juwi tajutua iijai kanagmi tujutkui, wi dakitakun senchi unsumajai. ¹⁵ Tusa imatai ¡tupikak jáanchjin awimak ukuak jiinki wemae!” tau.

¹⁶ Tusa ashí etsejuk idayak, José jáanchjin juki ukus pujai niina aishi, José apuji aajakua nunú tauwai. ¹⁷ Nunikmatai nii tikich aentsun ujaak chichakbaujinak, imatiksag aishinashkam ujaak:

“Ame hebreo aents* inagtajai tusam itamum nunú mina kanutaijui wainjua waitkagsae. ¹⁸ Tujash wi senchi jiika unsumai, tupikaki jiiinak niina jáanchjin awimak juwi ukukmae.

¹⁹ “Juna aatus amina inakem waitkagsae”, tau. Tusa ujakam José apujishkam niina nuwe chichaak aatus waitkagsae tabaun dekaa senchi kajekui. ²⁰ Nunik kajeka Josén achik juki aents achika chimpitainum apu inake aidau achikam chimpijunum egkeauwai.

²¹ Dutika egkeawagmataishkam Tuke Pujuu Josénak tuke kuitamu, nuadui achijatka chimpitai kuitamnun apujishkam niinak shiig anen-jauwai. ²² Dutikak aents achika chimpitainak, ashí aents achikam chimpijujai Josén ame ashí kuitamkata tusa idaitusui. Dutikamu asa nuwi chimpimas takajaku aina nunak José diiakui. ²³ Aents achika chimpitain apujig Josén ashí idaitusu asa, nigka nunak puyatjukchauwai. Wagki Josénak Tuke Pujuu kuitamajakui. Nuadui niina takatjig shiig pegkeg aajakui.

40

José jimag aents kajamkagtugbaun ujakbau

¹ José achikam pujai, faraón uwagtinun vinon shikika su aidaun apuji, pagka najanin aidaun apujijai faraógka chichamen betek umigkachajui.

² Nunikagmatai faraón uwagtinun shikika suu aidaun apujin, pagka najanin aidaun apujijai mai kajujuk, ³ achika apu Potifara jeen aents achika chimpitainum, José achikam egketunum, nuwi ditanashkam chimpiauwei.

⁴ Tuja aents achika chimpitain apuji Josén chichajak: “Apu faraóghan

* 39:17 “Hebreo aents” tawa nunak, hebreo chichaman chichau asagmatai timauwai.

inake aidaun achika egkeag juju ame ashí diista”, tusa niina idaitusui. Dutikamu asag kuashat tsawan nuwi pujusajui.

⁵ Nuwi pujusag, faraógkan umutain shikika suu aidaun apuji, pagka nanan aidaun apujijai mai kajamjajui maki makichik dita wajukawagtinuk ayanne nuna. ⁶ Nunik kajamag tsawajag batsatai, José kashikmas weji diikma wake besek pekajun wainkauwai. ⁷ Dutika wainak ditan iniak:

“¿Wagka wake besekjumesh pekagjume?” tau.

⁸ Tusa tama dita aínak:

“Kajamkagtugji, nunika wajukatnuk aannush kajamjaji, yaki ujpakainta tusa anentaimku pekagji”, tuidau.

Tiagtai José ayaak:

“¿Dekas Apajuichukai atum aan kajamjaujum nuna ujpamainuk? Wajuk atum kajamjaujme duka mina ujatkatajum”, tiuwai.

⁹ Tusa tima apu uwagtinun shikika suu aidaun apuji, nii kajamjamun ujaak:

“Wi kajanum makichik uva numiji uva numiji tsapai wajaun wainkamjaji. ¹⁰ Tuja nuna kanaweg kampatum ajime. Nunú kanawe aina nuwi jeeka yagkujime, nuniak niina yagkujiya duke neje najanea tsamame. ¹¹ Nuniai wi faraógka umutaijin takusa wajasan uvan juukan apu shikika sutainum nuna ijujan jukin wiki apu faraógkan sumajai”, tusa ujakui.

¹² Tusa ujakam José chichajak:

“Ame kajanum kampatum kanawe wainkaum duka, kampatum tsawan atina nunú kajamjaume. ¹³ Tuja kampatum tsawan asa, apu faraón atumin itugchatjumin diigtamsattawai, nunik aminak ame takataigminig ataktu awaintamattawai, dutijamamtai ame yaunchuk apu faraón niina umutaiji umigkam suyum dutiksamek sutatme. ¹⁴ Tuja wi tajam nunú betek uminkamtaig, minash wait aneasam anenjata kajimatkim idaitutsuk, nuniakum mina pachittsamesh faraón ujakta minash jiigkiti. ¹⁵ Wika hebreo aentsuitjai nuniaig minak kasamjukag imajui itajuawagmayi, dutijuawagmatai pujai, makichik pegkegchaunakesh takamsachu aig, juwi egketuawagmatai pujajai”, tiuwai.

¹⁶ Nuna aatus José tikichin betek ujakmatai, pagkan najannun apujishkam Joséni kajamjamujin ujaak:

“Wishakam kajanum kampatum chagkin yaignum pag puju aidau aimkamun yajuakan mina buukeajui ekenjamjai. ¹⁷ Nunú chagkin kampatum mina buukjui ekenbauwa nuwiya pag shiig pegkeg yumimitu najankamu faraógdau chimpijun chigki aidau kaunak yuwagmae”, tusa ujakui.

¹⁸ Tusa ujakam José ayaak:

“Ame kajanum kampatum chagkin yaijuch aidaun mina buukeajui ekenjai tame duka, kampatum tsawan atina nunú kajamjaume. ¹⁹ Kampatum tsawan asa faraón amina itugchatjumin diigtamsattawai, nunik jiigmaki numi muunnum aminak jigka detama buukmin tsupigtamak mantamattawai, dutijamamtai amina iyashminak chigki aidau yuwawagtatui”, tiuwai.

²⁰ Tusa ujakam batsamas kampatum tsawantan ejegainai, faraón nii akiinamujui tsawan tsawagmatai, ipaama yutain umika yuwinak batsamas, ashí nii ipaamu aidau emtin makichik aentsun awemauwai nii uwagtinun shikika suu aidaun apuji, pagka najanin aidaun apujijai, achikam chimpija nunú jiikjum utitajum tusa. Tusa akupkam jegajua jiiiki juki itajuauwai.

²¹ Dutika itajuam nii uwagtinun shikika su aidaun apujinak ataktu

yaunchuk takajakbaujinig awayauwai. Dutikam niig faraógka shikijuk suwak wekagu. ²² Untsu pagka najanin aidaun apujinak suwenum jigkajum numinum nenajum maatajum tusa tiuwai. Tusa timatai dutiksag maawajui, José tibaunak imatiksag.

²³ Tujash umutain shikika apun su aidaun apujig José akatjamunak kajimatki pachitsuk idaisauwai.

41

Faraón kajamkagtugbaun José ujakbau

¹ Faraógka umutain shikijuk su aidaun apuji achikam pujaun jiiikajua duwi nagkamas jimag mijan wegai, makichik tsawantai, faraón niishkam kajanum namak Nilonum uwet wajamujin kajamjauwai. ² Nunú namakia siete baka duwejam pegkeg aidaun jiiinag chijichi namaka tugkitkenian yuwinak ijunun kajamjauwai. ³ Nuniai tikich siete baka aidaun watsaku pegkegchau tsumain aidaun jiiinag, tikich baka duwejam aidaun chijichin yuwinak ijunbaunum jegantatak nuna ukujin namaka tugkitken ijuntsauwai. ⁴ Tuja nunú siete baka watsaku pegkegchau tsumain aidaun, tikich siete baka duwejam pegkeg aidaun ijuntatman shiig wamak yuwa amukajui.

Nunú nunidaun faraón wainak shintajui. ⁵ Nunik shintaag tepau ataktu kanukma tikichin kajamjauwai: Untsu duwi wainkauwai trigo makichik numitak sieteya imajin nejen nejeka mantamas wakemain wajas wajattaman. ⁶ Tuja nuna ukujin tikich trigo sieteya imajin nejentin tujash dase umputai asa neje tsejgkush kagaku aidaun jiiinajui. ⁷ Nunik dasen umputai asa kagaku tsejgkush aidaun, tikich trigo pegkeg siete nejen mantamas wajaun wamkes yuwa amukui. Dutiktatman dii pujau shintaag, kajanmap junikja tiuwai.

⁸ Nunik nuna kajanum wainak puyatuk ane anentaimkawa tsawag kashikmas, Egipto nugkanmaya anentaimas dekamin aidaun yacha aidaun-jai untsuka ashí ikaunmauwai. Nunik kaunamtai faraón nii kajamjamujin ditan ashí ujakui, tujash makichkish nunú nuniktin aan kanajume tusag ujakchaju ainawai. ⁹ Dutika tujinkagmatai apu uwagtinun umijuk su aina nuna apuji, faraógkan chichajak:

“Yamai wi umikchamujun adeajag nuna ujaktajame. ¹⁰ Ame apuh, kajekam pagkan najannun apuji wijai achigkam apu Potifara jeen aents achika chimpitainum mai egkejatuawamin pujusa, ¹¹ kanamunum pagka najanin aidaun apuji kajamkagtujabi, nuniai wishakam antsanuk nunú kashia duwik kajamkagtujamiajai, nunú jimag kajamkagtugbauwa duka mak makichik nagkaemaktinji ajuyi. ¹² Nunika kajamja, yaki ujakpa tusa pujajin nuwi makichik datsauch hebreo aents, aents achika chimpitain kuitamin aidaun apuji inaku waitkatai aajakua nunú achikam pujau waipakmatai, nii ujakabijai. Dutika ajin wajukatnuk dusha aan kajamjabijai nuna nii betek ujakababi. ¹³ Tuja nii tujabauk imanisag uminkabi, duwi wika ataktu mina takatug aajakunmak wayamiajai. Untsu tikichnak suwenum jigka nená maawagmayi”, tusa ujakui.

¹⁴ Tusa ujakam faraón chichaak:

“José utitajum” tusa awemauwai. Dutikam jegajua José achikam egketun wamkesag jiiikiag awajajui. Dutikawag jáanch pegkejan yapagmamamtai jukiag faraógkai ejegawajui. ¹⁵ Dutika ejegawagmatai faraón chichajak:

“Wi kajamkagtujan, wajukatnunak juni kajamkagtugja tusan ashí inim-sajai, tujash makichkish ujatuinatsui. Nunika pujai amina au kajanmayan shiig etsegmayi tujamainakui utsukjame”, tiuwai.

¹⁶ Tusa tama José ayaak:

“Apuh, wika wikik tumaitsujai, ¡Apajuí minai pujau asa nii dekaskea nuna ujakpakti!” tiuwai.

¹⁷ Tusa tima faraón nii kajamjamujin Josén ujaak:

“Kajanum namak Nilonum uwet wajamjai, ¹⁸ nuniai nunú namakia siete baka dekas pegkeg duwejam aidau jiinag namaka tugkitkenia chijichi ayaun yuwinak ijunun wainmajai. ¹⁹ Nuniai tikich siete baka tsumain watsaku aidau jiinag, nunú baka duwejam ijunbaunum nuna ukujin ijuntsame. ¡Wika yaunchkesh makichkish ashí Egipto nugka juwiyanak baka watsaju ibau tsumainnak wainkachuitjai! ²⁰ Nunú siete baka tsumain watsaku aidau, baka duwejam pegkeg aidau wamkesag ashí yuwawag amukagmae. ²¹ Dutika yuwawajash yuwachua nunik yama jiinainak tsumain watsaku aajakbaunak nunisag ijunigmae.

“Nuna wainkan paantapi tukaman shintagmajai. ²² Untsu ataktu kanukman tikichin kajamkun, wainkamjai makichik trigonmayag sieteya imajin nejek nejen mantamas wakejumain wajas wajaun. ²³ Untsu tikich nuna ukuujin dushakam sieteya imajin nejekuwe, tujash dasen umputai asa neje tsejgkush kagaku aidau jiinag asagmae. ²⁴ Nunú kagaku aidau tikich dekas pegkeg nejen mantamas wajaun wamkes yuwa amukagmae. Nuna pachisan dekamin aidau ashí ujakmajai, tujash makichkish nunú nuniktin aan kajamjaume tusag ujakchaje”, tau.

²⁵ Tusa ujaam José faraóggkan ayaak:

“Apuh, ame jimag kajanum kajamjaum duka makichkia duke. Nunak Apajuí nii dutikatnujin aminak iwaintugmake. ²⁶ Siete baka pegkeg duwejam aidau kajamjaum duka siete mijan atin kajamjaume, tuja siete trigo pegkeg kajamjaum dushakam nunisagke. ²⁷ Tuja siete baka watsaku tsumain aidau baka duwejam aidau ukujin jiinag ijuntsau wainkaum dushakam siete mijan atin kajamjaume. Tuja makichik trigonmaya sieteya imajin nejentin tujash dasen umputai asa neje kagaku aidau wainkaum dushakam siete mijana nunuwai. Juwai siete mijanai nujan tepeatta nunú.

²⁸ “Tuja wi amina tijam nunak betek Apajuí nii dutikatnujin amina iwaintugmake. ²⁹ Siete mijanai ashí Egipto nugka juwig kuashat ajakma juwamu atatu. ³⁰ Untsu nunú mijan nagkaemaig, nuigtushkam siete mijana imajin nujan tepeattawai. Nunikmatai nujantai senchi waitiamu atatu. Nuniau asamtai, ashí Egipto nugkanum tajimat batsamajaku aidash senchi waitiagtatu, wagki ashí nugkanum yumain atsau asamtai. ³¹ Imanik shiig senchi yapajut tepeau asamtai, yaunchuk ajakma yuujakbauwa duka shiig atsuttawai. ³² Mina apujuh, ame mai numamtinuk kajamjaum nunak Apajuí nii umiktata nuna dekas aik iwaintugmake. ¡Duka imanisag shiig wamak uminkattawai!

³³ “Nunú nuniktin asamtai, mina apujuh, ame aents yacha shiig anentaimkau diisam etegkam Egipto nugka juwi apusata nuna diistin.

³⁴ Nuadui mina apujuh, ame juju aatsa umikta: Adaijata nugká apuji aidau, dutikam dita ashí Egipto nugkanum yujasag ajak juukbaunmayan cinco saco aimkanu ataik makichik, tuja dieznunian jimajan aatus yaju yajumainakua, jeganum utuaktinme siete mijana duwi. ³⁵ Trigo senchi nejet mijan atata nuadui juukag ashí yaakat aina nuwi ijumjatnume. Duka amina chichamjuminig kuitamkamu ati, yapajut tepeamtaish nuwiya juki

aents aidau ayugnatin asamtai. ³⁶ Aatus trigo ijumjamu asamtai, Egipto nugkanum siete mijadai yapajut tepeamtaish nuwiya juki, juju nugka juwiya aents aidau ayugnati nujantai jinawainum”, tiuwai.

José Egipto nugkanum apu wajasa inamjamu

³⁷ Tusa José timatai, faraón niina inake aidaujai nuna antukag shiig wakejukajui. ³⁸ Nunik faraón niina inake aidau chichajak:

“¿Juju aentsun Apajuín Wakani aja imajush tikich aentsush igku-mainkait?” tiuwai. ³⁹ Tusa José chichajak:

“Amina Apajuí yaimpasmatai yachaitam imanuk tikich aentsuk juwig shiig atsuinawai. ⁴⁰ Ame wi pujusa inamtaijui pujusa inamjata, nuniamin ashí mina aentsug aidauk ame tabaun umigtamkatnume. Untsu ima wiki apu ekemtaijin eketu asan amina wagagkau atatjai”, tiuwai. ⁴¹ Nuna tusa: “¡Nijah, wi amina juju nugka Egiptua juna apuji ati tusan adaijame!” tiuwai.

⁴² Nuna tusa apu faraón niina patakumtaijin juki José patakuauwai. Dutika patakua chichaak: “¡Jáanch shiig pegkeg lino najanamu jukijum apegatajum!” tima dutiksag apegawajui. Dutikak nugkutai oro najanamunashkam anujajui. ⁴³ Dutikawagmatai niina tikich carrojin ekeniuwai, dutika ekeni aents aidau chichajak: “José eme anentakum tikishmaja pujusjum senchi untsumkajum: ‘¡Yamaik iina apujig juwai!’ titajum”, tiuwai. Tusa tiajam ashí aents aidauk tikishmag pujusag untsumaidau. Aatus faraón Josénak apu adaikauwai, dutikam nii Egipto nugkanum inamjauwai. ⁴⁴ Tuja duwi pujus faraón José chichajak:

“Witjai dekas apu faraón chichame antugtainuk, tujash yamaik ashí Egipto nugkanum aidauk amina chichamjumin antugtamiagtatui, makichik aentskesh intimjupakchagtatui”, tiuwai.

⁴⁵ Tusa faraón José daajin yapagtua amek yamaik Safenat-panéah ata tusa adaikauwai. Dutika sacerdote Potifera yaakat On tawa nuwiya aajakua nuna nawanji Asenat aajakua nujai nuweauwai. Dutikam nuadui José ashí Egipto nugkanum wekagas inamjauwai.

⁴⁶ José jukiag faraón pujamunum ejegawaju aina nunak treinta mijanji ajai dutikau ainawai. Dutika apu adaikam faraón pujamunum pujau jüinki, Egipto nugkanum yaakat aidau diyak weuwai. ⁴⁷ Tuja siete mijanai ajak aidauk shiig kuashat nejeauwai, ⁴⁸ imaniku asamtai, José ashí nugkanum trigo juukbau aidau siete mijanai yaju yajumkawa maki makichik yaakat aidauunum ijumjauwai. ⁴⁹ José trigonak nayantsa kamatkajiai betek ijumjauwai. Imatikamu asa dekapamainchau asamtai dekapachui.

⁵⁰ Tuja eke yapajut nagkamnatsaig José jimag uchin niina nuwe Asenatai akiauwai. ⁵¹ Yama nagkamchaku akiamujinak Manasés adaikauwai “wi waitiamugnak Apajuí ashí mina pataag aidaujai sakapitkajuae” taku tuu adaikauwai. ⁵² Untsu tikich uchiji ekeun Efraín adaikauwai. Nunak “juju nugka juwi pujusan waittsawaitag nunú nugkanmak pujaig, Apajuí minak jimag uchin sujuse” taku tuu adaikauwai.

⁵³ Tuja siete mijanai Egipto nugkanum ajak aidau kuashat nejek nagkaemakiu ai, ⁵⁴ nuigtu siete mijanai nujan tepeattawai tusa José tibaunak imanisag uminkauwai. Nuadui ashí nugka aidauunmak nujan tepeauwai, untsu Egipto nugkanmak yumainuk aajakui. ⁵⁵ Tuja egiptunmaya aents aidauhkam dita yumainjin amukag faraógan jegajiang yutain segaidau, dutikam ditan chichajak: “Joséyai wetajum, nunikjum nii wajinjupatig duke umiktajum”, tiuwai.

⁵⁶ Ashí nugkanum yapajut tepeau asamtai, aents aidauk senchi waituidau, imaniagtai José trigo ijumjamun ashí ujainiuwai egiptunmaya aidau sumaktinme tusa, yapajut aan senchi tepea wegau asamtai. ⁵⁷ Tuja ashí tikich nugkanmaya aents aidaush José trigo ijumjamu sumakmi tusag Egipto nugkanum shimujakui, wagki ashí tikich nugkanmakesh yutaig shiig atsau asamtai.

42

José yachi aidau yutain sumakagtatus Egipto nugkanum shiyakagbau

¹ Egipto nugkanum trigo ayawai tabaun Jacob dekaa, niina uchiji aidau chichajak:

“¹Atumesh wajuakeakjumea pempeentunikjumes ayatkesh niinish bat-satjume? ² Mina yamai ujakaje Egipto nugkanum trigo kuashat ayawai tusa. Aan batsamtsuk atumesh wejum trigo sumakjum utitajum, dutikawagmin nunú, iish yuwami tikima nujantai jinawaig”, tiuwai.

³ Tusa tima José yachi diez aajaku aina nunú Egipto nugkanum trigon sumakagtatus shiyakajui. ⁴ Nunik shimiagtaish Jacopak Benjamín José yachi aajakua nunak akupkachui, wagki jusha José megkaekauwa antsag megkaekai tau asa. ⁵ Tuja ashí Canaág nugkanmag nujan tepeau asamtai, Israela uchiji aidauk tikich aents aidaujai ijunag Egipto nugkanum trigon sumakagtatus shiyakajui.

⁶ Josék Egipto nugka apuji aajakui, nuniau asa aents tikich nugkanmaya trigon sumaktatus kauntaik nii sujujakui. Nuna sujak pujai, niina yachi aidaushkam jegawajui, nunikag José emtin tikishmajag nijayin nugka antig pujusajui. ⁷ Nuniagtai José diikma niina yachi aidau wainkauwai, dutika wainkayatak dekachu utugmaina numamtuk senchi chichajak:

“¹Atumesh tuwiyatigmea minagme?” tiuwai.

Tusa tama dita ainak:

“¹ik canaágnumiati trigo sumaktasa mininaji”, tiajui. ⁸ Tuja Josék niina yachi aidauk shiig wainkauwai, untsu ditak juka mina yatsujuapita tichajui.

⁹ Nuadui José niina yachi aidau emematam atinun kajamjamun adeajui, nunik chichajak:

“¹Atumek dekamin ainagme, nunin asajum wajuk utuaik jetemainaita tusajum, dekamataasa yujagme”, tiuwai.

¹⁰ Tama dita ainak:

“¹Atsa apuh! Ii amina inakem aidautik duka nuniatsji, ayatak trigo sumaktasa yujaji”, tiajui. ¹¹ Tusag: “Ashí ii ainag jutiik makichik aishmagkuk akiamu ainaji. Iik aents pegkeg ainaji, tuja dekamati tusa awemataigkesh ainatsji”, tuidau.

¹² Tiagtai José chichajak: “Atsa, wainkajum tajume, atumek wajuk utuaik jetemainaita tusajum dekamataasa yujagme”, tiuwai.

¹³ Tusa tama dita aimainak:

“¹Juti amina inakem aidautinak, iina apajig doce akimpakui, tuja iik Canaán nugkanum batsamin ainaji. Tuja makichik iina yachi ekeu iina apajijai juwakmae, untsu tikich iina yachi aajakua duka atsawai, jakauwai”, tuidau.

¹⁴ Nuna aatus tiagtai José ataktu ditan chichajak:

“¹Nijah, juwi tajime! Atumek dekas dekamin ainagme, ¹⁵ tuja yamai dekapsatjime atumesh dekaskeash chichajum: Junak faraógka daajin atum umiktinun tajime. Atum chichaakjum, yatsug ekeu pujawai tajum

nunú tatsaigkik juwi pujajum duka shiyakchattagme. ¹⁶ Yamai atum ainajum anuiya makichik akupkatajum, yatsum ekeun utiti. Untsu tikich aidautigmek juwi achinkajum batsamsattajume, nuni dekajuattajime atumesh dekaskeash chichajum nunak. Untsu nunú dekaskechuitkuig, dekamin aidauwap tuu yujawa titatjime. ¡Junak dekas faraógka daajin tajai!” tau.

¹⁷ Nuna tusa aents achika chimpitainum chimpia kampakum tsawan batsasui. ¹⁸ Dutika nunú kampakum tsawan nagkaemai ditan chichajak:

“Wika Apajuinak ishamajai, nuadui atumesh wi tajim nunú betek umiktajum, nunikagmin wishakam tsagkujan mausuk idaisattajime.

¹⁹ Atum dekas aents pegkeg ainakjumek, makichik atumi yatsum juwi ukuktajum, untsu tikich aidautigmek trigo jukijum wetajum atumi patayi aidau yuwatnume. ²⁰ Nunikjum atumi yatsum ekeu pujawai tajum nunú itagtuatajum, dutikawagmin dekaskeash chichajum nunú dekaami. Untsu nunú dekaskechuitkuig atumek mantamnattagme”, tiuwai.

Tusa tama ditashkam ayu duke ati tiajui. ²¹ Nuna tusag diták pempeentunikiag chichagdayinak:

“Juka iik iina yachi sujukuitag nuadui jutikam aji. Iina yachi buutak, wait anenjugtajum tusa imatjutpakuish, antugtsuk sujukuitag nuadui juju utugchata juka igkuaji”, tuidau. ²² Tiagtai Rubén ditan chichajak:

“Wika juna aneasan uchi maawaigpajum tusa tamaikujum, minash antugtukchau ayugme; yamai nii maamunum jutika waitkam ainaji, nunú umiaku aatsa dekapjagmi”, tiuwai.

²³ Nuna tusa chichainakush Josék ii chichamunak antawapi tuinachu, wagki nii chichamunak tikich aents etsegtuidau asamtai.

²⁴ Aatus dita chichainamun antuk, Josék tikich yantamnum wee buu-tiuwai. Nunik ataktu wakitki niina yachi batsatbaunum jeganta dita wainbaunum Simeógkan etegka juki egkeatajum tima egkea emetuuwui.

²⁵ Nuna dutika José niina aentsji aidaun inajui: “Tikich aina auk ditá costaljín trigo aimjugtajum, dutikakjum dita kuichkijishkam jukijum awagtukjum, dita trigo chimpia juwamujin egketuatajum. Tuja jintá wenak yuwawagtinchakam dutiksagmek susatajum”, tiuwai. Tusa inajam imitksag umikajui.

²⁶ Dutika umigkam ditá burrojin trigo aimjamun patag jukiag shiyakajui.

²⁷ Nunik we wenakua dita kajigtinum jegantag, makichik burrojin ayujatatus costaljín atia diikma wainkauwai trigo sumaku kuichik akik-makbaur imaniasag awantak egkemtatman. ²⁸ Dutika wainak, yachi aidaun chichajak:

“¡Antuktajum, wi kuichkin akikmakmag nunak awagtugkine! ¡Nijah mina costaljui egketana!” tau.

Tutai ashí wainkag senchi puyatuk kujainak pempeentunikiag tudayinak:

“¿Wagka Apajuish junash jutijamae?” tuidau.

²⁹ Nuna tusag we wenakua ditá apaji Canaán pujamunum jegawajui. Nunikag dita wekaesa wainkamujinak ashí ujakajui, nuna ujakag nuadui apajin chichajuinak:

³⁰ “Apu Egipto nugká apuji pujuma nunú iinak shiig senchi chichag-tamkame, dutijamak: ‘Atumek dekamin ainagme’, tusa tujamae. ³¹ Tusa tujamkui ii ayaaku: ‘Atsa, iik aents pegkeg ainaji, dekamnukesh ainatsji’, tusa timaji. ³² Tuja nuigtushkam chichagku: ‘Jutiik ashí ijumjamak

makichik aents akighbautik doce aayaji; nuniamu makichik megkaekauwai, untsu tikich ekeuwa duka amina aujai Canaágnun pujume', timaji.

³³ “Tusa tajin nii chichagtamak: ‘Ayu, dekas aents pegkejash ainajum dekapsatjime, juwi makichik yatsum ukuktajum nunikjum ujumak trigo jukijum atumi pataim yuwatin ejetuatajum. ³⁴ Tujash nunú susa ukuakjum atumi yatsum ekeu tajum nunú itagtuatajum. Dutikawagmin duwi wisha aents pegkejap ainawa titajime. Nunú itawagmin wainkan, juju yatsum ukuajum nunashkam jiktajai, dutikamtai atumesh shiig agkan juju nugka juwish yujasminjum’ tujamae”, tuidau.

³⁵ Aatus apajin ujakag idayinak nuadui, maki makichik ditá costaljin atija diikma kuichik ijiamu aajakuk imanisag chimpintatman wainkajui. Dutika kuichkin wainkag ditá apajijai senchi ishamkajui. ³⁶ Nuna wainak Jacob chichaak:

“Minak atumek shiig uchigtuchu ukugjume. Josésh megkaetugkauwai, Simeógshakam antsag wakitkig taache. ¡Yamai juju mina uchig Benjamín jujujtittagme! ¡Wika mina uchignak megkaejan wegag jama!” tau.

³⁷ Tutai Rubén apajin chichajak:

“Apawa mina idaitugsata, wi Benjamígnak ayan kuitamsan awagkin itajuatjame. Untsu wi awagki itachmataig, mina uchig jimaja au maata”, tiuwai.

³⁸ Tusa tama Jacob ayaak:

“Mina uchujuk atumjaig makichkish wechattawai. Niina yachi José jakamtai ima nigki juwake. Namputchawame jintá weagmin mina uchig megkaekamtai, wi múuntuch wajasa pujag nuna wake besemag dekapeakun buu buutkawa jakuig, duka atumi utugchatji atatu”, tiuwai.

43

Benjamín juki Egipto nugkanum webau

¹ Tuja aan nagkaemas nujan tepea wegau asamtai, ² yutai sumaka ikaunmamu ashí amuekamtai, Jacob niina uchiji aidaun chichajak:

“Ataktu wejum trigo sumakjum utitajum, yumain atsugtamji”, tiuwai.

³ Tutai Judá apajin ayaak:

“Tujash apu iina chichagtamak: ‘Atumi yatsum ekeu tajum nunú itachiatkugmek, juwi ataktu taagmek waitkaigpa’ tujamayi. ⁴ Tujabiu asamtai iina yachi ekeuwa anú jutijai akupeakminig, shiyaka trigo sumaka ikaunmamainaitji. ⁵ Untsu ame iina yachi ekeuwa anú awemashkuminig, iishkam yutai sumakuik wechattaji. Apu iina chichagtamak yatsum ekeu itachiatkugmek, juwi ataktu taagmek waitkaigpa tusa tujamayi”, tau.

⁶ Tusa tama Israel chichaak:

“¿Wagka minash ibau pegkegchaush itagtuaugme?

“¿Wagka nunú apush, tikich iina yachi ekeu ajutjamji tusagmesh ujakmajume?” tiuwai.

⁷ Tama dita ainak:

“Iishkam ujamainchawaitku, nii iina patayi aidaun pachis inimpakui ujakmajai. Dutika ajin nii inimpak: ‘¿Atumin apash pujawak? tusa ataktu inimpak, ¿tikich yatsumish pujatsuak?’ tusa inimpakui, aus yatsum ekeu itaata tujamti tachau asa ujakmajai”, tiajui.

⁸ Nuna tusag Judá niina apaji Israelan chichajak:

“Apawah, uchik mina idaitugsata nii juki wegagmi, nuniashkuik ashí iina uchiji aidaujui nuigtu, ame aatsa nujantai jinattaji. ⁹ Wi niinak

kuitamkattajai. Tuja jintá weamunum utugchat nagkaemakmataish, wi nunak umiktajai. Wi juna tiuwaitkun awagkin juwi itashmataig, ashí nunú utugchatak minai juwakti. ¹⁰ Ame sujimá pujachkuminig iik jimajakesh yutai sumaka ikaunmamain wajaji”, tiuwai.

¹¹ Tusa tama apaji ditan ayaak:

“Ayu, duka nunisag uminkati, tuja nuniktin asamtai, iina nugkenia dekas waji shiig pegkeg aina nunú apu susatin etegja jukitajum: Ujumak bálsamo, ujumak dapa yumiji, kugkuin mirra, nueces, almendra aaja tinamjajum jukitajum. ¹² Nuigtushkam jukitajum kuichik yama nagkamchaku jukibiujum nuni kuashat. Dutikajum kuichkin awagtugmakiagma nujai ijumajum susatajum, namputchawame dewaka egkeachajiwash.

¹³ ¡Ayu yamaik yatsum ekeuwa dushakam jukijum ataktu wetajum nunú aentsjai chichaakjum. ¹⁴ Apajuí ashí senchigtina nunú atumnak yaimpaktinme, dutijamamtai apu wait anenjamag yatsumin Simeógan agkanmitka, yatsum Benjamígnash emettsuk awagkiti. Untsu namputchawame nuna awakeachkuish, wika uchigtuchukesh juwaktin atajai!” tiuwai.

¹⁵ Aatus timatai Jacopa uchiji aidau waji apu susatin aidan ya-juakag nuigtushkam kuichkin yaunchuk jukimun nagkaesau jukiag, Benjamígnashkam jukiag Egipto nugkanum shiyakajui. Nunikag José pujamunum jegawagmatai, ¹⁶ José Benjamígan niina yachi aidaujai wajaun wainak, aents José jenian kuitamnun chichajak:

“Juju aents aina juju yajuakam mina jegajui ejegata, dutikam baka maam inagkata. Yamaik ditak etsa tutupit ai, wijai yujumkan yuwawagtatui”, tiuwai.

¹⁷ Tusa tima niina inake waji kuitamnuk imatiksag umikui. Dutika nigki aents aidanashkam yajuak José jeen emauwai. ¹⁸ Tuja yajuaka José jeen emam senchi ishankajui nunik diták pempeentuniag chichainak:

“¡Junak anagtamak aikagmawai! Ii kuichik akikmakbaun awagtugmakbau egketu wainkabiag nuadui jutijamji, niina inake etami, ashí iina tagkuji aidaujai waitkagmastatus”, tuidau.

¹⁹ Nuna tusag jegaa eke waittsuk José wajijin kuitamnun jegaantajui nijai chichastatus. ²⁰ Nunik jegantag chichajuinak:

“¡Apujuh tsagkugtugta! Ii yaunchuk taamiag duka trigo sumaktasa taamiaji. ²¹ Tujash nunú sumaku kuichik akikmakmayag nunú ii kanagtinum jeganta costal atia diikma, kuichik ii akikmakbau aajakuk imanisag egketaidau wainkabiaji. Dutika wainkau asa yamai awagkitasa itaaji. ²² Tuja nuigtushkam trigo sumaktasa kuichik nuni kuashat itaaji. Untsu yaki kuichkinash awagkish egketjamayawa duka dekatsji”, tuidau.

²³ Tiagtai nunú inak ditan ayaak:

“Wainkajum puyatkaigpajum, aunak Apajuí atumi apa Apajujiya dutsu costaljuninig egketjamayatai, wi atum akikmakbaunak ashí jukimijai”, tiuwai.

Nuna tusa idayak Simeógan jiiki juki dita batsatbaunum ejentauwai.

²⁴ Nuna dutika ashí yajuak José jeen utsauwai, dutika yumin juki susauwai nawen dijagtinme tusa, nuigtushkam dita burroji aidanashkam yutain juki ayugtukui. ²⁵ Tuja etsa tutupit ai yujumkan yuwak José taatin asamtai, ditashkam nuwi yuwatnunak dekainau asag dakak batsamas niina anentag susatnun umikajui.

²⁶ Dutikau asag José taamta, anentag susatin itaamu aidan jukiag susajui. Nuna suwinak tikishmatjag tsuntsumawag nijayin nugkan antig pujusajui emematuinak. ²⁷ Nuniagtai José ditan iniak:

“¿Atumesh pegkejak yujajum?” tau. Tusa ataktu iniak:

“¿Atum chichaakjum iina apajig múuntuch wajas pujawai timaijum dusha pegkejak pujuma?” tau.

²⁸ Tusa iniam eme anentus tsunsuma chichajainak:

“Iina apaji amina inaknea duka eke jatsui, pegkeg pujume”, tuidau.

²⁹ Tusa tiagtai José ditan diistakama niina yachi Benjamín nunú nuwanmak akiinauwa nunú wajattaman wainak chichaak:

“¿Jukait atum chichaakjum iina yachi ekeu pujawai timaijum nunú?” tau. Tusa: “¡Uchuchih, Apajui pegkegnum yumigtamsati!” tiuwai.

Juna aatus tusa, ³⁰ José niina yachin wainak senchi wake besemag buutmain dekapeak, ukuki niina kanutaijin tupikaki waya buutiuwai.

³¹ Nunik buuti nagkanak yumin juki yapin niijai ataktu jegan niina wajijin kuitamnun chichajak:

“¡Yutai pekastajum!” tusa inamjauwai.

³² Tusa timatai inak aidaushkam Josénak makichik mesanum ekettsajui, dutikak Jacopa uchiji aidau yuwatnunashkam tikich mesanum ekettsajui. Tuja egiptunmaya aents aidaushkam aantsag ditash kanakag yuwidau. Wagki egiptunmaya aentsuk Hebreo aentsajig tsanigkag yumainchau asamtai, dutikau ainawai. ³³ Tuja José yachi aidau mesanum pekamainakug iwaiyá ekemsantai, ekeu aidaushkam nunisag ekemsag pekaamak tsakatnum nagkankauwai, José nuni pekamsati tibaunak imanisag. Nuwi pekamsag anentai jegashmin dekapenak pempeentunikiag niinidau.

³⁴ Yutai aidaunashkam dutiksag maki makichik pekattsauwai. Untsu Benjamínkan ima kuashat tikich aidaun nagkaesau aimjuk ekettsauwai. Aatus ashí ijunas shiig yuwawag, umutnashkam uwajag, dakunkut nagkankajui.

44

José shikika umutaiji

¹ Nuna yuwawag, nuadui José niina inake niina wajijin kuitamnun juna aatus inajui:

“Juju aents aidau jukiagtin dita costaljin trigo aimjugta, dutikam maki makichik ditá costaljin awantak kuichik egketuata. ² Nunú dutikakum mina shikika umutaig plata najanamua nunú jukim, dita yachi ekeu trigon sumak kuichkin akikmakma nujai apatkam niina costaljin awantak egketuata”, tiuwai.

Tusa tima José jenia waji aidaun kuitamnushkam imatiksag umikui.

³ Dutika ashí umigkagmatai, wetajum tusa José tima, kashikmas etsa yama jiinai burrojin yajuak shiyakajui. ⁴ Nunik yaaktan ukukiag atushat kuwagainsaig, José niina inaken chichajak:

“Aents shiyakagma nunú pataetuktajum, dutikajum amaigkajum, juju aatsa titajum: ‘¿Wagka atumesh shiig kuitamkamaitkugmesh pegkegchaunmash iikagtagme? ¿Wagka shikika umutai plata najanamush kasamkaugme ⁵ mina apug duwi uumak dekanuwe dusha? Juka atumek shiig pegkegchau ankaugme’, tusajum titajum”, tiuwai.

⁶ Tusa tima José inake ditan pataetuk amainag, apu José tibaunak imatiksag tiuwai. ⁷ Tusa tama dita aimainak:

“¿Wagka amesh ajamesh jutiish tukagtagme? ¡Iik makichkish kasamchau ainaji!” tuidau. Nuna tusag: ⁸ “Iik kasachu asa iina costalji canaágnun jegaa ujaka diikma, kuichik chimpiju wainkaish juki awagtuki itajua sumag aikayatkuish, ¿wagkaik wainkaish iina apuji jeniash, kuichkish,

orokesh kasamka jukish ukuktaji? ⁹ Untsu ame inakem ainag juwiyash yana costaljin egketuk wainkatam duka mantamnati, nunikmatai tikich aidautik apu inake wajasagmi”, tuidau.

¹⁰ Tusa tiagtai inak ditan chichajak:

“Ayu, atum tajum duka nunisag uminkati. Tujash yana costaljin egketuk wainkatag duke mina inakjuk atatu. Untsu tikich aidautigmek agkan juwaktatjume”, tiuwai.

¹¹ Tusa timatai maki makichik ditá costaljin nugká apusag jigkakbaun atijag ijumjajui. ¹² Dutikawagmatai inak ditá yachi iwainum nagkama diya diyakua dekas ekeunum ejekama Benjamígka costaljin apu shikika umutaiji egketun wainkauwai. ¹³ Dutika wainkamtai, puyatkgag wake besemag dekaeamunum jáanchjin japiki ichigkag* ataktu dita costaljinak burrojin patag yajuakag waketug yaakat jegawajui.

¹⁴ Nunik Judá niina yachi aidaujai waketug José niina jeen pujai jegawajui. Nunikag tikishmatjag nijayin nugka antig pujusajui. ¹⁵ Nuniagtai José ditan chichajak:

“¿Wagka atumesh anísh yujagme? ¿Atumek dekatsjumek aents witag juninuk anentaimas dekagmamaina duka?” tau.

¹⁶ Tusa tutai Judá ayaak:

“¿Ii tumainuk makichkish atsugtamji! ¿Iik takamsachji takuish wajuk ejetajiki? Apajui iina pegkegchajuinak waitjamkaji. Nuadui ii aidautik ame shikika umutaigmin takaku wainnaka nujai, ashí amina inakem waigkagtaji”, tiuwai.

¹⁷ Tusa tama José chichaak:

“¿Atsa duka makichkish nunikchattawai, ima mina shikika umutaijun takaku wainnaka duke mina inataijuk atatu! ¡Untsu tikich aidautigmek shiig aneasjum agkan atumi apa pujamunum shiyaktatjume, makichkish atumin waitkagmamainuk atsawai!” tiuwai.

Judá Benjamígkan ayamjak chichakbau

¹⁸ Tuja Judá Josén jegantun chichajak:

“Mina apujuh, wait aneasam kajegtukaipa, wisha makichik chichaman ima amek antamin titajame. Amek dekas faraógkajai betekaitme. ¹⁹ Ame jutii inijatsum, atumi apash pujawak, tuja tikich yatsumish atsuak tukagtakmin, ²⁰ ii ayaaku, iina apajig shiig muumpakiu pujugtamji, tuja iina yachi tsakat pujawai iina apaji muumpakiu ai akiinawuwa nunú. Tuja nunak iina apajig shiig senchi aneenuwe, wagki nunú nuwanmak jimag akiinawuwa tikich jakamtai, makichik juwaku asamtai, timaiji. ²¹ Tusa tajin ame chichaakum: ‘Nunú itagtuatajum wainkatjai’ tusam segajatmayume, ²² tusa takumin ii ayaaku: ‘Nunú uchik apajin ukukig minimaitsui, wagki ukuamak apaji jamain asamtai’, timaiji. ²³ Tujash ame chichagkagtakum: ‘Nunú yatsum ayasam minachkugminig, makichkish awayashtatjime’, tukagtibiume.

²⁴ “Tusa tukagtiamin iina apaji jegajua juna aatus tujamaji tusa, ashí imatiksaik ujakmai. ²⁵ Nunika pujajin iina apaji chichagtamak: ‘Ataktush wejum trigo sumaka utitajum’, tusa tujamaji. ²⁶ Tusa tujamkui ii chichaaku: ‘Apawah, iina yachi ekeuwa nunú jutijai minachkuig iikik wemaitsui, wagki nii minichmataig, nunú apua duka makichkish jegajuaik waimaitsui’, timaiji.

* **44:13** “Jáanchjin japiki ichiijaku aina” nunak dita wake besemag dekaeamunum dutikajaku ainawai.

²⁷ “Tusa tajin iina apaji chichagtamak: ‘Atumek dekagme mina duwag jimagchik uchin uchigmakua duka; ²⁸ nuwiya tikichia duka ayatak megkaekauwai, nuniku asamtai, yamaikish waintsujai. Wika dekas kuntin ikamia kajenuap yuwawaita tiuwaitjai. ²⁹ Tuja juju niina yachi wijai puja nunú jukijum namputchawame megkaekamtaig duka atumi utugchatji atatu, wi muumpakin pujag nuna wake besemag anentaimkun buu buutkawan jataik’, tujutmayi.

³⁰ “Tusa tujuti asamtai, juna uchin ukukin wiki jegamtaig, juju ima senchi aneetaiji asamtai, ³¹ iina apajig uchijin wainkachag jamainai. Nunik jakamtaig ii utugchatji amainai, wagki múuntuch wajasu asa senchi ane anentaimkawa jamain asamtai. ³² Nuadui wi mina apajun chichagkun: ‘Apawah, wi uchinak kuitamkan itatjai, wi juna tiuwaitkun awagkin juwi itashmataig, ashí nunú utugchatak minai juwakti’, tibaijai.

³³ “Nuadui apuh wi amina tajame, wait aneam antugtukta juju uchua nunú amina inakem amaina nuna wi juwaktajai. Nuniai nigka tikich yatsug aidaujui wakitkiti. ³⁴ ¿Wagkanuk uchi ukuknush wikish mina apag pujamunmash jegatja? Wi uchi ukuki jega ai, mina apag anentaimak waitiakui diitan dakitajai”, tusa Joséni tiuwai.

45

José niina yachi aidaunum iwainmamkamu

¹ José ugmamá pujumainchau dekapeak, niina inake aidau emtin tumainchau asa, senchi unsumak, tikich aidautigmek ashí jijnajum shiyaktajum tima, jijnag ukukiaju. Nunikagmatai niina yachi aidaun chichajak:

“iWika atumi yatsum Joséyaitjai!” tusa etsegtumaku.

² Nuna tusa Josék shiig senchi jiika buutu, imatu asamtai kuashat aents egiptunmaya aidau antukajui, tuja faraógka pujusa inamtaijinchakam dekawajui. ³ Tuja José niina yachi aidaun chichajak:

“iWitjai Josénik! ¿Mina apajush iwakuk puja?” tau.

Tama ditak ishankag aimkashmin wajas ijuntsajui. ⁴ Nuniagtai José ditan chichajak:

“iAantsuk wait aneamsum juwi minai kaunatajum!” tau.

Tusa tama jegantagmatai yachi aidaun chichajak:

“Witjai atumi yatsum Josénik, atum Egipto nugkanum sujutkauwaitjum nunú. ⁵ Tujash wainkajum wake besemag anentaimkujum atumek pempeentunikjum kajegdaikajpajum, mina sujutkauwaitjum duka atum dutijatsjuminig, Apajui pujutan ayamjuktin ati tusa juni awetiuwai.

⁶ Juju nugka juwig nujan tepea jimag mijan weawai, tuja nuigtushkam cinco mijana imajin ajak ajakmamash tsapaishatui. ⁷ Nuniktin asamtai Apajui juni akupkata tujamaidau asagmatai, minak atumek juni sujutkau ainagme. Nii yutai aidaun ijumjatin ati dutikamta nuna yuwinak iwaku atum wegantush juju nugkanum batsamsatneme tau asa.

⁸ “Atumchawaitjume mina juju nugkanum awetiutigmek. Apajuiyai mina juwi itajua faraógka chichajin ema apujtusa duka, nuadui minak ashí niina jenia aina nunak amina chichamjumin batsasta dutikakum ashí Egipto nugkashkam amek kuitamkata tujutiuiwai. ⁹ Yamaik wamkesjum mina apag pujamunum wetajum, nunika jegajum juju aatsa ujaktajum: Juna aatus amina uchijum tawai: Apajui minak ashí egiptunmaya aentsun apuji eti apujtuse. Dutijuau asamtai megkaetsuk wamkesam juwi taam

waitkata. ¹⁰ Núnikam nugka Gosén tutaya juwi ame uchijum aidaujai, tijajum aidau, tagkujum aidau, nuigtu ashí amina wajijum aidau yajuaka kaunam wi pujag juwi tikiju pujusta. ¹¹ Juwi pujusamin wi amina pataim aidau tuja amejai aents yujau aidau yuwawagtinun yutain amastajai nujantai waittsajum; nujan tepea nunak mino atatuí, titajum.

¹² “Tuja wi taja nunak mina yatsug Benjamíkgash atumjai wajas antamunum tajai. ¹³ Juju aatsajum mina apag wi Egipto nugkanum apu wajas pujaq nunú ujaktajum, tuja nuigtu tikich juwiya wainkaujum dushakam ujaktajum. ¡Wamak wejum mina apag utitajum!” tiuwai.

¹⁴ Nuna tusa yachi Benjamíkgan pagkuk buutu. Nunitai Benjamíghakam Josén pagkuk wajas buutiuwai. ¹⁵ Nunik duwi tikich yachi aidounashkam pagkuk yapinum kugkuak buutiuwai. Nunikag duwi José yachi aidau niijai shiig chichasajui.

¹⁶ Nunú José yachi aidau kaunawaje tabau faraógka pujusa inamtaijin antuekauwai, nuna antuka faraón niina atuwe aidaujai shiig aneasajui.

¹⁷ Nunik faraón Josén chichajak:

“Amina yatsum aidau kauna nunú trigon aimjag burrojin pataja jukiag Canaán nugkanum wetinme, ¹⁸ nunik jegawag dita apajin, patayi aidaujai yajuakag juwi itatnume. Dutikawagmatai wi dekas dita pujustinnak nugka pegkeq Egipto nugkanum awa nuna susatjai, dutikawajam nuwi pujusag shiig yuwawag pujustinme, tajai. ¹⁹ Ame juwiya carreta aidau ishitkata, nuwi ditá nuwe aidau uchiji aidaujai yajumainak, atumi apanshakam jukiag itatnume. ²⁰ Dita wajiji aina nunak puyatjukainmegka, wagki egiptunmaya dekas waji pegkeq aina nunú ditanuk agtin asamtai”, tiuwai.

²¹ Tusa tima Israela uchiji aidauhkam, ayu duke ati tiajui. Tiagmatai José nii ishitkauwai carreta aidau faraón tibaunak imatiksag, dutikak nuigtu jintá weaku yuwatnujashkam susauwai. ²² Nuigtushkam dita nugkugtunin maki makichik jáanchin tinamiuwai. Untsu Benjamíkgan cinco jáanchin nugkutain susauwai, dutikak nuigtushkam trescientos kuichik plata najanamun susauwai. ²³ Tuja apajinashkam waji shiig pegkeq egiptunmaya aidau etegkeq yajuak diez burronum patag akup-tukui, nuigtu tikich diez burronum yutai trigon pagjai patatug nii jintá minisa yuwatnujin ishitkauwai. ²⁴ Dutika ashí susam nuna jukiag shimiagtai José niina yachi aidau chichajak:

“¡Jinta wesajum wainkajum maani yujaigpajum!” tiuwai.

²⁵ Tusa tima egiptunmaya jinkiag Canaán nugkanum ditá apaji Jacob pujamunum jegawajui. ²⁶ Nunik jegawag, Jacopan ujainak: “Josék yamaikish iwaku pujawai, nuniu asa nii Egipto nugkan apuji wajas pujume”, tusa ujaam puyatuk anentaimak dekaskeash tujutuina tusa dita tuinamunak antugmainchau dekapjauwai. ²⁷ Nunitai dita Joséjai chichasbaunak imatiksag ujakajui. Tusa tamash utujimiatak, José carreta aidau niina jukiti tusa ishitkamun wainak shiig aneasui. ²⁸ Nunik Jacob chichaak: “¡Make yamaik mina uchig José iwaku pujamun dekajai! ¡Nuniku asan wisha wenu iwaku pujag juajuik mina uchijun waipaktajai!” tiuwai.

46

Jacob Egipto nugkanum jegamu

¹ Israel niina wajiji aidau niina tagkuji aidaujai yajuak wea weakua bershebanum jegauwai, nuwi jegaa Apajuí niina apaji Isaaka Apajuíjin

emematak kuntinun maa nuna nejen ujumak apeauwai.* ² Dutika nuwi kanittaman Apajuí kajanum wantintuk niina daajin adaitus untsukui. Tusa untsuam nii ayaak:

“Juwi pujajai, Apujuh”, tiuwai.

³ Tutai Apajuí chichajak:

“Witjai Apajuí amina apa Apajuíjinuk. Egipto nugkanum wetak ishankaipa, awi pujusamin wi ame uchijum wegantunak shiig kuashat ikauntuktatjame. ⁴ Nuadui ame Egipto weam nunak wi uyuntsattajame, tuja wiki ame wegantu aidaunashkam Egipto batsatunak jiijan awagkitnaitjai. Tuja nuigtushkam ame eke jatsminig José kuitamjamkamtai pujusam jakattame”, tiuwai.

⁵ Tusa tima kanag tsawag, Jacob bershebanmaya jiinki weuwai. Nunik wenak Israela uchiji aidau, niina apajin, ditá uchiji aidaun nuwe aidaujai aatus faraón carreta ditan yajuakti tusa ishitkamunum pekamiag shiyakajui. ⁶ Nunik shimak Jacob ashí yajumakui, nuniak nuigtushkam baka aidaunash, uwig aidaujai Canaán pujusa uyujkamu aidaunak ashí yajuak Egipto nugkanum weuwai. ⁷ Tuja niina uchiji aidaush, nawanji aidaush, tijaji aishmag aidaush, nuigtu tijaji nuwa aidaushkam Jacob wetai ashí shiyakajui.

Jacob wegantu aidau Egipto nugkanum shiyakagbau

⁸ Juju ainawai Israel aents aidau Egipto nugkanum shiyakajua duka: Jacob niina uchiji aidaujai.

Tuja Rubén aajakui iwai. ⁹ Untsu Rubénka uchiji aidauk: Hanoc, Falú, Hesrón, Carmí aatus aajakui.

¹⁰ Tuja Simeógka uchiji aidauk: Jemuel, Jamín, Ohad, Jaquín, Sóhar, nuigtu Saúl canaágnunia nuwanum akiinauwa nunú aatus aajakui.

¹¹ Untsu Leví uchiji aidauk: Guersón, Quehat, Merarí aatus aajakui.

¹² Tuja Judá uchiji aidauk: Er, Onán, Selá, Fares, Zérah aatus aajakui. Tuja Er Onágjai Canaán nugkanum jakauwai. Untsu Faresa uchiji aidauk, Hesrón, Hamul aatus aajakui.

¹³ Isacara uchiji aidauk: Tolá, Puvá, Job, Simrón aatus aajakui.

¹⁴ Untsu Sabulógka uchiji aidauk: Séred, Elón, Jahleel aatus aajakui.

¹⁵ Jacob niina nuwe Leayai Padán-aram nugkanum pujusa uchin akigkua duka, juju aajaku ainawai. Tuja niina nawanji Dinashkam. Nuwa aishmag aidaujai ashí ijumjamak, nii wegantu aidauk treinta y tres aents aajaku ainawai.

¹⁶ Tuja Gad uchiji aidauk: Sefón, Haguí, Esbón Suní, Erí, Arodí, Arelí aatus aajakui.

¹⁷ Untsu Asera uchiji aidauk: Imná, Isvá, Ishví, Berían nuigtu ditá umayi Sérah aatus aajakui. Untsu Bería uchiji aidauk: Heber, Malquiel, aatus aajakui. ¹⁸ Tuja juju aajaku ainawai Jacob Zilpáyai uchi akigbau aina duka. Zilpá aajakui Labágka inake, nuna niina nawanji Lean susauwa nunú. Niina uchiji wegantu aidauk ashí ijumjamak dieciseis aajakui.

¹⁹ Jacob niina nuwe Raquelai uchi akiamu aidauk: José, Benjamín aatus aajakui.

* 46:1 “Kuntinun maa nuna nejen ujumak apeauwai” tawa nunak “sacrifici3n” taku tawai. Juna Israel aents aidau kuntinun maawag nuna nejen ujumak, tuja wiyajinashkam apeawag tikich nuna neje ampinjaun ijunag yuujakajua nuna taku tawai.

²⁰ José niina nuwe Asenatai Egipto nugkanum pujusa uchi akiamuk: Manasés, Efraín aatus aajakui. Asenatak aajakui sacerdote Potifera Onnumia aajakua nuna nawanji.

²¹ Tuja Benjamígka uchiji aidauk: Bela, Béquer, Asbel, Guera, Naamán, Ehi, Ros, Mupim, Hupim, Ard aatus aajakui. ²² Juju aajaku ainawai Jacob Raquelai akiamu aina nuna uchiji wegantu aidauk. Ashí ijumjamak catorce aajakui.

²³ Untsu Danka uchiji aidauk: Husim aajakui. ²⁴ Tuja Neftalí uchiji aidauk: Jahseel, Guní, Jezer, Silem aatus aajakui. ²⁵ Juju aajaku ainawai Jacob Bilháyai uchi akigbau aajakua duka. Bilhá aajakui Labágka inake, nuna niina nawanji Raquelan susauwa nunú. Niina uchiji wegantu aidau ashí ijumjamak, siete aents aajakui.

²⁶ Ashí aents Egipto nugkanum Jacobjai ijunag kaunau aina nuwiya ditá nuwe aidau dekapatsuk, aishmag aidauk dekaapamak sesenta y seis aents aajakui, ima dita wegantu aidauk. ²⁷ José Egipto nugkanum pujusa uchi akiamua duka jimagchik aajakui, tuja nujai ashí ijumjamak Jacob wegantu aidauk setenta aents Egipto nugkanmak jegawajui.

²⁸ Nunik wesag Jacob, José ujakta nugka Goségnum pujai igkunkati tusa emtika Judán awemauwai. Nunik Goségnum jegawajun dekaa, ²⁹ José niina inake aidaun inajui nii egkemja wetinjin carro umiktajum mina apajun igkugtajai tusa. Tusa tima umikagmatai, nuwi egkemag weuwai, nunik niina apajin minittaman igkugkui. Dutika igkug pagkuk wajas senchi butú wajau. ³⁰ Imanitai Israel José chichajak:

“Jakautskait tuwamjame, tujash iwaku pujamin paan wainkajame, nuniku asan yamaik jaknush maak anentaimsan jakatjai!” tiuwai.

³¹ Tusa tima José niina yachi aidaun niina apaji patayi aidaujai chichajak:

“Wika yamaik wenu faraógka jegajuan, mina yatsug aidau nuigtu mina apag niina patayi aidaujai Canaágnum batsatu wijai pujustag tusag kaunawaje. ³² Nunik mininak ditá uwigji aidaun baka aidaujai, ashí ditá wajiji aidaunak yajuakag kaunawaje, ditak tuke uwijan kuitamin, nuigtu baka tsakapau ainawai tusan ujaktajai. ³³ Tusa ujaka ai faraón untugmakag: ‘¿Atumesh waji takata takau ainagme?’ tusa inimpakuig:

³⁴ ‘Ii aidaulik uwig tsakapau ainaji, iina apachjishkam tagku tsakapajaku asagmatai’, titajum. Nuadui atumesh juju nugka Goségka juwi batsam-samnujum, wagki egiptunmaya aents aidauk tagkun tsakapau aina nujai ijunja pujutnak dakitín ainawai”, tiuwai.

47

Jacob faraógjai igkunikbau

¹ Nuna tusa ukuak José faraóghan ujaktatus weuwai. Nunik jegaa faraóghan ujaak:

“Mina apag mina yatsug aidaujai Canaán nugkanum batsatu uwig aidaun, baka aidaun, nuigtu ashí tikich ditá wajiji aidaunashkam yajuakag, Gosén nugkanum kaunawaje”, tiuwai. ² Tusa ujaka ukuak niina yachi aidaun cinco etegkeg juki, faraón wainkati tusa ejegauwai.

³ Dutikamtai faraón José yachi aidaun iniak:

“¿Atumesh waji takata takau ainagme?” tau.

Tusa tama dita aimainak:

“Jutii amina inakem aidautik uwig kuitamin ainaji, iina apachji aajaku aidaush tuké tagkunak kuitamajaku asagmatai. ⁴ Tuja nujan tepeau asa canaágnunmak chijichi uwig ayugmainush atsau asamtai, juwi batsamsata-tasa kaunaji”, tuidau. Nuna tusag: “¡Apuh, wait aneasam nugka Gosén tutaya au sukagtusta, iish awi batsamsagmi!” tiajui. ⁵ Tusa tiagtai faraón José chichajak:

“Amina apa, amina yatsum aidau amejai ijunag pujusagtatus kaunawaje. ⁶ Juju Egipto nugka juka ame diyame, nuniau asam amina apa yatsum aidaujai nugka pegkeg Goségka au susata, dutikam, nuwi batsamsatnume. Tuja dita aina awiya tagku kuitamin yacha akuig, nunú jukim mina tagkuju kuitamjutuina nuna apuji adaikata”, tiuwai.

⁷ Tusa timatai, José niina apajinashkam juki faraón wainkati tusa ejentauwai. Dutikam Jacobshakam faraórgan eme anentus kumpamauwai.

⁸ Dutikam faraón Jacopan iniak:

“¿Aminash wajupa mijana ajutjamua?” tau. ⁹ Tusa tama Jacob ayaak: “Wika junika wekae wekaekawan ciento treinta mijan ejelai. Mina mijanjuk ujumchiki, wika mina apag batsamajakajua imaniknuk ejechajai”, tiuwai.

¹⁰ Nuna tusa Jacob faraórgan kumpama ukuak jiinki weuwai.

¹¹ Nunikmatai José niina apajin niina yachi aidaujai faraón tibaunak imatiksag, nugka múun Ramsés tutai aajakua nuwi batsasui. Dutikam ditashkam nuwi nugkeenawag batsamsauwai. ¹² Tuja nuigtushkam José niina apaji, niina yachi aidaujai ashí ditá patayi aidaujai ijumag, yutai aidaun sujaku nujantai waittsainum tusa.

José nugkan trigojai yapajia yajuakbau

¹³ Ashí nugka aidaunmak makichik trigokesh atsujaku, nuadui nujantak aan senchi wegau. Nuniau asamtai, egiptunmaya aents aidauk canaágnunmia aidaushkam nujantai jinuidau. ¹⁴ Tuja Josék egiptunmaya aents, canaágnunmia aents aidaujai yutain sumagtai kuichkijai yapa yapajiakua dita kuichkijinash ashí yajutuk faraórgan jeen ijumjauwai. Dutika yajutuk kuichkigtinchau emakui.

¹⁵ Dutikamu asa Egipto nugkanmash, Canaán nugkanmash kuichik shiig atsutai, wajiyaik akikmakash yutainash sumaktinme nuninash egiptunmaya aents aidau José jagaji chichajuinak:

“¡Wait aneasam yutai sukagtusta! ¿Kuichik atsujui nujantai jinatnume tusamek idaikagtustatam?” tuidau.

¹⁶ Tusa tama José ditan chichajak:

“Kuichkijum atsugtamainakuig atumi tagkujum itaatajum, dutikawagmin nuna juwakun trigon amastajime”, tiuwai.

¹⁷ Tusa tima egiptunmaya aents aidauk ditá caballojin, uwigjin, bakajin, burrojin aatus yajuakag José ikautuawajui. Dutikawagmatai José nuna yajumak makichik mijadai trigon suu pujau.

¹⁸ Tujash nunú mijan nagkaemakmatai, yutain amukag waituinak, ataktu José kautuawag chichajuinak:

“Apujuh, iik dekas kuichkik shiig ashimkaji, tuja iina tagkuji aidaushkam ashí aminu wajase. Ii tikich sujaku yutai yapagmainuk atsugtamji, ima aentsti aidautik iina nugkejaig juwakji. ¹⁹ Nuniau asamtai trigo sukagtakum dekas jutiishkam iina nugkejai sumajatkata, dutikagtuwawamin iishkam faraórgan inake wajasa iina nugkeenig nii takajainaku ajak sukagtusamin nunú ajakma nuwiya yuwawagmi. Tuja ¿amesh wagkamek

jutiish dita nugken ajakma yutsuk batsamas jinaati tusamesh idaikag-tustame?” tuidau. ²⁰ Tusa imatiagtai José nugka egiptunmaya aidaunak ashí sumakui faraógdau atinun, nunak egiptunmaya aents aidau nujantai jinak dita nugken sujukajui. Dutikamuk duka ashí faraógdau juwakui. ²¹ Nuna dutikawag egiptunmaya aents aidauk nugkenchau juwakag, apu inake wajasajui. ²² Untsu ima sacerdote nugkenak sumakchauwai, ditak faraón trigo susam nuna yuwa batsatu asagmatai. Nuadui ditak nugkenak sujukchajui wagki faraón susam yuwa batsatu asag.

²³ Duwi pujus José aents aidaun chichajak:

“Wi atumnak sumakjime, dutikamu asajum atumek yamaik atumi nugkejaí faraógdau wajasugme. Nuadui juju ajak ajakmatin jukitajum, dutikajum ajakmatajum. ²⁴ Tujash nunú ajakma juwakjumek ujumak akankajum faraón susatajum, dutikakjum ipak usumta imajin juwaktata duka ajaatin, nuigtu atum uchijum aidaujai yuwatin, tuja atumjai batsatu aidau yuwatnujai jukitajum”, tiuwai.

²⁵ Tama dita aimainak:

“Amek dekas jutiik shiig wait anenkagtame. ¡Nuadui jutii aidautik faraórgan inake amí tuinaji!” tiajui.

²⁶ Juna aatus José chichaman umikui. Nuadui ashí aents egiptunmaya aidauk ajakmamujinian ujumak akanak faraógka suu atinme tusa tiuwai. Nunú chicham umikbau aajakua duka yamaikish nunisag awai. Tuja untsu ima sacerdote aidauk dita nugkenak faraórgan susachaju asag, tuke akikmachu ainawai.

Jacob inagnak Josén juju umigtukta tusa tibau

²⁷ Israel aents aidauk Egipto nugka Goségnum batsamsajui. Nunik nuwi batsamas shiig kuashat yujakajui. ²⁸ Tuja Jocopak Egipto nugkanum jegag diecisiete mijan pujusui, nujai ijumjamak ciento cuarenta y siete mijan ejejuwai.

²⁹ Israel shiig muumpaki nii jakatnujin dekapmamag, niina uchiji Josén untsuka chichajak:

“Wi titatjam nunú umigtuktinaikumek, amina uwejum mina bakuju wakentin yununkata, dutikam dekas ame segatam nunak umiktatjai tusam tujutta. ¡Wait aneamas wi jakamtaig Egipto nugka juwigkik ukugsai! ³⁰ Wi mina apag wegantu jinawajua núnikan jakamtaish, wi wegantu ukumasbau aina nuwig ukugsata”, tiuwai. Tusa tama, José ayaak:

“¡Apawah, ame tame nunak dutiksanuk umiktajai!” tiuwai. ³¹ Tama Jacob uchijin chichajak:

“¡Dekas nunak umiktajai! tusam yamaya juwik tujutta”, tiuwai. Tusa tama José ayaak:

“¡Nunak dekas umiktajai!” tiuwai. Tusa timatai Israel niina pegakji chaiken tsuntsuma tepes, Josén see tusa Apajuín emematiuwai.

48

Jacob Efraigkan Manasésjai pegkegnum yumigjamu

¹ Nuna ti ukuki dukap tsawan pujatsaig, Josén tajuawag amina apak jamae tusag ujakajui. Tusa ujakam José weak niina uchiji Manasésan Efraigjai juki weuwai. ² Nunik jegamtai uchijum José amina waipaktatus tae tusa Jacopan ujakajui, tusa ujakam niina pegakjin tepau katsuntus nantaki ekemsauwai. ³ Nunik ekemas Josén chichajak:

“Apajuí ashí senchigtina nunú Canaán nugkanum yaakat Luz tutai awa nuwi mina wantintujuk, pegkegnum yumigtak, ⁴ aatus tujutiabi: ‘Antukta nijah, wi aminak kuashat uchin uyuytuktatjame, dutika ai ame wegantu aidauk kuashat kawegkag nugka muunnum yaaktamak batsamsagtinaí. Tuja nuigtushkam ame wegantu aidau juju nugkanak susatnaitjai. Nuadui ajumaish tuke ditanu atinaí’.

⁵ “Tuja, wi eke Egipto nugkanum taatsaig, amina uchijum Efraín Manasésjai akiinau aina duka mina uchig agtatui. Ditak mina shiig uchig Rubén Simeóggjai aina nujai betek agtatui. ⁶ Untsu nuwi nagkama wi juwi taa pujai akiinau aina nunú amina uchigmik agtatui, tuja dushakam Efraígan Manasésjai yachi asag, ditashkam wajiinak nugkajai betek jukiagtin ainawai.

⁷ “Wi Padán-aram pujaun wakitkin wegai canaágnum yaakat Efratanum jegattak amina duku Raquelak jakauwai, nunikmatai nunú jintanmak yamai Belén tutaya nuwi ukusan ukukiuwaitjai”, tiuwai.

⁸ Tusa Israel José uchiji aidau wainak iniak:

“¿Jusha ya ainawa?” tau. Tusa iniam,

⁹ José ayaak:

“Junak wi Egipto nugkanum pujai Apajuí uchin sujusua nunú ainawai” tau. Tusa tutai niina apaji chichajak:

“Wait aneam juwi minai itanta, dutikawamin wi pegkegnum yumigsatjai”, tiuwai.

¹⁰ Tuja Israelak múuntuch wajasu asa shiig wainmachu asamtai, José niina uchiji aidau juki apajin ejentuntui, dutikam pagkuk kugkuasui.

¹¹ Nuna dutika Israel José chichajak:

“Wika aminak jutikanus wainkatja tusankesh anentaimjachuitjai. Tujash Apajuí juni tiu asamtai wainkajame, dutikan amina uchijum aidau-nashkam wainkajai”, tiuwai.

¹² Tusa timatai José niina uchiji aidau juki emenaas awajak, niina apajin eme anentus tikishmatug tsuntsuma nijayin nugka antig pujusui.

¹³ Nunik nagkanak, mai uchijin achikui. Efraígan unsugnum achiak, Manasésan menanum achikui, dutika niina apajin ejentuntui. Dutikamu asa Efraín Jacopa menajin juwatai untsu Manasés unsugnum juwakui.

¹⁴ Tujash Israelak niina uweje untsuja duwi Efraígka buuken achikui. Untsu menajiya duwi Manasésa buuken achikui. Nunak nigka iwai aig, makichik anentaimtugbau au asamtai dutikauwai. ¹⁵ Nuna dutika José pegkegnum yumigkiak aatus tiuwai:

“Mina apachug Abraham,

Isaac Apajuín umijujaku aina nunú

wi yama nagkamchakun akiinawaitag duwi nagkamas yamaikish tuke kuitamja nunú,

¹⁶ tuja Apajuí ángel tumain nayaimpinmaya pegkegchau aidau mash ashí agkanmitkajuauwa dushakam, ¡juju uchi aidau nak pegkegnum yumigsati!

¡Nuadui mina daajush, mina apachug aidau, Abraham, Isaakan daajish,

ditá daajin atakea duwish tuke pachitai atinme!

¡Ditak kuashat uchigtin atinme,

nuninak shiig kuashat yujaktinme!”

¹⁷ Tusa tutai José diikma Efraín ekeuwa nuna buuken untsujin achiaun wainak makchau diisui, nuniak apaji uweje untsuja nuna achijuk juki uchiji emkau Manasésa buuken achimtikatag tiuwai, ¹⁸ Dutikak:

“¡Atsa apawah aikawaipa! ¡Juwai emkauwa duka, juna buuken uwejum untsugmea nuadui achikta!” tiuwai.

¹⁹ Tusa tamashkam apajig uchijinak antugtsuk chichajak:

“¡Ehe, uchuchih nunak dekjai! ¡Niishkam kuashat yujaka nugka muunnun yaaktamak batsamsatnai! ¡Tujash, niina yachi ekeuwa nunú ima senchigtin atinai! ¡Nuadui nii wegantu aidauk shiig kuashat agtinai!” tiuwai.

²⁰ Nuna tusa nunú tsawantaik Jacob ditan pegkegnum yumigkiak aatus tiuwai:

“Tikich aidaush pegkeg yumigkia nuna jukitag tusag atumin pachipasag: “¡Apajuí Efraígan Manasésjai yaigkua dutika inash yaimpakti tiagtinai!” tau.

Nuna aatus tusa Israel Manasésan buuken niina uweje untsuja duwi achimainun idayak Efraígka buuken achikui.

²¹ Nuna dutika Israel Joséan chichajak:

“¡Antukta nijah, wika jakattajai; tujash Apajuí atumjaig pujuttawai! Nuniau asa atumi apachjumi nugkeenig awagtamkiagtinai. ²² Tuja aminak yatsum aina nuna nagkaesau pegkeg yumigkin amaaajai: Wi amorreo aents aidau depetka jujukbau, nugka Siquem tutaya nuna amaaajai, nunú jukitin ata”, tiuwai.

49

Jacob jakattak tepesa chichakbau

¹ Nuna tusa ashimak niina uchiji aidaun untsuka ikaunman chichajak:

“Juwi tantatajum, nunikagmin atakesh wajukatnuk ainagme nuna pachisan ujaktajime:

² ¡Jacopan uchiji aidauwah, juwi tanta ijuntsajum

atumin apa Israel tawa nunú antuktajum!

³ “Rubénkah, ametme mina uchig iwaimek, wi aminak nagkamchakun datsa asan akiauwaitjame, nuadui amek ajantusa diitai senchigtin wajasuitme.

⁴ Tujash imankek achatnaitme, shiig emetja anentaimchau, yumi tsukati waketama nujai betek asam, tuja mina eme anenjusa diigchau asam, mina duwagjaish ikagmakuitam nuadui.

⁵ “Simeóggak niina yachi Levíjai betek ajankachu ishamain ainawai.

⁶ ¡Ajumaish wika atumjai ijunja pujutnak dakitajai! wagki atumi kajetinig aents aidau maakjum, kuntinu kagkajish kupijajum uku yujau aidau asagmin.

⁷ ¡Atumek pegkegchau, dekas shiig pegkegchau! Atumi kajetjumik kuntin ikamia kajena ibauwai.

¡Nuadui wi atumnak ashí Israel nugkanum dapampaaktinaitjime!

8 “Untsu Judá aminak, yatsum aidauk pempeentugmakiag emematjamtin ainawai. Nuadui yatsumin waitkaidaush ame depetkam ayamjuktinaitme, tuja amina yatsum aidau emematjamainak tikishmatjamiagtinaí.

9 ¡Judá, mina uchijuh!

Amek leónka uchijijai betekaitme.

León nejen yuwa ejemag wajas tsunsuma ayamak múuntsukaitai tumain nugka tepegama numamtuk atinaitme.

¿Yaki aminash imanminash waitkagmasti?

10 Makichkish Judá senchijinak atankichagtinaí, tuja nii apu wee inabaujinashkam.

Untsu niina nagkaesau dekas apu taamtai, nuna ashí aents aidau niina chichamen umijuinak wedau asagmatai ukuktinaitme.

11 Niina burrojinash uva numijin

tuja uva daekjinig jigkatnai, dutikak niina jáanchjinash

¡vino uva yumiji najanamua duwik nijatnai!

12 Niina jiig uva yumiji vino bukuseaya aan nagkaemas bukuseayai; tuja niina naíshkam leche pujua aan nagkaemas pujui.*

13 “Sabulógkak nayantsanum uwet

dekas lancha múun aidau anumtaiji aidaunum pujustinaí.

Tuja niina nugke nagkatkamuk

Sidón nugka aatus atinaí.

14 “Isacarak burro senchigtin kijinun yanau,

niina wenuken waya tepesa dakimakug

inanmainchawama numamtinaí.

15 Niiig nugka pegkeg ayamainjin wainak

nuna tsunsumtitnai niina tuntupeñ kijinun patai jukitatus,

nuniak chichamjumatsuk tikima wainka

tikichi inatai atinaí.

16 “Dagkak Israel wegantu aidaujai betek

nii wegantu aidaun apuji atinaí.

17 Dagkak dapi jintá dakamak tepes

caballo minittaman sagkanum esai

ajiyama iman atinaí.

18 “¡Chah Tuke Pujuuwah,

uwemtijugti tusan amina dakajame!

19 “Gaadnak shiwag aidau jetetnai,

* 49:12 Juna aatus tiuwa nunak nii wegantu aidauk nugka pegkeg ajak shiig tsapaunum batsamas shiig wiakuch agtin asamtai tiuwai.

tujash nii wajantak depetuk ipistinai.

²⁰ “Asera nugkeg shiig pegkeg asamtai, yutai aidauk pegkeg shiig kuashat ajitnai, iman asamtai nuwiyān apunashkam tuké sutinai.

²¹ “Neftalík japa agkan wekagas uchijin shiig pegkejuch aidaun petsama numamtinai.

²² “Josék numi namaka uwet wajas shiig kagkapena kanawe múun waig senchi nejegama imanai.

²³ Nagki akenin aidau kajejuinawai, nuniak nagki aketuinawai, dutikainak tuké waitkainawai.

²⁴ Tujash José kuntujig senchi wajaknai, iman asa tuke depetmawai.

¡See kuashat Jacopa Apajuji senchigtinuh!

¡Apajuí Israelan kuitamna nuna daajin see kuashat!

²⁵ ¡See kuashat, Apajuí amina apa Apajujiya nunú yaimpakti;

Apajuí dekashí senchigtina nunú

aminak pegkegnum yumigtamsatin ati!

¡Nayaimpinmaya pegkeg jutai aina nuwiyānash!

¡Nayantsa initkenia pegkeg jutai aina nuwiyānash!

Tuja ¡uchi akia shiig tsakapaktinnashkam, dutiksag yaimpakti!

²⁶ Mina apag pegkegnum yumigtujua nuna nagkaesan wika aminak pegkegnum yumigkiajame.

Wi yumigkiajam juka, nugka nain aidau tuke megkaekashtina iman atinai.

Juju pegkeg yumigkia juka Josénu atinai,

wagki niyai yachi aina nuwiyān

Apajuí etegkamua duka.

²⁷ “¡Benjamíggak lobo kajen yukagtin kashikmas neje yuwa ajum agkuantai ampinjaun tinamkagtina imanai!”

²⁸ Juju doce aina juwai Israela uchiji aidau. Juna aatus ditá apaji maki makichik yumigjauwai.

Jacob jakamu

²⁹ Makichik tsawantai Jacob niina uchiji aidaun juna aatus tiuwai:

“Wi jakatnuk namput wajaschae. Wi jakamtaig mina apag ukusbau aina nuwi waa umikbau Efrógnum hitita aentsu nugken awa nuwi ukugsatajum. ³⁰ Canaán nugkanum waa Macpelá Mamrejai niinis awa nuna mina apachug Abraham ashí Efrógka nugken sumak, juka mina pataaju ukumatai ati tiuwa nuwi ukugsatajum. ³¹ Nuwi ukusajui Abrahaman niina nuwe Sarajai, nuigtushkam nuwig ukusajui mina apag Isaakan niina nuwe Rebecajai, tuja wishakam nuwig Lean ukusuitjai. ³² Nunú nugka duka, ashí waa aidaujai hitita aentsu nugke aajaku sumakbauwai.”

33 Juna aatus Jacob niina uchiji aidau umikagtinun ujaka ashimak, pegajin ataktu tepesui, nunik nuwig jakauwai.

50

1 Nunik niina apaji jakamtai, José apajin pagkuk buutak kugkuasui. 2 Nuna dutika ampijatin aidaun José chichajak: Ampi iyash kaushtaiyai ukatajum umiktajum wamak kaujai, tiuwai. Tusa timatai imatiksag José apaji Israela iyashin ukatuk umikajui. 3 Dutika uka ukatuinakua cuarenta tsawan ejejajui, nunú dutikakuik tuke imaan tsawan umitai asamtai.

Tuja egiptunmaya aents aidaushkam Israel jakamtai, setenta tsawantai buutiaju ainawai.

4 Nunú buutbaun mijaakag, José faraógka inake aidaun chichajak:

“Atumesh minash dekaskenum wait anenjakjumeK faraón jegajuajum ujatjuktajum: 5 ‘Mina apag jakattak tepesa chichagtak: Juju makichkish ewaetsuk wi jakamtaig, Canaán nugkanum wi ukumastinjun waan taini-uwaitag nuwi ukugsatajum tujutiwa nuna imatiksasuk umiktak tajai. Wait aneam tsawan sujista wisha nuwi wenu mina apajun ukusan ukuakun taatjai’, tujamui tusa ujaktajum”, tiuwai.

6 Tuja nuna faraón dekaa ditan ayaak:

“Dekas tawai, niina apaji wajintiuwaita nunak dutiksag ukusa ukuak taati”, tiuwai.

7 Tusa tima José weuwai apajin ukustatus. Nunik wetai faraógka atuwe chicham antugtai egiptunmaya aidauk ashí uyuniajui. 8 Nuniagtai José jenia aidauk ashí, tuja niina apaji jenia aidaushkam niina yachi aidaujai betekmasag shiyakajui. Nunik ashí shimak Goségnamak ima uchi aidaunak ditá tagkui aidaujai ukukiajui. 9 Nuigtushkam tikich aents aidaushkam carretanum, caballonum aatus José wetai uyunainak pataetukajui. Imanidau asag shiig kuashat aentsuk aajakui.

10 Nunik shiyakag, namak Jordágka yantamen etsa minitaiya nuni nugka Goren-ha-ataw awa nuwi jegawajui. Nuwi jegawag shiig kuashat tuwakag buutuidau, imadiagtai Joséshkam apaji jakamunum wake besemag deka-peak siete tsawan pujusui. 11 Nunú imatuidau canaágnunia aents nuwi batsamin aidau wainkag chichainak: “¡Aunak egiptunmaya aents aidau jakaun ukuinak imatuinawai!” tuidau. Nuadui nunú nugka Jordágka yantamen etsa minitaiya nuni awa nunak Abel-mizraim* adaikajui.

12 Jacopa uchiji aidauk niina apaji tibaunak imatiksag umiujinak,

13 Canaán nugkanum egegawag Macpelánun Efrón hitita aents aajakua nudaw waa taimun Abraham sumak juka iina ukumataiji ati tibau aajakua nuwi ukusajui. Nunú nugkak waa taimu aajakua nujai mai, Mamre nugkanum etsa minitaiya nuni awai. 14 Dutika ukusa ukuak Josék niina yachi aidaujai, nuigtu tikich aents niina uyuniaju aidaujai ashí betek Egipto nugkanum waketajui.

José jakattak pujusa yachi aidaujai chichasbau

15 Nunik Jacob jakamtai José yachi aidau diták anentaimas chichainak: “Namputchawame José kajegtamtsuash, nuniakug ii pegkegchau awa-jkauwaitag duwi nuna umiak iina iiktamainai”, tusag 16 aentsun akateg akuptuinak: “Amina apa eke jatsuk tepesa José ujaktajum tusa, 17 juna aatus iina akaatamak: ‘¡Wi amina segajame, wait aneam amina yatsum

* 50:11 “Abel-mizraim” tawa nunak hebreo chichamnumak “egiptunmaya wake besemag pujamu” taku tawai.

waitkagmasu aina nuna tudauji tsagkujata! tajame' tujamayi. Aatus iina apaji tujabiu asamtai, iishkam ataktu pataka sumaku: Iina pegkegchauji tsagkugtamjati taji, wagki iik amina apa Apajuújiya nuna inake aidau asaja", tiaju.

Tusa akatja ishiakam, chichama etsejin aidau jegajua ujakajui dutikam José nuna antuk buutiuwai.

¹⁸ Nuniaí niina yachi aidaushkam kautuawag, niina emtin tikishmag nugkan nijayin antig pujusag chichajuinak:

"¡Juwi pujaji, yamaik iik amina inakem ainaji!" tuidau.

¹⁹ Tujash José ditan ayaak:

"Ishamkagtukaigpajum, wika Apajuúchuitjai atumin suwimkan amastinuk. ²⁰ Atumek pegkegchau awajkami tujutiuwaitjume, tujash Apajuí nunú pegkegchauwa nunak pegkegnum yapajiauwei, yamai wainag juna jutikatin asamtai, tuja aents aidau pujutjin uwemtikati tujutu asa.

²¹ Nuadui ishamkagtukaigpajum. Wi atum yuwatnunak uchijum aidau yuwatnujai amastatjime", tiuwai. Aatus tusa anentain ichichtukui, dutikak shiig anentus ausauwai.

José jakamu

²² Josék niina apaji patayi aidaujai betek ijunas Egipto nugkanum pujusui. José pujusui ciento diez mijan, ²³ imaan mijan pujau asa Efraín akiamua nuna uchiji akiinaunash, ama tijajinashkam wainkauwai. Manasésa uchiji Maquir aajakua nuna uchijinashkam nii yajuak tsakapakui.

²⁴ Makichik tsawantai José niina yachi aidaun chichajak: "Wi jakatnuk namput wajaschae, tujash Apajuí atumnak tuke yaimpakgtatui. Dutijamak juju nugka juwi batsatjum nunashkam nigki jiiigmaki Abrahaman, Isaakan, Jacopan aatus nugkan amastinaitjime tusa anagkuawa nuwi ejetamawagtin atinme", tiuwai. ²⁵ Nuna tusa José Israela uchiji aidau umikagtinun chichajak: "Dekas tajime, atumnak Apajuí yaimpakgtinai.

Dutijamainakuig mina ukunchjush juwi ukugtutsuk jukitun atajum", tusa yachi aidaun akatjauwai. ²⁶ Tuja Josék ciento diez mijanji ajamu Egipto nugkanum pujus jakauwai. Nunikmatai iyashi wamak kaujai tusa kugkuinai ukatuk, aents jakau egketainum egkeawag ukusajui.

Jiinjamu Éxodo Israel aents aidau Egipto nugkanum waitkam batsamin agkanmagamu

(1.1—12.51)

Israel aents aidau Egipto nugkanum waitkasagbau

¹ Israel, tikich daaji Jacob aajakua nuna uchiji aidau maki makichik ashí ditá uchijijai Egipto nugkanum utsanawaju aina nuna daajig juju ainawai: ² Rubén, Simeón, Levi, Judá, ³ Isacar, Sabulón, Benjamín, ⁴ Dan, Neftalí, Gad, Asher aatus. ⁵ Jacopan uchiji wegantu aidau ashí ijumjamak setenta aents aajakui. Tuja niina uchiji Josék Egipto nugkanum pujajakui. ⁶ Josék niina yachi aidaujai, tikich aents aidau nunú tsawantin batsamajaku aina nujai nuwi batsamas ashí jinawaju ainawai. ⁷ Nunikagmataish dita uchiji aidauk kuashat akiinak wedau asag, shiig kuashat yujakajui. Imaanidau asag ditash senchigtin wajasag nugka dita batsatbaunmak piyakajui.

⁸ Imanikaju ai kuashat mijan asa Egipto nugka apuji yamajam, José niina patayi aidau ayamjak dutikauwa nuna makichkish dekachu ekemiuwai. Nunú egiptunmaya aidau chichajak:

⁹ “Israela uchiji aidauk iina nagkaetamsau yujakaje, tuja ditak iina nagkaetamsau senchigtin ainawai. ¹⁰ Nuadui, aan kuashat yujakainum tusaish utugmainaita nunú chicham umikagmi. Wagki namputchawame maaniamukesh ataik iina shiwaajijai atuekag jutiin pempeentugmakiag depetamak, juwi batsata nuna jiinag shiyakainum”, tiuwai.

¹¹ Nuna tusa Israel aents aidau takat katsugmanum takamtikainak waitkasagtinun, apu aidau adaitujajui. Dutikamu asag, faraón yutai aidau ijumajakua nuna jimag yaaktan, Pitón, Ramsés aatus najanawajui. ¹² Tujash Israel aents aidauk imatika waitkainamash nuni senchi yujak wedau.

Imaaniagtai egiptunmaya aidauk senchi ishamainak kajejuinau. ¹³ Nuninak, Israel aents aidau ditá inake emakag shiig senchi inainak waitkajaku ainawai. ¹⁴ Imatikainak takat katsugmanum nugka namukag ladrillon najankatnume tusag batsasajui, dutikainak ajanmash imatiksag takamtikainak tikima shiig senchi waitkaidau.

¹⁵ Nuigtushkam hebreo nuwa aidau uchigmatkau, Sifrá, Fúa aajakua nujai, faraón tutai chichajak:

¹⁶ “¡Atum hebreo nuwa aidau* uchigmatkakjum diistajum wajukuk akiinat! ¡Tuja aishmag akiinkuig maatajum, untsu nuwaitkuig idaisatajum!” tiuwai.

¹⁷ Tujash uchi uchigmatkau aidauk Apajuín ishamaidau asag, faraón tutai tibaunak umikchajui. Nuadui aishmag akiintaish mautsuk idayinau.

¹⁸ Nuniagtai Egipto nugka apuji ditan chichajak:

“¿Wagka uchi aishmag akiinush mautskesh idaijume?” tau.

¹⁹ Tama dita ainak:

* **1:16** “Hebreo nuwa aidau” tawa nunak ima Israel wegantu aina nunakek tatsui, tikich nuwa Israel wegantuchushkam hebreo chichaman chichaaku aidaujai ijumag taku tawai.

“¡Hebrea nuwa aidauk egiptunmaya nuwajaig betekchau ainawai, ditak senchigtin aina ibau asag, eke ii jegatsjinig diták uchigmainawai!” tuidau.

²⁰⁻²¹ Dutika idaibau asag, Israel aidauk kuashat akiinak wedau. Imaanidau asag aan nagkaemas senchigtin wedau. Tuja uchigmitk-agtin aidauk Apajuín ishamainak uchin maachaju asagmatai, Apajuí ditanashkam kuashat uchigtin atinme tusa yaigkui. ²² Imanik Israel aents aidau kawedau asagmatai, Egipto nugka apuji ashí niina aentsji aidaun chichajak: “¡Yamai nagkamsagmek hebreo aents aidaun uchiji aishmag akiinuk ashí namaka utsaitajum, untsu nuwa akiinkuig idaisatajum!” tiuwai.

2

Moisés akiinamu

¹ Makichik aents Leví wegantunmaya, tuja nuwashkam nunú wegantunmayajaig nuwenauwai. ² Tuja uchi aishmag aidauk mantamnati tusa apu umiku ai, nuna nuwe nunú tsawantin ejajjuk uchi aishmagkun uchigmakui. Nunik uchigmak, uchi pegkejuch asamtai, dukuji uuka kampatum nantu apusauwai. ³ Tujash dukap tsawan uuka pujumainchau dekapeak, chagkin kajis kanumá najanamun juki, yumi wayawai tusa pegkagag, nuwi uchin egkea dukuka namak Nilo tutainum ajug ukukuwai. ⁴ Nuna dutika, uchish wajukatig ikaa wajasa diyaku ata tusa, niina nawanjin akupkauwai.

⁵ Dutikau ai faraógka nawanji maitatus namaka akaikiuwei. Tuja nuwa niina inake aidauk namaka uwet yujai nii maak pujau tugkitak kajis tsapaku ayaunum chagkin kajis najanamun nanatun wainkauwai. Dutika wainak, niina inaken makichik awemauwai utita tusa. ⁶ Tusa tima weji juki itanmatai, ujaka diikma uchi buutu egketun wainak wait anenmain diisui. Nunik chichaak:

“Juka hebreo uchi”, tiuwai.

⁷ Nuna dutiktai uchí umayi apu nawanjin jegantun chichajak:

“Amesh wakegakminig, hebreo nuwa yamá uchí uchigmaku puja nuna wi ujaktajai, nunú nii amuntsuak kuitamkati”, tiuwai.

⁸ Tama nii ayaak:

“¡Ayu, untsu weme nunú nuwa ujakta!” tiuwai.

Tusa tima nuwauchik nunú uchí dukuji pujamunum weuwai. ⁹ Nunik ujak itanmatai, faraógka nawanji nunú nuwan chichajak:

“¡Juju uchi amina jemin jukim tsakapatjugta, wi amina uchi kuitabaunum akiktajame!” tiuwai.

Tusa tima uchinak niina dukujig juki kuitamak muumpitkajui. ¹⁰ Nunik muumpagmatai apu nawanjin susauwai. Dutikam juki nii uchijima niina daajin Moisés* adaikauwai. Nunak: “wi yuminmayan jiiikmai” taku tiuwai.

Moisés Egipto nugkanum pujau tupikaki Madián nugkanum webau

¹¹ Moisés tsakaja múun wajas pujau, makichik tsawantai nii wegantunmayan niina yachi aidaun ijagsatatus weuwai. Nunik jegakma takat shiig senchi katsugman takainak batsatun wainkauwai. Nunik diistakama egiptunmaya aents niina yachi hebreo aentsun suwimtatman wainkauwai. ¹² Dutika wainak ashí ayampa niimas, makichik aentskesh atsutai, egiptunmaya aentsun maa kayamnum yutua, ukukuwai.

* **2:10** “Moisés” tawa nunak “yuminmaya jiiikmau” taku tawai.

13 Nuna dutika kashinia duwi ataktushkam weuwai, nunik jegakma jimag aents mai Israel aentsuk pempeentunikiag maanidaun wainkauwai. Nunik wainak senchi suwimkagtaun chichajak:

“¿Wagka ame wegantukesh pempeentukmesh suwime?” tau.

14 Tama nii ayaak:

“¿Ya aminash apu chichama epegkin ati tusash adaitamkash iniish apujtamsame? ¿Egiptunmaya aents maamum dutika minash mantuag tusamek tujutam?” tau.

Tama Moisés nuna antuk senchi ishamkauwai, nunik anentaimas, dekas egiptunmaya aentsun wi maamag nunak dekawajeapi, tiuwai.

15 Tusa nii anentaimsamunak imatiksag faraón dekauwai. Nunik Moisés egakjum maatajum tusa inamjauwai. Tujash Moisésak tupikaki Madián nugkanum pujustatus weuwai. Nunik jegaa yumigmatnum ayaumas ekemsauwai.

16 Nunik eketai Reuel, tikich daaji Jetro sacerdote† Madiágnunia aajakua nuna nawanji siete aajaku aina nunú, ditashkam nunú tsawantin kuntin amutai aidaunum yumi shikik aimkag ditá apaji uwigji aidaun aajagtatus yumigmatnum shiyakajui. 17 Nunik jegawag batsatun tikich uwija kuitamin aidaun ujumak yumigmatnum kaunawag, nuwauch aidaun shiyaktajum tusa ishimiagtai, Moisés nuwi eketu asa wajatki ayamjuk yumi shikika aimak uwig aidaun aakui.

18 Dutikamtai nuwauch aidaun wamak waketug apaji pujamunum kuanmtai, apaji iniak:

“¿Wagka yamaish imanikjumesh wamkesh waketjauhme?” tau. 19 Tama dita ainak:

“Uwija kuitamin aidaun yumigmatnum kaunawag shiyaktajum tusa ajapjamiagtai, egiptunmaya aents nuwi eketu ayamjupak yumin shikika uwig aidaunashkam aakmae”, tuidau.

20 Tusa tiagtai Reuel niina nawanji aidaun chichajak:

“¿Tuwi dusha aentsush pujume? ¿Wagka nigkish ukukmaugme? ¡Wejum ujaktajum, taa yujumkan yuwati!” tiuwai.

21 Tusa timatai wejag ujakajui, dutika ukamak jegaa taamtai, yujumak yuwamunum Jetro niina chichajak:

“Juwi pujusta jutijai”, tiuwai. Tusa tama Moisés ayu tusa pujusui. Nunik pujaun Jetro niina nawanji Séforajai nuweauwai. 22 Nunik nuwena pujus niina nuwe Séforan ejapmitkakui, dutikam uchi aishmagkun uchigmakui, nunikmatai Moisés nunú uchi daajin Guersón adaikauwai. Nunak: “Wika juwiyachuitjai tikich nugkanmayaitjai”, taku tuu adaikauwai.

23 Tuja kuashat tsawan nagkaemai faraón jakauwai. Nunik jakamtaishkam Israel aents aidauk imanisag senchi waitu batsatu. Imaanik waituidau asa, yaki ayamjupak agkanmitkagmawa wajaidau. Nuna tusa imatuidau Apajui antukui. 24 Nunik Abrahamjai, Isaakjai, Jacobjai, nii chichaman umikua nuna adeajui. 25 Nunik Israel aents aidaun senchi waituanamun dijus wait anenjauwai.

3

Apajui Moisésan untsukbau

† 2:16 Sacerdotek aents aidaun utugchatjin Apajuyai epegtuatatus kuntuu maa apejaku ainawai. Tuja ima nunakek takajakchau ainawai tikichnashkam takajaku ainawai.

1 Moisésak niina wegaji sacerdote Madián nugkanmaya Jetro aajakua nuna uwigin kuitamjin aajakui. Tuja makichik tsawantai Moisés uwijan yajuak uwegshun nagkaiki weuwai, nunik muja Horeb Apajuí mujaji tutainum wakauwai. 2 Nuwi Apajuí ángela nunin wajas numi piipich zarza* kegamunum nuna ejapeen wantintukui. Nuna Moisés shiig diikma numi piipich kegayatak esaka amuechaun wainkauwai. 3 Nunik anentaimas: “¿Aush wajig aniawa? ¡Numi piipich kegayatak esaka amuetsu dusha wagkag aniawa, wejin diistajai!” tiuwai.

4 Tusa nuna diistatus jegantattak wegaun Tuke Pujuu wainak, numi piipich kegamunmaya untsuak:

“¡Moisés! ¡Moisés!” tama, nii ayaak:

“Juwi pujajai”, tiuwai.

5 Tutai, Apajuí chichajak:

“Imajuig tantaipa. Sapatjum ukuimakta, wagki ame wajam anka dekas nugka Apajuí etegkam pegkegmai”, 6 tusa nuigtushkam chichajak:

“Witjai Apajuínuk, amina apachjum Abraham, Isaac, Jacob aidau emematujaku aina nunuwaitjai”, tiuwai.

Tutai nuna antuk Moisés ishamak Apajuín diimainchau dekapeak, yapin dukukui. 7 Tujash Tuke Pujuu ataktu chichajak:

“Wika mina aentsug aidau Egipto nugkanum batsamas senchi waituina nunak shiig wainjai. Tuja takata apuji aidau takat katsugmanum takamtikainam waituinak pampaina nunashkam antukjai. Tuja dita waituina nunashkam shiig dekajai. 8 Nuadui egiptunmaya aents aidau waitkaina nuna uwentikatasan juwi taajai. Wi ditanak jiija yajuakan nugka múun pegkeg ajak shiig tsapau, tagkush shiig muumpau, yumi aidaush ayaunum ejegawagtajai. Nunú nugka duka Canaán aents, hitita aents, amorreo aents, ferezeo aents, heveo aents, Jebús aents aidau batsamtaí ainawai. 9 Antukta nijah: Wika mina aentsug Israel ame wegantu aidau senchi waituinak pampaina nunak shiig antukjai, tuja egiptunmaya aents aidau shiig senchi waitkaina nunashkam wainjai. 10 Nuadui umintsata, wi aminak Egipto apuji pujamunum jegaam, mina aentsug ame wegantu aidau batsata nunú jiigminum tusan akupeajame”, tiuwai.

11 Tusa tama Moisés Apajuín ayaak:

“¿Wisha winkauchitag juninnush Egipto apuji pujamunum jeganush, Israel aents wi wegantu aidau nuwi batsata nunash jiimainkaitag?” tiuwai.

12 Tutai Apajuí ayaak:

“Wi aminak uyuuntsattagme. Mina aentsug ame wegantu aidau Egipto nugkanum batsata nunú jiija yajuakam, ashí atum aidautijum juju muja juwi emematjitnaitjume. Nunú betek uminkui dekattame wi amina awemajam nunú”, tiuwai.

13 Tutai Moisés Apajuín ayaak:

“Tujash wi jegaan ditá chichagkun: ‘Atumin apachjum Abraham, Isaac, Jacob Apajuín emematujaku aina nunú atumin agkanmitkati tusa awe-time’ tai dita mina ajiuinak: ‘¿Dusha yaita daajish?’ tusa tujutainakuish, wisha ditanash ¿wajintu aikagtatja?” tiuwai.

14 Tutai Apajuí ayaak:

* 3:2 “Zarza” hebreo chichamnumash waji numi takug tawa duka shiig dekamait sui.

“Mina daajuk: ‘Tuke Pujuuwai’† Juju mina aentsug aidau ujaakum: ‘Tuke Pujuu’ minak atuminig awetime, titatme”, tiuwai. ¹⁵ Tuja nuigtushkam Apajuí Moisésan chichajak:

“Juju aatsa mina aentsug aidau ujakta. Wika Apajuí, Tuke Pujuu atumi apachjum Abraham, Isaac, Jacob emematujaku aina nunuwaitjai. Jujuwai mina daag yaunchkesh tuke asauwa nunú. Jujuwai mina daajun ajumaish tuke adaititin aina duka. ¹⁶ Nuadui wetá nunika jegaam Israel aentsu apuji múun aidau ijumja chichagkum: ‘Apajuí, Tuke Pujuu tutaya nuna, atumi apachjum Abraham, Isaac, Jacob emematujaku aina nunú mina wantintujuk chichagtak: Wika ditanak kajimat Chau asan, egiptunmaya aents aidau waitkam batsata nunak wainjai. ¹⁷ Nuadui Egipto nugkanum waitkam batsata nunak ankanmitkattajai dutikan Canaán aents, hitita aents, amorreo aents, ferezeo aents, Jebús aents, heveo aents aina nuna nugke nugka pegkeg ajak shiig tsapau, tagkush shiig muumpau, yumishkam imanisag ayá nuwi yajuakan ejegattajai tujamui’, titatme.

¹⁸ “Tusa tamin Israel aentsu apuji múun aidau antugtamtakatui. Nunik-agmatai ditajai faraón jegajau chichagkum: ‘Tuke Pujuu, Apajuí hebreo aents aidau Apajuí juti aidauti emematin ainag nunú wantintugmakji. Nuniku asamtai idaikagtusta kumpatum tsawan mujá shiyakaja, nuwi kuntin maa apeaku Tuke Pujuu ina Apajuíiya nunú emematmi taji’ titatme.

¹⁹ “Tusa taminish, faraógak shiyaktajum tujamchatta nunak shiig dekajai. Tujash wi niinak waitkastatjai, shiyaktajum tujamti tusan. ²⁰ Dutikakun wi mina senchigjai egiptunmaya aents aidau suwimka suwakun wainchatai ishamain aidau iwainagattajai. Nuadui faraón atumnak shiyaktinme tusa idaitamsagtatui. ²¹ Nuigtushkam wi egiptunmaya aents aidauak ditá wajiji aidau anenag shiig anenjam amastinme titatjai. Nuadui atumek jijnja shimakjumesh uwegmatakim shimutsuk wajiigtin wajasjum shiyaktatjume. ²² Tuja Israel nuwa aina duka maki makichik egiptunmaya nuwa pujamunum ijus pujuidauk, nuniachkush pachinak pujaushkam jiju plata tutayai dakumka najanamu aidau, orojai najanamu aidau, jáanch nugkutai aidau, aatu segattatui. Dutikawag nuna ditá uchiji aidau nawanji aidau anujagtatui. Dutika ditá wajiji ashí yajutkam asag, egiptunmaya aidau makichkish wajigtuchuwakagtatui”, tiuwai.

4

¹ Tutai Moisés ayaak:

“Tujash minak dekaakeap tawa tujutthagttatui, nuninak wi taishkam anugtutsuk Tuke Pujuu wantintugmakchau aig, tuu wekaeme, tujutiagtatui”, tiuwai.

² Tutai Tuke Pujuu niina chichajak:

“¿Waji aancha takakme?” tama:

“Ushujutaijun takakjai”, tau.

³ Tutai: “¡Nugka aepsata!” tau.

Tama nugká aepsauwai. Dutikamuik dapi najaneauwai, nunikmatai Moisés nuna ishamak tupikau. ⁴ Nunitai Tuke Pujuu Moisésan chichajak: “Ujuknum achikta” tau. Tama Moisés achikui; dutikam ataktu ushujutai wajasui. Nunikmatai chichajak:

† **3:14** “Tuke Pujuu” taji duka Apajuí daaji hebreo chichamnum “Yahvé” “Jehová” tawa nunú taji.

⁵ “¡Amesh jutiksamek iwaintukta! Juna wainkag dekas iina muunji Abraham, Isaac, Jacob aajaku aina nuna Apajuújimpap wantintuke tujami-agtatui”, tusa ⁶ ataktu chichajak: “¡Jáanchjum inuam detsepem achikta!”

Tama Moisés inua detsepen achikui. Nunik uwejen jiiki diikma jata lepra achikam shiig puju wajasun wainkauwai. ⁷ Nunikmatai Apajuú chichajak:

“Ataktushkam dutiksamek detsepem achikta.”

Tama ataktushkam inua detsepen achikui, dutika uwejen jiiki diikma yaunchuk iyashi aajakbaunak imanuk pegkeg wajasui.

⁸ Nunikmatai Tuke Pujuu chichajak:

“Yama nagkamchaku iwainamugmin dekaskeapi tusa antugta-mainashkush, yamai iwaintukjam juju iwaintamin dekaskeap tawa tusag antugtamtakatui. ⁹ Tujash juju mai iwaintamash dekaskeapi tusa antugtamaishkuig, namakia yumi shikika jukim nugká ukagta, dutikam yumi ukagbauwa nunú numpa wajastatui”, tiuwai.

¹⁰ Tama Moisés Tuke Pujuu ayaak:

“¡Chah, Tuke Pujuuwah! Wika shiig jintiaja chichamainchau dekap-nujai, junak yaunchuk nagkamsan, yamai ame augtakminish nunisnuk chichajai”, tau.

¹¹ Tutai Tuke Pujuu ayaak:

“¿Ya aentsu weninash najatuawaita? ¿Ya najanauwaita chichachu, antuchu, wainmachu, wainbau aidaunash? ¿Wichaukaitag Tuke Pujuu, nuna dutiknununuk? ¹² Nuadui wetá, wi aminak chichamtikattajame, wiki ame anentaimja chichaktinnash jintintuattagme”, tiuwai.

¹³ Tama Moisés ataktu chichaak:

“¡Chah, Tuke Pujuuwah, wait aneam dekas tikich awemata!” tau.

¹⁴ Tutai Tuke Pujuu Moisésan kajejuk chichajak:

“¡Awi amina yatsum Aarón Levi wegantu shiig chichau puja nuna wi wainag jamah! Nuigtushkam nii amina igkumpaktatus minawai. Tuja amina waipak shiig aneas jujamkittawai. ¹⁵ Dutijamamtai nijai chichasta, nuniakum wi amina tajam nunú ashí ujakta, dutikam ame tumaina nuna nii Israel aents aidaun ujakti. Tuja wi niinak yaigtatjai, dutikakun atum dutikatnunashkam jintintuattajime. ¹⁶ Ame Aarógak wi tumainaitag aikasmek tita, tuja nii ame tumainaitam dutiksag aents aidaun ujakti. ¹⁷ Tuja ¡anú ushujutajum jukim wetá, núnikam aanjai kuashat wainchatai aidaun iwainagtatme!” tiuwai.

¹⁸ Tusa tima Moisés wakitki niina wegaji Jetro jeen jegauwai, nunik chichaak:

“Wishi mina pataag Egipto nugkanum batsata nuwi wakitkitjai. Nunikan iwakuash batsata diistajai”, tau.

Tutai niina wegaji Jetro ayaak:

“¡Ayu, shiig kuitamamsam wetá!” tiuwai.

Moisés Egipto nugkanum wakitkimu

¹⁹ Moisés eke Madián nugkanum pujuttaman Tuke Pujuu chichajak:

“¡Egipto nugkanum wakitkita, amina mantamatatus egapagmaya duka ashí jinawaje!” tiuwai.

²⁰ Tusa tima Moisés niina nuwen uchiji aidaujai burronum peka, Egipto nugkanum wakitkiuwai. Nuniak ushujutajin Tuke Pujuu, jujai wainchatai aidaun iwainagtatme, tibaun juki weuwai. ²¹ Nunik wetatman Tuke Pujuu Moisésan chichajak:

“¡Egipto nugkanum jegamek, Wi amina iwaintukjam duka faraógka emtinish imatiksamek mina senchiju amaag nujai iwaintukta! Wi niinak antakchau emattajai, dutikamu asa kakajus wetinme tujamchagtatui. ²² Nuniakuish ame nii chichagkum: ‘Juna aatus Tuke Pujuu chichaak: Israel aents aidauk mina uchig iwai amaina numamtainai. ²³ Nunin asamtai, agkan idaitugsata mina uchig aidau jijnjag emematjitnume timajame, tusa tamash dakitau asamin, wi amina uchijum iwaiya nuna mantuattajame’, tujamui tusam tita”, tiuwai.

²⁴ Tusa tima wee wenakua jintá kajittaman Tuke Pujuu Moisésan wantintuk maatag tiuwai. ²⁵ Nunitai Séfóra kuchii kaya najanamun juki, uchiji katiuchiji chuchuken tsupigkauwai. Dutika nuna juki Moisésa nawen antigkui, dutika chichajak: “¡Amek mina uchiju numpen yamaikish mina aishjuitme!” tiuwai.

²⁶ Nuna aatus nuwe dutikamtai, Tuke Pujuuushkam mautsuk weti tusa idaisauwai. Nunikmatai Séfóra chichaak: Moisésak mina uchiju numpen yamaikish mina aishjui, tiuwai.

²⁷ Nuna nuniai Tuke Pujuu Aaróghan chichajak:

“¡Uwegshunum weme Moisés igkugkam utita!” tiuwai. Tima niishkam weji “muja Tuke Pujuu etegkamu pegkejam” tutainum waka igkug kumpamak yapiin kugkuasui. ²⁸ Dutika igkugkam Tuke Pujuu titatme tibaunak imatiksag Moisés Aaróghan ashí ujakuí. Tuja nunú dutikattame tusa Tuke Pujuu tibaunashkam imatiksag ujakuí. ²⁹ Nuna dutika nuadui Moisés Aaróghjai, Israel aentsu apuji múun aidau ijumjatatus wegajui. ³⁰ Dutika ijumag Tuke Pujuu Moisésan titatjume tibaunak Aarón imatiksag ashí ditan ujakuí. Dutikamtai Moisés Tuke Pujuu senchijin wainchatai aidau iwainagta tibaunak imatiksag dita wainainamunum ashí iwainajui. ³¹ Nuna wainkag Israel aents aidauk: Dekas Tuke Pujuuwap awemae tiajui. Tuja Israel aents aidau waituina nunak wainjai, tuja waitkam batsata nunashkam dekajai Tuke Pujuu timae tabaun antukag, tikishmag pujusag niina emematuidau.

5

Moisés Aaróghjai Egipto nugka apuji faraón tutain ausatasa webau

¹ Nuna dutika ukuinak Moisés niina yachi Aaróghjai faraóghan jega-uawag chichajuinak:

“Israel aents aidauti emematin ainag nunú Apajuí, Tuke Pujuuwa nu chichaak:

“‘Mina aentsug aina nunú idaitugsata, dutikam uwegshunum shiyakag, awi ijunag mina emematjuinak jiiistamatnume’ tawai”, tuidau.

² Tutai faraón ayaak:

“¿Yaita dusha Tuke Pujuuush, wi niina chichamen antugkan, Israel aents aidau shiyaktajum tusa idaisatnunash? ¡Wika Tuke Pujuuinak wainchaujai, nuigtushkam Israel aents aidau shiyaktinme tusanuk idaisatjatjai!” tau.

³ Tutai dita ainak:

“Apajuí, Tuke Pujuu tutai, hebreo aents aidauti emematin ainag nunú wantintugmakji. Nuniku asamtai, uwegshunum kampakatum tsawantai jegatainum wetatji. Nuwi jegaa kuintin maa apeaku Tuke Pujuu iina Apajuí emematiagmi taji. Tuja nunú ii nunishtaik niina suwimke, jatakesh jutiin iyanjamainai, nuniachkush shiwagkesh maaniamunum amupamainai”, tuidau.

⁴ Tama faraón ditan ayaak:

“¿Wagka Moisésa amesh Aaróggjaish aents aidau takaidaush nunú takugmesh tsawantash emegkagme? Nunú tuu yujatsuk wakitkijum takastajum”, tau.

⁵ Tuja nuigtushkam faraón ditan chichajak:

“Juju nugka juwi batsamas Israel aents aidau shiig kuashat yujakag takainak batsata nunidauk, takasaigpajum tusagmek tsawantak emegkau-maitsugme”, tiuwai.

⁶ Nuna tusa nunú tsawantaik faraón niina aentsji apu aidaun, nuigtu Israel aents aidau takata takagtai diistin adaijamu aidaujai ijumag chichajak:

⁷ “Yamai nagkamsagmek Israel aents aidau ladrillon pachimag najanatnume tusagmek trigo numiji tsupigbauk susaigpajum, diták wejiag yajuaktinme. ⁸ Tujash yaunchuk najanin agma imatiksag najanatnume tusajum inagtajum, machikish awagtukigpajum. Ditak daki asag mujá shiyakaja kuntin maa apeaku Tuke Pujuu emematmi tusag imatuinawai. ⁹ Nuadui yamaik nuni senchi takamtiksatajum. Imaatikamu asag wait chicham antumainji tsawan atsugtinme”, tau.

¹⁰ Tusa tiajam faraóggka aentsji apu aidau, Israel aents aidau takata takagtai diistin adaijamu aidaujai jijnag Israel aents aidaun ujainak:

“Faraón chichaak: ‘Yamai nagkamsagmek trigo tsupigbauk susaigpajum tujabiu asantai, yamaik amaschattaji! ¹¹ Atum tuwiyá jumainaitjume nunú atumek wejijum jukitajum. ¡Tujash nuniakjumes najannujum duka imatiksagmek najanattagme!’ tujamui”, tuidau.

¹² Tusa tiajam Israel aents aidau trigo tsupigbaujai pachimja ladrillo najanmain atsau asantai, trigo tsupija yajumku ampigbau aidaun yajuakag najai ladrillon najanataj tuidau asag Egipto nugkanak ashí pampankag egaidau. ¹³ Tuja kashi kashinig Egipto apuji niina aentsji apu aidau Israel aents aidau takata takagtai diistin adaijamu aidaun chichajuinak: “¡Yaunchuk trigo tsupija suwamu asajum makichik tsawantaik wajupa najanmajume duka imatiksagmek najanatajum!” tusag imatjuidau.

¹⁴ Tuidau asag faraón niina aentsji apu adaijamu aidau Israel aents takata takagtai diistin adaijamu aidaun asutidau. Dutikainak:

“Yaunchuk najanmajum imatiksagmekek yang najanachmaugme, tuja yamaishkam nunisjumek umiatsjum dusha ¿wagka aniagme?” tuidau.

¹⁵ Imatikainam Israel aents takata takagtai diistinme tusa adaijamu aidau, faraóggkan jegajuawag chichajuinak:

“¿Wagka amina inakem ainajinish imatikagmesh waitkagkagtame?”

¹⁶ Nuigtushkam trigo tsupigbaunash amina aentsjum aidauk amina inakem aidautinak sukagtuinatsui, nuninayatak: “¡Wamak ladrillo najanatajum!” tusa jiyajatuinawai. Nuigtushkam asutkagtuinawai. Ii wamak umiatsug duka amina aentsjum aina nuna utugchatjiyai”, tuidau.

¹⁷ Tusa tiagtai nii ayaak:

“Atumek daki ainagme, nunin asajum idaikagtustajum imau wee kuntin maa apeaku Tuke Pujuu emematiagmi tuu yujagme. ¹⁸ Tutsuk takakjum shiyaktajum, trigo tsupigbaun amainashkuish, yaunchuk trigo suwamu asajum najanmajum imatiksagmek ladrillok najantatjume”, tau.

¹⁹ Tusa tiajam Israel aents aidau takata takaidaun diistinme tusa adaijamu aidau shiig utugchat diisajui. ²⁰ Nuna aatus faraóggkan aujus jiinkama, Moisés Aaróggjai agá dakamainak batsatun wainkajui. ²¹ Nunik ditan chichajuinak:

“Atumi utugchatjin ii waitiag duwi Tuke Pujuu atumnak suwimkan amastinme. Atumi tuu wekaetin faraón niina atueka takatai aidaujai shiig kajegtamkaje. Atumek tuke aneasjum egiptunmaya aidau wai waitkainakua ijinatnume tusajum jutikagtagme”, tuidau.

Moisés Tuke Pujun ausamu

²² Tusa tiagtai Moisés Tuke Pujun aujak:

“¿Apujuh, wagka juju amina aentsjum aidaush pegkegchaunmash waitkame? ¿Wagka minash awetibiume jutika waitkastinaitkumesh? ²³ Wi yama nagkamchakun amina daagmin pachisan faraógakajai chichasmayag duwi nagkamas yamaikish amina aentsjum aidaunak nuni senchi waitkainawai, ¡tujash amek amina aentsjum aidauk eke agkanmitkachume!” tiuwai.

6

¹ Tusa tama Tuke Pujuu Moisésan ayaak:

“¡Yamai wi faraóghan itugkattaja nunú wainkattame! ¡Wi mina senchijun iwaintuktatjai, dutika ai nii dekas atumnak jijnatajum tusa tujamiagtatui!” tiuwai.

Tuke Pujuu Moisésan ataktu akateg awemamu

² Tuja Tuke Pujuu Moisésan ataktu chichajak:

“Witjai Tuke Pujunuk. ³ Wika Abrahaman, Isaakan, Jacopan wantintukuitag nuaduik: ‘Apajuí ashí senchigtinaitjai’ tuu iwainmamkauwaitjai. Tujash dekas mina daag ‘Tuke Pujuu’ tutaya nunak ujakchau ainajai. ⁴ Nuigtushkam ditajai chichama umiakun: ‘Nugka Canaághan amastajime’ tiuwaitjai. Tujash ditak nuwig ijagka numantin batsamsaju ainawai. ⁵ Tuja Israel aents aidau Egipto nugkanum inaku waitkainam batsamas chichaina nuna yamai antukjai. Nunikan adeagjai ditá muunji aajaku aina nujai chichaman umikuitag nuna.

⁶ “Nuadui Israel aents aidau tita: ‘¡Witjai Tuke Pujunuk! Nuniau asan egiptunmaya aents aidau waitkainam batsatum nunak egiptunmaya aidau suwimka suwakun jiigtatjime. Tuja takat katsugmanum takamtijamainakui waituinajum nunashkam dutiksanuk agkanmitkattajime. Wi mina senchigjai ayamjukan jiigtatjime. ⁷ Dutikan mina aentsug atinme titatjai, tuja wika Tuke Pujuu atumi ememattai atatjai. Duwi deka-juawagtinai, ina Apajuji Tuke Pujuu tutaya nunuwap egiptunmaya aents aidau inaku waitkatai batsatutin agkanmitkagbauwaita tusag. ⁸ Nuadui wi Abrahaman, Isaakan, Jacopan chichagkun: “Nugka amastajime” tusan dekas umiktinjun anagkuawaitag nuwi ejegattajime, dutikan nuna amastajime atumdau tuke atina nuna. Wi Tuke Pujuu tutayaitag imanun nunak tajai’ tita”, tiuwai.

⁹ Tusa tima Moisés dutiksag Israel aents aidau ataktu ujakui. Tujash ditak antugkachaju ainawai, wagki Moisésa tuu wekaetin shiig senchi takamtijamainak waitkagmainawai tuidau asag. ¹⁰ Dutika antugchagtai, Tuke Pujuu Moisésan chichajak:

¹¹ “¡Wetá faraón pujamunum! núnikam Israel aents aidau Egipto batsata duka, idaisata jijnati, tita”, tiuwai.

¹² Tama Moisés Tuke Pujun ayaak:

“Israel aents aidaukesh mina antugtuinatsu nunash ¿wajuk faraóghash antugtuktigki wi shiig jintiaja chichatsug nuniaish?” tau.

¹³ Tutai Tuke Pujuu Moisésan Aaróggjai akateak: “Israel aents aidau faraóggjai chichagkujum: ‘¡Tuke Pujuu Israel aents aidaun jiiḡtinme!’ tujamae titajum”, tiuwai.

Apajuí Moisésan Aaróggjai ataktu ausamu

²⁸ Tuke Pujuu Moisésan Egipto nugkanum ausauwa nunak, ²⁹ aatus tiuwai:

“Witjai Tuke Pujuu tutai. Wi amina titatjam duka ashí imatiksamek faraón ujakta”, tiuwai.

³⁰ Tusa tama Moisés Tuke Pujun ayaak:

“Tujash wi shiḡ jintiaja chichatsug nuniaish faraóḡkash ¿wajuk minash antugtuktigki?” tiuwai.

7

¹ Tutai Tuke Pujuu Moisésan chichajak:

“Amek faraóḡka emtinig wijai betek atatme. Tuja amina yatsum Aarón ame chichamun etsegtugmaktatui. ² Wi titatjam nunú ame Aarón ashí ujakta; dutikam nii faraóḡkan chichajak: Israel aents aidau juwi batsata duka idaisata jiiḡnatnume tusa titatui. ³ Tujash wi faraóḡnak antakchaujai betek emattajai, dutikakun mina senchigjai ashí Egipto nugkanmak kuashat wainchatai ishamain aidaun iwainagtatjai. ⁴ Nuna wainkush faraóḡkak antugtamakchagtatui. Tujash wi mina senchigjai egiptunmaya aidaun suwimka suwakun, mina aentsug Israel aents aidau Egipto batsata nuna ayamjukan jiiḡtatjai. ⁵ Dutikakun wi mina senchijun ashí Egipto nugkanum iwainakan Israel aents aidau batsata nuna jiiḡtai, egiptunmaya aidauk, wi Apajuí Tuke Pujuu tutayaitag nuna dekajuawagtatui”, tiuwai.

⁶ Tusa tima Moisés Aaróggjai Tuke Pujuu dutikatajum tibaunak imatiksag umikajui. ⁷ Dita faraóḡggjai chichasaju aina nunú tsawantaik, Moisésnak ochenta mijan ajujakui. Untsu Aaróḡnak ochenta y tres mijan ajujakui.

Aaróḡka ushujutaiji

⁸ Tuke Pujuu Moisésan, Aaróggjai chichajak: ⁹ “Wainchatai iwainakta tusa faraón tujamkuig, amina ushujutaijum jukim Aarón susata, dutikawamin faraóḡkash wainai nugká aepsati, dutikam dapi najaneati”, tiuwai.

¹⁰ Tusa tima Moisés Aaróggjai faraón pujamunum weajui. Nunikag Tuke Pujuu dutikatajum tibaunak imatiksag dutikawajui. Tuja faraón niina atueka takataiji aidaujai wainainamunum Aarón ushujutain juki nugká aepsauwai, dutikam dapi najaneauwai.

¹¹ Nunikmatai faraóḡshakam tunchi aidaun untzukui. Dutikam ditashkam dita dekamujijai dutiksag iwainakajui. ¹² Maki makichik ditá ushujutaijin nugká aepsajui, dutikam dushakam dapi najaneakui. Tujash Aaróḡka ushujutaiji dapi najaneauwa nunú ditanunak ashí yuwa amukui. ¹³ Dutikamtaish faraóḡkak antakchau wajas ditanak antugkachajui, Tuke Pujuu nuniktatui tibaunak imanisag.

Nagkamchaku suwimak suwaku yumi numpa emamu

¹⁴ Nunikmatai Tuke Pujuu Moisésan chichajak:

“Faraóḡkak antakchau wajasu asa, Israel aents aidaunak shiyaktinme tusag idaitsui. ¹⁵ Tujash kashin kashikmasam nii namaka weakui wejita,

núnikam namaka uwet wajasam dakasta. Nuwi weakum ushujutaijum dapi najaneama nunú jukita. ¹⁶ Nuwi wajamin taamtai chichagkum:

“‘Hebreo aents aidauti Apajuí Tuke Pujuu tutai emematin ainag nunú amina ujakti tusa awetine. Nuniak aatus tujamui: “Mina aentsug aidau uwegshunum shiyakag mina emematjitnume agkan idaisata timagme. Tujash antugtatsme”, tujamui. ¹⁷ Nuniau asamin juna aatus Tuke Pujuu chichaak:

“ ‘ ‘Yamai dekaattame wi Apajuí Tuke Pujuuwaitag nunú”, tujamui. Nuadui wi ushujutain takakag juwi namakan awattatjai, dutika ai yumi numpa wajastatui. ¹⁸ Nunikmatai namak aidau jinaamtai yumi mejet-tawai, nunitai egiptunmaya aidauk nuna tsumainak yuminak uwagchag-tatui’ tawai tita”, tiuwai.

¹⁹ Nuna tusa ataktushkam Tuke Pujuu Moisésan chichajak:

“Aarón ujakta ushujutaijin juki namak aidau, entsa aidau, kucha aidau, yumi shikika aintai cisterna aidau Egipto nugkanum ayá nuni, tuja ashí yumi piyaju aidau ayá aatus takui awentati, dutikam yumi aidau numpa wajasti. ¡Aatus ashí yumi shikitai numi najanamu, nuigtu kaya najanamu aidanmashkam yumi piyag ayauk numpa waigtatui!” tiuwai.

²⁰ Tusa tima Moisés Aaróggjai Tuke Pujuu dutikatajum tibaunak imatik-sag dutikawajui. Tuja faraón niijai atueka takatai aidaujai wainainamunum Aarón nii ushujutaiyai yumin awatiuwai; dutikam ashí yumi aidau numpa wajasui. ²¹ Imanikmatai namak aidauk jinauwai, nuniku asa yumi shiig senchi mejeau asamtai, egiptunmaya aidauk yuminak umuinachu. Tuja Egipto nugkanum yumi ayauk ashí numpa wajasui.

²² Tuja egiptunmaya tunchi aidaushkam dita dekamujijai yumin numpa awajsajui, nuna dutikawagmatai faraóggkak nuni senchi antakchau wajasui. Nuniau asa Moisés Aaróggjai tuinamunak antugchau, Tuke Pujuu nuniktatui tibaunak imanisag. ²³ Nuadui faraóggkak puyatjusagkesh diitsuk ukuak nii pujusa inamtaijin wakitkiuwai. ²⁴ Imanik namak numpa wajasu asamtai, ashí egiptunmaya aidauk yumi pegkeg piyagmatai uwagmi tusag namaka uwet yumigmatan taukajui. Wagki namakia yumik umumainchau asamtai.

Jimaja juju suwimak suwaku takash ishitkamui

²⁵ Tuke Pujuu namakan numpa emauwa nunú siete tsawan nagkaemakui ai,

8

¹ Tuke Pujuu Moisésan chichajak:

“Faraón pujamunum wetá, nunika chichagkum:

“ ‘¡Mina aentsug aina nunú agkan idaitugsata, jiinag shiyakag mina emematjitnume! tujamui. ² Tusa ujamaitkum ame jijnjati tusa idaichakminig, wi suwimka amaakun ashí Egipto nugkanum takashun ishitkattagme, ³ dutika ai takash namakia jiinag ame pujusa inamtaigminig, kanutaigmin, pegakjuminish, amejai atueka takau aina nuna jenish, ashí amina aentsjum aina nuna jenishkam, tuja pag inagtaigminish, pag najanatasu namutainmash ashí utsaaniagtatui. ⁴ Imaanidau asag amina tuja ame atueka takataijum aina nuna, nuigtu amina aentsjum aina nunashkam ashí takash pemjujag waitkasagtatui’ tita”, tiuwai.

⁵ Nuna tusa Tuke Pujuu Moisésan ataktu chichajak:

“Aarón ujakta ushujutaijin juki namakanini, entsa ayá nuni, kucha aidaunmanini awentati, dutikam nuwiya takash jiinag ashí Egipto nugkanak akijuati”, tiuwai.

⁶ Tusa tima Aarón egiptunmaya namak ayamunmanini awentau, dutikam takash jiinag ashí Egipto nugkanak pimitkau. ⁷ Nunikmatai tunchi aidaushkam dutiksag dita dekamujjai takashun Egipto nugkanum ikaunmakajui. ⁸ Imanikmatai, faraón Moisésan, Aaróggjai untsuka itan chichajak:

“Apajuí, Tuke Pujuu tutai, minash segatjitajum, takash mina, nuigtu mina aentsug aidaunash waitkagmaina nuna emegkagti. Dutikamtai wisha niina aentsji aidaunash kuntinu maa apeenak Tuke Pujun ememat-tinme tusan idaitustajai”, tiuwai.

⁹ Tusa tutai Moisés niina ayaak:

“Amina, tuja amejai atuegak takau aina nuna, tuja amina aentsjum aina nujai takash aidau waitkagmaina nunú shiyakti, nunikag namaka utsaanatnume tusanush, wajutiya nunash segattatjame nunú ame tujutta”, tau. ¹⁰ Tama nii ayaak:

“Kashin dutikata”, tiuwai. Tutai Moisés ayaak:

“Ame tame duka betek uminkattawai, nunikmatai amesh dekaata iina ememattai Apajuí, Tuke Pujuuwa, imanuk tikichik atsa nunú. ¹¹ Takash aidau amina waitkagmaina duka shiyaktatui, nunik namaka utsaanattawai. Nuadui aminak waitkagmaschattawai, tuja amejai atueka takataijum aidaunash, tuja amina aentsjum aidaunashkam ataktu awagkig waitkaschattawai”, tiuwai.

¹² Tusa Moisés Aaróggjai faraógka aujus ukuinak jiinkiajui. Nunik Moisés Tuke Pujun segauwai, takash faraón ishikamua nuna awakeagti tusa.

¹³ Tusa segam Tuke Pujuu Moisésan antugkauwai, nunik takash jegaa, agá, ajanum aatus ayaunak ashí ijinauwai. ¹⁴ Nunikmatai aents aidau takash jinaun yajuak iju ijuma emakajui, dutikam ashí nugkanum pegkegchau mejeg akijuuwai. ¹⁵ Tujash faraón nunú utugchatan agkan wajasa, ataktu antakchau wajas Israel aents aidau jijnainum tau asa awake dakitau. Nuniau asa Moisés Aaróggjai tabaunak antugkachui, Tuke Pujuu nuniktatui tibaunak imanisag.

Kampatuma juju suwimak suwaku teteé ishikamu

¹⁶ Tuke Pujuu Moisésan chichajak: “Aarón niina ushujutaijiya duwi nugka yukukuntu awatta tita, dutikam teteé najaneak, ashí Egipto nugkanmak piyakti”, tau.

¹⁷ Tusa tima nuna uminak Aarón ushujutaiyai nugka yukukuntun awatiuwai, dutikam ashí Egipto nugkanum nugka yukukuntu aidau ayauk teteé najaneak, Egipto nugkanak akijuuwai. Imaniku asa aents aidaunak, kuntin aidaujai senchi waitkaidau. ¹⁸ Nunitai tunchi aidaushkam dita dekamujjin teteen najankatag tukama tujinkajui, nuninai teteek aentsnak, kuntinnak shiig kuashat waitkaidau.

¹⁹ Nunik tujinkag tunchi aidau faraógkan chichajuinak:

“Juka dekas Apajuí senchijiyai”, tuidau.

Tamashkam faraógkak antakchau wajas Moisés Aaróggjai tabaunak antugkachui, Tuke Pujuu nuniktatui tibaunak imaanisag.

Ipak usumta nunú suwimak suwaku anchi ishikamu

²⁰ Nunitai Tuke Pujuu Moisésan chichajak:

“Kashin kashikmas faraón namaka jegattawai, nuniktin asamtai, ameshkam kashikmasa nantakim jegaantata, núnikam Apajuí chichaak: ‘¡Mina aentsug aina nunak agkan idaitugsati, dutikam jiinag mina emematjitnume!’ ²¹ Tuja ame mina aentsug aidau jijnatnume tusa idaichakminig, wi aminak, amejai atuegak takau aina nuna, tuja amina aentsjum aina nunashkam anchi wegantu aidau ishitkattagme. Dutika ai egiptunmaya aidau jenig, nugkeenish ayatak anchig piyaktatui. ²² Tujash nunú imaniakuish, mina aentsug Egipto nugkanum Gosén batsata nunak wi kuitamkattajai, nuadui dita batsatbaunmak makichik anchigkesh atsutawai. Nunú wainkum dekaattame wi Apajuí Tuke Pujuu tutain mina senchigjai juju nugka juwi dutikag nunú. ²³ Wi mina aentsug aidau nak agkanmitkakun, amina aentsjum aidau nak suwimka susattajai. Tuja duka kashin uminkattawai’ tujamui, tita”, tiuwai.

²⁴ Aatus Tuke Pujuu anchi aidau faraógka pujusa inamtaijin, nijai atueka takatai aidau jenish ashí shiig kuashat anchin ishitkauwai, dutikam ashí Egipto nugkanmak ayatak anchig piyakmatai pegkegchau wajas asauwai. ²⁵ Imanikmatai faraón Moisésan, Aaróggjai untuka chichajak:

“Wetajum, tujash atushat wetsuk atum batsatjum nuwig kuntin maa apeakjum atumin Apajuí ememattajum”, tau.

²⁶ Tama Moisés ayaak:

“Juwi pujusa dutikamuk shiig awajtamtsuji. Nunú kuntin maa apeamua duka egiptunmaya diismak shiig pegkegchauwai. Nuadui ii kuntin maa apeaku Tuke Pujuu emematjin egiptunmaya aidau waipakag, ditak kuntinu emematin asag kayai tuku tukugmainakua mantamain ainawai. ²⁷ Nunin asamtai iik kampakum tsawantai weaja uwegshunum jegaa kuntin maa apeaku nii tujamauwa dutiksaik iina Apajuí Tuke Pujuu tutaya nunú ememattag taji”, tau.

²⁸ Tusa tutai faraón chichaak:

“Untsu takugmek uwegshunum wejum Tuke Pujuu atum emematin ainajum nunú kuntin maa apeakjum ememattajum. ¡Nuniakjum mina pachittsagmesh segatjitajum! Tujash shiig atushak shiyakaigpajum”, tau.

²⁹ Tusa tama Moisés ayaak:

“Israel aents aidau shiyakag kuntinun maa apeanak Tuke Pujuu ememattag tuina nunú wegpajum tusa tichatnaitkuminig, wi amijai juwi chichag nuna jiiinkin, Tuke Pujuu segattatjame amina jemin, ame atueka takataijum aidau jeen nuigtu aentsjum aidau jenishkam anchi waitkagmaina duka kashin megkaejatnume tusan”, tiuwai.

³⁰ Nuna tusa Moisés faraógka jeen pujau agá jiiinki Tuke Pujuu segauwai. ³¹ Tusa segam Tuke Pujuu Moisés sumamunak imatiksag umikui. Nuadui faraógka jeen, nii atueka takataiji aidau jenish, tuja ashí niina aentsji aidau jenishkam makichik anchigkesh atsusui. ³² Nunikmatai faraón antakchau wajas, Israel aents aidau dekas jijnashtinme tiuwai.

9

Makichik uweja amua suwimak suwaku kuntin ijituamu

¹ Nunikmatai Tuke Pujuu Moisésan chichajak:

“Faraón jegajua chichagkum: ‘Tuke Pujuu Apajuí, Hebreo aents aidauti emematin ainag nunú chichaak: Mina aentsug aina nuna jiiigti, dutikam mina emematjitnume’, tawai. ² Tusa tamaitkum jijnatnume tutsuk ayatak eme emeteakua wegau asamin, ³ amina tagkujum aidau ajagmin batsata

nuna Tuke Pujuu niina senchijin jata ishamainun awetittawai. Dutikam caballo aidau, burro aidau, camello aidau, baka aidau, uwig aidau ashí jinattawai. ⁴ Tujash Israel aents aidau tagkujig makichkish jakashti tusa Tuke Pujuu kuitamjuktatui, untsu egiptunmaya aidau tagkujinak ijituattawai. ⁵ Nuigtushkam Tuke Pujuu tsawantan mamikia chichaak:

“¡Wi kashin nunak dutikattajai! tawai”, tiuwai.

⁶ Nuna tusa idayas tsawamunum egiptunmaya aidaun tagkujinak Tuke Pujuu ashí ijituauwai. Tujash Israel aents aidau tagkujig makichkish jakachui. ⁷ Nunikmatai faraón niina aentsji aidaun ishiakui Israel aents aidau tagkujish jinacheash diisa ukutajum tusa. Nunú waketug kauna Israel aents aidau tagkujig makichkish jakachmae tusa ujakajui. Nuna dekaash faraóggak antakchau wajas, Israel aents aidaunak jijnjatnume tichauwai.

Seisa imania suwimak suwaku kuchap ajunjamu

⁸ Nunikmatai Tuke Pujuu Moisésan, Aaróggai chichajak:

“Pag inagtainum yuku awa nunú uwegmin atsaakijum jukitajum, dutikajum faraón wainai Moisésa ame yaki nagkimata. ⁹ Dutikam nunú nugá iyaak yukukuntu najanea ashí Egipto nugkanum jamagti, nuniak ashí aents aidaunak tagku aidaujai kuchap amuati”, tiuwai.

¹⁰ Tusa tima pag inagtainum yuku aun jukiag faraón pujamunum jegawajui, nuwi Moisés yukuun yaki nagkimauwai. Dutikam aents aidaunak, tagku aidaujai kuchap amauwai. ¹¹ Nuna tunchi aidaushkam achiimag tikich aents aidaujai betek jinuidau asag, ataktu awagkig makichkish Moisésjaig dekapdaimainchau wajasui. ¹² Tujash faraógnak Tuke Pujuu antakchau emauwai, nuadui Moisés Aaróggai tabaunak makichkish antugchau, Tuke Pujuu Moisésan chichajak nuniktatui tibaunak imanisag.

Sieteya imania suwimak suwaku bicha akaketkamu

¹³ Nunikmatai Tuke Pujuu Moisésan chichajak:

“Kashin kashikmasa nantakim faraón pujamunum wetá, nunika chichagkum: “Tuke Pujuu, Apajuí Hebreo aents aidaute emematin ainag nunú chichaak: Idaisati mina aentsug aina nuna; dutikam mina emematjitime. ¹⁴ Tuja nunú dutikachkuminig yamai nagkamsanuk mina suwimkajun amina, nuigtu amejai atueka takataijum aidaun, tuja ashí amina aentsjum egiptunmaya aina nuwishkam ishiktattajume. Dutikamtaidekattame ashí nugkanmak tikich witag imajuk makichkish atsa nunú. ¹⁵ Wika aminak, amina aentsjum aidaujai suwimka amaakun mina senchigjai yaunchuk ijinan juju nugka juwig emegkaumain awajkajime. ¹⁶ Tujash dutikachjime wagki mina senchijun atumin iwaintuka ai, ashí tikich nugkanmaya aidaush dekaumatnume tau asan.

¹⁷ “ Dutika idaimaitkum mina aentsug aidau jijnjatnume tutsuk ayatak eme emeteakuam weame. ¹⁸ Nuadui kashin kashikmasan bicha múun aidaun yaunchuk nagkamsash imanuk Egipto nugkanmag wainajakchamun yutumtjittajai. ¹⁹ Imaniktin asantai tagkujum ajanum batsatuk ashí yajuakjum jegá utsatajum, nunú dutikachaminig, bicha múun aidau kakegak ashí aents aidau ajanum batsatunak, kuntin aidaujai ijinattawai’ tawai Tuke Pujuu”, tiuwai.

²⁰ Tusa ujakam faraóggka atuwe aidau Tuke Pujuu tibaun ishamaidauk, ditá inake aidaun, tagkuji aidaujai jegaa utsawajui. ²¹ Untsu tikich aidau Tuke Pujuu tibaun puyatjus anentaimituinachuk, ditá inake aidaunak

tagkuji aidaujaig jegag utsachajui. ²² Nunik batsatai Tuke Pujuu Moisésan chichajak:

“iUwejum nayaimpinmanini takuita, dutikam bicha yutugti, nuniak ashí Egipto nugkanum kuntin aidau, aents aidau, ashí ajak aidauš ayá nuna jijnai!” tiuwai.

²³ Tusa tama Moisés niina kuntujin nayaimpinmanini takuiniuwai, dutikamtai Tuke Pujuu chaagpin, peeman ajunjauwai, dutikak bicha múun aidau ashí Egipto nugkanum yutumtjauwai. ²⁴ Tuja chaajip patak, peem peetuk, bicha kakegush makichkish mijamtsuk tuke imani au; yaunchkesh Egipto nugkanmag ibau wainajakchamu wantinjauwai.

²⁵ Ibau kakegu asa Egipto nugkanum ayaunak ashí tsaikui: aents aidau, kuntin aidau, ajak aidaujai ashí jijnauwai, dutikak numi aidau kanawenak ashí kupijauwai. ²⁶ Nunú imaniakush nugka Gosén Israel aents aidau batsatbaunmak makichik bichakesh iyaagchauwai.

²⁷ Imanitai faraón Moisésan Aaróggjai untsuka chichajak:

“Dekas wi pegkegchaun takasag nunak degagmamjai. Juna imajun itugchata igkugka waitiag duka Tuke Pujuu itugchatjijnigkish waitiatsjai, juka mina pegkegchauju, nuigtu mina aentsug aina nuna pegkegchaujin waitiajai. ²⁸ Wait aneasjum jutiish Tuke Pujuu segatkagtijajum, chaajip patak ishamain waja nunú, bicha yuta nujai mijaakti. Nunikmatai wisha atumnak emettsuk shiyaktajum tusan idaisatjime”, tau.

²⁹ Tusa tama Moisés ayaak:

“Wi juju yaaktanum pujag nuna jijnmawaik, mina uwejun takuin Tuke Pujuu segattajai, dutikai chaagpik megkaekattawai, tuja bicha yuta dushakam megkaekattawai. Nunikmatai dekattame nugkak dekas Apajuínuapi tusam. ³⁰ Tujash iman ishamain wainkumesh amek, amina atueka takataijum aina nujai, Tuke Pujuu yamaikish ishamatsjum nunak wika shiig dekajai”, tau.

³¹ Tuja bicha yutak ajak lino ajakbau yagkujuku aidau, nuigtu cebada ajakbau aidau nejekunak ashí jijnauwai. ³² Untsu trigo aidau, centeno aidau ajakbau makichkish wajukachajui eke tsapainachu asag.

³³ Moisés faraóggjai chichasa yaaktanmaya jijnmawaik uwejen takui Tuke Pujuu segauwai, dutikamuik wamak chaajip ishamain wajauk, bicha yutauk, yumi yutaushkam mijaakui. ³⁴ Nunik mijakmatai faraóggkak ataktushkam pegkegchaun takasui. Nuniak nijai atueka takataiji aidaujai anentainkachu wajasui. ³⁵ Nuniau asa Israel aents aidau nak jijnatnume tusag idaisachui, Tuke Pujuu yaunchuk Moisésan ujaak nuniktatui tibau-nak imaanisag.

10

Ochoa imania suwimak suwaku manchi ishitkamu

¹ Tuke Pujuu Moisésan chichajak:

“iFaraón pujamunum wetá! Wi niinak, nijai atueka takataiji aina nujai antakchau emattajai, wagki mina senchigjai wainchatai ishamain aidau iwaintuktag tau asan. ² Tuja nunú wainchatai ishamainun egiptunmaya aidau iwaintuktatag nunú wainkau asajum, amina uchijum aidau, tijajum aidau nunú pachisa ujakminum tau asan dutikattajai. Nunú wainkau asajum wi Apajuí Tuke Pujuu tutayaitag nunú dekattagme”, tiuwai.

³ Tusa tima Moisés Aaróggjai faraógka jegajuawag chichajuinak:

“Tuke Pujuu Apajuí, Hebreo aents aidauti emematin ainag nunú aatus tawai: ‘¿Wajupa asamea emematjüm idaikumesh wi tabaush umiktatme? Idaisata mina aentsug aidau, jünjag mina emematjitnume. ⁴ Tujash emeteakminig, kashin manchin ishittakattajame amina nügkemin. ⁵ Nunú manchi nugkanak akijuattawai, imanikmatai nugka wainmainchau wajas-tatui. Imanidau asag ajak bicha ijinam ujumak ampinjaunak amuktatui, tuja nuigtushkam numi aidaunashkam yuwa amuktatui. ⁶ Imanidau asa ame pujusa inamtaigminig, amejai atueka takatai aidau jenish, ashí egiptunmaya aents aina juna jenish imanisag manchi piyaktatui. Duka amina apakesh, apachjum aidaukesh nuniachkush yamaikish imanuk wainkachbau wainkattame’ tujamui”, tusa ujaka ukuak jünkiuwai.

⁷ Nuna tusa waketjamtai, faraógka atueka takataiji aidau niina jegantag tuidau:

“¡Au aents aina duka kuashta utugchata apujtugmas waitkagmainawai! Nuniau asamtai, dekas shiyaktajum nunikjum atumi Apajuí Tuke Pujuuwa nunú ememattajum, tita. ¿Amek waitsumek Egipto nugka tsainak patamsa duka?” tuidau.

⁸ Tusa tima faraón Moisésan Aaróggjai ataktu untsuka chichajak:

“¡Wetajum, nunikjum Apajuí Tuke Pujuu atum emematin ainajum nunú ememattajum! Tujash eke wetsuk tujuttajum, ¿ya aidauwa miniatatua?” tau.

⁹ Tusa tama Moisés ayaak:

“¡Jutii aidautik ashí iina uchiji piipich aidau, múuntuch aidau, iina nawanji aidau, iina uchiji aishmag aidau aatsa ashí yajuaka, nuigtu iina uwigji, baka aidaujai yajuaka shiyaktatji! ¡Nunú atatui dekas jutii Tuke Pujuu emematuinaku shiig aneasa jüstamauwa nunú!” tiuwai.

¹⁰ Tusa tutai faraón ditan tuke aneas dushikiak:

“¿Ayu duka nuniktajum, atumi Apajuíjum Tuke Pujuuwa nunú uyun-tansatnume tusa tujutchaintash tatsugmek? ¡Waitju yujagme! ¿Wi anen-tainchaukaitag uchijum yajuaka shiyaktajum tusa idaisatnun? Atumek duka pegkegchau anentaiyai tuu yujagme. ¹¹ Duka nunikchattagme. Ayatak aishmag múun aidautigmek wejum Apajuí ememattajum, nunú nuniktasa wakegau asajum”, tiuwai.

Nuna tusa juju wamak jilki ishiaktajum tima jilki ishiakajui.

¹² Dutikamtai Tuke Pujuu Moisésan chichajak:

“Uwejum takuita dutikawamin Egipto nugka juwi manchi kaunak ajak ayá nuna, tuja bicha ijinam ampinjau aina nujai amukti”, tiuwai.

¹³ Tima Moisés ushujutaijin juki Egipto nugkanum takuiniuwai, dutikam dase etsa minitaiya nuwiya shiig senchi tsawai, kashish dasenkau. Nunik tuke dase dasenkawa tsawak manchin ikaunmakui. ¹⁴ Dutikam nunú manchi Egipto nugkanmak piyak asauwai, yaunchuk nagkamsash imanijakchamun tuja atakesh imani achatnun. ¹⁵ Imanik manchik ashí nugkanum piyaku asa shuwin wajas asauwai. Imaniku asa bicha ijinam ajak ampinag juwaku aidaunak ashí amukui. Dutika ashí amukbau asa makichik numi dukendukesh Egipto nugkanmak shiig atsusui.

¹⁶ Imanitai faraón pyatuk wamkes Moisésan Aaróggjai untsuka chichajak:

“Atum Tuke Pujuu Apajuí emematin ainajum nuna emtin, tuja atumi emtinishkam pegkegchaun takasjai. ¹⁷ Tujash wait anejasum mina tudaujush tsagkugtugtajum nuniakjum segatjitajum atumi Apajuíjum Tuke

Pujuu emematin ainajum nunú, dutikam manchi ajaka amuina nunú megkaejati”, tau.

¹⁸ Tusa tima Moisés faraóŋka jenia jiinki Tuke Pujuun segauwai. ¹⁹ Tusa segam Tuke Pujuu dasen etsa akaetaiya nuwiyā awemauwai, dutikam shiig senchi dasentak manchinak tajak yajuak nayants kajis ain* tutainum utsauwai. Makichik manchikesh Egipto nugkanmak juwakchauwai. ²⁰ Tujash Tuke Pujuu faraóŋnak antakchau awagsauwai, dutikamu asa Israel aents aidaunak jiiñjati tusag idaisachui.

Nueveya imania suwimak suwaku suwe awajsamu

²¹ Dutikamtai Tuke Pujuu Moisésan chichajak:

“¡Uwejum nayaimpinmanini takuita! Dutikam ashí Egipto nugkanmak shiig kanchi achikaish dekapmain wajasti”, tau.

²² Tama Moisés uwejen nayaimpinmanini takuiniuwai, dutikaig ashí Egipto nugkanmak shiig kanchi wajasui. ²³ Imaanikmatai, nii pujamu yan-tamen pujaujaish wainitsuk, nuigtush yajakesh wekaemainchau wajasag kumpatum tsawan nuwig batsatu. Tujash Israel aents batsatbaunmak tsawai au.

²⁴ Nunikmatai faraón Moisésan untsuka chichajak:

“Yamaik ashí uchijum aidaushkam yajuakjum wetajum, nunikjum atumi Apajuñjum Tuke Pujuu ememattajum. Tujash uwigjum, bakajum aina duka ukuktatjume”, tiuwai.

²⁵ Tusa tama Moisés ayaak:

“Duka makichkish nunikchattawai, atumetjume tagku sukagtumaintig-mek. ²⁶ Tuja nuigtushkam iina tagkuji aidauk ashí yajuaktatji, makichkish juwakchattawai, wagki nuwiya etegja juki maa apeaku iina Apajuñji Tuke Pujuu emematta tuidau asaja. Tuja ii Apajuñ ememattinnum eke jegaskek, Apajuñ emematta takuish wajig atsumtaji duka dekamaitsui”, tau.

²⁷ Tujash Tuke Pujuu faraóŋnak antakchau awajsauwai, dutikamu asa Israel aents aidaunak jiiñjati tusag idaisachui. ²⁸ Tuja nuigtushkam faraón kajeka Moisésan chichajak:

“¡Jiinkim wetá ataktu wakitkimek tajutuawaipa! ¡Ataktu wakitki juwi takminig maattajame!” tiuwai.

²⁹ Tama Moisés ayaak:

“¡Dekas tame, ataktuk makichkish tajuashtatjame!” tiuwai.

11

Uchi iwai aidau jinattawai tusa etsegkamu

¹ Tuke Pujuu Moisésan chichajak:

“Faraóŋnak, niina aentsji egiptunmaya aina nujai tikich suwimkan awetittajai. Dutika ai atumnak wetajum tusa idaitamsattawai. ¡Tuja niina nugken batsatjum nunak ajumaish wakitki taashtinun jiiŋpag ishípakatui! ² Nuadui Israel aents aishmag aidau, nuwa aidau ashí ujakta umintsat- nume, nuninak egiptunmaya aidau ditajai ijutkau batsata nuna jiju plata tutayai nugkutai, patakumtai najanamu aidaun, tuja orojai najanamu aidaunashkam segatnume”, tiuwai.

³ Tuja egiptunmaya aidau Israel aents aidaun eme anentus diitnume tusa Tuke Pujuu tibau asamtaí, ditanak eme anentus diidau. Tuja

* **10:19** “Nayants kajis ain” tawa nunak “nayants kapantu” tutaya nuna taku tawai.

Moisésnashkam faraógka atuwe aidaushkam eme anentus diidau, antsag ashí egiptunmaya aidaushkam Moisésan eme anentujaku ainawai.

⁴ Tuja Moisés faraóghan chichajak:

“Tuke Pujuu aehaet ai Egipto nugkanum nagkaemaktatjai, tujamui.

⁵ Nuniai ashí egiptunmaya uchi iwai aidau jinattawai. Faraógka uchiji iwai apu ati timauwa nuwi nagkamnas, niina inataiji ajak juukbaun dekegka najanin aina nuna iwaijishkam jinattawai. Tuja ashí kuntin yama nagkamchaku petsakbau aidaushkam jinattawai. ⁶ Nunikmatai ashí egiptunmak yaunchkesh imanishtain, tuja ajumaish nunikchatnun senchi buutuinak pampaidiagtatui. ⁷ Tujash Israel aents aidau uchiji iwai aidauk makichkish jakashtatui. Tuja tagkuji yama nagkamchaku petsakbau aidaukesh jinashtatui. Nunik agkan batsatu asamtai, makichik yawá shinaukesh antuekashtatui. Duwi dekattagme Apajuí egiptunmaya aidau suwimka suwak Israel aents aidau nak kuitama nunú. ⁸ Juju aatus nagkaemakmatai amina atueka takataijum aina nunú ashí tajutuawag tikishmag segatuinak: ‘Aentsjum aidau ashí yajuakam wetajum’, tujutiagtatui. Untsu nuna tujutainachkuig wechattajai”, tiuwai.

Nuna tusa faraógka pujusa inamtaijin pujau Moisés kajeka jiiinkiuwai.

⁹ Nunikmatai Tuke Pujuu Moisésan chichajak:

“Faraóggak tusa tamash antugtamakshatui, nuniakush wi aan senchi ishamain aidau ashí Egipto nugkanum iwainagtatjai”, tiuwai.

¹⁰ Tuja Moisés Aaróggjai faraóghan nunú ishamain aidau ashí iwaintukui. Dutikamash faraóggak Tuke Pujuu antakchau emamu asa, Israel aents aidau Egipto batsatunak jiiinjati tusag idaisachui.

12

Pascua jüstamatin pachisa jintiamu

¹ Moisés Aaróggjai eke Egipto nugkanum pujaun Tuke Pujuu chichajak:

² “Juju nantu taka juju atalui mijan nagkamnamu. Juju makichkish kajimattsuk puyatjusum aneaku atatjume. ³ Nuadui ashí Israel aents aidau wi yamai tajim nunú ujaktajum: Juju nantutin tsawan diez tsawagtata duwi maki makichik múun uchigtin aidau uwig aishmag tsakatan, dutikachkush chivo aishmag tsakatan achiktinme. ⁴ Untsu ujumchik uchiji ajamu aidauk tikich múun uchiji ujumchik ajamujai ijunag makichik kuntinun maa maki makichik aentsush wajupaun yumainaita dutiksag tinamdaegak yuwatnume. ⁵ Nunú kuntinuk makichik mijan ajamu aishmag makichkish jamamtuchu pegkeg atalui. Duka uwig tsakat, nuniashkush chivo tsakatkeshtatui.

⁶ “Tuja nunú kuntin achikbau pujutta nunak, juju nantutin tsawan catorce tsawag agkuantai ashí Israel aents aidau maawagtatui. ⁷ Dutika maawag nuna numpen jukiag jega dita ijunag yuwawagtata nuna waititji atin, numi jimag ajiamua nuna, nuigtu yakí minamua nujai ashí ukatkatnume. ⁸ Dutikawag nunú kashia* nuaduik kuntu neje pegka inajuamun dupa yapau yutai aina nujai, nuigtu pag lewadurajai pachimtsuk inajumujai yuwatnume. ⁹ Untsu kuntin aina nuna neje uduuk, nuniachkush painka inagkamuk makichkish yuwawaigpajum, ayatak pegka inajuamu

* **12:8** Israel aents aidau tsawanta duka etsa akagai nagkamas kashinia nuadui etsa akagai nagkanui, nuadui nunú kashia duka tsawan quince nagkamnawai.

yuwatajum. Tuja buuke, nawe, anentai, akapé aina dushakam pegka inajuajum yuwatajum.

¹⁰ “Untsu tsawaja yuwatnuk ukukigpajum, tuja neje ampinjamtaig jiiun apeatajum. ¹¹ Tuja neje yuwakjumek shiig yapagmamajum, sapat wegamakjum, ushujutajum takusa wajasum waugsajum yuwatajum, wagki wi atumi ayamjukan uwemtikattajim nunú tsawan asamtai, mina emematjakjum tuke dutiksagmek yutinaitjume.

¹² “Tuja nunú kashia duwi wi ashí Egipto nugkanum nagkaemakun uchi iwai egiptunmaya aidaunak ashí ijinattajai. Dutikakun kuntu uchi yama nagkamchaku petsakbau aidaunashkam ashí ijinattajai. Tuja egiptunmaya aidau apajuimtaiji aina nunashkam ashí tsaigkattajai. Ima wikitjai Apajuí Tuke Pujuuunuk, tikichik atsawai.

¹³ “Tuja nunú numpai ukatkatajum duka atum tuu jeganum pujagme nuna iwainaktatui, nunú numpa wainkun atumnak agkan nagkaikittajime. Nuadui egiptunmaya aents aidaun wi ijintaish, atuminig makichik jamukesh atsuttawai.

¹⁴ “¡Juju tsawantak tuke kajimatkishtin atajum! Juju tsawantin ijunjajum mina emematjakjum tuke jiiistamtinaitjume. Junak uchi akiinak wedaushkam tuke dutiktin agtinme. ¹⁵ Tuja tsawan catorcetin kuntu maa yuwattajum, duwi nagkamsajum siete tsawantai pag lewadurajai pachimtsuk inajuamu yuwattagme. Nuadui nunú tsawantin nagkamas atumi jeminig makichkish lewadurak atsuttawai. Tuja makichik aentskesh pagkan lewadurajai pachimag inajua siete tsawan aina nunú tsawantin yuwauk, jiiki ajapeam atatui. Dutikamu asa Israel aents aidaujaig ijunjag pujuschatnai. ¹⁶ Tuja tsawan jiiista nagkamnamua duik, ashí ijunjajum mina emematjtnaitjume. Tuja jiiista amuebau tsawan sieteya duwishkam nunisjumek ashí ijunjajum mina emematjtnaitjume. Nunú tsawantinig makichkish atumi takatjumek takaschattagme, untsu atum yuwatin umikattajum duke dutikattagme. ¹⁷ Nunú jiiistaya duka, atum Egipto pujautigmin wi nunú tsawantai jiiiktatjim nuadui tuke jiiistamtin atajum. Junak uchi akiinak wedaushkam tuke dutiktin agtinme: ¹⁸ Juju yama nagkamchak mijan nagkamnamu nantu taka juju atatui pag lewadurajai pachimtsuk inajuamu yutai, juka tsawan catorcetin aagkú nagkamajum; veintiunotin aagkú inagnattagme. ¹⁹ Siete tsawantai atumi jeminig lewadura atsuttawai. Tuja siete tsawan aina nunú tsawantin pag lewadurajai pachimja inajuamun yuwauk, Israel aentschaukesh, tuja Israel aents akushkam jiiki ajapeam atatui. ²⁰ Nuadui pag lewadurajai pachimja inajuamuk makichkish yuwawaigpajum. ¡Atum tuwi pujuttagme! nuniakjumesh nunú jiiistatinig pag lewadurajai pachimtsuk inajuamu yuwatajum”, tiuwai Apajuí.

²¹ Juna aatus Apajuí timatai, Moisés Israel aents aidau apuji múun aidaun ashí ijumag chichajak:

“Wejum uwig aishmag tsakat achiktajum, tuja dutikachkugmesh chivo tsakatmesh achikjum maki makichik atumi jemin maatajum. Dutikawagmin nunú yuwaku Apajuí iina jiiipag agkanmitkagmatta nunú tsawan Pascua jiiistamawagmi. ²² Untsu numpak pinignum jukitajum, dutikajum ajak hisopo tutaya nuna titiji kupika jukijum, numpai uchupajum waii nujamkatin numi ajiamu aina nunú, tuja nuna yakin minamua nujai ashí ukatkatajum. Nunú dutikagmesh eke tsawatsaigkik makichkish jiiinkigpa.

²³ Egiptunmaya aents aidau uchi iwai aidaun ijituatatus Tuke Pujuu

nagkaemak waiti nujamtai jimag numi awa nunú, yakin minamua nujai numpai ukatkamun wainak ikaa nagkaemaktatui. Nuniak niina aentsji nayaimpinmaya magkagtina nuna atumi jeminig wayashti titatui. Nuadui atumi uchijum iwai aidauk makichkish jakachagtai.

²⁴ “Juju dutikatajum tujabi duka betek umiktin atajum, tuja atumi uchijum wegantu aidaushkam tuke dutiktin agtinme. ²⁵ Apajuí nugkan anagtabauwa nuwi jegagmesh, juka tuke jutikin atinaitjume. ²⁶ Tuja uchijum inimpainak: ‘¿Wagka jusha jutikaji?’ tusa inimpainakuig, ²⁷ atum ayaakjum: ‘Juju kuntin tuké maag juka Apajuí niina aentsji makagtinun awemamu nagkaemak egiptunmaya aentsu uchiji iwai aidaun ijitak, Israel aents aidaui jenig waittsuk, ikaa nagkaemak ijipachua nunú anentaimtusa jutikaji’ titajum”, tiuwai.

Aatus Moisés chichaka inagnakmatai, Israel aents aidauk ashí tikishmag pujusag Tuke Pujun emematuidau. ²⁸ Nunik wakitkiag, Tuke Pujuu Moisésan Aarógjai akatjamunak imatiksag betek umikajui.

Dieza imania suwimak suwaku uchi iwai aidau ijinamu

²⁹ Nuniamunum aehaet Tuke Pujuu aentsji nayaimpinmaya magkagtin nagkaemak egiptunmaya uchi iwai aidaunak, faraógka uchiji iwai apu atin tibau niina apaji pujusa inamtaijin pujujakua nuwi nagkamas, aents achikam chimpijun uchiji iwai aidaunashkam, tuja kuntinu uchiji yama nagkamchaku petsakbau aidaujai ijinauwai. ³⁰ Dutikamtaí nunú kashia duwi faraón niijai atueka takataiji aidaujai, nuigtu ashí aents Egipto nugkanum batsamin aidauk nantajag shiig senchi buutuina ashí egiptunmak pampaidau. Makichik jeganmakeh iwai iwaaku pujauk shiig atusui. ³¹ Nunikmatai nunú kashia duwik, faraón Moisésan Aarógjai untuka chichajak:

“¡Shiyaktajum, nuniakjum Israel aents aidau ashí yajuaktajum, nunikjum atum timaujum dutiksagmek atumi Apajuíjum Tuke Pujuu ememattajum! ³² Nunika shimakjum atum mina segatmaujum duka dutiksagmek uwig aidau, baka aidau yajuakjum wetajum. ¡Nuniakjum minash Apajuí Tuke Pujuu segatjitajum!” tau.

³³ Tuja Israel aents aidau iina nugken batsata nuna wamak shimuinachkuig, ashí jinawaig tuidau asag, egiptunmaya aents aidau ditan waugmitkaidau wamak shiyaktinme tusag.

³⁴ Dutikainam ditashkam harina nanegbau lewadurajai pachimjach-baun, harina namutaijai ijumag ditá jáanchjin pempeajag yanakiag jukiajui. ³⁵ Dutikainak Moisés ditan akatjamunak imatiksag Israel aents aidauk egiptunmaya aidau wajiji jiju plata tutayai najanamu aidaun, orojai najanamu aidaun, tuja jáanch nugkurai aidaunashkam segaidau. ³⁶ Dutikainam egiptunmaya aidauk ashí dita sumamunak imatiksag susajui, wagki Israel aents aidaun eme anentus diitnume tusa Tuke Pujuu dita anentain antinkamu asag. Dutika dita wajiji aidaunak ashí susag wajigtuchu juwakajui.

Israel aents aidau Egipto nugkanum batsatu jijnamu

³⁷ Tuja Israel aents aidauk yaakat Ramsés batsatu jijnag shiyakajui Sucot nugkanum. Tuja nuwa aidau, uchi aidau dekapatsuk ayatak aishmag wajiu maanimain aidauk dekapamak seiscientos mil aajakui. ³⁸ Israel aents aidau jijnag shimuinakug uwig aidaun, baka aidaun, shiig kuashat yajuakajui. Nunik shimiagtai aents tikich nugkanmaya aidaushkam shiig

kuashat ditajai ijunag shiyakajui. ³⁹ Nunik shimuinak, yujumak inagmain tsawan atsutai yumainun inagkachaju asag harina levadurajai pachimtsuk nanegbau egiptunmaya jukimujin nuna pagkan najanak inagkajui.

⁴⁰ Tuja Israel aents aidauk Egipto nugkanmak cuatrocientos treinta mijan batsamsaju ainawai. ⁴¹ Tuja cuatrocientos treinta mijan jegau ai, nunú tsawantaik Egipto nugkanum batsatu ashí jijnjaju ainawai. ⁴² Tuja Tuke Pujuu niina aentsji Israel aidaun Egipto nugkanum batsatun jigtatus nunú kashia duwi ditan kuitamak wekaetau. Nuadui atakea duish Israela uchiji aidaush Tuke Pujun emematuinak nunú kashia duwi kanutsuk tsawaidiagtin ainawai.

13

Yama nagkamchak akiinau aidauk Tuke Pujuuu agtatui tibau

¹ Tuke Pujuu Moisésan chichajak: ² “Uchi iwai aina nunú midau agtin akaantugkata, wagki ashí Israel aents aidau uchiji aishmag iwai akiinuk, tagku yama nagkamchaku petsakbau aina nujai jashí midau ainawai!” tiuwei.

³ Tusa tima Moisés nii wegantu Israel aents aidaun chichajak: “¡Atum Egipto nugkanum batsamsajum waitu batsatutigmin, Tuke Pujuu niina senchijijai juju tsawantin jipaja nunú tsawan aneaku atajum! Nuniakjum nunú tsawantinig pag levadurajai pachimja inajuamuk yuwawaigpajum.

⁴ Atumek juju tsawanta juwi, nantu Abibtin* jijnjume. ⁵ Atumi muunjum aajaku aina nuna Tuke Pujuu anagkuak: ‘Canaán aents, hitita aents, amorrore aents, heveo aents, Jebús aents aina nuna nugke shiig pegkeg, ajak shiig tsapau, tagkush shiig muumpaina nuna atumi uchijum aidaunak susagtinaitjai’ tiuwa nuwi ejetamawagmatai, batsamsagmesh juju nantua juwi ijunajum Tuke Pujuu tuké ememattin atajum. ⁶ Tuja siete tsawantai pag levadurajai pachimtsuk inajuajum yutinaitjume, untsu tsawan sieteya duwi ijuntsajum Tuke Pujuu emematjukum jistamattagme. ⁷ Siete tsawantai pag levadurajai pachimtsuk inajuamu yuwatajum, nunú tsawan aina nuaduik levadurak tuja pag levadurajai pachimja inajuamukesh atum pujamunmak shiig atsuttawai. ⁸ Tuja nunú tsawantin uchijum aidau chichagkujum: ‘Juka ii Egipto nugkanum waitkam batsatutin Tuke Pujuu jipajua nunú anentaimtusa jutikaji’ titinaitjume. ⁹ Nunak Tuke Pujuu midau atinme tusa atumin uwegmin, dijaimin agatjamkau amainaitjum numamtuk asantai, chicham umiktin agagbaun Tuke Pujuu umiktajum tujabauwa duka kajimattsuk aneaku atajume. Wagki Egipto nugkanum waitkam batsatutigmin niina senchijin jügmajaju asantai. ¹⁰ ¡Nuadui maki makichik mijantin tsawan mamikiamua duwi shiig aneasa ijunajum Tuke Pujuu tuké ememattajum!

¹¹ “Tuke Pujuu atumi muunjum aajaku aina nuna, tuja atumnashkam canaágnunia aents aidau nugken amastajime tusa anagtabauwa nuna amasmataig, ¹² ashí uchi iwai aishmag akiinaidauk, kuntuu uchiji yama nagkamchak aishmag petsakbauwa nujai Tuke Pujuu idaitustajum, wagki duka niinu asagmatai. ¹³ Tuja uwija uchiji aishmag atsugtamkuig, burro yama nagkamchaku petsakbauwa nunú maatajum. Untsu uwig

* **13:4** “Abib” tawa nunak “ajak aidau yagkujut” taku tawai. Tuja nunú nantua duka nantu marzo tsawan 15tin nagkama nantu abril tsawan 15num ashimnawai. Hebreo aents aidau nantu dekapainakug Abibnum nagkama dekapau ainawai. Tuja iiniatinuk duka atsawai untsu apach aina nunú dekapainawai enerotin nagkamawag.

tsakat ajutjamkuig, tuja chivo tsakatkesh ajutjamkuig, nunú Tuke Pujuu suwakjum burrok mautesuk idaisatajum. Tuja atumi uchijum aishmag iwai aidau Tuke Pujuu sumaina nunú tikich waji anentag Tuke Pujuu suwakum uchijum uwemtijatajum. ¹⁴ Tuja tikich tsawantai uchijum inimpak: ‘¿Wagka jusha jutikame?’ tujamkuig, ame ayaakum: ‘Ti aidauti Egipto nugkanum batsamsa inaku waitkatai batsatutin Tuke Pujuu niina senchijin jiigmag agkanmitkagmawuwa nunú tsawan asantai jutikaji. ¹⁵ Tuja faraón antakchaw wajas iina jiiptan dakittai, Tuke Pujuu egiptunmaya uchi aishmag iwai aidau, kuntu uchiji yama nagkamchaku petsakbau aishmag aidaujai ijituawa nuadui, kuntu yama nagkamchak petsakbau maa apeaku Tuke Pujuu emematji, wagki jutii uchiji aishmag iwai aidau jatsuk uwemkaju aina duwi. ¹⁶ Nuadui kuntu iinu atin kuntu, dijainum agatjamu amaina numamtuk atum kuntu maa apeamua nunú tuké anemtijamsagke atinai, atum Egipto nugkanum pujautigmin Tuke Pujuu niina senchijin jiigmajawuwa nunú’”, tiuwai Moisés.

Nayants kapantunmanini shiyakbau

¹⁷ Faraón Israel aents aidau shiyaktinme tusa idaisamtaish, Apajuik filisteo batsata nuni jinta tutupit jegá aatu wetinme tusag tichauwai. Wagki filisteo aents aidau jinta epetam ditajai maaninak ishamak awake anentaimag Egipto nugkanum ataktu waketjainum tau asa. ¹⁸ Nuadui dekas jinta uwegshun tentea wea nuni nayants kajis ain[†] tutaya aatus wetinme tiuwai.

Nuadui Israel aents aidauk Egipto nugkanum batsatu jiiinag shimak, sungat maaniatatus shimumaina imaanik shiyakajui. ¹⁹ Nunik wenak Moisés José ukunchin jukuiwai. Nunak dutikauwai wagki José iwaku pujusa niina patayi Israel aents aidau chichajak: ¡Apajuí atumnak jiigmajagtin ainawai; dutijamainakuig mina ukunchjuk ukutsuk jukitin atajum! tibau asag.

²⁰ Nunikag nugka Sucot tutainum batsatu jiiinag uwegshunum jegan-tatak, Etam nugkanum jegawag aakmajag batsamsajui. ²¹ Tuja tsawai dita shimamunum nuna emtin Tuke Pujuu yujagminum pachitkau eemak wejaku, untsu kashi jii kegaunum pachitkau eemak wegau, nuna diisag tsawaish, kashish shiyaktinme tusa. ²² Tuja tsawai shimiagtaik yujagkim awaantamu eemak wajantun wejaku, antsag kashi shimiagtaishkam jii keeka eem wajantun wejaku.

14

Israel aents aidau nayants kajis ain tutainum katiagbau*

¹ Israel aents aidau Etam nugkanum batsatai, Tuke Pujuu Moisésan chichajak:

² “Israel aents aidau ujakta, waketug Migdol nugka nayantsajai niniaku awa nuna ejapeen yaakat Pi-hahirok tikich yaakat Baal-zefonjai awa, nujai niinis nayantsanum uwet aakmag batsamsatneme. ³ Faraón anentaimas: ‘Israel aents aidauk wajuk wetinmeki nunak dekainatsui. Nuadui, auk uwegshunum wagaja yujatai’ titatui. ⁴ Tuja atumin pataetugmaktinme

[†] **13:18** “Nayants kajis ain” tawa duka hebreo chichamnum tuu adaikamui. Untsu griego chichamnum yamajam chicham agagbauwa nuanuig “nayants kapantu” tawai. * **14:** “Nayants kajis ain” tawa duka hebreo chichamnum tuu adaikamui. Untsu griego chichamnum yamajam chicham agagbauwa nuanuig “nayants kapantu” tawai.

tusan wi niinak ataktu antakchau awajsattajai. Dutika ai pataetugmakui, niina, tuja niina suntaji aidaujai wi mina senchijun iwaintuktatjai. Dutika ai egiptunmaya aidauk, wi Apajuí Tuke Pujuu tutayaitag nuna dekajuawagtatui”, tiuwai.

Tusa tñajam Israel aents aidauk Tuke Pujuu tibaun betek uminak nuwi aakmajag batsamsajui.

⁵ Nuninai faraógshakam Israel aents aidauk shiyakaje tabaun dekauwai. Nunik nijjai atueka takatai aidaujai awake anentaimag kajekag chichainak: “¿Wagka Israel aents aidau iina takagtamainak batsatush jijnag shiyaktinme tusaish timaji?” tuidau.

⁶ Tusag, carro maaniaku wetai aidau umiktajum tusa faraón timatai, imatiksag umikajui, dutikawagmatai niina suntajin ijumjauwai. ⁷ Dutika seiscientos carro dekas pegkeg aidau yajuak, nuigtushkam egiptunmaya carro aidauk ashí yajuakag nuwi maki makichik suntaja apuji aidau pekamiag shimutkajui. ⁸ Tuke Pujuu faraógka shiig antakchau awagsauwai, dutikamu asa Israel aents aidauk Tuke Pujuu senchijijai jijnag shimuidaun dekainayatak pataetukajui.

⁹ Nuninak ashí suntag aidauk, carronum, caballonum aatus pataetukag, nayantsanum uwet yaakat Pi-hahirok tikich yaakat Baal-zefonjai niinis awa nuwi aakmag batsamtatman amainaidau. ¹⁰ Nuna wainkag, Israel aents aidauk shiig senchi ishankajui, nuninak Tuke Pujuu ayamjupakti tusag segaidau. ¹¹ Nuniyatak Moisésan chichajuinak:

“¿Egipto nugkanmak ukumataig atsau asamtaig, imajui uwegshunum jinatume tusamesh jiijatjamum? ¿Wagka jusha jutikagtame? ¿Wagka Egipto nugkanum pujajinish jiiatkimume? ¹² Juju aneasa Egipto batsamsa chichaaku: Idaikagtustajum waitiakuish egiptunmaya aidau takajuinaku batsamsagmi ¿tichamkajim? ¿Nunisaik batsatkuik, imajui uwegshunum jinumainkaitag?” wajaidau.

¹³ Imatiagtai Moisés ditan ayaak: “¡Ishankagtutsuk anentaim ichichi-agtajum! ¡Nuniakjum Tuke Pujuu iina ayamjupak dutikatta nunú wainkatajum! Yamai atum egiptunmaya aidau wainjum duka ataktu awagkigmek wainkashtinaitjume. ¹⁴ ¡Atumek uyumakaigpa, Tuke Pujuu iina ayamjupak maaniattawai!” tiuwai.

¹⁵ Tusa tutai Tuke Pujuu Moisésan chichajak:

“¿Wagka minash yainkata tusamesh segatme? ¡Anui wajasam mina segatú wajatsuk Israel aents aidau weajum antsagmek wetajum tita! ¹⁶ Tuja jame ushujutajum takakam nunú takuim nayantsanmanini awentata! Dutikawamin nayants jimaituk kanaka ejapeen buku wajastatui, nunikmatai Israel aents aidau bukunum katiagtinme. ¹⁷ Wi egiptunmaya aidauk antakchau ema ai pataetugmakagtatui. Nuninakuí ashí nii suntaji, carroji, caballoji aidau minina nuna ijinkun mina senchijun iwainaktatjai. ¹⁸ Nuna dutikamtaí jegiptunmaya aents aidauk deka-juawagtatui dekas wi Apajuí Tuke Pujuu tutayaitag nuna!” tiuwai.

¹⁹ Nuna tusa inagnaig, Apajuí ángel tumain nayaimpinmaya Israel aents aidau shimamunum yujagminum pachitkau eemak wegau ukuunum juwakuí, nunitai yujagmishkam antsag ukuunum asauwai. ²⁰ Nunú yujagkim egiptunmaya suntag aidau shimamunum nuna emtin wajantui, nuniaig suwe wajasui, untu Israel aents aidau shimamunmak yujagkim etsantug tsaaptin wajasui. Nuadui nunú kashi aajakua duik Israel aents aidauk amaigkachaju ainawai.

²¹ Nuninai Moisés niina uwejen nayantsanmanini awentauwai, dutikantai etsa minitaiya nuwiyen Tuke Pujuu makichik kashi shiig senchi dasenmitkakui. Imatika umpuamu asa nayantsak jimaituk kanakui. Aatus Tuke Pujuu nayantsa ejapeen buku awagsauwai. ²² Nunik nayants ejapeen buku wajasa, mai yantamenig yumik muja iman wajas ai, Israel aents aidauk utsanawag katiyajui.

²³ Nuniagtai faraógshakam niina suntaji aidaujai carro maanitai aidaunum, caballo maanitai aidaunum pekamiag, pataetukag nayants buku wajasbaunum utsanawag ejapeantajui. ²⁴ Tuja aents maanitan yacha aidau Israel aents aidaun pataetukag shimuidau. Nunik shimuinai tsawamunum Tuke Pujuu Israel aents shimamunum eemak yujagminum tuja jii kegamunum wejakuwa nunú egyptunmaya aidaun ayampatua diisui. Dutikam ishamainak utujimkag waugtuinak wechamin wajasajui. ²⁵ Tuja carro kagketaiji aidaushkam kushatuk ukuinidau. Nuniagtai juwimainchau dekapenak untsumaidau. Nuninak ditak pempeentunikiag chichainak:

“¡Auk Tuke Pujuu Israel aents aidaun ayamjak jutijai maaniak jutijamui, dekas pisajagmi!” tuidau.

²⁶ Tusa imatiagtai Tuke Pujuu Moisésan chichajak:

“Uwejum nayantsanmanini awentata, dutikamin yumi waketak egyptunmaya aents aidaun, ditá carroji aidaun, caballoji aina nujai yutua ijinati!” tiuwai.

²⁷ Tama Moisés niina uwejen nayantsanmanini awentauwai. Dutika uwejen awentamtai, nayants ejapeen buku wajas auk, tsawak yaunchuk aajakbaunak imanisag piyag asauwai. Tuja egyptunmaya aents aidauk pisagtakama nayantsanmak egkemkajui. Aatus Tuke Pujuu egyptunmaya aidaunak nayantsanum aepá ijinauwai. ²⁸ Nuadui nayants yaunchuk aajakbaunak imanisag weak faraón niina suntaji aidaujai carro aidaunum, caballo aidaunum, Israel aents aidaun pataetukag nayantsanum utsaadau aidaunak ashí yutua ijinauwai. ¡Tuja faraógkan suntaji aidaunmayag makichkikesh uwemjachui! ²⁹ Untsu Israel aents aidauk nayants buku wajas, mai yantamen yumi muja iman wajas aunum ditá eemak, shiig katiyajaju ainawai.

³⁰ Aatus Tuke Pujuu Israel aents aidaunak egyptunmaya aents waitkam batsatun ayamjuk uwemtikjauwai. Dutikamu asag nayantsa tugkitken yujakma egyptunmaya aents jinaun nayants tsukatak tugkitak anugkam batsatun wainkajui. ³¹ Nuna Tuke Pujuu imatika niina senchijin egyptunmaya aidaun ijinamun wainkag, Tuke Pujun eme anentus diidau. Nuadui ima Apajuíyaig kajinas anentaimainak, niina inake Moisésnashkam dutiksag kajitus anentaimtuidau.

15

Moisés Tuke Pujun emematak kantamamu

¹ Tuke Pujuu ayamjuka uwemtikjam, Moisés nii wegantu Israel aents aidaujai Niina emematuinak juna aatus kantamawajui:

“Tuke Pujun, eme anentsan kantamjuatjai, wagki niina senchijin ashí depetmak, shiwag caballojin entsatkau aidaun nayantsanum ijinau asamtai.

² Tuke Pujuu minak senchimtijawai,

niyai mina ayamjumataijuk,
nuadui wika niina kantamjajai.

Niyai dekas mina Apajuujuk,
nuadui shiig aneasan ememattajai.

Niyai dekas mina apajun Apajuuji,
nuadui wika tuke niina etsagjatnaitjai.

³ Tuke Pujuuwa nunuwai dekas maanitan yachak.
Niina daajig dekas Tuke Pujuu tutayai.

⁴ “Faraógka carrojinak, ashí niina suntaji aidaujui,
nuigtu suntaja apuji dekas yacha etegjamu
aidaunashkam Tuke Pujuu nayantsanum aepá ijinae.

⁵ Nuadui ditak nayantsa kunajin
shiig initak kayajai betek tepeawaje.

⁶ “Chah, Tuke Pujuuwah,
amina senchigmijai iina shiwaajig ijinamume,

⁷ Amina senchigmijai, shiwaajum aidauk depetnaitme.
Iman asam ame kajekbaugmin chijichi kagaku
apemaina numamtuk ijina emegkagmaume.

⁸ Ame dase awemamu nayantsan umpui jimaituk akankae.
Dutikamu asa yaakat peejamua iman wajasmae.
Nayantsa initkenish yumik buchittsuk asae.

⁹ Iina shiwaaji anentaimas:
‘¡Pataetukagmi! Dutika amainagkaja
ijjinku wajiji yajutka tinamdaekagmi’ tiaje.

¹⁰ Tujash ame dase senchi dasenmikakam
nayantsa ejapeen aepá emegkakmaume.
Nuadui plomo ajugkam tepegama numamtuk tepeawagmae.

¹¹ “¡Chah, Tuke Pujuuwah!
¡Aents aidau apajuímtaiji aina duka kuashtai!
¿Tujash amejai betek amainush tikichish aintash?
¡Ima ameketme pegkejam muunmek!

¡Ameketme ashí senchigtinmek!

¡Ameketme wainchatai aidau
ishamain iwainam ibaumek!

¡Ameketme ememattaimek!

¹² Amina senchijum iwainakume, dutikawamin
nugka ujani egiptunmaya aidaunak kujag emegkaje.

¹³ Amek amina aentsjum aidau
shiig senchi aneau asam,
amina senchigmin uwemtikjaume;
nuadui amina senchigminig uyunkagtusam ekagtame
nugka pegkeg anagkagtuawaitam
nuwi jegatnume tusam.

¹⁴ Juna aents tikich nugkanmaya aidau antukag
senchi ishamainak kujainiagtatui;
tuja filisteo aidaushkam sapigmmainak najaimaku
wajukmaina numamtuk tuni tunija iyainiagtatui.

¹⁵ Tuja Edom nugkanmaya suntaja apuji aidauk, ishamkag wakan wajasag-
tatui.

Tuja Moab nugka apuji aidaushkam
ishamainak kujainiagtatui.

Nuninai Canaán nugkanum batsamin aidaushkam
ishamkag wainkauch dekapmamiagtinaí.

¹⁶ ¡Chah, Tuke Pujuuwah,
aatus sapigmainak anentaimjatnume!
Amina senchijum iwainam juna dekainak
kaya buchitmainchauwa nunin wajastinme,
nunikmatai amina aentsjum ame uwentijamu
aina juka ame nugka anagkuawaitam
nuwi shiig utsaanatnume.

¹⁷ ¡Chah, Tuke Pujuuwah,
jukagtukim aminu atin muja etegkamua
nuwi pujustinme tusam ejekagtuata!
¡Ame nuwi pujustinme tusam etegkauwaitme,
tuja duka amina jem ame pujustin emtikam umikuitme!

¹⁸ ¡Chah, Tuke Pujuuwah,
amek yamaish, kashinish, ajumaya duish
tuke inama pujutnaitme!” tiuwai.

María kantamamu

¹⁹ Faraógka carroji maanitai aidaunum, caballo maanitai aidaunum sun-
tag aidau pekamiag nayants buku wajasmatai utsaanawag shimuidaun,
Tuke Pujuu yumin awakeak yutua emegkajui. Tujash Israel aents aidauk
bukunum shiig katiajajui.

²⁰ Nunikagmatai Tuke Pujuu chichamen etsegtin María, Aarógka umayi,
panderetan juki awatak kantamtai, ashí nuwa aidauk ditashkam pan-
deretan awaituinak nantsemaidau. ²¹ Imaniagtai María ditajai ijunag
kantamak:

“¡Tuke Pujuu eme anentsajum kantamjuatajum,
shiwag caballonum maanin aidau entsatkau minidaun
nayantsanum aepá ijinak depetmaku asamtai!”
waja wajas kantamu.

Yumi yapauunum jegamu

²² Moisés nii wegantu Israel aents aidaujai nayants kajis ain tutainum
batsatu juwakiag, uwejush Shur tutainum kampakum tsawan yumi
atsamanun shimu batsatu. ²³ Nunik shima shimakua yumi aunum
jegawajui, tujash nunú yumik yapau asamtai uwagchajui. Nuadui nunú
nugka daajinak “Mará”^{*} adaikajui.

²⁴ Nuadui Israel aents aidau, Moisésa kajejuk pegkegchaun chichajuinak:
“¿Yamaish iish wajig uwagtaji?” tusa imatjuinau. ²⁵ Imatjuinam Moisés
Tuke Pujuu yainkati tusa segauwai. Tusa segam, Tuke Pujuu Moisésan
inaktusui numi uchuchiji wajaun. Nuna Moisés tsupik juki yuminum
ajukui, dutikam yumi sakam pegkeg wajasui.

Tuja nunú nugkanum Tuke Pujuu ditan dekapsauwai, dutika nuadui
dita chicham umikagtinun susauwai. ²⁶ Dutika chichajak: “¡Wi Tuke
Pujuu atumi Apajuímetag nunú tabau puyatjusa antukjum wi wakegamu
takakjum, chicham umiktinun wi amasuitjim nunú betek umiakjuminig,
egiptunmaya aidau jata awetiuwaitag dutikanuk atumnak makichkish
awetishtajime! ¡Witjai Tuke Pujuu atumi etsagaumainnuk!” tiuwai.

* 15:23 “Mará” tawa nunak hebreo chichamnumak “yapau” taku tawai.

²⁷ Tusa tiajam shimui shimuinakua Elim tutainum, doce yumi pukuni jiinu, nuigtu setenta palmera aidau ijununum jegawajui, nunikag pukuni jiinainamunum ayauwas aakmajag batsamsajui.

16

Apajui Israel aents aidau maná susamu

¹ Israel aents aidau Elimnum batsatu ashí jiinag juwakiag shima shimakua Elim muja Sinaíjai niniaku awa nuwi uwejush Sin tutainum jegawajui. Nunak egiptunmaya jiinjauwa duwi nagkamas makichik nantu asa jegawajui. ² Nunú uwegshunum Israel aents aidau Moisésan Aarógjai chichaman patatuidau. ³ Tusa chichainak: “¡Atumek nujantai jinatnume tusajum juju muja juwi itajatuagme! ¡Awi batsamsaik waitiakuish, neje ollanum bete painka inagkamu shiig yuwa ejemaja pujuyaji, dekas Egipto nugkanum pujajinig Tuke Pujuu ijipati tumainus tichayagtai!” wajaidau.

⁴ Imatiagtai Tuke Pujuu Moisésan chichajak:

“¡Dita yuwatnunak nayaimpinmayan yumijai betek wi yutumtijattajai! Dutika ai makichik tsawantai yuwatnujin juuktinme. Nuadui dekattajai yaki dekas wi dutikatajum taja nunash betekash umikat, tuja yaki umikchat nunashkam. ⁵ Untsu tsawan seisa duwi yuwatin juwakjumek, iimag tsawantai yuwatin asantai, makichik tsawantai yuwatin juuttajum aan kuashat juuktajume”, tiuwai.

⁶ Tusa tima Moisés Aarógjai Israel aents aidau ujinak:

“Yamai agkuantai dekattagme, atum Egipto nugkanum batsatutigmin Tuke Pujuu jii pagmaya nunú. ⁷ Atum chicham patatjum nuna antugtamkaje. Nuadui kashin kashikmas niina imanjin iwaintugmaktata nunú wainkattagme. ¿Wagka atumesh jutiish augmatkagtagme? ¿Iikaitag atum atsumamu sumainti?”

⁸ Tusa ataktu Moisés chichaak:

“Atum yuwatnun Tuke Pujuu nejen ajum aagkú amastatui, untsu kashikmas pagkan shiig kuashat amastatui. Nunak dutikattawai atum chicham patatbaun antugtamkau asa. ¿Ilish ya ainaji? Atum chicham patatkatajum duka jutiik tukagtatsjume, Tuke Pujuu patatku tajume”, tiuwai.

⁹ Nuna tusa Moisés Aarógan chichajak:

“¡Israel aents aidau ashí ujakta Tuke Pujuu emtin ijunjatnume! Nunikag antuktinme dita chichaman pataina duwish, Tuke Pujuuish wajintig”, tiuwai.

¹⁰ Tusa tima Aarón Israel aents aidau ijumag chichaak wajai, uwegshunmanini niimsatakama, yujagkim winchamtinnum Tuke Pujuu wantintatman wainkajui. ¹¹ Nunú yujagminmaya Tuke Pujuu Moisésan chichajak:

¹² “Israel aents aidau chichaman pataina nuna antukjai. Nuadui juju aajam dita aidau ujakta: ‘Ajum agkuantai neje yuwattagme. Untsu kashikmasjum pag shiig kuashat yuwattagme tujamui. Aatus dekawagtatui wi Apajui Tuke Pujuu tutayaitag nuna’ tawai”, tiuwai.

¹³ Tusa timatai nunú tsawantin agkuantai aakmaja batsatbaunum codorniz* shiig kuashat kaunauwai. Nuniku ai kashikmas yumi sajatuk nugkan uchupkauwai. ¹⁴ Nunú yumi sajatuk nagkaemakmatai jinkiag diikma jegashik dukanum ekemag aama numamtin tujash katsujam, uwegshunum nenentu yaijuch aidau eketag weajun wainkajui. ¹⁵ Nunikag

* **16:13** “Codorniz” tawa duka yampitsa numamtainai.

nuna dekainachu asag tudayinak: “¿Jusha wajimpaya?” Tiagtai Moisés ditan ayaak:

“Junak Tuke Pujuu pagkan yuwatnume tusa amasa nunuwai. ¹⁶ Juna amaak aatus tujamjume: Maki makichikitijum wajupa yuwainaitjume nunú betek jukitajum, tuja wajupa aents jeminish pujuinawa nunú dekaapajum maki makichik aentsdau ichinak jimag litro yajatainum aimkajum jukittagme tujamjume”, tiuwai.

¹⁷ Tusa tima Israel aents aidauk dutiksag juukajui; tuja nii ima dukap juwai tikich ujumak juwaushkam asajui. ¹⁸ Dutik jukitajum tibaunak betek jukiaju asagmatai kuashat jukiwuwa nudaush ampinjachui, tuja ujumchik jukiushkam etagagchajui. Maki makichik dita wajupa yuwawagtatua nuna betek dekapa jukiaju.

¹⁹ Dutikawagmatai Moisés ditan chichajak:

“¡Makichikitigmekesh kashin yuwatnuk ampigumek ukukigpajum!” tiuwai.

²⁰ Tusa tibau aig Moisésnak antuugsuk, kashin yuwami tusa ampigaj ukuidaushkam asajui, tujash duka aka pimutkam kauja mejedau. Nuna dutikawagmatai Moisés ditan kajegkauwai.

²¹ Duwi nagkamas maki makichik dita yuwatnujin kashi kashinig yajumainau. Tuja etsa etsantak sukuam yumimea megkagu asamtai, kashikmas jiintujag yajumajaku ainawai.

²² Untsu tsawan seistinig jimag ichinkanum aimak yajumainau. Dutikiagtai Israel aents aidau apuji aidau Moisésan jegajuawag ujaidau.

²³ Tama Moisés ditan chichajak:

“Aunak Tuke Pujuu dutikatnume tusa timae”, tiuwai. Nuna tusa: “Kashin tsawan ayamtai atinun, Tuke Pujuu etegkamu tsawagtin asamtai, inagmain akuig yamaik inagkatajum, tuja ukuumain akuishkam yamaik ukuukatajum. Untsu yumain ampinjatta duka kashin yuwatin ukuktajum”, tiuwai.

²⁴ Aatus Moisés tibaunak imatiksag yutai ampinjaunak kashin yuwatnujin ukukiaju. Tujash nunak akakesh ikiachui, tuja mejetnakesh mejeachu.

²⁵ Nuadui Moisés ditan chichajak:

“Atum yau ukukbaujum nunú yamai yuwatajum. Juju tsawanta juka Tuke Pujuu etegkamu ayamtai tsawaje. Nunin asamtai, ¡juju tsawanta juwi yutai agá ayauk wainkashtatjume! ²⁶ Nuadui ayatak seis tsawanta duwi atum yuwatnuk juuktatjume. Untsu tsawan ayamtai Tuke Pujuu etegkamua nunú tsawantinig yutai juwamuk atsuttawai”, tiuwai.

²⁷ Tusa tiu aig, tsawan ayamtai tsawagmataish jiinki egaidaush asajui, tujash makichikish wainkachajui. ²⁸ Nuniagtai Tuke Pujuu Moisésan chichajak:

“Wi atumi jintinkun, juju umiktajum timajim dusha ¿wajupa chichagkama atumesh umiktatjume? ²⁹ Tsawan seistin yuwatnun kuashat amaajim nunak, tsawan sieteya duwi ayamsatin asagmin dutikajai. ¡Nunú tsawantinig makichikish jiintsuk ditá jenig batsamsagtatui!” tiuwai.

³⁰ Tibau asa Israel aents aidauk nunú tsawan jegatai ayamaidau.

³¹ Israel aents aidau yutai kakekaun juujaku aina duka shawi jigkayiya numamtin, niime puju; dapa yumiji pagjai pachimjamu yumimitu pegkejan kugkuwama iman aajakui. Nuna Israel aents aidau adaikau ainawai “maná”.

³² Tuja duwi pujus Moisés tiuwai:

“Tuke Pujuu juna aatus chichaak: ‘Atum Egipto nugkanum batsatutigmin wi jiija yajuakan uwegshunum yutain amasuitag nuna atak atumi

uchijum akiinak wedaush wainkagtina nunú maná makichik ichinkanum aimkajum ukustajum', tujamjume⁵, tiuwai.

³³ Nuna tusa Moisés Aaróghan chichajak:

“Makichik ichinkanum maná aimkata, dutikam jega pegkegma nuwi awayam Tuke Pujuu emtin apusata, atak atumi uchijum wegantu agtina dusha wainkagtin atinme”, tiuwai.

³⁴ Tuke Pujuu Moisésan tibaunak imatiksag Aarón maná ichinkanum chimpiamun juki, chicham umiktin agagbau arcanum† egkeam aunum ejegan nujai niimtikas apusauwai.

³⁵ Israel aents aidau ima manának yusag cuarenta mijan yujasui, ima nunak yusa yujasag jegawajui Canaán nugka nagkatkamunum.

³⁶ Israel aents aidau manán dekapainakug jimag litro dekapatai “gomer” tawa nujai dekapajaku ainawai. Tuja “efa” tawa nunú aajakui veinte litro dekapatai.

17

Yumi kayanmaya jikbau (Nm. 20.1-13)

¹ Israel aents aidau uwejush Sin tutainum batsatu ashí jiinag diipas jintá kanui kanuinakua Tuke Pujuu chichamen antujus Refidim nugkanum jegawag aakmajag batsamsajui. Tujash yumi dita umumainuk atsujakui.

² Nuadui Moisésan jegajuawag chichajuinak:
“¡Yumi sukagtusta uwajagmi!” tusa imatjuidau.

Tusa imatjam Moisés ditan chichajak:

“¿Wagka minash segatjume? ¿Wagka Tuke Pujuu senchigtuchua nunin chichagkugmesh ekajeagme?” tau.

³ Tujash Israel aents aidau senchi kitamaidau asag Moisésan kajejuk chichajuinak:

“¿Wagka Egipto batsamsatnume tutsukesh jiijatjamiume? ¿Uchiji aidaujai, tagkuji aidaujai kitakai jinaati tusamek jiijatjamium?” wajaidau.

⁴ Imatiagtai Moisés Tuke Pujun segaak:

“¿Utugkattaja juju aents imatjutuina nunash? ¡Jukea akug kayai tuku tukujuinakua mantuawagtatui!” tau.

⁵ Tama Tuke Pujuu Moisésan ayaak:

“Israel aents aidau ashí yajuaka weakum ditá apuji múun aina nunú ujumak jukim emka wetá. Nuniakum ame namak awatiuwaitam nunú ushujutajum jukita. ⁶ Tuja wika muja Horebnum* kaya awa nuwi dakastatjame, nuwi taam ¡nunú kaya awatta! dutikamin yumi jiinkittawai. Nunikmatai ashí aents aidau uwagtinme”, tiuwai.

Tusa tima Moisés Israel aentsu apuji múun aidau wainainamunum kayan awatiuwai. ⁷ Tuja Israel aents aidau yumi atsutai Tuke Pujuu emtin kajekag Moisésan pegkegchaun chichagkaju asagmatai, nuna nugka daajin adaikauwai “Meribá”.† Tuja nuigtushkam adaikauwai “Masá”.‡ Nunak Israel aents aidau chichainak: ¿Dekas Tuke Pujuuush jutijaish pujawash? tusag utujimkaju asagmatai tuu adaikauwai.

† 16:34 “Arca”: Juka numi kajunjai betek najanamu aajakui. Nuwi chicham umiktinun Apajui agag Moisésan susauwa nunú egkemajakui. * 17:6 Muja “Horeb” tawa nunak muja “Sinain” taku tawai.

† 17:7 “Meribá” tawa duka hebreo chichamnumak “chichamjukbau” taku tawai.

‡ 17:7 “Masá” tawa duka hebreo chichamnumak “utujimkamu” taku tawai.

Israel aents aidau Amalec aents aidaujai maaniamu

⁸ Israel aents Refidim batsatun Amalec aents aidau ditajai maaniawag-tatus shimutkajui. ⁹ Nuniagtai Moisés Josué chichajak:

“Aents aidau etegjam Amalec aents aidaujai kashin maaniata! Nuni-amin wi mujanum wakan ushujutain Apajui sujusbauwa nuna takusan pujuttajai”, tiuwai.

¹⁰ Tusa tima nuna betek umiak, Amalec aents aidaujai maaniatatus jiintukiuwai. Nuniai Moisés, Aarón, nuigtu Hur aatus muja titijin wakajui.

¹¹ Nuwi waka batsamas Moisés uwejen yakí takutai, Israel aents aidauk Amalec aents aidau depetuidau, untsu uwejen awaktai, Amalec aents aidau Israel aents aidau depetuinau. ¹² Moisés niina kuntuji yawetai awakeau asantai, kaya jukiag apujtusam nuwi ekemsauwai. Nunikmatai Aarón, Hurjai Moisésa kuntujin mai takujiag emetjuawajui. Dutikam nunisag pujai, etsashkam akaikiuwai. ¹³ Nuadui Josué niina aentsji aidaujai Amalec aents aidau depetuk amukui.

¹⁴ Dutikamtai Tuke Pujuu Moisésan chichajak:

“Juju maaniamu juu pachisam papiinum agagta, ajumaish kajimatk-ishtin ati! Tuja Josué ujakta, Amalec aents aina nunak wi ashí ijinan emegkagtajai”, tiuwai.

¹⁵ Tusa tima Moisés nuwi kaya yajuak ijumag altaran najana nuna daajin “Tuke Pujuu Nisi” adaikauwai. Nunak “Tuke Pujuuwai, bandera jikbaujai betekmantin depetmata sukagtinuk” taku tawai. ¹⁶ Nuna tusa:

“Juke Pujuuwa nuna depetmataig jutiyai awai, nuadui Tuke Pujuu Amalec aents aidauk ijinattawai, dutikak ditá uchiji wegantu aidau-nashkam ijinatnai!” tiuwai Moisés.

Muja Sinaínum chicham umikbau

19

(19—24)

Israel aents aidau muja Sinaínum jegawagbau

¹ Israel aents aidau Egipto nugkanum batsatu jijnjau aina duwi nagkamas, kumpatum nantua nuna achiak, makichik tsawan tsawajua nunú tsawantin muja Sinaí nagkatkamu uwegshunum jegawajui. ² Tuja Sinaínum jegawajua nunak Refidim batsatu juwakiag jegawajui. Nunikag nuwi mujá ijus uwegshunum aakmajag batsamsajui.

³ Nuwi pujus Moisés Apajuíjai chichastatus mujanum wakauwai. Nunikmatai Tuke Pujuu nunú mujanmaya Moisésan untsuka chichajak:

“Jacob tikich daaji Israel aajakua nuna uchiji wegantu Israel aents aina nunú ujakta: ⁴ Egiptunmaya aents aidau wi itugkauwaitja duka atumek shiig wainkauwaitjume. Tuja wi atumin, ukukui niina nanapen uchiji aidau pataja yajumaina numamtuk kuitamkan wi pujag juwi ikaunmajim dushakam shiig degame.

⁵ “Tuja ashí nugka aina duka ashí aents aina nujai midau ainawai. Nunin aig wi atumin mina aentsug atinme tusan etegkauwaitjime. Nuadui wi chichaman tajim nunú antukjum umiakjumek atum dekas atatjume mina aentsug tikich aents aina nuna nagkaesau. ⁶ Atum Israel aents aidautigmek dekas sacerdoté aidau ima wi wakegamunak takagtin aina nujai betek ima wi wakegamuk takau atatjume. Juna wi taja juju Israel aents aidau ujakta”, tiuwai.

7 Tusa tima Moisés wakitki jegaa, Israel aentsu apuji múun aidaun untsuka, ijumag ashí dita antuinamunum Tuke Pujuu tita tibaunak betek etsegkauwai. 8 Tusa timatai dita shiyakag Israel aents aidaun batsatun ujakajui. Dutikawajam ashí betek aimainak:

“¡Tuke Pujuu tujama duka ashí umikagmi!” tuidau. Tusa tiagmatai Moisés nuna dutiksag Tuke Pujuun ujakui.

9 Tusa ujakam Tuke Pujuu Moisésan chichajak:

“Nijah, wi amejai chichamun aents aidaun antukag, dekaskeap tawa tusag, tuké antugtamin atinme tau asan, yujagminum pachiinkan wantintuktatjame”, tiuwai. Tusa timatai, Moisés Israel aents aidaun tibaunak imatiksag ataktu awagki Tuke Pujuun ujakui. 10 Tusa ujakam Tuke Pujuu Moisésan chichajak:

“¡Wakitki jegaam aents aidaun ujakta! Yamai, tuja kashinchakam ashí shiig umintsatnume, mina emematjiagtin asag. Nuninak jáanchjin nijaktinme, 11 nunikag shiig uminas batsatai, tsawan kempatuma duwi aents aidaun ashí waituinamunum muja Sinaínum akaikittajai.

12 “Nuniktin asamtai, aents aidaun muja adjikainum dita ijuntsatin mamiktuata: ‘¡Mujanmak wakaigpajum, tuja nuigtush mamikiamua nuwig nagkaemakigpajum! ¡Antiitkesh antigkaigpajum! Nuna antiauk jakattawai’, tita. 13 Untsu makichik aentskesh, tuja kuntinkesh nuna dajagtata duka achikaigpajum ayatak kayai tukua tukuakuajum maatajum. Untsu dutikachkugmesh nagkikesh maatajum. Duka kuntin akush, aents akush tuké dutika maam atatu. Untsu uwija kachuji senchi umpuamun antuinak mujanmak wamain ainawai”, tiuwai.

14 Tusa tima Moisés nunú mujanmaya wakitki, Israel aents aidaun batsabaunum taa chichaak: “¡Umintsatajum Apajuí emematiagmi!” tusa tijam, ditashkam shiig umintsajui. 15 Nunikagmatai Moisés ditan chichajak:

“¡Kashin pujus tsawak Tuke Pujuu wantintugmaktin asamtai, nuwemjaig tsanitsuk umintsajum dakamsatajum!” tiuwai.

16 Tusa tiyajam, dakamainak batsatai, tsawan kempatuma nunú tsawamunum kashikmas ipamat ishamain wajau, imaniak peemshakam senchi peetu. Imaniamunum nunú mujanum yujagkim suwe wajas aunum, uwija kachuji umpuamu shiig senchi shinaun antukag, Israel aents aidaun aaknum batsatuk shiig senchi ishamak kujainau. 17 Imaniagtai Moisés ditá aakjin batsatun jiija yajuak Apajuíjai igkumtikatatus muja najatamunum ijumjauwai.

18 Nuninai nunú mujanum jii kegaunum pachitkau Tuke Pujuu akaikiuwai. Nunikmatai muja Sinaí ashí bukuitau. Nuadui nunú mujak aja apeam esaak bukuituwama imaniau. Imaniai nunú mujak shiig senchi uuju. 19 Tuja uwija kachuji shinamushkam Apajuí mujanum taattak minitai nuni senchi shinau. Tuja Moisés aujam, Apajuí ayaamuk ipamat wajukeama imatu.

20 Aatus Tuke Pujuu nayaimpinmaya muja Sinaí titijin yaki tauwai. Nunik taa Moisésan wakata tusa untsukui. Tusa untsukam Moisés wakauwai. 21 Nunikmatai Tuke Pujuu chichajak:

“¡Wakitkita, nunikam aents aidaun ujakta dita ijuntsatin mamiktuamua nuna nagkaiki mina diigsatatus wakainmegka! Nuna nunidauk jakagtatui. 22 ¡Tuja sacerdote minai tamain aina dukesh junisagkek tantainmeka, dekatkauk pegkeetneme! Nuninachkug ditashkam jinumain ainawai”, tiuwai.

²³ Tusa tutai Moisés Tuke Pujuu ayaak:

“Aents aidauk juju muja juwig wakachagtatui. Wagki juju muja duka aminu pegkejam asamtai, nuwi aents aidau wakainum tusam, dita ijuntsatín muja najatamunum mamiktuata timaum duka betek uminkae”, tiuwai.

²⁴ Tutai Tuke Pujuu Moisésan chichajak:

“Wakitkim jegata. Nunikam Aarógjai wakata. Untsu sacerdote aina duka Israel aidaujaig nugka mamiktuamua nuna nagkaikiajag wi pujag juwig makichkish wakainmegka. Nuna nuninakug wi jsuwimka susa ai jinawagtatui!” tiuwai.

²⁵ Tusa tima Moisés wakitki jegaa Tuke Pujuu tibaunak imatiksag Israel aents aidaun ujakuu.

20

Chicham umiktin dieza imajin agagbau

(Dt. 5.1-21)

¹ Apajuí chichaak juna aatus ashí tiuwai.*

² “Witjai Tuke Pujuu atumi Apajuígmínuk. Wi atumnak Egipto nugkanum inaku waitkatai batsatutigmin jiijuittjime.

³ “Tikich aina duka makichkish apajuímawaigpajum.

⁴ “Tuja yakiya, nugkaya, namaka initkenia aina duka makichkish dakumka najanagmek emematigpa.

⁵ “Nunú aidau eme anentsajum Apajuíjai betek anentaimtu yujaigpajum. Witjai Tuke Pujuu Apajuí atum emematin ainajum duka. Wika Apajuí akasmauwaitjai. Nuniau asan aents aidau mina dakitjuinak pegkegchaun takaina nuna suwimka suwakun, nuna uchiji aidaunash, tijaji aidaunash, ama tijaji aina imanuiyanash suwimkan suwaitjai. ⁶ Tujash mina anentuinak, chichamjun betek umigtuidaunak ashí niina uchiji wegantu agtina nujai shiig anentsan tuké kuitamnaitjai.

⁷ “¡Tuja Tuke Pujuu atumi ememattaijum Apajuíya nuna daaji wainka adaya yujaigpa! Nuna núnidaunak Apajuik suwimka sutsukek idaisashtinai.

⁸ “¡Tsawan ayamtai Apajuí etegkamua nunú kajimatkitin aigpajum! ⁹ Takamain aina duka seis tsawanta duwi ashí takastajum. ¹⁰ Untsu tsawan sieteya duka Tuke Pujuuu, amina Apajuíjum etegkamu asamtai amina uchigmekesh, nawanjumkesh, tuja wainka inataijum aidaukesh, tagkugmekesh, tikich nugkanmaya ijagtamak taa pujaukesh, takatnak takaschagtatui. ¹¹ Wagki Tuke Pujuu Apajuik seis tsawantai nayaimpin, nugkan, nayantsan tuja ashí nuwi ayá nujai najankauwai. Dutika tsawan sieteya duwi ayamjauwai. Nuadui nunú tsawanta nunak tuke ayamtai atinun Tuke Pujuu etegkauwai.

¹² “Amina apa, dukujai eme anentsam diita. Dutikakum yaigta. Nunú dutikakum Tuke Pujuu Apajuí amina nugkan amastata nuwi jegagmesh, dukap tsawan pujusminjum.

¹³ “¡Magkagtuawaipa!

¹⁴ “¡Ikagmakaipa!

¹⁵ “¡Kasamkaipa!

¹⁶ “¡Tikich aentsush wainka tsanumjujaipa!

* **20:1** Apajuí Moisésnakesh akattsuk nii tutupin chichakua duka ima juke.

¹⁷ “Tikichi jee wakejusam diisaipa. Tuja niina nuwegkesh, nuwa wainka inataijigkesh, aishmag aidaukesh, nuigtu tagkuji baka, burro aidaush, tuja ashí tikich niinu aidau wajig ayawa dukesh wakejusmek diisaipa”, tiuwai.

Israel aents aidau Apajuín ishamkagbau
(Dt. 5.22-33)

¹⁸ Nuna aatus Apajuí chichai ipamat, peem, chaajip, nuigtu bukuitak mujanak ejakui. Nuna ashí Israel aents aidauk wainkajui. Tuja uwija kachuji shinaunashkam antuidau. Nuna ishamainak ikaa ijunas dii ijunu.

¹⁹ Nuninak Moisésan chichajuinak:

“Ame dekas Apajuíjai chichasam ujabatkata. Nunú antuka umikagmi. Untsu Apajuík jutijaig ataktu awagkig chichasaigka, jinawaig taji”, tuidau.

²⁰ Tiagtai Moisés ditan ayaak:

“¡Ishamkaigpa! Apajuí junak niina senchijin atumi iwaintugmak juniawai. Juna wainkag ataktuk tudaunak takaschatnume tujamu asa”, tiuwai.

²¹ Tusa tiajam nuwi ikaa ijunaig yujagkim bukusea wajas aunum Moisés jegantui Apajuí pujamunum.

²² Nunikmatai Tuke Pujuu Moisésan chichajak:

“Israel aents aidau ujakta: ‘Yamaik wi nayaimpinum pujusan ditan aujag nuna antukaje, ²³ nuniku asag ¡mina emematjumaina numamtukek oro, plata aina nujai dakumak najanawajag emematinmek! ²⁴ ¡Mina emematjuinakug, nugka ijumjag kuntuu maawag nuna nejen nuwi patai ashí apeenak emematjitime! Tuja dita tsagkugnagbaunum anentag itainakush tuja uwig, baka aidau apeenakush wi tuwi dutikatajum titatja ima nuwig dutikatnume. Nuna betek uminakuig wishakam pegkegnum yumigsagtatjai.

²⁵ “Tuja kuntuu patai apeatnun kayan ijumainakush jimaituk dakatsuk takamchaun ijumjatnume. Untsu kayan jimaituk dakainakug chichaman intimainak dutikawagtatui. ²⁶ Tuja mina emematjaku kuntuu maa patai apeatin najanamua nuwi najami watai atinuk najanawaigpa. ¡Wagki nuwi waaku wisu weagmin waipakainum!’ tawai Tuke Pujuu”, tiuwai Moisés.

24

Moisés Israel aentsu apuji múun aidaujai muja Sinainum wakamu

¹ Tuke Pujuu Moisésan chichajak:

“Ame, Aarón, Nadab, Abiú, nuigtu Israel aents aidau apuji múun aidau setenta aatsajum wi pujamunum wakatajum. ¡Nunikjumes hikaag tikishmagjum pujustajum! ² Untsu ima amek mina adjituktatme. Tikich aidauk adjitukainmegka. ¡Tuja tikich aents aidau wakeen ijuna duka makichkish amejag wakainmegka!” tiuwai.

³ Tusa tima Moisés aents aidau Tuke Pujuu nuniktajum tibaun ujaku. Tama aents aidau ashí pampajag: “¡Duka dutiksaik umigkagmi!” tiaju.

⁴ Tusa tiagmatai Moisés Tuke Pujuu chichamunak ashí agajui. Dutika kashin tsawamunum kashikmas nantaki kuntuu maa patasa apeaku Apajuí emematinun altaran najanauwai. Dutika doce kayan yajuak, Jacopa uchiji doce aajakua dutiksag batsakui. ⁵ Nuna dutika Tuke Pujuu ditan ayamjuk agkanmitkamunum toro tsakatan maa ashí apeawagtinun, nuigtu tudau tsagkugtugi tusa toro tsakat aidau maawag nuna nejen ujumak apeawagtinun Israel aents datsauch aidau ujumak etegjauwai. ⁶ Nuna numpen jimaituk akanak Moisés juki tsapa aidauum yajaku, dutika

tikich jimaitukea nunak kuntin patai apetai najanamun ukatkauwai. 7 Dutika idayak chicham umiktin agagbaun juki, ashí Israel aents aidau antuinamunum ausauwai. Dutikantai dita aimainak: “¡Tuke Pujuu dutikatajum tujama duka ashí imatiksaik umikagmi!” tuidau.

8 Tusa tiagmatai Moisés numpa juki aents aidau ijunbaunum pegashmak: “Juju numpa juka Apajuí atumjai chichaman umika duka dekaske taku jutikaji”, tiuwai.

9 Nuna tusa Moisés, Aarón, Nadab, Abiú, nuigtu setenta Israel aents aidau apuji múun aidaujai mujanum wakauwai. 10 Nunikag nuwi Israel aents aidau Apajuí: Nawe najama wajamujig kaya safiro tutai wigkaya imadai ukatkamunmas winchamtinnum wajatai tumain nayaim wigkaya iman wajas atatman wainkajui. 11 Tuja Apajuik nunú apu aidau nak waitkatnume tiu asamtai wainkajui. Dutika wainkamash ditanak ijinachajui. Aatus niina emtin yutain yuwawag, umutnash uwajajui.

12 Nunikagmatai Tuke Pujuu Moisésan chichajak: “¡Mujanum wi pujamunum wakam dakagsata, nuniamin kayanum chicham umiktinun wi atumin jintintuatasan agajag nuna amastajai!” tiuwai.

13 Tusa tima Moisés niina yain Josuéjai mujá weuwai. 14 Nunik weak Israel aentsu apuji múun aidau chichajak: “¡Juwi atumek dakamsatajum nuniagmin tattaji! Tuja Aarón, Hurjai, atumjaig pujuttawai. ¡Utugchat ajutjamkujaish dita ujaktajum!” tau.

15 Nuna tusa ukuak Moisésak mujanum wakauwai, nuniai yujagkim mujan ijiauwai. 16 Tuke Pujuu imanji Sinaínum tauwai. Nunikmatai seis tsawanta imajin yujagkim ijia asauwai. Nunú yujagminmaya tsawan sieteya duwi Tuke Pujuu Moisésan untukui. 17 Tuke Pujuu imanji wantinbau Israel aents aidau diismak yakí mujá titijin jii kegak wajukeama iman aajakui. 18 Nunú yujagkim suwe wajas aunum Moisés waigkui. Nunik nunú mujanum cuarenta tsawan, nuigtu cuarenta kashi pujusui.

31

Orojai toro tsakat dakumka najanamu (Dt. 9.6-29)

18 Tuke Pujuu Moisésjai muja Sinaínum chichasa ashimak, jimag kaya pakama najanamunum chicham umiktinun, nii agatug susauwai.

32

1 Moisés muja Sinaínum wee megkaekamtai, Israel aents aidau ijunag Aarógan chichajuinak:

“¡Moisés jutiinak Egipto nugkanum batsatjin jii pajui! ¡Tujash dusha wajukaes, megkaetumkae! Nuniku asamtai dekas jame ii apajuímatin najanata, nunú iina uyuntamsamtai shiyakagmi!” tuidau.

2 Tusa tiagtai Aarón ditan ayaak:

“¡Takugmek atumi nuwemdau, uchigminu, nawanjumdau akiitaiji oro aina nunú ukuitajum juwi itatajum!” tiuwai.

3 Tusa tiajam oro najanamu ditá kuishin nenau aidauk yajuakag Aarógan eteuawajui. 4 Dutikawagmatai Aarón nuna yajuak ukuiyag, toro tsakatan dakumak najanauwai. Dutikantai dita chichainak: “¡Egipto nugkanum inaku waitkatai batsatjin Apajuí jii pakuiwa duka jujuwai!” tuidau.

⁵ Nuna Aarón antuk, toro tsakat dakumka najana apusamunum, nuna yantamen ayaunas altaran najanauwai. Dutika senchi unsumak chichaak: “Kashin ijunja Tuke Pujuu emematuinaku jiistamawagtatji”, tau.

⁶ Tusa tiu asamtai tsawainak kashikmas nantajag Apajui agkanmitk-agmauwai tusag nuna anentag suwinak kuntinun maidau, tuja tudau tsagkugnagtin tusashkam kuntinun maidau. Nuna dutikawag yujumkan yuwawag, umutan umuinak nantsemaidau.

⁷ Nuniagtai Tuke Pujuu Moisésan chichajak:

“iMujá pujam duka wakitkita, amina aentsjum aidau Egipto nugkanum batsatu jiigmayum duka pegkegchaun takainak wi dutikatajum tibaunak uminatsui! ⁸ iWi umigtuktajum tibaunak shiig wamak kajimatkieje! Nuninak oro ukuijag toro tsakatan dakumak najanawag nuna emematuinak kuntinu maa apenawai. Dutikainak:

“iEgipto nugkanum inaku waitkatai batsatjin Apajui jipakuuwa duka jujuwai! tuinawai”, tau. ⁹ Tusa Tuke Pujuu ataktu Moisésan chichajak:

“Wi ditanak diyakjai, nuniau asan dekajai ditak dekas shiig antakchau ainawai. ¹⁰ iNuadui amek makichkish ayamjukaipa! iWika shiig senchi kajekjai, nuniku asan ditanak ashí ijinattajai! Tujash ame wegantu aidaunak shiig kuashat ikauntuktatjame”, tiuwai.

¹¹ Tusa tima Moisés Apajui tsagkugti tusa chichajak:

“iTuke Pujuu mina Apajuijuh! iManikmek kajekaipa! Ameku amina senchigmin amina aentsjum aidau Egipto batsatu jiigmayume. ¹² Nuadui ame dutikawaminig egiptunmaya aents aidau chichagtamainak: ‘Apajui ditanak tsanuja yajuak, mujá uyujus ijina emegkajui!’ tusa dushiktamain ainawai. Nuadui dekas ikajegkau akumesh tsagkujata! ¹³ Amina inakem aidau Abraham, Isaac, Jacob aajaku aina nujai ame umiktinjum chichaakum: ‘Atumi uchijum wegantu aidaunak shiig kuashat ikauntukan, yaya nayaimpinum ayá iman awajatsnaitjai tusam, ijuju nugka junak atumi uchijum wegantu agtina nudau tuke atinun amastatjime!’ tiuwaitam nunú adeagta”, tiuwai.

¹⁴ Tusa tima, Tuke Pujuu ditan kajejuk ijinatjai tiuwaitak, anentain yapajia dutikachui.

¹⁵ Nunikmatai Moisés mujá pujau waketak, jimag kaya pakama najanamunum chicham umiktin mai yantamen agagbaun juki ejegauwai.

¹⁶ Nunú kayanak Apajui najanauwai, tuja nunú kayanum chicham agagbau aajakua nunashkam Apajui agajui. ¹⁷ Nunú chicham agagbaun jukimtai wakitkiag shimukma, aents aidau pampaidaun Josué antuk Moisésan chichajak:

“iAents aidau batsata nuwimpash maaniamunum pampainak wajekeama imatuinani antajai!” tau. ¹⁸ Tutai Moisés ayaak:

“Nunak depetmakbaunum shiig aneenakugkesh imatainatsui. Tuja nuniachkush tikich depetkam wake besemag dekapenakugkesh imatainatsui, iauk nunak nampeja batsamas imat batsatui!” tiuwai.

¹⁹ Imatu batsatai Moisés jegakma aents aidau nantsemainak batsatun wainkauwai. Nunik diikma toro tsakat dakumka najanamun atatman wainak, senchi kajeka chicham umiktin kayanum agagbau takakbaunak nagkima ajuag tsaikui. ²⁰ Nuna dutika toro tsakat dakumka najanamun juwakug nagkima jii kegamunum jiya tsaika yukukuntu ema yuminum chimpia pachimag, Israel aents aidaun chichajak:

“Yamai juju uwagtajum” tusa aakui.

²¹ Nuna dutika Aarókan chichajak:

“¿Juju aents aidaush itugtamkau asamtaiya, amesh ibau pegkegchau takamtikakmesh tunamitkame?” tau.

²² Tutai Aarón ayaak:

“¡Apujuh, minak kajegtukaipa, amek shiig dekame, juju aents aina juka ayatak pegkegchau takatnak wakeyin ainawai! ²³ Minak dita chichagtuinak jutii aidaute Egipto nugkanum batsatjin Moisés jipagmaya duka wajukaes megkaekae. Nuniku asamtai, ii shimajin uyuuntamsafin makichik apajuúmtai najatkagtuata tujutuinakui, ²⁴ wi ditá ayaakun: ‘Akiitaiji oro ajamu aidauk ikaunmatnume’ ti ai, ikaunmawagmatai wi jinum jiyanjai. Dutika ai juju toro tsakat najaneame”, tiuwai.

²⁵ Tuja Israel aents aidauk Aarón kuitamkacham batsamas pegkegchaun takainak, wainak yujaidau asamtai, ditá shiwaaji aidau dushikiam amainun Moisés anentaimas diisui. ²⁶ Nunik aakmaja yaaktamamunum waitainun Moisés wajas chichaak:

“¡Tuke Pujuu dekaskeapi tuidau wijai ijunjatnume!” tiuwai.

Tusa timatai Leví wegantu aidau Moisésjai ashí ijunjai.

²⁷ Nunikagmatai Moisés ditan chichajak:

“Tuke Pujuu Israel aents aidaun Apajujiya nunú juna aatus chichaak: ‘Maki makichik puyagjin jukiag aents aidau batsata nuna shimutuk maki makichik jegan utuawag ashí aents pegkegchaun takamsau aina nuna dita yachi aidaunum nagkamas kumpaji aidaun, tuja ditajai ijunag pujuidaun aatus kajegtinme’ tujamui”, tiuwai.

²⁸ Tusa tiajam Leví wegantu aidauk Moisés dutikatajum tibaun umiinak nunú tsawanta duwi tres mil aentsun ijinawajui. ²⁹ Dutikawagmatai Moisés chichaak:

“¡Yamai atumnak Tuke Pujuu pegkegnum yumigtamsag chichame an-tugtai etamiugme! Wagki atumek Tuke Pujuu umiju asajum atumi yatsum aidau, uchijum aidau pegkegchaun takaidau ijinawajui”, tiuwai.

³⁰ Tuja kashinia duwi Moisés aents aidaun chichajak: “Atumek shiig pegkegchau takasugme. Nuadui wi yamai mujá wetatjai Tuke Pujuu pujamunum, niish tsagkugtaminashit nuna dekaatag tusan”, tiuwai.

³¹ Nuna tusa ukuak, Moisésak mujá Tuke Pujuu pujamunum wakitki-uwai. Nunik waka Tuke Pujuu chichajak:

“¡Israel aents aidauk Apajuí tusag oron najanawag batsamtuidau asag dekaskenun shiig pegkegchaun takamsaje! ³² ¡Wait aneam ditá tudauji tsagkujata! tusan wi segajame. Tuja tsagkugmaichakmek, mina daag amina aentsjum aidaun daaji agatkamua nuwi agatjujuitam duka esakatjuga”, tiuwai.

³³ Tusa tutai Tuke Pujuu ayaak:

“¡Wika ima mina chichamjin intimjutuina nuna daaji aidaunak esakat-jattajai! ³⁴ ¡Tuja amek wakitkim Israel aents aidau yajuakam wi nugka amastajime tusan anagkuawaitjim nuwi wetá! Mina aentsug nayaimpin-maya uyuuntamsattawai. Tujash tsawan dita suwimak jukitnuji jegakui, duwi suwimkanak susattajai”, tiuwai.

³⁵ Tuja Aarón toro tsakatan dakumak najanamun Israel aents aidau ematiau asagmatai, Apajuí suwimka suwak jata ishamainun ajunjauwai.

33

Wi nugka anagkuawaitjim nuwi wetajum tusa Tuke Pujuu Israel aents aidaun tibau

¹ Tuke Pujuu Moisésan chichajak:

“Abrahaman, Isaakan, Jacopan uchiji wegantu aidaun nugka susatnaitjai tusan wi tiuwaitag nuwi Israel aents aidau Egipto nugkanum batsatu ame jiigmayum nunú yajuakam wetá. ² Amina uyuntamsatnun mina aentsug nayaimpinmayan awemattajai. Tuja Canaán aents, amorreo aents, hitita aents, ferezeo aents, heveo aents, Jebús aents aidau Canaán nugkanum batsata nunak jijjan usagatjai. ³ ¡Nuadui nugka pegkeg, ajakash shiig tsapaun amastatjim nuwi atumek wetajum!

“Tujash wika atumnak uyuntsashtatjime wagki intimkiu ainajum duwi. Nuadui kuitamamkatajum jintá weagmin shiwag amupakainum”, tiuwai.

⁴ Tusa Tuke Pujuu timatai nuna antukag, Israel aents aidauk wake besemag dekapenak iwagmamku patakumtai aidaunak patakumachaju ainawai. Tuja nugkutaiji aidaunash nugkugchaju ainawai. ⁵ Tuja Tuke Pujuu Moisésan chichajak:

“Israel aents aidau juju ujakta: Atumek antakchau ainagme. Nunin asagmin wi atunjai ijutkau pujaknuk wamak ijinan utsaumainaitjime. Nuadui atum iwagmamku nugkutajum, patakumtai aidaui ajutamaina duka yamaikiuch yajuaka ukuktajum. Dutikawagmin anentaimsatjai atumnash itugkatjimki nuna”, tiuwai. ⁶ Tusa tiam ashí awimag ukukiaju asag, muja Horebnum nagkamas iwagmamku nugkutai aidaunak ataktuk nugkugchaju ainawai.

Apajuújai chichastasa waitai carpa aakmakbau

⁷ Apajuú tibaun umiak Moisés carpan juki aents batsatbaun ukuki imau agkan Apajuújai chichastasa waitain aakmakui. Dutika nuna adaikauwai “Apajuújai igkunika chichatai”. Tuja makichik aents Tuke Pujuuai chichastatus wakegawk, nuwi waya Tuke Pujun aujukui.

⁸ Nunú aaknum Moisés Apajuújai chichastatus wetai, ashí aents aidauk maki makichik ditá aakji waitinum ijunas dii ijunaig, nunú aaknum Moisés wajakui. ⁹ Nunik wayamtai Tuke Pujuu nijai chichai yujagkim yakiya aaka waitijin wajantun au. ¹⁰ Nuna aents aidau wainainak, maki makichik dita Apajuún wajuk emamatin ainawa nunisag ditá aakjin waitinum tikishmajag pujujaku ainawai.

¹¹ Tuja nunú carpa aakmakbaunum Moisés wayamtai, Tuke Pujuu Moisésjai igkunia niina kumpajijai chichamaina imanis chichau. Nunik chichasmatai, Moisés Israel aents aidau batsatbaunum waketujakui. Untsu Nun aajakua nuna uchiji Josué Moisésa yain aajakua duka nunú aakan kuitamak jiintsuk nuwig pujujaku.

Moisés Tuke Pujun wantintugkata wainkatjame tusa segamu

¹² Moisés Tuke Pujun chichajak:

“Ame minak juju aents aina juju yajuakam emata tujutme. Tujutiakum yaki minash atutkati duka eke tujutsume. Nuniyatkum: ‘Anejame, nuniau asan kajittsan anentaimtajame’ tujutmayume. ¹³ Nunú dekas-ketkaug wajina dutikatjai tusamea anentaime nunú ujatkata, wisha nuna dekaan dekas yaimpaktatuapi titajai. Ame etegkagtujuitme mina aentsug atinme tusam. Nuadui idaikagtutsuk uyunkagtusta”, tiuwai.

¹⁴ Tusa tama Tuke Pujuu ayaak:

“¡Wi aminak uyuntsattagme, dutikakun agkan uyumat aneakas pujusti tusan kuitamkattagme!” tiuwai.

¹⁵ Tusa tama Moisés ayaak:

“¡Ame uyunkagtuschatnaitkumek, wetajum tusamek tukagtupa! ¹⁶ ¿Ame uyunkagtushtaish itusag tikich aents aidaush amina aentsjum aina nunash

tuja minash dekas Apajuíyap kuitamua tusash tujamtinme? Ame uyunk-agtau asamin, tikich aents aidau diismash dita nagkaesau agtatji”, tiuwai.

¹⁷ Tusa tutai Tuke Pujuu Moisésan ayaak:

“¡Aminak kajittsa anentaimtau asan, ame segatam nunak umiktatjai, tuja aminak shiig anentsan diyagme!” tiuwai.

¹⁸ Tusa tama Moisés niina chichajak:

“¡Untsu takumek dekas tikijuch paan wantintugkata!” tusa segauwai.

¹⁹ Tutai Tuke Pujuu niina ayaak:

“Wi ame wajamunum nagkaemaktatjai, nuniakui ame mina pegkegma-juja nunú wainkamnum tusan. Nuniakun mina daag Tuke Pujuuwa nuna ujaktatjame. Wika yana wait anentasa wakegaja, nuna wait anennaitjai. ²⁰ ¡Tujash amek mina niimjuk wainkashtatme, mina waitkauk makichkish iwakuk pujumaitsui!” tiuwai.

²¹ Tusa nuigtushkam chichaak:

“Nijah, minai ayaumas buchig awa juwi wajaim wajasta. ²² Nuniamin wi amini ayaumsan nagkaemakun aminak buchig waanum egkeattagme. Dutikakun mina uwejui jiimin ejatkan nagkaemaktatjai. ²³ Nunikan mina uwejun jukittajai, dutikamtai ima mina tuntupjuk wainkattame. Tujash mina niimjuk wainkashtatme”, tiuwai.

34

Chicham umiktinun Apajuí ataktu agagbau (Dt. 10.1-5)

¹ Tuke Pujuu Moisésan chichajak:

“¡Jimag kaya tsupikam yaunchuk aajakua nujai betek pakama najanata! Dutikawamin nuwi chicham umiktin yama nagkamchaku agagbau ame ajaja tsaikmayum nujai betekan ataktu agagtajai. ² Tuja nuigtushkam ¡kashin kashikmasam muja Sinaínum wakatin asam umintsata! ¡Nuwi wakam dekas muja titijin mina emtijui tantata! ³ Untsu makichik aentskesh mujanmak amejaig wakaigka, tuja juju muja juwi wekaguk makichkish wainnakchati, nuigtush uwig aidau, baka aidau chijichin yuwak wekagush atsuti”, tiuwai.

⁴ Tusa tima Moisés jimag kayan tsupik yaunchuk aajakua nujai betek pakama najanauwai. Dutika najana kashinia duwi kashikmas Tuke Pujuu tibaun umiak nuna juki muja Sinaínum wakauwai. ⁵ Nunikmatai Tuke Pujuu yuagminum pachitkau akaikiuwai, nunik nuwi Moisésjai pujus niina daajin Tuke Pujuu tutaiya nuna ujakui. ⁶ Nunika Moisés wajamunum nagkaemak senchi jiika chichaak:

“¡Witjai Apajuí TUKE PUJUU tutain, wika kakagchauch, wait anenkagtin, wamak kajechu, anenkaji múun, dekaskenum chichauwaitjai! ⁷ Mina anenkajuk yaunchuk auwa nunisag tuke atinai, nuadui aents aidau mina dakitjuinak pegkegchaun takainak, wijai shiwagmagainakuish, tsagkugk-agtinaitjai. ¡Dutikayatkun dita pegkegchau takamsamujin suwimka suwakun ditá uchiji aidaunash tijaji aidaunash, ama tijaji aidaunash suwimkan suwaitjai!” tiuwai.

⁸ Tusa timatai Moisés tikishmag tsunsuma nijayin nugka antig pujus Tuke Pujun emematak, ⁹ aatus tiuwai:

“¡Tuke Pujuuwah, dekaskenum mina anenkumek uyunkagtusta! Iik dekas antakchau ainaji, tujash tsagkugkagtujam amina aentsjum ekagtita”, tiuwai.

*Apajuí Israel aents aidaujai ataktu chichaman umikbau
(Dt. 7.1-5)*

¹⁰ Tuke Pujuu Moisésan chichajak:

“Juju shiig antukta. Wi yamai ashí amina aentsjum aidaujai chichaman umiktatajai, dutikakun tikich nugkanmash makichkish wainchatai aidaun kuashat iwainagtatjai. Nuna tikich aents aidau atum pujamunum pujuidaush ashí wainkagtatui.

¹¹ “Wi yamai juna tajim juka imatiksagmek umiktajum. Nuniakjumin wi atumesh wainbaunum amorreo aents, cananeo aents, hitita aents, ferezeo aents, heveo aents, Jebús aents aidau batsata nunak jiija utsaakun dita nugke aina nunak atumin amastatjime.

¹² “Tuja nunú nugkanum jegagmesh, nuwiya aents aidaujaig makichkish chichamak umikaigpajum, tsanupajag pegkegchau takatnum ajumpawainum. ¹³ Duka nunitsuk dekas ditá apajuímtaijin emematuinak patasa apetai altar aidau, tuja kayan emematin aina nunú, numin emematin aina nujai jashí tsaikjum utsankatajum!”

¹⁴ “¡Makichkish tikichik apajuímawaigpajum, ima midauk atajum! ¡Wika Tuke Pujuu akasmauwaitjai! Mina daajuk Apajuí akasmau tutayai.

¹⁵ “Makichkish nuwiya aents aidaujaig dutik takasmi tusagmek chichamak umikaigpajum, wagki ditá apajuímtaiji aidaun emematuinak kuntin maamun yuwami tusa ipapainakuí atumesh nunú yuwawaijum.

¹⁶ Tuja namputchwame atumí uchijum aidaun ditá nawanji aidaujai nuweami tusashkam tumain ainawai, dutikamak nunú nuwa aidau ditá apajuímtaijin emematuinak atumí uchijum aidaunash pegkegchaun takamtikmain ainawai.

¹⁷ “¡Tuja jiju ukuijajum atum emematin dakumkagmek makichkish najanawaigpa!”

Israel aents aidau Apajuín emematuinak maki makichik mijantin jiista-mawagtin jintintuamu

(Ex. 23.14-19; Dt. 16.1-17)

¹⁸ “Pag lewadurajai pachimtsuk inajuamu yutai tsawan jegakuig, wi dutikatajum tibauwa duka dutiksagmeg siete tsawantai yuwatajum. Tuja mijan achiamu marzo jimaituk nagkamna, abrilan ikak amuga nunú nantutin, tsawan mamikiamua duwi atumek duka dutikattagme, wagki nunú nantutin Egipto nugkanum batsatutijum jijnjau asajum.

¹⁹ “Uchi aishmag iwai akiinuk ashí midau agtatui, tuja baka, uwig, cabra aina nuna uchiji aishmag yama nagkamchaku petsakbau aidaushkam midau agtatui. ²⁰ Burro uchiji yama nagkamchaku petsakbau mina sujumaina nunú idaikum uwig tsakat, tuja chivo tsakatkesh sujustatjime. Tujash nunú dutika sujumain atsakuig, burro kuntuje kupigka maatajum. Tuja atumí uchijum aishmag iwai aina nunú anentag sujumainaitjum nunú idaikujum mina anentag sujustin tikich jukijum minitajum. Untsu mina anentag sujumain atsugbauk, makichkish wi pujamunmak tantainmeka.

²¹ “Atumek seis tsawantai takastajum. Untsu tsawan sieteya nuaduik ajakmamain akuish tuja ajak juumain akuish idaikujum ayamjatajum.

²² “Trigo ajakmamu yama nagkamchaku juuktatjum nuna jiista daaji ‘semana aidau’ tutaya duwi, tuja mijan amuebaunum* ajak juuktatjum

* **34:22** “Mijan amuebau” tawa nunak diciembren taku tatsui, wagki ditak marzotin nagkama dekapajaku ainawai.

nuna daaji, ‘ajak juut’ tutaya duwishkam Apajuí emematjukum tuke jüstamtajum.

²³ “Nuadui ashí aishmag múun aidauk makichik mijanai kempatuma imania wi pujamunum taawag mina emematjitnume. ¡Witjai Tuke Pujuu atumi Apajuíginuk! ²⁴ Atumesh wainjumin tikich aents aidaunak jiija utsakun, nunú nugkanak atumin amastatjime. Nuadui makichkish nugkanak atanjamkichagtin ainawai. Nuwi agkan batsamsajum wi Tuke Pujuu Israel aents aidaun Apajuíjiyaitag nunú emematjakum maki makichik mijantín kempatuma imania ijunajum jüstamtínaitjume.

²⁵ “Mina emematjaku kuntin maa apeamua nuna numpeg, pag levadurajai pachimja inajuamujai jukigmek itagtuawaigpa. Tuja jüsta pascuatin Apajuí ememattasa kuntin maamua nuna neje ampinjamtaish kashinia duwi yuwatnuk ukukigpajum.

²⁶ “¡Yujág yama nagkamchak nejeku dekas shiig pegkeg aina iman mina jegauiig itagtuatajum! ¡Tuja chivo maajum inagkugmesh dukuji muntsuji ijugbaunum egkeagmek inagkaigpajum! tawai Apajuí”, tiuwai Moisés.

Chicham umiktinun Moisés agagbau

²⁷ Nuna tusa Tuke Pujuu Moisésan chichajak: “¡Chicham umiktin aidaun wi yamai tajam nunú agagta! Wagki jujuwai ame Israel aents aidaujui umiktina nunú”, tiuwai.

²⁸ Aatus Moisés mujanum cuarenta tsawan, nuigtu cuarenta kashi yujumkan yutsuk, umutnash umutsuk Tuke Pujuuwai pujusui. Nuwi pujus kaya tsupika pakama najanamunum diez chicham umiktinun agajui.

²⁹ Nuna dutika muja Sinaínum pujau waketak nunú chicham umiktin agagbau juki wakitkiuwai. Tuja Tuke Pujuuwai igkunia chichasu asa niina yapiníg winchamtin wajasui. Tujash nunak niig wainmamchau.

³⁰ Moisés minittaman Aarón niina patayi Israel aents aidaujui diikma yapiin winchamtin wajas midaun wainkag, senchi ishamainak jegan-tachaju ainawai. ³¹ Nuniagtai Moisés Israel aentsu apuji aidaun untskui ditajai chichastatus. Dutikawajam Aarón Israel aents aidaun apuji aidaujui Moisésan jegaantajui. Nunikagmatai Moisés ditajai chichasui.

³² Nunik chichas nagkanainaig aents aidauk ashí jegaantajui. Nunik-agmatai chicham umiktin aidaun Tuke Pujuu Moisésan muja Sinaínum susamunak, imatiksag dita umikagtinun ashí ujakui.

³³ Nuna ditajai chichas ashimak, nuadui jáanchi juki niina yapiin dukumakui. ³⁴ Tuja Tuke Pujuuwai chichastatus weakug nunú jáanchnak ukuak waya, chichas jiinki Tuke Pujuu aents aidau ujakta tibaun betek uajakui. ³⁵ Tuja Moisésak niina yapi winchamtinun Israel aents aidau wainainau asagmatai, jáanchi dukumak pujujukui. Untsu Tuke Pujuuwai chichastatus wayakug jáanchnak juki ukujakui.

40

Apajuíjai chichatai carpan aakmakbau

¹⁶ Tuke Pujuu tibaunak Moisésak ashí betek umikui. ¹⁷ Tuja Egipto nugkanum batsatu jijnajua duwi nagkama mijan jimaja nunú achiamunum nantu yama nagkamchak taka makichik tsawan tsawaju ai, Apajuíjai chichatain carpan aakmak ashimkajui. ¹⁸ Nuna Moisés aakmakug jui nagkabauwai: Yama nagkamchakug jiju dupajam taumi najanamu aidaun batsaka umikui. Dutika nunú jijunum numi dupajam dakagbau aidaun awajug umika, nuna ichichiagtinun numi tsejeg dakagbau aidaun

minanjauwai. Dutika duwi aaka bakuin ajigka umikui. ¹⁹ Dutika nuwi carpan aakmakui, Tuke Pujuu dutikata tibaunak imatiksag. Aatus aakmatkauwai Tuke Pujuuwai chichastasa waitai pegkejam umikbau aajakua nuna.

²⁰ Dutika ashimak kaya pakama najanamunum chicham umiktin aidau agagbaun juki arcanum egkeauwai. Dutika dukutai shiig pegkeg najanamujai dukuka nunú yanaki jukitnun jimag numin wegaji apusauwai.

²¹ Dutika Apajujai chichastasa waitai aakmakbaunum, tesaamu “shiig pegkejam” tutainum nunú arcan awayauwai. Dutika awaya jáanch wegkagman juki ejatuuwai, Tuke Pujuu dutikata tibaunak imatiksag.

²² Nuna umika duwi mesa najanamun juki carpa aakmakbaunum, tesaamu jáanch detuamua nuwi jegatsuk, dekatkau tesaamu pegkejam tutainum awaya untsuja nuni apusauwai. ²³ Dutika pagkan yajuak Tuke Pujuu wainai nunú mesanum shiig pataja umikui, Tuke Pujuu dutikata tibaunak imatiksag.

²⁴ Tuja nuigtushkam jii ekemaka pekatai ayatak oro najanamu candelabron juki mesa pujaun niimtikas menanmanini apusauwai. ²⁵ Dutika aceite yajakbaun juki, nuwi peka ekemag ukukiuwai, Tuke Pujuu dutikata tibaunak imatiksag.

²⁶ Untsu Apajui emematu patasa apetai altar oro najanamun juki, jáanch ejamunum ejentattak apusauwai. ²⁷ Nuna dutika Tuke Pujuu tibaun umiak kugkuin incienseo tutain juki nuwi patai apeauwai.

²⁸ Nuna ashí dutika inagnak, nunú aakmakbauwa nuna waitijin jáanchin detua ukukiuwai. ²⁹ Dutika ajuma duwi kuntin maa patasa apetai altar bronce najanamun juki, agá aaka waitijin igkuas apusauwai. Dutika Tuke Pujuu tibaun umiak kuntinun maa nuna nejen nuwi patai ashí apeauwai. Tuja ajak juukbaun Apajui anentag suwak nunashkam dutiksag apeuwei.

³⁰ Nuna dutika yumi yajaa ikigmatai palangana bronce najnamu pujaun juki Apajujai chichatai carpa aakmakbau aajakua nujai niniaku altar pujaunum nuna ejapeen apusauwai. Dutika nuwi yumi ikigmagtinun yajauwai. ³¹ Nuna Moisés Aarógjai tuja Aarógka uchiji aidau aatus ditá ikigmagtinun, nawe dijajagtinjin nuwiyen shikika jujaku ainawai. ³² Tuja nunú aaknum wayatag tuinakug nunú yumi aimkamua nuna tuké ikigmag wajaku ainawai, Tuke Pujuu tibaunak imatiksag.

³³ Nuna ashí umika inagnak, aak carpa aakmakbau aajakua nuna agájin ashí tanishmag ashimak, jáanchi juki waitinum detua ukukiuwai.

*Apajujai chichatai
aak pegkejam
carpa aakmakbaunum
Tuke Pujuu wayamu
(Nm. 9.15-23)*

³⁴ Aak pegkejam carpa aakmakbaun yujagkim ijuwai. Nuniamunum Tuke Pujuu imanji pegkegma nunú aakan akijuuwai. ³⁵ Tuke Pujuu imanji pegkegma nunú yujagnijai betek aakan ijiau asamtai, Moisés waimainchau dekapjuwai. ³⁶ Tuja nunú yujagkim aak pegkegman ijia aajakua nunú yakí takuntai, Israel aents aidauk ditá aakji aidauk tegaka jukiag shimujaku. ³⁷ Untsu yujagkim yakí takunchataik, yakí takunti tusag dakak nuwig aakmag batsamajakajui. ³⁸ Tuja aak pegkejam carpa aakmakbaun yujagkim tsawai tuke ijia aajakua nunú, kashishkam

keejakua duka, Israel aents aidau shimamunmak nunisag au asamtai, dita nuna shiig wainajaku ainawai.

Levítico

10

Nadab Abiújai pegkegchaun takamsamu

¹ Aarógka uchiji Nadab Abiújai kugkuin incienso chimpia apetaim jukiag, nuwi jii ekemakag incienson chimpiauwag Tuke Pujuu dutikatajum tichamu aig, aak pegkejam Apajuújai chichatai aakmakbaunum wayawag nuna apeawajui. ² Dutikiagtai chicham umiktin agagbau Apajuúnu egketunmaya jii keeka jiinak apeam mai jakajui. ³ Nunikagmatai Moisés Aarórgan chichajak:

“Juna pachis Tuke Pujuu chichaak:
 “Wi pujamunum taidaunak
 mina pegkegmajun iwaintukagtatjai.
 Tuja ashí Israel aents aina nunak
 mina imanjun iwaintukagtatjai’ tujamayi”, tiuwai.

Nuna Aarón antuk, chichatsuk wajasui.

⁴ Nuna tusa Moisés Aarógka apaji yachi Usiel aajakua nuna uchiji aidaun: Misaelan Elzafánjai untsuka chichajak: “Atumi yatsum aidaun aak pegkegmanum wayawag jinawaja nunú jiiikum, ii batsatag nunú ukumtikijum imau ejeentajum ukuktajum”, tiuwai.

⁵ Tusa tima shimutuk jiiki jukiag Moisés tibaunak imatiksag dita batsatbaun ukumtikiag imau ejegan ukukiajui.

16

Tudau tsagkugnagtasu

maki makichik mijantin dutikajakbau

¹ Nunik Aarógka uchiji Tuke Pujuu pujamunum waikma jakagmatai, nuna pachis Tuke Pujuu Moisésan chichajak:

² “Aaknum tesaamu pegkejam tutaiya nuwi nunú tsawantai wayati tusa mamikiachbau aigkik, makichkish wayawaipa tusam amina yatsum Aarón ujakta. Wagki wika chicham umiktin agagbau arcanum egkeamu puja nuna dukutajin pujajai, nuniau asan nuwi wi yujagminum wantintai jakai.

³ “Tuja Aarón nuwi wayakug apeaku tudau tsagkugnagtinun toro tsakatan juki wayati, untsu mina anentag sujamun uwig tsakat aishmagkun juki waya, nuna apeak emematjiti. ⁴ Aarón nuwi wayatatus weakug dekatkauk maíti, nunik nuadui jáanch esajam lino apagbau sacerdote nugkutain nugkug, nuigtu wegamatai lino apagbaun wegamak, akachumtain akachuma, nuigtu atsejutai lino najanamun atsejuk wayati. Jujuwai jáanch dekass etegjamu Tuke Pujuujai chichastasa wayaku iwagmamtai aidauk.

⁵ “Tuja ashí Israel aents aina nuna tudauji tsagkugnagtinun Aarón maa apeati tusa jimag chivon susagtatui. Tuja Apajuú anentag suwamua nuna makichik uwig tsakat aishmagkun Aarón maa nuna nejen ashí apeati. ⁶ Nuna dutika inagnak, nuadui Aarón niina tudauji nuigtu niina nuwe, uchiji aina nuna tudauji aidaujui tsagkugnagtinun toro tsakatan maa apeati. ⁷ Tuja nunú jimag chivon aishmagkun juki aak pegkejam

aakmakbauwa nuna agaaji peeja tenteamua nuwi waya aaka waitijin jegantatak Tuke Pujuu emtin ejentati.

⁸ “Dutikantai chivo jimaja nuwiyash tuki midauash ati tuja Azazeldaush tuki ati nuna kaya jimajan juki nujai dekaati. ⁹ Tuja nunú chivo midau atata nunak tudau tsagkugnagtinnum Aarón maa apeati. ¹⁰ Untsu chivo Azazelda atata nunak mautsuk iwakun juki tudau tsagkugtamtaji tusag Apajuú emtin ejentattawai. Nuna dutika nuadui jiiki uwegshunum Azazel pujamunum awemattawai.

¹¹ “Nuna Aarón niina tudauji nuigtu niina nuwe, uchiji aina nuna tudaujijai tsagkugnagtinun toro tsakatan suwenum tsupik maa apeati. ¹² Nuna dutika Apajuújai chichaaku waitai aak pegkejam aakmakbaunum, dekatkau wayamua nunú ‘pegkejam’ tutaya nuwi kugkuin incienso chimpia apetainum jii kaiji kuntin apetaimaya yajuaka chimpianu eketa nuna jukiti. Dutika nuigtushkam kugkuin incienson atsaaki juki nunú aaknum tesaamu jáanch ejatuamua nunú ‘shiiig pegkejam’ tutaya nuwi awayati. ¹³ Dutika wisha wainai jii kegamunum kugkuin incienson utsaati. Dutikam nunú bukuitamu arca dukutain ijiati. Nunú bukuituk ijia ejaku asantai, wi nuwi wantintaishkam Aarógak jakashtatui.

¹⁴ “Tuja nuigtushkam toro tsakata numpen ujumak juki, tsajam uwejen inua, arca dukutaiji yantamen makichkia pegashmag ukatkati, dutika tikich yantame eem awa nuna sieteya imania pegashmag ukatkati. ¹⁵ Nuna dutika aents aina nuna tudauji tsagkugnagtinun chivon maattawai. Dutika nuna numpen juki aak pegkejam Apajuújai chichatainum tesaamu shiiig pegkegma nuwi awayattawai. Nuwi awaya arca dukutaiji tuntupen ukatuk, nuadui eemshakam ukatkattawai, yaunchuk toro tsakata numpegai ukatkama dutiksag. ¹⁶ Nuna dutika Israel aents aidau pegkegchau takamsamui aidau tsagkugnagmatai, nuadui nunú aak pegkejam Apajuújai chichatai aakmakbau, dita katseken pegkegchau wajas awa nuna iwajattawai.

¹⁷ “Tuja tudau tsagkugnagtinnum takak, aak pegkegma nuwi Aarón waya pujau eke jiintsaiikkik, makichik aentskesh aak pegkegma nuwi jegantag pujusainmegka. Nuna dutika Aarón niinu, niina nuwenu, niina uchiji aidaunu, nuigtu ashí Israel aents aina nunú pegkegchau takasbauji aidau tsagkugnagtinun ashí umika, ¹⁸ jiinki Apajuú emematku patasa apetai najanamu altar puja nuna iwajatatus wetatui. Nunik toro tsakata numpen chivo numpejai ujumak juki incienso patai apetaiya nuna tsakaji ipak usumat wagaku aina nuna ukatkattawai. ¹⁹ Tuja altar puja nuna niina tsajam uwejen numpan inua sieteya imania ukatkati. Aatus Israel aents aidau pegkegchau takasbaujin altar pegkegchau wajas awa nuna iwajattawai.

Uwejush aents atsamunum chivo awemamu

²⁰ “Dutika aak pegkejam Apajuújai chichataiya nuna, altar puja nujai Aarón ashí iwajug, nuadui chivo iwaku ukukbau utitajum tima itawagmatai jukittawai. ²¹ Dutika nuna kuntinu buuken achika pujus, Israel aents aidau pegkegchau takasbaujin tuja Apajuú antugtsuk intimjukkau aidaun aatus ashí esegtumagtatui. Dutika ashí pegkegchau aina nunak chivo buuken utuatkattawai, dutikantai makichik aents nuna juki uwegshunum ejegan atia akupkati. ²² Dutikam nunú chivo uwejush aents atsamunum megkagak, ashí ditá pegkegchauji aidaunak yajuak ajapattawai.

²³ “Nuna dutika nunú aak pegkejam aakmakbaunum Aarón waya jáanch lino apagbau nugkuagbaujin awimak ukuktatui. Wagki nunú jáanchik nuwi tuke ukutai asamtai. ²⁴ Dutika nuwig yuminum nijamag sacerdote nugkutai jáanch shiig iwajamun nugkuja, nuna agájin jiinki niina tudauji tsagkugnagtinnum, tuja Israel aents aidau tudauji tsagkugnagtinjai kuntinun maa nuna nejen ashí apeak emematjittawai. Nuna dutikamtaí ditá tudaujig tsagkugnagtatui. ²⁵ Tudaun tsagkugtugti tusa kuntin maa apeamua nuna wiyajinak altarnum patai apeati.

²⁶ “Aents chivon juki, uwegshunum akupkatatus weuwa duka aakmaja batsatbaunmak eke tatsuk, jáanchjin dijag niishkam, mai, nuadui wayati.

²⁷ “Tuja tudau tsagkugtugti tusa toro tsakat chivojai maa apeaku nuna numpe juki, aak pegkegma nuwi awayamua nunak, duwape, neje beseku aina nujai ijumag juki aents batsatbaun ukumtiki apeatnume.

²⁸ Aents nuna apeatta duka jáanchjin dijag niishkam mai, nuadui aents batsatbaunum wayati.

²⁹ “Tuja jujuwai dekas atum chicham umiktin tuke atina nunú. Nantu sieteya nunú taka, tsawan diez tsawagtata nuadui, atumek ijagma-jum yujumak yutsuk pujustajum, nuniakjum takatjumes takatsuk ashí idaisatajum. Atum nuniagmin aents tikich nugkanmaya aidau atumjai pujuidauk ditashkam dutiksag umiktinme. ³⁰ Nunú tsawantai sacerdote wi pujamunum taa, atum pegkegchau takamsamunum tsagkugnagtinun segattatui, nuadui tsagkugnagjum agkan juwaktatjume. ³¹ Juju chicham umiktina juka tuke asatnai, nuniau asamtai, nunú tsawanta nuaduik atumek ayamkujum ijagmajum yujumak yutsuk pujuttage.

³² “Tuja atumi apa sumo sacerdoteya nujai yapajinatnunik wi etegkat-tajai. Tuja atumi tudaujum tsagkugnagtinnumash wajina dutikattawa nunashkam betekmas umikti tusan, wi niinak inajai. Tuja nii sacerdote nugkutaiji jáanch puju lino apagbau nugkugtatuí. ³³ Nuna nugkuja aak pegkegmanum waya, tikich tesaamu shiig pegkegma nuna iwajug pegkeg awajsattawai. Dutikak altarnashkam iwajug pegkeg awajsattawai. Sacerdote dutikatta nunú dita pegkegchau takamsamujinak, tuja ashí Israel aents aidau pegkegchau takamsamujinashkam tsagkugnajagtatui. ³⁴ Pegkegchau takasbaunum tsagkugnagtag tuinakug, juju chicham umiktina juna umiak maki makichik mijanai makichkia dutikatnume”, tiuwai.

Aatus Apajuí Moisésan tibaunak imatiksag Aarón umikui.

19

Wajuk pujuinakua Apajuínash umigmáin ainawa nunú pachisa agagbau

¹ Tuke Pujuu Moisésan chichajak: ² “Israel aents aidau juju ujakta:

“¡Wika Tuke Pujuu atumi Apajuíginuk pegkegmaitjai, nuadui atumshakam pegkejam atajum!

³ “Maki makichik ditá apajin, dukujijai eme anentus diitnume.

“Nuigtushkam tsawan ayamtain wi etegkauwaitag nunú eme anentsajum diitajum. ¡Witjai Tuke Pujuu Apajuí atum emematin ainajum nunú!

⁴ “Dakumka najanamua aina duka emematigpa, tuja nuigtush atum apajuímatnuk jiju ukuija dakumkagmek najanawaigpa. ¡Witjai Tuke Pujuu Apajuí atum emematin ainajum nunú!

5 “Agkan pegkeg pujustasajum kuntin maa Apajuí anentag suwajum duka tuke dutiktajum, nunú dutikakjumeK Tuke Pujuun shiig awagmain dutikatajum.

6 “Nunú kuntin maamua duka nunú tsawantaik yuwatajum, tuja kashinia duwishkam yumainaitjume, untsu tsawan kampatuma duwi yumain ampinjatta duka apeatajum. 7 Nunú kuntu neje ampinjaun kampatum tsawan tsawaju ai yuwauk tsumain diyam atatuí, nuadui nunú aentsnak Apajuí idaisattawai. 8 Nuna yuwauk suwimkan ijutmamjattawai, tuja nuigtushkam ashí Israel aents aina nuwiya jiiki yaja ajapeam atatuí, Tuke Pujuu tibaun intinjuki umikchau asamtai.

9 “Ajak juut tsawan jegamtai juwakjumes ashí juukaigpajum, tuja ampinjai aina dukesh waketjukmek juukaigpa.

10 “Uva juukbaunmaya ampinjauk waketjuki egakmek juukaipa, nuigtush kakekaukesh yajuakaipa; duka idaisata ujudauch aidau tikich nugkanmaya aidaujai yuwatnume. ¡Witjai Tuke Pujuu, atumi Apa-juíginuk!”

11 “Kasamkaigpajum.

“Waitjuawaigpajum, atumek pempeentunikjumes tsanunijaigpajum.

12 “Umikchatnaitkum mina daag pachisa tsanumjaipa, duka amina Apajuígin daaji dushikiakum tame. ¡Witjai Tuke Pujuuuk!”

13 “Tikichish wainka takamtikakum waitkasaipa, niinu aina duka kasagkaipa. Nii takasbaujina akiktina duka kashin akiktagme tusa emetjuamek waitkasaipa.

14 “Aents empeku dushikiakum pegkegchau chichagkaipa. Aents wainmachuk makichkish tsanujaipa. ¡Witjai Tuke Pujuuuk!”

15 “Utugchat epegkeakjumes tsanumtsuk shiig epegkeatajum. Ujudauch akuish, wiakuch akuish, takamsamuji diigsajum suwimkak betek susatajum.

16 “Wainkam amejai ijutkau batsata nuwi chicham tsuwapa wekayipa. Tikich aentsush maatnume tusamek tsanumjuja sujukaipa. ¡Witjai Tuke Pujuuuk!”

17 “Initak kajegkagtinuk aipa. Dekas ame chichagkatag takumek igkuam chichagkata. Nunú dutikachkumek, ameshkam pegkegchaun takasua iman wajastatme.

18 “Amina pegkegchau awajtamainakuish, dutiksamkek iikaipa, tuja amina aentsjum aina dusha kajejin aipa. Duka nunitsuk amek anenmamsam tikichish aneeta. ¡Witjai Tuke Pujuuuk!”

19 “Chicham umiktinun wi tajim nunú ewaetsuk betek umiktajum. Atumi tagkujum aidauk tikich kuntin aidaujaig entsamtikaigpa. Ajagmin ajakmakmesh tikich ajakjai pachimjamek ajakmawaigpa. Tuja nuigtushkam jáanch pachimja najanamuk nugkujaigpa.

20 “Nuwa wainka inaku waitkatai makichik aentsjai aishinatatus pujaun, tikich aents nuna dekayatak nujai tsanijinuk, aents nuwatkatjai tiuwa nuna akiktatui, nii akimkak sumak niinu ema agkanmitkachu ataishkam. Tujash tikima mautnak maachagtatui ayatak suwimkan mai susagtatui. Wagki nunú nuwak eke sumaka agkanmitkachbau asamtai. 21 Aents tsanijinauwa nunú nii pegkegchau takasbaunum tsagkugnagtinjin Tuke Pujuu suwakug makichik uwig tsakatan juki aak pegkejam Apajuíjai chichatai aakmakbauwa nuna waitijin ejentati. 22 Nuna sacerdoté maa apeak aents pegkegchau takasa nunú tsagkujata tusa mina segattatui. Nunú dutikamua duwi niina pegkegchaujig tsagkujam atatuí.

²³ “Tuja wi nugka anagkuawaitjim nuwi jegajum, yujág ajakmattajum nuna neje aidauk yutsuk kumpatum mijan idaisatajum. ²⁴ Tuja mijan ipak usumta duwi yujág nejektata duka midau atatuí, nuadui shiig aneasa jüstamkujum nunú yujág aidau mina sujustatjume. ²⁵ Untsu mijan cincotin nejektata duwi nagkamajum atum yuwattajume. Nunú betek umiagmin aan kuashat yujág nejektatuí. ¡Witjai Tuke Pujuu, atumi Apajuíginuk!”

²⁶ “Kuntin numpennukek makichkish yuwawaigpajum. Anentaimsa dekamjai tinu aina nuninuk makichkish takasaigpajum, tuja tunchi takatai aina dukesh takasaigpa.

²⁷⁻²⁸ “Aents jakamtai atuni intashim wainka tsupi yujaigpajum, tuja susugmi titijgkesh tsupikaigpa. Nuigtushkam atumi iyashinig tsupimá yujaigpajum, tuja atumi iyashinig makichkish dakumkaigpajum. ¡Witjai Tuke Pujuuunuk!”

²⁹ “Atumi nawanjum aina duka akika wainka takatai ati tusa inakjumeck waitkasaigpajum. Dita pegkegchau takainamua nunú yujakmatai, atumi nugke shiig pegkegchau wajasai.

³⁰ “Tsawan ayamtai atinun wi etegkauwaitag nunú ajaantusjum diistajum. Nuigtushkam mina pujutaig pegkejam aakmakmawua dushakam ajaantusjum diistajum. ¡Witjai Tuke Pujuuunuk!”

³¹ “Tunchinmak makichkish inamajaigpajum. Tuja anentaimsa dekamjai tinu aina dushakam makichkish yujagsaigpajum. Nunin yujagkujum pegkegchau wajasaijum. ¡Witjai Tuke Pujuu atumi Apajuíginuk!”

³² “Aents múun aina duka ajantusjum diistajum. Duka dutikatajum mina umigtau asajum. ¡Witjai Tuke Pujuu atumi Apajuíginuk!”

³³ “Aents tikich nugkanmaya atumjai pujau, wainka inaku waitkasaigpajum. ³⁴ Duka dutiktusuk atum wegantu kuitamainaitjum dutiksagmek kuitamkujum, atumek anenmamsajum aneetajum. Atumshakam tikich nugkanmaya ainayatkujum, Egipto nugkanum batsamajaku ainagme. ¡Witjai Tuke Pujuu atumi Apajuíginuk!”

³⁵ “Dekapataiyai dekapakjumesh tsanumtsuk shiig dekapatajum, nuigtu kijin dekapataiyai dekapakjumesh, tuja yumi wegantu dekapakjumshakam kasamtsuk shiig betek dekapatajum. ³⁶ Betek ewaetsuk dekapatai balanza aina nunú, tuja kijin dekapataish, metro esajam dekapataishkam, ashí ajutjamtinme. ¡Witjai Tuke Pujuu, atumi Apajuíjum, Egipto batsatutigmin jiiujitjim nunú! ³⁷ Juju chicham umiktin aidaun wi tajim duka imatiksagmek umiktajum. ¡Witjai Tuke Pujuuunuk!”

23

Apajuí emematku ijuntai tsawan etegjamu

(Nm. 28.16-25)

¹ Tuke Pujuu Moisésan chichajak: ² “Juju Israel aents aidau ujakta: Tsawan Apajuínu atin etegjamua duka ‘Apajuí emematku ijuntai’ tutai atatuí. Duka juju ainawai:

³ “Atumek seis tsawantai takastatjume. Untsu tsawan sieteya nuaduik makichkish takaschattagme. Nunú tsawanta duka ayatak ijunja ayamku Apajuí ememattai atinai. Duka atum tuwi pujuttagme nuniakjumesh nunú tsawanta duik Tuke Pujuu emematkujum tuke ayamtinaitjume.

⁴ “Nunú tsawan etegjamu aina duwi atumek Tuke Pujuu emematkujum tuke ijuntinaitjume:

⁵ “Mijan nagkamnamu yama nagkamchak nantu takatta duwi tsawan catorcetin agkuantai ijunjajum, nunú tsawantak atum jiiinja agkamagamu Pascua tutaya duwi shiig aneasa jiiistamkujum Tuke Pujuu ememattajum.

⁶ “Tuja nunú nantutinig tsawan quincetin pag levadurajai pachimsuk inajuamu tutai asamtai, Tuke Pujuu emematkujum ijunjajum jiiistamatajum. Tuja siete tsawantai pag levadurajai pachimsuk inajuamu yuwattagme. ⁷ Jiista nagkamnamu yama nagkamchak tsawagtata nuaduik takatak takatsuk ayatak ijunjajum Tuke Pujuu ememattajum. ⁸ Tuja siete tsawantai Apajuí anentag suwamua nunú apeattagme. Tuja tsawan siete y nuaduik atumi takatjig makichkish takasaigpajum, ayatak ijunjajum Tuke Pujuu ememattajum.”

*Ajaka neje yama nagkamchaku juukbau tsawanji
(Nm. 28.26-31)*

⁹ Tuke Pujuu Moisésan chichajak:

¹⁰ “Juju Israel aents aidau ujakta: Wi atumin nugká amastatjim nuwi jegajum trigo ajaktatjum nuwiya yama nagkamchaku juuktatjum nunú jigka jukijum sacerdote ejetuatajum. ¹¹ Nuna sacerdote juki tsawan ayamtain nagkaiki tsawaitta nuadui Tuke Pujuu segaak iwaintuktatui nii atumi takatjumin shiig anenjamsati tusa. ¹² Nunú tsawantinig uwig tsakat aishmag pegkeg makichik mijan ajamun sacerdote juki, Apajuín anentag suwak maa nuna nejen ashí apeattawai. ¹³ Tuja nuigtushkam nunú tsawantaik Apajuí anentag suwaku apeatin kugkuin pegkeg ipak usumat nuigtu jimaituk kilo dekapamu harina aceifejai pachimja nanegbau itaattagme. Nuigtushkam ayatak ukagtina nunú vino makichik litro itaattagme. ¹⁴ Atumek Apajuínua nunú eke anentag sutsukek, pag, trigo duwikkbau, tuja samek juukbauk aidaukesh yuwashatjume. Jujuwai atum tuwi pujuttagme, nuniakjumesch chicham tuke umiktina duka. Junak uchi akiinak wedaushkam tuke dutiktin ainawai.

¹⁵ “Tsawan ayamtai kintamag tsawagtata duwi atum mina anentag sujakjum trigo tsupija jigkamu itagtuatajum, nunú tsawantin nagkama dekapajum siete semana ejetatjume. ¹⁶ Duka tsawan ayamtai tsawagmatai, kashinia duwi nagkama dekapajum tsawan cincuenta jegak, ayamtai tsawan tsawagtata duwi trigo yamá nagkamchaku juukbau anentag sujustatjume. ¹⁷ Nunú Apajuí anentag suwamua duka atumi jenia yama nagkamchaku trigo juuka dekegbau harina shiig pegkeg levadurajai pachimja jimag pag maki makichik ipak usumat kilo ajamu aidau inajuamu ittattajume. ¹⁸ Tuja nuigtushkam ashí aents aidautijum ijunjajum siete uwig tsakat aishmag makichik mijanji ajamu pegkeg aidau, nuigtu makichik toro tsakat, jimag chivo, nuigtu trigo, cebada, vino, aatsa jukijum sacerdote susatajum. Dutikam mina emematjak nuna ashí apeati, nuna kugkunti mina shiig awajtau asamtai. ¹⁹ Tuja nuigtushkam atumi tudaujum tsagkugnagtinnum makichik chivo sujustatjume. Tuja agkan pegkeg pujutan sujusti tujutkugmek, jimag uwig tsakat aishmag makichik mijanji ajamu sujustatjume. ²⁰ Nunú atum anentag mina sujamun, pagkan jimag uwig aishmag tsakat aidaujai, sacerdote juki mina itagtuattawai. Nuna sacerdote juki mina eme anenjus segatak iwaintugkattawai. Dutika nunak dita yuwawagtatui.

²¹ “Nunú tsawanta nuaduik atumi takatjume makichkish takasaigpajum, ayatak ijunjajum Apajuí ememattajum. Jujuwai atum tuwi

pujuttagme nuniakjumeshe tuke umiktina nunú. Junak uchi akiinak wedaushkam tuke dutiktin ainawai.

²² “Ajak ajakmamu juut tsawan jegamtai, juwakjumeshe ashí jukaigpajum, tuja ampinjau aina dukesh waketjukmek jukaigpa. Duka idaisatajum ujudauch aidau aents tikich nugkanmaya aidaujai yuwatnume. ¡Witjai Tuke Pujuu atumi Apajuigminuk!”

Apajuí emematku ijunja jüstamtai
(Nm. 29.1-6)

²³ Tuke Pujuu Moisésan chichajak: ²⁴ “Juju Israel aents aidau ujakta: Nantu sieteya nunú taka tsawan makichik tsawaitta nunú ayamtai tsawan asantai, takatjumek takatsuk ijunjajum jüstamkujum Tuke Pujuu ememattajum. Nuniakjum Tuke Pujuu yaimpamua nunú anentaimtusjum uwija kachuji umpuagtajum. ²⁵ Tuja nunú tsawantai Apajuí eme anentsa anentag suwamua nunú apeattagme. Nunú tsawantinig makichik takatjumkesh takaschattagme”, tita tiuwai.

Tsagkugnatai tsawan
(Nm. 29.7-11)

²⁶ Tuke Pujuu Moisésan chichajak: ²⁷ “Nantu sieteya duwi tsawan diez tsawaitta nunú atatu tsagkugnatai tsawan. Nunú tsawantin ijagmajum yujumak yutsuk pujusjum, Tuke Pujuu emematkujum kuntin maa apeatajum. ²⁸ Nunú tsawantinig makichikish takatjumek takaschattagme, wagki duka tsagkugnatai tsawan asantai, Tuke Pujuu Apajuí atumi pegkegchaujijn tsagkugtamjagtatui. ²⁹ Untsu nunú tsawantin makichik aentskesh ijagmatsuk yujunka yuwaunak, Israel aents aina nuna ukumtikiag yaja jiiki ajapeam atatu. ³⁰ Tuja nunú tsawantai aents takatjin takaushkam dushakam dutiksaik jiiki ajapeam atatu.

³¹ “Nunú tsawantinig makichik takatkesh takasaigpajum. Jujuwai atum tuwi pujuttagme nuniakjumeshe tuke umiktina nunú. Junak uchi akiinak wedaushkam tuke dutiktin ainawai. ³² Nunú tsawantin atum ayamkujum ijagma yujumak yutsuk pujustajume. Duka nantu sieteya duwi tsawan nuevetin aagkü nagkamna tsawag kashinia duwi agkuntai nagkantatui.”

Numi kanawen aakmajag batsamsaju aina nunú tsawantin jüstamajakbau
(Nm. 29.12-40)

³³ Tuke Pujuu Moisésan chichajak:

³⁴ “Israel aents aidau juju ujakta: Yaunchuk numi kanawe aakmajag batsamsaju aina nunú anentaimtusjum, numi kanawe aakmagjum juju nantu sieteya duwi tsawan quincetin nagkamajum ijunjajum, siete tsawantai Tuke Pujuu eme anentsa ememattajum. ³⁵ Jiista nagkamnamu yama nagkamchak tsawan tsawagtata nuaduik makichik takatkesh takaschattagme. ³⁶ Untsu siete tsawantai Tuke Pujuu eme anentsajum nii anentag suwamu apeattagme. Tuja tsawan ochotin ayatak ayamku ijunjajum Apajuí anentag suwamu nii emematkujum apeatajum. Nunú tsawanta duka Apajuí tsawanji asantai, makichik takatkesh takasaigpajum.”

Apajuí tsawantan etegjauwa nunú pachisa ataktu tibau

³⁷ “Juju tsawan aina nunuwai Apajuí emematku ijuntai atina duka. Nuadui nunú tsawan aina duka pegkejam takat takashtai, ayatak ijunja Tuke Pujuu ememattai awajsatnaitjume. Tuja nunú tsawan aina duwi

atum Apajuí anentag suwamu aidau apeamu, kuntin maa nuna neje ashí apeamu, trigo cebadajai juukbau anentag suwamu, pegkeg agkan pujutan sujusti tusa kuntin maa apeamu, vino anentag suwamu aina nunú maki makichik waji tsawantin dutikati tibauwaita duka betek dutikattagme. ³⁸ Nuiqtushkam tsawan ayamtain ijunja mina emematjajum duka betek dutikayatkujum, juju tsawan aina juwishkam emematjittagme. Atum mina anentag sujustatjum nunú, nuigtu midau atin anagtuawaitjum nujai sujajjum emematjittagme. ³⁹ Ajak juuka ashí ashimkajum nantu sieteya duwi tsawan quincetin Tuke Pujuu emematkujum ijunjatajum. Atumek jiista nagkamnamu tsawan tsawaitta duwi ayamjattagme. Tuja tsawan ochotinchakam nunisjumek ayamjattagme. ⁴⁰ Jiista nagkamnamu tsawan tsawaitta duwi yujág pegkeg aidau juukjum, palmera duke aidau, tuja tikich numi kuashat dukentin aidau, álamo namaka uwet ayá nuna dukee aidau tsupija aakmaktasajum yanaki juki shimittagme. Nunú dutikajum siete tsawantai Tuke Pujuu, atumi Apajuígmi emtin shiig aneetnaitjume. ⁴¹ Duka maki makichik mijantin nantu sieteya duwi siete tsawantai Tuke Pujuu eme anentsa emematkujum ijunjattajume. Junak uchi akiinak wedaushkam tuke dutiktin ainawai. ⁴² Nunú siete tsawan aina duwi ashí atum Israel aents wegantunum akiidau aidautigmek, numi kanawe tsupija aakmakbaunum pujustatjume. ⁴³ Juka atum Egipto nugkanum waitkam batsatutigmin wí jiija ai, numi kanawe dukentin tsupigjum aakmaja batsamsauwaitjum nuna atakea duwi atum wegantu aidau dekawagtin aina nunuwai. ¡Witjai Tuke Pujuu atum Apajuí emematin ainajum nunú!” tiuwai. ⁴⁴ Juna aatus Moisés Tuke Pujuu emematku ijuntai tsawan etegjamun pachis Israel aents aidaun ujakui.

Israel aents aidau uwegshunum yujasbau Números

6

Sacerdote aidau Israel aents aidau pegkegnum yumigjagtin

²² Tuke Pujuu Moisésan chichajak:

²³ “Aarón niina uchiji aidaujai Israel aents aidau pegkegnum yumigki-akug aatus titinme:

²⁴ “²⁴ “¡Atum aidautigminak

Tuke Pujuu pegkegnum yumigtamsatnume,
dutijamak nigki kuitamjamkatnume;

²⁵ Tuke Pujuu atumnak shiig anenjamas kuitamjamkatnume;

²⁶ Tuke Pujuu atumin

anempau asa,

shiig agkan pujustinme tusa kuitamjamkatin ati!”

²⁷ “Juna aatus sacerdote aidau mina daajun adayas Israel aents aidau tiagtatui. Nuadui wi ditanak pegkegnum yumigsagtatjai”, tiuwai.

9

Aak pegkejam carpa aakmakbaun yujagkim ijia aajaku (Ex. 40.34-38)

¹⁵ Chicham umiktin egkemsatnun aak pegkegman carpan aakmak ashimkaju ai, nunú tsawantaik aakan yujagkim ijiauwai. Nunik au agkuantai nagkamas jii keegama imanik aak pegkegmanum keeka au tsawak megkagajakui. ¹⁶ Duka tuké nuníjakui: Tsawaig aaknak yujagkim ijia aajakui, untsu kashi jiijai betek keeka aajakui.

¹⁷ Yujagkim nunú aakan ijia aajakua nunú yaki takuntai, Israel aents aidauk yajumakag shimujaku ainawai. Untsu yujagkim wegau tuwi jasa asattawa, nunitaik ditashkam nuwi aakmag batsamajaku ainawai.

¹⁸ Israel aents aidauk Tuke Pujuu yujagmin emtikak ematai, nuna diisag shimujaku ainawai. Tuja yujagkim wegau jasa ataik, nuwi aakmag batsamajaku ainawai. Aak pegkejam carpa aakmakbaun yujagkim ijia au takuni wechataik dita batsatbaunmag batsamajakajui. ¹⁹ Tuja yujagkim aak pegkejam aakmakbaun ijia kuashat tsawan ataik, Tuke Pujuu wetá tachamu asag, nuwi aakmajag batsamajaku ainawai.

²⁰ Tuja yujagkim ujumak tsawan ataishkam, nuwig dita batsatbaunmak batsamajakajui. Tuke Pujuu wetajum tama shimujakajui, tuja juwaktajum tutaik nuwi juwakag batsamajakajui. ²¹ Untsu yujagkim nii nuniktatug takuni wetsuk, nuwig jasa makichik kashi aajakui. Nunik au tsawak kashikmas takuni wetai shimujakajui. Tuja kashikesh, nuniachkush tsawaigkish yujagkim takuni wetaik, ditashkam shimujakajui.

²² Aak pegkejam aakmakbaun yujagkim jimag tsawan, nuniachkush makichik nantu, atsa makichik mijankesh ataik, shimutsuk nuwig aakmajag batsamajaku ainawai. Untsu yujagkim takuni eemak wetai nuadui shimujakajui. ²³ Tuke Pujuu wetajum tama shimujakajui, untsu juwaktajum tutaik nuwi aakmag batsamajaku ainawai.

Nunak Tuke Pujuu Moisésan akateak nunú umiktajum tibaun umiinak nuníjaku ainawai.

10

Israel aents aidau muja Sinaínum batsatu shiyakbau

¹¹ Israel aents aidauk Egipto nugkanum inaku waitkatai batsatun Apajú jiihua duwi nagkama jimag mijana nuna achikag, nantu jimaja nunú takau ai, tsawan veintetin aak pegkejam carpa aakmakbau aajakua nuna yujagkim ijia au yaki takuniuwai. ¹² Nunikmatai Israel aents aidau muja Sinaínum batsatu jiiag shiyakajui. Nunik shimui shimuinakua Parán nugkanum yujagkim jasa asamtai nuwi batsamsajui.

³³ Aatus muja Sinaínmaya juwakiag kumpatum tsawan jegawajui. Nunik shimak chicham umiktin agagbau egketun arcan Levi wegantu aidau yanaki jukiag eemak wedau, tuwig yujagkim jasa asat, nuwi ayamsagtin asag. ³⁴ Kashikmas nantajag eke uminainaig yujagmik takuni dita shiyaktinnum wajantun wegau. ³⁵ Tuja chicham umiktin agagbau egketun yanaki juwagtai Moisés chichaak:

“¡Tuke Pujuuwah, pai nantakta!
¡Nunikam amina shiwaajum aidau
dapampaakam utsagta!
¡Dutikawamin nuna diisag
amina kajegtamin aina duka ishamjamkag pisagtinme!” tau.

³⁶ Untsu nunú chicham umiktin agagbau egkeamun yanaki juki wedau apujiagtai Moisés chichaak:
“¡Tuke Pujuuwah, amina aentsjum Israel aents
shiig kuashat aina nunú ame tam kuitamkata!” tau.

11

Apajú Israel aents aidau yuwatnun nejen susattajai tibau

¹ Makichik tsawantai Israel aents aidau senchi waituinak, Tuke Pujuu pegkegchaun chichajuidau. Nuna Tuke Pujuu antuk senchi kajeka ditan ijinatatus jii kegaun dita batsatbaun tentea ajunjauwai. ² Dutikam nuna ishamainak Moisés ayamjuptakti tusag untsuidau. Imatiagtai Moisés ditá pachis Tuke Pujuu segauwai. Dutikam jii kegau kajinkauwai. ³ Nuadui nunú nugka daajig Taberá* adaikamu aajakui, wagki nunú nugkanum Tuke Pujuu ditá ijinatatus jii kegaun ajunjau asamtai.

⁴ Tuja Israel aents aidaujai tikich aents aidau pachiinak yujaidauk ayatak yutanak aentaimtujaku ainawai. Nuniagtai Israel aents aidaushkam ditajai betek buu buuttajai pegkegchaun chichainak:

“¡Yaki nejenash ii yuwatnunash amasti! ⁵ ¡Egipto batsamsaik namak akikchau yuyag nunú aentaimtaji! Nuigtushkam pepino aidau, melón aidau, puerro aidau, cebolla aidau, ajo aidau yuu ayaji. ⁶ Tujash yamaik juwig nujantai jinaji, tikich yutaigkesh atsawai jima maná yusaik yujaji!” wajaidau.

⁷ Nunú manák culantron jigkayijai betekmamtin aajakui, untsu niimeg culantro puwaji pauja numamtin aajakui. ⁸ Maná kugkuntig harina aceitejai pachimja torta najanamun kugkuntijai betek aajakui. Nuna Israel aents aidau agá jiiag juukag dekekag pagjai betekmamtinun inajujaku

* 11:3 “Taberá” tawa duka hebreo chichamnumak “jii kegau ishamain” taku tawai.

ainawai. ⁹Tuja duka dita aakmaja batsatbaunum kashi yumi sajatbaunum kakegakui.

¹⁰ Israel aents aidau maki makichik uchiji aidaujai ditá jeen waitinum batsamas buutuidaun Moisés antukui. Nuniagtai Tuke Pujuu senchi kakujui. Tuja Moiséschakam chicham patatbau asa, ditá apuji atanak dakitjauwai. ¹¹ Nunik Tuke Pujuu chichajak:

“¿Wisha itugkamu asamea wi amina inakmetag nunin aish, imatikamesh waitkajame? ¿Wagka juju aents aidash minai sujuamesh ame yajuaka emata tusamesh waitkajame? ¹² Uchi piipich muntsuaku minaaki jutayama numamtuk jukim, dita apachji aajaku aina nunú nugka anagkuawaitam nuwi ame ejegata tujutminum tusanuk wika ditá apajigkesh, tuja ditá dukujigkesh atsujai. ¹³ ¿Wisha tuwiyanak neje jukinush juju aents aidau yuwawagtinnash susagtaja? Mina tajutuawag buu buuttajai chichagtuinak: ‘Neje li yuwatin sukagtusta’, tujutuinaawai.

¹⁴ “Tuja wika mina senchigjaigkik juju aents aina nuna yajuaknuk wemait Sujai, wagki juka takatak shiig múntai. ¹⁵ Tuja jutika waitkaju pujutnaitkumek, waitu pujuti tujuttsuk dekaskenum minash wait anenjakmek mina pujujuk jujutkita. Dutijuawamin waitu pujumainaitag nuna dekasken ayamsatjai”, tiuwai.

¹⁶ Tusa tutai Tuke Pujuu niina ayaak:

“Israel aentsu apuji múun aidau ame wainbau chichame antugtai aidau setenta aents yajuakam aak Apajujai chichatai carpa aakmakbauwa nuwi ikaunmam dakagsata. ¹⁷ Nuwi wi taan amejai chichastajai, nuniakun mina Wakanig aminí awa nuna Israel aents aidau apuji aidauunash susatjai, dutikam dita aents aidau kuitabaunum yaimpaktinme. Nuadui amek waittsashtatme. ¹⁸ Tuja aents aidau ujakta kashin nejen yuwawagtai, nuniktin asag yamai ditá pegkegchajin iwagmamkatneme. Dita buu buuttajai chichainak: ¡Nejesh akuig yumainaitji! ¡Egipto nugkanum ima shiig pujuyaji! wajainawai.

“Imatuidau asagmatai, nejen yuwatneme tusan kashin susagtajai. ¹⁹ Wika ditanak makichik tsawantai, jimag tsawantai, cinco tsawantai, diez tsawantai, nuniachkush veinte tsawantai yumainnakek susashtatjai.

²⁰ Ditak makichik nantu nejenak yuu batsamiagtai, imatika yuu batsatu asag yawetug tsumiagtai, wagki wi kuitamsam yujayatak dakitjajug mina emtijui buu buuttajai chichainak: ‘Egipto nugkanum batsatuti jijnjauwaitag duwi nagkamsa yaunchuk Egipto batsamsa waitin aayag nuni senchi waitiaji’ wajaidau asagmatai”, tiuwai.

²¹ Tusa tutai Moisés Apajujin ayaak:

“Aents múun maanimain aidau wijai yuja duka seicientos mil ainawai. Imania dusha ¿Amesh itugkamea makichik nantuish nejesh ayujush pujuttame? ²² ¿Tuwi ayawa uwig aidash, baka aidash, nunú maa aents aidau ashí ayugmainush? Nayantsanmaya namak aidau ashí yajuaka suwakuish makichkish ejemaitu imanush”, tiuwai. ²³ Tutai Tuke Pujuu ayaak:

“¿Amek mina senchijuk piipichik diyam? ¡Tuja wi taja dusha uminkatpash, atsa uminkashtimpash duka yamai wainkattame!” tiuwai.

*Israel aentsu apuji múun
setenta aajaku aidau
profetajai betek chichakagbau*

²⁴ Tusa timatai Moisés agá jinki, Tuke Pujuu tibaun imatiksag aents aidau ujakui. Dutika nuadui Israel aentsu apuji múun aidau setenta,

aak pegkejam aakmakbaun tentea ijumjauwai. ²⁵ Dutika ijumjamtai Tuke Pujuu yujagminum pachitkau akaiki Moisésjai chichasui. Nunik duwi Wakani Pegkeji Moisésai aun ujumak juki, setenta aents Israel aentsu apuji múun aidaun tinamkauwai. Dutikam Apajuí Wakani ditai pujugsam profetajai betek chichatan nagkamawajui. Tujash duka makichkia nunik nagkaemakiuwai ataktuk nunikchauwai.

²⁶ Setenta aentsun Moisés etegkauwa nuwiya jimag Eldad daagtin Medad daagtinjai, ditak aak pegkegmanmak wetsuk, dita batsatbaunum juwakajui. Nuwi batsatunak Apajuí Wakani egkemtujam ditashkam profeta chichamaina betek chichainau. ²⁷ Nunik chichagtai makichik uchi tupikaki, Moisésan ujaktatus weuwai. Nunik ujaak:

“Eldad Medadjai dita batsatbaunmak pujusag profetajai betek chichag-mae”, tau.

²⁸ Tusa tutai Nun aajakua nuna uchiji Josué datsauch asag Moisésan yaijakua nunú chichaak:

“¡Mina apujuh Moisésah, chichakainmegka tusam tita!” tiuwai. ²⁹ Tusa tama Moisés ayaak:

“¡Minak akasmatjukaipa! Dekas itugkag ashí aents aina nuna Apajuí niina Wakanin susa, dutikawajam ashí profeta anum tajai”, tiuwai.

³⁰ Nuna tusa Moisés Israel aentsu apuji múun aidaujai waketug ditá batsamtaijin shiyakajui.

Tuke Pujuu Israel aents aidaun codornisan ishikamu

³¹ Nayantsanmayan Tuke Pujuu dasen dasenmikakui, dutikam nunú dase codornisan shiig kuashat ikaunmakui. Nunú dita aakmaja batsatbaunum tentea nuna yantamen nagkamas kakegak makichik tsawantai jegamainnum nagkankauwai. Imaniku asa makichik metro tumainun dupai asauwai. ³² Imaniku asamtai nunú tsawantin nagkamawag, kashish, tsawajash codornisnak juu batsatu. Tuja ashí aents aidau juukajui. Imatikaidau asag dieza imajin ijumjag utuakajui, dutikawag dita batsatbau yantamen batsakajui jujukti tsag. ³³ Nuna codornisa yuwawag eke amuinachunak Tuke Pujuu ditan kajejuk suwimka susa shiig kuashat ijinawai. ³⁴ Dutika Tuke Pujuu ijinaw asamtai, nunú nugka daajin Quibrot-hataavá[†] adaikau ainawai. Wagki aents aidau ayatak yutanak anentaimtujaku aidau jinawagmatai, nunú nugkanum ukusaju asag.

³⁵ Tuja Israel aents aidauk Quibrot-hataavá batsatu jiinag shima shimakua Hazerot jegawajui. Nunikag nuwi batsamsajui.

12

María Aarójjai Moisés chicham patatkamu

¹ Moisés Etiopía nugkanmaya nuwan nuwatkauwai. Nunikmatai María Aarójjai chichaman patatuidau. ² Dutikainak: “¡Tuke Pujuu ima Moisésjaigkik chichatsui, auk jutijaishkam chichawai!” tuidau. Tusa tiagtatman Tuke Pujuu antugkauwai.

³ Tuja aents ashí nugkanmaya aidaujai apatka diismash Moisésak dekas kakagchauch ima Tuke Pujuu wakegamunak umijin aajakui. ⁴ Nuadui Tuke Pujuu Moisésan, Aaróggkan, Marían aatus chichajak: “Atum kampatumtimum aak pegkejam aakmakbauwa nuwi wetajum”, tiuwai.

[†] **11:34** “Quibrot-hataavá” tawa duka “aents ayatak yutanak anentaimtin aidau jinawajun ukusagbau” taku tawai.

Tusa tima shiyakajui. ⁵ Nunikagmatai Tuke Pujuu yujagminum pachitkau akaiki aaka waitijin wajanta Aaróŕkan Mariajai untsukui. Tusa untsuam ditashkam jegantajui, ⁶ nunik jegantagmatai Tuke Pujuu ditan chichajak: “¡Antuktajum wi titatjim nunú! Atum ainajum anuiyan wi makichik profeta apusamua nujaig wika ayatak wakanmanta wajantan, tuja kajanum aajan chichajai. ⁷ Untsu Moisés mina inakjua nujaig aajanuk chichatsjai. Niyai dekas ashí tikich mina inakeg aina nuna nagkaesau ima minak jikatjus umigta duka. ⁸ Nuadui niijaig paan igkunian chichajai. Tuja nii mina igkuntua waita nuniaush, ¿wajukeakjumea atumesh mina inakeg Moisésash pegkegchaush chichagjume?” tiuwai.

13

Canaán nugkan dekaatnume tusa aents ishiakbau (Dt. 1.19-25)

¹ Tuke Pujuu Moisésan chichajak: ² “Ujumak aents yajuakam ishiakta wi atumin Canaán nugkan amastatag nuna dekaa ukuutinme. Israela uchiji doce wegantu aina nuwiya aents wajuu, chichame antugtai aidau maki makichik etegjam ishiakta”, tiuwai. ³ Tusa tima Moisés Tuke Pujuu tibaun umiak, Parán nugkanum pujus aentsun ishiakui. Nunú aents aidauk wajuu chichame antugtai aajaku ainawai.

²⁵ Dutika ishiakbau cuarenta tsawan yujasag nugka dekaawag waketug, Parán nugkanum uwejush aajakua nuwi ²⁶ yaakat Cades kaunawajui. Nunikag nuwi Moisés, Aarón, ashí Israel aents aidau aatus batsatun dita yujasa wainkamua aidau ujakajui. Dutikawag nunú nugkanmaya yujág juki ejegamunashkam iwaintukajui. ²⁷ Nuadui Moisésan chichajuinak:

“Nugka dekaatajum tusa ame tukagtiamin wemaji. Nunika jegaa wainkamji. Dekas nuggak shiig pegkeje, ajakash shiig tsapagmae, tagkush shiig muumpagmae, nuwiya yujág juki itaaji”, tusa iwaintuidau. ²⁸ “Tujash nunú nugkanum aents batsata duka senchigtin agmae. Yaakat aidaushkam shiig múun makichkish utumainchau peeja apakbau agmae. Tuja nuigtushkam gigante Anac aajakua nunú wegantu aidau batsatu wainkamji. ²⁹ Untsu Néguév nugkanum Amalec aents aidau batsaamae. Tuja hitita aents aidau, Jebús aents aidau, amorreo aents aidau muanum batsaamae. Untsu nayantsanmanini, tuja namak Jordágnun manaágnunia aents aidau batsaamae”, tuidau.

³⁰ Nuna antukag Israel aents aidau Moisésjai ijunag batsamas pampaidaun Caleb antuk itatmikak chichajak:

“¡Tutsuk dekas shiyakagmi, nunika mania depetmaka nunú nugka ii jukimi! ¡Dekas iik depetmaktatji!” tau.

³¹ Tusa tutai nijai shiyaku aidau chichainak:

“¡Atsa, iik nunú aents aina nujaig maanimaitsuji, wagki ditak iina nagkaetamsau senchigtin ainawai!” tuidau. ³² Tusag Israel aents aidau chichajuinak:

“Auk ii nugka dekaami tusa shiyakmayag duka pegkegchaui. Tuja nunú nugkanmaya aidauk nuwiya aents aidauunash main ainawai. Nuigtushkam nuwiya aents aidauk múun esajam ishamain agmayi. ³³ Tuja nuigtushkam gigante Anac aajakua nunú wegantu aidau batsatu wainkabiaji. Ditajai apatkamak iik manchia nunin wantinbajji, tuja ditashkam nuninuk diijatiagmayi”, tuidau.

14

*Israel aents aidau Tuke Pujuu chichamen intimjukiagbau
(Dt. 1.26-33)*

¹ Nuna antukag Israel aents aidauk untsumainak tuke buu buutainakua tsawagkajui. ² Nunikag ashí dita aidau Moisésan Aarógjai chichaman patatuinak:

“¡Egipto nugkanum batsamsa jinumainus imajui uwegshunum yujasa jinootin asa jiiinjayagtai! ³ ¡Tuke Pujuu imajuig itagmamaichaunas itagmayatai! ¡Ii aidautik iina shiwaajijai maaniawaja jinawagtatji! Tuja shiwag aidau iina nuwe aidau, iina uchiji aidaujai achija yajuakagtatui. ¡Dekas Egipto nugkanum atak waketmainus aniagtai!” wajaaidau.

⁴ Nuna tusag diták pempeentunikiag chichainak: “¡Dekas iina apuji atin adaika Egipto nugkanum waketjami!” tuidau.

⁵ Imatiagtai Moisés Aarógjai dita emtin tsuntsumawag nijayin nugka antig pujusajui. ⁶ Nuniagtai nugka dekatatus shiyakajua nuwiya Josué Calebjai anentai inagmak jáanchjin japiki ichigkajui. ⁷ Nunikag Israel aents aidau chichajainak:

“¡Ii nugka dekatasa wemayag duka dekas shiig pegkejayi! ⁸ Tuja Tuke Pujuu iina wait anenjamkug nii yaimpasmatai, nunú nugkanmak wayattaji. Tuja nunú nugkak dekas shiig pegkejayi, ajak aidaush shiig tsapagmayi. ⁹ Nuadui Tuke Pujuujaig dekas shiwagmagawaigpa, nuwiya aents aina dusha ishamkaigpajum, wagki ditak jutijaig shiig wainkaush ainawai. Dita yaimainuk shiig atsawai, untso iinak Tuke Pujuu yaimpawai. ¡Nuniau asamtai ishamkaigpajum!” tiuwai.

¹⁰ Tusa tamaitak aents aidauk kayai tukua tukuakua maatag tuidau.

Nuninai Tuke Pujuu imanjiya nunú Apajuujai chichatai carpa aakmakbaunum wantinkauwai Israel aents aidaush ashí wainainamunum.

¹¹ Nunik Moisésan chichajak:

“¿Juju aents aina dusha wajupa kuashta intimjutush yujagtatua? Waji wainchatai aidau kuasht wi iwaintukajan kuitamka emamash juju aents aina duka dekaskeapi tujutuinsatui. ¹² Nunin asagmatai wi ditanak jata ishamainun awetittajai, dutika ai jinawag wi nugka pegkejan anagkuawaitag nuwig wayashtinme tusan. Tujash aminiyanak kuasht aentsun uyujkatnaitjai, dutika ai Israel aents aidau nagkaesau kuasht, senchigtin agtinai”, tiuwai.

¹³ Tusa tutai Moisés Tuke Pujuu ayaak:

“Juju aents aidauk Egipto nugkanum batsatu amina senchigmin jiiigmayum nuna egiptunmaya aidauk dekanawai. Nuadui ame kuitamsuk idaisaminig, egiptunmaya aidau nuna dekawagtatui. ¹⁴ Nunikag Canaan nugkanum aents batsamin aina nuna ujakagtatui. Wagki ditashkam ame jutijai pujam nunak dekawaju ainawai. Tuja wishakam ame paan waitkati tujutiu asamin wainkajame, nuadui ame jutijaig tuke pujame. Tuja ame jutii uyunkagtakum tsawai yujagkim wajanbaunum, kashi jii keeka wajanbaunum emka weam nunashkam dita aidauk shiig dekanawai.

¹⁵ Nuadui juju aents aidau wamak ijinawaminig, aents tikich nugkanmaya ame imanjumin dekatamin aidau chichainak:

¹⁶ “Tuke Pujuu Israel aents aidau nugka amastajime tusa anagkuawa nuwi ejemainchau dekapeak, uwegshunum ijinae’, tujamiagtatui.

¹⁷ Nuadui ame anagkuakum dutikatjai tiuwaitam nunú umiakum senchijum iwainakta. Tuja ame chichaakum: ¹⁸ ‘Wika wamkek kajeचित्ता. Aents aidau senchi anejai, nuniau asan dita

pegkegchaun takainak mina shiwagmatuinakuish tsagkujajai, untsu dita pegkegchaujining tuké suwimkan suwajai dutikakun ditá uchijinash, tijajinash, ama tijajinash ditá apaji pegkegchau takamsamunum suwimkan suwajai', tame. ¹⁹ Nuadui amina anenkagmek múunta ibau asamtai, juju aents aina nuna pegkegchaujig tsagkujata, wagki ditak Egipto nugkanum batsatu jiija yajuakam ame kuitamsam imajui ikaunbau asam", tiuwai.

*Apajui Israel aents aidaun suwimak susamu
(Dt. 1.34-40)*

²⁰ Tusa tama Tuke Pujuu Moisésan ayaak:

"Ayu, ame segatam nunak imatiksasuk tsagkujattajai. ²¹ Wika dekas tuke pujuuwaitjai. Mina imanjunak dekas ashí nugkanum dekainawai. Au aents aidauk wi dita muunji aidaun nugka anagkuawaitag nunak dekas wainkachagtinaí. ²² Wagki wi mina imanjuí wainchatai ishain main aidaun Egipto nugkanum tuja uwegshunmashkam iwainamun wainkau ainay-atak, dekapjustasag mina umigtutan dakitjau aina nuadui. ²³ Tuja wi ditá muunji aajaku aina nuna nugka amastajime tusan anagkuawaitag nunak ditak wainkachagtatai. Mina dakitjujaju aina dushakam makichkish nunú nugkanak wainkachagtinaí.

²⁴ "Untsu Caleb mina inakjua duka tikich aina nujaig betekchauwai, wagki nigka ima minak umigtau asa. Nuadui nii nugká dekatatus weuwa nuwi niinak awayattajai. Dutika ai nii wegantu aidaushkam nuwi batsamsagtin ainawai. ²⁵ Tuja Amalec aents aidauk canaágnunmia aents aidaujai nugka pakanum batsatai. Nuadui atumek kashin kashikmasjum uwejush atum kaunamua nuni waketajum nayants kapantu tutaya aatsajum shiyaktajum", tiuwai.

²⁶ Tusa Tuke Pujuu Moisésan Aaróggjai chichajak:

²⁷ "Israel aents aidau pegkegchau asag, wainak chichá yuja nunash ¿wajupa kuashtak tsagkujatja? Dita mina pegkegchau chichagtuinamun antukjai. ²⁸ Nuniku asan wi yamai atumin titatjim nunú ujaktajum: 'Atum aidaatujim chichamugmin antugkajim duka nunisag uminkati, junak dekas uminkatnun Wi Tuke Pujuu tajai. ²⁹ Tuja ashí aents veinte mijanji ajamu daaji agatkamu aidau mina pegkegchaun chichagtukajuk ashí jinawagtatai, nunikagmatai ditá iyashig juju uwegshunum utsankattawai. ³⁰ Wi nugkan amastajime tusa anagkuawaitjim nuwig atumek makichkish wayashtatjume. Untsu ima Caleb Josuéjaig wayawagtatai.

³¹ "Tuja atum chichaakjum: Iina shiwaajui aidau mantamainak iina uchiji aidaun yajuakagtatai tusajum timaajum duka nunikhattawai. Wi atumi uchijum aidaunak yajuakan atum nugka dakitjaujum nuwi ejegawagtatai, dutika ai ditak nuwi ajakmawag yuwinak shiig aneas batsamsagtin ainawai. ³² Tuja atumi iyashig uwegshunum utsankattawai. ³³ Untsu atumi uchijum aidau atum pegkegchau takasbaun umiinak uwija kuitamin waigkag uwegshunum cuarenta mijan waitu yujagtinaí, atum aidau jinaati tusa.

³⁴ "Atum nugka dekaatag tusajum cuarenta tsawan yujasuitjum antsag, ditashkam cuarenta mijan dita pegkegchau takasbaujin umiinak yujasagtatai. Makichik tsawanta nuna makichik mijan yujagtatai. Aatus mina pegkegchau chichagtukbaunum yujasag waituinak dekawagtatai. ³⁵ Juju aents pegkegchau aina nunak mina pegkegchau chichagtukajui asagmatai dutikattajai. ¡Nuadui ditak juju uwegshunum yujasag jinawagtatai!

¡Witjai Tuke Pujjuunuk, nunak dekas uminkatnun tajai! Tusa Apajui tujamui”, tiuwai Moisés.

Doce aents nugka dekatnume tusa ishiakbau aina nuwiya diez aents dita pegkegchaujín jinawagbau

³⁶ Nugka dekaatnume tusa Moisés aents aidaun ishiakua nunú wake-tug kaunawag, nuggak pegkegchauwe tusag Israel aents aidaun ujaka-jam nuna antukag Moisésan chichaman patatuidau. ³⁷ Tuja nuggak pegkegchauwe tusa tiaju aina nunak Apajui suwimka susa ijinauwai. ³⁸ Untsu Caleb ima Josuéjaig jakachajui.

Hormá nugkanum Israel aents aidau ijinamu

(Dt. 1.41-46)

³⁹ Tuke Pujuu tibaun Moisés Israel aents aidaun ujaku. Dutikawajam nuna dekawag wake besemag dekapjajui. ⁴⁰ Nunikag kashinia duwi kashikmas jiinag ataktu waketug mujá shiyakajui, nunik nuwi wakag chichainak:

“¡Yamaik imajui kaunaji! Ii Tuke Pujuu intimjuki pegkegchau wajakag duka shiig dekaji, nuniku akuish Tuke Pujuu ina nugka anagtabauwa nuwi shiyakagmi”, tuidau.

⁴¹ Tusa tiagtai Moisés ditan chichajak:

“¿Wagka tujash atumesh Tuke Pujuu chichamesh intimjagme? ¡Atum tajum duka tuké umikchattagme! ⁴² Nuadui shiyakaigpajum, wagki yamaik atumnak Tuke Pujuu uyuuntamainatsui. Nuniau asamtai atumnak shiwag aidau amupakagtatui. ⁴³ Atum weajum nuwi Amalec aents aidau, canaágnunia aents aidaujai dakagmainawai atumin amupakagtatus. Tuke Pujuu atum idaisamu asa yamaik atumnak uyuuntamainatsui”, tiuwai.

⁴⁴ Tusa tamashkam nunak antutsuk dekas mujá wakami tusag shiyakajui. Nunik shimakush arcanak jukichajui, tuja Moiséschakam wechauwai, ayatak dita batsatbaunmak juwakajui. ⁴⁵ Nunik jiinag shimittaman nunú nugkanum batsamin Amalec aents aidau canaágnunia aents aidaujai jiiintujag pataetukag Hormá nugkanum amainagkag nuwi Israel aents aidaun depetuk amukajui.

20

Yumi kayanmaya jiiikbau

(Ex. 17.1-7)

¹ Mijan nagkamnamu makichik nantu takau ai, uwejush Sin tutainum Israel aents aidau jegawajui. Nunikag nuwi Cadesnum ujumak tsawan pujusajui. Nuwi batsatai María jakauwai, nunikmatai nuwig ukusajui.

² Tuja nuwi yumi umumain atsau asamtai, Moisésan jiyakagtatus aents aidau ashí ijunjajui. ³ Nunik ijunag Moisésan Aaróggai chichajuinak:

“¡Tuke Pujuu tikich Israel aents aidaun ijinawabia nunú nugkanmak iinash ijipamainnas aikagmayatai! ⁴ ¿Wagka atumesh Tuke Pujuu aentsji aidautish imajuish uwegshunmash itajatuaugme? ¿Tagkuji aidaujaí ashí jinatnume tukagtatsjumek? ⁵ ¿Wagka Egipto nugkanmaya jii-jatkigmesh, juju nugka shiig pegkegchauwa imagnumash itajatuaugme? Juju nugka juwig makichikish ajakmamaitsui. Tuja higerakesh, uvakesh, munchigkesh juwig shiig atsawai. Nuigtush ¡yumi umumainush shiig atsawai!” wajaidau.

⁶ Imatiagtai Moisés Aaróggjai aents aidaun ukukiag Apajuíjai chichatai aak aakmakbaunum nuna waitijin jegantag nuwi tsuntsumawag nijayin nugka antig pujusajui. Nunik pujuinai Tuke Pujuu niina imanijjai wantinkauwai. ⁷ Nunik Moisésan chichajak:

⁸ “Ushujutaijum jukim Aarón yaimpasmatai aents aidaun ijumjata. Dutika ijumjam ditá emtín kaya chichagkum: Yumi sukagtusta tita. Tusa tamin nunú kayanmaya yumi jiinkittawai, nunikmatai dita umuinak tagkujinash agtinme”, tiuwai.

⁹ Tusa tima nuna betek umiak, Moisés niina ushujutaiji Tuke Pujuu emtín atatman jukiuwai. ¹⁰ Dutika juki Aaróggjai aents aidaun kayanum ijumag chichajak: “Antuktajum, chichama intimkiu aidauwah: ¿Juju kaya juwiyen yumin jiikiag amasmatai, uwajagmi tusagmekka imatjum?”

¹¹ Tusa Moisés niina ushujutaijin juki kayan jimajá awatiuwai. Dutikam kuashat yumi jiinkiuwai. Nunikmatai Israel aents aidaun nuna umuinak ditá tagkujinash aakajui.

¹² Tujash Tuke Pujuu Moisésan Aaróggjai chichajak: “Atumek minai kajinta anentaimtsuk, tuja mina pegkegmajua dushakam Israel aents aidaunum iwainakchau asajum, wi nugka anagkuawaitjim nuwig juju aents aidaun yajuakjumek wechattagme”, tiuwai.

¹³ Nuadui nunú nugka daajin Meribá* adaikajui. Nuwi Israel aents aidaun Apajuín yumi sukagtusta tusa chichamjukaju asagmatai. Tusa segam Tuke Pujuu niina pegkegmajin ditan iwaintukui.

Israel aents aidaun nagkaemakinum tusa Edoma apuji dakitjamu

¹⁴ Cadesnum batsamas Moisés aents chichama etsejin aidaun Edoma apuji pujamunum ishimak, juna aatus akatmamtuju:

“Amina yatsum Israel aents aidaun juna aatus tujamainawai: Amek shiig dekame ii utugchatnum batsatuti jinja yujag duka. ¹⁵ Iina apachji aidaun Egipto nugkanum shiyakag awi kuashat tsawan batsamsajui, tujash egiptunmaya aidaun iina apachjin waitkasu aina dutiksag jutinashkam waitkagmayanume. ¹⁶ Imatijamainakui Tuke Pujuu yaimpakti tusa segabi-aji. Dutika ajin ii sumamun antugtamak, niina aentsji nayaimpinmaya ángel makichik awetugmabi, dutikam nunú Egipto nugkanum batsatutin jiiipaju asamtai, yamai juju amina nulkem nagkatkamunum yaakat Cadesnum kauna batsatji.

¹⁷ “Nuniaua asa wait anenkagtugta, amina nulkemea nuni nagkaemakiagmi tusa taji. Nunika nagkaemakuish, ajak ajakmamunmak, tuja uwa ayamunmash nagkaemakchattaji, tuja ame yumi umutaigmekesh uwagchattaji. Jinta wetaya duke yajash tsegketsuk amina nulkem nagkaikitasa wetatji tujamu”, taju.

¹⁸ Tusa ujaam Edoma apuji ditan ayaak:

“iMina nulkajua junig makichkish nagkaemakigpa, tuja antutsuk nagkaemakjumini, mina suntajujai jiiintuktatjime atumjai maaniatasan!” tiuwai.

¹⁹ Tusa tutai chichama etsejin aidaun ataktu awena shiig ujainak:

“Jinta wetaya duke wetatji, untsu nuniamunum iikish atsa nuniaishkush iina tagkujigkesh yumi amina umutaigmin umuinakuig nunak akiktajame. Iik ayatak nagkaemaktasa wakegaji”, tuidau.

²⁰ Tusa tiagtai, Edoma apuji chichaak:

“i Tujash junig nagkaemakchattagme!” tiuwai. Nuna tusa Israel aents aidaun maaniatatus niina suntaji maanitan yacha aidaun shiig uminas

* **20:13** “Meribá” tawa duka hebreo chichamnumak “chichamjukbau” taku tawai.

jiintukiuwai. ²¹ Dutika nagkaemamainchau emam, Israel aents aidauk pempeenag yaja tikich yantannum shiyakajui.

Aarón jakamu

²² Israel aents aidauk Cades batsatu ashí jiinag muja Hor tutainum shiyakajui. ²³ Nunikag Edoma nugke nagkatkamunum jegawagmatai, nuwi Tuke Pujuu Moisésan Aaróggjai chichajak:

²⁴ “Aaróggkak jakattawai, nuniktin asa wi Israel aents aidaun nugka anagkuawaitag nuwig wayashtatui, wagki atumek Meribánum yumi awa nuwi wi umikta tibau umikchau ainagme. ²⁵ Tuja Moisésah, ame Aarón niina uchiji Eleazarjai jukim, muja Hornum nuna titijin wakata. ²⁶ Nuwi wakam Aarón sacerdote nugkutaijin nugkuaja nunú awitka jukim niina uchiji Eleazar apegata. Nuwi Aaróggkak jakattawai”, tiuwai.

²⁷ Tusa tima Moisés Tuke Pujuu tibaunak imatiksag umikui. Nunak ashí Israel aents aidau wainbaunum muja Hornum weuwai. ²⁸ Nunik waka nuwi Moisés Aaróga jáanchjin awituk jujuki Eleazaran apegauwai. Tuja Aaróggkak nunú mujá titijiya nuwi jakauwai. Nunikmatai Moisés Eleazarjai mujanum batsatu waketug kaunauwai. ²⁹ Tuja Aarón jakamun Israel aents aidau dekawag, treinta tsawantai buutiaju ainawai.

21

Israel aents aidau Hormánmaya aents aidaun depetkagbau

¹ Canaágnunia aents aidaun apuji yaakat Arad tawa nuwiya Néguev nugkanum pujujakua nunú Atarim jinta nuni Israel aents aidau mininawai tabaun dekauwai. Nunik ditajai maaniatatus niina suntaji aidaujai jiintujajui. Nunik maaninak Israel aents aidaun ujumak achika yajuakui.

² Dutikawajam Israel aents aidau Tuke Pujuu segainak: “Ame yai-jatkamin nugka utuakuik, nuwi batsamin aina duka ashí ijinku yaaktajijai tsaikmi taji”, tiaju.

³ Tusa tiagtai, kame dutikatajum tusa Tuke Pujuu tiuwai. Nuadui Israel aents aidau canaágnunia aents aidaun amuktinme tusa Tuke Pujuu yaigkui. Dutikamu asa nuna amuinak yaaktajijai tsaikajui. Nuadui nunú nugka daajin Hormá* adaikau ainawai.

Dapi bronce najanamu

⁴ Israel aents aidauk muja Hornum batsatu jiinag Edoma nugke utu-awaig tusag, nuna tentea nayants kapantu tutaya nuni shiyakajui. Nunik jintá shimamunum atsanmainchau dekapenak waugkamin anentaimtan jukiaju. ⁵ Nuadui Apajuín Moisésjai chichaman patatuinak: “¿Wajukat-nume tusagmea Egipto nugkanum batsatjinish jiijatkimiuugme? ¿Imajui uwegshunum jinaati tusagmek jiijatkimiuugme? Yumi umumainush at-sawai, tuja yumainush shiig atsugtamji. ¡Tuja nuigtush yutai junin yuwi yuwinakua yawetkaji!” tuidau.

⁶ Imatiagtai, Israel aents aidaun esaitnume tusa Tuke Pujuu dapin ishikauwai. Nuadui nunú dapi esaim kuashat jinawaju ainawai. ⁷ Nunik jinuinak Moisésan jegajuawag chichajuinak:

“¡Tuke Pujuu chicham patatku, ameshkam chicham patatkau asaja pegkegchau wajasji! ¡Apajuí segata dapi iina waitkagma nuna yaja ishiakti!” tuidau.

* **21:3** “Hormá” tawa nunak hebreo chichamnumak “nugka sujimkamu utumainchau” taku tawai.

Tusa tiagtai, Moisés Apajuín segauwai ditan tsagkujati tusa. ⁸ Tusa segam Tuke Pujuu Moisésan chichajak:

“Anú dapi aina nunin dakumka makichik najanata. Dutikam numi esajam ajiam nuna titijin pempegka Dutikam numi esajam ajiam nuna titijin pempejam yakí jiikta. Tuja makichik aentskesh dapi esaimak, nunú dapi najanamua nuna diistinme, nuninak tsagajagtatui”, tiuwai.

⁹ Tusa tima Moisés broncen juki, dapi dakumak najanauwai. Dutika numin ajia nuwi pempeg awagkek yakí jiika ukukiuwai. Tuja dapi esaimak nuna diisag tsagajaku ainawai.

22

Balac Balaaman untsukbau

¹ Tuja Israel aents aidauk shima shimakua Moab nugka pakaji namak Jordágka tsumujin yaakat Jericójai niniaku awa nuwi jegawag batsamsajui.

² Israel aents aidau amorreo aents aidau depetuk amuke tabaun Siporan uchiji Balac Moab nugka apuji antukui. ³ Tuja moabnumia aents aidaushkam Israel aents aidau shiig kuashat asagmatai, nuna wainkag senchi ishamkajui. ⁴ Nunikag moabnumia aidau madiágnumia apu aidau chichajuinak: “Au aents aina duka baka chijichin yuwa amuwama numamtuk iinak iina nugkejaí amupakagtatui”, tuidau. Tuja nunú tsawantinig Balac aajakui Moab nugka apuji.

⁵ Balac nigki maaniakug Israel aents aidau depetmainchau asa, Balaam Beora uchiji yaakat Petor tutainum namak eufratesnum ijus nugka Amav tutainum pujaun untsukui. Balac chichama etsejin aidau Balaam ujaktajum tusa ishimak, juna aatus akatmamak:

“Egiptunmaya aents aidau kaunawag juju nugka junak ashí batsamtukaje, nuninak tikima wi pujamunmash kaunawaje. Imaniku asamtai, ⁶ wamak taata, nunikam juju aents aidau pegkegchaunum yumigjata, wagki ditak iina nagkaetamsau kuashat, senchigtin ainawai. Ame pegkegchaunum yumigjamin, wi depetkan juju nugka juwi batsata nuna jiijan ishiakchainjash, wagki ame pegkegnum yumigkiamuk tuja pegkegchaunum yumigkiamushkam betek uminna nuna wika dekau asan tajai, tujamui titajum”, tiuwai.

⁷ Tusa akatjam moabnumia apu aidau madiágnumia aidaujai Israel aents aidau yumigkiamunum akikmaktinun kuichki jukiag shiyakajui. Nunik Balaam pujamunum jegawag Balac akatmamjamun ujakajui. ⁸ Tusa ujakam Balaam ditan chichajak:

“Juwi kajigtajum nuniagmin Tuke Pujuuish wajinjuttig nuna dekaan ujaktajime”, tiuwai. Tusa tiyajam moabnumia apu aidauk nuwi niijai juwakajui.

⁹ Nunik batsatai Apajuí Balaaman wantintuk iniak:

“¿Anú aents amejai batsata dusha ya ainawa?” tau.

¹⁰ Tusa tama Balaam Apajuín ayaak:

“Balac Sipora uchiji Moab nugkan apuji aents aidau ishiake, mina chichaman ujakkatnume tusa. ¹¹ Kuashat aents egiptunmaya jiiinag ashí nugkanum pampagke. Imaniku asamtai, Balac wakegawai mina awi wamak jegaa nunú aents aina nuna pegkegchaunum yumigjati tusa. Dutika ai niina nugken batsata nuna nii depetuk jiija ishiaktag tau asa”, tiuwai.

¹² Tusa tutai Apajuí Balaaman chichajak:

“Anú aents aina nujaig wepa, tuja nunú aents aina dushakam pegkegchaunmak yumigjaipa, wagki ditak wi pegkegnum yumigjamu ainawai”, tiuwai.

¹³ Tusa tima tsawak kashikmas nantaki, Balac ishiakbau apu aidaun chichajak:

“Tuke Pujuu wakegatsui atumjai weti tusag, nuniau asamtai, atumi nugkemin waketjatajum”, tiuwai.

¹⁴ Tusa tiyajam apu moabnumia aidauk waketug Balac pujamunum jegawag ujainak: “Balaamak jutijai minitnak dakitmae”, tuidau.

¹⁵ Tusa ujakmashkam antutsuk yama nagkamchak ishiakua nuni kuashat dekas apu chichame antugtai aidaun ataktu ishiakui. ¹⁶ Dutika ishiakam Balaaman jegajuawag ujainak:

“Balac Sipora uchijiya nunú chichagtamak: ‘Wait aneamam juwi minitak dakiajaipa. ¹⁷ Wi aminak shiig kuashat akikatjame. Tuja nuigtushkam ame segatbaunak imatiksasuk umigkatjame. Nuadui wait aneamam juju aents aina nunú pegkegchaunum yumigjata’ tujamae”, tiaju.

¹⁸ Tusa ujamashkam Balaam ditan ayaak:

“Balac niina pujusa inamtaijin oro aidau, plata aidau piyak atsuash nuna ashí sujakuish, wika makichkish imannak tuja imanchaunakesh Tuke Pujuu Apajuí dutikawaipa tujutbaunak dutikmait Sujai. ¹⁹ Untsu wainkagmekesh juwi pujusum kanagtajum, tuja yamaish Tuke Pujuuish wajinjuttig, nuna dekaan ujaktajime”, tiuwai.

²⁰ Tuja nunú kashia duwi Apajuí Balaaman wantintuk chichajak: “¡Anú aents aidau amina jujamkitatus kaunawaja nujaig wetá! Tujash nunika wemesh wi amina wajintatjame duke umiktatme”, tiuwai.

²¹ Tusa tima tsawag nii ekemsa wetinjin burro tuntupen patai umika, nuwi ekemi moabnumia apu aidaujui weuwai.

²² Nunik ekemi wetai aents nii tsakapakbau aidau jimag uyuniaju. Tuja Balaam wetai Apajuí kajejuk, nii weamun jintanum ángelchawashit tumaina wee wajasui. ²³ Nunik nunú ángel jinta ejapeen akijua puyaja takus wajaun burro wainkauwai. Nuna wainak tsegkeki ikamnum akumkauwai. Nunik akumtai Balaam jintanum awagkitatus asutiauwei.

²⁴ Dutika asuttai nunú ángel ukuki uva ajakbaunum jinta menaku mai yantamen kaya peejamunum wajasui. ²⁵ Nuwi ángel wajaun burro wainak, jinta kaya peejamunum atuumi tepak Balaama bakuin chanuntua tepesui. Nunitai Balaam ataktu burron asutiauwei.

²⁶ Dutiktai nunú ángel ukuki niyá eemak jinta shiig menaku makichkish ayampa waketmainchaunum wajasui. ²⁷ Nunik wajaun burro wainak nugká tepesui, nunikmatai Balaam kajeka numi juki asutiauwei.

²⁸ Dutiktai Tuke Pujuu burron chichamtikauwai. Dutikam burro Balaaman chichajak:

“¿Wisha aminash itujeagme? ¿Tsuwah, kempatuma imania asutam jama?” tiuwai.

²⁹ Tusa tama Balaam ayaak:

“¡Amek mina dushiktakum tujutme! ¡Kuchiin takakkunuk yamaikiuch maumainaitjame!” tau.

³⁰ Tusa tama burro ayaak:

“Wika burruitjai, ame tuké entsamka wekaetaigmetjai. Wi amina chichaman intimjuuitjam duka amek shiig dekame”, tiuwai.

Tusa tama Balaam ayaak:

“Duka dekas tame”, tiuwai.

³¹ Tusa timatai Tuke Pujuu nunú ángel puyaja takusa jintá waja nuna Balaam wainkati tiuwai. Nuna Balaam wainak eme anentus tsuntsuma nijayin nugka antig pujusui. ³² Nunitai Apajuí ángel tumain* wajas chichajak:

“¿Wagka amina burrogmesh kempatuma imanish asutiaume? Ame weam nunú mina shiig awajtachu asamtai, wi jintanak akigtatme. ³³ Amina burrojum mina waituk kempatuma tsegkeki menanjuse. Nunikchauwaitkuig burronak iwaku akupeakun aminak maumain awajkajame”, tiuwai.

³⁴ Tusa tama Balaam ayaak:

“Niints awi pujusa jintá akigtujua tachau asan pegkegchaun takasjai. Tuja wi weag nunú amina shiig awagtamchakuig dekas wakitkitjai”, tiuwai.

³⁵ Tusa tutai Apajuí ángel tumain wajas ayaak:

“¡Anú aents aina nujai weam duka wetá! ¡Tujash amek ayatak wi titatag duke chichaktatme!” tiuwai.

Balac Balaaman igkug jukimu

³⁶ Balaam minawai tabaun Balac dekaa Moapa nugke nagkatkamunum namak Arnón tutainum makichik yaakat awa nuwi jegajua igkug jukitatus wejiuwai. ³⁷ Dutika igkug chichajak:

“Kuashta untsuakun waitkasjame. ¿Wagka juwi minitash dakitmaume? ¿Wi amina shiig kuasht akimainaitjam duka dekatsmek?” tau.

³⁸ Tusa tama Balaam ayaak:

“Kame yamaik juwi taajai amejai chichastasan. Tujash wika mina senchigjaikik chichamaitsuja, Apajuí wajinjuttig nuna wika titatjai”, tiuwai.

³⁹ Nuna tusa Balaam Balacjai yaakat Quiriat-husot weuwai. ⁴⁰ Nuwi jegamtai Balac Apajuín anentag suwak baka aidaun, uwig aidaun kajegkui. Nuna nejen Balaam niina uyunainak apu yujaidaujai yuwawajui.

⁴¹ Nuna dutika kashinia duwi kashikmas Balac Balaaman juki muja Bamot-baal tutainum wajasa diyam Israel aents aidau batsatbau shiig waindau asamtai, nuna iwaintuktatus weuwai.

23

Pegkegnum yumigjamuk pegkegchaunmak yumigmaitsu

¹ Nuwi waka Balaam Balakan chichajak:

“Juwi kuntin maa patasa apeaku Apajuí ememattin sieteya imajin najatjuata. Dutikam siete toro tsakat, nuigtu siete uwig tsakat aishmag aidau umigtukta”, tiuwai.

² Tusa tima Balac imatiksag umikui. Dutikamtai jimagtukag siete toro tsakat aidaun, siete uwig tsakat aishmag aidaujai maawajui, dutika kuntin patai apetai siete najanamunum nuwi maki makichik patajag apeawajui.

³ Tuja Balaam Balakan chichajak:

“Kuntin maa patagbauwa juwi pujumata, nuniamin Tuke Pujush wajinjuttig nuna dekaan ujaktajame”, tusa ukuak muja naintin weuwai.

Balaam Israel aents aidaun pegkegnum yumigjamu

⁴ Nuwi waka pujaun Apajuí wantintukam Balaam Apajuín chichajak:

* **22:32** “Apajuí ángel tumain” tawa duka Nm 22.22num agagbauwa nujai betekai.

“Kuntinu maa patasa apeakun amina ememattasan sieteya imajin najanajai. Dutikan nuwi makichik toro tsakatan, nuigtu makichik uwig aishmag tsakatan aatsa patajan umikjai”, tau.

⁵ Tusa tima Balaam chichaktinjin Tuke Pujuu ujakui. Dutika chichajak: “Wakitkita Balac pujamunum, nunikam wi amina tajam nunú betek tita”, tiuwai.

⁶ Tusa tima Balaam wakitki, Balakak apu moabnumia aidaujai kuntin maa patagbaunum nuna yantamen ijunai jegantui. ⁷ Nunik jeganta Apajuí tibaun etsejak:

“Etsa minitainmanini muja ayá nuwi,
Aram nugkanum pujai,
Moabnumia aents aidaun apuji Balac
chichama akuptujak:

‘Taata, nunikam Jacopa uchiji wegantu aidau
pegkegchaunum yumigjata’, tujutmae.

⁸ Tujash wisha Apajuí pegkegnum yumigjamunash
¿wajuk pegkegchaunmash yumigjatjaki?

¿Wisha itugkanuk Apajuí dakitamunash,
utugchat ajiti tusanush ditanash titaja?

⁹ Au aents aina duka,
tikich aents aina nuna pujutjijaig betekchau,
ditash kanakag batsamin ainawai.

Nunú aidaun juju mujanum wajasan wainjai.
¹⁰ Dita aidauk shiig kuashat nugka yukukuntu
dekapamainchauwa iman ainawai.

¿Ibaw kuashta nunash yaki dekapajainta?
Ditak pegkeg asag jainakush, shiig aneas jau aina nujai betek
wishakam shiig aneasan
jakatasan wakegajai”, tiuwai.

¹¹ Nuna antuk, Balac kajeka Balaaman chichajak:

“¿Wajuk takumea tame? Wika aminak mina shiwag aina nuna
pegkegchaunum yumigjati tusan itaamjame. ¡Dutikamaitkum amek
pegkegnum yumigkiame!” tiuwai.

¹² Tusa tama Balaam ayaak:

“Wika amejai chichaakun, Tuke Pujuuish tunak tujutit nuna wika titatjai
timagme”, tiuwai.

¹³ Tusa tamashkam Balac ataktu chichajak:

“Wegajai, tikich yantama awi wemi, nunika awi diyam Israel aents aidau
ujumak kanaka batsata nunú pegkegchaunum yumigtujata”, tiuwai.

¹⁴ Tusa Balac Balaaman juki muja Písagá nainti Sofim tutainum eje-
gawai. Dutika nuwi kuntin maa patasa apeatnun sieteya imajin
najana nuwi toro tsakat aidaun, uwig aishmag tsakat aidaujai kajegka
maki makichik pataja umikui. Dutikamtai nuna Balaam apeak Apajuín
emematiuwai. ¹⁵ Nuwi Balaam Balakan chichajak:

“Juju kuntin maa patagbauwa juwi pujumata, nuniamin wi wenu Tuke
Pujuujai chichastajai niish wajinjuttig”, tusa ukuak weuwai.

¹⁶ Nunik jeganmatai Tuke Pujuu Balaama wantintuk nii chichaktinjin
ujakui, dutika chichajak: “Wakitkita Balac pujamunum, nunikam wi
amina tajam nunú betek ujakta”, tiuwai.

17 Tusa tima Balaam wakitki kuntin maa patagbaunum nuna yantamen Balac apu moabnumia aidaujai ijunai jegantui. Nunik jeganmatai Balac iniak:

“¿Tuke Pujuush wajinjutpame?” tau.

18 Tusa iniam, Balaam Apajuú tibaun etsejak aatus tiuwai:

“Balac Sipora uchijiyah,
wi amina titatjam nunú shiig antukta.

19 Apajuúk aentschauwa nunin asa nigka waitjuchui,
tuja chichakbaujinash
yapajichui.

Nii nuna dutikatjai takug imatiksag uminai,
tuja nii anagkagtuamunashkam imatiksag uminai.

20 Nuniau asa Israel aents aidau pegkegnum yumigjata tusa Apajuú tujutne.
Nuadui Apajuú pegkegnum yumigkiamunak
wika pegkegchaunmak yumigmaitsujai.

21 Tuja nuigtush makichik aentskesh
Israel aents aidau waitjutaijinak dekagchau ainawai,
pegkegchau takamtaijinkesh dekauk shiig atsawai.
Tuja ditanak Tuke Pujuu ditá Apajuújiya nunú kuitamui.
Tuja ditashkam: ‘¡Jujuwai iina apujig!’ tuinawai.

22 Nuadui búfalo niina kachujin
ayamjumama numamtuk
Israel aents aidau ayamjumataijig
Apajuú dita Egipto nugkanum
batsatun jiihua nunuwai.

23 Jacopa uchiji wegantu aina nuna wi pegkegchaunum yumigkiaknush,
wainka dutikmainaitjai.

Israel aents aina nunak tunchikesh wawemait sui.
Wi yamai Israel aents aidau taja:

‘¡Apajuú atumnak dekas shiig pegkegnum yaimpakaje!’

24 Juju aents aina duka,
Leónjai betek nantaki niina shiwaaji aidau jeteakug,
ayamtsuk ashí amuka,
nuna numpen uwag duwi
shiig ayamak tepena iman ainawai”, tiuwai.

25 Tusa tutai Balac Balaaman chichajak:

“¡Au aents aina nunú pegkegchaunum yumigmainchau dekafeu asam,
pegkegnumak yumigjaipa!” tiuwai.

26 Tusa tutai Balaam ayaak:

“¿Wi amina chichagkug, Tuke Pujuush tunak tujutit nuna titatjame
tichamkajam?” tiuwai.

27 Tusa timatai Balac chichajak:

“Wegajai tikich yantama awi wemi. Awi jegantaminish, Apajuúish Israel
aents aidau pegkegchaunum yumigjata tujamchaintash”, tiuwai.

28 Tusa Balac Balaaman juki muja Peor tutai naintin emauwai. Nuwi
wajasa diyam ashí uwejush aidau waintainum emauwai. 29 Nuwi jeganta
Balaam Balakan chichajak:

“Juwi kuntin maa patasa apeaku Apajuú ememattin sieteya imajin
najatjuata. Dutikam siete toro tsakat, nuigtu siete uwig tsakat aishmag
aidau juki umigtukta”, tiuwai.

³⁰ Tusa tima Balac imatiksag umikui. Dutika umikmatai Balaam toro tsakat aidaun, uwig aishmag tsakat aidaujai kajegka kuntin patai apetai sieteya imajin najanamunum maki makichik pataja apeak Apajuín emematiuwai.

24

¹ Balaamak Apajuí Israel aents aidaun pegkegnum yumigkiau asamtai, nuigtu awagkig Israel aents aidau pegkegchaunum yumigmainun dekaatasag wakekachui. Tuja yaunchuk Tuke Pujuu segajakbaujinak idayak uwegshunum Israel aents aidau batsatbaunmanini ayampa niimsauwai. ² Nuniak Israel aents aidau maki makichik wegantu doce aajakua nunú batsatun diittaman Apajuí Wakani* ekemtujui. ³ Dutika egkemtujam atakea duwi atinun juna aatus tiuwai:

“Witjai Balaam Beoran uchiji,
wika Apajuí wakega nunak shiig dekajai.
Wi chicham etsegbau antuktajum.

⁴ Wika Apajuí Wakani egkemjutjamtai
tikishmaja pujusan, paan wainjai.
Tuja Apajuí ashí senchigtina nunú
mina nii wakegamujin iwaintujak,
chicham etsekatnun suja nuna ima shiig paan dekajai.

⁵ ¡Jacopa uchiji wegantu aidauwah,
atumi aakjum aidauk shiig pegkeg ainawai!
¡Israel aents aidauwah,
atum batsatjum duka shiig pegkejai!

⁶ Palmera shiig kuashat tepajua imanai,
ajak ajakbau namaka uwet aiyama imanai,
ajak Apajuí ajakbau aiyama iman,
¡setug namaka uwet ayau
shiig pegkejama imanaitme!

⁷ Israel aents aidau uwagtinuk
yumi shiig kuashat aitnai.
Tuja dita ajak ajakma ukatkatnushkam
imanisag aittawai.
Ditá apujig tikich apu Agag daagtinun depetkatnai.
Tuja ditá senchijig shiig múun atinai.

⁸ Apajuí Israel aents aidau
Egipto nugkanum batsatun jijjua nunuwai
búfalo ayamjumatai kachujiya numamtin.
Nuadui Israel aents aidauk
ditá shiwaaji aidaunash amuktinai.
Dutikak nagki iju mainak,
ukunchin kupijagtinai.

⁹ Israel aents aidau ayamak tepakug,
león tepegama nujai betek tepenawai.
Iman asamtai, jegaantag ishintaumainchau
dekapenawai.
¡Amina pegkegchaunum yumigtamaidauk,
ditashkam dutiksaik

* 24:2 Apajuín Wakani egkemtujui tawa nunak Wakani Pegkejin taku tawai.

pegkegchaunum yumigkiam agtinai,
untsu amina pegkegnum yumigtamidauk,
ditashkam dutiksaik
pegkegnum yumigkiam agtinai!” tiuwai.

Balaam Israel aents aidaun pachis etsegkamu

¹⁰ Nuna antuk Balac Balaaman senchi kajegkauwai. Nunik uwejen awati chichaak:

“Wika aminak mina shiwag aina nunú pegkegchaunum yumigjata tusa untsukmagme, dutikamaitkum amek au aents aina nunú kempatuma imania pegkegnum yumigkiame. ¹¹ Nuniau asam ¡dekas jemin wakitkita! Wika aminak shiig kuashat akiktagme timajai. Tujash Tuke Pujuu dakittin, amek wainka juwakume”, tiuwai.

¹² Tusa tama Balaam Balakan ayaak:

“Wika amina aentsjum chichama etsejin aidaun ujaakun, ¹³ ame pujusa inamtaigmin oro aidaun, plata aidaun piyak atsuash nunú mina ashí sujakminish, wika Apajuí tujutbaun intimjuknuk makichkish imannak tuja imanchaunakesh mina senchigjaig dutikmaitsujai. Ayatak Tuke Pujuu tujutbaunak tumainaitjai, tibaijai. ¹⁴ Untsu dekas mina nugkajui wakitkitjai. Tujash eke wetsuk, au aents aina dusha amina aentsjum aidaunash atakea duwish itugkatnuk ainawa nuna ujaktajame”, tiuwai.

¹⁵ Nuna tusa Balaam juna atak atinun etsejak aatus tiuwai:

“Witjai Balaam Beoran uchijinuk,
wika shiig dekajai Apajuí wakegamua nunak.
Tuja wi chicham etsegbau antuktajum.

¹⁶ Wika Apajuí Wakani egkemjutjamtai tikishmaja pujusan, shiig paan wainjai
Tuke Pujuu ashí senchigtina nunú nii wakegamujin mina iwaintujak,
chichaman etsekatnun sujawai.

¹⁷ Makichik aentsun atushat wainjai.
Tuja makichik waji atushat aun wainjai:
Duka Jacob wegantunmaya makichik yaya wantinui,
nunuwai Israel aents aidaun apujig.
Nunú apua duka Moab aents aidaun depetuk amuka,
nuigtushkam Set wegantu aidaunash
dutiksag amuktinai.

¹⁸ Tuja Edom aents aidaunashkam depetkatnai.
Seír nugkanum ditá shiwaaji batsata nunash depetuk, nugken atankiag
dita jukiagtinai.
Israel aents aidaun Edom aents aidaun depetuk dita senchijin iwainmamk-
agtinai.

¹⁹ Jacob wegantunmaya makichik senchigtin depetbau atinai,
nunú yaakat aidaunum
ujumak juwakag pujuidaun amuktinai”, tiuwai.

²⁰ Nuna tusa Balaam Amalec aents aidaun nugken ayampa wajas chichaak:

“Amalec aents aidaun senchigtin
ajantusa diitai ainawai.
Tujash ashí tsaika emegkam atinai”, tiuwai.

²¹ Nuna tusa idayak Balaam quenita aents aidau nugken diisa chichaak: “Atum Caín wegantu aidautigmek ayamjumataijum shiig umikbau akuish, tuja kaya múun aidaunum pishak pasugken ekenag kuitamama numamtuk umikuitkugmesh,
²² suntag asirianmaya aidau, achigmajag yajupainak nunú pasugkem aina nunak tsaika jiyiyai apeawag utsagkagtinai”, tiuwai.

²³ Tuja inagnak Balaam atak tikich tsawantai nagkaemagtinun pachis juna aatus tiuwai:

“¡Chah! ¿Apajuí nuna dutiktata duwish, yaki eke iwakush pujustinaita?

²⁴ Chiprenmaya lancha nayantsanum suntajan yajuak minawai. Nunú asirianmaya aidaun, Hebernumia aidaujai amukagtinai, dutikawag ditashkam jinawagtinai”, tiuwai.

²⁵ Nuna tusa ashí etsejuk Balaam jiinki weuwai niina jeen waketak. Nunikmatai Balakshakam niina pujusa inamtaijin wakitkiuwai.

27

Josué Israel aents aidaun apuji atin adaikamu (Dt. 31.1-8)

¹² Nunik kuashat tsawan nagkaemakui ai, Tuke Pujuu Moisésan chichajak:

“Juju muja Abarim tutaya juwi wakata, nunikam Israel aents aidaun wi nugka susatjai tusa anagkuawaitag nunú diista. ¹³ Nunú nugka wainkam, duwi amina yatsum Aarón jakauwa nunismek, ameshkam jakattame. ¹⁴ Atumek yumi umumain atsutai, Israel aents aidau chichamjuinakui, wi nunú dutikatajum tusan uwejush Sin tutainum tiuwaitjim nunú umikchauwaitjume. Nuwi Israel aents aidau yumi sumainakui, atum ditá emtin mina eme anenjuschauwaitjume”, tiuwai. Tuja nunak uwejush Sin tutainum yaakat Cades awa nuwi yumi pukuni jinu Meribá tutaya nuna pachis tawai.

¹⁵ Tusa tama Moisés Tuke Pujun chichajak:

¹⁶ “Ashí aents aina nuna Apajuí Tuke Pujuuwah, ame amina aentsjum aina nuna apuji atin makichik apu adaikata, ¹⁷ nunú yajuak emati, uwig kuitamkachbau wainak yujama nunikainum”, tiuwai.

¹⁸ Tusa tutai Tuke Pujuu Moisésan ayaak:

“Josué Nun tutain uchijiya nunuwai wi etegkamu, waji, mina umigtau. Nunú untsuka jukim amina uwegmin niina buuken achikta. ¹⁹ Dutikam sacerdote Eleazar pujamunum ejegam, nuadui ashí Israel aents aidau wainbaunum apu adaikata. ²⁰ Dutikam nuadui ame takasuitam dutika takastinji ujakta. Dutikamu asamtai, ashí Israel aents aidauk niina chichamen umigkatnume. ²¹ Untsu Josué nigki sacerdote Eleazarai weti. Nuwi jegamtai Eleazar mina inintsattawai. Tusa ininkui wi Urimnum* wajak iwainaktatja nuna Josué ujaktatui. Dutikamu asa nii Israel aents aidau apuji wajasa Israel aents aidaun yajuak emati”, tiuwai.

* **27:21** “Urim” tawa duka “dekaskeashit atsa dekaskechuashit tusa dekatasa takatai” aajakui.

²² Tusa tima Moisés Tuke Pujuu timaunak imatiksag umikui. Dutikak Josué juki sacerdote Eleazar pujamunum ejegauwai, tuja nuigtushkam ashí Israel aents aidau batsatbaunmashkam ejega iwainakui. ²³ Nuna dutika Moisés Tuke Pujuu tibaun umiak, Josué buuken achika Apajuín segati apu emauwai.

Chicham umiktin aidau agagbau aajakua nunú ataktu pataka agagbau Deuteronomio

Apajuí Israel aents aidau anagkuawa nuna pachis Moisés muja Horebnum pujusa ditan ataktu ujakbau

¹ Juna Moisés namak Jordágka amain etsa minitaiya nuni uwejush awa nuwi pujus, Israel aents aidau ujakui. Nunú uwegshuk Arabá nugkanum awai. Tuja duka yaakat Suf tawa nujai niniaku nugka Parán, Tótel, Labán, Haserot, Dizahab aatus aajaku aina nuwi awai. ² Tuja Cades-barnea jegamuk Horebnum juwaki jinta Seírnum wetaya duke wea weakua once tsawanta imajin jegawai.

³ Tuke Pujuu Moisésan Israel aents aidau ujakta tusa tima ujakua nunak, ⁴ amorreo aents aidau apuji Sejón Hesbón nugkanum pujaun, tuja Basán nugka apuji Og aajakua nujai depetuk amuka, nuigtu Astarot nugkanum yaakat Edrei tawa nuwiyashkam depetuk amukua duwi pujus, cuarenta mijan jegá, once nantu taka makichik tsawan tsawaju ai, Moisés Apajuí tibaunak imatiksag Israel aents aidau ujakui.

⁵ Nunak Israel aents aidau namak Jordágka tsumujin Moab nugkanum batsatun, Moisés dita umikagtinun juna aatus chichajak:

⁶ “Muja Horebnum batsatjin Tuke Pujuu iina Apajuí juna aatus chichagtamak: ‘Atumek juju muja juwig kuashat tsawan batsamsaugme. ⁷ Nuadui aakjum aidau tegakjum, wajijum yajuakjum amorreo aents aidau batsatbaunum mujá wetajum. Nunikjum nuna yantamen tikich nugka ayá nuwi batsamsatajum. Duka nuggak juju ainawai: Arabá nugka, ikam tepaju, nugka paka weaju, Néguév nuggá, nugka nayantsa pakaji, canaágnunia aents aidau nuge, nuigtu Líbano nugka, namak shiig múun Eufratesa aatus jegawai. ⁸ Wi nunú nugka aina nunak atumin amaajime. Wetajum nunikjum nunú nugka jukitajum, nunak atumi apachjum Abraham, Isaac, Jacob aajaku aina nuna uchiji wegantu aidau susatnaitjai tusan anagkuawaitjai’, tujutmayi!” tiuwai Moisés.

4

Apajuí umigkatajum tusa Moisés Israel aents aidau chichagkamu

¹ “Mina pataag Israel aents aidauwah, chicham umiktina nuna wi jintintuawaitjim nunú yamai antukjum betek umiktajum. Nuniakjum iwaku pujusjum Tuke Pujuu atumi apachjum aajaku aidau Apajuí, nugka amastajime tusa anagtamaawa nunú nugkanum jegajum batsamsamnujum. ² Chicham umiktina nuna wi tajim duka makichkish ewaetsuk, tuja esakagjumkesh emegkautsuk betek umiktajum. Tuke Pujuu atumi Apajuíiya nuna chichame umiktin agagbauwa nuna wi tajim nunú betek umiktajum. ³ Atumek shiig dekagme iina patayi aidau muja Baal-peor tutainum batsamas, nuwiya aents aidau apajuímtaiji Baal aajakua nuna emematu yujatai, Tuke Pujuu kajejuk ijinauwai. ⁴ Tujash atum aidautijum Tuke Pujuu atumi Apajuíiya nunú eme anentsajum niina chichame umigkau aidautigmek yamai juwi ashí iwaku pujagme.

5 “Tuja Tuke Pujuu mina Apajuíg atumin nugka amasua nuwi atum pujusjum, chicham umiktinun nii tujutbaunak imatiksasuk ashí jintintuajime. 6 Nunú chichama duka ashí betek umiktajum. Nuniagmin aents nunú nugkanmaya aidaush, yachamet unuimatjai atumin awa nuna dewagatatau. Nunú atum betek umiamugmin wainkag, dita chichainak: ‘Israel aents aidauk shiig yacha ainawai!’ tujamiagtinai. 7 Wagki aents tikich nugkanmaya aina duka ditá apajuímtaiji yayachbau asag, iina Apajuíji Tuke Pujuu ii segamak betek yaimpau asamtai, senchigtin ainag imanuk makichkish atsawai. 8 Tuja nuigtushkam iinu chicham umiktin aidau shiig pegkek ajutjamu asamtai, senchigtin ainag ibauk makichkish tikich aents aidauk atsuinawai. Wagki ditanuk iinu chicham pegkek umiktin aidau ajutjama nunin atsugbau asag. Nunú chichaman wi atumin jintintuan yamai amaajime. 9 Nuadui kuitamamkatajum Apajuí atumin yaimpau asa, kuashat waji wainchatai aidaun iwainamu wainkauwaitjum nunú kajimatkiyum. Tuja wi atumin jintinjim dushakam makichkish kajimatkiyga. Kajimattsuk atumi uchijum aidau, tijajum aidau, nunú pachisjum jintintuatajum”, tiuwai.

Apajuí muja Horebnum chichakbau

10 “Atum aidautijum muja Horebnum Tuke Pujuu atumi Apajuíji emtin pujuuyum nuadui Tuke Pujuu chichagtak: ‘Israel aents aidau ijumjata mina chichamjun antukag unuimagtinme. Nunikag mina tuké umigtuktinme, nuninak dita uchiji aidaunash jintintuatnume. Dutikam ditashkam dutiksag umiktin atinme’, tujutiabi.

11 “Tusa tujutai atumek muja najatamunum ijunjabiugme. Nunika ijunjajumin nunú mujanmaya jii kegak bukuiti yaiki takuni yujagkim najanea shiig suwe wajasabi. 12 Nunú kegamunmaya Tuke Pujuu Apajuí atumin chichagtamun antukuitjume. Tujash atumek chichame antakjumes niina niimeg makichkish wainkachuitjume. 13 Tuja nunú mujanum jimag kaya pakama najanamunum diez chicham umiktin aidau agagbau Tuke Pujuu amasabi. Dutika amaak juju ashí betek umiktajum tusa tujabiuwai. 14 Nuadui Apajuí nugka amastata nuwi batsamsajum nunú chicham umiktina nuna atumin jintintuati tusa Tuke Pujuu mina inatjauwai.

Dakumka najanamun aidau emematigpajum tibau

15 “Muja Horebnum jii kegamunum Tuke Pujuu atumjai chichasua duwikish atumek makichkish niina niimeg wainkachuitjume. Nuadui kuitamamkatajum, 16 wainkajum dakumka najana ememattai aina nunú aishmagkesh, nuwakesh dakumka najanagmek emematigpa pegkegchau wajasaijum. 17 Tuja kuntinkesh, chigkikesh, 18 japiinas yujau aina dukesh, namakia aina dukesh emematinuk dakumkagmek makichkish najanawaigpa. 19 Tuja nayaim diyakjumes, etsa, nantu, yaya aidau, nuigtu tikich agkajunum etsantin ayá dukesh wakemain diyakjum emematigpa. Wagki nunú aidaunak juju nugkanum tikich aents aidau batsata nunú emematinme, tusa Tuke Pujuu tiuwai. Tujash ii Israel aents aidatik Tuke Pujuu Apajuí ii emematin ainag ima duke emematiagmi.

20 “Atumnak jiju ukuijatasu hononum jitayama numamtuk Egipto nugkanum waitkam batsatutigmin Tuke Pujuu jipag niinu etamiuwai. 21 Dutijamawaitak atumi pegkegchaujin Tuke Pujuu mina kajegtuke.

Nuadui amek namak Jordágkak katitkashtatme tujutne. Tuja nuigtushkam nugka atumdau atinun amastata nuwig jegashtatme tusa tujutne. ²² Tujutiu asamtai wika namak Jordágnak katittsuk juu nugka juwig pujusan jakattajai.

“Untsua atum aidautijum Jordán katitkajum nugka pegkeja nunú jukit-tagme. ²³ Tujash kuitamamkatajum atum chicham umiktinum Tuke Pujuu atumi Apajuíjum amasua nunú kajimatikijum. Nuadui dakumka najana apajuímtai aidaun, Tuke Pujuu Apajuí dutikawaigpa tusa tujabiuiwa duka makichkish dutikawaigpa. ²⁴ Wagki Tuke Pujuu atumi Apajuíjiya duka dekasa, Apajuí akasmauwai. Iman asa niig jii kegak apea emegkaina imanai.

²⁵ “Tuja nunú nugkanum batsamsajum uchijinkajum, tijajinkajum múuntuch wajasa pujakjumes, Apajuí emematut idaikujum dakumka najana ememattai aina nuninuk emematigpajum, Tuke Pujuu atumi Apajuíjum kajegtamkainum. ²⁶ Tuja atum Jordágka amain katigjum Apajuí nugka amasua nuwi pujusum dakumkamu emematu yujakjume, nunú nugkanmak dukap tsawan pujutsuk ijina emegkam atinaitjume. Duka tuke uminkatta nuna wi yamai nayaimpin nugkajai adaisan tajai.

²⁷ “Tuja nuigtushkam Tuke Pujuu jii pag ashí nugkanum utsampaktatjume, dutijamawagmatai nunú nugkanmak ujumchik juwakag pujusagtinai. ²⁸ Dutika utsampakmatai tikich nugkanum yujasum nuwiya aidaun apajuímtaiji numi najanamu, kaya najanamu antuchu, wainmachu, yuchau, mayatchau aina nunú ememattinaitjume. ²⁹ Nunika tikich nugkanum batsamsajum waitiakjum, Tuke Pujuu atumi Apajuíjiya nunú, ashí anentaimijai, wakanmijai segaakjum antujam atinaitjume. ³⁰ Atum tikich nugkanum batsamsajum dakumkamu emematkujum waitu pujautijum idaikujum, ataktu Tuke Pujuu atumi Apajuíjum umigjuminig, ³¹ niig wait anenkagtina iman asa atumnakek idaitamsashtinai. Ijipatnash ijipashtinai, nuigtushkam nii atumi muunjum aidaujai chichaman umikua nunak kajimatkishtinai, wagki nunak tuké umiktinaitjai tiu asa.

³² “Atumesh anentaimsatajum: Apajuí yama nagkamchak aentsun najanauwa duwi nagkamsash, tuja ashí nugka najatawa imanuish, Apajuí iina yaimpau asa pegkeg aidaun yamai iwaina aika iwainakui tabaush makichkish antukukaitjum. ³³ ¿Jii kegamunum Apajuí atumin chichagtabau antakjumes, jinachuitjum nuninush tikich aents aidaush ainawash? ³⁴ Ii aidautinak Apajuí etegtamjauwai. Dutijabau asa iina ayamjutpak, jutii makichkish wainajakchamun ishamain aidaun Tuke Pujuu iwainag egiptunmaya aidaun senchi sapigmitkakua nunú atumek shiig wainkauwaitjume. Tuja tikich apajuímtai aina duka makichkish imanun iwainamainuk shiig atsawai. ³⁵ Nunak dutikauwai Tuke Pujuu senchigtina imanuk, tikich Apajuí shiig atsa nuna ashí aents aidau dekatnime tusa. ³⁶ Apajuí atumi pujutjumin esetamatag tau asa, nayaimpinum pujusa chichagtamkauwai. Tuja nugkaashkam jii kegaun iwaintugmakui. Nunú jii kegamunmaya niina chichame antukuitjume. ³⁷ Tuja atumi apachjum aajaku aina nunashkam Apajuí aneau asa dita wegantunmayan etegjauwai. Dutikau asa Egipto nugkanum waitkam batsatun niina senchijjai jiija agkanmitkauwai.

³⁸ “Nuadui tikich aents atumi nagkaetamsau kuashat, nuigtush senchigtin aidaun atumesh wainjumin Apajuí jiija utsagke, wagki yamai atum juu nugka jukitin asagmin.

39 “Nuniau asamtai Tuke Pujuu Apajuí nayaimpinash, nugkanash apujiya nunú shiig antukjum kajimattsuk aneaku atajum. Wagki Apajuíya imanuk tikichik atsawai. 40 Nuadui niina chichame umiktajum tibauwa nuna wi yamai juju tsawanta juwi amaajim nunú betek umiktin atajum. Nunú betek umiakjumek, Tuke Pujuu Apajuí atumdaun nugka tuke atinun amastata nuwi kuashat mijan pujustinaityume”, tiuwai.

6

Chicham umiktin aidau agagbaun Moisés jintiamu

1 Moisés Israel aents aidau chichajak: “Tuke Pujuu atumi Apajuíjum nugka anagtabauwa nuwi jegajum pujusjum, chicham agagbauwa nunú atum umiktin aidau jintintuati tusa, Apajuí mina inatjauwa duka jujuwai: 2 ‘Tuke Pujuu Atumi Apajuíjiya duke ememattajum. Dutikakjum niina chichame umiktin aidau agagbauwa nunú atum, atumi uchijum aidau, tijajum aidau aatus umiktinun wi jintinjim nunú betek umiktajum. Nuniakjum kuashat mijan iwaku pujustinaityume. 3 Nuadui Israel aents aidauwah, chicham umiktin aina nunú betek umiktajum. Nunú betek umiakjumek, nugka pegkeg ajak shiig tsapaun amastinaityume tusa Tuke Pujuu atumi Apajuíjum atumi apachjum aidau anagkuawa nuwi pujusjum shiig kuashat yujaktinaityume.’

4 “Antuktajum Israel aents aidauwah: Tuke Pujuuwa nunuwai iina Apajuíjig; Tuke Pujuu ima makichkiuchi. 5 Tuke Pujuu amina Apajuíjimea nunú amina anentaimijai, wakanmijai, senchigmijai aneeta. 6 Nuniakum wi yamai tajim nunú shiig atukjum kajimattsuk aneaku atajum. 7 Nunikjum atumi uchijum aidau kashi kashinig jintintajum. Dutikakjum atumi jeminish, tuja jintá wekaekugmesh, kashi kanakjumesh, tsawaku nantakjumesh, chicham umiktin aina nunú uchijum aidau jintintuatajum. 8 Atumek Apajuí etegkamu ainajum nunú iwainmamkujum chicham agagbau umiktin aina nunú kuntugmin patakumajum, atsejukjum yujastajum. 9 Tuja nuigtushkam shugku aidauunum, nuigtu atumi jee aina nuna waitijinchakam agaja anujkatajum.

Moisés Israel aents aidau chicham umiktin agagbauwa nunú betek umiktajum tibau

10 “Atumi apachjum Abraham, Isaac, Jacob aajaku aina nuna nugka amastajime tusa Tuke Pujuu atumi Apajuíjum anagkuawa nuwi atumnak ejetamawagtatui. Nunú nugka nuwig yaakat múun shiig pegkeg aidau atumkesh yaaktamkachbau, 11 jega aidauunum waji pegkeg aidau pimasua weaku atum ipiakchamu, yumigmat aidau atum taichbau yaunchuk tai umikbau aidau, tuja uva ajakbau aidau, aceituna ajakbau atum ajakmarchbau aidau, yaunchuk ajaka umikbau aina nuwiya shiig yuwajum pujustinaityume. 12 Nunú iman ayaunum jegagmesh, Tuke Pujuu Apajuí atum Egipto nugkanum inaku waitkatai batsatutigmin agkanmitkagmawau nunú kajimatgigpa. 13 ¡Tuke Pujuu atumi Apajuíjiya duke ememattajum! ¡Nuniakjum ima nigki eme anentsajum umigkatajum! ¡Tuja atum umiktin dekas takugmek ima Apajuí daajinig titajum!

14 “Tuka tikich aents aidau apajuímtaiji aina duka emematigpa, 15 wagki Tuke Pujuu atumi Apajuíjiya duka, dekas Apajuí akasmauwa, nuniau asa atum waínka apajuímtai aina nunú emematu yujataik, nii kajegtamak ashí ijipamainai.

16 “Tuja Masá nugkanum pujusjum Tuke Pujuu atumi Apajuújum dekapsauwaitjum numamtuk ataktu dekapsatasagmek wakeyigpajum. 17 ¡Tuke Pujuu atumi Apajuújiya nuna chichame umiktin agagbauwa nunú umiktajum tusa tujamauwa duka ewaetsuk betek umiktajum! 18 Atumi apachjum aajakua aina nunú umikagtinun Tuke Pujuu anagkuawa nuwi jégajum shiig pujustag takugmek Tuke Pujuu wakegamu pegkek aina duke takastajum. 19 Nuniagmin nii tibauwa nuna imatiksag atumi shiwaajum aidaunak atumjai maaniawai tusa uwakek ipisjattawai.

20 “Tuja atakea duwi atumi uchijum aidau inimpainak: ‘¿Juju chicham umiktin agagbauwaina nuna Tuke Pujuu iina Apajuúji umiktajum tujabiuwa nunash wajina taku tiuwaita?’ 21 Tujamainakuig atum ayaakjum: ‘Í aidautik Egipto nugkanum batsamsa faraógka inaku waitkatai ayaji. Nuni batsatjin Tuke Pujuu niina senchijijai jiiipagmayi. 22 Tuja faraógkan, niina nuwen, niina uchijin aatus Tuke Pujuu suwimka suwak wainchatai ishamain aidaun iwainajua nunú ii wainkauwaitji. 23 Untsu jutiinak nuwi batsatutin nii jiiipag jujamki iina apachji aajaku aina nuna anagkuak nugka amastajame tiuwa nuwi itagmae. Dutijama nunú nugkan iina amase. 24 Dutika amasu asa Tuke Pujuu iina Apajuúji chichagtamak: Juju chicham umiktin aidau agagbauwa nunú umiktajum, nuniakjum ajaantusjum diitajum, tusa tujamui. Wagki nunú betek uminaku yamai iwaku shiig batsatag junika batsamsatag tau asaja. 25 Tuja chicham umiktin agagbauwa nunú umiktajum tusa Tuke Pujuu iina Apajuúji tujabiuwa nunú betek umiajinig, dekas atumek pegkek takagme tujamtatji’ titatjum”, tiuwai Moisés.

7

Dakumka najanamu aidauk emematigpa tibau (Ex. 34.11-17)

1 “Tuke Pujuu atumi Apajuújum, atum batsamsatnun nugka amastata nuwi ejetamawagtatui. Dutijama nuwiya aents aidau siete nugka múun aidaunmaya maki makichik chichamtin, atumi nagkaetamsau senchigtin, shiig kuashat batsamin: hitita aents aidau, gergeseo aents aidau, amorreo aents aidau, cananeo aents aidau, ferezeo aents aidau, heveo aents aidau, Jebús aents aidau batsata nunak atumesh wainjumin Tuke Pujuu jiija utsagtatui. 2 Tuja nunú aents aina nuna depetkatnume tusa Tuke Pujuu atumi Apajuújum senchimtijamantai, depetkajum utuagmek wait anenjaigpajum, tuja nuigtush ditajaigkish chichamak umikaigpajum, ayatak ijina utsagtajum. 3 Tuja nuigtushkam atumek nuwiya nuwa aidaujaig nuwenawaigpajum, atumi uchijum aidaush, nawanjum aidaushkam nuwiya aents aidaujaig nuweawaigpajum. 4 Wagki dita aishin umiujinak aishi apajuúmtajii aidaun uchijum aidau, nawanjum aidau emematuinak Tuke Pujuu ememattan kajimatkinum. Dita nuniagtai Tuke Pujuu atumin kajegtamak shiig wamak ijipamain asamtai.

5 “Nuadui dita apajuúmtajin emematuinak kuintinun patasa apetai aidau najankamu ajuina duka tsaigkatajum. Dutikakjum dita apajuúmtai kaya aidau, numi kampujum tsupikbau, Asherá daagtin aidaun aatus dita emematuina duka ashí tsaigkatajum. Tuja nuigtushkam ashí tikich dakumka najanamu aina dushakam dutiksagmek tsaigka apeajum ut-sankatajum. 6 Wagki atumek ima Apajuú Tuke Pujuu tutaya nudau atinme

tusa etegjamu ainagme. Nuadui atumnak ima niinuk atinun ashí aents nugkanmaya aina nuwiyán etegtamjauwai.”

Israel aents aidau Apajú etegjamu ainakush juna umiktinme tibau

⁷ “Tuke Pujuu atumi Apajújiya nunú etegtamjauwa nunak, aents tikich nugkanmaya aina nuna nagkaesau ima kuashat asagminigkish etegtamjachui. Atumek dekas tikich aina nujai apatkamak imanchaush ainagme, nunin ajuminig etegtamjauwai. ⁸ Tujash ¿wagkag nunash etegtamjabi? Nunak Tuke Pujuu atumin anempau asa, atumi apachjum aajaku aidaun anagkuawa nuna umiktag tau asa, Egipto nugkanum batsamsajum faraógka inaku waitkatai batsatutigmin niina senchijijai jiijmajui. ⁹ Nuadui Tuke Pujuu atumi Apajújiya duka aents aidau niina aneak umiujinamak, nii umiktajai tibaujinak ewaetsuk, ditá uchiji wegantu aidaunmashkam tuke umina nunú dekaskeapi titajum. ¹⁰ Tuja niina betek umigtsuk kajejuina nunak nii suwimka susa wamak ijina utsainai. Nunin aina nunak kuashat tsawannakesh sutsuk shiig wamak ijina utsainai. ¹¹ Nuniau asamtai yamai wi atum aidautigmin chicham umiktin agagbau aidaun umiktajum tajim duka betek umiktajum”, tiuwai.

Chicham umiktina nunú betek umiakjum pegkegnum yumigkiam atajtume tibau

(Lv. 26.3-14; Dt. 28.1-14)

¹² “Juju chicham umiktin aidau agagbauwa nunú antukjum betek umiagminig, atumi apachjum aidaun Tuke Pujuu atumi Apajújum ditan anagkuawa nuna betek umiktatui. ¹³ Dutikak ima atumnak anempatnai. Nuadui pegkegnum yumigtamag atumi uchijum aidaunash pegkegnum yumigkig kuashat ikauntugmaktinai. Tuja ajakma juutnumash, trigogminash, vino, nuigtu aceite aidaunash, tuja baka aidau, uwig aidau tsakapatnumash atumi apachjum aidaun anagkuauwa nunak imatiksag amasagtatui.

¹⁴ “Atum atinaitjume dekas tikich aents aidaun nagkaesau pegkegnum yumigsamu. Nuadui nuwa kaga aidash atsutnai. Tuja aishmag aidaushkam uchi akiichuk atsutnai. Tagkujum nuwa aidau petsachuk, tuja aishmag uchi akiichush atsutnai. ¹⁵ Egiptunmaya aents aidaun jata ishamainun Tuke Pujuu ajuntug atumesh wainjumin ijinauwa annuk atum batsatmaunmak shiig atsutnai. Apajú nunak emegkaktinai. Iman jata aina duka atumnak waitkagmaschagtinai, untsu tikich aents atumi shiwaajum aina nuna waitkasagtinai.

¹⁶ “Tuja tikich aents aina nunú ijinatajum tusa Tuke Pujuu atumi Apajújum tujamkuig, wait anentsuk ijinatajum. Tuja ditá apajúmtaijiya dukesh emematigpajum. Nunú nuniakjumek waitut igkugjum suugtajtume.

¹⁷ “Tuja namputchawame, atum aentaimsajum, juju aents aina nunú iina nagkaetamsau kuashat aina imajush ¿itugkaik jiijaish utsagtaji? tumainaitjume. ¹⁸ ¡Tujash ishamkaigpajum! Tuke Pujuu atumi Apajújum faraóghan egiptunmaya aents aidaujai itujuk ijinauwaita nunú adeagtajum. ¹⁹ Atum Egipto nugkanum batsatutigmin Tuke Pujuu atumi Apajújum niina senchijin kuashat wainchatai aidaun atumesh wainjumin iwainag jiiipajua nunú aentaimtustajum. Tuja atumi shiwaajum kuashat asamtai ishamajum nunashkam Tuke Pujuu ijinattawai.

²⁰ “Tuja nunú aents aidau atum ijinjumin ujumak uwemjau, tuja tupikaki uumkaju aina nunashkam ijinati tusa Tuke Pujuu ete múun

aidaun ishitkattawai. ²¹ Nuadui nunú aents aina duka ishamkaigpajum. Atumnak Tuke Pujuu atumi Apajuújum senchigtina nunú uyuntamjume. ²² Nunú aents aina nunak Tuke Pujuu diipas utsa utsakua emegkagtatui. Atumek juu tamawaikik, waamkek utsagkaigpa, dutika ajuminig nugka ankan wajasmatai, kuntin ikamia aina nunú yujaka waitkagmasainum. ²³ Tujash Tuke Pujuu atumi Apajuúgmia nunú aents aina nunak atumin idaitugmastatui. Dutikau asa diipas utsa utsakua ashí emegkagtatui. ²⁴ Dutika utsagkam ditá apuji aina duka atumin yunumjagtatui, nuninakuí atum ashí ijinajum emegkaktinaitjume. Dutikamu asa makichkish ayamju-mainjig shiig atsujiagtinaí. Nuadui atum ashí amuktinaitjume.

²⁵ “Tuja ditá apajuúmtaiji aina dushakam apea utsankatajum. Untsu nunú tsayakjumes wainkajum oro aidau, plata aidau ayá nunú wakejukjum jukigpajum, nunú atumin waittan itagtamamtai waittsaijum. Wagki nunú aina nunak Tuke Pujuu tsumawai. ²⁶ Nuniau asamtai, Apajuú diisam, waji pegkegchau aina nuninuk atumi jeminig awayawaigpa, Apajuú atumnashkam ijpawainum. Wagki nunú waji aina duka shiig pegkegchau asamtai, tsaika utsagbau atatui.”

8

Aentsuk ima yujumkanak yusagkek iwaku pujumait sui tibau

¹ “Tuja wi atum aidautigmin chicham umiktin agagbauwa nunú umiktajum tusan yamai tajim duka betek umiktajum. Nunú umiakjum iwaku batsamsajum kuashat yujaktinaitjume. Nuniakjum atumi apachjum aidaun Tuke Pujuu nugka amastajime tusa anagkuawa nuwi jegajum batsamsamnujum.

² “Atum Egipto nugkanum batsatutigmin Tuke Pujuu atumi Apajuújum jiiipag jujamki cuarenta mijan uwegshunum awekapasua nunú makichkish kajimatigpajum. Imaan mijan awekapasua nunak, ememataiji aidaun idaisatnume tusa, tuja nuigtu imanik waituinakush dekas mina chichamjunash umigtumainash aina tusa dekapjamak, dutijamauwai.

³ Tuja kuashat tsawan nujantai waitiagminish, maná atumi wainchatain tuja atumi apachjum aajaku aina dukesh wainajakchamun Tuke Pujuu ayugtamaui. Nunak dutikauwai wagki aentsuk ima yujumkanak yusagkek iwaku pujutsuk, Tuke Pujuu chichamejai pujumaina nuna jintinjamak. ⁴ Cuarenta mijan yujasuitjum duwikkish atumi jaanchjumek mamukchajui. Tuja atumi nawe aidaukesh iyagchajui.

⁵ “Nuadui Tuke Pujuu atumi Apajuújum makichik múun niina uchijin jintintama numamtuk jintinjamawajua nunú anentaimtusjum diistajum.

⁶ Nuniakjum niina chichame umiktin agagbauwa nunú betek umiakjum, Apajuú eme anentsajum diitajum. Tuja nii jintinjamamua dushakam imatiksagmek umiktajum.

⁷ “Wagki atumnak Tuke Pujuu atumi Apajuújum jujamki nugka pegkeg paka tepetpetu ikamnum, entsa aidau, yumi pukuni jiinaidau, yumi initkanmaya aidau shiig kuashat ayaunum ejetamawagtatui. ⁸ Nunú nugkanmak trigo, cebada, uva ajakbau, higuera aidau, munchi aidau, olivo aidau, dapa yumiji aidau aatus ayawai. ⁹ Nunú nugkanmak atumek wajinak yuwatja tusagmek puyatchattagme. Tuja tikich waji aina dukesh puyatjukchattagme. Kaya aidaunmaya wainkatnaitjume hierro aidau, nuigtushkam mujanmaya taijum jiju cobre yajumtinaitjume. ¹⁰ Tuja

yutai yuwajum ejemagjum shiig aneasa pujakjumeck, Tuke Pujuu atumi Apajuujum kajimattsuk see titajum, nii nugka pegkejan amasu asamtai.”

Apajuú kajimatkipajum tusa tibau

¹¹ “Kuitamankatajum Tuke Pujuu atumi Apajuújiya nunú kajimatkipajum. Niina chichame umiktin agagbauwa nuna wi jintintuajim nunú umitsuk idaisaipajum. ¹² Tuja yutai yuwajum ejemagjum shiig aneasjum jega pegkeg jegamkamunum pujakjumes, ¹³ nuigtu uwigjum aidau, bakajum aidau, oro aidau, plata aidau, nuigtu tikich wajijum aidau aatus kuashat kawegku wainkugmesh, ¹⁴ ememakjum Tuke Pujuu atumi Apajuújiya nunú atum Egipto nugkanum inaku waitkatai batsatutigmin jiiipag, ¹⁵ jujamkiag uwejush ishamain dapi aidau, titig aidau ayaunum kuitamjamak, yumi atsutaish nii kayanmayan yumi jilki uwagtinme tusa amasajua nunú kajimatkipajum. ¹⁶ Tuja nuigtushkam atumi ememataigmin idaimitk-agmastatus, tuja nuigtu dekask mina chichamjunash umigtumainash aina tusa dekapjamak atumi wainchatain, tuja atumi muunjum aajaku aina dukesh wainajakchamun uwegshunum manán ayugtabauwai. Nunak nii dekapjamas pegkegnun yaimpaktag tau asa dutijamawajui.

¹⁷ “Wainka anentaimsajum: ‘jjuju waji aina junak mina senchigjai imatikatsjash!’ tiigpajum. ¹⁸ Nunak Tuke Pujuu atumi Apajuújum atumi muunjum aajaku aina nuna anagkuamun umiak, jamamfuchu pegkeg batsamas takastinme tujabiu asamtai, pegkeg pujusa takakjum wajijinau asajum. Nuadui Tuke Pujuu atumi Apajuújiya duka kajimatkipajum.

¹⁹ “Untsu atum Tuke Pujuu atumi Apajuújiya nunú umigtsuk, tikich apajuúmtai aina nunú emematkugmek, duka ashí ijina utsam atatjume. Junak dekask uminkatnun tajime. ²⁰ Atum Tuke Pujuu atumi Apajuúgmin chichame umigtsuginig, nii atumi shiwaajum aidaun ijinatta dutiksag atumnashkam ijpattawai.”

9

Depetmatak Israeldauchui, Apajuúnuu tibau

¹ “Israel aents aidauwah, antuktajum: Namak Jordán katitkajum atumi shiwaajum aidau senchigtin, atum ainajum aan kuashat, yaaktajish múun peeja apakbau utumainchau aina nunú utuajum depetkatnuk tsawantak jegawai. ² Nuwiya aents aidauk múun esajam gigante Anac aajakua nunú wegantujai betek aidau batsatui. Tuja atumek dekagme yaunchuk aaja timauwa nunú: ¿Gigante Anac aajakua iman aents aina nunash yaki depetkainta?

³ “Tujash atumnak Tuke Pujuu atumi Apajuújiya nunú kuitamjamsamtai shimajum nunú shiig dekau amainaitjume. Niig jii kegak ikagnamainchau ashí apeka weama iman asa, nunú aents aina nunak atumesh wainjumin ijinattawai. Tuke Pujuu atumi Apajuújum tujabiuwa duka imatiksgmek utugchat atsau, nunú aents aidauk shiig wamak jiija utsaakjum ijinattagme.

⁴ “Tuke Pujuu atumi Apajuújiya nunú atumi shiwaajum aidaun jiija utsaak nugka amasmataish: ‘See kuashat, ii ima pegkeg ainag duwi Tuke Pujuu juna nugkan amase’, tiigpajum. Wagki Tuke Pujuu nunú aents aidaunak ditá pegkegchajin utsagatui. ⁵ Tuja atum ima pegkeg asagminkish, atsa nuniachkush atum dekask ima shiig takau asagminkish wait anenjamu asag, nunú aents aina nunak jiiag utsagchattawai. Nunak

ditá pegkegchaujin, nuigtushkam atumin apachjum Abraham, Isaac, Jacob aajaku aidaun anagkuawa nuna umiak dutikattawai. ⁶ Juju shiig dekatajum: ¡Tuke Pujuu atumi Apajujiya nunú nugka pegkejan amastata nunak, atum ima pegkeg takau asagminkish amaschattawai! Atumek dekas chicham umichu intimkiu ainagme.”

Israel aents aidau muja Horebnum batsamas Apajuí chichame intimjuki-agbau

⁷ “Uwegshunum batsamsajum Tuke Pujuu atumi Apajujiya nuna chichame intimjukiú ainajum nunú kajimatkitin aigpajum. Atumek Egipto nugkanum batsatutigmin Tuke Pujuu jiiipajua duwi nagkamsajum yamaishkam tuke intimjakjum ikaje yujagme. ⁸ Nuigtushkam muja Horeb pujusjumes pegkegchau takakjum Tuke Pujuu ikajkauwaitjume. Nuadui Tuke Pujuu atumin senchi kajegtamak ijipamain awagtamkabi. ⁹ Tuja chicham umiktin agagbaun jukitanan wi mujá weamiajai. Nunikan yujumka yutsuk, umutnash umutsuk cuarenta tsawan nuigtu cuarenta kashi pujuyajai.

¹⁰ “Nunika pujai, atumesh ijunjajum diyagmin jii kegamunmaya atum chicham umiktinun Tuke Pujuu ujakabi. Nunú chichaman jimag kaya pakamamunum nii agagbaun juki sujusabi. ¹¹ Nuwi cuarenta tsawan nuigtu cuarenta kashi ejeyi ai, Tuke Pujuu jimag kaya pakama najanamunum chicham umiktin aidau agagbaun sujusami. ¹² Nuna sujusa chichagtak: ‘Amina aentsjum aidau Egipto nugkanum batsatu jii gmayum duka wainak yujawai. Nuniau asamtai wamak wakitkita, wi dita aidaun juju umiktajum tusa tibaunak kajimatkiag idayinak jiju ukuijag nujai dita ememattinum najanawag batsamtuinawai’, tujutiabi. ¹³ Tuja nuigtu chichagtak: ‘Juju aents aina junak shiig wainkagjai, ditak dekas chichaman shiig intimkiu ainawai. ¹⁴ Nunin asagmatai amek dita aidauk chichamjukaipa, wi ditanak ijinan utsagatjai. Dutika ai nugkanmak makichkish juwakchatnai. Tujash aminiyanak dita aina nuna nagkaesau kuashat aentsun ikaugkattajai’, tujutiabi.

¹⁵ “Tujutmatai jii kegamunum mujá pujaun waketkun, chicham umiktin agagbaun jukiamiajai. ¹⁶ Nunika atum batsatbaunum jegakman, Tuke Pujuu umiktajum tujabau umitsuk wamak kajimatki idaikujum, jiju ukuijajum nujai toro tsakat dakumka najanajum batsamtautigmin waink- abiajime. ¹⁷ Nunika kajekan, jimag kaya pakama najanamunum chicham umiktin aidau agagbau takakbaujun atumesh wainjumin nagkima ajiajan tsaikamiajai.

¹⁸ “Nuna dutikan atum yaunchuk pegkegchau takakjum Tuke Pujuu ikajkagmin, wi niina segaakun cuarenta tsawan nuigtu cuarenta kashi yujumka yutsuk umutnash umutsuk pujuyag imanisnuk ataktushkam Tuke Pujuu segaaku pujuyajai. ¹⁹ Nuniakun atum aidautigmin nii senchi kajegtamak ijipatag takui puyatiajai.

“Tujash Tuke Pujuu wi ataktu segamun antugtuku asa ijipachabi.

²⁰ Tuja Aarógnashkam Tuke Pujuu kajejuk maatag takui, wait aneam maawaipa tusan ayamjukamiajai. ²¹ Nuna dutikan nuadui, atum pegkegchau takakjum toro tsakat dakumka najanamugmin jukin jii kegamunum nagkiman patakamiajai. Dutika ai kuwigmatai, dekegka tsaika yukukuntu eman, nunú mujanmaya entsa akagunum ajugka ajapawamiajai.

²² “Tuja nuigtushkam Taberá nugka, Masá nugka, Quibrot-hataavá nugka aina nuwi pujusjumeskam pegkegchau takakjum Tuke Pujuu

ikajkauwaitjume. ²³ Atum Cades-barnea pujagmin Tuke Pujuu chichag-tamak: ‘Wi nugka amasuitjim nuwi wetajum’, tusa tujamkuish atumek antugtsuk, nuigtush niyai kajintsa anentaimchau asajum, nii tujabau umigkachuitjume. ²⁴ ¡Atumek yaunchuk nagkamsagmesh intimkiu, Tuke Pujuu umigchau ainajum nunak wika dekajime!

²⁵ “Nunin asagmin Tuke Pujuu ijipatag takui, wi cuarenta tsawan nuigtu cuarenta kashi makichkish ayamtsuk shiig senchi Tuke Pujuu segaakun pujusamiajai. ²⁶ Nuwi pujusan niina senchi segaakun: ‘Tuke Pujuu Apajuíyah, ame tujinmainuk makichkish atsawai. ¡Nuadui juju amina aentsjum aidau, Egipto nugkanum batsatu amina senchigmijai jiijuitam duka, wait aneamam ijinawaipa! ²⁷ Tuja adeagta amina inakem Abraham, Isaac, Jacob aatus aajaku aina nunú. Nuniakum juju aents aina nuna umishtaiji, tuja dita pegkegchauji aina nujai tsagkujam wait anenjata. ²⁸ Wagki Israel aents aina juju ame ijinawaminig, egiptunmaya aents aidau chichagtamainak: “Apajuí Israel aents aidau kajejau asa Egipto nugkanum batsatun jiija yajuak, nii nugka anagkuawa nuwi ejetsuk jintá uwegshunum ijina utsagke”, tujamain ainawai. ²⁹ ¡Tujash Israel aents aidau amina aentsjum ainawai! Nuniau asamtai amina senchigmin Egipto nugkanum batsatu jiigmayume’, tusan tiyamiajai” tiuwai Moisés.

10

Apajuí Israel aents aidaujai ataktu chicham umikbau

(Ex. 34.1-10)

¹ Tusa tai Tuke Pujuu chichagtak: “Jimag kaya pakamamu yama nagkamchak aajakua nujai betek tsupika umikta. Dutikam nuigtushkam chicham umiktin agagbau egkeatin arca najanata. Dutika nunú jukim mujá wakata wijai chichastasam, ² nunikamin wi nunú kaya pakama najanamua nuwi chicham umiktin yama nagkamchaku agagbau ame ajiaja tsaikabium nujai betekan agagtajai. Dutikamtai arca numi najanamunum egkeam kuitamkattame”, tujutiabi.

³ Tusa tujutmatai numi acacia tutaiyai arcan najanawabiajai. Tuja nuigtushkam jimag kaya pakamamun tsupika jukin mujá weamiajai. ⁴ Nunika waka ai Tuke Pujuu nunú kaya pakama najanamunum diez chicham umiktin aidau yama nagkamchak atumesh wainjumin ashí tuwaka ijunbaunum jii kegamunum tujabiwua nuna imatiksag agag sujusabi. ⁵ Dutika sujusmatai nuna jukin mujá pujaun wakitkiamiajai. Nunika jegaan arca najanamunum Tuke Pujuu dutikata tujutbaunak imatiksasuk egkeawabiajai. Duka yamaikish nuwi awai.

¹⁰ Tuja wi yama nagkamchaku pujusamiag imanisnuk mujá cuarenta tsawan, nuigtu cuarenta kashi pujusamiajai, nunika pujusan Tuke Pujuu segabiajai, ijinawaipa tusan. Tusa sega ai yaunchuk antugtuku nunisag ataktushkam Tuke Pujuu mina antugtuku asa ijipachabi. ¹¹ Untsu ayatak mina chichagtak: “¡Wamak wakitkita, nunikam umintsam Israel aents aidau yajuakam, wi ditá apachji aajaku aina nuna nugka anagkuawaitag nuwi emata!” tujutmayi.

Apajuí Israel aents aidauwaj juju umiktajum tusa tibau

¹² Israel aents aidauwah, atumnash Tuke Pujuu atumi Apajuígmish yamaish ¿wajina segapainawa? Ima nigki eme anentsajum nii tabau betek umiktajum, dutikakjum aneetajum, nuniakjum atumi anentaimijai,

wakanmijai ememattajum. ¹³ Apajuí wakegawai chicham umiktin agagbauwa nuna umiktinme, nuninak shiig batsamsatnume tusa.

¹⁴ Tuja nayaim aina duka, nayaimpi yakintin ayá dushakam, nuigtu nugka, tuja nugkanum ayá nujai ashí Tuke Pujuu atumi Apajuíjiya nudau aina nunú dekaatajum. ¹⁵ Nunú imanuk ayaig, nuna etegmainaitak, atumi apachjum aajaku aina nuna aneau asa etegkauwai. Nuigtushkam kuashat aents tikich nugkanum ayau dekag nuwiyen etegmainaitak, atumi apachjum wegantunmaya aidautigmin mina aentsug atinme tusa etegtamjauwai.

¹⁶ Nuniau asamtai aentainkachu atsuk, Tuke Pujuu atumjai chichaman umikua nunú shiig antukjum kajimattsuk aneaku atajum. ¹⁷ Wagki Tuke Pujuu atumi Apajuíjiya duka tikich apajuímtai aina nuna nagkaesau, ashí apu aidaun Apujiyai. Niig dekas Apajuí múuntai, senchigtinai, tuja ishainai, niig aents aidaunak etegka idaitsuk ashí betek kuitamnai, nuigtushkam wait anenjuti tusa akiamkesh amaitsui.

¹⁸ Niig bitaik aidaun, waje aidaun wait anentau asa kuitamui, tuja nuigtushkam tikich nugkanmaya aidau atum batsatbaunum pujuina nunashkam aneau asa, yutain, nugkutajai suwawai. ¹⁹ Nuadui atumek aents tikich nugkanmaya aina nunú aneetajum, wagki atumshakam egiptunmayachuitkujum Egipto nugkanum batsamajakuitjume.

²⁰ Tuke Pujuu atumi Apajuígmia duke ememattajum, nuniakjum ima nigki umigkatajum. Tuja atum umiktina nunú dekas takugmek ima Niina daajinig titajum. ²¹ Wagki Apajuík dekas múuntai. Iman asamtai, ima nigki emematuinaji. Niyai atumi Apajuíjig, nuniau asa atum aidautigmin ayamjupak, wainchatai ishain aidaun iwainajua nunú wainkauwaitjume. ²² Atumi apachjum aidau Egipto nugkanum jegawaju aina duka setenta aentsuk aajaku ainawai. Tujash yamaik, Tuke Pujuu atumi Apajuíjiya nunú shiig kuashat ikauntamak, yaya nayaimpinum ayá ibau kuashat awajtamsaugme.

12

Apajuí makichik nugkan etegkatta ima nuwig nii ememattajum tibau

¹ “Atumi apachjum aajaku aina nuna nugken Tuke Pujuu atumi Apajuíjum amastata nuwi jegá pujusjum, chicham tuke umiktina duka juju ainawai.

² “Nunú nugkanmaya aents aidau atum utuajum depetkattajum nuna ememattajii aidau muja aidaunum, nain aidaunum, nuigtu numi múun dukentin aidaun wakentin ayá nujai ashí tsaigkajum utsankatajum. ³ Tuja dita apajuímtaijin emematuinak kuntin maa patasa apetai dita najankamu aina duka tsaigkatajum. Nuigtu kaya aidau, numi múun kampujam tsupikbau aidaun aatus dita emematuina duka ashí tsaigkatajum. Tuja nuigtushkam dakumka najanamú ditá apajuímtaiji aina dushakam dutik-sagmek tsaika utsankatajum. Dutikamu asa makichikish atsusti. ⁴ Tikich aents aidau ditá apajuímtaijin emematuinak wajina dutikin ainawa, nujai betekak atumek Tuke Pujuu atumi Apajuíjum emematkugmek dutikawaigpa.

⁵ “Tuja atum maki makichik wegantu ainajum nuna nugke aina nuwiyen Tuke Pujuu makichik etegkattawai nii pujustinun. Dutikamtai nuwi wejum Apajuí ememattajume. ⁶ Nuwi kuntin maajum nuna neje ashí apeakjum Apajuí ememattajume. Tuja nuwi weakjumek, diezmo, tuja

atum Apajuí susatasa anagkuamu, tuja atumek anentaimsajum anentag Apajuí suwamu, nuigtu baka uchiji yama nagkamchaku petsakbau, uwija uchiji yama nagkamchaku petsakbau aatus jukijum wetajum.

⁷ “Nunika nuwi jegajum Tuke Pujuu atumi Apajuígmí emtin yutai yuwattagme. Tuja Tuke Pujuu atumi Apajuíjum yaimpasmatai atumi ajakjum aidaush, tagkujum aidaush kuashat kawegku asamtai, nunú yuwakjum pataim aidaujai ijunjajum shiig aneastinaitjume.

⁸ “Tuja Tuke Pujuu makichik nugká etegkatta nuanuig, yamai atum wakegamu takajum duka dutikashtatjume. ⁹ Tujash Tuke Pujuu atumi Apajuíjum nugka pegkeg agkan atum pujustinun amastata nuwig eke jegatsjume. ¹⁰ Tuke Pujuu atumi Apajuíjum nugkan amastata nuwi namak Jordán katiiki jegajum pujuttajum nuwig, atumi shiwaajum yamai waitkagmaina dutika waitkamak achattagme. Nuadui atumek ishankagtutsuk pujutnaitjume. ¹¹ Nuniau asamtai wi Apajuí tibaun yamai tajim juka juga pegkejam jegamkatnun Tuke Pujuu atumi Apajuíjum nugka etegkatta nuwi betek umiktatjum duka juju ainawai: Apajuí emematku kuntin maa nuna neje ashí apeamu, diezmo aidau, tuja Tuke Pujuu susatjai tusa etegjamu aidau aatus. ¹² Nunú umiakjum Tuke Pujuu atumi Apajuígmia nuna emtin atumi uchijum aidaujai, inakem aidaujai, Leví wegantu aidau nugkenchau atumjai batsata nujai ijunjajum shiig aneakjum dakujustajum.

¹³ “Kuitamamkatakajum, tikich yantannum yujasjum Apajuí emematji tusajum kuntin maa apé yujaijum. ¹⁴ Duka nunitsuk Apajuí atum wegantu aina nuna nugkenian makichik etegkatta nuwi, wi yamai atumi tajim duka dutikattagme. ¹⁵ Untsu atumi yaaktajin pujusjum neje yuwatag tusa wakegakjumek, kuntin atumdau aina nunú maajum japa nejejai betek yumainaitjume. Apajuí atum aidautigmin kuntin ikamian, nuniachkush tagkumtai aidau amastata duka sacerdote Apajuín sega pegkenti-juamtai yuwatjai tusajum dakatsuk, pegkemtikachbau akugmesh, atum wakegakjumek maajum yuwatajum. ¹⁶ Untsu kuntinu numpe aina duka yuwawaigpajum, ayatak yumi ukaja ajaptayama dutika ajapatajum.

¹⁷ “Untsu trigo, vino, aceite aina nuwiya diezmo Apajuí susatin jukimu aina duka atumi yaaktagmin pujusjumek yuwawaigpajum, nuigtushkam baka aidau, uwig aidau yama nagkamchaku petsakbau aina dushakam yuwawaigpajum. Tuja Apajuí anagkuamu aidau nuniachkush Apajuín anentag susatjai timau aina atumi yaaktagmin pujusjumek dushakam yuwawaigpajum. ¹⁸ Untsu Tuke Pujuu atumi Apajuíjum nugka etegkatta nuwi niina emtin atumi uchijum aidaujai, inakem aidaujai, Leví wegantu atumjai batsata nujai aatus ijunjajum nunú yuwattajume. Tuja Apajuí yaimpasmatai atumi ajakjum aidaush, tagkujum aidaush kuashat kawegku asamtai, shiig aneasjum dakujustajum. ¹⁹ Apajuí nugkan amastata nuwi batsamsagmesh, Leví wegantu aidau makichkish kajimatki idaisaigpajum.

²⁰ “Tuke Pujuu atumi Apajuíjum nugka muuntan amastinaitjime tusa tujabiwa nuna imatiksag amasmatai pujusjum, neje yuwatag tusa wakegakjumek, puyatjutsuk atum wakegamu yuwatajum. ²¹ Tuja Tuke Pujuu atumi Apajuíjum emematku ijuntai atinun nii nugkan etegkatta nunú atushtaitkuig, atumdau baka aidau, uwig aidau, Apajuí amasbau aina duka atum batsatbaunmak maajum nuwig pujusjum, wi atumin

timajim dutiksagmek atum wakegamu yuwatajum. ²² Sacerdote Apajuín sega pegkeemtijuamtai yuwatjai tusajum dakatsuk, dutikachbau akugmesh japa neje yumaina dutiksagmek yuwattagme. ²³ Untsu kuntu numpe aina duka makichkish yuwawaigpajum, wagki nunpanum pujut au asantai. Nunin asantai, pujuta duka nejejai apatkaik yumaitsui. ²⁴ Nuadui yumi nugká ukaja ajaptayama dutika ukaja ajapatajum. ²⁵ Nunú numpa yutsuk idaikugmek, Apajuí emtin pegkeg takau asajum, atumi uchijum aidaujai shiig pujustinaitjume.

²⁶ “Tuja Apajuín anentag susatjai tusa anentaimtugbau aina nunú, nii susatin anagkuamu aina nujai jukijum Apajuí emematku ijuntai etegkamua nuwi ejegatajum. ²⁷ Dutika ejegajum nuwi kuntin maajum nuna neje altarnum pataijum ashí apeakjum Apajuí ememattajum. Kuntin aidau numpega duka altar ukatkatajum. Untsu nuna nejega duka yuwatajum.

²⁸ “¡Wi atumin inajim nunú shiig antukjum betek umiktajum, nunú nuniakjum Apajuí emtin pegkeg takau asajum, atumi uchijum aidaujai shiig pujusminjum!” tiuwai.

Dakumka najanamu aina nunú emematigpajum tibaw

²⁹ Moisés Israel aents aidau ataktu chichajak: “Tuke Pujuu atumi Apajuíjum nugkan amastata nuwiya aents aidau ijina nugkan amasmatai jegajum pujusjumesh, ³⁰ nuwiya aents aidau ditá apajuímtaijin wajuk emematin ainawa nunú dekatag tusagmek jatumek makichkish inima yujaigpajum! Nuní yujasjum atumshakam nunú ememattajum. ³¹ Tikich aidau apajuí emematji tusag dakumak najanawag emematuina dutikagmek Tuke Pujuu atumi Apajuíjia duka emematigpa, wagki nunin aina duka ditá apajuímtaijin emematuinak, ditá uchiji aidau maawag jinum apen ainawai. Nunú dutikamua duka Apajuí diismak shiig pegkegchawai.

³² “Wi juna tajim duka atumek nuwi ekekjumkesh ematsuk, tuja nuigtush esakagjumkesh emegkautsuk, betek umiktajum”, tiuwai.

13

¹ “Namputchawame atum ainajum anuiya makichik aentskesh Apajuí chichamen etsegjai tusa kajanmayan dekau wekagas chichagtamak: ‘Wika dekajai wainchatai aidau atak nagkaemagata nunak’ tusa tujabauwa, ² nunú betek imaanisag umintai chichagtamak: ‘Atumi wainchatai, tikich apajuí aina nunú emematmi’, tusa tujamainakuish, ³ duka antugkaigpajum. Wagki nunak Tuke Pujuu atumi Apajuíjia nunú, dekas minash ashí ditá anentaijjai, wakanijai anentuinawash tusa dekapjamsatatus dutijamawagtatu. ⁴ Tuke Pujuu atumi Apajuíjia duke nemagkujum ajaantusum diitajum. Nuniakjum chicham umiktajum tusa tujamauwa nunú betek umigkatajum. Niina chichame antugkajum umigkatajum, nuniakjum ima niiyaig sumitkau atajum. ⁵ Tuja nunú aents Apajuí chichamen etsegjai tusa, kajanmayan dekau wekaga duka maatajum, wagki atum Egipto nugkanum waitkam batsatutigmin Tuke Pujuu atumi Apajuíjum agkanmitkagmawajua nujai shiwagmitkagmatatus wakegau asantai. Nunú aentsua duka Tuke Pujuu atumi Apajuíjum chicham umiktajum tujamauwa nuna datumtijamatag tiuwai. Nunin asantai nunú aents pegkegchau aidau atumjai batsata duka ijina emegkagtajum.

⁶ “Amina yatsumkesh, amina uchigmekesh, nawanjungkesh, atsa amina nuwem aneetaigmekesh, nuniachkush amina shuig kumpagmekesh wakenmataik chichagtamak: ‘Apajuímtai tikich aidau ame wainchatain, tuja amina apakesh wainajakhamun emematmi’ tusa, ⁷ nuwiya aents aina nuna apajuímtaiji aidau atum pujamunum tikiju, nuniachkush atushat ashí tikich nugka aidaunmash ayá nuninun pachis wakenmataik tujamainakui, ⁸ nunú antugkajum umigkaigpajum. Duka makichkish wait anenjaigpajum. Tuja waittsai tusagmesh puyatjukaigpajum, nuigtush uukaigpajum. ⁹ Duka dutiktsuk maatajum. Tuja dekatkauk, amea kayai tukua tukuakua maattame. Dutikawamin tikich aidaushkam dutiksag maawagtatui. ¹⁰ Apajuí Egipto nugkanum inaku waitkatai batsatutigmin jiigmajajua nujai datumtamain awagtamkau asamtai, duka kayai tukua tukuakuajum maatajum. ¹¹ ¡Nunú dutika ajumin ashí Israel aents aidauk nuna dekawag ishamkagtatui, nunikag ataktu awagkig nunin pegkegchau aina nunak takaschagtatui!”

18

Profeta Moisésjai betek atinun Apajuí etegkattawai tibau

¹⁴ Moisés Israel aents aidaun chichajak:

“Atum nugka jukittajum nuwiya aents aina duka anentaimsa atak atinun dekajai tinu aina nuna antuju yujau ainawai. Tujash atumnak Apajuík nuninun takasainum tusa dakitawai. ¹⁵ Nuadui Tuke Pujuu atumi Apajuíjiya nunú atum wegantu nuwianum makichik profeta witag imajun etegkattawai. Dutikamtai nunú umigkattagme. ¹⁶ Atum aidautigum muja Horebnum ijunja batsamsajum Tuke Pujuu segaakjum: ‘Tuke Pujuu iina Apajuíji ataktu chichaakui antutak ishamaji, nuigtushkam jii kega ibau waintash dakitaji jinawaig tuidau asa’ tuyugme. ¹⁷ Tusa tajumin Tuke Pujuu mina chichagtak: ‘Dita tuina duka dekas pegkejai.

¹⁸ “Wi dita aina nuwianum makichik mina chichamjun etsejin amejai betekan dita wegantunmayan etegkattajai. Dutikan wiki nii chichaktinnak jintintuattajai. Nuadui wi tabaun juki etsegtatui. ¹⁹ Tuja nuna chichamen antugkachaju aidaunak wi suwimkan susattajai.

²⁰ “Tuja chichama etsejin wi inagchamaitak, wainak mina daajun pachis chichaushkam, mantamnattawai. Tuja tikich apajuímtai aina nuna daajin wekagas chichaman etsejushkam nunisag mantamnattawai.’

²¹ “Atum anentaimsajum: ‘Tujash dekas Tuke Pujuu tibaunash etseja tusaish ¿wajuk dekamainaita?’ tusa takugmek juju dekatu atajum. ²² Nunú wekagas atak atinun etsegekatta nunú betek uminchakuig, dekas Tuke Pujuu awemachmawaitkumpap ememak tuu wekaewa tusajum dekattagme. Nuadui nunú aina duka ishamkaigpajum”, tiuwai.

19

Waita etsejin aidau chicham umigkamu

¹⁵ “Makichik aents wi wainkamjai takuig dekaskeapi tiigpajum. Untsu jimagkesh, nuniachkush kumpatumkesh, ii pegkegchaun takau wainkamji tusa tuinakui, nuadui nunú aents pegkegchau takamsauwa duka suwimak sumainaitjume.

¹⁶ “Makichik aents wait wekagas, tikichin chichajak: ‘Juju aents pegkegchaun takase’ tusa tsanumjakuig, ¹⁷ duka mai jukijum aak Apajuíjai chichatainum sacerdote aidau, apu chichama epegkin aidau aatus batsata

nuwi ejegatajum. ¹⁸ Dutika ajumin, chichama epegkin aidau emamkesmas shiig dekajuawagtatui. Dutika dekajam dekaskenum jegachmataig, ¹⁹ tsanumjuja ai suwimka susatnume tukama tsanumjauwa nunú nigki suwimkanak jukittawai. Aatsa dutikakjum aents pegkegchau aidau atumjai batsata duka ijina emegkagtajum. ²⁰ Nuna dekaawag tikich aidaushkam ishamainak tsanumat pegkegchau aina nunak idaisagtatui. ²¹ Nunú aents aina duka atumek wait anenjaigpajum. Aents magkagtau atumshakam dutiksagmek maatajum. Aents tikichi jin emestauk atumshakam dutiksagmek emestugtajum. Aents tikichi nain emestauk atumshakam dutiksagmek emestugtajum. Aents tikichi uwejen tsupijuk atumshakam dutiksagmek tsupigkatajum. Aents tikichi nawen tsupijuk atumshakam dutiksagmek tsupigkatajum” tawai Apajui.

24

Nuwa ajapet pachisa chicham umikbau

¹ “Makichik aents nuwena pujau niina nuwe shiig pujachbaun dekajua ajapatag takug, ajapdayatag tusa umitain papii umika nuwen susa idaimainai.

² “Dutika ajapamak tikich aentsjai aishinmainai. ³ Tuja tikich aents nuna juki pujau dakitak ajapatag takug, dakitajai tusa, papiin umika susa idaimainai. Untsu nunú aishi jakamtaig, ⁴ yama nagkamchak nuwatkaauwa duka ataktu awagkig nuwatmaitsui, wagki nuwa pegkegmachu asantai. Nunú nuniamaa nunak Tuke Pujuu dakitawai. Nuniaw asamtai atum aidautigmek nuninuk takasaigpajum. Atum nuniakjum Tuke Pujuu atumi Apajuikum nugka amastata nunú pegkegchau emaijum.”

Kuashat chicham umiktin aidau

⁵ “Makichik aents yama nuwena pujauk maaniamunmak wechattawai. Nuigtushkam tikich takat aina nunashkam takatsuk makichik mijan pujustatui. Aatus niina nuwejai shiig aneas, yainiak shiig agkan niina jeen pujuttawai.

⁶ “Atumin diwimjamkatag takuish, trigo chimpia dekeetai kaya ajutjama nunú sujusta, akigkumin awagtuktagme tusagmek jujukigpajum. Nunú dutikakjumek niina pujutji atanmaina* numamtin asamtai.

⁷ “Makichik aents Israel aentskesh nii wegantunak pempeentuki achika juki, niina inaku waitkataiji ematatus, nuniachkush tikich nugkanum sujuktatus wekagu wainkugmek, duka maatajum. Dutikajum aents nuninun takau aidau atumjai batsata duka ijina emegkagtajum.

⁸ “Tuja lepra achiimakjum jakjumek, sacerdote Levi wegantu aidau wajinjutpatig nunú betek umiktajum. Nuniakjum wi atum umiktinun jintintuawaitijim duka ashí betek umiktajum. ⁹ Atum Egipto nugkanum waitkam batsatutijum jijnjajum shimagmin, jintá Tuke Pujuu atumi Apajuikum Marían suwimka suwak itugkauwaita nunú aneaku atajum: Niig Apajuíjai shiwagmagau asa, suwimkan juwak lepran achiimakui.

¹⁰ “Tuja atum ijutkamunmaya kuichik tsagkatkugmesh, wi kuichkin tsagkatjam nunú akigkumin awagtuktagme tusajum niina jeen wayagmek niina wajijig jujukigpajum. ¹¹ Ayatak agá wajasjum dakastajum, nuniagmin nii juki amastí.

* **24:6** Pujutji atanmaina numamtin tawa nunak nunú jujukim dekegka pagka najana yutsuk nujantai jamaina nuna taku tawai.

12 “Tuja aents ujudauch kuichik tsagkatjukta tusa niina jáanchjin amastata duka kashin awagtuktagme tusagmek emetjuawaigpa. 13 Duka dutiktsuk nunú tsawantaik etsa akagai wamak awagtuktajum. Dutikam nuna asepek kanagti. Nuniak nii Apajuín segatjamtatui atumin yaimpakti tusa, aatsa atum dutikamua nunú Apajuín shiig awagbau asamtai.

14 “Aents ujudauch aidau, atumi pataim aidaukesh, nuniachkush tikich nugkanmaya atumi yaaktaji aina nuwi pujuidauk wainka akitsuk takamtikkujum waitkasaigpa. 15 Duka dutiktsuk nunú tsawantaik nii takasbaujiniag akiktajum, wagki niig ujudauch asa sumak yuwatatus atumawai. Utsu nunú betek umiatsjuminig, nii Tuke Pujun segattawai atumin suwimkan amastinne tusa.

16 “Múun uchigtin aina duka, niina uchiji aidau pegkegchau takam-samujinig maamak amaitsui, tuja uchi aina dushakam ditá apaji aidau pegkegchau takamsamujinig maamak amaitsui, ayatak maki makichik dita pegkegchau takasbaujin maam agtatui.

17 “Bitaik aidaush, tikich nugkanmaya aidaush wainka waitkasaigpajum. Duka dutiktsuk dita atumainakuig yaigtajum.

“Tuja waje kuichik tsagkatkugmesh, akigkumin awagtuktagme tusagmek niina jáanchjig jujukigpajum.

18 “Atum Egipto nugkanum makichkish ayamjumamainchau inaku waitkatai batsatutigmin Tuke Pujuu atumi Apajuíjum jiiipajua nunú kajimattsuk aneaku atajum. Nuadui wi atum aidautigminak juju ashí umiktajum tusan tajime.

19 “Tuja trigo juwamunum makichik trigo jigkamu kajimatigkimesh waketyukmek jukigpajum. Duka idaisatajum aents tikich nugkanmaya aidau, waje aidau, bitaik aidau nuna juki yuwatnume. Aatsa dutik-agmin Tuke Pujuu atumi Apajuíjum takatjumin pegkegnum yumigtam-sattawai. 20 Olivon neje juwaakjumes, kanawen ampinjau juwaktata duka waketyukmek juukaigpajum. Duka idaisatajum aents tikich nugkanmaya aidau, waje aidau, bitaik aidau nuna juuká yuwatnume. 21 Uva ajakbaunmaya nuna neje uva juwaakjumes, ampinjau juwaktata duka waketyukmek juukaigpajum. Duka idaisatajum aents tikich nugkanmaya aidau, waje aidau, bitaik aidau nuna juuká yuwatnume. 22 Wagki atumshakam Egipto nugkanum inaku waitkatai batsamajakuitjum nunú aneaku atajum. Nuadui wi atum aidautigminak juju chicham ashí umiktajum tusan tajime.”

25

1 “Aents utugchatjin diták epegmainchau dekapenakug, chicham epegkeaku ijuntainum suwimka jukiagtatus weagtatui, nunikmatai chichama epegkin shiig dekjua, yakita utugchatjinnush nuna suwimka suwak tikichnak akupkattawai. 2 Aents utugchatji aja nunú asutnati takug, chichama epegkin aidau nugká aepsatajum tusa tima aepsagmatai, nii pegkegchau takamsamujin diijus suwimka suwinak asutiawagtatui. 3 Tujash nunú aents utugchatji aja nunak cuarentaya nuna ewaekag asutiachagtatui, wagki imatika asutiamak suwimak shiig múun asamtai, atumi pataim datsan diimain asajum.

4 “Tuja toro trigon dajag akaak wekaeta nuna wenig jigkatuawaigpa yuwati.”

Aents nuweena pujau jakamtaish nuna yachi aidaush wajenash itugmain ainawa nunú pachisa chicham umikbau

⁵ Jimag uchi akiamu makichik nugkanmak pujuidau niina yachi nuweena uchin akiitsuk jakamtaig, wajea duka tikich aentsjaig aishinmait-sui, ima niina wajejiya duke niinak nuwatmainai. Dutika nuwatuk uchin akia, niina yachi uchijiya nunin emattawai.

⁶ Nuadui yama nagkamchak nuwa uchi aishmagkun uchigmaktata nunak niina yachi daaji aajakua nuna adaikattawai, wagki nuna daaji Israel aents aidaunum megkaekai tau asa.

⁷ Untsu nuwatkashtatjame tusa niina wajeji dakitamak, chicham epegkeaku ijuntainum jeganta Israel aents aidaun apuji aidaun chichajak: “Mina wajejuk niina yachi daajiya nunú Israel aents aidaunum megkaekai tutan dakitawai. Nuniau asa mina nuwatjutan dakitawai”, tumainai.

⁸ Tusa timatai apu aidaun nuna untsukag, niijai chichamain ainawai.

Untsu tusa tama, nii chichaak: “Wika niinak nuwatkashtatjai”, tusa tutaik, ⁹ Israel aents aidaun apuji aidaun wainbaunum, nuwa niina wajejin jegantun sapat wegamakbaujin makichik jujuktatui, dutika yapinum usukia chichajak: “iAaja jutiktaya aents wajejin juki niina yachi uchiji atinun akiitan dakitauki!” titatui. ¹⁰ Dutikamu asantai nuna patayi niina jeen batsata duka Israel aents aidaunmak “sapatji atankimu” tutai agtinai.

26

Ajak ajakmamunmaya yama nagkamchaku juuktatjum nunú Apajuí anentag susatajum tibau

¹ Tuke Pujuu atumi Apajuíjum nugka atumdaun atinun amasagtata nuwi jegajum pujusjum, ² ajak ajakmattajum nunú nejekmatai, yama nagkamchaku juuktatjum nunú makichik chagkinnun chimpia jukijum Apajuí ememattai atinun nii etegkauwa nuwi ejegatajum. ³ Dutikajum sacerdote puja nunú chichagkujum: “Wi mina Apajuíju emtin titatag nuna ashí tikich aidaush antuktinme: wika yamaik mina apachug aajaku aina nuna Tuke Pujuu Apajuí chichajak: Ame wegantu aidaun nugka susatnaitjai tusa anagkuawa nuwi taa pujajai”, titatme.

⁴ Tusa tiyamin nunú chagkinnun aimka ejeentamun sacerdote juki altarnum ejeenta nuna niimtika apusattawai. ⁵ Dutikantai Tuke Pujuu amina Apajuígmí emtin ame chichaakum:

“Mina apachug arameo aents aajaku aina duka kuashtachu, nuigtush nugkenchau yujajaku ainawai. Nunik yuja yujakua Egipto nugkanum shiyakag nuwi batsamsajui. Nuwi kuashat tsawan batsamas shiig kuashat yujakag senchigtin wajasajui. ⁶ Tujash egiptunmaya aents aidaun shiig kuashat waitkagmasu ainawai. Dutijamainak wainka inatai etamiag waitkagmasajui. ⁷ Imatijamainakui Tuke Pujuu iina apachji aajaku aina nuna Apajuíji yaimpakti tusa segayaji. Nunú ii sumamun antugtamak, nuigtushkam inapainaku takainaku kuashat waituinamun waipaku asa, ⁸ niina senchijijai ishamain wainchatai aidaun iwainag, Egipto nugkanum batsatutin jiiipagmayi. ⁹ Dutika jiiipag jujamki imajui itagmauwai. Dutika itagma juju nugka pegkeg ajak shiig tsapaa imajun amase. ¹⁰ Nunú nugkan Tuke Pujuu Apajuí sujusua nuwi ajakmamunmayan yama nagkamchaku juukbaun juki itaajai”, titatme.

Tusa tamawaik chagkinnun ajak juuka aimkamu pujau jukim altarnum ejeentam apusattame. Dutikam nuwi Tuke Pujuu amina Apajuígmí emtin tikishmaja pujustatme nii emematikum. ¹¹ Nunika emematim, amina pataim aidaujui, Tuke Pujuu amina Apajuíjum atumin amasbau aina nunú

anentaimtusam shiig aneakum jüstamata. Nuniamin Leví aents aidau, tuja aents tikich nugkanmaya atumjai batsata dushakam, atumjai ijunag jüstamatnume.

Ame takasa juwamunmaya Tuke Pujuu susatin diezmo akankatajum tibau

¹² “Mijan kempatuma nunú jegamunum Tuke Pujuu susatin diezmo jukitajum tusa timauwa duka, ashí ame ajak ajakmamua nuwiya akanja umikta. Dutikam Leví wegantu aidau, aents tikich nugkanmaya aidau atumjai batsatu, tuja bitaik aidau, waje aidau aatus atumi yaaktaji aidaunum batsamas, dita wakegamun yuwatnume tusam ashí susata. ¹³ Dutikam Tuke Pujuu amina Apajuigmi emtin chichaakum: ‘Wi ajakmamua aina nuwiya juuka ijumjamunmayanak, diezmo Tuke Pujuu susatnum akankajai. Nuna Leví wegantu aidaun, tikich nugkanmaya jutijai batsata nuna, bitaik aidaun, waje aidaun aatsan ashí tinamkajai, ame umikta tujutbauwa nunak ewaetsuk, nuigtush makichkish kajimattsuk. ¹⁴ Tuja nunú diezmo akankamua nunak jakamunum buutku pujaknush, pegkegchau wajasa pujusnukesh, makichkish yuwachmajai. Tuja jakau aina nunakesh anagkuachmajai. Tuke Pujuu mina Apajujuj, wika ame umikta tujutbaunak betek ashí umikjai. ¹⁵ Amek nayaimpinum amina pujutajum pegkegma nuwi pujusam, amina aentsjum Israel aents aidau ame nugka pegkeg shiig ajak tsapau susamua nuwi batsata nunú pegkegnum yumigkiakum, iina apachji aajaku aina nunú anagkuawaitam dutiksamek kuitamkaguktukta’ titatme”, tiuwai.

Israel aents aidau Apajuú aentsji ainawai

¹⁶ “Tuke Pujuu atumi Apajuújiya nunú chicham umiktin aina nuna umiktajum tusa yamai tujamainawai. Nunú betek atumi anentaimjai, wakanmijai umiktajum. ¹⁷ Apajuú dekas iina Apajuújiyai. Nuadui atum chichaakjum: ‘Nii tujabauwa duka betek umikagmi, nuniaku niina chichame umiktin agagbauwa dushakam tuke umiktin agmi’, tusajum yamai tiugme. ¹⁸ Nuadui Tuke Pujuuishkam nii anagtamauwa nunak imatiksag yamai chichaak: ‘Israel aents aidau tikichdauk amaitsuí, ima mina aentsjuk ainawai’, tujamui. Nuadui niina chichame umiktin agagbauwa duka betek umiktajum ¹⁹ Tuja atum ima nigki umigkugmek, tikich aents aidau nii najankamu batsata nuna nagkaesau shiig kuashat, senchigtin, ajaantusa diitai atatjume, tusa Tuke Pujuu atumi Apajuújum tujamui.”

30

Apajuú tsagkugtug pegkegnum yumigtugti tuinakush wajukmaina ainawa nunú pachisa ujakbau

¹ Moisés Israel aents aidaun chichajak: “Atum Tuke Pujuu atumi Apajuújum umigjuminig, nii pegkegnum yumigtamsagtinai. Untsu atum nii umigtsugminig, pegkegchaunum yumigtamjagtatui. Tuja atum betek umigtsugminig, atumi nugken ukumtijamki atushat tikich nugkanum ajapjamawagtatui. Dutijamawagmatai nuwi pujusjumes, wi yaunchuk tibaijim nunú yamai tajim nujai adeagtin atajum. Nuniakjum, ² pegkegchau takatak idaikujum wi tajim dutiksagmek, atum aidautijum uchijum aidaujai betek ataktu Tuke Pujuu atumi anentaimijai, wakanmijai umigkatajum. ³ Nuniagmin Tuke Pujuu atumi Apajuújiya nunú suwimka amamainun wait anenjamag pegkegnum yaimpakgtinai. Nuadui Apajuú atumin

suwimkan amaak, shiwag depetuk yajuaktinme tibau umintai, depetamak yajupakagmatai, tikich nugkanum batsatutiginash Tuke Pujuu awag-tamkiag nii nugkan amasua nuwi itagmawagtinaí. ⁴ Tuja atumi shiwaajum aidau depetamak yajupakagmatai pampagjum, tikich nugkanum shiig atushat batsatutiginash, Tuke Pujuu atumi Apajuíjya nunú yajupak, ⁵ atumi apachjum batsamajakua nuwi ataktu awagtamki itagmawagtinaí. Dutijamawagmatai atum yaunchuk batsamajakuitjum nuwig batsamsat-naitjume. Nuwi batsamsajum Tuke Pujuu yaimpasmatai, takatjumin emkatnaitjume. Nuniakjum atumi apachjum uchigtin aajakua aina nuna nagkaesau kuashat uchigtin atinaitjume. ⁶ Tuke Pujuu atumi Apajuíjum atumjai, tuja atum wegantu agtinjai chichaman umikua nunú kajimattsuk aneaku atajum. Nuniakjum atumi anentaimijai, wakanmijai Apajuí aneau asajum iwaku pujusminjum.

⁷ “Tuja atumi shiwaajum aidau kajegtamainak, aintamiagtina nunú waittsatneme tusa Tuke Pujuu atumi Apajuíjum ditan pegkegchaunum yumigjatnai. ⁸ Dutikamtai atumek Tuke Pujuuwai ataktu waktikijum nii umigkatnaitjume. Nuniakjum chicham umiktin agagbauwa nuna wi yamai umiktajum tajim nunú ashí umiktin atajum. ⁹ Nuniagmin Apajuí atumi takatjumnash, uchigminash, tagku tsakapatnumash, ajak ajakma juutnumash kuashat ikauntugmaktinaí. Nuna Tuke Pujuu atumi Apajuíjum diisa shiig aneastinaí, wagki yaunchuk atumi apachjum aajaku aina nuna yaigkua dutiksag atumnashkam yaimpau asa. ¹⁰ Aatus shiig anenjusti takugmek, Tuke Pujuu atumi Apajuíjum nemagkujum niina chichame umiktin papiinum agagbauwa nunú umiktajum. Nunú umiakjum atumi anentaimijai, wakanmijai ima nigki ememattajum.

¹¹ “Juju chicham umiktin agagbauwa juna yamai wi amaajim duka, atuminig imanikag utugchatchauwai. Nuniaú asamtai, shiig antuka umimainchaukesh atsui, wagki atushtakesh achau asa. ¹² Tuja chicham umiktin agagbauwa duka nayaimpinmakesh atsui. Nuadui atumek: ‘¿Yaki nayaimpinum waka, chicham umiktin agagbauwa nuna juki itaa ujakui antuka umikag?’ tumaitsugme. ¹³ Nuniachkush nayantsa amainigkish atsui. Atum chichaakjum: ‘¿Yaki nayantsa amain chicham umiktin agagbau awa nuna katituk juki itaa ujakui antuka umikag?’ tumaitsugme. ¹⁴ Chicham umiktin agagbauwa duka atumin awai. Nuadui wi atumin umiktajum tiuwaitjim nunú antukjum unuimaju asajum, utugchat akuish betek umiktajum.

¹⁵ “Tuja yamai atum etegkatajum tuu wakegagme nunú. Shiig pujutak wakegajum, atsa waitiamua duka wakegajum. Iwaku pujuta duka wakegajum, atsa jaka megkaetak wakegajum. ¹⁶ Wi yamai atum aidautigmin umiktajum tusan tajim duka Tuke Pujuu atumi Apajuíjum aneau asajum betek umiakjum, nii nemagkujum chicham umiktajum tusa agagbauwa nunú betek umiakjume, iwaaku pujusjum, uchi uyujkattagme. Nuig-tushkam Tuke Pujuu atumi Apajuíjum pegkegnum yumigtamsagtinaí, nii nugka amasua nuwi shiig pujustinme tusa. ¹⁷ Untsu atum nunú ashí umitsuk idaikujum wainka apajuímtai aidau tikishmatjajum emematu yujakjume, ¹⁸ namak Jordán katitkajum Apajuí nugkan amastata nuwi jegagmesh, kuashat tsawan pujutsuk jinaatin ainagme, wi tajim duka ewaetsuk.

¹⁹ “Wi atumin chichagkun: ‘Shiig pujutak wakegajum, atsa waitiamua duka wakegajum, tuja iwaku pujutak wakegajum, atsa jaka megkaetak wakegajum, nunú atum etegkatajum’ timajim nunú tuké uminkatnun

yamai wi taja nunak nayaim nugkajai antamunum tajime. Duka dekas etegkatajum iwaku pujuta nunú, atum wegantu agtina dushakam iwaku pujustin atinme. ²⁰ Tuke Pujuu atumi Apajuújiya nunú ima aneetajum. Nuniakjum nii umigkatajum. Tuja nii tabauwa nunú betek umigkatajum. Nunú betek umiakjumek, atumi apachjum Abraham, Isaac, Jacob aatus aajaku aina nuna Tuke Pujuu atumi Apajuújum nugkan amastinaitjime tusa anagkuawa nuwi jegajum kuashat tsawan pujustinaítjume”, tiuwai.

31

Israel aents aidau apuji atin yamajam adaikamu (Nm. 27.12-23)

¹ Moisés Israel aents aidau ataktu chichajak, juna aatus tiuwai: ² “Wika yamaik ciento veinte mijan ejelai, nuniku asan atushat wetag takunush kakaumainchau dekapejai. Nuigtushkam minak Tuke Pujuu chichagtak, amek namak Jordágkak katitkashtatme tusa tujutmayi. ³ Tujash atumek Tuke Pujuu atumi Apajuújiya nunú eemak wegak uyuuntamsantai wetatjume. Tuja atum shimamunum shiwaajum ayaunashkam nii depetuk ijinattawai. Dutikamtaí dita nugke aina duka atum jukittagme. Atumnak Josué apu wajasu asa, nii yajupak etamtatui Tuke Pujuu atumi Apajuújum tibauwa nunak dutiksag.

⁴ “Atumi shiwaajum aidau nak Tuke Pujuu yaunchuk amorreo aents aidau apuji, Sihón, Og, aatus ashí dita aentsíjai ijinauwa dutiksag ijinattawai. ⁵ Nunú aents aina nuna depetkatnume tusa nii tujamatai depeteakjumek, wi dutikatajum tusan tajim duka dutiksagmek umiktajum.

⁶ Mijamtsuk wajiu wajastajum. Atumi shiwaajum aina nujai maaniakjumesh ishamkagtukaigpa, wagki Tuke Pujuu atumi Apajuújum atumnak kuitamjamui, nuniau asa ima atumnakek kajimatjamkig idaitamsashtatui”, tiuwai.

⁷ Nuna tusa Josué untsuka Israel aents aidau antuinamunum chichajak: “Amek mijamtsuk wajiu wajasta, ametme juju aents aina nunú ya-uakam Tuke Pujuu nugka amastinaitjime tusa amina apachjum aajaku aina nuna anagkuawa nuwi ejegatnumek. Nuadui Israel aents aina duka ame yajuakam nunú nugka nuwig utsattame. ⁸ Tuke Pujuu aminak uyuuntamak, nigki kuitamjamkattawai. Nuniau asa ima aminakek kajimatjamkig idaitamsashtatui. Nuadui amek ishamkagtukaipa tuja sapigmatash sapigmakaipa”, tiuwai.

Diwimdaikamu aidau tsagkugdaitai mijan sieteya nunú jegakui chicham umiktin agagbau ausatin

⁹ Juju chicham umiktin aina nunak Moisés agajui. Tuja sacerdote Levi wegantu aidau Tuke Pujuu chichame umiktin agagbau egkeamun arcan yanakiag shimujakajua nuna ashí Israel aents aidau dita apuji aidaujai kuitamkatnume tusa susauwai. ¹⁰ Nuna susa chichajak:

“Mijan sieteya nunú diwimdaikamu aidau tsagkugdaitai jegatta duwi, ashí Israel aents aidautijum ijunjajum tsawan numi kanawe tsupija aakmaja batsamsamua nunú tsawantin jüstamatajum. ¹¹ Nuadui ashí Israel aents aidau Apajuújai chichatai aak pegkejam carpa aakmaka-bauwa nuwi twakag antuinamunum chicham umiktin agagbauwa nuna ausattawai. ¹² Ashí aents aidau: Aishmag, nuwa, uchi, aents tikich nugkanmaya atumjai batsatu aidaushkam ijunjatnume. Nunikag chicham umiktin agagbauwa nunú augbaun antukag Tuke Pujuu Apajuú eme

anentsa diitan unuimagtinme. Nuninak wajintu agagbauwaita nuna ashí betek umiktinme. ¹³ Atumi uchijum aidau juju chicham umiktina nuna dekachu aidaush antukag, Apajuí nugkan amasagtata nuwi namak Jordán katitkajum batsamsattajum, nuwi batsamsash kajimattsuk Tuke Pujuu Apajuí eme anentsa diitan unuimagtinme”, tiuwai.

Tuke Pujuu Moisésan inagnak jintintuamu

¹⁴ Nuna tusa inagnaku ai, Tuke Pujuu Moisésan chichajak: “Ame jakatnuk tsawantak jegawai. Nuniau asantai Josué untsukam niijai aak pegkejam aakmakbauwa nuwi tantatajum. Nunikagmin wi atum dutikatnun jintintuatjime”, tiuwai.

Tusa tima Moisés Josuéjai aak pegkejam Apajuújai chichatai aakmakbaunum weajui. ¹⁵ Nunik jegawagmatai Tuke Pujuu nuwi yujagminum pachitkau wantintuk, nunú aak pegkejam aakmakbau waitijin wajantun asauwai. ¹⁶ Nuwi Apajuí Moisésan chichajak:

“Ame jakatnuk namput wajaschae. Nunika jakamin juju aents aina duka nugkan jukiagtata nuwi jegawag, nuwa aishin ukuak tikichjai weama numamtuk nuwiya aents aidau apajuímtai aina nuna emematuinak minak kajimatjukiag, wi ditajai chichaman umikuitag nunashkam umikchagtinai. ¹⁷ Nunidau asagmatai wishakam senchi kajegkan makichkish puyatjutsuk idaisagtinaitjai. Dutika ai shiig senchi waitu batsatu asa makichik tsawantai chichainak: ‘Ii senchi waituinag duka Tuke Pujuu iina Apajuúji idaitamsa nuadui imanika waituinaji’, tiagtinai. ¹⁸ Nuna tusa tuinakuish, wika ditanak antugtsuk idaisagtinaitjai, wagki pegkegchaun takainak tikich apajuímtai aidaun ememetiaju asagmatai”, tiuwai.

¹⁹ Nuna tusa Moisésan chichajak: “Juju kantamtaiya nunú yamai agagta. Dutikam Israel aents aidau jintintuata. Nuna unuimajag, kantamainak chicham umiachkugminig, wi suwimka amastinaitjime, tusa tiuwaitag nuna tuke adeagtin atinme. ²⁰ Wagki wi dita apachji aajaku aina nuna anagkuakun, nugka pegkeg ajak shiig tsapaun amastinaitjime tusa tiuwaitag nuwi yajuakan egegawaja ai batsamas, shiig yuwawag ejemakag duwekag tikich apajuímtai aidaun emematuinak mina kajimatjukiag, wi ditajai chichaman umikuitag nunak umikchagtinai. ²¹ Nunik batsamas kuashat waituinak, juju kantamtainum agagbau chichaak: ‘Atum mina umigtachkugminig tuke suwimkan amastinaitjime’ tiuwaitag nuna adeagtin atinme. Tuja dita wegantu aidaushkam nunú kantamtaiya nunak kajimattsuk kantamtin ainawai. Wi nugka amastajime tusa tiuwaitag nuwi eke ejetsaig, nuwi jegawag dita pegkegchau takastinjinak emtika anentaimtuina nunak wika shiig dekajai”, tiuwai.

²² Tusa tima, nunú tsawantak, Moisés kantamtain agajui. Dutika agag Israel aents aidau jintintuauwai unuimagtinme tusa.

²³ Tuja Josué Tuke Pujuu juna aatus chichajak: “Mijamtsuk wajiu wajasta, ametme juju aents aina nunú yajuakam wi nugka amastinaitjime tusan anagkuawaitjim nuwi egeatnumek. Tuja wi aminak kuitamkattagme”, tiuwai.

²⁴ Tuja chicham umiktin aidaun Moisés papiinum agag ashimak, ²⁵ sacerdote Leví wegantu aidau Tuke Pujuu chichame umiktin agagbau egketun arcan yanakiag shimujakajua nuna chichajak:

²⁶ “Juju chicham umiktin agagbauwa nunú jukijum Apajuí chichaman atumjai umikua nunú agagbau egkeamu arca puja nuwi ayauntsa apusatajum. Juju agagbauwa nunú atum Tuke Pujuu atumi Apajuújum

umigchakjum waittsatnaitjum nuna anemtijamjatnai. ²⁷ Wagki atumek aents antakchau intimkiu ainajum nunak wika shiig dekajai. Wi atumjai iwaku pujag duikish atumek Tuke Pujuuwai shiwagmaejume. Nunin aidautigmesh ¿wajukatnuk ainagme wi jakamtaish?

²⁸ “Leví aents aidautijum, Israel aents aidaun apuji aina nunú, tuja nuigtu maki makichik wegantu aina nuna apuji múun aidaujai, ashí untukjum ijumjatajum. Dutikawagmin wi atum aidautigmin jintintuajim dutiksanuk ditanash shiig ujakagtajai. Dutikakun nayaimpin nugkajai pachisan dita antuinamunum dekas uminkatna nuna titajai. ²⁹ Wagki wi jakamtaig pegkegchaun takainak wi dutikatajum tiuwaitag nuna idaisagtina nunak wika dekajai. Nuigtush atak tikich tsawan atina duwi Apajuí emtin pegkegchaun taka batsamas Tuke Pujuu kajegka suwimak susam kuashat waittsagtina nunashkam dekajai”, tiuwai Moisés.

Moisés kantamamu

³⁰ Nuna tusa Israel aents aidau ashí tuwakag antuinamunum yama nagkamchaku agagbaunum nagkama juna aatus Moisés kantamauwai:

32

¹ “¡Nayaimpih, nugkah, wi chichaktatag nunú shiig antuktajum!

² Wi jintinkagtamua duka yumijai betek yutugtatuí, Mina chichamjuk yumi sajatama nujai betek atatuí. Yumi ujumak yutug chijichin uchupiamá nujai betek atatuí.

Yumi senchi yutak dupan uchupiamá nujai betekai.

³ Tuke Pujuu daaji pachisan nigka pegkejai, múuntai tusan etsegkatjai.

¡Atumshakam, iina Apajuíjiya duka dekas múuntai titajum!

⁴ Niyai iina kuitamjamnuk.

Nii takamujiya duka betek uminnai.

Niig Apajuí dekaskenum chichauwai.

Niig pegkegchaunak takachui.

¡Niig pegkegmai,

tuja nuigtush waitjuchui!

⁵ “Israel aents aidauwah, atumek pegkegchau ainagme.

Pegkegchau takakjum Apajuí ikajin ainagme.

Nunin asajum Apajuí uchijig amaitsugme.

⁶ Tuke Pujuu atumin kuitamjama duwika ¿aan iikuajum?

Atumek yachachu,

anentainkachu ainagme.

¿Apajuíchukai atumi apa najapauwa nunú?

¡Apajuíyai amina najapa uyujtamak senchimtijamauwa duka!

⁷ Ataktu awagkijum anentaimsatajum,

nuniakjum adeagtajum

yaunchuk aajakua nunú.

Tuja atumi apaji aidau, tikich múun aidaujai

yaunchkesh pujutash wajuku ayi tusajum iniastajum.

⁸ Apajuí aents aidaunak akanag
maki makichik chichamtin,
nugkentin emak batsasai;
tujash atum Israel aents aidautigminak Apajuí
makichik nugkanmak ijupag kuitamjamui.

⁹ Apajuik Jacopa uchiji wegantunmaya aidautin
etegtamjauwai niinu agtinun.

¹⁰ “Nuadui, uwejush nugka buku, yumi atsau,
dase umputainum
batsatjin, nii kuitamjamak jintinjauwai.
Dutijamak makichik aents niina jiin shiig kuitamama imatikas kuitam-
jamkauwai.

¹¹ Apajuik ukukui niina
nanapen uchijin dukuka
kuitamama numamtuk iinak kuitamjamnai.
Apajuik, ukukui niina uchijin kuitamak
niina nanapen pataja juwama numamtuk
kuitamjamak ishamainnumian uwentijamjauwai.

¹² “Tuke Pujuuwa nunuwai
iina uyuntamsauwa duka, tikichik atsawai.
¡Tikich wainka apajuímtai
aina duka makichikish yaimpakchauwai!

¹³ Apajuí depetmitkagmak
jujamki nugka pegkeg ajak shiig tsapau,
nain aidaun sujamsaje.
Nuwiya dapa yumiji buchignum ayaun
amasaje uwagtinme tusa.
Nuwiya ajak aina nunashkam
amasaje yuwatnume tusa.
Tuja nugka kuashat kayagkamunum
olivo ayá nuna aceitejinchakam amasaje.

¹⁴ Tuja baka aidau muntsuji
ijugbau kantentikamu aidau,
tuja uwija muntsuji ijugbau aidau
kuashat ajutjamiugme.
Tuja uwig duwejam aidau,
uwig tsakat duwejam aidau,
nuigtu cabra shiig kuashat Basán nugkanum
aajakua nuna neje yuuyugme.
Nuigtushkam trigo shiig pegkeg yuuyugme,
niniakjum uva yumiji ijugbau
kapantu umuyugme.

¹⁵ “Tujash Jesurún* aidautigmek kuashat tagkugtin,
kuashat ajakjintin wajasjum nunú yuwakjum duwekugme.
Imanika duweku asajum,
kuntin uduwejam niina ujen winchamtin wajas pempeentuki
niina kuitamnun tukumama numamtuk

* 32:15 “Jesurún” tawa nunak “Israel aents aidaun shiig anentus adayak” tuu adaikau ainawai.

Apajuí shiwagmauwaitjume.

Apajuíyai atumi najapauwa duka.

Nunin aig atum dakitakjum idaisauwaitjume.

Apajuíyai atumin kuitamjamak uwemtijamjauwa duka.

Nunin aig atumek kajegkauwaitjume.

¹⁶ Atumek dakumka najanamu

aidaun Apajuí dakita nunú

emematkujum, Apajuí senchi

ikajkauwaitjume.

¹⁷ Nuadui Apajuí emematmaina nunú

idaikujum, wainka apajuímtai aina nunú

ememattag tusajum

kuntin maajum apejakuitjume.

Atumi apachjum aajaku aina dukesh

wainajakchamu, tuja ememattanakesh

emematchaju aina nunú,

atumek yama wainmawaik emematjume.

¹⁸ Israel aents aidauwah,

atumek atumi Apajuíjum kuitamjamna

duka kajimatkiugme.

Apajuí pujutan amasua nunú kajimatkiugme.

¹⁹ Nuadui Tuke Pujuu atumnak,

niina uchiji nawanji ajuminig idaitamsaje.”

²⁰ Nuadui Apajuí chichaak:

“Atumek aents pegkegchau ainagme.

Atumnak kajittsa diimainchau dekapeajime.

Nunin asagmin atumnak nuigtuk yaigchattajime.

Wajukatagmek nuna dakastajime.

²¹ “Atum aidautijum wainka apajuímtai

kakachau, dekachu aina nunú emematkujum

mina kajemtijakjum akasmau etagme.

Nuadui Israel aentschau aidau

chichagmash makichkish antakchau aina

nuna wi yayaakui, atumek

kajeakjum waittsattagme.

²² Mina kajetjua duka jijjai betek kegawai.

Iman asa ashí nugka najatamunum kegak

nugkanak ajak aidaujai apea emegkaktatui.

Nuniak muja aidounmashkam keettawai.

²³ Wi atum aidautigminak ashí pegkegchau aina

nuna ishikattajime waittsatnume tusan.

²⁴ Dutika ai nujantai, nuigtu tsuweakjum jinattagme.

Tuja jata ishamain iyanjamag ijipattawai.

Nuigfushkam kuntin kajen aidoun,

dapi aidoun ishikattajime.

²⁵ Atumi uchijum aidauk jintá

maa aepeam agtinai.

Tuja atumi jemina aidoushkam

senchi sapigmagtinai.

Imaaninak uchi tsakat aidau,

nuwauch tsakat aidau, múuntuch aidau,

uchi muntsu muntsuaku aidaush jinawagtinai.

²⁶ “Tuja wi anentaimsan, tikich nugkanum dapampaakan utsagtajai, dutika ai dita wegantu aidau megkaejamtai, pachisaish augmatchatai juwaktin ati tusan anentaimsabiajai.

²⁷ Tujash nuna dutika ai shiwag aidau mina pegkegchau chichagtuinakui, antutan dakitakun dutikachmaijjai. Wi dutika ai mina shiwag aidau ememas chichainak: ‘Tuke Pujuu Israel aents aidaunak jii jag utsagchabi, jutii aidaui iina senchijjai jii ja utsagmajji’, tumain asagmatai idaisabiajai.

²⁸ Israel aents aidauk pegkegchau shiig anentainkachu ainawai.

²⁹ Atumesh shiig anentaimkau ainakjumek, wi suwimkan amastinaitjime tusan tiuwaitjim nunú shiig dekau amainaitjume.

³⁰ Atumesh anentaimsagmesh diyagmek, ¿atumi shiwaajum aina nuwiya suntag ima makichkitak mil suntag Israel aents aidaun ipisig ishiakua dusha? ¿Tuja atumi shiwaajum jimagchik suntajaitak, diez mil suntag Israel aents aidaun ipisjauwa dusha?

Nunak Tuke Pujuu atumi kuitamjamna nunú, shiwag aidau depetuk amuktinme tusa tiu asamtai dutijamau ainawai”, tiuwai.

³¹ Iina shiwaaji aina nuna apajuímtaiji aina duka iina Apajuíjiya nujag betekchauwa nunak ditak shiig dekeinawai.

³² Dita aidauk sodomanmaya aents, gomorranmaya aents aajaku aina nujai betek ainawai, nuadui dita aidauk uva pegkegchau yapau yuwa jamainun nejemaina nujai betek ainawai.

³³ Nunú vino dita umutaiji aina dushakam dapi tsagke magkagtina nujai betek ainawai.

³⁴ Tuja Apajuí chichaak: “Wi Israel aents aidaun ayamjakun dita shiwaaji aidaun tsaitinaitag nunak etseggashtatjai. Duka makichik waji akik uukam egkemama numamtinai.

³⁵ Witjai suwimka sukagtinnuk, nuniau asan tsawan jegakui, wi suwimkanak susatnaitjai, wagki nii waittsatna duka tsawantak jegawai. Tuja nii suwimak jukitnuji umigkamua duka tsawantak uminui”, tiuwai Apajuí.

³⁶ Tuke Pujuu niina aentsji aidau kakaag ayamjumamainchaun wainu asa ayamjuktatui.

Ditan ashí amuinak aents inaku waitkatai,
tuja agkan batsamin aina nujai
amukam kakaumainchau dekaapeagtai,
Apajuí wait anentug,

³⁷ chichajak: “¿Ii apajuímtaiji aina juju ayamjutpaktatui tusajum,

³⁸ nunú emematkujum

kuntin maa apeamua nuna wiyaji yuwakjum,
umutai vino nii anagkuamu umuyujum dusha tuwi batsatua?

¡Nunú nantajag atum waitiajum nuna ayamjutpaktinme!

¡Nunú kaunawag kuitamjamkatnume!

³⁹ Ima Wikitjai Apajuínuk.

Tikich Apajuík makichkish atsawai.

Witjai pujuta sukagtinnuk,

tuja wikitjai pujuta ataínnuk.

Witjai suwimka sukagtinnuk, tuja wikitjai tsagkugkagtinnuk.

¡Mina suwimkajua nuna uwemtumainuk
makichkish atsawai!

⁴⁰ Mina uwejun nayaimpinum takuajai,
nunikan wika Tuke Pujuu asan,
wi dutikatnujun pachisan tajai.

⁴¹ Mina puyagjun winchamtinun etsaka jukin,
ya aidaüwa pegkegchaun takainak
mina shiwagmatuínak kajegtuínawa nuna
ijinatasan nagkamattajai.

⁴² Dutikan kuashat aentsun ijinkun
mina puyagjunak numpeagtatjai.

¡Makichkish uwemjachagtatui!

¡Shiwag ijinku nuna apuji aidau achija yajuakbau aina nunashkam ashí
ijinattajai!

⁴³ “Nuadui ashí tikich aents
judíochu aidaütigmesh Apajuí aentsji aina
nujai ijunjajum dakujustajum.

Apajuí niina takajin aidau ijituamunum
atumi shiwaajum aidaunak ijinattawai.

Dutikak niina aentsji aidaunak wait anentug
ditá tudaujinak tsagkujattawai”, tiuwai.

Moisés inagnaku jintinkagtuamu

⁴⁴ Moisés Josuéjai Israel aents aidau batsatbaunum jeganta dita antuina-
munum yama nagkamchak agagbaunum nagkama kantama amukui.

⁴⁵ Nuna ashí kantama inagnak, ⁴⁶ nuadui Israel aents aidaun chichajak:
“Wi atumin jintintuajim nunú shiig antuka jukitajum. Nunikjum atumi
uchijum aidau jintintuatajum, dutikawajam ditashkam chicham umiktin
agagbauwa nuna ashí betek umiktinme. ⁴⁷ Tuja juju chicham umiktin
agagbauwa nunú wainkaya nunin diyakjum umitsuk idaisaipajum. Juju
chicham umiktina nunú atumnak pujutan amawai. Nuniau asamtai,
Apajuí nugka anagtamaüwa nunú namak Jordágka amain awa nuwi
jegagmesh, nunú umiakjum kuashat tsawan pujustinaítjume”, tiuwai.

Apajuí Moisésan Canaán nugkan wainkati tusa iwaintukbau

⁴⁸ Nunú tsawantin Tuke Pujuu Moisésan wantintuk chichajak: ⁴⁹ “Muja Abarim tutaya nuwi wetá, nunikam muja Nebo tutai Moab aents aidau nugkan yaakat Jericójai niinis awa nuwi wakata. Nunikam, nuwi wajasam Canaán nugkan wi Israel aents aidaun susattag nunú diista.

⁵⁰ “Nunú mujanum wakattam nuwi amek amina yatsum Aarón Hor nugkanum jakauwa nunismek jakattame. ⁵¹ Atumek yumi pukuni jiinbau Meribá-cades tutaya nuwi Israel aents aidau yumi umumain atsutai chichamjuinakui, wi nunú dutikatajum tusan uwejush Sin tutainum tiuwaitjim nunú umikchauwaitjume. Nunú nugkanum Israel aents aidau yumin sumainakui atum mina eme anenjamu ditá emtin iwainakchau ainagme. ⁵² Nuadui wi Israel aents aidaun nugka susattag duka amek ayatak ikaa wajasam wainkattame. Tujash amek nuwig wayashtatme”, tiuwai Apajuí.

33

Moisés Israel aents aidaun pegkegnum yumigjamu

¹ Apajuí inake Moisés, nii jakatnuji jegamtai pujusa, Israel aents aidaun pegkegnum yumigkiak, ² juna aatus tiuwai:

“Tuke Pujuu jutijai pujustatus
muja Sinaínum tauwai,
tuja nugka Seirnum nagkamas
niina tsaaptinjig etsanjabi.
Nunik etsantug yaakat Parágnum
nagkamas uyuuntamsabi,
tuja diez mil ángel aidaujai
weak, niina uweje untsujiya
duwi chicham umiktin agagbaun takakuyi.

³ Tuke Pujuuk niina aentsji aidaunak aneawai,
tuja niinu etegjamu aidaunak kuitamui,
nunú aidau Apajuín emematuinawai,
nununak nii umiktajum tibaun uminawai.

⁴ Moisés chicham umiktin
Jacob wegantunum tuke asatna nuna Apajuí susamun juki amasajui.

⁵ Apajuík Jesurúnkan apuji wajasui.
Apajuík Israel aents aidaun apuji aidaun apuji,
tuja Israela uchiji maki
makichik wegantu aidau
ijunjajua nuna apuji wajasui”, tiuwai.

⁶ Tuja Rubén wegantun pachis Moisés juna aatus chichajak:
“¡Rubén wegantu aidauk tuke batsamsatin agtinai!
¡Aishmag ujumak ataish,
jinaa megkaejashtin ainawai!” tiuwai.

⁷ Tuja Judá wegantun pachis Moisés juna aatus chichajak:
“Tuke Pujuwah, Judá wegantu
aidau amina segapainakuig antugkata.
Ataktu awagkim tikich aents

Israel wegantu aidau batsatbaunum ijumjata.
Amina senchigmijai ayamjukta, dutikakum yaigta
niina shiwaajinish ayamjumakti tusam”, tiuwai.

8 Tuja Leví wegantu aidaun pachis Moisés juna aatus chichajak:

“Tumim Urim* aina duka aminu ainawai.
Nunú Leví wegantu amina
sacerdotejum aidau
ame tabaun betek umigtamin
aina nunú susauwaitme.
Tuja Masá nugkanum ame dita dekapsauwaitme,
dutikakum Meribá
nugkanmashkam amina aentsjum aidau
yumi susauwaitam nuwi senchi jiyakuitme.

9 Leví wegantu aina duka
ame chicham umiktajum tiuwaitam nuna
puyatjus uminawai, nuninak kakanmamainawai
ame chicham tibauwa nuna betek umikagtatus.
Nuna ima senchi dita patayin nagkaesau
eme anentuinawai.
Nunidau asag ditá apaji aidaun
dukuji aidaujai chichajuinak:
‘Atumnak wika dekatsjime’ tuinawai;
tuja dita yachi iwai aidaun, umayi iwai aidaun,
tsakat aidaunashkam chichajuinak:
‘Wika atumnak dekatsjime’ tuinawai;
tuja ditá uchiji aidaun nawanji aidaujai chichajuinak:
‘Dekatsjime yatsu ainajum’ tuinawai,
wagki ditak ashí Apajuí umigtan
idaaisaju asagmatai.

10 Dita ainawai amina chichamem umiktin
agagbau aina nuna Jacob wegantun
jintintuina duka.
Dita ainawai kugkuin incienson
kuntin maa apeamujai jukiag,
aak pegkejam aakmakbaunum
nunú patasa apetai puja nuwi pataina nunú.

11 Nuadui Tuke Pujuuwah,
dita amina umigtamainak
puyatjusag takaina nunú
pegkegnum yumigsata.
Dutikakum dita shiwaaji aina
dushakam ame ijinata,
tuja ditan kajejin aina dushakam
ataktu wakitkig waitkaschatin atinme”, tiuwai.

12 Tuja Benjamín wegantun pachis Moisés juna aatus chichajak:

“Tuke Pujuuwah, amek Benjamín
wegantu aina duka aneame.
Nuadui ditak shiig aneasag batsatui.

* **33:8** “Tumim, Urim”: Juka makichik wajich najanamu aajakui, nuna sacerdote Apajuíjai chichastatus wayak jujaku ainawai. Nujai dekaajakajui Apajuí wakegamush tukita nuna.

Amek múun ashí senchigtinaitam ibau asam
tuke kuitamtinaitme.
¡Nuadui ame kuitamsam batsamsagtinaí!” tiuwai.

¹³ Tuja José wegantu aidaun pachis Moisés juna aatus chichajak:
“Tuke Pujuu niina nugkenak
pegkegnum yumigsatin ati,
dutikamu asantai, nayaimpinmaya yumi yutak,
tuja nugka initkeniash yumi pukuni jiinainak
niina nugkenak tuke uchupsagke atinai.

¹⁴ José wegantu aidauk dita ajakmamujinian
maki makichik mijantin
ajak juut nantu jegatai, shiig
kuashat juuka yuwagtinaí.

¹⁵ Dita wegantu aidau ajakmamujig, ikam aidau,
muja aidau ayá iman aidaun juwagtinaí.
Tuja muja makichkish megkaechauwa iman tuke atinai dita ajakmamu
aina duka.

¹⁶ Dita nugkenig yujág shiig
pegkeg aidau piyaktinaí.
Nuadui nii wegantu agtina
nudaushkam imanisag ajiti tusam yaigta.
Wagki ame mina zarza kegamunmaya wantintugkam,
amina aentsjum aidaun yajuak emati tusam etegtuawaitam,
dutiksamek ame Josék niina yachi iwai aidaun,
ekeu aidaun apuji ati tusam etegkauwaitme.

¹⁷ Tuja Efraín wegantunmayag
suntajak shiig kuashat agtinaí,
tuja Manasésnumiashkam aents maanin aidauk shiig kuashat agtinaí.
Nunú aina duka toro uchiji
yama nagkamchak petsakbau pegkejama iman,
búfalo senchigtinama iman agtinaí.
Iman asag ashí aents tikich
nugkanmaya aidaunash, ditá
senchijjai depetkatin ainawai”, tiuwai.

¹⁸ Tuja Sabulón wegantun Isacar wegantujai pachis Moisés juna aatus
chichajak:

“Sabulón wegantu aidautigmek shiig aneastajum,
atumek nayantsanum yujasjum tikich nugkanum waji sujitin asajum.
Untsu Isacar wegantu aidautigmek
aakchinmak batsamsajum,
kuntin tagkumajum shiig
kuashat uyugkajum shiig
aneasjum batsamsagtinaitjume.

¹⁹ Nunik batsamas tikich Israel aents aidaun
ipaa mjanum yajuak iwajagtinaí.
Dutikawag nuwi batsamas,
ame dutikatajum tusa timauwa nuna uminak
kuntinun maawag apeagtinaí.
Tuja nayantsanum waji pegkeg kuashat ayá
nuna tikich nugkanum yujasag sujiagtinaí.
Nuninak nayantsanmaya

yutai aidaun yuwagtinaí”, tiuwai.

²⁰ Tuja Gad wegantun juna aatus Moisés chichajak:
 “¡Apajuíyah, ame Gad wegantu aidauk
 nugka múun susatnaitme, nuadui
 amina see tujamainak emematjamtin ainawai!
 Gad wegantunmaya aidauk león dakamama
 numamtuk dakamak
 aentsun maakug kuntujin tsupijug,
 buuken tsupijug ukutnai.

²¹ Israela uchiji aidau maki makichik wegantu
 aina nuna apuji aidau Canaán nugkan
 tesagdayagtaish, Gad wegantu aidau
 ima muuntan jukitnai apu aidau juinamujai betekak.
 Dita aidauk ame dutikata
 timauwa nuna umikagtin ainawai.
 Dita aidauk pegkegnum
 chichajam agtinai, wagki
 ame Israel aents aidau
 umiktajum timauwa nuna umidau asag”, tiuwai.

²² Tuja Dan wegantun Moisés juna aatus chichajak:
 “Dan wegantu aidauk león tsakat
 kuntu tsekentama nujai betekai,
 iman asa niina shiwaajin jeteakug, nugka
 Basánum nagkamas tsekenti jiintawai”, tiuwai.

²³ Tuja Neftalí wegantu aidaun Moisés juna aatus chichajak:
 “Neftalí wegantu aidaunak Tuke Pujuu
 shiig anentus diyawai,
 Ame Apajuíyah, ditak kuashat
 pegkeg aidaunum yumigsauwaitme.
 ¡Nuadui kucha múun Galilea tutaya duka
 nujinum nagkamas tsumujiya
 aatus ditanu atinai!” tiuwai.

²⁴ Tuja Asher wegantu aidaun Moisés juna aatus chichajak:
 “Apajuíyah, ame Aserak Jacopa uchiji
 tikich aina nuna nagkaesau
 pegkegnum yumigsata.
 Dutikamu asamtai, niina yachi aidau
 eme anentsa diitai ati.
 Tuja kuashat olivogtin asa
 aceitejishkam imanisag ajitin ati.

²⁵ Niina yaaktaji aidauk,
 tuja jee aidaushkam kuashat waitigtin atinai.
 Tuja nunú waiti aidauk jiju hierro,
 bronce aina nujai najanamu asamtai,
 niina shiwaajish kakajus utumainchau atinai”, tiuwai.

²⁶ “Jesurúman Apajuíji atumin
 yaimpaktatus niina senchijjai yujagminum

egkemak minina imanuk tikichik atsawai.

²⁷ Apajuí Tuke Pujuuwa nunuwai
amina ayamjumataigmek.
Niig tuke senchigtina iman asa amina yaimpawai.
Ame wainminig amina shiwajumnak
uwakek ipisiak ijinata tusa amina inapawai.

²⁸ Israelak ishamkagtutsuk kajinas pujustinai.
Nii wegantu aidaushkam agkan
utugchat atsaunum batsamsatin ainawai.
Niina nugke aidaunmash trigo aidauk
shiig kuashat aitnai, tuja uva ajakmaushkam
imanisag aitnai, tuja yumishkam tuke
yutitnai, nuniau asamtai, yuminak atsumchatnai.

²⁹ ¡Israel aents aidautigmek
shiig aneastajum, wagki atum
kuashat asajum eme anentai ainajum
imanuk tikich aents aidauk atsawai!
Atumnak Tuke Pujuuwa nunú uwemtijamjaugme.
Nii atumnak kuitamjamui.
Tuja nigki ayamjutpaktatui.
Atumi shiwaajum aidaujai maaniagminish,
niyai depetmitkagbauk.
Nuadui shiwag aidauk atumiin yunumjagtinai.
Nuninakuí atum wagagkijum
ijinatin ainagme”, tiuwai Moisés.

34

Moisés jakamtai ukusbau

¹ Nuna tusa inagnak, nuadui Moisésak uwejush Moab nugkanum
pujau juwaki, muja Pisgá tutai Jericójai niinis awa nuna titijin Nebo
tutainum wakauwai. Nuwi wakamtai Galaad nugka múunta nuna
wainkati tusa Tuke Pujuu iwaintukui. Tuja Danka nugkenashkam
iwaintukui. ² Nuigtushkam Neftalí, Efraín, Manasés aina nuna nugke
aidaun iwaintukui. Dutikak Judá nugke nayants Mediterraneo tutaya
aatus awa nunashkam ashí iwaintukui. ³ Tuja nuigtushkam Néguev
nugkan, Jordágka pakajin, yaakat Jericó palmera ain tuuta awagmatia
nuna, tuja yaakat Sóar tutaya imanui iwaintukui.

⁴ Dutika duwi, Tuke Pujuu Moisésan chichajak: “Au nugka auwai,
wi Abraham, Isaac, Jacob aajaku aina nuna, atum wegantu aidaun
nugkan susatnaitjai tusa tiuwaitag duka. Wi aminak au nugka awi
washtinaitkush, wainkati tusan wakegau asan iwaintukjame”, tiuwai.

⁵ Aatus Moisés Apajuín inakega duka Moab nugkanum jakauwai, Tuke
Pujuu tibaunak imatiksag. ⁶ Nunik jakamtai Moab nugka pakaji, Bet-
peor tutaya nujai niinis awa nuwi ukusbauwai. Tujash dekas tuwig
ukusbauwaita nunak yamaikish dekainatsui. ⁷ Moisésak ciento veinte
mijan ajamu, wajiú, wainmatnash shiig wainbau, jamantuchu pujayatak
jakauwai.

⁸ Moisés jakamtai Israel aents aidau Moab nugkanum uwejush batsamas
treinta tsawantai buutiaju ainawai. Aatus nii jakamtai buutuinak, aents
jakamtai buutku iman tsawan pujutainak betek ejeyajui.

⁹ Moisés eke iwaku pujusa Josué buuken achika Apajuín segatiuwai, Israel aents aidaun yajuakash wajuk ematki nuna Apajuí dekamtikati tusa. Dutikamu asamtai Tuke Pujuu Josué antugkatnume tusa Moisésan tibauwa nunak imatiksag Israel aents aidauk Josué tabaun umikajui.

¹⁰ Tujash Tuke Pujuu Moisésjai igkunia chichajakua imanuk tikichik Israel aents aidaunmaya Apajuí chichamen etsejin profetak makichkish atsujakui. ¹¹ Tuja wainchatai ishamain aidaun iwainagti tusa Tuke

Pujuu tibau asa, Moisés Egipto nugkanum faraógka emtin niina atuwe aidaush wainainai iwainajua imanuk tikich aentsuk makichkish atsujakui.

¹² Tuja Moisésak senchigtin asa, wainchatai ishamain aidaun atum Israel aents aidautijum wainjumin iwainajua imatika iwainamainuk tikichik makichkish atsujakui.

Josué Canaán nugka utuamu

(1—12)

Apajuí Josuén mina takagtusta tibu

¹ Tuke Pujuun takajin Moisés jakamtai, Nun aajakua nuna uchiji Josué Moisésan yaijakua nujai Tuke Pujuu chichaak:

² “Mina inakeg Moisésak jakae. Nuniku asamtai, ame yamaik Israel aents aidau ashí yajuakam, wi atumin nugkan amastatjim nuwi weakum namak Jordágnun ikatiagtatme. ³ Wi nugka amastinaitjime tusan Moisésan anagkuawaitag nunak, imatiksasuk nugkanak ashí amastatjime. ⁴ Nunú nugkak muja Néguéw tutaya nuwi nagkamas, muja Líbano tutaya aatus, namak shiig múun Eufratesa imanui nagkamas, hitita aents aidau nugkega nuna ashí, tuja nayants Mediterraneo tutai etsa akaetaiya nuni awa imanuishkam ashí atumin amastatjime. ⁵ Aminak makichkish depetamkashitin ainawai. Moisésan kuitamajakuitag dutiksasuk wi aminak kajimatki idaitsuk tuke kuitamkattagme. ⁶ Nuadui kakajam, waji waja, wagki wi atumi muunjum aajaku aina nuna anagkuakun nugkan amastatjime tiuwaitag duka ame Israel aents aidau tinamkattame. ⁷ Wika aminak, ¡wajiu kakajam ata! tusan ima nunak segajame. ¡Nuniakum chicham umiktinun mina inakeg Moisés amasua nunú ashí betek umikta! ¡Nunú wajintu agagbauwaita duka imatiksametak ashí umikta! ¡Nunú ashí umiau asamin, ame takamugmesh ashí pegkeg atatu! ⁸ Chicham umiktin agagbauwa duka tuke ausamke ata. Nuniakum tsawaish, kashish tuke ima nuwig anentaimta, wajintu agagbauwaita nunú umiktag tau asam. ¡Nunú betek umiakmek, ame takamugmesh ashí pegkeg atatu!

⁹ “¡Aishmag waja! Wi aminak inajan awemagme. ¡Shamk-agtukaipa, awakesh anentaimjaipa, wagki witjai Tuke Pujuu amina Apajuígninuk! Tuja ame tuwi wekaetatme nuwi wika amejai pujuttajai”, tiuwai.

Josué Israel aents aidau yajuak Canaán nugkanum wetatus umintsamu

¹⁰ Tusa tima Josué Israel aentsu apuji aidau chichajak:

¹¹ “Aents aidau batsata nuwi shiyakjum, ashí etsegkatajum, jintá weaku yuwatnun umiktinme. Tuke Pujuu iina Apajuíjia nunú nugka amastata nuwi weaku kashin pujusa tsawaku namak Jordán katitkattaji”, tiuwai.

¹² Aatus akateg ishimak nuigtushkam Rubén wegantu aidau, Gad wegantu aidau, Manasés wegantu jimaituk aidau akatmamtak:

¹³ “Atumesh nugkentin agkan batsamsatnun, Tuke Pujuu atumin Apajuígmia nunú juju nugka juna amastatjime tusa Apajuín inake Moisés tiuwa nuna aneaku atinme, tujamui. ¹⁴ Nuadui juju nugka namak Jordágka amain ii pujag juna Moisés atumin amasua juwi, atumi nuwe aidau, uchijum aidau, tagkujum aidaujai batsaktajum. Untsu ashí aents maanimain aidautigmek maaniaku jutai aidau yajuaka umintsajum, Jordágka amain katiagjum atumi yatsum aidau maaninakui atuktajum.

¹⁵ Dutika atukjum, Apajuí atumin nugkan amasua dutiksag, ditanashkam

agkan batsamsatnum nugkan susatta nuna shiig emetjagmatai, waketjajum juju nugka Jordágka juni awa juna, Moisés atumin amasua juwi kaunajum tuke batsamsatnaitjume, tawai tita”, tiuwai.

¹⁶ Tusa tima ditashkam imatiksag ujakajui. Nuna antukag dita aimainak:

“Ame tame duka imatiksaik ashí umikagmi. Tuja ame tuwi wetajum tuk-agtittame nuwi shiyakagmi. ¹⁷ Yaunchuk Moisés tujamkui umijukaitag, dutiksaik ame tabaushkam tuké umiktinaitji. Tuja iik wakegaji: ¡Apajui Moisésan kuitamajakua dutiksag aminash kuitamjamkati! tusa. ¹⁸ Tuja ashí aents amina chichamjumin intimki umigtamchauk mantamnati. ¡Iik wakegaji ame kakajam, wajiu ati! tusa” tiajui.

2

Aents aidau uumak yujasag yaakat Jericón dekatnume tusa Josué ishiakbau

¹ Sitim nugkanum batsamas, aents uumak yujas dekatatin aidaun jimag aentsun etegka Josué ishimak: “¡Wetajum, nunikjum nugkash wajukukita nunú yaakat Jericójai diistajum!” tiuwai. Tusa tima shiyakag Jericónum jegawajui. Nunikag nuwa akika dutiktai Rahab pujaunum nuna jeen jegawajui, nuwi kajigkagtatus. ² Nunikagmatai aents nuna wainkau Jericó apujin jegajua ujaak: “Ujumak aents Israel aents aidau dekamatus yamai kashi kaunawagmae”, tiuwai.

³ Tusa ujakam Jericó apuji niina suntaji aidaun Rahab ujaktajum tusa ishimak:

“¡Aents aidau amina ijagtamainak amina jemin kauna batsata nunú jiija ishiakta, wagki ditak iina nugken dekatatus yujawai!” tusa akatmamtujuu. Tusa tima shiyakag imatiksag ujakajui.

⁴ Tusa ujakmash jiija ishimtsuk uuka batsas chichaak:

“Nunú aents aidauk dekas mina ijagtuinak kaunawagmae. Tujash dekachmajai tuwiyas agma. ⁵ Juwi batsatu kiitai jiiinag shiyakagmae. Wagki nuniai yaaktanum waitain waitin epenin agma duwi. Tujash tutsu wegagma nunak dekachmajai. Yamaik pataetakjumek amainamain ainagme”, tiuwai.

⁶ Tujash nunak niina jeen tuntupe pakamamunum, lino juuka jigkaka ujugkatasa ijumjamunum nuwi, yakí uuka batsasuitak tiuwai. ⁷ Nuwi batsataig, apu ishiakbau aidauk shiyakeapi tuidau asag, pataetukag namak Jordágnumanini shimutuk katitainum jegawajui. Nunik suntag jiiinag shimaig, yaakta waitijinak epeniu ainawai.

⁸ Nunik pataetuk shiyakagmatai, nunú aents dekamatus yujau eke kanuinatsaig, Rahab wajuka ditan chichajak:

⁹ “Tuke Pujuu atum aidautigmin juna nugka amasaja nunak wika deka-jai, wagki atumin senchi ishamjamkatnume tusa Apajui tine. Nuadui ashí aents juju nugkanmaya aidauk atumin ishamjamainak sapijai jinuinawai.

¹⁰ Atum Egipto nugkanum batsatutijum jiiinagmin nayantsa amain kati-agtinme tusa Tuke Pujuu nayants kapantun ukuyauuwa nunú iik dekaji. Tuja nuigtushkam atum aidautijum amorreo nugkanmayaapu aidau Sijón, Og aatus Jordágka amain batsatu ashí ijinawaitjum dushakam shiig dekaji. ¹¹ Nunú dekau asaja, shiig senchi ishamkagtuinaji. Tuja atumjai maaniatjai tumainuk makichkish shiig atsawai. Wagki Tuke Pujuu atumi Apajuujum atum emematjum nunuwai nayaimpinash, nugkanash ima nigki Apajujiya duka. ¹² Nuadui wi atumin wait anenjan kuitamkajim,

dutiksagmek mina pataag aidaush wait anenjatnaitkugmek dekaskenum wait anenjattaji tusajum Tuke Pujuu daajin tujuttajum. ¹³ Tuja atum maania depetmakjum juju nugka atumdau emakjumesh minash, mina apag, mina dukug, mina ubag, mina kaig aina duka ashí dita patayi aidaujai ijijattsuk kuitamkagtuktajum. ¡Nunuwai dekas pegkegnum yainiamua duka!” tiuwai.

¹⁴ Tusa tama dita chichajuinak:

“Juju nugka juwi kauna maaniamunum amina pataim aidau jakamtaig, Apajuí iina suwimkan amastí. Tujash ameshkam juju pachismek makichk-ish etsegkaipa. Tuke Pujuu juju nugkan iina amasmataig, amek amina pataim aidaujai shiig kuitamnaktatme”, tiajui.

¹⁵ Tusa tiagmatai yaakat peegmaja apakbaunum nuna ejapeen jega jegamkamunum pujau asa, nunú aents jiinaidaun wainkainum tusa niimtai ujaimunum daekan aganini detua nuni jüig ishiakui. ¹⁶ Dutika ishimak:

“¡Suntag aidau egapainak yujaina nunú waipakainum mujá wetajum! ¡Nunikjum nuwi kampatum tsawan uumkajum pujagmin, suntag aidau atumi egapainak shiyaka nunú waketug kaunamtai duwi shiyaktajum!” tiuwai.

¹⁷ Tusa tama dita chichainak:

“Ame segajatkumin, ii umiktin dekas umiktatji tusa Apajuí daajin timag duka imatiksaik umiktatji. ¹⁸ Untsu ii juju nugka juwi wayamu wainkumek, juju daek kapantua juwi ii akaikittag nunú aganini nenata. Dutikam nuadui juju amina jemea juwi amina apa, duku, umaim aidau, kaim aidau, amina apa patayi aidaujai utsaatajum. ¹⁹ Tuja makichik aentskesh amina jemin pujayatak, jüinki wekaekama mantamnakug duka niinu atatui. Untsu amina jemin pujaunak utua mainakuig duka utugchatak iinu atatui. ²⁰ Tuja ii chichag nunú ame etsegkaminig, ii umiktin Apajuí daajin taji duka umikchattaji”, tiajui.

²¹ Tusa tama: “¡Ayu, atum tajum duke ati!” tiuwai.

Aatus ashí ditajai chichas ishiakui. Dutikam shiyakmatai nuadui niimtai ujaimunum aganini daek kapantun nená idaisauwai.

²² Tuja nunú aents dekamin aidauk mujá shiyakag kampatum tsawan uumak batsamsajui. Nunik batsatai suntag aidauk ashí yantamnum egai egainakua wainkachag waketug Jericó jegawajui. ²³ Nunik waketjamtai, ditashkam mujá batsatu akaejag Jordágkan katitkiag Josué pujamunum jegawajui. Nunik jegawag dita yujasbaun pachis niina ashí ujakajui.

²⁴ Tusa ujainak:

“Au nugkanak Tuke Pujuu ashí iinu atinun idaitugmase. Dutikamu asamtai nuwiya aents aidauk iina ishamjamainak sapijai jinime”, tiajui.

3

Israel aents aidau namak Jordágkan katitkagbau

¹ Aents uumak yujas nugka dekatatus shiyaku waketug kaunawag etsegkagmatai, kashinia duwi shiig kashikmas Josué Israel aents aidaujai Sitim nugkanum batsatu ashí jüinag shiyakajui. Nunik shimui shimuinakua jegawajui namak Jordágnum. Nunikag eke atú amain katitsuk nuwi aakmag batsamsajui.

² Nuwi batsamas kampatum tsawan nagkaemai, suntaja apuji aidau Israel aents aidau batsatun shimutkag ³ ujainak aatus tuidau: “Leví

wegantu aina nunú chicham umiktin agagbau egkeamun arcan yanaki juki wedau wainkugmek, atumi aakjum aidau tegaka jukijum wetajum. ⁴ Nuniakjum dekatagme itug wetatjume nunú, wagki atumek yaunchkesh juju nugkanmak wekaechau ainajum duwi wajuk wetaigkita duka dekat-sjume. Tujash chicham umiktin agagbau egkeamun arcan yanaki juki wena nunú ijusa wetsuk makichik kilómetro tumain ukuunum wetajum”, tiuwai.

⁵ Tusa ujakagmatai Josué ditan chichajak: “Tuke Pujuu iina yaimpaktin asa kashin wainchatain iwainaktatui. Nuniktin asamtai, ¡pegkëejum umintsa dakamsatajum!” tiuwai.

⁶ Nuna tusa sacerdote aidau chichajak: “¡Chicham umiktin agagbau egkeamu arca yanaki jukijum emka wetajum!” tiuwai. Tusa tiajam nuna yanaki jukiag eemak wegajui.

⁷ Nunik shimai, Tuke Pujuu Josué chichajak: “Wi yamai dutikattag nuna wainkag, Israel aents aina duka dekaskeap Apajuí jutii apuji atinun etegkauwaita tujamiagtatui. Aatus dekawagtatui wi Moisésan kuita-majakuuitag dutiksanuk aminashkam kuitamja nuna. ⁸ Untsu sacerdote aidau chicham umiktin agagbau egketun arcan juki wena nunú ame chichagkum: ‘Namak Jordágnun jegagmek wajaajum ijuntsatajum’ tita”, tiuwai.

⁹ Tusa tima Josué Israel aents aidau chichajak: “Juwi kaunatajum, nunikagmin Tuke Pujuu iina Apajuíji ii emematin ainag nunú mina tujuti nuna ujaktajime. ¹⁰ Apajuí Tuke Pujuu tutaya nunú iina kuitamjamsantai shimag duka, hitita aents aidau, heveo aents aidau, ferezo aents aidau, gergeseo aents aidau, amorreo aents aidau, Jebús aents aidau aatus, Canaán nugkanum batsamin aina nunú ii shimaku Apajuí senchijin depetka ijina wetatag duwi dekattaji. ¹¹ Antuktajum nijah, Tuke Pujuu ashí aents aidau Apajuíjiya nuna chichame umiktin agagbau egkeamu arcan sacerdote aidau yanaki jukiag atum wainjum in namak Jordágnun katitkiagtatui. ¹² Nunikagmatai Israel aents aidautijum maki makichik wegantu ainajum nuwiya doce aents etegjatajum. ¹³ Tuja Tuke Pujuu ashí aents aidau Apajuíjiya nuna chichame umiktin agagbau egkeamu arcan sacerdote aidau yanaki jukiag yuminum wajawagtatui. Nuniagtai, namakak jimaituk tesana buku wajas katigtatui. Nunitai yumi nujinmaya minaus, jasa muja iman wajas asattawai”, tiuwai.

¹⁴ Tusa timatai Israel aents aidau namak Jordágka katitkagtatus jijnag shimai, sacerdote aidau chicham umiktin agagbau egketun arcan yanaki juki eemak wedau. ¹⁵ Tuja ajak juutai tsawan jegataik, namak shiig senchi dujajin asa namakak dujajua piyag aajakui. Imanik ai sacerdote aidau namaka jegawag tugkitak wajawajui. ¹⁶ Nuninaig namakak kuyua buku wajas asauwai. Duka peegmagbau Saretag tutai awa nujai niiniaku yaakat Adam tutai awa imanui nagkamas namak tsujina yumi nujinum pimutai, tsumujin namak juwakuk sae saekawa nayants jakau* tutainum nagkankauwai. Aatus Apajuí namakan akanak ukuyuantai, Israel aents aidau yaakat Jericón igkuas katiajajui. ¹⁷ Sacerdote aidau chicham umiktin agagbau egkeamun arcan yanaki juki wedau nuna yanasag namak Jordán kuyua buku wajasbaunum ejapeen ijunai, Israel aents aidau bukunum shiig katiajaju ainawai.

* 3:16 “Nayants jakau” tawa nunak apach chichamnum “mar muerto” tawa nunuwai.

4

Namak Jordágnunia doce kaya yajuaka ijumjamu

1 Ashí Israel aents aidau namak Jordágnum katiajagmatai, Tuke Pujuu Josué chichajak: 2 “Israel wegantu aina nuwiya maki makichik etegjam doce aents yajuakta. 3 Dutikam ishiakta namaka ejapeen, sacerdote ijuna nuwiyam doce kayan yajuaktinme. Dutikawag yamai dita tuwi kajigtatua nuwi ijumjatnume”, tiuwai.

4 Tusa tima Josué doce aents etegjamu aidanu untsuka ijumag 5 chichajak:

“Namak kuyua buku wajasa nuna ejapeen Tuke Pujuu atumi Apajujiya nuna chichame umiktin agagbau egkeamu puja nuwi wetajum. Nunikjum maki makichik kaya jukitajum. Tuja ashí ijumjamak doce kaya atatu. 6 Nunú kaya ijumjattajum nunú atatu atumi uchijum aidau atakea duwi inimpainak: ‘¿Wagka jusha kayash jutikaish ijumjamuita?’ tujamainakui, 7 atum ayaakjum: ‘¡Chicham umiktin agagbau egketun arcan sacerdote aidau yanaki jukiag namak Jordágnum wajawagmatai, namak jimaituk kanaka buku wajasbaunum í katiajuitag nuna anemtijamjatin auk ijumjamui!’ titinaitjume”, tiuwai.

8 Tusa tima Josué tibaunak imatiksag umikajui. Dutikainak Israel wegantu doce aajakua dutiksag doce kaya jukiag dita batsatbaunum ejegawajui. Dutikawag Tuke Pujuu Josué chichajak, dutikatnume tibaunak imatiksag doce kayan ijumjajui. 9 Tuja Josué niishkam dutiksag namak kuyua buku wajasbaunum, nuna ejapeen sacerdote aidau chicham umiktin egkeamun arcan yanasa ijunbaunum, nuwi doce kayan yajuak ijumjauwai. Duka yamaikish awai.

10 Tuja sacerdote aidau chicham umiktin agagbau egketun arcan yanaki jukiag wedauk namak Jordán kuyua buku wajasmatai nuna ejapeen ijunai, Israel aents aidauk Tuke Pujuu Josué akateak juna umiktinme tibaunak imatiksag umikajui. Tuja Josuéshkam Moisés akatjamunak imatiksag umikui.

Nunikmatai aents aidauk shiig wamak katiajajui. 11 Nunik ashí katiajagmatai, nuadui sacerdote aidau chicham umiktin agagbau egketun yanaki ijuna ditashkam katiajajui, nunikag dita emkajui. 12 Tuja nuigtushkam maanitan yacha Rubén wegantu aidau, Gad wegantu aidau, Manasés wegantu jimaituk maaniaku jutai aidanu yajuakag uminas tikich Israel wegantu aidau shimamunum eemak, Moisés nuniktajum tibaunak imaniasag shimuidau. 13 Nunú aidauk shiig uminas cuarenta mil aents tumain jijnag chicham umiktin agagbau egketun juki wegagtai nuwi ichichmamjag, nugka paka tepajunum yaakat Jericónmanini shiyakajui. 14 Tuja nunú tsawantai Tuke Pujuu ashí Israel aents aidanu, Josué eme anentus diitnume tiu asantai, Moisés iwaku pujusmatai, eme anentus diijaku aina dutiksag Josuénashkam eme anentus diidau.

15 Nuadui Apajuí Josué chichajak: 16 “Sacerdote aidau chicham umiktin agagbau egketun arcan yanaki ijuna nunú katiagtajum tita”, tiuwai.

17 Tusa timatai, katigtajum tusa tiuwai. 18 Tusa tiyajam ditashkam katiajag kukag jijnainag, namakak bete wajas yaunchuk aajakbaunak imaniasag asauwai.

19 Israel aents aidau Jordágnum katiaju aina nunak mijan nagkamnamu yama nagkamchak nantu taka tsawan diez tsawaju ai katiajajui. Nunikag yaakat Jericó yantamen etsa minitaiya nuni nugka Guilgal tutainum

aakmajag batsamsajui. ²⁰ Nunik batsamas doce kaya Jordágnunia yajuakbaun Josué nuwi ijumjauwai. ²¹ Dutika ijumag Israel aents aidaun chichajak:

“Atakea duwi atumi uchijum aidaun inimpainak: ‘¿Wagka jusha kayash ijumjamuita?’ tusa tujamainakuig: ²² ‘Israel aents aidaui namak Jordán kuyua buku wajasmatai ii katiajag’, nunú pachisjum ujaktajum. ²³ Tuja nuigtushkam Tuke Pujuu atumi Apajuújum yaunchuk nayants kapantun katitkatnume tusa ukuyauwa dutiksag, yamaishkam namak Jordágnkan katitkatnume tusa ukuyua buku awajsamtaí katiajulum nunú pachisjum ujaktajum. ²⁴ Nuna aatus ashí nugkanmaya aents aidaun Apajuí senchigtina nuna dekawagtinai. Untsu atumek Tuke Pujuu atumi Apajuúgmia nunú tuke ememattinaitjume”, tiuwai.

5

Israel aents aidaun Guilgal nugkanum batsamsamu

¹ Israel aents aidaun katiagtinme tusa Tuke Pujuu namak Jordágnkan ukuyua buku awajsae tabaun amorreo aents aidaun apuji aidaun Jordágnka amain etsa akaetaiya nuni batsamin aidaun dekawajui. Tuja canaágnunia aents aidaun apuji aidaun nayants Mediterraneonum batsamin aidaushkam dekawajui. Nunikag senchi ishankag Israel aents aidauijag kakaja maaniachmin dekapedau.

² Nuninai Tuke Pujuu Josué chichajak: “Kaya aina anú ujumak kuchii najankata. Dutikam nuadui Israel aents aishmag aina nuna kati chuchuke ashí tsupijata”, tiuwai. ³ Tusa tima Josué kuchiin najankauwai. Dutika Israel aents aishmag aidaun ashí tsupijauwai. Nunak muja Aralot tutaya nuwi dutikauwai. ⁴ Nunak dutikauwai wagki ashí aishmag waju maanimain aidaun Egipto nugkanum batsatu jijnau aina duka uwegshunum yujas jinawaju asagmatai. ⁵ Tuja Israel aents aishmag aidaun Egipto nugkanum batsamajaku aina duka, nuwi batsatuk ashí tsupijamu aajaku ainawai. Dutikamu ainaig Egipto nugkanum batsatu jijnag shimak, uwegshunum cuarenta mijan yujasu aina duwi uchi aishmag akiinkau aina nunú eke tsupijashbau asamtaí, dutikauwai. ⁶ Tuja aishmag waju maanimain aidaun Egipto batsatu jijnau aina duka cuarenta mijan uwegshunum yujasu aina duwi ashí jinawajui. Nunú aents aidaun Apajuú chichamen umigkachaju ainawai. Nuadui Apajuú ditan chichajak: “Atumi muunjum aajaku aina nuna anagkuakun, atum wegantun nugka pegkeg ajak shiig tsapaun, tagkush shiig muumpaina nuna susatnaitjai, tusan anagkuawaitag duka atumek wainkashunaitjume”, tiuwai. Nunik jinawaju asagmatai, namak Jordágnun katiajaju aina duka tsupimakchau aajaku ainawai ⁷ Nuadui Josué nunú aents aidaun uchiji aajaku aina nuna tsupijauwai. Wagki, ditá apaji jinawaju asagmatai, Tuke Pujuu atum nugka jukitajum tibau asa waujus shimuinak tsupimagchaju asagmatai. ⁸ Dutika ashí tsupijajam nuna esamawagtatus dita batsatbaunmak juwakajui. Nunik batsamas ashí tsagagkajui.

⁹ Nuwi batsataig Tuke Pujuu Josué chichajak: “Israel aents aidaun Egipto nugkanum wainka inaku waitkatai asag datsaamajaku aina nunak, yamai nagkamsan dita datsantinak emegkatjajai”, tiuwai. Nuadui nunú nugka daajiya duka Guilgal* tibau aajakui. Duka yamaikish tuu daagtinaí.

* 5:9 “Guilgal” tawa duka hebreo chichamnumak “ajapjuamu” taku tawai. Tuja tutupnik takug akagkekbaun taku tawai.

¹⁰ Israel aents aidauk Guilgal nugka yaakat Jericónmanini awa nuwi batsamsauwai. Nuwi batsamas mijan nagkamnamu yama nagkamchak nantu taka, tsawan catorcetin Pascua pag lewadurajai pachimtsuk inajuamu yutai tsawan asantai, agkuantai ijunag jüstamaidau. ¹¹ Nunú tsawantai pag lewadurajai pachimtsuk inajuamun trigo duwikbaujai yuwawajui. Untsu kashinia duwi nunú nugkanmaya ajak aidaun juukag yuwawajui. ¹² Nuna yuwidau asagmatai, maná kakebaunak nunú tsawantin megkaekauwai. Nuniku asantai ataktu awagkig, Israel aents aidauk manának yuwachaju ainawai. Tuja nunú mijantinig Canaán nugkanmaya ajak aidaun juukag yuujaku ainawai.

Josué Apajuí suntaji apujin wainkamu

¹³ Makichik tsawantai Josué yaakat Jericónum jegattak pujusa aents puyajan takus wajattaman wainkauwai. Nunik jegantun iniak:

“¿Amesh ii ainag nuwiyagkaitam, atsa iina shiwaaji aina nuwiy-achukaitam?” tau. ¹⁴ Tusa iniam nii ayaak:

“Ame jimag adayam nuwiyagkesh atsujai. Wika Tuke Pujun suntaji aina nuna apujiyajtjai”, tiuwai.

Tusa tutai Josué niina eme anentus tsunsuma nijayin nugka antig pujusa iniak: “Wajina dutikati tame nunú tujutta, nuna betek umiktajai”, tau.

¹⁵ Tusa tutai nii ayaak: “¡Sapatjum ukuimakta, wagki ame wajam aanka dekas nugka Apajuí etegkamu shiig pegkegmai!”, tiuwai. Tusa tama Josué sapatjin ukuimakui.

6

Jericó jetektasa chicham umikbau

¹ Israel aents aidau utsaantugmawag amupakainum ayamjumakmi tudaidau asag, yaakat Jericó waitiji aidaunak shiig epenjaju ainawai. Dutikamu asantai makichik aentskesh waimainchau, tuja agaagkesh jiinmainchau aajakui. ² Tujash Tuke Pujuu Josuén chichajak:

“Jericó apujin niina suntaji aidaujaí depetuk ijinati tusan amina idaitusjame. ³ Tuja atum santag Israel aents aidautijum ¡makichik tsawantai makichkia Jericó tentea ukutajum! Duti dutikakuajum seis tsawan etejatum.

⁴ Tuja yama nagkamchakug siete sacerdote aidau maki makichik umputai uwig aishmagku kachuji najanamun takus emkatnume. Nunikag tikich sacerdote aidau chicham umiktin agagbau egketun arcan jukiag ukunum wenai dita eemak shimittawai. Nuninai santag aidauk nuna ukujin shimittawai. Untsu tsawan sietetin sieteya imania yaakat tenteattagme. Tuja siete sacerdote aidau uwija kachujin takakuina nunú yaaktan tentea shimuinak umpuiniagtatui. ⁵ Nunú uwija kachuji umpuamun yapajia nuni senchi umpuinakui senchi unsumkatajum. Imatjumin yaakat peejamua nunú kupinak iyattawai. Nunikmatai pisajajum yaakat Jericó utsantuattagme”, tiuwai.

⁶ Tusa tima Josué sacerdote aidaun untsuka ijumag chichajak: “Atum chicham umiktinun Tuke Pujuu amasbau egkeamu arca yanaki jukijum Jericó tenteajum wetajum. Untsu atuminia siete aents aidau maki makichik uwija kachujin takus emkatnume”, tiuwai.

⁷ Aatus tusa ukuak, santag Israel aents aidaun ashí ijumag chichajak: “Atum aidautigmeshkam wetajum. Nunikjum yaakat tenteajum. Tuja

aents maanitan yacha aina nunú sacerdote aidau arcan yanaki juki wena nuna emtin shimiagtatui”, tiuwai.

⁸ Tusa timatai imatiksag umikajui. Nuadui siete sacerdote aidau maki makichik uwija kachujin jukiag umpui umpuinakua shimuidau. Nunik shimuinai nuna ukujin tikich sacerdote aidau arcan yanaki jukiag shimuidau. ⁹ Tuja aents maanitan yacha aidauk sacerdote aidau shimamu emtin shimuidau. Nuninai untsu tikich suntag aidauk, sacerdote chicham umiktin agagbau egketun juki wena nuna ukujin shimuidau. Nuninai sacerdote uwija kachujin takaku aidauk umpui umpuinakua shimuidau. ¹⁰ Israel aents suntag aidau eke jiinag shimatsaig Josué ditan chichajak: “¡Makichkish chichatsuk takamtak wetajum, wi untsumkatajum takui shiig senchi untsumkatin asajum!”, tiuwai.

Jericó jetekbau

¹¹ Sacerdote aidau arcan yanaki juki wena nunú yaaktan makichkia tenteatnume tusa Josué tiuwai. Tusa tima shiyakag makichkia tenteawag ukuinak waketug ditá batsatbaunum kaunawag nuwi kajigkajui. ¹² Nunikag kashinia duwi Josué kashikmas nantakmatai, Israel aents aidaushkam ashí nantajajui. Nunikagmatai sacerdote aidau arcan yanaki jukiajui. ¹³ Nunik shimiagtai aents maanitan yacha aidau eemag shimuidau. Untsu ditá ukujin sacerdote aidau uwija kachujin makichkish ayamtsuk umpui umpuinakua shimujakajui. Tuja nuna ukujin sacerdote arcan yanaki jukiag shimuinai, nuna ukujin inagnamunum suntag aidau shimuidau. Tuja kachu umpuamuk tuke shinu au. ¹⁴ Kashinia duishkam dutiksag yaaktan tenteawag ukuinak dita batsatbaunum waketajui. Duti dutikainakua seis tsawantan ekejajui.

¹⁵ Untsu tsawan sieteya duwi sacerdote aidau suntag aidaujai ejampek nantajag yaunchuk dutikamunak betek yaaktan tenteawag shimuidau. Untsu nunú tsawantin sieteya imania tenteawajui. ¹⁶ Tuja sacerdote aidau sieteya imania uwija kachujin umpuiniagtai, Josué aents aidaun chichajak: “¡Senchi untsumkatajum! ¡Wagki Tuke Pujuu juju yaaktanak depetuk tsaktinme tusa iina idaitugmase! ¹⁷ Au yaakta duka ashí nuwi wajig ayawa nujai tsainkattawai, wagki Tuke Pujuu nunikti tiu asantai. Untsu nuwa akika dutiktai Rahab ashí tikich aidaujai niina jeen batsamiagtata duka makichkish maawaigpa, wagki aents dekamatnume tusa wi ishiakbau aidaun nii uuka ayamjuku asantai. ¹⁸ Tuja atomshakam kuitamamkatajum, wainka nuwiya waji aina duka makichkish jukigpa. Nuigtush achitkesh achikaigpa, wagki nunú aidaunak Apajuí ashí tsaktinme tujabiuwai. Untsu nunú atum umishtaik, Apajuí iina yaaktajin tsaightamainai. Nuna dutikamtaig utugchatak iinu amainai. ¹⁹ Untsu oro, plata, tuja ashí waji bronce, hierro aatus najankamu aina duka Tuke Pujuu anagkuamu atalui. Nunú aina duka yajuaka, waji akik Apajuínu aidau egketainum egkenattawai”, tiuwai.

²⁰ Nuna aatus Josué Israel aents aidaun ujaka inagnakmatai, sacerdote aidau uwija kachujin umpuajajui. Nuna antuinamuik Israel aents suntag aidauk senchi untsumaidau. Imatuinai yaakat peejamu kupinak iyauwai. Nunikmatai pisajup yaaktan utuawajui. Nunikag yaaktan utsantuawag aents aidaun depetuk ijinawag, yaaktanak dita atainiajui. ²¹ Dutikawag nuadui aents aishmag aidaun, nuwa aidaun, datsauch aidaun, múuntuch aidaun, ashí ijinawajui. Dutikainak buey aidaun, uwig aidaun, burro aidaunashkam ashí ijinawajui.

²² Dutikawag nuadui aents nugka dekatatus yujasu aidaun Josué chichajak: “¡Nuwa akika dutiktai puja nuna jeen wetajum. Nunikjum nii jiyakjum tikich aidaun nijai batsatushkam ashí jiihtajum, atum wajintu nii anagkuawaitjume dutiksagmek!” tiuwai.

²³ Tusa tijam wayawag Rahab, niina apaji, dukuji, umayi aidaun, kai aidaun, nuigtu niina patayi aidaunai batsatun ashí jiihtajui. Dutikawag ditá batsamtaijin ukumtikag agkan ishamain atsaunum batsasu ainawai.

²⁴ Nuna dutikainai suntag aidaun yaaktanak ekemakag ashí apeawajui. Untsu oro, plata, tuja waji bronce, hierro najankamu aidaunak apeachajui. Nunak ayatak jukiag waji akik Tuke Pujuunu aidaun egketainum egkeawajui. ²⁵ Nuna imatika ashí ijinkush, Josué Rahabnak niina patayi aidaunai maachui, wagki aents nugkan dekatneme tusa Jericó ishiakbau aidaun maawainum tusa uuka uwemtikjau asantai. Dutika maachbau asag, Rahab wegantu aidaun yamaikish Israel wegantu aidaunai batsamin ainawai.

²⁶ Nuna ashí dutika atakea duish tuke uminkatnun pachis Josué juna aatus tiuwai: “Makichik aentskesh yaakat Jericó tsaikbauwa nuna ataktu jegamjatjai tusa takug, niina uchiji iwai mantamnattawai. Nunikmatai takatan takau aidaun nuna iyashin aepawag nuwi ekeniag jegamjagtinai. Tuja niina uchiji ekeushkam nunisag mantamnattawai. Nunikmatai nuna iyashinashkam aepawag nuwi ekeniag yaakta waitijin najanawagtinai”, tiuwai.

²⁷ Josuénak Apajuí yaigkui, nuadui ashí aents tikich nugkanum batsamin aidaun niina wajuujinak shiig dekajujaku ainawai.

10

Amorreo aents aidaun depetkamu

¹ Josué Israel aents aidaunai Jericón tsaikajua dutiksag tikich yaakat Ai tutainashkam tsaikajui. Dutikawagmatai yaakat Gabaógnunia aidaun ishamainak Israel aents aidaunai maaniachmi tusag chichaman umikajui asag, ditajai ijunag batsatui tabaun Adonisédec Jerusalégkan apuji dekauwai. ² Nunik dekaa yaakat Gabaógnunia tikich yaakat Ai tutain Israel aents aidaun tsaikajua nuna nagkaesau múun, kuashat apugtin tuja nuigtushkam suntag aidaun maanitan yacha aidaun asagmatai, niina aentsji aidaunai shiig senchi ishamkajui. ³ Nuadui Adonisédec yaakat Hebrógnka apujin Hohaman, yaakat Jarmutan apujin Piraman, yaakat Laquisha apujin Jafían, yaakat Eglógnka apujin Debiran aatus chichaman akuptukui. Dutikawajam chichama etsejin aidaun ditan ujainak: ⁴ “Apu Adonisédec chichaak: ‘Gabaón aents aidaun maanitsuk agkan batsamsagmi tusag Josuéjai, tuja Israel aents aidaunai ishamkajui chichaman umikaje. Nuniku asagmatai ipajime kaunatajum. Nunikjum Gabaón aents aidaunai maaniamu atuktatajum’”, tiuwai.

⁵ Tusa tijam cinco apu amorreo aents aidaun apuji aidaun: Yaakat Jerusalégnumia, Hebrógnunia, Jarmutnumia, Laquishnumia, Eglógnunia aatus ijunag dita suntaji aidaunai Gabaón jetekmi tusag shiyakajui.

⁶ Nuna Gabaón aents aidaun dekwag ditashkam Josué Guilgal pujaun chichaman akuptuinak aatus tijajui: “Íi atumjai chicham umiaku: ‘atumi inake agmi’, timaiji. Nuniau asantai atum jutiik ayamkagtumainaitjume. Nuadui amina suntajum aidaunai kaunajum ayamkagtuktajum, wagki

amorreo aents aina nuna apuji aidau mujanum batsamin aina duka ashí ijunjaje jetepakagtatus”, tiuwai.

⁷ Nuna antuk Josué Guilgal pujau niina suntaji maanitan yacha wajiu aidau yajuak ijumjauwai. ⁸ Dutika umikmatai eke wegachunak Tuke Pujuu Josué chichajak: “Amorreo aents aina duka ishamkaipa, amina idaitusjame, nii depetuk ijinati tusan. Nuadui makichik aentskesh dita aina nuwiyag amejai igkunia maanimainuk shiig atsuttawai”, tiuwai.

⁹ Tusa tima Josué Guilgal pujau Israel aents aidaujai jii nag kashi shima shimakua jegawajui. Nunik amorreo aents aidau gabaógnunia aidau jetektatus anutujag batsamtaun pachiachbaunum jetekajui. ¹⁰ Tuja amorreo aents aidau nak Tuke Pujuu Israel aents aidau jetenam ishamkatnume tiuwai. Tusa tibau asamtai Josué amorreo aents aidau Gabaógnum shiig kuashat amukui. Dutika amuam jinta Bet-horón wetainum pisatai pataetukag mai mainakua, yaakat Azecá yaakat Maquedájai aajakua imanui jegawajui. ¹¹ Tuja tikich aents amorreo aidauk Israel aents aidau ishamak yaakat Bet-horón jegattak shimittaman, Tuke Pujuu bichan kayajai betek akaketuk Israel aents aidau puyajai ijinai nuna nagkaesau ijinauwai.

¹² Tuke Pujuu amorreo aents aidau nak Israel aents aidau amuktinme tibau asag amukajua nunú tsawantin Josué niina suntaji aidau emtin Tuke Pujuu segaak aatus tiuwai:

“¡Etsayah, Gabaón mamiksam jasa ekemsata!

¡Nantuh, ameshkam

nain ségaju Aialón tutaya nunú mamiksam jasa ekemsata!”

¹³ Tusa tima etsa nantujai jasa asauwai, nunikmatai Israel aents aidau dita shiwaajinak ashí depetuk amukajui.

Tuja Israel aents aidau wajuk nunash yujasajamkiyi duka imatiksaik papii Jasher tawa nuwi agagbau aajakui. Tuja etsak akaetsuk makichik tsawan tumain jasa asauwai. ¹⁴ Nunak yaunchuk aents aidau Tuke Pujuu segajaku aina duikish dutikashbaun nunú tsawantin dutikauwai. Nunú tsawantai Tuke Pujuu Israel aents aidau ayamjak shiig paan maaniauwai.

¹⁵ Tuja Josué nunik depetmak Israel aents aidaujai dita batsamtaijin Guilgalnum wakitkiuwai.

24

Josué jakattak pujusa akatmamjamu

¹ Yaakat Siquemnum Josué Israel aents aidau ashí ijumjauwai. Nuwi Israel aentsu apuji múun aidau, apu chichama epegkin aidau, suntaja apuji aidau aatus, aak pegkejama Apajuújai chichatai aakmakbaunum niinis ijunjajui. ² Nunik ashí ijunjamtai Josué chichajak:

“Tuke Pujuu atumi Apajuújum juna aatus tujamainawai: ‘Yaunchuk atumi muunjum aajaku aidau: Téráh niina uchiji Abraham, Nacor, aatus namak Eufratesa amain batsamas dita apajuúmtaijin emematujaku ainawai. ³ Nuni batsatun wi Abrahaman jiiki jukin juju Canaán nugka juwi itaan awekasuitjai. Tuja nuigtushkam nii wegantun kuashat ikauntukuitjai. Yama nagkamchaknuk susauwaitjai niina uchijin, Isaakan.

⁴ Tuja Isaakan susauwaitjai jimag uchijin: Jacopan, Esaújai. Tuja Esaún

susauwaitjai muja ikam tepau Seír tutain. Untsu Jacob niina uchiji aidaun yajuak Egipto nugkanum weuwai.

⁵ “Nunika nuwi kuashat mijan batsatai, wi Moisésan Aarógjai akup-tukuitjai ditan yaigtinme tusan. Dutikan egiptunmaya aents aidaunak shiig senchi suwinka susan waitkasan atumi muunjum aidaun nuwi batsatun jiiujitjai. ⁶ Tuja atumi muunjum aidaun Egipto nugkanum batsatu jiiinjamtai, nuwiya aents aidaun carro maanitai aidaun caballo aidaujui yajuakag pataetukag nayants kapantunum ejegawajui. ⁷ Dutikainam, yainkata tusag mina untsugkajabi. Tujutuinakui egiptunmaya aidaun shi-mamu emtin, tuja Israel aents aidaun batsatbau ukujin suwe awajsamiajai. Tuja nayants buku wajasbaunum katidaun yumi pimak ijinati tusa ti ai, egiptunmaya aidaun nayants yutuam jinawabi. Wi nuna Egipto nugkanum dutikauwaitag duka atumek shiig wainkauwaitjume.

“Nunikjum kuashat mijan uwegshunum yujasuitjume, ⁸ nunika yu-jautigmin yajuakan namak Jordágka amain etsa minitaiya nuni amorreo aents aidaun batsamtaijin ikaunmawaitjime. Dutika ai amorreo aents aidaun atumjai maaniaawajabi. Tujash wi ditan ijinatnume tiu asamtai, atum depetkajum ijinawaitjume. Dutikajum dita nugke aidaun atum jukiawaitjume.

⁹ “Tuja tikich tsawantai Balac Sipora uchiji Moab aents aidaun apuji atumjai maaniatatus kautjamkajui. Nunik chichama etsejin aidaun akateg Balaam Beora uchiji ujaktajum, dutikam nii atumin pegkegchaunum yumigtamjatnume tusa tiuwai. ¹⁰ Tujash Balaam pegkegnum yumigtamjat-nume tusan wi ti ai, pegkegnum yumigtamjajabi. Dutikan ayamjukuitjime. ¹¹ Dutika ayamjukbau asajum namak Jordán katitkajum Jericó kaunawaitjume. Tuja Jericónum batsamin amorreo aents aidaun, Canaán aents aidaun, hitita aents aidaun, gergeseo aents aidaun, heveo aents aidaun, Jebús aents aidaun aatus atumjai maaniaawajui. Tujash wi ditanak atumin idaitusuitjime. Nuadui atum depetka amukuitjume. ¹² Tuja atum aidautijum amorreo aents aidaun apuji jimag aajakua nunú dita aentsji aidaujui depetkauwaitjume. Tujash duka atum ima senchigtin asagmekesh, atsa atum maanit ima yacha asagmekesh dutikachuitjume. Nunú depetkauwaitjum nunak wi atumin ishamjamkatnume tibau asag, ishamjamaidau asagmatai depetkauwaitjume. Nuadui atumek eke jegatsjuminig, ishamjamak pisaju aina nunak nuniku ainawai. ¹³ Nuadui yamai atumek tikich aents aidaun jegamjamunum batsatjume. Tuja uva aidaun, oliva aidaun ajakmakbau juuka yuwajum dushakam dita ajakbaunmaya yuwagme. Wagki wi juju nugkanum ayá nunak ashí nugkajai atumin amasuitjime’, tawai Apajuí”, tusa Josué tiuwai.

Tuja nuigtu Josué chichaak:

¹⁴ “Nunú ashí anentaimtusjum Tuke Pujuu eme anentsa emematjukum dekaskenum umigkatajum. Tuja yaunchuk atumi muunjum aidaun namak Eufratesa amain etsa minitaiya nuni batsamas ditá apajuímtai aidaun emematujaku aina duka idaisatajum. ¡Nunikjum ina Tuke Pujuu umigkatajum! ¹⁵ Tuja atum Tuke Pujuu umigkatasa wakegashkugmek, yamai titajum ya umigkatag tajume nunú. Yaunchuk atumi muunjum aidaun namak eufratesnum batsamas dita apajuímtaiji aidaun emematu-jaku aina duka ememattag tajum, atsa nuniachkugmesh amorreo aents juju nugkanum batsamin aina nuna ememattai aina duka ememattag tajum, nunú titajum. Tuja atum Tuke Pujuu emematut dakitakjuminish, ¡wika mina pataag aidaujui Tuke Pujuu umigkun ememattatjai!” tiuwai.

¹⁶ Tusa tutai Israel aents aidaun chichainak:

“¡Wainka apajuímtai aina duka ememattsuk ima Tuke Pujuuwa duke emematuinaku umigkagmi taji! ¹⁷ Ii aidautin iina muunji aajaku aina nujai Egipto nugkanum inaku waitkatai batsatutin jii pajua duka Tuke Pujuu iina Apajuíjiyai. Niiyai wainchatai aidaun iish wainjin iwainajua nunú. Tuja nuigtushkam jinja shimaku kuashat aents aidau batsatbaunum shimajinish nii kuitamjamu asa ayamjutpakui. ¹⁸ Ii shimamunum tikich aents aidau ayaunash nii jiija ishiakui. Amorreo aents aidau juju nugka juwi batsamin aajaku aina nunashkam nigki jiija utsagkui. Nunú anentaimtusa ¡Tuke Pujuu umigkagmi taji, wagki niyai iina Apajuíjiya duka!”, tuidau.

¹⁹ Tusa tiagtai Josué ditan chichajak:

“Atumek Tuke Pujuu kakajus umigmajin dekapeatsjume, wagki Apajuík pegkegmai, akasmatnash akasmauwai. Iman asa atum niijai shiwag-maekujum pegkegchau takamugminak atsanjagkesh idaitugmamait sui.

²⁰ “Atum aidautijum nii umigtsuk kajimatki idaikujum, tikich wainka apajuímtai aina nunú emematu yujagminig, wait anenjamag ayamjutpak uwemtijamjau akush, tuke suwimkanak amasagtinai”, tiuwai.

²¹ Tusa tutai Israel aents aidau chichainak:

“¡Duka nunikchattawai, iik ima Tuke Pujuu umigkagmi taji!” tuidau.

²² Tusa tiagtai Josué chichaak:

“Tuke Pujuu umigkagmi tusa tajum duka kame atumesh dekas umigmajin asagmes tajumtai”, tiuwai. Tusa tama dita aimainak:

“¡Iishkam ame tame dutiksaik anentaimji!” tajuí.

²³ Tusa tiagtai Josué ditan chichajak:

“Nunú takumgek anú wainka apajuímtai aidau atum pujamunum ayá nunú utsagtajum. Dutikajum Tuke Pujuu atumi Apajuíjum, atumi anentaimijai ememattajum”, tiuwai.

²⁴ Tusa timatai Israel aents aidau aimainak:

“¡Ii aidautik Tuke Pujuu iina Apajuíjiya duke emematku, nii tujabauwa duke umigkami taji!” tuidau.

²⁵ Tusa tiagmatai yaunchuk Apajuí Moisésjai chichaman umikua dutik-sag, Josué ashí Israel aents aidaujai nunú tsawantinig yaakat Siquemnum Apajuíjai chichaman umikajui. Nunú chicham umikbaun ditan susauwai umiktinme tusa. ²⁶ Dutika nuadui Apajuí chichame umiktin agatainum agajui. Duwi kaya muuntan juki aak pegkejam Apajuíjai chichatai aakmakbua aajakua nuna yantamen numi encina tutai wajaunum nuna wakentin apusauwai. ²⁷ Dutika apujus ashí Israel aents aidaun chichajak:

“Atumek deka gme ii umiktin pachisa chicham taji nuna makichik tuké anta nunú. Nunú chicham ii umiamun aents wajas antauwa numamtin atata duka juju kaya nunuwai, wagki yamaya juwi atum aidautigmin Tuke Pujuu tujamijai nunú umiktin pachisjum titin asagmin. Juju wainkujum Tuke Pujuu umijin amí tusa tajum nunú tuke aneasumke atinaitjume”, tiuwai.

²⁸ Nuna ashí tusa inagnak Josué Israel aents aidaun wakettajatum tusa maki makichik dita nugken ishiakui.

Josué jakamu (Jue. 2.2-10)

²⁹ Dutika ishiak kuashat tsawan weatsaig, Josué Tuke Pujuu inake aajakua duka ciento diez mijanan ejeyi pujus jakauwai. ³⁰ Nunikmatai muja Gaash tutai awa nuwi niina nugke Timnat-Sérah daagtin Efraí gka nugken awa nuwi ukusajui.

³¹ Tuja Josué pujusmataig Israel aents aidauk ima Tuke Pujuunak umijujaku ainawai. Tuja Israel aents aidaun yayaak kuashat waji wainchatai aidaun Apajui iwainajua nuna apu múun aidau wainkau aina nunú batsamsamtaishkam ima Israel aents aidauk Apajuínak umijujaku ainawai.

Israel aents aidau José ukunchin ukusagbau

³² Israel aents aidau Egipto nugkanum batsatu jiiinag shimak José ukunchin jukiaju aina nuna yaakat Siquemnum ukusajui. Nunak Hamor Siquem aajakua nuna apaji nugken Jacob cien kuichik jiju plata tutai najanamui akikmak sumakua nuwi ukusajui. Nunú nugkanak José wegantu aidau jukiu ainawai.

Eleazar jakamu

³³ Eleazar Arónka uchiji jakamtai, Efraín nugkanum niina uchiji Fineesa nugke mujá aajakua nuwi ukusajui.

Apu chichama epegkin aidau Jueces

2

Apajuí ángel tumain Boquim nugkanum Israel aents aidau wantintukbau

¹ Apajuí ángel tumain Guilgalnumia juwaki Boquimnum weuwai. Nunik jegaa Israel aents aidau chichajak:

“Atumnak Egipto nugkanum batsatutigmin wi jiigmaijime. Dutikan juju nugka juna atumi muunjum aidau anagkuakun, atumi uchijum wegantu aidau susatnaitjai, tiuwaitag nuwi itajime. Ditan chichajuinakun: ‘Wi atumjai chichaman umikag nunak tuké umiktinaitjai’, tiuwaitjai.

² “Tuja untsu atum aidautigmek juju nugkanmaya aents aina nujaig makichkish chichamak umikaigpa. Ayatak dita apajuímtaiji dakumkamu aina nunú tsaigka utsankatajum’, tiuwaitjime. Tujash atumek duka umigtukchauwaitjume. ¡Yamaikish juju umikugmek, aniau asajum umigtukchau ainagme! ³ Nuadui yamai tajime: ‘Au aents aidau atumjai batsata nunak jiignuk utsagchattajai. Nuadui dita apajuímtai aidaujai atumin tsanupajagtatui’”, tiuwai.

⁴ Tusa nunú Apajuí ángel tumain chichaka inagnakmatai, ashí Israel aents aidauk shiig senchi buutuidau. ⁵ Nuadui nunú nugka daajin Boquim* adaikau ainawai. Tuja nuwi kuintinun maawag apeenak Tuke Pujun emematiajui.

Josué jakamu

⁶ Nuna Josué tusa inagnakmatai, Israel aents aidau maki makichik ditá nugken waketjajui. ⁷ Tuja Josué pujusmataig Israel aents aidauk ima Tuke Pujunak umijujaku ainawai. Nuigtushkam Israel aentsu apuji múun aidau Tuke Pujun ditan yayaak kuashat dutikauwa nuna wainajaku aidau batsamsamtaishkam, ima Apajuímtai umijujaku ainawai.

⁸ Tuja Josuék ciento diez mijan ejeyi pujus jakauwai. ⁹ Nunik jakamtai, muja Gaash tutainum, Efraígka nugken niina nugke Timnat-Sérah tutai awa, nuwi ukusajui. ¹⁰ Tuja Josuéjai betek batsamajaku aina dushakam múun waigkag jinawajui. Nunú jinawaju ai batsamas akiinkau aidauk Tuke Pujunak dekajakchau ainawai. Tuja Apajuí ditan ayamjak wainchatai aidau kuashat iwainajua nunakesh dekachaju ainawai.

Israel aents aidau Apajuí ememattan idaisagbau

¹¹ Israel aents aidau uchiji aidauk Tuke Pujun diismak shiig pegkegchaun takajaku ainawai. Nuniau asag wainka apajuímtai Baal aajakua nuna emematujaku ainawai. ¹² Nuninak ditá muunji aidau Egipto nugkanum batsatun Tuke Pujun jiihua nunak kajimatki idaisajui. Nuninak nuwiya aentsu apajuímtai aidau emematuidau. Nuniagtai Tuke Pujun ditan senchi kajegkauwai. ¹³ Aatus Israel aents aidauk Baal, Astartéjai dakumka najanamu aidau emematuinak Apajuí ememattanak kajimatki idaisajui.

* 2:5 “Boquim” tawa nunak hebreo chichamnumak “buutbau” taku tawai.

¹⁴ Nuadui Tuke Pujuu Israel aents aidaun kajejuk dita wajiji aidaun shiwag aidaun kasajug yajutkatnume tusa idaisauwai. Nuigtushkam Israel aents aidaun batsatbaunum nuna yantamen ditá shiwaaji aidaun batsata nunú jetekag depetuk amuktinme tusa idaisauwai. Nuadui Israel aents aidaun ayamjumamainchau wajasui. ¹⁵ Tuja maaniawagtatus shimiagtaish, Tuke Pujuu ditanak yaijakchauwai. Dutika yayachbau asag maaninakush depetmajakchau ainawai, Apajuí tibaunak imatiksag.

Tuke Pujuu ditanak maaninakush kakaag iikmamainchau awajsauwai, ¹⁶ nuna dutikakush Israel aents aidaun kasajuidaun ayamjuktinun apu chichama epegkin aidaun adaitujui. ¹⁷ Tujash Israel aents aidaun apu chichama epegkin aidaun adaijamunash umigkachaju ainawai. Nunidau asag Apajuínak umigtsuk tikich wainka apajuímtai aidaun emematujaku ainawai. Untsu ditá muunji aajaku aina duka Apajuí chichamen umijujaku ainawai. Tujash ditak Tuke Pujuu chichame umigtanak dakitug idaisau ainawai.

¹⁸ Tuke Pujuu apu chichama epegkin atinun adaikag tuké yaijakui. Nunú apu aidaun batsamsamtaig, Israel aents aidaunak ditá shiwaaji waitkagtaish Tuke Pujuu ayamjukui, wagki waituinak chichainamun antuju asa. ¹⁹ Untsu nunú apu adaikamu aidaun jakamtaig, ataktushkam nunisag Apajuí ememattan kajimatkiag wainka apajuímtai aidaun emematujaku ainawai. Ditak yaunchuk ditá apachji aajaku aina nuna nagkaesau pegkegchau aajaku ainawai. Nunidau asag aents antakchaujai betek ima pegkegchaunak takajaku ainawai. ²⁰ Nuadui Tuke Pujuu ditan kajejuk chichajak:

“Juju aents aina juka wi yaunchuk ditá apachji aidaujui chichaman umikuitag nunak uminatsui. Nunidau asag minak umigtuinatsui. ²¹ Nuadui juju nugkanmaya aents aidaun Josué jiija utsag emau nii jak ukukbau batsata nunak wishakam jiiḡnuk utsagchattajai”, tiuwai. ²² Nuna tiuwa nunak: “Juna antukajash yaunchuk ditá muunji aidaun Tuke Pujun emematujaku aina nunisag ditash Tuke Pujun emematchajaintash tusa dekapsatatus”, tiuwai.

²³ Nuna tau asa nuwiya aents aidaun Josué eke jiiḡchauwa nunak Tuke Pujushkam jiiḡchauwai, ayatak idaisauwai batsamsatnume tusa.

4

Débora Baracjai Sísaran depetkamui

¹ Ehud jakamtaí pujusag Israel aents aidaun Tuke Pujun umigtsuk ataktushkam pegkegchaun takaidau. ² Nuniagtai Jabín canaáḡnumia aents aidaun apuji, yaakat Hasornum inamajakua nunú, Israel aents aidaun depetuk amuktinme tusa Tuke Pujuu idaisauwai. Jabíḡkan suntaji aidaun apuji aajakui Sísara. Duka Haróset-goím tutainum pujujakui. ³ Jabíḡnak ajujakui novecientos carro hierro najanamu aidaun. Nuadui Israel aents aidaunak veinte mijanai waitka batsamtuidau. Imatika waitka batsamtam ditashkam Tuke Pujuu yaimpakti tusag senchi segau ainawai.

⁴ Tuja Israel aents aidaun waitkajaku aina nunú tsawantinig Lapidot* aajakua nuna nuwe Débora, Apajuí chichamen etsejukua nunú, apu chichama epegkin aajakui Israel aents aidaunum. ⁵ Déborak palmera wajautin tuké ekemajakui. Nuadui aents aidaun nunú palmeran “Débora palmeraji” tiu ainawai. Duka Efraíḡka mujaji tutainum yaakat Ramá

* 4:4 “Lapidot” tawa nunak “antorcha” taku tawai.

Beteljai niniaku aajakua nuna ejapeen aajakui. Nuwi Débora pujau asamtai, Israel aents aidau shimutujaku ainawai, chichaman epegtujuati tusag.

⁶ Tuja makichik tsawantai Abinoáma uchiji Barac Neftalí wegantu aidau nugken yaakat Quedesnum pujuttaman, ujaka utitajum tusa Débora makichik aentsun akuptukui. Dutika ujakam taamtai chichajak:

“Tuke Pujuu Israel aents aidau emematin aina nunú Apajuí juna aatus chichaak: ‘Muja Tabornum weti. Nunik nuwi Neftalí wegantu aidau Sabulón wegantu aidaujai ipaa diez mil aentsun ijumjati. ⁷ Tuja Jabígka suntaji aina nuna apuji Sísara, atumin jetepaktatus niina carroji aidanunum namak Quisónnum kaunatnume titatjai. Nunikmatai wi atumin idaitustajime depetuk ijinatnume’, tusa Tuke Pujuu tujamui”, tiuwai.

⁸ Tutai nii ayaak:

“Wika amejai wetatjai. Untsu ame minachkuminig wikik wechattajai”, tiuwai.

⁹ Tutai Débora ayaak:

“Wika amejai wetatjai. Wagki Tuke Pujuu Sísaranak nuwa maati titatui. Nuadui juju maaniamunum ame nagkamatín akumesh Barac maania depetmake, tamak achattame”, tiuwai.

Nuna tusa Baracjai yaakat Quedesnum weuwai. ¹⁰ Nuwi Barac jegaa Sabulón wegantu aidau Neftalí wegantu aidaujai untuka diez mil aentsun ijumjauwai. Nunik wetai Déborashkam Baracjai weuwai.

¹¹ Untsu Moisésa wegaji Hobab aajakua nunú wegantu quenita aents aajakua aina nuwiya makichik Heber daagtin niish kanak, yaakat Quedes jegattak nugka Saanaim numi encina ayamunum pujujaku.

¹² Tuja Barac niina suntaji aidaujai muja Tabornum wakae tabaun Sísara dekauwai. ¹³ Nunik novecientos carro hierro najanamu aidau yajuak niina suntaji aidaujai ijunjauwai. Dutika ditajai yaakat Haróset-goím bat-satu jünag shima shimakua jegawajui entsa Quisónnum. ¹⁴ Nunikagmatai Débora Barakan chichajak: “¡Pai, yamai maaniata, Tuke Pujuu Sísaranak amina idaitugmase! ¡Amina suntajum aidau shimamunmak Tuke Pujuu eemak weawai!” tiuwai.

Tusa tima Barac muja Tabor pujau niina suntaji aidau diez mil yajuak akaikiuwai. ¹⁵ Nunikag igkuniawag maaninamunum Sísara suntaji aidau carronum yujas maanin aidaujai Baraka pyuagjin ishamkajui. Nunak Tuke Pujuu nuniktinme tiu asamtai, imanísag ishamak maanimainchau dekapenak pisajajui. Tuja niina suntaji aidau pisagtai, Sísarashkam niina carrojin egketu akaiki tupikakiuwai. ¹⁶ Nunik Sísara tupikakmatai, suntag aidauk tikich suntag carronum yujas maanin aidaujai pisaidau. Nunittaman Barac niina suntaji aidaujai pataetuk ma maakua Haróset-goím ejegawajui. Nuna maaniawajua nuaduik Sísara suntaji aidauk ashí ijinamu asa makichik iwakukesh juwakchauwai.

¹⁷ Tuja Jabín, Hasoran apuji aajakua duka, quenita aents Heberan patayi aidaujaig maaninchu asagmatai, nuwi Sísarak Hebera nuwe Jael pujamunum tupikaki jegauwai. ¹⁸ Nunikmatai Jael jüintuki igkug chichajak: “¡Mina apujuh, ishamkagtutsuk juwi wayata!” tiuwai.

Tusa tima wayamtai, jáanch dupagman juki dukuka uukui. ¹⁹ Dutikam pujusa senchi kitamak yumín uwagtatus Jaelan segauwai. Tusa segam duwap apagbaunum leche yajaa ukukbaun ujaka juki susauwai. Dutika susam nuna uwagmatai, ataktu dukuk idaisauwai. ²⁰ Dutikam Sísara niina

chichajak: “Waitinum pujusta, nuniamin makichik aentskesh inimpak juwi pujatsuak tujamkuig, atsawai tita”, tiuwai.

²¹ Nuna tusa Sísarak yaweju asa, shiig senchi kanag tepesui. Nunikmatai Jael martillon juki aak jigkatasa numi tsupija etsakamun juki, takamtak jegantun kajashkinum iju nugkajai ijumag achiauwai. Dutikam Sísarak jakauwai.

²² Tuja Baracshakam Sísaran egá egakua Jaela jeen jegauwai. Nunikmatai Jael jüntuki igkug chichajak: “iWayata, ame egaku wekaetam nuna iwaintuktagme!” tau. Tusa tama waya diikma, Sísarak yaunchuk buuknum iju chigkam jaka tepaun wainkauwai. ²³ Aatus Apajuí Israel aents aidau wainainamunum, Jabín canaágnunia aents aidau apuji aajakua nunak niina suntaji aidaujai depetkauwai. ²⁴ Duwi nagkamas Israel aents aidau Jabígnak nuni senchi jetedau. Ima imatikainakua ashí jinawag idaisajui.

5

Débora Baracjai kantamamu

¹ Nunú tsawantin Débora, Baracjai juna aatus kantamau ainawai:

² “Tuke Pujuu ashí ememattajum,
wagki Israel aents aidau
maaniatatus wakeyin aidau
Tuja nuigtushkam ditá apuji aidau
maaniawagmi tusa tamak
utujimkas, ayu tinu aidau batsatui.

³ ¡Apu aidauwah, yamai
wi taja nunú antuktajum!
¡Apu atuwe aidauwah, antugtuktajum!
¡Wi yamai Tuke Pujuun kantamjuattajai!
¡Israel aents aidau
Tuke Pujuun emematin
aina nuna kantamjuattajai!

⁴ “Tuke Pjuuwah, Seír Edom nugkanum
aajakua nuwi ame kuitamkagtusamin
yujajin, nugka uugmayi,
tuja yumishkam senchi yutujabi.

⁵ Tuke Pjuu Israel aents
aidau Apajuí ememattayah,
ame wainmin muja aidau uujiagmayi.
Tuja muja Sinaíshkam
senchi uugkauwai.

⁶ Samgar Anatan uchiji
pujukakua nuaduik,
tuja Jael pujukakua duishkam,
jinta aidau mak ishamain
wekaemainchau asamtai,
ditá shiwaaji aidau mantuawainum
tau asag, yaja menantag
jintachunum yujajaku ainawai.

⁷ Nunidau asag Israel aents aidau
kanajag batsamas apugtuchu

kajimatkim batsatun,
wi Déboran ditá ayamjuktasan,
makichik nuwa uchijin ayamjuwama
numamtuk wejbiajai.

⁸ Ashí Israel aents aidauk
wainka apajuímtai aidaun
emematiagmayi, nuniau asamtai,
ame ditá maaniatnume tusam
dita shiwaaji aidau ishikabiume.
Tujash ditak cuarenta mil suntag
nagkigtin, tantaajintin ainakush
sapigmaidau asag, maanimainji
atsugbau wajukmaina nuniagmayi.

⁹ See tajame amina Tuke Pujuwah,
tuja Israel aents aidaun
apuji aina nunashkam
shiig anentuinajai,
wagki ujumak wajiu aina
nunú maaniawaju asagmatai.
¡Nuadui Tuke Pujuu ashí ememattajum!

¹⁰ Atum wiakuch aidautijum
burro nuwa pujunum entsamka yujau aidautigmesh,
tuja ujudauch dawenum yujau aidautigmesh,
Apajuí kantamjuatajum,
wagki nii depetmatan amasu asamtai.

¹¹ ¡Tagku kuitamin aidautigmesh,
tuja ujudauch yaaktanum
batsamchau aidautigmesh,
Tuke Pujuu, Israel aents aidaun
ayamjuk agkanmitkau asamtai,
platillo aidau awatkujum
Tuke Pujuu kantamjuatajum!

¹² “¡Débora mijaakaipa!
¡Wajiu wajasta!
¡Nuniakum kantamata!
¡Barac Abinoáma uchijiyah, ameshkam mijamtsuk,
aents maaniaku achigbau aidau
yajuakam chimpiata!

¹³ “Tusa kantaman inagnai, Israel aents aidauk
wi ipaamu asag, shiwag
maanitan yacha aidaujai,
maaniawagtatus shiyakajui.

¹⁴ Tuja Efraín wegantu ujumak aents
Amalec aents aidaun
nugkenia juwakiag akaejabi.
Untsu Benjamín wegantu aidau
nuna ukuujin shiyakagmayi.
Tuja Maquir wegantun-
mayashkam apu aidau shimutkabi.
Tuja Sabulón wegantu
aidaushkam apu aidau shimutkabi.

15 Nuninai Déboranashkam
 apu Isacar wegantu aidau uyuniagmayi.
 Nuigtushkam Barakan
 Isacar wegantu aidau uyuniagmayi.
 Untsu Rubén wegantu aidauk
 apu waji u ainayatak,

16 ditá uwigji aidau puyatjuinak
 batsamas: ¿Maaniatjash,
 atsa maaniashtajash? waja batsatui.
 Rubén wegantu aidauk múun
 ainayatak sapig ainawai.

17 Tuja Galaad wegantu* aidauk
 Jordágka amain yaaktamak batsamsaje.
 Untsu Dan wegantu aidauk Asher wegantu aidaujai, nayantsa pakaji
 wegajunum lanchagtin
 waigkag batsamsaje.

18 Untsu Sabulón wegantu aidau, Neftalí wegantu aidaujai maaninak
 ishamainnum yujasu ainawai.

19 “Tuja Canaán nugkanmaya apu aidau
 yaakat Meguidon ijus namak awa nuwi
 yaakat Taanac kaunawajui,
 nunikag nuwi maaniawajui,
 tujash depetmakchajui.
 Nunikaju asag makichik wajinakesh jutsuk waketkijajui.

20 Israel aents aidau Sísarajai
 maaninakug, yaya nayaimpinum
 ayá nujai ijunjas maaninatai
 tumainun maaniawagmayi.

21 Iina shiwaaji aidau
 entsa Quisónkan
 katitkatag titatman,
 yumi yutug dujajak tajaka utsagke.
 ¡Ame shiwag senchigtin
 aidau depetkam, iikmak
 chichakchamin awajsattame!

22 ¡Caballo aidau ishamkagtukag
 shiig senchi pisainak
 tutugtau antuawai!

23 Apajuí ángeltsukaita
 tumain chichaman etsejak:
 ‘¡Yaakat Meroznum
 aents batsata nuwi
 suwimak iyagti tajai!’ tiuwai.
 Nunak tiuwai wagki dita
 aidauk waji u ainayatak,
 Israel aents aidau
 maaniagtai yaigchaju asagmatai.

24 “¡Heberan nuwe Jael

* 5:17 “Galaad wegantu” tawa nunak “Rubén, Gad, Manasés wegantu jimaituk aajakua” nuna taku tawai.

quenita nuwa duka,
 tikich nuwa Israel aents aina
 nuna nagkaesau pegkegnum
 chichagtai atinai!
 Tuja nuigtushkam nii pujamunum
 nuwa aidau pujuina nuna nagkaesau
 shiig anentam atinai.

²⁵ Sísara kitamak yumi segam,
 Jael lechen juki susauwai.
 ¡Leche kanteku shiig pegkejan pinignum yajaa juki susauwai!

²⁶ Dutikam nuna uwag kanag tepesmatai,
 numi etsakamun juki
 martillowai kajashkinum iju
 nugkajai ijumag achia maabi.

²⁷ Dutika ijum tadae tadaekawa
 nuwig jaka tepesmayi.

²⁸ “Tuja Sísara dukujig
 uchiji megkaekamtai
 puyatki, jeganum niimtai ujaimunum tsapui
 niimas atsutai chichaak:
 ‘¿Wagka mina uchijush
 imanikash megkaekae?
 ¿Wagka mina uchiju
 carroji maanitai agma
 dusha megkaejae?’ timayi.

²⁹ Tuja niina inake nuwa yacha aidau chichagtai,
 Sísara dukujishkam dutiksag chichaak:

³⁰ ‘Maaniawag depetmakajas,
 nuwa inak aidau achigbaun, suntag aidau maki
 makichik, atsa nuniachkush
 jimagnakesh akantunikag
 yajumainak megkaejatai.
 Tuja Sísaranun jáanch
 pegkeg agatkamu aidaun: makichik jáanchin,
 tuja nuigtu jimag jáanch agatka apijamu
 aents depetmakun
 kuntujen anugtai aidaun
 aatus yajumainakus batsatatai’, tuidau.

³¹ “Tuke Pujuwah,
 amina shiwaajum aina
 duka ame ashí ijinata.
 ¡Untsu amina anempaina duka etsa tajiag
 etsantama iman atinme!” aatus tusa Débora
 Baracjai kantama inagnakui.

Nuna maaniau aina duwi nagkamas cuarenta mijan maanitsuk batsam-
 sau ainawai.

6

Apajuí Gedeóghan mina takagtusta tibau

1 Tuja Israel aents aidauk Tuke Pujun intinjukiag ataktushkam pegkegchaun takajaku ainawai. Nuniagtai nii madiágnunia aents aidau siete mijanai waitkastinme tusa idaisauwai. 2 Imatika waitkainamu asag ishamainak mujá waa aidanum uumak kakajus wainmainchau batsamajaku ainawai. 3 Nunik batsatai Madián aents aidau, Amalec aents aidau, nuigtu aents etsa minitaiya nuni batsamin aidau aatus Israel aents aidau ajajin utsantuawag kasajuidau. 4 Nunikag nuwi Israel aents aidau nugken aakmajag batsamas, ajak ajakmamu aidanuk Israel aents aidau yumainnak makichkish ukugtsuk ashí ijituinak, nuigtushkam uwigji aidan, buey aidan, burro aidan aatus ashí yajutuidau. Dutikainak Israel aents aidau yumainnak makichkish ukujainachu. 5 Nunú shiwag aidauk, ditá aakjin tagkuji aidaujai yajuakag, Israel aents aidau nugken utsanawag piyakag nunú nugkanum ayaunak ashí tsaikag ijituinau. Imaaninak camellojjijai shiig kuashat manchi ajaka amuktatus miniyama imanik minituidau. 6 Imatika waitkamu asag ditá yumainji atsujam shiig senchi waituidau. Imanik waituinak Tuke Pujun segau ainawai yaijatkata tawag.

7 Nuna Tuke Pujuu antujuk, 8 makichik profetan awetiuwai. Dutikamu nunú ditan chichajak:

“Tuke Pujuu Apajuí Israel aents aidau emematin aina nunú juna aatus tawai: Atumi muunjum aidau Egipto nugkanum inaku waitkatai batsatun wi jijjabiajai. 9 Tuja Egipto nugkanum batsatutigmin agkanmitkauwaitjim nunakek dutikachuitjime, tikich aents aidau waitkagmidaunashkam atumesh wainjuminig jijja utsagkan dita nugke aidan atumin amas-baijime. 10 Nuadui atumi chichagkun: ‘Witjai Tuke Pujuu Apajuí atum emematin ainajum duka. Nuniau asamtai, amorreo aents aina nuna ememattai aidau dakumka najanamu aina duka ishamkaigpajum’, tiuwaitjime. Tujash atumek minak umigtukchaugme tawai Apajuí”, tusa profeta tiuwei.

11 Nuna tiu ai Apajuí ángel tumain yaakat Ofránnum taa numi encina wajaunum nuna wajautin ekemsauwai. Nunú numik Joás Abiezer wegantu aajakua nudau aajakui. Tuja nunú tsawantinig Gedeón Joása uchiji Madián aents aidau waitkainum tusa, uumak vino najanatasa uva najatainum pujus trigon awatug akaak pujau. 12 Nuna pujujun Apajuí ángeltsukaita tumain wantintuk chichajak:

“¡Aents wajiu senchigtinuh, Apajuí amejaig pujawai!” tau.

13 Tusa tama Gedeón ayaak:

“Tsagkugtugta Apujuh, tujash Apajuí jutijai pujaish, ¿wagka imanikaish waituinaji? Iina muunji aidau ujpainak, Apajuí wainchatai ishamain aidan iwainag Egipto nugkanum batsatutin jipajui tusa tujamin agma dusha ¿wajukauwaita? Apajuí iinak idaitamsau asamtai, madiágnunia aents aidau waitkagmainawai”, tiuwei.

14 Tusa tutai Tuke Pujuu niina pempeentuki chichajak:

“Israel aents aidan Madián aents waitkaina duka ame ayamjuktatme. Wi aminak awemajame”, tiuwei.

15 Tusa tamashkam ataktu Gedeón ayaak:

“Chah Apujuh, wait aneasam tsagkugtugta. Wisha Israel aents aidanash ¿wajuk ayamjuktajaki? Mina patag wegantu aina duka Manasés wegantu aidaujai apatkamak wainkauch kakakchau ainawai. Tuja mina yatsug aina nujai ijumjamash wika shiig wainkauchitjai”, tiuwei.

16 Tusa tutai Tuke Pujuu ayaak:

“Wi amejai pujau asamtai, duka dutikattame. Nuadui Madián aents aidauk makichik aents depetmaina numamtuk depetkam ijinattame”, tiuwai.

17 Tusa tama Gedeón chichaak:

“Dekaskenum minash Apajuíya ame aujtakmek wainchatai iwain-tugkata, nuna wainkan dekas Apajuíyap tujutua titagme. 18 Tuja wait aneam wepa, juwi pujumata nuniamin amina ajamsatnun utitjai”, tiuwai.

Tusa tama nii ayaak: “Ayu juwi dakastajame, nuniai weme taata”, tiuwai.

19 Timatai ukuak, niina jeen weuwai. Nunik makichik chivo tsakatan maa inagkauwai. Nuigtu veinte kilo harinan juki pagkan lewadurajai pachimtsuk inajuauwai. Dutika neje inajuamun chagkinnum egkea nuna yumijin ollanun yajaa juki numi encina tutai wajamunum ejentauwai.

20 Dutikantai: “Anú neje inajuamua nunú pagjai kayanum patagta. Dutikam nuna yumijiyai ukatkata”, tusa nunú ángel tiuwai. Tusa tima imatiksag umikmatai, 21 neje pagjai patagbaun ushujutai takakbauwai nuna titijin nunú ángel antigkui. Dutikam nunú kayanmaya jii kegak nuna apea emegkakui. Nuna dutika Gedeógkan iwaintuk ayatak megkaekauwai. Nunikmatai ataktu awagkig Gedeógkan wainkachui.

22 Nunik megkaekamta aentaimas, dekas Tuke Pujuu ángeljai betek wantinkaujaimpap chichasja tiuwai. Nunik chichaak:

“¡Chah, Tuke Pujuuwah, amina ángeljai betek paan wainkajam duwish jakashtajash!” tiuwai.

23 Tutai Tuke Pujuu ayaak:

“¡Ishamkaipa, jakashtatme! Wi aminak agkan pujutan amastasan tajuagme”, tiuwai.

24 Tusa tima Gedeón Tuke Pujuu emematak nuwi kaya ekenag najanauwai. Dutika nuna “Apajuí agkan pujutan sukagtin” tuu adaikauwai. Duka yamaikish Abiezeran patayi aidaun batsamtaí yaakat Ofrá tutaya nuwi awai.

25 Tuja nunú kashia duwik Tuke Pujuu Gedeógkan chichajak:

“Amina apa toroji jimaya nuwiya makichik siete mijan ajamu jukita. Dutikam amina apa ememattai Baal dakumka najanamu awa nunú tsaigkata. Dutikakum nuna yantamen wainka apajuímtai Asherá dakumka najanamu numi waja dushakam tsaigkata. 26 Nunú dutikam Tuke Pujuu amina Apajuíjum emematku kuntin maa patai apetai kaya aidau ekenjam yakí jikam najanata. Dutika umikam toro maam nuna neje nuwi patai ashí apeakum emematjita. Tuja nunú apeakmek numi Asherá dakumka najanamu tsaitkatan nujai apeattame”, tiuwai.

27 Tusa tima Gedeón niina inake aidaun diez yajuak, Tuke Pujuu dutikata tibaunak imatiksag ashí umikui. Tujash nunak tsawai dutikachui, kashi dutikauwai, wagki niina apaji patayi aidaun, tikich aents nunú yaaktanum batsamin aidaunashkam íshamau asa.

28 Nuna dutikau ai tsawak nunú yaaktanmaya aents aidau nantajag diikma, Baal dakumka najanamu numi Asherá dakumka najanamujai mai tsaikbaun wainkajui. Tuja nuigtushkam yamajam altar kaya ekenja najanamunum kuntin maa ashí apeamun wainkajui. 29 Nuna wainkag pempeentunikiag iniininak: ¿Yaki junash jutikame? tusag, nuna ejetatus

kuashta egakag, inimtanashkam imanisag inim yujakma, Gedeón Joása uchiji dutikau tabaun dekawajui. Nunik Joásan jegajuawag chichajuinak:

³⁰ “¡Amina uchijum jikta, maami! ¡Wagki Baal dakumka najanamuwe nuna, tuja tikich nuna yantamen numi Asherá dakumka najanamu wagama nujai nii tsaiké!” tuidau.

³¹ Tusa tiagtai Joás ditan ayaak:

“¡Atumek Baal ayamjakjumek maanimaitsugme! ¡Tuja Baala ayamjauk eke tsawatsaig mantamnati! Tuu yujatsuk idaisatajum. Baal dekás Apajuiyáitkug, niina niime dakumka najanamua duka niinu asamtai nigki ayamjumakti”, tiuwai.

³² Aatus Gedeón Baal dakumka najanamu ememattai wajattaman tsaiku asamtai, Israel aents aidau niina daajin yapagtuawag Jerubaaal adaikau ainawai, wagki Joás chichaak: Baalak nigki ayamjumakti tiu asamtai.

³³ Nunú nagkaemakui ai Madián aents aidau, Amalec aents aidau, nuigtu aents etsa minitaiya nuni batsamin aidaujai ijunag namak Jordágka amain katiajajui. Nunikag nuwi Jezreela nugke ségaju weajunum aakmajag batsamsajui. ³⁴ Tujash Gedeógkak Apajui Wakani egkemtujam Abiezera patayi aidau wijai ijunjatnume tusa uwig aishmagku kachujin umpuajui. ³⁵ Tuja nuigtushkam Manasés wegantu aidau ujaktajum ijunag atujatkatnume tusa, chichama etsejin aidaun ishiakui. Nuigtushkam Asher wegantu aidau, Sabulón wegantu aidau, Neftalí wegantu aidau ujaktajum tusa ishiakui. Dutikamu nunú ujakajam ditashkam Gedeógjai atuniktatus shiyakajui.

³⁶ Nunik ijunjamtai Gedeón Apajui chichajak:

“Israel aents aidau ayamjukta tusa tujutmaum nuna umikti tusa yainkatnaitkumek, ³⁷ uwija duwape uje wajasun trigo akatainum aipkittag nunú kashikmas nuggak buku aig nunú duwap chupijun wainkatjai. Nuna wainkan dekaattajai dekás ame Israel aents aidaun ayamjukti tujutbaunak. Nunikan dekáskeap Apajui yainkattawa titatjai”, tiuwai.

³⁸ Nunú tibauk imanisag uminkauwai. Nuadui Gedeón kashikmas duwapen diikma chupig aun wainak juki ijuja makichik pinignum yumin aimkauwai. ³⁹ Nuna wainkau ayatak ataktushkam Gedeón Apajui chichajak: “Wait aneasam wi ataktu iniimkuish kajegtukaipa. Yamaik ima junak segajame. Ataktush tikich iwainakta. Yamai duwap chupitna juju buku wetai nugka chupigti”, tiuwai.

⁴⁰ Gedeón tusa tibaunak nunú kashi aajakua duwi Apajui betek dutikauwai. Nuadui kashinia duwi diyam duwapek buku aig nugka chupika asauwai.

7

Gedeón Madián aents aidaun depetkamu

¹ Gedeón tikich daajin Israel aents aidau Jerubaaal adaikau aina nunú kashikmas nantakmatai, suntag niijai yujau aidaushkam ashí nantajajui. Nunikag shima shimakua yumi pukuni jiinu Harot tutainum jegawajui. Nunikag nuwi aakmajag batsamsajui. Nuwi pujusmak Madián aents aidauk nujinum muja Moré tutai najatamunum batsamajakui.

² Tuja Tuke Pujuu Gedeókan chichajak:

“Aents kuashat yajuaka wegam duwi dita Madián aents aidaun depetkajag, Apajui yaimpasmatai depetmakji tutsuk, kuashat ainag duwi

depetmakji tumain ainawai. ³ Nuadui aents aidau ishamkagtuidauk jemin waketjatajum tita”, tiuwai.

Tusa tima Gedeón aents aidaun: ¡Ya ishamkagtawa duka dita jeen waketjati! tusa iniasui. Tusa iniam veintidos mil aents waketjajui. Nunikagmatai diez mil aents juwakajui.

⁴ Nunikmataishkam Tuke Pujuu ataktu Gedeógkan chichajak: “Anú juwakaja dushakam shiig kuashtai. Nuniau asantai namaka yajuaka emata, dutikawamin wi awi dekapsattajai. Dutika dekapsan duwi ujaktagme, wajupak amejaish shiyaktinme nuna”, tiuwai.

⁵ Tusa tima Gedeón aents aidaun yajuak namaka yumin uwagtinme tusa ejegauwai. Dutikamta Tuke Pujuu chichajak: “Tikishmatug tekemtuawag yumi umuinai, tikich aidau uwejen shikikag yawá umau wajagtata nunú etejjata”, tiuwai.

⁶ Tuja uwejen yumi shikikag yawajai betek umuidauk trescientos aents aajakui. Tuja tikich aidauk tikishmatug tekemtuawag uwajaju ainawai.

⁷ Nunikagmatai Tuke Pujuu Gedeógkan chichajak: “Juju trescientos aents aina jujaig Madián aents aidaunak ijinattajai atumi ayamjakun. Untsu tikich aina duka ashí waketjatnume”, tiuwai.

⁸ Tusa timatai Gedeón tikich aidaunak waketjatajum tusa awakjauwai. Untsu eke waketuinatsaig dita uwagtin yajaka jukimu aidaun kachu aidaujai ashí atanjauwai.

Nunú waketjamta ayatak trescientos aents etejjamu aidaujaig Madián aents aidau tsumunum batsatai nuna nujiin jegajuawajui.

⁹ Nunikagmatai nunú kashia duwi Tuke Pujuu Gedeógkan chichajak: “Nantakim jetekta, wi ame depetkati tusan idaitustatjame. ¹⁰ Untsu jetet ishamakmek, amina inakem Purájai atuekam shiwag batsata nunú anutukta. ¹¹ Nuwi jeganta pujusam wajintuk chichakajat nunú antukta. Nunú antukam ichichmamjam jetektatme”, tiuwai.

Tusa tima niina inake Purájai weuwai. Nunik jegauwai nunú shiwag aakmag batsatbaunum. ¹² Tuja Madián aents aidaushkam Amalec aents aidaujai, nuigtu tikich aents etsa minitaiya nuni batsamin aidaujai aatus ijunag nugka dita batsatbaun pampantuk, manchi ajaka ijinatatus wajukmaina imanidau. Tuja dita camellojishkam shiig kuashat nayantsa kamatkajijai betek aajakui. ¹³ Tuja Gedeógkak Purájai nunú shiwag batsatbaunum anumak pujus antukui makichik suntag kumpajin níi kajamjamujin pachis ujaak:

“Kajamash makichik pag sebada najanamu kagkegak, ii batsatag juwi taak makichik aakan tukume. Dutikak aaknak tegaka ajuime”, tau.

¹⁴ Tusa ujaam, niina kumpaji ayaak:

“Auk duka tikichkesh aan kajamjachume. Duka Joása uchiji Gedeón suntag Israel aents aidaun apujiya nunú aan kajamjaume. Apajuí senchijin Gedeón iina depetamkatta nunú aan kajamjaume”, tau.

¹⁵ Nunú dekas uminkatnun niina kumpaji ujaun Gedeón antuk Tuke Pujuu emematiuwai. Nunik wakitkiuwai dita batsatbaunum. Nuwi jegaa Israel aents aidaun chichajak:

“¡Umintsatajum maaniawagmi, Madián aents aidaunak depetuk amuktinme tusa Tuke Pujuu iina idaitugmastatui!” tiuwai.

¹⁶ Nuna tusa trescientos aents aina nuwiyam kempatuma imajin betek akanag ijunjauwai. Dutika uwija kachuji aidaun tinamak, nuigtushkam yumi aimtainum nuwi ekematain yajaka ekemag tinamkauwai. ¹⁷ Dutika chichajak:

“Mina diigkau atajum, wi shiwag batsata nuna yantamen jegakun wajukattaja nuniakuig atumshakam betek nuniktajum. ¹⁸ Tuja wi mina uyuntuina nujai kachu umpuakuig, atumshakam dutiksagmek shiwag batsata nunú tenteajum umpuagtajum. Dutika umpuakjum senchi untsumkajum: “¡Tuke Pujuu daajin, Gedeógka daajin!” titajum”, tiuwai.

¹⁹ Nuna tusa Gedeógkak cien aentsun yajuak, shiwag aidau junta niimainak batsatu, kashi aehaet tikich aidaujai yapajinatatus uminainai jegantauwai. Nunik jegantun kachun umpuina, cántaro yumi yajaa jutai takakbau aidau tsaikajui. ²⁰ Dita umpuiniagtai tikich akanka ishiakbau aidashkam betek umpuajajui. Nuninak yumi aintai takakbaunashkam dutiksag tsaikajui. Jii ekemakbaunak menajin takusag, tuja kachunak untsujin takus ijunas untsumainak: “¡Tuke Pujuu daajin, Gedeógka daajin! ¡Jetektajum!” wajaidau.

²¹ Tuja Israel aents aidauk Madián aents aidau batsatun tenteawag jasa batsatu. Nunik batsataig senchi untsumaidau antukag ishamak, eke jeteachmaitak sapigmakag pisainak pampaidau. ²² Tuja trescientos Israel aents aidauk kachun umpú batsataig, Madián aents aidauk ditak pempeentunikiag maaniatnume, nuninak pisajag yaakat Sererá wetaiya nuni shiyakag yaakat Bet-sitá jegatnume. Nuninai tikich aidauk yaakat Abel-meholá yaakat Tabatnum ijus awa imanui jegatnume, tiuwai Tuke Pujuu.

²³ Timau asag pisajagmatai, Neftalí wegantu aidau, Asher wegantu aidau, Manasés wegantu aidau aatus Gedeón ashí untsukui, Madián aents aidau pisaja nuna pataetuktinme tusa. ²⁴ Nuna tusa Efraíngka nugke muja ikam weajunum batsamin aina nunú ujaktajum tusa chichama etsejin aidau Gedeón ishimak: “Kaunawag Madián aents aidaujai maaniatnume. Nunikag Madián aents aidau eke nugka agkannum yujasag namak Jordágkan katikag yaakat Bet-bará tutaya nuwi jegainatsaig, nunú nugkan dita batsamtuk akijuatnume”, tusa akatmamjauwai.

Tusa tiajam Efraín wegantu aidashkam Gedeón tibaunak imatiksag umikajui. ²⁵ Dutikainak nuigtushkam Madián aents aidau apuji Oreb, Zeeb aatus achikajui. Dutikawag Orebnak yamai kaya Oreb tutai awa nuwi maawajui. Untsu Zeeb aajakua nunak vino najanataua uva chimpia najatai aajakua nunú yamai Zeeb tutaya nuwi maawajui. Nuadui nunú uva chimpia najatai aajakua duka niina daajin namkauwai. Aatus Madián aents aidau ai aintuinakua Jordágka amain Gedeón pujaunum waketuinak, Orepa buuken Zeepa buukejai tsupijuk jujukajui.

8

Gedeón Madián aentsun apuji aidau achija yajuakbau

¹ Gedeón Madián aents aidaujai maaniatatus, tikich Israel aents aidau chichama akuptuk ujayatak, Efraín wegantu aidauak unjakchauwai. Dutikayatak imapam ukaku shiwajan pataetuktinme tusa. Nuadui kajekag Gedeógjai jiyaniku ainawai.

² Tusa tiagtai Gedeón ditan ayaak:

“¿Atum dekasa mina nagkaetasu dutikaujum duka dekatsjumek? Atum aidautijum ujumak dutikaujum duka ii aidauti kuashat dutikamua nuna nagkaesauwai. ³ Apajui atumnak Madián aents aidau apuji aidau Orepan, Zeebjai achiktinme tujabiu asamtai achikugme. Tuja wika atum dutikaujum imannakesh dutikachjai”, tiuwai Gedeón.

Aatus timatai nuna Efraín wegantu aidau antukag kajekbaujin tsagku-jajui.

⁴ Nunikagmatai Gedeóggak niina suntaji trescientos aidaujai shiwajan aintuinak pimpikiaju ainayatak, namak Jordágnunm jegawag atú amain katiaju ainawai. ⁵ Nunikag yaakat Sucot tutainum jegawag, Gedeón nuwiya aents aidau chichajak:

“Wait aneasjum aents wijai yuja nunú yutai ajamjutsatajum, ditak pimpiki yawekag mininawai. Iik Madiágnunia apu aidau Zébah Salmunájai achiktasa ainuku yujaji”, tiuwai.

⁶ Tutai Sucotnumia apu aidau chichajuinak:

“Amina aentsjum aina duka yujumkak ajamsashtatji, wagki eke Zébah Salmunájai achikchaugme”, tuidau.

⁷ Tusa tiagtai Gedeón ditan ayaak:

“¡Apajui yaintsamtai Zébah Salmunájai achika waketkun, numi jagkigtin aidau zarza aidaujai uwegshunum ayá nuna yajuakan atumnak asutkattajime!” tiuwai.

⁸ Aatus tusa nuwiya juwakiag jegawajui yaakat Penuelnum. Nunikag nuwishkam yaakat Sucotnum sumakbaunak dutiksag yutain sumakui. Tujash Penuelnumia aidashkam Sucotnumiajai betek tiajui. ⁹ Nuadui Gedeón ditan chichajak:

“¡Juju yaaktanum kumpin jiikbau waja junak wi depetmaka waketskun ajaka ajuattajai!” tiuwai.

¹⁰ Zébah Salmunájai yaakat Carcornum atú amain etsa minitaiya nuni quince mil suntag aidaujai batsatu, wagki ciento veinte mil suntag maaniamunum jinawaju asamtai. ¹¹ Nunik batsatai Gedeóggak niina suntaji aidaujai jinta uwegshunmanini wegaunum yaakat Nóvah nuigtu Jogbehá aatus aajakua nuna yantamen etsa akaetaiya nuni shimutkauwai. Nunik jegajuawag anenjas batsatun jetekajui. ¹² Dutika jeteam Zébah Salmunájai jiinki tupikakiajui. Nunikmatai Gedeón pataetuk amayag mai achikui. Nuna dutikamtai shiwag aidauk shiig senchi ishankajui.

¹³ Nunik Gedeón maania depetmak nugka yaijuch Heres tutai aajakua nuni wakitkiuwai. ¹⁴ Nunik wenak nunú nugkanum makichik datsauch yaakat Sucotnumia pujaun achika juki kuashat iniasui. Tusa iniam Sucotnumia apu setenta y siete aajaku aina nuna daajin ashí adaitujui.

¹⁵ Tusa ujakam Gedeón nuna dekaa Sucotnum weuwai. Nunik jegaa nuwiya aents aidau chichajak:

“¿Atumesh aneakjumeck Zébah Salmunájai achikchaugme tusajum dushiktibijum dusha? Tuja ¿atumesh aneakjumeck Zébah Salmunájai achikchaugme tusajum mina aentsug aidau yaweja pimpiki minidau dekeyaitekujum yutai ajamsachbijum dusha? ¡Pai yamaik achikan juwi itajai!” tiuwai.

¹⁶ Nuna tusa Gedeón apu Sucotnumia aidau suwimka suwak jagki aidau, zarza aidaujai uwegshunmaya yajuakbauwai asutkauwai.

¹⁷ Tuja nuigtushkam kumpin jiikbau yaakat Penuelnum wajattaman ajak ajauuwai. Nuwiya aents aidauwashkam kajegkui.

¹⁸ Dutika Zéban Salmunájai iniak:

“¿Atum muja Tabornumia aents aidau amukuitjum dusha wajuku ajajabi?” tau.

Tusa tama dita aimainak:

“Amejai betek agmayi. Maki makichik aents aidau apu tumain agmayi”, tuidau.

¹⁹ Tusa tiagtai Gedeón senchi untsumak:

“¡Mina yatsug emkau aidau! ¡Dekas mina yatsug emkau aidau kajegkuitjume! Nuadui Tuke Pujuu daajin tajime, atum dita maachuitkug-minig, wisha atumnak yamaik maubaitsujime”, tiuwai.

²⁰ Nuna tusa inagnamuik niina uchiji emkau Jéter aajakua nuna ame maata tusa inajui.

Tujash Jéterak eke tsakatuch asa ishamak maumainchau dekapjauwai.

²¹ Nunitai Zébah Salmunájai Gedeóghan chichajak:

“¡Amek dekas mai mantuata! ¡Aentsuk niina wajiujin dekatia!” tuidau.

Tiagtai Gedeón jegantun mauwai. Dutika Zébah camelloji Salmuná camellojjai kuntujen waji pegkeg apeekamu aidaun yajutkauwai.

²² Dutikamtai Israel aents aidau Gedeóghan chichajuinak:

“Madián aents aidau waitkagmaidau ame ayamkagtukam agkanmitkag-tuau asam ame, tuja ame wegantu aidaujai iina apuji atajum”, tiajui.

²³ Tusa tama Gedeón ditan ayaak:

“Wika atumi apujig achattajai. Tuja mina uchigkesh atumi apujig achattawai. Atumin apujig Tuke Pujuu atatuí.

²⁴ “Untsu atum shiwag aidau maakjum ditá patakumtaiji aidau yajutkajum nuna segajime mina sujustinme tusan”, tiuwai.

Tuja nunú suntag aidauk uwegshunum batsamin asag patakumtai oro najanamun tuke patakumajaku ainawai. ²⁵ Tusa timatai Israel aents aidau jáanchin nugká ainak nuwi patakumtai yajuakbaun batsasajui.

Dutikawag Gedeóghan chichajuinak:

“Pai, juju jukita”, tiajui.

²⁶ Nunú patakumtai oro najanamun aidauk diecinieve kilo tumain aajakui. Untsu apu aidaun iwagmamtaiji, nugkutaiji nuigtu jáanch yamakaitkau aidau aatus duka dekapachbau aajakui. Tuja camello anujamu aidaushkam dekapachbau aajakui. ²⁷ Nunú oro yajuakbauwai Gedeón sacerdote nugkutain dakumak najanauwai. Dutika niina yaaktajin Ofrá ejegauwai. Nuna Israel aents aidau ashí emematuinak Tuke Pujuu ememattan idaisau ainawai. Tuja Gedeóghan pegkegnap dutikaja tukama, nuna niina patayi aidaushkam emematuidau asamtai, niinishkam pegkeghau aajakui.

²⁸ Dutika depetkamu asag Madián aents aidauk Israel aents aidaunum yunumag batsamajaku ainawai. Nuadui yaunchuk aajakbaunak betekchau tiki wainkauch juwakajui. Tuja Gedeón iwaku pujusmataig, nunú nugkanmak cuarenta mijan maanitsuk batsamsau ainawai.

Gedeón jakamu

²⁹⁻³⁰ Gedeón Jerubaa tuuta awagmatai aajakua duka niina jeen wakitki pujusui. Nuwi pujus setenta uchin akigkui, tuja niina nuweshkam kuashat aajakui. ³¹ Tuja niina ikaa nuwe Siquem pujujakua dushakam makichik uchin uchigmakui. Dutikamtai Gedeón nunú uchi daajin Abimelec adaikauwai.

³² Gedeóghan shiig muumpaki jakauwai. Nunik jakamtai, niina apaji Joása ukumataiji Abiesel wegantu aidau batsamtai yaakat Ofrá aajakua nuwi ukusajui.

³³ Gedeón jakamtai batsamas Israel aents aidauk Baal dakumka najanamun aidaun emematuinak Apajuí ememattanak ataktu idaisajui. Tuja dita apajuímawagtinnak Baal-berit aajakua nuna etegkawag nuna emematujaku ainawai. ³⁴ Nunidau asag ditan shiwag waitkagtai Tuke

Pujuu Apajuí ayamjukua nunak kajimatki idaisajui. ³⁵ Gedeón tikich daaji Jerubaal aajakua nunú ditan ayamjak kuashat takasu aig, niina patayi aidaunash wait anenjachu ainawai.

9

Abimelec apu wajasbau

¹ Jerubaaalan uchiji Abimelec niina dukuji wegantu aidau Siquemnum batsatu asamtai, ditajai chichastatus weuwai. Nunik jegaa ditan chichajak:

² “Tik pataa ainaji, nuadui tajime. Jerubaaala uchiji setenta aina duka ashí apu amain ainatsui, ima makichik apu amainai tajai. Nuniau asamtai juwi tikich aents aidau batsata nujai nunú pachisjum shiig chichasjum antumtikatajum”, tiuwai.

³ Tusa timatai Abimelekan patayi asag, niina atuinak, Siquemnumia aidaujai chichastatus shiyakajui. ⁴ Nuigtushkam apajuímtai Baal-berit dakunka najanamu jegamjukbaunum kuichik plata najanamu atatman setenta jukiajui. Dutika Abimelekan susajui. Dutikam nuna akikmak, Abimelec aents magkagtin aidaun yajuakui. Dutika nunú aents aidaujai, ⁵ yaakat Ofrá niina apaji Jerubaal pujujakbaunum weuwai. Nunik wegak niina yachi setenta aajaku aina nuna makichik kaya múun pujaunum nuwi ashí kajekui. Untsu niina yachi Jotam awan aajakua nunú uumkau asa, ima nigki uwemjauwai. ⁶ Dutika niina yachi aidaun ashí amukmatai, Siquemnumia aents aidau, nuna yantamen Bet-miló aajakua nuwi batsamin aidaujai Siquemnum numi encina tutai wajaunum kaya pegkejam tutai pujaunum nuwi ijunjajui. Nunikag nuwi Abimelekan apu adakajui.

⁷ Abimelec apu wajase tabaun Jotam dekaa, muja Guerizim tutainum wakauwai. Nunik nuwi wajas Siquemnumia atuktinme tusa senchi untsumak chichaak:

“¡Siquemnumia aidauwah, wi titatag nunú shiig antuktajum! ¡Atum-nash Apajuí antugtamkachajaintash!

⁸ “Makichik tsawantai numi aidau apugtin amí tusag wakekajui. Nuadui olivon chichajuinak: ‘¡Ame iina apuji ata!’ tiajui. ⁹ Tusa tama: ‘Wika tikich numi aidaun apuji atag takunuk, aents aidau Apajuín emematuinak mina aceitejun juki takau aina nuna, tuja ditanu atinnashkam mina aceitignak juki takau aina nuna idaikun apu amainaitjai’, tusa dakitjauwai.

¹⁰ “Tusa timatai higuera chichajuinak: ‘¡Untsu ame iina apuji ata!’ tusag segajui. ¹¹ Tusa tama higuera chichaak: ‘Wika numi aina nuna apuji atag takunuk, mina yujagkeg higo shiig pegkeg yumimitun nejenaitag nuna idaikun apu amainaitjai’, tusa dakitjauwai.

¹² “Tusa timatai numi aidau uva numijin chichajuinak: ‘¡Untsu ame iina apuji ata!’ tusag segajui. ¹³ Tusa tama uva numiji chichaak: ‘Wika numi aina nuna apuji atag takunuk, Apajuín emematuinak tuja dita aidaushkam minaiya vino najanamun umuinak shiig aneen aina nuna idaikun apu amainaitjai’, tusa dakitjauwai.

¹⁴ “Tusa timatai inagnamua nuna numi jagkigtinun chichajuinak: ‘¡Untsu ame iina apuji ata!’ tusa segaidau. ¹⁵ Tusa tama jagki chichaak: ‘Dekaskenun atumi apuji ati tusajum wakegakjumek, wi dukuka ijiam nuna wakentin batsamsatajum. Untsu atum dakitakjuminig, minaiya jii keeka muja Libano tutainum setug múun ayá nuna apea ijinattawai’ tiuwai jagki”, tiuwai Jotam.

¹⁶ Nuna tusa inagnak: “Tuja yamai wi atumin tajime: ¿Atum Abimelec apu adaikabiujum dusha pegkejak dutikaujum? ¿Tuja mina apag Jerubaal atum aidautigmin shiig kuitamjamkau aina dutikagmek, atumesh niina patayi aidaush shiig kuitamkaujum?” ¹⁷ Atumek Madián aents aidau waitkatai batsatutigmin, mina apag atumi ayamjupak maaniak jamain wajakui. ¹⁸ Tujash atumek duka aneetsuk, mina apaju patayi aidaujai shiwagmagajum niina uchiji setenta aajakua nunú makichik kayanmak ijinaugme. Tujash ima dukek dutikachugme, nuigtush Abimelec atumi patayi asamtai, Siquema apuji ati tusajum adaikaugme. ¹⁹ Tujash yamai wi tajime: Atum aidautijum mina apag Jerubaal aajakua nunú niina patayi aidaujai pegkeg anentaiyai kuitamkau ainakjumek, Abimelecejai shiig aneasjum pujustajum. Nuniagmin niishkam atumin shiig anenjam-satnume. ²⁰ Untsu atum shiig kuitamkachu ataik, Abimelecnumia jii kegag Siquemnumia aidaun Bet-milónnumia aidaujai apea ijinati. ¡Tuja nunú jimag yaakta nuwiya jii kegag Abimelekan apea maati!” tiuwai.

²¹ Nuna Jotam aatus tusa ukuak, tupikaki yaakat Beernum wee pujusui. Nunak nunikui wagki niina yachi Abimelekan ishamak.

²² Tuja Abimelekek Israel aents aidaun apuji wajas kampatum mijan inamjauwai. ²³⁻²⁴ Tuja nuadui Jotam tibaunak imanisag umigkauwai. Nuadui ashí aents aidaunum shiig pegkegchau, senchi waitiamu ati tusa Apajuú tiuwai. Nunú umintai, pempeentunikig tsainika ainawai.

13

Sansón akiinamu

¹ Israel aents aidauk Tuke Pujuu umigtan kajimatkiag ataktushkam pegkegchaun takaidau. Nuniagtai Tuke Pujuu ditan idaisauwai. Dutikam-tai filisteo aidau cuarenta mijan waitkasu ainawai.

² Tuja nunú tsawantin makichik aents Dan wegantu Manoa daagtin yaakat Soránum pujujakui. Niina nuweg uchi uchigmachau asamtai uchijig atujukui. ³ Makichik tsawantai Apajuú ángelstukaita tumain nayaimpinmaya nunú nuwan wantintuk chichajak:

“Amek yaunchuk nagkamsam uchigmachuitme. Tujash yamai ejajjuk-tatme, nunikam uchi aishmag uchigmaktatme. ⁴ Nuadui umutai vino nuniachkush tikich uwaja nampetai aidauk makichkish uwajaipa. Tuja Tuke Pujuu dakitamu aina dushakam yuwawaipa, ⁵ wagki uchi aishmag uchigmaktatam duka atatui Nazareo.* Nunú uchi intashig awagchamu atatui, wagki nii múun wajasa filisteo aidau Israel aents aidaun waitkaina nuna ayamjuk agkanmitkattawai”, tiuwai.

⁶ Tusa tima aishin ujaktatus wejiuwai. Nunik jegaa ujaak:

“Apajuú ángeljai betek wi pujamunum tajutuame. Nuniakui senchi puyatkamjai, wagki Apajuú ángeljai betek asamtai. Yaitpa tusanuk wikish iniaschamjai, tuja niishkam niina daajinak tujutchame. ⁷ Untsu uchi uchigmaktatme tusa tujutmae. Nuna tusa, yamai nagkamsamek vino uwajaipa, tuja tikich uwaja nampetai aina dukesh uwajaipa, tujutmae. Nuigtush pegkegchau aina duka yuwawaipa. Tuja ame uchi uchigmaktatam duka uchi eke akiintsag Apajuúnu etegkamu asa, wika pegkegchau aina nunak takaschatjai tumamiu asa pegkegchaunak takatsuk, jau aina numamtin uchik atatui, tujutmae”, tiuwai.

* **13:5** “Nazareo” tawa nunak Apajuúnu asa pegkegchaunak makichkish takaschatjai tumamiu aidaun takau tawai.

⁸ Tusa ujakam Manoa Tuke Pujuun segaak aatus tiuwai: “Apujuh, ame aents awemaum nunú ataktu awekagtita tusan segajame, nunú taa uchi akiinkuish itugkattaji nuna ujabatki taji”, tiuwai.

⁹ Tusa segam Apajuí Manoa sumamunak betek umikui. Nuniak nuwa ajanom wekaetatman Apajuí ángeljai betek ataktu wantintukui. Tuja Manoa niijai wekaechau asamtai, ¹⁰ tupikaki weuwai ujaktatus. Nunik ujaak:

“¡Aentsun wi wainkabiag nunú ataktu wantintugkae!” tiuwai. ¹¹ Tusa ujakam Manoa niina nuwejai nunú aents pujamunum weuwai. Nunik jegantun iniak:

“¿Ameka tikich tsawantin mina duwagjai chichasmayum?” Tusa tama nii ayaak:

“Ehe, witjai”, tiuwai. ¹² Tusa tutai Manoa chichajak:

“Ame mina duwag tium nunú uminkuish ¿wajak uchish kuitamainaitji? ¿Tuja uchish itugkattaji?” tau.

¹³ Tusa tutai ángel tumain wantinkauwa nunú Manoan ayaak:

“Wi amina nuwemin timag nunak imatiksag umikti. ¹⁴ Vино najanamun uwajaigka. Tuja tikich umutai uvanmaya najanamun aidaunash uwajaigka, nuigtushkam tikich umutai kajiau aidaunashkam uwajaigka. Tuja tikich yutai aidaun Apajuí dakita nunak yuwawaigka. Wi tibaunak Imatiksag umikti”, tau.

¹⁵⁻¹⁶ Tusa tama, Apajuíyap ángeljai betek wantintujuk tujutua tachau asa chichajak:

“Wait aneam juwi jutijai juwakta, nunikamin chivo tsakatan maa inajuamtai yuwami”, tau.

Tusa tama nunú ángeljai beteka nunú niina ayaak:

“Wi juwi juwawnush amina yutaigminak amejai jimagtuknuk yumait-sujai. Untsu chivo tsakat maam nuna neje ashí apeakum Tuke Pujuu emematta”, tiuwai.

¹⁷ Tusa tama Manoa niina chichajak:

“Untsu amina daagmesh yaita dukesh uajatkata, nuna dekau asan ame tukagtam nunú uminkui see kuashat itagme”, tiuwai.

¹⁸ Tutai Apajuí ángeljai betek wantinkauwa nunú niina ayaak:

“¿Wagka mina daajush dekatasamesh wakegame? Mina daajuk shiig pegkeja ibau asa kakajus dekamaitsui. Nuadui uukbaujai betekai”, tiuwai.

¹⁹ Tusa timatai chivo tsakatan, ajak aidaun neje juukbaujai ijumag juki, kayanum patai nuna ashí apeak Tuke Pujuun emematiuwai. Nuna duitkamtai Tuke Pujuu Manoan niina nuwejai wainchatai pegkeg aidaun iwaintukui. ²⁰ Tuja Manoa niina nuwejai chivon nuna apeauwa nunú bukuitamunum Apajuí ángeljai betek nuwi pachitkau yaki waun wainkajui. Nuna wainkag tsuntsumawag nijayin nugka antig pujusajui. ²¹ Nuna Manoa wainak anentaimjauwai, dekas Tuke Pujuuwap ángeljai betek wantinkaun wainkaja tiuwai. Duwi nagkamsag niinak tuja niina nuwenakesh ataktuk wantintukchauwai.

²² Nuna wainkau asa niina nuwen chichajak:

“Ik dekas Apajuí wainkau asa jakattaji”, tiuwai.

²³ Tutai niina nuwe ayaak:

“Tuke Pujuu iina mantamatag takug, ii kuntin maa nuna neje ashí apeaku, ajak juukbaujai apeag nuna dakitmain wajake. Tuja iina iwaintug-maka nunashkam iwaintugmamainchau awajtamkae. Nuigtushkam iina ujpaka nunash ujpamainchau awajtamkae”, tiuwai.

²⁴ Duwi pujus niina nuwe ejajjuk uchi aishmagkun uchigmakui. Nunikmatai adaikauwai Sansón. Nunú uchi muumpatai Tuke Pujuu pegkegnum yayiakui. ²⁵ Tuja makichik tsawantai yaakat Sorá Estaoljai niiniaku aajakua nuna ejapeen Danka nugke aajakua nuwi Sansón pujaun Apajuín Wakani egkemtujui.

14

Sansón nuwenamu

¹ Makichik tsawantai Sansón weuwai yaakat Timnat. Nunik nuwi filisteo nuwa pujuttaman wainak wakejukui. ² Nunik niina jeen wakitki apajin dukujijai ujaak:

“Yaakat Timnatnum filisteo nuwa pujaun wainkamag nujai nuwenatag tajai. Nuadui wait aneasjum nuwenatasa umitai aina nunú ashí umiktajum”, tiuwai.

³ Tusa tutai niina apaji dukujijai ayaak:

“¿Wagkamek filisteo aents Apajuín umigchaw aina nuninjaish nuwenatame? ¿Lina patayi aina nuwiyag nuwak atsawak? atsa nuniachkush ¿ashí Israel aents aina nuwiya nuwak makichkish atsawak?” tiuwai.

Tusa tama Sansón ayaak:

“Wika nuna nuwan wakegajai. Dekas nunú nuwa sumagtuktajum nujai nuwenatjai”, tiuwai.

⁴ Tuja Tuke Pujuu yaunchuk emtika nuniktin ati tusa tibaunak niina apajig dukujijaig dejakachau ainawai. Tuja nunú tsawantin Israel aents aidaun filisteo aidaun waitkaidau asantai, wajuk waintuanuk filisteo aents aidaun ijinkun Israel aents aidaun agkanmitkawag tau asa tiuwai.

⁵ Nuadui Sansóggak niina apaji, dukuji aatus yaakat Timnat weuwai.

Nunik wegau niina apajin dukujijai ukuak tsegkeki uvan egak weuwai. Nunik wegau león yama tsakaju senchi kajeau jetekui. ⁶ Dutikatai Apajuí Wakani Sansóggan egkemtujui. Dutikam leónkan achika chivo tsakatuch maumaina dutika mauwai. Nuna dutikash apajinak dukujijaig ujakchauwai. ⁷ Tuja Timnatnum jegawag Sansóggak nii nuwa wakejukbau pujaunum weuwai. Nunik nijjai chichasui.

⁸ Nunik dukap tsawan pujusa nii nuwenatnuji tsawan jegantai, we-nak yaunchuk nii león maamujin diistatus tsegkeki weuwai. Nunik jegan diikna leónka iyashi sakajunum dapa jegamak yumijina egketun wainkauwai. ⁹ Dutika wainak ashí juki duka dukakua weuwai. Nunik niina apaji dukujijai pujaunum jegan, ditanashkam akaantuk susauwai, dutikam ditashkam nuna dukawajui. Tujash Sansóggak león maa ukukbaunmayan jukimjai tusag ujakchauwai.

¹⁰ Nunik jegawag Sansógka apajig uchi nuwe atinun wainkatatus wejiuwai. Tuja datsauch nuwenuk nuna dutikin ati tibaun umiak Sansón nii nuwenbaunum jüstamatatus ipamauwai. ¹¹ Tujash filisteo aidauk ishankagtuidau asag, treinta datsauchin ipauwai, Sansón nuwentai uyunainak batsamsatin aidaun. ¹² Nunú treinta aents aidaun Sansón chichajak:

“Makichik anentaimsa aimtain iniaatajime. Dutikantai nuwenbau siete tsawan asa atata duwi ujatkatatum wajina takunua taja nunú. Nunú betek ujatkgaminig maki makichik jáanch shiig pegkeg lino najanamun, nuigtu nuwenbaunum weaku nugkutai aidaujai amastajime. ¹³ Untsu nunú

betek aimkachjume, jáanch shiig pegkeg lino najanamu, nuigtu jáanch nuwenbaunum weaku nugkutai aidaujai mina sujustatjume”, tiuwai.

Tusa tama dita aimainak:

“Ame waji tame nunú tita antukmi nunika aimkagmi”, tuidau.

¹⁴ Tusa tiagmatai Sansón aatus tiuwai:

“Yukagtinnumia yutai

pegkeg jiinkiuwai, senchigtinnumia

yumimitu jiinkiuwai”, tiuwai.

Timatai, nunash wajina takug tawa tusa kumpatum tsawan batsam-takush ezechajui. ¹⁵ Tuja ezechamin dekapenak tsawan ipak usumta duwi Sansógka nuwen chichajuinak:

“Iina tujabi nunash wajina takug timae nunú aishjum dekaajuata. Nunikam amina ujakmatai ujabatkata. Unstu nunú dekaajuachaminig, aminak, amina apa patayi aidaujai apeattajime. ¡Wagki atumek dekasiina jáanchji aina nunú atankimi tusajum ipajatuaugme!” tiajui.

¹⁶ Tusa tiagmatai Sansógjai chichastatus weuwai. Nunik jegajua buutki chichajak:

“¡Amek minak anentsume! ¡Amek minak kajegtame! Nuniau asam mina pataag aina nunú anentaimsa aimtai iniasume, tujash amek minak dusha waji takumea tiume duka ujattsume”, tiuwai.

Tusa tama Sansón ayaak:

“Mina apagnakesh, tuja mina dukugnakesh ujatsug nunash aminash wagkanuk ujaktagme”, tiuwai.

¹⁷ Tusa tamashkam ujatkatu tusa niyai ayaumas pujus nii nuwenku jiiistabau siete tsawan aajakua imanisag siete tsawan buutu pujau. Imatika waitka pujujam tsawan sieteya duwi nunash wajina takug tiyawa nuna ujakui. Tusa ujakam niina patayi aidau batsatun jegajua niishkam ujakui.

¹⁸ Dutika ujakajam tsawan sieteya duwi eke etsa akaetsaig Sansógka jegajuawag chichajuinak:

“Dapa yumiji yumimitun

nagkaesauk tikichik atsawai.

Tuja Leónka nagkaesau senchigtinuk tikichik atsawai”, tuidau.

Tusa tiagmatai Sansón ditan chichajak:

“Mina duwag ujakachamtaig, atumek nunap tawa tusagmek ejemainchau ainagme”, tiuwai.

¹⁹ Nuna taig Tuke Pujuu Wakani egkemtung Sansógkan senchimtikauwai. Dutikam weuwai yaakat Ascalón, nunik nuwi treinta flisteo aidaun mauwai. Dutika nuna jáanchji aidaun yajutuk akikmakui. Nuna dutika senchi kajeka niina apaji jeen wakitkiuwai. ²⁰ Nunikmatai Sansón nuwenbaunum aents aidau pujusu aina nuwiyajai Sansógka nuwen tikich aentsnum sujuktajui.

15

¹ Tuja kuashat tsawan nagkaemakiu ai, trigo juut jegamunum Sansón niina nuwen ijagsatatus wegak chivo tsakatan juki weuwai. Nunik jegaa chichaak:

“Mina kanutajui wayan mina duwagjai chichastajai” tusa wayatag titatman niina wegaji dakitjauwai. ² Nunik chichajak:

“Wika dakitakus idaisayatai tibaijai. Tau asan amina kumpagmín nuwemnak sujukmajai. Tujash tikich mina nawantug ekeu niina nagkaesau shigmauch puja nunú nuwatkata”, tiuwai.

³ Tusa tama Sansón ayaak:

“Yamai atum filisteo aidautigminak wi ijinattajime. Dutika ai wagka aikae tujutmainuk atsuttawai”, tiuwai.

⁴ Nuna tusa ukuak niina nuwe sujutkamunum iikmaktatus, trescientos amich nuwa aidaun achika ijumjauwai. Dutika apa apatuk ujuknum jigkakui. Dutika jimag amich apatka jigkakbaunum nuna ujuken eke-matain anug jigkakui. ⁵ Dutika nuna ekemak amichan atia filisteo aidau ajaji aidaunum ishiakui. Nunú shimak trigo juuka ijumjamu aidaun eke juukchamu aidaujai ashí apekui. Dutikak nuigtushkam uva ajakbaun, olivo* ajakbaujai ashí apeka ijinauwai.

⁶ Dutika ijituam filisteo aidauk: ¿Yaki aikae? tusa inimainak yujakma: Auk Sansógka wegaji niina nuwen atanki, niina kumpajinig sujutkam, nuna iikmak aikae tabaun dekawajui. Nunik dekawag nuna shimutuk nunú nuwanak apajijai apeawag maawajui. ⁷ Dutikawagmatai Sansón chichaak:

“Atum aniau asagmin, nuna iikmakun makichkish idaitsuk ashí amuktatjime. ¡Nunak dekas wi umiktinjun tajai!” tiuwai. ⁸ Tusa senchi kajeku asa filisteo aidaun jeteka shiig kuashat ijinauwai. Dutika ukuak Etamnum kaya múun waa au asamtai, nuwi uumak pujustatus weuwai.

Sansón burro jagkejai filisteo aidaun ijinamu

⁹ Nunik weu ai filisteo aidaushkam Sansógkan egainak Judá nugken shiyakajui. Nunikag jegawag nuwi nagkamas batsamak nugka Lehi† tutaiya imanui jegantajui. ¹⁰ Imanikagmatai Judá wegantu aidau ditan iniinak:

“¿Wagka jutijai maaniasagmesh atumesh kaunaugme?” tuidau.

Tusa tama dita aimainak:

“Sansón iina pegkegchau awagtamkau asamtai, achika juki iishkam dutiksaik iikami tusa yujaji”, tuidau.

¹¹ Tusa tiagmatai nuna antukag, tres mil aents Judá wegantu aidau Etamnum kaya múun waa aunum nuwi Sansón pujau asamtai shimutkauwai. Nunik jegawag nuwi pujuttaman wainkag chichajuinak:

“¿Amek dekatsmek filisteo aents aidau iina nagkaetamsau senchigtin aina duka? ¿Wagka jutikamesh utugchatash itagkagtuaume?” tuidau.

Tusa tama Sansón ditan ayaak:

“Wika dita pegkegchau takasbaujin dutiksanuk iikamjai”, tiuwai.

¹² Tusa timatai dita chichajuinak:

“Iik ame achika juki filisteo aidaunum sujukmi tusa kaunaji”, tuidau.

Tusa tama Sansón ayaak:

“Atum mantuashatinaikugmek, dekas mashtatjame tusa tujuttajum”, tiuwai.

¹³ Tusa tutai dita ainak:

“Atsa, ii aidautik mashtatjame, ayatak achika juki filisteo aidau susami tusa taji”, tuidau. Aatus tusag jimag soga yamagmai jigkajajui. Dutikawag uumak pujaun jiikiag jukiajui.

¹⁴ Dutikawag we wenakua Lehin nugkanum jegawajui. Nunikagmatai filisteo aidauk shiig aneekua unsumkiag jiintujajui. Dutikiagtai Apajuí Wakani Sansógkan senchimitikauwai. Dutikam sogayai niina kuntujin,

* 15:5 “Olivo”: Juka makichik ajakai. Nuna nejeshkam olivo tutayai. Untsu nunú juuka painkamu aceituna tutayai. † 15:9 “Lehi” tawa duka hebreo chichamnumak “kuntinu jagken” taku tawai.

uwejen jigkagbaunak hilo lino najanamu apeamu tsujinmaina numamtuk tsujajui.

¹⁵ Dutika nuadui burro jagke eke shiig sakamchau atatman juki, duwi awatug mil filisteo aidaun kajegkui. ¹⁶ Dutika chichaak:

“Makichik burro jagkenig mil aentsun kajegkan ijumsawa emakjai”, tiuwai.

¹⁷ Nuna tusa burro jagke takakbaun nagkima ajapauwai. Nuadui nunú nugka daajig Ramat-lehi[†] adaikamui.

¹⁸ Tuja Sansón senchi kitaag Tuke Pujuun segaak: “¡Ame minak shiwag shiig kuashat aina nuna depetkati tusam yainkaume! Nuadui ¡yumi umumain atsutai juju aents amina umigtamchau batsata nuwi kitakai jakati, nunikmatai niina iyashin dushikjatnume tusamek idaitumaitsume!” tiuwai.

¹⁹ Tusa timatai Apajuí yumi initkanmayan jikiuwai. Dutikamtai Sansón nuna uwajui. Nuna uwag ataktu wajuu wajasui. Nuadui nunú yumi pukuni jiinkiuwa nuna daajin adaikauwai En-acore.[§] Duka yamaikish nugka Lehin tutainum awai.

²⁰ Sansógkak veinte mijan Israel aents aidaun yaigkui. Nunak filisteo aidaun nunú tsawantin Israel aents aidaun ashí depetuk waitkajaku aina nunú tsawantin niig takasui.

16

Sansón yaakat Gazanum webau

¹ Makichik tsawantai Sansón yaakat Gazanum weuwai. Nunik nuwi makichik nuwa akiaku dutiktai pujuttaman wainak, nuna jeen waya niijai kanajui. ² Nuwi pujai filisteo aidaushkam Sansón tae tabaun antukag, nunú yaaktanmaya aidaun Sansón pujamun tenteawajui. Dutikawag yaakta waitjijn kuitamainak makichik tsawan batsamtau asa, kiitai kashin tsawaku maami tusag dakainak jasa takamtak batsatu. ³ Tujash Sansógkak ejampek shintaag waiti aidaunak numijijai tegajui. Dutika jiju minantuamunashkam ukuinag ashí yanaki yajuak, yaakat Hebrógjai niiniaku muja jítkaunum iwaka nagkimak utsagkui.

Sansón Dalilajai

⁴ Duwi pujus, nuwa Dalila daagtin Sorec nugka pakajin pujuttaman jukitatus ausauwai. ⁵ Dutikamtai filisteon apuji aidaun Dalilajai chichastatus shiyakajui. Nunik jegaajuawag chichajuinak:

“Sansógkash waggak ibau senchigtinaita tsanuja dekajuata. Dutikawamin itugkaik depetmainaitji nunú ejemi. Nunú dekajua achika jigkaja apusami. Tuja ame dekajuawaminig, ii aidaui maki makichik mil cien kuichik plata najanamu amastatji”, tiajui.

⁶ Tusa tima Dalila Sansógkan chichajak:

“Wagka ibau senchigtinaime nunú minash wait aneamam ujatkata. ¿Wajigmin jigkapajgmatai ya ayamjumainchaush amainaitme?” tau.

⁷ Tusa tama nii ayaak:

“Siete daek samek aidaui jigkatjagmataig, tikich aents aina nujai betek senchigtuchu amainaitjai”, tiuwai.

[†] 15:17 “Ramat-lehi” tawa duka hebreo chichamnumak “jagke nain” taku tawai. [§] 15:19 “En-acore” tawa duka hebreo chichamnumak: “entsa segabau” taku tawai.

⁸ Tusa timatai Dalila filisteo apuji aidaun ujakui. Tusa ujakajam daek samek aidaun siete jukiag Dalilan susajui. Dutikam nuna juki Sansógkan jigkajui. ⁹ Dutika jigkaja, aents aidaun yaunchuk niina kanutaijin uuka batsasu asa, untsamak:

“¡Sansógka, filisteo aidau jetepainawai!” tau. Tusa tutai Sansón nantak nunú daeknak apeamujai betek tsujajui. Dutikantai filisteo aidauk wagkag ibau senchigtinaita nunak dekamainchau dekapjajui.

¹⁰ Tuja Dalila Sansógkan chichajak:

“¡Tsanujaume! ¡Amek minak dushiktakum tujutiume! Tujash dekas yamaik wait aneamam tujutta, itugkaya emetmainush amainaitme nunú”, tiuwai.

¹¹ Tusa tutai Sansón ayaak:

“Soga yamajam makichkish takashtaiyai jigkatjagmataig, tikich aents senchigtuchu aina nujai betek amainaitjai”, tiuwai.

¹² Tusa timatai yaunchuk aents aidaun niina kanutaijin uuka batsasua dutiksag batsasu asa, Dalila sogga yamagman juki Sansógkan jigkaja, untsamak:

“¡Sansógka, filisteo aidau jetepainawai!” tau.

Tusa tama Sansón nantak, hilo tsejgkush tsujimaina imatika soganak tsujajui. ¹³ Dutikantai Dalila niina chichajak:

“¿Wagka ima tsanugme? ¡Amek minak tuke tsanugme! ¡Itugkaya emetmainush amainaitme nunú tujutta!” tau.

Tusa tama Sansón ayaak:

“Kakaumainchau wajasti tujutkumek, mina intashig siete chapikmag-mawa nunú jáanchjai ijumjam jáanch apataiyai apijam, nuadui numi ajiam nuwi jigkamainaitme. Dutikawamin tikich aents senchigtuchu aina nujai betek amainaitjai”, tiuwai.

Tusa timatai Dalila Sansógkan ikanag aepes intashi siete chapikmag-baun ijumag jáanch apataiyai apijauwai.

¹⁴ Dutika numi juki ajia jigka emetua untsamak:

“¡Sansógka, filisteo aidau jetepainawai!” tau.

Tusa tama nantak intashi jigkatuamunak japiki juwak jáanch apigtainak numi ajiamujai tsujajui.

¹⁵ Dutikantai Dalila chichajak:

“¡Amek waitaitme! Nuniyatikum aneajame tusa tujutmaume. Amek mina dushiktau asam, kempatuma imania tsanujaume. Tujash tuwi senchigmesh ajutjamua duka eke ujattsume”, tau.

¹⁶ Tusa kashi kashinig iniak waitkamu asa yawetug dakitak, dekas jakatjai tiuwai. ¹⁷ Tau asa, wagkag ibau senchigtinush ayi nuna Dalilan ujaak:

“Wika nazareowaitjai. Mina intashjunak makichkish tsupigtuchu ainawai, wagki minak eke akiintsag Apajuínu ati tusa etegkamu asan, pegkegchaun takaschati tibauwaitjai. Tuja mina intashjun tsupigtukag-mataig, tikich aents senchigtuchu aina nujai betek amainaitjai”, tiuwai.

¹⁸ Tusa etsegtumakmatai, yamaik dekas ujatkae tusa filisteo apuji aidaun ujaktajum tusa chichaman akuptak:

“¡Yamaik Sansógkak wagkag ibau senchigtinaita nunak ashí ujatkae, nuniau asantai kaunatajum!” tiuwai.

Tusa timatai ame dekajuwaminig, akiktatjame tiu asag, kuichki jukiag Dalila pujamunum wegajui.

¹⁹ Dalilak niina bakuin Sansógkan patas ikanjauwai. Nunik kanag-matai niina intashi siete chapikmagbaun tsupijati tusa makichik aentsun

untsukui. Nunú jegantun ashí tsupijauwai. ²⁰ Dutika tsupijamtai Dalila untsamak:

“¡Sansógka, filisteo aidau jetepainawai!” tau. Tusa tama Sansógkak Tuke Pujuu niina idaisamunak dekachu asa, kanag tepau nantak tuke ayamjubau asa nuniktakama nunimainchau wajasui. ²¹ Nunik kakau-mainchau wajasmatai, filisteo aidau achikag jiin mai ukuitkajui. Dutikawag yaakat Gazanum emajui. Dutika nuwi ejegawag cadena bronce najanamui jigkajag, aents achika chimpitainum trigon dekeak pujusti tusa apusajui. ²² Dutikam pujai niina intashi ataktu tsakajauwai.

Sansón jakamu

²³ Filisteo aents aidau apuji aidau Sansógka achiku asag depetmakji tusag, shiig aneenak dita apajuímtaiji Dagón aajakua nuna emematuinak, kuntinun maawag apeawagtatus ijunajui. Nunik batsamas kantamainak: “Iina apajuíji yaimpasmatai, iina shiwaaji Sansón depetkaji” wajaidau.

²⁴ Tuja tikich aents filisteo aidaushkam nuna wainkag dita apajuímtaijin emematus kantamainak: “Iina apajuíji yaimpasmatai, iina shiwaaji Sansón ii ajakmamu aidau ijitjamak aents aidau kuashat ijinnuwe nunú depetkaji”, wajaidau.

²⁵ Imatuidau asag shiig aneenak Sansón achikam egketa nunú jiiki itatajum tima, jiiki itawagmatai senchi dushikinai. Dutikainak jega jeganmu ajigbau jimag wajaunum nuna ejapeen awajsajui.

²⁶ Dutikam wajasu uchi niina egkesa ejeentaun chichajak:

“Juju jega jeganmu ajigbau aina nunú jimag atsuak nuwi ejentunta, achimka wajasu ayamjatjai”, tiuwai.

²⁷ Tuja filisteo aidau apuji aidau nunú jeganum ashí nuwa nuwajaima ijunag piyak batsatu. Nuninai tikich aidaushkam nuna yakin ekenja jeganmunum tres mil aents tumain Sansógan dushikiagtai nuna diinak batsatu. ²⁸ Imatu batsatai Sansón senchi untsamak Tuke Pujuu segaak: “¡Tuke Pujuu Apajuí ashí senchigtinuh, wait aneam ima juke inagnamu yainkata! Filisteo aidau mina jiiun mai ukuitjukajag dushiktuina nuna iikmaktajai. ¡Senchijum sujusta!” tiuwai.

²⁹ Nuna tusa jega jeganmu ajiamu ejapeen jimag wajaun nuna mai achikui. ³⁰ Nunik achika wajas untsamak: “¡Filisteo aidautigmek yamai wijai jinaattagme!” tiuwai.

Tusa tamawaik ashí niina senchijijai shitakiuwei, dutikam kupinak jega iyak filisteo apuji aidauinak, tikich nuwi batsatujai ashí yutua ijinauwei. Nii iwaku pujusa aentsun ijinauwa nuni kuashat nii jak ijinauwei.

³¹ Nunik Sansón jakamtai, niina yachi aidau patayi aidaujai kaunawag iyashin jukiag, yaakat Sorá Estaoljai awa nuwi niina apaji Manoa ukusbaunum ukusajui. Sansógkak Israel aents aidau yayaak veinte mijan takasui.

Rut

Elimélec niina patayi aidaujui Moab nugkanum pujustatus shiyakagbau

¹⁻² Israel aents aidaunmak eke apu adaijachbau asamtai, ayatak makichik aents Apajuí etegkamu ayamjukam batsamajaku aina, nunú tsawantin ditá nugken ashí nujan tepeauwai. Nunikmatai makichik aents Elimélec daagtin, Judá nugken yaakat Belégnum pujau, Moab nugkanum ujumak tsawan pujustatus weuwai. Nunik wegak niina nuwe Noemí* nuigtu niina uchiji jimag: Mahlón, Quilión aatus juki weuwai. Dita aidauk Belégkanmaya ainayatak, Belégkan tikich daaji Efrata† tutai asamtai, Efrata aents tutai aajaku ainawai. Nunik shiyakag Moab nugkanum jegawag nuwi batsamsajui.

³ Nuwi batsatai Noemí aishi Elimélec jakauwai. Nunikmatai niina uchiji jimag aajakua nujai Noemí juwakui.

⁴ Nunik batsamas nunú uchi aidauk Moabnumia nuwa aidaujui mai nuwenawajui. Nunú nuwa aidaun daajig Orfa, Rut aatus aajakui. Nunik nuwenawag diez mijan tumain batsamas ⁵ ditashkam mai jakauwai. Nunik uchiji jinaamtai, Noemík uchigtuchu, nuigtush aishinchau nigkiuch juwakui.

Noemí Rutjai Belén wakitkimu

⁶ Nunik pujus Tuke Pujuu niina aentsji Israel aents aidaunak wait anenjae, dutikau asamtai, ajak ajakmamuji aidauk shiig tsapai kuashat nejenawai. Nuadui yamaik nujantaik waituinatsui tabaun Noemí Moab nugkanum pujus dekauwai. ⁷ Nunik dekaa Judá nugkanum waketak, niina uchiji nuwe aajaku aidaujui uminas jiinkiuwai. ⁸ Nunik jintá wesag Noemí ditan chichajak:

“Atumi duku pujamunum wakitkitajum, atum mina, tuja mina uchig aidaujui shiig kuitamkagtukuitjum dutiksag atumnash Tuke Pujuu kuitamjamkatnume. ⁹ Tuja nuigtush ataktu aishinawag shiig batsamsatnume tusa yaimpaktinme”, tiuwai.

Aatus tusa yapinum kugkuasui kumpama ishiaktatus. Dutikam dita buutuidau. ¹⁰ Nuninak:

“¡Atsa wakitkishtatji! ¡lik amejai amina nugkemin minittaji!” tuidau.

¹¹ Tusa tiagtai Noemí ditan ataktu chichajak:

“¡Nawantug aidauih, tutsuk shiyaktajum! ¿Wagka wijaish wetag tajume? wika muumpakiu asan, atum aishinmainnak uchi aishmagnak nuigtuk uchigmamait Sujai. ¹²⁻¹³ Tutsuk atumi jemin waketjatajum. Wika shiig múuntuch wajasjai, ataktuk aishinmait Sujai. Tuja yamai kashia duik aishinan uchi aishmagkun uchigmakaintagtaih, ¡nunikmataish atumek tsakagmatai, aishinatjai tusa dakakjume pujumait sugme! ¡Nunú tsakagi tusajum dakakjume, aishintsuk jamain ainagme! Nawantug aidauih, atumek wijaig pujumait sugme. Minak Tuke Pujuu waittsati tusa tutmatai waitiag, nuna nagkaesau atum waitiamun diisan atumin wait anentakun waitmainaitjai”, tiuwai.

* **1:1-2** “Noemí” tawa duka hebreo chichamnumak “yajauwajah” taku tawai. † **1:1-2** “Efrata” tawa duka yaakat Belégkan tikich daaji aajakui.

14 Tusa tutai ataktushkam buutuidau. Tusa jimajá timatai, Orfak niina tsatsajin kumpama kugkuas ukuak wakitkiuwai. Untsu Rutak tsatsajijai juwakui. 15 Nunik juwakmatai Noemí niina chichajak:

“Antukta nijah, amina wajegmi nuwe niina nugken, niina apajuímtaiji ayá nuwi waketui. Nuniau asamtai, jameshkam niijai wetá!” tiuwai.

16 Tusa tama Rut ayaak:
 “¡Ukugkita tusamek tujutipa!
 Ame tuwi wetatme nuwi wishakam minittajai.
 Tuja ame tuwi pujuttame,
 nuwi wishakam amejai pujuttajai.
 Ame wegantu aina duka
 wi wegantu agtatui.

Tuja amina Apajuígmeshkam
 mina Apajuíg atatuí.
 17 Ame tuwi jakatnaitme
 nuwig wisha jakatnaitjai,
 nunika ai nuwig ukugsagtin atinme tajai.
 ¡Jaka megkaechayatkun,
 wi amina ukuakun yaja wetaik,
 Tuke Pujuu suwimkan
 sujustin ati tajai!” tiuwai.

18 Tusa imattai, Noemí anentaimas, dekas mina uyuuntus wekaesatasampap tawa tusa ataktu awagkig wakitkita tusag tichauwai.

19 Nunik mai juwakag we wenakua Belén jegawajui. Nunik jegawagmatai aents aidauk senchi pampaidau shiig aneenak. Imatiagtai nuwa aidauk: “¡Noemí tae, Noemí tae!” wajaidau.

20 Tusa imatiagtai Noemí ditan chichajak: “¡Noemí tujutigpajum, Mará† tujuttajum! Wagki, minak Tuke Pujuu ashí senchigtina nunú kajegtuk waittsati tujutmatai waittsajai. 21 Wi juwi pujaun weuwaitag nunak kuashat yajumakan wegabiajai. Tujash yamaik wainkan uwegmatak wakitkijai, wagki Tuke Pujuu aatus wakekau asamtai. Nuadui minak Noemí tujutigpa, wagki Tuke Pujuu ashí senchigtina nunú minak waittsati tujutmatai waittsajai”, tiuwai.

22 Aatus Noemí Moab nugkanum pujau, Rut niina uchiji nuwe Moabnumia aentsu nawanji aajakua nujai wakitki, cebada ajakbau juutai tsawan jegamunum, Belén jegauwai.

2

Aents Booz daagtin aajakua nuna ajajin Rut takajakbau

1 Noemí aishi Elimélec aajakua nuna patayi Booz daagtin shiig wiakuch eme anentsa diitai, nunú tsawantin nuwi pujujakui. 2 Makichik tsawantai Rut Noemín chichajak:

“Wisha aja aina nuwi wetajai. Nunikan nuwi wekaesa takakun ajagtin juwaak nagkaejamu aidaun ukunum wekaetusan juukchainjash”, tiuwai.

Tutai Noemí ayaak:

“¡Ayu, wetá nawanta!” tiuwai.

3 Tusa tima ajanum jeganta nagkaejamu aidaun juwaak wekagu. Niig tikichi ajajinis wekaeja tukama, dekas Noemí aishi Elimélec aajakua nuna patayi Booza ajajin wekagu.

† 1:20 “Mará” tawa duka hebreo chichamnumak “yapau” taku tawai.

⁴ Nunik juwaak wekagai Booz Belén pujau niina ajajin weuwai. Nunik jeganta ajaka juu aidaun kumpamak aatus tiuwai:

“¡Tuke Pujuu atumnash kuitamjamkatnume!” tiuwai.

Tusa tama dita ainak:

“¡Tuke Pujuu aminashkam pegkegnum yumigtamsati!” tiajuj.

⁵ Tusa tiagmatai, Booz ajaka juu aidau apujin iniak:

“¿Juj nuwauch wekaga jusha yana patayimpaita?” tau.

⁶ Tutai nii ayaak:

“Juka Moabnumia nuwa Noemíjai taama nunuwai. ⁷ Nunú juwi taa, wisha ajaka juwaak yuja nunú nagkaikimu aidaun ukunum wekaesan juuktajai tusa mina segatkui ayu timajai. Tuja yama nagkamchak taama duwi nagkamas yamaikish taka wekagu, ame taum duwi machik ayamui”, tiuwai.

⁸ Tusa timatai Booz Rutan jegantun chichajak: “Nawanta, wi tajam nunú shiig antukta. Wainka tikich aja aina nuwi wekeasamek makichkish juukaipa. Nuwa mina tsakatkeg aidau ajaka juwaak juwi batsata nujai pujusta. ⁹ Nunika pujusam ajaka juu aidau tuwi takagtatua nuniakui nuwi ameshkam wetá. Tuja mina tsakatkeg aina nunak amina waitkag-masainum tusan shiig yajakajai. Tuja ame kitamakmek, yumi aimjamu batsata nuna dita umuina nuwiya uwagta”, tiuwai.

¹⁰ Tusa tama Rut niina eme anentus tsuntsama nugkanum nijayin antig pujusa Boozan iniak:

“¿Wagka wi tikich nugkanmayayaitag nunin aish, imatika puy-atjutsamesh waitash anenjujume?” tau.

¹¹ Tusa tama Booz ayaak:

“Amina aishjum jakamtai nagkamsam, niina dukuji wajuk kuitamkaume nuna wika shiig dekjajai. Tuja nuigtushkam amina apa, amina duku, amina nugkem aaja ukukim ii amina wainchatai aidautijai ijunja pujustasa taum nunashkam shiig dekjajai”, tiuwai. ¹² Nuna tusa ataktu chichajak: “¡Atashu uchiji dukuji nanapen waigka ayamjumama numamtuk, amina kuitamjamkatna nunú Tuke Pujuu Apajuí Israel aents aidaun Apajuíjiya nuwi yunumkaume! ¡Nuadui wi niina segajai, ame kuashat takasum nuna akigmakti tusan!” tiuwai.

¹³ Tusa tama nii ayaak:

“Apujuh, ame minak wait anenjujume. Ame tujutam nunú mina anentaingnak ichichtujui. Wika amina tsakatkem aina nujaig makichkish betekchauwaitjai, nuniag ame minak shiig anenjusak aujtusume”, tiuwai.

¹⁴ Tusa timatai yujumak yuwamunum Booz Rutan untsuka itan chichajak:

“¡Juwi tantam, juju pag puuka jukim ayaka yutai chujuin umikbauwa nuwi uchupjata!” tiuwai.

Tusa tima ajaka juu aidau pekagbaunum jeganta ekemsauwai. Nunikmatai Booz cebada duwikbaun juki susauwai. Dutikam nuna yuwa ejemag nuigtushkam ampíjuj.

¹⁵ Nuna dutika ukuak ataktu ajakan juuktatus wetai, Booz ajaka juu aidaun chichajak:

“Cebada tsupija jigkaka ijumjamu aina nunú sujittsut susatajum, jukiti.

¹⁶ Tuja atum cebada juuka jigkaka ijumjamunmaya akagag kakeguk duka idaitustajum nii yajuakti”, tiuwai.

¹⁷ Tuja Rutak Booza ajajinian ajakan juwaak wekagai, etsa akaetai nii juukbaujin akaja ijumag dekapa diikma veinte kilo amainun nagkagas jukiuwai. ¹⁸ Nuna yanaki juki Belén niina tsatsaji Noemí pujamunum

jegauwai. Nunik cebada juukbaujin, nuigtu yutai ampija jukimujijai Noemín susauwai. ¹⁹ Dutikam Noemí Rutan iniak:

“¿Tuwi yamaish takasume? ¿Tuwiya imatikamesh juukume? ¡Amina yaimpaka nunak Apajuí pegkegnum yumigsati!” tiuwai.

Tusa timatai, yana ajajinig takasabi, nuna Rut niina tsatsajin ujaak:

“Wika aents Booz daagtinu ajajin takasmajai”, tiuwai.

²⁰ Tusa timatai Noemí ayaak:

“¡Tuke Pujuu niinash pegkegnum yumigsati! Tuja nii iinashkam yaunchuk aents batsamajaku aina nuna yaigkua dutiksag yamai yaim-pawai. Nunú aentsua duka mina aishug ayá nuna patayiyai. Nuadui iinak nii kuitamjainai”, tiuwai.

²¹ Tusa timatai Rut ataktu chichaak:

“Nuigtushkam nunú aents chichagtak, mina tsakatkeg aidau takaina nujai takasta, nunikam ajak ashí juunkamtai idaisata tusa tujutmae”, tiuwai.

²² Tusa timatai Noemí Rutan chichajak: “Ayu nawanta, nunikta, wainka tikichi ajajin wekaemin waitkagmasainum, dekas niina tsakatke aina nujai takasta”, tiuwai.

²³ Tusa tima Rutak Booza tsakatke aidau cebadan trigojai juwagtai, niishkam nuna juwa juwakua ashí ashimdaekamtai idaisauwai. Nunak niina tsatsajijai uyunis pujusa takajakui.

3

Booz Rutan wait anenjamu

¹ Makichik tsawantai Noemí Rutan chichajak:

“Nawantah, ame aishina shiig pujumainun egatkatjame”, tiuwai. Tusa chichajak:

² “Nijah nawantah, Booz mina aishju patayiya nuna tsakatke aidaujai ame ijunja takasmaum nunú, trigon cebadajai akagtatus yamai kashi niina ajajin wetatui. ³ Nuniktin asantai, yamai wi titatjam nunú umikta: ¡Maita, nunikam kugkuin ukatmamkam jáanch pegkeg nugkugta! Nunikam Booz niina ajajin takak pujamunum wetá. Tujash eke yujumkan yuwa umutnash uwag umintsagkik wantintukaipa. ⁴ Ayatak uumka pujusam tuwig kanajat nunú diyaku ata. Nunikam nii kanagmatai jegantam, nawenia jáanch pajantukam nuwi ayaumsam tepesta. Nunika tepamin, ame wajukattame nuna nii tujamtatui”, tiuwai.

⁵ Tusa tama Rut ayaak:

“Ayu, ame tujutam nunak imatiksasuk umiktajai”, tiuwai.

⁶ Aatus tusa Rut ajanum weuwai. Nunik jeganta niina aishi aajakun dukuji tibaunak imatiksag umikui. ⁷ Tuja Boozak yujumkan yuwa, umutnash uwag shiig aneasui. Nunik nuadui kanagtatus ajak juuka ijumjamunum ayaumas tepesui. Nuwi kanak tepai Rutak takamtak jeganta Booza nawen ayaumas tepesui.

⁸ Tuja Boozak kanag tepau ejampek shintaag ayanteagtakama, dekap-jauwai makichik nuwa niina nawen ayaumas kanag tepaun. ⁹ Nunik iniak: “¿Yaitpa amesh?” tau. Tusa tama nii ayaak:

“Wika amina inakem Rutaitjai. Amek mina aishug ayá nuna shiig patayiyaitme, nuniau asam ame minak kuitamjumainaitme. Nuadui ame nuwatjukta tajame”, tiuwai.

¹⁰ Tusa tama Booz ayaak: “¡Nawanjuh, Tuke Pujuu pegkegnum yumigtamsati! Amek dekas amina aishjum aajakua duka shiig umigme.

Nuadui tikich aents datsauch, ujunakesh nuniachkush wiakchakesh mina nagkaetasu aidau egamainaitkum, mina egatkaume. ¹¹ Nuadui nawanta ishamkagtukaipa, ame nuwa pegkejaitam nunak mina yaaktajuig ashí dekeinawai. Nuadui ame segatam nunak imatiksasuk umiktajai.

¹² “Tujash wika amina aishjum aajakua nuna patayiyaitkunush, tikima shiig patayichuitjai, dekas niina shiig patayi aidauk batsatui. ¹³ Tuja yamaikik juwi kanagta, kashin amina aishjum aajakua nuna shiig patayi puja dusha, wi kuitamkatjai tujamtimpash nunú dekaami. Untsu nii dakitakuig, wi kuitamkatjame. Nunak Tuke Pujuu daajin umiktinjun tajai. ¡Tuja yamaik juwi shiig kanaja tsawagta!” tiuwai.

¹⁴ Tusa tima Rutak Boozaí ayaumas tepes kanajui. Nunik tsawak eke shiig pan weatsaig nantakiuwei, wagki Booz chichaak: “Juu nuwa ajanum tanta nunak makichkish wainkashtinme”, tiu asantai. ¹⁵ Nunik pujuttaman Booz chichajak: “Jáanchjum atiam wegkukam shiig emetuata.” Tusa tima achika emetuamtai, cebadan cuarenta kilo nagkagas yajatuauwai. Dutika jigkatua aenskam Belén wakitkiuwei.

¹⁶ Nunik niina tsatsaji pujamunum jegantai, iniak:

“¡Nawanta wajak wekaesauame!” tau. Tama Rut Booz tibaun imatiksag ashí ujakuí.

¹⁷ Tuja ataktushkam chichaak:

“Juna cebadan sujusa chichagtak: ‘Amina aishjumi dukuji puja nuwig uwegmatkek wakemaitsume’ tujutmae”, tiuwai.

¹⁸ Tusa timatai Noemí niina chichajak: “¡Nawanta waugtutsuk pujusam dakasta wajakatig! Auk niig kajimatig idaisashtatui, tuké wamak chichas epegkea idaisattawai”, tiuwai.

4

Booz Rutjai nuwenamu

¹ Etsa agkuantai Booz yaakta waitijin aents aidau ijunajaku aina nuwi weuwai. Nunik nuwi jegan eketu. Nunik eketu Rutan aishi aajakua nuna shiig patayi nagkaemattaman wainak untsuka chichajak:

“Juwi tanta ekemsata, chicham awa nunú chichasmi”, tiuwai. Tusa tima jegan ekemsauwai.

² Nunikmatai nunú yaaktanmaya apu eme anentsa diitai aidaun diez ipauwai. Dutikam ditashkam nuwi jegantag ekemsajui. Nunikagmatai, ³ dita antuinamunum Booz niina patayin chichajak:

“Noemí Moab nugkanum pujau wakitki tae. Nunik iina patayi Elimélecka nugke aajakua nuna sujuktak tawai. ⁴ Nuniau asantai, amina nii dekati, nunik sumaktag takug yamaikiuch juju apu aina dusha antuinai, sumaktajai tusa titi tajame. Ame Eliméleckan shiig patayi asam, niina nugkega duka dekas sumamainaitme. Untsu ame sumakchatnaitkumek ujakata. Ame dakitakminig, wi sumaktajai”, tiuwai.

Tusa tama nii ayaak:

“Nugkanak wi sumaktajai”, tiuwai.

⁵ Tusa tutai Booz niina chichajak:

“Shiig anentaimesata nijah, ame nunú nugka sumakmek, waje Moabnu-mia nuwa puja nujai nuwenattame. Wagki, nunú nugka yanau aajakuita duka nunisag niina daaji megkaetsuk asati tusam”, tiuwai.

⁶ Tusa tama nii chichaak:

“Nuninaitkuig wika nunú nugkanak sumamait Sujai, wagki mina uchig aidau nugkenchau wainak juwamain asagmatai. Untsu ame sumaktag takumek dekas ame sumakta, wi sumamainun amina idaitajame”, tiuwai.

⁷ Tuja nunú tsawantinig Israel aents aidauk makichik aentskesh niinu amainun tikichi suwakug, niina sapatjin* juinta yantamen ukuimak nunú aents sumaun sujaku ainawai. Nuna betek umiak, ⁸ niina sapatjin ukuimak Boozan susauwai. Dutika chichaak: “Ame nugkak sumakta”, tiuwai.

⁹ Tusa tima Booz apu aidau, nuigtu tikich Israel aents aidau aatus nuwi batsatun chichajak: “Wi Noemí aishi Elimélec tuja uchiji Quilión, Mahlón aatus aajaku aina nuna nugkenak yamai atum antagmin sumajai.

¹⁰ Tuja wi Rut Moabnumia nuwa wajea nuna nuwatkatag dushakam dekagme. Nunak dutikattajai, wagki niina aishi Mahlón aajakua nuna daaji megkaekai tau asan. Nuadui Mahlónka daajig, tuja nii wegantu aidashkam juu yaaktanmak megkaekashtinai. Atum dekamunum junak tajai”, tiuwai.

¹¹ Tusa timatai apu múun aidau tikich aents aidaujai nuwi batsatu chichainak: “¡Ehe, duka dekas iishkam wakegaji! ¡Nunú nuwa amina jemin wayatta nunak Tuke Pujuu yaigti, dutikam Raquel Lejai iina dukuji aajaku aina nujai betek atin ati! ¡Untsu amek Efrata, tikich daaji Belén tuuta awagmatia nuanuig, eme anentsa ajantusa diitai atatme! ¹² ¡Tuke Pujuu yaimpasmatai, juu nuwa jujai kuashat uchijinatini ata! Tuja wakegaji Judá Tamarai akiamu Fares shiig kuashat uchigtin aajakua, iman ati tusa”, tajui.

¹³ Aatus Booz Rutjai nuwenauwai. Nunik pujaun Apajuí Rutan ejapjukti tima, ejapjuk uchi aishmagkun uchigmakui. ¹⁴ Nunik uchigmakmatai, nuwiya nuwa aidau Noemín chichajuinak:

“¡Tuke Pujuu emematiagmi, wagki nii yamai amina kuitamjamkatnun tijajumin amasu asamtai! ¡Itusag amina tijajumek Israel wegantu aidanmak eme anentsa diitai ah! taji. ¹⁵ Ame muumpakiaminish nii shiig anemtijamsatnai, wagki amina uchigmi nuwe amina senchi anempa nuna uchiji asa. Nuadui Rutak, amina uchijum siete amaina, nuna nagkaesau atinai”, tajui.

¹⁶ Tusa tijam Noemí uchin juki tsakapajui. ¹⁷ Nunú uchin Noemí pagkus wajaun nuwa aidau wainkag chichainak: “¡Noemís uchigmakatai tumain anentaji!” tuidau. Nuna tuidau asag uchi daajin adakajui Obed.† Nunú aajakui Jesé apaji Davitan apachji aajakua nunú.

David wegantu aidau

¹⁸ Juu aajaku ainawai Fares wegantu aidau: Fares aajakui Hesrógka apaji. ¹⁹ Hesrón aajakui Ramá apaji. Ram aajakui Aminadapa apaji. ²⁰ Aminadab aajakui Nahasógka apaji. Nahasón aajakui Salmónka apaji. ²¹ Salmón aajakui Booz a apaji. Booz aajakui Obeta apaji. ²² Obed aajakui Jesé apaji. Tuja Jesé aajakui Davita apaji.

* 4:7 Sapat pachisa ausata Dt. 25.9-10. † 4:17 “Obed” tawa duka hebreo chichamnumak “kuitamkagtin” taku tawai.

**Samuel pachisa
yama nagkamchaku agagbau
1 Samuel
Samuel akiinamujin nagkamsa nii profeta wajasa
takasbau aidau**

(1—7)

Samuel akiinamu

¹ Efraíngka mujajin yaakat Ramónum makichik aents Elcaná daagtin, Jerohama uchiji Eliú tijaji pujujaku. Duka Suf Efraín wegantu aajakua nuna uchiji Tohu aajakua nuna ama tijaji aajakui.

² Elcanák jimag nuwentin aajakui: Jeteke daajig Ana aajakui, untsu awan nuwe daaji Peniná aajakui. Peniná aajakui uchigtin, untsu Ana uchigtuchu aajakui.

³ Maki makichik mijantin Elcaná nii pujamujin ukuki yaakat Silónum wejaku, nuwi kuntu maa apeak Tuke Pujuu ashí senchigtina nuna ememattatus. Tuja sacerdote Eli uchiji jimag: Hofní Fineesjai, ditashkam sacerdote asag, Tuke Pujun takajuinak nuwi batsamajaku ainawai.

⁴ Tuja Elcaná kuntu maa apea Apajuín emematkug nuna nejenak niina nuwe Penínán, niina uchiji aidaun, nawanji aidaujui aatus betek akanag tinamajakui.

⁵ Untsu Ananak Tuke Pujuu uchigmakchatin ati tibau aigkishkam senchi aneau asa, neje dekas pegkejan juki sujaku.

⁶ Dutiktai Peniná Anan kajejin asa, Tuke Pujuu uchin uchigmachu ati tibau asantai, pegkegchaun chichajak dushikiak waitkau. ⁷ Maki makichik mijantin Tuke Pujuu jeen Niina ememattatus shimujakua duik Peniná Anan tuke dushikijaku. Imatika waitkamu asa yujumkan yutsuk pujus ayatak buutujaku.

⁸ Nunitai niina aishi chichajak: “¿Wagka buutme Ana? ¿Wagka yujumak yutsukesh wake besekmesh pujame? Wichaukaitag amina uchijum diez amaina nuna nagkaesau”, tiuwai.

⁹ Tusa tima Ana Silónum pujus yujumkan yuwa umutnash uwag nuadui Apajuí jee pegkegmanum nuna waitijin sacerdote Eli etetbaunum jegantui. ¹⁰ Nunik jeganta nii kajekbaujin buutki Tuke Pujun segaak, ¹¹ juna aatus nii umiktinjin tiuwai:

“Tuke Pujuu ashí senchigtinuh, wika amina inakmetjai. Wi wake besemag wekagag duka amek dekame. Minash kajimatjuki idaitutsuk wait anenjakmek uchi sujasta. Dutijuawaminig wika amina takagtamin ati titinaitjai. Dutikau asan, nuna betek umiakun makichkish uchi intashinak tsupigkashtinaitjai”, tiuwai.

¹² Aatus Ana Tuke Pujun inittak segaak wenin umuchiaun Eli distakama wainkauwai. ¹³ Tuja Anak inittak Apajuín segau asa wenin umuchiaun asantai, Eli antukchauwai. Nuadui Eli anentaimas nampekampas aan etetatai tusa, ¹⁴ chichajak:

“¿Wagka ima nampetash wekaetame? ¿Nampet wekaetutsuk idaisata!” tiuwai.

¹⁵ Tusa tama nii ayaak:

“Vinonakesh, tuja tikich uwaja nampetainakesh uwagchamjai. Shiig senchi wake besemag dekapeamu ajutu asamtai, wi waitiamujun pachisan ashi Tuke Pujuun ujaakun eketjai. ¹⁶ Wainkam nuwa pegkegchawuwa nunin diigsaiapa, wika uyumamu ajutu asamtai, wake besemag dekapeakun nuna pachisan Tuke Pujuun augkun eketjai”, tiuwai.

¹⁷ Tusa tutai Elí ayaak:

“¡Agkan, shiig aneasam wetá! Ame waji segaume nunak, Israel aents aidau Apajuín emematin aina nunú amastatui”, tiuwai.

¹⁸ Tusa tima ayu tusa ukuak, niina jeen shiig aneas wakitkiuwai. Nunik jegaa yujumkan yuwauwai. Duwi nagkamsag wake besemag pujamujig atsugsauwai.

¹⁹ Tuja kashinia duwi kashikmas Elcaná niina nuwe aidau yajuak Apajuín jee pegkejam aajakua nuwi Tuke Pujuun ememattatus weuwai. Nunik nuwi jegaa Tuke Pujuun ememati ukuak, niina jeen yaakat Ramá wakitkiuwai.

Nunik wakitki jegaa Elcaná niina nuwe Anajai kanajui. Aatus Tuke Pujuu Anan wait anenjauwai. ²⁰ Nuadui Ana ejapjuk pujus tsawanji jegamtai, uchi aishmagkun uchigmakui. Dutika adaikauwai Samuel. Nunak “Apajuí segamu” taku tawai.

²¹ Duwi pujus Tuke Pujuu ememattai mijan jegamtai, Elcaná niina nuwe Peninán niina uchiji aidaujai yajuak, nii Tuke Pujuu anagkuamun umiak kuntinun maa apeak Tuke Pujuun ememattatus yaakat Silónum weuwai.

²² Untsu Anak ditajaig wechawuai, ayatak aishin chichajak:

“Wika minishtajai, uchi yujumkan nigki yumain wajasmatai, niina jukin, jega pegkegmanum Apajuín ejetuatajai, nuwi tuke pujustin ati tusan”, tiuwai.

²³ Tusa tutai niina aishi ayaak:

“¡Ame wajuk wakegame nunú umikta! ¡Amejai uchik pujus muntsun tsujakti! Ame tame nunak Tuke Pujuu umikti”, tiuwai.

Tusa timatai Anak niina uchijijai juwakui. Nunik pujai uchi muntsu tsujaka yujumkan nigki yumain wasasu.

²⁴ Nunikmatai Ana uchijin juki yaakat Silónum Apajuí jee pegkegmanum emauwai. Tuja nuigtushkam makichik toro tsakatan kampatum mijan ajamun, trigo veinti dos kilo, nuigtu duwap apagbaunum vinon yajaa aimak, aatus yajuak weuwai. ²⁵ Dutika ejegamtai Elcaná niina nuwe Anajai nuna apeak Tuke Pujuun emematiajui. Dutikawag uchi jukiag sacerdote Elí pujamunum ejeentajui. ²⁶ Dutika Ana chichaak: “Mina apujuh, wait aneasam antugtukta. Yaunchuk juwi wi aminí ayaumsa pujusan Tuke Pujuun segaakun pujubiajai, ²⁷ juna uchin sujusti tusan. Nuadui Tuke Pujuu juna uchin sujuse. ²⁸ Nuadui yamaik wishakam Tuke Pujuunu ati tusan niina idaitajai, ima niinak takagsatin ati tusan”, tiuwai.

Tusa timatai, Elí Tuke Pujuun emematak tsuntsuma nijayin nugka antig pujusui.

2

Ana kantamamu

¹ Ana kantamak aatus Apajuín tiuwai:

“Tuke Pujuuwah, wika aminí shiig aneajai, wagki ame senchimtijau asamin. Yamaik mina shiwag aidaujaish ainikan tudaimain wajasjai,

wagki ame yainkau asamin.
 ¡Yamaik shiig aneasan pujujai!

² ¡Tuke Pujuuwah,
 ame pegkegmaitam imanuk tikichik atsawai!
 ¡Ame jutii Apajuji asam kuitamkagtam, imatikas
 kuitamkagtau tikichik makichkish atsawai!
 ¡Amina nagkaetamsauk tikichik atsawai!

³ Makichkish ememasag chichamain ainatsui.
 Tuja ima nigki eme anenmamuk makichkish atsuti.
 Tuke Pujuuwai ashí yacha duka.
 Tuja Tuke Pujuuwai maki makichik aents
 pegkegchau takasbaujin diijus suwimkan suwa duka.

⁴ Apajuíyai aents senchigtin aina nuna
 senchigtuchu emak,
 aents senchigtuchu aina nuna senchintiknuk.

⁵ “Yaunchuk yumainji kuashat ajujakbauk,
 yamai makichik pag yuwatag
 tabaunum takak waituinawai.
 Tuja yaunchuk nujantai waitujaku aidau,
 yamai waituinatsui.
 Nuwa uchigmachu aajakushkam,
 nuwa uchigbau aidaun
 nagkaesau sieteya imagnia uchigmainawai.
 Untsu yaunchuk uchiji kuashat ajujakagbauk,
 uchigmamainchau wajasaje.

⁶ Tuke Pujuuwai pujutan sukagtinuk.
 Ima nigki jakati tusashkam tukagtau.
 Nunika jaka ajin iina patayi aidau
 ukumatainum ukugmasagmataish,
 ataktu inantamki pujutan amastina nunú.

⁷ “Tuke Pujuuwa nunuwai ujuuna ekagtinuk.
 Tuke Pujuuwai wiakuch ekagtinuk.
 Nii amasbaun atanjamkish,
 nigki ataktushkam imatiksag sukagtinai.

⁸ Nii aents ujunauchin wiakchamtiknai.
 Tuja aents yumainji atsugbaun,
 egaka yuu wekagun juki,
 aents eme anentai aidaujai betek emauwai,
 dutika nunú aents
 eme anensa diitai aidaun ekemtain ekentsatatus.
 Tuke Pujuuwai ashí nugka aina nuna najanak,
 nugka patami asatnunashkam umikua duka.

⁹ Tuke Pujuu ya niina shiig umijua nuna kuitamui.
 Untsu aents pegkegchau aidauk jinuinawai,
 nunikag suwimkanum shimuinawai.
 Wagki makichik aentsuk niina senchijinigkik
 ayamjumamaitsui.

¹⁰ Tuke Pujuu nayaimpinum pujus niina shiwaaji
 aidaun chaagpin ajuntug ijinattawai.
 Ashí aents nugkanum batsata nunak
 Tuke Pujuu dita takasbaujin diijus

suwimkan susattawai.

Untsu apu atinun nii etegkamunak aan nagkaemas senchigtin emattawai”, tiuwai.

¹¹ Tusa kantama inagnakmatai, Elcaná Anajai niina jeen yaakat Ramá wakitkiuwai. Tuja uchik Tuke Pujuun takagsatatus sacerdote Elíjai juwakuu.

Elí uchiji aidau pegkegchau takamsagbau

¹² Elí uchiji aidau pegkegchau aidau asag, Tuke Pujuunak ajantus diijakchau ainawai. ¹³ Nunidau asag makichik aentskesh Apajuín emematak kuntinun maa apeamun antukajag dita inaken akupejaku ainawai. Dutikamu nunú tenedor múun wajaknun takaku jegawag ajantsuk kuntinun neje yama najaunak, ¹⁴ nunú tenedorai iju jiiag yajumaidau. Dutikainak Israel aents aidau yaakat Siló jegawag Apajuín ememattag tuidaunak waitkaidau. ¹⁵ Tuja kuntinu wiyajin eke apeatatus pujugtatmanash sacerdote inake jegantun chichajak: “¡Sacerdotenu neje atinuk uduu mina sujusta wi jukin inagtuatjai, wagki sacerdotek neje inajuamunak dakitawai!” tau. ¹⁶ Tusa tama aents ayaak: “Jasta, dekatkauk kuntinu wiyajin apeatjai. Dutikamtai ame wakegamu jukita.” Tama nii chichajak: “¡Tutsuk yamaikiuch sujusta! ¡Sujachkuminig wiki atankittagme!” tau. ¹⁷ Elí uchiji aidauk shiig pegkegchau Tuke Pujuunash umijujakchau ainawai. Nunin asag Tuke Pujuu anentag suwamunash ajaantus diitsuk dita wakegamun takajaku ainawai.

¹⁸ Untsu uchi Samuelak Tuke Pujuunak shiig umijujaku.

Nuniau asa nigka sacerdote nugkutai lino apagbau efod* tutain nugjukaku. ¹⁹ Tuja maki makichik mijantin niina dukuji apajijai Apajuí jee pegkegmanum jegawag kuntinun maa apeanak Apajuín ememattatus weakug niina uchiji Samuel nugkugtin jáanch apagbaujin juki wejaku.

²⁰ Nuniau asamtai Elí, Elcanán Anajai pegkegnum yumigkiak: “Juju uchin Ana Tuke Pujuun anentag susa duwi, Tuke Pujuu Anayai nuni kuashat uchijum aidaun amastí”, tiuwai.

Tusa tima dita jeen waketajui. ²¹ Nuadui Anak Tuke Pujuu pegkegnum yumigkiamu asa, kempatum uchi aishmagkun, jimag nuwan aatus uchigmaku. Tuja Samuelak Tuke Pujuu kuitabau asa, nuwig niina takajak pujusa tsakau.

²² Tuja Elík múuntuch aajakui, tujash niina uchiji aidau Israel aents aidau waitkainawai tabaun ashí dekauwai. Tuja Apajuíjai chichatai jega pegkejam jegamkamua nuna waitjin nuwa aidau kuitamin aina nujaishkam kanuinawai tabaun dekauwai. ²³ Nunik dekaa ditan chichajak:

“Atum pegkegchau takainamun ashí aents aidau ujatkae. ¿Wagka dusha anish batsatjume? ²⁴ Mina uchig aidauwah, atum aniajum duka shiig pegkegchauwai. Atum aniakjum tikich aents Tuke Pujuun nemajin aidau bakuagme, wagki atum pegkegchau dutikamun tikich aents aidau nuna augmatu yujaidau antukjai. ²⁵ Makichik aents tikichin kajejaunak, Apajuí diisa ayamjumainai. Untsu aents Tuke Pujuun kajejaun ayamjumainuk makichkish atsawai”, tiuwai.

Tusa tamash, ditak apaji chichamenak antugkachajui, wagki Tuke Pujuu ditanak jinaati tibus asag. ²⁶ Untsu Samuelak nuni senchi muumpau.

* **2:18** Juju versículonum chicham “efod” tawa nunú chichamak capítulo 14.3numshakam awai. Nunak jáanch lino apagbau sacerdote nugkutain taku tawai.

Nunitai Tuke Pujuu shiig anentau, tuja aents aidaushkam shiig anentuidau.

²⁷ Tuja nunú tsawantin Apajúi chichame etsejin Elín ijagsatatus jegajuauwai. Nunik jegajua chichajak:

“Amina apachjum aidaun Egipto nugkanum faraógka inaku waitkatai batsatun wi mina senchijun ditan iwaintukuitag nuna dekati Tuke Pujuu tujamui. ²⁸ Israel aents aina nuwiyen Leví wegantu aidaun etegkauwaitjai mina sacerdoteg agtinme tusan. Dutika ai mina emematjuinak kuntuu maawag nuna nejen ashí apeatnume, tuja kugkuin incienson apeatnume, jáanch sacerdote nugkutainashkam nugkugtinme tusan. Tuja Israel aents aidaun anentag sujusbau aidaun mina emematjuinak apeena nunashkam yuwatnume tusan amina apachjum aajaku aina nuna tiuwaitjai. ²⁹ Nunin aish, ¿wagka wi dutikatajum timawa nunú dutiktsukesh dakitjagmesh idaisaugme? Amek amina uchijum aidaun mina nagkaetasu puyatjau asam, Israel aents aidaun mina anentag sujuinamua nunú jukim ayu ayugkawam udeukume.

³⁰ “Dutikau asamin Tuke Pujuu Israel aents aidaun Apajúi mina takagtin atinme tusa tujabiuwa nunú chichaak: ‘Wi atumnak mina takagtustinme tusan etegkauwaitjime. Tujash duka yamaik makichkish uminkashtatui. Wika mina eme anenjuina nuna eme anentatjai. Untsu mina dakitjuina nunak wishakam dutiksanuk dakitjattajai. ³¹ Amina uchijum aina duka yamai nagkamsag sacerdote achagtatui. Nuadui ame wegantu aina duka múuntuch wetsuk datsaitak jinawagtatui. ³² Untsu amek tikich Israel aents aina nuna wi yayaakui nunú diisam ame waitiakum dita kajegtinaitme. ³³ Tuja ame wegantu aina nuwiyen sacerdote atinme tusan wi ujumak apusamu akushkam, duka wainmachujai betek tikich aidaun takagtai nuna diisag kajenak wake besemag dekapenak buutiagtinaí. Tuja ame wegantu aidaun múuntuch wetsuk datsaitak jinawagtatui.

³⁴ “Tuja amina uchijum aidaun HofnÍ, Fineesjai makichik tsawantaik mai jakattawai. Nunikmatai dekaattame dekaskeap tujutne tusan.

³⁵ “Nuadui tikich wegantunmayan wi kajittsa anentamujun, tuja mina chichamjun betek umiktinun, sacerdote atinun makichik etegkattajai. Dutikan niina uchiji wegantu aidaunash megkaejainum tusan kuitamkattajai. Nuadui ditak wamak jinutsuk kuashat tsawan batsatu asa apu wi etegkamua nunú tabaun umigkatnume titatjai.

³⁶ “Nuadui ame wegantu jinaachu aidaun nunú sacerdoten jegajuawag ujumak kuichkin, yutajjai segainak tikishmatiagtinaí. Nuninak, minash takat sujusta wisha takasan yumainun sumapaktajai wajagtinaí’, tujamui Apajúi”, tusa tiuwai.

3

Apajúi Samuelan mina takagtusta tibau

¹ Samuelak tsakataitak nagkamas sacerdote Elí takatai yayaak pujus Apajúi umijujukui. Nunú tsawantinig Tuke Pujuu kakajus aentsnak wantintujakchawai. Nuadui makichik aentsnakesh chichama etseg-tugkati tusag ujakchawai.

² Elík muumpakui asa shiig wainmamainchau dekepeak niina kanutajjin kanak tepejakui. ³ Nuniai Samuelak Apajúi jee pegkegmanum chicham umiktin agagbau egkeamu arca pujujakua nuwi niishkam kanak tepai, nunú jeganum jii ekemakbauk eke kajintsag, ⁴ Tuke Pujuu niina untsuak:

“¡Samuel, Samuel!” tama nii ayaak:

“Juwi pujajai”, tiuwai.

⁵ Tusa nantaki tupikaki Elí pujamunum jegantui. Nunik jeganta chichajak:

“Paí taajai, ¿wagka untsugme?” tau.

Tama Elí ayaak:

“Wika aminak untsuatsjame, wakitkim kanagta”, tiuwai.

Tusa tima wakitki tepesui. ⁶ Nunik tepaun Tuke Pujuu ataktu untsuak: “¡Samuel, Samuel!” tusa untsuam, nantaki Elí pujamunum jeganta chichajak:

“Paí taajai, ¿wagka untsugme?” tau.

Tama Elí ayaak:

“Wika uchuchi aminak untsuatsjame, weme kanagta”, tiuwai.

⁷ Samuelak Tuke Pujuu nak makichkish wainchau tuja niina chichame-nash antuchu asa yaki untsujua, tiuwai.

⁸ Tujash Tuke Pujuu ataktu kempatuma juna untsukui.

Tusa untsuam nantaki Elí pujamunum jeganta chichajak:

“Juwi taajai, ¿wagka untsugme?” tau.

Tutai Elí anentaimas dekas Tuke Pujuu untsuamap tawa tiuwai.

⁹ Nuadui chichajak:

“Wakitkim tepesta, nuniamin ataktu untsugmakuig: ‘Mina Apujuh, amina inakminuk juwi pujajai, waji tame tujutta’ tita”, tiuwai. Tusa tima Samuel wakitki tepesui.

¹⁰ Nunik tepettaman, Tuke Pujuu ataktu jegantun yaunchuk untsukbau-nak dutiksag untsuak:

“¡Samuel! ¡Samuel!” tama nii ayaak:

“¡Mina Apujuh, waji tame tujutta, amina inakminuk juwi pujajai!” tiuwai.

¹¹ Tusa tama Tuke Pujuu niina chichajak:

“Israel aents aidaunum makichik ishamainun iwainaktatjai. Nuna aents aidaun wainkag ishamainak kujaidiagtatui. ¹² Tuja wi Elí patayi aidaun pachisa timag nunak nunú tsawantin makichkish ewaetsuk umiktatjai.

¹³ Wi niina ujaakun, amina uchijum aidauk mina umigtutsuk pegkegchaun takasaju asagmatai, suwimkan susattajai timag nunak nigka shiig dekawai. Wagki, niina uchiji aidaun mina pegkegchaun chichagtiagtaish, makichkish jintintuachu asamtai. ¹⁴ Nuadui Elí patayi aidauk Apajui tudaun tsagkug-tamjati tsag kuntinu maa apenakush, makichkish dita tudaujig tsagkujam achagtatui. ¡Wi nunak dekas nuniktinun tajai!” tiuwai.

¹⁵ Tusa tima Samuel ataktu tepesui, nunik kanag tsawag, kashikmas nantaki Apajui jee pegkegma nuna waitijin ujainiuwai. Tujash Samuelak Tuke Pujuu tibauwa nuna Elí ujanan ishamau. ¹⁶ Nunitai Elí untsuka chichajak:

“¡Uchuchi Samuela!” tau. Tama nii ayaak:

“¡Juwi pujajai!” tiuwai.

¹⁷ Timatai Elí niina iniak:

“¿Tuke Pujuuish wajinjutpame? ¡Wait aneam ugtukaipa! ¡Apajui tujamauwa nunú ame mina ugtutaik nii suwimkan amastatui!” tiuwai.

¹⁸ Tusa tama Samuel Apajui tibaunak uugsuk ashí niina ujakui. Tusa ujakam Elí senchi untsamak:

“¡Aminak dekas Tuke Pujuu tujamne! ¡Nii tawa nunak imatiksag umikti!” tiuwai.

¹⁹ Samuelak nuwig pujus tsakajui. Tuja Tuke Pujuu niinak yaigkui, nuadui Apajui tibaun nii etsegkauwa duka imanisag ashí uminkauwai. ²⁰ Tuke Pujuu mina chichamjun etsegtugkati tusa Samuelan etegkae tabaun Israel aents aidauk, Dan wegantu aidau nugken nagkamas, yaakat Beersheba tutaya imanui ashí dekawajui. ²¹ Tuja Samuelak yaakat Silónum Apajui jee pegkejam aajakua nuwi pujau asamtai, Tuke Pujuu nuwi tuke niijai chichau asa ataktushkam chichaman ujakui.

4

¹ Dutika ujakam Samuel ashí Israel aents aidau Apajui tibaunak imatiksag ujakui.

Suntag filisteo aidau arcan jukiagbau

Nunú mijan aajaku aina nuadui makichik tsawantai filisteo suntag aidau Israel aents aidaujai maaniawagtatus ijunajui. Nunik shimutkag nugka segau Afec tutainum nuwi aakmajag batsamsajui. Nuninai Israel aents aidaushkam ditajai maaniawagtatus jijnag nugka segau Eben-ézer tutainum jegattak aakmag batsamsajui. ² Nuwi batsamas filisteo suntag aidau Israel aents aidau jetekajui. Dutikawag maaninamunum filisteo aidau Israel aents aidau depetuk cuatro mil aentsun ijinawajui.

³ Dutikam Israel aents aidau waketug ditá aakjin jegawagmatai, apu aidau ditan iniinak: “¿Wagka Tuke Pujuuash iinash filisteo aents aidau ijinatnume tusash idaitamsae? Dekas yaakat Siló shiyakagmi, nunikaja arcanum chicham umiktin agagbau egketa nunú utiagmi. Dutika ajin Tuke Pujuu iinash ayamjutpakti”, tuidau.

⁴ Nuna tusag ujakam suntag aidau ishiakajui yaakat Silónum arca utitnume tusa. Dutikam shiyakag arcan juki itawajui. Nunú arca dukutaijin jimag ángel querubin dakumkamu aunum nuwi Apajui ashí senchigtina nunú pujujakui. Tuja Elí uchiji aidaushkam, Hofnín Fineesjai nuwi takaidau asag ditashkam kaunawajui.

⁵ Arcan juki dita batsatbaunum itawagmatai, ashí Israel aents aidauk shiig aneenak senchi unsumaidau. Nunú imatuinamu nugkan umuchkauwai. ⁶ Imatuidaun filisteo aidau antukag inimainak: “¿Israel aents aidau batsata nuwish wagka imanikash pampainawa?” tuidau.

Tukama dekawajui Israel aents aidau arcan dita batsatbaunum itawaje tabaun. ⁷ Nuna dekawag senchi ishamak chichainak:

“¡Apajui Israel aents aidau batsamtain tae! ¡Jaucha iish yamaish wajukatjiki, yaunchkesh anijakchamun yamai Apajui iina shiwaaji nugken tae!” wajaidau. ⁸ “¡Apajui ashí senchigtina nunú iina suwimka amataish, yaki iinash ayamjutpakti! ¡Niyai egiptunmaya aidau jata ishamain aidauwai suwimkan susa ijinauwa duka! ⁹ ¡Nuniau asamtai, hebreo aidau atumi inake aajaku aina nujai betek ditá inake atumesh atag tachakjumek, suntag filisteo aidautijum umintsatajum, nunikjum aishmag wajasjum senchi maaniatajum!” tuidau.

¹⁰ Tusa tiajam Israel aents aidau jetekag maaniawag depetkajui. Dutikainak dawé yujasag maanin aina nuna treinta mil suntag aidau amukajui. ¹¹ Tuja nuigtushkam arcanum chicham umiktinun Apajui Israel aents aidau susauwa nunú egketun jukiajui. Dutikainak Elí uchiji Hofnín, Fineesjai mai maawajui.

¹² Untsu makichik suntag Benjamín wegantunmaya maaniamunum wekagu tupikaki nunú tsawantaik yaakat Siló jegauwai. Nunik tupikak wake besemag dekapeamunum jáanchjin japiki ichigka, niina buukenishkam nugkan yukumag ayatak nugkak wajas weuwai. ¹³ Nunik jegakma, chicham umiktin agagbau egketun jukiaju asagmatai, Elí nuna puyatjak waitinum ayaumas ekemas jintanum niimak eketai jegauwai. Nunik jegá yaaktanum waya, nuwi aents batsatunum chichama etsegkauwai. Nuna antukag ashí aents aidauk senchi buutuidau. ¹⁴ Imatuidaun Elí antuk iniimak: “Nunash ¿wagka imatuinawa?” tau. Tusa tai suntag tupikaki jegauwa nunú waujus Elí pujamunum jeganta, ashí chichaman ujakui.

¹⁵ Tuja Elík noventa y ocho mijan ajamu asa múuntuch wainmamainchau wajas pujau. ¹⁶ Nuna jegantun chichajak:

“Maaniamunum wekagun tupikakin yamai taajai”, tau.

Tama Elí iniak:

“¿Wajukawagmae tujash, uchuchih?” tau.

¹⁷ Tusa tama nii ayaak:

“Filisteo suntag aidau, jutii aidautin depetamak, chicham umiktin agagbau egketunak atanjamkiagmae, nuigtu kuashat suntag aidaun ijinawagmae. Tuja amina uchigminashkam mai maawagmae”, tiuwai.

¹⁸ Elík shiig múuntuch kakaumainchau wajasu asa, chicham umiktin agagbaun Apajuí amasua nunak jukiagmae tusa ujakam, nuna antuk puyatuk sillanum eketu dakaga iyaak kuntujen akagak jakauwai. Elík Israel aents aidaunmak cuarenta mijan takasui.

¹⁹ Tuja Elí uchiji nuweshkam ejamtin uchigmatnak wajas pujau asa, filisteo aents aidau chicham umiktin agagbau egketun arcan jukiagmae, tuja amina aishjumnash maawagmae, nuigtushkam amina aishjumi apajish jakae tabaun antukui. Nunik puyatuk uchin najaima uchigmakui. ²⁰ Nunik uchigmak jakauwai.

Nunik eke jatsaig uchi uchigmatkau aidau chichajuinak: “Ishamkaipa, uchik aishmag uchigmakume”, tiajui. Tusa tamash nigka chichakchauwai, wagki jakau asa.

²¹⁻²² Untsu eke jatsuk uchiji daajin Icabod adaikauwai. Nunak: “Israel aents aidauk chicham umiktin atankimu asag yamaik shiig wainak juwakaje”, taku tawai. Nunak niina aishi jakau, tuja aishi apajishkam jakau asamtai, tiuwai.

5

Apajuí chichame umiktin egkeamun arcan filisteo aidau jukiag dita nugken ejegawagbau

¹ Chicham umiktin egketun arcan filisteo aidau jukiag muja Eben-ézer tutaya nuni akaikiag ditá yaaktajin Ashdod ejegawajui. ² Dutikawag ditá apajuímtaiji dakumka najanamu Dagón tutai aajakua nunú jegamjukbaunum awayawag, Dagónkan ayaunas ekentsajui.

³ Dutikawaju ai kashinia duwi kashikmasag Ashdodnumia aents aidau waya diikma, dita apajuímtaiji dakumka najanamu Dagón nagkima nugká ajajam, chicham umiktin Apajuínu arca eketu emtin tepaun wainkajui. Dutika wainkag inanki jukiag yaunchuk aajakbaunmak ukukiajui.

⁴ Dutikawag tsawainak kashikmas nantakiag wayawag diikma, atak-tushkam nagkima ajuajam tepaun wainkajui. Tujash ayatak iyajag tepachu, buuke akagak uweje aidauk kupinag, ima iyashig takamchau

tepaun wainakajui. ⁵ Nuadui sacerdote Dagónkan emematin aidauk nunú jeganum wainakug, Dagónkan buuke kuntujejai kupinag batsamsauwa nunak najatsuk chikai nagkayin ainawai.

⁶ Tuja duwi pujus filisteo aents aidau yaakat Ashdodnum batsamin aidau nak Tuke Pujuu suwimkan suwak jata tumor tutain ajunjauwai. Antsag tikich yaakat nuwi ayaumas aushkam nunú jatai shiig senchi waituidau.

⁷ Imanik waituidau asag Ashdodnumia aents aidau chichainak: “Israel aents aidau Apajujiya nunú iinak Dagón iina apajuímtaijiya nujai ijumag senchi suwimkan amase. Nuadui juju chicham umiktin agagbau Israel aents aidau Apajujiyina duka juwig jutuyaig amaitsui”, tuidau.

⁸ Nuna tuidau asag, filisteo apuji aidau untsuka itantag iniinak: “¿Israel aents aidau Apajujiya nuna chichame umiktin agagbau egketa dusha itugkattaji?” tuidau.

Tama dita aimainak:

“Yaakat Gadnum jukijum ejegatajum”, tiajui.

Tusa tiajam ditashkam dutiksag juki ejegawajui.

⁹ Tujash dutika juki ejegawaju ai, yaakat Gadnumia aidau Tuke Pujuu suwimka suwak imum ishamainun ajunjauwai. Dutikam múun aidauk, uchi aidauk, nuna utsumajag senchi waituidau.

¹⁰ Imaniagtai, chicham umiktin egkeamu arca Gadnum ejegamun filisteo aidau jukiag tikich yaakat Ecrón tutainum ejegawajui. Dutika ejegawagmatai nuwiya aents aidau untsu mainak: “¿Jinatnume tusa Israel aents aidau Apajujiya nuna chichame umiktin agagbau egketun arcan juki itagtamawaje!” wajaidau.

¹¹ Gadnumia aents aidau Apajuí suwimka suwak jata ishamainun ajunjae tabaun ashí tikich yaaktanmaya aidau antukajui. Nunikag filisteo apuji aidau untsuka ijumag chichajuinak: “¿Juju chicham umiktin Israel aents aidau arcanum egkeamua nunú jukijum itaujum duka, tuwi au jukimugme dutiksagmek wamak awagkitajum! Wagki Apajuí ashí ijpawai taji”, tuidau.

¹² Tusa imatuinak untsu mainamuk nayaimpinmash antuegu. Tuja aents iwaku batsatuk imum amuam shiig senchi waituidau.

6

Filisteo aidau arcan awagkiagbau

¹ Filisteo aidau arcan jukiajua duka siete nantu dita nugken asauwai. ² Nuwi aig sacerdote aidau, anentaimas dekamin aidaujai iniasagtatus untsukag ijumajui. Dutika iniinak:

“¿Chicham umiktin arcanum egketa dusha itugkattaji? Tuja wajuk awagkittaji nunú titajum”, tuidau.

³ Tusa tama dita aimainak:

“Chicham umiktin egketa nunú arca awakeakjume, Apajuí tsagkug-tugti tusajum waji anentag awetitajum. Nunú dutikajum atum jata achiimajum waitajum duka tsagagtajume. Nunikjum duwi dekattagme wagkag suwimkanash Apajuísh amasaje nunú”, tiajui.

⁴ Tusa tiajam dita aimainak:

“Tujash ¿ii pegkegcham takamsamunum kajegtamak suwimka amasai tusaish wajig sumainaitji?” tuidau.

Tusa tiagtai sacerdote aidau aimainak:

“Atumi apujum cinco aina dutiksagmek oro jukijum imumjai betek dakumkajum cinco najanatajum. Tuja nuigtu cinco katip dakumkajum dushakam orojai najanamum awetitajum, wagki atumek atumi apuji aina nujai jinuidau asajum. ⁵ Nuadui imum katipjai dakumkajum najanatajum, wagki nunú aidau iina nugken emestugbau asantai. Dutik etsagiatajum Israel aents aidau Apajuíji. Dutikawagminish tsagkugtamag suwimkan amatsuk, atumi apajuímtaiji aina nunash tuja atumi nugke aidaunash agkan idaisachaintash”, tuidau.

⁶ Nuna tusag: “¿Wagkamek atumesh egiptunmaya aents aidau ditá apuji aidaujai antakchau asag, Israel aents aidauun jiiija ishimain aig dutikchagtai, Apajuí suwimak susam waituinak jiiija ishiakua numamtinush atagme?”

⁷ “Duka nunitsuk makichik carreta yamajam najanatajum. Dutikajum atumdau jimag baka makichkish takamtikchatai yama petsaku aidau jukijum carretanum jigkajum ukuktajum, dutikakjum dita uchiji aidauk jujuki ukuktajum, dita wenak carretan japiki jukitnume. ⁸ Dutikajum nuadui chicham umiktin egkeamu arca jukijum carretanum juinia yantamen egkeatajum. Dutikajum atum Apajuí tsagkugtugti tusajum anentag susatin orojai najanamum aidau nuna yantamen chimpiatajum. Dutikawagmin nunú baka wenak carretan japiki juki wetinme.

⁹ “Tujash diyaku atajum baka aidaush nuna japikish itug wegagtig. Tuja Israel aentsu batsantai yaakat Bet-shemesh iina nugke nagkatkamunum awa nuwi chicham umiktin agagbau egkeamu arca nuni weakuig, duwi dekattaji dekas Apajuíyap suwimkanak amasaje tusaja. Untsu baka uchiji batsata nuni japiki shimakuig, Apajuí suwimkechuapi shiig jatap aikagmawa, titatji” tuidau.

¹⁰ Tusa tiajam imatiksag betek umikajui. Nuadui jimag baka yama petsakun jukiag, daekai anawag carretanum jigkawajui. Untsu uchiji aidaunak baka egketai peejamunum egkeauwai. ¹¹ Dutikawag arcan jukiag, imum dakumka najanamum aidaun, katip dakumka najanamum aidaujai carretanum chimpiawajui.

¹² Dutikawagmatai baka aidau shimak carretan japiki juki, makichkish yaja wetsuk tutupit shinukmaikia yaakat Bet-shemesh wetainum wegajui. Nunik shimutai filisteo apuji aidaushkam pataetukag yaakat Bet-shemesh nagkatkamunum jegantajui.

¹³ Tuja Israel aents aidauk nunú yaaktanum batsamin aidau yaakat jegattak waken ditá ajajin trigon juwak yujaidau. Nunik yujaidau niimsatakama arca carretanum egkeamun baka japiki inimaidaun wainkajui. Nunik wainak shiig anesajui. ¹⁴ Nunú jimag baka carretan japiki we wenakua Josué Bet-shemesh pujujakua nuna ajajin jeganta nuwi ijuntsauwai. Nunikmatai carretan dakajag kaya shiig múun pujaunum nuwi patajag bakan mai maawag nuna nejen ashí apeenak Tuke Pujun emematiajui. ¹⁵ Nuna dutikainatsaig Leví wegantu aidau arcanak jiiiki jukiajui. Dutikainak tikich waji orojai najanamum aidaunashkam jiiikajui. Dutikawag nunú kaya shiig múun pujaunum patajajui. Tuja nunú tsawantin aents Bet-shemesh batsamin aidauk Tuke Pujun emematuinak baka aidaun maawag nuna nejen ashí apeawajui. Dutikainak tikich kuntin aidaunashkam apeawajui.

¹⁶ Tuja filisteo aidaun apuji cinco aajakua duka nuna dutikaidaun diisag ukuinak nunú tsawantaik yaakat Ecrón waketjauwai.

¹⁷ Tuke Pujun ii pegkegchau takasbaunum tsagkugtamjati tusa filisteo aidau imuman dakumak cinco orojai najadau aina nunak, dita yaaktaji

aidau: Ashdod, Gaza, Ascalón, Gad, Ecrón aatus aajakua nuna daajin maki makichik najadau ainawai. ¹⁸ Tuja katip dakumka orojai najadau aidauk filisteon yaaktaji aidau peeja apakbau, nuigtu peejachbaujai ijumjam cinco aajakua dutiksaik najanamu aajakui.

Tuja chicham umiktin egketun arcan kaya shiig múun pujaunum ekentsaju aina duka yamaikish nunú kajak Josué ajaji yaakat Bet-shemesh aajakua nuwi awai.

¹⁹ Untsu Israel aents yaakat Bet-shemesh batsamin aidau arca initken diisu aidaunak Apajuí ijinauwai. Ashí ijumjamak setenta aentsun ijinauwai. Imatika Tuke Pujuu ijinamtai, nuwiya aents aidauk kuashat buutiaju ainawai. ²⁰ Nuna wainkaju asag chichainak: “¿Tuke Pujuu Apajuí pegkejam ashí senchigtina nuna emtinish yaki nigkish ayamjumakainta? Dekas Apajuí kajegtamak ijipawai tikich yaaktanun awemami”, tuidau.

²¹ Nuna tuidau asag Israel aents aidau yaakat Quiriat-jearim batsamin aidaun chichaman aatus akatmamtug akuptukajui: “Filisteo aents aidau chicham umiktin egketun arcan jukiajua nunak awagkiag itawaje. ¡Dutikawaju asamtai nunú taajum jukitajum!” tusa tiajui.

7

¹ Tusa ujakajam Quiriat-jearimnumia aents aidau wejiag arcan juki itawajui. Dutikawag Abinadapa jee nainnum aajakua nuwi awayag, nuna kuitamkatnun Abinadapa uchiji Eleazaran etegkawag Tuke Pujuun segatiajui.

Israel aents aidaunum apu chichama epegkin atsau asamtai, Apajuí Samuel adaitukui ditan yaigi tusa

² Arcan jukiag Quiriat-jearimnum egegawajua duwi nagkamas Israel aents aidauk veinte mijanai Tuke Pujuun segainak buutú batsatu, shiwag waitkagmaina nuna agkanmitkagmati tusag. ³ Imaniagtai Samuel ditan chichajak:

“Atum dekas Tuke Pujuu atumi anentaimijai emematjukum ima nigki umigkatag takugmek, ¡tikich nugkanmaya apajuímtai aina duka Astarté dakumka najanamua nujai utsagtajum! ¡Dutikajum ima Tuke Pujuu takagsatajum! ¡Nuniakjum ima nigki ememattajum! Dutikagmin nii filisteo waitkagmaina nunak agkanmitkagmawagtatui”, tiuwai.

⁴ Tusa tijam Israel aents aidauk Baal dakumka najanamu aidaunak, Astarté dakumka najanamu aidaujai ashí utsagkajui. Dutikawag ima Tuke Pujuunak emematuidau. ⁵ Nunik batsatun Samuel ditan chichajak: “Ashí Israel aents aidautijum yaakat Mispá ijunjatajum. Nunikagmin wi atumin pachisan Tuke Pujuun segattajime”, tiuwai.

⁶ Tusa tijam nunú yaaktanun ashí ijunjajui. Nunikag wake besemag pujamujin iwainainak yumi shikikag Tuke Pujuun anentag suwinak ukajajui. Dutikawag yujumka yutsuk batsamas, Tuke Pujuu emtin pegkegchau takamsamujin etsegtumakajui.

Tuja nunú nugkanum Samuel Israel aents aidaun utugchatjin epegtin wajasui. Nunik duwi nii takamujin nagkamauwai. ⁷ Israel aents aidau Mispá ijunag batsatui tabaun filisteo aidau dekawajui. Nunikag apu aidau dita suntaji aidaun yajuakag shimutkajui. Nuna dekawag Israel aents aidauk senchi ishamaidau. ⁸ Nuadui Samuelan chichajuinak: “¡Amek mijamtsuk Tuke Pujuu iina Apajúji segaa pujuta, nii ayamjutpakti filisteo aidau amupakainum!” tuidau.

⁹ Tusa imatiagtai Samuel uwig tsakat aishmagkun juki takamchaun patai ashí apeak Tuke Pujun emematiuwai. Nuna dutika Tuke Pujun segauwai Israel aents aidau kuitamkata tusa. Tusa segam Tuke Pujun ayu tiuwai. ¹⁰ Samuel uwig aishmag tsakatan maa nuna nejen ashí apeak pujai, filisteo aidauk Israel aents aidau jetekagtatus jegajuawajui. Nuniagtai Tuke Pujun ipamtan shiig senchi ajuntug uwakauwai. Dutikamtai Israel aents aidau filisteo aidau depetuk amuku ainawai. ¹¹ Dutikawag tikich aidau pisagmatai, Mispánmaya juwakiag pataetuk shima shimakua, amaigkag mai mainakua yaakat Bet-car tutaya nuna tsumujin jegawajui.

¹² Tuja nunú ashí nagkaankamtai, Samuel makichik kaya múunta juki Mispá, Sen aatus awa nuna ejapeen apusauwai. Dutika nuna adaikauwai Eben-ézer. Nuna adayak chichaak: “Tuke Pujuk yamaikish yaimpawai”, tiuwai. ¹³ Dutika depetkamu asag filisteo aidauk ataktu awagkig Israel aents aidau nugken waintuag waitkaschau ainawai.

Tuja Samuel iwaku pujusmataig, Apajuik filisteo aidau nak tuké ijina-jakui. ¹⁴ Nuadui Israel aentsu nugken filisteo aidau Ecrógnun nagkama Gatan nugke aajakua aatus jujukiu aina duka ataktu ditá nugke wajasui. Aatus Israel aents aidauk, filisteo aidau ditá nugken jujukiu aina nunak ataktu awagkijui. Nuadui ditak amorreo aents aidaujaig maanitsuk agkan batsamajaku ainawai.

¹⁵ Tuja Samuelak Israel aents aidau utugchatjin epegtin aajakua nunisag pujus jakauwai. ¹⁶ Nii pujus Israel aents aidau utugchatjin epegtak maki makichik mijadai yaakat Betel, Guilgal, Mispá aatus wekagajakui. ¹⁷ Nunik wekae wekaekawa nii pujutaijin yaakat Ramá waketujakui. Nunik nuwí pujus Israel aents aidau nak yayajakui. Tuja nuigtushkam nunú yaaktanum Tuke Pujun emematku kuntin maa patai apetaim altaran najanauwai.

8

Israel aents aidau apugtin amí tusa wakekagbau

¹ Samuelak múuntuch wajasu asa, niina uchiji aidau Israel aentsu apuji atinme tusa adajauwai. ² Niina uchiji iwai Joel, tuja nuwí patatkau Abías aajakua nujai yaakat Beersheban apuji aajaku ainawai. ³ Tujash ditá apaji Samuel shiig takasua nujai betekak takaschajui. Tikich aidau nak wait anentsuk ima ditanunak anenmamajaku ainawai. Nunin asagmatai aents aidauk suwimkan sujusainum tuidau asag kuichkin akijaku ainawai.

⁴ Nuniagtai Israel aentsu apuji múun aidau ashí ijunjag Samuel Ramá pujau asamtai, nijai chichastasag shimutkajui. ⁵ Nunik jegawag chichajuinak: “Amek yamaik múuntuch wajasume. Tuja amina uchijum aidashkam ame shiig takasuitam nujai betekak takainatsui. Nuniau asamtai ¡tikich aents aidau apugtin aina nujai betek iina apuji atin, ame adakata!” tiajui.

⁶ Tujash nunú Samuelan shiig awagmakchauwai. Nuadui nuna pachis nii Tuke Pujun segauwai. ⁷ Tusa segam Tuke Pujun niina chichajak:

“Dita wajina segapagtatua duka betek umigkata. Nunak amina dakitjamak tujamainatsui, ¡wi dita apuji atinun etegekeag duwi mina dakitjuinak tuinawai! ⁸ Yamai amina tujamaina antsag wi ditan egyptunmayan ¡jujuitag duwi nagkamas yamaikish minak tuke tujutin ainawai. Aanidau asag wainka apajuímtai aidau emematuinak minak kajimatjukiaje. ⁹ ¡Nuadui

amina segapaina duka umigkata! Untsu ditá apuji atata dusha ditajaish wajuk takastigki nunú shiig ujakta”, tiuwai.

¹⁰ Tusa tima nuna imatiksag Samuel ditan ujaku. ¹¹ Dutika chichajak:

“Atumi apujum atin sumajum duka juna dutikattawai: Atumi uchijum aidaun yajuak carronum yujas maaniatin aidaun, caballonum entsamak yujas maaniatin aidaun, tuja niina kuitamkagtin aidaun, aatus akan-jattawai. ¹² Dutikak nuigtushkam mil suntag aidaun apuji agtinun, nuigtu cincuenta suntag aidaun apuji agtinnashkam adajattawai. Tuja tikich aidaunak ajaka ajakbau emaktinai. Untsu tikich aidaun nunú apu yuwatnun ajakan juu agtinai. Untsu tikich aidaun apu carroji maanifai aidaun najanin agtinai.

¹³ “Tuja atumi nawanjum aidaunashkam niina inake emaktinai. Dutikam kugkuin aidaun najanin, yujumka injin, pagka najanin agtinai.

¹⁴ Tuja nuigtushkam nugka pegkeg aidaun yajuak ashí niinu emaktatui. Dutikak uva ajakbau, olivo ajakbaujai atumdaun shiig pegkeg aina nunashkam niinu emaktatui. Nuna yajuak niijai atueka takatai aidaun tinamkattawai. ¹⁵ Tuja atumdaun ajak juukbau aidaunashkam, uva juukbau aidaunjai ujumak akanak* juki niijai atueka takataiji aidaun, suntaja apuji aidaunjai tinamtinai. ¹⁶ Tuja nuigtushkam atumi tsakatke aishmag aidaun, nuwa aidaun, buey aidaun, burro aidaun atanjamag niinu emak takamtiktinai. ¹⁷ Nuigtushkam atumi tagkujum aidaun akanak yajutjamkatnai. Atumshakam niina inake atajume. ¹⁸ Atum apu etegkamua nunú imatika waitkagmainakui chichagminish, Tuke Pujuk antugtamtashtatui”, tusa ujaku.

¹⁹ Tusa ujamashkam aents aidaun dekaskepi tutsuk aimainak:

“Iik duka puyatjatsji, ayatak apugtin atag tusa wakegaji. ²⁰ Tikich aents aidaun apugtin aina nujai betek agmi taji. Nunú iina apuji etegkamua asa, iina nugken inamak iina shiwaaji aidaunjai maaniamunmash nii chichamjtpakti, taji”, tuidau.

²¹ Tusa tiagtai nuna ashí antujuk imatiksag Samuel Tuke Pujun ujaku.

²² Tusa ujakam Tuke Pujun ayaak: “¡Dita sumamua duka ayu tusam apu adaitukta!” tiuwai.

Tusa tima Samuel Israel aents aidaun chichajak: “¡Maki makichik atumi yaaktagmin waketjatajum!” tusa ishiaku.

9

Saúl Samueljai igkunikbau

¹ Makichik aents Quish daagtin Abiela uchiji, Zerora tijaji Benjamín wegantunmaya aajakui. Niina apajin apachjig Afiah uchiji Becorat aajakui. Quishak eme anentsa diitai aajakui.

² Niina uchiji datsa makichik yantsapin shiijam Saúl daagtin aajakui. Tuja nii shiijam aajakua imanuk tikichik Israel aentsuk makichikish atsujaku, nuigtush niina esantijai betekak tikichik atsujaku. ³ Tuja makichik tsawantai Quisha burroji aidaun megkaejauwai. Nunikmatai niina uchiji Saúl chichajak: “Makichik inak juki weme, burro megkaeja nunú egakta”, tiuwai.

⁴ Tusa tima Saúl inaka juki burro egak Efraigka nugken mujanum weuwai. Nunik jegauwai Salisá nugkanum; tujash burronak wainkachui.

* **8:15** “Ujumak akanak” tawa nunak “diezmon” taku tawai.

Nuwi nagkaemaki weuwai Saalim nugkanum, nunik Benjamí gka nugkenishkam jegauwai, tujash burro megkaejaunak wainkachui. ⁵ Nunik wainkacha ukuak Suf nugkanum jegaa inakan chichajak:

“Wakitkimi mina apajuk burro megkaeja nuna nagkaesaus iina puyatjut-patai”, tiuwai.

⁶ Tusa tama nunú inak ayaak:

“Juju yaakta juwi makichik aents Apajuí chichame etsejin pujawai, nunak nii tibau betek uminu asamtai, ashí aents aidau eme anentus diin ainawai. Nunú jegajua iniasmi, tuwig burrosh batsatua nuna ujjapakchaintash”, tau.

⁷ Tusa tama Saúl ayaak:

“Ayu untsu wemi, ¿tujash nii iniakuish wajig susatji? Makichik pagkesh nii sumainuk shiig atsugtamji”, tau.

⁸ Tusa tutai inak ayaak:

“Wi takakjai plata piipichin, nunú Apajuí chichame etsejin suwaku dekajuami, burrosh itug batsatuaki nuna ujjapakti”, tau.

⁹ (Initaikik makichik Israel aentskesh Apajuín inias dekatag takug: “Aents anentaimas ejenun iniasan dekatjai” tujaku ainawai. Nunak yamai ii profeta taji nuna taku tujaku ainawai.) ¹⁰ Tusa tutai, ayu wemi tusa mai juwakiag yaaktanum Apajuí chichame etsejin pujamunum weajui.

¹¹ Nunik yaakat jegattak wekama nuwauch aidau yumi shikiktatus shimuidaun igkugkag iniinak:

“¿Aents anentaimas dekamnush juwig puja?” tuidau. ¹² Tutai ditá ainak:

“Ehe, tujash imau yaakta nagkaiki pujawai. Wamak wejitajum, kuntuu maa, Apajuí emematak nainnum apeatatus yamai yaaktanum wakame.

¹³ Nuwi yujumka yuwatatus eke weatsaig wejitajum. Wagki Apajuí emematku kuntuu maamua nuna nii jegaa Apajuí segamtai yuwami tusa aents aidau dakainawai. Nuadui wamak wetajum, nuniakjum igkugtatjume”, tiajui.

¹⁴ Tusa tiajam ditashkam yaaktanum shiyakajui. Nunik jegattak wenai, Samuelchakam kuntuu maa apeatatus wegak dita shimamunmanini jiinki minau wainkajui. ¹⁵ Tuja Saúl kashinia duwi jegatin ai Tuke Pujuu Samuelan ujaak:

¹⁶ “Kashin, yamai etsa eketa juniai Benjamí gka nugkenian makichik aentsun awetittajame, nunú mina aentsug Israel aents aina nuna apuji atin asamtai. Ame aceiteyai buuken nijaktatme. Nii mina aentsug Israel aents aidau filisteo aidau waitkaina nuna ayamjuk agkanmitkattawai, wagki dita waituinak mina segatuinamunak wi antugkau asamtai”, tiuwai.

¹⁷ Nuadui Samuel Saúl wainkamtai, Tuke Pujuu chichajak: “Wi makichik aentsu pachisan amina timajam duka anuwai. Anú mina aentsug Israel aents aina nuna apuji atatuí”, tiuwai.

¹⁸ Nuniai Saúl Samuelan jegatun chichajak:

“¿Tuwi awa anentaimas dekamnu jeesh? nunú minash wait aneamam inaktugsata”, tau.

¹⁹ Tusa tama nii ayaak:

“Witjai anentaimas dekamnunuk. Wegajai Apajuí jee pegkeganame, awi wijai yujumak yuwata. Tuja ame waji dekaatag tusa wakegame nunak kashin kashikmasan ujaktagme, dutikamtai duwi wakitkita. ²⁰ Tuja burrojum megkagag kampatum tsawan wega duka puyatjukaipa, nunak wainkaje. Tuja nuigtushkam Israel aents aidau nugken waji pegkeg ayá duka ashí aminu nuigtu amina pataiminujai atatuí”, tiuwai.

21 Tusa tama Saúl ayaak: “¡Tujash wika tikich Israel aents wegantu kuashat aina imanchau Benjamín wegantunmaya ujumchik aina nuwiyayaitjai! Nuigtushkam Benjamín wegantu aina nunú ashí ijumjama mash mina pataajuk tiki wainkauch ainawai. ¿Nunin aish wagka minash dusha tujutme?” tiuwai.

22 Tusa timatai, Samuel Saúlan niina inakejai juki yujumak yuwaku ijuntainum awayauwai. Dutika treinta aents eme anentsa diitai aidau pekagbau nagkaesau dekasshiig pegkegnum ekentsauwai. 23 Dutika Samuel yujumka inagnun chichajak: “Wi neje amaakun juka akanka ukukta timajam nunú itaata”, tiuwai.

24 Tusa tima ayu tusa kuntu bakuin juki Samuelan ekettsauwai. Dutikamta Samuel Saúlan chichajak: “Wi aents aidaun ipau asan, ditajai ijunag yuwati tusan anna akankan amina ukugkimjame, anú yuwata”, tiuwai.

Tusa tima nunú tsawanta duwi Saúl Samueljai jimagtuk yuwawajui. 25 Nunikag Apajuí jee pegkegmanum batsatu juwakiag, Samuela jeen yaakat jegamta, Saúl kanagtinun jega tuntupen pegakan umigkajui.

26 Dutikam nuwi kanajui. Nunikmatai kashinia duwi Samuel Saúl yakí pujaun untuka chichajak: “Nantakim wakitkita”, tau.

Tusa tima nantaki wetatus uminas Samueljai agá jiinkiajui. 27 Nunikag yaakta ukukiag Samuel Saúlan chichajak: “Inakem amejai wekaga nunú emtikam awemata. Untsu amek machik ukuunum juwakta, nunikamin Apajuí tujutma nuna ujaktagme”, tiuwai.

10

Samuel Saúlan Israel aents aidaun apuji atinun adaikamu

1 Samuel aceite juki Saúla buuken nijakui. Dutika yapinum kugkuak aatus tiuwai:

“Tuke Pujuu amina Israel aents aidaun apuji ati tusa yamai etegtamae. Ame pujusam inamkum shiwag waitkaina nunú agkanmitkattame. Tuja amina Apajuí etegtama duka juju aidau wainkum dekaskeapi titatme.*

2 Tuja yamai weakum Benjamígka nugken yaakat Selsah Raquel ukusbaunum jegantatak, jimag aents minidau igkugtatme. Nunú inimpak: ‘¿Burro megkaejamta egaku wemaum dusha wainkaumek? Amina apak burronak puyatjichmae, amina ima senchi puyatjupame, nuniak mina uchijush inakjaish wajukawagmaki tusa dekatatus iniimak wekaemae’, tujamiagtatu.

3 “Nunú nagkaiki weakum, numi encina tutai yaakat Tabornum waja nuwi jegakum, kampakum aentsua nuwiya, makichkia nunú kampakum chivon jukimta, tikichik kampakum pagkan juki, tuja tikich duwap apagbaunum vino aimkamun jukiag Apajuín ememattatus yaakat Betelnum shimuidau igkugtatme. 4 Dutikawagmin kumpamjamawag jimag pagkan amainakuig dakittsuk jukita.

5 “Nunika wea weakum, yaakat Guibeá Apajuínu tutainum flisteo suntag aidau batsamta awa nuwi jegattame. Nunika jegakmam wainkattame aents kantamin aidau: pandero aidaun, arpa aidaun awatkiag, pigkui aidaun umpukmaikia, nuna ukujin profeta aidau Apajuí jee pegkegma nuwiya jijnjag Apajuí tibaun etseggkamaikia akagaidau wainkattame.

* **10:1** Juju versículonum chicham agaja inagnaka punto apujamua nuwi nagkama agagbauwa duka tikich Biblia yaunchuk agagbau aina nuwi atsaush awai.

⁶ “Nuniamin Tuke Pujuu Wakani amina wainjamattawai, nuniakui profeta chichagtata nujai betek ameshkam chichattame. Duwi nagkamas amina pujutjumek yapajinattawai. ⁷ Tuja nunú ashí uminkamtai, ame waji takasta tame nunú dutikata. Apajuí aminak yaimpaktatui.

⁸ “Tuja amek emkam yaakat Guilgal wetá. Nunikam awi siete tsawan dakagmin wi tattajai. Nunikan Apajuí daajin kuntinu maan nuna nejen ashí apeakun, nuigtu agkan pujutan Apajuí amastí tusan niina anentag susattajai. Dutikan duwi ujaktatjame ame wajuk takastatme nuna”, tiuwai.

⁹ Tusa tima nunú tsawantaik Samuel tibauk imanisag uminkauwai. Nuadui Saúl Samuelan kumpama ukuak weuwai. Aatus Apajuí Saúla pujutjin yapagtuauwai.

¹⁰ Nunik Saúl niina inakejai yaakat Guibeá jegawajui. Nunik jegattaman profeta aidau untsumkiag jijnajui Saúlan igkuinak. Nuninai Apajuí Wakani Saúlan egkemtujui. Dutikam niishkam profeta aidaujai betek wajasui. ¹¹ Nuniagtai yaunchuk Saúla wainin aidau pempeentunikiag tudayinak: “¿Quisha uchijish wagka aniawa? ¿Tuja au profeta aina dusha tuwiya jijnajae? ¡Tsuwah, Saúlash profeta wajasu diyajai!” tuidau. ¹² Tiagtai nuwiya makichik chichaak: “¿Yana jintintai ainawa aush?” tau. Nuna aatus tiaju asagmatai, nuwiya chicham jijnak: “¡Saúlchakam profeta wajase!” tibau juwakui.

¹³ Nuna nunik nagkaanak Saúl niina inakejai nuwi nagkaemaki, we wena kua Apajuí emematku kuntin maa apetai nain aajakua nuwi wakauwai.

¹⁴ Nunikmatai niina apaji yachi Saúlan niina inakejai iniak: “¿Tuu wemajume?” tau.

Tusa iniam Saúl ayaak:

“Burro megkaejamtai egaku wemajui. Nunika wainkacha Samuel pujamunum wemajui”, tau.

¹⁵ Tusa tama Saúla apaji yachi niina ayaak:

“¿Samuelash wajinjutpame? nunú minash wait aneam ujatkata”, tau.

¹⁶ Tutai Saúl niina apaji yachin ayaak: “Burro aidau megkaejau nak wainkaje, tusa ujakpakmae”, tiuwai. Tujash Samuel niina chichajak: “Ame Israel aents aidau apuji atatme”, tusa tibaunak ujakchauwai.

¹⁷ Duwi pujus Samuel Israel aents aidau untsuka, yaakat Mispá ijumjauwai, Tuke Pujuu emematiagmi tusa. ¹⁸ Dutika ijumag chichajak:

“Tuke Pujuu Israel aents aidau Apajuíjiya nunú chichaak: ‘Atum Israel aents aidautijum Egipto nugkanum batsamsajum waitkam batsatutigmin wi jiijan agkanmitkawabiajime. ¹⁹ Tuja wi atumi Apajuíjum asan yayajim duka dekayaitkujum, mina idaitakjum iish apugtin amí tusajum sumagme. Tujash nunak puyatjatsjai. Atum sumajum nunak betek umiktatjai, nuadui mina emtijui maki makichik wegantu ainajum duka ashí ijunjatajum’ tusa Tuke Pujuu tujamui”, tiuwai.

²⁰ Tusa tiajam maki makichik wegantu aidau ashí ijunjauwai. Nunikmatai Samuel kaya juki yana daajig jiiinkiti tusa diyam Benjamín wegantunmaya jiiinkiuwai. ²¹ Nunikmatai Benjamínkan patayi aina natuyash yana daajig jiiinkit tusa dekapsauwai. Dutika diyam Matrí patayinia jiiinkiuwai. Nunikmatai ataku awagkiag dekapsajui, dutikam Saúla daaji jiiinkiuwai. Nunikmatai Saúlan wainkatakama emegkakajui. ²² Nunikmatai Tuke Pujuu iniasajui Saúlash juwig puja tusa. Tusa iniam Tuke Pujuu ayaak: “Waji ijumjamu aina nuwi uumak pujawai”, tiuwai.

²³ Tusa timatai uumak pujaun jukitatus shimutkajui. Dutika jukim Israel aents aidau ijunag batsatbaunum wegajui. Nunik jegamtai diikma tikich niina nagkaekauk esagmak atsaun wainkajui. ²⁴ Nunikmatai Samuel Israel aents aidau ashí ijunag chichajak:

“iTuke Pujuu juna atumi apuji atinun etegka nunú ashí diistajum! iNiijai betek amainuk tikichik Israel aentsuk atsawai!” tiuwai. Tusa timatai dita shiig aneas aimainak: “iNii iina apujig ati tusa wakegaji!” tuidau. ²⁵ Tusa tiagmatai, Samuel apu takatjish wajuk atata nuna pachis Israel aents aidau ujakui. Nuna ujaka papiinum agag juki Apajuí jee pegkegmanum awayauwai. Dutika nuadu ashí aents aidau jemin waketjatajum tusa ishiakui.

²⁶ Dutikamtaí Saúlchakam yaakat Guibeánun niina jeen wakitkiuwai. Nunik wetai Apajuí niina uyuntsatnun ujumak aents wajuu aidau etegtujui.

²⁷ Nunik wematai aents pegkegchau aidau chichaman patatuinak: “iAush annush iinash ayamjupaktatuak!”, tusa tuidau asag apu wajas-mataish makichik wajinakesh susachajui. Dutikamashkam Saúlak nuna chichamjutan dakitak idaisauwai.

11

Saúl amonita aents aidau depetkamu

¹ Galaad nugkanum yaakat Jabes aajakua nuna jetektatus amonita aents aidau apuji Nahas aajakua nunú shiig uminas suntaja yajuak weuwai. Nuna dekawag nuwiya aents aidau Nahasan chichama akuptuinak: “Jutijaig maaniawai, ayatak chicham umikmi, nunika amina inakem agmi taji” tuidau.

² Tusa tiagmatai Nahas ditan ayaak: “Ayu, untsu chicham umikmi takugminig, wi atumi jii untsuja nuna ashí ukuitjatjime. Dutika ai atum Israel aents aidautijum dushiktaí datsan juwakminjum”, tiuwai.

³ Tusa timatai Jabesnumia apu aidau chichainak: “Kame siete tsawan sukagtusta, tikich Israel aents aidau batsata nunú chicham akuptuka dekanati. Untsu iina yaimpamain atsakuig, ame tame duke ati”, tuidau.

⁴ Nuna tusa chichama etsejin aidau yaakat Guibeánun Saúl pujujukua nuwi ishiakui. Dutikam jegawag Nahas tibaunak imatiksag nuwiya aents aidau ujakui. Nuna antukag kajekag buutiajui. ⁵ Nuninai Saúl niina ajajinia buey aidau yajuak minikma buutuidau antuk iniimak: “¿Wagka imatuinawa? ¿Wagka buutuinaawa?”

Tutai: “Jabesnumia aents aidau kaunawag chichama etseggamtaí nuna antukag buutuinaawai”, tuidau. ⁶ Tiagtaí Saúl nuna antak wajai, Apajuí Wakani niina egkemtujuu, dutikam shiig senchi kajekui.

⁷ Nunik jimag bueyen achika juki tsupig mauwai. Dutika nunú aents yuaju tinamak Israel aents aidau batsatbaunum ashí ishiakui. Dutika ishimak juu etseggatajum tusa chichama etsejin aidau akateak: “Aents wijai, tuja Samueljai ijunag maanitan dakituidauk, tagkuji buey aidauk jutsaika tsupija ijitam agtinme”, tiuwai.

Tusa timatai nuna antukag Israel aents aidau shiig senchi ishankajui. Nuninai Saúljai atunikatatus makichik aents amaina numamtuk jijnajui.

⁸ Nunik shiyakag ijunajui yaakat Bézec. Nunikmatai Saúl dekapajui, dutikam Israel aents aidau trescientos mil aents ijunauwai. Tuja Judá wegantunmaya aidau treinta mil aents ijunauwai. ⁹ Nunik ijunjamtaí Saúl

chichama etsejin aidaun chichajak: “Waketjajum Jabesnumia aents aidau ujaktajum, kashin etsa tajimai agkanmitkawagtatjai”, tiuwai.

Tusa tima jegawag Jabesnumia aents aidaun nuna ashí ujakajui. Nuna antukag shiig aneasajui. ¹⁰ Nunikag Nahas ujaktajum tusa chichama etsejin aidaun akuptuinak: “Kashin ame wakegamu umikta tusa minittaji”, tiajui.

¹¹ Tuja kashinia duwi Saúl niina suntaji aidaun akanag kampatum ijumjauwai. Dutika eke etsa jiintsaiig shimutuk shiwag amonita aents aidau batsatbaunum jegawajui. Nunikag mai mainakua etsan tajipiajui. Dutika amuam iwaku juwaku aidauk maki makichik pisaja megkaejauwai.

¹² Nunikagmatai nuwi aents yujau aidau Samuelan chichajuinak: “¡Israel aents aidau Saúlak iina apujig amaitsui tusa tiagma duka kajegmi!” tiajui. Tuidau asag, nunú aents aidauk idaisatajum ii kajegmi tusa sumaidau.

¹³ Tusa tiagtai Saúl chichaak: “Yamai tsawanta duik makichik aentskesh jakashtatui, wagki Tuke Pujuu yamai Israel aents aidaun ayamjuku asamtai”, tiuwai.

¹⁴ Tusa timatai Samuel ashí aents aidaun chichajak: “Yaakat Guilgalnum shiyakagmi, awi Saúl apu wajas inabaun nagkamati”, tiuwai. ¹⁵ Timatai aents aidau ashí yaakat Guilgal shiyakajui. Nuwi jegawag Apajui emtin Saúlan apu adaikajui, dutika chichainak: “¡Saúlai iina apujig!” tuidau. Nuna ashí umikag nuadui agkan maanitsuk pujustinan Tuke Pujuu amastí tusag kuntuu maa apeenak Tuke Pujuun emamatiajui. Nuadui Saúl Israel aents aidaujai ashí ijunag shiig aneasajui.

12

Samuel Saúlan ame yamaik Israel aents aidaunum inamjata tibau

¹ Nunú nagkaemakmatai Samuel ashí Israel aents aidau antamunum chichaak:

“Antuktajum nijah, wika atum aidautijum segatbaunak ashí umigkajime. Dutikau asan atumi apujinash adaitukjime. ² Nuadui yamai nagkamsag juju apu atuminig inamjattawai. Tuja wika yamaik múuntuch intashi puju wajasjai. Atumek dekagme mina uchig aidau atumjai batsatainawai.

“Wika datsauch asanuk atumi yayaakun taka takakuan yamai tsawantan ejejai. ³ Nuadui wisha wajuk atumjaish takasja nunú namputchawame wi atumdaun buey aidaunakesh, nuniachkunush atumi burrojum aidaunakesh atankimu akugmek, tuja tikichnakesh waitkasu akuig tujuttajum. Tuja chichama iwagtujati tusagmekesh akigkau akugmeshkam, yamai Tuke Pujuu emtin, juju apu Apajui etegkamua nuna emtinchakam tujuttajum. Nunú tujutiagmin nuna akikmaktajai”, tiuwai.

⁴ Tusa tutai dita aimainak:

“Amek makichkish kasagkagtukchauwaitme, nuigtush tsanujat-jachuitme, nuigtush chichama iwagtugtagme tusamkesh makichkish kuichkik segajatchauwaitme”, tiajui.

⁵ Tusa tiagtai Samuel chichaak:

“Tuke Pujuu emtinish, tuja apu aina nuna emtinish mina utugchatjuk makichkish ejetugchaugme”, tiuwai.

Tusa tutai ditá ainak:

“Ame tame duka dekaske”, tuidau.

⁶ Tusa tiagmatai Samuel Israel aents aidaun chichajak:

“Atumi apachjum aidau Egipto nugkanum waitkam batsatun, jiija yajuak, juju nugka juwi ikaunmati tusa Tuke Pujuu Moisésan Aaróggai awetiuwai. ⁷ Nuadui umintsatajum, wagki wi yamai atumin iwaintuk-tatjime, atum aidautijum ima Tuke Pujuuwaig kajintsa anentaimtsuk, apugtin amí tusa sumakjum pegkegchau takamsaujum nuna. Tuja atumi apachjum aajaku aina nuna uwentikatatus Apajuí dutikauwa nuna yamai dekamtikattajime.

⁸ “Atumi apachjum aajaku aina nunú Jacob niina uchiji wegantu aidaujai Egipto nugkanum shiyakag batsatun, nuwiya aents waitkasu ainawai. Imatika waitkainam Tuke Pujuu yaimpakti tusag segajaku ainawai. Nuna antujuk Tuke Pujuu Moisésan Aaróggai awetiuwai. Dutikam iina apachji aidaun jiija yajuak juju nugka juwi ikaunmauwai.

⁹ “Dutika ikaunmam batsamsash ima Tuke Pujuu dita Apajuújinak umigtsuk kajimatkiu ainawai. Nunidau asagmatai dita shiwaaji aidau depetkatneme tusa Tuke Pujuu timatai, Hasornumia suntag aidaun apuji Sisara aajakua nunú niina suntaji aidaujai depetuk amukajui. Tuja nuigtushkam filisteo aidau, moabnumia aents aidau aatus ditanak depetuk amuku ainawai.

¹⁰ “Dutika depetkam wajantag nuadui Apajuín adeajag segainak: ‘Dekas iik Baal dakumkamu Astartéjai emematu tunamagji’, tiu ainawai. Nuna tusag iina shiwaaji waitkagmaina nuna ayamjutpakti tusa Tuke Pujuu segainak: ‘Ame ayamkagtukaminig, ima amek emematiagmi taji’ tiajui.

¹¹ “Nuna antujuk Tuke Pujuu Jerubaalan Barakan, Jefeé aajakua nuna, tuja minashkam aatus awetugmauwai, atumin shiwaajum aidau waitkagmaina nuna ayamjutpakti tusa. Aatus iina apachji aajaku aina duka dita ayamjukam shiig batsamsau ainawai. Tuja yamai atumshakam kuashat tsawantai atumi shiwaajum waitkascham shiig batsatjume.

¹² “Tujash atumek amonita aidaun apuji Nahas aajakua nunú jetepaktag tabau antukjum, iish apugtin amí, nunú iinash yaimpakti tusajum, Tuke Pujuu atumi Apajuújiya nunú dekayaitkujum sumakmaijume.

¹³ “Nuadui atum apu sumakbaujum duka jujuwai. Juna Tuke Pujuu atum sumakbaun amasaje. ¹⁴ Nuadui atumek atumi apujijai yamai juju umiktatjume: Tuke Pujuu eme anentsajum nigki ememattajum, dutikakjum nii tabau umiktajum. Nii dutikata tujabau takastajum, tuja nii wakegamu umigkujum pujustajum. Nunú dutikakjum shiig pujustatjume. ¹⁵ Untsu nii umiktajum tabau umitsuk idaijumini, Tuke Pujuu atumnak atumi apugmijai suwimkan amastatjume.

¹⁶ “Nuniau asamtai titu batsamsatajum, Tuke Pujuu atum aidautigmin wainchatai aidaun iwaintugmakagtata nunú wainkamnujum. ¹⁷ Tuja yamai tsawan aina duka trigo juut asamtai, yumi yutatsu nunú wainjume. Nunik aun wi Tuke Pujuu sega ai, nii ipa ipamtajai yumin yutumtjittawai. Dutikamtai atum aidautijum apu sumakujum duka Tuke Pujuu diismak pegkegchau dutikaujum nunú dekattagme”, tiuwai.

¹⁸ Nuna tusa inagnamuik Samuel Tuke Pujuu segauwai. Dutikamuik Tuke Pujuu ipamtan yumijai ajunjauwai. Dutikamtai ashí aents aidauk Tuke Pujuu Samueljai ishamkajui. ¹⁹ Nuadui aents aidau Samuelan chichajuinak:

“Amina aentsjum aidauti pachijattsam Tuke Pujuu amina Apajuújum segata, wagki jinawaig tusa ishamaji. Iik apu sumá yujasa nuni senchi iina tudauji ikauntumakji”, tuidau.

²⁰ Imatiagtai Samuel ditan chichajak:

“Ishamkaigpa, Tuke Pujuuk mantamachagtatui. Dekaske atum pegkegchau takasujum duka. Tujash nuniku akugmesh Tuke Pujuuwaig kanakaigpa. Duka nunitsuk ima nigki atumi anentaimijai ememattajum. ²¹ Tuja tikich apajuimtai aina nunú atumi ayamjutpak uwemtijamainchau aina nuninuk yujagsaigpa. Duka wainak ainawai.

²² “Atum aidautijum ima nigki eme anentsajum emematjuminig atum-nakek idaitamsashtatui, wagki niig mina aentsug atinme tusa etegtamjau asa.

²³ “Untsu wika atumnak mijattsuk Tuke Pujuun segattatjime, nuna dutikashkunuk pegkegchaun takakun nunimainaitjai. Nuigtushkam aents pegkeg atinme tusan jintintuattajime. Duka juju ainawai:

²⁴ “Atumek ima Tuke Pujuuwa duke ajantusjum diitajum, dutikakjum nii umigkujum dekaskenum atumi anentaimijai ememattajum. Tuja Apajuú atumi yaimpak kuashat dutikauwa nunú aneaku atajum. ²⁵ Untsu pegkegchau takat aidau idaitsuk duke pujugkugmek, atumek atumi apugmijai ijina utsam atatjume”, tiuwai.

13

Israel aents aidau filisteo aidaujai maaniawagbau

¹ Saúl apu wajas Israel aents aidanum inabaun nagkamauwa nunak tsakaja pujus nagkamauwai. Nunik apu wajas inamak ujumak mijan pujau, ² makichik tsawantai tres mil suntag Israel aents aidan etegjauwai. Nuwiya dos mil suntag nijai Betelnum jegattak mujanum yaakat Micmas juwakajui. Nuninai tikich aidauk Benjamígka nugken yaakat Guibeá Jonatájai juwakajui. Untsu tikich aidanuk jemin waketjatajum tusa Saúl ishiakui.

³ Tuja suntag filisteo aidau ditá nugken Guibeánnum batsatunak, Jonatán niina suntajijai amukui. Dutika amuke tabaun tikich filisteo aidau dekawajui. Tuja Saúlchakam dekauwai. Nunik inamjauwai Israel aents aina nuna nugken ashí uwija kachujin umpuagtinme, nuna antukag umintsagmatai maaniawagmi tusa. ⁴ Tuja Guibeánnum suntag batsatunak Saúl amuke, dutikamtai filisteo aidau Israel aents aidan kajegkaje tabaun ashí Israel aents aidau dekawajui. Nuadui suntag aidau yaakat Guilgalnum Saúljai ijunjajui.

⁵ Nuninai filisteo aidashkam Israel aents aidaujai maaniawagtatus ijunjajui. Tuja filisteo aidanuk treinta mil carro maanitai aidau, seis mil suntag caballonum maanitan yacha aidau, nuigtu dawenum yujas maanitan yacha aidau aatus nayantsa kamatkajijai betek tumain aajakui. Imaanik ijunag shiyakag yaakat Bet-avén jegawag, nujai niinis yaakat Micmas aakmajag batsamsajui.

⁶ Ibau kuashat jetenam ishamainak Israel aents aidauk waa aidanum, japagau initak aidanum, kaya pagkaku aidanum, nugka taimu aidanum, yumigmat taimu aidanum uumjajui. ⁷ Nuninai nuigtushkam kuashat aents pisajag, Jordágkan katitkag Gad nugkanum, tuja Galaad nugkanmashkam shiyakajui.

Untsu Saúlak yaakat Guilgalnum juwakui. Nunikmatai suntag nijai yujauk ishamainak senchi kujaidau.

⁸ Tuja Saúlak nuwi pujus siete tsawan Samuelan dakasui, imaan tsawan dakagsattame tibau asa. Samuel tachatai daka daka aents aidauk wakettan nagkamaidau. ⁹ Nuniagtai Saúl chichaak: “Apajuú daajin kuntin maa nuna

neje ashí apeatnuwe nunú, tuja agkan pujutan Apajuí amastí tusa anentag susatnuwe nujai itagtuatajum”, tiuwai.

Tusa timatai juki ejetuam nii nuna maa apeak Apajuín emematiuwai.

¹⁰ Nuna dutika inagnai Samuel tauwai. Nunik taamtai Saúl jiintukiuwai igkug kumpamatatus. ¹¹ Tujash Samuelak eke Saúlan kumpamtsuk chichajak:

“¿Wagka amesh dutikata tichamaitkumesh, kuntin maamesh apeaume?” tau.

Tusa tama Saúl ayaak:

“Ame taatin tsawan nagkaemaki wetai aents aidau waketuinakui, tuja nuigtushkam filisteo aidau Micmas jutijai maaniatatus batsatu asamtai, ¹² eke wi Tuke Pujun segan umintsai, filisteo aidau kauna jetepakchajaintash tusan, kuntinu maan nuna nejen ashí apeakun Tuke Pujuu ememattajai tusan jutikajai”, tiuwai.

¹³ Tusa timatai Samuel ayaak:

“Ame aikaum duka makichkish dutikmainchau aikaume. ¡Tuke Pujuu amina Apajuíjum dutikata tujamauwa nunú betek umikaminig, Israel aents aidaun apuji tuke atin ati tusa Tuke Pujuu tujamain awajtamkae! ¹⁴ Tujash yamaik ame apu wajasa inabaugmek tuke achattawai. Yamaik Tuke Pujuu nii wakegamun betek umiaun makichik etegkattawai. Dutika Israel aents aidaun apuji ati tusa adaikattawai, wagki amek Tuke Pujuu tujabau umigkachume”, tiuwai.

¹⁵ Nuna tusa ukuak Guilgal pujau jiinki weuwai. Nunikmatai suntag nuwi juwakaju aidau Saúljai shiyakajui, filisteo aidaujai igkunia maaniawagtatus. Guilgalnumia shiyakag Benjamígka nugken yaakat Guibeá jegawajui. Nunik jegawag nuwi Saúl seiscientos suntajan ijumjauwai. ¹⁶ Dutika Saúlak niina uchiji Jonatággjai, nuigtu suntag nijjai yujau aidaujai aatus filisteo aidauk Micmas batsatai, ditak yaakaat Guibeánum Benjamígka nugken juwakajui.

¹⁷ Nuwi batsatai filisteo aents maanitan yacha emak shimin kumpatum akanka ijumjamu aidau, dita batsatbaunmaya makichik eemak wegak tikich aidaun yajuakui. Nunik yaakat Ofránmanini Shual aajakua nuna nugkeen shiyakajui. ¹⁸ Untsu tikich aidauk yaakat Bet-horón aajakua nuni shiyakajui. Nuniagtai kumpatuma nunú Seboíma mujajin uwegshunum shiyakajui.

¹⁹ Tuja Israel aents aidauk makichik aentskesh nagki aidaun jiju hierrojai najannuk atsjakui, wagki filisteo aidau dekainayatak jintintuachbau asag. Nunak jintintuachajui wagki unuimajag puyajan, nagkin aatus najankag jutijai maaniawainum tuidau asag. ²⁰ Nuadui Israel aents aidauk kuchii, jacha, azadón, pico aidau etsakmainkesh atsgubau asag filisteo aents aidaun segajaku ainawai. ²¹ Dutika segam nunú etsakeamunum jimag kuichkin akikmajaku ainawai. Tuja jacha etsakeamunmak, jiju etsaktai aguijada aidau iwagbaujai makichik kuichkin segajaku ainawai. ²² Nuadui suntag aidau Saúlan Jonatággjai uyunajaku aina duka puyaajinchau, nagkigtinchau aajaku ainawai. Untsu ima Saúlak Jonatággjai takaku aajaku ainawai.

²³ Nuninai filisteo aidauk Israel aents aidaun yaakat Micmasnumanini shimutkajui.

14

Jonatán filisteo aidaun depetkamu

¹ Makichik tsawantai Saúla uchiji Jonatán nii maaniaku jutaijin niina kumpaji takujus wekagajakua nuna chichajak:

“Namak katitka suntag filisteo aidau batsata nunú jetekmi”, tiuwai. Tusa weakush niina apajinak ujakchauwai. ² Niina apaji Saúlak Gabaanum yaakat Migrón aajakua nuwi munchi ayaunum nuna wakentin niina suntaji seisientos aidaulai batsatai nunikui. ³ Tuja makichik sacerdote yaakat Silónum pujus Tuke Pujuu umijujukua dushakam Saúljai pujau. Nuna daajig Ahías aajakui. Nunú sacerdote nugkutai lino apagbau efod tutain takujakui. Tuja Ahíasak Icabotan yachi Ahitub aajakua nuna uchiji aajakui. Untsu niina apachjig Elí uchiji Finees aajakui.

Tikich Israel aents aidaushkam Jonatán niina kumpajijai webaunak dekachaju ainawai. ⁴ Jonatággak niina kumpajijai filisteo aidau batsabaunum jegatatus wedau. Dita shimamunmanini jimag kaya múun Bosés daagtin Senéjai aajakui. ⁵ Tikichia nunú nujinmanini yaakat Micmasjai niniaku aajakui. Untsu tikichia nunú tsumunmanini yaakat Guibeájai niniaku aajakui. ⁶ Nuwi wesag Jonatán niina kumpajin, chichajak:

“Weajai au nagkaiki atú amainia awi aents pegkegchaun takau aidau batsata nunú jegajua Tuke Pujuu yaimpasmatai maaniami, wagki kuashat akuish, nuniachkuish ujumchik akuish, iik Tuke Pujuu yaimpasmatai depetmainitji”, tau.

⁷ Tusa tutai niina kumpaji ayaak:

“Ayu, ame anentaimam duka betek umikta. Wika ame tujutbaun umiktasa wekaejai”, tiuwai.

⁸ Timatai Jonatán niina chichajak:

“Weajai atú amainia awi filisteo aidau batsata nunú jegajua wantintukmi. ⁹ Dutika wantintuka ajin dita chichainak: ‘Anuig wajastajum, nuniagmin ii kaunawagmi’ tuinakuig wejutsuk nuwig wajasa dakasmi. ¹⁰ Untsu ‘wakatajum’ tujamkuig wajukmi. Nuni dekaattaji Tuke Pujuu ditan depetkatnume tusa tujabau”, tiuwai.

¹¹ Nuadui mai juwakiag filisteo aidau batsatbaunum jegantag wantintukajui. Nuniagtai ditan wainak chichainak: “Nijah, au hebreo aents aidau waanum uumak batsatu jijnajana”, tuidau.

¹² Tusa tuinaí aents aidau Jonatán niina kumpajijai wajattaman untsuinak: “¡Juwi wakatajum, nunikagmin wajuk maanitaimpaita nuna jintintuatjime!”, tuidau.

Tusa tiagtai Jonatán niina kumpajin chichajak: “Wi emka weakui mina ukujui minita, auk Tuke Pujuu iina amase, depetuk amuktinme tusa”, tiuwai. ¹³ Nuna tusa Jonatággak nunú kayanum achimki, achimki, niina kumpajijai mai wakauwai. Nunik waka suntag filisteo aidaunak achika nagki nagkima ajiau. Dutiktai niina kumpaji patagas wegak nuna iju iju kajeau. ¹⁴ Dutika yama nagkamchak Jonatán niina kumpajijai jetekajua nuaduik juu tamawaik veinte aentsun kajegkajui.

¹⁵ Nuna antukag suntag filisteo aidau aaknum batsatuk tuja suntag ujumak maanitan yacha eemak shimin aidaushkam senchi ishankajui. Tuja nuigtushkam nugka senchi uujak filisteo aidaunak shiig senchi uwakauwai.

¹⁶ Nuna ishankag wakan wajasag pisainak pachimdagaidau. Imanidaun Saúla suntaji yaakta kuitamin aidau Benjamígka nugken Guibeánun

pujuidau wainkajui. ¹⁷ Imaniagtai suntag nijjai yujaun Saúl chichajak: “Ashí diistajum betekash batsatag nunú dekaami”, tau.

Tusa tiajam, ashí diikma Jonatán niina kumpajijai megkaekauwai. ¹⁸ Nunikmatai Saúl Ahíasan chichajak: “Chicham umiktinun Apajui amasbau egketa nunú arca* itaata”, tiuwai. Nunak tiuwai wagki chicham umiktinuk tikich yantamnum au asamtai. ¹⁹ Tusa Saúl sacerdoté Ahíasjai eke chichaak wajai, filisteo aidauk aan nagkaemas waugtukag pachimdagainak senchi chajuatuinau. Imaniagtai Saúl Ahíasan chichajak: “Dekas arcak itawaipa”, tiuwai.

²⁰ Tusa ukuak Saúlak niina suntaji aidaujai ijunjauwai filisteo aidaujai maaniatatus. Nunik diikma filisteo aidauk shiwagtsukaita tusa dita ditak pempeentunikiag maanidaun wainkauwai. ²¹ Nuniagtai untsu hebreo aidau yaunchuk nagkamas filisteo inatai batsamin aidaushkam Israel aents aidaujai maaniatajum tima uminas batsatiatak, jijnag ukukiag Israel aents aidau Saúljai, Jonatággjai aatus ijunag batsatbaunum nuwi ditajai ijunjajui. ²² Tuja tikich Israel aents ishamkagtuinak Efraigka nugken uumkaju aidaunashkam, filisteo aidau pisainawai tabaun antukag ditashkam jijnag maaniawagtatus pataetukajui. ²³ Nunik pataetukag mai mainakua Bet-avén jegawajui. Aatus nunú tsawantin Tuke Pujuu Israel aents aidaun ayamjuk agkanmitkauwai.

Maaniamu nagkaantsaig suntag yutain yuwauk mantamnati tusa Saúl tibau

²⁴ Israel aents aidauk yujumkan yutsuk maaniawaju asag, shiig senchi pimpikiajui. Nunak Saúl chichaak: “Shiwag aidau eke depeteatsjinig, yutain yuwauk mantamnati” tusa chichaman umiku asamtai, nuna umiinak nunikajui.

²⁵ Tujash nunú tsawantin aents aidau maaninak yujasag dapa ayaunum jegantajui. ²⁶ Nunik ikam akumak diikma dapa yumiji shiig kuashat ayaun wainkajui. Dutika wainkajash piipichinakesh dukachajui, wagki nuna nuniauk mantamnati tibau asamtai, nuna ishamainau asag. ²⁷ Untsu Jonatággkak niina apaji chicham umiamun dekachu asa, numi takakbauwai nuna titijin, dapa yumiji saegun antig dukauwai. Dutika pimpiki wekaebaun ichichmamjauwai.

²⁸ Nunikmatai suntag aidaunmaya makichik niina chichajak:

“Amina apa chichama umiak: ‘Makichik aentskesh juju tsawanta duwi yutain yuwauk mantamnati’ tiu asamtai, iik senchi pimpikiatku makichik yutaigkesh yuwatsji”, tiuwai.

²⁹ Tusa tutai Jonatán chichaak:

“Mina apag chichaman umika nunak tumainchaun tine. Wika dapa yumijin dukaan pimpiki wekaebaujun ichichmamjajai. ³⁰ Tuja tikich Israel aents aidaush iina shiwaaji aidau depetka, yutai atankimua nuna yuwawajag, ditash aan nagkaemas senchigtin wemain wajakaje. ¡Nunikagmatai filisteo aidauk wamak amumain awajakaji!” tiuwai.

³¹ Tuja Israel aents aidauk nunú tsawantin filisteo aidaunak, yaakat Micmas nagkamas mai mainakua yaakat Aialón ejegawajui.

Tujash Israel aents aidauk shiig senchi pimpikiajui. ³² Imanik pimpikiaju asag, yapajuinak uwig aidau, baka aidau, toro tsakat aidau, filisteo

* 14:18 Juju chicham “arca” tawa duka tikich versiõnumak “efod” tawai.

yajutkamu aidaun maawag neje numpemtin uduunak yuwawajui. ³³ Nuna nuniagtai nuwiya makichik Saúlan jegajua chichajak:

“Tuke Pujuu: Neje numpemtin yuwawaigpajum, tusa tujamiuwa nuna umitsuk, neje uduun numpejai yuwinak tunamainawai”, tau. Tusa ujakam Saúl chichaak: “¡Atumek Apajuí tujabauwa duka umitsuk intinjukiugme! Nuniku asajum kaya múun jukijum juwi itagtuatajum”, tiuwai. ³⁴ Nuna tusa, tikich Israel aents aina dushakam ashí ujaktajum: “Maki makichik toron, nuniachkush uwijan itaatnume. Dutikawag juju kaya múun puja juwi patai maatnume, dutikam nuna numpe saeki utsankamtai, duwi shiig numpe atsaun yuwatnume. Nuna nuninak tunamagchagtai”, tiuwai.

Tusa tima nunú kashia duik maki makichik toro jukiag kaya múun pujamunum ejegawag, nuwi pataidiag maawajui. ³⁵ Dutikawagmatai Saúl kuntin maa patasa apeaku Apajuí ememattinun makichkish najanchauwaitak najanauwai. ³⁶ Nuna dutika Israel aents aidaun Saúl chichajak:

“Filisteo aidaun kashi jeteka mai mainakua tsawampaku ashí amukmi”, tau.

Tusa tutai dita aimainak:

“Ame wakegamua duka imanisag uminkati”, tuidau.

Tusa tiagtai sacerdote chichaak:

“Tujash dekatkauk Apajuí iniasmi”, tau.

³⁷ Tusa timatai Saúl Apajuín iniak:

“¿Filisteo aidaunash jetemainkaitag? ¿Tuja filisteo aidaun amuktinme tusamesh yaijatkattamek?” tau. Tusa tamash Tuke Pujuu nunú tsawantinig aikchauwai. ³⁸ Dutikam Saúl suntaja apuji aidaun chichajak:

“Apajuí mina aigkacha nunash ya pegkegchau takamsamunmak ankae nunú ejetajum”, tiuwai. ³⁹ Nuna tusa: “Tuke Pujuu Israel aents aidaun ayamjina nuna daajin uminkatnun tajai: ¡Mina uchig Jonatán pegkegchaun takasu akushkam mantamnattawai!” tiuwai.

Tutai suntag aidaun makichkish aimkachajui. ⁴⁰ Nuadui Saúl Israel aents aidaun chichajak:

“Kaunajum juwi ijunjatajum, nuniagmin wi mina uchig Jonatán atú yantam wajastajai”, tiuwai.

Tusa tutai suntag aidaun chichainak:

“Ame tame nunisag uminkati”, tuidau.

⁴¹ Tusa tiagmatai Saúl senchi untsamak Tuke Pujuu aujak: “Israel aents aidaun Apajuíjijyah, ¿wagka amina inakem segapamush yamaish aikchaume? Mina pegkegchaug, nuniachkush mina uchig Jonatán pegkegchauji akug Urim jinkittawai, untsu Israel aents aidaun pegkegchauji ataik Tumim jinkittawai”, tiuwai.

Dutika dekam Jonatán daaji Saúldaujai jinkiuwai. Nunikmatai Israel aents aidaun agkan utugchatjinchau juwakajui.

⁴² Nunikmatai Saúl chichaak:

“Mina uchig Jonatán wijai dekapsatajum, yana daajig jinkit”, tiuwai.

Dutika dekaepam Jonatán daaji jinkiuwai. ⁴³ Nunikmatai Saúl Joinatán chichajak:

“Amesh waji dutikamume nunú ujatkata” tiuwai.

Tusa tama Jonatán chichaak:

“Ima dapa yumijnak numi takakbau titijin antigka jukin dukamjai. ¿Tujash nunú dutikamuikik mantamnattag?” tau.

⁴⁴ Tutai Saúl untsamak:

“Jonatágkah, ame mantamnashtaik Apajuí mina mantuati!” tau.

⁴⁵ Tutai Israel aents aidau Saúlan chichajuinak:

“Jonatán iina ayamjutupak filisteo aidaujai maania depetmaka nuniaush ¿wagkag mantamnatí? Apajuí Tuke Pujuuwa nuna daajin makichik niina intashigkesh ukuuniakag nugkag iyagchattawai, wagki Apajuí yayasam depetmaku asamtai”, tiajui.

Aatus Israel aents aidau Jonatán mantamnamainun ayamjukajui.

⁴⁶ Tuja Saúlchakam filisteo aidaujai maanitnak idaisauwai. Dutikam filisteo aidauk ditá nugken waketjauwai.

⁴⁷ Aatus depetmak Saúl Israel aents aidau apuji wajas inamjauwai. Tuja Israel aents aidau nugken ditá shiwaaji Moab aents aidau, Amón aents aidau, Edom aents aidau ayamjuk agkanmitkauwai. Tuja Sobá nugka apujinash, filisteo aidau aatus ashí depetkauwai. Saúl niina suntaji aidaujai shiwajan jeteakug tuke depetmajakui. ⁴⁸ Niina suntaji aidaujai ijunag maania Amalec aents aidau depetuk ijinawai. Dutika Israel aents aidau kasajuinak waitkaidau agkanmitkauwai.

⁴⁹ Saúla uchiji aidauk: Jonatán, Ishví, Malquisúa aatus aajakui. Tuja niina nawanji iwai aajakui Merab, untsu Mical aajakui ekeu. ⁵⁰ Saúla nuweg Ahinóam Ahimaasa nawanji aajakui. Tuja niina suntaji aidau apujig Abner niina apaji yachi Neran uchiji aajakui. ⁵¹ Saúla apaji Quish aajakua duka Abneran apaji Ner aajakua nujai Abielan uchiji aajakui.

⁵² Saúl apu wajas pujusua nuaduik, Israel aents aidauk filisteo aidaujai shiig senchi maaniau ainawai. Nuadui Saúlak suntag maanitan yacha aidau etegkeg yajuak ijumag uminas pujujakui.

15

Apajuí Saúlan dakitjamu

¹ Makichik tsawantai Samuel Saúlan chichajak: “Tuke Pujuu niina aentsji Israel aents aina nuna apuji atinun amina adaikati tusa awetine. Nuadui Tuke Pujuu tujama nunú shiig antukta. ² Tuke Pujuu ashí senchigtina nunú juna aatus tujamui: ‘Israel aents aidau egiptunmaya jünag minidau Amalec aents aidau jetenak waitkasaju aina duwi, wi ditanak suwimka susagtatjai. ³ Nuadui amina suntajum aidaujai jetekjum ijinkujum dita wajiji aidaujai ashí tsaigkatajum. Tuja makichkish wait anenjaigpa. Aents aishmag aidau, nuwa aidau, uchi aidau, yama uchi akiinau aidau, tuja nuigtushkam toro, uwig, camello, burro aatsajum ashí ijinatajum’ tujamui”, tiuwai.

⁴ Tusa tima Saúl suntag aidau chichama ishitkauwai. Nuna dekaawag Telaimnum ijunjamtai ashí dekapajui. Dutikam dawé yujasag maanin aidauk doscientos mil aents aajakui. Tuja Judá wegantunmaya aidauhkam diez mil suntag aajakui.

⁵ Dutika dekapag nuna yajuak, yaakat múun Amalec nugkanum aajakua nuwi weuwai. Nunik nuwi jegattak entsa aunum nuna ijusag uumak batsamsajui, nuwi batsamsag pachiachbau jetekagtatus. ⁶ Nuwi batsamas Saúl quenita aents aidau chichama akatmamtug akuptak: “¡Amalec aents aidau batsatbaunum pujajum duka jünja yaja shiyaktajum! ditajai ijumja amukajim. Wagki atum wegantutigmek Israel aents aidau egiptunmaya jünag minidau wait anenjau ainagme”, tiuwai.

Tusa ujakajam quenita aents aidau Amalecjai ijunag batsatu jünag yaja shiyakajui.

⁷ Nunikagmatai Saúl Amalec aents aidaun nugka Havilánun nagkama jeteka ipisig, Shur nugka Egipto nugke nagkatkamunum awa imanui egegawajui, dutikawag nuwi amukui. ⁸ Dutika amuak nuna apuji Agag aajakua nuna achikui, dutikak niina suntaji aidaunak ashí ijituauwai. ⁹ Dutika ijiniatak Agagnak maachajui. Tuja nuigtushkam tikich waji iman-chau aidaunak tsainayatak, uwig pegkeg aidaunak ijinachajui, dutikainak toro aidaunak, toro tsakat duwejam aidaunak, cabra tsakat aidaunashkam ijinachajui. Dutiksag waji akik pegkeg aidaunashkam tsaikchajui.

¹⁰ Dutikawagmatai Tuke Pujuu Samuelan chichajak: ¹¹ “Saúlnek apu adaimainchaunas adaikayagtai, mina chichamjun umigtutsuk nii wakegamun takawai”, tiuwai.

Tusa timatai, Samuel kajeka Saúl tsagkujata tusa Apajuín sega segakua tuke tsawajui. ¹² Nunik tsawag kashikmas Saúljai igkunik chichastatus weuwai. Nunik eke weagan igkug ujanak: “Auk Saúlak yaakat Carmel wemae, nunik nuwi kaya esagman awajame, nuna diisag emematjitnume tusa. Dutika ukuak yaakat Guilgal wemae”, tusa ujakajui.

¹³ Tusa ujakam Samuel Saúlnek egak weuwai. Nunik jegamtai Saúl Samuelan chichajak:

“Apajuí pegkegnum yumigtamsati. Apajuí dutikata tujutma nunak betek umikjai”, tiuwai.

¹⁴ Tutai Samuel ayaak:

“¿Tujash dutika betek umiku aminish, uwig aidau, baka aidau pampaina dusha tuwiya ainawa?” tau.

¹⁵ Tusa tama Saúl ayaak:

“Aunak mina aentsug aidau Amalec aents aidaun amuinak uwig duwejam pegkeg aidaun, toro duwejam pegkeg aidaujai etegkeg yajuakag itawagmae, wagki nunú maa apeaku Tuke Pujuu amina Apajuíjum emematmi tusag. Untsu tikich aidauk ashí ijinamji”, tau.

¹⁶ Tusa tutai Samuel ayaak:

“¡Takamtak wajasta! Tuke Pujuu yamai kashi tujutma nuna ujaktagme”, tiuwai.

Tama Saúl ayaak: “Ayu ujatkata”, tiuwai.

¹⁷ Timatai Samuel chichajak:

“Yaunchkek amek wainkauch ayume, nunin aminig Tuke Pujuu Israel aents aidaun apuji ati tusa etegtamabi. ¹⁸ Dutijamau asa Amalec aents pegkegchaun takau aina nunú amukta tusa Tuke Pujuu tujabiu aish, ¹⁹ ¿wagka Tuke Pujuu tujabau intimjukmesh amina suntajum aidau kuntin aidaun yajumainakuish, yajuaktajum tusamesh timaume?” tau.

²⁰ Tusa tama Saúl ayaak:

“Wika Tuke Pujuu umiju asan, nii dutikata tujutbaunak betek umiakun, Amalec aents aidau apuji Agag achikan itaajai. Tuja nuigtushkam Amalec aents aidaunak ashí ijinamji. ²¹ Untsu suntag aidau uwig duwejam aidaun, toro duwejam aidaujai ijinami tibau aig, yaakat Guilgalnum maa apeaku Tuke Pujuu amina Apajuíjum emematmi tusa yajuakagmae”, tiuwai.

²² Tusa timatai Samuel chichaak:

“Kuntin maa, nuna neje ashí apeamua nuna nagkaesau, Tuke Pujuu tabau shiig antuka umigbauwa nunú niinak shiig awagmawai. Tuja nuigtushkam anentag dekas shiig pegkeg aidau Apajuí suwamua nuna nagkaesauwa duka nii umigbauwa nunuwai.

²³ Nuadui amek anentaimsam dutikaum duka

aents anentaimas dekamin aina nunin wajasume.

Tuja kaya esajam inantai apusam,
juna diis emematjitnume tau asam,
dakumkamun emematin aidau

Apajuí diisam pegkegchau aina nunin wajasume.
Nuadui Tuke Pujuu amina Israel aents aidau apuji ati
tusa etegtabauwa nunak, ame nii tibaun
kajimatkiu asamin, niishkam kajimatjamkittawai,
tuja niina chichame umitsuk idaisau asamin,
niishkam dutiksag idaitamsattawai”, tiuwai.

²⁴ Tusa tima Saúl Samuelan chichajak:

“Dekas tame, Tuke Pujuu dutikata tujutbaun kajimatkin pegkegchaun takasjai, tuja ame tujutbaunashkam kajimatkiyai. Aents aidau ishamakun dita segatuinamun umigkajai. ²⁵ Tujash wait aneasam mina pegkegchau- dusa tsagkugtugeta, nunikamin iijai wee Tuke Pujuu emematmi”, tiuwai.

²⁶ Tusa tama Samuel ayaak:

“Wika amejajig wakitkiishtajai, wagki amek Tuke Pujuu umikta tujabau intimjukim umikchaun nuadui, yamaik Israel aents aidau apujig achati tusa Tuke Pujuu tujamne”, tiuwai.

²⁷ Aatus tusa wetatman Saúl Samuela jáanchjin achika emetuawai. Dutikak jáanchjin ichiinkauwai. ²⁸ Dutikam Samuel Saúlan chichajak:

“Ame mina jáanchug ichinjukum dutiksag, ame Israel aentsu apuji wajasa pujam nunak Tuke Pujuu ichinjamkattawai. Dutika atanjamki, Israel aents tikich amina nagkaetamsau pegkeg puja nuna apu emattawai. ²⁹ Wagki Apajuí Israel aents aidau depetmatan suwa duka aents nii chichakbaujin yapajin aina nuninchauwai, nii tibaunak betek uminai”, tiuwai.

³⁰ Tusa tima Saúl ataktu chichaak:

“Wika dekas tunamagjai. Nuniku akuish wait aneasam Israel aents aidau apuji aina nuna emtinig, tuja Israel aents aina nuna emtinchakam eme anenjusak diigsata. Nuadui iijai Guilgalnum wemi, nunika awi Tuke Pujuu amina Apajuíjum emematmi”, tiuwai.

³¹ Tusa tima Samuel Saúljai wakitkiuwai. Nunik jegawag nuwi Saúl Tuke Pujuu emematiuwai. ³² Dutikamtai Samuel chichaak: “Agag Amalec aents aidau apuji achikam puja nunú itagtuatajum”, tiuwai.

Tuja Agagak yaunchuk mantumainnap mantuachaje yamaik mantu- achagtatuapi tusa puyattsuk shiig aneas Samuel pujamunum jegantui. ³³ Nunikmatai Samuel chichajak: “Amina puyagjumin uchi aidau ka- jegkamin, kuashat nuwa aidau uchigtuchu juwakajua nunisag, amina dukushkam uchigtuchu juwaktatui”, tiuwai.

Tusa tamawaik puyajan juwakug Tuke Pujuu dutikata tibaun umiak asaag mauwai. Nunak dutikauwai yaakat Guilgalnum.

³⁴ Nuna dutika Samuelak yaakat Ramá niina jeen wakitkiuwai. Nunikmatai Saúlchakam yaakat Guibeánun niina jeen wakitkiuwai.

³⁵ Duwi nagkamas Samuel Saúlan anentaimtus wake besemag anen- taimkush ataktu awagkig wainikchauwai. Tuja Tuke Pujuuashkam nii Israel aents aidau apuji emau asa wake besemag anentaimjauwai.

16

David Israel aents aidau apuji adaikamu

¹ Tuke Pujuu Samuelan chichajak:

“¡Saúl utugchatji anentaimtusam wake besemag dekapeakum waitu pujutsuk idaisata! Yamai nagkamsag Israel aents aidaun apujig achati tajai. Aní pujutsuk aminu kuntinu kachuji awa nuwi aceite yajaa jukim Beléḡkanmaya aents Jesé daagtin puja nuna jeen wetá. Niina uchiji aina nuwiyau makichik Israel aents aidaun apuji atinun etegkajai”, tiuwai.

² Tusa tama nii ayaak:

“¿Tujash nunash wajuk uuknuk dutikatja? ¡Nuna Saúl degag minak mantuattawai!” tiuwai.

Tusa tutai Tuke Pujuu ayaak:

“Kuntinu maa apeakun Tuke Pujuun ememattasan wegajai tusam makichik toro tsakatuch jukim wetá. ³ Nunika jegaam Jesé ipaata ame kuntin maa apeamin uyuuntamsati. Tuja ame dutikatnunak wi jintintuattagme. Tuja apu atinnashkam wi iwaintuktatjame. Dutikantai nunú aceiteyai buuknum nijakta”, tiuwai.

⁴ Nuna Samuel imatiksag umikui. Tuja Samuel Belén jegantai, nuwiyau apu múun aidau niina wainkag kautuawajui. Nunikag igkug iniinak:

“¿Wagka taume, utugchat atsuak?” tuidau.

⁵ Tusa tama nii ayaak:

“Utugchatak atsawai, ayatak kuntinu maa apeakun Tuke Pujuu ememattasan taajai”, tiuwai. Nuna tusa: “Umintsatajum, nunikjum wi kuntinu maa apeakun Tuke Pujuun emematkui uyuntustajum”, tiuwai.

Aatus tusa eke kuntin maa apeatnunum wetsuk Samuel Jesén niina uchiji aidaujai dita pegkegchau takamsamujin iwagmitkak pegkeg emakui. Dutika nuadui ditajai kuntinu maa apeak Apajuín ememattatus weuwai.

⁶ Nuwi ashí jegantag Samuel Eliabban diisa anentaimas: “Junap dekask Tuke Pujuuk apu atinnak etegkae”, tiuwai.

⁷ Tujash Tuke Pujuu niina chichajak: “Niina niimeg esantijaig diigsaipa, wagki nunak wika dakitajai. Aents niimen diijus etegkin aina nuninchauwaitjai, wika anentaimtajin diigsan etegkeajai” tusa nunak dakitjauwai.

⁸ Dutikantai Jesé niina uchiji Abinadapan untsuka Samuelai ejentauwai. Dutikantai Samuel chichaak: “Junashkam Tuke Pujuuk etegkache”, tiuwai.

⁹ Tusa timatai Jesé tikich uchiji Shamá aajakua nuna ejentauwai. Dutikantai: “Junashkam Tuke Pujuuk etegkache”, tiuwai.

¹⁰ Duti dutikakua niina uchiji siete aidaunak ashí Samuelai ejentauwai. Tujash Samuel niina chichajak: “Juju aina juwiyanak Tuke Pujuuk makichikish etegkache”, tiuwai. ¹¹ Tuja inagnamun Samuel Jesén iniak: “¿Uchijum tikichik atsgatamuak?” tau.

Tusa iniam, Jesé ayaak:

“Inagnamu makichik datsauch uwija kuitamak pujawai”, tau.

Tutai Samuel niina chichajak:

“Makichik aents awemata ujaka utiti, wagki kuntin maa apeamua nuna nejeg nii tatsaigkik yuwashataji”, tiuwai.

¹² Tusa timatai, ujaka utitajum tusa Jesé aentsun awemauwai. Nunú uchik jegkemtin, pegkeg iwajamu wakejumain aajakui. Nunú jeganmatai Tuke Pujuu Samuelan chichajak: “Anuwai wi etegkamua duka, nuadui aceite jukim buuknum nijakta”, tiuwai.

¹³ Tusa tima aceiten juki Davitan niina yachi aidaush wainbaunum buuknum nijakui, Israel aents aidaun apuji atin asantai. Nunú tsawantin nagkamas Apajuí Wakani Davitan egkemtujui. Tuja Samuelak nuna dutika ukuak, yaakat Ramá niina jeen wakitkiuwai.

David Saúlan yaijakkbau

¹⁴ Apajuí Wakani Saúlai pujaun Tuke Pujuu jujukiuwai. Dutikak wakan pegkegchaun awetiuwai. Dutikam nunú Saúlan senchi waitkau. ¹⁵ Nuadui niina takajin aidau chichajuinak:

“Apajuí aminak wakan pegkegchaun awetugma nunú senchi waitkag-mawai. ¹⁶ Nuadui amina inakem aina nunú ishiakta, aents arpa shiig awatnun egaka utitnume. Tuja amina wakan pegkegchau waitkagmataish, nunú arpan awatkui maak anentaimsa pujusminum”, tuidau.

¹⁷ Tusa tama nii ayaak:

“Takugmek wejum arpa shiig awatin egakjum itagtuatajum”, tiuwai.

¹⁸ Tusa tutai niina inake aina nuwiya makichik Saúlan chichajak:

“Jesé Belégnumiaya nuna uchiji aina nuwiya makichik arpan shiig awatun wi wainkamjai. Nuigtushkam duka wajuu maanitan yacha, chichamesh pegkeg, niimesh iwajamui. Tuja niinak nuigtushkam Tuke Pujuu yayawai”, tiuwai.

¹⁹ Tusa tima Saúl Jesén chichaman akuptak: “Uchijum David uwija kuitamna nunú awetugta”, tiuwai.

²⁰ Nuna antuk Jesé niina uchiji Davitan awetiuwai. Dutikak makichik burronum pagka pataja, vino aimkamun, nuigtu chivo tsakatan aatus ishitkauwai.

²¹ Nuna David yajuak Saúla pujusa inamtaijin jegauwai. Nunik jegantai Saúl shiig anentus jukiuwai. Dutika niina atuwe ati tusa adaikauwai.

²² Tuja Saúl Jesén chichama akuptak: “Amina uchijum Davidjai shiig pujajai, nuniau asan segajame wait aneamam idaitugsata mina yaintak pujusti”, tiuwai.

²³ Tusa tima pujus wakan pegkegchau Apajuí awemamu Saúlan wait-katai, David arpan juki awatujakui. Nuna awattai wakan pegkegchau Saúlan waitkau ukukim mijaak shiig pujujakui.

17

David Goliatan maamu

¹ Filisteo aidau Israel aents aidaun jetektatus ditá suntaji aidaun yajuak, Judá wegantu aidau nugken yaakat Soco ijunjajui. Nunik Azecá Socojai niniaku awa nuna ejapeen nugka Efes-damim tutainum aakmajag batsamsajui. ² Nuninai Saúlchakam Israel aents aidaujai Elá nugkanum ijunjajui, nuwi uminas juwakiag filisteo aidaujai maaniawagtatus. ³ Tuja muja segau asantai, filisteo aidauk atú amain batsatai, Israel aents aidauk tikich yantamnum batsatu.

⁴ Nuninai filisteo suntag aidaunmaya makichik aents Gad wegantun-maya maanitan yacha Goliat daagtin, esanti kampfatum metro aajakua nunú jiinkiuwai. ⁵ Niina atsejutaijig bronze najanam tuja iyashi ejaktinji jiju najanam cincuenta y cinco kilo ajamun nugkuaju aajakui. ⁶ Niina bakuin ejaktatus apujujakua dushakam bronze najanam aajakui. Tuja nagkijishkam bronze najanam aajakui. ⁷ Tuja nagki numijishkam kampujam nuna titijig jiju hierro eketkamu seis kilo aajakui. Niina emtin maanitai aidaun yajuak niina uyunajakua nunú eemak wejaku.

⁸ Goliat Israel aents aidau batsatbaunum jegantatak wajanta untsamak: “¿Wagka maaniatasa umintayama imanikjumes uninjume? Wika makichikitjai filisteonuk, tuja atumek Saúla inake ainagme. Tujash dekas atum ainajum anuiya makichik wijai maanimain etegkajum awematajum

wijai maanikti. ⁹ Nii mina depeetuk mantakuig atumi inake waigtatji, untsu wi niina maamtaig, atumek iina inake wajastatjume.

¹⁰ “Yamai wi Israel aents aidautigmin segajime: ¡Makichik aents awematajum wijai maanikti!”, tau.

¹¹ Nuna Saúl Israel aents aidaujai antukag senchi ishamainak awake anentaimaidau.

¹² Saúl apu aajakua nunú tsawantin makichik aents múuntuch Belégkanmaya Jesé daagtin pujujukui. Nuna uchijig ocho ajujukui. Nuwiya aajakui David. ¹³⁻¹⁴ Nunú muunta uchiji kampatum: Eliab, Abinadab, Shamá, aatus iwai aidau maaniamunum Saúljai shiyakajui. Untsu Jesé uchiji tsakat David aajakua duka, ¹⁵ Saúl niina suntaji aidaujai batsatbaunum chichama etsejak yutain juki ejega ukuak, atak wakitki niina apaji uwigjin kuitamak pujujukui.

¹⁶ Nunik pujai Goliatak kashikmas, agkuantai aatus kashi kashinig untsuak: Makichik aents wijai maanimain etgekajum awematajum, tusa Israel aents aidau cuarenta tsawan waitka pujuju.

¹⁷ Imatju pujai makichik tsawantai Jesé niina uchiji Davitan chichajak: “Trigo duwikbauwa nunú veinte kilo jukim, nuigtu diez pag jukim, yatsum aidau maaniamunum batsata nunú ejetuata. ¹⁸ Dutikakum baka muntsuji inanja nanegbau suntaja apuji susatin diez jukita. Nunika jegaam yatsumesh pegkejash batsata nunú dekaata. Tuja pegkeg batsatkuig, ame minakum ditá takataiji jukim itagtuata”, tiuwai. ¹⁹ Eke Davitak uminak pujai Saúlak Davita yachi aidaujai, nuigtu ashí Israel aents aidaujai aatus nugka Elá tutainum filisteo aidaujai maaninak yujau.

²⁰ Nuninai David uminas tsawak kashikmas tikich aentsun, ame uwig aidau kuitamamata tusa ukuak, niina apaji yutai aidau susamun juki weuwai. Nunik jegakma maaniatatus uminas, untsu mainak pampainai jegauwai. ²¹ Nunik jegaui ai Israel aents aidauk filisteo aidaujai maani-awagtatus igkuniawajui. ²² Nuniagtai David aents maaniaku jutai aidau kuitamak pujaun nii yutai jukimujin ame kuitamkata tusa ukuak, yachi aidau pegkejash yuja tusa iniastatus tupikaki weuwai. ²³ Nunik jeganta niina yachi aidaujai chichaak wajai, Goliat yaakat Gadnumia aajakua nunú filisteo aidau ijunbaunmaya jiinki wajan, yaunchuk nagkamas tuu pujuju asa, Israel aents aidau atsaneau. Tusa imatjittaman David antukui.

²⁴ Nunú aents ibaun, wainkag Israel aents aidauk senchi ishamak pisainak: ²⁵ “¿Atumesh aents maanitan yacha jiinki dusha wainkaugmek? Au aentsuk Israel aents aidau atsaneak tantae. Makichik aents auna depetuk maamtaig, kuashat waji akik aidau apu susattawai. Dutikak niina nawanjjai nuweattawai. Tuja nuigtushkam niina patayi aidau apu akitai aina nunash akikmakchagtatui”, tuidau. ²⁶ Tusa tuinamun David shiig antukchau asa nijai ijunun iniak:

“Au filisteo, Israel aentsun atsaneak waitka nuna makichik aents maa agkan emamtaish ¿wajina apush sumainai tawa? Filisteo pegkegchaun takauwa dusha niish ¿ya asaya aannush Apajuí suntaji aidau nash pegkegchaun chichajush wekaewa?” tau.

²⁷ Tusa tutai dita yaunchuk tibaunak dutiksag chichajuinak: Goliata maunak waji aidau apu susattawai tibaunak betek ujakajui. ²⁸ Aatus nunú aents aidaujai David chichaun yachi emkau Eliab antujuk senchi kajujuk chichajak:

“¿Amesh juwish waji minitmaume? ¿Uwig ujumak uwegshunum batsama dusha ya kuitamkati tusamea ukukmaume? Wika ame setakchauwaitam nunak dekajai, tuja pegkegchau anentaiyai aní wekagam nunashkam dekajai. Amek iina shiwaaji aidaujaish wajuk maaniaji nunú wainkatasa wekaeme”, tau.

²⁹ Tutai David ayaak: “Wi ayatak inimag nunash ¿wajina pegkegchauanash dutikaja?” tau.

³⁰ Nuna tusa David niina yachi iwai aidaun ukuki, tikich aidaun iniau. Tuja ditashkam yaunchuk tibaunak dutiksag ujakajui. ³¹ Nunik iniimak wekagun antugkaju aidau Saúlun jegajuawag ujakajui. Nuna Saúl dekaa, ujaka utitajum tusa inamjauwai. ³² Tusa timatai ujakam David jegaa Saúlun chichajak:

“¡Apuh, amek makichkish puyatjukaipa, auk wi niinak maattajai!” tau.

³³ Tutai Saúl ayaak:

“Amek makichkish maumaitsume. Nuigtushkam amek tsakatchitme, tuja niig yaunchuk datsa asag maanitnak yachai”, tau. ³⁴ Tama David ayaak: “Apuh, wika mina apaju uwigin kuitamnaitjai. Tujash ikamyawa, nuniachkush chayukesh uwija maa juki tupikakuig, ³⁵ pataetukan niina weninian atannujai. Dutikai mina esattag takuig, jagkeen achikan awatjan mainujai. ³⁶ Dutiksanuk au filisteo aents Apajui Tuke Pujuuwa nuna aentsji aidaun dushikiak atsanea nunak maattajai. ³⁷ Ikamyawa chayujai maawai tusa Tuke Pujuu ayamjtkauwa nunú minak yamaishkam filisteo maawai tusa ayamjtkattawai”, tau.

Tutai Saúl chichajak:

“Kame takumek wetá, Tuke Pujuu kuitamjamkati”, tiuwai.

³⁸ Nuna tusa nii maaniaku nugkutajin anugkug, atsejutai bronce najanamun atsemitkak, nuigtu iyash ejatai jiju najanamun anugjauwai.

³⁹ Dutika anugjam David puyaja juki akachumtaijin nenuwai. Dutika wekagas dekapas, unuimatchau asa, shiig wekaemainchau atai, Saúlun chichajak:

“Wika junika wekaetanak unuimatjachu asan, shiig wekaemainchau dekapeajai”, tusa ashí nii nugkuagbaujinak awimag ukukiuwai. ⁴⁰ Dutika ushujutajin juki cinco kaya entsanmayan yajuak wampachjin chimpia kaya egkea nagkimtaijin juki, Goliat pujamunum jegantatus weuwai.

⁴¹ Nuniai Goliatchakam maaniaku ejamatain takaku Davitan jegaantatatus wegau. Nuniai niina uyunin maanitai aidaun yajuak eemak wedau.

⁴² Tuja Goliat Davitan diikma tsakatuch shigmauch jekemtin wajaknun wainkauwai. Nunik wainak puyatjusagkesh diischauwai. ⁴³ Tuja Davitak ushujutajin takus wajau asamtai, dushikis chichajak:

“¿Wi yawakaitag numi jujuki minitam atinnush?”

Tusa tamawaik niina apajuimtaiji daajin pachis Davitan pegkegchaunum yumigjauwai. ⁴⁴ Tusa nuigtushkam chichajak: “¡Juwi tantata maatjame, dutikan amina iyashminak chuwag aidaun, kuntin yukagtin aidaujai ayujatjai!” tiuwai.

⁴⁵ Tusa tama David ayaak:

“Amek wijai maaniasam puyag, nagki, nuigtu akentai imaan jukim miname. Tujash wika aminak minitjame Tuke Pujuu ashí senchigtin Israel aents aidauti emematin ainag nuna daajin. Nuadui ame niina aentsji aidau wainkaush diyakum dushikiam nunak nii kuitamkattawai. ⁴⁶ Yamai Tuke Pujuu mina yainkattawai amina maati tusa. Nuadui amina maan buukmin tsupigkattagme. Dutika ai amina iyashminak amina suntajum

filisteo aidau jinaatta nujai chuweg aidau, kuntin yukagtin aidaujai yuwawagtatui. Dutika ai ashí tikich nugkanmaya aidauk dekawagtatui, Israel aents aidauti ememattaig Apajuí ima makichkia nuna”, tau. ⁴⁷ Nuna tusa filisteo aidau chichajak: “Yamai juwi tuwaka ijunutijum, Tuke Pujuuk puyagjaig, nagkijaig uwemtikagtuchua nunú ashí dekattagme. Juju maaniamua juka Tuke Pujuunui. Nii inak yaimpaktatui, atum aidautigmin depetuk ijinatnume tusa”, tiuwai.

⁴⁸ Tusa tama Goliat Davidjai maaniatatus jiintukiuwai. Nunitai Davidchakam tupikatkiuwai igkunia maaniatatus. ⁴⁹ Nunik wegak wampachjinian makichik kaya juki kaya nagkintainum egkea nagkia Goliatan nijayin tukuwai. Dutika tukum nijayinig kayan awajau, shushum iyaag tepesui. ⁵⁰ Aatus David Goliatan depetkauwai. Kaya egkea nagkimtaichijinig kaya egkea nagkia tuku mauwai. Dutika maa puyaja takakchau asa, ⁵¹ tupikaki jegantun niina puyaginak ukuinak jujuki awena mauwai. Dutika maa buuken tsupijuk jujukiuwai.

Nunú maanitan yacha etegtua mantuam, filisteo suntag aidauk pisajajui.

⁵² Nuniagtai Israel aents aidau Judá wegantu aidaujai maaniami tusag senchi untsumkag pataetukag, filisteo aentsu yaaktaji aidau Gad Ecrógjai aajakua imanui mai mainakua jegawajui. Dutika ijinamu asa Shaaraim uwaki, yaakat Gad wetainum, nuigtu yaakat Ecrón wetainum aatus filisteo suntag jinawk tepetag jegauwai.

⁵³ Israel aents aidauk filisteo aidau pataetukag shiyaku waketug filisteo batsamtaijin kaunawag dita wajiji aidauk ashí yajutkajui. ⁵⁴ Dutikawagmatai David Goliata buuken juki Jerusalén ejegauwai. Untsu maaniaku jutaiji aidauk niina aakjin jukiuwai.

⁵⁵ Eke David Goliatjai maaniatatus wegai, Saúl suntaja apuji Abner aajakua nuna iniak:

“¿Aush yana uchijimpaita?” tau.

⁵⁶ Tusa iniam Abner ayaak:

“Mina apujuh, wika shiig dekatsjai”, tiuwai.

Tusa tama apu Saúl chichajak:

“Kame ininsam dekata”, tiuwai.

⁵⁷ Dutika David Goliata maa buuken tsupijuk juki minittaman, Abner igkug juki Saúlai ejentauwai. ⁵⁸ Dutikamtai Saúl iniak:

“¿Amesh yana uchijiyaitpa? ujatkata”, tau.

Tama David ayaak:

“Wika amina inakem Jesé Belégnumiaya nuna uchijiyaitjai”, tiuwai.

18

Jonatán Davidjai chichaman umikbau

¹ David Saúljai chichas inagnakmatai, Jonatán Davitan shiig kumpauchiiji wajasui. Nuadui Davitan senchi anejakui niina iyashin aneemaina imatikas. ² Tuja Saúlchakam nunú tsawantaik mina takagtin ati tusa apusauwai. Dutikau asa niina apaji jenig awagkichui. ³ Tuja Jonatán Davidjai dita umiktinjin tudayinak: “Dekas iik atakea duwish tuke kumpaji ami”, tiajui, wagki Davitan niina iyashin aneemaina imatikas aneau asa. ⁴ Nuigtushkam Jonatán jáanchin nii nugkuagbaujin awimak, puyagjin, flecha nagkimtaijin, akachumtaijin aatus Davitan susauwai.

⁵ Davitak filisteo aidaujai maaniati tusa awemam maaniakug tuke depetmau asamtai, Saúl suntag aidau apuji adaikauwai. Dutikamtai

suntag aidauk ashí shiig aneasajui, nunisag suntaja apuji aidaushkam shiig anentuidau.

Saúl Davitan kajekamu

⁶ Dutika David Goliatan maamtai suntag aidau waketug miniagtai, tuké nunin asag Israel aentsu yaaktaji aidaunmaya nuwa aidauk apu Saúlan igkugtasag ashí jijnajui. Nuninak shiig aneasag kantamainak, nantse-mainak, pandero aidaun, platillo aidaun aatus awatuidau. ⁷ Imatuinak:

“Saúl mil aentsun kajegke, untsu David kajegke diez mil aentsun”,

wajaidau. ⁸ Nunú Saúlan shiig awajkachui. Nuadui senchi kajeka chichaak: “David diez mil aentsun mae tusag ima senchi eme anentu-inawai. Tuja minak ayatak mil aentsnak mae tujutuinawai. ¡Ima apu adaitanak awajsaje!” tau.

⁹ Duwi nagkamas Saúl Davitan kajejukui. ¹⁰ Tuja kashinia nuadui Apajui awemamu wakan pegkegchau Saúlan egkemtujui. Dutikam niina pujusa inamtaijne pujus imaanjaujai betek wajas pujau. Tuja David nuwi niijai pujus tuje arpan awatin asa awatak eketu. Nuniai Saúl nagkin takus eketu. ¹¹ Nunik eketu Davitan tanishjai ijumjan achia maatjai tusa aketkauwai. Dutikam tsuntsumun jimajá uwetjauwai.

¹² Dutika maachu asa Saúl Davitan ishamau, wagki Tuke Pujuuk niina yaitsuk Davitan yayau asantai. ¹³ Nuadui niijai pujaun jiikiuwai. Dutika mil suntag aidaun apuji adaikauwai. Dutika ai ditajai ijunjag yujas maaniak wekaesati tusa. Dutikamu asa Davitak Saúla pujusa inamtajiniig pujujakchauwai, tuké maaniak wegagajukui. ¹⁴ Tuja Tuke Pujuu yayamu asa nii takamujia duka ashí pegkeg aajakui. ¹⁵ Nuadui Saúl Davitan ishamau, wagki Davitak Tuke Pujuu yayamu asa shiig takau asantai. ¹⁶ Nuadui Israel aents aidau Judá aents aidaujai Davitan ashí wakegaidau. Wagki maaniamu ataik, nii chichakmatai maaniawag depetmak kaunaidau asag.

¹⁷ Makichik tsawantai Saúl Davitan chichajak:

“Mina nawantug emkau Merab puja nujai nuweatjame. Tuja nunú jukitag takumek Tuke Pujuu daajin filisteo aidaujai maaniam depetmakta”, tiuwai.

Nunak nigkik maumainchau dekapeak filisteo aidau maatnume tusa tiuwai.

¹⁸ Tusa tama David ayaak:

“Wika wainkauchitjai, mina pataag aidaushkam wainkauch ainawai. Wisha nuninnush ame apuitam ibaumin nawanjinash jumainkaitag”, tau.

¹⁹ Tuja David nuwenatin tsawan jegamtai, nii anagkuayatak Davita sumainun yapajia, tikich aents Adriel yaakat Meholánmaya aajakua nuwi nawanjin sujukui.

²⁰ Untsu Saúla tikich nawanji Mical Davitan wakekauwai. Nuna Saúl dekaa shiig aneasui, ²¹ wagki nii anentaimas: “Dekas auna susatjai, dutikan ame tsanugta tusan inagtajai. Dutika ai tsanugmatai, filisteo aidau Davitan maatnume”, tau asa tiuwai. Nuadui ataktu Davitan chichajak:

“Yamaik dekas mina nawantug jukittame”, tiuwai.

²² Nuna tusa Saúl niina inake aidaun chichajak:

“Davitai wetajum nunikjum tikich antuinachbaunum ima niijaig chichaakjum: ‘Mina nawanjun jukiti tusa apu shiig senchi wakejutpawai, nuniau asantai ayu tita, tuja niina inake aidautishkam ame eme anentaji’ titajum”, tiuwai.

²³ Tusa tima shimutka ujainam nii ayaak:

“Atumesh anentaimesakjuah, ¿wi wainkauch ujunauchitag juninnush apu nawanjinash jumainkaitag? Kame nii taunash itugkatjaki, ayu titajai”, tiuwai.

²⁴ Tusa timatai Saúla inake aidau waketug jegawag nuna Saúlan ujakajui. ²⁵ Nuna dekaa Saúl filisteo aidau Davitan maatnume tau asa:

“Nuwa juamunum aishmag tuke akikbau aina nuna akikmamainun filisteo aidau kati chuchuken cien tsupijug yajuak sujusti. Dutik iikmaktag tajai filisteo aidau iina amupakua nuna iikatag tau asan, tawai tusajum David ujaktajum”, tiuwai.

²⁶ Tusa timatai Saúla inake aidau nuna Davitan ujakajui. Tusa ukam Davidchakam nuna dutikan apu nawanjin jukitjai tau asa shiig aneasui.

Nunú tsawan nuwenatin jegatsaig, ²⁷ David niina suntaji aidau yajuak wee doscientos filisteo aidau kajekajui.

Dutika tsupijug yajuak apun ejetuauwai, niina nawanjin jukitag tau asa. Dutikamtai niina nawanji Micaljai nuweauwai.

²⁸ Tujash Tuke Pujuu Davitan yayau asamtai, niina nawanji Micalchakam senchi aneau. ²⁹ Nuna diis Saúl Davitan yaunchuk ishamajakbaunak nagkaesau senchi ishamau. Nuadui tuke niina shiwaaji wajasui.

³⁰ Filisteo aents aidau apuji aidau, dita suntaji aidaujai Israel aents aidau jeteagtaik, Saúla suntaji apuji aidau nagkaesau David ima senchi depetmajakui. Nuadui Israel aents aidau eme anentujaku ainawai.

19

Saúl Davitan maatag tibau

¹ Saúl niina uchiji Jonatágkan ashí suntaja apuji aidaujai inajui David maatajum tusa. Tujash Jonatágkak Davitan senchi aneau asa, ² niina apaji tibanu Davitan ujaak:

“Mina apag Saúl mantamatag tawai, nuniau asamtai, kashin kashikmasam waipainatsaig ikam uumkata. ³ Tuja wi mina apagjai ame uumka pujuttam nuwi ijusan minittajai. Nunikan mina apajun ausattajai mantamawai tusan. Tusa taish wajinjuttig nunikmatai ujaktajame”, tiuwai.

⁴ Aatus tusa ukuak Jonatán Davitan ayamjak niina apaji Saúljai chichaak aatus tiuwai: “Apuh, amek amina inakem Davitak pegkegchau dutikatasamek wakemaitsume, wagki niig aminak makichkish pegkegchauk awajtamtsui, ayatak ame tabaunak betek uminuw. ⁵ David nii mantamnamain wajak Goliatan maabi. Duwi nagkamas Tuke Pujuu yaimpasmatai, filisteo aidau depetkamji. Nuna David maamtai ame shiig aneemium dusha, ¿wagka yamaish David pegkegchaun takamchaush maatagtame?” tiuwai.

⁶ Tusa tama Saúl Jonatágkan chichajak:

“Apajui daajin umiktinun tajame, makichkish pegkegchauk awajkashtatjai”, tau.

⁷ Tusa tima Jonatán niina apajijai chichasbaunak imatiksag Davitan ujakui. Nuadui Saúl pujamunum ejegauwai, dutikan Davitak yaunchuk Saúlan takajak pujujakbaunak nunisag takak pujau.

⁸ Nunik kuashat tsawan pujau filisteo aidaujai ataktu maaniamu jegamtai, David maania depetuk ijinam tikich aidauk pisajajui. ⁹ Nuna dutika David apu Saúla pujusa inamtaijin wakitkiuwai. Nunik pujai makichik tsawantai Saúlan wakan pegkegchau Tuke Pujuu awemamu

ataktu egkemtujui. Dutikam nagki takus, David arpa awattai antak eketu, ¹⁰ Davitan nagkin aketkau tanishjai ijumag achia maatatus. Tujash David menaun uwetjauwai. Dutikam nagkik tanishnum wajauwai. Dutikam nunú kashia nuaduik David tupikaki niina jeen weuwai.

¹¹ Nunik tupikakmatai Saúl niina aentsji aidaun Davita jeen shimutkag nuwi batsamtus tsawampainak maatnume tusa ishiakui. Tujash Davita nuwe Mical niina emtika ujaak:

“Yamai kashia duwi tupikakchaminig, kashin mantamawagtatui”, tiuwai.

¹² Nuna tusa Mical Davitan jeganum niimtai ujaimunum nuni jiiki awe-mauwai. Aatus David tupikakiuwai. ¹³ Dutika awema Mical apajuímtai dakumka najanamun juki, niina pegakjin aepsauwai. Dutika chivo tsakata ujen juki, intashin apujtus jáanchi pempeag aepsauwai.

¹⁴ Dutika pujai Saúl niina aentsji aidaun David achiktajum tusa ishi-akbau, tsawajag David jinchatai utuawag achikagtatus waitin ijutuidau. Nuniagtai Mical waiti ujai jiinki ditan chichajak: “Davitak jak tepawai”, tiuwai.

¹⁵ Nuna Saúl dekaa niina aentsji aidaun David wejittajum tusa ishimak aatus akatjauwai:

“Jak tepakuish ukukigpajum jiiki jukijum itagtuatajum maatjai!” tiuwai.

¹⁶ Tusa tima shimutuk Davita jeen utsanawajui. Nunik diikma apajuímtai dakumka najanamu chivo tsakata ujegai intashi buuken apujtusbau pempeajam tepaun wainkajui. Nunik waketug Saúlan ujakajui. ¹⁷ Nuna Saúl antuk niina inaken makichik awemauwai Mical utitajum tusa. Dutikam juki itaamtai, apaji chichajak:

“¿Wagka mina shiwag jiiki awemakmesh aajamesh tsanujaume?” tau.

Tama Mical ayaak:

“Nii minak chichagtak, tupikakta tujutchakminig, maattagme tujutkui tupikamtikimjai”, tiuwai.

¹⁸ Aatus David tupikaki uwemjauwai. Nunik Samueljai chichastatus yaakat Ramá weuwai. Nuwi jegaa Saúl niina maatang tibaun ashí Samuelan ujaku.

Tusa ujaka Samueljai yaakat Naiot Ramá awa nuwi pujustatus weuwai.

¹⁹ Davitak yaakat Naiot Ramá jegattak pujawai tabaun Saúl dekauwai.

²⁰ Nunik dekaa Davitan achiktinme tusa niina aentsji aidaun ishitkauwai. Nunik jegakma, profeta aidau ijunag Apajuí chichamen etsejiagtai shiig etsekatnume tusa nuna diyak pujaun wainkajui. Nuniai ditanashkam Apajuí Wakani egkemtujajui. Dutikam ditashkam Apajuín pachis etsejuidau.

²¹ Nuna Saúl dekaa tikich niina aentsji aidaun David achiktajum tusa ishiakui. Tusa ishiakam jegattaman, Apajuí Wakani egkemtujam ditashkam nunisag etsejuidau. Nunikagmatai kempatuma duwi ataktu aents aidaun ishitkauwai. Dutikamu ditashkam tikich aidaujai betek núnidau.

²² Nuniagtai Saúl nii jiintuki yaakat Ramá weuwai. Nunik yaakat Secú tutainum yumi pimutai múun aunum jegaa, Samuelash Davitjaish tuwi pujawa tusa iniimu. Tusa inimtai makichik aents auk yaakat Naiot Ramá jegattak pujawai tusa ujaku.

²³ Tusa ujakam nuwi Saúl weuwai. Nunik wetatman Apajuí Wakani egkemtujui. Dutikam chichá chichaakua yaakat Naiot Ramá jegattak awa nuwi jegauwai. ²⁴ Nunik Samuel pujamunum jega jáanch nii nugkuagbaujinak awimag, maaniaku jutajinashkam utsag wisu tsawai,

kashishkam tuke Apajúi tita tibaun chichá wekagu. Saúl nuniku asamtai: “Saúlaske profeta wajase”, tiaju ainawai.

20

Jonatán Davitan yaigbau

¹ Yaakat Naiot Ramá jegattak awa nuwi pujau David Jonatán pujamunum weuwai. Nunik jegaa iniak:

“¿Wisha wajina takamsaja? ¿Tuwiya mina utugchatjush? Amina apa mina mantuatus egatak wekaga nunash wisha ¿wajina pegkegchaunash takagsaja?” tau.

² Tusa tama Jonatán ayaak:

“¡Apajúi dakitawai mina apag mantamawai tusa! ¡Nuadui aminak mantamashtatui! Ame dekamé mina apajuk nii dutikatag tabau ataik, nigkik dutikchawé tuké ujatnuwe, nuadui makichkish mina ujattsukek dutikashtatui”, tiuwai.

³ Tama David ataktu chichajak:

“Amina apa shiig dekawai ame mina kumpajuitam nuna. Nuniau asa anentaimas dekas Jonatágnak ujakchatjai, ujaka ai wake besemag anentaimjai titatui, tuja Tuke Pujuu daajin amina daagminchakam tajame, wi mantamnatnuk namput wajatsui”, tau.

⁴ Tusa tama Jonatán iniak:

“Wajina dutikati tusamea wakegame nunú tujutta, nuna umigkatjame”, tiuwai.

⁵ Tama David ayaak:

“Kashin atatui tsawan nantu yama takau jiistamtai. Nunú jiistatin wi apujai ekemsan tuké yujumkan yuujai. Tujash nunikchattajai. Wait aneasa etsegtugkaipa ajanum uumkan pujuttajai, nunikan kashin pujusa tsawakun agkuantai tatjai. ⁶ Tuja amina apa mina pachitus inimpakuig: ‘Maki makichik mijantin kuntin maa apeaku Apajúi ememattai jegau asamtai, wisha mina pataag aidau Belén batsata nujai ijunjan jiistamatjai tusa segatkui awemamjai’, tita. ⁷ Tusa tamin ayu timataig shiig aneasan juwaktajai. Untsu nii kajeakuí dekaattame dekas maatag tawapi tusam.

⁸ Nuadui wait aneasam wi segajam nunú umigtukta. Wagki wika yainikmi tau asan ame mina kumpag ata tujutkumin, Tuke Pujuu daajin chicham umikmajji. Tuja dekas mina utugchatjuitkuig, amina apai ejetutsuk amek dekas mantuata”, tiuwai.

⁹ Tusa tutai Jonatán ayaak:

“Wainka tuu anentaimipa, mina apag mantamatag takuig wi ujaktatjame”, tiuwai.

¹⁰ Tusa tama David niina iniak:

“Tujash ¿ya minash ujakattawa amina apash ame ujaamash wajintigki nunash?” tau.

¹¹ Tutai Jonatán ayaak:

“Weajai ajanum wemi nunika awi ujaktagme”, tiuwai.

Tusa ajanum weajui. ¹² Nuwi jeganta Jonatán Davitan chichajak:

“Tuke Pujuu Israel aents aidauti Apajúi emematin ainag nuna daajin tajame. Kashin, nuniashkunuk kashin pujusa tsawakun mina apajush wajintig nuna dekaattajai. Tuja mantamatag tutsuk pegkegnum chichakuig, chichaman akuptuktatjame ujakpaktinme tusan. ¹³ Untsu mantamatag taun dekyatkun, wi amina agkan utugchat atsaunum tupikak uwemjati tusan ujakchamtaig, Tuke Pujuu suwimkan sujusti. ¡Tuke Pujuu mina

apajun yaigkua dutiksag aminash yaimpakti! ¹⁴ Nunak wika Tuke Pujuu daajin umiktinjun tajame. Tuja wi iwaku pujakuig wi amina yayajam dutiksamek, minash wait aneasam yainkatin ata. Tuja wi jakamtaishkam, ¹⁵ Tuke Pujuu amina shiwaajum aidaun ashí ijinamtaish mina uchiga aidauk tuke wait anenjinin ata. ¹⁶ Ame nunú umishtaik, Tuke Pujuu umina pataim aidaujai suwimkan amastinai”, tau. Aatus tusa Jonatán Davidjai chichaman umikajui.

¹⁷ Nuadui Jonatán niina iyashi aneemaina imatikas Davitan aneau asa ataktu awagki niijai chichaman umikui. ¹⁸ Nuna umika Jonatán Davitan chichajak:

“Kashin nantu yama takau jüstamtai tsawan asamtai, ame ekemsa yuum duka agkan juwaktatui, nunikmatai wajukamki tujamiagtatui.

¹⁹ Tuja kampatum tsawan wetai, wagkag imanikash megkaekae tusag, aminí senchi anentamiagtatui. Nuniktin asamtai ame yaunchuk uumkabium nuwi wetá nunikam kaya múun batsata nuna awin uumkam pujusta. ²⁰ Nuwi pujamin flechanash shiijash akenag taunig wajakin ame pujamunmanini kampatum flechan akenkattajai. ²¹ Dutikan mina inakjun chichagkun: ‘Flecha nagkimamu tikiju batsata nunú utita’, takui dekattame. Nunikam anenjas jiinkita, wagki nunak utugchat atsutin asamtai titatjai. Nunak Tuke Pujuu tutaya nuna daajin umiktinjun tajame.

²² Untsu wi niina chichagkun: ‘Flecha nagkimamu imau kakeka nunú diista’, takuig dekaattame Tuke Pujuuwap weti tujutua tusam, nuniakum itupikakta! ²³ Juju chicham umikag duka Tuke Pujuu ii emematin ainag nuna daajin tuke atin umikji”, tiajui.

²⁴ Aatus tusag Jonatán niina apaji pujusa inamtaijin waketta, Davitak ikam kaya múun ayaunum nuna awin uumkatus weuwai. Nuwi uumak pujai jüista jégamtai apu yujumka yuwatatus mesanum jéganta ekemsauwai. ²⁵ Nii tuké ekemsa yutaijin tanisha tuntupek ekemsauwai. Nunikmatai Jonatán niina apajijai niinis ekemsauwai. Untsu Abner niina apajijai tsanias ekemsauwai. Tuja Davita ekemtaiji agkan juwakui. ²⁶ Nunú tsawantinig apuk Davidnak pachikchauwai, wagki pegkegchau takamsas eke iwagmamchau asa, sacerdote yuwinamunum pachiinak yumainchau asa, megkaekatai tau asa pachitsuk idaisauwai.

²⁷ Tuja kashinia duwi jüstabaunmashkam Davita ekemsa yutaijin nunisag agkan au. Nunitai Saúl niina uchiji Jonatágkan iniak:

“¿Wagka Jesé uchijish yau yujumak yuwamunum tachma nunisagkesh yamaish tache?” tau.

²⁸ Tusa iniam Jonatán ayaak:

“Davitak Belén wetajai tusa, wait aneasam tsawan sujusta tusa segatkui, ayu timajai. ²⁹ Nuna segatak aatus tujutmae: ‘Mina pataag kuntuu maa apeak Apajuín emematiagtin asamtai, mina yatsug taata tusa untsugkae’, tujutmae. Nuadui juwi jüstamainun niina yachi emkau aidaujai Belégnun jüstamatjai tusa segatkui, ayu wetá timajai. Nuwi weu asa, jutijai ijunag yujumka yuwatsu nunak aniawai”, tiuwai.

³⁰ Tusa tutai Saúl Jonatágkan shiig senchi kajejuk chichajak:

“¡Dukuji detsetkauwa! ¿Wi dekatsjak Jesé uchiji amina shiig kumpagmia nuna? amek amina kumpajum yayau asam dukujai datsanmain juwakugme. ³¹ Nuadui Jesé uchiji eke iwaku pujaigkik, amek makichkish Israel aents aidau apujig achattame. ¡Nunikaig tachakmek aents ishiakam David achika itagtuata maatjai!”, tiuwai.

³² Tama Jonatán ayaak:

“¿Tujash wagkag niish mantamnati? ¿Niish wajina pegkegchaunash dutikae mantamnatag tusash?” tau.

³³ Tujash Saúlak Jonatágnak aitsuk wajaakug nagki jukiuwai niina maatatus. Dutikam nii anentaimas dekas mina apag Davita maatag tawapi tiuwai. ³⁴ Nunik kajeka jimag tsawanta nunú jiista tsawagbaunum yujumkan yuwatatus mesanum eketu wajaki yujumkanak yutsuk ukukiuwai, wagki niina apaji Davitan maatatus datsantan chichaju asamtai.

³⁵ Tuja Davitak chichama ujatkachagtimpash tusa dakamak pujai, kashin tsawag Jonatán niina inake datsauchijai David uumak pujamunum weuwai. ³⁶ Nunik jegantag niina inaken chichajak:

“Tupikaki weme flecha aidaun akenkamag nunú egakta”, tiuwai. Tusa tima nunú uchi tupikaki wegau, nuniai Jonatán flechan nunú uchi weamun emtika atushat nagkimauwai. ³⁷ Nunú flecha nagkimamu tepaunum niina inake jeganmatai shiig senchi untsuka chichajak:

“¡Flecha nagkimamag duka ame wajam nuna nagkaiki tepawai!” tau.

³⁸ Nuna tusa ataktushkam untsuk:

“¡Wamak tupikakta, makichkish wajasai!” tau. Tuja nunú inakak flecha nagkimamun juki, niina apuji Jonatágnak itajuauwai. ³⁹ Tujash inakak Jonatán tuke aneas Davita ujaak tabaunak makichkish dekachui, wagki nunak Jonatán ima Davidjaig dekajakui. Nuadui nunú inakak mina apug nagkimtan unuimagtasampap nagkimua, tiuwai. ⁴⁰ Nuna ashí dutika Jonatán nagkimtaiiji aidaun jegá ejegata tusa niina inaken susauwai.

⁴¹ Dutika susam wakitkimtai, David kaya ayaunum uumak pujau jiinki Jonatán wajamunum jeganta, niina eme anentus tsuntsuna kumpatuma imania nijayin nugkan antigkui. Nuadui pagkunik kumpamdayinak egaanidau, nunik David buutbaun mijaakui. ⁴² Nunikmatai, Jonatán Davitan chichajak:

“¡i chicham umikuitag duka Tuke Pujuu daajin umikmaiiji, nuniau asamtai puyattsuk wetá. Tuke Pujuu amina, tuja mina, nuigtu ii uchiji wegantu aidaunash kuitamkatin ati”, tiuwai.

21

David Saúl maatag tama tupikakbau

¹ Saúl maatag tama David tupikaki sacerdote Ahimélec pujamunum weuwai. Nunik nimitaman sacerdote wainak puyatuk iniak:

“¿Wagka ima amekesh miname?” tau.

² Tama David ayaak:

“Chicham dekaata tusa apu tujutmatai minajai. Tujash wagkag minash awetime nunak makichik aentskesh dekamainchau ainawai. Nuigtushkam wajina dutikata tusag akuptukmae nunashkam dekamainchau ainawai. Untsu mina auntsug aidaunak yaja batsakmajai”, tiuwai.

³ Nuna tusa sacerdoten iniak: “Namputchawame ¿aminush yumainush atsugtamuak? Ajutjamkuig cinco pag ajamjusta, untsu pag atsakuig waji awa dukesh sujusta”, tau.

⁴ Tusa tama sacerdote ayaak:

“Pag wainka yutai aina duka atsugtawai, ayatak Apajui anagkuamu sacerdote yutaya duke awai. Untsu atumesh ijagmajum yujakjuminig nuna amamainaitjime”, tiuwai.

⁵ Tutai David ayaak:

“Maaniatasa shimakuik nuwajaig tsanichu ainaji. Tuja yamaishkam nunisaik maaniatasa yujachiatku, ii jeen pujauti jijnjamiag duwi nagkamsa ijagma yujaji”, tiuwai.

⁶ Tusa timatai pag yama najanamu Apaju anagkuamu aidaun nunú tsawantin jega pegkegmanum sacerdote awaya ukuak, pag yaunchuk najanamu aidau atatman yajuaka ukukbaujin tikich yumainuk atsau asantai, nuna juki Davitan susauwai.

24

David Saúlan wait anentak maachbau

¹ Makichik tsawantin Saúl filisteo aidaun pataetuk wejiuwai. Nunik wejiu waketskama Davitak En-gadi nugkanum uwejush pujawai tabaun dekauwai. ² Nunik dekaa ashí Israel aents aidaunmayan etegkeg tres mil suntaja yajuak, David niina aentsji aidaulai chivo batsamtaiji kaya múun pagkaju weajunum pujau asantai wejiuwai.

³ Nunik wea weakua uwija wenuken ijus waa aunum David niina aentsji aidaulai uumak pujamunum jegantui. Nunik juwimpap uumak pujawa tachau asa, wakenum wetatus nunú waanum waigkui, ⁴ nunik waittaman Davita aentsji aidau wainkag Davitan ashishmas chichajuinak:

“Tuke Pujuu amina chichagtamak: ‘Shiwajumnak amina idaitustatjame’, tujabauwa nunú betek uminui. Nuadui ame itugkatagtame dutikata”, tuidau.

Tusa tama David wajaki diipas jegantun Saúla jáanchji jawajin tsupijuk jujukuiwai. ⁵ Nuna dutikashkam dekas aikmainchaunap aikaja tusa awake anentaimjauwai. ⁶ Nuniak niina aentsji aidaun ashishmas chichajak:

“Wika apunak maumaitsojai, wagki niinak Tuke Pujuu apu ati tusa etegkamu asantai”, tiuwai.

⁷ Tau asa niina aentsji aidaun, Saúl maawaigpa, tusa tiuwai. Tusa mauntsuk idaisam nunú waanmaya jiinki weuwai.

⁸ Nunik jiinki wegaig, David nunú waanmaya jiinki untsamak:

“¡Apuh, mina apujuh!” tau.

Tutai Saúl ayampa diyau, dutikam David niina eme anentus tikishmag nijayin nugka antig pujusui. ⁹ Nunik pujus chichajak:

“¿Wagka apuju tikich aents ujpainak, David pegkegchau awajtamkatag tawai tusa ujpainakuish dusha antugme? ¹⁰ Amesh yamai dekaume Tuke Pujuu aminak wi pujamunum awetabiu aig, amina mautan dakitau asan tsagkujamjame. Wi anentaimsan Tuke Pujuuwauw apu ati tusa etegkauwaita tau asan idaisajame.

¹¹ “Juju wi takakag juju diista. Juka ame jáanchjum nugkuajam nuna jawajin tsupika jukimjai. Nuna tsupikmag nuaduik aminak maumain awajkamjame, tujash dutikashmajame. Nuadui dekamainaitme, wi amina pegkegchau awagmatan dakitag nunú. Tuja nuigtush pegkegchaunak takagchawaitjame, dutikamaitkum mantuatasam aintame. ¹² Dekas Tuke Pujuu diigmas, yakita pegkegchaush nuna tujamti. Untsu wika aminak makichkish maasztatjame. ¹³ Yaunchuk tibau awai: ‘Aents pegkegchauk pegkegchaunak takawai’, nuadui wika aminak tuke maumaitsojame.

¹⁴ Nuigtushkam wika eme anentsa diitaigkesh atsujai. Nuninaitag nunin aish, amesh ya pataetukmea ibau apumesh pujusa inamtaijum ukuakmesh, imajui uwegshunmash taume. ¡Amek auk yawá nujantai jau, nuniachkush sugku maatasa ainmaina numamtin pataetugkum tsawan megkaeme! Makichkish aan wekaemainchau aniname. ¹⁵ Nuadui wika:

‘Yakita pegkegchaush nuna diis Tuke Pujuu tujamti’, tajai. Tuja nii mina takatjun diigtus duwi ame mantuag tame nunashkam ayamjutkati”, tiuwai.

¹⁶ Tusa inagnakmatai Saúl untsamak:

“¡Amekaitam Davitah, mina uchijuh, ya minash tujutua!” tusa Saúl buutu.

¹⁷ Nunik buutki chichajak:

“Ame tame duka dekaske, wi amina maatas a inmaitkum, ame mina pegkegnum iiktukume. ¹⁸ Yamai dekamtijaume ame mina pegkegnum yaintam nunú. Wagki Tuke Pujuu maati tujabiu aig, ame mina mantuachume. ¹⁹ Makichik aents niina shiwaajin igkuakug, tuke pegkegchau awajkatatus wakenai. Tuja amek nuninchau asam mina mantumain ayatkum, wait anenjuju asamin, ¡Tuke Pujuu aminash yaimpakti tajame! ²⁰ Yamaik shiig dekajai ame dekas apu atam nuna. Ame apu wajasamin, Israel aents aidauk amejai nuni nagkaemas emkagtatui. ²¹ ¡Nuadui mina uchig aidau tuja nuna uchiji aidaushkam ijina emegkagchatnaitkumek, yamai Tuke Pujuu daajin dutikashtatjai tusam tujutta!” tiuwai.

²² Tusa segam nii ayaak: “¡Ame segatam nunak dekas Apajuí daajin umiktatjai!” tiuwai. Tusa timatai Saúlak niina pujusa inamtaijin wakituiwai. Nunikmatai Davidchakam niina aentsji aidaujai dita yaunchuk uumak pujusbaunum shiyakajui.

25

Samuel jakamu

¹ Samuel jakamtai ashí Israel aents aidau ijunag buutiaju ainawai. Nunikag Samuela iyashin jukiag yaakat Ramá nii akiinamu aajakua nuwi ukusajui.

28

Maaniamunum atutkati tusa Aquísh Davitan ipaamu

¹ Makichik tsawantai filisteo suntag aidau Israel aents aidaujai maaniawagtatus umintsajui. Nuniagtai apu Aquísh Davitan chichajak:

“Ame amina suntajum aidaujai maaniamunum atujatkati tusan tajame”, tiuwai.

² Tusa tama David ayaak:

“Ayu, kame atuktagme. Yamai wainkattame juju amina inakem David dutikatta nunú”, tiuwai.

Tutai Aquísh Davitan ayaak:

“Atujatkatin asamin, suntag mina kuitamjin aina nuna apuji adaikatjame”, tiuwai.

Saúl makichik nuwa anentaimas dekamnun iniasbau

³ Nunú tsawantinig Samuelak yaunchuk jakau asa atsujakui. Nii jakamtai Israel aents aidau senchi buutiaju ainawai. Nunikag nii akiinamunmak yaakat Ramá ukusajui. Tuja aents anentaimas dekaamin aidau, nuigtu jakau wakanin untsujuk chichau aidau aatus Israel aents aidau nugken batsatunak Saúl ashí jiig utsagkui.

⁴ Dutikau ai makichik tsawantai filisteo aidau ijunajui. Nunikag uminas yaakat Sunem jegawag nuwi aakmag batsamas maaniawagtatus shiyakajui. Nuninai Saúlchakam niina suntaji Israel aents aidaujai muja Guilboa tutainum ijunajui. ⁵ Nuwi wajas diikma filisteo aidau

aakmag batsatun wainkauwai, nunik shiig senchi ishamkauwai. ⁶ Nuniak Tuke Pujuu iniasui. Tujash Tuke Pujuu kajanmagkesh, nuniachkush Urim tutai aajakua nuigkish, nuniachkush profetayaigkish ujakchauwai.

⁷ Dutikam niina suntaji apuji aidaun chichajak:

“Wetajum nunikjum makichik nuwa jakau wakanin untsuka chichau aina nunin egaktajum. Dutikawagmin ¡Apajuish wajina dutikati tujutuaki nuna iniasan dekatjai!” tiuwai.

Tusa tutai dita ainak:

“Endornum aents jakau wakanin untsuka chichau makichik nuwa pujawai”, tusa ujakajui.

⁸ Tusa ujakam Saúl nuna wejak dekajuawainum tusa tikich jáanchin nugkujui.

Nunik jimag aents uyuntsam kashi nunú nuwa pujamunum weuwai. Nunik jegaa chichajak:

“¡Wait aneasam aents jakau wakani untsuktuka, iniasan dekaatjai wajinjuttig!” tau.

⁹ Tama nuwa ayaak:

“Aents anentaimas dekamin aidau, nuigtu jakau wakanin untsuka chichau aidau juwi batsatun Saúl jiija utsagmaya nunú ame dekam jamah. Nunin aish ¿wagka wi bakumamainush, tuja ameshkam bakumamainush tuu wekaeme?” tau.

¹⁰ Tutai Saúl Tuke Pujuu daajin niina chichajak:

“¡Ishamkagtukaipa utugchatak atsugtamtau!, Tuke Pujuu daajin taje!” tiuwai.

¹¹ Tutai nuwa ayaak:

“Tujash ¿yana wakanin untsugtukti tusamea tame?” tau. Tama:

“¡Samuela wakani untsugtuka!” tiuwai.

¹² Tusa tima Samuela wakanin untsuka wainkauwai. Nunik senchi untsamak Saúlan chichajak:

“¿Wagka minash tsanujaume? ¡Ame Saúlaitam jamah!” tau.

¹³ Tutai Saúl chichajak:

“Ishamkagtukaipa, ¿ya wainkaume?” tau. Tusa tama:

“Makichik Apajuí nugkaya nayaimpinum waun wainjai”, tau. ¹⁴ Tutai nii iniak:

“¿Wajukuita niimesh?” tau. Tama nii ayaak:

“Auk makichik aishmag múuntuch jáanchin nugkuajui”, tau. Tusa tutai Samuelnap dekas wainkae tiuwai. Tusa Samuelan eme anentus tikishmag tsunsuma nijayin nugka antig pujusui. ¹⁵ Nunik pujus iniau. Tusa iniam Samuel Saúlan ayaak:

“¿Wagka minash taati tusamesh waitkajame?” tau. Tama Saúl ayaak:

“Filisteo aidau jetetainakui shiig senchi ishamkagtajai, tuja Apajuishkam idaituse. Nuadui wi untsuaish profetayaigkish, nuniachkush kajanmagkesh aigtsui. Dutijakui wisha wajina dutikmainaitja nuna tujutti tusan amina untsukjame”, tau.

¹⁶ Tutai Samuel ayaak:

“¿Tuke Pujuu kajegtamak idaitamas, amina shiwaajum wajasa nuniaish wagka minash ininme?”

¹⁷ “Tuke Pujuu amina idaitamsatnun pachis mina ujatkamtai wi amina ukaitjame. Nuna umiak ame apuitam nunak atanjamki amina kumpajum Davitan susae, ¹⁸ wagki nii inapagbau umigkachu asamin. Nuigtushkam Amalec aents aidau ashí ditá tagkuji aidaujai ijinatajum tujabau umikchauwaitme. Nuadui Apajuí amina idaitamsa nunak dutijamae.

¹⁹ “Nuigtushkam Israel aents aina nunak filisteo aidau depetuk ijinati, dutikak aminashkam mantamatnume tusa idaitamsattawai. Tuja kashin ame, amina uchijum aina nujai jinaattagme. Tuja Israel aents aidau batsata nunashkam filisteo aents aidau depetuk achija yajuaktinme tusa Tuke Pujuu idaisae”, tiuwai.

²⁰ Tusa tama Saúlak nuna antuk puyatuk, esajam wajakin jaka iyantui. Wagki nunak makichik tsawan, nuigtu makichik kashi yujumkan yutsuk wegagu asa nunikui.

²¹ Nunik Saúl jaka iyanmatai, nunú nuwa dekamin jegantun chichajak: “Wika amina inakinuk wi mantamnamainun dekayatkun, amina umiju asan ame segatbaunak ashí umikjai. ²² Nuadui wi titatjam nunú ameshkam umikta: Yujumkan amasmatai yuwata, nunika ichichmamjam weminum”, tiuwai.

²³ Tusa tamash Saúlak yujumak yutanak dakitau. Nunitai suntaja apuji aidau, dekas yuwata tusa nunú nuwajai ijuntu jag imatju idau. Ima imatjam ayu tiuwai. Tusa nugká tepau nantaki pegaknum jeganta ekemsauwai.

²⁴ Nunik eketai nunú nuwa makichik toro tsakat duwejam niinu pujaun mauwai. Nuigtushkam harinan levadurajai pachimtsuk naneja pagkan injauwai. ²⁵ Nuna umika juki Saúlan niina suntaji aidaujai susauwai. Dutikam nuna yuwawag akatmam jag nunú kashik dita aakjin waketjajui.

31

Saúl niina uchiji aidaujai ijinamu

¹ Israel aents aidau Guilboa mujanum batsatun filisteo aidau jetekag amuinam pisajajui. ² Nunik pisajagmatai, filisteo aidau Saúlan niina uchiji aidaujai pataetukajui. Dutika amaigkag kcompatum uchiji: Jonatán, Abinadab, Malquisúa aatus aajakua nunak ashí kajekajui. ³ Dutika ukuinak Saúlan tuwajak flecha nagkimin aidau nagkiawag ijuajui. Dutika ijum shiig senchi ishankauwai. ⁴ Nuniak niina uyunak maanitai aidaun yajuak takus wekaenun chichajak:

“Puyagjum jukim mantuata, filisteo pegkegchaun takau aina nunú kaunawag mantuawag dushiktujainum”, tau.

Tutai: “¡Atsa wika maashtatjame!” tiuwai. Nunak ishamau asa tiuwai. Tama Saúl niina puyagjin juki awajai iyaak awagkemtukui.

⁵ Nunik jakamtaí niina uyunnushkam nunisag niina puyagjinak awagkemtuk jakauwai. ⁶ Nunik niina uchiji kcompatum, tuja niina uyunin aatus ashí niina aentsji pisagchaju aidaujai jinawajui.

⁷ Nunikagmatai tikich Israel aents aidau muja awin batsatu tuja Jordágka amain batsatushkam Israel aidauk filisteon ishamainak pisajaje. Tuja Saúlnak uchijijai amukaje tabaun antukag, yaaktajin ukuinak ditashkam pisajajui. Nunik pisajagmatai filisteo aidau nunú yaakat aidaunum dita akiinawag batsamsajui.

⁸ Nunikag kashinia duwi filisteo aidau aents jinaun wajiji aidaun yajutkagtatus shimutuk yujagkama Saúla iyashi, uchiji iyashi aidaujai muja Guilboanum batsatun wainkajui. ⁹ Dutika wainkag Saúla buuken tsupijuk jujuinak, tuja niina maanitajiji aidaunashkam yajutkajui. Dutikawag ashí ditá yaaktaji aidaunum, ditá apajuimtaiji jegamjukbau aina nuwi aents aidau ijumjajum, Saúlak jakae tusajum etsegkatajum tusa akatmamag ishiakajui.

¹⁰ Nuna dutikawag duwi pujus Saúla maanitaiji aidau yajuakbaun ditá apajuímtaiji Astarté jegagkamunum awayawajui. Tuja niina iyashinak, uchiji iyashi aidaujáí jukiag yaakat Bet-san tutai peejamunum nuwi nenajag idaisajui. ¹¹ Nuna dutikawagbaun Israel aents aidau Galaad nugkanum yaakat Jabes batsamin aidau dekawajui.

¹² Nuna dekawag aents wajiu aidau etegdajag jiiinag kashi shima shimakua yaakat Bet-san jegawajui. Nunikag Saúla iyashin, uchiji iyashi aidaujai nenajam aun kuwaki yajuakag Jabes ejegawajui. Dutikawag nuwi apeawajui. ¹³ Untsu ukunchi aidau jukiag numi wajautin ukusajui. Dutika ukusag wake besemag dekapenak, siete tsawan yujumka yutsuk ijagmawag batsamsajui.

Samuel pachisa jimaja nunú agagbau 2 Samuel David apu wajas inamjamu

(1—8)

David Saúl jakamun dekaamu

¹ Saúl jakamtai pujusa, David Amalec aents aidaujai maania depetuk wakitki yaakat Siclag jegauwai. Nunik nuwi jimag tsawan pujusui.

² Nunik pujai kumpatum tsawanta duwi, makichik aents Saúla suntaji wake besemag dekapeak, jáanchjin japiki ichig nugka yukukuntun buuken yukumag nuggak wajasa David pujamunum yaakat Siclag jegauwai. Nunik jegá Davitan eme anentus tikishmag tsuntsuma nijayin nugka antig pujusui.

³ Nunitai David niina iniak:

“¿Tuwiyamea miname?” tau.

Tama nii ayaak:

“Suntag Israel aents aidau batsatun filisteo aidau jeteam maaninakui tupikakmajai”, tau.

⁴ Tutai David iniak:

“Tujash wajakawagmae nunú wait aneamam wamak ujatkata”, tau.

Tama nii ayaak:

“Israel aents aidautin depetamkagmatai, kuashtati pisagmaji. Tuja jinuidaushkam asagmae. Untsu Saúlak niina uchiji Jonatágjai mai jakame”, tiuwai.

⁵ Tutai David iniak:

“¿Wajak amesh dekame Saúl niina uchiji Jonatágjai jakaush?” tau.

⁶ Tama nii ayaak:

“Wika tuke aneamam niimkun muja Guilboanum wekaemajai. Nuniai suntag filisteo aidau caballonum, carronum aatus Saúlan jegantattak shimutiagmae. Nuninai Saúlak niina nagkijin achimak wajame. ⁷ Nunik wajau ayampa niimsatakama waituk untsguki, aikmajai.

⁸ “Tusa aika ai: ‘¿Amesh yaitpa?’ tujutkui: ‘Wika Amalec aentsuitjai’, timajai. ⁹ Tai nii chichagtak: ‘Wait aneamam mantuata, jakatag takunush jamain dekapeatsjai’, timae.

¹⁰ “Tujutkui jeganta diikman ashí jaka tepakui, tsagaumainchau asamtai maamjai. Dutikan atsejutaijin* patakumtaijjai jujukin juwi itajai, apujuh”, tiuwai.

¹¹ Nuna David antuk wake besemag dekapeak jáanchjin japiki ichigkui, tuja tikich aents niijai batsatushkam jáanchjin japiki ichigkajui.

¹² Nunikag Saúl niina uchiji Jonatánjai jakau asamtai, buutuinak wake besemag batsatu. Tuja nuigtushkam Tuke Pujun suntaji Israel aents aidau jinawagbaun anentaimitusag buutuידau. Nuninak yujumka yutsuk ijagmawag batsataig etsa akaikiuwai. ¹³ Nuna nagkankag, David nunú aents chichama etsejak taun iniak:

“¿Amesh tuwiyampaitpa?” tau.

Tama nii ayaak:

* **1:10** “Atsejutaiji” tawa nunak, wainka atsejutai aina nuna taku tatsui. Duka apu “atsejutai corona tutai oro najanamu aajakua” nuna taku tawai.

“Wika Amalec aentsuitjai, nuniyatkun Israel aents aidaujai pujajai”, tau.

¹⁴ Tutai David senchi utsumak chichajak:

“¿Amesh wajuakeakmea ishamtsukesh Tuke Pujuu apu ati tusa etegkamush Saúlash maamume?” tau.

¹⁵ Tusa tamawaik, niina aentsji aidanmayan makichik untsuka itan, anú aents maata tusa inajui. Tusa tima mauwai. ¹⁶ Dutika mautai David chichaak:

“Tuke Pujuu apu ati tusa etegkamu maamujum etsegtuma wekaesam, jutika maam amé. Amek amina utugchatjuminig mantamname”, tiuwai.

Saúl Jonatággjai jakamtai buutuinak wake besemag batsamsagbau

¹⁷ Saúl niina uchiji Jonatággjai jakamunum David wake besemag pujus kantamauwai. ¹⁸ Nunú kantamtain ashí Judá wegantunmaya aidau jintintuatajum tusa inamjauwai. Duka papii Jasher† tutainum agagbau aajakui. Duka aatus tawai:

¹⁹ “¡Israel aents aidauwah,
“Amina imanjumea nunú mujanum tsainkae!
¡Wajukaya aents wajiú
aidaush imanikash jinawaje!

²⁰ Nunú pachisjum yaakat
Gadnum etsegkaigpajum,
tuja yaakat Ascalógnumashkam etsegkaigpajum,
nuna antukag filiteo nuwa
pegkegchaun takau aina
nunú, shiig aneenak nantsemawainum.

²¹ “Guilboa mujajiya nuwig,
ataktu awagkig yumik yutugchatnai,
nuigtush sajattanakesh sajatkashtinai.
Tuja nunú mujanmak aents aidauk ataktuk
jinashtin ainawai, wagki nunú mujanum
Israel aents wajiú aidan makichikish
ayamjumamainchau ijinawaja nuadui.
Israel aents aidan
wajiujig nunú mujanum megkaekae.

Nunú mujanum Saúla maaniaku ejamataiji‡
winchamtin aajakua duka bushapaje.

²² Saúla puyagjig, Jonatággka puyagjijai
shiwag dekas wajiú aidan numpen
wiyajijai maatug waketin ayi.

²³ ¡Saúlak Jonatággjai mina kumpag
shiig aneetaig ainawai!
¡Ukukuin nagkaesau amaimainchau,
leónka senchijin nagkaesau ainawai!
Iwaku pujusash kanakchajua nunisag
jainakush mai jakaje.

²⁴ “Israel nuwa aidauwah,

† 1:18 “Jasher” tawa nunak, “pegkeg” taku tawai. Tuja aents pegkeg aidan maaniau aina nuna daajinak nunú papiinum agatkamu aajakui. ‡ 1:21 “Maaniaku ejamataiji” tawa nunak “escudon” taku tawai.

atumek jáanch shiig pegkeg
yamakaitkau lino apagbaun,
nuigtu nugkutai orojai najanamun
Saúl amasmatai, nugku ayujum nunú
anentaimtusjum buuttajum.

²⁵ ¡Chah, aents kakajam aidaush wajukaya
imanikash maaniamunmash jinawaje!
¡Jonatágnashkam mujanum maawaje!

²⁶ Jonatághkah, amek mina
yatsugjai betek ayume.
Nuadui amini anentaimkun,
¡Shiig senchi wake besemag dekapeajai!
¡Ame minak shiig kuitamjukuitme!
¡Wi anentaimsamak,
ame mina kuitamjukuitam duka
nuwa anenken nagkaesauwai!

²⁷ ¡Chah, aents kakajam aidaush wajukaya
imanikash maaniamunmash jinawaje!
¡Shiwag aidau, iinia suntag
maanitan yacha aidaun amukaje!”

Tusa David juna aatus kantamauwai.

2

David Judá wegantu aidaun apuji wajasbau

¹ Saúl Jonatághjai jakamtai, David ditan eme anentus kantamjuawa nunú
nagkaemakmatai pujus Tuke Pujun iniak:

“¿Tuke Pujuwah, wi mina aentsug aidaujai filisteo nugken pujag
nunash, Judá wegantu aidaun yaaktajinish pujumainchaukaitag?” tau.

Tutai Tuke Pujuu ayaak:
“Ehe, wemainaitme” tiuwai.
Tama David iniak:

“Tujash ¿tuu yaaktanum wemainaitja?” tau.
Tutai Tuke Pujuu ayaak:

“Yaakat Hebrón wetá”, tiuwai.

² Tusa tima David niina nuwe jimag; Ahinóam yaakat Jezreelnumia
aajakua nuna, Abigail waje Nabala nuwe yaakat Carmel pujujukua nujai
mai juki weuwai. ³ Nunik wegak nuigtushkam niina kumpaji suntag
aidau patayi aidaujai yajuakui. Nunik yaakat Hebrón jegawag, nuna
yantamen tikich yaakat ayaunum nuwi batsamsauwai.

⁴ Nuwi pujuttaman Judá wegantu aidau ujumak kautuawag, aceiten juki
Davitan buuknum nijakag apu adaikajui. Davitak Judá wegantu aajakui.
Apu adaikam pujai, Galaad nugkanum yaakat Jabes batsamin aidau
Saúla iyashin juki ukusaje tabaun dekauwai. ⁵ Nunik dekaa ujumak
aents chichama etsejin aidau akateg ishiakui. Nunú jegawag chichama
etsejuinak:

“Aatus apu David tawai: ‘Atumek Saúl wait anentuidau asajum niina
iyashi jukijum ukusu asagmin, Tuke Pujuu pegkegnum yumigsatnume.
Nunú dutikaujum duka dekas shiig pegkeg aikaugme. Atumek dekas
pegkeg ainagme. ⁶ Nuigtushkam Tuke Pujuu wait anenjamak makichkish
kajimatjamtsuk kuitamjamkatnume tajai. Tuja wishakam atum pegkeg
dutikau asagmin shiig kuitamkattajime. ⁷ Nuadui ichichmamajum wajuu

wajastajum, wagki atumi apuji Saúl jakau ataish Judá wegantu aidau mina apu adaitukaju asamtai, wi yamaik atumi apujig atatajai' tujamui", tiuwai.

5

David ashí Israel aents aidau apuji adaikamu (1 Cr. 11.1-3)

¹ Davitak apu adaikam yaakat Hebrón pujai, makichik tsawantai Israel wegantu aidau apuji aidau nijai chichasagtatus shimutkajui. Nunik jegajuawag chichajuinak:

"Jutii aidautik ametam nunú wegantu ainaji, ² Israel aents aidauk Saúl apu pujaig amina chichamjumin antugtamas maaniawag waketug kaunianme. Tuja Tuke Pujuushkam aminak Israel aents aidau apuji wajasa ditan kuitamkati tusa tujabiuwai", tiajui.

³ Nuna tusag Hebrógnum ashí Israel wegantu apuji múun aidau Davidjai chichasajui. Nunikagmatai David ditajai Tuke Pujuu daajin chichaman umikui. Dutikamtai dita Davitan aceiteyai buuknum nijakag Israel aents aidau apuji emajui.

⁴ Davitak apu wajas inamtanak treinta mijanji ajamu asa nagkamauwai. Tuja ashí ijumjamak cuarenta mijan inamjauwai. ⁵ Judá wegantu aidau apuji wajasag yaakat Hebrógnum pujus siete mijan nuigtu jimaituk inamjauwai. Untsu ashí Israel aents aidau apuji wajas yaakat Jerusalén pujus treinta y tres mijan inamjauwai.

David maania depetmak yaakat Jerusalégkan jukimu (1 Cr. 11.4-9)

⁶ Apu adaikam pujus David niina aentsji aidau yajuak, nunú nugkanum Jebús aents aidau yaakat Jerusalén batsatu asamtai, maaniatatus shiyakajui. Jebús aents aidauk Davitak niina aentsji aidaujaig yaaktanak utu-achagtatui tusa chichajuinak: "Atumek makichikish juwig wayashtatjume, atumnak aents wainmachu aidau, shutuu aidaujai depetamak awaktam-jagtatui", tuidau. ⁷ Tujash Davitak niina suntaji aidaujai depetmakag apu pujusa inamtai kakajus utumainchau Sión tutai aajakua nuna utuawajui. Dutikawag, duwi pujus nunú yaaktanak, "Davita yaaktaji" tuu adaikau ainawai. ⁸ Jebús aents aidaujai maania depetuk Jerusalégka jukittak pujusa David chichaak: "Aents wainmachu aina duke, shutuu aidaujai uwakattawai tujamainawai. Nuniakuig ima nunin aidauish itugkatjiki, yumi saetai taimua nuni utuajum kajegtajum, ditanak shiig senchi kaje-jajai", tiuwai. Nuadui makichik tibau awai: "Wainmachu aidaukesh, tuja shutuu aidaukesh Tuke Pujuu jee pegkegma nuwig wayashtin ainawai", tibau. ⁹ Duwi pujus David, niina nuwe aidau, uchiji aidau, suntaja apuji aidau aatus nuwí wayawag batsamsajui. Nuwi pujus nuna yaakta daajin "Davita yaaktaji" adaikauwai. Dutika duwi pujus niina aentsji aidau yaakat peejatatum tusa inajui. Tusa timatai nain wajajunum nagkama pegkeg jukiag apu David pujusa inamtaijin inagnakajui.

Apu Hiram niina aentsji aidau Davitan ishikamu

¹⁰ Davidnak Tuke Pujuu ashí senchigtina nunú yaijakui. Dutikamu asa Davitak kashi kashinig nuni nagkaemas tikich aidau nagkaesau wajas wegau. ¹¹ Nuadui yaakat Tironmaya apu, nigki wee chichamainun, dekasa niina aentsji tikich nugkanum apu chichamen etsegkatin adaikamu aidau Davitan ishikauwai. Dutikak nuigtushkam aents numi dakaja jegamin aidau, kaya pakama jegamin aidaujai ishikauwai. Dutikak setug dakagbau aidauishkam ishikauwai. Nujai David pujusa inamjatnun

jegamjukajui. ¹² Dutikawagmatai David anentaimas: “Dekas Tuke Pujuwap Israel aents aidaun apuji ati tujutne. Nii Israel aents aidaun aneau asampap mina yainkui tikich aidaun nagkaesau wajasja”, tiuwai.

Davitan tikich uchiji aidaun

¹³ David Hebrón pujau Jerusalén jegá pujus, nuwiya nuwa aidaun nuwatjauwai. Nuigtushkam ikaa nuwe aidaun nuwatjauwai. Nunú nuwa aidaunum uchijin, nawanjin aatus kuashat akigkui. ¹⁴ Tuja niina uchiji aishmag Jerusalégnun akiinkau aidauk: Shamúa, Shobab, Natán, Salomón, ¹⁵ Ibhah, Elishúa, Nefeg, Jaffa, ¹⁶ Elishama, Eliada, Elifelet aatus aajakui.

David filisteo aents aidaun depetuk ijinamu

¹⁷ Davitan Israel aents aidaun apuji adaikaje tabaun filisteo aidaun antukajui. Nunikag suntag aidaun niina egainak shimutkajui. Nuna David dekaa niina suntaji aidaun kaya múun waa aidaunum nii uumka uwemtaijin weuwai. ¹⁸ Nunik weu ai, filisteo aidaun muja nagkatkamu paka wegaju Refaim tutainum kautuawajui. ¹⁹ Nunikagmatai nuna pachis David Tuke Pujun iniak:

“¿Filisteo aidaun kauna nunash jetemainkaitag? tuja wi jeteakuish ¿yainkattamek?” tiuwai.

Tusa iniam Tuke Pujuu ayaak:

“Ehe, amina suntajum aidaun jetekta, wi atumnak yaigtatjime depet-maktinme tusan”, tiuwai.

²⁰ Tusa tima David niina suntaji aidaun shimutuk Baal-perazim* jegawajui. Nunik nuwi filisteo aidaun maaniawag depetkajui. Dutika chichaak: “Shiwag minidaun Tuke Pujuu namak chichigmajai betek tajaka utsagke”, tiuwai. Nuna tusa nunú nugka daajin Baal-perazim adaikauwai. ²¹ Tuja filisteo aidaun pisainak dita apajuimtaiji aidaun utsag ukukiajui. Dutikamun David niina suntaji aidaun yajuakajui.

²² Nunik pisaju ataktu waketug Refaimnum kaunak batsamsajui. ²³ Nuninai David ataktu awagki Apajuin iniasui. Tusa iniam Apajuí ayaak: “Igku jetetsuk tenteajum ukunum jetektajum. Tuja numi bálsamo ijuna nuwi jegakjum, ²⁴ nuna titiji aidaunum aents waka wekaebau wajukama imatu antuktatjume. Nuniakjum pisajajum jetektajum, wagki nunak wi emkan filisteo aidaun ijinatasan wetatjai”, tiuwai.

²⁵ Tusa tima David Tuke Pujuu tibaunak imatiksag umikui. Aatus David filisteo aidaun depetuk yaakat Gabaón nagkama iji ijinkawa yaakat Guézer jegauwai.

6

Chicham umiktin arcanum egketun David juki Jerusalén ematag tibau

¹ David Israel aents tres mil suntag maanitan yacha aidaun etegkeg ijumjauwai. ² Dutika nuna yajuak Jerusalén pujau jinki, Quirit-jearim tikich daaji Baalá tutai Judá nugkanum aajakua nuwi weuwai. Nunak arcan juki Jerusalén ejegatag tusa wegak nunikui. Tuja Israel aents aidaun Apajuí ashí senchigtina nuna emematin aina nuna chichame umiktin agagbau egkeamun arcan tapajiya duka Tuke Pujun pujusa inamtaijijai betek tumain jimag querubin dakumkamu aajakui, nuna David niina yaaktajin ejegatag tiuwai.

* **5:20** “Baal-perazim” tawa nunak, “Apajuí tajaka ajapae” taku tawai.

³ Nunik wea weakua muja yaigchi naintin Abinadab pujujukua nuwi wakajui. Nunikag arcan jukiag yamajam carreta najanamunum egkeawag jukiajui. ⁴ Dutikawag buey carretan japiki wetai Abinadapan uchiji jimag, Uzá, Ahíojai pataetukajui. Nunikag, Ahío eemak wetai, Uzá ukuunum wegau.

⁵ Dutika juki emainai David ashí Israel aents aidaujai eemak wenak arpan, panderetan, tampujan, platillo aidaun aatus awatuinak, nuigtu pigkuin umpuinak nantsemkiag shimuidau. ⁶ Nuninai chicham umiktin agagbau egketun arcan carretanum egkejag buey japikmatai emaidau. Tuja Nacón trigon ijumajakua nuwi jegainai, buey winchainag iyaak carretan ayantai, arca iyajai tusa Uzá arcan achikui. ⁷ Dutika achikmatai Tuke Pujuu niina shiig senchi kajegkauwai. Nuadui arcanum ayaumas jaka iyantui.

⁸ Dutika Tuke Pujuu Uzán maamtai, David wake besemag dekapjauwai. Nuadui nunú nugka daajin Perez-Uzá adaikauwai. Duka yamaikish tuu daagtinai. Nunak Apajui Uzán kajujuk maamu taku tawai. ⁹ Tuja David Tuke Pujuu senchi ishamak chichaak: “¡Chicham umiktin agagbau arcanum egketa nunak wika mina yaaktajuig jukishtajai!” tiuwai.

¹⁰ Nuna tusa Gadnumia aents Obek-edom aajakua nuna jeen ejegatajum tusa tiuwai. ¹¹ Tusa timatai imatiksag umikajui. Nuadui Obed-edoma jeen kampatum nantu asauwai. Imaan nantu asauwa nunak imatiksag Tuke Pujuu Obed-edomnak niina patayi aidaujai pegkegnum yaigkui.

David arcan juki Jerusalén ejegamu

¹² Obed-edoma jeen arca au asamtai, niina patayi aidaujaí Tuke Pujuu pegkegnum yaigke tusa Davitan ujakajui.

Tusa ujakam David arcan utitatus weuwai. Nunik shiig aneas arcan juki Jerusalén ejegauwai. ¹³ Nunú arcan yanaki jukiag machik kuwagainaig David makichik toro duwegman uwig tsakatjai maa apeak Tuke Pujuu emematiuwai.

¹⁴ Dutika Tuke Pujuu emematak jáanch lino apagbaun sacerdote nugkutain nugkuja shiig senchi natsemki wegau. ¹⁵ Nunitai ashí Israel aents aidauk arcan juki wedaun saetus shimuinak, Davidjai betek shiig aneenak untsumai tikich aidau uwija kachujin umpuidaush aidau.

¹⁶ Arcan Jerusalén ejegawagmatai, Davita nuwe Mical Saúla nawanji, jeganum niimtai ujaimunum tsapui wajas niimkama arcan juki weagtai, nuna emtin apu David wesa Tuke Pujuu emematak senchi tsekeak nantsemki wegau wainak senchi kajegkauwai.

¹⁷ Dutika ejegawag nunú arca asatnun David emtika inamjamtai aakmakbaunum nuwi awayawajui. Dutikawagmatai David ajak juukbau aidaun Tuke Pujuu anentag susauwai. Tuja nuigtushkam kuntinun maa nuna nejen ashí apeak Tuke Pujuu emematiuwai, nii ayamjuk agkanmitkamu asa. ¹⁸ Dutika Tuke Pujuu ememati ashimak ashí Israel aents aidaun chichajak: “Tuke Pujuu ashí senchigtina nunú tuké pegkegnum yaimpaktin atinme”, tuu yumigjauwai. ¹⁹ Nuna tusa ashí Israel aents aishmag aidau, nuwa aidau aatus nuwi batsatunak pagkan, nuigtu makichik torta yujág dátíl tutaijai najanamun, nuigtu uva ekaejamun aatus maki makichik tinamkauwai. Dutika tinamkam nuna jukiag ditá jeen waketajui.

²⁰ Nunikagmatai Davidchakam niina jeen niina nuwe, uchiji aidaujai batsatun pegkegnum yumigsatatus weuwai. Nunik jeganmtai niina nuwe Saúla nawanji Mical jiinki igkug chichajak:

“¡Yamai tsawanta duwi amek yajau iwainmamkachume! ¡Amek apu tu-saikish eme anentsa diimainchau amina inakem nuwa aidau datsanmain pujutajum inaktu wekaeme!” tiuwai.

²¹ Tama David ayaak:

“Dekas tame, nunak dekas nantsemamjai. ¡Tujash wika nunak Tuke Pujuu amina apan amina pataim aidaujai kajejuk idayak, mina Israel aents aidaun apuji ati tusa etegtuawa nuna emematkun nunikmajai! Nuadui wika ame tujutkuminish, Tuke Pujun emematkun tuke nantsemtatjai.

²² Tuja ame diisam pegkegchaun nuniag nunak, aan nagkaemasan nuniktatjai. Ame inak aidau pachisam tame duka, wisha wagkanuk aniaja nuna shiig dekawag eme anenjusatui”, tiuwai.

²³ Tuja Micalak Apajui suwimak susamu asa makichkish uchigmachu aajakui.

7

Apajui Davidjai chichaman umikbau

¹ David apu wajasmatai niina shiwaaji aidaujai chichaman epegkea maanitsuk agkan nii inamtaijin pujusa shiig takasti tusa Tuke Pujuu yaigkui. ² Dutikam pujus, makichik tsawantai profeta Natágkan chichajak:

“Wika jega setug dakaja jegamkamunum shiig pujajai. Tujash chicham umiktinun Apajui amasua duka aakchinum awa nunú ameshkam dekame”, tiuwai.

³ Tusa tama Natán ayaak:

“Kame ame wajuk anentaime duka betek umikta, wagki aminak Tuke Pujuu ashí yaimpawai”, tiuwai.

⁴ Tusa tiu ai, nunú kashia duik Tuke Pujuu Natágkan chichajak:

⁵ “Mina inakeg David jegajua chichagkum: ‘Amek wi pujustinuk jegamkashatme’, tusa Tuke Pujuu tujamui tusam ujakta. ⁶ Tuja wika Israel aents aidau Egipto nugkanum batsatun jiijuitag duwi nagkamsan yamaikish jega pegkeg setug dakaja múun jegamkamunmak pujatsjai. Wika yaunchuk nagkamsan aakchinum puja pujakuan imajui tauwaitjai.

⁷ Yaunchuk nagkamsan ditajai wekaesauwaitag duikish wika mina aentsug Israel aents aidaun apuji atinun adajauwaitag nunak, setug pegkeg dakagjum jega múun jegamjutkatajum nuwi pujustajai tusanuk segachu ainajai.

⁸ “Nuadui yamai wi taja nunú mina inakeg David aatus Tuke Pujuu ashí senchigtina nunú tujamui tusam ujakta: ‘Amek uwig kuitamku pujaumin, wi aminak jukin Israel mina aentsug aina nuna apuji ati tusan adaikamjame. ⁹ Dutikau asan ame tuwi wekaeyume nuniakminish, wi aminak kuitamkauwaitjame. Tuja amina shiwaajum aidau jetepainakuish, amina ayamjakun ijinawabaijai. Wi aminak tikich aents eme anentsa diitai aina iman eme anentsa diitai awajsajame.

¹⁰ “Nuigtushkam mina aentsug Israel aents aidau batsamsatnun nugkan etegkajai. Dutikan nuwi batsasagjai. Nuadui yaunchuk shiwag aidau, kasa aidaujai waitkajaku aina dutika waitkamak achagtina. ¹¹ Tujash amek yamaik amina shiwaajum aidaujaig maanitsuk agkan pujustatme. Nuigtushkam amina uchijum wegantu aidaunmaya Israel aents aidaun apuji atinai.

¹² “Unsu ame jakamin uchijum aina nuwiyam makichik etegkan apu adaikattajai. ¹³ Dutika ai, nunú wi pujustinnak jegamjutkatnai. Tuja ame wegantunmayan apu atinun tuke adaitinaitjai. ¹⁴ Wi niina apaji

atatjai, untsu nii mina uchig atatu. Nuadui makichik múun uchiji pegkegchaun takatai, suwimka suwama numamtuk wi niinak suwimkan susatnaitjai. ¹⁵ Tujash Saúlan wi apu adaikau ayatkun, niina ajapeakun amina apu emauwaitjam numamtuk, amina atankinuk tikich aentsnak apu adaikashtinaitjai.

¹⁶ “‘Ame wegantu aidaunak wi kuitamkatnaitjai, nuwiyán makichik mina aentsug aidaun apuji atinun tuke etegkan adaitinaitjai’ tujamui tusam David ujakta”, tusa Apajuí Natágkan akatjauwai.

¹⁷ Tusa akatjam Apajuí tibaunak imatiksag nii wainkamujai ashí betek Natán Davitan ujakui. ¹⁸ Nuna antuk David Tuke Pujuuai chichastatus arca pujaunum wayauwai. Nunik Apajuíjai chichaak:

“Apuh, Tuke Pujuuwah, wika tikima wainkauchitjai. Tuja mina pataag aidaushkam tikima wainkauch ainawai. Nuadui wika apu atajai tumamaittujai. ¹⁹ Tuke Pujuuwah, wika wainkauchitag nunin aig, amina uchijum wegantu aidau apu agtinai tusam anagtame. ¡Ame yaijatnaitam imanuk tikichik atsawai! ²⁰ Tuke Pujuuwah, wi amina tumainuk makichkish atsugtawai, wagki wika amina inakmetjai. Nuadui ame minak shiig dekgeme.

²¹ “Juju pegkeg midau agtin, mina uchigdau agtinjai pachisam tujutam duka ame wakegamu umiktin asam tujutme. Nuadui wika dekaskeap umiktatua tajame. ²² Tuke Pujuuwah, jamek dekas shiig múuntaitme! Yaunchuk iina muunji aajaku aidau ujpayanum nunú yamai dekas ii antaji, wagki tikichik amejai betek amainuk makichkish atsawai. Tuja wainka apajuímtai aina dukesh amea ibauk makichkish atsawai. ²³ Tuja amina aentsjum Israel aents aina nujai betek amainuk tikich aents aidauk juju nugkanmak atsawai. Israel aents aidauk ame ayamjukam agkanmitkauwaitme.

“Tikich aents aidau nagkaesau dita ayamjakum ishain wainchatai aidau iwainajutme. Dutikakum iish wainjinig iina shiwaaji aidau ijinauwaitme. ²⁴ Wagki Israel aents aidauk tuké amina aentsjum atin atinme tusam tiuwaitme. Tuja ame atinaitme Tuke Pujuu ditan Apajuí.

²⁵ “Tuja wi amina inakmetag nunú yamai ame anagtam duka, tuke Pujuu Apajuíyah, kajimatkitin aipa. Tuja mina uchig wegantu aidaushkam apu agtin atinme. Ame tame duka tuke umiktin ata.

²⁶ “¡Amina daagminak ashí nugkanmaya aidau emamattin atinme! ¡Nuninak, Israel aents aidaun Apajuíjiyai dekas ashí senchigtina duka titin atinme!

“¡Wi amina inakmetag nuna uchiji wegantu aidauk ame yayasam tuke apu agtin atinme!

²⁷ “Tuke Pujuuwah, ame ashí senchigtinun anagtakum mina uchig wegantu aidauk tuké apu wegagtinai tujutiu asamin, wika amina inakem ayatkun juna pachisan segajame.

²⁸ “Tuke Pujuu Apajuíyah, amek Apajuí dekaskenum chichauwaitme. Wika amina inakem aig, amina anenkagmin ibau múun anagtame.

²⁹ Nuadui segajame wait aneamam mina uchig wegantu aidau pegkegnun yumigtugkum, ajumaish tuke kuitamjutkatin ata. Amek Tuke Pujuu Apajuí asam dekaskenum chichauwaitme. Nuadui, ame yayamu asag ditak tikich aidaun nagkaesau agtinai. Nuninak amina umigtamkatin ainawai”, tiuwai David.

David wegantu aidau Israel aents aidaun apuji namkagbau

9

(9—20)

David Mefi-boshetan wait anentug kuitamkamu

¹ Makichik tsawantai David iniimak: “¿Wi Jonatágjai chichama umikuitag, nuna umiakun kuitamainush Saúla uchiji wegantush makichikesh iwaku pujaush atsawash?” tau. ² Tutai nuwiya makichik aents chichajak: “Saúl wegantu makichik inak Sibá daagtin pujawai”, tau. Tutai David niina chichajak: “Untsukta taati”, tiuwai. Tusa tima untsukam Sibá taamtai apu David iniak:

“¿Amekaitam Sibá?” tama nii ayaak:

“Ehe, witjai, ame tabaun umiktasan taajai apuh”, tau.

³ Tutai apu David ayaak:

“Wi Apajuí daajin wait anenmainush Saúla uchiji wegantunmayash ¿makichkiuchikesh iwakush pujatsuak?” tau.

Tutai Sibá ayaak:

“Jonatágka uchiji makichik, naween mai beseju wekaechau pujawai”, tau.

⁴ Tutai nii ayaak:

“¿Tuwi dusha pujawa?” tau. Tama:

“Duka yaakat Lodebar* Amielan uchiji Maquira jeen pujawai”, tiuwai.

⁵ Timatai apu David nunú weji utitajum tusa inamjauwai.

⁶ Tusa tima wejiag itawajui. Dutikam Mefi-boshet Davita emtin niina eme anentus tsuntsuma pujusui. Nunikmatai David senchi untsuak:

“¡Mefi-boshet!” tiuwai. Tusa tama nii ayaak:

“Ame tabaun umiktasan juwi pujajai”, tiuwai.

⁷ Timatai David chichajak:

“Ishamkagtukaipa, wi amina apajai shiig wainijaku asan aminak shiig kuitamkattagme. Tuja amina apachjum Saúl aajakua nuna nugke aina nunak awagtugmaktinme titatjai. Tuja amek wijai ekemsam mesanum yujumak tuké yutinaitme”, tiuwai.

⁸ Tusa tama Mefi-boshet tsuntsuma pujus chichaak:

“Wika amina inakem shiig wainkauchitjai, nunin aish ¿wagka minash waitash anenjame? Wika yawá jakaujai betekaitjai”, tiuwai.

⁹ Tusa tutaishkam Sibá yaunchuk Saúlan inake aajakua nuna apu untsuka chichajak:

“Amina apujum Saúla wajiji aidaunak, niina uchijinu aidaujai ashí niina tijajin susajai. ¹⁰ Dutikamu asamtai, ame, amina uchijum aidau, tsakatkem aidau aatus nunú nugkanum niinu atin takagsattagme, dutikakum ajak juukam ijumtatme. Dutikawamin nuna amina apujum Saúl aajakua nuna patayi aidau yuwawagtatui. Untsu Mefi-boshet Saúla tijajiya duka wijai mesanum tuke yutatui”, tiuwai.

Tusa timatai Sibá quince uchigtin, nuigtu veinte inake aajakua nunú, ¹¹ apu Davitan chichajak:

“Apuh, ame tame nunak imatiksasuk umiktajai”, tiuwai.

Tuja Mefi-boshet apu uchijiskait tumain sillanum ekemas mesanum yuujaku.

* 9:4 “Lodebar”: Juju yaaktak namak Jordágnum etsa akaetaiya nuni Manasésa nugken aajakui.

¹² Duwi nagkamas Sibá jeen batsataidauk Mefi-boshetan ashí takajujaku ainawai. Mefi-boshetan uchijig Micaías daagtin makichik aajakui. ¹³ Mefi-boshetak naween mai beseju wekaechau asa Jerusalén pujujakui, wagki apu Davidjai ekemas tuké yujumkan yuu asa.

11

David Betsabéjai pachisa augmattsamu

¹ Tsawan numi aidau yagkujut jegamunum apu aidau ditá suntaji aidaujai ijunag shiyakag shiwaaji aidaujai maanin asag, David suntaja apuji Joab aajakua nuna niina atuwe aidaujai, nuigtu ashí suntag aidaujai maaniatajum tusa awemauwai. Dutikam shiyakag Amón aents aidau yaakat Rabá batsatun jetekag depetuk amukajui. Untsu Davitak wetsuk Jerusalén juwakui.

² Nunik pujau makichik tsawantai agkuantai David pegakjin ayamak tepau, nantaki wajas niimsatatus yakí wakauwai. Nuwi wajas niimkama makichik nuwa shigmauch wajakin niina agájin maak pujuttaman wainkauwai. ³ Nunik wainak niina inake aidaun, aush nuwash yakita inimsatajum tusa ishiakui. Tusa ishiakbau waketug kauna niina ujainak: “Au nuwa daajig Betsabé Eliama nawanji, hitita aents Uríasu nuwegai”, tiajui.

⁴ Tusa tiagmatai itagtuatajum tusa David inanjauwai. Tusa timatai weji jukiag itajuawajui. Dutikawagmatai David nijai kanajui. Nunik Betsabék niina jeen wakitkiuwai. Davitjai kanajua nunak nuwauch jau aina nuna tsawantan ejeyi nagkaanak tuke nunin asag mai uminak pujus nunikui.

⁵ Nunik ejajuk Davitan chichaman akuptukui. ⁶ Nuna David dekaa, Urías akuptugkata tusa Joapan tiuwai. Tusa tima akupkauwai.

⁷ Urías jegamtai apu David Joapan pachis, suntag aidaun pachis, wajuk pujuagmae tusa iniasui. Tuja nuigtushkam amonitajai maaniamush wajuk amae tusa nunashkam iniasui. ⁸ Nuna ashí inias dekjua, yamai jemin weme dawem dijajam ayamsata tusa awemauwai.

Dutikam jiinki wegaig yutai shiig pegkeg umikbaun Urías susatajum tusa apu David niina inaken awemauwai. ⁹ Tujash Uríasak niina jenig wetsuk, suntag apu pujusa inamtain waitiji aidaun kuitamin batsatunum nuwi ditajai pujus tsawajui.

¹⁰ Nunikmatai Uríasak niina jenig wakitkichmae tusa Davitan ujakajui. Nuna David dekaa, untuka itatajum tima itawagmatai iniak:

“Atushat wekagum tauwaitkumesh ¿wagka jeminish wechamume?” tau.

¹¹ Tama nii ayaak:

“Chicham umiktin agagbau arcanum egketa duka, suntag Israel aents aidau, Judá wegantu aidau, aatus ikam aak aakmakbaunum batsatui. Tuja Joab mina apujua dushakam suntaja apuji amina aentsjum aina nujai ikam juga atsaunum kanuinawai. Dita núninaish wisha ¿wagkanuk mina jegajui wayanush, yujumka yuwan, umutain uwajan, nuigtu mina duwagjaish kanush tepetja? ¡Wika makichkish nunimait Sujai, junak dekasenum tajame!” tiuwai.

¹² Tutai David chichajak:

“Kame yamaik juwi juwakta nunikam kashin wetá”, tiuwai. Tusa tima niina jenig wetsuk Jerusalégnum kanag tsawajui. Nunikmatai kashinia duwi, ¹³ David ipauwai nijai yujumkan yuwa umutain uwagtatus. Dutika ipaa ama amakua enamkauwai. Tuja kiyaju asantai, Uríasak jiinki

niina jenig wetsuk, suntag apu kuitamin aidau kajiamunum nuwi kanag tsawajui.

¹⁴ Nunikmatai kashinia duwi kashikmas David papii agag Joab susata tusa Uríasan susa akupkauwai. ¹⁵ Nunú papii agagbaunum chichaak: “Maaniakjumek dekas ishamainnum Urías emtikatajum, dutikajum nigki ukuktajum shiwag aidau maatnume”, tuu agagbau aajakui.

¹⁶ Nuna Joab jukiu asa shiwag aidau tenteawajui, dutikawag suntag maanitan shiig yacha aidau batsatbaunmanini nuna nii dekau asa, Uríasan nuni awemauwai. ¹⁷ Tuja shiwag aidauk dita yaaktajin ayamjuinak yaaktanum batsamsag, Israel aents aidaujai maaninayatak agá jijnajui. Nunikag maaniamunum Davita suntaji aidau ditá apuji aidaujai jinawwai, tuja nuwi Uríaschakam jakauwai.

¹⁸ Nunikmatai Joab nuna pachis Davitan papiiin agatug akuptukui ¹⁹ Nuna papiiin juki wegaun akateak:

“Ii maaniag nunú pachisam ashí apu ujakta. ²⁰ Namputchawame nunú tusa ujamin nuna antuk kajeka inimpak: ‘¿Wagka amonita aidau yaaktaji jeteakjumesh, senchish yunumtukmaugme? ¿Atum dekatsjumek, shiwag aidau yaakat peejamunum waka ijunas flechan akenin aina nunú! ²¹ Tuja yaakat Tebésnum makichik nuwa yaki waka wajas kayan nagkima Abimelec Jerubaal aajakua nuna uchijin mauwai. Nunú dekau asajum yaakat imatika yunumtumainchau yunumtukugme’, tujamkuig, ame ayaakum: ‘Amina suntajum aina nuna apuji aidau jinawaja nujai betek Uríaschakam jakame’ tita”, tiuwai.

²² Tusa akatjam jinki weuwai, nunik jegá, Joab akatmamjamunak imajtiksag ashí Davitan ujakui. Nuna antuk David Joapan shiig senchi kajekkauwai. Nunik chichama etsegnun chichajak:

“¿Wagka yaakat jeteakjumesh, imanikjumesh yunutukmaugme? ¿Atum dekatsjumek au aents aina duka yaunchuk nuwa yaakat Tebésnumia yaakat peejamunum waka wajas, kayai nagkia tuku Jerubaal aajakua nuna uchiji Abimelekan mauwa numamtuk dita nagkimin aina nunú? Nunú dekayatkugmesh ¿wagka tujash imanikjumesh yaakat peejamush yunumtukmaugme?” tau. ²³ Tama chichama etsejin ayaak:

“Shiwag aidau jutijai maaniatatus iina nagkaetamsau shiig kuashat agá jijnjame. Tujash ii ipisja juki yaakta waitijin ejentamji. ²⁴ Dutikajin tikich suntag aidau yaakat peejamunum wakag iina suntaji aidau flehayai aketiagmae, imaniamunum ujumak suntaja apuji aidau jinawagmae, tuja Uríaschakam nuwi jakame”, tiuwai.

²⁵ Timatai David niina ayaak:

“Joab ujakta: ‘Nunú jinamunmak imanikag puyatjukaigka, kame maaniamunmak tuke bakumatia. Tujash shiig kuitamamak nuni senchi jeteka yaaktan tsaikti, tuja ame niina anentai ichichtugta’ tujamui tita”, tiuwai.

²⁶ Tuja Betsabék niina aishi Urías jakae tabaun antuk senchi buu-tiuwai. ²⁷ Nunik buutak wake besemag pujamujin nagkaankamtaí, David niina untsukui. Dutika utsagkam jegamtaí, David nii pujusa inamtaíjin awayauwai. Dutika nii nuwatkauwai. Dutikam pujus makichik Davita uchijin uchigmakui. Tujash David dutikauwa duka Tuke Pujuunak shiig awagmakchauwai.

¹ Tuke Pujuu profeta Natágkan Davitai awemauwai. Dutikam Davitan jegajua aujak:

“Makichik yaaktanum jimag aents pujujakui. Tikichia duka aajakui wiakuch, untsu tikich ujudauch aajakui. ² Nunú wiakchanuk uwig aidau, baka aidau shiig kuashat ajujakui. ³ Untsu ujudauchinuk ima makichkiuch uwig sumapakbau ajujakui. Nunak ima nigki tsakapajui. Tuja nunú uwijak niijai niina uchiji aidaujai aatus ijunag pujus tsakajui. Imatika aneasa kuitabau asa, uwijak dita yuwinamun niishkam yujakui, tuja umutnashkam dita umuinamun umujakui. Untsu kanakug dita kanamunum ayaumas kanujakui. Tuja nunú múuntak uwignak niina nawanjijai betek kuitamajakui.

⁴ “Tuja makichik tsawantai makichik aents nunú wiakchan ijagsatatus jegajuauwai. Nunikmatai, niinu uwig aidauk, baka aidauk shiig kuashat ayaig, nuna maa ijag ajamtan sujimak, ujudauchi uwigiji makichkiuch pujaun atanki maa inagkauwai, ijagkan ajamsatatus”, tiuwai.

⁵ Nuna David antuk, senchi kajeka Natágkan chichajak:

“¿Wagkag tikima nunash dutikawabi? ¡Nunú aentsuk shiig pegkegchauwai! Nuadui, Tuke Pujuu pachisan tajame: ¡Nuna dutikauwa duka dekas mantamnamainai! ⁶ Nuigtushkam nuna dutikauk cuatro uwija akiken akikmamainai, wagki aents ujudauchin wait anenjachu asa”, tiuwai.

⁷ Tusa tutai Natán ayaak:

“¡Nunú aents pegkegchauwa duka ametme! Nuadui Tuke Pujun Israel aents aidau Apajuin emematin aina nunú yamai juna aatus tujamui:

“ Wi aminak Israel aents aina nuna apuji ati tusan adaikamiagme. Tuja Saúl maawai tusanchakam ayamjukmajame. ⁸ Ame pujusa inamjat-nunash, amina apugmi nuwe aidaujai amasmajame. Nuigtushkam Israel aents aidau Judá wegantu aidaujai apuji awagsajame. Tuja wi imatikan amasuitag nunú ame diisam imanchauwaitkuig, aan kuashat amastajame timajai.

⁹ “ Tujash ¿wagka mina chichameg intimjtkimesh wi dakitamush pegkegchaush takasume? Suntag amonita aents aidau Uriasan maatnume tusam inamjaume. Dutikawamin maawagmatai, ame niina nuwe atanki-ume.

¹⁰ “ Tuja mina intimjtkim Uríasa nuwe jujukium nuadui, yamai nagkamas amina pataim aina nunak tuke puyajai mainiagtinaí, dutikamu asag kuashat waitiagtinaí. ¹¹ Amina uchijum aina duke pempeentugmakiag waitkagmasagtinaí. Tuja amina ikaa nuwem aina nuna uchijum atan-janki, amesh wainminig pan tsawai dutikati titatjai, wagki tikich aents aidau ashí dekaatnume tusan. ¹² Amek uumka takamsaume, tujash wika ashí Israel aents aidau dekainamunum tsawai pan iwainaktatjai’, tawai Tuke Pujuu”, tiuwai.

¹³ Tusa tama David Natágkan chichajak:

“Tuke Pujun pegkegchaun takagsajai”, tau.

Tutai Natán ayaak:

“Tuke Pujuu amina tudaugminak tsagkugtamjae, nuadui jakashtatme.

¹⁴ Tujash amek Tuke Pujuu tuke dushikiakum pegkegchau takamsaum duwi, amina uchijum akiina duka jakattawai”, tiuwai.

¹⁵ Nuna tusa ukuak Natán niina jeen wakitkiuwai.

Nunikmatai pujus Uríasa nuween David uchin akiauwa nuna Tuke Pujuu jatan susauwai, dutikam senchi jau. ¹⁶ Nunitai David uchi jakai

tusa Apajuín segaak, yujumkan yutsuk ijagma pegakjin kanutan dakitak, nugka tepes kanau. ¹⁷ Imanik waittai niina atuwe apu aidau jegajuawag inankitag tuidau. Dutikamash niig dakitau. Tuja ditajai ijunja yujumak yutanashkam dakitau.

¹⁸ Tujash nunú uchik siete tsawan wegak jakauwai. Nunikmatai suntaja apuji Davitan kuitamin aidau nii ujanan ishamaidau, wagki dita anentaimasag: “Uchi eke jatsaigkish ii niijai chichajinish, wake besemag dekapeau asa, ii tabaunak antugtamchama nuniaush ¿wajuk ujaktajiki uchi jakae tusaish? ¿Tusa ujamin nuna antuk nuni nagkaemas wake besemag dekapeak, pegkegchaunakesh dutikmainai!” tuidau.

¹⁹ Tusa chichaidaun David antuk, dekas uchik jakaegapi tiuwai. Tusa ditan untsuka iniak:

“¿Uchish jakachmaka?” tau. Tutai:
“Ehe, uchik jakame”, tiajui.

²⁰ Tuja siete tsawantai uchi jak tepesua nuaduik Davitak makichkish maichui, tuja kugkuinnakesh nijamkachui, nuigtush jáanch pegkegnakesh nugkutsuk pujau. Nunik pujau uchi jakae tabaun dekaa, nugka tepau nantaki mainiuwai, nunik kugkuinun nijamak jáanchin yapagmamauwai. Nunik Tuke Pujun ememattatus aak Apajuíjai chichatai aakmakbaunum wayauwai. Nunik Apajuín ememati ukuak, yujumkan sujusagmatai yuwatjai tusa niina jeen weuwai. Nunik jegantai yujumak susam yuwauwai. ²¹ Yujumkan yuwamtai inake aidau chichajuinak:

“Uchi iwaku pujusmataig aneamum yujumak yutsuk ijagma pujusam buutmaume, tuja uchi jakamtaig nantakim yujumak shiig yuwaum dusha, Apuh, amesh ¿wagka aniame?” tuidau.

²² Tiagtai David ditan ayaak:

“Uchi jak tepema nuaduik Apajuí mina wait anenjug etsagagchaintash tusan yujumka yutsuk ijagma pujusan buutmajai. ²³ Tuja yamai uchi jaka nuaduish ¿wagkanuk ijagma pujusnush buuttaja? Wika uchi ataktu tsagagti tusanuk tumaitsujai. ¿Wi jakun niijai ijunjatnaitjai! Untsu niig ataktu aneantag wijaig pujumaisui”, tiuwai.

Salomón akiinamu

²⁴ David niina uchiji Betsabéyai akiamu jakamtai, nuwe Betsabé buuttai etsagkeg ukukiuwai. Nunik pujau tikich tsawantin nuwen ijagsatatus wejiuwai. Nunik jegá niijai kanajui. Dutikam pujus ejaujuk uchi aishmagkun uchigmakui, dutikamtai David adaikauwai Salomón. Tuja nunú uchinak Tuke Pujun anejakui. ²⁵ Nuadui Tuke Pujun profeta Natágkan akateak: “David niina uchiji akiina nunak Jedidía* adaikati”, tusa tiuwai. Tusa tima David niina uchijin Jedidía adaikauwai.

13

²³⁻³⁹ Absalón aajakui Davita uchiji tikich nuwanum akiamu. Nunú niina yachin maa shiwagmaga tupikaki, Gueshur nugkanum yaakat Tecoa jegaa nuwi uumak pujusui. Nunik pujai Absalón wakitki taati tusa Joab Davitan tiuwai.

14

David niina uchiji Absalóghan tsagkujamu

²¹ Makichik tsawantai apu David Joapan chichajak:

* **12:25** “Jedidía” tawa nunak hebreo chichamnumak “Apajuín aneetai” taku tawai.

“Absalón wakitki taa pujusti tusan tajai. Nuadui weme Absalón ujakta wakitki Jerusalén taati”, tiuwai.

²² Tusa tama Joab Davitan eme anentus tsuntsuma nijayin nugka antig pujus chichaak:

“Apuh, ame mina wait anenjam nunak yamai dekas shiig dekaajai. Wi amina segabaijam nunú antugtuku asam, ame minak inatme”, tiuwai.

²³ Aatus tusa, jünki Gueshur nugkanum weuwai Absalóghan juki Jerusalén itaatatus. ²⁴ Nunik wetai Apu chichaak: “Yamaikik Absalóghak minak waitkashtatui, tutupit niina jeen weti”, tiuwai. Tusa tibau asa Absalóghak apu pujamunmak wetsuk tutupit niina jeen weuwai.

²⁵ Tuja Absalóghai ashí tikich Israel aents aidau ijumja diismash, niijai betek shigmauchik makichkish atsujakui. Absalóghak niina nawen nagkamas buukenish shiig shigmauch aajakui. ²⁶ Niig maki makichik mijan amuebaunum intashin tsupimajakui, wagki intashi tsakatai tutitag dekapeau asa. Nunú intash tsupikbau dekapamak jimag kilo nagkaesau aajakui. Duka kijin dekapatai apunu aajakua duwi dekas shiig dekapa diisbau aajakui. ²⁷ Absalógha uchijig kampatum aajakui. Untsu nawanji makichik Tamar daagtin shigmauch aajakui.

²⁸ Absalóghak Jerusalén jegauwaitak, apu David eke waitkashti tibau asa, niina waintsuk jimag mijan pujau. ²⁹ Nunik pujus makichik tsawantai Joapan untsukui, apu David ujatjukta, niijai chichastajai tusa. Tujash Joab dakitjauwai. Nunikmatai ataktushkam chichaman akuptukui. Tujash ataktushkam dakiajai.

³⁰ Nunikmatai Absalón niina inake aidaun chichajak: “Joapa ajaji cebada ajakbau mina ajagjai apatdayas awa nunú wejijum ¡apejuatajum!” tiuwai.

Tusa tima shimutkag Joapa ajajin apejuawajui. ³¹ Dutikiagtai Joab Absalógha jegajua chichajak:

“¿Wagka amina inakem aidaush mina ajagnash apenawa?” tau.

³² Tama Absalón ayaak:

“¿Wagka wisha Gueshur pujaunush juwish taamja? Dekas imaug pujumainnas miniyagtai tajai. Tau asan amina akateakun: ‘Yamai apuh, amina wainkatasan wakegajai, tuja wi pegkegchaun takamsamu akuig mantuata tajame’ tujamui tusan apu David ujatjukta tusan awematag tai, ame dakitau asamin aunak aikajai”, tiuwai.

³³ Tusa tima Joab apu Davitan ujaktatus wejiuwai. Nunik jegajua ujakam, apu David Absalóghan untsukui. Dutikam apu pujamunum jegá, apun eme anentus tsuntsuma nijayin nugka antig pujusui. Unstu apu niina kumpamak shiig anentus yapinum kugkuasui. Dutika tsagkujug ataktu ni pujusa inamtaijin awayauwai.

15

Absalón apu Davidjai shiwagmagamu

¹ Kuashat sawan nagkaemakui ai, Absalón makichik carro maanitain caballo aidaujai ikamkauwai. Dutika niina kuitamkatin aidaun cincuenta suntag yacha aidaun ijumjauwai. ² Tuja Absalóghak kashi kashinig shiig kashikmas nantaki, yaakta waitjin jintá yantamnum tuké wajau. Nuwi wajas aents aidau utugchat ajam, apu chichama epegtuajati tusa minidaun chichajak: “Atumesh tuu yaaktanmaya ainagme”, tusa iniau. Tusa iniam: “Iik Israel aents aina nunú wegantu ainaji”, tuidau. ³ Tusa tiagtai Absalón chichajak:

“Ame apu chichaman epegtujuati tusa wakegam duka dekas shiig pegkejai. Tujash apu niina aentsjin ame chicham epegkeata tusa adaikamuk shiig atsawai”, tau. ⁴ Tusa nuigtu chichaak: “iWika apu chichama epegkin ati tusa adaikamuitkunuk, utugchat ajamu wijai chichastatus minidaunak wi epegtumainaitjai!” tau.

⁵ Tusa tau asa, nuigtushkam aents niyai jegaunak, uwegnum achika kumpamak pagkuk yapinum kugkuau. ⁶ Tuja nuigtushkam aents aidau apu David chichaman iwagtujati tusa minidaunak kumpamak tuké pagkuk kugkuau. Dutikak Israel aents aidau anentainak yampagtau. Nuadui niina apajin nagkaesau Absalógan ima senchi eme anentuidau.

⁷ Tuja ipak usumat mijan pujus, Absalón apu Davitan chichajak:

“Wisha Tuke Pujun anagkuawaitag nuna umiktag tusan Hebrón wetag tajai, nunú minash wait aneam ayu tujutta. ⁸ Wi Siria nugkanum Geshur pujusan Tuke Pujun segakun: ‘Ame Jerusalén awagtukiaminig, yaakat Hebrógnum wenu kuntinu maa apeakun ememattinaitjame’ tusan tiuwaitag nuna umiktag tajai”, tiuwai.

⁹ Tusa tutai apu ayaak: “Ayu, wetá”, tiuwai. Tusa tima Absalón yaakat Hebrógnum weuwai. ¹⁰ Tujash Hebrón eke wetsuk chichama etsejin aidau akateg Israel aents wegantu aidau batsatunum ishimak, uwija kachuji umpuamun antuinakug: “Absalógan yamaik Hebrógnum iina apuji atinun adaikaje tusa unsumkatnume”, tiuwai. ¹¹ Tusa ishimak nuigtushkam Jerusalégnunim doscientos aents nii Hebrón wetai uyuntsatin aidau ipauwai, dutikam nii chicham umiamunak dekachu asag nijai shiyakajui.

¹² Tuja nuigtushkam, wi Apajuín emematkun kuntinun maan apetai uyuntusti tusa Davita chichajin apu aidaumayan makichik Ahitófel daagtinun niina yaaktaji Guilo aajakua nuwi pujaun untsukui. Dutika untsukam Ahitófel Absalógjai weuwai. Nuadui Israel aents aidauk nuni kuashat Absalógjai ijunaidau. Nunidau asag shiig kuashat wajasajui.

David Jerusalén pujau tupikakbau

¹³ Makichik aents chichama etsejin Davitan wejiuwai, Israel aents aidau Absalógjai ijunjaje nuninak aminak shiwagmatjamainawai tusa ujaktatus. ¹⁴ Dutika ujakam David suntaja apuji niinu aidau Jerusalén batsatun chichajak:

“iYamaikiuchia duwik wamak pisajagmi, nuniatsjinig Absalón mantain ainaji! iWamak umintsatajum pisajagmi nuniatsjinig Absalón niina aentsji aidaujai amaintamak ashí Jerusalégnun batsatutinak amupamain ainawai!” tiuwai.

¹⁵ Tusa tutai, apu Davita chichajuinak:

“Apuh, iik ame tabau umiktasa umintsa dakamji”, tuidau.

¹⁶ Tusa tiagmatai apu niina ikaa nuwe aidau dieza imajin nii pujusa inamtaijin batsaak, nuwi ashí aents batsatu aidaujai jinkiuwai. ¹⁷ Nunik jiinki ashí niina uyunaidaujai yaakat nagkatkamunum jega pujaunum nuna yantamen ijunjajui. ¹⁸ Nunikag ashí suntaja apuji aidauk niina ejapeawajui. Nuninai untsu quereiteo aidau, peleteo aidaujai, apu pujusa inamtain kuitamin aidau, nuigtu seiscientos geteo aents aidau aatus yaakat Gadnum nagkamas apu pataetukaju aidauk apu wetai eemak shimujakajui.

¹⁹ Nunik shimuinamunum makichik aents Gadnumia Itai daagtinun apu chichajak:

“¿Wagka amesh jutijaish minimume? Amek dekas wakitkim yamajam apu ekemi nujai pujusta, wagki amek nuigtushkam nugkem ukuakum tikich nugkanum pujame. ²⁰ Wika wi pujustinnakesh shiig dekaa weatsug nuniaunush ¿wagkanuk wisha aminash yau taamun nuniauminash jutijai minita tusanush titagme? Dekas amek wakitkita nunikam amina pataim aidau batsatbaunum pujusta. ¡Tuke Pujuu pegkegnum yumigtam-sati, dutijamak tuké kuitamjamkatin ati!” tiuwai.

²¹ Tama Itai apu Davitan ayaak:

“Apajuish antai, tuja apuh ameshkam antamin tajame: ‘Wika ame tuwi pujuttame, tuja tuwi jamainnumkesh wekaetatme, nuwi wishakam amejai amina inakem asan wekaetajai’”, tiuwai.

²² Tusa imattai David ayaak: “Ayu, kame takumek minita”, tiuwai. Tusa tima Itai David weamunum niina patayi aidaujai, nuigtu tikich aents aidau niina uyunaidaujai aatus ijunag weuwai. ²³ Nunik shimuinak David niina uyunaidaujai senchi buutuidau. Nunikag shimui shimuinakua, entsa chichijam Cedron tutainum jegawag nuna ashí katitjajui. Nunikagmatai Davidchakam katigkui. Nunikag Davidjai ijunag jinta uwegshunum wetainum shiyakajui.

²⁴ Tuja sacerdote Sadokshakam ashí Leví wegantu aidaujai chicham umiktin agagbau egkeamun arcan yanaki jukiag shimuidau, nunik shimui shimuinakua ashí aents yaaktanmaya jijnjagmatai, nunú arcanak sacer-dote Abiatarai ukukiajui. ²⁵ Dutikawagmatai David sacerdote Sadokan chichajak:

“Chicham umiktin agagbau egketu arca Apajuinua duka yaakat Jerusalén awagkitajum, wagki Tuke Pujuu mina wait anenjaku Jerusalem ataku awagtuktatui, dutijakui juju chicham umiktin arcanum egketu ukuktatag duka Niina aakjinig aun ataktu wainmainaitjai. ²⁶ Untsu Apajuí wait anenjachu asa juwig pujusti tujutkuig, nunashkam nii wakegamua nunisag uminkati titatjai.”

²⁷ Tusa nuigtushkam sacerdote Sadokan chichajak:

“Amek Abiatarjai Jerusalén wakitkita, tuja atum wegakjumek uchijum jukijum wetajum. Ame yukita uchijum Ahimaas, tuja Abiatar jukiti uchiji Jonatágkan. ²⁸ Atum nunika shimagmin untsu wi uwejush tepetpetua nuwi pujuttajai, wakitki taajum chicham ujatkamnujum tusan”, tiuwai.

²⁹ Tusa tima Sadok Abiatarjai Apajuí arcain jukiag Jerusalén wak-itkijai, nunikag nuwi batsatu. ³⁰ Nuninai David Olivo nain tutainum wakauwai. Nuwi weakug sapati weamatsuk wake besemag dekapeak datsaamamunum buuken dukuka buu buutkawa weuwai. Nunitai aents aidau niina uyudaidauskam nunisag buuken dukuka buu buutuinakua shimuidau. ³¹ Tuja Ahitófel Absalóggjai chichaman uminawai tabaun antukag Davitan ujakajui. Nuna David dekaa, Ahitófel tabaun Absalón antugkashti tusa, Tuke Pujun ausauwai. ³² Nunik Davitak wea weakua muja titijin nii yaunchuk Apajuín emematak kuntu maa apejakua nuwi wakauwai. Nunikmatai makichik aents Husai daagtin arquita aents wegantu jáanchjin japiki ichigka buuken nugka yukukuntun yukumag jinkiuiwai, Davitan igkugtatus. ³³ Nunik minittaman David chichajak:

“Ame wijai minakminig kakajus tupikakin Absalón mantuawai tusan uumainchau atatai. ³⁴ Untsu mina yainkatag takumek Jerusalem jegam Absalón chichagkum: ‘Wika ame inakmetjai, nuniau asan yaunchuk amina apa umijin ayag dutiksanuk amina umigkatjame tajai’, tita. Tusa tamin ayu tusa niina inake etamataig, nuwi pujusam Ahitófelash wajintuk

chichat, nunú ame nii tabau yapagtumainaitme. ³⁵ Tuja Sadoc Abiatarjai imau batsata nunú chichaman mina ujatiagtatui. Tuja Absalóghkash nii pujusa inamtaijin pujusash wajintuk chichamnash umiawa mina shiwagmatuinakush, nunú antukam ame dita ashí ujattame, nuna untsu dita mina ujatiagtatui. ³⁶ Nuigtushkam sacerdoté Sadoc, Abiatar, nuigtu dita uchiji Ahimaas, Jonatán aatus mina chichama ujatkgatin batsatui. Nuniau asamtai, ame dekamú aidauk ditai yunumka pujusam wajintuk chichajat nunú ashí ujatkgata”, tiuwai.

³⁷ Tusa tima Husai Davita kumpaji aajakua nunú wea weakua Jerusalén jegakma Absalóghchakam Jerusalén jegá wayaig betek niishkam jegauwai.

16

David Sibájai chichasbau

¹ David mujanum pujau chichama dekaa jiinki muja nagkaiki uju-mak kuwagai, Sibá Mefi-boshetan inake aajakua nunú jimag burron entsamkatin umikbaun juki, nuwi doscientos pag chimpiamun, uva juukbaun cien nantagkun, tuja uva ekaeja cien pag najanamun aatus pataja, nuigtu umutai vinon juki Davita igkugtatus weuwai. ² Dutika igkugkam David niina iniak:

“¿Aancha itugkatna imatikamesh iniime?” tau. Tama nii ayaak:

“Juju burro aina juka amina nuwem aidau, uchijum aidaujai pekamiagtina. Untsu pag aina nunak, uva ekaekamu aina nujai amina inakem aidau yuwawagtina. Tuja umutai vinoa juka jintá uwegshunum shimamunum yaki pimpiawa nunú uwajagtina”, tiuwai. ³ Timatai David iniak:

“¿Amina apujum Saúl aajakua nuna tijaji Mefi-boshetash wajukame?” tau. Tama Sibá ayaak: “Auk ame tupikakiamin niina apachji Saúl apu aajakua nuaduú mina apu adaitukchajaintash tusa Jerusalén juwakmae”, tau.

⁴ Tusa tutai David niina chichajak:

“Ayu, dekás nii tuu wekagu asamtai, Mefiboshetdau aajaku aina nunak amina amastajame”, tiuwai. Tusa tima apu emtin tsuntsuma pujus chichaak: “Wi ame wakegamun umiakui, ame mina yamai wait anenjulum aikasmek tuké wait anenjugin ata tajame”, tiuwai.

Simí apu Davitan pegkegchau chichagkamu

⁵ Aatus chichasa ukuak Davitak aents niina uyunaidaujai we wenakua yaakat Bahurim jegawajui. Nuninai nuwiya makichik aents Saúl wegantu Guerar aajakua nuna uchiji Simí daagtin jiinki, Davitan pegkegchaun chichaju. ⁶ Imatjak kaya juki Davitan tukutatus nagkiau, dutikak niina suntaji aidaunashkam nagkiau. Dutiktai Davita aentsji aidau, suntag niina kuitamin aidaujai tentea ejapeawag emainaig, ⁷ Davitan pegkegchaun chichajak: “¡Magkagtinu, juwi pujutsuk wejumta! ⁸ ¡Ame apu atasam Saúla patayi aidau amukuitam duwi Tuke Pujuu aminak suwimkan amawai! ¡Nuna umiak Tuke Pujuu yamai amina atanjamki, amina uchijum Absalóghan apu emattawai! Ame juwi wekaesam waitiam duka amina pegkegchaugmin waitiame. Amek dekás pegkegchau magkagtinaitme”, ⁹ tusa imatjutai, Abisai Seruí uchiji aajakua nunú apu Davitan chichajak: “¿Wagka jusha annaitkush aminash pegkegchaunash chichagtamua? ¡Dekás yamaikiuch niina buuken tsupigkan maatjai!” tau.

¹⁰ Tutai apu ayaak:

“Atum Seruíá uchijitigmek tuke aanin chichá yujagme, tujash wika dutikatajum tichattajai, wagki nii mina pegkegchaun chichagta nunak Tuke Pujuu tita tibau asa tawai. Nuadui makichik aentskesh, wagka dusha tame tusa nuinak tumain ainatsui”, tiuwai.

¹¹ Nuna tusa Abisain, suntaja apuji aidaujai chichajak:

“¡Mina uchigkesh mantuatag tujuta duwi, Benjamín wegantua duka dekas minak mantuatag tawai! ¡Idaisatajum pegkegchaun chichagtakush chichagtukti! ¡Tuke Pujuu tita tibau asants tujutatai! ¹² Tuke Pujuu wi waitiamun diigtus au aents mina yamai pegkegchaun chichagta nuna yapajia pegkegnum yumigtumainai”, tiuwai.

¹³ Aatus tusa niina aentsji aidaujai, nuwi nagkaemakiag shimuidau. Nuniagtai Simí David weamunum yantamen peentaunum wesa pegkegchaun chichajak, kayai nagkiak, nugka yukukuntun juki yukua.

¹⁴ Tuja Davitak niina aentsji aidaujai namak Jordán jegawajui, nunikag senchi yawejaju asag nuwi ayamainak batsamsajui.

Absalón Jerusalén jegamu

¹⁵ Tuja Davitak niina aentsji aidaujai tupikakiag imau yujainai, Absalón Ahitófeljai nuigtu ashí Israel aents aidaujai Jerusalén jegawajui.

¹⁶ Nuninai Husai arquita aents Davita kumpaji Absalógka jegantun senchi untsamak chichajak:

“¡Ameketme apumek, ameketme apumek!” awaju.

¹⁷ Imatjam Absalón niina iniak: “¡Wika aminak mina apag Davitan shiig kumpajimpapi tinugme! ¿Wagka amina kumpagmijaish wechamume?” tau.

¹⁸ Tama Husai ayaak: “Wika Tuke Pujuu yana etegkattawa apu ati tusa, tuja nuigtushkam Israel aents ashí ijunag etegkawagtata nuna yayaakun pujustag tau asan juwakmajai. ¹⁹ Ame apu uchijiyaitam nuna umigchaknush wisha tujash ¿yanak umigkatja? Nuadui wika amina apan umijag dutiksanuk amina umigkattajame”, tiuwai.

²⁰ Tusa timatai idayas pujus Absalón Ahitófelan iniak:

“¿Amesh minash wajukati tujutme?” tau. ²¹ Tusa tama Ahitófel chichajak:

“Amina apa tupikak niina ikaa nuwe aidaun juga kuitamkati tusa batsaki nujai kanagta. Dutikawamin ashí Israel aents aidau dekas niina apajinak shiwagmagapi tujamiagtatui. Aatus tikich amina yaimpaina dushakam aminí agtatui”, tau. ²² Nuna tusa juga tuntupen carpan aakmatkajui. Dutikawagmatai nuwi apaji ikaa nuwe batsatun yajuak utsaa, ashí Israel aents aidau wainainamunum ditan kanutjauwai. ²³ Tuja nunú tsawantinig Ahitófelan chichameg Apajuín chichamejai betek tumain aajakui. Nunak David pujusmataish iman aajaku asa, Absalón pujusmataish imanuk aajakui.

17

Husai Ahitófelan anentain yapagtuamu

¹ Duwi pujus Ahitófel Absalógkan chichajak:

“Amina suntajum maanitan yacha aina iman etegjam doce mil sujusta. Dutikawamin yamai kashia duwik Davitan pataetuktajai. ² Dutikan pimpiki ayamak pujaun amainagkan, niina aentsji aidaun uwaaka ishimkun nigki juwakmatai maatjai. ³ Dutika ai ashí aents aidauk nuwa aishina niina apajin dukujijai ukuak, aishijai wegama numamtuk

waketug aminí kaunattawai, wagki amek ima Davitak mantamnati tusam wakegame. David mantamnantai ashí Israel aents aidauk agkan ijunag utugchat atsaunum batsamsagatui”, tiuwai.

⁴ Tusa timatai Absalón nuna shiig pegkeg diisui, tuja Israel aents aidaun apuji aidaushkam pegkejai tiajui. ⁵ Tujash Absalóggak Husai untsuka utujatum niish wajintuk anentaimua nunú dekajuami tiuwai.

⁶ Tusa tima Husai jegamtai, Absalón chichajak:

“Ahitófel chichaak: ‘Yamaikiuch David pataetukmi’ tawa dusha ¿amesh wajintu anentaime? nunú tukagtiita”, tau.

⁷ Tama Husai yaagak:

“Yaunchuk pegkejan tujamin akush, yamai tujama nunak pegkegchaun tujamne. ⁸ Amek shiig dekame amina apak niina aentsji aidaujai maanitan yacha ainawai. Iman asag chayú uchiji yajutkam kajeka ishmain wajama imaninawastai. Nuigtushkam amina apak yaunchuk nagkamas maanitnak unumatjauwai. Nuadui niig aneaku asa tikich aents aidaujai ijunjag kanagchattawai. ⁹ Yamaikish auk niig waanmagkesh, nuniachkush tikich yantamnumkesh uumkas pujatai. Tuja ame jeteamin amina suntajum aidaun ujumak jinaamtaig, tikich Israel aents aidau nuna dekawag Davitap dekas niina suntaji aidaujai depetkae tusa niina eme anenjagatui.

¹⁰ Nuniagtai amina suntajum dekas waju leónjai betek kajen aidaush nuna antukag maaniachmin dekapjagatui, wagki Israel aents aidauk ashí dekainawai, amina apak niina aentsji aidaujai waju aina nuna.

¹¹ Nuadui wika dekas Israel aents aidau yaakat Dagnum nagkamnas yaakat Beershebanmaya aatus suntag shiig kuashat nayantsa kamatkaji dekapamainchauwa iman batsata nunú ipaam ijumjata. Dutikam nunú ame yajuakam dekas wejita tumainaitjame. ¹² Dutika amina apash twig pujawa nunú deteka, yumi sajatuk kakegama numamtuk pachiachbau utsantua ashí niina aentsji aidaujai ijinami dutikam makichkish iwakuk juwakchati. ¹³ Tuja David tupikaki tikich yaakat utumainchau peejamunum uumkamtaish, ashí Israel aents aidauti daek yajutka yaakat peejamu anaa japiki entsanum utsaattaji, dutika ajin makichik kaya pujaukesh atsuttawai. Nunikmatai utua amina apa pujau wainka maattaji”, tiuwai.

¹⁴ Aatus Husai timatai Absalón ashí Israel aents aidaujai wakejukajui, wagki Ahitófel tibaun nagkaesau pegkeg asamtai. Ahitófel tibaun yapagtuawa nunak Tuke Pujuu tibau asamtai dutikauwai, wagki nuna dutikamtai David Absalóggan depetkati tau asa. ¹⁵ Aatus tusa ukauk Ahitófel wajintu Absalóggan ashí Israel aents aidaujai ijumag tine nuna pachis, tuja niish wajintu Absalógnash tine nuna aatus Husai sacerdote Sadokan Abiatarjai ujaku. ¹⁶ Dutika ditan chichajak:

“Wamak shiyakjum David ujaktajum, dita batsata nuigkik batsamtsuk nuna ukukiag namak Jordágka amain katiagtinme. Untsu nuna nunichag-taik, Absalón niina suntaji aidaujai amukagatui”, tiuwai.

¹⁷ Tuja Davitan ujakagtinuk Jonatán Ahimaasjai yaaktanum wayajin waipakainum tusag, yaaktanum jegattak yumi pukuni jinin Roguel tutainum nuwi uumak dakamainak batsatu. Nuninai makichik nuwa inak weji ujaku. Dutikam nuna Davitan ujakagtatus jinin shimuidau. ¹⁸ Núnidaun makichik uchi wainak, Absalóggan ujaktatus wejiuwai. Nunitai Jonatán Ahimaasjai waugtusag makichik aents dita waintai yaakat Bahurim tutainum pujujukua nuna jeen jegawajui. Nunikag nuna agájin yumigmat taimunum nuwi egkemawag uumkajui.

¹⁹ Nunikagmatai nuna nuwe yumigmat dukutain juki dukuka nuwi trigo akagbaun ukaja, yumigmat taimunak wainmainchau emauwai. Dutikamu asamtai makichkish yumigmatnak wainkachaju ainawai.

²⁰ Nunik chimpijai Absalógka inake aidau nuwi jegawag nunú nuwan iniinak:

“¿Ahimaasash Jonatágjaish tuwi batsatua?” tuidau. Tusa iniam nii ayaak:

“Juwi kaunawag namaka aatu shiyakmae”, tau.

Tusa timatai shimutkag egai egainakua wainkachag Jerusalén waketjajui. ²¹ Nunik waketjamtai Ahimaas Jonatágjai jiinkiang tupikaki shiyakajui Davitan ujakagtatus. Nunik jegawag ujainak:

“Wamak umintsajum Jordágka amain katiagtajum, wagki Ahitófel atumi mantamatatus chichaman Absalóggjai umikaje”, tuidau. ²² Tusa ujakajam David niina aentsji aidaujai ashí jijnjag waugtusag Jordágka amain katiajajui. Nunak nunú kashia duwik ashí katiajajui.

²³ Tuja Ahitófelak nii tibau umigkacham kajea niina burrojin entsamak niina jeen yaakat nii akiinamujin weuwai. Nunik jegaa niina patayi aidaujai ashí chichas uminak, suween daekai jigkama jakauwai. Nunik jakamtai niina apaji ukusbaunum ukusajui.

David yaakat Mahanaim jegamu

²⁴ Davitak Mahanaim jegau ai, Absalóggkak niina suntaji aidaujai pataetuk Jordágkan yama katituidau. ²⁵ Tuja Joab suntaja apuji aajakua nuna yapajia Amasá Joapa ikaa yachi aajakua nuna Absalón adaikauwai. Amasá aajakui Ismael aents Itrá aajakua nuna uchiji, niig Nahasa nawanji Abigail Davitan ikaa umayi aajakua nuwi akiamu aajakui. Abigail aajakui Seruíá umayi Joapan dukuji.

²⁶ Tuja Absalóggkak tikich Israel aents aidaujai Galaad nugkanum jegawajui. ²⁷ Nuninai David Mahanaim jegamtai, Nahasa uchiji Sobí Amón nugkanum yaakat Rabánmaya, tuja Amiela uchiji Maquir yaakat Lodebar-numia, nuigtu Barzilai nugka Galaadnum yaakat Roguelimnumia aatus Davita igkug kumpamatatus jintukiajui. ²⁸ Nunik shimuinak David niina aentsji aidaujai susatnun: Jáanch asepatai aidaun, shikika umutai aidaun, ichinak aidaun aatus yajuakajui. Tuja nuigtushkam trigon, cebadan, harinan, trigo duwikbaun, haba aidaun, lenteja aidaun, ²⁹ dapa yumijin, mantequillan, uwijan, nuigtu baka muntsujjai queso najanamun aatus yajuakag David niina aentsji aidaujai yuwati tusa ejetajui. Nunak dita anentaimas: Uwegshunum mininak pimpiki yapagkiag kitajag mininawai tusag dutikawajui.

18

Absalón jakamu

¹ David niina suntaji aidaun ashí dekapajui, dutika mil suntajan apuji agtinun, cien suntajan apuji agtinjai adaitujui. ² Nuna dutika nuwiyan kempatuma imajin akanag ijumag nunú makichik akanka ijumjamun apujin Joapan adaitukui, tuja tikich akanka ijumjamu apujin Abisaín adaitukui. Juju jimaja juka Seruíán uchiji aajakui. Untsu tikich akanka ijumjamun apuji atinun Itai Gadnumia aajakua nuna adaitukui. Dutika ashí ijumag chichajak:

“Wishakam maaniamunmak atumjai minittajai”, tiuwai. ³ Tutai dita ainak:

“Dekas apuh amek minipa, wagki shiwajak ii aidautinak imanikag puy-atjupainatsui, nuadui ii pisaajinish idaitamainai, nuniachkush jimaitukesh amupak idaitamainai. Tujash amek ii diez mil ainag nuna nagkaesau akikaitme. Nuadui amina dekas mantamawagtatus wakejutpainawai. Nuadui apuh, amek dekas juju yaakta juwig pujusam iina depetamainakui atujatkatin ishiakta”, tiajui. ⁴ Tusa tama:

“Ayu, atum tajum duke ati”, tiuwai. Tusa tamawaik yaakta waitiji yantamen wajasui. Nunik wajai suntag mil akanjamu aidau, cien akanjamu aidaujai aatus jiinaidau.

⁵ Nunú eke shimuinatsaig apu David chichaak:

“Absalón wainkugmesh tikima maawaigpa”, tusa, Joapan, Abisaín, Itain aatus ujakui. Tusa taun suntag aidau ashí antukajui. ⁶ Aatus suntag aidau jiinag tikich Israel aents aidaujai maaniawagtatus shiyakajui.

Nunak ikam Efraín tutainum maaniawajui. ⁷ Nuwi maaninak Davita aentsji aidau tikich Israel aents aidaun depetkajui. Nuwi maaniamunum shiig kuashat jinawawai. Ashí ijumjamak veinte mil aents jinawajui. ⁸ Nunú tsawantín ashí nugkanum maaniau ainawai. Tuja nuwi maaniamunmak puyajaik imanikag jinachajui, ikam shiig múun ishamainnum maanidau asag, imannum wainak akuumak yujasag ima kuashat jinawajui. Aatus Absalógka suntaji aidau shiig kuashat jinawawai. ⁹ Tuja Absalógchakam burrunom entsamak wekama Davita aentsji minidaujai pachiachbau igkunikiui. Nuna burro wainak ishamak tupikaki numi encina tutai ayaunum akumkauwai. Nunitai Absalón nuna numi kanawen kuntujen eteemantai, burro tupikak ukukiuwai, dutikam yaki numi kanawen detau. ¹⁰ Nunik detaun makichik aents wainak tupikaki jegaa Joapan ujaak:

“¡Absalón numi kanawen eteema detaun wainkamjai!” tau. ¹¹ Tusa ujaam Joab niina chichajak:

“¿Wagka wainkayatkumesh nuwig maa ukukchamume? Dutikawaminig plata diez najanamu aidaun makichik akachumtaijai amamain awajkajame”, tau.

¹² Tusa tama nunú suntag niina chichajak:

“Nunú mil plata sujakminish, wika apu uchijinak maumaitsujai, wagki apu amina, Abisaín, Itain aatus chichagtamainak, mina uchujuk maawaigpa tujamaidau ashí antukmag nuadui. ¹³ Tuja wi maamtaig apu Davitak tuké dekamainai, wagki niig makichkish uumjukaik idaimaitsui. Niig iniimas tuke dekamainai. Nunik dekamtaig amekesh minak ayamjut-maitsume, nii minak mantumainai”, tiuwai. ¹⁴ Tusa tutai nii ayaak:

“¡Amejai chichaaku tsawan megkaemainuk atsugtawai!” tusa ukuak kampatum nagkin juki Absalógkan jegantun iwaku detaun aketuk kampatuma imania detseppnum ijuwai. ¹⁵ Dutikamtai Joapan uyunaidau diez aents yujau Absalógkan tenteawajui. Dutikawag awenawag maawajui. ¹⁶ Dutikawagmatai, Joab uwija kachuji umpuagtajum tusa inamjauwai. Tusa tima umpuajagmatai, suntag aidauk tikich suntag Israel aidaun aintug shimuidau ukukiajui, wagki Joab ukuktajum tau asantai. ¹⁷ Nunikag Absalógka iyashin jukiag nunú ikannum waa múun aunum nuwi egkeawajui, dutikawag nuwi kaya múun aidaun yajuakag shiig kuashat ijumjujag ukukiajui. Tuja tikich suntag Israel aents aidauk Davita suntaji aidau pataetuk shimuidau ukukiajam, maki makichik dita jeen pisajajui.

¹⁸ Absalón iwaku pujusa niina niimen dakumak kayai najanauwai. Nunak nii anentaimas:

“Mina uchijuk atsa duwiyap wika jakanuk makichkish pachikcham megkaemainaitja”, tau asa nii iwaku pujusa dakummamak najanamujin, Absalón adaikauwai. Duka yamaikish Absalón dakummamak najanamu tutai nugka paka, apu nugke tutaya nuwi awai.

¹⁹ Tuja Sadoka uchiji Ahimaas Joapan chichajak:

“Tuke Pujuu amina ayamjupak shiwaajum aidaunak ijinae tusan apu Davitan tupikakin wenu ujaktajai”, tiuwai. ²⁰ Tama Joab ayaak:

“Amek yamaik chichamak etseggashtatme, tikich tsawantin etseggata, wagki yamaik apu uchiji mantamnae”, tiuwai.

²¹ Tusa tiuwaitak suntag etiope aentsun chichajak:

“Ame wetá nunikam apu pujamunum jegam ame waji wainkaume nunú ashí ujakta”, tiuwai. Tusa tima niina eme anentus tikishmag nugkan nijayin antig pujau wajaki tupikaki weuwai. ²² Nunikmatai Ahimaas Joapan ataktu chichajak:

“Dekas minash idaitusta wisha etiope aents wega nejai wetajai”, tau. Tutai Joab ayaak: “¿Wagka amesh nunú chicham etseggbaunum pegkeg waji jukitnunigkish wetag tame?” tau.

²³ Tama Ahimaas ayaak:

“¿Duka puyatjukaipa, juachkunush jukishtajai. Wika wamak tupikakin wetag tajai!” tau. Tutai Joab ayaak:

“¿Untsu takumek, tupikakim wetá!” tiuwai. Tusa tima nugka paka tepajunmanini tupikakiuwai. Nunik etiope aentsnak amayag nagkaikiuwai. ²⁴ Nuninai Davitak yaakat Mahanaima waitijin nuna yantamen eketu. Nunik eketai suntag jinta kuitamin yaakat peejamu waitijin nuna yakin wakauwai. Nunik niimkama makichik aents tupi tupikakua midaun wainkauwai, ²⁵ nunik apu David antukti tusa senchi untsumkauwai. Nuna antuk apu chichajak:

“¿Ima nigki minakug, chicham pegkejan etseggatatus minak aniawai!” tau. Tuja nunú aents tantattak minai, ²⁶ tikich aentschakam nuna ukujin tupi tupikakua midaun wainkauwai. Nunik nunú suntag waiti kuitamin untsumak:

“¿Tikishchakam tupi tupikakua minawai!” tau. Tutai apu ayaak:

“¿Niishkam chicham pegkejan etseggatag tusas minatai!” tiuwai.

²⁷ Tutai waiti kuitamin awentsag chichaak:

“Tupikamuji diigsamash Sadoka uchiji Ahimaas diyajai eemak mina nunak”, tau. Tutai apu ayaak:

“¿Niig aents shiig anentaimkauwe, chicham pegkejan etseggatasas minatai!” tau.

²⁸ Tusa chichaak eketai, Ahimaas tupikaki taakug apu eketun jegantun tikishmag tsuntsuma nijayin nugka antig pujus kumpama chichajak:

“¿Tuke Pujuu amina Apajuígmia duke ememattai ati! Wagki amina kajegtamiagma nuna, amina suntajum aidau depetkati tusa nii timatai depetkag ayamjupaku asagmatai”, tiuwai. ²⁹ Tama nii iniak:

“¿Absalógkash pegkejak wekaema?” tau. Tama Ahimaas ayaak:

“Joab mina chicham etseggata tujutmatai tupikakin minai, mina ukujin suntag aidau shiig senchi pampaidaun antukmajai. Tujash dekachmajai wagkas imatiagma”, tau. ³⁰ Tutai apu David chichajak:

“¿Menasta, nunikam anui wajasa dakamsata!” tama Ahimaas ayu tusa menaas wasasui.

³¹ Nunik wajai etiope aentschakam tupi tupikakua tantauwai. Nunik apu Davitan chichajak:

“Chicham pegkejan itaag nunú amesh, mina apujuh, antukta. Yamai Tuke Pujuu amina ayamjutpak shiwag amina kajegtamiagma nunak ashí jina agkanmitkagmae”, tau. ³² Tusa tama apu David etiope aentsun iniak:

“¿Absalógkash pegkejak wekaema?” tau. Tama nii ayaak:

“Apajuí waketaik nunú uchi Absalón jakama nunisag tikich amina kajegtamaina dushakam itugkag ashí jinawanum tusan wakegajai”, tau. ³³ Nuna antuk apu anentain inagmakui. Nunik waitinum yaki kanutai umikbaunum nuwi waka buutiuwai. Tuja nuwi wekagas buutkabaikia chichaak:

“¡Uchuchi Absalógka! ¡Uchuchi Absalógka! ¡Wi mantamnamain ame mantamnaume! ¡Uchuchi Absalógka!” waja wajas buutu.

19

¹⁻² Apu David Absalón jakamun dekaa buutui tabaun niina uyunainak Mahanaim jegawaju aidau dekawajui. Nunikag ujumak aents Joapan ujaktatus wejiajui. ³ Nuna suntag aidau antukag depetmakaju asag shiig aneasag waketmainun, ayatak datsaajag depetmakchauti wajukmaina numamtuk wake besemag waketjajui. ⁴ Nuninai apu David yapiin jáanchi dukumak senchi jüka buutak: “¡Uchuchi Absalógka! ¡Uchuchi Absalógka! ¡Uchuchi Absalógka!” waju.

⁵ Imatak niina inamtaijin pujusa buutak pujuttaman, Joab jegajua chichajak: “Amina, tuja amina nuwem aidau, uchijum aidau, nawanjum aidau, ikaa nuwem aidau aatsa ayamjaku, amina kajegtamiagma duka yamai depetka ijinaji. Dutikau ajinig, amek ii pegkegchau takamsamtai datsankagtakum wajukmaina aan pujame. ⁶ Amek suntaja apuji aidau, nuigtu amina suntajum aina dushakam eme anentsa diyatsum nunú yamai paan iwainmamkaume. Nuniau asam ya amina kajegtamua nunú ima senchi aneakum, amina anempaina nunú kajejame. Amek ii jinaa ajinish puyatkagtutsuk, Absalón iwaku pujakuig shiig aneasa pujumain asam aniname. ⁷ Aní pujutsuk jüinkim amina suntajum aina nunú anentai ichichtugta. Ame dutikchataik, amina aentsjum aina duka makichkish juwi batsamsag tsawagchagtatui. Nunikagmatai amek juwaktatme. Nunak Tuke Pujuu daajin tajame. Nunú atatuí ame yaunchuk datsach asam utugchat igkugkuitam nuna nagkaesau utugchat igkugtatam nunú”, tiuwai. ⁸ Tusa tima apu David yaakta waitijin jeganta ekemsauwai. Nunikmatai ashí aents aidau nuna dekaawag apu eketbaunum jegantag ijunjajui.

David Jerusalén wakitkimu

Ashí Israel aents aidauk pisajag maki makichik dita jeen shiyakajui.

⁹ Nunikagmatai Israel aents maki makichik wegantu aidau chichainak:

“Iina shiwaaji aidau waitkagmagma nunak David ayamjutpakji, tuja filisteo aents aidau waitkagmaidaunashkam ayamjutpak agkanmitkagmaji. Imanape tama Absalógka ishamak tikich nugkanum tupikaki wekaewai. ¹⁰ Untsu Absalón iina apuji atin adaikamiag duka maania-numun jakae. Nunika duwish ¿wagka David nigki ataktu iina apuji ati tumainchauwaita?” tuidau.

¹¹ Aatus Absalógka aentsji aajaku aidau tuinamun David dekauwai. Nunik: “Sacerdote Sadokan, Abiatarjai Judá wegantu aidau apuji múun aidau iniastajum: ¿Wagkag ditash minash wakitki niina inamtaijin taati tusash untujuinatsua? ¹² Dita ainawai wi wegantu mina pataag aina

duka. Nuadui dita ainawai dekas mina taati tusag untsugmain aina duka’”, tiuwai. ¹³ Tusa nuigtushkam Amasán chichajak:

“Ameshkam minak dekas shiig pataachijuitme. Nuadui Joab suntaja apuji puja nuna yapajiakun amina apu adaikattagme. Tuja nuna wi umishtaik, Apajuí suwimkan sujusti”, tiuwai.

¹⁴ Nuna tusa Judá wegantu aidau wainak chichá yujaun imijkauwai. Dutikam dita ashí ijunag apu David wakitki niina suntaji aidaujai Jerusalén taati tusag chichaman akuptukajui. ¹⁵ Nuna dekaa apu David niina aentsji aidaujai wakitkiag namak Jordágnum jegawajui. Nuninai Judá wegantu aidauishkam David niina aentsji aidaujai Jordán katiniagtai, yaigkagtatus shimutuinaik Guilgal jegawajui.

¹⁶ Nunik shimiagtai Simí Gera uchiji Benjamín wegantu Bahurimnumia aajakua dushakam apu Davita igkugtatus tupikaki ditajai ijunag weuwai. ¹⁷ Nunik wetai mil aents Benjamín wegantu aidau uyuniajui. Tuja Sibá Saúla jeen pujusa tsakajua dushakam niina uchiji quince aajakua nuna yajuak, nuigtu veinte inake aidau yajuak eke apu David Jordán jegatsaig niyá jegauwai. Nunikag apu David batsatbaunum katiajajui. ¹⁸ Nunak nunikajui wagki apu David niina patayi aidaujai yaigka ikatiaja shiig anemtikсами tuidau asag. Tuja apu David Jordágkan katitkatatus uminai, Simí niina jegantun eme anentus tsuntsuma wajas ¹⁹ chichajak:

“Ame Jerusalén jiinki weamin, wi amina pegkegchaun chichagkauwaitjam nunú wait aneam tsagkugtuga. Tuja nuigtush anentaimtu pujutsuk kajimatki. ²⁰ Mina apujuh, wi dewakbaugnak dekagmamjai. Nuadui wika amina igkugtasan ima wiki José wegantunuk wiyá emkan taajai”, tiuwai. ²¹ Tusa tutai Seruían uchiji Abisaí chichaak:

“¡Auk Simík apu Davitan Tuke Pujuu etegkamun pegkegchau chichagkau asa mantamnamainai!” tiuwai. ²² Tusa tutai, David ayaak:

“¡Wainka tuu wekaetsuk idaisata! ¡Yamai aents suwimak susami tabauk atsawai! Ayatak ijuntsa jiistamatag taji, wagki Israel aents aidau apujinuk yamaishkam wikitjai”, tiuwai. ²³ Nuna tusa Simín chichajak:

“¡Aminak mashtatjame! Wi tajam nunak Apajuí antamunum tajai”, tiuwai. ²⁴ Tuja Saúla tijaji Mefi-boshet aajakua dushakam apu Davitan igkugtatus jiintukiuiwai. Tuja niig David Absalógan ishamak Jerusalén jiinkiuwa duwi nagkamas nawenak nijatsuk, jáanchjinash nijatsuk, tuja susujinashkam awatsuk pujai, apu David iwaku pegkeg wakitki tauwai. ²⁵ Tuja niishkam apu Davitan igkugtatus Jerusalén jegauwai. Nunik jegantai apu chichajak:

“Amesh ¿wagka wijaiash minichmayume?” tau. ²⁶ Tama nii ayaak:

“Apujuh, wika shutuu asan wi ekemi wetinun burron itagtuati tusan mina inakjun inagbaijai. Tusa ti ai ayu tujutiatak, umikchau asamtai minichbaijai. ²⁷ Tuja wi wetinun umigtutsuk ukuak amina tajutjama wi makichkish tichamun amina tsanupagmayi. Tujash apuh, amek Apajuí aentsji nayaimpinmayajai betekaitme. Imanaitam duwi ame wajuk wakegapa duka nunisag uminkati. ²⁸ Wagki mina apaju uchiji aidautik ame ijinam amainaitku, amina pataim itugmaina numamtuk ipatuawamin, amejai ijunja ekemsan yujumka yuwag nuniaunush ¿wisha nuigtush wajinak ima segatjame? Wika amina inakmetjai”, tiuwai. ²⁹ Tusa tama apu David ayaak:

“Duka imanuk chichaak wekayipa. Wika amina Sibájai Saúla nugke aajakua nunú akandaika jukitajum timajime”, tiuwai. ³⁰ Tama Mefi-boshet ayaak:

“Mina apachju nugke aina duka ashí niinu ati, wagki nuna nagkaesauwa duka, dekas ame shiig pegkeg ataktu ame pujusa inamtaigmin taum nunuwai”, tiuwai.

³¹ Tuja Barzilai galaadnumia aajakua dushakam yaakat Roguilim pujau, apu David Jordágka katittai yaigka, nuwi apujai akatdayag ukuak wakitkatitatus wejiuwai. ³² Niinak ochenta mijanji ajujukui. Untsu niig wiakuch aajakui. Iman asa apu David Mahanaim pujusa atsumamujinak nii ashí yaijakui. ³³ Nuadui apu David Barzilain chichajak:

“Jerusalén taata nunikamin wi amina kuitamkatjame”, tiuwai. ³⁴ Tusa tama Barzilai ayaak:

“Wika múuntuch wajasjai, nuniku asan kuashat tsawan iwakuk pujush-tatjai. Tuja kuashat tsawan amejai pujustinígkik Jerusalégkak minimaitsujai, ³⁵ minak ochenta mijan ajutui, nuadui yujumka yuwaknush, umutain umaknush pegkegnak dekapeatsjai. Tuja nuigtushkam kantabaunash antumain dekapeatsjai. Nuadui wainka ame mina kuitamjakum waittsaim tajai. ³⁶ Ame Jordán katiakmin yaigtasan tajuajam duwikik apujuh, minash pegkegnum yainkatag tame. ¡Dekas duka puyatjukaipa! ³⁷ Wika dekas wakitkin mina yaaktajui jegaan, nuwi pujusan jakatjai. Nunikmatai mina apaju ukumataijin ukugsatnume tajai. Untsu juju mina uchig Quimham amina takagtamin ati tajai. Nii amina uyuuntamas wekaekui, ame nii yaigtin ata”, tiuwai. ³⁸ Tusa tama apu David niina ayaak:

“Untsu Quimham wijai pujusti, tuja ame uchigminash wajuk yainjukti tusa wakegame nunak imatksanuk umiktajai. ¡Tuja ame waji segattatme nunak ashí dutikatjai!” tiuwai.

³⁹ Tusa chichas inagnakmatai, ashí aents aidauk Jordán utsaanawag katiyajui. Nunikag nuwi apu David Barzilajai akatdayag niina kumpamak yapinuma kugkuasui. Dutikam Barzilaik niina jeen wakitkiuwai. ⁴⁰ Nunikmatai apu David niishkam Quimhamjai uyunis, nuigtu sungat Judá wegantu aidaujai aatus ashí ijumag, nuigtushkam sungat Israel wegantu aidau jimaituk aatus yaakat Guilgalnum shiyakajui.

⁴¹ Nunik nuwi jegawag batsatai, dukap atsuk ashí Israel aents aidau apu Davitan jegajua chichajuinak:

“¿Wagka ii Israel wegantu aidauti ame yaigka Jordán ikatimain aish, Judá wegantu aidau aminash Jordán katitminish yaimpakagmae?” tuidau. ⁴² Tusa tiagtai, Judá wegantu aidau ditan ainak:

“¿Wagka atumesh wainkagmesh kajeagme? Iik yaigmaji, wagki apuk iina patayi asantai. Iik apu yutain, nuniachkush waji aidau amasti tusaikish yaigchamji”, tiajui. ⁴³ Tusa tiagtai Israel wegantu aidau ditan chichajuinak:

“Ii ainaji dekas apu yaimaintik, wagki ii ima kuashat maki makichik wegantu dekapamak dieza imajin ainaji, tuja atumek ima makichik wegantu duke ainagme. Tuja nuigtushkam ii ainaji apu wakitki taati tusa untukutik. Dutikau ajinig atumek tikima wainkauchia nunin anenkagtagme”, tiajui. Tujash Judá wegantu aidau Israel aents aidau nagkaesau ima senchi pegkegchaun chichaidau.

¹ Saúl Davitan maatag tutai, Tuke Pujuu ayamjukui. Tuja tikich shiwag aidau maatag tiagtaishkam, Tuke Pujuu ayamjukbau asa Apajuín emematak juna aatus David kantamauwai.

² Nuniak aatus tiuwai:

“Tuke Pujuuwah,
ametme mina kuitamjaumek,
ametme mina ejamataigmek,
mina agkanmitkagnumek.

³ Ametme mina Apajuígmek,
ametme kaya muunnum uumka ejamtayama imanmek,
ametme mina ejamaka uwemtaijuk.
Ametme senchimek, mina uwemtijinmek;
amek dekas shiig yakí,
mina uumka uwemtaijuitme.

Amek dekas shiig yakí mina ejamataijuitme,
ametme mina uwemtijin.
¡Aents magkagtin aidau mantuatag tuinakuish,
ame minak ayamjutkabiume!

⁴ Tuke Pujuuwa, ametme pegkejam
ememattaimek,
wika amina emematjame,
mina shiwag mantuatag tuinakui
amina untsuagme,
tusa tai ame ayamjutme.

⁵ “Jamain ishamainnum jeganbaijai;
tuja magkagtin aidaunum pachiinkan,
mantuinawapi tusan senchi ishamkamiajai.

⁶ Jamainnum egkemkamiajai.
¡Nunak shiwag aidau
maami tusag umigtukagmayi!

⁷ Nuna ishamakun Tuke Pujuu segabiajai,
mina Apajuín yainkati tusan segabiajai,
tusa tai niina pujutaijin pujus antugtukmayi.
¡Wi untsubaunak nii antukmayi!

⁸ “Untsuka ai nugka senchi uugkabi,
muja aidaushkam buchitjabi,
nunak ¡Tuke Pujuu kajeka imatikabi!

⁹ Tuke Pujuu nujinia bukuiti jijnmayi.
Tuja niina weninia jii keeka jijnmayi,
niina weninian jii kaiji kegaun nagkimayi.

¹⁰ Nayaimpik jáanchjai betek ichiinak nemaabi,
nuwiya akaikibi mina ayamjutkatatus.
¡Amek yujagkim ikiyamag
suwe wajasbaunum nuwi najamayume!

¹¹ Amek mina ayamjutkatasam,
ángel querubignum ekemis,
nii nanaakmatai minatai tumain,
dasenum pachitkau taabiume.

¹² Yujagkim ikiyamag suwe ishamainnum,
amek pachitkau taabiume.

13 Amina senchijum
 chaagpijai betek keeka jijnmayi,
 nuniai jii kegau yumijai betek yutibi.
 14 Imaniamunum Tuke Pujuu Apajui múunta nunú,
 chichamun ipamtajai betekan antukagmayi.
 15 Imatak akentaiji aidaun akenak
 chaagpin ajuagmayi,
 imatikak mina shiwag aidaunak,
 uwakek ipisjabi.
 16 Ame kajeka chichamin,
 dase senchi dasentak,
 nayantsa umpui buku emamtai,
 nugka initke wantinkauwai.

17 “Apajuiyah,
 ame minak nayaimpinum pujusam,
 uwejum awentuntabiume,
 dutikam nayantsa kunajinia
 jiiikim uwemtijugmayume.
 18 Mina shiwag aidau,
 mina nagkaetasu senchigtin
 aidau kajegtiagmayi.
 Tujash ame ayamjutkabiume.
 19 Wi waitiakun pujai jetekajabi,
 tujash Tuke Pujuuwa, ame minak ayamjutkauwaitme.
 20 Amek mina anentu asam,
 uwemtijujam agkanmitkajuauwaitme.
 21 Tuke Pujuuwah,
 wika ame wakegamun takau asamtai,
 ame minak pegkegnum akigkabiume.
 22 Wika Tuke Pujuu tujutbaunak betek umikuitjai,
 nii tujutbaun umitskek idaisachuitjai.
 23 Wika niina chichame umiktina nunak,
 ashí betek aneakjai,
 nuadui niina chichame umiktina nunak
 makichkish umitskek idaisachuitjai!
 24 Wika ame diismash
 pegkegchaunak takamsachuitjai,
 tuja tudau aina nunak tujanjauwaitjai.
 25 Tuke Pujuu emtin
 pegkegchaun takaschau asamtai,
 nii minak pegkegnum yainkauwai.

26 “Tuke Pujuuwah,
 amina betek umigtamainakuig,
 ameshkam betek uminaitme.
 Ya amina chichamjumin betek umiawa,
 nunú amek shiig kuitamnaitme.
 27 Aents dekaskenum chichau aina duka,
 ameshkam dutiksamek kuitamnaitme.
 Untsu aents waitjin aina duka ameshkam dutiksamek iikuame.
 28 Amek aents ememachu aidau uwemtiknaitme,

untsu ememau aina duka
wainka dushiktai emame.

²⁹ Tuke Pujuuwah,
ametme mina tsaaptinug,
mina Apajujuh, ametme wi suwenum wekagaish
tsaaptin etugtaumek.

³⁰ Ame yaintsamin,
mina shiwag aina nujaig maaniattajai,
nunikan depetkan amuktatjai.

³¹ “Apajuíyah, ame dutikamu
aina duka ashí pegkejai.
Ame anagkagtuamua nunak dekaskeapi tajai.
Tuke Pajuuk ya niyai
dekaskeapi tuinawa nuna kuitamui.

³² Tuke Pujuuwah,
ima ameketme Apajuímek.
Ame kuitamkagtinaitam
imanuk tikichik atsawai.

³³ Apajuíyai senchigtin mina kuitamjinuk,
nii minak pujutji pegkeg ati tusa jintinjinai.

³⁴ Apajuí minak shiwag amaigkai tusa,
japa amaimainchau tupikaina iman etawai.
Wi shiwag amaintukai tusan,
muja titijn wakamtaish, ame minak kuitamjinaitme.

³⁵ Ame minak shiwagjai maanitash jintinjame,
ametme flecha ekenka
nagkintai jiju bronca najanamun,
japiki nagkimati tusam senchimtijaumek.

³⁶ Ametme shiwag aidau jetetuinauish
uwemtijnmek, ame yaintu asamin,
tikich aidaush eme anenjuinawai.

³⁷ Ame wi wekaebaunmak kuitamjame,
nuadui atakuinjanush iyagchabijai.

³⁸ Mina shiwag aidaun pataetukan
ashí ijinamijai,
dutika ijinan ima wiki wakitkimijai.

³⁹ ¡Shiwagnak ashí ijinawabijai!
¡Makichik iwakukesh juwakchabi!

⁴⁰ Ame senchimtijuawamin
shiwaajujai maaniawabijai.
Wijai shiwagmagaidaush
mina nii ijinati tusam idaitugsabiume.

⁴¹ Ame mina shiwag aidauk,
wisha wainaig ipisja ishiakuitme.
Tujash wi pataetuka amainagkan
mina kajegtuidaunak ijinawabijai.

⁴² Dutika ijinai,
tikich aents aidaun egayanme yainkatnume tusag,
tujash makichkish yaigchajabi.
Tuke Pujuuwah,
aminash egapayanume,

tujash yaigchabiume.

⁴³ ¡Nugka tsaimaina imatikan tsaikamiajai!
Tsakus wajatua najamaina imatikiajai ditanak.

⁴⁴ Mina pataag aidauk
pempuentugkiag shiwagmatuinakuish,
ame ayamjutsamin depetkamiajai.
Ame minak Israel aents aidau apuji,
nuigtu tikich aents aidau apujishkam etiuwaitme.
Aents wi wainajakchamu aidau
mina umigtuinak takagtuinawai.

⁴⁵ Wi tabaunak betek umigtuinawai.
Aents tikich nugkanmaya aidau,
mina inataig waigkag emematjuinawai.

⁴⁶ Aents tikich nugkanmaya aidauk,
wijai maaniatag takush sapigmainawai,
nuninak uumak batsatu kujaukmaikia
jiinkiang mantuawaipa tujutuinawai.

⁴⁷ “¡Tuke Pujuuwah,
amek tuke pujuuwaitme!
¡Ameketme mina ejamataigmek!
¡Ashí aents aidautijum
mina uwemtijina nunú ememattajum!

⁴⁸ Apajuiyah, ame mina
shiwag aidauk ijinabiume,
ame minak kuashat tikich aents aina nunashkam
apuji etiuwaitme.

⁴⁹ Mina shiwag kajegtuinak mantuatag
tuinakuish, ame minak uwemtijame.
¡Tuke Pujuuwah,
aents pegkegchau aidau mantuatag tujutiagmayi,
tujash ame ayamjutkauwaitme!

⁵⁰ Nuadui tikich aents
ii wegantuchu aina nuna emtinish
amina emematjame,
tuja amina etsagkeakun kantamjai.

⁵¹ Ame apu ati tusa etegtuau asam,
depetmatak tuké sujame.
Ame minak, tuja mina uchig wegantujai
amina anenkagmin tuké kuitamjame.”

23

David jakattak pujusa chichakbau

¹ Jujuwai David inagnaku kantamamu:

“Wika David Jesé uchijiyaitjai,
Israel aents aidau apuji ati tusa Apajui etegtuau asa,
ajaantusa diyaku chichame antugtai
emauiwa nunuwaitjai,
mina apachug Jacob aajakua duka
niina emematujakui.
Wika Israel aents shiig pegkegchin
kantamin asan wakejutaiyaitjai.

“Nuadui juna kantamjai:

² “Tuke Pujuu Wakani minai pujau asa
chichamtijawai.

Nii tujutbauwa nuna kantamjai.

³ Apajuí Israel aents aidautin

Apajuíjiya nunú chichakmae.

Israel aents aidautin

kuitamjamna nunú chichagtak:

‘Aentsu apuji atinun

Apajuí adaikauwa nunú shiig Apajuín ishamas,
betek pegkegnum takauk,

⁴ kashikmas etsa jiiinak etsantama imatikas

aents aidaun yaigtatui.

Tuja yumi yutug nagkanbaunum etsa jiiinak
nugkan shiig sukuam chijichi tsapaama iman atatui.’

⁵ Apajuík wijai chichaman umikui,

duka atakesh tuke atinai.

Nuadui mina pataag aidauk

ishamtsuk shiig batsamtatui,

tuja ima Apajuíke pujut pegkejan sukagta duka.

⁶ Untsu aents pegkegchau aidauk

jagkijai betek achimainchau ainawai.

⁷ Tsuwat aidau numi juki duwi tiwija

jii kegamunum utsaam

esaka megkagama numamtin ainawai.

Dutikamunak ataktu

waketjukiajag juchau ainawai”,

tiuwai David.

**Apu aidau takasbau aina
nunú pachisa
yama nagkamchaku agagbau
1 Reyes
David takas inagnakmatai nuwi nagkama
Salomón takasbau**

(1—2)

Abisag Davitan kuitamkamu

¹ Apu Davitak muumpakiau asa senchi tsetsemak waitiau asamtai, jáanchin kuashat yajutuk asekedau. Imatikamash kukukutuk dekapeachu.

² Nunitai niina kuitamin aidau chichajuinak:

“Apuh, dekas amina kuitamjarkatin makichik nuwa muntsujut egaka itaami. Nunú aminí ayaumas kanakui, kukukut kanagminum”, tuidau.

³ Aatus tusag Israel aents aidau nugkenian nuwa shigmauchin etegkatag tusa ashí egakajui. Dutikawag yaakat Sunemnum nuwa Abisag daagtinun wainkajui. Dutikawag nuna jukiag apu Davitan ejetuawajui. ⁴ Abisagkak muntsujut shigmauch aajakui. Nunú apu Davitan kuitamajakui. Tujash apu Davitak nunú nuwauchijaig makichkish tsanjinachui.

Adonías apu atajai tibau

⁵ Nunú tsawantin Davita uchiji Adonías, Haguít aajakua nuwi akiamu, wi Israel aents aidaun apuji atajai tusa, carro maaniaku jutai aidaun, caballo maanítai aidaun, nuígtu cincuenta aents niina kuitamkatin aidaun aatus etegkeg ijumjauwai. ⁶ Adoníasnak Davitak tsakat asamtaigkish, pegkegchau takamsaipa tusag makichkish chichagkachui. Nuigtushkam Adoníasak shigmauch yantsaptin, niina yachi Absalógka awaan akiinau aajakui. ⁷ Tuja Seruíá uchiji Joab aajakua nujai, nuigtu sacerdote Abiatar aatus Adonías chichaman umikui. Nuadui dita aidau yaijaku ainawai. ⁸ Tujash sacerdote Sadokkesh, Benaías Joiadá uchijigkesh, nuni-achkush profeta Natágnkesh, tuja Davitan kajittsa anentai Simí aajakua dukesh Adoníasnak yagchajui. Tuja Davita suntaji yacha aina dukesh Adoníasnak yagchajui.

⁹ Makichik tsawantai Adonías chichaak:

“Jiistamku yuwatin uwig aidau, baka aidau, toro tsakat duwejam aidau kajegjum inangka umiktajum”, tusa inamjauwai. Nunak Roguel nugkanum yumí pukuni jiiinbaunum ijus, Zohéletnum kaya múun pujujakua nuwi dutikauwai. Dutika umika apu Davita uchiji niina yachi aidaun, Judá wegantu aidaun, tuja apu Davita takajin aidaun aatus ashí ipauwai.

¹⁰ Untsu profeta Natágnak, Benaíasnak, Davitan maawainum tusa, suntag kuitamajaku aina nujaig ipachui. Tuja niina yachi Salomógnakesh ipachui. ¹¹ Nunikmatai Natán Salomógka dukuji Betsabén chichajak:

“Apu David dekatsaig Adonías apu wajasa duka ¿amek dekatsmek?

¹² Nunú dekachkumek juwi taata, wi amesh amina uchijum Salomógnajish wajuk ayamjumaktatme nuna ujaktagme. ¹³ Nijah, apu David jegajua chichagkum:

“Apuh, ame umiktinjum mina chichagtakum:

“Wi jakamtaig, mina uchig Salomón apu wajas inamjattawai’ tusa tujutmayum nuniaish ¿wagka Adoníasash apush wajase? tita. ¹⁴ Tusa nijai chichamin wi wayakun, nunak dekas tawai tusan titajai”, tiuwai.

¹⁵ Tusa tima Betsabé apu Davidjai chichastatus weuwai. Tuja apu Davitak shiig muumpakiu asantai, Sunenumia nuwa Abisag niina kuitamak pujau. ¹⁶ Nuniai Betsabé apu pujamunum jeganta niina eme anentus tsunsuma nijayin nugka antig pujusui. Nunitai apu David iniak:

“¿Waji atsumame?”, tau. ¹⁷ Tama nii ayaak:

“Apujuh, amina Apajuujum Tuke Pujuu tutaya nunú adaisam chichag-takum: ‘Amina uchijum Salomón apu wajas inamjattawai’ tujutmayume. ¹⁸ Nunú umintsaig Adonías apu wajase, tujash duka amek eke dekatsume. ¹⁹ Nunik apu wajasu asa, jiistamku yuwami tusa toro múun aidaun, toro tsakat aidaun, nuigtu kuashat uwig maajum inagkatajum tusa niina inake aidaun inaje. Dutikak amina tikich uchijum aidaun ipae. Tuja nuigtushkam sacerdote Abiataran, nuigtu Joab suntag aidaun apujiya nuna aatus ipae. Tujash amina uchijum Salomónak ipache. ²⁰ Nuadui ashí Israel aents aidaun apu Davitash yanak dekas apu atinnash etegkeati tusa dekatatus yamai dakamainawai. ²¹ Tuja nunú ame etseggachaminig, ame jakamin minak mina uchig Salomóggjai Adonías mantuattawai”, tiuwai.

²² Tusa aujak pujai, profeta Natán jegauwai. ²³ Nunikmatai Davita inake aidaun Natán tae tusa ujakajui. Tusa ujakam wayati tima, Natán apu pujamunum wayauwai. Nunik niina eme anentus tsunsuma nijayin nugka antig pujusui. Natán wayamtai, Betsabék jiinki weuwai. ²⁴ Nunikmatai Natán Davitan iniak:

“¿Apujuh, ame jakamin Adonías apu ati tusamesh ameka timaum?

²⁵ Tichamaitkush ¿wagka Adoníasash Sojelet jegaash, toro múun aidaunash, tsakat aidaujai, nuigtu uwig aidaujui maatajum tusa inamjash amina uchijum aidaun, suntaja apuji aidaun, nuigtu sacerdote Abiataran aatus ipash ijumag nuna ditajai yuwak, umutain umuinak batsamas unsumainakush:

“¿Adoníasai iina apujig!’ wajainawa? ²⁶ Nuninakush minak, tuja sacerdote Sadoknak, Joiadá uchiji Benaíasnashkam ipapachaje. Tuja amina uchijum Salomónakesh ipachaje. ²⁷ ¿Tuja ame jakaminish, yaki apush ati dusha ameka mina ujattsuk, Adonías apu adaikatajum tusam inamjamum?” tiuwai.

Salomón apu atalui tusa David etsegkamu

²⁸ Tusa timatai apu David Betsabé untsuktajum tiuwai. Timatai untsukam apu Davitai jeganta wajasui. ²⁹ Nunikmatai apu David niina chichajak:

“Tuke Pujuu wi waitiamujun diigtus agkanmitkajauwa nuna adaisan tajame: ³⁰ Tuke Pujuu Apajuí jutii Israel aents aidaui emematin ainag nuna adaisan, wi yaunchuk amina timaijam nunak yamai betek umiktat-jai:

“¿Wi jakamtaig, amina uchijum Salomón apu wajas inamjattawai!” tiuwai.

³¹ Tusa tima Betsabé tsunsuma nijayin nugka antig pujus senchi jiika chichaak:

“¿Mina apujuh Davita, kuashat tsawan iwaku pujusam inamjatin ata tajame!” tiuwai. ³² Tusa tima apu David sacerdote Sadokan, profeta Natágkan, Benaías Joiadá uchijin aatus ujaka utitajum tusa

inamjauwai. Tusa timatai ujakam kampakuma duka betek kaunawajui.
³³ Nunikagmatai apu ditan chichajak:

“Mina atunitaig apu aina nunú ujaktajum. Dutikajum atumjai ijunajum mina uchig Salomón burro mina entsamtaijua nuwi ekeni jukijum, Guihón ematajum. ³⁴ Nuwi egegajum aceiteyai buuknum nijakjum, Israel aents aidaun apuji ematajum. Dutikajum yamajam apu ekeni tusajum makichik aents uwija kachuji umpuagta titajum. Nuna umpuakui senchi unsumkajum:

“¿Salomógkah, yamaik ametme iina apujig, kuashat mijan inamjatin ata!’ titajtume. ³⁵ Dutikajum atum kuitamkajum Jerusalén itaatajum. Dutikam nii mina pujusa inamtaijui waya ekemsati. Nunik nuwi pujus inamjati, wagki wi niinak Israel aents aidaun, Judá wegantu aidaujai apuji ati tusan tija’”, tiuwai.

³⁶ Tusa tutai Joiadá uchiji Benaías apu Davitan ayaak:

“¿Ame tame duke ati! ¿Tuja ame tame duka Tuke Pujuu amina Apajujuum tujabau tau asamin imanisag uminkati! ³⁷ Tuja nuigtushkam Tuke Pujuu amina yaimpakua dutiksag Salomógnashkam yaigti. Dutikamu asa ame apu wajasa inamjauwaitam, aan nagkaemas niina takatjig pegkeg ati’”, tiuwai.

³⁸ Tusa timatai sacerdote Sadoc, profeta Natán, Benaías Joiadá uchiji, quereteo aents aidau, nuigtu peleteo aents aidau aatus ijunag apu Davita burrojin Salomóghan ekeniag juki Guihón emajui. ³⁹ Dutika egegawagmatai, sacerdote Sadoc aak pegkejam Apajujujai chichatai aakmakbaunum chicham umiktin agagbau egkeamu arca aajakua nuwiyam uwija kachujin aceitejai jukiuwai dutika nunú aceiteyai Salomógka buuknum nijak apu emauwai. Dutikamtaí uwija kachuji jukimun umpuajajui. Nuna antukag ashí aents aidau unsumainak:

“¿Salomógka, ametme iina apujig, kuashat mijan inamjatin ata!’” wajaidau. ⁴⁰ Tusa imatuinak Salomógka saetus shimak shiig aneasag pigkuinak umpui umpuinakua shimuidau. Tuja shiig aneek senchi unsumaidau asagmatai, nuggak jimaitukes puunatai tumain wajau.

⁴¹ Tuja Adoníasak niina ipake aidaujai yujumkan yuwawag inagnainai, pampaidaun antukajui. Tuja kachu shinaun Joab antuk chichaak:

“¿Wagka yaaktanmash imanikash pampainawa?” tau. ⁴² Tusa chichá wajaig, Jonatán Abiataru uchiji aajakua nunú jegauwai. Nunikmatai Adonías chichajak:

“Wayata amek eme anentsa diitaiyaitme, chicham pegkeg etsegkatasa taachumek”, tiuwai. ⁴³ Tama Jonatán Adoníasan ayaak:

“Atsa, chichamak pegkegchauwai. Iina apuji David Salomóghan apu adaikae. ⁴⁴ Dutika sacerdote Sadokan, profeta Natághan, Joiadá uchiji Benaíasan, tuja quereteo aents aidaun, peleteo aents aidaujai Salomón uyuntsatajum tusa tinea. Tusa tima apu Davita burrojin ekeniag emaje.

⁴⁵ Dutikawag entsa pukuni jiinu Guihón tutaya nuwi egegawag sacerdote Sadoc profeta Natággjai aceiteyai buuknum nijakag apu emaje. Dutikawag shiig aneasag waketjaje. Nuadui yaaktanum aents pampaina nunak imatuinawai. Nunú imatuinamu atumek antukugme. ⁴⁶ Tuja nuigtushkam Salomóggak apu pujusa inamtaiya nuwi waya ekemsae.

⁴⁷ Nunikmatai apu Davitan atuwe suntaja apuji aidau shiig anentuinak Davitan nagkaesau Apajuú yaigti, dutikam shiig takasti tusa tiagtatus shimutkaje. Tuja Davidchakam Apajuin emematak niina pegajinig tsunsuma tepese. ⁴⁸ Nunik tepes chichaak:

“ ‘Israel aents aidaun ememattai Apajuí Tuke Pujuu tutaya duke ememattai ati, wagki nii tibaunak betek umiak, yamai mina uchig aina nuwiyam makichik apu awajsae. Dutika mina pujusa inamtaijua nuwi pujus inamjati tusa apusa nuadui. Tuja minashkam eke jatsuk wainkati tujutiú asamtai wainkajai’, tusa Apajuín aujak timae”, tiuwai.

⁴⁹ Nuna antukag Adonías ipaamu aidauk sapigmainak kujaidau. Nuninak maki makichik shiig wamak jiiñag shiyakag megkaejajui. ⁵⁰ Nunikagmatai Adoníaschakam Salomón mantuawai tusa ishamak aak pegkejam Apajuíjai chichatai aakmakbaunum wayauwai. Nunik nuwi kuntin maa patai apetai altar aajakua nuna kachujin achimak pujusui.

⁵¹ Nunikmatai makichik aents Salomógan ujaktatus wejiuwai. Nunik jegaa ujaak:

“Adonías amina ishamjamak aak pegkegmanum waya altarnum achimak pujus chichaak:

“ ‘Apu Salomón mina mantuashtinaitkug, Apajuín adayas dekas mash-tatjai tusa tujutti’ tujamui”, tiuwai. ⁵² Tusa ujakam Salomón chichaak:

“Niish aents shiig anentaimkauwaitkug, niina buukeniag makichik intashigkesh iyagchattawai. Untsu niina pegkegchauji dekagnamtaig, tuke mantamnattawai”, tiuwai. ⁵³ Tusa tamawaik suntaja apuji aidaun jiiktajum tusa ishitkauwai.

Tusa tima shimutkag jiiiki juki ejegawajui. Dutika ejegam Adonías apu Salomógan eme anentus niina emtin tsuntsuma wajasui. Nunikmatai Salomón, ¡wetá jemin! tusa awemauwai.

2

David inagnak niina uchiji Salomógan akatjamu

¹ David nii jakatnuji tsawan jegamtai pujusa, uchijin Salomógan akateak: ² “Wi jakatnujuk tsawantak jegagtine. Nuadui ¡amek mijamtsuk wajuu wajasta! ³ Nuniakum Tuke Pujuu Apajuí amina ememattaig-meamea nunú chichagtamak, wi wakegamua duke umikta tujabiuwa nunú imitksamek ashí umikta. Tuja Moisés chicham umiktinun agajua dushakam ashí umikta. Nunú betek umiakum ame takamugminig ashí pegkeg atatme. Tuja tuwi wekaetatme nuniakmeshkam ashí pegkegnum wekaetatme. ⁴ Nuigtushkam Tuke Pujuu mina anagtak: ‘Uchijum aidau pujutji pegkeg asag chichaman betek dita anentaijai, wakanijai mina umigtuinakuig, amina uchijum wegantu aidaunmayan tuke Israel aents aidau apuji ematnaitjai’, tujutiuiwa nuna dutiksag umikti.

⁵ “Tuja Joab Seruíá uchiji takamsauwa nunú kajimatkipa. Niig jimag suntaja apuji Abner, Ner aajakua nuna uchijin, nuigtu Jétera uchijin Amasánashkam mauwai. Nunak maaniachbau aig, yaunchuk dita magkagtuawajua duwi iikmajai tusa wainak chicham atsamunmak mauwai. Dutikak mina utugchatan itagtuauwai. Nuadui ame duka nii takamsamujinish wajuk titatme nunú dutikattame. ⁶ Nuadui shiig anentaimsam dutikata. Tujash agkan pujus jakati tusamek idaisaipa.

⁷ “Untsu Barzilai galaadnumiaya nuna uchiji aina duka wait anenjam ame ekemsa yutaiginin ekentsam ayujatin ata, wagki wi amina yatsum Absalón aintakui tipukaki wekagai, dita kuitamjuku ainawai.

⁸ “Tuja aneaku ata, anui Benjamín wegantu Simí, yaakat Bahurimnumia puja nunú wi Mahanaim wegai shiig pegkegchaun chichagtukabi. Tuju-tiuwaitak Mahanaim pujaun waketai, mina igkunkatatus namak Jordán

tajutuawabi. Nunikmatai dekas wi umiktinjun chichagkun: Maashtatjame tusan Tuke Pujuu daajin tiabiajai. ⁹ Tujash amek duka tsagkujaipa. Amek yachaitme, iman asam ame diista itugkattame. ¡Tujash waitus jakati tita!” tiuwai.

David jakamu

¹⁰ David jakamtai niina apachji aidau ukumasbaunum Jerusalén ukusajui. ¹¹ Davitak Israel aents aidau apuji wajasag cuarenta mijan inamjauwai. Yaakat Hebrógnum inamjauwai siete mijan, untsu Jerusalén inamjauwai treinta y tres mijan. ¹² Salomón niina apaji David jakamtai, nii apu wajas shiig agkan pujus inamjauwai.

3

Salomón Egipto nugka apuji nawanjjai nuwenamu

¹ Salomón Egipto nugka apujijai maaniachmi tusag chichaman umikui. Nunú chicham umiamunum Salomón nuna nawanjin nuwatkauwai. Dutika nuwatuk yaunchuk Jerusalén David pujusa inamajakua nuwi ejejauwai. Nuwi pujai Salomón nii pujusa inamjatnujin yamagman jegamkauwai. Dutika Tuke Pujuu emematku ijuntainashkam jegamak umika, yaaktanashkam peegkeg ashimkauwai. ² Tuja jega Tuke Pujuu emematku ijuntai eke uminchau asamtai, Israel aents aidauk yaunchuk nuwiya aents aidau nugka nain aidauunum dita apajuimtaijin emematu-inak kuntinu maa apejaku aina nuwig ditashkam Tuke Pujuu emematu-inak kuntinun maa apejaku ainawai.

Salomón Apajuín yachametan segamu

³ Salomógkak Tuke Pujuu aneau asa, yaunchuk niina apaji David umijujakua nunisag niishkam Tuke Pujuu umijujakui. Nuniyatak nugka nain aidauunum kuntinun maa apejakui, dutikak kugkuin incienso tutainashkam nuwi apejakui. ⁴ Ima nuigkik pujujakchauwai, yaakat Gabaógnumshakam wejaku kuntinun maa nuna nejen ashí apeak Apajuín ememattatus, wagki nunú ima nain tsakaju asamtai. Nuwi jegá mil kuntinun maa nuna nejen ashí apejakui.

⁵ Nuwi pujai kashi Tuke Pujuu kajanum wantintuk chichajak:

“¡Waji wakegame, nunú segatta amastajame!” tiuwai. ⁶ Tusa tama Salomón ayaak:

“Mina apag David amina inakem aajakua nunú ame tabaun betek umiak shiig takau asamtai, ame yaigkuitme. Tuja minashkam niina uchiji apu wajas shiig takasti tujutu asam, wait anenjaku duka tujutme. ⁷ Tuke Pujuu, mina Apajuíjuh, ame mina apag David jakamtai, nii apu wajas inamjati tujutu asam, wika tsakatuch shiig anentaimja takamainchau aig etegtuabiume. ⁸ Nunin ayatkun amina aentsjum shiig kuashat makichik aentskesh dekapajag ejemainchau aina imanun apuji wajasjai. ⁹ Tuja makichik aentskesh juju aents shiig kuashat aina nuna apuji wajas, niina yachajinig shiig takamainuk atsawai. Nuadui minash shiig anentaimsa takatnum yachamtijuata. Dutijuawamin wisha juwapi pegkejak, tuja juwapi pegkegchauk tusan shiig dekau atajai tusan segajame”, tiuwai.

¹⁰ Tusa nuna sumakmatai Apajuí Salomógkan shiig anenjauwai. ¹¹ Nunik chichajak:

“Kuashat mijan iwaku pujutkesh, tuja wiakuch wetakesh, atsa nuni-achkumesh shiwaajum aidau ijintakesh segattsuk, dekas wajuk mina

aentsug aidaujaish shiijash takamainaitme nunú segatiu asamin, ¹² ame segatam nunak imatiksasuk amastajai. Tuja yaunchuk aents yacha aajaku aina nuna nagkaesau, nuigtush atakesh iman achatnun yachamtikattajame. ¹³ Tuja ame segatchamunashkam wiakchamtikattagme, dutikakun eme anentsa diitai awajstaggme, dutika ai apu ashí nugkanmaya aidau nagkaesau atatme. ¹⁴ Tuja wi wakegamua duke takakum, nuigtu chicham umiktin agagbauwa nuna amina apa David umikua dutiksamak umiakminig, kuashat mijan iwaku pujustinnun yumigsattagme”, tiuwai.

¹⁵ Tusa tima shintaag anentaimas, dekas kajanmap tujutne tiuwai. Nunik wakitki Jerusalén jegaa chicham umiktin agagbau egkeamu arca pujaunum jegantui. Nunik kuntinu maa nuna nejen ashí apeak Tukey Pujuun emematiuwai. Nuna dutika ajak juukbau aidau Apajuín anentag suwak tikich kuntin tudau tsagkugnagtasa maamu aidau neje ujumak apeaku ampigbaun nuna nejen inamag umika niina atuwe aidau suntaja apuji aidaujai ashí ajamsauwai.

Apu Salomón chicham epegtan yacha

¹⁶ Nunú tsawantin jimag nuwa akika dutiktai aidau Salomógkan jega-juawajui. Nunik nii eketbaunum jegantag, ¹⁷ makichkia nunú chichaak:

“¡Chah apujuh! Juju nuwa jujai makichik jeganmak pujaji. Nunika pujusan uchin uchigmakmajai. ¹⁸ Nunikan kauptum tsawan pujai, juju nuwashkam uchigmakmae. Nunika ima jimagchitik pujumji. Tikich aents wainchataigkesh atsume. ¹⁹ Nuniamunum kashi juju nuwa uchijin tepejuk maame. ²⁰ Dutika ejampek shintaag, wi kanaja tepai mina uchig minai ayaumas tepaun juki niyai ayaunas aepeak, niina uchiji jakaun minai itan aepsame. ²¹ Dutikau ai tsawajan kashikmasan nantakin mina uchiju amuntsuatag tukaman jakaun wainkamjai. Tujash shiig tsawagmatai, diikman mina uchigchaun wainkamjai”, tiuwai.

²² Tutai tikich nuwa chichaak:

“Atsa, auk iwakua duka mina uchijui, jaka nunuwai amina uchigmik”, tau. Tutai yama nagkamchak chichakua nunú chichaak:

“Atsa, auk uchi jakauwa duka aminui, untsu uchi iwakua nunuwai mina uchijuk”, tusag aatus apu emtin jiyaniidau.

²³ Nuniagtai apu Salomón anentaimas: “¡Uchi iwakua jaka mina uchijui tawai juju nuwa. Tuja untsu uchi jakauwa nunak tikich nuwa aunui tawai. Tujash tikich nuwa aushkam dutiksag tawai!” ²⁴ Tusa chichaak:

“¡Puyag sujstajum!” tiuwai. Tutai puyajan ejentuntajui.

²⁵ Dutikawagmatai chichaak:

“Anú uchi iwakua nunú jimaituk tsupikam jimag nuwa nunú mai etsegka susata”, tiuwai. ²⁶ Tutai uchi iwaka nuna dukuji niina uchiji asamtai, puyatjau asa, apu Salomógkan chichajak:

“¡Wait aneasam apuh, uchik maawaipa! ¡Dekas juju nuwa susata!” tiuwai. Tutai untsu tikich nuwa nunú chichaak:

“Anú uchua duka midaukesh achattawai, ¡dekas jimaituk tsupiktinme!” tiuwai.

²⁷ Tusa tutai apu chichaak: “Uchi iwakua duka anú nuwa uchi maawaigpajum tawa nunú susata, wagki niyai dekas uchigtinuk”, tiuwai.

²⁸ Aatus apu Salomón epegkeamtai, nuna ashí Israel aents aidau dekawajui. Nunikag apu Salomógkan eme anentuidau, wagki Apajuín chichaman shiig epegkeati tusa yachametan susau asamtai.

5

*Salomón Tironmaya apu Hiram aajakua nujai chichaman umikbau
(2 Cr. 2.1-18)*

¹ Salomógkan apu adaikaje tabaun yaakat Tiro apuji Hiram dekauwai. Nunik kumpamatatus niina aentsji aidaun ishitkauwai. Nunak dutikauwai wagki yaunchuk nagkamas Davidjai shiig anendayajaku asa. ² Dutika ishitkam Salomón dita waketiagtai, Hiram chichama akuptak: ³ “Amek dekame mina apag David niina shiwaaji aidaujui maaniak jega Apajuí emematku ijuntain jegamkachua nunú. Tujash niina shiwaaji aidaun ashí depetkati tusa Apajuí tima ashí depetkauwai. ⁴ Tujash yamai Tuke Pujun Apajuín wi emematnaitag nunú iina agkatmikagbau asamtai, jutijai maanidauk atsawai. ⁵ Nuadui Tuke Pujuu mina apag Davitan chichajak:

“ ‘Apajuí emematku ijuntain amina uchijum jegamkattawai, nuwi wayawag mina emematjiagtinun’, tusa tiuwa nuna umiakun jegan jegamkattajai. ⁶ Nuadui amina aentsjum aidau Libano tutaya nuwiyen setjun tsupigtugtinme. Tuja mina inakeg aidau ditan yainkagatujui. Nunú amina aentsjum aidaunak ame wajak akikti tujuttatpa nuna wi akikagtatjai. Nunak tajame, wagki jutii aidautik amina aentsjum Sidón batsamin aidau, numi tsupitan yacha aina imanuk makichkish atsa nunú, ameshkam dekau asamin”, tiuwai.

⁷ Tusa chicham akuptukbaun Hiram antuk, shiig aneasui. Nunik senchi untumak chichaak: “¡Tuke Pujuu Israel aents aidau emematin aina duke ememattai ati, wagki nii Davitan wait anentug uchi yachan niina aentsji aidau apuji atinun susauwai!” tiuwai. ⁸ Tusa pujus Salomógkan chichama akuptak: “Ame chicham akupjutkamun antukjai. Nuniku asan ame segatam nunak imatiksanak: Setjun pinojai ishitkattagme. ⁹ Mina inakeg aidau Libanonmayan tsupijag nayantsanum utsawagatujui. Dutikawagmatai ame tuwi itagtuatnume titatme nuwi papagma ejetuatajum titatjai. Nuwi ikaunmawag atijagmatai ame yajuaktatme. Untsu ame mina akigmaitam nunú mina aentsug aidau wi pujusa inamtaijui batsata nunú yuwatin aidau yujumak susata”, tiuwai.

¹⁰ Aatus Hiram setug aidaun pino aidaujai, Salomón wakegamunak imatiksag ashí susauwai. ¹¹ Tuja Salomógshakam Hiram niina aentsji aidau ayujatnun cuatro millón cuatrocientos mil litro trigon, nuigtu cuatro mil cuatro cientos litro aceite olivo nejenia yajuakbaun susauwai. Tuja maki makichik mijanai nunak sujaku. ¹² Tuja Tuke Pujuu Salomógkan anagkuamunak imatiksag shiig yacha emauwai. Tuja Hiramshakam maanichmi tusa Salomógjai chichaman umiku asa maanitsuk batsamajakui. Nuadui maanitsuk batsamajaku ainawai.

¹³ Nunik batsamas apu Salomón takat nagkamnati tusa ashí Israel aents aidaunum chichaman ishiakui. Tusa tima treinta mil aents aidau tuwakajui. ¹⁴ Nunikagmatai, muja Líbano tutainum maki makichik nantutin diez mil aentsun numin tsupigtinme tusa ishimajakui. Dutikamu asag aents aidauk nunú mujanum makichik nantu takasag waketug dita jeen jimag nantu batsamajaku ainawai. Tuja takata apujig Adoniram aajakui. ¹⁵ Nuigtushkam nunú mujanum ciento cincuenta mil aents takainak batsatu. Nuwiyen ochenta mil kayan tsupinau, dutikiagtai setenta mil aents yanaidau. ¹⁶ Nuigtushkam Salomógnak ajujaku tres mil trescientos aents takata takaidaun kuitamaidau. ¹⁷ Tuja apu Salomón aents kaya tsupin aidaun chichama akuptak:

“Kaya múun, shiig pegkeg aidaun, kaya pakamamu aidaujai jega Apajuí emematku ijuntai jegamkatnunum aepka nagkamatin aidaun, yajuak ikaunmatnume”, tiuwai. ¹⁸ Tusa timatai Salomógka aentsji jegá jegamin aidau Hirama aentsji aidaujai, nuigtu yaakat Guebalnum tikiju batsamin aidau aatus numin tsupijag, kaya dakajag pakamawag jega Apajuí emematku ijuntain ashí jegamak umikajui.

6

Apajuí emematku ijuntain Salomón jegamkamu

¹ Salomón apu wajas kampatum mijan ejeyi, nuigtu ipak usumta nuna achika nantu kampatuma nunú Ziv tutai taka jimaituk wegai, jega Apajuí emematku ijuntain jegamkatatus nagkamauwai. Nunak Israel aents aidau Egipto nugkanum batsatu jijnauwa duwi nagkamsa dekapajam cuatrocientos ochenta mijan weamunum nagkamauwai.

² Jega Apajuí emematku ijuntain Salomón jegamkauwa nuna esantig veintisiete dekapamu, wegkanti nueve dekapamu, tuja yakinti trece nuigtu jimaituk dakapamu aajakui. ³ Tuja jega jegamku ajigbau waitinum jegantata aajakua nuna esantig, jega wegkantijai betek nueve dekapamu aajakui, untsu wegkantig cuatro dekapamu, nuigtu jimaituk aajakui. ⁴ Nunú jeganum wajasa niimtai aidaun najanak, jiju aidaun ajintuk umikui. ⁵ Nuigtushkam sacerdote aidau, dita takataiji aidaun chimpiauwag kuitamkagtinun nunú jega yantamen achimtika jegamkauwai. Dutika kampatum tesauwai. ⁶ Nunú jeganum yama nagkamchaku tesaamu aajakua nuna wegkantig jimag dekapamu, nuigtu veinticinco centímetro aajakui. Untsu nuna yakin tesaamua nunú jimag dekapamu nuigtu setenta centímetro aajakui. Tuja nuna yakin inagnamu tesaamua duka tres dekapamu nuigtu quince centímetro aajakui. Nunú jeganak yaigchinum nagkama yakí iwakag jegamkauwai. Nunak dutik jegamkauwai wagki jega pegkejam jegamkamua nuna numi iju chigkawai tusa. ⁷ Jega pegkejam Apajuí emematku ijuntain jegamkug kaya pakamamu aidaun shiig umikbaun nuna ekenag jegamkajui. Nuadui martillo, jacha, tikich jiju najanamua aidauwaikish awatbauk makichkish antukachui. ⁸ Tuja jega pegkejam jegamkamunum nuwi achimtika jegamkamu aajakua nuna waitijig untsugnumanini aajakui. Untsu nuwi waya yaki wataig papaja tentea iwakbau aajakui.

⁹ Tuja Apajuí emematku ijuntai jegamnak ashí uminkamtaí, inagnak setug dakagbaun yakí pataja umikui. ¹⁰ Tuja nuigtushkam nunú jeganum achimtika ashí tentea jegamkauwai. Nunak nuwi waji aidau chimpia kuitamkatnun dutikauwai. Tuja duka numi ajinka emetjamu aajakui. Untsu maki makichik tesaamu aajakua nuna yakintig jimag dekapamu nuigtu veinticinco centímetro aajakui.

¹¹ Nuna ashí ashimkamtaí Tuke Pujuu Salomógkan chichajak: ¹² “Ame Apajuí emematku ijuntai múun jegamam nuna pachisan tajame: Shiig pujusam mina chichameg umiktin agagbau aina nunú betek umiak-minig, wi amina apa Davitan anagkuawaitag nunak imatiksanan amina yayaakun umiktatjai. ¹³ Tuja Israel aents aidautigminak makichkish idaisashinaitjime, wi atumnak tuke kuitamkatnaitjime”, tiuwai.

¹⁴ Aatus Salomón jega múun Apajuí emematku ijuntai atinun jegamak ashimkauwai. ¹⁵ Dutika nuna initken setug dakagbaun anujung shiig umikui. Untsu nugkanum numi pino dakagbaun papaja shiig umikui.

¹⁶ Tuja nuigtushkam jega nagkatkamunum makichik tesauwai, dutika nunú tesaamua nunú “shiiig pegkejam”^{*} tutai atinun setug dakagbauwai yakí nagkama shiiig pegkejan umikui. ¹⁷ Tuja tikich tesaamu ayatak “pegkejam” tutai aajakua nuna esantig dieciocho dekapamu aajakui. ¹⁸ Tuke Pujuu emematku ijuntai jegamkamu aajakua nuna initkenig setug dakagbauwai emematumun taumi yagkug aidau, yujág aidau dakumjamu aajakui.

¹⁹ Nunú jeganum tesaamu “shiiig pegkejam” tutainum chicham umikt-inun Tuke Pujuu agagbau egkeamu arca asatnun Salomón shiiig umikui. ²⁰ Nunú tesaamu shiiig pegkejam tutai aajakua nuwi waya dekapamak esantig nueve aajakui. Tuja wegkantishkam nueve dekapamu aajakui. Tuja yakintishkam nueve dekapamu aajakui. Tuja Apajuí emematku incienso patasa apetaín Salomón numi setjun najana orojai ukatkauwai. Dutika nunú tesaamu shiiig pegkejam tutainum nuna niimtikas apusauwai. ²¹ Tuja nuigtushkam jega Apajuí emematku ijuntai jegamkamunak oron ukatkauwai, dutika nuwi tesaamu shiiig pegkejam tutainashkam oron ukatuk umikui. Dutika ashimak nuna waitijin cadena oro najanamun aidau detujui. ²² Aatus ashí oron ukatuk emau asa, Apajuí emematku patasa apetai aajakua nunashkam dutiksag ukatuk umikui.

²³ Tuja nuigtushkam jega tesaamu shiiig pegkejam tutainum asatnun, jimag querubigkan dakumak numi olivo tutayai najanauwai. Nunú aidau esantig cuatro dekapamu aajakui. ²⁴ Nuna nanapeg maki makichik jimag dekapamu nuigtu veinticinco centímetro aajakui. Nuniau asa mai apatkam ipak usumat dekapamu nuigtu jimaituk aajakui. ²⁵ Nunú dakumka najanamun jimag aajakua nuna esantig mai betekak aajakui. Niimeshkam betek aajakui. ²⁶ Nuna yakinti aidauk cuatro dekapamu nuigtu jimaituk aajakui. ²⁷ Nuna Salomón juki jega tesaamu shiiig pegkejam tutai aajakua nuwi awayauwai. Nunú aidau nanapeg yapaag aajakui. Nuniau asa tikichia nuna nanape mena nunini awa nunú tanishan antig aajakui. Untsu tikichia nuna nanape untsuja nuni awa nunú tikich tanishan antig aajakui. Tuja tikich nanapega duka mai igkunia antiinik aajakui. ²⁸ Nunashkam Salomón oron ukatkauwai.

²⁹ Nuna dutika jega initken, tuja awankenishkam querubin aidau nanamtinun taumi dakumjauwai. Dutikak nuigtushkam palmera aidau, yagkug aidau dakumjauwai. ³⁰ Tuja jega initken nugkanum setug dakagbau shiiig batsaka umikbau aajakua nunashkam agaajijai oron ukatkauwai. ³¹ Untsu nunú jeganum tesaamu shiiig pegkejam tutaya nuwi wayaku ujatain jimag waitin numi olivon najanauwai. Nunú waiti nujamkatín aidau ajigbauk, cinco yantamjintin dakagbau asa yantagtau aajakui. ³² Tuja jimag waiti najanamun aajakua duka numi olivo najanamun aajakui. Nunú waitinun Apajuí aentsji nanaptin aidau taumi dakumjamun aajakui. Nuigtushkam palmera aidau, yagkug aidau dutiksaik dakumjamun aajakui. Tuja nunashkam oron ukatkauwai.

³³ Tuja jega Apajuí emematku ijuntai jegamkamun waitiji nujamkat-nunashkam numi olivo cuatro dekapu tsupija ajigbau aajakui. ³⁴ Nuna waitijig jimag najanamun asa mai ujanajakua duka pino najanamun aajakui. ³⁵ Nuwishkam querubin nanaptin aidau, palmera aidau, yagkug aidau taumi dakumja oro ukatkamu aajakui. ³⁶ Tuja nunú jeganum atrio tutai

* **6:16** “Shiiig pegkejam” tawa nunak apach chichamnum “lugar santísimo” tawa nuna taku tawai.

agkajua nunashkam kaya pakamamu aidaun kempatuma imania ekenag tentea umikui.

³⁷ Apajuí emematku ijuntain jegamkug nantu Ziv tawa duwi nagka-mauwai. Nunak Salomón apu wajas ipak usumat mijan inamak pujus nagkamauwai. ³⁸ Dutika nagkama nii apu wajas inabaujin once mijanan ejeji, nantu ochoa nunú Bul tutai takau ai, ashí umikui. Tuja ashí ijumjamak nunú jeganak siete mijanai umikui.

8

Chicham umiktin agagbau egketun arcan juki jega Apajuí emematku ijuntainum awayamu

¹ Nuna ashí umiku asa, Sión Davita yaaktaji tutai aajakua nuwi Tuke Pujuu chichame umiktin agagbau arcanum egketun jukitatus Salomón Israel aentsu apuji múun aidaun, maki makichik wegantu aajaku aina nuna apuji aidaun, nuigtu tikich Israel aents eme anentsa diitai aidaun aatus ipaa Jerusalén ijumjauwai. ² Nunak Etanim nantutin numi kanawe tsupija aakmaja batsamsamu tusag jiiistamajaku aina nunú tsawantin ashí Israel aents aidauk apu Salomógjai ijumjauwai.

³ Nunikag Israel aents aidaun apuji múun aidau ashí ijunjagmatai, sacerdote aidau, ⁴ ujumak Leví wegantu aidau yaigkajam arcan juwinak, Apajuíjai chichatai carpa aakmakbau aajakua nujai jukiajui. Dutikainak nuwi takatai aidaunashkam ashí yajuakag Apajuí emematku ijuntai jega jegamkamunum, Apajuí dutikata tibaunak imatiksag ejegawajui.

⁵ Dutikawagmatai apu Salomón ashí Israel aents aidaun arca apusamunum nuna igkuas ijumjauwai. Dutika nuwi uwig aidaun, toro aidaun makichikish dekapamainchau shiig kuashat maa apeak Apajuín emematiuwai.

⁶ Dutikamtai, sacerdote aidau Tuke Pujuu chichame umiktin agagbau egketun arcan jukiag Apajuí emematku ijuntainum awayawajui. Dutikawag nunú jeganum tesaamu shiig pegkejam tutainum querubin dakumkamu nanamtin aidau ijunbaunum nuna nanape aidaunum yun-nak apusauwai. ⁷ Nuna nanape aidauk chicham umiktin agagbau egkeamu arcan dukuka aajakui. Tuja arca juwaku numi wegagtai aajakua nunashkam dukuk aajakui. ⁸ Tujash nuna numiji aidauk esajam aajakui. Iman asa agá wajasa diyam wantinchakush, jega tesaamu ayatak pegkejam tutainum wajasa diyamak paan aajakui. Nuna dutika awayau aina duka yamaikish nunisag awai. ⁹ Nunú arcanmak Israel aents aidau Egipto ngukanum batsatun yajuak emas, muja Horebnum jimag kaya pakama najanamunum chicham umiktin agagbaun Tuke Pujuu Moisésan susauwa ima duke egkemajakui.

¹⁰ Sacerdote aidau arcan awayawag ukuinak, jega tesaamu pegkejam tutainum batsatu jiiinainaig, yujagkim jeganak initkajai ijiuwai. ¹¹ Nunú Tuke Pujuu imanji jeganum akijuau asamtai, sacerdote aidauk ijunja Tuke Pujuu emematmi tibaunak umikchajui.

Apajuí emematku ijuntai jegamkamu Apajuí idaitusbau

¹² Imanikmatai Salomón chichaak:
 “Tuke Pujuuwah, ame chichaakum
 wika suwenum pujuuwaitjai tiuwaitme.

¹³ Tujash wi ame tuke pujustinun jegan jegamjukjame”, tiuwai.

¹⁴ Nuna tusa, Israel aents aidau tuwaka ijunbaunum ayampa wajas ditan pegkegnum yumigkiak, ¹⁵ aatus tiuwai:

“Israel aents aidau emematin aina nunú Tuke Pujuu mina apag Davitan anagkuawa nuna umike. Nuadui ima nigki ememattai ati. Tuja nii chichaak: ¹⁶ ‘Israel aents aidau Egipto nugkanum batsatun jiiujitag duwi nagkamsanush mina jegajun jegamjutkagmatai, nuwi wayawag emematjitnume tusanuk maki makichik wegantu aina nuna yaaktaji aina nuwiyanak nugkanak makichkish etegkachuitjai. Tujash Davitan etegkauwaitjai mina aentsug Israel aents aina nuna apuji atinun’ tusa Apajuí tawai”, tiuwai Salomón.

¹⁷ “Nuadui mina apag David Tuke Pujuu emematku ijuntai atinun jegamkatatus wakekauwai. ¹⁸ Tujash Tuke Pujuu niina chichajak:

“‘Ame mina jegag jegamkatasa wakegam duka dekas pegkejai. ¹⁹ Tujash amechuitme jegamkatnumek, amina uchijum akinatta nunú mina emematjaku ijuntainak jegamjutkatnai’, tiuwai.

²⁰ “Tusa tiuwa nunak imatiksag umike. Nii tibaunak imatiksasuk, atumi apuji wajasana, mina apag ekemas inamajakua nuwig wi wayan ekemsajai. Nunúku asan Tuke Pujuu emematku ijuntain jegan jegamkajai.

²¹ Tuja nuigtushkam, iina muunji aajaku aina nuna Tuke Pujuu Egipto nugkanmayan jiija yajuak chicham umiktinun susauwa nunú arcanum egketa nunashkam tesajuan umikjai”, tiuwai.

²² Tusa inagnak, nunú jega agájin kuntin maa patai apetai altar pujaunum nuna igkuas wajasui. Nunikmatai ashí Israel aents aidaushkam ijunjai. Nunikagmatai ditá emtin niina uwejen nayaimpinmanini takuiniuwai. ²³ Nunik wajas senchi chichaka Tuke Pujuu segaak:

“jTuke Pujuuwah, ametme Apajuí Israel aents aidauti ememattaimek! Tuja ame chichakbaujum betek uminaitam imanuk tikichik nayaimpinmash, nugkanmashkam atsawai. Aents aidau amina dita anentain umigtamaina duka shiig anennaitme.

²⁴ “Tuja ame mina apag anagkuawaitam nunú yamai umikume. Niig ima aminak umigtamkauwa duwi ame niijai chicham umiakum: ‘Amina uchijum wi pujustinun jegan jegamjutkatnai’, tiuwaitme. ²⁵ Nuadui ame mina apag David chichagkum: ‘Ame wegantunmaya aidau shiig kuitamamas pujuinak, shiig takainakuig, nuwiyana apu atinun tuké etegtnaitjai’, tiuwaitam dushakam umikta. ²⁶ Tuke Pujuu, Israel aents aidautin Apajuíjijyah, ame mina apag anagkuawaitam duka imatiksamek umikta.

²⁷ “Nuga múun, nayaim múun aina nuwigkish amek betek pujumait-sume. jTuja juju jega ame pujustinun wi jegamjukjam juninchinmash wajuk pujustameki tajai! ²⁸ Nuninuch aigkish Tuke Pujuuwah, wi segajam nunú wait aneam antugtukta. Wi amina inakmin yamai segajame. ²⁹ Tuja juju jeganum pujustatai tiuwaitam nuadui ame pujakum tsawaish, kashish tuke diyaku ata. Wi amina inakmin juwi wajasana segajame. ³⁰ Amina aentsjum Israel wegantu aidauti, jega ame emematku ijuntai jegamkamua nuni ijuntsa segajam nunú nayaim amina pujutaigmia nuwi pujusam antugkagtukta, nunikam ii pegkegchau takamsamujish tsagkugkagtugta.

³¹ “Makichik aents tikich aentsun pegkegchaun takamjusmataig, juju kuntin maa patasa apetai juwi itantam wajas takamsachua asa dekaskenun chichaak: ‘Wika dekas takamsachmajai’ tumamkui, ³² ame nayaimpinum pujusam, dekas yanawaita utugchatash nunú diisam aents takamsau suwimak suwakum, takamsachua duka idaisatin ata.

³³ “Tuja amina aentsjum aidau pegkegchau takagtamsau asagmatai, dita shiwaaji depetuk achija yajuakam yujas, waituinak awake anentaimag amina emematjamainak, juju jega jegamkamua juna anentaimtus, tsagkugtuga tusa segapainakuig, ³⁴ nayaimpinum pujusam antugkata. Dutika tsagkujam ame iina muunji aajaku aidau juju nugka susauwaitam juwi ataktu awagkim ikaunmatin ata.

³⁵ “Amina aentsjum Israel wegantu aina nunú amina pegkegchaun takagtamainakui, suwimak suwakum yumi yutumtikjachamin waituinak awake anentaimag amina emematjamainak, juju jega jegamkamua nuna anentaimtus segapainakuig, ³⁶ nayaimpinum pujusam antugkatin ata. Dutikam amina aentsjum asagmatai, tsagkujatin ata. Dutikam jintintuatin ata, wajuk shiig batsamain ainawa nunú. Dutikam juju nugka atumdau tuke atinai tusa susauwaitam nuwi yumi yutumtjatin ata.

³⁷ “Juju nugkanum nujantai waitiamu, tuja yumish yutachu asamtai, ajak aidau kakaga jinaw, nuniachkush ajaka jati aidau, manchi aidau, tema aidau, shiwag aidaukesh iina yaaktaji aidau tenteawag jetedau, nuniachkush tikich waitut jata aidau aatus waitkainam, ³⁸ anentaimas juju jega ame emematku ijuntai jegamkamua juni uwejen takuniag wajasag amina segapainakuig antugkatin ata. ³⁹ Maki makichik aents wajuk anentaimainawa, tuja wajina dutikatag tuinawa duka ame dekame. Nuadui nayaim amina pujutaigmin pujusam maki makichik dita takatji diigsam aiktin ata. Dutikakum dekaskenum segapaina duka tsagkujatin ata. ⁴⁰ Dutikawamin ame iina muunji aidau nugka susauwaitam nuwi batsamsag aminak eme anenjamas umigtamiagtinai.

⁴¹ “Makichik aents atushtanmaya Israel wegantuchu amina daagmin antuka, juwi taa juju jega ame emematku ijuntaiya juni ayampa pujus, ⁴² amina segapakuig, amina daajum múunta nuna nuigtu ame senchigtnaitam nunashkam antuidau asagmatai, ⁴³ nayaim amina pujutaigmia nuwi pujusam antugkatin ata. Dutikakum nii segapamuk ashí susata. Nuna diisag aents tikich nugkanmaya aidaush, Israel aents aidau amina eme anenjamin aina dutiksag ditashkam eme anenjamsatnume. Aatus tikich nugkanmaya aidaushkam dekatnume amina daajum juju jegan wi umikag juwi ememattai atata nuna.

⁴⁴ “Tuja amina aentsjum Israel wegantu aidau, dita shiwaaji aidaujai maaniatnume tusam tuwi ishiaktatme, nuwi yujasag maaninak ame yaakat etegkauwaitam nuni ayampawag, tuja wi ame emematku ijuntain jegamkag junishkam ayampawag segapainakuig, ⁴⁵ nayaimpinum pujusam dita sumamuji antugkam ayamjuktin ata.

⁴⁶ “Ashí aents aidau amina pegkegchaun takagtamsagmatai, shiig senchi kajekam, dita shiwaaji aidau achija yajuaktinme tima, achija yajuakam nugken ukukiag, ⁴⁷ tikich nugkanum batsamas amina emematjamainak dita pegkegchau takamsamujin anentaimas awake anentaimag amina segapainakuig yaigtin ata. ⁴⁸ Tuja shiwag aidau achija yajuakam tikich nugkanum batsamas, juju yaakat Jerusalén ame etegkamua nuni ayampawag, tuja juju jega ame emematku ijuntai atinun wi jegamkag juni ayampawag pujusag dita anentaijai, wakanijai segapainakuig, ⁴⁹ dita sumamu antugkam nayaim amina pujutaigmia nuwi pujusam ayamjukam, kuitamkatin ata. ⁵⁰ Amina aentsjum aina nunú pegkegchaun takainak amejai shiwagmagainakuish, tsagkujatin ata. Dita shiwaaji aidau achija yajuakagmataish, nunú shiwag aidau amina aentsjum aidau wait anenjatnume tita. ⁵¹ Wagki ditak amina aentsjum asag aminu ainawai. Egipto

nugkanum batsamas jiju jii kegamunum jiya ukuitayama numamtuk awajam waituinak batsatu ame jiiuitme.

⁵² “Amina aentsjum Israel aents aidau segapaina nunú, tuja wi amina inakminchakam segajam nunú antugkagtukta. ¡Ii sumamua nunú antugkagtukam yaijatkata! ⁵³ Tikich aents aidauk batsataig, juju aents aina nunú aminu agtin etegkauwaitme. Dutikauwaitam nunú pachisam, iina muunji aidau Egipto nugkanum batsatu jiiuitam nuadui amina inakem Moisés ujakuitme”, tusa aatus Salomón Tuke Pujuu segauwai.

⁵⁴ Aatus Salomón altaran igkuas tikishmag pujus uwejen nayaimpinmanini takui Tuke Pujuu segauwai. ⁵⁵ Nunik ashimak wajai, ashí Israel aents aidau senchi chichaka pegkegnum yumigkiak:

⁵⁶ “Tuke Pujuu, nii anagkagtuamua nuna umiak, niina aentsji Israel aents aidau maanitsuk batsamsati tusa tujabiu asamtai agkan batsatag nuadui ima nigki ememattai ati. Wagki nii pegkeg aidau Moisésan anagkuauwa nunak umitskek idaisachu asamtai. ⁵⁷ Tuja Tuke Pujuu Apajuí ii emematin ainag nunú iina muunji aajaku aina nuna yaigkua dutiksag iinashkam yamaish yaimpakti. Ima iinakek idaitamashti, ⁵⁸ dekas iinash nii wakesa umigtan amastí, dutijamamtai nii wakegamua nunú umiaku niina chichame umiktin agagbau aidau umiktajum tusa iina muunji aidau susauwa dushakam umikagmi. ⁵⁹ ¡Juna ashí pachisan wi taja nunak, Tuke Pujuu iina Apajuí pegkegnum yaimpak, tsawaish, kashish tuke aneaku atin ati! Nuniak ii kashi kashinig atsumamunash sujamsatin ati. ⁶⁰ Nuna diisag aents tikich nugkanmaya aidaush dekas tikich Tuke Pujuu Apajuíyia ibauk atsawapi titin atinme.

⁶¹ “Nuadui atum aidautigmek Tuke Pujuu ii emematin ainag duka dekaskenum takajin atajum. Nuniakjum niina chichame umiktin agagbau yamai umiajum dutiksagmek umiktin atajum”, tiuwai Salomón.

⁶² Nuna tusa inagnak, apu Salomón ashí Israel aents aidaujai Tuke Pujuu emematak kuntuinun maa apeauwai. ⁶³ Aatus Salomón Tuke Pujuujai chicham epegkeamunum veinti dos mil toron, nuigtu ciento veinte mil uwijan mauwai, Apajuín emematak.*

Dutika apu Salomón ashí Israel aents aidaujai nunú jega Tuke Pujuu emematu ijuntai jegamkamun: Juka yamaik Tuke Pujuuui, tusa niina idaitusui.

⁶⁴ Tuja nunú tsawanta duik nunú jega jegamkamua nuna waitijin jegan-tatak agkaju awa nuna, juka Apajuínui tusa nuwi emematak kuntuinun maa nuna nejen ashí apeauwai. Dutikak ajaka neje juukbau aidauashkam Tuke Pujuu anentag susauwai. Tuja kuntuinun wiyaji aidauashkam Tuke Pujuu agkan pujutan amastí tusa apeauwai. Tuja nunú aidauak kuntuinun maa patai apetai bronce najanamu aajakua nuwi pataig apeachui, wagki nuwi ashí pataja apemainchau kuashat asamtai.

⁶⁵ Nunú tsawantin numi kanawe tsupija aakmaja batsamsamu tsawan asamtai, Salomón ashí Israel aents aidaujai, nuigtu yaakat Hamat jegattak nagkamas entsa Egipto nugkanum awa imanuiya nagkamas shiig kuashat aents kaunawajua nujai ijunag siete tsawan jiiistamawajui. Tuja tikich jiiistanashkam siete tsawan jiiistamawajui. Nunidau asag ashí ijumjamak catorce tsawan jiiistamawajui. ⁶⁶ Nunú jiiista ashimdaekamtai, kanag tsawajag apu Salomón aents aidau ashí kumpamauwai. Dutikam

* **8:63** Chicham Apajuíjai epegkeamunmak kuntuinun neje aina nunak ashí apejakchajui, ayatak wiyajin apeak nejenak inajuawag yujaku ainawai.

ditashkam Tuke Pujuu Davitan pegkegnum yayaak, ditanashkam dutiksag pegkegnum yaigbau asag, apu Salomógkan kumpamawag pegkegnum yumigkis shiig aneas waketajai.

9

Apajuí Salomógjai chicham umikbau

¹ Salomón jega Tuke Pujuu emematku ijuntain jegamak ashimak, nuigtu nii pujusa inamjatnunashkam ashimak, tuja tikichin nii dutikatag tibaau aidaunashkam ashí umikui. ² Dutikamtai Tuke Pujuu yaunchuk Gabaógnum wantintukua dutiksag ataktushkam wantintukui. ³ Nunik chichajak:

“Ame segatmaum nunak antugkajame. Nuadui juju ame jega wi tuke pujustin jegamkaum nunak tuke kuitamkattajai. ⁴ Tuja amina apa David mina umigtak shiig takasua imatiksamek wi chicham umikta tibaauwa nunú ashí betek umiakminig, ⁵ wi amina apa Davitan anagkuakun:

“‘Amina uchijum aidaunmayag makichik tuké Israel aents aidaun apuji atinai’ tiuwaitag nunak imatiksasuk amejai umiktatjai.

⁶ “Untsu ame, nuigtu amina uchijum wegantu agtina nunú mina chichameg umiktin agagbauwa nunú umitsuk tikich apajuímkugminig, ⁷ wi Israel aents aidaun nugka susauwaitag nuwi batsatjum nunak utsagtinaitjai. Tuja juju jega juna wi pujustinun etegkag nunashkam idaisattajai. Dutika ai tikich aents aidau Israel aents aidaunak dushikiagtinaí. ⁸ Tuja juju jega juka tsaikam numi aidauk, kaya aidauk tuwasua weaku atinai. Dutika ai aents nuni nagkaemainak wainkag puyatuk tuke dushikis chichainak:

“‘¿Wagkak Tuke Pujush Israel aents aidau nugkenash, juju jega nii pujustin jegamkamua nujaiash imatikayawa?’ tiagtinaí. ⁹ Tusa tiagtai, tikich aents ditan chichajuinak:

“‘Auk ditá muunji aajaku aina nunú Egipto nugkanum batsatun Tuke Pujuu jija agkanmitkamaitak, nuna umigtsuk kajimatkiag tikichin apajuímainak idaisamu asa, suwinka suwak imatikae’, tiagtinaí”, tiuwai.

10

Sabá nugkan apuji nuwa aajakua nunú Salomógkan ijagsatatus webau (2 Cr. 9.1-12)

¹ Salomógkak Tuke Pujuu yayamu asa, shiig yachai tusa augmatu-inamun Sabá nugka apuji nuwa aajakua nunú antukui. Nunik dekas yachashit tusa dekapsatatus Jerusalén weuwai. ² Suntaja apuji aidau ejapeam camello aidaunum nijamtaí kugkuin aidaun, oro aidaun kuashat yajuak, nuigtu kaya pegkejuch akik aidaun aatus yajuak jegauwai.

Nunik jegaa, Salomógkan iniaštajai tibaunak ashí iniasui. ³ Tusa iniam Salomón nunak ashí betek aikui. Makichikish nii aimainchau utugchat dekapeamuk atsugsauwai.

⁴ Dutika ashí aimkamtai anentaimas, Salomógkak dekas yachapi tiuwai. Tuja Salomón pujusa inamjatnuijin jegamkamunashkam wainkauwai.

⁵ Nuigtushkam niina yutaiji aidau shiig kuashat ayau, tuja niina suntajin apuji aidau batsamtaijishkam shiig pegkeg umikbau, nuigtush niina takajin aidaush, nii uwagtinjin shikika su aidaujui shiig iwagmamkau aidau, tuja nuigtushkam kuntin duwejam shiig pegkeg aidaun sacerdote

aidau Apajuín emematuinak maa ashí apeamu aidaun, aatus ashí wainak puyatus anentain jegagchauwai. ⁶ Nunik apu Salomógkan chichajak:

“Amina takatjumin amina dekatjumjai pachisag augmatuidaun mina nugkajui pujusa antukmag duka shiig dekaske. ⁷ Tujash wika dekaskeapi tichamjai, yamai juwi taa wainkau asan dekaskeapi tajai. Auk minak ashí ujatkachagmayi. Wi antukmayag nuna nagkaesau dekas amina dekatjumik takatjumjai shiig múuntai. ⁸ ¡Amina nuwem aidauk shiig aneasas batsatatai! ¡Amina inakem aidaush ame pegkeg chichamun antuinakus shiig aneasag batsatatai! ⁹ ¡Tuke Pujuu amina Apajuígmea duke ememattai ati, wagki nii aminak shiig anenjamas Isarael aents aidaun apuji ati tusa adaitamkae! ¡Tuke Pujuu Isarael aents aidaun aneau asa, apu adaitamkae shiig pegkegnum takasti tusa!” tiuwai.

¹⁰ Nuna tusa, tres mil novecientos setenta kilo oron, nuigtu kugkuin nijamtai aidaun, kaya pegkejuch akik aidaun aatus shiig kuashat Salomógkan susauwai. Nunak yaunchuk nagkamsagkesh Isarael aents aidaunmak imatikaik apu sujakchamun nunú nuwa imatika Salomógkan susauwai. ¹¹ Nuigtushkam lancha múun aidaunum Hiram ofirnumian, oro aidaun ikautkauwai. Tuja numi sándalo tutai katsujam shiig pegkeg aidaunashkam, kaya pegkejuch akik aidaujui ikautkauwai. ¹² Dutikantai nunú numi sándalo tutayai jega Tuke Pujuu emematku ijuntai jegamkamu nagkatkamunum wajasa niimtain, tuja nii pujusa inamjatin jegamkamua nunú nagkatkamunmashkam dutiksag umikui. Tuja nuigtushkam kantamin aidau awatiagtinun nunú numijai arpa aidaun, salterio aidaun ashí umikui. Yaunchuk nagkamsaish numi sándalok imatika wainajakchamun nunú tsawantin shiig kuashat wainnakui.

¹³ Tuja Salomógshakam yaakat Sabá apuji nuwa aajakua nunú sumanuk ashí susauwai. Dutikak nuigtushkam nigki anentaimas tikich waji aidaunashkam susauwai. Dutika susam nuna yajuak niina aentsji kuitamkam nugken wakitkiuwai.

Salomón yacha wiakuch wajasbau

(2 Cr. 9.13-24)

¹⁴ Salomógkak maki makichik mijantin oro aidaun veinti dos mil kilo tumainun yajuak ijumajakui. ¹⁵ Tuja nuigtushkam Isarael aents aidaun nugken waji sujin aidaushkam Salomógkan akikaku ainawai. Arabia nugkanmaya aidaush, nugka yaig aidaun apuji aidaushkam, ashí akikaku ainawai.

¹⁶ Tuja ejamaka maanitai tantag múun aidau oro ukatkajum doscientos najanatajum tusa inamjauwai. Tuja maki makichik ejamaka maanitai aidauk seis kilo oro ukatka najanamu aajakui. ¹⁷ Tuja nuigtushkam trescientos tantag yayijuch najanatajum tusa nunashkam inamjauwai. Nunú maki makichik tantag aidauk makichik kilo nuigtu jimaituk tumain oro ukuijajum ukatka najanatajum, tiuwai. Tusa tima najanawagmatai, nuna yajuak jega pujusa inamtai Líbano ikamji tutai aajakua nuwi awayauwai.

¹⁸ Nuna dutika nuigtushkam elefante nai* aidau yajuakjum ekemsa inamtai najanatajum tusa inamjauwai. Tusa timatai imatiksag najanawajui. Dutikawagmatai, oro ukatkatajum tima, ukatkajui. ¹⁹ Nunú ekemsa inamtai aajakua duka seisa imania ekeni najanamu aajakui. Tuja atumtaijiya duka apuni najanamu aajakui. Untsu kuntujin patai ekemtai najatuamu

* **10:18** “Marfil” tawa duka elefante nai najanamua nuna daajiyai.

aajakua nuna yantamen león wajau dakumka najanamu aajakui. ²⁰ Tuja seisa imania ekenjamu aajakua nuwishkam maki makichik ekenjamua nuna yantamen león dakumjamu aajakui. ¡Nunak tikich apu aajaku aina dukesh numamtin najanamukesh wainkashbaun nii imatika najanauwai!

²¹ Tuja apu pujusa inamtaiji Libano ikamji tutai aajakua nuwishkam apu shikika umutaiji aidauk, egkeja yutaiji aidaujai oro najankamu aajakui. Makichkish plata najanamuk atsujakui, wagki Salomón pujusmataig platak wakejusa diimainchau aajakui. ²² Tuja Salomógka lanchaji aidau yaakat Tarsisnum batsamajakua nunú Hiraman lanchaji aidaujai kampfatum mijan asa tuke kaunajakui, nuniak oro aidau, plata aidau, elefante nai aidau, kuntin uwegtin aidau, pavo real aidau aatus ikaunmajaku ainawai. ²³ Tuja apu Salomógkak ashí tikich nugkanmaya apu aidau nagkaesau wiakuch, nuigtush yacha aajakui. ²⁴ Apajuí yachantikamu asamtai, ashí aents aidauk niina wainkatatus, nuigtu chichamen antugkatatus shimujaku ainawai. ²⁵ Nunik shimuinak apu susatnun maki makichik juki wejaku ainawai. Nunak waji plata najanamu aidau, oro najanamu aidauwashkam, jáanch aidau, maaniaku jutai aidau, kugkuin nijamtai aidau, caballo aidau, burro aidau aatus sujaku ainawai.

Salomón carro aidau caballo aidaujai sumajakbau

(2 Cr. 1.14-17; 9.25-28)

²⁶ Salomógkak mil cuatrocientos carro maanitai aidau, doce mil caballo maanitai aidaujai sumag ijumjauwai. Tuja tikich suntag aidauk carro maanitai aidau kuitamainak batsatu, nuninai untsu tikich aidauk apu Jerusalén pujusmatai kuitamkagtin aidau dushakam batsatu. ²⁷ Apu Salomógkak Jerusalégnum kuichkinak kayajai betek shiig kuashat ijumjauwai. Tuja setjunashkam, higuera ajakchamaitak paka weagbaunum, shiig kuashat aiyama imatika ijumjauwai. ²⁸ Tuja Salomógka inake waji sujin aidau Egipto nugkanum nugka Musri tutai aajakua nuwiyen, Cilicia nugkanmayajai caballon apu Salomógkan sumajuk akuptujaku ainawai. ²⁹ Tuja makichik carro egiptunmayan akikeg seiscientos kuichik plata najanamu aajakui. Untsu makichik caballo akikeg ciento cincuenta aajakui.

Tuja hitita aentsu apuji aidauk sirianmaya aentsu apuji aidaujai, Salomón sumagbaun nuwiyen carro aidau, caballo aidaujai sumajaku ainawai.

11

Salomógkan kuashat aents shiwagmawaju aidau

²⁶ Nabat aajakua nuna uchiji Jeroboamshakam Salomógjai shiwagmagauwai. Jeroboam aajakui Salomógkan suntaji aidau apuji. Niig yaakat Sereánmaya Efraim wegantu aajakui. Niina dukujig waje Serúa daagtin aajakui. ²⁷ Jeroboam apu Salomógjai shiwagmagauwa duka juni nagkamdauwai: Salomógkak Davita yaaktaji tutai aajakua nuna, nain wajajunum nagkama peegkeg tentea ashimak, agkaju aidau sekaturg ashimkatatus takak pujusa, ²⁸ Jeroboam wajuu, takau wajasu asamtai, José wegantu aidau takaina nuna diisti tusa nuna apujin apu Salomón adaikauwai.

²⁹ Nunú tsawantin Jeroboam Jerusalén pujau jiinki wekama profeta Ahías yaakat Silónmaya aajakua nunú jáanch yamagman nugkuaju

wegaun igkugkui. Dutika ima niijaig ajanum batsatu. ³⁰ Nuwi pujus Ahías jáanch yamajam nugkuagbaujin doceya imajin ichiajui. ³¹ Dutika Jeroboaman chichajak:

“Juju jáanch doce ichiagbauwa juwiya diez aminu atin jukita, wagki Tuke Pujuu Apajui Israel aents aidau emematin aina nunú amina chichag-tamak: ‘Salomón apu puja nuna atankin, Israel aents aidau diez wegantu aina nuna amina amastatjame, dutikakun dita apuji adaikattagme’, tujamui. ³² ‘Untsu David mina inakeg aajakua nunú mina chichamjun umigtuku asamtai, tuja Israel aents aina nuna yaaktaji aina nuwiyam makichik Jerusalégkan wi pujustinun etegkauwaitag nuadui, Salomógnak ima Judá wegantu aina nuna apuji ati tusan titatjai. ³³ Salomógnak minak dakitjuje, nuniak nuwa Astarté dakumka najanamun yaakat Sidógnunia aidau emematin aina nuna, nuigtu Quemós Moab aents aidau ememattai aina nuna, nuigtu Milcom amonita aents aidau emematin aina nunashkam emematui. Nuadui niina takatjig mina shiig awajatsui. Niina apaji David mina chichameg umiktin agagbau aidau umikua dutikag niig umikchae. ³⁴ Nunin aigkishkam nii apu wajas inama nunak tikima ashí atankishtatjai. Nunak dutiktsuk nii iwaku puja duikik apu ati titatjai, wagki mina inakeg David wi etegkamu aajakua nunú mina chichamjun betek umigtuku asamtai. ³⁵ Tujash niina uchiji apu atina nunak Israel wegantu doce aina nuwiyam diez atankittajai, dutikamtai ame nuwi inamjattame. ³⁶ Tuja niina uchijinak ima makichik wegantunak ukugkittajai. Nunak dutikattajai, wagki mina inakeg David aajakua nunú wegantunmaya makichik Jerusalégkan wi etegkauwaitag nuwi pujus inamjati tusan. ³⁷ Tuja wi aminak ashí ame wakegamunum inamjata titatjame, dutikakun Israel aents aidau apuji emattagme. ³⁸ Tuja wi amina titatjam nunú ashí umiakum takatjumes pegkeg, tuja mina chichameg umiktin agagbauwa dushakam mina inakeg David umikua dutiksamak umiakminig, wi aminak yaigtinaitjame. Dutikakun David wegantunmaya apu agtinai tiuwaitag nunak imatiksasuk ame wegantu aidau mayanashkam Israel aents aidau apuji wajas inamjatnun etegkattajai. ³⁹ Untsu David wegantu aidau Salomón mina umigtutsuk tikichin apajui mak idaitusu asamtai, suwimkan susagattajai. Tujash nunú suwimkanak tuke suu pujushtinaitjai’, tawai Apajui”, tiuwai Ahías.

⁴⁰ Nuna Salomón antuk Jeroboaman maatag tiuwai. Dutikam Jeroboam tupikaki apu Sisac inamajakua nuwi Egipto nugkanum weuwai. Nunik nuwi pujaig Salomón jakauwai.

Salomón jakamu (2 Cr. 9.29-31)

⁴¹ Salomógnak pujutji, yachaji, takasbauji aidauk papii Crónica tutainum agagbau ainawai. ⁴² Salomógnak Jerusalén pujus ashí Israel aents aidau cuarenta mijan tumain inamjauwai. ⁴³ Salomón jakamtai Jerusalégnum niina apaji Davita yaaktaji tutainum ukusajui. Nii jakamtai niina uchiji Roboam apu wajas inamjauwai.

12

Israel aents aidau kanakagbau (2 Cr. 10.1—11.4)

¹ Israel aents aidau Roboaman apu adaikagtatus Siquemnum shiyakajui, nunikagmatai Roboamshakam nuwi weuwai. ² Nuna aatus chichainamun Jeroboam Nabatan uchiji, Salomón maatag tama tupikaki, Egipto nugkanum weuwa nunú, nuwi pujus dekauwai. ³ Jeroboaman untsuka itawag Israel aents aidau nijai ijunag Roboamjai chichastatus shiyakajui. Nunik jegajua chichajuinak:

⁴ “Amina apa aajakua duka ii aidautinak senchi takamtijamak waitkagmasui. Tuja amesh imatika takat sukagtachkuminig, iishkam ame tabauk betek umiktatji”, tiajui.

⁵ Tusa tama Roboam ditan chichajak:

“¡Waketjatajum, nunikjum kumpatum tsawan asajum kaunatajum!” tiuwai.

Tusa tijam Israel aents aidau waketjajui. ⁶ Nunikagmatai Roboam niina apaji Salomón iwaku pujusmatai, múun aidau nijai takajaku aidau iniak:

“Juju aents aidau tuina nunash wisha ¿wajintu aimainaitja?” tau. ⁷ Tusa iniam dita ainak:

“Amina takagtamainak ame tabaun tuke umigtamkatin atinme tusam wakegakmek, yamai ditajai shiig chichasam, dita tujamaina nunú umikta”, tuidau.

⁸ Tusa tamashkam apu Roboamak ditanak antugkachui. Nuniak nijai betek tsakaku niina takajin aidau batsatun, iniak:

⁹ “Juju aents aidau chichainak: ‘Amina apa iina shiig senchi waitkagmasua nunitsuk, amek shiig kuitamkagtukta’, tujutuina nunash ¿atum anentaimsamash wajinmainaitja?” tiuwai. ¹⁰ Tusa tutai nunú aents nijai betek tsakaku aidau niina chichajuinak:

“Au aents aidau amina chichagtamainak: ‘Amina apa iina senchi waitkagmasua nunitsuk, amek shiig kuitamkagtukta’, tusa tujamaina duka aajam tumainaitme: ‘Mina apag atumin shiig kuitamjamkachuitkuig, wika nuni nagkaemasan shiig kuitamkashtatjime. ¹¹ Tuja mina apag senchi takamtijamsau ainakuig, wi nuni senchi takamtikun waitkastatjime. Tuja mina apag akachumtayai atumin asutamajakuitkuig, wi nuni nagkaemasan jiju hierro tutai tsakaskatu aina duwí asutiattajime’ tita”, tiajui.

¹² Tuja apu Roboam Jeroboaman kumpatum tsawan asam taata tibau asa, Israel aents aidaujai ashí apu Roboamjai chichastatus jegawajui.

¹³ Nunikagmatai apu Roboamak apu chichagkagtin múun aidau tibaunak umitsuk, shiig senchi pegkegchaun chichagkauwai. ¹⁴ Nuniak nunú datsauch aidau tibauwa nuna imatiksag chichaak:

“Mina apag senchi takamtijamajakuitkuig, wika nuni senchi takamtikakun waitkastatjime. Tuja mina apag akachumtayai asutamajakuitkuig, wika nuni senchi jiju hierro tutai tsakaskatu aidauwai asutiattajime”, tiuwai.

¹⁵ Tau asa Israel aents múun aidau tita tibaunak Roboamak umikchauwai. Wagki nunak Tuke Pujuu profeta Ahíasan akateak:

“Salomón Israel wegantu doce aina nuna apujiya nunak diez atankin, Jeroboaman susattajai”, tusa tiuwa nunú uminkatin asamtai nunikui.

¹⁶ Tuja Israel aents aidau tabaun apu Roboam antugcham dita chichajuinak:

“¡David wegantu aina nunú iina apuji ati tusaik wakegatsji! ¡Jesé uchiji aidau dita wajijin akanak iina amamainuk makichkish atsujainawai! ¡Davita tijaji aidauk dita ditak kuitamdaikatnume! ¡Untsu Israel aents aidautik iina jeen waketjagmi!” tiajui.

Aatus tusa ukuinak dita jeen waketjajui. ¹⁷ Nunikagmatai Roboamak Israel aents ainayatak Judá wegantu aidau nugken batsamajaku aina nuna apuji wajas inamak pujujakui.

¹⁸ Nunik pujai, tikich Israel wegantu aidau pampaidau. Imatiagtai Adoram takata apuji aajakua nuna Roboam dekata tusa awemauwai. Dutikamun Israel aents aidau kayai tukui tukuinakua maawajui. Dutikawagmatai apu Roboam ishamak shiig wamak carrojin egkema Jerusalén tupikakiuwai. ¹⁹ Aatus Israel aents aidau diez wegantu aajaku aina nunú David wegantu apu wajasujai shiwagmagawajui.

²⁰ Nunik batsamas Jeroboam wakitki tae tabaun Israel aents aidau diez wegantu aajaku aina nunú antukag, ijunag chichama akuptukajui taati tusag. Tusa akuptukam taamtai, dita apuji adaikag chichainak: “¡Yamaik ametme iina apujimek!” Tuja David wegantu iina apuji ati tuidauk ima Judá wegantu aina duke juwakaje.

²¹ Tuja Roboamak tupikaki Jerusalén wegak, suntag aidau etegkeg Judá wegantunmayan Benjamín wegantunmayajai ciento ochenta mil yajuak, Israel wegantu aidaujai maania depetmakan ashí dita aidau apuji atajai tusa jegauwai. ²² Tujash profeta Semaías aajakua nuna Tuke Pujuu chichajak: ²³ “Salomógka uchiji Roboam Judá wegantu apujijai chichasta, nuniakum ashí aents Judá wegantu aina nujai, tuja Benjamín wegantu aidaujaishkam chichaakum: ²⁴ Tuke Pujuu chichaak: ‘Dita yachi Israel aents aina nujaig maaniawainmegka. Nunak nunitsuk dita jeen waketjatnume, wagki wi mina aentsug aina nunak kanaktinme tijai’, tawai tusam ujakta”, tiuwai.

Nunú Tuke Pujuu tibau ujakam, nuna umiinak dita jeen waketjajui.

Jeroboam Apajuín umigtsuk pegkegchaun takasbau

²⁵ Tuja Jeroboam yaakat Siquem Efraígka nugken awa nuna tentea peegkeg apakui, dutika nuwi nii pujusui. Nuwi pujus yaakat Penuel daagtin aajakua nuna peegkeg tentea apakui. ²⁶ Tujash nii anentaimas: “David wegantu aina nunú tikich Israel aents diez wegantu aina nuna awagki ijumag dita apuji atajai tumainai. ²⁷ Tuja juju aents aidauk Tuke Pujuu emematuinak, kuntinun apeatatus Jerusalén shimuina nuninak Roboam Judá wegantu apujiya nuna ataktu shiig anenmain ainawai.

“Nuninak mina mantuawag Roboamjai ataktu ijunmain ainawai” tusa, ²⁸ niina suntaji apuji aidaujai chichasa, oro yajuakjum jimag toro tsakat dakumka najanatajum tusa inanjauwai. Nuna najanawagmatai, aents aidau chichajak: “Atum aidautijum kuashta Jerusalén shimagme. Tujash yamaik jujuwai atumi Apajuíjum, Egipto nugkanum batsatutigmin jiiipajajua duka”, tiuwai. ²⁹ Nuna tusa niina suntaji aidau inajui, dutikam nunú jimag toro tsakat dakumka najanamun makichik jukiag tsumujin yaakat Betelnun apusajui, entsu tikichnak yaakat Dagnun apusajui. ³⁰ Dutikawagmatai Israel aents aidauk pegkegchaun takamsajui, wagki Jerusalén wegag Apajuí emematmainun idayinak, Betelnun shiyakag, tuja Dagnun shiyakag nuna emematuidau asag.

³¹ Tuja Jeroboamshakam nain aidauum jega Apajuí emematku ijuntai tusa jeganjauwai. Dutika aents Leví wegantuchu aidauunik sacerdote adajauwai.

³² Nuigtushkam Jeroboam dutikati tichamaitak, nantu ocho takamunum tsawan quincetin Judá wegantu aidau jiiistamin aina nunú jiiistamami tusa nigki umikui. Dutika nigki nuigtushkam kuntinun maa kuntin

patasa apetainum apeauwai. Nunak nii inamjamtai toro tsakat najanamu Betelnum aajakua nuna emematak dutikauwai. Dutika nunú jega wainka apajumtai emematku ijuntai aidaun kuitamkatnun, atum sacerdote atatum tusa adaitujui. ³³ Aatus nantu ochoa nunú takamtai, tsawan quincetin Jeroboam kuntin patasa apetainum Betelnum najanauwa nuwi kuntu maa patas apeauwai. Dutikak juju nantutin Apajui emematku jiiistamtai ati tusa Israel aents aidaun tiuwai. Nuna tusa kugkuin incienso tutain apeatatus altarnum wakauwai. Tujash nunak nii wakegag dutikauwai.

16

Acab Israel aents aidau apuji wajasbau

²⁹ Makichik aents Asá daagtin Judá wegantunum apu wajas treinta y ocho mijan inamai, Omrí uchiji Acab aajakua nunú Israel nugkanum apu wajas inamntan nagkamauwai. Niig yaakat Samaria pujus veinti dos mijan inamjauwai.

³⁰ Tujash niina pujutig Tuke Pujuu diismak shiig pegkegchau aajakui. Tikich apu aidau pegkegchaun takasu aina nuna nagkaesau pegkegchau aajakui. ³¹ Makichikish pegkegchaun takaschatjai tusagkesh anentaimtsuk, Jeroboamjai betek pegkegchaun takasui. Nuniau asa Sidóghan apuji Et-baal aajakua nuna nawanji nuwa pegkegchau Jezabelan nuwatkauwai. Nunik ditá ememattaiji Baal aajakua nuna niishkam emematujakui. ³² Nuigtushkam Baal emematku kuntin patasa apeatnun Samaria nugkanum najanauwai. Dutikak Baal emematku ijuntain jegan jegan kauwai. ³³ Tuja nuigtushkam tikich dita apajuimtaiji Asherá aajakua nuna niimen numinum dakumak najanauwai. Dutikamtai Tuke Pujuu Israel aents aidaun Apajujiiya nunú, yaunchuk apu aajaku aidaun kajegkauwa nuna nagkaesau shiig senchi kajegkauwai.

³⁴ Acab apu aajakua nunú tsawantin makichik aents betelnumia Hiel daagtin yaakat Jericó tsaikbau aajakua nuna ataktu yaaktamauwai. Nuna yaaktamatatus yama nagkama takamunum niina uchiji iwai Abiram jakauwai. Tuja yaakta najana nuna waitijin apujtusu ai, niina uchiji ekeu Segub jakauwai. Duka nunikui wagki Tuke Pujuu Josué chichajak: “Makichik aents Jericón ataktu yaaktamatag tusa takatna nuna uchijig jinaatnai”, tiuwa nunú umintai.

Apu Acab pujusmatai profeta Elías takasua nunú pachisa agagbau

17

(17—21)

Yumi yutugchattawai tusa profeta Elías etsegamu

¹ Profeta Elías Tisbénmaya aajakua nunú apu Acabpan chichajak: “iJuju mijana duwi nagkama yumi yutugchattawai, wi yutugti tama yutugtin asa! Tuja sajattanakesh sajatkashtatui. iJunak Israel aents aidau Tuke Pujuu Apajuin emematin aina nuna wi umijag nuna daajin dekas uminkatnun tajai!” tiuwai.

² Tusa pujai Tuke Pujuu Elíasan chichajak: ³ “Juwi pujam nunú jiiinkim etsa minitaiya nuni wetá. Nunikam entsa Querit tutai namak Jordághnum etsa minitaiya nuni awa nuwi uumkam pujusta. ⁴ Nuwi pujusam nunú

yumi uwagtatme. Tuja wi chigki cuervon* awemattajai yutain amasti tusan”, tiuwai.

⁵ Tusa tima Elías Tuke Pujuu tibaun umiak Querit entsanum weuwai. ⁶ Nunik imau pujai, cuervo aidau pagkan nejelai jukiag kashikmas, aagkú aatus eteutidau. Untsu yuminak nunú entsanmayaan umujakui.

⁷ Tujash yumi yutachu asamtai, nunú entsak dukap atsuk kuyua buku wajasui.

Nuwa waje sareptanmaya Elíasan yujumkan ajamsamu

⁸ Nunik entsa kuyuamtai, Tuke Pujuu Elíasan chichajak: ⁹ “¡Yaakat Sarepta Sidón nugkanum awa nuwi weme pujusta! Tuja makichik nuwa waje nuwi puja nunú amina yutain amasti tijai”, tiuwai.

¹⁰ Tusa tima Elías nunú yaaktanum weuwai. Nunik wea weakua jegattak wekama, makichik nuwa chigkimin juwaak wekaetatman wainkauwai. Nunik untsuka chichajak:

“¡Wait aneasam tsapanum yumi shikikam ajampusta uwagtajai!” tiuwai.

¹¹ Tusa tima nunú nuwa yumin utitag tusa wegaun Elías ataktu untsuka chichajak:

“¡Wait aneasam pagshakam itagtuata!” tiuwai. ¹² Tama nii ayaak:

“Tuke Pujuu Apajuín ame emematnaitam nuna daajin dekaskenum tajame, pagkak shiig atsugtawai. Untsu harina shiig piipich ichinkanum, tuja aceiteshkam piipich jarranum ajutui. Nuna mina uchigjai inajuan yuwatasan chigkimin juwakun wekaejai. Untsu nuna ashí inajuamtai yuwami, nunika nunú amuka nujantaikish jinaami, wagki tikich yu-mainuk shiig atsawai”, tiuwai. ¹³ Tutai Elías ayaak:

“Nuna amukan nujantai jakashtajash tusamek puyatkaipa. Ame piipich ajutui tame nunú inagkata. Tujash wi yuwatna nunuwá pag inajuam sujusta. Dutikam nuadui ame yuwatin uchijum yuwatnujai inajuata. ¹⁴ Wagki Tuke Pujuu Apajuín Israel aents aidau emematin aina nunú: ‘Harina ichinkanum awa duka amuekashtatui, tuja aceite jarranum awa dushakam amuekashtatui’, tawai. Nuadui nunú yusa pujajinig, Tuke Pujuu yumin yutumtijattawai”, tiuwai.

¹⁵ Tusa tima ukuak weuwai. Nunik Elías tibaunak imatiksag umikui. Nuna yusag kuashat tsawan batsamsajui. ¹⁶ Tuja Tuke Pujuu Elíasan tibaunak betek, harina ichinkanum auk amuekachui. Tuja aceite jarranum aushkam amuekachui.

¹⁷ Nunik kuashat tsawan batsatai, nunú nuwa wajea nuna uchiji jata achikam shiig senchi jau asa jakauwai. ¹⁸ Nunikmatai nunú nuwa Elíasan chichajak:

“¡Elíasah, Apajuín inakegah! ¿Wisha aminash itugkamu asamea suwimak sujakmesh mina uchijush mantugtame?” tiuwai. ¹⁹ Tama Elías ayaak:

“¡Uchijum juwi itanta!” tusa niina bakuin uchijin patasa pujujun juki, Elías nii kanutaijin yakí iwaka niina pegakjin aepsauwai. ²⁰ Dutika senchi untsamak Tuke Pujuu Apajuín segaak: “¡Tuke Pujuu Apajuín mina ememattaijuh! Juju nuwa mina kuitamjuka juna uchiji jakamtai, anentaimak senchi waittsati tusamesh ¿wagka tiume?” tau.

²¹ Tusa tamawaik uchin kempatuma imania pagkuk senchi untsamak Apajuín segaak: “¡Tuke Pujuu Apajuín mina ememattaijuh! ¡Wait aneasam juju uchi etsagagta!” tiuwai.

* 17:4 “Cuervo”: Juju chigkik uje bukusea chuwagka numamtainai.

²² Tusa segam Tuke Pujuu niina antujuk uchin etsagajui. ²³ Dutikamtai Elías uchi juki nugká akaiki dukujin suwak:

“¡Disia nijah, amina uchigmek iwaku!” tiuwai.

²⁴ Tusa tama nunú nuwa ayaak: “Yamai dekajai, amek dekas Apajui etegkamuitme. Tuja ame tame duka ¡dekaskea nu Tuke Pujuunmaya tame!” tiuwai.

18

Elías wakitki apu Acab pujamunum jegamu

¹ Kampatum mijan nagkaemakui ai, makichik tsawantai Tuke Pujuu Elíasan chichajak: “¡Yumin yutumtijattajai, dutikatin asamtai apu Acab pujamunum wetá!” tiuwai.

² Tusa tima Elías weuwai. Nunik apu Acab pujamunum jegauwai. Tuja nunú tsawanting yaakat samarianmaya aidauk yumain atsau asamtai, shiig senchi nujantai waituidau.

³ Imanik waituidau asag Elíasak eke jegatsaig, Acab niina wajiji aidaun kuitamin Abdías Tuke Pujuun eme anentus emematujakua nuna untsukui.

⁴ Tuja nunú tsawantin Jezabel Tuke Pujuu aentsji profeta aina nunú kajegtajum tusa suntag aidaun inajui. Dutiktai Abdías cien profeta Apajui takajin aidaun ijumjauwai. Dutika cincuenta, cincuenta akanak jimag waanum uumkatajum tusa ishiakui. Dutika ishiakam imau uumak batsatun yujumkan ejetua ayujujakui. ⁵ Tuja Abdías apu Acab pujamunum jegamtai, nii chichajak:

“Juju nugkanum entsa aidau, namak aidau ayá nuni wemi. Nunika nuwi wekaesa namputchawame caballo aidau, burro aidau ayugmain chijichi atsawash egakmi. Dutika egachkuik kuntin jinaamtai tagkugtuchu juwaktatji”, tiuwai. ⁶ Nuna tusag, nunú nugkanum dita yujastag tibaunum shiyakajui. Tuja Acab tikich yantannum wetai, untsu Abdías tikich yantannum weuwai.

⁷ Nunik wekama Elías minaujai Abdías igkuniki. Nunik niina emtin tsuntsuna pujus chichajak:

“¡Mina Apujuh! ¿Ame Elíaschaukaitam?” tau. ⁸ Tama nii ayaak:

“Ehe, witjai. Weme amina apujum Acab, Elías tae tusam ujakta”, tiuwai.

⁹ Tusa tama Abdías ayaak:

“Wi apu Acabpan jegajua ujaig, minak mantumainai. ¹⁰ Apu Acab amina egapak ashí nugkanum aents ishiakbau aidau yujawai. Dutikamu waketug kaunawag wainkachji tusa ujinam, dekas wainkachuikmek Tuke Pujuu daajin tajai tita tusa imatjawai. Nunak ame Tuke Pujuu Apajui ame emematnaitam nuna daajin dekaskenum tajame. ¹¹ ¿Imania nunash wi jegajuan Elías juwi pujawai tusan ujaktag? ¹² Wi apu ujakatan amejai pujag nuna ukukin wegai, Apajui Wakani egkemtugmag wi dekashbaunum etamtatui. Tuja wi Acabpan ujaka ai, nii amina waipaktakama waipachag mina mantumainai. Wi amina inakmetag nunak datsauch asanuk Tuke Pujuun umignaitjai. ¹³ Tuja Jezabel profeta aidaun kajegtag takui, wi ayamjukuitag duka ¿amek dekachukaitam? Tusa chichaman umikmatai, wi profeta aidaun cien ijumjan, cincuenta cincuenta akanak jimag waanum utsawabiajai. Dutikan nuwi batsatun yutain suyajai. ¹⁴ Nunin aish ¿wagka yamaish minash, apujum wejim Elías juwi pujawai tusa ujakta tusamesh tujutme? Atsa amina waipakcha maati tusa ¿tujuttsumek?” tiuwai.

¹⁵ Tutai Elías ayaak: “Tuke Pujuu Apajuí ashí senchigtina nuna daajin tajame. Yamaikiuch apu Acabjai chichastasan wetatjai”, tiuwai.

¹⁶ Tusa tima Abdías Acabpan ujaktatus weuwai. Dutika ujakam Acab Elíasjai igkunik chichastatus weuwai. ¹⁷ Nunik jegaa Elíasan chichajak: “¿Amekaitam Israel aents aidau utugchat apugtusam waitkam nunú?” tiuwai. ¹⁸ Tusa tama nii ayaak:

“Wika Israel aents aidau nak utugchatan apujtusnuk waitkatsjai. Auk ame amina pataim aidaujai Tuke Pujuu chíchame umiktajum tibauwa nunú idaikujum, Baal emematu yujau asajum, Israel aents aidauk waitkagme. ¹⁹ Untsu takumek ashí Israel aents aidau, Baala chichamen etsejin cuatrocientos aidau, nuigtu Astarté chichamen etsejin cuatrocientos aatus aina nuna Jezabel ayuju pujaia nunú muja Carmelo tutaya nuwi ashí ijunjatneme tusam tita”, tiuwai.

Elías Baala profetaji aidaujai

²⁰ Tusa tima Acab ashí Israel aents aidau Baala profetaji aidaujai muja Carmelonum ijunjauwai. ²¹ Dutikamtaí Elías ashí tuwaka ijunbaunum jeganta ditan chichajak:

“¿Atumesh ima Apajuík umigchau jimag anentaintin ainajum dusha wajutiya yapajinattagme? Wi Tuke Pujuum umijag nunú dekas Apajuíyaitkuig nii umigkatajum. Untsu dekas Baal Apajuíyaitkuig nii umigkatajum”, tiuwai. Tusa tamash aents aidauk makichkish aimtsuk ijunu. ²² Nuna tusa ataktu awagki chichaak:

“Tuke Pujuu chichamen etsegtin iwakuk ima wikiuchitjai. Untsu Baala profetaji aina duka cuatrocientos cincuenta ainawai. ²³ Tuja jimag toro tsakat sukagtustajum, nuna dita makichik etegka jukiag maa asajag jii ikapagtin ijunjamunum patagtinme. Tujash eke jii nak ekemakinmegka. Dutikawagmatai wishakam tikich toro tsakatan asajan jii ikapagtin ijunjamunum patagtajai, tuja wishakam jii nak ikapagchattajai. ²⁴ Nunú ashí uminkamtaí atum aidautijum atumi apajuíji untsuktajum. Tuja wishakam Tuke Pujuum untsuktajai. Tusa untsuam nuna antujuk jii kegaun ajuag ekemaktata nunú dekas atatuí Apajuíya duka”, tiuwai.

²⁵ Nuna tusa Elías Baala chichamen etsejin aidau chichajak:

“Atumek kuashat ainajum nuadui jimag toro tsakat puja nunú diisjum etegka jukijum atumea umiktajum. Dutikajum atumi apajuíjum untsuktajum. Tujash eke jii ijunjamua duka ekemakaigpa”, tiuwai. ²⁶ Tusa tima, betek umikajui. Dutika umikag kashikmas nagkamas Baalan untsú batsatu. Imatuinak: “¿Apawa Baala aijatkata!” tusag kuintin patasa apetainum nuna tентаe ijunas peepet tsekenau. Tujash makichkish ayachu. ²⁷ Imaniagtai etsa tutupit ai, Elías ditan tuke aneas dushikiak: “Senchi untsumkatajum, auk dekas niyai apajuík. Tsawanji atsugmas aigmatsutai. Nuniachkush wakenmas wematai. Atsa nuniachkush tikich nugkanmas wematai. ¡Namputchawame kanag shintachu asa aniatsuash, ishintagtajum!” tau.

²⁸ Tuja ditak tuke untsuma batsatu. Imatuidau asag, dita apajuíjin emematuinakug tuke nunin asag, kuchiyai tsupimakag numpak wajasag batsatu. ²⁹ Etsa tajiag tegamtaishkam, imaanjaujai betek tsekenak untsuma batsatu. Imani batsataig kuintin apeatin tsawan jegauwai. Tujash imatuidau ayauk makichkish antukachui. Wagki ditan aimainuk makichkish atsau asa. ³⁰ Nunikmatai Elías ashí aents aidau chichajak: “Wi wajag juwi kaunatajum”, tiuwai.

Tusa tima ashí jegantajui. Nunikagmatai Tuke Pujuu emematku kuntin maa patasa apetai yaunchuk najanamu aajaku tsaikbaun ataktu iwajauwai. ³¹ Nuna najankug Apajuí Jacopan Israel atatme tiuwa nuna uchiji doce aajakua imatiksag doce kaya aidaun yajuakui. ³² Dutika nunú kaya aidaun ekenag Apajuí emematku kuntin patasa apeatnun najanauwai. Dutika, nuna tentea tainiuwai veinte kilo trigo chimpimainun. ³³ Dutika nuwi chigkimi patag nuadui toro tsakatan asaag nuwi pataajui. ³⁴ Dutika chichaak:

“Ipak usumat ichinkanum yumi aimkatajum, dutikajum kuntin asaaja patagbauwa nunú chigkim patagbauwa nujai kempatuma ukatkatajum”, tiuwai. Tusa tima imatiksag dutikau ainawai. ³⁵ Dutikamu asa nunú yumi saegak kuntin patasa apetai najanamunum nuna yantamen nugka taimunmak ashí piyajui.

³⁶ Tuja kuntu neje ashí apetai tsawan jegantai Elías nuwi jeganta chichaak: “Tuke Pujuu Apajuin Abraham, Isaac, Israel aents aidau emematin aina nunuwah, dekas amek Israel aents aidaun emematayaitam nuna yamai dekatnume. Tuja wika amina inakem asan, ame inatjamin jutikag nunashkam dekatnume. ³⁷ ¡Tuke Pujuuwah ayu tujutta. Amek ditan Apajuíji asam aigkata, nuna wainkag ataktu amina umigtamainak, ame dita untsuam nuna shiig dekatnume!” tiuwai.

³⁸ Tusa inagnaig Tuke Pujuu awemamu nayaimpinmaya jii iyajui. Nunik iyaag nunú kuntin maa asaja patagbaunak chigkimjai ijumag apeauwai. Dutikak kayanashkam apea yuku emauwai. Dutikak nugka taimunum yumi piyajunak buku emauwai. ³⁹ Nuna wainkag aents aidauk ishamkag tsunsumawag nijayin nugka antig pujusag chichainak: “¡Tuke Pujuu dekas iina Apajuíjiyai, Tuke Pujuu dekas iina Apajuíjiyai!” wajaidau.

⁴⁰ Imatiagta Elías ditan chichajak: “¡Baala profetaji aina nunú achiktajum! ¡Makichkish tupikakig uwemjainmegka!” tiuwai. Tusa tima Israel aents aidau aintug achikajui. Dutikawagmatai muja segaunum entsa Quisón tutainum yajuak emauwai, nuwi ejegawag kajegkajui.

Elías Apajuí segamu yumi yutugti tusa

⁴¹ Dutika ijinawagmatai Elías apu Acabpan chichajak: “Wamak weme yujumak yuwata, yumi uutun antajai”, tiuwai. ⁴² Tusa tima Acab yujumka yuwatatus weuwai.

Tujash Elíasak muja Carmelo tutainum yakí wakauwai. Nunik nuwi tikishmag tsunsuma yapin tikishin antig pujusui. ⁴³ Nunik pujus niina inaken chichajak:

“Weme nayantsanmanini niimsata”, tiuwai. Tusa tima wee diisui, nunik wakitki taa chichaak:

“Atsawai wainkachjai”, tiuwai. Tujash Elías chichajak:

“Sieteya imania wakitkita”, tiuwai. ⁴⁴ Tusa tima sieteya nuna wee taa chichaak:

“¡Nayantsanmaya yujagkim piipich uwegjai betek yakí wau wainawai!” tiuwai. Timatai Elías niina chichajak:

“Weme Acab ujakta, carrojin juki, eke yumi yutatsaig weti, yumi senchi yutak epenkai”, tiuwai.

⁴⁵ Tusa tima, weji Acabpan ujakui. Dutika ujakam carrojin egkema yaakat Jezreelnum weuwai. Nuniai nayaimpinmak dasesegmat yujagkim suwe wajasui. Nunik shiig senchi yutujui. ⁴⁶ Tuja Elíasak Tuke Pujuu

senchintikamu asa, niina jáanchjin akachumtaiyai jigka shiig senchi tupikaki, apu Acab yaakat Jezreel jegatsaig niya jegauwai.

19

Elías muja Horebnum tupikakbau

¹ Acab yaakat Jezreelnum jegá, Elías dutikamun pachis wajuk Baala profetaji aidaun ijinae nuna ashí Jezabelan ujakuí. ² Dutika ujakam niina aentsji chichama etsegnun Elías ujakta tusa akateak: “¡Elíasah, ame mina profetag aidau kajegkume, nuadui wi aminak mantamatnume titatjai! ¡Tuja ame mina profetag aidau kajegkum dutiksanuk, kashin etsa yamai awa juniai wi amina maachmataig mina apajuig suwimkan sujusti!” tiuwai.

³ Nuna chichama antuk maatag tabau asa tupikaki, Judá nugken yaakat Beershebanum weuwai. Nunik jegaa nuwi niina inaken ukukiuwai.

⁴ Untsu niig nigki uwegshunmanini weuwai. Nunik makichik tsawan wea weakua tampuch wajamunum jeganta nuwi ayaumas pujusui. Nuwi pujus jamainun anentaimu asa chichaak: “¡Tuke Pujuuwah, yamai anentaimkun waittsashjai! ¡Dekas jakati tujutta, wagki wika mina muuntug aina nuna nagkaesaukesh atsujaí!” tiuwai. ⁵ Aatus tusa nuwig tepes kanajui.

Nunik tepaun ángel tumain Apajuí tajua achika ishintak: “¡Nantakim yujumak yuwata!” tiuwai. ⁶ Tusa tama shigtaag ashí niimsatakama, niina chaiken makichik torta yama inajuamu, nuigtu yumi jarranum aimkam pujaun wainkauwai. Nunik wainak nantaki nuna yuwa umutnashkam uwajui. Nunik ataktu tepes kanajui. ⁷ Tujash Apajuí ángel tumain ataktu tajua achika ishintag, chichajak: “¡Nantakim yuwata, ame wegama duka shiig atushtai!” tiuwai.

⁸ Tusa tima Elías nantaki nuna yuwa umutain uwajui. Nuna yuwa ichichmag cuarenta tsawan, nuigtu cuarenta kashi wekagas Apajuí mujaji Horebnum jegauwai. ⁹ Nunik jegaa nuwi waanum waigka kanag tsawajui. Nuwi pujaun Tuke Pujuu niina chichajak:

“¿Elíasah, amesh juwish waji pujugme?” tiuwai. ¹⁰ Tama nii ayaak:

“Israel aents aidau amina idaitamsaju asag, ame emematku kuntin maa patasa apetai najanamu aidaun yumpuajag, amina profetajum aidaunashkam kajegkaje. Nuninakuí amina akasmatkun shiig senchi kajeajai. Tuja ima wiki iwaku juwakjai. Minashkam mantuatatus egatunawai”, tiuwai.

¹¹ Tusa timatai Tuke Pujuu niina chichajak:

“¡Jiinkim anú mujanum mina emtijui wajasta!” tiuwai.

Nuna tusa inagnaig, Tuke Pujuu nagkaemakiuwai, nuniai dase shiig senchi dasentak nunú mujan umuchiam kaya múun aidau jimaituk dakaejauwai. Nunú nagkaemaig nugka senchi uugkauwai. Tujash Tuke Pujuu dasenmak atsujaui. ¹² Tuja nugka uugbau nagkaemaig, jii keejakuí. Tujash Tuke Pujuu nunú jii kegamunmashkam pujujakchauwai. Nunú jii kegau megkagai, antuekauwai shiig pegkegchin shinau. ¹³ Nuna Elías antuk ishamak niina jáanchjin juki, yapin dukuka waanum pujau jiinki pujusui. Nunik pujai chicham chichamu antuegak:

“¿Elíasah, amesh anuish waji pujugme?” tau. ¹⁴ Tama nii ayaak:

“Israel aents aidau amina idaitamsaju asag, ame emematku kuntin maa patasa apetai najanamu aidaun yumpuajag, amina profetajum aidau-nashkam kajegkaje, nuninakuí amina akasmatkun shiig senchi kajeajai.

Tuja ima wiki iwaku juwakjai. Minashkam mantuatatus egatuinawai”, tiuwai.

¹⁵ Tusa tutai Tuke Pujuu niina chichajak:

“Ame taamun nunú jintanmak uwejush yaakat Damasco awa nuni wakitkita. Nunika jegaam Hazael aceiteyai buuknum nijakam Siria apuji emata. ¹⁶ Tuja Nimsí tijaji Jehú aceiteyai buuknum nijakam Israel aents aidaun apuji emata. Untsu Safat Abel-meholánmayan uchiji Eliseo amejai yapajinatin adaikata. ¹⁷ Dutikawamin Israel aents aidau Baalan emematiu aidaunak Hazael kajegtatui. Dutika kajeam pisagmataish, Jehú ijinattawai. Untsu Jehú maatag tama pisagmataig, Eliseo ijinattawai. ¹⁸ Untsu Israel aents siete mil aidau Baalan tikishmatug emematchaju aidau, tuja sauktanakesh saukuachaju aina nunak ijinastatjai”, tiuwai.

Elías Eliseon ipaamu

¹⁹ Tuja Elíasak nuwi pujau wakitkiuwai, nunik Eliseo ajak ajakmatnun takak pujaun wainkauwai. Tuja doce toro aidaunum nugka pukutai jigkatuamu aidau eemak, nugka pukui shimutai niishkam nuna ukujin makichik japis nugka pukua pukuakua wegau. Nunittaman Elías jegantun niina jáanchjiyai tuntupnum dukukui. ²⁰ Dutikam nuna japis wegau ukuak tupikaki Elíasan jegantun chichajak:

“¡Machik tsawan sujasta! ¡Mina apajun mina dukugjai ujaka ukuakun amejai wekaesatjai!” tiuwai. Tusa tama:

“¡Ayu nunikta, tujash aneaku ata wi amina ipajam nunú!” tiuwai.

²¹ Tusa tima Eliseo Elíasan ukuak weuwai. Nunik jegá nunú jimag toro nugka pukuu aidaun mauwai. Dutika umika, toro nugka pukuiti tusa numi minantua jigkamua nunak juki ikapag inajauuwai. Dutika aents aidaun susauwai yuwatnume tusa. Nuna dutika ukuak Elíasjai uyunis wekaesatatus weuwai.

21

Nabot uva ajakbaun Acab atankitag tibau

¹ Apu Acab aajakua duka Samaria nugkanum pujus inamajakui, nuni-ayatak tikich niina pujusa inamtaiji yaakat Jezreel ajujukui. Nunú yaaktanmaya makichik múun Nabot daagtin uva ajakbau jega apu pujusa inamtain nuna yantamen aajakui. ² Tuja makichik tsawantai Acab Nabotan chichajak:

“Amina ajajum uva ajakbauwa nunú mina sujasta, mina ajag ati, wagki wi pujusa inamtaijua nuwi au asamtaí. Nunú sujakminig, tikich ajanum uva ajakbau shiig pegkeja nuna amastajai. Untsu ame wakegakminig, juna akiken kuichkin akiktajame”, tiuwai. ³ Tusa tama Nabot ayaak: “¡Mina apag mina dukugjai ukugtukmauwa duka midau asamtaí, amamatsugme!” tiuwai.

⁴ Tusa tima Acab wake besek wakitkiuwai, wagki Nabot chichaak: Mina apag mina dukugjai ukugtukbaunak amamatsugme tusa tibau asa. Nunik jega yujumkan yutsuk yapin tanishnum anug tepesui. ⁵ Nunik tepetai niina nuwe Jezabel, jegantun iniak:

“¿Wagka yujumak yutsukesh wake besekmesh pujame?” tau.

⁶ Tama Acab ayaak: “Jezreelnumia múun Nabotjai chichasmajai, niina ajaji uva ajakbauwa nuna sumaktajai tusan. Tujash sujutan dakitakui, tikich aja uva ajakbauwa nuna nagkaesau pegkeg awa nuna susatjai timajai. Tujash nii mina sujutan dakitmae”, tiuwai.

7 Timatai niina nuwe Jezabel ayaak:

“Tujash ¿amechukaitam Israel aents aidaun apujimek? Aní pujutsuk yujumak yuwata. ¡Au Nabotan ajajin uva ajakbauwa nunak wi ikamjuktagme!” tiuwai.

8 Tusa tamawaik Acabpa daajin papiin agag apu sellojin apuja, nunú yaaktanmaya apu eme anentsa diitai aidau Nabotjai batsamin aidaun ishikauwai. 9 Nunú papiinmak aatus agajui: “Yujumak ijagmat ati tusajum etsegkatajum. Tuja aents aidau tuwakmatai, Nabot juki ejentatajum dita emtin ekentsatajum. 10 Dutikajum niina tsanumjugtin aidau jimag aents pegkegchau aidau niijai niimtikajum ekentsatajum. Nuwi ekemas tuke aneas tsanumjuinak: ‘Ame Apajui pegkegchau chichagkum Apushkam pegkegchau chichagkamume’, tusa titinme. Tusa tiagmatai jiiikjum, kayai tukua tukuakuajum maatajum”, tiuwai. 11 Tuja Nabotan yaaktajinia aents aidauk múun aidau, nuigtu apu aidau aatus Jezabel papii agag akupkamunak imatiksag umikajui. 12 Nuninak yujumka ijagmawag batsamas, Nabotan jukiag aents tuwak batsatbaunum ejegan dita emtin ekentsajui. 13 Dutikawaju ai, ashí aents aidau antamunum niina tsanumjugtin aidau jimag jegantajui. Nunikag tsanumjuinak: “Nabot Apajui, apu Acabjai pegkegchaun chichaju antukmaji”, tiajui. Tusa tiagmatai juki, yaakta ukumtikiag kayai tukui tukuinakua maawajui. 14 Dutika maawagmatai, Nabotnak maawaje tusag Jezabelan ujakajui.

15 Nuna Jezabel dekaa Acabpan chichajak:

“¡Nabot niina ajaji uva ajakbauwa nuna amina amatan dakitma nunú weme jukita, wagki yamaik niig jakae!” tiuwai. 16 Nuna Acab dekaa Nabota ajajin jukitatus wejiuwai.

17 Dutikamtai Tuke Pujuu Elíasan chichajak: 18 “Wetá nunikam Acab Israel aents aidaun apuji Samaria nugkanum puja nunú egakta. Tuja yamaya juwik Nabota ajajin jukitatus ajanum jegan wekaewai. 19 Nunú jeganta chichagkum: ‘Ame Nabot maakum numpe ukagbauwa nuna yawá aidau dukajaja dutiksag, amina numpenashkam nuanuig dukajagatui’, Apajui tujamui tita”, tiuwai.

20 Tusa ujakam, Nabot Elíasan ayaak:

“Amek mina shiwaajuitme, tujash juwi igkunkaume”, tiuwai. Tama Elías ayaak:

“Ehe, igkugjame. Wagki amek Tuke Pujuu diismak ima pegkegchauwa duke takame. 21 Nuniau asamin Apajui aatus tujamui: ‘Aminak shiig pegkegchaun itajuattagme, dutikakun ame wegantu aidaunak ijituattagme; tuja amina uchijum aishmag aidau Israel nugkanum batsatunak ashí ijituattagme. 22 Tuja Nabata uchiji Jeroboaman, niina uchiji aidaujai ijinauwaitag dutiksanuk aminashkam ijinattagme. Tuja Ahías aajakua nuna uchiji Baasa Israel aents aidaun pegkegchaun takamtikak mina kajemtijuku asamtai, wi suwimka suwakun ijinauwaitag numamtuk aminashkam ijinattagme’, tujamui Apajui.

23 “Tuja Jezabelnashkam pachis Tuke Pujuu chichaak: ‘Jezabelnak yaakt Jezreel peejamua nuna aawin yawá aidau yuwawagatui. 24 Tuja amina pataim aidau yaaktanum jakagata nunak yawá yuwawagatui. Untsu agá jaunak chuwag yuwawagatui’”, tiuwai.

25 Tuja tikich apu aajaku aina duka Acabpan nuwe Jezabel tabaun umiju asa, Tuke Pujuu diismash ima pegkegchaunak takajakua nuninuk atsujakui. 26 Tuja amorreo aents aidau dakumkamun emematujaku

aina nunisag, Acabshakam nuna emematak shiig pegkegchau Tuke Pujuu aentsji Israel wegantu aidau emtin iwainmamajakui.

²⁷ Juna aatus Apajui tibaun Acab antukui. Nunik puyatuk jáanchjin japiki ichigkui, dutika jáanch pegkegchaun nugkuja, yujumkan ijagma pujau. Nunik pujus makichkish yapagmamtuk, wake besek wekagu. ²⁸ Nunik pujutai Tuke Pujuu Elíasan chichajak: ²⁹ “¿Acab awake anen-taimag minai yunumka dusha dekamek? nuniku asamtai, nii iwaku pujaigkik, niina uchiji aidaunak ijituashtatjai. Untsu nii jakamtai, niina uchiji apu wetata nuadui, niina uchiji wegantunak suwinkan susattajai”, tiuwai.

22

Apu Acabpan depetuk maawagtinun pachis Micaías etsegkamu

¹ Israel aents aidauk Siria nugkanmaya aidaujai maanitsuk kampakum mijan batsamsajui. ² Tujash kampakum mijana duwi Judá wegantu aidau apuji Josafat Israel aents aidau apuji Acabpan ijagsauwai. ³ Nunik mai apuk chichaak batsatai, Acab Israel aents aidau apuji niina atuwe aidau chichajak:

“Atumek dekagme, yaakat Ramot Galaadnum awa duka dekas iinui. Nunin aig Siria nugkan apuji nii atai kuitama nunú atankimi”, tiuwai. ⁴ Nuna tusa Josafatan iniak:

“Yaakat Ramot Galaadnum awa nuna sirianmaya aidau ayamjuinak akasmatuina nunú jeteamunum ¿uyunkagtumainchaukaitam?” tau. Tama Josafat ayaak:

“Wika mina suntag aidaujai, tuja caballonum entsamak maanin aina dushakam betek amina suntajum aidaujai atuniaji. ⁵ Tujash eke shimutsuk Tuke Pujuu iniasta ¿niish tunak tujamít?” tiuwai.

⁶ Tusa tima Israel aents aidau apuji Acab cuatrocientos profeta aajaku aina nuna ijumag chichajak:

“¿Yaakat Ramot Galaadnum awa nunash jetemainkaitag, atsa jetemainchaukaitag?” tiuwai. Tusa tama dita ainak:

“Jetekta, auk amek Tuke Pujuu yaimpasmatai depetkattame”, tiajui.

⁷ Tujash Josafat Judá wegantu aidau apuji iniak:

“¿Juju profeta aidauush dekaskeash tuina tusa, tikich profeta iniasta shiig dekamainush juwish pujatsuak?” tiuwai.

⁸ Tusa tama Acab Josafatan ayaak:

“Ehe, makichik pujawai, nunú iniasta dekamainai Tuke Pujuuish wajintuaki. Nuna daajig Micaías, Imlá uchijiyai. Tujash wika niinak kajegnujai, wagki pegkejan ujattsuk, ima pegkegchaunak ujatu asamtai”, tiuwai. Tutai Josafat ayaak:

“¿Duka aajamek tiipa!” tiuwai. ⁹ Tusa tima Israel aents aidau apuji Acab makichik suntaja apujin untsuka chichajak:

“¿Imlá uchiji Micaías wamkes juwi taati tusan wakegajai!” tusa akateg akupkauwai.

¹⁰ Tuja Israela apuji Acab Judá apuji Josafatjai apu nugkutain nugkujag iwagmamag, yaakat Samaria waitainum ekemsa ayamtai plazanum apu ekemtai aidau umikbaunum eketaidau. Nunik eketainai ashí profeta aidauk, Apajui tawai tusa chichaman etsejuidau.

¹¹ Tuja nuwiya makichik Sedequías daagtin múun Quenaaná uchiji baka kachujijai betek jiju najanamujin takus wajasa untsamak: “¿Tuke Pujuu aatus chichaak: ‘Juju kachu aina jujai sirianmaya aidau jetektatjume,

dutikajum ashí amuktatjume!’ tawai”, tau. ¹² Tuja tikich profeta aidaushkam dutiksag chichainak: “Yaakat Ramot Galaadnum awa nunú jetekta, ame depetmaktatme, wagki Tuke Pujuu depetmak yaaktan atankiti tujamu asamtai”, wajaadai.

¹³ Imatu batsatai Micaíasan utitag tusa weu jegajua chichajak:

“Ashí profeta aidauk ashí chicham pegkejan apu Acabpan ujakaje. Nuadui jwait aneasam ameshkam ditajai ijunjam, chicham pegkeg apu Acab ujakta! tusan tajame”, tiuwai.

¹⁴ Tusa tama Micaías niina ayaak:

“jDekas umiktinun Tuke Pujuu daajin tajame. Wika Tuke Pujush wajintig ima nunak etsegkattajai!” tiuwai.

¹⁵ Nuna tusa apu pujamunum weuwai. Nunik jegamtai apu Acab iniak:

“Micaíasah, ¿yaakat Ramot Galaadnum awa nunash jetemainkaitag, atsa jetemainchaukaitag?” tau. Tusa iniam nii ayaak:

“jJetekta, Tuke Pujuu yaimpaktatui depetmakti tusa!” tiuwai. ¹⁶ Tusa tutai apu Acab niina ayaak:

“Ame dekas takumek, Tuke Pujuu daajin tajai tita tusan kuashta tajame”, tiuwai. ¹⁷ Tusa tama Micaías niina chichajak:

“Israel aents sntag aidauk aidauk kuitamain atsugsam, pampagka yujama numamtuk yujaun wainkamjai. Tuja Apajui mina chichagtak: ‘Dita aidauk kuitamainuk atsawai, nuadui maki makichik agkan dita jeen waketjatnume’ tusa tujutui”, tiuwai. ¹⁸ Tusa timatai Acab Josafatan chichajak:

“Wi juna aneasan, ¿juju aentsuk pegkegnakesh etsegchauwe, ima pegkegchaunak etsegnuwe tusan tichamkajam?”, tiuwai.

¹⁹ Tusa tutai Micaías ataktu chichajak:

“Ame tame nuniau asam, wi Tuke Pujuu tujutbaun ujaktatjam nunú shiig antukta: Tuke Pujuu niina ekemtaijin ekemsamtai, niina aentsji aidau utsujin, menajin aatus ijunun wainkamjai. ²⁰ Nunik ijunun Tuke Pujuu iniak: ‘Maaniamunum Acabpan maatnume tusa tuke aneas tsanuak Galaad, nugkanum yaakat Ramot awa nuna sirianmaya aidau akasmatuina nunú jetekta tusa ¿Acabpan tsanumainush yakita?’ timae. Tusa tutai niina aentsji aidau nuwi ijunu maki makichik anentain apusagmae. ²¹ Tusa tuinai wakan pegkegchau Tuke Pujuu eketbaunum tanta chichaak: ‘jWi nunak tsanumainaitjai!’ timae. Tusa tutai Tuke Pujuu iniak: ‘¿Tujash wajuk dutikattame?’ timae. ²² Tusa iniam nunú wakan pegkegchau Tuke Pujuan ayaak: ‘Auk profeta aina nunú ashí Acabpan tsanugtinme titatjai’ timae. Tusa timatai Tuke Pujuu niina chichajak: ‘Kame tsanumain asameas tametai, weme tsanugta’, timae. ²³ Yamai dekaume amina profetajum aina nuna Tuke Pujuu wakan waitan egketjamu asa, maatnume tusa tsanugmaina nunú”, tiuwai.

²⁴ Tusa timatai Quenaaná uchiji Sedequías Micaíasan jegantun yapinum awati chichajak:

“Tuke Pujuu Wakani mina chichamtija nunú jiinki mina ukujuk, aminí waya chichamtijatsush tusamek wainka anentaimjaipa, nunak makichik-ish nuniatsui”, tiuwai.

²⁵ Tusa tama Micaías Sedequíasan ayaak:

“Ayu, ame mina tujutam duka tupikaki wekaesam uuma wekaetatam nuniakum dekattame”, tiuwai. ²⁶ Tusa timatai Acab chichaak:

“jAchika jukijum yaakta apuji Amón puja nuwi ejegatajum, dutikakjum mina uchig Joásaiskam ejegatajum! ²⁷ Dutikawagmin wi taja nuna dutiksag aents achika egketainum egkeatnume. Dutikawag pagkan

yumijai piipichin susatnume, dutikainai wi maania depetmakan pegkeg jatsuk taatjai”, tiuwai.

²⁸ Tusa tutai ataktushkam Micaías niina chichajak:

“¡Ame iwaku wakitkiaminig, mina tujutma nunak Tuke Pujuu tujutchau asamtai nuniktatme!” tiuwai.

²⁹ Tusa timatai suntag aidau Micaísan achikag aents achika chimpitainum juki emajui. Dutikainai Israel aents aidaun apuji Judá wegantu aidaun apujijai yaakat Ramotan jetekagtatus shimutkajui. ³⁰ Nunik shimutuinak Israel aents aidaun apuji Josafatan chichajak: “Wika suntag wainkauch aina nuna nugkutain nugkugtatjai. Untsu ame mina jáanchug apu nugkutaiya nunú nugkugta”, tiuwai. Nuna tusa Acabpak suntag wainkauch aidau nugkutain nugkuja maaniamun nagkamauwai.

³¹ Nunik shimuinai sirianmaya apushkam treinta suntaja apuji capitan carronum yujas maanin aidaun chichajak: “¡Tikich aentsuk jetekaigpajum, ima Israel aents aidau apujiya duke jetektajum!” tiuwai. ³² Tujash nunú suntag aidau Josafatan wainkag jutsukaita Israel aents aidau apuji tusag jiintujag tenteawajui. Dutikam Josafat niina suntaji aidaun untzukui yainkatnume tusa. ³³ Nuna antugkag, juka dekas Israel aents aidaun apujichuapi tiajui. Nuadui tupikautaiish pataetukchajui.

³⁴ Untsu Sirianmaya suntag makichik aentsnakesh wainchayatak wainak niina flechajin akenkauwai. Dutikkama Israel aents aidau apuji Acab niina suntaji aidau shimamunum pachitkau wegaun pachiachbau ijuwai. Dutika ijum niina carrojin anuntuk wegaun chichajak: “¡Carro ataktu awagkita, wika jakattajai, minak ijutiaje!” tiuwai.

³⁵ Nunú tsawantin suntag aidau shiig senchi maaniawajui. Tuja apu Acabnak niina carrojin egkeja awajainiag batsamtuidau sirianmaya aents aidaujai maaninak. Tujash flechayai ijumunum numpa saegak carronak ayatak numpak awajsauwai, nunik etsa akagai jakauwai. ³⁶ Tuja etsa ashí akagai Israel suntag aidaun apuji chichaak: “Ashí waketjatajum, ³⁷ wagki iina apujig jakae”, tabaun antukajui.

Tusa tima waketuinak Acabpa iyashin jukiag Samaria ejegawajui. Dutikawagmatai niina patayi aidau nuwi ukusajui. ³⁸ Dutika ukusagmatai niina inake aidau carro jukiag, nuwa wainka takatai aidau matainum ejegawag nijakajui. Dutikamunmayan numpa saekiun yawá aidau dukajajui, Tuke Pujuu tibaunak imatiksag.

³⁹ Tuja apu Acab pachisa augmatbauk nii takasbauji aidaujai, nuigtu jega apu pujusa inamtai marfil* umikbau aajakua duka, tuja yaaktan najankauwa dushakam papii crónicanum apu aidau takasbau agatkamua nuwi agagbau ayawai. ⁴⁰ Aatus Acab jakauwai. Nunikmatai niina uchiji Ocozías apu wajas inamjauwai.

* **22:39** “Marfil” tawa duka elefante nai tsupija, dakaja aduaja shiig pegkejuch umikbau aajakua nuna taku tawai.

**Apu aidau takasbau aina
nunú pachisa jimajá agagbau
2 Reyes
Elías nayaimpinum wematai Eliseo nagkama
takasua nunú agagbau**

2

(2—13)

Elías nayaimpinum webau

¹ Apajuí dasen wainchijai betek ajuag Elíasan jukitin tsawan jegau ai, Elías Eliseojai yaakat Guilgal batsatu juwakiag shiyakajui. ² Nunik wesag Elías Eliseon chichajak:

“Amek juwi pujumata, Tuke Pujuu minak Betelnum awetawai”, tau. Tama Eliseo ayaak:

“Tuke Pujuu antai tuja ameshkam antamin tajai. Wika ima nigki weti tusanuk idaisashtatjame”, tiuwai. Tusa timatai mai juwakiag Betel jegawajui.

³ Nunikagmatai profeta aidau Betelnum batsatu Eliseon igkugtatus jintujajui. Nunik igkug chichajuinak:

“¿Amesh amina jintinjamnun Tuke Pujuu jujutjamkitta dusha dekamek?” tuidau. Tusa iniam nii ayaak:

“Ehe, dekaikai, tujash atumek duka tiigpa”, tiuwai. ⁴ Tuja ajuma duwi Elías Eliseon chichajak:

“Amek juwi pujumata, minak Tuke Pujuu Jericó awetawai”, tau. Tama Eliseo ayaak:

“Tuke Pujuu antai tuja amesh antamin tajai. Wika ima nigki weti tusanuk idaisashtatjame”, tiuwai. Tusa timatai mai juwakiag Jericó jegawajui. ⁵ Nunikagmatai profeta aidau Jericó batsatu Eliseon igkugtatus jintujajui. Nunik igkug chichajuinak:

“¿Amesh amina jintinjamnun Tuke Pujuu jujutjamkitta dusha dekamek?” tuidau. Tama nii ayaak:

“Ehe, dekaikai, tujash atumek duka tiigpa”, tiuwai. ⁶ Tuja ajuma duwi Elías Eliseon chichajak:

“Amek juwi pujumata, Tuke Pujuu minak Jordán awetine”, tau. Tama Eliseo ayaak:

“Tuke Pujuu antai tuja ameshkam antamin tajame. Wika ima nigki weti tusanuk idaisashtatjame”, tiuwai.

Tusa timatai mai juwakiag Jordán jegawajui. ⁷ Nunik wegagtai cincuenta profeta aidau Jericó batsatu pataetakajui. Nunik pataetakag Elías Eliseojai ijunun nuna ukujin ikaa ijuntsajui. Nunik ijunai Elíasak Eliseojai namaka jegawajui. ⁸ Nunik jegawag Elías jáanch nii dukumataijin juki pempeag yamin awatiuwai. Dutika awatim namakak jimaituk kanaka buku wajasui. Nunikmatai nugka bukunum katimaina imatikas mai katiyajui.

⁹ Nunik katiyajag Elías Eliseon chichajak:

“Eke amejai kanaatsug nuaduik, ame wajina sujusti tame nunú segatta”, tiuwai. Tama Eliseo ayaak:

“Tuke Pujuun senchiji aminí awa nuna aan nagkaemas sujusti tajame”, tiuwai. ¹⁰ Tusa tama Elías ayaak:

“Amek shiig kuashat sumame. Tuja mina Apajuí jujuktata nunú waitkum ame segatam duka jukittame. Untsu mina Apajuí jujamu waitchakmek jukishtatme”, tiuwai.

¹¹ Nuna aatus chichakiag shimuinai pachiachbau makichik carro kegau, tuja caballo dushakam kegau wantinkauwai. Nuniak tsanig wajaun akankauwai. Dutikam Elíasak dase wainchijai betek ishamain wajaunum pachiiinak nayaimpinum weuwai. ¹² Nunikmatai Eliseo wainak senchi buutak:

“¡Apawah! ¡Apawah! ¡Amek Israel aents aidunmak suntag maanin aidun nagkaesau ayume!” waja wajas buutu. Tujash ataktu awagkig Elíasnak wainkachui. Elías wematai wake besemag dekapeak niina jáanchjin japiki ichigkui.

Elías wematai

Eliseo nagkama takasbau

¹³ Elías wegak jáanch nii dukumataijin ajuag ukukbaun Eliseo jukiuwai. Nunik wakitki namak Jordágnum jegauwai.

¹⁴ Nunik nuna jáanchin pempeag duwi namakan awati untsamak:

“¿Tuke Pjuu Apajuí Elíasan ememattaish tuwi pujawa?” tau. Dutikamuik namakak jimaituk kanaka buku wajasui. Nunikmatai Eliseo katigkui. ¹⁵ Tuja profeta aidau nuwi ijunas dii ijunuk, Eliseo dutikaun wainak chichainak:

“¡Apajuí Wakani Elíasai pujumia nunú yamai Eliseowai pujawai!” tusag niina igkugtatus wejajui. Nunik jegantag, ¹⁶ tsunsuma ijunas chichajuinak:

“Antukta nijah, ii ame inakem ainag juwiya cincuenta aents wajuu aina nunú amina jintinjamin Elías megkaeka nuna egaktinme. Namputchawame Tuke Pjuu Wakani yaki takui juki tikich mujanum, dutikachkush segaunmakesh ajuag ukukchaintash”, tuidau. Tusa tiagtai nii chichaak:

“Atsa, makichik aentskesh egaktinme tusagmek awemaigpajum”, tiuwai.

¹⁷ Tusa tamaitak intimki imatiagtai, ayu cincuenta aents ishiaktajum tusa tiuwai. Tusa timatai ishiakam kampatum tsawan yujagsag egainakush wainkachajui.

¹⁸ Nunik wainkacha waketug Jericó kaunamtai, Eliseo ditan chichajak:

“Wika anna aneasan wegpaum timajime”, tiuwai.

Eliseo Jericónmayan entsa pukuni pegkegchau jiinun pegkeg awajsamu

¹⁹ Tuja Jericónmaya aents aidau Eliseon chichajuinak:

“Iina yaaktajiya juka pegkejai. Duka ameshkam wainme. Tujash yumi pegkegchau umumaitsui, nugkashkam ajakmamash tsapatsui”, tuidau.

²⁰ Tiagtai Eliseo ditan chichajak:

“Tazón yamajam weejai jukijum itagtuatajum”, tau. Tusa tima juki ejentuntajui. ²¹ Nuna Eliseo juki yumi pukuni jiinbaunum jeganta nagkimak: “Juna aatus Tuke Pjuu chichaak: ‘Juju yumia junak wi pegkeg awagsajai. Nuadui makichik aentskesh juna umauk jakashtatui. Tuja nugkashkam ajak tsapamainchauk achattawai’ tawai”, tiuwai.

²² Duwi nagkamas Eliseo tibaunak imanisag, yumi pegkeg wajasui.

²³ Nuna dutika ukuak Eliseok Betel weuwai. Nunik wegaun uchi betelnumia datsa aidau jiiintujag dushikinak:

“¡Nampiaju ameshkam nayaimpinum wetá! ¡Nampiaju ameshkam nayaimpinum wetá!” awajuidau.

²⁴ Tusa imatjam Eliseo ayampatua Apajuín adayas ditan yumigkig ukukiuwai. Dutika ukuaig jimag chayú ikamia jüntuki cuarenta y dos uchi datsa aidaun ichiag ijinauwai.

²⁵ Nuwi juwaki Eliseo weuwai muja Carmelonum. Tuja nuwiya juwaki wakitkiuwai yaakat Samaria nugkanum.

4

Eliseo Sunemnumia nuwajai

⁸ Makichik tsawantai Eliseo Samaria wegak yaakat Sunem aajakua nuni nagkaemakiuwai. Nunik nagkaemattaman nuwiya nuwa eme anentsa diitai pujau, yujumkan yuwati tusa waitkas ipauwai. Nuadui Eliseo nuni weakug nuwi yujumkan yuwatatus tuke waijakui. ⁹ Tuja makichik tsawantai nunú nuwa niina aishin chichajak:

“Antukta nijah, wika dekajai au aents nagkaemak tuke waya ijagtama duka dekag pegkejam Apajuín profetajiyai. ¹⁰ Nuadui jega tuntupega nuwi nii kanutai umigkami. Dutika makichik pegak, makichik patasa yutai, ekemtai, nuigtu ekematai aatsa umigkami. Dutika umikbau asamtai, iina ijagtamkush nuwi kanagti”, tusag umikajui.

¹¹ Dutika umikbaunum Eliseo nuwi kanagtatus waya, ¹² niina inake Guehazi aajakua nuna chichajak: “Nuwa jentin untsukta”, tiuwai. Tusa tima untsukui. Dutika untsukam taamtai, Eliseo niina inaken chichajak:

¹³ “Anú nuwa iina shiig awajtamka nuniau asamtai, iish wajinmak yaimainaita nunú iniasta. Tuja niish wakegakuig apujai, nuniachkuish suntaja apujijai chichamainaitji”, tiuwai.

Tusa tutai nunú nuwa ayaak:

“Wika juwi mina pataag aidaujai pujau asan shiig pujajai, utugchatak atsugtawai”, tiuwai. ¹⁴ Nuna tusa wakitkimtai, Eliseo niina inaken chichajak:

“¿Tujash wajuk yaimainkita?”, tau. Tama nii ayaak:

“Achah, wajuk yaimaintsukait. Uchigtuchui, tuja aishishkam múunchi”, tiuwai. ¹⁵ Timatai, kame ataktu untsukta tiuwai. Tusa tima ataktu weji untsukui, dutikam kanutainmak waitsuk, ayatak waitinum jegan wajasui.

¹⁶ Nunikmatai Eliseo nunú nuwan chichajak:

“Tikich mijan atata duwi yamai tsawanta juniai, uchi uchigmakam pagkuaku atatme”, tiuwai. Tama nii Eliseon ayaak:

“Mina apujuh, amek Apajuí etegkamuitam iman asam minak tsanu-jaipa”, tiuwai.

¹⁷ Tau asa nigka dekaskapi tichauwai. Tujash duwi pujus Eliseo tibau-nak imatiksag ejappukui. Nunik tikich mijantin uchigmakui. ¹⁸ Dutikam pujus nunú uchi muumpajui. Nunik pujau makichik tsawantai niina apaji aents ajaka juwagtai diyak ajanum pujau asamtai, ditajai pujustatus weuwai. ¹⁹ Nunik jegan wajanbauwaik senchi buutak:

“¡Ayau, buukeg najautawai! ¡Ayau, buukeg najautawai!” wajau. Imattai apaji niina inaken chichajak:

“Juju uchi jukim dukujin ejegata”, tiuwai.

²⁰ Tusa tima juki dukuji pujamunum ejegauwai. Dutikamtai niina dukuji juki niina bakuin ekenas pujujus etsan tajipiuwai. Nunik nuwi pujusag uchik jakauwai. ²¹ Nunik jakamtai dukuji juki profeta Eliseo kanutaijin

yaki iwaka pegaknum aepes waitin epeni ukukiuwai. ²² Dutika ukuki niina aishin untsuka taamtai chichajak:

“Makichik inak burro susam awetugta nujai wi wenu profeta Eliseojai chichasan taatjai”, tiuwai. ²³ Tutai niina aishi chichaak:

“¿Wagka yamaish niijaiish chichastag tame? Nantuk yama takache, tuja tsawanchakam ayamtaichui”, tau. Tama nii ayaak:

“Duka amek puyatjukaipa, nunin aigkish wetatjai”, tiuwai. ²⁴ Tusa timatai ayu tusa niina inaken burronum ekemsa wetin unikta tiuwai. Tusa tima umikmatai nuwa niina chichajak:

“Wegajai wamak, ame emkata, tuja wi juwi ayamjami tatsaigkik wajantaipa”, tusa weuwai.

²⁵ Nunik wea weakua muja Carmelonum Eliseo pujamunum jegauwai. Nuwi jegattak wetatman Eliseo wainak niina inake Guehazín chichajak:

“Nijah diisia, au nuwa mina duka Sunemnumia nuwa iina kanutain amauwe nunuwai. ²⁶ Tupikaki igkugkam iniasta niina aishish, niina uchijish pegkejash batsata nunú”, tiuwai. Tusa tima tupikaki weji igkug iniasui. Tusa iniam nii ayaak:

“Ehe, pegkeg batsatji”, tau.

²⁷ Nuna tusa Eliseo pujamunum jegauwai. Nunik Eliseo nawen tapit achik pujusui, nunitai Guehazi jegantauwai emenastatus. Dutiktai Eliseo niina inaken chichajak:

“Idaisata nigka kuashat anentaimak waitiawai, tujash Tuke Pujuu eke jututsui waji utugchatak ajawa”, tiuwai.

²⁸ Tusa tutai nunú nuwa Eliseon chichajak:

“¿Mina apujuh, wisha aminash uchi uchigmaktasan wakegajai tusanush timakajam? Juna aneasan wika aminak wainkam tsanujaiipa timaijame”, tiuwai. ²⁹ Tusa tutai Eliseo niina inake Guehazínkan chichajak:

“Umintsata nunikam mina ushujutaig jukim juju nuwa jeen wetá. Tuja jintá weamin aents igkupainakuish kumpamawaipa. Tuja makichik aentskesh kumpamjamkuish aikaipa. Nunika jegam mina ushujutaijuwa juju uchi yapiin patatta”, tiuwai. ³⁰ Tusa tutai nunú nuwa Eliseon chichajak:

“Tuke Pujuu antai, tuja ameshkam antamin tajame, wika ame wegachkuminig makichkish wechattajai”, tiuwai. Tusa imattai Eliseo nunú nuwajai weuwai.

³¹ Nunik Eliseok eke wegai Guehazi niyá eemak jegá, ushujutai takakbauwai uchi yapiin patatiuwai. Tujash uchik makichkish tsagaumainchau tepau.

Nunitai ukuak Eliseon igkugtatus wejiuwai. Nunik igkug chichajak:

“Ame tujutmaum nunak betek dutikamjai, tujash uchik tsagaichmae, jakamutak tepeme”, tiuwai.

³² Tusa ujakam Eliseo niishkam jegá jegauwai. Nunik waya diikma uchi jaka peaknum tepaun wainkauwai. ³³ Dutika wainak nunú kanutain epeni Tuke Pujun aujak pujau. Tuja nunú kanutainmak ima Eliseok nunú uchi jakaujai pujau. ³⁴ Eliseo Apajuín aujus inagnak pegaknum waka uchi jakaun patamti uchin pagkuk niina wenin, jiin, uwejen, uchi wenin, jiin, uwejen, aatus tuket enekna tepesui. Nunik tepai, uchi jaka bichatug tepau nimpautan nagkabau. ³⁵ Nunitai Eliseo nantaki nunú kanutainum imau wajan, wegagu. Nunik ataktushkam pegaknum waka uchi patamti pagkuk tepau, nunik tepai uchi sieteya imania jachituk niimiuwai. ³⁶ Nunikmatai Eliseo Guehazigka untsuka chichajak: “Uchi dukuji untsukta”, tima untsukui. Tusa untsukam nunú nuwa Eliseo

wajamunum jeganmatai Eliseo chichajak: “Juju uchijum jukita, jakache tsagaje”, tiuwai.

³⁷ Tusa tima tupikaki Eliseo nawen pagkuk pujusui. Dutika ukuak uchijin juki Eliseo kanutaijin pujau nungká akaikiuwai.

5

Naamán lepran achiimak jaun Eliseo etsagagbau

¹ Siria nugkan apuji aajakua nuna suntaji aidaun apuji makichik aents Naamán daagtin aajakui. Niina Tuke Pujuu yayau asamtai, sirianmaya aidau maaninak depetmakaju asag, niinak apu shiig anentujukui. Tujash nunú aents lepra achiimak jak tepau.

² Nunik tepai makichik tsawantai, sirianmaya aidau Israel aents aidaujai maaninak, makichik nuwa tsakatan achikag jukiag Siria nugkanum ejegawajui. Dutikawagmatai Naamán niina nuwen inake ati tusa juki apusauwai. ³ Dutikam pujus nunú nuwauch niina inaun chichajak:

“Mina apug amina aishjum ja duka profeta Samaria nugkanum puja nuna weji diyakug tsagaumainai”, tiuwai. ⁴ Tusa timatai Naamán nuna pachis apun weji ujakui. ⁵ Tusa ujaam apu chichaak:

“Dekas tame, wetá, ame wegakmin papii agajan, Israel aents aidau apujin akuptuktajai yaimpakti tusan”, tiuwai. Tusa tima Naamán kuichik plata najanamun treinta mil juki, nuigtu kuichik oro najanamun juki, nuigtushkam diez jáanch nugkutai aidaun profeta akiktinun aatus yajuak niina inake aidaujai weuwai. ⁶ Nunik wegak nuigtushkam papii agagbaun jujukiuwai. Nunú papiinmak:

“Wi mina aentsug Naamán suntaja apujiya nuna awemajai, lepra achimak ja nuna etsagagti tusan”, tuu agagbau aajakui.

⁷ Nuna Israel aents aidaun apuji aujus diisa, shiig anentaimainchau waugkamin dekapeak, niina jáanchjin japiki ichigka chichaak:

“¿Wi Apajuí pujuta sukagtin, nuigtush jakati tusash tukagtina dukaitag, aents lepra achimak ja nuna etsagagti tusa awetam atinun? ¡Atumesh shiig anentaimsa diistajum, wika junak maaniami tusa segapak jutijamui taja!” tiuwai.

⁸ Tuja papii agaja akupkamun apu diisa, jáanchjin japiki ichigke tabaun profeta Eliseo antukui, nunik niina chichaman akuptak:

“¿Wagka jáanchjumesch japikmesh ichigkume? aaní wekaetsuk anú aents awemata juwi tati. Nunik juwi taa dekaattawai, Israel aents aidaunum makichik profeta Apajuí etegkamu puja nuna”, tiuwai.

⁹ Tusa timatai Naamán niina carrojin caballo aidaujai yajuak weuwai. Nunik Eliseo jeen jeganta waitinum wajasui. ¹⁰ Tujash Eliseok jiintukig kumpamachui, ayatak chichama etsegnun akateg awemak:

“Namak Jordágnum jegá sieteya imania nijamagti, nunik duwi tsagag-tatui, tujamui tita”, tusa akateg awemauwai.

¹¹ Nuna antuk Naamán shiig senchi kajekui, nunik wegak chichaak:

“Wika niina jenis awaintua, nuwi wajasa Tuke Pujuu niina Apajuíjin segaa, nuadui mina iyashjui lepra ayá nuna achikmatai tsagajainja timajai.

¹² Israel aents aidau nugken namak aina nuna nagkaesau Damasconmaya namak pegkeg dekas múun aidau Abaná Farfarjai awa ¿duchaukait? Nuwi wika wenu nijamaja tsagaumain wajakchaja”, tau.

Tusa senchi kajeka weuwai. ¹³ Nunik wetai niina inake aidau jegantag chichajuinak:

“¿Profeta amina aan nagkaemas utugchatan tujamkuig duka umikchat-nukum? Iik umimainapi taji, nuadui dekas ayatak nijamajam tsagagta tujama duka, dutiksamek nijamajam tsagaumainaitme”, tiajui.

¹⁴ Tusa tima Naamán namaka wee, Eliseo tibaunak imatiksag sieteya imania iyagka nijamajui. Nunik tsagag niina iyashinig uchi tsakatchin iyashijai betek pegkeg wajasui. ¹⁵ Nunik tsagag niina uyunaidau aidaujai ijunag Eliseojai chichastatus weuwai. Nunik jegá Naamán Eliseon chichajak:

“¿Dekas yamaik shiig dekaajai, tikich nugkanmak Apajuik atsawai, ima Israel aents aidunmak pujawai! Nuniau asamtaí, wait aneasam ame mina etsaentuju asamin, wi amina inakem asan, waji aidau amastatag nunú jukita”, tiuwai.

¹⁶ Tusa tama Eliseo niina ayaak:

“Tuke Pujuu wi takamun deka nuna daajin tajame. Ame tujutam nunak ayu tichattajame”, tiuwai. Nuadui Eliseok Naamán, waji susatag tamash dakitjauwai. ¹⁷ Dutika dakitjamtai Naamán Eliseon chichajak:

“Wi amina amastag taig ame dakitau asamin, untsu wi amina sega-jame. Juju Israel aents aidau nugkega juna tai aimkan, jimag burro entsamainun nugkan jukitjai. Dutikan mina nugkajui ejegan Apajuí emematku kuntin maa patasa apetaín najanatjai. Wagki wika yamai nagkamsanuk tikich apajuímtai aina nunak kuntinu maan nuna ne-jeñ ashí apeaknuk emematchattajai, ima Tuke Pujuu ame emematam nunak ememattatjai. ¹⁸ Untsu wi mina nugkajui jeganuk mina apug niina apajuímtaiji Rimón ememattatus weakui uyuntsattajai, wagki nunú ememattainum waya nuna emematak mina kuntujui achimak tikishmag pujakui, wishakam tikishmajan pujustatjai. Nuna wi nunitaish, minash Tuke Pujuu tsagkugtugti tajai”, tiuwai.

¹⁹ Tusa tutai Eliseo niina chichajak:

“Ayu, puyattsuk nugka jukim wetá”, tusa tima Naamán nuwi pujau jiinki weuwai.

Nunik ujumak kuwagai, ²⁰ Eliseo inake Guehazi anentaimas: “Naamán sirianmaya aentsua nunú susatag tama mina apug Eliseo dakitug awagki nunak dekas wi wamak pataetukan amaigkan wajinak segainja nuna segatjai. Tuja nunak Tuke Pujuuish waitai umiktajai”, tiuwai.

²¹ Aatus anentaimas Naamágkan pataetukui. Nunik pataetuk wegaun Naamán wainkauwai, nunik niina carrojin aepes akaikiuwai kumpamata-tus, nunik kumpamak:

“¿Utugchat atsuaq?” tau. ²² Tama nii ayaak:

“Atsa, utugchatak atsawai. Untsu mina apug Eliseo profeta datsa aidau Efraigka nugkenia kaunawaju asamtaí, nunú susatin ame weme tres mil kuichik plata najanamu, nuigtu jimag jáanch nugkutaijai sega utita tusa tujutmatai minajai”, tiuwai. ²³ Tutai Naamán niina ayaak:

“Dekas wait aneasam seis mil kuichik jukita”, tusa imatjau. Nuna tusa jimag sacon juki kuichkin chimpia jáanchnashkam jimajan egkeauwai. Dutika niina inake aidau susauwai atum jukijum ejetuatajum, tusa. ²⁴ Dutikam jukiag mujanum Eliseo Guehazíjai pujujakua nuwi ejegawajui. Dutikawagmatai Guehazi nuna juki ditan kumpama ishiakui. Nunik shiyakmatai nunú kuichkin jáanchjai juki jegá uukui.

²⁵ Dutika uuka ukuaq niina apuji Eliseo pujamunum jegauwai, nunikmatai Eliseo niina iniak:

“¿Amesh tuwiyamea miname?” tau. Tama nii ayaak:

“Wika yajak wegatsjai, juwig pujajai”, tau. ²⁶ Tutai Eliseo niina ataktu chichajak:

“Naamán amina kumpamjamatus niina carrojinia akaikima nunak, nuwi amejai mina wakanjuk pujume. Yamaik kuichkikesh, jáanchkesh, olivo ajakbaukesh, uva ajakbaukesh, uwig aidaukesh, buey aidaukesh, inak aishmagkesh, nuwa aidaukesh makichkish jumaitsuji. ²⁷ Nuniaig ame juki asamin Naamágka lepraji amina, ame wegantu aidaujai achigmaktatui. Dutijamantai tuke leprayai jau atajtume”, tiuwai.

Tusa tima Guehazi Eliseojai pujamun kanaabuik lepran achiimak niina iyashinig ishamain puju wajasui.

6

Jacha namakia jiiكبau

¹ Makichik tsawantai profeta aidau Eliseon chichajuinak:

“Ii ame pujamunum pujag duka shiig piipichi. ² Nuniau asantai wait aneamam idaikagtusta, Jordágnum shiyaka numi tsupika ii pujustin jegamkagmi taji”, tuidau. Tusa tiagtai:

“¡Ayu wetajum!” tiuwai. ³ Tutai nuwiya makichik niina chichajak:

“Wait aneamam uyunkagtusta”, tau. Tusa tama:

“¡Ayu, kame uyuntsatjime!” tiuwai. ⁴ Aatus ditajai juwaki Jordán jegauwai. Nunikag nuwi numi tsupinak yujau. ⁵ Nuninai nuwiya makichik aents jachan apakuig namaka ajukui. Dutika ajukka untsumak:

“¡Chah, jintunkagtinuh! ¡Jachak midauchawe tsagkatjukagmae!” tau.

⁶ Imattai nii iniak:

“¿Tuwi ajugmaume?” tau. Tutai nuwi tikich wajau chichaak:

“Auk juwi iyagmae”, tiuwai. Tusa timatai Eliseo numin tsupik juki nuwi nagkima ajukui. Dutikam jacha wampumni jiiniuwai. ⁷ Nunikmatai:

“Jukita”, tusa tima nuwi tikich wajau asa esanti jukiuwai.

Eliseo sirianmaya suntag aidaujai

⁸ Tuja nunú tsawantin sirianmaya apu Israel aents aidaujai maanidau asag, tuwig niina suntaji aidaujaish ijunjatnush aajabi nuna pachis niina atuwe aidaujai chichasui. ⁹ Nuna pachis Apajuí Eliseon ujakui. Dutikam Eliseo chichama etsegnun akateg awemak: “Sirian apuji niina suntaji aidaujai nunú nugkanum ijunjattaji tuinawai. Nuadui Israel aents aidau apuji niina suntaji aidaujaig nuni nagkaemakinmegka tusajum ujaktajum”, tiuwai. ¹⁰ Tusa timatai ujakam, Israel aents aidau apuji anentaimas, Eliseosh dekaskeash tawa tusa niina suntaji aidau ujumak akupkauwai, dutika dekaamá dekas atai, yaja shimak uwemaidau. Nunik kuashta uwemajaku ainawai.

¹¹ Nunidau asagmatai apu sirianmaya shiig senchi kajekui. Nunik suntaja apuji aidau untsuka ijumag chichajak:

“¡Israel aents aidau apuji maatasa chicham umijag nunash ya ima ujawa nunú etsegkatajum!” tiuwai.

¹² Tusa tutai nuwiya makichik ayaak:

“Iik apu ujakchamji, auk profeta Eliseo Israel nugkanum puja nunú ame chichamun antuk ashí ditan ujawai. Nuigtushkam ame amina kanutaigmin pujusa chichaam nunashkam antawai, nunik Israel aents aidau apujin ashí ujawai”, tiuwai. ¹³ Tusa timatai sirianmaya apu chichaak:

“Tuwig Eliseosh pujawa nunú inimsa dekatajum, dutikajum nii pujamu shiig ejeyagmin, aentsun ishitkatjai achikintme”, tiuwai.

Tusa tima iniimas dekawag:

“Eliseok yaakat Dotán pujawai”, tusa ujakajui. ¹⁴ Tusa ujakam suntag caballonum maanin aidaun, carronum yujas maanin aidaun, nuigtu dawenum yujas maanin aidaujai ishitkauwai. Dutikam shimutuk kashi yaakat Dotáŕkan tenteawajui.

¹⁵ Nunik batsatai kashikmas Eliseo inake nantaki agá jiinkama, suntag aidaun caballonum, carronum aatus yaaktan tenteawag batsatun wainak tupikaki waya Eliseon chichajak:

“¿Jintinkagtinuh, yamaish iish wajukattaji?” tau. ¹⁶ Tutai Eliseo niina ayaak:

“¿Ishamkagtukaipa! wagki jutijai batsata nunuwai ditajai batsata nuna nagkaesau aidaun”, tiuwai. ¹⁷ Aatus tusa Eliseo Apajuín segaak:

“¿Tuke Pujuwah, wait aneamam amina senchigmin mina inakeg waintsu nunú yamai iwaintukta!” tiuwai. Tusa taig Tuke Pujuu niina suntaji caballo aidaunum, carro aidaunum jii kegaujai betek nunú mujanum Eliseon tentea ijunun iwaintukui.

¹⁸ Tuja suntag sirianmaya aidauk yaakat Eliseo pujamun jetektatus uminainai Eliseo Tuke Pujuu segaak:

“¿Au aents aina nunú wainmachujai betek emakta!” tiuwai. Tusa tima Tuke Pujuu imatiksag wainmachu emakui. ¹⁹ Dutikantai Eliseo jiintuki ditan chichajak:

“¿Jintak juchauwai, wainka yujagme, tuja atum yaakat egajum dushakam juchauwai. Wi weakui minitajum, atum aents egajum nuwi ejegatjime”, tusa yajuak yaakat Samaria nugkanum ejegauwai.

²⁰ Dutika ejega Apajuín segaak:

“¿Tuke Pujuwah, juju aents aina nunú yamai ataktu wainmitkakta!” tiuwai. Tusa tima Tuke Pujuu wainmitkakui, dutikam niimsatakama Samaria nugkanum batsatbaun wainkajui. ²¹ Tuja Israel aents aidaun apuji nunú aents aidaun wainak, Eliseon iniak:

“¿Apawah, juju aents aidaunash kajegtatjak?” tau. ²² Tutai Eliseo ayaak:

“¿Atsa kajegkaipa! Maaniamunum aents aidaun achija yajuakbaukesh amek mauchume, nuadui duka tutsuk ¡yujumak ayujam dita apuji pujamunum awakjata!” tiuwai.

²³ Tusa timatai jiistan umikag, yujumkan shiig ayujawag, umutnash imatiksag ajamsag nuadui apu ditan kumpama ishiakui. Dutikam dita apujin waketjauwai. Duwi nagkamas Israel aents aidaujaig maaniachaju ainawai.

Samaria nugkanum nujan tepeamu

²⁴ Nunú nagkaemakui ai, Siria nugkan apuji Ben-hadad niina suntaji aidaun ashí ijumag yajuak Samarian jetektatus weuwai. Nunik jegaa yaaktan tenteawajui. ²⁵ Dutikam epemi batsatu asagmatai, nunú tsawantin Samaria nugkanum nujan tepeauwai. Nuadui burro buuke akikeg ochenta plata najanamu aajakui. Untsu pauma iji jimaituk litro tumain yajamun akike cinco plata najanamu aajakui.

²⁶ Tuja makichik tsawantai Israel aents aidaun apuji yaakat peejamunum yakí nunigka wegaun makichik nuwa wainak untsuak:

“¿Apuh, minash yainkata!” tiuwai. ²⁷ Tusa tama nii ayaak:

“¿Tuke Pujukesh yaimpatsu nunash wisha itug yaigtagmeki? ¡Trigo amamainuk minak atsugtawai! ²⁸ ¿Wagka tuu wekaeme?” tau. Tama nii ayaak:

“Juju nuwa chichagtak, amina uchijum yamai yuwami, nunika kashin mina uchig yuwami tujutmae. ²⁹ Tujutmatai mina uchig maa, ukugkuutai aidau chimpijua inagka yuwamji. Tuja yamai aminu yuwami tai, niig uchijinak uuke”, tau.

³⁰ Nuna apu antuk kajeka, niina jáanchjin japiki ichigkui. Dutika yakí yaakat peejamunum wekagu asamtai, aents aidau diikma jáanch pegkegchaun nugkuaju wekagun wainkajui. ³¹ Tuja nuwi wajas apu senchi untsumak:

“¡Yamaikiuch Eliseo Safatan uchijiya nuna buuken tsupigkan maattajai! ¡Untsu dutikachmataig, Apajuí mina suwimkan sujusti!” tiuwai.

³² Tuja Eliseok nii pujamunum Israel aentsu apuji múun aidaujai ijunak pujau. Nuniai apu niina aentsji aidanmayan makichik Eliseon akuptukui. Tujash nunú eke jegatsaig, Eliseo Israel aentsu apuji múun aidan chichajak:

“Au apu magkagtina nunú niina aentsjin mina buukjun tsupigtukti tusa awema nunú atumesh dekaatajum. Tujash antaku atajum. Nunú aents wayau wainkugmek waiti epentajum. Dutikajum nii wajamunmanini shitakjum emetuatajum. ¡Niina apuji ukunum patatkau minisa pampaun antajai!” tau. ³³ Tusa ditajai chichá wajaig, apu akupkamu tauwai. Nuniaig apushkam patatkau taa chichaak:

“¡Ili waituinag nunak Tuke Pujuu aikagbau asamtai, nii yaimpakti tusanuk dakak pujumaitusjai!” tiuwai.

7

¹ Tusa tutai Eliseo niina ayaak:

“Tuke Pujuu chichaak: ‘Kashin yaakat Samarian waitijiya nuwi, yamai etsa eketa juniai, aents aidau makichik kuichik plata najanamuik siete kilo trigon sumagtatui, tuja cebadanashkam makichik kuichik plata najanamuik quince kilo sumagtatui’ tawai”, tiuwai. ² Tusa tutai apu atuwe niina ayaak:

“¡Tuke Pujuu nayaimpin ujaimtaish ame tame duka makichkish nuni-maitsui!” tau. Tutai Eliseo ayaak:

“Nuna imatika sumaidauk ameshkam waintkattame. Tujash amek duka makichkish yuwashatme”, tiuwai.

³ Tusa chichainai cuatro aents jata lepran achiimaku aidau agá yaak-tanum waitainum batsatu dita ditak pempeentunikiag chichainak:

“¿Ilish juwish waji pujugji, nujantai jinaatag tusaika aní batsatag? ⁴ Yaakat wayaish, tuja juwig pekagkuish betek nujantai jinaattaji, wagki juju yaaktanmak yumainuk shiig atsawai. Dekas sirianmaya batsata nuwi shiyakagmi. Nunika dita wait anenjamainakuig, ditajai batsam-sami. Untsu dita wait anenjamainachkug, mantamkush mantamatnume”, tuidau.

⁵ Nuna tusag kintamainak juwakiag sirianmaya aidau aakmag batsat-baunum shiyakajui. Nunikag jegattak wesag diistag tukama makichik aentskesh atsaun wainkajui. ⁶ Sirianmaya aents aidau nuwi batsatu pisajua nunak Tuke Pujuu carro aidanum, caballo aidanum, suntag maaniatatus shimuinamu kedegtuwama imatun antuktinme tibau asag nuna antukag, Israel aents aidan apujimpap hitita aentsu apuji aidan, egiptunmaya aentsu apuji aidaujai jetekmi tusa minitjamainawa tusag,

7 pisagtatus uminas batsatu asag, kashi pisainak dita aakjinak, caballojji aidaunak, burrojji aidaujaj, ashí batsainak, pisajajui.

8 Nunik pisainak ukukbaunum lepran achiimaku jegawag aaknum wayawajui. Nunikag nuwiyán yutain yuwawag, umutnash uwajajui. Nunikag plata aidaun, oro aidaun, jáanch aidaun, aatus yajuakag yaja uukajui. Dutika ukuinak tikich aaknum wayawag nuwiyánashkam dutiksag waji aidaun yajuakag yaja uukajui. 9 Dutikawag ditak pempeen-tunikiag chichainak:

“Íi aikag duka pegkegchau dutikajj. Yamai tsawanta jujuwai pegkeg chicham, sirianmaya pisajaja nunú pachisa tikich Israel aents aina nunú ujamain. Dutikmain aig iik dutikatsj. Tuja kashin jegá etsegjinig ¿wagka wamak etsekgachugme? tusa iina kajegtamak suwimkan amamain ainawai. Nuadui dekas apui wemi, nunika sirianmaya aidauk pisajagmae tusa etsekgami”, tuidau.

10 Aatus tusag waketug jegawag suntag yaakta kuitamin aidaun untuka chichajuinak:

“Sirianmaya aidau batsamtain wemajj, nunika jegá diikma makichkish atsume. Tuja makichik aents chichaukesh antukchamj. Ima caballo aidauk, carro aidaujaj anaam batsamae, tuja aak aakmagbau aidaushkam nunisag batsamae”, tiajuj.

11 Tusa tiagmatai, yaakta waitijin kuitamin aidau, apu pujusa inamtaijin kuitamin aidaun untukajui. 12 Nuna apu dekaa, kiyaju aig nantaki, niina suntajj aidaun chichajak:

“Jasta sirianmaya aidash itugtamkatasag aninawa nuna ujaktajime. Aunak ii nujantaj waituinag nuadui ikam uumja batsatjin nujantaj jinuinak jiinaidau achigmi, dutika dita yaaktajin utsantuami, tusa aninawai”, tau. 13 Tutaj suntajja apujj chichaak:

“Dekas cinco caballo batsata nunú ame cinco aents etegkam susam ishiakta, dutika pujusa diismi wajukawagtig. Tuja dita iwaku waketuinakush, nuniashkush jinuinakush tikich Israel aents aidauti juwi batsatag nuna nagkaesauk achagtatui, tuja nuniachkush nuni wainkauchikesh achagtatui”, tiuwai.

14 Tusa timatai ujumak suntag aidau jimag carron, caballo aidaujaj jukiajuj. Dutikawagmatai sirianmaya aidaun batsamtai diisa ukutajum, wagka ankaje tusa ishiakui. 15 Dutikam shiyakag diikma agkan wajas atatman wainkajui. Dutikawag pataetukag Jordán jegawajui. Tuja jintanmak jáanch aidauk, tikich waji aidaujaj sirianmaya pisainak utsagbauk tepetag weakun wainkajui. Nuna wainkag waketug jegawag, dita wainkamujinak imatiksag Israel aents aidau apujin ujakajui. 16 Dutikawagmatai aents aidau shimutkag waji aidaunak ashí yajuakajui. Tuke Pujuu tibaunak imatiksag, waji sujín aidauk trigonak siete litron makichik kuichkijaj yapajidau, tuja cebadanashkam quince litro sujak nunashkam dutiksag makichik kuichkijaj yapajidau.

17 Imaniagtai apu niina atuwen yaakta waitijin kuitamkati tusa inajui. Tujash nuwiya aents aidau shiig kuashat utsaanaidau asag tepejuk maawajui. Nunak apu, profetajaj chichastatus jegamtai, profeta apun tibaunak imanisag jakauwai.

18 Nuniktinun profeta Eliseo, Israel aents aidau apujin aatus tiuwai: “Yaakat Samaria nugkanun waitainum aents aidau siete litro tumainun harinan makichik kuichki sumagtatui. Tuja cebadanashkam quince litron makichik kuichki sumagtatui”, tiuwai. 19 Tusa Eliseo tutaj, apu awemamu suntajja apujj chichaak: “Tuke Pujuu nayaimpin ujaimtaish,

duka makichkish imanaimatsui”, tutai, Eliseo ayaak: “Wi taja duka wainkattame, tujash amek duka yuwashtatme”, tiuwa duka ²⁰ imanisag uminkauwai. Nuadui niinak Eliseo tiuwa nunak imatiksag yaakta waitijin kuitamak pujaun aents aidau utsaanainak tepegkam jakauwai.

13

Eliseo jakattak pujusa inagnaku chicham etsegkamu

¹⁴ Eliseo shiig senchi jak tepau asamtai, Israel aents aidau apuji Joás niina ijagsatatus wejiuwai. Nunik jegajua pagkuk buutak:

“¡Apawah! ¡Apawah! ¡Amek Israel aents aidau suntag maanin aidau nagkaesau ayume!” tiuwai. ¹⁵ Tutai Eliseo niina chichajak:

“¡Flecha akentai, flechajai jukita!” tau. Tama nuna apu mai jukiuwai. ¹⁶ Dutikantai Eliseo niina chichajak:

“¡Umintsata flecha akenkamnum!” tiuwai. Tusa tima uminai, Eliseo niina uwejen apu uwejen patainiuwai, ¹⁷ dutika chichajak:

“¡Niimtai najanamu etsa minitaiya nuni awa nunú ujaita!” tau. Tima apu ujainiuwai. Dutikantai Eliseo chichajak.

“¡Yamai flecha akenkata!” tau. Tama apu flechan akenkauwai, dutikantai Eliseo senchi untsamak:

“¡Apajuíyai juju flechajai betek ayamkagtin! Nuadui ¡Apajuí yaimpasmatai sirianmaya aents aidau yaakat Afecnum depetkajum ashí ijinattagme!” tiuwai. ¹⁸ Tuja ataktu chichajak:

“¡Ataktushkam flecha jukita!” tiuwai. Tusa tima jukimtai, Eliseo chichajak:

“¡Anú flechayai nugka awatta!” tiuwai. Tama apu nunú flechayai kempatuma imania nugkan awatiuwai. ¹⁹ Dutikantai Apajuí inake Eliseo niina kajejuk chichajak:

“Cincoa imania dutikashkumesh seisa imania awatiuwaitkumek, sirianmaya aidau depetkam ashí amumainaitme. Tujash kempatuma awatiu asam dutiksamek kempatuma imania depetkattame”, tiuwai.

²⁰ Nuna ashí tusa nuadui Eliseo jakauwai, nunikmatai ukusajui. Tuja maki makichik mijantin Moab aents kasa aidau Israel aents aidau nugken utuawag waitkaidau asagmatai, ²¹ makichik sawantai ujumak Israel aents aidau aents jakaun ukustatus nugka tagak batsatu. Nuna tagak batsatu diistakama, kasa aidau minidaun wainkag ishamak pisainak, aents jakau iyashin nagkimawag Eliseo ukusbaunum egkeawag ukukiajui. Dutika ukuinaig nunú aents jakauwa duka Eliseo ukunchin antig aneantui, nunik jiinkiuwai.

Judá wegantu aidau apuji aidau takasagbau, Babilonia nugkanum achijag yajuakajua nujai pachisa augmattsamu

18

(18.1—25.26)

Asirianmaya aidau yaakat Samarian tsaikagbau

(2 Cr. 29.1-2)

⁹ Elá uchiji Oseas Israel aents aidau apuji wajas siete mijan inamak pujai, Ezequíaschakam Judá wegantu aidau apuji wajas, ipak usumat mijan inamak pujau. Nunú tsawantin Asirian apuji Salmanasar niina suntaji aidaujai Samarian tenteawag jetekajui.

¹⁰ Dutika maa maaninakua kampakatum mijana duwi depetuk yaaktan utuawag dita atainiajui. Nunak apu Oseas inabaujin nueve mijan ejeyu ai, tuja apu Ezequíaschakam nii inabaujin seis mijan ejeyu ai, dutikau ainawai. ¹¹ Asiria nugkan apuji niina suntaji aidaujai Israel aents aidanak depetuk achija niina nugken asirianum yajuakui. Dutika Habor nugkanum yaakat Halah batsasui. Untsu tikich aidau Gozán nugkanum namak aajakua nuna yantamen batsasui. Tuja tikich aidanak medo aents aidau yaaktaji aidanum batsasui. ¹² Nunak dutikau ainawai, wagki Tuke Pujuu dita Apajuji yaunchuk ditajai chichaman umikua nuna umitsuk, tuja Tuke Pujun inake Moisés tibaunashkam betek umikhchaju asamtai, dutikau ainawai.

Senaquerib Judá wegantu aidan jetekbau
(2 Cr. 32.1-19; Is. 36.1-22)

¹³ Apu Ezequías catorce mijan inamai Senaquerib Asirian apuji Judá wegantu aidan yaaktaji peejamu aidan jetekag depetuk utsantuawag nii atainiuwai. ¹⁴ Dutikamtai Judá wegantu aidan apuji Ezequías, Asirian apuji Senaquerib yaakat Laquishnum pujaun chichaman akuptak aatus tiuwai: “Wi dewakjai, nuniku asan ame jijnbaunum wajupa akigkati tujutpa nunak imatiksasuk akiktajame. ¡Mina nugkajui pujam duka amina suntajum aidaujai jijnkim wetá!” tiuwai.

Tusa tima Asirian apuji ayu tusa Ezequíasan nueve mil novecientos kilo platan segauwai, dutikak nuigtushkam novecientos noventa kilo oro akigkata, tiuwai. ¹⁵ Tusa timatai Ezequías ayu tusa, jega Apajuí emematku ijuntai jegamkamunum ayaunak, apu pujusa inamtai aidanum waji akik ayaujai nagkamas ashí yajuak susauwai. ¹⁶ Dutikak nunú tsawantinig Ezequías jega Apajuí emematku ijuntai jegamkamunum waitiji aidan, tuja waiti nujamkatini aidaujai nii najanak, oro ukatkamunum aidanashkam ukuinag oron yajuak Asiria nugka apujin Senaqueripan susauwai.

¹⁷ Dutika pujai Asiria nugka apuji yaakat Laquishnum pujus suntaja apujin, tikich niina atuwe kajittsa diitain, tuja tikichin suntaja apujin suntag aidaujai aatus apu Ezequíasan jetektinme tusa Jerusalén ishitkauwai. Dutika ishiakam Jerusalén jegawag, entsa pukuni jinu Guihón tutai saekitin taimua nuna yantamen yumi piyajunum, aents aidau jáanchin dijajag pegkeg emau aina nuwi anutug batsamsajui. ¹⁸ Nuwi batsamsag apu Ezequíasan untukajui jijnkiti tusa. Tujash niig jijnkichui, ayatak niina aentsji aidan kampakatum ishiakui ditajai igkunikti tusa. Nuna daajig juju ainawai:

Eliaquim Hilquíasu uchiji apu pujusa inamtain waji ayaun kuitamin, untsu Sebná, Asaf aajakua nuna uchiji Joahjai papiin agau aajakui.

¹⁹ Dutikam jegawagmatai, asirianmaya suntag apu aidau ditan chichajinak:

“Tina apuji Senaquerib Asirian apujiya nunú Ezequíasan chichama akupta nunú jegajum ujaktajum. Niig juna aatus tawai:

“¿Amesh yayai emesh anenname? ²⁰ ¡Chicham pegkejuch chichamua duka, maanitan yacha senchi shiig maanimaina nujajig betekchauwai! ¿Amesh ya yainkati tusamea wijaish shiwagbaeme? ²¹ Ame anentaimsamek, egiptunmaya aidau yainkagtatui tau diyagme. Nunú takumesh duka wainka titatme, wagki auk egiptunmaya aidauk tagkan chipaju achika shutukmatku besemaina iman ainawai. Iman asag, Egipto apujiya duka niyai kajinas anentaimaidanak senchi waitkawai. ²² Tuja ame chichaakum:

“ ¡Tuke Pujuu Apajuí ii emematin ainag nunú iinak yaimpaktatui! tumainaitme. Nunú tumainaitkumesh ¿wagka tujash Apajuí emematku kuntin maa patasa apetai najankamu aidau tsaika utsagmesh: ¡Ima Jerusalégnumak kaunajum ememattajum! tusamesh timayume? ²³ Nunú tuu anentaimtsuk dekas apu Senaquiribjai chicham umikta. Dutikawamin aents caballonum entsamak maanitan yacha aidau egakaminig, wi dos mil caballon amastajai. ²⁴ Nuna amasmataish, amek asirianmaya suntag aidau kakakchau aina dukesh uwakamek tupikantikmaitsume. Nuninaitkum amek egiptunmaya caballonum maanitan yacha aidau ikamkatag tame. ²⁵ Tuja nuigtush amek Tuke Pujuu jetektajum tichamaitak jetepaktatus kaunacheash tumaitsume. ¡Minak Tuke Pujuu atumin jeteka ijinata, tusa tujutne!” tusajum Ezequías ujaktajum”, tiuwai.

²⁶ Tusa chicham akupkamun antukag Eliaquim, Sebná, Joah aatus nunú suntag asirianmaya chichama itaun chichajuinak:

“ ¡Wait aneasam hebreo chichamaik aujkgatusaipa, yaakat peejamunum yaki waka yuja nunú antuinawai! ¡Dekas arameo chichamai aujkgatusta, wagki iik arameo chichamak antaji!” tiajuu.

²⁷ Tusa tiagtai suntag asirianmaya ditan ayaak:

“Asirianmaya apuk ima atumi apuji Ezequíasnakek, tuja atumnakek chichamnak akuptugmakchame. Ashí aents aidau yaakat peejamunum waka batsata nunú antuktinme timae, wagki dita aidauk atumjai betek yumain, umumain atsujuinam dita ijin yuwinak, shikiin umiagtatui”, tiuwai.

²⁸ Tusa tutai makichik suntaja apuji nuwi wajau senchi untsumak hebreo chichamai chichaak:

“Anú tikich apu aidaun nagkaesau apu asirianmaya chichaman akupka nunú, antugkatajum: ²⁹ ¡Ezequías tsanugma nunú wainka antuju yujaigpa, nigka makichkish mina depetukag ayamjupmait sui!” ³⁰ Tuja Ezequíasak atumin tsanugmainak, Tuke Pujuu yaimpaktatui, tuja Tuke Pujuu asirianmaya aidau juju yaaktan tsaikti tusag idaisashtatui tujamui. ³¹ Tusa tujama duka antugkaigpa. Asiria apuji mina atumi ujakti tusa akaatak:

“ ¡Intimtsuk wijai chicham epegkeajum mina inataig atajum, nunika shiig batsamsajum maki makichkitijum nii ajakmamunmayan uvan, higo aidaun aatus yuwawagtatui, tuja yuminashkam dita taimunmayan uwajagtatui! ³² Duwi pujus tikich nugkanum trigo aidau, uva aidau, pag najana yumain aidau, vino najana umumain, olivo aceiteji aidau, dapa yumiji aidau aatus atumi nugkeen ayá nujai betek ayá nuwi jujamki ejetamawagtatui. Dutijamawagmatai nuwi jinutsuk shiig batsamsatnaitjume. Nuadui Ezequíasak antugkaigpajum, wagki nigka atumi tsanugmak ¡Tuke Pujuu ayamjupak agkanmitkagmattawai!” tujamui. ³³ Nijah, atumesh anentaimsatajum, tikich aents aidaun apajuímtajai aina dusha ¿asirianmaya apun depetkash niina aentsji aidaunash ayamjukukait? ³⁴ ¿Hamatnumia aents aidaun apajuíji, arpadnumia aents aidaun apajuíji, sefarvaimnumia aidaun apajuíji, yaakat Henánmaya aidaun apajuíji, Ivánmaya aidaun apajuíji aatus aajaku aina dusha asirianmaya aidaun depetkash samarianmaya aidaunash ayamjukukait? ³⁵ Tuja wi adaijag nuwiyash tuu nugkanmaya aidaun apajuíjiya asirianmaya aidaun ¿depetkash niina aentsji aidaunash ayamjukuita? Nunú dekau asajum, Jerusalégnumia aidautinak Tuke Pujuu yaimpak uwemtijamjattawai tumait sugme”, tiuwai.

³⁶ Tusa tutai aents aidau yaakat Jerusalén peejamunum yaki waka pekajuk itatug makichkish aimkachajui, wagki apu Ezequías ditan chichajak, makichkish aikaigpajum tibau asa. ³⁷ Nuna antukag Eliaquim, apu pujusa inantaijin waji ayaun kuitamin aajakua nunú, Sebná, Joahjai papiin agajakua nunú aatus kajekag jáanchjin japiki ichigkajui. Nunikag asirianmaya suntajan apuji chichakbaun Ezequíasan ujaktatus shiyakajui.

19

Judá wegantu aidau Senaquerib waitkam batsatun agkanmitkamu
(2 Cr. 32.20-23; Is. 37.1-38)

¹ Nuna apu Ezequías dekaa jáanchjin japiki ichigka, wake besemag dekapeak jáanch pegkegchaun nugkuja, Tuke Pujuujai chichastatus jega Apajuí emematku ijuntainum weuwai. ² Nunik Apajuújai chichasa ukuak, nii pujusa inantaijin kuitamin Eliaquim aajakua nuna, tuja papii agagbau aidau kuitamin Sebná, papiin agajakua nuna, nuigtu sacerdote eme anentsa diitai aidau aatus, jáanch pegkegchau wake besemag pujaku nugkutai aidau anugkug, profeta Isaiás Amosa uchiji aajakua nujai chichastajum tusa ishiakui. ³ Dutika ishimak aatus chichaman akuptukui:

“Nuwa uchigmaktinji jegamaitak kakaumainchau dekapeak uchin uchigmamainchauwa numamtuk, yamai suwimak juki waituinaku kakaja ayamjumamainchau dekapeajin dushiktamainakui, datsaama batsatji.

⁴ Tuja Tuke Pujuun pegkegchaun chichagkati tusa apu asirianmaya niina suntaji aidau apujin akupkamu juwi taa, Apajuí Tuke Pujuuwa nuna pegkegchaun chichaja nuna, itusag Tuke Pujuu amina Apajuújum antujuk suwimkan susa tajai. ¡Nuadui Israel aents aidau ujumak juwag batsata nunú pachisam Apajuí ausata! tujamui apu Ezequías titajum”, tiuwai.

⁵ Tusa akatjam apu Ezequíasan atuwe aidau Isaiásjai chichastatus shiyakajui. ⁶ Nunik jegawag Isaiásan ujakajui. Dutikam Isaiás ditan chichajak:

“Tuke Pujuuk juna aatus tawai: ‘¡Nunú suntaja apuji asirianmaya mina pegkegchaun chichagtuka nunak ishamkainmegka! ⁷ Wi niinak utugchatan antuk, ishamak niina nugken wakitkiti titatjai. Nunikmatai nuwiya aents aidau niinak maawagtatui’, tawai Apajuí timae tusajum apu Ezequías ujaktajum”, tiuwai.

⁸ Tuja nunú asirianmaya suntaja apuji Apajuín pegkegchaun chichagkauwa dushakam apu Senaqueripak niina suntaji aidaujai yaakat Laquishnum batsatu jiiing shiyakaje tabaun antukui. Nunik Jerusalén pujau niishkam weuwai. Nunik wekama apu niina suntaji aidaujai yaakat Libnán jetenamunum jegauwai. ⁹ Nuna jetenak yujasag, apu Tirhaja Etiopianmayaya nunú Judá wegantu aidau atuinak ataktu amejai maaniatatus niina suntaji aidaujai minitjamainawai, tusa tabaun Senaquerib antukui.

Nunik niina suntaji aidau ataktushkam apu Ezequíasan ishitkauwai.

¹⁰ Dutika ishimak aatus akatmamtujui: “Ame chichaakum: ‘Wi Apajuín emematnaitag nunú minak yainkattawai’, tame nunú Jerusalégkan tsaikai tusa dakitau asamtai, Jerusalégkak iinuk achattawai. Tujash aneaku ata nunú Apajuú wainak tsanupajai. ¹¹ Tuja asirianmaya apu aidau, tikich nugka múun aidau tsaikaju aina nunú amek shüig dekame. Nuadui amek makichkish ayamjumakchattame. ¹² Mina muuntug aajaku aina nunú yaakat Gozán, Harán, Résef, Telasar aajaku aina nuna ashí tsaiaku ainawai.

Imatikiagtaish ditá apajuímtai aidaukesh makichkish ayamjukchauwai. ¹³ ¡Tuja yaakat Hamat, Arpad, Sefarvaim, Hená, Ivá aajaku aina nuna apuji aidaunashkam ashí ijinawaju ainawai!” tiuwai.

¹⁴ Tusa, papii agaja akupkamun Ezequías juki ausauwai. Nunik jega Apajuí emematku ijuntainum weuwai. Nuwi waya Tuke Pujuu emtin nunú papii agagbaun aepes, ¹⁵ Tuke Pujuu aujak: “Tuke Pujuu, Israel aents aidau Apajuíjyah, amina pujusa inamtaigmek querubin batsatbaunum awai, ameketme ashí apu nugkaya aina nuna Apujimek. Tuja ametme nugka nayaimpijai najanaumek. ¹⁶ ¡Tuke Pujuuwah, shiig jitusa antukta, nuniakum diyaku ata. Senaquerib mina chichama akuptujak, amina pachipas pegkegchaun chichagtamka nunú shiig antukta! ¹⁷ ¡Tuke Pujuuwah, asirianmaya aidau tikich nugkanmayan tsaiku aina duka dekaske! ¹⁸ Dutikainak nunú aents aidau apajuímtaiji aidaunashkam jinum apejuk utsankau ainawai. Tujash duka dekas Apajuíchu wainka aents dakumka numi, kaya najanamu aajaku ainawai. Nuadui nunak apea ajapau ainawai. ¹⁹ Tujash ametme Tuke Pujuu iina Apajuíjimek, nuadui wait anesam yamai dita iina waitkagmaina nunú ayamkagtukta. ¡Ame ayamkagtukamin, ashí nugkanmaya aidaush dekas Tuke Pujuu ima ameketam nuna ditashkam dekaatnume!” tiuwai apu Ezequías.

²⁰ Duwi pujus profeta Isaiás Ezequíasan chichaman akuptak: “Tuke Pujuu Israel aents aidau Apajuíji chichaak: ‘Ame Asirian apuji Senaquerib pachisam segatmaum nunak antugkajame’ tujamui”, tiuwai.

²¹ Tuja yamai Apajuí Senaqueripan pachis juna aatus tawai:

“Senaqueripah,

Jerusaléggak nuwauchijai betek
amina dakitjamak dushiktamui.

Jerusalégnunia aidauk

ame waketmin dushiktamainak buuken pegainawai.

²² ¿Amesh yanas dushikiakun

pegkegchaun chichagja tame?

¡Amek mina pegkegchau chichagtakum

eme emematjai chichá wekaeme!

¡Amek Israel aents aidau ememattai

Apajuí pegkegma nunú

pegkegchau chichagkaume!

²³ Tuke Pujuu pegkegchau chichagkatnume

tusam amina aentsjum chichama etsejin aidau

akatja ishiakume.

“Tuja ame chichaakum:

‘Mina carrog maanitai aidau

shiig kuashat ayá duwi,

egkemjan muja titiji aidaunum wakajai,

tuja muja Libanonum yakí wakan,

nuwiya setug shiig esajam aidau tsupigjai.

Tuja muja shiig múun aina

nuna ikamji aidau yagkug

ajakbaujai betek aidaunmashkam wakajai tame.

²⁴ Tuja tikichi nugke aidaunmash

yumigmatan tain nuwiyan yumin uwagmajai,

dutikakun egiptunmaya
namaknashkam dajajan ukuyakbaijai', tame.

²⁵ Tujash duka wi nunikti
tibau asamtai, dutikauwaitme.
Nuadui amek dekas Apajuiyap aikawa tumainaitme.
Wi nunak yaunchuk emtikan nuna dutikatjai tusan
anentaimtugbaujun yamai umikjai.
Ame yaakat peejamu aidau tsayam duka
nunú uminkui dutikame.
Dutika tsaikbau asag kaya aidau,
numi aidau tuwasua weakui.

²⁶ Nunú yaakat aidaunum
aents batsamajaku aina duka,
kakaag ayamjumamainchau aajaku ainawai,
sagig, datsan wajasu aidau,
dupa ajanum aiyama numamtin,
tuja chijichig yama tsapaku
samekbauwama numamtin,
tuja chijichig jega tuntupen tsapakun
dase etsa minitaiya nuwiya
dasentak umpuim jinuwama
numamtuk aidau asamtai, duka ijinawaitme.

²⁷ Wika ame tuwi wekaeme nunak shiig wainjame,
ame waji dutikame nunashkam ashí wainjai,
ame mina senchi kajegtukum nunashkam dekajai.

²⁸ Amek kajen wajasu,
emebau wajasuitam nunashkam dekajai,
nuadui makichik tsjam uwegnum patakumtain
amina dujimin tigkaan detuattagme,
tuja nuigtushkam chichakaim tusan
wenimin jigkatuattagme,
dutikan ame itug taamume
duke awagkittagme,
tawai Apajuí Senaqueripan",
tusa Isaías Ezequíasan tiuwai.

²⁹ Tusa ataktushkam Ezequíasan chichajak:
"Juju mijantin tuja tikich mijantinchakam,
trigo aidau ajaachmaitak,
tsapaka nejektata nuna neje yuwattame.
Untsu mijan kempatuma duwi
atum ajakmajum nejekmatai juuttagme,
tuja uva ajakjum nunú nejekmatai yuwattagme.
³⁰ Tuja Judá wegantunmaya jinachu aina duka
waji ajakaitkuish, kagkapenawag nejeawagatui.

³¹ Jerusalégnunia aidauk
nujantaik ashí jinachagtatui,
ujumak aents iwaku batsamtatui.
Tuke Pujuu nunak dutikattawai
wagki nii senchi aneau asa.
Juju ashí betek uminkui dekaattagme,
dekas Tuke Pujuuwap yaimpawa tusajum", tiuwai.

³² Nuigtushkam Isaías Ezequíasan chichajak:

“Asirianmaya apun pachis

Tuke Pujuu juna tawai:

‘Asirianmaya apuk Jerusalégnak utuashtatui.

Tuja makichik flechanakesh aketkashtatui.

Ejamaka maanitai aidaun ejamakash jetekchattawai.

Tuja yaakat peejamua nunak
pinikmatjagkesh utuachagtatui.

³³ Untsu Jerusalégnumash niish

itug taamki nunak nunisag waketjumkittawai.

Juju yaaktanmak makichkish wayashtatui.

Witjai Tuke Pujuuunuk, nunak dekas nuniktinun tajai.

³⁴ Wika wiki anenmamsan,

nuigtush David mina inakeg aajakua nunú

mina chichamjun shiig umigtuku asamtai,

niina aneau asan juju yaaktanak wi kuitamkattajai,

dutikakun ayamjuktatjai’

tusa Apajuí tawai”, tiuwai Isaías.

³⁵ Tuja nunú kashi aajakua duwik, Apajuí ángel tumain nayaimpinmaya

taa ciento ochenta y cinco mil suntag asirianmaya aidaun ijinauwai.

Dutikamu asa kashinia duwi aents jinauk tuwasua weaku aajakui.

³⁶ Dutika ijituam Senaquerib niina nugken wakitki yaakat Nínivenum

pujusui. ³⁷ Nunik pujus makichik tsawantai niina apajuíi Nisroc tutain

ememataku pujai, uchiji aidau Adramelec Sarézerjai jegajuawag apajin

maawajui, dutikawag ukuinak tupikakiag Ararat nugkanum wegajui.

Dutika maawagmatai, niina tikich uchiji Esarhadón aajakua nunú apu

wajasui.

22

Josías Judá wegantu aidaun apuji wajas inamjamu

(2 Cr. 34.1-2)

¹ Josíasak ocho mijan ajamu apu wajasui. Nunik apu wajas

Jerusalégnum pujus treinta mijan ejeyi, nuigtu machik mijan inamjauwai.

Niina dukujig Adeías yaakat Boscatnumia aajakua nuna nawanji Jedidá

aajakui. ² Tuja Josías takatjig Tuke Pujuu diismak shiig pegkeg aajakui.

Niig nii wakegamun takatsuk, niina apachji Davita pujutji pegkeg aajakua

nuna ainjauwai.

Chicham umiktin agagbau aajakua nunú egketu wainkamu

(2 Cr. 34.8-33)

³ Josías apu wajasa dieciocho mijan ejeyi pujus, Asalías aajakua nuna

uchiji Mesulama tijaji Safán papiin agau aajakua nuna, jega Apajuí

ememataku ijuntainum weme sacerdotejai chíchasta tusa awemauwai.

Dutika awemak:

⁴ “Weme sacerdote Hilquías wi taja nunú ujakta: ‘Israel aents aidau

Tuke Pujuu anentag suwinak Apajuí emematku ijuntainum kuichkin

ejegawagmatai, Leví wegantu waitin kuitamin aidau jukiag utsaawajua

nuna yajuak ijumjatnume. ⁵ Dutikawag jega Apajuí emematku ijuntaya

nuna iwajiagtai yujajus diin aidaun susatnume. Dutikawajam nunú

kuichkia duwi nuna iwajuinak takaidaun akiktinme. ⁶ Nunak numi tsupija

jegamtan yacha aidaun, jega shiig jegamnakti tusa chichamjin aidaun, jega

jegamin aidaun aatus akiktinme. Tuja nunú kuichki numi sumankattawai, dutikaku kaya aidaushkam sumankati. ⁷ Nuna kuichkin susajashkam wajak akikmajugme tusagkesh iniaschagtatui, wagki ditak wainkagkesh takachu, shiig anentaimkau ainawai' timae tusam ujakta", tiuwai.

⁸ Tusa ujakam chicham umiktin agagbaun jega Apajuí emematku ijuntai aajakua nuwi aun wainkajai tusa, Hilquías sumo sacerdote aajakua nunú Safánkan ujakui.

Dutika ujaka nuna juki susauwai, dutikam Safán juki ausauwai. ⁹ Dutika aujus nuna pachis apu ujaktatus weuwai. Nunik jegá ujaak:

"Jega Apajuí emematku ijuntainum plata ayaunak amina inakem ukuiyag umikaje. Dutikawag jega takaidaun susagmae", tiuwai.

¹⁰ Tusa nuigtushkam, sacerdote Hilquías chicham umiktin agagbaun sujusmae tusa apu Josíasan ujakui. Dutika niina aujtusui. ¹¹ Nunú aujtusam antuk, wake besemag dekapeak jáanchjin japiki ichigkui. ¹² Nuniamuik wamkes profeta Hilquíasan, Ahicam Safánka uchiji aajakua nuna, Achor Micaíasa uchiji aajakua nuna, Safán apu takamun agajakua nuna, Asaías suntaja apuji apu kuitamajakua nuna aatus inag ishimak: ¹³ "Wetajum nunikjum mina pachittsajum, aents aidau pachisjum, ashí aents Judá wegantu aina nunú pachisjum, tuja chicham agagbau wainnaka nunú pachisjumshakam Tuke Pujuu iniastajum. Iina muunji aajaku aina nunú juju agagbaunum chichá nuna betek umikchaju aina duwis Tuke Pujuu iinak kajegtamkatai", tiuwai.

¹⁴ Tusa tima Hilquías, Ahicam, Achor, Safán, Asaías, aatus Ticván uchiji Harhásan tijaji Salum aajakua nuna nuwe Huldá daagtin profeta aajakua nujai chichastatus shiyakajui. Salumak jega Apajuí emematku ijuntainum jáanch aidaun kuitamajakui. Untsu Huldá pujujakui Jerusalén, tujash yaakta ejapeenig pujujakchawai tikich yantamnum pujujakui. Nuna jegajuawag nijjai chichasajui. ¹⁵ Dutikam nii ayaak: "Tuke Pujuu, Israel aents aidauti Apajuí juna aatus tawai: Mina inintsatnume tusa atumin awetami nunú ujakta: ¹⁶ 'Wi Israel aents aidau Apajuíjin tajai: Chicham uminkatnun Moisés agajua nuwi wajintu chichawa nuna apu Josías antuka dutiksanuk, juju aents Jerusalégnunmia aidaunak suwimkan susattajai. Dutikakun yaaktajinashkam tsaigkattajai. ¹⁷ Wagki dita aidauk mina kajimatjukkiag pegkegchaun takainak, wainka apajuímtai aina nuna emematuinak, kugkuin incienson apenak shiig senchi kajemtiujinawai. Nuadui juju nugkanmaya aina nunak shiig senchi kajekgau asan, aní batsamtinme tusanuk idaisashtatjai. Ditanak tuke suwimkan susagattajai.' ¹⁸ Dutikatin asamtai Judá wegantu aidaun apuji Tuke Pujuu iniasa dekatajum tusa atumin awetamiaja nunú ujaakum: Tuke Pujuu Apajuín Israel aents aidau emematin aina nunú junashkam chichagtamak:

" 'Wi juju yaaktanuk tsaiktattjai, tuja nuwiya aents aidaunashkam pegkegchaunum yumigattajai, tija nunú antukam minai yunumkaume. ¹⁹ Tikich Israel aents aidau pegkegchaun takamsaju asamtai, wake besemag dekapeakum jáanchjum ichigkume. Tuja nunú anentaimsam buutam nunashkam wainjame. ²⁰ Nuadui aminak shiig agkan pegkegnum jakati, nunik niina muunji aajaku aidaujai ijunjati tusan titattjame. Tuja amek wi nunú aents aidau suwimka suwakan itugkattaja duka makichkish wainkashtatme', tujamui Tuke Pujuu tita", tiuwai.

Tusa tima nunú aents aidauk nuna pachis apu Josíasan ujaktatus waketjauwai.

23

¹ Nunik jegawag apu Josíasan ujakajui. Tusa ujakam Judá wegantu apuji múun aidaun niijai Jerusalégnum ijunjatnume tusa untsukui. ² Dutika untsuka, ashí Judá wegantu aidaun, Jerusalégnumia aidaun, sacerdote aidaun, profeta aidaun, ashí aents aidaun, ujunauchinum nagkamas aents eme anentsa diitai aidaun aatus jega Apajui emematku ijuntainum shiyakag ijunjajui. Nunikagmatai, chicham umiktinun Apajui Israel aents aidaun susauwa nuna jega Apajui emematku ijuntainum aun Hilquías jukiwa dusha wajintuk agagbau ayi nuna imatiksag ashí ausauwai. ³ Nuna ashí aujus, apu Josías jega jegamku ajiamunum ayaumas wajasui. Nunik wajas, dekas Tuke Pujuu daajin juju chicham umiktinun Moisés agajua duka ashí imatiksaik umikagmi tusa tiuwai. Tusa tutai ashí aents aidaun, ayu duke ati tiajui.

*Apajui umigkatnun pachis apu Josías ataktu chichaman umikbau
(2 Cr. 34.3-7)*

⁴ Apu Josías sumo sacerdote Hilquíasan tikich sacerdote aidaun, nuigtu waiti kuitamin aidaun, aatus jega Apajui emematku ijuntainum wainka apajuímtai aidaun, Baal, Asherá, nuigtu yaya aidaun aatus dakumja najanam ayá nunú emematku takatai aidaun ashí jiigtajum tiuwai. Tusa tiajam shiyakag ashí jiijajui. Dutikawagmatai apu Josías apeatajum tusa tima Jerusalégka ukukiag entsa Cedrón tutaya nuna yantamen apeawajui. Dutikawag yuku wajasmatai nuna jukiag yaakat Betelnum ejegawajui.

⁵ Tuja wainka apajuímtai Baal, etsa, nantu, yaya aidaun nayaimpinum ayá nunú dakumkamu aidaun, nainnum jega jegamjag Apajui emematji tusag kugkuin incienson apeatin aidaun yaunchuk Judá apuji aajakua aidaun sacerdote aidaun adaijau aina nuna Josías ashí ijumag chichajak:

“Atumek yamaik sacerdotek achattajume, tuja nuigtush inciensonk apeshtatjume”, tiuwai.

⁶ Nuna tusa nuigtushkam, wainka apajuímtai Asherá dakumka najanam jega Apajui emematku ijuntainum aun juki Jerusalégkan ukumtiki entsa Cedrón tutai yantamen ejegawag apeawajui. Dutikawag yuku wajasun jukiag dita ukumataijin egkeawag ukukijajui. ⁷ Tuja jega Apajui emematku ijuntai aajakua nuwi batsamas, nuwa aidaun dita apajuímtaiji Asherá dakumka najanam anugjatnun jáanchin apajaku aina nuwi mai aishmagkuk pegkegchaun takanijaku aina nunashkam tsaijuk ut-sankauwai.

⁸ Nuna dutika Judá wegantu aidaun yaaktajin sacerdote batsata nunú ashí kaunati tiuwai. Tusa tima kaunamta, dita yaunchuk nain aidaunum kugkuin incienson apajaku aina nunak Guebanum nagkamas yaakat Bershebaya aatus ashí utsagkui. Tuja wakan pegkegchau aidaun emematku kuntin maa patasa apetai Josué yaakta apuji aajakua nuna waitiji yaakat wayamunum mena nuni aajakua aina nunashkam ashí tsaigkauwai.

⁹ Tujash nunú sacerdote waika apajuímtai aidaun mujanum emematjaku aina duka, Apajui jee jegamkamu Jerusalén aajakua nuwig wetsuk batsamas, dita kumpaji tikich sacerdote aidaun pag lewadurajai pachimtsuk inajuanun yujaku ainawai.

¹⁰ Tuja nuigtushkam muja najatamu wake Ben-hinom tutainum wainka apajuímtai Moloc dakumkamu nunú tsaika ukuutajum, nuna emematuinak dita uchiji aishmagkun, dutikachkush nawanjinakesh maa apeawainum tusa aentsun ishiakui.

11 Tuja yaunchuk eke Josías apu weatsaig, Judá apuji aajakajua nunú, etsan emematuinak caballon najatuamu jega Apajuí emematku ijuntainum nuna waitaijin ijus, suntaja apuji Natán-melekan kanutaiji aajakua nuna yantamen atatman nunashkam tsaigkauwai. Dutikak dita apajuímtaiji etsa aajakua nuna carroji tusa najankamu aidaunashkam apea utsankauwai.

12 Tuja apu Ahaz inamtai jegamkamunum niina kanutaijin tikich tesaamu ijuntai aajakua nuna tuntupen Judá wegantu aidaun apuji aidau kuntin maa patasa apeatnun altaran najanawajua nunashkam tsaigkauwai. Dutikak nuigtushkam Apajuí emematku ijuntainum nuna agájin kuntin maa patasa apeatnun altaran apu Manasés najanauwa nunashkam tsaijuk yukuu wajasmatai, jukiag entsa Cedrógnun ukaja ajapawajui.

13 Tuja Olivo nain tutai Jerusaléggjai niniaku awa nuwi tsumujinini yaakat Sidógnunmia aents aidaun apajuímtai Astarté aajakua nuna, Moab aents aidaun apajuímtai Quemós aajakua nuna, nuigtu amonita aents aidaun apajuímtai Milcom aajakua nuna aatus Salomón Israel aents aidaun apuji najanak umikua nunashkam apu Josías tsaika utsagkui.

14 Tuja kaya aidau, numi aidau aatus dita apajuímtaiji dakumka najanamu aajaku aina nunashkam ashí tsaigkauwai. Dutika atak waketjukiag tikich wainka apajuímtai aidaun nuwi najanawainum tusa nunú tsaikbau aidaunum aentsu ukunchi aidaun ijumag ukukiajui.

15 Nuna dutika ukuak, yaunchuk Nabatan uchiji Jeroboam, Betelnum wainka apajuímtai ememattinun umikmatai, nuna Israel aents aidaun emematmikak tunamitkajua nunashkam tsaika yuku awajus jinum apeauwai. Tuja tikich wainka apajuímtai Asherá dakumka najanamu aajakua nunashkam apu Josías apeauwai.

16 Nuna dutika ayampas ashí niimkama, nuna mujajin ukumasbau ayaun wainak, niijai yujaun chichajak: “Au ukumasbau aina nuwiya ukunch jiija yajuakjum utitajum” tusa ishiakui. Tusa tima ukunchin yajuak ikaunmawagmatai, kuntin patasa apetai najanamu Betelnum aunum nuwi patai Josías apeauwai. Duka Apajuí chichamen etsejin profeta nuna pachis etsegkauwa imanisag uminkauwai. 17 Nuna dutika chichaak:

“¿Aush waji dakumka najanamuita?” tau. Tutai, betelnumia aents aidau ainak: “Ame yamai betelnumia aents aidau dita apajuímtaiji aidaun emematuinak, kuntinun pataidiag apen aina nunú tsaigkaum dutikatnun, chichama etsegkatatus Judánmaya tauwa nunú jakamtai ukusbauwai”, tiajui.

18 Tusa tiagmatai Josías chichaak:

“¡Auk aantsag asati! ¡Ukunchig achikaigpajum!” tiuwai. Tusa timatai profeta chichama etsejin Judánmaya aajakua nuna ukunchinak samarianmaya profeta chichama etsejin aajakun ukunchijai mai dutiksag idaisajui.

19 Tuja Israel aents aidau apuji aajakajua nunú wainka apajuímtai aidaun Samaria nugkanum jegamjajagmatai, Apajuí senchi kajegkauwa nunashkam, Betelnum tsaiku aina dutiksag Josíaschakam niina aentsji aidaujai ashí tsaigkajui. 20 Nuna dutika pujus sacerdote wainka apa-juímtain emematin aidau nuwi batsatunak altarnum patai kajegkui.

Dutika aentsu ukunchi aidaun yajuakag nunú altarnum sacerdote kajegbau aidaujai ashí patag apeauwai. Dutika ukuak apu Josías Jerusalén wakitkiuwai.

Josías Paskuan jiistamamu

(2 Cr. 35.1-19)

²¹ Makichik tsawantai Apu Josías ashí aents aidaun chichajak: “¡Yaunchuk Apajuí chichame agagbaunum Tuke Pujuu, atumi Apajuíjum emematkujum Pascua jiistamatajum tibauwa nunú umiakjum jiistamatajum!” tiuwai. ²² Tusa tiajam yaunchuk Israel aentsu apuji chichama epegkin aidau* batsamajaku aina duikish imatikchatain, tuja Israel aents aidau apuji, Judá weantu aidau apuji† aatus aajaku aina duikish imatika jiistamajakchamun, nunú tsawantin shiig jiistamawaju ainawai. ²³ Nunak Josías apu ekemi dieciocho mijan takai, Jerusalégnum Tuke Pujun emematuinak Pascuan jiistamawajui.

Josías Apajuíyai kajinas anentaibau

²⁴ Josíasak tunchi aidaun, anentaimas dekamin aidaujai ashí ijinauwai. Dutikak dita jeen apajuímtai dakumka najanamu ayaunash, tuja tikich wainka apajuímtai aidau, ashí waji pegkegchau aidaujai Judá wegantu aidaunum ayaunak Jerusalégnum ayaujai nagkamas ashí tsaika utsagkui. Nuna dutikauwa nunak jega Apajuí emematku ijuntainum Moisés chicham umiktinun agajua nunú atatman, sacerdote Hilquías wainkauwa nuna umiak dutikauwai. ²⁵ Tuja Josías niina anentajai, wakanijai, senchijijai Tuke Pujun umijukua, imanuk yaunchuk apu aajaku aina nuwiyag makichkish atsujakui.

²⁶ Tujash Tuke Pujuk Judá wegantu aidaunak Manasés wegantu aidau pegkegchaujin kajegkamutak pujau. ²⁷ Nuadui Tuke Pujuu chichaak: “Judá wegantu aidaunak Israel aents aidaun ijinauwaitag dutiksanuk ijinattajai. ¡Tuja Jerusalén wi etegkamua nunak jega wi pujustin jegamkamua nujai tsaiktatjai!” tiuwai.

Josías jakamu

(2 Cr. 35.20-27)

²⁸ Josías nuigtush kuashat takasua duka, tikich Judá wegantu aidaun apuji takasu aina nunú agatkamu papii Crónica tutaya nuwi agagbau ayawai. ²⁹ Makichik tsawantai Egipto nugkan apuji Neco aajakua nunú asirianmaya apun maaniamunum atuktatus namak eufratesnum weuwai. Nunitai apu Josías jiintukiuwai nijai maaniatatus, nunik wetatman faraón Neco niyá wainak Meguido nugkanum niina mauwai. ³⁰ Dutika maamtai, suntaja apuji aidau carronum egkeawag jukiag Jerusalén ejegawag, nii ukumastin umikbaunum ukusajui. Nuna dutika ukuinak, Josiasa uchiji Joacazan aceiteyai nijakag Judá apuji adaikajui.

24

Apu Joaquégnan suntaja apuji aidaujai achikag Babilonia nugkanum yajuakbau

* **23:22** “Israel aents aidaun apuji chichama epegkin aidau” tawa nunak, Israel aents aidaun yaigkagtinun Apajuí adaijamu “Jueces” tutai aajaku aina nuna taku tawai. † **23:22** “Israel aents aidaun apuji aidau, tuja Judá weantun apuji aidau”, tawa nunak, “Rey” aajaku aina nuna taku tawai.

⁸ Joaquéngkak dieciocho mijanji ajamu Judá wegantu aidaun apuji wajasui. Tuja Jerusaléngnumak ayatak kampakatum nantu inamjauwai. Niina dukujig Elnatán Jerusaléngnumia aajakua nuna nawanji Nehustá aajakui. ⁹ Tuja Joaquéngkak niina apajijai betek Tuke Pujun intimjuki pegkegchaun takajakui.

¹⁰ Tuja nunú tsawantin Babilonia nugkan apuji Nabucodonosor aajakua nuna suntaji aidaun Jerusaléngkan jetekagtatus shimutkajui. Nunik jegawag tentea apakajui. ¹¹ Dutika tenteawag jetenai Nabucodonosorchakam jegauwai.

¹² Nunik jegamtai Joaquín Judá wegantu aidaun apuji mantuawainum tusa ishamak, niina dukuji, tuja suntaja apuji aidaun, niina atuwe aidaun aatus Babilonia apujin sujumankauwai. Nunikagmatai achija yajuakajui. Nunú utugchat asauwa duka Nabucodonosor apu wajas ocho mijan inamai nunikui.

¹³ Nuna achija yajuak jega Apajuí emematku ijuntainum waji pegkeg akik aidaun ayaunak, tuja apu pujusa inamtainia aidaunashkam Nabucodonosor ashí yajuakui. Dutikak nuwi takastin waji aidaun apu Salomón oron najanak umikua nunashkam ashí tsaikui. ¹⁴ Dutika ukuak aents Jerusaléngnumia aidaunak ashí yajuakui. Suntaja apuji aidaun, suntag maanitan yacha aidaun, dakumak najantan yacha aidaun, hierrojai takata yacha aidaun aatus ashí achija yajuakui. Ashí ijumjamak diez mil aentsun yajuakui. Dutikam Judá nugkanmak ayatak ujudauch aidaun juwakajui.

¹⁵ Tuja nuigtushkam apu Joaquéngkan, niina dukujin, niina nuwe aidaun, suntaja apuji aidaun, aents eme anentsa diitai aidaun aatus achija Babilonia nugkanum yajuakajui. ¹⁶ Tuja aents eme anentsa diitai aidaunak siete mil achija yajuakui, dutikak untsu dakumak nananin aidaun, hierrojai najanin aidaujai mil achija yajuakui. Dutikak nuigtushkam aents senchi maanitan yacha aidaujai ashí achija yajuakui.

¹⁷ Dutika yajuak pujus apu Nabucodonosor Joaquéngka apaji yachin Mataníasan Judá wegantu aidaun apuji adaikauwai. Dutika niina daajin yapagtua Sedequías adaikauwai.

Sedequías Judá wegantu aidaun apuji

(2 Cr. 36.11-16; Jer. 52.1-3)

¹⁸ Sedequíasak apu wajasa inamtanak nagkamauwai veintiún mijan ajamu. Nunik apu wajas Jerusaléngnum inamjauwai once mijan. Niina dukujig Hamutal yaakat Libnánmaya Jeremiasa nawanji aajakui. ¹⁹ Tujash Sedequíasak Joaquinjai betek Tuke Pujun umigtsuk pegkegchaun takajakui. ²⁰ Nuaduí Jerusaléngnumia aidaun, Judá wegantu aidaujai Tuke Pujuu shiig senchi kajejuk yaitsuk idaisauwai.

Dutikam pujus apu Sedequías, Babilonian apujijai shiwagmagauwai.

25

Jerusalén tsaikbau *(Jer. 39.1-7; 52.3-11)*

¹ Sedequías apu wajasa diez mijanan ejeyi, nuigtu nueve nantu inamak pujai, Babilonia nugkan apuji niina suntaji aidaujai shimutkajui Jerusaléngkan jetekagtatus. Nunik jegawag, yaaktan tenteawajui, dutikawag nuwi ijus kumpinan najankajui, nuwi wakag ima shiig jetekagtatus. ² Dutika tenteawag nuwi batsataig, Sedequías tsawan nii inabaujin once mijanan ejeyuwai. ³ Dutika tenteam batsamas nunú mijantin nantu

Julio tsawan veinticuatrotrin yujumak yumain abuekamtai nujantai senchi waituidau. ⁴ Tuja nunú tsawantai babilonianmaya suntag aidau Jerusalén peejamun iju chigkawajui. Dutikawagmatai Israel aents aidauk senchi ishamaidau. Nuninak Sedequías Israel aents aidaujai Jerusalén waitainum jimag apatka peejamunum niina pujusa inamtaiji agájin yagkug ajakbau aajakua nuni kashi jiinkiang jinta namak Jordán wetainum paka aajakua nunú pisajajui.

⁵ Nunik shimittaman babilonianmaya suntag aidau apu Sedequíasan pataetukag Jericó pakajin amainagkawajui. Dutikiagtai niina suntaji aidauk pisajag shimuinak ima niinak ukukiajui. ⁶ Dutikam nigki juwakmatai, apu Sedequíasnak niina uchiji aishmag aidaujai, achikag jukiag Babilonia nugkan apuji yaakat Riblá, Hamat aajakua nuna nugken pujau asamtai nuwi ejegawajui.

Dutikawagmatai apu Nabucodonosor Sedequías maatajum tusa in-amjauwai. ⁷ Tusa inamjamtai Sedequíasa uchiji aidaunak nii wainai suwenum tsupik maawajui, untsu Sedequíasnak jiin mai ukuitkawajui, dutikawag cadenayai jigkajag Babilonia nugkanum jukiajui.

Babilonianmaya suntag aidau jega Apajuí emematu ijuntai Jerusalégnum jegamkamu aajakua nuna tsaikagbau
(2 Cr. 36.17-21; Jer. 39.8-10; 52.12-30)

⁸ Tuja Nabucodonosor Babilonia nugkan apuji wajas tsawan siete, nantu Julio, mijan diecinueve ejeyi pujus, niina kuifamin suntag aidau apuji Nebuzaradán aajakua nuna Jerusalén awemauwai. ⁹ Dutikam jegaa, Apajuí ememaku ijuntai jega jegamkamu aajakua nuna, apu pujusa inamtaijin nuigtu nunú yaaktanum tikich jega aidaun, tuja aents eme anentsa diitai aidau jenashkam ashí apeauwai. ¹⁰ Tuja nuigtushkam suntaja apujin uyunainak yujaidau Jerusalén peeja tentea apakbau aajakua nunak ashí tsaikajui.

¹¹ Dutikawagmatai, Israel aents aidau Nebuzaradán mantamawai tusag ishainainak yunumjau aidaun, nuigtu dakumak waji aidaun najantan yacha aidaun, aatus achija niina nugken Babilonia yajuakui. ¹² Dutika yajumak shiig ujudauch aidaunak, uva ajakbau dupajin, tuja tikich ajak jakbau aina nuna dupajijai takagsatnume tusa batsakiuwai.

¹³ Nuna dutikawag jega Apajuí emematu ijuntainum takastin waji bronceyai najankamu aidaunak ashí tsaikajui. Tuja jega bakui aidaun, jega jegamku aepkamu aidaun, nuigtu yumi aintai múun najanamu aidaun ashí tsaikajui. Dutikawag nuwi bronce ayaunak ashí Babilonia nugkanum yajuakajui. ¹⁴ Nuigtushkam yuku shikika jutai aidaun, palana aidaun, cuchara aidaun, tijig aidaun, nuigtu Apajuí emematu takatai bronceyai najankamu aidaun ashí yajuakajui. ¹⁵ Tuja jii kaiji chimpitai oro najanamu aidaun, nuigtu tsapa plata najanamu aidaun aatus ashí Nabuzaradán yajuakui.

¹⁶ Tuja jega Apajuí emematu ijuntain Salomón jegamak jimag shugkun ajigkua duka, tuja yumi aintai múun, nuigtu jiju taubau shugku ajigtin aepkamu aatus aajakajua nuna kijinjig makichkish dekapamainchau aajakui. ¹⁷ Tuja jimag shugku aajakua nuna esantig maki makichik ocho dekapamun nagkaesau ajujakui. Untsu nuwi ekeni jiju bronceyai jega emetuatin najanamu aajakua nuna esantig jimag dekapamun nagkaesau ajujakui. Nuwi manzanaya numamtin dakumka bronce najanamu aidau detugbau aajakui. Tuja nunú shugkuk mai betek aajakui.

Judá wegantu aidau achija Babilonia yajuakbau

¹⁸ Tuja nuigtushkam sumo sacerdote Seraías, sacerdote Sofonías, nuigtu jega Apajuí emematku ijuntai jegamkamun kuitamin kauptum aajakua nunashkam achija yajuakui. ¹⁹ Dutikak sacerdotechunashkam suntaja apuji aidau, cinco aents apu chichajin aidau, nuigtu suntaja apuji aidau daajin agatuk kuitamnun, tuja sesenta aents eme anentsa diitai aidau aatus achikajui. ²⁰ Dutikawag nuna Nabuzaradán ashí yajuak Babilonia apujishkam yaakat Riblá pujai ejegauwai. ²¹ Dutika Hamata nugken ejegawagmatai, Babilonia nugkan apuji kajegtajum tusa inamjauwai.

Aatus Judá wegantu aidau achijag, dita nugken ukumtikiag tikich nugkanum yajuakajui.

*Israel aents aidau
ujumak iwaku juwaju aidau
Egipto nugkanum pisajagbau*

²² Tuja Judá nugkanum ujumak iwaku juwakajua nuna apuji ati tusa apu Nabucodonosor makichik Israel aentsun etegkauwai. Nuna daajig Guedalías, Ahicaman uchiji, Safánka tijaji aajakui. Niig yaakat Mispá pujajakui.

²³ Nuna suntaja apuji Judá wegantu achikchamu aidau batsatu dekawag, Guedalíasjai chichasagtatus yaakat Mispá shiyakajui. Nunú apu aidauk: Netaníasan uchiji Ismael, Caréah uchiji Johanán, tuja Tanhúmetan uchiji Seraías yaakat Netofánmaya aajakui, untsu Jaazánias aajakui yaakat Maacánmaya. ²⁴ Nunik jegawagmatai, Guedalías ditan chichajak:

“Apajuí Tuke Pujuu tutaya nuna daajin tajime: Juwi batsamsaja apu Nabucodonosor umigjinig, babilonianmaya aidauk shiig awagtamkagtatui. ¡Nuadui babilonianmaya suntag aidau apuji aina duka ishamkaigpajum!” tiuwai.

²⁵ Tusa idayas siete nantu pujai, Judá wegantu aidau apuji aajaku aina nunú wegantu, Netaníasa uchiji Elisamán tijaji Ismael, diez aents aidau yajuak Guedalíasan jegajua mauwai. Dutikak judío aidauashkam, babilonianmaya suntag aidaujai batsatunak ashí kajekui. ²⁶ Nuna dutikawagmatai, ashí aents aidauk babilonianmaya aidau ishamainak, datsauch aidauum nagkamas múuntuch aidaujai, tuja suntaja apuji aidaujai pisajag Egipto nugkanum shiyakajui.

**Apu Joaquín achikam Babilonia nugkanum pujau
agkanmitkamu**

(25.27-30)

*Apu Joaquín aents achika egketainum achikam egketu jiiikbau
(Jer. 52.31-34)*

²⁷ Tuja Judá apuji Joaquín aajakua nunak achikag Babilonia nugkanum jukiajui. Dutikam pujus treinta y siete mijan ejeyi, nantu doceya nunú takau ai, tsawan veintisietetin makichik aents babilonianmaya Evilmerodac apu wajasui. Nunik Joaquínkan wait anentug aents achika chimpitainum achikam egketun jiiikiuwai. ²⁸ Dutika, tikich apu aidau achikam chimpijaidau nagkaesau shiig ausauwai. ²⁹ Nuadui Joaquín aents achika chimpitainum pujusa nugkujakbaujinak awimak ukuak tikich jáanch pegkejan nugkujui. Nunik pujus yujumkanak tuké apujai

jimajuk yuujakui. ³⁰ Tuja nuigtushkam apu Evil-merodac kashi kashinig
nii atsumamu sumaktinjin tuké kuichkin sujakui.

Esdras

Achija yajuakbau aidau waketjag jega Apajuí emematku ijuntain jeganakamu

(1—6)

Apu Ciro papii umikbau
(2 Cr. 36.22-23)

¹ Apu Ciro, Persia nugkan apuji wajasa makichik mijan takai, yaunchuk profeta Jeremías Tuke Pujuu tibaun etsegkauwa nunú uminkatin tsawan jegaú asamtai, apu Ciro papiin umika ashí nugkanum nii inama nuwi ishiakti tusa Tuke Pujuu niina anentain antinkauwai. ² Nuadui apu Ciro juna aatus papiin agajui:

“Tuke Pujuu Apajuí nayaimpinum pujuuwa nunú ashí aents nugkan-maya aidaunak mina idaitugsae. Nuadui Judá wegantu aidau nugken Jerusalégnum Apajuí emematku ijuntain jega pegkegman jeganakati tusa inatjæ. ³ Nuadui atum Apajuí aentsji aidautijum juwi batsatutigmek Jerusalén Judá nugken shiyaktajum. ¡Nunikjum Tuke Pujuu Apajuí Israel aents aidau emematin aina nunú nuwi puja nu emematku ijuntai, jega jeganakatajum! Apajuí nuwi puja nunú atumnak yaimpaktinme. ⁴ Tuja ashí aents jinaachu aidau Apajuí emematku ijuntain jeganakatus shimuidaunak tikich aents ditajai batsamin aidau: kuichkin, oron, tikich waji aidaun, baka aidaun aatus susagtai. Dutikainak nuigtushkam jega Apajuí emematku ijuntainum takastin waji aidaun anentag susagtai”, tiuwai.

Israel aents aidau Jerusalén waketjamu

⁵ Tusa timatai Judá wegantun apuji aidau, Benjamín wegantun apuji aidau, sacerdote aidau, Leví wegantu aidaushkam ashí Apajuí wakemitkakkbau aidauk Jerusalén shiyakag Apajuí emematku ijuntain jeganakagatus umintsajui. ⁶ Nunik uminiagtai aents ditajai ijunag batsamin aidau: oron, platan, waji pegkeg najanamu akik aidaun, baka aidaun, aatus susajui. Dutikainak nuigtushkam tikich waji aidaun kuashat anentag susajui. ⁷ Tuja Apajuí emematku ijuntai jeganakamu Jerusalén aajakua nuwi waji ayaun Nabucodonosor yajuak niina apajuíntai jeganakbaunum awaya ukukbaunashkam apu Ciro ashí yajuak susauwai. ⁸ Tujash tikima nii jukig susachui, kuichki kuitamin Mitridates aajakua nuna ame susata tíma, nii juki ashí dekaapa Judá wegantu aidaunum gobernador Sesbasar aajakua nuna susauwai. ⁹ Nunú waji aidauk juju aajaku ainawai:

Treinta pinig oro najanamu aidau,
mil pinig plata najanamu aidau,
veinti nueve kuchii,

¹⁰ treinta taza oro najanamu,
cuatrocientos diez taza
plata najanamu aidaun
aatus susauwai.

Tuja nuigtushkam mil
tikich waji aidaun susauwai.

¹¹ Tuja waji orojai najanamu aidauk, platayai waji najanamu aidaujai ashí ijumjamak cinco mil cuatrocientos aajakui. Nunú waji aidaunak Sesbasar tikich judío aidau achija yajuakbau Babilonia nugkanum batsatujai Jerusalén waketuinak ashí yajuakajui.

3

Altar ataktu najanamu

¹ Israel aents aidauk waketug ditá nugken jegawag maki makichik ditá yaaktajin batsamsau ainawai. Nunik batsamas nantu sieteya nu takau ai, ashí aents aidau Jerusalén ijunjajui. ² Nunikagmatai Josué Josadakan uchiji niina kumpaji sacerdote aidaujai, tuja Zorobabel Salatielan uchiji, niina patayi aidaujai aatus ijunag Moisés jintiauwa nunak imatiksag Apajuí emematku kuntin maa patasa ashí apeatnun altaran najanawag-tatus nagkamawajui. ³ Dutikawag nunú nugkanmaya aents aidau ishainayatak, yaunchuk altar najanamu tsaikbau aajakua nuwi ekeniag najanawajui. Dutikawag kashikmas, aagkú aatus tuké kuntinu maa nuna nejen ashí apeenak Apajuín emematuidau. ⁴ Nuigtushkam numi kanawe tsupija aakmaja batsamsamu aajakua nunú tsawantin jiistamatajum tusa chicham umikbaunak imatiksag jiistamawajui. Nuninak maki makichik tsawantin Apajuí emematkuik imania kuntin maa, nuna neje ashí apeami tibaunak dutiksag apedau. ⁵ Dutikaidau asag maki makichik tsawantai apetainak dutiksag apedau. Tuja nantu yama takamunum apetaishkam dutiksag apedau, wagki Tuke Pujuu nunú tsawantin emematjitajum tusa tibaun imatiksag umidau asag. Tuja nuigtushkam aents aidau Tuke Pujuu anentag waji aidau suwidau. ⁶ Apajuí emematku ijuntai jegamtanak eke nagkamtsuk nantu siete Etanim* tutai taka makichik tsawan tsawaju ai nagkamas, Apajuí tudaun tsagkugtamjati tusa kuntinun maawag nuna nejen ashí apenak Tuke Pujuu emematuidau. ⁷ Nuna dutikawag jega jegamin aidau, numi dakag takatan yacha aidaujai, kuichkin susajui. Untsu aents tironmaya, sidógnunia aidaujai, setug tsupigbau aidau Líbano nugkanmayan yajuakag apu Ciro tibaunak imatiksag Joep nugkanum ikaunmawagtin aidau yutain kuashat, umutai aidau, nuigtu aceite aidau kuashat susajui.

Apajuí emematku ijuntai jegamkatasa nagkamamu

⁸ Tuja Salatielan uchiji Zorobabel, Josadakan uchiji Josué, dita kumpaji sacerdote aidau, nuigtu Leví wegantu aidau aatus ijunjajui. Nuigtushkam ashí aents achija yajuakbau aidau, Jerusalén wakitki kaunawaju aidaujai ijunjag nunú jega pegkegman jegamkagtatus nagkamawajui. Nunak Jerusalén kauna batsamas jimag mijana nuna achikag, nuigtu jimag nantu takau ai, nagkamawajui. Dutikainak sacerdote aidau, Leví wegantu aidaujai veinte mijan ajamun nagkaesau aidau etegkeg atum jega jegabau diistajum tusa tiajui. ⁹ Tuja Josuéshkam niina uchiji aidau, niina yachi aidau aatus ijunjauwai. Tuja Cadmielchakam niina uchiji Judá wegantu aajaku aina nujai ijunjauwai. Nunikagmatai ditajai atunikag tikich aents Henadad wegantu aidau, Leví wegantu aajaku aina nujai ijunjag aents aidau nunú jegan jegamiagtai, shiig uminkati tusag diinak yujaidau.

* **3:6** “Etanim” tawa duka nantu setiembre ejapean nantu octubren achik jimaituk ejegak makichik nantu wega nuna daajin taku tawai.

¹⁰ Tuja jegá jegamin aidau Apajuí emematku ijuntai jegamkatatus shugkun ajigkag umikagmatai, David dutikatajum tibaun uminak sacerdoté aidau dita nugkutaijin nugkukag iwagmamkag uwiji kachujin yajuakag jegantajui. Tuja Leví wegantu Asaf aajakua nuna uchiji wegantu aidau shkam platillo aidau yajuakag jegantajui, nuna awatuinak Tuke Pujuun emematiagtatus. ¹¹ Nunik ijunag kantamainai, tikich aidauk: “Tuke Pujuuk dekas pegkejai, nuadui see titajum, niig Israel aents aidau nak tuke aneetnai”, wajaidau. Ashí aents aidauk shiig aneas Tuke Pujuun emematuinak pampaidau, wagki Apajuí emematku ijuntai ataktu jegandau asamtai. ¹² Nuna jegamainak nagkamiagtai sacerdoté aidau, Leví wegantu aidau, nuigtu maki makichik wegantu aidau apuji múun aidau, yaunchuk yama nagkamchaku jegamkamun wainajaku asag ataktu nagkamawag jegamiagtai, shiig aneanak senchi jiika buutuidau. Nuninai tikich aidau shkam shiig aneanak unsumaidau. ¹³ Imatuidau asamtai shiig aneakuash imatuina, atsa wake besemag dekapenakuash imatuina duka shiig dekamainchau aajakui. Nunú imati pampainamuk shiig atushat antugajakui.

6

¹ Tuja chicham uminkatin agagbau aidau ijuntai Babilonia nugkanum awa nunú egaktajum tusa apu Darío inamjauwai. ² Tusa tiajam egá yujakma Media nugkanum yaakat Ecbataná aajakua nuwi apu pujasa inamtain makichik papii dupajam patatun wainkajui. Nunú papiinum aatus agagbau aajakui:

³ “Ciro apu adaikam makichik mijan takak pujus juna aatus agajui: “Tuja Apajuí emematku ijuntai jegamkamun pachis aatus agagbau aajakui: Jerusalénum jega jegamtanak nagkamatumé, dutika ataktu jegamkatnumé, nuwi kuntinun maa apenak Apajuín emematiagtin asag. Nunú jega yakintig veintisiete dekapamu atatuí, tuja wegkantishkam veintisiete dekapamu atatuí. ⁴ Tuja nunú jega jegamkatasa aepkamu aidau numu nuwi nagkama kampatuma imanía kaya múun aidau ekenja iwakbau atatuí. Nunú maki makichik ekenjamu aidau numu yama dakagbau anujamu atatuí. Tuja nuna akikenak kuichik apu aidau takasagtin tibauwa nuna jukiag akikmakagtatuí. ⁵ Tuja waji orojai najanamu aidau, jiju platayai najanamu aidau aatus apu Nabucodonosor jega Apajuí emematku ijuntainmayan yajuak Babilonia nugkanum ikaunmauwa duka Jerusalén awakjamu atatuí. Dutika Apajuí emematku ijuntai jegamkamua nuwi utsaamu atatuí, wagki nuwiya yajuakbau asamtai””, tuu agagbau aajakui.

⁶ Nuna wainkagmatai, apu Darío nugka yaig namak eufratesnum etsa akaetaiya nuni aajakua nuna apuji Tatenai daagtin, nuigtu Setar-boznai niina kumpaji aidaujai batsatun chichajak:

“Jerusalénum batsatjun duka jijnajum ukuktajum, ⁷ judío apuji aidau dita atuwe aidaujai jega Apajuí emematku ijuntai tsaikbau aajakua nuna ataktu jegamkatnumé. ⁸ Tuja Apajuí emematku ijuntain dita jegamkatnumé tusan yayaakun wishakam juna tajai: Namak Eufratesa yantamen etsa akaetaiya nuni aents nugka yaignum batsamin aidau apu takastinun kuichikin akikmaina duka jega jegamku takamunum akikmakintin ashí wayati, nunú dutikachmak wamak jega jegamain tsawan nagkaemaki. ⁹ Tuja sacerdoté Jerusalénumia aidau wajinak atsumiajat nuna sumainakuig, makichikish utugchat apujtutsuk, kashi kashinig sutajum:

toro tsakat aidaun, uwig aishmag aidaun atsumainakuish, nuniashkush uwig tsakat aidaun maawag nuna nejen ashí apenak Apajuí ememattinun atsumainakuish susatajum. Tuja trigonakesh, weenakesh, vinonakesh aceitenakesh, ¹⁰ apenak Apajuín shiig anemtiksatatus atsumainakuish susatajum. Nuna dutikainak mina pujutjun, mina uchig aidaun pujutjijai pachisag Apajuín ausatnume.

¹¹ “Tuja makichik aentskesh wi taja nuna umiachkug, niina jeniag numi juki etsaka iju maam atatui. Tuja niina jeshkam ashí tsaigka ajapjam atatui. ¹² ¡Tuja makichik apukesh, nuniachkush aents nugka muunnumia aidaukesh Apajuí emematku ijuntai jegabaunum utugchatan apujunak Apajuí nii pujustinjin Jerusalégkan etegkauwa nunú ijinati! Wi junak apu Darion tajai. ¡Juju wajintu agagbauwaita duka imanisag uminkati!” tusa agajui.

Apajuí emematku ijuntai jegamka ashimkamu

¹³ Aatus apu chichaman umiku asantai, nunú nugkanum batsamin aidaun apují aidaun Tatenai, Setar-boznai aatus, tikich apu dita kumpaji aidaujui papii agagbaunak imatiksag betek umikajui. ¹⁴ Nuadui Apajuí chichamen etsejin profeta Hageo, Idó uchiji Zacarías aajakua nujai Apajuí emematku ijuntai jegamnaktinun pachis emtika etseggamunak imatiksag apu takata chichamjin Judío aidaun atak nagkamawag takasajui. Dutikainak Israel aents aidaun Apajuíjii jega dutik jegamnakti tibaunak imatiksag jegamak umikajui. Tuja Persian apuji aidaun: apu Ciro, apu Darío, apu Artajerjes aatus, tibaunashkam betek umikajui. ¹⁵ Nunú jeganak Darío apu wajas seis mijan inamai, nantu Adar* taka kumpatum tsawan tsawaju ai, ashí jegamak ashimkajui.

¹⁶ Dutika ashimkagmatai Israel aents aidaun, sacerdote aidaun, Leví wegantu aidaun, nuigtu aents achija yajuakbau waketjau aidaun aatus ijunag, shiig aneenak jüstamawajui. ¹⁷ Nunú tsawantin Apajuí emematku ijuntai jegamnak ashimnaku asantai, cien toro tsakat aidaun, doscientos uwig aishmag aidaun, cuatrocientos uwig tsakat aidaun maawag Apajuín emematuinak apeawajui. Nuigtushkam Jacopa uchiji doce aajakua dutiksag ashí Israel aents aidaun tudauji tsagkugnagtinme tusag doce chivon achikag maawag nuna nejen ujumak jukiag apeawajui. ¹⁸ Nuna dutikawag Moisés agajua nuna uminak sacerdote aidaush wajina takastinuk aajabi, nuna mamiktujajui. Tuja Apajuí emematku Jerusalén ijunbaunmash Leví wegantu aidaush wajina dutikatnuk aajabi nunashkam dutiksag mamiktujajui.

Pascua jüstamamu

¹⁹ Tuja nuigtushkam achija yajuakbau waketug kaunau aidaun tsawan catorcetin mijan nagkamnamu yama nagkamchak nantu takau ai, Pascuan jüstamawajui. ²⁰ Sacerdote aidaun, Leví wegantu aidaujui, atumi tudaujum aidaun dutik iwagmamkatajum, tusa tibaun uminak iwagmamkau ainawai. Nunikag ashí aents achija yajuakbau aidaun, dita kumpaji tikich sacerdote aidaun, tuja ditau aidaun aatus tsagkugnagtinun nunú tsawan Pascuatín kuntinun maa apeawajui. ²¹ Nunú kuntin Pascuatín maamu aidaun nejenak ashí Israel aents achija yajuakbau waketug kaunau aidaun, nuigtu tikich aents aidaun, aents pegkegchaun takau aina nuna wekaetutsuk, Israel

* **6:15** “Adar” tawa nunak nantu febrero ejapean achika, nantu marzo ejapean makichik nantu ejega nuna taku tawai.

aents aidaujai betek Tuke Pujuun ememattag tuidaujai ijunag yuwawajui. ²² Tuja pag lewadurajai pachimtsuk injuamu yutai tsawan jegau asantai, nuigtushkam Apajuí ditan ataktu yayaak Persia nugkan apuji, Apajuí emematku ijuntai jegabaunum yaigtinme tibau asa, yaigkam jegan jegamak ashimkaju asag, shiig aneenak siete tsawantai jüstamawajui.

7

Esdras niina kumpaji aidaujai Jerusalén jegamu

¹ Persia nugka apuji Artajerjes pujujakua nunú tsawantin Seraíasua uchiji Esdras daagtin pujujakui. Tuja Seraíasua patayi aidauk juju aajaku ainawai:

Asarias, Hilquías ² Salum, Sadoc, Ahitub, ³ Amariás, Azariás, Meraiot, ⁴ Seraias, Uzí, Buquí, ⁵ Abisúa, Finees, Eleazar aatus. Tuja Aarón yama nagkamchak sacerdote aajakua nunashkam shiig patayi aajakui.

⁶ Apajuí Moisés chicham umiktinun susauwa nuna Esdrasak yacha aajakui. Tuja niinak Tuke Pujuu niina Apajuíyia nunú yaijakui. Nuadui apu Artajerjes Esdras sumamunak ashí susauwai. Dutikam Babilonia nugkanum pujau, ⁷ apu Artajerjes inabaujin siete mijan ejeyu ai, Israel aents aidaujai, sacerdote aidaujai, Levi wegantu aidau, kantamtan yacha aidau, Apajuí emematku ijuntai jegamkamun waitijin kuitamin aidau, nuigtu aents nunú jeganum takau aidau aatus ijunag Jerusalén wakitkijai. ⁸ Nunik mijan sietetin nantu cinco takau ai, Jerusalén jegauwai. ⁹ Babilonia nugkanum batsatu waketjauwa nunak mijan nagkamnamu, yama nagkamchak nantu taka makichik tsawan tsawaju ai, nunú tsawantin jinki, nantu cinco taka makichik tsawan tsawaju ai, Apajuí wait anenkagtina nunú kuitamsam Jerusalén jegauwai. ¹⁰ Esdrasak Tuke Pujuu chichame umiktin agagbauwa nuna wisha shiig unuimajan umiakun Israel aents aidaun jintuntuatjai, dutika ai ditashkam nuna umiktinme tusa puyatjukui.

Apu Artajerjes papiin agag Esdrasan susamu

¹¹ Apu Artajerjes papiin agag sacerdote Esdras jintinkagtin chicham umiktin agagbaun yacha aajakua nuna susauwa duka juju aajakui:

¹² “Apu Artajerjes, sacerdote Esdrasan Apajuí nayaimpinum pujuuwa nuna chichame agagbaun yacha, jintinkagtina nuna kumpamak, aatus tawai: ¹³ Ashí Israel aents aidau mina nugkajui batsata nunú Jerusalén amejai wetag tuidauk wetinme. Tuja Levi wegantu aidaush, sacerdote aidaushkam wetag tuinakug wetinme. ¹⁴ Wi mina aentsug chichagkagtin siete aina nujai, chichama umikan Judá nugken aents batsata dusha, tuja Jerusalén batsata dusha chicham umiktin agagbaun Apajuí atumin amasua nunash betekash umiina nunú dekata tusan amina awemajame.

¹⁵ Tuja apu niina aentsji chichagkagtin aidaujai anentaimas, Israel aents aidaun ememattai Apajuí Jerusalén puja nunú iish susami tusag, platan, oron amasagtata nunú jukim wetá. ¹⁶ Tuja plata aidau, oro aidau Babilonia nugkanum yaakat ayá nuwiya ikamkugmek ashí jukitajum. Nuigtushkam tikich aents aidau, sacerdote aidau, diták anentaimas Apajuí emematku ijuntai jegamkamu Jerusalén awa nuwi takastinun amainakuig ashí yajuakta.

¹⁷ Dutika yajuakam nunú kuichkia duwi toro tsakat aidau, uwig aishmag tsakat, uwig múun aidaujai, nuigtu ajak juukbau aidau, vino aina nujai ijumjam sumakta. Dutikam nunú Apajuí emematku

ijuntainum altar awa nuwi apeakjum atumi Apajuíjum Jerusalén puja nunú emematminjum. ¹⁸ Tuja oro, plata aina nunú ampinkuig, amina kumpajum aidaujai chichasam Apajuí wakegamush tukita nunú dutikatajum. ¹⁹ Untsu amina Apajuíjum emematku ijuntainum waya, nii emematku takastin aidau amasag duka, Apajuí Jerusalén pujuuwa nunú susattame.

²⁰ Tuja nunú jeganum takastinush waji atsumtatme nuniakmek apu aidau takastin ijumjamu aina nuwiya jukita. ²¹ Apajuí nayaimpinum pujuuwa nuna chichame umiktin agagbauwa nuna yacha, sacerdote Esdras sumamuk makichkish intimjutsuk ashí susatajum, tusan wi apu Artajerjesan aents kuichki kuitamin aidau namak eufratesnum etsa akaetaiya nuni batsatutigminak ashí tajime. ²² Tuja duka juju aidau susattagme: Tres mil trescientos kilo plata, veintidos mil litro trigo, dos mil doscientos litro vino, dos mil doscientos litro aceite, tuja weenash wajupak atsumit duka imatiksagmek susattagme.

²³ Apajuí nayaimpinum pujuuwa nunú niina jenia atinun sumakuig duka wamak ashí sunastatui, wagki nunú umiatsjinig, Apajuín suwimkega nunú apu uchijin, tuja niina inamtaiji nugka múunta nuwi suwimak iyanjamain asamtai. ²⁴ Nuigtushkam juju dekatajum: Sacerdote aidauk, Leví wegantu aidauk, kantamtam yacha aidauk, jega Apajuí emematku ijuntain kuitamin aidauk, tuja nunú jeganum takau aidauk, nuniachkush tikich aentskesh nunú jeganum takau aidashkam, apu kuichkiji atin akikmaktajum tusa waitkamuk makichkish atsuttawai.

²⁵ Untsu Esdrasah, aminak Apajuí shiig anentaimsa takatan amasua duwi shiig anentaimsam, apu chichama epegkin aidau, nuigtu nugka yaig aidau apuji gobernador aidaujai adajata. Dutikawamin dita utugchat ataish epegkeatnume. Nunú aidau ashí tikich nugka yaig aidau namak eufratesnum etsa akaetaiya nuni ayá nuwish, amina Apajuígin chichame umiktin agagbauwa nunash betekash umikajat nuna diistinme. Untsu nunú chichaman dekachu aina duka ame jintintuata. ²⁶ Ashí aents aidau Apajuí chichame umiktin agagbauwa nuna umiachuk, tuja apu chichamenash umiachuk wamkeuch mantam-nattawai, dutikachkuiñh tikich nugkanum sujunkattawai, nuniachkush kuichkin akikmaktatui, nuniachkush aents achika chimpitainum achika egkeam agtatui”, tusa apu Artajerjes agajui.

Esdras Apajuín ausamu

²⁷ Aatus apu papiin agag umikmatai, Esdras Apajuín aujak:

“¡Tuke Pujuu iina muunji aajaku aina nuna Apajuí emematiagmi! ¡Nunuwai dekas pegkejam wait anenkagtinuk, wagki nii apu Artajerjesa anentain antintuk, Apajuí emematku ijuntai Jerusalénum awa nuna eme anentus diisti tumamtikiu asamtai! ²⁸ Tuja minashkam nii yaintsamtai, apu niina aentsji chichagkagtiin aidaujai, nuigtu tikich aents aidau apu inamtaijin takau eme anentsa diitai aina dushakam ashí wait anenjujaje. Nuadui dita yaintsagmatai, Israel aents eme anentsa diitai aidau wijai Jerusalén waketjatnume tusan ijumjajai”, tiuwai.

Nehemías Jerusalén peejamun shiwag aidau tsaikagbaun Nehemías ataktu peejamu

(1.1—7.73)

Jerusalégnunia aents aidau pachis Nehemías Apajuín aujtusbau

¹ Witjai Nehemías Acalíasan uchiji. Jujuwai mina pachitus augmatbau. Artajerjes apu wajas inabaujin veinte mijan ejeji, nuigtu nantu Quislev* achika takak pujukaua, nunú tsawantin wi yaakat Susanum apu pujusa inamtaijin pujuyajai. ² Nuwi pujai mina yatsug Hananí tikich aidaujai Judá wegantu aidau nugken batsatu minyanme. Nunik minidaun wainkan iniakun: “Jerusalégnunia judío aents aidau shiwag amuan, achipag yaju-pakainum tusag pisaju aina dusha ¿wajukau ainawa?” tusan iniasabiajai. ³ Tusa iniai dita aijuinak: “Shiwag aidau tikichin achija yajumiagtai pisaju aina duka, waketug Jerusalén kauna batsamas waituinak, tikich aents aidau dushikiam batsatui. Tuja Jerusalén peejamu aya nunashkam shiwag aidau tsaikajui. Waitijinashkam jiiyai apeawajui”, tusa ujatkejabi.

⁴ Nuna antukan buutiajai. Nuniakun wake besemag dekapeakun, ujumak tsawantai yujumka ijagma pujusan Apajuí nayaimpinmayan augkun, ⁵ aatsan tiabiajai:

“¡Tuke Pujuu, Apajuí nayaimpinum pujuuwah, Apajuí múun senchigt-inuh, amek ame anagkagtuamuk tuke uminaitme! ¡Tuja amina anempainak chichamjumin betek umidauk kajimatkimek idaichauwaitme!

⁶ Nuadui wi amina aentsjum aidau anentaimtusan tsawaish kashish tuke amina augjam nunú yamai antugtukta. ¡Israel aents aidauti amina chichamjum umitsuk, pegkegchau takamsag nunak dekaskap nunikji tajai! ¡Mina muuntug aidau pegkegchaun takamsau aina nunak wishakam pegkegchaun takamsaji!

⁷ Ame diismak shiig pegkegchau takau batsamsaji. Amina inakem Moisés chicham umiktin susauwaitam duka iik umikchaji. ⁸ Amina inakem Moisés chichagkum: “¡Mina chichamjun umigtutsuk pegkegchaun takainakuig, dapampaakan tikich nugkanum yujas waittsatnume tusan ishiaktinaitjai!” tiuwaitme. ⁹ Tujash dutika utsajatkamin yujasa, ataktu aminí mininaku chichamjum umiajinig, atushat nugka nagkatkamunum batsatjinish, ataktu awagkagtukim, ame nugka etegkam juwi emematjitin atinme tibaunum ikaunmatnaitjime tiuwaitam nunú adeagta.

¹⁰ “Ti aidautik amina inakem ainaji. Amina aentsjum aidau Egipto nugkanum waitkam batsatu amina senchigmijai jiija agkanmitkauwaitam nunú ainaji. ¹¹ ¡Tuke Pujuuwah, wait aneam wi tajar nunú antugtukta! ¡Tuja amina inakem aidau segapaina dushakam antugkata! Ii wakegamua duka ima ame ememattag tabauwa nunuwai. ¡Tuke Pujuuwah, wait aneam minash atutkata, apu shiig aneam wi tabaun antugtuk yainkati tusan segajame!” tiabiajai.

* **1:1** Nantu “Quislev”: Juju nantua duka “Noviembre ejapean nagkamna nantu Diciembren achika jimaituk ejegak makichik nantu wega nuna daajin” tawai.

Tuja nunú tsawantinig wika apu Artajerjes uwagtinun shikikan su ayajai.

2

Apu Artajerjes Nehemíasan Jerusalén weti tibau

¹ Artajerjes apu wajasa inabaujin veinte mijan ejeyu ai, nantu Nisán taka makichik tsawan tsawaju ai, apu uwagtinun vino najanamun suwakun wake besemag wekaebau apu waitkabi. ² Nunik chichagtak:

“Wake beseka wekagu diyagme ¿wagka aniame? ¡Jachu diyagme, utugchatas ajutjamatai!” tujutiabi. Tujutkui shiig senchi ishambabijai, ³ nuniakun:

“¡Apuh, kuashat tsawan iwaku pujusam inamjata! ¿Wagkanuk wake besemag wekaechatja, yaakat mina apag mina dukugjai ukusbau aina nunú tsaikbau, tuja nuna waitijishkam apeka utsagbau aish?” tiabijai.

⁴ Tusa tai, apu inintak:

“¿Wajinma yaimainaitjame?” tusa tujutkui, Apajuí nayaimpinum pujuwu nuna mina anentaijuig inintak ausamijai. ⁵ Nunikan apu ayaakun:

“Apuh, ame diisam pegkejaitkuig, tuja ame mina wait anenjakmek, Judá nugken yaakat awa nuwi mina apag dukugjai ukusbauwa nuwi awetiti tajame. ¡Nuwi jegaan nunú yaakat tsaikbauwa nuna iwajatjai!” tiabijai.

⁶ Tusa tai apu niina nuwe eketbaunum nuna yantamen eketu chichagtak: “¿Wemesh wajupa tsawanta megkaemainaitme? Nunikmesh ¿wajutiya waketmainaitme?” tujutiabi. Tujutkui tsawantan mamiktuawamijai.

Tusa ti ai ayu tujutiabi. ⁷ Tujutmatai nuigtushkam segaakun: “Ame dutikmainaitkumek, aents aidau namak Eufratesa yantamen etsa akaetaiya nuni batsamna nuna apuji aidau papii agatjata, wi nuni nagkaemai utugchatan apujtugsainum. Nuna jukin agkan Judá nugkanum jegatjai.

⁸ Tuja Asaf, amina aentsjum ikama kuitamin puja nunú numi aidau sujusti. Nuna jukin Apajuí emematku ijuntai jegamkamua nuwi jegan-tatak kumpin jikbau awa nuna iwajatjai, dutikakun yaaktan peejatjai. Dutikakun wi pujustinnashkam iwajatjai”, tusan nunashkam segabijai. Tusa ti ai ayu tujutiabi, wagki Apajuí mina yaintu asamtai.

⁹ Tujutmatai jiiinkin namak eufratesnum etsa akaetaiya nuni apu aidau batsatbaunum jegaan apu papii agagbau takakbaujun susabijai. Tujash apuk ima papiinakek sujuschabi, mina uyuntusagttinnash aents caballonum maanitan yacha aidau suntaja apuji aidaujai sujusabi.

¹⁰ Nuna dekawag Horón aents Sambalat, Tobias apu atuwe amonita aents aajakua nujai senchi kajekajui, wagki makichik aentskesh Israel aents aidau nak yaygchatnume tuidau asag.

Yaakat peejatnun wekaetus diisbau

¹¹ Ima imaniakun Jerusalén jegawabijai, nunika jegan kampatum tsawan pujusan, ¹² ujmak aentsu yajuakan dita uyuntusagmatai kashi nantakin wegabijai, tujash Apajuí mina Jerusalén iwajata tusa tujutbau-nak makichikish etsegekachabijai. Wika burronum entsamkan weyajai, nuniai tikich aidau dawé shimuyanume. ¹³ Nunú kashia duwi yaakta waitiji Valle Tutaya nunú jiiinkin, yumi pukunin daaji Pagki tutaya aajan, tikich waiti Tsawat utsatai tutaya nuni wegabijai. Nunika jegan-tan Jerusalén peejamu tsaikbau aidau, waiti apekbau aidau, wekaetusan ashí diisabijai. ¹⁴ Nuna diisa ukuakun waiti Entsa pukuni jiiin tutainum wegabijai. Tuja nuwi juwakin Apu maatai yumi aimkamu aajakunum

jegantabijai. Tujash burro wi entsamka wekaebau nuwi nagkaemamainchaw ayi. ¹⁵ Tuja eke suwe aig entsa aintin wakabijai. Nunikan yaakat peejamu aajakun ashí diisan ukuakun, yama nagkamchaku jinkimunak nunisnuk wakitkiabijai.

¹⁶ Tuja apu aidauk wi webaugnak dekachaju ainawai, nuigtushkam wajina dutikaknuk wekaeyaja nunakesh dekachaju aajabi. Nunika wekaekunush judío aents sacerdote aidaunash, apu aidaunash, apu yain aidaunash tuja tikich aents takata yaimkagtin aidaunakesh makichkish ujachabijai. ¹⁷ Nuadui dita chichagkun:

“Ti aidauti shiig utugchatnum batsatag duka atumek dekagme, Jerusalégkak tsaikam, waitiji aidaush apegkam awai. Nuadui wijai atuniktajum, ¡nunikagmin ijunja Jerusalén peejamu tsaikbauwa nunú ataktu peeja iwajami! ¡Dutika iwajau asa dushikiam batsatag duka dutikamak achattaji!” tiabijai.

¹⁸ Nuna tusan Apajuí mina wait anenjug yainkamun, nuigtu apu tujutbaunashkam ditan ujakabijai. Dutika ai dita aimainak:

“¡Ayu, takasagmi!” tusag shiig aneasag pempeentunikiag, dekas takasagmi tudayajabi.

¹⁹ Nuna antukag Sambalat, Tobías, Guésem árabe aents aatus dushiktamainak aatus tujabianume: “¿Waji aikash batsamtagme atumesh? ¿Apu intinjuki atumek takakjumek aniajum?” tusa tujabianume.

²⁰ Tusa tujamainaku wi ditan ayaakun:

“¡Apajuí nayaimpinmayaya nunú yaimpasmatai, niina inake aidautik juju tsaikbau aina duka ashí iwaja ashimkattaji! ¡Tuja atumek makichkish juka diimainchaw ainagme, nuigtush Jerusalén pachisjumek makichkish chichamaitsumge, dekachu asajum!” tiabijai.

4

Israel aents aidau takatan emtikainum tusag shiwag aidau utugchatan apujtusagbau

¹ Yaakat peejami tusa nagkama takajin, Sambalat dekaa senchi kajekui.

² Nunik niina kumpaji aidau emtin, tuja suntag samarianmaya aidau emtinchakam dushikis Nehemíasan chichajak:

“¿Au nujantai jinattak yuja aniaush wajukatasaya anish yujawa? ¿Yaunchuk Apajuí emematuinak kuntuu maa apeyanum dutikatajum yamaish tujamchajaintash tusa aní yujatsuak? ¿Atsa nuniachkush makichik tsawantai takat ashimkami tuinatsuash? ¿Atsa nuniachkush kaya esaku tuwasua wegaka nuwiya yamajam kaya jiiigmi tusag aní yuja?” tau.

³ Nuna tai Amón aents Tobíaschakam nuwi wajau asa chichaak: “¡Yaaktan peegkeg emaina auk shiig wainkauchi! ¡Aunak kujancham nuwakesh awi wakug kupik ajuattawai!” tau.

Nehemías Apajuín ausamu

⁴ Tusa tuinakui wi Apajuín segaakun: “¡Iina Apajuíjyah, iina dushiktamaina nunú antukta! ¡Iina kajegtamainak dushiktamaina duka ditaig pempenkita, dutikawamin dita shiwaaji aidau depetuk achija tikich nugkanum yajuaktinme! ⁵ ¡Dita pegkegchaujiya duka makichkish tsagkujaipa, tuja dita tudaujishkam esakatjaipa, wagki amina aentsjum aidau yaaktan ataktu peegtatman dushikina nuadui!” tiabijai.

Shiwag aidau awanmakbau

⁶ Tusa Apajuín ausan idaikun takatnak mijattsuk emayajai, imatikau asan jimaituk peeja iwakabiaji. Tuja aents aidaushkam shiig aneas wakekegat takayanume. ⁷ Jerusalén peejamu yumpuagbau aidauk peeja ashí apaka emajin, Sambalat, Tobías, árabe aents aidau, Amón aents aidau, ashdodnumia aidau aatus nuna dekawag shiig senchi kajekajabi. ⁸ Nunikag Jerusalégkan peegkeg emaina nunú tsaigkami, dutika awake anentaimtikjami tusag ijunag chichama umikajabi. ⁹ Tusa tuinakui iina Apajuíjin ausabijai, dutika idaikun jetepainakui ayamjumakmi tusan, aents jintan tsawai kashijai niimsatin aidaun etegjan batsakabiaji. ¹⁰ Untsu Judá wegantu aidau chichainak: “¡Aents kijinu yanau aina duka yaakat peejamu aidau tsaikbau tuwasau wegaka nuna diisag mijamainawai, nuadui kakajus ataktu peejaik ashimaituji!” tuyanume.

¹¹ Iina shiwaaji aidau anentaimsajag, eke dekainatsaig utua ijinami, dutika ajin takata emaina nunú idaimitkasagmi tusas anentaimianumtai. ¹² Tujash tikich judío aidau shiwag batsatbaunum ijus batsatu kaunawag ujpainak: “¡Au aents aina nunú ashí yantamnum kautjamkag jetepak-agtatui!” tusag kuashta ujpayanume. ¹³ Nuadui aents aidau dita patayi aidaujai juunikag yaakat peeja emamua nuna agájin, wake aidaunum, tuja eke peejachbau agkaju aidaunum aatus puyag aidaun, nagki aidaun, akentai aidaun yajuakjum dakamkatnume tusan tiabijai. ¹⁴ Tusa tai ishamaínakui, wi wajantan aents eme anentsa diitai aidaun, apu aidaun, nuigtu ashí tikich aidaujai ijumjan chichagkun: “¡Ishamkaigpa, Apajuí senchigina nunuwai dekas ishamaínuk! ¡Ishamsuk dekas atum wegantu múun aidau, dita uchiji aidau, nawanji aidau, nuwe aidau, dita jee aidau ayamjakjum maaniatajum!” tusan tiabijai.

¹⁵ Nuna iina shiwaaji aidau dekawag, dekas Apajuíyap ditanak yayawa, dutikamu asampap ii chicham umiamun degagtamawaje tiajuu. Tusa tiag wajantagmatai, yaakat peeja emamu idaisauti ataktu nagkama takayaji. ¹⁶ Nuadui nagkamas mina aentsug aidauk jimaituk takatan takainai, tikich aidauk puyajan, nagkin, ejamatai tantag aidaun, akentai aidaun, nuigtu maaniaku nugkutai jiju najanamu aidaun aatus yajuakag uminas batsamianume. Tuja apu aidauk Judá wegantu aidau ¹⁷ yaaktan peegkedaun yaiyanume. Tuja yaakat peejatnun chimpia juki ejegaidaush, yanakiag ejegaidaujai nagkamas ashí takainak yujayanume. Imanidau asag juinia uwejen takainak, tikich uwejen maanitai aidaun takaku aajabi. ¹⁸ Ashí aents nuwi takaidauk maki makichik dita puyagjin akachumau aajabi. Untsu mina yantamjui uwija kachujin umpuagtin wekaeyi. ¹⁹ Tuja aents eme anentsa diitai aidaun, apu aidaun, ashí tikich aents aidaujai chichajuinakun:

“Takatak shiig múuntai, iman asa ashimainuk kuashat awai, nuigtushkam maki makichik akanjamu aidauti atushat kanaja yujasa takainaji, ²⁰ nuadui iina shiwaaji aidau jetepagtaik, uwija kachuji shinuktatui. ¡Nunú antakjumek tupikaki, kaunajum yaijatkatajum! ¡Apajuí iina ayamjutpak, iina shiwaajijai nii maaniatawai!” tiabijai.

²¹ Tuja ii jimaituk kanakuti kashi kashinig takainaku, kashikmas nagkamsa tuke etsa akapayaji, imaniajin tikich jimaituk kanaku aidau nagki takus shiwag minaun wainkatatus niimak ijunmayi. ²² Tuja nuigtushkam nunú tsawantin aents aidaun chichagkun: “Atum takagmin yaimpau aina nujai ashí Jerusalén utsanatajum, nunikjum kashi jinta diistajum, nuniakjum tsawai takastajum”, tiabijai. ²³ Nuigtush wika, mina pataag aidaujai, mina yaintin aidaujai, mina uyuntin aidaujai,

tuja tikich aents jinta niimin aidaujai jáanch nugkuagbauk nunisaik makichkish yapagmamtsuk, nagki takusa jinta niimku ijuniaji.

7

Apajuí chichame umiktin agagbaun aents tuwakbaunum Esdras ausamu

⁷³ Ashí Israel aents maki makichik wegantu aidauk dita nugken batsamkajui, nunik batsatai nantu sieteya nunú takauwai.

8

¹ Nunikmatai ashí aents aidauk Jerusalégnum waitin daaji Yumi tutai aajakua nujai niinis ekemsa, ayamtai umikbau plaza tutai aajakua nuwi ijunjajui. Nunik ijunag Esdrasan chichajuinak: Tuke Pujuu chichame umiktinun Moisés agag Israel aidaun susauwa nunú jukim itanta tusa tiajui. ² Tusa tima sacerdote Esdras chicham umiktin agagbaun juki aents aishmag aidau, nuwa aidau, nuigu ashí uchi anentaimjau aidau aatus tuwakbaunum ejentauwai. Nunak nantu sieteya nunú taka makichik tsawan tsawaju ai dutikauwai. ³ Dutika ejegan, kashikmas nagkamas aents tuwaka aunum nuna emtin wajas, au augkawa etsan tajipiuiwai. Nuna augtai ashí aents aidauk jasa ijunas puyatjus antu ijunu.

⁴ Esdrasak aents tuwaka ijunbaunum nuna emtin numi yakí papamunum wajau. Tuja niina untsojiya nuni Matatías, Sema, Anías, Uriás, Hilquías, Maaseías aatus ditashkam ijunu. Nuninai untsu menajinini Pedaiás, Misaél, Malquías, Hasum, Hasbadana, Zacarías, Mesulam aatus dushakam ijunu. ⁵ Nuwi Esdras waka wajau asamtai, ashí aents aidauk wainaidau, nuniemunum chicham umiktin agagbaun juki ausatatus ujatai, ashí aents aidauk wajainiajui. ⁶ Nunikagmatai Esdras Tuke Pujuu ashí senchigtinun emematiuwai. Nunitai ashí aents aidauk uweje takuiniag aimainak: “¡Aatus ati, aatus ati!” tiajui. Nuna tusag tikishmag pujusag tsuntsunawag nijayin nugka antig pujusag Tuke Pujuu emematiujui.

⁷ Tuja Leví wegantu aidau: Josué, Bani, Serebías, Jami, Acub, Sabtai, Hodías, Maaseías, Quelitá, Azarías, Jozabad, Hanán, Pelaías aatus nunú chicham umiktin agagbauwa dusha wajina takug tawa nuna aents aidaun shiig ujaidau. Tuja aents aidauk dita wajamunmak nuwig jasa ijunu.

⁸ Nunik ijunai chicham umiktin agagbaun senchi jikag aujuinak, shiig paan antuktinme tuidau asag: Junak taku tawai tusag dita chichamen ujaidau.*

⁹ Nuna aujiagtai antuinak, ashí aents aidauk buutuidau. Nuniagtai gubernador Nehemías, sacerdote Esdras, nuigu Leví wegantu aidau aatus aents aidaun ujainau asag ditan chichajuinak: “¡Wake besemjak anentaimigpa, tuja buutash buutigpa!” tiajui. Nunak tiajui, wagki nunú tsawanta duka Apajuí emematmi tusa etegkamu asamtai. ¹⁰ Tuja nuigu Esdras ditan chichajak: “¡Jemin wejum yujumak shiig yuwajum, umutai vino yumimitu uwagtajum, nuniakjum juju tsawanta duka Apajuí emematku ijuntai asamtai, yumain umikbau atsujaidaujajai ajamdaísatajum! ¡Wainka wake besemag anentaimigpajum, Tuke Pujuu dakunkutan

* **8:8** “Dita chichamen ujaidau” tawa nunak, chicham umiktin agagbau aajakua duka hebreo chichamnum agagbau asamtai, arameo chichamnum ukajaju aina nuna taku tawai. Israel aents aidauk achija Babilonia nugkanum yajuakam batsamsau aina duwi nagkamas arameo chichamnak unumaju ainawai.

ama nunú iinak ichichtamu asamtai, shiig aneasjum jiiistamatajum!" tiuwai.

¹¹ Tuja Leví wegantu aidaushkam ashí aents aidaun anentain ichich-tuinak: "¡Buuttsuk itatkatajum, juju tsawanta duka pegkejam Apajú tsawanji asamtai, uyumaku wake besemag dakapeamuk atsumainai!" tuidau.

¹² Tusa nunú chicham jintintuam shiig antukaju asag, ashí aents aidau yujumkan yuwinak, umutain umuinak tikichdau yumain umikbau atsujaidaujaish ajamdaisata tusag shiig aneas shiyakajui.

Numi kanawe aakmaja batsamsamu tsawan jegamtai jiiistamamu

¹³ Nuna inagnakag kashinia duwi maki makichik wegantu aidaun apuji aidau, sacerdote aidau, Leví wegantu aidau aatus ashí Esdrasjai ijunjajui, chicham umiktin agagbauwa dusha wajina takug tawa tusa aujus diinak. ¹⁴ Dutika auju batsamtukma Tuke Pujuu Moisésan jintintak, Israel aents aidau numi kanawe aakmajag batsamsajua nunú tsawantin nuna anentaimtusag, numi kanawen aakmag batsamas Apajúin emematuinak jiiistamatnume, tusam ujakta tibau agagbaun wainkajui. ¹⁵ Nunikag ashí yaakat aidaunum, tuja Jerusalégnunshakam, ashí aents aidau, mujá shiyakag olivo kanawe aidaun, arraya duke aidaun, palmera duke aidaun, nuniachkush tikich numi kuashat dukentin kadaukdauju aidaun egakt-inme, Apajú chichame umiktin agagbaunum tawa dutiksaik aakmagtinun, tusa tibau antuekauwai.

¹⁶ Nuna antukag aents aidauk dita jeen yaki aakmaktinun, tuja jega agaaji aidaunum aakmakagtinun, nuigtushkam jega pegkejam Apajú emematku ijuntai jegamkamunum waitijin jegantatak agkaju ayatak shugku ajigbauwa nuwi aakmaktinun, tuja waitin daaji Yumi tutaya nuwi plaza awa nujai niniaku aakmaktinun, nuigtu tikich waitin daaji Efraín taitainum plaza awa nuwi aatus aakmajagtinun numi kanawen tsupig ikaunmawajui. ¹⁷ Ashí aents achijam yajuakbau aidau waketjau aidauk betek aakmajajui, dutikawag nuwi utsanawajui. Nunak aents Nun daagtin aajakua nuna uchiji Josué pujusmatai dutikau aina duwi nagkamas, dutiktuk idaisamun imapam nunú tsawantin dutikawajui. Nuadui shiig aneaku dakujamu asauwai. ¹⁸ Tuja nunak siete tsawantai jiiistamawajui, nuninak yama nagkamchak tsawan tsawagbaunum nagkamas chicham umiktin agagbaun Esdras kashi kashinig au augkawa jiiista amuebaunum inagnakui. Nuna inagnak tsawan ochoa duwi ijunjajui, nunikag nunú tsawantinish wajinak dutiknush aajabi nuna betek umikajui.

9

Israel aents aidau tudaujin Esdras etsegtukbau

¹ Nantu sieteya nunú takau ai, tsawan veinticutrotin Israel aents aidau yujumka yutsuk batsamas Apajúin ausagtatus ijunjajui. Nuninak jáanch pegkegchaun nugkujag, buuken nugka yukukuntun yukumajag, ² aents tikich nugkanmaya dita wegantuchu aidau ijunbaun ukukiag, ditash kanakag ijunas dita pegkegchau takamsamu aidaun, dita muunji aajaku aidau pegkegchau takamsau aidaujai ashí etsegtumakajui. ³ Tuja nunisag ijunaig chicham umiktin agagbaun Tuke Pujuu dita Apajúji ditan susauwa nuna kampatum horayai ausajui. Tuja tikich kampatum horaya duwi dita pegkegchau takamsamu aidaujin etsegtumakajui. Nunikag nuadui Tuke Pujuu dita Apajújin emematiajui. ⁴ Nuna inagnakag, Leví wegantu aidau:

Josué, Binuy, Cadmiel, Sebanías, Binuí, Serebías, Baní, Quenaní aatus numi yakí papamunum wakajui. Nunikag nuwi ijunas senchi untsamak, Tuke Pujuu dita Apajujin ausajui. ⁵ Dutikawag Leví wegantu aidau: Josué, Cadmiel, Binuy, Hasabnías, Serebías, Hodías, Sebanías, Petahías aatus aidau chichainak:

“¡Wajaitajum, nunika ijuntsajum Apajuí Tuke Pujuuwa nunú yamaish ajumaish tuke ememattajum! ¡Apajuí daaji dekas tikich aidau nagkaesau ima pegkegma nunú kantamjakjum shiig ememattajum!” tiajui.

⁶ Tusa tiagmatai Esdras chichaak:

“Tuke Pujuuwah, tikich apajuí amejai betekak makichkish atsawai, ima ameketme Tuke Pujuumek. Ame nayaimpik najanauwaitme, tuja nuna nagkaiki awa dushakam ame najanauwaitme, dutikam ashí yaya aidauhakam najankauwaitme. Nugkashkam, tuja nugkanum ayá dushakam ashí ame najanauwaitme. Tuja nayants aidauhakam najanam nuwi ayá dushakam najankauwaitme. Ashí waji aina duka ame pujutak suwame. Nuadui yaya nayaimpinum ayá duka amina emematjamainawai.

⁷ Tuke Pujuuwah, ame Abram etegkauwaitme. Dutikau asam caldeo aents aidau yaaktaji Ur aajakua nuwi pujau, ame jikim niina daaji yapagtuam Abraham adakauwaitme. ⁸ Dutikam ima aminig kajinas anentaimu wainu asam, niijai ame chicham umiakum:

Canaágnunia aents aidau nugke, hitita aents aidau nugke, amorreo aents aidau nugke, ferezeo aents aidau nugke, Jebús aents aidau nugke, gergeseo aents aidau nugke aatus aina nuna ame wegantu aidau susatnaitjai tusam, anagkuawaitam duka betek umikuitme.

⁹ Iina muunji aajaku aidau Egipto nugkanum batsamas waitujaku aina duka amek wainkauwaitme. Tuja nayants kapantu taitunum jegawag buutuidaush ame antugkauwaitme. ¹⁰ Nuadui faraón ashí niina inake aidaujai, tuja nunú nugkanmaya aidau ashí suwimak suwakum ishamain wainchatai aidau iwainajuitme, wagki Israel aents aidau shiig pegkegchaunum waitkaidau asagmatai. Dutikau asam yamaik ameketme dekas pegkegnum augmattaimek.

¹¹ Ditash wainainai nayants jimaituk akanka buku awajsabiume. Dutikamunum katiyajui. Untsu shiwag aidau ditan pataetukajua duka nayantsa ejapeen dekas shiig kunajin kayajai betek aepá emegkagmayume. ¹² Dutika ayamjukam tsawai shimakui, yujagkim emtika awantamin, nuna diisag shimuyanume, untsu kashi jii kegau emtika awantamin jintan tsaaptin emantai, shiig shimuyanume.

¹³ Tuja tikich tsawantín muja Sinainum akaikiuwaitme. Tuja nayaimpinum pujusam ditajai chichasuitme. Nuwi susauwaitme chicham umiktin shiig pegkeg aidau agagbau. ¹⁴ Tuja tsawan ayamtai ame etegkauwaitam nunú jegakuig, nunú tuké dutikin atajum tusam jintintuawaitme. Tuja chicham dekaskenum umiktin agagbau Moisés susauwaitme, nuna umiktinme tusam. ¹⁵ Tuja nuigtushkam dita yapajainak waituinakuish, nayaimpinmaya pag susauwaitme, nuna yuwawag ichichmamjatnume tusam. Tuja kitamainakuish uwagtinme tusam, kayanmaya yumi susauwaitme. Nuigtushkam nugkan amastinaitjime tusam anagkuawaitam nunú jukitajum tiuwaitme.

¹⁶ Tujash iina muunji aajaku aina duka emebau, antakchau wajasu aajaku ainawai. Nuadui amina chichamem umiktin agagbaunash umikchau ainawai. ¹⁷ Nunidau asag amina chichamjum umitan

dakitjag, ame dita yayaakum wainchatai ishamain aidau iwainajuitam nunashkam kajimatkiajui. Nunidau asag amina chichama intimjupakiag, tikich apun adaikajabi ataktu Egipto nugkanum awagtamki waitkam batsabiag nuwig ejetamatnume tusag. Tujash amek tsagkugkagtin, anejatin, wait anenkagtin, nuigtush kakajus kajechuitam duwi kajimatkimek idaisachuitme. ¹⁸ Jiju ukuijag baka tsakatan daku-mak najanawag, jujuwai apajuí, ii Egipto nugkanum waitkam bat-satutin jiigmajajua duka tusag emematuinak pegkegchaun takainakuish, ¹⁹ uwegshunum jinaati tusamek idaitsuk wait anenjauwaitme.

Dutikam tsawai dita shimamunum yujagkim wajantun wejakuia dusha, tuja kashi shimamunum yujagkim keeka wejakuia dushakam emegkakchauwaitme. ²⁰ Nuigtushkam Wakani Pegkeji ditan jintintuatin susabiume, tuja dita yapajak yuwawagtin nayaimpinmaya yutai maná akaketkabiume, tuja kitamainakuishkam dita uwagtinuk sumayume. ²¹ Tuja cuarenta mijan uwegshunum yujasag yuwawagtinush ame susabiume, tuja jáanahjigkesh mamugchagmayi, nawenigkish iyagchag-mayi.

²² Nugka múun aidau susauwaitme. Dutikau asam nunú akaantujam tesagkam maki makichik wegantu aidau tinamkauwaitme. Tuja apu Sihón aajakua nuna nugke Hesbón aajakua nunú, apu Og aajakua nuna nugke Basán aajakua nujai ame susauwaitme, dutikam nuna jukiag nuwi batsamsaju ainawai. ²³ Nuigtush nayaimpinum yaya ayá iman kuashat uchigtin atinme tusam tiuwaitme. Tuja dita muunji aajaku aidau anagkuakum, nugka atumdau atinun amastinaitjime tiuwaitam nunú umiakum, yajuakam nunú nugkanum ejegauwaitme. ²⁴ Dutikamu asag nunú nugkanum utsanawag Canaán nugkan jukiajui. Tuja nuwiya aents aidauk chichaka ayamjumakchamin awajsauwaitme. Tuja dita apuji aidaushkam nuwiya aents aidaujai ashí Israel aents aidau, dita wakegamun dutikatnume tusam ditai idaisauwaitme. ²⁵ Nuigtushkam yaakat peejamu aidaun, nugka pegkeg ajak tsapau aidaun, jeganum waji pegkeg piyaku aidaun, yumi taimu aidaun, uva ajakmbau aidaun, olivo ajakbau aidaun, aatus nuigtu tikich ajak jigkayi yujutai aidaun, shiig kuashat yajuakajui. Dutikawag nuna shiig yuwawag duwekajui. Aatus ame wait anenja kuitabau asag shiig batsamsajui.

²⁶ Nunik batsatiatak, aminak umigtamkachu ainawai. Nunidau asag amejai shiwagmagawag, chicham umiktin ame susauwaitam nunak dakitug idaisau ainawai. Tuja nuigtushkam amina chichamjumin etsejin profeta aidau ditan chichajak, aní batsamtsuk Apajuí nemagkatajum tusa dita pegkegchaujin paan etsegtamu asag kajegku ainawai. Dutikaidau asantai, ameshkam dita kajegkauwaitme. ²⁷ Nuadui dita shiwaaji aidau waitkastinme tusam idaisauwaitme.

Dutikam batsamas waituinak amina segapajabi. Tusa segapainakui, amina anenkem múunta iman asantai, nayaimpinum pujusam dita sumamu antugkam, ditan ayamjuk agkanmitkatin aidau aents etegtu-juitme. ²⁸ Dutika ayamjukam machik agkan pujamuik, amina ataktu pegkegchaun takamjupagmayi. Nunidau asagmatai dita shiwaaji aidau waitkastinme tusam idaisabiume. Dutikam waituinak ataktu amina segapainakui, amek wait anenkagtin wajasuitam iman asam, dita sumamu nayaimpinum pujusa antugkam kuashta ayamjukam agkanmitkauwaitme. ²⁹ Tuja chicham umiktin agagbauwa nunú umiktajum tusameshkame ujayume. Tujash ditak eme anenmamaidau asag, amina chichamjum umiktin agagbaunak ajantusagkesh diischau ainawai.

Nunidau asag amina chichamem pujutan sukagtina nunak umikchaju ainawai. Nuninak intimkiu antakchau wajasag, nunú chicham umitnak dakitjau ainawai. ³⁰ Imanik pegkegchaun takamainakuish, kuashat mijadai atsanjauwaitme. Nuadui aminí Wakan awa nujai, tuja amina chichamjumin etsejin profeta aidaujai ankaigpa tusam ujayume. Tujash ditak antukchaju ainawai. Nuadui aents nugka múun aidanmaya ditan depetuk waitkastinme tusam idaisauwaitme. ³¹ ¡Dutikau ayatkum ame wait anenkagtutaigmek múunta iman asamtai, ashí ijintsuk, nuigtush ima ditakek idaitsuk kuitamkauwaitme, wagki amek Apajuí kagagchauch, wait anenkagtinaitam iman asam!

³² ¡Nuadui iina Apajuíjyah, amek múun, senchigtin, ishamain, ame chicham tibauk imatiksamek uminaitme, tuja amina anenkagmek múunta! Jutiin apuji aidau, tikich apu aidau, sacerdote aidau, amina chichamjumin etsejin profeta aidau, iina muunji aajaku aidau, nuigtu ashí aents aidau, Asiria nugkan apuji pujujukua duwi nagkamas waitujaku aina nunisaik yamaishkam waitiaji. ³³ Tujash ii imanika kuashat waittsa minag duka utugchatak aminuchui. Ii pegkegchau takasu asajin, amek amina chichamjum betek umiau asam suwimkak sukagtame.

³⁴ Iina apuji aidau, tikich apu aidau, sacerdote aidau, iina muunji aajaku aina dushakam, chicham umiktin agagbaunak umikchaju ainawai. Tuja pegkegchau takasaigpa, suwimak jukittagme tusa ame ujamash antukchaju ainawai. ³⁵ Nunidau asag ame apu emam apusamuitak, tuja nuigtush shiig kuashat waji aidau susamaitak, nuigtush nugka pegkeg shiig tsapau susamuitak, nunak kajimatug emematjamchaju ainawai. Nunidau asag pegkegchau takamujinash idaisachu ainawai.

³⁶ ¡Diista nijah, ame iina muunji aidau nugka susauwaitme ajakmawag yuwatnume, nuninak wajigtin atinme tusam! ¡Nunú nugkanum batsamsa iina pegkegchaujin yamaikish wainka inaku waitkatai batsatji!

³⁷ Ii ajakmamu shiig kuashat juwag duka iina pegkegchaujin ame apu aidau sukagtusu asamin, dita yuwatin ajaaku waitiaji. Ii aidautinak nunú apu aidau iina tagkuji aidaujai niinu etamak waitkagmainawai. Nuadui shiig pujuschamin dekapeakun waitiaji”, tiuwai Esdras.

Chicham umiktin agagbauwa nunú umikmi tusag Israel aents aidau tumamiagbau

³⁸ Imanika waituidau asaja dekas chicham umiktin agagbauwa nunú umikmi tusa tumamainaji. Nuadui nunú pachisa papiinum agaji. Nunú papii agaja umikbaun iina apuji aidau, Leví wegantu aidau, sacerdote aidau aatus dita daajin apujawag firmainawai.

Job

Job pachisa yama nagkamchaku agagbau

(1—2)

Job waittsamu

¹ Makichik aents aajakui Job daagtin, pegkejam, utugchatji atsuju, Apajuí inake, pegkegchaun takasaig tusa kuitamamin aajakui. Niig Us nugkanum pujujakui. ² Jopa uchijig aajakui siete aishmag, kampatum nuwa. ³ Niina tagkuji aidauk: siete mil uwig, tres mil camello, mil buey, nuigtu quinientos burro nuwa aidau aatus aajakui. Nuigtushkam niina inake aidaush kuashat ajujakui. Etsa minitainmanini tikich aents batsamajakua nuna nagkaesau nii ima wiakuch aajakui.

⁴ Niina uchiji aidauk maki makichik tsawantan etegkawag yujumka umikag yuwinak jiistamajaku ainawai. Nuna jiistamainak dita umayi kampatum aajakua nuna tuké ipajaku ainawai. ⁵ Nuna ashí uminkagmatai Job anentaimas, namputchawame mina uchig aidau Apajuín pegkegchaun takagsachajeash tusa, niina uchiji aidau untsuka ijumag, kashikmas nantaki dita tudauji tsagkugnagtinun kuntinu maa nuna nejen ashí apeak Apajuín emematujakui.

⁶ Makichik tsawantai Apajuí aentsji ángel aidau Tuke Pujuwai jegan-tagtin ainai, iwanchakam Apajuíyai jegantui. ⁷ Nunikmatai Tuke Pujuu niina iniak:

“¿Tuwiyamea miname?” tama iwanch ayaak:

“Ashí tikich nugkanum wekagun minajai”, tiuwai. ⁸ Tutai Tuke Pujuu ayaak:

“¿Mina inakeg Job ima minak umigtinuwe dusha wainkachmakum? Aents ashí nugkanmaya aidaujai ijumja diyamash, niig ima minak umigtak, wi wakegamunak takak, pegkegchaun takatsuk pujuuwe imanuk makichikish tikichik atsawai”, tiuwai.

⁹ Tusa tutai iwanch Tuke Pujuu ayaak:

“Tujash amina umigtama nunak tikima wainkag umigtamtsui. ¹⁰ Niina, tuja niina nuwe, niina uchiji aina nuna, niina wajiji aidaujai waitkainum tusam tuke kuitamjame. Tuja niina takatjinish ame kuashat ikauntame. Nuadui au nugkanmak tikich aidaun nagkaesau nii ima tagkugtinai. ¹¹ Tujash diik niinu aina nunú atankikiah, dutikamak aminak pegkegchaun chichagtamkattawai”, tiuwai. ¹² Tusa tutai Tuke Pujuu iwanchin ayaak:

“Dekas tame. Niina wajiji aina duka ame itugkatag tame dutikata. Tujash nigka makichikish antigkaipa”, tiuwai. Tusa tima, iwanchik Tuke Pujuuai chichaak pujau jiinki Job pujamunum weuwai.

¹³ Makichik tsawantai Jopan uchiji aidau, nawanji aidaujai niina uchiji iwai aajakua nuna jeen yujumka umikag ijunag yuwinak jiistamainak batsatai, ¹⁴ makichik aents tupi tupikakua Jopa jeen taa niina chichajak:

“Mina kumpag aidaujai baka nugkan pukuakui batsatjin, burro nuwa aidau ii pujamunum tikiju dupan yuwak ijunmae. ¹⁵ Nuniamunum pachichbau arabianmaya sabeo aents aidau kaunawag, ashí juju tagku aidau kasamak yajumainak, mina kumpag aidau kuchiyai ijuag kajegmae.

Dutikainakui ima wiki tupikakin uwemjan taajai amina ujaktasan”, tau. ¹⁶ Tusa eke etsejak wajaig, tikich inak tupikaki taa chichaak:

“Chaajip iyaak uwija kuitamin aidaun uwigjai ijiname. Dutikamtai ima wiki uwemjan amina ujaktasan tupikaki taajai”, tau. ¹⁷ Tusa eke etsejak wajaig, kempatuma nunú tupikaki taa chichaak:

“Caldeo aents aidau kuashat kaunawag jetepakag depetamak, camello aidaun yajumainak, tagku kuitamin aidaunak kuchiyai iju kajegkagmae”, tau. ¹⁸ Tusa eke etsejak wajaig, tikich tupikaki taa chichaak:

“Amina uchijum aidau nawanjum aidaujai uchijum iwai jeen yujumka umikag yuwatatus batsatai, ¹⁹ pachiachbau dase uwegshunmaya dasentak jegan umpui kupik ajuak, amina uchijum aidaunak ashí ijiname. Dutikamtai ima wiki uwemjan amina ujaktasan minajai”, tau.

²⁰ Nuna antuk, Job wajaki wake besemag dekapeak, jáanchjin japiki ichigka, awamajui pinuin. Nunik Apajuín emematak tikishmag pujus tsuntsuma nijayin nugka antig pujusui. ²¹ Nunik pujus chichaak:

“Juju nugka juwi akiinkunuk wajigtuchu akinawaitag, nunisnuk jaknushkam wajiigtuchu jakattajai.

Tuke Pujuu mina ashí sujusua nunú nigki ashí jujutkine.

¡Nuadui ima Tuke Pujuu pegkegma nuna ememattajai!” tiuwai.

²² Aatus imaanik waitiakush, makichkish pegkegchaunak takamsachui, nuigtush Apajuínash pegkegchaunak chichagkachui.

2

Jopan ataktu dekapsamu

¹ Makichik tsawantai Apajuí aentsji ángel aidau Apajuíyai jegantagtin ai, iwanch niishkam jegantui. ² Nunikmatai Tuke Pujuu niina iniak:

“¿Tuwiyamea miname?” Tama iwanch ayaak:

“Ashí nugkanum wekagun minajai”, tiuwai. ³ Tutai Tuke Pujuu ayaak:

“¿Mina inakeg Job ima minak umigtinuwe dusha wainkachmakum? Aents ashí nugkanmaya aidaujai ijumja diyamash, niig ima minak umigtak wi wakegamunak takak, pegkegchaun takatsuk pujuuwe imanuk makichkish tikichik atsawai. Tuja ame utugchat atsujai, dekapsatjai tusa segatkumin dutikata timajame. Tujash ame imatika uchiji aidau, tagkuji aidau ijutuamash nigka shiig umigtawai, nii pegkegchau takamuk atsujui”, tiuwai.

⁴ Tusa tama iwanch Tuke Pujuu ayaak:

“Makichik aentsuk niina iyashin najaimamuji atsugmak shiig pujawai. Unstu najaimamu achiamak jakaig tusa nii wakegamun dutikattawai.

⁵ Diik najaimaku waitmain susakia, dutikamash wajukatig, nunú dutikamak jakaig tau asa amesh antamin pegkegchaun chichagtamainai”, tau.

⁶ Tutai Tuke Pujuu iwanchin ayaak:

“Dekas tame. Ame itugkata tame dutikata. Tujash niina pujutjig antinkaipa”, tau.

⁷ Tusa tima iwanch Tuke Pujuujai chichaak pujau jiinki Job pujamunum nugka weuwai.

Nunik Jopan jatan susauwai, dutikam jata iyashnum amujatin shiig kuashat ashí iyashnum amauwai. ⁸ Imatika amuamu asa atsanmainchau dekapeak, tsuwat ijumja apetaunum jeganta yukunum pujusui. Nuwi

pujusa jakachin juki duwi bechmamajakui. ⁹ Imani pujutai niina nuwe chichajak.

“Apajuí nemagkum shiig pujakmesh pegkejak jukichume. Nuadui Apajuí antug wekaetsuk pegkegchau chichagkam, jaka ajapnata”, tau.

¹⁰ Tusa tama Job ayaak:

“iDuwajuh, nuwa anentainkachujai betek chichakaipa! Apajuí waji pegkeg aidaun kuashat amaakui juwag dutiksaik, nii pegkegchaun amaakuishkam jumainaitji”, tiuwai. Tuja imanik waitiakush makichkish pegkegchaunak takamsachui, nuigtush pegkegchaunakesh Apajuínak chichagkachui.

Jopa kumpaji aidaun niina ijagsatasag jegajuawagbau

¹¹ Jopa kumpajig kauptum aajakui: Temágnunia aents Elifaz, Súah nugkanmaya Bildad, Naamat nugkanmaya Sofar aatus aajakui. Nunú aidaun Job jak shiig senchi waitiawai tabaun antukag, ijagsami anentai ichichtaku tusag shimutkajui.

¹² Nunik shima shimakua jegattak wesag diikma, Job ashí jaka yaunchuk aajakbaunak yapajina pujaun wainkag senchi jiika buutiajui. Nuninak wake besemag dekapenak jáanchjin japiki ichigkajui, dutikainak nugka yukukuntun atsaaki jukiag yaki nagkimawag dita buukeenishkam ukatmamkajui. ¹³ Nunikag Job pujamunum jegantag pujusajui. Nunik siete tsawan, kashishkam imanisag siete kashi makichkish chichatsuk batsatu, wagki Jopak najaimak shiig senchi waitiau asantai.

Job niina kumpaji aidaunai chichasbau

3

(3—27)

Job senchi waitiak kajeka chichakbau

¹⁻² Jopak imanik waitiakush, chichatsuk pujau tikima atsanmainchau dekapeak chichakui. Nuniak:

“Wika akiinmainchaunas akiinawabiagtai tajai.

³ iTsawan wi akiinamua duka pegkegchau atin ati!

Tuja wi akiinamtai kashi chichainak:
Aishmag akiinae tujutiu aina dushakam pegkegchau atin ati.

⁴ iWi akiinawaitag nunú tsawannak Apajuí suwe emamainnas aikachamiatai, Apajuí nunú tsawantan kajimatkiu ataik, tsawaumainchaun tsawajui!

⁵ iWagkag nunú tsawantinish makichik suwe dupajam iyagchabi!
iNunú tsawannak yujagkim suwe ijia emegkaumainnas aikachamiatai!
iEtsa etsantun epenak suwe ishaimain emama imatika emegkaumainnas aikachamiatai!

⁶ iWagkag nunú kashia duwi mina dukug ejajjukua dusha, suwe wajas megkaekachabi?
iNunú tsawantin kashi mina dukug mina ejajjutkauwa duwi nagkamsag tsawan aidauk, nantu aidauk, mijan aidauk

dekapamainchaus ayatai!

7 “iMina dukujuk nunú kashia duwik
ejapjuchu wemainnas nunikchamiatai,
nunikuitkuig makichik aentskesh
aishmag akiinae tusag tumainchau wajakajui!

8 iTunchi aidau, makichik kuntin múun
nayants puju Leviatán tutaya nuna iwishtug
nii wakegamu dutikati
tumainnas dutikachajabiatai!

Nunú tunchi aidaush

¿wagkag nunú kashi aajakua nunash emesjachajabi?
dutikau agtaik mina
dukujuk ejapjumainchau wajakui.

9 iYaya tsawagtatak etsantin aidau,
mina dukug ejapjutkamtai,
ejampek etsanjau aina
nunak etsanmainchaus ayatai.

Tsawan tsawagmatai, etsa jiinu
wainna duka wainnamainchau wajakui!

10 iMina dukug kashi ejapjutkauwa nunú
kashia duka pegkegchau atin ati!
wagki jakati tutsuk

akiinati tusa tujutiu asamtai,
nunú kashi aajakua duwi akiina pujusan,
senchi waitiag ankatin asamtai.

11 ¿Wagkanuk mina dukujui
egkemsanuk jakachamiaja?
Nuniachkunush ¿wagkanuk
yama akiinmawaik jakachamiaja?

12 ¿Wagkag wi akiinamtaish,
mina dukujush kuitamjukabi?
¿Wagkag muntsujinash amunstuawabi?

13 Yama akiinmawaik jakauwaitkunuk,
utugchatji atsugbau shiig kanak tepemaina
numamtuk, yamai ayamkun tepemainaitjai.

14 Yaunchuk jakauwaitkunuk apu aidau,
dita atuwe aidaujai,

jega múun aidaun jegamjau aidau
jinawajua nujai ijunja pujumain wajajai.

15 Nuniachkunush maki makichik nugka apuji
aajaku aidau, dita pujusa
inamtaiji aajakunum oro
aidaun, jiju plata aidaun
utuamajaku aina nujai
ijunjan pujumain wajajai.

16 ¿Wagkag uchi jakau akiidaun
ukusa ajapin aina dutika ajapjuachajabi?

17 Aents pegkegchau jakauk,
pegkegchaunak taka pujumaitsui,
tuja tikich aentsnashkam
pegkegchaunum inakug waitkamaitsui.
Tuja aents pimpiki yaweja

pujaushkam jakug ayamui.

¹⁸ Nuwi batsamas achikbau
aajaku aidauk agkan batsatui,
wagki takata apuji senchi takatsjume,
tusa jiyaku suwimchamu asag.

¹⁹ Nuwig batsatui aents
eme anentsa diitai aidau,
imanchaush aidaushkam betekmas batsatui.
Inaku waitkatai jinau aidaush
apuji waitkascham agkan batsatui.

²⁰ “¿Wagkag Apajuish aents
waittsatnunash akiinati tawa?
¿Wagkag aents kuashat waitiaunash
iwaku pujusti tawa?

²¹ Aents jakatatus egauk wamak jatsui,
waji pegkeg akik uukbaun wainkatatus
egama imatika jakatatus egakush jatsui.

²² Nunú aents shiig aneamujiya duka
jakamtai ukusam mekgaga nunuwai.

²³ Niinash waji utugchatak ajiti nunak
Apajuik dekamtiktsui.
Nuadui aents wainmachujai betek,
jinta wetai epenbaunum
wetakama tujimaina numamtuk wajawai.

²⁴ “Yujumak yumainun idaikun,
wake besemag dekapeakun buutjai,
umutain umakun pujumainun
senchi waitiakun kajeajai.

²⁵ Ashí mina ishantaig ayá nunú,
dekas mina uwaktin ayá nunú
yamai waitkajawai.

²⁶ Makichkish ayamainchau dekapeajai,
mina anentajjun ichichtujug
shiig anentijumainuk atsawai.
Shiig aneasan agkan pujumainchau,
ayatak waugkamin dekapeajai”, tiuwai Job.

4

Elifaz Jopan ayaak chichakbau

¹ Job chichaka inagnakmatai, Elifaz yama nagkamchak Jopan ayaak
aatus tiuwai:

² “Makichik aentskesh aujtamsatag takuig,
kajegmainaitme.
Tujash chichatskek idaimainchau dekapeajai.

³ Wika ame tikich aents aidau
jintintin aayum nunak dekajai.
Tuja aents kakaakchau aidaush
anentai ichichtin aayume.

⁴ Aents wake besemag pujaush
ame niina anentai ichichtuyume.

Tuja aents jakatag taushkam
ame jakai tusam yaiyume.

⁵ Amek sapigmamaitsume,
tuja yamai waitiam dushakam ishamaitsume.

⁶ “Amek Apajuik tuké shiig umignaitme,
amek aents pujutji shiig pegkejaitme.
Imanmesh ¿wagka Apajuíyaish dekaskeapi tumaitsume?

⁷ Aents pegkeja takaun,
Apajuí kajejuk mauwai tabaush
antukuashitam, nunú anentaimsa diista.

⁸ Kuashat mijan pujau asan,
utugchatan wainka weakun dekaikai,
aents magkagtak pegkegchaun takauk,
dutiksaik ikuam auwai.
Wagki duka aents nii ajakmamujinia
nejekun juuwama numamtinai.

⁹ Dita pegkegchaun takaidau asamtai,
Apajuí kajejuk dasejai betek umpui ijinui.

¹⁰ Aents pegkegchau aidauk
ikamyawajai betek,
kajeak senchi shinak
tikich aentsun maatag tutaish,
Apajuí nunak ikamyawa nai kupijam itatama
numamtuk itatmitkaktatui.

¹¹ León nii yuwatnuijin
wainkacha jamaina numamtuk,
nunú aents aidauk jakagtatui.
Nunikagmatai dita uchiji aidauk
pampagkag megkaejagtinai.

¹² “Tikichish antuinatsaig
takamtak chicham tajutuae,
nuna takatkamat
shiig pegkejan antukjai.

¹³ Aents aidau kashi
kaja achiam kanuinai,
wika kanumainchau dekapjamjai.

¹⁴ Sapigmamu achigkame,
mina iyashjuk ashí kujaieme.

¹⁵ Mina yapijui dase
umpuntun dekapjamjai,
dutijakui iyashjui anchiajua nunin dekapmajai.

¹⁶ Makichik aents nuwi wajame.
Nuna wi wainkamjai.

Tujash niimesh dekas wajukuki
nunak wainkachmajai;
ashí itatjamunum untsujak,
aatus tujutmae:

¹⁷ ‘Aents aidauk ashí jau ainawai.
Apajuik makichik aentsnakesh,
ametme chicham betek umiamek,

tusa tama amainuk shiig atsawai.

Tuja ametme dekas
pegkegchau takamchaumek,
tama amainchakam shiig atsawai.

¹⁸ Apajuik niina aentsji ángel aidaunakesh,
tikima shiig kajittsag diyatsui.

Apajuí diismak ditashkam
tikima pegkegmak ainatsui.'

¹⁹ Nuadui aents aidauk
ima pegkegnakek takainatsui.
Maki makichik aents aina duka,
nugka jegamkamua numamtin ainawai.

Jega jegamin aidau
nugka yukukuntunum apuja,
jegamaina numamtin ainawai.
Nuadui dase dasentai yumpunak,
nuwi mamuk ayaun
yutua emegkauwama numamtuk emegkam amainai.

²⁰ "Aentsuk kashikmasagkesh,
nuniachkush agkugkesh jaka megkaewai.
Nunikmataish makichkish pachinatsui.

²¹ Niina pujutig hilo yupichu tsujimaina numamtuk
tsujgkam megkaewai.

Aentsuk ashí unuimajag jatsui", tiuwai Elifaz.

5

¹ "¡Senchi untsumkata Jopah!
¡Makichik aentskesh aipakchatpash,
nunú antukmi!

Ame yainkati tusa
segamainuk ángelak atsawai.

² Aents pegkegchauwa duka,
Apajuíjai shiwagmagau asa jawai,
aents shiig anentaimkachunak,
kajegkagtutaijiya nunú maawai.

³ Wi wainjai aents pegkegchau aidau,
kuashat wajiigtin wedaun,
tujash machik asag
wamak niina jeen atantuinawai.

⁴ Niina uchiji aidaun, nawanji aidaun,
kuitamjumainuk atsawai.
Apu chichama epegkin aidaush
tuke aneas waitkainawai,
ditá ayamjumainuk atsawai.

⁵ Ajakmamujinash kuitamjuinatsui,
nuadui aents nujantai jinuidau nuna yujuinawai,
dutikainak jagkinmayanash
akuumtuk yujajus yajutuinawai.
Tuja wajiji aidaun diigsag,
imanun jukitag tinu aidau
kasajuk yajutuinawai.

6 Wake besemag dekapeamua duka
ajakjai betekak nugkayag tsapatsui.
Tuja waitiamua dushakam
nugkanmayag tsapatsui.

7 Jii kegaunmaya kaiji
tsachigtuk shimuwama
numamtuk aentsuk
waittsatatus akiinainawai.

8 “Wika ametkunuk
Apajuí yainkati tusan segamainaitjai,
tuja wi waitiamua nunak
Apajuín idaitumainaitjai.

9 ¡Apajuí iwainawai kuashat waji wainchatai ishamain aidaun,
tuja nunash wajuk dutikawaki nuna
dekaa ejemainuk makichkish atsawai!

10 Apajuí yuminak nugká yutumtikawai,
nunú yumi yutak ajak aidaun ukatui.

11 Apajuík aents kakagchauch aidaun
eme anentai emawai.
Tuja aents patayi jajukam
wake besemag pujaunashkam
anentain ichishtawai.

12 Aents pegkegchaun dutikatasa
anentaimas umiaunash Apajuí yapagtinai.
Dutika yapagtuam wainak nagkaanui.

13 Aents niina yachajin pegkegchaun
dutikatatus umiaunash
nii umiamujinig pempegki ajua emegkainai,
dutikak nii anentaimtugbaun yapagtuam wainak nagkaanui.

14 Tikichin pegkegchaun
takamtiksafatus yuja duka,
kashi numi tukumka iyaumaina
numamtuk wajainawai.
Tsawai aentsun tsanuina dushakam,
wainmachujai betek ainawai.

15 Untsu Apajuík aents kakaakchau
niina shiwaaji waitkam pujaunash,
nii ayamjuk uwemtikawai.

16 Tuja aents kakaakchau aina duka,
Apajuí ayamjutuk
uwemtijugti tusa dakainawai.
Apajuík aents pegkegchau aina nunú,
tikichin aents kakaakchau aina nuna,
kuntin yutaijin, yuwa amuwama
numamtuk amukti tusag idaitsui.

17 “Nuadui aminak Apajuí
suwimkan amasmatai waitiau asam,
jamek shiig aneasta!
Apajuí ashí senchigtina nunú
jintinjamak aikagma nunú dakitjaipa.

18 Tuja nii jata amasmatai jam nunashkam,
nigki etsaentamjattawai.

Tuja nii waittsati tujamatai
waitiaminchakam, nigki yaimpektatui.

19 Ame ishamainnum pujutaish,
nigka kuashta aminak
agkanmitkagmattawai.

Tuja pegkegchauwa nunú
waitkasti tusag idaitamsashtatui.

20 Nujan tepeamtaish
nujantai jakai tusa yaimpektatui,
tuja maaniamunmash
nii ayamjutpektatui mantamawainum tusa.

21 Amina pegkegchaun
chichagtamainakuish ishamkagtukaipa,
duka makichkish uminkashtatui,
wagki aminak Apajuí kuitamjamui.

22 Nujantaikish, nuniachkumesh
senchi waitiakmesh,
amek duka dushiksam diitnaitme.
Tuja kuntin ikamia kajen aina dushakam ishamkashtinaitme.

23 Ame ajagminig utugchat atsaunum
agkan shiig takastatme,
wagki ajagminig kaya awatmainkesh
atsau pegkeg atinai.

Tuja kuntin kajen ikamia aina duka
makichkish jetepakchagtinai,
duka ayatak amina kumpajum agtatui.

24 Nuadui amina jeminig
utugchat atsau pujustinaitme,
tuja amina tagkujum aidauk
makichkish megkaekashtinai.

25 Tuja amina uchijum
wegantu aidauk shiig kuashat dupa ikam ayá iman agtinai.

26 Trigo ajakbau tsawanji jegamtaí,
pegkejan tsamaka uminas aama
numamtuk amek múuntuch wajasam
jatanum jgamesh
senchigtin, pegkeg pujutnaitme.

27 Kuashat mijan pujau asan,
utugchat nagkaetujua
nunak shiig dekajai.
Nuadui atak nagkaemagtinun tajam
nunak dekaskenum tajai.

Nijah, juju wi tajam nunú
dekaskeapi takumek dekapsata”,
tusa Elifaz Jopan tiuwai.

Elifaz, Bildad, Sofar, aatus Jopan ausajui. Dutikam Job inagnak ditan
ayaak aatus tiuwai:

14

1 “Aents nuwanum akiinauwa

nuna pujutjig ujumke,
untsu waitiamuji ima múuntai.

² Aentsu pujutjig yagkug kashikmas
pegkegchin yagkujuk ajum kagaja
megkagama numamtinai,
nuigtushkam aentsu pujutjig etsa
bikian wamak megkagama numamtinai.

³ Wika wainkauchitag nuniaigkiap
mina utugchatug diigtusam,
suwimak sujustasam chicham umigtame.

⁴ Pegkegchauwa duka pegkejak wemaitsui,
nuna dutikmainuk makichkish atsawai.

⁵ Aents aidaush wajupa tsawantak
juju nugka juwish batsamsagtinaita
duka ame dekame,
tuja ii jakatnuk tsawantak mamikiamui,
nunú inagkeakik pujumaitsuji.

⁶ Nuadui idaikagtusta diijattsuk,
idaikagtusta agkan pujusagmi.

¡Idaikagtusta takasa jukimui ii atsumamua nunú sumakagmi!

⁷ “Aents numin ajakag
nuna wajauti jeeka tsapai
muumpagti tusa dakauwai.

⁸ Tuja numi múun wajasa
kagkapeen kukaja jakattak wajaush,

⁹ yumi juki ukatjamak ataktu uchimea
yama nagkamchaku ajak ajaamu tsapai,
pegkeg samekbaun
muumpama iman weawai.

¹⁰ Tujash aents aidautik wamak jaji,
nunika jaka tuke megkaeji.

¹¹ “Tuja aents aidautik kucha aidau,
entsa aidau, kuyuka buku waiyama
numamtuk ainaji.

¹² Nuadui nayaim eke aigkik aents jakamtai,
ukusbau aidauk ataktuk nantamainchau ainawai.
Aents jakauwa duka tuke kanajujai betekai.

¹³ “¡Apajuíyah, ame kajekbaujum
nagkaetamai dekas jakatjai,
nunikan aents jinau aidau
batsatbaunum pujustajai
tumain anentaímjai!

¡Nuwi pujai ame wait anenjujam
ataktu inantukminum tusan!

¹⁴ Aents jakauwa duka
ataktu anean nantakig pujumaitsui,
wika aents jakau aidau batsatbaunum
dakamkun pujuttajai,
wait anenjug ayamtijugti tusan.

¹⁵ Ame mina najatuaum

wait anenmain diigsam untsugkuminig,
wika aminak aimainaitjame.

¹⁶ Ame mina kuitamjukta tau asam,
wi takamug aidauk ashí wainme.
Nuadui wi pegkegchaun takasmataish,
tudau takasume tusamek tujutchattame.

¹⁷ Duka tujuttsuk ame minak tsagkugtujam
mina tudaujuk wampachnum egkea jukim
shiig atushat ajapmainaitme.

¹⁸ Dutikmain aminig
ayatak muja aidau,
buchig aidaujai yumpunawag
amugama nuniaji.

¹⁹ “Ashí aents aidauk iwaku
batsamsagtatus wakegainawai,
tujash ame duka yumi kayan
taumama numamtuk awagme.
Dutikakum yumi yutak
nugka yukukuntun tajaka,
ajapama numamtuk
aentsu pujutjig ajapeame.

²⁰ Dutikam tuke emegkame,
pujutchakam atankagtame,
dutikam ukumatainum ekagtame.

²¹ Aents jakauwa duka,
aents iwaku aidaush
dita uchiji aishmag aidau,
nawanji aidaujai takatjin diigsash,
shijjash awagmaina nunak dekatsui,
tuja pegkegchaun takagtaish,
itujenawaki nunashkam dekatsui.

²² Ima nii iyashin
najaimamunak dekapeawai,
nuniak buutui”, tusa Job tiuwai.

19

¹ Nuna tusa nuigtu Job chichaak:

² “;Make agkan idaitustajum, ipimtagme!
;Atum tujutjum duka
kuchiyai ijutbau najamaina imatijawai!
³ Kuashta minak pegkegchau chichagtagme.
;Mina jutika waitkajakjumes
datsaamatsjumek?

⁴ Wi pegkegchaun takamsau
amainaitag duka,
atumnak pegkegchauk etamaitsui,
duka ima mina utugchatjuke.

⁵ Atumek mina nagkaetasu
pegkejam anenmamjume,
wi jakun kakaumainchau
wajasa pujag duwi
dushiktaku imatjutagme.

6 Wi waitiag junak,
 Apajuí waittsati tujutmatai waitiag nunú
 shiig dekatajum.
 Kuntin chanua maatasa
 umigtayama numamtuk
 Apajuí umikbaunum pujusan waitiajai.

7 “Senchi untsumkan
 ¡mantuinawai! tusan imattaish,
 makichkish aijuinatsui.
 Yainkatajum taish,
 makichkish yaintuinatsui.

8 Apajuí minak nagkaemaki
 tusa jintan akigtujue.
 Tuja nuigtushkam
 jintan suwe etugtine.

9 Mina wajiig aidaun, tagkug aidaun,
 aents inakeg aidaun ashí yajutjue;
 dutijak nuigtushkam eme anentsa
 diyam amainchau etine.

10 Minak makichkish wajigtuchu
 shiig wainak etine.
 ¡Numi kagkapejai tegai ajapamu, ataktu tsapamaitsu numamtuk,
 tsagagnuap pujustatja
 tumainchau awajtuse!

11 Nii kajekbaujin imatijawai,
 imatijak shiwaajui
 utugmaina dutijawai.

12 Niina suntaji aidauk ashí nantagtujaje,
 nunikag mina jegajun tentea apakag
 uminas jetetuinak waitkajuinawai.

13 “Mina yatsug aidau
 mina kumpag aidaujui kajimatkitnume,
 dutikainak aents tikich nugkanmaya
 utugtaya dutikatnume tusa Apajuí tine.

14-15 “Mina pataag aidaushkam
 kumpag aidaujui pachittsuk idaitusaje.
 Wijai ijunag yujajaku aidaushkam pachitkachaje.
 Mina inakeg aidaushkam
 aents tikich nugkanmaya
 wainchatai itugmaina dutijainawai.

16 Mina inakeg aidaun
 untsuaish aijuinatsui;
 kuashta untsuaish
 makichkish antugtuinatsui.

17 Mina duwagshakam
 wi mejeau asamtai tsuumjawai,
 tuja mina yatsug aidaushkam kajegtuinawai.

18 Uchi ai aidauwaske dushiktuinawai,
 eke yama wajain wekaesatag taig,

dushiktuinawai.

19 Mina shiig kumpauchig aidaush
kajegtuinawai,
mina aneetaig aidau,
shiwagmatuinawai.

20 Watsajan ayatak ukunchik wajasjai,
ashí jakan piipichin iwaakjai.

21 “Mina kumpag aidauwah,
minash wait anenjugtajum,
minak Apajuí waittsati tujutiu asamtai,
wika senchi waitiajai.

22 ¡Make idaitustajum!
atumek kuashta waitkagjume.
¡Apajuí waittsati tujutmatai
waitiag duke ati!” tiuwai.

31

1 Tuja nuigtu Job chichaak:
“Wika nuwa muntsujut aidaunak
makichkish wakejukchatin
atajai tumamiuwaitjai.

2 Wi nuwa aidaun diisan wakegá wekaetaik
Apajuí ashí senchigtin
nayaimpinum puja nunú
minak dekas suwimkan sujumainai.

3 Atumek aents pegkegchauwa nuna
Apajuík suwimkan susa
waitkawai tajume.

4 Wisha wajinak dutikaja
nunak Apajuí dekawai,
tuja wisha wajuk pujajaki
nunashkam nigki dekawai.

5 Wika makichkish tikich aentsnak
pegkegchauk awagmachuitjai,
tuja makichik aentsnakesh tsanugchauwaitjai.

6 ¡Apajuí minak kijin dekapatayai
waji dekapatiama numamtuk dekapá diijus,
mina anentaig pegkeja nuna dekaattawai!

7 “Tuja wi pegkeg pujutan idaikun,
pegkegchauwa nuna wekaetutaik,
tuja wi wakegamun taka wekaetaik,
nuigtu wi kasamkamujun ejetujiajag

8 wi ajakmamua nunak
tikich aents aidau ashí yajuaktinme.

9 Tuja tikich nuwa aishinnun wakekau ataik,
nuniachkunush wijai ijunja pujutaiju nuwen
pakijimatasan wakejuku ataik,

10 mina duwajuk inaku waitkatai wajasti,
nunikmatai aents tikich nugkanmaya aidau
kanutjatnume.

11 Wi nuwajai pegkegchaun
takamsau ataik,
apu aidau minak
suwimkan sujumain ainawai.

12 Wi pegkegchaun takamsau ataik,
jii kegak apea tsaika ajapama numamtuk
mina wajiig aidaunak
ashí tsaika ajapmainai.

13 “Wika mina inakeg aidau segatainakuig,
dita sumamunak tuké umijin ayajai.

14 Wika ditan waitkasuitkunuk,
Apajuí suwimka sujakuish
ayamjumamaitsujai.
Tuja ame takamsamu ujatkata
tujutkuishkam, wika dekaskea nuna
ashí ujamainaitjai,
dutika ai nuna diis
suwimkanak sujumainai.

15 Apajuí mina najatuuwa duke
mina inakeg aidaunashkam najanauwai.
Dutika betek pujutan amasui.

16 Tuja ujudauch aidau
atsumainak segatainakuig,
yaitskek idaisachuitjai,
tuja nuwa waje aidaunash
nujantai waittsatnume
tusanuk idaisachuitjai.

17 Yujumka yuwaknush bitaik aidaunash
ajamtsukek yuwachuitjai.

18 “Makichik múun uchijin
kuitamaina imatixsan
bitaik aidaunak tuke kuitamkauwaitjai.
Tuja waje aidaunashkam
tuke kuitamin ayajai.

19 Makichik aents jáanchji atsujam
tsetsekai jaun wainkunuk,
tuja jáanchji asepamain atsujunashkam,

20 mina uwigjun ujejai jáanch apagbaun
asepakti tusan suyajai,
dutika ai shiig anenjin aajabi.

21 Wika apu chichama epegkin aina nunú
mina kumpag ainakuish,
ditajai ijunjanuk uchi bitaikanak makichkish kajegchauwaitjai.

22 Wi taja nunú dekaskechuitkuig,
mina kuntujun kupigtugtinme,
dutikawag ichiajag ajapatnume.

23 Wika Apajuí suwimkenak ishamajai,
jwaqki wika niina senchijijaig
betekchauwaitjai!

24 “Wika oro kuashat ajutkuish,
nunuapi shiig pujutan
sujustinuk tusankesh,
ima nuig anentaimsanuk
pujukchauwaitjai.

25 Wika wiakuch akunush,
tuja kuichik kuashat ajutkuigkish,
ememaku shiig aneamuk atsugtinai.

26 Etsag nantujai shiig pegkeg ainawai,
27 tujash wika makichkish uumkankesh,
nuniachkunush aents aidau
emtinish nu aidaunak emematmaitsujai.

28 Nuna emematiu ataik,
Apajuí minak suwimkan sujusu amainai,
¡wagki niina umigkachu asamtai!

29 Tuja mina shiwaajunu utugchat ajakuish,
wika dushikchauwaitjai.

Tuja ditan waitkainak
pegkegchaun chichajuinakuish,
wika makichkish dushikjachuitjai.

30 Wika mina shiwajunak makichkish
pegkegchaunmak yumigchauwaitjai,
tuja utusag jaka
tusagkesh tuchauwaitjai.

31 Tuja wijai ijunag batsamin aidau
aents tikich nugkanmaya aidaun
waitkastag tuinakuish,

32 wika nunú aents aidaunak
agá kajigtinme tusanuk idaisachuitjai,
aents tikich nugkanmaya aidau yujaunash
mina jegajui awayan ikannaitjai.

33 “Wika tikich aents aidau
ditá pegkegchaujin
ugmamin aina nuniknukesh
makichkish ugmamchauwaitjai,
tuja uumkan pegkegchaun takamsatag tusankesh anentaimchauwaitjai.

34 Wika aents aidau
dushiktugchagtimepash tusanuk puyatjatsjai,
nuadui wika ashí pan iwainajan takajai,
patatjukchagtimepash tachau asan
mina jegajuig epeminuk pujatsjai.

35 ¡Utusag makichik aentskesh antugtuka tajai!
Wi taja nuna dekaske titinme tusan
papiinum agagjai.

¡Apajuí ashí senchigtina nunú yamai aigkati tajai!
Tuja wi pegkegchaun takamsamu ataik,
papiinum agatjugtinme.

36 Nunú agagbauwa nunak
eme aneasan jukin,
atsejutajjai betek atsejuktatjai.

37 Tuja wi takasbau aidaunak

Apajuín ashí ujaktatjai, dutikau asan,
apu pegkeg utugchatjinchau amaina iman
wajasan Apajuín jegantattajai.

38-39 “Wika mina aentsug aidaunak
makichkish waitkachuitag duwi,
mina nugkajuk pegkegchaunmak yumigtuchui,
wika mina inakeg aidau
ajakmamujinak kasagchauwaitjai,
nuadui nugka tai
ijumja ajakmamu aina dushakam
wake besemag
anentaimkug buutuinsui.

40 ¡Untsu wi taja nunú dekaskechu ataik,
mina nugkajuig trigo
tsapatsuk jagki tsapaktinme,
tuja cebada tsapamainun dupa tsapakti!”,
tusa juna aatus Job ayamjumak chichaka inagnakui.

Tuke Pujuu Jopan aikbau

38

(38.1—42.6)

Job chichaka ashimkamtai Tuke Pujuu aikbau

1 Job chichaka inagnakmatai, dase senchi dasenbaunum Tuke Pujuu
Jopan chichajak aatus tiuwai:

2 “¿Amesh ya asamea
mina dekatjua nunú
dekaskehua nunin anentakmesh
pegkegchaush chichame?

3 Diik minash amina
wajium iwaintugkakah,
nunikam wi yamai
iniastatjam nunú aigkata:

4 Amek wi nugka najanauwaitag,
nunú tsawantaik atsuyume,
untsu dekaskenum dekakmek,
wi nugka najadiag duwish ¿amesh tuwi pujuyume? nunú kame tujutta.

5 ¿Yaki nugkanash múun ati tusash tiyabi?
tuja ¿yaki najanawabi?
duka amek dekatsme.

6 ¿Wajinum chichiajaya nugkash awa?
¿Nugka patami asatnunash
ya kayanash apujtuawaita?

7 Kashikmas pegkejan
etsantug jiiinama nuniai,
yaya aidau aents ijunag
kantamaina numamtuk kantamiagtai,
ángel aidau nantsemianum
nuaduik amek atsuyume.

8 Tuja nayants nugka

ejapeen jiiniuwa nunú
piyag betsakai tusash
¿ya epetkauwaita?

⁹ Wi nunak makichik nuwa uchijin jáanchi
pemepegama numamtuk,
yujagkim pujui dukukan epetkauwaitjai,
dutikan yujagkim
suwé ijikan idaisauwaitjai.

¹⁰ Tuja nayantsak pimu amain aig,
yumi initak jiinaidaun
epenjan idaisauwaitjai.

¹¹ Dutikan chichagkun:
‘Juwig nagkankata, nuigtu
nagkaemakmek piyajaipa;
tuja tsukatbaujum
ishamain waja dushakam
nuigtuk wee pujushtatui’, tiuwaitjai.

¹² “Amek tsawan pegkejan etsantug
tsawagti tusamek makichkish inachuitme.

¹³ Amek nuigtush etsa ashí nugkanum etsanjati,
nunitai aents pegkegchau aidau
suwenum uumjatnime
tusamek inachuitme.

¹⁴ Nunú etsa etsantug jiiinak
nugkanak jáanch kapantuama iman emawai.

¹⁵ Nunitai aents pegkegchau takau aidauk
kashi uumak takamin asag,
nunikchamin dekapenak idayinawai,
wagki tsawai nuniagtaik,
achika suwimak suwam amain asag.

¹⁶ ¿Tuja yumish tuwiyag jiinua
nunú wainkatasamesh,
amesh nayantsa initkenish jegamkayum?

¹⁷ ¿Amesh aents jakau aidau
batsamtain jegamesh wainkaukaitam?

¹⁸ ¿Tuja nugkash wajupa múuntaita
dusha dekamek?

¡Nunú ame dekakmek minash ujatkata!

¹⁹ ¿Tuja tsauptinush
suwejaish tuwi awa?

²⁰ Amek duka dekachu asam
tsauptinuk emamaitsume,
tuja suweshkam emamaitsume.

²¹ ¡Nunú aidaun wi najanauwaitag,
nunú tsawantinig eke
akiinchau asam atsuyume!

²² “¡Tuja wisha yujagminash bicha aidaujaish
tuwig ukuaja duka amek waintsume!

²³ Nunak maaninamunum
aents pegkegchau aidau suwimak suwaku,

yutumtijatnun ukusan pujugjai.

²⁴ ¿Tuja peem peetish itug weawaki?
duka amek dekatsme.

¿Tuja dasesh etsa
minitaiya nuni dasenkash,
itusaya ashí nugkanash jajutuaki?
duka amek dekatsme.

²⁵ ¿Nugka taimunum
yumi saagama numamtuk
yumin yutumtikna dusha yaita?
tuja ¿yaita aents jintan inaktumaina numamtuk,
ipamat pati wetai jinta inaktinush? duka amek dekatsme.

²⁶ Witjai nuna dutikaunuk,
tuja witjai uwejush aents makichkish atsamunum yutumtikaunuk,

²⁷ wagki nunú yutak nugka tutuptinnash
uchupjati, dutikam chijichig tsapaiti tusan dutikajai.

²⁸ Yumi, nuigtu jegashik aina duka
aents apagtin aina nuninchau ainawai. ¡Witjai nuna najanaunuk!

²⁹ Bicha aidauk, tuja jegashik aidauk
aents dukugtin aina nuninchau ainawai.
¡Witjai nuna najankaunuk!

³⁰ ¡Witjai yuminak bichatin
kaya katsugma iman emaanuk,
tuja nayantsa awankenishkam bichatbikajan katsujam emauwaitjai!

³¹ “¡Yaya aidau ijumnag ayá duka
ame dutikachuitme!

¡Tuja amechuitme yaya
ijumnaju aidau sutu tutai,
tunim tutai ditash
kanakag aina nunú umikumek!

³² Tuja ¿amekaitam
makichik yaya múun tsawak
etsanjati timawa nunú etsanmitkaum?
Tuja ¿amekaitam yaya ijumnaju aidau
Osa múun tutaya nunú,
Osa yaijuch tutaya nunujai
wantinkatnume tusam iwaidaum?

³³ Tuja yaya aidau, nantu aidau,
tikich aidau nayaimpinum ayá dusha ¿wajuk buchitainawaki?
duka amek anentainsamek ejemaitsume.

¡Nuadui amek nunú aidau etsantug
nugkan tsaaptin ematnume
tusamek tumaitsume!

³⁴ ¿Amesh yumi yujagminmaya
yutak piyagti tusamesh tumainkaitam?

³⁵ ¡Amek chaajip, peem aina duka,
amina inakmejai betek
umigtuktinme tusamek,
tikich yantamnum wetajum
tusamek tumaitsume!

³⁶ ¿Yaita atash ayumpan,
chigki aina nujai tsawantan dekapeak

shinin atinme tusa tiuwa dusha?

³⁷ Wika yachaitag iman asan,
yujagmish wajupa ayawa nunak dekajai.
Tuja witjai yumi yutumtiknunuk.

³⁸ Wi yumi yutumtikag nunak
nugka yukukuntua nunú chupija
achinig katsujam wajasti tusan dutikajai.

³⁹ “¿Amekaitam león aidau
dita uchijin ayuja ututuakti tusam
yutaiji egatka suum?

⁴⁰ ¡León niina waajin uumak tepes,
nuniachkush dupanum
uumak tepesa, kuntinjin tsekenti
tepejuk maina duka ame dutikatsme!

⁴¹ ¡Chuwagka uchiji aidau
yapajainak buutiagtai,
yutaijin mina segatuina
duka amek sumaitsume!”

39

¹ “¿Amesh dekamek cabra ikamia aina dusha
ejajjukajash, wajupa asag petsajawa?
Tuja ¿japa petsaídaush wainnukum?

² ¡Amek wajupa nantu asag
petsajawa duka dekatsme!

³ Japak petsaktinji tsawan jegajim,
uchijin najaimakug
nugká tepes petsauwai.

⁴ Dutika petsakam chichiag
ikam pujus muumpawai.
Nunik dukujin ukuak
kanaka yaja wenawai,
nunika ataktu wakitkig dukujinig tainatsui.

⁵ “¿Ya burro ikamia aina nunash
waitkaschamu agtinme tusash tiuwaita?

¿Ya ditanash agkan
yujatnash susauwaita?

⁶ Wi ditak uwegshunum,
nuigtu nugka paka
kachi tepaju asamtai,
dupa tsapachu aina nuwi
batsamsatnume tusan etegtuawaitjai.

⁷ Tuja yaaktanmaya aidauk senchi pampainak dakitmain wajaidau asag-
matai,

nuna dakituinak atushat batsatui,
nunidau asag aents aidau
burro tagkumamu aidaun inainak
jyainamunashkam antuinatsui.

⁸ Nunik batsamas dita yuwatnujin
dupan egainak mujanum yujainawai.

9 “¿Amek toro ikamia aina nunuwap
wi takatai yainkag, kiitai
mina tagkuju batsamtain
kajjkgagtatua tusamek tumaitsume!

10 ¿Tuja nugka pukugti tusamek
jigkaja emetuamek waitkamaitsume!
¿Nuiqtush nugka pukugbaun
tsaikti tusamesh tumaitsume!

11 ¿Nunú senchigtin ainakuishkam,
amek dita takagtustinme
tusamek ditakek idaimaitsume!

12 ¿Ame ajakmamu aina
nunak ditaap juuka
ikaunma ijumjutjattawa
tusamek tumaitsume!

13 “Avestruzak shiig aneak,
nanapen awagtumawai,
tujash avestruzak shiijak awajkgatuchui.

14 Tuja avestruzak kamatkan tai,
nuwi petsaka etsa sukuam, nimpak takiagti tusa pachitsuk idainai.

15 Tuja niig makichik aentskesh,
nuniachkush kuntinkesh dajag
tsaikchaintash tusag anentaimtsui.

16 Avestruzak uchijinash
niina uchijichu itugmaina
numamtuk awagnai,
tuja megkaekachaintash
tusagkesh puyatjuchui.

17 Nunak nuniawai, wagki
wi unuimatan susachuitag nuadui,
tuja shiig jintiaja
anentaimtanashkam susachuitjai.

18 Untsu nantaki tupikakug caballo aidaunak
aents nuwi entsatkau aidaujai
juwiachu asamtai dushikiawai,
wagki nii ima senchi tupikau asa.

19 “¿Amekaitam caballo
aidau senchintikaum?
tuja ¿amekaitam caballo kuntujen
intash tumain pegkeg
ajuwama nunú najatuaum?

20 ¿Manchi tsekegama imanik tsekeak,
senchi mayatak aentsun uwakna
nunú ameka dutikam?

21 Caballo aidauk maaniatasa ijumjamak
sapigmakas ejapkabiag,
aents niini entsatkau
aidau shiwagjai igkunia
maaniati tusa tupikauwame.

22 Tuja suntag aidau maanitain yajuakag uminas ijunun wainkush,
ishamtsuk tupikatki jetegame.

²³ Tuja suntag aidau flecha chimpia jutain
caballo aenskam tupikainak
tatagtutaish, ishamchauwai.

Tuja nagki aidau, flecha aidau akenbau
winchantutaish, ishamchauwai.

²⁴ Maaniatatus uwija kachujin umpuiniagtaish,
caballo aidauk jasa ijunmainchau dekapenek,
tupikatiagtai, suntag nuwi entsatkau aidaushkam
kakajus emetmainchau dekapajame.

²⁵ Maaniatnume tusa
uwija kachuji umpuamun
caballo aidau antuinakug,
aentsjai betek pampauwame,
tuja atushat ijuntsag
maaniamu ataik dekafejame.
Tuja suntaja apuji aidau
dita suntajin chichajuinamunak,
suntag aidau pampaidaujai
atushat wajasag antinai.

²⁶ “Tuja pinchu aidau
yaki nanaak yujas
etsa minitaiya nuni yuja nunú
¿ameka amina yachagmin
nuniktinme tusam tiuwaitam?

²⁷ Tuja ¿ameka ukukui aidau
yaki nanaak yujau atinme,
nuninak yaki kayanum pasugmakag
nuwi petsau atinme tusam tiuwaitam?

²⁸ Ukukuik yaki kayanum pujuuwai.
Tuja nunú kaya yaki jiidkauwa nunuwai
nii pujusa ayamjumatai,
jega peejamua numamtina duka.

²⁹ Imanui yaki pujus
yutaijin wainak akaetuki maa yuwame.

³⁰ Ukukuik tuwi jakau
tepawa nuna tuwajui,
tuja uchiji aidauk
nuna neje uduun yuwinak
shiig aneen ainawai”,
tiuwai Apajuí.

40

¹ Nuigtushkam Tuke Pujuu Jopan chichajak:

² “Witjai Apajuí ashí senchigtinun,
amek mina chicham patatjukume,
nuniakum umikchamna nunin diigsaume.
¿Dusha yamaish nunismekek anentaimam?
nunú yamai tujutta”, tiuwai.

³ Tuke Pujuu nuna tusa inagnakmatai, Job ayaak:

⁴ “¿Wisha wainkauchitag juninnush,
wajintuk aiktajame aminash!

Wi tumainuk makichkish atsugtawai.

⁵ Wika kuashat chichakjai,
nuigtu tikich tumainuk atsugtawai”, tiuwai.

Apaju Jopan ataktu awagki tibau

⁶ Tusa tama Tuke Pujuu dase senchi dasenbaunmaya ataktu Jopan chichajak:

⁷ “;Diik ibau wajuwaitkumek,
sapigmatsuk wi amina
iniastatjam nunú aigkata!

⁸ ;Ame pegkeg jumamkum
mina pegkegchauwa nunin jujukiume!

⁹ ;Amekaitam mina nagkaetasu ima senchigtinum?

;Ame chichamugmish
wi chichamu chaagpijai beteka ibaukai?

¹⁰ ;Nunú dekasketkuig, amina imanjum
senchigmejai iwainmamkata!

¹¹ Tuja imanika kajeakmek
katsuntu pujutsuk, aents
emebau aina nunú

suwimak susam inatsakta.

¹² Kame ame ima pegkeg takau asam,
apu emebau aina duka diyamuik
dita inamtaiji aina nunú emegkatjata.

Tuja aents pegkegchau aina
duka tuwi ame waintatme,
dutikakum ijina utsagta.

¹³ Dutikam nugka taim ashí yutuata.

Dutikawamin magkagtin aidau
achikam chimpimama numamtuk,
aents jinau aidau

batsatbaunum batsamsatnume.

¹⁴ Nunú dutikawamin,
niina senchijiniap imanik depetmake titajai.

¹⁵ “Amesh kuntin múun

Behemot tutaiya nunú
anentaimtusa diista.

Wi nunú kuntinun najanauwaitag
dutiksanuk aminashkam najanawaitjame.

Nunú kuntinuk bueyejai betek dupan yuwai.

¹⁶ Niina senchiji aina duka
tuntupega nuwi ashí ajawai.

¹⁷ Untsu ujekeg setug katsugma imanai.

Tuja yaape nawen achitjau aidaushkam,
daek chapikmagbaujai
betek kampujam ainawai.

¹⁸ Tuja ukunchi aidauk,
tubo jiju bronce tutai najanamua imanai.

Untsu bakui aidauk jiju hierro tutai
katsugma iman ainawai.

¹⁹ Wi kuntin aidaun najankauwaitag
nujai ijumja diismash,

nunú kuintinun nagkaesauk
tikichik atsawai.
Nunú kuintinu maumainuk makichkish atsawai,
ima wiki maumainaitjai,
wagki wi niinak najadau asan.

²⁰ Nunú kuintinuk chijichin yusa pujuuwai,
nuadui ibau múun senchigtin ataish,
tikich kuintin aina duka ishamainatsui.
Tuja nii chijichin yuwak tepetai,
tikich kuintin aidauk nuna tentea
batsamas wasugkamin ainawai.

²¹ Tuja ayamsatag takug
numi jagkigtin loto tutai aina
nuna wakentin tepenai,
nuniachkush kuchanum tagkan ayaunum
waigka uumak tepenai bichatjatatus.

²² Numi loto tutai aina
nuna kanawe bikintu emamunum,
tuja numi álamo tutai
entsa akaebaunum tsapaka bikintu emamunum nuwi waig tepenai.

²³ Nujag senchi dujajutaish ishamchauwai.
Tuja nujag dujajua utugmashkam
ishamtsuk tepenai.

²⁴ Nunú kuintinun makichik aentskesh achika,
jii ukuituk wainmachu emamainuk atsawai.
Nuigtush nujiin tigkajua daekai wegak anaa
emetmainuk atsawai.”

41

¹ “Amek semagkauk* agseayaik
makichkish maumaitsume,
tuja wenigkesh jigkatmaitsume.

² Amek makichkish semagkau
nujig jigkatmaitsume,
tuja jagkenum awagkekmes emetmaitsume.

³ “Aminak semagkauk
wait anenjugta tusa
segapakug waitkagmamait sui.

⁴ Tuja nuigtushkam,
amina inakem wajasan,
tuke amina taka takagkawan
jakatin atajai tusag
makichkish tujamait sui.

⁵ “Amek uchi pishakjai
wasugkamama numamtukek,
makichkish semagkaujaig wasugkamaitsume.
Amek makichkish semagkauk
amina nawanjum aidaun
wasugkamtai ati tusamkesh

* **41:1** “Semagkau” tawa duka Job 3.8num nayantsanmaya kuintin múun “Leviatán” tawa nunú kuintinnak tawai.

anaamek apugmaitsume.

⁶ Namaka sujin aidauk
semagkaun sujuktasag
namak sujutainmak ejemainchau ainawai.

⁷ “Amek semagkauk flechayai ijumek
duwapeg chigkagmaitsume,
Tuja arpónkai buuknum
ijuakmesh maumaitsume.

⁸ Ame achika emetuatag tukamamek,
nii depetankui maa maaniakuam pimpikim,
awake anentaimjam atakek
aikchau atajai tusam idaimainaitme.

⁹ Amek itugkanuk semagkaun
depetkag tusamek tiipa.
¡Ayatak wainmawaik
ishamkam jaka iyaumainaitme!

¹⁰ Makichik aentskesh umuchiamak
kajeak ishain wajawai,
tuja niijai maanimainuk
makichkish atsawai.

¹¹ Ashí nugkanmak makichkish
niijai maania depetmainuk atsawai.

¹² “Tuja semagkaun naweg
shiig senchi ainawai,
niig tikich kuntin aina nuna
nagkaesau senchigtinai.

¹³ Niina duwape dupajam wajakin
katsugma nuna iju chigká emestumainuk
makichkish atsawai.

¹⁴ Makichik aentskesh
semagkaun achika emetua
iwaag nai ishain tsakaskatu aina
nuna diigmainuk atsawai.

¹⁵⁻¹⁷ “Niina duwapeg shiig achimjau
dasegkesh waimainchau
kayajai betek katsugmai.
Iman asamtai nuna
chigkamainuk makichkish atsawai.
Nuadui niig ememawai.

¹⁸ Nii jachitbaujig peemjai betek jiinui.
Tuja niina jiig tsawak etsa
kapantun etsantug jiinama imanai.

¹⁹ “Niina nujinia jii keeka jiinui,
tuja nunú jii kega nuwiya
yantsagtuk jiinainawai.

²⁰ Niina nujinia bukuiti jiina duka
olla jinum ekenkam
kuwaak bukuiti jiinama imaniawai.

21 Tuja nii mayatbaujiya
nununú jiiin ekemawai,
tuja niina weniin jii kegaun jiyawai.

22 Niina kuntujeg shiig
kampujam senchi wajaknai.
Iman asamtai aents aidau
nuna diinakug ishamainawai.

23 Tuja niina nejeshkam katsujam
jiju hierro ukuijamu nanaju
katsugmama imanai,
nuadui makichkish tsupimaitsui.

24 Tuja niina aentaishkam
kaya katsugma imanai.

25 Nunú nantaun wainainakug,
tikich senchigtin aidaush
niina ishamainak pisainawai.

26 “Niinak nagkiikesh,
puyajaikish, flechayaikish,
makichkish maumainchau ainawai.

27 Nii diismak jiju hierrok
dupa kagajujai betekai,
tuja jiju broneshkam
numi mamujujai betekai.

Nuadui niinak nunú jiju aina nujai
maanitai najanamu aina
duwik makichkish
maumainchau ainawai.

28 Niig flechan ishamakug tupikatsui,
kayai nagkiamua duka nii diismak
dupa kagajuwai nagkimaina nuninai.

29 Tuja numi kijinai awatmawa duka
nagkushpi awatmaina numamtinai.
Tuja nagki aketmashkam
niig dushikis diyawai.

30 “Tuja japiinak weakug,
nugkanak numi etsakamui taumaina
imatika taumi jintama weawai.

31 Tuja nayantsa kunajin tepeakug,
nayantsanak yumi kuwaak
wajukeama imatikawai.

32 Nunik wegak yuminak tsakigmitkak,
puju winchamtinun saugmitkak ukuawai.

33 Tuja semagkaun niimega nuninuk
tikichik juju nugka juwig
makichkish atsawai,
Wi niinak najanauwaitjai
makichkish ishamkagtuchu atinun.

34 Niig tikich kuntin múun
senchigtin aidaunash ishamatsui.
Niiyai ashí tikich
kuntin aina nuna apujig”,

tiuwai Apajuí.

42

Job Apajuín aikbau

¹ Tuke Pujuu tusa inagnakmatai, Job ayaak:

² “Wika ame ashí
dutikmainaitam nunak shiig dekajai,
ame dutikmainchau makichkish atsawai.

³ Amek makichkish tujintsuk
ame wakegakmek,
ashí dutikmainaitam nuna
dekachua numamtuk chichakag nunak,
ame yachaitam ibauchu asan,
wainkan anentaimkas chichakjai.
Wika ame yacha asam

ashí ame najanamu aidau kuitamam nunak
utujimsanuk anentaimaitsujai.
Wi chichakmag nunak wainkan
dekachiatkun chichakmajai,
nuadui waji pegkeg aina nunashkam
shiig dekamainchau dekapeajai.

⁴ Ame chichagtakum:
‘Antukta wi titatjam nunú,
nunikam aigkata,
wi iniastatjam nunú’, tujutmaume.

⁵ Wika yaunchuk nagkamsan,
amina pachis etsegbaun antin ayajai.
Tujash yamaik ame tujutu asamin,
paantas wainkaja tumain dekapeajai.

⁶ Nuadui wi chichakbaujun
anentaimsan datsajaan, awake anentaimjai.
Nuniakun pegkegchaunap tija tusa
anentaimkun yukunum pujajai”,
tiuwai Job.

Apajuí Jopan yaunchuk aajakua imanuk awajsamu

⁷ Aatus Job chichaka ashimkamtai, Tuke Pujuu Elifazan chichajak:
“Amek amina kumpajum aidaujai mina pachittsajum waitjuau asagmin,
senchi jakegajime. Untsu Jopak mina pachitus dekaskenem chichake.

⁸ Tuja atum waitjuajum nuna tsagkugtugi tujutkugmek, siete toro,
nuigtu siete uwig aishmag aidau yajuakjum, mina inakeg Job puja nuwi
wetajum, nunikjum atumi tudaujum tsagkugnagtinnun nunú kuntin
aidau maaajum nuna neje ashí apeatajum. Dutikawagmin mina inakeg Job
atumin pachipas mina segattatui. Tusa tujutkui atumek mina inakeg Job
dekaskenem chichaka nunitsuk pegkegchau chichaku asajum, suwimak
jumain ajuminig tsagkujattajime”, tiuwai.

⁹ Tusa tiajam Elifaz, Bildad, Sofar aatus Tuke Pujuu tibaunak betek
umikajui. Dutikawagmatai Tuke Pujuu Job sumakbaunak betek umikui.

¹⁰ Job niina kumpaji aidau pachis Apajuín segauwa duwi pujus, Tuke
Pujuu Jopan ataktu yaunchuk aajakua imanuk awajsauwai. Dutikak nuig-
tushkam yaunchuk niina wajiji aidau ajujakua nuni kuashat ikauntukui.

¹¹ Dutikam pujaun niina yachi aidau, umayi aidau, kumpaji aidau, tuja

tikich aents aidau, nii pegkeg pujus wainajakbau aidau aatus shimutkajui ijagsatatus. Nunik jegawagmatai, ditajai ijunag yujumkan yuwinak jiistamawajui. Nunikag Jopan chichajuinak: “Tuke Pujuu waittsati tujamatai waittsaum nunú anentaimsa wake besemag anentaimji”, tiajui. Nuna tusag, nuigtushkam plata aidaun, tuja patakumtai oro najanamu aidaujai aatus maki makichik susajui.

¹² Aatus Tuke Pujuu Jopan nii waitus nagkaikiuwa duwi nagkamas yaunchuk ajujakbaun nagkagas ikauntukui. Niina tagkuji aidauk: catorce mil uwig, seis mil camello, dos mil baka nugká pukuu aidau, mil burro aatus ajujakui. ¹³ Nuigtushkam diecisieste uchin akiauwai, catorce aishmagkun, kampatum nuwan. ¹⁴ Nawanji emkaunak Jemimá* adaikauwai, untsu nuwi patatkaun adaikauwai Quesiá† tuja nuwi patatkaun adaikauwai Queren-hapuc‡. ¹⁵ Nunú nuwa aidauk ashí nugkanmak dita ima shigmauch aajaku ainawai. Tuja Job niina wajiji aidaun, tagkuji aidaun, nugke aidaun, aatus ashí niina uchijinu atinme, tusa tiuwei. Dutikak niina nawanjinashkam ditashkam jukitin atinme tiuwei.

¹⁶ Apajuí etsagajua duwi nagkamas Job ciento cuarenta mijan pujusui. Nuadui uchiji aidau, nawanji aidau, tsakaka uchi akigbau aidau, ama tijaji aidaunashkam wainkauwai. ¹⁷ Nunik pujus múuntuch wajas jakauwai.

* **42:14** “Jemimá” tawa nunak hebreo chichamnumak “paum” taku tawai. † **42:14** “Quesiá”, tawa nunak hebreo chichamnumak “canela”, (tawaip) taku tawai. ‡ **42:14** “Queren-hapuc” tawa nunak hebreo chichamnumak “kugkuin aidaun chimpitai pegkejuch” taku tawai.

Salmos LIBRO I

1

(Salmos 1—41)

Dekaskenum shiig aneasa pujamu

¹ Aents pegkegchau aidau
chichainamun antujus umiju wekaechauk
shiig aneas pujustinai.
Tudau aidau takatan
wakejus taka wekaechauk,
tuja Apajuín pegkegchau chichajuidaujai ijunag,
ditajai betek chichá wekaechauk
shiig aneas pujustinai.

² Wagki niig nuna wekaetutsuk,
Apajuí chichame umikta
timauwa nuna umiak,
kashish, tsawaish tuke nuwig
anentaimas pujau asa.

³ Nuadui nunú aentsuk makichik numi
yuminum ijusa ajaamu,
pegkeg, senchi nejen,
dukesh kaketsama imanai.
¡Iman asa ashí nii takamuji aidauk
shiig pegkeg ainawai!

⁴ Untsu aents pegkegchau aina duka
nunú aentsjaig betekchau ainawai,
nuadui ditak ajusa wampujin dase umpui ajapama numamtin ainawai.

⁵ Aents pegkegchau aidaunak
Apajuí dita takasbaujin
diijus suwimkan susatnai.
Tuja aents pegkejan takau aidau
Apajuí pujutain ijunagtina
nuwig ditak wayachgtinai.

⁶ Tuke Pujuuk aents
pegkeg aidaun kuitamui.
Untsu aents pegkegchau aidauk
dita pegkegchaujinig waittsagtinai.

2

Ametme mina uchigmek

¹ ¿Wagka aents pegkegchau aidaush
Tuke Pujuujai shiwagmagainakush
ijunjash pampandayinawa?

¿Wagka chicham jegamainchaunash
wainkash tuu yujawa?

² Nugkanmaya apu aidau
yaakta apuji aidaujai ijunag

Apajuín kajejuinak, nii etegka
 apu adaikauwa nunashkam
 shiwagmainak wakenmataik
 chichaman umijuinawai.

³ Nuninak senchi untsunkag:
 “¡Achikbaujai betek batsatag
 duka ankanmagawagmi!
 ¡Tuja jigkaja emetuamujai betek
 batsatag dushakam
 agkanmagawagmi!” wajainawai.

⁴ Imatiagtai Apajuík niina pujusa inamtaijin
 nayaimpinum pujus dushikiawai.

⁵ Dutikak kajejuk uwakeawai,
 untsu nuni senchi kajejuk chichajak:

⁶ “Wi etegkan apu emamugnak
 muja etegkamua nuwi Jerusalén
 pujus inamjati tusan
 wi apusajai”, tawai.

⁷ Tuja Tuke Pujuu mina tujutma
 nuna etsekatjai.

Tuke Pujuu chichagtak:
 “Ametme mina uchigmek,
 amek wi akiinati tima akiinawaitme.

⁸ Ame wakegamu segatta,
 Wi nunak imatiksasuk ashí nugkanmaya
 aents aidaun amastatjame aminu atinun.

⁹ Ichinak najanamu shigki basegbauwai
 awati tsaimaina numamtuk,
 apu pegkegchau aina duka
 ame tsaika utsagatme”, tujutmae.

¹⁰ ¡Apu nugkanum inamin aidauwah,
 shiig antuktajum, nunikjum
 juju chicham shiig unuimagtajum!

¹¹ Nuniakjum Apajuí
 eme anentsajum umigkujum
 shiig aneasjum ememattajum.

¹² Apajuí eme anentsajum ememattajum
 kajegtamkainum, nii kajegtamkamtaig
 jinumain ainagme, wagki nii kajeamujig
 makichkish imijtumaitsui.

Aents Apajuíyai kajinas anentaimaidauk
 nii kuitamsam pujuidau asag,
 shiig aneas pujusagtinai.

8

Apajuí imanjiya nunú aentsu pujutjijai

David kantamamu

¹ Tuke Pujuuwah, ametme iina apuji,
 ashí tikich aidau nagkaesau muunmek.

¡Amina daagmek
 ashí nugkanum antunawai!
 ¡Amina imanjumek nayaim
 múunta nuna nagkaesauwai!
 2 Amina shiwaajum kajegtamainak
 mantamatag tinu aina duka,
 uchi tsakat aidau,
 uchi muntsu muntsuaku aidaujai
 shiig pegkegchin kantamaina duwi
 amina senchijum iwaintukam itatmikajume.

3 Ame nayaim najanamua
 nuna diisan, tuja nantu,
 yaya aidaujai ame najankamu aidau
 nayaimpinum ayá nunashkam wainkun

4 anentaimsan:
 ¡Aents aidautik pegkegmakesh ainatsji!
 ¡Tikima wainkauch ainaji!
 Nunin ajinish ¿wagka tujash
 puyatkagtusmesh kuitamkagtame?

5 Aentsuk ángelchawashit tumain najanauwaitme.
 Nuadui apu kuitamaina
 imatiksam kuitamam duka dutikame.

6 Tuja ashí ame najankamu aina duka
 ashí nii idaitusuitme, dutikakum
 tikich ame najankamu aina
 nuna nagkaesau emam apusauwaitme.

7 Dutikam uwig aidau
 buey aidau, kuntin ikamia aidau,

8 chigki yakí nanamin aidau,
 namak nayantsanmaya aidau,
 tuja tikich kuntin aidau
 nayantsanum ayá duka
 ashí nii idaitusuitme.

9 Tuke Pujuwah, ametme iina apujimek,
 ametme ashí tikich aidau
 nagkaesau dekas muunmek.
 ¡Amina daagminak
 ashí nugkanum dekainawai!

14

Aents pegkegchau aidaun pujutji

David kantamamu

1 Aents anentainkachu aidauk:

“Apajuik atsawai”, tuinawai.

Nuadui dita anentainig

ima pegkegchau aina nunú takatak ajuinawai,

nuadui dita takamuji aina duka shiig dakitmainai.

Tiki makichkiuchikesh

pegkejan takauk shiig atsawai.

2 Apajuik aents aidaunak

nayaimpinum pujusag
diyawai, makichkikesh
shiig anentaimkau Apajuí
umigmain atsuash tusa wainkatatus.

³ Tujash aents aidauk
pegkegchau takatan yujajui,
nunidau asag ashí betek tunamakaje.
¡Tiki makichkikesh pegkejan
takauk shiig atsawai!

⁴ Pegkegchaun takau aina
duka anentaimainatsui.
Pag yuwa wamak amutiama numamtuk
mina aentsug aidaun amuinawai.

Nunú aents aidauk
Apajuí yainkati tusagkesh makichkish
Tuke Pujunak segachu ainawai.

⁵ Nunú aents pegkegchaun takaina duka
sapigmainak kujaidiagtatui.
Tuja Apajuík aents ima niina chichamen
umin aidaunum pujawai.

⁶ Atum pegkegchau aidautijum
aents ujudauch ememachu aina nunú
atsaneakjum dushikiagme,
tujash Tuke Pujuu ditanak kuitamui.

⁷ ¡Israel aents aidaun uwemtijatin utusag
Siógka mujajinia taawa! tusan wakegajai.
Tuke Pujuu niina aentsji aina nuna
pujutjin iwagtugmataig,
Jacob Israel daagtina nuna
uchiji aidauk ashí shiig aneasagtinai.

15

Apajuí jee pegkegmanum aents aidau pujumain

David kantamamu

¹ Tuke Pujuuwah,
¿aentsush wajuku aidauwa
amina jem pegkegma
nuwish pujumainaita?
Tuja ¿wajuku aidauwa muja ame etegkamua
nuwish pujumainaita?

² Nuwi pujusagtina duka
aents pegkeg bakumamainji
atsugbau, pegkejan takau,
waitjutsuk dekaskea nuna chichau;

³ tikichnash pegkegchaun chichagchau,
niina kumpajinash pegkegchau awagmachu,
tuja nii ijutkamu aidaunash inatsauchu;

⁴ aents Apajuín dakitaujaig
makichkish ijunchau,

untsu Tuke Pujuun eme anentaunak
niishkam eme anentus diin,
tuja waitiakush
nii anagkagtuamunak betek umin.

⁵ Kuichkin tsagkatkagtukash
ewaekam akigkata tusa waitkagkagtuchu,
tuja aents takamsachu aig,
tsanumjugta akiktagme tamash dakitin.
Nunú aents imanis puja duka shiig aneas tajimat pujustinaí.

16

Apajuí mina sujusua nuna nagkaesau pegkejak atsawai

David agagbau

¹ Chah, Tuke Pujuuwah, kuitamjukta,
wika aminí ejabatnak egajai.

² Wi amina chichagkun:
“Ametme mina apug
pegkegnum yainnumek,
tikich amea ibauk atsawai.”

³ Ame chichagtakum:
“Mina aentsug nugka batsata nunú
minak umigtuidau asag
shiig awajtuinawai.

⁴ Untsú tikich aents aidau apajuíchun apajuímainak niina umijuina duka
senchi waittsagtinaí”, tame.

Nuadui wika nunak
tuké etsagjashtinaitjai.
Tuja nunú apajuímtai aina
nunak makichkish emematchattajai.
Nuna daajinakesh makichkish adaikashtinaitjai.

⁵ Tuke Pujuuwah,
ametme mina ashí sujinmek.
Ame sujame kuashat pegkeg aidau,
mina pujutjua duka aminí awai.

⁶ Nugka shiig pegkeg aidau
makichkish wi anentaimtukachamu ajutui,
Apajuí anagtuamu wi jukitin ajuta duka
dekas shiig pegkejai.

⁷ Tuke Pujuunak shiig pegkegnum chichagtinaitjai,
nii minak pegkegnum jintinjau asamtai.
Dekas mina iyashjunash jintinjutui,
dutijak kashishkam esetawai.

⁸ Tuke Pujuu mina Apajuíjua duka
tuke wijai ijutkau pujawai.
Wika niini emetuman wajau asamtai, makichkish ajunjashtin ainawai.

⁹ Wika shiig aneasan dakunkut pujajai,
ima nayaig kajintsa anentaimsan pujuttajai.

¹⁰ Apajuíjuh, amek minak
jakati tusamek idaituschattame,
tuja ipegkegmaitak ukumatainum ukusam
kaugti tusamesh idaituschattame!

11 Jinta pujutnum ekagtina nunú
ame iwaintugkattame.
Ame pujamugmia nuwig
shiig dakujamu awai.
Aminí awai dakujut tuke atina nunú.

19

Apajuí imanjiya duka nii najankamu aina duwi dekanui

David kantamamu

¹ Apajuí imanjiya nunak
nayaimpia nunú ujabatui,
nayaim wigkaya nunú wainku,
dekas Apajuíyap najanauwaita taji.

² Tsawaiya nunú, kashia nujai,
Apajuí imanjinak tuke etsejuinawai.

³ Chichainachiatak,
makichik chichamnakesh tuinachiatak,
tuja chichamujigkesh antugchatayaitak,

⁴ ashí nugka nagkatkamunum
dita chichainamuk antugainawai.
Tuja nayaimpinum etsa ekemsatnunak
Apajuí umikui.

⁵ Etsag nuwi eketu makichik aents
yama nuwan nuwatuk
nii kanutaijin pujau
jiinama numamtuk kashikmas jiinui.

Nunik jiinki aents
tupikain uminas shiig aneas
wemaina numamtuk weawai.

⁶ Nunik nayaim tikich yantamnumia etsa jiinki,
tentea wea weakua,
yaja tikich yantamnum jegaa kintamui.
Nuadui etsa etsantun uwentumainuk makichkish atsawai.

⁷ Tuke Pujuun chichamega duka
yamajam pujutan sukagtau asa, shiig pegkejai.
Tuke Pujuun chichamega duka
waitchauwai, shiig dekaske,
wagki nunú aents
kakagchauchin unuidau asa.

⁸ Tuke Pujuun chichame
umiktina duka pegkejai,
anentainum dakujutan sukagtau asa.
Tuke Pujuun chichame umiktina duka
dekas shiig pegkeg tsaaptinun anentaimtikagtinai.

⁹ Tuke Pujuu puyatjusa
umigbauwa duka shiig pegkejai,
tuja nii chichamega dusha
tuke megkaekashtinai.
Tuke Pujuun chichame umiktina duka waitchauwai,
dekaskenum ashí pegkejai.

¹⁰ Nunú chichamak oro tsuwatjinchau

shiig pegkeg akika nuna nagkaesauwai,
tuja dapa yumiji yumimitu pegkejama
nuna nagkaesau shiig pegkejai!

¹¹ Wika amina inakmetag duwi pegkegchaun takasai tujutu asa,
amina chichamjumea nunú jintinjawai.
Nunú chichaman umiauk shiig pujustinai.

¹² Makichik aentsuk niina tudaujinak
nigki anentaimsag dekgamamaisui.
Nuadui, Tuke Pujuuwah,
jwi pegkegchaun takamsatjai tusan
wakegachiatkun takamsamug aidaush tsagkugtugta!

¹³ Tuja mina ememataijush emegkatjukta.
Mina emematug wagagtuki, idaitusaipa.
Aatsan wisha ibau tudau ajuta
nuna agkanmagatjai.

¹⁴ Tuke Pujuuwah, mina chichamjush
mina anentaimtagjai,
ame diismash pegkeg, wakemain ati.
Chah, Tuke Pujuuwah,
ametme mina ayamjutkam uwentijinmek.

22

Waitiamunum pujusa Apajuí emematku kantabau

David kantamamu

¹ ¡Apajuíjuh, Apajuíjuh!
¿Wagka minash idaitusume?
¿Wagka taamesh uwentijatsme?
¿Wagka wi imanikan amina segaakun
buutaish pachittsume?

² Mina Apajuíjuh, tsawaish,
kashish untsuajame,
imatjamash aigtsume.
¡Wi ayabaujuk atsugtawai!

³ Tujash ametme pegkegmamek,
ametme apumek, iman asamin
Israel wegantu aidau emematjamainawai.

⁴ Iina apachji aajaku aina duka
aminí kajinmamsag
anentaimajaku ainawai;
aminí kajinmamsag
anentaimaidau asamtai,
agkanmitkauwaitme.

⁵ Yainkata tusa segapainakuish,
ame agkanmitkauwaitme,
tuja aminí kajitmamsag
anentaimaidau asagmatai,
tsanugmek idaisachuitme.

⁶ Tuja wika aents tamak amaitsujai,

wika bagajai betekaitjai.

¡Wika aents aidaun dushiktaiyaitjai!

⁷ Mina waituidauk dushijuinawai,
nununak buuken pegainawai.

⁸ Nuninak: “¡Tuke Pujuuwai
kajinmamas anentaima pujuuwe
nuadui, nii taa uwemtikjati!

¡Imatika aneau asa, nii uwemtijati!” tuinawai.

⁹ Tuu yujatnume:

Ame minak akiinati tujutiu asamin,
mina dukuju waken
egkemkan akiinawaitjai.

Tuja ame minak mina dukuju kuntujin
patattsam kuitamjukmayume.

¹⁰ Duwik nagkamsam wi akiintsag,
ame minak kuitamjukuitme.

Tuja mina dukuju wakeen pujubiag
duwi nagkamsamek
mina Apajuig aayume.

¹¹ Ima minakek idaitusaipa,
wika waittanum jegantan pujajai.
Tuja mina yainmainuk atsgutawai.

¹² Mina shiwag aidauk,
baságnunia toro kajen aina
iman tententuawaje.

¹³ Dutijuawag ikamyawa kajen
shinuwama imatuinak
esattatus tsekenjuinawai.

¹⁴ Tuja wika yumi ukagag
megkagama numamtinaitjai;
mina ukunchig aidauk
akaejaujai betek wajase.

Tuja mina anentaijuk
wiya yumimeaujai betek wajase.

¹⁵ Mina wenujuk ichinak yama inajuamu
bukuama nunin wajase.
Mina idaijush kayakmataijui nujamjutkae.
¡Jakaujai betek minak
nugka yukukuntunum aepjukiume!

¹⁶ Aents pegkegchaun takau aidau
yawajai betek tuwagtukaje;
tuja mina dawegnak,
mina uwejujai ichinjujaje.

¹⁷ Mina ukunchig aidaunash
pan wainmain dekapeajai;
tuja mina shiwag aidauk
ayatak diiju batsatui.

¹⁸ Mina jáanchjun jujutkiag, yana daajig jiinkiti,
nunú jukiti tusag,
nunú dutika dekatain

wasugkamainawai.

¹⁹ Tujash Tuke Pujuwah,
ametme mina senchimtijinmek.
¡Tupanjutsuk, wamak taam yainkata!

²⁰ Puyajai ijutiag mantuawainum
minash agkanmitkajuata.
Yawajai betek aina nunú
maatnume tusamek idaitusaipa.

²¹ Leónjai betek kajejn aina nunú mantuawainum ayamjuktata.
¡Toro kajejn kachujin
magkagtina iman aina nunú
mantuawainum ayamjuktata!

²² Ame ayamjuktamin, wi amina pachisan
mina yatsug aidaun ujaktajai;
dutikan ditajai ijunjan
amina emematkun kantamatjai.

²³ ¡Atum Israel aents aidautijum,
Tuke Pujuu eme anentin aidautigmek,
Niina senchiji anentaimtusjum ememattajum!

²⁴ Apajuik ujudauch aidau waitiamun
wainiatkug waittsatnume tusag
pachitskek idaitsui.
Tuja uumjutrakesh uumjuchui.
Yainkata tusa segamak antujui,
nunik betek yayawai.

²⁵ Apajujuh,
ima aminak ememattagme,
amina aentsjum eme anenjamin aidau
kuashat tuwakbaunum nunak umiktatjai.

²⁶ Ujunauch aidautigmek
yutai yuwajum shiig ejemagtajum.
Tuja Apajuí wainkatasa
egautigmek nii ememattajum,
nuniakjum kuashat mijan pujustajum.

²⁷ Ashí aents tikich nugkanmaya
ditash niimtin aidau,
chichamnash tikich
chichaman chichaaku aidauwah,
Tuke Pujuu kajimatkipajum.
Niiyai jeganjum,
¡tikishmaja pujusjum ememattajum!

²⁸ Tuke Pujuuwai apua duka,
iman asa ashí nugkanum inamui.

²⁹ Shiig atsumkas pujautigmesh,
tuja ashí jaka pujautigmeshkam,
ima Apajuíya duke tsuntsumjuajum etsagjatajum,
wagki ima atumkek
pujutak jukichu asajum.

³⁰ Wi wegantu aidauk
Tuke Pujuun emematuinak,
tuké niina pachisag etsejiagtin ainawai.
³¹ Nuninak atakea duwi
akiinawagtina nunashkam
Apajuín takatji pegkeja nuna,
kuashat wainchatai aidaun
iwainajua nujai pachisag ujakagtinai.

23

Apajuí minak

*aents uwija kuitamnujai betek
kuitamjawai*

David kantamamu

¹ Aents uwigjin puyatjus
kuitamna numamtuk
mina kuitamjauk Tuke Pujuuwai,
nuadui wi atsumamuk atsugtawai.

² Aents niina uwigjin chijichi pegkejan
ayu ayugkawa pimpiagtai,
yajuak bikintunum ayamtikama numamtuk,
Tuke Pujuu minak ayamtijawai.
Tuja kitamamun uwagti tusashkam
entsa pegkeg wiyakunum ejetawai.

³ Niig tuke anenka ibau asa,
wi pimpitaishkam ichichtawai,
dutijua pujut pegkegnun etawai.

⁴ Nugka ségaju ishamain
suwenum nagkaemaknush,
ame wijai wekagu asamin, ishamkashtatjai.
Uwija kuitamin uwigjin ayamjuktatus
ushujutaijin takus wekagama numamtuk,
amek mina ayamjutkatasam wekaeme.
Nuadui jamainnum jegaknush ishamkashtatjai.

⁵ Mina shiwag kajegtin aidaun emtin,
ame minak yutai pegkeg aidau umigtame.
Aents ipaamujin shiig anentus juwak
buuken kugkuinai nijau aina imatiksam
minak shiig awajtukume.
Umutai umikbau pinignum aun
aents wainak shiig anegama numamtuk,
minashkam shiig anemtijusume.

⁶ Amina anenkagmia nunú,
wait anenkagtutaigmijai
ashí tsawantai tuke uyuuntawai.
Tuke Pujuuwah, wika
ame pujam nuwi tuke pujustinatjai.

24

Ashí najankamu aina nuna apuji

David kantamamu

¹ Nugkak ashí Tuke Pujunui,
nunú nugkanum ashí ayá duka,
nuwi batsamin aidaujai
ashí niinu ainawai.

² Wagki nugka tujig asatnunak nii umikui,
dutika nayantsanum,
namak aidaunum aatus
emetug idaisauwai.

³ Tuke Pujuu mujaji etegkamua nuwish
¿yaki wakainta?

Apajuí jee pegkegma imannummash
¿yaki wayash pujusainta?

⁴ Nunak aents pegkegchaun takachu,
anentai pegkeg,
dakumka najanamun emematchau,
umikchatnaitak tsanumak
Apajuí daajin adayas
dekas umiktatjai tuu wekaechau,
nuwig wayawagtinai.

⁵ Nunú aentsnak
niina apuji Apajuíya nunú uwemtijatnai.
Tuja niinak Tuke Pujuu
pegkegnum yumigkig,
ayamjuk shiig pujutan susatnai.

⁶ Tuke Pujuu, Jacopa Apajuíjyah,
aents amina egapaidauk,
dutika yayaam agtinai.
Tuja amina segapaina nuna uchiji aidaushkam
dutiiksaik yayaam agtinai.

⁷ ¡Jerusalégka waitijiya nunú ujaitajum!

¡Yaunchuk waitai aajakua

nunú ujai idaisatajum!

¡Apu pegkejam niina imanjin nayaimpinum,
nugkanmash inamna nunú wayattawai!

⁸ Apu pegkejam niina imanjin nayaimpinum,
nugkanmash inamna dusha ¿yaita?

Duka dekas iina apuji

Tuke Pujuu niina shiwaajinash ishamchau,
wajiuwa nunuwai.

⁹ ¡Jerusalégka waitijiya nunú ujaitajum!

¡Yaunchuk waitai aajakua

duka ujai idaisatajum!

¡Apu pegkejam niina imanjin nayaimpinum,
nugkanmash inamna nunú wayattawai!

¹⁰ ¿Yaita nayaimpinum,
nugkanum inamna dusha?

¡Duka Israel aents aidaun Apujiyai!

¡Duka Tuke Pujuu ashí senchigtina nunuwai!
 ¡Niiyai dekas apu pegkejam,
 niina imanjin nayaimpin, nugkan apujiya nunú!

27

Apajuíyai mina tsaaptinjuk, mina uwemtaijuk

David kantamamu

¹ Tuke Pujuuwai mina tsaaptinjuk,
 Tuke Pujuuwai mina uwemtaijuk,
 Tuke Pujuuwai mina pujutjun kuitamjutuk,
 nunin aish ¿yanak wisha ishankainja?

² Aents pegkegchau
 mina shiwag aina nunú,
 ijunainawai mina mantuawagtatus,
 tujash ditak tukumak iyajag jinuinawai.

³ Kuashat suntag mina tententuinakuish,
 wika ishankashtatjai,
 tuja mina jetetkagtatus uminainakuish,
 wika puyattsuk pujuttajai.

⁴ Ima makichkia nunak
 Tuke Pujun segabiajai,
 tuja wika ima makichkia nunak wakegajai:
 Wika iwaku pujag duikik
 kashi kashinig Tuke Pujun emematkun
 niina jee pegkegma nuwi
 pujustatajai, niina pegkegmajiya
 nuna wainkatasan.

⁵ Tsawan utugchat ajuttaish,
 Apajuí niina jee pegkegma nuwi uugkattawai,
 Tuja kaya muunnum waka
 uwemaina numamtuk uwemtijugtatui.

⁶ Nuadui mina shiwag aidau
 tententuinakuish, ishankashtatjai
 Apajuí depetmikaju asamtai.
 Nuadui kuntu maan
 Apajuí jee pegkegma nuwi
 apeakun niina ememattatjai;
 shiig aneasan senchi kantamkun
 Tuke Pujun ememattatjai.

⁷ ¡Tuke Pujuuwah,
 amina segajame, antugtukta!
 ¡Minash wait anenjujam, aigkata!

⁸ Mina anentaig chichagtak:
 “Apajuí egakta”, tujutui.
 Nuadui amina wainkatasan egagme.

⁹ ¡Wait aneasam uumjutkaipa!
 ¡Kajegtukam aigtsuk idaitusaipa!
 ¡Ima ameketme mina yainnumek!
 Nuadui mina ayamjutmain atsugtaigkik,
 ima minakek idaitusaipa,

wagki ametme mina Apajuíg uwemtijin.

¹⁰ Mina apag mina dukugjai
ima minak idaituinakuish,
Tuke Pujuuwah,
ame minak jujukim kuitamjuktinaitme.

¹¹ Mina shiwag aidau egatuinawai,
nuadui Tuke Pujuuwah,
amina jintim pegkeja nunú iwaintugkata,
tuja wisha wajuk pujumainaitja nunú tujutta.

¹² Mina shiwag aidau dita wakegamujin uminak,
maatnume tusamek tsagkamjukaipa,
mina shiwag tsanumin aidau nantagtujaje.

¹³ Tujash wika eke jatsuk
iwaku juju nugka juwig pujusan,
amina pegkegmagnia nuna
wainkatnunak shiig dekaikai.

¹⁴ ¡Tuke Pujuuwai
kajinmamsam anentaimsata!
¡Ishamkagtutsuk, ichichmamjata!
¡Ehe, dekas ima Tuke Pujuuwaig
kajinmamsam anentaimsata!

32

Tudau etsegtumaka tsagkugnamu

David kantamamu

¹ Tudauji ashí tsagkujamua duka
shiig aneastinai.

² Aents pegkegchau takatan
anentaimtus wekaetuchuk shiig aneastinai.
Tuja tudauji ashí tsagkujamushkam shiig aneastinai.

³ Wika mina tudajun etsegtumachkunuk,
wake besemag pujau asan ayatak jamaijai.

⁴ Nuadui ame dekapjau asamin,
tsawaish tuja kashish
senchi waitmajjai.

Yagkug etsa sukuam kagama
numamtuk dekapmamkun,
kakaumainchau dekapmajjai.

⁵ Nuniakun mina pegkegchaugnak,
makichkish uutsuk etsegtumaktajai
tusan amina ashí ujakmajjame,
nuadui ame mina tudajuk
ashí tsagkugtugmayume.

⁶ Nuadui amina umigtamin aidauk,
waituinakush amina segapainawai.
Nuadui nujag dujajak
nugka punag weakush,
ditanak amaigkashtinai.

⁷ Ametme mina ejamataigmek,

ishamainnumash ame kuitamjame;
nuadui ame agkanmitkajuamun anentaimtusan
shiig aneakun, kantamjagme.

⁸ Apajuí chichaak:
“Wi aminak diyakjame,
nuadui amina unuinagtasan jintintuattagme,
tuja wiki jintan inaktusan kuitamkattagme.
⁹ Nuadui caballo, burrojai anentaimchau
asantai, jagken jijui jinka emetua
mai japia, mai japia,
awajam wegama numamtinuk, amek aipa”,
tujamui Apajuí.

¹⁰ Aents pegkegchaun takau aina duka
kuashat waituinawai.
Untsu ima Tuke Pujuuwaig
kajinas anentaimaina nunak,
niina anenke múunta duwi
tuke ijik kuitamui.

¹¹ Aents pegkeg,
tuja takatjish pegkeg aidautigmek,
Tuke Pujuuwai shiig dakujustajum,
¡Nuniakjum nii emematkujum shiig aneasjum senchi kantamjuatajum!

33

Shiig aneasa Apajuí emematku kantamjamu

¹ Aents pegkeg aidauwah, shiig aneasjum
Tuke Pujuu emematkujum kantamatajum.
Aents pegkeg aidau kantabauk yajautsui.

² Arpa awatku kantamtai kantamkujum
Tuke Pujuu see titajum.

³ ¡Kantamtai pegkeg aina nunú
kantamkujum nii ememattajum!
Tuja yamajam kantamtai
kantamkujum nii eme anentsajum
shiig aneakjum untsumtajum.

⁴ Tuke Pujuun chichamega duka
waitchauwai, shiig dekaske,
nuadui nii tibauwa duka ashí betek uminui.

⁵ Tuke Pujuuk pegkeg takata nuna
dekaskea nujai aneawai.
¡Nuadui niina anenkega duka
ashí nugkan jamag awai!

⁶ Tuke Pujuuk ima niina chichamenig
nayaim aidaun, nantu, etsa, yaya aidaun
aatus ashí najankauwai.

⁷ Apajuíyai kucha múun aidaunmayan
yumi yajuak makichkinmak ijumjauwa duka.

⁸ ¡Aents ashí nugkanmaya aidautijum
Tuke Pujuu eme anentsajum umigkatajum!

9 Wagki nii niina chichamenig
ashí najankauwai.
Tuja nii nunikti timauwa duka imanisag
makichkish wajukachmin wajas asauwai.

10 Tuke Pujuuk aents pegkegchau
tikich nugkanmaya aidau
pegkegchaun dutikatag tusa
anentaimtugbaujin betek umikti
tusag ayatkek idaitsui.

11 Untsu Tuke Pujuu nuna dutikatjai tibauwa duka
makichkish yapajinchauwai.

12 Aents aidau Tuke Pujuuwai dekas iina
Apajuíjig tuina duka
shiig aneasag pujusagtinai,
wagki midau ati tusa etegkamu asag.

13 Tuke Pujuuk nayaimpinum pujusag
ashí aents aidaunak diyakui.

14 Nii puja nuwi pujusag
aents nugkanmaya aidaush
wajukenawa nunak ashí wainui.

15 Apajuíyai iina anentain najadauk,
nuadui ashí ii takamunak diigtamkawai.

16 Makichik apua duka
niina suntaji aina nujaig
ayamjumakag uwemaitsui,
tuja aents aidaushkam
niina senchijinigkik ayamjumamaitsui.

17 Tuja caballo aina duka
senchigtin ainayatkush,
aentsu ayamjukag uwentikmaitsui.

18 Untsu Tuke Pujuun eme anentus,
ima nayaig kajinmamas anentaimaina
nunak nii tuké kuitamui.

19 Tuja nujan tepeamtaish,
nujantai jakati tusag idaitsui.

20 Ii aidautik Tuke Pujuuwai kajinmamsa anentaimji,
nuniajin ¡nii kuitamjamak yaimpaji!

21 Iina anentain Apajuí anentaimtusa shiig aneaji.
Nuniaku niina daaji pegkegma nuwi
kajinmamsa anentaimji.

22 ¡Tuke Pujuuwah,
aminí anentaimsa pujau asajin,
amina anenkagmia nunú uyunkagtusti!

34

Apajui wait anenkagtamu anentaimtusa kantabau

David Abimelec maatag tama mantuawai tusa tsanumak imaanjaujai betek wajatai, jiiki awemam pujus agagbau

¹ Wika Tuke Pujuunak kashi kashinig
pegkegnum chichagkun,
tuke ememattinaitjai.

² Wika Tuke Pjuuwai eme anenmamjai;
nunú antukjum ememachu aidautigmek,
shiig aneastajum.

³ Tuke Pjuuu daaji múunta nunú
ashí ijuntusaja emematiagmi.

⁴ Wika Tuke Pjuun segabaijai yainkati tusan,
dutika ai sapigmamujun agkanmitkajuabi.

⁵ Tuke Pjuuwai anentaimas pujuidauk,
shiig aneasag pujuinawai,
nuadui datsan ipatmak achagtinaí.

⁶ Wika wainkauchitjai,
nuniau asan Tuke Pjuun segabaijai.
Tusa segai nii antugtuk,
wi waitiamujun agkanmitkajuabi.

⁷ Aents Apajuín eme anentus umijin aidaunak
Tuke Pjuuu aentsji ángel awemamua nunú
kuitamui.

⁸ Tuja Tuke Pjuush dekas pegkejashit tusajum
dekaatasa wakegakjumek dekapsatajum:
¡Aents Apajuíyai kajinmamas anentaimaidauk,
shiig aneas pujusagtinaí!

⁹ Tuke Pjuunu atajai tumamiu aidautigmek,
nii eme anentsajum ememattajum;
wagki niina umijuidauk makichkish atsumchagtinaí.

¹⁰ Wiakuch aina duka ujudauch wajasag
nujantai waituinawai.
Untsu aents Tuke Pjuun egau aina duka
tuke waittsachagtinaí.

¹¹ Mina uchig aidauwah,
minai minitajum, nunikjum antugtuktajum,
Tuke Pjuuu umigtan wi jintituatjime.

¹² ¿Kuashat tsawan pujustasamesh wakegamek?
Iwaku pujusam shiig takakum
dakujustasamesh ¿wakegamek?

¹³ Nuniakmek,
pegkegchau chichamak chichatsuk pujusta,
tuja wait aina duka makichkish chichakaipa.

¹⁴ Pegkegchau takat aina duka idaisata,
nunikam pegkeja duke takasta;
nuniakum kakanmamsata maak agkan pujutnum.

¹⁵ Tuke Pjuuk aents niina shiig umijin aina nuna kuitamui,
dutikak nii sumamunash antujuk yayawai.

16 Untsu tudaun takau aidaunak
Tuke Pujuu kajejawai,
dutikak ijina atakesh adeagchatnun
emegkagtatui.

17 Tuke Pujuuk niina umijin aidau
sumamun betek antujui;
dutikak nii waitiamujinash agkanmitkawai.

18 Aents wika uwemjashtinapitja tusa
anentaimak waitiaun uwemtijatatus
Tuke Pujuuk tikijuch pujawai.

19 Tuke Pujuun umigna duka
kuashat utugchatan igkuawai,
tujash niinak Apajuí depetmatnak suwawai.

20 Tuja niina ukunchi aidaunashkam
nii kuitamjawai;
nuadui makichik ukunchinakesh kupigkachagtinai.

21 Aents pegkegchau aina duka
ditá tudau takamsamujin waituinawai,
tuja Apajuí umijin aidaun kajejuina dushakam
suwimkan jukiagtinai.

22 Tujash Tuke Pujuuk niina inake aidaun uwemtikawai.
Nuadui ;Tuke Pujuuwai kajinmamas anentaimaidauk
suwimak suwamak achagtinai!

37

Apajuíyaig kajitmamsa anentaimat

David kantamamu

1 Aents pegkegchaun pujutji diigsam kajekaipa,
tuja aents pegkegchau aidau
atsumkas pujuinakui, nunú diisam kajegkagtukaipa.

2 Wagki nunú aents aina duka
dupa tsupikam wamak kagaja megkagama
numamtin ainawai.

3 Tuke Pujuuwaig kajinmamsam anentaimsata,
nuniakum ima pegkeja duke takasta.
Nuniamin Apajuí yaimpasmatai,
juju nugkanum pujusa takakum
shiig yuwa pujusminum.

4 Tuke Pujuu shiig anentsam aneeta,
nii umiktatui ame senchi wakegamunak.

5 Amina pujutjumek Tuke Pujuu idaitusta,
dutikakum niyai kajinmamsam pujusta,
nuniamin nii yaimpaktatui.

6 Ame shiig pujamugmea nunú,
tuja amina takatjum pegkeja dushakam
etsa tajimak shiig etsantama iman atinai.

7 Tuke Pujuu emtin wainka chichá wekaetsuk
takamtak pujusta;
nuniakum dakasta nii yaimpakti.

Tuja aents pegkegchau aidau
shiig atsumkas pujuinakui,
nunú diisam kajegkagtukaipa.

⁸ Tuja kajeta duka idaisata,
kajeka jiyanita dushakam ukukta,
kajekaipa, wagki kajeamua duka utugchatan itawai.

⁹ Aents pegkegchau aina duka ijina utsaam agtinai.
Untsu aents aidau Apajuín umijuinak
niinig anentaimas kajinas batsata nunú
Tuke Pujuu nugkan anagkagtuawa nuna jukiagtinai.

¹⁰ Aents pegkegchaun takau aidauk,
dukup atsuk megkaejattawai;
nunikagmatai wainkatasa egaakmesh
makichkish wainkashtinaitme.

¹¹ Untsu aents ememachu aina nunú nugka pegkegnum wayawag,
tutit chicham atsamunum shiig pujusagtinai.

¹² Untsu aents pegkegchauwa duka
aents pegkejan kajekak
pegkegchau awajkatatus egatui.

¹³ Tujash Apajuík nunú aents aidaunak dushikiawai,
wagki dita megkaejatnuk tsawan jegau asamtai.

¹⁴ Aents pegkegchau aina duka
ujudauch aidaun, ememachu aidaun,
pujutji pegkeg aidaun aatus maawagtatus
puyagjin akentaijjiai uminawai.

¹⁵ Tujash ditak, dita puyagjinig maam agtatui,
untsu akentaiji aina duka
kupija utsantam agtatui.

¹⁶ Aents pegkegma duka
wajiji kuashat achataish,
aents wiakuch pegkegchaun
nagkaesau shiig pujawai.

¹⁷ Wagki Tuke Pjuuk
aents pegkegchau aidaun ijinak,
aents pegkeg aidaun kuitamkattawai.

¹⁸ Apajuík aents tudaugtuchu aidaun kuitamui,
tuja ditak ajumaish tuke atina nuna jukiagtinai.

¹⁹ Tsawan waitiamu jegataish,
ditak waittsachagtinai,
tuja nujan tepeamtaish,
dita yuwatnuk kuashat ajiagtinai.

²⁰ Aents pegkegchau aina duka
dupa kagakujai betek keekagtinai.
Tuja Apajuín shiwaaji aidaushkam
jii bukuiti megkagama numamtuk
megkaejatin ainawai.

²¹ Aents pegkegchauwa duka

tsagkatjukta takui tsagkatkamash akikmachui;
 untsu aents pegkeja duka
 tsagkatkamak nuni ewagas akikmawai.

22 Apajuí pegkegnum yumigsamu aina nunú
 nugka pegkegnum pujusagtinai;
 untsu nii pegkegchaunum
 yumigjamu aina duka, ijina utsam agtinai.

23 Tuke Pujuuk aentsu pujutjin diijus
 nii wakegamujai betek pegkeg ataik,
 shiig pujusti tusa yayawai.

24 Tuja nunú aentsuk
 pegkegchaunum iyakush,
 nunisagkek megkaekashtinai,
 wagki nigka Tuke Pujuu achiakbau asa.

25 Wi datsa asan pujuyag duwikish,
 tuja yamai múuntuch wajasan pujag duwish,
 makichkish waintsujai aents pegkeg aidau
 Apajuí kajimatki idaisamu asag waituidaunak,
 tuja dita uchiji aidaukesh
 yumain atsujam waituinak
 sumá yujaunak makichkish waintsujai.

26 Aents pegkeg aina duka
 ashí tsawantai wait anenkagtinai,
 nuniau asa tsagkatkagtinai;
 tuja niina uchiji aidaushkam
 pegkegnum chichajam agtinai.

27 Pegkegchau takata duka tujanjata,
 nunikam pegkeja duke takasta,
 nuniakum ame pujustinun Apajuí anagtabauwa
 nuwi tuke pujustinaime.

28 Wagki Tuke Pujuuk
 shiig takamua nuna wakegawai;
 nuadui niina umijuidaunak kajimatki idaitsui;
 untsu pegkegchau aidauunak
 dita uchiji aidaujai ashí ijinui.

29 Nugkan Apajuí anagkagtuawa nuwig
 aents niina umijin aidau tuke pujusagtinai.

30 Aents pegkejak shiig anentaimas chichawai;
 nuniak tuke pegkeja nunak chichawai.

31 Nuniau asa niina anentainishkam
 Apajuí jintintuamua nunak tuke aneakui;
 nuadui niig makichkish pegkegchaunmak
 iyaumaitsui!

32 Aents pegkegchauwa duka
 aents pegkejan tsanumjug,
 maatnume tusa sujuktatus wekaetawai.

33 Tujash Tuke Pujuuk aents pegkegchauwa nunú

maati tusag idaisashtatui;
tuja nuigtushkam tsanumjujagmatai,
achikag waitkastinme tusagkesh idaisashtatui.

³⁴ Tuja amek Tuke Pujuuwai kajinmamsam pujusta,
nuniakum niina chichame umigkata;
wagki nii aminak tikich aidaun nagkaesau etamtatui,
dutijama nugkan anagtabauwa nuna amastinai.
¡Nuwi pujusam aents pegkegchau aidau
jinuidau wainkatnaitme!

³⁵ Aents pegkegchauwa nunú
numi múun wajaama numamtuk
ememas wajaun wainkabiajai.

³⁶ Tujash wajukayawas, megkaekabi,
wainkatasan egaknush wainkachmaijai.

³⁷ Aents shiig anentaimkauwa nunú diista,
nunú aentsuk tutit chicham atsaunum agkan pujustinai.

³⁸ Untsu aents antumtikmainchau
intimkiu aina duka
ashí ijina utsaam agtinai;
nuadui ditak jinatnujin dakainawai.

³⁹ Tuke Pujuuk aents pegkeg aidaun
yaigka uwemtiknai,
tuja tsawan waitiamu jegataish,
nii ejaka kuitamui.

⁴⁰ Tuja ditanak Tuke Pujuu ayamjuk agkanmitkawai,
wagki niyai kajinmamas
anentaimaidau asagmatai.

40

Apajujúh, ame wakegamun umiktasan wakegajai
(Sal. 70)

David kantamamu

¹ Wika Tuke Pujuu yainkati tusan
niyai kajitmamsa pujusan segabiajai;
tusa segai nii antugtukmayi.

² Tuja wi jamainnum jeganta pujaish,
nii uwentijugmayi.

Tuja kuchanum tepea
jamaina numamtuk ashí jaka pujai,
Apajúú uwentijugmayi.

Dutijua kaya múun
makichkish buchitmainchaunum wajasa iyaumaitsu iman etibi.
Nuadui wi wekaesatnunak nii umigtuke.

³ Dutijak yamajam kantamtain
Apajúú kantamjutain kantamati tusa jintinjuabi;
nuna wi kantabau kuashat aents aidau
anentain antinkabi,

dutikam Tuke Pujuuwaig kajinas anentaibiagmayi.

⁴ ¡Aents ememachu

tuja wainka apajuímtai aidaunash emematchau,
ima Tuke Pujuuwaig kajinmamas anentaimaina duka
shiig aneas pujustinai!

⁵ Tuke Pujuu mina Apajuíjuh,

amek jutii wait anenkagtakum,
kuashat ishamain wainchatai aidau iwainajuitme.

¡Makichkish amejai betekak atsawai!

Nuna pachisan etsegkatag takunush,
ashí etsegmainchau dekapeajai.

⁶ Apajuí tsagkugtugi tusag

kuntinu maawag nuna nejen ashí apeatnume,
dutikainak ajak aidaunashkam anentag sujustinme tusamek sumatsme.
Untsu Apajuin chichamen antukti tujutume.

⁷ Nuadui, papiinum agagbau

mina pachitus tawa nujai betek,
chichaakun: Juwi pujajai, timajai.

⁸ Apajuíjuh, ame wakegamu takata nunú minak shiig awajtaiwai.

¡Ame jintinjuamua nunú mina anentajui ajutui!

⁹ Amina aentsjum aidau

kuashat tuwaka ijunbaunum
amina takatjum pegkegma nuna iwainakmajai.
¡Tuke Pujuuwah, wi aminun pachisa etsegsuk
uuka pujatsug duka amek shiig dekame!

¹⁰ Tuja aents aidau wait anentakum,

dita tudaujish tsagkugnaitam nunú pachisa
etseganmak itattsachmajai.

Tuja ame anagkagtuamuk betek uminaitam nuna
ame uwemtikagtamujai pachisan chichagkagtukmajai.

Nuigtush amina aentsjum kuashat aina

nuna emtinig amina anenkagminak
dekaskegmijaig, makichkish ukchamjai.

¹¹ Nuadui Tuke Pujuuwah, amesh minash wait aneasam

amina anenkagmea duka atushat etugtipa.

¡Amina anenkagmin

pegkegmagma nujai yainkata!

¹² Untsu ame kuitamjachkuminig wika jamainaitjai,

wagki wi waitiamua duka

dekapakuish makichkish ejemaitsui.

Mina tudaujuk mina intashjun nagkaesau

shiig kuashat ajutui.

Iman asamtai, datsaamakun shiig niimsachmin,

nuigtush shiig pujuschamin jakamin dekapeajai.

¹³ Tuke Pujuuwah, ¡wait aneasam,

minash agkanmitkajuata,

dutijakum wamak yainkata!

¹⁴ Aents aidau mina mantuawagtatus

wakejutuina duka ame inatsakta;
 dutikamu asag,
 mina pegkegchau awajtuktatus
 anentaimaina duka
 datsantin pisagtinme.

¹⁵ Tuja mina dushijuina duka
 datsagkag pisagtinme.

¹⁶ Untsu amina egapaina duka shiig aneastinme;
 tuja ame uwemtikagtinaitam
 nuna wakejuina duka:

“¡Apajuíyai dekas múunta duka!” tusag
 tuke emematjamtin atinme.

¹⁷ Tuja wi shiig senchi waitiakun
 wake besemag pujag nunú,
 minash wait aneamam Tuke Pujuuwah, kajimatjukipa.
 Ametme mina yainkam uwemtijinmek;
 nuadui Apajuíjuh, minash wamak yainkata.

LIBRO II

42

(Salmos 42—72)

Wi jinta niimjamua duka Apajuíyai

Coré uchiji aidau kantamawagbau

¹ Japa senchi kitamak uwagtatus yumin egama numamtuk
 wika Apajuíjuh, amina egajame.

² Apajuí pujuta sukagtina nuna wainkatasan,
 aents kitakai waitiak yumin egamaina
 numamtuk egajai.

¿Wajutik wisha ataktush

Apajuí jee pegkegma nuwish wayatja? tusan
 anentaima pujajai.

³ Nuadui tsawaish,

tuja kashish buutú pujajai,

nuniaí aents aidau inintuinak:

“¿Amina Apajuígmasha?” tujutuinawai.

⁴ Nuwi anentaimkunuk

wake besemag dekapeajai.

Wi yaunchuk aents aidau yajuakan

Apajuí jee pegkegma nuwi emai,

shiig aneamag Apajuín emematuinak

untsumki shimuyanum nuna anentaimjai.

¡Yajauwajah ijunja Apajuí emematbau!

⁵ Iman aish ¿wagkanuk wisha mijaktaja?

Wi puyatumainuk atsawai.

Apajuí uwemtikagtina nuwig

kajintsan anentaimtatjai,

nuniakun ima niinak ememattatjai.

6 Shiig aneasa pujuschamin
wake besemag dekafejai,
nuniakun muja Hermón
tuja muja Misar tutainum
namak Jordágka nujinchi jinagbaunum
pujusan aminí senchi anentaimjai.

7 Tuja ame najankamu aidau
mujanum wajasa antam,
namaka nujinchi chichijam
tuna detau aidau senchi uutak,
ishamain wajama imanik
wi waitiamua duka minitjawai.

8 Tujash kashi kashinig
Tuke Pujuu niina anenkega duwi minak yaintui;
nuadui wishakam

Apajuí mina pujutan suja nuna emematkun
kashi kantamtanak mijattsujai,
nuniakun segatnashkam segatskek idaitsujai.

9 Apajuí mina ayamjutna nuna chichagkun:
“¿Wagka minash kajimatjukiume?
¿Wagkanuk wisha mina shiwag aintuinakuish,
wake besemjash wekaetaja?” tajai.

10 Mina shiwag aidau dushiktuinak:
“¿Amina Apajuí gmesha?”
tusa aju ajumag inintuinawai.
Imatjutiagtai mina ukunchig najautuinawai.

11 Tuja ¿wagkanuk wisha mijaktaja?
Wi puyatjuminuk atsawai.
Apajuí uwemtikagtina nuwig
kajintsan anentaimtatjai,
nuniakun ima niinak ememattatjai.
¡Niyai mina Apajuí g uwemtijinuk!

43

1 Apajuíyah, wi pegkegchau takamsamu
atsugta duka ame dekame,
nuniau asam ¡aents pegkegchau aina nunú
maawai tusam ayamjuktata!
¡Aents pegkegchau waitjin aidaunum agkanmitkajuata,

2 wagki ametme mina Apajuí g kuitamjinmek!
¿Wagka minash idaitusume?
¿Wagkanuk wisha mina shiwag aintuinakuish
wake besemjash wekaetaja? tajai.

3 Amina tsaaptinjum
dekaskegmijai sujusta, nunú jintinjuati.
Muja ame etegkamunum pujam nuwi
wakatag tusaish wajuk wemainaita nuna.

4 Nuwi wakan amina altarjumin jegantan,
arpa awatkun amina ememattajame;
wagki shiig aneasa pujuta nunú ame sujau asamin.

⁵ Tuja ¿wagkanuk wisha mijaktaja?
 Wi puyatjumainuk atsawai.
 Apajuí uwentikagtina nuwig kajintsan anentaimtatjai,
 nuniakun ima niinak ememattatjai.
 ¡Niyai mina Apajuig uwentijinuk!

46

Apajuik jutjai pujawai

Coré uchiji aidaun agajagbau
 Juka jaka ukumamunum kantamajakbauwai

¹ Apajuíyai iina kuitamjamin,
 iina senchimitjamin,
 tuja utugchat ataish tuke yaijatin.

² Nuadui nugka buchittai,
 muja aidaun yumpunainak,
 nayantsanum kakegu
 wainkuish ishamaitsuji.

³ Nayants senchi tsukatbau,
 kedegtak muja aidaun senchi umuchiak
 ishamain wajakuish ishamaitsuji.

⁴ Namakak nii tsegkeakbaujjai
 Apajuí yaaktajin aents batsatun shiig anemtikui,
 nunú yaaktak dekas tikich yaakat aidaun nagkaesau
 shiig pegkegmai, Apajuí pujutai asa.

⁵ Apajuik nunú yaakta ejapeen pujawai,
 nuadui makichkish tsaimainchau ainawai.
 Tuja Apajuí aentsji aidaun,
 nunú yaaktanun batsatunak kashikiuch nagkamas yayawai.

⁶ Aents nugka muunnumia aidauk,
 nugka múun aidaun apuji aidaujai
 Apajuí chichamun antukag
 ishamainak senchi pampainawai.
 Tuja nugkashkam Apajuí chichatai,
 yumpuna tsainak megkaewai.

⁷ ¡Tuke Pujuu ashí senchigtina duka jutjai pujawai!
 ¡Jacopan Apajuíjiya nunuwai iina kuitamjamin!

⁸ Tuke Pujuu ishamain wainchatai aidaun
 juju nugkanum iwainajua nunú
 taajum diistajum.

⁹ Maanitik ashí nugkanum atsuti tusa tine.
 Nuadui maaniaku flecha akentai aidaunak
 nagki aidaujai kupigmayi,
 dutikak carro maaniaku jutai aidaunashkam
 apeka utsagmayi.

¹⁰ ¡Anuig nagkankatajum!
 ¡Witjai Apajuínuk, nunú dekatajum!
 Ashí nugkanmaya aidauk mina umigtukagtatui.

11 ¡Tuke Pujuu ashí senchigtina duka jutijai pujawai!
 ¡Jacopa Apajujiya nunuwai iina kuitamjamnuk!

47

Apajuíyai ashí nugka apujig

Coré uchiji aidau kantamawagbau

¹ Ashí aents aidautijum Apajuí uwejum awatitajum.

Tuja nii emematkujum

shiig anejasum senchi kantamatajum.

² Wagki Tuke Pujuuwai ishantai múun, ashí nugka apujiya duka.

³ Aents tikich nugkanmaya aidaun Apajuí depetuk,

atum inagtajum tusa iina idaitugmasui.

⁴ Apajuí Jacopan aneau asa,

nii wegantu aidautin etegtamjauwai,

dutijama nugka pegkejan

nii anagtabauwa nuna sujamsajui.

Nunú nugka duwi ii eme anenmamji.

⁵ Tuke Pujuu Apajuík niina aentsji aidau

shiig anejasag senchi kantamainak,

nuigtu uwija kachujin umpuinak

pampainamunum niina pujusa inamtaijin

waya ekemsae.

⁶ ¡Kantamtai Apajuí kantamjuatajum!

¡Kantamtai iina apuji kantamjuawagmi!

⁷ Apajuíyai ashí nugkanmaya aidaun apuji,

nuadui shiig anejasum kantamjuatajum.

⁸ Apajuík nii pujusa inamtaiji

pegkegma nuwi pujusag,

ashí aents nugkanmaya aidaun inawai.

⁹ Tuja ashí tikich nugkanmaya

apu eme anentsa diitai aidauk,

Abrahama Apajuíjin ememattatus

nii wegantu aidaujai ijunainawai.

¹⁰ Ashí aents nugkanmaya aina duka Apajuínu ainawai.

Nuadui nii ashí inawai.

51

Apawa wait aneamam mina tudaujush tsagkugtugta

David Betsabén nuwatkamtai* profeta Natán jiyakam pujusa juna aatus agajui

¹ Apajuíyah, amina anenkagmin wait anenjugta;

tuja amina wait anenkagtutaigmin

mina tudaujush tsagkugtugta.

² ¡Mina anentaijui pegkegchau ayá nunú nijatjugta!

Tuja mina tudaujush jaipja utsanjukta.

³ Mina pegkegchaugnak wika shiig dekgamamjai.

Tuja wi pegkegchau takamsamua duka

mina anentaijuig sakamtsui.

* 51: Nunú pachisa ausata 2 Sam 12.1-12.

4 Ame dakitamun amina emtimin
 pegkegchaun takamsan
 ikajeakun waitkagme.
 Nuadui minak dekaskenum
 suwimkak sujustatme.
 Wika pegkegmaitjai tusanuk tumaitsujai.

5 Wika dekas wi akiinawaitag
 duwi nagkamsanuk tudauwaitjai;
 tuja mina dukuju muntsujin muntsuaku asanuk tudau ayajai.

6 Amek dekas aents ememachu
 dekaskenum chichauwa nunú aneame;
 nuadui shiig anentaimja pujut sujusume.

7 Wi pegkegchau takamsamu
 mina anentaijui ajuta nunú hisopowai† jaipja ajapjutuata,
 dutijuawamin pegkeg wajastajai;
 ashi minak nijatjata, dutijuawamin
 yujagkim pujuama nuna nagkaesau wajastajai.

8 Suwimak sujakum waitkagsau akumesh,
 yamaik minash shiig aneasa pujut sujusta.

9 Mina tudaug aina duka kajimatkita,
 nuniakum mina pegkegchaug aina nunú
 ashi esaktujata.

10 Apajuiyah, mina anentajush tudaugtuchu yamajam etugtita,
 dutikakum pegkeg anentaimat
 ima aminak umigtamain sujusta.

11 Tikima ajapjutak ajapjuawaipa,
 tuja amina Wakanim Pegkegma dusha jujukipa.

12 Tuja ame uwemtikagtujamin shiig aneamu
 ajutkagtuwama nunú ataktu sujusta,
 nuniakum amina Wakanim wait anenkagtina nujai
 kuitamjukta.

13 Dutijuawamin aents amina chichamjumin umitan
 dakitin aina nuna jintintuatjai,
 amina nemagtamkatnume tusan.
 Dutika ai aents tudau aidaush dita tudaujin idaisag
 ima aminak umigtamkatnume.

14 Apajuiyah, ametme mina uwemtijnmek,
 tuja wi pegkegchaun takamsauwaitag duwi
 maatnume tusamek idaitusaipa.
 Wisha ame wait anenkagtutaigmea nuna
 pachisan etsegkun shiig aneasan
 kantamtain senchi kantamjuatjame.

15 Apuh, minash kantamati tujutta,
 wisha kantamtain amina kantamjuatjame.

16 Tuja uwija maan nuna nejen ashi apeakun,
 nuigtu anentag aidaun amaakun
 amina ememattag takunush

† 51:7 “Hisopo” tawa duka makichik ajak ajakui. Nuna duke juki jaipmaina numamtuk jaipjugti tusa David tiuwai.

dutikmainchau dekaapeajai,
 wagki duka aminak shiig awajtamchau asamtai.
 17 Apajuiah, amek aents wika tudauwapitja tusa
 anentaimak waitia nunú shiig anentame.
 Tuja aents wika tudauwapitja tusa
 awake anentaimag tsagkugtugta tusa
 segapakuig, yaitskek idaichauwaitme.

18 Apuh, wait aneasam
 Isarael aents aina nunú
 wait anenjam kuitamkata.
 Dutikakum Jerusalén peejamu tsaikbauwa nuna
 ataktu peejatnume tusam yaigta.
 19 Dutikawamin kuntu maawag
 nuna nejen ashí apeawagtata
 nunú shiig awajtamkattawai.
 Nuadui amina emematjamainak
 toro tsakat aidaun maawag apeawagtinaí.

63

Apajuí anenkeg pujutan nagkaesauwai

David Judá wegantu aidau nugken uwegshunum pujusa agagbau

1 Apajujuh,
 ametme mina Apajuígmek,
 Yama tsawamuik kashikmasan
 wakejusan segajame,
 wika amina wainkatasan wakegakun
 kitamaku wajuktayama imaniajai.
 Tuja yumi yutushtai nugka buku wajas,
 yumin atsumak wajukchawash imaniawai,
 mina iyashjuk amina atsumjamak.

2 Amina jem pegkegma nuwi wayan,
 amina imanjumea nuna
 senchigmijai wainkatasan wakegajai,

3 wagki amina anenkagmea duka
 pujutan nagkaesauwai,
 nuadui kantamkun ememattatjame.

4 Wika aminak tuke ememattinaitjame,
 nuniakun mina uwejun takuin
 amina aujattjame.

5 Aents yutai pegkejan yuwa
 shiig aneas pujuuwa numamtuk wika shiig aneasan pujuttajai,
 nuadui shiig aneasan
 kantamkun ememattatjame.

6 Kashi kanaku tepesnush
 aminí anentaímsanuk tepajai.

7 Ametme mina yaintumek;
 nuadui aminí yunumsan
 ame kuitamjusamin shiig aneasan pujujai.

⁸ Ashí mina pujutjua nunak
amina amaajai, wagki ame minak
amina senchigmin kuitamjame.

⁹ Mina mantuawagtatus
wakejutuina duka ijinata,
dutikam initak yutuam emegkagta.

¹⁰ ¡Ditak nagki iju maam agtinai,
dutikamun ikamia yawá yukagtin aidau
ditá iyashinak yuwawagtinai!

¹¹ ¡Untsu apuk, Apajuíyai shiig aneastinai!
¡Tuja ashí aents Apajuín daajin chichau aidaushkam
shiig anentsag kantamjuawagtinai!
Untsu waitjin aina nuna weninak
Apajuí ashí epetjatnai.

65

Ima Apajuíke ememattaig

David kantamamu

¹ Apajuíyah, muja Siógnum pujuuwah,
¡ametme eme anentsa
kantamjam amainmek!

Amina takagsatjame tusa anagtabau aidauk
betek umigtamain ainawai.

² Amek ii segamash antugkagtame;
tuja ashí nugkanmaya aidauk aminí mininawai.

³ Iina tudauji aidau wagagkagtakuish,
ame tsagkugkagtame.

⁴ Ame aents aidau etegjam,
ame jem pegkegma nuwi mejai pujustinme
tiuwaitam duka shiig aneasagtinai.
¡Tuja ame jem pegkegma nuwi pujusa
amina pegkegma mea nunú wainkau asaja shiig aneestatji!

⁵ Apajuíyah, ametme jutiin uwemtikagtinmek,
nuadui aents pegkegchau aidau suwimak suwakum
amina umigtamaidauk shiig anennaitme.

Nuadui ashí nugkanum pujuidauk
tuja nayantsa amain atushat batsamin aidaushkam
ima aminig kajinmamas anentaimainawai.

⁶ Muja aidauk amina senchigmijai najanauwaitme,
dutikam buchittsuk asatnume tusam kuitame.

⁷ Amek nayants tsukatbaujish imignaitme,
tuja aents aidau pampaidaush,
bitat asatajum tusam itatmitkauwaitme.

⁸ Tuja atushat batsamin aidaushkam ame amina senchigmin
wainchatai aidau iwainamun wainkag kujainawai.

Tuja ashí nugkanum batsamin aidaush
aminí shiig aneenak unsumainawai.

⁹ Ametme nugka kuitamnumek;
tuja yumishkam yutumtikame,
dutikam ajak aidaush tsapapitkame.

Ame yumi yutumtikjamu betsaka akagak
nugkan uchupjamtai, trigo aidaush
shiig tsapainiag nejenawai.

¹⁰ Ajak ajakmatasa nugka taimu aidaush
yumi yutumtikjam uchupiame,
wagki ajak aidau tsapainiag senchi nejektinme tusam.

¹¹ Ajak aidau mijadai kuashat nejektinme
tusamesh nejemtiknaitme.

Tuja yumi kuashat yutau asamtai,
yumi atsumakuish waitnatsui.

¹² Nuadui uwegshunmash
dupa tsapaka samekbau pegkeg wajas awai.

Tuja muja aidaushkam
samekbau pegkejan iwagmamainawai.

¹³ Tuja nugka nain pegkeg aidaunmak,
tagku aidau piyake,
tuja nugka paka aidaunmak
kuashat trigo ayawai.

¡Ashí nunú aidau shiig anenawai!

66

Apawa amina takatjumelek shiig pegkejai

Kantamtai agagbau

¹ Ashí nugkanmaya aidautijum

shiig anejasjum Apajuí kantamjuatajum.

² Apajuí daaji pegkegma nunú pachisjum
kantamtai kantamatajum.

Tuja niina imanjiya nunú pachisjumshakam
kantamtai kantamatajum.

³ Apajuí chichagkujum:

“Amina takatjumelek shiig pegkeg ainawai.

Ame ima senchigtin asamin,

amina shiwaajum aidauk

ishamjamainak aminí yunumainawai.

⁴ Nuninak ashí amina etsagtamainawai,

nuninak amina daagmin pachisag

kantamtain kantamainawai”, titajum.

⁵ Apajuí aents aidautin ayamjupak

ishamain wainchatai aidaun iwainajua

nunú anentaimtustajum.

⁶ Nigki nayantsanash ukuya buku emauwai,

dutikamtai ii muunji aajaku aidau bukunum katiyajui.

Nuadui jima Apajuíyaig shiig anejasgmi!

⁷ Apajuí niina senchijiya duwi

aents aidaunak tuke inawai;

untsu niina umigtan dakitin aidaunak

nijjai shiwagmagawainum tusa tuke diyakui.

⁸ ¡Ashí aents aidautijum,

iina Apajuíjiya nunú

pegkegnum chichagtajum!

¡Dutikakjum kantamtai kantamjuatajum!

⁹ Wagki nii iinak kuitamjamui.

Pegkegchaun takastinme tusag idaikagatsui.

¹⁰ Iina Apajuújjyah,

amek ima aminigkiash

kajinas anentaima tusam

dekapkagtusuitme,

nuadui plata jinum jiyamu

pegkejama iman ekagtiuwaitme.

¹¹ Tuja kuntin achiktinun

dakamtikak, kuntinun achiyajama numamtuk,

shiwaaji achiktinme tusam

tsagkamkagtukume.

Nuigtush shiig kuashat waitkagkagtusume.

¹² Nuadui aents pegkegchau aidau

waitkastinme tusam

agkan idaisabiume,

tuja jutiik yuminmash tuja

jijnmashkam nagkaemakmai.

Dutika ashí dekapkagtusam,

juju nugka pegkeja imagnum

pujustinme tusam apujkagtusmayume.

¹³⁻¹⁴ Nuadui wi yaunchuk

ishamainnum pujusan amina chichagkun:

Ame yaintsamin juna nagkaikinuk,

amina emematkun anentag amastinaitjame

tiuwaitjam, nuna imatiksasuk amina jem

pegkegma nuwi wayan kuntinu maan,

nuna nejen ashí apeakun ememattajame.

¹⁵ Tuja kuntin duwejam aidaun

uwija wiyaji aidaujui

amina eme anentsan ashí apeattajai.

Nuigtushkam toro aidaun, chivo aidaun,

amina emematkun apeattajai.

¹⁶ ¡Ashí atum Apajuú umijin

aidautigmek minitajum!

Nunikjum antuktajum

Apajuú mina yainka nuna pachisan ujaktajime.

¹⁷ Apajuín untsukmai.

¡Dutikan niina emematkun kantamjuamiajai.

¹⁸ Wi ayatak pegkegchaunmak

anentaimsan pujutak,

Apajuú antugtukchatnuyi.

¹⁹ Tujash minak antugtuku asa,

wi segamunash yainkabi.

²⁰ ¡Apajuuk wi segamunak dakitjachmayi,

tuja niina anenkenash sujitjukchabi,

nuadui take ememattai atin ati!

69

Waitiaku pujusa Apajuí segamu

David kantamamu

¹ Apajuijuh, kuashat waitiakun
atsanmainchau dekaapejai,
wait aneamam yainkata.

² Kucha amutnunum tepeajai,
wajai emetumainkesh atsugtawai.
Dekas namaka kunajin akaejai,
namak chichijam asa ajektawai.

³ Untsu untsumkawan sagagjai;
mina suweg dajautawai.
¡Apajuín daka dakakuan jiijuish yawegjai!

⁴ Mina shiwaajuk intash kuashta
nuna nagkaesau ainawai,
utugchat atsugtaig kajegtuinak,
mantuatag tuinawai.
Tuja makichkish kasamkachu aig,
kasamkamujum awagkita tusa imatjutuinaawai.

⁵ Apajuijuh, ame dekame wika pegkegchau ayajai;
nuadui mina tudaugnak ugmaitsugme.

⁶ Tuke Pujuu Apajuí ashí senchigtinuh,
¡aminí kajinmamas anentaimin aina nunú,
wainak mina pegkegchaujui
datsaama yujainum idaisaipa!
Israel aents aidaun Apajuíjijyah,
aents amina egapau aina nunú
mina pegkegchaujui datsaama
yujainum kuitamkata.

⁷ Amina umiju asan
kajegtuinakuish katsuntajai.
Datsanjui mina yapijuk nimpawai.

⁸ ¡Mina yatsuchig aidaush,
tikich aents itugmaina dutijuinawai!

⁹ Amina jemin akasmatkun senchi waitiajai.
Tuja amina pegkegchaun chichagtamainakui,
nuna antakun kajeajai.

¹⁰ Buutkun yujumkan yutsuk
ijagmaan pujai, dushiktuinakuish katsuntajai.

¹¹ Jakamunum nugkutain
nugkuai, dushiktuinakuish katsuntajai.

¹² Ashí aents aidauk
pegkegchaun chichagtuinaawai.
Tuja nampen aidaushkam
tuke aneas dushiktuinak kantamjutuinaawai.

¹³ Tujash Tuke Pujuuwah,
wika amina segajame,
¡wait aneamam yainkata!
Amek anenkaitme, tuke kuitamkagtinaitme,

iman asam minash uwentijugta.

14 Tsakusnum tepean tepag nunú
eke jatsaig jiigkita,
tuja mina kajegtuina dusha agkanmitkajuata.
Tuja namak chichijam ajapjuattak
awajta nunú uwentijugta.

15 ;Namak chichijam
ajekjati tusamek idaitusaipa!
Tuja wainchi ishamaina nunú
yutua emegkakti tusamesh idaitusaipa.

16 ;Tuke Pujuuwah,
amek pegkeg, anentak wajasuitme,
iman asam minash aigkata!
Amek wait anenkagtinaitam
iman asam minash antugtukta.

17 ;Juju amina inakem
segapa nunú antugtsuk idaisaipa!
;Utugchat ishamain ajutui, wamak yainkata!

18 ;Juwi taam, shiwag aidau
waitkajuina nunú ayamjuktata!

19 Amek mina dushiktuinak
inastuina duka shiig dekame.
Tuja mina shiwaajush ya ainawa
dushakam amek dekame.

20 Ima imatjutuinakua ipimtukiaje,
nuadui shiig aneasa pujumainchau
kakaagchamin dekapeajai.

Yaki wait anenjug
anentaijun ichichtujainta tusan,
egaknush wainkachmajai.

21 Yapajaish, yutainum jatain egketjiagmayi,
tuja kitamaish chujuinun sujiagmayi.

22 Nuadui dita jiistamaina nunú
yutaiji aina nunú aatus ditan pempeentuki
utugchatan apujtusti.

23 ;Tuja wainmachu,
kakaumainchau emakta!

24 Dutikakum ame kajekbauwai
makichkish idaitsuk ashí ijinata.

25 Dutikawamin dita jee aina duka
agkan juwajagtatui,
tuja nunú jega aidaunmak
makichkish pujuschatnume.

26 Wagki ame mina suwimak sujusamin
waitiaish, ditak minak diigtsuk
ayá dushiktuinak, nuni sENCHI waitkajuinawai.

27 Nuadui ameshkam
pegkegchaunmak ikata.
;Tuja makichkish dita tudaujig tsagkujaipa!

28 ;Aents tuke pujusagtin aina nuna daaji

papiinum agatkamua nuwi, dita daaji ayá
duka ashí esakatjata!

Tuja aents amina umigtamin aidaun
daaji agatkamua nuwig,
dita daajig makichkish agatjaipa.

²⁹ Apajuíyah, wi jakun wake besemag
dushikiam pujag nunú minash
wait aneasam yainkam uwentijugta.

³⁰ ¡Apajuín see tusan kantamtain kantamkun,
shiig aneasan ashí iwainakan
niina daajin ememattatjai!

³¹ Nunú dekas, kuntin aidau
maa apeamun nagkaesau
Tuke Pujuunak shiig awagmaktatui.

³² Tuja aents Apajuín segau aidau
wake besemag batsatuk,
nuna wainkag shiig aneasagtatui;
nuninak ichichmamjagtatui.

³³ Wagki Tuke Pujuuk aents waitiak
wake besemag pujus sumaunak antujui;
tuja niina aentsji aidau achikam batsamas
waitiagtaish, dakitjag idaitsui.

³⁴ Nugka, nayaim, nayants aidautigmesh
Apajuí ememattajum,
tuja ashí nuwi batsamin aidautigmeshkam
Apajuí ememattajum.

³⁵ Apajuí Jerusalégnak kuitamkattawai,
dutikak Judá wegantu aidaun
yaaktaji aidau tsaikbau aina nunak
ataktu iwagkattawai.
Dutikamtai niina aentsji aidau
nuwi batsamsagtinai.

³⁶ Nunú nuggak niina aentsji aidaun
uchiji wegantu aidaunu atinai.
Tuja nunú nugkanmak Apajuín aneen aidau
shiig batsamsagtinai.

72

Apu eme anentsa Apajuí segatbau

Salomón kantamjuamu

¹ Apajuíjuh,
jujú apu amina takatjum pegkeja nuna
niishkam shiig takasti tusam yaigta.
Tuja tikich apu atina dushakam
dutiksag shiig takastin atinme.

² Aatus amina aentsjum aidaun,
tuja nuigtu waitkam batsatu aidaun apuji wajas,
inamak shiig takastin ati.

³ Tuja muja aina nuwiya jijnag,

agkan maanitsuk pujutan,
pegkeg takatjai aents aidaun jintintuati.

⁴ ¡Ujudauch aidaun ayamjukti!

¡Tuja aents waituina nuna
uchiji aidaunashkam ayamjukti!

¡Tuja untsu tsanumag kasamin aina nunak waitkasti!

⁵ ¡Nii tuké iina apuji atin ati,

Tuja etsa, nantu megkaekashtinun tuke auwa
nujai betek pujustin ati!

⁶ ¡Yumi yutak nugkan uchupig, ajakan shiig tsapapama iman ati!

⁷ ¡Nii apu wajas inamtata duik shiig agkan pujusa takamu ati!

¡Tuja nii inabaujig nantu tuke auwa
nujai betek atin ati!

⁸ ¡Nunú apua duka
etsa jiintaya imanui nagkamas,
etsa akaetaiya aatus

ashí nugkanum inamjatin ati!

⁹ ¡Tuja niina shiwaaji aidau
uwegshunum batsata duka
nii tabaun umiktinme!

¹⁰ ¡Nuninak Tarsis nugkan apuji aidau,
ajuntai aidaunum batsamnun apuji aidau,

Sabá nugkan apuji aidau,
nuigtu Sebá nugkan apuji aidau aatus
waji aidaun ikautiagtinaí!

¹¹ ¡Ashí apu aidauk
ima niinak tikishmatjagtatui!

¡Tikich nugkanmaya aidaushkam
ima niinak umigkagtatui!

¹² Ujudauch aidau atsumainak
sumainamunak nii yaigtatui,
tuja waitiak wake besemag
pujaunashkam nii ayamjuktatui.

¹³ Ujudauch aidaun wait anenjattawai,
dutikak wake besemag pujaunash
yaigka uwemtijattawai.

¹⁴ Ujudauch aidaun waitkainak maaniagtaish,
nii ayamjuk uwemtijattawai.
Wagki dita pujutji aina duka
nii diismak akik ainawai.

¹⁵ ¡Niig tuke iina apuji atin ati!

¡Sabánmaya oronak ashí susatnume!

¡Nii pachisa tuke Apajuí segattai ati!

¡Tuke pegkegnum chichagtai ati!

¹⁶ ¡Tuja ashí juju nugkanmak
trigo shiig kuashat aittawai,
imaniak muja titjinak ijia emegkaktatui!
Imaniau asa muja Libano tutainum
trigo aijkua iman wajasti,
nuniak nuna yagkuji aidauk

dupa yagkujuwama imanik yagkujuk asattawai.

¹⁷ ¡Apu daajig etsa tuke ekemna iman
tuke pegkegnum chichagtai ati!
¡Aents ashí nugkanmaya aidauk
niina daajin pegkegnum yumigkiam agtinai!
Ashí nugkanmaya aidauk niina
pegkegnum chichajiagtinai.

¹⁸ Tuke Pujuu, Israel aents aidaun Apajujiya duka
tuke pegkegnum chichagtai ati,
wagki ima nigki wainchatai aidaunash iwaidau asamtai.

¹⁹ Apajuí daaji pegkegma duka
tuke pegkegnum chichagtai ati.
¡Niina imanjiya nunú ashí nugkan jamagti!
¡Aatus ati!

²⁰ Jesé uchiji David aajakua nunú kantamamuk juwi amuewai.

LIBRO III

73

(Salmos 73—89)

Apajuí wait anenkagtamú

Asaf kantamamu

¹ Israel aents aidau anentaimtaji pegkeg aidaunak
Apajuí shiig kuitamui.

² Namput wajaschabijai iyautnak,
jukea akunuk iyagtinuyajai.

³ Aents Apajuín umigchau aidau wiakchamenakui,
nuna diisan kajebijai.

⁴ Ditak jamamtuchu batsatu asag
jakachainjash tusagkesh puyatunatsui.

⁵ Dita utugchatjig atsujuinawai,
nuadui tikich aidau waituina imanikag
waituinatsui.

⁶ Nuadui ditak nugkutai pegkeg najanamú
nugkumaina numamtuk,
dita emematin nugkuaju ainawai.
Tuja ditak magkagtutajinak,
jáanchjai betek nugkuaju ainawai.

⁷ Duwegmatnak duwejam ainawai,
tujash dita yapinig wainnawai
anentai shiig pegkegchau aina duka.

⁸ Ememainak tikich aents aidaunash
dushikinawai, nuninak
makichkish datsaamtsuk,
ii wakegakuik pegkegchau takamsattaji
tusag awanmainawai.

⁹ Nuninak Apajuínash pegkegchaun chichajuinawai,
tuja aents aidaunash dutiksag pegkegchaun chichajuinawai.

10 Nuna aents yujajus iniinak
yajau chichainatsui tusag
shiig antuju yujaush ainawai.

11 Nuninak: “¿Apajuísh wajuk dekatki iina pujutjinash?
Tuja Apajuí nayaimpinum puja aniaush
aents takainamunash
¿wajuk dekamainaita?” tuinawai.

12 ¡Diisjua aents pegkegchau aina nunú!
Ditak utugchatji atsau,
shiig pujusag wiakuch wenawai.

13 ¡Wi pegkegchau takatan
ashí idaisauwaitag duka minak
makichkish pegkegnumak yaintsui!

14 Minak wa wamak utugchatan itagtuinawai,
tuja kashi kashikmasan suwimkanak igkuajai.

15 Tuja wisha dita anentaimaina nujai betek anentaimkunuk,
amina aentsjum aina nunak kajimatki idaikunus,
wi wakegamun takasu aintagtai.

16 Tuja ibau tudaugtin aidaush,
¿wajukag wiakchash wenawa? tusa
anentaimsan ejetakamanush
ejemainchau dekapjabiajai.

17 Nuni pujaun Apajuí jee pegkegma nuwi
niijai chichastasan waya ai,
aents pegkegchau aidaush
wajukatnuk ainawa
nuna Apajuí dekamtijuabi.

18 Nunú aents aidauk ishamainnum batsasume,
dutikamu asag dita megkaejatnunum shimawai.

19 ¡Nunú aidauk pachiaqbau
shiig wamak ijina utsam agtatui!
¡Ditak sapijai jinawagtinai!

20 Tuke Pujuwah, aents kanag tepau nantak
nii kajamjamujin kajimatama numamtuk,
ame nantakum aents pegkegchau aidau
ditash ima pegkeg ainawa tumain aina duka
emegkagtatme.

21 Wi senchi kajekan pujubiajai,
nunia mina anentaig dajautibi.

22 Wika aents pegkegchau aina nuna
pujutjin dekajuatasan wakegakun,
kuntin jintiag anentaimchau asa
wajukmaina numamtuk wajubiajai.

23 Nuniyatkun amejaig tuke pujubiajai,
nuniau asamtai tudaunum iyawai tusam
egkegsam awekatmayume.

24 Umigtukti tujutu asam
ame chichagtukmayume,
nuadui wi jakamtaish,
eme anenjusam jujuktinaitme.

25 ¿Amina nagkaetamsaush tikichish
nayaimpinmash ya pujawa? Duka atsawai,
ima ameketme.

Amejai pujaknuk juju nugkanmaya aidaunak
makichkish wakejumaitsujai.

26 Mina pujutjua duka nagkankattawai,
tujash Apajuíya nunú
pujut tuke atinun sujustatui,
tuja nii mina anentaijuish ichichtawai.

27 Aents amina nemagtamtan dakitauk, jinawagtinai;
tuja ima aminig kajinas
anentaimainachushkam ijinatnaitme.

28 Untsu wika ima Apajuíyaig
anentaimsan pujustinaitjai,
nunú minak shiig awajtawai.
Ametme Tuke Pujuu Apajuí, mina ayamjutkatnumek.
Nuadui ashí ame dutikamu aina nunak etsegkattajai.

80

Tuke Pujuuwah, wait anenkagtugta

Asaf kantamamu

1 Apajuí, Israel aents aidaun kuitamnuh,
jame José wegantu aina duka
aents uwigjin kuitamas awekauwama numamtuk
kuitamsa awekame!

¡Ame querubin aidauk iname!
¡Iman asam Efraín wegantu aidau,

2 Benjamín wegantu aidau,
Manasés wegantu aidau wait anenjata!
Dutikakum amina senchigmijai uwentikagtugta.

3 Tuke Pujuuwah, ¡iina pujutji yapagkagtuam
yaunchuk ayag iman ekagtita!
Dutikagtuawaminig jutiishkam uwemjagtatji.

4 Tuke Pujuu ashí senchigtinuh,
amina aentsjum aidau
segapainaku dakitam dusha
¿wajupa kuashta aikash pujugtatme?

5 Yutai sukagtumaina nunú
waitut sukagtusmayume,
tuja umutai umumaina nunú
waitiaku buutbau sukagtusmayume.

6 Iina nugkega nuna yantamen batsamin aina
nunú atsaneaku dushiktai ekagtiume.

7 Apajuí ashí senchigtinuh,
¡iina pujutji yapajiam
yaunchuk ayag iman ekagtita!
Dutikagtuawaminig jutiishkam uwemjagtatji.

8 Uva numiji* egiptunmaya jukim
juwi itaam, aents pegkegchau aidau
jiija utsaakum juju nugkanum ajabiume.
9 Dutikam shiig tsapaiti tusam nugka iwajabiume,
dutikawamin nuwi tsapaka
ashí nugkan jamagmayi.
10 Imaniku asa nunú tsakaak
muja aidaunak bikintu awajsabi;
dutikak numi múun aidaunash
nagkagag niina kanawen yutua asabi.
11 Imaniau asa kanawe aidauk
nayantsanum jegabi.
Tuja nuwi yama tsapaidashkam
namak Eufratesa imanui jegabi.
12 Uva ajakbau peejamua dusha
¿wagka yumpuntuamesh agkantash awajtusume,
aents aidau nagkaemainak
akajag yajumtinme tusamesh?
13 Paki utsantua tegaja ijinui.
¡Kuntin ikamia aidau amuinawai!

14 Amek Apajuí ashí senchigtinaitme,
iman asam wait aneamam
nayaimpinum pujusam
juju uva ajakbauwa nunú kuitamkata.
15 Juju uva ayá duka ame ajakbau ainawai,
nuadui kuitamkata.
16 Tuja uva numijin tsupig apea ijinuk,
ameshkam dutiksamek ijinata.
17 Untsu apu ati tusa ame etegkamua duka
kuitamkata, dutikakum yaigta.
18 Tuja yamai nagkamsaik
makichkish aminig tsujakchattaji.
¡Pujut sukagtusta ima aminig
kajitmamsa batsamsagmi!

19 Chah, Tuke Pujuuwah, ametme
Apajuí ashí senchigtinmek,
nuadui jiina pujutji yapajiam
yaunchuk ayag iman ekagtita!
¡Dutikagtuawaminig jutishkam uwemjagtatji!

84

Apajuí jee pegkegma nuwi pujustasan ima senchi wakegajai

Coré uchiji aidau kantamawagbau

1 ¡Tuke Pujuu, ashí senchigtinuh,
amina jemea duka shiig pegkejai!

2 ¡Wika Tuke Pujuu jee pegkegma nuwi pujustasan

* 80:8 “Uva numiji” tawa nunak Israel aents aidau Egipto nugkanum batsatun Apajuí jiija yajuak Canaán nugkanum ikaunma, nuwi aents aidaun jiija utsaak nunú nugkanum batsasua nuna taku tawai.

shiig senchi wakegajai!

¡Nuniakun Apajuí pujuta sukagtina nuna
shiig anentsan senchi kantamjajai!

³ Tuke Pujuuwah, ametme ashí senchigtinum.

Mina apug, Apajuíjuh,
tiki pishakchikesh amina jemin waya,
pasugmak uchijin muumpitkamainuk
agkantak ayawai.

⁴ ¡Amina jem pegkegma nuwi pujuidauk
shiig aneasag batsatainawai,
nunidau asag amina emematjamtanak
makichkish mijamainatsui!

⁵ Tuja aents aidau aminiyán
senchimetan juwina duka shiig aneasagtatui,
tuja amina jemin minitag tusa
wakeyin aina dushakam shiig aneasagtatui.

⁶ Nugka paka buutbau tutai
yumi atsaunum weakush,
yumi pukuni jinaidaun waintinai;
tuja yumigmat taimunmaya yumi
kuyua megkaetaish, yumi yutak
ashí nugka waa aidaunmak pimasua waigtinai.

⁷ Apajuíyah, amina senchigmejai
ditak tuké senchimeawagtinai.
Tuja Siógnum jegawang
Apajuí senchigtina nuna wainkagtinai.

⁸ Tuke Pujuu, ashí senchigtin,
Jacopan Apajuíjyah,
¡wi sumamush antugtukta!

⁹ Apajuíyah, jutii ejamaktin
ame etegkam apu emauwaitam
nunú shiig anentsam kuitamkata.

¹⁰ Amina jem pegkegma nuwi waya,
makichik tsawan pujamua duka,
mil tsawan agá pujumaina
nuna nagkaesau ima pegkejai.
Wika aents pegkegchau aina nujai
ijunja pujutnak idaikun,
dekas amina jem pegkegman waitijiya nuna
kuitamin atajai tusan wakegajai.

¹¹ Wagki Tuke Pujuu Apajuí iinak ejapak kuitamjamui;
tuja aents tudau takatsuk batsata nunak,
nii wait anentak eme anentus kuitamui,
dutikak waji pegkeg aidaunak sujitatsui.

¹² Tuke Pujuu, ashí senchigtinuh,
¡aminí kajinmamas anentaimaidauk
shiig aneasagtinai!

87

Jerusalén pachisa kantamamu

Coré uchiji aidau kantamawagbau

¹ Yaakat Jerusalégkak muja pegkejam
Apajuínu tutaiya nuwi yaaktamamui.

² Tuke Pujuuk Israel aents aidaun yaaktaji,
tikich aina nuna nagkagas,
Jerusalégkan ima senchi aneawai.

³ Apajuín yaaktajiya nuna
Jerusalégkan pachisag,
shiig pegkejan augmatuinawai.

⁴ Apajuí chichaak:

“Aents aidau mina emematjuina duka
Egipto nugkanum, Babilonia nugkanum,
Tironum, Etiopia nugkanum, Filisteo nugkanum aatus batsatui.
Nunú nugkanmaya aents aidau chichainak:
‘Apajuínak Jerusalégnum wainkabaijai’ tiagtatui”, tiuwai.

⁵ Tuja Siógnnumia aidaun chichajuinak:
“¿Wagkag ditash ibau pegkegnumash batsamsajabi?
Dita batsamsatnunak dekas Apajuíyap
umigkauwaita”, tiagtinaí.

⁶ Aents aidaun daaji agattainum
Tuke Pujuu dita daajinak:
“Juka Siógnnum akiinawai”, tuu agatjatnai.

⁷ Nuadui nuwiya aents aidauk nantsemki,
kantamkabaikia chichainak:
“Mina pujutajuk Jerusalégkai”, tiagtinaí.

89

Apajuí Davitjai chicham umikbau

Esrahita aents Etán aajakua nunú kantamamu

¹ Tuke Pjuuwah, wi kantamkunuk,
amek tuke wait anenkagtinaitme titatjame,
tusan aju ajumag kantamjittagme.

² Nuniakun amina anenkem tuke auwa nuna,
tuja ame anagkagtuamuk
nayaim yapajinchauwa imana nuna etsegkattajai.

³ Amek Davidjai chichamak umikuitme;
dutikau asam nii anagkuakum:

⁴ “Ame jakaminig,
ame wegantunmaya apu wajasa
ame pujusa inamtaigmin pujus inamjatnai”,
tiuwaitme.

⁵⁻⁷ Chah, Tuke Pjuuwah,
nayaim aidauk amina takatjum pegkeja
nuna diisag emematjamainawai,
tuja ashí ángel aidauk
amina anenkagmin pachisag chichainawai;

ima aminak eme anenjamainawai.
Tuke Pujuuwah, ametme
tikich aents aidaun apajuji aina
nuna nagkaesau ishamtai dekas muunmek.

⁸ Tuke Pujuu ashí senchigtinuh,
ame senchigtinum chichakbaugmek
betek uminaitam imanuk tikichik
makichkish atsawai.

⁹ Ame nayantsak inau asam,
tsukatak ishamain wajakuish,
mijaakta tusam imijiamé.

¹⁰ Nayantsanmaya kuntin múun depetkam,
amina senchigmin shiwaajum aidau
uwaakam ipisjabiume.

¹¹ Nayaim, nugka aina duka aminu ainawai,
ame nugkak, tuja ashí nugkanum
ayá nujai najankauwaitme.

¹² Tsumujinish, nujinchinish
ame ashí nugkak najanauwaitme.
Tuja muja Tabor, muja Hermógjai
amina daagmin pachisag kantamainawai.

¹³ Amina kuntugmek senchigtinai,
tuja amina uwejum untsuja dushakam
senchigtin depetbauwai.

¹⁴ Amek pegkegnum anenkajai inaame,
tujash nuna nagkaesau dekas
amina anenkagmin
tuke kuitamkagtame.

¹⁵⁻¹⁶ Chah, Tuke Pujuuwah,
aents amina emematjamin,
amina tsaaptinjumin wekayin,
tuja amina takatjum pegkegma nuna diis
tuke shiig anea duka
amek eme anentame,
dutikakum pegkegnum yumigkiamé.

¹⁷ Wagki dita imanji aina duka,
tuja senchiji aina nujai ame susauwaitme.
Nuadui jutii aidautik aan nagkaemasam
senchigtin ekagtame.

¹⁸ Israel aents aidaun Apajuji, Tuke Pujuuwah,
ametme iina apuji pegkegmamek,
tuja ametme ejajatkam kuitamkagtaumek.

¹⁹⁻²⁰ Amina chichamjumin etsejin
yaunchuk kajanum chichagkum:
“Mina aentsug aina nuwiyán
makichik wajiun etegkajai,
duka mina inakeg Davitai,
wi niinak yaigkan, chichame antugtai emajai.
Dutikan ¡Israel aents aidaun apuji adaikajai!

²¹ Niinak yaitskek idaisashtinaitjai.

Mina senchigjai senchimtikatnaitjai.

²² Niina shiwaaji aidaush jetekchagtin ainawai,
tuja aents pegkegchau aidaushkam
depetkachagtin ainawai.

²³ Niina shiwaaji aidaunak
niish wainaig ijinatnaitjai,
tuja niina kajejuidaunash ijinatnaitjai.

²⁴ Wi niina aneamua duka tuke atinai,
wi kuitamsam kuashat kaweg
senchigtin wajastinai.

²⁵ Tuja niig nayants Mediterraneo tutaya
nuwí nagkamas namak
Eufratesa aatus inamjatnai.

²⁶ Tuja nii chichagtak:
'Ametme mina apag kuitamjaumek;
tuja ametme mina Apajuíg uwemtijnmek', tujuttinai.

²⁷ Tuja wi niinak mina uchig iwai,
ashi tikich apu aidaunash
nagkaesau apu emattajai.

²⁸ Wika niinak tuke anetnaitjai,
tuja wi nijjai chichaman umikuitag
dushakam tuke atinai.

²⁹ Nayaim awa nunisag aigkik,
niina uchiji wegantu aidaunmayag
tuke apu wegagtin ainawai.

³⁰ Untsu dita chicham umiktinun
wi jintintuau ainag nuna
kajimatkiag batsamas,

³¹ nunú chichaman uminachkuig,

³² dita pegkegchaujin
suwimak ishamaunun susatnaitjai.

³³ Untsu Davidnak tuke anetnaitjai,
tuja wi niina anagkuawaitag nunashkam
umitskek idaisashtinaitjai.

³⁴ Wi nijjai chichaman umikuitag nunak
tuke idaisashtinaitjai,
nunak tuke umiktinaitjai.

³⁵ Makichik tsawantai
wi Davitan anagkuawaitag nunak
dekas umiktatjai tusan tumanjai.

³⁶ Etsa eketa nunisag eketaigkik,
niina uchiji wegantu aidauk
tuke apu wegagtin ainawai.

³⁷ ¡Nii wegantu aidauk,
nantu tuke ekemna iman atinai!
¡Nii pujusa inamtaijishkam nayaim tuke auwa iman atinai!" tiuwaitme.

³⁸ Tusa tiuwaitkum ame apu etegkamu aig,
kajekkam dakitja idaisaume.

³⁹ Dutikau asam nijjai chicham umikuitam duka
umitsuk, David kajimatkim idaisaume.

⁴⁰ Tuja yaakat Jerusalén peejamua dushakam

yumpua tsaikam ayamjumamainchau
 eman idaisaume.

⁴¹ Ashi aents nuni nagkaemaidauk
 wayawag dita wakegamun kasamainawai,
 tuja aents dita nugkega nuna yantamen
 batsamin aidau dushikinawai.

⁴² Nuadui Davita shiwaaji aidauk shiig anenawai,
 wagki dita ima senchijinawaju asag.

⁴³ Niina maanitaiji puyagshakam atankiume;
 dutikau asam maaniakuish yaigchaume.

⁴⁴ Eme anentai aajakua duka
 wainkauch idaisaume;
 dutikakum apu wajasa inamtaijishkam
 tikima wainkauch awajtusume.

⁴⁵ Tuja nuigtush kuashat mijan
 pujuschatu tusam atankiume,
 dutikakum datsa datsantak awajsaume.

⁴⁶ Chah, Tuke Pujuuwah,
 ¿uumjuktamek pujuttam?
 ¿Kajegtukbaukek pujuttam?

⁴⁷ Apuh, mina pujutug piipichia nunú adeagta;
 ame aents najanamua duka
 ujumak tsawantak pujus jauwai.

⁴⁸ ¡Makichik aentsuk jatsukek iwakuk pujumaitsui!
 ¡Tuja jakashtajai tusa,
 jata uwemtumainchakam makichkish atsawai!

⁴⁹ Apuh, ¿ame yama nagkamchakum:
 Davita tuke anetnaitjame tusam
 tiuwaitam dusha wajukame?

⁵⁰ Apuh, iinak kuashat dushiktamainawai,
 imatika dushiktamainakuish atsaneaji.

⁵¹ Tuke Pujuuwah, amina shiwaajum aidau
 ¡aatus iina pegkegchaun chichagtamainawai!
 ¡Aatus ame apu etegkamua nuna
 aju ajumag pegkegchaun chichajuinawai!

⁵² ¡Tuke Pujuuwah, tuke pegkegnum chichagtai atin ati!
 Maake, aatus ati.

LIBRO IV

90

(Salmos 90—106)

Aentsuk Apajuí tuke pujuuwa nuninchauwai

Moisés Apajuí etegkamua aajakua nunú Apajuín ausamu

¹ Apuh, amek yaunchuk nagkamsam
 jutiik tuké yaijatnaitme.

² Tuja muja aidaush najaneatsaig, nuggashkam najaneatsaig,
 yaunchuk nagkamsam,
 yamaya juish, tuja atakea duishkam
 ameketme Apajuimek.

³ Amina chichamjuminig
 aents aidauk jakag nugka najanenawai.

⁴ Ame diismak mil mijana duka
makichik tsawan nagkaema nuninai;
tuja mil mijana duka
kiyag tsawak megkagama
numamtuk nagkaemawai.

⁵ Amek namak chichigmajai betek
aents aidauk utsame,
tuja iina pujutjig kajanum kajamja
shintaku ukutiama nujai betekai.

⁶ Aents aidauk dupajai betek ainawai,
dupa kashikmas yagkujuk,
etsa akagai kagaka
jinuwama numamtuk wajaji.

⁷ Ame kajekbaugmin amujatme,
tuja ame kajekamin ishamka
imaanjaujai betek pujaji.

⁸ Iina tudauji pegkegchauwa duka
ame shiig dekame.

⁹ ¡Ame kajekagtukaminig
ii iwaku batsatag duka,
mayai mayati ajaptayama
numamtuk jaka megkaemainaitji!

¹⁰ Iik ayatak setenta mijan pujusa jainaji,
tuja nuni wajiu aidau ochenta mijan jagainawai;
tujash imaan mijan pujakuish,
ima waitiamua duke utugchatjai igkunui.
¡Mijanak jutii pujutjijai betek
wamak nagkaemawai!

¹¹ Ame senchi kajeamugminash
¿ya dekamainaita?
Ame kajekbaujum ishamaina nunash
¿yaki dekamainaita?

¹² ¡Iik tuke jakatnapitji tusa,
shiig dekau ata nunú jintinkagtuata!
¡Nunú dekau asaja,
pegkegnum pujuta nunú puyatjukagmi!

¹³ ¡Tuke Pujuuwah, ataktu yaijatkata!
¿Wajupa asamea yaijatkattame?
¡Juju amina inakem aina nunú wait anenjata!

¹⁴ Kashikmasa nagkamsam
amina anenkagmea nunú sukagtusta,
dutikagtuawaminig ashí tsawantai,
shiig aneasa tuké kantamtinaitji.

¹⁵ Kuashat mijanai waitujakuitag
imatiksamek shiig aneasa pujut sukagtusta.

¹⁶ ¡Juju amina inakem aina nunú
dita wegantu aidaujai amina imanjumin
senchigmejai wainkatnume tusam iwaintukta!

¹⁷ ¡Iina Apajuji Tuke Pujuuwa

nuna wait anenkagtutaijig jutinii asati!
 ¡Apajuíjuh, iina takatjish pegkegnum yumigsata!
 ¡Ehe, dekas iina takatjig pegkegnum yumigsata!

91

Apajuíyai iina kuitamjamnuk

¹ Apajuí múun, ashí senchigtina nunú
 kuitamsam pujauk,

² Tuke Pujuu chichajak: “Ametme
 mina ejamataijuk,
 wi uumka ayamjumataig.
 ¡Ametme mina Apajuíg,
 ima aminig kajintsan anentaimjai!” tawai.

³ Wakan pegkegchau
 utugchatan apujtugmataish,
 tuja jata aidaunmashkam
 ima nigki ayamjupamainai.

⁴ Wagki niig atash niina nanapen uchuchiji aidaun
 dukuka kuitamama numamtuk kuitamjamnai,
 nuadui amek puyattsuk
 shiig aneamam pujustinaime.
 ¡Niina anenkega duwi
 aminak tantag ejamatia numamtuk
 ejapak kuitamjamkattawai!

⁵ Nuadui kashi ishamainnum pujakmesh,
 tuja tsawai wekaekumesh,
 mantuachagtimpash tusamek ishamkaipa.

⁶ Tuja jata kashi magkagtin,
 tsawai magkagtinkesh iyanjugmatai,
 jakashtajash tusamek ishamkaipa.

⁷ Amina menagma nuni mil aents jinitnai,
 tuja untsugmea nunishkam
 diez mil aents jinitnai,
 tujash amek makichkish wajukashtinaime.

⁸ Untsu aents pegkegchau aidaun Apajuí suwimak susam jinuidau waiti-
 naitme,

⁹ wagki aminak Tuke Pujuu múun,
 ashí senchigtina nunú
 ejapak kuitamjamu asamtai.

¹⁰ Aminak makichik pegkegchaukesh
 waitkagmaschatnai,
 tuja jatashkam amina jeminig utugmashtinai.

¹¹ Wagki Apajuí ángel aidaun ishiaktatui
 ame tuwi wekaetatme nuwi kuitamjamkatnun.

¹² Nunú ángel aidau achigmaku agtatui,
 kaya tukumak iyajai tusa.

¹³ Nuadui, ikamyawa yukagtin aidau,
 tuja tikich kuntin ishamain ayaunum
 wekaekumesh, uyumat aneakas wekaetatme.

¹⁴ Apajuí chichaak:

“Juju aentsuk mina waitui,
 anentanash anentui, nuniau asamtai
 wi niinak ayamjukan uwemtikjattajai.
¹⁵ Tuja yainkati tusa mina segatkuishkam,
 aiktinaitjai, dutikakun ;niijaig pujutnaitjai!
 ;Tuja waitiakuishkam agkanmitkatnaitjai!
 ;Dutikakun eme anentsa diitai awajsatnaitjai!

¹⁶ Tuja kuashat mijan
 shiig pujustin ati titinaitjai.
 ;Dutikakun pujut nagkanchau tuke atina nuwi pujus
 dakujusti tusan jukitnaitjai!” tawai Apajui.

93

Apajuiyai dekas apuk

¹ ;Tuke Pujuuwai dekas apua duka!
 Tuke Pujuuk etsantug tsaaptin wajas eketui,
 niyai ashí senchigtina duka,
 tuja nugka buchitkai tusashkam kuitamui.

² Amek yaunchuk nagkamsam apuitme,
 ;Amek tuke pujuuwaitme!

³ Chah, Tuke Pujuuwah,
 namak senchi tsukatak uutui.

⁴ Tujash apujuh, amek nayaimpinum pujusmek,
 namak tsukatak uutuuina nuna nagkaesau,
 tuja nayants uutbaun nagkaesau
 senchigtinaitme.

⁵ Chah, Tuke Pujuuwah,
 amina chichamjum umiktina duka
 yapajinchau tuke auwai.
 ;Amina pegkegmagma duka
 makichik jeganum yagkug
 nenaja iwajamuama imanik,
 amina jem pegkema nuwi tuke awai!

95

Apajui shiig anentsa kantamjuawagmi

¹ Kaunatajum,
 Tuke Pujuu, iina kuitamjamak
 uwemtijamna nunú
 shiig aneasa kantamjuawagmi.

² Nii pujamunum wayawaja
 nii emematku kantamtai kantamjuawagmi.

³ Wagki Tuke Pujuuwai dekas múun senchigtin,
 ashí tikich apajuiantai aina nunashkam Apujiyai.

⁴ Nugkak initken nagkamas
 ashí Apajui emetuum awai,
 tuja muja tsakaju aidaushkam niinu ainawai.

⁵ Tuja nayantsashkam
 nii najanamu asa ima niinuke.
 ;Nugkanashkam nigki najanauwai!

- 6 Minitajum,
Tuke Pujuu, iina najapauwa nunú
tikishmatja emematiagmi.
- 7 Niyai iina Apajuújig,
tuja iik niina aentsji ainaji,
nuadui uwija kuitamin
niina uwigjin kuitamama numamtuk
iinash kuitamjamui.
Apajuí yamai atumin tujama
nunú antuktajum.
- 8 “Yaunchuk Meribánum,
tuja uwejush Masánmashkam
Apajuí chichamen intimjukiú aina
numamtuk wajakaigpajum.
- 9 Atumin muunjum aajaku aina duka
kuashat wainchatai aidaun
wi iwainamun wainainayatak,
dekaskechua nunin diisu ainawai.
- 10 Nuadui nunú aents aidaun
dakitjan cuarenta mijan pujubiajai,
nuniakun: ‘Juju aents aidauk
shiig wainak yujawai; núnidau asag
mina chichamjunak umigtuinatsui’.
- 11 Nuadui kajekan,
chicham yapajiashtinun chichaakun:
‘Dita shiig batsamsatnun nugka pegkejan
wi ditan anagkuawaitag,
nuwig ditak jegashtin atinme’ tiabiajai”,
tiuwai Apajuí.

96

Yamajam kantamtai ii apuji kantamjamu

- 1 Ashí nugkanmaya aents aidautijum
yamajam kantamtai
Tuke Pujuu kantamjuatajum.
- 2 Tuke Pujuu kantamjakjum,
niina daaji pegkegnum chichagtajum.
Tuja Apajuíyai uwemtikagtinuk tusajum
kashi kashinig etsegtajum.
- 3 Apajuí imanjiya nunú,
niina pegkegmajijai pachisjum
ashí nugka múun aidaunum etsegkatajum.
- 4 Wagki Tuke Pujuuwai dekas múuntak,
ima nigki eme anentsa kantamjam amainuk.
Niyai tikich apajuímtai aina
nuna nagkaesau ishamaín.
- 5 Tikich aents aidaun apajuímtaiji aina duka
wainak ainawai;
tuja Tuke Pujuuwai nayaimpin najanauk.
- 6 ¡Apajuín tsaaptinjiya duka jiin utsumakui!
¡Nii pujamujiya nuwig niina senchiji,
pegkegmajiya nujai awai!

⁷ Ashí nugkanmaya aidautijum:

“Ameketme senchigtinum,
ameketme pegkegmamek”,
tusajum Tuke Pujuu ememattajum.

⁸ Tuke Pujuu anentag susatin jukijum,
nii jega nuna agájin ikaunmajum,
tikishmaja pujusjum Apajuí etsagjatajum.

⁹ Apajuí jee pegkegma nuwi
wayajum etsagjatajum.

¡Ashí nugkanmaya aidauk
amina ishamjamainak kujaitnume!

¹⁰ Ashí aents nugkanmaya aidau chichagkujum:
“¡Tuke Pujuuwai iina apujiya duka!
Nugkanak jasa buchittsuk asatnun nii najanauwai,
tuja ashí aents aidauanak
nii inak betek diyakuí.

¹¹ ¡Nayaim aidauush, tuja nugkashkam
shiig aneastinme!

¡Tuja nayantsashkam,
tikich namak múun aidaujai
shiig aneenak uuttinme!

¹² ¡Tuja nugkashkam,
nunú nugkanum batsamin aidaujai
shiig aneastinme!

¡Tuja numi ikam ayaushkam shiig aneenak,

¹³ juju nugka juwi inamjatin
mina nuna emtin pampaitnume!

¡Tuke Pujuu dekas
iina nugken inamjatatus taattawai!
Nunik taa aents aidau takasbaujin
diijus etegjattawai.”

100

Apajuí iina najapauwa duwi niinu ainaji

See taku kantamtai

¹ Ashí nugkanmaya aidautijum
shiig aneasjum Apajuí kantamjuatajum.

² Shiig aneasjum
Tuke Pujuu etsagjatajum.
¡Shiig aneasa untsumkujum

Apajuí jee pegkegma nuwi minitajum!

³ ¡Tuke Pujuuwapi dekas apuk titajum!
Inak nii najapauwai, nuadui iik niinu ainaji.

¡Niina aentsji ainag duwi,
aents uwigjin kuitamama numamtuk
kuitamjamui!

⁴ Nuadui Apajuí jee pegkegma
nuna waitijin kaunajum,
Apajuí see takujum niina daaji pachisjum
kantamtai kantamkujum ememattajum.

⁵ Wagki Tuke Pujuu dekas pegkejai,

tuja niina anenkajishkam tuke auwai,
antsag nii anagkagtuamujig
makichkish yapajinchauwai.

103

Ashí mina senchigjai Apajuínak ememattajai

David kantamamu

¹ Ashí mina anentaigjai
Tuke Pujuun emematkun
pegkegnun chichagtinaitjai;
niina daaji pegkegma nuna
pachisan ashí mina senchigjai
pegkegnun chichagtinaitjai.

² Ashí mina wakanujai
Tuke Pujuun emematkun
pegkegnun chichagtinaitjai;
tuja nii mina yainkauwa nunak
makichkish kajimatkishtinaitjai.

³ Niyai mina tudaujun tsagkugtau;
nigki wi jaaku pujaish etsaentinuk.

⁴ Tuja jamainnum jeganta aish,
niyai mina uwemtijnuk.
Tuja nigki niina anejattaijiya nuna
mina anentaijui suja duka.

⁵ Niig ashí pegkeg aina nuna sujawai.
Tuja wi múuntuch wajasan pujaish,
nii minak ataktu senchintijua
ukukui yakí nanamama iman etawai.

⁶ Tuke Pujuuk, pegkegma iman asa,
aents waituidaunash yaigka
agkanmitkawai.

⁷ Moisés Israel aents aidaujai
dutikatnun, tuja dita umikagtinun
aatus Apajuí jintintuauwai.

⁸ Tuke Pujuuk kakagchauch
wait anenkagtinai;
wamak kajechui,
tuja anentak wajasui.

⁹ Apajuík jiyajatu pujuchui;
tuja kajegkagtukbaujish tukek achauwai.

¹⁰ Ii pegkegchau takamtaijin
shiig kuashat suwimak jumain ajinig,
imatikagkesh amaschauwai.

¹¹ Niina umijin aidaunak Apajuík
nayaim múun nagkatkachua nuni
nagkaemas aneawai.

¹² Etsa juintaijiya nuna
etsa akaetaijiya nujai
atushat akankauwa numamtuk,
iina tudaujinak atushat datupajui.

¹³ Tuke Pujuuk niina umijuina nunak,
makichik múun uchijin shiig anentus

kuitamama imatikas kuitamui.

14 Wagki iish wajiyai najanamuitji
nunak nii dekawai;
iik nugka yukukuntujai najanamuitji,
nuna nii shiig dekawai.

15 Aentsu pujutjiya duka
dupajai betekmamtinai;
dupa tsapai yagkujuwama numamtuk wajawai.

16 Tuja yagkugnak dase dasentak umpui utsauwame,
dutikamu asantai, ataktu awagkik wainchataiyai.

17 Untsu Tuke Pujuu anenkega duka
niina umijin aidaunmak
megkaekashtinun tuke atinai.
Nuadui, nuna uchiji wegantu aidaunash,

18 tuja ditajai chicham umikbauwa nuna
betek umidaun, nuigtu diez chicham umiktin
agagbaun kajimattsuk umidaun
aatus tuke yaigtinai.

19 Tuke Pujuun pujusa inamtaijiya duka
nayaimpinum awai;
nuwi ekemas ashí nugkanum inamui.

20 ¡Nayaimpinmaya aents ángel senchigtin,
Apajuí chichame umijin,
tuja nii inapakui umiktasajum
batsamin aidautijum
Tuke Pujuu ememattajum!

21 ¡Atum niina suntaji aidautijum nii takajin,
tuja nii inapamu betek umijin aidautijum
Tuke Pujuu ememattajum!

22 ¡Tuja Apajuí najankamu
ashí nugkanum batsamin aidautijum
Tuke Pujuu ememattajum!
Tuja wishakam ashí mina wakanujai
Tuke Pujuun ememattajai.

104

Apajuí emematbau

1 Ashí mina wakanujai Tuke Pujuun
emematkun pegkegnum chichagtinaitjai.

¡Tuke Pujuu mina Apajuíjuh,
amek dekas múuntaitme!
Tuja amek amina imanjumea nunú ijiam,
etsanjam pujame.

2 Amek dekas tsaaptin ijimakume.
¡Ame nayaimpia duka
jáanchjai betek ejauwaitme!

3 Dutikam yaki nayaimpinum
ame pujusfinjum umikuitme.
Amina carrogmin yujagminum
egkemkam wekaeme.

¡Amina nanapjumin
 dasenum nanaakam wekaeme!
 4 Dase aina duka ame iname,
 ame nunikti tama jiishkam kegawai.
 5 Apajuik nugkanak nigki
 buchitmainchaun najanauwai;
 nuadui makichkish umuchmainchau atinai.

6 Ame nayants pimumtikjam
 nugka yutuabiume,
 dutikakum ashí muja
 múun tsakaku aidaush yutuabiume.
 7 Imanikmataish,
 kuyua buku wajasti timayume,
 tusa tabaugmin amina chichamjumin
 ipamtajai betek antuk wamak kuyuabi.
 8 Nuadui, yumi piyag
 muja aidaun amuja auk,
 wake aidaunum akaiki,
 ame nuwi ijumnagti tibaunak imanisag
 nuwi ijumnajui.

9 Nunikmatai ataktu pimak
 nugkan utujai tusam,
 juwig nagkankati, nuwi nagkama
 pima pimakuag wechatu tiuwaitme.
 10 Untsu yumi mujanum pukuni jiinki,
 entsa najanea pakajin jegak,
 namak múun wajasti tusam idaime.

11 Nunú yumin kuntin ikamia aidau
 burro ikamia aidaujai kitamainak
 umin ainawai.
 12 Nunú namaka yantamen numi ayaunum,
 nuna kanawen chigki aidau pasugmak petsainak,
 shinuinamu antunawai.

13 Tuke Pjuuwah, amek
 nayaimpinum pujusam yumi yutumtijam,
 ikam ukatkam pegkeg emame;
 tuja amina anenkagmea nunú
 nugkanak shiig anemtikui.

14 Apajuí dupanak tsapapitkawai,
 kuntin nuna yuu aidau
 yuwatnume tusa,
 tuja ajak aidaunashkam
 tsapapitkawai, nunú nejekmatai
 aents aidau yuwatnume tusa.

15 Tuja pagkan yuwa ichichmamtain,
 tuja vino uwaja shiig aneastinun,
 nuigtu aceite kugkuin yapinum
 nijamtain aatus ashí umikui.

16 Tuke Pjuuu numi najankamua duka
 yumi uchupiam shiig ijunui,
 tuja Libanonmaya setug aidaun
 nii tsapapitkakua dushakam,

yumi yutak nugkan uchupiau asamtai
shiig ijunui.

17 Nuna kanawe aidaunum
chigki aidau pasugmak petsainawai;
nuwi pishak cigueñashkam pujawai.

18 Tuja muja tsakaku aina duka
cabra ikamia aidau batsamtai ainawai;
untsu kaya múun aina duka
wapujushan uumka batsamtai ainawai.

19 Apajuí nantunak najanauwai,
wajupa nantuk weawa tusa dekatnun;
tuja tsawan dekapa dekatain etsan najanauwai.

20 Etsa akaetaik kiyawai,
nunikmatai kashi kuntin
ikamia aidau jiinag yujawai.

21 Tuja león aidaushkam kashi jiinag,
dita yumainji atsutai shinuinawai,
Apajuín segainak.

22 Untsu tsawak etsa jiintai,
dita waajin akuumag megkagainawai.

23 Tsawan tsawagmatai,
aents aidau takatjin jiintukiag,
takai takainakua agkutai ukuinawai.

24 ¡Tuke Pujuuwah,
amek shiig kuashat najankauwaitme!
Tuja ashí duka
amina yachagmijai umikuitme.
¡Nugka ame najanamua
nuwig ashí ame najankamu aina nunú batsatui!

25 Diisia ame najanamu
nayants shiig múun,
nuwig kuntin múun aidau,
kuntin piipich aidau shiig kuashat
makichkish dekapamainchau ayawai.

26 Nuwi yujawai lancha múun aidau;
tuja nuwi semagkau múun
najanawaitam nunú
shiig aneak wasugkamui.

27 Nunú aidauk ashí
amina dakagmainawai,
wajutik yutainash amasat tusag.

28 Nuadui ame dita yuwatnuk suwame,
dutikam jukiag shiig yuwinawai.

29 Untsu ame uumjukmak,
senchi ishamainawai;
tuja ame mayatut jujamshakam jawai,
nunik iyashig yukukuntu najaneawai.

30 Tujash ame Wakanim suwamak
ashí nugkanmaya aents aidauk
yamajam pujutan juwinawai.

31 ¡Tuke Pujuu imanjiya duka tuke auwai!

¡Tuke Pujuu nii najankamujin diisa shiig aneawai!

³² Tuja Apajuí diyamak nugkak kujawai,
untsu muja aidauk

Apajuí antiamak bukuituinawai.

³³ Wi eke iwaku pujuttag nuaduik

Tuke Pujuu, mina Apajuíjun emematkun
kantamtain kantamjuattajai.

³⁴ Tuja Tuke Pujuu wi anentaibaujua

nuna shiig aneas diigtusti,
wagki minak niyai shiig aneamujuk ajutui.

³⁵ ¡Aents pegkegchaun takau aidau

Apajuí ememattan dakituidauk
ashí jinawag megkaejatnume!

¡Ashí mina wakanjuai Tuke Pujuu emematkun
pegkegnum chichagtinaitjai!

¡Yajauwajah! Tuke Pujuu daaji ememattai ati.

105

Apajuí Israel aents aidaun yaigbau

¹ ¡Tuke Pujuu see titajum!

¡Niina daaji pachisjum
aents aidau ujaktajum!

Dutikakjum nii takatji
tikich nugkanmaya aidaush ujaktajum.

² Apajuí wainchatai aidaun
iwainajua nunú anentaimtusjum,
kantamtai kantamjuatajum.

³ Niina daaji pegkegma nunú
anentaimtusjum eme anenmamtajum.

¡Tuke Pujuu umijin aidautigmek,
shiig aneatajum!

⁴ Ashí tsawantai Tuke Pujuu egaktajum,
nuniakjum niina senchijiya nunú segatajum.

¡Tuké Apajuí egaktajum!

⁵⁻⁶ Apajuí ii aidautin, tuja niina inake Abraham, Jacob aajaku aina
nunú wegantu aidaun etegjauwa nuna,

ayamjak wainchatai ishamain aidaun
iwainajua nunú anentaimtustajum.

Tuja chicham umiktin agagbauwa
dushakam adeagtajum.

⁷ Niyai Tuke Pujuu, iina Apajuíjiya nunú;
niyai ashí aents aina nuna apujig.

⁸ Kuashat mijan nagkaemataish,
nuna dutikatjai tusa anagkagtuamujinak
Apajuík tuke kajimatkishtinai.

⁹ Nunak Abrahamjai umikua nuna,
Isaakjaishkam ataktu umikui.

¹⁰ Nuna Jacobjaishkam umikui,
tuja nunú tuke asatin

Israel aents aidaunum juwakui.

¹¹ Nuadui Apajuí niina chichajak:
“Wi nugka Canaágnak amastajai,
aminu tuke atina nuna”, tiuwai.

¹² Israel wegantu aidauk
ujumchik aajaku aina duwik
nugkenchau asag,
Canaán nugkanmak ijagjai betek
wainak yujajaku ainawai.

¹³ Nunidau asag,
tikich nugkanum shiyakag,
nuwi batsamas, nuna ukuinak
tikich apu aidau batsatbaunum jegawag,
nuwi ujumchik tsawan pujusag,
waja yujayanume.

¹⁴ Tujash Apajuík
waitkastinme tusag idaisachmayi,
nuadui ditan ayamjak
apu aidaun suwimkan susabi.

¹⁵ Nuadui apu aidaun chichajak:
“Mina aentsug wi etegjamu aina duka,
tuja mina chichamjun etsejin aidaushkam
makichkish waitkasaigpajum”, tiuwai.

¹⁶ Tuja Canaán nugkanum
Apajuí ajak aidaun ashí ijinabi,
dutikamu asa nujan tepeabi.

¹⁷ Tujash eke nujan tepeatsaig,
Apajuí Josén emtika Egipto nugkanum
awemauwai, dita yachi aidau
wainka inataijai betek sujukajua nuna.

¹⁸ Dutikam Egipto nugkanum jegamtai,
Josénak jijui dawenum jigkajag
jukiag aents achika egketainum
egkeawagmayi.

¹⁹ Tuja José kajamjamuji uminkati tusa,
Tuke Pjuu niina dekapeak
kuashat tsawan waitkastinme tiuwai.

²⁰ Nunik waitu pujaun,
Egipto nugkan apuji José jiiktajum tusa
inamjamtai jiikiagmayi,
dutika agkanmitkabi.

²¹ Dutika jiiki niina jeen apuji ema,
nuigtu niinu aidau Egipto nugkanum ayaunak ashí diisti tusa niina
idaitusui.

²² Tuja nuigtushkam apu atuwe aidaun,
tuja tikich apu aidaunashkam
nigki jintintua unuinakti tusa idaitusui.

²³ Nunikbaunum Jacob Israel daagtin
aajakua nunú Egipto nugkanum jegauwai.
Nunik jegaa tikich nugkanmayayaitak
Cam nugkanum pujusui.

24 Nunik pujusmatai, Apajuí
nii aentsji aidaun kuashat uyujkauwai,
dutika niina shiwaaji aidaun
nagkaesau senchigtin emauwai.

25 Tujash egiptunmaya aidaun
Israel aents aidaun kajejiagti,
dutikainak tsanujagtinme tusa
Apajuí tsagkamkauwai.

26 Tuja kuashat waitkagtai,
Apajuí niina inake etegkamujin Moisésan Aaróggai
Egipto nugkanum awemauwai.

27 Nuadui Apajuí senchijin
wainchatai ishamain aidaun Egipto nugkanum, Cam nugkanum iwainaka-
juí.

28 Tuja Egipto nungkak ashí suwe wajasti tusa
Apajuí suwe emabi.

Nuna wainainayatak
egiptunmaya aents aidauk,
Apajuí chichamenak
antugkachaju ainawai.

29 Tuja yumi aidaunak ashí numpa awajtusui;
imanikmatai, namak aidaushkam jinawajui.

30 Takash aidaunashkam,
ashí yaaktanum piyakti,
nuniak apu pegajinish
tuja nii ekemtajinish utsaniag
waitkasti tusa ishitkabi.

31 Apajuí nunikti timatai,
anchi tetezejai pachimnag,
yujagkim wajukama imanik
Egipto nugkanak akijuawabi.

32 Tuja yumin yutumtiktsuk,
bicha kaya iman najaneaku
jiijai pachimag nayaimpinmayan
Egipto nugkanum yutumtikjabi.

33 Nunú yutak uva ajakbau aidaun,
higo aidaunash ijinabi.
Dutikak numi kanawe
aidaunashkam ashí kupijabi.

34 Tuja Apajuí ataktushkam nunikti tusa timatai,
manchi aidaun shiig kuashat kaketukmayi.
¡Shiig kuashat asa dekapatash dekapamaichabi!

35 ¡Imaniau asa ajak ajanum ayaunak,
tuja dupa aidaunak ashí amukagmayi!

36 ¡Dutiksag egiptunmaya aents aidaun
uchiji iwai aidaunashkam ijituabi!

37 Dutika nuadui,
iina muunji aidaunak Apajuí
oro aidaun, tuja plata aidaun
aatus uyumitkak jiiigmayi.
Nunik shimakush Israel aents aidauk

makichik kayanakesh tukumkachagmayi.

³⁸ Nunik shimiagtai, egiptunmaya aidauk
ishamkagtu batsatu asag,
shiig aneasaju ainawai.

³⁹ Dutika jiiija yujagmin awetiuwai,
niina aentsji aidaun ejakti tusa;
tuja dutiksag kashi diisag
shiyaktinnashkam jii kegaun awetiuwai.

⁴⁰ Tuja yumainji atsujam yapajuinak sumagtaish,
codornisan ishikabi;
tuja nayaimpinmaya yutai susam
nuna yuwawag ejemajag
shiig aneasagmayi.

⁴¹ Tuja Moisés kayan awatmatai,
kayanmaya yumi jiinkibi,
nunik entsajai betek wajas
uwegshunum akaikibi.

⁴² Apajuí yaunchuk Abrahaman
anagkuamunak betek umikmayi.

⁴³ Aatus Apajuí niina aentsji aidau
Egipto nugkanum batsatun jiigmayi.
Dutikam aents aidauk
shiig aneenak untsumiagmayi.

⁴⁴ Dutika yajuak nugka
tikich aents aidau batsamtain susabi,
dutikak ajak tikich aents aidau
ajakbau aidaunashkam susabi.

⁴⁵ Nunak Apajuí dutikauwai,
juwi batsamas chicham umiktin agagbauwa nuna umiktinme tau asa.
¡Yajauwajah! Apajuí emematiagmi.

LIBRO V

107

(Salmos 107—150)

Apajuíyai pimpiki wake besemag pujajinish yaijatnuk

¹ Tuke Pujuu see titajum,
wagki niyai pegkejak,
niina anenkajig tuke auwai.

² Iina shiwaaji aidau inaku
waitkatai batsatutin Tuke Pujuu
niina senchijijai jiigmag
agkanmitkagmabi titajum.

³ Dutijama etsa jiintai, etsa akaetai,
nujinum, tsumunum batsamin
aidautin yajupak ijupagmayi.

⁴ Tuja iina muunji aajakajua duka,
wainak megkagag uwegshunum yujajakui,
yaakat dita batsamainun
wainainachu asag.

⁵ Nuninak nujantai, kitakai
ashí jinawag yujagmayi.

6 Nunik waituinak Tuke Pujuun
yaijatkata tusag segagmayi,
nuna nii antujuk, dita
waitiamujin yaigka agkanmitkabi.
7 Dutika jintintua dita
shiig batsamsatnunum ejegawagmayi.
8 Nuadui Tuke Pujuu emematiagmi,
niina anenkajin iina ayamjupak
ishamain wainchatai aidaun iwainajua,
nunú pachisaja.
9 Wagki Apajuíyai aents kitakai jaunash,
tuja nujantai jaunashkam suwa duka.

10 Tuja iina apachji aajakajua duka,
inaku waitkainam pimpikiag
wake besemag pujuagmayi.
11 Nunak Tuke Pujuun shiwagmainak,
chicham umiktinun susauwa nunash
uminachu asag nunikajui.
12 Nuadui Apajuí suwimak susam
shiig senchi waitujakajui,
dita yaimainuk makichkish
atsugsamu asa.
13 Nunik waituinak Tuke Pujuun
yaijatkata tusa segagmayi,
nuna Apajuí antujuk, dita
waitiamujin yaigka agkanmitkabi.
14 Dutika senchi inainaku waitkam batsatun
agkanmitkabi.
15 ¡Tuke Pujuu anenkega nunú see titajum,
wagki nii jutiin ayamjupak
kuashat wainchatai ishamain
aidaun iwainajua nuadui!
16 ¡Waiti bronce najanamunash,
tuja jiju awajamu aidaujai,
Apajuí ashí tsaikui!
17 Tuja iina apachji aidauk anentainkachu asag,
dita pegkegchaujín jata achikam
senchi waitiagmayi.
18 Nunik jinuinak yujumkan tsumainak
yutsuk, nujantai ashí jinaa batsabi.
19 Nunik waituinak Tuke Pujuun
yaijatkata tusa segagmayi,
nuna Apajuí antujuk,
dita waitiamujin yaigka agkanmitkabi.
20 Ashí niina chichamenig etsagakmayi.
¡Aatus ashí jinaa batsatun uwemtikjabi!
21 Tuke Pujuun anenkega nunú see titajum,
wagki nii jutiin ayamjupak,
kuashat wainchatai ishamain aidaun
iwainajua nuadui.
22 Apajuí yaimpakua nunú anentaimtusjum,

see takujum kuntin maa apeatajum,
dutikakjum nii dutikamuji pachisjum
shiig anejasjum senchi
untsumkajum etsegkatajum.

²³ Iina apachji aajaku aina nunú
lanchanum nayants shiyaku aidauk,
nayantsa amain tikich nugkanum
wajiin sujak yujau ainawai.

²⁴ Ibau nayants muunnum yujasag,
junak dekas Tuke Pujuuwap najanauwaita
tusa dekawajui.

²⁵ Apajuí chichakmatai,
dase ishamain iyagmayi,
imaniak nayantsan shiig senchi
tsukatmitkabi.

²⁶ Imatikak lanchanak
yaki ema ema ajuibi.
¡Imaniau asamtai,
ayamjumamainchau dekapiagmayi!

²⁷ Nuninak nampekujai betek
winchainag tukumak iyainiagmayi.
Imaaninak lanchanum
yujatan yacha ainayatak
dutikmainchau dekapiagmayi.

²⁸ Imanitai ishamainak
Tuke Pujuun segagmayi,
tusa segam antujuk yaigka uwemtijabi.

²⁹ Dutikak dase ishamain wajak
nayantsan tsukatmitkaunak imijakmayi.

³⁰ Nunik mijakmatai, shiig aneasagmayi,
tuja Apajuí ditanak yajuak
dita jegatag tibaunum ejegauwai.

³¹ ¡Tuke Pujuu anenkega nunú see titajum!
Wagki nii jutiin ayamjutpak,
kuashat wainchatai ishamain aidaun
iwainajua nuadui.

³² ¡Ashí aents aidautijum ijunjajum
Apajuí ememattajum!
Tuja Israel aents aidaun apuji
múun aidautigmesh ijunjajum
Apajuí ememattajum.

³³ Apajuík namak múun aidaunash
ukuya uwejush emawai,
tuja yumi pukuni jiinunash
ukuya buku emawai.

³⁴ Tuja nugka ajak shiig tsapaunash,
nuwiya aents aidau tudaujin
ajak tsapachu emawai.

³⁵ Uwejush yumi atsaunash
kucha ain emawai,
dutikak nugka buku ataish,

yumi pukuni jiinin emawai.

³⁶ Tuja aents nujantai waituidaunak
yajuak nuwi batsawai,
dutikam nuwi dita batsamsatnun
yaaktan najanainawai.

³⁷ Nuwi batsamas uva ajakag
kuashat nejekun juuka yuwinawai.

³⁸ Apajuí ditanak yayawai,
tuja dita tagkuji aidaunashkam
kuashat ikauntawai.

³⁹ Untsu tikich aidauk
kuashat waitkainamu asag,
ujudauch ainawai.

⁴⁰ Tuja Apajuík aents pegkegchau
waitkagkagtin aina nunak kajejawai.
Nuadui ditanak uwegshunum wainak yujas
jinaati tusa idaisauwai.

⁴¹ Tuja aents ujudauch
wake besemag pujaunash
nii agkanmitkawai.

Dutika nii uchijinak
tagkujai betek kuashat uyujtawai.

⁴² Nuna aents Apajuí umijin aidau
diisag shiig anenawai.
Untsu aents pegkegchau aidauk
datsaamainak ataktuk tumainchau
dekapenawai.

⁴³ Aents shiig anentaimkauk juna anentaimas diisti.
Nuniak Tuke Pujun anenkega nuna dekattawai.

110

Apajuí apunak senchimitknai

David kantamamu

¹ Tuke Pujun mina apujun chichajak:
“Mina untsujui ekemsata, nunikamin
wi amina shiwaajum aidaunak depetkan
aminí ikaunmakmatai,
ame inagminum”, tiuwai.

² Jerusalégnun pujusa inamjati tusa
Tuke Pujun amina umigtamkae.
Tuja amina shiwaajum aidaunak nii depeteawai.

³ Ame apu wajasamin,
amina aentsjum aidau shiig aneas kaunawag,
ame tabau umikmi tusa tujabiagtin ainawai.
Tuja amek kashikmas
jegashjuk tsawauwama numamtuk,
kashi kashinig yamajam senchi jutatme.

⁴ Tuke Pujun nii umiktinjin
yapajinashtinun chichaak:
“Ametme sacerdote Melquisedec aajakua
nujai betek tuke sacerdote atinmek”, tiuwai.

5 Apajuik amejaig pujawai amina yaimpaktatus.
Makichik tsawantai nii kajeka
apu aidaunak ijinattawai.
6 Aents aidaun suwimkan susa ijinatnai,
dutikam ashí nugkanmak
aents jinauk tuwasua weaku atinai.
;Nugka múun aidaun
apuji aidaunash ashí ijinatnai!
7 Depetmak jintá minis
yumi entsanmayan uwagtinai;
nunik ataktu ichichmanjatnai.

115

Iina Apajuigig nayaimpinum pujawai

1 Tuke Pujuuwah, jutiik eme anenkagtusaipa,
dekas ima amek eme anenmamta,
amina anenkagmin,
tuja dekaskegmijai eme anenmamta.
2 Wagkag aents pegkegchau aidaush
jutiin chichagtamainakush ¿tuwi pujawa
atumi Apajuigmesh, tusash tujamajainta?
3 Iina Apajuigig nayaimpinum pujawai,
tuja nii wakegamu aidaun ashí najankauwai.
4 Aents pegkegchau aidau
apajuímtaijig oro, plata ainawai.
Tuja duka aents najankamu ainawai.
5 Dita apajuímtaijig weni ajamaitak
chichachu ainawai;
jiishkam ajamaitak wainmachu ainawai.
6 Kuwishish ajuidau, tujash antuchu;
nujintin, tujash mayatchau;
7 uwegtin aidau, tujash achimchau;
nawentin aidau, tujash wekaechau;
;makichik chichamujigkesh
antugchatai ainawai!
8 Nuniau asamtai aents nuna najanin,
tuja nunú dakumka najanamua
nuna emematin aina duka
dita apajuímtaijijai betek ainawai.
9 ;Israel aents aidautigmek,
Tuke Pujuuwaig kajinmamsa anentaimsatajum!
Wagki nii jutiinak yaimpawai,
tuja nigki kuitamjamui.
10 Sacerdote aidautigmesh
ima Tuke Pujuuwaig kajinmamsa
anentaimtajum.
Wagki nii jutiinak yaimpawai,
tuja nigki kuitamjamui.
11 Ashí aents Tuke Pujuu umijin aidautigmek,
;Tuke Pujuuwaig kajinmamsa anentaimsatajum!

Wagki nii jutiinak yaimpawai,
tuja nigki kuitamjamui.

¹² ¡Tuke Pujuu iinak kajimatjamtsuk
pegkegnum yumigtamjatnai!
¡Israel aents aidaunashkam
pegkegnum yumigjatnai!
¡Sacerdote aidaunashkam
pegkegnum yumigjatnai!

¹³ Aents Tuke Pujuu eme anentus
umijin aidaun:
aents eme anentsa diishtai,
eme anentsa diitai aidaujai
Apajuí ashí ditanak pegkegnum yumigjatnai.

¹⁴ Tuke Pujuu atumi uchijum aidaunash,
tuja nuna uchiji aidaunash uyujtugmaktinai.

¹⁵ ¡Tuke Pujuu nayaimpin, nugkajai najanauwa nunú
aminak pegkegnum yumigtamsattawai!

¹⁶ Nayaimpia auk Tuke Pujuuunui,
tuja nugka nuna aents aidaun susauwai.

¹⁷ Jakau aidauk chichamainchau asag,
Tuke Pujuuunak emematmainchau ainawai.

¹⁸ Untsu ii iwaku aidautik
tuke ememattinaitji.
¡Yajauwajah!
Iina Apajuí ememattai ati.

116

Apajuí see tabau

¹ Wika Tuke Pujuuunak anejai,
wagki wi segamun antugtuku asamtai.

² Wagki wi segamun antugtuku asamtai,
wi iwaku pujaknuk,
niina tuke segatnaitjai.

³ Jata achigkamtaimpap
jakattaja tusan ishamkabajai,
nuniakun wake besemag pujubajai.

⁴ Nuniakun Tuke Pujuuun segabajai
uwemtijugta tusan.

⁵ Tuke Pujuuuk pegkejam, wait anenkagtinai,
iina Apajuíyia duka
kakagchauch anejatin wajasui.

⁶ Tuke Pujuuuk aents kakakchau
aidaunash kuitamui.
Wi kakaumainchau wajasan pujaishkam,
nii minak uwemtijugmayi.

⁷ ¡Yamaik shiig aneasan pujumainaitjai,
Tuke Pujuu pegkeg etiu asamtai!

⁸ Wagki Apajuí jamainun uwemtijug
wi wake besemag buutku
pujamugnash yaintuk uwemtijuja nuadui.

9 Tuja iwaku juju nugka juwi pujag nuaduih,
Tuke Pujunak tuke umigkatnaitjai.

10 Wika senchi waitiaknushkam, Apajuinak dekaskeapi tibaijai.

11 Tuja wi waugtukan chichaakun:
“Ashí aents aidauk waitjin ainawai”,
tibaijai.

12 ¿Tuke Pujuu mina pegkegnum
yainkamunmash,
wisha wajuk akimainaitja?

13 Tuja nii mina uwemtijugbaunum
vinon anentag Tuke Pujun suwakun,
niina daajin pachisan ememattajai.

14 Wi umiktajai tusan
Tuke Pujun tiuwaitag nunak,
yamai ashí niina aentsji aidau
wainainamunum umiktatjai.

15 Tuke Pujuk niina umijin aina
nunú jakamtaig,
wake besemag dekapeawai.

16 ¿Tuke Pujuwah, wika amina inakmetjai!

¿Wika nuwa amina inakmea
nuna uchijiyaitjai!
¿Ame minak achikbaujai betek
ashí jakan pujai uwemtijugmayume!

17 Tuke Pujuwah, ame uwemtijugbaunum
see takun uwija maan apeakun ememattajame,
dutikakun daagmin pachisan segattajame.

18 Wi umiktajai tusan
Tuke Pujun tiuwaitag nunak,
yamai ashí niina aentsji aidau
wainainamunum umiktatjai.

19 Yaakat Jerusalégkan ejapeen,
Tuke Pujuu jee pegkegma
nuna waitijin jegantatak agkaju
ayatak shugkuk ajigmauwa nuwi nunak dutikattajai.
¿Yajauwajah!
Apajuí daaji ememattai ati.

118

Tuke Pujuu uwemtikagtugbaunum see tabau

1 Tuke Pujuu see titajum,
wagki niyai pegkejak;
niina anenkajig tuke auwai.

2 Israel aents aidauk yamaikiuch:
“Apajuí anenkeg tuke auwai”, titinme.

3 Sacerdote aidaushkam:
“Apajuí anenkeg tuke auwai”, titinme.

4 Tuke Pujun eme anentus diin aidaushkam:
“Apajuí anenkeg tuke auwai”, titinme.

- 5 Waittanum pujusan
Tuke Pujuu untsukbaijai,
dutika ai, aijuk uwemtijugmayi.
- 6 Tuke Pujuu wijaig pujawai;
nuadui wika ishankagtatsjai;
minak makichkish pegkegchawk
awajtumain ainatsui.
- 7 Tuke Pujuu wijaig pujawai;
nuniau asa minak nii yaintui.
¡Nuadui mina shiwag aidau
mina kajegtuina nuna nii ijinamun wainkattajai!
- 8 Aentsnum kajintsa anentaima wekaetsuk,
dekas Tuke Pujuuwaig kajintsa anentaimainaitji.
- 9 Apu aidaunum kajintsa anentaima wekaetsuk,
dekas Tuke Pujuuwaig kajintsa anentaimainaitji.
- 10 Tikich nugkanmaya aents aidau
tuwagtukagmayi;
tujash Tuke Pujuu daajin depetkamiajai.
- 11 Ashí tententuawagmayi;
tujash Tuke Pujuu daajin depetkabiajai.
- 12 Etejai betek tuwagtukagmayi;
tujash jagki ijumjamun jii apea
emegkauwama imatikan ajapabiajai;
¡Tuke Pujuu daajin depetkabiajai!
- 13 Ajua maami tusag shitatkiagmayi;
tujash minak Tuke Pujuu ayamjutkabi.
- 14 Wika Tuke Pujuu mina senchimtija
nuna kantamjajai.
¡Niiyai mina uwemtijinuk!
- 15 Aents Apajuín umijin aina nuna jenig
shiiig aneas untsuainak:
“Tuke Pujuu senchijiya nunú depetmake”,
titinme.
- 16 ¡Tuke Pujuu senchijiya duka
augmatkuish, makichkish ejemaitisui!
¡Tuke Pujuu senchijiya nunú depetmakui!
- 17 ¡Jakashtatjai, iwaku pujuttajai,
wagki Tuke Pujuu iina ayamjutpak
dutikauwa nuna etsegkatasan!
- 18 Tuke Pujuu minak shiiig senchi
suwimkan sujusmayi;
tujash jakati tusag idaituschabi.
- 19 ¡Apajuí jee pegkegma nuna
waitiji ujatjitajum;
nuwi wayan Tuke Pujuu see titag tajai!
- 20 Juju waitiya duka
Tuke Pujuu pujamunum waitiyai;
aents Apajuín nemajin aidauk
nunú waitiya nuni wayawagtinai.

21 Tuke Pujuwah, see tajame
wagki ame antugtukam uwemtijuju asamin.

22 Kaya ekenag jegamin aidau
kaya pegkegchawai tusag,
dakitjajua nunú yamai
dekas kaya ima pegkeg atsumtai wajase.

23 Nunak Tuke Pujuu dutikae,
duka yamaik puyattsa diimainai.

24 Juju tsawanta juwai,
Tuke Pujuu iina ayamjutpakua nunú;
nuadui iyamai shiig anenaku jüstamawagmi!

25 Tuke Pujuwah, iwait aneasam uwemtikagtugta!
Tuke Pujuwah, iwait aneasam yaijatkata,
shiig batsamsagmi!

26 ¡Tuke Pujuu awemamu mina nunú
dekas ememattai ati!
¡Tuja Tuke Pujuu jee pegkegma nuwi pujusan atumin pegkegnum yumigki-
ajime!

27 Tuke Pujuk Apajuíyai.
¡Apajuíyai tsaaptinun sujamsauk!
Yagkug aidau yajuaka altarnum
ejegawagmi, dutikawaja Apajuí
aentsji aidau nuwi batsata nunú uyuntsagmi.

28 Amek mina Apajuíg asamin see tajame,
nuniakun amina imanjumin emematjai.

29 Tuke Pujuu see titajum,
wagki niyai pegkejak;
niina anenkajig tuke auwai.

119

97 ¡Amina chichamjum umiktin sukagtusuitam nuna
shiig senchi aneau asan,
kashi kashinig nuwig anentaimjai!

98 Nunú chicham umiktin agagbau
umiktajum tusa sukagtusuitam nunú
mina shiwag aidaun
nagkaesau yachamtijawai,
wagki nunú jintinjau asamtai.

99 Wika nuna ausa dekau asan,
mina jintinjín aidaun nagkaesau
chicham umiktin agagbauwa nuwi anentaimjai.

100 Tuja amina chichamjum umiktin
sukagtusuitam nuna umiau asan,
múun amina chichamjumin etsejin aidaun
nagkaesau amina chichamjumnak dekajai.

101 Amina chichamjumin umiktag tau asan,
pegkegchau aina nunak idaisabijai.

102 Tuja ame minak jintinjau asamin,
aminu chicham umiktina nunak idaisachmajai.

103 Ame umiktin anagkagtuawaitam
 nunak mina kayakmatajuig
 shiig yumintsak dekapeajai,
 tuja mina wenujui dapa yumijin nagkaesau
 yumintsak dekapeajai.

104 Amina chichamjum umiktin
 sukagtusuitam nuwiya unuimaju asan,
 waitjut aina nunak kajejajai.

105 Amina chichamjum agagbauwa nunú
 jii ekemakbaujai betek,
 wi weamunum tsaaptin emawai,
 tukumak iyajai tusa.

106 Wi yaunchuk chichaakun,
 umiktajai tiuwaitag nunak, ataktushkam tajai:
 “Amina chichamem
 pegkegma nunak dekas umiktatjai.”

107 ¡Tuke Pujuuwah, shiig pimpikin
 wake besemag pujajai!
 ¡Ataktu ichichtugta, ame chichamjum
 wajintu chichawa dutiksamek!

108 Tuke Pujuuwah,
 wi amina emematjam nunú
 shiig aneamam jujutkita,
 nuniakum amina chichamjumia nunú jintinjuata.

109 Wika tuké jamainnum pujajai,
 tujash ame jintinjuamua nunak kajimattsujai.

110 Aents pegkegchau aidau,
 utugchatan apujtujuinawai,
 tujash amina chichamjum umiktin
 sukagtusuitam nunak kajimatkinuk idaitsujai.

111 Amina chichamjum umiktina nunú
 minak tuké shiig aneasa pujutan sujawai.

112 Wika amina chichamjum umiktin
 sukagtusuitam nunak wakejusan,
 atakea duwish tuke umiktin atajai,
 tusan tumamjai.

129 Amina chichamjum umiktina
 duka shiig pegkejai;
 nuadui wika betek umiajai.

130 Amina chichamjum etsegbauwa duka
 tsaaptinjai betekai;
 nuniau asa aents kakagchauchinak
 shiig dekamtikawai.

131 Amina chichamjum umiktin sukagtusuitam
 nuna dekatasan wakegajai,
 nuniakun itugkanuk shiig dekawag
 tusa anentaimkun waitiajai.

132 Tuke Pujuuwah, amina anempau aidau
 wait anentam dutiksamek,
 minash diigsam wait anenjugta.

133 Amina chichamjum wajintua dutiksamek awekattsata;
pegkegchau wagagkiti tusamek idaitusaipa.

134 Aents pegkegchau aidau
mantuawainum ayamjuktata,
wika amina chichamjum umiktin
sukagtusuitam nuna umiktasan wakegajai.

135 Wi amina inakmetag dusha
shiig aneasam diigsata,
nuniakum nunú chichamem jintinjuata.

136 Amina chichamjumin
eme anentus uminachu asamtai,
shiig senchi buuttjai.

137 Tuke Pujuuwah, amek pegkegmaitme;
tuja ame suwimak sukagtam
dushakam pegkegnum jintinkagtawai.

138 Chicham umiktin ame sukagtusuitam
duka waitchauwai, betek uminnai.

139 Mina shiwag aidau
amina chichamjumin uminachkui,
kajeakun shiig senchi waitiajai.

140 Amina chichamjumik
ashi dekapsamu dekas pegkegmai,
nuadui wika amina
inakminuk nuna wakegajai.

141 Wika dushiktai, wainkauchitjai,
tujash amina chichamjum umiktin
sukagtusuitam nunak kajimattsujai.

142 Amina takatjum pegkeja duka
tuké imanisag auwai,
tuja amina chichamjum umiktin
agagbauwa duka dekas shiig pegkegmai.

143 Waitiakun wake besemag pujubiajai;
tujash amina chichamjum umiktin sukagtusuitam
nunak minak shiig anemtijusmayi.

144 Ame chicham umikuitam
duka makichkish yapajinchauwai.
¡Yainkata wisha nuna shiig antukan umiktajai!

121

Tuke Pujuuwai amina kuitamjamnuk

Atushat wekaeku Apajuíyai anentaimsa kantabau

1 Muja aidaun pagkain diyakun:
¿Tuwiya taag minash ayamjuktainta? tajai.

2 Minak Tuke Pujuu nayaimpin nugkajai najanauwa nunú yainkattawai.

3 ¡Apajuik waitkastinme tusag
makichkish idaituschattawai!

¡Amina kuitamjamna duka makichkish kanatsui!

4 Nigka makichkish kanuchui;
Israel aents aidaun kuitamna duka
makichkish kanuchui.

⁵ Tuke Pujuu aminak kuitamjamui;
Tuke Pujuu aminak ejaka kuitamjamui.
Niig amina yaimpaktatus amejai ijutkawai.

⁶ Tuja tsawaishkam etsag senchi sukupakug
waitkagmaschattawai,
antsag nantushkam waitkagmaschattawai.

⁷ Ishamain ataish,
Tuke Pujuu ejapak kuitamjamui;
tuja nii amina pujutjumnash kuitamjutpawai.

⁸ Tuke Pujook yamaya juwish, tuja ajumaish
ame tuwi wetatme nuniaminish,
tuja wakitki minaminish,
nigki tuké kuitamjamkatnai.

122

Jerusalén kantamjuamu

David Jerusalén wakatatus wesa shiig aneak kantamamu

¹ Tuke Pujuu jee pegkegma nuwi wemi
tujutuinakui, wika shiig anebiajai.

² Jerusalégkah, yamai juwi waitinum kaunaji.

³ Jerusalén yaaktamamua nuwi
ashí tikich yaakat aidaushkam ijutkau ainawai.

⁴ Ashí Israel aents Tuke Pujuu aentsji aidauk
Jerusalén tuwainawai, Apajuín emematuinak,
wagki nuwi Apajuí ememattajum
tibau asag, nuna umiinak.

⁵ Nuwi awai chicham inagnatai,
tuja Davitan pujusa inamtaijishkam.

⁶ Nuadui: “Jerusalégkah,
aminak utugchatak atsugtanti;
tuja amina anempaina dushakam
agkan pujustinmé.

⁷ Yaakat peeja apakbauwa nuna initken
aents batsata dushakam agkan,
tuja jega apu pujusa inamtaijiya
dushakam waitkaschamu ati”, titajum.

⁸ Tuja mina yatsug aidaun
kumpag aidaujai chichagkun:
“Atumnash utugchatak atsugtamtinme”, tajai.

⁹ Untsu Jerusalégkah,
aminig pujut pegkeg ati tusa wakegajai,
wagki Tuke Pujuu amina Apajuígmí
jee pegkegma nunú au asamtai.

124

Apajuík tuke yaijatui

David Jerusalén wakatatus wesa shiig aneak kantamamu

¹ Ashí Israel aents aidautigmek,
Tuke Pujuu iina yaimpakchau akuish,
wajukauk ainji, tumamtajum.

² Tuke Pujuu iina yaimpakchau ataik,
aents aidau jetepagmaya nuadui,

³ ashí ijipamain awajtamkajui,
senchi kajegtamkaju asag.

⁴ Dutijamawagmatai namak dujajak tajaka
ajapama numamtuk ajapeam amain wajakuitji.

⁵ Namak chichijam tajaka ajapama
numamtuk ajapjamain awajtamkajui.

⁶ ¡Tuke Pujuu tuke pegkegnum chichagtai ati,
wagki shiwaaji ijinatnume
tusa idaitamsachu asamtai!

⁷ Aents chigkin achiktatus detuamunum
chigki nemak tsujimak wegama numamtuk,
iishkam shiwag achigmak
mantamatag tujamainakui, pisaja uwemjabiaji.

⁸ Tuke Pujuu nayaimpin nugkajai
najanauwa nunuwai ayamkagtinuk.

126

Achija yajuakbau waketjagbau

Jerusalén wakatatus wesag shiig aneenak kantamawagbau

¹ Achija yajupakagmatai, waitu batsatutin
Tuke Pujuu awagtamag Jerusalén ikaupamtai,
kajanmatskait dekapin ayaji.

² Nuniaku senchi dushimiaji,
imaniaku shiig aneasa senchi kantamaaji.
Nunijain tikich nugkanmaya aents
pegkegchau aidau chichainak:
“¡Tuke Pujuu ditanak
shiig pegkegnum yaigke!” tuyanume.

³ Duka dekaske, ¡Tuke Pujuu
iinak yaimpak agkanmitkagmabi!
¡Nuadui iishkam shiig anebiaji!

⁴ ¡Tuke Pujuuwah, yumi uwegshunum yututai,
entsa najanea akagama numamtuk,
ataktu awagkim Jerusalén itajatuata!

⁵ Aents buu buuttajai ajakmaku aidau,
atakea duwi shiig aneas juukagtinai.

⁶ Tuja aents aidau ajak pegkejan juki
ajakmatatus buutkabaikia shiyakaju aidau,
dita ajakmamunmayan juukag,
shiig aneas kantamkiag
dita jeen wakitkiagtinai.

127*Ashí Tuke Pujuumaya junawai*

Salomón Jerusalén wakatatus wesa shiig aneak kantamamu

¹ Tuke Pujuu jegan jegamchataik,
jegá jegamin aidauk wainak takak waituinawai;
tuja Tuke Pujuu yaakta kuitamchataik,
yaaktan kuitamin aidauk
wainak kuitamak waituinawai.

² Ajakma yuwatatus takak,
kashikmas nantaki tuke etsan akapakush,
kuashat juuka yuwatnunid
wainak imanik waituinawai.
Nuninai Apajuik niina kumpajinak kanak tepetaish,
nii yuwatnujinak ashí suwawai.

³ Iina uchiji aina duka,
Tuke Pujuu anentag pegkejuch amasbau ainawai.

⁴ Ii datsa ajin iina uchiji akiinaina duka,
aents maanitan yacha nuna
flechajijai betek ainawai.

⁵ Nuadui aents kuashat uchigtina duka
shiig aneasagtin ainawai.
Tuja niina shiwaaji aidaujai igkuniakush dushikiam achatnai,
niina uchiji kuashat asa, apajin ayamjukagtinai.

130*Tuke Pujuuwai kajintsa anentaibau*

Jerusalén wakatatus wesag shiig anenaku kantamawagbau

¹ Tuke Pujuuwah, waanum inidak
egkema pujusan amina untsuagme.

² ¡Apuh, wi untsuajam nunú antugtukta!
¡Wi amina egakun untsumag
nunú antugtukam yainkata!

³ Tuke Pujuuwah,
ame tsagkugkagtugchawaitkuminig,
iwakuk batsamaitsuji.

⁴ Tujash ame tsagkugkagtau asam,
eme anentsa umijam atatme.

⁵ Wika Tuke Pujuuwai ashí mina anentaigjai,
kajintsan pujajai.
Tuja nii anagkagtuawa nunashkam
dekaskeapi tajai.

⁶ Wika yaakta kuitamin
wajupa asag tsawajat tusa,
tsawantan dakajama numamtuk
mina Apajuíjun dakajai.

⁷ Israel aents aidautigmek
Tuke Pujuu taatnuji dakastajum;
wagki niyai awai anentak, tuja ashí agkanmaetashkam.

⁸ Apajuí Israel aents aidaun tudaujinak

ashí tsagkujuk agkanmitkattawai.

137

Achija Babilonia nugkanum yajuakbau

¹ Babilonia namak aidaunum

uwet pekaamsaja,

Jerusalén anentaimtusa buutiaji.

² Nuwi numi ayaunum nuna kanawen

iina arpaji aidau nenayaji.

³ Nunika nuwi batsatjin

suntag iina achipag yajupaku aidau

chichagtamainak:

“¡Shiig aneasjum kantamatajum,

tuja atumi nugkem Sión pachisjumshakam

kantamatajum!” tusa waitkagmayanume.

⁴ Iik makichkish iina Apajuji kantamjutaig

tikich nugkanmak kantamaitsuji, tuyaji.

⁵ ¡Jerusaléggah,

wi amina kajimatkin idaitaik,

mina uweg untsujua duka makichkish achika

takamainchau wajasti!

⁶ ¡Tuja wi amina eme anentsuk,

kajimatkin idaikun shiig aneasan pujutaik,

mina idaijuk kayakmatajui nujamak asati.

⁷ Tuke Pujuuwah,

babilonianmaya aents aidau

Jerusaléggan tsaikajua duwi,

Edom aents aidau chichainak:

“¡Ashí tsaiktajum!” tusa imatianum

nunú kajimatki idaisaipa!

⁸ ¡Babiloniah, ameshkam tsyam atatme!

¡Ame jutii aidauti waitkagkagtam

nuna iiktamainak tsaipaidauk

shiig aneasagtin atinme!

⁹ ¡Amina uchijum aidaun achika yajuakag

kayanum anugkag tsupig ijinawagtina nunak

Apajuí pegkegnum yumigatin ati!

139

Apajuik ashí wainui

David kantamamu

¹ Tuke Pujuuwah, ame minak shiig dekagme.

² Ame wi dutikamu aina duka ashí dekame,

amek atushat pujumesh,

wi wajuk anentaimja dushakam dekame.

³ Wi wajuk wekaeja duka amek ashí dekame,

¡wi wajina takaja dushakam ashí dekame!

⁴ Wika eke chichatsaig,

wi wajina titag taja duka amek

emtikam dekame.

⁵ Ame minak ashí tententuam,
amina uwegmin achigsam pujame.

⁶ Wika amina yachajum imana nunak
kakajus dekamainchau dekaapejai.
Mina dekatjuk nuwig makichkish jegatsui.

⁷ Amina Wakanmin ukuknush ¿tuki wetaja?

Ame ashí nugkanum dekam nuniaish,
¿wisha itug tupikaknuk uumjuktagme?

⁸ Wi nayaimpinum wakamtaish,
amek nuwi pujuttame,
tuja wi nugka initken akaikimtaish,
amek nuwishkam pujuttame.

⁹⁻¹⁰ Wi nanaakan etsa minitaiya nuni wemataish,
ame minak achigkau atatme,
tuja etsa akaetaiya nuni nayantsa amain wenu
pujusmataishkam, ame minak yainkattame.

¹¹ Wi suwenum uumkatjai tumainaitjai,
tuja nuniachkush tsawaiya nunú suwe wajasmataish,

¹² suwea duka minak aminig ugmaitsui;
ame diismak kashia duka tsauptinai.

¡Ame diismak suwea duka tsauptinjai betekai!

¹³ Ame mina iyashjuk najatjuawaitme,
ame minak, mina dukuju wakeen najatuawaitme.

¹⁴ Wika ame imatika najanamu asan see tajame,
ame najanamu aina duka ashí pegkejai.

¡Wika nunak shiig dekaikai!

¹⁵⁻¹⁶ Wi initak wainkachbau
mina dukuju wakeen najaneauwaitag duka ame waitmayume,
eke najaneaiwajupa tsawan pujustinaitja duka
ame umigtukuitme.

¡Nunú amina papiigmin agagbauwai!

¹⁷ Chah Apajujuh,
amina anentaimtagmia nunak
shiig anentaimja ejeyin
dekamainchau dekaapejai.

¡Untsu nuna pachisan augmattsatag takun
ima utugchat dekapmainaitjai!

¹⁸ Nuna dekapagtajai takunush,
kamatak kuashta iman asamtai,
kakajus dekapamait Sujai.

¡Tuja kanaja shintaish amek wijaig pujame!

¹⁹ Apajuíyah, aents pegkegchau aina duka ijinata,
dutikakum magkagtin aidaushkam datupatjukta.

²⁰ Nunú aents aidauk amina daagmin pachisag
pegkegchaun chichainawai.

Nuninak amijai wainak shiwagmagainawai.

²¹ Tuke Pjuuwah,

amina kajegtamaidaunak wishakam kajejajai,
tuja amina dakitjamaidaunashkam
dutiksanuk dakitajai.

22 ¡Nunú aents aidaunak shiig senchi kajejajai!
Amina shiwaajum aina duka
mina shiwag ainawai.

23 Chah Apajuíyah,
mina anentaijush shiig diigtusta,
dutikam mina anentaimtajush shiig dekapjutsata.

24 Tudau jintan aintsujash nunú diigtusta,
nuniakum jinta pujut nagkankashtinum
ekagtina nuni etita.

145

Ashí aents aidauk Apajuín ememattinme

David kantamamu

1 Mina apug Apajuíyah,
amina daajum ajumaish tuke atina
nuna pachisan etsekatjai.
Tuja amina daagminak tuké pegkegnum
chichagtinaitjai.

2 Ashí tsawantai aminak pegkegnum chichagtatjame,
nuniakun amina daagmin tuke ememattinaitjai.

3 Tuke Pujuuk dekas múuntai,
iman asa ima nigki emematam amainai,
iman asantai anentaimsaish, kakajus dekamaitsui.

4 Uchi akiinak wegagtina duka
ame pegkeg iwainajuitam nuna emematiagtinaí.
Tuja amina senchigmejai
wainchatai ishamain aidau
iwainajuitam nunú etsegnaktinaí.

5 Amina imanjumin tsaaptinjumjai pachisag
etsejiagtinaí.

Nuninakuí wishakam
ame iwainajuitam nuna pachisan chichattajai.

6 Amina senchigmin shiwaajum aidau
depetnaitam nuna pachisag chichagtinai.
Nuninakuí wishakam ame múuntaitam
nuna pachisan chichattajai.

7 Amina wait anenkagtutaigmin
pachisag etsejiagtinaí;
nuninak shiig aneas kantamainak:
¡Apajuíyai pegkegماك! tujamiagtinaí.

8 Tuke Pujuuk kakagchauch, wait anenkagtin;
wamak kajechu anentak wajasui.

9 Tuke Pujuuk ashí aents aidaun kuitamui;
tuja tikich nii najankamu aina nunashkam puyatjus kuitamui.

10 ¡Tuke Pjuuwah,
ashí ame najankamu aidau emematjamtinme!
¡Tuja amina umigtamin aidaushkam

pegkegnum chichagtamtinme!

¹¹ ¡Amina inamtaijum pegkegma nuna pachisag chichatnume!

¡Tuja amina senchigmejai
wainchatai ishama in aidau
iwainajuitam nuna pachisag chichagtatui!

¹² ¡Tuja amina senchigmea nuna,
ame inamtaijum pegkegma nujai
ashí aents aidau dekaatnume!

¹³ Amina inamtaigmea duka
ajumaish tuke atinai,
nuadui ajumaish amek tuke inamtinaitme.

¹⁴ Tuke Pujuu aents wake besemag pujaunash yayawai,
tuja kakakchau wajas pujaunash senchintikawai.

¹⁵ Apujuh, ashí aents aidauk
amina dakagmainawai, yutain sujamsati tusa.

¹⁶ Nuninakuí ame shiig aneasam suwame,
nuna ashí iwaku aidauk
yuwawag ejemakag shiig anenawai.

¹⁷ Tuke Pujuuk ashí
nii anagkagtuamunak betek uminai,
tuja nii najankamu aina nunak
shiig anentawai.

¹⁸ Tuke Pujuuk aents niina dekaskenum
segau aina nujai ijutkawai.

¹⁹ Tuja niina eme anentus umijin aina nunú
segamak antujuk yaigka uwentikui.

²⁰ Tuke Pujuuk niina aneen aidauk kuitamui;
untsu aents pegkegchau aidauk ijina utsawai.

²¹ ¡Wika kantamkun Tuke Pujuun ememattajai!
¡Ashí aents nugkanum batsamin aidauk
Apajuí daaji pegkegma nuna pachisag
tuké ajumaish ememattin atinme!

148

Apajuí najankamu aidautigmek nii ememattajum

¹ ¡Iina Apajuí emematiagmi!

¡Nayaim aidautijum Tuke Pujuu ememattajum!

¡Yakí agkajunum Apajuí ememattajum!

² ¡Atum Apajuí aentsji ángel aidautijum
Apajuí ememattajum!

¡Nayaimpinmaya suntag aidauwah,
Apajuí ememattajum!

³ ¡Etsa, nantu aidauwah,
Apajuí ememattajum!

¡Yaya aidautigmesh Apajuí ememattajum!

⁴ ¡Yumi yakiya aidautigmesh
Apajuí ememattajum!

¡Nayaim shiig múunta

dushakam Apajuín emematti!

⁵ Tuke Pujuu daaji ememattajum,
wagki nii chichakmatai,
ashí najaneakua nuadui.

⁶ Nii ashí umikui tuke asatnun;
dutika chichaman umikui atakesh yapajinashtinun.

⁷ ¡Nugkaya aidautigmesh,
tuja nayantsanum batsamin
kuntin múun aidautigmesh,
nayantsa initken batsamin aidaujai
Tuke Pujuu ememattajum!

⁸ ¡Chaajip, bicha, nieve, yujagkim aidautigmesh,
tuja dase Apajuí dasenkati tima
ishamain dasentin aidautigmesh,

⁹ muja aidautigmesh, nain aidautigmesh,
tuja ashí setug aidautigmesh,
numi neje yujutai aidautigmesh
Apajuí ememattajum!

¹⁰ ¡Kuntin tagkumtai, kuntin tagkumchatai,
chigki aidau, kuntin japiinas yujau aidautigmesh,

¹¹ tuja ashí nugka múun aidaun
apuji aidautigmesh, atumi aentsjum aidaujai,
apu ashí nugkanmaya aidautigmesh,

¹² aishmag, nuwa,
datsa, múuntuch aidautigmesh,

¹³ ashí Tuke Pujun daaji ememattajum,
wagki ima niina daajiya duke múuntak!
¡Niina imanjiya duka nayaimpin
nugkajai nagkaesau múuntai!

¹⁴ ¡Apajuí niina aentsji aidaunak senchimitikawai!
Nuadui niina aentsji Israel wegantu aidautik
nii emematuinaji.

¡Yajauwajah!
Apajuí ememattai ati.

150

Ashí aentstijum Apajuí kantamjuatajum

¹ ¡Yajauwajah!
¡Apajuí niina jee pegkegma nuwi ememattajum!
¡Apajuí nayaim wigkaya nuna
niina senchijijai najanauwa nuwi ememattajum!

² ¡Niina senchijin wainchatai aidaun iwainajua
duwi ememattajum!
¡Niina imanjig nagkatkachua
duwi ememattajum!

³ ¡Uwija kachuji aidau umpuakjum ememattajum,
arpa, salterio aatsa awatkujum ememattajum!

⁴ ¡Pandero aidau awatkujum
nantsemkijum ememattajum!

¡Pigkui umpuakjum,
guitarra awatkujum ememattajum!
⁵ ¡Platillo awatkujum ememattajum!
¡Platillo senchi shinin aina nunú
awatkujum ememattajum!
⁶ ¡Ashí pujutji ajamu aidauk
Tuke Pujuun ememattinme!

¡Yajauwajah!

Pujutan wakannumiajai pachis jintiamu Proverbios Yama nagkamchaku agagbau

(1.1-7)

Chicham pegkeg yachametai jintinkagtamu

¹ Juju ainawai apu Salomón, Davita uchiji, Israel aents aidaun apuji aajakua nunú tibau.

² Juna tiuwa nunak:

Niina aentsji Israel wegantu aidau yacha shiig anentaimkau atinme, nuninak dekas chicham pegkeg aina nuna dekau atinme.

³ Nuninak jintiamu antuka jutan, wainak chichashtan, shiig takatan, imagnisa emetmamja pujutan,

⁴ tuja datsauch imanis jintiag anentaimchau aidaun

jintintua wajiu aneaku emak, shiig anentaimsa eseja pujutan unuinagtatus agajui.

⁵ Aents yacha shiig anentaimkauwa duka juju jintiamua nunak shiig antawai, nunik nuni kuashat unuimatan shiig anentaimtajai juwawai.

⁶ Wagki niig aents yacha shiig anentaimkau aidau tuja dita apachji augmattsamu, etsegbaun, tuja adivinanza jintiamu aidaun aatus antuka unuimagtag tau asa.

⁷ Yachameta duka Tuke Pujuu eme anentsa umigbauwa nuwi nagkamnawai. Tuja aents pegkegchau aidauk unuimat pegkeg jintiamua nunak dakitawai.

Datsa aidau chichagbau

⁸ Uchuchih, amina apa chichame antugkata, tuja amina duku jintinjabaush kajimatki idaisaipa.

⁹ Nii jintinjabauwa duka amina nugkutaijum pegkeg nugkuaju, tuja atsejutai corona atsejaku amainaitam nujai betekai.

¹⁰ Uchuchih, aents pegkegchau aidau tsanupagtag tuinakuish antugkaipa.

¹¹ Tuja dita tujamiajaintaih:
“Juwi taata nunikamin

jutijai ijunja tuke aneasa
ii wakegamu umiktasa
aents utugchatji atsugbau
nagkaebaukesh maami,

¹² dutikaku aents shiig anentaimkau
aina dushakam dutiksaik maami.
Dutikawaja nugka tai initak yutua ukukiagmi.

¹³ Dutika waji aidau yajuaka
wiakchameawagmi.

¡Nuniaku iina jenig
waji kasamkamu aidau
yajuaka aimkagmi!

¹⁴ Nuadui taata nunikamin
kasamkattag nunú akandaika
yajuakmi”, tujamainakuish,

¹⁵ ¡amek uchuchi ditajaig wepa!
Tuja dita pegkegchaun
takaina duka amek tupanjata.

¹⁶ Wagki ditak pegkegchaun
takastatus waugtuinawai;
¡Aentsun maatasashkam waugtuinawai!

¹⁷ Pishak achiktasa,
pan wainmain apujtusmak,
pishakak nuna wainu asa
duka nagkaemamaitsui.

¹⁸ Tujash nunú aents aidauk
dita jamainnak dekainayatak
pempeentumakiag umigmamainawai.

¹⁹ Nuadui aents magkagtin aina
duka wiakuch wetajai tukama,
dita pegkegchau takamtin
¡ditashkam dutiksaik maam ainawai!

Unuimat Apajuínmaya jukitajum tusa ipaamamu

²⁰ Unuimatak antugtuktinme tusa
jinta aidaunum unsumainawai.

²¹ Unuimata duka yaakta waitijin,
tuja tuwig ima senchi aents aidaush
tuwawa nuwi aatus unsumainak:

²² “Datsauch imanis jintiag
anentaimchau aidauwah,
atumesh ¿wajutiya dushikagtutash,
kajegkagtutash idaisattagme?
Tuja unuimat dakitajum dusha
¿wajutiya idaisattagme?
¿Wajutiya unuimagtatjume?

²³ Wi tajim nunú antuktajum,
nuniakjumin wi atumnak
mina wakanjun amastatjime,
dutikakun mina anentaimtajun
dekamtikattajime.

24 Wi atumnak untsuajime,
tuja wi ipaajime kaunatajum tusan,
tujash atumek mina antugtutak dakitagme.

25 Nuniau asajum, mina chichamjuk
kajimatkiyum idaisaugme,
tuja wi atumin jintinbau
antuka unuimatcakam dakitagme.

26 ¡Nuadui wishakam
atum waitiakjuminish,
tuja sapigmakjuminish
ayatak dushittajai!

27 Tuja sapigmamu, waitut,
wake besemag pujamu,
waugkamin anentaibau aatus,
dase wainchijai betek
iyaak nugká ayaunak
ashí tsaiyama imanik minitjamkui,

28 waitiakjum untsugkugminish,
wika aikchatnaitjime.
Egatkugmesh waitkashtinaitjume,
untsugkugmesh ayam achattagme.

29 Wagki atumek unuimat
pegkeja duka dakitau asajum,
Apajuí umigtashkam dakitagme.

30 Nuniau asajum, mina chichameg
antuka jutak dakitagme,
tuja wi atumin nunikaigpajum
tusan tajim dushakam dakitagme.

31 ¡Nuadui atumek nunú umiakjum waittsattagme!
¡Tuja atum wakegamu
taka takakuajum pimpiktatjume!

32 Aents shiig emetug
anentaimkachu aina nunak
nii dekachbaujiya duke pempeentuki maawai.
Tuja aents pegkegchau aina nunak
nii wakejus pegkegchaun taka duke
pempeentuki maawai.

33 Untsu mina chichamjun umigtau
makichkish ishamkagtutsuk
agkan shiig pujustinai.”

3

Unuimat pachisa ujaniamu

1 Uchuchih, wi jintinkagtamua nunú kajimatkipa,
tuja mina chichameg umiktin agagbauwa nunú
amina anentaimin jukita.

2 Nunú umiakum, kuashat tsawan iwaku shiig aneasam pujustinaitme.

3 Tuja anenka duka, dekaskea nujai
makichkish idaisatin aipa;
duka nugkutaikai betek nugkuaju ata.
Amina anentaimtagmin
kajimatmainchau aneaku ata.

4 Nuniakum Apajuí wait anentam atatme,
tuja aents aidaushkam wait anenjamjagatui.

5 Amina dekatjumin kajinmamsa anentaimtsuk,
ima Tuke Pujuuwaig ashí
kajinmamsam anentaimta.

6 Ashí ame takattam duka
Apajuí anentaimtusam takasta,
nuniamin nii pujut pegkegnum etamtatui.

7 Ame ima yacha jumamipa,
duka nunitsuk Tuke Pujuu umigkata,
nuniakum pegkegchau aina nunú tupanjata.

8 Nuniakum jamamtuchu,
wajiu pegkeg pujuttame.

9 Amina tagkujum aidau, wajijum aidau
akanka Tuke Pujuu suwakum emematta;
dutikakum ajak ajakmamu aina
nuwiyashkam yama nagkamchaku
juukbau Tuke Pujuu susata.

10 Dutikakum yutanmash,
tuja umutnumash atsumkas pujuttame.

11 Uchuchih,
Tuke Pujuu esetamatatus
suwimkan amaakuig dakitjaipa,
tuja nii chichagtamkuish kajekaipa.

12 Wagki Tuke Pujuu
makichik múun uchijin jintintak,
suwimkan suwama numamtuk,
nii aneamu aidaun
jintintak suwimkan suwawai.

13 Datsauch unuimaju,
shiig anentaimkauwa nunak
Apajuí pegkegnum yumigkiawai.

14 ¡Nunú unuimata nunuwai oron nagkaesau,
plata nagkaesau pegkeja duka!

15 Unuimat shiig anentaimja
pujutan sukagta duka,
kaya shiig pegkejuch akik aina
nuna nagkaesauwai.
¡Iman asa tikich waji pegkeg
wakejumain aina nujaigkish betekchawai!

16 Aents unuimaju, yacha duka
kuashat mijan pujustinai,
nunik wiakuch wajas eme anentam atinai.

17 Apajuín chichame umiamua
nunú ima pegkejai,
tuja nii jintinkagtamu
betek umiamua nunú
agkan pujutan sukagtawai.

18 Shiig anentaimja pujutan unuimaina

nunú pujutan juwinawai.
 Shiig anentaimja pujutan juidauk,
 numi pujuta sukagtinjai betek ainawai.
 Tuja nunú unuimatan jukiaju aidauk
 shiig aneasagtinai.

6

Daki aipa

⁶ Dakih, week wajuk takawa
 nunú weme diisam unuimagta:
⁷ Weeka inauk atsawai,
 tuja nunú dutikata tusa
 tumainchakam atsawai,
⁸ nuniaig nii yuwatnujinak esattin
 ajak juut jegamtai, juuka ijumui.
⁹ ¡Dakih, yamai kanaschaum jamah!
 ¿Wajupa asamea nantaktatme?
¹⁰ Ame kanú tepamin,
 tuja kajim mantamkui pukuga eketmin,
 tuja shiig kanagtasam
 pagku pagkumasa tepamin,
¹¹ waitut, kasajai betek pachiachbau iyanjama
 shiig ujuuna awajtamsattawai.

Apajuí dakitamua nunú

¹⁶ Awai seisa imajin, tuja nuigtu
 makichik, nujai ijumjamak sieteya imani
 Tuke Pujuu shiig dakita nunú:
¹⁷ Emebau aidaun, waitjin aidaun,
 aents utugchatji atsujunak main aidaun,
¹⁸ aents anentaimtaji pegkegchau aidaun,
 pegkegchau takatan wakejus wekaetaun,
¹⁹ tikichin tsanumjin,
 tuja waitjin, chichama tsanumjug
 niina yachijaig maanimitkau aidaun
 aatus Apajuik dakitawai.

7

Nuwa aishin pegkegchau takajin aidau ujaamu

¹ ¡Uchuchih, mina chichameg umikta,
 mina chichameg umiktin agagbauwa nunú
 shiig aneaku ata!
² Mina chichameg umiktin
 agagbau aina nunú umikta;
 dutikakum amina jiiim kuitamainaitam imatiksam kuitamkata,
 nuniakum iwaku pujuttame.
³ Amina tsajam uwegmin jigka nenau ata,
 anentaimin kajimatmainchau, aneaku ata.
⁴ Unuimata duka amina umaimijai betek emata,
 tuja yachameta nunú amina kumpajum emata.
⁵ Tuja nuwa aishin pegkegchaun takamjin,

pegkegchin chichagtamak,
tsanuja pegkegchaun takamtiksai tusa,
unuimata nunú ayamjupaktatui.

⁶ Makichik tsawantai jeganum
niimtai ujaimunum wi niimkun wajayajai.

⁷ Nunika niimku wajai,
uchi datsa imanik jintiag
anentaimkachu aidau yujainamunum,
nuwi makichik datsauch nuni nagkaemas
shiig esegag anentaimkachun wainkabiajai.

⁸ Nunú uchik jinta aintug juwaki,
jinta tuniakbaunum jeganta
nunú nuwa jeega nuni wemayi.

⁹ Nuniaig etsa akaemayi,
nuniak suwe wemayi.

¹⁰ Nuniai nuwa akika dutiktai iwagmamin
aina nujai betek, makichik nuwa iwagmamjau,
pegkegchaun takamin asa
nunú anentaiyai jiinkibi uchin igkugtatus.

¹¹ Nunú nuwak setakchau datsantainkachu,
tuja emetnag jeen titu pujuchu,

¹² jinta ain wekayin, tuja plazanum,
jinta tuniakunum aents nagkaebaun igkug,
pegkegchau takamtiksatus wekayin.

¹³ Nunin asa nunú uchi wetatman
pagkuk saukua ajantsuk chichajak:

¹⁴ “Wi mina apajuimtaiju
emematkun kuntinun maamua
nuna nejen ajamsatjame.
Wi dutikatjai tibaugnak yamai betek umikjai.

¹⁵ Nuadui amina igkugtasan jiinkijai,
amina wainkatan shiig senchi
egamjam nuna yamai igkugjame.

¹⁶ Mina pegakjui,
colcha egiptunmaya lino
pegkeg najanamun ainkamjai,

¹⁷ dutikan kugkuin pegkeg mirra,
áloe, canela aidauwai ukatkamjai.

¹⁸ Wayata nunikamin ii wakegamu a aniakua tuke tsawampagmi.

¹⁹ Mina aishjuk atsawai;
tikich nugkanum wemayi.

²⁰ Kuichkin aimak juki wemayi,
nuadui wamkek tashatui,
nantu antumai taattawai”, tau.

²¹ Tusa pegkegchin ima
imatjakua wakemitkakmayi,

²² dutikam buey maatasa
juki ematiama numamtuk,
tuja kuntin maatasa dakamtikamunum
japa egkemkamtai,

23 flechayai anentai ijutim
 jama numamtuk wajaktatus,
 tuja pishak achiktasa
 detua ukukbaunum awimpap
 jakattaja tusa dekachu asa,
 wemaina numamtuk nuwan pataetuk megkaekabi.

24 Nunika megkaekatag tachakmek
 uchuchih, mina chichameg antukam umikta.

25 Amek nunú nuwa duka
 anentaimtusmek diisaipa.
 Wagki nunú wekaetakum,
 amina pujutjumin megkaekaim.

26 Nunú nuwa duka kuashat aentsun
 pegkegchaun takamtikas emegkawai.
 ¡Nii emegkagbau aidauk shiig kuashtai!

27 Tuja niina jeen wayamua duka
 jaka megkaemaina nujai betekai.

8

Unuimatan chichame

1 Unuimata duka senchi untsunui;
 yachameta nunú niina chichamen
 antumtikagtawai.

2 Nain aidaunum,
 jinta amatkau aidaunum,

3 tuja waiti aidaunum,
 yaaktanum waitainum wajas untsunui:

4 “¡Ashí aents aidautigmin juna tajime!

5 Datsauch jintiag anentaimkachu aidautigmesh
 shiig anentaimkau atajum;
 tuja atum shiig anentaimkachu aidautigmek,
 eseja anentaimat unuimagtajum.

6 Pegkeg unuimamainun
 wi titatjim nunú shiig antuka jukitajum.

7 Wi titatag duka dekaske;
 minak waitjutak shiig awajtuchui.

8 Mina chichamjuk ashí pegkejai;
 wika jimag weninnuchuitjai.

9 Aents shiig anentaimkauwa
 nunú diismak mina chichamjuk dakitmainchau
 paan antumainai.

10 Plata jumain idaikujum,
 dekas wi jintiamua nunú jukitajum,
 tuja oro shiig pegkeg jumain idaikujum,
 dekas unuimata nunú jukitajum.

11 Unuimata duka kaya pegkejuch aina
 nuna nagkaesauwai.

Tuja waji pegkeg wakemain ainakush,
 makichkish unuimatjaig betekchauwai.

12 Witjai dekatnuk,

witjai chicham pegkejan sukagtinnuk,
tuja wi dutikatag takunuk
shiig anentaimsan dutikajai.

¹³ Tuke Pujuun umija duka
pegkegchau takat aina nunak kajejawai.

Tuja ememamu,
tikich wagagkau anentaimat, pegkegchau takat,
waitjut aina nunak wika kajejajai.

¹⁴ Chichagkagtut, pegkegnum anentaimat,
yachamet, unuimat aina duka midau ainawai.
Tuja senchia dushakam midauwai.

¹⁵ Wi nunikti tibau asag apu wenawai,
nuninak chicham umiktin
dekas pegkeg aidaun najainawai.

¹⁶ Ashí apu nugkanum inamin aina duka,
wi nunikti tibau asag inamainawai.

¹⁷ Tuja mina anentuidaunak
wishakam dutiksanuk anejai,
tuja mina egatuidaunashkam wantintajai.

¹⁸ Wiakchamet, eme anentam ata,
shiig pujut, waji wamak megkaejashtin
aina nunashkam wi suwajai.

¹⁹ Wi sukagtamua duka
oro pegkeja nuna nagkaesauwai,
tuja wi sukagtamua duka
plata akiken nagkaesauwai.

²⁰ Wika tuke pegkejan takauwaitjai,

²¹ nuniau asan mina anentuidaunak,
kuashat wajigtin wiakuch emajai.

²² “Tuke Pujuu minak najatuawai.
Nii najankamu aina nunak
eke najantsuk miná najatuawai.

²³ Tuja nugkanak eke
najantsuk miná najatuawai.

²⁴ Mina najatuawa nuaduik
nayantsak atsujakui,
tuja yumi pukuni jiinaidaush,
namak aidaush atsujakui.

²⁵ Tuke Pjuuk muja aidaun, nain aidaun
eke najantsuk miná najatuauwai.

²⁶ Tuja nugkanak ikam aidaunash,
nuigtu nugka yukukuntujai nugkan najankauwa
nunakesh najantsuk miná najatuauwai.

²⁷ Apajuí nayaimpin yumi
piyajunum eneknak najanauwa
nuaduik wika pujuyajai.

²⁸ Tuja yakí agkajunum yujagmin najana umika,
nayantsan initken yumi pukuni jiinaidaun epetug,

²⁹ nayantsanum yumi piyag betsakai tusa emetug idayak,
tuja nugka buchitmainchau
atinun umikua nuadui nagkamsan,

³⁰ wika Apajuí takakui,
niijai takakun pujuyajai.
Wi ayajai niina shiig anemtikin,
tuja niina emtinig shiig aneasan
wasugkamkun pujuyajai.

³¹ Apajuí nugka najanamun
diisan shiig aneyajai,
tuja nii aentsun najanauwa nuna
diisan shiig aneamu ajuti.

³² “Nuadui uchig aidauwah,
wi tajim nunú antugtuktajum:
Wi tajim nunú umiakjumek,
Apajuí yayaam atinaitjume.

³³ Wi jintinjim nunú dakittsuk
shiig unuimagtajum,
nuniakjum shiig anentaimkau atajum.

³⁴ Aents kashi kashinig mina jegajui taa
mina chichamjun antugtau shiig aneastinai,
wagki Apajuí yayamu asa.

³⁵ Mina igkuntuk pujutan juwawai,
nunik Tuke Pujuu wait anentam awai.

³⁶ Tuja mina pegkegchaun chichagtau
jaka megkaetanum pujawai.
¡Tuja mina kajegtuina duka
jaka megkaetan aneenak nuninawai!”

13

¹ Uchi shiig anentaimkauwa duka
niina apaji chichamen umignai,
untsu uchi anentainkachua duka
apaji chichamenak antugsui.

² Maki makichik aentsuk nii pegkeg chichakbaujinian pegkejan juwawai,
untsu aents chichamen betek umichu aina duka
dita pegkegchaujin suwimkan juwinawai.

³ Shiig anentaimag chichauk
niina pujutjin kuitamak nuniawai,
untsu wainak chichá wekaguk kuashat utugchatan igkuawai.

⁴ Aents dakia duka
nii wakegamujin jukitag takush juwatsui,
untsu aents takauwa nudauk
kuashat waji ajawai.

⁵ Aents pegkegchau takatan
tupanjauk waitjutnak dakitawai.
Untsu aents pegkegchaun takauk
eme anentsa diishtai,
datsan chichajam auwai.

⁶ Shiig anentaimsa pujamua nunú
aentsnak pegkeg emawai,
untsu aents pegkegchaun takau aina
nunak niina pegkegchaujig bakuawai.

7 Awai aents makichkish wajigtuchitak
wiakuch atajai tusa wakegau,
tuja antsag kuashat wajigtin aidaushkam
wajigtuchuapi tujuttinme tusa uumush ainawai.

8 Aents wiakcha duka achikmak,
mantuawainum tusa ishamkagtak
niina kuichkijin ashí akikmak uwemainai,
untsu ujunauchik achigkachagtimpash
tusa anentaimkug waitiatsui.

9 Aents pegkegchau takatan
tupanjau aina duka tsaaptin pegkeg winchamtinama iman ainawai,
untsu aents pegkegchauwa duka
jii kajinkaujai betekai.

10 Ememata duka ima maanitnak inimui;
untsu unuimata nunú
aents chichama antuk umin aina nuwi awai.

11 Yupichuch wiakchameamua duka
wamak amugak megkaewai;
tuja aents shiig takak,
diipas wiakchamea duka kuashat ikauwai.

12 Tuja ii wakegamu uminchakuig,
wake besemag dekapnawai.
Untsu ii atsumamu betek uminkuig,
shiig aneamu ajutkagtawai.

13 Aents chichaman umiachuk
suwimkan jukitnai;
untsu chichaman umiauk akiam atinai.

14 Aents shiig anentaimkau
jintinkagtamua duka pujutan sukagtawai,
nuadui jamainun uwemtikagtawai.

15 Shiig jintinkagtau k shiig anentam auwai,
untsu shiig jintinkagtachuk
pegkegchaunum jegantainai.

16 Aents yacha shiig anentaimkauwa duka
shiig anentaimag takawai,
untsu aents anentainkachua duka
nii dekachbaujiya nuna iwaintumawai.

17 Aents chichaman betek etsegchauwa
duka utugchatan apujui,
untsu chichaman shiig
betek etsegna nunú
aentsnak shiig anemtikawai.

18 Aents chichagkatatama dakitauk,
waittanum, datsannum pujutnai;
untsu chichaman antuk umiauk,
eme anentam atinai.

19 Ii wakegamu uminkuig shiig aneenui;
tuja aents anentainkachu aina duka
pegkegchau takat idaitanak atsanenatsui.

²⁰ Aents yacha aidaujai tsaniauk,
niishkam yacha atinai,
untsu aents shiig anentainkachu aina nujai tsaniauk, pegkegchaunum
jegatnai.

15

¹ Pegkegnum aimawa nunú
kajekbaunak imijiawai;
untsu kajeka aimawa duka nuni senchi kajeamun inimui.

² Aents yacha shiig anentaimkau aina
nuna chichameg unuimatan sukagtawai,
untsu aents anentainkachu aina
nuna chichameg pegkegchau ainawai.

³ Tuke Pujuuk ashí yantamnum pujawai,
nuniau asa aents pegkeg aidau pegkegchau aidaujai diyakui.

⁴ Pegkeg chichamua nunú aentsnak pegkegnum yayawai.
Untsu pegkegchau chichamua nunú aentsu pujutin emestawai.

⁵ Aents anentainkachua duka
niina apaji jintinmash dakitawai,
untsu yacha shiig anentaimkauwa duka niina apaji chichamen antujui.

⁶ Aents Apajuí umigna duka
shiig kuashat wajigtinai,
untsu aents pegkegchauwa nunak
niina wajijiya duke utugchatan itajui.

⁷ Aents yacha shiig anentaimkauwa duka
nii dekamujin tikich aentsnash
pegkejan jintintui.
Untsu aents anentainkachu aina duka
pegkegchauwa nuna jintintui.

⁸ Aents pegkegchau aidau
Apajuí anentag suwaji tusag,
kuntinun maa apeena duka
Tuke Pujuunak shiig awagmatsui.
Untsu aents pegkegchau takatan tupanjau aina
nunú segamak Apajuík shiig antujui.

⁹ Tuke Pujuuk aents pegkegchau aina
nuna pujutjinak dakitawai,
untsu ya tudaun tupantug
pegkejan takak pujawa nuna aneawai.

20

¹ Vino nampeamua nunú
aentsun pegkegchau chichamtin emawai;
uwaja nampetai aina duka utugchatan inimui;
nuna uwag nampeauk shiig anentaimag chichatsui.

² Apu kajena duka
león kajeak shinuwama imanai;
tuja nuna apun ikajeauk nigki bakumawai.

³ Aents pegkegchau takatan
tupanjauk jiyanitnak dakitawai;
untsu anentainkachua duka jiyanitan wekaetawai.

⁴ Aents dakia duka aja takamain esat tepeau aig,
takatsuk pujau asa,
yumi tepeamtai nii yumainjig atsugtinai.

⁵ Aentsu anentaimtajig
nayantsa kunajinia wainmaitsu numamtinai.
Untsu aents yacha duka
nuna takumpap tawa tusa shiig dekawai.

⁶ Kuashat aents aidau,
amina kumpauchijum atajai tuinawai;
¿tujash dekas aents imanush igkumainashit?

⁷ Aents pegkegchau takatan
tupanjau aidau uchiji aidauk,
dita apaji pegkejan takajaku aina nujai betek
pegkejan takainak,
Apajuí yayamu asag shiig aneasagtinai!

22

¹ Pegkegnum augmatam ata nunuwai
wiakchameutan nagkaesau.

² Aents wiakuch akush ujunajaig betekai,
wagki mai Tuke Pujuu najanamu asag.

³ Aents yacha shiig anentaimkauwa duka
pegkegchaun wainkug wamak idaiwai;
untsu aents anentainkachua duka
ayatak akuumtawai, nuniau asa,
utugchatan igkug waitiawai.

⁴ Apajuí eme anentsa puyatjusa umigbauwa nunú
sukagtawai pujutan, wiakchameutan,
eme anentam atan.

⁵ Aents pegkegchau aina nuna
tsanumtaiji aidauk ishamain ainawai.
Untsu aents niina pujutjin
kuitama duka nunak tupantawai.

⁶ Amina uchigmek piipichia duik shiig jintintuata,
dutikamu asa múun wajasash kajimatkishtinai.

23

⁴ Wiakuch atajai tusam
anentaimkum waittsaipa,
duka puyatjutsuk idaisata.

⁵ Ame shiig anentaimsa diyakmek,
wiakuch wetak wainkaya nunú dekaattame,
wagki duka águila uchiji aidau

nanapjuk nanaak shimak megkagama
numamtuk megkaewai.

¹⁹ Uchuchih, wi tajam nunú
shiig antukam unuimagta,
nuniakum shiig anentaïmsam pegkeg takata duke takasta.

²⁰ Aents nampeku aidaujui
ijunjamek wekaesaipa,
tuja ushu aina nujaiishkam kumpajinawaipa.

²¹ Wagki nampen aidauk,
ushu aidauk, ujuuna wenawai,
tuja daki aidauk jáanch pegkegchau
ampinkau mamuku aidaun apajag nugkuinawai.

²² Apa amina akimpawa
nuna chichame antugkata;
tuja amina duku múuntuch
wajasmataish dakitjaipa.

²³ Dekaskea nunú, yachameta nunú,
jintinjammu aina nunú,
unuimata nunú aatsam sumakta.
¡Dutikamek duka sujukaipa!

²⁴ Uchi pegkeg, yacha,
shiig anentaïmkauwa nuna apajig
shiig aneak ememas anentaïmui.

²⁵ ¡Yajauwajah, uchi yacha shiig anentaïmkau aidaunmak!
Nuadui uchita atumek atumi apa dukujui
shiig anemtiksatajum.

²⁶ Uchuchih,
wi tajam nunú shiig antukta,
nuniakum wi jintintuawaitjam nunú kajimatkipa;

²⁷ wagki nuwa akika dutiktai aina duka
waa múun suwe ishamainama imanai;
tuja nuwa aishintin tikichjai
tsanijinna dushakam waa tsejegkush,
init akagama numamtinai.

²⁸ Nuadui kasajai betek
kuashat aishmag aidaun achiawai,
dutika aents nuna yujajin aina
nujai betek emawai.

²⁹ ¿Yaita waitiaush?
¿Ya waitiakush etetua?
¿Yaita utugchatan apujus
anentaïmak waitu wekagush?
¿Yaita nigki suwimkan sumamas waitiaush?
¿Yaita bushapajun niim wekagush?

³⁰ Nunak vino uwaja,
nampetan makichkish idaitsuk,
tikich umutai aidaunashkam umú yujau aina nunú
nunak núninawai.

³¹ ¡Datsauchih, uwaja nampetai aidaun

kajiak niime pegkeg wega duka
makichkish anentaimtusmek diisaipa!
¡Nunú diyakmek wakejukam uwagtatme!

³² Tuja niimeg pegkejaitak,
dapi esajatbau tsaagke najamama imanai.

³³ Iman asantai nunú umakmek,
pegkegchau wainchatai aidau waintatme,
tuja pegkegchau anentaimkum
ima pegkegchauk chichattame.

³⁴ Nuniakum lanchanum egkemjanus
yáki jítkaunum ekemsan nayantsanum
wegagtai dekaptatme.

³⁵ Nuniakum: “Awatujagmae,
tujash dekapjachmajai;
asutuinakuish dekapjachmajai;
tujash nunak puyatjatsjai,
juna sakapagnuk nantakin vino egakan,
nuni kuashat uwagtatjai”, titatme.

24

³ Jegak shiig anentaimsa jegamtayai,
tuja shugkushkam
shiig anentaimsa ajitayai.

⁴ Waji pegkejuch wakejumain aidau
ijumaina numamtuk, unuimata nuna
niina kanutaiji aidaunum ijumui.

⁵ Aents yacha nunuwai tikich aents
senchigtina nuna nagkaesauk.
Unuimata nunuwai dekas
senchigtin ata nuna nagkaesauk.

⁶ Wagki maaniatag takuik, shiig anentaimsa
chicham umika maanitayai,
tuja depetmaktatus wakegauk
tikichi chichamenash shiig antuku amainai.

¹⁷ Amina shiwaajum waituinakuish,
shiig aneakjum dushikjaigpajum,
tuja utugchatji ajakuish dushikjaigpa.

¹⁸ Wagki duka Tuke Pujuunak shiig awagmatsui,
nuniaú asa amina kajegtamak suwimkan amamainai.

¹⁹ Aents pegkegchau aidau diisam kajekaipa,
tuja niina wajiji aidau
diisamesh kajekaipa.

²⁰ Wagki aents pegkegchauwa duka
pegkeg pujutnakesh jukishtinai.
¡Aents pegkegchau aina duka
lampara ikagnakbaujai betek agtinai!

25

²¹ Amina shiwajumesh yapajakuig,
yutai ajamsata;
tuja kitamakuishkam umutai susata.

22 Nunú ame dutikamin,
amina pegkegchau awajtamin asa
nii tuma datsaagtatui,
Nuadui Tuke Pujuu aminak
pegkegnum akigmaktinai.

27

1 Kashin nuna imatikan takastatjai
tusamek emtikamek tumamipa,
wagki amek dekatsme
kashinish wajukatamki duka.

2 Duka amek imatipa,
idaisata nunak tikich aidau tujamtinme,
iik eme anenmamku
imatbauk pegkegchauwai.

3 Kaya, kamatak aina duka
senchi kijin ainawai,
tujash nuna nagkaesau kijinai
aents anentainkachu nii wakegamun
umiktakama kajeamujiya nunú.

4 Kajeamua duka pegkegchauwai, tutitjan itawai,
tujash nuna nagkaesau
kakajus depetmainchauwa duka,
tikich takakui diisa kajekagtamua nunuwai.

5 Aents amina anempa duka
uuka chichá wekaetsuk,
paan igkumpa tujamtatui.

6 Shiwag kajegtamiatak tsanupak kumpamjama nunú kajittsa diitsuk,
dekas iina kumpaji igkujatua tukagta nuwi
kajintsa anentaimainai.

30

18 Wi puyatjusa diyamug aidauk
kampatum waji, tuja nuigtu makichik,
nujai ijumjamak ipak usumta imajin ainawai.
Tujash shiig ejeyin dekamainchau dekapeajai.

19 Duka juju ainawai:

“Águila yakí wekaga nuna jintig dekamaitsui,
tuja kaya aidaunmash dapi jintish
wajuk awaki duka shiig dekamaitsui.
Tuja lancha nayantsanum wekaga nuna jintishkam dekamaitsui;
tuja wagkag aishmagkush imatikash
nuwanash wakegawa dushakam dekamaitsui.
Juju aina nuna shiig ejeyin
dekamainchau dekapeajai.”

31

*Nuwa pegkeg
eme anentsa diitai*

10 Nuwa shiig anentaimkauk

kakajus igkumaitsui,
 ikaya pegkejuch akik aina
 nuna nagkaesauwai!

¹¹ Niina aishig shiig kajitus diyawai,
 tuja kuichkinash atsumchagtinai.

¹² Niina aishig, nuwe utugchatan apujtus
 waitkachbau asa,
 tuké shiig aneas pujawai.

¹³ Lanan ujuchjai egaka sumak,
 nuna wakejus shiig aneas jáanchi apijug najanak pujawai.

¹⁴ Lancha wajiin atushtanmayan ikaunmama numamtuk,
 nunú nuwa dita yuwatnujinak atushtanmayan ikaunmawai.

¹⁵ Dutika eke tsawatsaig nantaki,
 yutain inajuk uchiji aidaun
 inake aidaujui ayujuk,
 inake aidaunak takatnum ishimui.

¹⁶ Tuja nugka pegkejan diisa,
 nuna akikenak nii takasa jukimui
 betek akikmak sumawai.
 Dutika nuwi uvan ajakmawai.

¹⁷ Aatus kakaag senchi takau asa,
 shiig aneas kashikmas nagkama taka takakua etsa akapak ukuawai.

¹⁸ Wajiji kuashat kawegti tau asa nii kuitamui,
 tuja kashish takau asantai, jii tuké keeka awai.

¹⁹ Tuja niina jáanchjinash
 nigki apaja nugkuawai.

²⁰ Tuja ujudauch aidaun
 atsumiagtaish, yayawai.

²¹ Tsetsek tepetaish,
 niina uchiji aidaunak puyatjatsui,
 wagki ditak jáanchin shiig nugkujag yujaidau asagmatai.

²² Colchajinash nigki najanui,
 tuja niig jáanch shiig pegkeg
 apagbau aidaun nugkuawai.

²³ Tuja niina aishinashkam
 yaaktanmaya aidauk ashí wainainawai,
 wagki apu eme anentsa diitai aina nuwi niishkam
 pachitkau asantai.

²⁴ Nunú nuwak jáanch aidaun
 akachumtai aidaujui najanak,
 waji sujin aidaunum sujawai.

²⁵ Eme anentsa diitai asa,
 nuna megkaekaig tusa kuitamamui.
 Tuja atakea duish wajukatnukitja
 tusagkesh puyatmamtsui.

²⁶ Chichaakush shiig anentaimas chichawai,
 tuja niina uchijinash shiig anentus jintintui.

²⁷ Niina jeen utugchat ai tusa aneaku pujawai,
 tuja nii takasa jukichbaujiniyanak yuwatsui.

²⁸ Nuadui niina uchiji aidaun
 niina aishijai emematus chichajuinak:

29 “¡Nuwa pegkeg aidauk kuashat ayawai,
tujash ametme ashí tikich nuwa aina
nuna nagkaesaumek!” tuinawai.

30 Nuwa shigmaji diisa wakejamua duka wainkayai,
tuja shiig awajkagtamujia
dushakam wainkayai,
dekas nuwa Tuke Pujuun umigna
nunuwai ememattsá diyam auwa duka.

31 ¡Niina takatji pegkeja nunú anentaimtusjum,
ashí aents aidau emtin eme anentsajum
pegkegnum chichagtajum!

Juninai pujutak Eclesiastés

3

Ashí waji nagkaema nunak maki makichik tsawanji ajuinawai

¹ Juju nugkanum ashí waji aidau nagkaemaina duka tsawanji mamiktu-
amu ainawai:

² Tsawan jegawai akiinbau,
tuja jamu, ajak ajakmamu,
nunú ajakmamu nejekmatai juwaamu.

³ Tsawan jegawai aents maamu,
tuja aents jakui tsuwamu,
yaakat tsayamu,
tuja yaakat tsaikbau ataktu yaaktabau jegawai.

⁴ Tuja buuttinush tsawan jegawai,
tuja shiig aneaku dushiamush,
jakamunum buutku wake besemag pujamush,
tuja jiistamatnush tsawan jegawai.

⁵ Tsawan jegawai kaya yajuaka utsamu,
kaya utsagbau yajuaka ijubau;
shiig anendaiku pagkuniamu,
tuja kanaamu.

⁶ Tsawan jegawai kuichik juwamu,
tuja takatsuk wainka pujamu,
ii takasa jukimu anetamu,
tuja ii anettsamu utsamu.

⁷ Tsawan jegawai jáanch ichiamu,
nunú ichigbau apigbau,
chichatsuk pujamu,
tuja tsawan jegawai chichaamu.

⁸ Tsawan jegawai aneeniamu,
kajegdayamu, maaniamu,
maanitsuk agkan shiig pujamu.

⁹ Aents senchi takak waitia dusha ¿waji pegkegna juwawa? ¹⁰ Tuja Apajuí aents aidaunak takainak batsamsatnume tusa, kuashat takatan susauwa nuna anentaimesan ejemaijai. ¹¹ Tuja Apajuí juju nugkan najanauwa duwi nagkamas, aentsnak shiig pegkejan najanauwai. Dutika unuimatan susauwai, atakea duish wajig nagkaemajagtinaita nuna dekatnume tusa. Tujash dutikamaitak, aents aidau Apajuí yama nagkamchak najankauwa nunak shiig dekamainchau dekapenawai.

¹² Nuadui wika dekajai dekas aentsuk eke iwaku puja duik, pegkejan takak shiig aneas pujumainai. ¹³ Tuja ii yutai aidau yuwaku, umutai umag duka ii takasa jukimunmaya dutikaji, wagki Apajuí nunak amasu asantai.

¹⁴ Tuja nuigtushkam dekajai ashí Apajuí najankamu aina duka tuke asatna nunak:

Nii najankamua duka
nuwi ekekaik makichkish najanmait sui,

tuja emegkautkesh emegkaumaitsui.

Nunak Apajúi dutikauwai,
wagki niina senchijin dekaatnume tau asa.

¹⁵ Ashí yamai ayá duka yaunchuk aijakua nunuwai,
tuja atakea duwi agtina dushakam
yamai ayá nunuwai.

Tuja yaunchuk nagkaemajua nunak
Apajúi ataktu nunikti tusa tima ataktu wantinui.

Aents jakug nugka yukukuntu najaneawai.

¹⁶ Juju nugkanmak apu aidauwap shiig takasagtatua
tusa eme anentamaitak,
ima pegkegchaunak takainak
aentsun waitkaina nuna
anentaimsan ejemaijai.

¹⁷ Nuadui Apajúi aents aidaunak tsawan jegatna duwi pegkejan taka-
sunash pegkegchaun takasujai mai apatuk dekajuatnai.

¹⁸ Tuja nuigtushkam aentsu pujutjig kuntinu pujutijaig betekmamtina
nuna Apajúi ditan dekamtikaun anentaimsan ejemaijai. ¹⁹ Shiig anen-
taimsa diyamak, aents aidaush, tuja kuntin aidaush mayattaiji betek ajamu
asag, tsawanji jakatin jegagmak betek jainawai. Wagki juju nugka juwi
pujutak aajayai.

²⁰ Ashí iwaku aina duka betek jainawai.
Nunikag nugka yukukuntui najanamu asag,
nunisag ataktu nugka yukukuntu wajasagtina.

²¹ ¿Ya tumainaita, aentsu wakanig yakí nayaimpinum weawai, nuniai
untsu kuntinu wakani nugka initken akaewai tusash?

²² Untsu jaka ajin inantamki, atakea duish wajig nagkaemakinta nuna
iwaintugmamainuk makichkish atsawai. Nuadui ii takasa juwamua duwi
ii wakegamu takaku shiig aneasa pujumainun anentaimsan ejemaijai,
wagki iik nuni takas pujusti tibau ainaji.

9

Iwaku pujamu jaka megkaebaujai anentaimtusa diyamu

⁷ ¡Wainka anentaimkum waitu pujutsuk, Apajúi amina takatjumin shiig
anenjamsau asantai, yutai yuwam, umutai vino uwajam shiig aneasam
pujusta! ⁸ Amek jáanch puju tuké nugkuta, nuniakum kugkuin buukmin
tuké nijamta.

⁹ Juju nugka juwi pujutak wainkaya nuna Apajúi amasua nuwi pujusam,
amina nuwem aneetaigmea nujai kashi kashinig shiig anendaisam pu-
justa. Nunuwai ame kuashat takaku waitiam duwi pegkeg juwamua duka.

¹⁰ Ashí ame takamain ajutjamkuig, duka ame dekapmamsam takasta;
wagki ame jakam wetatam nuwig takamainuk, tuja dekatan jukitjai tusa
waitmainchakam makichkish atsutnai.

¹¹ Tuja tupikamunum depetma duka ya ima senchi tupikawa nunú
depetmatsui, tuja maaniamunum depetma dushakam nunú ima waji
asagkesh nuniatsui; tuja yacha aina nuna yumainjig tuké ajuinatsui,
wamak unuibau aina dusha wiakchak ainatsui. Tuja papiin unuimaju
aina dusha shiig anenmak ainatsui; ditanushkam shiig pujamu shiig
pujachbaush jegajuinawai.

¹² Tuja dekatsji wajutik ii jakatnush tsawantash jegagtamti duka, nuadui
red nená ukukbaunum namak nemama numamtuk, tuja pishak achitai

nená ukukbaunmashkam pishak nemama numamtuk pachichbau ii waittsatnunum jegaku waitiaji.

11

¹ Aents yapajau wainkumek, yutai susata yuwati.

Nunú dutikau asam,

makichik tsawantai ameshkam dutiksaik ikuam atatme.

² Aminu ajutjama duka anetu pujutsuk ajamasta, wagki amek dekatsme waji utugchatak juju nugka juwish nagkaemakti duka.

³ Yujagkim bukusea weakug yumi yutak nuniawai.

Numi katugak nujinum, tuja nuniachkush tsumunmagkesh iyakug tuwi iyaje, nuwig tepestinai.

⁴ Ajakmatasa wakegakmek dase dii pujuipa;

tuja ajak ajakmamu juuktag takumek nayaim dii pujuipa.

⁵ Dase dasenkash itug weawaki nunú dekatsum numamtuk, tuja uchish wajuk najaneawaki dusha dekatsum numamtuk, Apajuí ashí najankauwa nunash wajuk dutikaukita duka dekatsme.

⁶ Kashikmasam ajakmata, tuja agkushkam ajakmata, wagki yama nagkamchaku ajaamua nunuwash ima shiig nejekat, atsa, ukuunum ajamua nunuwash ima shiig nejekat, aatsa nuniachkush mai betekash nejekat duka dekamainchau asamtai.

12

¹ Eke múuntuch wetsuk yamai datsauchtam duik

Apajuí amina najapauwa nunú aneaku ata.

Tuja tsawan waitiamu jegamtai, ame chichaakum:

“Kuashat tsawan waitu pujutak shiig awajtatsui”, titinaitme.

² Eke etsa, nantu, yaya aidau

etsanbaujin kajinainatsaig,

amina najapauwa nunú adeagta.

Tuja yumi yutug nagkankamunum

yujagkim wajas awa duik adeagta.

³ Tuja tsawan jegattawai

apu pujusa inamtain kuitamin aidau

ishamkagtuinak kujainamu.

Tuja aents waji u aidau

ishamkagtuinak tikishmasua waigkagtatui;

tuja trigo dekeen aidauhkam ujumchik asag

dekeetnak idaisagtatui.

Tuja jeganum niimtai ujaimunum niimin aidauhkam

wainmamainchau wajasagtatui.

⁴ Nunú tsawan jegamtaig,

waiti aidauk ashí epenjamu atatui.

Tuja trigon dekeenak

tatagmitkamushkam itatjagtinaí.

Nuninai untsu pishak shinuinamu senchi antuetinaí.

Untsu ame kantabaugmek
shiig antumainchau initak kujakjatu antuetinai.

⁵ Nunú tsawan jegakuig
nainnum wamu ishamtinaitme.
Tuja iyajaig tusamshakam ishamtinaitme.
Tuja almendro yagkujamu nagkamnattawai,
tuja amina iyashmek makichkish
atsumchattame, ayatak manchi pakaemag
nanapjug nanaak wegama numamtuk
atasam duke dakattame.
Nunú jegakuig amek ataktu wakitki
tashtinnum wetinaitme,
nunikamin aents aidau ame jakamin
buutuinaak agá tuwagtamkagtinai.

⁶ Nuadui amina pujutjum
plata najanamui anaa emetuumua
numamtina nunú eke tsujintaig,
tuja ichinak oro najanamu tsaintsu duik,
tuja nuigtushkam ichinak yumi shikitaiya
nunú eke tsainak ajapnatsaig,
yamaya juwik Apajui amina najapauwa nunú
kajimattsuk umigkata.

⁷ Nunú tsawan jegamtaig,
amina iyashmek nugka yukukuntu wajastinai,
wagki amek nugka yukukuntu juki najanamu asam.
Untsu wakanik Apajuiyai wakitkittawai,
wagki nii amasbau asa.

⁸ Wi Apajui chichamen etsegnun juna ataktu tajai:
“¡Juju pujuta juwig iman pegkejak
makichkish atsawai!
¡Ashi wainak ainawai!”

Isaías Jerusalén Judá wegantu aidaujai pachisa etsegkamu

(1—6)

Judá wegantu aidauk pegkegchaun takau aidau

¹ Judá wegantu aidounash waji utugchatak ajitnush ayi nuna pachis Amosa uchijin Isaíasan Apajuú ujakui. Nunak Judá wegantu aidoun apuji aidau Uzías, Jotam, Acáz, Ezequías aatus aajakú aina nunú tsawantin ujakui.

² Dutikam nuna Isaías etsejak:

Nayaim, nugka aidautigmesh
Tuke Pujuu tawa nunú antuktajum.

Apajuú chichaak:

“Wi Israel aents aidounak mina uchig asagmatai,
kuitamkan tsakapakan idaisawaitjai.
Dutikamaitak mina umigtutsuk wijai shiwagmagawaje.

³ Tuja bakak, yaita niina kuitamnush
nunak shiig wainui;
tuja burro aidauhkam aents niyai entsamak
wekaena nunak shiig dekainawai,
untsu mina aentsug Israel aents aina duka
wi kuitamsam batsatiatak
mina shiwagmatuinawai.

⁴ “¡Aents ayatak pegkegchaunak takau aidauk,
pegkegchau takat aina nuna
utuatumkamg batsamin ainawai!
¡Tuja pegkegchaun takajaku aina
nuna uchiji wegantu aidauhkam,
pegkegchaunak dekainayatak,
nuninun yujaju asag
Tuke Pujuu, pegkejam,
Israel aents aidoun Apajuújiya nuna
kajimatkiag idaisaje!

⁵ Atumek dekas intimkiu atag tusajum wakegagme,
nunin asagmin shiig kuashat suwimkan amasjime.
Imatikamu asajum atumi iyashinig
pegkeg ayautkauk atsawai.

Tuja atumi buuken pujagbauk esamtsui,
tuke imanisag ayawai.
¡Nuadui atumek kakakchau wajasugme!

⁶ Dawemin nagkamas buukmijai
ashí atumi iyashig makichkish pegkeg ayautkauk atsawai;
tuja anú ibau atumi iyashin ayá nuna
ampia pempenjamag kuitamak
etsaentamainuk makichkish atsawai.
Tuja najaimagminish aceiteyai yakagtamjagkesh, imijtugmakchaje.

7 Atumi nugkenak yaaktajum aidaujui shiwag aidau tsaikagmatai, agkan shiig pujumainchau wajase. Tuja yaakat aidau apeamu keenawai. Tuja atum ajakmamu aidaunmayan shiwag aidau juukag atumesh wainjuminig amuinawai. Yaunchuk yaakat Sodoma tsaikam atsau agkan juwakua numamtuk wajase”, tujamui Apajuí.

8 Untsu ima Jerusaléggak tsaikchamu juwake, nuniku asa melón ajakbaunum nuna ejapeen makichik aak aakmaka pachitsuk idaisamu aama numamtuk wajas awai. Nuniak nuigtushkam makichik yaakat shiwag tenteam aama numamtin wajas awai.

9 Tuja Tuke Pujuu ashí senchigtina nunú jutii ainag nuwiyán ujumak uwentikchakuig, iik sodomanmaya aents, gomorranmaya aents aidaujui ijinauwa numamtukes wajakgtai.

Israel aents aidau Apajuín dekaskenum emematchagbau

10 Israel aents aidaun apuji aidautigmek, sodomanmaya tuja gomorranmaya aents aidaun apuji pegkegchau aajaku aina nunin wajasugme. Nuadui Tuke Pujun chichamega nunú shiig antuka jukitajum.

11 Tuke Pujuu chichaak:

“¡Atum Apajuí anentag suwaji tusajum, kuintin aidau maajum mina emematjaku kuintin patai apetainum patagjum, nuna neje ashí apeajum nunak wika dakitajai! ¡Ataktuk sujusaigpa! Tuja toro aidaun wiyaji, uwig aishmag aidaun, chivo tsakat aidaun numpen wainkunchakam tsumajai.

12 Wika mina emematjitasajum minakjum, kuintin aidau ikaunmatajum tusanuk makichkish atumnak segatsjime. Atumek mina dushiktakjum, mina jegag pegkegma nunú pegkegchau ematasajum kaunjume. ¡Juju jega mina emematjaku ijuntaya juwig batsamsuk, jiinja shiyaktajum!

13 Ataktu awagkigmek anentag mina sujumu pegkegchau aina juninuk itagtuawaigpa. Nunú apeamua nunak wika tsumain diyajai. Tuja nantu yama takamunum Apajuí emematku jiiistamtai, nuigtu tsawan ayamtain jiiistamtai ati tusa umikbauwa nunú jiiistamami tusajum aents aidau ipajum ijumjume, tujash wika aents pegkegchaun takau aidau jiiistamaina nunak shiig dakitajai.

14 Nantu yama takamunum jiiistamjum nunak wika dakitajai;

¡Nunú jüstamjum nunak dakitmain diyajai,
nuniakun katsuntu pujumainchau dekafejai!

¹⁵ Tuja atum mina aujtustasajum uwejum takuajum nunak
wika makichkish diyatsjime;
tuja antugtanakesh antugsujime.

Tuja atumek kuashat aents mainaitjum duwi,
uwejum takuajum duka ayatak numpak ainawai.

¹⁶ ¡Nijamaktajum!

¡Pegkegchaujum aidau diitan dakitajai!

¡Pegkegchau takatak idaisatajum!

¹⁷ ¡Pegkeja nunú takat unuimagtajum,
kakanmamsatajum pegkeg takatnum,
nuniakjum aents waitkam batsata nunú yaigtajum,
dutikakjum uchi bitaik aidaush,
tuja waje aidaushkam ayamjuktajum!”

¹⁸ Tuke Pujuu chichagtamak:

“Yamai juju pachisa atumjai chichasmi.

Tuja atumi tudaujum numpa kapantua imanaitkuish,
wi nunak esakatjan yujagkim pujua iman awajtustatjime;
tuja jáanch numpa kapantui egkekbauwa imanaitkuish,
wi nunak esakatjan lana pujuama iman awajtustatjime.

¹⁹ Atum mina umigtakjumek,
atumi nugkem pegkeja nuwi ajakmajum yuwattagme.

²⁰ Untsu atum ayatak intinkugmek,
duka maaniamunum ijina utsam atatjume”,
tujamui Tuke Pujuu tusa, Isaías tiuwai.

Apaju Jérusalégnak iwajattawai

²¹ ¡Jérusalégnunia aents aidauk
yaunchkek shiig anentaimkau, waitjuchu, pegkeg aajabi,
tujash yamaik nuwa wainka akika dutikatajai betek,
magkagtin wajasu ainawai!

²² Atumek plata pegkejama iman ayugme,
tujash yamaik utsagbaujai betek wajasugme.
Yaunchkek vino pegkeja iman ayugme,
tujash yamaik chujuin wajasugme.

²³ Atumi apuji aidauk aents intimkiu,
pegkegchau aina nuna kumpaji ainawai.
Kuichik akiam, tuja waji aidau suwam
nuna juwinak,
aents takamsachunak jujuwai takamsauk tuinawai.
Tuja bitaik aidaunash, waje aidaunash waitkainawai,
dutikainau asag makichkish yainatsui.

²⁴ Nuadui apu Tuke Pujuu ashí senchigtina nunú chichaak:
“¡Ditak mina shiwag ainawai,
nuadui wi ditanak suwimkan susagatjai!

²⁵ Dutikakun dita tudaujinak waji pegkegchau aidau
apetia numamtuk apean utsankattajai,
dutikan dita pegkegchau takamtaiji aina nunak esakatjattajai.

²⁶ Dutikan yaunchuk apu chichama epegkin aidau,
chichagkagtin aidau shiig takau,

waitjuchu aajabia nujai betek emaktatjai.
 Dutika ai: 'Jerusalégnumia aents aidauk,
 pegkejan takau aidau', nuigtu:
 'Ima Apajuínak umijin aidau', tujamtin ainawai.

²⁷ Wika wait anenkagtin asan,
 nuigtush uwentikagtin asan,
 Jerusalégnumia aents aidau mina umigtuinakuig,
 wainka waitkam yujakuish,
 wi ditanak ayamjuktinaitjai.

²⁸ Untsu aents pegkegchaun takau aina duka
 ashí jinawagtinai,
 wagki mina umigtutan dakituidau asag.

²⁹ Tuja atum aidautijum anú yagkug aidau,
 tuja numi encina aidau ayá nunú shiig wakejusjum
 kuitamjum nuwi wainka apajuímtai aidau
 emematjum nunú diisjum datsagtinaitjume.

³⁰ Atum aidautigmek, numi encina duke kakekamtai,
 wentsamtug wajama numamtin,
 tuja yagkug yumi ukattsuk idaisamujai betek atinaitjume.

³¹ Tuja atum ainajum anuiya senchigtina duka
 chijichi kagaju apeam megkagama
 numamtuk megkaejatnai.
 Niina tudauji aina nunuwai jii kegaujai beteka duka.
 Nuniau asa nunú chijichinak apea ajapeawai.
 Nuadui niina tudaujijai esatnai,
 tuja nuna ikagnamainuk makichkish atsutnai.”

2

Ashí nugkanmaya aents aidauk agkan batsamsagtin ainawai

¹ Apajuí Judá wegantu aidaun, Jerusalégjai pachis, Amosa uchijin
 Isaíasan ujakua duka jujuwai:

² Apajuí emematku ijuntai
 mujanum jegamkamu awa duka
 atakea duish eme anentsa diitai atinai.
 Nuna diinak kuashat aents
 tikich nugkanmaya aidau kauniagtinai.

³ Kuashat aents aidau kaunainak:
 “iMinitajum au muja Tuke Pujuu etegkamua awi wakagmi,
 tuja jega Apajuí emematku ijuntai
 jegamkamua awi wakagmi.

Awi Apajuí niina chichamen jintinjamamtai,
 nunú antuka nii tabauwa duke umikagmi!” titinai.
 Wagki nii chichame umiktin agagbauwa duka Siógnumia wantintinai.
 Tuja niina chichameshkam
 Jerusalégnumia jiinki antuetinai.

⁴ Tuja nugka múun aidaunmayanash
 Apajuí dita pegkegchaujin diijus suwimkan susatnai.
 Nuadui ashí nugka múun aidaunmayag
 dita maanitaiji aidaunak ajak ajakmaku nugka pukutai,
 arroz tsupitain najankatin ainawai.

Dutikawagmatai maaniamuk nagkankatnai,
tuja maaniatin jintiamushkam atsustinai.

⁵ ¡Israel aents aidauwah,
Tuke Pujuu chichamega nunú antuka betek umikagmi!

5

Uva ajakbau pachisa kantamamu

¹ Mina kumpaju daajin pachisan, nii uva ajakmamujiya nuna pachisan,
kantamtain wi kantamatjai.

Mina kumpagdau nugka pegkeg
shiig tsapaunum uva ajakbau ajuyi.

² Nuna nugkan pukuja, kaya aidaun utsantuk,
uva ajake shiig pegkeg aidaun ajakui.

Dutika peegkeg apaka,
nunú aja ejapeen kumpinan jiika,
vino najanatnunashkam umikui.

Dutika umika uva yumimitun tsamakti tusa
eke tsamachu asamtai, dakak pujau.

Tujash nunú uva aidauk chujuinun tsamakui.

³ Jerusalégnunia aidauwah,
Judá aents aidauwah,

nunú nunika dusha ¿yanawaita utugchatash,
midaukait, atsa uva ajakbauwa nudaukait?

⁴ ¿Uva chujuin ai tusan wi dutikmainush awak?
Wika yumimitun nejekti tusan wakekabiajai,
tujash ¿wagkag chujuinnash nejekiawa?

⁵ Tuja midau uva ajakbauwa nunash,
wisha itugkatag tajaki nuna yamai ujaktajime.

Wika aunak ashí ijinatnume tusan
kuitamtsuk idaisattajai, tuja utsaantuawag,
najakag kupig ijinatnume tusan
peejamua nunashkam tegajattajai.

⁶ Dutikan pachitsuk idaisattajai.

Tuja tuke nejen ati tusa,
kanawe pegkegchau aidau tsupija utsanka
pegkeg ematia nunash dutikachagtatui.

Tuja dupanash takagsachagtatui,
dutikamu asa dupa jagki aidaujai tsapaka
akijuatnai.

Tuja nuna uchupig pegkeg ematnunash
yuminak yutumtijashtatjai.

⁷ Tuke Pujuu ashí senchigtin uvan wakejus ajakua duka

Israel aents Judá wegantujai aina nunuwai.

Tuke Pujuu mina chichamjun umigtuktinme
tusa wakekauwai,

tujash ditak magkagtin wajasu ainawai.

Tuke Pujuu shiig pegkeg dekaskenum takau atinme

tusa wakekauwai,

tujash ditak ima pegkegchaunak takaidaun

Tuke Pujuu wainui.

6

Apajuí Isaiásan chichaman etsegtugkati tusa etegkamu

¹ Apu Ozías jakauwa nunú mijantin Apu Apajuí niina ekemsa inamtaiji shiig pegkegnum yakí eketun wainkabajai. Tuja jega Apajuí emematku ijuntai jegamkamua nuna initkenak nii jáanch nugkuagbauwa nunú dukuka amayi. ² Apajuí eketbaunum nuna yakin serafin aidau batsamayi. Maki makichik seis nanaptin agmayi. Jimag nanapega duwi yapin dukuaku agmayi, tikich jimaja duwi nawen dukuaku agmayi, tuja tikich jimaja duwi nanamiagmayi.

³ Tuja dita chichainak:

“Tuke Pujuu ashí senchigtina duka shiig pegkegmai, tuja niina imanjiya nunú ashí nugkan jajutua awai”, wajagmayi.

⁴ Nunú Apajuín emematuinak imatuinamu, jega Apajuí emematku ijuntai waitiji aidaun senchi umuchmayi, nuniai nunú jeganum bukuituk yujagkim wajas asabi. ⁵ Imaniakui chichaakun:

“¡Jajapi yamaik! Wagki wika pegkegchaun chichau wajasu, tuja aents pegkegchaun chichau aina nujai ijunjan pujag, nunaiyatkunup Tuke Pujuu ashí senchigtina nuna pan wainkaja”, tusan tibaijai.

⁶ Tusan tai makichik serafin wi wajamunum nanaak tantabi. Nunik minák altarnumian jii kaiji kapaun juki itanmayi. ⁷ Dutika duwi mina wenujun antinjuk chichagtak:

“Nijah, juju jii kaiji amina wenimin antinjamkae.

Juwi Apajuí amina tudaugminak esakatjamjae.

Nuadui amina tudaugmek tsagkugnaje”,
tujutmayi.

⁸ Tujutmatai pujai Apajuí chichaak:

“¿Yanak awemainja?

¿Yaki iina chichamen etsegnush ati?”

taun antukbajai. Tusa takui wi ayaakun:

“¡Mina awetita, wi amina chichamjumnak etsejin atajai!”
tiabaijai.

⁹ Tusa tai nii chichagtak:

“Wetá nunikam juju aents aidau aatsam ujakta:

‘Chichaman antuinakush

nunap tawa tusag tichagtatui,

tuja pan wainainakush dekachagtatui.’

¹⁰ Juju aents aina nuna dekatig pachimjukta,
dutikakum antukchamin, wainmakchamin emakta,
dutikamu asag wainmamainchau, antutnash antumainchau,

tuja anentainsash nunap tawa

tusa dekamainchau wajastinme,

nuninak pujutjinish yapajinmainchau atinme.

Nunidau asagmatai,

wishakam dita tudaujinak tsagkujashtatjai,

tawai tita”,

tujutmayi.

¹¹ Tusa tujutkui wi niina iniakun:

“Apuh, ¿tujash dusha wajupa tsawanta atata?”
tibaijai.

Tusa tai nii aijak:

“Yaakat aidaun tsainak

ashí aents aidau ijinawajam agkan wajastina duwi,
tuja jega aidanmash makichik aents pujaukesh atsutna duwi,
aja aidanmash atsutna duwi,

¹² tuja Tuke Pujuu aents aidan dita nugkenian
jiija tikich nugkanum ishiakmatai,
dita nugkega nunú aents atsau
agkan juwaktina nunú tsawantin nagkankatnai.

¹³ Tuja cien aents aidanmaya
diezkesh iwaku pujau akushkam ijina utsam agtatui.
Dutika ashí ijinawagmataish,
numi ajakam wajauti juwama numamtuk,
ujumchik Israel Apajuín umijin aidau juwakagtinaí.
Nuwiya aidau numi ajakbaitak,
wajauti ataktu jegama numamtuk wajakagtinaí”,
tujutmayi.

Emanuel pachisa agagbau

7

(7—12)

Isaías apu Acazan yama nagkamchak ujakbau

¹ Jotama uchiji, Ozíasa tijaji Acaz Judá aents aidan apuji wajas
Jerusalén pujai, Siria nugkan apuji Resín, Remalías aents uchiji Pécah Israel
aents aidan apuji aajakua nujai jimagtukag Jerusalégkan jetekajui,
depetka iinu emami tusag. Tujash depetkachajui.

² Dutika jeteagtai, Apu Acaz pujusa inamtaijin niina aentsji aidaujai
pujuttaman jegajuawag ujainak: “Sirianmaya aents aidan Israel aents
aidaujai jetepakagtatus ijunjaje”, tusa ujakajui. Nuna dekaa niina aentsji
aidaujai ishamak kujainak, numi dase umpuam saatama imanidau.

³ Imaniagtai Tuke Pujuu Isaíasan chichajak: “Amina uchijum Sear-
iasubjai weme apu Acaz igkugta. Duka Gihonnum yumi pukuni jiina
nuwiya japiki aimkatin aepá juki yaki yumi aimtainum nain iwakbauwa
nuwi ayaumas jáanch nijaku wetai jinta nagkaemakua nuwi igkugtatme.

⁴ “Nunika chichagkum:
“ ‘Kuitamamkata, tujash ishamkaipa;
apu Resín, apu Pécahjai shiig senchi kajenawai,
tujash ishamkaipa,
wagki ditak jii bukuituk wamak kajinama numamtin ainawai’, tita.

⁵ Tuja sirianmaya aents aidan, Efraín aents aidan
Remalíasan uchiji aatus amina
mantamatatus chichaman umigtamkagmae.
Nunik chichainak:

⁶ Judá aents aina duka uwaaka depetka utua
Tabeelan uchijiya nunú apu adaitukmi”, tuinawai.

⁷ Tujash Tuke Pujuu chichaak:
‘¡Duka makichkish nunikchattawai!

⁸⁻⁹ Wagki Sirian yaaktaji dekas
múunta duka Damaskui,
tuja Resínkai Damascon apuji;
tuja Efraín aents aina nuna yaaktaji
dekas múunta duka Samariayai,

tuja Remalíasan uchijiya nunuwai Samarian apuji.
 Tujash Efraín aents aidau ditash nugkentin aina nunak
 sesenta y cinco mijan jegai, depetkag
 nugke atankim nugkenchau juwakagtatui.
 Tuja atumshakam minai kajintsa
 anentaimkujum dekaskeapi tusajum,
 mina umigtachkugmek ijina utsam atatjume',
 tawai Apajui", tiuwai Isaiás.

¹⁰ Tuja nuigtushkam Tuke Pujuu Acazan chichajak:

¹¹ "Ame dutikatnujum wainchatai aidau iwaintugkata tusam Tuke Pujuu amina Apajuijum segata, tuja ame waji wakegame nunú nayaimpin-mayagkesh nuniachkumesh nugka initkeniagkesh segatta, tusa tujamui", tau.

¹² Tusa tama Acaz ayaak:

"Atsa make, wika Tuke Pujun nuna segaakun pegkegchaunum dekap-tanak dakitajai", tiuwai.

¹³ Tutai Isafas chichaak:

"Davitan patayi aidautijum antuktajum.
 ¿Aents atumin chichagtamu antugtsuk intimjakjum
 waitkajum duke nuniskek,
 Apajuiyaske waitkastasajum wakegajum?"

¹⁴ Nunin asagmin atumnak

Apajui nii dutikatnujin iwaintugmaktatui.
 Nunak: ¡Makichik nuwa muntsujut aentsu takashtai ejapjuktatui,
 nunik uchi aishmagkun uchigmaktatui,
 dutika uchigmakmatai, uchi daaji adaikattagme Emanuel!*

¹⁵ Nunú uchi muumpak ashí anentaimama nuniak
 baka muntsuji kantemtikamun dapa yumijiyai yutinaí.

¹⁶ Tujash nunú uchik eke jintiag anentaimtan juwatsaig,
 jimag nugka múun amina uwaktamaina nuna tsaikagtinaí.

¹⁷ "Tuja duwi pujus tikich tsawantin amina,
 nuigtu amina aentsjum aina nuna,
 ame wegantu aina nuna aatus
 Tuke Pujuu suwimak ishamainun awetugmattawai.
 Dutikantai yaunchuk Salomón apu pujusmatai,
 Israel aents aidau
 Judá wegantu aidaujai kanakajua duwi nagkamsaish,
 makichkish imanuk wainkachbau shiig ishamain atinaí.
 ¡Duka asirianmaya apu niina suntaji aidaujai
 waitkagmasagtina nunuwai!

¹⁸ Nunú tsawan jegatai, egiptunmaya suntag aidaun,
 kaapjai betek shiig kuashat,
 tuja nuigtu asirianmaya suntag aidaun dapa ishamain
 ijujatin aina imanun Tuke Pujuu ishitjamkatnaí.

¹⁹ Dutikam kaunak nugka ségaju aidaunum,
 uwejush aidaunum, kaya múun waa aidaunum,
 jagki tepaju aidaunum,
 tuja yumi baka umutai aina nuwi, aatus ashí piyaktinaí.

²⁰ Nunú tsawantin namak Eufratesa amainia

* **7:14** "Emanuel" tawa nunak: "Apajuk jutiyai awai" taku tawai.

navaja ikamka itamaina numamtuk,
 Apajuí asirianmaya aents aidaun apujin
 niina suntaji aidaujui ikaunmatnai.
 Dutikam Israel aents aidau intashin,
 susujin, uje aidaunash ashí kesajug utsankagtinaí.

21 “Nunú tsawantinig makichkiuch bakan,
 jimagchik uwigjai apujus pujayatak,
 22 shiig kuashat nuna muntsujin
 ijuja juwau asa, nuna kantemtika yutinaí.
 Tuja tikich aents maaniamunum uwemjau
 aidaushkam nunú baka muntsuji kantemtikamun,
 dapa yumijijai atsumkas yutin ainawai.
 23 Tuja mil uva ajakbaun akike
 mil plata aajakua duka ayatak jagki tsapaka
 ikam wajas asatnai.
 24 Nunú nugkanmak ashí jagki tsapaka akijua
 ikam wajasu asamtai,
 ayatak kuntin maatasa wekaetaí atatuí.
 25 Tuja nain tepetpetu aidaunum
 pegkeg takataí aajabia duka jagki wajastinaí,
 imanikmataí ishainak makichkish duka wechagtinaí.
 Ayatak uwig aidau, baka aidau yutai wajastinaí.”

8

Isaíasan uchiji akiinatín pachisa etsegkamu

1-2 Tuke Pujuu chichagtak: “Sacerdote Urías, Jeberequíasa uchiji Zacariasjai untsukta. Dutikam dita wainbaunum makichik numi dakakbau wegkajam jukim nuwi shiig pan wainmain: ‘Maher-salal-hasbaz’* tuu agagta” tujutiabi.

3 Tujutmataí nuna agajan pujusan tikich tsawantin mina duwajui uchi aishmagkun akiauwaitjai. Dutika ai Tuke Pujuu chichagtak: “Uchi daajig Maher-salal-hasbaz adaikattame. 4 Nunú uchik: ‘Apauch, awach’ tusagkesh eke chichatsaig, asirianmaya aidau yaakat Damasconak Samari-ajai mai tsaikagtinaí. Dutikawag dita wajiji aidaunak ashí yajutkagtin ainawai”, tujutmayi. 5 Nuna tujuti ataktu Tuke Pujuu chichagtak:

6 “Wika yumi aimkamu Siloé tutai chichigmachua nujai betek kakagchauchitag duwi juju aents Judá wegantu aina duka Siria apuji Rezánkam Israel aents aidaun apuji Pécahjajai ishainak, dita ayamjupaktinme tuidau asag mina dakitjuinawai”, tiuwai.

7 Nuadui ditanak Apajuí asirianmaya suntag aidaun ishitkattawai, dutikam namak Eufrates dujajak ashí utuja nugkan yumpuag eemak, nuwi ayaunak ashí utsauwama numamtuk ditanak utsagtatuí.

8 Imatikau asa Judá wegantu aidaunashkam

* 8:1-2 “Maher-salal-hasbaz” tawa juka hebreo chichamnumak, “Amujatkatnuk tsawantak ashí jegaé” taku tawai.

waji nujagketkuish, ashí utuja suwega iman iwaktinai.
 Imatikak águilajai betek nanapen ayapatug
 ashí dukuk uwemainchau awajsatnai.
 Tujash jutiyaig Apajuí pujawai.†

9 Ashí aents nugka muunnum
 atushat batsamin aidautigmesh antuktajum,
 atum maaniami tusajum uminkugmesh wainkajum nuniktatjume;
 tuja maaniami tusajum
 maanitai aidau umiakjumes
 ayatak sapigmaktatjume,
 nuniakjum ijinam atatjume.

10 Atum waji dutikatag tajume duka umiktajum;
 tujash nunak Apajuí emegkaktatui;
 tuja atum waji dutikatasajum
 wakegagme dushakam chicham umiktajum,
 dutikakjumes makichkish umikchattagme,
 wagki Apajuík jutijai pujawai.‡

Tuke Pujuuwai ishamainuk

11 Minak Tuke Pujuu niina uwejen senchi achijuk emetjua chichagtak:
 “Tikich Judá aents aidau takaina nuninuk amek takasaipa”, tusa tujutmayi.
 Nuna tujuti nuigtushkam chichagtak:

12 “Apajuín shiig umijin aina nunak pempeenkgatuki sujujatna nuninuk
 chichagmain ainatsui. Nuadui atum ishamkatnume tusa ishamainun
 chichaina duka makichkish ishamkaigpajum. 13 Dekas Tuke Pujuu
 ashí senchigtina nunuwai, shiig pegkejam asantai, ishamaku ajantusa
 diimaina duka. 14 Atumin shiig pujutan sujamna duka Apajuíyai. Tujash
 Israel aents aidauk Judá wegantu aidaujai nuna dakitjaje. Nunidau asag
 Apajuí suwimak susam Jerusalégnunia aidauk kaya múun tukumaina
 numamtuk tukumkag iyaidau nunú kaya tepegkam nantamainchau
 wajasag jiniagtinai. 15 Kuashat aents atum ainajum anuiya kayan tukumak
 iyajag jinuidau agtinai. Tuja kuashat achija yajubaushkam agtinai.”

Isaiás niina jintintaiji aidaun anemtikak ujakbau

16 Juju chicham Apajuínun wi etsejag nunú jintinkagtag nujai
 ashí agagjum shiig ijiajum uuka ukuktajum.
 Dutikajum tikich tsawantin jintinkagtuatatjume.

17 Tuke Pujuu Jacopan kajejuk uumjuku akuish,
 wika ima niyaig kajintsan aenatimjai,
 nuniakun ima niinak dakajai.

18 Mina daagnak, mina uchig aidaun
 Apajuí sujusbau aina nuna daaji aidaujai
 Tuke Pujuu ashí senchigtin muja Siógnum pujuuwa nunú
 Israel aents aidaun utugchatjin iwaintuktatus adaikamu ainaji.

19-20 Tuja atumin chichagtamainak:

“Ashí aents aidauk dita apajuímtaiji aidaun
 iniasag dekainawai.

Nuadui atumshakam aents jakau aina nuna wakani,

† 8:8 “Jutiyag Apajuí pujawai” tawa duka hebreo chichamnumak “Emanuel” taku tawai. ‡ 8:10
 Juka versículo 8num tawa nujai betekai.

tuja anentaimsa dekaji tinu aina
 nujai iniasjum dekaatajum,
 atakea duish waji utugchatak nagkaetamkiajat”, tusag tujabiagtatui.
 Tujash atumek nuninuk antugkaigpa,
 duka shiig wainkayai.
 Atumek dekas Apajuí iniasjum dekaatajum.

²¹ Tuja yumain atsutai,
 tikich nugkanum yujasag waituinak
 kajekag dita apujin, dita apajuimtaiji aidaujai
 pegkegchaun chichajiagtinaí,
 nuninak ataktu yaki pagkaidiag niibiagtinaí.

²² Untsu nugká niimkama, ayatak waitut, suwe,
 buutut, wake besemag ayaun wainkagtinaí,
 iman suwenum ditak pujusagtinaí.

9

¹ Tujash imanik waituinak wake besemag
 batsabiagtina duka tuke achatnai.

Agkan pujutan sukagtin akiina apu wajas inamjatin

Tuja Sabulógka nugkeg Neftalí nugkejai mai Galileanum aents Apajuín
 nemagchau aidau batsata nuna ijus awai. Nunú nugkak, namak Jordágka
 amain nagkamnas nayantsanum jegaa nagkanui. Tuja yaunchuk nunú
 aidaun Apajuí suwimkan susa ijinauwai. Tujash duwi batsamas ataktu
 Apajuí anenken wainkau ainawai.

Nunú nuniktinun Isaías pachis etsejak:

² “Aents aidau suwenum yujau agma nunú tsaaptinun wainkaje;
 tuja suwenum batsatunashkam tsaaptin etsantug iyanjae.

³ Apuh, aents aidauk kuashat uyugkaume,
 tuja shiig aneamushkam múun awajsaume.
 Nuadui ajak juwamunum shiig aneen aina numamtuk,
 amina emtimin shiig aneasagtin ainawai.
 Tuja wiakuch wajiin akantuninak
 shiig aneen aina numamtuk shiig aneasagtinaí.

⁴ Wagki aents aidau inaku waitkatai wajasag
 waitu batsamaya duka ame agkanmitkaume.
 Dutikakum Madián wegantu aidau tsaikuitam dutiksamek
 yamaishkam ijina utsagkam agkanmitkaume.

⁵ Tuja suntag aidau maaniatatus shimuinak
 botasjin wakugtin aajabia duka,
 jáanchji numpamkamu aidaujai jinum apeam utsankatnaitme.

⁶ Wagki iinak makichik uchi akiintugmae,
 Apajuí iinak makichik uchin amase.
 Nunú uchía nunuwai apu ati tusa etegkamua duka.
 Nuadui niina daaji aidauk:

‘Shiig chichagkagtin’,
 ‘Apajuí senchigtin’,
 ‘Apajuí tuke Pujuu’,
 ‘Agkan pujutan apuji’ tutai atinaí.

⁷ Nunú uchik apu David inamaajakua nuwi pujus

ashí nugkanum inamjatnai.
 Nuniau asamtai agkan pujuta duka tuke atinai.
 Tuja nii inabaujig shiig emetjamu atinai,
 nii inabaujinig shiig takamu, ajantunisa niiniamu atinai.
 Nunak Tuke Pujuu ashí senchigtina nunú
 ina anempau asa dutikatnai.”

11

David wegantunmaya apu wajas agkan pujutan sukagtustinai tibau

- ¹ David wegantuk numijai betek ajaka ajuamu atatu,
 tujash nuna wajautinia yamajam jeeka tsapaitnai.
² Nunikmatai Tuke Pujuu Wakani niyai pujus
 unuimatan, shiig anentaimitan, senchimetan,
 tuja Apajuin shiig wainu asamtai,
 puyatjus umigtan susatnai.
³ Nunú apuk aentsnak ayatak diisagkek
 suwimkanak susashtinai,
 tuja nuigtush ayatak chichaman antamuikik,
 nuni ati tusag chichamnak iwajachagtinai.
⁴ Aents kasagtai aidaú,
 ujudauch aidaújai waitkam batsata nuna ayamjuktinai,
 dutikak untsu aents magkagtin,
 pegkegchau aidaunak suwimkan susa ijinatnai.
⁵ Niig pegkeg takatan
 dekaskea nujai ayamjak maanitkatnai.
⁶ Tuja nunú tsawan jegamtaig,
 lobo uwigjai ijunag pujuagtinai;
 ikamyawa chivojai ijunag kanitnai,
 untsu baka leónjai ijunag wekagas tsakagtinai,
 tuja uchi aidaú nuna yutaijin ayujuinak yajuak awekaidiagtinai.
⁷ Tuja baka nuwa, chayú nuwajai shiig kumpaji agtinai,
 tuja uchiji aidaushkam nujai ijunag kajitnai,
 tuja leónshakam bueyejai ijunag chijichin yuwagtinai.
⁸ Tuja uchi piipich aidaushkam dapijai wasugkabiagtinai,
 dapí pasugken pujaunash inua achiagtinai.
⁹ Nunú tsawantinig Tuke Pujuu mujanum puja nuig
 pegkegchau awajkagtumainuk makichkish atsutnai,
 wagki yumi nayantsanum pima numamtuk,
 Tuke Pujuu imanjinak ashí nugkanum dekawagtin ainawai.

Israel aents aidaú pachisa kuashat agagbau

28

(28—35)

Yaakat Samaria tsainkattawai tusa etsekgamu

- ¹ ¡Chah, Samariayah,
 amina nugkemek pegkeg
 shiig tsapau wajasuitam duwi,
 Efraín aents nampen aina duka aminí ememainawai!
 Untsu atumi apujig yagkug pegkejuch aidaú
 kagaka megkagama numamtuk megkagainawai.
 Samarianmak ima aents nampen aina duke piyak awai.

² Makichik aents senchigtin
Tuke Pujuu etegkamu pujawai,
niina senchijig bicha kakegak ishamain wajama imanai,
tuja dase senchi dasentak magkagtina iman,
yumi senchi yutug, nujag pimak ijijatna imanai.
Iman asa samarianmaya aents
aidaunak makichkia shitamuik ajuattawai.

³ Dutikak Efraín wegantu nampen wajasu aidau,
yaakat Samaria pegkeg asamtai,
emema batsata nunak nii tsaika ajapatnai.

⁴ Dutikamtai nunú nugka pegkegnum
yagkug kagaku ayá duka,
higo tsamajun aents ajantutsuk akaka yuwa
amuwama numamtuk awajam agtatui.

⁵ Untsu nunú tsawantin aents niina umijin aidau
iwaku juwagtina nuna atsejutaiji, dekas pegkeg atina duka,
Tuke Pujuu ashí senchigtina nunuwai.

⁶ Tuja apu chichama epegkin aidaunashkam
Apajuí shiig takau emaktinai,
tuja suntag yaaktan kuitamin aidaunash wajiumitkaktinai.

Jerusalégnak tsaikagtatui tusa etsegkamu

⁷ Tuja profeta aidaushkam sacerdote aidaujai,
senchi vinon umuidau asag,
nampejag winchainainak tukumak iyá yujawai;
imanik nampedau asag,
Apajuí chichamenak antukchamin batsatui.

⁸ Nuadui dita mesajinig
ayatak tsumain iyakbau ayawai,
makichkish iyaka tsuwapachbauk atsawai.

⁹ Tuja mina chichagtuinak:
“¡Taata nunikam aminash Apajuísh
wajina iwaintugmake, nunú uchi piipich

¹⁰ papii augchau unuimagti
tusa a, ba, cha, da, jintinmaina numamtuk
jintinkagtuata!” tusa dushiktuinawai.

¹¹ Tuja atumek nampekjum
pegkegchau chichá batsatu asajum,
chicham antut dakitau asagmin,
aents tikich chichaman chichaaku aidau
amuktinme tusa Apajuí idaitamsattawai.

¹² Yaunchuk Apajuí chichagtamainak:
“Juwig utugchatak atsawai, juwi ayamainaitjume,
aents pimpikiuk ayamsati”, tusa tujabiuwai.
Tujash atumek tusa tujamaig antugkachuitjume.

¹³ Nuadui Tuke Pujuu atumnak
uchi piipich papii augtan unuimagti tusa
chichagmaina numamtuk chichagtamkattawai.
Uchi piipich yama wekagama numamtin atatjume,
nunun asajum tuntupmin iyagjum,
najaimakjum nantakchamin dekapatjume.

¹⁴ Atum datsantainchau aidau

Jerusalégnum apu wajasjum, inamak batsatu aidautijum
Tuke Pujuu tujama nunú antuktajum.

¹⁵ Atum chichaakjum:

“Ii aidautik jinau aidaujai chicham umikji”, tajume.
Tuja atumek asirianmaya suntag aidau ishamakjum
iwanchnum sujumankaugme, nii kuitamjamkati tusajum.
Nuniku asajum, chichakjum:

“Iinak makichkish mantamainchau ainawai,
wagki nunú iina shiwaaji aidaunak
tsanuja dushijattawai”, tajume.

¹⁶ Nuadui Tuke Pujuu chichaak:

“Siógnum makichik kaya etegkamu shiig pegkeg akikan apusattajai,
nunú atatui dekas ima eme anentsa diitai.

Nunú kayanum ekeni jegamnaktatui.
Nunú kayanum kajinas anentaimaidauk
shiig agkan batsamsagtinaí.

¹⁷ Nunú jegamku, tunin ai tusa
plomo nená diitia numamtin
atatui shiig takamua nunú.

“Atumek egyptunmaya aidau
ayamjutpaktatui tajume,
tujash ditanak asirianmaya suntag senchigtin aidau
namak dujajak tajaka ajapama numamtuk ijinawagtinaí.”

30

Egyptunmaya aents aidaun emematin aidau pachisa etsegkamu

¹ Tuke Pujuu chichaak:

“¡Chah, mina uchig intimkiu aina nunak,
wait anentuinajai, wijai chichatsuk,
wi inachmaitak dita wakegamun takasagtatus chichaman uminawai!
¡Nuninak aan kuashat tudaun utuatmamainawai!

² Tuja mina inintsuk Egipto nugka apuji
ayamjutpakti tusag pisajuinawai.

³ Tujash Egipto nugka apujig,
wi ayamjuktajime tiuwaitak,
ditanak ayamjukchattawai,
dutikam egyptunmaya aidaunum yunumka uwemjami tukama datsajagta-
tui.

⁴ Israel aents aidauwah,
Soán nugkanum yaakat ayá imanui,
tuja yaakat Hanés tutaya imanuishkam
aents atumin chichamjutpaktin aidau ishiaku akugmesh,

⁵ nunú nugkanmaya aidauk atumnak tsanupajagtatui,
ditak makichkish yaimpakchagtatui,
ayatak utugchatan itagtamawagmatai,
waitiakjum datsagtatjume”, tiuwai Apajuí.

⁶ Tuja Isaiás chichaak: “Juna Apajuí aatus tawai:
‘Israel aents aidauk egyptunmaya aents aidau
ayamjutpaktinme tusag dita wajiji aidaun,
dita burrojin, camellojin aatus patag yajuakag,

Néguev nugka ishamain, león aidau,
dapi aidau, dragón nanamtin aidau
aatus ayamunum shimuinawai,

⁷ tujash egiptunmaya aidauk
kakagmachu tikima wainkauch ainawai.
Nuadui dita daajinak:

“Kuntin múun shinakush wainak imatin”
tuu adaikauwaitjai’ tawai Apajuí”, tiuwai Isaías.

⁸ Tusa inagnakmatai Apajuí Isaíasan chichajak:
“Wi timag nunú yamai numi pakama najanamunum agagta,
atakea duwish wi tibauwa nuna tuke adeagtin atinme”, tiuwai.

⁹ Tusa tima Isaías chichaak:
“Israel aents aidauk intimkiu asag,
Tuke Pujuu chichame umiktin agagbauwa
nunú umitnak dakituinawai.

¹⁰ Nunidau asag Apajuí chichamen etsejin
profeta aidau chichajuinak:
“Yamai nagkamsagmek atum kajanum wainkamu aidauk etseju yujaigpa.
Tuja chicham pegkeg dekaskea dushakam ujabatkaigpa;
duka idaikujum dekas nugkaya waji pegkeg aidau ayá
nunú ujabatkatajum.

¹¹ Tuja jinta pegkegnum atum wegajum duka idaisatajum,
nuniakjum ataktu awagkigmek,
Israel aents aidau Apajuí pegkegma nunú
pachisjume aukagtusaigpa’, tuinawai.

¹² Nuadui Israelan Apajuí pegkegma nunú chichaak:
‘Atumek ujamash dakitagme,
nuniakjum ayatak pegkegchau, magkagtut,
waitjut aina nunú takatnum eme anenmamjume.

¹³ Nuadui atumek atumi tudaugmin
nugka peegmagbau pachiachbau yumpuna
iyauwama numamtin ainagme.

¹⁴ Tuja ichinak najanam ashí tsainak ajapnamtai,
jii kaijigkesh chimpia jumainchau,
tuja yumikesh shikimainchau wegama numamtuk,
Apajuí ditanak ashí tsaika emegkagtatui.’

¹⁵ Nuadui Tuke Pujuu Israel aents aidau Apajuí
pegkegma nunú chichaak:
‘Ataktu mina umigtuktajum,
nuniakjumin wi senchintikattajime.
Tuja dekas minai kajintsajum anentaimkugmek,
wainkajum chichá batsamtsuk takamtak batsamsatajum,
nuniakjum uwemjattagme’, tujamui.

Tujash atumek nunú dakitau asajum,

¹⁶ chichaakjum:
‘Atsa, dekas caballonum, ekemi pisajagmi’, tajume.
Kame takugmek pisagtajum.

Tuja nuigtushkam chichaakjum:
‘Carronum egkemja pisagmi’, tajume.
Kame takugmek nuniktajum,
tujash atumin aintamaidau ima senchi tupikainau
asag amaintamkagtatui.

17 Nuadui makichik aents awannaig,
 nuna ishamainak mil aents pisajagtatui.
 Tuja cinco aents awannakuig nunú ishamakjum,
 atumek ashí pisagtinaitjume.
 Nunikagmin ujumchik juwakag,
 makichik numi mujanum ajiamu wajama numamtuk,
 tuja mujanum numi ajiamunum bandera jikbau
 makichik wajama numamtuk juwaktatjume.

Apajuí Israel aents aidaun uwentijatin

18 “Untsu atum tsagkugnagtin tsawan jegamtaí, Tuke Pujuu atumin wait anenjamag atumi tudaugmin tsagkugtamjattawai. Apajuík niina anenken iwaintugmaktatus wakegawai, wagki niig pegkegchaunak dakitin asa, ima pegkeja nunak takauwai. ¡Nuadui Apajuíyai kajinas anentaimaidauk shiig aneasagtin ainawai!” tiuwai Isaiás.

31

Egiptunmaya suntag aidaun ayamjupakagtatui tinu aidaun pachisa ujakbau

1 Egipto nugkanmaya aidaun caballoji maanitai aidaun kuashat,
 tuja carrojishkam imanisag asagmatai,
 Israel aents aidauk dita yaimpaktinme tusag
 shimutuina nunak wait anentuinajai,
 wagki Israel aents aidaun ememattai
 Tuke Pujuu pegkegma nunú yaimpakti tusag,
 niina segamainun idayinak wainak yujau asagmatai.

2 Tujash Apajuík makichkish tsanushtayai,
 iman asa suwimkan sukagtinai,
 tuja nii dutikatjai tibaun yapajiang idaichauwai,
 betek uminai.

Apajuík aents pegkegchaun takau aidaun
 yayaunak suwimkan susa ijinatnai.

3 Egiptunmaya aidauk Apajuíchu ainawai,
 ditak aents ainawai;
 tuja caballoji aidaushkam iyashtin ainawai, wakankesh ainatsui.
 Tuke Pujuu ditanak suwimkan susattawai.
 Nuadui Israel aents aidauk ya ditan ayamjawa
 nujai betek suwimkan jukiag jinawagtatui.

4 Tuja Tuke Pujuu chichagtak tujutmae:
 “León uwijan maamtaí, uwijan kuitamin aidaun tuwakag,
 senchi untsumkag leónkan uwakatajtakush
 uwakmainchau ainawai.
 Numamtuk Tuke Pujuu ashí senchigtina nunú taattawai muja Siógnum
 niina aentsji aidaun ayamjuktatus.

5 Tuja chigki nanaak wekagas
 niina uchijin kuitamama numamtuk,
 Tuke Pujuu ashí senchigtina nunú
 Jerusalégnak kuitamak uwentikattawai,
 dutika ayamjuk agkanmitkattawai.”

6 Nuadui Israel aents aidauwah,
 atum tudau, chicham imtimkiu akugmesh,
 ataktu Apajuí umigkatatum.

7 Wagki atum aidautijum,
oro, plata aidaujai atum dakumka najanamu aidau
emematjum nunú idaisagminig,

8 asirianmaya aents aidauk ijina utsam agtatui,
tujash nunak aents aidauk ijinashatui,
ayatak maaniamun ishamainak pisajagtatui,
tuja datsauch maanitan yacha aidaush
wainka inaku waitkatai wajasagtatui.

9 Tuja dita apujig nuna ishamak tupikaki jiinkittawai,
tuja suntaja apuji aidaushkam banderajinak ukuinak pisajagtatui.
Tuja junashkam Apajuí chichaak:
“Niina shiwaaji aidaun suwimak susatnujig
Jerusalégnunum umikbau awai”, tawai.

32

Makichik aents apu wajas pegkegnun inamjatin

1 Makichik aents apu atinai
pegkegnak inamjatin,
tuja nuna atuwe aidaushkam
shiig takasagtin ainawai.

2 Aents aidauk shiwag jeteamash,
tuja utugchatnum jegainakush,
tuja pegkegchau takainak waitkainamash,
nunú apu aidau shiig takaidau asagmatai,
ditai yunumak ayamjumaktin ainawai.

3 Nuadui Israel aents aidauk
wainmachu wainmamaina numamtuk
Apajuínak pan wainkagtinai.
Nuninak Apajuí chichamesh wajintua
nuna puyatjus antuktatus wakeyagtinai.

4 Nuadui waugtutsuk emamkemas takasagtatui,
nununak dekaskea nuna shiig antumainun chichagtatui.

5 Aents pegkegchau, tsanumin aina duka
eme anentsa diyam achagtinai.

6 Wagki aents pegkegchauwa duka
ima pegkegchaunak chichawai;
tuja niina anentainish ayatak pegkegchau takatnak anentaimui;
nuniak magkagtuta nuna wekaetawai,
tuja Apajuínash tsanumjuinak pegkegchaun
chichajuinawai;

nunidau asag aents nujantai waitiaunash,
tuja kitakai waitiaunashkam ajampenatsui.
7 Aents waitjin aina nuna ayamjumataijig ishamainai;
tuja pegkegchau takastinun niina anentain umiawai;
Nunin asag ujudauch aidau chichamjumak,
ayamjumamainchaunak tsanumjug,
apunum sujuk waitkainawai.

8 Untsu aents pegkeg aidauk tikichnash yaigtatus wakenai,
nuadui niina pegkeginig shiig anentam atinai.

Jerusalégnunumia nuwa aidau chichagkamu

9 Atum nuwa daki batsamtin

puyatmamchau aidautijum,
wi titatjim nunú antuktajum.

¹⁰ Atumek yamaik puyatmamtsugme,
tujash kuashat tsawan atsuk, yumain atsakui,
tuja uva juuka yumainkesh atsakui,
makichik mijan nuigtu ewaekajum waitiakjum kujaittagme.

¹¹ Nuwa aidautijum puyatmamtsuk
shiig aneasa batsatufigmek puyatakjum kujaitajum;
tuja atum pachimakas pujautigmek sapigmakjum kujaitajum.
Nuniakjum jáanch pegkeg
nugkuagjum duka awika ukuakjum,
wake besemag pujaku nugkutai nugkugtajum.

¹² Atumdau trigo ajakbau, uva ajakbau aidaujai
shiig kuashat pegkeg ayá
duka imankek achattawai.
Nuadui wake besemag dekapeakjum
detsepem ijutajum.

¹³ Mina nugkag múunta nuwig jagki aidau
ashí tsapak akijuattawai,
tuja jega pegkejuch aidau yaaktanum ayá nuwi batsamsajum,
shiig anee batsatum duka ashí tsaikam megkaejattawai.

¹⁴ Tuja apu pujusa inamtaijishkam ukukim
itajak juwaktatui;
yaakat muunchakam ukukim agkan juwaktatui.
Tuja kumpin jiikbau aidaushkam,
yaakat tentea peejamu aidaush, ashí ukukim agkan juwagtatui.
Nunikmatai ikamia burro aidau,
baka aidau nuwi batsamsagtinaí.

¹⁵ Tujash Apajuí ashí waji aidaun
najankauwa nuna senchiji ataktu tajutjamattawai,
nuniak uwegshunak nugka pegkeg
ajak ajakmamain awajsattawai,
untsu nugka pegkeja duka yaunchuk aajakua
nuna nagkaesau shiig pegkeg wajastatui.

¹⁶ Nunikmatai juju nugka múunta juwig
ashí yantamnum pegkeja duke takamu atatui.

¹⁷ Tuja pegkeg takamua nunuwai atakesh maanitsuk agkan,
kajinmamsa pujutan sukagta duka.

¹⁸ Nuadui mina aentsug aidauk waitkascham
agkan dita jeen puyatkas shiig batsamsagtinaí.

¹⁹ Bicha kakegak ikaman ijinau akuish,
tuja yaakat tsaikbau akuish,

²⁰ atumek yumi ayaunum ajakmajum,
nunú yuwakjum pujustinaítjume,
tuja burro aidaush, baka aidaush
chijichi ayaun yuwinak agkan batsatkui,
shiig aneasjum pujustinaítjume!

¹ Wait anentagme aminak,
wagki amek tikich nugkanmaya aidau
tsainaitkum tsaikchamuitme,
nuigtush amek tikich nugkanmaya aidau
tsanuwaitkum tsanugchamuitme.
Nuadui amujatut idaisa pujamin,
aminashkam tikich nugkanmaya aidau tsaipakagtinaí,
tuja tsanujatut idaisa pujamin,
tikich nugkanmaya aidau tsanupajagtinaí.

² Tuke Pujuuwah,
niimpap yaimpaktatua tusa
aminig anentaimaidautik wait anenkagtugta.
Nuniakum tuké kashikmasam yaijatta,
tuja ishamainnum jegamunmash ame uwentikagtugta.

³ Amina chichamjumin antukag ishamainak,
tikich aents aidauk pisainawai,
tuja yaakat muunnumia aidauk
amina senchijum iwainamun wainainak,
ishamkag pampagkag megkagainawai.

⁴ Nuniagtai dita shiwaaji aidau
manchijai betek yumpuntuk utsantuawag,
dita wajiji aidaunak ashí yajutuínawai.

⁵ Tuke Pujuuwai dekas múuntak,
niig nayaimpinum pujawai;
Jerusalégnunia aidaunak pegkejan takainak,
esegag pujustinme tiuwai.

⁶ Nuadui shiig pujustinme tusa tuké kuitamtinaí.
Unuimata duka dekata nujai uwemtan sukagtau asa,
waji pegkeg aidaun nagkaesauwai.
Tuke Pujuu puyatjusa umigbauwa nunuawai
waji pegkeg akik aina nuna nagkaesau.

⁷ ¡Suntag wajiú aidau tikich yaimpaktinme tusag,
jintá yujas unsumainawai,
tuja agkan pujutan chichaman etsejin
aidaushkam kajekag buutuínawai!

⁸ Jinta aidauk bashiake,
makichkish jintanmak yujainatsui,
tuja jutijai chichaman umikajua nunash uminatsui;
nuadui ajantunisa niniamush atsawai.

⁹ Israel aents aidaun nugkega duka ajak aidau tsapaachu asamtai,
wake besemag wajas awai.

Libano aidaush datsaamainak jajatuk jinawai;
tuja nugka paka Sarón tutaya dushakam
yaunchkek pegkeg ajak shiig tsapaya nunak
yamai uwegshujai betek wajase.

Tuja Basán nugka, muja Carmelo tutaya nujai
nugka pegkeg numi dukentin ayau asa,
pegkeg samekbau wajas ayá duka duke kakekamtai,
wentsamtuk ijunui.

¹⁰ Nuadui Tuke Pujuu chichaak:
“Wi yamai nantagkitjai;
nuniakun ashí mina senchijun iwainaktajai.

11 Tuja atum chicham umiamua duka
dupa kagakujai betek,
nuigtush tsuwatjai betek ainawai.
Nunin asamtai wi umpuamua nunú
nunak jiijai betek ekemak ajapattajai.

12 Nuadui aents aidauk jagki tsupigbau akaam
keegama numamtuk keeka yuku wajasagtatui.

13 “Atushat pujautigmek,
wi dutikauwaitag nunú dekatajum,
tuja tikiju pujautigmeshkam, mina senchijua nunú dekaskeapi titajum.”

14 Aents pegkegchau aidau Jerusalégnum
batsata duka sapijin kujainawai,
tuja aents Apajuín umigchau aina dushakam sapigmainawai.
Nuninak: “¿Ii ainag nuwiyash yaki jii kajinchau
tuke kee auwa ibaunmash pujusainta?”

15 Aents pegkejan takau, dekaskenum chichau,
tuja tikichin atanki yajutuk wiakchameuchu,
tuja akikam yaimchau,
magkagtuata tusa tamash dakitin,
nuigtush pegkegchaunak makichkish anentaimtuchu,

16 nunú aentsuk waitkascham agkan pujustinaí.
Niina jeeg utumainchau kaya jegamkamu atinaí.
Tuja nii yuwatnujish uwagtinjish ashí ajitnai.

17 Tuja ataktu wainkatnaitme
apu niina imanjin etsantug tsaptin wajas eketu.
Niig atushat tikich nugka aidaunmash inamjatnai.

18 Ame yaunchuk sapigmayum nunú anentaimtusa chichaakum:
“Apu kuichkiji atin akikmakbau aidaun dekapainak,
akikmaktajum tusa
waitkagmayanum dusha ¿tuwi batsatua?
¿Tuwi batsatua ajak juukbau aidaun
dekapau aajabia dusha?

Iina uchiji aidaun suntagmagatnume tusa
achija yajutjamianum dusha ¿tuwi batsatua?” titinaitjume.

19 Aents pegkegchau tikich chichaman antumainchaun
pachimtakan chichaaku aidaujai ijunjajum
pujajum duka yamaik nunikchattagme.

20 Jerusalégnum jega Apajuí emematku ijuntainum
ijunja jiiistamnuweg nunú anentaimtusam diista;
Jerusalégkak aak shiig aakmagbau yumpumainchau
numi ajigbaush kupimainchau, tuja
daekai jigkakbaush tsujimainchawama iman atinaí.

21 Nuwi Tuke Pujuu niina imanjjai iina wantintugmawai.
Jerusalégnumak namak múun chichijam aidau ayawai.
Namak iman agtaish, shiwag aidauk
dita lanchaji wiyanka wekaetai aina duikish,
tuja lanchaji múun aina duikish kakajus utuachgtinaí.

22 Wagki Tuke Pujuuwai iina ayamjutpa duka,
tuja ii umiktinnak nii chichaman sukagtawai.
Niyai iina apujig, iina uwemtjiamin.

²³ Nunú lanchanum numi ajiamu aidau jigkakbauwa duka daekak takatkae, nuniku asamtai jáanch detuamua duka pukugak iyaumain wajawai. Nunitai wemainchau dekapenakui, lanchajin utsaantua wajiji aidau yajutkagtatji, dutikajin aents shutuu ai aidauwaske dita wajiji aidaunak yajuakagtatui.

²⁴ Tuja Judá wegantu aidaun tudaujinak Apajuí tsagkujatnai, nuadui makichik aentskesh: “Jajai”, tusa tauk atsutnai.

35

Israel aents aidau Jerusalégnum waketjamu

¹ Uwejush ajak ajakmamainchau buku wajas awa duka nugka pegkeg wajastatui, nunik ajak aidau tsapatai, uwegshuk aents shiig aneemaina numamtuk shiig aneestatui.

² Nunik ajak aidau kuashat tsapakmatai, uwegshuk shiig aneas senchi kantamtatui.

Tuke Pujuuwa nunú uwegshunak, Líbano nugka, Carmelo nugka, Sarón nugka pegkeg aina iman awajsattawai. Dutikamtai ashí aents aidauk iina Apajuíji imanjiya nuna niina senchijijai wainkagtinai.

³ Atum mina chichameg antautigmek, Judá wegantu kakaakchau aina nunú ichichiagtajum, dutikakjum pimpikiu aidaushkam yaigtajum.

⁴ Tuja sapig aidau chichagkujum: “¡Ishamkagtutsuk, aishmag wajastajum! ¡Amina Apajuíjum juwi pujawai uwemtijamjagtatus, tuja iina shiwaaji aina nunak nii suwimkan susattawai!” titajum.

⁵ Dutikamtai aents wainmachu aidau wainmakagtinai, tuja empeku aidaushkam chichaman antukagtinai;

⁶ tuja aents shutuu aidaush japajai betek tsekeniagtatui, nuninai chichachu aidaushkam chichainak shiig aneasag unsumiagtinai. Nuninai uwegshunmashkam shiig kuashat yumi pukuni jiiniagtinai.

⁷ Imanidau asamtai, uwegshuk yumi wajas asattawai, tuja nugka bukunmashkam kuashat yumi pukuni jiiniagtatui. Tuja lobo batsamtai aina nuwig tagkan kajis aidaujai tsapaktatui.

⁸ Nuwi atinai makichik jinta. Nuna daajig: “Jinta pegkejam” tutai atinai. Aents pegkeechu aidauk nunú jintanmak wechagtin ainawai; tuja aents anentainkachu aidauk nunú jintanmak yujaschagtin ainawai.

⁹ Nuwig leónkak atsutnai,
 tuja tikich kuntin yukagtin aidaukesh
 nunak makichkish adjkachagtinai.
 Tuja Tuke Pujuu uwemtikjamu aidauk nunú jinta nuni waketjagtinai.
¹⁰ Tuke Pujuu uwemtikjamu aidauk shiig aneas kantamkiag
 Jerusalén utsanawagtinai.
 Nunikag tuké shiig aneasag batsamsagtinai.
 Ditaig ima shiig aneamua duke atinai.
 Nuadui wake besemjak atsutnai,
 tuja najaimamushkam atsutnai.

40

Apajuí Jerusalégnunia aidaun anentain ichichtau

¹ Iina Apajuí chichaak:
 “Shiwag aidau achipag dita nugken yajupakagmatai batsamsagmesh,
 jmina aentsug aina nuna anentai ichichtugtin atajum!
² Jerusalégnunia aents aidauk shiig anentsajum ausatajum,
 tuja achija yajuakam yujasag waituina nunú
 ayamsagtinuk tsawantak jegae”, titajum.
 Dita tudaujig tsagkugnaje.
 Dita pegkegchau takasbaujin nagkaesau
 Tuke Pujuu suwimken jukiag waituinak umikaje.

³ Makichik aents uwegshunum untsamak:
 “¡Tuke Pujuu wekaesatin jinta uwegshunum
 shiig iwaja jintamajum, tunin aidau
 dakuegjum umiktajum!

⁴ Nugka ségaju aina duka
 yutuka aimjajum paka awajsatajum,
 tuja muja tsakakunum
 nuna wakeen entsa ayá dushakam
 yutukjum makichkish wagaku atsau paka awajsatajum.

⁵ Dutika umikagmin
 Tuke Pujuu niina imanjin iwainaktinai,
 nuna ashí aents aidau ijunag wainkagtinai,
 tawai Tuke Pujuu”, tusa Isaiás tiuwai.

⁶ Nuna tusa nuigtushkam Isaiás chichaak:
 “Makichik aents chichagtak:
 ‘¡Untsumkata!’ tujutkui, wi ayaakun:
 ‘¿Wajintu untsumkattaja?’ tai, nii chichagtak:
 ‘Ashí aents aidauk dupajai betek,
 tuja yagkug ikamia níme wainak
 pegkegchiamanunin ainawai.

⁷ Tuja Tuke Pujuu dase awemamu dasentak
 tukua tukuam dupa kagaka ijuname,
 tuja yagkugshakam kagaka kakegame.
 Numamtuk aentsuk dupajai betek ainawai.

⁸ Dupag kagaka jininai,
 tuja yagkugshakam kagaka kakenai.
 Tujash Apajuí chichameg makichkish
 megkaekashtinun tuke auwai’.

9 “Jerusalégnunia aidauwah,
 muja titijin wakatajum,
 nunikjum nuwi ijuntsajum senchi untsumkatajum,
 aents ashí nugkanmaya aidaun antuktinme.
 Jerusalégnunia aidauwah,
 chicham etsegtak ishankagtutsuk
 senchi untsumkajum etsegtakajum,
 ashí Judá nugkanmaya yaakta aidaush
 yamajam chichaman antuktinme.
 Senchi untsumkajum:

‘Iina Apajujiya duka jujuwai’, tusa titajum.

10 Apu Tuke Pujuu niina senchijjai minawai,
 nuniak nii ima senchigtin asa, ashí depetmak minawai.
 Nunik minak niina aentsji aidaun waitkam batsatun yajuak inimui.

11 Uwija kuitamnuijai betek
 niina aentsji aidaun kuitamak inimui.
 Uwig tsakat aidaunak pagkuk juki inimak,
 yama petsakbau aidaunak shiig puyatjus juki minawai.”

Israel aents aidaun Apajuin nagkaesauk tikichik makichkish atsawai

12 “Apajuik nayantsanak makichik uwejenig
 achika dekapamainai.

Tuja nayaimpinashkam tsajam uwejinig
 ashí achika dekapamainai.

Nugkaash wajupa kijinkita nuna shiig dekauk Apajuíyai.

Apajuí dekawai muja aidaush
 wajupa kijinuk ainawa nunak.

13 Tuke Pujuu chichagnuk makichkish atsawai.

Apajuin jintinmainuk shiig atsawai.

14 Apajuin jintintua unuinajuk makichkish atsawai.

Tuja pegkeg takat aina nuna takasti tusa Apajuin jintintushkam atsawai.
 Niig ashí yachai.

Ashí waji ayá dusha wajuk najaneakukita
 nuna pachis Apajuin jintinmainuk atsawai.

Niig ashí dekawai, wagki nii najankau asa.

Apajuí yacha ati tusa jintintua unuinajuk atsawai.

15 Nugka múun aina duka nii diismak
 makichik yumi dakitamua nujai betek,
 nugka yukukuntunmaya
 makichik nenentuch piipich juki,
 balanzanum dekapam kijinji atsumaina numamtinai.

Nugka múun aidaun nayantsan ijus ayá dushakam
 makichik kayam piipichia nunin ainawai.

16 Ikam múun Líbano tutaya nuwiya kuntin
 ashí yajuaka Apajuí emematku apeatin ijumjamash,

Apajuí diismak piipichi, tuja kuntin maa apeatin
 nunú ikamnumia numi ashí yajuaka ijumjamash
 Apajuí diismak piipichi.

17 Ashí aents maki makichik chichamtin
 nugka muunnum batsamin aina dushakam
 Apajuí emtinig shiig wainkauch ainawai.

Nii diismak atsaujai betek ainawai.

¹⁸ Atumek Apajuik makichkish tikichjai apatagmek diimaitugme.
Dakumka najanamu aina dukesh
Apajuujai betek amainuk makichkish atsawai.

¹⁹ Aents dakumak najanna nunú dakumak najanui,
dutikantai tikich aents patakumtai aidaun najanin
orojai ukatuk umiawai,
dutika cadenan platayai najatui.

²⁰ Tuja ujunauch aidaunu aents dakumak najanna duka
numi katsujam wamak mamumainchaun diisa najanui.
Dutika nunú iyaag tsainkai tusa
tikich aentsun ame juju chichiag asatin
najatuata tusa inawai.

²¹ “¿Atumek duka dekachuk ayujum?
¿Nuna pachisag chichaidauk antuchuk ainajum?
¿Yama nagkamchakush ujakaku ainatsuak?
Apajuí nugkan najanauwa duwi nagkamas
aents aidauk dekau amain ainawai.

²² Apajuí pujusa inamtaijiya duka nayaimpi yakin awai.
Nuwi pujus aents aidaunak manchia nuninush diyawai.
Tuja nayaimpinak Apajuí carpajai betek eja,
nuna nugkaan aents aidau batsamsatnume tiuawai.

²³ Apajuik aents senchigtin aidaunak
tikima wainkauch emawai,
tuja nugkaya apu aidaunashkam ijina emegkawai.

²⁴ Nuadui ditak ajak yama ajakmamu
kagkape yama achimag wegama nujai betek ainawai.
Tuja Apajuí dasen dasenmitkataik pimpika jinawai,
tuja dase ishamain iyakug
chijichi tsupigbau kagakujai betek umpui utsawai.

²⁵ Tuja Apajuí pegkegma nunú chichaak:
‘Atumek minak makichkish tikichjai
apatukjumeck diigmaitugme.
Wijai betekak makichkish tikichik atsawai’, tawai.

²⁶ Yaki pagkaijum diistajum:
¿Juju ayá nunash ya najanauwaita?
Yaya aidaun, nantu, etsa,
nuigtu tikich aidau ayá nuna najanak,
maki makichik akanag pekasua nunú
nigki nuna daaji aidaunash adaitug umikui.
Niig senchigtina ibau asa,
makichkikesh najantsuk ampija ukukbaujig atsawai.

²⁷ Jacopa uchiji Israel aents aidauwah,
¿wagka atumesh wainkagmesh chichagme?
¿Wagka wainkagmesh:
Tuke Pujuuk wi waitiag nunak dekatsui;
tuja Apajuik minak pachittsui, tajume?

²⁸ Apajuí Tuke Pjuu,
ashí nugkan, nayaimpijai najanauwa duka
makichkish yawechu, nuigtush pimpichu,

dekatisch amuechauwa duka ¿amek dekatsmek,
atsa nuniachkumesh amek antuchukum?

²⁹ Apajuíyai aents pimpikiunash senchimtika
wajiu emauwa duka,
tuja aents kakakchaunash senchijin ikauntinai.

³⁰ Datsauch aidaush pimpikiag kakaumainchau dekapenawai,
tuja aents senchigtin aidaush nugka tukumak iyainawai.

³¹ Tujash ima Tuke Pujuuwaig kajinas anentaimaina duka
yamajam senchin jukiagtin ainawai.

Águilajai betek nanaakagtin ainawai,
wekaekush yawegchagtin ainawai,
makichkish yaweakchau shiig tupikaidiagtinai.”

41

Israel aents aidaunak wi agkanmitkatnaitjai tusa Apajuí tibaw

¹ Apajuí chichaak:

“Yaakat múun nayantsanum ijus ayá nuwi
batsamin aidaütijum takamtak pujusjum antugtuktajum.
Tuja nugka muunnum batsamin aidaütigmesh
ishamkagtutsuk kaunatajum.

Nunikagmin atumesh shiijash batsatjum nunú ijunja dekaami.
Nunika atumesh wajukatagmeki
nunú chicham umikmi.

² Etsa minitaiya nuwiya apu
tuke depetma nunash ¿ya dutiknaita?

Anú apu tikich nugkanmaya aidaun depetuk
ijinatnume tusan umiaunuk witjai.

Nuadui nunú apu suntaji aidau, puyagjai,
nagkijai aatus shaa dekeaja tsaitiama numamtuk
tsakag ijinatnume,

dutikawag hijichi kagakun dase umpui dapampaak
utsauwama numamtuk emegkagtinme tusan idaijai.
Dutikakun dita apuji aidaushkam suntaji amutam
sapijin ditai yununjatnume tusan idaijai.

³ Shiwaajin pataetakush ishamain atsaunum,
agkan shiig wamak nanaakas shimatai tumain
shimitnume tusash ¿ya dutiknaita?

⁴ Witjai nuna dutikaunuk.

Yama nagkamchakun nugkan nayaimpijai
najanawaitag duwi nagkamsan,
yaunchuk waji nagkaemajua nunak,
tuja yamai nagkaema nunashkam,
wi dutiknaitjai.

Witjai Tuke Pujuu dekas Apajuínuk.

⁵ Wi dutikamunak yaakat nayantsanum
ijus batsamin aidauk wainin ainawai.

Nuna wainainak senchi sapigmainawai.

Nugkashkam ashí yantamnum uujui.

Aents tikich nugkanmaya aidau ijunjagtatus
ashí kaunawag mininawai.

⁶ “Maki makichik aents dakumak najanin aidauk

niina kumpajinak ima niinakek idaitsui,
yayawai dutikak anentain ichichtawai.

⁷ Dakumak najanin aina duka patakumtain,
nugkutain orojai najanin aina nuna chichajuinak:
'Pegkeg najanme, idaitsuk takasta', tuinawai.
Tuja martillowai takau aidauk,
jiju awatug ikag najanin aidaun chichajuinak:
'Achija umikum duka pegkejai', tuinawai.
Nuna tusag dakumka najanamu iyajai tusag
clavowai achiawag ukuinawai."

⁸ Apajuí chichaak:

"Jacob wegantu Israel aents aidauwah, antuktajum:
Atumek mina inakeg, wi etejamu ainagme.
Atumek mina kumpag Abraham aajakua
nunú wegantu ainagme.

⁹ Tuja tikich nugkanum achija yajuakam
atushat batsatutigmin wi agkanmitkauwaitjime,
dutkan mina takagtustajum tusan chichagkun:
'Atumek mina inakeg ainagme', tiuwaitjime.
Wi atumnak etegkauwaitjime,
nuadui atumnak dakitjankesh idaisachjime.

¹⁰ Ishamkagtukaigpa, wi atumjaig pujajai.
Ishamkagtukaigpa, witjai atumi Apajuíjinuk.
Wi atumnak senchintikajime,
wi atumnak yayajime,
mina uweg senchigtin depetmauwa duwi
ayamjukan kuitamjime.

¹¹ "Amina kajegtamin aidaunak, wi inatsaktinaitjai.
Dutika ai ememamujinak kajimatkiagtinai.
Atumjai maanidaushkam ashí ijinawajam megkaejattawai.

¹² Nunik megkaejamtai, wainkatasajum
egakjumesch wainkashtinaitjume,
wagki amejai maaniatag tinu aidauk
ashí amukam megkaejatnai.

¹³ Tujash aminak wi achiajkame.
Wi atumin chichagkun: 'Ishamkagtukaigpa,
wi atumnak yayajime' tiuwaitjime", tawai Apajuí.

¹⁴ Tuja Apajuí ataktu awagki chichaak:
"Jacob wegantu Israel aents aidautigmek,
piipich kakakchau ainakjumesch,
ishamkagtukaigpa, wi atumnak yayajime.
Witjai Israel aents aidau Apajuíji pegkegmanuk,
wi atumnak agkanmitkauwaitjime.

¹⁵ Antuktajum nijah: Atum ainajum anuiyan,
makichik trigo akatain yamagman,
nain batsatkan najanattajai.
Dutikamtai nujai muja aidau tsaikam
yukukuntu awajsattagme.
Tuja nain aina dushakam tsaiaktajume,

dutikawagmin chijichi kagaku tuwasua weaku atatui.

16 Nunú yakí takui nagkimjumin, dase umpui utsagtinai.
 Tuja trigo akagbau, dukee utsankam
 wampuji juwakun dase shiig senchi dasentak
 utsauwama numamtuk,
 atumi shiwaajum aidaun dapampaak utsagtatui.
 Dutikamtai Israel aents aidaun Apajuji
 pegkegma nuwi shiig aneamam pujuttame,
 nuniakum ima niyaig eme anenmamtatme.

17 “Aents ujudauch kuichkigtinchau,
 wajigtuchu wekagas yumi egá egakua
 wainkacha kitamak umumain atsumaj,
 suweuchijin jujuk wekaetatui.
 Tujash wi niinak yaigtinaitjai,
 witjai Tuke Pujuu Israel aents aidau Apajujiinuk,
 nuadui ditanak kajimatkinuk idaisashutinaitjai.

18 Muja uwegshunum entsa ayau awajsatnaitjai,
 tuja nugka ségaju paka aidaunmashkam
 yumi pukuni kuashat jiiniagtinaí.
 Nuadui yumi kuashat ayau asamtai,
 dupa shiig tsapak aama iman uwegshunak emaktatjai.

19 Uwegshunmak setug aidaun,
 numi acacia aidaun, arrayan aidaun,
 nuigtu olivo aidaun tsapapitkatnaitjai;
 untsu nugka bukunum, numi pino aidaun,
 abeto aidaun, nuigtu cipre aidaun tsapapitkatnaitjai.

20 Nuna ashí aents aidau wainkatnume,
 nuninak puyatjus unuimagtinme,
 wi Tuke Pujuun mina senchigjai dutikag nuna.
 Witjai Israel aents aidaun Apajuji pegkegmanuk,
 wi nunak najanauwaitjai”, tiuwai.

Apajuí tikich apajuímtai aidaun atsaneamu

21 Jacob wegantu Israel aents aidaun Apajuji chichaak:
 “Apajuímtai dakumka najanamu aidautijum kaunajum,
 chichamjumaktajum, nuniakjum atumi takatjum ayamjuktajum.

22 Kaunatajum,
 nunikjum atakea duwi atin etsegkatajum,
 dutikakjum yaunchuk waji nagkaemajua nunú
 shiig uajatkatajum, iish shiig antukagmi
 atakea duish wajig nagkaemagtinaita nunú,
 tuja dusha dekas uminkatpash nunú diismi.

23 Atakea duish waji nagkaemagtatua nunú tukagtatajum.
 Atum dekas Apajuyaitkugmek nunú iwainaktajum.
 ¡Atum dutikmain pegkeg aidau,
 tuja pegkegchaukesh,
 nuniachkush ishamain iina uwaktamain
 aidaukesh iwainaktajum!

24 ¡Atumek shiig wainkauch ainagme,
 nuadui makichkish iwainamaitugme!
 ¡Atumin kajintsa anentaimauwa duka
 pegkegchau shiig wainkayai!

25 “Makichik aentsun etsa minitaiya nuwiyán jiiikjai, dutikan niina daajin untsuka ai nujinmanini minawai. Nunú aentsua nunú tikich apu aidaunak tsakus najamaina numamtuk najaktatui, tuja ichinka najanin duwen nawen najama numamtuk najak ukuktatui.

26 Junak emtikan eke nagkaematsaig wi ashí ujajime. Dakumka najanamu apajuímtai aina duka wi etsejag nunak, wi taatsaigkik yaunchkek makichkish etsegchau ainawai; Dita chichamuk makichkish antugchatayai.

27 Junak makichkish etsegchatain wi Jerusalégnumia aidaun ujakuitjai. Tuja aents achija yajuakbau tikich nugkanum batsata duka, dukap atsuk waketjattawai tusa etsegkatnun wi makichik aentsun akatjan Jerusalén awemajai.

28 Ashí diyajai, tujash makichik apajuímtai dakumka najanamukesh wantintsui; chichaman etsegmainkesh makichkish wantintsui. Tuja wi ditan iniasagmag nuna aigmainkesh makichkish wantintsui.

29 ¡Ditak shiig wainak ainawai!
Dita dutikmainuk makichkish atsawai.
Ditak dakumka najanamu waa ainawai.”

42

Tuke Pujuun inake

1 “Jujuwai mina inakeg. Wi niinak achiakjai, wi niinak etegkauwaitjai, niini shiig aneajai, niyai mina Wakanjun apusajai; Nii aents ashí nugkanmaya aidaun pujut pegkejan susatnai.

2 Niig senchi jiiikag untsunchatnai, chichaakush senchi jiiikag chichashtinai, jintá wekagas senchi untsamak chichamujish antuekashtinai.

3 Tagkan kupinak aunash tsujigkag ajapashtinai, tuja lamparin ekemakbau shiig keeshtaish ikagnakchatnai. Niig dekag pegkeg pujutan itaatnai.

4 Tuja ashí nugkanum pujut pegkeg ati tau asa, nii takamujinak makichkish ayamsashtinai, tuja pimpikigkesh idaisashtinai. Tuja nugka múun nayantsa ijus ayá nuwi aents batsamin aidauk, nii jintiamun antuktatus niina dakagtinai, tawai Apajuí”, tiuwai Isaiás.

5 Tuke Pujuu Apajuí nayaimpin najanauwa nunú, tuja nugkanashkam najana, nunú nugkanum tsapau aidaunashkam najankauwa nunú, tuja iwaku pujutan mayattanashkam aents aidaun susauwa nunú niina inaken chichajak:

6 “Witjai Tuke Pujuu Apajuínuk, tikichik atsawai, wi aminak mina takagtusti, nuniak

uwemtikagtugti tusan etegkeawaitjame,
 wi aminak kuitamkatnaitjame,
 dutikakun achiaku atatjame,
 wagki wi chichaman ditajai umikuitag nuna umiakun,
 mina aentsug aidaun amasjai.

Ame tsaaptin asam,
 aents aidau yajuakam minai ikaunmatnaitme.

⁷ Aents wainmachu aidau wainmitkakta,
 tuja aents achikbau aidau suwenum chimpija dushakam
 jiijam agkanmitkata, tusan wakegajai.

⁸ Wika Tuke Pujuuwaitjai, nunuwai mina daajuk!
 Mina emematjaku kantamtai aina duka
 tikichik makichkish kantamjuawaigpa,
 tuja aents emematjutmaina nunú idaikumek,
 dakumka najanamu aina duka makichkish emematipa.

⁹ Wi yaunchuk etsegkauwaitag nunú
 uminka nunú atumesh anentaimsa diistajum,
 yamai etsegkattajai yaunchkesh antukchamu yamajam aidaun.
 Nunú eke wantintsaig, atumnak dekamtikajime”,
 tiuwai Apajuí.

Tuke Pujuu uwemtikagtugbau anentaimtusa kantamtai

¹⁰ Yamajam kantamtai Tuke Pujuu kantamjuatajum.

Ashí nugka najatamunum batsamin aidautigmesh
 Apajuí emematkujum kantamatajum,
 lanchanum nayants yujau aidaush,
 kuntin nayantsanum batsamin aidaush,
 tuja nugka múun nayantsa ijus ayá nuwi
 batsamin aidaush Apajuín ememattinme.

¹¹ Uwegshunum yaaktamak batsamin aidaush,
 tuja Quedar wegantu aidaujai batsamin aidaushkam shiig aneastinme.
 Yaakat Selá batsamin aidaushkam shiig aneasag
 dakunkut Apajuín kantamjuatnume;
 tuja aents mujanum batsamin aidaushkam
 depetmaka shiig aneaku unsumaina imattinme.

¹² Tuke Pujuu imanjiya nunak ima niinak idaitustinme,
 tuja nugka muunnum nayantsa ijus batsamin
 aina dushakam Apajuín emematak kantamjuatnume.

¹³ Tuke Pujuu, múun, senchigtin asa, maanitan yacha,
 shiwaaji aidaun kajujuk,
 suntag maaniamunum unsumajama imati unsumak jiiintuki,
 shiwaaji aidaunak ijinattawai.

¹⁴ Apu Mesías chichaak:
 “Kuashat tsawantai chichatsuk pujujai,
 makichik chichamnakesh tutsuk,
 tuja nuigtush kajetsuk pujujai.
 Tujash yamaik nuwa uchin uchigmak,
 buutak mayatama imanittajai.

¹⁵ Muja aina nunak nain aina nujai tsaiaktatjai,
 tuja numi aidau, ajak aidau ayá nunashkam ashí ijinattajai.
 Tuja entsa ayá nunak ukuyuan buku awajsattajai.

Dutikakun kucha aidaunashkam ukuyan buku awajsattajai.

16 Wainmachu aidaunak jinta dita wainajakchamunum emattajai.

Tuja suwenum yuja nunak tsaaptin etittajai.

Tuja jintanum kaya pujutjin weaja

nunashkam utsagkan pegkeg awajtstatjai.

Wi taja nunak umitskek idaisashtatjai,

tuké dutikattajai.

17 Tuja wainka apajuímtai dakumka najanamu aidaun

dekaskeapi tinu aina duka

dita apajuímtajii aidaun chichajuinak:

‘Atumetjume jutii apajuíji aidautigmek’, tuinawai.

Nuna tinu aina duka datsagkag jiiñag

megkaejagtinai”, tiuwai Apajuí.

Israel aents aidau Apajuí chichamen antuinakush umikchagbau

18 Antuchu aidauwah, antuktajum,

wainmachu aidauwah, niimi wainmaktajum.

19 Wi mina takagtustinme tusan,

atumin etegkau asan aents aidau chicham ujaktajum tusan

ishiakbau ainayatkujum aents antuchu,

wainmachu aina nujai betek ainajum,

nuninuk tikichik makichkish atsuinawai.

Atumin wi mina takagtustinme tusan

etegkamu aidautigum chicham antuchu,

wainmachujai betek ainajum annuk tikima tikichik

makichkish atsawai.

20 Wi atumin yayaakun kuashat dutikawaitag

duka atumek wainkauwaitjume,

tujash umigtukchau ainagme.

Atumek chichamak antagme,

tujash wi tajim duka makichkish nunap tawa tusagmek dekatsjume.

21 Tuke Pujuuk uwemtikagtina ibau asa,

pegkeg wakemain aina nuna

aents aidaun jintintuatjai tusa wakejukui.

22 Tujash juju aents aina nunak,

dita shiwaaji aidau kasajainak waitkainawai.

Dutikainak achijag waanum,

nuigtu aents achika chimpitainum chimpiauwag batsamtawai.

Dutikawag dita wajiji aidaunak ashí yajutuinaawai.

Ditan ayamjumainuk makichkish atsawai.

Tuja dita patayi aidaunash achika jukiag,

akikmakui awagtukmi tusag emegkatuinaawai.

Tujash ditan ayamjuk awakmainuk atsawai.

23 Tujash atum ainajum anuiyag

makichkish nunak puyatjusagkesh diinatsui.

Nunidau asag atakea duish wajukatnukita tusa

dekatatus wakegauk makichkish atsawai.

24 Jacob wegantu Israel aents aina nuna

shiwag aidau utsaantuawag kasajuinak waitkaina nunash,

ya dutikati tima dutikainawa duka

atumek shiig degagme.

¿Tuke Pujuuchukait nuna dutikau?

Israel aents aidauk Apajuín pegkegchau takamjusu ainawai,
 nuninak, Apajuísh ditanash wajuk pujustinme
 tiyamkiyi nunash umikchau ainawai,
 núnidau asag nii jintintuawa nuna umitnash dakitajui.
²⁵ Nuadui atumnak kajegtamak suwimkan amasmatai,
 maaniamunum ijipau ainawai.
 Tujash imaanika waitiakjumes, makichkish unuimatsjume.

43

Ima Tuke Pjuuke uwentikagtinuk

- ¹ Jacob wegantu Israel aents aidauwah,
 Tuke Pjuu atumin najapauwa nunú chichagtamak:
 “Ishamkagtukaigpa,
 witjai atumin agkanmitkaunuk,
 wi atumnak daagmin adaisan midau atinme tusan
 etegkauwaitjime, nuadui atumek midau ainagme.
² Yumi piyajunum nagkaemakminish, wi kuitamkattagme,
 tuja namak aidau katitkuminish, jakejai tusan kuitamkattagme;
 tuja jii kegamunum nagkaemakmesh esashtinaitme,
 jii kegak nimpauash dekapjashtinaitme.
³ Witjai Tuke Pjuu, amina Apajuíginuk,
 witjai amina uwemtiknununuk,
 witjai Israel aents aidau Apajuíji pegkegmanuk.
 Wi Egipto nugkan, Etiopía nugkan, Sabá nugkan aatsan sujakun
 atumnak sumakuitjime.*
⁴ Atum iwaku batsamsamnujum tusa tabaunum
 tikich aidau jinawajui.
 Atum jinumainun yapajian dekas dita jinatnume tiuwaitjai.
 Wi nunak dutikauwaitjai,
 wagki atumin wait anentau asan,
 atumek dekas waji pegkeg akikama iman ainagme.
 Wika atumnak aneajime.
⁵ Ishamkagtukaigpa, wi atumjaig pujajai.
 Amina aentsjum aidau etsa minitaiya nuni,
 tuja etsa akaetaiya nuni batsata nuna
 ijumjatasan yajuakan ikaunmattajai.
⁶ Tuja aents nujinum batsamin aidau chichagkun:
 ‘Awakjatajum’, titatjai.
 Tuja tsumunum batsamin aidau chichagkun:
 ‘Makichkish emetuawaigpa’, titatjai.
 ‘Mina uchig aidau, mina nawantug aidaujai,
 atushat nugka nagkatkamunum batstush
 awakjatajum.
⁷ Tuja uchi apaji daajin naamama numamtuk
 mina aentsug asag, mina daajun jukiú aina nunak
 mina daag ememattai atinun najanauwaitjai;
 nuadui makichkish emettsuk awakjatajum.’

* **43:3** “Wi atumnak Egipto nugkan, Etiopía nugkan, Sabá nugkan aatsan sujakun sumakuitjime” tawa nunak “juju nugka aidau nuna Israel aents aidau waitka batsatu asamtai, Apajuí dita shiwaajin sujua idayak Israel aents aidau ayamjuk agkanmitkauwa” nuna taku tawai.

8 “Mina aentsug aidau jiintin ainayatak wainmachujai betek aina nunú, tuja kuishtinaitak antuchu aina nunú dita nugken ashí awakjatajum.

9 Ashí aents aidautijum makichik ijunbaunmak ijunjatajum. Nunikjum tujuttajum atum ainajum anuiyash çyaita atakea duwi atinun pachis, tuja yaunchuk nagkaemajua nunash betek etsegnush? Nunin ataik juwi itantinme, dutikam nunú etsegtai antukag dekaskeapi titinme.”

10 Apajuí chichaak:
 “Atumek mina chichamjun etsegtugkatnume tusa etegkamu ainagme, wi atumnak etegkauwaitjime, minai kajintsa anentaimkugmek, dekas wi Tuke Pujuuwaitag nunú dekajuattagme. Initaikia duwish tikich apajuí mina nagkaetasuk atsujakui, tuja atakea duwish, duka makichkish atsutnai.

11 Ima wikitjai Tuke Pujunuk; tikichik uwemtikagtumainuk atsawai.”

12 Tuke Pujuu chichaak:
 “Wi atumin ujaakun, uwemtijatnaitjime tusan tiuwaitjim nunak, betek uwemtijauwaitjime; tuja wainka apajuímtai aina duka atumnak uwemtijamjachajui, duka atumek shiig degagme.

13 Witjai yaunchuk nagkamsan Apajuínuk, tuja atakea duwish wiki atinaitjai Apajuínuk. Makichkish mina suwimkajun uwemtumainuk atsawai. Tuja wi dutikamua nuna emegkaumainush makichkish atsawai.”

14 Tuke Pujuu pegkejam, Israel aents aidaun agkanmitkauwa nunú aatus tawai:
 “Atumin ayamjakun suntag aidaun Babilonia nugkanum ishiaktatjai, dutika ai dita yaaktaji waitiji aidaunak tsaikagatui. Dutikawagmatai, caldeo aents aidau shiig aneas batsataina nunak wake besemag juwakagatui.

15 Witjai Tuke Pujuu, Israel aents aidaun najanaunuk. Witjai atumi Apajuíjum pegkegmanuk.”

16 Nayants kuna ishamainnum nuna ejapeen Apajuí ukuya buku awajus ikankauwai. Aatus niina aentsji aidaun ikatiajui.

17 Tuja Egipto nugkanmaya suntag maanitan yacha aidau caballo aidaujui, carro aidaujui Israel aents aidaun pataetukajui, tujash nayantsanum tepeawag makichkish jiinkishtinun megkaejabi; tuja lamparin ekemakbau kajinak megkagama numamtuk megkaejabi.

18 Apajuí niina aentsji aidaun yamai chichajak:
 “Waji nagkaemakiuwa duka pachikaigpa, tuja anentaimtutkesh anentaimtusaigpa.

19 Wi iwainaktatjai yamagman,
nunú ame yamaikiuchia duik wainkattame.
Uwegshunum jintan jintamattajai,
tuja nugka pegkegchau ajak tsapachua nunashkam
entsa ayau awajsattajai.

20 Kuntin ikamia kajen lobo aidau,
avestruz aidau aatus shiig anenjusatginai,
wagki wi yumi pukuni jiinun uwegshunum kuashat jiiju asantai.
Tuja nugka ajak tsapachunum
entsa aidaun kuashat najankattajai,
mina aentsug, wi etegkauwaitag nuna, uwajagtinun.

21 Nunú aents aidaunak wi najankauwaitjai,
mina emematjitnume tusan.

22 “Tujash Israel aents
Jacob wegantu aidautigmek
mina umigtutak kajimatki idaisaugme.

23 Tuja uwig aidaush anenjauchik sujatsjume,
kuntin maa nuna neje ashí apeakjumes emematjatsjume.
Wika atumnak anentag sujatajum
tusa segaaknuk waitkatsjime, tuja kugkuin incienso
apeatajum tusankesh segaaknuk waitkatsjime.

24 Mina anentag sujustinuk pagat kugkuin aina
duka sumagtukchabiugme,
kuntin aidau wiyajigkesh apeakjume minak emematjishbaijume.
Ayatak pujusjum pegkegchau takamugmin dii diin yawetjajai,
nunú pegkegchaugmia nuna diitan tsuwaagjai.

25 Tujash wi amina Apajuíjum asan,
ame magkagtutaijum aidaunak esakattagme,
dutkan atakea duish adeagchatnun kajimatkin idaisattajai.

26 Ame mina utugchatug dekagtakmek
yamai tujutta, chichasmi.
Pai, ame waji titag tame nunú tita,
nunú tiyamin amesh dekas shiig imagnismesh
pujam nunú dekaami.

27 Atumi apachjum aajakua nunú,
tikich amina chichaman jintinjabianum
nujai mai pegkegchaun takainak
mina umigtukchau ainawai.

28 Tuja amina apujum aajaku aidau
jega mina emematjaku ijuntain shiig kuitamkachu ainawai.
Nuadui Jacob wegantu Israel aents aidaunak ijinatnume,
dutikawag dushiki batsamtin atinme
tusan idaisauwaitjai”, tawai Apajuí.

44

Israel aents aidauk Apajuínu ainawai

1 Tuke Pujuu chichaak:

“Jacob wegantu Israel aents aidautigmin
wi mina takagtustinme tusan etegkauwaitjim,
nunú aidautijum yamai shiig antuktajum.

² Witjai Tuke Pujuu, atumin najanaunuk,
atumek eke akiintsugminig najanauwaitjime.
Wi atumnak yayajime.

Amek Jesurún* Jacob wegantu, mina inakeg
wi etegkamuitme, nuadui ishamkagtukaipa.

³ Uwegshunmak yumi kuashat ayau awajsattajai,
tuja nugka buku aina nuwishkam entsa kuashat aittawai.
Ame wegantu aidaunak mina Wakanjun susagtinaitjai,
dutikakun kuashat pegkegnun yaigtinaitjai.

⁴ Nuadui chijichi yumi ukattai asa,
pegkejan muumpama iman,
tuja álamo namaka tugkitken tsapaka aiyama
iman atinaitjime.

⁵ Nuwiya makichik chichaak:
'Wika Tuke Pujuunuitjai', tumamtinai.

Tuja tikichik:

'Jacob wegantu', naamkatnai.

Untsu tikichik niina uwejen:

'Wika Apajuínuitjai' tuu agatmamjatnai.

Tuja nuigtu ikak agak, niina apachji daajin
'Israel' agagtinai."

⁶ Tuke Pujuu, Israel aents aidaun apuji, Israel aents aidaun uwemtikin,

Tuke Pujuu ashí senchigtina nunú chichaak:

"Witjai nagkamtinish tuke pujuunuk,
tuja atakea duish tuke pujutnaitjai.

Tikich Apajuí mina nagkaetasuk atsawai.

⁷ ¿Yaita wijai betek amainush?

Iman akug juwi wajanta tujutti.

Tuja mina aentsug agtinun etegkauwaitag
duwi nagkamsan atakea duwi

nagkaemagtinnash etsegnunuk witjai,

tuja wikitjai atakea duish wajig nagkaemagtinaita
nuna betek etsegnunuk.

⁸ ¡Makichkish ishamkagtukaigpa!

Yaunchuk nagkamsan emtikan junak ujakuitjime.

Duka atumek shiig dekagme,

tikich Apajuik wijai betekak makichkish atsawai.

Tikich Apajuí atumin kuitamjamainuk atsawai.

Wika tikich Apajuínak waintsujai.

Dakumka najanamun aidaunak Apajuí dakitau

⁹ "Dakumak najanin aina duka pegkejak ainatsui. Tuja dakumka najanamun aidaun dita shiig anentuina dushakam pegkegchau ainawai. Tuja dakumka najanamun emematuina duka anentainchau wainmachujai betek ainawai, nuadui ditak datsagkag wainak juwakagtatui. ¹⁰ Tuja dita emematiagtinun jiju ukuiyag najanin aina duka shiig pegkegchauwai.

¹¹ Dakumka najanamun emematin aidauk datsaajagtinai, wagki dakumak najanin aina duka aents wainkauch ainawai. Ashí dita aidauk Apajuí emtin dita utugchatjin dekagmamawag datsaajagtinai, nuninak sapigmakagtinai.

* 44:2 Chicham "Jesurún" tawa duka diista Dt. 32.15.

12 “Diistajum jiju najanin wajuk takawa nunú: Jinum jiya inimpag, martillowai dekegka tsaika niina senchijin takawai. Nuadui nuna puyatjak yujumkan yutsuk, umutnash umutsuk pujujus pimpiki takamainchau dekapewai.

13 “Tuja numi taumi dakumak najanin aina dushakam anentaimtusa diisagmi: Niig reglayai dekapawai, tuja lápisai, compásai aatus dakumui. Dutika formónkai tai aentsun dakumak najana jega Apajuí emematku jiuwainum awaya apujui.

14 “Tuja tikichik setjun ajainawai, dutikamun yumi yutak uchupiam muumpawai, nuadui niinu setug ajaka takamain aittawai. Nuniachkush numi ciprén, roblejai wakegainakug ikam ajawag shiig kuitamainawai kampuagti tusa. 15 Nunú kampuaju aidaun ajakag kanawen tsupig yajumainawai jin ikapag anamawagtinun, untsu tikichnak pag injuatnun juwinawai. Dutikainak wainka apajuímtain dakumak najanatnunashkam juwinawai, dutika najanawag emematuinawai.

16 “Tuja numi jimaituk ampinjaun jukiag nuna ikapajag, nuwi kuntu nejen pegka injuawag shiig yuwawag senchi tutuinawai. Nunikag nunú jinum ayaumas anamak pujus chichaak: ‘¡Yajautsui jii ijusa pujusa anabauk!’ tuinawai. 17 Nuwiya numi ampinjaun jukiag wainka apajuímtain dakumak najanainawai, dutikawag nuna emematak tikishmatug pujus segaak: ‘¡Ametme iina apajuíjimek, jutiish uwemtikagtuga!’ tuinawai.

18 “Nunú aentsuk makichkish dekatsui, tuja antutnash antatsui, wainmachujai betekai, unuimatish atsau, shiig anentainkachui. 19 Ekeemsagkesh anentaimainatsui, jintiaja shiig anentaimat atsujuinawai, nuadui ditak: ‘Jimaituk numin apeamjai, dutikan nuna kaijin pagkan injuamjai, tuja nuigtu neje pegka injauun yuwamjai, tuja nunú ampinjauwai juna pegkegchaun tsumainun dutikamjai, ¡wika numi tsupikbaun emematu wekaejai!’ tumamainchau ainawai. 20 Duka dekaskenun yuku yumaina numamtainai. Duka wainka tsanuam nuni wekaemainai. Nunú aents aina duka pujutjinak uwemtijashnt ainawai. Dita takuinaka duka shiig pegkegchauwai. Nunin ataish ditak: ‘Juka pegkegchauwapi’ tusa dekamainchau ainawai”, tiuwai Isaías.

Tuke Pujuu Israel aents aidaun wait anentug uwemtijamu

21 “Israel aents Jacob wegantu aidauwah, mina inakeg ainajum nunú adeagtajum; atumek mina inakeg ainagme, atumek mina inakeg wi najanam ainagme, nuadui ¡minak kajimatjuki idaitusaigpajum!

22 Amina pegkegchaujum aidaunak yujagkim kakegak mekgagama numamtuk emegkatkagme. Ataktu wakitkim mina umigtukta, wi aminak agkanmitkauwaitjame” tawai Apajuí.

23 ¡Nayaimpih, ameshkam Tuke Pujuu dutika nunú anentaimtusam shiig aneakum senchi kantamata! Nugka initken batsatutigmesh senchi untsumkujum aents wajukmaina imattajum. Muja aidautigmesh, ikam aidautigmesh, ashí numi aidaujai shiig aneakjum aents wajukmaina imatkujum senchi untsumtajum.

Tuke Pujuu Israel aents Jacob wegantu aina nuna ayamjuk agkanmitkak niina senchijin iwainake.

²⁴ Tuke Pujuu amina uwentjiamin, ame eke akiintsuminig najapauwa nunú chichaak: “Witjai Tuke Pujuu, ashí waji aina nuna najankaunuk, wi nayaimpinak nugkajai najanauwaitjai, mina yainkauk makichkish atsawai.

²⁵ Tuja waita etsejin aina nunú etsegbau betek uminkati tusanuk wika wakegatsjai, anentaimsa dekamji tinu aina nunak anentainchau emajai. Aents yacha aina nuna dekatjinak yapagtuan shiig wainak dekachu emajai.

²⁶ Untsu mina inakeg aidau chichaman etsejuina duka betek uminkati tusan yayajai, tuja aents wi awemamu aidau chichaman umina dushakam imanisag betek uminkati tajai.

Tuja Jerusalégnumak ataktu yaaktamak batsamsagtina. Tuja Judá wegantu aidaun yaaktaji aajaku aina dushakam ataktu awagki yaaktamkamu atatui. Yaakat tsaikbau aidaun ataktu jegamjatnume tusan, jega jegamin aidaun wi inagtatjai.

²⁷ Tuja nayants kuyua buku wajasti, nunikmatai tikich namak aidaushkam buku waigti tusan tumainnuuk witjai.

²⁸ Wi apu Ciron chichagkun: ‘Ametme mina uwig aidau kuitamnumek, amek wi wakegamua duke ashí takastatme’ tajai.

Tuja Jerusalégkan chichagkun:

‘Amek ataktu yaaktamamu atatme’ titatjai.

Untsu jega Apajuí emematku ijuntai jegamkamun chichagkun:

‘Amina ataktu jegamjamkatnun,

jega jegamin aidaun awemattajai’ tawai Apajuí”,

tusa Isaías tiuwai.

45

Ciro takastinun Apajuí takatan susau

¹ Tuke Pujuu Ciron apu adayak, aents tikich nugka múun aidaunum apu senchigtin batsata nuna depetuk, maanitaiji aidaunak atanjati tusa yayaak, egkesa awekajakui.

Tuja yaakat peeja apakbau aina nunash tujintsuk utua shiwag aidaun ijinati tawai.

Nuadui Apajuí niina chichajak:

² “Ame weamunmak wi emkan wetatjai, tuja muja aidaunak yumpuajan paka emaktatjai, waiti jiju bronce najanamu aina nunak tsaiktatjai, tuja jiju hierro waiti batsatkamua nunashkam tsaiktatjai.

³ Tuja waji pegkeg aidau makichkish wainmainchau uukbau awa nuna, wi amastatjai.

Nunú wainkam, Tuke Pujuu Israel aents aidau

Apajufjinuk ima wikipag nunú dekattame.
Wi aminak untsukmajame.

⁴ Israel aents Jacob wegantu aidau,
mina inakeg aina nunú aneamunum,
amek minak dekaqtsuminig wi aminak etegkamjame,
dutikan apu emamjame tikich apu aina nuna
nagkaesau ati tusan, nuadui aents aidaush
ame tabaun antugtamtakatui.

⁵ Witjai Tuke Pujuunuk,
tikich mina nagkaetasuk atsawai,
amek minak dekaqtsuminig wi aminak
kuitamtattajame depetmakti tusan.

⁶ Ashí tikich nugkanum batsamin aidaush
tikich Apajuí mina nagkaetasuk atsa nuna
dekaatnume tau asan nunak dutikattajai.
Witjai Tuke Pujuunuk, tikich mina
nagkaetasuk makichkish atsawai.

⁷ Witjai tsaaptinun suwejai najanaunuk,
tsawan pegkeg atinnash,
tsawan pegkegchau atinnashkam,
ashí nunak wi dutikajai.”

Apajuí ashí senchigtin

⁸ “Ashí nugkanmaya aidauk
ima pegkeg takat aina nunak takagtatui,
duka Tuke Pujuu jegashik nayaimpinmayan
akakea numamtuk atatui.
Aatus aents aidau pegkejan takainak uwemtan jukiagtinai.”

⁹ Pinig duwe juki najanamua duka,
aentsjai betekak, niina najanauwa nuna chichagkug:
“Amek najantak dekatsme” tusag jiyanimaitsui,
tuja tsakusai pegkejan dakumak najannunak: “¿Waji takame?” tusag
tsakusak iniatsui.

¹⁰ Tuja uchi yama akiinauwa duka
niina apajinak dukujijaig: “¿Wagka minash akiintuabiugme?”
tusag jiyamaitisui.

¹¹ Apajuí pegkejam, Tuke Pujuu, Israel aents aidau
najanauwa nunú chichaak:
“Atumek minak makichkish inatmain ainatsjume,
mina aentsug aidaunash wisha itugkatnaitja
nuna ujatkatui tusagmek wakemaitisugme,
tuja wi dutikamujua dushakam jutik dutikata
tusagmek jintinjumain ainatsjume.

¹² Wi nugkanak najanan,
nuwi aents aidau batsasuitjai,
tuja nayaimpinash múun agkajun najanan,
nuwi agkajunum etsanjatin aidau najankauwaitjai.

¹³ Wi apu Cironak etegkajai,
dutikau asan wi niinak Jerusalén mina yaaktajua nuna
ataktu jegamag yaaktamtati tusan yaigtatjai.
Nuadui Israel aents aidau achija yajuakam
Babilonia nugkanum batsata nuna jiiigtatui,
dutika jiiija agkanmitkakush, akikmaktajum tusag

makichkish kuichkinak segashtatui”,
tusa Tuke Pujuu ashí senchigtina nunú juna aatus tawai.

14 Tuke Pujuu Israel aents aidaun chichajak:

“Egiptunmaya aents ajakan ajakbau,
tuja etiopianmaya aents waji sujin aidaun,
Sabá aents esajam aina dushakam,
ashí ditak ima atum tabaunak umigtabiagtatui.
Ditak atumi wainka inaku waitkatai agtatui.

Imanik waituinak atumi emtin tikishmag pujusag
chichainak:

‘Dekas Apajuik ima atumjaig pujawai,
tikich Apajuik makichkish atsawai.’

15 Amek dekas wainmainchauwaitme,
tuja ametme Israel aents aidaun ayamjukam uwentiknumek.

16 Wainka apajuimtai aidaun dakumak najanin aina duka datsagkag
wainak juwakagtatui.

17 Tuja Israel aents aina nunak
Tuke Pujuu tuke batsamsatnun uwemtijatnai.
Nuadui ditak wainka inaku waitkatai,
dushiktaig achagtinai.”

18 Tuke Pujuu Apajuí nayaimpin, nugkan najana,
juwi aents aidaun batsamsatnume tusa
umikua nunú chichaak:

“Witjai Tuke Pujunuk, tikichik makichkish atsawai.

19 Wika aents aidaun antachbaunum suwenum uumka
pujusnuk chichatsjai.

Tuja Israel aents aidaun susashtinaitkunuk,
segattajum amastajime tusanuk anagkuatsjai.
Wika Apajuí dekasken pegkejan chichauwaitjai.”

Wainka apajuimtai aidaun atsaneak Tuke Pujuu chichakbau

20 “Ashí nugkanum batsatutijum
juwi kaunajum ijunajum, antuktajum.
Atumek anentainkachu ainajume, wainka
apajuimtai numi dakumka najanamu makichkish
atumin uwemtijamainchau emematjume.

21 Tuja wainka apajuimtai dakumka najanamu
emematjum dusha pegkejash aniajum nunú
pempeentunikjum ininistajum.
¿Yaita juju waji aidaun nagkaemagtinun pachis emtika etsegkaush?
Makichik aentskesh juju waji nagkaemaina nuna pachis etsegkauk at-
sawai.

Witjai Tuke Pujuu juju waji nagkaemaina juniktinun yaunchuk emtikan
etsegkaunuk.

Tikich Apajuí mina nagkaetasuk makichkish atsawai.
Apajuí pegkejam uwentikagtinuk tikichik atsawai.

22 “Tikich nugkanum atushat batsatutigmesh
minai minitajum, wi uwemtan amastajime,
witjai Apajuínuk tikich mina nagkaetasuk atsawai.

23 Wika dekas umiktinjun tumamjai,

mina shiwag aina nunak ijinatnaitjai,
 duka dekas imanisag uminkatnai.
 Tuja mina emtijui aents aidauk
 tikishmag batsamsag emematjuinak:
 ‘Dekas ametme jutii Apajuujimek’, tujutiagtin ainawai.
²⁴ Tusa chichainak:
 ‘Pegkeg takata duka ima Tuke Pujuuwaig awai,
 tuja ima nigki senchigtinuk’ tujutiagtinai.
 Aents mina chichamjun umitan dakitujaku aina duka
 datsagkag wainak juwakagtinai.
²⁵ Ashí Israel aents aidauk wi yayamu asag,
 minak umigtuinak ima pegkeg takata nunak takagtinai”,
 tawai Tuke Pujuu, tiuwai Isaías.

46

Babilonianmaya aidaun apajuímtaiji aina nujai diismak Apajuí ima senchigtinai

¹ Isaías chichaak:

“Babilonianmaya aidaun apajuímtaiji Bel, Nebo,
 aina duka winchainag, nugka iyainawai.
 Tuja babilonianmaya aidauk,
 kuntin waji pataja jutai aidaunum dita
 apajuímtaiji aidaun patajag yajumainak,
 kijin asantai kuntinjin waitkainawai.

² Nunik kijimainak nugka tukumak iyaak
 ajuajam ayamjumamainchau asag tsainak ajapnainawai.
 Nunin asagmatai tikich nugkanum yajumainawai”, tiuwai.

³ Tuja Apajuí chichaak:

“Jacob wegantu, Israel aents iwaku batsatutijum antuktajum:
 Wi atumnak eke akiintsugminig uchi pagkusa
 kuitamaina numamtuk kuitamkauwaitjime.

⁴ Tuja atum múuntuch wajasjum jempejuja pujakjuminish,
 wi atumin najadau asan, yamai kuitamjim dutuksanuk kuitamkan
 uwemtijatnaitjime.

⁵ “Wijai betek tikichik makichkish atsawai.

Witjai tikich aina nuna nagkaesaunuk.

⁶ Tuja awai aents kuashat oron, platan ikaunbau.

Dutika ikaunamtai aents wainka apajuímtain
 dakumak najanin najanamtai,
 emematmi tusag nunú aentsun egainawai.

⁷ Tuja nuna najanamtai, yanaki jukiag
 tuwi pujustatua nuwi ejegan apujuinawai,
 dutika apujkim makichkish buchittsuk pujawai.
 Nunik pujaun yaimpakti tusag,
 senchi untsukag segamash makichkish ayatsui,
 tuja waituinak nii ayamjupakti tusa segamash
 makichkish ayamjumaitsui.

⁸ Pegkegchaun takau aidauwah,
 juju adeagtajum, nuniakjum shiig anentaimjatajum,

⁹ yaunchuk waji aidau nagkaemajua nunú adeagtajum,

witjai Apajuínuk tikichik atsawai;
 witjai Apajuínuk, tikich wijai betekak makichkish atsawai.

¹⁰ Tuja tsawan nagkanbaush wajuk atinaita nunak
 wika yaunchuk nagkamsan dekaikai,
 tuja atakea duish

waji nagkaemagtinaita nunashkam etsegjai.
 Wi wajina dutikatag tusanua wakegaja nunak
 wika imatiksasuk uminaitjai.

¹¹ Makichik aentsun tikich nugkanmayan
 etsa minitaiya nuwiyen untukumajai,
 duka tuke chuwigjai betek atushtanmaya minittawai,
 nigka wi tabaun umiktatui.

Tuja wi nuna dutikatin atajai tusan tiuwaitag nunak
 nii imatiksag umiktatui.
 Wi dutikatnujun chichaman umikuitag nunak tuke umiktatjai.
 Nunak dekas uminkatnun tajai.

¹² Chichaman antakchau, intimkiu aidautijum
 anentaimsajum, iik wamak agkanmagashtin
 ainaji tusajum tautijum, wi tajim nunú antuktajum.

¹³ Wi atumnak wamak agkanmitkattajime,
 nunak shiig wamak dutikattajai.

Tuja Jerusalégnum aents aidau batsata
 nunak wi ayamjukan agkanmitkattajai.
 Mina imanjua duka Israel aents aidaunum atatui”,
 tiuwai Apajuí.

49

*Tuke Pujuu minak dukuju wakeen egketaig yaunchuk nagkamas etegtu-
 auwai*

¹ “Yaakat múun nayantsan ijus ayá
 nuwi batsamin aidautijum,

tuja tikich nugka múun aidaunum atushat
 batsamin aidautigmeshkam wi tajim nunú antugtuktajum:
 Tuke Pujuu minak eke akiintsag etegtuauwai.

Tuja mina dukuju wakeen egketaig mina daajun adaitujus untugkauwai.

² Apajuí minak senchimtjua chichamtin,
 puyag etsakamu empekama iman,

tuja flecha etsakamu tsakaskatuama iman awajtusmayi.
 Dutijua makichik waji ejaka kuitamaina numamtuk kuitamjukmayi.

³ Tuja nii chichagtak:

‘Israel aents aidauwah, atumek mina inakeg ainagme,
 atumiin mina senchignak iwainaktatjai’, tujutmayi.

⁴ Tuja wi anentaimsan chichaakun:

‘Pegkegnakesh jukitnunig wainka takakun waitiajai’, tibaijai.
 Tujash wi takasbaunum jukitnujuk Tuke Pujuu
 senchigtina nuwi amayi.

⁵ “Israel aents Jacob wegantu aidau
 pampagka batsata nuna yajuak
 atak awakeag ikaunmati,
 dutikak mina takagtusti tujutu asa,
 wika eke akiintsag, Tuke Pujuu minak wait anenjug,

yaunchuk nagkamas etegtuauwai.

⁶ Tuja nii chichagtak:

‘Wika aminak mina inakeg ati, nuniak Jacob wegantu aidau achija yajuakam nugken ukukiag, tikich nugkanum batsata nuna ataktu awakeag, dita nugken ikaunmati tusanuk ima nunakek tatsugme. Tuja ashí tikich aents judiochu aina nuwishkam tsaaptinun iwainakti titatjame.

Ashí tikich nugka aidaunum mina chichamjun etsegkati, nunitai ditashkam uwemjatnume tusa’, tujutmayi.

⁷ Tuke Pujuu uwemtikagtin,

Israel aents aidaun Apajuji pegkegma nunú, niina aentsji tikich nugkanmaya aidau kajejam, wainka inaku waitkatai batsata nuna chichajak: Wi atumnak etegkauwaitjim nuadui apu aidauk niina atuwe aidaujai atumi waipakag, eme anenjamsag, atumi emtimin tikishmag pujusagtinai. Nuadui wi atumin anagkuawaitjim nunak imatiksasuk umiktatjai.”

Jesuralén tsaikbauwa nunú ataktu yaaktamatin pachisa etsegkamu

⁸ Tuke Pujuu chichaak:

“Wi wait anenkagtamú tsawan jegau asamtai, untsugkugmin aikmajime, uwemain tsawan jegagtamiaju asamtai, wi yaigbaijime.

Wi atumnak tikich aents aina nuna nagkaesau agtinme tusan etegkauwaitjime. Nuadui atum Israel aents aidautigmek atumi nugkemin ataktu waketjattagme, nunika jegajum atumi shiwaajum aidau yaaktan tsaikajua nunú ataktu yaaktamkatnaitjume.

⁹ Tuja aents aidau achijam chimpija nunú chichagkujum:

‘Yamaik agkan wajasugme, tuja suwenum batsatutigmeshkam tsaaptin wainkatajum, nunikjum jinta yantamenig chijichi pegkeg ayau wainkattagme. Tuja muja uwegshunmash baka aidaun yumainjig kuashat aittawai’, titajum.

¹⁰ Atumek nujantaish tuja kitakaish, etsa sukupainakuish, seekiyaish, makichkish waittsashtin ainagme.

Wi atumnak aneau asan uyuntsattajime, tuja nuigtushkam yumi pukuni kuashat jinaidaun amastinaitjime.

¹¹ Muja aina nunak yumpuajan pakaman, shiig iwaja jintaman esekan tutupit dakuejan umiktatjai.

¹² Tuja Israel aents aidautigmek tikich nugka nagkatkamunum atushat batsatutijum juwi kaunatnaitjume.

Untsú tikich aidauk nugka Sinim* batsatu kaunatnai.

¹³ ¡Nayaimpih, shiig aneakjum kantamatajum!

¡Nugkah, shiig aneasta!

¡Muja aidauwah, shiig aneakjum untsúmkatajum!

* **49:12** Nugka “Sinim” tawa nuna daajig yamaik, “Asuán” adaikamui, nuadui tikich versiónnumak Asuán agagbauwai.

Wagki Tuke Pujuu niina aentsji waituinak
wake besemag batsatun,
wait anentug anentai ichichtuju asamtai.

14 “Atum Jerusalén batsamsajum chichaakjum:
‘Tuke Pujuu jutiinak kajimatjamki idaitamsae’, tuyugme.

15 “¿Nuwa nii jujegbaujinash wait anentsukesh kajimatkish idainukaih?
Nuwa nii jujegbaujin kajimatki idaisaintai,
tujash wika aminak makichkish kajimatkinuk idaisashtatjame.

16 Atumek mina aentsug ainajume,
mina uwejuí agaja takaku amainaitag numamtin ainajume.
Jerusalén peeja tenteamu tsaikbauwa nuna tuke anentaimtajai.

17 “Shiwag aidau Jerusalégkan
wamak tsaikajua nuni senchi shiig wamkeuch
ataktu jegamjajum yaaktamkatin ainajume.

18 “Jerusalén batsatutigmek pagkaijum,
ashi yantamnum niimsatajum,
Israel aents aidau achija yajuakbau aidau
ataktu waketug Jerusalén kaunainawai.
Junak dekas uminkatnun wi Tuke Pujuu taji.
Dita nunik waketiagtai, nuwa aishinatin tsawan jegamtai,
iwagmamak patakumtain patakumama numamtuk Jerusalégkak wajakta-
tui.

19 Atumi nugkem tsaikam pegkegchau wajas amayi,
tujash nuna dutikau aina duka yamaik ukukiaje.
Nuadui nunú nugkanum kuashat aents piyakmatai,
tikich aents pujumain agkauk atsutnai.

20 Atumi uchijum aidau megkaejamtai,
kajimatki idaisamu aidau kaunawag chichagtamainak:
‘Juu nugkak tikima piipich asa ijunja pujumaitsui.
Nunin asamtai tikich nugka sukagtusta nuwi pujusagmi’,
tujamiagtatui.

21 Tujamainakui atum chichaakjum:
‘¿Ya iinash uchinash imatikash amase?
Íik kuashat uchigtuchu ayaji,
nuigtush uchijinmainchau ayaji,
iik uchiji yajutka ukukim uchigtuchu juwakuitji.
Tujash ¿jusha tuwiya kaunae?
¿Jusha ya kuitamkam tsakakuita?’ titinaitjume”, tiuwai.

22 Nuadui Tuke Pujuu apu chichaak:
“Wi nugka múun aina nunak
wainchatai ishamain aidaun iwaintuktatjai,
dutika ai, nuna wainkag atumi uchijum aidaun,
nawanjum aidaun shiig kuitamas yanaki jukiag
ikaunmatnume titatjai.

23 Tuja atumek apu aina nunú apajimattagme,
untsu apu nawanji aidauk
atumi nawanjuchijum aidaun kuitamin agtatui.
Nuninak atumin tikishmatjamjag

dawem bika wajasan dukatjamiagtinai.
 Nuninakui anentaimsajum,
 dekask Tuke Pujuu pujawapi titatjume.
 Tuja mina dekaskapi tujutuidauk tsanuamak achagtinai.

²⁴ “Aents wajiun maanitan yacha asa,
 maania depetmak waji jukimujia duka kakajus atanmaitisui.
 Tuja aents maaniaku achikmauwa dushakam
 aents wajiun tsanug ukukig tupikaumaitisui.

²⁵ Tujash Tuke Pujuu chichaak:
 Aents senchigtin maania depetmak,
 waji aidaun yajuakbaujinak atanjagtinai,
 tuja tikich aents wajiun aentsun achika
 jukiwa nunashkam atankiagtinai.
 Tuja atum Israel aents aidautigmin
 utugchatan itagtamainakuig,
 wi atumi uchijum aidaunak ayamjuktinaitjai.

²⁶ Dutikakun ditak pempeentumakiag yumamatneme,
 nuninak dita numpenak uwag vinojai betek
 nampegtinme titatjai.

Dutika ai ashí aents nugkanmaya aidauk
 wi Tuke Pujuu, amina uwemtikin Jacopan Apajuí
 senchigtinaitag nuna dekawagtatui.
 Witjai amina ayamjukan agkanmitkaunuk”,
 tiuwai Apajuí.

50

¹⁻³ Nuigtushkam Tuke Pujuu chichaak:

“Israel aents aidauwah,
 wika atumin egaknush wainkachmaiijime.
 Untsukmaiijime, tujash aigkashmaiijime.
 Wika atumnak pachitskek idaisachuitjime;
 tuja mina diwig akikmaktinun kuichkin jukitag tusankesh
 wainka inaku waitkatai atinme tusanuk sujukchabaiijime.
 Wika atumi tudaugmin idaisabaiijime.
 Tujash atum waitu batsatjum nuna
 jiiki uwemtikmainuk mina senchijuk ajutui.
 Aents patayi jakamtai, jáanch bukusean nugkuwama
 numamtuk nayaimpinak wi bukuseayai dukukan idaijai.
 Tuja nayants, nuigtu namak aina nunú kuyuatag takug
 wi nunikti tusan machikiuch tamawaitak kuyumainai.
 Nunik yumi buku wajasmatai,
 namak aidau jinaa kaukti tusa nunak nunimainai”, tiuwai.

⁴ Tuke Pujuu, apu, minak aents pimpiki
 batsatun jintintua anentain ichichtugti tusa unuitugmae.
 Tuja aents chichaman antuk betek umiauk
 jintintayama duwi minak Apajuí kashi kashinig
 tuké kashikmas inaantawai,
 niina chichamen antuk unuimagti tujutu asa.

⁵ Tuke Pujuu, apu, minak chichama umin ati tusa
 jintinjauwai.

Nuadui wika niina intimjuknuk umigtsukek idaisachmaijai.

⁶ Mina tuntupjuí asutuínakuish,
asutuátnume tusan idaisabiajai,
susujun uwegtuínakuish, idaisabiajai.
Dushiktuínak yapijui usuktuínakuish,
yapignak ejakchabiajai.

⁷ Tuke Pujuu, apua nunuwai mina yainta duka,
nuadui pegkegchau chichagtuina nunak
wika najaimatsjai.

Nuadui wika kaya múun umuchmainchawama iman
wajasan pujuyajai,
nuadui wika wainka inatsamak achattajai.

⁸ Mina ayamjutna duka wijai pujawai.
Tuja ¿wi pegkegchau takamsamujun etsegtugmainush yaita?
¡Nuna dekau akuig, apu chichaman epegkin
pegkeg puja nuwi wemi!

Wi pegkegchau takamsamun dekau akug nuwi tantati.
¡Nunik mina igkuntua tujutti!

⁹ Tuke Pujuu, apu, minak kuitamjawai,
mina achijuk suwimka sujumainuk makichkish atsawai.
Mina shiwag aina duka jáanch mamuk yuwam
megkagama numamtuk megkaejagtinai.

52

Jerusalégnunia aents aidaunak agkanmitkattajai tusa Apajuí tibau

¹ Jerusalégnunia aidaautijum aneaku niimkau pujustajum,
Jerusalén yaakat pegkegma nuwi batsatutigmek wajiú wajastajum,
nuniakjum shiig iwagmamkatajum,
wagki Apajuín umigchau aents pegkegchau aina duka
ataktu awagkig atumnak jetepakchagtatui.

² Jerusalégnunia aidaautijum
nugká pushugkajum batsatjum duka,
datsaamtsuk wajakjum jáanchjum pegakjum yantsaptuktajum,
nunikjum apu niina inamtaijin ekemaina numamtuk ekemsatajum.
Tuja datsauch aidautigmesh, achija yajuakam
batsabaijum nunisjumek yamaikish batsamtsuk,
agkanmagatajum.

³ Tuja Apajuí chichaak:
“Atumin achipag yajupakajua nunak minak akigkachu ainawai.
Nuadui wishakam atumin awakeaknuk makichkish akimakkhattajai.

⁴ Yaunchuk mina aentsug aidau Egipto nugkanum shiyakag
nugkenchau inaku waitkatai batsamajakua ainawai.
Tuja tikich tsawantinchakam makichkish
utugchatji atsujunak asirianmaya aents aidau
senchi waitkasaju ainawai.

⁵ Tujash yamaish ¿wagka imatikash waitkainawah?
Mina aentsug aina nunak utugchatji atsujunak
Babilonia nugkanum yajuakaje.
Dutikawag nuna apuji aidau waitkainak
ememas chichainak kashi kashinig kajemtijuinawai.

⁶ Tujash tsawan jegattawai,

mina aentsug aidau mina shiig waitkagtina nunú.
Nunik waitkag adeajagtinaí, wi ditan chichagkun:
‘Witjai apunuk’ tiuwaitag nuna”, tiuwai Apajuí.

⁷ Aents mujanmaya akaiki wekagas yamajam chichaman
agkanmaetan uwemtajai pachis etsejak wekagas,
Jerusalégnunia aents aidaun chichajak:
“Atumi Apajuíjyai dekas apuk”,
tusa etseja duka shiig anentam auwai.

⁸ Atumi suntajum jinta niimin aidau
Tuke Pujuu Jerusalégnun wakitki midaun wainkag
shiig aneenak unsumaina nunú jantuktajum!

⁹ ¡Jerusalégnunia aidauwah,
Tuke Pujuu niina aentsji aidaun wait anentug
Jerusalégnashkam agkanmitka duwi
nii eme anentsajum kantamtai shiig aneasjum
senchi kantamatajum!

¹⁰ Ashí aents tikich nugkanmaya aidaush
wainainamunum Tuke Pujuu niina senchijin iwainake.
Tuja Apajuí iina uwemtijamja nunak ashí nugkanum dekawagtinaí.

¹¹ ¡Babilonia nugkanum batsatjum duka
jiinjajum ukuktajum!
¡Tuja Tuke Pujuu jeen takastin waji aidau
ikaunmatnutigmek kuitamamkatajum,
pegkegchau takasaigpa!

¹² Tujash wainkajum waugtukaigpa,
tuja uumkagmekesh tupikakigpa,
atumi aintamuk atsawai.
Tuke Pujuu, Israelan Apajuíjyai nunú atumnak
kuitamjamainawai.

Tuke Pujuu inakeg waitiakush nii yayasam depetmawai

¹³ Mina inakjuk ashí depetmaktinaí,
nuadui tikich aidaun nagkaesau eme anentam atinaí.

¹⁴ Kuashat aents aidau niina yapin diigsag puyatkagtinaí,
wagki yapi emestujam aents niimtinchau
wajasu asamtai.

¹⁵ Tuja aents tikich nugkanmaya aidaushkam
senchi puyatkagtinaí.

Tuja apu aidauk nuna wainkag makichkish chichakchagtinaí,
wagki nunak yaunchkesh antushtain antuinak,
waintanashkam wainaidau asag.

53

¹ ¡Ii etsegbaunak makichik aentskesh dekaskeep tawa
tichau ainawai!

¡Apajuí senchijinak makichik aentskesh wainkachui!

² Apajuí niina inakenak ajak yama tsapaak kagkape
nugka katsugmanum init akagama nunikti tiuwai.

Nunú aentsuk imanchauch, eme anentsa diimainchau,
nuigtush wait anenmainkesh atsayi.

³ Ashí aents aidauk niina tsumainak dakitianume.

Niyai dekas senchi najaimak waittsauwa duka.
Niig waitiakush, waitiajai tichauwai,
wagki tuke unuimatjau asa.

Nuadui makichik aents ii dakitamu diimaitsu dutikiaji.
Tsuwaaja idaisabiaji, nuadui puyatjusaikish diischauwaitji.
4 Tujash niig dutikamaitak ii waitiamujinak nii yajuakmayi,
tuja iina najaimatai aidaunak nii yajuakmayi.
;Iik niina pegkegchaujini aents aidau eemtin
Apajuí suwimak susam waitiatai tuyaji!

5 Niinak iina katseken nagki ijuajui,
tuja iina tudaujin shiig senchi waitkasaju ainawai.
Nii waittsamunum agkanmagat jukimui,
tuja nii ijunbaunum iinak etsaentamjauwai.

6 Tuja yaunchkek iik uwig kuitamkacham wagaka
wekagama numamtuk aayaji.
Tujash yamaik Tuke Pujuu iina tudaujinak
niyai akikmatjamkauwai.

7 Niinak shiwag aidau shiig senchi suwimawagmayi,
imatikamash niig ayatak yunumkabi,
nuniak makichkish chichakchabi,
uwig maatasa juki ematia numamtuk
jukiag emagmayi maatasag.
Tuja uwig uje tsupigmash takamtak tepegama numamtuk
makichkish chichakchabi.

8 Pegkegchaun takamsachunak achikag jukiagmayi,
dutika juwagtaish niina ayamjumainuk makichkish atsubi.
Tuja niinak makichkish puyatjukchagmayi,
ayatak ajak ajaamu tegai ajapmaina numamtuk,
mina aentsug aidau tudaujin maawagmayi.

9 Niig makichkish magkagtuachu aig,
tuja waitjutnakesh waitjuachu aig,
aents pegkegchau aidau jinau ukusbaunum
nuna yantamen ukusagmayi.

10 Nunak Tuke Pujuu dutik waitkastajai tusa wakekauwai.

Niig aents aidau tudaujin waittsau asa,
kuashat mijan jatsuk iwaku pujus, nii wegantu aidaun
uchiji wegantu aidaunak ashí wainjatnai.
Tuke Pujuu nii dutikatnujin anentaimtujúa
duka nunú aents waittsamunum betek uminkatnai.

11 Imanik waitus nagkaikiu asa,
dekaattawai dekas Apajuí umigbau ima pegkeja nuna,
nunik shiig aneas juwaktinai.
Apajuín inake chichaman betek umina nunú aents aidau
tudaujinak entsaktinai, dutikak agkanmitkatnai.

12 Nuadui Apajuí niinak senchigtin
ashí eme anentsa diitai awajsattawai.
Wagki niig pegkegchau takamsachuitak,
pegkegchaun takamsaujai betek,
aents aidau uwemjatnume tusa, dita tudaujin
dita mantamnamainun nii mantamdauwa duwi.

54

Tuke Pujuu anenkeg atakesh nagkankashtinai

¹ Isaías chichaak:

“Nuwa uchin uchigmachu aidauwah,
shiig aneakjum kantamtai senchi kantamatajum,
Apajuí chichaak:

‘Nuwa uchin uchigmachu asamtai,
idaisamua duka aishinnun nagkaesau uchigtin atatuí’, tawai.

² Israel aents aidauwah,

atumin aakjum aina nunú puyattsuk

nuni senchi múun awajsatajum,

dutikajum daek esajam yajuakjum

nunú achimtika jigkaktin numi shiig ajigtajum.

³ Ame wegantu aidauk shiig kuashat yujaktatui,

nunikag tikich nugkanum shiyakag

makichik yaaktakesh atsaunum dita yaaktamak

batsamsagtinai.

⁴ Ishamkagtukaipa, wainka pegkegchau chichagmak

achatnaitme, dushikiamash achattame.

Datsa asam uchijum atsau asamtai,

dushikiam wekaeyum duka kajimatkita.

Ame wajemea pujamin dushiktamainakui,

datsaamin ayum duka yamaik nunikchattame.

⁵ Wagki Apajuí amina najapauwa nunú

nuwa nuwatkamujai betek awajtamsattawai.

Niina daajig Tuke Pujuu ashí senchigtin tutayai.

Amina ayamjutpak uwemtijamna duka

Israela Apajuí pegkejam ashí nugkan jajutua awai.

⁶ Amek nuwa muntsugtaitak idaisam pujus

waitu pujuuwama numamtuk waitu pujubiume.

Tujash niina aishi ataktu awagki tsagkujuk

jumaina numamtuk,

Apajuí unsugmawai midau ati tusa,

nuadui juna aatus tujamui:

⁷ ‘Ujumchik tsawantai pachitsuk idaisamjame,

tujash wika wait anenkagtinaitag iman asan,

ataktu awagkin minai itattagme.

⁸ Amina kajegkan, ujumak tsawan uumjukan idaisamiagme.

Tujash makichkish kajimatmainchaun aneau asan,

wait anenjabiagme’,

tusa Tuke Pujuu amina uwemtijamjauwa nunú tawai.”

⁹ Tuja junashkam Apajuí chichaak:

“Yumi ashí nugkanum piyajua nunú tsawantin

wi Noén chichagkun:

‘Ataktu awagkinuk nugkanmak yuminak

pimuntijashtinaitjai’ tiuwaitag dutiksanuk yamaishkam tajai.

Ataktuk aminak kajekkashtatjame,

tuja awantanashkam awankashtatjame.

¹⁰ Muja aidau tikich yantannum shimakuish,

tuja yumpuna kakekuish,

wi amina aneajam nunak anentaingnak yapajiashtinaitjai,

tuja utugchat akuish, epegkea pujutai atinun
chichaman umikuitag dushakam yapajinashtinai,
tusa Tuke Pujuu
amina wait anenjamja nunú tujamui”,
tiuwai Isaiás.

Yamajam Jerusalén

¹¹ Apajuí chichaak: “¡Jerusalégkah,
aminak anentaimin ichichtugmatsuk kajimatki idaitamsagmatai,
dase tukua tukuum pegkegchau wajasum nunak
ataktu nagkaman iwajattagme!

Dutikakun kaya zafiron aepkan nuwi ekenin
kaya pegkejuch akik aidauwai peejan umiktatjame.

¹² Kumpin aidaunak kaya rubi tutayai najanattajai,
tuja waiti aidauk kaya berilo tutayai najanamu agtatui.
Untsu yaaktanak kaya pegkejuch aidauwai peejattajai.

¹³ “Amina uchijum aidaun,
nawanjum aidaujui ashí jintintuattajai,
dutika ai, ditak agkan shiig batsamsagtinai.

¹⁴ Amek shiig takauwaitam duwi senchi atatme,
nuadui makichik aentskesh inapakug waitkagmaschatnai.
Tuja sapigmamush atsugtamtinai,
ishamain antakum sapigmam duka ataktuk
sapigmakchatnaitme.

¹⁵ Makichik aentskesh jetepakug,
wi inagbau asagkesh jetepakchatnai,
dutijamkuish duka ame depetkatnaitme.

¹⁶ “Juju shiig antukta:
Aents jiju ukuiyag najanin aina nunak wi najanauwaitjai,
tuja aents magkagtak utugchatan
aepin aina nunashkam wiki najanauwaitjai.

¹⁷ Tuja wi najankauwaitag nuna nagkaesaun magkagtutai
amina mantamainun najanauk makichikish atsawai.

Nuadui amina mantamatag tuidauk ashí depetkam
itatmikagtinaitme.

Wika mina inakeg aidaunak:
‘Depetmatan suwajai’ ” tusa Tuke Pujuu tiuwai.

55

Apajuí niina aentsji aidaun ijumjatin

¹ Apajuí chichaak:

“Aents kitamauk minai taa uwagti.
Kuichik atsugbau aidauk minai kaunawag
trigo, vino, leche aidaun akikmatsuk yuwatnume.

² Waittsa takasa kuichik jukimua duka
yutai sumaka yuwa yapajamu megkaekashtinaitkuik,
wainka akikmakaik ajapmaitsui.
Wi tajam nunú antukam yutai pegkeg yuwatnaitme.

³ “Juwi minai kaunajum wi titatjim nunú antuktajum,

nuniakjum iwaku pujustajum.

Wi Davita aneau asan anagkuawaitag nuna umiakun, atumjai chichaman umiktatjai atakesh yapajinashtin tuke asatnun.

⁴ Juju shiig antuktajum, wi niinak mina chichamjun ashí tikich nugkanmaya aidaunash jintintuati tusan apu awajsauwaitjai.

⁵ Israel aents aidauwah, aents tikich nugkanmaya aidau utsuktinaitjume. Dutikawagmin atumin waipachu ainayatak, tupi tupikainakua kautjamawagtinai.

Wi nunak atumin wait anenjamjatnume tusan dutikattajai.

Witjai Tuke Pujuu, Israel aents aidaun Apajuíji pegkegmanuk.

⁶ Tuke Pujuu wainkatag takugmek yamaikiuchia duik egaktajum, tuja tikijuch puja duik untsutash untsuktajum.

⁷ Pegkegchaun takau aina duka nuninun wekaetutsuk idaisati, tuja pegkegchaun anentaimtin aina dushakam nunak idaisatnume. Ataktu wakitkijum Tuke Pujuu tsagkugkagtina nuwi minitajum, nuniagmin nii wait anenjamjagtatui.”

⁸ Tuke Pujuu chichaak:

“Wika atumjai betekak anentaimtsujai.

Nuigtush wi takamua duka atum takajum nujaig betekchawai.

⁹ Tuja mina anentaimtajuk, atumi anentaimtajin nagkaesauwai, mina takatjushkam atum takajum nuna nagkaesauwai”, tusa Apajuí tujamui.

¹⁰ Yumik nayaimpinmaya yutawai, nunikash ataktuk nayaimpinmak wakettsui, ayatak nugkan uchupig ajak tsapamain emawai, dutikamtai ajak aidau tsapawai, nunik nejeku juuka yutayama

¹¹ numamtuk mina chichamjushkam wi tibau umintsukek, tuja wi wakegamua nunashkam dutiktsukek wakitkig minaig waatsui.

¹² Atum achija yajuakam batsatjum duka jijnajum agkan shiig aneasjum, atumi nugkemin waketjajum kaunattagme. Nunika kaunajum muja aidau wainkujum, shiig aneasjum senchi kantaminaitjume. Atum imatjumin muja aidauk, numi aidauk, aentsjai betek uwejen awatiagtinai.

¹³ Atumi nugkemin jagki ayá nunú jinaamtai, pino aidau tsapaktinai, tuja naja jinutai arrayán aidau tsapaktinai. Nuna wainainak ashí aents nugkanmaya aidauk Apajuín emematiagtinai. Apajuí niina senchijin umikbaunak makichkish tsaikchagtin ainawai.

¹ Apajuí mina chichagtak:

“¡Ishamkagtutsuk senchi untsumkata,
uwija kachuji shinaujai betek senchi chichakta!
¡Imatkum mina aentsug Jacob wegantu aina nunú
pegkegchaun takamsamuji pachisam senchi chichagkata!

² Dutikakum tita:

‘Atumek minak kashi kashinig untsugjume,
nuniakjum chichama umin najaneajum
mina umigtuktasajum wakegagme.
Nuniau asajum ii chicham uminkatna nunú
sukagtusta tusajum segatjume,
nuniakjum shiig aneagme Apajuí umigji’ tusajum.

³ Tusa tayatkujum:

‘¿Wagkaik wainkaish Apajuí waipatsu nuniaish
ijgmash pujutji?
¿Wagkaik ijgamaish waitush wekaetaji Apajuí waipatsu
nuniaish?’ tajume.

Tau asajum atumek ijagma pujusa Apajuí segatia
nunú tsawantin waji sujakjum,
atumi takagtamin aidaushkam shiig akitsuk kasagjume.

⁴ Atumek ijagma pujusa Apajuí segatia
nunú tsawantin jiyaniakjum, maaniakjum ijuni batsatjume.
Apajuí atum ijagma pujusa segamun
antugtukti takugmek, a antajaig takamaitugme.

⁵ Ijagma pujusa Tuke Pujuu segaji tayatku,
imani batsatmawa duka Apajuínak shiig awagmatsui.
Atumek kajis namaka uwet kasua wajama nunikjum
tsuntsama pujusjum, jáanch wake besemag pujaku
nugkutai nugkugjum yukunum tepajum nunú,
ijagma pujusa Apajuí segaji, tajume.
Nuniakjum juju Tuke Pujunak shiig awagmawai, tajume.

⁶ Tujash duka dekaskechui.

Mina shiig awajkati tujutkugmek,
ijagma pujusam:
Aents achikam chimpija nunú agkanmitkata,
takamsachu aig jigkajam batsata nunú atiam agkanmitkata,
inaku waitkatai batsata nunú agkanmitkata.
Dutikakum shiig takashtai, pegkegchau aina duka
ashí idaisatajum.

⁷ Nuniakjum, atumdau yutai ajutjamaina nunú
tikich aents nujantai waituidau ajamsatajum;
tuja aents jenchauwa duka atumi jem jukitajum;
tuja nugkumainji atsakuishkam,
jáanch susatajum nugkugti.
Dutikakjum tikich aidaushkam tuké yaitajum.

⁸ Nunú dutikakjumek, kashikmas etsa jiiinak
etsantama iman atatjume.

Nuniagmin mina imanjua nunú uyuntamsagtatui.
Tuja pegkegchau takataijum aidau tsupimakbaujai betek wajas awa
duka wamak esamattawai.

⁹ Nunikmatai untsugkugminig aiktatjime;

tuja yainkata tusajum senchi untsugkugminishkam,
 wi ayaakun: 'Juwi pujajai', titatjime.
 Tikich aents aidau waitkajum nunú idaisajum
 pegkegchau chichagtsuk, nuigtush wainka tsanumjutsuk,
¹⁰ yumainji atsujush amek anenmamsam ajampeakum,
 tikich waituidau yayakjumeke,
 suwenum jii kegak tsaaptin emama numamtin atatjume.
 Tuja amina pegkegchaujum suwe wajas awa duka,
 yamai pegkeg takagmin, etsa tutupit wegak
 etsantug tsaaptin emama iman wajastatui.

¹¹ Wi aminak tuké uyuntsattagme,
 dutikakun uwegshunum pujakminish,
 shiig kuashat yutain amastatjime,
 dutikakun senchimitikattagme,
 nuadui ajak ajakbau yumi ukattai asa pegkejama iman,
 nuigtu yumi pukuni jinu tuke amuechau ama iman atatjume.

¹² Atum wegantu aidau
 yaakat yaunchuk tsaikbau aidau ataktu jegamjagtinaí.
 Dutikainak nunú jegamku kaya aepkamu aidau
 yumpunawai tusa shiig emetug umikagtinaí.
 Dutikau asagmatai:
 'Yaakat peejamu tsaikbaun ataktu iwajin aidau',
 nuigtushkam: 'Jega tsaikbaun iwajin aidau'
 tuu adaikagtinaí."

Ayamta tsawan pachisa jintiamu

¹³ "Tsawan ayamtaya nunú ajantusjum diistajum,
 tuja mina tsawantug pegkegma duik
 atumi takatjumeke takasaigpajum.
 Nunú tsawanta duwi shiig aneasjum ima Tuke Pujuu
 pegkegma duke ememattajum, tibauwa nuwi anentaimsatajum.
 Nunú tsawantin atumi takatjum,
 nuniachkush atum wakegamukesh
 chichamju yujatsuk ayatak ajantusa diistajum.

¹⁴ Nunú umiakjuminig,
 shiig aneasa pujutan wi amastatjime.
 Nuigtush nugka múun aidau apuji awajsattajime.
 Dutikakun wi atumi apachjum Jacopan
 anagkuawaitag nuna nugkan amastatjime.
 Junak dekas wi umiktinjun tajai", tiuwai Tuke Pujuu.

60

Yamajam Jerusalén

¹ Isaías chichaak:
 "Jerusalénumia aidauwah,
 atumnak Tuke Pujuu imanjiya nunú
 ijpaku asantai, winchamtin wajasugme.

² Untsu nugkanak suwe dukuakui,
 nuniái yaakat múun aidau nak suwe ijike,
 untsu atumnak Tuke Pujuu etsantug wajantugmattawai,
 nuniak niina imanjiya nunú wantintugmakagtatui.

³ Aents nugka muunnumia aidauk

atumin etsantug awa nuwi miniagtatui,
tuja apu aidaushkam atumin tsaaptin awa nuwi miniagtatui.

⁴ ¡Jerusalégnumia aidauwah,
ayampajum ashí niimsatajum,
ashí aents aidauk Jerusalén ijunainawai.
Atushtanmaya aidau dita patayi aidaujai ashí
yajumakag uchin pagkuaku mininawai!

⁵ Nunú imanik kaunainak,
nayantsanmaya waji aidaun,
tikich nugka múun aidaunmaya waji aidaun
takuinaku mininakuí shiig aneastinaitjume.

⁶ Madiágnumia aidau, efánmaya aidau
camellonum entsatkau minidau waitinaitjume.
Tuja Sabá nugkanmaya aidaushkam
ashí camellon yajuakag oron, kugkuin
inciensojai patajag minidau wainkujum,
mina emematjitnaitjume wi dutikau asamtai.

⁷ Tuja Quedarnumia aents aidaun
tagkuji ikaunmawagtata duka,
Nebaiotnumia uwig tsakat aidaun ikaunmawagtata nujai
ashí Apajuín shiig anemtiksatín altarnum pataijum apeattagme.
Aatus Apajuí niina jee pegkegma nunak nuni pegkeg awajsattawai.

⁸ “¿Aush yujagmijai betek nanaakag,
paum dita pasugken shimuwama numamtuk
minina dusha ya ainawa?

⁹ Duka lancha múun Tarsisnumia aidau,
atumi uchijum aidaun yajuakag Tuke Pujuu
atumi Apajuíjum senchintijamna nuna emematiagtatus
oron, plata aidaujai yajuak mininawai.

¹⁰ “Apajuí atumin kajegtamak suwimkan amasajui.
Dutijamayatak yamai wait anenjamjau asamtai,
aents tikich nugkanmaya aina nunú
yaakat peejamu aidau tsaikbauwa nunak ataktu peekeg umikagtatui.
Tuja apu aidauk amina inakem agtatui.

¹¹ Tikich nugkanmaya apu aidau dita aentsji aidaujai
waji aidaun ikaunmawagtín asagmatai,
Jerusalégka waitijig kashish, tsawaish tuke ujaim asatnai.

¹² “Ashí aents tikich nugkanmaya aidau
atumin takagtamtan dakituidauk ijinam agtinai.

¹³ Apajuí Jerusalégnumia aidaun chichajak:
‘Libanonmaya waji aina duka, numi dakaja jegamtai shiig pegkeg:
pino, abeto, cipre aina nujai
ashí wi pujusa inamjatnún etegkauwaitag nuwi
mina jegag awa,
nunú iwaja shiig pegkejuch awajsatnún ikaunmawagtínai.

¹⁴ Yaunchuk atumin waitkagmajaku aina
nuna uchiji aidauk atumin inake waigtatui,
tuja atumin yaunchuk dakitjamajaku aidauk

atumin tikishmatjamag, Jerusalégkan chichajuinak:

“Tuke Pujuu, Israel aents aidaun Apajuíji pegkegma nuna yaaktajiyai”, wajagtinaí.

¹⁵ Atumek kajimatki idaisamu, kajegtai ayugme.

Tujash nunak wi yapajian

atumin imanjumek tuke atin ati titatjai.

Nuadui atumek ajumaish shiig aneasjum pujustinaítjume.

¹⁶ Tikich nugkanmaya aidau atum yuwatnun

yutai shiig pegkeg aidaun ikautjabiagtinaí,

tuja apu aidaushkam waji akik aidaun

anentag amasagtinaí.

Nuna Jerusalégnumia aidau wainainak

wi Tuke Pujuu, senchigtin, Israel aents aidaun

uwemtiknaitag nuna dekajuawagtinaí.

¹⁷ “Witjai Israel aents aidaun Apajuíjinuk, nudiau asan, agkan shiig takainak batsamsatnume tusan agkan pujutan, waitjutsuk shiig takatan jintintuattajime.

Dutikakun bronze amamainaitkun dekas oron amastatjime,

tuja hierro amamainun dekas platan amastatjime,

tuja numi amamainun dekas broncen amastatjime,

tuja kaya amamainun hierron amastatjime.

¹⁸ Atumi nugkeminig maaniamuk makichkish antuekashtinaí,

tuja yaakat tsayamush atumi nugkeminig

makichkish atsutnai.

Nuadui Jerusalén peejamua duka

“Uwemtai” adaikatnaitjume.

Untsu waitiji aina nunú “Dakujutai” adaikatnaitjume.

¹⁹ “Tuja etsantug tsaaptin wajas

ajumaish tuke atina duka witjai.

Nuadui atumek etsa etsankui yujasmi,

tuja nuniachkuish nantu kashi etsantak tsaaptin

weakui yujasagmi tusagmek batsamchattagme.

²⁰ Witjai Tuke Pujuu atumi Apajuíjinuk.

Nuadui etsag makichkish akaikig megkaekashtinaí,

tuja nantushkam etsanbaujinak kajinkashtinaí.

Wi ajumaish atumi tsaaptinjum tuke atinaitjai.

Nuadui atum wake besemag pujamuk atsugtamiagtinaí.

²¹ “Atumi aentsjum aidauk shiig anentaimkau

eme anentsa diítai, nugkeesh atantam achatnaitjume,

tuja waji ajakaitkuish wi ajakmamu atinaitjume.

Wi nunak mina imanjun iwainaktasan dutikattajai.

²² Kuashtachu aina nunú yujaka mil aents wajastinaí,

nunú yujaka nugka múun wajastinaí.

Wi nunak nunú tsawan jegakui wamak dutikattajai.

Witjai dekas Tuke Pujunuk’, tawai Apajuí’, tiuwai Isaías.

61

Israel aents aidaunum uwemat taatin pachisa etsegkamu

¹ Tuke Pujuu inake chichaak:

“Apajuí minak ujudauch aidaun yamajam chichaman ujakti,
 dutikak waitkam batsata nuna anentain ichichtugti,
 tuja achikbau aidaunash agkanmitkati,
 dutikak achikam chimpija nunashkam
 agkanmitkati tusa awetine.

Nuadui niina Wakani minai awai.

² Nuigtushkam Tuke Pujuu

iina wait anenjamjatnuk tsawan jegattawai,
 tuja nunú tsawantin Apajuí iina shiwaaji
 waitkagmaina nuna depetuk, uwemtijamjatnuk
 tsawantak jegattawai tusam etsegekata tusa awetine.

“Tuja aents wake besemag batsatunashkam
 anentain ichichtugti tusa awetine.

³ Israel aents aidau dita shiwaaji depeteam

buutu batsata nuna shiig aneastinme,
 tuja yukuun ukatmama batsata nuna
 dakunkut anentain susati tusa awetine.

Tuja wi agkanmitkamu asag, numi roble

Apajuí ajakbau pejkejush amain aina iman asagmatai, tikich aidau
 chichajuinak:

‘Roble katsujam tegamainchau’ tiagtinaí.

⁴ “Tuja yaunchuk yaakat tsaikbau aidau

tuwasua wegaka nunú Jerusalégnunia aidautijum
 ataktu jeganmajum yaaktamkatnaitjume.

⁵ Dutikawagmin aents tikich nugkanmaya aidau
 kaunawag tagkuji aidaun, ajajum uva ajakbau aidaujai
 kuitamjupakagtinaí.

⁶ “Tuja atumnak ‘Sacerdote aidau,

Tuke Pujuun takajin’ tujamiagtinaí.

Atumek yutai tikich nugkanmaya aidau
 shiig pegkeg yutinaitjume.

Tuja nugkurai aidaushkam pegkeg iwajamu aidau
 tikich nugkanmaya iwagmamtainaitjume.

⁷ Atumek mina aentsug ainayatkujum

shiig kuashat datsan chichajam,
 busainaku dushikiam kuashat waittsau ainagme.

Nuadui nuna nagkaesau atumi nugkem
 waji aidaujai shiig kuashat jukitnaitjume.

Dutikajum ajumaish tuké shiig aneasjum pujustinaitjume.

⁸ Apajuí waitjutsuk shiig takamua nuna aneawai,
 nuniak kajegdayat, magkagtut aina nunak kajejawai.

Nuadui niina aentsji anagkuamunak
 makichkish ewaetsuk umiktinaí.

Dutikak chicham tuke atinun ditajai umiktinaí.

⁹ Dutikau asantai, dita wegantu aidauk
 tikich aents aidaun nagkaesau shiig kuashat agtinaí.

Ashí aents aidauk nuna diisag:

‘i’Tuke Pujuuwap ditanak pegkegnun yumigjauwaita!’ tiagtinaí.

¹⁰ “Tuke Pujuu minak shiig anemtijawai.

Apajuí minak dakunkut pujutan sujawai.
 Apajuí minak uwemtijuje.
 Apajuí minak shiig pegkegnum kuitamjuke.
 11 Nuadui jigkai ajaamu tsapaama numamtuk,
 tuja ajak ayaunmaya tikich ajak tsapaama numamtuk,
 tsanumtsuk shiig takatan
 shiig aneasa pujutjai ashí aents aidaunum
 waji ajakaitkuish, Tuke Pujuu tsapapitnai.
 Nuadui shiig aneenak kantamiagtinai.”

63

Apajuí Israel aents aidaun ayamjak edomnumia aents aidaun ijinatin

1 ¿Yaita aush edomnumia yaakat múun
 Boshrá tutaya nuwiya jáanch kapantui egkekbau tumainun
 shiig pegkejan nugkuaju ishamain mina dusha?
 Nunak wi depetmaktinun iwainajai,
 wika senchigtin asan uwentikagtumainaitjai.
 2 ¿Wagka uva naja najam jáanch kapantu wegama
 imanush jáanchjumesch wajasuita?
 3 Junak imanikjai wiki uvan najakun,
 makichkish yainkachaje.
 Senchi kajekmajai, nunikan mina shiwag aidaun
 suwimkan susamjai.
 Dutikakun senchi kajeku asan, tepegka ijinmaina imatikamjai,
 dutikai nuna numpe aidau
 tsakiantak jáanchjui ukatjukmae.
 4 Nunak dutikamjai mina aentsug aidaun ayamjakun,
 mina shiwag aidau ijinatin tsawan jegau asantai.
 5 Mina yainmainush atsuash tukaman
 makichkish wainkachmajai,
 nunikan anentai jegachmajai.
 Nunikan senchi kajekbaujui mina senchigjai depetmakmajai.
 6 Shiig senchi kajekbaujui
 aents nugka muunnumia aidaunak
 tepegka ijinmaina numamtuk ijinabijai.
 Dutika ai numpa saeki akaikibi.

Apajuí Israel aents aidaun wait anenjatín

7 Isaías chichaak:
 “Apajuí anenken pachisan chichaakun,
 níi jutiin ayamjutpak kuashat dutikauwa nuna
 anentaimtusan kantamatasan wakegajai.
 Apajuik Israel aents aidaun wait anentau asa
 níina anenkega nuna ditan iwaintak kuashat yaigkui.”
 8 Apajuí chichaak:
 “Ditak mina aentsug asag, mina uchig,
 mina nawantug aina duwi
 intimjutmainchau ainawai.
 Nuadui dita pegkegchaujig kuashat aig,
 wait anentug uwentikjauwai.
 9 Israel aents aidaun waitkagtaik,
 níig tikichin akupkag ayamjukchauwai,

dekas nii Apajuí taa ayamjukui.

Apajuik niina anenken, niina senchijin aatus,
Israel aents aidaunak wait anentak
tuké ayamjuk uwentiknai.

¹⁰ Imatika yayamash Israel aents aidauk intimjuinak,
Apajuí pegkegman ikajejaku ainawai.
Nuadui ditan pempeentuki shiwaajui
itugmaina numamtuk ditajai maaniauwai.

¹¹ Imanik waituinak yaunchuk Moisés
dita apachji aajaku aidaun jiija yajuak
uwemtikjauwa nuna anentaímtus chichainak:
‘Moisés Israel aents aidaun apuji aajakua nunú
piipich asantai, namak Nilonum ajugkam jakeaun
jiikiuwa dusha Apajuísh ¿tuwi pujawa?

Tuja Moisésai Niina Wakani pegkegman
apusauwa dusha Apajuísh ¿tuwi pujawa?

¹² Apajuí niina senchijijai Moisésan uyunajakua dusha,
tuja niina aentsji aidau ishamainun ukumtikak,
atakea duish kajimatkishtinun niina senchijin iwainak
nayantsan ukuyauwa dusha ¿tuwi pujawa?

¹³ Caballo mujanum weakush atakuinag iyachua numamtuk,
nayants buku wajasbaunum inidak shimakush,
atakuinjashtinme tusa umikua dusha Apajuísh yamaish ¿tuwi pujawa?

¹⁴ Apajuí niina aentsji aidaun baka aidau nainnum yujau
wakeen nugka pakanum utsanawag
ayamama numamtuk ayamtikna dusha
Apajuísh ¿tuwi pujawa?’ tiagtinai”, tiuwai.

Tuja inagnamua nuna Isaiás chichaak:

“Apajuín Wakani ditan uyuntsauwai.

Aatus niina imanjin ashí iwainak ekemsauwai”, tiuwai.

Apajuí yainkati tusa augbau

¹⁵ Israel aents aidau Apajuín aujainak:

“Chah, Apajuíjuh, ame pujutajum
nayaim pegkegma nuwi pujusam antukta.
Amek jikamsa anejatchau dekapeaji,
tuja ame senchigtinaitam dusha iwainkagtatsme.
¿Amesh jutiish wajuk diijatme?

¿Asta amina wait anenkagtutaígmek ¿amuekaek?

¹⁶ ¿Ametme jutiin apajimek,
Abraham niina uchijichu anenjamkuish,
tuja Israel pachipachkuish,
ametme iina apajimek!

¿Ametme iina tuke uwemtikagtinmek!

¹⁷ Aminí kanaktinme tusamek tukagtipa,
tuja intimkiu atinme tusamesh tukagtipa.

Amina inakem ainag nunú,
amina aentsjum maki makichik wegantu
aina nujai aneakmek, ataktu wait anenkagtugta.

¹⁸ Amina aentsjum ame etegkamu aina duka
dita nugkeenig ujumak tsawanchik batsatui.

Ame emematku ijuntaiya nunak
iina shiwaaji aidau pegkegchau awajainawai.

¹⁹ Ii aidautik amina chichamem umitsuk,
nuigtush aminuchu amaina numamtuk batsatji.
Wait aneasam amina anenkem
ataktu iwainkagtukta”, tiajui.

64

¹ Apajuíjuh, utusamek nayaim ujaim

akaikim nugká taakum muja aidau pegakam,

² jii kegak jagki kagakun apegama numamtuk,
tuja dutikachkush yumin ukuwama numamtuk
awajkam tusa wakegaji.

Nuna amina shiwaajum aidau wainainak,
Apajuík ima ameketam nuna dekawagtinaí.

Tuja aents nugka muunnumia aidaush ishamjamainak
kujaidiagtinaí.

³ Kuashat ishamain aidau iwainajuitam nunú
iina uwaktamkauwai.

Nuadui muja aidaush amina emtimin
senchi buchitiagmayi.

⁴ Aminí kajinas anentaimaidau yayaakum,

ame ishamain aidau iwaintujuitam dutika

tikich apajuí niina kajitus anentaidaun yayaak,
imanun ditan iwaintukuy yaunchkesh makichkish wainkachbauwai,
tuja antutkesh antushtayai.

⁵ Aminak aents shiig aneas pegkejan takak,
chichamjum umiktina nuna

aneaku puja nunú shiig awajtamui.

Amek ii pegkegchau takaku yaunchuk
nagkamsaish ikaje pujag duwi kajekume.

⁶ Ii aidautik makichik aents tsumaina iman ainaji.

Ii pegkeg takaji taji dushakam jáanch tsuwata iman ainawai.

Ashí ii aidautik duka kagaka kakekaujai betek ainaji.

Tuja iina magkagtutaijiya nunú dasejai betek

tukugmi ajapjamainawai.

⁷ ¡Amina segapauk, tuja amina nii wait anenjugti tusa kakanmamukesh
makichkish atsawai!

Nuadui amek iina pegkegchaujin uumka idaikagtusume.

⁸ Apuh, ii nunin ainajinish, ametme iina apajimek.

Ii aidautik duwejai betek ainaji,

untsu amek aents duwen namuka najannujai betekaitme.

¡Iik ashí ame najankamu ainaji!

⁹ Tuke Pujuuwah, imanikmek kajekaipa,

tuja iina magkagtutai aidaush pachikaipa.

¡Kame, iik amina aentsjum ainaji!

¹⁰ Yaakat ame etegkamu aina duka

itajak wajas bashiak ainawai.

Jerusalégnak iina shiwaaji aidau tsaikam
pegkegchau wajas awai.

11 Amina jem pegkegmanum iina apachji aidau
amina emematjamajaku aina nunak
jiiyai apea ashí tsaikajui.
;Ii ima senchi wakesa diin ayag duka
tsaikam pegkegchau wajas awai!

12 Tuke Pujuuwah, imatikau aina nuna iikmakti
tusamek amek ;yaijatkashtatmek?
Atsa ;ayatkek idaisattam?
Nuniakum aan senchi waitkastinme
tusamek ;idaikagtustatam?

65

Apajuín shiwagbaunak nii suwimkan suwawai

1 Apajuí chichaak:

“Aents makichkish mina segatchau aajabia
nunú mina kautjuinawai;
tuja aents mina egatkachu aajabia nunú
yamai mina waituinawai.

Mina emematjuchu aajabia nuna chichagkun:
‘Juwi pujajai’, tibaijai.

2 Aents intimkiu aidau
wijai shiwagmagainak,
dita wakegamun pegkegchaun taka yujau aina
nunú segatainakui yaigtasan tuke dakabiajai.

3 Nunú aents aidauk mina igkuntuawag
tuke inastuinawai.

Dita aidauk apajuímtai dakumka najanamun
emematuinak,

kuntinu maawag ikam yujasag, kaya pataja
najanamunum nuwi patainiag apé yujau aajabi.
Nuigtushkam ladrillo najanamunum kugkuín incienzon
apé yujau ainawai.

4 Nunú aents aidauk ukumatainum pekamá yujayanume,
nuninak waanum uumak batsamas tsawampa
batsamianume.

Nunú aents aidauk Apajuí dakitamun
kuchi nejen yuyanume,
nuigtush dakumkamu emematku kuntin
maamu aidau painkamun yumiji ollanmak tsumain aajabi.

5 Nunú aents aidau chichainak:
‘Antijatkaigpa iik Apajuí etegjamu asa
pegkejam ainaji’, tuinawai.

Nunú aents aina duka jii tuke,
tsawantai keeka aama numamtin ainawai.
Jii bukuituji dujin amajama
numamtuk minak waitkajuinawai”, tiuwai.

Nayaim yamajam nugka yamagmajai

17 Apajuí chichaak:

“Antuktajum nijah, wi yamajam nayaimpin,
nugka yamagmajai najanattajai.
Tuja yama nagkamchak nayaim

nugkajai aajakua nunak kajimatkiagtinaí.
Makichkish nunak tuke adeagchagtinaí.

¹⁸ Wi nuna yamagman najanatin asamtai,
ajumaish tuké shiig aneastin atajum.

Wi yamajam Jerusalégkan shiig pegkejan
najanattajai;

dutikamtai nuwi aents aidauk shiig aneasag batsamsagtinaí.

¹⁹ Tuja wishakam Jerusalégkan diisan

shiig aneastatjai;

nuniakun mina aentsug aina nuwishkam
shiig aneastatjai.

Jerusalégnmak jaku buutbaush atsutnai.

²⁰ Nunú nugkanmak uchi akiina jaka megkaguk atsutnai,

tuja múunchishkam tsawanjin shiig ejetsuk
jauk atsutnai.

Tuja makichik aentskesh cien mijan ajamu jauk
múuntuch achatnai, datsauch atinaí.

Tuja cien mijanan ejetsu duka suwimak asamtai nuniktinaí.

²¹ Aents aidauk nunú yaaktanum jegamag batsamas,
trigon, uvan ajakmakag nuna nejen juukag yuwagtinaí.

²² Dita jegamkamunmak tikich

akiinag batsamsachagtinaí,

tuja dita ajakmamujinash atankiajag yujuachagtinaí.

Mina aentsug aidauk numijai betek

kuashat tsawan iwaku pujusagtinaí;

Wi etejamu aina duka dita takasbaujinian

jukiag shiig batsamsagtinaí.

²³ Dita aidauk Apajuí pegkegnum yumigjamu asag

wainak takainakug waittsachagtinaí,

tuja dita uchiji aidaushkam

tsawan jegatsaigkik jakachagtinaí.

Nunú uchi aidau wegantu aidaushkam

ditajai betek pegkegnum yumigjamu agtinaí.

²⁴ Eke dita utsujuinatsaig,

wiyá ditanak aiktinaitjai;

tuja eke chichakag ashimainatsaig,

wiyá ditanak antugkatnaitjai.

²⁵ Lobo uwig tsakatjai jimagtuk yuwawagtinaí.

Leónkak bueyejai betek hijichin yutinaí.

Untsu dapi nugka yukukuntun yutinaí.

Tuke Pujuu chichaak:

‘Jerusalégnmak tikichin pegkegchau awagbauk

makichkish atsutnai’ ”, tiuwai.

66

¹ Tuke Pujuu chichaak:

“Nayaimpik mina ekemsa inamtajui.

Untsu nugka nunuwai wi najamsa eketbau.

Atumek wi ayamsatnuk mina jegajuk

jegamjutmaitsugme,

tuja nunú jegamainchakam nugka etegkamuk atswai.

² Waji ayá nunak wiki ashí najankauwaitjai;

dutika ai nunisag juwajui.
Witjai Apajuínuk.
Wi nunak dutikauwaitjai.
Wika aents wakanin pimpiki pujusa
mina chichamjun eme anenta nuna diyakjai”, tiuwai.

Jeremias

Jerusalén Judájai pachisa chicham etsegkamu

(1—25)

Yama nagkamchaku agagbau

¹ Profeta Jeremias Hilquíasa uchiji sacerdote wegantu, Benjamígka nugken yaakat Anatot pujujakua nuna, Tuke Pujuu chicham etsegtugkata tusa ausauwai. ² Tuke Pujuu Jeremiasan ausauwa nunak, Amónka uchiji Josías Judá apuji wajas trece mijan inamai, chichaman ujakui. ³ Tuja nuigtushkam Josías uchiji Joaquim Judá wegantu aidaun apuji aajakua duishkam Apajuik Jeremiasnak ausauwai. Tuja Josías uchiji tikich Sedequíasa Judá apuji wajasa inabaujin nantu Julion achiak, once mijanan ejeyuwa nunak, Apajuik Jeremiasjaig kuashta chichasui. Nunú tsawantin Jerusalégkan jetekag depetuk, Israel aents aidaun achijag yajuakajui.

Apajuí Jeremiasan mina takagtusta tusa inagbau

⁴ Tuke Pujuu mina chichagtak:

⁵ “Wi aminak eke akiintsuminig, mina chichamjun ashí nugkanum etsegtugkati tusan etegkauwaitjame”, tujutmayi.

⁶ Tusa tujutkui wi ayaakun: “Chah, apu Tuke Pujuuwah, wika tsakataitag nuniau asan jintiaja chichatnak dekasjai”, tibaijai.

⁷ Tusa tai nii chichagtak: “Tsakataitjai tusamek tiipa. Wi amina tuwi awemattagme nuwi amek wetatme, nunikam wi titatjam nunú etsegkattame.

⁸ Makichkish ishamkagtukaipa wi aminak kuitamkattagme, wi nunak dekas umiktinjun tajai”, tujutmayi.

⁹ Nuna tusa Tuke Pujuu wenujun achigtuk chichagtak:

¹⁰ “Antukta nijah, aminak yamai nagkamas aents nugka muunnumia aidaush, nuna apuji aidaush antugtamtakinun, tuja tsaktinun, ijinatnün, tsaikbau ataktu yaaktamtatnün ajakmatnum senchintikajame”, tujutmayi.

¹¹ Nuna tusa chichagtak: “¿Jusha wajimpaya?” tujutmayi. Tujutkui wi ayaakun: “Anka almendro kanawegai”, tibaijai. Tusa tai Tuke Pujuu aijak: ¹² “Dekas tame, wika mina chichameg uminkati tusan antaku pujuttajai”, tujutmayi.

¹³ Nuna tujuti ataktu chichagtak: “¿Jusha wajimpaya?” tujutkui wi ayaakun: “Ichinak ekenkamu kuwaak nujinmanini yantak ukagattak eketui”, tibaijai.

¹⁴ Tusa tai Tuke Pujuu chichagtak:

“Nujinmaya juwaki tsumujiya aatus aents
batsata nunak suwimkan susattajai.

15 Dutikakun aents nugka muunnumia
nujinum batsata nunak ashí untsuktatjai.
Dutika ai nuna apuji aidau kaunawag
Jerusalégnum waitaiya nuwi kaunawag,
yaakat peejamua nuna tenteawag batsamtusag,
Judá wegantu aidaun jeteka depetuk
achija yajuakgatatui.

16 Nuni suwimkan susattajai,
aents aidau mina umigtutsuk wainka apajuímtain
tikich aents aidau emematin aina
nuna dakumak najanawag, nuna emematuinak
kugkuin incienson apenau asagmatai.

17 Untsu amek umintsata;
nunika weme wi amina titatjam nunú ashí etsegkata.
¡Wainka ishankagtukaipa!
Ishankagtakminig shiwagjai igkuniak
sapijin kujaiti titatjame.

18 Wi aminak yaakat peejamu utumainchawa iman,
jiju hierro ajiamu kupinchauwa iman,
tuja yaakat broncejai peejamu tsaika
utumainchawa iman awajsajame.
Judá wegantu aina nuna nugkenig,
tuja dita apuji aina nujai shkam,
sacerdote aina nujai nagkamas
ashí aents aina nuna chichagkati tusan
senchintikajame.

19 Jetepakgatatui, tujash depetamkachagtinai,
wagki wi amina kuitamkatasan,
amejai pujau asamtai.
Witjai Tuke Pujuu ashí senchigtinnuk,
junak dekas uminkatnun tajai”, tiuwai.

2

Israel aents aidau pegkegchaun takainak Apajuújai shiwagmagawagbau

1 Tuke Pujuu mina chichagtak:

2 “Jerusalén wetá, nunikam ashí aents aidau senchi untsumka
chichagkum aatus Tuke Pujuu tawai tita:
“ ‘Ame tsakat asam ima minak umigtin ayum nuna aneakjai.
Tuja yama nuwatkamu aishin aneemaina
imatikam anentiume, nuniau asam
uwejush ajakmamash tsapamainchaunum
juki emaish pataetugsam miniyume.

3 Israel aents aidauk midau agtin etegkamu ayi,
ditak ajak ajakmamu yama nagkamchak
shiig pegkejan nejegama iman aajabi.
Tuja ditan waitkainakuig,
wi nunak suwimkan su ayajai.
Nunak dekas dutikamujun’, tajai”, tiuwai.

⁴ ¡Israel aents aidauwah, Apajuí chichame antuktajum! ⁵ Tuke Pujuu chichagtamak:

“Atumi apachjum aajaku aina dusha
¿waji utugchatan waitjukajaya minash
tupanjujush ainawa?
Dakumka najanamu pegkegchaun emematu yujau asag,
ditashkam nuninuk wajasajui.

⁶ Nunidau asag, dita apachji aidau
Egipto nugkanum batsatun jiija yajuakan,
uwejush yumi atsau, muja yumpunjau aidau,
ishamain aents aidauh pujumainchau,
makichkish nagkaemamainchau
ishamain wegajunum wi kuitamsan
emauwaitag nunak aneetsuk pachitkachajui.

⁷ Wi atumnak juju nugka pegkeja juwi
ajakmawag yuwatnume tusan ikaunmawaitjime.
Tujash atum kaunajum mina nugka pegkeg ayá nunú emesjauwaitjime.
Nuadui mina nugka pegkeg ayá duka tsumain awajsaugme.

⁸ Sacerdote aidauh mina pachittsag inimsachu ainawai;
tuja mina chichamjun jintinkagtin aidauh
makichkish waitkachaju ainawai,
apu aidauh pegkegchaun takamjutsau ainawai,
tuja mina profetag aidauhkam
Balan etsegtuinak, mina chichamjunak
etsegekachu ainawai.

Nunidau asag dakumka najanamu aidau
wainak emematujaku ainawai.

⁹ Nuadui atumnak, atumi uchijum aidau,
tijajum aidaujai suwimkan jukitnume tusan umigkattajime.
Nunak wi Tuke Pujuu dekas umiktinjun tajai.

¹⁰ “Etsa akaetaiya nuni nayantsa ajuntaijin
yaakat ayá nuwi wetajum,
nuniakjum Quedar nugkanum aents awematajum.
Dutikajum inimsatajum

¹¹ tikich aents dakumka najanamun emematin aina dusha,
atum wajuakeajum ankampash
nuna idayinak, tikichin nemaju yujau aina.
Nunú aents aidauk wainka apajuímtai dakumka
najanamun pegkegchaun emematin ainayatkush,
yapa yapajiakuag wechau ainawai.
Tujash mina aentsug aina duka dakumka
najanamu aidau yujajak, dekas wi
Tuke Pujuu senchigtinaitag nunak idaitusaje.

¹² Nugka múunta duka nuna antuk
puyatuk ishamak senchi kujawai.
Witjai Tuke Pujuu. Nunak dekas tajai” tiuwai.

¹³ “Mina aentsug aidauk jimajan tudaun takamsaje:
Yumi pukuni pujutan sukagtina duka witjai,
nuniaig mina kajimatjukiag idaitusaje.
Nuninak yumi aimentain chigkaejaun tikichin umikaje.”

*Israel aents aidau**Apajuín umigkachaju asag**suwimka jukiag waittsagbau*

14 “Israel aents aidauk wainka inaku waitkataig ainatsui, Israel aents aidauk inaku waitkatai atinuk akiinachajui.

Tujash ¿wagka imatika waitkamash ainawa?

15 ¿Wagka imatikash leónjai betek jetenakush senchish unsumainawa?

Dita nugkega duka yaaktaji aidau apegkam pegkegchau wajas bashiak awai.

Nuwi pujauk makichkish atsawai.

16 Menfisnumia suntag aidau,

Tafnesnumia aidaujai buukmin tsaigtamjaje.

17 Nunak wi Tuke Pujuu atumi Apajuíjum asan, kuitamka itamaitkujum mina kajimatjukiu asajum dutikam asaugme.

18 Tuja yamaish atumesh

¿waji wakegakjumea

egiptunmaya suntag aidau asirianmaya aidaujai

atujatkatajum tusa ditajai chicham umikmi

tusagmesh tajume?

19 Atumek intimkiu, pegkegchau takamin ainajum duwi dekas nunin ainagme tama ajume.

Nuadui mina umigtichagtaish,

waji utughchatak miniawa nunú wainkajum dekaskeapi titajum.

Witjai apu Tuke Pujuu ashí senchigtinnuk, nunak dekas tajai.

20 Yaunchuk nagkamsajum wijai shiwagmagajum, mina umigtut dakitakjum:

‘Apajuí umigtak dakitaji’, tiuwaitjume.

Tau asajum, mina umigtutsuk

dakumka najanamu aidau nain aidaunum emematkujum,

numi kampuja aidau wakentín nuwa akika dutikataijai betek wajasjum,

pegkegchau takama yujayugme.

21 Wi atumnak uva numiji

dekas shiig pegkeg etejamu juki ajamaina

iman amainun waji ajataitkuish ajauwaitjime.

Tujash ¿wagka imanikjumesh pegkegchaush wajasugme?

¡Imaniku asagmin wainkatag takunush waintsujime!

22 Lejiajai nijamakjumesh, tuja jabón pegkeg aidaujai

atum wakegamu nijamakjumesh,

atumi pegkegchaujum makichkish esakaumaitsugme.

Witjai Tuke Pujuuunuk, nunak dekas tajai.

23 Ibau pegkegchau ainayatkugmesh

¿wajukeakjumea iik pegkegchauk takatsji,

tuja dakumka najanamu aina dushakam

emamatuinatsji tajume?

Nijah, nugka Ben-hinom aajakua nuwi

wakeen pujusjumesh wajukin ayugme nunú adeagtajum,

nunikjum dekaskeapi titajum.

Atumek camello numpajak emetnag

pujuschamin wajama nujai betek ainagme.

24 Atumek burro numpajak
 aishmag entsamjutkati tusa egak,
 dase dasentai mejea, mejea, mejea wajak
 tupikaki ikam akumkuig,
 makichkish emetmaitsu nujai betek wajagme.
 Imaniau asamtai, aishmag egakug yupichuch igkuinai.

25 ¡Israel aents aidauwah,
 sapatjinchau tupika yujasjum dawem ichiajaigpa,
 kitakai jinawaigpa! tusa tamash,
 atum chichaakjum:
 Atsa, duka makichkish nunikchattawai,
 iik tikich aents aidau dakumkamun emematin aina
 nunú emematmi tusa wakegau asa,
 ditajai shimaji tusajum shimutjume.

Israel aents aidauk dita pegkegchaujin suwimak suwam atin

26 Atumek kasa kasamkatatus wekagu waikam
 datsaamama numamtuk, atumi apujum aidaujai,
 sacerdote aidaujai, profeta aidaujai ashí datsagatjume.

27 Atumek numi chichagkujum:
 ‘Ametme iina apajimek’, tajume.
 Tuja kaya chichagkujum:
 ‘Ametme iina dukujig’, tajume.
 Tujash atumek minak diigtsuk tuntupmatjagme.
 Nuniyatjukum ishamainnum jegakjumek:
 ‘¡Ayamkagtukta!’ tusajum segatjume.

28 Tuja atum aidautijum atumek dakumka najanamu
 apajuima yujaujum dusha ¿wajukawaje?
 Atumi apajuimtai aidauk yaakat kuashta iman ainawai.
 Nunú aidau kaunawag atum ishamain igkuagminish
 ayamjupaktinme.

29 ¡Atumek minak tuke intimjutin ainagme!
 Nunin asajum minak waikagmek pegkegchawk chichagtumaitsugme.
 Witjai Tuke Pujunuk, nunak dekas tajai.

30 Atumi uchijum aidauk
 suwimak suwakuish waika dutikmainai,
 wagki imanik suwimka juinakush makichkish unuimainatsui.
 Atumek león kajeaujai betek
 mina profetag aidau ijinawaitjume.

31 Tuja atum yamai uchi aidautigmeshkam
 Tuke Pujuu chichame antuktajum.
 Wika uwejush nimpain asamtai,
 waittayama dutikankesh waitkachuitjime,
 tuja waa suwenum pujusa waittayama
 dutikankesh waitkachuitjime.

Dutika waitkashtayaitkugmesh ¿wagka iik
 agkan batsatji, nuniau asa ataktuk
 aminak emematchattagme tusagmesh tujutjume?

32 Nuwa aishinatnuk jáanch aishinku nugkutainak
 patakumtai aidaujaig makichkish kajimatbaitsui.
 Tujash mina aentsug aidauk yaunchuk
 minak kajimatjukiaje.

33 ¡Amek pakijintai aina nuanuig shiig yachaitme!

Iman asamin nuwa akika dutiktai aina duka aminiyan unuimainawai.

³⁴ Amina jáanchjum aidauk aents pegkegchaun takachu aina nuna numpen, ujudauch aidau numpejai maatug numpak wajasui. Makichkish takamsachu aig, tsagkugsuk tuke aneamam mainaitme.

³⁵ Nuninaitkum datsantainkas chichaakum: ‘Wika Apajuí kajegtukti tusanuk pegkegchaunak takamtsujai’, tame. Ayu kame takamtsujai tusa imatu asamin, nuna dekajuatasan apu chichama inagdau aina nuwi ematjame.

³⁶ ¿Wagka tujash atuniktinjum egaakmesh imanikmesh waugtame? Auk Asiria nugkanmaya aidau idaitamsa antsag Egipto nugkanmayashkam idaitamsattawai.

³⁷ Mina kumpag ainawai tame nunak wi dakitjan idaisajai. Nuadui amek egiptunmaya aidaujai atunikan maaniatjai tukamam depetamkagmatai, datsaaja wake besekam wakittame. ¡Amina kumpajum ainakush makichkish yaimpakchagtatui! tujamui Tuke Pujuu”, tiuwai Jeremías.

6

Israel aents aidau Apajuín intimjukiagbau

¹⁶ Apajuí niina aentsji aidaun chichajak: “Jintanum wajasjum diistajum, yaunchuk jinta pegkeg aajakua dusha tuki ayi tusajum inimsatajum. Jinta pegkeja nunú ainukujum ayamat igkugtatjume”, tujamui.

Tujash dita chichainak: “Atsa, iik nii tawa nunú umigtak dakitaji”, tuinawai.

¹⁷ Jinta niimin aidau utugchat atai, etsegkatnun Apajuí ishiaku asa, Israel aents aidaun chichajak: “Dita chicham atai etsejainakui antuktajum” tiuwai.

Tusa tamashkam dita chichainak: “Tik nunú antutak dakitaji”, tuinawai.

¹⁸ Tusa tiagtai Apajuí chichaak: “Mina aentsug aidaunash itugkagtajak nunú tikich nugkanmaya aidautigmesh dekatajum.

¹⁹ Ashí nugkanmaya aidautigmesh antuktajum: Mina aentsug aidau dita wakegamun takastag tuidau asag, wi chicham umiktajum timawa nuna dakitug umitsuk idaisaju asagmatai, wi ditanak suwimkan susagatjai.

²⁰ ¿Wagka Sabá nugkanmaya kugkuin incienso jukigmesh itagtuaugme? ¿Wagka tikich nugka atushtanmaya

kugkuin jukigmesh itagtuaugme?
Atum anentag itaamu aidau, tuja mina emematjaku
kuntin maa nuna neje ashí apeajum duka
minak shiig awajtatsui.”

²¹ Nuna tusa Tuke Pujuu chichaak:

“Wi shiwag aidaun ishikattajime,
dutika ai jetepakag,
uchijum aidaun,

atum pujamunum nuna yantamen ijunag pujuidaunak
atumi kumpaji aidaujai ashí ijinatnume, tusan”, tiuwai.

Nujinmanini jeteka ijinam agtin

²² Tuke Pujuu chichaak:

“Aents atushat nujinum batsamin senchigtin aidau
uminainawai maaniawagtatus.

²³ Suntag aidauk puyag aidaun akentai aidaujai
yajuakag umintsaje;

ditak magkagtin wait anenkagtuchu ainawai.

Dita untsaubaujig nayants uutbaujai betekai
caballonum ekemiag mininawai
Jerusalégkan jetekagtatus”, tiuwai.

²⁴ Nuna aents aidau antukag chichainak:

“Nunú chicham dekawaja
sapigmainaku kakaumainchau dekaapeaji,
nuniaku nuwa tsawanji
jegajim uchin najaimak waitama imaniaji.

²⁵ Nuadui makichkitigmekesh ajanmak wegpajum,
tuja jinta ainjagmesh yujasaigpajum,
;shiwag aidau puyaja yajuakag mininawai!
¡Ashí yantamnumak sapigmainawai!

²⁶ Mina aentsug aidauwah,

jáanch wake besemag pujaku nugkutai nugkugjum
yuku tadaetugtajum,
nunikjum makichik uchi pujau jakamtai, wake
besemag dekapeaku buutmaina imanikjum buuttajum;
wagki iina ijipawagtinuk dukap atsuk
kautjamkagtatui”, tibaijai.

²⁷ Tuja Tuke Pujuu mina chichagtak:

“Wi aminak mina aentsug aina nuna pujutish
wajukuk ainawa nuna diigsati tusan
apusabiagme”, tujutmayi.

²⁸ Tujutkui wi ayaakun:

“Ditak intimkiu, tsanumkagtin, chichama antuchu,
pegkeja iman wantinaidau, tujash
chichamesh pegkegchau antuntikmainchau
bronze, hierro katsugma iman ainawai.

²⁹ Jiju jinum jiyamak kuwija
pegkegchaujin utsanak pegkeg weawai,
tujash aents pegkegchau aina nuna
iwagmainuk atsawai.

Nunú iwajatag takuish, wainka tsawan megkaemainai.

³⁰ Nunin asagmatai ame idaisau asamin:

‘Plata pegkegchau asagmatai utsagbau’

tuu adaikagtinai.”

7

Jega Apajuí emematku ijuntai jegamkamunum Jeremías chichagkagtukbau

¹ Tuke Pujuu Jeremíasan chichajak:

² “Jega Apajuí emematku ijuntainum wetá, nunikam nuwi wajasam juju chicham etsegkum: ‘Judá wegantu aidautijum Apajuí ememattag tusajum juju jeganum utsanin aidautijum, Tuke Pujuu Israel aents aidaun Apajuíji ashí senchigtina nuna chichamega nunú antuktajum:

“ ‘Atumi pujutjum, pegkegchau takataijum aidaujai iwagmamjatajum, nunikagmin kuashat tsawan juju nugka juwi iwaku batsamsatnume titatjime.

⁴ Waita jintinkagtin aidau chichagtamainak:

¡Jega Apajuí emematku ijuntaig jujuwai, tusa ujpainakuish, duka antugkaigpa!

⁵⁻⁷ Atumi pujutjum iwajatajum, nuniakjum tikich aidaujaish, pegkegnum yainiktajum, tuja aents tikich nugkanmaya aidau, bitaik aidau, waje aidau, shiig akikchatnaitkujum inaku waitkajum nunú idaisatajum. Nuniakjum aents takamsachu aig, maajum dushakam idaisajum, nuigtush wainka apajuímtai aidau emematkujum, atumek pegkegchau wegajum nunú ashí idaisagminig, juju nugka juna atumi apachjum aidaun susauwaitag nuwi kuashat tsawan iwaku batsamsatnume titatjime.

⁸ “ ‘¡Tujash atumek wait chicham, atumnash pegkegnumkesh yaimpakchatna nunú ima dekas antugjume! ⁹ Atumek kasamjume, magkagtagme, tikichi nuwejai tsanijnjume, nuninaitkujum tsanumkujum Apajuí anagmagme, tuja wainka apajuímtai aidau Baal tikich aina nujai yaunchkesh wainchau ainayatkujum emematkujum kugkuin incienso apé yujagme. ¹⁰ Nunin ainayatkujum juju jega mina emematjaku ijuntaya juwi kaunajum, juju jega juwi pujakuits, uwemtak jumainaita tajume. Nuadui agá jiinkigmek pegkegchau tsumain wi dakitamu aina nunú takagme. ¹¹ Atumek mina emematjaku ijuntai jegamkamua duka kasa batsamtaí emaugme, wika nunak ashí wainkajai. Witjai Tuke Pujunuk, nunak dekas tajai.

¹² “ ‘Israel aents aidauwah, yama nagkamchak mina emematjaku waitai pegkejam aakmakbau Silónum aajakua nuwi wetajum, nunikjum diistajum wisha nunú jeganash atumi tudajinish itugkauwaitja nunú.

¹³ Wika atumi pujutjumín pachisan atumnak kuashta chichagkauwaitjime, tujash mina umigtutak dakitjauwaitjume. Nuniau asajum wi tabau antuka umitsuk pegkegchau takata nunú ainjauwaitjume. Witjai Tuke Pujunuk, nunak dekas tajai.

¹⁴ “ ‘Nuadui, juju mina emematjaku ijuntai jegamkamua nuna wi atumin, tuja atumi apachjum aajaku aina nunashkam susauwaitag, nuwi atum kajinmamsajum anentaimjum nunak, wi amasu akunush wi yaunchuk

nunú aak Silónum aun tsaikuitag dutiksanuk tsaiktatjai. ¹⁵ Dutikakun yaunchuk atumi yatsum Efraín wegantu aidaun jiijan utsagkuitag dutiksanuk atumnashkam utsagatjime' tujamui Apajuí", tiuwai Jeremias.

Israel aents aidau Apajuí umigtan idaisagbau

¹⁶ Apajuí chichagtak: "Jeremiasah, yamai nagkamsamek juju aents aina nunú pachismek segatipa, tuja dita anentaimtusmesh buutipa, tuja yaigta tusa segatkumesh waitkagsaipa, tujutkuminish antugkashtatjame.

¹⁷ "Judá wegantu aidau nugken tuja Jerusalégnum jinta aina nuwi pegkegchaun takaina duka ¿amek waintsumek? ¹⁸ Uchi aidau chigkimin ikaunmainawai, múun aidau jiiin ikapainawai, nuwa aidau pagkan inajuinawai dita apajuímtaiji nuwa shigmauch nayaimpinmaya etegkamu tuina nuna emematuinak susatnun. Dutikainak nuigtushkam tikich wainka apajuímtai aina nuna emematuinak, vinon suwina duka mina dushiktuinak aninawai. ¹⁹ Tujash dekas minak dushiktuinatsui, ditak pempeuntumakiag datsantan dushikmamainak aan yujawai. ¡Witjai apu Tuke Pujuunuk, nunak dekas tajai! ²⁰ Nuadui wi kajekbaujuu juju nugka junak aents aidaun, kuntin aidaun, numi aidaun, ajak aidaun, ashí ijinattajai. ¡Wi kajekbaujua duka jiijai betek kakajus kajinchauwai! Nunak dekas uminkatnun tajai."

²¹ Tuke Pujuu ashí senchigtin, Israel aents aidaun Apajuíji niina aentsji aidaun chichajak: "Atum wakegakjumek mina eme anenjusjum anentag sujustin aina duka, kuntin maa nuna neje ashí apeatin aidaujai yajuakjum ijuma pujutajum, dutikajum nuna neje yuwajum tagkaijum kantaushmaktajum. ²² Untsu atumi apachjum aidau Egipto nugkanum batsatun jiijuitag nunak wika mina eme anenjusjum anentag sujustajum, nuniakjum kuntin maajum nuna neje ashí apeatajum tusanuk ditanak inagchauwaitjai. ²³ Wika ditanak mina umigtuktinme, nuninakuwi wi dita Apajuíji atajai, untsu dita mina aentsug atinme tiuwaitjai. Tuja nuigtushkam chicham umiktinun wi susajuitag nuna umiktinme nuninak shiig batsamsatneme tiuwaitjai. ²⁴ Tujash minak umigtukchajui, nuigtush puyatjusagkesh dekaskeap tawa tujutchajui. Umidau asag, anentainkachu najaneawag dita wakegamun takajaku ainawai. Nunidau asag mina idaituinak nuni senchi pegkegchau wajasajui. ²⁵ Atumi apachjum aidau Egipto nugkanum batsatu jiiinjawu aina duwi nagkamsan wika yamaikish atumnak profeta mina chichamjun etsejin aidaunak makichkish mijattsuk tuke ishitnaitjime. ²⁶ Imatikamaitkujum atumek minak umigtatsjume. Nuadui mina chichamjuk puyatjusjumkesh diitsuk, atumi apachjum aidaun nagkaesau pegkegchau ainagme.

²⁷ "Jeremiasah, antugtampakshin ainaigkish, tuja aipakchagtin ainaigkish, juju chicham senchi untsunkam ashí etsegkata. ²⁸ Ame dita chichagkum: 'Juu aents aina duka Tuke Pujuu dita Apajuíji umigtanak dakituinawai. Nunidau asag Apajuí jintintuatag tamash dakituinawai. Dita dekasenum chichatajig shiig atsujuinawai', tita" tujutmayi.

Jerusalégnum pegkegchaun takasagbau

²⁹ ¡Jerusalégnumia aidauwah, intashim esajam aina duka tsupigjum utsagtajum! ¡Dutikajum muja uwegshunum shiyakjum, nuwi yujasjum wake besemag pujaku kantamta kantamatajum, wagki atumnak Apajuí kajegtamak idaitamsau asamtai!

30 Apajuí chichaak:

“Judá wegantu aina duka wi dakitamu aidaun, dakumka najanamu pegkegchau tsumain aina nuna mina jegag pegkegma nuwi awayawag mina jegajun pegkegchau etugtiaje. 31 Tuja nuigtushkam, wi dutikata tichamaitak makichkish anentaimtushtaijun, dita uchiji aidaun nawanji aidaujui maawag, apeenak dita apajuímtaijin emematiagtinun Ben-hinom nugka ségaju awa nuwi altar Tófet tutain najanawaje. 32 Tujash nunú Tófet, Ben-hinom tutai aina nuna daajig dukek achagtinai. Nuna daaji yapajinkatnuk tsawan jegattawai. Nunikmatai: ‘Nugka ségaju aents aidau kajeetai’, adaikagtinai. Witjai Tuke Pujuu, nunak dekas tajai. Tuja aents jinawajunak tikich nugka ukumamain atsau asamtai, Tófet tutaya nuwig batsakiagtinai. 33 Dutikamun, nuna ayamjumainuk atsau asamtai chuweg aidau, kuntin aidau yuwa amukagtinai. 34 Tuja Judá wegantu aidaun yaaktaji aidaunum jistamku kantabau, shiig aneamu, nuwenbaunum shiig aneaku kantabau aajabia nunak ashí emegkagtatjai. Dutikamtai Judá aents aidau nugkega duka bashiak itajak wajas asattawai.”

9

10 “Nunikmatai muja aidaunum yujasjum
 “atumi tagkujum aidaun yutaiji chijichi aidauk
 ashí apekbau asamtai,
 wake besemag dekapeakjum buuttajum.
 Tuja imatika apekbau asamtai,
 nuni nagkaematnak dakitainawai;
 tuja atumi tagkujum aidau shinaukesh
 makichkish antuenatsui,
 chigki aidaush, kuntin ikamia aidaush
 ashí pisag megkaejaje.

11 “Judá wegantun yaaktaji aidaunak wi ashí tsaiktatjai,
 dutika ai aents atsau bashiak agkan wajas asatnai.
 Jerusalégnashkam tsaiktatjai, dutika ai
 ayatak kaya tuwasua weaku atatu.
 Nunú nugkanmak ikamia yawá aina duke
 batsamsatnai, tujamui Tuke Pujuu”, tiuwai Jeremías.

12 Nuigtu Jeremías chichaak: “Juu nugkanum yaakat ayá dusha ¿wagka imatikaish tsaikbauwaita? Juu nugka juni waya nagkaebauk makichkish atsawai.

“iUwegshuchuashit tumain wajas awai! ¿Yaita nuna shiig dekamainush? Profeta Apajuí awemamu asa, ¿nuna pachis iina ujamainush awash?” tiuwai.

13 Tutai Tuke Pujuu ayaak: “Ehe, auk chicham umiktinun wi ditan susauwaitag nuna intimkiag umitsuk idaisaju asag aikam asaje. 14 Nuna umitsuk dita apaji emematujakagbaun nuna, ditashkam dita anentai wakegamun Baal aidaun emematiaju ainawai. 15 Nuadui wi Tuke Pujun, Israel aents aidaun Apajuji, ashí senchigtinun juna tajai: Wi ditanak yutai yapaun ayujawagtatjai, tuja umutai jatai egketuamun aajagtatjai. 16 Tuja yaunchkesh dita apajigkesh wainajakhamunum tikich nugkanum dapampaakan utsagtatjai. Dutika ai, shiwag aidau puyaja juki yujagsag ashí amuktinme titatjai”, tiuwai.

Jerusalégnunia aidau awake anentaimjag buutiagbau

¹⁷ Tuke Pujuu ashí senchigtina nunú chichaak:

“¡Juju shiig antugtuktajum!

Aents jakamtai buutin atinme tusa

etegjamu nuwa aina nunú utsuka ikaunmatajum.

¹⁸ ¡Duka dekas buuttan yacha aina nunú wamak kaunawag atumin egampagtinme!

¡Imatuinak dita jünig negaikjinak bete wajastinme!

¹⁹ Nunik Siógnum nagkamas buutuinak:

‘¡Jauchah, wagkaik imatika tsayamash asaji!

Iina jee aidaunak ashí tsaigtamkaje, tikich nugkanum shimaku ukukiagmi’, wajaidau antuenawai.

²⁰ Tuja nuwa buuttan yacha aidauwah, Tuke Pujuu chichame shiig jitusa antuktajum, nunikjum atumi nawanjum aidau kumpajum aidaujai wake besemag pujaku buuttai, juju aatsa jintintuatajum:

²¹ Iina jee aidaunum jata wainjamae, tuja apu pujusa inamtainish wayae, nuniku asa, uchi piipich jintá wasugkamak yujaun, datsauch aidau plazanum yujaunashkam ijinui.

²² Dutikamu asa aents jinau aidauk, ajak juwaam kakegak batsamama numamtuk, tuja tsuwat ukaja ukukmawa numamtuk wajas awai. Witjai Tuke Pujuunuk, nunak dekas tajai.

²³ “Tuja aents yacha duka niina yachajinigkik eme anenmamigka, tuja aents senchigtina dushakam, niina senchijinigkik eme anenmamigka, tuja wiakchashkam niina wiakchajinig eme anenmamigka.

²⁴ Dekas eme anenmamsatatus wakegakug, wi Tuke Pujuu ashí senchigtinaitag nuna shiig dekaa umigtak eme anenmamainai. Wika nugkag anenkajai takajai, nuadui anenka nunú tsanumtsuk shiig takamua nujai shiig awajtawai.”

14*Kuashat tsawantai yumi yutugchamu*

¹ Yumi yututsuk kuashat tsawan au asamtai, Tuke Pujuu Jeremíasan chichajak:

² “Judá wegantu aidauk wake besemag dekapenak buutuinaawai, dita yaaktaji aidaunmash waji sujutaji aidauk atsujuinawai.

Ashí aents aidauk nuská batsatui, tuja Jerusalégnunmak senchi buutuinaawai.

³ Wiakuch aidauk dita inake aidaun yumi egaktajum tusa ishimainawai, tusa tima yumi aimentinum shiyakag egainawai,

tujash yumik atsawai.

Nunitai yumi shikitainak wainak takus yuja yujakua waketuinak, puyatkiag datsantin buuken dukumakag waketuinawai.

⁴ Tagkugtin aidauk yumi yutachu asamtai, nugka buku wajasmatai, senchi puyatuinak buuken dukuinawai.

⁵ Nugka buku wajasu asa chijichi jinaamtai, japa aidauk yumainji atsujam, uchiji yama petsakbaunak ukukiag yaja shimuinawai.

⁶ Ikamia burro unuinakchamu aidauk chijichi yumain atsutai, nain uwegshunum ijunas nujantai jinuinak, ikamia yawajai betek dase dasentai mejea mejea wajainawai, imaaninak jaka iyainawai”, tiuwai.

Profeta Jeremías Apajuí segamu

⁷ Jeremías Apajuín segaak:

“Tuke Pujuuwah, iik dekas ame umigtsuk amina emtimin shiig kuashat pegkegchau takamsaji. ¡Tujash wait aneasam ame tuke pujuuwaitam nunú anentainsam yaijatkata!

⁸ ¡Ametme Israel aents aidau uwemtiknumek, ametme tsawan utugchat akuish ayamkagtukam uwemtikagtinmek!

Imanaitkumesh, ¿wagka aents tikich nugkanmaya ijaak tau asa, ayatak diijatus kanag tsawak wegama numamtukesh awajkagtame?

⁹ Israel aents aidau Apajujiyah, ashí aents aidauk dekainawai amina aentsjum ainag nunak, tuja amek jutijai pujame. ¡Kajimatkimek idaikagtusaipa! Aents kakakchau maanitan yachachu ayamkagtumainchauwa nunin wajasume”, tiuwai.

¹⁰ Tuke Pujuu aents aidaun chichajak: “Atumek wainka apajuímtai aidau ememattasajum ima senchi wakegagme, nuniau asajum wainka yujagme, anka minak shiig awajtatsui, nuadui wi atumnak suwimkan amastatjime”, tujamui.

¹¹ Nuna tusa Tuke Pujuu mina chichagtak:

“Jeremíasah, anú aents aina nuna yaigti tusam segatkumek waitkag-saipa. ¹² Yujumak ijagma pujusam segatkuminish, wika antugkashtatjame; kuntin aidau, trigo, cebada aidau kuashat anentag sujakjuminish, wika ju-jukchattajime. Wika atumnak maaniamunum, nujantai, jatai ijinattajime”, tujutmayi Apajuí.

¹³ Tujutkui wi ayaakun:

“Tujash apu Tuke Pujuuwah, tikich profeta aidau aents aidaun chicha-juinak, maaniamuk atsuttawai, tuja nujanchakam tepeashtatui tusa, amina au nii shiig utugchat atsaunum batsamsatnume tusa yainpaktatui tuinawai”, tibaijai.

¹⁴ Tusa tai Tuke Pujuu aijak:

“Nunú profeta aidau mina daajun pachis tuina nunak waitjuinak tuinawai. Wika ditanak, atum wejum chicham etsegkatajum tusanuk makichkish inatsjai. Nuigtush wika ditanak aujuinatsjai. Nunak ditak anentaimas waitjuinak tuinawai. ¹⁵ Nunú profeta aidau wi akatja awemachmaitak mina pachitus, auk maaniamuk atsuttawai, tuja nujan-chakam juju nugkanmak tepeashtatui tuu yuja duka nujantai, puyajai jinawagtatui. ¹⁶ Tuja tikich aents aidau dita ujaina dushakam nunisag nuwe aidau, nawanji aidau, uchiji aidau aatus ashí nujantai, puyajai jinawagtatui. Nunik jinawagmatai, dita iyashi aidauk Jerusalén jinta ayá nuwi tepetag waigtatui, wagki ditan ukumainuk atsau asantai. Nuni akikmakagtatui dita pegkegchau takamsamujinak.

¹⁷ “Nuniktin asantai juju aatsam aents aidau ujakta:

“¡Mina aentsug aidau utugchat ishainun igkugkaju asantai, nuna anentaimtusan tsawaish, kashish mijamtsuk tuke buut pujuttajai! Dita utugchatjiya duka tsupimakbaujai betek najamawai.

¹⁸ Jiinkin ajanum wekaman, aents aidau puyajai kajegkam batsatun wainjai, tuja yaaktanum waikmanchakam, nujantai jinuidaun wainjai. Imanitaish profetakesh, sacerdotekesh, wagkag imaniawa nunak puyatjutsuk wainak tikich nugkanum yujawai’, tujutmayi.”

Profeta Jeremías Apajuín aikbau

¹⁹ Jeremías Apajuín ayaak:

“Apuh, ¿Judá wegantu aidauk tuke idaikumek idaisaum?

¿Yaakat Jerusalékkak yawetjamek idaisaum?

¿Wagka waji jataitkuish ampimakuish, tsagaumainchaush ekagtiume?

Pegkejap batsamsattaji tibaiji, tujash pegkegchau iyanjamamtai, kuashat waituinaji.

²⁰ Tuke Pujuuwah, iina pegkegchaujiya duka dekagmamji, tuja iina apachji pegkegchaun takasu aina dushakam dekaji.

Iik dekas ame pegkegchau takagku tunamagi.

²¹ ¡Amek betek uminaitam iman asam, antugkagtuskek idaikagtusaipa, tuja amina pujutaijum jega pegkegma nunú tsaikaipa! Duka dutiktusuk ame jutijai chicham umikuitam nunú adeagta nunikam betek umikta.

²² Tuke Pujuu, iina Apajuíjiyah, dakumkamu apajuímtai aina duka yuminak makichkish yutumtikmaitsui, ametme yumi nayaimpinmaya yutumtiknumek, ametme ashí najankaumek. ¡Nuadui ima aminig kajintsa anentaimji!” tiuwai.

15

Suwimak atin etsegkamu

¹ Tuke Pujuu chichagtak: “Juu aents aina nunú wait anenjata tusa Moisés, Samueljai segatainakuish, wika juu aents aina nunak wait anenmaitsujai. Jiinag shiyaktinme tujamui tusam ujakta, dutikam jiinag shiyaktinme. ² Tuja tuwi shiyaktatji tusa inimpainakuig ame ayaakum:

“Nii jatai jakati tibauk nunisag jakati;
tuja nii maaniamunum jakatnuk nunisag
maaniamunum jakati;
untsu nujantai jakatnuk dushakam nunisag
nujantai jakati;
tuja achija yajuakam yujas waittsatnuk
nunisag waittsatnume’.

³ “Wi ditanak ipak usumta imajin suwimkan ishitkattajai. Tuja duka juu ainawai: Maaniamunum jinawagtinai, nunikmatai yawá aidau esainiag japisa yujagtatui, chuwag amukagtinai, dutikawagmatai kuntin kajen aidau, shiig amutan amukagtinai. ⁴ Nunak Ezequías uchihi Manasésa pegkegchajin dutikattajai. Wika nunú Judá apuji wajas pujusa Jerusalégnun wajina dutikauwaita nunak kajimattsujai. Nuna antukag nugka múun aidau apuji aidau senchi ishambagatui. Nunak dekás nuniktinun tajai.

⁵ “¿Jerusaléggah, aminash yaki wait anenjamjainta?
¿Yaki amina anempakush buutti?
¿Yaki aminash jamamtuchu pujusti
tusash puyatjutpakti?

⁶ Atumek mina idaitusjum pegkegchau takagtusugme.
Nuniakjuminish wait anentau asan
tsawanta ewae ewaekawan yawegjai,
nuniku asan yamaik ijinattajime.

⁷ Jerusaléggah, aminí aents batsata nunak
chijichin dase umpui utsauwama numamtuk
yaakta ukumtikin utsagtatjai.
Mina aentsug aidauk mina umigtukchaju asag
uchigtuchu juwakaje.

Wi ditanak mina umigtukchaju asagmatai ijinawagjai.
⁸ Dutika ai nayantsa kamatkaji kuashta nuna nagkagas
nuwa aidauk shiig kuashat wajemeakagtinai.
¡Etsash etsantaig nuwa aidauk
dita uchihi datsa aidaujai ijinattajai!
Makichkish nuniktatuapi tachamunum
pachiachbau ishamainun ajunjagtatjai.

⁹ Nuwa kuashat uchigtin aidauk wampainag
iyajag nunisag jagtinai.
Nunikag datsan dushikiam agtinai,
Tuja etsa pegkeg etsantug au suwe wajastinai.
Makichik aentskesh iwaku pujaunak
tikich aents aidau maatnume tusan idaisattajai.
Nunak dekás nuniktinun tajai”, tiuwai Tuke Pujuu.

Profeta Jeremías buutbau

10 “¡Chah, dukuwa wika senchi anentaimkun waitiajai!
 ¡Wika akiinmainchaunas akiinawamiagtai!
 Wika makichik aentsnakesh pegkegchauk awagmachuitjai,
 tujash minak ashí pegkegchaun chichagtuinawai,
 dutijuinak shiwagmatuinakui ditajai maaniajai.

11 Wi ame inatjamun umikchau ataik,
 tuja dita pachisnush amijai chichaschau ataik,
 dita tujutuina duka betek uminkati.
 ¡Tujash mina shiwag aidau waituinakui,
 nuna yaigti tusan
 wi amina segajam duka amek dekame!

12 Tuke Pujuu aents aidau chichajak:
 Suntag asirianmaya, babilonianmaya aina nuna
 depetmainuk atsawai.

13 Israel aents aidautigmek ashí tunamakugme,
 nuniku asagmin atumi tagkujum aidau, wajijum
 aidau, tuja atumi nugkemin ayá nunashkam
 atumi shiwajumin ashí susattajai.

14 Wika shiig senchi kajekjai,
 nuniku asan, jiijai betek apeattajime.
 Atumi shiwaajum aidau achipag tikich nugka atumi wainchataijin yaju-
 pakag,
 dita inainak waitkastinme tusan idaisattajime”,
 tiuwai Tuke Pujuu.

Jeremías Apajuín ausamu

15 Jeremías Tuke Pujuu aujak:

“Tuke Pujuuwah, amek ashí dekame,
 wika amina takaju asan maatag tama ajai,
 minash kajimatjutsuk yainkata.
 ¡Tuke Pujuuwah, mina mantuatag tuina duka
 ayatak dii pujugtsuk eke mina mantuinatsaig,
 suwimak susam ijinata!

16 Tuke Pujuu ashí senchigtinuh,
 ame mina aujtuyum nunak
 wika puyatjusan antuyajai.
 ¡Wika aminuitag duwi
 amina chichamjumin antakun shiig aneyajai!

17 Wika aents pegkegchau takatnak yujajin aina
 nujai ijunja wekaetanak idaisajai.
 Aminu etiuwaitam duwi nagkamsan wika wiki pujajai,
 tuja pegkegchau takat ame kajejam nunak
 wishakam kajejajai.

18 ¿Wagka tujash imaniknush waitush pujaja?
 ¿Wagka wi imanikan waitiag dusha
 megkaemainchawaita?
 Niimpap yainkattawa timajai, tujash idaitusume,
 amek yumi pukuni jiuu kuyua
 buku wegama numamtin wajasume”, tiabiajai.

Apajuí Jeremíasan aikbau

19 Tusa ti ai Tuke Pujuu aijak:

“Nunú anin wanka tuu wekaetsuk,

awake anentaimjam minai minakminig,
mina chichamjun etsegtujin ati tusan yaigtatjame.

Dutika ai ame mina profetag atatme.

Amek ditaig waketmaitsume,

auk dita aminí minimain ainawai.

²⁰ Juju aents aina nuna emtinig wi aminak
yaakat broncejai peejamua iman awajsattajame.

Amina shiwaajum aidau jetepainakush

depetamkachagtatui,

wi aminak ayamjukan uwemtijattagme.

Witjai Tuke Pujuunuk, nunak dekas dutikatin asan tajai.

²¹ Aents pegkegchau aidau mantamatag tuinakuish,

wi ayamjukan uwemtikjattagme;

tuja magkagtin aidau mantamatag tuinakuish,

wi uwemtikjattagme”, tiuwai.

18

Duwe namuka najanin pachisa augmattsamu

¹ Tuke Pujuu chichagtak:

² “Jeremíasah, duwe namuka najanin puja nuna jeen wetá. Nunikamin nuwi chichaman ujaktagme”, tujutmayi. ³ Tusa tujutmatai nuna jeen webaijai. Nunika jegakman nunú aents shikika umutain tornonum najanak pujaun wainkabaijai. ⁴ Nuna najanak pujus, shiig jiinkichmatai, nunú duwenak juki ataktu nagkama nii wakegamunak imatiksag shiig pegkejan najanmayi.

⁵ Nuwi Tuke Pujuu mina chichagtak:

⁶ “Atumek mina uwejuí pujagme, nuadui wika atumnak juju aents duwen namuka najanak itujeawa nujai betek awagmamainaitjime.

“Witjai Tuke Pujuunuk, nunak dekas tajai. ⁷ Wi wakegaknuk, nugka múun aidaunash, tuja apu aidaunash, shiig wamak tsaikan utsajai. ⁸ Untsu nunú aents aidau pegkegchau takatan idayinak mina umigtuinakuig, suwimkan susatasan umigkau akunush suwimkanak sumaitsujai. ⁹ Tuja tikich tsawantai, aents nugka muunnumia aina nunú takainak emkatnume, nuninak senchigtin wajastinme tusanush dutikajai. ¹⁰ Untsu nunú aents aidau pegkegchaun takainak mina umigtuinachkuig, wi dita wajiji aidaun susatag tibaugnash suchauwaitjai”, tujutmayi Apajui.

¹¹ Tuja duwi pujus Tuke Pujuu chichagtak:

“Judá aents aina nuna Jerusalégnum batsamin aidaujai, wi taja nunú ujakta: ‘Atumin suwimka amastasan chichaman umiajai. Tuja suwimak dakitakjume, pegkegchau takat idaikujum pujutjum iwajatajum’ tujamui Apajui tita tujutmayi. ¹² Tusa tamin dita chichagtamainak: ‘¡Wainka tsawan megkaekum tuu wekaetsuk wetá, iik ii wakegamu takainaku batsamsatasa wakegaji!’ tujamiagtatui.

¹³ “Tusa tujamainakui wi ditan chichagkun:

“Tikich aents pegkegchaun takau aina duka

tikima atumjai betekak atsawai.

¡Tuja atum Israel aents aidautigmek

tikima shiig pegkegchau takagme!

¹⁴ Muja Líbano titiji aidaunum bicha nujamag ayá duka makichkish megkaechauwai.

Tuja entsa bichatin muja aidaunum ayá dushakam kuyuag megkaechauwai.

¹⁵ Tujash mina aentsug aidauk minak kajimatjukiaje, nuninak dakumka najanamu apajuímtai aidaun emematuinak kugkuin incienson apé yujawai. Dita yujatai jinta aya nuna imagkag wainak jintachunum yujawai.

¹⁶ Nunidau asagmatai, dita shiwaaji aidau wa wamak waitkamu asag yaaktaji tsaigkam, dita nugkeg bashiak awai.

Ashí aents nuni nagkaemaidauk nuna diisag puyatkg buuken pegag nagkagainawai.

¹⁷ Israel aents aidaunak dase etsa minitainmaya dasentak utsaumaina numamtuk wi utsagtatjai; tuja dita shiwaaji aidaun ishamkag pisagtinme titatjai. Suwimak jukitnuji tsawan jegamtaig, ditanak ausachgatjai, ayatak atsu ayampatuan idaisagtatjai”, tiuwai.

Jeremías maatasa chicham umigkamu

¹⁸ Aents aidau chichainak: “Sacerdote aidau, aents yacha aidau, profeta aidau Apajuí chichamen iina jintinjainamainuk tuke aitnai. Nuadui nii tawa duka makichkish antugkachmi, dutikaku Jeremíasak chicham umigka tsanumjuja maa ajapami”, tuidau.

Jeremías Apajuín ausamu

¹⁹ ¡Tuke Pujuwah, wait aneamam antugtukta!

¡Mina shiwag aidau chichaina nunú antukta!

²⁰ ¡Wi egkema jakatnupun waa muuntan tautjiaje!

¡Wika ditanak pegkegnum yayamaitak, dita mina aan iiktuina duka pegkegchauwai!

Wi ditan wait anentakun juwi taan,

suwimak susaipa tusan amina segajam nunú adeagta.

²¹ ¡Tujash yamaik ame dita uchiji aina duka nujantai jinaati tita!

Untsu nuniachkush maaniamunum jinaati tita.

¡Nunikagmatai dita nuwe aidauk waje uchigtuchu juwakagtinme!

¡Tuja aents múun aidaunak jata ijinatnume!

¡Untsu datsa aidauk maaniamunum jinatnume!

²² Tuja pachiachbau kasa aidau ishitkata,

¡nuna ishamainak pampaidau antuekati!

Wagki ditak wi egkema jakatnun waa muuntan tai umigtukaje.

Tuja wi weamunmashkam iyatnun umigtuinawai.

²³ Tujash Tuke Pujuwah, mina mantuawagtatus chichaman umigtuina duka amek shiig dekame.

¡Dita pegkegchauji aina duka tsagkujaipa!

¡Tuja kajimatkimesh idaisaipa!

¡Ame kajekbaugmin suwimak susata,

shiwag aidau depetuk ijinatnume tusam idaisata!

19

Yumi shikitai intajamu pachisa augmattsamu

¹ Tuke Pujuu mina chichagtak: “Yumi shikitai makichik duwe najanamu sumakta. Dutikam aents aidaun apuji múun aina nuwiya ujumak, sacerdote múun chichin aidaujui untsukam ijumjata. ² Dutikam dita uyuntamsagmatai, Ben-hinoman pakajin wetá. Nunikam yaakta waitiji ichinak duwejai najanamu tutaya nujai niniaku wajasam, wi amina akatjattajam nunú etsegekata. ³ Nuwi wajanta chichaakum: ‘Judá apuji aidauwah, Jerusalégnunia aidautigmejai, Tuke Pujuu ashí senchigtin, Israel aents aidaun Apajuíyiya nuna chichame antuktajum. Apajui chichaak juna aatus tawai:

“ ‘Juju nugka juwi waitut ishamainun awemattajai, dutika ai nuna antuidauk senchi ishamak kujainiagtinaí. ⁴ Wagki Israel aents aidauk mina kajimatjukiag, juju nugka junak Apajuí etegkachua nunin awajsag, ditash wainchataijin, tuja dita apachji aajaku aina dukesh wainajakchamun, Judá wegantu aidaun apuji aidaukesh wainchatai wainka apajuímtai aidaun emematuinak nuwi kugkuin incienson apé yujawai. Nunidau asag juju nugkanak aents takamsachu aina nuna numpeg awajsaje. ⁵ Tuja nuigtushkam, wi dutikatajum tichamaitak, nuigtush makichkish anentaímtachbaujun, Baalan emematuinak dita uchijin maawag patasa apeatnun altaran najadau ainawai. ⁶ Nuadui juju nugka daaji Tófet tutaiya nunú yapagtuatin tsawan jegattawai. Dutikamu asa Ben-hinoman pakaji tutaigkesh achattawai. Juju nugka daajig: “Aents ijinamu” tutaí atinaí. Witjai Tuke Pujunuk, nunak dekas uminkatnun tajai. ⁷ Judá wegantu aidau Jerusalégnunia aidaujui chichaman umina nunak pachimjukan emegkatkattajai. Dutikan shiwag aidau maaniamunum ijinatnume tusan idaisagtatjai. Dutika ai nuwi jinawag tepetag waigkun chuwag aidau, kainisn kajen aidaujui amuktinme titatjai.

⁸ “ ‘Tuja Jerusalégnak ashí tsaikan ishamain awajsattajai. Dutika ai bashiak asattawai. Tuja aents nuni nagkaemaidauk nunú imatika yaakat tsaikbaun diisag ishiamiagtinaí. Nuninakush dushikiagtinaí. ⁹ Shiwag ishamain aidau ditan ijinawagtatus yaaktan tenteawagtinaí. Dutikawagmatai jiintsuk batsamas yumain atsutai, nujantai jinuínak dita uchiji aidaun, nawanji aidaujui yuwatnume, dutikainak pempeentunikiag yudaitinme tusan idaisattajai, tawai Apajuí’, titatme.

¹⁰ “Nunú tusa inagnakam, aents aidau amina uyuntamainak yuja nunú wainainamunum yumi shikitai duwe najanamu takakbaujum ajiaja tsaiikatme, dutika tsaikam ¹¹ chichagkum: Apajuí ashí senchigtina nunú chichaak: ‘Juju aents aina nunak yumi shikitai tsainka nunú iwag-maitsu numamtuk ataktush nantamainchaun tsaiikatjai. Dutikamtaí aents aidauk nuna iyashi aidaunak tikich ukumamain atsau asamtaí Tófetnum ukusagtinaí. ¹² Tuja Jerusaléggak tsaikam Tófetjai betek wajastatui. Witjai Tuke Pujunuk, duka dekaskenum uminkattawai. ¹³ Nuadui, Jerusalégnunia jega aina nuwig, tuja Judá wegantu aidaun apuji aidau pujusa inamtaiji aina nuwishkam minak makichkish emematjishtinme titatjai, wagki ashí yaya aidaun emematuinak nunú jega aina nuna tuntupen kugkuin incienson apeenak, tikich apajuímtai aidaun anentang suwinak vinon ukaidau asag senchi tunamaidau asagmatai. Nuadui duka ashí Tófetjai betek juwaktatui’ tawai Apajuí”, tiuwai Jeremías.

¹⁴ Nuna tusa inagnak, Tuke Pujuu mina chichameg etsegkata tima, Tófetnum weuwa nuwiya wakitkiuwai. Nunik jega Apajuí emematku ijuntai jegamkamunum nuna waitijin jegantatak wajanta ashí aents aidaun chichajak: ¹⁵ “Tuke Pujuu ashí senchigtin, Israel aents aidaun Apajuíjiya nunú chichaak: ‘Juju aents aina duka yaaktajijai nagkamas nuni senchi intimkiag mina umigtutnak dakitjaje. Nuadui dita suwimak jukitnun pachisan timag nunak imatiksasuk suwimkan susagtatjai’ tawai Apajuí”, tiuwai Jeremías.

20

Profeta Jeremías sacerdote Pashurjai

¹ Imer aajakua nuna uchiji Pashur sacerdote Apajuí emematku ijuntai jegamkamun apuji aajakua nunú Jeremías utugchat nagkaemagtinun pachis chichagkagtaun antukui. ² Nunik: “Jeremías achikjum asutiatajum, dutikajum aents achika chimpitai Apajuí emematku ijuntai jegamkamua nuwi jegantatak, Benjamígka waitiji tutaya nuwi ayaumas awa nuni egkeatajum”, tusa inamjauwai. ³ Tusa inamjayatak kashinia duwi kashikmas Jeremías jiiktajum tusa tiuwai. Tusa tímatai jiikiajui, dutikam Jeremías niina chichajak:

“Amina daagminak Tuke Pujuu yapagtugmattawai. Dutijamamtai Pashur idaikum Magor-misabid* namkattame. ⁴ Wagki Tuke Pujuu chichaak: ‘Aminak senchi sapigmitkaktatjame, dutikakun amina kumpajum aidaunashkam sapigmitkaktatjai. Nuadui amesh wainminig shiwag aidau amina kumpajum aidaunak ijinawagtatui. Tuja ashí Judá wegantu aidaunak Babilonian apuji depetuk achija niina nugkeen yajuakti, tuja dutikachkush kuchiiyai kajegti tusan niina idaitustatjai. ⁵ Tuja nuigtushkam ashí dita wajiji aidaunak apu takatai waji akik pegkeg aidaujai nagkamsan shiwajan ashí susattajai. Dutika ai nuna ashí yajuakag Babilonia nugkanum egegawagtinai. ⁶ Tuja Pashura aminak amina pataim aidaujai achipajag Babilonia nugkanum yajupakagtinai. Dutijamawagmatai nuwi pujusam jakattame, nunikamin amina kumpajum aidau Apajuí pachisan wainka tsanu ayum nujai ijumag ukupasagtinai’ tusa Apajuí tawai”, tiuwai Jeremías.

Jeremías senchi waitiak Apajuíyai chichamjumakbau

⁷ Jeremías chichaak:

“Tuke Pujuuwah, amek minak pegkeg chichagtukam unsugkabiume, tusa tujutkumin ayu tusan aikmajame. ¡Amek mina nagkaetasu senchigtinaitme, iman asam wagagtukmayume!

“Minak aents aidauk tuké dushiktuinawai.

⁸ Wi tuwi chichaja nuniaknuk:

‘¡Suwimak juki waittsatin tsawan jegawai!

¡Shiwag ijipatin tsawan jegawai!’

tusan tuké nuna tajai.

Nuadui amina chichamjumin etseju asan

* **20:3** “Magor-misabid” tawa duka hebreo chichamnumak, “ashí yantamnum sapigmamu awai” taku tawai.

kashi kashinig dushikiam pujajai.

⁹ Tuja wi anentaimsa chichaakun:

'Dekas yamai nagkamsanuk Apajuinak kajimatkitjai,

tuja niina daajin pachisnush etseggashtatjai', tajai.

¡Tujash amina chichamem mina anentaijui

jiijai betek nimpak mina ukunchjunash sukuawai!

Dekas yamaik chichakchatjai tajai,

tujash amina chichamjumnak etsegtsuk

idaimainchau dekaapeajai.

¹⁰ "Aents aidau tuke aneas dushiktus chichainak:

'¡Ashí yantamnum sapigmainaji!' tuinawai.

Tikichnashkam chichainak:

'¡Kaunatajum tsanumjuja utugchat apujtusmi!'

tuidaunash antajai.

Mina shiig kumpauchig aidaush

itusag pegkegchaun takasa tusa utugchatan egatjuinawai.

Nuninak: 'Tsanusa dekapsami,

dutikkama ajuaik depetka emegkaktatji', tujutuinawai.

¹¹ "Tujash Tuke Pujuuwah,

amek maanitan yacha depetmainchawaitme,

ame wijaig tuké pujame;

nuadui mina aintuina duka minak depetukchagtatui.

Ame depetkamu asa datsagkag, ame dutikamua

nunak makichkish kajimatkishtinun

tuke augmatu yujatin atinme.

¹² "Tuke Pujuu ashí senchigtinuh,

amek aentsu anentaimtajig shiig wainme,

nuadui ii anentaibaujish, tuja ii dutikatasa

anentaimtamush ashí dekame.

Ame wajuk suwimak susattame nuna wainkatasan wakegajai,

wagki wika midauwa nunak amina idaitusjame.

¹³ ¡Tuke Pujuu kantamjuatajum!

¡Tuke Pujuu ememattajum,

wagki aents pegkegchau aidau

ujudauch aidau waitkagtaish,

nii ayamjuk agkanmitkawai!

¹⁴ "¡Tsawan wi akiinamua duka

shiig pegkegchau atin ati!

¡Mina dukug uchigmatjukua nunú tsawanta duka

pegkegnun chichagtai achati!

¹⁵ Wi akiinamtai: ¡Aishmag akiinae! tusa

mina apajun ujaka shiig anemtiksauwa duka

shiig pegkegchau atin ati.

¹⁶ Utusag nunú aentsuk yaakat Tuke Pujuu tsaikam,

tuke megkaena numamtuk megkaeka tusan wakegajai.

¡Nuniak imaanjaujai betek kashikmas untsumiagtai,

tuja etsa tutupit aish,

maaniamunmas imatuinawa tumainun antak sapigma wekaya tajai!

¹⁷⁻¹⁸ Imanikan waitu pujutnaitkunush

¿wagkanuk akiinawabiajah?
 Aika datsanmain maa ajapeam atinaitkunus
 dekas jakau akiinachamiagtai.
 ¡Akiintsuk jakauwaitkunuk
 wi ukumasbaujuk mina dukuju wake amainai!” tiuwai.

23

Achija yajuakbau waketjagtin

¹ Tuke Pujuu chichaak:

“¡Chah, aents uwija kuitamin, mina uwijun pachitsuk ipisig ishima nunak wait anentajai!”

² Tuke Pujuu, Israel aents aidaun Apajujiya nunú, niina aentsji aidaun apuji aina nuna chichajak: “Atum aidautijum mina uwig aidau dapampaakugme, dutikajum shiig kuitamtsuk ipisjaugme. Dutikau asagmin wi atumnak suwimkan amastatjime, wagki atumi pegkegchaujín achijag tikich nugkanum yajuakaju asagmatai. Witjai Tuke Pujuuunuk, nunak dekas tajai. ³ Tujash wi dutika yajuaktinme tibau asag dutikau ainakuish, mina uwig aidaunak wiki ataktu awakjan dita nugken ikaunmattajai, dutika ai nuwiyan chijichin yuwinak yujakag kuashat wajasagti tusan.

⁴ “Dutika ikaunman, ditan kuitamkagtinun tikich aidaun adaitugtatjai, dutika ai ishankagtutsuk batsamsagtinai. Witjai Tuke Pujuuunuk, nunak dekas tajai”, tiuwai.

⁵ Tuke Pujuu chichaak:

“Mina aentsug aidaunmak
 aents shiig takau, yacha nunú apu atatuí.
 Duka David wegantunmaya atinai.
 Nunú dekaskenmak shiig takastinai.

⁶ Nii inamjatna dui,

mina aentsug Judá wegantu aidauk ayamjumaktinai,
 tuja Israel aents aidaushkam agkan shiig batsamsagtinai.
 Nunidau asag, Apajuí daajinak:
 ‘Tuke Pujuuwai iina depetmitkagbauk’
 tuu adaikagtinai.

⁷ “Tuke Pujuu chichaak: ‘Israel aents aidau Egipto nugkanum batsatun Tuke Pujuu jiihua nuna daajin tajai’ tusa tutaiya nunú yapajinatnuk tsawan jegattawai. ⁸ Nunikmatai nuna idayinak: ‘Israel wegantu aidau Babilonia nugkanum, tuja tikich nugka aidaunum, utsagkam batsatun Tuke Pujuu jiiha yajuak ikaunmauwa nuna daajin tajai’ tiagtinai. Apajuí yajuaka ikaunmam dita nugken batsamsagtinai”, tiuwai.

Profeta waitjin aidau

⁹ Jeremías chichaak:

“Profeta aidaun anentaimtusan
 shiig senchi anentaimkun waitiajai,
 imaniai mina iyashjuk ashí sunatuí.
 Tuja Tuke Pujuu niina chichame pegkegma duwi
 profeta aidaun pachis ujatkau asamtai,
 nuwi senchi anentaimkun,
 aents vinon nampeka wajukmaina numamtuk
 winchainjan iyaumain dekaapejai.

10 Juju nugkanmak,
 ayatak aents pegkegchaun takau aidau,
 pegkegchaun takastatus tupikatin aidau,
 apu adaikam nuna anagma
 tikichi waitkau aidau aatus batsatui.
 Nunin asagmatai juju nugkanak Apajuí pegkegchaunum yumigjauwai.
 Dutikamu asamtai chijichi kagaka megkaejamtai,
 juju nugka juka uwejush wajas asae.”

11 Tuke Pujuu chichaak:
 “Profetayaske, sacerdoteyaske
 pegkegchaun takainawai,
 núnidau asag mina emematjaku ijuntai
 jegamkamua nuwi pegkegchaun takaidaun wainkamjai.
 12 Nuadui dita jintig suwe atakuinja iyaumain atinai.
 Shitaki ajuatnume tusan wi inamjattajai.
 Suwimak jukitnuji tsawan jegamtai,
 wi ditanak suwimkan susagtatjai.
 Witjai Tuke Pujuunuk, nunak dekas tajai.

13 “Samarianum shiig pegkegchaun wainkamjai.
 Wi dakitamua nuna profeta aidau
 Baalan pachis etsejuinawai,
 dutikainak mina aentsug aidau ima minak
 umigtumainun datupainawai.

14 Tuja profeta Jerusalégnunia aina duka dekas
 nuna nagkaesau shiig pegkegchau ainawai.
 Nuadui ditak dekas Apajuí chichamen etsegtsuk
 dita anentaimsa jiikbaujin waitan etsejuinawai.
 Nuna aents pegkegchau aidau antuinak
 ichichmamainawai.
 Nunú aidauk, makichkish pujutjin yapajiatag
 tusagkesh anentaimainatsui.
 Ayatak pegkegchaunak takainawai.
 Nuadui ditak dekas aents sodomanmaya,
 gomorranmayajai aajaku aina nuna nagkaesau ainawai.

15 Nuadui wi apu Tuke Pujuu ashí senchigtinun
 profeta Jerusalégnunia aina dusha wajukawagtigki
 nuna yamai etsegjai:
 Ditanak yutai yapaun ayujawagtatjai.
 Tuja umutainashkam jatain egketuan aajagtatjai,
 nunak dita pegkegchauji aidau ashí Israel aents
 aidau nugken yujaku asamtai, dutikawagtatjai”,
 tawai Apajuí.

16 Tuja atum Israel aents aidautigmin pachipas
 Tuke Pujuu ashí senchigtina nunú chichagtamak:
 “Israel aents aidautigmek anú profeta aidau
 tujamaina duka makichkish antugkaigpa.
 Dita etsejuina nunak waitjak tuu yujawai,
 wi mina chichameg etsegtugkata tichamaitak, ditak nagkabiag tuu yu-
 jawai.

17 Nunidau asag mina chichamjun dakitin aidaun chichajuinak:

‘Tuke Pujuu tujamui,
utugchatak atsugtamiagtatui’, tuinawai.
Tuja aents dita wakegamunak takaina nuna
chichajuinak: ‘Makichik suwimkakesh
jukishtatjume’, tuinawai.”

Jeremías senchi chichakbau

18 ¿Yaita nigki waya Tuke Pujuujai chichasush?

¿Yaita nuna wainkaush, tuja nuniashkush
chichamen antugkaush?

¿Yaita nuna antuk puyatjus umiktajai tusa
anentaimush?

19 Tuke Pujuu kajekbaujiya duka dase ishamainun
dasentama iman asa,
aents pegkegchau aidaunak ijinattawai.

20 Tuke Pujuu kajekbaujiya duka makichkish
mijamtsuk ashí wajina dutikatjai tawa nuna
umika nagkankattawai.

Makichik tsawantai dekatnaitjume,
wagkag dusha imaniktinaita.

Profeta waita etsejin aidaun pachis Apajú etsegkamu

21 Nunú profeta aina nunak wika makichkish awematsjai,
mina chichameg etsegtugkatajum tusanuk,
ditanak augtanakesh augtsujai,
dutikamaitak jiinki yujasag mina daajun pachisag etsejuinawai.

22 Dekas mina chichamjun antuk uminakug,
mina aentsug aidaunak mina chichamjun ujakag
pegkegchau takatnak idaimitkamain ainawai.

23 Tuke Pujuu chichaak:
“Atushat akuish, tuja tikijuch akuish
wika nuwi pujajai.

24 Nuadui minak makichkish uumjutmainchau ainawai.
Nayaimpinmash, nugkanmash wika pujajai,
wi nunak Tuke Pujuu dekaskenum tajai.

25 “Anú profeta aidau waitjuinak mina pachitus Apajújai kajanum
chichaji tuidaun antukjai. 26 Wainak waitjuinak ditak anentaimas dita
wakegamun chichá yuja nunash ¿wajutik idaisagti? 27 Kajanmayan
augmatuinak mina aentsug aidaun tsanuinawai, dutikam yaunchuk dita
apachji aidau Baalan emematuinak mina kajimatjuki idaitusu aina nu-
mamtuk ditashkam kajimatki idaisatnume tusa. 28 Makichik profetakesh
kajamkagtujag, kajanmayan tajai titi. ¡Untsu mina chichamjun antuk
etsejuk, shiig betek etsegkati! Trigon dukega duka nejejaig betekchauwai.
29 Mina chichamjuk jiijai betek, nuigtu martillowai kaya awati tsaitiama
imantai. Witjai Tuke Pujuu, nunak dekas tajai.

30 “Nuadui wika au profeta aidau dita ditak pempeentunikiag, witjai
dekas Apajú chichamen etsejunuk tusa tuu yuja nuna antakun kajeajai.
Witjai Tuke Pujuu, nunak dekas tajai. 31 Au profeta aidau ditak
anentaimas jiiikiag tsanumak mina chichamjua numamtuk etsejuina nuna
antakun kajeajai. 32 Au profeta aidau kajanmayan waitan etsejuinak, mina
aentsug aidaun anentain yapagtuawag pegkegchau takamtikaina duwi

kajeajai. Wika ditanak makichkish mina chichameg etsegtugkatajum tusanuk ishimsujai. Nuadui ditak mina aentsug aidaunak pegkegnumkesh yaimainchau ainawai. Witjai Tuke Pujuunuk, nunak dekas tajai”, tiuwai.

Aents aidau pegkegchaunum yumigjamu uwemtajai pachisa agagbau

26

(26—45)

Jeremíasan maatag tiagbau

¹ Josíasan uchiji Joaquim Judá wegantu aidaun apuji wajas inabaun nagkamai, Tuke Pujuu Jeremíasan Jerusalén pujaun chichajak: ² “Mina emematjaku ijuntai jegamkamua nuna waitijin jegantatak agkaju ayatak shugku ajigbauwa nuwi wajasta. Nuwi wajasam, aents Judá wegantu aidau mina emematjitatus minidau wi amina akatjamjam nunú ashí ujakta. ³ Nuna antukag pegkegchau takatan idayinak pujutjin yapajinakuig, suwimkan susatjai tiu akunush dutikashtatjai. ⁴ Tuja jujuwai ame dita ujaktinuk: ‘Mina antugtutsuk, wi ditan jintintuawaitag nunash umitsuk, ⁵ wi mina profetag aidaun ishiakbau yujasag pata pataka ujamash nunashkam antugkachaju asagmatai, ⁶ juju mina emematjaku ijuntai Jerusalén awa nunak yaunchuk Silónum aak mina emematjaku waitai aakmakbaun tsaukuitag dutiksanuk tsauktatjai, dutika ai juju yaakta duka ashí aents tikich nugkanmaya aidau dushiktai atatu’ tawai Apajuí”, tiuwai Jeremías.

⁷ Nuna aatus Jeremías tabaun sacerdote aidau, profeta aidau, ashí aents aidaujai antukajui. ⁸ Tuja Tuke Pujuu tita tibaun ashí tusa inagnakmatai, sacerdote aidau, profeta aidau, ashí aents aidaujai ijuntujag Jeremíasan achikajui. Dutikawag chichajuinak: “¿Amek yamaik mantamnattame! ⁹ ¿Wajukeakmea amesh Tuke Pujuu daajinish, juju Apajuín jega duka, yaunchuk Silónum Apajuíjai chichatai aakmakbau wajukauwa nuniktatui tusamesh, nuigtush yaaktashkam tsaukam aents jinaamtaí agkan wajastatui tusamesh tame?” tuidau. Nuna tusag ashí aents aidau nuwi batsatuk ijuntug tenteawag achikajui.

¹⁰ Nuna Judá wegantu aidaun apuji aidau antukag apu inamtain batsatu Apajuí emematku ijuntai jegamkamunum shiyakajui. Nunik jegawag nunú jega waitiji yamajam aajakua nuwi jegantag ekemsajui. ¹¹ Nuwi pekajun sacerdote aidau, profeta aidaujai ditan chichajuinak: “Juju aentsua duka mantamnainai, wagki atumesh antagmin: ‘Juju jega duka yaaktajai tsainkattawai’ tuu wekagu asa”, tuidau.

¹² Tusa imatiagtai, Jeremías apu aidaun ashí tikich aents aidaujai ijunun chichajak: “Apajuí emematku ijuntai jegamkamun, yaakat Jerusalégjai pachisan wi tabau antukujum nunak wiki nagkamnukek tatsujai, nunak dekas Tuke Pujuu tita tujutbaun tajai. ¹³ Suwimak dakitakjumekek pujutjum iwajatajum, nunikjum Tuke Pujuu atumin Apajuíjiya nunú umigkatajum. Nuniagminig nii suwimkan amastatjime tujabi nunak amaschattawai. ¹⁴ Tuja wika juwi atumjai pujajai, atum ituguktatajume, nunú atum wakegamu umiktajum. ¹⁵ Tujash atum mina mantakjumekek, utugchatak atumdau atatuí, wagki aents utugchatji atsaig mau asajum. Wika wiki

nagkamnukek tatsujai, dekas Tuke Pujuu etsegkata tujutbaun etsegjai”, tiuwai.

¹⁶ Tusa timatai apu aidau, ashí aents aidaujai sacerdote aidaun profeta aidaujai chichajuinak: “Juju aents pegkegchau takamsamujig atsuji, niig Tuke Pujuu ina Apajuújiya nunú tibaun etseji, nuadui niig makichkish mantamnamaisui”, tuidau.

¹⁷ Tusa tiagtai, apu múun aidau ujumak wajakiag nuwi aents ijunag batsatun chichajuinak: ¹⁸ “Ezequías Judá apuji wajas inamjauwa nunú tsawantin profeta Miqueas Morésetnumia aajakua nunú, Tuke Pujuu akatjam ashí aents Judá wegantu aidaun juna aatus chichajak:

“Tuke Pujuu ashí senchigtina nunú chichaak:
 ‘Jerusalégnak tsaikagtinai;
 dutikam ayatak kaya tuwasua weaku atinai.
 Tuja nainnum Apajuú emematku ijuntai
 jeganamua nunak dupa tsapaka akijuatnai.
 Jerusalégnak dutika tsaikbau asa jega atsau,
 ayatak ajak ajakmatai wajastatui’, tiuwai.

¹⁹ “Nuna aatus Miqueas tutaish, apu Ezequíasak Judá wegantu aidaujai ijunag niinak maachajui. Nuadui apu Ezequíasak ashí aents aidaujai Tuke Pujuu ishamaidau asag, tsagkugkagtugta tusag segajui. Nuadui Tuke Pujuu ditan suwimkan susatag tiuwaitak tsagkujung idaisauwai. ¿Dita nuniku ainainpash, ii Jeremías maaku utugchat igkugtag?” tiajui.

²⁰ Tuja Semaías yaakat Quiriat-jearimnumia aajakua nuna uchiji profeta Urias Jeremíasjai betek Tuke Pujuu daajin Jerusalégnan nugka múunta nujai pegkegchaun chichagkauwai. ²¹ Tusa timatai, apu Joaquim niina atuwe aidaujai nuna antukag mantamnati tiuwai. Tujash nuna Urias dekaa ishamak Egipto nugkanum tupikakiuwai. ²² Nunikmatai apu Joaquim Acboran uchiji Elnatán aajakua nuna uchijin tikich aents aidaujai Urias egaktajum tusa ishiakui. ²³ Dutikam yujajus Egipto nugkanum pujaun juki itawajui. Dutikawag apu Joaquim an ejetuawajui. Dutikawagmatai: “Maatajum, dutikajum aents jakau egkea ajaptai nugka taimua nuwi egkeatajum”, tusa inamjauwai.

²⁴ Tuja Zafagka uchiji Ahicam Jeremíasan wait anentau asa, aents aidau maawainum tusa ayamjukui.

31

Israel aents aidau dita nugken wakjetjama

¹ Tuke Pujuu chichaak:

“Israel aents aidau achija yajuakbau Babilonia nugkanum batsata nunú ataktu waketug kaunawagmataig, wi ashí Israel aents aidaun Apajuúji atatjai, untsu dita mina aentsug agtinai”, tawai.

² Tuke Pujuu chichaak:

“Israel aents aidau uwegshunum yujayanum nunak wi wait anenjan yaigkuitjai.
 Tuja maaniamunum jinachu aina nunashkam
 wi ayamtiksauwaitjai.

³ Yaunchkek wika ditanak atushat wantintukuitjai.
 Nunika chichagkun: Wika atumnak tuke aneen asan,

yamaikish tuke wait anentakun kuitamjime.

⁴ Israel aents aidauwah, ataktu inantaittajime.
Dutika ai ataktu pandereta awatkujum
shiig aneasjum nantsemtinaitjume.

⁵ Samaria mujajin ataktu uva ajakmakjum
nunú nejekmatai, shiig aneasjum yuwatnaitjume.

⁶ Tuja suntag jinta kuitamin aidau

Efraígka mujajinia untsu mainak:

‘iKaunatajum, nunikagmin Jerusalén shiyaka
Tuke Pujuu iina Apajuúji emematiagmi!’
tiagtina nunú tsawan jegatnai”, tawai.

⁷ Tuke Pujuu chichaak:

“Israel aents aidau pachisjum,
shiig aneasjum kantamatajum,
atum ainagme tikich nugka múun aina
nuna nagkaesau eme anentsa diitai aidautijum.
Nuadui senchi kantamkujum:

‘iTuke Pujuu niina aentsji aidau ujumak iwaku
juwaku aina nuna ayamjuk uwentikjati!’ titajum.

⁸ Babilonia nugkanum batsatjum nunak awakjattajime,
tuja tikich nugkanum batsatutigminashkam
atumi nugkemin awakjattajime.

Wainmachu aidaush, shutuu aidaush,
nuwa ejamtin aidaush, yama uchigmaku aidaush waketjagtinai.
Nuninak shiig kuashat waketjagtinai.

⁹ Awake anentaimag buutkiag waketiagtina,
nunik mininakui wi yajuakan,
jinta pegkeg paka tukumka iyaumainchau wega nuni emagtinaitjai.
Witjai Israel aents aidau apajinuk.

Tuja Efraíkgai mina uchig iwaiya duka.

¹⁰ Ashí aents aidautijum

Tuke Pujuu chichame antuktajum,
nunikjum nayantsa pakajin atushat yujasjum
niina chichame etsegkatajum.

Israel aents aidau Apajuú dapampaak emegkajui.

Tujash nigki ataktu ikaunmattawai,
dutika uwija kuitamin uwigjin kuitamama imatikas kuitamkattawai.

¹¹ Tuke Pujuu Israel aents aidau
tikich nugka muunnumia achija yajuakbaun
ayamjuk agkanmitkatnai.

¹² Dutika Apajuú yaigbau asag, Israel aents aidau Jerusalén
kaunawag shiig aneanak kantamiagtina.

Untsu Tuke Pujuu ditan yayaak: Trigo, vino, aceite,
uwig aidau, baka aidau susamun nuna maawag
shiig aneas yuwawagtina.

Tuja ditak ajak ajakbau yumi ukattai asa,
pegkegchiaman iman agtinai.

Ditak atakesh depeteamak achagtina.

¹³ Tuja nuwa muntsujut aidau, aishmag datsa aidau,
múuntuch aidau aatus shiig aneasag nantsebiagtina.
Wi dita anentainak ichichtugtinaitjai,

dutikakun wake besemag batsatunak yapagtuan dakujamun susagtinaitjai.

Tuja dita najaimainak waituina nuna nagkaesau shiig anemtiksgatinaitjai.

¹⁴ Sacerdote aidaushkam dekas yutai shiig pegkeg aidaun yuwawagtina, tuja mina aentsug aidaushkam, wi ditan susagtinaitag nunak dita atsumamun nagkaesau jukiagtina, nuninak shiig anediagtina. Witjai Tuke Pujuunuk, nunak dekas tajai.”

¹⁵ Nuigtu Tuke Pujuu chichaak: “Ramá nugkanum senchi buutbau antuenawai, nunak Raquel niina uchiji jinamunum buutak imatui, tuja anentai ichichtugta tamash dakitawai”, tawai.

¹⁶ Tujash Tuke Pujuu niina chichajak: “Raquelah, buutu pujutsuk idaisata, nunikam negaikijum jaipjata, wainkan uchigtuchu juwakchatjash tiipa, amina uchijum aidauk shiwaja nugken batsatu waketug kaunattawai. Nunikmatai wake besemag pujam duka shiig aneestatme.

Witjai Tuke Pujuunuk, nunak dekas tajai.

¹⁷ Uchigtuchup wajasja tusam anentaimkum waitiame, tujash amina uchijum aidauk atakea duwi waketug kaunatnai.

Witjai Tuke Pujuunuk nunak dekas tajai.

¹⁸ Mina aentsug Efraín wegantu aidau kajeka buutuinak: ‘Israel aents aidau Apajuujiyah, ¡Ametme Tuke Pujuu, ii aidauti Apajuujimek! Iik toro kakajus unuinamaitu iman ayaji, tujash ame unuinakbau asa, ame tabau umiaji. ¡Ametme jutii Apajuujimek, nuadui ataktu awagkim yaijatkata!

¹⁹ Ii aidautik ame umigtsuk wainka yujasji, tujash awake anentaimja ii pegkegchau takamsamu anentaimtusa, pempeentumaki iina bakui iju yujaji. Yaunchuk datsa asa pegkegchau takamsamu anentaimtusa datsaamaji”, tuidau.”

²⁰ Tujash Tuke Pujuu ditan chichajak: “Efraín aents aina duka mina uchig ainawai, nuadui wika dita aidaun ima senchi aneajai. Suwimka susanush pachitskek idaitsujai.

¡Ashí mina anentaigjai aneajai!

¡Ditanak shiig anentuinjai!

Witjai Tuke Pujuunuk, nunak dekas tajai.

²¹ Israel aents aidauwah, atum weajum nunú jinta shiig diisa wetajum, kajimatgumesh ataktu yupichu wainkamnnum. Atumi wekaetajum aajakua nunú shiig diistajum. Nunikjum, ¡wakitkijum atumi yaaktajin kaunatajum!

²² Makichik nuwauch emetnag pujuchujai betek

wainka yujajum dusha ¿wajutiya idaisattagme?
 Witjai Tuke Pujuu, Israel aents aidau Apajuujinuk,
 juju nugka juwi pegkejan Apajuí umike.
 Nunak nuwa aishin aneak ataktu wakitkittawai”, tawai.

Israel aents aidau atakea duwi shiig batsamsagtin

²³ Tuke Pujuu, Israel aents aidau Apajuji ashí senchigtina nunú kajanum chichagtak:

“Judá wegantu aidau shiwaja nugken batsata nuna awakjan Jerusalén ikaunmattajai. Dutika ai dita nugken, dita yaaktajin batsamas ataktu chichainak: ‘Jerusaléghkah, amek Tuke Pujuu pegkegnun yumigsamu ata! jJerusalégnun dekas shiig takamu awai!’ tiagtinai.

²⁴ “Nunú nugkanmak, Judá wegantu aidau, dita yaaktaji aidau, ajak ajakbau aidau, uwija kuitamin aidau aatus aitnai.

²⁵ “Tuja aents pimpikiag kakaumainchau wajas batsatunak wi ayujatnaitjai, dutikakun umutainashkam agtinaitjai”, tusa Apajuí tujutmayi.

²⁶ Tujutkui antu pujaun shintajan, kajanmap ankaja tibaijai, nunú mina shiig awajtukmayi.

²⁷ Tuke Pujuu chichaak: “Israel aents aidau nugken, Judá wegantu aidau nugken, aents aidau shiig kuashat, tuja kuntin aidaushkam imanisag yujakti tusan titatjai. Nunú uminkatin tsawan jegattawai. ²⁸ Tuja tsaihtasan, ijinatasan, tegaktasan, aneaku pujuyag nunisnuk yamaishkam yaakat tsaihbau ataktu yaaktamkatasan, ataktu ajakmatasan, ataktu iwajatasan nunú betek uminkati tusan aneaku pujuttajai. Witjai Tuke Pujuu, nunak dekas uminkatnun tajai. ²⁹ Nunú tsawantin chichainak: ‘Múun aidau takainawai, nuniagtai uchi aidau akikmainawai’ tusa tauk makichkish atsutnai. ³⁰ Wagki maki makichik aentsuk nii pegkegchau takamsamujin suwimkan jukitnai. Nuadui maki makichik dita pegkegchau takasbaunum jakagtinai”, tiuwai.

³¹ Tuja Tuke Pujuu junashkam tawai:

“Wi Israel aents aidaujai, Judá wegantu aidaujai, chichaman umiktinaitag nunú tsawan jegatnai. ³² Wi chichaman umiktinaitag duka yaunchuk dita apachji aajaku aidau Egipto nugkanum batsatun jiijan ditajai chichaman umikuitag nujai betekak achatnai, wagki ditak midau ainayatak, mina chichamjun umikchaju ainawai. Witjai Tuke Pujuuunuk, nunak dekas tajai.

³³ “Tuja nunú tsawan jegamtai, wi ditajai chichaman umiktinaitag duka juju atinai: Wi chicham umikbauwa nuna dita anentain egketjattajai, tuja anentaimtajinish agatjagtatjai. Wi dita Apajuji atatjai, untsu dita mina aentsug agtatui. Witjai Tuke Pujuuunuk, nunak dekas tajai.

³⁴ “Nuadui makichik aents mina chichamjun unuimag tikichi jintin-mainuk makichkish atumnashtinai, wagki nunú tsawantinig uchi aidau nagkamas múun aidaushkam ashí mina chichamjunak unuimajagtinai. Tuja wi dita tudaujinak ashí tsagkujatnaitjai. Ataktu awagkinuk dita tudaujinak adeagchatnaitjai. Witjai Tuke Pujuuunuk, nunak dekas uminkatnun tajai”, tiuwai.

³⁵ Tuke Pujuu etsanak tsawai etsanjatnun apusauwai, tuja yaya, nantu, aina nunashkam kashi etsanjagtinun apusauwai. Tuja nayantsak tsukatak uutti tama imaniawai. Nunak Tuke Pujuu ashí senchigtina nunú tawai:

36 “Tuja Israel aents aidau chicham umikagtinun wi umikag nuna betek uminachkug, duwi nagkamsag mina aentsug achagtinai. Witjai Tuke Pujuunuk, nunak dekas tajai.

37 Untsu wi ditan anagkuawaitag nuna, dita pegkegchaujín idaisatag takunuk, makichik tsawantai nayaimpin ashí dekapa ashimak, nugka initkenash ashí ejeyagmatai idaisatnaitjai. Witjai Tuke Pujuunuk nunak dekas tajai.”

38 Tuke Pujuu chichaak: “Mina yaaktag Jerusalén tsaikbau ataktu kumpin jikkbau Hananel awa, nuwi nagkama waiti múun najanamu yaakat tuniakbaunum awa imanui yaaktamkatin tsawan jegattawai. 39 Yaakat peejamu nagkatkau aidauk, tutupit juwaki Garebnum nain awa nuwi ejeenta, nuwi tunimtikja juki Goa tutaya nuni emamu atatuí. 40 Tuja aents jakau aidau ukutai, yuku aidau utsautai wake aina duka ashí midau atatuí. Tuja nuigtushkam nugka agkan takaschamu entsa Cedrón tutaya aatus nagkamas, caballo waitai tutai etsa minitaiya nuni awa imanui nagkatkauwa duka ashí midau atatuí. ¡Atakea duish Jerusaléggak ataktu awagki tsayamak achatnai!” tiuwai.

36

Baruc chicham duwapnum agagbaun jega Apajuí emematku ijuntainum waya ausamu

1 Josíasa uchiji Joaquim Judá apuji wajas ipak usumat mijan inamai, Tuke Pujuu Jeremíasan chichajak: 2 “Jeremíasah, duwap ikamkata, dutikam wi Israel aents aidaun, Judá wegantu aidaun, tuja tikich nugkanmaya aidaunashkam pachisan apu Josías pujusmatai nagkamsan timajam nunú yamai tajam nujai ashí ijumjam agagta. 3 Judá wegantu aidaun wi suwimka susatasan umijag nuna antukag, pegkegchau takaina nuna idayinakui, dita tudaujinak tsagkujagtajai”, tiuwai.

4 Tusa timatai, Neríasan uchiji Baruc aajakua nuna Jeremías untsuka itan Tuke Pujuu tibaunak imatiksag ashí ujakui. Dutikam Baruc nuna agajui. 5 Nuna ashí agagmatai, Jeremías Barukan chichajak:

“Minak juwi achujuk emetjuawagmatai, Apajuí emematku ijuntainmag wemainchau wajasan pujajai. 6 Nuniau asamtai, tsawan ijagma pujusa Apajuí agtai jegatta duwi ame dekas Apajuí emematku ijuntainum wetá. Nunika jegaam wi Tuke Pujuu chichamen amina ujaka ai, ame agagmaun nunú senchi jiika ausata. Dutikamin Jerusalégnumia aidau, tikich aents Judá wegantu dita yaaktajin batsamin aidaujai nuwi kaunawag Tuke Pujuu chichamen antuktinme. 7 Nunikag Tuke Pujuu ditan kajejuk suwimka susatatus umia nuna dekawag, pegkegchau takamujin idayinak pujutjin yapajiachajaintash”, tiuwai. 8 Tusa tima ayu tusa nuwi weuwai. Nunik jega Jeremías tibaunak imatiksag Tuke Pujuu chichame agagbaun ausauwai.

9 Tuja nunú tsawantin Jerusalégnumia aidau, tikich aents Judá wegantu dita yaaktajin batsamin kaunau aidaujai ashí ijagma pujusa Tuke Pujuu agnasti tusa Josíasa uchiji Joaquim, Judá wegantu aidaun apuji aajakua nunú, tiuwai. Nunak apu Joaquim inabajin cinco mijanan achika, nantu nueveya nunú takau ai tiuwai. 10 Nunú tsawantin Baruc Apajuí emematku ijuntainum weuwai, nunik aatu yantamnum waiti yamajam

najanamu aajakua nuwi jegantatak agkaju ayatak shugku ajigbau aajakua nuwi wayauwai. Nunik nuwi Safánka uchiji Guemariásan papii takataiji tesaamu aajakua nuwi was, ashí aents aidau antuinamunum Tuke Pujuu chichamen ausauwai.

Apu aidau emtin Baruc Apajuí chichamen ausamu

¹¹ Micaías, Guemariása uchiji, Safánka tijaji aajakua nunú, Tuke Pujuu chichamen Baruc augbaun ashí antukui. ¹² Nunik apu pujusa inamtain weuwai, nunik papiin agau pujutai tesaamunum apu aidau: Papii agatan yacha Elisamá aajakua nunú, Semaíasan uchiji Delaías, Acboran uchiji Elnatán, Safánkan uchiji Guemariás, Ananíasan uchiji Sedequíás, nuigtu tikich apu aidau aatus ijunag batsatbaunum wayauwai. ¹³ Nunik Micaías waya, Baruc Apajuí chichame agagbaun ashí aents aidau emtin aujun antukbaujinak imatiksag etsegkauwai. ¹⁴ Tusa etsegkamtai, apu atuwe aidau Netaníasan uchiji, Selemíasan tijaji, Cusigkan ama tijaji Jehudí aajakua nuna, Baruc ujakta nii chicham agagbaun aents aidau antuinamunum ausama nuna itaati tusa akateg awemajui. Nunú ujakam Barucshakam chicham agagbaun juki dita batsatbaunum jegauwai. ¹⁵ Nunikmatai dita chichajuinak:

“Anuí ekemsam chicham agagbau takakam nunú ausata antukmi”, tuidau.

Tusa tima, Baruc nuna ausauwai. ¹⁶ Dutika aujus ashimkamtai, nuna antukag ishamak pempeentunikiag chichainak:

“Dekas juju pachisa apu ujakagmi”, tiajui.

¹⁷ Nuna tusag Barukan iniinak:

“Jusha tuwiya agagmaume nunú etsegkata. ¿Jeremíasak tuu agagta tujamatai agagmaum?” tuidau.

¹⁸ Tusa tama Baruc ditan ayaak:

“Wika junak Jeremías tuu agagta tujutkui, nuna imatiksasuk tintai agagmajai”, tiuwai.

¹⁹ Tusa timatai niina chichajuinak:

“¡Nuniakuig amek yamaikiuch Jeremíasjai mai tupikakim uumkatajum! ¡Makichkish atum pujamunak dekashtinme!” tiajui.

Apu Joaquim papii agagbaun apeamu

²⁰ Nuna tusag apu atuwe aidauk nunú chicham agagbaun Elisamá pujusa papii takataijin awaya ukuinak, nuna pachis apu ujakagtatus wegajui. ²¹ Dutika ujakam, nunú chicham agagbau Elisamá papii takatainum au asamtai, nunú utita tusa Jehudínkan awemauwai. Tusa tima juki itaa, apu niina atuwe aidaujai antuinamunum ausauwai. ²² Tuja nantu Quislevting tsetsek aajakui. Iman asamtai apuk tsetsektin pujustinji tesaamunum nuwi jii anamak pujau. ²³ Nuwi pujau asa Jehudí chicham agagbaun aujus wetai, ausa nagkaikumun apu kuchiyai tsupik jinum pataka apejakui. Duti dutikakua ashí apea ashimkauwai. ²⁴ Nunú chicham Apajuínu agagbaun antuinakush, apuk niina atuwe aidaujaig makichkish ishamkachajui, tuja awake anentaimjagkesh wake besemag dekapenakug jáanchjinak ichighajui. ²⁵ Nunú chicham agagbaun apu apetai, Elnatán, Delaías, Guemariásjai niina chichajuinak: “Wait aneasam apeawaipa”, tuidau. Tusa tamash ditanak antugtsuk, ²⁶ Jerahmeel aajakua nuna, tuja Asrielan uchiji Seraíasan, Abdeelan uchiji Selemíasan aatus apu chichajak: “Baruc Jeremías tabaun agauwa nunú Jeremíasjai achikjum egkeatajum”, tusa inamjauwai. Tujash ditanak Tuke Pujuu uukui wainkainum tusa.

Jeremías Barukan ataktu Apajuí chichame agagta tusa inagbau

²⁷ Baruc Tuke Pujuu chichamen Jeremías agagta tima agajua nuna apu apea ajapantai, Tuke Pujuu Jeremíasan ataktu chichajak: ²⁸ “Yamajam duwap ikamkata, dutikam yama nagkamchaku agagbaun Judá apuji Joaquim apeabia nujai betek nunú duwapnum agagta. ²⁹ Tuja nuigtushkam apu Joaquim chichagkum: “Tuke Pujuu chichaak: Babilonianmaya aidauk makichkish megkaetsuk tuké kaunattawai, nunikag aents aidaunak kuntin aidaujai ijinawagtatui, tusa Jeremías agajua nunú apeaume, dutikakum Jeremíaschakam jiyakume. ³⁰ Dutikau asam yamai juju dekata. Amina uchijum aina nuwiyag makichkish Judá wegantu aidaun apujig achatnai. Tuja ame jakaminig ukugmaschagtinai, dutijamawagmatai amina iyashmek etsa sukuam tepetnai, untso kashi bichatug tepetnai. ³¹ Aminak ame wegantu aidaujai, tuja amina atuwem apu aina nujai ijumjan atumi pegkegchaujín suwimkan amastatjime. Atumin, tuja Jerusalégnunia aidaunashkam, ashí Judá wegantu aina nujai ijumjan suwimak ishamain aidaun amastatjime tusan tibaijim nunak imatiksasuk amastatjime. Nunak dutikattajime wagki atumek mina umigtukchau asagmin’, tujamui Apajuí”, tiuwai Jeremías.

³² Nuna tusa nagkanak, Jeremías tikich duwapen juki Baruc papiin agau aajakua nuna susauwai, dutikam nuna juki Jeremías tabaunak imatiksag ashí agajui. Nunak yama nagkamchaku agagbaun apu Joaquim apeauwa nuna ashí betek agajui, dutikak, nuigtushkam tikichin nunú chicham agagbaujai betekmamtinun Jeremías ekek tutai nunashkam dutiksag ashí agajui.

37

Jeremías achika egkeamu

¹ Babilonia nugkan apuji Nabucodonosor, apu Joaquima uchiji Jekoníasan Judá apuji adaimainun idayak, Josiasa uchiji Sedequíasan apu adaikauwai. ² Tujash Sedequíasak, niina atuwe aidaush, tuja tikich aents Judá wegantu aidaushkam Jeremías Tuke Pujuu chichamen etsegbaunak antugkachu ainawai.

³ Nuninayatak apu Sedequías Selemíasan uchiji Jucal aajakua nuna sacerdote Sofonías Maaseíasan uchiji aajakua nujai akateg profeta Jeremías ujaktajum tusa ishiakui. Dutika ishimak aatus akatmamjauwai: “Jeremíasah, Tuke Pujuu iina Apajuíjiya nunú ame segatkagtita”, tiuwai.

⁴ Tuja Jeremíasak eke aents achika chimpitainmak egkeachbau asa, agkan wekagajakui. ⁵ Nunú tsawantin babilonianmaya suntag aidau Jerusalégkan jetejtatus tenteawag batsamtau. Nunik batsatun egiptunmaya suntag aidau apu Sedequías maanitai atukagtatus mininawai tabaun antukajui, nunik antukag ishamak dita nugken waketuinak Jerusalégnak ukukiajui.

⁶ Nunikagmatai Tuke Pujuu Jeremíasan chichajak: ⁷ “Judá apuji aents chichama etsejin aidaun awemama nunú ujakta: Egiptunmaya suntag aidau dita ayamjuktatus minina duka dita nugken wakettattawai.

⁸ Nunikmatai, babilonianmaya aidau ataktu waketug Jerusalégnak jetekek depetuk ditanu emagtatui, dutikainak yaaktanak jiyai apeawagtatui.

⁹ Tuke Pujuu chichaak: Babilonianmaya aidauk tuke shimak shiyakaje, ataktu wakitkig kaunachagtatui tusagmek shijjak anesaigpajum, nunak

nunikchattawai. ¹⁰ Tuja atumin ataktu jetepainakui, atum ashí ijinawag-minish, ujumak aents kupinau aidau dita aakjin juwaju aina nunú ataktu nantajag atumnak depetamak atumi yaaktajinak jiyai ekemakagtatui”, tiuwai.

¹¹ Tuja egiptunmaya suntag aidau mininamun antukag, caldeo suntag aidau Jerusalégkan tentea batsatu waketuinaig, ¹² Jeremías nuwi pujau jiinkiuwai, Benjamín wegantu aidau nugken wetatus, wagki nuwi jegaa nugkan tinamkagtiagtai niinu atinun jukitin asa. ¹³ Nunik wea weakua Benjamígka waitijin jegattaman, Selemíasan uchiji Iriás Hananíasan tijaji waitin kuitamin aajakua nunú awajus chichajak:

“¡Amech dekas babilonianmaya suntag aidaujai ijunjatjai tusameap wakegame!” tiuwai. ¹⁴ Tusa tama Jeremías ayaak:

“¡Wika babilonianmaya suntag aidaujai ijunjatag tusanuk wakegatsjai!” tiuwai.

Tusa tutaish antugtsuk achika juki apu atuwe batsatbaunum ejegauwai. ¹⁵⁻¹⁶ Dutikamtai nunú apu atuwe aidau Jeremíasan shiig senchi kajejuidau asag, suwimatajum dutikajum Jonatán papiin agauwa nuna jee aajakua nunú, yamai aents achika egketai awajsamua nuwi inidak taimua nuwi egkeatajum tusa tima egkeawajui. Dutikam nuwi kuashat tsawan pujusui.

¹⁷ Nuwi pujaun, Jeremías jiikjum wi pujusa inamtaijua juwi itaatajum tusa apu Sedequías, tiuwai. Tusa timatai Jeremíasan juki ejegawajui. Dutikawagmatai apu Sedequías ima niinak akanak iniak:

“¿Chicham etsegekata tusa Tuke Pujuu akatamjamush atsuak?” tau.

Tama Jeremías ayaak:

“Ehe awai, tuja apujuh, aminak Babilonia nugkan apujiya nunú depetamkattawai tujutmae”, tiuwai.

¹⁸ Nuna tusa niina pempeentuki iniak:

“Atum mina achigkajum egketuaujum nunash wisha ¿aminash, amina atuwem aidaunash, nuniachkunush ashí tikich aents aina nunash waji pegkegchauna dutikau asamtai egketuaujume? ¹⁹ Tuja profeta aidau chichainak, babilonianmaya aidauk atumnak, tuja atumi nugkenash jetekchagtina tusa tujamin agma dusha ¿tuwi batsatua? ²⁰ Apuh, minash wait anenjugta tajame. Wait aneamam, ¡ataktu awagkimek Jonatágka jeen egkeatajum tusamek tiipa! ¡Nuwi epenim pujus jakati tusamesh wait aneamam idaitusaipa!” tiuwai.

²¹ Tusa timatai apu Sedequías, Jeremías jukijum agá suntaja ijuntai awa nuwi apusajum, kashi kashinig pagka sujin yuja nuwiya makichik pag sutatjume, tiuwai. Tusa timatai jukiag, suntaja ijuntain apusajui. Dutikawag makichik tsawantai makichik pagkan suwidau. Dutika suu batsatu ashí yaaktanum pag amuekamtai, sutsuk idaisajui.

38

Jeremías achika waanum egkeamu

¹ Nunú kuashat tsawan nagkaemakui ai, Jeremíasan shiwaaji aidau: Matánka uchiji Sefatías, Pashura uchiji Guedalías, Selemíasan uchiji Jucal, aatus antuinamunum Jeremías aents tuwakbaunum chichaman etsejak: ² “Tuke Pujuu chichaak: ‘Juju yaaktanum juwak pujauk maaniamunum, nujantai, jatai aatus jinawagtatui, untsu babilonianmaya suntag aidaunum sujumanuk, pujutjinakesh uwemtijattawai.’ ³ Tuja nuigtu Tuke Pujuu chichaak: ‘Juju yaaktanak Babilonia nugkan apuji niinu awajsattawai,

dutikamtaig makichkish atanmainchau atatuí, tawai Apajuí”, tiuwai Jeremías.

⁴ Nuna antukag apu atuwe aidau apun chichajuinak:

“Jeremiasak nuna taku, suntag yaaktanum batsata nunak ashí aents aidaujai, kakakchau wainkauchia nunin anemtikawai. Juju aentsuk pegkegnakesh augmatu wekaetsui, ima pegkegchaunak augmatui”, tuidau.

⁵ Tusa tiagtai apu Sedequías ditan ayaak:

“Ayu, atum tajum duka pegkejai, atum itugkatag tajume dutikatajum. Wika atum dutikatag tabaunak dutikawaigpajum tumaitsujai”, tiuwai.

⁶ Tusa timatai, shimutuk Jeremíasan achikajui, dutikawag daekai jigkawag apu uchiji Melquías aajakua nuna yumigmatji agá taimu aajakua nuwi egkeawajui. Nunú yumigmatnumak yumi atsau, ayatak kunta piyaku asamtai, nuwi initak amamki egkemsauwai. ⁷ Dutikawaju ai etiope aents apu inake kajittsa diitai Ébed-mélec apu inamtain pujujakua nunú, Jeremíasan achika waanum egkeawaje tabaun dekauwai. Nunú tsawanting apu Sedequíasak Benjamígka waitiji tutainum ijunak pujujakui.

⁸ Untsu Ébed-mélec apu pujusa inamtaijin pujau jiinki apu ujaktatus weuwai. ⁹ Nunik jegajua ujaak: “Apujuh, au aents aidau Jeremíasan shiig senchi waitkainawai, nugka taimunum initak egkeam puja nuwig pujus nujantai jakattawai, tuja pag sumainchakam ashí yaaktanmak atsawai”, tiuwai. ¹⁰ Tusa ujakam apu Sedequías Ébed-mélekan inajui, treinta aents jukim Jeremías eke jatsaig jiktajum tusa. ¹¹ Tusa tima Ébed-mélec aentsu yajuak, apu pujusa inamtaijin makichik tesaamu jáanch ijumtainum waya, jáanch mamukum juki, daekai jigka Jeremíasan detuauwai. ¹² Dutika chichajak:

“Anú jáanchia duwi kuntugmin pempemagta, daek pakapakai”, tiuwai. Tusa tima kuntujin jáanchin pempemajui. ¹³ Nunikmatai daeka detuawag jiiikajui. Dutika jikim Jeremiasak apu suntaji aidau ijuntai agá aajakua nuwi pujau.

Sedequías Jeremíasan untsubau

¹⁴ Nuwi pujaun Jeremías jukijum Apajuí emematku ijuntai waitiji kampatuma nuwi ejentatajum, tusa apu Sedequías timatai, jukiag ejentajui. Dutikawagmatai apu Sedequías Jeremíasan jegantun chichajak:

“Wi amina iniastatjam nunú waitjutsuk dekaskata”, tiuwai. ¹⁵ Tusa tama Jeremías ayaak:

“Wi dekaskenum aimkamtaig amek mantuattame, tuja wi chicham pegkejan amina ujaish antugtukchattame”, tiuwai. ¹⁶ Tusa tutai apu Sedequías nii dekaskenum umiktinjin ashishmas chichajak:

“Atsa, mashtatjame, nunak Tuke Pujuu iina pujutan amasua nuna daajin tajame. Tuja tikich maatnume tusanush idaisashtatjame”, tiuwai. ¹⁷ Tusa tama Jeremías Sedequíasan chichajak:

“Ayu, kame ujaktajame: Tuke Pujuu ashí senchigtina nunú chichaak: ‘Atum aidautigmek ashí Babilonia apujin sumimkatajum, nunikjumek amina pataim aidaujai uwemjattagme. Tuja yaaktakesh apenashtatui.

¹⁸ Untsu ame nunishtaik, juju yaaktanak babilonianmaya aidau utsan-tuawag apeawagatui, dutikainakui atumshakam makichkish uwemjash-tajume’ tujamui”, tiuwai. ¹⁹ Tusa tutai Sedequías ayaak:

“Kame nunak nunimainaitjai, tujash judío aents aidau babilonianmaya-jai ijunjaja nuna wi ishamajai. Wi Babilonia apujin yunumtaik, nunú judío

aents aidau minak senchi suwi suwimjuinakua mantumain ainawai”, tiuwai. ²⁰ Tusa tutai Jeremías ayaak:

“Apujuh, aminak judío aents aidauk suwimjachagtatui. Tuke Pujuu chichamen wi amina tajam nunú wait aneamam umikta, nunú umiakmek shiig pujustatme, tuja nuigtush mantamachagtatui. ²¹ Untsu Tuke Pujuu tujama nunú umiatsminish, waji utugchatak nagkaetamkiti nuna Apajuí iwaintugkame. ²² Apujuh, ame pujusa inamtaigmin nuwa aidau batsata nunak babilonianmaya aidau ashí yajuakag suntaja apuji aidaun susagta-tui, dutikam imau batsamas chichainak:

“‘Apu Sedequíasnak niina kumpauchiiji aidau tsanujag depetkagmayi, amina kumpajum aidauk ashí idaitamsaje. Tuja amek suwemea iman kuntanum amamam tepeattaku wajame’, tujamiagtinai”, tiuwai. ²³ Nuna tusa nuigtushkam chichajak:

“Amina nuwem aina nunak uchijum aidaujai ashí Babilonia nugkanum yajuakagtatui, tuja ameshkam uwemjashtatme, Babilonia apuji aminak achigmaktatui, tuja yaaktanashkam apeawagtatui”, tiuwai. ²⁴ Tusa tutai Sedequías Jeremíasan chichajak:

“Ame pujutjum puyatjakmek, juju mina ujatkaum duka makichkish tikichik ujakaipa. ²⁵ Tuja wi amijai chichasag nuna apu aidau dekawag, waji pachisam apush ausamume, tuja niish wajinjutpame nunú uutsuk etsegkata, tuja nunú etsegchakmek mantamnattame tujamain ainawai. ²⁶ Tusa tujamainakuig ame chichagkum: ‘Ataktu awagtukmek Jonatágka jeen aents achika egketai awa nuwi egkeam pujus jakati tusamek wait aneamam tujutipa tusan augkun pujumjai’ tita”, tiuwai. ²⁷ Tusa apu tibaunak imatiksag ashí apu atuwe aidau Jeremíasan shimutkajui. Nunik jegajuawag inidau. Tusa iniam, apu tuu aimkata tibaunak imatiksag betek aimkauwai. Tusa timatai, apu Sedequías Jeremíasjai chichamun antukchaju asag utugchatan tutsuk agkan ukukiajui. ²⁸ Tuja Jeremiasak suntaja ijuntai agá aajakua nuwi pujau. Nuwi pujaig Jerusalégkan jetekag utuawajui.

Ezequiel Profeta untsukbau

(1—3)

Ezequiel Apajuí pujusa inamtaiji wainkamu

1-3 Witjai sacerdote Ezequiel, Buzi uchiji. Babilonianmaya aents aidau apu Joaquiŕkan achika juwinak tikich Israel aents aidaujai ijumag achijuk jujukiajabi. Dutijuawagmatai Babilonia nugkanum cinco mijan pujusan, mina mijanjun treinta mijan ejeju ai, tsawan cincotin, nantu Tammuz* takau ai, kajanum namak Quebar aajakua nuwi uwet eketai, nayaim ujaniabi. Nunikmatai Apajuín wainkabajai, nunikan Tuke Pujuu senchijin dekapjabiajai, dutijua ashí iwaintugkabi tikich tsawantinish wajig nagkaemagtinush ayi nuna. 4 Nunú nayaim ujanbaunmayan diikman etsa akaetaiya nuwiya dase shiig senchi dasentuk yujagkim múun ijiamu winchamtin, tuja nunú yujagminmaya peem ashí yantamnum peetun, nuigtu yujagminum jii kegaunum nuna ejapeen jiju jinum jiyam duwenip wegama imanun wainkabajai. 5 Imaniamunum nuna ejapeen, ipak usumat aentsjai betek wantinkabi. 6 Nunú aina duka ipak usumat yapintin, ipak usumat nanaptin, 7 kagkajig chuujam aentsu kagkajijai betek, nanchikig toro tsakata nanchikijai betek, bronce shiig keemja winchamtin awajsamujai betekayi. 8-9 Nuigtushkam nunú ipak usumat yapintin, ipak usumat nanaptin aina nuna uwejeg nanape nugkaan ipak usumat aentsu uwejejai betek agmayi. Tuja nanape aina duka mai nanapenig antiniakuyi, tuja nanamainakushkam betekush ukunmakesh ayampag niimtsuk nanamiagmayi.

10 Tuja nuna niimeg juninuyi:

Eem diyamak aentsua nuninuyi, tuja untsugnumanini diyamak león niimtinuyi, unstu menanum diyamak toro tsakata nuninuyi, tuja ukunum diyamak ukukuijai betekayi. 11 Tuja nanape aidauk yaki takuni agmayi, nuwiya jimaja nunú mai nanapeg antinik amayi, tuja tikich jimaja nunú iyashin dukuakuyi. 12 Apajuí senchiji wajuk ditan emawa nunisag tutupit, makichkish ukunmakesh ayampash niimtsuk shimiagmayi. 13 Nunú aina nuna niimeg jii kaiji kegaujai betek agmayi, tuja nuna ejapenis jii ekemaka ekentsamu mai we mai we wajatai tumain wantinmayi, tuja jii nunú kegauk winchantibi, nuwiya peem aidau jiiniagmayi. 14 Nunú aina duka shiyakajash shiig wamak peemjai betek waketug kaunmayi.

15 Tuja nunú aidau diikman maki makichik dita ijunbau yantamen rueda ajuidaun wainkabajai. 16 Nunú rueda aidauk makichik niimtinuk betek najanamu, kaya pegkejuch winchamtina iman agmayi. Tuja nuna initkenis tikich rueda egketatai tumain shiig shutukja umikbauyi. 17 Imatika umikbau asa ashí yantamnum buchitkush ukunmak waketchabi. 18 Tuja rueda ipak usumat shutukjamua nuna yantame aidau nantu jii batsatkamu winchamtin agmayi. Nuna imanun wainkan senchi ishamkabajai. 19 Nunú aentsjai betek aidau shimutai, ruedashkam ditajai betek shimibi, tuja dita yaki takuntaik, ruedashkam yaki takuniagmayi. 20 Nunú

* 1:1-3 "Tammuz" tawa nunak iina calendariojinig nantu Junio ejapean tsawan quincen achika nagkama nantu Julio ikak tsawan quincetin makichik nantu ejeja nuna taku tawai.

aidaunum Apajuí Wakani pujau asa, nii wajuk weawa nunitaik ditashkam nunisag shimiagmayi, tuja yaki takuntaik betek yaki takuniagmayi, untsu nugká akaetaik betek akayagmayi, tuja ukunum wakettaishkam betek waketiagmayi. ²¹ Tuja aentsua nunin aidau buchitiagtaik, rueda aidaushkam buchitaidau, tuja dita nuwig jasa ataik ruedashkam nuwig batsamayi. Untsu nunú yaki takuniagtaik ditashkam yaki takunaidau, wagki Apajuí Wakaniya nunú ruedanum au asamtai.

²² Nunú aentsjai betek aidaun buuken makichik nagkuekau vidrio winchamtina iman pegkejuch ajiagmayi. ²³ Nuna nugkaan, jimag nanape dakuenak mai antiniakuyi, tuja tikich jimaja nunú iyashin dukuakuyi.

²⁴ Tuja nanamiagtaik, nanape aina duka namak senchi dujajua utama imatmayi, Apajuí ashí senchigtina nunú chichamus imatatai tumain, suntag kuashat ijunag pampaumaina imatmayi. Tuja nanaak wegau iyainiagtaik, nanape aina duka nugkaan nemag amayi. ²⁵ Nuninai dita buukenia makichik waji nagkuekau ajuinamunmaya senchi chajatuk jijnmayi.

²⁶ Tuja nunú dita buuken ajuina nuwi apu ekemsa inamtaiji safiro najanamujai betekayi. Nuwi makichik aentsjai betek ekemayi. ²⁷⁻²⁸ Tuja akachumtaya nuwi nagkamas yakinig, jiju ukuija tsuwatji utsankamu winchamtinama imanayi, untsu akachumtaya nuna nugkanig jiijai betek keebi. Tuja ashí yantamnumak keeka tsaaptin wajas amayi. Untsu nuna yantamen yumi yutugmatai yujagminum pagki waja tutayama nunin winchamtin wajaknuyi. Nuwiya Tuke Pujuu imanji wantintugkabi.

Dutijakui tikishmajan nijaijui nugka antigkan pujusan mina aujtaun antukbaijai.

2

Apajuí Ezequielan takagtusti tusa untsukbau

¹ Tuja Apajuí chichagtak: “Aentsu uchijiyah, wajaita amejai chichas-tatajai”, tujutmayi. ² Tusa tujutai Apajuí senchiji egkemjutuabi, nunik awajtukmayi, dutijumtai dekabiajai Apajuí aujtamun. ³ Tuja nii chichag-tak: “Aentsu uchijiyah, Israela uchiji aidauk, dita apachji aidau mina chichamjun umigtukchaju aina nujai betek mina chichameg umitan dakitin asag yamaikish pegkegchaunak taka batsatui. ⁴ Dita uchiji aina duka antakchau, kakajus antumtikmainchau ainawai, nunin ainaig wi aminak awemajame, mina chichamjun ditan ujakti tusan. ⁵ Tusa ujamin dita antugtamainakug antugtamain ainawai, nuniachkush antugtamaichau ainawai. Nuninakuish duka puyatjukaipa, amek chichamak etseggkata, ditak antakchau chichaman umichu intimkiu aina duwi nunimain ainawai, tujash nunak ditai profeta puja nunak dekayaitak nunikagtatui. ⁶ Tujash ditak ishankaipa, dita chichaman tujamainakuish, ishankagtukaipa, jagki tентаe apakbauwa iman, tuja titig ayaunum ejapeena wajamaina iman dekapekmes, tuja kajekag pegkegchaun chichagtamainakuish, amek ishankagtukaipa. ⁷ Mina chichamjun antutan dakitainakuish, amek mijamtsuk mina chichamjuk etseggkata, ditak chichaman umichu intimkiu ainawai. ⁸ Wi tajam nunú shiig antukta. Tuja amek ditajai betekak aipa, tuja wi amina amastatag nunú yuwata”, tujutmayi. ⁹ Tujutkui diistakaman papiunum chicham agaja pempeagbau awentujun wajaun wainkabiajai, ¹⁰ tuja mai yantamejai agagbaun nuna dakuek iwaintugkabi, nunú agagbauk: “Jakamunum buutbau, najaimamu, wake besemag pujamu”, aatsa agagbauyi.

3

1-4 Nuna iwaintujuk chichagtak: “Aentsu uchijiyah, juju papiinum chicham agagbaun amag nunú yuwam ejemagta”, tujutmayi. Tusa tujutmatai papiinum chicham agagbaun yuwabijai, duka dapa yumijijai betek yumimituyi. Nuna yuwa ai chichagtak: “Israel aents aidaunum weme wi amina titatjam nunú etsekgata”, tujutmayi.

5-6 Nuigtu chichaak: “Tuja ame chicham dekamainchaun chichaaku aidau batsatbaunmak awematsjame, ame wegantu aidaunum awemajame. Aents tikich chichaman chichaaku aidau batsatbaunum awema aish, ditak ame mina chichameg etsegbauunak shiig antugtama inawai. 7 Tujash Israel aents aina duka aminak antugtamakachgatui, wi tabaunash antuinachu asag, wagki ditak antakchau, kakajus antumtikmainchau, intimkiu ainawai. 8 Tuja wi aminak dita kajemtin antakchau aina nujai betek awajsattajame. 9 Wi aminak kaya katsugma iman emattajame. Nuadui amina kajegtamainak ishamaunun diigmainakuish ishankagtukaipa, ditak kakajus antumtikmainchau intimkiu ainawai”, tujutmayi.

10 Tuja nuigtushkam Apajuí chichagtak:

“Wi titatjam nunú shiig antukam jukita, dutikam kajimatmainchau aneaku ata. 11 Amina pataim aidau achija yajuakbau Babilonia nugkanum batsata nuwi weme wi tajam nunú etsekgata. Tusa etsegmin antugtamainashkuish, makichkish idaitsuk, Tuke Pujuu tawai tusam etsekgata”, tujutmayi.

12 Tusa tujutai Apajuí senchiji yaki takugmayi, dutijai mina ukujui Tuke Pujuan imanji nugka au takunak uujak wajukeama imatun antukbaijai.

13 Tuja aentsjai betek aina dushakam, nanapen mai apatuinak senchi uutmayi, tuja rueda aidaushkam kagegainak nugka uujak wajukeama imatmayi. 14 Tuja minak nuwi pujai, uwegnum achika jumaina numamtuk Apajuín Wakani jujukmayi. Dutijakui kajekan wake besemag dekapmajai.

15 Nunikan Tel Abib, namak Quebarnum uwet, Israel aents aidau achija yajuakbau batsatbaunum jegabijai, nunikan nuwi ditajai makichkish shiig anentaimjan tumainchau dekapeakun chichatsuk wake besemag siete tsawan pujubijai.

Apajuí Ezequielan Israel aents aidaunum mina chichamjun etsegtugkati tusa apusamu

16 Siete tsawan nagkaemai, Tuke Pujuu chichagtak: 17 “Aentsu uchijiyah, wi aminak Israel aents aidaun kuitamkati tusan apusajame, dutikamu asam, wajina wi titatjame duka imatiksamak dita aidau ujaktatme. 18 Tuja aents pegkegchau takaina nunak idayinak pujutjin iwajatnume tusan wi taja nunú ame ujakham, pegkegchau takatan idaitsuk batsamas jinawagmataig, ametme suwimak jukitnumek. 19 Untsu pegkegchau takainajum duka idaikujum pujutjum iwajatajum tusa ame ujamaitak, amina antugtamsuk pegkegchau takatan idaitsuk batsamas jinaamtaig, amina utugchatjumek atsuttawai. 20 Tuja namputchawame, aents pegkegchau takatan tujanauwaitak, ataktu pegkegchau takak megkaetanum pujau wainiatkum ame mina chichameg ujatsuk idaisam pujus jakamtaig, ame suwimak suwam atatme. 21 Tuja ame chicham ujakam awake anentaimag pujutjin yapajiakug iwaku pujuttawai, nuniakui ameshkam utugchat atsau agkan juwaktatme”, tujutmayi.

Ezequiel chichachu wajasbau

22 Nuna tusa Tuke Pujuu mina uwejuí achijuk chichagtak:

“Wajaim agá nugka paka nuwi wetá, nunikamin ame dutikatnun pachisan ujaktajame”, tujutmayi. 23 Tujutmatai agá jiinkin jeganbaijai, nuwi wajasan Tuke Pujuu imanjin wainkabaijai, nunikan shiig diikman namak Quebarnum uwet pujusan Apajuí imanjin wainkabiag nujai betek wainkan, tikishmajan nijaijui nugkan antigkan pujusbaijai. 24 Nunikan pujai Apajuí Wakani egkemjutug awajtukmayi, dutijua chichagtak:

“Jemin weme epemim egkemsata. 25 Nijah, aminak achipakag daekai jigkapajag, jiinki agkan wekaemainchau etamiagtatui. 26 Tuja wi aminak ujumak tsawantai chichachu awajsattajame, nuadui amek Israel aents aidau intimkiu aina duka kakajus chichagmainchau wajastatme. 27 Tujash wi ataktu chichamtikattajame, dutika ai chichaakmek: ‘Nii antuktatus wakegauk antukti, tuja antutan dakitauk antukchati’ tawai Tuke Pujuu titatme. Wagki ditak intimkiu ainawai”, tiuwai Apajuí.

18

Pegkegchaun takauk jakattawai tibau

1 Tuke Pujuu nuigtu chichagtak:

2 “¿Wagka Israel aents aidash juju chicham agagbaunum chichaak: ‘Múun aidau pegkegchau takamsamunum uchi aidau waituinawai’, tawa nunash kajimatuinatsua? 3 Tujash dekas uminkatnun wi yamai juna tajai. Atumek juju chicham agagbauwa duka ataktu awagkimek Israel aents aidaukam augmattsashitajume. 4 Ashi aents aina duka midau ainawai, múun aidash, uchi aidashkam midau ainawai. Nuadui aents ayatak pegkegchaunak takaidauk jakagtinaí.

5 “Aents pegkejan taka duka pegkeg takatan dekawai. 6 Nunin asa wainka apajuimtai dakumka najanamu aidau emematiagtatus mujanum shimutai, ditajai ijunag ememattsui, tuja nuwigkish kajinmamsag anentaimtsui. Tikichi nuwejaish tsanijinchauwai, niina nuwe tsawanjin jataish nuwejaig kanatsui, 7 tikichnash makichkish waitkachui, tuja aents diwijun akikmakun jukitjai tusa niina jáanchji ukukbaunash akikmatai awaktawai. Makichik aentsnakesh kasagchauwai. Yumainji atsujunash ajampeawai, jáanch atsujunash suwawai. 8 Kuichkin tsagkamkash ewaekam akigkata tusag tuchauwai, tuja tikichnash pegkegchau awagmattsui, utugchat ajaunash yadaukita dekas utugchatash nuna diisa shiig epegtinaí. 9 Nunú aentsua duka iwaku dukap tsawan pujustinaí, wagki mina chichamjun betek umiau asa. Witjai apu Tuke Pujuuunuk, nunak dekas uminkatnun tajai.

10 “Tujash nunú aentsu uchijiyaitak kasa, magkagtin, niina apaji dutikachbaun takak, 11 nuwiya aents aidau wainka apajuimtain ememattatus mujanum shimutai, ditajai ijunag nuna emematak, tuja tikichi nuwen tsanijimak, 12 ujuuna aidau waitkak, tikich aidaukasajin, tuja aents diwimkagtukbaujin akikmak jukitatus, niina jáanchji ukukbaujinash awagtutsuk, wainka apajuimtai aidaukam kajinas anentaimak pegkegchaun wi dakitamua nuna takak, 13 kuichkin tsagkamkash nuni senchi ewaegak segaakug iwakuk pujumattsui. Ashi wi dakitamua nuna dutikau asa, nunú aentsuk nii pegkegchau takasbaujinig akikchau jaka ajapnattawai.

14 “Tujash aents pegkegchauwa nuna uchiji, niina apaji tudau ataish, nigka nunak aintsuk, 15 wainka apajuimtai aidaun mujanum emematu-inak ijunag jüstamiagtaish, ditajai ijunag jüstamchau, nuigtush nuwigkish kajintsag anentaimchau, tuja tikichi nuwejaish tsanijinchau, 16 tikichnash waitkachu, akikmakun jukitjai tusa jáanch ukukbaunash betekush awagtau. Makichkish aentsnak kasagchau, aents yumainji atsujunash ajampeau, jáanchji atsujunash suwau, 17 tikichnash pegkegchauk awagmachu, kuichkin tsagkamkash ewaekam akigkata tusag segachu. Nunú aentsua duka niina apaji tudaujinig mantamnamaitsui. Ayatak nigka dukap tsawan iwaku pujustinaí. Wagki wi mina chichameg umiktinun ukuki-uwaitag nuna betek umiau asa.

18 “Tuja niina apajig katsek, kasa, tikichin kasajin asa, nii pegkegchau takasbaujin suwimkan juki jakattawai. 19 Namputchawame atum anentaimsajum:

“¿Apaji tudau aajakua nunin aish, wagka uchijish suwimkanash jumainchawaita? tumainaitjume. Tujutkugmin wi atumin ayaakun: ‘Nigka mina chichamjun betek umiak pegkegchau takat aidaunak takaschau asa, iwaku pujustatui’, tumainaitjime. 20 Múun uchigtin aina duka, niina uchiji aidaun pegkegchau takamsamujinig suwimkanak jumaitsui, tuja uchi aina dushakam ditá apaji aidaun pegkegchau takamsamujinig suwimkanak jumaitsui. Ayatak nii pegkegchau takasbaujin suwimkan jukittawai, untuunii pegkejan takasuk waji pegkejan jukitnai.”

Apajuí chichameg betekush uminnai
(Éz. 33.10-20)

21 “Aents pegkegchauwa nunú, awake anentaimag pegkegchau takatan idayak, mina chichamjun betek umiakug, jatsuk iwaku pujustatui. 22 Tuja nii tudauji aidaunak tsagkujan, atakea duish anentaimtuschatnun kajimatkin idaisatnaitjai, nigka waji pegkeg aina nuna takasu asa iwaku pujustatui. 23 Aents pegkegchau aina nunú jakai tusan dakitajai, ayatak pegkegchau takatan idayinak pujutjin iwajatnume, nunikag iwaku pujustinme tajai. Witjai Tuke Pujunuk nunak dekas uminkatnun tajai.

24 “Tuja aents pegkeg takatan idayak, aents pegkegchau aina nujai betek wi dakitamu tsumain aina nuninun takakush, ¿nunú aentsush iwakush pujumainkait? Wika nii pegkeg takasbaujiya nunak ataktu awagkinuk adeagchatnun kajimatkin idaisatnaitjai. Dutikam nigka mina umigtutsuk pegkegchau takata nunak taka wekagu asa jakattawai. 25 Tuja atum chichaakjum:

“Auk Apajuí pegkegchawai shiig takatsui’, tajume. Israel aents aidauwah, shiig anentaimsajum aigkatajum, ¿dekas wikaitag shiig takachunush? ¿Atumchaukaitjum dekas pegkegchau takautigmek?

26 Tuja aents pegkeja nunú pegkeg takatan idayak pegkegchaun takakug, nii pegkegchajinig jakattawai. 27 Tuja aents tudauwa nunú pegkegchau takatan idayak, niina pujutjin iwajug pegkejan takakug pujutjinak uwemittattawai. 28 Nii pegkegchau takamujin wainmamak awake anentaimag nuna idaisau asa, jatsuk iwaku pujustinaí.

29 “Tujash Israel aents aidautijum ataktushkam chichaakjum:

“Apajuik shiig takatsui’, tujutjume. ¿Tujash dekaskenmash wika shiig takatsug? ¿Atum Israel aents aidautijum dekas pegkegchau takatsjume?

30 Israel aents aidauwah, witjai atum maki makichik takasbaugmin diigsan suwimkan amastinnuk. Witjai Tuke Pujunuk nunak dekas uminkatnun tajai. Tuja atumi tudaujum aina duka idaisatajum, atum pegkegchau

takasbaunum suwimak juki waittsaijum. ³¹ Atum pegkegchau takajum duka ashí idaisatajum. Nuniakjum shiig anentaimat, yamajam pujut jukitajum. Nunú nuniakjumek makichkish jakashtatjume. ³² ¡Wika atum jakatnume tusanuk wakegatsjai! ¡Nuadui pegkegchau takat aina duka idaisatajum, nuniakjumek iwaku pujustatjume! Witjai apu Tuke Pujunuk nunak dekas uminkatnun tajai”, tiuwai.

Uwemat anagkagtuamu (33—39)

33

Profetak niina aentsji aidaun kuitamainai
(Ez. 3.16-21)

¹ Tuke Pujuu nuigtu chichagtak:

² “Ezequielah, wi tajam nunú chicham Israel aents aidaun ujakta: ‘Wi makichik nugkanum maaniamun akupeakui, juwiya aents makichik etegkajum jinta kuitamkatin adaikatajum. ³ Nunú jinta kuitamna nunú shiwag aidaun yaaktanum kaunattak miniagtai, aents aidaun ujaak uwija kachujin umpuagtatui. ⁴ Nunú uwija kachuji umpuamun antayatak, intimki umintsuk pujai, shiwag aidaun jetekag maawagmak, duka niina utugchatji atatu. ⁵ Wagki nunú umpuamun antuk umintsau akug uwemainaitak, umintsuk pujus mantamdau asa. ⁶ Untsu jinta kuitamna nunú shiwag aidaun minidaun wainiatak, uwija kachujin umputsuk pujai, shiwag aidaun jeteka makichik aentsnakesh maamak nunú aentsuk tudauk pujus jakattawai, tujash wi jinta kuitamna nunak nunú aents jakamunum suwimkan susattajai.’

⁷ “Aentsu uchijiyah, wi aminak Israel aents aina nuna kuitamin ati tusan etegkajame, nuadui mina chichameg shiig antukam, wi tajam nunú etsegkata. ⁸ Tuja aents pegkegchauwa nuna wi chichagkun: ‘Nigka niina pegkegchaujini jakattawai’, tusan titatjai. Tuja ame aents pegkegchauwa nunú: ‘Tudaujum idaisam pujutjum iwajata’, tusan ujatsuk pujamin, tudaugtin pujus jakamtaig, ame bakumatnaitme. ⁹ Untsu nunú aents chichagkun: ‘Tudaujum idaisata nunikum pujutjum iwajata’, tusa ujamaitak, nunú antutan dakitakug niina tudaujini jakattawai. Nunikmataish amek ujaku asam bakumashtinaitme.”

Aents aidaun dita pujutjin maki makichik puyatjukagtin
(Ez. 18.21-32)

¹⁰ “Aentsu uchijiyah, Israel aents aina nunú chichagkun: Atum chichaakjum: ‘Iik shiig tudau waigji, imaniku asaja ii aidautik kaujujai betek ainaji, nunin aidautish ¿itugsaiik iwakush batsamsatji?’ tajume. ¹¹ Tujash wika aents tudau aina nunú jinaati tusanuk wakegatsjai, ayatak pujutjin yapajiwag iwaku pujustinme tusan wakegajai. Israel aents aidauwah, pegkegchau takajum duka idaisatajum, nuniakjumek jakashtatjume, tawai Tuke Pujuu.

¹² “Ezequielah, amina pataim aina nunú ujakta: Aents pegkeja nunú tudau takakuig, nii pegkejan takajaku akuishkam uwemtijashtinaitjai. Tuja aents tudauwa nunú, pegkegchau takatan idayak pujutjin yapajiamtaig, nii tudau aajakua duwik suwimkanak susashtinaitjai. Aents pegkeja nunú tudau takakug, yaunchuk tudau takajakchauwa nuaduikik iwakuk pujuschattawai. ¹³ Tuja aents pegkeja nuna wi chichagkun: Amek kuashat mijan pujustinaitme timawaitak, nii pegkeg takasbaujin kajinas anentaimak, pegkegchaun ataktu takakuig, pegkejan takasu akuishkam

kajimatkin idaisatnaitjai. Dutikamu asa nunú aentsuk niina tudaujinig jakatnai. ¹⁴ Aents tudauwa nuna chichagkun: ¡Amek amina tudaugmin jakatnaitme! tusa tai, niina tudaujin idayas pegkejan takak, ¹⁵ aents diwimkagtak akikmakun jukitjai tusa jáanch ukukbaun awagtukchamujin, tuja kasamkamujin awakeakuig, niina tudaujinak kajimatkitnaitjai. Dutikamu asa mina chichameg pujuta sukagtina nuna betek umiau asa, atakea duish tuke pujustinai. ¹⁶ Yaunchuk nii pegkegchau takasbauji akuish, nunak kajimatkitnaitjai. Nigka ashí pegkeg aidaun takasu asa iwaku pujustinai. ¹⁷ Tuja amina pataim aidau chichainak:

“¡Apajuik shiig takatsui!’ tuinawai. Tujash dekaskenmak dita ainawai pegkegchau takaidauk. ¹⁸ Untsu aents pegkeja nunú, pegkeg takatan idayak pegkegchau takakug, niina pegkegchaujigin jakattawai. ¹⁹ Aents tudauwa nunú pegkegchau takatan idayak, pujutin yapajia, pegkejan takakug iwaku pujustinai. ²⁰ Tuja Israel aents aidau ataktushkam pegkegchau chichagtuinak:

“¡Apajuik shiig takatsui!’ tujutuinawai. Tujash wi Israel aents aidaunak makí makichik dita takasbaujin diigsag suwimkan susatnaitjai.”

Jerusalén tsayam atin etsegkamu

²¹ “Tuja babilonianmaya achipag yajupakagmatai, nuwi jegaa, tsawan cinco, nantu diez, doce mijan batsatin, shiwag Jerusalégkan tsayagtai, makichik aents uumak tupikakiau, Jerusalégnak iina shiwaaji aidau tsaikagmae tusa ujatkabi. ²² Tuja nunú aents eke taatsaig, Tuke Pujuu niina senchijin kashi mina egkemjutak, chichachu awajtusmayi, tujash kashinia duwi nunú aents uwemjau tatai, Apajuí ataktu chichamtijukmayi.” ²³ Nunika Tuke Pujuu mina chichagtak: ²⁴ “Israel aents aidau nugke tsaikbauwa nuwi aents ujumak iwaku juwaju aidau batsamas chichainak: ‘Abrahamak nigkitak, juju nugkanak niinu ema pujusui, tuja ii aidautik kuashat ainaji nuadui utujimkas iinu emami’, tuinawai. ²⁵⁻²⁶ Nuadui ame weme Tuke Pujuu tawai tusam etsegkata: ‘Atumek pegkegchau takakjum, neje numpentin yuwagme, wainka apajuímtai dakumka najanamu emematjume, atumi maanitajium aidau eme anentajume, nuniakjum tikichi nuwejaish tsanijinjume, nuni batsatiatkugmek, ¿juju nugkak iinu atatui tajum?’ tawai Apajuí tita.

²⁷ “Tuja jushakam ujakta: ‘Israel aents aidau shiwag amuum ujumak iwaku juwaju yaakat tsaikbaunum batsata nunashkam ijinawagtatui, tuja aents ikam batsatunashkam kuntin kajen aidau yuwawagtatui. Tuja wainmainchau shiig peeja apakbaunum, waanum uumak batsataidauk jatai jinawagtatui. Witjai apu Tuke Pujuuunak nunak dekas uminkatnun tajai.

²⁸⁻²⁹ “ ‘Atumek pegkegchau wi dakitamua nunú takagme, nuadui wi atumi senchijinak, atumi emematajium aidaujai atankittajime, dutika ai juju nugkak bashiak aents atsau shiig agkan itajak juwaktatui. Muja aina nuwig makichik aentskesh wegaguk atsustinai. Nunikmatai wi dekas Tuke Pujuuwaitag nuna dekajuawagtinai.’

³⁰ “Amina pataim aidau, yaakat peejamua imanui nagkamas, dita jeen waitijin amina pachipas chichainak: ‘Kaunatajum Tuke Pujuu niina chichamen Ezequielai awetugma nunú antukagmi’, wajainawai. ³¹⁻³² Nunik kaunawag ame chichamun antukagtatus tuke nunin asag, aminí ayaumas pekajui. Amek dita diismak aents kantamtan yacha pegkegchin anenkan kantamnujai betekaitme, ditak senchi wakegainawai ame chichamun antukagtatus. Tujash ditak kuichkin ima puyatjuinawai.

Nunidau asag ame chichamunak antugtamañayatak uminatsui. ³³ Tuja wi taja duka shiig wamak uminkattawai. Nunú betek umintai, dekawagtinañ Apajuñ chichamen etsegtin dita pujamunum puja nuna, tawai Apajuñ”, tiuwai Ezequiel.

34

Israel aents aidaun apuji pegkegchau aajaku aidaun

¹ Nuigtu Tuke Pujuu chichagtak:

² “Aentsu uchijiyah, Israel aents aidaun apuji aina nunú juna apu Tuke Pujuu tawai: ¡Chah, apu Israel aents aidaun uwigjai betek kuitamin aina nunak wait anentuñajai! ¡Dita aidauk nunú uwijan shiig kuitamtsuk ima ditanunak anenmama batsatui! ³ Atumek uwija muntsuji ijugbau umagme, tuja nuna uje najanamush nugkuagme, nuigtush uwig duwejam aidaun maagme; dutikayatkujum uwig aidauk kuitamtsugme.

⁴ “Atumek uwig kakakchau aidaush kuitamtsugme, tuja jakuishkam ampiatsjume, nawen kuwinjukmataish pempenjagmesh kuitamtsugme, tuja wagakmataish ejakjumek ataktu awakeatsjume, tuja megkaekamtaish egatsjume, duka dutiktsuk ayatak asutiakjum senchi waitkagme. ⁵ Mina uwig aidauk kuitamain atsugsam, ditak batsatu asa pisaja megkaejae, nunik wainak yuajun kuntin kajen aidaun yuwinawai. ⁶ Uwig aidauk ashí muja aidaunum tuja nain aidaunum pisaje, nuninak ashí nugkan pampamtuk megkaejae, nunik megkaejamtaish, nuna egaka awakjatatus puyatjauk makichkish atsawai.

⁷ “¡Uwija kuitamin aidauwah, wi taja nunú shiig antuktajum! ⁸ Mina uwig aidaun kuitamainuk atsau asantai, kuntin ikamia kajen aidaun amuke. Uwija kuitamkagtinun adaijamu aidauk uwignak kuitamainatsui. Ditak anenmamainak uwig aidaunak pachikchaje. Witjai apu Tuke Pujunuk, nunak dekaskenum tajai. ⁹ Nuadui wi chichaman tajim nunú uwija kuitamin aidauntijum shiig antuktajum: ¹⁰ Uwija kuitamin aidauwah, wika yamaik atumnak shiwagmajime, mina uwig aidaun kuitamkatajum tiuwaitijum dusha betekash umikujum nuna dekajuattajime. Dutikakun mina uwig aidaun apuji ainajum nunak jiktatijime. Nunak dutikattajime ima atumek anenmamkujum mina uwig aidaun yuu batsamijum tusan. Dutikan mina uwig aina nunak ataktu yajuakan ijumjattajai, tawai tusam ujakta.”

Uwijan shiig kuitamin

¹¹ “Tuja mina uwig aidaunak tikich kuitamkatneme tusanuk idaisashtatjai, ima wiki kuitamkattajai. Witjai apu Tuke Pujunuk, nunak dekas dutikattajai. ¹² Aents uwigji megkaejamtañ puyatjuwama imatiksan mina uwig aidaunak puyatjittajai, nuadui yujagkim suwe wajas-matañ ishamañnak pisaja megkaejaja nunak ataktu yajuakan ikaunmattajai. ¹³ Tikich nugkanum achija yajuakbau batsata nuna ataktu awakjan, dita nugke ashí batsamtukbauwa nuwi ikaunmattajai. Dutikan dita nugkan muja aidaun, entsa aidaun ayá nuwi ashí yajuaka iwajan chijichi pegkeg aidaun ayujawagtatjai. ¹⁴ Israel aents aidaun nugken muja aina nuwi yajuakan iwagtatjai, nuwiya dupa shiig pegkeg aina nuna yuwatneme tusan. Dutika ai nuwian pegkeg dupa aidaun shiig yuwawag ayamjagtañ-tui. ¹⁵ Wi dita yuwatnunak susattajai, dutikakun ayamtiksgatjai. Nunak dekas wi umiktinjun tajai. ¹⁶ Uwig megkaejaja nuna egakan tikich jintanum yuajunash yajuaka ikaunman nawen ichiinkau akuish, shiig dijajan ijijuan

kuitamkattajai, tuja duwejam wajuu aidaunash kuitamkattajai, dutikakun kakaakchau aidaunashkam shiig kuitamkattajai.

¹⁷ “Atum mina uwig aidautigmin wi tajim nunú antuktajum: Atum ainajum anuiyag uwig múun, tuja uwig tsakatuch, uwig kakaakchau, uwig wajuu, tuja chivokesh akuishkam ashí betek ijumsan kuitamkattajai.

¹⁸ Atum ainajum anuiya chijichi pegkejan yuwinakush shiijak aneenatsui, ayatak tikich chijichi ayaunash najak tsaika ukuinawai. Yumi pegkejan saawin umuinawai, nuninayatak tikich saawi wajas aunak wajatug ukusmak ukuinawai. ¹⁹ Mina uwig kakaakchau aidauk atum chijichi najakbaun yuwawagatui, tuja yuminashkam atum ukusmakbaun uwajagatui.

²⁰ Nuadui wi juna tajime: Wika aents wajuunash kakachaujai betek diisan suwimkan susattajai. Nunak dekas dutikatnujun tajai. ²¹ Atum wajuu aidautigmin uwig kakachau aidau depetkajum kachugmin ijua ijuakuajum tupikamtikjume.

²² Tujash mina uwig aina nunak wi ayamjukagattajai. Ataktu kasajuinak waitkastinme tusanuk idaisashtattajai. Mina uwig aina nuwish yakita shiig takaush, tuja shiig takachush nunak wi diistattajai.

²³ Mina inakeg David mina umigtujakua nunú uwijan kuitamkati tusan ataktu untsuktattajai. ²⁴ Witjai Tuke Pujuunuk. Wi dita Apajuji atattajai, untsu dita apujig David atattajai. Witjai Tuke Pujuunuk, nunak dekas uminkatnun tajai. ²⁵ Agkan pujusagtinme tusan wi ditajai chichaman umikattajai. Tuja kuntin ikamia kajen aina nunak yaja ishiaktattajai, dutika ai mina uwig aidau agkan batsamsatnume, nuninak ikamash agkan kanitnume tusan.

²⁶ “Mina uwig aidaunak midau muja pegkegma nuna yantamen batsastattajai, tuja ditanak wi yaigtattajai, dutikakun yuminashkam nunú tsawantin yutugti tibaunak imatiksasuk yutumtijattajai. ²⁷ Numi aidaush nejeagtinai, tuja ajakmamash shiig tsapai kuashat nejetnai, nuadui ditak dita nugken shiig batsamsagtinai. Mina aentsug aidaun waitkaina nuna suwimkan suwakun agkanmitkawaja ai, wi dita Apajujiyaitag nuna shiig dekawagtinai. ²⁸ Aents Israel wegantuchu tikich nugkanmaya aidauk, Israel aents aidaunak ataktu dita inataiji emakag waitkaschagtinai. Tuja kuntin kajen aidaukesh ditanak yuwachagtinai. Nuadui ditak makichkish ishankagtutsuk agkan shiig batsamsagtinai. ²⁹ Dita nugkenak pegkeg, ajak aidaush shiig tsapai awajattajai. Nuadui ditak nujantaik waittsachagtinai, tuja tikich nugkanmaya aidaush ataktu awagkiajag dushikjachagtinai, wagki shiig batsatu asagmatai. ³⁰ Nuadui wi Tuke Pujuu, dita Apajujiin ditajai pujag nuna dekawagtinai. Witjai apu Tuke Pujuunuk, nunak dekas tajai. ³¹ Atumek mina uwijujai betek ainagme. Witjai atumin Apajuigminuk”, tiuwai Tuke Pujuu.

36

²²⁻²³ “Nuadui Israel aents aidau chichagkum:

“Juna aatus apu Tuke Pujuu chichaak: Atumi pegkegchaujin tikich aents aidau mina daag pegkegma nuna dushikinawai, nuadui atumek tsagkujamak amaitsugme. Nunin ajuminig wika mina daag pegkegma nuna ayamjakun agkanmitkattajime. Dutika ai nuna wainkag wika Tuke Pujuu pegkejam, ashí senchigtin, Israel aents aidaun Apajujiyaitag nuna dekawagtinai. Witjai Tuke Pujuunuk nunak dekas uminkatnun tajai. ²⁴ Atum tikich aents aidau waitkam batsatjam nunak wi agkanmitkattajime, dutikan yajuakan atumi nugkeen ikaunmatnaitjime.

²⁵ Atumek dakumka najanamu tsumain emematin ainagme, tujash wi

atumi tudaujinak kajimatkin idaisattajai, dutikan jáanch bika dijaja pegkeg ematia numamtuk dijajan pegkeg awajsattajime. ²⁶ Wi atumnak yamajam pujatan, pegkeg anentaimtajai amastatjime. Dutikakun kakajus antumtikmainchau kayajai betek ainajum nuna, kakagchauch chichaman umin awajsattajime. ²⁷ Nuigtushkam mina Wakanjun amastinaitjime, mina chichameg umiktin agagbau aina nuna umiktinme tusan. ²⁸ Dutikamu asajum atumi apachjum aajakajua nuna nugkan susauwaitag nuwi jegajum batsamsatnaitjume. Tuja atumek mina aentsug atatjume, wi atumi Apajuújum atatjai. ²⁹ Atumi tudaujumnak esakatjattajime, dutikakun shiig kuashat trigon tsapamtikatnaitjai, nunú yuwakjum ataktu awagkigmek nujantaik waittsashtinaitjume. ³⁰ Tuja ashí numi nejen aidaunak, atum ajakmamu aidaujui senchi nejemtikatnaitjai, wagki atum nujantai waitiagmin, tikich nugkanmaya aidau dushiktamaina nunak ataktu awagkig dushiktamjashstinme tau asan. ³¹ Nuna dutika ai atumi pujutjum pegkegchau, tuja takamujum aidaush shiig pegkegchau aina nunú wainmamkajum datsagtatjume. ³² Israel aents aidautiljum shiig antuktajum. Wi ashí nuna dutikattag nunak atum pegkejam asagminkish dutikashtajai. Nunak dutikattajai, atumi pujutjum anentaimtusjum datsaagminjum tusan. Witjai apu Tuke Pujuuunuk, nunak dekas uminkatnun tajai.

³³ “Wi atumi tudaujum aidaun ashí tsagkujan, atumi yaaktaji tsaikbau aina nuna ataktu jegamjatnume timatai, jegamjajum nuwi batsamsatnaitjume. ³⁴ Tuja atumi nugkeg ukumkimu asa takascham bashiak au, atum ataktu kaunajum nuwi ajakmatnaitjume. Nuna ashí aents nuni nagkaemaidauk wainiagtinai. ³⁵ Nunik chichainak: ‘Juju nugka ukumkimu asa bashiak amaya nunú yamai Edégjai betek wajase; tuja yaakat tsaikbau asa kaya tuwasua weaku aajabia dushakam shiig jegamja peeja umikbau ainawai. Imannum aents aidau batsatuí, tiagtinai. ³⁶ Tuja imatika tsaikbaunash wi ataktu jegamjan, tegagbaunash ataktu ajakmakan uminaitag nuna diisag, Israel aents aidau nugken tikich yantamnum aents iwaku pujuidauk dekas Tuke Pujuuwap aikae tiagtinai. Witjai Tuke Pujuuunuk, nunak dekas umiktatjai.

³⁷⁻³⁸ “Tuja nuigtush Israel aents aidauk shiig kuashat yujakag uwigjai betek agtinai, wagki nunak dita aatus mina segatijae. Nunak dekas dutikattajai. Yamaik dita yaaktaji tsaikbau aina nunak ataktu yaaktamkag, nuwi aents aidauk pimasua weaku atatuí. Jiista jegamtai, Apajuín emematuinak uwijan shiig kuashat Jerusalén yajumin aina nujai betek atatuí. Imanitai nuna wainainak, dekas Tuke Pujuuwap aikawa tiagtinai”, tiuwai.

37

Ukunch sakaku aidau

¹ Apajuí senchiji mina tajutuamtaí, niina Wakani egkemjutug muja najatamu pakajin ukunch sakaku tuwasua weakunum ejentunmayi. ² Dutijua ashí yantamnum awekatus shiig kuashat ukunch sakaku batsatun iwaintugkabi. ³ Nuna iwaintujuk chichagtak: “Ame anentaimsamash juju ukunch sakakua dusha ¿ataktu aents najanemainuk aina?” tujutmayi. Tujutkuí wi ayaakun: “Apu, Tuke Pujuuwah, duka ame dekame”, tibiajai. ⁴ Tusa tai nii chichagtak: “Ukunch sakaku batsata nunú mina pachittsam ujaakum: ‘Ukunch sakaku aidauwah, juju Tuke Pujuu chichame antuktajum. ⁵ Apu Tuke Pujuu chichaak: Wi atumnak

mayain egketjattajime aneantinme tusan. ⁶ Dutikan yaapen, nejen, duwapen batsatkan mayain egketjagattajime, anean iwaku pujustinme tusan. Dutika ai, dekas Tuke Pujuuwap aikae tujuttattajime' tita", tujutmayi. ⁷ Tusa tujutmatai nii tujutbaunak imatksanuk ukunch sakaku batsatun ujakbaijai. Tusa ujaakun wajai, nugka uugmayi, jnuniaig ukunch aidauk ikaniagmayi! ⁸ Nuniaig yaap aidau, neje aidau, duwap aidau, ukunch aidau ijika iyashtin emabi. Tujash mayati pujustinjig eke atsujiagmayi.

⁹ Nunikagmatai nii chichagtak: "Mayai pujutan sukagtina nunú mina pachittsam chichagkum: 'Aatus apu Tuke Pujuu tawai: Mayati iwaku pujutan sukagtinuh, ashí yantamnum taata, nunikum aents jinaa batsata nunú egkemtujam inanjata' tita", tujutmayi. ¹⁰ Tusa tujutbaunak imatksanuk Apajuí daajin tibaijai. Tusa ti ai nunú mayati pujutai egkemtujam, dutikam ashí nantajag shiig kuashat suntagjai betek ijunjabi.

¹¹ Nunikagmatai Apajuí chichagtak:

"Aentsu uchijiyah, Israel aents aidauk juju ukunch sakaku aina nujai betek ainawai. Nunin asag chichainak: '¡Ilik ukunch sakakujai betek ainaji! ¡Iina ayamjutupamainuk atsugtamui! ¡Kakaja ayamjumakchamin wajasji!' tuinawai. ¹² Tuu batsata nunú mina pachittsam ujaakum: 'Apu Tuke Pujuu juna tujamui: Mina aentsug aidauwah, atumek aents jinau ukusbaujai betek ainagme, nunin akugminish wi yajuakan atumi nugkemin ejegattajime. ¹³ Dutikan jakau aidau ukusbau sakaku ujamaia numamtuk awajkattajime, dutika ai: Juwapi Tuke Pujuu iina Apajuíjia duka, titatjume. ¹⁴ Tuja wi atumnak mayati iwaku pujutan amastatjime, dutika ai atumek aneantattajime, nunikagmin atumin nugkeminig batsastatjime.' Nuadui: Dekas Tuke Pujuuwap nii tibaunak betek umike, titatjume. Witjai Tuke Pujuuunuk, nunak dekas uminkatnun tajai."

*Judá aents aidau
Israel aents aidaujai
ataktu ijumjamu*

¹⁵ Nuigtushkam Tuke Pujuu mina chichagtak:

¹⁶ "Makichik numinum agakum 'Judá aents aidauk Israel aents aidaujai atuunin ainawai', tuu agagta. Untsu tikich numinum agakum: 'José uchiji Efraín wegantu aina nunú tikich Israel wegantu aidaujai ijunainawai', tuu agagta. ¹⁷ Dutikam nunú numi mai apatkan achikta. ¹⁸ Dutikawamin ame wegantu Israel aents aidau inimpainak: '¿Jusha wagka aikame?' tujamainakuig, ¹⁹ ame ayaakum: 'Tuke Pujuu juna aatus chichaak: Numinum José daaji agagbauwa nuna Efraín tikich Israel aidaujai takakuina nuna jukin, tikich numi Judá daaji agagbauwa nujai apatkan makichik numi awajsattajai. ²⁰ Tuja ame jimag numinum agagmaun nunú ditash wainainai mai apatkan achikta.' ²¹ Nunú takusa wajasam dita chichagkum: 'Tuke Pujuu juna aatus chichaak: Israel aents aidau tikich aents aidau nugken batsata nunak jiija yajuakan dita nugken ikaunman batsastatjai. ²² Dutikan dita nugkenak dita mujaji aidaujai ashí makichik nugkak emattajai. Dutika ai jimag nugka akankachbau makichik apugtinuk agtinai. ²³ Tuja nuigtushkam Israel aents aidauk ataktu awagkig, dakumka najanamu tsumain aina nuna emematuinakug tunamagchagtin ainawai, tuja tikich pegkegchau aina nunashkam takama yujashtin ainawai. Dita pegkegchaujinash pachitsuk idaisatnaitjai. Ditak mina aentsug agtinai, untsu wi dita Apajuí atinaitjai.

²⁴ “Dita aidaun apujig David atatui, tuja ditan kuitamkatnushkam ima Davitak atinai. Untsu chicham umiktinun wi ditan susauwaitag nunak dita umikagtinai. ²⁵ Nuninak wi Jacopan nugka susauwaitag nuwi batsamsagtinai. Nunú nugkanum dita muunji aajaku aidaushkam batsamajaku ainawai. Nuwi difak dita uchiji aidaujui tuke batsamsagtinai, tuja dita wegantu aidaushkam ashí nuwi batsamsagtinai. David mina inakjua nunú dita apujig tuke atinai. ²⁶ Utugchat atsaunum agkan batsamsatnume tusan wi ditajai chichaman umiktatjai. Wi ditajai chichaman umiktatag duka atakesh tuke yapajinashtinai. Wi ditanak shiig kuashat uyujkatnaitjai, tuja dita nugken mina emematjaku ijuntain tuke asatnun umiktinaitjai. ²⁷ Dutikan ditajai pujustinaitjai, nuniakun wi dita Apajuíji atinaitjai, untsu dita mina aentsug agtinai. ²⁸ Mina emematjaku ijuntai nugka dita batsamtain jegamkamu tuke atina nuna tikich aents Israel wegantuchu aidau diisag, dekas Tuke Pujuuwap Israel aents aina nunak etegkauwaita tiagtinai. Witjai Israel aents aidaun Apajuíjinuk’ tawai Apajuí”, tusa Ezequiel tiuwai.

Daniel Daniel pachisa agagbau

(1—6)

Yama nagkamchaku augmattsamu

¹ Joaquim Judá aents aidaun apuji wajas kampatum mijan inamai, Babilonia nugkan apuji Nabucodonosor Jerusalégkan jetektatus niina suntaji aidaujui tenteawajui. ² Apu Nabucodonosor Israel aents aidaun depetuk, apu Joaquim tikich Israel aents aidaujui achija yajuakti tau asa, Tuke Pujuu Israel aents aidaunak yaigchauwai. Tuja Apajui emematku ijuntai jegamkamunum takatai aidaunashkam yajuaktinme tusa tiuwai. Nuadui Nabucodonosor Israel aents aidaun achija Babilonia nugkanum yajuakui, dutikak Apajui jeen takatai ayaunashkam kuashat yajuak Babilonia nugkanum ejegauwai, dutika dita apajuimtai aidau jegamjuk-baunum nunú emematku takatai waji akik pegkeg aidau ayaunum nuwi awayauwai. ³⁻⁴ Tuja nuigtushkam apu Nabucodonosor niina aentsji aidau apu pujusa inamtaijin takau aidaun apuji Aspenaz aajakua nuna chichajak: “Israel aents achigbau aina nuwiya apu wegantu aidau, tuja aents eme anentsa diitai aina nuwiyashkam datsauch shigmauch, yantsapin, iyashish pegkeg, ashí yacha, apu inamtaijin pujusa takamain aidau etegjata. Dutikawamin iish wajuk batsamin ainaji nunú, tuja iina chichameshkam kampatum mijanai jintinnati. ⁵ Tuja ditak kampatum mijanai apu yuwatin umikbaun yuwawagtatui, umutainashkam apu uwagtin umikbaun umiagtatui. Nuni nuninakua kampatum mijanan ejejag, duwi nagkamas apu takajuinak batsamsatnume tajai”, tiuwai.

Danielan niina kumpaji aidaujui yajuakag apu pujusa inamtaijin ejegamu

⁶ Datsauch aidaun etegjaju aina duka ipak usumta imajin Judá wegantu aajaku ainawai; dita daaji aidauk: Daniel, Ananías, Misael, Azarías aatus aajakui. ⁷ Tuu daagtin aidaun Aspenaz yapagtukui, dutikak: Danielan Beltsasar adaikauwai, untsu Ananíasan Sadrac adaikauwai, tuja Misaelan Mesac adaikauwai, untsu Azaríasan Abed-nego adaikauwai. ⁸ Tujash Danielak ngiki anentaimas dekawika apu yutainak yuwashatai, umutai-jinkesh uwagchatjai tumamiuwai, wagki nii nuna yuwakug pegkegchau wemain dekapeau asa. Nuadui Aspenazan chichajak: “Apu yutai aina nunú yuwata tusamek wait aneam waitkagsaipa, tuja mina kumpag aidaushkam waitkasaipa”, tiuwai. ⁹ Tusa tutaish Apajui Danielnak yayau asantai Aspenazak kajegkachui. ¹⁰ Dutikayatak chichajak:

“Atum yuwatnunak, tuja atum vino uwagtinnashkam apu chichaman umike. Nuadui wika mina apujun ishamajai. Wagki tikich datsa aidau pegkeg batsatai, atum yujumak yuwachu asajum jaujai betek shigchau wajasum pujagmin, apu waipakag mina mantumainai. Dutijuamtaig atumdau utogchatak atatui”, tiuwai.

¹¹ Nuna tusa apu pujusa inamtain waji aidaun kuitamin Melsar aajakua nuna Aspenaz etegkauwai, Danielan niina kumpaji aidaujui kuitamkati tusa. Dutikamtai Daniel Melsarjai chichastatus weuwai, nunik jegajua chichajak:

¹² “Jutii aidautik amina inakem ainaji. Nuadui wait aneasam diez tsawantai ii yuwatnuk, yutai ajanmaya juukbau aidau yumi uwagtinjai sukagtusta tajame. ¹³ Tuja nunú diez tsawan jegamtai, tikich datsauch aidau apu yuwatin umikbaun yuwina nujai apatkam diijattsata. Nunikam ame wajak anentaime nunú tita”, tiuwai. ¹⁴ Tusa tima ayu tusa Daniel tibaunak imatiksag dutikauwai. ¹⁵ Nunú diez tsawan nagkaemakmatai diikma, Danielak niina kumpaji aidaujai tikich datsauch aidau apu yuwatin umikbaun yuwidaun nagkaesau shiig pegkeg waji u aidau bat-satun wainkauwai. ¹⁶ Dutika wainak, yujumak vinojai susatajum tusa apu tibaunak sutsuk yutai ajanmaya juukbau aidau yumi sijai sujakuu.

¹⁷ Nunú ipak usumat datsauch aajaku aina nunak, ashí waji aidau unuimagtinme tusa Apajuí yachamtikauwai. Nuigtush Danielak kajan-mayanash shiig dekajakui. ¹⁸ Apu tsawantan mamikiamu jegamtai, Aspe-naz datsauch aidau yajuak apu Nabucodonosor pujamunum ejegauwai. ¹⁹ Dutikamtai apu ditajai chichasui. Tujash Daniel, niina kumpaji aidaujai shiig yacha aajaku aina imannak tikich datsauch aidau nak makichkish wainkachui. Nuadui ditak apu takajuinak batsamsajui. ²⁰ Apu nii dekatag tusa wakegamujinak ashí inias dekajakui, tuja anentaimes dekamini aidau, tunchi aidau apun ujakui aina nuna nagkaesau ditak shiig yacha aajaku ainawai. ²¹ Aatus Danielak nuwi pujaig, tikich apu yamajam Ciro, Persia nugkanmaya aajakua nunú, Babilonia nugkan apuji wajasui.

2

Apu Nabucodonosor kajamjamu

¹ Nabucodonosor apu wajasa jimag mijana nuna inamak pujus, kajanum kuashat pegkegchaun kajamjauwai, nunik wagkanuk aan kajamjaja tusa senchi anentaime kanumainchau dekaeau. ² Nuniak ujatkatnume tusa, anentaimes dekamini aidau, tunchi aidau, yaya dekapau aidau aatus untsukui. Dutikam apu pujamunum jegawajui. ³ Nunikagmatai apu nii kajamjamujin ditan ujaak:

“Kajanum kajamjag nuna shiig ejemainchau dekapeakun senchi anentaimejai”, tau.

⁴ Tutai dita arameo chichamai apun chichajuinak:

“iApuh, kuashat tsawan pujusam inamjatin ata! Tuja waji kajamjaume nunú amina inakem aidauti ujakkata, nunikamin wagkamek aan kajamjaume nunú ashí ame ujakmi taji”, tiajui.

⁵ Tusa tiagtai apu ditan ayaak:

“Wika juna anentaimesajai. Wi kajamjag nunash wajukatnunak aan kajamjaja nunú betek ujatcakjumek asaja ijinam atatjume, tuja atumi jeshkam ashí tsainkattawai. ⁶ Untsu atum wi kajamjag nunash wagkanuk aan kanagja nunú betek ujakgaminig, kuashat waji aidau amastatjime. Dutikakun ashí aents aidau atumin eme anenjamtinme titatjai”, tiuwai.

⁷ Tusa timatai anentaimes dekamtan yacha aidau niina ataktu chichajuinak:

“Apuh, ame waji kajamjaume nunú etsekgata, nunikamin wajukatnuk aan kajamjaume nunú ii ame ujakmi”, tuidau.

⁸ Tusa tiagtai apu ditan ayaak:

“Atumek mina tsawan emegkatkujum tuu yujagme. Wagki atumek wi tija nunú dekaulum nuadui, wajintuk tsanujag tusajum tajume. ⁹ Tujash wi tija nunak yapajiashtatjai. Ayu kame wi kajamjag nunash wajukatnuna

aannunash kajamjaja nunú yamai ujatkatajum. Nunú ujatkgamin dekas yachap ainawa titajime. Nunú betek uatchakjumek ashí betek suwimak jukittagme”, tiuwai.

¹⁰ Tusa timatai dita ainak: “Initaikish makichik apukesh iman senchigti-naitkush aents yacha nii iniasa dekataiji aidaunak ibau utugchat shiig ejemainchaunak iniaschauwai. Nuigtush apuh, ame dekatag tame nuna anentaimas ejeyi ujpamainuk ashí nugkanmash makichkish atsawai.

¹¹ Untsu apajuímtai aina dutsu ujpakaintai. ¡Tujash duka juju nugkanmak batsamchauwai!” tuidau.

¹² Tusa tiagtai apu senchi kajeka aents yacha dekamin babilonianmaya aina duka ashí kajegtajum tusa inamjauwai. ¹³ Tusa timatai Daniel-nashkam niina kumpaji aidaujui maatasag shimutuk egakajui.

Apu Nabucodonosor kajamjauwa nunash wajukatnunak aan kanajabi nuna Daniel ujakbau

¹⁴ Suntag apu kuitamin aidaun apuji Arioc aajakua nunú aents yacha anentaimas dekamin aidaun ijinatatus umintaun Daniel dekauwai.

¹⁵ Nunik Ariokan jegajua shiig pegkegnun iniak:

“¿Wagka apush aents yacha anentaimas dekamin aina nunú ijinatajum tusash inamjæ?” tau.

Tusa iniam, wagkag inamjabi nuna ashí ujakui. ¹⁶ Dutika ujakam Daniel apun jegajua chichajak: “Apuh, wait aneasam tsawan sujusta, nunikamin ame kajamjaum dusha wajukatnuk aan kajamjaume nuna dekaan ujaktajame”, tiuwai. ¹⁷⁻¹⁸ Nuna tusa ukuak nii pujutaijin weuwai, nunik niina kumpaji Ananíasan, Misaelan, Azaríasan aatus nii apujai chichasbaun ashí ujakui. Dutika: “Apajuí segatajum nii nuna ashí dekamtijamati, wagki nunú betek ujakcha ajin babilonianmaya yacha aina nuna mainak iinash mantamawainum”, tiuwai. ¹⁹ Nuna tusa kanuinai, kajanum Nabucodonosor kajamjamun Apajuí Danielan ashí ujakui. Dutikam Daniel Apajuín emematak, ²⁰ aatus tiuwai:

“Apajuíyah, amek senchigtin ashí yachaitme.

¡Apajuín daajiya nunú
ajumaish tuke ememattai atin ati!

²¹ Tsawan yapajinak minina nunak Apajuí dutikawai,
Apajuí aentsnak apu emawai,
nuigtush nigki yapajinai,
aents yacha shiig anentaimkau aina nunak nii dutikawai.
Tuja wamak unuibau aina nunashkam
nigki dutikawai.

²² Anentaimsaish ejemainchaunash nii iwainauwai,
tuja uukbau ataish nigki iwainauwai.
Apajuíyai tsaaptinuk.

²³ Apajuíyah,
ametme mina apachug aajaku aina nuna Apajuíjimek,
amina see takun emematjame.
Ame minak yacha wajiu etiume,
tuja ii sumakmag duka imatiksamek,
apu nii kajamjamujin anentaimtus dekatatus
waitma nunú mina iwaintugkaume”, tiuwai.

²⁴ Nuna aatus Apajuíjai chichasa ukuak, Ariokan wejiuwai, nunik jegajua chichajak:

“Aents yacha anentaimas dekamín babilonianmaya aina duka kagjekaipa. Dekas mina apui ejetuata. Nii kajamja nunash wajukatnunak aan kajamjae nuna wi ashí ujaktajai”, tiuwai.

²⁵ Tusa timatai Arioc Danielan juki wamak apu Nabucodonosor pujamunum ejegauwai, dutika apun chichajak:

“Apuh, ame kajamjamugmin ujakpaktinun judío aents achija yajuakbau batsata nuwiyán makichik jukin itaajai”, tiuwai.

²⁶ Tusa timatai Danielan dita Beltsasar adaikau aina nuna apu chichajak: “Ameka wi kajamjag nunú ejeyim, nunash wajukatnunak aan kanagja nunú ¿tjutmainaitam?” tiuwai.

²⁷ Tusa tama Daniel ayaak:

“Ame kajamjaum nunak, aents anentaimas dekamnukesh, tunchikesh, yayan dekapau aidaukesh wajukatnuk aan kajamjaume nuna ejeyig makichikish ujamainchau ainawai. ²⁸ Tujash Apajuí nayaimpinum puja nunuwai dekamainchaunash dekamtikagtinuk. Nii aminak atakea duwi atinun iwaintugmake. Jujuwai kajamjaum duka. ²⁹ Apuh, ame anentaimsam atakea duish wajukatnukita tusam ane anentaimkawam kanimume, nuniamin Apajuí nuna iwaintugmake. ³⁰ Nuna minashkam Apajuí iwaintugkame, tujash wi tikich aents aidau nagkaesau yacha asamtaigkish iwaintugkache, ayatak ame kajamjaum dusha wajukatnuk aan kajamjaume nuna ujakti, dutikam shiig dekaati tusa iwaintugkae.

³¹ “Apuh, kajanum makichik aents dakumka najanamu múun, tsumain wajakin, winchamtin ishamain wainkaume. ³² Nuna buukeg tikich-jaigkish pachimjachbau ayatak oro najanamu; tuja detsepeg kuntujijai plata najanamu, untsu ampuji bakuijai bronce najanamu, ³³ kagkaji hierro najatuamu, tuja naweg hierro tsakusjai pachimja najanamu wajuwainkaume. ³⁴ Nunú dii wajamin makichik kaya múun mujanmaya, aentskesh shitakchamaitak nigki kagkegak juwaki nunú wajattaman, dawenum dekegka nawe tsaigkam iyaag tepesmae. ³⁵ Nunik iyaabuik oro, plata, bronce, hierro aidauk tsainak yuku wajase. Nuniaig dase senchi dasentak trigo akaaku duke ijumjamun umpui utsauwama numamtuk umpui utsagke. Dutikam tuke megkagak megkaekae. Untsu nunú kaya tuku tsaikua duka muja shiig múun najaneau wainkaume.

³⁶ “Apuh, ame kajamjaum duka juju ainawai. Tuja dusha wajukatnuk aan kajamjaume nuna yamai ujaktajame: ³⁷⁻³⁸ Apuh, aents dakumka najanamun buuke oro wainkaum duka ametme. Aminak Apajuí nayaimpinmayaya nunú apu etamne, dutijabau asa senchigtin eme anentsa diitai awajtamsae. Tuja nuigtushkam ashí aents nugkanmaya aidauk kuintin aidauk chigki aidaujai ashí amina idaitugmase.

³⁹ “Amina ukuugmin tikich aents ametam aan wainkauch apu wajastinai. Untsu nuna ukuujin kempatuma nunú broncejai betek tumain apu wajas ashí nugkanum inamjatnai. ⁴⁰ Untsu nuna ukuujin ipak usumta nunú apu wajastinai, tuja duka hierrojai betek atinai. Iman asa tikich apu aidauk ashí depetuk ijinatnai.

⁴¹⁻⁴² “Tuja nuigtushkam apuh, ame nunú aentsu nawe hierro, tsakusjai najatuamu wainkaum duka ipak usumta nunú apu wajastina duwi aents aidau kanakagtina nunú aan wainkaume. Nunú apua duka hierro katsugma iman atinai. Untsu tikichia nunú tsakus pukutsama nunin

kakakchau atinai. ⁴³ Tuja aents dakumka najanamu wainkaum nuna tsajam nawe hierro tsakusjai pachimjamu tame duka, kanakchagmi ijutkau agmi tusag tikich nugkanmaya aidaujui nuwan sudayagtata nunú aan kajamjaume. Tujash nuninakush hierro tsakusjai apatka anugkam tuke amaitsu numamtuk maki makichik apugtin aina duka makichkish ijunmainchau atatu.

⁴⁴ “Tujash nunú tsawantin Apajúi nayaimpinmaya makichik tuké apu atinun adaiatnai, nunak makichkish depetkachagtinai. Tikich apu aidaunak nii ashí depetuk ijinatnai. ⁴⁵ Apuh, ame kaya makichkish shitakchamaitak kagkegak iyaak aents dakumka najanamu wajaun dekegka tsaika yuku emau wainkaum duka nunú aikaume. Nuna Apajúi tikich tsawantin nagkaemaktinun iwaintugmake. Ame kajamjaum duka dekaske, tuja wajukatnuk aan kajamjaume dushakam wi taja imanisag betek uminkattawai”, tiuwai.

⁴⁶ Tusa Daniel timatai, apu Nabucodonosor Danielan ememattatus tikishmag pujusui. Tuja nuigtushkam Daniel anentag suwakjum kuntin maajum apeatajum dutikakjum kugkuin inciensoshkam apeatajum tusa tiuwai.

⁴⁷ Nuna tusa Danielan chichajak:

“Atumi Apajújiya duka wainka apajúimtai aina nuna nagkaesau múuntai. ¡Niyai apu aidaun nagkaesauwa duka! Niig ashí yachai, nuadui nii ujakmatai kajanmaya kakajus dekamainchaush ujatkaume”, tiuwai.

⁴⁸ Nuna tusa, apu Nabucodonosor waji pegkeg akik aidaun anentag susauwai. Nuigtushkam babilonianmaya nugka yaig aidaun apuji gobernador adaikauwai, dutika nunú nugkanmaya aents yacha dekamin aidaun apuji awajsauwai.

⁴⁹ Dutikau asa, Daniel niina kumpaji aidaun chichamjukmatai, ditashkam Daniel takatai yaigkagtinun adaitujui. Tuja Danielak tikich aents apujai takau aidau batsatbaunum nuwi niishkam pujujakui.

3

Aents dakumka oro najanamun emematujakagbau

¹ Duwi pujus Apu Nabucodonosor chichaak, aents dakumkajum oro najanatajum tusa inamjauwai. Nuna esantig treinta dekapamu untsu wegkanti tres dekapamu aajakui. Nuna najanawag babilonianum nugka yaig aajakua nuwi muja Durá tutai najatamu pakajin apusajui.

² Dutikawagmatai nunú iwainamunum, apu Nabucodonosor tikich apu nugka yaijan apuji góbernador aidaun, suntaja apuji aidaun, apu chichajin aidaun, kuichki diin aidaun, apu chichama epegkin aidaun, aatus ashí ipauwai, nuna wainkatnume tusa. ³ Dutika ipaam ashí apu aidauk aents dakumka najanamu iwainamunum jüstamawagtatus ijunjajui. ⁴ Nunikagmatai, makichik aents ame nagkamattame tusa tibau senchi jiika chichaak: “Ashí aents maki makichik chichamtin aidautijum juwi kaunaumun nunutijum antuktajum: ⁵ Uwija kachujin, pigkuijai umpuinak, cítara, lira, salterio, gaita aatus awatuidau antakjumek, tikishmaja pujustajum, apu Nabucodonosor inamjamtai, aents dakumka oro najanamua nunú ememattajume. ⁶ Untsu nunú tibau aig tikishmag pujusa emematinachuk, wamak juki pag inagtai kee awa nuwi egkeam agtatui”, tiuwai.

⁷ Tusa tibau asag, nuna awatiagtai ashí tikishmajag batsamsajui, nunikag aents dakumka oro najanamun emematuidau.

⁸ Tuja ujumak Israel aents aidau nuwi batsatuk emematchajui, nuniagtai babilonianmaya aents aidau, apu ujakmi tusag shiyakajui. ⁹ Nunik apu Nabucodonosoran chichajuinak:

“¡Apuh, kuashat tsawantai iwaku pujusta! ¡Tuja amina daagmek tuke pachitai atin ati! ¹⁰ Apuh, ame chichaakum awatuinamu antakjumek wamak tikishmaja pujustajum, nunikjum aents dakumka oro najanamua nunú ememattajum, ¹¹ tuja nuna nuniachuk pag inagtai kee awa nuwi wamak jukijum egkeatajum tukagtimume. ¹² Tujash ujumak judío aents aidau, nugka yaig babilonianum awa nuwi amejai atuegak takasagtin Sadrac, Mesac, Abed-nego aatsam batsasmayume, tujash ditak aminak eme anenjamainatsui, nuninak amina apajuímtajum aidanash, tuja aents dakumka oro najanamunashkam emematuinatsui”, tiajui.

¹³ Tusa ujakam, apu Nabucodonosor senchi kajeka, utitajum tusa inam-jauwai. Dutikam yajuak apu pujamunum itawajui. ¹⁴ Dutikawagmatai apu ditan iniak: “Mina apajuímtajua nuna emematuinatsui, nuninak aents dakumka oro najanamua nunashkam tikishmatjag emematuinatsui tujamaina nunash ¿dekaskek tujamaina? ¹⁵ Nunú dekaskekuiush nunak tsagkujajime. Untsu yamai músican awatuinakui, jeganjum tikishmaja pujusjum ememattajum. Nuniakjuminig suwimkanak amaschagtatjai. Untsu atum emematchakjuminig, pag inagtai horno kega imannum egkeatajum tusan titatjai. Nuna dutika aish, makichik apajuikesh atumnak ayamjupakchagtatui”, tiuwai.

¹⁶ Tusa tutai, dita chichajuinak: “Iik duka makichkish puyatjatsji. ¹⁷ Ame jinum egkejatuawaminish, Apajuí ii emematnaitag nunú iinak uwemtijamainai, tuja ame itugkami tukagtame, nunashkam iinak Apajuí uwemtijamjattawai. ¹⁸ Tuja Apajuí iina uwemtijamchakuish amina apajuímtaigmia duka, tuja dakumka oro najanamua dukesh tikishmatja emematchapash tusaik makichkish anentaímtsuji”, tiajui.

Kampatum datsauch aidau jii kegamunum egkeamuitak esachaju

¹⁹ Aatus datsauch aidau tiagtai, apu Nabucodonosor ditan senchi kajujuk yapinig kapantu wajasui. Nunik aents aidau, jii kega nunú nuni senchi siete jii kemaina imatikajum ikapagtajum tusa tiuwai. ²⁰ Tusa tima imatiksag umikagmatai, suntag senchi aidau etegkeg, atum datsauch kampatuma nunú achikjum jinum egkeatajum tusa inajui. ²¹ Tusa timatai, kampatum datsauch aidau ditashkam tuke apu asag jáanch pegkeg aidau nugkuajunak imatiksag achikag, jigkaja jukiag jinum nagkimawag egkeawajui. ²² Tuja apu inamjamtai jiik nuni senchi ikapajam shiig senchi atushat nimpau asa, suntag aidau uchin achikag egkedaun apeam jinauwai. ²³ Untsu datsauch aidau shiig pegkeg jigkagbaunak nunisag hornonum egkemsajui.

²⁴ Nunik pegkeg chimpimtai, Nabucodonosor puyatuk wajaakug aents niina anentaímtan su aidau ijunun jegantun chichajak:

“¡Uchi datsa kampatume duka imatiksaikiap jigkaja chimpiamji!” tau. Tutai dita ainak: “Ehe, kampatume duka dutiksaik egkeamji”, tuidau.

²⁵ Tusa tiagtai apu chichaak:

“¿Wagka tujash ipak usumta imanish chimpijua? Jigkagbaunak atimawag jii sukuachbau wajukmaina numamtuk shiig yujawai. Nuig-tushkam ipak usumta nuwiya makichik ángeljai betekai”, tiuwai.

²⁶ Nuna tusa Nabucodonosor horno waitijin jeganta untsumak:

“¡Apajuí múunta nuna inake: Sadrac, Mesac, Abed-nego aidauwah, jiinkijum juwi taatajum!” tau.

Tusa tama kempatuma duka imanisag jinum chimpiju jiinkiajui. ²⁷ Nunikagmatai ashí apu aidau nuwi ijunuk datsauch aidau jegaantag diidau, tujash makichkish esachajui, nuigtush makichik intashigkesh shiig esachui, tuja jáanchji aidaukesh shiig esachu asa, jáanch esau mejegama dukesh shiig atsau.

²⁸ Nuna wainak Nabucodonosor senchi untsamak: “¡Sadrakan, Mesakan, Abed-negon ayamjak niina aentsji ángelan awema nunú Apajuí ima nigki tuke emamattai ati! Ditak dita Apajuíjin kajinas anentaimaidau asag, wi chicham umikbaunash umikchagmae. Nuadui wainka apajuimtai aina nunú ememattan dakituinak, dekas ayatak jinaami tumabiagmae. ²⁹ Tuja juju datsauch aina nuna Apajuíji iwainaka imanun iwainamainuk tikich Apajuik makichkish atsawai. Nuadui, nunú Apajuí pegkegchaun chichajuk asaja maam atatuí, tuja niina jeshkam apea ajapjam atatuí. ¡Nunak juwiya akuish, tuja tikich nugkanmaya akuish, makichkish tsagkujashtatjai!” tiuwai.

³⁰ Aatus apu chichaman umika pujus, nunú uchi datsa kempatum aajakua nunak imatiksag Babilonia nugkanum nugka yaig provincia aajakua nuna tuke apuji agtinun adaijauwai.

4

Apu Nabucodonosor detsemeagbau

¹ Nuna dutika pujus, apu Nabucodonosor chichaak: “Wika ashí aents máki makichik chichamtin, ditash nugkentin aina duka shiig agkan maanitsuk, ajak aidau ajakmawag shiig atsumkas batsamsatnume tusan wakegajai. ² Apajuí nigki ashí wagakua nunú shiig pegkeg aidau mina iwaintugka nunú atumesh dekatajum tusan wakegajai. ³ ¡Yaunchkesh dekashtai aidau Apajuí iwainamua duka, shiig pegkeg makichkish ejemaitsuí! Nii inabaujiya duka ajumaish tuke atinai, tuja niina senchijiya dushakam makichkish nagkankashtinai.

⁴ “Witjai Nabucodonosor, wika apu asan, makichkish atsumkas mina pujusa inamtaijui shiig aneasan pujuyajai. ⁵ Imanisan pujukman, kashi kajanum ishamainun kajamjabiajai. Nuna anentaimtusan senchi ishabiajai. ⁶ Nuniakun, nunash wajukatnunaak aan kajamjaja, nuna ujatkatnume tusan, aents anentaimsa dekamtan yacha aidau ashí ikautjuatajum tiabiajai. ⁷ Tusa ti ai, tunchi aidau, anentaimas dekamin aidau, yaya dekapau aidau ikaunmawagmatai, wi kajamjamujun ujakajabiajai, tujash makichkish duka nuniktin aan kajamjaume tusag ujatkachagmayi. ⁸ Nunik ujatkachagmatai pujai Daniel taawabi. Wi niina daajinak yapagtuan mina apajuíjun eme anentsan Beltsasar adaikamiajai. Wika Danielnak Apajuí pegkegma nuna Wakani jintintui tajai. Niina wi kajamjamujun ujaakun:

⁹ “ ‘Beltsasarah, amek juju aents yacha aidau ijuna nuna nagkaesau yachaitme. Apajuí pegkegma nuna Wakani aminí puja nunak wika dekajai, nuadui amek shiig dekamainchau aidauash ashí dekame. Nuadui wi kajamjamujun amina ujaktatjam nunú antukam wajukatnunaak aan kajamjaja ujatkata’, tiabiajai.

¹⁰ “Nuna tusan wi kajamjamujun ujaakun:

“ ‘Kajanmash nugka múunta nuna ejapeen

numi múun jiihkau wajame.

¹¹ Nunú numia duka shiig muuntan tsakaja nayaimpin antiime, iman asamtai ashí nugkanmaya aidaush wainiagmae.

¹² Nunú numi dukeg pegkeg samekbauwe, tuja shiig kuashat nejeku asamtai, nuna ashí chigki aidauk yuwagmae, tuja kuntin aidauk nuna wajauti bikintunum batsamas ayamiagmae, untsu kanawe aidaunum chigki aidaun pasugmagmae, ashí nugkanum iwaku batsamin aidauk nuwiyan yuwa batsamae.

¹³ “ ‘Nuna dii wajakman pachiachbau makichik ángel kuitamkagtin nayaimpinmaya akagun wainkamjai. ¹⁴ Nunú senchi untsamak chichaak:

“ ‘ ‘Au numia duka ajaka ajuatajum! Dutikajum kanawe tsupijatajum, dukeshkam utsankatajum, neje aidaushkam akagum utsankatajum. Tuja kuntin aidaun nuna wakenti bikintunum batsata duka pisagtinme, pishak aidaun kanawen pasugmaina dushakam shiyaktinme.

¹⁵ Untsu wajautiya duka tegainigpajum, ayatak cadena hierro najanamui, bronce najanamujai jigkagjum, ajanum dupa ayaunum ukuktajum. Dutikam jegashik uchupiam asati. Nuniak kuntin aidaunim jimagtuk chijichin yuwati.

¹⁶ Nunú numi anentaimtajig yapajinati, nunikmatai kuntinim betek wajasti. Nunisag pujus siete mijanan ejeti”, timae.

¹⁷ Aatus Apajuin aentsji ángel aidaun suwimkan susatnuwe. Nunak dutikatnuwe, wagki Apajuin nigki ashí wagakua nunuwai apu aidaun inauk, tuja apu atinnashkam nii wakegamun etegkeawai, aikasag makichik nugka apuji atinnash aents aidaunmayan imanchauchin etegka apu emawai tusa aents aidaun nuna iwaintuktag tusa dutikmae’.

¹⁸ “Juna wi amina ujam nuna kajamjamjai. Nunikan yacha aidaun ujatkatajum tijai, tujash ujatkachaje. Tujash wika amina Beltsasara niimpap ujatkatawaja tajai, wagki aminig Apajuin pegkegma nuna Wakani pujawai, tibaijai.

¹⁹ “Tusa ti ai Danielak kuashat anentaimat minitbau asa, puyatak chichatsuk ekemayi. Nuniakui wi niina tikich daajin untsukan chichagkun:

“ ‘Beltsasarah, wi kajamjamua duka puyatjukaipa, tuja nunash wajukat-nunak aan kajamjaja dushakam puyatjukaipa, ayatak ujatkata’, tibaijai.

“Tusa tai nii chichagtak: ‘¡Chah apuh, utugsag ame kajamjaum nunú ashí shiwag aidauwai uminka tajai! ²⁰ Numi múun shiig esagman tsakaju asantai, ashí nugkanmaya aidaush wainaidau, ²¹⁻²² tuja nuna dukeg pegkeg samekbau, tuja shiig kuashat nejeku asantai, ashí nugkanmaya aidau nuwiyau yuwawag batsatu, tuja kuntin aidauk nuna wajauti bikintunum batsamas ayamaidau, chigki aidaush nuna kanawen pasugmaidau kajamjaum duka, ame ashí tikich aidaush nagkaesau wajasum nunú kajanum wainmamkaume. Tuja amina imanjumea duka nayaimpinash antigke. Nuigtush ame inabaugminak ashí nugkanum dekainawai’.

²³ “Tuja nuigtushkam Apajuí aentsji nayaimpinmaya kuitamkagtin minis chichaak: ‘Au numia duka ajaka ajuajum tsaktajum, untsu wajautijia duka tegainigpajum, ayatak cadena hierro najanamui bronce najanamujai jigkagjum ajanum dupa ayaunum ukuktajum. Dutikam jegashik uchupiam asati. Nuwi kuntin aidaujai ijuntug chijichin yuwati’, tusa tau kajanum wainkaume. ²⁴ Auk duka Apajuí nigki ashí wagakua nunú amina suwimkan amastatus umigtamka nunú aan kajamjaume. ²⁵ Amek aents aidaujai ijunjamek pujuschattame, kuntin aidaujai ijunjam pujustatme, nuniakum ditajai betek dupa yutatme. Amek jegashik uchupiam tepettame, nunika pujusam siete mijan ejetatme. Nuwi pujusam dekas Apajuí nigki ashí wagakua nunuwap apu aidaunak inawa, tuja nii wakegamujinap apu atinnash etegkeawa tusam anentaimat jukittame.

²⁶ “Numi ajakbauwa duka wajautijai ukuktajum tusa tau kajanum antukum duka, dekas Apajuíyapi ashí senchigtinuk tusam anentai jukittam duwi ataktu apu wajastatam nunú aan kajamjaume. ²⁷ Nuadui wi yamai titatjam nunú antukta: Pegkegchau takatak idaisata, nunikam shiig takakum ujudauch aidau yaighta. Nunú dutikakum shiig aneasam agkan pujakum shiig atsumkas pujuschainpash”, tiuwai.

²⁸ Aatus Daniel apu Nabucodonosor unjakua duka imanisag ashí uminkauwai. ²⁹ Makichik mijan nagkaemakui ai apu nii pujusa inamtaijin niimak wekagu. ³⁰ Nunik wekagu untsamak chichaak: “¡Atumesh Babilonia shiig múunta nunú diistajum! ¡Aunak wi awi pujusa inamjatnupun ibau pegkejan umikuitjai! ¡Nuigtush mina senchijun ashí aents tikich nugkanmaya aidau iwaintuktasan imatikan umikuitjai!” tau.

³¹ Tusa eke chichaak waijai nayaimpinmaya chichau antuekauwai, nunú niina chichajak: “Apuh, amek yamai nagkamsamek apu achattame. ³² Amek aents aidaujai ijunjamek pujuschattame, kuntin aidaujai ijunja pujusam ditajai betek dupa yusa pujusam siete mijan ejetatme. Nuwi pujusam dekas Apajuí ashí senchigtina nunuwap apu aidaunak inawa, tuja nii wakegamujinap apu atinnash etegkeawa tusam anentaimat jukittame”, tiuwai.

³³ Nuna tusa inagnaig duka imanisag uminkauwai. Nuadui Nabucodonosor niina pujusa inamtaijin pujaun jiiki jukiag baka batsatbaunum ejegan ukukiajui. Dutikam nuwi pujus bakajai betek chijichin yuu pujau. Nuwi pujus jegashkijug pujau, tuja intashishkam águilan ujejai betek, nanchikish águilan nanchikijai betek muuntan tsakapak pujau.

Nabucodonosor detsemeag pujamun tsagagbau

³⁴ “Wi suwimkan juki waitiamu tsawan amuekamtai, wi Nabucodonosor nayaimpin diismaijai, nunikan detsemeajajai betek waitu pujamujun tsagagbajai. Nunikan Apajuí nigki ashí wagaku tuke pujuuwa nuna emematkun:

“Apajuí senchijiya duka
nagkankashtin atakesh tuke atinai,
niina inamtaijiya dushakam tuke imanuk atinai.
³⁵ Apajuí emting aents aidauk tikima wainkaush ainawai.
Apajuík nayaimpinmash, nugkanmash
nii wajuk wakegawa nuna umiawai.
Apajuújai ainik tudaimainuk atsawai, nuigtush
¿wagka aikame? tusa tumainkesh atsawai’, tibajiai.

³⁶ “Tusa Apajuín emematin nagkanmawaik, detsemeaja pujamugnak
pegkeg wajasmaiiai, nunikan ataktu inamtan nagkamabiajai. Nunika
ai chichamnum mina yaintujaku aidau tikich aents apu aidaujai ashí
kaujuawagmayi. Nunik kaunawagmatai, ditajai ijunjan yaunchuk aajak-
baujun nagkaesau wajasmaiiai.

³⁷ “Nuadui wika Apajuí nayaimpin apujiya nuna emematjai, wagki nii
takamujiya duka betek shiig pegkeja nuadui. Aents emebauwa nunak
Apajuí inatsawai. Wika apu Nabucodonoraitjai. Wi nunak dekas tajai.”

5

Tanishnum chicham agagbau wantinkau

¹ Apu Belsasar Babilonia nugkan apuji jiista muuntan umika, nijai
takau aidau mil aents eme anentsa diitai aidaun ipauwai. Dutika ipaam
kaunawag vinon shiig kuashat uwajajui. ²⁻³ Tuja apu Belsasarchakam
kuashat vinon uwag nampeka, yaunchuk niina apaji Nabucodonor
Jerusalégnun Apajuí emematku ijuntai aajakua nuwiyen shikika umutai
oro najanamu aidaun, plata najanamu aidaujai yajuakua nuna utugti-
tajum tusa inamjauwai. Nunak nii ipaamu aidaujai, tuja niina nuwe
aidaujai, nuigtu awan nuwe aidaujai aatus batsamas duwi shikikag
umú batsabiagtatus tiuwai. ⁴ Nuna umuinak batsamas dita apajuímtajii
oro, plata, bronce, hierro, numi, kaya najanamu aidaun emematuinak
kantama batsatu. ⁵ Imatu batsatai makichik uweg tanishnum wantinak,
jii kegau asantai, apu pujusa inamtaiji tanish pujui ukatkamunum paan
agau. Nuna apu wainak, ⁶ senchi ishamak kujaak yapinig puju wajasu.
⁷ Imaniak, babilonianmaya tunchi aidaun, yaya dekapau aidaujai senchi
untsumak chichajak:

“Anú chicham agagam awa dusha wajintuaki nuna ujatkaunak jáanch
shiig pegkeg yamakaitkaun anujattajai, tuja nuigtush kuntujeanum nugku-
tai oro najanamun anujattajai. Niinak mina ukujui tikich jimag apu aina
nuna ukujin apu atinun adaikattajai”, tau.

⁸ Tusa imattai aents yacha yaya dekapau aidau, anentaimas dekamin
aidau aatus nuwi apu inamtain batsatuk ashí jiiag chicham agagam
aunum utsanawajui. Tujash wajintu agagbauk ayi nuna aujus diis nuna
taku tawai tusa apu ujainuk makichikish atsusui. ⁹ Nuadui apu
Belsasarak senchi puyatuk yapinig puju wajasui. Nunitai nijai takau
apu aidaushkam shiig anentaimjachmin dekapedau. ¹⁰ Belsasar nii aents
ipaamu aidaujai pampainiagtai, nuwa múun niina dukuji reyna tutai
pujau jiiinki, yujumak yuwaku ijuntainum wayauwai. Nunik chichaak:

“¡Apuh, kuashat tsawan iwaku pujustin ata! ¡Imanikmek puyatkaipa,
tuja nuigtush senchi ishamkaipa! ¹¹ Juwi iina nugken makichik aents
yacha pujawai. Niyag Apajuí pegkegma nuna Wakani pujawai. Amina
apu Nabucodonor ayá nunú niina shiig wainajakui, nuadui ashí aents

yacha anentaimas dekamain aidaun apuji adaikauwai. ¹² Nunú aents yacha duka kajanmayanash, tuja utugchat shiig dekamainchaunash shiig etsegmainai. Niina daajig Daniel aig apu Nabucodonosor yapagtua Beltsasar adaikauwai. Nunú untsukta, dutikawamin nii taa juju agagbauwa jusha wajintuk agagbauwaita nuna ujpakti”, tiuwai.

¹³ Tusa tima Danielan untsukui, dutikam taamtai apu niina iniak:

“¿Amekaitam Daniel mina apag Nabucodonosor judío aents Judá nugkanmaya aidaun achija ikaunmauwa nuwiyam? ¹⁴ Amina pachipas ujatuinak, Apajuí pegkegma nuna Wakani Danielai pujawai, nuadui niig shiig yachai, iman asa kajanmaya shiig dekamainchaunash betek etsejui tujamainawai. ¹⁵ Ame eke tatsminig juwiya dekasa ashí aents shiig yacha anentaimas dekamain aina imanun ikaunman, juju agagbauwa dusha wajintua nunú ausa dijsjum ujatkatajum ti ai diisagmae, tujash makichikish dekainatsui. ¹⁶ Tujash wika niimpap utugchat shiig dekamainchaunash juna taku tawai tusa etsegmainaita tajame. Anú chicham agajam awa dusha wajintuaki nunú ujatkamini, jáanch shiig pegkeg yamakaitkaun anujattagme, tuja nuigtush nugkutaí oro najanamun anujattagme. Nuigtushkam mina ukujui tikich jimag apu aina nuna ukujin apu atinun adaikattajame”, tau.

¹⁷ Tusa tama Daniel niina ayaak:

“Apuh, tanishnum agagbauwa dusha wajina takug tawa nunak wi aminak ujamainaitjame. Tujash minak makichik wajigkesh sujumaitsume, nuigtush apu adaitukti tusanush wakegatsjai.

¹⁸ “Apajuí nigki ashí wagakua nunú, amina apa Nabucodonosornak apu emauwai. Nuadui nugka muunnum aents batsamin aidaush ashí ajaantus diijaku ainawai, niina imanjinash shiig dekaajaku ainawai. ¹⁹ Nuigtushkam ishainak kujaidau, wagki nii yana kajejawa nunak mau, dutikak wait anentamujinak maitsuk idayu asamtai. Nii yana apu ati tusa wakegawa nuna apunash adayu, untsu nii dakitamunak idayajakui. ²⁰ Apu Nabucodonosor, nigki ima wagaku senchigtin anenmamtai, Apajuí nii apu aajakua nunak atankiwai. ²¹ Dutikamu asa nigka aents aidaujai ijunjug pujumainchau asamtai, kuntin aidau batsatbaunum ejegawag ukukiajui. Dutikam nuwi pujus burro ikamia aidaujai betek dupan yuujakui, tuja iyashinashkam jegashik jegashkijam tepejakui, nunik nuwi pujus dekasa Apajuí nigki ashí wagakua nunuwap apu aidaunak inawa, tuja nii wakegawajinap apu atinnash etegkeawa tusa anentaimtan jukiuwai. ²² Tuja apuh, amek nuna uchiji asam shiig dekame, nuniayatkum pegkeg takatak dakitame. ²³ Nuadui Apajuí dushikiakum niina jenia shikika umutai aidau yajuakbau aina nunú itagtuatajum tusa inamjamin ikaunmawagmatai, nujai vino shikikam tikich apu ipaamu aidaujai umame, wainka apajuímtai aidau oro, plata, bronce, hierro, numi, kaya aidau najankamu, wainmatnash wainmachu, antutnash antuchu, anentaimtajish atsu aina nunú emematu wekaeme, Apajuí pujutan amasua nunú emematmain idaikum. ²⁴ Nuadui Apajuí uwejan awemae juna agagti tusa. Nunú chicham agagbauwa duka juju ainawai: ²⁵ ‘MENE MENE TEKEL Y PARSIN’, ²⁶ Juju chicham aina duka juna taku tawai: MENE tawa duka: Ame apu asam inamam nunú amuekatnunak Apajuí tsawantan mamiktugmae, taku tawai. ²⁷ Untsu TEKEL tawa duka: Makichik waji yaunchuk kijin aajaku duwi dekaapam kijinji megkaekauwa numamtuk amina Apajuí apu etamiu aig, ame shiig takaschaum nuna taku tawai. ²⁸ PARSIN, tawa duka:

Ame inabaugmea nuna Apajuí jimaituk akankattawai, dutika Medo aents aidaun, Persia aents aidaujui susatta nuna taku tawai”, tusa Daniel ujakui.

²⁹ Tusa ujakam nuna ashí antuk nagkanmawaik, Daniel jáanch shiig pegkeg yamakaitkau anujatajum, tuja nugkutai oro najanamua dushakam anujatajum tusa inamjauwai. Nuna tusa, nugka yaijan apuji* kampatuma duka Daniel atatui tusa ashí etsegkauwai.

³⁰ Nuna tusa kintamun nunú kashia duik apu Belsasar Babilonia nugkan apujin mau ainawai. ³¹ Nunikmatai Darío Media nugkanmaya aajakua nunú apu wajasui. Tuja Daríok sesenta y dos mijanji ajamu apu wajasui.

6

Daniel leónka batsamtain waanum egkeamu

¹ Darío apu wajasu asa niina yaigtin aidaun ciento veinte gobernadoran adajauwai. ² Tuja gobernador aidau takagtai, diistin aidaun kampatum apun adaitujui. Nunak adaitujui wagki apu nuna uyumak anentaimak waittsai tusa. Nunú kampatuma nuwi Danielchakam pachitkau aajakui.

³ Tuja Daniela takatjig tikich apu aidaun takatjijai diismash nii ima yacha shiig takajakui. Iman asamtai apu anentaimas, ashí wi inabauwa nuwi mina aentsug aina nuna apuji dekas adaikatjai tiuwei. ⁴ Nuna tikich apu aidau dekawag, wajinmak dewakat, tuja nuniachkush wajinak shiig umikchat nuniakuig apu ujatkami tusag egatuidau. Dutikainakush Danielak shiig takau asamtai, makichkish pegkegchaunak waitkachajui.

⁵ Nuniku asag chichainak: “Daniel shiig takatsui tusa tsanumjumainuk makichkish atsuji, untsu nii Apajuín umigjai tawa nuwi utugchat apujusmi”, tiajui.

⁶ Aatus gobernador aidau chichaman umikag, apu Daríojai chichastatus shiyakajui. Nunik jegajuawag chichajuinak:

“¡Apuh, kuashat mijan pujustin ata! ⁷ Apuh, chicham umiktina nunú papii najannati tusa, amejai takau aidauti chichasji. Nunú chicham umiamunmak: makichik nantua duwi tikich apajuímtai aidau, tuja aentskesh emematbauk shiig atsusti, untsu apuh, ima aminak emematjamtinme. Tuja nuna umiachunak leónka batsamtain egkeatnume. ⁸ Nunú papii ame firmawaminig, nunak makichkish yapagmainchau ainawai. Duka aatus Media nugkanum Persia nugkanmashkam umikbauwai”, tiajui.

⁹ Tusa tiagmatai, nunú papii umikbaunum apu Darío firmauwai.

¹⁰ Dutika apu papii umike tabaun Daniel dekaa ukuak Apajuín usatatus niina jeen weuwei. Nunik waya nunú jeganum Jerusalégnumanini niimtai ujaimu epenim aun ujai, nuwi tikishmag pujus maki makichik tsawantai kampatuma Apajuín augtaijinak dutiksag Apajuín aujak pujau.

¹¹ Nunik Apajuín aujak pujai, nunú aents chichaman umiku aidau Daniela jeen utsaankama Apajuín aujak, emematak pujaun wainkajui. ¹² Dutika wainkag Danielan tsanumjugaatatus apun wejiajui, nunik jega-juawag chichajuinak:

“Apuh, ame chicham umiakum makichik nantu wainka apajuímtai aidaunak, tuja aentsnakesh emematchagtatui, ayatak ima minak emematjitnume, untsu nuna umiachuk leónka batsamtaijin egkenati timaum duka eke nantuk amuetsui. Nunú ¿dekaskechukait?” tuidau.

Tiagtai apu ditan ayaak:

* 5:29 “Nugka yaijan apuji” tawa nunak “governadoran” taku tawai.

“Ehe, duka dekaske. Media nugkanum, tuja Persia nugkanmashkam chicham umikbauk makichkish yapagmatsui, duka nunisagke”, tiuwai.

¹³ Tusa timatai, nuigtu chichajuinak:

“Nunin aish ¿wagka tujash judio aents achija ikaunmamua dusha Danielash amina eme anenjamtukesh, nuigtush ame chicham umikbauwa nunash ajaantus diitskesh, tsawantaish kempatuma imaniash Apajuínash aju pujawa?” tuidau.

¹⁴ Nuna apu antuk, senchi wake besemag dekapjauwai. Nuniak wajuk Danielan ayamjukajak tusa ane anentaimkawa kintamu. ¹⁵ Nuniai nunú aents aidau ataktu apu jegajuawag chichajuinak:

“Apuh, Daniel jakatnuk amek dekame. Wagki Medo aents aidaun apuji, nuniachkush Persia aents aidaun apujigkesh chichaman umikbauk makichkish yapajimatsui”, tiajui.

¹⁶ Tusa tiagtai, untsu Daniel utitajum, dutikajum león batsata nuwi egkeatajum tusa inamjauwai. Tujash eke egkenatsaig Danielan apu chichajak: “¡Ame Apajuí tuke umignaitam nunú ayamjupakti!” tiuwai.

¹⁷ Tusa inagnaig Danielan jukiag leónka batsamtain egkeawajui. Dutikawag kaya muuntan jukiag nunú waan dukukajui, dutikawagmatai nuna waitijin apu niina sellojin apujtuauwai. Tuja tikich apu aidaushkam Danielan jikinun tusa ditashkam dita sellojin apujtuawajui. ¹⁸ Dutika ukuak apuk nii pujusa inamtajin weuwai, nunik jegaashkam yujumkanak yutsuk kanagtatus tepesui, nunik kanagchamin dekapeak tuke kanutsuk tsawau, nuniakush kantamtain awattinme antuktajai tusagkesh tichauwai.

¹⁹ Nunik tsawamuik nantaki waugtus leónka batsamtain weuwai. ²⁰ Nunik waanum jegantatak wesa wake besemag dekapeak aatus Danielan untsukui:

“¡Apajuí pujutan sukagtina nuna inake Danielah! ¿Amina Apajuígmesh león yujamawai tusash ayamjupakchaek?” tau.

²¹ Tusa untsuam Daniel ayaak:

“¡Apuh, kuashat tsawan iwaku pujustin ata! tajame. ²² Wi pegkegchau takamsachbaun Apajuí dekau asa, tuja aminakesh tsanuchuitjam nunashkam dekau asa, león yuwawai tusa, wi Apajuín nemajag nunú niina aentsji ángelan akupkame, dutikamu taa nii leónka weninak epetjame”, tau.

²³ Tusa aimkantai Daniel jiiktajum tusa apu tiuwai. Apu timatai jiiikajui, dutikawag león esaicheash tusa ashí diidau, tujash Danielak shiig pegkeg egketu, wagki niig Apajuíyai kajinas anentaimu asa. ²⁴ Daniel jinkintai ajuma duwi, aents Danielan tsanumjuju aidau ikaunmatajum tusa apu timatai ikaunmawajui. Dutikawagmatai ashí nuwejai, uchiji aidaujai yajuakag león batsatbaunum ashí chimpiawajui, dutikam eke nugka iyachunak yakig león aidau tsekentiag ichiajajui.

²⁵ Nunikmatai, apuk ashí aents tikich nugkanmaya ditash chichamtin aidaun papiin aatus agatjauwai:

“Ashí atum aidautignim kumpamjime, ²⁶ nuniakun ashí wi inamag nuwi batsamin aidauk Daniela Apajuíjia nuna ememattinme tajai.

“Apajuíyai pujutan sukagtina duka,

niig tuke pujuuwai.

Nii inabaujia duka makichkish megkaekashtinai, tuja niina senchijishkam nagkankashtinai.

²⁷ Apajuíyai agkanmitkagtin,

Apajuíyai uwemtikagtin,
niig nayaimpinmash, nugkaash wainchatai pegkeg aidaun iwainauwai.
Apajuí Danielan león yuwawai tusa ayamjuke”, tiuwai.

²⁸ Nuadui Danielak apu Darío aajakua nunú eme anentsa diitai aajakui.
Tuja apu Ciro Persian apuji aajakua duishkam imanuk aajakui.

7

Apajuí Danielan kajanum iwaintukbau

¹ Belsasar Babilonia apuji wajasa makichik mijan inamak pujai, Daniel kashi kajanum kajamjauwai, nunik shintaag nii kajamjamujin agajui. Tuja duka aatus tawai:

² “Kajanum nayaimpinmaya dase ashí yantamnum dasentuk nayantsan iyantug senchi tsukatmitkabi. ³ Imaniamunmaya pachiachbau ipak usumat kuntin múun maki makichik niimtin aidaun jiiniagmayi. ⁴ Yama nagkamchak jiiniuwa duka leónjai betekmamtinayi, tujash nanapeg ukukuin nanapejai betekayi. Nuna dii wajai nanapen japiki ichinkagmayi, dutikawag inantainiag aentsjai betek awajainiagmayi, dutikawag aentsu anentaimtajijai betek awajsagmayi.

⁵ “Untsu tikich kuntinuk chayujai betekayi, niina pagae juinia yantame ima wagakuyi. Tuja kcompatum ukunch pagae aidaun apaakuyi, nuna chichajuinak: ‘¡Wetá, nunikam neje ame wakegamu shiig kuashat yuwata!’ tiagmayi.

⁶ “Tuja tikich kuntinuk kaichjai betekayi. Nunú kuntinuk chigki nanapejai betek tuntupen ipak usumat nanape ajibi, tuja buukeshkam ipak usumta imaniyi. Niina senchimitkawagmayi, aents aidaun apuji wajas inamjati tusa.

⁷ “Untsu tikich kuntinun kajamjabiag duka yama nagkamchakun kcompatum kuntinun kajamjabiag nuna nagkaesau shiig tsumain, ishamain, senchigtin, diez kachugtinaiyi. Iman asa naísh jiju hierro tsakaskatu etsakamu asantai, nii wainbaunak ashí amubi, dutikak ampinunak najak tsauka ukubi.

⁸ “Nunú kuntinu kachuji diez asantai, nuna dii wajai pachiachbau tikich kachuji piipich ukuunum jijnmayi. Nunikmatai, nunú nigki agkan wajasti tusa kachuji múun aidaun kcompatum ukuikagmayi. Tuja kachu yama tsapainiuwa nuna jiig aentsdaujai betekayi, chichaakush ememas chichabi.

⁹ “Nuniakui dii wajai, apu ekemsa inamtai aidaun jukiag apusagmayi,

nuwi makichik apu múun ekemsabi.

Nuna jáanchjig yujagkim shiig pujua imanayi,
intashishkam lana pujua imanayi.

Tuja ekemtaijiya nuna ruedajig jii kegaujai betek
tsawan wajas amayi.

¹⁰ Tuja nii eketbaun emtinia jii kegau betsaka akaemayi.

Nunú muunnak aents shiig kuashat emematiagmayi.

Nuninai tikich aents aidaun nuni kuashat

makichkish dekapamainchau,

jegantag ijuniagmayi.

Nuninai nunú múun dita takasbaujin diijus

suwimkan susatatus papii aidaun ujakmayi.

11 “Nuna kuntinun kachuji yamajam tsapainiuwa nunú ememas chichaakui dii wajabiajai, nuniai nunú kuntinun maawagmayi, dutikawag tsupijag jii kegaunum chimpiawagmayi. 12 Nuna dutikawag tikich kuntin aidaunashkam kakaagchamin awajagsagmayi, dutikau ainayatak mautsuk tsawanji jegagti tusag ukukiagmayi.

13 “Nuna wika kajanum ashí diyakun wajabiajai.

“Nuniai pachiachbau, yujagminum pachitkau makichik aentsjai betek akagun wainkabiajai. Nunik akaiki nunú múun eketbaunum jeganmayi.

14 Nunikmatai niina dekas tikich aidaun nagkaesau apu emabi, dutikamtai aents ashí nugkanmaya maki makichik chichamtin aidaun niina umjuinak emematiagmayi. Niina senchijig imanisag atinai, tuja inamtaijishkam makichkish megkaekashtinai.

15 “Nuna imanun wainkan senchi ishambabiajai, nunikan puyatkan jamaijai. 16 Nuniakun aents tuwaka ijunbaunum jeganan, makichik inakun: ‘Aunash wagka imaninawa nunú minash ujatkata’ tibaijai. Tusa tai ayu tujutmayi. Tusa chichagtak: 17 ‘Juju ipak usumta imajin kuntin múun aina duka ipak usumat apu aidaun ashí nugkanum inamjagtina nunuwai. 18 Tujash nunú nagkaemakmatai, Apajuú aents aidaun etegkauwa nunú atakea duish tuke inamjatnai’, tusa ujatkabi.

19 “Tusa ujatkamtai shiig dekatag tau asan, kuntin inagnamu ipak usumta nunú tikich aidaujaig betekchau tsumain, nai aidaush hierro, nanchikish bronce, nii wainbaunak ashí yuwa amuka, ampinunak najak tsaika ukua aush wagkag ibauwaita, 20 tuja nuigtush diez kachugtina dusha, tuja kachuji uchuchiji yama tsapainiuwa nunú jiinna dusha wagkag annaita, tuja nuigtush chichaakush ememas chichau, tuja kachuji yamajam tsapainiuwa nunú piipichitak tikich kachuji múun aidaun nagkaesau, nunú tsapatai kumpatum kachuji ukuiniaja nunash, wagkag ankae nuna dekatasan iniasbajjai. 21 Tuja nuigtushkam, nunú kachu yama tsapainiuwa nunú Apajuún aentsji aidaujai maania ditan depeteaun wainkabiajai. 22 Imatika pujujai nunú múun taabi, nunik Apajuú ashí senchigtinu aentsji aidaun ayamjuk agkanmitkabi. Nunak Apajuú ashí senchigtinun aentsji aidaun apu wajasag inamjagtin tsawan jegau asamtai nunak dutikatnai.

23 “Dutika chichaak:

“ ‘Kuntin inagnamu ipak usumta nunú kuntin wainkaum duka, apu ipak usumta nunú ashí nugkanum inamjatna nunuwai, duka tikich aidaujaig betekchau atinai. Ashí nugkanmaya aidaunak yuwa amuak, tikich aidaunak najak tsaika ukubi. 24 Untsu diez kachujija duka, nunú tsawantin diez apu aidaun inamjagtina nunuwai.

Nunú nagkaemakmatai, yama nagkamchak apu aajaku aidaun nagkaesau tikich apu wajastinai, nunik diez apu aidaunmayan kampatum depetuk maatnai.

²⁵ Nunú apuk Apajuí pegkegma nuna pegkegchau chichagtinai.

Nuniak Apajuí aentsji aidaujui maanitnai.

Tuja Apajuí chichame umiktin agagbauwa nunashkam, Apajuí emematku ijuntai tsawan etegjamu aidaunashkam yapajiatag titinai.

Nuniak Apajuí aentsji aidaunak kampatum mijan nuigtu jimaituk nii wagagki waitka pujugtinai.

²⁶ Tujash nunú apua duka apu chichaman inagdau aidau utugchatjin ejetim suwimkan jukitnai, nunik ajumaish apu achatnun tuke megkaekatnai.

²⁷ Nunikmatai Apajuí ashí senchigtina nuna aentsji aidau apu wajasag

nugkanmaya apu aidaunak ashí inagtinai.

Dutikantai dita aidau niina chichamen umijuinak emematiagtinai.

Tuja nii inabaujig atakea duish tuke atinai.’

²⁸ “Juna augmattsag nunuwai wi kajanum wainkamua duka. Nuna kajamjan puyatkan shiigchau yampia wajasmaijai, tujash nuna pachis-nukesh tikichnak makichkish ujakchabijai”, tiuwai Daniel.

9

Daniel niina aentsji aidaun pachis Apajuín ausamu

¹ Asuero uchiji Darío, Medo aents aajakua duka, caldeo aents aidaun apuji wajas inamajakui. ² Nunú apu makichik mijan inamai, nunú mijantin wi Daniel, Apajuí profeta Jeremiasan ujaak, Jerusalégnak tsaikagtinai, dutikam setenta mijan asatnai tiuwa nunú agagbaun augkun pujuyajai. ³ Nuna ausan, yujumka ijagmaan jáanch pegkegchaun nugku-jan, yukunum antumka pujusan mina pataag aidaun pachisan Apajuín aujijai. ⁴ Wi Tuke Pujuun mina Apajuíjun segaaknuk aatsan segayajai:

“Apajuíjuh, ametme múun ashí senchigtinum. Ame dutikatjai tibauk betek uminaitme, tuja amina anempainak chichamjumin umigtamin aina nunú amina anenkem iwaintinaitme. Nuadui anentaimesan ⁵ dekas pegkegchauwup takasji tajai. Ii aidautik aminig pegkegkesh iwainmamtsuji. Ame atsakmin wajukmaina numamtuk batsatu asa, ame umigtash kajimatki idaisa wainka yujaji. ⁶ Amina takagtamin profeta aidau ame akatjam wekagas iina apuji aidaun, iina muunji aajaku aina nunash, tuja ashí Israel aents aidaunash chichaman ujaku ainawai. Tujash ii aidautik nii chichaman ujakkuish dekaskeapi tatsuji. Nunidau asa makichkish antugtsuji. ⁷ Apuh, ametme pegkegmamek. Nuadui ii judío aents aidautik datsaamaji. Jerusalégnam batsatushkam datsaamainawai, tuja tikich Israel aents aidau amina shiwagmatjamawagmatai, ame utsagkam tikich nugkanum batsatushkam datsaamainawai. ⁸ Tuke Pujuuwah, iik pegkegchau takamsau asa datsaamainaji. Tuja iina apuji aidaush, iina muunji aidaush datsaamainawai. ⁹ Iik ame intinjaku chichamjumik umikchaji. Tujash amek tuke wait anenkagtinaitam duwi tsagkugkagtu-mainaitme. ¹⁰ Tuke Pujuu iina Apajuíjijyah, amina profetajum aidau ame

akattjamu jintinjainakuish nunú antukaik umikchaji. ¹¹ Israel aents aidauk ashí amina chichamem umiktina nunak umikchaje, nuninak tupantug idaisaje. Nuadui Moisés amina inakem agak: Apajuí umigchakjumek suwimak jukitnaitjume tiuwa nunú uminu asamtai, iina pegkegchaujain amina suwimkajum iyanjamae. ¹² Ame yaunchuk ujjatkamum umiakum, jutii pegkegchau takasbaunum, tuja iina apuji aidaush pegkegchau takasagbaunum suwimak ishamain shiig katsunmainchau, yaunchuk Jerusalégnun aents iina shiwaaji aidau batsatu suwimak suwakmesh imatika susachbau sukagtusume. ¹³ Juju suwimak iina iyanjamja duka yaunchuk Moisés agajua nunú imanisag uminkae. Tuke Pujuu iina Apajuíjjayah, iik nunú iman dekanayatku ame egatsuk, tuja ame umigtsuk, nuigtush iina tudauji aidaush idaisachji, tuja amina chichamjumkesh umikchaji. ¹⁴ Nuadui Tuke Pujuuwah, ame suwimak sukagtusume, iina Apajuíjjayah, ame dutikamua duka shiig pegkejai, nunin aig jutii aidauti ame umijut dakituinaji.

¹⁵ “Apuh, iina Apajuíjjayah, yaunchuk ame aentsjum aidau Egipto nugkanum inaku waitkatai batsatu ayamjukam amina senchigmijai jiiigmayume. Nunú ame dutikakum senchijum iwainakuitam duka yamaikish augmattai awai. Iman aig jutii aidautik pegkegchau takamsaji. ¹⁶ Apuh, ame wait anenkagtinaitam duka shiig dekaji. Tuja Jerusalén amina yaaktagnia duka wait aneamam ame kajeku akumesh tsagkujata, wagki ashí aents amina umigtamchau tikich nugkanmaya aidau iina pegkegchaujain, tuja iina apachji aajakajua nuna pegkegchaujinishkam Jerusalégnun tsajakajua nuna diisag amina aentsjum aidautinashkam dushiktamainawai. ¹⁷ Iina Apajuíjjayah, wi amina inakmin segajam nunú wait aneamam antugtukta. Ame emematku ijuntai pegkegma nunú wajukaya awa nunú wait anenjata. ¹⁸ Apajuíjuh, wait aneamam antugkagtukta; jii waitiamua nunú diista, tuja ame emematku ijuntai yaakat aya nunashkam tsajakajui! Ii sumag duka pegkeg takau asaikish sumatsji, amek wait anenkagtinaitam nunú dekau asa sumaji. ¹⁹ ¡Apuh, ii pegkegchau takamsau ainakuish, wait aneamam tsagkugkagtugta! ¡Apuh, idaikagtutsuk atujatkata! ¡Apajuíjuh, amek anenmamsam, amina aentsjum amina emematjain aidau anentaimtusam, tuja amina yaaktajum anentaimtusam, kuashat tsawan megkaetsuk wamak yaijatkata!” tusan segabiajai.

Setenta semana

²⁰ Tuja nuigtushkam, mina pegkegchaujain pachisan, Israel aents aidau pegkegchaujain, tuja Jerusalégnun pachisnushkam Tuke Pujuu mina Apajuíjjun aukun pujuyajai. ²¹ Nunika Apajuí aukun pujai, yaunchuk ángel Gabriel waitintugkauwa nunú nanaak taawabi. Nunak etsa akagai aagkú Apajuí emematku kuntin maa apetia nuniai taawabi. ²² Nunik chichagtak: “Danielah, chichaman amina shiig ujaktasan minajai. ²³ Apajuí amina senchi anempawai, nuadui ame yama nagkamchakum Apajuí augmaum duik nagkamas ame sumamunak Apajuí antugtamak aigmake. Wi nuna pachisan amina ujaktasan tajuagme. Tuja ame kajamjaum dusha wajukatnuk aan kajamjaume nunashkam wi ujaktatjam nunú shiig antukta:

²⁴ “Amina pataim aidau Apajuín intimjukaij pegkegchaun takamsaju asag suwimkan jukaij waituina nunak,

setenta semana* waitu batsamtatui,
 tuja yaakat pegkejam tsaikbauwa dushakam
 nunisag setenta semana asatnai.
 Imanik waituinak anentaimtan jukiagtinaí,
 tuja Apajuí dita tudaujinak tsagkujatnai,
 dutikamtai ima pegkeg takata nunú tuke atinai.
 Tuja Apajuí emematku ijuntai jegamkamunum
 tesaamu shiig pegkejam tutaya dushakam
 yaunchuk profeta aidau takasu aina iman shiig iwajamu atinai.

²⁵ Juju ame shiig dekaata:

Jerusalén tsaikbauwa nuna iwajatnume tabau
 chicham antuekatna nunú tsawantin nagkamas
 yamajam apu etegkamu wantinkatna duwi
 siete semana jegattawai.

Jerusalégnun jinta ayá nunú iwagbaunak,
 Jerusalén peeja iwagbaujai sesenta y dos semana ashimkagtinaí,
 tujash nunú tsawantinig senchi waitiamu,
 wáke besemag atinai.

²⁶ Sesenta y dos semana nagkaemakmatai,
 apu atin etegka adaikamun makichkish
 utugchatji atsujunak maawagtinaí.

Tuja tikich apu ekemtina nuna suntaji aidau
 Jerusalégnak jega Apajuí emematku ijuntai
 jegamkamujai ashí tsaikagtinaí.

Nunú tsawan uminbauk pachiachbaunum
 nujag dujajak utuwama numamtuk atinai.
 Tuja maaniamu, tsainiamu atinai tusa etsegkamua
 duka imanisag wea weakua amuekatnai.

²⁷ Tuja nuigtu makichik semana inagnamua duwi
 apu pegkegchau ekemiua nunú aents aidaujai
 chichaman umiktinaí.

Dutikayatak jimaituk semana wegak

Apajuí emematku kuntin maa

nuna neje ashí apetia nuwi shiig pegkegchaun tsumainun takamsatnai.

Nuniau asa Apajuí emematku anentag suwamuk atsusti titinaí.

Tusa umik pujuttaman, Apajuí suwimkan susa maatnai”, tujutmayi.

* **9:24** Jer 25.11-12; 29.10num chichaak, setenta mijan tawa nuna juwi setenta semana tawai. Junak maki makichik semanatinig siete mijan atinun tawai. Tuja setenta semanatinish wajupa mijanak jegawa imaan waitu batsamiagtinun taku tawai.

Oseas

Nuwa akika dutiktajai Oseas nuwenamu

¹ Beeri uchiji Oseasan Tuke Pujuu ausauwai. Nunak Ozías, Jotam, Ahaz, Ezequías aatus Judá wegantu aidaun apuji aidau, tuja Joásan uchiji Jeroboam Israel aents aidaun apuji aatus batsamajaku aina nunú tsawantin ausauwai.

² Yama nagkamchak Tuke Pujuu Oseasan ausauwa duka jujuwai:

“Israel aents aina duka mina umigtutnak idaisaje, nuninak nuwa akika dutiktajai betek wajasaje, nuadui ameshkam nunismek nuwa akika dutiktajai nuwenata, nunikam nuwi uchi akiata. Dutikamu asag ditak nuwa akika dutiktain uchiji agtinme”, tiuwai.

³ Tusa tima múun Diblaim aajakua nuna nawanji Gómeran nuwatuk pujus uchi aishmagkun akiauwei. ⁴ Nunú uchi akiinamtai Tuke Pujuu Oseasan chichajak:

“Anú uchi daajig Jezreel adaikata, wagki ujumak tsawan asan, apu Jehú Jezreel nugkanum kuashat amujatkawa nuna umiakun, suntag Israelnunia aidaunak ashí ijinattajai. Dutikan Jehú apu wajas puja nunak atakesh tuke apu achatnun atankittajai.

⁵ Nunak nugka paka Jezreel tutaya nuwi Israel aents aidaun shiwaaji jetekag ijinatnume, dutikainak achija yajuaktinme titatjai”, tiuwai.

⁶ Duwi pujus Gómer ataktu ejapjuk tsawanji jegajim nuwauchin uchigmakui. Nunikmatai Apajuí Oseasan chichajak:

“Israel nugkanmaya aidaunak ataktuk wait anenjashtatjai, tuja nuigtush ditá pegkegchaujijnash tsagkujashtatjai. Dutikatin asamtai, uchi nuwauch akiina nuna daajig Lo-ruhama* adaikattame.

⁷ “Untsu Judá wegantu aina nunak wi, apu Tuke Pujunuk, wait anenjattajai. Tujash wika ditanak suntagjai ijunjanuk, nagki, puyag, flecha, caballo, aidaun yajuakan maaniankesh ayamjukchagtatjai ima wiki ayamjukagtatjai”, tiuwai.

⁸ Tuja Gómer niina nawanji Lo-ruhama aajakua nuna amuntsuamun atsujuk pujus, ataktu ejapjuk uchi aishmagkun uchigmakui. ⁹ Nunikmatai Tuke Pujuu Oseasan chichajak:

“Anú uchik Lo-amí,† adaikattame,

* **1:6** “Lo-ruhama” tawa nunak hebreo chichamnumak “wait anenjashbau” taku tawai. † **1:9** “Lo-amí” tawa nunak hebreo chichamnumak “mina aentsjuchui” taku tiuwai.

wagki atumek mina aentsug ainatsjume,
wishakam atumi Apajuígmichuitjai.

¹⁰ “Tujash Israel aents aidauk shiig kuashat yujakag,
nayantsa kamatkaji dekapamainchauwa iman wajasagtinai.

Nunú tsawantinig Apajuík ataktu chichaakug:
‘Atumek mina aentsjuchu ainagme’, tichatnai.

Ayatak dekas:

‘Atumek Apajuí tuke pujuuwa nuna uchiji ainagme’, titinai.

¹¹ Tusa tima Judá wegantu aidau Israel aents aidaujai ijunag
dita apujin ima makichik adaikagtinai.

Dutikawagmatai tikich nugkanum achija yajuakbau
batsatushkam waketug kaunawagtinai.

Duwi nagkamas Jezreel nugkanmak
shiig aneasa pujamu atinai”, tiuwai.

2

¹ Nunik atumi yatsum aidau waketug kaunawagmatai
atum chichagkujum:

“Apajuín aentsji aidau” titinaitjume.

Untsu nuwa aidau chichagkujum:

“Wait anenjamu aidau” titinaitjume.

Israel aents aidau Apajuín umigkachagbau

² Nuigtu Apajuí chichaak:

“¡Wika Israel aents aidaunak

nuwa nuwatkamua numamtin anentiajai,
tujash ima minakek umigtukchau ainawai.

Nuadui wika yamaik pachikchagtatjai.

¡Atum dita uchiji aidautijum apu chichaman
epengin aidaunum chicham egketuatajum.

Niig yamaik mina duwagchauwai,
tuja wishakam niina aishichuitjai!

Untsu wainak nuwa akika dutiktajai betek waja puja nuna idaisati!

¡Niina pakiji aidaun shiig anemtika pujutsuk idaisati!

³ Nuna nuniachkuig, jáanchjin awitkan

nii yama akiinak wisu akiinauwa nunin awajsattajai.

¡Dutikan uwejush nugka buku takasa pujumainchau awajsattajai!

Dutika ai kitakai jinattawai.

⁴ Tuja niina uchiji aina duka mina uchigchau ainawai,

nunak nii pegkegchaun takamak wekagas uchigmaju asamtai,
wika ditanak wait anenjachagtatjai.

⁵ Israel aents aidauk nuwa akika dutiktai

datsantainkachua nunin ainawai.

Nunin asag chichainak:

‘Mina pakig aidaun egaktajai,

wi atsumamu aidaunak dita:

yujumkan, yumin, jáanch lana najanamun,

lino najanamun, aceiten, vinon, kugkuin aidaun

aatus sujuinak wi wakegamun umigtin ainawai’,

tuinawai.

⁶ Tuidau asagmatai, jiinki yujasag pakijin igkugkainum tusan,

jintanak jagki awajsattajai.

7 Dutika ai, dita pakijin igkugtag tuinakush igkugchagtatui, tuja nuigtush wainkachagtatui. Nuninak: ‘Yama nagkamchakun aishinawaitag nujai ima shiig pujuyajai, dekas niyai wakitkitjai’, titinai.

8 “Tuja wika niina kuitamu asan, nii yuwatnunak, nii atsumamujinash ashí suwaitag nunak niig anentaimas diyatsui. Wika niinak oronash, platanash suwaitjai. Dutika aish nuna yajuak nii ememattin aidaun dakumag najanauwai.

9 Nunin asamtai, wi nii yuatnun trigon, vinon, tuja nii asepaktinun lana, lino najanamu aidaun susauwaitag nunak imatiksasuk ashí atanjattajai,

10 dutikakun niina pakiji aidau emtin wisu awikan inatsagtatjai. ;Nuna dutikai niina ayamjumainuk makichkish atsuttawai!

11 Tuja maki makichik semanatin, maki makichik nantutin, maki makichik mijantin jiiistamtaya nunak jiiistamashti titatjai.

Nuadui nuna jiiistamak dakujinuwe nunak ataktuk nunikchattawai.

12 Higo ajakbau ayá nuna, uva ajakbau ayá nujai pachis:

Juka mina pakiig aidau sujusbau ainawai tusa emema puja nunak unuptuktajai, dutika ai ikamia kuntin aidau ashí amutkatnai.

13 Tuja dakumkamu aidaun emematak incienson apejakui, nuigtush mina kajimatjuki, niina pakijin pataetak patakumtain patakuma, nugkutain nugku nugkus iwagmamag weawai. Nuni wekagu asamtai wi suwimkan susattajai. Witjai Tuke Pujuun, nunak dekas tajai.”

Apajuik niina aentsji Israel aents aidaunak aneawai

14 “Aatus mina aentsug pegkegchaunum wekaekuish, wi jukin uwegshunum emattajai, dutikan ataktu mina anenti tusan shiig kuitamkattajai.

15 Dutika unuinakan, niina nugken uva ajakbau ayá nunak imatiksasuk awagtuktajai. Tuja muja Acoran pakaji pegkegchauwa nunak pegkeg awajsattajai, dutika ai nuwiyau yuwa pujustinai. Nuniak ataktu nagkama yama nagkamchak aya iman atatu, nuniak egyptunmaya jiiinki shiig aneeya imanun anentaimtatui.

16-17 Nuadui ataktu awagkig:

‘Baaldauwaitjai’ tichatnai, dekas: ‘Wika aminuitjai’, tujuttinai. Ataktu awagkig wainka apajuimtai aidaun daajinak adaikashatin ati tusan idaimitkastajai.

Witjai Tuke Pujuu Israel aents aidaun Apajuíjinuk.
Nunak dekas uminkatnun tajai.

¹⁸ “Nunú tsawan jegamtaig,
mina aentsug aidauk shiig agkan maaniumu atsaunum batsamsatnume
tusan kuitamkagtatjai.
Tuja kuntin aidau ditan waitkamainush atsutnai.

¹⁹ “Israelah, wika aminak waji nuwaitkuish
ataktu nuwatkkattagme,
ajumaish amek tuke mina duwag atinaitme.
Wika aminak shiig senchi aneajame,
nuadui amek dekas mina shiig duwag
wi chicham umikbaunum nuwenin aina
nujai betek nuwatkamu atatme.

²⁰ Wika aminak mina duwajun kuitamainaitag
imatiksan kuitamkattagme,
dutikakun ima aminak anettagme,
nunú diisam, dekas juwapita mina apujuk tujuttinaitme.

²¹ Israel aents aidauwah, nunú tsawan atina duwi
wi yumin yutumtijatnaitjai,

²² dutika ai, trigo, aceite, vino aatus shiig kuashat aitnai.
Aatus Jezreel nugka duka shiig pegkeg
ajak tsapau wajastinai.

Witjai Tuke Pujuu Israel aents aidaun Apajuíjinuk.
Juna taja nunak dekaskenum tajai.

²³ Mina aentsug aidaunak Israel nugkanum
ima midauk agtinun batsastinaitjai.

Dutikan chichagkun:
‘Atumek mina aentsjuchu ayugme,
tujash yamaik mina aentsug ainagme’, titinaitjai.
Untsu dita chichagtuinak:
‘¡Ametme iina Apajuíjig!’ tujutiagtinai.”

3

Oseasa nuwe ekagbau aajakua nujai pachisa augmattsamu

¹ Tuke Pujuu ataktu chichagtak:
“Oseasah, amina nuwemek wainak takamin asa,
amina kumpagmijai pakijina pujawai.
Nunin aigkish kajegtsuk ataktu aneeta.
Tuja Israel aents aidauhkam dakumka najanamu aidaun ataktu
waketjukiag emematuinak
anentag torta susamu aidaun yuu batsatui.
Nunin ainaig wika ditanak aneajai”, tujutmayi.

² Tusa tujutmatai, mina duwajun awagkitasan niina pakijin quince
kuichik plata najanamun akikmajai, dutikan nuigtu cebadan trescientos
treinta kilo susabijai. ³ Dutikan mina duwajun chichagkun:

“Yamaik mina duwag wajasu asam,
pegkegchau takamtsuk pujusta.
Nuniakminig wishakam pegkegchaunak takamjuschattagme.

Untsu ujumak tsawan tsanigkaik kanagchattaji”, tibaijai.

⁴ Numamtuk Israel aents aidauk kuashat tsawan apugtuchu batsam-sagtinai, tuja Apajuínash anenjakesh susachagtinai, Apajuísh ditanash wajina dutikatnume tusag wakegawa nunakesh dekachagtinai, tuja sacer-dote aidaush atsutnai, dita jenish dakumka najanamu emematmainuk makichkish atsutnai. ⁵ Nunú nagkaemakmatai Israel aents aidauk awake anentaimjag Tuke Pujuuwai ataktu waketjagtinai. Nunikag nunú tsawan umintai, ataktu Tuke Pujun eme anentus umiujinak, nii yaimpakti tusag segagtinai. Nuninak dita apuji Davitan ataktu egakagtinai.

4

Apajuí Israel aents aidaun utugchatan apujtusbau

¹ Israel aents aidauwah, Tuke Pujuu chichaa nunú antuktajum.

“Juju nugkanmayag waitjutsuk chichauk atsawai, tikichjaish aneeninatsui.

Tuja minashkam iina Apajuíjiyapi tujutuinsui.

Nuadui juju nugka juwi batsamin aidaunak

Apajuí chichaman umigkae.

² Juju nugka juwig ayatak waitjamu,

umikchatnaitak Apajuí daaji adaisa tsanumat,

magkagtut, kasamat, nuwennush, aishinnush

antugdayas batsamsuk ikagdaibau,

aju ajumag magkagtamu aina duke piyak awai.

³ Iman wajas au asamtai, aents aidauk buutuinaawai,

nuninak kakaagchamin dekapenawai,

tuja kuntin ikamia aidaush, chigki aidaush,

namak nayantsanmaya aidaush ashí jinuinawai.”

Sacerdote aidau

suwimkan jukiagtatui tusa

Tuke Pujuu tiuwai

⁴ Tuke Pujuu chichaak:

“¡Sacerdote aidauk makichkikesh

tikich aidaunak jiyakchati!

Tuja utugchatnakesh apujtuschatu.

Wíka atum sacerdote aidautigminak kajejajime.

⁵ Atumek tsawaish kashish,

tuke pegkegchau takamjume,

nuniakjum tikich profeta aidaush,

pegkegchau takamtikagme.

Nunin asagmin amina aentsjum aidaunak ijinattajai.

⁶ Mina aentsug aidauk dita Apajuíjichua nunin anenjuidau asagmatai

ijinauwaitjai.

Untsu amek sacerdote mina umigtukchau asamin,

wi aminak ajapattagme,

wagki amek mina chichameg umikchaume,

nuadui atum wegantu aidaunashkam pachikchatnaitjai.

⁷ Kuashat sacerdote kawenakug,

imanisag pegkegchaun takainak mina shiwagmatiagmayi.

Nuadui eme anentam aina nunak,

dushiktai awajsagtatjai.

⁸ Tuja mina aentsug aidau
dita tudaujin tsagkugnajagtatus
kuntinun ikaunmagtai Sacerdote aidauk nuna yusa batsatu asag,
puyatjutsuk pegkegchaun takastinme tusag idayinawai.

⁹ Nunin asagmatai, ditanak mina aentsug aidaujai ijumjan
suwimkan susagtatjai.

¹⁰ Mina umigtutan idaisaju asag
imanik yuwinakush shiig aneasag pujuschagtinai.
Tuja uchi akiami tusag tuinakush
uchinash akiachagtinai”, tawai.

Wainka apajuímtai aidaun

*Israel aents aidau
emematiagbau*

¹¹ Nuigtushkam Apajuí chichaak:
“Israel aents aidauk nuwan yujajuinak,
vino nampe yujau asag, shiig anentaimja
pujumainjig atsujuinawai.

¹² Nunin asag numi dakumka najanamu aidaun wajinjutpatig,
tuja atakea duish wajukatnukitji tusag
nuna jegantun iini yujawai.

Pakijintanak idaimainchau dekapedau asag,
mina aentsug aidauk nuna yujajuinak
mina umigtutan tupanjug wagakag wainak yujawai.

¹³ Nugka nainnum wakag imanui numi ayaunum
nuna wakentin bikintunum,
kuntinu maa apenak, kugkuin incienson apenak
dita apajuímtaijin emematuinawai.

¡Dita nawanji aidauk tuja dita uchijin nuwe aidaushkam
nuwa akika dutiktai aina nujai betek ainawai!

¹⁴ Nunik pegkegchaun takamainakuish,
wika ditanak suwimkanak susashtatjai,
wagki atumshakam nuwa wainka apajuímtai
aidaun apajuímin aina nuninjai tsanijnjume.
Aents shiig anentaimsa pujutan mekgaga
duka tuke beseak nuninawai.

¹⁵ Israel aents aidauwah, atum aidautijum,
wainka apajuímtai yujagjuminish,
Judá wegantu aidauk atum pegkegchau takajum nunak takaschagtai.
¡Guilgalnum, tuja Bet-avénnumshakam
dakumka najanamu ememattai aina duka emematiagpa!
¡Nuigtush Tuke Pujuu daajin umiktatjai tusagmek
tuu yujaigpajum!

¹⁶ Israel aents aidauk antakchau intimkiu,
burro nuwa unuinakchamujai betek ainawai.
Nunin aina nunash itugsag Tuke Pujuu
uwig tsakatuch chijichi pegkeg samekbau ayamunum
kuitamaina ¿imatiksash kuitamkati?

¹⁷ Israel aents aidauwah,
wainka apajuímtai aidau ememattasajum wakegakjumek
emematu yujatajum.
¿Atumek datsaamtak wakegajum,
atsa shiig anentam atak wakegajum?

18 ꞑNampenakug nuwa akika dutiktai aina nuna yujajuinawai!
 Pegkeg takatnak dakituinak,
 pegkegchau datsanmainun yujajuinawai.
 19 Wainka apajuímtai aina nuninun
 emematu yujaidau asag,
 dase chijichi kagakun umpui ajapama numamtuk
 ajapeam agtatuí”, tiuwai.

5

Israel aents aidau suwimkan jukiagtin etseggamu

1-2 ꞑSacerdote aidauwah, antugtuktajum!
 ꞑIsrael aents aidauwah, antugtuktajum!
 Apu patayi aidauwah, shiig antuktajum.
 Atum aidautijum mina aentsug aidau tsanuakjum,
 wainka apajuímtai aidau ememattajum tusajum
 dita dakituinaig, waitkasjum muja Tabornum, Mizpanum
 awekasjum, Sitima pakajin yumigmat taimu
 ukumkimujai betek awajsauwaitjum duwi
 suwimkan amastatjime.

3 Efraín wegantu aidauwah,
 Israel aents aidauwah,
 wika atum wajuku ainagme nunak shiig dekajai.
 Atumek nuwa akika dutiktajai betek ainagme.

4 Nuadui ataktu Apajuí umigkatag tajuminish, atumi pegkegchau takatai-
 jum aina nunú
 nunimainchau etamainawai.
 Wainka apajuímtai aidau emematuidau asajum
 minak iina Apajuíjiyapi tujuttsugme.

5 Atumek pegkegchau, emebau ainagme,
 nunin asajum ijina utsam atatjume.
 ꞑJudá wegantu aidaushkam dutiksaik ijinam agtatuí!

6 Tuke Pujuu tsagkugtamjati anentag susami tusag,
 uwig aidau, baka aidau yajuak shimiagtinai,
 nuninakush Apajuí idaisamu asag, niinak wainkachagtinai.

7 Ditak Tuke Pujunak umigchau ainawai,
 dita uchiji aina duka mina uchigchau ainawai.
 Ima Apajuínak umigchau aina duwi
 dita nugkenak ditajai ijumag makichik nantuik
 tsaika emegkam agtatuí.

Israel aents aidau Judá wegantu aidaujai suwimkan jukiagtin

8 ꞑKachu Guibeánum umpuagtajum,
 untsu uwija kachuji Ramánum umpuagtajum!
 ꞑAdeagtinme tusa umputai Bet-avénnum umpuagtajum!
 ꞑBenjamín wegantu aidau ujaktajum aneaku pujustinme!

9 Israel aents aidau suwimkan susattajai tiuwaitag
 duka imanisag uminkattawai tusan etsegjai.
 Nuna dutika ai, Efraín wegantu aidau nugkeg
 yaakat aidaujai tsaigkam bashiak asatnai.

10 Judá wegantu aidau apuji aidauk

aents ajantsuk tikichi nugken kasajin aina
 nujai betek asag Israel aents aidau nugken atantuinawai.
 Nunin asagmatai wi kajekbaujui ditanak suwimkan susagtatjai.

¹¹ Israel aents aidauk wainka apajuímtai aina nuninun
 apajuíma yujau asagmatai,
 tepejus chichajuinak ajantusash diitsuk
 dushiki batsamtuinawai.

¹² Nuadui Israel aents aidaunak,
 Judá wegantu aidaujai ijinattajai.
 Mamuk numin amuwama numamtuk ashí amuktatjai.

¹³ Tuja Israel aents aidauk, Judá wegantu aidaujai
 dita kuashat pegkegchau takamsamujin
 mai suwimka jukiag waituinak,
 asirianmaya apu yaimpakti tusag shimutkagtinaí,
 tujash niig makichkish yaigchatnai.

¹⁴ Israel aents aidaunak,
 Judá wegantujai leónjai betek jetektatjai,
 dutikan wiki achikan asaajan ukuktatjai,
 nuna dutikai ditan ayamjumainuk
 makichkish atsuttawai.

¹⁵ Dutikan ujumak tsawan pachitsuk idaisan
 dakastinaitjai awake anentaimjatnume tusan,
 dutika ai, dita pegkegchau takamsamujin
 anentaimtusag buu buuttajai egatkagtinaí,
 tawai Apajuí tiuwai, Oseas.

6

*Israel aents aidau pegkegchaun taka batsatu awake anentaimjag dekas
 Apajuí umigkagmi tiagbau*

¹ Nuna antukag Israel aents aidau chichainak:
 “Kaunatajum ataktu wakitki Tuke Pujuu umigkagmi,
 nii kajegtamak suwimkan amasu akush,
 nigki wait anenjamag tsagkugtamjattawai.

² Jakaujai betek batsatag nunak jimag tsawan asa,
 nuniachkush kampakatum tsawan asa, inantamkintai
 niijai ijutkau atatji.

³ ¡Tuke Pujuu umigtanum kakanmamsagmi!
 Maniajinig etsa kashi kashinig jiina numamtuk,
 tuja numi yagkujutnum yumi yutak nugka uchupiamá
 imanis iina yaimpaktatus tajutjamattawai”, tuidau.

Apajuí Israel aents aidaun aikbau

⁴ Tusa tiagtai Apajuí ditan ayaak:
 “Israel aents aidauwah,
 Judá wegantu aidauwah,
 ¿itugkainjimki atumnash?
 Atum mina aneagme tujutjum duka
 yujagkim kashi kakegak, tuja jegashik kashi kakekau,
 tsawak kashikmas megkagama numamtuk
 atumi anenkeg megkaewai.

⁵ Nuadui, wi mina profetag aidaun akatja ishiaka ai,
 yujasag dita mina chichamjun etsejuinamu

chaajip iyaak tsaimaina imatijamawaje,
wi shiig takamua duka jii keeka tsaptin emama imanai.

⁶ Atum mina anentag sujajum nunak wika dakitajai,
tuja mina emematjakjum kuntin maajum
nuna neje ashí apeajum nunashkam dakitajai.

Wika ayatak mina anentinme, nuninak:
¡Ametme iina Apajuíjimek! tujuttinme tusan wakegajai.

⁷ Tujash mina aentsug aidautigmek,
Adágjai betek antakchau intimkiu ainagme,
nuadui chicham umiktinun wi amasuitag
nunú umikchaugme.

⁸ Yaakat Galaadnumak ayatak pegkegchau aidauk
magkagtin aidaujai batsatui.

⁹ Sacerdote aidauk jinta Siquemnum wetaya nuwi
kasajai betek uuma yujawai,
aents nuni wedaun mainak wajjin atankiagtatus.

¹⁰ Tuja Israel aents aidauk
nuna nagkaesau pegkegchau
Apajuín umigchau intimkiu aidaun wainkajai.

¹¹ Tuja Judá wegantu aidautigmeshkam
pegkegmauchik ainatsjume,
nuadui atumshakam suwimak jukittagme.

“Nunú ashí nagkaemagmatai,
mina aentsug aidaunak
dita nugken waketjati tinaitjai.”

11

Apajuík niina aentsjig intimkiu ainaig aneawai

¹ “Israel aents aidaunak tsakatuch ainaig nagkamsan aneen ayajai,
wi ditanak mina uchig asagmatai,
Egipto nugkanum batsatun jiijuitjai.

² Dutikamaitak mina umigtutan dakituinak
nuni senchi tupanjuyanume,
nuninak wainka apajuímtai aidaun emematuinak
kuntinun maa apeenak,
kugkuin incienonashkam apeeyanume.

³⁻⁴ Nunin ainaig wi ditan aneau asan
uchijai betek jukin egkesan emayajai,
dutikakun wekaetanash jintintuawabiajai,
yutainash ayujiajai, utugchatnumash yaigkabiajai.
Imatika kuitamaitak, Apajuíyap kuitamjamua
tichau ainawai.

⁵ Nunidau asag mina umigtutnak dakitjau ainawai.
Nuadui egiptunmaya aents aidau inainak
waitkajaku aina nunak, yamaik asirianmaya
ditanak inainak waitkasagtatui.

⁶ Dita yaaktaji aidaunak tsaigkagtinai,
dutikainak aents aidaunashkam ijinawagtinai,
nuna dutikainak dita anentaimjamujinak ashí idaimitkasagtinai.

⁷ Mina aentsug aidauk,

wainka apajuímtai aidaun emematuinak
 mina umigtutnak dakituinawai.
 Nunidau asag mina idaitusag batsata
 nunisag batsamsatatus wakegainawai.
 Senchi untsuimainawai,
 tujash makichkish ditan yayauk atsawai.

8 “Israel aents aidauwah, wika atumi aneakun
 shiig senchi waitiajai,
 nuadui wika kajimatkinuk idaimaitsujime!
 ¡Wika Admánmaya aents aidaun,
 Seboímmunia aents aidaujui dita pegkegchaujín
 ijinauwaitag imatikanuk tikima ijinmaitsujime!
 9 Wika atumnak kajekbautkek suwimkanak amaschagatjai,
 Tuja Efraín wegantu aidaunak ataktuk ijinashtainaitjai,
 wagki wika aentschauwaitjai, wika Apajuíyaitjai.
 Witjai Tuke Pujuu pegkegmanuk,
 wika atumjai ijutkau pujajai,
 wika atumin ijinatasanuk tachmajai.”

13

Apajuí Israel aents aidaun suwimkan susattawai tusa etsegkamu

4 Tuke Pujuu chichaak:
 “Israel aents aidauwah,
 witjai apu atumi Apajuígminuk,
 atum Egipto nugkanum batsatutigmin wi jiiujitjim
 duwi nagkamsanuk yamaikish wika atumi Apajuíyaitjai.
 Witjai atumin uwemtiknununuk.
 5 Uwejush yumi atsau nimpainnum batsabiujum duish
 wi atumnak kuitamkauwaitjime.
 6 Tujash atumek yutai kuashat ajutjamu asamtai,
 ememakjum mina kajimatjukiú ainagme.
 7 “Nuadui león kajeka kuntainun jetegama imatikattajime.
 Jintá yantam uumka tepesan ikamyawajai
 betek tepegkattajime.
 8 Chayú niina uchiji megkaetujam wainkatatus egak
 ishain wajama imanika jiintukin detsepen ichinjattajai;
 dutikan nuwig leónjai betek amuktatjai.
 9 Israel aents aidautigmek wi kuitamkam batsamnaitjume,
 tujash yamaik wi ijinattajime,
 dutikawaipa tujutmainuk atsawai.
 10 Dusha atumi apujish ¿wajukame?
 ¿Wagka nunú untsuatsjume ayamkagtukta tusajum?
 Tuja nuigtush tikich apu aidau adaitujata tusajum
 sumabiujum dusha ¿wajukawagmae?
 11 Imatkugmin atumin kajekkan apun adaitukbaijime.
 Tuja yamaishkam nunisnuk atum kajemtijuku asagmin
 nunak atankittajime,
 dutikam apugtuchu juwaktajime.

12 “;Atum pegkegchau takasbau aidaunak ashí papiinum agagjai!

13 Israel aents aidautigmek anentainkachu ainagme, nunin asajum uchi akiinatnuji jegau aig, tutupit egkemsuk tunija egkemama nuninaitjume.

14 Nunin ainayatkujum

Apajuí uwentijamjati tusajum dakagjume.

;Wika atumnak jatanmak uwentikjashtatjime!

Nuadui: ‘¿Jaka megkaetaish tuwi awa?

;Amina senchigmejai juwi taam

juju aents aidau ijinata!’ tusan untsuajai.

15 Yaja anejasum chijichi tsupigbau ataktu pegkejan tsapaama numamtuk wajakainjuntaih, nuniakjuminish dase uwegshunmaya dasentak entsa pukuni jininun buku emama numamtuk wi ijinan emegkagtatjime.

Dutika ai atumi shiwaajum aidau

wajijum pegkeg akik aidaun yajutjamkagtinai.

16 Samarianmaya aidauk Apajuín shiwagmawaju asag suwimkan jukiagtatui.

Nuwi aents aidauk maaniamunum jinawagtatui,

uchi piipich aidaunak nugká ajiajag kajegkagtinai,

untsu nuwa ejamtin aidaunak

ejapeniag ijinawagtinai”, tawai.

14

*Oseas Israel aents aidaun pegkegchau takat idaikujum Apajuí umigkata-
jum tibau*

1-2 Oseas Israel aents aidaun chichajak:

“Israel aents aidauwah,

atumi pegkegchajum wagagtamkintai,

kakaumainchau wajasum batsatjum nunú idaikujum

ataktu atumi Apajuíjum, Tuke Pujuuwai minitajum.

Nuniakum juju aatsajum Apajuí segatajum:

‘Apajuíjuh, amek pegkejaitme,

nuadui wait aneasam iina tudaujish tsagkugkagtugta,

dutikawamin ii ame emematku kantabauwa nunú

amina shuig awajtamkati.

3 Asirianmaya aidauk carrogtin ainakush,

iinak ayamjutupamainchau ainawai,

nunin asamtaí ataktu awagkik ii dakumka najanamu aidauk emematchat-
taji.

Bitaikshakam ima aminiyanak anenkanak wainainawai’

titajum”, tiuwai.

4 Tuke Pujuu Israel aents aidaun chichajak:

“Wi kajekbaugnak mijaakjai,

nuniku asan dita pegkegchau ainaigkish,

mina anenkajun iwaintukagtatjai,

dutika ai nuigtuk intimkichagtatui.

5 Israel aents aidaunmak wika jegashkijai betek atatjai.

Tuja dita aidauk Lirio yagkujuwama iman,

Líbanonmaya setug shiig kagkapenag wajama iman agtatui.

⁶ Tuja kanaweshkam olivo kanawejai betek kadaukdauju pegkejuch, Líbanonmaya setug pegkegchin kugkuwama iman agtatui.

⁷ Israel aents aidauk ataktu wi kuitamkam batsamsagtinai; dutikamu asa trigojai betek tsakajagtinai, nuninak uva yagkujuwama imaniagtinai, kugkuntishkam muja Líbanonmaya vinon kugkuntijai betek atinai.

⁸ Tuja Efraín nugkanmaya aidau chichainak: 'Dakumka najanamu aina duka iik makichkish puyatjatsji', tiagtinai. Witjai mina aentsug aidau segatuinakui antujunuk, witjai mina aentsug aidaun kuitamunuk. Wika pino pegkeg samekbau tuke kukachua imanaitjai, minai pegkeg waji aidaunak jukiagtinai", tawai.

Inagnaku etsegkamu

⁹ Aents yacha shiig anentaimkau akug, juna chichaman antukti: Tuke Pujuu dutikamu aina duka shiig pegkejai, nuadui dita aidaun diisag tikich aidaush pegkeg takata nunak takamain ainawai. Tuja aents pegkegchau aina duka pegkegchaunak takainawai, nuadui Apajuí ditanak suwimkan suwawai.

Joel

Manchi ajakan amukbau

¹ Joel Petuelan uchiji aajakua nuna Apajuí Israel aents aidaun ujakti tusa akateak aatus tiuwai:

²⁻⁴ Atum chichaman jintinkagtin múun aidautijum
juju shiig antuktajum,
tuja ashí aents aidautigmeshkam antuktajum.
¡Ipak usumta imajin manchi maki makichik niimtin
aidau kakegak iina ajake aidaunak
tikich manchi aidau amuak ukubaun ashí amutjamkaji!
Tuja ¿atumesh wajutiya junin wantinush wainkauwaitjume?
Yaunchuk atumi muunjum aidau
batsamajaku aina duka makichkish
junin wantinunak wainkachu ainawai.

¡Nuadui atumi uchijum aidau nunú pachisjum ujaktajum,
tuja dita ujaktinme dita uchiji aidaun,
nuna uchiji aidau ujaktinme dita uchiji aidaun!

⁵ ¡Nampen aidauwah, nantagtajum,
vino umin aidautigmek buuttajum,
atum vino umumainuk atsuttawai!

⁶ Manchi shiig kuashat,
suntag maaniatatus shimaujui betek
iina nugkeen untsaantugmae.
Nuna nai aidauk shiig empek asag,
león kajenun naíya iman ainawai.

⁷ Iman asag uva ajakbau aidaunak higo ajakbau aidaujai ashí tsupije.
Imatikau asa kanawe aidaunak ashí pakajug saeptuchu emake.

⁸ Imatikau asamtai, nuwa nii aishinatag tibau jakamtai,
wake besemag pujaku nugkutain nugkuja
buutama imanikag,
aents aidauk makichkish etsagmainchau buutuina
jakamunum nugkutain nugkuinawai.

⁹ Tuja Apajuí anentag suwaku vino, trigo,
cebada ejemainuk atsutai,
jega Apajuí emematku ijuntainmag
ejegainachu asamtai, sacerdote aidaushkam buutuina.

¹⁰ Ajanum ajak ayauk kagaka asae,
imaniku asamtai trigok, vinok, aceitek makichkish atsawai.
Tuja nugkak uwejush tutuptina nunin
wake besemag wajas asae.

¹¹ Atum ajanum takau aidautigmek,
uva ajakbaunum takau aidautigmek,
wake besemag dekapeakjum buuttajum.
Atumek trigo cebadajai ashí jinaamtai,
shiig wainka juwakugme.

12 Uva aidau, higo aidau, munchi aidau, palmera aidau, manzana aidau, tikich numi aidau aatus ashí jinaamtai, aents aidauk buutuinaawai. Nunínak shiig aneamunak idayinak wake besemag batsatui.

13 Vino, trigo, cebada aina duka atsau asamtai, aents aidauk Apajuínak anentag ejetuinatsui. Nuadui Apajuí emematku ijuntainmak makichkish atsawai. Nunú diisjum atum sacerdote Apajuí altarjin takau aidautigmek wake besemag pujaku nugkurai jáanch nugkugjum kashi buu buutkawajum tsawaitajum.

14 Nuniakjum Apajuí emematku ijuntainum apu múun aidau ashí Israel aents aidaujai ijumjatajum. Dutikajum, ijagma pujusjum Apajuí ausatajum.

15 ¡Apajuí taatnuk namput wajaschae!
¡Tsawan ishamain atina duka ashí jegawai!
¡Pegkegchau takat idaiku Apajuí umigtsujinig,
Apajuí ashí senchigtina nunú súwimak ishamainun amastatui!

16 Ii yuwatin agmaya nunak manchi aidau iish wainjinig dukeen amutuk ijinae. Nuadui Apajuí emematku ijuntainum shiig aneasa takau ayag duka nunimainchau wajasji.

17 Trigo ajakbau aidauk, yumi yutushtai ashí jinae, nuadui juuka yumain shiig atsau asamtai, trigo chimpitai aidauk wainak batsamas mamuka utsanui.

18 ¡Iina bakaji aidauk buutuinaawai!
¡Uwig aidaushkam buutuinaawai!
¡Tagku aidauk yumainji chijichi atsutai,
nujantai jinuinawai!

19 Tuja jii kegak dupa aidauk, numi aidaukshkam apea ijinae. ¡Apajuíjuh, wait aneasam yaijatkata!

20 Entsa aidauk kuyuka buku waigke, tuja jii kegak dupanak ashí ijinae. ¡Imanikmatai kuntin ikamia aidaushkam Apajuí yaimpakti tusag ima aminak segapainawai!

2

1 ¡Jerusalégnum uwija kachuji umpuagtajum!
¡Adeagtinme tusa umputai Tuke Pujuu emematku ijuntainum umpuagtajum!

Nuna antuinak ashí aents aidau Judá nugken batsamin aidauk sapigmainak kujaitnume, wagki Tuke Pujuu taatin tsawan ashí jegae.

2 Nunú tsawanta duka suwe atinai, nunú tsawantinig yujagkim suwe wajastinai.

Suntag aidau shiig kuashat depetmainchau muja aidaukshkam shiyaktatui,

nunikag etsa kashikmas yama jiinak etsantug,
ashí mujan patamtuwama numamtuk
ashí nugkan pampankattawai.

Duka yaunchkesh imanuk wainkachbauwai,
duka atakea duish imanuk wainnakchatnai.

³ Nunú iman aina duka jii kegaujai betek asa,
nii juwi taatatus minakug ashí apea nagkaemawai.

Nunú tatsaigkik nugkak shiig pegkeg ayi,
nunú taamtai nagkamas nugkak uwegshujai betek wajase.

¡Nuna uwemtumainuk makichkish atsawai!

⁴ Nunú manchi aina duka
aents caballonum maanitan yacha aidau
maaniamunum jetejatmaina imanik utsantawai.

⁵ Ikam utsaana tsekeamuji antamak
carro maanitai shimak wajukama imatui,
duka kagaku apeam tsachigtuwama imatui,
suntag shiig kuashat ijunag uminas
shiwaajin jetektatus ijunama imanai.

⁶⁻⁹ Nunú manchi aina duka kasajai betek
jeganum wakag niimtai ujaimua nuni utsanui.
Suntag aidaujai betek yaakat peejamunash
tujintsuk pachiachbaunum yaaktan utsantawai.

Nunidau asag dita shimamunak nunisag
makichkish tunitsuk, shitanitnash shitanitsuk,
ukunmakesh wakettsuk shimutui.
Tuja akentai aidaun shiig kuashat aketmash
ditak nunisag shimawai.

Imanik manchi minidaun wainkag
aents aidauk senchi ishamainak yapinig puju wajasag kujainawai.

¹⁰ Tuja nugkak nayaimpijai senchi uujui,
nunitai etsa, nantu kajinag suwe wajase.
Tuja yaya aidaushkam etsantainatsui.

¹¹ Tuke Pujuu niina suntaji aidaujai minak
chichamujig ipamtajai betek wajawai,
Tuke Pujuu suntajig senchigtin ainawai,
Tuke Pujuu tabaun umin aidauk
shiig kuashat dekapamainchau ainawai.
¡Tsawan Apajuí minamuk ishamain atatu!
¡Imanun atsaneg pujumainuk makichkish atsawai!

Tuke Pujuu niina aentsji aidaun wait anentamu

¹² Tujash Tuke Pujuu yamai juna aatus tawai:

“Atum pegkegchau takajum duka
idaisajum atumi anentaimijai umigtuktajum,
nuniakjum ijagma pujusjum buutkujum Apajuí ausatajum.

¹³ ¡Pegkegchau takatak idaikujum
mina umigtuktajum!

Wake besemag dekepeakjum,
jáanchjum japiki ichi yujatsuk
atumekek pempeentumakjum kajegmamkatajum,
nuniakjum dekas dewakjapi tumamtajum.

Wika kakagchauch wait anenkagtinaitjai.
Wika wamak kajechuitjai, nuadui wika
tsagkugkagtugtasan pujajai.

¹⁴ Nuniagminish nii suwimkan amastag tiu akush tsagkugtamag
trigon, vinon nii anentag susatnun shiig kuashat amaschajaintash.

15-16 “¡Jerusalégnium uwija kachuji umpuagtajum!

¡Ashí aents aidau ijumjatajum!

¡Múuntuch aidau, uchi aidau,

uchi muntsu muntsuaku aidaushkam,

tuja yama nuwedau aidaushkam jegá batsataidauk ashí kaunatnume!

Nunikagmatai ijagma pujusjum pegkegchau takat

idaisajum umintsatajum Apajuí ememattasajum.

¹⁷ Sacerdote aidaushkam kaunatnume,

nunikag altarnum jeganta wajasag

buutuinak aatus Apajuín segatnume:

“¡Tuke Pujuwah,

amina aentsjum aidau tsagkujata,

makichik aentskesh ditan dushijati tusamek idaisaipa!

¡Tuja tikich aents aidau depetkatnume tusamesh idaisaipa!

Aents tudau aidau tuke aneasag inimpainak:

‘¿Atumi Apajuíjish wajukame?’ tusag dushiki

batsamtinme tusamek idaisaipa”, tiuwai.

¹⁸⁻¹⁹ Tusa imatjumin Apajuí juju nugka juna aneau asa,
wait anenjamag chichagtamak:

“Juju shiig antuktajum:

Trigon, vinon, aceiten shiig kuashat amastatjime,

dutikantai nunú yuwakjum

shiig aneasjum pujustatjime.

Ataktu awagkinuk tikich aents aidau

dushiktai atinme tusanuk idaisashtatjime.

²⁰⁻²¹ Nujinmaya aidau manchijai betek

atumin ajaantugmatsuk jetepakaja nunak

uwegshunum utsagatjai.

Untsu igku jetepaktata nunak,

nayants jakau tutaya nuwi utsaan ijinattajai.

Tuja ukuunum jetepaktata nunak

nayants mediterraneanum utsaan ijinattajai.

¡Dutika ai nunú kauja senchi mejettawai!

“Mina aentsug juju nugkanum batsatutigmek

ishamkagtukaigpa, ayatak shiig aneastajum,

Tuke Pujuu atumin ayamjutpak, yaunchkesh

wainkachbau aidaun iwainaktatui.

²² Kuntin ikamia aidautigmesh,

¡ishamkagtukaigpajum!

¡Ataktu chijichi tsapaktatui!

Numi aidaushkam kuashat nejeagtatui,

tuja uva aidaush, higo aidaush shiig kuashat aittawai.

²³ ¡Atum Jerusalégniumia aidautigmek

shiig aneasjum Tuke Pujuu atumi Apajuujum emematkujum
kuntin maajum apeatajum!

Apajuí yaunchuk yumin yutumtikjauwa dutiksag
yamaishkam yumi yutugtin jegamtai yutumtijattawai.
Niina anenken iwaintugmak yagkug yagkujut aig
yumi yutut tepeamtai yutuwama nujai betek yutumtijattawai.

²⁴ Nuadui trigo, vino, aceite, shiig kuashat aittawai.

²⁵ “Atumi ajaji aidaun manchi amukmatai,
tuja shiwag aidau tsaigtamkamtai, ajakjinchaw
wajasujum nunak Apajuí yaunchuk aajakua imanuk awajtugmastatui.

²⁶⁻²⁷ Atumek shiig yuwajum pujusjum

Apajuí ememattinaitjume,
wagki nii atumin ayamjutpak
wainchatai ishamain aidaun kuashat iwainajui.
Nuadui niina aentsji aidauk wainka inatsamak yujashtinai.

“Witjai Israel aents aidaun Apajuíjinuk,
wika mina aentsug aidaujai pujajai.
Nuadui ima wiki dita Apajuíjig atinaitjai.

Apajuí Wakani taamu

²⁸ Nunú uminkamtai,
mina Wakanjun ashí susagtinaitjai,
dutika ai nuwa aidau, aishmag aidau ashí mina pachitus etsejiagtinai.
Tuja múuntuch aidaujai
kajanum chichatnaitjai,
untsu datsauch aidaunak pan wantintukan augtinaitjai.

²⁹ Tuja nunú tsawantaik, inak nuwa aidaunash,
aishmag aidaunashkam mina Wakanjun susagtinaitjai.

³⁰ Yaunchkesh wainkachbaun ishamain aidaun nayaimpinum iwainagti-
naitjai,
dutikakun nugkanmashkam,
numpan, jiin, senchi bukuitaun iwainagtinaitjai.

³¹ Etsag etsanjashtinai,
tuja nantushkam numpa iman wajastinai,
juka eke Tuke Pujuu iina apuji Apajuí minitin
tsawan ishamain atina nunú jegatsaig nagkaemaktinai.

³² Imanitaish ima Tuke Pujunak kajitus umiujinak
segaidauk uwemjagtinai.
Tuke Pujuu anagkagtuauwa duka imanisag
muja Sión yaakat Jerusalégnun uwemtak atinai,
Apajuí etejamu aidauk jatsuk uwemjagtinai”, tawai.

3

Apajuí aents aidau pegkegchajin diijus suwimkan susatin

¹ Nunú tsawan jegakuig,

Judá wegantu aidau Jerusalégnunmia aidaujai
achija yajuakbau batsatunak awakjatnaitjai.

²⁻³ Untsu aents tikich nugkanmaya aidaunak
Josafat nugka pakajin ashí ijumjatnaitjai,

dutika ijumjan, dita mina aentsug Israel aents aidaun
 achija yajuakag tikich nugkanum dapampaak
 emegkajag, dita nugke aidaunashkam atanjag,
 dita uchiji, nawanji aidaunash kuichkin juwinak,
 tikich nugkanum sujujag nunú kuichkia duwi
 vinon sumak umuinak nampenak,
 nuigtushkam nunú kuichkia duik
 nuwa akika dutiktai aidaun yujaju asagmatai, suwimkan susagtinaitjai.

Tuke Pujuu aents tikich nugkanmaya aidau pegkegchaujín diijus suwimka susatin

⁴ Atum Tiro nugkanum, Sidón nugkanum, filisteo nugkanum batsamin aidautijum mina aentsug Israel aents aidau jeteajum dusha ¿wisha itugkamu asagmae jeteajume? Atsa ¿iikmakmi tusagmek aikajum? Nunú atum eke jeteatsjumínig, wiyá atumnak suwimkan amasan ijinattajime.
⁵ Atumek oro, plata, tuja ashí tikich waji pegkeg akik midau aidau yajuakjum, atumi apajuímtajum emematku ijuntai jegamkamunum ashí utsauwaitjume. ⁶ Atum Tironmaya, Sidógnunia aidautijum Judá wegantu aidau Jerusalégnunia aents aidaujai achija yajuakjum, griego aidaun inataiji atinme tusajum Grecia nugkanum sujujuitjume. ⁷ Dutikam nuwi batsatun wi ditanak jiija yajuakan ikaunmattajai. Untsu atumnak mina aentsug waitkasuitjum dutiksanuk wishakam iikattajime. ⁸ Dutikakun, atumi uchijum aidaun, nawanjum aidaujai, Judá wegantu aidaunum sujuttattajime. Dutika ai dita yajuakag Sabá aents aidaunum sujujagtinaí. Wítjai Tuke Pujuuunik, nunak dekas uminkatnu tajai.

⁹ Juju chicham tikich aents aidaunum etsegkatajum, dutikajum ¡suntag maanitan yacha aidau ijumjajum shiig umintsatajum!

¡Nunikjum Apajuín aentsji aidaujai maaniatajum!

¹⁰ Atumi takataijum aidau maaniaku jukitin, nagki, puyagjai najankatajum.

Tuja aents sapig aina nunú, waiju wajastinme.

¹¹⁻¹² Ashí atum Judá wegantu aidaun shiwaaji aidautijum

Josafat nugkanum wamak kaunajum ijunjatajum.

Tuja aents kakagchauch maanitan dakitiin akush,

maanitan yacha wajasag ashí ijunjatnume.

Nunikagmin ashí aents jutii aidaui nugken ijus batsamin aidaunak Tuke Pujuu suwimkan susattawai.

¹³ Wagki nunú aents aidauk shiig pegkegchau ainawai, nunin asagmatai,

trigo tsamaku tsupija juutiama numamtuk tsupigta;

tuja ajak juutak tsawantak uminkae,

nuadui uva tsamakmatai juuka

vino najanatasa najatiama numamtuk awajkata.

¡Dita tudauji aidauk dekas shiig múuntai!

¹⁴ Tuke Pujuu taatin tsawan uminu asamtai,

Josafat nugkanum aents aidau shiig kuashat ijunjaje.

¹⁵ Tuja nantuk etsajai mai kajinak suwe wajastatui.

Yaya aidaushkam etsanjachagtatui.

¹⁶ Tuke Pujuu kajeka muja Siógnun pujusa chichaak

ipamtajai betek wajatai, nuna antukag
nugkak nayaimpijai uugtatui.
Imanitaish Israel aents aidaunak
Tuke Pujuu niina aentsji asagmatai kuitamkattawai.

Judá wegantu aidauk atakea duish shiig batsamsagtin

17 Tuja Tuke Pujuu niina aentsji aidaun chichajak:

“Atumek nunú tsawan uminkui,
mina pachittsajum dekas iina Apajujiyapi tujuttinaitjume.
Wika muja Sión wi etegkamua nuwi pujajai.
Jerusalégkak pegkejam mina aneetaijui,
nuadui shiwag tikich nugkanmaya aidauk
ataktu utuawajag makichkish dajagchagtinai.

18 Apajuí shiwag aidaun suwimkan susa ijinamtai nagkamas,
shiig kuashat uva ayau asamtai,
vino najanamu aidauk shiig kuashat aittawai,
tuja baka aidaushkam shiig kuashat ayau asamtai,
nuna muntsuji ijugbauk shiig kuashat
mujanmaya yumi betsaka akagama iman atinai.

Judá wegantu aidaun nugkenig yumi shiig kuashat aitnai.
Mina jegajuiya yumi pukuni jiinki
Sitim nugka pakajin ashí ukattinai.

19 Untsu Egipto nugkanmaya aidau,
Edom nugkanmaya aidaujai

Judá wegantu aidaun utugchatji atsaunak,
tuke aneas jetekag dita nugkenig
aents utugchatjinchaunak ijinawaju asagmatai,
suwimkan susagtatjai.

Dutika ai, dita nugkega duka aents atsau
bashiak pegkegchau wajas asattawai.

20 Judá wegantu aidau jinauwa nunak wi iikmatkattajai.
Nuna dutikau aidauk suwimkan jutsukek pujuschagtatui.

21 Untsu Judá wegantu aidau nugkeg
agkan bashiakag asashtinai,
Jerusalégchakam agkantak aents atsauk achatnai.
Tuja wika Jerusalégnum
muja Sión wi etegkamua nuwi pujuttajai”, tawai.

Amós

Apajuí kajekbau

¹ Nugka uugbau atin jimag mijan ai, Ozías Judá wegantu aidaun apuji, tuja Jeroboam Joása uchiji Israel aents aidaun apuji aatus batsamajaku aina nunú tsawantin, Amós uwija kuitamin yaakat Tecoanmaya aajakua nuna Apajuí akatjauwai. Dutikam Israel aents aidaun ujakui.

² Nunak aatus tiuwai:

“Tuke Pjuu kajeka Jerusalén pujus chichataik, chijichi aidauk kagaka jinawai, tuja muja Carmelonum ajak pegkeg wegajushkam kagaka jinawai.”

Ashí aents Apajuín umigchau aidau suwimkan jukiagtin pachisa et-segkamu

³ Tuke Pjuu chichaak:

“Damasconmaya aidauk ayatak tudauk ainawai. Iman asagmatai, makichkish tsagkujachagtatjai. Wagki ditak galaadnumia aents aidaun trigo dekegka tsaimaina imatikawajui.

⁴ Nuadui jega apu Hazael pujusa inamtaijiya nunak apejuattajai, dutika ai nunú kegak niina uchiji Ben-hadad pujusa inamtaijiya nunashkam apeattawai.

⁵ Damasco waitijinak tegajattajai, dutika utuan, Bicat-avénkan apujin Bet-edénkan apujijai mai maattajai. Dutikantai atum aidautigminak achigmajag Quir nugkanum yajupakagtatui”, tawai Tuke Pjuu.

⁶ Nuigtu Tuke Pjuu chichaak:

“Gazanmaya aents aina duka ayatak pegkegchauk ainawai. Iman asagmatai, makichkish tsagkujachagtatjai. Nuigtush kuashat aentsun achija yajuakag Edom aents aidaunum sujujajui, dita inake atinme tusag.

⁷ Nuadui yaakat Gaza peejamua nunak ashí apejuattajai, dutika ai nunú kegak apu pujusa inamtainak ashí apeattawai.

⁸ Tuja apu Ashdodnum puja nunak Ascalónkan apujiya nujai mai tsaitatjai, dutikakun wi kajekbaujui utuan filisteo aents aidaunak ijinattajai. Dutikakun ecrógnumianashkam wi kajekbaujui ijinattajai. Nunak dekas uminkatnun tajai”, tawai Tuke Pjuu.

⁹ Tuke Pjuu nuigtu chichaak:

“Tironmaya aents aidauk ayatak pegkegchauk ainawai. Iman asagmatai, makichkish tsagkujachagtatjai. Wagki ditak tikich aents aidau dita yachi yachijaig chichama umikag batsatunash ajaantus diitsuk achija yajuakag,

Edom aents aidaun inake atinme tusag ashí sujujajui.

¹⁰ Nuadui yaakat Tiro peejamua nunak apejuattajai, dutika ai nunú kegak apu pujusa inamtain ashí apeattawai.”

¹¹ Tuja junashkam Tuke Pujuu chichaak:

“Edom aents aidauk, ayatak pegkegchauk ainawai.

Iman asagmatai, makichkish tsagkujachagtatjai.

Wagki ditak dita yachi Israel aents aidaun

tuke kajejin asag,

dita kajetin umiinak pempeentukiag ai aintuinakua,

makichkish wait anentsuk puyajai ijinawaju ainawai.

¹² Nuadui yaakat Temágnak apejuattajai,

dutika ai nunú kegak apu pujusa inamtain

Boshránnum awa nunak ashí apeattawai”, tawai.

¹³ Junashkam Tuke Pujuu chichaak:

“Amón aents aidauk ayatak pegkegchauk ainawai.

Iman asagmatai, makichkish tsagkujachagtatjai.

Wagki ditak kuashat nugkan jukitag tuidau asag,

Galaad nugkanum nuwa aidaun ejapeniag ijinawau ainawai.

¹⁴ Nuadui yaakat Rabá peejamua nunak apejuattajai,

dutika ai nunú kegak apu pujusa inamtain ashí apeattawai.

Dutikan ijinai buutuinamu

dase suwe wajas kedegtuwama imattatui.

¹⁵ Tuja dita apujinak, niina atuwe tikich apu aidaujui

achikag, yaja tikich nugkanum jukiagtinaí.

Witjai Tuke Pujunuk, nunak dekas uminkatnun tajai.”

2

¹ Tuke Pujuu chichaak:

“Moab aents aina duka ayatak pegkegchauk ainawai.

Iman asagmatai, makichkish tsagkujachagtatjai.

Wagki ditak Edom aents aidaun apujin

ukunchin apeawag yuku awajsajui.

² Nuadui Moab nugkanak apeattajai,

dutika ai nunú kegak apu pujusa inamtain

Quiriotnum awa nuna apeattawai.

Moab aents aidauk maaniaku untsubau,

cornetan umpuinamu aatus pampainamunum jinawagtatui.

³ ¡Dita apujinak, tikich apu eme anentsa diitai

aina nujai ashí wi ijinattajai!

Nunak Tuke Pujuu dekas uminkatnun tawai.”

⁴ Tuja junashkam Tuke Pujuu chichaak:

“Judá wegantu aina duka ayatak pegkegchauk ainawai.

Nunin asagmatai, makichkish tsagkujachagtatjai.

Wagki ditak Tuke Pujuu chichamen umigtsuk,

dakumka najanamu aidaun

dita apachji emematiu aina nuna ditashkam emematiaju ainawai.

⁵ Nuadui Judá wegantu aidaun yaaktaji aina nunak apejuattajai,

dutika ai nunú kegak apu pujusa inamtai aidau

Jerusalén ayá nuna apeattawai.”

Israel aents aidau dita pegkegchaujin suwimkan jukiagtin

⁶ Tuke Pujuu chichaak:

“Israel aents aina duka ayatak pegkegchawk ainawai.

Iman asagmatai, makichkish tsagkujachagtatai.

Dita aidauk aents ujudauch aidau,
tikichi inake atinun kuichkin juwinak sujuinawai,
dutikaidau asag sapatjaiyaske yapajinawai.

⁷ Tuja aents ujudauch aidau nak tikima shiig senchi waitkainawai,
dutikaidau asag makichkish yainatsui.

Múun aidauk, uchijijai makichik nuwanak jimagtu yujawai.

Nuninak kajetan sujuinawai.

⁸ Aents ujudauch aidau jáanchjin
diwijum akikmaku jukita tusa
emetjuamu aidau ainak tepesag,

dita apajuímtaijin emematuinak yujumkan yuu batsatui.

Aents diwimkagtukchaunak akikmakta tusag
kuichkin atankiag,

nunú kuichkia duwi vinon sumakag,

dita apajuímtaiji jegamjukbaunum wayawag umú yujawai.

⁹⁻¹⁰ Israel aents aidauwah,

wi atumnak Egipto nugkanum waitu batsatutigmin jüigmaiijime,

dutika yajuakan wi kuitamsan

cuarenta mijan uwegshunum awekasuitjime.

Dutikakun atumi shiwaajum amorreo aents aidau

shiig senchigtin esajam wajatpakín aidau nak

ashí ijinan dita nugken atumín amasuitjime.

¹¹ Atumi uchijum aidau nmayan profeta agtinun etegjauwaitjai,

tuja tikich aidau nak nazareo atinme tusan nunashkam akanjauwaitjai.

Tuke Pujuu nunak dekas nunikua nuna tawai.

¹² “Tujash atum aidautijum

nunú nazareo aidau vino uwagta tusajum waitkasu ainagme.

Dutikakjum profeta aidau shkam mina chichamjun

etsegkai tusajum dakitjauwaitjume.

¹³ Nuadui, carreta trigon aimak wegak

nugkan umuchiakui,

wajasa ayamainchau dekapmaina imatikattajime.

¹⁴ Nuna imatikai uwemjatag tusajum tupikakjumes uwemjashtatjume,

aents senchigtin akush kakaumainchau dekapjattawai.

Tuja aents wajiushkam ayamjumakchattawai.

¹⁵ Tuja flecha akentan yacha akush,

senchi tupikain akush,

caballunum tupikain akush, uwemjachagtatui.

¹⁶ Nunú tsawantinig maanitan yacha akush,

maanitai aidau takakbaujinak utsag ukuinak pisajagtatui.

Nunak dekas nuniktinun Tuke Pujuu tawai”, tiuwei Amós.

1 Israel aents aidauwah, atum Egipto nugkanum batsamsajum waitu batsatutigmin Tuke Pujuu jipag agkanmitkagmawa nuna chichame antuktajum:

2 “Ashí nugkanum aentsuk ayaig, ima atumnak etegkauwaitjime. Dutikamuitkujum pegkegchau takamsau asajum, nunú umiakjum diwimkagtukbau akikmamaina numamtuk suwimak jukittajume.

3 “Jimag aents tsanigka wekaga nunak, mai antugdayas wekagu asa aniawai.

4 León shinakug, kuntinjin maa akasmatak shinawai, tuja leónka uchiji waanum shinakug, kuntinjin mau asa akasmatak shinawai.

5 Pishak nemak pujakug, nemaktinji detua ukukbaunum nemawai. Kuntin achiktasa dakamtika ukukbau tsekea nunak achika aniawai.

6 Trompeta yaaktanum shidaun antuinakug, aents aidauk pampainawai. Utugchat yaaktanum nagkaema duka Tuke Pujuu nunikti tibau asa nuniawai.

7 Tuke Pujuu niina aentsji profeta aidau dekamtiktsukek nii wakegamu ataish, nigkik makichkish dutikatsui.

8 León shinaun antuinakug, ashí ishamainak kujain ainawai. Tuja Tuke Pujuu profetan chichakti tamak niina daajin chichamainai”, tawai Apajuí.

Yaakat Samaria tsayam atin

9 Ashdotan apuji aidau batsatbaunum, Egipto apuji aidau batsatbaunum chicham etsegkujum: “Samaria mujaji aina nuwi kaunatajum”, tusajum ijumjatajum, nuwi ijunas Samaria nugkanum magkagtuinamu pegkegchau takainamujai pachimnaga awa nuna wainkatnume.

10 Tuke Pujuu chichaak: “Samarianmaya aidauk shiijak takainatsui, aents aidau mainak wajiji yajutkamu aidau dita pujusa inamtaijin ijumag batsamtawai.”

11 Nuadui Tuke Pujuu chichaak: “Shiwag aidau yaakat Samarian jetektatus tenteawagtatui, dutika jetekag kaya jegamkamu aidau nak tsaikag, apu pujusa inamtaijin waji ayaunak ashí yajuakagtatui”, tawai.

12 Tuja junashkam Tuke Pujuu chichaak: “Uwija kuitamin uwigiji yujam ayamjuktatus maanitkush ayatak jimag nawe ampigbaun nuniachkush kuishi ampigbaunakesh,

juwama numamtuk
 atum samarianmaya aidautijum
 Damasconmaya jáanch pegkeg ainkajum
 kaji batsatjum duka
 pisakjum piipich jukijum pisagtatjume.”

¹³ Nuadui Tuke Pujuu ashí senchigtina nunú ataktu chichaak:
 “Antuktajum atum aidautijum,
 nunikjum Jacob wegantu aidau
 suwimkan jukiagtata nunú pachisjum etsegkatajum.

¹⁴ Wika dita pegkegchau takamsamujin
 suwimkan susagtatjai,
 dutikakun Betelnum dita apajuímtaijin emematuinak
 altar najankamu ayá nunak ashí tsaiktatjai,
 dutika ai nugká batsamsattawai.

¹⁵ Wiakchan jee aidau, tsetsek tepeamtai kanutai,
 jega pegkeg umikbau aina nunak,
 esattin kanutai aina nujai tsaiktatjai.

Tuja jega marfil jegamkamu aina nunashkam tsaiktatjai,
 tuja jega apu pujusag inamaina nunashkam
 ashí tsaiktatjai”, tawai Tuke Pujuu.

4

¹ Samarianmaya nuwa aidautijum antuktajum:
 Atumek baságnunia baka duwejam aina iman
 duwekjum batsatjume.
 Atumek ujudauch aidau senchi waitkakjum dushikiagme,
 nunin asajum atumi aishjum aidau vino sujusta uwajan nampektajai
 tusajum inaku waitkagme.

² Israel aents aidaun Apajuji
 niina pegkegmajin nii umiktinun aatus tawai:
 “Atumin tsegkenai awagtamak
 japiki jujamkiagtinuk tsawan uminui,
 tuja atumi uchijum aidaunak agseyai nenakag japikiagtinai.

³ Atumek yaakat peejamu agkaju aidaunum eteemajum maki makichik
 jijnjatnaitjume.

Nunikagmin muja Hermógnum utsampakgtinai.”
 Nunak Tuke Pujuu dekas uminkatnun tawai.

Israel aents aidauk suwimkan juinakush anentaimainachu

⁴⁻⁵ “Atumek pegkegchau takat aidau
 ima wakegau asajum Betelnum shiyakjum,
 tuja Guilgalnumshakam shiyakjum,
 atumi apajuímtai dakumkamu najanamu aidau
 emematu batsamtajume.
 Atum nuniakjuminish, wika puyatjukchattajai.
 Witjai Tuke Pujuu, Israel aents aidaun Apajujiinuk,
 nunak dekas uminkatnun tajai.
 ¡Atum wakegakjumek tunamá batsamtajum!
 Tuja atumi apajuímtaiji aidau emematjukum
 kashikmasjum kuntin maajum apeatajum.
 Dutikakjum nuigtushkam kampakum tsawan jegakui,
 atum ajakmamunmaya juukjum diezmo tuké sutajum,

tuja tikich anentag aidaushkam susatajum,
ashí aents aidau anentag susatnume tusajum
etsegkatajum.

⁶ Nujantai waittsatnume ti ai,
ashí yaakat aidaunum yumain atsakui,
nujantai waitbaijume.
¡Imanika waitiakjumes atumek minak
umigtukchabiugme!

⁷ “Tuja nuigtushkam ajak juut jegau aig,
kampatum nantui yumin yutumtijachmajai.
Makichik yaaktanmak yutumtijamajai,
untsu tikich yaaktanmak yutumtijachmajai.
Tikich yantamnumak yumi yutuju asamtai,
nugka chupika pegkeg wajas amayi,
nuniai untsu tikich yantamnum yumi yutugchau asamtai,
ajakak kagaka amayi.

⁸ Nunikmatai aents aidauk yumin egainak
maki makichik yaaktanum yujabi,
imanik yujainakush kuashat uwaja kitak
amikmainnakesh wainkachagmayi,
tuja imanika waitiakjumes minak
umigtukchabiugme.

⁹ “Wi atumdau ajak ajakmakbau aidaunak,
tuja numi nejen aidaunashkam ijituajime,
atumi ajagmin manchi aidaun ishitkabiajime,
nuigtushkam dase sukutnun uwegshunmayan
dasenmitkabajai,
tujash imanika waitiakjumes atumek minak umigtukchabiugme.

¹⁰ Egiptunmaya aents aidaun suwimkan susauwaitag
imatikan suwimkan amasuitjime;
tuja atumi uchijum aidau
maaniamunum jinaati ti ai jinawabi.
Nunikagmatai dita caballoji aidaun yajutkajabi,
nunú jinaa kauku mejeakjum waitiugme,
¡imaniakjumes minak umigtukchauwaitjume!”
tawai Tuke Pujuu.

¹¹ Apajuí ataktu chichaak:
“Sodomanmaya aents aidaun,
Gomorranmaya aents aidaujai suwimka suwakun
jii ajunjan ijinauwaitag numamtuk awajkauwaitjime atumnashkam.
Dutika ai jii kajji ampinjau tepegama numamtuk wajakuitjume.
¡Imanika waitiakjumes minak umigtukchau ainagme!”
tawai Tuke Pujuu.

¹² “Nunin asagmin, yaunchuk tikich aidaun
suwimkan susauwaitag numamtuk
awajkattajime Israel aents aidautigminak.
Apajuí suwimkeg uwemtumainchau asajum,
jumintsajum Apajuí igkugtasajum dakastajum!”

13 Tuke Pujuwai muja aidaun najanin,
 dasenashkam najanin, tsawainash suwe emau,
 niinu aidaunash aentsun paan dekamtikau
 ashí nugkanum wekagu.
 Tuke Pujuu, Apajuí ashí senchigtin tutaya
 nunuwai niina daajig.

5

*Pegkegchau takatak idaikujum Apajuí umigkatajum tusa Israel aents
 aidau chichagkamu*

1 Israel aents aidauwah,
 ishamain nagkaemaktin asamtai,
 wi wake besemag dekapeakun kantamag nunú antuktajum.

2 Israel aents aidau imanji,
 pegkeg wajaknuwe nunú nantakchatnun iyaajaje,
 nunikag nantamainchau wajasag batsatui.
 Ditan inanmainuk atsawai.

3 Tuke Pujuu Israel aents aidaun chichajak:
 “Makichik yaaktanmaya
 mil suntag maaniamunum ishiakbauk,
 ayatak cien suntajak iwaku wakitkittawai.
 Tuja cien suntag ishiakbauk,
 ayatak diez suntag iwaku wakitkittawai”, tawai.

4 Tuke Pujuu Israel aents aidaun nuigtu chichajak:
 “Iwaku pujustag takugmek, mina umigtuktajum.

5 Dakumkamu aidau ememattasajum Betelnum wetin aigpajum.
 Nunú nuniakjumek ijina utsam atatjume.
 Tuja Bershebanmakesh wetin aigpajum,
 nuniachkugmesh Guilgala nunigkesh nagkaemaktin aigpajum,
 wagki nuwiya aents aidaunak ashí achijag yajuakagtinaí.
 Tuja Betelak tsaikam uwejush wajas asatnai.

6 Tuke Pujuu umigkatajum,
 nuniakjum iwaku pujustatjume,
 atum nii umigtsugminig, Israel aents aidau
 kanakag ijunjajua nuna ijinattawai.
 Betelnum dakumka najanamu apajuímtai aina nunak ekemaktatui,
 dutikamtaig makichkish ikagnakchagtatui.

7 Aents ujudauch aidau waitkam batsata nunú
 shiig anentsajum kuitamchau,
 nuigtush aents ayamke atsaujai
 betek waitkau aidautigminak wait anentajime.
 Wagki atumek pegkeja nunú pegkegchau anentagme.

8-9 “Apajuíyai yaya aidaun, nayaimpijai najadau,
 tsaaptinnash suwe emau,
 suwenash tsaaptin emau,
 yuminash yutumtikau.
 Apajuík yaakat peejamu aidaunash tsainai,
 tuja nunú tsaikbaunmayanak jega múun aidaun kaya ekenag jegamak
 uminaí.

¡Tuke Pujuu ashí senchigtin tutaya nunuwai niina daajig!

¹⁰ Aents shiig takantsati tusa chichamjaun waitjutsuk dekasken chichaujai kajeja nunak wait anentajai.

¹¹ Wagki ditak ujudauch aidaun tepejuk batsamtusag, diwijum akikmakta tusag trigo atantuinawai.

Nunin asag, jega pegkeg aidaun dita jegamjajua nuwig pujuschagtatui.

Tuja nuigtush dita uva ajakbaujiya nuwiyan vino najanawajag shiig aneasag uwagchagtatui.

¹² Dita aidaun shiig kuashat pegkegchau takamaina nunak wika shiig dekajai.

Tuja apu chichama epegkin aidaun aents pegkegchau aidaun yayaak, tikich aents utugchatji atsujunak suwimkan suwina

nunak shiig dekajai.

Nuadui chicham ataik, wiakuch aidaun ujudauch aidaunak tuke depetuinawai.

¹³ Nuadui kuashat pegkegchau takamu ayau asamtai, aents yacha duka takamtak pujawai.

¹⁴ “Pegkegchau takat aina duka idaikujum, pegkeg takat aina nunú takastajum, nunú nuniakjum dukap tsawan pujustatjume. Nuniagmin Tuke Pujuu, ashí senchigtina nunú inak yaimpawai tajum nunú dekaskenum atumnak tuke yaimpaktatui.

¹⁵ ¡Pegkegchauwa duka dakitjatajum!

¡Pegkeja nunú waketajum!

Apu chichama epegkin aidautigmek, shiig betek chicham iwajatasajum anentaimtajum.

Nuniagminig Tuke Pujuu, Apajuí ashí senchigtina nunú Israel aents aidaun ujumak iwaku batsata nunash wait anenjachajaintash.”

¹⁶⁻¹⁷ Tuke Pujuu ashí senchigtina nunú chichaak:

“Wi atumin suwimka amastasan minitaik, ashí yantannum buutiagtinaí.

Jinta aidaunum buutuidau,

yutai ijumja sujutai aidaunum buutuidau,

ashí plaza aidaunum buutuidau,

uva ajakmakbau aidaunum buutuidau,

aja aidaunum buutuidau,

jakamunum buutuidaushkam agtatui”,

tawai Tuke Pujuu.

¹⁸ ¡Tuke Pujuu tattawai tusajum shiig aneautigminak wait anentajime!

Atumek waji utugchatak nagkaetamkiti nunú dekachu asajum tuu yujagme.

¡Tuke Pujuu minamuk, tsaaptinuk achattawai, suwe ishamain atatui!

¹⁹ Nunú tsawantinig makichik aents

león aintam tupika wekama, chayujai igkuniak wajuk anentaimainaita iman atatui.

Nuniachkush jegá waya tanishnum atumkama,

nuwi dapi tepau esaim anentaimaina iman atatuí.

²⁰ Duka dekaske, Tuke Pujuu minamuk
tsaaptinuk achattawai, suwe atatuí;
jnunú tsawantinig shiig aneamuk achattawai,
ayatak wake besemag atinai!

²¹ ¡Jiistamtai ati tusa tsawan etegjamu aina
nunú umiaji tusajum jiistamjum nunak shiig dakitajai!

Tuja Apajuí emematji tusajum ijunjajum
shiig anejum nunashkam shiig dakitajai.

²² Apajuí tudaun tsagkugtamjati tusajum
kuntin maajum nuna neje ashí apeajum
nunak wika dakitajai.

Tuja agkan pujutan amastí tusagmeshkam,
kuntin aidau, ajak juukbau aidaujai
anentag kuashat ikaunmagne,
tujash wika nunú diitnak dakitajai.

²³ ¡Juwi wainka kantama batsamsuk,
yaja shiyakjum kantamatajum!
¡Atum arpa awatjum nunú antutnak dakitajai!

²⁴ Aan batsamsuk dekas
wi shiig kuitamkagtinaitag nunisjume,
atumshakam tikich aidau shiig kuitamkatajum.
¡Atum shiig takamua duka namak kuyua
megkaechauwa nujai betek ati!

²⁵ “Israel aents aidauwah, atum cuarenta mijan uwegshunum yuja-
suitjum nuaduk, anentag aidauk minak sujuschauwaitjume. ²⁶ Atumek
Sicut atum dakumka najanamu wainka apajuímtai atum apu tajum nunú
yanasa yujayugme. Nuigtushkam Quiliún atum dakumka najanamu
yaya nunin aajakua nunú yanasa yujayugme. ²⁷ Nuadui aents tikich
nugkanmaya Siria nugkan nagkaiki batsamin aidau achija yajuaktinme
tusan idaisattajime”, tawai Tuke Pujuu, Apajuí ashí senchigtina nunú.

6

Apajuí Israel aents aidaun suwimak susamu

¹ Amós chichaak:

¡Jerusalégnunia aidau sapigmatsuk
puyatkas batsata nunak wait anentuinajai!
Yaakat Samaria eme anentautigminak wait anentajime.

Juju nugka múunta nuwi apu aidautijum
puyattsuk batsatutigminak wait anentajime.

² Yaakat Calné wejum diistajum,
tuja nuwi juwakjum yaakat Hamat shiig múunta nuwi wetajum,
nunikjum nuwi nagkaemakjum filisteo aidaun yaaktaji Gat wetajum,
nunika jegajum nunú yaakat aidaunash itugkajamkiyi nunú diistajum.
Atumek dita nagkaesau ainatsjume,

tuja atumi nugkega dushakam dita nugken nagkaesauchui.

³ Atumek suwimak jukig tusajum dakitajume,
nuniyatkujum ayatak suwimak akumtagme.

⁴ Atumek wainka batsamsajum pegak shiig pegkeg

marfil najanamu aidaunum kaji batsatjume,
nuniakjum kuntin pegkeg duwejam aidau yuu batsatjume.

⁵ Atumek arpa wainka awatkujum kantamainchau wainka kantamjume,
tuja kantamku awattai aidau tusajum wainka najanjume,
nuniakjum David yacha aajakua iman anenmamjume.

⁶ Atumek tsapa muunnum vino umakjum
shiig senchi nampeagme,
tuja dekaskugkuin pegkeg akik aina ibau nijamjume.
¡Nuniau asajum atumi yatsum aidau waituina duka pachiatsume!

⁷ Nunin ainajum duwi, aents aidaun achija yajumainakug
atunna etegtamawag jujamkiagtinaí,
dutijamawagmatai atum shiig jüstama batsatjum duka
wainka juwaktatjume.

⁸ Tuke Pujuu Apajuí ashí senchigtina nunú pan antumainun chichaak:
“¡Jacob wegantu aidauk jega muuntan
jegamag batsamas ememaidau asagmatai kajejajai!
Nuadui dita yaaktaji aidaunak shiwag aidau tsaigkatnume
tusan idaisattajai.

⁹ “Dutika ai makichik jeganum diez aents iwaku pujauk ashí ijinam
agtatui. ¹⁰ Nunú aents jinau aidaun patayi aidau dita iyashin jukiag
apeawagtatus kaunawag yujattaman, tikich nuna patayi aidau nuwi yujau
ditan ininak: ‘¿Tikichish atsuak?’ tusa tama: ‘Atsa, makichkish atsawai’,
tiagtinaí, nuna tusa: ‘¡Takamtak wajasta!’ tiagtinaí. Wagki nuna inima
yujas mina daajun adaikug nuni senchi suwimkan jumain asagmatai.
¹¹ Wagki Tuke Pujauk Israel aents aidaun suwimkan suwak, jega múun
aidaun jega piipich aidaujai ashí tsaiaktatui.

¹² “Atumesh anentaimsakjuah,
¿caballosh kayanmash tupikaumainkait?
Tuja ¿kayanmash pukujaish ajakmamainkait?
Tujash atumek shiig takata duka jata awajsaugme,
dutikakjum shiig aneasa pujuta dushakam
wake besemag awajsaugme.

¹³ Atumek yaakat piipich aidau depetkajum
ememasa chichaakjum:
‘Ína senchijin depetkaji’, tusajum shiig aneajume.

¹⁴ Nuniau asagmin, Tuke Pujuu Apajuí, ashí senchigtina nunú chichagta-
mak:
Shiwag aidau Hamatnum nagkamas jetepakag,
uwejush tsumujin awa aatus ashí depetamak
dita wagagtamkiag waitkagmastinme tusan idaisattajime”,
tujama nunú Israel aents aidautijum shiig antuktajum,
tiuwai Amós.

7

Manchi aidau ajakan amuktin

¹ Ajak ajakmamu nejeka tsamakmatai, apu susatnun yama nagkamchak
juuka idaisamu, ataktu tsamakmatai dita yuwawagtinnak eke juwinatsaig,
manchi kaketuk amuktatus uminas aun Tuke Pujuu iwaintugkabi. ² Nunú

ajak aidaun manchi kaketuk dupajai nagkamas ashí amuakui, Tuke Pujun segaakun:

“i Tuke Pujuwah, wait aneasam tsagkugkagtugta! Amina aentsjum Jacob wegantu aidau kuashtachua dusha manchi ajakji amutkamash ¿wajina yuwa batsamsattawa?” tibaijai.

³ Tusa tai Tuke Pujuu chichagtak:

“i Duka nunikchattawai!” tujutmayi.

Jii kegau wainkamu

⁴ Junashkam Tuke Pujuu jii kegauwai suwimkan sukagtustatus umiamujin iwaintugkabi. Nunú jii kegak ashí nugkan apebi, tuja nayantsa kunajinash apebi. ⁵ Imatikakui wi Apajuin chichagkun:

“i Tuke Pujuwah, wait aneasam imijkata! Amina aentsjum Jacob wegantu aidau kuashtachua dusha ¿wajuk ibaunash atsanjag pujustinme?” tibaijai.

⁶ Tusa tai Tuke Pujuu ditan wait anentug chichaak:

“Juju suwimkashkam uminkashtatui”, timayi.

Plomo najanamu

nená dekapatain takus

wajau wainkamu

⁷ Nuigtushkam Tuke Pujuu juna iwaintugkabi: Apajuí nená dekapatain plomon takus yaakat peejamunum ayaumas wajaun wainkabiajai. ⁸ Nuwi wajas inintak:

“¿Amosah, jusha wajimpaya?” tujutmayi.

Tujutkui wi ayaakun:

“Aanka plomo, jega jegamin takau aina nunuwai”, tibaijai.

Tusa tai nii chichagtak:

“Juna takakag juwi mina aentsug aidaunak dekanan diistatjai, dita pujutish pegkejash aina nuna. Tuja dita pujuti pegkegchaw ainakuig, makichkish tsagkujachagtatjai. ⁹ Isaac emematujakbau nain aidaunum ayá nunak tsaiktatjai, tuja Israel aents aidau wainka apajuímtai aidaun emematuinak jegamjamu aina nunashkam tsaiktatjai. Dutikakun Jeroboam wegantu aidaunak ijinattajai”, tujutmayi.

Amós Amasíasjai kajegdaikamu

¹⁰ Betelnumia sacerdote Amasías Israel aents aidau apujin Jeroboaman chichaman akuptak: “Apuh, amina Amós Israel aents aidaunum wekagas chichaman umigtamui. Tuja iik nuna tujamá wekaeti tusaik idaimaitsuji.

¹¹ Nuwi wekagas chichaak: ‘Jeroboamnak maaniamunum maawagtatui, tuja Israel aents aidaunak ashí achijag yajuakagtatui’ tusa tuu wekaewai”, tiuwai.

¹² Tusa ujaka ukuak Amasías Amósan chichajak:

“i Dekamnuh, juwi pujusam tuu pujutsuk jiinkim wetá! Ame chicham etsejam nuwiya yuwa pujustag takumek, Judá wegantu aidau nugken wetá.

¹³ “Tujash Betelnumak nunú pachismek nuigtuk chichakaipa, wagki juju yaakta juwig dekask apu niina apajuímtaiji jegamjukbau awai”, tiuwai.

¹⁴ Tusa tama Amós ayaak:

“Wika profetachuitjai, tuja profeta achainjash tusankesh anentaimtsujai. Wika uwija kuitamkun, higo ikamia aidaun juuka sujakun, nuwiyen yuwan pujajai. ¹⁵ Nunika pujai Tuke Pujuu nuna idaimitkajak, mina chichameg Israel aents aidaunum etsekgata tujutmayi. ¹⁶ Nuadui nii

tujutbaun etsejag nunú, yamai Tuke Pujuu chichame antukta. Ame chichaakum: ‘Israel aents aidau pachisam pegkegchau chichagkaipa, tuja nuigtush Isaac wegantu aidaushkam pegkegchau chichagkaipa’, tusa tame. ¹⁷ Amek tame, tujash Tuke Pujuu juna aatus tawai: ‘Juju yaakta juwi amina nuwem akika dutiktai wajastatui, amina uchijum aidaunak tuja nawanjum aina nunashkam maawagtatui. Dutikawagmatai tikich aents aidau amina nugkernak jukiagtinaí, amek amina nugkem ukukim atushat aents Apajuí nemagchau aidau nugken jakatnaitme, Israel aents aidaunak achijag nugken ukumtikiag tikich nugkanum atushat yajuakagtinaí’ tawai Apajuí”, tiuwai Amós.

8

Yujág juuka chagkinum aimkamu

¹ Makichik chagkinum yujág tsamaku juuka aimkam pujaun Tuke Pujuu iwaintugkabi. ² Nuna iwaintujuk chichagtak:

“¿Jusha wajimpaya?” tujutmayi.

Tujutkui wí ayaakun:

“Yujág juuka chagkinnum aimkamu pujawai”, tibaijai.

Tusa tai, Tuke Pujuu chichagtak:

“Israel aents aidau suwimak jukitnujig yujág tsamaka uminas aama numamtuk tsawantak ashí jegae. Nuadui makichkiakesh tsagkujashtatjai.

³ Nunú tsawantin kuashat aents jinaamtai, apu pujusa inamtaijinig shiig aneasa kantabauk atsutnai, ayatak wake besemag atinai. Nunú aents jinau aidau iyashinak takamtak yajuakag utsagkagtinaí”, nunak Tuke Pujuu dekas uminkatnun tawai.

Israel aents aidau pegkegchauji diigsa suwimak susatnuk tsawantak uminui

⁴ Juju nugkanmaya aents ujudauch aidau kasajak waitkau aidautijum shiig antuktajum; ⁵ atum chichaakjum: “¿Trigo wamak sujukchamnush, wagka nantu yama takamunum jüstamtaya dusha tsawantash wamak nagkaematsua? Trigo sujaku kijinji iman Chau aig, tsanumja kasamku kuashat kuichik jukichminush ¿wagka tsawan ayamtaish wamak nagkaematsua?” wajagme. ⁶ ¡Imatu asajum, trigok saepejai sujumain deka-peagme! Nunin asajum ujudauch aidau inaku waitkatai ati tusajum kuichik piipich juwakjum sujuktatag tajume, tuja nuigtush makichik sandali-ayai yapajiatag tajume. ⁷ Nuadui Tuke Pujuu, Israel aents aidau Apajuí chichaak: “Atum dutikajum nunak makichkish kajimatkishtinaitjai”, tawai.

⁸ Imatika waitkajum duwi nugka senchi uugtinai, imaniak namak Nilo dujajak ikaman utuja ataktu kuyua, ataku utug kuyua wajama imanittawai. Imanitai aents aidau ishamainak buutiagtinaí.

⁹ “Nunú tsawantinig etsag etsanjashtinaí, tuja etsa tutupit wajas etsantu eketiatak kajinak suwe wajastinaí, nunitai ashí nugkanmak suwe wajastinaí.

¹⁰ Atum jüstamkujum shiig aneenujum nunú idaikujum, aents jinamunum wake besemag batsamsajum ayatak buut batsamtatjume, nuniakjum jáanch jakamunum nugkurai

nugkugjum yujastatjume.

Nuniakjum pinui awamagjum,
makichik aents uchiji makichkiuch ajamu jajukam
wake besemag dakapeak kajeka buutama imanittagme.

¹¹ Yapajut tepeatin tsawan jegattawai,
tujash duka pag atsutaigkish yumi atsutaigkish nunikchattawai;
duka mina chichameg antuktasa yapajamujai betek wakegamu atinai.
Nunak Tuke Pujuu dekas uminkatnun tawai.

¹² Tuke Pujuu chichamen antuktajai tusa
ashi yantamnum nayantsa amain yujatnai,
tujash imaaninakush mina chichamjun etsejuidaunak antukchagtinaí.

¹³ Nunú tsawantinig,
nuwa muntsugtauch shigmauch aidaush,
tuja uchi datsa wajiu aidaushkam
pimpikiag weetuk wampainag iyainiagtinaí.

¹⁴ Tuja nuigtushkam samarianmayan, Dagnumian,
bershebanmayan wainka apajuímtai aidaun emematiaju aidauk,
tuke jainak wampainag iyainiagtinaí.
Nunú wainka apajuímtai aidaun jutsukaita
dekas Apajuík tusag, ame tuke umigtai atin ata tusag
tinu aidauk nantakchatnun tuke jak wampainag
iyainiagtinaí”, tawai Apajuí, tiuwai Amós.

9

*Apajuí aentsu pegkegchaujin diijus suwimkan susatna nuna uwemtu-
mainuk makichkish atsawai*

¹ Duwi pujusan Tuke Pujuu altaran ijus wajasa chichagtak:
“Tuke Pujuu emematku ijuntai jegamku
shugku ajigmawa nunú awatim kupikta,
dutikam jega yumpunak aentsun yutua ijinati,
tuja tupikaki uwemjatag tuinakush makichkish uwemjachagatui.
Tupikaki uwemjashkam maaniamunum jakattawai.

² Nugka initken uumkagmataish, imanuiyanash jiigtatjai,
tuja nayainpin nagkaesau yakí uumkagmataish,
imanuiyanash ajuawagtatjai.

³ Tuja muja Carmelo titijin waka uumkagmataish,
egakan achikagtatjai,
tuja nayantsa kunajin uumjutkagmataish,
kuntin múun ichiag ijinati tusan awetittajai.

⁴ Tuja shiwag aidau yajuakam uwegshunum shiyakmataish,
puyajai ijinatnume tusan inamjattajai.
¡Ditanak tuké diyaku atatjai,
tujash nunak yayakdukeshtatikattajai,
suwimkan suwakun dutikattajai!

⁵ “Tuke Pujuu Apajuí, ashi senchigtina nunú
nugkan antiawai, dutikam nugkak yumpunui,
nunitai aents aidauk buutuinaawai.
Tuja nugkak uujak namak Nilo dujajak ikaman utuja
kuyua, ataktu utug kuyua wajama imanittawai,
imanitai aents aidauk ishamainak buutiagtinaí.

⁶ Tuke Pujuu niina jenak nayaimpinum umikui, untsu nuna ichichiagtinun nugkanum umikui, nayantsak bukuiti yakí weawai, nunik yumi najanea ataktu yuta nunak Apajuí dutikawai.” Niina daajig “Tuke Pujuu” tawa nunuwai.

⁷ Tuke Pujuu chichaak:

“Wi diismak Israel aents aidautigmek etiopianmaya aidaujai betek ainagme. Atum Egipto nugkanum batsatutigmin jiijan ikaunmawaitjim dutiksanuk, filisteo aidaunashkam Creta nugkanum batsatun jiijan ikaunmauwaitjai. Tuja arameo aidaunashkam dutiksanuk Quir nugkanum batsatun jiijan ikaunmauwaitjai.”

⁸ Juju Israel nugkanmaya aidau pegkegchau aina nuna Tuke Pujuu diisa chichaak: “Au aents aidaunak ashí ijinan emegkaktatjai, dutikaknush Jacob wegantunak ashí ijintsuk ayamjukan uwemtijattajai.

Witjai Tuke Pujunuk, nunak dekas dutikattajai.

⁹ Tuja Israel aents aidautigmin shiwag aidau trigo wampuji utsankatasa pegamash jigkayi pegkejak iyautsama imatijamatnume tusan titatjai.

¹⁰ Ashí aents chichainak:

“Duka makichkish nunikchattawai, utugchatak atsugtamatji”, tuinawai.

Tujash nuna tuu chichaina duka maaniamunum puyajai ashí jinawagtatui”, tawai.

Apajuí Israel aents aidaun atakea duwi yaigtin

¹¹ “Nunú tsawan jegakui, Davita aakji tegaekau ataktu aakmamaina numamtuk, ataktu nii wegantunmaya Israel aents aidaun apuji wajas inamjatnai. Nuadui yaunchuk ayanum iman wajasagtinai. ¹² Nunikag edomnumia iwaku pujuidauk, tuja tikich aents mína emematjin aidaujai ataktu ashí Israel aents aidaujai awakjattajai”, tusa Tuke Pujuu nii dutikatnun tawai.

¹³ “Kuashat trigo juwamu atin tsawan jegawai. Trigo juwamuk eke ashimchayatkujum ataktu nagkamajum ajakmattagme. Tuja uva juukbaushkam eke vino najantsuk ukuakjum ataktu uva ajaktatjume. Imatikau asagmin vino najanamu aidauk mujanmash, nain aidaunmash yumijai betek shiig kuashat aitnai. ¹⁴ Nunú tsawan uminkui, mína aentsug Israel aents aidau achija yajuakam tikich nugkanum batsatun jiija yajuakan ikaunmatnaitjai. Dutika ai dita yaaktaji tsaiqbau aidaun ataktu najanawag batsamas, uva ajakmakag vinon najanawag umuínak, tikich ajak aidaunashkam dita agájin ajakmawag, nuna nejen yuwinak shiig batsamsagtinai. ¹⁵ Israel aents aidaunak waji ajakaitkuish wi dita nugken susauwaitag nuwi atakesh tegai ajapashtinun ajakmawagtatjai”, tusa Tuke Pujuu tawai, tiuwai Amós.

Jonás

Jonás awematatama intimkiuwa nunú, nayantsanum ajugkajua nujai pachisa agagbau

(1.1-16)

Jonás Apajuín intimjukbau

¹ Amitai uchiji Jonásan Apajuí chichajak: ² “Nínive yaakat múunta nuwi wetá. Nunikam dita chichagkum, atumi pegkegchaujig Apajuíyai ashí wantinkae. Nuadui Apajuí suwimkan susagatjai tujamui tusam ujakta”, tiuwai.

³ Tusa timaitak Nínive wemainun ukuak, dekas tikich nugkanum Apajuísh waitmainchaunum wetajai tusa, yaakat Jope lancha anumtaijin jegauwai. Nunik jegakma makichik lancha wetatus uminas tepaun wainkauwai. Nunik España nugkanum yaakat Tarsis atushat asamtai, imanui weakun Apajuín uumjuka ukuktajai tusa shiig aneas akikmak egkemjauwai. ⁴ Tuja lancha juwaki nayantsanum ejapean wegai, pachiachbau Apajuí dasen shiig senchi dasenmitkatai, nayants senchi tsukatu. Imaniau asamtai lanchak tsainkattak wajau. ⁵ Imanitai aents lanchanum takau aidau chimpijuk ishamaianak, kujaukmaikia senchi untsumak dita apajuíjin segaidau nii yaimpakti tusag. Nuninak lancha tepeawai takunti tusag, waji aidau chimpijunak nayantsanum utsaawajui. Imaaninai Jonásak initak waji chimpitainum waya shiig kanak egketu. ⁶ Nunittaman lanchanum takau aidaun apuji jegantun chichajak:

“¿Kaja wajasuh, amesh juwish waji kanush egkemtame? ¡Nantakim amina Apajuíjum segata! ¡Wait anenjamag yaimpakchaintash!” tau.

⁷ Tusa tayatak dita ditak pempeentunikiag chichainak:

“Yana utugchatjinig imajush iyanjamjae nunú dekaami”, tuidau.

Tusag nunú dekataiyai dekapkamá Jonásan ejeyajui. ⁸ Nunikmatai Jonásan iniinak:

“¿Wagka jusha imajush iyanjamae? nunú ujajatkata, tuja amesh ¿wajinma takauwaitme? ¿Tuwiyamea miname? ¿Tuita nugkemesh? ¿Ya aentsuitpa?” tusa inidau.

⁹ Tusa iniam Jonás ditan ayaak:

“Wika hebreo aentsuitjai, wika Tuke Pujuu Apajuí ashí najankauwa nuna emematnaitjai. Juka mina utugchatjui. Junak wi Tuke Pujun uumjukan ukuakun tupikag duwi imaniawai”, tau.

¹⁰⁻¹¹ Tusa tutai, daseshkam aan senchi dasentak nuni senchi ishamaian wajau asamtai, senchi ishamaidau asag chichajuinak:

“Juka amek pegkegchau aíd wekaeme. ¿Dase mijaakti tusaish iish amesh utugmainaitji?” tuidau.

¹² Tusa tama nii aimak: “Juju dase ishamaian waja duka dekas mina utugchatjui imaniawai. Dekas minak nayantsanum ajunkatajum, duti-juwagmin nayants tsukatak ishamaian waja nunak mijaktatui”, tau.

¹³ Tuja nayantsanum yujatan yacha aidauk shiig senchi wiyantuidau anunkami tusag, tujash nayants nuni senchi dasentu asamtai, anumainchau dekapedau. ¹⁴ Nunidau asag Apajuín segainak: “Tuke Pujuuwah, juju aentsua juna tudaujin jinaati tusamek idaikagtusaipa. Nii jamainnumak

ii aidautik waitbaitsuji. Juka ame diisam jutikame”, tuidau ¹⁵ Nuna tusag Jonásan jukiag nayantsanum ajugkajui, dutikawagmatai nayants senchi tsukatbaunak mijaakui. ¹⁶ Nunik mijakmatai, lanchanum takau aidau chichainak: “Tuke Pujuuk dekas senchigtinai iman asamtai, yamai nagkamsaik dekas Apajuú tuke umigkagmi”, tiajuí. Nuna tusag kuntinun maa apeenak Apajuín emematiajuí.

Jonás namaka ampujin pujusa Apajuú segamu

¹⁷ Tuke Pujuu Jonásnak namak muuntan akuptukui, nunú Jonás nayantsanum iyaittaman kujajui. Dutika kujajam kampatum tsawan, kampatum kashi namaka ampujin pujusui.

2

Jonás Apajuín ausamu

¹ Nunik Jonásak namaka ampujin egkemas Tuke Pujuu niina Apajuíjin aujak, ² aatus tiuwai:

“Tuke Pujuuwah, namaka initken tepeakun jajapi tibaijai.

Ashí jakan amina untsukmajame,
dutika ai ame minak yainkabiume.

³ Dekas nayantsa kunajin ajunkabiume,
ayatak yuminum egkemkan wekaebaijai.

Wainchi ishamain ame awemamu
tuku tukuji nagkaetibi.

⁴ Minak dekas ajapjuameapi tibaijai,
tuja amina jem pegkegma nunak
ataktu awagkinuk wainkashthinapitja tibaijai.

⁵ Shiig initak tepeabaijai,
nayants ijitua emegkatkabi,
initkanmaya dupa aidau buukjun pempenjibi.

⁶ Shiig initak tepean nugkanum jegabaijai,
tuke jiinkishtinapitja tibaijai.

Tujash Tuke Pujuuwah, mina Apajuíjuh, ame minak uwemtijugmayume.

⁷ Tikima jakun aminí anentaimjan,
untsukmajame. Tusa untsamai
ame amina jem pegkegma nuwi pujusam antugtukmayume.

⁸ Wainka apajuímtai aidaun emematuinak
ima aminak umigtamainun idayinawai.

⁹ Tujash wika kuntinun maa apeakun amina ememattatjame,
nuniakun wi amina ememattatjame tusan
tiuwaitjam nunak imatiksasuk umiktatjai.
¡Wagki ameketme uwemtikagtinmek!” tiuwai.

¹⁰ Tusa aatus timatai, Tuke Pujuu nunú namak Jonásan kukag iyakti tiuwai. Tusa tima Jonásan kukag iyakui.

Jonás yaakat Nínivenum chichagkagtukbau

3

Nínivenmaya aents aidau Apajuín umigkagbau

1 Tuke Pujuu Jonásan ataktu chichajak: 2 “Nínive yaakat múunta nuwi wetá. Nunika jegaam wi amina akatjattajam nunú etsegkata”, tiuwai.

3 Tusa tima, Apajuí tibaun umiak Nínivenum weuwai. Yaakat Nínivek shiig múun asamtai, ashí wekaesa wainkatag takuik, kumpatum tsawantai tenteemain aajakui. 4 Nunú yaaktanum Jonás waya makichik tsawan Apajuí chichamen etsejak: “¡Juu yaaktanak Apajuí cuarenta tsawan asa tsaitatui!” tau.

5 Tusa etsegtaí, ashí aents Nínivenmaya aidauk uchinum nagkamas múun aidashkam pegkegchau takatnak idayinak, dekas Apajuí umigk-agmi tuidau. Nuna tusag wake besemag dekapenak, jáanch pegkegchaun nugkugak yujumkan ijagmawag Apajuín segainak batsatu. 6 Tuja Níniven apujishkam nuna dekauwai. Nunik niishkam ekemsa inamtaijin eketu wajaki, jáanch apu nugkutai nugkuagbaunak awimak ukuak, jáanch pegkegchaun nugkuja nulgá pujusui. Nunak Apajuín eme anentus nunikui. 7 Nunik pempeenmawaik, apu niina atuwe aidaujai chichaman umika ashí aents Nínivenmaya aidau akuptak: “Makichik aentskesh yujumkanak yuwashtinme. Tuja tagku aidashkam ayugnashsti, yumish sunaschati. 8 Duka puyatjutsuk ashí aents aidautijum wake besemag pujaku nugkutai jáanch pegkegchau aidau nugkuktajum, nunikjum Apajuí senchi untsuktajum. Nuniakjum maki makichikitijum pegkegchau takamtaijum, magkagtutaijum aidaujai idaisatajum. 9 Nunika ajinish Apajuí iina kajegtamak suwimkan amastag tiu akush, wait anenjamag tsagkugtamjamtaí jinutsuk iwaku pujuschainjash”, tiuwai.

10 Tuja ashí aents Nínevenmaya aidau pegkegchau takatan idaisagmatai, Apajuí suwimkan susatjai tiuwaitak, dekas dutikashtatjai tusa idaisauwai.

4

Jonás kajekbau

1 Apajuí Nínivenmaya aents aidau tsagkujuk suwimkan sutsuk idaisamtaí, Jonás senchi kajekui. 2 Nunik Tuke Pujuu chichajak:

“Tuke Pujuuwah, wika juna aneasan tuyajai. Wi mina nugkajui pujusan anentaibiag duka imatiksamek umikume. Amek Apajuí pegkeg, wait anenkagtin, wamak kajeche, anentak wajasuitam iman asam, suwimkan susattajai timesh awake anentaíjiam, suwimak sutsuk idainaitam nuna dekau asan, wika amina ukukin Tarsis nugkanum atushat tipuktajai tibajai. 3 Ame suwimak sutsuk idayam nunú minak shiig awajatsui. Aaní pujutnaitkumek dekas minak mantuata. Iwaku pujusan ame suwimak suwatsum dutikakmin anentaímu waittan dakitajai”, tiuwai.

4 Tujash Tuke Pujuu niina ayaak:

“¿Amesh wagka wainkamesh kajeame?” tiuwai.

5 Tusa tima yaaktanum pujau jíinki, etsa minitaiya nuni yantamnum numi kupig pataja bikintu wajasmatai, nuwi waig ekemas Apajuish yaaktanash itugkatig tusa diyaak eketu. 6 Nuwi pujaig Tuke Pujuu makichik ajakan tsapapiuwai, dutikam nunú Jonás pujamun bikintu awajsauwai. Nuni yaigkui Apajuí Jonásan senchi etsa sukuak waitkasai tusa. Dutikam Jonásak shiig aneas nuna wakentin bikintunum pujau. 7 Nunik pujai tsawak kashikmas Apajuí shuni numin yuwati tima yuwauwai. Dutikam nunú numi jakauwai. 8 Nuniku ai kashikmas etsa jíinai, Apajuí dase sukutnun etsa akaetaiya nuwiyen dasenmitkakui. Nunú shiig senchi sukuam Jonás jamain dekapeak:

“Iwaku pujutnak dakitajai, jakatag tajai”, wajau.

⁹ Imattai Apajuí chichajak:

“¿Anú numi jakamtai kajeam dusha pegkejan aniajai tamek?” tau. Tusa tama Jonás ayaak:

“Ehe, wika pegkejan aniajai. ¡Senchi kajeakun jajai!” tiuwai.

¹⁰ Tusa tutai Tuke Pujuu chichajak:

“Aanka ame ajachbau, tuja nuigtush ame tsakapagchamu nigki kashi tsapai tsakaja, tikich kashia duwi jaka tsawaja nunú ame puyatjame.

¹¹ ¿Ame numikesh puyatjam nunash, wi ciento veinte milan nagkaesau aents Nínivenmaya aidau shiig dekachu asag uchijai betek yuja nuna, nuigtu kuashat kuntinchakam ayá nuna wait anenjashtag? Nuadui wika wait anentajai”, tiuwai Apajuí.

Miqueas

Apajuí yaakat Samaria pegkegchaujin diijus tsaiktin pachisa, Jerusalén pachisa, tikich yaakat Judá wegantunu aidaujai chicham umigkamu

(1—3)

Apajuí yaakat Samaria pegkegchaujin diijus tsaiktin pachisa etsegkamu

¹ Tuke Pujuu Samarian Jerusalégjai dita pegkegchaujin diijus tsaiktinjin pachis Miqueas Moréset nugkanmaya aajakua nuna ujakui. Nunak Judá wegantu aidau apuji aidau Jotam, Acaz, Ezequías aatus takasu aina nunú tsawantin ujaak aatus tiuwai:

² “¡Ashí aents aidautijum wi taja nunú antuktajum!
¡Juju nugkanmaya aidautijum shiig antukjum jukitajum!
Tuke Pujuk niina jee pegkegma nuwi pujusag,
atum suwimak jukitnun pachis etsegkattawai.

³ Tuke Pujuu niina pujusa inamtaijin pujau ukuak,
muja titijin taa nuwi wekagas tattawai.

⁴ Tuja nii taa mujan najataik,
muja aidauk wiya jinum sukuam yumimegama
numamtuk wajaktinai,
tuja muja najatamu paka aidauk
yumi senchi yutak nugkan yumpuwama imanik
yumpunag kanaktinai.

⁵ Duka Israel aents aidau intimtaijin,
tuja dita tudaujin nuniktinai.
Israel aents aidauk Samaria nugkanum pegkegchaun takamsau ainawai,
untsu Judá wegantu aidauk wainka apajuímtai dakumka najanamun
aidauun
Jerusalégnum jegamjujag nuna emematujaku ainawai.”

⁶ Nuadui Tuke Pujuu chichaak:
“Yaakat Samarianak tsaiktatjai,
dutika ai ayatak kaya tuwasua weaku,
jega atsau ayatak uva ajakmamain awajsattajai.
Tuja muja najatamu paka aina nuwishkam,
nunú kaya aidauun nagkimkattajai.
Dutikan yaakat najanku kaya aepkamunash ipaantujan pan awajsattajai.

⁷ Tuja dita apajuímtaiji dakumka najanamun
Samaria nugkanum ayá duka ashí tsainkattawai.
Tuja dita ememattai numi aina dushakam ashí apenkattawai.
Nunú dita apajuímtaiji aina duka
nuwa akika dutiktai aidauun kuichkiji juki
najanamu asagmatai, jinum jiya ukuijan ataktu
nuwa akika dutiktai aina nuna kuichkiji awajsattajai”,
tjutmayi Apajuí.

Miqueas buutbau

⁸ Nuna antukan shiig senchi wake besemag dekapeakun senchi buutjai,

nuniakun wisu sapatjinchau wekaesan,
bakantau shinau wajakun, lobo buutu wajajai.

⁹ Samarianmaya aents aidaun tudaujig tsagkugnamainchau,
Judá wegantu aidaun tudaujinash amaigkae,
imaniak mina aentsug aidaun Jerusalén batsata
imanuishkam jegae.

¹⁰ Tujash Gadnumia aents aidauk juju pachisjumek ujakaigpajum,
buuttakesh buuttigpajum,
ayatak wake besemag dekaeamunum
Bet-le-afránmaya nugka yukukuntua nuwi tadaejatajum.

¹¹ Bellavistanmaya aents aidautigminak achipajag jujamkiagtinaí,
dutihawawagmatai wainka inataijai betek,
wisu datsan shiyaktinaitjume.
Atum pujamun ijus tikich yaaktanun batsamin aidaun buutiagtinaí.
Tujash dutika jujabiagtaish, Zaanágnunia
aents aidaush atumnak ayamjutpakchagtinaí.

¹² Tuja yaakat Amargura batsamin aidauk
ayamjutpaktinme tusa dakamainak waitiagtinaí.

Tujash Tuke Pujuuk Jerusalén waitainum nagkamas suwimkanak susatnai.

¹³ Atum Laquishnumia aidautigmek,
caballo senchi tupikain
carro maanitainum jigkajum umintsatajum.

Siógnunia aents aidauk Laquishnum
pegkegchau takatnak unuimaju ainawai.

Tuja nuwi Israel aents aidaushkam
Apajuín intimjukiag pegkegchaun takasu ainawai.

¹⁴ Atumi nugkem Moréset-gat tutaya duka
tuke ukuakjum ukuktajum.

Tuja Israel aidaun apuji aidaunak
yaakat Aczibnumia yaigchagtinaitak
wi yaigtatjime tusag tsanujaje.

¹⁵ Tuke Pjuuu chichaak:

“Maresánmaya aents aidautigmin depetamak amupaktinme tusan
aents maanita yachan ataktu awetittajime.

Nunú minitaik Israel aents dekas wajuu aidaush,
nuna ishamak pisajag waa Adulam tutaya
nuwi akumjagtinaí.

¹⁶ Jerusalégnumia aidautigmek buuttajum,
nuniakjum susujum awagtajum,
buuttajum nuniakjum awamagjum,
chuagka buukejai betek pinui wajastajum.
Atumi uchijum aneetaijum aidaunak,
achijag tikich nugkanum yajuakagtinaí”, tawai.

2

Aents ujudauch aidaun waitkaidauk suwimkan jukiagtin

¹ Aents pegkegchau aina nunak wait anentuinajai,
wagki ditak depetmak batsatu asag, ememainak
wajina pegkegchaun takastag tuinawa nunak
kaja kajanmaske uminawai.
Nuadui nantaamuik nunak betek dutikainawai.

² Tuja nugkan wakegainakug

tikichi nugken atantuinawai,
tuja jega aidaun wakegainakushkam,
tikichdaun atainiag juwinawai.
Dutikainak jennunak niina nuwe, uchiji aidaujui
tsanujag jiiki ajapawag waitkainawai.

³ Nuadui Tuke Pujuu chichaak:

“Wishakam atum suwimak jukitnunak chichaman umikjai.
Suwimak katsunmainchaun amastatjime,
nuna uwemtumainuk makichkish atsuttawai.
Suwimak ishamain katsunmainchau asamtai,
emema yuja nunak nunikchagtatui.

⁴ Nunú tsawantin aents aidau dushiktamiagtinaí,

nuninák juna aatus kantamjutpainak:

‘¡Ashí depetkam wainak juwakaje!

¡Yaunchkek Apajuí aentsji ayanume,
tujash nunak ídaisaje!

¡lína suntaji aidau depetkagmatai,
dita nugke aidauk ii akandaija yajuakji!’ tiagtinaí.

⁵ ¡Israel aents aidautijum antuktajum!

Atumek mina aentsug ayugme,

tujash wika nugkanak ataktuk amaschagtatjai”, tujamui.

Profeta waita etsejin aidau

⁶⁻⁷ “¡Atum waita etsejin aidautigmek

Apajuí profetaji chicham pegkegchaun ujatikai!”

tusajum dakitagme.

Atumek utugchat ajutjamu dekakjumesh,

dekaskeapi tatsugme.

Nuadui profeta etsegbau antutak dakitagme.

Nuniakjum: “Apajuík jutijaig shiwagchauwai,

Apajuík jutiinak kajegtamkash idaitamtsuk atsane pujuttawai,

nuigtush Apajuík aajag dutikchauwai,

Apajuík ashí aents aidau pegkejan takaidaunak

shiig kuitamnai”, tajume.

⁸ Atumek mina aentsug aidaujui shiwagmaejume.

Tuja maaniamunum shiyaku aidau

uwemjajiapi tusag shiig aneas waketug minidaushkam,

jáanch akik aidaun yajuak minidau atanjume.

⁹ Dutikakjum dita jee aneetaiji aidaushkam

atum atankujum nuwa aidau jiiki ajapeagme.

Dita uchiji aidaun wi susauwaitag dushakam

tuke jujuki emegkatjume.

¹⁰ Nuadui atumek ¡juwi batsamtsuk, ¡jinja shiyaktajum!

Juwig dita wakegamun takainak batsamsatnume tichamui,

tuja atum pegkegchau awajsau asagmin,

juka ashí tsainkattawai.

¹¹ Makichik aents nigki nagkami waitjak:

“Vino senchi kajiau umamuk pegkejai,

tuja tikich uwaja nampetai aina dushakam pegkejai”,

tawa nunú atumek dekas profeta pegkejai tajume.

Apajuí niina aentsji aidaun uwemtikjatin

¹² Israel aents aidau ujumchik iwaku batsatunak yajuakan,

uwig makichik wenuknumak ijumaina numamtuk ijumjattajai.
Dutika ai shiig aneenak, kuashtachuitak,
kuashat pampaumaina imatiagtinaí.

¹³ Apajuí eemak jinta jintama wetinai,
nunitai dita pataekagtinaí,
yaakta waitijiya nuni jijnjagtinaí.
Nunikagmataí dita apuji Tuke Pujuu eemak wetinai.

3

Israel aents aidau apuji pegkegchau aidau chicham akuptukbau

¹ ¡Israel aents aidau apuji aidautijum
juju yamai antuktajum!

¿Atumchaukaitjum shiig takastinme tusa
etegkamu aidautijum?

² Tujash atumek pegkeja nunú kajejakjum,
pegkegchauwa nunú takagme.

Nuniaú asajum mina aentsug aina nuna neje
ichiaja yajutkajum ayatak ukunchik emajum ukuajume.

³ Tuja atumek mina aentsug aidauk iwakuk yuwagme,
dutikakjum duwape ichinjajum,
neje ollanum painkatasa akaaja ukunchi tsupigtayama imatikagme.

⁴ Makichik tsawantai Tuke Pujuu untsuktinaitjume,
tujash niig aigmakchagtinaí.

Atumek tikima pegkegchau ainajum duwi
Apajuí atumnak uumjutpakagtinaí.

Profeta waitan etsejin aidau

⁵ Mina aentsug aidauk profeta waita etsejin aidau
tsanumainak, utugchatak atsuttawai tuina
nuna antujuinak pegkegchaunum yujawai,
nunú profeta aidauk ya ditan yujumkan ajampeawa
nuna shiig anentuinak,
yujumkan ajampenatsu nunak kajejuinawai.

⁶ Nuadui wi wajina dutikatag taja nunak
ataktuk ditanak ujakchagtinaitjai.
Ajumaish ditanak makichkish dekamtikashtinaitjai,
nuadui ditak wajig nagkaemaktinaita
nunak makichkish etsekgashtin ainawai.

⁷ Nuadui nunú profeta aidauk,
anentaimas dekamín aidaujai shiig datsantan juwakagtinaí.
Wagki Apajuí jintinchamush wajinak etsekgatnume nuninak
wainak chichá yuja nunak itatjatnai.

⁸ Untsu minaig Tuke Pujuu Wakani pujau asa,
nunú minak senchimtjawai.
Nuadui wika Apajuik dekas
shiig betek imatikas takawai tajai.
Tuja nuigtushkam Israel aents aidauk
pegkegchau intimkiu ainawai tajai.

Jerusalén tsaikbau

⁹ Apajuí chichaak:
“Israel aents aidau apuji aidautijum antuktajum.

Atumek tsanumtsuk shiig takata duka dakitajume,
tuja chicham umiktina dushakam yapajajum takagme.

¹⁰ Jerusalégnmak,
tuja mina jegag pegkegma nuwishkam,
pegkegchau takat, tuja magkagtut aina duka
makichkish mijamtsuk tuke imani awai.

¹¹ Apu chichama epegkin aidauk ya kuichkin akikmawa nuna yainawai,
tuja sacerdote aidaushkam kuichkin akigkatnume tusa jintinkagtuinawai.
Profeta aidaushkam kuichik akiam chichaman etsejuinawai,
nuninak: ‘Tuke Pujuu jutijaig pujawai,
nuadui suwimkanak amaschattawai’, tuinawai.

¹² Atumi pegkegchaujin mina jegag pegkegma duka tsainkattawai,
tuja atumi pegkegchaujin Jerusaléggak tsaikam aents atsau bashiak
asattawai.

Tuja muja pegkejam Sióggak dupa ijiam asattawai”, tawai.

4

Tuke Pujuu ashí nugkanum inamjatin

¹ Tuke Pujuu jee pegkejam awa nunú mujak,
tikich muja aidaun nagkaesau dekas muja shiig múun atinai.
Nunú mujanum ashí aents tikich nugkanmaya aidau
shiig kuashat kauniagtinai.

² Kuashat aents nugka muunnumia aidau kaunainak:
“¡Minitajum muja Tuke Pujunua nuwi wakagmi,
nunika Jacopa Apajuíjiya nuna jeen jegawagmi,
awi Tuke Pujuu niina chichame umiktin agagbauwa nuna
jintinjamtai, iish nunú antuka umikagmi!” tiagtinai.

³ Tuke Pujuu aents nugka muunnumia aidaunak,
tuja atushtanmaya aidaunashkam suwimkan susattawai.
Tuja utugchat ataishkam nii epegkeatnai.
Nuadui dita aidauk puyagjinak
ajak ajakmaku takatain najankagtinai,
untsu nagki aidaunak trigo tsupifain najankagtinai.
Dutikawaju asag nugka muunnumiagkesh
tikichjai maaniauk makichkish atsutnai.
Tuja maaniatag tusa uminku
suntagmaebaushkam atsustinai.

⁴ Nuadui ashí aents aidauk ishamkagtutsuk
maki makichik dita uva ajakbaujin, higo ajakbaujin
nuna wakentin bikintunum shiig agkan
ayamainak batsamsatnai.

¡Nunak dekas Tuke Pujuu ashí senchigtina nunú aatus tawai!

⁵ Tuja tikich aents aidauk
dita apajuímtaiji aidaun umijuinawai;
dita núninakuish, iik Tuke Pujuu iina Apajuíjiya nunú
atakea duish tuke umigkatin ainaji.

⁶⁻⁷ Tuja junashkam Tuke Pujuu chichaak:

“Mina aentsug aidauk
wi suwimak susam waituidau asag,
uwigjai betek yawekag, shutusag wainak yujawai.
Tujash dukap atsuk ataktu yajuakan ijumjattajai.

Nunú tsawan jegamtai,
 ujumak iwaku batsatun yajuaka ijumjan,
 ataktu shiig kuashat senchigtin awajsatnaitjai.
 Dutikan wi dita apuji wajasan
 mina jegag pegkegma nuwi pujusan inamjatnaitjai.

⁸ Muja Siógkah, ame yaakat Jerusalén mina
 aneetaijua nunú ejakam kuitamin ayume,
 nuaduú ataktu yaunchuk aayum iman wajastatme.
 ¡Ame atatme mina aentsug aina nuna
 dekas yaaktaji shiig múun!”* tawai.

⁹⁻¹⁰ “¿Wagka tujash Jerusalégka amesh
 nuwa uchin najaimak buutama imanikmesh buutme?
 Amek waínkamek buutmaitsume,
 amina apugmik pujawai,
 tuja apu chichagkagtin aidaushkam batsatui.
 Dekas buuttag takumek, amina aentsjum aidau
 ukugmakiag ikam ajanum batsatun,
 babilonianmaya aidau achijag yajuakagtina nunú
 aentaímsam buutta.
 Dutikawagmataish, wi ditanak ayamjukan
 uwentikjan agkanmitkawagtínaitjai.

¹¹ “Kuashat aents nugka muunnumia aidau
 amina shiwagmatjamainau asag chichainak:
 ‘¡Utusag Jerusalégkan tsaikanum tusa wakegaji!’ tuinawai.

¹² Tujash nunú aents aidauk Apajuísh wajinak dutikatag tawa nunak shiig
 dekainatsui,

Apajuí ditanak trigo tsupija ijumja jigkatiamá
 numamtuk awajkatta nuna
 ditak dekainachu asa tuu yujawai.

¹³ ¡Pai Jerusalégkah!

¡Nantakta, nuníkam dekegka tsaikta!

Wagki Apajuí chichaak:

‘Wi aminak depetmakti tusan toro senchia iman,
 kachuji jiju hierro katsugma ibau,
 nuigtush nanchiki bronce katsugma iman awajsatagme.
 Dutika ai depetkam dita wajiji kasamka ijumtai aina nunú
 ashí yajutkam mina sujustinaitme,
 wagki ashí nugka duka midau ainawai’, tawai Apajuí”,
 tiuwai Miqueas.

5

David wegantunmaya apu wajas inamjatin

¹ Jerusalégnumia aidautigminak tentempawaje,
 atum ayamjumaktinjum umintsatajum.
 Apajuí atumi shiwaajum aina nuna ishituk,
 Israel aents aidau apujin senchi suwimkan susattawai.

² Untsu Belén Efrata tuuta awagmatia,
 nuwiya aidautigmek, tikich Judá wegantu aina nujai
 diismash ujumchik ainagme.

* **4:8** “Yaakat shiig múun” tawa nunak apach chichamnum “capital” tawa nunú taku taji.

Nuninuch ainayatkujum,
 eme anentsa chichagtai atinaitjume.
 Wagki atumi patayi aajakua nuwiya
 apu atin akiina Judá wegantunum inamjattawai.*

³ Tuja Tuke Pujuuk

nuwa uchin uchigmaktin ejapjuk puja
 nunú uchigmakmatai,
 niina aentsji aidaunak ataktu yaigtin asa,
 yamai nagkamas ima ditanak idaiwai.
 Nunú uchi akiinamtai, tikich Israel aents aidau
 shiwag amuam iwaku juwaku aidau
 dita patayi aidaujai ijunjagtinai.

⁴ Nunikagmatai aents uwija kuitamnujai betek
 nunú apu Apajuí senchijijai ditan kuitamkatnai.
 Tuja nunú apuk ashí nugka nagkatkamunmash inamjatnai.

⁵ Nuniak nii agkan pujutan amastinai.
 Tuja asirianmaya aidau iina nugken utsanawag
 juga múun aidaun atanjamjatag tuinakuig,
 siete apu aidau ocho suntaja apuji aidaujai
 ditan jétektinme tusa ishiaktatji.

⁶ Dutika depetka Asiria, Nimrotan nugkega nunú utsaantua ii jukitnaitji.

Shiwag aidau ijinatin

⁷⁻⁸ Tuja maaniamunum jinachaju aidauk
 tikich aents aidaujai apatka diismash,
 chijichi yumi ukatchamaitak,
 Tuke Pujuu yumi yutumtijamu yutak uchupjam
 pegkegchin iwagnama iman agtinai.

Tuja nuigtushkam león tagku wenuken waya,
 uwig aidaun ashí ijinama iman agtinai.

⁹ Tuke Pujuuwah, amek amina shiwaajum aidauk
 imatika jetekam ashí ijinatnaitme.

Ashí tsaikbau

¹⁰ Tuke Pujuu chichaak:

“Nunú tsawan jegatna duwi,
 amina caballojum maanitai aidaunak
 ashí ijituattagme,
 dutikakun carrojum aidaunashkam tsaigkattagme.

¹¹ Tuja yaaktajum aidaunashkam kumpin jiiqbau ayá nujai ashí tsaiktinait-
 jai.

¹² Tunchijum aidaunak,
 anentaimas dekamin aidaujai ashí ijituattagme.

¹³ Amina apajuímtaijum aidaunak,
 tuja dakumka kaya najanamua aina nujai ashí tsaiktatjai.
 Dutika ai ame najanamua emematu pujam duka
 ataktuk emematchatnaitme.

¹⁴ Yaaktajum aidaunak ashí tsaiktatjai,
 tuja amina apajuímtaijum Astarté,
 dakumka najanamua nunashkam,
 numi aidau emematam nujai tsaiktatjai.

* 5:2 Juju versículonum chichá duka Mt. 2.6numshakam augmatui.

15 Ashí aents tikich nugkanmaya aidau mina umigtutan dakitjau aina nunak mina umigtukchagbaunum iikmakun shiig senchi suwimkan susagtatjai”, tawai.

6

Apajuí Israel aents aidau kajegkamu

1-2 Israel aents aidauwah, shiig antuktajum. Tuke Pujuu atumin kajegtamak chichaak: “Mina aentsug aidauwah, atumi utugchatjumin dekaajuajime, nuniku asan, yamai ayamjumaktajum tajime. Atum ayamjumaku chichamun antukag, nunak dekas tawai tusa amina yaimpakagtina nunú, muja aidau, nain aidau untsuka ijumjam, atum antugtagmin chichamjumaktajai titajum.

3 “Tujash nunú ame eke chichaktin aminig wi tajame: ¿Wisha aminash itugkamjame? Atsa dutikachkunush ¿wajinma pegkegchaush awajkajame? Nunú tujutta.

4 Atumek Egipto nugkanum inaku waitkatai batsatutigmin wi jiijan agkanmitkauwaitjime; atumin yaimpakag jiiipagtinme tusan Moisésan, Aaróghan, Marian ishiakamiajai.

5 Mina aentsug aidauwah, Moab nugkan apuji Balac atumin pegkegchaunum yumigtamjatag tuyi, tujash Balaam mina daajui atumin pegkegnum yumigtamjabia nunú adeagtajum. Tuja nuigtushkam Sitim nugkanum juwaki, Guilgal shimamunmash waji utugchat igkugkabiugme nunú kajimattsuk aneaku atajum. Nuniakjum, dekas Tuke Pujuuwap yaimpakuita titajum”, tiuwai.

6 Tusa timatai dita chichainak: “Tuke Pujuuwah, amek múuntaitme. ¿Ame emematkuish, iish waji jukiya aminish tamainaitji? ¿Toro tsakat makichik mijanji ajamu maa nuna neje ashí apeakuika emematmainaitag? Tujash amek duka wakegatsme.

7 Dutikachkuish mil carnerok, atsa diez mil namak amaina ibau kuashtak aceite anentag amamainaitag. Tuja dushakam aminak shiig awajtamtsui; amek iina tudaujinig iina uchiji iwai aina nuna sujustinme tusamkesh tatsume”, tuidau.

8 Tuke Pjuuk atumnak tuwita pegkejash, tuja aminunash wajina wakegawa nunak yaunchuk upapakagmae. Duka utugchatchauwai shiig yupichuchi, tuja duka juju ainawai: Shiig takata nunú aneetajum, nuniakjum aents imanchauch aidauwait anenjatajum,

nuniakjum emematsuk ima minak emematjitajum
tusa Apajuik wakegawai.

7

Apajuik niina aentsji aidaunak wait anentug tsagkujawai

¹⁸ “Apajujuh, tikich Apajuí amejai betekak atsawai.
“Amek amina aentsjum ujumak iwaku batsata
nuna pegkegchauji tsagkujakum,
intimtaiji aidaush kajimatkim idaime.
Amek jutii aidaui anejatu asam,
kajekmesh tuke nunismekek pujatsme.

¹⁹ Nuadui wait aneasam ataktu wait anenkagtujam,
iina tudauji aidauk
dekas nayantsa kunajin ajugka ajapata.

²⁰ ¡Iina apachji Abraham, Jacob,
nuigtu tikich iina muunji aajaku aidau
anagkuawaitam duka,
dutiksamek wait aneasam amina anenkagmin
tuke kuitamkagtuktin ata!” tiajui.

Habacuc

Profeta Habacuc Tuke Pujuujai chichasbau

¹ Profeta Habacuc aajakua nuna Apajuí nii aentsji aidaun chichama ujakti tusa iwaintukui.

² “Tuke Pujuuwah, yainkata tusan senchi untsuagme, tujash amek minak antugtatsme.

¿Wajutiya minash antugtuktatme?

Pempeentuniki waitkaniamu ayá nunú suwimak susam emegkagta tusan segamjame, tujash amek makichkish duka dutikatsme.

³ ¿Wagka minash ibau pegkegchau aidau iwaintugkumesh waitkajame?

Pegkegchau takat aidau, utugchat aidau, yaakat tsayamu, jiyaniamu, maaniamu aina duka makichkish agkaatsui, ashí yantamnum ayawai.

⁴ Amina chichamem umiktin agagbaunak makichkish uminatsui, ajantunisag shiig aneas betek yainidauk makichkish atsawai.

Aents pegkegchau aidau aents pegkeg aidaun waitkainawai. Tsanumat, kasamat aina duka ashí yantamnum ayawai”, tiuwai Habacuc.

Apajuí suwimak sukagtustin etsegkamu

⁵ Tusa timatai Apajuí ayaak:

“Tikich aents aidau batsata nuwish wajukeya nunú shiig diistajum.

Aunak dukap tsawan atsuk wi dutikattag nunú wainkajum anentai jegashtatjume.

Juna tikich ujpainakuig, atumek dekaskeapi tumaitsugme.

⁶ Caldeo aents pegkegchau magkagtin aidau ashí nugkanum yujasag,

tikichi nugken atankiagtatus wakeyin aina nuna inajagtatjai jetepaktinme tusan.

⁷ Dita pegkegchau takatnum eemkau ainawai, nunin asag, dita wakegamun takau ainawai, nuadui makichkish tumainchau ainawai.

⁸ Aents caballonum maanin aidauk shiig kuashat caballonum entsatkau atushat minisag tutugtuinawai.

Nunú caballo aidauk ikamyawan nagkaesau senchi tupikainawai, tuja nuigtush uwegshunmaya lobo kajejan ajankachua nuna nagkaesau ainawai.

Iman asag atushat minisag dita shiwaajinak águila yutaijin wainak, nanaak akaetuki achiyama iman ainawai.

⁹ Dita shimuinakug ashí ijina shimawai,

imaaninak senchi uwakmakag shimawai,
tuja aentsun achijag yajumaina duka,
nayantsanum kayam dekapamainchauwa iman weakui.

¹⁰ Iman asag apu aidaunak, tuja tikich aents
eme anentsa diitai aina nunashkam dushikinawai.

Yaakat peejamu aina nunak
wainkauch diinak dushikinawai,
nuninak kamatkanum batsamas yaaktanak utuinawai.

¹¹ Dase senchi dasentak kedegtuk nagkaemama iman ainawai.
Iman ainakush dita senchijiya nuna
apajuimaidau asag tunamainawai”, tiuwai.

Profeta kajeka ataktu chichakbau

¹² “Israel aents aidaun Apajujiyah,
amek pegkejam tuke pujuuwaitme;
jinatnume tusamek idaikagtusaipa.
Amek amina aentsjum aidau suwimak susam jintintuatag
tusam, caldeo aents aidau ishitkaume.

¹³ Amek pegkegmaitam iman asam,
pegkegchauwa duka atsane pujuchuitme,
tuja tudaushkam dakitnaitme.
Nuadui ayatkek dii pujuipa, tuja aents pegkegchau aidau
aents pegkeg aidaun maatnume tusamek
agkan idaisaipa.

¹⁴ ¿Wagka aents aidaush
nayantsanmaya namak aidaujai betekash,
tuja kuntin apugtuchu aina nujai betekash awajsaume?

¹⁵ Nuadui caldeo aents aidau,
aents namaka main agsean ajuntuk,
tuja retan nená yupichuch
kuashat namakan achiyama numamtuk
aents aidaun achija ijumainawai,
dutikawag nuna diisag shiig aneenawai.

¹⁶ Nuadui nunú aents namaka main aina duka
niina redjin, agseajijai emematuinak
kuntinun maa apenak,
kugkuin incienonashkam apenawai,
wagki ditak duwi maawag
dita yuwatnujinak shiig kuashat ijumag batsatu asag,
shiig aneas batsatui.

¹⁷ Caldeo aents aidau wainak mau batsamtitnume
tusamek idaikagtusaipa”, tiabijai.

2

Apajuí inagnak Habacukan aikbau

¹ Nuna pachisan Apajuín segau asan,
suntag jinta niimin ekemas niimak ekemama numamtuk
Tuke Pujuush wajinjuttig tusan dakakun pujubijai.

² Nunikan pujai Tuke Pujuu mina aijak:
“Wi amina iwaintuktatjam nunú
tablanum paan shiig wainmain agagta,
dutikamu asamtai, tikich aidaush yupichuch ausatnume.

3 Nunú ame wainkattam duka
juu tamawaikik nagkaemakchattawai,
tujash amek waugtutsuk dakasta,
nunú nagkaemaktinuk eke tsawan jegatsui.
Tujash duka makichkish megkaetsuk
tuké uminkattawai”, tujutmayi.

Aents pegkegchau aidaush wajukatnuk ainawa

4 “Tuja wi agagta tajam nunak juna tajai:
‘Aents pegkegchau emebau aidauk jinawagtinai,
untsu aents pegkeg ima Apajuínak umijuidauk jinachagtinai.’

5 Aents emebau aidauk apu atag tusag wakegainawai,
vino pegkejaitak enamkagtuwama nujai betek ainawai.

Tikich aidau nagkaesau amí tuidau asag,
makichkish ayámjutsuk yujajus
aents tikich nugkanmaya aidaun amuinawai.
Dita aidauk jaka megkaetaijai betek,
tuja ukumatai aents jakaun dakitmaitsu nujai betek ainawai.
Nunin asag ayatak wenawai.

6 Tujash ditak yana waitkainawa nunú pempeentuki dushikiam agtinai.
Dutika dushikinak:

‘¡Ame tikich aents aidaun wajiji yajutkam
wiakuch wajasum nunak wait anentagme!
¿Amesh wajutiya kasamtash idaisattame?’

7 “Ame waitkam nunú pachiachbaunum
pempeentugmakiag waitkagmasagtinai,
imatijamainakui sapijai kujaitnaitme,
tuja amina wajijum aidaunak ashí atanjamjagtinai.

8 Tikich nugkanmaya aidau ijunag chichama umikag,
ame dita kasajauwaitam dutiksag ditashkam
ashí kasagtamjagtinai.

Dutik akikmaktatme ame juju nugka juwiya
aents ijinkum yaakat aidau tsaukitam nuadui.

9 ¡Kasamkamu aidau,
tikich tsanuja yajutkamu aidaujai
amina aentsjum aina nunú wiakuch awajsaum,
nuadui aminak wait anentagme!
Ame anentaimsamek,
jutikanus shiig batsasainja tamestai.

10 Tujash ayatak datsanmain iwaintukume.
Kuashat aents tikich nugkanmaya aidau ijinatjai
tukamam, amek pempeentumakim amumakume.

11 Yaakat peejamu aidau, jega ayanke aidaujai
ame pegkegchau takamsamua nuna pachisag
aentsjai betek senchi untsumiagtinai.

12 “¡Amek aents aidau ijinkum,
dita nugke atanjam nuwi yaakat najankaume,
nuadui aminak wait anentagme!

13 Tujash ame waittsa umikum duka wainka imatikaume,
aunak Tuke Pujuu ashí senchigtina nunú ashí apea tsauka ajapattawai.

14 Tuja Tuke Pujun imanjiya duka,
yumi nayantsan ipiamna numamtuk,
ashí nugkanum piyaktatui.

Nunikmatai ashí nuna dekawagtinai.

15 ¡Aents amejai tikiju batsatu

vino drogajai pachimja ama amakuam enamkam wisu weakui,
nunú diisam dushiki pujam nunak wait anentagme!

16 Tuke Pujuu aminak inastamjattawai,
amek makichkish emematam amaitsume.

Atum tikich aidau datsan dushikiajum dutiksag,
atumnashkam Apajuí datsanmainun iwaintamkagtatui.
Dutijamawagmatai emebau ainajum duka
ememachu wajastatjume.

17 Muja Líbanonmaya kuntin aidau
ijinauwaitam nunú aminak bakugmattawai.

Áme aents aidau ijinamunum,
tuja yaakat aidau tsaikbaunum, suwimak juki waitiakum
amina pegkegchaujum akikmaktatme.

18-19 ¡Babilonianmaya aidaunak wait anentuinajai!

¿Wagka atumesh wainka apajuímtai aidaunmash
kajintsagmesh anentaimjume?

¿Wagka atumesh aannush yainkata tusagmesh
segash yujagme?

Auk numi, kaya, atum najanamu ainawai,
tujash duka wainak ainawai.

Auk jiju najana orojai, platayai ukatkamu iwakuchu asa
nigki wajamainchau, tuja chichamainchau ainawai.

20 Tujash Tuke Pujuk niina jee pegkegma nuwi pujawai.

¡Niina emtinig ashí nugkanmaya aents aidauk
takamtak pujustinme!” tajai.

3

Habacuc Apajuí segamu

1 Profeta Habacuc Apajuín juna aatus segauwai:

2 Tuke Pujuwah,

ame ashí dutikaum nunak shiig dekajai,
nuadui amina ishamakun kujajai.

Wait aneam iina apachji aidau yaigkuitam
dutiksamek yaijatkata,

kajegkagtukam idaikagtusu akumesh, wait anenkagtugta.

3 Apajuík Temán nugkanmaya minawai,

Apajuí pegkegma nunú muja Parágnomia jiinki minawai,
Apajuín imanjiya duka ashí nayaimpin jajutua awai,

tuja ashí nugkanum Apajuí emematku kantamtain kantamainawai.

4 Winchamtinnum egkemak minawai,

niina uwejenia chaajip keeka jinui,
nuniak niina senchiji uumak aunash iwainawai.

5 Nii minitaik kuashat aents aidau

jata ishamainun achiimakag jinuinawai.

Tuja niina ukuujin tsuwemu ishamain minawai.

6 Apajuí minau jasa wajataik, nugka uujui,
tuja ashí aents aidaun diitaik,
aents aidauk ishamainak kujainawai,
muja aidauk tsainak megkagainawai,
muja yaunchuk nagkamas aajaku aidaush yumpunainawai.
Tujash Apajuín jintiya duka yumpunagkesh megkaekashtin tuke atinai.

7 Nuigtushkam Cusagnumia aents aidau
initak makichkish jijnmainchaunum egkema
waitmaina imanik senchi waituidaun wainkabiajai.

Tuja Madián nugkanmaya aidaushkam
senchi ishamainak jiintsuk ayatak kaemag
aakchinmag batsatun wainkabiajai.

8 Tuke Pujuwah, aents caballonum entsatkau
minimaina imanika minakum,
aents maaniamunum depetmak carro maanitainum egkemag wegama
numamtuk wajam dusha ¿wagka imanikmesh umintsauame?
¿Namak aidau, nayants aidau, wainka apajuímtai aina nunú kajegkamek
imanikmesh umintsauam?

9 Akentaiyai aketka iju ichimaina imatikabiume nugkak,
amina senchigmin imatikamua nunú
namak najaneakmayi.

10 Muja aidauk amina waipainak, ishamjamak sunatuinawai.
Tuja nayaimpinmaya yumi senchi yutawai,
imanitai nayants kuna senchi tsukatu asa
kedegtak ishamain wajawai.

11 Ame chaajip ishamain winchamtin nagkijai betek
ekemaka akupkaamin,
etsak nantujai uumak megkaekaje.

12 Ame kajekam nugka tenteame,
dutikakum ame kajekbaugmin
aents nugka muunnumia aidauk dajaja tsaika
ajapmaina imatikame.

13 Amina aentsjum aina duka ame apu etegkauwaitam nujai yayaakum
miname.

Untsu aents pegkegchau aina nuna apujig mantuam,
inabaujiya duka ashí tsaigkam emegkatkaume.
Dutikamu asa ditak shiig wainak juwakaje.

14 Caballonum maanitan yacha aidau ememasag
dase senchi dasentujai betek jetepaidau asag,
amupaktag tiagmayi.
Imatijamainakui ayamjumamainchau dekapmajji,
tujash ame dita apujig niina flechajinig depetkabiume.

15 Amek amina caballogmin entsamkam
nayants ishamain wajamunum wekaeme.

16 Nuna antakun senchi ishamkabiajai.
Nuniai mina wenujuk sunatmayi,
imaniakun wajaschamin, ashí mina iyashjuig
kakaumainchau dekapmajjai,
nuniakun anentaijui tetegtímajjai.
Tujash wika imaniaknush,

waugtutsuk iina waitkagbau aina nuna Apajuí waitkastin tsawan jegatna
nuna dakastatjai.

¹⁷⁻¹⁸ Tuja higuera ajakbau nejeachkuish,
uva nejeachkuish, olivo aceitunan nejeachkuish,
ajanmaya aidaush, ikamia aidaukesh nejenachkuish,
tuja baka aidaush, uwig aidaush ashí jinutjamamtaish,
minak Tuke Pujuu uwentijuju asamtai,
wika shiig aneasan niina ememattatjai.

¹⁹ Wagki Tuke Pujuu minak senchimitjawai,
dutijak japa senchi tupikaina iman awajtus
muja aidaunum iwajuk tikichish maumainchau kuitamjawai.

Zacarias

9

Israel aents aidaun apuji atin pachisa etsegkamu

⁹ ¡Yaakat Jerusalégnunia aidautigmek shiig aneastajum!
 ¡Shiig aneakjum kantamatajum!
 ¡Amina apujum burro tsakatnum entsatkau minitjamui!
 Imanchauch wajakin, pegkejam, pegkegchaun takachu,
 amina yaimpak depetmitkagmaktatus minawai.
¹⁰ Efraín wegantu aidaun carroji aidaunak,
 flecha akenka nagkimtai aidaujui ashí tsaiktatui,
 dutikak Jerusalégnunia caballo aidaunashkam ijinattawai.
 Israel nugkanmak ashí depetmaktatui,
 nunik ashí tikich aents aidaush agkan batsamsatnume titatui.
 Tuja niig nayants jinagbau aina imanui nagkamas,
 namak Eufratesa aatus ashí nugkanum inamjatnai,
 nii inabaujig nagkatkauk achatnai.

Apajuí niina aentsji aidaun yainka ataktu inantaitin

¹¹ Tuke Pujuu chichaak:
 “Jerusaléggkah, wi amejai numpai chichaman
 umikuitag nuna betek umiakun,
 yumigmat taimu yumi atsaig ashí
 jinaajum chimpigjum nunak jiijan uwemtijattajime.
¹² Achija yajuakam tikich nugkanum batsatutigmek
 yaakat shiig peeja umikbauwa nuwi waketjattagme.
 Yamaik atum waitiajum nuna nagkaesau,
 pegkegnum yumigsattajime,
 nuadui shiig aneasjum batsamsattajume.
¹³ Judá wegantu aidauk arcojai betek,
 tuja Israel wegantu aidauk flechajai betek,
 tuja Jerusalégnak puyagjai betek awajsattajai,
 dutikan ditajai griego aents aidaunak ijinattajai”, tawai.
¹⁴ Tuke Pujuu ditan jetektajum tusa titata nunak,
 dita nagki akenbaujig peemjai betek agtinai,
 Apajuí kachun umpuag tsumujinia dasenum pachitkau wetinai.
¹⁵ Tuke Pujuu ashí senchigtina nunú
 niina aentsji aidaunak kuitamkatnai,
 dutikamu asag dita shiwaaji aidaunak depetuk
 najakag ashí amukagtinai.
 Aatus depetmakaju asag, shiig aneenak
 altar ukatkatasa numpa tsapanum aimka jutaya
 imatika aimak vinon umuinak nampejag shiig aneenak pampainiagtinai.
¹⁶ Nunú tsawan jegakuig, mina aentsug aidaunak,
 uwija kuitamin uwigjin ayamjina numamtuk
 wi ayamjukan uwemtikjattajai,
 dutika ai dita nugken waketug batsamsag
 kaya pegkeg winchamtin juki atsejutai najanamu winchantuwama iman
 agtinai.

¹⁷ | Yajauwajah, nuwauch aidau,
uchi datsauch aidau shiig yuwawag senchigtin
shiig aneas dakunkut juju nugkanum batsatbau!

10

Text to get InDesign to put correct chapter number.

Malaquías

Yama nagkamchaku agagbau

1 Israel aents aidaun ujakti tusa Tuke Pujuu profeta Malaquíasan akatjauwa duka jujuwai:

2 Tuke Pujuu chichaak: “Wika atumnak aneajime”, tujamui. Tusa tujamaig atum chichaakjum: “¿Amesh jutiish wajuk anejatme?” tajume. Tusa tajumin Tuke Pujuu chichaak: “Wika atumnak Esaú Jacobjai jimagmamau aig, Jacopan anejakuitag dutiksanuk atumnashkam aneajime.

3 “Tuja Esaúnak dakitjauwaitjai. Dutikau asan, niina nugke muja pegkeg ikam tepau aajakua nunak emestujan pegkegchau, uwejush ayatak kuntinun batsantai awajtusuitjai”, tawai Apajuí.

4 Tuja Esaú wegantu Edom aents aidaun chichainak: “Ina yaaktaji aidaunak tsaigtamkau ainawai, dutikau ainakuish ataktu yaaktamkagmi”, tumain ainawai. Tusa tiagtai Tuke Pujuu ashí senchigtina nunú chichaak: “Yaaktamkatnume, dutikawagmataish wi nunak ataktu tsaigkagatjai. Dita nugke: ‘Aents pegkegchau aidaun batsantai’ tutai atinai. Tuja ‘nuwiya aents aidaun Apajuí tuke kajegtai agtin’ tutai atinai.”

5 Nunú wainkajum chichaakjum: “¿Apajuín senchijiya nunak Israel aents aidaun nugkega nuna nagkaiki aents batsamin aidaush ememat-tinme!” titinaitjume.

Sacerdote aidaun Apajuín shiig takagsachagbau

6 Tuke Pujuu ashí senchigtina nunú sacerdote aidaun chichajak: “Uchi aidaun dita apajinak umiujinawai, tuja inak aidaushkam dita parjugjin umiujinawai. Tuja wi atumin Apajuíiyaitag nuniaish ¿wagka minash eme anenjusunmesh diigtsugme? Tuja wi atumin apugmitag nuniaish ¿wagka ajaantugsagmesh diigtsugme? Atumek minak dakitjagme, nuniakjum: ¿Ilish amina daagmesh wajutiya dakitjaish idaisabijai? tajume.

7 “Atumek pag pegkegchau aidaun jukijum mina altarjui itagme. Nuniy- atkujum: ¿Ilish waji pegkegchauwa dutikaji? tajume. Atum aidautigum mina altarjua nunú ajaantusa diitsuk wainkaya nunin diyajum nunú minak kajetan sujawai. 8 Kuntin wainmachu aidaun, shutuu aidaun, jau aidaun mina sujakjum, pegkeg takaji tajume. Diik nunú yajuakjum atumi apujum aidaun susakjua ditash shiig aneasampash jukijajat.

9 “¿Apajuí anentag suwaji tusajum aanin pegkegchau aidaun ikaun- mayatkugmek, Apajuí ii segamun antugtamak wait anenjamjati tusajum dakagjum? Witjai Tuke Pujuu ashí senchigtinnuk. Tuja juna shiig dekatnume tusan wakegajai: 10 ¿Wika mina jegajun waitiji aina duka epennati tusan wakegajai! Ataktu awagkijum anentag susami tusajum, aanin pegkegchau aidaun ikaunmajum mina altarjui wainka apeawajum tusan dakitjai, wagki wika atumnak kajekajime, nuadui makichkish jujukhattajime.

11 “Ashí nugkanum mina eme anenjusun diijuina duka, mina emematjuinak kugkuin incienson apeenak, dekas anentag pegkeg wisha wakemain aidaun itagtuinawai. 12 Tujash atum sacerdote aidautigmek minak ajaantugsagmek diigtsugme. Nuadui midau altar, mina mesajua nunú pegkegchau diyakjum, nuwi anentag mina sujusbau yutai aina dushakam tsumain diyagme.

13 “Tuja atum chichaakjum: ‘¡Jutiká pujutak iik yawetjaji!’ tajume. Tau asajum, kuntin kasamkamu, baka shutuu, nuniachkush jamamtin jukijum, juju maa apeaku Apajui shiig anemtiksamí tajume. Duka minak makichkish shiijak awajatsui, atumek duka mina dushiktakjum aikagme. 14 ¡Kuntin shiig pegkeg, mina anagtuamun yapajia ukuak, tikich kuntin pegkegchaun juki mina anentag itagta duka aentsuk tikima shiig pegkegchau atinai! Witjai dekas apunuk, wika aents aidaun ishamtayaitjai”, tusa Tuke Pujuu ashí senchigtina nunú tawai.

2

1 “Juna yamai wi Tuke Pujuu ashí senchigtinun taja nunak sacerdote aidaun tajai:

2-3 “Atumek ima minak umigtumain ainagme, nuniakjum ajaantugsajum diigmáin ainagme. Nuniachkuminig pegkegchaunum yumigjattajime. Tuja dekasenum takagtachkugminig, wi atumin pegkegnum yumigkijim nuna yapajian, pegkegchaunum yumigjattajime. Tuja nuigtushkam atum sacerdote asajum, eme anentaku kuitamam ajum duka jiiiki ajapam wainka juwaktatjume. ¡Nunikagmin atum kuntin mina sujajum nuna ijinig yapimin nijaktatjime, dutika ai ijan japimak ajapenak atumjai ljumjamag ajapjamawagtatui!

4-5 “Juna tajim nunak atumi apachjum Leví wegantu aajaku aina nujai chichaman umikuitag nuna, betek umiktag taja nuna dekatnume tusan emtikan ujajime. Levíjai chichaman umiakun:

“‘Shiig agken pujustajum tusan yaigtinaitjime’, tusa tai, nii chichagtak: “‘Wishakam aminak ajaantusan eme anentsan ememattinaitjime’, tujutiwa nunak niig betek umikui”, tusa Tuke Pujuu ashí senchigtina nunú tawai.

6 “Levík aentsnak makichkish tsanugchauwai, ayatak dekaskea nuna jintiauwai, nigka minai sumitkau aajakuí, kuashat aents pegkegchau takaidaunash idaimitkasui. 7 Sacerdote aidauwah, atumek mina chichameg etsejin ainagme. Nuadui atumi takatjiya duka, mina chichamjun aents aidaun ujakinme, dutikawajam ditash pujutjin iwajag mina nemagtukinme tibau ainagme.

8 “Tujash atumek pegkeg takatak idaisaugme, nuniakjum pegkegchau takat tikich aents aidaush jintinjume. Wi Levíjai chichaman umikuitag dushakam umiatsjume. 9 Nuadui atumnak aents aidauk ajantugmas diigmaschatnume, tuja antugtanash antugkashtinme tijai, wagki atum mina umigtachu asagmin. Atumek aents jintinkugmesh ashí betek wait anentsuk tikich ima wait anentagme”, tusa Tuke Pujuu ashí senchigtina nunú tawai.

Aents nuwejai idainayas ataktu nuwenaidau pachisa agagbau

10 ¿Ashí aents aidautin najapauwa dukechukai iina Apajuíji? ¿Tujash nunin aish, wagka iik pempeentunikish tsanuniai? ¿Wagka iina apachji aajaku aina nujai Apajui chichaman umikua dusha umiatsji?

11 Judá wegantu aidauk Apajuínak antugchau ainawai, nunin asag pegkegchau datsanmain aina nuna Jerusalégnum, tuja Israel nugkan-mashkam takamsajui.

Judá wegantu aidauk Tuke Pujuu niina jeen dekas senchi anea nunash ajaantus diischaje. Nuninak aishmag aidauk nuwa wainka apajuímtai aidaun emematin aina nuna nuwatjaje. 12 Utusag aents nunin aina nunak Tuke Pujuu ashí senchigtina nunú ijinawa, dutikak, Tuke Pujun anentag

suwajai tusa altarnum jeganta pujus buut pujaunashkam puyatjutsuk ashí ijinawa tajai.

¹³ Tujash atumek Apajuí anentag suwajum nuna nii shiig aneas jujutjam-chakui, altarnum jeganta pujusjum nuni senchi buutjume. ¹⁴ Nuniakjum ¿wagkag Apajuísh aigmatsua? tajume. Tuke Pujuu atumin aigmatsu nunak, atum datsa asajum yama nagkamchaku nuwenkujum, amejaig jakatnaitjai tiuwaitam nunú umikchaum duwi aikagmawai. ¹⁵⁻¹⁶ Apajuí iinak makichik iyashik, makichik wakanik atinme tusa najapauwai. Nunak dutijamauwai, wagki niina aentsji atinme tujamu asa. Aents nuwen ajapin aina nunashkam Apajuík kajejawai. Nuadui atumek kuitamankatajum, nuniakjum ima atumi nuwemjaig pujustajum, tusa Tuke Pujuu Israel aents aidaun Apajuíji ashí senchigtina nunú tawai.

Apajuí Israel aents aidaun pujutjin iwagtugin

¹⁷ Tuke Pujuu atum sumamun antu antugtama yawetjamjae. Nuniku aig atum iniakjum: “¿Iish yawetjamjati tusaish, waji ima segaji?” tajume. Tau asajum: “Tuke Pujuu pegkegchau asa, aents pegkegchau aidaun shiig kuitamui”, tajume. Atumek makichkish: Apajuík dekas pegkejapi, tatsugme.

3

¹ Tuja Tuke Pujuu ashí senchigtina nunú chichaak: “Wi taatnun jintan umigtukti tusan mina chichamjun etsegnun awemattajai. Atum Tuke Pujuu dakajum duka pachiachbaunum wamak niina jee pegkegma nuwi wayattawai.

“¿Chicham umikbaun jintinjamatna duka minawai!” tawai.

² Tujash nii juwi tatai, ishamsuk shiig aneas wajamainuk atsawai, ayatak tikichmajag pujusagtinaí. Niig jii kegaujai betek taattawai iina pujutjin iwajatatus. Jabón jáanch bika wajasun esakag iwajama numamtuk iina tudaujin esakagtinaí. ³ Tuke Pujuu Leví wegantu sacerdoté aidaunak, oro, plata jinum jiyam pegkegchauji esaka ajapnak dekas pegkeg juwauwa numamtuk awagmaktatui. Dutika pujutji iwagtujam Apajuínak anentag sumain ainawai. Tujash nunak dita wakegamun takatsuk, Apajuín shiig awagma nuna imatiksag dutikmain ainawai. ⁴ Aatus shiig takagtaik, yaunchuk Judá wegantu aidaun Jerusalégnunia aidaujui Tuke Pujuu anentag suwam, shiig aneas jujakua imatiksag shiig aneas jukittawai.

⁵ Tuke Pujuu ashí senchigtina nunú chichaak: “Wika atumin suwimka amastasan taatnaitjai. Tuja nuigtushkam tunchi aidaun, nuwentin, aishintin tsanijima yujaw aidaun, tuja wainak tsanumak Apajuín anagbau aidaun, aentsun akikchatnaitak takamtikak, waje aidaunash, bitaik aidaunash waitkau aidaun, tuja aents tikich nugkanmaya aidaunash shiig kuitamchau aidaun, nuigtu mina eme anenjuchu aidaunashkam ashí suwimkan susattajai”, tawai.

Israel aents aidaun dita diezmojin

Apajuín sutsuk idaisagbau

⁶ “Witjai Tuke Pujuu. Wika yapajintsujai. Nuadui Israel aents aidautigminak ashí ijinachuitjime. ⁷ Atumi apachjum chicham umiktinun wi susauwaitag nuna tupanugtum umikchaju aina nunijsumek, atumshakam tupanajum umitsuk idaisaugme. Wi Tuke Pujuu ashí senchigtinun atumin chichagkun: “¿Ataktu mina umigtuktajum, nuniakjumin wishakam ataktu

yaigtatjime!’ timaijime. Tujash atum chichaakjum: ‘¿Wagkaik amesh ataktush umigkatji?’ timaijume. ⁸ Tusa takugmin wi ayaakun: ‘Minak makichik aentskesh kasagtumaitsui. Tujash atum minak kasagtagme.’ Nuniayaitkujum: ‘¿lish waji aminush kasamkaji?’ tusajum ininjume. ¡Atumek minak atum takasa jukimunmaya diezmo, nuigtu anentag sujusta tibau aina nunú kasagtagme! ⁹ Nunak dekas ashí aents aidau kasagtuinawai, tuja atumshakam minak kasagtagme, nuadui pegkegchaunum yumigjattajime. Nunak wi Tuke Pujuu ashí senchigtinun tajai.

¹⁰ “Atumi diezmojum aidau mina jegajui itaatajum, dutikawagmin yutai aidau kuashat atatu. ¡Dutikajum dekapjustajum! Nunú dutikakjumini, atum jukitnun nayaimpinmayan shiig kuashat ukatuattajime. ¹¹ Tuja atumi ajakjum aidaunak uva ajakbau aidaujai jata iyantug ijinawai tusanchakam kuitamjuktatjime. ¹² Nuadui ashí aents aidauk atumnak, ‘Apajui pegkegnum yumigsamu aidau’ tujamiagtinaí, wagki atumi nugkem shiig pegkeg asamtai. Witjai Tuke Pujuu ashí senchigtinnuk, nunak dekas wi tajai”, tiuwai Apajui.

Apajui Israel aents aidau shiig kuitamkatnaitjime tusa anagkuamu

¹³ Tuke Pujuu chichaak: “Atumek minak pegkegchau chichagtagme. Tujutiatkujum chichaakjum: ‘¿lish waji pegkegchauwa amesh chichagji?’ tajume. ¹⁴ Atum chichaakjum: ‘Apajui ashí senchigtina duka wainkaik umiju pujumaitsui, tuja nii pegkegchau takamjusaish wake besemag dekapeakuik, jáanch aents jakamtai wake besemag pujaku nugkutaig nugkumaitsui, tuja niina chichame umiktin agagbauwa dushakam umijuk pujumaitsui. ¹⁵ Auk aents emebau aidau ima shiig batsatui, tuja aents pegkegchau aidau dita takatjinash ima shiig eemtikainawai. Tuja Apajuijai shiwagmagainakush, Apajuín dekapenakush suwimkan juinatsu jama’, tajume”, tiuwai Apajui.

¹⁶ Tusa timatai Apajuín emematin aidau dita ditak pempeentunikiag chichaidau. Tusa chichaidau Apajui antujuk, dita daaji aidauk aents Tuke Pujun eme anentus emijin aidau daaji agatkamua nuwi agatkamu ati, tawai Tuke Pujuu.

¹⁷ Tuja nuigtushkam Tuke Pujuu ashí senchigtina nunú ditan pachis chichaak: “Dita aidau ataktu mina aentsug wajasagtina nunú tsawan jegattawai. Makichik múun niina uchiji umigbau asa, wait anentus kuitamna numamtuk wishakam ditanak wait anenjagtatjai. ¹⁸ Nuadui, wuwapi pegkejak, tuja juka pegkegchauwapi tusag ataktu shiig dekawagtinaí. Nuninak Apajuín emematuidaush wajukuk ainawa, tuja Apajuín emematchau aidau shiig dekawagtinaí”, tawai.

4

Tuke Pujuu niina aentsji aidau suwimak suwamu

¹ Tuke Pujuu ashí senchigtina nunú chichaak: “Trigo dukee tsupigbau jinum chimpian keeka ashí esak megkagama numamtuk, aents pegkegchau aidau, emebau aidau ashí esakag megkaejatna nunú tsawan uminuí. ² Untsu atum mina eme anenjautigminak shiig kuitamkattajime. Duka makichiksh uukchamu paan etsa etsantujai betek atinaí. Tuja pegkegchau awajtamkatag tuínakuish wi kuitamkatnaitjime. Dutikamu asajum, toro tsakatuch aidau wenuken batsatu jijnainak, shiig aneas tsekgama imanitnaitjime. ³ Nunú tsawan jegamtaig aents pegkegchau

aidauk, atum depetkajum nugka yukukuntu najatiama numamtuk awajkatnaitjume”, tawai.

Inagnaku chichagkagtukbauwa nunú, Elías wakitki taatnujai pachisa etsegkamu

⁴ “Wi mina inakeg Moisésan chicham umiktin agagbaun, Israel aents aidau umikagtinun, muja Horebnum susauwaitag nunú adeagtajum.”

⁵ “Juju antuktajum, wi atumin suwimkan amastasan wakitkin minitakun, emtikan profeta Elíasan awetittajime. ⁶ Dutika ai múun aidau uchiji aidaujai tsagkugnayag, shiig agkan pujustinme tusa nii yaigtatui. Untsu nuna umiinachkuig wi tajuan suwimka suwakun, dita nugke aidaunak emestujan pegkegchau awajtusagtatjai”, tawai Apajuí, tiuwai Malaquías.

Yamajam chicham Mateo agagbau

Jesucristo muunji aajakú aidau

(Lc. 3.23-38)

¹ Ju ainawai Jesucristo muunji aajakajua nuna daaji agatkamua duka. Nigka David, Abraham aina nu weantu aajakui.

² Abraham akiauwai Isaacan,
Isaac akiauwai Jacopan,
Jacob akiauwai Judan nuigtú yachi aidaunashkam.

³ Judá akiauwai Tamarai Faresan nuigtú Zarajai.
Fares akiauwai Esroman,
tuja Esrom akiauwai Araman.

⁴ Aram akiauwai Aminadapan.
Aminadab akiauwai Naasogkan,
tuja Naasón akiauwai Salmogkan.

⁵ Salmón Rahapai akiauwai Boozan,
Booz Rutai akiauwai Obetan,
tuja Obed akiauwai Isain.

⁶ Isai* akiauwai rey Davitan,
tuja rey David akiauwai Salomogkan Uriasa nuwe aajakua nui.

⁷ Salomón akiauwai Roboaman,
Roboam akiauwai Abiasan,
tuja Abías akiauwai Asan.

⁸ Asa akiauwai Josafatan,
Josafat akiauwai Joraman,
tuja Joram akiauwai Uziasan.

⁹ Uzías akiauwai Jotaman,
Jotam akiauwai Acazan,
tuja Acaz akiauwai Ezequiasan.

¹⁰ Ezequías akiauwai Manasesan,
Manasés akiauwai Amogkan,
tuja Amón akiauwai Josiasan.

¹¹ Josías akiauwai Jeconiasan nuigtú yachi aidaunash, Babilonia yajuakbau aajakajua nu tsawantin.

¹² Babilonia yajuakam batsamsag
Jeconías Salatielan akiauwai,
tuja Salatiel Zorobabelan akiauwai.

¹³ Zorobabel akiauwai Abiutan,
Abiud akiauwai Eliaquiman,
tuja Eliaquim akiauwai Azoran.

¹⁴ Azor akiauwai Sadocan,
Sadoc akiauwai Aquiman,
tuja Aquim akiauwai Eliutan.

¹⁵ Eliud akiauwai Eleazaran,
Eleazar akiauwai Matagkan,
Matán akiauwai Jacopan.

* 1:6 "Isai" tawa nunak tayatak "Jesé" tai, tikich tuidau "Yesé" taushkam ainawai. Tuja griegonmag "Tessai" tawai.

¹⁶ Tuja Jacob akiauwai Josen, María aishi aajakua nuna; nuwi akiin-
auwai Jesús, Cristo tujakbauwa nu.

¹⁷ Nunin asa Abrahamai nagkama ashí akiinak Davitai tantauwa
duka catorce awai, tuja Davitai nagkama Babilonianmaya yajuakbauwa
nui ejemash catorce awai, tuja Babilonia yajukam batsamsauwa nui
nagkama Cristo akiinawua imanui ejemashkam catorce awai.

Jesucristo akiinamu
(Lc. 2.1-7)

¹⁸ Jesucristo akiinamuk aatus aajakui. Josek Jesucristo dukují atinun
Marian anagma pujau, tujash eke nemachiatok pujus Wakaní Pegkejin
ejapjukui. ¹⁹ Tujash José María aishiya duka, aishmag pegkeg asa,
pegkegchau diisainum tabaunum wakenmataik idaisatjai tiuwai. ²⁰ Nuna
aatus anentaimas José kanittaman, Apu Apajuí angelji awemamu kajanum
wantintuk: “José, David weantu uchijiyah, ishamtsuk Mariak jukita, ni
ejapjuka nunak Wakaní Pegkejin ejapjuka”, tiuwai. ²¹ “Nuna uchigmak-
tatui, nunikmatai adaikattame JESÚS,† wagki niina aentsji tudauji aina
nunak tsagkujug uwemtijatin asamtai”.

²² Ju ashí aatus nunikua duka, Apu Apajuí tibaun profeta tiuwa nu
uminbaunum nunikui, duka:

²³ “Ejapjuktinai makichik muntsujut aentsú takashtai, nunik uchigmakti-
nai aishmagkun,

nunikmatai Emanuel‡ adaikagtinai”, nunak: “Apajuik jutijjai awai” taku
tawai.

²⁴ Nu aaja tima José shintaag, Apu Apajuí angelji tibauwa dutiksag
Marianak juki nuwatkauwai. ²⁵ Tujash Mariajaig tsanigchauwai eke uchi
akiintsagkik, nunik pujai uchi akiinamtai adaikauwai Jesús.

2

Yacha aidau kaunkag Jesusan emematiagbau

¹ Rey Herodes inamak pujai, Jesús yaakat Belén akiinawuai, Judea
nugkanum awa nui. Nunikmatai ujumak mago* etsá minitaijin batsamin
aidau Jerusalén kaunawajui. ² Nunikag iniimainak:

—¿Tuwí pujawa judío aidaun reyji atin akiina dusha? yaya ni akiintai
wantinkatnai timawa nunú wantinkamtai etsá minitaijin pujauti wainká
mininaji ni ememattasa, tuidau.

³ Nu tabaun Rey Herodes antuk anentai jegachu, antsag ashí Jerusaleg-
numia aidaushkam puyatkajui.

⁴ Nunik apu Herodes sacerdote apuji aidaun, escriba† aidaujai untsuk
ijumag:

—¿Tuwí Cristush akiinatnaita? tau.

⁵ Tutai dita aiinak:

—Duka Belén, Judea nugkanum awa nui akiinatnai; juna aatus profeta
agajui:

⁶ “Belén, amek Judá nugkanmayaitme; tujash Judanum yaakat eme anentai
aina nuní piipichikesh atsume, wagki aminí jüinkitnai makichik

† 1:21 “Jesús” tawa duka griego chichamai, nunak “Uwemtikagtin” taku tawai. ‡ 1:23 Is. 7.14.

* 2:1 “Mago” aina duka yaya aidaun dekapawag diisag dekau aidau etsá minitaijin batsamajakú
ainawai. † 2:4 “Escriba” tawa nunak: Chicham umiktin agagbaun pachis etsegnun tawai.

Apu, tikich apu aidaun nagkaesau mina aentsug Israel aina nuna uwemtikatin”[‡] tawai, tuidau.

⁷ Tiagtai Herodes mago[§] aidaun wakenmataik untsuká shiig inias dekajuau, yayá wainkajash wajupa tsawanta yujawa nuna.

⁸ Dutika Belén ishimak:

—Wetajum nunikjum shiig inimsajum dekaatajum tuwig uchish pujawa, nunika waketkujum minash ujakatajum wisha wenu ememattajai, tiuwai.

⁹ Tusá rey tima weaju, nuniai yaya etsá minitaijin pujusá wainkamu dita weamunmanini wegau, nunik uchi pujamunum mamikis tajiaku. ¹⁰ Nuna yayá wainkag shiig senchi anejasaju. ¹¹ Nunikag jegá waikmag uchin wainkaju, dukují Mariajai pujuttaman, nunik tikishmatug emematuidau; nuninak cofre^{*} ujakag uchin anentag susaju: oron, incienson nuigtú mir-ranashkam. ¹² Tujash nuna dutika kajiittaman kajanum ángel, Herodes pujamunmag wakitkigpajum tibau asag, ditá nugkeen waketuinakug tikich jintanum weaju.

José Mariajai Egipto tupikakbau

¹³ Nunik waketjau ai, Josenashkam Apu Apajuí angelji kajanum wantintuk chichajak: “Nantaktá, nunikam uchi dukujijai jukim Egipto wetá, nunikam nui pujamin wi wakitkita tusan ujaktajame, wagki Herodes uchin maatatus egaktatui”, tau. ¹⁴ Tama Joseshkam nantakí nunú kashia duik uchin dukujijai juki Egipto weuwai. ¹⁵ Nunik nui pujai Herodes jakauwai. Nunú nunikua duka Apu Apajuí tibaun profeta: “Mina uchig Egipto pujaun untsukjai”,[‡] tibauwa nu imanisag uminkauwai.

Herodes suntaji aidaun uchin kajegtí tusa ishiakbau

¹⁶ Nunú mago aidau tsanugbaun Herodes dekagmama shiig senchi kajekú, nunik suntajin ishiakui ashí uchi belegnumian nuigtú nui tikiju batsataidaunash yamá akiinaw aidaunum nagkama jimag mijan ajuinamun kajegtinme tusa, nunak mago aidaush wajupa tsawantak yayá wainkajash yujaayi nuna shiig dekajuau asa nuna diis dutikauwai. ¹⁷ Aatus uminkauwai profeta Jeremias tibauwa nu, duka:

¹⁸ “Antukmajai Ramá pampainamun, untsu untsumas senchi buutuinau, nunak Raquel uchijí aidaunum buutak, anentai ichichtumain wajachmae, wagki uchijí aidauk jinawaju asagmatai”,[‡] tawai.

José Mariajai Nazaret wakitkimu

¹⁹ Herodes jakau ai, José Egipto pujuttaman Apu Apajuí angelji kajanum wantintuk: ²⁰ “Nantaktá, nunikam uchi dukujijai jukim Israel nugkanum wakitkita, wagki uchin maatatus egagmaya duka jakaje”, tiuwai. ²¹ Nunú tima Joseshkam uchin dukujijai juki Israel nugkanum wakitkiuwai. ²² Tujash Arquelao rey wajas Judeanum inamui apají Herodes inamajakua nui tabaun dekaa nuwi wetanak ishamau, nunittaman kajanum ujakam, Galilea nugkanum weuwai, ²³ nunik jegaa yaakat Nazaret pujustatus jegauwai. Nunú aatus nunikua duka, profeta aidau: Nazaretnumia[§] tama atinai, tibauwa nu uminkauwai.

[‡] **2:6** Mi. 5.2. [§] **2:7** Versículo unonum magon pachis tawa nu diistá. ^{*} **2:11** “Cofre” tawa duka, makichik caja tapagtin waji akik aidau egketai aajakui. [†] **2:15** Os. 11.1. [‡] **2:18** Jer. 31.15. [§] **2:23** Is. 11.1.

3

*Juan Yamijatin uwegshunum chichagkagtukbau**(Mr. 1.2-8; Lc. 3.1-20; Jn. 1.19-28)*

¹ Nu aatus tsawan aina nu nagkaemakiu ai, Juan Yamijatin Judea uwegshujin wekaegas chichagkagtak: ² “Tudau takatak idaikujum pujutum yapajiatajum, wagki Apajuí aentsnum inamjatta duka tikijuch wajasé”, tau. ³ Juagkak profeta Isaías niina pachis tiuwa nu aajakui, duka: “Makichik chicham uwegshunum untsubau antuewai: ‘Apu minitin jinta iwajatajum, jinta tutupit dakuektajum’”, tawai.

⁴ Juagká nugkutaijig camello uje najanamu aajakui, akachumtaijish duwap nuigtú langostan,* dapá yumijin yuujakui. ⁵ Juan chichagkagtamun antukagtatus Jerusalegnunia aidau, ashí Judea nugkanmayash, Jordán uwet batsamin aidaushkam kautuidau. ⁶ Nunikag tudauji aidaun etseg-tumgtai namak Jordagnum yamiau.

⁷ Nuniai kuashat fariseo aidau, saduceo aidaujai yamimajagtatus jegan-tajam, chichajak: “¡Iwanchi uchijí aidauwah! ¿Ya atumnash yamimaku Apajuí suimkaji tikijuch wajasá nu uwemtumainai tusash tujabiagmae?

⁸ Dekas tudau takatan idaisaush wajuku amainaita, nunú iwainmamkata-jum pegkeg aina nu takaakjum, ⁹ atumek: ‘Abraham wegantu asaja yupichu uwemain ainaji’ tumamigpa; wagki Apajuik jujú kaya aina junakesh Abraham uchijí aidau emamainai. ¹⁰ Yamaiya juik jachai kagkap tsupitama numamtuk awakatatus Apajuí suwimkeg uminas awai; ashí ajak nejeachu tsupika jiinum apetiama dutikatatus. ¹¹ Wika yumí yamijatjai tudau takatan idaiyinak pujutin yapajiatnume tusan; tujash mina ukujui minitta nuuwai mina nagkaetasu senchigtin, wika nuna sapatjinakesh jujumait Sujai, niyai Wakaní Pegkejiyai yamigmajagtinuk nuigtush jiiyai yamigmajagtina nu. ¹² Nigka trigo awagti wampuji utsanku neje akantayama numamtuk awajkatatus uminas awai. Dutika ijumtainum trigonak yajumak, wampujinak jii ajumaish kajinkashtina nui apeatnai”, tiuwai.

*Jesús yamimagbau**(Mr. 1.9-11; Lc. 3.21-22)*

¹³ Jesús galileanmaya jiinki Jordán jegauwai, nunik Juan yamijati tusa jegantauwai. ¹⁴ Dutikam Juan yamimainchau dekapeak:

—Wiitag jamah ame yamiam amainaitag nunak, ¿nuniaig ame minai yamimagtasa minam? tau.

¹⁵ Tama Jesús ayaak:

—Idaitusta, aaja jutikaku umiktatji ashí Apajuí pegkejan wakega nunú.

Tutai Juagshakam yamijú. ¹⁶ Dutika yamijam Jesús wamkes yuminmaya jiinkiu, nuniai nayaim ujaniuwai, nunikmatai Apajuí Wakaní† pauma nunin akaiki niini jegattaman wainkauwai. ¹⁷ Nuniaig nayaimpinmaya chicham antuekau: “Juuwai dekas mina Uchig anetaijuk, niini shiig aneamu ajutui”, tabau.

* **3:4** “Langostak” yutai aajakui, manchi katsajaip tutaya numamtin. † **3:16** “Apajuí Wakaní” tawa nunak “Wakaní Pegkejin” tau asantai, “Apajuí Wakaní” takuish “Wakaní Pegkeji” taji.

4

Iwanch Jesusan pegkegchaunum dekapsamu
(Mr. 1.12-13; Lc. 4.1-13)

¹ Nunikmatai Wakani Pegkeji Jesusan juki emauwai uwegshunum, Iwanch* dekapsati tusa. ² Dutikam cuarenta tsawai, cuarenta kashi, ayuna pujau asa, yapajuauwai. ³ Nunitai Iwanch Jesusa jegantun chichajak: —Ame dekas Apajui Uchijiyaitkumek, ju kaya aina jujú pag najankam yuakia, tau.

⁴ Tama Jesús ayaak:

—Agagbau awai: “Aentsuk imá pagjaigkik pujumait sui, ashí chicham Apajui wenin jiina nujai pujumainai” tawai, tiuwai.

⁵ Timatai, Iwanch Jesusan yaakat pegkejam Jerusalegka nui emauwai, dutika jega Apajui ememattai jegamkamunum yaki nagkatkamunum iwaká awajus, ⁶ chichajak:

—Ame dekas Apajui Uchijiyaitkumek tsekem iyata, wagki agagbau awai: “Apajui ángel aidaun awetugmattawai, dutikam dita achigmakagtatui kayá tukumkai tusa” tiuwai.

⁷ Tama Jesús ayaak:

—Dushakam agagbau awai: “Amina Apujum Apajuiya nu pegkegchaunum dekapsatasamek wakeyipa” tawai, tiu.

⁸ Timatai nuigtú Iwanch Jesusan muja tsakajunum iwakui. Dutika ashí nugkanmaya yaakat aidaun shiig wiakuch senchigtin aina nuna iwaintukui, nuigtú ashí nuna imanji aina nunashkam iwaintukui, ⁹ dutika chichajak: —Ashí junak amina amastajame tikishmajam emematjakminig, tau.

¹⁰ Tama Jesús ayaak:

—¡Wetá Iwanchih!† agagbau awai: “Amina Apujum Apajuiya duke emematta, nuniakum imá nigki umigkata” tawai, tiu.

¹¹ Tima Iwanchik ukukiuwai. Nunikmatai ángel aidaun kautuwajui kuitamkagtatus.

Jesús Galileanum takatji nagkamamu
(Mr. 1.14-15; Lc. 4.14-15)

¹² Jesús, Juagkan achikag egkeawaje tabaun antuk Galilea wakitkiuwai. ¹³ Tujash Nazaretak juwakchauwai, yaakat Capernaum Galilea kuchajin uwetus awa nui jegaa pujusui, Zabulón, Neftalí aajakajua nuna nugke aajakua nui. ¹⁴ Aatus uminkauwai, yaunchuk profeta Isaías tibauwa nunú: ¹⁵ “Zabulogka nugke nuigtú Neftalí nugke, nayantsa yantamen batsamin aidaun, Jordagka amain batsamnushkam, Galilea judiochu aidaun batsata dushakam;

¹⁶ Aents aidaun suwenum yujau agma nunú tsaaptinun wainkaje; tuja suwenum batsatunash tsaaptin etsantug wajantae”, tawai.

¹⁷ Nui nagkama Jesús chichagkagtak: “Tudau takatak idaikujum putjum yapajiatatum, wagki Apajui aentsnum inamjatta duka tikijuch wajasé”, tau.

Jesús ni jintintaiji atinun cuatro namaká main aidaun yajuakbau
(Mr. 1.16-20; Lc. 5.1-11)

* **4:1** “Iwanch” tawa nunak tuinayatak griego chichamnum “Diablo” tai, hebreo chichamnum “Satanás” tawai. “Diablo” tawa nunak “Tsanumkagtin” taku tawai. Tuja “Satanás” tawa nunashkam “Shiwag” taku tawai. † **4:10** Diístá versículo 1.

¹⁸ Jesús Galilea kuchajin wekaekamá Simón, Pedro daagtina nuna, ni yachi Andresjai namakan main asag retan kuchanum ajuntuinak yujattaman wainkau, ¹⁹ nunik Jesús chichajak:

—Minitajum wi jintintuatjime, namak maatas a yujagjum anmamtuk, Apajuí chichame etsegkujum aents aidau minai ikautjin atajum tusan, tau.

²⁰ Nu tamawaik, ditá redjinak ukuinak niijai weajui.

²¹ Nunik Jesús machik kuwaesag wekamá, Jacobon yachijai Juagjai, apaji Zebedeo aatus barcanum chimpimas redjin apijuinak chimpimatman wainak, ditanash Jesús untsukú.

²² Tamawaik ditashkam:

—Barcanak ukuinak, apajinashkam ukukiag Jesusjai weajui.

Jesús Galilea chichagkagtaku jau aidau etsagakbau

(Lc. 6.17-19)

²³ Jesusak ashí Galilea nugkanum wekaegas, jega ditá ijuntai aidaunum wayá jintinkagtau, nuniak yamajam chichaman Apajuí inabaujiya nuna pachis etseju nuniak ashí jatai jau aidaunash nuigtú najaubau aidaunashkam etsagau. ²⁴ Nu dutikamua duka ashí Sirianmag antuekauwai nunikmatai itajuidau ashí jatai jau aidaun, nuigtú pegkegchau ajamu waituidau, wakan pegkegchau egkemtuamunash, kukujiyai jau aidaun, pimpijú aidaunashkam, dutikam Jesuschakam ashí etsagakui.

²⁵ Nunitai kuashat aents aidau galileanmaya, decapolisnumia, jerusalegnumia, judeanmaya nuigtú Jordagkan amain batsamin aidaush Jesusan saetuidau.

5

Shiig aneasjum pujustajum tibau

(Lc. 6.20-26)

¹ Imatika tuwajam Jesús wainak wakau nainnum, nunik nui ekeem-samtai ni jintinbau aidaushkam jegaantaju. ² Nunikmatai Jesús nagkama jintintak tau:

³ “Shiig aneastinme iikik iina wakanig uwentikmaitsuapi tuidauk, wagki Apajuí ashí nayaimpinum inama duka ditanu asamtai.

⁴ “Shiig aneastinme butuidauk, wagki ditak ichichmamtan jukiagtin ainawai.

⁵ “Shiig aneastinme kakagchauch aidauk, wagki ditak nugka anagtama-mua nuna jukiagtin ainawai.

⁶ “Shiig aneastinme pegkejan takastatus wakegak yapajaku nuigtú kitamtaiyama imanidauk, wagki ditak shiig juakagtin asag.

⁷ “Shiig aneastinme wait anenkagtin aidauk, wagki ditashkam wait anentam aagtin asag.

⁸ “Shiig aneastinme anentai pegkeg aidauk, wagki ditak Apajuí wainkatin asag.

⁹ “Shiig aneastinme shiig agkan pujutan chichamjina duka, wagki ditak Apajuí uchijí ainawai tama agtin asag.

¹⁰ “Shiig aneastinme pegkeja nuna takainak waitkam aidauk, wagki ditanu ainawai Apajuí inamtaijiya duka.

¹¹ “Shiig aneastajum atumek, aents pegkegchau chichagtamainak, pegkegchau awatamainakuish, mina nemagtau asagmin ashí waitan tsanumjutpainakuish. ¹² Shiig aneasjum dakujustajum, wagki atum

jukitnuk shiig muun nayaimpinum ajutjamaidau asamtai. Wagki atum atsamgin profeta batsamajakua nunash aatus waitkasaju ainawai.

Nugkanmag weega nunin tsaaptina nunin ainagme tibau
(Mr. 9.50; Lc. 14.34-35)

¹³ “Atumek ju nugka juajuig tuke weega nunin ainagme. Tujash nunú wee jea jeatuji megkaekamtaish,* ¿utugsaya ataktush jea jeatush emamainaita? Duka atsumnachu asamtai agaa ukajá ajapmainai dutikamun aents aidau najamain ainawai.

¹⁴ “Atumek nugka juajuig tuke tsaaptina nunin ainagme. Yaakat nainnum awa duka uumkag amaitsui. ¹⁵ Lámpara ekemakaik kajunai dukukaik idaichatiame, dutiktsuk yakí ekentayame ashí jeganum awa nuna tsaaptin emati tusa. ¹⁶ Atumshakam nunisjumek, ashí pegkeg aidauk takaakjum aents aidauš iwaintuktajum, nuna wainainak atumin Apa nayaimpinum puja nuna emematiagtinne.

Chicham umiktin agagbauwa nunú pachisa Jesús jintinkagtuamu

¹⁷ “Chicham umiktinun, nuniachkush profeta aidau agagbau aina nunakesh emegkaktatus taacheash tusajum anentaimigpajum, wika nuna emegkaktasanuk tachuitjai, ayatak nuna umiktasan tauwaitjai. ¹⁸ Nunak dekash tajime: Nugka, nayaim aina nunú megkaegainatsaigkik chicham umiktinnum, piipich agasbau aina dukesh megkaekashtinai, imanisag aig ashí uminkatnai. ¹⁹ Nuadui makichik aentskesh, jujú chicham umiktajum tibauwa juiyan imanchau diyak umiachuk, tikich aidaunash umiktajum tusa jintinchauk, Apajuí inama nuish imanchau diyam atinai. Tuja chicham umiktajum tibauwa nuna betek umiak tikichnashkam dutiksag jintintuk, Apajuí inama nui eme anentam agtinai.

²⁰ “Tujash, chicham umiktinun jintinkagtin aidau, nuigtú fariseo aidau umiina nuna nagkaesau pegkeg aina nunú takaachkugmek, Apajuí ashí nayaimpinum inama nuig wayashtin ainagme.

Shiwajumjaish shiig chichasá epegkeata tibau
(Lc. 12.57-59)

²¹ “Atumek antukuitjume atumi muunjum aajakajua nunú tibau aajakajua nu: ‘Magkagtuawaipa, makichik aentskesh magkagtau suwimak suwam atatui’ tawai. ²² Tujash wi tajime: Makichik aentskesh wainak yachin kajejauk, suwimak suwam amainai. Nunisag yachin anentainkachu chichajú wekagushkam, Sanedrín† ejega dekajam amainai, tuja yachin pegkegchau chichajú wekagushkam jii ajumaish kajinkashtina nui pujus waittsatnai.

²³ “Nunin asamtai ofrenda jukim altarnum jegakmam yatsumjai kajegdaikamu adeagmek, ²⁴ ofrendak altarnum ejetsuk ukuakum dekatkauk yatsumjai epegkam agkan wajasam wakitkim ofrendajum ejentata.

²⁵ “Ame apunum utugchat dekagmamatasam weakmek eke jintaa weamuik amina shiwajumjai chichasam epegtoniata, nunikchaminig jueznum ejetamantai, juez aentsji inajam cárcel egkepawai. ²⁶ Dekash tajime, nui egkepamtaig jiiinkishtatme, kuichkijum ashí akikmakam ashimkam jiiinmainaitme.

* **5:13** “Wee jea jeatuji megkaekamtaish” tawa junak palestinamaya week nigkish jea jeatujig megkaeyin ainawai tawai Thompson. † **5:22** “Sanedrín” tawa nunak concilio tawai. Nuanuig fariseo aidau, saduceo aidau, judío apuji aidau, escriba aidaujai ijunajakajui chichaman dekawagtatus, nunak Sumo sacerdote chichakmatai ijunajakajui.

Jesús tsanijinawaigpa tibau

²⁷ “Atumek antuku ainagme: ‘Tsanijinawaigpa’ tibauwa duka. ²⁸ Tujash wi tajime: Aents nuwan dutikachainjash tusa wakegas diyaushkam, anentainig tsanijimui.

²⁹ “Nuniau asamtai amina jiiim untsugmia nu tudaunum ajumpamain awajtamkuig ukuinkam ajapata; wagki pegkejai iyashminia makichik megkaebauwa nu, ashí iyashmia nu waitiaku pujutaiya nui ajapeam amaina nu. ³⁰ Tuja uwejum untsuja nunú tudaunum ajumpakuig tsupikam ajapata; wagki pegkejai iyashminia makichik megkaebauwa nu, ashí iyashmia nu waitiaku pujutaiya nui ajapeam amaina nu.

Jesús nuwak idaimaitsui tibau

(Mt. 19.9; Mr. 10.11-12; Lc. 16.18)

³¹ “Jushakam tibauwai: ‘Aishmag nuwen idaikug, papí nuwa idaiku najantain umiká sumainai’, tawai. ³² Tujash wi tajime: Aishmag nuwen ekagmakchau aig idaikug, aentsjai tsanijinati tusa idaimaina dutikawai. Nuwa idaisamujai nuwenushkam ekagmawai.

Atum dutikatin pachisjumek Apajuik adaikaigpajum Jesús tibau

³³ “Nuigtushkam antukuitjume atumi muunjum aajakajua nunú tibau aajakajua nu: ‘Ame Apujum Apajuí pachisam dutikatjai tibauk umitskek idaisaipa’, tawai. ³⁴ Tujash wi tajime: Apajuí adaisagmek tiigpajum, nayaim pachisjumesh tiigpa; wagki nayaimpia duka Apajuí ekeemtai asamtai, ³⁵ nugka ju pachisjumesh tiigpajum, wagki Apajuí najamsa eketbau asamtai; Jerusaleghakam pachisa tiigpa; wagki Rey ashí nagkaek-agtasua nuna yaaktaji asamtai. ³⁶ Atumi buukem pachisjumesh tiigpajum; wagki makichik intashia dukesh bukusea nuniachkush pujukesh emainchou asajum. ³⁷ Dekas ayatak ame dutikmainaitkumek ‘ehé’ tita, tuja ame dutikmaichakmek ‘atsá’ tita, aaja tumaina nu wainka tu wekaebauk pegkegchau asamtai.

Jesús pegkegchaunmag ikdaikaigpajum tibau

(Lc. 6.29-30)

³⁸ “Atumek antuku ainagme: ‘Aents jiiimin emestugmakuig, ameshkam dutiksamem emestugta, tuja daimin akagtamkuish, ameshkam dutiksamem nai akagkata’, tawa nu. ³⁹ Tujash wi tajime: Duka dutikawaigpa. Amina pegkegchau takagtamkuishkam iikatasam wakeyipa. Makichik aentskesh yapim untsugmia atú awatamkuishkam, atumesh iikajum awattsuk, juinia yapijuish awatita tusajum ayampatuatajum. ⁴⁰ Makichik aentskesh nugkutaigmin atanjamkitatus utugchatan aputugmakuig, awantak pataká nugkutaigmesh[†] susata. ⁴¹ Aents kijinun amaaak: ‘Jujú jukim makichik kilómetro kuwagtukta’, tujamkuishkam jimag kilometronum ejentuntajum. ⁴² Makichik aentskesh segapakuig susata, tuja amina wajiigmin tsagkatjukta tusa segapakuish, sujitkaipa.

Shiwajui aidau aneamu

(Lc. 6.27-36)

⁴³ “Dushakam antuku ainagme: ‘Amejai ijutkamu aneakum, shiwajum aidauk kajegkatajum’ tibauwa nu. ⁴⁴ Tujash wi tajime: Atumi shiwajum aidauh aneetajum, nuniakjum atumin pegkegchau chichagtamaidaush

[†] 5:40 “Awantak pataká nugkutai” tawa nunak, judío aidauk tsetsektin ejamakta tabaunum awantak pataká nugkujakú asagmatai tiuwai.

Apajuí aultustajum. ⁴⁵ Nunú aajam dutikakjum, atumi Apa nayaimpinum puja nuna uchijí atatjume. Wagki nigka ashí aents pegkeg, pegkegchau aina nudaujái etsanak etsanmitkawai, aikasag yuminashkam pegkejan takaidau, pegkegchau takau aina nudaujái yutumtikawai. ⁴⁶ Tujash atum ya anempainawa nujaig aneniakjumesh ¿wají imana juwagme? Nunak apu kuichkiji atinun ijumin aidaush nunin ainawai. ⁴⁷ Tuja atum yatsum aidaujaig kumpamdayakjumesh ¿wají imana iwainame? Nunak Apajuí anentaimtuchu aidau nunin ainawai. ⁴⁸ Dekas atumek betek umin atajum, atumin Apa nayaimpinum puja nu betek umina iman.

6

Aents atsumau yayamunak tikichik dekamainchau ainawai

¹ “Atum pegkeg takaaum nunú aentsnum iwainmankata tabaunum dutikawaigpa, kuitamankatajum. Atum aaja dutiktaik atumi Apa nayaimpinum puja duka wají pegkeja nunak amaschagtinaí.

² “Nuniau asamtai atum aents atsumau yayakjumesh, wi takaamun dekaatnume tusagmek jega ijuntainmagkesh, jintaagkesh etsejú yujaig-pajum; nunak aentsú tsanú aidau eme anenjús diigsatnume tusag nuni yujau ainawai. Dekas tajime: Nuna nunidauk aents eme anentam aidau asag wají pegkeg suamak achagtinaí. ³ Tujash ame atsumau yayakmek tikichkesh ujakaípa, ⁴ duka dekachbaunum dutikata. Nunak amina Apa ame dutikamunak wainu asa wají pegkeg aidaun amastatui.

Jesús Apajuí aujut jintinkagtuamu (Lc. 11.2-4)

⁵ “Atumek Apajuí aujukgumesh, aentsú tsanú aidau, jega ijuntai aidaunum, nuninachkush jintá wajantag, aents aidau wainkamu atag tus wakegainak Apajuin aujú yujau aina nunikaigpa; dekas tajime, nuna nunidauk aents eme anentam yujaidau asag wají shiig pegkeg aina nunak jukichagtinaí. ⁶ Tujash ame Apajuí aujukmek, ame kanutaigmin wayam waiti epenim, dekachbaunum amina Apa puja nu ausata. Nuniamin amina Apa amek dekachbaunum nuniam nuna waipau asa wají pegkejan amastatui.

⁷ “Apajuí aujukgumesh chicham imanchauk awá awagkigmek aujigpa, Apajuí anentaimtuchu wajukin aina nunitsuk, ditak imatjamas imá shiig antugtukainta tusag nunak imatin ainawai. ⁸ Atumek dita wajukena nunikaigpa, wagki amina Apa duka dekawai atum atsumamunak eke segatsjuminig. ⁹ Atumek aaja aujmainaitjume:

“Íina Apajiyah, amek nayaimpinum pujuwaitme. Pegkegmaitam íbau asam imá ameketme ememattaim.

¹⁰ Amek jutiishkam inajatjata.

Ame wakegamun nayaimpinmaya umigtamaina nunisag ju nugka juiyash aminak umigtamkatnume.

¹¹ Dutiksamék ii yuwatnushkam kashí kashinig sukagtita.

¹² Nuigtú ii tudaujishkam tsagkugkagtugta, jutii tikich pegkegchau awajtamush tsagkujuinag aikasmek.

¹³ Pegkegchaut takastinne tsumamek idaikagtutsuk, ayatak yayiatkam agkanmitkagtuata', tiuwai.

¹⁴ “Atum tikich pegkegchau awajtamaidau tsagkugtaik, atumnashkam atumí Apa nayaimpinum puja dusha tsagkugtamjattagme, ¹⁵ untsu atum

tikich aents aidaush tsagkugchataik, atumin Apa dushakam atumi tudaugminash tsagkugtamjashtatui.

Jesús ayuno pachisa jintinkagtuamu

¹⁶ “Atum ayuno takaakjume, wake besemjak yapiminish iwainmamkaigpa, aentsú tsanú aidau, ayunawapi tusa aents waitkatnume tusag wajukena nunitsuk. Dekas tajime: Nuna nunidauk aentsnum iwainmamá yujaidau asag wají shiig pegkegnak jukichagtinai. ¹⁷ Nuaduí ame ayuná pujusam Apajúi aujkumek wake besekam wekaetsuk, yapim nijaim, shiig temashmajam, shiig dakunkut wekaesata, ¹⁸ aents aidau ayunawapi tusa dekagmawainum. Ame nuniamunak, imá amina Apa duke amijai puja nu waipawai, nuniau asa amina Apa dekachbaunash waina nu wají pegkejan amastatui.

Nayaimpinum wiyakchameaut

(Lc. 12.33-34)

¹⁹ “Jujú nugka jui wajiin mamuk emesmain, nuniachkush kawanchjumin, kasashkam wayá kasamain aina juninum wiyakchameatasagmek wakeyigpajum. ²⁰ Dekas nayaimpinum, mamukush wajiin emeskamtai megkaemainchau, nuniachkush kawanchjumainchau, kasashkam wayá kasamainchauwa nui wiyakchameatajum. ²¹ Wagki tuwí atum wiakchameatin ajutjamua nuig anentaimsa pujustajum.

Lámpara pachisa augmattsamu

(Lc. 11.33-36)

²² “Atumi jiimek lámpara ekemakam tsaaptin emaama numamtuk atumi iyashminak awagmawai. Jiim pegkeg asamtai shiig wainmamainaitam imatiksam, ashí pegkeg aina duke anentaimtaik, anentaiminish tsaaptin ajutjamainai. ²³ Untsu jiim pegkegchau ataik ashí amina iyashmia duka suwenum amainai. Aminí tsaaptin awa nu suwe wetaik, nuní nagkaemas pujutjum pegkegchau wemainai.

Jesús inakak jimá apuginuk amaitsui tibau

(Lc. 16.13)

²⁴ “Makichik inakak jimá apun takagnuk amaitsui; wagki tikichin dakitak, tikichnak aneemainai, nuniachkush tikichin eme anentus diyak, tikichnak junik diimainai, nunin asamtai Apajúi umigkata tu, wiyakchameatasa anentaimtu wajamait sui.

Apajúi ni uchijí aidaunak kuitamui

(Lc. 12.22-31)

²⁵ “Nuaduí atumin tajime: ¿Wajina yuwanuk, wajina uwagnuk, wajina nugkugnu, pujustaja? tusagmek uyumá pujuigpajum. Yutai nagkaesauwa duka atumi pujutjumia nuuwai, tuja jaanchin nagkaesauwa duka, atumi iyashmia nuuwai. ²⁶ Shiig anentaimsa diistajum pishak agkajunum nanamaina nunú. Ditak ajakmakagkesh juwinatsui, jeganakesh jegamkag yutajinak ijumainatsui, nuniaunak atumi Apa nayaimpinmaya nu dita yuwatnunak suawai. ¿Atum dekas chigki aidau nagkaesau ainatsjume? ²⁷ ¿Yaa atum ainajum anuiyash, esajam atajai tusa anentaimtu pujakush esaumainaita?

²⁸ “¿Wagka atumesh jaanchish imá puyatjagme? Ikamia yagkug aina nu anentaimsa diistajum wajuk tsakainawa, ditak takainatsui, ujchnash kutamainatsui. ²⁹ Tujash atumin tajime, Salomón ashí imanun iwagmamá wajakuitkush yagkujá niimega ibaunak nugkujakchawai. ³⁰ Dupa ikamia

aidau kashin apeam atinnakesh Apajuí imatikas iwaja ibaush, ¿wagkag aan nagkaemas atumnash dutijamashinme aents imatikas dekaskeapi tuchau aidauwah? ³¹ Nuadui atumek: ‘¿Wajig yuwatji?, nuniachkugmesh ¿wajig uwagtaji?, tachakjumesh ¿wajig nugkugtaji?’ tusajum anentaimá pujuigpajum. ³² Wagki ashí nunú aidaunak Apajuí anentaimtuchu aidau puyatjus yujajin ainawai, tujash atumi Apa nayaimpinmayaya nu shiig dekagtamjume, atum ashí nu atsumajum nunak. ³³ Nuadui dekatkawk Apajuí inama nu nuigtú ni pegkejan takaa nunuwá egaktajum, nuniakjumek ashí nunú aina dushakam aan kuashat ajutjamiagtinai. ³⁴ Nunin asamtai kashin atina duka anentaimtu pujuigpajum, wagki kashin dutikmainuk tsawan ajitin asamtai, adeagtajum makí makichik tsawanta nuna utugchatji ajuina nunú.

7

Tikichi pujutji pachisjumek augmatigpa tibau (Lc. 6.37-42)

¹ “Tikichi pujutjig augmatú yujaigpajum, atumnash Apajuí aikasag tujaminum. ² Wagki atum tikich aidau pegkegchaujish augmatú yujataik, Apajuí atumnash nunú aents tajum dutiksag tujamattajume. Atum tikich utujagme dutiksag Apajuí atumnash dutijamattagme. ³ ¿Wagka yatsumi jiin chipum tekani egkemaush diyagme, atumi jiimin numi egketa nu diitskesh? ⁴ ¿Utugsamea amina yatsumish: Yatsuju jasta chipum tekani jiimin egketa nuna jigkitjame tumainaitme? ⁵ ¡Tsanumin aidauwah! Dekatkawk amina jiimin numi egketa nu jiiktá, nunikam shiig wainkam yatsumi jiin chipum tekani egketa dusha jigkita.

⁶ “Antsagmek Apajuí chichame pegkegma nu ujamaitak antutan daki-tuinakuig waitkatsuk idaisatajum, ditak yawá kafen aidau yutai pegkeg suwamaitak iiki esajatta tuwama nunidau asagmatai. Tuja atumdau perlak kuchi batsatbaunmag ukubaitsugme, dajag tsaiká atumin pempeen-tumaki emestamain asamtai.

Wajuk Apajuish aujmainaita nu pachisa tibau (Lc. 11.9-13; 6.31)

⁷ “Apajuishkam segatajum, imatjamak amastatjume; egatash egaktajum, egakjumek igkugtattajume; untsuktajum, imatjamak waitin ujatjamattajume. ⁸ Wagki ashí aents sumauk, suwam auwai; egauk igkuinai, ni egamujinak; waitinum wajas untsumushkam, ujatam auwai. ⁹ ¿Ya aentsuita uchijí yujumak segamaitak kayá sumainush? ¹⁰ ¿Nuniachkush namak segamaitak dapí sumainush? ¹¹ Atum pegkegchau ainayatkugmesh, uchijum pegkeg sufak dekagme; ¡wagkag aan nagkaemas atumi Apa nayaimpinum puja dusha atum segamunash waji pegkegnash amaschagti!

¹² “ ‘Nunin asamtai, ashí pegkeg aina nujai tikich aidaush shiig awajkatajum, atum shiig awajtuktinme tusajum wakejin ainajum nunisjumek’, wagki aatus chicham umiktina duka jintinkagtawai nuigtú profeta aidau tibauwa nuishkam.

Waiti menakua nu (Lc. 13.24)

¹³ “Waiti menakua nuní wayatajum. Kuashat aents aidau junta untsujin, waiti wegkajam megkaetanum ekagta nuní imá weenawai. ¹⁴ Wagki

waiti menaku, jinta tsejgkuch pujutnum ekagta nunak ujumak aents igkuinawai.

Numik neje diigsajum dekamainaitjume tibau
(Lc. 6.43-46)

¹⁵ “Kuitamamkatajum profeta wait aina nunú tsanugmajainum, ditak uwija nunin wajas minitjamainawai, tujash anentainig ikamyawa kajena iman ainayatak ¹⁶ Nuadui atumek aents aidauk ditá takatji diigsajum wainmainaitjume, untukjak munchiinak nejetsame, antsag uvashkam jagkinmayag juushtayame. ¹⁷ Nunisag ashí numi pegkeg aidaushkam pegkegnak nejenai. Tuja numi pegkegchaushkam pegkegchaunak nejenai. ¹⁸ Nunin asa numi pegkejak pegkegchaunak nejemaitsui, antsag numi pegkegchaushkam pegkegnak nejemaitsui. ¹⁹ Ashí numi pegkegchau nejen aidauk tsupija apea ajaptaiyai. ²⁰ Nuadui atumek aents aidauk dita takaamuji diigsajum wainmainaitjume.

Nayaimpinmag ashí wayachgtinai tibau
(Lc. 13.25-27)

²¹ “Ashí aents aidau: ‘Apuh, Apuh’, tujutuina duka Apajuí nayaimpinum inama nuig wayachgtin ainawai. Mina Apag nayaimpinum puja nunú wakegamun takasú aina duke wayawaghtinai. ²² Nunú tsawan atina dui kuashat aents: ‘Apuh, Apuh’ Jutiishkam amina daagmin chichamjum etsegekabijai, nuniaku amina daagmin iwanch aidau aentsun egkemtuaush jiijá ishimaíji, tuja aents dutikmainchau aidaush kuashat takasuitji, tujutiaghtinai. ²³ Tujash wi ayaakun: ‘¡Atumnak wainchau ainajime! ¡Pegkegchau takau aidauwah, wetajum!’ titinaitjai.

Jegamkatasa ajiagbau pachisa tibau
(Mr. 1.22; Lc. 6.47-49)

²⁴ “Makichik aentskesh mina chichamjun antugtuk wi taja dutiksag umia duka, jega jegamtan dekau nugkan inatak tai kaya muunnum dekanmitkak aja jegamkau aajakua nuninai. ²⁵ Nuniai yumi yutug, namakash dujajukui, dasesh senchi nunú jegan umpuau imatika tukuinakush yumpuachui, kaya muunnum dekanmitkaka ajigbau asamtai. ²⁶ Untsu miná chichamjun antuinayatak umigtachuk, aents anentainkachu jegan kayamnum tauk ajigká jegamkauwa nuninai. ²⁷ Nuniai yumi yutug namakash dujajukui, dase senchi jega umpuak tegakui, dutikam shiig tsainkauwai”.

²⁸ Juna aatus Jesús chichá chichakua ashimkamtai, aents aidauk ni jinti-amujinak anentai jegagchajui, ²⁹ wagki Jesusak jintinkagtau apu chicham antugtai tumaina imatikas, maestro chicham umiktinun jintinkagtin aidau nagkaegas, apu chichame antugtai jintimaina imatika jintinkagtau asamtai.

8

Aents lepraghtinun Jesús etsagagbau
(Mr. 1.40-45; Lc. 5.12-16)

¹ Nuna Jesús ashimak nainnumia akaiki wetai, kuashat aents saetukaju. ² Nuniai makichik aents jata lepra achikam jaak pujau wainak, Jesusan jegantun niina eemtin tikishmag pujus segaak:

—Apuh, wakegakmek etsaentumainaitme, tau.

³ Tama Jesús uwejin antiak:

—Wakegajai, pegkeg wajastá, tiuwai. Tamawaik leprak megkaekauwai.

⁴ Nunikmatai Jesús chichajak:

—Nijah, makichik aentskesh ujakaipa, sacerdote jegajuam wantintukta, nuniakum ofrenda susata Moisés dutikata tibauwa dutiksamek, ditashkam waipakag dekas tsagaje tujamtinme, tiu.

Jesús Capernaumnia capitani inaken etsagagbau

(Lc. 7.1-10; Jn. 4.43-54)

⁵ Jesús Capernaúm jegattaman capitán jegantauwai aajsatatus. ⁶ Nunik:

—Apuh, mina inakeg ashí iyashí najaimak shiig senchi waitiak buchit-mainchau wajas jegajui tepawai, tiuwai.

⁷ Tama ni ayaak:

—Ayú, wi anui taan etsagagtajai, tiuwai.

⁸ Tutai capitán* ayaak:

—Apuh, wika amea ibauk mina jegajui utuamak amaitsujai; ayatak chichamaik tsagagti tujutta, tamak mina inakjush tsagagtatui. ⁹ Wagki wikishkam apu umigbau ajutui, antsag suntag mina umigtuidaush ajutuinau, nunú aina nuiyan wi: “Wetá”, tamak wegawai. Tikichia nuna: “Taata”, tamak minawai; aikasnuk mina inakjunash: “Ju dutikata”, tamak dutikawai, tau.

¹⁰ Nuna tutai Jesús antuk anentai jegagchau, nunik niina saetus minina nuna chichajak:

—Dekas tajime, Israel aina nuiyanakesh imatika dekaskeapi tabau ajamunak wainkachjai. ¹¹ Nunin asamtai tajime: Etsá minitaijinia, etsá akaetaijinia kuashat aents aidau kaunkagtinai, nunikag Apajui inamtaijin nayaimpinum Abraham, Isaac, Jacob aina nujai pekaamsag yuawagtinai, ¹² tujash Apajui inamtaijin wayatnume tibau aina duka, agaa jiiiki suwenum ajapeam agtinai, dutikam nui batsamas butuinak nainak tekegtú batsamtin ainawai, tau.

¹³ Nuna tii Jesús capitainin chichajak:

—Wakitkita, ame dekas ashí nuniktatuapi tame duka imatiksag uminkat-tawai, tau. Nuna tiuwa duik inakshakam tsagajui.

Jesús Pedro tsatsají etsagagbau

(Mr. 1.29-31; Lc. 4.38-39)

¹⁴ Nuna tusa ukuak Jesús Pedro jeen weuwai, nui jegakmá Pedro tsatsají senchi tsuweak tepettaman wainkauwai. ¹⁵ Dutika Jesús uwegnum antigkui, dutikam tsuweamunak megkaekau, nunik nantakí Jesusan yutain ajampeau.

Kuashat aents etsagakbau

(Mr. 1.32-34; Lc. 4.40-41)

¹⁶ Nunú tsawantaik kintamai, kuashat aents wakan pegkegchau egkemtuamu aidaun ikautuawajui; dutikawagmatai chichamenig wakan pegkegchau aidaunak jiijá ishiakui, dutika ashí jau aidaunash etsagaku.

¹⁷ Nunak profeta Isaiás tibau aajakua nu uminkati tusa dutikauwai, duka: “Nigki jutii kakakchamujinash, jatanashkam jukini”, tawai.

Jesusa jintintaiji agtatus wakejukaju aidau

(Lc. 9.57-62)

* 8:8 “Capitán” tawa nunak tikich agagbaunmag “centurión” tuinawai.

¹⁸ Jesús kuashat aents tuwajuinam wainak, ni jintintaiji aidaun: — Amain wegagmi, tiuwai. ¹⁹ Nuniai makichik maestro chicham umiktinun jintinkagtin jegantun:

—Maestroh, wisha ame tuwig wekaetam nuniakminish tuke amijaig wekaesatin atajai tajai, tau.

²⁰ Tutai Jesús ayaak:

—Kujancham aidau waajig ajuinawai, antsag yakiya pishak aidaushkam pasugkeg ajuinawai; tujash Aentsmaga akiinawuwa duka buuké atumsa ayamainjigkesh atsujui, tiu.

²¹ Nuna tutai makichik niina jintintaiji aina nuiya:

—Apuh idaitusta, dekatkauk wenu mina apajun ukusan ukuakun nemagkatjame, tau.

²² Tutai Jesús ayaak:

—Amek nemagtukta, idaisata wakanin jakau aina nu jakau aidaunak ukustinme, tiuwai.

Jesús dase imijkamu

(Mr. 4.35-40; Lc. 8.22-25)

²³ Nuna tusa ukuak Jesús ni jintintaiji aidaujai barcanum chimpimjag weajui. ²⁴ Nunik weenai dase shiig senchi dasentu, imaniau asa tsukatak barcanum yumik senchi yajanu; tujash Jesusak kanag egketu, ²⁵ imanitai niina jintintaiji aidau jegaantag ishintainak:

—¡Apuh, uwemtikagtugta jakektatji! tuidau.

²⁶ Tama ditan ayaak:

—¿Wagka sapigmajume aents imatikas dekaskeapi tuchau aidauwah?

Tusa nantakí dasen, kuchanashkam imijiaku, dutikam kuchashkam miyasuch wajas patamsauwai. ²⁷ Dutikamtai ditak pempeentunisag:

—¿Jusha waji aents asamtaiya dasesh, kuchash ni chichamenash antujuinawa? tudaiyinau.

Gadaranmaya aents aidau wakan pegkegchau egkemtuamu

(Mr. 5.1-20; Lc. 8.26-39)

²⁸ Nunik Jesús kuchá amain katigkú, nugka gadaranmaya aidau bat-samtain, nuniai jimag aents iwanch egkemtugbau aidau ukumatainmaya jiinkiag Jesusan jegantaju. Nunú aents aidauk senchi kajen aidau asam-tai, nunú jintanmag makichkish nagkaemamainchau aajakui; ²⁹ nunik untsumainak:

—¿Apajuí Uchijiyah, jutiish utugkagtukta tame? ¿Tsawan jegatsaigkik juish suwimak sukagtustasam minam? tuidau.

³⁰ Tuja kuashat kuchishkam ikaa yuwak batsatu, ³¹ nuniau asamtai wakan pegkegchau aidau Jesusan segainak:

—Ju aentsnumia jiiatukumek, au kuchi batsata awi awekagtita.

³² Tusá tama Jesús ayaak:

—Wetajum, tiuwai.

Tama wakan pegkegchau aidaushkam aentsnak ukuinak kuchinum utsanawajui, dutikam kuchishkam pisajag betsag tajaekaunum utsanawag kuchanum iyagkag jinawajui.

³³ Nunikagmatai kuchí kuitamin aidaushkam pisajag yaakat jegawag, kuchi jinamun pachis, tuja aents wakan pegkegchau egkemtuamu aidaushkam nunikagmae tusag ashí etsejuidau. ³⁴ Tiagtai ashí yaaktan-maya aidauk Jesusan wainkagtatus wejiajui, nunik wainkag, juig pujutsuk yajá wetá tusag segajui.

9

*Jesús aents wekaechau etsagagbau**(Mr. 2.1-12; Lc. 5.17-26)*

¹ Nuna dutika ukuak, Jesús barcanum egkemag, amain katigká niina yaaktajin jegauwai. ² Nunikmatai aents wekaechaun camillanum pataidiag ejetiaju; dutikawagmatai Jesús dita dekaskeapi tuinamujin wainak, jaun chichajak:

—Uchijuh, shiig aneasta, ame tudajum aidauk tsagkugnaje, tau.

³ Nuna tutai ujumak maestro chicham umiktinun jintinkagtin aidau anentaimsag: “Juka Apajuin pegkegchaun chichajak tu wekaewai”, tuidau.

⁴ Tu anentaimaidaun Jesús dekau asa ditan chichajak:

—¿Wagka anentaiminish pegkegchaush anentaimjume? ⁵ ¿Tuwaita imá yupichuch tumainush, tudajum aidauk tsagkugnaje taja dukaih, atsa nantakim wetá tumainaitag dukaih? ⁶ Tujash Aentsmaga akiinauwa nu, ju nugka juish tudau aidaunash tsagkugkagtumaina nu dekaatajum. Tusa wekaechaun chichajak:

—Nantaktá nunikam camillajum jukim jeemin wakitkita, tiuwai.

⁷ Tama niishkam nantakí jeen weuwai. ⁸ Nuna wainkag aents aidauk ishamkaju, nunikag Apajuin emematiaju, niina senchijin ashí aents aidaunum iwainaku asamtai.

*Jesús Mateo untsukbau**(Mr. 2.13-17; Lc. 5.27-32)*

⁹ Nuna dutika Jesús wekamá Mateon* wainkauwai, kuichik apunu atinun akikmagtai yajumak ekeematman, nunik:

—Mateo, wegajai mina jintintaig aminum, tau.

Tama Mateoshkam ayú tusa wajakug Jesusjai weuwai. ¹⁰ Jesús yujumkan yuwak jintintaiji aidaujai Mateo jeen eketai, apu romanmaya kuichkiji atinun ijumin aidau, nuigtú tikich aents tudaugtin aidaujai kuashat kaunawag Jesús eketbaunum jegaantag pekaamsaju. ¹¹ Nuna wainkag fariseo aidau Jesusa jintintaiji aidaun iniinak:

—¿Wagka atumi jintinjamnush apú kuichkiji atinun ijumin aidau, nuigtú aents tudau aidaujaish ijunjash yuawa? tuidau.

¹² Nu tabaun Jesús antuk ayaak:

—Jamamtuchu aidauk ampijatnuna atsumatsui, jau aidau atsumawai.

¹³ Wetajum nunikjum ju chichamash wajina takua tawa nu unuimagtajum: “Wait anenkagtin atajum tusan wakegajai, anentag itaajum nunak dakitajai”, tawa nu. Wika aents pegkejan takau aidau untsuktasan minichuitjai, aents tudaugtin aidaunum tauwaitjai.

*Ayuno pachisa iniimsamu**(Mr. 2.18-20; Lc. 5.33-35)*

¹⁴ Juagká jintintaiji aidau Jesusan jegaantag, iniinak:

—¿Wagka jutiik, fariseo aidaujaig kuashtá ayuno takau agmag nuniajinish, amina jintintajum aidaush ayunonash takainatsua? tuidau.

¹⁵ Tama Jesús ayaak:

—¿Nuwenbaunum ipaamu aidaush wake besemag batsamainkaih, nu nuwenu ditajai pujaigkish? Tujash tsawan jegattawai nuwena nunú juwam atata nu, nunikmatai ipaamu aidauk ayunó wajakagtatui.

* 9:9 Jujú papinum “Mateo” tawa nunak tayatak tikichnumag “Leví” tawai.

16 “Makichik aentskesh jaanch yamagman tsupikag jaanch mamujunmag adujtuchu ainawai, yamajam asa waketak jaanch mamujua nuna nuni nagkaemas ichiimain asamtai. 17 Antsag vino yamagmak duwap apagbau ajutnumag yajashtaiyai, dutikamak ichiimain asamtai, nunik vinok ukaegag, duwapshakam ichiinak ajapnamainai. Nuadui vino yamagmak duwap yamagmanum yajataiyai, nunin asa mai pegkejak amainai”, tiuwai.

Jairo nawanji nuigtú nuwa Jesusa jaanchjin antigkua nu
(Mr. 5.21-43; Lc. 8.40-56)

18 Jesús nuna pachis chichagkagtai judío aidau apuji tajua, niina eemtin tikishmag chichajak:

—Mina nawantug yamá jakae; tujash ame minim uwegmin antinjukta, dutikam aneantatui, tau.

19 Tama Jesuschakam ni jintintaiji aidaujai weajui. 20 Nuniamunum nuwa doce mijadai numpan puwak waitú pujú Jesusan wainak ukunum juwatki adijkauwai, nunik Jesusa jaanchji wenin antigkui, 21 wagki ni anentaimsag: “Imá jaanchjinkesh antiaknuk tsagagtajapi”, tau asa.

22 Dutika antigkam Jesús ayampá nuwan wainak:

—Nawantah, shiig aneasta, ame dekaskeapi tabaugmia nu etsaentamjae, tiuwai.

Nu tsawanta nuaduik nuwak tsagajui. 23 Nunik Jesús judío aidau apujiya nuna jeen jegakmá pigkuin† umpuin aidau nuigtú kuashat aents pampaa batsamtatman wainkau, 24 nunik chichajak:

—Jiinjatajum, nuwauchik jakache ayatak kanaje, tau.

Tutai dushikidau. 25 Tujash ashí aents jiiinjagmatai wayá, nuwauchin uwegnum achiká inantam, niishkam nantakiuwai. 26 Nu dutikamua nunak ashí nu nugkanum etsejug dapampajajui.

Jesús jimag aents wainmachu etsagagbau

27 Nuna dutika Jesús jiiinki wetatman, jimag aents wainmachu pataetukag, untsumkag:

—¡Davita uchijiyah, jutiish wait anenkagtugta! wajaidau.

28 Nunik Jesús jegá wayamtai, wainmachu aidaush jegantajam, ditan iniak:

—¿Dekaskeap etsaentumainaita tujutjumek? tau. Tama ditashkam:

—Ehé Apuh, tuidau.

29 Tiagtai Jesús ditá jiiin antintak:

—Atum dekaskeapi tajum nunisag uminkati, tiuwai.

30 Tamawaik wainmakajui. Nunikmatai Jesús shiig ujaak:

—Makichik aentskesh ujakaigpa, tiuwai.

31 Tujash ditak jiiinjag weenak, ashí aents nu nugkanum batsamin aidaunak ujá ujakua weajui.

Aents chichachun Jesús etsagagbau

32 Nunú wainmachu jiiinki weenaig, aents iwanch egkemtuamu asa chichachun, Jesusan itajuawajui. 33 Dutikam iwanchin jigkiuwai, nunikmatai chichachushkam chichakú. Dutikamtaí aents aidauk anentai jegachaju, nunikag:

—Israel aidautik makichkish jutikamuk wainchataiyai, tuidau.

34 Tujash fariseo aidauk:

† 9:23 Flauta tawa duka makichik umputai aajakui.

—Juka iwanch aidau apujiya nuna senchijin iwanch aidaunak jiyawai, tuidau.

Jesús aents aidau wait anentsá diyamu

³⁵ Jesusak wekagajakui ashí yaakat aidaunum nuigtú yaakat yaijuch aidaunmashkam, makí makichik ditá ijuntaiji aina nui jintinkagtak. Nuniak yamajam chicham Apajú inamjatnujin pachis etsejak ashí jatai jau aidaunash tuja najaimagtin aidaunashkam etsagau. ³⁶ Aents imanik tuwaidau wainak, wait anenjauwai, wagki pimpikiag nuigtú pampagkag uwig pastorji atsugbau wajukmaina nunidau asagmatai. ³⁷ Nuniak ni jintintaiji aidaun:

—Dekaskenmag juumainuk kuashtai, tujash takau aidau ujumke, ³⁸ nuadui nunú ajak juuktinun Apujiya nu segatajum, nuwi takastin aidaun ishiakti tusajum, tiuwai.

10

Jesús ni apostolji agtin aidau etejamu

(Mr. 3.13-19; Lc. 6.12-16)

¹ Jesús niina jintintaiji doce aina nuna untsuká, wakan pegkegchau aidau jiiktinun, jau aidau nuigtú najaimagtin aidau etsagaktinun senchintikauwai.

² Nunú doce apóstol aina nuna daajig jujú ainawai: dekatkauk Simón, tikich daaji Pedro, Andrés Simogka yachi nuigtú Jacobo niina yachi Juagjai Zebedeo uchiji aidau; ³ Felipe, Bartolomé, Tomás, Mateo apú kuichkiji atinun ijumajakua nu, Jacobo Alfeo uchiji nuigtú Tadeo, ⁴ Simón cananeo tutai nuigtú Judas Iscariote Jesusan sujukua nunú.

Jesús ni apostolji doce aina nu ishiakbau

(Mr. 6.7-13; Lc. 9.1-6)

⁵ Jesús jujú doce aina nuna ishimak juna jintintus tiuwai: “Judiochu bat-satbaunmag wegpajum, samarianmaya yaaktaji aidaunmash wayawaig-pajum; ⁶ dekas Israel uwig megkaejauwa nunin aina nui wetajum. ⁷ Nunikjum etsegkatajum, ‘Apajú nayaimpinmaya inamjatna duka tikiju wajasé’ tusajum. ⁸ Jau aidaush etsagatajum, jakau aidaush inantajum, lepragtinush etsagatajum, iwanch egkemtuamush jiijatajum. Nu dutikat-nuk anenjauch jukú ainajum nunisjumek anenjauch dutikatajum.

⁹ “Jukigpajum kuichkikesh, orokesh, akachumtaigmin cobrekesh, ¹⁰ waji egkesá jutai jintá atsumainkesh, yapagmamatnukesh, sapatkesh, ushujut-aijkesh; wagki aents takaa duka yuwatnujig suwam auwai.

¹¹ “Tuja yaaktanum jegakjumesh nuniachkugmesh yaakat yaigchinum jegakjumshakam, egaktajum aents kajintsá diimaina nu, nunikjum nuig pujusjum weakjum ukuktajum. ¹² Tuja jegá wayaakjumesh nuwi bat-sataina nunú kumpamatajum. ¹³ Tuja nunú jeganmaya aents aina nu atumnash shiig aneas jujamiagtaik, atum agkan pujamu ajutjama duke ditaish atí; tuja nuninchau ataik, agkan pujamuk atsujiagatui.

¹⁴ “Tuja makichik aentskesh jeen awaintamtan dakitjamainak, atum chicham etsegbau antutnash dakitakuig, nunú jegak ukuakjum, nuni-achkugmesh yaakat jinkugmekesh daweminia tsetse pegatjam akaketkam ukuktajum. ¹⁵ Dekas tajime: Suwimak sukagtam tsawan atina duik, nu yaakta duka, Sodoma Gomorra nugka aajakua nui aents batsamajakú suwimak susamua nuna nagkaesau suwimkan jukiagtinaí.

Waitiamu atin Jesús emtika etsegkamu

16 “Aneaku atajum, wika atumnak ikamyawa batsatbaunum uwig ishimaina numamtuk aents pegkegchau batsatbaunum ishimjime. Nunin asamtai atumek dapi ebetmainchawu iman atajum, nuniakjum paum aidau tutitajish atsujin aina iman atajum. 17 Kuitamamkatajum, wagki achigmakag apu chichaman inagnau aidaunum sujupakagtinaí, dutijamawagmatai jega ditá ijuntaiji aidaunum awaintamawag asutamawagtinaí; 18 dutijamainak gobernador aidaunum etejamawag nuigtú rey aidaunum mash etejamawagtinaí mina nemagtuidau asagmin. Dutijamawagmatai ditá eemtin mina pachittsajum chichaakjum, Apajuí anentaímtuchu aidau eemtinish etsegtugkatín ainagme. 19 Tujash achigmakag sujupainakuish atum chichaktinuk uyumakaigpa wajintu titatjume dushakám, wagki atum chichattajum dúí wajintu chichaktatjume duka tibau atinaitjume. 20 Wagki duka atum chichakchatnaitjume, atumi Apa nuna Wakaní atumin aujtama nu chichaktinaitjume.

21 “Nuniamunum yachin maatnume tusag sujiagtinaí, antsag uchigtin aidaush uchijin sujiagtinaí, uchi aidaushkam apajin shiwagmagtinaí nuninak maidiagtinaí. 22 Ashí aents aidau kajegtabiagtinaí mina daag pachisjum chichaidau asagmin; tujash ní ebetmamag nagkanbaunum jega nu uwemjagtinaí. 23 Tuja makichik yaaktanum pujagmin aintamainakuish tikich yaaktanum tupikaktajum. Dekas tajime, Israelnumia yaakat aina nui mina chichameg pachisjum ashí etsegtugminig, wi Aentsmagan akiinawuwaitag nunak taatnaitjai.

24 “Jintintaiya duka jintinkagtina nuna nagkaesauchi, tuja inakshakam apujin nagkaesauchi. 25 Jintintaiya duka jintinkagtina ibauk amainai, nunisag inaka dushakam apujiya ibauk amainai. Jeenna nuna Beelzebú* tuina nuniaush, ¿wagkag nuna jeen batsata nunash pegké tichagtinme?

Dekas ishamaina nu

(Lc. 12.2-9)

26 “Nuadui ditak ishamkaigpajum; wagki uukbau wantintsuk juwaktinuk makichkish atsawai, antsag dekaachbau dekantsuk juwaktinchakam makichkish atsawai. 27 Nuadui atumek tikichish antachbaunum wi imá atumnak jintinbau antukujum nunú, ashí aents antuinamunum etsejatajum dekaatnume. 28 Iyashmin mainakuish ishamkaigpajum, tujash wakanminak maumainchawu ainawai. Dekas ishamkatajum iyashin, wakannash waitut tuka atina nui egkepamaina nu.

29 “¿Makichik kuichkiuch kayauch piipich juwaku jimag pishak sujush-taigkaih? Tujash nunú pishak aina nuna atumin Apa Apajuiya nu jakati tachamak makichkish jamaitsui; 30 tuja nigka atumi intashim wajupa awa nunash dekaapag shiig dekawai. 31 Nuadui ishamkaigpajum; wagki atumek kuashat pishak aina nuna nagkaesau akik ainagme.

Ishamtsuk Cristo nemagnaitjai tumaamainai

(Lc. 12.8-9)

32 “Makichik aentskesh Cristunuitjai tusa aents aidau eemtin et-segtugkaju aidaunak, wishakam dutiskanuk ditanashkam mina Apag nayaimpinum puja nuna eemtin titinaitjai. 33 Tujash makichik aentskesh, aents aidau eemtin: Wika Cristunak nemagchawuwaitjai tujutiu aidaunak,

* 10:25 “Beelzebú” tawa duka tu chichamkita shiig dekantsui, tujash iwanchnak taku tawai.

wishakam dutiksanuk mina Apag nayaimpinum puja nuna eemtin: Ditak minak nemagtuchu ainawai titinaitjai.

³⁴ “Atumek agkan pujustinme tusas ju nugka juig tauwaitai tajume; tujash wika agkan batsamsatnume tusanuk taachuitjai, maaninak batsamsatnume tusan tauwaitjai. ³⁵ Wika miniuwaitjai uchi apajijai shiwagmagati tusan, nawanjish dukujijai shiwagmagati tuja nuwa nemakush tsatsajijai shiwagmagati tusan; ³⁶ nuniamunum ditá shiwajiya duka niina patayí aina duke agtinai.

³⁷ “Aantsag mina anenmaina nuní nagkaemas apajin, nuniachkush dukujin imá senchi aneak midau amaitsui, antsag uchijin nuniachkush nawanjin mina nagkaetasu aneashkam, midau amaitsui; ³⁸ tuja ni mina nemagtuk waittan dakitaushkam, midau amaitsui. ³⁹ Aents ju nugka jui pujutan imá senchi wakegak, mina nemagtuk waittan dakitauk uwemjashin ainawai; tujash mina nemagtak niina pujutjinash puyatjukchawk, uwemjatnai.

⁴⁰ “Atumin jujamaina duka mina jujuinawai, tuja mina jujuina dushakam mina awetiuwa nuna juinawai. ⁴¹ Makichik aentskesh profeta Apajuí tabaun etsejin asamtai niina jeen juwauk, nu profeta waji shiig pegkejan jukitna dutiksag jukitnai; antsag aents pegkejan takaun juwaushkam, nu aents pegkejan takau waji shiig pegkejan jukitna dutiksag jukitnai. ⁴² Makichik aentskesh ju mina nemagtin imanchauch aina juna, yuminakesh vasonum suwauk, dekas tajime, waji shiig pegkeg juwamu atina nunak megkaekashtinai”.

11

Juan Yamijatin ni jintintaiji aidaun chicham dekaatajum tusa ishiakbau (Lc. 7.18-23)

¹ Jesús ni jintintaiji doce aina nuna ashí jintintua inagnak, nuiya jiinki ditá yaaktaji aina nui jintinkagtak chichaman etsekatatus weuwai.

² Juagkak achikam cárcel egkemas antuku Cristo chichagkagtak wekaebaun; nunik ni jintintaiji aidaun awetiuwai, ³ Jesusan juna iniasti tusa:

—¿Amekaitam taatnai tibauwa nu, atsa tikichnak dakastatag?

⁴ Tama Jesús ayaak:

—Wetajum nunikjum Juan ujaktajum atum antukujum nu nuigtú wainkajum dushakam. ⁵ Wainmachush wainmainawai, shutushkam wekagainawai, lepragtin aidaush tsagainawai, empekush antuinawai, jakaush nantainawai, tuja ujunauch aidaush yamajam chichaman antuinawai, ⁶ shiig aneastinai mina junik anentaimtujuiunatsu duka, tiuwai.

Juan pachisa Jesús etsegkamu (Lc. 7.24-35)

⁷ Nunik ditak waketjamtai, Jesús nui aents batsatun Juagkan pachis iniak: “¿Wají wainkatasagmae uwegshunmash weabiugme? ¿Tagkanan dase umpuau wainkatasagmek weabium? ⁸ ¿Nuniachkugmesh waji wainkatasagmae weabiugme? ¿Aents jaanch shiig pegkejan nugkujá pujau wainkatasagmek weabium? Atumek dekagme jaanch pegkejan nugkuaju aidauk rey aidau jeen pujuinawai. ⁹ Tujash ¿wají wainkatasagmae weabiugme? ¿Profeta wainkatasagmek weabium? Ehé, dekaske, duka profeta nagkaesau aajakui. ¹⁰ Wagki ni pachisa agagbauwa duka: “‘Wi mina chichamjun etsegnun emtikan awemajai, ni jintanak umigtamkati tusan’, tawai.

11 “Dekas tajime, aents akiinaina nuig Juan Yamijatna nuna nagkaesauk atsawai; tujash Apajuí nayaimpinum inama nuig aents dekas iman-chauchia nuuwai niina nagkaesauk.

12 “Juan Yamijatin tauwa nuwi nagkamas yamaikish, Apajuí nayaimpinmaya inama nunak tutitag awagmainak waitkainawai, tuja aents kakakantu aidau nunak emegkakta tuinawai. 13 Ashí profeta aidau nuigtú chicham umiktina duka Juan tauwa imanuiya atinun etsegkajui. 14 Tuja wi taja nu dekas nuninapi takugmek dekaatajum, niyai Elías taatnai tibauwa nu. 15 Ni antutaiji ajamuk antukti”, tiuwai.

16 “¿Jujú aents aina junash wajijai apatkanua tumainaitja? Ditak, uchi aidau plaza aidaunum* pekaamsag kumpajijai untsuninak: 17 ‘Flauta umpuakuish, atumek nantsemachmaugme; wake besemjan kantamkuish, buutchamugme’, tunaiyin aina numamtin ainawai. 18 Wagki Juan taa, yutainash yuachu, umutnash umachkui, Iwanch ajamu asa aniawai, tajume. 19 Tuja Aentsmaga akiinawuwa nu taa yutainash yuwau, umutainash umakui, yuwa yuwakua wegawai, umutnash umú wekaewai, apu kuichkiji ijumin nuigtú tudaugtin aina nuna kumpajiyai, tajume. Tujash Apajuí yachajig, ni pegkeg takaamujiya dui wainnawai”.

Aents pegkegchau idaitan dakitin aidau
(Lc. 10.13-16)

20 Tusa aents dutikmainchau kuashat iwainak yaakat aidaunum takasua nuna najamnun chichagtan nagkamauwai, wagki anentain yapa-jiachaju asagmatai, nunik: 21 “¡Jauhaj Corazigkah aminak wait anentajame! ¡Jauhaj Betsaidah aminash wait anentajame! Tironmash nuigtú Sidogkash aents dutikmainchau atum iwaintukbau ainajum dutikamu ainakug, yaunchkes kuashat anentai idagmak yapajinmain aajakú ainatai. 22 Tujash tajime tsawan dekagmbau atina duik, tironmaya, sidogkanmaya aina nuna nagkaesau atumek suimkak jukiagtin ainagme. 23 Capernaúm,† ¿amesh nayaimpinum juwam atinaitjai tamek? Atsa, amek Hades‡ akaikitnaitme. Wagki aents dutikmainchau atum iwaintukbau ainajum dutika sodomanmayash iwaintukbau ainakug, yamaiya juish yaaktak amainai. 24 Tujash tajame, tsawan suwimak sukagtau atina duik, amek Sodoma nugkanmaya nagkaesau suwimkak jukitnaitme”, tiuwai.

Jesús ni Apají emematbau
(Lc. 10.21-22)

25 Nunú tsawantinig Jesús chichaak: “Emematjame Apawah, nayaimpin nugkan Apujiyah, wagki yacha nuigtú unuimaju aina duka uugkam aents imanchauch aina nunú iwaintuku asamin. 26 Dekaske Apawah, wagki amek aajam wakegame”, tiuwai.

27 “Mina Apag ashí waji aina nunak mina idaitugsauwai. Makichkish wainainatsui Uchijinak, nunak Apajig wainui; antsag makichkish Apagnak wainuk atsawai, nunak Uchijig wainui, nunak Uchijiya nu iwaintam dekamain ainawai”.

* **11:16** Plaza, makichik agkantu yaakat awa nu. † **11:23** “Capernaúm”, griego chichamnumag Cafarnaúm tawai. Tau asamtai tikich tuidauk “Cafarnaúm” taush ainawai. ‡ **11:23** “Hades”, tawa duka griego chichamai, tuja hebreo chichamnumag “Seol” tutaiyai. Nunak aents jakau aidau wakaní batsamtain tawai. Hadesnak nugká initken auwa nuninun iwainawai (Mt. 11.23; Lc. 10.15).

²⁸ “Minai minitajum ashí atum kuashat takat takaakjum pimpikjum nuigtú kijin aidau yanamaina imanikjum pujautigmek, nunak wi ayamti-jatjime. ²⁹ Wi atumin dutikatajum tajim juka umiktajum nuniakjum midau unuimagtajum, wi batajuch nuigtú imanchauch anentaimtumauwaitag nu; aaja nuniakjum in wi atumi wakanminash ayamtiksettajai. ³⁰ Wagki wi atum chicham umiktinun amajim juka yupichuchi nuigtú umikcham-nukesh atsui”.

12

Jesusa jintintaiji aidau tsawan ayamtai aig trigo juki yuwawagbau
(Mr. 2.23-28; Lc. 6.1-5)

¹ Nunú Tsawan weamunum Jesús tsawan ayamtai ai ajak ajakmak-baunum nagkaebau. Nuniamunum niina jintintaiji aidaushkam yapajau asag, trigon kupik jukiaju nejen yuawagtatus. ² Nuniagatman fariseo aidau wainkag:

—¡Jintintaijum aidau diisia! ¡Tsawan ayamtai tsawagmataig makichk-ish dutiknashti tibauwa nunin aig anina nu! tuidau.

³ Tiagtai ni ayaak:

—¿Atumek ausachukaitjum David niijai ijunag yujaamujai yapajuinak, ⁴ jega Apajuí ememattainum wayá, pag Apajuí anagkuamun niijai yujá nujai yuwawajua duka? nunak nigkish yumainchau nuigtú niijai yujá dukesh yumainchau aajakui, nunak imá sacerdotek yuwati tibau aajakui.

⁵ ¿Nuigtush atumek chicham umiktina nuiyag ausachukaitjum, jega Apajuí ememattainum sacerdotek aidauk tsawan ayamtai aig takainawai tawa nu, nuninakush bakumamainjig atsujaina duka? ⁶ Nuniau asamtai tajime, juajui pujawai jega Apajuí ememattaiya nuna nagkaesau dekas imana nu. ⁷ Nuadui atum jujú chicham: “Wait anenkagtin atajum tusan wakegajai, anentag kuntin itaajum nunak dakitajai”, tawa dusha wajina takua tawa nu dekaakjumek, bakumamainun dutikainatsaigkik nimjuuk yujamainchau ainagme; ⁸ wagki Aentsmaga akiinauwa duka, tsawan ayamtaiya nuna Apujiyai, tiuwai.

Tsawan ayamtai aig Jesús aents jau etsagagbau
(Mr. 3.1-6; Lc. 6.6-11)

⁹ Jesús nuiya jiinki jega ditá ijuntaijin jegauwai. ¹⁰ Nuwi aents uwejí jaka ekemkau pujau asamtai, Jesusan kajejuidau asag wajintig timatai etsegtuka bakumí tuidau asag iniinak:

—¿Tsawan ayamtai aish jaush etsagaumainkaih? tuidau.

¹¹ Tama Jesús ayaak:

—¿Atum ainajum anuiya, makichik uwig ajamu aintai, nuniamunum nunú uwig tsawan ayamtai tsawaju ai waanum egkemamtaish, jiiskek idaimainaitjum? ¹² Tujash ¿aentschukait dekas uwijá nagkaesau akika duka? Nunin asamtai tsawan ayamtai aigkish pegkeg aina duka dutik-mainai, tiu.

¹³ Tusa nuna aentsun chichajak:

—Uwejum dakuekta, tiuwai.

Tamawaik uwejin dakuek, tikich kuntujijai betek pegkeg wajasui.

¹⁴ Tujash fariseo aidauk jinjag, Jesusash wajuk maumainkita nuna pachisag chichasajui.

Profeta Jesús pachisa tibau uminkauwa nu

¹⁵ Jesusak nuna dekaa, nuiya jiinki weuwai, nunitai kuashat aents pataetukajui; tuja niishkam ashí jau aidaun etsagau, ¹⁶ dutikak akateau: Mina pachittsagmek etsegkaigpa tusa. ¹⁷ Ju aatus nuniamunum profeta Isafas tibauwa nu uminkauwai, duka:

¹⁸ “Juwai mina inakeg wi etegkauwaitag nu, mina anetaig, niini shiig aneamu ajuta nu.

Niina susatnaitjai mina Wakanjun, dutikam ni aents judiochu aina nunash pegkeg takat aina nuna ujaktinai.

¹⁹ Nigka jiyani wekaechatnai nuigtush untsumash wekaechatnai, jintá wajantá untsumá wekagunakesh antukchagtinai.

²⁰ Nigka aents tudaugtinnash tsagkugsukek idaisashtinai, ayatak tsagku-jug pegkemtiktinai, aikasag aents niina imatikas anentaimtuinachunash nigki dekaskeapi tumamtiktinai. Aatus ashí pegkegchau aidaunak ni pegkejan takaak depetkatnai, ashí aents aidaun Apuji atinai.

²¹ Tuja ashí aents aidaun dakamuji atina duka niyai”, tawai.

Jesusak Beelzebú senchijin wakan pegkegchaunak jiyawai tibau
(Mr. 3.20-27; Lc. 11.14-23; 12.10)

²² Aents wainmachu nuigtú chichachu, iwanch egkemtuamun Jesusan ejetuawajui, dutikawagmatai niishkam etsagaju; dutikam wainmakui nuigtushkam chichakui. ²³ Ashí aents aidauk nuna wainkag, puyatkag: “¿Juchauwashit David weantunum Cristo akiinatnai tibauwa nu?” tuidau.

²⁴ Tuinamun fariseo aidau antukag: “Beelzebú, iwanch aidaun apujiya nuna senchijin iwanch aidaunak jiyawai”, tuidau.

²⁵ Jesusak dita aatus anentaimainamujin dekau asa, tiuwai: “Makichik nugkanmag inamin ainayatak shiwagmagawag maani batsatkujag megkaemai ainawai, nuigtú makichik yaaktanmag batsatiatak nuniachkush nu jeganmag batsamnaitak pempeentunisag maani batsatushkan megkaemai ainawai. ²⁶ Tuja Iwanch pempentuki iwanchin jiyakug, pempeentunisag maaninak nunimainai, ¿nuniaush wajuk ni inamtaijinash kuitamainaita? ²⁷ Atumek Beelzebú senchijin Iwanch aidaunak jiyawai tujutjume; tujash nu aatus aish, ¿atumi jintintajum aidaunash, ya senchinash suwawa Iwanch aidaun jiiktinme tusash? Nuadui, dita iwainmamainawai atum dewakjum tu yujajum nunak. ²⁸ Wagki wi Apajuí Wakaniya nujai Iwanch aidaun jiyaag nunak, atumiin Apajuí inamu asamtai jutikajai.

²⁹ “Aents senchigtina nuna jeen wayaa wajijin yajutkata takug, nuna aentsun jigkajá nuadui yajutmainai ashí wajijinak.

³⁰ “Aents mina yaintuinatsu duka, mina shiwagmatuinawai; nunisag wijai takainatsu dushakam aentsnak dapampainawai.

Wakaní Pegkeji pachisa Jesús tibau
(Mr. 3.28-30)

³¹ “Nuadui tajime, ashí aentsun tudaujig nuigtú Apajuí pegkegchaun chichagkau aidauk tsagkugnainai; tujash Wakaní Pegkejin pegkegchau chichagkau aidauk tsagkugnagchagtinai. ³² Makichik aentskesh Aentsmaga akiinawu nuna pegkegchau chichagkau akush tsagkujam atinai. Tujash Wakaní Pegkejin pegkegchau chichagkau aidauk, yamaiya juish ajumaish tuke tsagkujam achagtinai.

³³ “Numi pegkejak, pegkegnak nejeawai; tuja ajak pegkegchaushkam, pegkegchaunak nejeawai. Nuadui ajakak niina nejenig dekataiyai.

³⁴ ¡Iwanch weantu aidauwah! ¿pegkegchautigmesh, wajuk pegkejash chichaktagmeki? Wagki shiig kuashat anentainum awa nuiyan aentsuk chichawai. ³⁵ Aents pegkejak pegkegnumag anentaimu asa, pegkegnak chichawai. Nunisag aents pegkegchaushkam pegkegchaunmag anentaimu asa, pegkegchaunak chichawai. ³⁶ Tujash wi tajime: Suimak sukagtamu tsawan jegatna duik, ashí aentsuk dita chicham pegkegchau chichakbaujiya nunak imatiksag etsegtumakagtin ainawai. ³⁷ Wagki ame chichamjum aina duik pegkeg diyam atatme nuniachkumesh chichamjumea duik bakumattame”.

Aents pegkegchau aidau Jesusan wainchatai iwainakia tibau
(Mr. 8.12; Lc. 11.29-32)

³⁸ Ujumak fariseo nuigtú maestro chicham umiktinun jintinkagtin aidaujai Jesusan iniinak:

—Maestroh, ame wainchatai iwainamu wainkatasa wakegaji, tuidau.

³⁹ Tiagtai Jesús ayaak:

—Jujú aents pegkegchau nuigtú betek umichu aina nu wainchatai iwainamun wainkatatus wakegainawai. Tujash nunak dutikashtatjai, ayatak profeta Jonás wajukauwa nunisnuk ditanak iwaintuktatjai. ⁴⁰ Wagki Jonás namak muunta ampujin kampatum tsawan kampatum kashi egkemsauwa nunisag, Aentsmaga akiinauwa dushakam nugká initken kampatum tsawan kampatum kashi pujustinai. ⁴¹ Nunisag ninivenmaya aents aidau atak suwimak atina duwi bakugmagtinai. Ditak Jonás Apajuí chichame ujakam, dekaskeapi tusag tudaujin idaiyinak Apajuin nemagkajua dui. Tujash jui atumjai pujawai Jonasa nagkaesau. ⁴² Aantsag surnumia reina aajakua dushakam nugka najatamunmaya Salomogkan tajiuiwai Apajuí yachamtikamun antujuk dekajuatatus, nunú atumnak bakugmagtinai atak suwimak juwamu atina duik, wagki wi Salomogkan nagkaesaun chichagmash umikchau asajum.

⁴³ “Wakan pegkegchau aentsnumia jiikí ajapamak, weawai uwegshunum ni ayamainjin egaak; tuja wainkachag: ⁴⁴ ‘Mina jegajui pujaun jiinkibiag nuwi wakitkitjai tusa anentaimas’, tajua diikmá japimká shiig iwajamun ukumkimun wainak, ⁴⁵ wakitki siete wakan niina nagkaesau pegkegchau aidau yajuak egkemtawai. Dutikam aentsuk duik pegkegchau aajakbauwa nuna nagkaesau pegkegchau weawai. Nunisag jujú aents pegkegchau aina juka dutikam agtatui”.

Jesusa dukují ni yachi aidaujai kautuamu
(Mr. 3.31-35; Lc. 8.19-21)

⁴⁶ Tusa Jesús eke aents aidau aujak pujai niina yachi aidau, dukujijai tajuawag agaa ijunaidau, Jesusjai chichastatus wakegaidau asag. ⁴⁷ Nuniai tikich aents Jesusan ujaak:

—Amina duku, yatsum aidaujai aujsatjai tusa kaunawag agaa ijunui, tau.

⁴⁸ Tusá ujaam, nu aents etseja nuna chichajak:

—¿Yaita mina dukujush, tuja yaita mina yatsug aidaush?

⁴⁹ Tusa ni jintinbau aina nuna inakmas:

—Jujú ainawai mina yatsug, mina dukug aidauk.

⁵⁰ Wagki mina Apag nayaim puja nu wakegamun umijuina nuuwai mina yatsug, mina ubag, mina dukug aina duka, tiuwai.

13

*Ajakan ajakbaun pachis Jesús augmattsamu
(Mr. 4.1-9; Lc. 8.4-8)*

1 Nunú tsawantaik Jesús jegá pujau jiinki kuchanum jegaa uweus keeemsantai, 2 aents aidaushkam tuwagkaju. Imanikagmatai Jesuschakam barcanum egkemag keeemsau, nuniai aents aidauk kaamatak ijunaidau. 3 Nunikagmatai kuashat wajiin pachis augmatus ujaak:

“Ajakan ajakbau ajakmatatus weuwai. 4 Nunik jegantá ajajin jigkai nagkimam jintá kakekaunak, pishak kaketuk amukui. 5 Tikich jigkai kayagnunum nugka imanik atsamunum kakekauwai, nu nunikuk wamkes tsapaidiajui, wagki nulgak awankauch asamtai; 6 nuniktatman etsa jiinak kagkapé initak akaejachu asamtai apeká ijinauwai. 7 Tuja tikich jigkai jagki ayaunum kakekaunak, jagki tsapainak yutuawajui. 8 Tujash tikich jigkaik nugka pegkegnum kakekajui, nunikajuk shiig nejekajui; makí makichik ajak aidau cien, tikich sesenta, tikitchakam treinta aatus nejekajui. 9 Ni antutaiji ajamuk antukti”, tiuwai.

*Augmatta jintinkagtamua nu pachisa tibau
(Mr. 4.10-12; Lc. 8.9-10)*

10 Tusa augmatus ashinkamta niina jintintaiji aidau jegaantag, iniinak: ¿Wagka aents aidau aujkumesh augmatta jintinkagtamu pachismesh tame? tuidau. 11 Tama ni ayaak: “Atumnak Apajuí dekamtijamui ni nayaimpinum inama nu dekachbau aajakajua nuna; tujash ditak nunak dekamain ainatsui. 12 Wagki kuashat aja duka nuní dukap suwam atinai; untsu atsuja duka, nu piipich ajamua dukesh atantam atinai. 13 Nuadui ditanak augmatbaujai pachisan jintinjai; wagki ditak wainainakush wainchau wajukmaina nuninak, antuinakush antachu wajukmaina nunidau asagmatai. 14 Juka ditai uminui profeta Isaiás tibauwa nu, duka tawai: “Antutaijin antuinakush, dekachagtinai; wainainakush, wainchau wajukmaina nunikagtinai.

15 Jujú aents aina nuna anentaimtajig wamak dekamainchau waigkaje, antutaijish epetkamua nunin, jiishkam ejatkamua nunin ainawai.

Nuninchau ainakug jiin wainainak, antutaijin antuinak, anentainish dekinak yapajinmain ainawai, nuninakuí wi etsagaumainaitjai’.

16 “Tujash atumek shiig aneastajum, waintash wainu, antutash antau asajum. 17 Dekas tajime, Kuashat profeta aidau nuigtú aents pegkejan takajakú aina dushakam yamai atum wainjum juna wainkagtatus wakegajakú ainawai. Tujash wainkachu ainawai, antutnash yamai atum antajum juna antukagtatus wakegajakú ainawai, nuninakush ditak antukchajui.

*Ajakan ajakbau timag nunak, juna takun timajai tusa Jesús etsegkamu
(Mr. 4.13-20; Lc. 8.11-15)*

18 “Wi ajakan ajakbaun augmattsan jintinkagtuamag nuna pachisan takui antuktajum. 19 Ashí aents Apajuí inama nu pachisa etsegbaun antuinakush dekamainchau dekapena duka, jigkai jintá kakekauwa nunin ainawai, nunin asamtai Iwanch chicham antukbaujin anentainian kajimitka nuna takun timajai. 20 Jigkai kayagnunum kakekajua duka, chichaman antukag wakegas juina nuna iwainawai; 21 tujash nu ajakak kagkapenachu asa ebetumtsui; numamtuk utugchat minitmarsh nuniachkush Apajuí chichamen umidau asag waitkainam wamkes idaiyinawai. 22 Untsu jigkai jagki ayaunum ajaamua duka, chicham etsegbaun antuina nuuwai;

tujash ju nugkanmaya takat aina nuna imá senchi uyumainak nuigtú wiyakchameata tabaujiya nu tsanuinam chicham antukbaujin sakapajag ajak nejemainchauwa nunin wenawai. ²³ Tujash jigkai nugka pegkegnun kakekajua duka, chicham etsegbaun antukag shiig dekawag dutiksag pegkejan takaina nuna iwainawai, makí makichik ajak treinta, sesenta, cien nejewajua numamtuk”.

Trigo cizañajai pachisa Jesús jintinkagtuamu*

²⁴ Nuigtú tikichin augmatus jintinkagtak: “Apajuí inama duka aents niina ajajin jigkai pegkejan ajakmakua nujai betekmamtainai. ²⁵ Tujash kajiinak batsatai, shiwaji jegají trigo ajakbaunum cizaña ajatuk ukuak weuwai. ²⁶ Dutikamu trigoshkam tsapakag nejenai, cizañashkam paan wantinkajui. ²⁷ Nunikmatai takau aidaushkam ajagtina nuna jegagiag chichajuinak: Apuh, ¿ame jigkai pegkeg ajagmin ajakbauwa nunaish, tuwina cizañash tsapaidiaje? tuidau. ²⁸ Tama ni ayaak: ‘Aunak shiwag aikae’, tau. Tutai takajin aidau aiinak: ‘¿Shimutkaja tegagchagtatjik?’ tuidau. ²⁹ Tiagtai: ‘Atsa, idaisatajum, cizaña tegakmajum trigoshkam tegainijum; ³⁰ idaisatajum mai betekak tsakagtí, nunikmatai juwamu jegatta dui ajaka juu aina nuna, dekatkauk cizaña tegagjum jigkaka batsatajum apenkati, dutikakjum trigok mina ajak ijumtaijua nui ijumjatajum titajai’”, tiuwai.

Mostaza jigkayí pachisa augmattsamu

(Mr. 4.30-34; Lc. 13.18-19)

³¹ Junashkam Jesús tikich augmatbaun pachis jintinkagtak: “Apajuí inama duka, aents mostaza jigkayin niina ajajin ajauwa numamtinai. ³² Dekaskenmag mostaza jigkayig ashí tikich jigkai aina nuní piipichi; tujash tsakakug ajak nugkauchik nejen aina nuna nagkaegas tsakawai; nunik numi wajasmatai kanawen pishak pasugmama numamtinai”, tiuwai.

Levadura pachisa augmattsamu

(Lc. 13.20-21)

³³ Nuigtushkam tikichin augmatus jintinkagtak: “Apajuí inama duka levadurajai betekmamtainai, nuna makichik nuwa juki, harinan kampatuma† imania dekaapa namukbaunum pachimjauwai, dutikam ashí harina namukbauwa nuna wampushmitkajua numamtinai”, tiuwai.

³⁴ Jesusak ashí augmatbau aina nujai aents aidaunak jintintujakui, augmattsukek jintinkagtuachui. ³⁵ Aatus uminkauwai profeta chichaak: “Augmatbaujai chichaktatjai, iwainaktatjai yama nugka najanetnumash dekaachbau aajakua nuna”, tibauwa nunú.

Jesús cizaña augmattsamua nu pachisa tibau

³⁶ Jesús nuna tusa aents aidaun ukuak, jegá wayauwai, nunikmatai jintintajai aidau jegaantag: Cizaña ajanum ajakbau augmattsam timaum nu ujajatkata, tusag segaidau.

³⁷ Tama Jesús ayaak: “Jigkai pegkejan ajakma duka, Aentsmaga akiinauwa nuuwai; ³⁸ aja timag nunak ashí nugkanmayan takun timajai, ajaka jigkayí pegkeg timag dushakam Apajuí inama nuna uchijí aina

* **13:23** “Cizaña”, tawa duka makichik dupayai, trigo niimejai betek. † **13:33** “Kampatum”, tawa nunak apach chichamnumag “tres medidas” tawai. Nuna Antiguo Testamentonum 20 kilos tawai. Tres medidas tawa nunak ocho litros ajawai taush ai, tikich tuidau 10 nuniachkush 11 litros ajumainai tuinawai. Nunin asamtai ii ayatak “tres medidas tawa nuiya, kampatuma imania dekaapa” tusa ukuaji.

nuuwai; untsu cizaña timag duka Iwanchi uchijí aina nuuwai; ³⁹ tuja shiwag ajakú timag duka, Iwanchi. Ajak juwamu timag dushakam nugka nagkanbaunum atina nuna iwainawai, tuja ajakan juu aina duka, ángel ainawai. ⁴⁰ Cizaña tegajá jinum apetiama numamtuk wajaktinai nugka nagkanbaush. ⁴¹ Aentsmaga akiinauwa nunú angelji aidaun ishiaktinai, ní inama nuiyan ashí pegkegchau takau aidau, tikichin pegkegchaun takamtikin aina nuna ijumjatnume tusa; ⁴² dutika jii kegamunum chimpinatnai, dutikam nui batsamsag buutuinak daik takegtú batsamtin ainawai. ⁴³ Untsu pegkejan takasú aina duka, ditá Apají inamtaijiya nui wakag tuke etsajai betek etsantiagtinai. Ní antutaijii ajamuk antukti, tiuwai.

Oro uukbau pachisa jintinkagtuamu

⁴⁴ “Apajú inama duka oro nugkanum yutua ukukbauwa nuninai, nuna makichik aents wainak, nuig ataktú yutua ukuak, shiig aneas wakitki, ashí niina wajijjinak sujug, nunú nugkan sumakui.

Kaya perla pachisa jintinkagtuamu

⁴⁵ “Apajú aentsnum inama duka, aents wají sujin kaya perla tutai dekas pegkeg iwajamu akiktanash akikan wainkatatus egá wekaetukmá, ⁴⁶ wainak wakitki ashí niina wajijjinak sujug sumakua nujai betekmamtinai.

Red augmattsa tibau

⁴⁷ “Aantsag Apajú inama duka, redjai betekmamtinai, nuna namaká main aidau nayantsanum ajugkam ashí namak aidaunak yajumui; ⁴⁸ nunik kuashat chimpinkamtai, kaamatak ajuidiag, ekeemsag namak pegkejan chagkinnum chimpinak, pegkegchau aidaunak utsain ainawai. ⁴⁹ Aatus atinai ju nugka nagkanbaunmashkam, ángel aina nu pegkegchau aina nuna pegkeg aina nuiyan akanjagtinai; ⁵⁰ dutika jii kegamunum chimpinatnai, dutikam nui batsamsag buutuinak daik takegtú batsamtin ainawai”.

⁵¹ Tusa Jesús iniak:

—¿Ashí wi taja dusha antukugmek? tau.

Tutai dita aiinak:

—Ehé Apuh, tiajui.

⁵² Tiagtai ni chichajak:

—Ashí maestro chicham umiktinun jintinkagtin aidau Apajú inama nuiyan unuimauk, aents jeentin oroji ukukbaun, yamagman nuniachkush ajutan jiiyama nuninawai, tiuwai.

Jesús Nazaret pujusbau

(Mr. 6.1-6; Lc. 4.16-30)

⁵³ Jesús nu augmatbaun ashimak, nuiya juaki weuwai, ⁵⁴ nunik niina nugkeen jegaa, jega ijuntainum wayá jintinkagtau, nunitai anentai jegagchag chichainak:

—¿Jusha tuwí unuimajuita imatika deka dusha? ¿Utugsaya aents dutikmainchaunash dutikawa? ⁵⁵ ¿Jujú carpintero uchijiya duchaukaih? ¿Dukujish María, yachi aidaush Santiago, José, Simón, Judas ainajama? ⁵⁶ ¿Ni umayí aidaushkam jui jutiijai batsata aniaish, wajukaya niish imatikash dekawa? tuidau.

⁵⁷ Tusa pampantuinam Jesús chichaak:

—Profetak niina nugkenig tuja niina jeenish eme anentamak achauwai, tiuwai.

⁵⁸ Tau asa, nuanuig kuashat aents dutikmainchau aidaunak iwainajag takaschauwai, dekaskeapi tuinachu asagmatai.

14

Juan Yamijatin maamu (Mr. 6.14-29; Lc. 9.7-9)

¹ Nunú tsawantinig Herodes tetrarca Jesús pachisa tuinamun antuku, ² nunik ni inake aidaun chichajak: “Duka Juan Yamijatnai, nunú nantakne, nuniku asa senchijí ajawai aents dutikmainchaun iwaina nunak”, tau.

³ Nunak Herodesak niina yachi Felipe nuwe Herodiasan nuwatuk pujau asa Juagkan achiká cárcel egkeau aajakui. ⁴ Wagki Juan chichajak: “Amek, yatsumi nuweg nuwatramek pujumaitsume”, tibau asa.

⁵ Herodesak maumainaitak aents aidaun ishamak idaisauwai; wagki Juagnak profetayai tuidau asagmatai. ⁶ Tujash dutikauwaitak Herodes akinamuyi tsawagmatai, Herodiasa nawanji ipaamu aidaun eemtin nantsemauwai, nuniak Herodesan shiig awajkauwai, ⁷ dutikam makichkish yapajimainchaun anagkuauwai ni wajina segattawa nunak imatiksag susatatus. ⁸ Tima nuwauchishkam dukují akatjam, Herodesan jegantun:

—Platonum Juan Yamijatnun buuké sujustá, tusa segauwai.

⁹ Nunú tama Rey Herodesak wake besekui, nuniayatak ipaamu aidaush antuinamunum yapajimainchaun anagkuau asa, susatnume tiuwai.

¹⁰ Dutika inamjauwai Juan cárcel puja nuna buuken tsupiktinme tusa.

¹¹ Timatai Juagkan buuken platonum egkejag itaantajui, dutika nuwauchin susajui. Ni juki dukujin susauwai. ¹² Dutikawagmatai Juagkan jintintaiji aidaun kautuawag iyashin jukiag ukusag ukuinak, Jesusan wejiag ujakajui.

Jesús cinco mil aents ayugkamu (Mr. 6.30-44; Lc. 9.10-17; Jn. 6.1-15)

¹³ Jesús nuna antuk, nuiya jiinki barcanum egkemag uwejush agkan-tunum nigki pujustatus weuwai; nuniai aents aidaushkam dekaawag, yaaktanmaya juakiag kukag shimutkajui. ¹⁴ Nuniai Jesús barcanmaya jinkamá, kuashat aents tuwaká ijunun wainak, wait anenjauwai, nunik jau aidaun ikaunmamunash etsagakui. ¹⁵ Nuniai kiyau asamtai, niina jintintaiji aidaun jegaantag:

—Juig aents atsamunum batsatji, etsash akaewai. Aentsuk akatjam ishiakta, yaakat yaijuch aina nui wegag dita yuwatnun sumaktinme, tuidau.

¹⁶ Tutai Jesús ayaak:

—Wemain ainatsui, atum dita yuwatnuk susatajum, tau.

¹⁷ Tama dita aiinak:

—Atsugtamui ayatak cinco pag nuigtú jimag namak ajutjamui.

¹⁸ Tiagtai Jesús:

—Jui itagtuatajum, tiuwai. ¹⁹ Tusa aents aidaunak chijichi aina nui batsamsatnume tiuwai. Tusa cinco pagkan nuigtú jimag namaka nuna juki, nayaimpinum pagkai see tusa, pag aidaun puujá ni jintintaiji aidaun tinabiu; dutikam dita aents aidaun tinabiau. ²⁰ Tuja ashí yuwawagmatai, ampinkaun yajuakag doce chagkinnun aimjajui. ²¹ Nui yuawaju aina duka cinco mil aishmag tumain aajakajui; nuwa aidaun, uchi aidaush dekapatsuk.

Jesús yumí awanken wekaesá webau
(Mr. 6.45-52; Jn. 6.16-21)

²² Nuna dutika, Jesusak ni jintintaiji aidaunak barcanum egkemjag ditá eemak kuchá amain katigtinme tusa ishimak, nigka aents aidaun akateg ukuktatus juwakui. ²³ Nunik aents aidaun akateg ukuak, mujanum kanakí wakuawai Apajuin aujsatatus. Nunik kiyagmataishkam nuig nigki pujau, ²⁴ nuniai barcashkam atushat nugkan ukukí wegai, dase igku umpuau, dutikamu asa yumi tajeamujiya nu barcanak senchi pegau. ²⁵ Imaniai tsawagtatak weamunum, Jesús yumí awanken wekaegas ditan adjikauwai. ²⁶ Nunik yumí awanken wekaegas minittaman jintintaiji aidau wainkag, puyatkag:

—¡Pasun, pasun! tusag untsumaidau sapigmaidau asag.

²⁷ Imatiagtai Jesús chichaak:

—¡Witjai, ishamkaigpajum! ¡Imatigpajum! tau.

²⁸ Tutai Pedro ayaak:

—Apuh, dekas ametkumek minash, yuminum wekaesam tantata tujutia, tau.

²⁹ Tutai:

—Minitá, tiuwai Jesuschakam.

Tama Pedroskam barcanmaya jiinki, yumí awanken wekaegas Jesús wajanunum jeganatus wegau. ³⁰ Tujash dase senchi dasentun wainak ishankau, nunik yuminum tepeak:

—¡Apuh, achigkata! tau.

³¹ Taig Jesuschakam uwegnum achikú, dutika:

—¡Aents imanish dekaskeapi tuchauwah! ¿Wagka utujimkaume?, tiuwai.

³² Tusa barcanum egkemjagmatai, daseg mijakui. ³³ Nunikmatai ashí barcanum chimpujuk Jesusan jegaantag emematuinak:

—¡Amek dekaskenum Apajuin Uchijiyaitme!, tiajui.

Jesús Genesarenumia jau aidau etsagakbau
(Mr. 6.53-56)

³⁴ Nuna nunikag katigkag Genesaret nugkanum jegawajui. ³⁵ Nunikmatai nuiya aents aidau Jesusa wainkajui, nunikag ashí nu nugkanmag etsegkajui, dutikawagmatai ashí jau aidaunak niina ikautuidau; ³⁶ dutikawajam ni jaanchji weninakesh antigtajai, idaikagtusta tusag segaidau, tuja ashí aents antigkaju aidauk tsagakajui.

15

Aentsun pegkegchau ema nu pachisa tibau
(Mr. 7.1-23)

¹ Ujumak fariseo aidau nuigtú maestro chicham umiktinun jintinkagtin aidaujai Jerusalegnumia kaunawag Jesusan jegaantag iniinak:

² —¿Wagka amina jintintaijum aidash iina muunji umiktajum tibauwa nuna umitskesh ikigmatskesh yuinawa? tuidau.

³ Tiagtai Jesús ayaak:

—¿Wagka tujash atumesh atumi muunjum umiktajum tibauwa nu umiakjumesh, Apajuí umiktajum tibauwa dusha umiatsjume? ⁴ Wagki Apajuí: “Amina apa, dukujai eme anentsam diistá, tuja apajin, dukujinakesh pegkegchaun chichajuk tsagkugtsuk maatajum”, tiuwai. ⁵ Tujash atumek: Makichik aentsuk apajin, nuniachkush dukujinakesh: “Wika yaimaitsugme, wagki ashí ajutuina junak, Apajuin ofrendan susajai”,

tumainai tajume, ⁶ nuniau asag, apajinak dukujinash yaimaitsui tajume. Aaja tau asajum atumek, atumi muunjumi umitaijiya nu umiakjum Apajuí umiktajum tibauwa duka imanchauch awajsaugme. ⁷ ¡Tsanumin aidauwah! profeta Isaías atumin pachipasag shiig tiuwai:

⁸ “Ju aents aina juka weninig eme anenjuinawai; tujash anentainig atushat minaig ainawai.

⁹ Mina emematjuina duka wainkayai; jintinkagtuina nunak, aents tibauwa nuna jintinkagtuinawai”.

¹⁰ Nuna tii, Jesús aents aidau untsuká:

—Antuktajum, nuniakjum dekaatajum, tiuwai. ¹¹ Wenunum wayá duka aentsnak pegkegchau ematsui; untsu wenunmaya jiina nuwai aentsun pegkegchau ema duka.

¹² Timatai ni jintintaiji aidau Jesusan jegaantag iniinak:

—¿Amesh wainkamkum fariseo aidau ame tame nuna antukag kajekagma dusha?, tuidau.

¹³ Tama ni ayaak:

—Ashí ajak mina Apag nayaimpinum puja nu ajachbau aidauk, kagkapejai tegam agtinai. ¹⁴ Idaisatajum, ditak wainmainatsui, nuninaitak tikich wainmachu aidau jintan inaktustatus wajukmaina nuninawai. Wainmachua nunú tikich wainmachun jintan inaktustatus weakug mai waanum iyaumainai.

¹⁵ Tutai Pedro Jesusan:

—Ame augmathbau pachisa timaum nu ujajatkata, tau.

¹⁶ Tutai Jesús ayaak:

—¿Atumesh duka dekamainchauk dekapeajum? ¹⁷ ¿Dekatsjumekek ashí wenunum wayauk ampugnum nagkaemaki, atsumamunum wegam letrinanum ajapna duka? ¹⁸ Tujash wenunum jiina duka anentainmaya jiinui; nuniau asa aentsnash pegkegchau emawai. ¹⁹ Anentainmaya jiinui pegkegchau anentaibau aidau, magkagtam aidau, tsanijinat, ashí pegkegchau iyashnum takanit, kasamat aidau, dekaskechu aig tsanumjut aidau, pegkegchau chichagkagtut aina nu. ²⁰ Ju aina juuwai aentsun pegkegchau ema duka, tujash ikigmagjum yuwatajum timawa nunú, ikigmatsuk yuwamuk aentsnak pegkegchau ematsui.

Canaagnumia nuwa Jesusan dekaskeapi tibau

(Mr. 7:24-30)

²¹ Jesús nuiya jiinki Tiro nugkanum, Sidón nugkanmash weuwai. ²² Nui jegattaman canaagnumia nuwa Jesusan untsukmaikia minis:

—¡Apuh, Davita uchijiyah, minash wait anenjugta! ¡Mina nawanjun wakan pegkegchau egkemtug senchi waitkagta nu!, tau.

²³ Tamash Jesusak machikish aikchauwai. Nunitai ni jintintaiji aidau jegaantag:

—Iina ukujin minis untsú untsunkawa minajama, wakitkita tikia, tuidau.

²⁴ Tama Jesús:

—Apajuik minak Israel aents megkaejau aina nuig awetiuwai.

²⁵ Tujash nuwak Jesusa eemtin tikishmatug pujus:

—Apuh, yainkata, tau.

²⁶ Tutai Jesús ayaak:

—Uchijui aidau pag atankí yawá suwamuk pegkegchauwai, tau.

²⁷ Tutai nuwa ayaak:

—Apuh dekaske; tujash yawashkam mesanmayan apaji tsaisa akakeamun yuwamajamah, tau.

²⁸ Tutai Jesus chichajak:

—Nawantah, dekaskeapi tabaujum shiig muun ajutjamui, ame wakegam duka nunisag uminkati, tiuwai.

Nuna taig wamkes niina nawanjishkam tsagajui.

Jesus kuashat aents jaidau etsagakbau

²⁹ Jesus nuiya jiinki Galilea kuchajin tikiju jegauwai; nunik nainnum waka ekeemsauwai. ³⁰ Nunikmatai kuashat aents aidau ni eketbaunum tuwakaju; nuninak shutu aidau, wainmachu aidau, manchantuku aidau, chichachu aidau, nuigtu kuashat jau aidauashkam ni eketbaunum ikautuidau. Nunikmatai Jesuschakam etsagakui. ³¹ Nuna Dutikamta aents aidauk anentai jegagchaju chichachu aidau chichaidau, manchantuku aidau pegkeg wedau, shutu aidauashkam wekagaidau, wainmachu aidauashkam wainmuidaun wainaidau asag. Nuninak Israela Apajuijia nuna emematuidau.

Jesus cuatro mil aents ayugkamu

(Mr. 8.1-9)

³² Nunikagmatai Jesus ni jintintaiji aidau untuka chichajak:

—Aents aina juna wait anentuinajai, wagki kumpatum tsawan jui wijai batsatainawai; tujash yumainjig atsujuinawai. Yujumkan ayugtsukek dita jeenig ishimaitujai, wagki jintu wekamag jaka iyaantainum tau asan, tau.

³³ Tutai ni jintintaiji aidau:

—¿Tuwiya kukiya yumainush sumainaita, aents atsamunum pujag junautish?, tuidau.

³⁴ Tiagtai Jesus ditan iniak:

—¿Wajupa pagka ajutjamainawa?, tau.

Tutai dita aiinak:

—Siete pag nuigtu wajumchik namak ajutjamui, tiajui.

³⁵ Tiagtai Jesus aents aidau nak nugka batsamsatajum tusa ³⁶ siete pag aina nuna juki nuigtu namak aina nunashkam juki Apajuin see tii, puuja jintintaiji aina nuna susajui, dutikam dita aents aidau tinamkajui.

³⁷ Dutikawajam ashi shiig yuwawajui, nuigtushkam ampinjau aidau siete chagkinnun aimjajui. ³⁸ Nui yuawajuk cuatro mil aishmag aajakajui; nuwa aidau, uchi aidau dekapatsuk. ³⁹ Juna dutika Jesus aents aidau akateg ukuak, barcanum egkemag Magdala nugkanum weuwai.

16

Fariseo saduceo aidaujai, wainchatai iwainakta tusa Jesusan segamu

(Mr. 8.11-13; Lc. 12.54-56)

¹ Fariseo aidau, saduceo aidaujai pegkegchau anentaiyai dekapagsatatus Jesusan jegaantajui, nunikag nayaimpinmaya wainchatai iwainakti tusag segaidau.

² Tiagtai ni ayaak: “Atumek agkuntai: Pegkeg tsawan atatui, nayaim kapantu wajasé”, tinu ainagme; ³ untsu kashikmasjum: “Yamai tsawanta juik senchi dasenkattawai, wagki nayaim kapantu wajas yujagkim suwe wajasé”, tajume. Atum nayaimpi niime diisjum nunikatui tinu ainayatkugmesh, ¿wajuk asagma tsawan aina nui wantinkagtin aina dusha dekamainchaush dekapegme? ⁴ Jujui aents pegkegchau aidau Apajui chichamenash umigchau aina nu, wainchatai iwainakta tusag

segatuinawai. Tujash dita tuina nunak nuigtuk iwaintukchattajai, ayatak Jonás wajakauwa nunisnuk ditanak iwaintuktatjai, tusa ukuak weuwai.

Fariseo jintinkagtuina duka, lewaduraya numamtinai tibau
(Mr. 8.14-21)

⁵ Jesusa jintintaiji aidau kuchá amain weenak pagkan kajimatki jutsuk katigkajui. ⁶ Nunikbaunum Jesús ditan chichajak:

—Nijah, fariseo aidau nuigtú saduceo lewaduraji aina nujai kuitamamkatajum, tau.

⁷ Tutai niina jintintaiji aidau pempeentunikiag:

—Junak ii pag takukchag dui tujamji, ⁸ tusa tuinamun Jesús antuk:

—Aents imanis dekaskeapi tuchau aidauwah, ¿wagka pagkak atsugtamji tajume? ⁹ ¿Eke dekamainchau dekapeajum nuigtush aneaktsugmek, wi cinco pagka nuiyan cinco mil aents tinamkam yuinak ampijagmataish, wajupa chagkina aimjabiugme duka? ¹⁰ ¿Nuigtush aneaktsugmek, wi siete pagka nuiyan cuatro mil aents tinamkam yuinak ampijagmataish, wajupa chagkina aimjabiugme dusha? ¹¹ ¿Wagka antumainchaush dekapeagme, wi kuitamamkatajum fariseo, saduceo lewadurajiya nujai taja nunak pagkan pachisan tatsug duka? tiuwai.

¹² Timatai dekawajui, Jesusak lewadura pag najanatasa pachimtaiya nuna tatsupaita; fariseo, saduceo jintinkagtutaiji aidanap tawa tusag.

Pedro, Jesusan amek Cristuitme tibau
(Mr. 8.27-30; Lc. 9.18-22)

¹³ Jesús nugka Cesarea, Filipino yaaktamamua nui jegaatatus wesa, ni jintintaiji aidanun iniak:

—¿Aents aidash Aentsmaga akiinawua nunash yayai tuinawa?, tau.

¹⁴ Tutai dita ainak:

—Ujumak aents aidau: “Juan Yamijatnai”, tuinai; tikich chichaidau: “Auk Eliasai”, taush ainawai. Nuniai tikich tuidau: “Jeremiasai nuni-achkush profeta aajakú aina nuiyaskaitai” tuinawai, tuidau.

¹⁵ Tiagtai ditan iniak:

—¿Tujash atumesh minash yayai tujutjume?, tau.

¹⁶ Tutai Simón Pedro ayaak:

—Amek Cristo, Apajuí tuke pujuuwa nuna Uchijiyaitme, tiuwai.

¹⁷ Tutai Jesús ayaak:

—Simón, Jonasa uchijiyah amek shiig aneasta, aminak aents nejentin numpenna nuninkesh tujamchae, mina Apag nayaimpinum puja nunú dekamtijamae. ¹⁸ Wishakam amina tajame, yamaik amek Pedro* atatme. Jujú kaya muunta jui ekenin mina iglesiagnak† jegamkattajai, nunak jaamua dukesh depetkashtinai; ¹⁹ amina idaitustatjame Apajuí inama nuna llave‡ ujatiana numamtuk awajkati tusan; dutikamu asam ame ju nugka jui chicham etsegbaun dekaskeapi tachauk nayaimpinmag tsagkugnagchatnai. Untsu ame chicham etsegbaun dekaskeapi tauk aantsag nayaimpinmashkam tsagkugnagtinai, —tiuwai.

* **16:18** “Pedro” tawa duka griego chichamnumag “Petros” tawai, nunak “kaya” taku tawai.

† **16:18** Griego chichamnum “eklesia” tawa nunak tayatak apach chichamnum againak “iglesia” tuinawai. Nunak “asamblea” (ijunbau) taku tawai. ‡ **16:19** Llave, “llavé amastatjame” tawa nunak Juan capítulo 20 versículo 23num tawa nunak tayatak tawai; tujash nu dutikatna nunak imá apóstol aina duke dutikawagtinun tiuwai.

²⁰ Nuna tusa ni jintintaiji aidaun, makichkish tikich aidauk, nigka Cristuwai tusagmek tiigpajum, tiuwai.

Jesús ni maam atinji etsegkamu
(Mr. 8.31-33; Lc. 9.22)

²¹ Nui nagkamas Jesús ni jintintaiji aidau ujanan nagkabau, ni Jerusalén jegamtai apu aidau, sacerdote apuji aidau, maestro chicham umiktinun jintinkagtin aidaujai waitkasa maam, kampaum tsawanta jui nantaktina nuna pachis. ²² Tutai Pedro akanak juki kakaakan chichajak:

—Apuh, Apajuí wakechataik, duka nuninuk makichkish nagkaetamait-sui, tau.

²³ Tujash Jesús Pedron ayampatua chichajak:

—iWetá Iwanchih, ukugkita! Ame utugchat aputugme, amek dekatsme Apajuí dutikatjai tabaujiya duka, nuadui nuna umikai tusam tujutme, aentsú anentaimtaig anentaimam duwi, tiuwai.

Jesús mina nemagtukta tautigmek atum wakegamuk idaikujum nemagtuktajum tibau

(Mr. 8.34-38; Lc. 9.23-27)

²⁴ Nuna tii Jesús ni jintintaiji aidaun:

—Makichik aentskesh mina jintintaig atatus wakegawk, niinunak idaiyak, waitiakush nemagtukti. ²⁵ Wagki aents ju nugka jui pujutan imá senchi wakegak, mina nemagtuk waittan dakitauk uwemjashtin ainawai. Tujash mina nemagtak niina pujutinash puyatjukchawk, uwemjatnai.

²⁶ ¿Wajinma yaimainaita aentsnash ashí nugka juiyan niinu emakush, wakanin megkaemaina nuish? ¿Nuniachkush wajupa wakaninash akikmatmainaita? ²⁷ Wagki Aentsmaga akiinauwa duka, ni Apají imanjiya nujai nuigtú niina angelji aidaujai minitnai, nuniak makí makichik aents takasbaujiya dutiksag akiktinai. ²⁸ Dekas tajime Atum jui ijunjum juiyati-jum ujumak aidautijum eke jatsuk, Aentsmaga akiinauwa nu inamjatatus minau wainkatnutigmesh ajume, tiuwai.

17

Jesús yapajinamu

(Mr. 9.1-13; Lc. 9.28-36)

¹ Seis tsawan asa Jesús, Pedron, Jacobo niina yachi Juangkan aatus juki muja yakí tsakajunum weajui. ² Nuwi ditash wainainai Jesús niimé yapajinawwai; nunik yapig etsajai betek etsantu, niina jaanchjishkam shiig puju tsaaptin wajasui. ³ Nuniai Moisés Eliasjai Jesusan aujuinak ijuntatman wainkajui. ⁴ Nunik Pedro Jesusan chichajak:

—Apuh, jutiish maigkis jui batsatagtai!, amesh wakegakminig kampa-um aak umikagmi, makichik aminu, tikich Moisesdau, nuigtú Eliasdau, tau.

⁵ Nuna aatus Pedro chichai, yujagkim winchamtin ashí ditajai ijumag ijikui; nuniai yujagminmaya chichaak: “Juuwai mina uchig anetaijuk, wi etegkamu. Nigki antugkatajum”, tiuwai.

⁶ Nu tabaan antukag, niina jintintaiji aidau senchi ishamkag tikishmajag tsuntsunawaju. ⁷ Nunikagmatai Jesús ditan tajuntun antiak:

—Nantaktajum; ishamkaigpajum, tau.

⁸ Tama diistakamá imá Jesusak wajattaman wainkajui.

⁹ Nunik Jesús mujanmaya minisá:

—Atum wainkaujum nu pachisjume makichik aentskesh ujakaigpajum, Aentsmaga akiinawuwa nu jakau aina nuiya nantatsaigkik, tiu.

¹⁰ Nuna timatai, ni jintintaiji aidau inidau:

—¿Wagka maestro chicham umiktinun jintinkagtin aidaush, deatkauk Eliás taatnai tuinawa?

¹¹ Tusa iniam Jesús ayaak:

—Duka dekaske, Eliás niyá eemak taa tikich takastinun umiktinai tibauwa duka. ¹² Tujash wi tajime, Eliasak taabi, nunikunak ditak dekachaju ainawai, nuninak ashí dita wakegaina dutiksag niinak in-agkeatkiamyai. Nunisag Aentsmaga akiinawuwa dushakam dita waitkam atawai, tiuwai.

¹³ Nuna tutai ni jintintaiji aidaushkam dekaawajui, Jesusak Juan Yamijatnunap pachis tawa tusag.

Wakan pegkegchau uchin egkentuamun Jesús etsagagbau

(Mr. 9.14-29; Lc. 9.37-43)

¹⁴ Aents tuwakbaunum jegamtai, makichik aents Jesusa tajuntun tikishmatug chichajak:

¹⁵ —Apuh, mina uchijush wait anenjutjata, nantu nantutin jauwe nuniak senchi waitnuwe, imaniak kuashtá jinum patamnuwe nuniak namakash iyainuwe; ¹⁶ imaniakui jintintaijum aidaun itaantamjai; tujash etsagagchagmae, tau.

¹⁷ Tutai Jesús ayaak:

—¿Aents dekaskeapi tuchau pegkegchau aidauwah! ¿Wajupá dukapea atumjaish pujumainaitja? ¿Wajupak katsunjatjime?

Jui uchi itantá, tiuwai.

¹⁸ Tusa Jesús iwanchin jiyaká uchinmayan jiikiuwai, dutikamuik uchishkam pegkeg wajasui. ¹⁹ Nuna dutikamtai ajuma dui jintintaiji aidau Jesusan niinak akanki iniinak:

—¿Wagka jutiish wakan pegkegchau jiiktakamaish tujinkamji?, tuidau.

²⁰ Tiagtai Jesús chichaak:

—Atumnak dekaskeapi tabauk imaanis atsugtamainawai. Dekas tajime, dekaskeapi tabaujum mostaza jigkayiya nuninkesh ajutjamainakuig, ju muja jujú chichagkujum: “Juig atsuk tikich yantannum wetá”, tamak nunisag nagkaemamainai. Makichkish tujinmainuk atsugtamainaitjume.

²¹ Tujash jujú wakanik ayuno takaaku, Apajui aujku jii-mainai, tiuwai.

Jesús awentsag ni mantamnatnuji etsegkamu

(Mr. 9.30-32; Lc. 9.43-45)

²² Galilea weenak ijunja shimamunum Jesús jintintaiji aidaun chichajak:

—Aentsmaga akiinawuwa nunak, aents aidaunum sujukagtatui, ²³ dutikawagmatai maawagtatui; tujash kampatum tsawanta jui nantaktatui, tau.

Tutai ditashkam senchi wake besekajui.

Jega Apajui ememattainum kuichik akikmaktin tibau

²⁴ Nunik Jesús ni jintintai aidaujai yaakat Capernaúm jegawagmatai, jega Apajui ememattainum kuichik itaamun yajumin aidau Pedron jegaan-tag iniinak:

—¿Amina jintinjamnuk jega Apajui ememattainum kuichik itaata tibauwa nunak akikmakchattawak?, tuidau.

²⁵ Tama Pedro ayaak:

—Ehé akikmaktatui, tusa ukuak jegá wayamtai. Jesús niyá iniak:

—¿Simogka amesh wajuk anentaimtame? ¿Ju nugka juiya Rey aidaush yaá aents aidauna akikmakta tuinawa? ¿Ditá uchijish akikmainawak atsa tikich aents aidaunak akikmakta tuina?, tau.

²⁶ Tutai Pedro ayaak:

—Ikaya aina nuna akikmakta tuinawai, tau. Tutai Jesús ayaak:

—Dekaske, ditá uchijig akikmainatsui; ²⁷ tujash nunin aig dita shiig juwakchainum tau asá kuchanum weme agsea ajugtá, dutikam dekatkau namak ajuittam nuna weni iwanjam diistá. Nui kuichik egkemtai. Nunú kuichik jukim jega Apajuí ememattainum weme, midau aminujai akikmakta, tiuwai.

18

Yaki dekas imá wagaakush atinaita tiagbau

(Mr. 9.33-37; Lc. 9.46-48)

¹ Nunú tsawantinig ni jintintaiji aidau Jesusa jegaantag:

¿Apajuí inama nuish yaita dekas iman wagaakush? tusag inidau.

² Tiagtai Jesús makichik uchin untsuká itan ditá ejapen awajus,

³ chichaak:

Dekas tajime, atum yapajinajum uchi aina numamtin wegachkugmek, Apajuí inama nuig waimain ainatsjume. ⁴ Nunin asamtai makichkikesh imanchauch anenmamak jujú uchía junin weena nuuwai Apajuí inama nui iman wagaakua duka. ⁵ Makichkikesh ju uchía juninun mina daajui juidauk, mina jujuinawai.

Tikichin pegkegchau takamtikaidau pachisa tibau

(Mr. 9.42-48; Lc. 17.1-2)

⁶ “Makichkikesh jujú piipich aina juiya mina dekaskeapi tujutuina nuna tudaun takamtikaidauk, dekas kaya muun juki kuntugnum jigká detua nayantsa kunajin ajugká ajapmainus ajapachbau ainatai. ⁷ ¡Wait anentuinajai aents aidaunak, tsanumin aidau midiagtin asagmatai! Duka uwemtumainchau atinai; tujash ¡wait anentuinajai ya aents aidaun tudaun takamtikiagtatua nunak!

⁸ “Nuadui amina uwejum nuniachkush amina dawem tudaunum ajumpamain awajtamkuig tsupika ajapata; pegkejai uwejí muntuch wasá nuniachkush shutusá pujutnum wayamuk, jimag uwegtin jimag nawentín jii tuke kajinchauwa nui ajapeam amaina nu. ⁹ Tuja amina jiiim tudaunum ajumpamain awajtamkuish, ukuinkam ajapata; pegkejai makichik jiiintin pujutnum wayamuk, jimag jiiintin jii waitiaku pujutaiya nui ajapeam amaina nu.

Uwig megkaekaun pachis Jesús augmattsamu

(Lc. 15.3-7)

¹⁰ “Nijah, imanchauch diisaigpajum ju piipich aina jujú, wagki ángel aidau ditan kuitamin aina duka nayaimpinmag mina Apag nayaim puja nunak tuke wainainawai. ¹¹ Wagki Aentsmaga akiinawau duka, megkaekauwa nuna uwentikatatus tauwai.

¹² “¿Wajuk anentaimjume? Aents cien uwig ajamu makichik wagak megkaetukam, noventa y nueve uwija nunak muja aidaunum batsaak, ¿megkaekauwa nuna egaak wemainchaukai? ¹³ Nunik wainak, dekaskenmag nuna imá shiig anenmainai, noventa y nueve megkaekachu aina nuna nagkaegas. ¹⁴ Nunisag atumi Apa nayaimpinum puja dushakam, jujú piipich aina juiya makichkish megkaekatnume tusag wakegatsui.

*Apajuí nemajin aidautish wajuk tsagkugdaimainaita
(Lc. 17.3)*

¹⁵ “Amina yatsum tudaun takagtamkuig, imá nigki ausata, dutikakum ni dewakbaujish dekamtikata. Ame tama antugtamkuig, duka yatsum yaigkume. ¹⁶ Untsu antugtamchakuig, makichik aentskesh nuniachkumesh jimagkesh jukim wetá, jimag nuniachkush kempatumkesh antuinamunum ashí chichamua duka dekaamu atí. ¹⁷ Ditanash antugchakuig, iglesia ujaktá; iglesianash antugchakuig, aents Apajuí anentaimtuchu nuigtú apú kuichkiji atinun ijumin aidau aentsú tsanug yajutin aina nuninuk emá idaisatajum. ¹⁸ Dekas tajime, atum ju nugka jui aaja yayachmak nayaimpinmaskam tsagkugnagchatnai. Untsu atum ju nugka jui tsagkujamuk, nayaimpinmaskam aantsag tsagkugnagtinai. ¹⁹ Ataktushkam awentsanuk tajime, ju nugka jui jimagtigmekesh atuekajum, ashí waji pachisjum segamak mina Apag nayaimpinum puja nu amastatjume. ²⁰ Wagki tuwí jimag nuniachkush kempatumkesh mina daajui ijunag pujuinawa, nuwi wika ditajai pujajai”.

²¹ Nuna tutai Pedro Jesusan jegantun iniak:

—Apuh, ¿wajupa imania tsagkugmainaitja mina yatsug tudaun takag-takuish? ¿Sieteya imania tsagkugmainkaitag?

²² Tama Jesús ayaak:

—Sieteya duke tsagkujata tatsujame, tuke tsagkugsamké ata tajai, tiuwai.

Aents tsagkugkagtugchauwa nu pachisa augmattsamu

²³ “Nuadui Apajuí nayaimpinum inama duka, rey niina takajin diwibau asa, akikmakti tiuwa nujai betekmantinai. ²⁴ Dutika nagkamak, aents diez mil kuichkin diwimkagtaun juki ejetuawajui. ²⁵ Tuja nunú akikmamainji atsuju asamtai, apu inamjauwai nuwesh, uchiji aidaush nuigtú ashí wajiiji aina dushakam sujunkati, dutika diwijig akikmakbau atí tusa. ²⁶ Tutai apú takagnushkam tikishmag segak: Apuh, wait aneamam dakagsata, amina diwimjam nunak ashí akiktatjame, tau. ²⁷ Tama apushkam niina inaken wait anenmain diisá, diwijinak tsagkujauwai dutika agkan idaisauwai. ²⁸ Tujash nunú apú inake jiinki wekamá, nijai takataiji cien denario* diwimjam igkugku, nunik suwenum ininá awajus: ‘Diwimjam nunú yamaik akigkata’, tusa segau. ²⁹ Imatikam nijai takauwa dushakam tikishmatug segak: ‘Wait aneamam dakagsata, amina diwimjam nunak ashí akiktatjame’, tau. ³⁰ Tamash antugsuk, achiká egkeauwai, nui pujus diwin akikmakti tusa. ³¹ Nunú dutikamun tikich ditajai takatai aina nu wainkag shiig wake besemag diisajui, nunikag apun jegajag ashí dita wainkamunak imatiksag ujakajui. ³² Dutikam apushkam itatnume tusa inamjauwai, nunik: ‘¡Inak pegkegchauwah! ame segatu asamin ashí mina diwimjam nunak tsagkujamjame. ³³ Dutikamu asam ameshkam, amijai takau diwimjama duka wait anenmain awajkaume, wi amina wait anenjamjam dutiksamak’. ³⁴ Tusa apu senchi kajeká achijatin aidaun inajui suwimkan susatnume, dutikam ashí niina diwijinak akikmakti tusa”. ³⁵ Dutiksag mina Apag nayaimpinum puja dushakam atumi yatsum dekas anentaiyai tsagkugchataik dutijamawagtinai, tiuwai.

* **18:28** “Denario”, romano aidau kuichkiji. Makichik tsawantai takasá jumaina nunin aajakui.

19

*Jesús nuwak idaimaitsui tibau**(Mr. 10.1-12; Lc. 16.18)*

¹ Jesús nuna tusa ashimak, Galilean ukuak Judea nugkanum jegaa Jordagka amain katigkui. ² Nunikmatai kuashat aents aidau pataetukaju, dutikam nui jau aidanash kuashat etsagakui.

³ Nuniai ujumak fariseo aidau Jesusan jegaantaju, nunikag pegkegchau anentaiyai iniinak:

—¿Nuwennush utugchat atsaish nuwenash idaimainkaih?, tuidau.

⁴ Tama Jesús ayaak:

—¿Atumek ausachukaitjum Agagbaunum, Apajuí yama nagkamchakug aishmagkun nuwajai najanauwai, ⁵ dutika chichajak: “Aishmag nuwenkug apajin, dukujin ukuak niina nuwejaig ijunmainai, nuniak nuwejai makichik iyash wegawai” tawa duka? ⁶ Nunin asag jimagchauwai, makichik iyash weawai. Nuadui aatus Apajuí dutikamua nunak aentsuk datupau-mainchau ainawai, tiuwai.

⁷ Tutai dita iniinak:

—¿Wagka tujash Moisesash papí nuwa idaiku najantain umiká nuwá susa idaisati tiuwaita?

⁸ Tiagtai Jesús ayaak:

—Nunak atum antumtikmainchau ainajum dui, Moisesak nuwemik idaimainaitjume tujabijui, tujash nagkamtinig Apajuik nunak tichauwai.

⁹ Wi tajime, makichkikesh nuwe tsanijinachu aig tikichjai nuwenkug ekagmawai, nunisag nuwa idaisamujai nuwenushkam ekagmawai, tiuwai.

¹⁰ Tutai ni jintintaiji aidau:

—Aatus aishmag nuwejai nunimainaitkuig, nuwenmaitsujama, tuidau.

¹¹ Tiagtai ni ayaak:

—Nunak ashí aentsuk nunimain ainatsui, ya nunin atí tibauwaita duke nunimain ainawai. ¹² Awai aents tuke nuwenmainchau akiinau aidash; nuniai tikichik aents kagamtikamush ainawai, tuja aents nigki Apajuí inama nuna etsegtin atajai tabaunum nuwenmainchaush ainawai. Ni nunimain dekapmamuk; nunikti, tiuwai.

*Jesús uchi ikautkamu**(Mr. 10.13-16; Lc. 18.15-17)*

¹³ Ujumak uchi aidau Jesusan ikautuawajui achiká Apajuin aujtusti tusag; dutikiagtai ni jintintaiji aidau uchin ikaunmaina nuna jiyaidau.

¹⁴ Nudiagtai Jesús chichaak:

—Idaisatajum uchi aidauk minai minitnume, utujiakaigpajum, wagki Apajuí inama duka jujú uchi aina junin aina nudauwai, tiuwai.

¹⁵ Nuna tusa uchi aidau makí makichik buuknum uwejin achiká pegkegnum yumigkis ukuak weuwai.

*Datsauch wiyakuch Jesusan iniasbau**(Mr. 10.17-27; Lc. 18.18-27)*

¹⁶ Makichik aents Jesusan jegantun iniak:

—Maestroh, ¿wají pegkegna takamainaitja pujut nagkanchaun jukitanush?, tau.

¹⁷ Tutai Jesús ayaak:

—¿Wagka pegkeg pachismesh ininme? Imá makichki pegkeja duka. Tujash ame pujutnum wayatasam wakegakmek, chicham umiktina nu umiktá, tau.

¹⁸ Tama ni ayaak:

—¿Tu ainawa?, tau.

Tutai Jesús ayaak:

—Magkagtuawaipa, tsanijinawaipa, kasamkaipa, wainkamek tsanumk-agtjuai, ¹⁹ amina apa dukujai eme anentsam diistá, nuniakum tikich aidaush amek anenmamsam aneeta, tiu.

²⁰ Tama datsauch ayaak:

—Wika nunak datsauch asanuk ashí umikuitjai. ¿Nuiqtush wajina dutikmainaitja?, tau.

²¹ Tutai Jesús ayaak:

—Ame pegkeg atasam wakegakmek, weme amina wajiijum ajutjamaina duka sujukam, ujunauch aina nu susata, dutikam nayaimpinum wajiigmik ajutjamatui; nunika taam mina nemagtukta, tiuwai.

²² Nu tama datsauchik wake beseká weuwai, wagki shiig wiyakuch asa.

²³ Nunikmatai Jesús jintintaiji aidaun chichajak:

—Dekas tajime, wiyakuch aidauk kakajus Apajuí inama nuig wayashtin ainawai. ²⁴ Awentsanuk tajime: Camellok aujá jiinish waigkag yupichu nagkaemamainai, tujash wiyakuch Apajuí inamtaijin wayata tabauk utugchatai.

²⁵ Nu tabaun jintintaiji aidau antukag shiig anentai jegagchag:

—¿Yaki tujash uwemjaush amainaita? tudayinau.

²⁶ Tiagtai Jesús ditan diis chichajak:

—Aents diismak dutikmaitsui, tujash Apajuik ashí dutikmainai, tiuwai.

Mina nemagtuidauk ditanu ukukbaujin nagkaesau jukiagtinaí tibau (Mr. 10.28-31; Lc. 18.28-30)

²⁷ Tutai Pedro ayaak:

—Nijah, jutii ashí iina ajutjamaina duka ukuinaku ame nemagkabiajim nuutish, ¿wajig jukitnaitji?, tau.

²⁸ Tutai Jesús ayaak:

—Dekas tajime, ashí najankamu aidau yamagmitkamu jegatna nunú tsawantin, Aentsmaga akiinawuwa nu ni ekeemsa inamtaiji imana nui ekeemsamtaí, atum mina nemagtuku aidautigmek doce ekeemtainum ekeemsajum, Israelan uchijí doce aajakajua nunú weantu inagtin ainagme.

²⁹ Tuja ashí aents mina nemagtuinak jeen, yachi aidaun, umayí aidaun, apajin, dukujin, nuwen, uchijí aidaun, nugke aidaun ukukiaju aidauk, dita ukukbaujin nagkaesau cieгка imaania jukiagtin ainawai, nuigtushkam pu-jut tuke atina nunash jukiagtinaí. ³⁰ Tujash kuashat aents dekatkau atatus wakegaina nu ukunum juwakagtinaí. Untsu iman atan anentaimtumachu aina nu dekatkauk agtinaí.

20

Aents ajanum takastajum tusa ishiakbau pachisa jintinkagtuamú

¹ ‘Apajuí inama duka, uva ajagtin, shiig kashikmas ajajin takastin aidaun aentsun egaak jiinkiuwa nujai betekmamtinaí. ² Nunik takastin aina nuna igkug, makichik tsawan takagtustajum akiktajime tusa chichasá, uva ajakbaunum ajajin ishiakui. ³ Nunik ataktú a las nueve tumain ai jiinkiuwai, nunikmá tikich aidaushkam plazanum wainak batsatun wainak, ⁴ chichajak: ‘Atumshakam mina ajajui uva ajakbauwa nui takaakjum wetajum, atumnashkam dutiksanuk betek akiktajime, tama ditashkam weajui’. ⁵ Dutika ataktushkam etsa tajiaju ai jiinkiuwai, nunik wakettsag a las tres wegaishkam jiinkiuwai, nunik nunashkam

betek dutikauwai. ⁶ Nunik a las cinco jegattak wegai jiinki wekamá, tikich aidaushkam wainak ijuntatman wainkauwai, nunik iniak: ‘¿Wagka atumesh takatskesh etsash akapagme?’, tau. ⁷ Tama dita aiinak: ‘Inak makichik aentskesh, takastá tusag egapainatsui’. Tiagtai: ‘Atumshakam mina ajag uva ajakbauwa nui takaakjum wetajum’, tiuwai. ⁸ Nunik kiyagmatai uva ajagtina nu, niina inake takatá diinun chichajak: ‘Ashí takau aidau untsuktá dutikam inagnamunum wayawagma nui nagkam-sam, nagkamchak wayawagma imanui akigtá’, tiuwai. ⁹ Timatai a las cinco jegattak wegai wayau aidau kaunawag, makichik tsawantai takasbaunum akikmataiya dutiksag makí makichik aidau makichik denario* jukiaju. ¹⁰ Dutikamtai yama nagkamchak wayau aidau jegaantag, jutiinak aan dukapeap akigmaktatji tusag anentaimaidau, tujash ditashkam dutiksag makí makichik, makichik denario jukiaju. ¹¹ Nuna jukiag, ajagtina nu augmattan nagkamawaju, ¹² nunikag chichajuinak: ‘¿Wagka jujú aidau inagnamunum wayawag makichik hora takasagma nuniaish jutiijai betekash akikume, dekas jutii kijin takainaku etsa sukumainakuish katsunja tsawan ashimag nuniajinish?’, tuidau. ¹³ Tiagtai ajagtina nu dita aina nuiyan makichik ayaak: ‘Kumpajuh, wika aminak makichik pegkegchaunakesh dutikatsjame, ¿wi yama nagkamchakun makichik denario akiktajame tama, ayú tichamkum? ¹⁴ Juuwai aminua duka, jukim wetá, inagnamunum waya nunash amina amaajam dutiksanuk susatasan wakegajai. ¹⁵ ¿Mina kuichkignak wi wakegamun dutikmainchaukaitag? ¿Wi pegkeg asan dutikag duiká ame tikich kajejakum tu wekaegam?’, tiuwai.

¹⁶ “Tujash kuashat aents deatkau atatus wakegaina nu ukunum juwakagtina. Untsu iman atan anentaimtumachu aina nu deatkauk agtina!”.

Kompatuma juna Jesús ni mantamnatnuji etsegkamu

(Mr. 10.32-34; Lc. 18.31-34)

¹⁷ Jesús Jerusalén wakatatus wesa jintaa jintintaiji doce aina nuna akanki chichajak:

¹⁸ —Yamai Jerusalén wakattaji, nunikmatai Aentsmaga akiinauwa nunak achikag sacerdote apuji, maestro chicham umiktinun jintinkagtin aidaunum sujukagtatui maatnume tusag, ¹⁹ dutikam dita jukiag judiochu aidaunum sujukagtatui; dushí dushikinakuag, asutiawag, achijag maatnume tusag; tujash kompatum tsawanta jui nantaktatui, tiu.

Zebedeo nuwe uchijinun pachis Jesusan segamú

(Mr. 10.35-45)

²⁰ Zebedeo uchijí aina nuna dukují niina uchijí aidaujai ijunag, Jesusan jegantun niina eemtin tikishmaju, wait anenjugi tusa segatatus. ²¹ Nunitai Jesús iniak:

—¿Wají wakegame?, tau.

Tama nuwa ayaak:

—Ame inamtaigmin mina uchig jimaja juna, makichik untsujin ekenak, tikichia junak menajin eketjusti tajame, tau.

²² Tutai Jesús ayaak:

—Atumek dekatsjume mina segatjum duka.

¿Atumesh wi waittsattag imaanikjumesh waitmainuk ainajum? tau. Tama dita aiinak:

* 20:9 “Denario”, diistá Mt. 18.28.

Ehé, iishkam duka nunimainaitji, tuidau.

²³ Tiagtai Jesús ditan chichajak:

—Dekaskenum wi waittsattag nunisjumek waittsatin ainagme; tujash mina untsujui niigtú mina menajui ekeemsatajum tusanuk wika tumait-sujai; nunak mina Apag ya aidau ekeemsatnuna umigkauwaita nuna dutikatnai, tiuwai.

²⁴ Nu tabaun tikich diez jintintaiji aina nu antukag, mai yachijai kajegkajui. ²⁵ Nuniagtai Jesús ditan untsuká chichajak:

—Atumek dekagme, aents ju nugka juiya aentsun apuji aidauk, aentsnak ditanua nunin emak inainawai, tuja nunú apu aina nuna aentsji aidashkam aentsnak, dita wakegamun inainawai. ²⁶ Tujash atum ainajum anuiyag nuninuk amaitsui; dekas apu atatus wakegawk atum ainajum anuiyag, tikichi takajin amainai; ²⁷ Atum ainajum anuiya dekatkau atatus wakegawk, atumi inakem wemainai. ²⁸ Wagki Aentsmaga akiinauwa duka umigtuktinme tusag taachui, nigka tikich aidauun yaigtatus tauwai, nunik mantamnak kuashat aentsun uwemtikata tau asa.

Jesús jimag aents wainmachu etsagagbau

(Mr. 10.46-52; Lc. 18.35-43)

²⁹ Jericonmaya dita jiinki weagtai, kuashat aents Jesusan saetukajui.

³⁰ Nuniamunum jimag aents wainmachu aidau jintá yantamen eketaidau, Jesús nagkaebaun antukag:

—iApuh, Davita uchijiyah, jutiish wait anenkagtugta! tusag untsuidau.

³¹ Imatiagtai aents aidau itatkati tusag jiyaidau; tujash ditak nuní senchi untsumkag:

—iApuh, Davita uchijiyah, jutiish wait anenkagtugta!, tuidau.

³² Imatjam Jesús nui wajan untsuk ikaunman iniak:

—¿Utugtukti tusagma wakegagme?, tau.

³³ Tama dita aiinak:

—Apuh, iik wainmaktasa wakegaji, tuidau.

³⁴ Tiagtai Jesuschakam wait anentug ditá jiin antinkaju, dutikamuik wainmakag, ditashkam Jesusan nemagkaju.

21

Jesús Jerusalén wayamu

(Mr. 11.1-11; Lc. 19.28-40; Jn. 12.12-19)

¹ Jerusalén tikiju wajasag Betfagé jegawaju Olivosan mujají awa nui, nunik Jesús ni jintintaijin jimajan awemauwai, ² dutikak:

—Wetajum au yaakat yaijuch awa awi, nunikjum wainkattagme makhichik burra* jigkam uchijijai wajau. Nunú atia jukijum itagtuatajum. ³ Nu dutikagmin makhichik aentskesh wajinjutpatig, takuush: Apu atsumawai, wamak awagtugmaktatui, tusajum ukuktajum, tiuwai.

⁴ Jujú junikua duka profeta tibuawa nu uminkauwai, duka:

⁵ “Yaakat Jerusalén batsamin aina nu titajum:

‘Diistá amina Reyjum minitjamui, imanchauch wajasá, burronum ekemi, burro tsakat, kuntin kijin takamtiktaiya nuna uchijin’ ”, tawai.

* **21:2** “Burra” tawa nunak versión Dios Habla Hoy (DHH) tawai, nuiya jukimui antumain atí tusa. Tuja tikich versión Reina-Valeranmag (RV) nunak tayatak “asna” tawai.

⁶ Tiajam jintintaiji aidaushkam wegag Jesús tibaunak imatiksag umikaju. ⁷ Dutikawag burran uchijijai itantag, jaanchji aidaun tuntupen aitk-agmatai, Jesús ekebiuwai. ⁸ Kuashat aents asag, jinta Jesús wea-munum jaanchji aidaun ainak emainai, tikich aidauk dukan tsupig jintá ainag emaidaush aidau. ⁹ Imatikainak aents emak weedau, ukunum minidaushkam untsumkag:

—¡Shiig anentsagmi Apu David weantunum akiinauwa nunú! ¡Apu Apajuí awemam miná duka pegkegmai! ¡Apajuishkam emematiagmi! wajaidau.

¹⁰ Nunik Jesús Jerusalén wayamtai ashí aents aidauk pampaidau, nuninak:

—¿Jusha yaita? tusag inimaidau.

¹¹ Tiagtai:

—Juka profeta Jesusai, Nazaret, Galilea awa nuiyayai, tuidau.

Jega Apajuí ememattainum aents batsatun Jesús jiigbau
(Mr. 11.15-19; Lc. 19.45-48; Jn. 2.13-22)

¹² Jesús jega Apajuí ememattainum wayau, nunik nui sujak batsatun sumau aidaujai ashí agaa jiijú, dutikak kuichki yapajiin aidau mesaji-nashkam shitaki akaketuk, paumá sujin aidau ekeemtaiji aidaunash dutiksag akaketkau; ¹³ dutika:

—Agagbau awai: “Mina jegajuk, Apajuí aujku ijuntai tutai atinai” tawai; nuniaig atum kasá batsamtai emaugme, tiuwai.

¹⁴ Jega Apajuí ememattainum Jesusan jegajuawajui wainmachu aidau, shutú aidaujai; nunikmatai niishkam etsagakui. ¹⁵ Tujash Jesús anen-tai jegamainchau dutikamun sacerdote apuji aidau, maestro chicham umiktinun jintinkagtin aidaujai wainkag, uchi aidaushkam jega Apajuí ememattainum batsamas untsumainak: “¡Davita uchijí emematiagmi!”, awajuinamun antukag kajekag, ¹⁶ Jesusan chichajuinak:

—¿Antamek jujú imataina dusha?, tuidau.

Tiagtai Jesús ayaak:

—Ehé, antajai; tujash ¿atumeke tuke ausachuk ainajum: “Uchi tsakat aidau, muntsuaku aidaujai emematjitnume tusam umikume” tawa duka? tiuwai.

¹⁷ Nuna tusa yaaktan ukuak jiinki, Betania weuwai, nunik nui kanajui.

Higuera nejechun Jesús yumigjamu
(Mr. 11.12-14, 20-26)

¹⁸ Kashikmas yaakat waketak, Jesús yapajuau. ¹⁹ Nuniak higuera jintá yantamchijin wajattaman wainak jegantau, tujash nejeg atsau ayatak dukak wajas atai, chichajak:

—¡Amek tuke nejekchatnaitme! tamawaik higerashkam kukajá wa-jasú. ²⁰ Nunikun wainkag jintintaiji aidau puyatkajui, nunikag Jesusan iniinak:

—¿Wajukaya higerash tabauwaikish kukajé?, tuidau.

²¹ Tiagtai Jesús ayaak:

—Dekas tajime, atum dekaskeapi tabau ajutjamkui utujibaush atsug-tamkuig, imá higeran jutikag dukek dutikmainchau ainagme, ju muja jukesh: ¡Jui atsuk nayantsanum wajaata! tamak nunimainai. ²² Ashí atum Apajuí aujukum, dekaskeapi tabauwai segakjumeke, jukittagme, tiuwai.

Sacerdote apuji aidau Jesusan iniasagbau

(Mr. 11.27-33; Lc. 20.1-8)

²³ Jesús jega Apajuí ememattainum wayá jintinkagtak wajai, sacerdote apuji aidau nuigtú judío apuji aidaujai tajuntag iniinak:

—¿Aminash ya jintinkagtuata tusash awetamae? ¿Yana chichamenia jusha juniame?, tuidau.

²⁴ Tama Jesús ayaak:

—Wishakam makichik iniastajime, nunú aigkagmin wisha ya aikata tujutkuiya jutikaja nuna titajime. ²⁵ ¿Juagnash ya yamijatjata tiuwaita, Apajuik awemauwait atsa aents aidauk awemauwait?, tau.

Tama ditak pempeentunikiag chichainak: “Juagnak Apajuí awemauwai tajinish, ‘¿tujash wagka dekaskeapi tichau ainagme tujamtatajama?’”

²⁶ Tuja aents aidau awemauwai titag takuish, aents aidau ishamaji, Juagnak profetayai tuidau asagmatai”. ²⁷ Nunikag Jesusan aiinak:

—Dekatsji, tuidau.

Tiagtai ni ayaak:

—Wisha tichattajime yana chichamenia jutikaja nunak, tiuwai.

Aents jimag uchigtin pachisa tibau

²⁸ Jesús ditan iniak:

—¿Atumesh jusha wajuk anentaimtagme? Makichik aents jimag uchiji ajujakui, nunú uchiji emkauwa nuna chichajak: “Uchijuh, yamai uva ajakbauwa nui weme takastá”, tiuwai. ²⁹ Tama uchi ayaak: “Maake, wechattajai”, tau. Tiuwaitak anentai yapajia, weuwai. ³⁰ Tikichia nunashkam jegantum dutiksag tiuwai. Tama nu ayaak: “Ayú apuh, wi wetajai”, tiuwai. Tujash wechauwai. ³¹ ¿Ju jimaja juiyash, tuuwa apaji wakegamunash dutikauwaita? Tuinam dita aimainak:

—Dekatkauwa nuuwai, tuidau.

Tiagtai Jesús ayaak:

—Dekas tajime, apú kuichkiji atinun ijumin aidau nuigtú nuwa akiká takatai aina duka, atumek wayasjuminig Apajuí inamtaijinig ditá wainawai. ³² Wagki Juan Yamijatna duka pegkeg takatan jintinjamata-tus tauwai, tujash atumek dekaskeapi tichau ainagme; atum nuni-agmin apú kuichkiji atinun ijumin aidau nuigtú nuwa akiká takatai aidsashkam dekaskeapi tiajui, tujash atumek ashí nu wainiatkujum tudau-jum idaisajum pujutjum yapajiachu ainagme nunikjum niish dekaskeapi tumainaitjum nu, tiuwai.

—Dekatkauwa nuuwai, tuidau.

Tiagtai Jesús ayaak:

—Dekas tajime, apú kuichkiji atinun ijumin aidau nuigtú nuwa akiká takatai aina duka, atumek wayasjuminig Apajuí inamtaijinig ditá wainawai. ³² Wagki Juan Yamijatna duka pegkeg takatan jintinjamata-tus tauwai, tujash atumek dekaskeapi tichau ainagme; atum nuni-agmin apú kuichkiji atinun ijumin aidau nuigtú nuwa akiká takatai aidsashkam dekaskeapi tiajui, tujash atumek ashí nu wainiatkujum tudau-jum idaisajum pujutjum yapajiachu ainagme nunikjum niish dekaskeapi tumainaitjum nu, tiuwai.

—Dekatkauwa nuuwai, tuidau.

Tiagtai Jesús ayaak:

—Dekas tajime, apú kuichkiji atinun ijumin aidau nuigtú nuwa akiká takatai aina duka, atumek wayasjuminig Apajuí inamtaijinig ditá wainawai. ³² Wagki Juan Yamijatna duka pegkeg takatan jintinjamata-tus tauwai, tujash atumek dekaskeapi tichau ainagme; atum nuni-agmin apú kuichkiji atinun ijumin aidau nuigtú nuwa akiká takatai aidsashkam dekaskeapi tiajui, tujash atumek ashí nu wainiatkujum tudau-jum idaisajum pujutjum yapajiachu ainagme nunikjum niish dekaskeapi tumainaitjum nu, tiuwai.

Takau pegkegchau aidau pachisa tibau

(Mr. 12.1-12; Lc. 20.9-18)

³³ “Antuktajum tikich augmatbaushkam: Aajakui makichik aents jeentin, nunú uvan ajakui, dutika tanishig, uva yumiji ijutinnash umik, wajasá diistinnash torre ajiauwai. Dutika ujumak takau aidau ukujuk tikich nugkanum weuwai. ³⁴ Nunik uva juwaamu jegamtai, ni inake aidau ishikui takau aidau batsatbaunum, niinush wajupaita nuna jukitnume tusa. ³⁵ Tujash takau aidau inak awemamu aina nuna achikag, makichkia nuna suimainak tikichia nunak maawag, tikichia nunak kayai tukuja-jui. ³⁶ Dutikawagmatai nagkamchaku ishiakbauwa nuní kuashat inaken ishitkauwai; tujash nunashkam dutiksag dutikawajui.

³⁷ “Dutikawagmatai inagnamunum niina uchijin awemauwai: ‘Mina uchignak ajantusampap diimain ainawa’, tusa anentaimas. ³⁸ Tujash takau aina nu uchi wainkag ditak pempeentunikiag: ‘Auwai ju aja juna jukitnuk,

³⁷ “Dutikawagmatai inagnamunum niina uchijin awemauwai: ‘Mina uchignak ajantusampap diimain ainawa’, tusa anentaimas. ³⁸ Tujash takau aina nu uchi wainkag ditak pempeentunikiag: ‘Auwai ju aja juna jukitnuk,

³⁷ “Dutikawagmatai inagnamunum niina uchijin awemauwai: ‘Mina uchignak ajantusampap diimain ainawa’, tusa anentaimas. ³⁸ Tujash takau aina nu uchi wainkag ditak pempeentunikiag: ‘Auwai ju aja juna jukitnuk,

dekas maa ajapami, dutikaku juka iinu emami', tuidau. ³⁹ Tusag achiká jukiag uva ajakbaun ukumtikiag maawajui.

⁴⁰ “Dusha atumesh wajuk anentaimtagme, dekas uva ajagtina nunú minakush, ¿utugmainai tajume takau aina nunash?”

⁴¹ Tutai dita aiinak:

—Nunú pegkegchau aina nunak wait anentsuk kajeemainai, dutika tikich takau aidaun idaitumainai uva juut jegamtai juwinak niinu amaina nuna sujustinme tusa.

⁴² Tiagtai Jesús ditan ayaak:

—¿Atumek Agagbau aina duka tuke ausachuk ainajum, nui:

“Kayá ekenag jegamin aidau, kaya pegkegchawai tusag dakitajua nunú yamai dekas jegá ichichkatin kaya apujutia iman wajasé;

Nunak Apu Apajuí dutikau asamtai jutii diismak anentai ejetumaitsui” tawa duka?

⁴³ “Nuadui tajime, Apajuí atumin inapa nunak idaiyak tikich aentsun inagtinai, midau atin aidaunak dutiksag itagtuatnume tau asa. ⁴⁴ Nunú kaya nui iyauk, tsainkatnai; untsu kaya aentsnum iyaakug, yuku ematnai”.

⁴⁵ Nuna Jesús augmattai sacerdote apuji aidau, fariseo aidaujai antukag, ditan pachis tawa nuna degagmamawaju. ⁴⁶ Nunikag achiktag tuidau; tujash aents aidaun ishamaidau, Jesusak profetayai tuidau asagmatai.

22

Nuwenku fiestamamu pachisa Jesús augmattsamu (Lc. 14.15-24)

¹ Jesús ditan aujuinak ataktú nagkama augmatbaun pachis tau: ² “Apajuí inama duka makichik rey uchiji nuwenatin asamtai yutai shiig pegkejan umigkauwa nujai betekmamtinai. ³ Dutika ishiakui inake aidaun, ipaamu aina nuna ujaktinme tusa, tujash ditak nui minitnak dakitajui. ⁴ Nunikagmatai ataktú tikich inake aidaun ishimak: ‘Ipak aidaun ujektajum, yumainuk uminkae, mina toro aidaujun, kuntin uduekbau aidaunashkam maatajum tijai; ashí uminkae, nuwenbaunum minitnume, timae titajum’ tusa. ⁵ Tujash ipaamu aidauk antugkachajui. Nunikag makichik ajajin wegai, tikich wajiijin sujak weuwai, ⁶ nuniai tikich aina duka, apú inake ishiakbau aina nuna achikag, wai waitkainakuag maawajui. ⁷ Dutikamun rey antuk kajaká suntaji aidaun ishitkauwai, dutikam wejiag aents magkagtuau aina nuna kajaká, ashí yaaktajinash apejuk ukugkijui. ⁸ Nuna dutika inake aidaun chichajak: ‘Nuwenbaunum yuwatnuk uminkae, tujash ipamu aidauk minimainchau ainawai. ⁹ Wetajum yaaktanum jinta aina nui, nunikjum ashí aents atum wainbauk ipaatajum nuwenbaunum kaunatnume’, tiuwai. ¹⁰ Tijiam inak aidaushkam jintanum shiyakag, ashí aents dita wainbaunak ipaawajui pegkeg aidaun, pegkegchau aidaujai. Imatikamu asa jeganmag aentsuk piyaku.

¹¹ “Nunikmatai rey wayau, ipak aidaun diistatus. Nunikmá makichik aents nuwenbaunum weaku nugkutain nugkuagchaun wainkau, ¹² nunik: ‘Kumpajuh, ¿wajuk amesh juish wayaume jaanch nuwenbaunum nugkuta nugkutskesh?’ Tamash nigka chichaachu. ¹³ Nunitai rey ni inake aidaun chichajak: ‘Juka dawenum jigkagjum, uwejinish jigkagjum agaa suwea awi jiktajum, nui pujus buutak nainak takegtú pujuti’, tiuwai. ¹⁴ Wagki untsukbau aidauk kuashtai, tujash etejamu aidauk ujumke”.

*Kuichik akikmamu pachisa tibau**(Mr. 12.13-17; Lc. 20.20-26)*

¹⁵ Timatai fariseo aidau jijnag chichaman umikaju, Jesús wajintig nunikmatai tsanumjugmi tusag. ¹⁶ Nunikag ishiakajui ditá aentsji aina nuiyan ujumak, Herodesan aentsji aina nujai, Jesusan iniastinme tusag, dutikawajam:

—Maestroh, dekainaji amek dekaskea duke tame duka, Apajuí jinti dekaskea duke jintinkagtam dushakam, aents tuina dukesh uyumatsme wagki dita shiig awajkatasam tachau asam. ¹⁷ Nuniau asamin tajame: ¿Amesh wajinpa, Cesarash kuichkish akimainkaih atsa akimainchaukaih?, tuidau.

¹⁸ Tiagtai Jesús dita pegkegchau anentaiyai tabaun dekaju asa:

—¿Tsanumin aidauwah! ¿Wagka pegkegchaunum dekapjustasagmesh wakejutagme? ¹⁹ Iwaintugkakjua kuichik akikmajum nunú, tau. Tama makichik denario ejentuntaju.

²⁰ Dutikam ditan iniak:

—¿Yana niimegaita jusha, tuja yana daajiyaita ju agagbauwa jusha?, tau.

²¹ Tama dita aiinak:

—Cesardauwai,* tuidau.

Tiagtai Jesús ayaak:

—Cesardauwa duka, César susatajum; Apajuinua duka, Apajuí susatajum, tiuwai.

²² Nuna antukag anentai jegagchaju, nunikag ukuinak weajui.

*Jakau nantagtin pachisa iniimsamu**(Mr. 12.18-27; Lc. 20.27-40)*

²³ Nunú tsawantaik saduceo aidaushkam Jesusan wejiaju, ditak jakau aidauk nantagchatnai tinu asag, nunikag iniinak:

²⁴ —Maestroh, Moisés chichaak: “Aents nuwan juki uchin akiitsuk jakamtaig, ni yachintin nuwan juki uchin akiimainai, dutika yachí uchijiya nunin emamainai”, tiuwai. ²⁵ Nuniamunum, jutii ainag juiya siete yachigbau aayi. Nuanuiya nagkamchak nuwenauwa duka uchin akiitsuk jakauwai, nuniak nuwanak yachin ukugkiuwai. ²⁶ Nunikmatai jimaja ju jukishkam nunisag jakauwai, nunisag kempatuma dushakam jakauwai, nuni nuninakua siete aajakajua duka ashí jinawajui. ²⁷ Nu ashí jinawagmatai pujus nuwashkam jakauwai. ²⁸ Nuna nunikajua duish, atak nantamunmash, ¿Siete yachi aajakajua nu ashí nunak nuwatkajua duish, yana nuweg atinaita? tuidau.

²⁹ Tama Jesús ayaak:

—Atumek Agagbau aina duka, nuigtú Apajuí senchijiya dushakam dekachu asajum dewakugme. ³⁰ Atak nantamu atina duik nuwenbauk atsutnai, ángel nayaimpinum batsata nuninuk agtinai. ³¹ Tujash ¿jakau nantajagtinun pachis Apajuí tibau agagbauwa duka ausachuk ainajum, nuanuig:

³² “ ‘Witjai Abraham, Isaac, Jacob aina nuna Apajuijinuk’ tawa duka? Apajuik jakau aidaun Apajuijichui, iwaaku aina nuna Apajujiyai”, tiuwai.

³³ Aents aidau nuna antukag, Jesús jintinkagtamun anentai jegagchaju.

*Chicham umiktin dekas imana nu**(Mr. 12.28-34)*

* **22:21** “César”, tawa nunak Roma apujiya nuna tujakajui, tujash duka aentsú dajichui, duka makichik título Roma apuji taku tujakbauwai.

³⁴ Jesús saduceo aidaun itatmitkakbaun fariseo aidau antukag, ijunjaju; ³⁵ nunikbaunum dita aina nuiya makichik maestro chicham umiktinun jintinkagtin, pegkegchau anentaiyai iniak:

³⁶ —Maestroh, ¿chicham umimain dekas imana dusha tuwaita?, tau.

³⁷ Tama Jesús ayaak:

—Amina Apujum Apajuiya nu, ashí amina anentaimjai, ashí amina wakanmijai, ashí amina anentaimtagmijai aneeta, tawai. ³⁸ Juuwai dekas imanuk, nuigtú chicham dekatkau umimaina duka. ³⁹ Tuja tikichia duka jujai betekmantinai, duka: “Tikich aidaush amek anenmamsam aneeta”, tawai. ⁴⁰ Ju jimag chicham umiktina juig ashí chicham umiktin aidau nuigtú profeta aidau tibauwa dushakam ainawai, tiuwai.

Cristush yana uchijgkita tibau

(Mr. 12.35-37; Lc. 20.41-44)

⁴¹ Fariseo aidau ijunjamutak batsataig, Jesús iniak:

⁴² —¿Atumesh Cristush wajuk anentaimtagme? ¿Yana uchijiyai tajume?, tau.

Tuinam dita ainak:

—Davita uchijiyai, tuidau.

⁴³ Tiagtai:

—Nuniaish, ¿wajuk asamtaiya Davitash Wakan ichachiamash Apú tiuwaita? ⁴⁴ Tau asa:

“Apu mina Apujun chichajak: Ekeemsata mina untsujui, nunikamin wi amina shiwajum aidaunak ashí idaitustajame”, tiuwai.

⁴⁵ —David, Apu tawa nuniaish, ¿wajuk asaya Davita uchijish amainaita?, tau.

⁴⁶ Tutai makichkish aimainchau dekapedau asag, nui nagkamsag makichkish iniaschajui.

23

Jesús fariseo aidaun, escriba aidaujai pegkegchajui pachisa tibau

(Mr. 12.38-40; Lc. 11.37-54; 20.45-47)

¹ Nunikagmatai Jesús aents aidaun, niina jintintaiji aidaujai chichajak:

² “Maestro chicham umiktinun jintinkagtin aidauk, fariseo aidaujai Moisés tibauwa nuna jintinkagtuinawai. ³ Nuaduí atumek, ashí dita dutikatajum tujamaina duka umigkatajum; tujash dita takaina duka takasaigpajum, wagki ditak tuinayatak nunak takainachu asagmatai.

⁴ Ditak shiig kijin yanamainchau aidaun tikichnak ayanainawai, ditakesh makichik tsajam uwejinkesh antitnak dakituinayatak. ⁵ Ashí dita dutikaina nunak aents wainkamu atatus nuninawai, nuninak senta wegkagman jukiag, chicham umiktajum tibauwa nuiyan agajag, kuntujinish dutiksag jigkamá yujainawai. Aantsag nugkuagbauji weniya nuwish esagman sasamjukag detug nugkujag yujainawai. ⁶ Yutai umikbau yuinamunmash, aents eme anentsá ekeemsati tibaunum ekeemsagtatus wakegainawai; nunisag jega ijuntainum wainakush nuninawai. ⁷ Nunidau asag, plazanum aents kumpamjuinakush eme anenjus: Rabí* tujuttinme tusag wakejin ainawai.

⁸ “Tujash atumek ‘Rabí’ tujuttinme tusagmek wakemaitsugme; wagki makichki atumi Maestrogmek, tuja ashí atum aidautigmek yatsut ainagme.

* 23:7 “Rabí”, tawa duka arameo chichamai, nunak mina jintinjin taku tujakú ainawai.

⁹ Atum aidautigmek ju nugka juiyag makichkish ‘Apawá’ tiigpajum; wagki makichki atumi Apak, nayaimpinum puja duke. ¹⁰ Nuigtush ‘maestro’ tamak aigpajum; wagki atumi Maestrogmik makichki, Cristua duke. ¹¹ Atum ainajum anuiya dekas eme anentaiya nunú, tikich aina nuna inake amainai. ¹² Wagki nigki eme anenmama duka, imanchau diyam atinai, untsu imanchau diyamua nu eme anentam atinai.

¹³ “¡Wait anentajime atumnak, maestro chicham umiktinun jintinkagtin nuigtú fariseo aidautigminak tsanumin asagmin! Wagki Apajuí inama nui wayawainum tusa epetjume, atumkesh wayachiatkujum tikich wayata tuidaush idaitsugme. ¹⁴ ¡Wait anentajime atumnak, maestro chicham umiktinun jintinkagtin nuigtú fariseo aidautigminak, tsanumin asagmin! Wagki atumek nuwa waje aina nuna jee atankijum, tsanumkujum Apajuí dukap aujú yujau ainagme, nunin asajum imá senchi bakumatin ainagme.

¹⁵ “¡Wait anentajime atumnak, maestro chicham umiktinun jintinkagtin nuigtú fariseo aidautigminak, tsanumin asagmin! Atumek kukag nuigtú nayantsanum yujagme atumdau amain wainkatasajum, nunika wainkagmek nunú aentsuk unuinajum, atumi nagkaetamas jimaja imania waitmain emá idaiyin ainagme.

¹⁶ “¡Wait anentajime atumnak, wainmachu ainayatkujum jinta inkmaidau asagmin! Atumek: ‘Makichkikesh juga Apajuí ememattaiya nuna pachis dutikattajai tauk wainkayai tajume; untsu oro juga Apajuí ememattain awa nuna pachis tawa nu, ni tibaujiya nunak betek umimainai tajume’. ¹⁷ ¡Anentainkachu, wainmachu aidauwah! ¿Dekas tuwaita imanush: orokaih, atsa nuniachkush juga Apajuí ememattai oron pegkemtika dukaih? ¹⁸ Nuigtushkam atumek tajume: ‘Altaran adaiyas ni dutikatnuijin umikattajai tauk, wainkayai’ tajume; ‘untsu Apajuí ofrenda suwamu altarnum patatun adayas tauk, dekas imatiksag unimainai’ tinu ainagme. ¹⁹ ¡Wainmachu aidauwah! ¿Dekas tuwaita imanush: ofrendakai atsa altar ofrendan pegkemtika dukaih? ²⁰ Aents ni dutikatnuijin altaran adayas tawa duka imá altarnak taku tatsui, ashí altarnum patata nujai taku tawai. ²¹ Tuja juga Apajuí ememattaiya nuna pachis taushkam imá jeganak takug tatsui, Apajuí nui puja nujai taku tawai. ²² Aantsag nayaimpin pachis taushkam Apajuí ekeemtaijiya nuna nuigtú nui eketa nunashkam pachis tawai.

²³ “¡Wait anentajime atumnak, maestro chicham umiktinun jintinkagtin nuigtú fariseo aidautigminak, tsanumin asagmin! Atumek menta, anís, † comino aatsajum diezmó† wajau ainagme; nuniayatkujum chicham umiktin dekas iman aina duka umiatsjume: pegkeg takata nu, wait anenkagtuta nu, dekaskeapi tabauwa dushakam. Jujú dutikmain ainagme, tikichia dushakam idaitsuk. ²⁴ ¡Wainmachu ainayatak jintá inakbau aidauwah! Wiyunchik tsatsamá ajapeayatkujum, camellok kujajume.

²⁵ “¡Wait anentajime atumnak, maestro chicham umiktinun jintinkagtin nuigtú fariseo aidautigminak, tsanumin asagmin! Wagki vaso, plato aina nuna awankeg jai piagme, tujash initkak kasamtajum nuigtú pegkegchau takataijum aina duka piyak ajutamainawai. ²⁶ ¡Fariseo wainmachuh!

† 23:23 “Anís” tawa duka Dios Habla Hoy (DHH) tawa nuiya jukimui. Untsu Reina-Valera takug: Eneldo tawai. † 23:23 “Diezmo”, tawa nunak dieza nuiya makichik Apajuinu atin akanbauwa nuna tawai.

Dekatkauk vaso, plato aina nuna initegá jaipjata, dutikam awankeshkam pegkeg atatu.

²⁷ “;Wait anentajime atumnak, maestro chicham umiktinun jintinkagtin nuigtú fariseo aidautigminak, tsanumin asagmin! Aents ukusbau awanke pujui ukatkamua nunin asajum pegkeg wantinjume, tujash initegaminig aents jakau ukunchi tsumain wajas aama nunin ainagme. ²⁸ Atumshakam nunin ainagme aents aidau eemtinig pegkejan takauwa iman iwainmamjume; tujash initegaminig tsanumtajum, pegkegchajum aidau piyak ajutjamainawai.

²⁹ “;Wait anentajime atumnak, maestro chicham umiktinun jintinkagtin nuigtú fariseo aidautigminak, tsanumin asagmin! Atumek profeta ukusbau aina nunú jegagakajum nuigtú aents yaunchuk pegkejan takasú batsamajakajua nuna niimé dakumkamu aidaush shiig iwajin ainagme, ³⁰ nuniakjum: Jutiish ii muunji batsamajakua nunú tsawantin pujujakuitkuik, profeta aidau mainak numpen ukajajua nuig jutiik pachinkachus amainaitai, tajume. ³¹ Nunú tajum nuadui atumek etsegtumagme profeta aidau maawaju aina nunú weantu ainajum nu. ³² ;Atumi muunjum nagkamua duka, atumshakam dutiksagmek ashinkatajum!

³³ “;Iwanch dapimea aentsun tsanujua nujai betek aidauwah! ¿Wajuk uwemtugtagmeki, suwimak waitiamu atina dusha?

³⁴ “Nuadui wi profeta aidau, aents yacha aidauwash, maestro aidauwashkam awemattajai. Tujash atum nunú aina nuiya maakjum, tikichik achigtin ainagme; tikich aina duka jega atumi ijuntaigmin awayajum asutiakjum, tikich aina duka ya yaaktanum yujagsajum aintú yujagtin ainagme. ³⁵ Aaja nuniau asagmin, atumiin suimkak iyagtinai, ashí numpa pegkejam nugkaa ukajeamunum, Abel pegkejan takajakua nui nagkamás, Zacarias Berequiasa uchiji, jega Apajuí ememattai ai altar awa nuna ejapen mau ainajum dui. ³⁶ Dekas tajime, ashí nuna nunikajua dui yamai aents aina jui suimkak iyagtinai.

Jesús Jerusalén anentai idajtukbau

(Lc. 13.34-35)

³⁷ “;Jerusalén, Jerusalén, amek profeta aidaush mainaitme, dutiksamek aminí awemamu mininakuish kayai tukui tukuinakuajum main ainagme! Kuashtá wakekamjai uchijum aidau, atash uchiji aidau nanapen ijumama numamtuk awajkatasan, tujash amek dakitjamume. ³⁸ Nuniku asagmin atumi jeemia duka ukumkimu juakagtinai. ³⁹ Nunin asamtai tajime yamai nagkamsagmek ataktuk waitkashatjume, nuniautijum: ;Apajuí awemam mina ju emematiagmi! tujuttinaitjum dui waitkatin ainagme”.

24

Jega Apajuí ememattai tsayam atinai tusa Jesús etsegkamu

(Mr. 13.1-2; Lc. 21.5-6)

¹ Jega Apajuí ememattainmaya jiinki Jesús wetai, niina jintintaiji aidau jegaantaju jega Apajuí ememattai jegamkamun inaktustatus. ² Dutikam Jesús chichaak:

—¿Ju ashí wainjumek? Dekas tajime, juka makichik kayakesh ekenjamu aina nuiyag juwakchatnai, ashí tsaikbau atinai, tiuwai.

Nagkanbau jegatsaig wantinkagtin aidau
(Mr. 13.3-23; Lc. 21.7-24; 17.22-24)

³ Jesús Olivosa mujajin waka ekemsamtaí, niina jintintaiji aidau jegaan-tag, niinak akanak iniinak:

—Tukagtita, ¿wajutiya dusha nuniktinaita, tuja waji wantinkatnaita ame taattaku wajataish, nuigtú nugka nagkanbau jegattak wajataish?, tuidau.

⁴ Tiagtai Jesús ditan ayaak:

—Kuitamamkatajum, makichkish tsanugmajainum. ⁵ Wagki kuashat midiagtinai mina daajun pachisag, nuninak: “Witjai Cristunuk”, tusag kuashat tsanumiagtinai. ⁶ Atumek maaniumu aidau, nuigtú maaniatatus pampandayamush antitnaitjume, imatuinakuish puyatkaigpajum. Duka dekas ashí aatus nagkaemagtinai, tujash nu achatnai nagkanbauk. ⁷ Nugka munnum inamnuk, mai imanuk maaniagtinai, tuja nugka yaignum batsamnushkam, mai nuninuk maaniagtinai. Jata ishamain utsumaja jinamush, yapagtach, kuashat nugkanum uugbaush atinai. ⁸ Tujash ashí ju aina juka waitut yamá nagkammak imanitnai.

⁹ “Untsu atumnak waitkastinne tusag sujupakagtinai, dutijamawag-matai mantamawagtinai; ashí aents aidau kajegtabiagtinai, mina daag pachisjum chichaidau asagmin. ¹⁰ Nunú tsawantinig kuashat aents minak tujanjukagtinai, nuninak pempé pempeentunisag sujuninak, pempeentunisag kajegdayagtinai. ¹¹ Kuashat profeta tsanumaidaush wantinjatnai, nuninak kuashat aentsun tsanuagtinai. ¹² Kuashat pegkegchau aitnai, imaniau asamtaí kuashat aents Apajuí aneamunak mijakagtinai. ¹³ Tujash ni ebetmamag pujusá nagkanbaunum jegaa nu uwemjatnai. ¹⁴ Ju yamajam chicham Apajuí inamjatin pachisa etsegbauwa duka, ashí nugkanum et-segkamu atinai, ashí aents aidau dekaatnume tabau samtaí; nunikmatai nagkanbauk atinai.

¹⁵ “Profeta Daniel Apajuí ememattai pegkegma nui shiig pegkegchau dutikawagtinun pachis agajua nunú wainkugmek (nuna aujuk dekaat-nume), ¹⁶ atum Judea batsatutigmek mujanum pisagtajum. ¹⁷ Tuja jega ekenja jegamkamú nagkatka nui pujauk akaikig makichkish wajiinjak jukiigka; ¹⁸ antsag ajanum takaak pujaushkam, jaanchi jukitjai tusag wakjetjukigka; ¹⁹ wait aentuinajai nunú tsawantin nuwa ejamtin, nuigtú uchi amuntsuaku agtina nunak! ²⁰ Apajuí ausatajum, atum pisamua nu tsetsek tepeamunum, nuniachkush tsawan ayamtaí aigkish ajutjaminum. ²¹ Wagki nugka najanamú aajakua nui nagkamas, yamaiya juish, atakea duish imanika waittsashtin tikima senchi waitiamu atinai. ²² Tuja nunú tsawan aina nui imanika waitiamu atina nuna Apajuí imijchataik, makichik aentskesh uwemainchau ainawai; tujash ni etegjamu aina nunú aneamunum imijkatnai.

²³ “Tuja makichik aentskesh: ‘Diistajum, jui Cristo pujawai’, tachakush: ‘Awi pujume’ tuinakuish dekaskeapi tiigpajum. ²⁴ Wagki kuashat aents, ‘Cristuitjai’ tusag nuigtú profeta ainaji tuidaush wantinjatninai; nuninak kuashat aents dutikmainchau iwainagtinai tsanumainak, nunidau asag Apajuí etegkamú aidanush dita tsanuamunak tsanuagtinai. ²⁵ Junak yaunchkesh timajime. ²⁶ Nuadui: ‘Uwegshunum pujawai’, tujamainakuish weegpajum; nuniachkush: ‘Jega tesamua jui pujawai’, tujamainakuish dekaskeapi tiigpajum. ²⁷ Wagki peem etsá minitaiya nuiya peeti, etsá

akaetaiya atú peemama numamtuk wajaktinai Aentsmaga akiinauwa nu minamuk. ²⁸ Tuwí jakau tepettawa nuna chuwaagakak tuwakagtinai.

Aentsmaga akiinauwa nu minitnuji

(Mr. 13.24-37; Lc. 21.37)

²⁹ “Nunú waitut nagkaemaig, etsag suwe wajastinai, nantushkam etsanbaunak megkaekatnai, yaya aidaushkam kakeyagtinai, imanidau asagmatai nayaimpinmaya senchigtin aidaushkam peganjagtinai. ³⁰ Nuniamunum Aentsmaga akiinauwa nu minamu nayaimpinum wantinkatnai, nunitai ashí aents nugkanmaya aidauk buutiagtinai, Aentsmaga akiinauwa nunú nayaimpinmaya yujagminum pachitkau shiig tsawan wajas senchijjai minaun wainkag. ³¹ Nunik ni angelji aidaun ishiaktinai trompeta senchi umpuajag ashí nugka nagkatkamunum nayaim najatamunum nagkamas ni etejamuji batsata nuna ijumjatnume tusa.

³² “Higueran pachisan augmattsan titatjim nu unuimagtajum, atumek: ‘Higuera kanawe aidau wentsamtuju dukeguig wamkeap esat nagkam-nattawa’, tusajum dekau ainagme. ³³ Nunisjumek, ashí nunú wají uminaidau wainkugmek, Aentsmaga akiinauwa nu taatnuk namput wajaschagapi titin atajum. ³⁴ Dekas tajime, yamai aents aina jusha batsataig ashí uminkatnai. ³⁵ Nayaimpick nugkajaig megkaejatnai, tujash mina chichamjuk umintsukek juwakchatnai.

³⁶ “Tujash tsawannak, horanash makichikish dekainatsui, nayaimpin-maya ángel aidaukesh, Apajú Uchijigkesh dekatsui, imá Apajuk dekawai.

³⁷ “Noé pujusua nu tsawantin wajukejaku aina nuninuk atinai Aents-maga akiinauwa nu minamunmash. ³⁸ Nunú tsawantaik eke diluvió* nagkamnatsaig batsamsag, yutai yuinak, umutnash umuinak, nuwe-nainak, nawanjin suju waja batsatai Noé niina arcajin egkemaui; ³⁹ imaní batsatu asag dekachajui, nuniai diluvió nagkamna ashí aentsnak tajak utsagkui. Nunisag atinai Aentsmaga akiinauwa nu minamushkam. ⁴⁰ Nuniamunum, jimag aents ajanum takaak pujauk makichik juwaku, tikichik ukuam atinai. ⁴¹ Jimag nuwa deketainum dekeak pujuidaushkam makichik juwaku, tikichik ukuam atinai.

⁴² “Iwá pujutajum, wagki atumek atumí Apugmesh wají tsawanting minitnaita duka dekachu asajum. ⁴³ Tujash ju dekatajum, makichik jeentin waji horatinia kasa taattawa nuna dekakug, iwá pujumainai wayá kasagtukai tau asa. ⁴⁴ Nuadui atumshakam umintsajum pujustajum; wagki Aentsmaga akiinauwa duka, hora atum anentaimtachbaunum minitin asamtai.

Inak betek umina nu, umichua nujai pachisa augmatbau

(Lc. 12.41-48)

⁴⁵ “¿Yaita inak betek umin nuigtú shiig anentaimkau asamtai, apuji niina jeen batsatun yutain diyaku susati tibauwa dusha? ⁴⁶ Shiig aneastinai inak, ni apuji wakitki takamá, ni tibaujinak betek umiak pujaun wainam atina duka. ⁴⁷ Dekas tajime ashí niina wajijji aina nunak ni diísti tusa idaitumainai. ⁴⁸ Untsu nunú inak pegkegchau asa anentaimas: ‘Mina apujuk wamak taashtatui’, tusa; ⁴⁹ tikich inak aina nuna suwimak, nigka nampen aidaujai yuwak, umak wekagai, ⁵⁰ nunú inaka nuna apuji tsawan dekachbau, horash dekachbau ai taa, ⁵¹ suwimkan susa, aents tsanumin

* 24:38 “Diluvió”, yumi chiwausuk senchi yutú puja nunú diluvió tutaiyai.

aidaujai waittsati tusa idaimainai. Dutikam nui pujus buutak nainig takegtú pujutnai.

25

Diez nuwa muntsujut aidau pachisa Jesús augmattsamu

¹ “Apajuí inama duka, diez nuwa muntsujut lámpara jukiag nuwenun igkugtatus jiintukiajua nujai betekmamtin atinai. ² Cinco nuwa aina duka shiig anentaimkachu aajakajui, nuniai tikich cinco aina duka shiig anentaimkau aajakajui. ³ Shiig anentaimkachu aina duka, lamparajin juinakush aceitenak jukichajui; ⁴ nuniai nuwa shiig anentaimkau aina duka, lamparajin juinakush aceitenak botellanum aimak jukiajui. ⁵ Nuwenatna nu tachatai, dakai dakainakua kaji pujajuinam ashí kajigkajui. ⁶ Nuniai aehaet ai antukajui: ‘¡Nuwenatta duka minawai, jiinjajum igkugtatum!’ tusa untsumjamun. ⁷ Tutai nuwauch aidaushkam nantajag lamparajin ekemaktasag uminaidau. ⁸ Nuniamunum nuwa shiig anentaimkachu aina nu, nuwa shiig anentaimkau aina nuna: ‘Jutii lamparajig kajinainawai, aceite machik sukagtusta’, tuidau. ⁹ Tama dita aiinak: ‘Uju ujumak akantunika jukimak, minashkam aminash abuetugmamainai, dekas aceite sujutainum wejum sumaktajum’, tiaju. ¹⁰ Tiajam aceiten sumaktatus weenai, aents nuwenatnush tauwai, nunikmatai nuwa umintsag daká batsataidauk, nuwenku fiestabaunum utsanawaju, nunikmatai waitin epeniuwai. ¹¹ Nuniku ai nuwa aceiten sumainak wegajushkam kaunkag: ‘¡Apuh, apuh, waiti ujatkgagita!’ wajaidau. ¹² Tama ni ayaak: ‘Dekas tajime wika atumnak wainchaujime’”, tiuwai. ¹³ Nuadui atumek aneaku batsamtajum, wagki Aentsmaga akiinauwa nu taatnujig tsawantak nuigtú horash dekachu asajum.

Kuichik pachisa augmattsamu

(*Lc. 19.11-27*)

¹⁴ “Apajuí inama duka, aents tikich nugkanum wetin asa, inake aidaun untsuká niina wajiiji aidaun tinamkauwa nujai betekmamtinai. ¹⁵ Makichik inakega nuna cinco talento suwak, tikichia nuna jimag talenton susa, kempatuma juna makichik talenton susauwai. Junak makí makichik dita takamainjin diijus tinamkauwai. Dutika ukuak tikich nugkanum weuwai. ¹⁶ Inak cinco talento jukiuk, wajiin sumag sujak nuigtushkam imatiksag cinco talento ikaugkauwai. ¹⁷ Tuja jimag talento jukiushkam, dutiksag jimag talento ikaugkauwai. ¹⁸ Untsu inak makichik jukiuiwa duka, ni apuji kuichkijinak nugkan tai yutua idaisauwai.

¹⁹ “Kuashat tsawan nagkaemakui ai, apushkam ni inake batsatbaunum wakitki tauwai; nunik, wajupak kuichkinash ikaugkaje tusa dekajuawagtatus nagkamau, ²⁰ nuniai cinco talento jukiuiwa nu, nuigtú cinco talento juki jegantun chichajak: ‘Apuh, cinco talento sujusmayume; nunak jui itajuajame, nunú talentowa nuna takamtiksan, nuigtú cinco talento ikaugkajai’, tau. ²¹ Tama apuji chichajak: ‘Ayú, amek inak pegkeg nuigtush betek uminaitme. Machik susamuitkum imatikam ikaugkaume, yamaik aan kuashat amastajame. Wayata, nunikamin iijai dakujusmi’. ²² Tusa inagnaig, tikich jimag talento jukiuiwa nu jegantun chichajak: ‘Apuh, minak jimag talento sujusmayume nunak jui itajuajame, juna takamtiksan nuigtú jimag talento ikaugkajai’, tau. ²³ Tama apuji ayaak: ‘Ayú, amek inak pegkeg, nuigtush betek uminaitme. Machik susamuitkum, imatikam

ikaugkaume, yamaik aan kuashat amastajame. Wayata, nunikamin iijai dakujusmi', tiu.

²⁴ "Nuniai tikich makichik talento jukiwa dushakam jegantun chichajak: 'Apuh, wika ame waitkagkagtainaitam nuna dekagjame; ame ajakchauwaitkum juu wekaenaitme, nuigtushkam ame ipanjachuitkum yajumá wekaenaitme; ²⁵ nunin asamin ishamakun talentogminak nugká yutuan idaisabiajai, dutikamun yamai jui itajuajame', tau. ²⁶ Tutai apuji ayaak: 'Amek inak pegkegchau, dakitme; wi ajakmachiatkun juu wekayin, nuigtushkam ipanjachuitkun yajumá wekayin dekaju asam, ²⁷ banconum takau aidau sumain awajkaume, dutikau asamin wi taakun midau kawegkun jumain wajakjai'. ²⁸ Tusa nui ijuntatman chichajak: 'Aanú makichik talento aja nu atankijum, diez talento aja nu susatajum, ²⁹ wagki kuashat aja duka, nuní dukap suwam atinai, dutikamu asa nuní kuashat ajitnai; untsu atsuja duka, ní piipich aja dukesh atantam atinai. ³⁰ Ju inak atsumnatsu duka, agaa suwea awi jiiiktajum, nui pujusá buutak daik takegtú pujutí'.

Inagmunum dekagmabau atina nu

³¹ "Aentsmaga akiinawuwa nu tsawan wajas ashí niina angeljjai minakug, ekeemtaiji dekas imana nui ekeemsantai, ³² niina eemtin, ashí aents nugkanum batsataidauk tuwakagtinai. Nunikmatai pastor uwigjin chivojai akanama numamtuk akanjatnai. ³³ Uwig aidaunak untsunum ijumak, chivo aidaunak menanum ijumjatnai. ³⁴ Dutika, untsujin ijunaina nuna Rey chichajak: 'Minitajum, mina Apag pegkegnum yumigsamu aidautigmek, nunikjum jukitajum atum inamjatnun nugkash najannatsaig umigtamkamua nunú. ³⁵ Wagki yapagbaijai, nuniakuish atum ajamjusbaijume; kitabiajai, nuniakuish umutai sujusbaijume; tikich nugkanum wekaeyajai, nuniakuish atumi jeemin jujukbaijume. ³⁶ Nugkumainush atsugtuyi, nuniakuish atum sujusbaijume; jaakun tepakuishkam taajum ijagtusbaijume; achigkagmatai egketaish waitkatasajum tajutbaijume', titinai. ³⁷ Tutai pegkejan takasú aina nu ainak: 'Apuh, ¿wajutiya ame yapajú wekaeminish ayujabijame? ¿Wajutiya kitamá wekaeminish umutaiish amasbaiji? ³⁸ ¿Wajutiya tikich nugkanum wekaekuminish, iina jeenish jukibiajime, tuja nugkumain atsugtamkuish, wajutiya amasbaiji? ³⁹ ¿Nuniachkuish wajutiya ame jaakum pujaminish tajuabaijime nuniachkuish achinká pujakminish wainkatasaisish tabiaji?' tiagtinai. ⁴⁰ Tiagtai Rey ayaak: 'Dekas tajime, ju mina yatsug aina juiya wait anenjauwaitjum duka, mina dutijauu ainagme'.

⁴¹ "Tusa menajin ijunun chichajak: 'Pegkegchau aidauwah, jii ajumaish tuke atin Iwanch ni angeli aidaujai umigkamua nui wetajum. ⁴² Wagki yapagbaijai, nuniakuish atumek ajamjuschabiugme; kitabiajai, nuniakuish umutaig sujuschabiugme; ⁴³ tikich nugkanum wekaeyajai, nuniakuish atumi jeeminish jujukshabiugme, nugkumainush atsugtuyi, nuniakuish sujuschabiugme, jaakunsh tepebiajai, achinkanush psubiajai, nuniakuish waitkatasagmesh tajutuachbaijume', titinai. ⁴⁴ Tama ditashkam aimainak: 'Apuh, ¿wajutí ame yapagkim, kitaajam, tikich nugkanmash wekagu, jaanchjinchau, jaakum nuniachkumesh achinkam pujamu wainiatkuish yaigchabaijime?' ⁴⁵ Tiagtai Apu ayaak: 'Dekas tajime, atum ju aents imanchauch aina jujú yaigchauwaitjum duka, mina dutijauu ainagme', titinai. ⁴⁶ Aaja tima nunú aents aidauk suwimak tuke atina nui weagtinai; untsu aents pegkeg aidauk pujut tuke atina nui wayawagtinai", tiuwai.

26

Jesús maami tusa chicham umigkamu
(Mr. 14.1-2; Lc. 22.1-6; Jn. 11.45-57)

1 Jesús nuna ashí chichaká ashimak ni jintintaiji aidaun chichajak:

2—Atumek dekagme, jimag tsawan asa fiesta Pascua* atata duka, nuanui Aentsmaga akiinawuwa nunak, achigtinme tusag sujukagtatui, tiuwai.

3 Tuja nunú tsawantinig sacerdote apuji aidau, judío apuji aidaujai sumo sacerdote Caifasa jeen agaajin ijunjajui. 4 Nunikag chichaman umikajui, Jesús tsanumjuja achiká maami tusag.

5 Tujash fiesta aigkik dutikachagmi, yaaktanum pampandayamu ai, tijaui.

Betanianmaya nuwa Jesusan kugkuinui buuken nijakbau
(Mr. 14.3-9; Jn. 12.1-8)

6 Jesús Betanianum, Simón lepragtin tutai jeen pujai, 7 nuwa tajuauwai makichik botella alabastro najanamunum kugkuin aimkamu shiig akik wajaknun takusá, nunik Jesús mesanum eketun buuknum ukatjauwai.

8 Nunú dutikamun ni jintintaiji aidau wainkag kajekajui, nunikag:

¿Wagka wainkash wasujua? 9 Dekas akik sujuka ujunauch aidau yaimainajama, tuidau.

10 Jesús nuna antuk ditan chichajak:

—¿Wagka ju nuwash kajegame? Mina jutija junak pegkejan takaak aikae, 11 ujunauch aidauk tuke atumjai batsamiagtatui, tujash wika atumjaig pujushtatjai. 12 Ju nuwa mina iyashjui kugkuinun ukatjuka junak, wi ukuntsatnun umigtak jutijawai. 13 Dekas tajime, yamajam chichama juna etsejuinak ashí nugkanum yujainakush, ju nuwa mina jutija juna pachis tuke etsejiagtin ainawai, tiuwai.

Judas Jesusa sujuktatus kuichik jukimu
(Mr. 14.10-11; Lc. 22.3-6)

14 Doce aina nuiya, Judas Iscariote daagtin sacerdote apuji aidaujai chichastatus weuwai. 15 Nunik:

—¿Wajupa sujumainaitjume, wi Jesusan atumiin sujakuish?, tau.

Tutai treinta kuichkin susaju. 16 Nui nagkamas ni yupichu sujumainjin egatu.

Jesús inagnaku Pascuatin yuwamu
(Mr. 14.12-25; Lc. 22.7-23; Jn. 13.21-30; 1 Co. 11.23-26)

17 Pag levaduragtuchu† yuwaku fiestamtai nagkamak tsawagmatai, ni jintintaiji aidau Jesusan jegaantag iniinak:

—¿Pascua yuatnush tuwí umiktinme tusamea wakegame?, tuidau.

18 Tama ni ayaak:

—Yaakat wetajum, nunikjum atum aents wainjum nunú jegajuajum: “Maestro chichaak: Mina tsawanjuk namputchí wajaschae, nuniau asam-tai niina jeen mina jintintaig aidaujai Pascuan fiestamatjai tujamae” titajum, tiu.

* 26:2 “Pascua” tawa duka judío aidau uwig aishmag tsakatan maawag yuwinaku fiestamtaiji aajakui. Nunak Egipto nugkanum batsamas waitkam batsatun Apajui ayamjuk jijjá agkanmitkamu asag, nuna anentaimtusag fiestamainak dutikajakú ainawai. Diístá Ex. 12.1-28. † 26:17 “Levadura”, tawa nunak pagkan inagkatatus harinan namukag ajuntin ainawai, wampushmitkati tusa.

¹⁹ Tiajam jintintaiji aidaushkam Jesús tibaunak imatiksag Pascua yuwatunak umikajui.

²⁰ Kiyagmatai Jesús ni jintintaiji doce aina nujai mesanum jegantá ekeemsau. ²¹ Nui yuwamunum Jesús chichaak:

—Dekas tajime, atum ainajum juiyag makichik minak sujutkattawai, tau.

²² Tutai shiig senchi wake besemag dekapjag, makí makichik iniinak:

¿Apuh, wikaitag? wajaidau.

²³ Tiagtai Jesús ayaak:

—Wijai nu platonmag uchutua yuwa nu, minak sujutkattawai.

²⁴ Dekaskenmag Aentsmaga akiinauwa duka, ni pachisa agagbauwa nunisag wetatui; tujash ¡wait anentajai ya sujuktatua nunak! Duka dekas akiinmainchaunas akiinawabiataih, tau.

²⁵ Tutai Judas niina sujukua nu chichaak:

¿Maestroh, wikaitag?, tau.

Tutai ni ayaak:

—Ame tame duka dekaske, tiuwai.

²⁶ Yuwinak pekagbaunum, Jesús pagkan juki Apajuin see tii, puuká, jintintaiji aidaun suwak:

Ju yuwatajum, juka mina iyashjun iwainawai; ²⁷ tusa, copa juki Apajuin see tii, suwak:

—Ju copa[†] juiya ashí atum uwagtajum; ²⁸ wagki juka mina numpajui, yamajam chicham apaamunum kuashat aents tudaujin tsagkugnagti tabaunum ukaejatta nuuwai. ²⁹ Dekas tajime, yamai nagkamsanuk ju uva yumijinak awenanuk uwagchattajai, atak tsawan uminkui mina Apajú inamtain ataktú atumjai ijunkun yamagman uwagtin asan.

*Pedro Jesusnak wainchaujai tusa uukbau
(Mr. 14.26-31; Lc. 22.31-34; Jn. 13.36-38)*

³⁰ Nuna timatai himno kantamawag Olivosan mujajin weajui. ³¹ Nunik Jesús ditan chichajak:

—Jujú kashia juik, ashí atum aidautigmek minak ukugkittagme, wagki agagbauwa nui: “Pastoron maattajai, dutikam uwig ijunag batsatuk pampagkagtinai” tawa nunisag. ³² Tujash ataktú nantakin, atumek Galilea wegatsjuminig wiyá emkan wetatjai, tiuwai.

³³ Tutai Pedro ayaak:

—Ashí tikich aidau ukugmainakuish, wika aminak tuke ukukchattajame, tau.

³⁴ Tutai Jesús ayaak:

—Dekas tajame, jújú kashia juik atash shinatsaig, kampatumá: “Wainchaujai” tujuttatme, tiuwai.

³⁵ Tama Pedro ayaak:

—Amijai jakata tau asan, wainchaujai tichattajame, tau.

Nuna tutai ashí niina jintintaiji aidaushkam dutiksag tiajui.

*Jesús Getsemaní pujusá Apajú ausamu
(Mr. 14.32-42; Lc. 22.39-46)*

³⁶ Nunik Jesusak ditajai ijunag Getsemaní tutainum jegaa, jintintaiji aidaun chichajak:

—Jui ekeemsatajum, nuniagmin wi awi wenu Apajuin ausatjai.

[†] 26:27 “Copa” tawa duka yukunta numamtin aajakui.

³⁷ Tusa Pedron nuigtú Zebedeo uchijin mai juki wesa wake besetan nagkamauwai, nuniak shiig senchi anentaimak waitiau. ³⁸ Nunik Jesús chichaak:

—Senchi wake besemag dekapeakun jamain dekapeajai, atumek jui batsamsajum wijai betekak iwá batsamtajum, tiuwai.

³⁹ Tusa machik kuwaesag, tikishmag nugkan nijayin intaa pujus, Apajuin aukaj: “Mina Apajuh, nunimainaitkuig, wi waitmainaitag duka agkanmitkajuata. Tujash wi wakegamu ahati, ame wakegamu atí”, tiuwai.

⁴⁰ Nuna ti ni jintintaiji batsakbaunum wakitkiu, nunikmá kajigká batsatun wainak Pedron chichajak:

¿Atumek wijaig makichik horakesh iwamainchauk dekapeajum? ⁴¹ Kaji batsamtsuk Apajuí ausatajum, pegkegchaunum iyawaijum; dekaskenmag atumi wakanmik uminas awai, tujash iyashia nuuwai kakaakchauk.

⁴² Tusa ataktú wakitki Apajuin aukaj:

Mina Apajuh, wi waitmainaitag nuna waittsuk nagkaemainchauwaitkuig, ame wakegamu dutikata, tau.

⁴³ Nuna tusa ataktú tanta diikmá, kajigkag batsatun wainkauwai, kaji senchi mainamu asag. ⁴⁴ Nunik diisá ukuak kempatuma jui wakitki Apajuin aukaj, ni tibaujinak dutiksag auju. ⁴⁵ Nunik ataktú jintintaiji aidau jegantun:

—¿Atumek ayamkugmek kaji batsatjum? Yamaik horak jegawai, Aentsmaga akiinauwa nuna tudaugtin aidaunum sujukagtata nu. ⁴⁶ Nantagtajum weagmi, mina sujuta duka tikiju minawai, tiuwai.

Jesús achiká jukimu

(Mr. 14.43-52; Lc. 22.47-53; Jn. 18.2-11)

⁴⁷ Tusa Jesús eke chichaak wajai, Judas doce aina nuiya, kuashat aents espada, numi aidaun takuinaku sacerdote apuji nuigtú judío apuji aidau ishiakbaujai tajuntau. ⁴⁸ Judas Jesusan sujukua nu: “Wi kugkuastatag nu ataiui, nu achiktajum”, ⁴⁹ tiu asa Jesusan jegantun:

¿Maestro pujamek! takug kugkuasu. ⁵⁰ Tutaí Jesús ayaak:

Kumpajuh, ¿wagka miname? Taunak jegaantag Jesusan achikajui.

⁵¹ Nuna dutikiagtai Jesusa jintintaiji aina nuiya espadajin ukuini juakug, sumo sacerdote inake kuwishin tsupigkauwai. ⁵² Dutikamtaí Jesús chichajak:

Espadajum jukim awajata, ashí aents espadajai magkagtau, espadajai maam agtinaí. ⁵³ ¿Dekatsmek, wi mina Apajun segamak yamaiya juik doce nagkaesau legión ángel aidaun[§] ishitjumaina duka? ⁵⁴ Tujash nu nunitaish, ¿wajuk uminmaina ainawa Agagbau aina nui aatus nuniktinaí tibauwa dusha?

⁵⁵ Tusa Jesús aents tuwakun chichajak:

—¿Wagka kasa achiktasa utugmaina imanikjumesch espada, numi aidau takusjumesch achigkatasagmesh minitjagme? Wi kashí kashinig jega Apajuí ememattainum atumin jintinnujim nuniakuish, jutikagmek achigkachu ainagme. ⁵⁶ Tujash ashí ju juniajum juka, profeta aidau agagbau aina nunú uminu asamtaí juniagme.

Nuna taig, ashí niina jintintai aidauk pisainak ukukiajui.

§ 26:53 “Doce legión nagkaesau ángel aidaun” tawa nunak, 36,000 nuniachkush 72,000 ángel amainun taku tiuwai.

Jesús apu aidau batsatbaunum ejentamu

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Jesusan achikag jukiaju aina nu, Caifás sumo sacerdote jeen egegawajui, maestro chicham umiktinun jintinkagtin aidau nuigtú tikich apu aidaujai ijunag batsatbaunum. ⁵⁸ Tujash Pedrok ikaag pataetus wea weakua sumo sacerdote agaajin jegauwai. Nunik wayá achijatin aidaujai ekeemsau, wajuk inagnakagtig tusa diistatus.

⁵⁹ Sacerdote apuji aidau, ashí apu chichaman inagnau aidaujai egatuidau, Jesusan tsanumjugag maatnume tusa sujukagtatus; ⁶⁰ tujash ejetichaju kuashat aents wainak tsanumjuinakush. Nuninai inagnanunum jimag aents tsanumjugtin taawaju, ⁶¹ nunikag:

Ju aents chichaak: “Wika jega Apajuí ememattaiya juna tegakan, kumpatum tsawantai ataktú jegamainaitjai timayi”, tuidau.

⁶² Tiagtai sumo sacerdote wajakí iniak:

—¿Wagka machikish aimtsume? ¿Nunash wajinbauna tujamainawa? tau.

⁶³ Tamashkam Jesusak chichaachu. Nunitai sumo sacerdote chichajak:

—Apajuí iwaakua nuna daajin tajame, ame dekas Cristo, Apajuí Uchijiyaitkumek dekas ujajatkata, tau.

⁶⁴ Nu tama Jesús ayaak:

—Duka ame tiume, nuigtushkam tajime, yamai nagkamsajum Aentsmaga akiinauwa nu Apajuí ashí senchigtina nuna untsujin eketu tsawan uminkamtai, nayaimpinmaya yujagminum pachitkau minau waitkatnaitjume, tiuwai.

⁶⁵ Nuna tutai sumo sacerdote ni nugkuagbaujin japikí ichigká chichaak:

—¡Apajuin pegkegchaun chichagkae! ¿Nuigtush ya etsegtukti tusaya atsumaji? ¡Yamaik atumshakam Apajuin pegkegchau chichagka nu antukugme! ⁶⁶ ¿Atumesh wajuk anentaimtagme?, tau.

Tutai dita aiinak:

—Aanka mantamnamainai, tiajuí.

⁶⁷ Tiagtai yapinum usukinak ijuidau: Nuniai tikich aidauk yapinum awatuinak:

⁶⁸ —Cristo dekakia, ¿ya awapime?, tuidau.

Pedro Jesusnak wainchaujai tusa uukbau

(Mr. 14.66-72; Lc. 22.54-62; Jn. 18.15-25)

⁶⁹ Pedro jegá agaajin ekeematman, makichik nuwa inak jegantun chichajak:

—Amesh Jesús galileanmayaya nujaimpap wekaemume, tau.

⁷⁰ Tujash nigka ashí aents aidau eemtin uwau, nuniak:

—Dekatsjai, waji takumes tame, tiuwai.

⁷¹ Nuna tusa waitinum jiantatman tikich nuwa inak wainak, nui aents ijunun ujaak:

—Ju Jesús nazaretnumiaya nujai wekaenuwejama, tau.

⁷² Tujash Pedrok ataktushkam:

—¡Dekas tajai, wika au aentsnak wainchaujai!, tau.

⁷³ Machik asag aents nui batsatu Pedron jegaantag:

—Dekaskenum amesh dita aina awiyayapitme, ame chichamjuminig dekagme, tuidau.

⁷⁴ Tama Jesusan pegkegchaun chichajak nuigtú Apajuí adaiyas:

—¡Wika au aentsnak wainchaujai! tau.

Taig atash shinukui, ⁷⁵ nunikmatai Pedroschkam adeaju Jesús chichajak: “Atash eke shinatsaig kampakumá ugtuktinaitme” tibauwa nuna. Nunik nuiya jiinki senchi kajeká buutiuwai.

27

Jesús Pilatowai ejegamu

(Mr. 15.1; Lc. 22.66-71; Jn. 18.28)

¹ Tsawagmatai, ashí sacerdote apuji aidau, judío apuji aidaujai Jesusan chichaman umigkajui mantamnati tusag, ² Dutikawag jigkajá jukiag, apu Poncio Pilato pujamunum ejegawag susajui.

Judas Iscariote kajemjamu

(Tak. 1.18-19)

³ Judas, Jesusan sujukua nunú, maawagtatus imatikiagtai wainak, anentai idajuk sacerdote apuji aidaun tikich apu aina nuna treinta kuichkin awagtak:

⁴ —Wika tudau takasjai, pegkegchau takasbaujish atsujai maatajum tusa sujuku asan, tau.

Tama dita aiinak:

—¿Ilish dusha utugkatjiki? Duka aminuajamah, tiaju.

⁵ Tiagtai Judas kuichkin nagkimá jega Apajuí ememattainum ukuak, wee kajemjauwai.

⁶ Dutikamtai sacerdote apuji aidau kuichkin jukiag:

—Ju kuichkia juka ofrenda egketaiya nuig egkemaitsui, aents mantamnati tusa akimatkamun asamtai.

⁷ Tusag chichasag nunú kuichkia duik, “Duwé takau nugke” tutain sumakajui, aents tikich nugkanmaya jaidaun ukustinun. ⁸ Nuadui, nunú nugka duka yamaikish “Nugka numpeagbau” tutaiyai. ⁹ Aatus uminkauwai profeta Jeremías:

“Jukiaje treinta kuichkin Israela uchijí aidau akike apujtusbaun, ¹⁰ dutikawag sumakaje duwé takauwa nuna nugkeen, Apajuí tibauwa dutiksag” tawa nunú.

Pilato Jesusan iniasbau

(Mr. 15.2-15; Lc. 23.2-25; Jn. 18.28-40)

¹¹ Jesusa jukiag gobernadora eemtin ejegawajui, dutikawagmatai iniak:

—¿Amekaitam Rey judío aidaunu?, tau.

Tama Jesús ayaak:

—Duka ame tujutme, tiuwai.

¹² Tuja sacerdote apuji aidau, tikich apu aidaujai bakutatus etsegtuidau, imatjamash nigka makichkish chichaachu; ¹³ nunitai Pilato chichajak:

—¿Antatsmek kuashat wajiin pachis imatjutpaina duka?

¹⁴ Tamashkam Jesusak makichik chichamnakesh aikchau. Nunitai apuk shiig anentai jegagchau.

¹⁵ Tuja apuk fiestatinig aents achikbau aina nuiyan makichik jiisagké au, aents aidau nu jiinkiti tusa mamikiamua nuna. ¹⁶ Nuniamunum Jesús Barrabás* daagtinchakam pegkegchaunum wantinjau achikam egketu.

¹⁷ Nunin asamtai aents aidau nui ijuntatman Pilato iniak:

* **27:16** “Jesús Barrabás”, manuscritos initaik agagbau aina nuig Jesús Barrabás tawai griego chichamnumag.

—¿Yana jiiktí tusagmea wakegagme, Jesús Barrabasnak jiiktatag atsa Jesús, Cristo daagtina nunaká jiiktatag?, tau.

¹⁸ Nunak kajejuidau asag sujukaja nuna dekau asa tiuwai.

¹⁹ Nuna tusa Pilato chicham epegkatasa ekeemtaijin eketai, niina nuwe chichaman awetak: “Amek aanú aents pegkejan takauwa nuig pachinkaipa. Wi ishamainun kajamjamjai yamai, aanú imatikamunum”, tiu.

²⁰ Tujash sacerdote apuji aidau nuigtú tikich apu aidaujai, aents tuwaká ijunun anentain egketuawaju, Pilaton segati Barrabás jiintai Jesús mantamnati tusag. ²¹ Ataktushkam Pilato ditan iniak:

—¿Ju jimaja juiyanash, yana akupkati tusagmea wakegagme?, tau.

Tutai dita aiinak:

—Barrabás akupkata, tuidau.

²² Tiagtai Pilato ditan iniak:

—¿Tujash Jesús, Cristo tajum junash utugkatjaki? tau.

Tutai ashí pampaajag:

—¡Anka achinjati! wajaidau.

²³ Tiagtai apu ayaak:

—¿Tujash jusha wají pegkegchauna takasé?, tau.

Tutaishkam nuní senchi unsumkag:

—¡Anka achigtá! wajaidau.

²⁴ Pilatok makichkish niinak antujuinatsu nuna wainu asa, ayatak nuní senchi pampaidiagtai yumí utugtitnume tusa inamjau, nunik ashí ditá eemtin ikigmak:

—Wika agkantaitjai, ju aents pegkegma nuna numpe ukaemainnumag; atum diistajum, tau.

²⁵ Tutai ashí aents pampaajag:

—Ni mantamnamua duka jutiini nuigtú ashí ii uchijí aina nui juakti, tiaju.

²⁶ Tiagtai Barrabasan jiikiu, dutika Jesusnak asutiawagmatai, achigtinme tusa sujukui.

Suntag aidau Jesusan waitkasagbau

(Mr. 15.16-20; Jn. 19.1-3)

²⁷ Dutikamtai apú suntaji aidau Jesusan jukiag apú pujusá inamtaijin egegawagmatai, ashí suntag ijuntujaju ni wajamunum. ²⁸ Nunikag jaanchin awitkag tikich jaanch kapantu nentetkaun anugjaju. ²⁹ Dutiksag atsejutain jagkin najatuawag Jesusan atsemitkakag, uwejí untsujin numin achimtikag, niina eemtin tikishmatjag dushikinak:

—¡Juuwai Rey judío aidaunuk! awajuidau.

³⁰ Imatjuinak usukidau, dutikainak numi atakuamujin jujukiag buuknum awatuidau. ³¹ Dutikainak dushí dushikinakua jaanch anugjamunak awituk, ni nugkutaijinak anugjag juki emajui achijagtatus.

Jesús achigbau

(Mr. 15.21-32; Lc. 23.26-43; Jn. 19.16-24)

³² Jiinkamag, yaakat cirenenmaya Simón daagtinun wainkag, Jesús achigtinun cruzan yanaktí tusag susajui.

³³ Nunikag Gólgota tutainum jeganatajui, (“Gólgota” tawa duka, “Buuké Sakamtai” taku tawai.) ³⁴ Nui ejentag, Jesusan vino chujuau dupa yapaujai pachimjamun uwagti tusag susajui. Nu susam apas dekapas idaisauwai.

³⁵ Dutika achijag, suntag aidauk Jesusa jaanchjinak yana kayají jiintukne nuna diisag akandaikajui.† ³⁶ Nunikag pekaamsag dii batsamtuidau. ³⁷ Tuja wajuk asamtaiya achijaje nuna pachisag agajag chaiken anujtukaju: “JUUWAI JESÚS, REY JUDÍO AIDAUNU”, tusag.

³⁸ Nuigtushkam jimag kasan niijai achijajui, makichkia nuna untsujin awajainak, tikichia nunak menajin awajawajui. ³⁹ Tuja nui aents nagkaemaidauk, buuken pegajag pegkegchau chichajuidau, nuninak:

⁴⁰ —¡Ame, jega Apajuí ememattai tegakam kampatum tsawantai ataktú jegamainaitjai tinumjamah, akaikim uwemjakia! ¡Dekas Apajuí Uchi-jiyaitkumek, cruznum nematsuk akaikita!, tuidau.

⁴¹ Dutiksag sacerdote apuji, maestro chicham umiktinun jintinkagtin aidaun nuigtú tikich apu aidaujui ijunag dushikinak:

⁴² —Tikich aidaunak uwemtiknuwe, tujash nigkig uwemain dekapeat-sui. Nuigtush Israela Reyjiyai, nunin asa yamai cruznum deta nuna akaikimtai, niinig dekaskeapi tiagmi. ⁴³ Apajuin kajinas anentaimtinuwe, ni wakegakug yamai agkanmitkati, wagki Apajuí Uchijiyaitjai tumamnuwe dui, wajaidau.

⁴⁴ Nunisag kasa aidaushkam Jesusjai achijam detaidaush pegkegchau chichajuidau.

Jesús jakamu

(Mr. 15.33-41; Lc. 23.44-49; Jn. 19.28-30)

⁴⁵ Etsa tutupit ai nagkamas, a las tres wegaish ashí nugkanum suwe wajas asauwai. ⁴⁶ A las tres jegattak weamunum Jesús senchi untsamak: “Elí, Elí, ¿lama sabactani?”,† tiuwai. (Nunak: “Mina Apajuijuh, mina Apajuijuh, ¿wagka idaitusume?” taku tiuwai).

⁴⁷ Ujumak aents nui ijunaidauk nuna antukag:

—Eliasan untsuawai, tuidau.

⁴⁸ Tusa taig, ijuna nuiya makichik tupikaki esponja juki vino chu-juaanum ajugká tagkanai aapi Jesusan uwagti tusa iwagkau. ⁴⁹ Dutiktai tikich aidaun chichainak:

—Idaisakia, Elías uwemtijatatus minishtimpash wainkami, tuidau.

⁵⁰ Tujash Jesusak ataktú senchi untsamak, jakauwai.

⁵¹ Nuniaig jega Apajuí ememattainum jaanch ejaamuk, yakiin nagkam-nas ichiinak jimaituk kanakui. Nugkashkam ugkauwai imaniau asamtai kaya muun aidaushkam punjauwai; ⁵² Imanikmatai ukumatai aidaun ujanaijuu, nunikmatai kuashat pegkejam jinaw aidaushkam nantajajui; ⁵³ nunikag ukusbaunmaya jiinjajui Jesús nantakiu ai, nunik yaakat pegkegma nui utsanawajui, nunikun kuashat aents wainkajui.

⁵⁴ Tuja capitán tikich niijai ijunas Jesusan diyak ijunaidauk, uugbau imanikmatai nuigtú kuashat ishamain nagkaemajun wainkag, senchi ishamkag chichainak:

—Dekaskenum juka Apajuí Uchijí aajakui, tuidau.

† 27:35 Textus Receptus (TR), tawa duka latin chichamai. Nunak “Texto Recibido” taku tawai. Nunú textoa nu awaiwai salmo capítulo 22 versículo 18, nuiyan Reina-Valerashkam tawai; tujash duka ju textonmag idaiji, wagki griego dekas yaunchuk agagbau aina nuig, duka atsau asamtai.

† 27:46 “Elí, Elí, ¿lama sabactani?”, tawa juka hebreo chichamai.

⁵⁵ Nui nuwa aidaushkam ikaa ijunas dii ijuntuidau, Jesusan Galileanum nagkamsag saetusag yaijakú aina nunú. ⁵⁶ Nu aina nuiya María magdalan-maya; María, Santiagon Josenashkam dukujiya nu nuigtú Zebedeo uchijí aina nuna dukují aatus wajaidau.

Jesús ukusbau

(*Mr. 15.42-47; Lc. 23.50-56; Jn. 19.38-42*)

⁵⁷ Kintamai arimateanmaya José daagtin wiyakuch, niishkam Jesusa jintintaiji aajakú asa tauwai. ⁵⁸ Nunik Pilaton Jesusa iyashin segauwai. Tutai Pilatosham Jesusa iyashin susatnume tiuwai. ⁵⁹ Tuja Joseshkam Jesusa iyashin juki, dekas sávana pegkejai pempeajui, ⁶⁰ dutika ukumatai yamá kaya taimunum awayá kaya muuntan apapetug waajin epeti ukuak weuwai. ⁶¹ Tuja María magdalanmaya tikich María aatus, Jesús ukusbaunum jegantag eketaidau.

Jesús ukusbaun kuitamkatnume tusa ishitkamu

⁶² Kashinia nu, tsawan ayamtai tsawagtin asamtai, sacerdote apuji aidau nuigtú fariseo aidaujai Pilaton jegajuawag:

⁶³ —Apuh, adeagji wait aaya nunú, iwaaku pujus chichaak: “Kampatum tsawan asan nantaktinaitjai”, tuuyi. ⁶⁴ Nuniau asamtai, awemata aents ukusbauwa nuna kampatum tsawantai shiig kuitamkatin, dutikashmak niina jintintaiji aidau kashi kautuawag iyashin jukiag, aents aidau ujinak: “Jakabia duka nantakne”, tiagtatui. Nuna aatus tuinakug yama nagkamchaku waitjuamua nuna nagkaesau waitjuawagtatui, tuidau.

⁶⁵ Tusa tiagtai Pilato ayaak:

—Anú suntag aidau kuitamkatnume, wejum wajuk wakegagme dutik-sagmek umiktajum, tau.

⁶⁶ Timatai ditashkam wegag ukusbau kaya apujtukbaunak shiig asakug, nui suntag kuitamkatin aidaunashkam batsatkiajui.

28

Jesús nantakbau

(*Mr. 16.1-8; Lc. 24.1-12; Jn. 20.1-10*)

¹ Tsawan ayamtai nagkaemaki tumig tsawagmatai, María magdalan-maya, tikich Mariajai Jesús ukusbaun diisagtasag weaju. ² Nuniamunum senchi ugkauwai, wagki Apajuí angeljí nayaimpinmaya akaegu asamtai, nunik taak kayan ekek ni nui ekeemsauwai. ³ Nuna niimeg peemjai betek, jaanchjish puju nieve* tutaya iman aajakui. ⁴ Imanun wainkag suntag kuitamak batsatuk ishamak kujagkag, jakaujai betek kakekajui. ⁵ Nunikaju ai, ángel nuwa aidau chichajak:

—Ishamkaigpajum, wika dekajai atum Jesusan achijagma nu egajum nunak. ⁶ Juig atsawai, nigka nantakne ni timaya nunisag. Jui tantajum Apu Jesusan ukusagma nunú diistajum, ⁷ nunikjum wamak wejum: Jakama duka nantakne, tusajum niina jintintaiji aidau ujaktajum. Nigka, niiyá eemak Galilea wetatui, awi wainkagtatui. Juna titajime timajai, tiuwai.

⁸ Nu tima nuwa aidaushkam, ukusbaunmaya jiinkiang ishamainayatak shiig aneasag tupikaidau, Jesusa jintintai aidau chichaman ukagtagtatus. ⁹ Nuniai Jesús wantintuk ditan kumpamauwai. Tuja ditashkam Jesusan jegaantag dawenum pagkugdag emematuidau. ¹⁰ Dutikam Jesús chichajak:

* 28:3 “Nieve” tawa duka ujuch puja ibau winchamtin, dukap diimainchau jii emesmain.

—Ishamkaigpajum; wejum mina yatsug aidau ujaktajum Galilea minitnume, awi minak waitkagtatui, tiuwai.

Jesús nantakbaun etsegekainum tusa suntag aidau akikbau

¹¹ Nunikag nuwa aidauk weenai, ujumak suntag nuna kuitamaidau yaaktanum wegag, sacerdote apuji aidaun dita wainkamunak ashí ujakaju.

¹² Tusá ujakajam weajui apu aidaujai ijunjag chichaman shiig umikagtatus. Nunikag kuashat kuichkin suntajan susaju. ¹³ Dutikainak:

Atumek aajajum etsegekatajum: “Jutii kajigká batsatjin jintintaiji aidau kashi kautuawag kasamkagmae titajum”, ¹⁴ tuja gobernador dekamtaishkam jutii tiagtatji, dutikaku atumnak ayamjuktatjime, tiaju.

¹⁵ Tiajam ditashkam kuichkin jukiag, dita titajum tusa akatjamunak imatiksag tuidau. Jujú tibauwa nunak yamaikishkam judío aidauk dutiksag tinu ainawai.

Jesús niina jintintaiji aidau dutikatnuji ujakbau

(Mr. 16.14-18; Lc. 24.36-49; Jn. 20.19-23)

¹⁶ Tuja Jesusa jintintaiji once aina duka Galilea weajui, Jesús nunú mujanum minitnume tibaunum. ¹⁷ Nunikag Jesusan wainkag emematuidau, tujash ujumak utujimushkam asaju. ¹⁸ Jesús ditá jegantun chichajak:

“Ashí nayaimpinmaya aidau, nugkanmaya aidaushkam ame diistá” tusa mina Apag sujusé, ¹⁹ nunin asamtai, wetajum nunikjum atum jintintuatajum ashí nugkanmaya aidaush, nuniakjum Apajú daajin, Uchijí daajin, Wakaní Pegkeji daaji pachisjum yamigtajum, ²⁰ dutikakjum ashí ju umiktajum, atumin tiuwaitjim dushakam jintintuatajum. Wika ashí tsawantai, nugka nagkanbau atina duish atumjaig tuke pujutnaitjai.

Aatus ati.

Yamajam chicham Marcos agagbau

Juan Yamijatin uwegshunum chichagkagtukbau

(Mt. 3.1-12; Lc. 3.1-20; Jn. 1.19-28)

¹ Jesucristo Apajuí uchijiya nu pachisa yamajam chicham etsegbauwa nu nagkamnamu. ² Profeta Isaías agagbaunum:

“Wi mina chichamjun etsegnun emtikan awemajai, ni jintanak umigtamkati tusan’.

³ ‘Makichik chicham uwegshunum untsubau antuewai’:

‘Apu minitin jinta iwajatajum, jinta tutupit dakuektajum, tibauwa nu uminkauwai’”.

⁴ Aatus asamtai Juagshakam uwegshunum aentsun yamiau, nuniak etseju tudau idaiyinak yamimajag tudau aidaun tsagkugnagtinme tusa.

⁵ Nuna antukag ashí yaakat Judea nugkanmaya aidauk, ashí Jerusalemia aidaushkam kautuidau. Nunikag ditá tudaujin etsegtumagtai Juagshakam Jordagnum yamiau.

⁶ Juagká nugkutaijig camello uje najanamu, akachumtaijish duwap aajakui, tuja langostan* nuigtú dapá yumijin yuujakui. ⁷ Juan aents aidaun chichajak: “Mina ukujui minittawai dekas mina nagkaetasu senchigtin. Wika nuna sapatjinak tsuntsuntuankesh jigkatuamunak atitmaitsujai niya imanchau asan. ⁸ Wika ayatak yumiik yamigmajime, tujash nigka Wakani Pegkejiya dui yamigmagtatjume”, tau.

Jesús yamimagbau

(Mt. 3.13-17; Lc. 3.21-22)

⁹ Nunú tsawantai Jesús Nazaret, Galilea nugkanum awa nuiya jiinki jegauwai, nunikmatai Juan Jordagnum yamijui. ¹⁰ Dutikam yuminmaya jinkamá, Jesús wainkauwai nayaim ujanmatai, Wakani Pegkeji pauma nunin niini akaetatman. ¹¹ Nuniai nayaimpinmaya chicham antuekau: “Ametme mina uchig aneetaigmek, dui aminig shiig anejai”, tabau.

Iwanch Jesusan pegkegchaunum dekapsumu

(Mt. 4.1-11; Lc. 4.1-13)

¹² Juna timatai Wakani Pegkeji uwegshunum emauwai. ¹³ Nui cuarenta tsawan pujusui, nunittaman Iwanch pegkegchaunum dekap-sauwai. Kuntin kajen aidau batsatbaunum pujau; tuja ángel aina nu Jesusnak kuitamaidau.

Jesús Galileanum ni takatji nagkamamu

(Mt. 4.12-17; Lc. 4.14-15)

¹⁴ Juangkan achikag egkeawaju ai, Jesús Galilea weuwai yamajam chicham Apajuinua nuna etsegkatatus. ¹⁵ Nuniak: “Tsawantak yamaik uminkae, Apajuí inamjatnuk tikijuch wajasé; tudau idaikujum, yamajam chichama ju dekaskeapi titajum”, tiuwai.

Jesús ni jintintaiji atinun cuatro namaká main aidaun yajuakbau

(Mt. 4.18-22; Lc. 5.1-11)

¹⁶ Jesús Galilea kucharai yantamen wekamá Simogkan, ni yachi Andresjai namakan main asag retan ajuntuinak yujattaman wainkau, ¹⁷ nunik Jesús:

* 1:6 “Langostak yutai aajakui, manchi katsajait tutaya numamtin”.

—Minitajum wi jintintuatjime, namak maatasajum yujagjum anmam-tuk, Apajui chichame etsegkujum aents aidau minai ikautjin atajum tusan, tau.

¹⁸ Tamawaik ditá redjinak ukuinak niijai weajui.

¹⁹ Nuwi nagkaemaki machik kuwaesag wekamá, Zebedeo uchiji Jacobo ni yachi Juagjai, barcain chimpimas redjin apijuinak chimpimatman wainkauwai. ²⁰ Dutika nunashkam:

—Weajai, mina jintintaig atajum, tiu. Tama ditashkam apají Zebedeonak ditajai takau aidaunak barcanum ukuinak Jesusjai weajui.

Aents wakan pegkegchau egkemtugbaun Jesús etsagabau
(Lc. 4.31-37)

²¹ Capernaúm jegawajui, nunik tsawan ayamtai tsawagmatai Jesús jega ijuntainum wayá jintinkagtau. ²² Nunitai aents aidauk ni jintinkagtamujin puyatjuk diidau, wagki maestro chicham umiktinun jintinkagtin aidaun nagkaegas, apu chichame antugtai jintimaina imatika jintinkagtau asam-tai. ²³ Nuniamunum jega ijuntaiya nui, makichik aents wakan pegkegchau egkemtuumu eketu untsamak:

²⁴ —¡Jesús nazarenumiyah! ¿Wagka amesh jutii pujamunmash miname, ijijatuatasamek minam? Wika ame yaitpa nunak dekaagme, amek pegkejam Apajuinuitme, tiuwai.

²⁵ Tama Jesús wakan pegkegchaun jiyaa:

—¡Takamtak jiinkim ju aentsuk ukuktá!, tiuwai.

²⁶ Tamawaik wakan pegkegchaushkam aentsun waugmitkak nugká ajajui, dutika shiig senchi untsamak jiinki ukukiuwai. ²⁷ Nunikmatai ashí ishankag, ditak pempeentunikiag:

—¿Jusha yaita? ¿Jintiamujish yamagmajama, wajuku asaya chichamesh senchigtinaita wakan pegkegchau aidaush antujuina dusha?, tudayinau.

²⁸ Nunú nunikbaunak wamak ashí galileanmaya aidauk dekawajui.

Pedro tsatsají Jesús etsagabau
(Mt. 8.14-15; Lc. 4.38-39)

²⁹ Nunik Jesusak jega ijuntainmaya jiinki Jacobojai nuigtú Juagjai, Simón nuigtú Andresa jeega nui weajui. ³⁰ Simogka tsatsajig tsuweak pegakjin tepau, nunitai Jesusan ujakajui. ³¹ Tima Jesuschakam jegantun uwegnum achik inankiuwai; dutikamuik tsuweamunak megkaegak, Jesusan yutain umijuk ajamsauwai.

Kuashat jau aidau etsagabau
(Mt. 8.16-17; Lc. 4.40-41)

³² Kintamai, etsa akaikiu ai, ashí aents jau aidaun nuigtú iwanch egkemtuumu aidaunashkam Jesusan ikautkaju; ³³ tuja ashí aents nui batsamin aidauk waitinmag tuwakaju. ³⁴ Nunikagmatai Jesús kuashat aents ashí tikich jatai jau aidaun etsagakui, kuashat iwanch aidaunashkam jiiuji; tujash iwanch aidaunak chichaktí tusag idaichau, wainainamu asa.

Jesús Galileanum chichagkagtukbau
(Mt. 4.23-25; Lc. 4.42-44)

³⁵ Tsawak eke suwe aig nantakí, jiinki aents atsamunum weuwai, nunik nui Apajui auju. ³⁶ Nunikmatai Simón ni kumpají aidaujai egaak weajui; ³⁷ nunik Jesusan wainkag:

—Ashí aents egapainawai, tuidau.

³⁸ Tusa tama ni chichaak:

—Wemí yaakat tikiju anem aina nui, awishkam chichaman etsegkatjai; wika nuna nuniktasan tauwaitjai, tau.

³⁹ Nunik Jesusak ashí Galileanum makí makichik yaaktanum jega ijuntai aidaunum chichagkagtak, iwanch aidaunashkam jiijá ishimu.

Aents lepragtinun Jesús etsagagbau

(Mt. 8.1-4; Lc. 5.12-16)

⁴⁰ Makichik aents lepra achikbau Jesusa jegantun tikishmag pujus:

—Wakegakmek etsaentumainaitme, tau.

⁴¹ Tama Jesuschakam wait anentug uwejin antiak:

—Wakegajai, pegkeg wajastá, tiuwai.

⁴² Tusa taig leprak megkaekauwai, nunikmatai pegkeg wajasui. ⁴³ Tujash Jesús nuna shiig akateg ukuak:

⁴⁴ —Nijah, makichik aentskesh ujakaipa; ayatak weme sacerdote wantintukta, nuniakum ofrenda jukita Moisés tibauwa dutiksamek, ame pegkeg wajasum nuna ditash waipaktinme, tiuwai.

⁴⁵ Tujash nigka jiinki weak makichkish uutsuk ni tsagagbaujinak etse etsegkawa weuwai. Dutikau asamtai, Jesusak wantinak yaaktanmash waimainchau wajasú asa, aents atsamunum wekagu; nuniaig ashí yantamnumia aidau niina wainkatatus minituidau.

2

Jesús aents wekaechau etsagagbau

(Mt. 9.1-8; Lc. 5.17-26)

¹ Ujumak tsawan pujus Jesús wakitki Capernaúm jegauwai; nunikmatai jega ni pujamujin dekajuawaju. ² Nunikag kuashat aents aidau jeganmag pimuidiaju, waitinum nagkamasag tikichish wayachmin awajsaju. Imanikagmatai niishkam Apajuí chichamen etseju. ³ Nuniai cuatro aents aidau, aents wekaechaun jukiag itawaju. ⁴ Dutikawag kuashat aents asamtai, Jesús wajamunum jegamainchau asag, Jesús wajamun mamikis jegá tuntupen wakag chigkaidiag, wekaechauwa nuna camillanum aepsag akakiaju. ⁵ Dutikamtai Jesús niini dekaskeapi tuidaun wainu asa, wekaechaun chichajak:

—Uchijuh, amina tudajum aidauk tsagkugnaje, tau.

⁶ Nuna tutai ujumak maestro chicham umiktinun jintinkagtin aidau nui pekajaidau ditá anentainig: ⁷ “¿Wagka jusha tuush chichawa? ¡Apajuin pegkegchau chichajak tu wekagajama! Imá Apajuikeajama tudaun tsagkugkagtumainuk”, tuidau. ⁸ Dita aatus anentaimainamujinak Jesús dekau asa:

—¿Wagka aannush anentaimainagme? ⁹ ¿Tuwaita imá yupichuch wekaechauwa ju tumainush, amina tudajum aidauk tsagkugnaje taja dukaih, atsa nantakim tepetaijum jukim wetá tumainaitag dukaih?

¹⁰ Tujash Aentsmaga akiinauwa nu, ju nugka juish tudau aidaunash tsagkugkagtumaina nu dekaatajum.

Tusa wekaechaun chichajak:

¹¹ —Amina tajame, nantakim ainká tepetaijum jukim jeemin wetá, tiuwai.

¹² Tamawaik nantakug tepetaijin juki ashí wainainamunum jiinkiu. Nunikmatai ashí ditak anentai jegagchajui, nunikag Apajuin emematinak:

—Juninuk makichkish wainkachuitji, tuidau.

Jesús Levin mina jintintaig atá tibau

(Mt. 9.9-13; Lc. 5.27-32)

¹³ Dutika Jesusak ataktú weuwai kuchá tugkitken; nunitai kuashat aents niina jegajuidau, dutikam niishkam jintinkagtau. ¹⁴ Nui nagkaemakmá Levi* Alfeo uchijin wainkauwai, apú kuichkiji atinun ijumin asa akikmag-tai yajumak ekeematman, nunik:

—Wegajai mina jintintaig aminum, tiuwai.

Tama Levishkam wajakí Jesusjai weuwai.

¹⁵ Nunik Jesusak Levi jeen jegaa mesanum ekeemsau, kuashat apu romanmaya kuichkiji atinun ijumin aidau nuigtú tudaugtin aidau, jintintaiji aidaujai ijunag niijai ekeemsajui, kuashat niina saetus yujaidau asag. ¹⁶ Nunittaman maestro chicham umiktinun jintinkagtin fariseo aina nu, Jesús ijunag yuwaun wainkag jintintaiji aidau chichajuinak:

—¿Wajukeakua niish apú kuichkiji atinun ijumin nuigtú tudaugtin aina ibaujaish ijuntug yuwakush, umutnash umawa?, tuidau.

¹⁷ Nu tabaun Jesús antuk ayaak:

—Jamamtuchu aidauk ampijatnunak atsumatsui, jau aidau atsumawai. Wika aents pegkejan takau aidau untsuktasan minichuitjai, aents tudaugtin aidau, tauwaitjai.

Ayuno pachisa iniimsamu

(Mt. 9.14-17; Lc. 5.33-39)

¹⁸ Juagká jintintaiji aidau, fariseo aidauhkam ayuno takainak batsaidau, nuninai ujumak Jesusan jegantun iniinak:

—¿Wagka Juan Yamijatna nuna jintintaiji aidauk, fariseo aidaujai ayuno takainash, ame jintintaijum aidau ayunonash takainatsua?, tuidau.

¹⁹ Tama Jesús ayaak:

—¿Ipaamu aidauhkam nuwena nu ditajai pujaigkish ayunaumainkaih? Nuwenu ditajai pujaigkik ayunaumaitsui. ²⁰ Tujash tsawan jegattawai nuwena nunú juwam atata nu, nunikmatai ipaamu aidauhkam wake besemag dekapenak ayunawagtatui.

²¹ “Makichik aentskesh jaanch yamagman tsupikag jaanch mamujunmag adujtuchu ainawai, yamajam asa waketak jaanch mamujua nuna nuní nagkaemas ichiimain asamtai. ²² Dutiksaik vino yamagmashkam duwap apagbau ajutnumag yajashtaiyai, dutikamak ichiimain asamtai, nunik vinok ukaegag, duwapshakam ichiinak ajapnamainai. Nuadui vino yamagmak duwap yamagmanum yajataiyai”.

Jesusa jintintaiji aidau tsawan ayamtai aig trigo juki yuawagbau

(Mt. 12.1-8; Lc. 6.1-5)

²³ Tsawan ayamtai tsawaju ai, Jesús trigo ajakbaunum wegau, nuniamunum niina jintintaiji aidau trigon kupig juidau. ²⁴ Nuniagtai fariseo aidau wainkag:

—Nijah, ¿wagka tsawan ayamtai aig takantsashti tibauwa nuniaish aikainawa?, tuidau.

²⁵ Tusa tiagtai Jesús ayaak:

—¿Atumek tuke ausachuk ainajum, David niijai yujaamujai yapajuinak dutikawajua duka? ²⁶ Abiatar sumo sacerdote wajas pujai, jega Apajuí ememattainum wayauwai, nunik yuwauwai pag Apajuí anagkuamu imá sacerdotek yuwati tibauwa nuna, dutikak aents niijai yujaunash susauwai.

* 2:14 Diistá Mt. 9.9.

²⁷ Tsawan ayamtaiya duka aents atsumau asamtai aikamui. Untsu aentsuk tsawan ayamtaiya nuiya umimain aina nuna umiktinme tichamui.
²⁸ Nunin asamtai Aentsmaga akiinauwa duka, tsawan ayamtaiya nuna Apujiyai, tiuwai.

3

Tsawan ayamtai ai Jesús aents jau etsagagbau *(Mt. 12.9-14; Lc. 6.6-11)*

¹ Jesús ataktú jega ijuntainum wayau, nuwi aents uwejí jaka ekeemkau pujau. ² Nunitai dii ijuntuidau tsawan ayamtai aish etsagagchatpash tusag tsanumjugtatus. ³ Nuninaig Jesús aents uwejí jaka ekeemkau chichajak: —Wajaktá nunikam ejapan wajantá, tiuwai.

⁴ Nuna ti, tikich aidaun chichajak:

—¿Tsawan ayamtai aina nuish pegkejan dutikati atsa pegkegchaun dutikati tibaukaih; etsagautskek jakati tusa idaimainait?, tau.

Tamash ditak aimainachu. ⁵ Nuna ti nui ijuntatman kajeká, wake besemag diisú antumtikmainchau asagmatai. Nunik nuna aentsun chichajak:

—Uwejum dakuekta, tiuwai.

Tama niishkam uwejin dakuoku, nuniamuik uwejenig pegkeg wajasui.

⁶ Dutikamtai fariseo aidau, Herodesan aentsji aidaujai agaa jinjang, Jesusan maatasag chichaman umigkajui.

Kuashat jau aidau Jesús etsagakbau

⁷ Tujash Jesusak ni jintintaiji aidaujai kuchanum weajui, nuniai kuashat aents galileanmaya aidau, Judeanmaya aidaushkam, ⁸ Jerusalegnumiashkam, idumeanmaya aidaush, Jordagka amain batsamin aidaushkam nuigtú Tiro, Sidón aina nuwi tikiju batsamin aidaush minitaijui, Jesús kuashat iwainaka takaamun antukaju asag wainkagtatus. ⁹ Nuniaun asamtai, Jesusak ni jintintaiji aidaun, kuashat aents kaunainak chanuntuawainum tau asa barca yaijan shiig unis asatume tusa ujakajui; ¹⁰ wagki kuashat jau aidaun etsagau asamtai, ashí najaimak waituidau niina antigkagtatus awagkemtuidau asamtai.

¹¹ Tuja wakan pegkegchau aidauk Jesusan wainkag, niina eemtin tikishmajag, senchi untsumkag:

—Amek Apajuí Uchijiyaitme, tuidau.

¹² Tujash Jesusak senchi jiyau, dekaajuawainum tau asa.

Jesús ni apostolji agtin aidau etejamu *(Mt. 10.1-4; Lc. 6.12-16)*

¹³ Nunik Jesús mujanum wakauwai, nui untsukui ni wakegamu aidaun, dutikam niini kauntajui. ¹⁴ Dutika nuanuiyan etegjauwai doce, nunú aidaunak apóstol tusa adaijauwai tuke niijai ijunja wekaesatin aidaun, niina chichame etsegkati tusa ishiaktinji aina nuna, ¹⁵ dutikak wakan pegkegchau aidau egkemtugbau jiiiktinnashkam senchijin susauwai. ¹⁶ Doce etegjamua duka ju ainawai: Simón, Pedro atame tibauwa nu, ¹⁷ Jacobo ni yachi Juagjai, Zebedeo uchiji aidaun Jesús Boanerges adaikajua nu (nunak “ipamta uchijí aidau” taku tawai), ¹⁸ Andrés, Felipe, Bartolomé, Mateo, Tomás, Jacobo Alfeo uchijí, Tadeo, tikich Simón cananeo tutai aajakua nu, ¹⁹ nuigtú Judas Iscariote Jesusan sujukua nunú.

Jesusak Beelzebú senchijin wakan pegkegchaunak jiyawai tibau
(Mt. 12.22-30; Lc. 11.14-23; 12.10)

²⁰ Nuna dutika Jesús jegá wayauwai, nunikmatai ataktushkam aents aidau tuwagkag yujumkash yumainchau awajuidau. ²¹ Nuna antukag Jesusa patayí aidau jukitasag kautuawaju, aentainkachu wajas wekaetsuash tuidau asag.

²² Maestro chicham umiktinun jintinkagtin aidau Jerusalegnumia kawnawaju aidau chichainak: “Beelzebú, iwanch aidau apujiya nuna senchijin iwanch aidau nak jiyawai”, tuidau.

²³ Tiagtai Jesús ditan utsuká, augmatbaun pachis ujaak: ¿Utugkaya iwanchish, iwanchnash jii mainaita? ²⁴ “Makichik nugkanmag batsatiatak pempeentuniki maaní batsatkug megkaemain ainawai. ²⁵ Tuja makichik jeganmag ijunag batsatiatak pempeentunikiag maaní batsatushkam megkaemain ainawai. ²⁶ Aantsag Iwanchia dushakam pempeentuniki, maaniakug, megkaemain ainawai, nuniakug nagkanbauji jegajim nuni-mainai.

²⁷ “Aents senchigtina nuna jeen wayag makichkish wajiijinak yajutmainchau ainawai nuna jigkatskek, untsu nuna jigkajá wajiijinak yajutmain ainawai.

Wakaní Pegkeji pachisa Jesús tibau

(Mt. 12.31-37)

²⁸ “Dekas tajime, Apajuik ashí aentsú tudaujinak tsagkujatnai, nina pegkegchau chichagkau aidaunashkam, ²⁹ tujash Wakaní Pegkejin pegkegchaun chichagkau aidauk, tuke tsagkugnagchatnai, ajumaish tudaujig tuke atinai”.

³⁰ Nunak Jesusak: “Wakan pegkegchau ajawai” tibau asa tiuwai.

Jesusa dukuji ni yachi aidaujai kautuamu

(Mt. 12.46-50; Lc. 8.19-21)

³¹ Nuna tusa inagnaku ai Jesusa yachi aidau dukujijai kautuawaju, nunikag agaag ijuntsag, untsugtuktajum tiajui. ³² Tuinam Jesusan tenteawag pekajuidau ujanak:

—Amina duku, yatsum umaim aidaujai agaa ijunas egapainawai, tuidau.

³³ Tusá ujaam ni ayaak:

—¿Yaita mina dukug, mina yatsug aidaush?

³⁴ Nuna tusa nui pekajuidaun ayampatua:

—Jujú ainawai mina dukug, mina yatsug aidauk. ³⁵ Ashí aents Apajuí wakejamun takaina nuuwai mina dukug, mina yatsug, mina ubag aidauk, tiuwai.

4

Ajakan ajakbaun pachis Jesús augmattsamu

(Mt. 13.1-9; Lc. 8.4-8)

¹ Jesús ataktú kuchanum uwet jintinkagtau nunitai shiig kuashat aents tuwagkaju, nunikmatai barca kuchanum nanatunum egkemag ekeemsau, nuniain aents aidauk kuchá uwet kaamatak ijunaidau. ² Nunik kuashat waji aidauin pachis augmatus jintinkagtak:

³ “Antuktajum, ajakan ajakbau ajakmatatus weuwai. ⁴ Nunik jegantá ajajin jigkai nagkimam jintá kakekaunak, pishak kaketuk amukui. ⁵ Tikich jigkai kayagnunum nugka imanik atsamunum kakekauwai, nu nunikuk wamkes tsapaidiajui, wagki nugkak awankauch asamtai; ⁶ nuniktatman

etsa jiiinak, kagkapé initak akaejachu asamtai apeká ijinauwai. ⁷ Tuja tikich jigkai jagki ayaunum kakekaunak, jagki tsapainak yutuawajui, dutikamu asa nejeachui. ⁸ Tujash tikich jigkaik nugka pegkegnum kakekajui, nunikajuk tsapaidiag, tsakajag shiig nejekajui, ni treinta nejeai, tikich sesenta, tikich cien aatus nejekajui”, tau. ⁹ Nuna tii nuigtushkam: “Ni antutaiji ajamuk antukti”, tiuwai.

Ajak augmattsa jintinkagtuamua nu pachisa tibau
(Mt. 13.10-17; Lc. 8.9-10)

¹⁰ Nigki juwakmatai, niijai juwakajua nu doce aina nujai inidau ajak augmattsa tibauwa nuna pachis. ¹¹ Tama ni ayaak: “Atumnak Apajui dekamtijamui ni inabauji dekajakchamua nuna; tujash tikich aina nunak ashí augmatbau pachisan tajai, ¹² imanik wainainakush wainmachu wajukmaina nuniktinme, kuashat antuinakush antachu wajukmaina nuniktinme, nunidau asag yapajinashtinme nunitai tudau aidaujish tsagkugnagchatnume tusan”, tiuwai.

Ajakan ajakbau timag nunak juna takun timajai tusa Jesús etsegkamu
(Mt. 13.18-23; Lc. 8.11-15)

¹³ Junashkam tiuwai: “¿Atumek jujú augmattsa tabauk dekatsjume? ¿Aniautigmesh ashí wi augmattsan takuish, wajuk dekattagme? ¹⁴ Ajakan ajakbauwa duka chichaman ajakma nuuwai. ¹⁵ Ajaka jigkayí jintá kakekauwa nunin aina duka juninai: yamaikik chichaman antittaman wamak Iwanch tajua chicham ditai ajakmamua nuna sakapitkawai. ¹⁶ Tikich aidauk ajaka jigkayí kayagnunum ajakmamua nunin ainawai: chichaman antukag yamaikik shiig wakegas antuinawai, ¹⁷ tujash nu ajakak kagkopenachu asa ebetmamsui; numamtuk utugchat minitmarsh nuniachkush Apajui chichamen umidau asag waitkainam wamkes idaiyinauwai. ¹⁸ Tikich aina duka ajaka jigkayí jagki ayaunum ajaamua nuninai: chichamnak antawai, ¹⁹ tujash ju nugkanmaya takat aina nuna imá senchi uyumainak, wiyachameata tabaujiya nu tsanuinam nuigtú ashí waji ajutti tusa senchi wakegamujiya nu egkemtam chicham antukbaujinak sakapag ajak nejemainchauwa nunin weawai. ²⁰ Untsu jujú ainawai nugka pegkegnum ajamua nunin aina nu: chichaman antukag, jukiaju aidauk makichik ajak treinta jigkain, sesenta, cien aatus nejewajua nunin ainawai”.

Lámpara pachisa augmattsamu
(Lc. 8.16-18)

²¹ Junashkam chichaak: “¿Lámpara ekemakaish, dukukaik dutikachkuish pegaká wakenting aputayama? ¿Dutiktsuk yakí ekenchataigkama? ²² Nunisag, ashí uukbau aidaush wantintsuk juwaktinuk atsawai, antsag ashí dekaachbau aidaushkam dekaamu agtinai. ²³ Ni antutaiji ajuinamuk antuktinme”.

²⁴ Junashkam tiuwai: “Shiig antuktajum, tikichish utujagme dutiksagmek atumesh dutikam atajtume, antuidautigmek aan nagkaemasa eketam atinaitjume. ²⁵ Wagki kuashat ajá duka nuní dukap suwam atinai; untsu piipich ajamua dusha, nu piipich ajamua dukesh atantam atinai”.

²⁶ Junashkam Jesús tiuwai: “Apajui inabaujiya duka, aents jigkain nugká ajaa nuninai, ²⁷ nunik ajaa kanak tepaish tuja iwaa pujaishkam kashi tsawai aish jigkaik tsapaawai, nunik tsakawai ajauwa duka wajuk tsakaawa nunak dekatsaig. ²⁸ Nunak nugka nigki nejemtikamu asa nuniawai, dekatkauk dupaya nunin wee, tsakaak pasamjawai, nunik

pasamega nui ayatak jigkaik weawai. ²⁹ Nunik jigkayí tsamakmatai hozan juki jiintawai juuktatus, tsawan juumainji jegau asamtai”.

Mostaza jigkayí pachisa augmattsamu
(Mt. 13.31-32; Lc. 13.18-19)

³⁰ Junashkam Jesús tiuwai: “¿Apajuí inama dusha wají pachisaiya nuni-nai tumainaita, nuniachkuish wají augmatbaujaiya apatkaish tumainaita? ³¹ Duka mostaza jigkayí nugká ajatiama nuninai. Ashí nugkanmaya jigkai ajakmatai aina nuna nagkaesau shiig piipichi, ³² tujash ajaam tsakaakug ajak nugkauchik nejen aina nuna nagkaegas tsakawai, nunik kanawe muun wajasmatai yakiya pishak aidaushkam nuna wakentí bikintunum pasugmau ainawai”.

³³ Tusa Jesusak kuashat augmatbaun pachis jumamtin aidaun jintinkag-tujakui, dita wajuk antumaina ainawa dutiksag. ³⁴ Augmatbaun tutsukek aents aidaunak aujukachauwai, tujash jintintaiji aina nunak ditanak akanki ashí jintias ujakakui.

Jesús dase imijkamu
(Mt. 8.23-27; Lc. 8.22-25)

³⁵ Nunú tsawantai kiyagbaunum Jesús jintintaiji aidaun chichajak:
—Amain weagmi, tiuwai.

³⁶ Timatai aents aidaunak ukuinak, Jesús barcanum egketunak dutiksag jukiag weajui. Nuniai tikich barcanum minidaush aidaun. ³⁷ Nunik weenai dase senchi kuchan umpuak tsukatmitkau, imaniau asa barcanmag yumik bete wajasú. ³⁸ Tujash Jesusak barca ukujin atamjutain atamjuk kanag egketu, nunittaman ishintainak:

—¡Maestro! ¿Amek puyatkagatsmek jutii jakektatag duka?, tuidau.

³⁹ Tama nantakí dasen jiyak idaiyak, kuchanashkam:

—¡Mijakta! ¡Jasá asata!, tiuwai.

Tamawaik daseshkam mijaku, nunikmatai kuchashkam wiyaku wajasú.

⁴⁰ Nuna dutika niina jintintaiji aidaun chichajak:

—¿Wagka sapigmajume? ¿Dekaskeapi tabauk atsugtamainawak?, tau.

⁴¹ Nuna dutikamtai shiig senchi puyatkaju, nunikag ditak pempeentu-nikiag:

—¿Jusha yaita dasesh, kuchash antujam awa dusha?, tudayinau.

5

Gadaranmaya aents wakan pegkegchau chimpintuamun Jesús jiijamu
(Mt. 8.28-34; Lc. 8.26-39)

¹ Kuchá amain katigkajui gadaranmaya batsamtai nugkeen. ² Nunik Jesús barcanmaya jiinaig, ukumatainmaya aents wakan pegkegchau egkemtugbau tajuauwai. ³ Nunú aentsuk ukumatainun pujú, makichk-ish cadenayaikish jigkamainchau. ⁴ Kuashtá cadenayai uwejin jigkajá, dawenum jigkajá awajkamash tsujiag utsau, imaniau asa makichkish depetmainchau. ⁵ Nuniak tuke kashi tsawaishkam mujanum, ukumatainmash wekaegas unsumá wekagu, nuigtush kayai ijumak tsupimag wekagu. ⁶ Nuniau Jesusan atushat wainmawaik, tupikatki jegantun tikishmatjau. ⁷ Nunik senchi unsumak:

—¡Jesusah, Apajuí ashí tikich aidaun nagkaesau muunta nuna uchijiyah! ¿Wagka amesh minaish miname? Apajuí daajin segajame, ¡wait aneam waitkagkagtsuapa!, tau.

⁸ Nunak Jesús:

—Wakan pegkegchauwah, aents jiinkim ukuktá, tibau asa tiuwai.

⁹ Tutai Jesús iniak:

—¿Amesh yaitpa?, tau.

Tama ni aimak:

—Wika Untsujiyaitjai, wagki jutiik kuashat asaja, tiuwai.

¹⁰ Nuna tii senchi segau Jesusan tikich nugkanum aweti tusa.

¹¹ Mujanum tikiju kuashat kuchi dupaan yuwinak yujau asamtai, ¹² ashí wakan pegkegchau aidau Jesusan segainak:

—Kuchi batsata awi awekagtita, kuchinum wayawagmi, tuidau.

¹³ Tutai Jesuschakam nuniktinme tusa idaisauwai. Dutikam wakan pegkegchau aidaushkam jijnag, dos mil kuchi tumain batsatunum ut-sanawajui. Dutikawajam kuchishkam pisajag betsag tajagak kuchanum najataunum utsanawag jinawajui.

¹⁴ Nunikagmatai kuchi kuitamin aidaushkam pisajaju, nunikag yaak-tanum jegawag etsejuinak, ajanum batsataidaunash dutiksag ujakajam, aents aidaushkam nu nunikbaun diisagtatus shimutkaju. ¹⁵ Nunik Jesús pujamunum jegakmag, wakan pegkegchau untsuji chimpintuamu aajakushkam pegkeg wajas, jaanchin nugkujá eketun wainkag, senchi ishankajui.

¹⁶ Nuna wainkau aidau tikich aidaunashkam ujaidau, aents iwanch chimpintuamu tsagajun nuigtú kuchi jinaamun pachisashkam.

¹⁷ Tiagtai Jesusan segajui, ditá nugkenak ukuak, yajá weti tusag.

¹⁸ Jesús waketak barcanum egkentai, iwanch egkemtuamu aajakushkam niijai wetatus segauwai. ¹⁹ Tujash Jesusak nunikta tichauwai, ayatak:

—Jeemin wetá pataim batsatbaunum, nunikam shiig kuashat Apu Apajui amina wajak wait anenjamjae nunú pachisam ashí ujaktá, tiuwai.

²⁰ Tima weuwei, nunik Decápolis jegaa Jesús niina shiig kuashat wait anenja nu pachisa etsegtan nagkabau. Nunitai ashí aents aidauk anentai jegachaju.

Jairo nawanji nuigtú nuwa Jesusa jaanchjin antigkua nu
(Mt. 9.18-26; Lc. 8.40-56)

²¹ Jesús barcanum egkemag ataktú kuchá amain katigmatai, kuashat aents aidau tuwagkaju; dutikam nigka nuig kuchá tugkitkenig juwakui.

²² Nuniai juga ijuntaiya nuna apuji aina nuiya makichik Jairo daagtin Jesusan wainak jegantun tikishmatjau; ²³ nunik senchi segau: —Mina nawantug ashí jakaun ukukmajai; ame taam uwegmin achigtukta, dutikam tsagag pujusti, tusa.

²⁴ Tama Jesús niijai wegau, nuniai kuashat aents saetuidau asag senchi chanuidau. ²⁵ Nu imatikainamunum nuwa doce mijadai numpam puwak waitú pujú asa, ²⁶ kuashat ampijatín aidaunum wekaegas ampimak ashí ni ajamuchijnak ashimkush, tsagautsuk nuní nagkaemas waitú wekayin,

²⁷ Jesús pachisa chichainamun antuk, aents tuwakbaunum eteenki, ukujin pataetuk Jesusa jaanchjin antinkauwai. ²⁸ Wagki ni anentaimsag: “Imá jaanchjinakesh antiaknuk tsagagtatjapi”, tau asa. ²⁹ Nuniamuik numpa puwamujinak megkaekau, tuja ashí iyashin jaamujinash pegkeg weamujin dekapjauwai. ³⁰ Nuniaig Jesuschakam niina senchiji jijnun dekapeg, aents minidaun ayampatua:

—¿Yaa jaanchjuish antinkae?, tau.

³¹ Tutai niina jintintaiji aidau ayaak:

—Kuashat aents chanumpaina nu wainiatkumek, ¿ya antinkae tame?, tuidau.

³² Tujash Jesusak ashí diyau, yaki antinkame tusa wainkatatus. ³³ Nunitai nuwak ishamak kujaukmaikia, ni wajukae nuna dekau asa, jegantun niina eemtin tikishmag, dekaskenum ashí ni waitiamujinak ujakú. ³⁴ Tusá ujaam:

—Nawantah, ame dekaskeapi tabaugmia nu etsaentamjae, shiig agkan anentaimsam wetá, yamaik jaamugmik tsagajume, tiuwai.

³⁵ Tusa eke chichaak wajai, apu Jairo jeen batsatu kaunawag ujainak:

—Nawanjumek jakame ¿utugkatasamea Maestros h waitkame?, tuidau.

³⁶ Tujash Jesusak nu tuinamun antuk, jega ijuntain apujiya nuna chichajak:

—Ishamkaipa, ayatak dekaskeapi tita, tiuwai.

³⁷ Nuna tii makichik aentskesh uyuntusainmegka tusa Pedro, Jacobo ni yachi Juan aatus weajui. ³⁸ Nunik apú jeen jegakmá aents pampainak, untsu untsumas butuidaun wainkauwai. ³⁹ Nunik wayá:

—¿Wagka pampakjumesh buutush batsatjume? Nuwauchik jakache kanag tepawai, tiuwai.

⁴⁰ Tutai dushikidau. Tujash nigka ashí aents nui batsatunak jijjá, nuwauchi apají, dukují nuigtú ni jintintaiji uyunaina nujai utsanawajui nuwauch jaka tepamunum. ⁴¹ Nunik uwegnum achik:

—¡Talitá cum!*, tiuwai. Nunak: “Nuwauchih, amina tajame, nantaktá”, taku tiuwai.

⁴² Tamawaik nuwauchik nantakui nunik wekagu, duka doce mijan ajau. Nuna dutikamtai aents aidauk senchi ishamkajui. ⁴³ Tujash Jesusak makichkish etsegkaipajum tusa shiig akatjag idaiyak, nuwauch yumain susatajum yuwati, tiuwai.

6

Jesús Nazaret pujusbau (Mt. 13.53-58; Lc. 4.16-30)

¹ Jesús nuiya jiiinki ni nugken wetai, jintintaiji aidaushkam nijai weajui. ² Nunik tsawan ayamtai tsawagmatai, jega ijuntainum nagkama jintinkagtutai nui kuashat antuidauk puyatjukag:

—¿Jusha tuwí imatikash unuimajuita? ¿Utusaya imatikash yachameajuita? ¿Tuwiyana senchinash jiyawa uwejinig aents dutikmainchaun dutika nunash? tuidau. ³ ¿Jujú carpinterowe duchaukaih, María uchijí nuigtú Santiago, José, Judas, Simón aina nuna yachi? ¿Umayí aidaushkam jutijai batsatajama? Tusag pampantuidau. ⁴ Tujash Jesús ditan chichajak:

—Profetak niina nugkenig, niina patayí aidaunmash tuja niina jeenish eme anentamak achauwai, tiuwai.

⁵ Nuwig aents dutikmainchaunak makichkish dutikachui, nuniayatak ujumchik jau aidaun uwejin achik etsagakui. ⁶ Nunik anentai jegagchauwai ditak dekaskeapi tuinachu asamtai. Nunik yaakat yaijuch aidaunum wekaegas Jesusak jintinkagtau.

Jesús jintintaiji doce aina nu ishiakbau (Mt. 10.5-15; Lc. 9.1-6)

* 5:41 “Talitá cum”, tawa duka arameo chichamai, texto griegonmag aatus tau asamtai dutiksaik jui inagkeakji.

⁷ Nunik ni jintintaiji doce aina nuna untsuká, jimá jimajan apatuk ishimtan nagkamauwai, dutikak wakan pegkegchau aidau jiiimainnash senchijin susauwai. ⁸ Dutikak jintá wesá atsumainuk wají egkesá jutaigkesh, pagkesh, akachumtaigmin kuichkikesh jukigpajum, ayatak ushujutaigmek jukitajum, ⁹ nuniakjum sapat wegamahtajum, tujash nugkutaigmik pataká nugkujaigpajum, tiuwai. ¹⁰ Tusa ditan chichajak:

—Makichik jeganum wayaakjumek nuig pujusjum weakjum ukuktajum.

¹¹ Tuja atum tu yaaktanma jegattagme nuniagmin jujamtan dakitjamainak, antugtamtanash dakitjamainakuig jiiinkí ukuktajum, nuniakjum atumi akap dawemin yukukuntu awa nu pegagjum akakekjam ukuktajum dita suwimak jukitnujiya nu iwaintakjum. Dekas tajime, suwimak sukagtamu tsawan jegatna duik, nunú yaaktanmaya aents aina duka, nugka Sodoma Gomorra aajakua nui aents batsamajakú suwimak susamua nuna nagkaesau suwimkan jukiagtinaí.

¹² Tima jintintaiji aidau shiyakag, aents aidau tudaujin idaiyinauk pujutjin yapajiatnume tusag etsejuidau. ¹³ Nuninak kuashat iwanch aidanash jiiing ishimainak, jau aidanashkam buuken aceitiyai nijak etsagaidau.

Juan yamijatin maamu

(Mt. 14.1-12; Lc. 9.7-9)

¹⁴ Rey Herodes Jesús pachisa chichainamu ashí yantamnum naatun antuku. Wagki ujumak chichainak: “Juan Yamijatin maamua nu nantakiu asa, senchigtin wajas aents dutikmainchaun aikawai”, tuidau.

¹⁵ Tikich chichaidau: “Auk Eliasai” tuinaí, tikich chichaidau: “Profetayai nuniachkush profeta aajakú aina dutsukaitai”, tuidau.

¹⁶ Nunú tuinamun Herodes antuk:

—Auk Juan wí buuké tsupigkatajum tii ai tsupijuk maawajamia nunú nantakne, tiuwai.

¹⁷ Nunak Herodesak nigki Juan achiktajum tima shimutkag, achikag cadenayai jigkajag cárceel egkeau aajakui. Nunak ni yachi Felipe nuwe Herodiasan juki nuwatuk pujutai, ¹⁸ Juan Herodesa chichajak: “Amek yatsumi nuweg nuwatkamek pujumaitsume”, ¹⁹ tabaun Herodías antuk kajejuk maatatus wakegayatak dutikmainchau dekapeau, ²⁰ wagki Herodesak Juagnak ishamau, pegkegnak takau nuigtush pegkegman dekau asa, nuniak kuitamu. Herodesak Juan chichatai antujak tumainchau dekapeayatak, wakejus antuju. ²¹ Nuniamunum Herodes ni akiinamuji tsawagmatai fiestamak, yutai umikbaun ni aentsji aidaujai nuigtú suntajá apuji aidau, galileanmaya eme anentsá diitai aidaujai yuwinak pekagbaunum, ²² Herodiasa nawanji wayá nantsebau, nuniak Herodesan nuigtú nijai mesanum pekajuidaunashkam shiig awajkauwai. Nunikmatai rey nuwan chichajak:

—Ame wakegamu segatá, tujutkuminig amastajai.

²³ Tusa Apajuí pachis anagkuauwai ashí ni wajina segamua nuna nuniachkush ni inama nunakesh jimaituk susatatus.

²⁴ Tima jiiinki dukujin jegajua chichajak:

—¿Wajinak segatjá?, tau.

Tama dukují ayaak:

—Juan Yamijatna nuna buuké segatá, tau.

²⁵ Tima nuwauchishkam wamkes rey pujamunum wayau, nunik:

—Yamaikiuch Juan Yamijatna nuna buuken platonum egkejá sujustí tusan wakegajai, tau.

²⁶ Tama rey shiig senchi wake besekú; nuniyatak ipaamu aidaush antuinamunum yapajimainchaun anagkuau asa, dakitmainchau dekap-jauwai. ²⁷ Nuniku asa rey wamak makichik suntajan awemauwai, Juagká buuken tsupik itati tusa. Tima suntagshakam cárcel jegá Juagká buuken tsupigkauwai, ²⁸ dutika platonum egkea itauwai. Dutikamtai nuwauchin susau, tuja ni juki dukujin susauwai.

²⁹ Nu dutikamun Juagká jintintaiji aidau antukag wejiag, iyashin jukiag ukusajui.

Jesús cinco mil aents ayugkamu
(Mt. 14.13-21; Lc. 9.10-17; Jn. 6.1-15)

³⁰ Apóstol aidau Jesusjai ijunjaju, nunik ashí dita dutikamujin nuigtú jintinkagtuamujinash ujaidau. ³¹ Tama ni chichajak:

—Minitajum, wegagmi agkan aents atsamunum, nunikjum machik ayamsatajum, tiuwai.

Wagki kuashat weenai tikich minidaush aidau asag yujumak yumainush agkantak atsujuidau. ³² Nunik barcanum chimpimjag nugka agkantunum ditak shiyakajui.

³³ Tujash nunik wetatman kuashat aents aidau wainkag, tuwí weakua nuniawa nuna dekawag kukag juakiag tupikakiag ditá jegawaju. ³⁴ Jesús barcanmaya jinkamá shiig kuashat aents tuwaká ijunun wainkau, nunik wait anenmain diisui, uwig pastorji atsugbau wajukmaina numamtuk wajaidau asagmatai. Dutikak kuashat waji aidau pachis jintintan nagkamauwai. ³⁵ Nuniai etsashkam akaegu asantai jintintaiji aidau jegaantang:

—Juig aents atsamunum batsatji, etsash akaewai. ³⁶ Aentsuk akatjam ishiakta, aja aina nui nuigtú yaakat yaig aidauunum wegag yumainun sumaktinme, yumainjig atsujuinawai, tuidau.

³⁷ Tiagtai Jesús ayaak:

—Atum dita yuwatnuk susatajum, tau.

Tama dita aainak:

—¿Jutii shiyakaiyash doscientos denariowai pag sumaka ayugkatag?, tuidau.

³⁸ Tiagtai ni ayaak:

—¿Wajupa pagka ajutjamainawa? wejum diistajum.

Tima wegag dekawag:

—Cinco pag nuigtú jimag namak awai, tuidau.

³⁹ Tusa ujakam:

—Aents aidau yajuakjum chijichi aina anui akanjajum batsagtajum, tiuwai.

⁴⁰ Tiajam ditashkam cien aentsun akanak batsainai, tikich cincuenta akanag batsaush aidau. ⁴¹ Dutikawagmatai cinco pagkan nuigtú jimag namaka nuna juki, pagkai nayaimpin diis see tusa, pagkan puujá jintintaiji aidau susaju, dita aentsun tinamkatnume tusa. Dutiksag namak jimaja nunashkam ashí tinamkau. ⁴² Dutikawajam ashí shiig yuwawajui. ⁴³ Nunikagmatai pag namakjai ampinkaunak yajuakag doce chagkinnun aimjaju. ⁴⁴ Junak cinco mil aishmag aidau yuwawajui.

Jesús yumí awanken wekaesá webau
(Mt. 14.22-33; Jn. 6.16-21)

⁴⁵ Nuna dutikamuik, jintintaiji aidauunak barcanum chimpijag ditaa eemak atú amain Betsaida katigtinme tusa ishimak, aents aidauun akateg

ukuktatus juwakui. ⁴⁶ Nunik aentsun akateg ukuak mujanum wakauwai Apajuin ausatatus. ⁴⁷ Nunik kiyaju ai, barcashkam kuchá ejapean wegai nigka kukag juwaku. ⁴⁸ Nunikmá wainkau dase igku umpuamu asa, wiya wiyantuinakua pimpikiag tsawagtatak wedaun. Nuniamunum niishkam yumí awanken wekaegas ayaumas nagkaikitatus ditan adjikau. ⁴⁹ Nunik yumí awanken wekaegas minittaman wainkag, dita anentainsajag pasun minatsuash tusag senchi untsumaidau, ⁵⁰ wagki ashí wainaidau asag ishamainak. Imatiagtai Jesús chichaak:

—¡Witjai, ishankaigpajum! ¡Imatigpajum!, tiuwai.

⁵¹ Tusa dita chimpigbaunum barcanum egkemjau, nunikmatai dase-shkam mijaku; nunikmatai senchi puyatkag anentai jegagchaju. ⁵² Wagki pag dutikamua nunakesh, dutikamape tusag anentaimtuinachu asag, utujimas anentaimaidau.

Jesús Genesaretnumia jau aidau etsagakbau
(Mt. 14.34-36)

⁵³ Kuchá amain katigkag Genesaret nugkanum anumkaju. ⁵⁴ Nunik barcanmaya jiinaidaunak Jesusan aents aidau wainkaju. ⁵⁵ Nunikag ashí yaaktanum wegag jau aidau camillanum pataidiag Jesús nui pujawai tabaun antuinakug nui emaidau. ⁵⁶ Dutikaidau asag yaakat yaig aidaun-makesh, yaaktanmakesh nuniachkush ajanum batsatbaunmakesh ni tuwí jegawa nuwi jau aidaunak jintá aepedau, dutikam jaanchji weninakesh antigtajai tusag segaidau. Ashí nuna antidauk tsagagkaju.

7

Aentsun pegkegchau ema nu
(Mt. 5.1-20)

¹ Fariseo aidau, maestro chicham umiktinun jintinkagtin Jerusalegnunia kaunawaju aidaujai Jesusan jegaantajui. ² Nunú aidau, ujumak Jesusa jintintajui uwejí tsuwat aig achiká yuwagtatman wainkag augmatuidau, nunak ikigmagchaju asagmatai tiajui. ³ Wagki fariseo aidauk, ashí judío aidaushkam eke yutsuk ikigmanjati tibauwa nuna umitskek yuujakchajui, ditá muunji nunitaijinak idaimainchau dekapedau asag. ⁴ Ditak, mercado wegag wakitki tawajash ikigmatskek yuujakchajui. Nuigtushkam kuashat tikich aidaunash umijakú ainawai, vaso nijatan, jarra aidau nuigtú tikich takatai cobre aidau, pegaknumia aina nunashkam. ⁵ Fariseo aidau nuigtú maestro chicham umiktinun jintinkagtin aidaujai Jesusan jegaantag iiniinak:

—¿Wagka amina jintintaijum aidaush, iina muunji umiktajum tusa tibauwa nuna umitskesh uwejí tsuwat aigkish yuinawa?, tuidau.

⁶ Tama ni ayaak:

—Tsanumin aidauwah, dekas profeta Isaías atumin pachis agak:

“Ju aents aina juka weninig eme anenjuinawai; tujash anentainig atushat minaiag ainawai.

⁷ Mina emematjuina duka, wainkayai; jintinkagtuina nunak, aents tibauwa nuna jintinkagtuinawai”, tiuwai.

⁸ Atumek Apajuí chicham umiktajum tibauwa duka umitsuk, aents tibauwa nu idaimainchau dekaapeagme. Jarra aidau nijakjum, vaso aidau nuigtú tikich kuashat jumamtin aidaush takaa yujagme. ⁹ Nuigtushkam tiuwai: Apajuí umiktajum tujabauwa duka wainka diyagme, atumi muunjum umiktajum tibauwa nu umikta tau asajum. ¹⁰ Wagki Moisés

tiuwai: “Amina apa, dukujai eme anentsam diistá”, tuja “apajin, dukujinakesh pegkegchaun chichajuk tsagkugsuk maatajum”. ¹¹ Tujash atumek makichik aentsuk apajin nuniachkush dukujinakesh: Wika yaimaitsugme, ashí ajutuina juka Corbagkai (nunak ofrenda Apajuinu taku tawai) tumainai tajume; ¹² nuniakjum apajinakesh, dukujinakesh yaimainchau emagme; ¹³ Apajuí chichamega duka idaikujum, atumi muunjum umiktajum tibauwa duke tikich aidaush inagkeatjume, nuigtú kuashat wají jumamtin aidaush takagme, tiuwai.

¹⁴ Juna tii, Jesús ashí aents tuwakú aidaun untsuká chichajak:

—Wi taja ju shiig antugtuktajum: ¹⁵ Makichkish atsawai agaya aentsnum wayá aentsun pegkegchau emamainuk, untsu aentsnumia jiina nuuwai pegkegchau ema duka.

¹⁶ Ni antutaiji ajamuk antuktinme, tiuwai.

¹⁷ Nuna tusa aents aidaun ukuak jegá wayamtai, niina jintintaiji aidau nu augmatbaun pachisag inidau. ¹⁸ Tama ni ayaak:

—¿Atumesh duka dekamainchauk dekaapeajum? ¿Dekatsjumek ashí agaya wayá duka aentsnak pegkegchau ematsu duka?, ¹⁹ wagki anentainum wayachu asa ampugnum egkemá letrinanum ajapnawai.

Junak ashí yutai aidauk pegkeg ainawai taku tiuwai.

²⁰ —Untsu aentsnumia jiina nu aentsnak pegkegchau emawai. ²¹ Wagki initkanmaya, aentsú anentainia jiinainawai pegkegchau anentaimat aidau, ashí pegkegchau iyashnum takanitaish, kasamat aidau, magkag-tamu aidaushkam, ²² tsanijinbau aidau, pegkegchau wakegamu aidau, pegkegchau aidau, tsanubau, ii wakegamuk takaamu, tikichdau diisá kajeamu, Apajuí pegkegchau chichagbau, eme anenmabau, shiig anentaimchat aina nu; ²³ Ju ashí pegkegchau aina juuwai initkanmaya jiinu asa, aentsun pegkegchau ema duka.

Sirofenicianmaya nuwa dekaskeapi tibau (Mt. 15.21-28)

²⁴ Nuiya jiinki Tiro nugkanum weuwai. Nunik jegá wayauwai makichik aentskesh dekajuawainum tau asa; tujash uumainchau dekapjauwai.

²⁵ Nuniai wakan pegkegchau egkemtugbauwa nuna dukují wamak antukui, Jesusak nui pujawai tabaun, nunik tajuntun tikishmatjau. ²⁶ Duka nuwak judiochu, Sirofenicianmaya aajakui, nunú segauwai nawanji iwanch egkemtugbaun jigtugkita tusa. ²⁷ Tujash Jesús ayaak:

—Jasta dekatkawk Israela uchijí aina nuwá shiig yuwatnume, wagki pegkegchauwai uchi pag yuwamuji atankí yawá suwamuk, tau.

²⁸ Tama nuwa ayaak:

—Apuh dekaske, tujash yawashkam mesa wakentin pujusá uchi yuwaku tsaisá akakeamun yuwamajamah, tau.

²⁹ Tutai ni ayaak:

—Nunú tame duik wetá, iwanchik nawanjumnak jiinki ukukne, tau.

³⁰ Tima nuwashkam wakitki jeen jegakmá, nawanjig iwanch jiinki ukukim pegaknum tepettaman wainkauwai.

Aents antuchu shiig chichachun Jesús etsagagbau

³¹ Jesús Tiro nugkanmaya jiinki Sidón nagkaemak, Galilea kuchají Decápolis nugkanum awa nui jegauwai.

³² Nunikmatai aents antuchu shiig chichachun itaantag segaidau uwejin achiktí tusa.

³³ Tama Jesús aentsun ukumtiki niinak akanki, tsjam uweji aidauwai kuwishin inujuauwai; dutika usukin juki inayinash antinkauwai. ³⁴ Dutika wajan nayaimpinum pagkai senchi mayatak: “Éfata”, tau. (Nunak: “Ujanta” taku tiuwai.)

³⁵ Tusa tamawaik aents antuchun kuwishig ujaniuwai, inayishkam pegkeg wajasui, nunikmatai shiig chichakú. ³⁶ Dutika, makichik aentkesh ujakaigpajum tusa tiuwai. Tujash tiigpajum tibauwaitak nuní senchi etsejuidau. ³⁷ Aents aidauk shiig senchi puyatkag: “Ashí dekas pegkejan takaawai, empekunash antumtikawai, chichachunash chichamtikawai”, tuidau.

8

Jesús cuatro mil aents ayugkamu

(Mt. 15.32-39)

¹ Nunú tsawantinig ataktú kuashat aents tuwakú asag yumainji atsu-juidau asagmatai, Jesús ni jintintaiji aidaun unsuká chichajak:

² —Ju aents aina juna wait anentuinajai, wagki kempatum tsawan jui wijai batsatainawai; tujash yumainjig atsujuinawai, ³ wi yujumkan ayugetsuk jeen ishiakmak, jintá wekamá jaka iyaumain ainawai, ujumak atushtanmaya kaunkajush aina dui, tau.

⁴ Tutai jintintaiji aidau aiinak:

—¿Tuwiya jukiya yumainush sumainaita aents atsamunum pujag juni-autish?

⁵ Tiagtai ditan iniak:

—¿Wajupa pagka ajutjamainawa?

Tama:

—Siete pag ajutjamui, tuidau.

⁶ Tiagtai aents nugkanum batsagtajum tusa ishiakui. Dutika siete pagkan juki Apajuin see tii, puujá ni jintintaiji aidaun tinabiu, dutikam ditashkam aentsun tinamkaju ⁷ Nuigtushkam ujumchik namak ajuidau, nuna Apajuin see tii tinamkagitajum tusa tinabiuwai. ⁸ Nunik ashí shiig yuwawajui, nunikagmatai ampinkau aidaun siete chagkinnum aimjajui. ⁹ Nuna yuawajuk cuatro mil tumain aajakajui. Imana nuna akatek ishiakajui.

Fariseo aidau wainchatai iwainkagtukta tusa Jesús segamú

(Mt. 16.1-4; Lc. 12.54-56)

¹⁰ Nunik jintintaiji aidaujai barcanum chimpimjag Dalmanuta nugkanum weuwai. ¹¹ Nui jegamtai fariseo aidau kautuawag Jesusjai tudaiyidau, nuninak pegkegchau anentaiyai dekapsagtatus nayaimpinmaya wainchatai iwainakti tusag segaidau. ¹² Tusá segainam Jesús senchi mayati chichaak:

—¿Wagka ju aents aidaush wainchatai iwainakti tusash segamainawa? Dekas tajime makichik wainchataigkesh iwaintamak achagtatui.

¹³ Tusa ukuak barcanum egkemag, ataktú amain katigkui.

Fariseo aidau jintiamujig levaduraya numamtinai tibau

(Mt. 16.5-12)

¹⁴ Kajimatkiaju asag pag aidaunak jukichajui, ayatak makichik pag ajuidau barcanum egketu. ¹⁵ Nuniku ai Jesús ditan chichajak:

—Nijah, fariseo aidau nuigtú Herodesa levaduraji aina nujai kuita-mamkatajum, tau.

¹⁶ Tutai ditak pempeentunikiag: “Nunak pag takukchag dui tujamji”, tuidau.

¹⁷ Nu tuinamun Jesús dekajua:

—¿Wagka pag atsawai tusagmesh jiyaniagme? ¿Atumek dekamain-chauk nuigtush antumainchau dekaapeajum? ¿Ekek utujimsa anen-taimjum? ¹⁸ ¿Jiimesh ajutjamainaigkik wainmatsjum nuigtush antutaig-mish ajutjamainaig antasjum? ¿Nuniau asagmek aneaktsujum? ¹⁹ Wi cinco pagkan puujan cinco mil aents ayugkamash ¿ampinjau aidaush wajupa chagkina aimjamiugme?

Tama dita aiinak:

—Doce, tiaju.

²⁰ Tiagtai:

—Wi siete pagkan cuatro mil aents ayugkamash ¿ampinjau aidaush wajupa chagkina aimjamiugme?

Tama dita aiinak:

—Siete, tiajui.

²¹ Tiagtai ni ayaak:

—¿Dutikauwaitkugmek antumainchau dekaapeajum?

Betsaidanmaya aents wainmachun Jesús etsagagbau

²² Nunik Betsaida jegawajui, nunikmatai wainmachun itajuawag, antin-jukta tusa segaidau. ²³ Tama Jesuschakam wainmachun uwegnum egkesá juki yaakat yaijan ukumtiki jiin usuktua, uwejin nuna jiin patati, machikish wainmawash tusa iniau.

²⁴ Tama wainmachushkam pagkai niimak:

—Aents aidaunak numia nuninun wainjai; tujash weedaun wainjai, tau.

²⁵ Tutai Jesús wainmachu jiin ataktú uwejin patatiu, dutikam paan wainmakui, nunik atushtanmayanash shiig wainu. ²⁶ Nunikmatai jeen awemak:

—Yaakat yaija awigkesh wayawaipa, tiuwai.

Pedro Jesusan amek Cristuitme tibau

(Mt. 16.13-20; Lc. 9.18-22)

²⁷ Nuna dutika, Jesús jintintaiji aidaujai weajui yaakat yaig aidau Cesarea nugkanum Filipino yaaktamamua nui. Nunik jintá wesa jintintaiji aidau iniak:

—¿Aents aidaush minash yayai tujutuinau?, tau.

²⁸ Tutai dita aiinak:

—Ujumak aents: “Juan Yamijatnai” tuinai, tikich chichaidau: “Auk Eliasai” taush ainawai, tikich tuidau: “Profeta aajakajua nuiyaskaitai” tujamainawai, tuidau.

²⁹ Tiagtai ni ayaak:

—¿Tujash atumesh, minash yayai tujutjume? tau.

Tutai Pedro ayaak:

—Amek Cristuitme, tiu.

³⁰ Tujash Jesusak mina pachittsagmek makichkish tiigpajum, tiuwai.

Jesús ni maam atinji etsegkamu

(Mt. 16.21-23; Lc. 9.22)

³¹ Tusa Jesús nagkama jintinkagtak:

Aentsmaga akiinauwa duka kuashat waittsattawai nuigtú judío apuji aidau, sacerdote apuji aidaush, maestro chicham umiktinun jintinkagtin

aidaujai dakituinak maawagtatui, dutikamash kampatum tsawan asa nantaktatui, tau. ³² Tusa paan etsegtai, Pedro akanak juki kakaakan chichagtan nagkabauwai.

³³ Tujash Jesús ayampattsag, jintintaiji aidaun diis Pedron jiyaak:

—iWetá Iwanchih, ukugkita! Amek Apajuinu aina duka anentaimtatsme, aentsú anentaimtajig anentaime, tiuwai.

Mina jintintaig atatus wakegauk waitiakush nemagtukti tibau

(Mt. 16.24-28; Lc. 9.23-27)

³⁴ Nunik Jesusak jintintaiji aidaun nuigtú tikich aents aidaunashkam untsuká chichajak:

—Makichik aentskesh mina jintintaig atatus wakegauk, niinunak idaiyak, waitiakush nemagtukti. ³⁵ Wagki ashí aents ju nugka jui pujutan imá senchi wakegak, mina nemagtuk waittan dakitauk uwemjashtin ainawai; tujash mina nemagtak nuigtú yamajam chichaman etsejuinak waituidauk uwemjatnai. ³⁶ ¿Wajinma yaimainaita aentsnash ashí nugka juiyan niinu emakush, wakanin megkaemaina nuish? ³⁷ Nuniachkush aentsush ¿wajupa wakaninash akikmatmainaita? ³⁸ Wagki mina pachitus etsegtan datsanjuju tuja mina chichamjunash aents betek umichu weantu aina nuna nuigtú aents tudaugtin aidau ujatnash datsanjau aidaunak, Aentsmaga akiinau Apají imanjiya nujai ángel pegkejam aidaujai minitna dui datsanjatnai.

9

¹ Junashkam Jesús chichaak:

—Dekas tajime: Atum jui ijunjum juiyatijum ujumak aidautijum eke jatsuk iwaaku pujusjume, Apajuí inama nu senchijijai minau wainkatnutigmesh ajume, tiuwai.

Jesús yapajinamu

(Mt. 17.1-13; Lc. 9.28-36)

² Jesusak seis tsawan nagkaemakui ai, Pedron, Jacobon, Juangkan aatus juki ditanak akanki muja yakí tsakajunum weuwai. Nui ditá eemtin, Jesusa niimé yapajinuwai. ³ Jaanchjig winchamtin, shiig puju, nugkanmaya jaanchi nijaukesh imatikag puju emamainchau aajakui. ⁴ Nuniai Moisés, Elías aatus Jesusjai chichaidaun wainkajui. ⁵ Nunik Pedro Jesusan chichajak:

—Maestroh, pegkejai jutii jui batsatag duka, nuniau asá kampatum aak aakmakagmi. Makichik aminu, tikich Moisesdau nuigtú Eliasdau, tau.

⁶ Nunak ni tabaujinakesh dekachiatak tiuwai, wagki ishamkaju asag.

⁷ Nuna taig yujagkim ijikui, nuniai yujagminmaya chichaak: “Juuwai mina uchig anetaijuk, ni antugkatajum”, tabaun antukajui. ⁸ Nuna taig diikmá, imá Jesusnak wainkajui nuigtú tikichik atsuwain.

⁹ Nunik mujanmaya akaebaunum, dita wainkamujinak Aentsmaga akiinauwa nu jaka nantatsaigkik makichik aentsnakesh ujakainum tusa akatajui. ¹⁰ Tibau asag ditakek pachitsuk idaiyinayatak, jaka nantatsaigkik tawa nunash wajukatnunak tawa tusag iniinidau. ¹¹ Nuninak Jesusan iniinak:

—¿Wagka maestro chicham umiktinun jintinkagtin aidaush, dekatkauk Eliasá taatnai tuinawa?, tuidau.

¹² Tiagtai Jesús ditan ayaak:

—Dekaskenmag Eliasak niyá eemak taatnai nunik ashí waji aidaunak ni ataktú iwajatnai. Tujash ¿Aentsmaga akiinaw pachisaish wajintu agagbauwaita, senchi waittsatnai nuigtush dakitjamu atinai tatsuak?
 13 Tujash wi tajime: Eliasak taabi, nunikmataish ashí dita wakegaina dutiksag inagkeatkigmayi, agagbaunum niina pachis tawa dutiksag, tiuwai.

*Wakan pegkegchau uchin egkentuamun Jesús etsagagbau
 (Mt. 17.14-21; Lc. 9.37-43)*

14 Nunik ni jintintaiji aidau batsatbaunum jegakmá, wainkaju kuashat aents tuwajuk aun, tuja maestro chicham umiktinun jintinkagtingchakam ditajai tudayinaun. 15 Nunidau Jesusan wainkag puyatuk tupikatkiag jegaantag kumpamawajui. 16 Nunikmatai ditan iniak:
 —¿Waji pachisjumea ditajaish tudaijume?, tau.

17 Tutai aents tuwakbaunmaya makichik ayaak:

—Maestroh, mina uchijun wakan pegkegchau egkemtua chichachu etugtimun amina itajuajame. 18 Junak wakan egkemtakug nugká ajinuwe, nunik saun apak, nain takegtak, ichichkam patamnuwe. Imatijutin asam-tai amina jintintaijum aidaun jigtugkitajum timajai, tujash tujinkagmae, tau.

19 Tutai Jesús ayaak:

—¿Aents dekaskeapi tuchau aidauwah! ¿Wajupá dukapea atumjaish pumainaitja? ¿Wajupá dukapek dakastajime minak dekaskeapi tujuttinme tusanush? Jui uchi itantá, tiuwai.

20 Timatai uchin ejentuntaju. Dutikam wakan pegkegchaushkam Jesusan wainak uchinak waugmitkak nugká ajiaju, dutikam tadaegak saun apakú;
 21 nunitai Jesús uchi apajin iniak:

—¿Junash wajuti nagkamsaya imatikawa?, tau.

Tama ni ayaak:

—Uchuch aig nagkamas. 22 Dutikau asa kuashtá jinumash patakta tinuwe, namakash ajug maata tinuwe. Ame machikish dutikmainaitkumek, jutiish wait anenkagtujam yaijatkata, tau.

23 Tutai Jesús ayaak:

—Dekaskeapi tumainaitkuminig, dekaskeapi tawa nudauk ashí dutikmain ajawai, tau.

24 Tusa taig uchi apajishkam untsamak:

—¿Dekaskeapi tajai! ¿Wi dekaskeapi tachakuish yainkata!, tiuwai.

25 Jesús kuashat aents tuwagtai wainak, wakan pegkegchaun jiyak:

—Wakan chichachu empekuwah, wi tajame: ¡Jiinkim ukuktá, ataktuk waketjukmek egkentuawaipa!, tiuwai.

26 Tama wakanchakam untsamak uchin kujamtikak waugmitkak jiinkiuwai, nunikmatai uchik jaka iyaantu. Nunitai kuashat aents chichainak:

—Jakajamah, tuidau.

27 Tujash Jesús uwegnum achiká inankiu, dutikam wajainiu.

28 Nuna dutika Jesús jegá wayamtai, jintintaiji aidau agkan niinak iniinak:

—¿Wagka jutiish jiiktakamaish tujinkamji?, tuidau.

29 Tiagtai ni ayaak:

—Tujash ju wakania juka junisaikik jimait sui ayuno takaaku Apajui aujku jiumainai, tiuwai.

Jesús awentsag ni mantamnatnuji etsegkamu

(Mt. 17.22-23; Lc. 9.43-45)

³⁰ Nuwiya jinki Galilea wegamunum makichik aentskesh dekawainum tusa Jesús dakitau, ³¹ wagki ni jintintaiji aidaun jintintu asa. Nunik:

—Aentsmaga akiinauwa nunak aents aidaunum sujukagtatui, dutikawagmatai maawagtatui. Tujash jakaashkam kampatum tsawanta jui nantaktatui, tau.

³² Tutaish ditak ni tawa nunak dekamain dekapenachu, nuninakush ishamaidau asag iniaschajui.

Yaki dekas imá wagaakush atinaita tiagbau

(Mt. 18.1-5; Lc. 9.46-48)

³³ Yaakat Capernaúm jegawajui, nunik nui jegá batsatbaunum Jesús jintintaiji aidaun: ¿Jintaa minisjumesch waji tudaimugme?, tau. ³⁴ Tujash ditak chichainachu, wagki jintaa minisag ditak pempeentunikiag, yaki imá wagaakush atinaita tudaiyaju asag. ³⁵ Nuniagtai ekeemsau, nunik jintintaiji doce aina nuna untsuká: Ni dekatkau atatus wakegauk, ashí tikich aina nuna ukujin amainai, nuniak ashí tikich aidaun takajin amainai. ³⁶ Nuna tii uchin juki ejapen awasauwai, dutika minaaki juki chichaak: ³⁷ Ju uchua junin aidaun mina daajui juidauk, mina jujuinawai; tuja mina jujuina duka, minakek jujuinatsui, mina awetiuwa nunash juwinawai.

Jutiin shiwagmatjamsu duka jutiinu asa aniwai

(Lc. 9.49-50)

³⁸ Tutai Juan chichaak:

—Maestroh, makichik wainkamji amina daagmin iwanchin jiyau, tujash jutijai minitan dakitaku, amek aikawaipa timaji, tau.

³⁹ Tutai Jesús ayaak:

—Atumek aikawaipa tusagmek tiigpajum. Makichik aentskesh mina daajui wainchatain iwainayatkug, pempeentugsagkek pegkegchaunak chichagtumaitsui. ⁴⁰ Jutiin shiwagmatjamsu duka, jutiinu asa nuniawai. ⁴¹ Tuja makichik aentskesh atumin mina daajui, Cristunu asagmin yumin amasú aidauk, dekas tajime, dita waji shiig pegkek jukitnujiya nunak megkaekachatinai.

Tikichin pegkegchau takamtikaidau tibau

(Mt. 18.6-9; Lc. 17.1-2)

⁴² “Makichikesh jujú piipich aina juiya mina dekaskeapi tujutuina nuna tudaun takamtikaidauk, dekas kaya muun juki kuntugnum jigká detua nayantsa kunajin ajugká ajapmainus ajapachbau ainatai. ⁴³ Amina uwejum tudau takamtijamkuig tsupikta, dekas pegkejai muntuch wajasá pujut tuke atina nui wayamuk, jimá uwegtin asá waitiaku pujutai, jii tuke kajinchaunum waimaina nu, ⁴⁴ nuig akash jinuchu nuigtú jiishkam tuke kajinchauwa nui. ⁴⁵ Tuja amina dawem tudau takamtijamkuig tsupikta, dekas pegkejai pujut tuke atina nui shutusá wayamuk, jimá nawentin asá waitiaku pujutai, jii tuke kajinchaunum ajapeam amaina nu, ⁴⁶ nuig akash jinuchu nuigtú jiishkam tuke kajinchauwa nui. ⁴⁷ Amina jiiim tudaun takamtijamkuig ukuinkata, dekas pegkejai Apajuí inamtaijiya nui makichik jiiintin wayamu, jimag jiiintin asá waitut tuke atina nui ajapeam amaina nu, ⁴⁸ nuig akash jinuchu nuigtú jiishkam tuke kajinchauwa nui.

49 “Wagki ashí nunú aidauk weejai kachitiama numamtuk jiiyai kachiam agtinai. 50 Week* pegkejai; tujash jea jeatuji megkaekamtaish, ¿utugsaiya ataktush jea jeatush emamainaita? Atuminish weega numamtin ajutjabijai agti nuigtú shiig agkan tikichjai pujamush ajutjamtinme”.

10

Jesús nuwak idaimaitsui tibau (Mt. 19.1-12; Lc. 16.18)

1 Jesús Capernaumnumia jiinki Judea nugkanum jegaa, Jordagka amain katigkú. Nunikmatai aents aidau ataktú tuwagkajam jintinkagtutan nagkabau, ni tuke jintinkagtina dutiksag. 2 Nuniai ujumak fariseo aidau Jesusan jegaantaju, wajintig tusa dekapsagtatus, nuwennush nuwenash idaimainashit tusag. 3 Tama ni ayaak:

—¿Moisesash wajukatajum tujabiajuita?

4 Tama dita ainak:

—Moisesak papí nuwa idaiku najantai umikjum nuwemek idaisatajum tujabiuwai, tuidau.

5 Tiagtai Jesús chichaak:

—Moisesak atum antumtikmainchau ainajum dui nu umiktinnak agajui.

6 Tujash yama nagkamchaku najanbaunmag Apajuik aishmagkun nuwajai najanauwai. 7 Dutikamu asag aishmag nuwenkug apajin, dukujin ukuak niina nuwejaig ijunmainai, 8 nuniak nuwejai makichik iyash wegawai. Nunin asa jimagchauwai, makichki. 9 Nuadui aatus Apajuí dutikamua nunak aentsuk datupaumainchau ainawai, tiuwai.

10 Nunik jegá jegawag jintintaiji aidau nuna pachisag Jesusan inidau.

11 Tusá iniam:

—Makichik aentskesh nuwen idaiyas tikich nuwajai nuwenkug, jeteken ekajeak nunimainai, 12 nunisag nuwashkam aishin idaiyas tikich aentsnum nemakug, ekagmawai, tiuwai.

Jesús uchi ikautkamu (Mt. 19.13-15; Lc. 18.15-17)

13 Ujumak uchi aidaun Jesusan ikautuawajui, uwejin antinjukti tusag. Dutikiagtai ni jintintaiji aidau, uchin ikaunmaina nuna jiyaidau.

14 Dutikiagtatman Jesús wainak kajek chichajak:

Idaisatajum, uchi aidauk minai minitnume, utujiakaigpajum, wagki Apajuí inama duka jujú uchi aina junin aina nudauwai, tiuwai. 15 Dekas tajime: Aents aidau, uchi mina anentaimjutuina imanis anentaimjutu-inachuk, Apajuí inamak amain ainatsui, tiuwai.

16 Tusa Jesús uchi aidaunak minaaki juki, makí makichik uwejin buuknum achiak Apajuí pujutnum yumigtamsatnume, tiuwai.

Datsauch wiyakuch Jesusan iniasbau (Mt. 19.16-26; Lc. 18.18-27)

17 Jesús wetatus jiinai, makichik tupikaki tajuntau, nunik niina eemtin tikishmatug iniak: —Maestro pegkejah, ¿wajina dutikmainaitja pujut tuke atina nuna jukitasanush?, tau.

18 Tama Jesús ayaak: —¿Wagka pegkejá tujutme? Makichkish pegkejek atsawai, imá makichik Apajuíya duke pegkejek. 19 Chicham umiktin aina nu dekame: “Tsanijnawaipa, magkagtuawaipa, kasamkaipa, wainkamek

* 9:50 Diistá Mt. 5.13.

tsanumkagtujaipa, wainka tsanujá jujukipa, apa dukujai eme anentsam diistá” tawa nu, tau.

²⁰ Tama ni ayaak:

—Maestroh, wika ashí nunak datsauch asanuk umikuitjai, tiuwai.

²¹ Tutai Jesús wait anenmain diisui, nunik chichajak:

—Makichik umimain ajutjame: wetá, nunikam ashí amina ajutjamaina duka sujukam ujunauch aina nu susata. Nu dutikawamin nayaimpinum wajiigmik ajutjamtinai. Nu dutika ukuakum waitiakmesh atsanjam nemagtukta, tiuwai.

²² Nu tama junik dekapjauwai, nunik wake besek weuwai shiig wiyakuch asa.

²³ Jesús ayampá ashí niimas jintintaiji aidaun chichajak:

—Shiig utugchatai wiyakuch aidau Apajuí inamtaijin wayata tabauk.

²⁴ Nuna tutai jintintaiji aidauk puyatkaju. Nuniagtai Jesús ataktú chichaak:

—Uchig aidauch, shiig utugchatai Apajuí inamtaijin wayata tabauk.

²⁵ Camellok aujá jiinish waigkag yupichu nagkaemamainai, tujash wiyakuch Apajuí inamtaijin wayata tabauk utugchatai, tau.

²⁶ Nuna antukag, nuni nagkaemas puyatkag, pempeentunisag iniininak: —¿Yaki tujash uwemjaush amainaita?, tuidau.

²⁷ Tiagtai Jesús ditan diis chichajak:

—Aents diismak dutikmaitsui, tujash Apajuiyaig nuninchauwai, wagki Apajuik ashí waji aina nunak dutikmainai.

Mina nemagtuaidauk ditanu ukukbaujin nagkaesau jukiagtinaí tibau
(Mt. 19.27-30; Lc. 18.28-30)

²⁸ Pedro nagkama Jesusan chichajak:

—Nijah, Jutiik ashí iinu aina duka ukuinaku, ame nemagkauwaitji, tau.

²⁹ Tutai Jesús ayaak:

—Dekas tajime, makichik aentskesh mina nemagtak nuigtú yamajam chichaman etsejak jeen, yachi aidaun, umayí aidaun, dukujin, apajin, uchijí aidaun, nugke aidaunash ukukiu aidauk, ³⁰ yamai puja duish cieгка inagkeas jee aidaun, yachi aidaun, umayí aidaun, dukují aidaun, uchijí aidaun, nugke aidaun ukukbau aidaun inagkeas jukiagtinaí waittsau ainakush, nunik atak atina nuish, pujut tuke atina nuna jukiagtinaí.

³¹ Tujash kuashat aents dekatkau atatus wakegaina nu ukunum juwak-agtinaí. Untsu iman atan anentaímtumachu aina nu dekatkauk agtinaí.

Kampatuma juna Jesús ni mantamnatnuji etsegkamu
(Mt. 20.17-19; Lc. 18.31-34)

³² Jerusalén wakatasa wegamunum, Jesusak eemak wegai ni jintintaiji aidauk puyatuidau nuniai tikich aidauk ishamaidau. Nuniagtai ataktú niina jintintaiji doce aina nuna yajuak akanki, niinash waji nagkaikittawa nu pachisa ujatan nagkabau. ³³ Nuniak: “Yamai Jerusalén wakatasa wegag juik Aentsmaga akiinawu nuna achikag sacerdote apuji aidau nuigtú maestro chicham umiktinun jintinkagtin aidaunum sujukagta-tui; dutikam dita mantamnati tusag judiochu aidaunum sujukagtaui. ³⁴ Dutikawagmatai dushi dushikinakua, usu usukinak, asuttanash asut awa awajainakua maawagtaui, tujash kempatum tsawanta jui nantakta-tui”, tiuwai.

Juan, Jacobojai Jesusan segagbau
(Mt. 20.20-28)

³⁵ Zebedeo uchijí aidau Jacobo Juagjai, Jesusan jegaantag:

—Maestroh, ii segamtatag nuna wait aneas umigkagtukti tusa wakegaji, tuidau.

³⁶ Tiagtai ni iniak:

—¿Wajina dutikati tusagmea wakegagme?, tau.

³⁷ Tutai dita aiinak:

—Jutii jimajaitag nunuti ame inamtaijum imana nui, makichkia nu untsugmin ekenkum, tikichia nu menajui ekeemsatin atajum tukagtita, tuidau.

³⁸ Tiagtai Jesús ayaak:

—Atumek mina segatjum duka dekatsjume. ¿Atumesh wi waittsattag imaanikjumesh waitmainuk ainajum nuigtush wi jakattag nunisjumkek jamaín ainajum?, tau.

³⁹ Tama dita chichainak:

—Ehé, nunimainaitji, tuidau.

Tiagtai Jesús ditan chichajak:

—Dekaskenmag wi waittsattag nunisjumek atumesh waittsatin ainagme, wi jakattag nunisjumek jakatin ainagme, ⁴⁰ tujash mina untsujui, mina menajui ekeemsatin atajum tusanuk tumaitsujime. Duka ya aidau ekeemsatnuji umigkamuíta nudau ainawai.

⁴¹ Nu tabaun tikich diez jintintaiji aina nu antukag, Juangkan Jacobojai kajekajui. ⁴² Nuniagtai Jesús ditan untsuká chichajak:

—Atumek dekaeme, aents ju nugka juiya aentsun apuji aidauk aentsnak ditanua nunin emak inainawai, tuja nunú apu aina nuna aentsji aidaushkam aentsnak dita wakegamun inainawai. ⁴³ Tujash atum ainajum anuiyag nuninuk amaitsuí; dekas apu atatus wakegauk atum ainajum anuiyag tikich aina nuna umijin amainai. ⁴⁴ Atum ainajum anuiya dekatkau atatus wakegauk, tikichi inake amainai. ⁴⁵ Wagki Aentsmaga akiinauwa duka umigtuktinne tusag taachui, tikich aidaun yaigtatus tauwai, ni mantamna kuashat aentsun uwemtíkata tau asa, tiuwai.

Wainmachu Bartimeo wainmabau

(Mt. 20.29-34; Lc. 18.35-43)

⁴⁶ Jericó jegawajui; nunik nuiya jiinki Jesusak ni jintintaiji aidaujai nuigtú kuashat aents aidaujai ashinai, wainmachu Bartimeo daagtin Timeo uchijí jintá yantam ekeemas, kuichkin segamak eketu. ⁴⁷ Nuniau Jesús nazarenumia nagkaemawai tabaun antuk, untsuman nagkamau, nuniak:

—¡Jesusah Davita uchijiyah, wait anenjugta! wajau.

⁴⁸ Imattai kuashat aents itatkati tusag jiyaidau; tujash nigka nuní senchi untsamak:

—¡Davita uchijiyah, minash wait anenjugta! wajau.

⁴⁹ Imattai Jesuschakam wajantú, nunik chichaak:

—Untsuktajum, tau.

Tutai wainmachun untsuinak:

—Shiig aneasta, untsugmawai wajaktá, tuidau.

⁵⁰ Tama niishkam tseke wajakí jaanchjinak nagkimá ukuak Jesús wajamunum jegantui. ⁵¹ Nunikmatai Jesús iniak:

—¿Minash utugtukti tusamea wakegame?, tau.

Tama wainmachu ayaak:

—Maestroh wainmaktasan wakegajai, tau.

⁵² Tutai Jesús:

—Weté, ame dekaskeapi tabaugmin tsagajume, tiuwai.

Tusá tamawaik wainmakui, nunik Jesús wetai niishkam weuwai.

11

Jesús Jerusalén wayamu

(Mt. 21.1-11; Lc. 19.28-40; Jn. 12.12-19)

¹ Jerusalén tikiju awajus weenak, jegawajui Betfagé nuigtú Betania Olivosan mujajin diiká awa nui, nunik Jesús ni jintintaijin jimajan awemauwai, ² nunik chichajak:

—Wetajum au yaakat yaijuch awa awi, nuwi waikmajum wainkattagme burro tsakat jigkam wajau, makichik aentskesh entsamchatai, nu atiajum itaatajum. ³ Nu dutikagmin makichik aentskesh: ¿Wagka aikagme? tusa inimpainakuig, Apu atsumawai, wamak awagkittawai tusajum ukuktajum, tiuwai.

⁴ Tiajam wegag, burrok yaakta waitijin agaan jigkam wajattaman wainkajui, nunikag atiwajui.

⁵ Dutikiagtai ujumak aents nui ijunaidau:

—¿Wagka burrosh atiangme? tusag inidau.

⁶ Tiagtai ditashkam Jesús titá tibaunak dutiksag tiajui, tutai jukiti tusag idaisajui. ⁷ Dutikawag burron jukiag Jesusan ejetuawag, burro tuntupen jaanchji aidaun aitkajui, dutikawagmatai niishkam ekebiuwai. ⁸ Kuashat aents jaanchji aidaun ainag emainai tikich aidauk ajanmayan dukan tsupijag ainag emaidaush aidau. ⁹ Imatikainak aents eemak weedau, ukunum minidaushkam untsumkag:

—¡Emematiagmi! ¡Apu Apajui awemam miná duka pegkegmai!

¹⁰ ¡Pegkejai iina apají David inamajakua nui inamjatatus mina nu! ¡Nigki nayaimpinmash ememattai atí! wajaidau.

¹¹ Nunik Jesús Jerusalén wayá, jega Apajui ememattainum weuwai. Nunik ashí wají nui atatman diis ukuak, etsa akaegu asamtai jintintaiji doce aina nujai Betania weuwai.

Higuera nejechu Jesús yumigja maamu

(Mt. 21.18-22)

¹² Kashinia dui betanianmaya jiinki wegamunum Jesús yapajuau,

¹³ nunikmá ikaag wainkau higuera duken, nunik neje atsuash tusa diistatus wejiu; tujash jegantá diikmá nejeg atsau ayatak dukeg au, higo* nejetchau asamtai. ¹⁴ Jesús higuera chichajak:

—¡Ame nejekbaunak makichik aentskesh tuke yuwachagtin ainawai!, titatman ni jintintaiji aidau antugkajui.

Jega Apajui ememattainum aents batsatun Jesús jügbau

(Mt. 21.12-17; Lc. 19.45-48; Jn. 2.13-22)

¹⁵ Jerusalén jegawag jega Apajui ememattainum Jesús wayá, nui sujak batsatun sumau aidaujai agaa jiijú, dutikak aents kuichki yapajiin aidau mesajinashkam shitatki akaketuk, paumá sujin aidau ekeemtaiji aidau-nash dutiksag akaketkau, ¹⁶ dutika jega Apajui ememattaiya nui makichik wajinakesh takusá wayawainum tusa dakitau. ¹⁷ Nunik jintinkagtak:

—Apajui chichame agagbaunum:

“Mina jegajuk ashí tikich nugkanmaya aidau Apajui aujuinaku ijuntai tutai atinai” tawa nuniaig atum kasa aidau batsamtai emaugme, tiu.

* 11:13 “Higo”, tawa duka higuera neje tutaiyai.

¹⁸ Nuna timatai sacerdote apuji, maestro chicham umiktinun jintinkagtin aidaujai antukag, wajuk maumainaita tusag egatuidau; wagki ni jintinkagtamun ashí aents puyatjus antujuidau asamtai nuna ishamainak.
¹⁹ Tujash kiitai, Jesusak jintintaiji aidaujai yaaktanmaya jijnajui.

Higuera yumigjamua nu kukajú wainkamu

(Mt. 21.20-22)

²⁰ Shiig kashikmas ai nagkaemakmag, higuera ashí kagkapejai kukag wajattaman wainkaju. ²¹ Nunik Pedro adeag Jesusan chichajak:

—Maestroh, diisia ame higuera yumigjam ukukmaum nu kukájá wajana, tau.

²² Tutai Jesús ayaak:

—Imá Apajuiyaig dekaskeapi titajum. ²³ Wagki dekaskenum tajime, makichkitigmekesh ju muja chichagkujum: ¡Jui atsuk nayants wajaata! tusam anentaiminish utujimtsuk dekas wi taja duka nuniktatuapi tamak, nunisag uminkattawai. ²⁴ Nuadui tajime, Atum Apajui aujku segakjume, dekas jukittajapi titajum, nuniakjume, jukittagme. ²⁵ Atum Apajui aujkugmek, tikichjai kajegdaikamu ajutjamkuig tsagkujatajum, atumnashkam Apajui nayaimpinum puja dushakam aikasag tsagkugtamtatnime atum pegkegchau chichakbaugminash. ²⁶ Wagki atum tsagkugkagtushtaik, atumin Apa nayaimpinum puja dushakam, atum pegkegchau chichakbaugminash tsagkugtamtatnime.

Sacerdote apuji aidau Jesusan iniasagbau

(Mt. 21.23-27; Lc. 20.1-8)

²⁷ Ataktú wakitkiag Jerusalén jegawajui. Nunik jega Apajui ememattainum Jesús wekaetatman sacerdote apuji, maestro chicham umiktinun jintinkagtin aidau nuigtú tikich apu aidaujai jegaantag, ²⁸ iniinak:

—¿Aminash ya jintinkagtuata tusash awetamae? ¿Ya ju aikata tusash tujamae?, tuidau.

²⁹ Tuinam Jesús ayaak:

—Wishakam iniastajime, atum nu aigkagmin ujaktajime ya jutikata tujutmataiya jutikaja junash. ³⁰ ¿Juagnash ya yamijatjata tiuwaita, Apajui awemauwait atsa aents aidauk awemauwait? Nunú aigkatajum, tau.

³¹ Tama utujimkag, ditak pempeentunikiag chichainak: “Juagnak Apajui awemauwai tajinish, ‘¿tujash wagka dekaskeapi tichau ainagme’ tujamtata jama? ³² ¿Wajintajiki, aents aidau awemauwai titajiash?” Tuinayatak aents aidau ishamaidau Juagak dekaskenum profetayai tuidau asagmatai. ³³ Nuninak Jesusan chichajuinak:

—Dekatsji, tuidau.

Tiagtai Jesús ayaak:

—Wisha tichattajime yana chichamenia jutikaja nunak, tiuwai.

12

Takau pegkegchau aidau pachisa tibau

(Mt. 21.33-46; Lc. 20.9-18)

¹ Jesús ataktú augmatbaun pachis aents aidau jintintak, tau: “Aents niina ajajin uvan aajakui, dutika tanishig, uva yumiji ijugtinnash umik, wajasá diistinnash torre ajiauwei. Dutika ujumak takau aidau: Atum takastajum nuniakjum minash sujstajum tusa susa ukuak tikich

nugkanum weuwai. ² Nunik uva juut jegamtai, makichik inaken awe-mauwai takau batsatbaunum, nui jegamtai uva neje jukbaun niinun susatnume dutikam itagtuati tusa, ³ nui jegamtai uva neje jukbaun niinun susatnume dutikam itagtuati tusa, nunik jegattaman takau aina nu suwimawag sutsuk wainak awagkiajui. ⁴ Dutikawagmatai ataktú tikich inaken awemauwai, tujash nunak kayai buuknum tukuag upukajui, dutikawag pegkegchaun chichagkag awagkiajui.

⁵ “Dutikawagmatai tikichin awemauwai, nunashkam maawajui. Dutikamtai tikichin kuashat ishiakui; dutikamun ujumak suwimainak, tikichin maawajui.

⁶ “Inagnamun niina uchijí makichkiuch aneetaiji ajamun dita batsatbaunum awemauwai: ‘Mina uchignak ajantusampap diimain ainawa’ tusa anentaimas. ⁷ Tujash takau aidauk ditak pempeentunisajag: ‘Auwai ju aja juna jukitnuk, maami, dutika juka iinu emami’, tuidau. ⁸ Tusag achikaju, dutika maawag uva ajakbauwa nuna ukumtikiag iyashinak ajapawajui.

⁹ “¿Nunash uva ajagtina dusha utugmainaita? Dekas ajagtina nu tajakug nunú ajanum takaina nunak kajeg idaiyak, ajanak tikichin sumainai.

¹⁰ “¿Atumek Agagbauwa duka ausachuk ainajum:

“‘Kayá ekenag jegamin aidau, kaya pegkegchauwai tusag dakitjajua nunú, yamai dekas jegá ichichkatin kaya apujutia iman wajasé;

¹¹ Nunak Apu Apajuí dutikau asamtai jutii diismak anentai ejetumaitsui’ tawa duka?”

¹² Tutai achiktag tuidau, wagki augmatus tawa nunak, ditan pachis tawa nuna dekaidau asag, tujash aents tuwakajua nuna ishamaidau asag, ukuinak weajui.

Kuichik akikmamu pachisa Jesús iniasbau

(Mt. 22.15-22; Lc. 20.20-26)

¹³ Nunikag ujumak fariseo aina nuiyan, Herodesan aentsji aidaujai awemajui, Jesusan iniastinne dutikam wajintig, nunikmatai tsanumjugmi tusag. ¹⁴ Dutikawajam ditashkam Jesusan jegaantag:

—Maestroh, dekainaji, amek dekaskea nu tame duka, nunin asam aents tuina dukesh uyumatsme, wagki dita shiig awajkatasam tachau asam, Apajuí jinti dekaskea duke pachisam jintinkagtau asam. ¿Amesh wajinpa, Cesarash sumainashit, atsa sumainchaukaih? tusag inidau.

¹⁵ Tama Jesús dita tsanubaujin dekaju asa:

—¿Wagka pegkegchau anentaiyai dekapjustasagmesh wakegagme? ¡Makichik kuichik itagtuakjua diistajai!, tau.

¹⁶ Tutai ditashkam ejentuntaju, dutikam:

—¿Yana niimempaita jusha, tuja yana daajiyaita ju agagbauwa jusha?, tau.

Tutai dita aiinak:

—Cesardauwai, tiaju.

¹⁷ Tiagtai Jesús ayaak:

—Cesardauwa duka Cesarak susatajum, Apajuinua duka Apajuí susatajum, tiuwai.

Nuna timatai anentai jegagchajui.

Jakau nantagtin pachisa iniimsamu

(Mt. 22.23-33; Lc. 20.27-40)

¹⁸ Nuniku ai saduceo aidaushkam Jesusan tajuntajui, jakauk nantachagtin ainawai tinu aina nunú, nunikag iniinak:

19 —Maestroh, Moisés agag ukugtamkiuwa nuig, makichik aents nuwentin uchi akiitsuk jakamtaig, yachi nuwan juki uchin akig yachi uchijiya nunin emamainai tawai. 20 Nuniamunum siete yachigbau aajakui. Nuanuiya nagkamchak iwai nuwenauwai, tujash uchin akiitsuk jakauwai. 21 Nunikmatai tikich yachi jukiuiwai. Nunik niishkam uchinak akiitsuk jakauwai. Kampatuma nu jukishkam nunisag jakauwai. 22 Nuni nuninakua siete aajakajua duka uchinak akiitsuk ashí jinawajui. Nunikaju ai dui pujus nuwashkam jakauwai. 23 Dusha atak nantamu atina dui nantainakush, ¿siete aajakajua nu nunak nuwatkejua duish, yana nuweg atinaita?, tuidau.

24 Tiagtai Jesús ayaak:

—Atumek Agagbau aina nu nuigtú Apajuí senchijiya dushakam dekachu asajum dewakugme. 25 Atak nantamu atina duik nuwenbauk atsutnai, ángel nayaimpinum batsata nuninuk agtinai. 26 Tujash jakau nantajagtinun pachis tawa duka, ¿atumek ausachuk ainajum Moisés papí agagbauwa nui Apajuí zarza kegamunum chichaak: “Witjai Abraham, Isaac, Jacob aina nuna Apajuijinuk” tawa duka? 27 ¡Apajuik jakau aidau Apajuijinchui, iwaaku aina nuna Apajuijiyai! Nunin aig atumek shiig kuashat dewagme, tiuwai.

Chicham umiktin dekas imana nu
(Mt. 22.34-40)

28 Jesús shiig aimkamun maestro chicham umiktinun jintinkagtin aina nuiya antuku asa, jegantun iniak:

—¿Tuwaita ashí chicham umiktin aina nuiya dekatkau umimaina dusha?, tau.

29 Tutai Jesús ayaak:

—Ashí chicham umiktajum tibauwa nuiya dekatkau umimainuk juwai: “Antuktajum Israel aidauwah, Apu iina Apajuijiya duka, Apuk makichkiuchi. 30 Amina Apujum Apajuiya nu, ashí anentaimjai, ashí amina wakanmijai, ashí amina anentaimtagmijai, ashí amina senchigmijai aneeta, tawai. 31 Tuja tikichia duka jujai betekmamtinai, duka: Tikich aidash amek anenmamsam aneeta”, tawai. Tikich chicham umiktin juna nagkaesauk atsawai, tau.

32 Tutai maestro chicham umiktinun jintinkagtinchakam:

—Maestroh duka dekas tame, imá makichik Apajuik awai, tikichik atsawai; 33 tuja ashí anentaijai, ashí anentaimtajai, ashí senchijai nuigtú tikich iik anenmamsa aneamua nuuwai kuntin maa apeaku Apajuí ememattaiya nuna nagkaesauk, tiuwai.

34 Shiig anentaimas timatai, Jesús wainak:

—Apajuí inama nuig atushat atsume, tiuwai.

Nui nagkamsag makichik aentskesh inimainchau dekapjajui.

Cristush yana uchijigkita tibau
(Mt. 22.41-46; Lc. 20.41-44)

35 Jesús jega Apajuí ememattainum jintinkagtak:

—¿Wajuk asamtaiya maestro chicham umiktinun jintinkagtin aidash, Cristuk Davita uchijiyai tuinawa? 36 David Wakaní Pegkejiya nu ichachiam:

“Apu mina Apujun chichajak:

Ekeemsata mina untsujui,

nunikamin wi amina shiwajum aidauk ashí idaitustajame”, tiuwai.

³⁷ David mina Apug tawa nuniaish, ¿wajuk asaya Davita uchijish amainaita? tau.

Tutai nui aents tuwakú aidauk shiig aneasag antujuidau.

Maestro chicham umiktinun jintinkagtin aidau pegkegchaujin pachisa Jesús tibau

(Mt. 23.1-36; Lc. 11.37-54; 20.45-47)

³⁸ Jesús jintinkagtak: “Maestro chicham umiktinun jintinkagtin aina nujag kuitamamkatajum, ditak nugkutai esagman nugkujag yujainak, plazanum igkuntuinakush eme anenjus kumpamjitnume tusag wakejin ainawai, ³⁹ nuninak jega ijuntainum nuniachkush yuamunum wainakush aents eme anentsá ekeemsati tibaunum ekeemsagtatus wakejin ainawai, ⁴⁰ nuninak nuwa waje aina nuna jee aidau atankiag tsanumainak dukap Apajuí ajujú yujau ainawai. Nunú aidau imá senchi bakumatin ainawai”.

Nuwa waje ujunauch ofrenda egkeamu

(Lc. 21.1-4)

⁴¹ Jesús ofrenda egketainum igkuas, aents aidau kuichkin egkeagtai diyak eketu; tuja kuashat wiyakuch aidashkam kuichkin kuashat chimp-idau. ⁴² Nuniai nuwa waje ujunauch taa, niishkam jimagchik kuichik cobre najanamu, akiktanash imanis akikchaun egkeauwai. ⁴³ Nunikmatai jintintaiji aidau untsuká ikaunman chichajak:

—Dekas tajime, ju waje ujunauchia ju ashí kuichkin egkeena nuna nagkaesau imá kuashat egkeae, ⁴⁴ wagki ashí tikich egkeawaja duka ampinun egkeawaje, tujash juka ujunauchitak ni sumaka yumainjiya nunak ashí egkeae, tiuwai.

13

Jega Apajuí ememattai tsayam atinai tusa Jesús etsegkamu

(Mt. 24.1-2; Lc. 21.5-6)

¹ Jesús jega Apajuí ememattainmaya jiiintatman niina jintintaiji aina nuiya makichik:

—Maestroh, ¡kaya aina nu diisia nuigtú jegamkamua dushakam!, tau.

² Tutai Jesús ayaak:

—¿Ju ibau ekenjá jegamkamua nu wainjumek? Juka makichik kayakesh ekenjamu aina nuiyag juwakchatnai, ashí tsaikbau atinai, tiuwai.

Nagkanbau jegatsaig wantinkagtin aidau

(Mt. 24.3-28; Lc. 21.7-24; 17.22-24)

³ Olivosa mujaji jega Apajuí ememattaijai ninis awa nui waka Jesús ekeemsauwai. Nunikmatai Pedro, Jacobo, Juan, Andrés aatus niinak akanak iniinak:

⁴—¿Wajutiya dusha nuniktinaita? ¿Tuja tu wantinkatnaita ashí nu waji aina ju uminkatnush?, tuidau.

⁵ Tiagtai Jesús ditan ayaak: “Kuitamamkatajum makichkish tsanug-majainum, ⁶ wagki kuashat midiagtinai mina daajun pachisag, nuninak: ‘Witjai Cristunuk’, tusag kuashat tsanubiagtinai.

⁷ “Atumek maaniamu aidau, nuigtú maaniatasa pampandayamu antakjumesh puyatkatin aigpajum; wagki duka aatus nagkaemaktinai, tujash nu achatnai nagkanbau. ⁸ Wagki nugka muunnum inamnuk, mai imanuk maaniagtinai, tuja nugka yaignum batsamnushkam mai nuninuk maaniagtinai. Nuigtush kuashat nugkanum uugbaush atinai; nuniai

yapagtash tepeatnai, pampandayamushkam atinai. Waitiamu yama nagkamnamuk nu agtinai.

⁹ “Tujash atumek kuitamamkatajum; wagki apu chichaman inagnau aidanum supupakagtinaí nuigtú jega ijuntai aidanum awaintamawag asutamawagtinaí. Dutijamainak mina nemagtaw asagmin gobernador batsatbaunum ejetamawag nuigtú rey batsatbaunmash ejetamawagtinaí, mina pachitus titinme tusag. ¹⁰ Tujash dekatkauk yamajam chichama juka ashí nugkanum makí makichik chichaman chichaaku batsata nuish etseggamu atinai. ¹¹ Tuja apunum supupaktatus jujamainakuish, atum chichaktinuk uyumakaigpajum, nui titatjum duka Apajuí tujamtata nu chichaktatjume; wagki duka atum chichakchattagme, Wakani Pegkejiya nu chichamtijamkatnai. ¹² Nuniamunum yachin maatnume tusag sujiagtinaí, antsag uchigtin aidaushkam uchijin maatnume tusag sujiagtinaí; uchi aidaushkam apají shiwagmagtinaí nuninak maidiagtinaí. ¹³ Ashí aents aidau kajegtabiagtinaí mina daag pachisjum chichau asagmin; tujash ni ebetmamag nagkanbaunum jegá nu uwemjagtinaí.

¹⁴ “Tuja profeta Daniel, makichkish dutikmainchaun shiig pegkegchau dutikawagtinun pachis tiuwa nunú wainkugmek (nuna aujuk dekaatnume), Judea batsatutigmek mujá pisagtin atajum. ¹⁵ Tuja jega ekenja jegamkam nagkatka nui pujauk, akaiki jegagkesh wayawaigka makichik wajiijnakesh jukitasag, ¹⁶ antsag ajanum takaak pujaushkam, jaanchi jukitjai tusag waketjukigka. ¹⁷ ¡Wait anentuinajai nunú tsawantin nuwa ejamtin nuigtú uchi amuntsuaku agtina nunak! ¹⁸ Apajuí asutajum, atum pisamua nu tsetek tepeamunum ajutjaminum.

¹⁹ “Wagki Apajuí nugká najanauwa nui nagkamas yamaiya juish imanika waitchatain, atakea duish imanika waittsashin tikima senchi waitiamu atinai. ²⁰ Tuja Apu Apajuí nu waitiamu aina nuna imijchataik, makichkish uwemainchau ainawai; tujash ni etegjamuji aina nu aneamunum, waitiamu aina nunak imijkatnai.

²¹ “Tuja makichik aentskesh: ‘Diistajum, Jui Cristo pujawai’ tachakush ‘Awi pujume’ tuinakuish dekaskeapi tiigpajum. ²² Wagki kuashat aents ‘Cristuitjai’ tusag nuigtú profeta ainaji tuidaush wantinjagtinaí; nuninak kuashat aents dutikmainchaun iwainagtinaí tsanumainak, nunidau asag Apajuí etegkamua aidanash dita tsanuamunak tsanujagtinaí. ²³ Nuadui atumek kuitamamkatajum, ashí juna pachisnuk yaunchuk emtikan tibaijime.

Aentsmaga akiinauwa nu minitnuji
(Mt. 24.29-44; Lc. 21.25-28)

²⁴ “Nunú tsawan waitut nagkaemaig, etsag suwe wajastinaí, nantushkam etsanbaunak megkaekatnai. ²⁵ Yaya aidaushkam kakeyagtinaí, imanidau asagmatai nayaimpinmaya senchigtin aidaushkam buchitjagtinaí. ²⁶ Nunú imaniai Aentsmaga akiinauwa nu, yujagminum pachitkau ashí senchijijai tsawan wajasá minaun wainkagtinaí. ²⁷ Ni angelji aidau ishiaktinaí, dutikam ni etegjamuji aidau ashí nugka nagkatkamunum nayaim najatamunum batsatun ijumjatnume tusa.

²⁸ “Higueran pachisan augmattsan titatjim nu unuimagtajum, atumek: ‘Higera kanawe aidau wentsamtuju dukeguig wamkeap esat nagkam-nattawa’, tusajum dekau ainagme. ²⁹ Nunisjumek, nunú waji uminaidau wainkugmek, Aentsmaga akiinauwa nu taatnuk namput wajaschagapi titin atajum. ³⁰ Dekas tajime, yamai aents aina jusha batsataig

ashí uminkatnai. ³¹ Nayaimpik nugkajaig megkaejatnai, tujash mina chichamjuk umintsukek juwakchatnai.

³² “Tujash tsawannak nuigtú horanash makichkish dekainatsui, nayaimpinmaya ángel aidaukesh, Apajuí Uchijigkesh dekatsui, imá mina Apajuk dekawai. ³³ Nuadui atumek aneaku pujakjum iwá pujutajum, wagki nu tsawan uminkatnuk dekachu asajum. ³⁴ Juka, aents tikich nugkanum weak, niina inake aidaun jega kuitamjutkatajum tusa makí makichik inake aina nuna takatan tinamak, waitin kuitamkatnunashkam iwá pujutá tusa ukuak weuwa nuninai. ³⁵ Nuadui iwá pujutajum, wagki jeenna dusha wajutik minit; kintamkumpash nuniachkush ae aetash, atash shinaimpash, kashikmasampash minit duka dekachu asajum; ³⁶ nuniagmin pachiachbau minikmá kajigka batsatjumin waipakainum. ³⁷ Atumin tajim junak, ashí tikichnash tajai: ¡Iwá pujutajum!”

14

Jesús maami tusa chicham umigkamu

(Mt. 26.1-5; Lc. 22.1-6; Jn. 11.45-57)

¹ Jimag tsawan asa fiesta Pascua nuigtú pag lewaduragtuchu yutai jegatin ai, sacerdote apuji aidau maestro chicham umiktinun jintinkagtin aidaujui, wajuk Jesusash achikaiya tsanumjuja maumainaita nuna egatuidau. ² Nunidau asag: Fiesta aigkik dutikachagmi, aents aidaujui pampandayamu ai, tiajui.

Betanianmaya nuwa Jesusan kugkuinui buuken nijakbau

(Mt. 26.6-13; Jn. 12.1-8)

³ Jesús Betania weuwai, Simón lepragtin tutaiya nuna jeen. Nunik mesanum jegan eketai, makichik nuwa botella alabastro najanamunum kugkuin ayatak nardo najanamu senchi akikan takusá tajuauwai. Dutika botella alabastro najanamua nuna kupik Jesusa buuken ukatjauwai.

⁴ Dutikamtai ujumak aidau initkag kajedaush asajui, nunikag:

—¿Wagka kugkuinnash wainkash wasujua? ⁵ Aikatsuk trescientos denario amain sujuka ujunauch aidau sumainajamah, tusag nuwan ashishmatuidau. ⁶ Tiagtai Jesús chichajak:

—Idaisatajum, ¿wagka waitkagme? Pegkejan jutijawai. ⁷ Ujunauch aidauk tuke atumjai batsamiagtatui, nuniakui atum wakegakjumek yaimainaitjume, untsu wika atumjaig pujushtatjai. ⁸ Juka nuwak ni dutikmaina nuna dutikae; wagki mina iyashjunak emtika ukatjutkae mina ukugsagtina nuna. ⁹ Dekas tajime, yamajam chichama juna etsejuinak ashí nugkanum yujainakush, ju nuwa mina jutija juna pachis tuke etsejiagtin ainawai, tiuwai.

Judas Iscariote Jesusan sujukta tibau

(Mt. 26.14-16; Lc. 22.3-6)

¹⁰ Nuna timatai Judas Iscariote, doce aina nuiya jiinki weuwai sacerdote apuji aidaujui Jesusan wajuk sujumainaita nuna chichaman umiktatus. ¹¹ Nu tama antukag shiig anejasaju, nunikag kuichkin susatatus anagkuawaju. Dutikam Judaschakam wajuk yupichu sujukajak tusa egatu.

Jesús inagnaku Pascuatin yuwamu

(Mt. 26.17-29; Lc. 22.7-23; Jn. 13.21-30; 1 Co. 11.23-26)

¹² Pag lewaduragtuchu yutai nagkamak fiesta tsawagbaunum, Pascua yuwatin uwig aishmag tsakat mautai asamtai, Jesusa jintintaiji aidau:

—¿Tuwí umiktatji Pascuatin yuwatnush?

¹³ Tiagtai jimagchik niina jintintaijin awemak:

—Yaakat wetajum, nunikjum aishmag yumin aimak waketu wainkat-tajum nunú pataetuktajum, ¹⁴ nunikjum wayaakui jeenna nu: “Maestro chichaak: Tuwí wi mina jintintaig aidaujui Pascua yumainush” agkantash awa tujamae titajum, tiu. ¹⁵—Nu tajumin ni inaktugmastatui yakí tesamu agkan muuntan shiig umikbaun, nuanui jutiinuk umiktajum, tiu.

¹⁶ Tiajam jintintaiji aidaushkam wegag yaakat jegakmag, ni tibaunak imatiksag wainkag, Pascuatin yuwatnunak nui umikajui.

¹⁷ Kiyagmatai Jesús niina jintintaiji doce aina nujai jegawaju. ¹⁸ Nunik mesanum pekaamsag yuwinamunum Jesús chichaak:

—Dekas tajime: Atum ainajum juwiyag makichik wijai yuwa nu minak sujutkattawai, tau.

¹⁹ Tutai ditak wake besekaju, nunikag makí makichik iniininak:

—¿Wikaitag? tutai, tikitchakam: —¿Wikaitag? wajaidau.

²⁰ Tiagtai Jesús ayaak:

Duka doce ainajum juwiya wijai nu platonmag uchutua yuwa nuuwai, tau.

²¹ Tusa:

—Dekaskenmag Aentsmaga akiinauwa duka, ni pachisa agagbauwa nunisag wetatui; tujash, ¡wait anentajai ya sujuktatua nunak! Duka dekas akiinmainchaunas akiinawabiataih, tau.

²² Yuwinak pegagbaunum, Jesús pagkan juki Apajuin see tii puuká, ditan suwak:

—Ju yuwatajum, juka mina iyashjun iwainawai, tau.

²³ Tusa, copa juki Apajuin see tii ditan susauwai, dutikam ashí betek uwajajui. ²⁴ Dutika:

—Juka mina numpajui, yamajam chicham apaamunum kuashat aentsnum ukaejatta nuuwai. ²⁵ Dekas tajime, ju uva yumijinak awenanuk uwagchattajai, atak tsawan uminkui Apajuí inamtaijin ataktú yamagman uwagtin asan, tiuwai.

Jesús Pedron uugtuktatme tusa ujabau

(Mt. 26.30-35; Lc. 22.31-34; Jn. 13.36-38)

²⁶ Nuna timatai himno kantamawag, Olivosan mujajin weajui. ²⁷ Nunik Jesús ditan chichajak:

—Jujú kashia juik, ashí atum aidautigmek mina pampanjuttatjume; wagki agagbauwa nui: “Pastoron maattajai, dutikam uwig aidauk pam-pagkagtinai” tawa nunisag. ²⁸ Tujash ataktú nantakin, atumek Galilea wegatsjuminig wiyá emkan wetatjai, tiuwai.

²⁹ Tutai Pedro ayaak:

—Ashí tikich aidau ukugmainakuish, wika nunikchattajai, tau.

³⁰ Tutai Jesús ayaak:

—Dekas tajame, yamai kashia juik atash eke jimajá shinatsaig, kampa-tumá wainchaujai tujuttatme, tau.

³¹ Tamashkam Pedrok itatchau, nuniak:

—Amijai jakata tau asan wainchaujai tichattagme, tau.

Tutai tikich aidaush ashí dutiksag tiajui.

Jesús Getsemani pujusá Apajuí ausamu

(Mt. 26.36-46; Lc. 22.39-46)

³² Nunikag ajak ajakbau Getsemani tutainum jegawajui. Nunik jintintaiji aidaun:

—Jui ekeemsatajum, nuniagmin wi awi wenu Apajuin ausatjai.

³³ Tusa weak Pedron, Jacobon, Juan aatus yajuak ditajai wesa, wake besetan nagkamauwai nuniak shiig senchi anentaimak waitiau, ³⁴ nuniak:

—Senchi wake besemag dekapeakun jamain dekapeakjai, atumek jui batsamsajum iwá batsamtajum.

³⁵ Tusa machik kuwaesag, nugká tikishmag, Apajuin ausauwai, nuni-main ataig ni waitmaina duka tsawantak jegagtishti tusa. ³⁶ Nunik: “Mina Apajuh, ashí waji aina duka ame dutikmainaitme, wi waitmainaitag nuwig agkanmitkajuata, tujash wi wakegamuk achati, ame wakegamu ati”, tiuwai.

³⁷ Tusa wakitki dita batsatbaunum jegakmá, kajig batsatun wainak, Pedron chichajak:

—Simón, ¿kanamek? ¿Makichik horakesh iwamainchauk deka-peam? ³⁸ Kaji batsamtsuk Apajuí ausatajum, pegkegchaunum iyawaijum; dekaskenmag wakanik pegkejan takastatus wakegawai, tujash iyashia nuuwai kakaakchauk.

³⁹ Tusa ataktú wee, ni tibaujiya dutiksag, Apajuí ausauwai. ⁴⁰ Nunik waketjuki diikmá, ataktú kajig batsatun wainkauwai kaji senchi mainam, nunidau asag aimainchau dekapjajui. ⁴¹ Kampatuma jui waketjuki taa, chichajak:

—Kajigtajum nuniakjum ayamjatajum, yamaik horak jegae Aentsmaga akiinawu nuna tudaugtin aidaunum sujam atata nu. ⁴² Nantagtajum, wegami; mina sujuta duka tikiju minawai, tiuwai.

Jesús achiká jukimu

(Mt. 26.47-56; Lc. 22.47-53; Jn. 18.2-11)

⁴³ Tusa Jesús eke chichaak wajai, Judas, doce aina nuiya kuashat aents espada, numi aidaun takuinaku sacerdote apuji nuigtú maestro chicham umiktinun jintinkagtin aidaun judío apuji aidaun ishiakbaujai tajuntuwui.

⁴⁴ Judas Jesusan sujukua nu: “Wi kugkuastatag nu atatu; achikjum shiig emetjajum jukitajum”, ⁴⁵ tiu asa Jesusan wamkes jeganmawaik:

—¡Maestro! takug kugkuasui. ⁴⁶ Dutiktai achikag jukiajui.

⁴⁷ Tujash ijuna nuiya makichik espadajin ukuini juwakug, sumo sacerdote inake kuwishin tsupigkauwai. ⁴⁸ Tuja Jesús nu aents aidaun chichajak:

—¿Wagka kasa achiktasa utugmaina imanikjumesch espada, numi aidaun takusjumesch achigkatasagmesch minitjagme? ⁴⁹ Wi kashi kashinig jega Apajuí ememattainum atumjai pujusan jintinnujime, nuniakuish achigchau agmaugme; tujash juka Agagbau uminu asamtai juniagme, tiuwai.

⁵⁰ Nuna taig, ashí niina jintintaiji aidauk pisainak, ukukiajui. ⁵¹ Tujash makichik datsauch sabanan pempemag pataetuku, nunittaman achikajui, ⁵² tujash sabananak ukuak wisú tupikakiuwai.

Jesús apu aidaun batsatbaunum ejentamu

(Mt. 26.57-68; Lc. 22.53, 54-71; Jn. 18.12-14, 19-24)

⁵³ Jesusan jukiag sumo sacerdote pujamunum ejegawajui; dutikawag-matai ashí sacerdote apuji aidaun, judío apuji aidaun nuigtú maestro chicham umiktinun jintinkagtin aidaujui ijunjajui. ⁵⁴ Tuja Pedrok ikaag

pataetus wea weakua, sumo sacerdote jeen wayá agaajin achijatin aidaujai jiin anamak eketu.

⁵⁵ Sacerdote apuji aidau, ashí apu chichaman inagnau aidaujai ega-tuidau, Jesusan tsanumjugag maatnume tusa sujukagtatus, tujash eje-tuinachu. ⁵⁶ Wagki kuashat wainak tsanumjuinakush, betek tuinachu. ⁵⁷ Nuniai ujumak wainak tsanumjuinak:

⁵⁸ —Jutii ni tabauk antugkabiaji: “Wi ju jega Apajuí ememattai uwejai takasbauwa nunak yumpuan kampakum tsawantai tikichin uwejai takaschamun jegamkattajai” timayi, tuidau.

⁵⁹ Tujash nuna aatus tuinakush makichkish bakumainchaun tuidau.

⁶⁰ Nuniai sumo sacerdote ejapen wajantá, Jesusan iniak:

—¿Wagka machikish aimtsume? ¿Nunash wajinbauna tujamainawa?, tau.

⁶¹ Tujash nigka aimkag chichaachu, nunitai sumo sacerdote awentsag iniak:

—¿Amekaitam Cristo, Apajuí Pegkeja nuna Uchijim?, tau.

⁶² Tutai Jesús ayaak:

—Witjai, nuigtush wainkatnaitjume Aentsmaga akiinauwa nu Apajuí ashí senchigtina nuna untsujin eketu nayaimpinmaya yujagminum pachitkau minamu, tau.

⁶³ Tutai sumo sacerdote ni nugkuagbaujin japikí ichigká chichaak:

—¿Nuigtush ya etsegtukti tusaya atsumaji? ⁶⁴ Apajuin pegkegchau chichagka nu antukugme, ¿atumesh wajuk anentaimtagme?

Tusag ashí pampajag, mantamnati tiajui.

⁶⁵ Tiagmatai ujumak usukinai, jiin epetkag ijuinak:

—Adaikakia, ya ijupime, tuidau.

Tuja achijatin aidaushkam yapinum awatuidau.

*Pedro Jesusnak wainchaujai tusa uukbau
(Mt. 26.69-75; Lc. 22.56-62; Jn. 18.15-18, 25-29)*

⁶⁶ Pedro jegá agaajin nugkaa pujai sumo sacerdote inake nuwa aina nuiya makichik tajuntu, ⁶⁷ nunikmá Pedro jiin anamak ekeematman wainak, dii wajatu, nunik:

—Amesh Jesús nazaretnumiaya nujaimpap wekaemume, tau.

⁶⁸ Tama Pedro uwaak:

—Wika wainchaujai, ame tujutam nunakesh dekatsjai, tiuwai.

Tusa ukuak waitaiya nuní jiinkiuwai, nuniai atash shinukui. ⁶⁹ Nuwa inaka nu ataktú wainak, nui batsatun chichajak:

—Jujú ditajai wekaenuwejamah, tau.

⁷⁰ Tujash nigka ataktushkam uwau. Nuniai machik asag, nui batsatu ataktushkam Pedron chichajak:

—Dekaskenum amesh dita aina nuiyampapitme, wagki amesh galilean-mayaitamjamah, dita chichaina aujai betek chichamjamah, tuidau.

⁷¹ Imatjuinam pegkegchau chichatan nagkama nuigtú Apajuí adaiyas:

—¡Atum tajum nunak wika wainchaujai!, tau.

⁷² Nuna taig atash awentsag shinukui, nunitai Pedroschkam Jesús chichajak: “Atash jimajá shinatsaig, kampakumá waintsamjai tujuttatme” tibauwa nuna adeag buutiwai.

15

*Jesús Pilatowai ejegamu**(Mt. 27.1-2, 11-14; Lc. 23.1-5; Jn. 18.28-38)*

¹ Tsawamunum, sacerdote apuji aidau, judío apuji aidau, maestro chicham umiktinun jintinkagtin aidau nuigtú apu chichama inagnau aidaujai ijunjag chichasag, Jesusan jigkajag jukiag Pilaton ejetuawajui.

² Dutikawagmatai Pilato iniak:

—¿Amekaitam Rey judío aidaunu?, tau.

Tama ni ayaak:

—Duka ame tujutme, tiuwai.

³ Tujash sacerdote apuji aidauk kuashat wajiin pachisag etsegtuidau asagmatai, ⁴ Pilato ataktú iniak:

—¿Amek machikish aimtsumek? Diisia kuashat wajiin pachis tanumjutpaina nu, tau.

⁵ Tujash Jesusak nu tamashkam aimchau, nunitai Pilato anentai jegangchau.

⁶ Tuja fiestatinig aents achikbau aina nuiyan makichik jiiisagké au, aents aidau ya jiiinkiti tusaya segabiagtatua nuna. ⁷ Nuanui Barrabás daagtin, apu dakituinaku pampandayamunum ni kumpajijai aentsun mau asamtai achikam cárcel egketu. ⁸ Nuniyamunum kuashat aents kaunkag, makichik aents tuke akupdauwe dutiksaik akupnakti tusag Pilaton segaidau. ⁹ Tama Pilato ditan chichajak:

—¿Wakegagmek judío aina nuna Reyjin akupkati tusagmesh?, tiuwai.

¹⁰ Nunak sacerdote apuji aidau tuke aneas kajejuinak sujukaja nuna dekau asa tiuwai. ¹¹ Tujash sacerdote apuji aidau aents tuwaká ijunun akatjajui, Pilato dekas Barrabasan jiikti titajum tusag.

¹² Tiagtai Pilato ataktú ayaak:

—¿Judío aidau Reyji tajum junash utugkati tajume?, tau.

¹³ Tutai unsumkag:

—¡Achinjati!, tiajui.

¹⁴ Tiagtai Pilato ayaak:

—¿Tujash jusha waji pegkegchauna takasé?, tau.

Tujash nuní senchi unsumkag:

—¡Achigtá! awajuidau.

¹⁵ Imatiagtai Pilatoshkam aents aidaun shiig awajkata tau asa, Barrabasan jiiykiu; dutikak Jesusnak asutiawagmatai achigtajum tusa inamjauwai.

¹⁶ Dutikamtai suntag aidau jukiag jega apu pujusá inamtaijin ejegawagmatai, ashí suntag aidau ijuntujaju. ¹⁷ Dutikawag jaanch kapantu nentetkaun anugjag, atsejutai jagki najanamun atsemitkakag, ¹⁸ eme anentsá kumpamji tusag dushikinak:

—¡Juuwai Rey judío aidaunuk! awajaidau.

¹⁹ Imatjuinak tagkanai buuknum awatuidau, usuktanash usukidau, nuninak emematji tusag tikishmatuidau. ²⁰ Dutikainak dushí dushikinakua jaanch kapantu nentetkaunak awituk jujuinak, ni nugkutaijinak anugjag juki emajui achijagtatus.

*Jesús achigbau**(Mt. 27.32-44; Lc. 23.26-43; Jn. 19.17-27)*

²¹ Makichik aents cirenenmaya, Simón daagtin Alejandro, Rufo aina nuna apají, ajajinia wakettatman inajajui cruzan yanaktí tusag.

²² Dutika Jesusnak Gólgota tutainum ejentag, (“Gólgota” tawa duka “Buuké sakantai” taku tawai); ²³ vino mirrajai pachimjamun susajui; tujash nigka uwagchawai. ²⁴ Dutika achijag, suntag aidauk Jesusa jaanchjinak, yana kayají jiintukne nuna diisag akandaikajui. ²⁵ Jesusnak kashikmas a las nueve ai achijajui.

²⁶ Dutikainak wajuk asamtaiya achijaje nuna pachisag: “REY JUDÍO AIDAUNU” tusag agatjajui. ²⁷ Nuigtushkam jimag kasan nijai achijajui, makichkia nuna untsujin awajainak, tikichia nunak menajin awajawajui. ²⁸ Aatus uminkauwai agagbaunum chichaak:

—“Pegkegchau takau aidaujai betek dutikam atinai”, tawa nunú.

²⁹ Tuja nui aents nagkaemaidauk, buuken pegainak pegkegchau chichajuinak:

—¡Waj!, ame jega Apajuí ememattai tegakam kumpatum tsawantai ataktú jegamnumjamah, ³⁰ cruznum nematsuk akaikim, amek uwemjakia, awajuidau.

³¹ Dutiksag sacerdote apuji aidau, maestro chicham umiktinun jintinkagtin aidaujai dushikinak:

—Tikich aidaunak uwemtiknuwe, tujash nigkig uwemain dekapeat-sui. ³² Cristo, Israela Reyjiya nunú yamai cruznum deta nuna akaikiti nunikmatai wainká dekaskeapi tiagmi, awajuidau.

Nunisag nijai achijam detaidaush pegkegchaun chichajuidau.

Jesús jakamu

(Mt. 27.45-56; Lc. 23.44-49; Jn. 19.28-30)

³³ Etsa tutupit wajasú ai nagkamas a las tres wegaish ashí nugkanum suwe wajas asauwai. ³⁴ Nuniamunum a las tres wegai Jesús senchi untsamak: “Eloí, Eloí, ¿lemá sabactani?”* tiu. Nunak: “Mina Apajuijuh, mina Apajuijuh, ¿wagka idaitusume?” taku tiuwai.

³⁵ Tuja ujumak aents nui ijunaidau nuna antukag:

—Antukjua, Eliasa untsuana, tuidau.

³⁶ Nuniai makichik tupikaki, esponjan vino chujuau pujaunum uchupig, tagkannum aapi Jesús uwagtí tusa susau, dutika:

—Elías juna kuwaktatus minishtimpash nuniau wainkagmi, tau.

³⁷ Tujash Jesusak senchi untsamak jakauwai. ³⁸ Nunikmatai jega Apajuí ememattainum jaanch ejaamuk, yaikiin nagkamnas ichiinak nugkaan jegaak jimaituk kanakui. ³⁹ Tuja capitán Jesús achigbaunum diyaak wajau, senchi untsamak jakantai wainak, chichaak:

—Dekaskenum ju aentsuk Apajuí Uchijí aajakui, tau.

⁴⁰ Nuigtushkam ujumak nuwa ikaag ijunas diidau, nu aina nuiyag María magdalanmaya, tikich María José nuigtú Santiago ekeuwa nuna dukují, Salomé aatus ijunu, ⁴¹ Jesús Galilea pujusmatai, nemajus yujasag yaijakú aina nu; nuigtú kuashat nuwa Jesusjai Jerusalén kaunawajua dushakam.

Jesús ukusbau

(Mt. 27.57-61; Lc. 23.50-56; Jn. 19.38-42)

* **15:34** “Eloí, Eloí, ¿lemá sabactani?”, tawa juka arameo chichamai. Tujash Biblia Reina-Valerianmag “Eloí, Eloí, ¿lama sabactani?”, tawai. Untsu ju “Lama sabactani” tawa juka hebreo chichamai.

⁴² Kintabaunum, tsawan ayamtai nagkamnatin asamtai uminbaunum, ⁴³ José arimateanmaya, apu chichaman inagnau aina nuiya eme anentsá diitai, niishkam Apajú inamjatnun dakau asa, ajankas Pilaton jegajua Jesusa iyashin segauwai. ⁴⁴ Tusá segam Pilatok anentai jegachu jakae tutai. Nunik capitanin untsuká iniasui, wajupa yaunchkea jakame tusa. ⁴⁵ Tutai capitán jakame tusa ujakam, Josen Jesusa iyashinak jukita tiuwai. ⁴⁶ Dutikam makichik sabanan sumak, Jesusa iyashin kuwakí juki pempeajui; dutika ukumatai kaya tai umikbaunum egkea, kaya muuntan apapetug waajin epeni ukukiuwai. ⁴⁷ Nui ukuamun María magdalanmaya nuigtú María Josen dukujiya nujai wainkajui.

16

Jesús nantakbau

(Mt. 28.1-10; Lc. 24.1-12; Jn. 20.1-10)

¹ Tsawan ayamtai nagkaemakmatai María magdalanmaya, tikich María Jacobo dukují nuigtú Salomé aatus, pegkeg kugkuinun sumakaju, Jesús ukusbaunum wegag Jesusa iyashin ukatkgatatus. ² Nunikag tumig tsawaju asamtai, shiig kashikmas Jesús ukusbaunum wegaju, etsa jüiniu ai. ³ Nunik weenak pempeentunikiag:

—¿Yakí eketjamkati ukumatai waitainum kaya aputuamuwe nunash?, tudayinau.

⁴ Tujash jegaantag diikmá, kaya shiig muun aputukbauk ekekam ataman wainkajui. ⁵ Nunik ukumatain utuawag diikmag, untsugnumanini aents datsauch jaanch puju esagman nugkuaju ekeemtatman wainkag ishankaju. ⁶ Nuniagtai nunú chichajak:

—Ishamkaigpajum, atumek Jesús nazaretnumian achijagma nu egagme, duka nantakne, juwig atsawai, anui ukusagma nunú diistajum. ⁷ Tujash wejum niina jintintaiji aidau nuigtú Pedroshkam ujaktajum. Nigka Galilea niyyá eemak wetatui, awi wainkagtatui ni tiuwa nunisag, tiuwai.

⁸ Nu tima nuwa aidaushkam Jesús ukusbaunum jegantajuk ukuinak tupikakiaju, shiig senchi ishankag kujaidau asag, makichik aentsnakesh ujakchajui.

María Magdalanmaya Jesús wantintukbau

(Jn. 20.11-18)

⁹ Jesús tumigtin kashikmas nantakí dekatkauk María magdalanmaya wantintukui, ni siete iwanch jijjamu aajakua nuna. ¹⁰ Dutikam wee Jesusjai yujajakú aidau, wake besemag dekapenak buutú batsatun jegajua ujakajui.

¹¹ Tujash ditak, Jesusak iwaakuwe wi wainkamjai tusa ujainamash, dekaskeapi tuinachu.

Jesús ni jintintaiji jimag wantintukbau

(Lc. 24.13-35)

¹² Nuigtushkam ni jintintaiji jimag ajanum wetainum jintá wetatman tikichia nunin wajas wantintuku. ¹³ Dutika wantintukam ditashkam tikich batsatun jegajug ujakaju; tuinamash ditanash dekaskeapi tichajui.

Jesús apóstol aidau dutikatnuji tibau

(Mt. 28.16-20; Lc. 24.36-49; Jn. 20.19-23)

¹⁴ Inagnamunum once aina nunú mesanum pekajun wantintuku, nunik dekaskeapi tuinachu asamtai kakaakan chichagkauwai, nantakiu wainkau aidau ujamash dekaskeapi tichaju asagmatai.

¹⁵ Nuna tii chichajak: “Ashí nugkanum wetajum, nunikjum yamajam chichama ju ashí aents aidaunum etsegekatajum. ¹⁶ Dekaskeapi tuidauk yamimagtinme nuninak uwemjatnume; untsu dekaskeapi tuinachuk, bakumagtinai. ¹⁷ Dekaskeapi tuina duke ju wainchatai aina nunak dutikawagtinai: mina daajui iwanch aidaun jiiinak, yamajam chicham chichashtainash chichagtinai; ¹⁸ dapi achiam esaimash, jatai egketuamun umuinakush jakashtin ainawai. Jau aidaunash ditá uwejin achikag etsagaidiagtinai”, tiuwai.

Jesús nayaimpinum wakitimu
(Lc. 24.50-53; Tak. 1.6-11)

¹⁹ Apu Jesús nuna tusa inagnak, nayaim weak takuniuwai; nunik Apajui untsujin ekeemsauwai. ²⁰ Tuja ditashkam jiiinjag ashí yantamnum etsejuidau, nuniagtai Apu Jesús chicham etsegbaunash aents aidaush dekaskeapi titinme tusa wainchatai aidau iwainamunmash yaigkui.

Aatus atí.

Yamajam chicham Lucas agagbau

Nagkabau

¹ Kuashat aents dekapsaje augmatbau jutiiní dekaskenum nagkaemakuwa nuna pachisag betekmas agajagtatus, ² yama nagkamsag Jesusan wainkau aidau, chichaman etsejuidau jutiin jintinjamawajua dutiksanuk, ³ wishakam kuitamsan ashí wají aidaush wajuk nagkamdauwaita nuna shiig inimsan dekaan, betekmasan aneetaiju Teofiloh agatjame, ⁴ amina dekaskea nuna jintinjamawajua nu shiig dekau aminum tau asan.

Juan Yamijatín akiinatnuji etsegkamu

⁵ Herodes Judeanum rey wajas inamai, sacerdoté Zacarías daagtin pujujakui Abías weantu, nuweg Aarón weantu Elisabet daagtin aajakui. ⁶ Dítak Apajú eemtinish pegkegnak takaidau, nunidau asag Apu Apajú chicham umiktajum tibauwa nui awa nunashkam imatiksag betek umidau. ⁷ Tujash uchijig atsujuidau Elisabet kaga asamtai, nuigtushkam dítak mai muuntuch wajasaju asag.

⁸ Nuniamunum makichik tsawantai Zacarías, dítajai ijunja takataijai antiamu asa, sacerdoté Apajú eemtin takau aina dutika takainamunum, ⁹ sacerdoté aidauk tuke dutikin asag, Apu Apajú ememattai pegkegma nui wayash yaki incienonash apeat tabaunum, niina kayaji jüntukiuwai. ¹⁰ Nunikmatai incienso apetai hora jegamtai, ashí aents aidauk agaa ijunas Apajuin aujuidau. ¹¹ Nuniai Apu Apajú angelji Zacariasan wantintuk, altar incienso apetainum ayaumas unsugnumanini wajantau. ¹² Nuna Zacarías wainak puyatkau, nunik senchi ishamau; ¹³ nunitai ángel chichajak:

—Zacariasah ishamkaipa, wagki ame Apajú augbauk antuekae, nuniau asamtai nuwem Elisabet aishmagkun uchigmakmatai Juan adaikat-tame. ¹⁴ Nunikmatai shiig aneasam dakujstatme. Tuja kuashat aents aidaushkam shiig aneediagtatui nu uchi akiinamunum; ¹⁵ wagki nigka Apu Apajú eme anentai atinai, uwagchatnai vinonash, umutai kajiau aidauanashkam nuigtushkam dukují wakeen nagkamsag Wakani Pegkeji ajitnai; ¹⁶ kuashat Israelan uchiji aidau ataktú dítá Apuji Apajuiya nui awakeagtatui; ¹⁷ niiyá eemak taa etsegkattawai Apu minitnujin Eliasa wakaní nuigtú senchijí ajujakua nunisag, dutikak muun aidaush anentain yapajiawag uchijijai iwajag pujustinme, aents intimkiu aidaushkam chichaman betek umiktinme, apu minitaish shiig anentus jukitag tuidau asag, tau.

¹⁸ Tama Zacarías angelan ayaak: ¿Nunash wajuk nuniktatuapi titajaki, wi mina duwagjai mai muuntuch wajasag juninnush?, tau.

¹⁹ Tutai ángel ayaak:

—Wika Gabrielaitjai, Apajú inakegaitjai, ni awetime yamajam chicham pegkeja nuna amina ujaktí tusa; ²⁰ tujash wi tajam nu dekaskeapi tatsum dui, yamaik chichachu wajastatme, nunikam chichatsuk pujusam, tsawan wi tajam nu ejetatme, tau.

²¹ Nuniai aents aidauk Zacariasan dakak ijunaidau, tesamu pegkegmanum wayá megkaekamtai, wagkag imanikash megkaekae tusag.

²² Nuninai jiinki chichamainchau dekapeau, nunitai tesamu pegkegmanum waya duwiyap wantintuke, tuidau. Nigka ayatak iwimas augmamumu nuniak chichatsuk pujau.

²³ Nunik Zacariasak tsawan ni takaamujinak ashí umik ukuak, ni jeen wakitkiu. ²⁴ Nuna nunik dukap tsawan pujatsaig nuwe Elisabet ejapjuku, nunik wantintsuk jeenig pujus cinco nantun inagkeakui. ²⁵ Nunak: “Apu Apajuú wait anenjak jutijuae, wi datsaamá pujuweg nuna emegkatjukta-tus”, taku nunikui.

Jesús akiinatin etsegkamu

²⁶ Elisabet ejapjuk seis nantu pujai, Apajuí, ángel Gabrielan yaakat Nazaret tutai Galilea nugkanum awa nui awemauwai, ²⁷ nuanui makichik nuwa María daagtin aentsú antishtai, Rey David wegantu José daagtin anagmamumu pujau asamtai. ²⁸ Nunik ángel María pujamunum wayaak:

—María pujamek, aminak Apajuí wait anenjamag etegtamjae, dutijabau asa amijai awai, tau.

²⁹ Tujash nigka nu aaja tama antuk puyatkau, wajina takug tuush kumpamjawa tusa. ³⁰ Nunitai ángel chichajak:

—María ishamkaipa, aminak Apajuí wait anenjamjae, ³¹ nunin asamtai amek ejapjukam aishmag uchigmakam, Jesús adaikattame. ³² Duka eme anentai atatuí, nuniau asa “Apajuí ashí tikich aidau nagkaesau muunta nuna Uchijí” tama atinai. Apu Apajuiya nu, niina apají David ekeemas inamajakua nui inamjati tusa susattawai, ³³ dutikamu asa, Jacopa uchijí aidaunum tuke inamin atí tusa, ni inabaujiya duka ajumaish nagkankashtinai, tau.

³⁴ Tama María angelan ayaak:

—¿Dusha wajuk nunimainaita wi makichik aishmagjaigkish pujatsugjama?, tau. ³⁵ Tutai ángel ayaak:

—Wakaní Pegkeji aminí taattawai nunikmatai ashí tikich aidau nagkaesau muunta nuna senchijí ejapaktatuí. Nunin asa uchi akiinatta dusha pegkejam “Apajuí Uchijí” tama atinai. ³⁶ Tuja ame pataim Elisabetchakam muumpatnum ejapjuka, nunik seis nantu wegawai, kagae tinu agma nunú.

³⁷ Apajuú tujinmainuk makichkish atsawai, tau.

³⁸ Tutai María ayaak:

—Wika Apu Apajuí inakegaitjai, ame tujutam duka nunisag uminkati, tiu.

Timatai angelak weak ukukiuwai.

María Elisabet ijagsamu

³⁹ Nunú tsawan wegamunum, María waujus jiinki weuwai, Judea nugka mujajin yaakat aunum, ⁴⁰ nunik Zacariasa jeen wayá Elisabetan kumpamau. ⁴¹ Nunik Elisabet, María kumpamku chichaamun antaig uchi senchi kakaaju, nuniaig Elisabetan Wakaní Pegkeji egkentujam, ⁴² senchi chichaak:

—Ashí nuwa aina nuiyan amina Apajuí pegkegnum chichagtai awatamsae, antsag uchigminash pegkegnum chichagtai awasae. ⁴³ Wi iman-chauwaitag nunin aish, ¿wagka mina Apujú dukujimesh ijagtustasamesh miname? ⁴⁴ Wagki ame mina kumpamjakum chichaam nuna antaig, uchi senchi kakaaje, shiig aneak. ⁴⁵ Shiig aneastinai dekaskeapi tiuwa duka, wagki Apu Apajuú tibauwa duka uminkatin asamtai.

⁴⁶ Tutai Mariashkam:

“Wika Apunak mina anentaimtagjai emematjai.

⁴⁷ Mina wakanjuk shiig aneawai Apajuí mina uwemtijina nui,

⁴⁸ niina inake imanchauch aigkish mina etegtua dui.

Yamai nagkamsag ashí aents aidauk, shiig aneasui tujutiagtinai.

⁴⁹ Wagki Senchigtina nu, wají shiig muuntan minai dutika duka daajig Pegkegmai.

⁵⁰ Nuigtush ni wait anenkagtutaijiya duka, aents akiinak minidau niina ajantus emematiagtin aina nudauwai.

⁵¹ Nigka senchigtina ibau asa junak jutikae; dutikak emebau aidau dutikatasa anentaimtusbaujinash wainak emake.

⁵² Senchigtin aidau ekeemtaijinak atankine, dutika imanchauch aina nuna dekas iman awasae.

⁵³ Yapajuau aidaunash wají pegkeg aidaun shiig kuashat susaje, dutikak wiyakuch aidaunak uwegmatak ishiake.

⁵⁴ Ni inake Israelnak yaigké, ni wait anenkagtutaijiya nuna aneaku asa;

⁵⁵ nuna pachisag jutii muunji aajakajua nuna tiu aajakui, Abrahaman

nuigtú ni weantunum akiinak wegagtina nunash tuke atina nuna”.

⁵⁶ María nuna tii, Elisabetan jeenig kumpatum nantu tumain pujusui, nunik wakitkiuwai niina jeen.

Juan Yamijatín akiinamu

⁵⁷ Elisabet tsawanji jegajim, aishmagkun uchigmakui. ⁵⁸ Nunikmatai nui ijutkau batsataidau, niina patayí aidaushkam Apu Apajuí wait anenjam uchigmakbaun antukaju asag Elisabetjai shiig aneasajui. ⁵⁹ Uchi akiina ocho tsawan wetai, uchi pakaji ajapjuatasag* kautuwajui, nuninak apaji daaji Zacarias nunak adaikatag tuidau. ⁶⁰ Tujash uchi dukují chichaak: —Atsa, uchik Juan atatuí, tau.

⁶¹ Tutai: —Ame pataim aina nuiyag tu daagtinuk atsajamah, tuidau.

⁶² Tutai uchi apajin iwiyas inidau, daajish ya atí tawaki tusag.

⁶³ Nuniagtai tapna sujustá tusa inakmatai susam: Daajig Juagkai tusa agaju. Dutikantai ashí anentai jegagchaju. ⁶⁴ Nuna dutikamuik ataktú chichakú. Nunik Apajuin emematiu. ⁶⁵ Nunikmatai nui ijutkau batsamin aidauk senchi puyatkaju; nunisag ashí Judea mujajin batsamin aidaushkam, nu nunikbauwa nunak ashí dekaawaju. ⁶⁶ Ashí aents nuna antuidauk: “¿Jusha uchish wajukuk atinaita?” tuidau, Apu Apajuí niina senchijin kuitabaun dekaidau asag.

Zacarías Apajuí emematbau

⁶⁷ Zacarías, uchi apajiya nu, Wakaní Pegkeji chichamtikam, nuniktinun pachis chichaak:

⁶⁸ “Emematiagmi Apu, Israelan Apajuijiya nu,

ni aentsjin agkanmitkatatus taa nunú.

⁶⁹ Awetugmaji makichik senchigtin Uwemtikagtinun, ni inake David aajakua nunú wegantun.

⁷⁰ Yaunchuk nagkamas niina profetaji

pegkejam aajakajua nu etsejuinak:

⁷¹ iina shiwaji aidaun

* **1:59** “Pakaji ajapjuatasag” tawa nunak, judío aidauk uchi aishmag akiinamtaig, Apajuí dutikata tibau asag uchi katiuchiji chuchuken tsupigkag ajapjuakú asamtai tawai. Diistá Gn. 17.10-12; Lv. 12.3.

nuigtú ashí tikich aents kajegtamin aina nunash depetuk uwentijamjatna nuna;

⁷² iina muunji aajakajua nunash wait anenjatnaitjame tusa chicham apakbau pegkegma nuna aneaku asa.

⁷³ Iina apají Abrahaman dekas umiktatjai tiuwa duka juuwai:

⁷⁴ Ishamkas pujuinaku, iina shiwajinish agkanmagawaja, ni umiujinaku, ⁷⁵ pegkeniaja nuigtú pegkeja nu takainaku niijaig ashí tsawantai pujusagtasa”, tiuwai.

⁷⁶ Nuna tii uchijinashkam:

“Amek uchijuh, ashí tikich aidau nagkaesau muunta nuna profetaji tama atatme;

wagki amek eemkam wetatme Apú jinti umigkatasam,

⁷⁷ ni aentsjish uwemat dekamtikatasam;

tudau aidau tsagkugnamushkam.

⁷⁸ Iina Apajuijija nu shiig senchi wait anenjamu asa, nayaimpinmaya etsa puwau jinama nuniktinun awetugmae,

⁷⁹ suwenum batsataina nuna tsaapmitka;

jinta agkan pujutnum ekagtina nui jutiinash awekapasti tau asa”, tiuwai.

⁸⁰ Uchishkam tsakau, nuniak wakaninchakam nuni senchi ichichmamu, nuniak uwegshunum pujusui, Israelfnum chicham etsegkatin tsawan jegatai wantinkatatus.

2

Jesús akiinamu

(Mt. 1.18-25)

¹ Nu tsawantin, César Augusto ashí aents aidau agatmamkatnume tusa chichaman umik dapampajui. ² Jujú nagkamchaku agatmabauk Cirenio, Siria apuji wee pujai nunikui. ³ Tibau asantai ashí shimuidau, makí makichik ditá yaaktajin agatmamjagtatus.

⁴ Tuja Joseshkam Galileanum yaakat Nazaret awa nuiya juwaki Judea nugkanum jegau, yaakat Belén David akiinamu aajakua nui, nigka David wegantu asa. ⁵ Nui agatmamjatatus weak, ni nuwenatasa dakaniamuji María ejamtinun ayasá weuwai. ⁶ Nunikag nui jegaa pujuinai tsawan ni uchigmaktinji jegajiu. ⁷ Nunikmatai iwaijin aishmagkun uchigmaku, dutika uchi pempetaiyai pempeag tagku ayugtainum egkeauwai, ijagka kajitainig dita ayamainuk agkantak atsusú asantai.

Ángel aidau uwijá kuitamin aidau wantintukbau

⁸ Nu nugka nuiyag ujumak pastor aidau uwigjin kuitamainak kashi iwá batsataidau. ⁹ Nuniyai makichik ángel Apu Apajuinu wantintuku, nuniag Apu Apajuí tsaaptinjiya nu tsawan awajus tenteawajui, dutikam shiig senchi ishampakajui. ¹⁰ Nuniagtai ángel chichaak: “Ishamkaigpajum, wika atumin yamajam chichaman ujaktasan minitjime, ashí aents aidau shiig aneasagtata nuna. ¹¹ Yamai kashia juik Davita yaaktajija nui makichik Uwentikagtin, Apu Cristo akiinae. ¹² Uchi pempeajam tagku ayugtainum egketu wainkattajum nunú atatuí”.

¹³ Nuniag pachiaichbau angeljai kuashat tikich ángel nayaimpinmaya aidau wantunjau, nunikag Apajuin emematuinak:

¹⁴ “Nayaimpinmash Apajuiya duke emematiagmi,

nugkanmash shiig agkan pujamu atatuí Apajuí wait anenjamu aina duka”, wajaidau.

¹⁵ Ángel aidau nayaimpinum wakitkiagmatai, pastor aidau pempeentu-nikiag:

—Belén wegagmi, Apu Apajuí nunike tusa ujpaka nu wainkagmi, tuidau.

¹⁶ Tusag waujus wegag jegakmag, Marian Josejai nuigtú uchi tagku ayug-tainum egkematman wainkaju. ¹⁷ Nunik wainkag, uchi pachisa tibauwa nuna etsejuidau. ¹⁸ Tusa pastor aidau etsegbaun ashí aents antuidauk anentai jegachaju. ¹⁹ Tujash Mariak nu ashí tabau antukbaun sakapamain-chau dekapeau, nuniak nuwi nuwig anentaimá pujau. ²⁰ Nunikag pastor aidauk waketuínak Apajuín eme anentsag emematuídau, ashí antukbauji nuigtú wainkaja duka, ángel tibauk imanísag uminkau asamtai.

Jesús jega Apajuí ememattainum ejegamu

²¹ Ocho tsawan jegamtai, uchin pakaji ajapjuatasag adaikaju JESÚS. María eke ejapjumainchau aig, nu adaikattame tusa ángel tibaunak dutiksag.

²² Nunikag tsawan dita pegketnujiya nu jegamtai, Moisés chicham umiktinnum tibauwa dutiksag Jerusalén ejegawaju Apu Apajuí eemtin iwainaktatus. ²³ Nunak Apu Apajuí tibau chicham umiktina nui agag-baunum: “Ashí uchi aishmag iwai akiinuk Apu Apajuínu atí”, tibau asamtai dutikawajui. ²⁴ Nunik weenak Apu Apajuínu atinun jukiaju chicham umiktajum tibanum: Jimag tórtola,* nu atsakuig jimag paum tsakat itaatajum tibauwa dutiksag.

²⁵ Nunú tsawantinig Jerusalén pujujukui Simeón daagtin, pegkejan takau, wait anenkagtin, Israelan Apajuí ichichjatna nuna wainkatatus daká pujú, Wakaní Pegkejishkam ajamu; ²⁶ nuniau asa Wakaní Pegkejiya nu dekamtikau aajakui, Apu Apajuí Etekgamu waintsukek jakashtinaitme tusa; ²⁷ nunin asa Wakaní Pegkeji anentaimtikjam jega Apajuí ememattainum weuwai; Joseshkam Mariajai Jesusan jukiag jega Apajuí ememattainum jegawaju, chicham umiktinnum dutikatajum tawa nuna betek dutikatatus. ²⁸ Nunik Simeón uchin minaaki juki Apajuín pegkegnum chichajak:

²⁹ “Apuh, yamaik ame chicham tujutbauwa duka uminkau asamtai, miná inakjuk shiig agkan anentaimas jakati tusam idaitusta.

³⁰ Wagki mina jiiujui wainkajai ame uwemtikagtamunak,

³¹ ashí aents ame awemamun wainkagtata nuna.

³² Juka tsaaptin

judiochu aidaunash wantintuktina nuuwai,

amina aentsjum Israel aina nu eme anentai atina nu”, tau.

³³ Ashí nuna pachis uchi tutai, Josek Mariajai anentai jegachaju. ³⁴ Nuna tii Simeón atumnash Apajuí yaimpaktinme tusa, Jesusa dukujin, Marian chichajak:

—Nijah, ju uchía junak kuashat Israel aina nuiyag dakitiagtinaí niina dakituídauk megkaejagtatuí, nuninaí kuashat nemajiagtina nu uwem-jagtinaí. Nigka Apajuínua nuna iwainatnai, tujash kuashat aents daki-tiagtinaí, ³⁵ aatus nuninak ditá anentain awa nuna iwainmabiagtinaí,

* 2:24 “Tórtola” tawa duka pauma numantin tagkumtai aajakui.

nu nuninamua nunú aminak espadayai ijumaina imatijamak anentaimin waitkagmastinai, tiuwai.

³⁶ Nuanuig nuwa profeta Ana daagtin, Fanuela nawanji Aser weantu shiig muuntuch wajasá pujau. Nigka shiig tsakatuch aishina siete mijan pujusui, ³⁷ nuniau wajemea ochenta y cuatro mijan wegau; nuigtush juga Apajui ememattainum kashish tsawaishkam megkaechau, nuniau asa ayunó wajak Apajuin ajujú pujú. ³⁸ Nuniaig niishkam, Apajuin see taku uchin pachis ashí aents Jerusalén agkanmitkam atinun dakaina nuna tau.

³⁹ Apu Apajuí chicham umiktajum tibauwa nunak imatiksag umikag, ditá yaaktaji Nazaret, Galilea nugkanum awa nui wakitkajau.

⁴⁰ Tuja uchishkam tsakau nuniak senchi wegau, nuigtush senchi yachameau, tuja Apajuí wait anentamujish niini au.

Jesús juga Apajuí ememattainum pujau wainkamu

⁴¹ Ashí mijantin José Mariajai, Jerusalén tuke wesagké aidau fiesta Pascua jegatai; ⁴² nuniamunum Jesús doce mijan ajamu ai weajui Jerusalén fiesta inagkeautaiya nuna betek dutikatatus. ⁴³ Nunik fiesta ashim-nakmatai ditak waketainai Jesusak Jerusalén juwakui, Josek Mariajai dekainatsaig. ⁴⁴ Dita anentaimsajag, tikich aidaujais ijunag wegatai, tusag makichik tsawan kuwaekaju, nuniau ashí ditá waitai nuigtú ditá patayí aidanmash egaidau; ⁴⁵ tujash wainkachag Jerusalén waketjaju egainak.

⁴⁶ Nunikag kampatum tsawanta jui wainkaju, juga Apajuí ememattainum maestro chicham umiktinun jintinkagtin aidaujai ejapena ekeemas, chichaagtai antak niishkam iniimak eketun. ⁴⁷ Ashí aents ni chichaamun antujuidauk, yachajin diijus puyatkag diidau, dita iniamash shiig aimu asamtai. ⁴⁸ Nunittaman apají dukujijai wainak puyatjuk, dukují chichajak:

—Uchijuh, ¿wagka jusha jutikagtame? Nijah, wi apajai shiig senchi puyatjukan egakun wekaetusjamna, tau.

⁴⁹ Tama ni ayaak:

—¿Wagka minash egatjume? ¿Atumek dekatsjumek mina Apagdau aidan uyumamainaitag duka?, tau.

⁵⁰ Tujash ditak, wagkag tawa tusag dekgamainchau dekapedau.

⁵¹ Nunikag Jesusan jukiag Nazaret waketjajui, Jesús nui pujusá ashí dita tabaunak betek umiau. Tujash niina dukujig ashí Jesús nunikbaunak tuke kajimattsuk anentaimtú pujau. ⁵² Tuja Jesuschakam nuní senchi tsakau, nuniak nuní senchi dekau, nunisag Apajuishkam shiig anentau nuigtú aents aidashkam shiig anentuidau.

3

Juan Yamijatin uwegshunum chichagkagtukbau (Mt. 3.1-12; Mr. 1.1-8; Jn. 1.19-28)

¹ Tiberio César quince mijadai inabaunum, Poncio Pilato gobernador wajas Judeanum inamu, nuniai Herodes Galilea inamu, untsu niina yachi Felipe Iturea nuigtú Traconitenum inamu, nuniai Lisania Abilinia inamu, ² nuniai Anás, Caifás aatus sumo sacerdote wajas pujuinai, Zacariasa uchijí Juan uwegshunum pujuttaman Apajuí ujakuí chichagkagtukti tusa, ³ dutikam niishkam Jordagnum tikiju batsataidaunum ashí wekaegas chichagkagtau, tudau idaiyinak yamimajag tudau aidan tsagkugnagtinme tusa; ⁴ profeta Isaiás tibau agagbaunum tawa nunisag, duka:

“Makichik chicham uwegshunum untsubau antuewai:
‘Apu minitin jinta iwajatajum, jinta tutupit dakuektajum’,

⁵ ashí japagau aidaunash nugkan ainjatnai,
nainnashkam yumpuag pakamak betekmaktinai, jinta tunin aidaunash
tutupit esekatnai, jinta
japaejau aidaunash ainjatnai, tawai.

⁶ Apajuí uwentikagtamua nunak ashí aents wainkagtatu”, tawai.

⁷ Kuashat aents aidau Juan yamijati tusag minituidau, nuniagtai
chichajak: “¿Iwanchi uchijí aidauwah! ¿Yaa atumnash yamimaku Apajuí
suwinkaji tikijuch wajasa nu uwemtumainai tusash tujabiagmae? ⁸ Dekas
tudau takatan idaisaush wajuku amainaita nunú iwainmankatajum,
wainka atumek anentaimsajum: Abraham wegantu asaja yupichu uwe-
main ainaji, tumamigpa; wagki Apajuik jujú kaya aina junakesh Abrahama
uchijí emainai. ⁹ Nuigtush yamaiya juik jachai kagkap tsupitama
dutikatatus Apajuí suwimkeg uminas awai; ashí numi nejenatsu duka
tsupika jiinum apeam atatuí”.

¹⁰ Tutai aents aidau iniinak:

—¿Wají dutikmainaitji?, tuidau.

¹¹ Tiagtai ni ayaak:

—Jimag nugkumainji ajamuk atsgubaun susati, yumainji ajamushkam
dutiksag dutikati, tau.

¹² Apú kuichkiji atinun ijumin ujumak yamijati tusag kaunawag iniinak:

—Maestroh, ¿jutiish wajukmainaitji?, tuidau.

¹³ Tiagtai Juan ayaak:

—Wajupa akikmakta tibauwaita, nunú uwaekajum akikmakta tiigpa,
tau.

¹⁴ Tutai ujumak suntag aidaushkam iniinak:

—¿Jutiish wajukmainaitji?, tuidau.

Tiagtai:

—Makichikish uwakagmek atankigpajum, tikichish tsanugmek jujukigpa,
apujum akigmaina nujaiig shiig aneasjum juwaktajum, tau.

¹⁵ Tuja aents aidauk, dakak batsataidau asag, ditá anentainig,
Juagchawashit Cristo, tuidau; ¹⁶ tujash Juan ashí ditan chichajak:
“Wika dekaskenmag yumí yamijatjai, tujash mina nagkaetasu makichik
senchigtin minawai, wika niina sapatji jigkamunakesh atitmaitsujai niya
imanchau asan. Niyai Wakaní Pegkejiya nujai yamigmagtinuk nuigtush
jiyai yamigmagtina dushakam. ¹⁷ Nigka trigo awagti wampuji utsanku
neje akantayama numamtuk awakatatus uminas awai, dutika ijumtainum
trigonak yajumak, wampujinak jii ajumaish kajinkashtina nui apeatnai”,
tiuwai.

¹⁸ Juna aatus tusa nuigtú kuashat tikich chicham aidaujai Juagkak aents
aidaunak jintintu yamajam chicham pegkeja nuna. ¹⁹ Tuja gobernador
Herodesan jiyakui, yachi Felipe nuwen Herodiasan juki pujau asamtai,
nuigtú ashí pegkegchau dutikamuji aina nuna pachis, ²⁰ nu aaja tibau asa
nuni nagkaemas pegkegchaun takaak, Juagkan achiká cárcel egkeauwai.

Jesús yamimagbau

(Mt. 3.13-17; Mr. 1.9-11)

²¹ Ashí aents yamimainamunum, Jesuschakam yamimajui, nunik Apajuí
aujai nayaim ujanu; ²² nuniai Wakaní Pegkeji pauma nunin wajas paan
niini akaegu, nuniai nayaimpinmaya chicham antuekau:

—Ametme mina uchig aneetaigmek, aminí shiig aneamu ajutui, tabau.

*Jesucristo muunji aajakú aidau**(Mt. 1.1-17)*

²³ Jesús takatjin nagkamauwa duka treinta mijan tumain ajujukui, José uchijiyai tujakajua nu,

Josek Elí uchijí aajakui, ²⁴ Elik Matata uchijí,

Matat Leví uchijí, Levik Melqui uchijí,

Melquik Jana uchijí, Jana José uchijí,

²⁵ José Matatiasa uchijí, Matatías Amosa uchijí,

Amós Nahuma uchijí, Nahúm Eslí uchijí,

Eslí Nagai uchijí, ²⁶ Nagai Maata uchijí,

Maat Matatiasa uchijí, Matatías Semeí uchijí,

Semei José uchijí, José Judá uchijí,

²⁷ Judá Joana uchijí, Joana Resa uchijí,

Resa Zorobabela uchijí, Zorobabel Salatiela uchijí,

Salatiel Neri uchijí, ²⁸ Neri Melqui uchijí,

Melqui Adi uchijí, Adi Cosama uchijí,

Cosam Elmodama uchijí, Elmodam Era uchijí,

²⁹ Er Josué uchijí, Josué Eliezera uchijí,

Eliezer Jorima uchijí, Jorim Matata uchijí,

Matat Leví uchijí, ³⁰ Leví Simeogka uchijí,

Simeón Judá uchijí, Judá José uchijí,

José Jonagka uchijí, Jonán Eliaquima uchijí,

³¹ Eliaquim Melea uchijí, Melea Mainagka uchijí,

Mainán Matata uchijí, Matat Natagka uchijí,

Natán Davita uchijí, ³² David Isaí uchijí,

Isaí Obeta uchijí, Obed Booza uchijí,

Booz Salmogka uchijí, Salmón Naasogka uchijí,

³³ Naasón Aminadapa uchijí, Aminadab Arama uchijí,

Aram Esroma uchijí; Esrom Faresa uchijí,

Fares Judá uchijí, ³⁴ Judá Jacopa uchijí,

Jacob Isaaca uchijí, Isaac Abrahamama uchijí,

Abraham Taré uchijí, Taré Nacora uchijí;

³⁵ Nacor Serugka uchijí, Serug Ragau uchijí,

Ragau Pelegka uchijí, Peleg Hebera uchijí,

Heber Sala uchijí, ³⁶ Sala Cainanka uchijí,

Cainán Arfaxata uchijí, Arfaxad Sema uchijí,

Sem Noé uchijí, Noé Lameka uchijí,

³⁷ Lamec Matusalegka uchijí, Matusalén Enoca uchijí,

Enoc Jareta uchijí, Jared Mahalaleela uchijí,

Mahalaleel Cainagka uchijí,

³⁸ Cainán Enosa uchijí,

Enós Seta uchijí, Set Adagka uchijí,

Adán Apajuí najanamu.

4*Iwanch Jesusan pegkegchau takamtiksata tibau**(Mt. 4.1-11; Mr. 1.12-13)*

¹ Jesús Wakaní Pegkeji egkemtujam Jordagnumia wakettai, Wakaní Pegkeji uwegshunum emauwai, ² cuarenta tsawan pujustí tusa, nui pujaun

Iwanch pegkegchaun takamtiksatus dekapsauwai. Nu tsawan aina nuwig makichkish yuwachui, nunú inagnamunum yapajauwai. ³ Nunitai Iwanch chichajak:

—Ame dekas Apajuí Uchijiyaitkumek, ju kaya ju pag najanam yuakia, tau.

⁴ Tutai Jesús ayaak:

—Agagbau awai: “Aentsuk imá pagjaigkik pujumaitsui, ashí Apajuí chichamega nujai pujumainai” tawai, tiuwai.

⁵ Timatai Iwanch juki muja tsakajunum iwakui, dutika juu inaktamuik ashí nugkanum inamin aina nuna iwaintukui. ⁶ Dutika Iwanch chichajak:

—Ashí ju imaja junak nuigtú ditá imanji aina nunashkam amina amastajame, wagki juka minai idaisamui, nuadui wi wakegamun sumainaitjai.

⁷ Ame mina tikishmajam emematjakminig, ashí aminuk atí tusan idaitustajame, tau.

⁸ Tama Jesús ayaak:

—iWetá Iwanchih! agagbau awai: “Imá amina Apujum Apajuiya duke emematta, nuniakum imá nigki umigkata” tawai, tiu.

⁹ Timatai nui juki Jerusalén ejegau, dutika jega Apajuí ememattainum yakí nagkatkamunum iwaká:

—Ame dekas Apajuí Uchijiyaitkumek, tsekem iyata, ¹⁰ wagki agagbau awai:

“Apajuí, angelji aidaun awetugmattawai amina kuitamjamkatnun,

¹¹ dutikam dita achigmakagtatui kayá tukumkai tusa”, tiuwai.

¹² Tutai Jesús ayaak:

—Dushakam agagbauwai: “Amina Apujum Apajuiya nu pegkegchaunum dekapsatasamek wakeyipa” tawai, tiuwai.

¹³ Tuja Iwanchik pegkegchau takamtiksata tibaunak ashí dekapes, ujumak tsawan idaisauwai.

Jesús Galileanum takatji nagkamamu

(Mt. 4.12-17; Mr. 1.14-15)

¹⁴ Nunik Jesusak Wakaní Pegkeji senchintikam Galilea wakitkiuwai, nunikmatai ashí nugkanum nui batsataidauk niina pachisag kuashat chichaidau. ¹⁵ Nui jegaa, jega ijuntainum wayá jintinkagtutai ashí aents aidauk emematuidau.

Jesús Nazaret pujusbau

(Mt. 13.53-58; Mr. 6.1-6)

¹⁶ Jesús Nazaret ni pujusá tsakagbaunum wakitki jegaa, tsawan ayamtai tsawagmatai jega ijuntainum wayau tuke nunin asa; nunik wajainiu Apajuí chichamen ausatatus, ¹⁷ nunitai papí pempeagbau profeta Isaias agagbaun susaju, dutikam dakuek, ju pachisa agagbaun wainkau, nunik auju:

¹⁸ “Apu Apajuí Wakaní minai awai, nuniau asa mina etegtuauwai,

ujunauch aidaunash yamajam chichaman ujaktí tusa;

achikbau aidaunash antuinamunum senchi chichaká agkanmaetan ujaktí, nuniak

wainmachu aidaunash wainmitkakti, waitkatai aidaunash agkanmitkati,

¹⁹ yamai mijana juuwai Apu Apajuí wakegamu tusa chichagkagtukti” tibauwa nuna.

²⁰ Nuna aujus inagnak papiin pempeag nui takaun susa ekeemsau; nunikmatai ashí aents jega ijuntainum utsanawajuk, dii pekajaidau.

²¹ Nuniagtai:

—Agagbaunum tawa juka, atumin eemtimin yamai uminkae, tiuwai.

²² Ashí aents aidauk niina pachisag pegkejan etsegtuidau, ni waji pegkeg pachisa chichamunashkam puyatjusag diidau, nuninak:

—¿Ju José uchijiya duchaukaih?, tuidau.

²³ Tiagtai ni ayaak:

—Dekaskenmag ju chicham: “Ampijatnuh, amek ampimata” tibauwa ju tujuttatjume. Nuigtushkam: “Kuashat waji aidau Capernaúm dutikamu antinuweg nu, juwish amina nugkeminish dutikata”, tujuttatjume.

²⁴ Nuna tii:

—Nuigtush dekas tajime, makichik profetakesh niina nugkenig shiig anentsá juwamak achauwai. ²⁵ Junak dekas tajai, Elías pujukua nunú tsawantinig Israel nugkanmag kuashat nuwa waje batsamajakajui, nuniemunum kumpatum mijan jimaituk yututsuk au asamtai, ashí nugkanum yapajut tepeauwai; ²⁶ tujash Eliasnak nuwa waje Israel batsata nui awematsuk, sareptanmaya nuwa waje yaakat Sidón tikiju awa nui pujaunum awemauwai. ²⁷ Nuigtushkam kuashat aents lepragtin Israel aijkai, profeta Eliseo pujukua nunú tsawantin; tujash makichkish nunú aidaunak etsagautsuk, Naamán sirianmaya aajakua nuna etsagajui, tiuwai.

²⁸ Nu tabau antukag jega ijuntainum utsanawajuk senchi kajekaju, ²⁹ nunikag wajatjag Jesusan yaaktanmayan jiikiag, muja nagkatkamunum ditá yaaktajish nuwig au asamtai jukiag iwakaju betsag tajaekaunum ajuami tusag. ³⁰ Dutikam dita mininamunmag eteenki, waketak ukuki-uwai.

Aents wakan pegkegchau egkemtugbaun Jesús etsagabau

(Mr. 1.21-28)

³¹ Nunik Jesusak yaakat Capernaúm Galilea nugkanum awa nui weuwai, nui pujus tsawan ayamtai tsawautai jintinkagtau. ³² Nunitai aents aidauk ni jintinkagtamujuin puyatjuk diidau, wagki apu chichame antugtai jintimaina imatika jintinkagtau asamtai.

³³ Nuniai jega ijuntainum aents wakan pegkegchau egkemtumu wayá eketu, shiig senchi untsumak:

³⁴ —Jesús nazarenumiyah, ukujatkiti! ¿Wagka amesh jutii pujamun-mash miname, ijijatuatasamek minam? Wika ame yaitpa nunak dekagme, amek pegkejam Apajuinuitme, tiuwai.

³⁵ Tutai Jesús jiyak:

—¡Takamtak jiinkim ju aentsuk ukuktá!

Tama iwanchakam ditá eemtin ajiaju, nunik jiinkiuwai makichkish aentsnak pegkegchau ematsuk. ³⁶ Nunikmatai ashí aents aidauk anentai jegagchaju, nunikag pempeentunisag:

—¿Jusha wajuku asaya chichamesh senchigtinaita wakan pegkegchau aidaunash chichamenig jiyá dusha?, tuidau.

³⁷ Nu dutikamua duka, ashí nu nugkanmag antuejuwai.

Jesús Pedro tsatsají etsagabau

(Mt. 8.14-15; Mr. 1.29-31)

³⁸ Jesús jega ijuntainmaya jiinki Simogka jeen jegauwai. Nuniai Simogka tsatsají senchi tsuweak tepau, nunitai etsagagti tusag segajui. ³⁹ Tama

Jesuschakam niina tsuntsumtua, tsuwemun ukuktí tamawaik pegkeg wajasá nantakí yutain umijuk ajamsauwai.

Kuashat aents etsagakbau
(Mt. 8.16-17; Mr. 1.32-34)

⁴⁰ Etsa akaegai, ashí aents makí makichik jatai jau aidaun Jesusan ikautuawajui, dutikawagmatai niishkam makí makichik achiká etsagakui.
⁴¹ Nuigtushkam iwanch kuashat aentsun egkemtuju aidaush senchi untsumak jiinainak:

—Amek Apajuí Uchijiyaitme, tuidau; tujash Jesusak senchi jiyau chichakai tusa, wagki ni Cristua nunak dekaidau asagmatai.

Jesús Galileanum chichagkagtukbau
(Mr. 1.35-38)

⁴² Nunik tsawagmatai, Jesusak jiinki aents atsamunum weuwai. Nuniai aents aidauk egai egainakuag ni pujamunum jegawag, emetuidau ukujatki tusag. ⁴³ Tujash ni ayaak:

—Wika tikich yaakat aina nuwishkam yamajam chicham Apajuí inama nuna pachisan etsegmainaitjai, wagki nuna nunikti tusa awemamuitjai, tiuwai.

⁴⁴ Tau asa, Galilea* jega ijuntai aidaunmash wayá chichamnak etseju.

5

Kuashat namak achikbau
(Mt. 4.18-22; Mr. 1.16-20)

¹ Jesús kucha Genesaretnum uwet wekagai, kuashat aents Apajuí chichamen antukagtatus tuwakag chanuidau. ² Nuniamunum jimag barca kaamatak tepaun Jesús wainkauwai, namaká main aidau redjin nijainak jiinjá ukukbau. ³ Nunik makichik Simogka barcajiya nui egkemag, machik ejapen inananta tusa, nui ekeemas aents namaká uwet tuwakun jintintu. ⁴ Nunik chichamun ashimak, Simogkan chichajak:

—Wiyankam kuchanum ejapeantam redjum ajugkam namak maata, tau.

⁵ Tama Simón ayaak:

—Maestroh, kashi red ajú ajunkawa tsawampakuish makichkish maach-maji, tujash ame chichamjumin ajugtajai, tau. ⁶ Tusag ajukmag, shiig kuashat namakan chimpikaju, imatikamu asa rednak ichiau. ⁷ Nunitai ditá kumpají tikich barcanmayan iwiyaidau, taawag yaimpaktinme tusag. Dutikam kautuawaju, nunikag namaknak barcanmag mai aimkaju, dutikam tepeattak wajau. ⁸ Imanitai Simón Pedro nuna wainak, Jesusa eemtin tikishmag:

—Apuh, ukugkita minak, wika tudauwaitjai, tiu.

⁹ Namakan imatika kajegká ishankau, nunisag ashí niijai yujaidaushkam, ¹⁰ nuniamunum Jacobo, Juan Zebedeo uchijí Simogka kumpají aina dushakam nunikaju. Nunitai Jesús Simogkan chichajak: —Ishamkaipa, yamai nagkamsamek namak maatas a wekaetam anmamtuk, Apajuí chichame etsegkum aents aidau minai ikautjin atatme, tiu.

¹¹ Nunikag barca aidaunak anugkag, ashí ukuinak, Jesusjai weajui.

* **4:44** Tikich papí agagbaunmag “Judea” tuinai, tikich agagbauwa nui “Galilea” tawa nuiya jukimui, nunin asa mai pegkejai.

Aents lepragtinun Jesús etsagagbau

(Mt. 8.2-4; Mr. 1.40-45)

¹² Tikich tsawantai, Jesús makichik yaaktanum pujai, aents lepragtin tajuauwai, nunik Jesusan wainak tikishmag tsuntsumá, nijayin nugká antig pujasá:

—Apuh, wakegakmek etsaentumainaitme, tau.

¹³ Tama Jesuschakam uwejin antiak:

—Wagegajai, pegkeg wajastá, tiuwai.

Tusa tamawaik leprak megkaekauwai. ¹⁴ Dutika: Makichkish ujakaipa, sacerdote jegajum wantintukta, nuniakum ofrenda susata ame pegkeg webaugmin Moisés tibauwa dutiksamek, ditashkam waipakag, dekas tsagaje tujamtinme, tiuwai.

¹⁵ Tujash ni dutikamua duka nuni nagkaemas naatu, nuniau asamtai kuashat aents tuwajuidau ni chichamen antugkagtatus nuigtú dita jaamujinash etsaentugti tusag. ¹⁶ Tujash nigka nugka agkantú aidaunum wegau, nunik Apajuin auju.

Jesús aents wekaechau etsagagbau

(Mt. 9.1-8; Mr. 2.1-12)

¹⁷ Makichik tsawantai Jesús jintinkagtau, nuniamunum fariseo aidau, maestro chicham umiktinun jintinkagtin aidau eketaidau, nunú aidauk ashí yaakat yaijuch galileanmaya, Judeanmaya nuigtú Jerusalegnunia aina nuiya kaunawajui. Nuniamunum Apu Apajuí senchijin Jesús iwaidau aents aidau etsagamunum. ¹⁸ Nuniamunum ujumak aents aidau, aents wekaechaun camillanum pataidiag itawag, awayatag tuidau Jesús wajamunum ejentuntatus. ¹⁹ Tujash kuashat aents tuwakú asa waimainchau asamtai, jegá tuntupen wakaju, nunikag ujajag aagkawag, wekaechauwa nuna camillanum akakiaju, dutikawag ejapen Jesusa eemtin aepsaju.

²⁰ Jesús dita dekaskeapi tabaujin wainak chichajak:

—Aishmagkuh, amina tudaujum aidauk tsagkugnaje, tau.

²¹ Nuna tutai chicham umiktinun jintinkagtin aidau, fariseo aidaujai ditak anentaimsag: “¿Niish ya asaya Apajuinash pegkegchaunash chichajua? ¿Ya tudau aidaunash tsagkugkagtumainaita imá Apajuikeajama?”, tuidau.

²² Tu anentaimaidaun Jesús dekau asa ditan chichajak:

—¿Wagka annush anentaimjume? ²³ ¿Tuwaita imá yupichuch tumainush, amina tudaujum aidauk tsagkugnaje taja dukaih, atsa nantakim wetá tumainaitag dukaih? ²⁴ Tujash Aentsmaga akiinauwa nu, ju nugka juwish tudau aidaunash tsagkugkagtumaina nu dekaatajum.

Tusa wekaechaun chichajak:

—Amina tajame, nantakim camillajum jukim jeemin wakitkita, tiuwai.

²⁵ Tusa tamawaik ditash wainainaig nantakiuwai, nunik camillajin juki Apajuin emematki jeen weuwai. ²⁶ Dutikamta ashí aents aidauk puyatkaju, nunikag Apajuin emematiaju, nunik ishambag, chichainak:

—¡Yamai anentai jegagmainchau wainkaji!, tuidau.

Jesús Leví untsukbau

(Mt. 9.9-13; Mr. 2.13-17)

²⁷ Nuna dutika ukuak jiinkiu, nunik wekamá Leví* apú kuichkiji atinun akikmagtai ijumak ekeemtatman wainkauwai, nunik chichajak:

—Wegajai mina jintintaig aminum, tiuwai.

* 5:27 Diistá Mr. 2.14.

²⁸ Tama ni takataijnak ashí ukuak niijai weuwai.

²⁹ Nunik nunú tsawantaik Jesusan eme anentus ajamsatatus niina jeen yutain shiig umikú, dutikamunum Leví kumpají, apu romanmaya kuichkiji atinun ijumin aidaushkam, nuigtú tikich aidaujai mesanum pekajaidau. ³⁰ Nuniagtai maestro chicham umiktinun jintinkagtin aidau fariseo aidaujai, Jesusa jintintaiji aidau chichajuinak:

—¿Wagka atumesh apú kuichkiji atinun ijumin, nuigtú tudaugtin aidaujai ijunjajum yuwakjumesh, umutash umagme?, tuidau.

³¹ Tiagtai Jesús ayaak:

—Jamamtuchu aidauk ampijatnunak atsumatsui, jau aidau atsumawai.

³² Wika aents pegkejan takau aidau untsuktasan minichuitjai, wika aents tudaugtin aidau tudaujin idaiyinak mina nemagtuksinme tusan tauwaitjai, tiuwai.

Ayuno pachisa iniimsamu

(Mt. 9.14-17; Mr. 2.18-22)

³³ Jesús tutai dita aiinak:

—¿Wagka Juagká jintintai aidauk, kuashtá ayunainak Apajuinash aujin agmae nunisag fariseo aidaushkam, tujash amina jintintaijum aidauk ayatak yuwinak, umutnash umú yujainawa?, tuidau.

³⁴ Tutai Jesús ayaak:

—¿Nuwenbaunum ipaamu aidaush, nu nuwenu ditajai pujaigkish, ayunatajum tumainuk ainajum? ³⁵ Tujash tsawan jegattawai nuwena nunú juwam atata nu, nunikmatai ayunawagtatui, tiuwai.

³⁶ Tusa junashkam augmatu:

—Makichkish nugkutai yamagman tsupikag nugkutai mamujunmag adujtuchu ainawai, dutikamak nugkutai yamagmaitak besemain asantai, tuja yamajam tsupikbau mamujunum adujtamashkam shiig juwamait-sui. ³⁷ Dutiksaik vino yamagmashkam, duwap apagbau ajutnumag yajashtaiyai, dutikamak vino yamajam ichiimainai nunik ukaemainai, nunitai duwapshakam ajapnamainai. ³⁸ Nuadui vino yamagmak duwap yamagmanum yajataiyai, dutikamu asa mai betek amainai. ³⁹ Tuja umutai kajiau umin aidauk, yamá kajiaunak wakegainatsui, wagki: “Kajiau imá pegkejai” tuidau asag, tiuwai.

6

Jesusa jintintaiji aidau tsawan ayamtai aig trigo juki yuwawagbau

(Mt. 12.1-8; Mr. 2.23-28)

¹ Tsawan ayamtai tsawaju ai, Jesús ajak ajakbaunum nagkaebau. Nuniamunum ni jintintaiji aidau trigo nejeen kupik jukiag uwejin pakajag yuwidau. ² Nuniagtai ujumak fariseo aidau chichajuinak:

—¿Wagka tsawan ayamtai tsawagmataig takantsashti tibauwa nunin aish aikagme?, tuidau.

³ Tiagtai Jesús ayaak:

—¿Atumek agagbauk ausachuk ainajum, David niijai yujamujai yapa-juinak, ⁴ juga Apajuí ememattainum wayá, pag imá sacerdotek yuwati tibauwa nuna yuwak, niina kumpají aidaunash susauwa duka?, tau.

⁵ Nuna tii, nuigtú chichaak:

—Aentsmaga akiinauwa duka, tsawan ayamtaiya nuna Apujiyai, tiuwai.

Tsawan ayamtai aig Jesús aents jau etsagagbau

(Mt. 12.9-14; Mr. 3.1-6)

⁶ Ataktú tikich tsawan ayamtai ai, Jesús jega ijuntainum wayau, nunik jintinkagtau; nuniamunum nui aents uwejí untsujiya nu jaka ekeemkau pujau. ⁷ Nunitai maestro chicham umiktinun jintinkagtin aidau, nuigtú fariseo aidaujai Jesusan dii ijuntuidau, tsawan ayamtai aish etsagagchat-pash tusag tsanumjugasag. ⁸ Tujash nigka dita anentaibaujinak dekau asa, aents uwejí jaka ekeemkaun chichajak:

—Wajaktá, nunikam ejapen wajantá.

Tama niishkam wajakí ejapen wajantú. ⁹ Nunikmatai Jesús chichajak: —Iniestajime: ¿Tsawan ayamtai aina nuwish pegkejan dutikati atsa pegkegchaun dutikati tibaukait; etsagautskek jakati tusa idaimainait?, tau.

¹⁰ Nuna tii ashí aents nui ijunun diisá, nuna aentsun chichajak:

—Uwejum dakuekta, tiuwai.

Tama dakueku, nunik uwejenig pegkeg wajasui. ¹¹ Dutikamtai ditak senchi kajekag, Jesusash utugmainkita tusag chichaidau.

Jesús ni apostolji agtin aidau etejamu
(Mt. 10.1-4; Mr. 3.13-19)

¹² Nunú tsawantai Jesús Apajuú ausatatus mujanum weu, nunik nui kashi pujus Apajuú au aujkawa tsawampajui. ¹³ Nunik tsawag jintintaiji aidau untsukui, dutika nunú aina nuiyan doce etegjauwai, nunú aidau apóstol tusa adaijauwai. ¹⁴ Duka jujú ainawai: Simón, Pedro atatme tibuauwa nu, Andrés Simogka yachi, Jacobo, Juan, Felipe, Bartolomé, ¹⁵ Mateo, Tomás, Jacobo Alfeo uchijí, nuigtú Simón Zelote tutai aajakua nu. ¹⁶ Judas Santiago uchijí, nuigtú Judas Iscariote Jesusan sujukua nu aatus.

Jesús kuashat aents jintintuamu
(Mt. 4.23-25)

¹⁷ Nunik mujanmaya ditajai ijunag akaiki, pakanum wajantú, nunikmatai kuashat aents tuwagkaju ashí judeanmaya, jerusalegnumia, Tiro nayantsa uwet awa nuiya, sidognumia aidau, ni jintinkagtamujin antukagtatus, nuigtushkam dita jaamujinash etsaentugti tusag, ¹⁸ nunikag wakan pegkegchau egkemtugbau aidau tsagagkaju. ¹⁹ Ashí aents aidauk Jesusan antigtatus kakanmamaidau, niiniya senchi jiinak ashí aents jau aidauk etsagau asamtai.

Shiig aneasagtin waittsagtinjai tibau
(Mt. 5.1-12)

²⁰ Jesús ni jintintaiji aidau diisá chichajak: “Shiig aneastajum atum ujunauch aidautigmek, wagki Apajuú inama duka atumdau asamtai”.

²¹ “Shiig aneastajum yamai yapajautigmek, wagki shiig juwakagtin asajum. Shiig aneastajum atum yamai buututigmek, wagki shiig aneakjum dushigtin asajum.

²² “Shiig aneastin atajum, Aentsmaga akiinau nemaju asagmin aents aidau kajegtamainak, yajá pujusta tusa jiiainak, pegkegchau chichag-tamainak, daagmin adaisajash pegkegchau tujamainakuish. ²³ Nunú tsawantinig shiig aneakjum dakujustin atajum, wagki atum jukitnuk shiig muun nayaimpinum ajutamaidau asamtai; wagki aatus dutikajakú ainawai atumi muunjum, profeta aajakajua nunashkam.

²⁴ “¡Tujash wait anentajime atum wiyakuch aidautigminak, wagki ju nugka juwig atum shiig aneamuk ajutamaidau asamtai!

²⁵ “¡Wait anentajime atum yamai shiig yuwá batsatutigminak! wagki atak yapajuawagtin asagmin.

“;Wait anentajime atum yamai dushit batsamtautigminak, wagki wake besemag jegagtamkui buuttin asagmin!

²⁶ “;Wait anentajime atum ashí aents pegkegnum chichajam aidautigminak! wagki atumi muunjum aajakajua dusha wait profeta aidaun imatikas chichajujakú aina dui.

Shiwajui aidau aneamu

(Mt. 5.38-48; 7.1-2, 12)

²⁷ “Tujash atum mina antugtautigmin tajime: Atumi shiwajum aidaush aneetajum, kajegtamaidaushkam pegkegnum yaigtajum; ²⁸ pegkegchau chichagtamaidaush pegkegnum chichagkatajum, wainak tsanumjut-painakuish Apajuí ajtustajum. ²⁹ Yapinum awatamkujaish, tikich yapiminish awapiti idaitusta; capa* jujutjamkujaish tunicagmesh† sujittsuk susata. ³⁰ Makichik aentskesh segapakuig susata; tuja amina wajiigmin jujutjamkuishkam, awagtugkita tiipa. ³¹ Atum tikich aidau shiig awajtuktinme tusajum wakejin ainajum nunisjume tikichish shiig awajkatajum.

³² “Atumin anempa duke atumshakam aneakjumes, ¿wají imana juwagme? Wagki aents tudau aidaushkam dita aneniamujaig aneninawai.

³³ Atumin shiig awajtamaina duke shiig awagmakjumes ¿wají imana juwagme? Wagki aents tudaugtin aidaush nunak nunin ainawai. ³⁴ Atum kuichkin ekes awagtugmamaina duke tsagkatgumesh ¿wají imana juwagme? Wagki aents tudaugtin aidaushkam penpeentunisag tsagkatdayin ainawai, uwaegak jukitag tuidau asag. ³⁵ Atumi shiwajum aidaush aneetajum, nuigtush shiig awajkatajum, nuigtushkam tsagkatkatajum, niish minash jutiksag iktukti tusa dakatsuk, aatus nuniamunum wají shiig pegkeg jukitnuk ajutjamtinai, nuniakjum Apajuí ashí tikich aidau nagkaesau muunta nuna uchijí atatjume; wagki nigka pegkejai, niina see tuchau aidau, pegkegchau aina nujashkam. ³⁶ Wait anenkagtin atajum, atumin Apa wait anenkagtina ibau.

Tikichi pujutji pachisjume augmatigpa tibau

(Mt. 7.1-6)

³⁷ “Tikichi pujutjig augmatú yujaigpajum, atumesh dutiksagmek tama aijum. Suwimkash sukagtusaipa amesh suwimak suwam aim, tsagkugk-agtugtajum dutiksaik tsagkujam aminjum. ³⁸ Tikich atsumau wainkugmek susatajum, atumnash Apajuí amastinme tikich atsubau wajuk suwagme dutiksag. Nigka shiig kuashat atum atsumamu nagkaesau amastatjume.

Tikich augmatigpa tibau

(Mt. 7.3-6, 15-23; 12.34-35)

³⁹ “Jesús junashkam augmatak tau: ¿Wainmachua dusha tikich wainmachunash jintanash inaktumainkaih? ¿Mai waanum iyaumainchauhkaih? ⁴⁰ Jintintaiya duka jintinkagtina nuna nagkaesauhui. Untsu papí augbaujin ashimkatta dui, niina jintinta iman wemainai.

⁴¹ “¿Wagka yatsumi jiiin chipum tekani egkemaush diyagme, atumi jiiimin numi egketa nu diitskesh? ⁴² ¿Utugsamea amina yatsumish: Yatsuju jasta chipum tekani jiiimin egketa nuna jigkitjame tumainaitme?

* **6:29** “Capa”, tawa duka awantak nugkutai esajam aajakui. Lana nuniachkush cabra uje nuniachkush ujuch najanamu tsetsemaku nuniachkush dasenkui dukumatai. Diistá Mt. 9.20.

† **6:29** “Túnica”, tawa duka jaanch nugkutai esajam tikishia imaan jegaaku aajakui. Duwap nuniachkush uje nuniachkush lana nuniachkush lino najanamu aajakajui. Ujunauch aidauk imá tunicanak nugkujakajui.

¡Tsanumin aidauwah! Dekatkauk amina jiimin numi egketa nu jiiktá, nunikam shiig wainkam yatsumi jiin chipum tekani egketa dusha jiigkita.

Numik niina nejeen dekataiyai

⁴³ “Numi pegkejak pegkegchaunak nejemaitsui, numi pegkegchaushkam pegkegnak nejemaitsui. ⁴⁴ Wagki makí makichik numi aidauk ni nejea dui dekanui; untukjak munchiinak nejetsame, antsag uvashkam zarzanmayag juushtayame. ⁴⁵ Aents pegkejak pegkegnak chichauwai, wagki pegkeja duka anentain ajamu asa. Nunisag aents pegkegchaushkam pegkegchaunak chichauwai, wagki pegkegchauwa duka anentain ajamu asa; wagki shiig kuashat anentain aja nunak, chichaak iwainawai.

Jegamkatasa ajiagbau pachisa tibau

(Mt. 7.24-29)

⁴⁶ “¿Wagka: ‘Apuh, Apuh’ tujutjume wi taja nu umiachiatkugmesh? ⁴⁷ Ashí aents minai tanta, mina chichamjun antugtukag imatiksag umidau-nak wajijai betekaita nuna titajai. ⁴⁸ Duka aents jegá jegamkatatus inidak tai, kaya muunnum dekanmitkak ajiamun, namak piyujak jegan senchi tukuakush, kayanum dekanmitkabbau asamtai machikish umushkachua numamtainai. ⁴⁹ Tujash mina chichamjun antayatak umigtachuk, aents jegá jegamak, ajitsuk nugká awanken ekeni jegamkamun, namak piyujak jegá senchi tukú tegak shiig tsaik ajapauwa numamtainai”.

7

Jesús Capernaumnumia capitani inaken etsagagbau

(Mt. 8.5-13; Jn. 4.43-54)

¹ Jesús aents aidau jintinbaun ashimak Capernaúm weuwai. ² Nui makichik capitán pujau, nuna inake aneetaijiya nu jau, nuniak jakattak tepau. ³ Nunitai Capitán Jesús pachisa chichaamun antuk, ujumak judío apuji aidau awetiuwai, mina inakjun taa etsaentujati, timae titajum tusa.

⁴ Tima Jesusan jegajag ujakaju, nuninak:

—Au capitani dekas wait aneasam yaimainaitme; ⁵ nigka judío aidautinash anejatnuwe, nuniau asa jega ijuntainash jegamjutpakmayi, tuidau.

⁶ Tiagtai Jesuschakam ditajai weuwai. Tujash jegá tikiju wajasá weenai, capitán* ujumak niina kumpají aidau ishikauwai, dutikak: “Apu kajegtukaigka, wika niiya ibau, mina jegajui utuamak amaitsujai; ⁷ nuniau asan wika niinakesh adijmaitsujai, tujash tsagagti tujutti, tamak mina inakjush tsagagtatui; ⁸ wagki wikishkam apu umigbau ajutui, antsag suntag mina umigtuidaush ajutuinauwai, nunú aina nuiyan wi: Wetá, tamak wegawai: Tikichia nuna: Taata, tamak minawai, aikasuk mina inakjunash: Ju dutikata, tamak dutikawai”, tujamae tita tiuwai. ⁹ Tusá ujaam Jesús antuk anentai jegagchau, nunik nui aents minidaun ayampattsag:

—Dekas tajime, Israel aina nuiyanakesh imatika dekaskeapi tabauji ajamunak wainkachjai, tau.

¹⁰ Nunú awemamu aidau waketug jegá jegakmag, inak jau ukukbauk tsagag pegkeg pujaun wainkaju.

Nuwa wajú uchijí jakau Jesús inankimu

¹¹ Nu nuniku ai, Jesús yaakat Naín tutainum wegau, nunitai ni jintintai aidau nuigtú kuashat aents aidau saetukaju. ¹² Nunik yaakta waitijin tikiju wajas wegai, nuwa wajú uchijí makichkiuch ajamu jakamtai ukustatus

* 7:6 Diistá Mt. 8.8.

emaidau, nunitai nuwan uyunainak kuashat aents weedau. ¹³ Nunittaman Apu Jesús nuwan wainak wait anenjau, nunik chichajak:

—Buutipa, tiu.

¹⁴ Tusa jakau patasá yanakí emamun adijkau, nunik antigku. Dutikantai yanasá weedaush wajantaju, nunikmatai Jesús chichajak:

—Datsauchi, amina tajame nantaktá, tiu.

¹⁵ Tama jakaushkam nantakiu, nunik chichatan nagkabau, nunikmatai Jesús dukujin susauwai. ¹⁶ Dutikantai ashí aents aidauk ishamkag Apajuin emematuinak: Profeta dekas senchigtin jutiinash wantintugmakji, Apajuí ni aentsji aidautin yaimpaktatus tajutjamaji, tuidau.

¹⁷ Nu Jesús dutikamuk ashí Judeanmag antuekau, nuigtú tikiju aneem batsatu aidaunmashkam.

Juan Yamijatn ni jintintaiji aidaun chicham dekaatum tusa ishiakbau (Mt. 11.2-6)

¹⁸ Juagká jintintaiji ashí nu wají dutikamu aidaun ujakaju. Dutikam Juagshakam jimag jintintaijin untsuká, ¹⁹ Apu Jesús pujamunum awemau iniastinme: “¿Amekaitam minitnai tibauwa nu atsa tikichik dakastatag?” tusa. ²⁰ Tusá awemajam Jesusan jegajuawag:

—Juan Yamijatna nu amina iniastí tusa awetamaji, nuniak: ¿Amekaitam minitnai tibauwa nu atsa tikichik dakastatag? timae, tuidau.

²¹ Nuna tuinaig aents jau aidaun, tikich jatai waituidaunash, wakan pegkegchau egkemtuamu aidaun, nuigtú kuashat wainmachu aidaunash nimitkiaju. ²² Tiagtai Jesús ditan ayaak:

—Wetajum, nunikjum atum wainkaujum ju nuigtú antukujum dushakam Juan ujaktajum: Wainmachush wainmainawai, shutú aidaushkam wekaegainawai, lepragtin aidaush tsagainawai, empekush antuinawai, jakaush nantainawai, tuja ujunauch aidauk yamajam chicham ujaam ainawai; ²³ nuigtú shiig aneasagtinai minai dekaskeapi tabaujin megkaegainatsu duka, timae tusam ujaktajum, tiuwai.

Juan pachisa Jesús tibau (Mt. 11.7-15)

²⁴ Juan awemamu aidau waketjamtai, Jesús Juagkan pachis aents aidaun iniak: “¿Wají wainkatasagmea uwegshunmash weabiugme? ¿Tagkanan dase umpuau wainkatasagmek weabiujum? ²⁵ Nuniachkugmesh ¿wají wainkatasagmea weabiugme? ¿Aents, jaanch shiig pegkejan nugkujá pujau wainkatasagmek weabiujum? Atumek dekagme, nugkutai shiig pegkejan nugkuaju aidauk rey aidau jeen shiig aneenak pujuinawai.

²⁶ Tujash ¿wají wainkatasagmea weabiugme? ¿Profetaka? Ehé, dekaske, duka profeta nagkaesau aajakui. ²⁷ Juuwai ni pachisa agagbauwa duka:

“¿Wi mina chichamjun etsegnun emtikan awemajai, ni jintanak umigtamkati tusan’, tawa nu.

²⁸ “Dekas tajime, ashí aents akiinaina nuiyag Juagká nagkaesauk atsawai, tujash Apajuí inamtainig aents imanchauchia nuuwai niina nagkaesauk.

²⁹ “Nunú tabaun antukag ashí aents aidau nuigtú apú kuichkiji atinun ijumin aidaushkam, Apajuí nuniktinme tusa wakega nuna dutiksag umiinak, Juan yamijatbaunum yamimakajui. ³⁰ Tujash fariseo aidauk, maestro chicham umiktinun jintinkagtin aidaujui dakitjaju, Apajuí ditan wait anentuinak umiktajum tibauwa nu umitnak, nunidau asag Juan yamijatbaunmash yamimakchajui”.

Juagkan dekaskeapi tichaju aidau
(Mt. 11.16-19)

³¹ “¿Jujú aents aina junash wajijai apatkanua tumainaitja? ¿Wajijai betekai tumainaita? ³² Ditak, uchi aidau plazanum pekaamsag kumpajijai untsuninak: ‘Flauta umpuakuish, atumek nantsemachmaugme; wake besemjan kantamkuish, buutchamugme’, tudaiyin aina numamtin ainawai. ³³ Wagki Juan Yamijatin taa pagnash yuwachu, vinonash umachu nuniakui atum chichagkujum: Iwanch ajamu asa aniwai, tajume. ³⁴ Tuja Aentsmaga akiinawua nu yutainash yuwau, umutainash umakui: Ju aentsua juka yuwa yuwakua wegawai nuigtush vino umú wekaewai, nuniau asa apú kuichkiji ijumin nuigtú tudaugtin aina nuna kumpajiyai, tajume. ³⁵ Tujash Apajuí yachajiya nunak, uchijí aina nu pegkegnak iwainawai”.

Jesusan fariseo Simón daagtin ipaamu

³⁶ Fariseo aina nuiya yujumkan ajamsatatus Jesusan ipauwai, tima fariseo jeen wayá mesanum jegan ekeemsauwai. ³⁷ Nuniai nuwa pujutji pegkegchauwa nu yaaktanum pujau. Nuniau Jesús fariseo jeen yuwak pujawai tabaun dekaa, botella alabastro najanamunum kugkuinun juki tajuntau; ³⁸ nunik Jesusa nawen ayaumas pujus buutak nawen negaikijai, dutika intashinig ujugtuju, nuniak nawen kugkuntak kugkuinui ukatu. ³⁹ Dutiktai fariseo Jesusan ipauwa nunú nigki anentaimas: “Jujú aents profetayaitkug, ya antiawa, tuja jusha nuwash wajukuita, pujutji pegkegchauwa nuna dekamainapi”, tau.

⁴⁰ Nunitai Jesús chichaak:

—Simón, makichik wajiin titajame.

Tutai:

—Maestro tujutta, tau.

⁴¹ Tutai Jesús ayaak:

—Kuichkin tsagkatkagtinun jimag aents diwimaidau, nuniemunum makichkia nu quinientos denario diwimai, tikichia nu cincuenta diwimu; ⁴² nunú akikmamainji atsujiagtai mai tsagkujauwai. Yamai tujutta: ¿Ju jimaja juwiyash tu imá senchish aneemainaita?, tau.

⁴³ Tama Simón ayaak:

—Diwijí imá muun tsagkujamua nu imá senchi aneemain diyajai. Tutai: Duka dekas tiume, tau.

⁴⁴ Tusa nuwan ayampatua diis Simogkan chichajak:

—¿Ju nuwa wainmek? Jeemin wayamjai, nunikmataish daweg dijagtinuk yumik suluschamume; tujash jujú dawejun negaikiang niina intashinig ujugtujae. ⁴⁵ Kumpamjakmesh minak kugkuntsachmaume; tujash ju nuwa juka wayamag dui nagkamas dawegnak kugkunjú pujawai. ⁴⁶ Buukeajuish aceiteyaikish nijatkachmaume; tujash jujú kugkuinui dawejun nijatjuje. ⁴⁷ Nunin asamtai tajame; niina tudauji shiig kuashta duka ashí tsagkugnaje, dutikamu asa imá senchi anentui, tujash aents tudauji ujumak ajamu tsagkujamuk ujumak anentui, tiuwai.

⁴⁸ Nuna tii nuwan chichajak:

—Tudaujum aidauk tsagkugnaje, tiu.

⁴⁹ Tuja mesanum nijai pekajaidauk ditak pempeentunisag chichainak:

—¿Jusha ya asaya tudaunash tsagkugkagtawa?, tudayinau.

⁵⁰ Tuinaig nigka nuwan chichajak:

—Ame dekaskeapi tame nu uwentijamjae, shiig agkan anentaimsam wetá, tiuwai.

8

Nuwa aidau Jesusan yaigkú aina nu

¹ Nuna nunik Jesusak kuashat yaakat aidaunum nuigtú yaakat yaijuch aidaunmashkam wekaegas, yamajam chichaman Apajuí inabaujin pachis etseju, nunitai doce aina nunú uyunaidau, ² nuigtú ujumak nuwa wakan pegkegchau egkemtuamu, jau aidau etsagagbau aidaushkam uyunaidau. Nuanui pachitkau María magdalanmaya, siete wakan pegkegchau egkemtuamu jiijamua nunú, ³ tikich Juana, Cuza Herodesa kuichkijin kuitamna nuna nuwe, Susana, nuigtú kuashat aidau ditá wajiiji aina nujai yaidau.

Ajakan ajakbau pachisa Jesús augmattsamu

(Mt. 13.1-9; Mr. 4.1-9)

⁴ Makí makichik yaakat aina nuiya aents minidau Jesusan wainkatasag, nunikag kuashat tuwakagmatai Jesús juna pachis augmatak: ⁵ “Ajakan ajakbau ajajin ajaka jigkayin nagkimak ukutatus weuwai, dutika ajakmau asa. Nunik ajajin jegaa nagkimkau, dutikam ujumak jigkai jintaa kakekauwai, nunikun aents najakag ukukbaun yakiya pishak kaketuk amukajui. ⁶ Tikich jigkai kayagnunum kakekauwai, nunik tsapainiuwaitak jakauwai, chupitnuchu asantai. ⁷ Tuja tikich jigkaik jagki ayaunum kakekauwai, nunik tsapaittaman jagki yutua ijinauwai. ⁸ Tujash tikich jigkaik nugka pegkegnum kakekajui, nunikajuk tsapaidiag shiig nejekajui, makí makichik ajak cien jigkain nejeawajui”.

Nuna tii senchi jiiká chichaak: “Ni antutaiji ajamuk antuktinme”, tiuwai.

⁹ Timatai jintintaiji aidau, waji takumea nu augmattsamesh timaume tusag inidau.

¹⁰ Tama ni ayaak:

—Atumnak Apajuí ni inabauji dekaachbau aajakajua nuna dekamti-jamjume, tujash tikich aidaunak augmatbaujai pachisan augjai, wagki wainmainakush wainmachu wajukmaina nuniktinme tuja antuinakush antachu wajukmaina nuniktinme tusa, tiuwai.

Ajakan ajakbau timag nunak juna takun timajai tusa Jesús etsegkamu

(Mt. 13.18-23; Mr. 4.13-20)

¹¹ Wi ajakan ajakbaun augmattsan timag nunak juna takun timajai: Jigkaiya duka Apajuí chichamega nuuwai. ¹² Jintá jigkai kakekauwa duka, aents aidau chichaman antuidaun, Iwanch juwatki chicham ni anentain wayaun dekaskeapi tuinak uwemjainum tusa yajuta nuuwai. ¹³ Jigkai kayanum kakekajua duka, chichaman antukag wakegas nemajuina nuna iwainawai; tujash nu ajak kagkapanachua duka, ujumak tsawantai dekaskeapi tuinawai; tujash utugchat minitam idaiyina nuuwai. ¹⁴ Jagki ayaunum iyajua duka, chichaman antuina nuuwai; tujash tsawan wegamanum uyumamu aina nu, wiyakchameamu aina nu nuigtú dita wakegamu aina nuna anentaimtuinak ajak nejemainchauwa nunin wewawai. ¹⁵ Tujash nugka pegkegnum iyajua duka, aents anentai pegkeg nuigtú wakegas antukag chichaman umiinak, imagnis pujuidauk, ajak pegkejan nejekua nunin ainawai.

Lámpara pachisa augmattsamu

(Mr. 4.21-25)

¹⁶ Makichik aentskesh lámpara ekemakajag ichinkaik dukuchu ainawai, dutikachkush pegaká wapken awaigkagkesh apujchau ainawai, dutiktuk yaki ekenin ainawai wayatatus minidaush tsaaptinun wainkatnume tusag. ¹⁷ Numamtuk yamai uukbauwa nunik awa juka, atak paan wantinkatnai. Aantsag yamai dekamainchauwa dushakam atak shiig dekamú atinai.

¹⁸ Juna tajim jujú shiig antuktajum, ni aja duka nuni kuashat suwam atinai, untsu atsuja duka, ajuttatuapi tusa anentaimta dusha atantam atinai.

Jesusa dukuji ni yachi aidaujai kautuamu

(Mt. 12.46-50; Mr. 3.31-35)

¹⁹ Jesusa dukují, yachi aidaujai tajuawajui; tujash ni wajamunmag jegamainchau dekapjajui kuashat aents tuwakaju asamtai. ²⁰ Nunitai niina ujainak:

—Amina duku yatsum aidaujai waipaktatus tajutjamawag agaa ijunui, tuidau.

²¹ Tama ni ayaak:

—Mina dukug nuigtú mina yatsug aina duka Apajú chichamen antukag umiina nu ainawai, tiuwai.

Jesús dase imijkamu

(Mt. 8.23-27; Mr. 4.35-41)

²² Makichik tsawantai Jesús ni jintintaiji aidaujai barcanum chimpim-jaju, nunik: Kuchá amain wegagmi. Tusag weedau, ²³ tujash katiamunum Jesusak kanaju. Nuniai dase senchi dasentak kuchan umpuau, nunitai barcanum yumi yajanak tepeattak ishamain wajau. ²⁴ Imanitai jegaantag ishintainak:

—¡Maestroh, Maestroh iik jakektatji! tuidau.

Tama shintaag dasen jiyak idaiyak, kucha tsukatunashkam:

—¡Mijakta!, tiuwai.

Tusá tamawaik dase imaniauk mijak, miyasu wajas patamsau.

²⁵ Nunikmatai ni jintintaiji aidaun chichajak:

—¿Dekaskeapi tabaugmish utugkaugme?, tau.

Tujash ishankag anentai jegagchaju, nunikag ditak pempeentunikiag:

—¿Jusha ya asamtaiya dasesh, yumish ni chichamenash umijuinawa?, tudayinau.

Gadaranmaya aents wakan pegkegchau egkemtuamu

(Mt. 8.28-34; Mr. 5.1-20)

²⁶ Nunikag kuchá amain katigkag gadaranmaya batsamtaí nugkeen Galilea igkuas awa nuwi anumkajui. ²⁷ Nunik Jesús jiinkimtai nunú yaaktanmaya aents, kuashat mijanai iwanch egkemtujam pujú igkugtatus jiintukiuwai, duka jaanchnash nugkuchu, jegaash pujuchu ukumatainum pujú. ²⁸ Nunú Jesusan wainak senchi untsumkau, nunik niina eemtin tikishmag senchi untsamak:

—¡Jesusah, Apajú ashí tikich aidau nagkaesau muunta nuna Uchijiyah, minash utuguktasamea miname! ¡Wait aneamam suwimkak sukagtu-saipa!, tau.

²⁹ (Wagki Jesús, wakan pegkegchauwa nuna: Anú aentsuk jiinkim ukuktá tibau asa tiuwai. Nu aentsnak kuashat tsawantai wakan pegkegchau egkemtung pujuju, nuniau asamtaí cadena aidaujai jigkajag kuitamaidau, tujash cadena aidaunak tsujimtikag, wakan pegkegchau nugka uwejush aidaunum emau.) ³⁰ Tutai Jesús iniak:

—¿Amesh yaitpa?

Tama ni aimak:

—Wika Untsujiyaitjai, tau.

Nunik kuashat wakan pegkegchau aentsun chimpintua batsamtau asag tiuwai; ³¹ nunú aidau Jesusan, waa muun ishamain akaga nuig awekagtipa, tusag segaidau. ³² Nuanui kuashat kuchi mujanum dupaan yuwinak yujaidau asamtai, nuwi wayatjai idaikagtusti tusag segaidau, tiagtai niishkam; nuniktajum, tiuwai. ³³ Tima iwanch aidaushkam aentsnumia jijnag kuchinum utsanawajui; dutikam kuchishkam pisajag betsag tajagak kucharum najataunum iyagkak jinawajui.

³⁴ Nunikmatai kuchi kuitamin aidau nu nunikbaun wainkag pisajag yaaktanum jegawag etsejuinak, ajanum batsataidaunash dutiksag ujaka-jui. ³⁵ Tusá ujakajam: Wagkak ankae diisagmi, tusag wejiajui. Nunik Jesús pujamunum jegakmag, aents iwanch egkemtuamu aajakua duka pegkeg wajas, shiig aenatimas Jesusai ayaumas jaanchin nugkujá ekeematman wainkag ishamkaju. ³⁶ Nuniagtai nuna wainkai aidau aents aidan, Iwanch egkemtuamu wajuk tsagaje nuna ujaidau. ³⁷ Tiagtai ashí aents nugka Gadaratum batsataidauk Jesusan yajá weti tusag segaidau, senchi ishamaidau asag. Tama Jesuschakam barcanum egkemag wakitkiu. ³⁸ Nunitai aents Iwanch jijamushkam Jesusan segau nijai wetatus; tujash Jesús akateg ukuak:

³⁹ —Amek jeemin wakitkita, nunikam Apajuí amina ashí dutijama nunú etsegkata, tiuwai.

Tima wee ashí yaaktanum etsejauwai Jesús niina shiig kuashat dutika nuna pachis.

Jairo nawanji nuigtú nuwa Jesusa jaanchjin antigkua nu
(Mt. 9.18-26; Mr. 5.21-43)

⁴⁰ Jesús wakitki jegamtai kuashat aents tuwakajuk shiig aneas jukiaju, ashí aentsuk niina dakaidau asag. ⁴¹ Nuniamunum Jairo daagtin, jega ijuntaiya nuna apuji tauwai. Nunik Jesusa tikishmatug segauwai niina jeen jukitatus, ⁴² wagki niina nawanji shiig makichkiuch doce mijan ajamu tumaina nu jakattak tepau asamtai. Nunik wegaun kuashat aents wedau asag Jesusan chanuidau. ⁴³ Nunú aents aina nuiya makichik nuwa doce mijadai numpam puwak waitú pujú pachitkau, nuigtú kuashat ampijatin aidaunum ampimak ashí ni ajamuchijinak ashimkau; imaniakush makichkish etsagam asachui. ⁴⁴ Nunú nuwa ukunum jegantun Jesusa jaanchji wenin antigkui; dutikamuik numpa puwamujinak megkaekauwai.

⁴⁵ Dutikam Jesuschakam:

—¿Yaa antinkame?, tau.

Tujash ashí aents aidauk etsegchagtai, Pedro chichajak:

—Maestroh, kuashat aents tuwakag chanumpaina nu antimpakaja nuniaigkik, ¿ya antinkae tame?, tiu.

⁴⁶ Tutai Jesús ayaak:

—Makichik antinkau awai, wagki minaiya senchi jijnun dekapjajai, tau.

⁴⁷ Tutai nuwak, uumainchau dekapeak kujaukmaikia Jesusan jegantun tikishmatug, ashí aents antuinamunum, wajuk asaya antigke nuna pachis, nuigtú ni Jesús antiamuik tsagagbaujinashkam ujakú. ⁴⁸ Tutai Jesús ayaak: —Nawantah, ame dekaskeapi tabaugmia nu etsaentamjae, shiig agkan aenatimsam wetá, tiuwai.

⁴⁹ Eke Jesús chichaak wajai, Jairo jega ijuntaiya nuna apuji jeenia makichik aents tanta:

—Nawanjumek jakame, nuigtuk Maestrok waitkasaipa, tau.

⁵⁰ Tabaun Jesús antuk chichajak:

—Ishamkaipa, ayatak dekaskeapi tita nawanjumik aneantatui, tau.

⁵¹ Nunik jeganum jegaa, wayamunum tikich aidaunak makichkish awayachajui, ayatak Pedro, Jacobo, Juan, nuwa jakauwa nuna apají dukují aina duke wayawajui. ⁵² Tuja ashí aents aidauk buutuidau nuninak anentai idajuidau nuwauch jakaun anentaimtusag. Tujash Jesús chichajak:

—Buutigpajum jakache, ayatak kanaje, tau.

⁵³ Tutai dushikidau, jakaun dekaidau asag. ⁵⁴ Tujash nigka uwegnum achiak senchi chichaká:

—¡Nuwauchih nantaktá!, tiu.

⁵⁵ Tusá tamawaik mayai egkemtujam nantakmatai, Jesús chichajak: Yumain susatajum, tiuwai.

⁵⁶ Dutikantai nuwauchi apajig dukujijai anentai jegachaju; tujash Jesusak:

—Ju junika ju pachisjumek makichik aentskesh ujakaigpajum, tiuwai.

9

Jesús doce jintintaiji aina nu ishiakbau

(Mt. 10.5-15; Mr. 6.7-13)

¹ Jesús jintintaiji doce aina nuna ijumag ashí iwanch aidaunum jii-mainun, nuigtú jata aidaunum etsaegkagtumainnash senchin susauwai.

² Dutikak ishiakui Apajui inama nuna pachis etsegkatnume nuninak jau aidaunash etsagagtinme tusa; ³ dutikak:

—Makichkish jukigpajum jintá weaku atsumainuk. Ushujutaigkesh, wáj egkesá jutaigkesh, pagkesh, kuichkikesh, nuigtú nugkutaigmesh yachiagmek jukigpajum; ⁴ atum tu jeganma wayattagme nuig pujustajum nunikum weakjum ukuktajum. ⁵ Tuja tuwí atumin jujamtan dakit-jamiagtata, nuniakuig nu yaaktanmag jiinki ukuakjum, atumi dawemin yukukuntu awa nu pegajum akaketkajum ukuktajum, dita suwimak jukitnuji iwaintakjum, tiu.

⁶ Tiajam ditashkam jijnag ashí yaakat yaijuch aidaunum nagkaemainak yamajam chichama nuna etsejuinak, jau aidaunashkam etsagaidau.

Herodes Jesusan yakita tibau

(Mt. 14.1-12; Mr. 6.14-29)

⁷ Herodes tetrarca Jesús ashí dutikamua nuna antuku, nunik anentai jegachu, wagki ujumak aents aidau chichainak: “Juan maamua nu nantakne”, tuinai ⁸ tikich chichaidau: “Auk Eliasai” tuinai, tikich chichaidau: “Yaunchuk profeta aajakajua nuiya nantakne”, tuidau asagmatai. ⁹ Tujash Herodes chichaak:

—Wi inamja ai Juagká buuken tsupikagmayajama, ¿dusha ya amainaita tuinamun antujag dusha?

Tusa wainkatatus wakegau.

Jesús cinco mil aents ayugkamu

(Mt. 14.13-21; Mr. 6.30-44; Jn. 6.1-15)

¹⁰ Apóstol aidau Jesús ishiakbau waketug kaunawag, ashí dita dutikamujinak ujakaju. Dutikam ditan yajuak nugka agkantu yaakat Betsaida tutainum awa nui weajui. ¹¹ Tujash aents aidau dekaawag shimutkaju; nunikag jegajuawajam Jesuschakam ditan shiig anentus jukiajui, dutika Apajui inama nuna pachis ujainak, tsagagtatus atsumaidaunash etsagau.

¹² Nuniai etsashkam akaegu asamtai, doce aina nunú jegaantag chichajinak:

—Aents akatjam ishiakta, yaakat yaig aina nui nuigtú ajanum batsata nui wegag kanuinak dita yuwatnujinash egaktinme, wagki juig makichkish atsamunum batsatji, tuidau.

¹³ Tiagtai Jesús ayaak:

—Atum dita yuwatnuk susatajum, tau.

Tuinam dita aiinak:

—Atsugtamajamah, cinco pag, nuigtú jimag namaka duke ajutjama-jamah, untsu jutii shiakaja ashí ju aents aidau yuatnuk sumamain-chauwah, tuidau; ¹⁴ duka cinco mil aishmag tumain aajakajui. Tiagtai Jesús ni jintintaiji aidaun:

—Cincuenta, cincuenta kanagjum batsamsatajum titajum, tiu.

¹⁵ Tima ditashkam ashí dutiksag batsasaju. ¹⁶ Dutikawagmatai cinco pagkan nuigtú jimag namaka nuna juki, pagkai nayaimpin diis see tusa puug jintintaiji aidaun tinabiu, dita aentsun tinamkatnume, tusa. ¹⁷ Dutikawajam ashí shiig yuwawajui, nunikagmatai ampinjau aidaunak doce chagkinnun yajuakajui.

Pedro Jesusan amek Cristuitme tibau

(Mt. 16.13-20; Mr. 8.27-30)

¹⁸ Makichik tsawantai Jesús kanaká Apajuin aujak pujusá ni jintintaiji aidaush, nui pujuidau asamtai iniinak:

—¿Aents aidaush minash yayai tujutuinawa?, tau.

¹⁹ Tutai dita aiinak:

—Ujumak aents aidau, Juan Yamijatnai tuinai; tikich chichaidau auk Eliasai taush ainawai; nuniai tikich tuidau yaunchuk profeta aajakajua dutsu aneantatai tujamainawai, tuidau.

²⁰ —Tiagtai Jesús ayaak: ¿Atumesh minash yayai tujutjume?, tau.

Tutai Pedro ayaak:

—Amek Cristo Apajuí awemamuitme, tiu.

²¹ Tujash Jesusak mina pachittsagmek makichkish tikichik tiigpajum, tiuwai.

²² —Aentsmaga akiinawuwa duka kuashat waittsattawai nuigtú judío apuji aidau, sacerdote apuji aidaush, maestro chicham umiktinun jintink-agtin aidaushkam dakitjagtatui. Dutikau asag maawagtatui, tujash kampatum tsawan asa nantaktatui, tiuwai.

Mina jintintaig atatus wakegauk waitiakush nemagtukti tibau

(Mt. 16.24-28; Mr. 8.34-38)

²³ Tusa ashí aents aidaun chichajak:

—Makichik aentskesh mina jintintaig atatus wakegauk, niinunak idaiyak kashí kashinig waitiakush nemagtukti. ²⁴ Wagki aents ju nugka jui pujutan imá senchi wakegak, mina nemagtuk waittan dakitauk uwem-jashtin ainawai; tujash mina nemagtak niina pujutjinash puyatjukchawk, uwemjatnai. ²⁵ ¿Wajinma yaimainaita aentsnash ashí nugka juwiyan niinu emakush, wakanin nigki megkaemaina dusha? ²⁶ Wagki mina pachitus-etsegtan datsanaju tuja mina chichamjunash datsanjau aidaunak, Aents-maga akiinawu Apají imanjiya nujai ángel pegkejam aidaujui minitna dui datsanjatnai. ²⁷ Tujash dekas tajime, atum ainajum juwiyatijum ujumak eke jatsuk, Apajuí inabauji wainkatnutigmesh ajume, tiuwai.

Jesús yapajinamu
(Mt. 17.1-13; Mr. 9.1-13)

²⁸ Nuna tii ocho tsawan tumain nagkaemaku ai Jesús Pedron, Juagkan, nuigtú Jacobo juki mujanum wakauwai, Apajuú ausatatus. ²⁹ Nunik Apajuin aukaj pujai niina yapi yapajinawai, jaanchjish puju winchamtin wajasui. ³⁰ Nuniaig jimag aents Jesusan aujuidau, duka Moisés, Eliasjai aajakajui; ³¹ nunik tsauptin winchamtin wajasbaunum wantinkaju, nunikag ni wakitkitnujin nuigtú Jesús Jerusalén waitkasa maam atinun pachis aujuidau. ³² Tuja Pedro ditajai ijunag yujaidaushkam, kaji depeteam kajigkú shintaukmá, Jesús tsawan wajas Moisés, Elías aatus ijuntatman wainkajui. ³³ Nunik jimag aentsua nunú wegagmatai, Pedro Jesusan chichajak:

—Maestroh, jutiish maigkis jui batsatagtai; kumpatum aak umikagmi, makichik aminu, makichik Moisesdau, nuigtú Eliasdau, tau; tujash nunak ni tabaunash dekachiatak, tiuwai. ³⁴ Juna aatus Pedro chichai, yujagkim ditajai ijumag ijkui, dutika yujagkim ijkam ishankajui. ³⁵ Nuniai yujag-minmaya chichaak: “Juuwai mina Uchig, wi etegkamu ni antugkatajum”, tabau antuekauwai.

³⁶ Nunú chichaamu nagkanaig Jesús nigki wajaun wainkajui; tujash ditak takamtak juwakajui, nuigtush nunú tsawanta duik, makichkish tikich aidaunak dita wainkaja nunak ujakchajui.

Wakan pegkegchau uchin egkemtuanun Jesús etsagagbau
(Mt. 17.14-21; Mr. 9.14-29)

³⁷ Nunik kashinia dui mujanmaya akaejagmatai, kuashat aents Jesusan igkugtatus minidau. ³⁸ Nuniai tuwakbaunmaya makichik aents senchi jiiká chichaak:

—iMaestroh, wait aneamam mina uchig makichkiuchia ju etsaentujata; ³⁹ wakan pegkegchau egkemtakug pachiaichbau untsumtiknuwe, imatikak kujamtiknuwe, dutikam saun wenin apauwe! iNuigtush tunamitkag waitkas ipimpig ukuwe! ⁴⁰ Imatikakui amina jintintaijum aidaun segamjai jiigtugkitnume tusan tujash tujinkagmae, tau.

⁴¹ Tama, Jesús ayaak:

—iAents dekaskeapi tuchau, pegkegchau aidauwah! ¿wajupá dukapea atumjaish pujumainaitja, wajupak katsunjatjime? jui uchijum itantá, tiuwai.

⁴² Tima uchishkam adiju, nuniai iwanch uchin nugká ajiaju, dutika waugmitkam senchi kujau; tujash Jesús wakan pegkegchaun jiyakú, dutikamtai uchik tsagaju, nunikmatai apajin susauwai. ⁴³ Dutikamtai ashí aents aidauk anentai jegachaju Apajuú senchijiya nuna wainkag.

Jesús awentsag ni mantamnatnuji etsegkamu
(Mt. 17.22-23; Mr. 9.30-32)

Nunikag ashí aentsuk Jesús dutikamun wainkag puyatuk ijunainai, Jesús jintintaiji aidaun chichajak:

⁴⁴—Shiig antuktajum wi titatjim nu: Aentsmaga akiinauwa nunak, aents aidaunum sujukagfatui, tau.

⁴⁵ Tujash ditak antuinachu wajina takua tawa nunak, eke Apajuú dekamtikchamu asag; nuigtush ajantuidau nunú pachisa iniitnak.

Yaki dekas imá wagakush atinaita tiagbau
(Mt. 18.1-5; Mr. 9.33-37)

⁴⁶ Nunikag jintintaiji aina nu, dita aina nuiyash yaki imá wagakush atinaita tudayinau. ⁴⁷ Jesús dita anentaibaujinak dekaju asa, uchin juki niini ayaunas awajsau, ⁴⁸ dutika chichaak:

—Makichik aentskesh ju uchía juna mina daajui juwauk, mina jujak dutikawai; nuigtú makichik aentskesh mina jujauk, mina awetiuwa nuna juwawai; wagki atum ainajum anuiya imanचाuch anenmamaina nu imá wagaaku atinai, tiuwai.

Jutiin shiwagmatjamtsu duka jutiinu asa aniawai
(Mr. 9.38-41)

⁴⁹ Tutai Juan ayaak: Maestroh, makichik wainkamji amina daagmin iwanchin jiyau; tujash jutiijai minitan dakitakuí, amek aikawaipa timaji, tau.

⁵⁰ Tutai Jesús ayaak:

—Duka tiigpajum, jutiin shiwagmatjamtsu duka, jutiinu asa nuniawai, tiuwai.

Jesús Jacobo jiyakbau

⁵¹ Jesús nayaim wakitkitnuji tsawan jegau asamtai, puyatkas Jerusalén wegau. ⁵² Nuniak chichama etsegkatin aidaun emtikak awemau, dutikam ditashkam wegag samarianmaya aents aidaun batsamtaijin yaakat yaignum wayawaju ni kanagtinun umikagtatus. ⁵³ Tujash samarianmaya aidauk dita jutanak dakitajau, Jerusalén weenak tuidau asamtai. ⁵⁴ Dutikainam Jacobo, Juagjai Jesusan chichajuinak:

—Apuh, ¿nayaimpinmaya jii iyak apeká ijinati tumainचाukaih?, tudau.

⁵⁵ Tujash Jesús ditan ayampattsag jiyakú. ⁵⁶ Nunik tikich yaakat yaignum weajui.

Jesusa jintintaiji agtatus wakejukaju aidau
(Mt. 8.18-22)

⁵⁷ Nunik jintá weenai, makichik aents Jesusan chichajak:

—Apuh, wisha ame tuwig wekaetam nuniakminish tuke amijaig wekaesatin atajai tajai, tau.

⁵⁸ Tutai Jesús ayaak:

—Kujanচam aidau waajig ajuinawai, antsag yakiya pishak aidaushkam pasugkeg ajuinawai; tujash Aentsmaga akiinawuwa duka tepesá ayamainkesh atsujui, tiu.

⁵⁹ Nuna tii Jesús tikich aentsun:

—Nemagtukta, tiuwai.

Tama:

—Apuh idaitusta, dekatkauk wenu mina apajun ukusan ukuakun nemagkatjame, tau.

⁶⁰ Tutai Jesús ayaak:

Idaisata, wakanin jakau aidaunak ukustinme; tujash amek weme Apajui inama nu pachisam etsegkata, tiu.

⁶¹ Tikitchakam:

—Apuh nemagkatjame, tujash idaitusta, dekatkauk mina jegajui pataag aidaun akatjan ukuutajai, tau.

⁶² Tutai Jesús ayaak:

—Aents nugka tsayaak, nugka tsaitaijiya nuna bakajin nenea tsayaak wekaeyatak, ukujin ayampatua dii wajamaina numamtuk wajauk, Apajui inama nu pachisa etsegkata tamak amaitsui, tiuwai.

10

Jesús setenta y dos ishiakbau aidau

¹ Nuna tii, Apu Jesús tikichnashkam setenta y dos* etejauwai, dutika jimá jimajan emtika ashí yaakat nuigtú nugka ni wetin aidaunum ishiakui.

² Dutika chichajak: “Dekaskenmag ajak juumainuk kuashtai, tujash takau aidau ujumke; nuadui ajakjinna nu segatajum aents nuwi takastin aidaun ishiakti tusajum, tiuwai. ³ Nunin asamtai wetajum; tujash kuitamamkatajum, atumnak uwig ikamyawa batsatbaunum ishimaina numamtuk aents pegkegchau batsatbaunum ishimjime. ⁴ Weakjumesh kuichik egketai, wáj egkesá jutaigkesh, sapat aidaukesh jukigpajum; jintá weakjumesh makichik aentskesh kumpamkujum wajantaigpa. ⁵ Makichik jeganum wayaakjumesh, dekatkawk: Apajuí atumnash shiig agkan anentaimsa pujutan amastinme titajum. ⁶ Tajumin aents nui puja nu shiig aneas jujabiagtaik, Apajuí ditanash yaigtatui. Untsu atumin shiig aneas jujamchagtaik, Apajuishkam ditanak yaigchagtatui. ⁷ Nunú jega nuwig pujustajum nunikjum dita yutain amainamuk yuwatajum, umutain amainakuish uwagtajum; wagki aents takaa duka akiam auwai, makí makichik jeganum kanagjum nagkaemá yujaigpajum. ⁸ Atum makichik yaaktanum jegattajum nui jujamkiag, yutain amasagtata duka yuwatajum. ⁹ Nuniakjum nui jau akuish etsagaitajum, dutikakjum: ‘Apajuí inama duka tikiju wajasé’, titajum. ¹⁰ Tuja makichik yaaktanum jegagmin jujamtan dakitjamainakuig jiinkijum: ¹¹ ‘Atumi yaaktagminia nugka jutii nawen peemja juka, atuminig pegajá akakeka ukuaji, chicham etsegbau dakitjau asagmin; tujash Apajuí inamjatta duka tikiju wajasé’, titajum. ¹² Juna tajime: Suwimak sukagtamú tsawan jegatna duik, sodomanmaya aidau suwimkan jukiuiwa nuna nagkaesau jukiagtinai.

Aents pegkegchau idaitan dakitin aidau
(Mt. 11.20-24)

¹³ “¡Corazinkah aminak wait anentajame! ¡Betsaidah aminash wait anentajame! Tironmash nuigtú Sidonkash aents dutikmainchau atum iwaintukbau ainajum dutikamu ainakug, yaunchkes senchi anentai idagmak tudau takatan idaiyinak yapajinmain aajakú ainatai. ¹⁴ Tujash Apajuí suwimak sukagtamú jegatna duik, tironmaya, sidogkanmaya aina nuna nagkaesau atumek suwimkak jukiagtin ainagme. ¹⁵ Capernaúm,† ¿amesh nayaimpinum juwam atinaitjai tamek? Atsa, amek Hades‡ akaikitnaitme.

¹⁶ “Atum chicham etsegbaun antugtamina duka, mina antugtuinawai; untsu atumin dakitjamaina duka, mina dakitjuinawai; mina dakitjuina dushakam mina awetiuiwa nuna dakitjuinawai”.

Setenta y dos ishiakbau waketja kaunkamu

¹⁷ Setenta y dos ishiakbau shiig aneas kaunawag:
—Apuh, ame daagmin iwanch aidaush: Jiinkita tamak, iinash antugtamak aents aidaunash jiinkia ukuagmae, tuidau.

¹⁸ Tama ni ayaak:

—Dekaske, wisha wainkabiajai Iwanch peem wajukeya imanik nayaimpinmaya iyaun. ¹⁹ Nuadui atumi shiwajum Iwanchia nuna senchijí

* **10:1** Yamajam chicham nagkamku griego chichamai agagbau aina nuwish jimajan tuinawai, tikich 70 tai tikich 72 tawai, nuniau asa apach chicham aina nuwish mai pegkejai. Duwi iina chichamega juig 72 apusamui. † **10:15** Diistá Mt. 11.23. ‡ **10:15** Diistá Mt. 11.23.

depetkatnun mina senchijun amasmajime. Dutikamu asagmin dapi esapainakuish, titigkesh ijupainakuish wajukashtatjume. ²⁰ Tujash shiig aneasagpajum wakan pegkegchau aidau antugtamdaka duikik, dekask shiig aneasatjum, atumi daagmik nayaimpinum agagbauwa nuadu.

Jesús shiig aneasbau

(Mt. 11.25-27)

²¹ Nuna tusa idaiyak, Jesús Wakaní Pegkeji shiig anemtikam: “Apawah, amek ashí nayaimpinum batsamin aidau, nukkaya aidaushkam apuji asamin emematjame; wagki yacha nuigtú unuimaju aina duka uugkam aents imanchauch aina nunú iwaintuku asamin. Dekaske Apawah, wagki amek aajam wakegame”.

²² “Mina Apag ashí waji aina nunak mina idaitugsauwai. Makichkish dekajuinatsui Apajui Uchijiyaitag nunak, imá mina Apajuk shiig dekajui, aikasag mina Apagnash dekaïnatsui, imá wiki shiig wainjai. Tuja Uchijiya nu iwaintamu dekamain ainawai”.

²³ Tusa jintintaiji aidaun ayampatua ditanak chichajak: “Shiig aneasagtinai atum wainjum juna wainaidauk; ²⁴ wagki junak tajime kuashat profeta aidau, rey aidaushkam atum wainjum juna wainkatatus wakegajakú ainawai, tujash wainkachajui; antutnash atum antajum juna antukagtatus wakegajakú ainawai, nuninakush ditak antukchajui ju chichamnak”, tiuwai.

Samarianmayan pachis Jesús augmattsamu

²⁵ Tutai maestro chicham umiktajum tibauwa nuna jintinkagtin wajakí, Jesusan dekapsatatus:

—Maestroh, ¿wajina dutikmainaitja pujut tuke atina nuna jukitanush?, tau.

²⁶ Tama ni ayaak:

—¿Wajintu agagbauwaita chicham umiktina nuwish? ¿Wajintu augme?

²⁷ Tama ni ayaak:

—“Amina Apujum Apajuiya nu ashí anentaimjai, ashí wakanmijai, ashí senchigmijai, ashí anentaimtagmijai aneeta, nuniakum tikich aidaush amek anenmamsam aneeta” tawai, tiu.

²⁸ Tutai Jesús ayaak:

—Shiig aimkaume; nunú dutikata, nuniakum pujut tuke atina nu jukittame, tau.

²⁹ Tujash ni tabaujin shiig juwakta tau asa, Jesusan iniak:

—¿Yaita wijai ijutkamush?, tau.

³⁰ Tutai Jesús ayaak:

—Makichik aents Jerusalegnunia juwaki Jericó wegau, nunikmá kasanum egkemkauwai; nunikmatai kasa achikag suwi suwimainakua, ipu ipujú ashí maawag, ni takakbaujinak yajutuk weak ukukiajui.

³¹ Dutikamu ai, pachiaichbau sacerdoteshkam nunú jintanmag nagkaemakmá wainak, ikaag diis ukukiuwai. ³² Nunisag levitashkam nuwi jegakmá wainak, ikaag wajas diis weak ukukiuwai. ³³ Nuniai samarianmaya aentschakam nu jintanmag wekamá wainkauwai, nunik wait anenjauwai.

³⁴ Nunik jegantun, aceite vinojai juki ipujamu aidaun ampijua pempeaju, dutika niina entsamtaijin ekeni jega kajitainum ejega kuitamkauwai.

³⁵ Nunik kashinia dui weak, jeennun jimag denarion akik chichajak: “Ame kuitamjutkata, wi waketkun wajupa tujuttatme nunash akiktajame”,

tiuwai. ³⁶ Tusa, ¿ju kampakum aina nuiyash ya aajakuita nigki anenmamas kasa suwimam aents tepaun wait anenjaush?, tau.

³⁷ Tutai ni ayaak: Nuna wait anenjauwa nuuwai, tiuwai.

Timatai Jesuschakam:

—Ameshkam wakitkim, dutiksamek amijai ijutkamu wait anenjata, tiuwai.

Jesús Martan Mariajai ijagsatasa webau

³⁸ Tusa ukuak Jesusak wega weakua yaakat yaig aunum jegauwai; nunikmatai nuwa Marta daagtin niina jeen juki awayauwai. ³⁹ Nuna kai María daagtin pujau, duka Jesús chichatai ayaumas antak eketu. ⁴⁰ Tujash Martak kuashat takamainun uyumak wekaetau asa, Jesusan jegantun chichajak:

—Apuh, anú mina kaig ayatak eketa nu, kaim yaigtá tusam awetujia niish yainkati, tau.

⁴¹ Tama Jesús ayaak:

—Marta, Marta, shiig kuashat takamain uyumakam pimpikim wekaeme,

⁴² tujash dekas imá senchi puyatjumaainuk makichkiuchi, Mariak dekas pegkejan etegka mina chichamjun antak eketui nunak makichkish atan-main ainatsui, tiuwai.

11

Jesús Apajuí aujut jintinkagtuamu

(Mt. 6.9-15; 7.7-11)

¹ Makichik tsawantai, Jesús Apajuin aujak pujuttaman wainkaju. Nunik ashimkamtai jintintaiji aina nuiya makichik jegantun:

—Apuh, Apajuí aujut jintinkagtuata, Juan jintintaijin jintintuuwa dutiksamek, tau.

² Tama ni ayaak:

—Apajuí aujukgumek aaja titajum: “Apawah, amek nayaimpinum pujuwaitme, pegkegmaitam ibau asam imá ameketme ememattaim. Amek jutiishkam inajatjata. Ame wakegamun nayaimpinmaya umigtamaina nunisag, ju nugka juwiyash aminak umigtamkatnue.

³ “Dutiksamek ii yuwatnushkam kashí kashinig sukagtita.

⁴ Jutii tudaujish tsagkugkagtugta, wagki jutiish ashí pegkegchau awajta-maidaush tsagkujuinag dutiksamek, pegkegchaun takastinme tusamek idaikagtusaipa” ayatak yaijatkam agkanmitkagtuata, tiuwai.

Segatajum, egaktajum, untsuktajum Jesús tibau

(Mt. 7.7-12)

⁵ Junashkam tiuwai:

—Atum ainajum anuiyash, ¿ya kumpaji ajamu asa, aehaet jegajua: “Kumpajuh, kampakum pag tsagkatjukta, ⁶ mina kumpag atushtanmaya tajutua nunú ajaamain shiig atsugtau asamtai tajame”, ⁷ tamin ni jegaag pujus aigmak: “Waitkagsaipa, waitinak epenin mina uchig aidaujai kanakun tepajai, nunin asan nantaknuk amamaitusujai tujamainkait?”

⁸ Dekas tajeme, nantaki sumainchau ayatkush niina kumpaji asamtai, nantaki ashí ni atsuma nunak sumainai. ⁹ Nuadui wi tajime: Apajuishkam segatajum, imatjamak amastatjume; egatash egaktajum, egakjume igkug-tatjume; untsuktajum, imatjamak waitin ujatjamtatjume. ¹⁰ Wagki ashí

aents sumauk, suwam auwai; egauk igkuinai, ni egamujinak; waitinum wajas untsumushkam, ujatam auwai.

¹¹ “¿Atum ainajum anuiyash, yaita uchijí yujumak segamaitak kayá sumainush? ¿Nuniachkush namak segamaitak dapi sumainush?
¹² ¿Nuniachkush makichik nujintan segamaig, titigkin sumainush?
¹³ Atum pegkegchau ainayatkugmesh dekgame uchijum aidau pegkeg waji aidau sutak. Atumkesh nuniagminish jwagkag aan nagkaemas atumi Apa nayaimpinum puja dusha Wakani Pegkeji segamash amaschagti!”, tiuwai.

Makichik jeganum batsatiatak pempeentuniki shiwagmagaidau
 (Mt. 12.22-30; Mr. 3.20-27)

¹⁴ Iwanch aentsun egkemtua chichachu emamun Jesús jiiki awetak chichantikau, nunikmatai aents aidauk anentai jegagchaju. ¹⁵ Tujash ujumak aents chichainak: Juka “Beelzebú, iwanch aidau apujiya nuna senchijin iwanch aidaunak jiyawai”, tuidau.

¹⁶ Nuna tuinai tikich aidau, pegkegchaunum dekapsagtatus, nayaimpinmaya wainchatain iwainakti tusag segaidau. ¹⁷ Tujash nigka dita anentaimainamun dekau asa:

“Makichik nugkanmag batsatiatak pempeentuniki maani batsatkujag megkaemain ainawai; nunisag makichik jeganmag batsatiatak maani batsatushkan megkaemain ainawai. ¹⁸ Nunisag Iwanch nigki pempeentuniki shiwagmagakush ¿wajak niina inamtaijiya dusha nunisagkesh amainaita? nunak atum, Beelzebú senchijin iwanch aidaunak jiyawai tututjum dui tajime. ¹⁹ Atumek Beelzebú senchijin iwanch aidaunak jiyawai tututjume; tujash nu aatus aish, ¿atumi jintintaijum aidaunash, ya senchinash suwawa, iwanch aidaun jiihtinme tusash? Nuadui atumi jintintaijum aina duke atumnak bakugmatnai. ²⁰ Wi Apajuí senchijin iwanch aidaun jiyag nunak, atumiin Apajuí inamu asantai jutikajai.

²¹ “Aents senchigtin niina jeen kuitamak akajun takus wajataik wajiiji nui awa duka ashi betek amainai. ²² Tujash tikich aents niya nuni senchi minitak depetuk, akajun atanki jegá wayá ashi wajiinak yajutuk kumpaji aidaun tinamainai.

²³ “Aents wi takaag nujai shiig aneas juwachuk mina shiwagmatui, nunisag Apajuí chichame etsegbaunash yainchagtaik, kuashat aents uwe-mainun megkaegainawai.

²⁴ “Wakan pegkegchau aentsnumia jiiki ajapamak, wegawai uwegshunum ni ayamainjin egaak; nunik wainkachag: Wi pujaun jiinkibiag nuwig wakitkitjai tusa anentaimas, ²⁵ tajua diikmá, nunú aentsuk jega japimká shiig iwajamuama imanun wainak ukuak, ²⁶ tikich wakan niina nagkaegas pegkegchau aidaun sieteya imaan yajuak nu aentsnum pujustatus egkemtawai. Dutikam aentsuk duik pegkegchau aajakbauwa nuna nagkaesau shiig pegkegchau wegawai”, tiu.

Dekas shiig aneasagtin aidau

²⁷ Eke Jesús nuna pachis chichá waji, aents tuwakua nuiya nuwa senchi untsamak:

—¡Shiig aneastinai nuwa amina jujepag muntsujin amuntstamauwa duka! tiuwai.

²⁸ Tutai Jesús ayaak:

—¡Dekas nuni nagkaemas shiig aneastinai Apajuí chichamen antukag umijuina nu! tiuwai.

Aents pegkegchau aidau Jesusan wainchatai iwainakia tibau
(Mt. 12.38-42; Mr. 8.12)

²⁹ Jesús aents aidau nuni kuashat tuwajam nagkama chichaak: “Ju aents aina juka pegkegchau asag aents dutikmainchau iwainakta tujutuinaawai, tujash nunak dutikashtatjai, ayatak Jonás wajukauwa nujai betekak iwaintuktatjai. ³⁰ Jonás namaknumia iwaku jiinki ninivenmaya aents aidanum Apajuí chichamen etsegtai dekas Apajuí awemamuapita tiajua nunisag, Aentsmaga akiinauwa dushakam jaka nantakmatai wainkag, dekas Apajuí awemamuapita tujutiagtatui. ³¹ Aantsag surnumia reina aajakua dushakam Salomogkan tajiuiwai, Apajuí yachantikamun antujuk dekajuatatus. Nunú atumnak bakugmagtinai, atak suwimak atina duik, wi Salomogkan nagkaesaun dekaun imatika chichagmash antukchaju asagmin. ³² Nunisag ninivenmaya aents aidau atak suwimak atina duwi bakugmagtinai. Ditak Jonás Apajuí chichame ujakam, dekaskeapi tusag tudaujin idaiyinak Apajuin nemagkajua du. Tujash jui atumjai pujawai Jonasa nagkaesaun.

Lámpara pachisa augmattsamu
(Mt. 5.15; 6.22-23)

³³ “Makichik aentskesh lámpara ekemakag yantamnum uuká nuniachkush kajunai dukukag apujchau ainawai, dutiktuk yakí ekenin ainawai, wayatatus minidaush tsaaptinun wainkatnume tusag. ³⁴ Atumi jiimek lámpara ekemakam tsaaptin emama numamtuk atumi iyashminak awagmawai. Jiim pegkeg asamtai shiig wainmamainaitam imatiksam, ashí pegkeg aina duke anentaimtaik, anentaiminish tsaaptin ajutjamainai. Untsu jiim pegkegchauwaitkui wainmamainchauwaitam nunisjumek, ayatak pegkegchauk anentaimkugmek suwenum pujagme. ³⁵ Nunin asamtai aminí tsaaptin awa nunú suwe wajatjamsai kuitamkata. ³⁶ Ame ashí pegkegchau aidau idaisam pujakmek, lámpara kashi ekemakam tsaaptin emama numamtuk, atumi pujutjuminish wajagme”.

Jesús fariseo aidau escriba aidaujai pegkegchauji pachisa tibau
(Mt. 23.1-36; Mr. 12.38-40; Lc. 20.45-47)

³⁷ Jesús chichaká ashimai, makichik fariseo yujumkan ajamsatatus ipauwai.

Tima Jesuschakam jegá wayá, mesanum jegantá ekeemsau. ³⁸ Nunikmatai fariseo wainak anentai jegagchau, eke yujumak yutsuk tuke ikigmasjumké atajum timawa nuna umikchamtai. ³⁹ Tujash Apu Jesús ayaak:

—Atum fariseo aidautigmek, vaso nuigtú plato aina nuna awanke nijamaina numamtuk wajagme; tujash atumi anentaiminig kasamtaijum nuigtú pegkegchau takataijum aidaushkam piyak ajutjamainawai. ⁴⁰ ¡Anentainkachu aidauwah! ¿Apajuí iyashin najanauwa duke iina anentainash najanachukait? ⁴¹ Nuadui atumek, atumin ajutjamaina duka ujunauch aidau susatajum, aaja nuniakjum ashí pegkeg atatjume.

⁴² “¡Wait anentajime fariseo aidautigminak!, atumek menta, ruda, nuigtú ashí ajak nugkauchik nejen aina nuiya diezmó wajagme. Tujash pegkeg takat aina nu nuigtú Apajuí anemainaitjum dushakam idaijume. Juuwai dekas dutikmaina nu, tikichia dushakam idaitsuk.

⁴³ “¡Wait anentajime fariseo aidautigminak! Atumek juga ijuntainum aents eme anentsá ekeemsati tibanum ekemsatasajum wakejin ainagme,

plazanum igkuntuinakush eme anenjus kumpamjuatnume tusagmesh wakejin ainagme.

⁴⁴ “¡Wait anentajime atumnak! Atumek aents ukusbau wainmainchau shiig yutuamua nunin ainagme, nunin asagmin aents nui awantak wekaekush dekatasuk wekaemaina numamtuk wajainawai”.

⁴⁵ Tutai maestro chicham umiktinun jintinkagtin ayaak:

—Maestroh, ame fariseo aidau tame duka jutiishkam tukagtakum tame, tau.

⁴⁶ Tutai Jesús ayaak:

—¡Wait anentajime atum maestro chicham umiktinun jintinkagtin aidautigminash! wagki atumek chicham umiktin kakajus umimainchauwa ibauk, tikich aidau ju umiktajum tajume atumkesh umiachiatkujum, nuniau asajum tikich kijin ayankajum machikish yaitsuk chichagmainaitjum numamtuk wajau asagmin.

⁴⁷ “¡Wait anentajime atumnak, atumek profeta ukusbau aina nu jegamjin ainagme, atumi muunjum maawajua nu! ⁴⁸ Nu nuniakjum iwainmamjume atumi muunjum dutikajakú aina nuninuk atumesh ainajum nu, wagki dekaskenmag dita maawajui, dutikamtai atum profeta ukusbauwa nu jegamjau asajum.

⁴⁹ “Dui Apajuí ni yachajin atumin pachipas: ‘Awetittajime profeta aidau nuigtú apóstol aidounashkam, nunú aina nuiya mainakjum tikich aidauk aintú yujatin ainagme’ tiuwai. ⁵⁰ Nuadui ju aents aina junak Apajuí suwimkan susatnai ashí profeta aidau nu nuga najanamu aajakua nui nagkamas maawaju aina nuadui, ⁵¹ Abela maawajua nui nagkamas Zacariasa maawajua imanui, jega Apajuí ememattai ai altar awa nuna ejapan maawaju aina nu. Nuadui ju aents aina junak Apajuí suwimkan susatnai.

⁵² “¡Atum maestro chicham umiktinun jintinkagtin aidautigminak wait anentajime! Atumek aents llave takakiatak, tikich jegá wayata tutai waitin epetin aina numamtuk, aents Apajuí nemagkag uwemjata tuinaig, atum chicham umiktina duka dekyatjukum, wajina tawa nunú dekachu asajum shiig jintintsugme, nuniau asajum atumkesh uwemainnum pujatsjume”.

⁵³ Tusa Jesús nuiya jiinkimtai, maestro chicham umiktinun jintinkagtin aidau fariseo aidaujai senchi kajekú asag, kuashat awá awagki iniinak waitkaidau, ⁵⁴ wajintuk chichakat timatai tsanumjuja maami tusag.

12

Fariseo aidau lewaduraji pachisa tibau (Mt. 10.26-33; 12.32; Mt. 10.19-20)

¹ Nuniai kuashat mil aents aidau tuwakaju asag, pempeentuniki nanaidau. Imaniagtai Jesús dekatkauk jintintaiji aidau chichajak: — Fariseo aidau lewaduraji aina nujai kuitamamkatajum, ditá tsanumtaiji aina nujai. ² “Wagki uukbau wantintsuk juwaktinuk makichkish at-sawai, antsag dekaachbau dekantsuk juwaktinukmak makichkish at-sawai. ³ Nuniau asamtai ashí atum tikich antachbaunum chichakbauwa duka, paan antuekatnai; atum kanutaigmin epeni pujusjum chichakbau-nashkam ashí antukagtinai”, tiuwai.

Dekas ishamaina nu (Mt. 10.26-31)

4 Atum mina kumpag aidautigminash tajime: Iyashmin mainakuish isharkaigpajum, nuna dutikainakush nuigtuk dutikmainchau ainawai.

5 Tujash wi jintintuatjime ya ishainaitjume nuna: Apajuí isharkatajum suwimkan sujamak waitut tuke atina nui egkepawagmatai wait-mainaitjum nunú.

6 ¿Jimag kuichkiuch kayauch piipich juwakjum cinco pishak sujuchuk agmujum? Tujash nunú aina nunak Apajuik makichkish kajimatig idaitsui. 7 Antsag atumnash Apajuik atumi intashim wajupa awa nunash shiig dekawai, nunin asamtai atumek isharkaigpajum. Atumek pishak aina nuna nagkaesau ainagme.

Ishamtsuk Cristo nemagnaitjai tumaamainai

(Mt. 10.32-33; 12.32; 10.19-20)

8 Makichik aentskesh Cristunuitjai tusa aents aidau eemtin etsegtugkaju aidaunak, dutiksag Aentsmaga akiinauwa dushakam Apajuí angelji aidau eemtin mina nemagtin ainawai titinai; 9 “tujash aents aidau eemtin mina pachitus dekachujai tujutiu aidauk, Apajuí angelji aidau eemtin ditanak wainchaujai tama agtinai.

10 “Ashí aents aidau Aentsmaga akiinauwa nuna pegkegchau chichagkau akush tsagkujam agtinai; tujash Wakani Pegkejin pegkegchau chichagkau aidauk tsagkugnagchagtinai.

11 “Atum mina nemagtin aidautigminak jega ijuntainum gobernante nuigtú apu inamin aidau eemtin etjamawagmataish, wajuk aimkatjaki nuniachkugmesh wajintuk titaja tusagmek uyumaktin aigpa; 12 wagki Wakani Pegkeji dekamtijamattawai wajintu titatjume nunak”.

Wiyakuch anentainkachu

13 Aents tuwakú aina nuiya makichik chichaak:

—Maestroh, iina apají jaak waji ukugtamkimua nu, ame mina yatsug, yatsumjai akantuniktajum tujutta, tau.

14 Tutai Jesús ayaak:

—Kumpajuh, ¿ya minash ame juez atá nuniachkumesh aents waji sujitdayinakui akantukam suu atá tusash adaitukmae? tau.

15 Nuna tii idaiyak:

—Kuitamamkatajum, utugsag shiig kuashat waji ajutia tusagmek anentaimtú pujuigpa; wagki aentsú pujutjiya duka, shiig kuashat waji aja nui atsui, tiuwai.

16 Nuna tusa augmatbaun pachis: “Makichik wiyakcha nugkeen, shiig kuashat ajak juumain uminjauwai. 17 Imanikmatai nigki anentaimas: ‘¿Utugkatjaki juuká ijumain atsugta duish?’ tau. 18 Nunik anentaimag: ‘Dekas juna jutikatjai, ajak juuká ijumtai aina junak tegagtajai dutikan aan muuntan jegamjatjai, nuwi ashí ajak juukbau aidaun ijumkun nuigtú mina wajig aidaunashkam nuwig ijumjatjai; 19 nunikan umikan: Kuashat mijanai yumain waji aidaunash nuwig ijumjan, nuanui jegá pujusan ayamkun shiig yuwakun, umutainash umakun shiig aneasan pujustajai’, tiuwai. 20 Tujash Apajuí chichajak: ‘¿Anentainkachuh! Yamai kashia juik jakattame; tuja ame waji imatikam ijumjaum dusha, ¿yanau atatua?’ tiuwai. 21 Aatus nuniawai nigki wiyakchameatatus wakega duka, tujash Apajuí eemtin pegkejan takaachkug”, tiuwai.

Apajuí ni uchijí aidaunak kuitamui

(Mt. 6.25-34)

²² Jesús nuna tusa idaiyak jintintaiji aidaun chichajak: “Nuadui tajime. Atumek wajinak yuwatja, wajinak nugkugtaja tusagmek uyumá pujuigpajum. ²³ Dekas pujuta nuuwai yutai nagkaesauk, tuja iyashia nuuwai jaanchin nagkaesauwa duka. ²⁴ Cuervo aidau anentaimsa diistajum, ditak ajakmag juuchu ainawai, ajak juuká ijumtajijish jegash atsujuinawai; nunaig Apajuí ayujui. ¿Atum dekas cuervo aidau nagkaesau akik ainatsjumek? ²⁵ ¿Atum ainajum anuiyatigmesh wajupatigmea esajam achainjash tusajum anentaimtú pujakjumes esaumainaitjume? ²⁶ Nu nuninchikesh dutikmainchau ainayatkugmesh, ¿wagka tikich wáji aidaush imanikjumes uyumagme?”

²⁷ “Yagkug aina nu anentaimsa diistajum wajuk tsakainawa, ditak takainatsui, ujchnash kutamainatsui; tujash atumin tajime, Salomón ashí imanun iwagmamá wajakuitkush yagkujá niimega ibaunak nugkujakchauwai. ²⁸ Dupa ikamia aidau kashin apeam atinnakesh Apajuí imatikas iwaja ibaush, ¿wagkag aan nagkaemas atumnash dutijamachagti aents imatikas dekaskeapi tuchau aidauwah? ²⁹ Nuadui atumek yuwatin, uwagtin aina nu uyumaka anentaimkujum waitú pujuigpajum. ³⁰ Wagki ashí ju wáji aina junak aents Apajuí anentaimtuchu aidau, puyatjus yujajin ainawai, tujash atum nunú wáji atumajum nunak atumin Apa nu dekwai. ³¹ Nuadui atumek, Apajuí inama nu egaktajum, nuniakjum nunú aina duka aan kuashat ajutjamtatjume.

Nayaimpinum wiyakchameaut
(Mt. 6.19-21)

³² “Ishamkaigpajum, ujumak mina jintintaig ainajum nuutigmek, wagki atumnak Apa Apajuiya nu mina inamtaijuí pujustinme tusa wakejutpagme. ³³ Sujuktajum atumi wajiijum aidauk dutikajum ujunauch aidau yaigtajum. Atum dutiktai Apajuí nayaimpinum wiyakchameaut tuke atinun, kasash waimainchau, mamukush wajiin emesmainchau nuanui ukugtamsattajume; ³⁴ nunú wiyakchameatin ajutjamaina nuanuig anentaimsajum pujustajum.

Umintsajum aneaku pujustajum tibau
(Mt. 25.1-13; Mr. 13.34-36)

³⁵ “Shiig umintsajum lámpara ekemakjum dakamsatajum; ³⁶ nuniakjum inak aidau apuji nuwenbaunum wematai, wakitki taa unsumkui wamak ujattajai tusa daká pujuwa numamtuk wajatajum. ³⁷ Shiig aneasagtinaí nunú inak aidauk apuji wakitki takamá iwá batsatu igkuam atina duka; dekas tajime, nunak yapagmitka mesanum pekas nu yutain ajamsatnai. ³⁸ Shiig aneasagtinaí ditak, aehaet wajasú aish nuniachkush tsawamunakesh apuji minak uminas batsatu wainam agtina duka. ³⁹ Tujash ju dekatajum, jeenna nunú wáji horatinia kasa taattawa nuna dekakug iwá pujumainai, nuniakug jeenig utua kasagmak amaitsui. ⁴⁰ Nunisjumek atumshakam umintsá pujumainaitjume, wagki Aentsmaga akiinauwa duka, nu horatiniaip minittawa tusa anentaimtachbaunum minitnai”, tiuwai.

Inak pegkeg inak pegkegchaujai pachisa augmatbau

⁴¹ Nuna timatai Pedro iniak:

—Apuh, ¿nu augmatbau tame dusha jutiikek tukagtam atsa ashí tikich aidaush takumek tame? tau.

⁴² Tutai Apu Jesús ayaak: “¿Yaita inak betek umin nuigtú shiig anentaimkau asantai, apuji niina inake aidaun diísti nuniak yutain diyakuk susati tusa idaitam amaina dusha? ⁴³ Shiig aneastinai inak, ni apuji wakitki takamá, ni tibaujinak betek umiak pujaun wainam atina duka. ⁴⁴ Dekas tajime, ashí wajiijinak niina diigtusti tusa idaitustinai. ⁴⁵ Tujash nunú inak anentaimas: ‘Mina apujuk wamak taashtatui’, tusa tikich inak aidaun nuigtú inak nuwa aidaunashkam suwimak, nigka yuwak nuigtú umak, nampetnash nampee waja pujai, ⁴⁶ nunú inaka nuna apuji tsawan dekachbau, horash dekachbau ai faa suwimkan susa, tikich aents betek umichu aina nujai waittsati tusa idaimainai.

⁴⁷ “Nunú inak apuji wakegamun shiig deokayatak, umitsuk takatnash takatsuk puja nunú imá senchi suwimkan jukitnai. ⁴⁸ Untsu suwimak jumainun dekachau asa dutikauwa duka, ujumak suwimak suwam atinai; wagki ya kuashat susamuita, duka kuashat segam atinai; ya kuashat kajintsá idaitusbau ainawa, duka nuní inagkeasa segam atinai.

Jesusa nemajin nemagchau aidaujai tupandayagtinai tibau

(Mt. 10.34-36)

⁴⁹ “Wika ju nugka juwig tauwaitjai mantuawagmatai ataktú nantaki ai mina nemagtuídau Wakaní Pegkejin jukitnume nunitai tikich mina dakitjuina nunak Apaju suwimkan susatnume tusan, nuniau asan utugsag wamak uminka tajai. ⁵⁰ Senchi waittsan inagkeaktatjai, nuadui jnunú uminkati tabaunum kuashat anentaimkun waittajai! ⁵¹ ¿Atumek agkan pujustinme tusas ju nugka juwig tauwaitai tajumek? Nuninchauwaitjai, wika atum mina nemagtin aidautiginin tikich dakitjamainak kajegtamá batsamtin asantai tauwaitjai. ⁵² Wagki yamai nagkamas makichik jeganum cinco aents batsata nuiya, kempatuma nu jimaja nuna shiwagmat-tawai; nuniai jimaja nu kempatuma nuna shiwagmattawai. ⁵³ Apajishkam uchijjai shiwagmagagtinai, uchishkam apajin shiwagmatnai, dukujish nawanjjai nunisag nawanjish dukujjai, uchijí nuweshkam tsatsajjai, tsatsajishkam uchijí nuwen shiwagmatnai”, tiuwai.

Tsawanta niimé diísá dekamu

(Mt. 16.1-4; Mr. 8.10-13; Mt. 5.25-26)

⁵⁴ Tusa Jesús aents aidaun chichajak: “Yujagkim etsá akaetaiya nuiya jiinu wainmawaik, yumi yutugtatuí tajume, tibauk imanisag yutawai. ⁵⁵ Dase tsumunmaya dasenkamtaig atumek: Seeki atatuí tajume, duka imanisag uminui. ⁵⁶ ¿Tsanumin aidauwah! atum nugkanmayash, nayaimpinmayash niimé diisjum, tsawan wajuku atatuá nunú dekau ainayatkugmesh, wi takaamush wainu nuniayatkugmesh, ¿wagka Apa-juinunap iwainawa tusagmesh dekamainchaush dekaepagme?

Shiwajumjaish epegkata tibau

(Mt. 5.25-26)

⁵⁷ “¿Wagka atum pegkeg takamainaitjum duke egatmamtsugme? ⁵⁸ Amina shiwajumjai apu chichaman epegnunum weakmek, jintaag kakantsam iwajata. Nunikchaminig jueznum ejetamantai, juez aentsji inajam cárcel egkepawai. ⁵⁹ Duwi tajame, nui egkepamtaig jinkishtatme, diwijum ashí akikmakam jijnmainaitme”, tiuwai.

¹ Nunú tsawantaik, ujumak aents Jesusan jegajuawag, wajuk Pilato ujumak galileanmaya aidaun kajegké Apajuí emematuinak uwijan maawag apeenak batsamtatman, nuna pachisag ujaidau.

² Tiagtai Jesús ditan ayaak: “¿Atum anentainsagmek nunú galileanmaya aidaun dutikawaja duka, galileanmaya aina nuig dita imá senchi tudau asag aikam ainawai tajumek? ³ Atsa, duka nuninchauwai. Atumshakam tudau takat idaisajum pujutjum yapajiachkugmek ashí betek antsagmek jinatin ainagme. ⁴ Torre iyak Siloenum batsatun dieciocho aentsun kajegkua dusha, ¿Jerusalén batsamajakajua nuna nagkaesau tudau asajampap suwimkan juwak jinawaita tajumek? ⁵ Atsa, duka nuninchauwai. Atumshakam tudau takat idaikujum pujutjum yapajiachkugmek ashí betek antsagmek jinatin ainagme”.

Higuera nejenchau pachisa augmattsamu

⁶ Junashkam Jesús augmatak: “Makichik aents uva ajanum makichik higuera ajaamu ajujakui, nuna nejeatsuash tusa diistatus wejiuwai, tujash nejeg makichikish atsuju. ⁷ Nunitai ni inake ajan kuitamak pujuttaman: ‘Jujú higueraan kampatum mijadai tajuan diyajai nejeatsuash tusan, tujash nejeatsui ajakam ajapata. ¿Wagkag atumnachiatkush nugká akijuash wajastí?’, tiu. ⁸ Ajakjintin tutai inak ayaak: ‘Apuh, dekás makichik mijan dakasmi nejeashtimpash, wi wajauti tentean pukujan, tikich nugka dekás pegkeg aina nuna yajutkan ijutjatjai; ⁹ dutikamash nejekchatpash, untsu tikich mijantinish nejeachkui ajakta’”, tiuwai.

Jesús tsawan ayamtai aig nuwa jau etsagabau

¹⁰ Jesús jega ijuntainum tsawan ayamtai ai jintinkagtau; ¹¹ nuniai nui makichik nuwa dieciocho mijadai jaa pujú, wakan pegkegchau egkemtuamu asa machikish dakuentsuk, punus wekayin eketu. ¹² Nuna Jesús wainak untsuká chichajak:

—Nuwah, yamaik jaam duka tsagame.

¹³ Takug nuwan achikú; dutikamuik nuwashkam dakuenkau, nunik Apajuin emematu. ¹⁴ Tujash jega ijuntaiya nuna apuji kajekú, wagki Jesús tsawan ayamtai aig etsagaju asamtai, nunik aents aidaun chichajak:

—Seis tsawan awai takat takamainuk, nunú tsawan aina dui kaunatajum etsaentugti takugmek, tsawan ayamtai aig antsuk, tau.

¹⁵ Tutai Apu Jesús ayaak:

—¡Tsanumin aidauwah! ¿Makí makichik atum aidautijum tsawan ayamtai aig baka nuniachkugmesh burro ayugtaijin batsatu atiajum namaká ejegajum yumi amuchuk agmaujum? ¹⁶ Jujú nuwa Abraham wegantu dieciocho mijadai Iwanch waitkam pujaunash, ¿wagkanuk etsagagchatja tsawan ayamtai aigkish?

¹⁷ Jesús nuna aatus timatai, niina shiwaji aidauk datsajajui; tujash ashí aents aidauk shiig aneedau, kuashat anentai jegamainchaun Jesús dutikau asamtai.

Mostaza jigkayí nuigtú levadura pachisa augmattsamu

(Mt. 13.31-33; Mr. 4.30-32)

¹⁸ Junashkam Jesús chichaak: “¿Apajuí inabaujiya dusha waji pachisaiya nuninai tumainaita nuniachkuish waji augmattsaiya tumainaita? ¹⁹ Apajuí inama duka mostaza jigkayin makichik aents ajajin ajauwa nuninai; dutikamu tsapai tsakajá muun wajasmatai, yakiya pishak aidau nuna kanawen pasugmakajui”, tiuwai.

²⁰ Nuigtushkam chichaak: ¿Apajuí inama nunash wajijai apatkanua tumainaitja? ²¹ Duka makichik nuwa harinan kempatuma imania dekaapa namukbaunum lewaduran pachimjauwai, dutikam ashí harina namukbauwa nuna wampushmitkajui, tiuwai.

*Waiti menakua nu
(Mt. 7.13-14, 21-22)*

²² Jerusalén jegatatus weak, Jesús yaakat aidaunum nuigtú yaakat yaig aidaunmashkam jintí jintinkagtakua wegau. ²³ Nuniai makichik iniimak: —Apuh, ¿uwemkagtin aidaush wajumkek aina? tau. Tama ni ayaak:

²⁴ —Waiti menakua nuní wayatasajum kakanmamsatajum; wagki tajime, kuashat wayatatus kakanmabiagtinai nuniakush ashí betek wayachagtinai. ²⁵ Jeenna nu wajakí waiti epenmataig, atum agaa waitinum ijuntajum untsumkujum: “Apuh, Apuh waiti ujatjita, tajumin, ni aigmak: Wika atumnak wainchau ainajime, tuwiyants ainajum tujabiagtinai”

²⁶ Takui atum ayaakjum: “Apuh, jutii amijai yuwaku, umutash umin aayagjama, jutii plazajinish jintinkagtin aayumjama, tiagtin ainagme”.

²⁷ Tajumin ataktú ni aigmak: “Wika atumnak wainchau ainajime, tuwiyants ainajum wetajum ashí pegkegchau takau aidauwah”, tujabiagtinai. ²⁸ Nunú atinai atum agaa utsagkam batsamsajum buutbau nuigtú dai takegtamu, Apajuí inamtaijin Abraham, Isaac, Jacob nuigtú ashí profeta aajakua nu ijunu wainkajum. ²⁹ Wagki etsá minitaijinia, etsá akaetai-jinia, nortenmaya, surnumia aidau kaunkag, Apajuí inamtaijin mesanum pekaamsagtinai yuawagtatus. ³⁰ Nuniamunum aents dekatkau atatus wakegaina nu ukunum juwakagtinai. Untsu iman atan anentaimtumachu aina nu dekatkauk agtinai.

*Jesús Jerusalén anentai idajtukbau
(Mt. 23.37-39)*

³¹ Nunú tsawanta duik ujumak fariseo aidau Jesusan tajuawag: Juig jiinkita, nunikam tikich nugkanum wetá, wagki Herodes mantamatatus wakejutpawai, tuidau. ³² Tama ni ayaak:

—Wetajum, nunikjum nunú apu pegkegchau takatan shiig anentaimtug takauwa nu jegagjum ujaktajum: Wika yamai, kashinchakam iwanchnak jiiittajai, aents jau aidaunash etsagaittajai, nunikan kempatum tsawanta jui ashimkattajai wi dutikmaina nunak. ³³ Wi yamai wegag junisnuk wetatjai, kashinchakam, nui tsawaknush, wagki makichik profetak Jerusalén pujachukek maamak amaitsui.

³⁴ “Jerusalén, Jerusalén amek profeta aidaush mainaitme, dutiksamek aminí awemamu aidau mininakuish kayai tukui tukuinakuam mainaitme! Kuashtá wakekamjai uchijum aidau, atash uchijí aidau nanapen ijumama numamtuk awajkatasan, tujash amek dakitjamume. ³⁵ Nuadui atumdau juga Apajuí ememattaiya duka ukumkimu atatu; dui tajime ataktuk awenagmek waitkashtatjume tajim nunak, nuniautijum tsawan jegamtai: ¡Apú daajin mina duka pegkejai! tujuttinaitjum dui waitkatin asajum”.

14

Jesús aents jau etsagagbau

¹ Tsawan ayamtai ai Jesús fariseo aidau apuji jeen yujumka yuwatatus weuwai, nunitai tikich fariseo aidauk wajukatig tusag diidau. ² Nunik

waikmá Jesús wainkau aents iyashin iyag tepettaman. ³ Nunitai Jesús escriba aidaun, fariseo aidaujai iniak:

—¿Tsawan ayamtai aish aents jaush etsagaumainkaih, atsa etsagau-mainchaukaih? tau.

⁴ Tujash ditak aimainachu. Nuniagtai Jesús kuntunum achiká etsagaju, dutika awemauwai. ⁵ Nudiagtai ditan chichajak:

—¿Yaa atum ainajum anuiyash uchijigkesh nuniachkush torojigkesh waanum egkemamtaish, tsawan ayamtaiyai tusash wamak jiiskesh idaimainaita?

⁶ Tamashkam ditak aimainchau dekapedau.

Nuwenbaunum ipaamu aidau

⁷ Nuwenbaunum ipaamu aidau aents eme anentsá ekentsatin aidaun etegkawag pekabiagtai, juna augmatu:

⁸—Makichik aentskesh nuwenbaunum ipapamtaish, aents eme anentsá ekentsatin aidaunmag ekeemsaipa, wagki amina nagkaetamsau tikich eme anentsá ipaamush amainai; ⁹ nuniau asa amina ipapauwa nu tajuntugman: “Wajaktá, ju aents ekeemsaipa”, tujamkui, datsá datsanjai wajakim ukunum ekeemtai aunum ekeemsaim. ¹⁰ Duka nunitsuk, ipapawagmataish ukunum ekeemsata, nuniamin ni ipapauwa nu minak: “Kumpajuh, eemkam ekeemtai pegkeja awi ekeemsata”, tujamti. Aatus dutijamamtai ashí ipaamu aina nuna eemtinish eme anentam atatme.

¹¹ Wagki nigki eme anenmama duka, imanchau diyam atinai, untsu imanchau diyamua nu eme anentam atinai.

¹² Nuigtushkam aents niina ipauwa nuna chichajak:

—Yuwatin umiakjumesh nuniachkugmesh aagkú yuwatin dutikakjumesh, kumpajuh aidau, yatsum aidau, pataim aidau, amijai ijutkam wiyakuch pujaukesh ipaawaipa; nu dutikamak, ditashkam dutiksag ipapainaku, akikbauwa nunin juwaktatme. ¹³ Duka nunitsuk, yuwatin pegkeg umiakmek untsuktá ujunauch aidau, takamainchau aidau, shutú aidau, wainmachu aidaushkam; ¹⁴ nuniakmek shiig aneastinaitme, wagki ditak akigmamainchau asagmatai, tujash aents pegkejan takasú aidau nantajagtina dui akiam atinaitme.

Aagkú yuwatin pachisa augmattsamu

(Mt. 22.1-14)

¹⁵ Nu tabaun antuk, Jesusjai mesanum pekaja nuyia makichik chichaak:

—Shiijap aneastin ainawa Apajuí inamtaijin yutai shiig umikbaun yuawagtin aina duka, tau.

¹⁶ Tutai Jesús ayaak:

—Makichik aents yutain shiig umikui aagkú yuwatnun, dutika kuashat ipamauwai. ¹⁷ Dutika aagkú yuamu hora jegamtai, inaken awemauwai ipaamu aidaun ujaktí tusa, dutikak: Kaunatnume, yuwatnuk ashí uminkae, tita tusa. ¹⁸ Tujash ashí makí makichik tsakugtugti tutan nagkamawaju. Dekatkau ipaamua nu chichaak: “Yamá nugká sumakjai, nuna diyakun wetatjai, wait aneas tsagkugtugti”, tau. ¹⁹ Nuniai tikich chichau: “Cinco toron yachigkan sumakjai, nuna dekapsatasan weajai, wait aneas tsagkugtugti”, tiu. ²⁰ Tikitchakam aikasag: “Yamá nuwenajai, nuniau asan minishatjai”, tau. ²¹ Tiagmatai inak wakitki apujin ashí ujaku. Dutikam jeennushkam kajeká inaken chichajak: “Wamak plaza aina nui wetá nuigtú yaaktanum jinta aina nuishkam, nunikam ujunauch aidau, takamainchau aidau, shutú aidau, wainmachu aidaushkam jui

ikaunmakta”, tiuwai. ²² Tima inakshakam wee, aents nunin aidaunak yajuak ikaunma apujin wejí: “Apuh, ame tujutmaum nunak imatixsanuk umikjai, tujash nuigtú ekeemainuk awai”, tau. ²³ Tama apu inaken chichajak: “Wetá jinta aina nui nuigtú yaakat pegmagbau agaaji aina nuishkam, nunikam tikich aidau wainkam kakantsam jukim ikaunmata, mina jegajui ekeemtai agkan awa nu ashí piyakti. ²⁴ Wagki wi nagkamchakun ipaamu agma duka, aagkú yuwatnun shiig umikag nunak yuwachagtatui”, tiuwai.

Cristo nemagbaunum waitmaina nu
(Mt. 10.37-38; 5.13)

²⁵ Kuashat aents Jesusjai weedaun, ayampatua chichajak: ²⁶ “Makichik aentskesh mina nemagtayatak, apajin, dukujin, nuween, uchijí aidaun, yachi aidaun, umayí aidaun, niina pujutinakesh imá senchi aneawuk, mina jintintaijuk amaitsui. ²⁷ Nunisag mina nemagtuk waittan dakitaushkam, mina jintintaijuk amaitsui. ²⁸ Atum ainajum anuiya, torre jegamkatatus wakegakug, ¿dekatkauk wajupa akikaik jegamainaita kuichkish kuashtash ajuta ju ashimainush tusa ekeemas anentaimainchaukait? ²⁹ Nuniachkug jegamkatatus ajiajuitak ashimkashmataig, ashí nuna wainaidauk dushikmain ainawai; ³⁰ nuninak: ‘Junak makichik aents jegamkatatus nagkamabi, nunikiatak ashimkachmayi’, tumain ainawai. ³¹ Nuniachkush makichik rey tikich reyjai maaniata takug, ¿dekatkauk ekeemas anentaimainchaukait, diez mil suntag ajuta jujaish dita veinte mil minitjuina nujaish maanimainashitag tusa? ³² Nunik maanimainchau dekapeakug, eke nagkamtsuk rey atushat pujaig, dekas epegkami, tusa chichaman akupjumainai. ³³ Nunisag, atum ainajum anuiyatijum makichitigmekesh ashí atumdau aina nu idaichakjumek, mina jintintaijuk amaitsugme.

Wee jea jeatuji pachisa Jesús augmattsamu
(Mr. 9.50)

³⁴ “Week pegkejai, tujash jea jeatuji megkaekamtaish, ¿utugsaya ataktush jea jeatush emamainaita? ³⁵ Wee nunikmataig nugkanum takamainkesh, abono najanmainnumkesh atumaitsui, ayatak agaa ukajá ajapmainai. Nuna antutaiji ajamuk, antuktinme”, tiuwai.

15

Uwig megkaekau augmattsamu
(Mt. 18.10-14)

¹ Jesusan antugkagtatus kuashat aents apú kuichkiji atinun ijumin aidau, tikich aents tudaugtin aidaujai ijuntuidau. ² Imatikiagtai fariseo aidau, escriba aidaujai Jesusan pachisag:

—Au aentsuk tudau aidaun yajuak ditajai ijunag yu wekaenuwe, tusag ashishmatuidau.

³ Nu tama ju augmatbaun pachis augmatak: ⁴ Atum ainajum anuiya, cien uwig aja nuiya makichik megkaetukam, noventa y nueve juwaka nunak uwejush batsaak, ¿megkaekauwa nuna igkugtatus egaak jiantumainchaukaih? ⁵ Nunik wainkag, shiig anentus yanakí juawai; ⁶ nunik wakitki jeen jegaa, kumpají aidaun nuigtú nijai ijutkau batsatun chichajak: “Uwig megkaetugkaunak yamaik igkugjai, nuniku asantai atumesh wijai shiig aneastajum”, tumainai. ⁷ Nunin asamtai tajime, nayaimpinmash juní nagkaemas shiig aneamu awai makichik aents tudau takatan idaiyak

pujutjin yapajintaig, noventa y nueve pegkeg aidau sujumankatatus atsumainatsu nuna nagkaesau.

Kuichik emegkabbau pachisa augmattsamu

⁸ ¿Nunisag nuwa diez dracma* ajamu makichik emegkak, lámpara ekemak, jegá japimak shiig kuitamas egaak igkumainchaukaih? ⁹ Nunik wainak, kumpají aidaun nuigtú nijai ijutkau batsatun ijumag: “Dracma emegkakmayag nunak igkugjai, nuniku asamtai atumesh wijai shiig aneastajum, tumainai. ¹⁰ Nunin asamtai tajime, Apajuí angelji aidauk shiig aneastawai, makichik aents tudau takatan idaiyag pujutjin yapajitaik”.

Uchi kuichkin ashimkauwa nu pachisa augmattsamu

¹¹ Junashkam Jesús augmata: “Makichik aents ajujukui jimag uchijí; ¹² tuja uchi ekeuwa nu apajin chichajak: ‘Apawah, wají aidau midau amaina duka yamaik sujustá’, tusa segauwai. Tutai apajishkam waji aidaunak mai akantuk susauwai. ¹³ Dutikam dukap tsawan atsuk, uchi ekeuwa duka ashí ni wajijjinak ijumag juki apajinak ukuak, tikich nugkanum atushat weuwei. Nunik nui pujus pegkegchaunum wekaegak, wajijji aidaunak wainak ashimkauwai. ¹⁴ Nunik ashí ashimak pujai, nunú nugkanum shiig senchi yapajut tepeauwai, nunikmatai niishkam shiig atsumamunum jegantui. ¹⁵ Nuniak wee nuiya aentsun jegantun takatan inimtai, ajajin awemauwai kuchin kuitamjutkati tusa. ¹⁶ Dutikam kuchi yuinamun yumain dekapeau, tujash makichik aentskesh yutainak suwinachu. ¹⁷ Dutikam anentaimag: ¡Mina apajú takajin aidauk shiig kuashat yutaiji ajuinainpap wi jui pujusan nujantai jakattaja! ¹⁸ Dekas mina Apajuí wakitkitjai, nunikan jegaan: Apawah, wika Apajuinash tuja aminash shiig pegkegchau takagsajame, ¹⁹ nuniku asan wika amina uchijum tamak amaitsujai, minak amina takagtamin aina nuninuk etita titajai, tiuwai. ²⁰ Tusa jiinki apají pujamunum weuwei. Nunik iká minittamanak uchijin wainak, apají wait anenjauwai, nunik tupikatki igkug, kajut pagkuk kugkuasui. ²¹ Dutikam uchijí chichaak: ‘Apawah, wika Apajuinash tuja aminash shiig pegkegchau takagsajame, nuniku asan wika amina uchijum tamak amaitsujai’, tiuwai. ²² Tujash apajig inake aina nuna chichajak: ‘Wamak jaanch dekas pegkeg agma iman jiiikjum anugtujatajum, dutikakjum tsajam uwejinish anillo patakuajum, sapatchakam wegagtuktajum. ²³ Dutikajum toro tsakat duwejam itajum maatajum, yutai shiig uniká yuwinaku fiestamawagmi; ²⁴ wagki juka mina uchijuk jakau aajakui, tujash yamaik iwaaku wakitki tae; megkaekau aajakui, tujash yamaik wainkaji’. Tusa timatai fiestamtan nagkamawajui uchijí tajum shiig aneak.

²⁵ “Nuniai, uchijí eemkau ajanum pujau, wakitki jegá taattak minikmá, nantsemainak música ishinainamun antuku; ²⁶ nunik inaken untsuká: ¿Wagka imatuinawa? tusa iniau. ²⁷ Tama ni ayaak: —Amina yatsum taamtai apa, toro tsakatan dekas duwegman mae, uchijí jatsuk iwaaku tau asamtai, tau. ²⁸ Tama kajeká, jegaa waitnak dakitau, nunitai apají jiiintuki, wayata tusa imatjau. ²⁹ Tama apajin ayaak: ‘Apawah, wajupa mijadaiya ame dutikata tabaunak makichkish intimjutsuk yayatsjame, nuniaigkish makichik cabra tsakatchikesh kumpají aidaulai fiestamati tusemek sujuchume. ³⁰ Tujash ju amina uchijum, ashí wajijjum aidaunak

* 15:8 “Dracma”, tawa duka Persnamaya kuichik kaya oro najanamu aajakui.

nuwa akiká takatai aidaujai wekagak ashimak taamtai, eme anentsam toro tsakat dekas duwejam mantuam ayugkum fiestamjame', tau.

³¹ “Tama apají ayaak: ‘Uchijuh, amek wijai ijunjam tuke pjuwaitme, ashí wají midau aina duka aminu ainawai. ³² Tujash juka fiestamainaitji shiig aneaku, wagki juka yatsumek jakau aajakui, tujash yamaik iwaaku wakitki tae, megkaekau aajakui, tujash yamaik wainkaji’ ”, tiuwai.

16

Waji kuitamin betek umichu pachisa augmattsamu

¹ Junashkam Jesús jintintaiji aidaun ujaak: “Aajakui makichik aents wiyakuch, nu ajujukui makichik inak wajiji aidaun kuitamjin; nuna apujin ujatkejui, wajigminak wainak takagtamui”, tusag. ² Tiagtai untsuká chichajak: ¿Wajuk asamtaiya nunash tujamainawa? Ame takasbaujum iwaintugkata, wagki yamaik mina waji kuitamnuak achattame, tau. ³ Tama waji kuitamin anentaimas: “¿Mina apug takatnum jiija duish, wajinak dutikatja? Nugkanash kakaajan taumaitujai, wainkauch sujstajum tusa segamtanash datsamajai. ⁴ Untsu juna jutikatjai apu ni takatjin jiiptaish, aents ditá jeen jujumain aina nuna”, tau. ⁵ Tusa ni apujin diwimaidaun makí makichik untsuká, dekatkauwa nuna iniak: ¿Wajupa mina apujush diwime? tau. ⁶ Tama ayaak: “Wika aceite cien barril* diwimjai”, tau. Tutai: “Ju papí jukim ekeemsam wamkesam agagta cincuenta diwimjai tusam”, tiuwai. ⁷ Nunik tikichin iniak: “¿Amesh wajupa diwime?” Tama ni ayaak: “Wika trigo cien saco diwimjai”, tau. Tutai ni ayaak: “Ameshkam ju papí jukim ekeemsam wamak agagta ayatak ochenta diwimjai tusam”, tiuwai. ⁸ Nunú inak waji kuitamin pegkegchauwa nu, shiig anentaimag dutikamujin waituk, apujig shiig anentsauwai. Nuna tusa Jesús, Apajuí nemagchau aina duka pegkegchau takatnumag, Apajuí nemajin aidaun nagkaegas imatika anentaimainawai.

⁹ “Nuadui tajime: Dekas kuichik pegkegchau takasa jukimua duka tikich yayakjum kumpajum ikaugkatajum, nu dutikagmin atumdau abuetugmakmataish, Apajuí ni pujutaiji tuke auwa nui jujamkitin asamtai.

¹⁰ “Aents waji piipichinakesh kuitamas takauwa duka, waji muunnumash nunisag amainai; untsu waji piipichinakesh kuitamas takachuk, waji muunnumshakam nunisag amainai. ¹¹ Aents ju nugka jui pujus, kuichik kuashat ajamaitak pegkejan takaachunash, ¿Yaa dekas tuke atina nunash sumainaita? ¹² Tikichdaukesh kuitamsa takaschaum nunash, ¿yaki amasti atumdau atí tibaunash?

¹³ “Makichik inakak jimag apunak takagmait sui; wagki makichkia nuna dakitak, tikichia nuna anemainai; nuniachkush makichkia nuna umijak, tikichia nunak umigmait sui. Atumek Apajuí takag, wiyakchameatasa takaa wajamait sugme”.

¹⁴ Ashí ju waji aina nu tabaun fariseo kuichkinak anentaimtin aina nu antukag, dushikis chichajuidau. ¹⁵ Nudiagtai Jesús ayaak: “Atumek aentsú eemtinig pegkejan takauwa iman jumamjume, tujash Apajuí atumi anentaimnak dekagtamjume; wagki aents eme anentam aina nunak, Apajuik dakitawai.

Chicham umiktin nuigtú Apajuí inamtai pachisa tibaw

* 16:6 Makichik barrilnumag ocho galones inagkeasa aceitek yajá wajakbauwai.

16 “Chicham umiktin nuigtú profeta tibau aina duka Juan tauwa nui nagkanui; nui nagkamas yamajam chicham Apajuí inabau pachisa etsegnawai, nuwi wayawagtatus ashí kakanmamainawai.

17 “Nugka, nayaim aina nu megkagainatsaigkik, chicham umiktinum Moisés agagbau piipich aina dukesh umintsukek juwakchatnai.

Jesús nuwak idaimaitsui tibau

(Mt. 19.1-12; Mr. 10.1-12)

18 “Makichik aishmag nuwen idaiyas tikichjai nuwenkug, ekagmawai; tuja nuwa idaisamujai nuwenushkam, nunisag ekagmawai.

Lázaro wiyakchajai

19 “Aajakui makichik aents wiyakuch, apu iwagmamtai dekas jaanch shiig pegkejan iwagmamag pujus, kashí kashinig yutain shiig umiká fiestamá pujau. 20 Nuniai, makichik ujunauch Lázaro daagtin ashí iyashinig kuwi kuwimjú wajasun wiyakcha waitijin apujkiajui nui pujus segamti tusa; 21 nui pujus senchi yapajak wiyakcha mesajinia puunas kakegun yuwatatus wakegau, nunittaman yawá aidau tajuawag kuwimjin dukatuidau. 22 Lázaro nuní pujau jakamtaí, ángel aidau jukiag Abraham pujamunum iwakajui. Nuniku ai wiyakchashkam jakauwai, nunikmatai ukusajui.

23 “Tuja wiyakchak Hades† waitiak pujus pagkas niimkamá, Abrahaman atushat waikauwai, Lazaroshkam niini ayaumas ekeemtatman. 24 Nunik senchi untsumak: ‘Apawah Abrahamah, minash wait anenjugta nuniakum Lázaro awetugta ni tsajam uweji titigchijin yumí antig idaijun bichatmitkajuati, wagki jii imaniamunum pujusan senchi waitiajai’, tau. 25 Tujash Abraham ayaak: ‘Uchijuh, ame pujusbaujum adeagta, aminak waji pegkeg aidau ajutjamajakui; nuniai Lazarok waitujakui. Tujash yamaik nigka jui shiig aneas pujai, ame waitiame. 26 Nuigtushkam juwiyati anui minita takuish minimaitsui, wake ishamaín asamtaí. Anuiyatigmeshkam jui minitasajum wakegakjumesh nagkaemamaitsugme’, tau.

27 “Tama wiyakuch ayaak: ‘Untsu apawah Abrahamah, Lazaron mina apajú jeen awemati tusan segajame, 28 nui cinco yatsug batsata nuna ujatjukti, dutikam ditak ju imag waitiamua juig minishtinme’, tau. 29 Tama Abraham ayaak: ‘Ditak, Moisés nuigtú profeta aidau agagbauwa nu ajuinawai; nuna aujus imatiksag umiinak waittanmag minimainchau ainawai’, tau. 30 Tama wiyakuch ayaak: ‘Atsa, apawa Abrahamah, jakau aina nuiya makichik nantakí jegajua ujamak, tudau takatan idaiyinak pujutjinak yapajimain ainawai’, tau. 31 Tutai Abraham ayaak: ‘Moisés nuigtú profeta aidau agagbauwa nuna betek umiinatsu anidauk, jakau aina nuiya nantakí ujamash antugkachagatui’ ”, tiuwai.

17

Tikichin pegkegchau takamtikaidau pachisa tibau

(Mt. 18.6-7, 21-22; Mr. 9.42)

1 Jesús jintintaiji aidaun chichajak: —Kakajus tupanmaitsui tudau takata nuna anentai egketkagtuina duka; tujash jwait anentajai makichik aentskesh tikichin tudau takamtikaina nunak! 2 Dekas pegkeja duka jujú piipich aina juiya mina dekaskeapi tujutuina nuna tudaun

† 16:23 “Hades” tawa duka diistá Mt. 11.23.

takamtikaidauk, dekas kaya muun juki kuntugnum jigká detua nayantsa kunajin ajugká ajapmainus ajapachbau ainatai. ³ Nuadui ¡Atumek kuitamamkatajum! “Amina yatsum tudau takagtamkuig, jiyaktá; dutikam tsagkugtugta takuig, tsagkujata. ⁴ Nuigtú makichik tsawantinig sieteya imagnia tudaun takagtamas, sieteya imania tajutjama: Atak awagkinuk ankashatjai takuig, tsagkujata”, tiuwai.

Dekaskeapi tabauwa nu
(Mt. 21.21)

⁵ Apóstol aidau Apu Jesusan:

—Dekaskeapi tabau aan nagkaemas sukagtusta, tuidau.

⁶ Tiagtai Apu Jesús ayaak:

—Dekaskeapi tabauwa nu mostaza jigkayiya nuninkesh ajutjamainakuig, ju sicómoro chichagkujum: “Teganim nayantsanum wajaata”, tamak nunisag umigtamainai, tiuwai.

Inak aidau umimain

⁷ “¿Atum ainajum anuiyash, ya inake ajanum takaak wekagu nuni-achkush baká kuitamak wekagu taamtai, wayam mesanum ekeemsam yujumak yuwata, tumainaita? ⁸ ¿Nunak tutsuk: ‘Aagkú yuwatin umigtukta, nunikam yapagmamam ajamjusta wi yuwan, uwagmatai amesh dui yuwam uwagta’, tuchauk aina? ⁹ ¿Inakega nuna dutikata tibaun imatiksag umikmataish see tinuk aina? ¹⁰ Atumshakam nunisjumek, Apajuí ashí dutikata tibauwa duke umiká idaikugmek: ‘Jutiik inak atsumchatai ainaji, imá tibauwa duke umidau asaja’, tumainaitjume”.

Diez aents lepragtin aidaun Jesús etsagakbau

¹¹ Jesús Jerusalén weak, Samaria, Galileajai tesagdayamu jinta asamtai nuní nagkaebau. ¹² Nunik yaakat yaignum jegai, diez aents lepragtin jiinag ikaag ijuntsaju, ¹³ nunik senchi untsumkag:

—¡Jesús, Maestro, jutiish wait anenkagtujia! wajaidau.

¹⁴ Imatiagtai Jesús wainak, chichajak:

—Wetajum nunikjum sacerdote wantintuktajum, tiu.

Tima ditashkam, jintá wesag pegkeg wajasaju. ¹⁵ Nunik dita aina nuiya makichik ni tsagagbaujin wainmamak, senchi jiiká Apajuin emematki waketak, ¹⁶ Jesusa jegantun tikishmag dijayin nugkan antig pujus, see tau. Duka samarianmaya aajakui. ¹⁷ Nunitai Jesús chichak:

—¿Diez aidau tsagagchagmaka? ¿Nueveya dusha wajukawagmae?

¹⁸ ¿Imá jukeuchikaih tikich nugkanmayayaitak wakitki Apajuí ememati duka? tau.

¹⁹ Tusa Jesús:

—Wajakim wetá, amek dekaskeapi tame dui tsagajume, tiuwai.

Apajuish wajutí inamjatnaita tibau
(Mt. 24.23-28, 36-41)

²⁰ Fariseo aidau Jesusan, Apajuish wajutí inamjatasash taatnaita tusag inidau.

Tama ni ayaak: —Apajuí inamjatna duka duwiyap atatua tusaik kakajus dekamaitsui. ²¹ Nuniau asamtai: “Jui inamui, awi inamui”, tabauk achatnai. Apajuik yamaiya juik atumin inamui, tiuwai.

²² Tusa jintintajji aidaun chichajak:

—Tsawan jegatnai, Aentsmaga akiinauwa nuna makichik tsawankesh wainkatatus wakeyagtin aina nu, nuniakush waitkachagtin ainawai.

²³ Ujumak aents aidaukesh chichagtamainak: “Jui pujawai”, nuniachkush “awi pujume”, tujamainakuish wegpaum nuigtushkam nemagkaigpajum.

²⁴ Wagki peem peeti nayaimpin mai yantamejai tsaaptin emama numamtuk wajaktnai tsawan Aentsmaga akiinau minamu atina duka. ²⁵ Nunú tsawan jegatsaig, dekatkauk senchi waittsattajai, aantsag aents aidauh dakitjiagtatui. ²⁶ Noé pujusua nu tsawantin wajujejakajua numamtuk wajagtina, tsawan Aentsmaga akiinauwa nu minamunmash. ²⁷ Aents aidauk yuwinak, umutnash umuinak, nuwenainak, nawanjin suju waja batsatai, Noé niina arcajin egkemaui, nuniai diluvio minak ashí tajaku. ²⁸ Nunisag Lot pujujakua nu tsawantinish yuwinak, umuinak, sumainak, sujuinak, ajakmainak nuigtú jegá jegam waja batsataidau; ²⁹ nuniai Lot Sodoma pujau jiinkiuwai, nunikmatai nayaimpinmaya jii yutug azufrejai pachimdaegag iyajui, nunikmatai ashí jinawajui. ³⁰ Nunisag atinai Aentsmaga akiinauwa nu wantinkatna dusha.

³¹ “Nu tsawantin, jega ekenja jegamkamu nagkatka nui pujauk, wajijii jegá aunak akaikig jukishti; antsag ajanum takaak pujaushkam jeenig wakitkishti. ³² Adeagtajum Lota nuwe wajukauwaita nu. ³³ Aents ju nugka jui pujutan imá senchi wakegak, mina nemagtuk waittan dakitauk uwemjashtin ainawai; tujash mina nemagtak niina pujutjinash puyatjukchauk, uwemjatnai.

³⁴ “Junashkam tajime: Jimag aents kashi makichik pegaknumag tsanias tepaushkam, makichik juwaku, tikichik ukuam atinai. ³⁵ Jimag nuwa tsanias deketainum dekeak pujuidaushkam makichik juwaku, tikichik ukuam atinai. ³⁶ Jimag aents ajanum takaak pujaushkam, makichik juwaku, tikichik ukuam atinai”, tau.

³⁷ Tutai iniinak:

—¿Apuh, dusha tuwí nuniktinaita?

Tiagtai ni ayaak:

—Tuwí jakau tepettawa, nuwi chuwagkak tuwakagtina, tiuwai.

18

Nuwa waje juez pegkegchaujai pachisa augmattsamu

¹ Jesús juna augmattsauwai mijamtsuk Apajuí tuke augmaina nuna pachis jintinkagtuata tau asa. ² “Makichik yaaktanum makichik juez pujukajui, Apajuinash ishamsash anentaimtuchu, aentsnash eme anentsagkesh diichu. ³ Nunú yaaktanmag pujujakuí makichik nuwa waje, nunú shiwaji utugchat aputusam juezan jegajua: ‘Jujú epegtujuata’, tusa segau. ⁴ Tusa imatjú pujugmash yaitnak dakitú pujau asa nigki anentaimas: ‘Apajuin ishamsanush anentaimtuchu, aents aidanash ajantusnush diichu akunush, ⁵ ju nuwa waje waa wamak tajutak waitkaja juní pujui yaigkan epegtuatjai dutikam, agkan idaitusti’”, tiuwai.

⁶ Tusa nuigtú Apu Jesús chichaak: Juez pegkegchaukesh aatus tiuwa nunin aish; ⁷ ¿Apajuish ni etejamu aidau kashi tsawaijai untsuamash, waggag ayamjukchati? ¿Wamak aitskesh idaimainkai? ⁸ Dekas tajime Apajuik waamak yaimpamainai. ¿Tujash wi Aentsmaga akiinauwaitag nuna ataktú ju nugka jui taatnaitag nuniaknush aents dekaskeapi taunash wainkatnashitag?, tiuwai.

Fariseo nuigtú apú kuichkiji atinun ijumnujai pachisa augmattsamu

⁹ Ujumak aents aidau dita imá pegkejan takauwa iman anenmamainak, tikich aidaunak imanchauch diidau asagmatai, Jesús jujú augmatbaun pachis chichaak: ¹⁰ Jimag aents Apajuin ausatatus jega Apajuí ememattainum weajui, makichik fariseo, tikich apú kuichkiji atinun ijumnujai. ¹¹ Nunik fariseo Apajuin aukaj wajai wajas: Apawah, see tajame, wika tikich aents aidau kasa, pegkegchau takau, tsanijimtan wekaetin, jujú apú kuichkiji atinun ijumin puja juninkesh atsujai; ¹² wika makichik semanatin jimag tsawantai ayunó wajaujaj, nuigtushkam kuichkinash ashí wi juamunak diezmó wajaujaj, tau. ¹³ Tujash apú kuichkiji atinun ijumnuk kanaká iká wajas, nayaimpinash pagkai diitsuk, detsepen ijuak: “Apajuiyah, wika tudauwaitjai, minash wait anenjugta”, tiuwai. ¹⁴ “Wika tajame, nunú aatus tiuwa nu pegkeg Apajuí emtin wantinak waketai, tikichia duka nunikchauwai. Wagki nigki eme anenmama duka, imanchau diyam atinai; untsu imanchau diyamua nu eme anentam atinai”, tiuwai.

Jesús uchi ikautkamu
(Mt. 19.13-15; Mr. 10.13-16)

¹⁵ Nuna tusa ashimkamtai uchi aidaun Jesusan ikautuidau antinjukti tusag. Imatikiagtai ni jintintajai aidau wainkag uchigtin aidaun jiyaidau.

¹⁶ Tujash Jesús, uchin untsuká:

—Idaisatajum, uchi aidauk minai minitnume, utujiakaigpajum, wagki Apajuí inama duka, jujú uchi aina junin aina nudauwai. ¹⁷ Dekas tajime: Aents aidau, uchi mina anentaimjutuina imanis anentaimjutuinachuk, Apajuí inamak amain ainatsui, tiuwai.

Datsauch wiyakuch Jesusan iniasbau
(Mt. 19.16-26; Mr. 10.17-27)

¹⁸ Makichik apu Jesusan iniak:

—Maestro pegkejah, ¿wajina dutikmainaitja pujut tuke atina nuna jukitasanush? tau.

¹⁹ Tama Jesús ayaak:

—¿Wagka pegkejá tujutme? Makichkish pegkejak atsawai, imá Apajuiya duke pegkejak. ²⁰ Amek dekame chicham umiktin agagbaunum: “Tsanijinawaipa, magkagtuawaipa, kasamkaipa, wainkamek tsanumkagtuajaipa, amina apa dukujai eme anentsam diistá” tawa nunú, tau.

²¹ Tama ni chichaak:

—Wika nunak datsauch nagkamsanuk ashí umikuitjai, tau.

²² Nuna tutai Jesús antuk ayaak:

—Nuigtú makichik umimain ajutjamui: ashí amina ajutjamaina duka sujukam ujunauch aina nu tinamkata. Nu dutikawamin nayaimpinum wajiigmik ajutjamtinai. Nu dutika ukuakum mina nemagtukta, tiuwai.

²³ Tujash nu tama wake besekú, wagki shiig wiyakuch asa. ²⁴ Nunik senchi wake besektatman Jesús wainak chichaak:

—¡Shiig utugchatai wiyakuch aidau Apajuí inamtaijin wayata tabauk!

²⁵ Camello aujá jiin waigká nagkaemamain yupichuchia nuna nagkaesau utugchatai, wiyakuch Apajuí inamtaijin wayatag tabauk, tiuwai.

²⁶ Nu tabaun tikich aidaushkam antukag, iniimainak:

—¿Yaki tujash uwemjaush amainaita? tuidau.

²⁷ Tiagtai Jesús ayaak:

—Aents aidau dutikmainchauwa nunak Apajuí dutikmainai, tiuwai.

Mina nemagtuidauk ditanu ukukbaujin nagkaesau jukiagtinaí tibau
(Mt. 19.27-30; Mr. 10.28-31)

²⁸ Tutai Pedro ayaak:

—Apuh, jutii aidautik ashí iina ajutjamaina duka ukuinaku, ame nemagkabiaji, tau.

²⁹ Tutai Jesús ayaak:

—Dekas tajime, ashí aents Apajuí inabaujin etsejuinak jeen, nuwen, yachi aidaun, uchijí aidaun, apajin dukujijai ukukiag yujaidauk, ³⁰ jujú nugka jui pujusash, ni ukukbaujin nagkaesau jukiagtinaí, nuigtú atak atina duish pujút tuke atina nunash jukitnai.

Kampatuma juna Jesús ni mantamnatnuji etsechkamu

(Mt. 20.17-19; Mr. 10.32-34)

³¹ Jesús ni jintintaiji doce aina nuna akanak chichajak: “Yamai Jerusalén wegag dui, profeta aidau Aentsmaga akiinau nuniktinun ashí agajajua nunú uminkattawai. ³² Nuniau asamtai aents judiochu aidaunum sujukag-tatui, dutikawagmatai pegkegchau chichajuinak, dushikinak usukiagtatui; ³³ dutikawag asuttanash asut awa awajtuinakuag maawagtatui; tujash kampatum tsawanta dui nantaktatui”, tau.

³⁴ Nunak jintintaiji aidauk makichkish shiig dekachajui, wajina takua tawa nuna shiig dekamainchau dekapedau asag.

Jericonmaya wainmachu wainmakbau

(Mt. 20.29-34; Mr. 10.46-52)

³⁵ Jesús Jericó jegattak wegai, aents wainmachu jintá yantamen ekeemas: Kuichik sujustajum, tusa segamá eketu. ³⁶ Nuniau kuashat aents nagkaemainak pampainamun antuk, wagka imatainawa tusa iniimu. ³⁷ Tutai, Jesús nazarenumia wetai imatuinawai tusag ujaidau. ³⁸ Tiagtai senchi untsamak:

—iJesusah, David weantu uchijiyah, minash wait anenjugta! wajau.

³⁹ Imattai aents eemak ashinaidau itatkati tusag jiyaidau, tujash nigka nuní senchi untsamak:

—iDavid weantu uchijiyah, minash wait anenjugta! wajau.

⁴⁰ Wainmachu imatbaun antuk Jesús wajantá:

—Jukijum jui itagtuatajum. Timatai ejentuntam, iniak: ⁴¹ —¿Utugtukti tusamea wakegame? tau.

Tama ni ayaak:

—Apuh, wainmaktasan wakegajai, tau.

⁴² Tutai Jesús chichajak:

—iWainmakta! Ame dekaskeapi tame dui tsagajume, tiu.

⁴³ Tusá tamawaik wainmakui. Nunik Apajuin emematkamaikia Jesusan nemagkauwai. Tuja ashí aents nuna wainkajushkam Apajuin emematu- idau.

19

Jesús Zaqueojai igkunikbau

¹ Jesús yaakat Jericó wayá nagkaebau. ² Nuniai Zaqueo apú kuichkiji atinun ijumin aidaun apuji shiig wiyakuch, nunú yaaktanmag pujau. ³ Nuniau asa Jesusan wainkatatus wakegau; nuniyatak kuashat aents tuwagkagmatai wainmainchau dekapjau, sutajuch asa. ⁴ Nuniak eemak tupikaki, sicomoronum waka ekeemsau, Jesús nuní nagkaemaktin asamtai wainkatatus. ⁵ Nuniai Jesuschakam nui jegak pagkai diyak:

—Zaqueo, wamkesam akaikita, yamai amina jeemin ayamjatasan minajai, tiu.

⁶ Tama Zaqueoshkam wamkes akaiki, shiig anentus Jesusan juki niina jeen emauwai. ⁷ Nunitai ashí aents aidau waínkag, aents tudaugtinu jeen kanagtatus wegawai tusag augmatuidau. ⁸ Tujash Zaqueok niina jeen ejega wajaki Jesusan chichajak:

—Apuh, yamai nagkamsanuk aents ujunauch aidaunak jimaituk waji-ijun akankan tinamtajai, wi makichik aentsun wajiin kasagkau akunush ipaksumta imagnia awagtuktajai, tau.

⁹ Tutai Jesús ayaak:

—Yamaik ashí amina pataimijai uwemkaugme, Abraham dekaskeapi tiuwa nunisjumek dekaskeapi tujutiujum dui, dekas Abraham wegantu wajasugme. ¹⁰ Wagki wi Aentsmaga akiinawaitag nunak, megkaejauwa nuna egaká uwemtijatasan tauwaitjai, tiuwai.

Kuichik pachisa augmattsamu
(Mt. 25.14-30)

¹¹ Jesús Jerusalén jegattak wegau asamtai, aents aidau ni chichaamu antugkaju asag, awi jegaa apu wajasá waamak inamjashtimpash tusag anentaímaidau asagmatai augmatbaun nagkabau.

¹² Nuniak tau: “Makichik aents eme anentsá diitai aajakui, nunú tikich nugkanum atushat weuwai, rey wajas wakitki taatatus. ¹³ Eke wetsuk niina inaken diez aina nuna untsuká, makí makichik kuashat kuichkin susa chichajak: ‘Jujú kuichkia ju takamtikamatajum nuniagmin wisha taatjai’, tiuwai. ¹⁴ Tujash aents niina nugkenia aidau kajejuidau asag, dekas apun chichaman awetuinak: ‘Jutiik anú rey wajas jutiini inamjati tusaik wakegatsji’”, tiajai.

¹⁵ “Tujash nu aaja tabau aig, rey adaikam wakitki niina nugkeen tauwai, nunik inake kuichik tinamká ukukbauji aidaun untsukajui, maki makichkish wajupak ikaugkaje tusa dekajuatatus. ¹⁶ Tiajam makichik niiyá eemak jegantá: ‘Apuh, amina kuichkigmik diesa imania kawegke’, tau. ¹⁷ Tama ni ayaak: ‘Ayú, pegkeg aikaume, amek inak pegkejaitme, machik susamuitkum imatikam ikaugkaume, dui wishakam diez yaakat aina nuna apuji emattajame’. ¹⁸ Tusa inagnaig tikitchakam jegantun chichajak: ‘Apuh ame kuichik sujusmayum duka, nuigtú cinco imania kawegke’, tau. ¹⁹ Tutai rey nunashkam ayaak: ‘Ameshkam cinco yaakta apuji atá’, tiuwai.

²⁰ “Tuja tikich inak tajuntun chichajak: ‘Apuh, juuwai kuichkigmik, jaanchi shiig ijian ukusan pujugjai, ²¹ wagki amek waitkagkagtin, nuigtush ame susachu ayatkum atantin, aikasmek ame ajakchauwaitkum juu wekayin asamin ishamakun kuichkigminak takamtiksachmajai’, tau. ²² Tama ni ayaak: ‘Amek inak pegkegchauwaitme, amina chichamjuminig bakumattame, wi waitkagkagtin, susachu ayatkun atantin, nuigtú ajakmachu ayatkun juu wekayin dekajiatkumesh, ²³ ¿wagka banconum egkeam ukugtuchabiume, wakitki taak kawegkun jukiti tusam?’, tau. ²⁴ Tusa nui ijuntatman chichajak: ‘Aanú kuichik atankita, dutikam diesa imania ikaugka nu susatajum’. ²⁵ Tutai aents chichajuinak: ‘Apuh, niinuk diesa imania ikaugkam ajajama, tuidau. ²⁶ ‘Tiagtai rey chichajak: Kuashat aja duka nuní dukap suwam atinai; untsu piipich ajamua dusha, nu piipich ajamua dukesh atantam atinai. ²⁷ Mina shiwag aidau rey

wajasá jutiiní inamjai tusa dakitjiagma nunú, jui itanjum mina emtijui kajegtajum’ ”, tiuwai.

Jesús Jerusalén wayamu
(Mt. 21.1-11; Mr. 11.1-11; Jn. 12.12-19)

²⁸ Juna tusa idaiyak, Jesús nagkaemaki Jerusalén wakatatus wegau.
²⁹ Nunik Betfagé nuigtú Betania awa nui tikiju wajas, olivosa mujaji tutainum jegan, Jesús ni jintintaijin jimajan awemauwai.

³⁰ Dutikak: Wetajum au yaakat yaijuch awa awi, nuwi jegakmajum burro makichik aentskesh entsamchatai jigkaam wajau wainkattagme; nu atiajum itaatajum. ³¹ Nu dutikagmin makichik aentskesh inimpainak: ¿Wagka atiaagme? tujamkujaish: Apu atsumawai titajum, tiu.

³² Tiajam jintintaiji aidaushkam wegag, jegakmá ni tibaunak imatiksag betek wainkaju. ³³ Nunik jegantun attitaman burrogtin wainak: —¿Wagka burrosh atiaagme? tau.

³⁴ Tama dita aiinak:

—Apu atsumau asamtai juwaji, tiaju.

³⁵ Dutika jukiag Jesusan itaantaju, dutikawag jaanchji aidaun jukiag burro tuntupen aitkag, Jesusan ekeniajui. ³⁶ Nunik Jesús wetai, aents aidauk ditá jaanchji aidaun jintá ainag emaidau. ³⁷ Nunikag olivosan mujaji chapaibaunum jegantatak weenak, ashí Jesusa nemajin aidauk shiig dakujusag senchi jiikag Apajuin emematuidau, aents dutikmainchaun dutikaun wainkaju asag, ³⁸ nuninak: —¡Apu Apajuí awemam Rey miná duka pegkegmai! ¡Nayaimpinmash shiig agkan atí, antsag ashí yakiya aidaush junak ememattinme! wajaidau.

³⁹ Imatiagtai ujumak fariseo nui pachitkau aidau:

—Maestroh, jintintaijum aina nu itatjatajum tita, tuidau.

⁴⁰ Tama Jesús ayaak:

—Dita itatiagtaik kaya aina ju pampaumain ainawai, tiuwai.

Jesús Jerusalegnunia aents aidau egaagbau

⁴¹ Jesús Jerusalén tikiju wajasú, nunik yaakta wainak, buutiuwai.
⁴² Nunik: “¡Wajuk dekawajumek tusan wakegajai yamaiya juik amina agkan etamaina nu! Tujash yamaik duka dekamainchawaitme ejatka-mua nunin asam. ⁴³ Tujash tsawan jegagtamtinai, shiwajum yaaktagmin peegmak apagtamak, ashí yantamnum dakagmajag jetepakagtina nu. ⁴⁴ Dutijamainak atumnak ashí uchigmijai amupainak yaaktagminash ashí tsaitgamtagnai, dutikamu asa makichik kayakesh tikich kayanum patamiukesh juwakchatnai, wagki Apajuí uwentijamjatatus awetugmamumu dakitjau asajum”.

Jega Apajuí ememattainum aents batsatun Jesús jügbau
(Mt. 21.12-17; Mr. 11.15-19; Jn. 2.13-22)

⁴⁵ Nuna tusa idaiyak, Jesús jega Apajuí ememattainum wayauwai, nunik nui sujak batsamtatman jüjü. ⁴⁶ Dutika chichajuinak:

—Agagbau awai: “Mina jegajuk Apajuí aujku ijuntaiyai” tawa nuniaig, atum kasa aidau batsamtaí emaugme, tiu.

⁴⁷ Nunik Jesusak jega Apajuí ememattainum kashí kashinig jintinkagtau. Nunitai sacerdote apuji, maestro chicham umiktinun jintinkagtin nuigtú judío apuji aidaujui maawagtatus chichaman umijuidau. ⁴⁸ Tujash yupichu dutikmainchau dekapedau, kuashat aents aidaush ni chichagk-agtamunak puyatjus antujuidau asagmatai.

20

Sacerdote apuji aidau Jesusan iniasagbau
(Mt. 21.23-27; Mr. 11.27-33)

¹ Jesús jega Apajuí ememattainum aents aidau jintintak nuigtú yamajam chichaman etsejak pujai, sacerdote apuji aidau, maestro chicham umiktinun jintinkagtin, tikich judío apuji aidaujai utsanawajui. ² Nunikag: ¿Aminash ya jintinkagtuata tusash awetamae? ¿Yana chichamenia jusha juniame? tuidau.

³ Tama Jesús ayaak:

—Wishakam iniastajime, aigkatajum: ⁴ ¿Yaa Juagnash yamijatjata tusash awemauwaita, Apajuik awemauwait, atsa aents aidauk awemauwait? tau.

⁵ Tama ditak pempeentunikiag chichainak: “Juagnak Apajuí awemauwai tajinish, ‘¿Tujash wagka dekaskeapi tichau ainagme?’ tujamtata jama.

⁶ Tuja aents awemauwai tajinchakam, ashí aents aidauk Juagnak profetayai tuidau asag kayai tukugmag mantamain ainawai”, tuidau. ⁷ Tusag:

—Dekatsji, yatsu Juagnash yamijatjata tusash awemauwait, tuidau.

⁸ Tiagtai Jesús ayaak:

—Wishakam tichattajime yana chichamenia jutikaja nunak, tiuwai.

Takau pegkegchau aidau pachisa tibau
(Mt. 21.33-46; Mr. 12.1-12)

⁹ Junashkam Jesús aents aidau jintintak augmatbaun pachis nagkama tau: “Makichik aents ajajin uvan jakui, dutika ujumak aents takau aidau ukujak, weuwai dukap tsawan asa taatatus. ¹⁰ Nunik uva juut jegamtai, makichik inaken awemauwai takau batsatbaunum, nui jegamtai uva neje jukbaun niinun susatnume dutikam itagtuati tusa, nunik jegattaman takau aina nu suwimawag sutsuk wainak awagkiajui. ¹¹ Dutikawagmatai tikich inaken awemauwai, tujash nunashkam suwimawag pegkegchaun chichagkag wainak awagkiajui. ¹² Nuna dutikawagmatai kempatuma juna tikich inaken awemauwai, dutikamun ajanum takaina nu senchi suwimá, upu upujú awajsag jiiki awemajui.

¹³ “Dutikawagmatai uva ajagtina nu anentaimas: ‘¿Utugkatjaki? tusa, dekas mina uchig anetaijua juna awematjai, dutika ai nuna wainkag ajantus diischajaintash’ tiuwai. ¹⁴ Tujash takau aina nu uchi minittaman wainkag: ‘Auwai ju aja juna jukitnuk, dekas maa ajapami, dutika juka iinu emami’, tuidau. ¹⁵ Tusag achiká jukiag uva aja ukumtikiag maawajui.

“¿Nunash ajagtina dusha utugmainai tajume? ¹⁶ Dekas ajagtina nu tajakug takau aina nunak kajegká utsak, uva ajakbauwa nunak tikich aents aidau susa idaimainai”.

Nuna Jesús tutai antukag:

—¿Duka tuke dutikamak achatnaitji! tuidau.

¹⁷ Tiagtai Jesús ditan esetug diisá:

—¿Tujash wajina pachisaya agagbauwa nuwish:

“Kayá ekenag jegamin aidau, kaya pegkegchauwai tusag dakitjajua nunú, yamai dekas jegá ichichkatin kaya apujtutia iman wajasé”, tawa?

¹⁸ Nunú kaya nui iyauk tsainkatnai, untsu kaya aentsnum iyakug yuku ematnai, tau.

¹⁹ Nuna Jesús augmattai, sacerdote apuji aidau, maestro chicham umiktinun jintinkagtin aidaujai achikta tuidau. Nuninayatak aents aidau ishamaidau.

*Kuichik akikmamu pachisa tibau**(Mt. 22.15-22; Mr. 12.13-17)*

²⁰ Nuninak aents aidaun, iish pegkeja nu dekatasa wakegainaji tusajum dekabuatatum tusag awemajui, dutika Jesús wajintig timatai achiká gobernator inama nui sujukmi tusag. ²¹ Tiajam Jesusan iniinak:

—Maestroh, jutiik dekainaji ame tame duka nuigtú jintinkagtam dushakam dekas jintinkagtame; nuigtush aents shiig awajkata tabaunum dutikasme, amek dekaskenum Apajuí jintiya nu pachisam jintinkagtame.

²² Nuniau asamin amina iniagme: ¿Jutiish Cesarash akimainkaih atsa akimainchaukaih? tuidau.

²³ Tujash Jesusak pegkegchau anentaimainamujin dekaju asa:

—¿Wagka pegkegchau anentaiyaish tujutjume? ²⁴ Iwaintugkakjua makichik kuichik. ¿Yana niimegaita jusha, yana daaji agagbauwaita?

Tama:

—Cesardauwai tuidau. ²⁵ Tiagtai Jesús ayaak:

—Cesardauwa duka, César susatajum, Apajuinua dushakam Apajuik susatajum, tiuwai.

²⁶ Nuna ashí aents antuinamunum timatai, tsanumjumainchau dekapjaju. Nunikag nu tu aikam anentai jegagchag, itatjaju.

*Jakau nantagtin pachisa iniimsamu**(Mt. 22.23-33; Mr. 12.18-27)*

²⁷ Juna tusa machik aig, ujumak saduceo aidau, jakauk nantagchagtin ainawai tinu asag, Jesusan iniinak:

²⁸ —Maestroh, Moisés papí agag ukugtamkiuwa nui: “Aents nuwan juki uchin akiitsuk jakamtaig, ni yachintin nuwan juki uchin akiimainai, dutika yachí uchijiya nunin emamainai”, tawai. ²⁹ Tuja nuniamunum, siete yachigbau aajakajui, nuanuiya nagkamchak iwai nuwenauwai, tujash uchinak akiitsuk jakauwai. ³⁰ Nunikmatai tikich yachi jukishkam, uchinak akiitsuk jakauwai. ³¹ Tuja kempatuma nu jukiish, uchinak akiitsuk jakauwai, nuni nuninakua siete aajakajua duka, uchinak akiitsuk jinawajui. ³² Nunikagmatai dui pujus nuwashkam jakauwai. ³³ Siete aajakajua duka ashí nunak nuwatjaju aina duish ¿dekas yana nuweg atinaita atak nantainamunmash? tuidau.

³⁴ Tusa tiagtai Jesús ayaak:

—Ju nugka juig aishmag aidauk nuwenainawai, nuwa aidaushkam aishinainawai, ³⁵ tujash uwemkaju aidau jakau nantajag tuke pujustin aina nuig, makichkish nuwenbauk atsutnai, ³⁶ jatanash jakachagtinai. Ditak angeljai betek agtinai nuigtú Apajuí uchijí agtinai nantakijau asag. ³⁷ Jakau aidau nantajagtina nunak Moisés dekamtijamui zarza kegmunum, Apu Apajuí chichaak: “Witjai Abraham, Isaac, Jacob aina nuna Apajuujinuk”, tiuwa dui. ³⁸ Wagki ¡Apajuik jakau aina nuna Apajuujichui, nigka iwaaku aidaun Apajuujiyai! Apajuí diismak jakau aidaush iwaaku batsatainawai.

³⁹ Aatus timatai maestro chicham umiktinun jintinkagtin aidau:

—Maestroh shiig tiume, tuidau.

⁴⁰ Nuna timatai ataktuk iniaschajui.

*Cristush yana uchijigkita tibau**(Mt. 22.41-46; Mr. 12.35-37)*

⁴¹ Nuniagtai Jesús ditan iniinak:

—¿Wajuk asamtaiya Cristuk Davita uchijiyai tuinawa? ⁴² Tujash David nigki Salmosnum agak:

“Apu mina Apujun chichajak, ekeemsata mina untsujui;

⁴³ nunikamin wi amina shiwajum aidaunak, amina dawemin ikautkatjame”, tiuwai.

⁴⁴ David Apug tawa nuniaish ¿wajak asaya Davita uchijish amainaita? tau.

Jesús escriba aidau pegkegchauji pachisa tibau

(Mt. 23.1-36; Mr. 12.38-40; Lc. 11.37-54)

⁴⁵ Ashí aents antuinamunum jintintaiji aidaun chichajak: ⁴⁶ “Maestro chicham umiktinun jintinkagtin aina nujaig kuitamamkatajum, ditak nugkutai esagman nugkujag yujainak, plazanum igkuntuinakush eme anenjus kumpamjitnume tusag wakejin ainawai, nuninak jega ijuntainum nuniachkush yuamunum wainakush aents eme anentsá ekeemsati tibaunum ekeemsagtatus wakejin ainawai. ⁴⁷ Nuwa waje aidau jeenash atankiag, tsanumainak Apajuin au aujuinakua ukú yujau aina nunin aigpajum. Nunú aidau imá senchi suwimkan jukiagtin ainawai”.

21

Nuwa waje ujunauch ofrenda egkeamu

(Mr. 12.41-44)

¹ Ofrenda egketainum wiakuch aidau kuichkin egkeagtai Jesús diyak wajau, ² nunikmá makichik nuwa waje ujunauch jimag kuichik cobre najanamun egkettaman wainkau. ³ Nunik:

—Dekas tajime, jujú nuwa waje ujunauchia ju ashí tikich aidaun nagkaesau egkeae, ⁴ wagki ashí ofrendan tikich egkeawaja duka ampinun egkeawaje, tujash juka ujunauchitak ni sumaka yumainjiya nunak ashí egkeae, tiuwai.

Jega Apajuí ememattai tsayam atinai tusa Jesús etsegkamu

(Mt. 24.1-2; Mr. 13.1-2)

⁵ Ujumak aents aidau jega Apajuí ememattain pachis, kaya pegkeg nuigtú ofrenda itaamu aidaujui jega shiig iwajamua nuna pachisag chichaidau. Tiagtai Jesús chichajak:

⁶ —Atum ju imatika jegamkamu wainjum juka, tsawan jegatnai nunikmatai makichik kayakesh ekenjamu aina nuiyag juwakchatnai, ashí tsaikbau atinai, tiuwai.

Nagkanbau jegatsaig wantinkagtin aidau

(Mt. 24.3-28; Mr. 13.3-23; Lc. 17.22-24)

⁷ Tutai Jesusan iniinak:

—Maestroh, ¿wajutiya dusha nuniktinaita? ¿Wají aidauk wantintinaita nu dutikam atin jegattak wajataish? tuidau.

⁸ Tama ni ayaak: “Kuitamamkatajum tsanuam aijum, wagki kuashat midiagtinai mina daajun pachisag, nuninak: ‘Witjai Cristunuk, tsawan-tak tikiju wajasé’ wajagtinai, tuinakuish atumek antugkaigpajum.

⁹ Maaninawai tuinamu antitnaitjume, nuigtú pampandayamush aitnai, imaninakuish isharkaigpajum; dekatkawk nunú aidauwá nagkaemagtinai, tujash nagkanbau nu nuniaig achatnai”.

¹⁰ Tusa nuigtushkam: “Nugka yaignum batsamin aidau tikich nuninum batsatujai maaniagtinai, tuja nuninai nugka muunnum batsamin aidaushkam, mai imannumiajajaig maaniagtinai. ¹¹ Senchi uugbau aidaush

agtinai nuigtú yapagtash, jata ishamain utsumaja jinamush ashí yantamnum atinai. Nayaimpinmayashkam shiig ishamain wantinaidaun wainiagtinai.

¹² “Tujash ju ashí wi tajim nu eke jegatsaig, atumnak achigmakag waitkagmasagtinai. Dutijamainak jega ijuntai aidaunum awaintamawag, nui jujamkiag cárceel egkepawag, nui jujamkiag tikich apu aidaunum ejeta-mawag, nui inagkeapakiag gobernador aidaunumsh ejeta-mawag, nuigtú rey aidaunumsh ejeta-mawagtinai mina nemagtin asagmin. ¹³ Tujash nuna dutijamainakuish, mina pachittsajum tikich yupichu ujamainush ajutjami-agtinai. ¹⁴ Nuniakjumesh uyumakaigpa atum ayamjumamainush wajintu tumainaitjume duka; ¹⁵ wagki wi atum chichaktinnak dekamtikattajime, dutikamu asagmin atum chichataik, shiwajum aina nuiyagkesh makichk-ish tujamainchau agtinai. ¹⁶ Tujash atumnak apa aidau, yatsum aidau, pataim aidau, kumpajum aina duke sujupakagtinai, dutijamawagmatai dita maamuk maam agtinai; ¹⁷ nuigtush ashí aents aidau kajegtabiagtinai mina daag pachisjum chichaidau asagmin, ¹⁸ tujash makichkish minai datumtamain ainatsui. ¹⁹ Tujash ebetmamja pujakjumek, uwemjatín ainagme.

²⁰ “Suntag aidau Jerusalegkan tentea au wainkugmek, wamkeap tsai-kgatua tusajum dekaatin atajum. ²¹ Nuadui, Judea batsatutigmek mujá pisagtin atajum; Jerusalén batsatushkam jijnag yaaktanak ukukt-inme; ajanum takaak batsatushkam, yaaktanmag wakitkig waimainchau ainawai. ²² Wagki duka tsawantak suwimak jegau asa imanitnai, ashí agagbaunum tibauwa nu uminu asa. ²³ ¡Wait anentuinajai nunú tsawantin nuwa ejamtin nuigtú uchi amuntsuaku agtina nunak! Wagki ju nugka juig shiig senchi waitiamu atinai nuigtushkam ju aents aina judauk suwimak ishamain atinai. ²⁴ Espadayai maamush agtinai nuigtush achijag ashí tikich nugka aidaunum yajumam agtinai; judiochu aina nu Jerusalegnak tsai-kagtinai, nunisag pujus tsawan dita mamiktugbauwa nuna ejeyagtinai.

Aentsmaga akiinauwa nu minitnuji

(Mt. 24.29-44; Mr. 13.24-37)

²⁵ “Nuniamunum etsa, nantu, yaya aidaunum wainchatai aidau wantiniagtinai. Ashí nugkanmaya aents aidauk anentaimak waitiagtinai nuniak puyatiagtinai nayants shiig senchi tsukatak uutbauji antuidau asag. ²⁶ Imatu asamtai ishamainak jaka iyauke agtinai nugkanum nagkaemaktata nuna anentaimtusag, nuigtú nayaimpinmaya senchigtin aidaush peganaidau asagmatai. ²⁷ Nuniai Aentsmaga akiinau yujagminum pachitkau tsawan wajas niina senchijijai minau wainkatnaitjume. ²⁸ Nunú nagkamna imaniakuig ichichmamjatajum, nuniakjum pagkai diistajum, wagki atum agkanmagatnuk tikijuch wajasú asamtai”, tiuwai.

Numi higuera pachis Jesús augmattsamu

(Mt. 24.32-35; Mr. 13.28-31)

²⁹ Tusa Jesusak junash augmatus: “Higuera diistajum nuniachkugmesh tikich numi aina dukesh. ³⁰ Atumek numi wentsamtuju dukekkuig, wamkeap esat nagkamnattawa tusajum dekau ainagme. ³¹ Nunisjumek, nunú nunidau wainkugmek, Apajuí inamjatnuk tikijuap wajasé tusajum dekaatin atajum.

³² “Dekas tajime, yamai aents aina jusha batsataig ashí uminkatnai. ³³ Nayaimpi-k nugkajaig megkaejatnai, tujash mina chichamjuk umintsukek juwakchatnai.

Umintsajum dakamsatajum tibau

³⁴ “Kuitamamkatajum, pegkegchau unuimatjam shiig anentaimja dekaachmin wajasaim, nampet nuigtú nugkaya aina nu uyumakam wekaetakum, nuniamin pachiaichbau tsawan nagkanbau jegak uwaktamkai, ³⁵ chinamu ujabauwa numamtuk; wagki duka ashí aents nugkaa batsatana nuwi minitnai. ³⁶ Nuadui atumek aneaku ashí tsawantai Apajui aújú pujutajum, nunú ishain nagkaemagtina nu uwemtugminjum nuigtushkam Aentsmaga akiinawuwa nujaiish ijunjamnujum”.

³⁷ Jesusak tsawai jega Apajui ememattainum jintinkagtua, kiitaik Olivosa mujaji tutainum weejakui. ³⁸ Ashí aents aidauk kashikmasag jega Apajui ememattainum weedau, Jesús jintinkagtutai antukagtatus.

22

Jesús maami tusa chicham umigkamu
(Mt. 26.1-5; Mr. 14.1-2; Jn. 11.45-57)

¹ Fiesta pag lewaduragtuchu yutai Pascua tutai jegattak wajai, ² sacerdote apuji aidau, maestro chicham umiktinun jintinkagtin aidaujai, aentsun ishamaidau asag, Jesús wajak maawajik tusag chichaidau.

³ Nuniamunum Jesusa jintintaiji doce aina nuiya Judas, Iscariote tuuta awagmatia nuna Iwanch egkemtuauwai, ⁴ dutikam wee sacerdote apuji aidaujai nuigtú jega Apajui ememattain kuitamin aidaujai chichasajui, wajak Jesusash achikaish sujumainaita nuna pachisag. ⁵ Tama ditak shiig aneasajui, nuninak kuichkin susatatus anagkuawajui. ⁶ Tama Judaschakam ayú tusa wajak Jesusan aents atsamunum sujukajak tusa egau.

Jesús inagnaku Pascuatin yuwamu
(Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷ Pascuatin, pag lewaduragtuchu yuwaku uwig aishmag tsakat maa yutai jegau asantai; ⁸ Jesús, Pedron Juagjai awemak:

—Wetajum, nunikjum Pascua yuwatin umiktajum, tiuwai.

⁹ Tuinam dita aainak:

—¿Tuwi umikti tusamea wakegame? tuidau.

¹⁰ Tiagtai Jesús ayaak:

—Yaakat wayamunum makichik aishmag yumí aimak waketu wainkattagme, nunú pataetukjum jeen wayatta imanui jegatajum, ¹¹ nunikjum jeentin chichagkujum: “Maestro chichagtamak: ¿Tuwi awa tesamu wi mina jintintaig aidaujai Pascua yumainush? tujamae” titajum, ¹² tajumin ni inaktugmastatui yakí tesamu agkan muuntan shiig umikbaun, nuanui umiktajum, tiuwai.

¹³ Tusa tiajam wegag Jesús tibaunak imatiksag wainkaju. Nunikag nui Pascua yuwatnunak umikajui.

Jesús inagnaku Pascua yuwamu
(Mt. 26.20-25; Mr. 14.17-21)

¹⁴ Hora jegamtai, Jesús apóstol aidaujai mesanum jegaantag pekaamsajui. ¹⁵ Nunik chichaak:

—Senchi wakemajai, eke jatsuk ju Pascuan atumjai ijunjan yuwatasan.

¹⁶ Wagki junak ataktuk jutikanuk yuwashtinaitjai; atak Apajui inabauji uminkatna dui yuwatin asan, tiuwai.

¹⁷ Tusa vino copanum aun juki, Apajuin see tusa chichaak:

—Ju uwagtajum ashí atum aidautijum, ¹⁸ dekas tajime, ataktuk jutikanuk uva yumijinak uwagchatnaitjai, Apajuí inamak taatna duwi uwagtin asan, tiuwai.

Jesús, mina anentaimjutsajum yuwakjume juní dutikatajum tibau

(Mt. 26.26-29; Mr. 14.22-25; 1 Co. 11.23-26)

¹⁹ Tusa pagkan juki Apajuin see tii puuká, jintintaiji aidaun susa chichaak:

—Jujú pagka juka mina iyashig atumiin mantamnatta nuna iwainawai, juka tuke jutiksagmeké atin atajum mina anentaimjutsajum.

²⁰ Tusa ashí yuwawagmatai copa juki, chichaak:

—Ju copa juka, mina numpajui yamajam chicham apaamu atumiin ukajetta nuuwai. ²¹ Mina sujutkatta duka ju mesa juwig wijai eketui.

²² Dekaskenmag Aentsmaga akiinawuwa duka, nuniktinai tusa agagbauwa nunisag wetatui, tujash nuna sujuktata nunak wait anentajai, tau.

²³ Tutai ditak pempeentunikiag iniinidau, yaki nunash dutikati tusag.

Yaki dekas imá wagakush atinaita tiagbau

(Mt. 19.28; 20.25-28; 23.11; Mr. 9.34-35; 10.42-45; Lc. 9.46; Jn. 13.12-15)

²⁴ Nuigtushkam jintintaiji aidau jutii ainag juwiyash yaki imá wagakush atinaita tusag pampandayidau. ²⁵ Tudaiyagtai Jesús chichajak: “Rey nugkanum inamaina duka aentsnak ditanua nunin emak waitkainawai,

tuja apu inamaina nunú, pegkegnum yaimin ainaji tumamin ainawai;

²⁶ tujash atumek nuninuk amaitsugme. Duka nunitsuk atum ainajum anuiya eme anentai atag takug, datsauch eme anentsá diishtaya nunin anenmamainai. Inamna dushakam tikichin takagna nunin amainai.

²⁷ Wagki ¿yaita eme anentsá diitaish, mesanum eketa dukaih atsa ajaama dukaih? ¿Mesanum eketa duchaukaih? Nunin aig witjai atumjaig ajamauwa nuninnuk.

²⁸ “Atum ainagme mina pegkegchaunum dekapjuinakuish wijaig ijutkau yujasujum duka. ²⁹ Nuadui wi atumnak apu emajime, mina Apag mina apu etiuwa dutiksanuk, ³⁰ mina inamtaijui mina mesajui yuwakjum uwagminjum tusan, nuniakjum ekeemtainum ekeemsajum Israelan uchiji doce aajakajua nunú wegantu inagtin ainagme”.

Jesús Pedron ugtuktatme tusa ujakbau

(Mt. 26.30-35; Mr. 14.26-31; Jn. 13.36-38)

³¹ Junashkam Jesús tiuwai:

—Simón, Simón Iwanch segamne, atumin trigo pegatia numamtuk awatamkagtatus; ³² tujash wi aminak segatmagme, dekaskeapi tabaugmia nunú mijakaim tusan. Ame minai ataktú anentaimjam, yatsum aidaush minaiag ebetmamjatneme tusan yaigminum tau asan. ³³ Tama ni ayaak:

—Apuh, wika umintsan wekaejai cárcel jujamainakuish nuniachkush mantamainakuish amijai jakatasan, tau.

³⁴ Tutai Jesús ayaak:

—Pedro, yamai kashia juik atash eke shinatsaig, Jesusnak waintsamjai tusam kampatumá ugtuktatme, tiuwai.

Wají egkea jutai, kuichik egkea jutai, espadajai tibau

³⁵ Tusa idaiyak:

—Atumin wi ishinkun, wají egkea jutaigmekesh, kuichik egketaigkesh, sapatkesh jukigpajum tiuwaitjim duish, ¿makichkish atsumamush ajut-jamsauk aina?

Tama dita aiinak:

—Atsa, tiajui.

³⁶ Tiagtai Jesús ayaak:

—Tujash yamaik waji egkea jutaigmesh, kuichik egketaigmeshkam jukitajum, espadajum atsutgtamkuig, jaanchjum sujakum makichik sumak-tajum. ³⁷ Dekas tajime, agagbaunum tawa duka minai uminkattawai: “Aents pegkegchaujai betek diyam atinai”, tusa mina pachittsa agagbauwa duka uminui, tau.

³⁸ Tutai dita aiinak:

—Apuh, jui jimag espada ajutjamui, tiajui.

Tiagtai Jesuschakam:

—Maake, tiuwai.

Jesús Getsemani pujusá Apajuí ausamu
(Mt. 26.36-46; Mr. 14.32-42)

³⁹ Tusa Jesús yaaktanmaya jinki Olivosan mujajin weuwai, nui tuke weu asa, nunitai jintintaiji aidaushkam ashinkajui. ⁴⁰ Nui jegantá jintintaiji aidaun chichajak:

—Jui pujusjum Apajuí ausatajum, pegkegchaunum iyawaijum, tau.

⁴¹ Tusa ukuak nigka kaya nagkimam iyauwama imaan atushat kanaká, tikishmag pujus Apajuin aujak: ⁴² “Apawah, amesh wakegakmek, wi waitmainaitag nu agkanmitkajuata; tujash wi wakegamu ahati, ame wakegamu ati”, tiuwai.

⁴³ Nuniai makichik ángel nayaimpinmaya wantintuku anentain ichichtugtatus. ⁴⁴ Jesusak ni senchi waittsatnuji jegau asantai anentaimak waitiau asa, nuní senchi Apajuin auju, imaniau asantai segagbaujig numpa apu aidau nugká kitaama numamtuk wajaidau.

⁴⁵ Jesús Apajuí augbaun inagnak wajakí, jintintaiji batsakbaun jegantun diikmá, wake besemag dekapenak ane anentaimainakua kajig batsatun wainak:

⁴⁶ —¿Wagka kajiish batsatjume? Nantakjum Apajuí ausatajum pegkegchaunum iyawaijum, tiuwai.

Jesús achiká jukimu
(Mt. 26.47-56; Mr. 14.43-52; Jn. 18.2-11)

⁴⁷ Tusa Jesús eke chichaak waji, kuashat aents kaunawaju, nuniamunum ni jintintaiji doce aina nuiya Judas daagtin eemak minau, nunú jegantau Jesusan kugkuastatus; ⁴⁸ Nunitai Jesús chichajak:

—Judasah, ¿Aentsmaga akiinawau duka kugkuasmeap sujame? tiuwai.

⁴⁹ Jesusjai yujaidauk, nu nunidaun wainkag:

—¿Apuh, espadajaig maaniattag? tuidau.

⁵⁰ Tuinai dita aina nuiya makichik sumo sacerdote apuji inaken espadayai kuwishí utsujin tsupigkauwai. ⁵¹ Dutiktai Jesús chichajak:

—Maake, idaisatajum.

Tusa kuwishí tsupigkamun juki ataktú anujtuk pegkeg awajtusui. ⁵² Dutika sacerdote apuji aidau, jega Apajuí ememattain kuitamin aidau apuji nuigtú judío apu aidaujai niina achiktatus kaunau aidau Jesús chichajak:

—¿Wagka kasa achiktasa utugmaina imanikjumesh, espada aidau, numi aidau tinamdaekagmesh tantaugme? ⁵³ Wi kashí kashinig jega Apajuí ememattainum atumjai ijunnuweg duikish jutikagmek achigchau

agmaugme. Tujash juka tsawantak atumdauwai, Iwanch inapainakui juniajum juka, tiuwai.

Pedro Jesusnak wainchaujai tusa uukbau
(Mt. 26.57-58; Mr. 14.53-54; Jn. 18.12-18, 25-27)

⁵⁴ Dutikawag Jesusa achiká jukiag sumo sacerdote jeen ejegawaju, dutikiagtai Pedroskham ikaag patataetus wegau. ⁵⁵ Nuwi, jegá agaa-jin jii ikapajag pekagbaunum, Pedroskham ditajai anamak ekeemsau. ⁵⁶ Nunitaman makichik nuwa inak, jinum ekeematman wainak, dii wajatu, nunik:

—Jusha Jesusjai wekaemajama, tau.

⁵⁷ Tama Pedro wainchauwa nunin chichaak:

—Nuwah, wika wainchaujai, tau.

⁵⁸ Machik asag, tikitchakam Pedron wainak:

—Amesh Jesusa jintintaijitamjama, tau.

Tama Pedro ayaak:

—Atsa, duchauwaitjai, tau.

⁵⁹ Tusa makichik hora tumain nagkaemai, tikitchakam iniak:

—Dekaskenum jusha niijaimpap wekaenaita, wagki niishkam galilean-maya asa, tuidau.

⁶⁰ Tiagtai Pedro chichaak:

Wika atum tajum nunak dekatsjai.

Tusa chichaak wajai, atash shinukui. ⁶¹ Nuniai Jesús ayampá Pedron diisú, dutikam Pedroskham adeaju Apu Jesús chichajak: “Atash eke shinatsaig kampatumá ugtuktinaitme”, tibauwa nuna. ⁶² Nunik Pedrok nuiya jiinki, senchi kaké buutiuiwai.

Apu aidau Jesús maatajum tusa inamjamu
(Mt. 26.59-68; Mr. 14.5-65; Jn. 18.19-24)

⁶³ Aents Jesusan kuitamak ijunaidauk niina dushikinak awatuidau.

⁶⁴ Dutikainak jiiin epetkag iniinak:

—Dekakia ¿ya awatamne? tuidau.

⁶⁵ Tusag nuigtú kuashat pegkegchaun chichajuidau.

⁶⁶ Nunik tsawagmatai, judío apuji aidau, sacerdote apuji aidau, maestro chicham umiktinun jintinkagtin aidaujai ijunjag Jesusan jukiag Sanedrín* ejegawag, iniinak:

⁶⁷ —¿Amekaitam Cristo? tukagtita, tuidau.

Tama Jesús ayaak:

—Wi nunuwaitjai takuish, dekaskeapi tujutchattagme, ⁶⁸ tuja wi in-inkuish aigmaitugme, nuigtush akupjumaitugme. ⁶⁹ Tujash yamaiya jui nagkamas Aentsmaga akiinawau duka, Apajuí ashí senchigtina nuna untsujin ekeemsattawai, tiuwai.

⁷⁰ Tutai ashí pampanjag iniinak:

—¿Untsu amekaitam Apajuí Uchijim? Tuidau.

Tuinam Jesús ayaak:

—Dekaske atum tajume, tiuwai.

⁷¹ Nuna timatai:

—¿Nuigtush ya etsegtukti tusaya atsumaji? ii dekas ni chichaamu antugkagjamah, tuidau.

* 22:66 “Sanedrín” tawa duka diistá Mt. 5.22.

23

*Jesús Pilatowai ejegamu**(Mt. 27.1-2, 11-14; Mr. 15.1-5; Jn. 18.28-38)*

¹ Ashí aents aidauk wajajag, Jesusan jukiag Pilato pujamunum ejegawaju. ² Dutikawag Jesusa tsanumjuinak:

—Jujú aents jutii nugkeen chichaman tsuwapak wekaegas: —Witjai Rey Cristunuk; tusa, Roma apujig akimait sui, tu wekagu asamtai jui itaaji, tuidau.

³ Tiagtai Pilato iniak:

—¿Amekaitam Rey judío aidaunu? tau.

Tama Jesús ayaak:

—Duka ame tujutme, tiuwai.

⁴ Timatai sacerdote apuji, nuigtú aents tuwakú aina nuna Pilato chichajak:

—Wika ju aents bakumamainjinak makichkish waittsujai, tau.

⁵ Tutai nuní nagkaemasag:

—Aanka aents aidaun jintintak dapamkagtú wekaenuwe. Nuniak Galilea nagkamas jintí jintinkagtakua juwish Judeanmash dutiksag dapamkagtú wekaewai, awajuidau.

Jesús Herodesai ejegamu

⁶ Nu tabaun antuk, Pilato iniimu, ju aents galileanmayachukai tusa.

⁷ Jesusak Herodes inama nuiyayai tabaun dekaa, Herodesan awetiuwai, niishkam nunú tsawanting Jerusalén taa pujau asamtai. ⁸ Herodes Jesusan wainak shiig aneasu, kuashat tsawantai niina wainkatatus wakegá pujú asa, niina pachis chichaidau antau asa, nunik Jesusan wainchatai iwainakta titatus. ⁹ Nuniau asa kuashat iniasui, tujash Jesusak makichkish aikchauwai. ¹⁰ Nunitai nui sacerdote apuji, maestro chicham umiktinun jintinkagtin aidaujai ijunu wainak senchi tsanumjuidau. ¹¹ Herodeschakam ni suntaji aidaujai, Jesusan dushikinak, jaanch shiig iwajamun anugkug, ataktú Pilato pujamunum awemauwai. ¹² Yaunchkek Herodesak Pilatojai shiwag pujuwaitak, nunú tsawanta duik, nuna dutikainak kumpamdayawajui.

¹³ Dutikawagmatai Pilato sacerdote apuji aidaun, gobernante aidaun nuigtú tikich aents aidaun ijumjau. ¹⁴ Dutika chichajak:

—Atum ju aents itagtuamugme, aentsun dapampawai tusajum; tujash wi atumi eemtimin iniasjai, dutikaknush dekajuashjai atum nuninai tajum nui bakumamainnak. ¹⁵ Nunisag Herodeschakam dekajuache, dutikau asa awagkine; diistajum, makichkish ni mantamnamainnak pegkegchaunak takaschae. ¹⁶ Asutiatajum titajai, dutikan akupkatjai, tiuwai.

¹⁷ Nu fiestatinig makichik aents tuke jiitai aajakui.

¹⁸ Tutai ashí aents aidauk betek pampaajag:

—¡Anka mantamnati, Barrabás akupkata! wajaidau.

¹⁹ Barrabasnak cárcel egkeawaju yaaktanum pampandayamunum aentsun mau asamtai. ²⁰ Pilato Jesusan akupkata tau asa, ataktú awentsag ditan chichajak: —Dekas Jesusan akupkatjai, tau.

²¹ Pilato tutai nuní senchi untsumkag:

—¡Achigtá! ¡Achigtá! wajaidau.

²² Imatiagtai kumpatuma juwishkam Pilato chichajak:

—¿Tujash waji pegkegchauna takasé jusha? wika ni pegkegchau takasbaunum bakumaku mantamnamainjinak dekagchau asan, ayatak asutiawagmatai jiiiktajai, tau.

²³ Tutaishkam nuní senchi untsumkag, achinjati wajainak Pilatonak depetkijai. ²⁴ Imatiagtai Pilatosham, dita sumaina dutiksag uminkati, tiuwai, ²⁵ dutikak dita aentsun jiiinkiti tusa segaimana nuna jiiikiuwai, pampandayamunum aentsun maamtaí cárcel egkeamua nuna, dutikak Jesusnak dita wakegaina dutiksag umiktinme tusa sujuk idaisauwai.

Jesús achigbau

(Mt. 27.32-44; Mr. 15.21-32; Jn. 19.17-27)

²⁶ Dutikam Jesusan achigtatus juki emainak, cirenenmaya aents Simón daagtin ajajinia minittaman awantag, cruzan ayankajui.

Dutikam Jesús eemak wetai, ukuunum yanas wegau.

²⁷ Jesusan kuashat aents nemajus ashinainamunum, nuwa aidaushkam imanisag ukunum saegas, untsu untsumas buu buutuinakua ashinaidau.

²⁸ Imatiagtai Jesús nuwa aidaun ayampatua chichajak:

—Jerusalegnunia nuwa aidauwah, minak eganjaipajum, atumek egaamakjum uchijum anentaimtusjumes buuttajum. ²⁹ Wagki tsawan jegagtamiagtinai, nunikmatai: “Nuwa kaga aidauk, uchinash jujegchau, muntsujinash amuntsuachu aidauk yajau aneas batsatainatsupí wajatin ainagme”. ³⁰ Nuniakjum muja chichagkujum: “¡Yutujatuata!” takujum, mujauch aidaush: Uujatkata, wajatin ainagme. ³¹ Wi tudau takaschau aig, imatijuawag waitkajuinaish, ¿Apajuish wagkag tudau aidaunash waitkaschati? tiuwai.

³² Nuigtushkam jimag magkagtinun jukiajui, Jesusjai achijag maawag-tatus. ³³ Nunikag Gólgota tutainum egegawag, Jesusan achijajui nuigtú magkagtin aidaunashkam, dutikawag makichik untsugnum awajuinak tikichnak menajin awajawajui. ³⁴ Dutikam Jesús chichaak: “Apawah, tsagkujata, wagki dita jutikaina nunak dekainatsui”, tau.

Nuniai suntag aidauk, yana kayajig jiiinkit nunú Jesusa jaanchjinak jukiti tusag wasugkamaidau. ³⁵ Nuniamunum aents aidauk dii ijuntuinai, gobernante aidau Jesusan dushikinak:

—Tikichnak uwemtiknuwe, yamai niishkam nigki uwemjati, ju dekas Cristo, Apajuí etegkamuitkug, tuidau.

³⁶ Nunisag suntag aidaushkam jegaantag dushikinak, vino chujuinun aagtatus jegantag, ³⁷ chichajuinak:

—Ame judío Reyjiyaitkumek, amek uwemjakia, awajuidau.

³⁸ Tuja ni chaichenchakam griego, latín, hebreo chicham aidauwai: “JUUWAI REY JUDÍO AIDAUNUK”, tusag agatjajui.

Magkagtin aidau chichakbau

(Mt. 27.45-56; Jn. 19.28-30)

³⁹ Jimag magkagtin achijam deta nuiya makichik Jesusan pegkegchau chichajak:

—Ame dekas Cristuitkumek, amek uwemjam, aaní nematsuk amea akaikim, jutiish uwemtikagtuja, tau.

⁴⁰ Tutai nui tikich detau aiká jiyak:

—¿Amek Apajuik ishamatsmek, amesh niijai betek suwimak juway-atkumesh? ⁴¹ Jutiik dekaskenum waituinaji, ii nunikbaunum suwimak juwau asá; tujash juka makichkish pegkegchau takasbauk atsujui, tau.

⁴² Tusa Jesusan chichajak:

—Jesusah, minash ame apu wajasam inamjattam nuniakmesh kaji-matjukipa, tiuwai.

⁴³ Tutai Jesús ayaak:

—Dekas tajame, yamaiya juik amek wijai paraíso pujuttame, tiuwai.

Jesús jakamu

(Mt. 27.45-56; Mr. 15.33-41; Jn. 19.28-30)

⁴⁴ Etsa tutupit ai nagkamas, a las tres wegaish ashí nugkanum suwe wajas asauwai. ⁴⁵ Etsa suwe wajas ai, jega Apajuí ememattainum jaanch ejaamu ichiinak jimaituk kanakui. ⁴⁶ Nuniai Jesús senchi untsumak:

—¡Apawah, amina uwegmin mina wakanjunak idaijai! tau. Nuna tusa jakauwai.

⁴⁷ Nunik jakamtai Capitán wainak, Apajuin emematak:

—Dekas ju aentsua júka pegkegchaukesh atsujui, tau.

⁴⁸ Ashí aents nui ijunaidauk, nu nunikbaun wainkag, waketuinak, wake besemag dekapenak detsepenak awatkiag weedau. ⁴⁹ Nuninai ashí Jesusa waintaiji aidauk, nuwa Galilea nagkamas saetusag yujajakú aidaushkam, ikaag ijunas Jesusan dii ijuntuidau.

Jesús ukusbau

(Mt. 27.57-61; Mr. 15.42-47; Jn. 19.38-42)

⁵⁰ Judeanum yaakat Arimatea tutai awa nuiya José daagtin, niishkam apu chichaman inagnau aina nuiya, aents pegkeg nuigtushkam pegkeg aidaunak takaak pujuwa nu, ⁵¹ Apajuí inamjatnujin dakak pujú asa, Jesusan maata tiagtaish dakitjauwa nu ⁵² Pilato jegajua Jesusa iyashin segauwai. ⁵³ Dutika cruznumian akakí sabanayai pempeag, kaya waa muun tai umikbau, makichik aentskesh ukuschamunum egkeauwai.

⁵⁴ Nunú tsawantak, tsawan ayamtai atin asamtai, ashí umintai ajakui.

⁵⁵ Nuwa aidau Galilea nagkamas Jesusa nemajus yujasaju aidaushkam, José wetai pataetukaju, nunik wainkaju Jesusa iyashin wajuk ukusaje nuna, ⁵⁶ nunik waketug jegá kaunkag, Jesusa iyashí ukatkatnun kugkuin shiig pegkeg aidaun najanawaju, dutikawag tsawan ayamtai tsawaju asamtai, ayamjaju chicham umiktinnun tawa nunisag.

24

Jesús nantakbau

(Mt. 28.1-10; Mr. 16.1-8; Jn. 20.1-10)

¹ Tumig tsawagmatai shiig kashikmasag nuwa aidau kugkuin shiig pegkeg najanamujin jukiag, Jesús ukusbaunum wegaju. ² Nunik jegakmag ukumatai kaya muuntai epenbauk ekemak atatman wainkaju; ³ nunik utuwaju, tujash Apu Jesusa iyashinak wainkachajui. ⁴ Nunikag puyatkg, wajukamki tusag iniininak wajainai, jimag aents jaanch winchamtinun nugkuaju ditai ayaumas wajaantaju. ⁵ Nuna wainkag senchi ishamkag, nugká tsuntsumá ijunainai chichajak:

—¿Wagka iwaaku pujaush jakau ukutainmash egagme? ⁶ Juig atsawai, nantakne. Adeagtajum ni Galilea pujus chichaak: ⁷ “Aentsmaga akiinauwa nunak, aents tudaugtin aidaunum sujukagtatui dutikawagmatai achijag maawagtatui, dutikam kampakum tsawanta jui nantaktatui”, tujabiauwa nu.

⁸ Tama ditashkam Jesús chichaak nuniktatjai tibauwa nuna adeajaju.

⁹ Nunik ukusbaunmaya waketug jegawag, ashí dita wainkamujinak niina

jintintaiji once juwakajua nuna ujakajui nuigtú tikich aidaunashkam. ¹⁰ Apóstol aidaun ujakajua duka: María magdalanmaya, Juana, tikich María Jacobo dukujiya nunú, nuigtú tikich nuwa aidau aajakajui. ¹¹ Nuwa tusa etsejiagtaish, wainak tu yujatsuash tusag, ditak dekaskeapi tichajui.

¹² Nuniagtai Pedrok jiinkug tupi tupikakua Jesús ukusbaunum jegantá, tekená diikmá imá sabananak wainkauwai, nunik anentai jegacha wajakamki tusa ane anentaimkawa jegá wakitkiuwai.

Emaús wedaun wantintukbau
(Mr. 16.12-13)

¹³ Nunú tsawantinig, Jesusa jintintaiji aina nuiya jimag, yaakat yaijuch Emaús tutainum wedau, Jerusalén juwaki once kilómetro awa nui jegawagtatus. ¹⁴ Nunik weenak ashí Jesús dutikamun pachisag chichai chichainakua weedau. ¹⁵ Nuna tuinak ditak tudayinai, Jesuschakam amainag ditajai ijunag ashinu. ¹⁶ Tujash ditak, wainainayatkush Jesusapita tuinachu. ¹⁷ Nudiagtai Jesús iniak:

—¿Jintá wesagmesh, wají pachisjumea chichamugme? Tau. Tama wake besekag ijuntsajui.

¹⁸ Tutai Cleofas daagtin ayaak:

—¿Imá amekak ashí wají Jerusalén nagkaemaki nunú dekatum? Tau.

¹⁹ Tama ni iniak:

—¿Wají nagkaemakne? Tau.

Tutai: —Jesús nazaretnumia profeta aayi, takaamujish tuja chichamesh senchigtin Apajuí eemtin nuigtú ashí aents aidaunmashkam; ²⁰ nuna, sacerdote apuji aidau nuigtú jutii gobernanteji aidaujai sujukagmae achijag maatnume tusa. ²¹ Tujash jutiiik, niimpap Apu wajas Israel aidautinak agkanmitkagmattaji tusa dakauji. Nuna dutikawaja duka kauptum tsawan nagkaemawai. ²² Nuniamunum ujumak nuwa jutiijai yujau aidau kashikmas Jesús ukusbaunum wegaju, anentai jegamainchaun, ²³ Jesusa iyashin wainkachag, waketug kaunawag, ángel aidau wainkamji nunika ajin, Jesusak iwaaku pujawai tujamaji tusa etsejiagtai, ²⁴ ujumak jutii kumpají aidau Jesús ukusbaunum wegag, nuwa tiaja nunak imatiksag wainkaje, tujash Jesusnak wainkachaje, tuidau.

²⁵ Tiagtai Jesús ayaak:

—iWagka anentainkachush ainagme nuigtush dekaskeapi tumainchawk dekapeajum ashí profeta tiajua duka! ²⁶ ¿Atumek dekatsjumeak Cristuk niina imanjiya nuwig eke waitsuk waittsatna duka?

²⁷ Tusa, Moisés agagbauwa nui nagkamas nuigtú ashí profeta aidau, ashí agagbaunum niina pachis tawa nuna ujakajui.

²⁸ Nunik yaakat yaijuch Emaús jegamunum, Jesusak nagkaemaki wegau, nuní atushat wegau wajukmaina numamtuk. ²⁹ Nunitai dita chichajuinak:

—Jui jutiijai juwakta, kiyawai, tuidau.

Tiagtai Jesuschakam wayauwai ditajai juwaktatus. ³⁰ Nunik ditajai mesanum jegantá pekagbaunum, pagkan juki Apajuin see tusa puukú, dutika susaju. ³¹ Nuna dutiktai dekawajui Jesusapi tusag, nuniaig nigka megkaekauwai. ³² Nunikmatai ditak pempeentunikiag:

—¿Wagkaik jintá minis Apajuí chichameg nuní awai tusa ujakajui, shiig aneasua minimag duwish anentaimjaish diischamji? tudayinai.

³³ Tusag tamawaik jijnag Jerusalén wakitkajui, nunik jegakmag once aina nu nuigtú tikich aidaujai ijunag batsatun wainkajui. ³⁴ Nunik kaunamtai ujinak:

—Dekas Apu Jesusak nantakne, nunik Simogkan wantintuke, tuidau.

³⁵ Tama ditashkam jintá wesá wainkamun nuigtú pag puuká susam Jesusapi tusa dekamujin pachis ujaidau.

Jesús jintintaiji aidau wantintukbau

(Mt. 28.16-20; Mr. 16.14-18; Jn. 20.19-23; Tak. 1.4-9)

³⁶ Nuna pachisag chichainak batsatai, Jesús ditá ejapen wajantá, chichaak: —Agkan pujamu atumnash ajutjamti, tau.

³⁷ Tama ditak senchi ishamkaju, wakan waintsujiash tusag. ³⁸ Nuniagtai ditan chichajak:

—¿Wagka imaanikjumesh ishamagme? ¿Wagka utujimsagmesh anen-taimjutjume? ³⁹ Mina uweg aidau diistajum nuigtú daweg aina dushakam, witjai, achigká diigsatajum; makichik wakanik nejeesh ukunchí aidaukesh atsugnai, mina ajutu wainjum junikag.

⁴⁰ Nuna tii niina uwejin, dawenmashkam achiamu aajakua nuna ditan inaktusajui. ⁴¹ Dutikam wainkag shiig aneenayatak dekas nantakneapi tumainchau dekapiagtai:

—¿Yumainuk atsugtamainawak? tau.

⁴² Tutai makichik namak achijuamun kupik susaju, ⁴³ dutikam niishkam juki ditá eemtin yuwauwai. ⁴⁴ Nunik chichaak: Juna pachisan atumjai pujubiag duwi, Moisés chicham umiktin agagbaunum, profeta aidau agajajua nuwish nuigtú salmosnum ashí mina pachitus agagbauwa duka uminkattawai tusan ujayajime, tiuwai.

⁴⁵ Nuna aatus taku Apajuí chichamen agagbauwa nuna shiig dekamtikawajui. ⁴⁶ Nuna ti nuigtú chichaak: —Aaja agagbauwai,

Cristuk jakatnai, nunik kampatum tsawanta jui nantaktinai, ⁴⁷ nunikmatai niina daajin pachis chichagkagtuinak ashí nugkanmaya aidaush anentai yapajiawag, tudaujin tsagkugnagtinme tusag, duka Jerusalén nagkam-sajum ⁴⁸ atum ainagme ju ashí wainkaujum nunú etsejatin aidautigmek.

⁴⁹ Tujash yamaikik Jerusalegkak juwaktajum, nuniagmin wi mina Apag Wakaní Pegkejin anagtamawajua nuna awetitjime, nunikmatai nayaimpinmaya senchi jukitajum, tiuwai.

Jesús nayaimpinum wakitkimu

(Mr. 16.19-20; Tak. 1.9-14)

⁵⁰ Nunik Jesusak jintintaiji aidaun yajuak yaakta ukumtiki Betania ejegawajui, nunik nui Jesús uwejin takui: Apajuí yaimpakti, tiuwai. ⁵¹ Tusa Apajuí yaimpaktinme tamawaik yakí takuniuwai, nunik nayaimpinum wakitkiuwai. ⁵² Nunikmatai ememati ukuinak, shiig aneasag Jerusalén waketjajui. ⁵³ Nunikag jega Apajuí ememattainum kashí kashinig tuke ijuntsagké aidau Apajuin emematuinak.

Yamajam chicham Juan agagbau

Cristo chicham dekaskea nunak itauwai

1 Yama nagkamting Chichamak aajakui, nu Chichama duka Apajuijai aajakui, nuigtush Chichama duke Apajui aajakui. 2 Nagkamtingish nigka Apajuijai pujujakui. 3 Ashí waji aidauk ni najankamu ainawai, nunin asa makichkish ni najanachbauk atsawai. 4 Niinig pujutash aajakui, nunú pujuta nu aentsun tsaaptinji aajakui. 5 Nu tsaaptin suwe aidaunak tsaaptin awajsauwai, imatikamu asa suwea dushakam tsaptinnak depetkachajui.

6 Aajakui makichik aents Apajui awemamu, Juan daagtin, 7 nigka tsaaptinun pachis etsegtukti tibau aajakui, nunú etsegtai ashí aents aidauk dekaskeapi titinme tabaunum. 8 Juagkak tsaaptina nu aajakchauwai; ayatak tsaaptina nuna etsegtukti tusa awemamu aajakui. 9 Nu dekas tsaaptin ashí aentsun tsaapmitkauwa nu, wamak ju nugka jui taatin asantai.

10 Nunú tsaaptinuk nugká akiinawwai, nuigtush nugkak ni najanamu aajakui; tujash nugkanmaya aidauk, juwapita Apajui awemamuk tusag dekachaju ainawai. 11 Niinu aidau batsatbaunum tauwai, tujash niinu aina duka dakitjajui. 12 Dutikawagmataish ya aidauwa chichaman etsegtai shiig wakejus antugkag dekaskeapi tiaje, nu aidaunak Apajui uchiji emakui, 13 nunin asag Apajui uchiji ainawai, aents wakegamunum akiintai aina nunin ainatsui, Apajuijai akiinkaju asag.

14 Nunú Chichama duka Aentsmaga akiina jutijai wajumchik mijan pujusui. Nuna iman jig jutio wainkabiaji, Apajui Uchiji makichkiuchia nu, wait anenkagtamui nuigtú dekaskejishkam. 15 Juan Jesusan pachis etsegtak: “Juuwai wi niina pachisan: Mina ukujui minitta nuuwai mina nagkaetasuk, wagki nigka wisha atsaig pujujakú asa” timayag duka, tiuwai.

16 Wagki ashí niina imanjiya nuyag pegkeg pujutak jukiuwaitji, shiig kuashat anentag wait anenjamjauwa dui. 17 Apajuik chicham umiktina nunak Moisesai sujamsau aajakui, tujash wait anenkagtamui nuigtú dekaskea duka Jesucristui jukiuwaitji. 18 Apajuinak makichik aentskesh tuke wainkachu ainawai, ni Uchiji makichkiuch Apajijai ijunag pujuwa nunú dekamtijamawwai.

Juan Yamijatin Jesucristo pachisa etsegtukbau (Mt. 3.11-12; Mr. 1.7-8; Lc. 3.15-17)

19 Juna Juan etsegkauwai, judío apuji aidau Jerusalén batsamsag sacerdote aidaun, levita aidaujai Juangkan iniasti niish yakita tusag ishikajua dui. 20 Nu aidau tusá iniam Juan ugmamtsuk etsegtumak:

—Wika Cristuchitjai, tiuwai.

21 Tutai ataktú iniinak:

—¿Tujash amesh yaitpa? ¿Eliaskaitam? tuidau.

Tama: Duchauwaitjai, tau. Tutai: —¿Profeta taatnai tibauwa dukaitam? Tamashkam:

—Atsa, tiuwai.

22 Tutai:

—¿Tujash amesh yaitpa? jutii awetabiagma nu ujakta tau asá dekatasa taji, ¿amesh yaitjai tumame?

²³ Tama Juan ayaak:

—Wika makichik chicham uwegshunum untsubau antuekatnai: “Apu minitin jinta tutupit dakuektajum”, titinai tusa profeta Isaías tiuwa nuuwaitjai, tau.

²⁴ Fariseo aidau ujumak aents aidaun Juagkan iniasti tusa awemamu aidau, ²⁵ iniinak: —Ame Cristuchu, Eliaschau, profetakesh achayatkumesh ¿wagka aentsush yamiame? tuidau.

²⁶ Tiagtai Juan ayaak:

—Wika yumí yamijatjai, tujash atum ainajum anuiya awai makichik, duka atumek waintsugme, ²⁷ nigka duik nagkamas tuke pujuwaitak mina ukujui patatkawai. Wika niya ibauchu asan ni sapatji jigkamunakesh atitmaitsujai, tiuwai.

²⁸ Ashí jujú aina duka Betábara Jordagka amain, Juan yamijatak pujamunum nunikui.

Apajuí Uwigji pachisa tibau

²⁹ Kashinia dui, Juan Jesusan wainkauwai, niina adijkatatus minittaman, nunik: “Diistajum, auwai Apajuí Uwigji,* ashí aents nugkanmaya aidau tudaujin akikmak mantamnatta nunú. ³⁰ Juuwai wi niina pachisan: ‘Mina ukujui makichik aents minitta nuuwai mina nagkaetasu, wagki nigka wisha atsaig tuke pujujakú asa’, timag duka. ³¹ Wikishkam niinash yaita nunak dekachiatkun yumí yamijatmajai, Israel aents aidauk ni wantintai dekaatnume tau asan”, tiuwai.

³² Junashkam Juan: “Wakaní Pegkeji nayaimpinmaya pauma nunin wajas akaiki, Jesusai ekeematman wainkabiajai tusa etsegkauwai.

³³ Nuniakuish eke dekachbaijai niish yaita nunak; tujash yumí yamijatjata tusa awetiuwa nu chichagtak: ‘Wakaní Pegkeji akaiki yayai ekeemu wainkattame, nunú atatuí Wakaní Pegkejijai yamijatjatnuk’, tujutmayi.

³⁴ Wika nuna wainkau asan, nigka Apajuí Uchijiyai tusan etsegtajai”, tiuwai.

Nagkamchak Jesusa jintintaiji aajakaju

³⁵ Kashinia dui, Juan ataktú jimag jintintaijjai wai, ³⁶ Jesús nagkae-mattaman wainak: —Diistajum, auwai Apajuí Uwigji, tau.

³⁷ Tutai jimag Juagká jintintai aidau antukag, Jesusan nemagkajui.

³⁸ Nunik miniagtatman Jesús ukujin ayampá diikmá wainak:

—¿Wají atumesh egagme? tau.

Tutai dita aiinak:

—Rabí (nunak maestro taku tawai), ¿tuwí pujame? tuidau.

³⁹ Tiagtai Jesús ayaak:

—Minitajum nunikjum wainkatajum, tau.

Tima ditashkam wegag ni pujamujin wainkajui, nunikag nuig juwakajui, a las cuatro tumain wegau asamtai.

⁴⁰ Jimaja nuiya Juan tabaun antuk Jesusan nemagkajua duka Andrés, Simón Pedro yachiya nu aajakui. ⁴¹ Andrés Jesusan wainak dekatkauk ni yachi Simogkan wejí:

—Yamaik Mesías wainkaji, tusa ujakui. (“Mesías” tawa nunak “Cristo” taku tawai.)

* **1:29** Judío aidauk ditá tudaujin tsagkugnagasag, tuké uwijá uchijin aishmagkun maa apejakú ainawai. Juan Jesusan pachis: “Juuwai dekas Apajuí Uwigji” tiuwa nunak, jutii tudaujin mantamnatin asamtai tiuwai.

⁴² Tusa Simogkan juki Jesús pujamunum ejegauwai, dutikamtai Jesús wainak, chichajak:

—Amek Simogkaitme, Juagká† uchijí, tujash yamaik amek Cefas‡ atatme, tiuwai. (Cefas tawa nunak Pedro taku tawai.)

⁴³ Kashinia dui, Jesús Galilea wekamá Felipen igkug, chichajak:

—Nemagtukta, tiuwai.

⁴⁴ Felipek betsaidanmaya, Andrés Pedro aina nuna yaaktajiya nuyag niish aajakui. ⁴⁵ Felipeshkam Natanaelan ujaktatus weuwai, nunik: —Jesús nazaretnumia, José uchijí wainkamji, niina pachis Moisés chicham umiktinum agajua nu, nuigtú profeta aidaush dutiksag agajajua nu, tau.

⁴⁶ Tama Natanael chichaak:

—¿Nazaretnumias makichik pegkejash jijnmainkaih? tau.

Tutai Felipe ayaak:

—Dekas wemí amesh wainkamnum, tiuwai.

⁴⁷ Tima Natanael Jesús pujamunum jegantatus wetatman ikaag wainak:

—Ju mina juuwai dekaskenum Israel aents, tsanumtanash tsanumchauwa nu, tau.

⁴⁸ Tama Natanael ayaak:

—¿Tuwí minash waitkamume? tau.

Tutai Jesús ayaak:

—Eke Felipe tajutjama ujpatsaig, higuera wakentin pujamin wainkamjame, tiuwai.

⁴⁹ Tama Natanael ayaak:

—Rabí, amek Apajuí Uchijiyaitme, ametme Rey Israeldau, tau.

⁵⁰ Tama Jesús ayaak:

—¿Higuera wakentin pujamin wainkamjame taja duikik, dekaskeapi tujutam? juna nagkaesau wají aidau wainkattame.

⁵¹ Tusa nuigtú chichaak:

—Dekas tajime, Atumek nayaim ujanmatai Apajuinu ángel aidau Aentsmaga akiinauwa nuwi taa waketuidau wainkatin ainagme, tiuwai.

2

Caná nuwenbaunum Jesús yumin vino emamu

¹ Kampatum tsawan asa nuwenbau asauwai Caná Galilea nugkanum awa nui. Jesusa dukujish nui pujau. ² Nunú nuwenbaunum Jesunashkam jintintaiji aidaujai ipawajui, dutikamu asa weajui. ³ Nuniamunum vino abuekamtai Jesusan, dukují chichajak:

—Vinsonak amukaje, tau.

⁴ Tama Jesús ayaak:

—Dukuwah, ¿wagka dusha minash tujutme? Wi takamainjuk eke mina tsawanjuk jegatsui, tau.

⁵ Tutai ajaamak yujaun María chichajak:

—Ni tujamtata duka imatiksagmek dutikatajum, tiuwai.

† **1:42** “Juan” tawa nunak Simón Pedro apajin tawai tikich versión aina nuig, nuna imá Reina Valeraya duke Jonás tawai. Mt. 16.17 Jonás tawai Simón Pedro apajin. Nuniau asa pachintakan tuinawai, tujash initaik manuscrito griego agagbau aina nuig Juan tau asantai, aikasaik ukuaji.

‡ **1:42** “Cefas” tawa nunak arameo chichamnum kaya taku tawai. Tuja Pedro tawa dushakam griego chichabai kaya taku tawai duka diístá Mt. 16.18.

6 Nui batsatu seis buits kaya najankamu yumi aimtai, judío aidau pegketasa takataiji, makí makichik buitsnumag cincuenta, nuniachkush setenta litro* tumain pimuidau. 7 Jesús ajaamau aidaun chichajak:

—Buitsnum yumi aimjatajum, tiu.

Timatai ajaamau aidau yumin buitsnum betsamtsat aimjaju.

8 Dutikawagmatai Jesús chichaak:

—Machik shikikjum fiesta chichamja auwá susatajum, tau. Tutai dutiksag susajui. 9 Fiesta chichamjauk yumi vino emamun uwag dekap-sauwai, tuwiyanak aikainawa nunak dekatsuk; nunak imá inak aina duke dekaidau, dita yumin aimjaju asag. Nunik fiesta chichamja nu, nuweena nuna untsuká, 10 chichajak: —Tikich nuwenaidauk dekatkauk vino pegkejan ajaabau agmae, dutikawag ipak dukap uwajagmatai, dui vino imanchauchin ajamau agmae. Tujash amek, yamaikish vino pegkeja duke ajamá pujame, tiuwai.

11 Juna nagkamchak Jesús aents dutikmainchaun iwainakua nunak Caná, Galilea awa nui dutikauwai. Aatus niina imanjin iwainakmatai jintintaiji aidauk dekas Apajuí Uchijimpapita tiajui.

12 Nuna dutika Jesusak Capernaúm weuwai ni dukují, niina yachi aidau nuigtú ni jintintaiji aidaujai; nunik nui ujumak tsawan batsamsajui.

Jega Apajuí ememattainum aents batsatun Jesús jügbau

(Mt. 21.12-13; Mr. 11.15-17; Lc. 19.45-46)

13 Judío aidau fiestamtaiji, Pascua jegattak wajasmatai, Jesusak Jerusalén weuwai. 14 Nunik jega Apajuí ememattainum waikmá toro aidaun, uwig aidaun, paumá sujin aidaun nuigtú kuichki yapajiin aidaushkam pekajaidau wainkauwai. 15 Nunik nuwi duwap etsentsjamu atatman juki chapikmag, jiyaká iwiyag, jega Apajuí ememattainum batsatunak ashí jüjui, uwig aidaunash, toro aidaunashkam. Dutikak kuichki yapajiin aidau kuichkijinak nügká nagkimjuk, mesajinash akaketkauwai. 16 Dutika, paumá sujin aidaun chichajak:

—Jui aina juka jüigtajum. Mina Apajuí jeeg, wají sujutai emaignajum, tiuwai.

17 Dutikamtai jintintaiji aidau, agagbaunum chichaak: “Amina jeemnak senchi akasmatjai”, tawa nuna adeajajui.

18 Dutiktai judío apuji ainnak:

—¿Wají iwainakmea aents chicham antugtai wajukeya nunikmesh aikame? tuidau.

19 Tama Jesús ditan ayaak:

—Jega Apajuí ememattaiya ju tegaktatjume, dutikawagmin kampakum tsawan asan ataktú jegamkattajai, tiuwai.

20 Tutai judío apuji aidau chichajuinak:

—Cuarenta y seis mijadai ju jega Apajuí ememattai jegamkamua duká, ¿ame kampakum tsawantai jegamkattam? tuidau.

21 Tujash ni, jega Apajuí ememattai tawa nunak, niina iyashin taku tiuwai. 22 Nuadui, jakamtai ukusbau aajakú nantakmatai jintintaiji aidau adeajajui nuna tiuwa nuna; nunikag Agagbauwa nuna nuigtú Jesús tibuwa nunashkam dekaskeapi tiajui.

* 2:6 “Cincuenta, nuniachkush setenta litro” tawa juka versión (DHH) tawa nuiya jukimui, tikich versión aidauk dos o tres medidas tuina, tikichik cien litro tuidaush ainawai.

Jesusak ashí aents anentaibaujin dekwai

²³ Jesús fiesta Pascua tutain inagkeaktatus Jerusalén jegaa pujai, kuashat aents niini dekaskeapi tiajui, aents dutikmainchaun dutikaun wainaidau asag. ²⁴ Tujash Jesusak ditanak kajinas anentaimituinachu, ashí ditanak wainu asa; ²⁵ nuniau asa atsumachu aents aidaun pachis etsegtuktinme tusag, wagki nigka aentsun anentaimitajinak shiig dekadju asa.

3

Nicodemo Jesusan tajuamu

¹ Aajakui makichik fariseo Nicodemo daagtin judío aina nui eme anentsá diitai. ² Nunú kashi Jesusan ausatatus weuwai, nunik:

—Rabí, jutiik dekeinaji, aminak Apajuí jintinkagtuati tusa awetabiuwa duka, wagki makichkish ame aents dutikmainchau iwainam jutikmainchau ainawai, Apajuí nijai achataik, tau.

³ Tama Jesús ayaak:

—Dekas tajame, aents ataktú akiinachuk Apajuí inamtaijinak wainmain ainatsui, tau.

⁴ Tutai Nicodemo iniak:

—¿Muuntuch wajasush utugsaya akiinmainaita? ¿Ataktú dukují wa-keen egkemkag akiinmainait?

⁵ Tutai Jesús ayaak:

—Dekas tajame, yuminum nuigtú Wakaní Pegkejiya nui akiinachuk, Apajuí inamtaijinig waimainchau ainawai. ⁶ Aentsnum akiinaina duka, aentske; Wakania nui akiinauk, wakanía duke. ⁷ Wi tajam duka, anentai jegagchamnuk anentaimitipa, nunak: “Ataktú akiinmain” ainawai. ⁸ Daseg ni wajuk wakegawa nunisag umpuawai, nunú dasentu antakmesh, tuwiya minawa, tuja tuwí wegawa duka dekatsme. Juninke ashí aents Wakaní Pegkejin akiinaidaush, tiuwai.

⁹ Tama Nicodemo ayaak:

—¿Dusha wajukaya nunimainaita? tau.

¹⁰ Tutai Jesús ayaak:

—¿Ame Israela maestrojiyaitkumek, dusha dekatsum? ¹¹ Dekas tajame, jutiik dekamú chichainaji, tuja wainkamú etsejuinaji. Tujash jutií taji duka dekaskeapi tatsugme. ¹² Wi ju nugkanmaya wajiin pachisan takuish dekaskeapi tatsujum aniautigmesh, ¿Utusagmek dekaskeapi titagme nayaimpinmaya pachisa chichaakuish?

¹³ “Makichkish nayaimpinum wakauk atsawai; nayaimpinmaya akaiki-uwa duke, duka Aentsmaga akiinauwa nunuwai. ¹⁴ Moisés dapi dakumká najanamun uwegshunum yakí jiiikua numamtuk, Aentsmaga akiinauwa nunash yakí jiiikagtinai, ¹⁵ ashí aents niina dekaskeapi tuidauk, pujut nagkanchau jukitnume tabaunum.

Apajuí ashí aentsun aneawai

¹⁶ “Wagki Apajuí ashí aentstin senchi anejatu asa, Uchijí makichkiuchia nuna sujamsauwai, ashí niina dekaskeapi tuidauk megkaekashtinme, ayatak pujut nagkanchau ajitnume tau asa. ¹⁷ Wagki Apajuik Uchijinak ju nugka juig aents aidaun sujimkan susati tusag awemachui, ayatak aents aidaun niini uwemtan jukitnume tusa awemauwai.

¹⁸ “Niina dekaskeapi tuidauk, bakumashtinai; tujash niina dekaskeapi tuinatsu duka bakumatnum juwakajui, wagki Apajuí Uchijí makichkiuchia

nuna daajin dekaskeapi tichaju asag. ¹⁹ Dekaskeapi tuinachu bakumakbauwa duka juuwai: tsaaptinuk ju nugká juig tae, tujash aents aidauk tsaaptinnak dakituinawai, suwen imá senchi wakegaidau asag tudau takaina nuna iwaintugkai tuidau asag. ²⁰ Wagki ashí aents pegkegchaun takaina duka, tsaaptinnak dakituinawai, nunidau asag tsaaptinnak adijainatsui, pegkegchau aidau takaamujin iwaintugkai tuidau asag. ²¹ Tujash dekaskea nuna takaidauk, tsaaptinnum mininawai, Apajuí wakegamu takaamua nu paan iwainakbau atí tuidau asag”.

Nuwenatna nuna kumpaji

²² Nuna tii, Jesús jintintaiiji aidaujai Judea nugkanum weuwai, nunik nui ditajai pujus yamijatu. ²³ Nuniai Juagshakam Enón yamijatu, Salimnum tikiju awa nui, nuwi kuashat yumi au asantai; nuwi aents aidauk weedau yamimajagtatus. ²⁴ Nunak Juagkak eke cárcel egkeachbau asa nunikui.

²⁵ Nuniemunum Juagká jintintaiiji aidau, makichik judiojai pegkeemun pachis tudayinau, ²⁶ nunikag Juagkan jegajuawag, chichajuinak:

—Rabí, Jordagka amain amijai pujubia nu, ame ni pachisam etsegmayum nunú yamijattai, kuashat aents aidauk tuwajuinawai, tuidau.

²⁷ Tama Juan chichaak:

—Apajuí dutikata tichamunak aentsuk makichkish dutikmait sui.

²⁸ Atumetjume wi tibau antuku aidautigmek, wika Cristuchuitjai, ayatak ni minitin asamtai emtika awemamuitjai tibaijim nunú. ²⁹ Nuwenbaunum, nuwe atinun achiaka duka nuwatkatna nuuwai, tuja aishmag nuwenatna nuna kumpajig ayaumas wajas nunú chichatai antak shiig aneawai. Wishakam nunisnuk senchi shiig aneajai ju chichainamu antakun. ³⁰ Niyai imá eme anentam atata duka, nuniakui wika imanchauch juwaktatjai.

Yakiya tauwa nu

³¹ Yakiya tauwa nuuwai ashí nagkaekagtasua duka. Nugkanmayaya duka, nugkanmayagke, nunin asa chichakush nugkanmayanak chichawai. Tujash nayaimpinmaya mina nuuwai ashí nagkaekagtasua duka; ³² nunin asa ni wainkamujin nuigtú antukbaujin etsejui, nunitaish makichkish dekaskeapi tuinatsui ni etsegbaunak. ³³ Tujash ni etsegbaun antujuina nuuwai, Apajuí tabauk dekaske tuina duka. ³⁴ Apajuí awemamua duka Apajuí chichamenak chichawai, wagki Apajuí Wakaní Pegkeji ashí susamu asa. ³⁵ Apajiya nu Uchijin aneau asa, ashí waji aidaunak niina uwejin idaitusui. ³⁶ Duwi niina Uchijin dekaskeapi tuidauk, pujut nagkanchau ajuinawai, tujash niina Uchijiya nuna dekaskeapi tuinachuk, nu pujutak atsujuinawai, nunin asag Apajuí suimkaji ishamaina nunak jukiagtinaí, tiuwai.

4

Jesús Galilea weaku jüinkimu (Mt. 4.12; Lc. 4.14)

¹ Jesús antuku fariseo aidau dekawaje Jesús yamiamua nu Juagká jintintaiiji aidau nagkaesau kawewai tuinawai tabaun. ² (Jesusak yamijattsai g niina jintintaiiji aidau yamijatuinaig tuidau.) ³ Nuna Jesús dekaa, Judeanak ukuak ataktú Galilea weuwai.

Jesús Samarianmaya nuwajai igkunikbau

⁴ Nunik Samaria nugkanum nagkaemak, ⁵ Samaria nugkanum yaakat Sicar tutainum, Jacob ni uchiji Josen nugká susauwa nui tikiju jegauwai. ⁶ Nuwi au Jacob nugka tai yumi chigkamú aajakua nu. Jesús miná minakua pimpikiu asa, nugka tai yumi chigkamunum ayaumas ekeemsauwai, etsa tajiastatak wegai. ⁷ Nuniai samarianmaya nuwa yumin shikiak tantamtai, Jesús chichajak:

—Minash machik yumi ajamjusta uwagtajai, tau. ⁸ Jintintaiji aidauk yaakat yutain sumaktasag wegaju ai.

⁹ Tujash judío aidauk samarianmaya aidaujaig dakitdayin asag, nuwa ayaak:

—¿Wagka ame judiowaitkumesh, wi samarianmaya nuwa aish, yumi ajamjusta tusamesh segatme? tau.

¹⁰ Tama Jesús ayaak:

—Apajuí anentag awemamua nu yumin segapa nu dekakmek, dekas tajame, ameshkam segamainaitme, dutikamak nigka yumi iwakua nuna amamainai, tiu.

¹¹ Tutai nuwa chichaak:

—Apuh, yumi shikitai takaktsum aniaumesh, yumishkam initka nunin aish, ¿tuwiya yumi iwakush sujustatme? ¹² ¿Ame ii muunji Jacob aajakua nunú nagkaesaukaitam? Ii muunji Jacob aajakua nu junak nugká tai yumin chigká ukugtamjuwai. Niishkam junak ashí ni uchijjai umujakui, tagkujinashkam junak suujakui, tau.

¹³ Tama Jesús ayaak:

—Ashí ju yumia juna umuidauk tuke kitabiagtin ainawai, ¹⁴ untsu wi yumi susattag nuna uwajuk, tuke kitaagchatin ainawai, ayatak wi yumi susattag nunú niini yumi pukuni jinama imaní au asa, pujut tuke atina nu ajitnai, tiuwai.

¹⁵ Tama nuwa ayaak:

—Apuh, minash nunú yumi sujustá, kitamchau atajai, nuigtú yumi shikiaknush minichu atajai, tiuwai.

¹⁶ Tutai Jesús chichajak:

—Weme aishum jukim, jui taata, tau.

¹⁷ Tama nuwa ayaak:

—Wika aishinchauwaitjai, tiuwai.

Tutai Jesús ayaak:

—Dekas tame aishinchauwaitjai tame duka; ¹⁸ tujash cinco aishum ajutjamajakui, tuja yamai ajutjama dushakam aishumchauwai. Duwi dekas tiume, tau.

¹⁹ Nunú tama nuwa chichaak:

—Apuh, profeta diyajame; ²⁰ iina muunji aajakajua nu Apajuí emematujakbauk au muja auwai, tujash judío aidautigmek, Apajuí emematmainuk imá Jerusalegka nuigki tinu ainagme, tau.

²¹ Tutai Jesús ayaak:

—Nuwah, dekaskeapi tujutta, hora jegawai imá ju muja juig, imá Jerusalegkak Apagnak emematchagtata nu. ²² Atumek dekachiatkujum emematjume; tujash jutiik ya emematji duka dekainaji, wagki uwentikagtinuk judionmaya minitin asamtai. ²³ Yamaik horak jegawai, duka yamaiya juiki, dekaskenum Apajun emematin aidauk, Wakan tawa dutiksag dekaskenum emematiagtata nu. Mina Apajuk nunú aidaun emematjitnume tusa egawai. ²⁴ Apajuik Wakani, nunin asamtai niina

emematuidauk, wakan tawa dutiksag dekaskenum emematmain ainawai, tau.

²⁵ Tutai nuwa ayaak:

—Dekajai Mesías* Cristo daagtin taatna nunak, ni taak ashí waji aidaunak upaktinai, tau.

²⁶ Tutai Jesús ayaak:

—Nunak wi amijai chichag nuuwaitjai, tiuwai.

²⁷ Nuna aatus chichaak pujai, jintintaiji aidau kaunawajui, nunikag anentai jegagchajui makichik nuwajai chichaak pujau asantai. Nunikajash makichkish ¿waji ininame? nuniachkush ¿waji pachismea chichame? tusagkesh iniaschajui. ²⁸ Nunik nuwak yumi shikitaijin ukuak, yaakat weuwai. Nunik jegaa aents aidau ujaak:

²⁹—Awi aents pujuma nu ashí wi nunikbaugnak tujutmae, atumesh mini diistajum ¿Cristuchuashit? tau.

³⁰ Tutai yaaktanmaya aidauk jijnag, Jesús pujamunum weajui. ³¹ Nuna nuninai, jintintaiji aidau:

—Maestro, amesh yuwata, tuidau.

³² Tama ni ayaak:

—Wi yumainuk ajutui, atumek duka dekatsjume, tau.

³³ Tutai ditak pempeemtunikiag:

—Tikichiash yuwatnunash itajuawagma, tudayinau.

³⁴ Tiagtai Jesús chichajak:

—Mina yutaijua duka, mina awetiuwa nu wakejamuji umigkata tabau nuigtú ni takatji ashimjukta tabauwa nuuwai. ³⁵ Atumek: Ajak juutak eke ipaksumat nantu awai, tinu ainagme. Tujash wi tajime: Pagkai diistajum, ajak ajakbauk uminag saigká, juumain wajas awai. ³⁶ Ajak juwaamunum takaa duka akiam auwai, nu ajak juukbauwa duka pujut nagkanchaunum atina nuuwai; ajakbauwa nu, juwá nujai shiig aneastinme tabaunum. ³⁷ Wagki ju tibuwa juka dekaske: Makichkia nu ajakmawai, tikichia nu juuawawai, tawa nu. ³⁸ Wi atumnak, makichkish atum takaschamu aig, juuktajum tusan ishiakbaijime; tikich takaak waittsau ainawai, nuniku aig, atum nu takasbauwa nuiya juukbaijume, tiuwai.

³⁹ Nuniai Kuashat samarianmaya nunú yaaktanum pujuidauk, dekaskeapi tiajui, nuwa etsejak: “Wi nunikbaugnak ashí tujutmae”, tiu asantai. ⁴⁰ Nunikag samarianmaya Jesusan kautuawag, jui jutijai juwakta tusag segajui. Tima nui jimag tsawan pujusui. ⁴¹ Nui pujus chichatai niina chichamen antuinak, nuní kuashat dekaskeapi tiajui. ⁴² Nunikag nuwan chichajuinak: Ame timaum duikik dekaskeapi tatsuji, wagki jutiishkam ni chichamuk shiig antugkaji, nuniku asá niimpapita dekas ashí nugkanmayan uwemtijatnuk tusa dekainaji, tiajui.

Suntajá apuji Capernaumnumia uchijin Jesús etsagagbau

⁴³ Jimag tsawan pujusá, Jesús Galilea weuwai. ⁴⁴ Wagki Jesús nigki etsegkauwai, “profetak niina nugkenigkik eme anentamak achauwai”, tusa. ⁴⁵ Nunik Galilea jegamtai, nuiya aidauk shiig anentus jukiajui, Jesús Jerusalén pujus fiesta Pascuatin ashí dutikamujin ditashkam fiestatin jegawag wainkaju asag.

* 4:25 Hebreo chichamnum “Mesías” tai, griego chichamnum “Cristo” tawai, nunak “Apajui Apu atinun etegka awemamu” tawa nunak taku tuinawai.

⁴⁶ Ataktú Jesús Caná Galilea awa nui jegauwai, ni yumin vino emamua nui. Nuniai Capernaúm pujau makichik rey oficialji, nuna uchiji jaak tepau. ⁴⁷ Nunú, Jesús Judeanmaya Galilea tae tabaun dekaa, jegajua segau, mina uchig ashí jakama nu, jegajui taam etsaentujata tusa. ⁴⁸ Tama Jesús ayaak:

—Aents dutikmainchau iwainamu waintsukek kakajus dekaskeapi tumaitsume, tiuwai.

⁴⁹ Tutai oficial ayaak:

—Apuh, mina uchig jaatsaig jegaami, tau.

⁵⁰ Tama Jesús chichaak:

—Jeemin wakitkita, uchigmik tsagaje, tiuwai.

Tutai dekaskeap Jesusak tawa tusa wakitkiuwai. ⁵¹ Nunik jeen wakettatman, ni inake aidau igkugkag: —Uchigmik tsagagmae, tusag ujidau.

⁵² Tiagtai waji horatinia tsagagmae tusa inidau. Tama dita aiinak:

—Yau a la una ai tsuweamunak bichatjame, tuidau.

⁵³ Tama uchi apajishkam adeaju, nunú horatin Jesús chichajak: Uchigmik tsagaje, tibuwa nuna.

Nunik nigka ashí ni patayí aidaujai, Jesusai dekaskeapi tiajui.

⁵⁴ Ju jimaja juna wainchatain iwainakua nunak, Jesús Judeanmaya jiinki Galilea jega dutikauwai.

5

Aents wekaechaun Jesús etsagagbau

¹ Nuna dutika pujai, judío aidau fiestamaidau, nuniagtai Jesuschakam Jerusalén wakauwai. ² Jerusalén, waiti Uwijá waitai tutaiya nui tikiju awai yumi ipiagbau, hebreo chichamai Betesda tutai. Duka cinco waiti aagjamu ajuidau. ³⁻⁴ Nuanui kuashat jau aidau batsataidau wainmachu aidau, shutú aidau nuigtú wekaechau aidau. ⁵ Nunú jau aina nuiya makichik aents treinta y ocho mijadai jauwa nu nui pujau. ⁶ Nunittaman Jesús wainak, nunisag kuashat mijadai tepenun dekau asa, iniak:

—¿Tsaagtasamesh wakegatsmek? tau.

⁷ Tama jau ayaak:

—Apuh, yumi ipiagbauwa ju tagkittai ajunmainuk atsau asantai, wi iyagta taig tikichia iyainawai, tiuwai.

⁸ Tutai Jesús chichajak:

—Nantakim camilla jukim wetá, tiuwai.

⁹ Tusá tamawaik nunú aentschakam tsagag, ainká tepetaijin takui juki wekaetan nagkamauwai, nunak tsawan ayamtai aig nunikui.

Tsawan ayamtai pampanjamu

¹⁰ Tujash judío aidau, nu aents tsagajua nuna chichajuinak: —Yamaik tsawan ayamtaiyai, nunin asantai ainká tepetaijum jukimek wemaitsume, tuidau.

¹¹ Tama ni ayaak:

—Tujash mina etsaentugma nu chichagtak: Ainká tepetaijum jukim wetá tujutmajamah, tau.

¹² Tutai dita iniinak:

—¿Yaita ainká tepetaijum jukim wetá tujabiush? tuidau.

¹³ Tujash etsagagbau aajakua duka dekachu ya etsagaje nunak, wagki Jesusak nui aents batsata nunak ukuak weu asantai. ¹⁴ Dutikamu ajuma dui Jesús, jega Apajuí ememattainum wainkau, nunik chichajak:

—Nijah, yamaik tsagajume, ataktú awenamek tudau takasaipa, aan nagkaemas pegkegchau ajutjami, tiuwai.

¹⁵ Tima weuwai, nunik judío aidaun jegajua: —Mina etsaentuja duka Jesusai tusa ujakajui. ¹⁶ Nunak tsawan ayamtai aig dutikau asamtai judío aidaun Jesusan achiktatus egaidau. ¹⁷ Nudiagtai Jesús chichaak:

—Mina Apajuk yamaikish takaawai, nuniau asamtai wishakam dutik-sanuk takaajai, tiuwai.

¹⁸ Nuna tutai judío aidauk nuní senchi maatatus wakegaidau, wagki tsawan ayamtaiya nunak umiachu nuigtushkam Apajuijai betek chichag-mamak, Apajuk mina Apajui tau asamtai.

Apajui Uchijiya nuna senchiji

¹⁹ Nu imatjuinam Jesús ayaak: “Dekas tajai, Uchik nigki nagkamig takamait sui, Apají dutikamun waina nuna takamainai; wagki ashí Apají takaa nunak Uchijishkam takauwai. ²⁰ Wagki Apajiya nu uchijin aneau asa ashí waji aidaun ni takaa nunak iwaintawai, nuigtush nuní nagkaemasash iwaintuktatui, dutikamtai atumek anentai jegamainchau juwaktatjume.

²¹ Wagki Apag aents jakaunash inanki pujutan suwa dutiksanuk wishakam wi wakejamugnak pujutan suwajai. ²² Apajuk aentsnak etejashtinai, nunak ashí mina idaitugsauwai ame dutikata tusa; ²³ mina eme anenjin aina dutijamsag aminash eme anenjamtinme tujutiuwai. Tujutiú asamtai mina eme anenjachuk, Apag mina awetiuwa nunashkam eme anentuinat-sui.

²⁴ “Dekas tajime, mina chichamjun antuk, mina awetiuwa nunash dekaskeapi tauk, pujut nagkanchau ajawai; nuniau asa bakumashtinai, wagki jaakug megkaemaina nuna ukuak pujut nagkanchau jukiu asa. ²⁵ Dekas tajime, hora jegawai, duka yamaiya juwai, jakau aidau Apajui Uchijí chichamen antukagtata nunú, nuna antuidauk tuke pujusagtinai. ²⁶ Wagki mina Apajui pujutak awai, nunin asa wi niina Uchijí asamtai niinish pujutak nunisag ajití tusa sujusui; ²⁷ nunak wi Aentsmaga akiin-auwaitag nuna nigki aentsnash etejati tusa idaitugsauwai. ²⁸ Juka anentai jegagchamin anentaimgtupajum; wagki hora jegatnai ashí ukusbau aina nu, niina chichamen antukagtina nu, ²⁹ nuniamunum pegkejan takasú aidauk nantakiagtinai, pujutan jukitatus; untsu pegkegchaun takasú aina duka nantakiagtinai, suwimkan jukiagtatus.

Cristo etsegtin aidau

³⁰ “Wika wikik makichkish dutikmait sujai. Apag dutikata tujutbauwa dutiksanuk etegkeajai, tuja wi etegkeag duka pegkejai, wagki wi wakegamun egatsjai, Apag mina awetiu wakegamua nuna egajai. ³¹ Wi wiki pachimasan etsegtumamuk, dekaskechu amainai. ³² Tujash awai tikich mina pachitus etsegtuju, nunú mina pachitus etsegtuja duka dekas tawai. ³³ Atum Juagan inias dekajuati tusajum awemauwaitjume, tama nigka dekaskea nuna etsegkauwai. ³⁴ Tujash wika aents mina pachitus etsegtugkatnume tusanuk atsumatsjai, junak atum uwemkamnujum tabaunum tajime. ³⁵ Juagak lámpara kegak etsantama numamtin aajakui, tuja atumek ujumak tsawantai niina chichame wakejusa antugkujum shiig anejakuitjume. ³⁶ Tujash Juan mina pachitus etsegtugkauwa nuna nagkaesau ajutui; wagki mina Apag takatan sujak ju umiktá tujutbauwa nuna takaag duke minak etsegtujuinawai Apag awetiuwa nuna. ³⁷ Nuigtushkam mina Apag jui awetiuwa dushakam, mina pachitus etsegtujui. Atumek niina

chichameg makichkish antugkachu ainagme, waintashkam wainkachu ainagme, ³⁸ niina chichamega dushakam atumek umigtsugme, dekas Apajuí awemamuapi tujutchau asajum. ³⁹ Atumek Agagbauwa duka shiig kuitamsajum augjume, awiyampap pujut tuke atina duka jumainaita tau asajum, nunú agagbauwa nuwig mina pachitus chichawai, ⁴⁰ nuniaig atumek nunú pujut jukitasajum minaig minatsjume.

⁴¹ “Tujash wika aents aidau eme anenjitnume tusanuk wakegatsjai, ⁴² tujash atumnak wainjime nuigtush dekajai dekaskenum Apajuí aneamu atsugtamaina nuna. ⁴³ Wika mina Apag awetimtai taamjai, nuniaig atumek minak dakitjagme. Tujash tikich, awemachmaitak, nigki nagkami minakuig, duka shiig anentsajum jumainaitjume. ⁴⁴ ¿Utusagmek dekaskeapi titagme, atumek pempentunikjum iman anendaiyakjum, Apajuí makichkia nuna imanji egachutigmesh? ⁴⁵ Wainka anentaimsaigpa Apajin ujatjamak bakugmashtumpash tusajum. Atumin bakugmatna duka Moisesa nuuwai, atum dakakjum batsamtajum nunú. ⁴⁶ Wagki Moisés dekaskeapi takugmek, minash dekaskeapi tujutmain ainagme, wagki nigka mina pachitus agajui. ⁴⁷ Tujash ni agagbauwa nu dekaskeapi tachautigmesh, ¿utugsagmek mina chichamjush dekaskeapi titagme?”, tiuwai.

6

Jesús cinco mil aents ayugkamu (Mt. 14.13-21; Mr. 6.30-44; Lc. 9.10-17)

¹ Nuna tusa ukuak, Jesusak Galilea kuchají amain ueuwai, Tiberias tutainum. ² Nuniamunum kuashat aents saetukajui, jau aidau aents dutikmainchaun dutikaun wainkaju asag. ³ Nudiagtai Jesusak nainnum waka, jintintaiji aidaujai ekeemsauwai, ⁴ Judío aidau fiestamtaiji Pascua tikiju wajasú ai. ⁵ Nunik Jesús niimkamá shiig kuashat aents niini minidaun wainak, Felipein iniak:

—¿Pagkash tuwiya sumaktatji aents imaanik minina au ayugmainush? tau.

⁶ Tujash nunak dekapsatatus tiuwai, wagki nigka dekau wajuk dutikat-tawa nunak. ⁷ Tama Felipe ayaak:

—Doscientos denariowai pag sumaka, makí makichik aents imá imachik tinamash tuké jegamait sui, tiuwai.

⁸ Tutai jintintaiji aina nuiya makichik Andrés, Simón Pedro tutaya nuna yachi chichaak:

⁹ —Jui makichik uchi cinco pag cebadajai najanamu nuigtú jimag namak ajawai. ¿Jukeuchish aents ibauwa nuish jegamainkaih? tiuwai.

¹⁰ Tiagtai Jesús ayaak:

—Ashí aents aidau batsamsatajum titajum, tiuwai.

Nuanui kuashat chijichi ayau, nuwi batsamsajui cinco mil aishmag tumain. ¹¹ Jesús nuna pagkan juki Apajuin see tii jintintaiji aidau tinamkauwai, dutikam dita jukiag batsata nuna tinamkajui, dutika namaknashkam dita wakegaina dutiksag tinamkajui. ¹² Dutikam shiig yuwawagmatai, Jesús jintintaiji aidau chichajak:

—Punjau ampinkaja duka yajuaktajum, wainak utsankai, tiuwai.

¹³ Tima ditashkam yajuakajui, dutikawag doce chagkinnum aimkajui, cinco pag cebada najanamu yuwaku puujá ampigbau aina nuna.

¹⁴ Dutikawagmatai aents aidaushkam, Jesús aents dutikmainchaun dutikau asamtai, chichainak:

—Juka dekaskenum profeta ju nugka jui taatnai tibauwa nuuwai, tuidau.

¹⁵ Tujash aents aidau Jesusan tajuawag kakantus jukiag rey ematasag wakegainamun dekau asa, ataktú nigki muja yakí jítkaunum wakauwai.

Jesús yumí awanken wekaesá webau

(Mt. 14.22-33; Mr. 6.45-52)

¹⁶ Nunik kintamai, Jesusa jintintaiji aidauk kuchanum jegawajui, ¹⁷ nunikag barcanum chimpimjag Capernaúm katigtatus weedau. Shiig suwe wajasmataishkam, Jesusak eke wakitkig taachu asamtai.

¹⁸ Nuniamunum, dase senchi umpuamu asa kuchak senchi tsukatu.

¹⁹ Imatikamaitak wiyankag seis kilómetro tumain kuwagainai, Jesús yumí awanken wekaegas barcan adjikkattak minittaman wainkajui. Nunik ishankajui. ²⁰ Nuniagtai Jesús chichaak:

—¡Witjai ishankaigpajum! tiuwai.

²¹ Tutai shiig aneasag barcanum egkejajui, nunik machik wesag wamkes dita jegatasa wegmunum anuumkajui.

Aents aidau Jesús egakbau

²² Kashinia dui, aents kuchá amain juwaju aidauk adeajajui, jintintaiji aina duka makichik barca au asamtai ditak weenai, Jesús ditajai egkemjachua nuna. ²³ Nuniamunum yaakat Tiberiasnumia barca aidau, Apu Jesús Apajuin see tusa pagkan puujá, aents aidau ayugkauwa nui, tikiju anumkajui. ²⁴ Nunikag diikmá, Jesús ni jintintaiji aidaujai nui atsuagtai, ataktú barca aina nui chimpimjag Capernaúm weajui, Jesusan egakgtatus.

Jesusai pag pujutan sukagtinuk

²⁵ Nunik kuchá amain katikmag Jesusan wainkag, iniinak:

—Maestroh, ¿wajuti juish taamume? tuidau.

²⁶ Tama Jesús ayaak:

—Dekas tajime, atum egatjum duka aents dutikmainchaun dutikamag dui egattsugme, pag shiig yuwamujum dui egatjume. ²⁷ Yutai dukap atsuk abuena duka anentaimtigpajum. Dekas yutai abuechau tuke pujutan sukagtina nu jukitasajum anentaimtustajum; nunak Aentsmaga akinauwa nu amastatui, wagki Apajuí mina Apajua nu: Ame duka dutikata tusa inatjau asamtai.

²⁸ Timatai aents aidau iniinak:

—¿Wají dutikmainaita Apajuí wakegamu umigkatasais? tuidau.

²⁹ Tiagtai Jesús ayaak:

—Juuwai Apajuí wakega duka, ni awemamua nuna dekaskeapi titinme tawa nuuwai.

³⁰ Tutai dita chichajuinak:

—¿Wají wainchatai iwainkagtumainaitme, nu wainkaja dekaskeapi tumainush? ¿Tuwaita ame takaamu aidaush? ³¹ Jutii muunji aajakajua duka uwegshunum maná yuujakú ainawai, agagbaunmash: “Nayaimpinmaya pagkan yuwatneme tusa susauwai” tawai, tuidau.

³² Tiagtai Jesús ayaak:

—Dekas tajime, nunak Moisés nayaimpinmaya pagnak susachui, mina Apajua nuuwai nayaimpinmaya pag dekaskea nuna sukagta duka.

³³ Wagki Apajuí pagjiya duka nayaimpinmaya jui akaikiuwa nuuwai, ashí nugkanmayan pujutan susatna nu.

³⁴ Tutai:

—Apuh, nu pag tuke sukagtita, tuidau.

³⁵ Tiagtai Jesús chichaak:

—Witjai pag pujutan sukagtinnuk, minai minidauk tuke yapajuashtin ainawai. Nunisag minai dekaskeapi tuidaushkam tuke kitaagchatin ainawai. ³⁶ Tujash timajim dutiksanuk tajime, mina waitiatkugmesh dekaskeapi tujuttsugme. ³⁷ Ashí mina Apag sujamu aina nu minaig tamain ainawai, nunú minai taidaunak wika dakitjashtatjai. ³⁸ Wagki wi nayaimpinmayan akaikig nunak, wi wakegamun takastasan taachuitjai; mina awetiuwa nu wakegamun takastasan tauwaitjai. ³⁹ Juuwai mina awetiuwa nu wakegamua duka, makichkish ni sujusbauwa nunak emegkaumainchawaitag nu, dutikakun tsawan nagkanbaunmash inanmainaitag nuuwai. ⁴⁰ Wagki mina Apag wakegamua duka, ashí aents Apajuí Uchijimpapita tusa dekaskeapi tujutuidauk pujut nagkanchau ajitnume, nunikmatai wi tsawan nagkanbaunum inankitjai, tawa nuuwai.

⁴¹ Nuna tutai judío aidauk Jesús augmattan nagkamawaju, wagki ni chichaak: “Witjai pag nayaimpinmayan akaikiunuk” tau asamtai.

⁴² Nunik pepeemtunisag: —¿Ju Jesús José uchiji, apajish nuigtú dukujish jutii wainnuweg duchaukaih? ¿Wajukeakua jusha nayaimpinmayan akaikijai tusash tawa? tuidau.

⁴³ Tiagtai Jesús chichaak:

—Atumek tudayá yujatsuk idaisatajum. ⁴⁴ Makichkitigmekesh minaig tamain ainatsjume mina Apag awetiuwa nu itagmashkuig. Tuja wi inankittajai tsawan nagkanbaunum. ⁴⁵ Profeta aidau agagbaunum: “Ashí Apajuí jintintuamu agtinai”, tawai. Nunin asamtai ashí Apajun antugkau aina nu nuigtú niinayan unuimaina nu minaig mininawai.

⁴⁶ “Nunak makichik aentskesh Apajun wainkau asa nuniatsui, ya Apajuiyai pujau tauwaita duke Apagnak wainkauwai. ⁴⁷ Dekas tajime, minai dekaskeapi tuidauk, pujut tuke atina nu ajuinawai. ⁴⁸ Witjai pag pujutan sukagtinnuk. ⁴⁹ Atumi muunjum aajakajua nu uwegshunum maná yuwawaju aina duka jinawaju ainawai; ⁵⁰ tujash wika pag nayaimpinmaya akaikiuwa nuna tajai, ya nuna yuwattawa duka jakashtinai tusan. ⁵¹ Witjai pag iwaaku nayaimpinmayan akaikiuwaitag nunak. Makichik aentskesh ju pagka juna yuwauk, tuke pujutnai. Wi pagkan sukagustatag duka, mina iyashjua nuuwai, nunak wi ashí nugkanmaya aidaun pujutan susatasan nuniktatjai”.

⁵² Tutai judío aidau ditak tudaiyinak:

—¿Utugsaya niina nejenash yuwatajum tusash sujamainaita? tuidau.

⁵³ Tiagtai Jesús ditan chichajak:

—Dekas tajime, Aentsmaga akiinawua nuna neje yuwachkugmek, numpesh umachkugmek, pujutak atsugtabiagtinai. ⁵⁴ Mina nejejun yuwak, numpagnash uma nu, pujut tuke atina nu ajawai; nuna tsawan nagkanbaunum wi inankittajai. ⁵⁵ Wagki dekaskenum yutaiya duka mina nejejuu nuuwai neigtú dekaskenum umutaiya dusha, mina numpajua nuuwai. ⁵⁶ Mina nejejun yuwak, mina numpajun umauk, wijai ijutkawai, nunisnuk wisha niijai ijutkajai. ⁵⁷ Apag iwaaku pujuwa nu awetiu asamtai, wisha niinig iwaaku pujajai; nunin asamtai minaiyan yuwauk, wijai pujustinai. ⁵⁸ Juuwai pag nayaimpinmaya akaikiuwa nu. Atumi muunjum

maná yuujakaju jinawajua nuninchau, ju pagka juiyan yuwauk, tuke pujustinai.

⁵⁹ Jesús ashí ju aidau pachis jintinkagtuauwa nunak, Capernaúm jega juntainum tiuwai.

Chicham pujut tuke atina nuna sukagtin

⁶⁰ Nu jintinkagtamun antukag, kuashat niina nemajuidau chichainak: —Juna jintia juka shiig utugchatai, ¿ya nunash nunimainaita? tuidau.

⁶¹ Nuna tusa ashishmatuinamun Jesús dekaa chichajak:

—¿Wi tajim duka atumnak shiig awajtamkachajek? ⁶² ¿Atumesh wajukmainaitjume, Aentsmaga akiinauwa nu yaunchuk pujujakbauwa nuwi weak takunu wainkugmesh? ⁶³ Wakani pujutan sukagta duka, tujash iyashia duka nunak sukagtumaitsui; wi chicham aidau timajim nu ainawai wakan aidauk nuigtú pujut aina duka. ⁶⁴ Tujash atum ainajum anuiya ujumak dekaskeapi tuinachush ainawai. Nunak Jesusak yama nagkamsag ya aidauwa dekaskeapi tuinatsua, tuja ya sujama atinaita nuna dekau asa tiuwai. ⁶⁵ Nuigtushkam chichaak:

—Nuadui timajime makichkitigmekesh minaig minimainchau ainagme, Apag nunikti tichamu aidautigmek tusan.

⁶⁶ Duwi nagkamas, kuashat jintintaiji aidauk ukukiajui, nunikag nuigtuk niijaig yujainachu. ⁶⁷ Nunikagmatai Jesús ni jintintaiji doce aina nuna:

—¿Atumesh wetasajum wakegatsjumek? tau.

⁶⁸ Tutai Simón Pedro ayaak:

—Apuh, ¿jutiish yayaig wetaji? Amina chichamjum aina dukeajama pujut tuke atinun sukagta duka. ⁶⁹ Jutiik aminí dekaskeapi tiuwaitji, nunin asá dekaji, amek Cristo, Apajuí pegkegma nudauwaitme, tau.

⁷⁰ Tutai Jesús ayaak:

—¿Wichaukaitag atum doce ainajum nuna etegaunuk? Dutikamu ainagminig, atum ainajum anuí makichik Iwanch pachitkawai, tiuwai.

⁷¹ Nunak Judas Iscariote, Simogka uchijiya nuna tiuwai, wagki nunú doce aina nuiya sujam atin asa.

7

Jesusa yachi aidau dekaskeapi tichagbau

¹ Nuna tusa idaiyas, Jesusak Galileanum wekagu, Judea pujutnak dakitau, wagki nuiya judío aidau maatasag egainamu asa. ² Judío aidau fiestamtaiji tabernáculo* tutai tikiju wajasú ai, ³ yachi chichajuinak:

—Juig pujutsuk Judea wetá, jintintajum aidau ame takaamun wainkat- nume; ⁴ wagki makichkish aents wainkamu atatus wakegauk, waji aidauk uuká takachu ainawai. Nunin asamtai ju aina ju jutikakmek, ashí aents wainainamunum dutikata, tiajui.

⁵ Nunak yachi aidaukesh niiní dekaskeapi tuinachu asag tiajui. ⁶ Tiagtai Jesús chichaak:

—Mina tsawanjuk eke jegatsui, tujash atumdauk tsawantak uminas awai. ⁷ Atumnak ju nugkanmaya aents aidauk kajegtamain ainatsui, tujash minak kajegtuinawai, wagki dita takaamujiya nu pegkegchauwai

* **7:2** “Tabernáculos” tawa duke, fiesta de los tabernáculos, nuniachkuish fiesta de las enramadas tutaiyai. Nunak judío aidau nantu Eitanim-Tishri tawa nu jegatai siete tsawantai fiestamajakú ainawai. Duka hebreo chicham sukkot tawa nu, apach chichamnum tienda, enramada, cabaña tibauwai.

tusa etsegtuinamu asa. ⁸ Atumek fiestanmag wetajum, wika minishtatjai; wagki mina tsawanjuk eke jegachu asantai, tiuwai.

⁹ Nuna tusa, nigka Galilea juwakui.

Jesús fiesta tabernáculo tutainum webau

¹⁰ Tujash yachi fiestanum weaju ai, Jesuschakam wantintsuk uumak weuwai. ¹¹ Judío aidauk fiestatin egaidau, nuninak:

—¿Dusha tuwig pujawa? tuidau.

¹² Kuashat aents aina nuiya niina pachis kuashat chichaidau. Nuniai ujumak chichaidau: “Duka aentsuk pegkejai”, tuinai; tikich chichaidau: “Atsa nuninchauwai, aentsun tsanuawai”, tuidau.

¹³ Tujash makichkish niina pachisag paan iwainakag chichainachu, judío apuji aidaun ishamaidau asag.

¹⁴ Fiestamainamu tsawan ejapeantu ai, Jesuschakam jega Apajuí ememattainum wayau, nunik jintinkagtau. ¹⁵ Nunitai judío apuji aidauk puyatjusag diidau, nuninak: —¿Utusaya imatikash dekawa papí ausachua annaitkush? tuidau.

¹⁶ Tiagtai Jesús ayaak:

—Wi jintinkagtag duka midauchui, mina awetiuwa nudauwai. ¹⁷ Aents Apajuí wakegamun takastatus wakega nunú, dekamainai wi jintiag jusha Apajuinumiayashit atsa wiki nagkamnuash taja nuna. ¹⁸ Nigki nagkami chichá duka, niina imanjinak egak tawai; tujash ya awemauwaita nuna imanjin egá nuuwai, dekaskea duka nuigtush ni pegkegchau takaamujish atsuja nu.

¹⁹ “¿Moisés chicham umiktinun atumin amaschaukaitjum? Dutika-muitkujum atum ainajum anuiyatigmek makichkish umiatsjume. ¿Wagka mantuatasgmesh wakegagme?”, tau.

²⁰ Tutai aents aidau aiinak:

—Iwanch ajutjamui, ¿ya mantamata tujamua? tiajui.

²¹ Tiagtai Jesús ayaak:

—Wi aents dutikmainchaun makichik dutikamag duik anentai jegat-sjume. ²² Dekaskenum Moisés, uchi aishmag akiinkuig pakaji ajapjitajum tujabijui, (nunak Moisés nagkamachui, duka atumi muunjum nagkamamui); nunin asantai atumek tsawan ayamtai aigkish pakaji ajapjin ainagme. ²³ Duka dekaske, atumek Moisés umiktajum timawa nuna uwaekaig tsajum, tsawan ayamtai aigkish uchi aishmag akiinamtaig pakaji ajapjin ainagme. Nunin ainayatkugmesh ¿wagka wi tsawan ayamtai aig, aents jaun etsagagmataish kajeagme? ²⁴ Atumek aentsú niimé diisjum etegkawaigpajum; dutikakjumesh shiig anentaimesa dutikatajum, tiuwai.

Jesús tuwiya tauwaita nu etsegkamu

²⁵ Ujumak Jerusalegnumia aidau:

—¿Juchaukaih maatatus egagma nu? ²⁶ Diisjuah, tuwakbaunum chichataish pachinatsujamah. ¿Dekas Cristui tuidau asampash apu aidaush ayatak diina? ²⁷ Tujash jutiik jusha tuwiyampaita duka dekainaji, untsu Cristo minitna nunak makichkish dekajuachgtin ainawai tuwiyampaita nunak, tiajui.

²⁸ Nu tuinamun, Jesús jega Apajuí ememattainum jintinkagtak pujau antuk, senchi chichaak:

—Minak dekagjume tuwiyana minaja duka. Tujash wika, wiki nagkamnuak taachmajai, minak dekaskea nu awetiuwai, duka atumek

waintsugme. ²⁹ Tujash wika wainjai, wagki niiniya minau asan nuigtush nigki awetiuwai, tau.

³⁰ Tutai achikta tuidau; tujash makichkish achikchajui, niinu hora eke jegaachu asamtai. ³¹ Kuashat aents niini dekaskeapi tiajua nunú chichainak:

—Cristo taatna duish, ¿ju iwainag takaa juní nagkaemasampash takastinait? tuidau.

Fariseo aidau Jesús achikta tibau

³² Aents aidau Jesusan pachisag chichainamun fariseo aidau antukajui; nunikag fariseo aidau, sacerdote apuji aina nujai jega Apajuí ememattai kuitamin aidau awemajui Jesusan achiktinme tusag.

³³ Nudiagtai Jesús chichaak:

—Wika atumjaig wajumchik tsawan pujusan, mina awetiuwa nui wetatjai. ³⁴ Atumek minak egatkattagme, tujash waitkashtatjume, nuigtush wi tuwí pujuttaja, nuig atumek minimainchau ainagme, tiuwai.

³⁵ Timatai judío aidau pempeentunisag iniininak:

—¿Tuwig jusha wetí ii wainmainchaunmash? ¿Judío aidau pampagkag griego aents batsatainamunum pujuina nui wee, griego aidau jintintu-atasampash tawa? tuidau. ³⁶ ¿Nunash wajuk takua, “egatkattagme, tujash waitkashtatjume, nuigtush wi tuwí pujuttaja, nuig atumek minimainchau ainagme”, tujamji? tiajui.

Yumi pujutan sukagtinun pachis Jesús tibau

³⁷ Fiesta ashimnamua nunú tsawan dekas imá puyatjusa anentaimtutai asamtai, nunú tsawantin Jesús wajantá senchi jiiká chichaak:

—Makichik aentskesh kitabauk, minai tantati, nunik uwagti. ³⁸ Ni minai dekaskeapi tauk, Agagbau tawa nunisag, niina anentainig yumi pujutan sukagtina nunú pukuni jintuktinai, tiuwai.

³⁹ Nuna tiuwa nunak, niini dekaskeapi tuidau Wakanin jukiagtin aina nuna taku tiuwai; Nu tsawantaik Wakaní Pegkejig eke taachu, wagki Jesús jaka nantakí nayaimpinum waketchau asamtai.

Aents aidau kanakagbau

⁴⁰ Nunú tabaun ujumak aents antukaju chichainak:

—Dekas ju aentsua juka profetayai, tuidau.

⁴¹ Tikich chichaidau:

—Juka Cristui, tiajui.

Ujumak chichaidau: ¿Cristo galileanmayag atinait? ⁴² ¿Agagbauwa nuanui, Cristuk David weantu nuigtú belegnumia atinai David pujujukua niuya tatsuak? tuidau.

⁴³ Nuna Jesusan tukiag, aents aidauk kanajajui. ⁴⁴ Nuniai ujumak dita aina niuya Jesusan achiktag tuidau, tujash achikchajui.

Judío apuji aidau Jesusai dekaskeapi tichamu

⁴⁵ Nunikag jega Apajuí ememattain kuitamin aidauk waketjag fariseo aidau, sacerdote apuji aidaujai batsatbaunum jegawajui. Nunikmatai iniinak:

—¿Wagka itachugme? tuidau.

⁴⁶ Tusá tuinam jégá kuitamin aidau ainak:

—Makichik aentskesh nu aents chichama imatika chichauk tuke wainkashbauwai, tiajui.

⁴⁷ Tiagtai fariseo chichainak:

—¿Atumesh tsanuamak yujainajum? ⁴⁸ ¿Jutii apuji aidaukesh, nuniachkush fariseo aidaukesh niini dekaskeapi tuidaush wainjumek? ⁴⁹ Tujash au aents chicham umiktinun dekasu duka, shiig pegkegchawai, tuidau.

⁵⁰ Tiagtai dita aina nuiya Nicodemo, Jesusan ausatatus jegajuauwa nu chichaak:

⁵¹ —¿Jutii chicham umiktina nuish, makichik aents ni chichamujish antugsuk nuigtú ni takaamujish dekagtsuk suwimak sumainai tawak? tiuwai.

⁵² Tutai dita aiinak:

—¿Amesh galileanmayagkaitam? Agagbauwa nu ausam diistá nuniakum wainkattame, galileanmayag makichkish profetak tuke jiinkichui, tiajui.

⁵³ Tusag makí makichik ditá jeen shiyakajui.

8

Nuwa ekagmaku Jesús ejentunbau

¹ Tujash Jesusak Olivosa mujajin weuwai, ² nunik kashinia dui, kashikmas, jega Apajuí ememattainum wakitki jegauwai. Nunikmatai kuashat aents tuwagkam ekeemas jintinkagtutan nagkamauwai.

³ Nuniai maestro chicham umiktinun jintinkagtin aidau, fariseo aidaujai, nuwa aentsjai takamun wainkag jukiag itawaju, dutika aents aidau ejapen awaasajui, ⁴ dutikawag Jesusan iniinak:

—Maestroh, ju nuwa aentsjai takaniak pujau wainkaji. ⁵ Moisés chicham umiktajum tujabauwa nuig, nuwa junin aidaunak ayatak kayai tukua tukuakua maatajum tawai, ¿tujash amesh wajinpa? tuidau.

⁶ Nunak wajintig tusa dekapsatatus tiajui, nunik tsanumjugtasag. Tujash Jesusak tsuntsumá uwejin nugkanum agau. ⁷ Nunitaishkam ayatak inidau, imatjam Jesús pagkai chichaak:

—Atum ainajum anuiyash yaita machikish tudaun takachush, nunú dekatkauk kayai tukutí, tau.

⁸ Tusa ataktú tsuntsumá nugkan agau. ⁹ Nuna timatai ditá tudaujish dekgamamaidau asag, muunchinum nagkamna makí makichik jii jiinkawag ashí shiyakgmatai, imá Jesusak nuwajaig juwakui. ¹⁰ Nunik Jesús pagkai niimkamá aents atsuagtai nuwan iniak:

—Nuwah, ¿dusha wajukawagmae? ¿Makichkish tukugmachagmaka? tau.

¹¹ Tusa tama nuwa ayaak:

—Atsa Apuh, tiuwai.

Tutai Jesús chichaak:

—Wisha suwimkan jukiti tumaitsujame. Wetá, nuigtuk awenamek tudauk takasaipa, tiuwai.

Jesuai nugká tsaaptinjiya nu

¹² Ataktushkam Jesús aents aidaun chichajak:

—Witjai nugká tsaaptinjinuk; mina nemagtau, suwe aidaunmag wekaesashtainai, ayatak tsaaptin pujutan sukagtina nu ajiagtinaí.

¹³ Tutai fariseo aidau chichajak:

—Amek, aminuk pachisam etsegtumame, nuniau asam ame etsegtumam duka dekaskehui, tuidau.

¹⁴ Tiagtai Jesús ayaak:

—Wi wiki midaun pachisan etsegtumaknush, wi tumamag duka dekaske, wagki wika dekajai tuwiyana tauwaitja nuigtush tuwí wetatja nunak; tujash atumek tuwiyana tauwaitja nuigtú tuwí wetatja dusha dekatsjume. ¹⁵ Atumek aentsú anentaimtaijiya dutiksagmek etegkeagme; tujash wika makichik aentsnakesh etegkeatsjai; ¹⁶ tujash wi etegkeaknuk, dekaskenum dutikmainitjai, wagki wika wikichuitjai; wi, Apag awetiwa nujaiyaitjai. ¹⁷ Atum chicham umiktin agagbauwa nuig, jimag aents etsegtuina nuuwai dekaskek tawai. ¹⁸ Witjai midaun pachisan etsegtubaunuk, nuniai Apag awetiwa dushakam mina pachis etsegtujui.

¹⁹ Nuna tutai:

—¿Amina Apash tuwí pujawa? tusag inidau.

Tama Jesús ayaak:

—Atumek minak dekagtsugme, nuniau asajum mina Apagshakam dekamaitugme. Atum mina dekagkugmek mina Apagshakam dekamain ainagme, tiuwai.

²⁰ Juna tiuwa nunak Jesusak ofrenda aidau egketainum, jega Apajui ememattainum jintinkagtak pujus tiuwai; tujash makichik aentskesh achichajui, wagki horaji eke jegachu asamtai.

Wi wegmunmag minimaitugme tibau

²¹ Jesús ataktú chichaak:

—Wika wetatjai, nunikmatai egatkattagme, tujash atumek atumi tudaugminig jakatnaitjume. Wi wetatag nuig, atumek minimainchau ainagme.

²² Tutai judío aidau chichainak:

—¿Nigki maamatin asampash, wi wegmunmag atumek minimainchau ainagme tujama? tuidau.

²³ Tiagtai Jesús ayaak:

—Atumek nugkaya ainagme, witjai yakianuk. Atumek ju nugka juiya ainagme, wika ju nugka juiyachuitjai. ²⁴ Nuadui timajime atumi tudaugminig jakatnaitjume timag nunak; wagki Witjai taig dekaskeapi tujutchakjume, atumi tudaugminig jakattagme, tau.

²⁵ Tutai:

—¿Amesh yaitpa? tusag inidau.

Tama Jesús ayaak:

—Nunak nagkamchakun timajime. ²⁶ Kuashat atum dutikajum nu pachisa tumainuk ajutui; tujash mina awetiwa nu dekaskea nuna tawai. Nunin asamtai wika, ni tabau antukbauwa nuna aents aidaunak augjai, tiuwai.

²⁷ Tujash ditak dekachajui Apajin pachis tawa nunak. ²⁸ Nuadui Jesús ditan chichajak:

—Aentsmaga akiinauwa nunú yakí takuijum dekkattagme Wikipag nu, nuigtú wiki nagkamin takatsuk, Apag jintinjuamua dutiksanuk chichag dushakam. ²⁹ Mina awetiwa duka wijai pujawai, Apajuk minakek idaitatsui, wagki wika ni wakega dutiksanuk tuke takau asamtai, tiuwai.

³⁰ Nuna Jesús timatai, kuashat aents aidau niini dekaskeapi tiaju.

Dekaskea nu agkanmitkagmattawai

³¹ Jesús judío aidau niini dekaskeapi tiaju aidau chichajak:

—Atum wi jintinjim nu dutiksagmek umiakjume, dekaskenum mina jintintaig atatjume; ³² nuniakjum dekaskea nu dekkattagme, tuja dekaskea nunú agkanmitkagmattagme, tiuwai.

³³ Tutai dita aiinak:

—Jutiik Abraham weantu ainaji, nunin asaja makichkish inaku waitkataig aajakchawaitji. Nuniajinish, ¿wagka agkanmagattagme tukag-tame?

³⁴ Tiagtai Jesús ayaak:

—Dekas tajime, ashí aents tudau takaa duka, tudau inaku waitkatai ainawai. ³⁵ Inaku waitkataiya duka inamnun jeenig tuke pujuchu ainawai; untsu inamnun uchijiya nuuwai jeen tuke pujuwa duka niina uchiji asa. ³⁶ Nuadui, Uchijiya nu agkanmitkagmakui, dekaskenum agkanmagattagme. ³⁷ Dekajai atumek Abraham weantu ainajum nunak, nuni-naitkujum mantuatasajum wakegagme, wagki mina chichameg atumiin shiig juwachu asantai. ³⁸ Wika Apagdauwa nu wainkamun chichajai; atumshakam nunisjumek, apanu antukbauwa duke takaagme, tau.

³⁹ Tutai dita aiinak:

—Jutii apajig Abrahamai, tuidau.

Tiagtai Jesús ayaak:

—Abrahama uchiji ainakjumek, Abraham takajakua duke takamainaitjume. ⁴⁰ Wi mina Apag jintinjuamun dutiksanuk jintinmash minak ayatak mantuatasajum wakejutagme. Abrahamak makichkish annunak anentaimajakchawai. ⁴¹ Atumek, atumi apá takatjiya nu takaagme, tau.

Tutai dita aiinak:

—Jutiik kasanum akiamuk ainatsji, iina Apajig imá makichki, Apajuiya duke, tuidau.

⁴² Tiagtai Jesús ayaak:

—Atumi apa Apajuiyaitkuig, dekaskenum mina anenmain ainagme, wagki wika Apajuinomia taan jui pujajai. Wika wiki nagkamnuk taachmajai, minak Apajui awetiuwai. ⁴³ ¿Wagka wi chichamush deka-main dekapeatsjume? Duka mina chichameg antut dakituidau asajum nuniagme. ⁴⁴ Atumin apa duka Iwanchia nuuwai; nunin asantai atumi apa wakega duke takastasajum wakegagme. Nagkamtinish Iwanchik magkagtin aajakui, nunin asa dekaskea nunak nigka tuchauwai, wagki niinig dekaskea duka atsau asantai. Waita nunin asa chichakush waitnak tawai tuke nunin asa, wagki nigka waitai, nunin asa waita apajiyai. ⁴⁵ Tujash wika dekaskea nuna chichaig, dekaskeapi tujuttsugme. ⁴⁶ Atum ainajum anuiyash ¿ya wi tudau takasbaugnash dekagtuinawa? ¿Wagka wi dekaskea nuna etsegkuish, dekaskeapi tujuttsugme? ⁴⁷ Apajuinua duka, Apajui chichamen antujuk umijin ainawai; tujash atumek Apajuinuchu ainajum nuadui, nu antutak dakitagme.

Cristuk Abraham akiintsaij pujujakui

⁴⁸ Tutai judío aidau chichajuinak:

—Ii timayag duka dekaske, amek samarianmaya aentsuitme, nunin asamin Iwanch pujugtamui timayag duka.

⁴⁹ Tama Jesús ayaak:

—Makichik iwanchkesh minak atsugtawai. Wi takaag nunak Apajun eme anentsan aikajai, nuniaig atumek minak eme anenjusjumek diigt-sugme. ⁵⁰ Wika mina emematjitnume tusanuk egatsjai; tujash Apajui emematjitnume tujutu asa, mina emematjumainnak iwainawai, nuuwai aentsú etegeka duka. ⁵¹ Dekas tajime, mina chichamjua nuna umiauk, tuke jakachagtin ainawai, tiuwai.

⁵² Tutai judío aidau aiinak:

—Yamai dekas dekajai Iwanch ajutjama duka; Abraham nuigtú ashí profeta aidaush jinawu aina nuniaig, “mina chichamjua nuna umiauk,

tuke jakachagtinai”, tame. ⁵³ ¿Ame iina apají Abraham aajakua nuna nagkaesaukaitam? Abrahamak nuigtú profeta aajakajua dushakam jinawajui nuniaish, ¿amesh ya anenmamkumea tame? tiajui.

⁵⁴ Tiagtai Jesús ayaak:

—Wiki eme anenmamkunuk, wi eme anenmamag duka wainkayai. Tujash mina eme anenjauk, mina Apajui, atum iina Apajuiiyai tajum nunú. ⁵⁵ Tujash atumek wainchauwaitjume, wika wainjai; wainchaujai takunuk, atum waitaitjum nuninuk amainaitjai. Tujash wainu asan, ni chichamenash umigjai. ⁵⁶ Abraham atumi muunjum aajakua nu, wi jui taamtai waitkatatus shiig anejakui; nuniau mina waituk shiig aneasui, tiuwai.

⁵⁷ Tutai judío aidau:

—Cincuenta mijankesh ajutjamtsu nuniaigkik, ¿Abrahaman wainkauwaitjai tame? tuidau.

⁵⁸ Tama Jesús ayaak:

—Dekas tajime, Abrahamash akiintsaig, tuke pujuwaitjai, tau.

⁵⁹ Tutai tukutasag kaya aidau nuniaigkik, tujash Jesusak uumkauwai, nunik jega Apajui ememattainmayag jiinkiuwai.

9

Aents wainmachu akiinaun Jesús etsagagbau

¹ Jesús nuiya jiinki wekamá, aents tuke wainmachu akiinaun wainkauwai. ² Nunikmatai jintintaiji aidau iniinak:

—Maestroh, ¿wagka jusha wainmachush akiinauwaita? ¿Apají nuniachkush dukují tudaujiniash ankauwait atsa niina tudaujinigkiash aanin akiinauwait? tuidau.

³ Tiagtai Jesús ayaak:

—Juka niina tudaujin nuniachkush apají, dukují tudaujinkish ankachui; Ju junin akiinauwa juka, Apajui ni senchijin iwainaktatus wakegau asamtai aanin akiinauwait. ⁴ Eke tsawaiya juik, mina awetiu dutikata tutubauwa nunak takastatjai; kashi wajasmataig, makichkish takamainchau agtatui. ⁵ Nugkaa pujag juikik, nugká tsaaptinjiyaitjai, tiuwai.

⁶ Nuna tusa, Jesús nugkaa usukmá, niina sawinjin nugkan bikamkatu ema juki, wainmachu jiin anutukui. ⁷ Dutika chichajak:

—Yumi ipiagbau Siloé tutaya awi weme nijamita, tiuwai. (“Siloé” tawa nunak, “Awemamu” taku tawai.)

Tima wainmachushkam wee nijamajui, nunik wainmak wakitkiuwai.

⁸ Nunikmatai wainmachujai ijutkau batsamin aidau nuigtú yaunchuk segamá ekeemnun wainin aidau chichainak:

—¿Juchaukaih ekeemas segamá ekeemnuwe nunú? tuidau.

⁹ Tiagtai ujumak chichainak:

—Ehé, niyai, tuinai; tikich chichainak: —Atsa, auchui, nujai betekmamtinai, tiajui.

Tiagtai ni chichaak:

—Witjai, tau.

¹⁰ Tutai:

—¿Tujash wajukamea wainmakume? tusag inidau.

¹¹ Tiagtai ni ayaak:

—Makichik aents Jesús daagtina nu, nugkan bikamkatu ema jiiuji anutujuk, weme “yumi ipiagbau Siloé tutaya nuwi nijamita”, timatai wenu, nijamin wainmakmajai, tau.

¹² Tutai:

—¿Dusha tuwí pujawa?

Tama:

—Achah, tiuwai.

Fariseo aidau wainmachu tsagajun iniasagbau

¹³ Nunú wainmachu aajakua nuna jukiag fariseo batsatbaunum ejegawajui. ¹⁴ Jesús nugkan bikamkatu ema wainmachun wainmitkakua nunak tsawan ayamtai aig dutikau asamtai, ¹⁵ fariseo aidau awentsag iniasajui: ¿Wajukamea wainmakume? tusag, tama ni chichaak: —Nugkan bikamkatu ema jiiuji adutugkamtai nijamin, yamaik wainmajai, tau.

¹⁶ Tutai ujumak fariseo aidau chichainak:

—Nuna dutijama duka Apajuí awemamuk amaitsui, wagki tsawan ayamtaiya nunak ajantus diyatsui, tuidau.

Tiagtai tikich aidau chichainak:

—¿Utugsaya aents tudaugtinush aents dutikmainchaunash iwainainata?

Tusag ditak kanajajui. ¹⁷ Nunikag awaksag wainmachu aajakua nuna iniinak:

—Amesh, amina etsaentamja dusha ¿yayai tame?

Tama: —Duka profetayai, tiuwai.

¹⁸ Tujash judío aidauk wainmachu aajakua nuuwap yamai wainmawa tusag dekaskeapi tumainchau dekapedau, nuninak apajin dukujijai untsukajui, ¹⁹ dutika iniinak: —¿Jukaih atumi uchijum wainmachu akiinawai tuina nunú? ¿Utugsaya yamaish wainmawa? tuidau.

²⁰ Tiagtai nuna apají dukujijai chichainak:

—Ju iina uchijí wainmachu akiinawua duka dekaji, ²¹ tujash dekatsji wajuk wainmake duka, nuigtushkam yaki wainmitkakmae dusha dekatsji. Nigka muuntai, nigki iniastajum, ni tujamtatui, tiuwai.

²² Nuna, apají dukujijai tiajua nunak, judío aidau, makichkikes Jesusak Cristui takuig, iina ijuntajinig jiiikmi tusag chichaman umikaju asagmatai ishamainak tiajui. ²³ Nuniau asamtai wainmachu apajig dukujijai:

—Nigki iniastajum, nigka muuntai, tiajui.

²⁴ Nuna timatai judío aidau wainmachu aajakun ataktú untsuká itan chichajak:

—Apajuí eemtin dekaskenum tukagtita. Jutiik dekainaji nu aentsua duka tudaugtinai.

²⁵ Tiagtai ni ayaak:

—Tudaugtinashit, dekatsjai. Makichik wajiya nunak dekajai, wainmachu aajakuitkun, yamai wainmag juna, tiuwai.

²⁶ Tutai ataktú iniinak:

—¿Utugtamakame? ¿Utugkaya niimtijamne? tuidau.

²⁷ Tusá iniam: Timajimjamah, tujash antugtatsjume, ¿Wagka awagki titi tusagmesh wakegagme? ¿Atumesh ni nemagkatasajum wakegau asagmek tajum? tiuwai.

²⁸ Tutai pegkegchau chichajuinak:

—Ameakitme nu aentsú jintintaimek, tujash jutiik Moisesa jintintai ainaji. ²⁹ Apajuí Moisesan aujukua duka dekainaji; tujash au aentsuk tuwiagkita dusha dekantsui, tiaju.

³⁰ Tama ni chichaak: —Nuuwajamah kamé anentai jegagmainchau, mina wainmitkajiu, atum dekatsji tuwiyaskai tajum nu. ³¹ Dekainaji Apajuik tudaugtin aidaunak antugtsu nu, tujash Apajuin puyatjus umi-juinak, ni wakegamujin takaa nuna antujui. ³² Nagkamtinish antukchamui makichik aentskesh, aents wainmachu akiinaun wainmitkakui tabauk. ³³ Au, Apajuí awemam taachuitkug, makichkish aikmait sui, tau.

³⁴ Tutai dita aiinak:

—Ame akiinkumesh ayatak tudauk akiinauwaitkumek, ¿jutii jintinkag-tam? tusag jega ijuntainmayan jiikajui.

³⁵ Jesús antuku jiikiaje tabaun, nunia asa wekamá wainak chichajak: —¿Amesh Aentsmaga akiinauwa dusha dekaskeapi tamek? tiuwai.

³⁶ Tama ni ayaak:

—Apuh dusha yaita, wisha niini dekaskeapi titajai, tau.

³⁷ Tutai Jesús ayaak:

—Amek duka wainme, wi amijai chichag juuwaitjai, tau.

³⁸ Tutai ni ayaak:

—Apuh, dekaskeapi tajai. Tusa tikishmag emematiuwai.

³⁹ Tutai Jesús ayaak:

—Wika ju nugka juig tauwaitjai aents aidau etejatasan, wainmachu aidau wainmaktinme, nunitai wainbau aina nu wainmachu waigtinme tusan.

⁴⁰ Tutai ujumak fariseo aidau ditajai ijunu, nuna antukag, iniinak:

—¿Jutiish wainmachuk ainag? tuidau.

⁴¹ Tiagtai Jesús ayaak:

—Atum wainmachu ainakjume atumin tudaugminish bakumamainuk atugtaminai; tujash atum wainbau ainaji tajum dui, tudaugmik ajutjainawai, tiuwai.

10

Pastor uwigjijai pachisa augmatbau

¹ Nunik Jesús chichaak: “Dekas tajime, uwig pegmatjamu waitijiya nuwi waitsuk yajá waya duka, kasa nuniawai, ² tujash waitinum wayá duka, pastor uwijá kuitamna nu nuniawai. ³ Nuna waiti kuitamnuk ujutui, nunikmatai uwig aidaushkam nuna chichamen antuinawai; nuniau asamtai makí makichik daajin adaitus untsuawai, dutika jiyawai. ⁴ Dutika ashí jijjá, ni eemtuk weawai, nunitai uwigshakam saetuinawai wagki niina chichamen antuju asa. ⁵ Uwajak ni wainchataijinak saetuchu ainawai, ayatak pisag shimina, wagki chichamen takanchbau antuju asa”, tiuwai.

⁶ Jesús ju augmatbaun apatuk tiuwa nunak, ditak dekachajui wajintu takua tawa nunak.

Jesusai pastor pegkejak

⁷ Jesús ataktú chichaak: “Dekas tajime: Witjai uwig aidau waitijinuk.

⁸ Ashí yaunchuk wi taatsaig kaunawaju aina duka kasa aidau, uwijá yajumin aajakajui; tujash uwig aidauk antugkachajui. ⁹ Witjai waitinuk, aents minai waidauk uwemjagtin ainawai; nunik uwig wenuken utsanawag jjinag pastu yuwama numamtuk wajagtatui.

¹⁰ “Kasak, kasamak kajeg ijina emegkaktatus minawai, tujash wika pujutan jukiag shiig atumkas batsamsatnime tusan tauwaitjai. ¹¹ Witjai dekas pastor pegkegnuk; pastor pegkejak ni pujutinak uwigji aidaunum tsagakamanmainai; ¹² untsu akitaia duka, pastorchauwai, wagki uwig aina

duka niinuchu asamtai, nunin asa ikamyawa minittai wainkug, uwignak ukuak tupikainai; nunikmatai ikamyawashkam uwig aidaunak uwakek ipisiawai. ¹³ Nunú aentsua duka tupikawai wagki akitai asa, nunin asa uwig aidaunak puyatjatsui.

¹⁴ “Witjai pastor pegkegnuk; nunin asan uwig midau aidaunak wainjai, nunisag minash waituinawai. ¹⁵ Apag mina waita antsanuk, wishakam Apagnak wainjai, nuniau asan mina pujutjunak uwig aidaunum tsagkamankattajai ¹⁶ Nuigtush tikich uwig aidaush ajutuinawai ju pegjamua juiyachu; nunú aidaunashkam yajuakan ikaunmattajai, dutika ai makichkinmag ijunag batsamas mina chichamjun antugtiagtatui, nuigtú pastorchakam makichik atatui.

¹⁷ “Nuadui Apajuk aentui, wagki mina uwigjun ayamjakun mantamnan ataktú nantaktin asamtai. ¹⁸ Makichkish minak mantumain ainatsui, wika wiki tsagkamankattajai; minak senchig ajutui jakanush ataktú nantamainaitag dushakam. Nunak mina Apag aatus tujutiawai”.

¹⁹ Jesús nu tabaun antukag, judío aidauk ditak tudaiyag, ataktú kanakajui. ²⁰ Kuashat dita aina nuiya chichainak:

—¿Wagka antugjume, Iwanch egkemtuamu asa imaanag tuu wekaga aniaush? tuidau.

²¹ Tujash tikich chichaidau:

—Makichkish Iwanch egkemtuamuk aajag chichamaitsujama, ¿iwan-chish wainmachunash wainmitkamainkaih? tuidau.

Judío aidau Jesusan dakitjagbau

²² Tsetsek tepeau ai, Jerusalén fiestamaidau jega Apajui ememattai jegamkamua nunú tsawan jegau asamtai. ²³ Tuja Jesusak jega Apajui ememattainum Salomón waiti aagjamunmanini wekagu. ²⁴ Nuniaun judío aidau tenteawag, iniinak:

—¿Wajutiya shiig dekamainush tukagtittame? Ame dekas Cristuitkumek shiig ujabatkacia, tuidau.

²⁵ Tiagtai Jesús ayaak:

—Wika atumnak timajime, tujash dekaskeapi tujuttsugme. Mina Apag dutikata tibaun takaakun paan atumnash iwaintajim nuuwai mina etsegtuja duka; ²⁶ tujash atumek dekaskeapi tujuttsugme, wagki mina uwigjuchu asajum. ²⁷ Mina uwig aidauk mina chichamjun antugtuinawai, wishakam ditanak wainjai, nunú aidau minak saetujuinawai. ²⁸ Wi ditanak pujut tuke atina nunak suwajai, dutikamu asag tuke waittsashtin ainawai. Mina uwejuinyanak makichkish atanjumainchau ainawai. ²⁹ Mina Apag ashí nagkaekagtasua nu minak sujusui. Nunin asamtai Apajui uwejinianak makichkish atanmainchau ainawai. ³⁰ Wika mina Apagjaig makichkitji, tiuwai.

³¹ Tutai judío aidau ataktushkam kayá jukiag tukutá tuidau. ³² Dutikam Jesús chichaak:

—Wi mina Apagdaun kuashat pegkejan takasan iwaintukmajim duish, ¿tu dutikamunma kayaish tukugta tajume? tau.

³³ Tama judío aidau aainak:

—Pegkeg takasbaunum tukumí tatsujame, amek aentsuitkum Apajui pegkegchau chichagkum, Apajuiya iman anenmamam dui kayai tukumí taji.

³⁴ Tiagtai Jesús chichaak:

—Atum chicham umiktina nuwi agagbaunum: ¿Wi, atumek Apajui ainagme tijai tatsuak? ³⁵ Agagbaunum tawa duka dekainaji, nuninchauwai tumaitsui; Apajuk ni chichamen aents aidaun awetiuwa nuig apajui ainagme tiuwai. ³⁶ Apajui mina etegtua ju nugka jui awetimtai tau asan: —Wika Apajui Uchijiyaitjai takuish, wajuk anentaimesagmea Apajui pegkegchau chichajui tujutjume ³⁷ Wi mina Apag wakega dutiksanuk takaachkuig, dekaskeapi tujutigpa. ³⁸ Mina dekaskeapi tujutchakjumes, wi takaag nu diisjum dekaskeapi titajum, nuniakjum minai Apag ai, wi Apajui aja dushakam dekaatajum.

³⁹ Tutai ataktú achikag jukiagta tuidau, imatikainam Jesusak jiinki weuwai.

⁴⁰ Nunik Jesús wakitki Jordagka amain weuwai, yaunchuk Juan yamijatujakbauwa nui, jegaa pujusui. ⁴¹ Kuashat aents jegajuawag:

—Juagkak dekaskeapi aents dutikmainchaunak iwainakag takaschauwai; tujash Juan ju aentsun pachis ashí tiuwa duka dekaske, tuidau.

⁴² Nuninak kuashat aents nui batsatuk Jesusnak dekaskeapi tiaju.

11

Lázaro jakamu

¹ Betanianmaya Lázaro daagtin jaak pujau; María, Marta aina nuna umayí. ² Duka Mariak, Lázaro umayí Apu Jesusa nawen kugkuinui ukatuk niina intashinig ujgugtjua nunú aajakui. ³ Nunú, ni kaijai Jesusan chichaman akupjuinak:

—Apuh, amina kumpajum aneetaigmia duka jaawai, tiaju.

⁴ Jesús nuna antuk, chichaak:

—Au jata duka jachataiyai, ayatak Apajuin eme anentuinak, nuigtú Apajui Uchijiya nunú dutikamunum eme anentiagtata nuna iwainaktatus aniawai, tiuwai.

⁵ Jesusak Martan niina kaijai, nuigtú Lazaronashkam aneejakui.

⁶ Lázaro jaawai tabaun antukuitak, wetsuk, ni pujamunmag jimag tsawan pujusui, ⁷ nunik ni jintintaiji aidaun chichajak:

—Judea wakitkimi, tiuwai.

⁸ Tama dita aiinak:

—Maestroh, dukap atsujama judío aidau kayai tukugmagta tiagma nunú, nuniaigkik, ¿ataktú awi wakitkitasamesh wakegam? tuidau.

⁹ Tiagtai Jesús ayaak:

—¿Makichik tsawantan doce hora ajatsuak? aents tsawai wekaegas wegauk tukumtsame tsaaptinum shiig wainak wegau asa; ¹⁰ untsu kashi wegaga duka tukumui, tsaaptinum wainak wegachu asa.

¹¹ Nuna tii, nuigtú:

—Iina kumpají Lazarok kanawai, tujash wi wejin ishintagtajai, tiuwai.

¹² Tutai jintintaiji aidau chichajuinak: —Apuh, kanag tepauku, nantak-tatajamah, tuidau.

¹³ Tujash Jesusak Lázaro jakau asantai tau, nuniaig ditak kanag tepaunas tawatai tuidau. ¹⁴ Tiagtai Jesús paan iwainak: —Lazarok jakae, ¹⁵ tujash awi pujuschag dui shiig anejai; wagki atum dekaskeapi tiagtin asagmin. Tujash wee diisagmi, tau.

¹⁶ Tutai Tomás, Jimagmamutaiya nu, tikich Jesusa jintintai aina nuna chichajak:

—Jutiishkam wegagmi, mainakush jutiijai mantamatnume, tiuwai.

Jesusai jakaunash inantin pujutnash sukagtin

¹⁷ Jesús jegakmá, Lázaro ukusam cuatro tsawan wegaun wainkauwai.

¹⁸ Betaniak Jerusalén jegattak kumpatum kilómetro tumain au. ¹⁹ Kuashat judío aidau Martan Mariajai jegajuawaju, umayí jakau asamtai anentain ichichtugasag. ²⁰ Nuninai Jesús taattak minawai tabaun Marta antuk, igkugtatus jüntukiuwai, nunitai Mariak jegag juwakui. ²¹ Nunik Marta Jesusan chichajak:

—Apuh, ame jui pujutaik mina ubajuk jamain wajakchae, ²² tujash wika yamaikish ame Apajui segamunak imatiksagkeap amastatua tajai, tiuwai.

²³ Tutai Jesús ayaak: —Amina umaimek aneantatui, tau.

²⁴ Tama Marta chichaak:

—Dekaske, tsawan nagkanbau atina dui jakau aidau nantakiagtina nunak dekajai, tiu.

²⁵ Tutai Jesús chichajak:

—Witjai jakaunash inannunuk, wikitjai pujutnash sukagtinnuk. Minai dekaskeapi tauk, jakau akush tuke pujutnai; ²⁶ ashí aents iwaaku pujuina nu mina dekaskeapi tujutuk, tuke jakashtin ainawai, ¿dusha dekaskeapi tamek? tiuwai.

²⁷ Tama ni ayaak:

—Ehé Apuh, wika aminak dekaskeapita Cristo Apajui Uchijí, ju nugka jui taatnai tibauwa nuuwapi tajame.

Lázaro ukusbaunum Jesús buutbau

²⁸ Nuna tusa ukuak, Martak kai Marian jegantun, niinak akanki:

—Maestro jui taa untsugmawai, tau.

²⁹ Nu tama antamuik, Mariashkam wajaakug Jesusan wainkatatus wejiuwai. ³⁰ Jesusak yaaktanmag eke waitsuk, Marta igkugbaunmag pujau.

³¹ María waujus jüinki wetai, judío aidau María jeen anentai ichichtuinak kauná batsatushkam: —Umayí ukusbaunum jegantá buuttasas wegatai, tsug pataetukajui.

³² Nunik Mariak Jesús pujamunum jegantá tikishmatug pujus:

—Apuh, ame jui pujutaik, mina ubajuk jakachampastaih, tau.

³³ Tusa María buuttai, judío Marian pataetuk kaunkaushkam buutiagtatman Jesús wainak, shiig senchi wake besemag dekapjauwai. ³⁴ Nunik iniak: —¿Tuwí ukusmaugme? tau.

Tutai ainak: —Apuh jui ukusmaji, tantá diistá, tuidau.

³⁵ Tama jegan diikmá wainak Jesús buutiu. ³⁶ Nunitai judío aidau:

—¡Diisjuah, yaitnaku aneejakuajah! tuidau.

³⁷ Tiagtai dita aina nuiya chichainak:

—¿Jujú wainmachunash wainmitkauwe ibaush, Lázaro jataish utugkatnuki, ni pujutaish jakatnasha? tuidau.

Jesús Lázaro inankimu

³⁸ Jesús ataktú shiig senchi wake besemag dekapeg, ukusbaunum jegantú. Duka makichik waa, waitaiji kaya aputuamu aajakui.

³⁹ Nunik Jesús chichaak: —Kayak ekektajum, tiuwai.

Tutai Marta, jakauwa nuna umayí chichaak:

—Apuh, mejeawastaih, wagki jaka cuatro tsawan wega dui, tau.

⁴⁰ Tutai Jesús ayaak:

—¿Ame dekaskeapi takumek, Apajuí senchijí iwainamu wainkattame tichamkajam? tiuwai.

⁴¹ Tama kayan ekekaju, dutikantai Jesús nayaimpin pagkai diyak:

—Apawah see tajame, wagki antugtukum dui. ⁴² Wika dekajai, amek minak tuke antugtam nunak; tujash ju aents ijunaina nu shiig wainak, ame awetiuwaitam nuna dekaskeapi tujuttinme tabaunum tajame, tau.

⁴³ Nuna tii, senchi untsuká:

—¡Lázaro, nantakim agaa jiinkita! tiuwai.

⁴⁴ Tama jakauwa dushakam, uwejinish nawenish pempeagbau nuigtú jaanchi yapijai pempeagbauk imanisag jiinkiuwai. Nunikmatai Jesús chichaak:

—Atiajum idaisatajum, wetí, tiuwai.

Jesús maami tusa chicham umigkamu

(Mt. 26.1-5; Mr. 14.1-2; Lc. 22.1-6)

⁴⁵ Kuashat judío aidau Marian uyunainak kaunawajuk, Jesús dutikamun wainak: Dekas juka Apajuí Uchijimpapita, tiajui. ⁴⁶ Tujash ujumak dita aina nuiya fariseo aidaun wejiag, Jesús dutikamun ujakajui. ⁴⁷ Dutikam fariseo aidau, sacerdote apuji aidaujai apu chichaman inagnau aidaun ipawag ijunjag: —¿Utugkattaji, au aents aentsush dutikmainchaun iwainag kuashat takaa aush? ⁴⁸ Aikasaik idaijinig, ashí niinig dekaskeapi tiagtatui; nuniemunum romanmaya kaunawag iinu jega Apajuí ememattaiya nuna tsainak, ashí jutijai amupaktatajama, tuidau.

⁴⁹ Tiagtai dita aina nuiya, Caifás daagtiin, nunú mijantin sumo sacerdote wajas pujau asa, chichaak:

—Atumek makichkish dekatsjume, ⁵⁰ anentaimsagmesh diyatsjume, ashí aents jinumaina nuna makichik aents mantamnamaina duka, tiuwai.

⁵¹ Nunak Caifasak nigki nagkamig tichauwai, nunú mijantin sumo sacerdote wajas pujau asa, Jesús judío aidaunum mantamnatnun et-segkauwai; ⁵² tujash imá judío aidaunmagkek mantamnatsuk, ashí Apajuí uchijí pampag batsatina nu ijunja makichik emata tabaunum nuniktinun tiuwai. ⁵³ Nunikag, nunú tsawanta duik, mantamnati tusag chichaman umigkajui.

⁵⁴ Nuadui Jesusak judío aidaunmag wantinkag wekaechau, nuniau asa Judeanak ukuak, makichik yaakat yaijuch Efraín tutai uwejush tikiju anem aunum weuwai. Nunik nui jegaa niina jintintaiji aidaujai pujusui.

⁵⁵ Judío aidau fiestamtaiji Pascua tikiju wajasú asantai, kuashat aents yaaktanmaya aidau Jerusalén weedau, eke Pascua jegatsaig pegkeniagtatus. ⁵⁶ Nunik Jesusan egaidau asag, jega Apajuí ememattainum wayawag pempeentunisag iniininak:

—¿Wajuk Jesusash anentaimtagme? ¿Fiestanmash taatpash? tuidau.

⁵⁷ Sacerdote apuji aidau, fariseo aidaujai: —Makichkitigmekesh Jesús pujamuji dekagkugmek etsegkatajum achikmí, tiajui.

12

Betaniannmaya nuwa Jesusa naween kugkuinui ukatkamu

(Mt. 26.6-13; Mr. 14.3-9)

¹ Seis tsawan asa Pascua jegatin ai, Jesusak Betania weuwai, Lázaro jakamtai ni inankiuwa nuna pujutaijin. ² Nui jegamtai Jesusan eme anentsag agkú yuatnun umigkajui; dutikawagmatai Marta yutain pekai, Lázaro Jesusjai mesanum eketaidau. ³ Nuninai María kugkuin senchi

akik, ayatak nardo najanamun, jimaituk litro juki tajuntun, Jesusa nawen ukatuk, niina intashinig ujugtujui. Dutikam kugkuntig jegan akijuuwai. ⁴ Imanikmatai Judas Iscariote, niina jintintaiji aina nuiya, makichik niina sujuktina nu chichaak:

⁵ —¿Wagka jujú kugkuinush trescientos denario sujunkache, dutika ujunauch aidau yaimaina nu? tau.

⁶ Tujash nunak, ujunauch aidau puyatjak tichauwai, nigka kasa asa nuigtú kuichik egketainash nigki takaku asa, nui egkeamunash juujakú asa dutikatatus tiuwai. ⁷ Tutai Jesús ayaak:

—Idaisata, junak mina ukugsagmatai jutijuuwagtinun ukusá pujugbaun jutijuwai. ⁸ Ujunauch aidauk atumjaig tuke batsabiagtatui, untsu wika atumjaig tuke pujushtatjai, tiuwai.

Lázaro maami tusa chicham umigkamu

⁹ Kuashat judío aidau Jesús Betania pujawai tuinamun dekawag weajui, niina wainainak Lazaronashkam jakau aig Jesús inankiu asamtai, wainkata tuidau asag. ¹⁰ Nudiagtai sacerdote apuji aidaushkam, Lázaro maami tusag chichaman umigkajui, ¹¹ wagki ni nantakbaujin wainainak, kuashat judío aidau Jesusan dekaskeapi tusag nemajuinak ditajai kanaidau asagmatai.

Jesús Jerusalén wayamu (Mt. 21.1-11; Mr. 11.1-11; Lc. 19.28-40)

¹² Kashinia dui kuashat aents fiestanum kaunau aidau, Jesús Jerusalén taatatus minawai tabaun dekawaju, ¹³ nunikag duká tsupijag jijnjag igkuinak, senchi untsumkag:

—¡Emematiagmi! ¡Apu Apajuí awemam Israela Reyji miná duka pegkegmai! wajaidau.

¹⁴ Jesús burron wainkau, nunik nuwi ekeemiu, Agagbaunum tawa nunisag, duka:

¹⁵ “Siognumia aents aidautigmek ishankaigpa;

diistá atumi Reyjum burronum entsatkau mina nunú”, tawai.

¹⁶ Nagkamchakug jintintaiji aina duka wagka aniawa nunak dekachajui; tujash Jesús nayaimpinum wakitkintai adeajajui, ashí niina utugkaje, nu pachisa agagbauwa nunak.

¹⁷ Aents aidau Jesús Lázaro ukusbaun untsuká inanbaun wainkaju aina nu, dutikame tusag etsejuidau. ¹⁸ Nunikmatai, aents aidau Jesusan igkugtatus jiintujaju, wagki aents dutikmainchaun dutikamu tabaun dekawaju asag. ¹⁹ Nuniagtai fariseo aidau ditak tudaiyinak: —¡Diisjuah, ashí aents igkugtatus ashintuinana! Ii chicham umikmag duka makichkish dutikashatagjama, tiajui.

Griego aidau Jesusan wainkatatus kaunkamu

²⁰ Fiestanum Apajuin ememattatus kaunkau aina nuiya, ujumak griego aents aidau, ²¹ Felipe yaakat betsaidanmaya Galilea nugkanum pujuuwa nuna jegaantag:

—Apuh, Jesús wainkatasa wakegaji, tiajui.

²² Tama Felipe Andresan jegajua ujakú, nunik niijai Jesusan ujakajui.

²³ Tusa ujaam Jesús chichaak:

—Aentsmaga akiinauwa nu nayaimpinum wakitkitta duka yamaik horak uminkae. ²⁴ Dekas tajime, Ajakan jigkayí nugkaa ajachmak nunisag nigki awai, untsu nugkaa initak ajaam jaka tsapai nejeakug, kuashat

nejeawai. ²⁵ Aents ju nugka juiyan wakegas takaa pujauk, uwemjashtinai; untsu ju nugkanmaya aina nunak uyumatsuk mina umigtuina duka pujut tuke atina nuna jukitin ainawai. ²⁶ Aents mina umigtuktatus wakegauk nemagtuktinme, mina umigtin aidauk wijai pujusagtinai, tuja mina umigtin aina nunak mina Apagshakam eme anentainai.

Jesús ni mantamnatnuji etseggamu

²⁷ Yamaiya juik shiig senchi anentaimku waitiamu ajutui, ¿wajintajaki? ¿Apawah, mina mantuawagtata nunak idaitustinme titajash? Tujash juna juniktasan tauwaitjai.

²⁸ Apawah, aminak emematjabiagtinme, tiuwai. Nuna tai nayaimp-inmaya chicham: Duwaj emematjitnume tusanak dutikabiajai, tujash awentsanak iwainaktatjai tabau antuekauwai.

²⁹ Nu tabaun aents nui ijunu antukaju, nunikag, ipamtai tuidau; nuniai tikich aidau:

—Ángel chichaké, tuidau.

³⁰ Tiagtai Jesús chichaak:

—Juna chichá nunak mina antumtijuktasag tatsui, atumin antumtijamk-agtatus tawai. ³¹ Yamaiya juuwai ju nugkanmaya suwimak suwamu atata duka, tuja yamaiya juiki Iwanch ju nugka jui inama nunú depetkamu atata dushakam. ³² Mina numinum achijag yakí takujiagmatai, jakan nantaakun, ashí aentsnak minai minaig ikaunmantatjai, tiuwai.

³³ Nunak ni wajuk maam atinaita nuna aentsun dekamtikak tiuwai.

³⁴ Tutai aents aidau aினak: —Chicham umiktina nui, Cristuk tuke pujutnai tibauwa nu antukuitji; nuniaish, ¿wajuk asamea Aentsmaga akiinauwa duka maatasa yakí takuam atatuí tame? ¿Nu Aentsmaga akiinaush yaita?

³⁵ Tiagtai Jesús ayaak: —Yamaikik tsaaptinuk atumjai ijunag pujawai, tujash dukap tsawan pujugtamchattawai, wajumchik tsawan atumjaiig pujuttawai, nuniaun asantai atumjai tsaaptin awa duik, tsaaptinnum yujastajum. Pachiachbau suwe minak uwaktamkainum, wagki suwenum wegaga duka dekatsui ni wegamujinak shiig wainmak wegachu asa.

³⁶ Tsaaptin atumin awa duik, tsaaptina nu dekaskeapi titajum, nunikjum tsaaptinu uchijí aminjum.

Juna Jesús tusa ukuak weuwai, nunik ditanak uumjukui.

Judío aidau dekaskeapi tichamu

³⁷ Tujash aents dutikmainchaun kuashat ditá eemtin iwainataish Jesusnak dekaskeapi tuinachu; ³⁸ nu nuniamunum profeta Isaías agagbauwa nui:

“Apuh, ¿ya ii etsegbaunash dekaskeapi tuinawa?

¿Apush yana niina senchijinash iwaintawa?” tawa nu uminkauwai.

³⁹ Nuadui dekaskeapi tumain dekapenachu, junashkam Isaías agak:

⁴⁰ Apajuí ditanak wainmachu, anentaimtanash anentainkachu emakajui; dutikamu asag jinchakam wainmachua nunin ainawai, chicham etsegbaun antuinakush antachua nunin ainawai, nunin ainachkug chichamjun antukag pujutjin yapajinakuig wi ditanak uwentik-mainaitjai, tiuwai.

⁴¹ Isaías juna tiuwa nunak, Jesusa imanjin wainkau asa, niina pachis tiuwai.

⁴² Tujashkam kuashat aents aidau, nuigtú apu aidaushkam Jesusnak dekaskeapi tiajui. Nuninakush fariseon ishamainak iwainmamainachu, ditá ijuntaijin tuke jiyaku jiyam aig tuidau asag. ⁴³ Nunak aents eme

anentam ata wakegaidau asa, Apajuí dekas eme anentam amaina nunak imanchau anentuinak nunikajui.

Jesús aentsun uwemtijatasan tauwaitjai tibau

⁴⁴ Jesús senchi jiiká chichaak: “Mina dekaskeapi tujutuk imá minakek dekaskeapi tujuttsui, mina awetiuwa nunash dekaskeapi tawai; ⁴⁵ tuja mina waita dushakam, mina awetiuwa nunash wainui. ⁴⁶ Wika tsaaptin ju nugka juig taamjai, minai dekaskeapi tuidau suwenum pujusainum tusan. ⁴⁷ Makichikesh mina chichamjun antayatak umiatsu nunak wika bakushtatjai; wagki wika aents aidaun bakutasanuk taachuitjai, aentsun uwemtijatasan tauwaitjai. ⁴⁸ Mina dakitjak, chichamjunash antugtatsu nuna bakutnuk awai, chichaman wi timajim nunuwai tsawan nagkanbaunum bakujattinuk. ⁴⁹ Wika wiki nagkamnuk chichatsjai, Apag mina awetiuwa nu nigki wi tumainaitag nunak nuigtú jintimainaitag nunash umiktá tujutuwai. ⁵⁰ Nuadui wika shiig dekajai, Apag umiktá tibauwa duka pujut tuke atina nuna; nunin asamtai wi atumin tajim nunak Apag tujutbauwa dutiksanuk tajime”, tiuwai.

13

Jesús jintintaiji aidau nawe nijatkamu

¹ Pascua fiestamtai eke jegatsaig, Jesús ni Apajin weaku ju nugka ukuktinji hora jegaun dekau asa, ni jintintaiji aidaun ju nugka jui pujus aneejakbaujinak, imatiksag inagnamunmash aneamujin iwaintukui.

² Nunik agkú yuamunum Judas Iscariote Simogkan uchijiya nuna, Jesús sujutnum Iwanch anentaimtijauwai. ³ Jesusak Apají ashí waji niini idaitusbauwa nuna, nuigtú Apajuijai pujau tauwa nunash, nuigtushkam Apajuiyai waketa nunashkam dekau asa; ⁴ agkú yuamunum wajakí jaanch awantak nugkuagbaujin awimak toalla juki itipjuauwai. ⁵ Nunik bandejanum yumin yajaa, niina jintintaiji aidau nawe nijattan nagkamau, dutika toalla itipjuamujiya nujai ujgtuk emau; ⁶ dutikau asa Simón Pedronashkam jegantau, dutikam ni chichaak: —¿Apuh, ameká mina daweg nijatjगतam? tau.

⁷ Tutai Jesús ayaak: —Wi jutikag juka yamaikik dekatsme, tujash dui dekaattame, tiuwai.

⁸ Tusa tama Pedro chichaak: —Apuh, amek mina dawejuk tuke nijatjgchattame, tiuwai.

Tutai Jesús ayaak: —Amina nawemin wi nijagchamtaig, amek wijaig ijunmaitsume, tau.

⁹ Tama Simón Pedro chichaak: —¿Untsu apuh, imá dawejuk nijatsuk, uwejush nijatjakum, buukjushkam nijatjgta! tiuwai.

¹⁰ Tutai Jesús ayaak: —Mainua duka nuigtú nijamagtasag atsumatsui, ayatak naweeg nijatam amainai; wagki ashí iyashiya duka tsuwatchau asamtai, numamtuk atumek tsuwatchau ainagme, tujash ashí tsuwatchauk ainatsjume, tiuwai.

¹¹ Jesusak dekau ya sujuktatua nunak, nuadui: “Ashí tsuwatchauk ainatsjume”, tiuwai.

¹² Dutika, ashí nawen nijatuk, jaanchjin juki wakitki mesanum jegantá chichaak: —¿Atumesh degagmek wi jutikajim jusha? ¹³ Atumek minak Maestro nuigtú Apú tujutjume, duka dekas iman asamtai tujutjume. ¹⁴ Wi Maestroitkun nuigtush Apuitkun atumi nawemin nijatjajime, atumesh junisjume atumin kakagchaujum pempeentunikjum iwaintuniktajum.

¹⁵ Wi jutikag junak, atumesh jutiksagmek takastajum tusan iwaintakun jutikajime. ¹⁶ Dekas tajime, inakak apujin nagkaesauchui, awemamua dushakam awekagtiuwa nuna nagkaesauchui. ¹⁷ Ju aina ju dekaajum atumesh dutiksagmek takaakjumek shiig aneasjum pujustin ainagme.

¹⁸ Junak ashí atumin takun tatsujime, wika dekajai ya aidauna eteg-jauwaitja nunak; tujash Agagbauwa nui: “Wijai pagkan yuwa nuiyag pempeentugkittawai”, tawa nu uminkattawai. ¹⁹ Yamai nagkamsanuk, eke jegatsaig tajime, wagki nunú tsawan jegakui, dekas Apajuí Uchijimpapita tujutminjum tau asan. ²⁰ Dekas tajime, wi awemamun jukitta duka, mina jujuinawai, mina jujuina dushakam, mina awetiuwa nuna juinawai.

Jesús Judas sujam atin etsegkamu

(Mt. 26.20-25; Mr. 14.17-21; Lc. 22.21-23)

²¹ Jesús nuna tii, shiig senchi wake besemag dekapjauwai, nunik chichaak: —Dekas tajime, atum ainajum juiyag makichik minak sujutkattawai, tau.

²² Nuna timatai jintintaiji aidauk pempeentunisag niinidau, yana takug tawa tusag. ²³ Nuniai jintintaiji aina nuiya makichik, Jesusa anetaiji, Jesusai ayaumas eketu. ²⁴ Nuna Simón Pedro iwijau, yana takug tawa iniasti tusa. ²⁵ Dutikam Jesusan adjik, iniak: —¿Apuh, dusha yaita? tau.

²⁶ Tama Jesús ayaak: —Yana wi pagkan puukan uchupjan susattaja nuuwai. Tusa pagkan uchupig Judas Iscariote Simogkan uchijiya nuna susauwai; ²⁷ dutikam yuwaig, Iwanch waintuauwai. Nunitai Jesús chichajak: —Ame dutikattam duka, wamak dutikata, tiuwai.

²⁸ Tujash makichkish mesanum eketaina duka dekachajui wagka tawa nunak. ²⁹ Ujumak anentainsajui, Judas kuichik egketain takaka dui, Jesús: Fiestanum atumtin sumakta nuniachkumesh ujunauch aidau susata tawastai tiaju.

³⁰ Judaschakam pag puukbau juki waujus jiinkiuwai. Nunak kashi nunikui.

Yamajam chicham umiktin

³¹ Judas jiinki wematai, Jesús chichaak: —Yamaiya juuwai Aentsmaga akiinauwa nu eme anentam atata nu, nuigtú Apajuinash niini eme anentiagtatui. ³² Aentsmaga akiidau Apajuí ememattinme tusa iwainataik, Apajuishkam Uchijun ememattinme tusa wamak umiktatui. ³³ Uchuchig aidauwah, atumjai ijunjanuk kuashat tsawantaik pujushtatjai, tujash judio aidaun timag dutiksanuk atumnash tajime, wi wetatag nuanuig atumek yamaikik minimainchau ainagme. ³⁴ Chicham umiktinun yamagman ukugjime: Makí makichik pempeentunisjumek aneenitajum; wi atum aneamun iwaintukjim nunisjumek, atumesh pempeentunisjumek aneenitajum tusan. ³⁵ Atum pempeentunikjum aneediagtaik, tikich aidauh Jesusa jintintaijimpap ainawa tusag dekgamawagatui, tiuwai.

Jesús Pedron uugtuktatme tusa ujakbau

(Mt. 26.31-35; Mr. 14.27-31; Lc. 22.31-38)

³⁶ Tutai Simón Pedro iniak: —Apuh, ¿tuwí wetatme? tau.

Tama Jesús ayaak: —Wi wetatag nuig yamaik minimaitsume, tujash dui pujusam minittame, tau.

³⁷ Tutai Pedro ayaak: —Apuh, ¿wagka yamaikish minimainchawaitja? wisha aminí jakatasan umintsan pujajai, tau.

³⁸ Tutai Jesús ayaak: —¿Dekaskek wijai mantamnatasam umintsam wekaegam? Dekas tajame, eke atash shinatsaig kampakumá ugtuktatme, tiuwai.

14

Jesuai jinta iina Apajin wetai

¹ Nuna tii: “Atumek wi tajim nunú anentaimtakjum wake besemag anentaimá pujuigpajum; Apajuiyai dekaskeapi takujum, minaishkam dekaskeapi titajum. ² Mina Apajú jeenig kuashat pujumain awai, nu iman au asamtai, wi atum pujustinnak umigkatjime tusan weajai. ³ Yamai wenu atum pujustinun umikan, ataktú wakettsanak taattajai, mina pujutaijui pujustajum tusan atumin juwakun. ⁴ Atumek jintak wainjume, wi wegag nui minimaina duka”.

⁵ Tutai Tomás: —Apuh, dekatsji tuwí wegame duka, nuniautish, ¿wajuk jintash dekamainaitji? tau.

⁶ Tutai Jesús ayaak: —Witjai jintanuk, dekasketnash wikitjai, nuigtushkam witjai pujutnash sukagtinnuk. Makichkish wijaichuk mina Apajuijegamainchau ainawai. ⁷ Atum mina waitutigmek, mina Apagshakam wainjume. Yamai mina waitjum juik, mina Apagshakam wainjume, tau.

⁸ Tutai Felipe chichaak: —Apuh, Apa iwainkagtukta, duke atsumaji, tiuwai.

⁹ Tama Jesús ayaak: —Felipeh, kuashat tsawan atumjai pujag nuniaigkik, ¿eke waittsum? Mina waita duka, Apagnashkam wainui, nuniaish; ¿wagka Apa iwaintugkata tame? ¹⁰ ¿Dekaskeapi tatsumek wi mina Apajui pujau asamtai, mina Apagshakam minai puja duka? Wi chichaman tajim nunak, wiki nagkamnuk tatsujai, mina Apag minai puja nunú, ni dutikata tabaunak takaajai. ¹¹ Wi mina Apagjai pujau asamtai, mina Apag minai pujawai taja duka dekaskeapi titajum. Nuniachkugmesh, wi takaag nunú diisjum, dekaskeapi tujuttajum.

¹² Dekas tajime, mina dekaskeapi tujutuk, wi takaag junak jutiksag takasatui, nuigtush wi takasag juna nagkaegas takasagtinaí, wagki wi Apajui wegau asamtai. ¹³ Ashí mina daajui Apag segattajum nunak amastatjime, wi dutikamunum Apajun ememattinme tau asan. ¹⁴ Makichik wajigkesh mina daag pachisjum atum segatkugminig, imatiksasuk umiktatjai.

Jesús Wakaní Pegkeji anagagtuamu

¹⁵ Atum mina anenkugmek, wi chicham umiktajum tajim nunú betek umiktajum. ¹⁶ Nuniakjumin wi Apajun segattajai, atumiin tuke pujus ichichtamtina nuna Wakaní Pegkeji awetugmatí tusan. ¹⁷ Nunú Wakan dekaskea nuna jintinkagtina nunak, aents mina nemagtuchu aidauk jumain ainatsui, wagki waintanash wainmainchau dekatnash dekamainchau asag; tujash atumek degagme, wagki atumiin pujau asamtai nuigtushkam atuminig tuke pujutajum.

¹⁸ Tuke bitaika numamtukek ukukchatnaitjime, waketjusnuk ataktú tajuatnaitjime. ¹⁹ Machik asag, aents mina nemagtuinatsi duka waitkachagatui, tujash atumek waitkattagme, wagki wi pujau asamtai atumshakam tuke pujutin asajum. ²⁰ Nunú tsawan jegakui, wi Apajui pujai atumshakam minai pujagmin, wi atumin pujamuk shiig dekaattagme. ²¹ Aents wi chicham umiktajum tibuwa nuna umiakug dekas mina anentak nuniktatui. Nuniaun mina Apajuk aneettawai, nuniakui wishakam aikasnuk anettajai, dutikakun wantintuktatjai.

²² Tutai Judas (Iscariotechu) chichaak: —Apuh, ¿amina nemagtamchau aidau wantintutskesh, utugsamea imá jutiikesh wantinkagtuktatme? tau.

²³ Tama Jesús ayaak: —Mina anentuk, mina chichamjua nuna umiktatui, nunitai mina Apajush aneettawai; nuniakui wishakam mina Apagai niina anentain tajuan tuke pujustinaitjai. ²⁴ Untsu mina anenchauk, mina chichameg aina nunak umikchattawai; tujash jujú chicham atum antajum juka midauchui, Apag awetiuwa nudauwai.

²⁵ Ashí juna tajim junak, yamai atumjai pujag dui tajime. ²⁶ Tujash Ichichkagtina nuna, Wakaní Pegkejin Apag mina daajui awematta nunú, ashí waji aina nunak jintinjamawagtatui, dutikak ashí wi tiuwaitjim nunash aneemtijamjagtatui.

²⁷ Shiig agkan pujata nuna ukugjime, mina shiig agkan pujatajua nunash amajime, wika ju nugkanmaya sukagtin aina nuninnak amatsjime; nunin asantai anentaiminish puyatkaigpa, ishamtash ishankaigpajum.

²⁸ Wika wegajai, nuniknush waketsanuk atumjai pujustasan tajuattajime tabaushkam antukmaugme. Dekas mina anenkugmek, wi Apag mina nagkaetasua nui wegajai tabau antugtakjume shiig aneemain ainagme.

²⁹ Junak emtikan tajime, nunú uminkui dekaskeapi timinjum tusan.

³⁰ Atumjaig kuashat chichá pujushtatjai, ju nugka juna apuji minau asantai, nigka mina depetumainjig senchijig atsujui; ³¹ tujash ju nugkanmaya aidauk dekamain ainawai wi mina Apajun aneau asan, ni dutikata jutbaunak imatiksianuk umijag nuna.

Wajagtajum, wegagmi.

15

Jesús, witjai uva numijinuk tibau

¹ Witjai dekaskenum uva numijinuk, untsu mina Apajua nuuwai ajakan kuitamna duka. ² Ashí mina kanaweg nejeachunak tsupiawai; untsu ashí kanaweg nejena nunak, asantug iwajui aan senchi nejektí tau asa.

³ Atumek wi chichaman jintintuamjim nu umiau asajum shiig asanjamu ainagme. ⁴ Wijai ijutkau atajum, wi atumjai ijutkag antsagmek. Ajakan kanawe numijin achitkachu nigki kanakí akug nejemaitsui, antsagmek atumesh wijai ijutkau achakjume pegkejak takamaitsugme.

⁵ Witjai uva numijinuk, atumetjume mina kanaweg aidautigmek, wijai ijutka nu, tuja wi niini ijutkag nunú senchi nejeawai; wagki atum wijai ijutkau achakjume Apag wakegamua duka makichkish dutikmainchau ainagme. ⁶ Wijai ijutkatsu duka, jiki ajapam ajaka kanawe tsupikbau kukagmatai, juki jinum apetiama numamtuk awajam atinai.

⁷ Wijai ijutkau pujakjume nuigtú mina chichameg aina dusha umiakjume, ashí atum wakegamu segattajum, nuniakjuminig ashí amastinaitjime. ⁸ Atum pegkeg takaamu aina duke iwainagtaik, tikich aidaush mina Apagnash shiig emematiagtatui, nuninak dekas mina jintintaig ainajum nunashkam dekagmawagtatui.

⁹ Apag mina anenta dutiksianuk atumnashkam aneajime, nuadui wi aneajim nunisjume atumshakam anenitajum. ¹⁰ Mina chichameg aina nu umiakjuminig wishakam aneettajime, wi mina Apajú chichame aidaun umiju asantai, ni anenta aikasnuk.

¹¹ Ju aidaun tajim junak, wijai betek dakujus shiig aneas pujustinme tusan tajime. ¹² Wi chicham umiktajum tajim duka: Mina nemagtin

aidautigmek pempeentunisjumekek aneenitajum, wi atumin aneajim antsagmek, tajim nuuwai. ¹³ Makichik aentskesh ju anenka juna nagkaesauk atsujui, niina pujutjin kumpají aina nui tsagkamanmainuk. ¹⁴ Atumek mina kumpag ainagme, wi dutikatajum tajim nu umiakjumekek. ¹⁵ Nuniau asamtai inak ainagme tichattajime, wagki inaka duka apuji takaa nunak dekatsui; mina kumpag ainagme tajime, wagki mina Apag tabau antukbaunak ashí ujakjim nuadui. ¹⁶ Atum minak etegtuachu ainagme, wi atumnak etegjauwaitjime, dutikau asan mina chichameg etsegkujum, ajak senchi nejegama numamtuk wajaktajum timaijim duka ajumaish tuke atinai. Nuadui atum mina pachittsajum, ashí mina Apag segamak amasagtinai. ¹⁷ Junashkam tajime: Pempeentunisjumekek anenitajum.

Nugkanmaya kajegtabiagtinai tibau

¹⁸ Aents mina nemagtuchu aidau, atum mina nemagtau asagmin kajegtamainakuish, adeagtajum, mina dekas nagkamchakug kajegtuku ainawai. ¹⁹ Atumesh ju nugkanmaya agtaik, dita anenina aikagmasajag anempamain ainagme. Tujash wi atumnak ju nugkanmaya aina nuiyatigmin etegjan midau emakbau asajum, ditajai betekchau ainajum duwi kajegtamainawai. ²⁰ Adeagtajum wi: “Inak apujin nagkaesauchui” timajim nu. Mina waitkagsaju aina dutiksag atumnash waitkagmasagtinai. Mina chichamjun umiauk, atum tabaunash umikagtatui. ²¹ Ashí nu aina nunak mina nemagtuidau asagmin imatijabiagtinai, wagki mina Apag awetiuwa nuna dekainachu asag.

²² Wi jui taan ujakchamu ainakug, tudaujin bakumamainuk atusgmain ainawai; tujash yamaik ditá tudaujin ayamjumamainuk atsujuinawai. ²³ Mina kajegtuidauk, mina Apagnash kajejuinawai. ²⁴ Wi dita aina nui tikichish dutikchatain takaschau ataik, bakumamainchau ainawai; tujash wi iwainaja takaamun waituinayatak ayatak kajegtuinak, mina Apagnashkam kajejuidau asag bakumagtinai. ²⁵ Tujash junak dita chicham umiktin agagbauwa nui: “Wainak kajegtukajui”, tawa nu uminu asamtai aikajuinawai.

²⁶ Tujash wi Ichickagtinun awemattag nu, Wakan Apagdau dekasken jintinkagtina nu, mina pachitus shiig dekamtijamattagme. ²⁷ Dutijamainakui atumshakam yama nagkamchakjumesh wijaig batsamsau asajum mina pachittsajum tikich aidauish ujaktajume.

16

¹ Juna tajim nunak, minai dekaskeapi tabau megkaekaijum tusan tajime. ² Jega ijuntai aina nui wayagminish agaa jigmaktin ainawai, dutijamawag mantamainak: Juka Apajui takaju asa jutikaji tiagtinai. ³ Nunak mina Apagnash, minashkam dekajuinachu asag dutijamiagtinai. ⁴ Juna tajim nunak, nu tsawan jegakuish wi tibauwa nu adeagminjum tusan tajime.

Wakaní Pegkeji takatji

Junak nagkamsanush tichabiajime, wagki wi atumjai pujau asan. ⁵ Tujash yamaik mina awetiuwa nujai pujustasan wegajai, makichkitigmekesh: ¿Tuwí wegame? tusagmek inintsachugme; ⁶ ayatak, wi nunú aidau takui wake besekjum pekagume. ⁷ Tujash dekaskea nuna tajime: Wi weamua nu atuminig imá pegkejai; wagki wi wechataik, Ichickagtina duka atumjai pujustasag tamaitsui, tujash wi wenu awemattajai. ⁸ Dutikam ni taa, aents aidau tudaunum batsata nunak dekamtikattawai, pegkeg takat aina nunash nuigtú suwimak atina nunashkam. ⁹ Tudau

takaina duka, mina dekaskeapi tujutuinsatsu nuuwai; ¹⁰ Wi pegkejan takaunuk mina Apajui wetatjai, nunikmataig ataktuk waitkashtatjume; ¹¹ suwimkan jukitta duka, ju nugka juna apujiya nuwai, duka suwimkan jukiti tibauwai.

¹² Kuashat waji aidau atum tumainuk ajutui, tujash yamaiya juikik imatikagmek ashi dekamainchau ainagme. ¹³ Tujash Wakan dekaskea nu taa, ni ashi dekaskea nuna dekamtijamattawai, wagki nigka nigki nagkamig chichakchattawai, ashi ni antukbaujiya nuna titatui nuigtush waji nagkaemagtina nunash dekamtijamattawai. ¹⁴ Wakan Pegkejiya nu mina imanjua nunak iwaintugmak, ima midaunmayanak atumnash dekamtijamattagme. ¹⁵ Ashi mina Apagduwa duka midau ainawai; nuadui Wakan Pegkeji midauwa nuna juki, dekamtijamattawai tajime.

Wake besemja duka shiig aneamujai yapajinatnai

¹⁶ Machik asagmek minak waitkashtatjume, tujash dukapech tsawan asagmek ataktú waitkattagme.

¹⁷ Tutai ujumak jintintaiji aidau pempeentunisag iniininak:

—¿Wajina takua nunash, “machik asagmek minak waitkashtatjume, tujash dukapech tsawan asagmek ataktú waitkattagme, wagki Apajui wegau asamtai” tawa nunash tawa? tuidau. ¹⁸ Tusag ¿wajina takua: “Machik asagmek tawa”? Antumaitsui wajina takus tawa, tuidau.

¹⁹ Tusag, iniastag tuinamun Jesús dekau asa, chichaak: —“Machik asagmek minak waitkashtatjume, tujash dukapech tsawan asagmek ataktú waitkattagme” taja duká, ¿pempeentunikjum iniiniakjum, wajinak tawa tajum? ²⁰ Dekas tajime, atumek buutkujum wake besemag pujuttagme, nuniagmin ju nugkanmaya aents aidauk shiig aneediagtatui; tujash atum wake besemag pujamua duka, sakapakjum ataktú shiig aneestatjume, wi nantakin wantintuktatjim dui. ²¹ Nuwa uchigmakug najaimawai, wagki horaji jegagbau asa; tujash uchin uchigmaktata dui, ni waittsamujinak kajimatui, uchin uchigmak shiig aneamunum. ²² Atumnashkam aantsag yamaik wake besemag ajutjamainawai, tujash wakettsanuk wainkattajim dui, atumi anentaimin shiig aneastinaitjume, nunú shiig aneamugmia nunak makichkish emegkatjamainchau ainawai.

²³ Nunú tsawanta duik makichkish inintsashtin ainagme. Dekas tajime: Atum mina pachittsajum ashi mina Apag segatajum nunak amastatjume. ²⁴ Yamaikish makichkish mina pachittsagmek Apajuk segachugme, tujash yamaik segatajum nuniakjumek jukittagme, nunikjum atumesh shiig aneestatjume.

Jesús nugkanmayanak depetkauwai

²⁵ Ju aina junak augmatbaujai apatkan tinujime, tujash hora jegawai augmatbaujai apatkan tutsuk, shiig paan mina Apajun pachisan etsegkattag nu. ²⁶ Nu tsawantinig mina pachittsajum Apag segatajum, wi Apajun atumin segattajime tatsujime, ²⁷ wagki Apajuk tuke atumnak anempajume. Atumin anempajum nunak mina anenjum dui anempawai, wagki wi Apajuinomia tauwaitag nu dekaskeapi tujutuidau asagmin. ²⁸ Mina Apajuian jinkin ju nugka juig tauwaitjai, yamaik ju nugka junak ukuajai Apajui waketkun.

²⁹ Tutai jintintaiji aidau chichainak: —Makichik augmatbaukesh tutsuk, yamaik paan tukagtume, tuidau. ³⁰ Yamaik dekaji ashi waji aidau dekam

duka, nuigtush atsumatsme inintsatnume tusamek, nuadui Apajuiyap awemauwaita tusa dekaskeapi tuinaji, tuidau.

³¹ Tama Jesús ayaak: —¿Yamaik dekaskeapi tajum? ³² Yamaik hora jegawai, duka yamaiya juiki, atum pampagjum makí makichik shimakjum minak ukugkittajum nu. Tujash imá wikik juwakchattajai, wagki Apag wijai pujawai. ³³ Juna tajim junak, minaiya shiig agkan pujuta nu ajitnume tusan tajime. Ju nugka juig waitiamuk igkugtinaitjume, tujash ichichmamjatajum, wi ju nugkanmayanak depetkajai.

17

Jesús jintintaiji aidau Apajuí segatbau

¹ Nuna tii idaiyak, Jesús nayaimpin diis chichaak: Apawah, minak horak jegagtine; minash ememattai etita, aents aidaushkam: Dekas Apajuí Uchijimpapita tusag dekajuatnume. Wishakam dutiksanuk aents aidaunmash iwainaktajame emematjabiagtinme tusan. ² Ame minak ashí nugkanmaya aina nunak, nigki diísti tusam idaitugsaume, dutikakum senchigmishkam sujusmaume, mina nemagtin aidau ame sujusmauwa nunash pujut nagkanchaun susati tusam ³ Pujut nagkanchauwa nunak, amina dekagmawag: imá jukepita dekas Apajuik tujamainak, ame mina awetiuwaitam nunashkam: Dekas juwapita uwemtikagtumainuk, tuidau jukiagtinai.

⁴ Wika ju nugka jui pujusnuk aminak emematjame, nuniakun ame umiktá tujutiwaitam nunash imatiksasuk umikjai. ⁵ Apawah, yamaik ame minash yaunchuk nungkash najannatsaig amijai emematjamin aajabia imanuk etita.

⁶ Ame ju nugkanmaya aents aidau etejam sujusuitam nunak, wishakam amina pachisnuk shiig jintintuawagjai. Duka aminuk sujusuitme, dutikamu asag ditashkam chichamjumnak betek umigtamainawai. ⁷ Yamaik wi ashí aminu aidaun jintintuabiag nunak, dekainawai; ⁸ aikasnuk ame mina chicham etsegtugkata tujutbaunak imatiksasuk ujakagmajai, dutikam ditashkam wakejus antukagmae, nuninak: Dekas Apajuí awemaup tauwaita tusag dekaskeapi tujutuinaawai.

⁹ Duwi ditanun pachisan segagme aminu asagmatai, tikich aents mina nemagtuinatsu nuna pachisnuk segatsjame. ¹⁰ Ashí aents midauwa duka aminu ainawai, tujamtai aminu aidauk midau ainawai. Nunú aidau mina emematjuinawai, tikich aidaushkam Jesusa imanjin waikatnume tusag.

¹¹ Wika aminí midau asan juig pujushtatjai, tujash jujú aidauk nugká juwainawai. Apawa pegkegmah, amina senchigmin kuitamkata ame sujusbau aina duka, ii makichik duke anentaimkag nunisag ditashkam anentaimtinme. ¹² Wi ditajai pujaknuk, ame senchijum sujusbauwa dui ditanak kuitamnuijai, dutikamu asa dita aina nuiyag makichikikesh megkaekache, nuninaitak aatus megkaekati tibaauwa nu megkaekae, yaunchuk chicham agagbauwa nu uninu asamtai.

¹³ Yamaik ame pujam nui minajai, nuniayatkun ju nugka jui pujusan tajame, ditanash wi shiig aneag nunisag betek ajitnume tau asan. ¹⁴ Amina chichamjumnash jintintuawagmajai, dutikai aents ju nugkanmaya aidau kajejuinawai, wagki wi ju nugkanmayachuitag nunisag ditashkam ju nugkanmayachu asagmatai. ¹⁵ Ju nugka jui batsamsainum yajuakta tusanuk segatsjame, Iwanch waitkainakuish ayamjukta tusan segajame. ¹⁶ Wi ju nugkanmayachuitag nunisag ditashkam ju nugkanmaya ainatsui. ¹⁷ Amina chichamjum dekaskea nunak umigtamkatnume ditash

pegkemtikata. ¹⁸ Ame mina ju nugka jui, aents amina dakitjamin aidau batsatbaunum awetiwaitam dutiksanuk ditanash ishimjai. ¹⁹ Wika, amina takaju asan mina pujutjunak ashí idaitusjame, ditashkam nunisag aminu dekaskea nuna takagtamainak, ashí ditá pujutinak idaitug-mastinme.

²⁰ Tujash imá jujú aidaunakek segatsjame, dita chichaman etsejiagtai antuinak mina dekaskeapi tujutiagtin aidau pachisnush segajame; ²¹ ashí dita aina duka ijutkau atinme, tusan. Apawah, ame minai amin, wi aminí au asamtai makichkitag nunin ditash atinme, nuniagtai ju nugkanmaya aidaush ame awetiwaitam nuna dekaskeapi tiagtinme. ²² Ame imanjum mina sujusuitam nunak ditanash susajai, jutíi makichkitag nunisag ditash makichik agtinme tusan; ²³ wi ditai ai, ame wijai ame nunisag, shiig betek ijunas makichik atinme, nuniagtai ju nugkanmaya aidaush ame awetiwaitam nuna dekaajatneme, nuninak mina anentam aikasmek dita aneam nunashkam dekaatneme.

²⁴ “Apawah, ame sujusbau aina nunak mina pujutajui ditash pujusag, nugkash najannatsaig ame mina anentujakú asam, amina imanjum ashí mina sujusum nunash waikatin atinme tusan wakegajai. ²⁵ Apag pegkegmah, aents nugkanmaya amina umigtamainachuk dekaagmainatsui; tujash wika aminak dekagme, ju aina jusha dekaagmainawai ame mina awetiwaitam nunak. ²⁶ Wika amina pachisnuk ditanak shiig dekamtikamjai, aan nagkaemasnush tuke dekamtiksané atatjai, ame mina anentam aantsag ditaish atí, nuniakui wishakam ditai atajai tau asan”.

18

Jesús achiká jukimu

(Mt. 26.47-56; Mr. 14.43-52; Lc. 22.47-53)

¹ Jesús aatus Apajuin aujus inagnak, ni jintintaiji aidaun yajuak entsa Cedrón tutai amain katigkui, nunik ajak olivos tutai ajakbaunum jegantajui. ² Nunak Judas, Jesusan sujuktina dushakam dekau, wagki núi Jesús ni jintintaiji aidaujai kuashtá ijunin asamtai. ³ Nunin asa Judaschakam, kuashtat suntag aidaun yajuak nuigtú sacerdoté apuji, fariseo aidau ditashkam, jega Apajuí ememattain kuitamin aidaujai ishiakbaujai, lamparan nuigtú jii ekemajag, nagki tinamdaekag Jesusan kautuawajui. ⁴ Tujash Jesusak, ashí niina utugkagtatua nuna dekau asa, jiiintuki igkugku, dutika iniak: —¿Yaa egagme? tiuwai.

⁵ Tama dita aiinak:

—Jesús nazaretnumia egaji, tuidau. Tiagtai Jesús ayaak: —Witjai nunak, tiuwai. Judas niina suja dushakam ditajai wajau asa, ⁶ Jesús chichaak: “Witjai”, tutai waketsag nugkaa kakekaju. ⁷ Nunikagmatai awentsag iniinak: —¿Yaa egagme? tau. Tutai dita aiinak: —Jesús Nazaretnumia egaji, tiajui.

⁸ Tiagtai Jesús ayaak: Witjai timajim jama, mina egatkugmek, ju aina juka idaisatajum wetinme, tiuwai.

⁹ Nunak Jesús Apajin segaak: “Apawah, ame sujusbauunak makichkish emegkatkachjame” tiuwa nu betek uminu asamtai tiuwai. ¹⁰ Nuniagtai Simón Pedro, espadajin ukuini juwakug sumo sacerdoté inake Malco daagtinun kuwishí untusujija nuna tsupigkauwai. ¹¹ Dutiktai Jesús Pedron chichajak: —Espadajum jukim awajata, ¿amek, mina Apag waittsati tujutbauwa nunak umimainchawk anentaimtujam? tiuwai.

Jesús Anasai ejegamu

¹² Suntag aidau, comandante, jega Apajuí ememattai kuitamin judío aidau ishiakbau aina nujai Jesusan achikag jigkajajui. ¹³ Dutikawag dekatkauk Anasai ejegawajui Caifasa wegajin, nu mijantinig Caifás sumo sacerdote wajas pujaw asamtai. ¹⁴ Nunú Caifás judío aidaun chichajak: “Ashí aentsun ayamjuk uwemtijatnuk, dekas makichik aents mantamna-mainai”, tiuwa nu aajakui.

Pedro Jesusnak wainchaujai tusa uukbau

(Mt. 26.69-75; Mr. 14.66-72; Lc. 22.54-57)

¹⁵ Jesusan jukiag emagtai, Simón Pedro nuigtú tikich Jesusa jintintaijiya nujai, ukunum pataesag weedau. Nunú Jesusa jintintaijiya duka, sumo sacerdote waintai asa, sumo sacerdote jeen agaajin Jesusan awayagtai niish wayauwai, ¹⁶ nunitai Pedrok agaag, waitinum juwakui. Nuniai Jesusa jintintai sumo sacerdote waintaijiya nu jiinki, nuwa waiti kuitamna nuna aujus Pedron awayauwai. ¹⁷ Nunitaman nuwa waiti kuitamna nu Pedron iniak: —¿Amesh au aentsú jintintaiji aina duchaukaitam? tau.

Tama Pedro ayaak:

—Atsa, duchauwaitjai, tau.

¹⁸ Tsetsek asamtai, sacerdote apujin inake aidau nuigtú jega Apajuí ememattai kuitamin aidaujai jiin ikapajag anamainak ijunaidau; nuniamunum Pedroshkam ditajai ijunag jii anamak wajau.

Anás Jesusan iniasbau

(Mt. 26.59-66; Mr. 14.55-64; Lc. 22.66-71)

¹⁹ Sumo sacerdote Jesusan, niina jintintaiji aidaun nuigtú ni jintinkag-tutaijin pachis iniau. ²⁰ Tutai Jesús ayaak: —Wika ashí aents antuinamunum chichaujai. Tuke jintinkagtinujai jega ijuntainum nuigtú jega Apajuí ememattainmash ashí judío aidau ijunin aina nui, wika uuknuk chichachujai. ²¹ ¿Wagka minash ininjume? Wi chichaamun antuku aina nu iniasta, dita wi wajintu chichauja nunak dekainawai, tiuwai.

²² Nuna Jesús tutai, jega Apajuí ememattain kuitamna nu makichik juwatki yapinum awatí chichajak: —¿Aajamek sumo sacerdotesh aiya-mum? tiuwai.

²³ Dutikam Jesús ayaak: —Wi pegkegchaun chichakmataig, titá wajina pegkegchaunash tija nu, nuninchau aish, ¿wagka awatame? tiuwai.

²⁴ Timatai Anás, Jesusnak jigkagbautak sumo sacerdote Caifás puja-munum awemauwai.

Pedro Jesusnak wainchaujai tusa uukbau

(Mt. 26.71-75; Mr. 14.69-72; Lc. 22.58-62)

²⁵ Nuniai, Pedroshkam jii anamak wajau. Nunitaman iniinak:

—¿Amesh auna jintintaiji aina nuyachukaitam? tuidau.

Tama Pedroshkam uwaak: —Atsa duchauwaitjai, tiuwai.

²⁶ Titatman sumo sacerdote inake aina nuiya makichik, Pedro kuwishí asankauwa nuna patayí chichajak: —¿Wi amina ajak ajakbaunum Jesusjai wajamin wainkachmakiajam? tau.

²⁷ Tamashkam Pedrok ataktú uuku, nuniaig atash shinukui.

Jesús Pilatowai ejegamu

(Mt. 27.1-2, 11-14; Mr. 15.1-5; Lc. 23.1-5)

²⁸ Jesusnak Caifasa jeenian jukiag gobernador romanmaya puja-munum ejegawajui. Dutikawag tsawau asamtai, apú jeenig wayachajui,

pegkegchau utsumakaja Pascua yuwachaig tuidau asag. ²⁹ Nuniagtai Pilato dita ijunbaunum jiinki, iniak: —¿Jusha aentsush wajukamtai itagtuaugme? tau.

³⁰ Tutai dita aiinak: —Ju aents katsekchauwaitkuig jutika achikaik itagmaitusjime, tuidau.

³¹ Tiagtai Pilato chichaak: —Atum jukijum, atum chicham umiktinnu-mash wajintua dutiksagmek dutikatajum, tiuwai.

Tutai judío apuji aidau aiinak: —Jutii judío aidautik, makichik aentskesh maatajum tibauk ainatsji tajui.

³² Aatus uminkauwai Jesús, wajuk waitus jakatin asaya tiuwaita nu.

³³ Tiagmatai Pilato ataktú jega niina pujasá inamtaijin wayá, Jesusa iniak: —¿Amekaitam Rey judío aidaunu? tau.

³⁴ Tama Jesús ayaak: —¿Dusha amek nagkamek tujutam atsa tikich mina pachitus tujamchagmaká? tau.

³⁵ Tama Pilato ayaak: —¿Wi judiokaitag? Amina aentsjum nuigtú sacer-dote apuji aina nujai achigmakag minai itagmawaje. ¿Wají aikamume? tau.

³⁶ Tama Jesús ayaak: —Mina inamtaijuk ju nugka juchauwai; juiya ataik, mina takagtin aidau maanimain ainawai achikag judío aidaunum mina sujutkainum tusa; tujash mina inamtaijuk juiyachui, tiuwai.

³⁷ Tutai Pilato iniak: —Nuniakmek ameapitme rey, tau.

Tama Jesús ayaak: —Ame rey tujutam duka dekaske. Wika ju nugka juig akiinawaitjai, nunikan chicham dekaskea nuna etsegkatasan tauwaitjai. Ashí aents chicham dekaskea nuna antukag umiina nu mina chichamjunak antugtuinawai, tiuwai.

³⁸ Tutai Pilato iniak: —¿Wajimpaya dekaskea dusha? tiuwai. Nuna tii ukuak agaa jiinki, judío aidau ijuntatman chichajak: —Wika ju aents bakumamainjinak makichkish pegkegchajinak dekajuchjai.

Jesús mantamnati tibau

(Mt. 27.15-30; Mr. 15.6-17; Lc. 23.17-25)

³⁹ Tujash Pascua jegakuig, tuke makichik jiiktá takugmin jiuuweg dutiksag, ¿judío aina nuna Reyjinash jiiktí tajumek? tau.

⁴⁰ Nuna tutai ataktú ashí senchi unsumkag: —¡Aanka jikipa, Barrabás jiiktá! wajaidau.

Duka Barrabasak kasa aajakui.

19

¹ Imatiagtai Pilato, Jesusan jukijum asutiatajum tusa suntag aidaun inajui. ² Dutikamtai suntag aidaushkam jagkin chapikmajag atsejutain najanawag Jesusan atsemítkakag, jaanch kapantu nentetkaun anugajui; ³ dutika chichajuinak: —¡Juuwai judío aina nuna Reyjig! awajuidau.

Tuinakug yapinum awatuidau.

⁴ Tiagtai Pilato ataktú jiinki chichaak: —Diistajum jui agaa itanjai, ni bakumamainjig makichkish atsuja nuna dekatnume tusan, tau.

⁵ Jesuschakam jagki atsejutai najanamu atsegmitkakbaunak nuigtú jaanch kapantu nentetkau anujamunash imanisag jiinkiuwai, nunikmatai Pilato chichaak: —¡Ju aentsun jui itanjai, diistajum! tiuwai.

⁶ Tutai sacerdote apuji aidau, jega Apajuí ememattai kuitamin aidaujai wainkag, senchi unsumkag:

—¡Achigtá! ¡Achigtá! awajuidau. Imatiagtai Pilato ditan chichajak: —Imatjakjumek atum jukijum achigtajum; wika ni pegkegchau takasbaujin mantamnamainnak dekajuachjai, tau.

⁷ Tutai judío apuji aidau aினak: —Jutii chicham umiktin agagbauwa nui tawa nunisag jamainai, wagki Apajuí Uchijiyaitjai tumamu asa, wajaidau.

⁸ Tuinamun Pilato antuk, nuní senchi ishamkauwai. ⁹ Nunik jega niina pujusá inamtaijin ataktú wayá Jesusan iniak: —¿Amesh tuwiyampaitpa? tau.

Tujash Jesusak aikchauwai. ¹⁰ Nunitai Pilato chichaak: —¿Wagka aigtsume? ¿Dekatsmek wi achigtajum takunush, nuniachkunush akup-katajum tusanush tumainaitag duka? tau.

¹¹ Tutai Jesús ayaak: —Mina Apag dutikata tujamchakuig makichkish minak dutikatajum tujutmaitsume; untsu mina aminí itajuawaja nu ainawai amina nagkaetamsau tunamaina duka, tiuwai.

¹² Nuna tutai Pilato Jesusan utugsanuk jiikiag tusa kakantu; tujash judío aidauk senchi untsumkag: —Aanú jiyakmek Roma apuji Cesara nuna kumpajichu atatme, ashí aents reyyaitjai tumamuk, Roma apuji Cesara nuna shiwaji weak tawai, awajuidau.

¹³ Nuna Pilato antuk, Jesusnak agaa jiikiuwai, nunik chicham dekaku ekeemtaijin ekeemsauwai hebreo chichamnum Gabatá tutainum. “Gabatá” tawa nunak “Kaya ukatkamu” taku tawai. ¹⁴ Pascua jegatin asamtai uminainak batsatbaunum, etsa tajiastatak wajasú ai, Pilato judío aidaun chichajak: —¡Rey atumdaunak jui itantajime! tau.

¹⁵ Tujash ditak senchi untsumkag: —¡Dakitaji! ¡Dakitaji! ¡Achigtá! wajaidau. Imatiagtai Pilato iniak: —¿Atumi reygminash achigtag? tau. Tutai sacerdote apuji aினak: —¡Iina reyji imá Roma apuji Cesara duke! tuidau.

¹⁶ Tiagtai Pilatosham achigtinme tusa ditan susauwai, dutikamtai suntag aidau Jesusan jukiajui.

Jesús achigbau

(Mt. 27.32-50; Mr. 15.21-37; Lc. 23.26-49)

¹⁷ Dutikam Jesusak cruz ni achinjatnun yanakí jiinkiuwai, “Buuk sakaju” tutainum weak, hebreo chichamnum Gólgota tutaiya nui. ¹⁸ Nuwi achijajui, dutikainak niijai nuigtú jimajan achijag, Jesusan ejapeawag awajawajui. ¹⁹ Dutikawagmatai Pilato: “JESÚS NAZARETNUMIA, REY JUDÍO AIDAUNU” tusa agajui, dutika cruznum adutuktajum tiuwai. ²⁰ Kuashat judío aidau nu agagbauun ausajui, wagki Jesús achigbauk yaaktanun tikiju au asamtai; nu agagbauwa duka hebreowai, latigkai nuigtú griego chichamai agagbau aajakui. ²¹ Nu dutikamu asamtai, sacerdote apuji aidau, tikich apu aidaujai Pilaton jegaantag aujuinak: —Judío aidau reyji tusamek agajaipa; tutsuk, juka: “Judío aidau reyjiyaitjai” tinuwe nuuwai tita, tuidau.

²² Tiagtai Pilato ayaak: —Wi agagmag duka, nunisag atatui, tiuwai.

²³ Suntag aidau Jesusan achijag, jaanchjin jujukiajui, dutikawag ipaksumta imajin ichiajag makí makichik tinamdaekajui. Nuigtushkam tunicajinash jukiajui apijachbau ayatak yaikiin nagkama awantua nugká inagnakbau aajakua nuna; ²⁴ dutikawag, pempeentunisag chichainak: —Juka ichiagchagmi, yana kayajig jiinkit nu jukítí, tiajui.

Nuní uminkauwai, duik Agagbaunum: “Mina jaanchjunak ditak tinam-daekaje, dutikainak mina jaanchjun yana kayajig jiinkit nu jukiti tiae”, timawa duka. Junak suntag aidau dutikawajui.

²⁵ Cruz Jesús achigbaunum niina dukují, dukujiya nuna kai, tikich María Cleofasa nuwe, nuigtú María magdalanmaya aatus tikiju ijunauidau.

²⁶ Nunittaman Jesús dukujin wainak nuigtú ni jintintaiji anetaiyya dusha nuig wajau asamtai, dukujin chichajak: —Dukuwah, yamaik anuwai uchigmik, tau.

²⁷ Nuna tii, jintintaijin chichajak: Anuwai amina dukuk, tiuwai.

Nu tima ajumag niina jeen jukiuwai.

Jesús jakamu

(Mt. 27.45-56; Mr. 15.33-41; Lc. 23.44-49)

²⁸ Nuna tii, Jesús ashí ni dutikmainjin uminkaun dekau asa, Agagbauwa nu uminkati tabaunum: —Kitamajai, tiuwai.

²⁹ Tutai nui buitsnum vino chujaua bete pujau asamtai, nu chujauuwa nujai esponjan uchupjag numi hisopo kanawen ayai takuji aapawajui.

³⁰ Dutikam Jesús vino chujauun uwag chichaak: —¡Yamaik ashí umikjai! tusa tsuntsumá jakuawai.

Jesús bijagnum nagki ijumu

³¹ Judío aidauk Pascua atin asamtai uminaidau asag, iyashik cruznumak juwakchati tuidau tsawan ayamtaiya duka dekak puyatjusa diitai asamtai, nuninak Pilaton jegajag chichajuinak: Suntag ishíkata aents cruznum detaina nuna kagkajin kupijag, ashí kuwajag yajuaktinme tuidau. ³² Timasuntag aidaushkam wejiajui, nunikag Jesusjai achigbau aidau dekatkauwa nunaa nuigtú tikichia nunashkam kagkajin kupigkajui. ³³ Nuna dutikawag Jesusan jegantun diikmag jakaun wainkajui, nunikmatai kagkajinakupigkachajui.

³⁴ Dutikamu aig makichik suntag nagki bijagnum iju ichigkui, dutikamuik numpa yumijai jiinkiuwai. ³⁵ Wika nunak dekak wainkau asan etsegjai, wainkachbaugnak etsegtsujai. Wi wainai dutikawaju asagmatai, atumshakam shiig dekaatajum, nunikjum dekaskap nunikuuta timinjum tusan ujjajime. ³⁶ Nu nunikajua duka Agagbaunum: “Makichik ukunchigkesh kupigkachbau atinai”, tibuawa nunú uminkauwai.

³⁷ Nuigtú tikich Agagbaunumash: “Ijumun wainkagtin ainawai”, tawai.

Jesús ukusbau

(Mt. 27.57-61; Mr. 15.42-47; Lc. 23.50-56)

³⁸ Nu ashí dutikamu ai, José arimateanmaya Jesusa jintintaiji asa, judío aidaun ishamak wakenmataik Pilaton jegajua, Jesusa iyashin jukitjai tusa segauwai; tama Pilatoshkam dutikata tiuwai, tima wejí Jesusa iyashin jukiuwai. ³⁹ Nicodemo Jesusan yaunchuk kashi ijagsatatus jegajuauwa dushakam, kugkuin mirra, áloe tutajai pachimjamun treinta kilos takus tauwai. ⁴⁰ Nunikmatai Joseshkam nujai atuegak Jesusa iyashin jukiag, jaanchin kugkuidai ukatuk pempeajag, judío wajuk ukuumau ainawa dutiksag ukusajui. ⁴¹ Nunú Jesús achigbauwa nuig ajak ajakbau au, nunú ajak ajakbauwa nuig ukuumatai yamajam makichik aentskesh ukuschamunum, ⁴² judío aidau pascuaji atinun uminaidau asag, Jesusa iyashinakupigkachajui, nu ukuumatai imá tikiju asamtai.

20

*Jesús nantakbau**(Mt. 28.1-10; Mr. 16.1-8; Lc. 24.1-12)*

¹ Tumig tsawaju ai, María magdalanmaya kashikmas, suwe aig Jesús ukusbaunum weuwai, nunikmá kaya aputukbau ekekam atatman wainkauwai; ² nunik tupikaki, Simón Pedro tikich Jesusa jintintaiji ane-taijiya nu pujamunum weuwai, nunik jegawag: —Iina Apujin ukusagma nunak jukiaje, tujash dekatsji tuwig ukusaje, tusag ujaidau.

³ Tusa ujakajam Pedro tikich Jesusa jintintaijiya nujai ukusbaun diisagtatus weajui. ⁴ Nunik mai tupikaidau, tujash tikich jintintaiya nu Pedro nagkaesau tupikau asa, niyá eemak Jesús ukusbaunum jegantui; ⁵ nunik tekená diikmá, imá jaanchnak wainkauwai, tujash nigka wayachui. ⁶ Nuniai Simón Pedroskam niina ukujin tantauwai, nunik Jesús ukusbaunum wayaa, diikmá imá jaanch aidauk atatman wainkauwai, ⁷ nuigtushkam Jesusa buuké jaanchi pempenjamu ajakua duka, iyashí pempeagbauwa nujag ijunag achau, kanaká pempeajam tepaun wainkauwai. ⁸ Nuniai tikich jintintai ukumatainum eemak tantauwa dushakam wayauwai, nunikmá wainak, dekaskeapi tiuwai. ⁹ Ditak Apajuí chichamen agagbaunum: Jesusak maamash ataktú nantaktinai tibauwa nunak anenachu. ¹⁰ Nuna dutika diisag jintintaiji aina duka ditá jeen wakitkiajui.

*Jesús María Magdalanmaya wantintukbau**(Mt. 28.1-10; Mr. 16.9-11; Lc. 24.10)*

¹¹ Tujash Mariak agaa Jesús ukusbaunum buutú wajau; nunik buutk-abaikia Jesús ukusbaun tekenas diikmá, ¹² jimag ángel pujun nugkuaju aidau Jesusa iyashí ukukbau aajakua nui chaiknum makichik eketai, tikich dawenmanini ekeemtatman wainkauwai. ¹³ Dutikam ángel aidau iniinak: —Nuwah, ¿wagka buutme? Tau. Tama ni ayaak: —Mina Apujun jukiaje, tujash tuwig ukusaje nuna dekachu asan butjai, tiuwai.

¹⁴ Nuna tusa ayampakmá Jesús nui wajattaman wainkauwai, tujash dekaachui niimpapita tusag. ¹⁵ Nunitai Jesús iniak. —Nuwah, ¿wagka buutme? ¿Yaa egame? tau.

Tama nigka, ajak ajakbauwa nuna kuitamnuskaitai tau asa: —Apuh, ame jukiuwaitkumek, tuwí ukusmaume nu ujakkata, wi jukitjai, tau.

¹⁶ Tutai Jesús ayaak: —¡Mariah! tiuwai. Tama ayampatua diikmá Jesusan wainak: —Raboni, tiuwai, (duka arameo chichamnumag: Maestro taku tawai).

¹⁷ Nuna takug achikta tama Jesús chichajak: —Achigkaipa, eke mina Apajuig weatsjai; wetá mina yatsug batsatbaunum nunikam ujaktá: Mina Apajuí weajai, atumnash Apa nui nuigtú mina Apajuig atumnash Apajuigmea nui tímae tusam, tiuwai.

¹⁸ Nu tuma María magdalanmayashkam weuwai, nunik Apu Jesús wainkamujin nuigtú ni tibaujiya nunash jintintaiji aidauun ujakajui.

*Jesús jintintaiji aidau wantintukbau**(Mt. 28.16-20; Mr. 16.14-18; Lc. 24.36-49)*

¹⁹ Nunú tsawantinig tumig kintabaunum, jintintaiji aidauk judío ishamainak waitinak epenjag pujuinai, Jesús ejapen wajantú, nunik ditan kumpamak: —Apajuí atumnash shiig agkan pujutan amastinme, tiuwai.

²⁰ Nuna tusa, uwejí achigbau aidaun nuigtú bijagnum nagkí ijumunash iwaintukui. Nunitai jintintaiji aidaushkam Apu Jesusan wainkag shiig aneasajui. ²¹ Dutika Jesús awentsag: —Apajúi atumnash shiig agkan pujutan amastinme. Mina Apag awetiuwa dutiksanuk atumnash awemajime, tiuwai.

²² Nuna tusa ditainini suut umpuiniuwai, dutika: —Wakaní Pegkeji jukitajum. ²³ Atum ju nugka jui tsagkujashbauk, nayaimpinmashkam tsagkugnagchatnai. Untsu atum ju nugka juish tsagkujamuk nayaimpinmashkam tsagkugnagtinai, tiuwai.

Tomás dekaskeapi tichamu

²⁴ Tujash Tomás doce aina nuiya Jimagmamutu taya duka, Jesús wayauwa nuig atsau asa wainkachui. ²⁵ Nuniku asamtai tikich jintintaiji aina nu: —Apu Jesús wainkamji tuidau. Tama ni chichaak: —Wika uwejin clavowai achijagmaya nuna wainkan tsajam uwejuish inujuan diigtsukek nuigtú bijagnum ijuagmaya nunash inujuan dekaptsukek dekaskeapi tumaitsujai, tau.

²⁶ Ocho tsawan nagkaemakui ai, jintintaiji aidauk makichik jeganum ataktú ijunajui, nuanuig Tomasash pujau. Waitinak shiig epenag batsataig, Jesús ejapen wajantá kumpamak: —Apajúi agkan pujutan atumnash amastinme, tiuwai.

²⁷ Nuna tusa Tomasán chichajak: —Jui tsajam uwegmin inuata, dutikakum mina uweg aina nu diistá; uwejum itantá nunikam mina bijagjui inuata. ¡Dekaskeapi tuchauk aipa, dekaskeapi tinu atá! tiuwai.

²⁸ Tama Tomás senchi chichaká: —Mina Apujuh, amek mina Apajui-juitme, tau.

²⁹ Tutai Jesús ayaak: —Tomasah yamai mina waitkaum dui, dekaskeapi tujutme. ¡Mina waitkachuitak dekaskeapi tujutiu aina nu shiig aneasagtinai! tiuwai.

Wagka ju papish agagbauwaita nu pachisa tibau

³⁰ Jesús aents aidau dutikmainchaun ashí iwainag niina jintintaiji aidash wainainamunum takasua duka, ashí ju papinumag agagchamui. ³¹ Nuniaig juka: Atumesh Jesusak, Cristo Apajúi Uchijimpapita, tusajum dekaskeapita takujum, pujut tuke atina nu jukimnujuk, tusan agatjime.

21

Jesús jintintaiji aidau ataktú wantintukbau

¹ Nuna nunik, Jesús jintintaiji aidau kucha Tiberias tutai tugkitken batsatun ataktú wantintukui. Nunak juní nunikui: ² Simón Pedrojai ijunjag, Tomás Jimagmamutu taya nu, Natanael Caná Galilea awa nuiya, Zebedeo uchijí aidau, nuigtú jimag Jesusa jintintaiji aidau batsataidau. ³ Nuninamunum Simón Pedro chichaak: —Namakan maatjai, tau. Tutai, ditashkam: —Jutijai wegami, tusag barcanum egkemjag weajui, nunik nu kashia duik makichikish maachajui. ⁴ Nunikag yamá tsawaig, Jesús kuchanum uwetus wajau, tujash jintintaiji aidauk, Jesusapi tichajui.

⁵ Nuniai Jesús: —Uchig aidauh, ¿makichik namakkesh maachugmek? tau.

Tama dita ainak: —Atsah, tiajui.

⁶ Tiagtai Jesús chichaak: —Redjum barcanum untsuja atú ajugtatum, dutikakjum achiktatjume, tama ajugkajui dutikam kuashat namak

chimpinkamtai jiitakamag tujinkajui. ⁷ Nunitai Jesusa jintintaiji anetai-jiya nu Pedron chichajak: —¡Auk Apu Jesusai! tau.

Tabaun Pedro antamuik awimaku asa jaanchjin nugkujui, nunik tseke namaká iyagkui. ⁸ Nuniai tikich jintintaiji aidauk barcanum anumkaju rednum namak chimpinkaun japisag, cien metros tumain yujau asag. ⁹ Nunik kukag jiinkamag jii ikapagbaunum, makichik namak pagjai jiyamun wainkajui. ¹⁰ Dutikainai Jesús chichaak: —Namak achikujum nu ujumak itatajum, tiuwai.

¹¹ Tutai Simón Pedro barcanum egkemjau, nunik retan kukag jikiu, namak muun aidau ciento cincuenta y tres a imaan piyakun, imaan chimpinkauwaitkush rednak ichigchauwai. ¹² Nunikmatai Jesús chichaak: —Tantajum yuwatajum, tiuwai.

Makichkish jintintaiji aina duka iniaschajui: ¿Amesh yaitpa? tusag, wagki Apu Jesusan dekaidau asag. ¹³ Nuna tii, Jesús jegantá, pagkan juki tinamak, dutiksag namaknashkam tinamkauwai.

¹⁴ Nunak Jesusak jakau nantakí kempatuma jui jintintaiji aidaun wantintukui.

Jesús Pedron kempatumá iniasbau

¹⁵ Yujumak yuwá nagkankamunum Jesús, Simón Pedron iniak: — Simón, Jonasa uchijiyah, ¿minash jujú aina juna nagkaesauk anentam? tau.

Tama Pedro ayaak: Ehé Apuh, ame wi aneajam duka dekagtame.

Tutai Jesús chichajak: Uwig midau aina nu kuitamkata, tau.

¹⁶ Tusa awentsag iniak: Simón, Jonasa uchijiyah, ¿minash anenmek? tau.

Tama Pedro ayaak: Ehé Apuh, ame wi aneajam duka dekagtame, tau.

Tutai Jesús chichajak: Uwig midau aina nu ayujata, tau.

¹⁷ Tusa kempatuma juna iniak: Simón, Jonasa uchijiyah, ¿minash anenmek? tau.

Tama Pedro wake besekú, kempatuma juish: ¿Anenmek? tabau asa. Nunik Pedro ayaak: —Apuh, amek ashí dekame, wi dekaskenum aneajam duka, tau.

Tama Jesús ayaak: Uwig midau aina nu kuitamkata. ¹⁸ Dekas tajame, amek aan datsauch asamek, amek nugkujam ame wakegamunum wejakitme; tujash muuntuch wajastatam nuig, kuntujum dakuekamin tikich anugtamjagtinaí, dutijama ame wakegachbaunum jujamkiag etabiagtinaí, tiuwai.

¹⁹ Nunak Pedro wajuk maam atinaita nuna ujaak tiuwai. Nuna tii: — ¡Nemagtukta! tiuwai.

Jesusa aneetaiji pachisa chichasbau

²⁰ Tima Pedro ayampá niimkamá, Jesusa jintintaiji niina aneetaijiya nu, agkú yuwamunum niini ayaumas ekeemas: —Apuh, ¿yaita amina sujupaktinush?, tusa iniasua nu minittaman wainkau.

²¹ Nuna Pedro wainak, Jesusan iniak: —Apuh, ¿jusha wajukatnaita? tau.

²² Tama Jesús ayaak: Wi wakegaknuk nigka iwaaku pujaig taatin atajai tumainaitjai. ¿Wagka amesh dusha uyumame? Amek tutsuk nemagtukta, tiuwai.

²³ Nunú tibauwa nunak yachi aidau nu jintintaiya nunak jakashtinaí tine tabaun antujajui; tujash Jesusak, jakashtinaí tichauwai: Wi wakegaknuk iwaku pujaig taatin atajai tumainaitjai. ¿Wagka amesh dusha uyumame? tiuwai.

²⁴ Junak Jesusa dekas jintintaiji aajakua nunú, ashí ni wainkamujinak etsejak dekaske tusa agajui. Dutikamu asamtai dekaskeapi tuinaji.

²⁵ Jesús takasbauwa duka shiig kuashtai, nunú maki makichik pachisa agamak, ju nugka juig ayatak papikes piyakaintai.
Aatus atí.

Apóstol aidau takasbau

Wakaní Pegkeji anagkagtuamu

¹ Anetaiju Teofiloh, wi yama nagkamchakun papiin agatjabiajam nunak, Jesús ashí takaamujin, jintinkagtamujin nagkamauwa nuna, ² nuigtú ni nayaimpinum wakitkiuwa imanuiyan pachisan agatjabiajame. Nunak eke wetsuk Wakaní Pegkeji dutikata tabau asa ni etegjamuji apóstol aidau jintintuauwai; ³ nuigtush waitus jaka nantakí, iwaku paan kuashat aents aidau kuashtá wantintukui cuarenta tsawantai, nuniak Apajuí inabaujin pachis ujakajui.

⁴ Nui Jesús apóstol aidaujai ijunag yuwak pujus: Jerusalén ukukí wegpaum juig pujusjum, mina Apag Wakaní Pegkejin amastatjime tusa anagtamamun ujakmajim nunú dakastajum, ⁵ wagki Juagkak imá yumiik yamijatjauwai, tujash atumek dukap tsawan atsuk Wakaní Pegkejiya nujai yamigbau atatjume, tiuwai.

Jesús nayaimpinum wakitkimu

⁶ Tutai nui ijunag pujuina nu iniinak: ¿Apuh, yamaikik Israelnumash ataktú yaunchuk inamin aajabia nunin awasattam? tuidau.

⁷ Tama Jesús ayaak: Atumek dekamaitsugme tsawantak nuni-achkugmesh wajutí dutikatjai tusa Apag nigki mamikiauwaita duka; ⁸ tujash Wakaní Pegkeji atumiin tajutjamamtai nuna senchijí jukittagme, nunikjum mina pachittsajum jui Jerusalén, ashí Judeanum, Samarian-mashkam, nuigtú ashí nugka atushat aina nuwishkam etsegtugkattagme, tiuwai.

⁹ Nuna tutai ditash dii ijunaig takuniuwai, nunaig yujagkim ijkui, nunikmatai awenag wainkachajui. ¹⁰ Nunik Jesús wematai nayaimpin dii ijunai, jimag aents jaanch pujun nugkajuu ditai ayaumas wajaantaju, ¹¹ nunikag ditan chichajuinak:

—Galileanmaya aents aidauh, ¿wagka nayaimpish diish ijunjume? Jujú Jesús, nayaim wegau wainkaujum junisag ataktush minitnai, tiaju.

Matías etegkamu

¹² Nunú tusá tiajam Olivosa mujají tutainum batsatu Jerusalén wakitkajui, nuní imá tikiju asamtai, chicham umiktinum tsawan ayamtai tsawagmataig tikijuk wekaenasti tibauwa dui. ¹³ Yaaktanum jegawag juga yakí tesamunum wakaju nui batsataidau asag, nuna daajig ju ainawai: Pedro, Juan, Jacobo, Andrés, Felipe, Tomás, Bartolomé, Mateo, Jacobo Alfeo uchijiya nunú, Simón Zelote tutai, Judas Santiago uchijiya nunú. ¹⁴ Ashí nunú aidauk kashí kashinig makichik anentaiyaik ijunas Apajuin aujuinak ijunaidau, Jesusa yachi aidaujai, María Jesusa dukujiya nu, nuigtú tikich nuwa aidauhkam.

¹⁵ Nunú tsawantin ciento veinte aents tumain ijunajui Jesusa nemajin aidau, nunikbaunum Pedro wajakí chichaak: ¹⁶ Yatsug aidauh, David Wakaní Pegkeji dekamtikam, Judas Jesusan achiktinme tusa unpi-agtinun pachis yaunchuk Agajua duka kuashat mijan nagkaemakne. ¹⁷ Judasak jutijai ijunag wekaegas niishkam jutii takaag jutiksag takaa-jakui. ¹⁸ (Nuninaitak Jesusan sujuk kuichkin juki nugkan sumakui, tujash

nigka nunú nugka ni sumakbauwa nuig kajeemag tsujimak achapai iyaak pujaká ampujin jiijá jakauwai. ¹⁹ Nu nunikbaunak ashí Jerusalegnumia aidauk dekawajui, nunikag nuna nugkan ditá chichamen Acéldama adaikajui, nunak “Nugka Numpeagbau” taku tiaju.) ²⁰ Nuna tusa nuigtú Pedro chichaak: Wagki duka salmosnum agagbauwai:

“Niina jeeg ukumkimu atatuí, makichik aentskesh nuig pujuschatnai, nuigtushkam:

Niina takatjinak tikich takastinai”, tusa.

²¹⁻²² “Nu tibau asamtai makichik etegkami, Apu Jesús jutiijai pujusmatai tuke ijunag yujasaju jutiijai batsatina nuiya, Juan Jesusan yamijua dui nagkamas tuke Jesusjai wekaegas nayaimpinum wegaunash wainkauwa nu, dutikamu asa jutiijai betek Jesús nantakbaun pachisash shiig etseg-mainai”, tau.

²³ Timatai, jimajan ju atí tiaju, José Barsabás tutai, Justo tuuta awagmatia nuna nuigtú Matiasan. ²⁴ Dutikawag aatus Apajuin aujuinak: “Apuh, ame ashí aentsú anentaimtajig wainam ibau asam, iwainkagtukta, ya ju jimaja juwiyash etegkaume nunú, ²⁵ dutikamu asa niishkam Judas, apóstol atí tibauwa nu, ni dutikata tabaujin wejak ukukí nuna takastí tusam”, tiaju. ²⁶ Dutikawag, yana kayajig jiintukit tabaunum, Matiasdau jiinkiuwai; nunikmatai once apóstol aina nuanui Matiasan pachiauwajui.

2

Wakaní Pegkeji taamu

¹ Tsawan Pentecostés jegamtai, ashí makichkinmag ijunjag batsataidau. ² Nuninai, pachiachbau nayaimpinmaya dase senchi dasentak kedeg-tuwama imatuk, jegá dita pekagbaunum tauwai; ³ nuniaig, wantinjauwai jii kegama numamtin aidau, nunik ditan makí makichik kanajug pekam-tujui; ⁴ nunikmatai Wakaní Pegkeji ashí egkemtujajui, dutikam tikich chichaman chichaidau Wakan chichamtikamua dutiksag.

⁵ Nu tsawanta duik, judío aidau Apajuí puyatjus umijin ashí tikich nugkanum batsamin aidau Jerusalén kaunawag batsataidau. ⁶ Nu imatuk kedegtamun antukag aents aidauk ijunjajui; nunikag puyatkajui, wagki makí makichik ditá chichamen chichaidaun antuidau asag. ⁷ Nunik puyatgag anentai jegachag chichainak:

—¿Ju chichaina jujú ashí galileanmaya ainatsuak? ⁸ ¿Wajukaya chichainawa makí makichik iina chichamen chichaidau antuinag dusha? ⁹ Juwig partianmaya aidau, medianmaya aidash, elamnumia, mesopotamianmaya, judeanmaya, capadocianmaya, pontonmaya, asianmaya, ¹⁰ frigianmaya, panfilianmaya, egiptonmaya nuigtú Libia nugka aina nui, Cirene tikiju awa nuiya, Roma batsamnushkam juig pujuinawai; ¹¹ ujumak judío aidau nuigtú judío atajai tumabiag judío waigkú aidau, cretanmaya aidashkam nuigtú arabianmaya aidaujai antuinaji iina chichamen Apajuí imanjin pachisag chichainamu.

¹² Tusag ashí puyatkaju, nunikag shiig anentaimainchau dekapenak, pempeentunisag iniininak:

—¿Jusha wagka juninawa? tuesdayinau.

¹³ Tuinai tikich aidau dushikinak:

—Nampejajama, tuidau.

Pedro chichakbau

14 Tiagtai Pedro, once aina nujai wajainiag, senchi chichaká: “Mina pataag judío aidauwah, nuigtú ashí atum Jerusalén batsamin aidautigmesh, jujú shiig dekaatajum wi titatjim nu. 15 Atum nampegchajeash tajum duka nuninchauwai, yamá a las nueve weawai; 16 juka profeta Joel nuniktinai tusa etsegkamua nuuwai, duka:

17 “ Tsawan inagmanunum, Apajuí tawai, mina Wakanjun ashí aentsun susatnaitjai.

Dutikawajam atumi uchijum aidau, nuigtú nawanjum aidaushkam mina pachittsag etsejiagtinaí; nuniamunum datsauch aidauk paan wainiagtinaí, nuninai muuntuch aidauk kajanum kajabiagtinaí.

18 Aikasruk aishmag, mina inakeg aina nuna, nuigtú nuwa mina inakeg aina nunashkam nu tsawan atina duik mina Wakanjun susatnaitjai.

Dutikawajam mina pachittsag etsegtujiagtinaí.

19 Yakí nayaimpinum nuigtú nugkanmashkam nuninush wainchatain iwaintuktinuitjime: Numpan, jiin, yujagkim aidau bukuitamun.

20 Etsag suwe wajastinaí, nantushkam numpa wajastinaí, eke Apu Apajuí senchijijai tsawan wajas minitna nu jegatsaig.

21 Tujash ashí aents Apu Jesusan adaiyas segauk uwemjatnai*, tawai.

22 “Israel aidautigmesh ju chicham antuktajum: Jesús nazaretnumi-aya nuna Apajuí awemauwai dutikau asa niina senchijinash susauwai, dutika niini aents dutikmainchau aidaun, anentai jegagmainchau aidau-nash nuigtú wainchatai aidaun atumin iwaintugmakajua duka atumek shiig dekagme; 23 nunú sujukuitjume Apajuí wajuk dutikatasa emtikak dekauwaita dutiksagmek; dutikajum aents pegkegchau aidaujai ijuntugjum cruznum achigum mau ainagme. 24 Tujash Apajuí inankiuwai ni jaak najaimaku waitsamunash agkanmitka, wagki jata duka niinak depetmainchau aajakui.

25 “Davidchakam Jesusan pachis tiuwai:

“ Wainbajai mina Apujuk tuke mina emtijui pujaun, wagki mina untsujui pujawai nuniau asamtai umuchtumainchau ainawai.

26 Nuadui mina anentaijuk shiig aneawai, nuniak shiig aneas kantamui, nuigtushkam ashí mina iyashjuk niinu dekas atatui;

27 wagki mina wakanjuk Hadesnumak idaisashtatme, nuigtush aminu Pegkegma duka kaugtí tichattame.

28 Ame iwaintugkauwaitme jinta aidau pujutnumiaya nunú;

Dutijuum shiig aneemtijustatme ame pujau asam’†

29 “Yatsug aidauh idaitustajum paan titajime, iina munnji David aajakua duka jakauwai, nunikmatai ukusaju ainawai, nu ukusbauk yamaikish jutiini awai. 30 Tujash Davitak profeta aajakui, nuniau asa dekajakui Apajuí chicham yapajimainchauwai anagkuak, ame weantunmayan makichik ame ekeemtaigmin ekentsatnaitjai tibauwa nuna. 31 Nuna aatus emtikak Cristo aneantinun wainu asa, wakanig Hadesnumag juwakchatnai iyashigkesh kaugchatnai tiuwai. 32 Nunú Jesusa nuna Apajuí inankiuwai, duka jutii ashí wainkau ainaji. 33 Dutika eme anentai awajus nuigtú Apajuí niina untsujin ekentsam, Apaji Wakaní Pegkejin anagtamauwa nuna juki sukagtusa nunú wainkaugme nuigtush antukugme. 34 Wagki Davidchauwai nayaimpinum wakauwa duka, nigki juna:

* 2:21 Jl. 2.28-32. † 2:28 Sal. 16.8-11.

“ ‘Apu mina Apujun chichajak, ekeemsata mina untsujui,

³⁵ wi amina shiwajum aidaunak amina dawemin ikautkatjame’,[†] tiuwai.

³⁶ “Nunin asamtai shiig dekaskea ju ashí Israel aidautigmek dekaatajum, nunú Jesús atum achigbauwa nuna Apajuí etegka atumi Apujum nuigtú uwemtikagtin awasae”.

³⁷ Nuna antukag shiig senchi anentain najaimawaju, nunikag Pedron nuigtú tikich apóstol aidaun iniinak:

—Yatsug aidauh, ¿jutiish wajukmainaitji? tuidau.

³⁸ Tiagtai Pedro ayaak:

—Tudau takat idaikujum pujutjum yapajiatatum, nunikjum makí makichik yamimagtatum Jesucristo daajin, tudau tsagkugnagtag tabaunum; nunikjum Wakaní Pegkeji jukittagme. ³⁹ Wagki Apajuí anagkagtuamua duka atumdaun ainawai, atumi uchijum aina nudau, nuigtú ashí atushat batsataina dushakam; ya aidauna Apu Apajuí untsuktatus wakegawa nudau ainawai.

⁴⁰ Nuigtú kuashat tikich chichamnash etsejak aents aidaun chichajak tiuwai:

—Aents pegkegchau aina duka ukuktatum.

⁴¹ Nu tabaun chichaman antukag yamimakajui; nunikag nunú tsawanta duik tres mil aents tumain kawegkajui. ⁴² Nunikag apóstol aidau jintiamua dutiksag umidau, nuninak shiig ijuntsag pempeentunisag yainidau, nunisag pagkan yuinak Apajuinash aujuidau.

Nagkamchak Jesusa nemagkaju aidau pujutji

⁴³ Ashí puyatjusag diidau aents aidauk, kuashat aents dutikmainchaun dutikainak apóstol aidau iwainagtai. ⁴⁴ Ashí Jesusa dekaskeapi tiaju aidau makichik anentaiyaik ijunaidau, nunidau asag ashí wají aidaush betek ajuidau; ⁴⁵ ditá nugken nuigtú wajiiinash sujukag, ashí makí makichik atsumaina dutiksag akandayidau. ⁴⁶ Kashí kashinig jega Apajuí ememattainum ijuntsagké aidau, nuninak ditá jeenish ijunag shiig aneas wakegat anentaiyai pagkan yuidau, ⁴⁷ nuninak Apajuin emematuinak, imadiagtai ashí aents aidaushkam wakejus diidau. Nuniagtai Apu Apajuishkam kashí kashinig aents uwemaidaunak ikaweau.

3

Aents wekaechau etsagagbau

¹ Makichik tsawantai Pedro, Juagjai jega Apajuí ememattainum weedau a las tres wajasú ai, Apajuí aujtai jegau asamtai. ² Nuanui jega Apajuí ememattai waitiji daaji Shijam tutainum, aents akiinmawaik shutú akiinau pujau, nuna kashí kashinig itan apujuidau, nui aents wainiagtai kuichkin segamti tusag. ³ Nunin asa Pedro Juagjai jega Apajuí ememattainum wayatatus minidaun wainak:

—Wait aneasam kuichik sujustá, tusa segau.

⁴ Tama Pedro Juagjai esetug diinau, nunik Pedro chichajak: Diijattsata, tiaju.

⁵ Tama niishkam diyau piipichinakesh sujustatuapi tusa. ⁶ Nunitai Pedro chichajak:

[†] 2:35 Sal. 110.1.

—Kuichkik atsugtawai, oroshkam atsugtawai, tujash ajuta nuna amastajame; Jesucristo nazarenumiaya nuna daajin wajaktá nunikam wekaesata.

⁷ Takug uwejí untsujin achiká awajkiu, dutikamuik nawenig nuigtú wanusenish pegkeg wajasú. ⁸ Nunik tseke wajakí wekagu, nunik ditajai ijunag jega Apajuí ememattainum nigki wekaegas tsekeas dekapki, Apajuí emematki wayau. ⁹ Ashí aents aidau wekaegas Apajuin emematum wainkag, ¹⁰ senchi puyatkaju nuigtush ishankaju nu nunikmatai, nu aentsnak jega Apajuí ememattai waitiji Shijjam tutainum ekeemas kuichkin segamnun wainin asag.

Salomón waiti aagjamu tutainum Pedro chichakbau

¹¹ Shutú etsagagbauwa duka Pedronak, Juagjai idaichau, nunitai ashí aents aidauk puyatkag pisajag Salomón waiti aagjamu tutainum pujuag-tatman jegaantaju. ¹² Nunidaun Pedro wainak aents aidaun chichajak: “Israel aidauwah, ¿wagka ju junikmataish puyatkaugme? ¿Wagka iina senchijin nuniachkuish jutii pegkeg takau asaja ju aents awajkim wekaekui diimaina imatikagtagme? ¹³ Junak iina muunji Abraham, Isaac, Jacob aina nuna Apajuí, iina muunji aajakajua nuna Apajuíiya nunú, niina Uchiji Jesusan ememattinme tusa jutikae; atum sujukagmin Pilatok akupkata taig atum dakitjau ainajum nuna. ¹⁴ Atumek Pegkejam Pegkejan takauwa nu dakitjauwaitjume, dutikakjum magkagtina nunú jiiktá tusajum segauwaitjume; ¹⁵ dutikakjum mau ainagme pujatan sukagtina nunú, tujash jakamataish Apajuí inankiuwai duka jutiiik wainkau ainaji. ¹⁶ Jesusa daaji dekaskeapi tabaunum ni etsagaje, atum wainjum junak nuigtush dekajum nunak; ni dekaskeapi tabau asa shiig etsagaja juka atumesh ashí wainjume.

¹⁷ “Yatsug aidauh, atumek dekachu asajum apujum aidaujai dutikauwaitjum nunak, dekajai. ¹⁸ Tujash junak Apajuí umiké, yaunchuk ashí niina profetaji aajakajua nui niina Cristujig aatus waittsatnai tusa etsegkauwa nuna. ¹⁹ Nunin asamtai tudau takat idaikujum pujutjum yapajiatajum, atumí tudaujum aidaunash esaktugmagtinme, dutijamawag Apajuí ichichmamtan amastinme; ²⁰ dutika Apajuí Cristo Jesusan awetugmati yaunchuk tujamajua nuna. ²¹ Yamaikik Jesucristuk nayaimpinmag pujuttawai, nuniai Apajuí ashí waji aidau yamagmitkamu tsawan atinun, yaunchuk niina profetaji pegkejam aidau batsamajakajua nui etsegkauwa nu jegati tusa. ²² Moiseschakam iina muunji aajakajua nuna chichajak: ‘Apu, atumi Apajuigmia nu, atumi yatsum aina juuyan etegkatnai makichik profetan wiya juninun; dutikamtai mina antugtatum jutiksagmek ashí waji aidaun tujamtina duka umigkatajum; ²³ wagki ashí aents nunú profeta tabaun antugchauk niina aentsjig achagtinai’,* tiuwai.

²⁴ “Ashí profeta aidau, Samuel pujujakua nui nagkamas batsamsajua dushakam, ju tsawan aidaun pachis etsegkaju ainawai. ²⁵ Profeta aidaun Apajuí anagkauwa duka atumdauwai, nuigtú jutii muunji aajakajua nujai chichaman apakajua dushakam, Abrahaman chichajak: ‘Ashí nugkanmaya aents aina duka, amina tijajum akiinak weagtina nuiya makichik akiinatna dui pegkegnun yumigsamu agtinai’,† tiuwai. ²⁶ Apajuí ni Uchijin

* 3:23 Dt. 18.15, 18, 19. † 3:25 Gn. 12.3 y 22.18.

inanki dekatkauk atumná awetugmae, pegkegnum yaimpaktinme dutikam makí makichik tudaujin idaiyinak yapajinatnume tujamu asa”.

4

Pedro Juagjai apu aidau eemtin chichakbau

¹ Pedro Juagjai aents aidaun aujak wajai, sacerdote aidau, jega Apa-juí ememattaiya nuna kuitamnun apuji, saduceo aidaujai kautuawaju.

² Nunikag kajekaju, Pedro Juagjai aents aidaun jintintuinak; jakau aidau nantagtinnak, Jesús nantaak paan iwainake tuidau asagmatai; ³ achikag cárcel egkeawag ukukiaju etsa akaegu asamtai, kashin dekaajuami tusag.

⁴ Tujash chicham etsegbaun antukag kuashat dekaskeapi tiaju aina nu imá aishmag aidauk dekapam cinco ml tumain wajasaju.

⁵ Kashinia dui Jerusalén gobernante aidau, judío apuji aidau, escriba aidau; ⁶ nuigtú sumo sacerdote Anás, Caifás, Juan nuigtú Alejandro, nuigtú ashí sumo sacerdote aidaun patayí aidaushkam, ijunjaju. ⁷ Nunikag, Pedron Juagjai dita batsatbaunum itantagmatai ejapen awaantag iniinak:

—¿Yana senchijinia, nuniachkugmesh yana daajinia jusha atumesh jutikagme? tuidau.

⁸ Tama Pedro Wakaní Pegkeji tabau asa chichaak:

—Gobernante aidautijum nuigtú Judío aidaun apuji aidautigmeshkam antuktajum: ⁹ Atumek aents jau pegkegnum yaigkag nu pachisjum wajukaya tsagaje tusa dekatasajum inijatjume. ¹⁰ Nuniau asajum ashí atumesh dekaatajum nuigtú ashí Israel aidautigmeshkam, ju aents ashí wainjum junak, Jesucristo nazaretnumia atum achigjum maawagmin Apajuí inankiuwa nuna daajin tsagaje.

¹¹ Nunú Jesusa nuuwai atum jega jegamin aidautijum kaya dakitmaina numamtuk awakau ainajum nunú, dutikamu yamaik kaya dekas jegá ichichkatin apujtutia iman wajasé.* ¹² Makichikish tikich iina uwemtijamainuk shiig atsawai, wagki ju nugka juig Apajuí tikichin adaiyak juna daajin aentsuk uwemjatnume tusa susamuk atsau asamtai, tiuwai.

¹³ Pedro Juagjai ajankas chichainamun apu aidau wainkaju, nunikag papinash ausachu, unuimatnash unuimagchau aina nuna dekaidau asag anentai jegagchaju, nunikag Jesusa jintintaimpap ainawa tusag, dekawaju. ¹⁴ Nuigtush tsagajua dushakam ditajai nuig wajaun wainaidau asag, tumainchau dekapadau. ¹⁵ Nunidau asag Sanedrín† ijunjamunmag Pedronak Juagjai jiikiaju ditak chichasagtatus:

¹⁶ —Nunikag, ¿Au aents aina dusha utugkattaji? Ashí Jerusalegnumia aidauk aents etsagagbaunak pan wainkajajamah; nunin asamtai waitai tusaikish tumaitsuji. ¹⁷ Tujash nuna pachis aents aidaunum etsegkainum tuidau asag “yamai nagkamsagmek makichik aentskesh Jesusa daaji pachisjume ujakaijpajum, nu idaichakjuminig suwimkan amastatjime timí”, tuidau.

¹⁸ Tusag Pedron Juagjai untsukaju.

Dutikawag, yamai nagkamsagmek Jesús pachisjume chichakaipajum makichik aentskesh jintintuawaijpajum, tiaju.

¹⁹ Tama Pedro Juagjai aimainak:

* **4:11** Yaunchuk judío aidau, jegamainakug kaya muunta apujtua nui ekeni jeamajakú ainawai. Diistá Sal. 118.22. † **4:15** “Sanedrín” tawa duka Mt. 5.22num diistá.

—Atum nunimainai titajum ¿Pegkegkaih Apajuí emtinish, atum umigku ni umigmaitsu dusha? ²⁰ Jutiik ii wainkamu nuigtú antukuitag dushakam tutsukek idaimaitsuji, tuidau.

²¹ Tiagtai apu aidau:

—Suwimkan amastatjime tusag awemaju, suwimak jumainnak waitkachaju asag. Wagki ashí aents aidauk nunú dutikamun wainkag, Apajuin emematuidau asagmatai; ²² nu aents, aentskesh dutikmainchau aig etsagagbauwa duka cuarenta mijan tumain ajujakui.

Jesusa nemajin aidau Apajuí ausagbau

²³ Pedro Juagjai jükiajam waketug Jesusa nemajin aidau batsatbaunum jegawag, sacerdote apuji aidau nuigtú judío apuji aidau tiagbaunak ashí ujakaju. ²⁴ Nuna antukag ashí ijunag Apajuin aujuinak: Apuh, ametme ashí senchigtiin nayaim, nugka najanaumek, nayantsashkam ashí nui ayá dushakam. ²⁵ Ame Wakaní Pegkejiya nui, inakem David iina muunji aajakua nui chichaakum:

¿Wagka aents aidaush pampainawa? ¿Wagka wainkash anentaimainawa?

²⁶ Nugkanmaya rey aidau nuigtú apu aidaushkam ijunjag,

Apu Apajuin kajejuinak ni etegkamu Cristunash kajejuinawai, † tiuwaitme.

²⁷ “Tibau asamtai Herodes nuigtú Poncio Pilatojai, jujú yaaktanum ashí Israel aidau nuigtú judiochu aidaujai ijunjag, Uchijum Jesús pegkejam ame etegkauwaitam nuna kajegkajui, ²⁸ yaunchuk amina senchigmin nuigtú ame waketagmin nuniktinai tibauwa nuna dutikawagtatus. ²⁹ Nunin asamtai Apuh wainme amina inakem aidaun awantuina nunú, senchijum susata, ditash ishankagtutsuk chichamjumin etsegkatnume, ³⁰ nuninak amina senchigmin jau aidaunash etsagainak nuigtush aents dutikmainchaunash amina inakem Jesús pegkegma nuna daajin iwainatnume, tusam”, tuidau.

³¹ Tusa Apajuin ausag nagkanbaunum, dita ijunja batsatbau buchitkau; nuniaig Wakaní Pegkeji ashí egkemtujajui, dutikawajam sapigmakas Apajuí chichamenash etsejuidau.

Ashí waji aidauk ashí ditanu aajakbau

³² Ashí dekaskeapi tiaju aina duka, betekak anentain idajus anentaimunaidau, nunidau asag betek nuninnak anentaimaidau. Nunin asag makichkish ditá wajijinak imá midauk atí tusag anentaimainachu, ashí waji aidauk betek aajakajui. ³³ Tuja apóstol aidaushkam Apajuí senchijin Apu Jesús nantakbaun pachis etsejuidau, nuigtush Apajuí ashí ditan wait anentuidau asa senchi yayau. ³⁴ Dutikamu asag dita aina nuiyag makichik atsumaukesh atsuidau, wagki ditá nugke ajamuk nuniachkush jee ajamukesh sujuk kuichkin jukiag, ³⁵ apóstol aidaun itajuidau, dita maki makichik atsumamujin diijus akaantugtinme tusag. ³⁶ Nuanui José Leví weantu chiprenmaya, apóstol aidau Bernabé adaikajua nu pachitkau, (nunak “ichichkagtinu Uchijí” taku tawai); ³⁷ nunú nugke ajamu asa sujuk kuichkin juki, apóstol aidaun wajuk dutikmainaita nunak dita dutikatnume tusa itajuu.

5

Ananías Safirajai

† 4:26 Sal. 2.1-2.

1 Tujash makichik aents Ananías daagtin niina nuwe Safirajai nugkeen sujuku; 2 dutika nuwejai chichasag, kuichkin akanak ukuinak, tikich akankamun jukiag apóstol aidau wajuk dutikmainaita nunak dutikat-
nume tusag itajauuwai. 3 Dutikantai Pedro chichajak:

—Ananiasah, ¿wagka anentaimin Iwanch, Wakaní Pegkejin tsanugtí tujamkuish antugkaume, nugkem sujukam kuichik jukim aminu akankam ukukiuwaitkumesh? 4 ¿Eke sujatsminkek nuggak aminuchuka? nuigtú sujukum duish ¿Kuichkik aminuchukait? ¿Wagka jusha juniame? Aents aidaukesh tsanugchaume, Apajuí tsanujume, tau.

5 Nu tabaun antamuik Ananiasak jaka iyaantu. Nu nunikbaun ashí aents aidau dekawag senchi ishankajui. 6 Nunikmatai datsauch aidau tajuntag pemepeg jukiaju ukusagtatus.

7 Nunik tres hora tumain nagkaemai Ananiasa nuweshkam wayauwau, nigka nu nunikbaunak dekatsuk. 8 Nunikmatai Pedro iniak:

—¿Nugkem sujakjumesh ju kuichkia jukek jukimujum? tau.

Tama nuwa ayaak:

—Ehé, anú kuichkia anke jukimji, tau.

9 Tutai Pedro ayaak:

—¿Wagka atumesh mai betekash Apu Apajuí Wakanish tsanugta tajume? Anú waitinum tantattak mininawai amina aishumin ukustatus wegma nunú, aanke aminash jujamkiag ukugmasagtatuí.

10 Tamawaik Safirashkam Pedro wajamunum ayaumas jaka iyaantu. Nuniktatman datsauch aidauhkam waikmag jaka tepaun wainkaju, nunikag jukiaju, dutikawag aishi ukusmaunmag ayaunas ukusaju.

11 Nunikmatai, ashí iglesia aidauk nuigtú ashí nuna dekawaju aidauhkam senchi ishankajui.

Aents dutikmainchau kuashat dutikaku iwainakbau

12 Apóstol aina nú Apajuí, aents dutikmainchau aidau kuashat aents aidauunum iwainaidau; nuniagtai ashí Jesusa nemajin aidauhkam makichkinmag anentaimas ijunaidau Salomón waiti aagjamu tutaiya nú.

13 Makichkish tikich aidauk ditajaig ijunmainchau dekapedau; tujash nuninayatak aents aidauk kuashat eme anentuidau. 14 Nuniamunum Apu Jesusan dekaskeapi tuidaush aishmag aidau nuigtú nuwa aidauhkam aan kuashat kawedau.

15 Tuja jau aidauunashkam ainká tepetaijin jukiag nuigtú camilla aidauunum pataidiag jiikiag jintanum batsaidau, Pedro nagkaematai makichkinakesh niina wakaní wakanman wajantati, tusag.

16 Nuigtush yaakat tikijunmaya aidauh Jerusalén kaunaidau, nuninak jau aidauun nuigtú wakan pegkegchau waitkam batsatunash ikaunmaidau; dutikiagtai ashí etsaegkaju.

Pedro Juagjai waitkasagbau

17 Nuniagtai sumo sacerdote nuigtú ditajai ijunag takau aidau, saduceo aidauhkam senchi kajegkaju; 18 dutikawag apóstol aidau achikag cárcel yaaktanum au asantai nú egkeawaju. 19 Tujash makichik ángel Apu Apajuinu carcela waitiji aina nuna ujati jiyak: 20 “Wetajum, nunikjum jega Apajuí ememattainum wayajum, ashí ju chicham pujatan sugagtina jujú aents aidau ujaktajum”, tiu. 21 Nu tabaun antukaja nunisag kashinia dui kashikmas, jega Apajuí ememattainum wayawag jintinkagtuidau.

Nuninai sumo sacerdote nuigtú ditá aentsjijai batsatu kaunawag, ashí israelita apuji aidauun untsukag, sanedrinnunum ijunajau, nunikag apóstol

aidau cárcel batsatun, utitajum tusag awemaju. ²² Tujash suntag aidau jegajuawag diikmag wainkachaju, nunikag wakjetag ujinak:

²³ —Carcelak shiig epenjamuwe nuigtush suntag aidaush kuitamainak waitinum ijunmae; tujash ujai wayá diikmá wainkachmaji atsuagmae, tuidau.

²⁴ Tiagtai sumo sacerdote nuigtú jega Apajuí ememattain kuitamin aina nuna capitanji aidaushkam antukag anentai jegagchaju nunikag dusha wajukawagmaki tusag ditak iniinidau.

²⁵ Nuna tuinaig makichik tanta:

—Atum cárcel egkeamujum duka, jega Apajuí ememattainum aents aidauin jintintak pujuagma jamah, tuidau.

²⁶ Tiagtai capitán niina suntaji aidaujai wejiag, apóstol aidauin jukiaju tutit awagmatsuk, wagki aents aidau kayai tukujinum tusa ishamaidau asag. ²⁷ Dutika itawag apu aidau batsatbaunum sanedrín ejegawaju, dutikawagmatai sumo sacerdote chichajak:

²⁸ —¿Ii Jesusa daaji pachisjumek makichikish jintinkagtuawaigpa tichamkajim? Atum nu aaja ashí Jerusalegnimia jintinbau asag, jutií aidautin dita nunú aentsun mau ainawai tujamainawai, tuidau.

²⁹ Tuinam Pedro nuigtú tikich apóstol aidaujai chichainak:

—Jutiik aents aina nu umigtsuk Apajuí umigmaitiji. ³⁰ Iina muunji aajakajua nuna Apajuíi Jesusnak inankiuwai, atum numinum nenaajum mau ainajum nuna. ³¹ Dutika Apajuí niinak ashí nagkaekagtasu Apu nuigtush uwemtikagtin awajus untsujin ekentsauwai, Israel aidau tudaujin idaiyagtai tsagkujati, tusa. ³² Jutiik dekas wainkau asaja etsegji, tuja Wakaní Pegkejiya dushakam dutiksag etsegtawai. Wagki Apajuik niina umijuina nuna Wakaní Pegkejiya nunak suwawai, tuidau.

³³ Nuna antukag kajekaju nunikag maatag, tuidau. ³⁴ Nuniagtai nunú apu aina nuiya makichik fariseo Gamaliel daagtin, maestro chicham umiktinun jintinkagtin ashí aents aidauin ajantusa diitaiya nu wajakí, apóstol aidauin machik agaa jiiktajum tiuwai. ³⁵ Dutika chichaak:

—Israel aidauwah, kuitamamkatajum jujú aents aidau utugkatag tajume nunú. ³⁶ Wagki yaunchuk, Teudas witjai apunuk tumamtai cuatrocientos aents saetukajui, nunidau nuna maawagmatai ashí nuna saetin aidauk pampagkajui nunikmatai nui nagkankauwai. ³⁷ Nu nuniku ainai, Judas galileanmayashkam tsawan aentsú daaji agatbau ai kuashat aentsjintin wajasui, tujash nuna maawagmatai niina saetin aidauk pampagkajui. ³⁸ Nunin asantai tajime: Jujú aents aina juka waitkatsuk agkan idaisatajum; juna jutikaina ju ditak juní yujainakug megkaekagtatui; ³⁹ tujash Apajuinuitkuig atumek depetkashtajume, kuitamamkatajum Apajuíjai maaniakjum aniatsjupash, tiuwai. Nu tamawa nuna pegkeg diisajui.

⁴⁰ Nuna tusag apóstol aidauin untsukajui dutikawag asutiawag Jesusa daaji pachismek chichakaigpa tusag akupkajui. ⁴¹ Dutikawajam apóstol aidaushkam apu ukukiag weenak, shiig aneasag dakunkut weedau, Apajuí Jesusai waitsatnume tima waituidau asag. ⁴² Nunidau asag kashí kashinig jega Apajuí ememattainum nuigtú makí makichik jeganmash yamajam chichaman etsejuidau Jesusak Cristui tusag.

6

¹ Nunú tsawantin Jesusa nemajuidau kuashat kaweg wenamunum, griego chichau aina nu, hebreo chichau aina nuna chichaman patatuidau, nuwa waje griego aina duka, dita yuwatnuk betek suinachbau asag. ² Nudiagtai doce aina nu, ashí Jesusa nemagkau aina nuna ijumjag chichainak:

—Pegkegchauwai jutii Apajuí chichame etsegmaina nu idaiku, wajuk yuawagtatua nu uyumaka wekaetuinag duka. ³ Nunin asamtai yatsug aidauh, atum ainajum anuiya siete yatsug eme anentsá diitai, Wakani Pegkeji ajamu, shiig anentaímas dutikmain aina nu etegjatajum, nunú aidau ju takatnak diistinme. ⁴ Nuninai jutii Apajuí ajuj, chichame etsegta nujai uyumakagmi.

⁵ Nuna aatus tiagtai, ashí aents tuwakaju aidauk wakekaju, nunikag etegkawaju Esteban kuashat dekaskeapi tabaujish ajau nuigtú Wakani Pegkeji ajamun, tikichin Felipe, Prócoron, Nicanoran, Timogkan, Parmentasan, Nicolás antioquianmaya judío wajasua nujai; ⁶ dutika apóstol aidau batsatbaunum ejegawaju, dutikawagmatai ditashkam buuknum achikag Apajuin ajtusaju.

⁷ Tuja Apajuí chichame etsegbaush nuní senchi wegau, Jesusa nemajuidaushkam Jerusalegkak kuashat kawegkaju; nunisag sacerdote aidaushkam kuashat Jesusan dekaskeapi tusag nemajuidau.

Esteban achikbau

⁸ Esteban Wakani Pegkeji ajamu nuigtú Apajuí senchijin kuashat aents dutikmainchaun aents aidaunum iwainau. ⁹ Jega ijuntai, agkanmagau aidau ijuntai tutainum ujumak, cirenemaya, alejandrianmaya, cilicianmaya, nuigtú asianmaya aina nu ijumjag Estebagjai tudayinau; ¹⁰ tujash niijaig tudaimainchau dekapedau Wakani Pegkeji dekamtikam chichau asamtai. ¹¹ Nuninaj ujumak aentsun akikaju, “Esteban Moisesan pegkegchau chichajak nuigtú Apajuinash pegkegchau chichaju ii antugkamji” titinme, tusag. ¹² Nuna dutikawag aents aidaun ekajkaju, judío aidaun apuji, maestro chicham umiktinun jintinkagtin aidau-nashkam; dutikawajam Estebagkan achikag jukiag, sanedrin ejegawaju. ¹³ Nuigtushkam tsanumjugtin aidaunash egakaju, dutikam chichainak:

—Ju aentsua juka jega Apajuí ememattai pegkegma nuna pachis, chicham umiktina nunashkam pegkegchau chichagtanak idaitsui; ¹⁴ nuniau asa “Jesús nazarenumiaya nunú junak tsaitkatui, dutikak Moisés juní pujustajum tujabiuwa nunashkam yapagkattawai” timayi, tuidau.

¹⁵ Nuna tiagtai ashí aents sanedrinnum pekajuk, Estebagkan shiig esetug diikmag, angela yapiya numamtin wajas eketun wainkajui.

7

Esteban apu aidau eemtin chichakbau

¹ Sumo sacerdote Estebagkan: ¿Dekaskek nunash tujamaina? tau, ² tama ni ayaak: “¡Yatsug aidauh nuigtú mina muuntug aidautigmesh antuktajum! Iina Apajuji dekas imana nunú, iina muunji Abraham aajakua nuna, Harán wegatsaig Mesopotamia pujuttaman wantintuk, ³ chichajak: ‘Nugkemik ukuktá pataim aina dushakam, nunikam wetá wi nugkan* inaktustatjam nuí’, tiuwai. ⁴ Tima Abrahamshakam Caldea

* 7:3 Gn. 12.1.

nugkanak ukukí, Harán nugkanum pujusui. Nuwi pujai apají jakamtai, Apajuí ju nugka yamai atum batsatjum jui itauwai. ⁵ Tujash nugkanak piipichinakesh nawe najamainnakesh susachui, tujash makichik uchijgkesh atsujaig anagkuauwai amastinaitjame tusa, nuigtú niina uchijí weantu agtina nudaunashkam. ⁶ Nuigtushkam, Apajuí: ‘Amina uchigmiin akiinak wegagtina duka, tikich nugkanum nugkenchau, wainka inatai, nuigtush waitkainam cuatrocientos mijan batsamsagtinai, ⁷ tujash tu nugkanmaya inainak waitkagtinaita nunak suwimkan susatnaitjai, dutika ai nuiya jijnag jujú nugka jui emematjiagtinai Apajuí tiuwai’. ⁸ Tuja Apajuí Abrahamjai chichaman apakua dui pakamaktajum tiuwai; tibau asa Abraham uchijí Isaac akiina ocho tsawan wetai pakajuiwai.† Dutiksag Isaacshakam uchijí Jacopan dutikauwai, tuja Jacobshakam aikasag uchijí aidaunak dutikauwai, doce aajakajua nuiya Israel aidau apají agtina nuna.

⁹ “Nunú iina apají aajakajua duke José kajejuinak Egipto jukitnume tusag sujukajui. Tujash Apajuí Josejai au asa, ¹⁰ ashí ni waitiamujinak agkanmitka, nuigtú yachamtikauwai dutikamu asamtai Faraón Egipto reyjiya dushakam wait anentus diisui, dutika ‘Egiptonu gubernador adaiyak nuigtú jega ni inamku pujutaiya nunash niinak idaitusu’.

¹¹ “Nuniku ai yumi yututsuk asamtai nugka buku wajasui ashí Egipto nugkanum nuigtú Canaagshakam, nunikmatai yapajut tepeamtai senchi waitiamu asauwai, nuniau asamtai iina muunji aajakajua dushakam yumainjig atsujuidau. ¹² Nunidau, Egipto trigo awai tabaun Jacob antukui, nunik iina muunji aajakajua nuna nagkamchak ishiakui. ¹³ Nunikmatai ataktú jegawagmatai, José niina yachi aidaun wantintukui, nunikmatai Faraogshakam Josesh ya weantuita nuna dekauwai. ¹⁴ Nunik José, niina apají Jacopan ashí niina patayí aidaujai kaunatnume timatai setenta y cinco aents Egipto jegawajui. ¹⁵ Nunik Egipto jegaa pujus Jacopak iina muunji aajakajua nujai jinawajui. ¹⁶ Nunikagmataish iyashí aidaunak jukiag Siquem ejegawajui, dutikawag Abraham ukumatain Hamora uchijí aidaunun shiig akikan sumakua nú ukusajui.

¹⁷ “Apajuí Abrahaman anagkuauwa nu uminkattak wajau asamtai, Israel aidauk ayatak kawedau, nuninak aan kuashat Egipto yujakajui. ¹⁸ Nuniamunum, tikich rey Egiptonum ekeemiuwai José wainchau aajakú. ¹⁹ Nunú rey iina aentsjin tsanujui, dutikak iina muunji aajakajua nuna waitkainak suwimkan sujakú ainawai; dutikau asa uchi aishmag aidau akiidiagtaik jutsuk idaisatnume jakati tiuwai. ²⁰ Nunú tsawantin Moiseschakam akiinauwai, nunikmatai Apajuishkam wakegas diisui, tuja apají jeen kauptum nantu uukag apusajui; ²¹ dutikawag uumainchau wajasmatai jakati tusa ajapawajui dutikamun, Faraogka nawanji juki tuke niina uchijí ema tsakapajui. ²² Dutika Moisesnak egiptonmaya unuimatai aina nunak ashí jintintuawajui. Dutikamu asa, chichamesh najamin takatjinish imanuk ajakui.

²³ “Cuarenta mijan ajamu Moisés niina yachi, Israel aajakua nuna uchijí aidau ijagsata tabau anentaimat ajusam weuwai. ²⁴ Nunikmá niina patayin Egiptonmaya aents suimatman wainkauwai, nunik nuna ayamjak egiptonmaya aentsun mauwai. ²⁵ Moisés anentaimsag mina yatsug aina duka, Apajuí ditan agkanmitkati tujuttata nunak dekainawapi tau, tujash ditak apajag anentaimjachaju. ²⁶ Kashinia dui Moisés, jimag Israel ditak

† 7:8 “Pakaji” ajapjitajum tiuwai tawa duka, diistá Lc. 1.59num.

pempeentunikiag maanidaun wainak epegtuatatus jegantun chichajak: Atumesh yatsumjaish ‘¿Wagka pempeentunikjumesh maaniagme?’ tau. ²⁷ Tama yachin suwima nu Moisesan shitakiu, dutikak: ‘¿Yaa aminash jutii aidautin apuji, nuigtú juez atí tusash adaitamkame?’ ²⁸ ¿Minash yau Egiptonmaya maamam dutiksamek mantuatasamek tujutam?’ tau. ²⁹ Nu tama antuk Moisesak Madián nugkanum tupikakiuwai, nunik jegaa tikich nugkanmayaitak nuwi pujusui, nuwi jimag uchi ajusui.

³⁰ “Cuarenta mijan nagkaemai, makichik ángel uwegshunum wantintukui muja Sináí tikiju awa nui, numi zarza tutai jii kegamunum. ³¹ Nunitaman Moisés wainak puyatkau, nunik shiig wainkatatus adijkamá Apu Apajuí chichamun antuku, nuniak: ³² ‘Witjai, amina muunjum aajakajua nuna Apajuíjinuk, Abraham, Isaac, nuigtú Jacob aajakajua nuna Apajuíjinuk’, tau. Tutai Moisesak ishamak kujau, nuniak diimainchau dekapeau. ³³ Nunitai Apu Apajuí chichajak: ‘sapatjum ukuimakta, wagki ame wajam anka nugkak pegkegmai. ³⁴ Dekaskenum mina aentsug Egipto batsamas waituina nunak wainkajai, nuigtush buutainak untsujuina nunash antugkajai, nunikan agkanmitkatasan akaikijai. Nunin asamtai tantata Egipto awematjame’,[‡] tiuwai.

³⁵ “Nunú Moisesan dakituinak: ‘¿Yaa aminash apu, nuigtú juez atí tusash adaitamkame?’ tiajua nuna Apajuí apu ema, nuigtú agkanmitkagtin atí tusa ángel numi zarzanum wantintukua nuna senchijin awemauwai. ³⁶ Tima Moisés Egipto batsamatman jiiujui, aents dutikmainchau Egipto nugkanmayan iwaintuk, dutiksag Nayants Kapantu tutainmash, nuigtú cuarenta mijadai uwegshunum yujasua nuishkam.

³⁷ “Nunú Moisesa duke Israel aidaun chichajak: ‘Apu, atumi Apajuigmia nu, atumi yatsum aina juiyan etegkatnai makichik profetan wiya juninun’,[§] tiuwai. ³⁸ Nunú Moisesa duke Israel uwegshunum ijunjagmatai, muja Sinainum angeljai chichajakua duka, nuigtú iina muunji aajakajua nujaiskam; nigki chicham pujutá sukagtinun jukiuiwa dushakam jutii ujakptinun.

³⁹ “Tujash iina muunji aajakajua duka dakituidau asag umijujakchajui, ayatak Egipto waketjagtatus anentaimajakajui. ⁴⁰ Nunidau asag Aarogkan chichajuinak: Ii Apajuimatin aidau najatkagtuata ni emjtpakti; wagki Moisés Egipto nugkanum batsatjin jigmakiuwa duka dekantsui wajukaeki, tiajui. ⁴¹ Tusag toro tsakat niimtinun najanawaju, dutika kuntinun maa apeenak dita najanamujin eme antenuinak, fiestamaidau.

⁴² Nudiagtai Apajuishkam ditanak idaisauwai nayaimpinmaya yaya aina nuna emematinme tusa. Aatus agagbauwai profeta aina nuna papijinish: “‘Israela uchiji aidauwah, ¿atum uwegshunum cuarenta mijadai yujasuitjum duish kuntin maa apeakjumes emematjiuk ainajum?’

⁴³ Duka dutiktsuk Moloc, nuigtú atumi apajuijum yaya Refán, atum ememattasajum dakumká najanauwaitjum nudau tabernáculo yanasjum yujau asgmin,

Babilonia inagkeakin atushat emattajime,* Apajuí tiuwai’.

⁴⁴ “Iina muunji aajakajua nunú uwegshunum jega pegkejam Apajuikai chicham apaaku kayanum agagbauwa nu aajakui, Apajuí Moisesan chichajak wainkaum dutiksamek jegamkata tibauwa dutiksaik takasbau.

[‡] 7:34 Ex. 3.5, 7-8, 10. [§] 7:37 Dt. 18.15. * 7:43 Am. 5.25-27.

⁴⁵ Nunú tabernaculon iina muunji aajakajua nu jukiajui, dutikamun tikich nugkanum aents batsatun Apajuí depetuk dita emtin jiiua nui utsanawagtatus Josuejai mininak itawajui, duka David pujujakua duish aajakui. ⁴⁶ Davitan Apajuí wait anenjauwai, dutikamu asa Jacopa Apajuijiya nudaun tabernáculo jegamkatatus wakejukui; ⁴⁷ tujash Salomón jega Apajuí ememattainak jegamjukui; ⁴⁸ nunin aigkish Apajuik aents jegamkamunmag pujatsui. Profeta tawa nunisag:

⁴⁹ “Mina ekeemtaijuk nayaimpia auwai, untsu mina najamtaijua duka nugka nuuwai.

¿Minash wáji jegak jegagtuktagme? ayamainjush atsugeta juniaish, ¿tu amainaita mina ayamtaijush? tawai Apu Apajuí.

⁵⁰ ¿Ju ashí wáji aina juka wi najankashbaukaih?”†

⁵¹ “Atumek tuke antumtikmainchau, nuigtú antutaigmish, anentaimtagminish Apajuí anentaimtuchua nunin aajakuitjume, nuniau asajum Wakaní Pegkejiishkam shiwagmage, atumi muunjum wajukejakua nunisjume. ⁵² ¿Ya profeta aidauna atumi muunjum aajakajua dusha waitkajakchau ainawa? Nunidau asag pegkejan takau taatna nuna pachis emtikak etsejuidaun maajakú ainawai, yamai nunú pegkejan takauwa nu tamtaish unupiajum sujukuittjume dutikajum mau ainagme. ⁵³ Atumek chicham umiktinun ángel aidau amasajua nu ajutjamainaig umikchau ainagme”.

Esteban maamu

⁵⁴ Nu tabaun antukag, Estebagkan senchi kajegkag, nainak taket emenawag katetmitkaidau. ⁵⁵ Tujash Esteban Wakaní Pegkeji ajamu asa, nayaimpin diimk Apajuí imanjin wainkau, nuigtú Jesús Apajuí untsujin wajattaman, nunik:

⁵⁶ —Nayaim ujaniun wainjai, nuigtú Aentsmaga akiinauwa dushakam Apajuí untsujin wajaun, tau.

⁵⁷ Tujash ditak kuwishinak epenkag, senchi pampanjag ashí wajatjag achikag; ⁵⁸ yaaktanmag jiikiag kayai tukuidau; nuninak tsanumjuina duka ditá jaanchjin awimajag makichik datsauch Saulo daagtinun kuitamkati tusag susajui.

⁵⁹ Kayai tukuamaitak Esteban Apajuin aujak: “Apu Jesusah, mina wakanjuk jujutkita”, tusa ⁶⁰ tikishmag senchi untsamak: “¡Apuh, ju mina jutijuina juna tudaujig tsagkujata!” tiuwai.

Nuna tii jakauwai.

8

Saulo Jesusa nemajuidaun waitkasbau

¹ Sauloshkam nui pujau asa Estebagkak mantamnati tau.

Nunú tsawantin iglesia Jerusalén batsatu senchi waitkamun nagkamauwai; nuniau asamtai ashí nugkanum Judea, Samarianmash pam-pagkajui, tujash apóstol aidauk nuig batsatu. ² Tuja Estebannak ujumak aents Apajuí puyatjus umijin aidau, Estebagkan iyashin jukiag ukusag, senchi buutiajui. ³ Nuniamunon Saulok iglesiammaya aidau waitkatan nagkamau, nuniau asa makí makichik jeganum utua, aishmag aidaun, nuwanashkam achig yajumu cárcel chimpitatus.

† 7:50 Is. 66.1-2.

Yamajam chicham Samaria etsegekamu

⁴ Tujash pampagkaju aidauk, dita tuwí jegainawa nuanui yamajam chichama nuna etsejuidau. ⁵ Nuniamunum Felipe yaakat Samaria jegaa, Cristo pachis etseju. ⁶ Nunitai aents aidauk ijunjag Felipe etsegbaun puyatjus antuidau, nuninak aents dutikmainchau dutikamunash wainaidau. ⁷ Wagki kuashat aents wakan pegkegchau ajamu aidauk senchi untsumak jiinaidau, nuigtushkam wekaechau aidau, nuigtú shutú aidaunashkam etsagaku. ⁸ Dutiktai nunú yaaktanmaya aidauk shiig aneedau.

⁹ Yaunchuk nagkamas nunú yaaktanum makichik aents Simón daagtin magia takau pujujakui, nuniak samarianmaya aidaunak tsanuau “Wika imajaitjai” tusa. ¹⁰ Tutai, ashí uchi, muun aidaujai nagkamas puyatjus antujuinak: “Juuwai ‘dekas Apajuí senchijig’”, tuidau.

¹¹ Tuidau asag nuna antujuidau, wagki kuashat tsawantai mágico takatai aidaujai takaak tsanú pujujuinamu asag. ¹² Tujash Felipe yamajam chichaman Apajuí inabaujin nuigtú Jesucristun pachis etsegtai, aishmag nuwa aidaujai dekaskeapi tiaju aidauk yamimakajui. ¹³ Nuniamunum Simogshakam dekaskeapi tusa yamimag, Felipejai ashí yantamnum wekaegu, nuniak aents dutikmainchaun kuashat dutiktai puyatjus diyau.

¹⁴ Nuniamun apóstol aidau Jerusalén batsatu, Samarianmaya aidaush Apajuí chichamen wakegas antuinawai tabaun antukag, Pedron Juagjai awemajui. ¹⁵ Dutikawajam ditashkam jegawag Apajuin aujtusaju, Wakaní Pegkejin jukitnume tusa, ¹⁶ wagki eke ditaig makichkinmakesh Wakaní Pegkejig taachui, ayatak Apu Jesusa daajinak pachisag yamimakaju asagmatai, ¹⁷ Pedro Juagjai buuknum achikag Apajuin aujtuinam, Wakaní Pegkeji egkemtujajui.

¹⁸ Apóstol aidau aentsun buuknum achitai, Wakaní Pegkeji egkemtamun Simón wainak, kuichkin anagkuauwai.

¹⁹ Nuniak: Minash aanú senchi sujustajum, wisha tikich aents aidaun buuknum achiai Wakaní Pegkejin jukitnume, tau.

²⁰ Tutai Pedro chichajak:

—Amek kuichkigmijai megkaekatnaitme, Apajuí anentag sukagtusbauwa nunú kuichki sumakta tiu asam. ²¹ Amek makichkish jukiti tamak amaitsume, wagki Apajuí emting amina anentaimik pegkegchauwai. ²² Nuniau asam pegkegchaujum idaikum Apajuí segatá, ame aaja anentaimjaun nunash tsagkugtamjachaintash; ²³ wagki senchi kajeam nuna wainjame, nuniau asam pegkegchauwa nu achikam wekaeme, tiuwai.

²⁴ Tama Simón ayaak:

—Atum minash Apu segatjitajum, atum mina tujutjum nunú imanisag nagkaetuki, tiuwai.

²⁵ Pedro Juagjai Apajuí chichame etsegbaun ashimkag, Jerusalén wakitkijajui, nuninak kuashat yaakat yaig samarianmaya batsatbaunum weenak, yamajam chichaman etsejuidau.

Felipe Etiopianmaya yamigbau

²⁶ Nuniku ai makichik Apajuí angelji Felipen chichajak: “Felipeh, surnumanini weta jinta Jerusalén juwaki Gaza wegamunum uwejush awa nui”, tiuwai. ²⁷ Nu tima Felipeshkam weuwai, nunikmá etiopianmaya aents, aents kaga emamu, Etiopía reinaji Candace kuichkijin kuitamin Jerusalén Apajuin ememattatus weu wakettatman wainkau; ²⁸ nugkeen waketak carrojin ekeemas profeta Isaías agagbau au aujkawa wegau.

²⁹ Nunittaman Wakan Felipen chichajak: “Carro wega au adjikata nunikam tikiju wajastá”, tiuwai. ³⁰ Tama Felipeshkam adjikamá profeta Isafas agagbaun au aujkawa minittaman antujuk iniak:

—¿Ame aujam dusha antemek? tau.

³¹ Tama ni ayaak:

—¿Wajuk antuktajaki, nuna taku tawai tusa ujachbaunush? tau.

Nuna tusa Felipen:

—Wakata tiuwai nijai ekeemsatatus. ³² Agagbaunum ju chicham tawa juna auju:

“Uwig mautainum juki ematia numamtuk jukiag emagmayi; nunisag uwig uje tsupigmash takamtak tepegama numamtuk niishkam chichakchabi.

³³ Nuniau asa ayatak yunumkabi, nunitaish makichkish ayamjauk atsusui, niina uchijigkesh atsugsauwai ju nugka juig maamu asa”.*

³⁴ Tibauwa nuna eunuco† Felipen iniak:

—Wait aneasam tujutta, ¿junash profetash yana takua tawa; nigkik tumama, atsa tikichin takug tawa?

³⁵ Tutai Felipeshkam nunú ni Apajuí chichamen auja nui nagkama, chicham yamagman Jesusan pachis ujakú. ³⁶ Nunik weamunum jintaa entsa aunum jegantá eunuco chichaak:

—¿Ju yumi awa jui wi yamimagta tamash wají utugchata amainaita? tau.

³⁷ Tutai Felipe ayaak:

—Ame dekas ashí anentaimjai dekaskeapi takumek yamimamainaitme, tiuwai.

Tama ni ayaak:

—Wika Jesusak dekas Apajuí Uchijimpapita tajai, tiuwai.

³⁸ Tutai carrojum awantata tusa awantamtaí, mai yuminum jegawajui nunik Felipeshkam yamijú. ³⁹ Entsanmaya jiinkimtai, Wakaní Pegkeji Felipenak jukiuwai; dutikamtaí eunucok ataktuk wainkachu, tujash shiig aneas weuwai. ⁴⁰ Felipek Azoto wantinkauwai, nunik ashí yaaktanum nagkaemak yamajam chichaman etse etsegkawa Cesarea jegauwai.

9

Jesús Saulo wantintukbau

(Tak. 22.6-16; 26.12-18)

¹ Nuna nuninaí Sauloshkam Apu Jesusa nemajuidaun maatasá awantanak idaichau. Nuniau asa sumo sacerdoten jegajuau.

² Nunik papí agajam sujustá Damasco jegaan jega ijuntaiya nui wayaaknush nuna inakmasan, Jesusa nemajuidaun aishmag, nuwa aidaujai achijan, Jerusalén ikaunmaktajai, tusa segau. ³ Nunik, Damasco jegaattak tikiju wajas jintá wetatman, pachiachbau nayaimpinmaya tsaaptin Saulon egkeku; ⁴ dutikam nugká iyaju, nunikmá makichik chicham: “Saulo, Saulo ¿Wagka minash waitkajame?”, tabaun antuku.

⁵ Tama Saulo iniak: “¿Apuh, amesh yaitpa?” tau. Tutai ni ayaak: “Wika Jesusaitjai, ame ya ainkum waitkame nuuwaitjai, ⁶ nantaktá nunikam yaakat jegata, awi ame dutikmainnak tujabiagtatui”, tiuwai.

* **8:33** Is. 53.7-8. † **8:34** “Eunuco” tawa juka, aishmag suki katijai tsupigkamu aajakajui, ashí rey jeen takasagtin aidau, nunú shiig wainkatasam diistá Mt. 19.12 Jesús nunin aidau kampaatum niimtinun tawa nu.

⁷ Aents aidau Saulojai ashinuk senchi ishankaju, chichamunak antu-inayatak wainainachu asag. ⁸ Nunik Sauloshkam nugká tepau nantakí nintakamá wainmamainchau wajasú. Nunikmatai uwegnum achik egkesag Damasco ejegawaju; ⁹ dutikam kempatum tsawan wainmatsuk, yutanash yutsuk, umutnash umutsuk pujau.

¹⁰ Damasco Jesusa nemajin Ananías daagtin pujau, nunittaman Jesús wantintuk: “¡Ananiasah!” tiuwai. Tama ni ayaak: “Apuh, jui pujajai”, tau.

¹¹ Tutai Apu Jesús chichajak: “Jinta tutupit tutaya nui wetá, nunikam Judasa jeen jegaam inimsata Saulo daagtin tarsonmaya pachisam, nui Apajuin aukaj pujawai; ¹² wainkae Ananías daagtin wayá wainmaktitus buuknum achiamun”, tiuwai.

¹³ Tama Ananías chichaak: “Apuh, au aentsun, Jerusalén amina nemag-tamin pegkejam aidau batsata nuna, tikima pegkegchau waitkamujin pachisag chichainamun antukmagjama; ¹⁴ nuniau asa juishkam sacerdote apuji aidau inajam, juiya amina daagmin pachis chíchaina nuna achig yajuaktatus taajama”, tau.

¹⁵ Tutai Apu Jesús ayaak: “Wetá, wi aunak etegkajai mina pachitus ashí judiochu aidaunum nuigtú rey aidaunmash nuigtú Israela uchijí aina nunash ujakti tusan; ¹⁶ wagki wi iwaintuktatjai mina daajun pachis etsejak wajupa waittsashtatua nuna”, tiuwai.

¹⁷ Tima Ananiaschakam jega Saulo pujamunum uwewai, nunik waya niina uwejin buuknum achiaik:

—Yatsug Sauloh, Apu Jesús ame jintá minamin wantintugmaka nunú awetine ataktú wainmakti tujamu asa, nunik Wakaní Pegkejinash jukiti tusa, tiuwai.

¹⁸ Tamawaik Saulo jinia namaká saepaga nunin aidau kakekauwai nunikmatai wainmakui; nunik wajakmatai Ananías yamijui. ¹⁹ Dutikam yutain yuwa chichiajui, nunik Jesusa nemajin aidau Damasco pujuidaujui ujumak tsawan ijunag pujusui.

Saulo Damasco chichagkagtukbau

²⁰ Nuniak jega ijuntai aidaunum wayá Jesusak Apajuin Uchijiyai, tusa etseju. ²¹ Ashí nuna antuidauk puyatkaju, nunikag:

—¿Juchaukaih Jerusalén Jesusa daajin pachis chichaidaun achig ya-juaktatus aintú wekaetinuwe nu? ¿Jukechukait juiyanash achijá yajuak sacerdote apuji aidaunum sujukagtatus taa nunú? tuidau.

²² Tujash Saulok aan nagkaemas sapigmakas Jesusak Cristui tusa etseju, nunitai judío aidau Damasco batsata duka pachimdaekag shiig dekamainchau juakajui.

Saulo chagkinum egkea yaaktanmaya jiiikbau

²³ Nunikag dukap tsawan asag judío aidau, Saulo maami tusag chichaman umigkaju; ²⁴ tujash Saulok dekau ni maami tuinamunak. Ditak tsawai kashishkam yaakta waitiji jiiintainum dakak batsamtau jiiinkui maami tusag. ²⁵ Tujash Saulo jintintaiji aidau kashi jukiag chagkinnum egkeawag yaakat pegmagbaunum nenaak akakiaju.

Saulo Jerusalén wakitkimu

²⁶ Saulo Jerusalén jega Jesusa nemajin aidaujui ijunjatatus wakegau, tujash ashí ishamaidau, wagki nigka Jesusa nemagtsuapi, tuidau asag.

²⁷ Tujash Bernabé juki, apóstol aidau batsatbaunum ejegau, dutikam Saulo jintá wesa Apu Jesusan wajuk wainkae, wajintu ausae nuigtú

Damascosh wajuk ajankas Jesusa pachis etsegkae nuna pachis ujakaju. ²⁸ Saulok Jerusalén juwaku nunik, ditajai ijunag wekaegas ajankas Jesusan daajin pachis etseju; ²⁹ nuniak chichaak judío, griego chichaman chichau aidaujai tudaiyu Apu Jesusa daajin pachis; tujash ditak ayatak maata tuidau. ³⁰ Nuna yatsut Jesusa nemajin aidau antukag jukiag, Cesarea ejegawaju dutikawag Tarso awemajui.

³¹ Dutikawagmatai iglesia aidauk ashí Judea nugkanum, Galileanmash nuigtú Samarianmashkam, shiig agkan batsatainak, Apu Jesusan puyatjus umijuidau, nuninak nuni nagkaemas kawedau Wakaní Pegkeji ichichmat suinamu asag.

Pedro Eneas etsagagbau

³² Pedro, yatsut Jesusa nemajin aidau diyaak wekaetau asa, Lidatum Jesusa nemajin pegkejam aidau batsatu asamtai wainkatatus weuwai. ³³ Nunikmá Eneas daagtin wekaechau asa, ocho mijadai pegajinig tepenun wainkauwai. ³⁴ Nunik Pedro chichajak:

—Eneasah, Jesucristo etsaentamui; nantakim janchjum ainkata.

Tamawaik Eneasak pegkeg wajas wajakiuwai; ³⁵ nunikmatai ashí yaakat Lida nuigtú Sarón batsamin aidau nuna wainkag Apu Jesusan nemagkajui.

Dorcas jakaun Pedro inankimu

³⁶ Nunú tsawantin yaakat Jopenum, Jesusa nemajin Tabita daagtin pujau. (Duka griego chichamnumak “Dorcas” taku tawai.) Nunú nuwak ashí pegkeg aina nunak takaak, aents ujunauch aidaunash yayaak pujau; ³⁷ nunú pujau Dorcas jakauwai. Nunikmatai iyashin nijajag jega makichkia ekeni jegamkamunum iwakag, tesamunum awayá aepsajui. ³⁸ Lidak, Jope tikiju au asamtai, Pedro nui pujawai tabaun dekaawag, Jesusa nemajin aidaushkam jimag aentsun: “Jopenum megkaetugtsuk tajutjamati, tujamae tusa ujaktajum”, tusa awetiaju.

³⁹ Tusa ujakajam Pedroskam ditajai weu. Nunik jegamtai jukiag yakí jakau tepamunum awayawaju, nunikmatai ashí nuwa waje aidauk buutuinak tenteawaju, nunikag túnica aidau inaktuidau nuigtú tikich jaanch Dorcas ditajai iwaaku pujusá najantaiji aidau. ⁴⁰ Dutikam Pedro ashí aentsun jiijú nunik, tikishmag Apajuin aujus, jakaun pempeentuki:

—¡Tabita nantaktá! tiu.

Tama nuwashkam nimiuwai, nunik Pedron wainak nantakí ekeemsau. ⁴¹ Nunikmatai Pedro uwegnum achik awajainu, dutika Jesusa nemajin aidau, nuigtú nuwa waje aidaujai untsuká iwakun iwaintukaju. ⁴² Nunú dutikamun ashí jopenmaya aidauk dekaawaju, nunikag Apu Jesusan kuashat dekaskeapi tiaju. ⁴³ Nunik Pedrok Jopenum Simón duwapé apijin tutaiya nuna jeen kuashat tsawan pujusui.

10

Pedro Cornelio jeen webau

¹ Yaakat Cesareanum makichik aents Cornelio daagtin pujau, suntag akankamua nuna daaji Italianmaya tutaiya nuna capitantji. ² Duka ashí niina patayí aidaujai ijunas Apajuin puyatjusag emematin aidau. Nunin asa judío senchi atsumamui ajuidaunash yayaak kuashat kuichkin suwau, nuniak Apajuinashkam tuke aujsagké au. ³ Nuniau makichik tsawantai, a las tres tumain ai paan wainkau, Apajuí angelji ni pujamunum waittaman, nuniak:

“¡Cornelioh!” tiuwai. ⁴ Tama Corneliook dii wajau, nunik ishamayatak: “¿Apuh, wagka tujutme?” tau. Tama ángel ayaak: “Apajuí, ame aujam nunak antugtamkae, nuigtú ame atsumaidau yayam nunash waitjamkae; ⁵ nunin asamtai ujumak aents awemata yaakat Jopenum, Simón, Pedro tutaya nuna utitnume. ⁶ Nigka tikich Simón duwapé apijin tutaya nuna jeen nayantsan uwetus pujawai”.

⁷ Ángel Cornelion aujus wakitkimtai, jimag ni inaken, nuigtú makichik suntag Apajuin puyatjus anentaimtinun ni kajittsá ditaijjai untsukú; ⁸ dutika ashí ni wainkamujinak ujaká Jope awemauwai.

⁹ Kashinia dui jintá eke yaakat jegattak weenai, Pedroskam jega ekenja jegamkam nagkatkamunum wakauwai Apajuin ausatatus etsa tajiastatak wajasú ai. ¹⁰ Nui pujus senchi yapajau, uniak yuwatatus wakegau; tujash eke yutain umiagtai pujukmá niishkam makichik yakiya wantinun wainkauwai, ¹¹ nayaim ujanmatai, sávana muun wegkagma iman cuatro weni nagkatjamuji jigkatkamu nugkanum akaetatman, ¹² nuanui ashí kuntin cuatro nawentin aidau, yakiya chigki aidaush, ashí japiinas yujau aidaushkam chimpiju. ¹³ Nuniamunum makichik chichaman antuku: “Pedro, wajakim anú maata dutikam yuata”, tabaun.

¹⁴ Tama Pedro ayaak: “Atsá Apuh, dutikashtatjai, wika ju yuchatai nuigtú tsumain aina nunak tuke yuwachuitjai”, tiu. ¹⁵ Tutai ataktú awentsag chicham: “Apajuí pegkeg emamua duka amek tsumainai tiipa”, tiuwai. ¹⁶ Duka kumpatumá nunikmatai, sabananak wamak nayaimpinum awagkiuwai.

Pedro judiochu jeen wayamu

¹⁷ Kajanum nuninun paan wainak Pedro, puyatuk wajukatnunak aunash wainkaja tusa anentaimtú pujai, Cornelio aents awemamu aidaushkam Simogkan jeen inimas waitinum tantaju, ¹⁸ nunikag untsamak iniimu, Simón daagtin Pedro tutaya nu anuish pujatsuak tusag.

¹⁹ Pedro eke kajanum paan wainkamujiya nuna anentaimtú pujai, Wakani Pegkeji chichajak: “Simogka kumpatum aents egapainawai, ²⁰ wamak akaikita, nunikam ditajai ijunjam utujimtsuk wetá, wi ditanak awemamjai”, tiuwai.

²¹ Tama Pedroskam akaiki, aents aidaun jegantun:

—Witjai, atum egatjum duka, ¿wagka taugme? tau.

²² Tama dita ainak:

—Capitán Cornelio, pegkejan takaak Apajuin emematin asamtai ashí judío aidaush aneas wakegas diin aina nunú awetamatai minaji. Nuna Apajuí angelji chichajak amina ujaktá, dutikam ni jeemin tajutjamati, nunik ni tujamkui shiig antugkata tibau asa, tuidau.

²³ Tutai Pedro jegá awayawaju, dutika nu kashia duik ditajai kajigkaju, nunik tsawajag Pedro ditajai weagtai, ujumak Jesusa nemajin aidau jopenmaya uyuntsaju.

²⁴ Nunikag kashinia dui Cesarea jegawaju, Cornelioskam niina patayí aidaujai nuigtú niina shiig kumpaji aidaun ipaa dakak pujau. ²⁵ Pedro jegá jegattaman, Cornelio jiintuki igkuak tikishmatjau ememattatus. ²⁶ Tujash Pedro awajki chichajak:

—Wajaita, wishakam ame aentsuitam annuketjai, tiuwai.

²⁷ Tusa niijai chichá chichakua wayau, nunikmá kuashat aents ijunag atatman wainkau. ²⁸ Nunik Pedro chichaak:

—Atumek shiig dekagme, judío aidautinak iinu chicham umiktina nuig, judiochu aina nujaig ijunmainchaun nuigtush ditá jeenkesh utu-mainchaun tujama duka. Tujash Apajuí mina iwaintugkae makichkish tsumainai tsuwatai tumaitsug nuna. ²⁹ Nuadui mina awetujiagminish utujimtsuk minimjai, yamai iniastajime: ¿Wagka taati tujutmaugme?, tau.

³⁰ Tutai Cornelio ayaak:

—Cuatro tsawan weawai, ju horaya junin ai a las tres wegai mina jegajui Apajuí aukun pujukman, makichik aents jaanch winchamtinun nugkuaju wajattaman wainkamjai; ³¹ nunika ai chichagtak: “Cornelioh, ame Apajuí aujam nunak antugtamkae, aents atsumaidau yayam nunash waitjamkae. ³² Awemata aents Jopenum dutikam Simón Pedro tutaya nuna itaatnume, tikich Simón duwapé apijin nayants uwetus puja nuna jeen pujawai”, tujutmae. ³³ Nuna tujutiu asamtai wamkesan utugtitajum tusan awetimjame, dutikamu asam ameshkam pegkeg taume. Yamai Apajuí waipamunum jui ijunjaji, nunidau asaja wakegainaji, amina Apu Apajuí tujabau iishkam ame etsegkumin antukagtasaa.

Pedro Cornelio jeen chichagkagtukbau

³⁴ Tama Pedro nagkama chichaak:

—Dekaskenun yamaik dekajai, Apajuik aents aidaunak akanag juka jushá awai, jushakam nishá awai tatsu nunak; ³⁵ nigka ashí nugkan-maya aents aidaunak shiig anentus diyawai, niinak puyatjus umijuinak pegkegnak takaina nunak. ³⁶ Apajuí Israel aidaun chichaman awetiuwai yamajam chicham shiig agkan pujutan Jesucristo etsegkauwa nuna, nigki ashí Apua nunú. ³⁷ Atumek dekagme ju chicham ashí Judea nugkanum, Galilea nagkamas Juan yamimagtajum tusa chichagkagtamu wantinjuawua duka. ³⁸ Dekagme, Apajuí senchijin nuigtú Wakaní Pegkejin Jesús nazaretnumiaya nuna susauwa duka, dutikam wekaegas pegkeg aidaun takaak Iwanch waitkam batsatunash etsagajakui, wagki nunak Apajuí niini pujau asamtai dutikauwai. ³⁹ Jutii ainaji ashí waji aidaun Jesús Judea nugkanum, nuigtush Jerusalén takaamu wainkau aidautik, nuna nuninum nenawag maawaju ainawai. ⁴⁰ Tujash Apajuí kempatum tsawanta jui inankiuwai, dutika iinash iwaintugmakui; ⁴¹ ashí aentsnak wantintukchawwai, imá jutiinak wantintugmakui, ya aidauna Apajuí duik nagkamas, ju aidau etsegkatin atinme tusa etegjauwaita nunú aidautin, jutii aidauti nantakmatai niijai yuinaku nuigtush umutash uwagmajii. ⁴² Ni awetabajui aents aidaun ujaktinme, nuninak Jesusnak Apajuí, iwaku aidaun, jakau aidaunash juezji ema apusae tusa etsegkatnume tusa. ⁴³ Ashí profeta aidauk Jesusnak pachis etsegtuinawai, ashí niina dekaskeapi tuidauk niina daajin tudaujig tsagkujam agtinai tusa.

Judiochu aidaun Wakaní Pegkeji egkemtugbau

⁴⁴ Pedro eke chichá wajai, Wakaní Pegkeji ashí aents nunú chichaman antuidaunak egkemtujajui. ⁴⁵ Pakamatan chichamjin Pedrojai kaunkaju aidauk, anentai jegachajui judiochu aidaunash Wakaní Pegkeji egkemtuja-jam, ⁴⁶ tikich chichaman chichainak Apajuin emematuidau antuidau asag. ⁴⁷ Nudiagtai Pedro chichaak:

—¿Wajinma utugmamain ainawa yamimagta tabaunmash aents aidau Wakaní Pegkejin jutiijai betek jukiaja dusha?

⁴⁸ Dutika Jesucristo daajin yamimagtajum tusa, ashí yamikajui, dutikawajam Pedron:

—Jui ujumak tsawankesh pujusam wetá, tusag segajui.

11

Pedro Jerusalegnumia Jesusa nemajin aidau ujakbau

¹ Apóstol aidau, nuigtú Jesusa nemajin aidau Judea batsatu dekaawaju, judiochu aidaush Apajuí chichamen wakejus antuinawai tabaun. ² Tujash Pedro Jerusalén jegantai, pakamaku aina nuiya chicham patattan nagkamawaju.

³ Nuninak: ¿Wagka amesh aents pakamakchau aidau batsatbaunum wayamesh, ditajai ijunjamesh yujumkash yuwaume? tuidau. ⁴ Tuinam Pedroskam nagkama, makí makichik wajuk nagkaemakni nuna pachis ujainak:

⁵ —Wika yaakat Jopenum pujusan Apajuí aujku pujukman, kanum paan sávana muun wegkagma iman makí makichik nagkatjamujin jigkatkamu nayaimpinmaya akaiki wi pujamunum iwaintugbaun wainkamjai. ⁶ Nunikan shiig diikman ashí kuntin nugkanmaya kajen aidau, nuigtú japiinas yujau aidau, yakiya chigki aidaushkam chimpimatman wainkamjai. ⁷ Nuniai makichik chicham: Pedro, wajakim anú maata, dutikam yuata tujuttatman antukmajai. ⁸ Tujutkui wi ayaakun: “Atsá Apuh, dutikashtatjai, wika ju yuchatai nuigtú tsumain aina nunak tuke yuwachuitjai”, timajai. ⁹ Nuna tai awentsag nayaimpinmaya chicham: “Apajuí pegkeg emamua duka amek tsumainai tiipa”, tujutmayi. ¹⁰ Nunak kempatamá dutika ashí nayaimpinum jukibi. ¹¹ Nu nunikmatai pujai, cesareanmaya awemamu kempatum aents jega wi pujamunum tajutuawagmayi. ¹² Nunikmatai Wakan, utujimtsuk ditajai wetá tujutmayi. Tujutmatai jujú seis yatsut Jesusa nemajin aina jujai wegagmajji, nunika makichik aentsú jeen wayabiaji; ¹³ nunika ajin ni ujakmayi, wajuk angelan niina jeen wajaun wainkae, nunik chichajak: “Aents awemata Jopenum, dutikam Simón, Pedro tutaiya nuna utitnume; ¹⁴ dutikam ni chichaman tujamtatui ame, amina pataimijai uwemainaitam nuna, tujutmae” tusa. ¹⁵ Timatai wi nagkaman chichai, ditanashkam Wakaní Pegkeji tajuawagmayi jutiin nagkamchak utugtamkabia dutiksag. ¹⁶ Nuna nunikmatai adeagmajjai, Apu Jesús chichaak: “Juagkak yumi yamijatjauwai, tujash atumek Wakaní Pegkejiyai yamigbau atatjume”, tubabauwa nuna. ¹⁷ Nunin asantai, Apajuí jutii Apu Jesucristo dekaskeapi tabaunum anenjauch amasajua dutiksag ditanash susaja nunash, ¿wisha yaitja Apajuin dutikawaipa titinnush?

¹⁸ Nu tabaun antukag itatkaju, nunikag Apajuin emematuidau, nuninak:

—Dekas judiochu aidaunash Apajuí, tudauji idaiyinak pujutan jukitnume tusa aikae, tuidau.

Antioquía Jesús nemajut nagkamamu

¹⁹ Estebagkan maawagmatai pujusag, Jesusa nemajuidau waitkatan nagkamawaju, dutikainam pampagkag ujumak Fenicianum weenai, Chiprenmash, Antioquianmashkam shiyakaju. Nui batsamsag yamajam chichaman Apu Jesuan pachisag tikichnak ujatsuk imá judío aidaunak jintintuidau. ²⁰ Nuninai ujumak Jesusa nemajin aidau chiprenmaya, cirenemaya aidau Antioquía jegawag, griego aidaunash yamajam chichaman Apu Jesuan pachisag ujaidau. ²¹ Nuniagtai Apu Jesuschakam niina

senchijin ditan suidau, dutikainamu asag kuashat dekaskeapi tusag Jesusan nemagkajui.

²² Iglesia aidau Jerusalén batsatu antukag, Bernaben Antioquia awe-maju. ²³ Dutikam jegaa, Apaju wajak yainawa nuna wainak senchi shiig aneasu, nunik: Shiig anentaiminish ebetmamjajum Apu Jesús nemagkajatam, tusa chichaju. ²⁴ Wagki Bernabek aents pegkeg, nuigtush Wakani Pegkejiya nuna senchiji kuashat ajamu, dekaskeapi tabaujishkam imanuk. Iman asamtai ni chichamun antugkag kuashat aents Apu Jesusan nemagkajui.

²⁵ Nuna dutika Bernabek Tarsonum weuwai Saulon egaak, ²⁶ nunik wainak Antioquia jukiuwai. Nuwi iglesia aidaujai makichik mijan pujusajui, kuashat aents aidaun jintintuinak. Nui nagkamas Antioquia Jesusa nemajin aidaun “crisunu” ainawai, tiajui.

²⁷ Nunú tsawantinig ujumak profeta aidau Jerusalegnunia akaikajui Antioquia weenak, ²⁸ nuanuyia makichik Agabo daagtin wajakí, Wakan dekamtikam: “Senchi yapajut ashí nugkanum Roma apuji inama nui te-peattawai”, tusa etseju, duka Apu Claudio inamak pujai nagkaemakiuwai. ²⁹ Nunikmatai Jesusa nemajin antioquianmaya aidau, Jesusa nemajuidau Judea batsatu waitiagtai, makí makichik dita ajuinamujin awetitnume tusag umikajui; ³⁰ dutika Bernabé Saulojai wetai, Jesusa nemajin aidaun apuji Judea batsatun ofrenda awetiajui.

12

Jacobon mainak Pedro achiká egkeamu

¹ Nunú tsawantaik, rey Herodes ni suntaji aidaun ishiakui, ujumak iglesia aidaun achikag waitkastinme tusa; ² dutika Jacobo* Juangkan yachiya nunak espadayai maatajam, tiuwai. ³ Nu dutikamu judío aidaun shiig awajkagmatai Pedroskam achiktajam, tiuwai. Nu tsawan aina duka pag levaduragtuchu yutaiya nu jegamunum nunikui. ⁴ Dutika achikagmatai cárcel egkeauwai, dutikak deciséis suntajan cuatro cuatro kanajag kuitamkatnume, dutikawag Pascua nagkaemakmatai aents aidau ijunjamunum jiikin, chichaman dekajuatjai, tusa anentainsauwai. ⁵ Dutikamu asa Pedrok cárcel shiig kuitamkam egketu; tujash iglesia aidauk niina pachisag mijattsuk Apajuin senchi aujtuinak batsatu.

Pedro cárcel egketun ángel jiikbau

⁶ Herodes, kashin jiiktajai ashí aentsú emtin, dutikan chichaman dekajuatjai tiu ai nu kashik, Pedrok jimag sunset ejapeam, cadenayai jigkaam kanak tepau, nuniai tikich sunset aidauk waitin kuitamainak ijunaidau. ⁷ Nuninai makichik Apu Apajuí angelji wantinkau, nunitai carcelak tsawan wajasui; nuniak Pedron bijagnum antig ishintaju, dutika: “Wamak nantaktá”, tiu. Nuniag cadena Pedro uwejin jigkamuk kakekau; ⁸ nunikmatai ángel chichajak: “Jaanchjum nugkujam akachumam, sapatjumesh shiig jigkagtá”, tiuwai. Tama dutiksag umikú, nunikmatai ángel chichajak: “Jaanchjum nugkugtá, nunikam wi weakui pataetugkata”, tiuwai.

⁹ Tama Pedroskam pataetuk jiinkiu, tujash dekaskeash ángel tawa dusha junia tusa dekachiatak, wagki nigka kajanum waintsujash tau.

* **12:2** Ju “Jacobok” Juangkan yachi Zebedeo uchiji Jesús chicham etsegtugkata tusa etegkamua aajakua nunuwai. Jacoboa duke Santiago tuuta awagmataiyai.

¹⁰ Tujash dekatkauwa nuna, nuigtú jimaja juna kuitamunash nagkaikiag, waiti jijui epenbau yaakat jiina nui jegantaju; nuniaig dushakam nigki ujanu, nunikmatai jiinkiag makichik jintá nagkaikajau, nunik angelak weak niinak ukuiuwai.

¹¹ Dutikam Pedro nigki anentaimas: “Dekaskenum Herodes jutija junak mantuata tau asamtampap agkanmitkajuatatus Apu Apajuí angeljin awetugni, ashí judío aidau dakajuina dui, tau”.

¹² Nuna aatus dekaa idaiyak, Juan Marcos tuuta awagmatia nuna dukují María jeen jegau, nui kuashat ijunag Apajuin aujuinak batsatbaunum.

¹³ Nunik agaa wajas waitin ijutai makichik nuwauch inatai Rode daagtin yakita tus diistatus jegantú; ¹⁴ nunik Pedro chichamen antujuk shiig aneas ujatsuk tupikaki wakitki wayá Pedro tanta waitinum wajawai, tau.

¹⁵ Tutai dita aiinak: ¡Imanjachumek!, tuidau. Tujash nigka dekas tajai tutaishkam, dita aiinak: Ni amaitsui angelji amainai, tuidau.

¹⁶ Nuna tuinai ataktushkam Pedro waitin ijuau, nunitai waitin ujakmá wainkag puyatkajui. ¹⁷ Nuniagtai uwejin takuinu bitat asatnume tusa, nunik Apu Jesús wajuk carcelnumian jiikne nuna pachis ujakaju, dutika:

—Atum Santiago, tikich yatsut aidaushkam ujaktajum, tusa ukuak jiinki yajá weuwai.

¹⁸ Tsawagmatai, suntag aidauk ditak pampandayidau Pedrosch wajakamki tusag.

¹⁹ Nunikmatai egaktajum tusa Herodes ishiakui, dutikamash wainkachagmatai kuitamkaju aina nunak kajegtajum tiajam kajegkajui, nuna dutika Herodes Judeanak ukuak Cesarea weuwai nui pujstatus.

Herodes jakamu

²⁰ Herodes tironmaya aidaujai, nuigtú sidognumia aina nuna senchi kajegkauwai; tujash ditak chichama umikaju nijjai chicham apakmí tusag, nunikag Blasto kumpamawaju rey Herodesjai takau asamtai, nunikag: “Ame chicham epegkami tuinawai tusam tukagtita”, tiajuí, Herodes inabaujinian yutain sumaidau asag. ²¹ Tiagmatai Herodes tsawantan mamikiau asa, jaanch dekas pegkeg rey nugkutajjin nugku iwagmamag, chicham dekatasa ekeemtainum ekeemas nagkama chichau; ²² nunitai aents aidauk senchi untsumkag: “¡Shiig aentschauwai, Apajuí chichau wajawai!” awajuidau. ²³ Nuna imatjuinai, Apu Apajuí angelji jatan susauwai, Apajuin emematchau asamtai; dutikam Herodesak aka amukam jakauwai.

²⁴ Tujash Apajuí chichamega nunak aan nagkaemasag ashí yantannum etsejuuidau.

²⁵ Bernabeshkam Saulojai dita takaamujinak ashimak, Jerusalén wake-tuinak Juan, tikich daaji Marcos tutaiya nuna jukiajuí.

13

Bernabé Saulojai nagkamchaku Apajuí chichame etsegku webau

¹ Iglesia aidau Antioquia, profeta nuigtú maestro aidau; Bernabé, Simón (Shuwin tutai), Lucio cirenemaya; Manaén (Herodes Tetrarcajai ijunag tsakajua nu) nuigtú Saulo aina ju batsatu. ² 28 Makichik tsawantai Apu Apajuin emematuinak nuigtú ayuno takainak batsatai, Wakani Pegkeji chichaak: “Bernabek Saulojai akaantugkatajum, wi dita takastinun untsukuitag nui takastinme”, tiuwai.

³ Tiajam ayunamun nuigtú Apajuí augbaun inagnakag, buuknum achikag Apajuin aujtus awemajui. ⁴ Bernabé, Saulojai Wakani Pegkeji awemam weajui Seleucia, nui juaki barconum egkemawag ajuntai Chiprenum weajui. ⁵ Nui Salamina jegawag, jega judío ijuntaijin Apajuí chichamen etsejudau. Juan Marcos tutaya nunashkam yaimpakti tima wekaegu.

⁶ Ashí ajuntai aina nunak yujagsaju, nunikag Pafos jegakmag wainkajui, makichik iwishin judío aents Barjesús daagtin wait profetan; ⁷ nunú iwishna duka gobernador Sergio Paulo yacha nujai pujau. Nunú gobernador, Bernaben Saulojai untsukú, Apajuí chichamen antuktatus wakegasa. ⁸ Nunittaman iwishin, griego chichamaik Elimas tutaya nu, gobernador Sergio utugchatan apujtau dekaskeapi tii, tau asa. ⁹ Tutai Saulo tikich daaji Pablo tutaya nu; Wakani Pegkeji ajamu asa shiig emetug diis chichajak:

¹⁰ —Amek tikima wait, pegkegchau, iwanchin uchijí, ashí pegkeg aina nuna shiwajiyaitme; ¿Wagka Apu Apajuin chichame pegkeja dusha, pegkegchauwa nuninush chichagme? ¹¹ Yamai Apu Apajuí suwimkan amasmatai, wainmachu wajasam etsash waintsuk dukap tsawan pujus-tatme, tiu.

Nunú tamawaik iwishnushkam wainmachu wajasú, nunik aentsun egau egkegsamtaí wekaesatjai tusa. ¹² Nu nunikun gobernador wainak dekaskeapi tiu, nunik Apu Jesús pachisa etsegbaunash shiig puyatjus antukui.

Pablo Bernabejai Antioquia, Pisidia awa nui chichagkagtukbau

¹³ Pablo ni kumpají aidaujai Pafos jegawaju nunikag barconum chimpimjag Perge shiyakajui, Panfilia nugkanum awa nui; tujash Juagkak ditan ukuinak Jerusalén wakitkiuwai. ¹⁴ Nunikmatai ditak Perge ukuinak jegawajui Antioquia Pisidia awa nui; nuniai tsawan ayamtai tsawagmatai jega judío ijuntaijin wayawag ekeemsajui. ¹⁵ Nuniai chicham umiktin agagbauwa nuna, profeta agagbau aidaunash ashí aujus ashimkag, jega ijuntaiya nuna apuji chichajuinak:

—Yatsug aidauh, atumesh aents aidau anentai ichichtumain ajutjamku-jag chichaktajum, tau.

¹⁶ Tama Pabloskam wajakí, uwejin takuinu bitat asatnume tusa, nunik: —Israel aidauwah, nuigtú judiochu Apajuí puyatjusum umijin aidautigmeschkam antugtuktajum. ¹⁷ Israelan Apajujiya nu, iina muunji aajakajua nuna etegjauwai, dutikamu asa shiig kuashat yujakajui nuigtush tajimat wajasajui eke Egipto nugkenchau batsatiatak, imanikagmatai Apajuí shiig senchigtina ibau asa jiiujui. ¹⁸ Dutikam uwegshunum cuarenta mijan tumain yujas pegkegchaun takaagtaish katsunjauwai; ¹⁹ dutika Canaan nugkanum, siete nugkanum ditash chichaku aidau batsamtatman depetuk ii muunji aidau batsasui. ²⁰ Nu ashí cuatrocientos cincuenta mijan tumain nagkaemakui ai; “Apajuí juez aidau adaijauwai, nu dutikam profeta Samuel pujujukua imanui jegantui. ²¹ Nunik pujusmatai, Samuelan segau ainawai iina reyjish ajutjamti, tusag. Tiagtai Apajuí Saulan Cisa uchijin, Benjamín weantun susauwai, dutikam cuarenta mijan inamjauwai. ²² Dutikamun idaimitkak Davitan rey ema chichaak: ‘Davitan Isai uchijin wainkajai ju anentaijui shiig awajtaiwa ni ashí wi tabaunak dutikattawai’. ²³ Nunú David weanta nuiyan ni anagkuauwa dutiksag Apajuí, Jesusan Israel aidau uwemtijatnun awetiuwai. ²⁴ Tujash Jesús eke jintinkagtutan nagkamtsaig, Juan ashí Israel aidau, ‘tadau takat

idaikujum yamimagtajum', tusa etsejú wekagu. ²⁵ Nuniak Juan jakatnuji tikiju wegau asantai chichaak: ¿Atumesh minash yayai tusagmea anentaimtugjume? wika atum auchuashit tujutjum duchauwaitjai; tujash mina ukujui makichik minittawai, nunak wika sapajinakesh atitmaitsujai, tiuwai.

²⁶ “Yatsug aidauh Abraham weantu aidauwah, nuigtú atum judiochu Apajú puyatjusjum umijin ainajum aanutigmin juna chichaman antukag uwemjatnume tusa awetugmaje. ²⁷ Tujash Jerusalén batsamin aidauk, ditá apuji aidaushkam Jesusnak dekachaju ainawai, nuigtú profeta chichamen ashí tsawan ayamtainum aujuinakush dekachajui, nunidau asag Jesusnak mantamnati tiaju ainawai, nuna dutikainak Apajú nunikti tibauwa nuna umikajui. ²⁸ Ni dutikamujin mantamnamainuk atsujaig Pilaton segajui maati tusag. ²⁹ Nuna ashí ni pachisa agagbauwa nuna umikag, numinmayan akakiag ukusaju ainawai. ³⁰ Tujash Apajú jakaunak inankiuwai. ³¹ Dutikam kuashat tsawantai wantintukui Galilea nagkamas Jerusalem take niijai ijunag yujajakú aina nuna. Nunú ainawai yamai niina pachis, ashí aents aidauash antuinamunum etsejuina duka.

³² “Nuadui jutiishkam yamajam chicham atuminish etsejuinaji: Apajú ii muunji aajakajua nuna anagkuauwa nunú; ³³ nunak Apajú yamai, jutii ditá uchijí ainag nui umiké, Jesusan inankiuwa nuadui; Salmo jimaja ju agagbaunum agak: ‘Amek mina uchijuitme tuja witjai amina Apanuk, wi yamai aentsnum akiinati tima akiinau asam’,* tibauwa nunisag. ³⁴ Apajuik ni chichame agagbauwa nui etsekgau aajakui, Jesús inankim niina iyashig ukumatainmag kaugchatna nuna pachis, duka: ‘Wi Davitan pegkejan dekaskea nuna anagkuauwaitag nunak aminí umiktatjai’,† tawai. ³⁵ Nuadui tikich agagbaunumash: ‘Amek amina inakem Pegkegma nuna iyashí kaugtú tusamek idaisashtatme’, tawai. ³⁶ Dekaskenmag Davitak ni weantu aina nuig Apajú dutikata tibaunak ashí imatiksag umik jakauwai, nunikmatai niina muunji ukumataijinig ukusam kauju. ³⁷ Tujash Apajú Jesusnak inankiuwai dutikamu asa kaugchawai. ³⁸⁻³⁹ Nunin asantai yatsug aidauh, atumesh dekamain ainagme, tudau tsagkugnemuk Jesusai awai tusa etsejuinag nu; nunin asantai ditá tudauji aidauk, Moisés chicham umiktá tibauwa nu umiamunmakesh pegkejai tamak asachajui, tujash ashí Jesusai dekaskeapi tabaunum pegkeg ainagme tama asajui. ⁴⁰ Kuitamankatajum profeta aidau tibauwa nu atumin uminkai, duka:

⁴¹ “‘Dushikkagtin aidauwah antuktajum, puyatkatajum, nunikjum megkaejatajum; wagi atum batsaminaitjum dui makichik takatan iwainaktinaitjai, duka makichik aentskesh ujpainakuish, dekaskeapi tichatin ainagme’ ”.‡

⁴² Juna tusa ashimak Pablo ni kumpají aidaujai jega ijuntainmaya jijnjagmatai, judiochu aina nu, tikich tsawan ayamtai atata duishkam ju pachisam aan nagkaemasam ujjatkata, tusag segaidau. ⁴³ Nunú ijunbau ashinnakmatai, kuashat judío aidau, nuigtú judío atajai tumamiu aidaujai Pablon Bernabejai wetai uyunaidau.

Nuniagtai, atumek Apajú wait anenjamja nuig ebetmamjatajum tusag chichajuidau.

* **13:33** Sal. 2.7. † **13:34** Is. 55.3. ‡ **13:41** Hab. 1.5.

⁴⁴ Tikich tsawan ayamtai jegamtai, ashí yaaktanmaya tumain ijunjajui Apu Apajuí chichame etsegbaun antukagtatus. ⁴⁵ Tujash judío aidau kuashat aents tuwakajun wainkag senchi kajekag, Pablo tabaunak daki-tuidau asag pegkegchau chichajuidau. ⁴⁶ Tuinam Pabloskam Bernabejai ajankas aikaju:

—Dekas dekatkauk atum ainajum nunú Apajuí chichame ujaktajum tibau ainagme. Tujash atumek pujut tuke atína duka dakitau asagmin, yamaik judiochu aina nui wetatji. ⁴⁷ Wagki jutiinak Apu Jesús chichagta-mak:

“Aminak judiochu aina nui tsaaptina numamtin atí tusan apusajame, dutikamu asam midau uwemat pachisam ashí nugkanmash etsegkata tusan”, tujamajji.

⁴⁸ Nuna antukag, judiochu aidauk shiig anejasajui, nunikag Apu Apajuí chichameg pegkejai tutan nagkamawaju, nuninak ashí pujut nagkanchaun jukitnume tibau aina duka dekaskeapi tiajui. ⁴⁹ Apu Apajuí chichamega nunashkam ashí nunú nugkanmag dekaawajui. ⁵⁰ Tujash judío aidau, nuwa Apajuin puyatjus umijin eme anentsá diitai aidaun, nuigtú aishmag chicham antugtai aidaujai akatjajui; dutikam Pablon Bernabejai wait-kaidau, dutikawag ditá nugkeenig jiikiag awemajui. ⁵¹ Dutikam ditashkam ditá nawen yukukuntu awa nuna, pegajag akaketkaju dakituinamu asag iwaintuinak, dutika ukukiag Iconio weajui. ⁵² Tujash Jesusa nemajin aidauk, shiig anejasag pujuidau, Wakaní Pegkejish ajamu asag.

14

Pablo Bernabejai Iconio yamajam chicham etsegkamu

¹ Pablo Bernabejai Iconio jegawaju, nunikag tuke nunin asag, jega judío aidau ijuntaijin mai wayawaju, nunikag Jesusan pachisag etsejiagtai antukag kuashat judío aidau, judiochu aidaushkam dekaskeapi tusag Jesusan nemagkajui. ² Tujash judío aidau dekaskeapi tuinatsu nu, judiochu aina nuna pegkegchau anentaiyai akatedau, Jesusa nemajuidaun kajekkatnume tusag. ³ Nuninaig Pablo Bernabejai dukap tsawan nui pujusajui, nunikag ajankas Apu Jesusai kajinas, Apajuí wait anenkagtamun pachis etsejuidau, nuniagtai senchijin suwidau dutikam aents dutikmainchaun iwainagtai chicham etsegbaunash dekaskeapi tuidau. ⁴ Tujash aents yaaktanmayag kanakajui; ujumak judío aidaujai ijunainai, tikich ujumak apóstol aidaujai ijunaidau. ⁵ Nunidau asag judío aidau, judiochu aidaujai nuigtú apu aidaujai chichaman umigkaju, waitkasa kayai tukui tukuinakua maami tusag. ⁶ Nunú tuinamun Pablo Bernabejai dekaawaju, nunikag Licaonia nugkanum yaakat tikijumamtin aidaunum, Listra nuigtú Derbe aina nui jegawaju, ⁷ nunikag nuwishkam yamajam chichama nuna pachis etsejuidau.

Pablo Listranum kayai tukuagbau

⁸ Listranum makichik aents tuke wekaechan shutú akiinauwa nunú eketu; ⁹ Pablo chichagkagtutai antak, nunittaman Pablo esetug diikmá, dekas tsagaumainapitja tabaujin waitkau; ¹⁰ dutika senchi jiiká chichajak: —¡Wajaita, nunikam tutupit wajastá! tau.

Tamawaik tseke wajaki wekaetan nagkabau. ¹¹ Pablo dutikamun wainkag aents aidauk, Licaonia chichamai senchi untsumkag:

—¡Apajuí aidau aentsmaga jutiiní taawaje!

12 Tusag Bernaben chichajuinak:

—Juka Apajuí Jupiterai* tuidau.

Tuja Pablon ní chichagkagtau asamtai:

—Juka Apajuí Mercuriowai tuidau.

13 Nunú yaaktanun níniasuk Apajuí Júpiter tutai ememattai jega au, nuna sacerdotéji toro aidaun jukiag nuigtushkam iwagmamak yagkug aidaulai yajuak, kuashat aents aidaulai kaunawaju. Nunikag toron maa apeenak, ememattag tuidau.

14 Nu nuniamun apóstol Pablo, Bernabéjai wainkag, jaanchjin tujit ichigkag aents tuwaká ijunbaunmag ditashkam eteena wajan senchi untsumkag:

15 —Muun aidaun, ¿wagka aancha aikagme? Jutiishkam aents atum ainajum annuketji; nunin asaja atum wainkajum aikajum aanú idaikujum, dekas Apajuí iwaku pujuwa nu nayaimpin, nugkan, nayantsan, nuigtú ashí nui ayá nunash najankauwa nu nemagkatajum tusa yamajam chicham etsejuinaji. 16 Yaunchuk tsawan aajakua duik, Apajuik ashí aentsnak dita wakejuinamunak takastinme tusa idaisauwai; 17 dutikauwaitak ni pegkeg takaamujiya nui niish yaita nunak tuké iwainmamkauwai; nigki atumin nayaimpinmayan yumin awetugma dushakam ajakash shiig nejektí tusa, nunikmatai shiig yuawag ditá anentainish shiig aneastinme tusa.

18 Tusá ujainamash, aents aidauk nunú toro maa apeaku dita ememat-tanak kakajus idaimainchau dekapedau.

19 Nuninai ujumak judío aidau, antioquianmaya nuigtú iconionmaya aidaulai kaunawag, aents aidaunak anentain yagtuawaju, dutikawajam Pablonak kayai tukui tukuinakua, maajistai tusag japikí jukiag yaaktanun jiikiag aipkiajui. 20 Tujash Jesusa nemajin aidau ijunag Pablo tentea batsamtaí niishkam nantakiu, nunik ataktú yaakat wayau; nunik kashinia dui Bernabéjai jiinkiang Derbe weajui.

21 Nunik nunú yaaktanun yamajam chichama nuna etsejiagtai, kuashat aents Jesusan nemagkagmatai ukuinak, Litra, Iconio, Antioquía aina nuní waketjajui. 22 Nui jegawag Jesusa nemajuidaan chichajuinak:

—Atumek dekaskeapi tiuwaitjum nuig emetmamatajum, Apajuí inam-taijin wayata takuik, kuashat waitiamuk inagkemainai, tiaju. 23 Nunikag makí makichik yaakat aidaunum iglesia aidau batsatun anciano aidaun adaitujag, ayunawag Apu Apajuin aujtusag niini dekaskeapita tiu aidaunak niina idaitusajui.

Pablo Bernabéjai Antioquía Siria awa nui wakitkimu

24 Nuna dutikawag ukuinak Pisidia nugkan nagkaikiag Panfilia jegawajui. 25 Nunikag Perge chichaman etsegkag ukuinak, Atalía akaikiajui. 26 Nui egkemjag Antioquía weajui, nunú yaakta nui Apajuí anenkajin kuitamsam takastinme tusa idaisam, takasaju asag. 27 Nunik Antioquía jegawag, ashí iglesia aidaun ijumag, Apajuí dita takainamunum shiig kuashat yaigkagbaun pachis ujakaju, judiochu aidaush wajuk Apajuin dekaskeapi tiaje nunashkam. 28 Nunikag Pablo Bernabéjai kuashat tsawantai nuig Jesusa nemajin aidaulai ijunag batsamsajui.

* 14:12 Jupiterai, Mercurio tawa nunak versión Reina-Valera (RV) tawai. Tikich versión Dios Habla Hoy (DHH) takug: Zeus, Hermes tawai. Zeus, Hermes aina juka griego aidau apajimtaiji aajakajui. Nuna romanmaya aidau tuinakug Júpiter, Mercurio tujakajui nunak tuinayatak.

15

Jerusalén ijunjamu

¹ Nunú tsawantai ujumak Judeanmaya aidau Antioquia jegawag, Jesusa nemajin aidaun jintintuinak: “Atumek Moisés chicham umiktinun agajua nuí, pakamaktajum tibauwa nu umiachkugmek uwemain ainatsjume”, tuidau. ² Tabaun Pablo Bernabesai antukag, ditajai senchi pampandaijag kajegdaikaju. Nunikag, Pablo Bernabesai nuigtú tikich aidau ujumak Jesusa nemajin aidaujai Jerusalén wetinme, nunikag apóstol aina nujai nuigtú anciano batsata nujai nuna pachisag chichastinme taju.

³ Iglesia antioquianmaya awemajam, Fenicia nugkanum nuigtú Samaritanmash nagkaemainak wajuk judiochu aidau duik umitaijin idaisaje Apajuin nemagkagtatus. Nuna etsejiagtai ashí Jesusa nemajin aidau antukag shiig aneedau.

⁴ Jerusalén jegawagmatai shiig anentus jukiaju iglesia aidau, apóstol aidaush nuigtú anciano aidaushkam, dutikawajam ditashkam ashí Apajuí ditai dutikawaja nunak ujakaju. ⁵ Tujash ujumak secta* fariseo aina nuiya, Jesusan dekaskeapi taju aidau wajainiag chichainak:

—Judiochu aidau Jesusa nemajuina dushakam pakamaktinme, nuninak Moisés chicham umiktajum tibauwa nunash umiktinme tumainai, tuidau.

⁶ Tiagtai apóstol aidau nuigtú anciano aidaujai ijunjaju shiig dekawagtatus. ⁷ Kuashat nuna pachis chichai chichainakua Pedro wajakí chichaak:

—Yatsug aidauh, atumek dekagme yama nagkabaunum, Apajuí atum ainajam anuiyatigmin mina etegtuauwa duka, wi yamajam chichaman etsetgai judiochu aidaush antukag Jesusan dekaskeapi titinme tusa.

⁸ Apajuí aentsú anentainash waina nunú, ditanash iwaintukui ni anea nuna, dutikak Wakaní Pegkejinash susajui jutiin utugtamkauwa dutiksag;

⁹ jutii ainag nujai ditanak tikich aentsua nuninuk diigmaschauwai, dekaskeapi tabaunum ditá anentainash pegkemtikajui. ¹⁰ Nunin aish,

¿wagka Apajuí ekajmainush, iina muunji aidaukesh umikchaju, jutiikesh umimainchauwa dusha, Jesusa nemajin aidaush umiktinme tajume?

¹¹ Duka nunimait sui, yamaik jutii Apu Jesús dekaskeapi tabaunum anenjauch uwemainag nunisag ditashkam uwemainawai, tiuwai.

¹² Timatai ashí itatjaju, Bernabé, Pablojai tutai antukagtatus, nunikagmatai judiochu aidaunum aents dutikmainchau aidaun Apajuí ditai iwainagbaun etsejuidau. ¹³ Nu Chichaamun ashimkagmatai Santiago wajakí chichaak:

—Yatsug aidauh, minash antugtuktajum. ¹⁴ Simón ujakpakmaji, Apajuí nagkamas judiochu aidaunash wajuk wait anentug etegjae mina aentsug agtinme tusa. ¹⁵ Duka Profeta aidau agagbaunum tawa jujai betekai:

¹⁶ “Ju junikmatai Davita jee iyaaja nuna waketjukin ataktú jegamkattajai; tsainka nuna ataktú jegamkan yaunchuk aaya imanuk awasattajai;

¹⁷ dutikam tikich aents aidaush Apú egaktinme, nuigtú ashí judiochu aidau mina daag pachisa ujakbau aina dushakam.

¹⁸ Aatus Apu Apajuí tawai, yaunchuk nagkamas jujú chichaman dekamti-jamauwa nunú”.†

¹⁹ “Nuadui wika judiochu aidau, Apajuin nemagkaja duka waitkaschagmi tajai; ²⁰ dekas ayatak carta agatmainai, apajuimtai aidau

* **15:5** “Secta” tawa junak, Jesusa chichame dekaskea nuna yapajia etsejin aina nuna tawai.

† **15:18** Am. 9.11-12.

anagkuamu pegkegchau aina duka, pempeaja maamu aina nuna nejeesh, nuigtú kuntu numpeshkam yuawaigpajum tsanijintash tsanijinawaigpa tiagmi; ²¹ wagki yaunchuk nagkamas duka awai, Moisés chicham umiktajum tusa agagbauwa nuna etsejuidauk, duka ashí yaaktanum tsawan ayamtai tsawagmatai jega ijuntainum tuke aujtaiyai”, tiuwai.

Papí agaja judiochu aidau awetimu

²² Nuna tutai apóstol aidau, anciano aidau nuigtú iglesia aidauhkam pegkeg diisajui, nunikag chichasag jutii ainag juiya etegjami dutika Pablo Bernabesai awemami Antioquia, tiaju. Dutikawag Judas, Barsabás tutaiya nuna Silasjai etegkawajui, dita aina nuiya eme anentsá diitai aidau; ²³ dutika ditai juna carta agajag awemajui:

“Apóstol aidauti nuigtú anciano aidaujai atumi yatsum aidauti, iina yachí judiochu aidautijum Antioquia, Siria nuigtú Cilicia batsatjum nunú aidautigmin, kumpanjime.

²⁴ Antukmaji ujumak jutii ainag juiya jutii awemachbauwaitak, atumiin taawag anentaimtagmin pachimjupak ukugmakiaju tabau.

²⁵ Nunikaja ashí ijunja chichasji, jutii ainag juiya ujumak aents etegkami dutika, jutii aneetaiji yatsug Bernabé, Pablojai atumin ijagtamsatatus mininakui awemami tusaja; ²⁶ Bernabé, Pablo aina juka Apu Jesucristo chichamen etsejuidau asag, maata tama ishamainnum yujainakush ditá pujutinak puyatjuinatsui. ²⁷ Nunidau asagmatai Judasan, Silasjai awetajime, dita igkumpawag, ashí ju agajag juna pachisag shiig ujapaktinme tusa. ²⁸ Wakaní Pegkejin shiig awajkae jutiinash aikasag, nunin asamtai makichkish dita umimainchawk utugchatak apujtuschgami, jújú aina junak dutikatnume taji; ²⁹ apajuimtai aidau anagkuamu maamu aina duka yuwawaigpajum, kuntu numpe aidauhkam, kuntu pempeaja maamu aina nuna nejeesh, nuigtú tsanijintash tsanijinawaigpajum, tajime. Jújú aidau tupantakjumek pegkeg nuniktatjume; aaja juaktajum”.

³⁰ Ditashkam akatmamag ukuinak Antioquia weajui, nunikag Jesusa nemajin aidau ijumag cartan susajui; ³¹ dutikawajam nuna ausag shiig aneasaju anentai ichichtuinamu asag. ³² Judas, Silas aina dushakam profeta asag, yatsut aina nuna kuashat ausaju, dutikam ichichmamjag shiig aneas juakaju. ³³ Nui dukap tsawan batsamsag waketiagtai, Jesusa nemajin aidau shiig anentsag akateg awemajui. ³⁴ Tujash Silasak nui juakta tabau shiig awajkam juwakui. ³⁵ Pablok Bernabesai Antioquia juwakajui, kuashat tikich Jesusa nemagkau aidau jintintak, nuigtú yamajam chicham Apu Jesusdaun etsejak.

Pablo Bernabesai kanakbau

³⁶ Ujumak tsawan asag Pablo Bernaben chichajak:

—Ataktú wee yatsut aidau ijagsami, ashí yaaktanum Apu Jesusa chichame etsegkabiag nui wajuk batsatainawaki diyaku, tiuwai.

³⁷ Tama Bernabé Juangkan ayatá tau Marcos tutaiya nuna; ³⁸ tujash Pablok Marcos jutanak dakitau, wagki Panfilia ditajai ijunag takaamunum ukukbau asa. ³⁹ Nunitai kuashat jiya jiyaituinakua mai kanakaju. Nunik Bernabek Marcosan juki egkemag Chipre weuwai. ⁴⁰ Nuniai Pablo Silasan etegkawui, nunikmatai yatsut aidau, Apu Jesús wait anenjamjati tusa akatjam, nuiya jinkiajui. ⁴¹ Nunikag Sirianum nuigtú Cilicianum iglesia aidau anentain ichichtukiag nagkaemakiajui.

16

Timoteo Pablon Silasjai uyuntsamu

¹ Pablo Derbe jegaa nagkaemaki Listra jegauwai. Nui makichik Jesusa nemajin Timoteo daagtinun wainkauwai, dukujig judío nuwa Jesusa nemajin, tujash apají griego. ² Yatsut listranmaya, Iconionmaya aidaushkam Timoteo pachisag pegkejan chichajuidau. ³ Tuidau asagmatai Pablo uyuntusti tau asa, pakagtajum tima pakajiajuu, judío nui batsamin aidau pegkegchaun anentaimtinum tau asa, apají griegon ashí dekaidau asagmatai. ⁴ Nunikag ashí yaaktanun nagkaemainak, Jesusa nemajin aidau, apóstol aidau nuigtú anciano aidau Jerusalén batsata nujai chichaman umikag agagbauwa nuna pachisag ujidau. ⁵ Nuniau asamtai iglesia aidaush dekaskeapi tabaujiya nuig ichichmamaidau, nuninak kashí kashinig kawedau.

Pablo kajanum macedonianmaya aents wainkamu

⁶ Wakaní Pegkejiya nunú Asia nugkanmag chichamak etsegkaipa tabau asag, Frigia nugkanum nuigtú Galaciaya aatú nagkaemakiajuu; ⁷ nunikag Misia nugkanum jegawag, Bitinia nugkanum wegagtatus anentaimaidau; tujash Jesusa Wakaní wetinme tichauwai. ⁸ Nunikag Misanak tutupit nagkaikiag Troas jegawajuu. ⁹ Nuanui Pablon Macedonianmaya aents kajanum paan wantintuk chichajak: “Macedonia katigkam jutiish yai-jatkata”, taun wainkauwai. ¹⁰ Pablo nuna wainkamtai, dekas Macedonia wegagmi tusa umintsabaiji, junak Apajuiyap yamajam chichaman awi etsegkati tujamu asa jutikawa tusaja.

Pablo Silasjai Filipos jegaamu

¹¹ Nunikaja Troas egkemjá tutupnik wega weakua ajuntai Samotracia jegaa, kashinia dui Neápolis jegabaiji. ¹² Nui pujusá Filipos weamiaji, romanmaya batsamtaiji dekas yaakat iman Macedonia nugkeen awa nuanui, nunika nu yaaktanun machik tsawan pujusbaiji. ¹³ Nuniamunum tsawan ayamtai tsawagmatai, yaakat jiinki namaká uwet jegawabaiji, judío aidau Apajuí aujtaijig awints awatai tau asaja; nui pekaamsa nuwa aidau ijunjau chicham ujabaiji. ¹⁴ Nu aina nuiya nuwa Lidia daagtin, yaakat tiatiranmaya jaanch kapantu nentetkau sujín, Apajuinash emematin ekeemas antú ekeemayi; nunittaman Apu Apajuí anentain antinkabi Pablo etsegbaunash shuig antukti, tusa. ¹⁵ Nunik ashí niina patayijai yamimakag:

—Atumesh, minash Apu Jesusan dekas umigmáin waitkugmek, mina jegajuu taajum kanagtajum tusa segapakui, weamiaji nui pujustasa.

Pablo Silasjai cárcel egkeamu

¹⁶ Nunika, Apajuí aujtainum wegáin, nuwa muntsujut inak wakan dekamin ajamu igkumpaktatus jiintugmakmayi. Nunú dekaamtai apuji aidauk kuashat kuichkin juidau. ¹⁷ Nunú, jutiin Pablojai wegáin pataetugmak minis senchi untsamak:

—Ju aents aina juka Apajuí ashí nagkaekagtasu muunta nuna inake ainawai, nunin asag nuiya uwemta nuna pachis jintinjamatatus minitjamainawai! wajau.

¹⁸ Nunak kuashat tsawantai imatú wekaegu, nunitai Pablo kajejuk ayampatua wakanin chichajak: Jesucristo daajin tajame, aanú nuwauch jiinkim ukuktá.

Tamawaik wakanchakam jiinki ukukuiwai.

¹⁹ Tujash nuna apuji aidau ni dekamamtai kuichik jutaijin nunimainchau wajasmatai, Pablon Silasjai achiká jukiag, plazanum apu aidau eemtin ejegawaju. ²⁰ Dutika juez aidau chichajuinak:

—Jujú aents aina juka judío ainawai, nuninaitak iina yaaktajin taawag dapamkagtuinawai, ²¹ nuninak ditá pujutin ii romanmaya aidautik machikish dutikmaitsug nuna jintinawai, tuidau.

²² Nuna tiagtai aents aidau Pablon Silasjai pampantug wajatkiagmatai, juez aidau, jaanchjin awitug, numí suwimatajum, tusa inamjau. ²³ Timatai senchi suwimawag cárcel egkeawaju, dutikawag achikbau kuitamin aidau:

—Shiig kuitamkatajum, tiajui. ²⁴ Nunú tiajam, achikbau kuitamnushkam juki, carcela initken calabozo egkeawajui, dutikawag naween cepo* apujtusag shiig emetug ukukiajui.

²⁵ Tujash aehaet wajasú ai, Pablo Silasjai Apajuin ajuinak, kantamtan kantam wajagtai, tikich achigbau aidaukam antú batsatu. ²⁶ Nuniai pachiachbau shiig senchi uujak, cárcel jegamku ajigbau aidau senchi umuchiau, nuniaig waamak ashí waiti aidauhkam ujanjau; nunitai ashí achigbau aidau cadenayai jigkakbauk tsujinag kakekajui. ²⁷ Imaniai achikbau kuitamin shintaak diistakamá, carcela waitiji aidau ujanag atatman wainkau, nunik espadajin ukuini juki maamata tau, achigbau aidau tupikakiajeapi tusa. ²⁸ Nunitai Pablo senchi untsuká:

—Maamawaipa, jutiik ashí betek batsatji, tiuwai.

²⁹ Tutai achikbau kuitamnushkam jii ekemakjum sujustajum tusa segabiu, nunik ishamak kujaukmaikia tupikaki Pablo Silasjai wajamunum jégantá tikishmatjau. ³⁰ Dutika agaa jiiki:

—Muun aidauh, ¿wajina wisha dutikmainaitja uwemjatasanush? tusa iniau.

³¹ Tuinam dita aினak:

—Apu Jesucristo dekaskeapi tita, nuniakum ame, nuigtú amina pataim aidaujai uwemjattame, tiajui.

³² Tusa Apu Apajú chichamen niina ujaak, ashí niina jeen batsata nunash ujakui. ³³ Nunú hora kashia duik juki, achikbaun kuitamnushkam ipujamu aidau nijatkau; dutikam nuadui yamimakaju ni, nuigtú ashí patayí aidauhkam. ³⁴ Nunik niina jeen juki yutain ajamsau, nunikag ashí niina jeen batsata duka shiig aneasaju, Apajuin dekaskeapi tiaju asag.

³⁵ Kashikmas juez aidau achijatin aidau, achikbau kuitamnun awetiaju: Anú aents aidauk jiiiktajum, timae titajum tusa. ³⁶ Tima achikbaun kuitamin Pablon chichajak:

—Juez aidau akupkati tujutiaje; nunin asamta shiig aneasjum wetajum, tau.

³⁷ Tujash Pablo achijatin aidau chichajak:

—Jutiik romanmaya aents ainajinig shiig chichaman dekagtamtsuk tuwakbaunum asutamawag cárcel egkepawagmae; dutijabau ainayatkush, ¿wagka yamaish uukash jigmakta tuinawa? Duka nunimait sui, dita taawag jigmaktinme, tuidau.

* **16:24** “Cepo” tawa nunak, achikbau cárcel pujau jiinki tusag tapna jimag mai yantamen agtuamunum dawenum apatuk chanua ukujakú ainawai.

³⁸ Achijatin aidau juez aidau timae tusa ujainam, antukag senchi ishankaju, romanmaya aents ainaji tuidau asagmatai. ³⁹ Nunikag Pablon, Silasjai wejajau, tsagkugtugtajum, tita tusag. Dutikawag jiikiag:

—Juig pujutsuk wetajum, tusag awemaju. ⁴⁰ Carcelnumia jiinkiag Pablo Silasjai Lidia jeen weaju, nunikag nui yatsut aidau wainkag anentain ichichtujag ukuinak shiyakajui.

17

Tesalónica pampandajamu

¹ Nunik ashinkag Anfípolis, nuigtú Apolonia nagkaikiag Pablo Silasjai Tesalónica jegawaju, jega judío aidau ijuntaijin. ² Pablok tuke nunin asa, jega ijuntainum wayau, nunik tresa imania tsawan ayamtai aina nui ditajai tudaiyidau Agagbauwa pachisag. ³ Dutikak, Cristuk waitkasa maam ataktú nantaktinai tusa agagbauwa nuna pachis ujaak:

—Wi Jesusan pachisan ujaajim, nuuwai Cristuk, tiuwai.

⁴ Nuna tutai wajumchik judío aidau dekaskeapi tiaju, nunikag Pablojai nuigtú Silasjai ijunjaju; nuigtushkam kuashat griego Apajuí emematin aidaush, nuigtú kuashat nuwa puyatjusa diitai aidaushkam, dekaskeapi tiaju. ⁵ Tujash judío aidauk senchi kajejuidau asag, aents pegkegchaw, daki aidau jintaa yujattaman yajuakaju, nunikag nujai ijunjag aents aidau dapampaidau; nuninak Jasogka jeen jetekaju, Pablo Silasjai egainak, jukiag aents tuwakbaunum ejegatasag. ⁶ Tujash nui wainkachag Jasogkan, nuigtú ujumak yatsut aidaujai jukiag yaakta apuji batsatbaunum ejegawag untsumaidau:

—Ju aents aina ju, ashí nugkanum wekaegas dapamkagtú wekaenuwe nunú jui tajutjamamtai; ⁷ Jasón niina jeen apujus pujujui, dutikam dita ashí Roma apuji chicham umiktin aidau umikbauwa nunak dakituinawai, tikich rey Jesús daagtin awai tuidau asag.

⁸ Nunú tabaun aents aidau, ashí yaakta apuji aidaush antukag, pampaidau. ⁹ Imatiagtai Jasón, nuigtú tikich aidaujai kuichkin susajui dutikamtai akupkajui.

Pablo Silasjai Berea jegamu

¹⁰ Dutikawajam wamkesag kashi aig yatsut Apajuí nemajin aidau, Pablo Silasjai Berea awemajui, dutikam jegawag judío aidau ijuntaijin weajui. ¹¹ Nuiya aidauk tesalonicanmaya aidau nagkaegas shiig anentaimaidau, nunin asag wakegas chichamnash antuidau, nuninak kashí kashinig agagbauwa nuna kuitamas aujuinak egaidau, Pablo tawa dusha dekaskeashit tusag dekawagtatus. ¹² Nunidau asag kuashat judío aidauk dekaskeapi tiaju, nunisag kuashat griego aidaushkam dekaskeapi tiaju nuwa eme anentsá diitai aidau nuigtú aishmag aidaushkam. ¹³ Nuniamun judío Tesalonicanmaya aidau, Pablo Berea Apajuí chichamen etsejui tabaun dekaawag shimutkaju, nunikag nuishkam aentsun dapampaidau. ¹⁴ Nudiagtai yatsut Jesusa nemajin aidau Pablon; nayants anunjukam wetá tusag awemaju, nuniai Silas Timoteojai Berea juwakajui. ¹⁵ Pablo uyunaidauk Atenas ejegawaju, nunikag waketiagtai Pablo, Silasan, Timoteojai waamak jui taatnume, ditajai igkuniktajai, tiuwai.

Pablo Atenas pujusbau

¹⁶ Pablo Atenas, Silasan Timoteojai dakak pujus, kuashat anentain idajtus diyau, ashí yaakta nuanuig imá ditá apajuimtaiji aina duke ayau

asamtai. ¹⁷ Nuniau asamtai jega judío aidau ijuntaijin wayá judío aidaujai tudaiyu, tikich judiochu Apajuin puyatjus emematin aidaujaishkam, dutiksag kashí kashinig plazanum tuwakbaunmash tudaiyu. ¹⁸ Nunisag, ujumak filósofo epicúreo aidau nuigtú estoico aidaush Pabljai tudayinau, nuniagtai ujumak aents aidau:

—¿Aush wajina pachisaya imá chichawa? tuidau.

Tiagtai tikich chichaidau:

—Tikich nugkanmaya apajuimtai aidaun yamagman pachis etsejajama, tuidau.

Nunak yamajam chichaman Jesusan pachis nuigtú nantakbaujin etseju asamtai, tiajui. ¹⁹ Tusag Pablon, Areópago ejegawag iniinak:

—¿Ame yamajam jintinkagtam dusha waji pachismeame tame nunú dekatasa wakegag dusha tukagtumainkaitam?; ²⁰ wagki waji aidau dekahtai tame dusha waji takumeame tame nu dekatasa wakegaji, tuidau.

²¹ Ashí Atenas batsamin aidauk, nuigtú tikich ikaya kaunkau nui batsam-nushkam, tikichnak dutiktusuk ayatak chichaman antuktatus wakegaidau nuninak yamajam aina nunak pachis augmatuidau.

²² Tama Pablo Areópago* ejapen wajantá chichaak:

Atenasnumia aidauwah, atum apajuinjum duka dekas pujawapi tusajum anentaimitin ainajum nunak wainjime. ²³ Atumi apaju-jum emematku ijuntaigmin nagkaemaku diikman, altarnum APAJUÍ WAINCHATAI tusa agagbaun wainkamjai; nunú atum wainchayatkujum emematjum nuna wika pachisan etsejaji.

²⁴ Apajuí nugkan najanauwai, nuigtú ashí nui ayá nunashkam, niyai nayaimpin nugkanash apujig, nunin asa aents ni ememattai atin jegamkamunmag pujuchui; ²⁵ makichik aentskesh niinu atinun takagtusti tusag atumchauwai; niyai pujutnash, mayainash nuigtú ashí waji aina nunash sukagtinuk.

²⁶ Tuja makichik aentsua nuiyanak yujak ashí nugkanum batsamsatnume tiuwai. Dutika mamiktujui tsawantan tuja nugka dita batsamsatnunashkam; ²⁷ nunak Apajuik, mina egatkatnume nuninak antintsagkesh dekapsatnume tusa. Tujash dekaskenmag jutiijaig atushtak atsui. ²⁸ Wagki Apajuí takui pujaji, nuniau asa buchituinaji, nunisaik iwaku batsatji; ujumak atumdau poeta† aajakajua dushakam: “Jutiik Apajuí uchijí ainaji”, tiajui. ²⁹ Dui Apajuí uchijí aidau asaja oro nuniachkush plata nuniachkush kayakesh aents aidau anentaimesa najanamu aina duka jutsukaitai Apajuik tusaik anentaimitumaitusji. ³⁰ Nunak aents dekachu asa nuniagtaish, Apajuik pachitsuk idaisauwai, tujash yamaik aents ashí nugkanum batsamin aidaush, tudaujinak idaisatnume, tawai. ³¹ Wagki Apajuik makichik tsawantan mamikiauwai, nunú tsawan jegatai ashí nugkanmaysa aidau, Cristo Aentsmaga akiinua maamu nantakiuwa nuna, yamaik aents pegkegchau aidau, pegkeg aidaujai etegjam akankam ijumjata titin asa.

³² Tujash nantakbau tabaun antukag tikich aidauk dushikinai, tikich chichainak:

—Dekas ju tame duka tikich tsawantin ataktú jutiksaik antukagmi, tiaju.

* **17:22** “Areópago” tawa nunak, yaaktanmaya apu aidau chichaman dekawagtatus tuwakua nuna tawai. Nunak nunijakú ainawai, aents ikaya taamtai chichaman antugkagtatus. † **17:28** “Poeta” tawa juka, aents wake besemag anentaibau, nuniachkush shiig aneamu ajam, ni nunimain anentaimitamun agau aina nuuwai.

³³ Tiagmatai Pabloskam ditanak ukukiuwai. ³⁴ Tujash ujumak aents dekaskeapi tiaju, nunikag Pablojai ijunjajui, nuanui pachitkau Dionisio Areópago ijunin, nuigtushkam makichik nuwa Dámaris daagtin, nuigtú tikich aidaushkam.

18

Pablo Corinto jegaamu

¹ Pablo nuna dutika ukuak, Atenas jiinki Corinto weuwai. ² Nui jegakmá, Pontonmaya Aquila daagtinun nuwe Priscilajai wainkau italianmaya taa ujumak tsawan pujuttaman apu Claudio ashí judío Roma batsata duka jijnjatneme tibau asa. Pablo nuna diyak wejiuwai; ³ nunik jegakmá, jegamkatnun duwapen apijin asagmatai niishkam nu takatnak takau asa ditajai juwakui ijunag takasagtatus. ⁴ Ashí tsawan ayamtai tsawautaik, jega ijuntainum jegaa, judío aidaun, griego aidaunash tuke ausagké au dekaskeapi titinme tusa.

⁵ Silas Timoteojai Macedonia pujau taawagmatai, Pablok imá chicham etsegbauwa nunak takau, dutikak judío aidaunash Jesusak Cristuwai tusa ujaidau. ⁶ Tujash judío aidaun dakituinak pegkegchau chichajuinam, Pablo niina jaanchjin pegajá wajantá chichaak:

—Atumek bakumajum megkaekatin ainagme, wika atuminig agkantaitjai yamai nagkamsanuk judiochu aidaunum wetatjai, tiuwai.

⁷ Tusa jega ijuntainmaya jiinkiu, nunik Ticio Justo Apajuin emematin jega ijuntainum ayaumas pujau asamtai nuna jeen weuwai. ⁸ Tujash Crispo, jega ijuntaiya nuna apuji ashí niina patayijai Apu Jesusan dekaskeapi tusag nemagkaju. Tikich corintionmaya aidaush chicham etsegbaun antukag kuashat dekaskeapi tiaju, nunikag yamimakajui.

⁹ Nuniku ai Apu Jesús Pablon kashi paan wantintuk chichajak: “Sapigmakaipa, chichagkagtukta itatkaipa; ¹⁰ wagki wi amijaig ajai, makichkish pegkegchau awajtamkatasag achigmainchrau ainawai, ju yaakta jui mina aentsug aidauk kuashat ajutui”, tiuwai. ¹¹ Nu tima Pablo makichik mijan nuigtú jimaituk Corinto pujusui, nuiya aents aidaun Apajuí chichamen jintintak.

¹² Nunú tsawantin Galión Acayanum gobernador wajas pujau asamtai, judío aidaun ijunjag chichaman umikag Pablo jukiag, chicham dekatainum ejegawaju, ¹³ dutikawag:

—Ju aentsua ju ashí aents aidaun Apajuiya duke ememattajum tawai, iinu chicham umiktina nuig nuniktajum tabauk atsaig.

¹⁴ Tiagtai Pablo nagkama chichaktag taig, Galión judío aidaun chichajak: —Ju aents pegkegchau takasbau, nuniachkush magkagtuamukesh pachisjum takuginig judío aidautijum tajum nunak antugmainaitjime; ¹⁵ tujash ayatak chichama duke, aentsú daaji pachisjum, nuigtú atumin chicham umitaigmea duke pachisa tau asajum; atumek juka iwajatajum, wagki wika aanú aina nuig juez amaitsujai.

¹⁶ Tusa chicham epegkeaku ijuntainmayan agaa jiijú. ¹⁷ Dutikawajam ashí aents aidauk jijnjag Sóstenes jega ijuntain apujiya nuna achikag, chicham epegtaiya nuig suwmaidau, tujash Galiogkak nunak pachikchau.

Pablo Antioquia wakitkimu

¹⁸ Pablo Corinto kuashat tsawan pujus yatsut aidaun akateg ukuak, Aquila Priscila aatus Siria nugkanum ashinkauwai, nunik Cencrea jegaa barconum egkemtsuk, Pablo buuken kesajui, Apajuin nuniktajai tiuwa

nuna umiak. ¹⁹ Nunik Pablo Éfeso jegaa, Priscilanak Aquilajai nui ukukuwui, nunik jega ijuntainum waya judío aidaujai Jesusan pachis tudaiyu. ²⁰ Nunikmatai: —Dukap tsawan jutiijai pujusam wetá, tusa segaidau, tujash nigka ayú tichauwai; ²¹ nunik ditá akateg ukuak: —Apajuí wakegakuig ataktú wakettsanuk taattajai, tusa barconum egkemag, Éfeso ukuak weuwai. ²² Cesarea anumak Jerusalén weu, iglesia aidau kumpamatatus; nunik Antioquía weuwai.

²³ Nui dukap tsawan pujus ataktú jiinkiu, makí makichik nugka aidauum Galacianum, Frigianmash ashí Jesusa nemajin aidau anentain ichichtugtatus.

Apolo Éfeso chicham etsegkamu

²⁴ Nunú tsawantin makichik judío Apolo daagtin, Alejandrianmaya Éfeso jegauwai. Nunú aentsuk Apajuí chichamenash agagbaunashkam shiig dekau aajakui iman asa shiig antumainun chichau. ²⁵ Nigka, Apu Jesús pachisa jintintuamu asa, wakekegat shiig paan antumainun Jesusan pachisash jintinkagtau, imá Juan Yamijatin jintinkagtuamun deokayatak. ²⁶ Apolo jega ijuntainum ashí antuinamunum chichatai Priscila Aquilajai antujuk, akanak niina jeen jukiag, Apajuí pachis shiig ujakajui. ²⁷ Apolo Acaya wetag tutai, yatsut aidau yaigkaju dutikainak cartan agatjaju nuiya Jesusa nemajin aidau shiig anentus jukitnume tusag. Dutikam Acaya jegaa, Apajuí wait anentsam dekaskeapi tiaju aina nuna kuashat yaigkú; ²⁸ nuniau asa ashí antuinamunum judío aidauumash, agagbauwa nuiyan Jesusak Cristuwai tusa iwaintau.

19

Pablo Éfeso pujusbau

¹ Apolo Corinto pujai, Pablok mujanmanini tsupina Éfeso jegauwai, nunikmá kuashat Jesusa nemajin aidau wainkauwai; ² nunik iniak:

—¿Atumesh dekaskeapi tiuwaitjum duish Wakaní Pegkejish jukiuk ainajum? tau.

Tama dita aiinak:

—Atsah, jutiik Wakaní Pegkeji pachisa chichamukesh antuchuitji, tudau.

³ Tiagtai:

—¿Wajiyai yamimajuitjume?

Tama dita aimainak:

—Juan yamijatujukua nujai, tudau.

⁴ Tiagtai Pablo ayaak:

—Juagkak ayatak aents aidau tudau takatan idaiyagtai yamijakui, nuniakush mina ukujui minitta nunú dekaskeapi titajum, tiuwai, nunak Jesusan tiuwai.

⁵ Nunú tabaun antukag Apu Jesusa daajin yamimakajui. ⁶ Nunikagmatai Pablo ditá buuken achikmatai, Wakaní Pegkeji ditanash egkemtujajui. Dutikawajam tichichichaman chichaidau, nuninak Apajuí tabaunash etsejuidau. ⁷ Nunú ashí aina nuiyag doce aishmag tumain aajakajui.

⁸ Pablok kampaum nantua imajin jega ijuntainmag wesag pujau, nui jegaa ishamkagtutsuk chichaman etseju, nuniak aents aidauumash Apajuí inabaujin pachis aujuidau shiig dekamtikatatus. ⁹ Tujash ujumak

antumtikmainchau aidauk dekaskeapi tuinachu. Nunidau asag ijunjamunum yamajam chichama nuna pegkegchau chichajuidau. Nuniagtai Pablok ditajaig kanakú, nunik Jesusa nemajin aidaun yajuak, Tirano escuelajin utsaa, kashí kashinig jintintu. ¹⁰ Aatus jimag mijan takasui, nuniamunum ashí aents Asia nugkanum batsamin aidaush, judío aidaujai, tikich judiochu aidaushkam Apu Jesusa chichame etsegbaun antukajui. ¹¹ Apajuishkam Pablon yayau dutikam kuashat aents dutikmainchau aidaun iwaidau; ¹² nuniau asamtai pañuelo aidaun jukiag, nuniachkush jaanchikish Pablo iyashin antigkag aents jaun etjuidau, dutikam tsagaidau, wakan pegkegchau aidaushkam jiiinaidau.

¹³ Tujash ujumak judío wakan pegkegchaun jiiin aidau, Apu Jesusa daajin adaikag jiiiktá tuidau; nuninak “Pablo Jesusa etsegta nuna daajin jiiinkitajum”, tuidau.

¹⁴ Nunak sacerdote aidaun apuji Esceva daagtin judío aentsua nuna uchijí siete aajakajua nu dutikaidau. ¹⁵ Tujash wakan pegkegchau ayaak: “Jesusk wainnuijai, nuigtush yaita Pablosk nunak dekaikai; tujash atumesh *ζα* ainagme?”

¹⁶ Tamawaik, aents wakan pegkegchau egkemtuamua dushakam tupikatki achikag ashí depetkau, dutika senchi suwimainam jegan ukuinak wisú upu upujukim tupikakajui.

¹⁷ Judío aidau, judiochu aidaushkam ashí Éfeso batsatuk antukaju, nunikag ashí ishankaju, nuninak Apu Jesusa daajin pachisag emematu- idau. ¹⁸ Nunisag kuashat Jesusan dekaskeapi tiu aidaush kaunawag, ashí antuinamunum dita pegkegchau takataiji aidaun etsegtumaidau.

¹⁹ Nunisag kuashat aents magia takajakú aidaushkam, papiijin ikaunmak, ashí wainainamunum apekaju; nuna akikeg cincuenta mil kuichik tumain aajakui. ²⁰ Aatus Apu Jesusa chichameg niina senchijijai, ashí tikich nugkanmash pampag wegau.

²¹ Nunú nunik nagkaemakui ai, Pablo macedonianmaya aidaun, nuigtú Acayanmayanash ijagsatjai, nunikan Jerusalén wetajai, tiuwai. Nuigtushkam:

—Jerusalén pujusan Roma wemainaitjai, tiuwai. ²² Nuniak jimag niina yain aina nuna Timoteon, Erastojai Macedonia awemauwai, nunik nigka machik tsawan Asia pujustatus juwakui.

Efesonom pampandaijamu

²³ Nunú tsawantai Yamajam chicham pachisa kuashat pampandayamu asauwai. ²⁴ Wagki Demetrio daagtin, jiju plata tutain takau asa, jega Diana ememattain dakumak najanu, dutikak niijai takaina nujai kuashat kuichkin juidau; ²⁵ nunin asag niijai takau aidaujai, nuigtú tikich ditajai betekmantuk takau aidaunash ipaa ijunjag chichainak: “Kumpag aidaush, dekaime jujú takainaku kuashat kuichik juu ainag duka; ²⁶ tujash atumesh wainjume, nuigtush antagme jujú Pablo, apajuimtai aidau aents najanamu aina duka apajuichu ainawai tusa, kuashat aents aidaun dekas nuninapi tumamtikui, nunak imá Efesowa juig tatsui, ashí Asia nugkanmash tu wekaewai. ²⁷ Juna jutika juka shiig ishainai, wagki jutii sujuinag juka megkaemainai, nuigtú jega iina apajuiji Diana* dekas imana nu

* 19:27 “Diana” tawa duka griego aidau apajuijintajai aajakui. Tikich versiognumak “Artemisa” tawai Diana tawa nunak tayatak.

ememattaiya jushakam pachikchamu atatu, nunitai Asia nugka juiya, ashí tikich nugkanmaya aidaush emematin agma nunak dakitug idaisagtatu”.

²⁸ Tiagtai antukag, senchi kajekag untsumainak: “¡Diana efesomayanua duke dekas imanuk!” wajaidau.

²⁹ Imatuidau asag ashí yaaktanmag shiig dekaashmin wajasag pachimdaekaju, nunikag Macedonianmaya jimag aents Pablon uyunaidaun, Gayo, Aristarcojai, achiká japikí jukiag teatro† ejegawaju. ³⁰ Dutikawagmatai Pabloskam nui wayatatus wakegau, aents aidaun ausatatus, tujash Jesusa nemajin aidauk idaisachajui. ³¹ Asianmaya apu aina nuiya ujumak Pablo kumpají aidau, nigka teatronmag wayawaigka, tusag chichaman akupjukajui. ³² Nunú ijunjaja duka pachimdaekaju, nuninak makí makichik wajiin pachisag senchi untsumaidau, nunidau asagmatai kuashat aents aidauk dekainachu, wajina pachisag ijunjaje nunak. ³³ Imadiagtai dita aina nuiya ujumak Alejandro ujakaju wagka aninawa nuna pachis, dutikawag judío aidau shitaki jikiaju ni chichaktí tusag, dutikam Alejandroshkam uwejin takuinu bitat asatnume tusa, judío aidaun ayamjak ashí antuinamunum chichaktatus. ³⁴ Tujash judío asamtai wainkag, ashí untsumkag: “¡Diana efesomayanua juke dekas imanuk!” wajai wajainakua jimag hora amainun ejesattak weedau.

³⁵ Nudiagtai yaakta secretarioji imatuidaun itatmitkak chichaak: “Efesomaya muun aidauwah, ashí nugkanmaya dekainawai yaakat Efesowa ju, apajuí Diana dekas imana nu ememattaiya nuna jeenak kuitamkati, ashí niina niimejai betek nayaimpinmaya iyajua nunashkam tibauwa nunak. ³⁶ Dui junak wainkayai tumainchau asagmatai bitat asatajum, waugtujukemek pegkegchawk dutikawaigpajum; ³⁷ wagki jujú aents atum jui itaujum juka, atumi apajuijum ememattai jega nunakesh pegkegchawk ematsui, apajuijminakesh pegkegchawk chichagtsui. ³⁸ Demetrio, niijai takau aina nujai, tikich aidaujai tudaimain ataik, juez aidau batsata nui wegag, makí makichik ditanua nunak tudaimain ainawai. ³⁹ Untsu atum tikich tumain ajutjamainakuig, nunú pachisjumek dekas ijunjamunum tumain ainagme. ⁴⁰ Yamai nagkaemaki juka puyatjumainnum awai, apu aidau dekawajag chichaman tsuwapau aidau tujabiagtatu, nuninak pampandaijamua nuna pachis inimpainakui juní asae tumainush atsawai”. ⁴¹ Nuna tusa aents aidaunak ishiakui.

20

Pablo Macedonia Grecia webau

¹ Nunú pampandayamu nagkankamtai, Pablo Jesusa nemajin aidaun untsumkaju, dutika anentain ichichtug ditan pagkuk, pujumatajum atak wainiami tusa ukuak Macedonia weuwai. ² Nui wekaegas ashí Jesusa nemajuidaun ijajus anentain ichichtug ukuak Grecia jegaa; ³ nui kumpatum nantu pujusui. “Siria barcanum wetajai tusa uminas pujukmá”, dekauwai judío aidau chicham umigkagbaun, nunik ataktú kukag Macedoniaya atú nagkaemaktajai, tiuwai. ⁴ Tusa wetai uyuntsajui Sópater Pirro uchijiya nu bereanmaya, Aristarco nuigtú Segundo Tesalonicanmaya; Gayo derbenmaya, nuigtú Timoteo, nuigtú Tíquico, Trófimo Asia nugkanmaya aidau. ⁵ Ju yatsut aina juka eemkagmayi, nunikag Troas dakagmasagmayi.

† 19:29 “Teatro” tawa duka jega muunnum, aents aidau tuwakmatai, iwainaku jiiitaiya nuna tawai.

⁶ Tujash jutiik pag lewaduragtuchu yuwaku fiestamtaiya nu inagkeaki; filiposnumiati barcanum juaki, cinco tsawan Troas jegaa, nui makichik tumig inagkeakiabiaji.

Pablo Troas ijagsamu

⁷ Tumig tsawagmatai ijunjabiaji Jesús jakamu anentaimtusa pag yuwatasa, nuniamunum Pablo kashinia dui jiinkitin asa, Jesusa nemajin aidaun jintí jintintai aehaet wajasabi. ⁸ Jutiik jega yakí tesamunum kuashat lámpara ekemagbaunum ijunja batsamiaji; ⁹ nuniamunum makichik datsauch Eutico daagtin, ventanum eketu, Pablo chichá chichakua ematai káji achikam inítjau kanag tercer pisonmaya iyawabi; nunikmatai jakaun wainkajabi. ¹⁰ Nunikun Pablo akaetuki, uchin patamti pagkuk inankiabi. Dutika chichaak:

—Puyatkaigpajum iwaakui, tiabi.

¹¹ Dutika ataktú waka, Jesús mantamnamun anentaimtusag pagkan puug yuwa chichá chichakua tsawampaju, nunik weuwai. ¹² Nunitai uchin iwakun jukiag shiig ichichmamjag juwakajui.

Troasnumia juaki Mileto webau

¹³ Jutiik emka barcanum juaki Aso wegabiaji Pablo jukitasa, nigka kukag wetasan wakegajai, tiu asantai. ¹⁴ Nui Aso niijai igkunika niish egkemjamtai Mitilene jegawabiaji; ¹⁵ nuyati jiinki kashinia dui Quío jegawabiaji, nui juwaki kashinia dui Samos anumtainum anumkabiaji. Nunika Trogilio kanaja kashinia dui Mileto jegawabiaji. ¹⁶ Nunak Pablok, Éfeso tutupit nagkaemaktatus Asia nugkanum dukap tsawan pujutan dakitau asa nuniki, wamak Jerusalén jegaa niishkam fiesta Pentecostés pachinkata tau asa.

Pablo Efesonmaya anciano aidaujai akatdajamu

¹⁷ Pablo Mileto pujus, anciano aidau efesonmaya iglesian diin aina nuna unsukabi. ¹⁸ Tima kaunkamtai chichajak: “Atumek dekagme wi yama nagkamchakun, jui Asia nugkanum taawabiag dui nagkamsan, ashí tsawantin atumjai wajuk pujusmaiija duka. ¹⁹ Ashí tsawantai atumjai pujusuitjai Apu Jesusan takagkun, emematsuk kuashat negayai; nuigtú Judío aidaushkam kuashat utugchatan itagtuinak waitkajianume. ²⁰ Tujash, wika atumnak pegkegnum yaimpamaina nunak ujatskek idaisachmajime, nuniakan ashí antuinamunmash, nuigtú atumi jeeminish jintinbaijime. ²¹ Judío aidaun, judiochu aidaunash tudau takatak idaikujum, Apajui nemagkujum, Apu Jesuschakam dekaskeapi titajum tusan, ujayajime. ²² Yamaik Wakaní Pegkeji awetau asantai Jerusalén wegajai, awish wajig nagkaetukit nunash dekatsuk. ²³ Untsu Wakaní Pegkeji ashí wi yaaktanum wegag nuig achigmakagtatui nuigtush waittsattame, tusa ujatbaunak dekaui. ²⁴ Tujash wika nunak puyatjuchujai, mina pujutjunash uyumas-nukesh diichujai, wika mina takatjua nuna shiig aneasan ashimkatasan wakegajai, Apu Jesús yamajam chicham Apajui anentag uwemtikagta nu pachisam etsegkata tujutbauwa nuna.

²⁵ “Yamaik dekas nuniktata nunak dekajai, wi atumiin wekaesan Apajui inamtaijin pachisan ujayajim nuyiatigmekesh minak awenagmek waitkashtin ainagme. ²⁶ Nuadui yamai titajim tusan wakegajai, wi ashí atum ainajum nui bakumamainuk makichkish atsugtawai; ²⁷ wagki atumnak Apajui wakegamujiya nunak uugtsuk ashí imatiksanan ukakuitjim nuadui.

²⁸ Nuadui atumek kuitamamkujum ashí Apajuí iglesiajiya dusha kuitamkatajum. Adeagtajum atumnak Wakaní Pegkejiya nu pastor etamkajui, Apajuí iglesiaji niina Uchiji numpeen sumakua nuna kuitamkatnume tusa. ²⁹ Wagki dekajai, wi wemataig tikich aidau kuntin kajen aina iman tajutjamawag, iglesian emegkaktatus wakeyagtata nunak. ³⁰ Atum ainajum anuiyag ujumak waitan jintinkagtaush agtatui, Jesusa nemajuidaush dekaskeapi tuinak nemagtuktinme tusag. ³¹ Nuadui aneaku pujustajum; adeagtajum kumpatum mijadai kashi tsawajai, makí makichik atum aidautigminak idaitsuk nuní pujustajum tusan negá negajai chichagmajim nunú.

³² “Yatsug aidauh, yamaik Apajuiyai idaijime, ni anejatbaunum chichaman sujamsauwa nujai juwaktajum, nu chichamak senchigtinai, iman asa yaimpaktatjume wakannum tsakatnumash, nuigtush ashí ni aentsji pegkemtikbau aidau anagkuauwa nunash amastatjume. ³³ Wika tikichdau kuichik, oro, jaanch aidauakesh wakeejuk wekaechabiajai. ³⁴ Atumek shiig dekagme wi atsumamunash, nuigtú wijai yujaidau atsubiagtaish jujú uweg aina ju yainkagmayi. ³⁵ Ashí jintinbaijime aaja takaaku atsumaidaush yaimainaitjume, nuigtush adeagtajum Apu Jesús chichaak: ‘Ni juwak shiig anea nuní nagkaemas shiig aneawai tikichin suwa duka’, tiúwa dushakam”.

³⁶ Juna tusa idaiyak Pablo ashí tikich aidaujai tikishmajag, ditajai Apajuin ausajui. ³⁷ Nunikag ashí buutuina, Pablon pagkukag kugkuyanume. ³⁸ Senchi wake besemag dekapenamuk, ataktú awenagmek waitkashtin ainagme tawa nu aayi, nunikag uyuntsag barcanum ejegawajabi.

21

Pablo Jerusalén webau

¹ Nuiyati yatsug aidau ukuinaku barconum chimpimjá, tutupit Cos wegabiaji, nunika kashinia dui Rodas jegaa, nagkaemasaik Pátara jegawabiaji; ² nunikmá barco Fenicia wegau wainká, nui egkemjá weamiaji. ³ Nunika wesá Chipre ajuntaiji wainka duka menanmanini ukuaku Siria weamiaji, nunika Tiro anumkabiaji barconmayan wajiin jiiigta tuinakui. ⁴ Nui Jesusa nemajin aidau wainkaja makichik tumig ditajai batsamsabiaji; nuniemunum Wakan dekantikamu asag dita, Pablon Jerusalegkak we-maitsume, tiajabi. ⁵ Tujash makichik tumig pujusú asaja jiiinjá wenajin, Jesusa nemajin aidau nuwejai nuigtú uchiji aidaujai yaaktan ukukiag uyuntamas miniyanume, nunikagmatai nui kaamatkanum tikishmakaja Apajuí ausabiaji. ⁶ Nunikaja akatdaiyina pagku pagkuní nagkanka barconum egkemjin ditashkam jeen waketjajabi.

⁷ Jutiik Tironmayati juwakiaja Tolemaida jegawabiaji, nunika yatsut aidau kumpamawaja nui makichik tsawan ditajai pujusabiaji. ⁸ Kashinia dui jiiinkiaja Cesarea jegawabiaji, nunika apóstol aidauin yaigtin siete aajakua nuiya Felipe wekaegas chichagkagtina nuna jeen kanajabiaji; ⁹ nuna nawanji cuatro agkanjam profetisa aidau batsabianume.

¹⁰ Nuanuig kuashat tsawan pujajin Judeanmaya profeta Agabo daagtin taawabi, ¹¹ nunik waipaktatus taa Pablo akachumtaijin jukiabi, nunik uwejin nawenishkam jigkamag, chichaak:

—Aatus Wakaní Pegkeji tawai: Jutika aents juna akachumna nuna jigkajagtatui Jerusalén judío aidau, dutikawag judiochu aidauunum sujukagtatui, tiabi.

¹² Takui nu antukaja jutii, Cesareanmaya aidaujai: Pablo, Jerusalegkak weepa, tiabiaji. ¹³ Tama Pablo aigmak:

—¿Wagka buutkugmesh anentaijuish wake besenjash egketjagme? Wika ayatak jigkagbau atasanuk umintsan wekaetsujai, Apu Jesús takagbaunum chichame etsegbaunum Jerusalén jakatasan wekaejai.

¹⁴ Depetmainchau weakui:

—Apu Jesús wakegamu atí, tusa idaisabiaji.

¹⁵ Nu tusa idaisá pujusá, umintsá Jerusalén ashinkabiaji. ¹⁶ Nuniajin cesareanmaya ujumak Jesusa nemajin aidau uyuntamsag, chiprenmaya Mnasón daagtinu jeen ejetamawagmayi, nigka duik nagkamas Jesusa nemajin pujau asantai, niina jeen kanagtin asajin.

Pablo Jerusalén jegaamu

¹⁷ Jerusalén jegaa ajin yatsut aidau shiig anenjamsag jujamkiagmayi.

¹⁸ Kashinia duwi Pablojai ijunja weamiaji Santiago wainkatasa, nunikmá ashí anciano aidau ijunag batsatbaunum jegawabiaji. ¹⁹ Nunika ajin Pablo ditan kumpamá, makí makichik judiochu aidaunum ni takatai Apajuí wajuk yaigke nuna pachis ujayi. ²⁰ Nuna antukag Apajuin emematiagmayi, nunikag Pablon chichajuinak:

—Dekaske yatsujuh, amesh wainme shiig kuashtai judío aidau Jesusan dekaskeapi tuina duka; nunú aina duka ashí Moisés chicham umiktajum tibauwa dusha idaitsuk umimainai tuinawai.

²¹ Tujash amina pachipas ujapakagmaji, ashí judío aidau, judiochu aidaunum batsata nuna jintintak; Moisés chicham umiktajum timawa duka idaisatajum, uchi aishmag akiinkuish pakagmaitisui, iina muunji takajakua dushakam idaisatajum, tawai tusa. ²² ¿Wagka junash tujamainawa? Aents aidauk dekawagtatui ame jui taum nunak. ²³ Nunin asantai ju dutikmainaitme: Jutii ainag jui, cuatro aents aidau Apajuí eemtin dutikatjai tibaujin yamai umiktatus batsatainawai. ²⁴ Nunú yajuakam wetá nunikam ditajai pegkeeta, nunikam ditash akikmatkata buuken kesagtinme; dutikawamin amina pachipas tujabiaja dusha ashí dekawag wainkampap tuinawa, niish dekas Moisés chicham umiktá tibauwa nunash imatiksagkeap umiawa, tujabiagtatui. ²⁵ “Judiochu aidau Jesusan dekaskeapi tusag nemajuina dushakam, ashí apajimtai aidau anagkuamu aina duka yuwawaigpajum, tsanijintash tsanijinawaigpajum, kuntin ayatak pempeaja maamu aina nuna nejeesh, numpeshkam yuwawaigpajum tusa agatjabiaji”, tiaju.

Pablo achikbau

²⁶ Tima Pabloskam cuatro aentsun yajuak wee, kashinia dui ditajai pegkeniag, jega Apajuí ememattainum wayau, wajutí pegkeamush tsawantash abuekattawa, wajutiya makí makichik ditanu ofrendanash itawagtatua nuna etsegkatatus.

²⁷ Nunik siete tsawantan ejetatak wajai, ujumak judío Asia nugkanmaya aidau Pablo jega Apajuí ememattainum pujamunum taawaju, nunikag ashí aentsun ujakag pampanjag Pablon achikag, ²⁸ untsunkag: “¡Israel aidauwah, yaijatkatajum! Ju aentsua juuwai ashí nugkanum wekaegas jintinkagtak, jutii aidautinash pegkegchau chichagtama wekaega nu, nuniak Moisés chicham umiktinun amasua nunash umikaigpajum taku, nuigtú jega Apajuí ememattaiya nunash pegkegchau chichajui, nuniau

asa yamaish jega Apajuí ememattai pegkegma nui griego aidaun utsaa pegkegchau awasae²⁹, wajaidau.

²⁹ Nunak, yaunchuk Trófimo yaakat efesonmayaya nujai Pablo wekae-num wainkajui, nuniku asag jega Apajuí ememattainmash awayachiwash tuidau asag tiajui.

³⁰ Nunitai ashí nu yaaktanmaya aidauk pampaidau, nuninak pisag kaunawag Pablonak achikag jega Apajuí ememattainum wajaun japiki agaa jiyamuik, wamkesag waitinak epetiagmayi. ³¹ Ayatak maata tiagtai, wamkes romanmaya suntaja comandantejin, ashí aents Jerusalegnumia aidauk senchi maaninawai, tusa ujakajui. ³² Dutikam comandanteshkam ujumak capitán aidaun, nuigtú suntag aidaunash yajuak pisajag aents tuwaká abaunum kaunawagmayi. Nunikmatai comandante suntagjai wainkag Pablo suwibaunak idaisagmayi. ³³ Nunikmatai comandante jegantun, Pablon achiká juki jimag cadenayai jigkagtajum tiabi, dutika amesh yaitpa, waji aikaume tusa iniibi. ³⁴ Tujash ujumak aents, tikichi pachisag unsumainai, tikich aidaushkam dutiksag tikichin tuidau, imati pampaidau asamtai shiig dekamainchau dekapeau asa comandante, suntaja batsamtain jukitajum, tiuwai. ³⁵ Tiajam Pablon juki, suntag aidau ditá batsamtain awayatasag, papajá iwakbaunum jegantag yanakiag jukiajui, aents aidau Pablon achiktatus imatikaidau asagmatai. ³⁶ Ashí aents aidauk saegas wesag unsumak: “¡Maatajum!” awajiangmayi.

Pablo ayamjumaku aents tuwakbaunum chichakbau

³⁷ Suntaja batsamtain awayattaku emam, Pablo comandante iniak: —¿Wisha machik augmaitsujamek? timayi.

Tama comandante ayaak:

—¿Amesh griegosh dekaemek? ³⁸ ¿Amechukaitam egiptonmaya aents yamaipat romanmaya apun shiwagmá, chichaman tsuwapá cuatro mil maanin aidaun yajuak uwegshunum jiihua nu? tau.

³⁹ Tama Pablo ayaak:

—Wika judiowaitjai, mina pujutaijuk yaakat muun Tarso, Cilicia nugkanum awa nuyayaitjai. Wait aneam ayú tujutta, aents aina juna machik ausatasan wakegajai, timayi.

⁴⁰ Tutai comandante ayú tima papajá iwakbaunum Pablo wajas uwejin takuiniabi aents tuwak abaunum, dutikam pampamun itatjamtai hebreo chichamai ditan aujak:

22

¹ “Muuntug aidauwah, yatsug aidauh wi ayamjumamainun chichakui antugtuktajum”.

² Tusa Pablo hebreo* chichamai aujuinam antukag nuní nagkaemas bitat asagmayi. Nunikagmatai Pablo chichaak:

³ “Wika judiowaitjai, yaakat Tarso Cilicia nugkanum awa nui akiin-auwaitjai, nunikuikun jui Jerusalén tsakajuitjai, Gamaliel jintinjuauwai iina muunji aajakajua nu chicham umijakbauwa nunak imatiksag. Dutikamu asan, Apajuinash akasmatnaitjai atum yamai wajukeyum nunis-nuk. ⁴ Nuniau asan wika duikik, yamajam chichama juna umiktatus wakegaidaunak egakan maatasanush, aishmag aidaunak nuwá nuwajai

* **22:2** Tikich papinumag arameo tuinawai. Hebreo chichamak arameojag betekmamtin aajakui. Jutii chichame wampisdauij betekmamtina anmamtin.

achijan cárcel chimpiyajai. ⁵ Sumo sacerdoteshkam, ashí apu aidaush nunak shiig dekagtuinawai. Dita papí agag sujusajui, Damasco iina yachi judío aidau batsatbaunum jegá nuna inakmas, Jesusa nemajin aidaun egak achijá, jui Jerusalén ikaunmantai, suwimak susami tusag.

Pablo ni yapajinamu etsegtumamu
(Tak. 9.1-19; 26.12-18)

⁶ “Tujash Damasco jegattakun jintá wegai, etsa tajiastatak wajasú ai, nayaimpinmaya tsaaptin egketkamtai, ⁷ nugká iyagbajjai. Nunikman makichik chichaman antukbajjai: ‘Saulo, Saulo ¿wagka minash waitkajame?’ ⁸ tujutkui wi iniakun: ‘¿Apu amesh yaitpa?’ tibajjai. Tai ni aijak: ‘Wika Jesús nazaretnumiayaitjai, ame ya ainme nuuwaitjai’.
⁹ Wijai yujaushkam tsaaptinun wainkag ishamkagmayi, tujash mina aujta nunak chichamnak antukchagmayi. ¹⁰ Nuna tujutkui: ‘Apuh, ¿wajukati tusamea wakejutame?’ tusan iniasbajjai. Nuna tai Apu Jesús chichagtak: ‘Nantaktá nunikam wegam antsamek Damasco jegata, awi jegawamin ame dutikmainnak ujakagatui’, tujutmayi. ¹¹ Tsaaptina nu wainmachu etimtai, wijai yujaidau egkegsag Damasco ejetiajabi.

¹² “Nuanui makichik aents Ananías daagtin, Apajuí puyatjus umijin, Moisés chicham umiktajum tibauwa nunash umin asamtai, ashí judío Damasco batsamin aidauk niina pachisag pegkeg chichagtai pujubi. ¹³ Nunú tajutua chichagtak: ‘Yatsug Sauloh, yamaik ataktú wainmakta, tujutmayi’, nuna tujutmawaik niimkaman niina wainkabajjai. ¹⁴ Nunika ai chichagtak: ‘Iina muunji aajakajua nuna Apajuji, duik nagkamas wi wakegamunash dekaatin atí tusa etegtamjau asa, yamai Jesús dekas Pegkeja nunash wainak, ni chichamujinash antugkati tusa aikagmaume; ¹⁵ dutijabau asamtai ashí aents aidaunmash, ame wainkamu, nuigtú antukbaugmish etsejin atatme tujutmayi. ¹⁶ Yamaish, ¿wají dakame? Wajaktá nunikam Apu Jesusa daajin yamimagta, dutikam tudaugminish tsagkugnagta’, tujutmayi.

Pablo judiochu aidaunum awemamu

¹⁷ “Nunikan Jerusalén wakitki jegaan, jega Apajuí ememattainum Apajuin aujken pujusan paan wainkabajjai; ¹⁸ nunika ai Apu Jesús chichagtak: ‘Jerusalén pujutsuk waamak jüinkita, juiyag ame mina pachittsam etsegtaiush antugtamakchagtatui’, tujutmayi. ¹⁹ Tujutkui wi ayaakun: ‘Apu minak ditak, wi jega ijuntainum wekaetusan nuiya aents amina dekaskeapi tujamaidaun achiká cárcel chimpian suwimin aayag nunak; ²⁰ nuigtush Esteban, amina inakem amina pachipas etsegna nuna maatnume tusan chichaman ijutkan, nuna maidaun jaanchjin wiki kuitamjuyag nunash dekagtuinawai’. ²¹ Tai Apu Jesús chichagtak: ‘Tutsuk wetá, wi aminak atushat tikich nugkanum aents judiochu aidau batsatbaunum awemattajame’, tujutmayi”, tiabi.

Pablo comandante uwejin juwakkau

²² Pablo tabaun ashí antugkak, senchi pampajag: “Juka aentsuk puju-maitsui mantamnatí”, waintak dakitaji wajainak, ²³ unsumaidau nuninak jaanchjinak japikí tujit ichigkak wajantag, nugka yukuukuntun atsaaki jukiag yakí nagkimawag wajagtai; ²⁴ comandante atum batsatbaunum Pablo awayajum asutiatajum, dutikam wajuk asamtaig aents aidaush

imatjuinawa nuna etsekgati, tusa inamjabi. ²⁵ Dutikawajam Pablonak jigkagbautak asutiata tama, nui capitán wajau asamtai chichajak:

—¿Atumesh romanmaya aentsush bakumamainji dekagtsuk asutiatajum tibaukaitjum? timayi.

²⁶ Nunú tama capitán antuk, comandanten jegantun chichajak:

—¿Aush aentsush utugkattame? romanmaya aentsui, tiyabi.

²⁷ Tima comandante Pablon jegantun iniak:

—¿Dekas ame romanmaya aentskaitam? tau.

Tama Pablo ayaak:

—Ehé, romanmayayaitjai, tuuyi.

²⁸ Tutai comandante chichaak:

—Wi romanmaya aents wetasanuk kuashat kuichkin akimkuitjai, timayi.

Tutai Pablo ayaak:

—Tujash wika Roma akinau asan romanmaya aentsuitjai, tuuyi.

²⁹ Nuna timatai Pablon asutiatus ijunjaushkam ukukiagmayi. Comandanteshkam romanmaya aentsun dekajua ni jigkagtajum tusa inamjau asa senchi sapigmakmayi.

Pablo judío apuji aidau ijunjamunum awayamu

³⁰ Kashinia dui comandante, Pablonash wajinmag judío aidaush imatjuinawa tusa shiig dekajuata tau asa, cadena aidaunak atitjau, dutika sacerdote apuji aidaun, nuigtú tikich apu aidaujui ijunjatnute tusa, ashí ijunjamtai Pablon juki ejega ejapen awaantagmayi.

23

¹ Dutikam Pablo apu ijunjau aidaun shiig esetug diis chichaak:

—Yatsug aidauh, wika Apajuí emtinish pegkeg anentaiyai pujusuitjai yamaiya juishkam nunisnuk pujajai.

² Tutai sumo sacerdote Ananías, aents Pablon adijis ijuna nuna: —Aanú tawa nu weni awatita tusa inajabi. ³ Tutai Pablo ayaak:

—¿Aentsun tsanuwah, amina dekas Apajuí awatamtatui! Chicham umiktin tawa dutiksamak dekagtuatasam eketiatkumesh, ¿wagka chicham umiktina nu umitskesh awattá tujutme?

⁴ Tutai nui pekajuidau Pablon chichajuinak:

—¿Aajamesh Apajuí sumo sacerdotejish pegkegchaush chichagkamum? tiajabi.

⁵ Tama Pablo ayaak:

—Yatsug aidauh, wika Sumo Sacerdotenak dekachu asan tajai. Apajuí chichame agagbauwa nuishkam: “Atumin apujum aidauk pegkegchau chichajigpajum”,* tawai.

⁶ Nuna tii Pablo saduceo aidau, nuigtú fariseo aidaushkam pachitjaun wainak senchi jiiká chichaak:

—Yatsug aidauh, wika fariseowaitjai, fariseo uchijiyaitjai, nunin asan jakaish nantaktinaitji tau asamtai, nuna dekagtuatatus imatjuinawai, tuuyi.

⁷ Pablo nuna timatai fariseo aidau, saduceo aidaujui ditak pempeentunikiag tuná tunaiyinakua, kanakajabi. ⁸ Wagki Saduceo aidauk, nantamuk atsutnai, ángel aidaush atsuinawai, wakan aidaush atsuinawai tuinai, fariseo aidauk ashí nunak awai tinu asag nunikagmayi. ⁹ Nunikag senchi

* 23:5 Ex. 22.28.

untsumiagtai, wajumchik maestro chicham umiktinun jintikagtin fariseo weantu aidau, wajakiag chichainak:

—Ju aentsuk makichik pegkegchaunakesh takaschae, makichik wakankesh nuniachkush angelkesh ausau amainai, tuidau.

¹⁰ Ayatak nuní senchi shiniagtai, comandanteshkam ishabi Pablon maawainum tusa, nuniak suntag aidau chichaman awetiabi, kaunawag nuiyanak jiktinme, dutikawag dita batsatbaunum ejegawagti tusa.

¹¹ Dutikam kanittaman, kashi Apu Jesús Pablon wantintuk: “Pabloh, anentaim ichichiagta, Jerusalegka jui mina pachittsam etsegkaum antsamek, romashkam etsegkata”, tiuwai.

Pablo maatasa chicham umigamu

¹² Kashinia dui, ujumak judío aidau chichaman umikaju Pablo maami tusag, nunú umikchaik iik suimkak jukimi tiaju, nuninak yutash yutsuk, umutash umutsuk batsamsá, Pablo maami tuidau. ¹³ Nuna tumabiaju aidauk cuarentan nagkaesau aajakajui. ¹⁴ Nunú aidau sacerdote apuji aidau, nuigtú tikich apu aidau jegajiag chichajuinak:

—Jutii aidauti, Pablo maachkuik iik suwimkak jukimi tiagji, nuniau asaja yutash yutsuk batsamsá maami taji tuidau. ¹⁵ Yamaik atum aidautijum, apu chichaman epegkin aina nujai comandante segatajum kashin jutii batsatbaunum itata tusajum, shiig kuitamka chicham dekajuami tusa utugmaina dutikajum, jutiiik umintsá batsamtatji atumiin eke taachuk maatasa, tuidau.

¹⁶ Nu tuinamun Pablo umayin akiinaw uchi antuk, suntaja batsamtaijin wayau nunik Pablon ujakabi. ¹⁷ Dutikam Pablo capitán aina nuiyan makichik untsuk:

—Ju uchi jukim comandante pujamunum ejegata, dutikam ni ujamain awa nuna ujaktí, tiabi.

¹⁸ Tima capitán juki, comandante pujamunum ejegau, dutika:

—Pablo achikam puja nunú untsujuk, jujú uchi jukim comandante ejetuata, ni ujamain awa nuna ujaktí tujutmae, tau.

¹⁹ Tama comandante uchin uwegnum egkes juki niinak akanak:

—¿Wají tujutta tame? tusa iniau.

²⁰ Tama ni ayaak:

—Judío aidau chichaman umikagmae, nuninak amina pachipasag segatajum Sanedrín kashin Pablo itaata tusajum, shiig kuitamka chicham dekajuami tusa utugmaina dutikajum tujabiagmae; ²¹ tujash dekaskeap tuinawa tiipa, wagki cuarentan nagkaesau aents uumkag dakainawai, nu aidauk maachkuik iik suwimkak jukimi tuidau asag yutash yutsuk, umutash umutsuk batsamsá maami tiagmae; nunidau asag yamaik uminas aminak dakagmainawai aigmakti tusa, tau.

²² Tima comandante uchin awemak:

—Makichik aentskesh ujakaipa mina ujatkaum duka, tiuwai.

Pablo apu Félix pujamunum awemamu

²³ Nunú ujaká ukukim jimag capitandin untsuká:

—Doscientos suntag dawé weagtin aidau, setenta caballonum wegagtin, nuigtú doscientos nagki tinamkam umiktá, yamai kashia juik a las nueve Cesarea wetinme, ²⁴ nuigtushkam makichik caballo shiig umikjum Pablo nui ekenjum iwaaku shiig kuitamkajum gobernador Félix pujamunum ejegatajum, tusa awemak; ²⁵ juna cartan agatug awetiuwai:

²⁶ “Witjai Claudio Lisias, gobernador Félix chichame antugtaiyah, eme anentsan kumpamjame.

²⁷ Judío aidau, ju aentsua juna achikag maata tuidaun dekaan, wi mina suntajujai shimutkan ayamjukjai, romanmaya aentsui tabaun antukan. ²⁸ Wajinmag imatjuinawa tusan dekajuatasan wakegau asan Sanedrín ejegamjai. ²⁹ Nunikman dita chicham umitaiji aina nuna pachisag tuidaun antugkamjai; tujash ni cárcel wemaina nunak, maam amainnakesh dekajuachmajai. ³⁰ Tujash judío aidau maawagtatus chichaman umigkagbaun ujakgagmatai, anui aminí awemajai; dutikakun chichaman tsanumjuina nunash segamjai ame antaminish niina pachisag, wagkag kajejuinawa nunash titinme tusan, dui wainiami”.

³¹ Suntag aidaushkam dutikatajum tibaunak imatiksajag Pablon cabal-lonum eneki jukiag, kashi wee weenakua Antípatris jegawaju. ³² Kashinia dui suntag dawé ashina duka, Pablonak caballonum ematnume tusag ditá batsamtain waketjaju. ³³ Nunik Cesarea jegawag cartan gober-nadoran suwinak, Pablonash ejegawaju. ³⁴ Nuna cartan gobernador aujus, tu nugkanmayayaitpa tusa inias; cilicianmayayaitjai tutai dekajua, ³⁵ chichajak:

—Amina tsanumjupaina nu kaunak chichainakui, dekajuatjame timayi. Tusa achijatin aidaun inagmayi Herodes yaunchuk juga jagamkamu aajakua nui ejega shiig kuitamkatnume tusa.

24

Pablo gobernador Félix antamunum chichakbau

¹ Cinco tsawan nagkaemakui ai sumo sacerdote Ananías, nuigtú ujumak judío apuji aidaujai, makichik abogado Tértulo daagtinun ayasá Cesarea kaunawajui, gobernadoran emtin Pablon bakumamainun tiagta tusa.

² Nunik Pablon itaawagmatai Tértulo wajakí Félix antai tsanumjak:

—See tajame gobernador, ame inamu asamin agkan batsatainaji, nuigtushkam amina yachagminig kuashat waji iina nugkeenish iwagnaka dui. ³ Ashí nu dutikam duka ashí yantamnum ashí tsawantin juwinag dui apu Felisah see tuinaji. ⁴ Tujash kuashat tsawantan atankijam tau asan, wait aneasan jutii chichamush machik antugkagtukta tusan segajame. ⁵ Ju aentsua juka makichik jatai, nunin asa niyai chichaman tsuwapak datumkagtú wekaega duka, ashí judío aidaunum wekaesash Nazaretnumia sectan* chichamjú wekayin. ⁶ Nuigtushkam juga Apajui ememattaiya nunashkam tsuwapaktatus nagkamamtai achikmajai, jutii chicham umitaijin tawa dutiksaik dekajuami tusa. ⁷ Nuniajin coman-dante Lisias suntajin utsanjama, senchi kakantus jujutjamkibi, ⁸ dutikak chichaman tsanumjuina nuna aminí wetajum timayi. Nunin asantai imá achekme jutii tuinag nu ashí iniasam dekagmainaitam duka.

⁹ Nuna tutai judío aidau nui ijunushkam:

—Ni tawa duka dekaské, tuidau.

¹⁰ Tiagmatai gobernador iwijau Pablon chichaktí tusa, dutikam Pablo chichaak:

—Dekajai, kuashat mijanai ame ju nugka juig juez wajasam pu-jam nunak, nunin asamin shiig aneasan wi ayamjumamainun tajai. ¹¹ Ameketme ju shiig chicham dekamainaitam duka, wi Jerusalén Apajuin ememattasan wakabiag duka doce tsawan wegawai; ¹² nuig makichik

*

^{24:5} “Sectan” tawa nu diistá; Tak. 15:5.

aentsjaigkish, jega Apajuí ememattainmagkesh, ijuntainmagkesh, tikich yaaktanmagkesh dapamkagtujan jiyaniaku wekagaigkesh waitkachagmae. ¹³ Jujú aents aidau chichaman tsanumjutuinak kaunawaja juka, dekas wi nunikbaugnak aminak nuna nunikme tusagkesh ujamain ainatsui. ¹⁴ Uentsu junak etsegjai: Wika mina muuntug aajakajua nuna Apajuijin emematjai, Yamajam Jinta juna, dita secta[†] tuina nuna, wagki wika chicham umiktina nunash, profeta aidau agajajua nunashkam dekaskeapi tau asan. ¹⁵ Wishakam dita aidau, Apajuik aents pegkeg aidau, pegkegchau takau aidaunash inanjatnai tuina nunak dakajai. ¹⁶ Nuniau asan Apajuí eemtinish, nuigtú aents aidaunmash mina anentaimtajuish pegkeg, wantinkatasan kakanmamjai.

¹⁷ “Ujumak mijan tikich nugkanum wekagun, mina nugkajui aents waituidau yaigtinun ofrenda ejegatasan taamjai. ¹⁸ Nunikan pegkeenu asan, jega Apajuí ememattainum pujumjai, tujash nuig kuashat aentsuk atsuagmae, nuwig pampandaimainnakesh dutikachmajai. ¹⁹ Minak ujumak judío asianmaya aidau tajutuawag waitkagmae. Nunú ainawai amina emtimin mina pegkegchajush ajutuash nuna tujamain aina duka. ²⁰ Nuniachkush, ju ijuna jujú aidaukesh, Sanedrín ejetuawagmaya duish, wi bakumamainnash waitjukajiwash nuna ujamain ainawai; ²¹ untu ditá eemtin senchi jiikan: ‘Yamai mina jutijajum juka, jakau aidaush nantagtinaí taja dui, nu dekgatuatasajum jutijagme’ tusan imá nunak timajai”.

²² Nuna tutai Félix, duik nagkamas yamajam chicham etsegbaunak shiig dekaa pujau asa, ijunbaunak nuig tsujig idaiyak:

Comandante Lisias taamtai, aminunak shiig dekaajatjame, timayi.

²³ Dutika capitainin, jukijum kuitamka apusatajum, tujash machik agkan idaisatajum niina kumpají aidaush tajuawag wainkatnume, nuninak yaigtinme, timayi.

²⁴ Ujumak tsawan asa Félix, niina nuwe Drusila judío nuwa nujai tajuau, nunik:

—Pablo itaatajum, tima itawajui, dutikam Jesucristua duke dekaskeapi tumainai tusa etsegbaun antuku. ²⁵ Tujash Pablo, pegkeg takatan pachis, iik kuitamamtan, suwimak atinun pachis etsegtaí Félix ishamak:

—Maake juig atí, wetá tsawan agkan ajutkui ataktú untsuktajame, timayi.

²⁶ Felisak Pablo kuichkin sujustí tau asa, tuke untsuká auju. ²⁷ Duti dutikakua jimag mijan jegamtai Félix jiantai Porcio Festo yapajinawai. Nuniak judío aidaujai shiig juwakta tau asa Pablonak achikbautak Félix ukukuiwai.

25

Pablo apu Festoi ejegamu

¹ Nunik Festo Cesarea jegaa, kumpatum tsawan asa Jerusalén weuwai. ² Nunikmatai sacerdoté apuji aidau, nuigtú judío apuji aidaushkam, Pablo pachisag tsanumjudiau. ³ Nuninak wait aneamam Pablo jui Jerusalén awematajum tita tusag segaidau. Nunak ditak jintá dakak maata tuidau asag, tiajui. ⁴ Tiagtai Festo ayaak:

[†] 24:14 “Secta” tawa ju diístá Tak. 15.5.

—Pablok Cesarea achikam pujawai, nuniai wi ujumak tsawan pujusan awi wetatjai. ⁵ Nunitai ujumak atumi apujum aidau wijai minitnume, nunikag awi dita titinme waji pegkegchauna takase nuna, tau.

⁶ Nunik Festok Jerusalén ocho tsawan nuniachkush diez tsawan tumain ditajai pujus Cesarea jegaa, kashinia dui chicham dekatainum ekeem-sauwai, Pablon niina eemtin itaatnume tusa. ⁷ Pablo wayamtai, judío aidau Jusalegnunia kankajuk adijis ijunas, kuashat waji pegkegchau aidau tsanumjudau nunap dutikae tusaish tumainchaun. ⁸ Imatjuinam Pablo ni ayamjumaktatus chichaak:

—Wika makichik pegkegchaunakesh takaschamjai, judío chicham umiktajum timawa nuna pachisnukesh, jega Apajuí ememattaiya nunakesh, Roma apujinakesh pegkegchau chichagkachmajai, timayi.

⁹ Tujash Festo judío aidaujai shiig juwaktag tau asa, Pablon iniak:

—¿Jerusalén wetasamesh wakegatsmek? Awi chichaman dekajuatjame, tau.

¹⁰ Tama Pablo ayaak:

—Wika Roma apuji chicham inagnataijin pujajai, nuniau asan nuig dekajam amainaitjai. Wika judío aidau nak makichkish pegkegchaunak takagsachmajai, duka amek shiig dekame. ¹¹ Wi mantamnamainun pegkegchau takasuitkunuk jatanak dakitmaitsujai, tujash atsaig mina tsanumjutuina aniaigkik, makichik aentskesh ditaig sujutmain ainatsui. Nunin asan segajame, Roma apujiya nu chichamnak dekagtuati tusan, timayi.

¹² Tutai, Festo ditajai takatai aidaujai chichasag, chichajak:

—Roma apuji dekagtuati tame nuniau asam, Roma apuji pujamunum wetatme, tiabi.

Festo rey Agripan Pablo pachisa ujakbau

¹³ Ujumak tsawan nagkaemakui ai, rey Agripa, Berenicejai Cesarea jegawaju Feston kumpamawagtatus. ¹⁴ Nui jegawag kuashat tsawan batsataidau asag, Festo nunú reyn Pablo pachis ujaak:

—Jui makichik aents Pablo daagtin Félix achiká ukukbau pujawai.

¹⁵ Jerusalén pujai sacerdote apuji aidau, judío apuji aidau shkam niina pachis dekas mantamnati tita tusag segatiagmayi. ¹⁶ Tujutuinakui wi ayaakun, romanmaya aidautik aents chicham tsanumjamua nunú, ya tsanumjuinawa nujai igkumtikam, ayamjumamainjin taigkik mantamnati tuchau ainaji, tibaijai. ¹⁷ Tai ditashkam wijai jui taawagmatai, tsawantan megkaetsuk kashinia dui chicham dekatainum ekeemsan, nunú aents itaatajum, tibaijai. ¹⁸ Chichaman tsanumjuina dusha pegkegchau takasbaujin tichagtimpash tusa anentaimtamunak tichagmayi. ¹⁹ Imá ditá muunji Apajuin umijin aina nunak, tikich Jesús daagtin maamu yamaik nantakui asa iwaku pujawai tusa Pablo tabaujinak pachisag etsegiagmayi. ²⁰ Tuina nuna dekamainchau dekaeau asan iniasmajai, Jerusalén wetasash wakegatsush, awi dekajuatjai tusan. ²¹ Tujash Pablo Roma apuji chichamnak dekagtuati tajai, tujutkui, yamaikik untu junismek pujustá, wi aents ejetamain akui awematjame tusan idaisamjai, tau.

²² Tutai Agripa ayaak:

—Wishakam wakegajai ni chichaakui antugkatasan.

Tutai Festo ayaak:

—Kashin amesh chichaakui antugkata, tau.

²³ Kashinia dui, Agripa, Berenicejai shiig iwagmamjag taawaju, suntajan apuji aidau, nuigtú nu yaaktanmaya chichame antugtai aidaujai, nunikag chicham dekatasa ijuntainum utsanawagmayi, nunikmatai Festo chichaak:

—Pablo utitajum, tima itawaju. ²⁴ Dutikawagmatai Festo chichaak:

—Rey Agripah, ashí muun aidautijum jutiijai jui ijunjaujum nu aidautigmesh diistajum: Juuwai aentsuk, juna ashí judío aidau chichaman apujtusag Jerusalén nagkamas, jui Cesarea taamtaish ayatak mantammati, tusag segatuinak senchi chichainawai. ²⁵ Tujash wika ni mantamna-mainun pegkegchau takasbaujinak waitchau asan, niishkam Roma apujiya nu chichamnak dekagtuati tujutu asamtai, niini awematjame, timajai. ²⁶ Tujash mina apug Roma puja nunash, niina pachisan juna jutikae tusa agatmainuk atsugatawai; nunin asamtai jui atumiin itaajai, rey Agripah, amina niish iniasti dutikam wajintig nuna antugkan cartanash agatjatjai, tusan. ²⁷ Wagki shiig dekamaitsui, achikbauwa nu awemakuish, juna jutikau asamtai jutikainawai tutsuk dutikamuk, tiabi.

26

Pablo Agripa emtin ayamjumaku chichakbau

¹ Agripa Pablon chichajak:

—Ame ayamjumaku chichamainuk agkan ajutjamui, timayi.

Tama Pabloskam uwejin takuinu, nunik ni ayamjumamainun chichaak nagkamau: ² “Rey Agripah, shiig aneamu ajutui, judío aidau ashí tsanumjutuina nuna yamai amina emtimin ayamjumaktasan chichag dui.

³ Amek judío aidauti dutikatai aina duka ashí dekame, nuigtú nuiya pachisa tunaiyin ainag dushakam. Nuniau asamin segajame minash emamkesam antugtukta tusan.

⁴ “Ashí judío aidauk dekagtuinawai, wi uchuch nagkamsan, datsauch asanush mina pataag aidaujaish, nuigtú Jerusalegkash wajuk pujujakuitja nunak. ⁵ Ditak minak yaunchuk nagkamas dekajuinawai, nunin asag wakegainakug etsegmain ainawai, wi fariseo asan iinu secta tawa imatik-sanuk umijakuitag nuna. ⁶ Yamai mina tujutuina nunak, Apajuí iina muunji aajakajua nuna anagkuauwa nuna dakag dui, nuna dekagtuatasag jutijuinawai. ⁷ Nunú anagkagtuamu umintai wainkatag tuidau asag, doce Israela uchiji aajakajua duka, Apajuin emematuinak kashi tsawaijai takajuinawai. Nuna dakag duik rey Agripah, judío aidauk tsanumjutuinaawai.

⁸ ¿Wagka atumesh, Apajuí jakau aidanash inanmaina dusha dekaskeapi tumainchaush dekapegme?

Pablo ainkagtujakbau

⁹ “Wi anentainsanuk wajuk dutikmainaitja nunak ashí dutikatjai Jesús nazaretnumiaya nuna daajin pachis chichaina nuna emegkaktasan timajai; ¹⁰ nunak dutiksanuk Jerusalegkash takamiajai. Sacerdote apuji aidau inatjagmatai Jesusan nemajin aidaun kuashat achijan cárcel chimpiyajai, mainakuish chichaman ijuyajai. ¹¹ Kuashtá suwimkan suinakun waitkayajai dekaskeapi tabaun idaimitkastasan; nunak ashí juga ijuntainum dutikajai, ditanak senchi kajejau asan, tikich nugkanmaya yaakat aidanun batsatunash aintú wekaeyajai.

¹² “Nuna dutikatasan yaakat Damasco webaijai, sacerdote apuji aidau dutikata tusa awetuinakui. ¹³ Tujash rey Agripah, etsa tajiaju ai jintá wekaman, makichik tsaaptinun nayaimpinmaya etsa etsanbaujin

nagkaesaun wainkabiajai, nunú tsaaptina duke ashí wijai minidaujai ijumag egketkabi. ¹⁴ Dutijamantai ashí nugká kakekabiaji. Nuniamunum hebreo chichamai nayaimpinmaya chichagtak: ‘Saulo, Saulo ¿wagka minash waitkajame? Amek baka kajeká jagkin tukumak beseakush dekaptsama numamtuk amek pegkegchau weakum imaniame tujutmayi’. ¹⁵ Tujutkui: ‘¿Apuh amesh yaitpa?’ tusan iniai: ‘Wika Jesusaitjai, ame ya waitkame nuwaitjai, tujutmayi. ¹⁶ Tujash nantaktá nunikam wajantá, yamaik mina inakeg ematasan wantintukjame, dutikamu asam ame midau wainkaum nu etsegkata, ataktú iwaintuktatjam dushakam dutiksamak etsegkata. ¹⁷ Judío aidau nuigtú judiochu aidau kajegtamainakuish wi ayamjuktatjame, dutikatin asan dita batsatbaunum awemajame, ¹⁸ ame wainmitkakta dutikam suwenum batsata nuna tsaaptinun wainkatnume, nuninak Iwanchi inatai batsata nunak ukuinak Apajuin nemagkatnume; nuninak mina dekaskeapi tujutuina tudau aidaunash tsagkugnagtinme, nunikag Apajuí aentsji pegkejam aina nuninuk atinme’, tujutmayi.

¹⁹ “Tujutiu asantai, rey Agripah, nayaimpinmaya wainkamunak intimjuchabiajai; ²⁰ nunikan dekatkau Damasco batsata nuiyá etsegk-
 abiajai, nui juakin Jerusalén, nuigtú ashí Judea nugkanmash, judiochu aidaunash tudau takatan idaiyina Apajuin nemagkatnume, nunikag pegkejan takainak dita yapajinamujinash iwainmamkatnume, tusan. ²¹ Nuna taja duik judío aidau, jega Apajuí ememattainum pujai achigkag mantuag tujutiagmae. ²² Tujash Apajuí yaintsantai yamaikish nuig ebetmanjan pujajai, nuniakun ashí aents imanchau aidau nuigtú eme anentai aidaunash, yacha aidaunashkam ujasnuké ajai. Profeta aidau nuigtú Moisés nuniktinai tiajua nuna idaikunuk chichachujai ²³ Cristuk waitus jakatnai, nunikash ni dekatkau jakaunmayag nantaktinai, nunik tsaaptina nuna pachis judío aidau, judiochu aidau mash etsegkatnai tiuwai”, tuuyi.

²⁴ Nunú aidau Pablo ayamjumak tutai, Festo senchi chichaká:

—¿Pabloh, imanjaume! Senchi au aukawam imanjaume, timayi.

²⁵ Tama Pablo ayaak:

—Apu Festoh, chichame antugtayah, imanjachjai, wi taja duka dekaske, nuigtush anentaimtumainai. ²⁶ Anui rey Agripa eketa dushakam ju waji aidaunak shiig dekawai, nunin asantai shiig agkan chichajai niina emtin, wagki niish junak ashí dekawai, juka uuká takaschamu asantai. ²⁷ ¿Rey Agripah, profeta aidau tiajua dusha dekaskeapi tamek? Wika dekajai dekaskeapi tame nunak.

²⁸ Tama Agripa Pablon ayaak:

—¿Machik tame duikik, minash Cristo nemagkati tujutam?, timayi.

²⁹ Tutai Pablo:

—Wi kuashat tsawan etsegchataish, machik tsawan etsegtaish, Apajuik aminak, nuigtú ashí wi chichaamun antuina junash wi wajukeag juniktinme tujamjume, tujash wi cadenayai jigkajam wajag junitsuk.

³⁰ Juna Pablo timatai, rey wajakiu nuigtú gobernador, Berenice, ashí nui ditajai pekajushkam. ³¹ Nunik kanakiag chichainak: Ju aentsua juka pegkegchau takasbaujin mantamnamainuk atsujuí, carcelash wemaitsui.

³² Tusa Agripa Feston chichajak:

—Juka akupmainaitji, Roma apujiya nu chichaman dekgatuati tichauwaitkuig, timayi.

27

Pablo Roma awemamu

¹ Nunikag dekas Italia awemami tujamaidau asag, Pablón nuigtú tikich achigbau aidaun yajuak, makichik capitán Julio daagtin niina suntaji romanmaya apunu tutaiya nuna susabi. ² Nunikmatai adramitionmaya barco Asia nugkanum anumtai aina nui wetatus uminas tepaunum chimpimjá shimamunum, Aristarco macedonianmaya Tesalónica awa nuiyashkam jutijai wemayi. ³ Kashinia dui Sidón anumkabiaji; nunika ajin Julio Pablón eme anentus diyau asa, ni kumpaji aidaush kautua wainainak yaigtinme tusa idaisabi. ⁴ Sidón juwaki dase igku umpumpau asamtai, Chipre ajuntaiji anuasa webaiji. ⁵ Nunika Cilicia, Panfilia aina nuna yantamen ijusa wega weakua, Mira yaakat Licia awa nui jegaabiaji.

⁶ Nui jegaajin capitán barco Alejandrianmaya Italia wegaun wainak nui chimpipagmayi jui wetajum tusa. ⁷ Dutijamamtai kuashat tsawantai diipasa wee batsabaiji, nunisa ashintsá senchi takai takainakua Gnido igkuasa jegaa, nui juwaki dase igku umpumpau asamtai, Creta jegabiaji Salmona igkuasa. ⁸ Nunika wai waitiakua tugkitak anuasa ashí ashinkawa yaakat Lasea tikiju, Anumtai Pegkeg aidau tutainum jegawabiaji.

⁹ Kuashat tsawan megkaekabiaji, ayuno fiestamtai nagkaemakui asa nayants wetak ishamain wajau asamtai, nunin asamtai Pablo aents nui chimpijun chichajak:

¹⁰ —Muon aidaush, ju ii wegag juka shiig ishamain atin diyajai, nuigtú barcosh ashí waji aidaushkam megkaemainai, tuja jutii aidaush jinakuik jinumainaitji, timayi.

¹¹ Tujash suntag aidaun capitanjiya duka, barcogtina nuna, anunta nujai antujak, Pablón antugkachmayi. ¹² Nunú anumtaig yumi tepeamtaish pujas inagkeamainchau pegkegchau asamtai, kuashat aents aidau Fenice jegasá dekapsagmi, anumtai Cretanum etsá akaetaiya nuní awa nui, awi yumi tepeamtaish inagkeakiagmi, tiagmayi.

Nayants senchi dasenkamu

¹³ Surnumia dase diipas dasentu asamtai, dita anentaimsajag wemainapi tusag anclan egkejag Creta tugkitken tikiju wajasá weedau. ¹⁴ Nuniai machik asa etsá minitaijiya atú ayaumas, Euroclidón* tutai shiig senchi dasentuk minak barcon tukuau; ¹⁵ nuniak senchi umpumpak yajá pempempaki etamkui, dase depetka waketmainchau asa, junisaikish wemi, tusa idaisabiaji. ¹⁶ Nunika ajin dase jujamkintai ajuntai yaijuch Cauda tutai ukujin dasen ejatjamkamtai nagkaemaku, bote yaijuch nenea minamua nu waitkasa barconum pataibiaji. ¹⁷ Dutika patai ajin barcon sogayai jigkajagmayi wewe ematatus. Dutikawag Sirte kaamatkajin pataamig tusag ishamaidau asag, jaanch ejagbaunak kuwajag idaisagmayi, ayatak dase umpui emati tusa. ¹⁸ Kashinia duishkam daseg senchi dasentu asamtai, barcanum waji chimpiamunak jiiig utsaidiagmayi. ¹⁹ Kampatum tsawanta jui, barconum waji chimpijunak ditak utsaidiagmayi. ²⁰ Kuashat tsawantai etsash, yaya aidaush waintsuk yujau asaja, daseshkam senchi tukugbau asamtai, jiiinjattajipi tabauk atsugtamayi.

²¹ Kuashat tsawantai yutsuk yujanu asamtai, Pablo ejapen wajantá chichaak:

* **27:14** “Euroclidón” tawa junak dase shiig senchi dasenta nuna tuujakú ainawai.

—Muon aidauh, wi timajim nu antugtukagmin Creta dakasuitkuik, waji aidauh megkaemainchau wajakji. ²² Tujash ichichmamjatajum tajime, makichkish jakashtatjume, imá barcok megkaekattawai. ²³ Wagki kashi, wi Apajuinu asan nuigtush niina umijag nuna angelji minai ayaumas wajaná, ²⁴ chichagtak: “Pabloh ishankaipa, wagki amek Roma apuji pujamunum jegaatasam wegame, nuniau asamin ashí amejai barconum weena junak Apajuí kuitamkattawai tujutmae”. ²⁵ Nuadui muon aidauh ichichmamjatajum, wagki minak Apajuuyai kajintsan anentaibau ajutui, nunin asamtaí tujuti duka nunisagkeap uminkattawa tajai. ²⁶ Tujash makichik ajuntainum patamtatji, tuuyi.

²⁷ Nunika jimag tumig inagkeamunum makichik kashi dase mai jujam awajtamkui nayants Adriático nanamsabiaji, nuniajin barconum takau aidau aehaet ai, nugkan tikiju adijun dekapenak, ²⁸ kunajin dekaapa diikmag treinta y seis metros kunají atatman wainkajabi, dutikawag nuní dukapech ekemsag dekapakmag veintisiete metros atatman wainkag, ²⁹ kaya tukuig tusag ishainak, barca ukujin cuatro ancla atatman nayants utsawajabi, dutikawag, utusag wamak tsawaja tusag Apajuin segayanume. ³⁰ Nuniai barcanum takau aidau, uumak pisajagtatus bote yaig pataimun, barco nujinianas ancla aina nuna ajuinatai tumain ajukajabi.

³¹ Nudiagtai Pablo capitanin nuigtú suntag aidaujai chichajak:

—Ju aents aidau barconmag juwainachkuig atumek jijnashtatjume, timayi.

³² Tutai suntag aidau, bote yaigchia nuna anagke aidau tsupijug nayants ajukagmayi.

³³ Dutikawagmatai tsawamunum Pablo ashí aents aidau chichajak:

—Jimag tumig atumesh yutsuk yujagme wajukatjik tusa dakainaku.

³⁴ Nuniau asamin tajime, piipichikesh yuwatajum. Duka dekas at-sumnawai nu ichichmamsa iwaaku jegatasaja, atum ainajum anuiyag makichkish jakashtatjume.

³⁵ Nuna tusa idaiyak, Pablo pagkan juki, ashí aentsush wainainamunum Apajuin see tí puuká yuwau. ³⁶ Nunitai tikich aidauhkam anentain ichichiajag yuawagmayi. ³⁷ Ashí ijumjamak barconum chimpijutik do-scientos setenta y seis aents aajabiaji. ³⁸ Dita yapajamunak shiig yuwawag, trigonak nayants utsagkag, barconak wampu awasajabi.

Barco tsainkamu

³⁹ Tsawagmataish barconum takau aidauk nunú nugkapita tusag dekachagmayi; tujash nayants egkeentaunum kaamatak atatman waink-agmayi, nunikag awi anuumkami tiagmayi. ⁴⁰ Tusag ancla aidau anagke aidauk tsupijug nayantsanmag idaiyinak, remo aidau atiwaju, dutikawag jaanchin barca nujiin detuawagmatai, dase umpuakui kaamatak adijkatasa weyaji. ⁴¹ Nunikmá chichijam tukuniagbaunum barco kaamatak pataamatai, nujinchig shiig tepea umuchmainchau wajasabi, nuniai ukujinak kupiyi nayants tsukatatak senchi tukuau asa.

⁴² Imanitai suntag aidauk aents achigbau aidauk kajegta tuyanume, yukuak pisajainum tusa. ⁴³ Tiagtai suntag aidau capitanji Pablon uwemtijatatus wakegau asa, dutiktuk dekas ya imá senchi yukumnaita nunú niyá eemak yukuak kukag jinkitnime, ⁴⁴ nuninai tikich yukumta dekinatsu duka tapnan barca kupinja nunakesh jukiag patabiag katigt-inme, tiabi. Nuna aatus tiu asamtaí ashí jinutsuk kukag jijnjabiaji.

28

Pablo Malta ajuntaijin pujusbau

¹ Nunika jijnjá Malta ajuntaijimpapi tusa dekaawabiaji. ² Nuwiya aidaush ashí shiig awajtamkajabi, nuninak yumi yutak tsetsek asamtai, jijn ikapajag anamatajum tusa ipapawajabi. ³ Nuniamunum Pablo chigkimin yajuak jinum pataayi; nuniai nuiya dapi jii sukuam jijnak, uwegnum esainiabi. ⁴ Dutika Pablon dapi uwegnum esai nemajuauin wainkag nu ajuntainum batsamin aidau pempeentunikiag chichainak: “Juka aentsuk dekas magkagtintsukaitai, nunin asamtaints nayants jakegchamtaish, iina apajuijiya dutsu jakati tusa suwimkan suwak jutikatai”, tyanume.

⁵ Tujash Pablok dapin pegajá jinum jiyawabi, nunikash machikish wajuktsayi. ⁶ Nunitai uwejinish iyagchatpash, nuniachkush pachiachbau jaka iyagchatpash tusag dakayanume; tujash kuashat dakasag makichkish wajukchatai, “Auk makichik Apajuiyai”, tiajabi.

⁷ Nunú ajuntaiya nui tikiju, apu eme anentsá diitai Publio daagtinun nugke ajibi, nu niina jeen jujamki kampatum tsawantai shiig anenjamas kuitamjamkabi. ⁸ Nui Publio apají disenteria achikam jaak tsuweke pegaknum tepeyi. Nunitaman Pablo diistatus waintua Apajuin aujus, uwejin antig etsagajabi. ⁹ Nuna dutikamtai ashí jau ajuntainum batsamin aidaushkam kaunianume, nunikag ditashkam tsagagkajabi. ¹⁰ Nunikag eme anenjamsag kuashat yaimpakajabi, nuigtú ii jintá wesá atsumainnash ashí waji aidaunak amasajabi, dutijamawagmatai, nu yajuaka barconum chimpimjá shiakabiaji.

Pablo Roma jegaamu

¹¹ Kampatum nantu ajuntainum pujusá inagkeakiaja, Alejandrianmaya barco niishkam nui pujus tsetsek nagkaemakmatai wegaunum egkemjabi-aji, nuna nujinchin ditá apajuintaiji Cástor* nuigtú Pólux dakumjuka adu-jtukbau aayi. ¹² Nunika ashí ashinkawa Siracusa anumtainum anumkaja, nui kampatum tsawan pujusabiaji. ¹³ Nuiyati juwaki anuasa ashí ashinkawa Regio jegawabiaji. Nunika kashinia dui dase surnumia senchi umpumpakui, jimagchik tsawantaik Puteoli jegawabiaji. ¹⁴ Nui ujumak Jesusa nemajin aidau wainká ajin, jui jutiijai makichik tumig juaktajum tusa ipapawagmatai juaka; tsawan jegakuí Roma jegatasa jünkiabiaji. ¹⁵ Yatsut romanmaya aidauk jutii minamunak dekawag batsatu asag, iina igkumpaktatus waji sujutai Foro tutai Apio awa nui kaunawajabi, nuniai tikich aidauk Kampatum Jega tutaiya nui igkumpakajabi. Nunikmatai Pablo ditan wainak Apajuin see tiabi, nunik ichichmamjabi. ¹⁶ Roma jegaa ajin, capitán aents achikbau aina nunak dekas suntajá apujin susa idaiyak, Pablonak niinash akanak makichik suntag kuitamkati tusa apusajabi.

Pablo Roma Apajú chichame etsegkamu

¹⁷ Kampatum tsawan nagkaemai, Pablo judío aidau apuji aidaun untsuká ijumag ditajai chichaak:

—Yatsug aidauh, wika judío aidaunakesh pegkegchaunak takagsachu aig, iina muunji umitaiji aina nunakesh pegkegchau chichagtsaig Jerusalén achigkag romanmaya aents aidaunum sujutkagmae; ¹⁸ dutijuawagmatai kuashat inintsag, wi pegkegchau takasbaunum mantamnainuk makichkish atsugtau asamtai akupjuktag tujutiagmayi. ¹⁹ Tujash judío

* 28:11 “Cástor” Pólux tawa duka, Alejandrianmaya apajimtaiji daaji, jimagmamau taku tawai.

aidau dakituidau asamtai, Roma apujiya nu chichamnak dekgatuati tibaijai, tujash mina nugkajui pegkegchau takasbaunum tujutuidau asamtai tichabaijai. ²⁰ Nuadui atumnash untsukjime, atumjaish wainiakan chichastasan, jutii Israel aidautik Cristo dakainag nuadui, jutika cadenayai jigkajam wajajai, timayi.

²¹ Tutai dita chichajuinak:

—Jutiik Judeanmaya amina pachipas carta agagbaukesh jukichmaji, makhichik yatsutkesh awiya taawajag, amina pegkegchaugmin pachisagkesh ujakchagmae. ²² Tujash ame wajuk anentaime nu dekatasa wakegaji, wagki jutii dekanag duka ashí tikich nugkanmaya aidaush, ju yamajam sectaya juna dakituinak, kuashat chichainamu antaji, tiagmayi.

²³ Makichik tsawantan, Pablojai ijunjami tusa mamikiawaju asag, kuashat kaunawajui jega ni pujamunum, nunikagmatai Pabloskam kashikmas nagkamas agkujai Apajui inabauji pachis ujaidau; dutikak Jesusa pachisash etseju shiig antumtikatatus, Moisés chicham umiktinnun tibauwa nui nagkama profeta aidau tiajua nunashkam. ²⁴ Ujumak aents nuna etsegtai dekaskeapi tuinai, tikich dekaskeapi tuinachush aidau. ²⁵ Nunidau asag, Pablo nuna timatai dekaskeapi tuinai tikich dekaskeapi tuinatsu nujai shiig juwamainchau dekapedau, nuninak aents aidauk jiiinag shimutan nagkamawaju, nuniagtai Pablo chichaak:

—Dekaskenum Wakaní Pegkeji profeta Isaías aajakua nui, atumi muunjum aajakajua nuna chichajak:

²⁶ “Wetá, au aents aina nui, nunikam titá:
Antutnak antiagtinai, nuniakush dekashtin ainawai,
nuigtush diinakush, wainkashtin ainawai.

²⁷ Wagki ju aents aina juna anentaimejtajig antumtikmainchau wajasé;
nuigtush, antutaijig epetkamu ainawai,
nunisag jii aidaush epetkamu ainawai,
dutikachbauwaitkug jiiin wainainak, kuwishinish antumain ainawai,
nununak anentaish shiig dekanak tudau takatan idaiyinakuig, wi
etsagaumainaitjai”,† tiuwai.

²⁸ Nunin asamtai, atumesh dekaatajum, yamai nagkamsag Apajui uwemtikagta nu pachisa etsegbaunak, judiochu aidau antukagtatui.

²⁹ Nuna timatai, judío aidauk ditak pempeentunikiag pampa pampan-dayinakua shiyakagmayi.

³⁰ Pablok, nu jega ikamkamua nuig jimag mijan pujusui, nuniak ashí niina wainkatatus minidaunash nui juujakui. ³¹ Nuniak Apajui inabaujin etsejak, Apu Jesucristo pachisash aents aidauk jintinmayi shiig agkan waitkascham pujus.

† 28:27 Is. 6.9-10.

Pablo carta agaja romanmaya aidau awetimu

Kumpamkagtau

¹ Wika Pablo, Jesucristo inakegaitjai. Apajuí minak Jesucristo pachis yamajam chichama juna etsegkati tusa etegtuauwai; ² ni anagkagtuamua nuna niinu profeta aajakajua nunú etsegkajui, dutikak agaju ainawai; ³ niina Uchiji iina Apuji Jesucristo David weantu aajakua nuna pachisag; ⁴ nigka David weantunum Aentsmaga akiinaw aajakui, nuninaitak jakau atak nantakmatai Wakan pegkemtikagtina nu Apajuí Uchiji senchigtina nuna iwainakui. Duka Jesucristo iina Apujiya nuuwai.

⁵ Ni nunikbaunum Apajuí jutiinak wait anenjamag apóstol etamiuwai, Jesusa pachis etsegtukti nunitai, ashí aents aidauk niini dekaskeapi tuinak niinak umigkatnume tusa. ⁶ Atumshakam nu aina nuiyag ainagme Apajuí Jesucristunu atí tusa etegjamu asajum; ⁷ ashí atum Roma, Apajuí aneetaiji pegkejam atinme tusa etegjamu aidautijum batsatjum nuna agatjime: Apajuí iina Apajiya nunú, iina Apuji Jesucristujai wait anenjamag, shiig agkan pujutnum yaimpaktinme.

Pablo romanmaya aidau ijagsatasa wakekamu

⁸ Dekatkauk, Jesucristo yaintsamtai mina Apajuijun see tajai ashí atumin pachisan, atum dekaskeapi tabau ajutjamaina nuna pachis tikich nugkan-mash pegkejan chichaidau asagmatai. ⁹ Apajuí wakejusa takaju asan, niina Uchijin pachisan yamajam chichaman etsegtag nunú dekgatawai, Apajuí aujkan idaitsuk tuke atumin adaisanké ajim nunak; ¹⁰ nuniakan Apajuin tuke augjai, niish wakegakug tsawantan sujusmatai atumin tajaan wainkatasan. ¹¹ Wagki senchi wakegajai atumin wainkatasan, nunikan Wakani Pegkeji don sujusbau ajuta nuna, atum ichichmamja pujumaina nuna jintintuatasan; ¹² nunak wi dekaskeapi tabau ajuta duke atumnash ajutjamu asagmatai, pempeentunisaik ichichdaijagmi tusan tajai.

¹³ Yatsug aidauh, atumesh dekaatajum tusan wakegajai, kuashtá atumiin minitasan anentaimesajai, tujash yamaikish tuke tujiamu ajutui. Wika, tikich nugkanmaya judiochu aidau Cristo nemagkagmaya nunisag atum ainajum anuiyash Cristo nemagkatnume tusan wakegajai. ¹⁴ Wika ashí aents griego aidau, griegochu aidau jintintuata tusa awemamu asan, diwimkagtau anentaimesajai imaniajai jintinkagtuata tusan. ¹⁵ Nuniau asan atum Roma batsatjum nunash yamajam chichama juna Jesucristo pachisan ujaktasan wakeesan pujajai.

Chicham yagma nu pachisa etsegbau

¹⁶ Wika yamajam chichama ju Jesucristo pachisa etsegtanmag dat-samatsjai, wagki ashí aents nuna antukag dekaskeapi tuidaunak Apajuí senchigtina ibau asa uwemtika dui, deatkauk judío aidauaná uwemtikak dui judiochu aidauanashkam uwemtikatin asamtai. ¹⁷ Wagki chicham yagma ju dekamtijamui, Apajuish wajina dutikawa jutiin pegkeja iman diigmagatkush, nunak imá niinig dekaskeapi tabauwa duik dutikawai. Aatus agagbaunmash: “Apajuí pegkejaitme tibauwa nu imá niinak dekaskeapi tawa nu tuke pujutnai”, tawai.

Apajuí aents dakituinamu asa dita wakegamun takastinme tusa idaisamu

¹⁸ Apajuik nayaimpinum pujusag dekamtijamji, ashí aents niina ajantus diitsuk pegkegchau takaidaun kajejuk suwimkan suwa nuna, wagki ditá pegkegchau takatinig tikich aidaush dekaskea nuna dekamainchau dekapedau asagmatai; ¹⁹ ditak dekainawai ashí aentstí Apajuinu dekamainaitag nunak, wagki Apajuí najankamua nuna dekaidau asag. ²⁰ Apajuí wainmainchauwa duka dekamainaitiji ni takasbauji wainainag nu anentaimtusa diyaku nuigtú nugka yama nagkamchaku najanamu ashí wainainag juajui paan wainnawai, ni dekas Apajuia nunú nuigtú niina senchijish tuke atina dushakam. Nuadui aents pegkegchau aidauk, wika Apajuinak dekatsamjai tusa ayamjumamainjig atsujuinawai. ²¹ Apajuinak shiig dekainayatak, niinak eme anentus see tutsuk, ayatak pegkegchaunak ane anentaimainakua dekamainchau wajasajui. ²² Yacha ainaji tuma-mainayatak, dekachu waigkajui; ²³ nuninak Apajuí ajumaish jakashtina nu eme anenmaina nuna idaiyinak, aents jinin aina nuna, chigki, kuntin, dapi aidaun niime dakumkamun emematiajui.

²⁴ Nunidau asamtai Apajuishkam pegkegchau aidaun anentaimtuina nunak takastinme tusa idaisajui; dutikawajam tikima datsanmainun pempé pempeentunisag takanidau; ²⁵ nuninak Apajuinu dekaskea nunak idaiyinak waita nuna antujuinak, najankagtina nunú emematmaina nuna; najankamu aidaun emematuidau, imá nigki ajumaish ememattai atí. Aatus atí.

²⁶ Nuniagtai Apajuishkam idaisauwai tikima datsanmainun takastinme tusa. Dutikamu asag, nuwa aidauk aishmagjai pujustinme tibauwa nuna idaiyinak, mai nuwak pempeentunikiag takanijakajui; ²⁷ nunisag aishmag aidaushkam nuwajai pujutan idaiyinak mai aishmagkuk pempeentunikiag takanistasag senchi wakegaidau, nuninak tikima datsantainchau waigkag, mai aishmagkuk pempeentunikiag takanijakajui. Nunidau asag dita pegkegchau takasbaujin suwimkanak egatmamkag ditak waituinawai. ²⁸ Apajuik aents aidaun dakituinamu asa, pegkegchau anentaimta nuwi idaisauwai; pegkegchau dutikmainchau aina nunak takastinme tusa. ²⁹ Dutikamu asag ashí pegkegchau aina nunak takainak, pegkegchaunak unuimatkejui, ashí waji ajuttí tusa waugtutan, yajaumaetan, tikichdau pegkeg wakejuka kajegtan, magkagtin, jiyanita wekaetin, tsanumin, chichama wekaetin, ³⁰ augmatkagtin, Apajuí shiwaji, datsantan chichaaku, eme anenmamin, ni wagaaku chichagmamin, pegkegchaush wajuk takamainaita nuna jintiag anentaimin, apajinash dukujinash chichaman umigchau, ³¹ anentaimtajish pegkegchau, ni tibaujinash umichu, makichik aentsnakesh shiig anentus diichu, tsagkugkagtuchu, wait anenkagtuchu ainawai. ³² Apajuí aentsun nuninun takaidauk suwimkan juak tuke jakatin atinme tiuwa nunak shiig dekainawai. Tibau aig, ditak pegkegchauwa nunak takainak, tikich pegkegchaun takaagtaish shiig anentus diinawai.

2

Apajuik aents takasbaujiya dutiksag susatnai

¹ Nunin asamtai ameshkam, yaki ainme nunin akumesh, tikich pegkegchau takainawai tusa bakutá takumesh amek bakumame, nunin asa ame ayamjumamainuk atsugtamui; amesh dita pegkegchau takaina nuninuk takau asam. ² Dekaji aents nuninun takau aidaunak, Apajuí dekas dita pegkegchau takaamujiya dutiksag suwimkan suwa duka. ³ ¿Nunin

asamtai ame, tikich nuniawai tusa augmatiatkum, dita takaina nunismek takaam dusha, Apajuik suwimkanak sujuschatnapi tamek? ⁴ Apajuik ame pegkegchau takataish shiig senchi wait anenjamu asa suwimkan sujamsuk, tudau takatan idaiyak pujutin yapajiatu tusa emamkes dakagma dusha dakitame. ⁵ Tujash ame antushtaigmin, tudau takat idaikum pujutjum yapajishtaigmin suwimak aminu atinuk ikauntumame, tsawan jegatai Apajuí kajeká, aents takasbaujiya dutiksag suwimkan susatna nui aminush atina nu. ⁶ Apajuik, maki makichik aents wajuk takasaje, nuna diijus dutiksag susatnai. ⁷ Pujut tuke atina nunak, ya aidauwa Apajuí imana nuna egak, eme anentsá diyam, jachau amig tusag pegkegnak takainak kakanmamsaje nuna susatnai; ⁸ tujash aents nigki anenmamin aidaunak, Apajuí kajujuk suwimkan susatnai, dekaskea nuna dakituinak pegkegchaun takaa batsatu asagmatai. ⁹ Ashí aents pegkegchau takatnak batsamtauk waittsagtinai, nuninak senchi anentaimak waittsagtin ainawai; dekatkauk judío aidau pegkegchau takaidauwá nunikagmatai, dui judiochu aidaushkam nunikagtinai. ¹⁰ Untsu ashí aents pegkejan takasú aidaunak, Apajuishkam shiig anentus ni pegkeja imanuk emaktinai nuigtush shiig agkan pujamu atina nunash susatnai; dekatkauk judío aidauná dutika, judiochu aidaunash dutikatnai; ¹¹ wagki Apajuik jushá aentsui, aushá awai tuchauwai.

Chicham umiktinun Moisés agajua nu

¹² Wagki ashí aents chicham umiktinun Moisés agajua nunú atsugbau batsamas tudau takasú aidaush suimkanak jukiagtinai. Chicham umiktina nunú ajamaitak tudau takasú aidaushkam, chicham umiktinum tawa dutiksag suwimkanak jukiagtinai, ¹³ wagki chicham umiktina nuna aents dekau asamtai Apajuik pegkeg takauwaitme tatsui; aents chichaman umiina nuna Apajuik pegkeg takauwaitme tawai. ¹⁴ Judiochu aina duka, chicham umiktin atsugmaitak tuke nunin asag, dita dutikaina duwi chicham umiktinum tawa nuiyan takainawai, nuninak iwainmainawai dutikmainchash, dutikmainnash dekaina nuna; ¹⁵ nuninak chicham umiktin ditá anentaimtajin ajuina nuna iwainainawai. Juka pegkegchauwapi, juwap dekas pegkejaita tusag anentaimaina nunash iwainawai, nunin asa ditá anentaimtajiya duke bakumainai nuniachkush ayamjumainai; ¹⁶ aatus nagkaemaktinai tsawan jegamtai Apajuí niina Uchijí Jesucristun, aents aidau ashí takasbauji nuigtú tikichish dekachbaunum anentaimsamujish diigsam, dita takasbaujiya dutiksam susata titinai tusan, wi yamajam chichaman Jesucristo pachisan etsegnuweg nunisag.

Judío aents aidau chicham umiktin umiachbau

¹⁷ Atum ainajum anuiya ujumak aidautijum, jutiik judiowaitji Moisés chicham umiktinnash sujamsauwai, nuadui Apajuíjaish shiig ijutkaji tusajum emebautigmesh ainagme. ¹⁸ Atumek Apajuí wakegamua dusha dekagme, chicham umiktina nu pegkeg aina duké etegja takatan dekamtijamu asamtai. ¹⁹ Atum anentaimsagmek aents wainmachu egkesá emamaina numamtuk awajkagtin ainaji tajume. Nuigtush Apajuí dekachau aidaush Apajuin dekaatnume tusa yain ainaji tajume. ²⁰ Nuigtushkam dekachau aidaush jintintin ainaji, nuniaku chicham umiktin ajutjamu asamtai Apajuí chichamen imaanis dekainachush unuidau ainaji wajuk shiijash pujumainaita dushakam, jutiik dekaskea dusha shiig dekainaji

tajume. ²¹ Atum aaja tikich jintintin ainayatkugmesh ¿wagka atumek jintinmamtsugme? Atum kasamchatia tusa etsejiatkugmesh, ¿wagka kasamjume? ²² Atum tsanijinchatia tayatkugmesh ¿wagka tsanijinjume? Atum apajuimtai dakumkamu dakitayatkugmesh, ¿wagka juga nunú dakumkamu ememattainum wayagmesh kasamjume? ²³ Atumek chicham umiktin ajutjamaina dui ememagme, nuniayatkujum nuiya umiachu asajum Apajuik eme anentsá diyatsjume. ²⁴ Yaunchkesh aaja agagbauwai: “Atum pegkegchau takatigmin judiochu aidau, Apajuin pegkegchau chichajuinawai”, tusa.

²⁵ Duka dekaske, judío asaja pakamainag duka pegkejai, tujash chicham umiktinnum tawa nu ashí umiinaku aaninakuik pegkeg amainaitji. Tuja pakamaku* akugmesh chicham umiachkugmek pakamakchau aina nujai betekak ainagme. ²⁶ Tuja pakamakchauwa nunú, chicham umiktinnum tibauwa nuna umiagtaik pakamakua iman Apajuik diyawai. ²⁷ Pakamakchau akush, chicham umiktina nuiyan umiakug atumin bakugmagtin ainawai, atum chicham umiktinush ajutjamaig nuigtush pakamaku ainayatkujum chicham umiachu asagmin. ²⁸ Judío aents asajum nuniachkugmesh iyashnum awantak awa nui pakamaku asajum judío tamak amaitsugme; ²⁹ dekaskenum judiowa duka ditá anentainish yapajinau aina nuuwai dekaskenum pakamakaju aina duka, nunak Wakaní Pegkeji dutikawai chicham umiktinun Moisés agajua nu dutikatsui; dutikamu aina nuna Apajuik pegkeg ainagme tawai, tikich aents aidau tutan dakituinaigkishkam.

3

¹ Nunin aish ¿wajinma imanaita judío atash? ¿wajinma yaijatua pakamamush?, tautigmesh amainaitjume; ² tujash duka nuninchauwai, dekaskenmag judío aidautik tikich nagkaesau ainaji, Apajuí ni chichame agagbaun dekatkauk jutiná sujamsauwa dui. ³ ¿Tujash ujumak judío aina nuiya Apajuí tibaujin dekaskeapi tusag umikchaju aina duiká, ni anagkagtuamua nunak umimainchauwait? ⁴ Makichkish nunimait sui, Apajuik dekas ni tibaujinak betek uminai, ashí aents aidau wait ainaigkish. Dui agagbaunmash:

“Ame tibaugmek betek umin asam pegkejai tama atatme, iman asam pegkegchaun aikawai tujamainakuish, bakumamainkesh atsugtama asamtai, tuke depetmaktinaitme”, tawai.

⁵ Jutii pegkegchau takaamuji, Apajuí pegkeg takaamujin nuní paan iwainaiash, ¿wagka Apajuish suwimkanash sukagtumainaita, pegkegchau takaakug nunimainait? (Junak tikich aents aidau wajuk chichainawa nuna dutiksanuk tajai.) ⁶ ¡Duka makichkish nuninchauwai! Apajuí pegkegchaun takaakush, ¿Wajuk aents nugkanmaya aidaunash suwimkanash sumainaita?

⁷ Tujash wi waitjamua nu, Apajuinu dekaskea nuna, aan nagkaemas paan emaish, ¿wagka wisha tudauwaitme tamash aja? ⁸ Ujumak aents aidau wainak tsanumjutuinaik: Pegkeg ajutjamti takuik pegkegchau takamainai tusa jintinkagtawai, tujutuinau, ¿Dekas aajanuk jintinkagtag? Makichkish nuninchauwai, nunú aents aidau mina pachitus tu chichaina duka suwimak jumainun tu yujainawai.

Ashí aents aidautik tudau ainaji

* **2:25** “Pakamaku” tawa duka diístá Gn. 17.10-25.

⁹ ¿Wajinmainaitji? ¿Jutii judío aidautika tikich aidau nagkaesau imá pegkeg ainag? ¡Makichkish nuninchauwaitji! Timajim nunisag judío aidautish, judiochu aidaushkam tudau ainaji. ¹⁰ Nunin asamtai Apajuí chichame agagbauwa nuwi:

“¡Makichkish aents pegkejan takauk atsawai, shiig makichkiuchikesh atsawai!

¹¹ Makichkish Apajuí pegkejan wakega nuna dekaukesh atsawai, antsag Apajuin egaukesh atsawai.

¹² Ashí aentsuk Apajuinak tupankaju asag atsumainchau waigkajui, nunin asag ashí pegkegchau ainawai.

¡Makichkish aentskesh pegkejan takauk atsawai!

¡Shiig makichkiuchikesh atsawai!

¹³ Suwenig

aents ukusbau ashiiimua imanai,

waitjuidau asag;

ditá weninig dapí tsaagkega iman ajuinawai,

¹⁴ nunidau asag, kuashat kajeamujin aentsnash pegkegchaun chichajuinawai.

¹⁵ Wamkes kajedau asag aentsun maatatus yujajin ainawai;

¹⁶ dita tuwí yujainawa nuninakush pegkegchaun dutikainak, tikich aents aidaunak waittanum ukuinawai.

¹⁷ Dekainatsui tikichjaish shiig agkan pujutnak.

¹⁸ Apajuí ajantusa diyamujish atsujuinawai”, tawai.

¹⁹ Chicham umiktina nui: “Ashí pegkegchau ainagme”, tawa nunak jutii judío aidautin Apajuí chicham umiktinun sujamsau asa tujama duka dekeinaji. Nunú chicham umikchamunum chichamainchau juwaktinaitji. Nunin asamtai judío aidautish, ashí nugkanmaya aents aidaush wi bakumamainuk atsugtawai tumainuk atsustinai, wagki Apajuí diismak ashí aentsti bakumamainuk ajutjamaidau asamtai. ²⁰ Nuadui makichkish aentskesh Apajuí eemting chicham umikbauwai pegkeg diyamak achatnai, wagki chicham umiktina duka ayatak jutii tudauwaitag nunak dekamtijamu asamtai.

Apajuik Jesucristo dekaskeapi tabaunum uwemtijamui

²¹ Tujash yamaiya jui iwaintugmake, chicham umiktina nu umiat-sjinkesh Apajuish wajuk pegkeg diigmaji nuna, juna pachisag chicham umiktina nuwish, profeta aidaushkam etsegkaju ainawai. ²² Nu aidau dekamtijamawajui Jesucristo dekaskeapi tabaunum Apajuí pegkeg ainagme tujama nunak, nunin asamtai ashí aents Jesucristo dekaskeapi tuina nunak, yaá aentsuk ainta nunin ataish nunak pachitsuk ashí betek pegkeg ainagme tujamji. ²³ Ashí aentstik betek tunamaku asaja, Apajuí diismak pegkejak wantinkachuitji. ²⁴ Nunin ajinig, Jesucristo iina tudaujin esaktugmag agkan etamkau asamtai wait anenjamag anenjauch pegkeg ainagme tujabiuwai. ²⁵ Apajuik Jesusnak jutii suwimak jumaina nuna ni suwimkan juwak mantamnati tusa awetugbauwai, nunikmatai Jesusan minaipap mantamdauwaita tusag dekaskeapi tuinak uwemjatnume tusa. Aatus Apajuik pegkeg takaamujinak iwainmamkauwai, nunin asa aents yaunchuk tudau takasbaujinash pachitsuk yaa Jesusan dekaskeapi tawa nuna uwemtikui. ²⁶ Ni pegkeg dutikamun iwainmamkata tau asa Jesusan jutiini mantamnati tusa awetugbauwai. Nuna aatus dutikak

Apajuik pegkeg takaamujinak iwainakui nuigtushkam Jesusan dekaskeapi tuina nuna pegkeg ainagme tawa dui.

²⁷ Nunin asamtai jutii ememamainuk makichkish atsawai, chicham umiktajum tibauwa nu umikbaunmagkesh pegkeg ainagme tichamu asaja. Ayatak Jesucristo dekaskeapi tabaunum Apajuik pegkeg ainagme tujamui.

²⁸ Apajuik Jesucristo dekaskeapi tabaunum pegkeg ainagme tujama nunak, chicham umiktajum tibauwa nu umikbauwaikish tujamtsu duka dekaji.

²⁹ Atsa ¿Apajuik imá judío aina nuna Apajuijigke tajumek? Atsa ¿Ashí judiochu aina nunash Apajuijichukaih? Dekaskenum ashí aents judiochu aina nunashkam Apajuijyai. ³⁰ Apajuik makichkiuchi, nunin asa nigki Jesucristo dekaskeapi tuidaunak pakamaku agtaish, pakamakchau agtaishkam pegkeg ainagme titinai. ³¹ Nunin asamtaig, ¿Jesucristo dekaskeapi tau asajin chicham umiktina duka wainak juwaka? ¡Makichkish nuninchauwai! Nunisag awai, ayatak nuní nagkaemas paan awasaji chicham umiktinush wajinma yaijatua duka.

4

Apajuish wajuk pegkejash diigmawa nuna Abraham iwainakbau

¹ Yamai dekawagmi Abraham iina apají wajukauwaita nudau.

² Abraham ni takasbaujiya nu diigsá aents pegkejai tibau akug, nigki emematmamain aajakui, tujash Apajuiyaig ememamain aajakchauwai.

³ Apajuí chichame agagbauwa nuig: “Abrahamak Apajuiyai dekaskeapi tujakuí, nuniau asamtai Apajuí Abrahamnak pegkeg diisui”, tawai.

⁴ Aents ni takagsamunum akiakug: Junak anentag amajame tumaitsui, diwibaunum akiau asa. ⁵ Tujash aents pegkejan takaschau aig Apajuí tidaunum agkanmitka nunak niini dekaskeapi tau asamtai dutikawai, nunú dekaskeapi tibauwa duik pegkeg ainagme tawai. ⁶ Davidchakam aikasag agajui. Aents pegkeg takasbaujish atsujai, Apajuí pegkeg ainagme tima shiig aneasinjin pachis agajua duka, ⁷ aatus tawai:

“¡Shiig aneasagtinai aentsú pegkegchauji tsagkujamu aidauk, tuja tudau yaunchuk takasbaujish pachitsuk idaitusbau aidaushkam!

⁸ ¡Shiig aneasagtinai

Apu Apajuí nu aents aidau tudaujin anenjachbau agtina duka!”

⁹ Juna tibauwa jusha ¿imá jutii pakamaku aidauti shiig aneastinnak tiuwait atsa pakamakchau aidau shiig aneastinun tichaukai? Nunak ditanashkam tiuwait. Yaunchuk timajime, Apajuik Abrahamnak niinig dekaskeapi tabau asa, aents pegkeg diisui tusan. ¹⁰ Tujash nunash ¿wajukamtaiya dutikauwaita? ¿pakamakmataig dutikauwait atsa pakamatsaigkik dutikauwait? Nunak pakamakmatai dutikachui, eke pakamatsaig dutikauwai. ¹¹ Nunik pujus Abrahamak pakamakui, ayatak Apajuí dekaskeapi tabaunum pakamakchau ajinkesh Apajuí pegkeg ainagme tujama nuna iwainakta tau asa. Nuniku asa Abrahamak pakamakchau ainayatak Apajuí dekaskeapi tuina nuna apají wajasui, ashí nunin aidaunak Apajuik betekmas pegkeg diyawai. ¹² Nuigtushkam pakamaku ainakush, Abraham eke pakamatsuk Apajuiyaig dekaskeapi tujakua nunisag anentaimaina nuna apají wajasui.

Apajuik Abraham dekaskeapi tujakua nunin aidaun pegkeg ainagme tawai

¹³ Apajuí Abraham anagkuaku tibauwa duka: Ju nugka juka amina uchijum weantu akiinak wegagtina nudau atin atí tiuwai. Nunak Moisés chicham umiktajum tibauwa nuna umikú asamtaigkish tichauwai. Ayatak niini dekaskeapi tau asamtai pegkeg diisá tiuwai, ¹⁴ wagki jutii judío aidauti chicham umiktajum tibauwa nunú umiaku jumainaitkuig, Apajuyiai dekaskeapi tabauwa duka ni anagkagtuamua nujaí wainak juwamainai. ¹⁵ Moisés chicham umiktajum tiuwa duka ii umiachbaunum Apajuí suwimkan sujamaina nuna itagtamji. Tujash chicham umiktina nunú atsakuig umiatsjume tamak amaitsuji.

¹⁶ Nunin asamtai Apajuí Abrahaman anagkuaowa nunak, ni weantu aidaush dekaskeapi tabaunum anenjauch uwemjatnume tiuwai. Apajuí anagkagtuamuk, jutii judío aidauti chicham umiinag nudaukechui, Abraham Apajuyiaig dekaskeapi tujakua nunisag ashí aents dekaskeapi tuina nudauwai. Aatus asamtai Abrahamak ashí jutii aidauti apajuyiai. ¹⁷ Nuadui Apajuí eemtinish Abrahamak dekaamauwai chicham agagbaunum: “Wi aminak kuashat aents aidau apají emajame” tawa nuna. Nuadui Abrahamak aents jakaunash Apajuí inanki ataktú pujutan suwak, atsamunmayanash ashí wajiin najanna nuanui dekaskeapi tujakui.

¹⁸ Nunin asa Abrahamak uchijish atsugmaitak, dekaskeap uminkattawa tabauwai dakasui, nuniku asa kuashat aentsun apají wajasui, Apajuí chichajak: “Amina uchigmiin akiinak wegauk, yaya dekapamainchauwa ibau atinai”, tibau asa. ¹⁹ Abrahamak cien mijan tumain ajujakui, Sarashkam muuntuch wajasú asa uchinash ejapjumainchau wajasui, tujash dekaskeap uminkattawa tabaunmag mijakchauwai. ²⁰ Nuigtush Apajuí niina anagkuamunash utujimsag anentaimtsuk, nuní nagkaemas dekaskeapi tabaujin ichichmamag Apajuin emematiuwai. ²¹ Abrahamak: Apajuí ashí senchigtina ibau asampap ashí ni anagkagtuamujinash imatiksag umiktatua, tiuwai. ²² Nunú aaja dekaskeapi tabauwai Apajuik Abrahamnak pegkeg diisui.

²³ Tujash Apajuí Abraham dekaskeapi tabau asa pegkeg diisua duka, imá ni nunikbauwa duke pachisa agagchamui. ²⁴ Jutii nuniktina dusha pachisa agagbauwai: Ii dekaskeapi tabaunum Apajuí pegkeg ainagme tama atinaitag nunú. Duka jutii Jesucristo iina Apujuya nu jakaunak Apajuí inankiuwa nunú dekaskeapi tuinag nuuwai. ²⁵ Apajuí Jesusnak jutii tudaubin mantamnati tusa idaisauwai, nunik maawagmataish ataktú nigki inankiuwai jutiin pegkeg ainagme tujamta tau asa.

5

Yamaik Apajuí wait anenjabaunum pujaji

¹ Yamaik Apajuyiai chichatash agkan ajutjamji, Jesucristo iini mantamna iina tudaubinash esaktumagmatai pegkeg ainagme tujabiui asamtai nuigtush iina Apuji Jesucristo dekaskeapi tuinag dui. ² Cristo dekaskeapi tabaunum Apajuik adjikauwaitji, ni wait anenkagtuju asamtai shiig aneenaji nuniaku shiig aneasa dakainaji nuigtushkam Apajuí tsuwatan antiakchauwa imanuk iishkam wajasaja, atak nijai ijunja pujustinaitag nunú dekainaku shiig aneamu ajutjamji. ³ Imá duikik shiig aneatsji, kuashat waitiamu ajutjamkuish shiig aneasa batsatji, waitiamua nu utugchat emamkesa katsunjá nagkaetan unuitama dui, ⁴ nunú emamkesa nagkaiki, Apajuí dekapjabaush nunisaik nagkaikiaja atakeap nijai pujustinaitja

tusa shiig aneasa dakamu ajutjamji. ⁵ Nunú dakainaku pujuidautik idatsamak achatnaitji, wagki Wakaní Pegkejiya nu iina anentain pujau asa Apajuí niina anenkajin amasua nuna dekamtijamkui tikich aidaujaish pempentunisaik anenidau asaja.

⁶ Jutiikek uwemainchau waigká batsatjin, Apajuí tsawan mamikiamu jégamtai Jesucristun awemauwai, dutikam jutií tudaujin mantamna uwemtijamjauwai. ⁷ Makichik aentskesh tikich aents pegkejan takau asamtai ayamjakun mantamnatjai tumainuk atsawai, ¿aents pegkegnun yaigbau asampash: Wi mantamnatjai tumainait? Achah tumainashit. ⁸ Tujash Apajuik ni anenkajinak iwaintugmakui, ii tudau ainajinig Cristo jutiiní mantamdauwa dui. ⁹ Cristo niina numpen Apajuyai iwainakmatai jutiinak pegkeg ainagme tujabiuwai. Nuadui Cristo aan nagkaemas iina Apajuí suwimak sujamainnak ayamjutupakmatai waittsashtinaitji. ¹⁰ Yaunchkek aents aidautik Apajuin shiwaji ainajinig, ni Uchijí iina ayamjutupak mantamna ni Apajijaish epegtugmauwai. Dutijamau asa yamaik Cristo iwaku pujau asa aan nagkaemas ayamjutupaktinai. ¹¹ Imá dukechui jutií Apajuyai shiig aneenag duka, iina Apuji Jesucristo Apajujai shiwagmagamun epegtugmauwa duish shiig aneenaji.

Adán Cristujai pachisa tibau

¹² Makichik aents tudau takasua dui, nugkanum tudau takaamush nagkamdauwai. Nu aaja tudau takasbaunum jatashkam nagkamdauwai, nunikmatai ashí jinin wajasuitji, wagki ashí aentstik tudau takau asaja. ¹³ Apajuí Moisesan chicham umiktinun eke suwatsaig nugkanmag tudauk aajakui, tujash Apajuik aents tudaun takaagtaish pachikchauwai, chicham umiktinun eke susachu asa. ¹⁴ Nunin aigkishkam Adán pujujakua dui nagkamas Moisés pujujakua imanuish jamuk aajakui, Adán tudau takaak Apajuí intinjukiwa nuninachiatatak. Duka Cristo minitna nuna iwainak nunikui.

¹⁵ Tujash Adán umikchamunum tunamagbauwa duka Apajuí anenjauch sujamsamua nuaig apatkaish tumaitsui. Makichik aents tunamagbaunmag ashí jinin wajasuitji. Tujash Apajuí wait anenjamag anenjauch Jesucristun awetugmauwa nuadui ashí iinu pegkeg aina nunak aan nagkaemas pegkejan dutikauwai. Aatus Apajuí wait anenjamag nunú aents tunamajua nuna nagkaegas pegkejan dutikauwai. ¹⁶ Adán tudau takasbauwa duka Apajuí anenjauch sujamsauwa nuaig apatkaish tumaitsui. Adán tudau takasua dui ashí aentstik Apajuí eemtinish bakumamainnum juwakuitji. Tujash aents imanik tudau takasú aigkish, Apajuí anenjauch dutikauwa dui pegkeg ainagme tujamji. ¹⁷ Makichik aents umikchamunum tunamagbauwa dui jaamuk asauwai, tujash nuna nagkaesau makichik aents Jesucristua nu pegkeg dutikamunum Apajuí shiig senchi wait anenjamu asa, pegkeg ainagme tibau aidautik yamajam pujuta nuwi tuke pujustin ainaji.

¹⁸ Makichik aents Apajuí umigkashbaunum, ashí aentstik Apajuí, atumek suwimak juwakjum jakattagme tama asauwaitji. Aantsag makichik aents Jesucristo pegkeg dutikamunum, Apajuí ashí aentstina- nak pegkeg ainagme tujabiuwai pujut nagkanchaun jukitnime tujamu asa. ¹⁹ Makichik aents Apajuí intinjukbaunum kuashat aentstik tudau waigkuitji. Tuja makichik aentsua nu Apajuí umigkamunum, kuashat aents pegkeg ainagme tama agtinai.

²⁰ Chicham umiktina duka ayatak nuní nagkaemas tudaunak ikauntugmakui; tujash nu imanikmataish nuna nagkaesau, Apajuí ni wait anenkagtamujiya nuna iwaintugmakui. ²¹ Nunú tudau jatan itagtabauwa nunisag Apajuishkam ni wait anenkagtamujiya nunak Jesucristo iina Apuji jakauwa dui pegkeg ainagme tujamu asa, pujut tuke atina nuna jukitnume tujabiuwai.

6

Jutiik tudau takatnumag jakauwa numamtuk juwakuitji

¹ ¿Dusha wajuk anentaimtagme? ¿Apajuí senchi wait anenjamjati tusaik tudau takaa batsaamainait? ² ¡Duka makichkish nunimaitsui! Jutiik tudau takatnumag jakauwa numamtuk juwakuitji, nunintish ¿wagkaik tudaush takaash pujutji? ³ Atumek shiig dekagme, jutií Cristo Jesusai dekaskeapi tabaunum yamimainakuik, ni jakauwa numamtuk wajainag duka. ⁴ Nunin asaja yamimainakuik Cristun ukusajua numamtuk wajainaji, niijai betek jakauwa numamtuk wajaidau asá. Nuniku asaja Cristo Apají niina senchiji imana nujai inankiuwa numamtuk wajainaji yamajam pujutnum pujuidau asaja. ⁵ Niijai jamaina numamtuk wajakú asá, ni nantakuwa nunisaik jutiish nantaktinaitji.

⁶ Yaunchuk aajakuitag duka Cristo achijá maamua nujai betekak maamua duka dekainaji. Aatus nunikmatai iina iyashi yaunchuk tudau takamtiktai wajasua duka wainak juwakti, nunikmatai tudau takainak waitú batsamchatnume tujamu asa. ⁷ Aents jakauwa duka tudaunak takaa pujuchui jaka agkan wajasú asa. ⁸ Numamtuk jutiishkam iina tudau takataiji aidauk Cristujai jakau asamtai agkantaitji. Nuadui dekaskenum Cristujai pujutnaitji. ⁹ Dekainaji Cristo jakaunak Apajuí inankimu asa ataktuk jakashtina duka. Cristuk jaamunak depetkau asa ataktuk jamaitsui. ¹⁰ Aents tudaun takaagtai Apajuí suwimkan susatjai tiuwa duka, Cristo waitus jakauwa duik ashí nagkankauwai. Yamaik nantakí puja nunak Apajuí shiig anemtikak pujawai. ¹¹ Atumshakam nunisjumek tudau takatnumak jakauwa nunin anentaimtumastajum, tuja iwaaku anentaimtumastajum, ii Apuji Cristo Jesusjai ijutkau batsatkujum Apajuí shiig aneemtiksata tabaunum.

¹² Nuadui atumek tudauk takaa batsaamaitsugme, atumi iyashim pegkegchaun takastatus wakega nunú takaakjum. ¹³ Atumi iyashmia nuiyagkesh tudau takamtiktaig awasaigpajum. Dekas Apajuiyaig idaimamsatajum jakauti nantamaina numamtuk wajakú asajum, iyashmiin ajutjamaina nunak Apajuí pegkegnum takamtiksati tusajum idaitustajum. ¹⁴ Aaja dutikamu asamtai tudauwa duka atumnak inapamaitsui, wagki chicham umiktina nu umiktasa batsamtutsuk Apajuí wait anenjabaunum batsatu asagmin.

Aents yana umigkatjai tawa duka nuna umijin wegawai

¹⁵ ¿Tujash wajukmainaita? ¿Chicham umiktasa batsattsuji Apajuí wait anenjabaunum batsatji tusaika, tudau takamainait? ¡Makichkish nunimaitsui! ¹⁶ Atumek dekagme, makichik aents wika parjugkan takajin atajai tumamkug, nuna inake wajasá parjugji wakegamujin umigna duka. Numamtuk aents ayatak tudaunak takaa pujauk nigki jatan egatmamak nuniawai. Untsu Apajuin umijak pegkeg aina nunak takauk, pegkeg pujuta nuwi weawai. ¹⁷ Apajuin see tajai, yaunchkek tudau achikam batsatutijum Jesucristo pachisa jintiamu antukjum, dekas anentaimin

wakejusjum umijin waigkujum nuadui. ¹⁸ Tudau takatnum achikbauwa nunin batsatutijum agkanmitkamu asajum, pegkeg aina nunak takau atajai tumamiuwaitjume, nunikjum pegkeja duke takaakjum batsatjume.

¹⁹ Nunak atum kakajus antumainchau asagmin apattsan shiig antukt-inme tusan tajime. Yaunchkek atumi iyashmik pegkegchau nuigtú tsumain aina nuanui takamtikajakuitjume. Tujash yamaik atumi iyashmik pegkeg takat aina nuanui takamtikakjum pegkeejum pujustajum.

²⁰ Atumek tudau takatnum idaimamsau asagmin, Apajuí pegkejan wakega nunú takagsatajum tumainchau aajakuitjume. ²¹ Tujash ¿wají pegkeja jukiuiwaitjume, yamai datsantan itagtamaina nunú takasuitjum duish? Duka ayatak jatanmag ejetajume. ²² Tujash yamaik atumek tudaunum agkanmitkam Apajuí takajin wajasujum nuadui, pegkee pujakjum pujut tuke atina nuwi jegantinaitjume. ²³ Tudauk Apajuiyai datumkagtawai; untsu Apajuí anenjauch sujama duka iina Apuji Cristo Jesusjai ijutkau pujamunum pujut tuke atin juwamua nuuwai.

7

Chicham umiktajum tibuwa nunú nuwenbauwa nujai apatka dekamu

¹ Yatsug aidauh, atumek chicham umiktina duka dekagme. Nuigtushkam dekagme chicham umiktina nunak aents iwaaku puja duke umimaina nunú. ² Ju anentaimitusa diisagmi; chicham umiktina nuanuig nuwa nemakua duka aishi pujaigkik tikichnumag nemamaitsui, untsu aishi jakamtaig chicham umiktin tawa nuig agkan juwawai tawai. ³ Nunin asantai aishi pujaig tikichjai nemakug ekagmawai, untsu aishi jakamta chicham umiktin nuwenbaun pachis tawa nunak agkan wajasú asa, tikich aentsnum nemakush ekagmatsui. ⁴ Mina yatsug aidauh, atumesh numamtuk Cristujai ijunkujum niijai jakauwa numamtuk wajasjum chicham umiktina nuig agkan wajasuitjume, nunikjum yamaik Cristo jakaunak Apajuí inankiuwa nujai ijunjajum pujagme, nuniau asajum Apajuí pegkejan wakega duke takagmain wajasugme. ⁵ Yaunchkek iina iyashí pegkegchau takatan unuimatjauwa duke takajakuitji, nuniajin chicham umiktina nunú nuní nagkaemas pegkegchau takatnum dekamtijamauwai, dutijamantai nunú takainaku jatanum jegantuitji. ⁶ Tujash yamaik chicham umiktajum tibuwa nuanuig jakauwa numamtuk wajakaju asaja, agkanmagawaitji achikbauwa numamtin aajakuitag duka. Nunin aajakuti yamaik Wakani Pegkeji yaimpasmatai yamajam pujuta nu jukiui asaja nujai Apajuik takajuinaji yaunchuk chicham umiktajum tibuwa duka idaiku.

Tudau minai pujugta nunú

⁷ Nunin asamtaig ¿chicham umiktina duka tudauwai tumainait? ¡Duka makichkish nuninchauwai! Chicham umiktina nunú atsauguig wika tudauak dekaachu amainaitjai, nuigtushkam tikichdau pegkegchau anentai egketua wakejuta nunash chicham umiktina nu tachakuig dekaachu amainaitjai. ⁸ Tujash tudauk, nunú chicham umiktin tawa duka ashí tikichdau wainká pegkegchau anentai egketua wakejut minai awa nuna dekamtijauwai, wagki tudauwa duka chicham umiktina nu atsuitaik jakauwa nunin wajas au samtai. ⁹ Wika yaunchkek chicham umiktina nunash dekatsuk pujujakuitjai; tujash chicham umiktina nuna dekakman wi shiig tudauwaitag nuna dekagmamauwaitjai. ¹⁰ Tuja chicham umiktina nu, pujutnum ejetumaina nuna megkaetanum ejetiuiwai, ¹¹ wagki tudauwa

duka chicham umiktin tawa nujai tsanujug jatanum ejetiuwai. ¹² Aaja dekainaji chicham umiktina duka pegkegma nu, nunin asa umiktin aina dushakam pegkegmai nuigtushkam pegkejai, pegkeg aidau takastinun tau asa.

¹³ ¿Tujash nu iman pegkejaitkush, wagka minash megkaetanmash ejetiuwaita? Duka nuninchauwai. Nuninaitak tudauwa nu, pegkeja iman wajas megkaetanum ejetiuwai dekas tudauwa nuna iwainmamkata tau asa. Nunak chicham umiktin tawa nuwish shiig pegkegchauwa nuna iwainmamkatatus nunikui.

¹⁴ Nunin asamtai dekainaji chicham umiktina nunak Apajuí Wakaní jintintuam Moisés agajui dutikamu asa pegkejai, untsu wika ju nugkanmaya asan kakaakchawaitjai. Nunin asan inak apujin umijama numamtuk tudau umijag nunak dutiktsukek idaimainchau dekaapejai.

¹⁵ Wika dekamain dekapeatsjai, wi wakegamujua nuna takatsuk, dekas wi dakitamujua nuna takaag dui. ¹⁶ Nuniau asan wi dutikag nunak dakitamujua nuna takau asan, chicham umiktina duka dekas pegkejapita tajai. ¹⁷ Nuadui wichauwaitjai dekaskenum pegkegchaun takaunuk; minai tudau ajuta nu takamtijakui nuniajai. ¹⁸ Nunin asan wika mina iyashig kakaakchauwa nuwi makichkish pegkejak atsugta nunak shiig dekagmamjai, wagki pegkeja nuna takastasan wakegayatkun takamainchau dekaapeau asan. ¹⁹ Pegkeg takastasa wakegamua nunak takatsuk, pegkegchau dakitamujua nuna imá takaajai. ²⁰ Tuja wi dakitamujua nuna takaaknuk, wi takaakun nuniatsjai, minai tudau ajuta nu takamtijakui nuniajai.

²¹ Dutijau asamtai pegkeja nuna takastasan wakegayatkun, pegkegchau ajuta nuna chicham umiktina nuwi dekagmamjai. ²² Nunak mina anentaijui chicham umiktin Apajuí sujamsamua nu umiktasa wakegamu ajutu asamtai. ²³ Tujash mina iyashjui umigmajin ajuta nuna wainjai, duka mina anentaimtajuig pegkeja nuna umigkata taig dakitmitkajak, mina iyashjui tudau ajuta nu achigkauwa nunin eti ajuta nuuwai.

²⁴ ¡Wajukawajak tajai! ¿Ya agkanmitkagmainaita mina iyashig pegkegchaun takamtijak megkaetanum eta nuanuish? ²⁵ Apajuin see tajai, ina Apuji Jesucristun awetugma agkanmitkagmauwa dui. Inagnakun tajime: Apajuinu chicham umiktina nuna mina anentaijuig umigkata tajai; tujash mina iyashig tudau takatan unuimatjauwa dui idaimainchau dekaapejai.

8

Wakaní Pegkeji wakega nunisaik pujamu

¹ Tujash yamaik Cristo Jesusai ijutkau pujuina duka suwimak jumainuk shiig atsujuinawai. ² Wagki Cristo Jesús umijuinaku pujuidautinak Wakaní Pegkeji pujutan sujamas agkanmitkagmawajui tudaunum pujuidautin nuigtú megkaemaina nunashkam. ³ Moisés chicham umiktinun tibauwa duka makichkish umimainchau aajakui, ina iyashí pegkegchau unuimatjau asa kakaakchau asamtai. Nuniamun Apajuí niina Uchijin aentstí iyashí tudauwa nunin ema awemauwai, ni tudaunum mantamnati tusa. Aatus Apajuik tudaunak depetkauwai Cristo iyashí kakaakchau wajasuwa nujai. ⁴ Nunak chicham umiktin pegkeja nuna imatiksag umiinak iyash unuimatjamua nuna batsamtutsuk, Wakaní Pegkeji wakega nunisag pujustinme tusa dutikauwai.

⁵ Wagki iyash wakegamua nunak takaa pujuidauk, nunak anentaimtin ainawai; untsu Wakaní Pegkeji wakega nunisag pujuidauk, Wakan wakega nunak anentaimtin ainawai. ⁶ Nunin asa iyash wakegamua duke takaa pujamak megkaetanum ejekagtawai; untsu Wakaní Pegkeji wakega dutiksaik takamak pujutnum ejekagtawai nuigtú shiig agkan pujutnumshakam. ⁷ Aents iyashí wakega nunak takastatus anentaimtú pujuidauk, Apajuí shiwaji weenawai, wagki Apajuí chicham umiktajum tibauwa nuna dakituidau asag, umitnash umimainchau asag. ⁸ Aents iyashí wakega nunak takaa puja duka, makichkish Apajuinak shiig awagmamaisui.

⁹ Tujash atumek, iyashim wakega nu takaakjumek pujatsjume, Wakaní Pegkeji wakega nu takaakjum pujagme, Apajuí Wakaní Pegkejin sujamsamua nu atuminish pujugtamú asamtai. Untsu Wakaní Pegkejin Cristo sujama nu atsugbau aidauk Cristunuchu ainawai. ¹⁰ Iina iyashí tunamaju asamtai jakatin atí tibau aigkish, Cristo atumiin pujau asa wakannash pujutan suwawai, Apajuí pegkeg ainagme tujabiu asamtai. ¹¹ Jesús jakaunak Wakan inankiuwa nu atumiin pujau asa, nigki Cristo inankiuwa dutiksag yamajam pujutan susatnai iina iyashinash, Apajuí Wakaní Pegkeji sujamsamu atumiin pujugtamjum dui. ¹² Aatus asamtai yatsug aidauh, ii dutikmaina duka ajutjamji, tujash duka iina iyashí wakega nu takaaku pujuta duchauwai. ¹³ Jutii iyashí wakega duke takaa pujuinakuik, tuke megkaekatin ainaji; untsu iina iyashí wakega nu Wakaní Pegkeji yaimpasmatai idaiyutik, Apajuikai tuke pujustin ainaji.

¹⁴ Ashí aents aidau Apajuí Wakaní takamtijusti tusa idaimamaidauk, Apajuú uchijí ainawai. ¹⁵ Atumek wakan inajatak waitkagkagtina nu jukichuitjume ataktú sapig batsamtita tusagmek, Wakaní Pegkejiya nu Apajuú uchijí etamkaju asamtai. Nunú Wakan ichachtamkui: ¡Mina Apajuú! tuinaji. ¹⁶ Nunú Wakania duke iina wakaninash dekamtikawai, Apajuú uchijí ainagme tusa. ¹⁷ Apajuú uchijí asaja, Apajuú ii jukitnun anagtabauwa dushakam jukitnaitji Cristo jukitna nunisaik; dekaskenum Cristo waittsauwa nunisaik waittsajaik, niina imanjiya nuwish niijai pujutnaitji.

Apajuú anagtamamua nuwi kajintsá pujuidau asaja ichichmamja batsatainaji

¹⁸ Ju nugka jui yamai waituinag duka wainkayai, Apajuú atak pujut dekas imanun amastina nujai apatkaish tumaisui. ¹⁹ Ashí Apajuú najankamu aina duka shiig senchi wakegas dakainawai, tsawan jegatai jutii Apajuú uchijí aidautin ashí wainainamunum iwaintamkatna nuna wainkagtatus. ²⁰ Wagki ashí najankamu aina duka dekaskenmash wajuku atí tibauwaita nunak megkaekaju asag wainak juwakajui, nunak dita wakegainak nunikhajui, Apajuú aatus nuniktinme tibau asa nunikajui. Nunak Apajuú makichik tsawantai yapajiatin asa dutikauwa nuna dakainawai, ²¹ wagki duka besekú asag jinín waigkajui, nuniku asag inaku waitkatai wajas awa nunú Apajuú imanjiya nujai niina uchijí aidautin agkanmitkagmatna nujai betek, ditashkam agkanmitkam agtin asamtai dutikamui. ²² Duka dekainaji yamaiya juikish ashí najankamu aina duka, najaimaku ejetayama imatuinak nuwa uchin uchigmaktatus najaimama imanina duka. ²³ Tujash imá ditakek waituinatsui, jutii Apajuú amastina nu jukitin asaja emtika Wakaní Pegkeji jukiu aidautishkam waituinaji, niina uchijí aidautin agkanmitkagmatna nu dakainaku batsamsaja. ²⁴ Nunú dakamu

ajutjama duka uwemkau asa nuninaji. Nu dakaku pujuinag nu jukiu ainakuik, jukitnap ainaji tusaik dakaak pujumaitsoji. ¿Ya jukiuwaitkush dakakush pujumainaita? ²⁵ Tujash dakainag duka ii wainchamua nu dakainaji, nuniau asá emamkesa dakainaji.

²⁶ Antsag Wakani Pegkejishkam ii kakaakchaw wegajinish yaimpaji, wagki Apajuish wajuk aujmainaita duka dekachu asajin; tujash Wakani Pegkejiya nu jutiin pachipas Apajuin aujtugmawai, anentai senchi idajka tumainchau dekapeajinchakam. ²⁷ Tuja Apajuik aentsú anentain shiig dekagna ibau asa, Wakani Pegkejish wajina tawa nunak shiig dekawai, wagki Apajuí wakega dutiksag niina aentsji pegkeemtikamu aina nuna segatu asantai.

Jesucristo anempau asa ashí utugchatan depetkatnume tusa yaimpaji

²⁸ Dekainaji Apajuí aneen aidautinak ashí iina waji nagkaetamainawa duka pegkegnun yayjata nu. Nunú aidautik ni Apajuí wajuk dutikatjaji tawa dutiksaik untsukbau ainaji. ²⁹ Wagki ni yaunchuk emtika wainkamuji ainag nu aidautin etegtamjauwai mina Uchig Cristua imanuk atinme tusa, dutikau asa ni yachi kuashat aina nuig ni iwai atí tiuwai. ³⁰ Nunú yaunchuk midau atinme tibau aina nu untsukbau ainawai. Nunú untsukbau aina nuna, pegkeg ainagme tiuwai. Pegkeg ainagme tiuwa nuna, wijai pujuinak eme anentai agtinme tiuwai.

³¹ ¿Nuna tajim nuanuish tu tumainaita? Apajuí iina wait anenjama nu jutiijai awa nuniaish, ¿ya pegkegchaush awajtamainaita? ³² Apajuí niina Uchijinakesh sujijamtsook ashí aents aidau tudaujin mantamnati tusa awetugbauwa ibaush, ¿wagkag ni Uchijin ashí wajiin susatna dutiksag iinash amaschagti? ³³ ¿Ya Apajuí etegjamu aidautinash bakugmamainaita? Makichkish atsawai, wagki Apajuiya duke iina pachipas juka pegkeg ainawai tujamu asantai. ³⁴ ¿Ya suwimkanash amamainaita? Makichkish atsawai, wagki Cristo Jesusai jutiiní mantamduwa duka, nuigtushkam nigki nantakiuwa dushakam, nunik yamaik Apajuí untsujin ekeemas iina segatjama dushakam nigki. ³⁵ ¿Ya Jesucristo iina anempa nunash datumtamainaita? Makichkish atsawai. Waitiamukesh, utugchatkesh, waitkagmainakugkesh, yapajamukesh, mamuamukesh, ishamainkesh, mantamata tuinakugkesh datumtamaitsoi. ³⁶ Dutiksag Apajuí chichamen agagbauwa nuwi jutiin pachipas:

“Apajuiyah, jutiik aminu asaja, tuké puyatjumainnum pujuinaji mantamata tuidau asagmatai;

uwig mautainum juki ematiama numamtuk awajtamainawai”, tawai.

³⁷ Tujash ashí nunú aidanmag Jesucristo anempak dutikauwa dui ashí depetmamu ajutjamui. ³⁸ Wika junak shiig dekau asan tajai: Jaamukesh, iwaaku pujamukesh, ángel aidaukesh, dekash wakan pegkegchau aina nuna apujgkesh, wakan senchigtin aidaukesh, ii yamai pujag juiyagkesh, atak atina dukesh, ³⁹ agkajunum batsamas inamin aidaukesh, nugká initken batsamas inamin aidaukesh, nuniachkush ashí Apajuí najankamu aina nuiyagkesh, Apajuí jutii anempamujin ii Apuji Cristo Jesusai iwain-tugmakua nuna datumtamainuk atsawai.

¹ Cristun dekaskeapi tinu asan waitjutsuk dekas tajai, Wakaní Pegkeji mina anentaimtija dushakam dutiksag tujutu asantai duka dekaskeapi tau asan, ² shiig kuashat wake besemag dekapeakun anentaijun tuke idagmasnuké ajai. ³ Nunimainaitkuig wi Cristui kanakan suwimkan jukitjai tumain dekapeakai, aaja nuniamash mina yatsug aidaush wait anentam amainaitkuig. ⁴ Ditak Israel aajakua nunú weantu asag Apajui etegkamu ainawai, dutikau asa Apajui niina imanjiya nuna iwaintukajui, ditajai Apajui chichaman apakui, chicham umiktinun Moisés agajua nunashkam susauwai, wajuk emematjiti tusa wakegawa nunashkam shiig ujakajui, aikasag kuashat yaigtinaitjime tusa anagkuauwai. ⁵ Ditashkam ii muunji Apajui etegkamu jutii uyujtamkatin aajakajua nu weantuk ainawai. Nunú ii muunji aajakajua nuwi Jesucristuk egkemak aentsmaga akiinawai. ¡Cristui ashí wájí aina nuna diyauk, niyai Apajui, nigki tuke ememattai atí! Aatus atí.

⁶ Apajui tibauwa duka mina pataag dekaskeapi tuinachu asantai umintsuk juwaktin asagkesh aniatsui, wagki ashí Israel weantu ainag nuiyatik ashí betek etegjachbau ainag dui, ⁷ nunisag ashí Abraham weantu aina nuiya aidautik, ashí betekak Abraham a uchijig ainatsji, wagki juna Apajui Abrahaman chichajak: “Ame weantu aidauk Isaac akiiamua nuiya agtinai”, tiuwai. ⁸ Jui dekainaji, ayatak Abraham weantu ainag dukik Apajui uchijí tama amaitsug duka, Apajui anagtabauwa nuna dekaskeapi tuina nunú dekas Abraham weantu ainawai. ⁹ Apajui Abrahaman anagkuak tiuwa duka juuwai: “Tikich mijantin ataktú tajuattajam dui, Sara uchijí ajittawai”.

¹⁰ Jushakam anentaimtustajum, iina muunji Isaac aajakua duke aajakui Rebeca jimagma uchigmakbau aajakajua nuna apají, ¹¹ tujash uchik eke akiinainatsaig, pegkegnash pegkegchaunash takainatsaig, Apajui wajak dutikatasaya anentaimtus etegkauwita duka nunisag atí tau asa takasbaujinak diigtsuk, ¹² Apajui Rebecan tiuwai: “Iwaiya nunú ekeuwa nuna umigkatnai”, tusa. ¹³ Dutiksag agagbaunmash: “Jacopan aneakun, Esaunak dakitajai”, tawai.

¹⁴ Juna taja juka Apajui pegkegchau takaakuap aniawa tumaitsui, nigka makichkish pegkegchaunak takachui. ¹⁵ Apajui Moisesan chichajak: “Wika, wi wakegamujun wait anenjatnaitjai”, tiuwai. ¹⁶ Nunin asa, aents eteguati tusa wakegaidau asamtaigkish, nuniachkush niina shiig awajkatatus senchí kakanmamu asamtaigkish etegkeatsui; Apajui nigki nagkami ni aents wait anenjata tabaujiya nuna wait anentawai. ¹⁷ Nunin asantai Apajui chichame agagbauwa nuwi Faraogkan chichajak: “Wi aminak apu emamjame, aminí mina senchijun iwainakmatai ashí aents nugkanmaya aidaush mina dekajuatneme tabaunum”, tibau awai. ¹⁸ Nuadu Apajui ni wakegamun wait anentawai, tuja aents intimkiti tusa wakegakush dutiksag intimtikawai.

Apajui judío aents aidaun tuja judiochu aents aidaunash wait anentawai

¹⁹ Tujash atum tujutmainaitjume, nunin aish: “¿Wagka Apajuish aents aidaunash pegkegchau aniagme tumainaita, Apajui wakegak dutika nuna makichik aentskesh aikawaipa tumainush atsa aniaish?” ²⁰ Nunin tautigmin tajime: “¿Amesh ya iman asame Apajuish wagka aikame tumainaitme?” ¿Ichinak najanamush, najankagta nuna pempeentukish: “Wagka juní najatuaume”, tumainkaih? ²¹ Aents duwen takauwa duka,

ni wakegamujin diisá najanmainai, nunú duwea duik amamuk fiestatin takastinun najanak, tikichnak ichinak ashí atsumamunum takastinun najanmainai.

²² Nunin asa Apajuishkam ni kajeamujin senchijiya nujai iwainakta tau asa shiig senchi emamkes katsunjauwai, nunú aidauk suwimkan juinak megkaetanum wegagtina nuna. ²³ Nunisag jutiin wait anenjamjauwa nunash iwainmamkauwai, nunú aidautik Apajuí yaunchuk nagkamas emtikak niina imanji tuke atina nuwi pujustinme tusa etegjamu ainaji.

²⁴ Dutikamu aina nuiyag jutii ainaji. Tujash imá judiotikek ainatsji, atum judiochu aidautigmesh ainagme. ²⁵ Juna pachis yaunchuk Apajuí tiuwa nuna, profeta Oseas agagbaunum:

“Yaunchkesh mina aentsjuchu aajakú aidaunash: ‘Mina aentsjuitme’ titinaitjai,

duikish aneeshtaijua nuna: ‘Mina anetaijú’ titinaitjai”, tawai.

²⁶ “Nuanuig junashkam tawai:

‘Atumek mina aentsjuchu ainagme’, tiuwa nu nugkanmag batsatunak makichik tsawantai:

‘Atumek, Apajuí tuke pujuuwa nuna uchijí ainawai’ tama atinaitjume”, tiuwai.

²⁷ Nuigtushkam Isaías Israel aidaun pachis: “Israelan uchijí weantu aidauti shiig kuashat nayantsa kaamatkajiya ibau ainakuishkam, ayatak wajumketi ayamjuka uwemtikjamu agtinaitji, ²⁸ wagki Apajuik, ni tibaujiya nunak wamak ashí nugkanum umiktatui”, tiuwai. ²⁹ Nunak Isaías yaunchuk agagbauwa nuwish:

“Apajuí ashí senchigtina nu,

iina muunji aajakua nuna wait anenjachuitkuig,

nu weantu aidautik yamaikiuchia juik Sodomamaya aentsun,

Gomorranmaya aents aidaujai ijinauwa numamtuk awajam amainaitji”, tawai.

Apajuí dutikamua nuwi dekaskeapi tuidaun Apajuik pegkeg ainagme tawai

³⁰ Nuna tajim nuanuish ¿wajinmainaita? Judiochu aina duka Apajuí eemtin pegkeg atasag kakanmamchayatak, Apajuí dutikamujiya nuwi dekaskeapi tuidau asag pegkeg diyam asajui. ³¹ Tujash Israel aina duka, chicham umiktina nuna umiinak Apajuiyai pegkeg wantinkagtatus kakanmamainakush igkugchajui. ³² ¿Tujash wagka nunash nunikajuita? Nunak Apajuiyai dekaskeapi tutsuk dita takasbaujiya nujai Apajuí eemtin pegkeg diyam atag tukamag nunikajui. Nunidau asag kaya tukuumaina numamtuk wajakajui. ³³ Nuna pachis Apajuí chichame agagbauwa nui:

“Wi Sioignum* apusattajai makichik kaya muuntan.

Nunú kaya nunak kuashat aents tukumak iyajagtinaí.

Tujash niini dekaskeapi tauk,

makichkish wainkag juwakchatnai”, tawai.

10

Apajuik ashí aents Jesucristui dekaskeapi tuina nuna pegkeg ainawai tawai

* 9:33 “Sioignum” tawa duka: 1. Jega Apajuí ememattai Jerusalén aajakua nuna tawai. 2. Yaakat Jerusalegran pachisashkam tawai.

¹ Yatsug aidauh, mina anentajui wakegag nunak, Israel aidauh uwem-jatnume tau asan Apajuinash aujtuinajai. ² Wika ditanak shiig wainin asan tajai; ditak Apajuinak shiig senchi umigkagtatus wakegainawai, nuninayatak Apajuinu dekaskea nuna shiig dekainatsui. ³ Ditak shiig dekainatsui Apajuí aentsun pegkeg ema nunak, nunidau asag ditak kakanmaminawai Apajuí pegkeg diyam atajai tuidau asag, ⁴ wagki Apajuí chicham umiktajum tibauwa duka Cristo tauwa dui nagkamas nagkankauwai. Yamaik Cristo dutikauwa nuig dekaskeapi tabaunum pegkeg ainagme tujamji.

⁵ Pegkeg takaamua nunú chicham umiktina nuwi tibauwa nuna Moisés agak: “Aents chicham umiktinum tawa nuna imatiksag umiauk, nunú umiamua duwik tuke pujutnai”, tawai. ⁶ Tujash Apajuí dutikamua nuna dekaskeapi tuidaun pegkeg diyam nuna pachis agakug tawai: “Makichk-itigmekesh wainka anentaimesajum: ‘Yaki nayaimpinum waka’, tiigpa-jum”. Nunú aaja tuinakuik, “Cristo yaki pujau wajuká nugká itawagmi”, tumaina nunin asamtai. ⁷ Nuniachkugmesh: “Yaki jakau batsamtain akaikia tiigpajum”, tawai. Nunú aaja anentaimainakuik, “Aents jakau batsamtainum Cristo pujau jegaji, juki iwakagmi”, tumaina nuninai. ⁸ Nunin asamtai junashkam: “Chichamak tikijuch atumi wenimin, atumi anentaimin ajutjamjume”, tawai. Nunin asamtai dekaskeapi tabauwa nu pachisa chichamak etsegnawai. ⁹ Ame wenimin chichamak: Jesusak mina Apujui takum, anentaiminish Jesús jakauwa nunash Apajuiyap dekas inankiuwaita takumek uwemjau atatme. ¹⁰ Wagki anentainum dekaskeap nunikuita tabaunum pegkeg ainagme tama ainaji. Tuja, iina wenin chichaká Jesusak mina Apujui tabaunum uwemtak junawai.

¹¹ Aikasag Apajuí chichame agagbauwa nuwi: “Ashí aents niini dekaskeapi tauk makichkish wainkag juwakchatnai”, tawai. ¹² Wagki nunak judío aidautin, griego aina nunashkam betek taku tawai, wagki Apajuik makichkiuchi ashí aents aidau Apujiya duka, nunin asa ashí ya niina segawa nunak shiig anentus yayawai. ¹³ Duka agagbau: “Ashí aents Apu Jesucristun uwemtijugta tusa segauk, uwemjagtin ainawai”, tawai. ¹⁴ Tujash, ¿wajuk segatnumki uwemtijugta tusash, dekaskeapi tuinachush? Tuja ¿wajuk dekaskeapi tiagtigki, ni pachisa etsegbaunash antukchaju aidaush? ¿Nuwigtush wajuk antuktinmegki niina pachis etseju atsa aniaish? ¹⁵ ¿Wajuk etsegkatnumki etsegkata tusa awemachbau aidaush? Apajuí chichame agagbaunum: “Tikima shiig pegkejai, yamajam chicham pegkeja nuna pachis etsejak taa duka”, tawai.

¹⁶ Tujash aents yamajam chicham etsegbau antukaja nuiyag ashí betekak dekaskeapi tuinatsui. Nuna pachis Isaías: “Apuh, ¿ya ii etsegbaunash dekaskeapi tuinawa?”, tiuwei. ¹⁷ Nunin asamtai dekaskeapi tabauwa duka, chicham etsegbau antukbaunum nagkamnawai, nunú chichama duka Cristo chichame pachisa etsegna nuuwei.

¹⁸ Tujash wi iniaastajime: ¿Nunash dekaskek antukamnash antukchaju asajag antukchaw iniaastajime? ¿Dekaskenum antukaju ainawai! Wagki Agagbaunum chichaak:

“Chichamak ashí nugkanum etsegkamui”, tawai.

¹⁹ Ataktushkam iniaastajime: ¿Dekaskek Israel aidauh dekaachu aina? Duka nuninchauwai. Dekatkauk Moisés Apajuí tama iina pachipas:

“Wi atumnak akasbau emattajime mina aentsjuchu aina nuna yayaakun,

tuja atum aents imanchau diyajum nuna yayaakun kajentikattajime”,
tiuwai.

²⁰ Dutiksag Isaiaschakam wakejus chichaak:

“Aents mina egatú wajakchau aidau, waitkaju ainawai.

Tuja aents mina pachitus inimjutú wajakchau aidaunum, iwain-
mamkauwaitjai”, tiuwai.

²¹ Junashkam Israel aidaun pachis:

“Ashí tsawantai dakasjai

mina aentsug intimkiu, ai aimtau aina nuna yaigtasan”, tiuwai.

11

Israel aina nuiyan niini dekaskepí tuidaun Apajuí etegkauwai

¹ Yamai juna tajime: ¿Apajuish niina aentsji Israel aidaunash idaisau asag tawa? ¡Duka nuninchauwai! Wagkí witjai Israel weantunuk Abraham weantu asan Benjamín aajakua nunú weantunuk. ² Apajuik jutii Israel aidautinak yaunchuk, juka midau atinme tusa etegtamjau asa, ni aentsji aidautinak idaitamsachui. ¿Atumek eke dekatsjumek Apajuí chichame agagbaunum, Elías profeta aajakua nu, Israel aents aidau pegkegchau dutikamujin Apajuin ujaak: ³ “Apuh, chichamjumin etsejin aidaunak ashí kajekgag, ame altarjumnash yumpuajag, wiki juwakmatai minashkam mantuatatus aintuinawai”, tiuwa duka? ⁴ Tama Apajuí ayaak: “Wi siete mil aents mina umigtin aidaun ayamjukan uwemtijajai, apajimtai Baal tutaya nuna eme anentus tikishmatug emematchaju aidaun”, tiuwai. ⁵ Yamaishkam nunisag ujumak Israel weantu aidau Apajuí wait anenjamag etegjamu aidauti juwakji. ⁶ Nunú wait anenja etegjamu aidautik, jutii pegkeg takasbaujinig etegjamu ainatsji, wagki aents pegkeg takasbaujin diígsá etegtaiyaitkuig, Apajuí wait anenkagtutajig atsumainai.

⁷ Nunin asamtaish ¿wajintu anentaimtumainaitji? Israel aidautik egakuitag nuig jeganchau ainaji; tujash ujumak Israel weantu aidauti Apajuí wait anenjamag etegjamu aidautik, uwemtak jukiu ainaji. Nuniajin tikich aidauk utujimag juwakajui. ⁸ Apajuí chichame agagbaunum:

“Apajuí, Israel aidaunak

ditá wakaninia egamujinak

anentaimtuja dekaachmin emakui,

dutikamu asag yamaikish nuninuk ainawai,

jiinish wainmachua nunin,

antuinakush antakchauwa nunin atinme”, tawa nunisag.

⁹ Aikasag Apu David aajakua nu agagbaunmashkam:

“Dita shiig aneastasa fiestamainamua duke ditanak,

iwagtukbau dawenum jigká emetmaina numamtuk awajkatnume.

Nuniachkush suwenum jigká maumaina numamtuk wajainak suwimkan
jukitnume.

¹⁰ Jiinish bushapaju asa

shiig wainmatsama numamtuk

wajaktinme,

tuntupenish

aents kijinun yanakí punus wekaemaina numamtuk

tuke waitin atinme”, tiuwai.

Apajuí judiochu aidaunash uwemtikui

¹¹ Yamai juna tajai, ¿Israel aidautin pachipas kaya tukumká iyautiama numamtuk wajakaje tawa nunash, nunisag juwaktin asamtaig tawa? ¡Makichkish nuninchauwai! Nunak Israel aidau chicham umiktinun umikchagmatai judiochu aidau uwemtan jukitnime tabaunum nunikajui, nuniagta Israel aidau akasmatjitnime tawai. ¹² Nunú mina pataag aidau intimkimunum, Apajuí ashí aentsun pegkegnum yaitan nagkabauwai. Dutikau asa: ¡Dekaskenum mina pataag aidau ashí Apajuin umijiagtaik, aan nagkaemas pegkegnum yaigtinai!

¹³ Nuadui atum judiochu aidautigmin tajime: Apajuí minak judiochu aidau chicham ujaktá tusa etegka awetiuiwai. Nunin asamtai wi takaag junak, eme anentsan diiyajai. ¹⁴ Wi judiochu aidaunum aatus takaamun wainainak, mina pataag aidaush Apajuí akasmatchajaintash nuninak wajumkesh uwemjatnime tusan wakegajai. ¹⁵ Dutika judío aidau idaisamua dui ashí aents aidau Apajuijai epegtuniawaju ainawai. Aikasag mina pataag aidaun Apajuí ataktú niina aentsji emaktina duik jakau ataktú nantamaina numamtuk awajkatnai. ¹⁶ Pag najanayasa nagkamku nanegbauwa duka, Apajuinu atí tusa pegkeemtikamu asa, ashí nanegbauwa dushakam pegkejam ainawai; antsag ajak Apajuinu atí tusa pegkeemtikamu asa, kanaweshkam pegkeemtikamu ainawai.

¹⁷ Tuja Judío aidau ajak olivo tutaya nunin aina nuna kanawe ujumak tsupigbauwa nuwi ikamia olivo kanawe jukí dekas ajaknum ikakmau asa, nuna kagkapienai shiig pegkejan juwa numamtuk Apajuí awajtamkaje atum judiochu ainajum nuna jutií judío ainag nujai. ¹⁸ Dutikamu asajum judío aidau ajakan kanawega numamtin aina nu imanchau diyakum ememaigpa. Tuja atum eme anenmamkugmek, adeagtajum, kanawega duka niina pegkeginak kagkapienak inagkeatmaitsui, kagkapega nuuwai pegkegin kanawen inagkeata duka, numamtuk atumnash awajtamkajui.

¹⁹ Atum anentaimsagmek: “Tujash Apajuí judío aidaunak ajaka kanawe tsupika ajaptayama numamtuk ditanak awakajama, jutiin ajaknum ikamaina numamtuk awajtamkata tau asa”, tumainaitjume. ²⁰ Dekaske, ditak Cristo dekaskeapi tachamunmag dutikam asajui, tujash atumek ni dekaskeapi tabauwa duik uwentikamu ainagme. Dutikamu asajum emematsuk dekas ayatak puyattsá anentaimtumastajum. ²¹ Wagki Apajuí judío aidau ajaka kanawega numamtin aina nuna tsagkujachua nunin asa, aminashkam tsagkugtamjashtatui. ²² Anentaimsajum diistajum, Apajuik shiig pegkejai nuigtushkam ni tibaujinash uwaechauwai. Iman asa judío aidau tupanjam ni tibaujinak imatiksag umiak idaisauwai. Nunin asamtai atumek ni wait anenjamu asajum nunisjume pujumainaitjume, nu nunishtaik atumnash idaitamain asamtai. ²³ Tuja judío aidaushkam dita dekaskeapi tuchataijiya nuna idaiyagtaik, numí kanawe tsupika ajapamu jukí duik aajakbaunmag ikamaina numamtuk awajkagtinai, Apajuik senchigtina ibau asa. ²⁴ Wagki atumek yaunchkek ikamia olivo aina numamtin aajakuitjume, nuninaitkujum kanawe tsupika jukí dekas ajak olivomash ikamainchau aig ikamaina numamtuk awajkamú ainajum nuniaish, ¡wagkag dekas judío aidau ajak olivoa numamtin aina nunash ataktú yaunchuk aajakbaujin ikamaina numamtuk awajkashti!

Apajuí niina aentsji Israel aidaunak uwemtijatnai

²⁵ Yatsug aidauh, Apajuí dutikatnuji dekaachbau aajakua nu dekaatajum tusan wakegajai, wainkajum yacha iman anenmamkujum ememá yujaijum tusan. Israel aina nuiya ujumak antumtikmainchauh juwakaje,

duka nunisag batsamsag ashí judiochu aidau niini wayawagtina imanui jegantagtinai. ²⁶ Nu nunikmatai ashí Israel aidaunak Apajuí uwemtijatnai agagbaunum tawa dutiksag, duka:

“Agkanmitkagtinuk Sión yaaktanum taa,

Jacopa uchiji weantu aidau pegkegchaujina utsankatnai”.

²⁷ “Wi ditajai chichaman apaktinaitag duka, ditá tudaujin tsagkujatnaitag nu atinai”, tawai.

²⁸ Nunin asag judío aidauk yamajam chicham etsegbauwa nuna dakituidau asag Apajuí shiwaji ainawai. Nunak atum uwemjatnume tabaunum nuninawai, tujash Apajuik ditanak aneawai, ditá muunji aajakajua nuna mina aentsug atinme tusa etegkauwa dui. ²⁹ Apajuik anentag sukagtusbaujiya nunak atankagtuchui, antsag midau atinme tusa etejamujiya nunash yapajichui. ³⁰ Atum judiochu aidautigmek yaunchkek Apajuí chichameg umigchau aajakuitjume, tujash yamaik judío aidau Apajuí chichamen umiujinachu asamtai, Apajuí atumin wait anenjamjaje.

³¹ Nunisag yamai ditashkam Apajuinak umiujinatsui, nuniagtai Apajuí atumin wait anenjamjau asa dutiksag ditanash wait anenjata tau asa dutikauwai. ³² Apajuik ashí aentsnak umigtukchatnume tusa idaisauwai, nunikagmatai ashí ijumag wait anenjata tau asa.

³³ ¡Anentai jegagmatsui, Apajuí yachajiya duka, nuigtú anentaimtuja dutiktaiya dushakam! ¡Ni takaamujiya nuna anentaimtug etejumainuk makichkish atsawai, tuja ni juní atí tawa nuna, wagkag tawa tusa etejumainush shiig atsawai! ³⁴ Wagki: “¿Ya dekgmainaita Apajuí anentibaujinash nuniachkush ya ju jutikata tusash jintinmainaita? ³⁵ Tuja ¿ya yaunchkesh Apajuinash makichik wajinash susauwaita minash aikasag sujustí tusash?” ³⁶ Ashí najankamu aina duka Ni najankamu ainawai, nunú aina duka ni chichamenig ainawai, nunin asa ashí niinuk ainawai. Iman asamtai: ¡Imá nigki tuke ememattai atí! Aatus atí.

12

Yamajam pujut

¹ Nuadui mina yatsug aidauwah, Apajuí wait anenjamjau asamtai, atumi iyashmia duka iwaku ofrenda pegkejam Apajuinash shiig awagmamaina nunú Apajuí susatajum tusan segajime. Nuuwai dekasenum Apajuí emematjukum dutikmainaitjum duka. ² Atumek Apajuí nemagchau pujuina nujai betekak pujusaigpajum; nunitsuk dekas anentaimtajum yapajiatatum nunitai pujutjumish yapajinau atí, nuniakjum dekattagme Apajuí wakegamujiya nu, pegkeja dushakam, Apajuin shiig awagma nunú nuigtú imagnisa pujuta dushakam.

³ Minak Apajuí wait anenjag chicham etsegkata tujutiuiwa dui ashí atumin tajime: Makichkitigmesh atum wagaakuk anentaimtumigpajum. Duka nunitsuk, dekas maki makichkitijum ebetmamjajum anentaimkau atatum, atumin Apajuí shiig yupichu dutikatnun dekaskeapi tau asagmin sujamsamua nunisjumek. ⁴ Wagki, iina iyashig makichkitak kuashat akanjamu ajawai, tujash nuninaitak makichik takata nunakek takainatsui.

⁵ Nunisaik jutiishkam, kuashat ainayatku, Cristo nemagbaunum makichik iyashia nunin weenaji, nunin asaja tikich aidaujaish pempeentunisaik atsumdayaji. ⁶ Nunin asamtai Apajuí makí makichik niimtin yupichuch takastinun anenjauch sujamsauwa dutiksaik dutikawagmi. Ni Apajuí

tabaujin yupichu etsegтанum susamuk Apajuiyai dekaskeapi tabaujish wajak ajawa dutiksag dutikmainai, ⁷ ni aentsun yain atí tusa Apajuí wakegat susamuk, dutiksag wakegas dutikati. Apajuí yupichu jintinkagtuati tusa susamushkam, dutiksag jintinkagtumainai; ⁸ pegkegnum wakemitkagtina duka dutiksag dutikati; aents atsubaun suwaushkam, shiig aneas dutikati; Cristo nemagnun apuji aidaushkam shiig puyatjus takastinme; aents waitiaun wait anentaushkam aneas dutikati.

Cristo nemajin aidau umimainji

⁹ Tikich aidaujaish dekaskenum pempeentunikjum aneenitajum, pegkegchauwa duka dakitakjum, pegkeja duke wakejusjum takau atajum. ¹⁰ Cristo nemajin aidautigmek pempeentunisjumek aneenitajum, nuniakjum ajantunisa niiniakjum eme anendaitajum.

¹¹ Kakanmamsatajum, ina Apuji wakejusa takagsata tabaunum, dakik aigpajum.

¹² Shiig aneasjum pujustajum atum jukitin dakakjum pujau asajum. Waitiakjumesh emamkesjum katsunjatajum. Apajuí aujut idaisaigpajum.

¹³ Jesucristo nemajin aidau atsumainakuig yaihtajum. Aents amina ijagtamsatatus minauskam, shiig anentsajum jukitajum.

¹⁴ Waitkagmainakuish, pegkegnumak chichagtajum. Pegkegchauk chichagtsuk, pegkegnumag chichagtajum.

¹⁵ Shiig aneas pujaujaig, atumshakam shiig aneasjum pujustajum, tuja buutuidaujaig, atumshakam buuttajum.

¹⁶ Atú atumek shiig ijuntsajum pujustajum, emebau aigpajum, aents imanचाuch aina nujai betek anenmantajum. Tikichin nagkaesau yacha imanuk anenmamigpa.

¹⁷ Pegkegchau awajtamainakuish makichkish pegkegchaunmag iikaigpajum, duka nunitsuk pegkeg aina duke takaakjum ashí tikich aidaush pegkeg iwaintukta tabaunum kakanmamsatajum. ¹⁸ Atumek utugsanuk ashí aents aidaujaish shiig agkan pujusag tusajum kakanmamsatajum.

¹⁹ Aneetaig yatsug aidauh, atumkek iikmakaigpa, Apajuí idaitusta ni suwimkanak susati, wagki Apajuí chichame agagbaunum: “Witjai aents tikichin pegkegchau awagbaun suwimkan suwaunuk, nunin asan aents pegkegchaunak wi suwimkan susattajai”, Apu tiuwai. ²⁰ Nunin asamtai: “Amina shiwajum yapajakuish

yutai ajamsata,
kitamakuishkam umutaish ajamsata.

Ame aajam dutikamin,
amina pegkegchau awajtamin asa datsagtatui”, tiuwai.

²¹ Pegkegchauwa nu depetkamu aigpajum, pegkegchauwa duka pegkeg takaakjum depetkatajum.

13

Apu aidauunum sumimkatajum

¹ Ashí aents aidauk apu aina nuwi sumimain ainawai, wagki makichik apukesh nigki, wi apu atajai tusa apu weguk atsawai. Yamai apu aina duka Apajuí apu emamu ainawai. ² Nunin asamtai nunú apua nuwi sumimtan dakituidauk, Apajuí apu emamu aina nuna shiwagmainawai, nuna nunidauk ditak suwimkanak jumain ainawai. ³ Wagki apu aina duka aents pegkejan takaidau ishamkati tusaik adaikachbau ainawai, untsu pegkegchau takaina nu ishamainawai. Apu ishamkats pujustasam

wakegakmek pegkeja duke takastá, nunitai apu aidaush eme anenjasmas diigmastinme. ⁴ Ditak pegkeja nuna takastinme tusa Apajuí apusamu asag, atumnak pegkegnun yaimpamain ainawai. Untsu ame pegkegchau takaakmek dekas apuk ishamainaitme. Wagki apuk, wainak suwimkan sukagustusi tusaik adaikachbau ainawai. Apajuí pegkejan takastinme tusa apusamu asag pegkegchau takaina nuna suwimkan suwawai. ⁵ Nuadui apu aidaujaig sumitkau amain ainag duka suwimkan sujusai tamawaikik nunimaitsuji, jutiik duka pegkegchau anentaimesa diyam aig tabaunum nunimainai. ⁶ Nuadui apunu kuichik atin tibauwa dushakam dutiksagmek akikmagme, wagki apu aidauk Apajuí takastinme tusa apusamu asag nuna umiinak takaidau asagmatai.

⁷ Makí makichkitijum wajinma akikmamain ajutjamainawa duka betek akikmaktajum. Apunu atin aidaush dutiksagmek akikmaktajum, nuniakjum ajantusjum diyakjum eme anentsajum diitajum.

Pegkegchau takat idaikujum tikichjaish aneenitajum

⁸ Makichik aentskesh diwimkaigpajum, diwimkagtukmesh akikmatskek idaisaigpajum. Dekas pempeentunisaik aneenita nuuwai akikmamainch Chauwa duka, wagki tikich aidaush iik anenmamsa aneamua dui chicham umiktajum tibauwa duka uminu asantai. ⁹ Apajuí chicham umiktajum tiuwa duka: “Tsanijnawaigpa, magkagtuawaigpa, kasamkaigpa, dekaskechuk tikichik tsanumjujaigpa, tikichdauk anentaimtusa wakejukaigpa”, tawai. Nuigtú tikich aidau umimain awa duka: “Tikich aidaush amek anenmamsam aneeta”, tawa nunú imatiksaik umiamunum, chicham umiktinnum tawa duka ashí uminui. ¹⁰ Aents aneenit ajamuk, tikichnak pegkegchaunak takagmatsui. Nuniau asantai chicham umiktajum tibau umiamua duka, aneenita nuuwai.

¹¹ Nunin asantai jujú tawa duka umiktajum. Wagki atumek dekagme Cristo jui taatnuji tsawantak namput wajaschae, jutii dekaskeapi tusa Cristo nemagkau aayag duik imá dukap aayi. Tujash yamaik tsawantak tikima shiig jegawai, Apajuí uwemtijamjatna duka. Nuniau asantai atumshakam kajinkagmek batsamigpajum aneaku batsamsatajum. ¹² Pegkegchau takata duka shiig senchi juikne, nuniau Cristo jui ataktú minitai, kiyag au tsawautai tsaaptin wegama numamtuk wajaktata dusha tikiju wajasé. Nuadui pegkegchau takaakjum suwenum wekaemaina numamtuk wajainajum duka idaisatajum, suntag maaniatin asa uminas aama numamtuk pegkeg takaakjum umintsajum pujustajum. ¹³ Nuadui yamai nagkamsaik tsawai wekaemaina numamtuk shiig kuitamamka pujusagmi. Ijunag yuwinamu wekaetusjum ayatak yuwa yuwakua weakjum nampet batsamtajum duka idaisatajum, iyashnum takanit tunamatja pujugtash, jiyaniit yujagku tikichdau diigsá iish imanuk atajai tukamá kajegkagtutash. ¹⁴ Duka nunitsuk, Apu Jesucristo nemagkaju aidaush wajuk pujumaina ainawa nunisaik pujuinaku, iina iyashí pegkegchau takamtikta dushakam idaisagmi.

14

Yatsut chicham patatmainchau

¹ Cristo nemagna nu dekaskeapi tayatak shiig dekainachu wainkugmesh shiig anentsajum jukitajum, tujash dita anentaimeina nunú pachisjum jiyaniitsuk. ² Wagki, awai aents, ashí yutai aina duka yumainai tuidaush, nuniai tikich Cristui dekaskeapi tayatak shiig dekachu asa ajak dita

ajakmamun yuu ainawai. ³ Nuniau asamtai ashí yutai aidaun tinamag yuwina duka, tikich nuna yuwinachunash dakitmaitsui. Nunisag ashí tinamag yuwinatsu dushakam chichamnak patatmaitsui tinamag yuwina nunak, wagki Apajuí nunú aidaunak ashí niina aentsji emaku asamtai. ⁴ Nunina nuwish, ¿amesh ya asamea tikichi inakega dusha chichamash patatash wekaeme? Apajuyai ni inau asa shiig takataish, shiig takashtaishtumaina duka, wagki ina Apujig senchigtina ibau asa niinig ebetmamjau atinme tusa yaigtatui.

⁵ Nuniai, awai aents makichik tsawantan puyatjus diyau, tikichia nu, tsawantak ashí betekajama tuidaush ainawai. Makí makichik aents aidauk dita tsawantan wajuk anentaimtuinawa nunak dita anentaimtusbaujiya nunisag ebetmamjati. ⁶ Aents makichik tsawantan dekas wagaakua iman anentaimtus dutika duka, dekas Apajuin eme anentus dutikawai. Nunisag ashí tinamag yuwina dushakam Apajuin eme anentus dutikainawai, wagki Apajuin see tusa yuwidau asag. Ashí tinamag yuwinatsu dushakam, Apu Apajuí eme anentamunum yuwinatsui, wagki ditashkam Apajuin see tuidau asag.

⁷ Wagki jutiik iik shiig awagmamkatasaiik pujatsji, jaakuishkam shiig awagmamkatasaiik jainatsji. ⁸ Nuadui iwaaku pujakuik Apu Cristo shiig awajkata tabaunum pujuinaji, jaakuishkam Apu Cristo shiig awagmainaji. Nunin asaja iwaaku pujakuish, jaakuishkam imá Apu Cristunuk ainaji. ⁹ Wagki Cristo maamuitak ataktú nantakiuwa nunak aents iwaaku aina nuna nuigtú jakau aidaunashkam Apuji wajastatus nunikui.

¹⁰ Nunin asamtaish, ¿wagka yatsumish chichamash patatme? ¿Wagka wainkaya nuninush niiniagme? Ashí jutii aidautik Apajuí eemtin tuwaká ajin ni tujamtinai. ¹¹ Wagki agagbaunum: “‘Witjai dekas tuke pujuunuk’ tawai Apu.

Nuadui ashí aents aidauk, tikishmatjuijag emematjuinak: ‘Ametme dekas Apajuimek’, tujutiagtinai”, tawai.

¹² Ashí jutii aidautik makí makichikiti ii wajuk takasuitji duka dutiksaik Apajuí ujaktinaitji.

Tikich Cristo nemajuidau pegkegchau awajkaig tusa kuitamamain (1 Co. 8.1-13)

¹³ Nuadui Cristo nemajin aidautik pempeentunisaikik chichamak patatdaikachagmi. Dekas ayatak kuitamamkatajum, ame pegkegchau diyachu asam takatai, tikich yatsum waipak niishkam dutiksag takakmá tunamaina nunú. ¹⁴ Wika Apu Jesusan nemajin asan, makichkish yutai aina duka pegkegchauwap ainawa tatsujai. Untsu makichik aents ashí tinamjá yuwamuk pegkegchauwai takug, nigki tawai, nuniau asa tinamjá yuwamuk niinig pegkegchauwai. ¹⁵ Yamai juna tajime, ame yuwam nuna waipak yatsum anentaimak waitmainai, nu aaja waitkakmek, duka anejatnum nuniatsme. Ame yuwam nuna pegkegchauwapi tayatak yukamá tunamag megkaemainai Cristo niinish mantamdauwa nunin aig. ¹⁶ Nu atum yuwakjumesht pegkeg dutikajum duka, yatsum Apajuí tupanmain wainkugmek idaisatajum tikich aidau pegkegchau chichagtamkainum. ¹⁷ Apajuik jutiinak ii yuwamun, ii umamun diisag inapatsui. Nigka Wakaní Pegkeji jutii puja nu yaimpasmatai pegkeg takaaku, shiig agkan pujaku, dakujusa pujutnum inajatu. ¹⁸ Juna ashí imatiksag Cristo wakejamun umiidauk, Apajuin shiig awagmainawai. Nunidau asagmatai, tikich aents aidaush pegkeg ainawai tumain ainawai.

¹⁹ Nuniau asamtai ashí tikich aidaujaish shiig agkan pujuta nu egakagmi, nuninaku pempeentunisaik Apajuinu dekatnum yainikagmi. ²⁰ Apajuí aentsnum pegkejan dutikauwa nunú, yutanum utugchat apujmaunum wainkaya nunin juwakai tuidau asaja. Dekaskenmag ashí yutai aina duka pegkeg ainawai, untsu pegkegchauwa duka dita tunamaininji yuwaku Jesucristui dekaskeapi tabauji emegkatmaina nuuwai. ²¹ Nuadui dekas nejek yumaitsume, umutaish nampemain aina duka umumaitsume, makhichish amina yatsum pegkegchau wemainuk, anentaimak waitmainkesh nuigtú kakaakchaunum jegamainkesh dutikawaipa. ²² Ame dekaskeapi tabaunum dutikam nunak Apajuish dekatamui. Nunin asamtai shiig aneasagtinaí aents ni takaamujin bakumamainush atsugbau aina duka. ²³ Tujash utujimaitak yuwa duka, nigki suwimak jumainnak egatmamui, wagki juka tudauk ekagtumaituapi tusa dekaskeapi tabauwai anentaimas yuwachu asa. Ashí ii dekaskeapi tachayatku dutikamua duka, tudauwai.

15

Tikich Cristo nemajuidaush pegkeg diyamu aina duke dutikatajum

¹ Nuadui jutii Apajuiyai dekaskeapi tabaunum ichichmamjau aidautik, tikich aidau Apajuí dekaskeapi tabaunum ichichmamjachu aina nu yaimainaitji, ii shiig aneasta tabauwa duke egatmamtsuk. ² Nuniaku tikich Cristo nemagkau aidaush shiig awajkatasa wakemainaitji, pegkegnum yaigkam, ditash Cristui dekaskeapi tabaunum ichichmamjatnume tusa. ³ Wagki, Cristukesh imá nigki shiig awagmamkatasag wakekachui, duka niini uminkauwai Apajuí chichame agagbaunum: “Apajuiyah, aents amina pegkegchaun chichagtamaina nunak, mina tujutuínawai”, tawa nu. ⁴ Wagki yaunchuk Apajuí chichame agagbauwa nuwi agakbauwa duka, jutiin jintinjamatin asamtai agakbauwai. Nunú chichama nujai ichichmamku, ebetmamsa pujamunum Apajuí dakamuk ajutukagtawai. ⁵ Apajuí ebetmanja pujatan sukagtak ichichkagtina nu atumnash yaimpaktinme shiig anendaisa batsamtanum, Cristo Jesús jintinjamawajua nunisjumek pujusminjum. ⁶ Nuniakjum ashí betek ijuntsajum, Apajuí, iina Apuji Jesucristo Apajiyia nunú ememattajum.

Judiochu aidau yamajam chicham ujakbau

⁷ Nuniakjum pempeentunisjumek shiig anendaisajum judaitajum, Cristo atumin Apajuin ememattinme tujamu asa, shiig aneas jujamkiajua nunisjumek. ⁸ Juna tajime: Cristo Jesusak judío aidautin yaimpaktatus tauwai, Apajuí iina muunji aidaun anagkuauwa nuna umiktatus. Ni nuniak iwainakui Apajuik dekas ni anagkagtuamujinak betek umina nuna. ⁹ Nuigtushkam Cristuk tauwai, judiochu aidaush Apajuí wait anenjamu asag, ditash Apajuin ememattinme tusa; agagbaunum: “Nuadui Apajuiyah, wika judiochu aidaujai ijuntsan amina emematkun, daagmin pachisan kantamjuatjame”, tibauwa dui.

¹⁰ Tikich agagbaunum tawai:

“Judiochu aidautigmes, judío Apajuí etegjamu asag Apajuí uchiji aina nujai dakujustajum”.

¹¹ Nuigtú tikich agagbaunmaskam:

“Ashí aents judiochu aidautigmeskam Apu Cristo emematkujum, ni imanjiya duke pachisjum chichastajum”, tawai.

¹² Tuja Isaías agakshakam:

“Isaí weantunmaya atinai,

ashí aents judiochu aidaunmash inamjatnuk,
nunitai ashí aents aidauk
imá niinak dakagtinaí”, tiuwai.

¹³ Apajuí niini mijamtsuk dakatan sukagtina nu, atum dekaskeapi tautigmainak shiig dakunkut pujutan amaak, shiig agkan pujutnashkam amastinme. Dutijamainak Wakaní Pegkeji senchijiya nujai shiig senchi wakesa Apajuí dakamainnumash sujamsatnume.

¹⁴ Mina yatsug aidauh, atumek pegkeg wajakín ainajum dui tikich jintinmainush dekau asajum, pempeentunisjumek chichagdaimain ainajum nunak shiig dekajai. ¹⁵ Nuniyatkun ju papiin agatjime, dekaskenum atum dekamtikata tabau ajuta nuna, tuke aneakuk atinme tau asan. Apajuí minak wait anenjuju asa, ¹⁶ judiochu aidaush Cristo Jesús pachisan ujakta uwemjatnume tusa awetiuwai. Tibau asan, yamajam chicham Apajuinua nuna judiochu aidaunash ujaajai. Wakaní Pegkeji pegkeemtikajam tudaugtchu wajas pujuinakui Apajuí emtinish ofrenda shiig pegkeja imanun ditanash iwainakta tau asan.

¹⁷ Nuadui wí Apajuí takaju asan eme anenmamainuk ajutui, Cristo Jesusan pachisan chichagkagtag dui. ¹⁸ Wika tikichdaunakesh pachisan chichatsuk, Cristo, judiochu aidaush Apajuin umigkatnume tujutiwa nunak chichagkagtakun takasmajai. ¹⁹ Wakaní Pegkeji senchijin aents dutikmainchaunash iwainajan takaakun, Jerusalén nagkamsan ashí yantamnumash yamajam chichama junak etse etsegkawan Iliria nugkanmash Cristo pachisnuk etsejajai. ²⁰ Aajan wika wekaesan yamajam chichama nuna etsegkun takasjai, tuwí Cristo pachis etsegkachaje nuwi, wagki tikich etsegkamunum wisha nuig pataká chichagkagtagtutnak dakitau asan. ²¹ Ju chicham agagbau:

“Yaunchkesh ni pachisa etsegbaunash antujakchau aina nu wainkagtin ainawai,
ni pachisa etsegbaunash antukchaju aina nu dekaawagtin ainawai”, tawai.

²² Nuna etsegkun pujau asan, atumin wainkatasan minitá takunush minimain dekapjachmajai. ²³ Tujash yamaik jui takamainuk atsgtau asamtai, kuashat mijadai atumiin minitasan wakegá pujau asan, ²⁴ España weakun atumin wainkatasan minitag tajai. Nunikan atumin wainkan shiig aneasan ujumak tsawanchikesh pujusan nagkaemakui, atum yainkatajum wí wemaina duka.

²⁵ Tujash yamaikik Jerusalén wegajai, yatsut waituidau yaigtin awa juna ejetuatasan. ²⁶ Junak yatsut macedonianmaya, Acayanmaya aidaujui, Jerusalegnumia Jesucristun nemajuidau waituina nu yaigmí tusag wake-sag anenjauch ijumjaje. ²⁷ Juna wakegas pegkejan jutikawaja junak, judío aidau Jesusa nemajuina nu, ditak judiochu ainaig wakannum uwemtan pachisag ujakagbau asag, ditashkam judío aidau atsumiagtai yainak aikainawai. ²⁸ Ashí ju dutikmain ajuta nuna ashimkan nuigtú atum ijum-jajum nuna jukin Jerusalén jegaan ditá susan ukuakun, España weakun minittajai nuniakun atumnashkam ijagsattajime. ²⁹ Wika shiig dekajai, wi anui atumiin taattag duik Jesucristo pegkegnum yumigtamsagtata nunak.

³⁰ Yatsug aidauh, iina Apuji Jesucristo daajin, Wakaní Pegkeji anenitan sujama nujai segajime, wi maaniumu ajuta nuig atumshakam ijtukau atajum, nuniakjum mina pachittsajum Apajuí aultjatsajum tusan. ³¹ Apajuí segatajum dekaskeapi tuinachu Judea batsata nuwi agkanmitkajuati, tuja anentag ijumjamun yatsut Jerusalén batsataidau yaigtinun ejetu-attag nunashkam shiig anentus jukitnume tabaunum. ³² Wisha Apajuí

wakegakuig, shiig aneasan atumiin taan ayamjatjai. ³³ Apajuí shiig agkan pujutan sukagtina nu ashí atumjaish atí. Aatus atí.

16

Kumpamkagtau

¹ Iina umayí Febe, diaconisa Cencreanum iglesia atsumiagtai nuanui, niishkam dita atsumiagtai yaimna nuna awemag nunú, ² Apu Jesucristo nemajin asamtai, shiig anentsajum jukitajum. Jesucristui dekaskeapi tinu aidau wajuk judaimainaita dutiksagmek, ashí ni atumakuish yaigtajum. Nigka tikich aidaunash kuashat yaigkui, nigki minash yainkauwai.

³ Priscila, Aquilajai kumpamjutuatajum, wi Cristo Jesusan pachisa etsegtau wekagai yainkau aina nu. ⁴ Ditak, mina ayamjutuina pu-jutin ishamainnum jegantaju aina dui see tajai, imá wikik see tatsujai, iglesia judiochu aina dushakam see tuinawai. ⁵ Tuja niina jeen iglesia ijunaina dushakam kumpamjutuatajum, aiksagmek Epeneto mina aneetaijua dushakam, niyai asianmaya nagkamchak Cristun nemagkauwa duka. ⁶ María atumin senchi yaimpakua dushakam kumpamjutuatajum, ⁷ aikasmek Andrónico, Juniasjai kumpamjutuatajum, ditak mina pataag ainawai, nuigtush wijai betek achinkajui. Ditanak apóstol aina dushakam aneas diin ainawai. Wika eke Cristun nemagsuk pujai, ditá Cristunak nemagkaju ainawai.

⁸ Dutiksamek Amplias, mina aneetaig iina Apuji Jesucristun nemaja dushakam kumpamjutuatajum. ⁹ Kumpamjutuatajum Urbano, wi Cristo Jesusan pachisan etsejai kuashat yainkauwa nu, tuja mina aneetaig Estaquischakam. ¹⁰ Aikasmek Apeles, Cristo takagtusti tusa etegkamua nu, tuja Aristóbulo jeenia aidaush kumpamjutuatajum. ¹¹ Mina pataag Herodioshakam kumpamjutuatajum, Narciso jeenia Apu Jesucristun nemajuina dushakam. ¹² Aikasmek Trifena, Trifosajai Jesucristo takatjin takainak batsata nu, tuja iina aneetai ubag Pérsida Apu Jesusdaun shiig senchi takasua dushakam kumpamjutuatajum. ¹³ Nuigtú Rufo, Apu Jesús etegkamua nu, tuja niina dukují minashkam dukujua imana dushakam kumpamjutuatajum. ¹⁴ Aiksamek Asincrito, Flegonte, Hermes, Patrobas, Hermas, nuigtushkam ashí yatsug ditajai ijutkau batsataina dushakam kumpamjutuatajum. ¹⁵ Dutiksamek Filólogo, Julia, Nereo, niina umayijai, Olimpaschakam, tuja ashí aents Jesucristo nemajin aidau niijai ijunag batsataina dushakam kumpamjutuatajum. ¹⁶ Atumek pempeentunikjum shiig anendaisajum pegkeg anentaiyai kumpamdaiyatatum. Ashí Cristo iglesiaji aidau kumpamjamainawai.

¹⁷ Yatsug aidauh, segajime diyaku atajum, atum Jesucristo chichame jintinkagtau antukuítjum nuna yapajlawag jintinjamainakui kanakajum, nunin aidaujaig atumek ijunjaigpa. ¹⁸ Nunú aents aidauk ii Apuji Cristunak takajainatsui, dita wakejuinamun egainak tuidau asag, chicham pegkegchi aujuinak, shiig tsanuinawai imanis anentaimainachunak.

¹⁹ Ashí dekagtauinawai atum Jesucristo umigjum nunak, nuadui shiig aneajai. Nuniau asan utusajag pegkegchaunak takatsuk, aan nagkaemas pegkejan takainak pegkegunamak iwainmamkatnume tusan wakegajai. ²⁰ Apajuí shiig agkan pujutan sukagtina nu wamak iwanchin depetug-maktatui, nunisag iina Apuji Jesucristua dushakam wait anenjabaujin iwaintugmaktatui.

²¹ Timoteo, mina takatnum yainta nunú atumnash kumpamjamainawai. Tuja mina pataag Lucio, Jasón, Sosípater aina dushakam aikasag kumpamjamainawai.

²² Wika Terciowaitjai, wi agajai jujú papiinak, nuniau asan wishakam Apu Jesucristo daajin kumpamjime.

²³ Gayo wi niina jeen pujag dushakam kumpamjamainawai, ashí iglesia atsumiagtaish yaina nu. Erasto ju yaaktanum kuichkin kuitamna dushakam, iina yachi Cuartojai kumpamjamainawai. ²⁴ Iina Apuji Jesucristo wait anenkagtutaijiya dushakam ashí atuminish atí. Aatus atí.

Inagnaku Apajuí emematbau

²⁵ Apajuí emematiagmi, wi yamajam chichaman etsejag nuanuish, Jesucristo pachisan jintinkagtag nuig atumnash ebetmamjatnume tusa yaimpa nunú. Juka Apajuí tuke puju nugkash najannatsaig dutikatjai tusa anentaimtusbau dekaashbau aajakun iwainaka nuuwai. ²⁶ Tujash yamaik iwaintugmakji Apajuí etsegtin aajakajua nunú agajajua nunak, nuigtush Apajuí tuke pujuuwa nuna ashí aents aidauk imá Jesucristunak dekaskeapi tuinak umigkatnume tibauwa nunashkam.

²⁷ ¡Apajuí imá nigki yacha, ashí wajiin dekauwa nu tuke emematiagmi Jesucristo daaji pachisa!
Aatus atí.

Pablo nagkamchaku carta agaja corintonmaya aidau awetimu

Kumpamkagtau

¹ Witjai Pablotjai, Jesucristo apostoljiyitjai Apajui wakegau asamtai, yatsug Sostenesjai pujusan, ² atum iglesia Apajuinu aidautijum yaakat Corinto batsatutijum Cristo Jesús pegkeemtiki mina aentsug pegkejam atinme tusa, ashí tikich nugkanmaya aidau Jesucristo daajin adaiyina nujai etegtamjau asa ditá Apuji iina Apujiya nunú, ³ Apajui iina Apajiya nunú, Apu Jesucristujai wait anenjamag, shiig agkan pujutan atumnash amastinme.

Pablo Apajui see tabau

⁴ Tuke Apajui see tusanké ajai atumin pachisan, atum Cristo Jesús nemajuidau asagmin, Apajui wait anenjamjau asamtai. ⁵ Wagki atumnak Apajui Cristo Jesusai ashí pegkeg wakannumia aina nunak amasajui: Chichatan nuigtú dekatnashkam, ⁶ nunisag wi Cristo pachisan etsegekauwaitag dushakam atuminig imanisag juwatjamkajui. ⁷ Nunin asamtai Apajui don sujamsamua duka ajutjamainawai, iina Apuji Jesucristo wantinkatnuji dakakjum batsatjum dui. ⁸ Apajui nigki kuita-mjamkattagme, ii Apuji Jesucristo minitta duwish bakumamainchau agtinme tujamu asa. ⁹ Apajuik ni anagkagtuamujinak imatiksag uminai, nigki etegtamjauwai niina Uchiji Jesucristo iina Apujiya nujai ijutkau pujustinme tusa.

Jesucristo nemajin tupandaiyinau

¹⁰ Yatsug aidauh, iina Apuji Jesucristo daajin segajime, ashí atum aidautigmek tuké betek atuesajum takastajum, nuniamunum atsuti kanainamu, shiig anendaisajum pujustajum, nuniau asajum dutikatasa anentaimtamugmik nuní nuninuk anentaimtamu atinme. ¹¹ Mina yatsug aidauh, junak tajime, atum pampandayá batsatjum nuna, Cloé patayí dekamtijuau asamtai. ¹² Juna titag tajime, atum ainajum anuiya: “Wika Pablon nemagnaitjai”, tai; tikich: “Wika Apolon nemagnaitjai”, tawai. Nuniai: “Wika Cefasan nemagnaitjai” tai, tikich: “Wika Cristo nemagnaitjai”, tau awai. ¹³ ¿Cristush akanjamukaih? ¿Pablok atumiin achin-jauwait? ¿Nuniachkugmesh Pablo daajinig yamigbau ainajum? ¹⁴ Wika atumnak yamigchauwaitjim dui Apajuin see tajai, imá Crisponak, Gajojaig yamigbajai, ¹⁵ makichkish mina daajui yamigbau ainaji tujutijum tau asan. ¹⁶ Estefanasa patayinash yamigbajai, nuigtuk dekatsjai tikichnash yamijuashitag nunak. ¹⁷ Minak Cristuk yamijatjata tusag awetichui, yama-jam chicham etsegekata tusa awetiawai; aents niina yachajin chichamaina nuniknuk etsegekashbajai, Cristo cruznum achigbauwa nuna wainkaya nunin diisainum tau asan.

Apajui yachajiya duka aentsú yachajijaig betekchauwai

¹⁸ Cristo cruznum jakauwa nu pachisa etsegbauwa nunak wainak diinawai, megkaetanum batsata duka; tujash jutii uwemjau aidautinmag, ju chicham etsegbauwa juka Apajui senchijiyai. ¹⁹ Chicham agagbaushkam:

“Wi yacha aidaunak yachachu emaktatjai, dutikakun dekataijinash emegkatjattajai”, tawai.

²⁰ ¡Apajuí ju nugkanmaya unuimat aidaunak wainak emake! dutikamu asa yacha aidaun, chicham umiktinnash jintikagtin nuigtú tikichjai chicham ataish imaakas chichau aina dushakam wainak juwakaje ²¹ Wagki Apajuí ni yachajin iwainakua nunak aentsuk ditá yachajiya nujaig dekamainchau wajasajui, tujash Apajuik wakeekauwai, chicham etsegbaun imanchau diinaigkesh dekaskeapi tuina nuna uwentikatatus.

²² Judío aidaun wainchatai iwainamun wainkatatus wakegainawai, nuniai griego aidaun aentsú yachajin antuktatus wakegainawai. ²³ Tujash jutiik Cristo numinum achinjauwa nu pachisa etsejuinaji, nunak judío aidaun dakitus diinai, judiochu aina duka wainkaya nunin diinawai. ²⁴ Tujash Apajuí untsukbau aina nudauk, judío akush, griego akushkam, Cristuk Apajuí senchijiyai nuigtú Apajuí yachajiyai. ²⁵ Apajuinu imanchau diyamua nuuwai aentsú yachajiya nuna nagkaesauwa nu, Apajuinu kakaakchau diyamua nuuwai aentsú senchijiyai nuna nagkaesau senchigtina duka.

²⁶ Yatsug aidaun, atumek, aents diismak yacha wajakin, apu chichame antugtai aina iman, eme anentsá diitai ainatsjum duka dekaamagme. ²⁷ Nunin ainagminig Apajuik, aents yacha aidaun inatsakta tau asa, aents wainkauchia nuna etegkauwai. Dutiksag aents chichame antugtai aidaun inatsaktatus, aents imanchauch aina nuna etegkauwai. ²⁸ Apajuik aents imanchauch diyaku jujú nugka juig dakitjamu aina nuna etegjauwai, aents eme anentai aina duka wainak juwaktinme tau asa. ²⁹ Nunak Apajuik, niina eeminish ditak eme anenmamimum tau asa dutikauwai. ³⁰ Tujash Apajuia duke atumnak Cristo Jesusai ijupajajui, dutijama Cristunak iina yachají, iina pegkeg etamin, iina pegkeemtijamin nuigtú iina agkanmitkagbau emauwai. ³¹ Nunin asamtai chicham agagbauwa nuwish: “Makichik aentskesh eme anenmamjatatus wakegauk, Apu Jesusai eme anenmamjati”, tibau awai.

2

Cristo achigbauwa nu pachisa etsegbau

¹ Yatsug aidaun, wi atumin Apajuinun pachisan ujaktasan tauwaitag nunak, aents yacha shiig jintiag chichaman chichaaku aina imanun iwainmamkatasanuk taachbaijai. ² Wika atumjai pujubiag duik atumdaun dekatanuk wakekachbaijai, imá Jesucristo numinum achigbauwa nunak pachisan ujakbaijime. ³ Wi atumin wantintukbaijim duik, imanchauch dekapmamkun senchi sapigmakun kujaiibiajai. ⁴ Mina chichamjuk, wi chicham etsegbaushkam, aents yachameagbaujjai tikichin wakeemittakatus chichau aina nunitsuk, Wakani Pegkeji dekamtijamunum chichagkagtakun, senchijinash iwainakbaijai, ⁵ atum dekaskeapi tabaugmia duka aentsú yachajiya nuwi najaneau achati, Apajuí senchijiyai nui najaneau atí tau asan.

Yaunchuk dekaachbau aajakua nunak Wakani Pegkeji dekamtijamauwai

⁶ Nuniatyatu dekaskeapi tabaujin katsugkú aina duka, dekata nujai jintiaja ujaajl. Tujash nu unuimatak ju nugka jui unuimaina nuiya unuimagchamui, nuigtú ju nugka jui senchigtin inamaina nudaukesh atsui, duka wamak megkaejatin ainawai. ⁷ Jutiik Apajuí yachají yaunchuk

dekaachbau uukbau aajakua nu chichaji, nunak Apajuí nugkanash najantsuk niina imanjin ii shiig aneastinjin dutikauwai. ⁸ Nunak ju nugka jui inamin aina dukesh makichkish dekachaju ainawai, wagki nuna dekau ainakug iina Apuji dekas imana nunak achijag maachaju amain ainawai.

⁹ Tujash agagbaunmash:

“Apajuí uwigkauwai niina aneen aidaunak, waji makichkish wainkachbaun,

antutkesh antukchamun, anentaimtutkesh anentaimtugchamun”, tawai.

¹⁰ Tujash Apajuí jutiinak Wakaní Pegkejiya nujai dekamtijamauwai. Wakanía nuuwai ashí shiig mamikis dekauk, Apajuinu makichkish dekamainchauwa nunashkam.

¹¹ ¿Tujash aents aidautish wajupatiya tikich anentaibaush dekamainaitji? Nunak aentsú wakaní niini puja duke imá shiig dekawai. Nunisag Wakaní Pegkejiya duke dekawai Apajuí anentaibaujiya nunak.

¹² Jutiik ju nugka juiya wakanik jukichu ainaji, Wakaní Pegkeji Apajuinumiaya nunú jukiú ainaji, Apajuí wait anenjamag ashí amasbau aina nuna dekaati tujamu asamtai, ¹³ nunú pachisa chichainag duka, aents jintinjamamu unuimagbauk chichainatsji, Wakaní Pegkeji jintinjamamu chichainaji. Nunidau asaja wakannumia pachisa jintinkagtakuik, Wakaní Pegkeji tawa dutiksaik jintinkagtaji.

¹⁴ Tujash aents wakanin akiinachu aina duka, Apajuí Wakaniya nuiya pachisa chichamunak wainkaya nunin diidau asag antumainchau dekapenawai, Wakaní Pegkeji atsugbau asag. ¹⁵ Wakaní Pegkeji ajamua duke ashí jintinkagtamunak dekaskeapi tusag dekamainai; tujash nunú aentsnak makichkish nuninchauwai tumain ainatsui. ¹⁶ Chicham agagbaunum: “¿Yaa Apu Apajuí anentaibaujinash dekgmainaita? ¡Makichkish Apajuí jintinmainuk atsawai!” tawai. Tujash jutiyyaitji Cristo anentaimtaiya nu anentaimkau aidautik.

3

Jutiik Apajuí takajin ainaji

¹ Yatsug aidauh, wika aents wakanin katsugkú aidau chichagmaina imatikanuk chichagkachbaijime, ayatak aents wakanin katsugachau aidau chichagmaina dutiksanuk chichagkabiajime, Cristo nemagtanmag uchuchia nunin asagmin. ² Ayatak jintintubiajime shiig yupichuchin, uchi kuwijuch katsugman yumainchau asamtai muntsu amutiama numamtuk. Wagki atumek yutai katsugmak yumainchauwa nunin asagmin, yamaikishkam nuninuk ainagme, ³ nuniau asajum tikichi pujutji diigsajum kajejagme, nuniakjum maanitash maaniakjum, tupandaikajum batsatjume. Ju aja nuniakjum aents Apajuí nemagchau aina nujai betek pujutjum yapajitsuk batsatjume. ⁴ Atum: “Wika Pablon nemagnaitjai” tajumin, tikich chichau: “Wika Apolon nemagnaitjai” tuinajum duka, ayatak aentsú anentaimtaiji anentaimkujum tu yujagme.

⁵ ¿Pablosch wajimpaita, Apolosh wajimpaita? Jutiik ayatak Apajuí takajin ainaji, nunin asá jutii chicham etsegbau antukjum, dekaskeapi tiu ainagme; duka Apu Jesús makí makichik dutikata tujabauwa dutiksaik takasaju ainaji. ⁶ Wi atumi anentaimin Apajuí chichamen ajakmami-ajai, dutikamun Apolo ajak yumi ukattayama numamtuk awajtamkajui Apajuí chichamega nuna uapak, tujash Apajuiya nuuwai ashí niinua nuna dekamtijamawajua duka. ⁷ Nunin asamtai ajakan ajau, yumi

ajakan ukatjau aina duka wainkayai, Apajuiyai dekas ashí ajakmakbaun tsakapa duka. ⁸ Wika Apolojaig mai betekaitjai, nunin asajin Apajuí iina takatjin diigtamas makí makichik akigmaktinai. ⁹ Apajuí takatjiya nunú takagtanmag Apolok mina atuetaijui; untsu atumek Apajuí ajakji, Apajuí jee ainagme. ¹⁰ Apajuí wait anenjug, Cristo chichame etsegtukta tujutiuwa duwi, wika jega jeganman yacha nagkamak shugkú ajiyama numamtuk, wi Cristo pachisan nagkamsan atumnak jintintuauwaitjime. Tikich nui ekeniag emainawai, tujash makí makichik kuitamas jeganmaina numamtuk, Apajuí chichamenak shiig jintinjama inawai. ¹¹ Aatus asamtai, nagkamsa Jesucristo pachisa etseggamua duka, jega jeganmatasa nagkamku shugku ajitiamana numamtuk awakamui, nunin asamtai pataká tikich ajimaitso numamtinai. ¹² Makichik aents nunú shugku ajigbauwa nui ekenag jeganmak oroi, jiju plata tutaiyai, kaya pegkejuch aidauwai, numiikesh, tagkanaikesh, dukaikesh jegaamainai; ¹³ nunú aidauk makí makichik takasbau dekagbau tsawan atina dui, ashí paan wantinjatnai, wajiyaik jeganmamuina nunú. Ashí takasbau aidauk jiiyai apetiama numamtuk dekapeamu agtinai. ¹⁴ Tuja jeganmamuina nunú esakchamtaig, nuna jeganmamuina duka akiam atinai. ¹⁵ Tuja ni takasbauji esagkamuk wainak juwaktinai; nuniaigkish nigka uwemjatnai, jega esatai jünmaina numamtuk.

¹⁶ ¿Atumek dekatsjumek jega Apajuí ememattai asagmin, Apajuí Wakaní atumiin puja duka? ¹⁷ Makichik aentskesh jega Apajuí ememattain tsayaunak, Apajuishkam dutiksag niinash tsaiktinai. Wagki, jega Apajuí ememattaiya duka pegkegmai, duka atum ainagme.

¹⁸ Makichikitigmekesh atumek tsanumajaigpajum. Atum ainajum anuiyatijum, ju nugkanmaya unuimatai aina nu ashí dekaawa iman dekapmutigmek, dekachua nunin atajum, dekas yacha atasa wakegajumek. ¹⁹ Ju nugkanmaya yachameta duka, Apajuí diismak shiig wainkayai, agagbau aatus tawai: “Apajuik yacha aidauk ditá tsanumtaji aiina nuig achiawai”. ²⁰ Nuigtushkam tawai: “Apu Apajuí dekawai yacha aidau anentaimtaji aiina duka, wainkaya nunak”. ²¹ Nuadui makichik aentskesh, tikich aentsun pachisag emematmaitsui, wagki, jujú aidauk ashí atumdaui ainawai: ²² Wishakam, Apoloshkam, Cefaschakam, nugka dushakam, pujutash, jaamushkam, atum yamai pujajum dushakam, atak atina dushakam. Ashí ju aidauk atumdaui ainawai, ²³ tuja atumetjume Cristunu aidautigmek, untsu Cristuwai Apajuinuk.

4

Jesús chicham etsegtugkata tusa awemamu aidau takatji

¹ Atumek jutiik Cristo inake aina nunin anentaimkagtustajum, Apajuinu yaunchuk dekaachbau ajakua nu jintinkagtuata tusa awemamu ainag dui. ² Yamai dekaami, jintinkagtuata tibau aidau, kajittá diyam amaina nuna iwainmamain ainawai. ³ Wika, atumkesh, tikich aidaukesh mina pachittsag nuní takaawai tujutmaina nunak pachiatstjai. Wikik, shiijash takaag atsa tunatú takaajash nunak tumamaitsujai. ⁴ Mina pegkegchau anentaimtamua atsugta nuniaigkish, pegkejaitme tamak amaitsujai, tujash mina tujutmaina duka, imá iina Apujiya duke. ⁵ Nuadui atumek makichik aentskesh nuniktinai tusagmek tiigpa eke tsawan jegatsaigkik, ayatak dakastajum Apu Jesús jui taa, suwenum awa nunak tsaptinnum wainmaina imatikas aentsú anentaimtajin aunak shiig paan iwainakui

wainkatnaitji. Dutika Apajuí makí makichik aentsdaun diijus shiig aneastinjin susatnai.

Corintonmaya aidau ditak eme anenmamainamu

⁶ Yatsug aidauh, midaun, Apolonujai pachisan tajim junak, ditash Apajuí chichame agagbau tawa nuna uwaegak anentaimtsuk, jutiinu diis unuimajagti tusan tajime, makichkia nu eme anentsá diyakjum, tikichia nu junik diisaijum tau asan. ⁷ Atumnash ¿ya tikichin nagkaesau pegkejash etabiae? ¿Apajuí amaschamush waji ajutjamainawa? Ashí Apajuí amasajua nuniaish, ¿wagka atumek jukiuwa nunin anenmamkugmesh ememagme?

⁸ Atum anentaimsagmek: Jutiik Apajuí chichameg shiig dekaidau asaja, tikichik atsumatsji tajume, nuniau asajum atumek apu wajasjum jutiik atsumkagtsajume. Atumesh dekas apu waigkagminig, jutiish atumjai betekak inaamainaitji. ⁹ Wagki wi anentaimsanuk, apóstol aidautik Apajuí idaisamu asajinis, mantamnati tusag chichaman umigtamkaje dekapmajai. Nunin asajin aents ju nugka juuya aidauk, ángel aidaushkam, wakeejumainun iwainakuí diistasa wakeejutiana numamtuk awajtamainawai. ¹⁰ Jutiik Cristo aneaku, ni pachisa etsegtamunum anentainkachua nunin diyam ainaji, nuniajin atumek Cristo nemaju asajum shiig anentaimkau ainagme. Jutii kakaakchau ainajin, atumek ichichmamjau ainagme, jutiinak wainkauk diigmaintak, atumnak eme anenjamás diigmaintawai. ¹¹ Yamaikishkam jutiik nujantai, kitakaish, nugkumain atusgtamkuish waituinaji, aents aidaush tutitag awajtamainawai, ii pujumainush atsgtamainawai. ¹² Jutii uwejenig takai takainakua pimpikiagji, pegkegchau chichagtamainakuish pegkegnumak chichajuinaji, waitkagmainakuish katsuntuinaji. ¹³ Pegkegchaunum augmatjamainakuish, wait anentsá chichajuinaji. Yamaikish ju nugka juig tsuwata nunin diigmaintak ashí aentsuk dakitjamainawai.

¹⁴ Junak idatsagtasankesh agattsujime, mina uchig anentsan aneau asan chichagkun tajime. ¹⁵ Wagki atum Cristo Jesús nemaju asagmin diez mil jintinkagtin ajutjamkush apak kuashtak amaitsui. Atumí apanuk witjai, wagki yamajam chicham wi etsegbau antukjum Cristo nemagkau asagmin. ¹⁶ Nunin asagmin segajime, wi pujag junisjumek pujustajum tusan.

¹⁷ Nuadui Timoteo mina uchijua iman aneetaig, Apu Jesusan shiig umigna nuna awetajime; wi Cristo Jesusa nemajin asanush wajuk pujuwaitja, nuigtush wajuk jintinkagtinaitja ashí yantamnum wekaesan ashí iglesiamash nunashkam uwapaktinme tusan. ¹⁸ Atum ainajum anuiya ememaush ainawai; wi atumiin tuke taashtina nunin anentaimtjuinak. ¹⁹ Tujash wika Apu wakegakuig wamkes minittajai, nunikan anui taakun wainkatag tajai nunú aents ememak tu yujaina dusha dekas Apajuí senchijin takainakpash tuina, atsa ayatak chichainak tu yujainatsuash. ²⁰ Wagki Apajuí aentsnum inama nunak, ayatak chichamaikik inajattsui, niina senchijiya nujai inajatui. ²¹ ¿Waji wakegagme, taa suwimkan sujamsati, nuniachkush anenkai shiig anenjamás aujtamsatnume tajumek?

5

Cristo nemagkau pegkegchaun takaakuish utugmainaita

¹ Dekanae atum ainajum anuiya tsanijinainamu, nunak Apajuí anentaimtuchu aidaukesh nuninatsui; nuniamunum makichik apaji nuween nuwejai betek ema pujuju tabau antuwai. ² Nuniaig atumek ememá

batsatjume, nunitsuk wake besemag batsatkujum, nunú aents nuninun takaa puja duka jikjum awemamainaitjume. ³ Wi atumjai ijunja pu-jachkunush wakannumag ijutkajai, nunin asan wi anui pujusan aents nunikun tumainaitag nuna tajai: ⁴ Apu Jesucristo daajin, niina senchijin ijuntatjum nuanuig, wishakam mina wakanjuig atumjai ijutkau atatag dui; ⁵ nunú aentsuk Satanás idaitustajum, dutikam ni nuna iyashin suwimak susam waitiak, pujutjin yapajia Apu Jesús minitaish wakanin uwemjati.

⁶ Atumek ememasjum anentaimainchau ainagme, dekagme: “Pag najanatasa nanegbauwa nunak levadura piipich ajuntuamuitak ashí utujá wampushmitkauwai” tawa duka. ⁷ Levadura yaunchuk ajutjamajakajua duka utsagtajum, nunikjum yamajam nanegbau wajastajum, levadurag-tuchu ainajum nunisjume, wagki iina pascuaji Cristua duka jutiini mantamdau asamtai. ⁸ Nunin asamtai yaunchuk tudau takainaku pegkegchau unuimatkamú aina nunisaik pujusaik Cristo ememattsuk, yamajam pujut dekas pegkeg aina nu takainaku dekaskenum emematiagmi.

⁹ Wi duik papiin agajan awetibiajim duishkam tsanijimtan idaiy- inatsu nujai ijunjaigpajum tibaijime. ¹⁰ Wika junak anui aents Cristun nemagchau aidau tsanijimtan batsamtin, ekagbau, suji, tsanu- mag kasamin, apajuimtai dakumkamun emematin batsatana nujai tu- pandaikatajum tusanuk tichabaijime. Nu nunikta takugmek ju nugka ju ukuakjum nunimainaitjume. ¹¹ Wika nunak, Jesucristo nemajin asá yatsut ainaji tayatak tsanijimtanak wekaetin, suji, apajimtai dakumkamun emematin, pegkegchaun chichagkagtin, nampen, tsanumag kasamin aina nujai ijunmaitsugme tibaijime. Aents nunin aidaujaig makichkish ijun- jagmek yuwawaigpajum. ¹² Wika Apajuí nemajuinatsu nunak suwimak susatajum tumaitujime. Untsu Jesús nemagjum nuiya pegkegchau takainakuig, atumek pempeentunisjume wajak juwaktatua duka tumain ainagme. ¹³ Apajuí nemajuinatsu nunak, Apajuí titatui; nunin asamtai atumiin pegkegchau takau puja duka jiki ajapatajum.

6

Cristo nemajin aidauk chichamnak ditak epegmainai tibau

¹ Atum mai Jesucristo nemajin ainayatkujum chicham tsuwapjuni- agmesh, ¿wagka apu chichama iwajin Apajuí anentaimtuchu aina dusha, ni epegtugmati tusagmesh wejagme, Jesusa nemajin pegkejam aina nujai epegmainush? ² ¿Atumek dekatsjume Apajuí aentsji pegkejam aina duka, Apajuí nemagchau aina nuna dita diistin aina duka? Nunú atum iman dutikatin ainayatkugmesh, ¿wagka imanchau aina dusha atumkesh iwagmainchaush dekapeagme? ³ ¿Nuigtush dekatsjume ángel aidaush jutiik diistin ainag duka? Aan nagkaemasa juiya utugchat aina duka dutikmainaitji. ⁴ Nunin asamtai chicham tsuwapjuniagmesh, ¿wagka apu chichaman epegtujuati tusagmesh wejagme iglesianum ijutkachú aina nunin aish? ⁵ Junak datsamas dekapsatnume tusan tajime. ¿Atum Apajuí nemajin ainajum anuiyag yatsut chicham epegtan yachak makichkish atsau asamtaig, ⁶ yatsumjai pempeentunikjumes, apu chichaman epegkin Apajuí nemagchau aidau eemtinish jiyani yujajum?

⁷ Atum Jesucristo nemagkau aidautigmek pempeentunikjum chicham tsuwapjuniajum duka tikima pegkegchauwai. ¿Wagka pegkegchau tak- agtamainakuish ayatak katsunjá idaitsugme? ¿Wagka kasagtamainakuish jukiti tusam idaitsugme? ⁸ Tujash atumetjume pegkegchau takaaajum duka,

Jesusa nemajin aidautigmek yatsumjai pempeentunikjum kasagdaiyinau asajum.

⁹ ¿Atumek dekatsjumek aents pegkegchaun takaidauk Apajuí inam-taijinig wayashtinai tawa duka? Wainkajum tsanumajaigpajum: Aents tsanijimtanak yujajin aidau, apajuimtai dakumkamun emematin aidau, ekagbau aidau, aishmagkuitak nuwameaushkam, aishmag nuwameaun dutiknushkam, ¹⁰ kasamin aidaush, suji aidau, nampenchakam, chicham dekaskechunak tsanumnushkam, tsanumag kasamin aidaushkam Apajuí inamtaijinig wayachagtinai. ¹¹ Yaunchkek atum ainajum anuyatigmesh nunin aajakuitjume. Tujash yamaik Apu Jesucristo nemagkagmin, Apajuí wakaniya nunú atumin egkemtugmajag tudaugmin utsanjamkag pegkemtijabaijai, nuadui Apajuik pegkegma iman diigmainawai.

Ina iyashig Apajuinui

¹² “Ashí waji aidaunak takamainaitjai”, tujash ashí shiig awajtumain ainatsui, “ashí waji aidaunak takamainaitjai”, tujash nunú depetukti tusanush idaimamaitsujai. ¹³ Jushakam: “Yutai aidauk wakenum egkematin ainawai, wakea duka yutai egkematna nuuwai”, tibauwa duka dekaske, nunak Apajuí mai emegkaktinai; tujash iyashia duka ashí pegkegchau iyashnum takanitai aina nuwi takamtiktai atí tusaik najanachbauwai, iyashik Apu Jesucristunui, tuja Apu Jesucristo iyashnak ni wakega dutiksag takamtiksatus wakegawai. ¹⁴ Apajuí niina senchijinig Apu Jesucristun inankiuwa dutiksag jutiinashkam niina senchijinig inaantamkitnai.

¹⁵ ¿Atumek dekatsjumek atumi iyashmia duka Cristo iyashiya nuninkea duka? ¿Nunú Cristo iyashiya nuninkea nu jukiish nuwa akiká takataiya nuna iyashijaish apatmainkaih? Duka dutikmaitsui. ¹⁶ ¿Nuigtush dekatsjumek, makichik aentskesh nuwa akiká takataijai iyashnum tsaninakug, makichik iyash wega duka? Apajuí chichame agagbaunmash aikasag: “Jimag iyashia duka makichik iyash agtatui”, tawai. ¹⁷ Tujash makichik aentskesh Apu Cristo nemajuk niijai ijunkug wakannumag makichik weawai.

¹⁸ Tupanjatajum ashí pegkegchau iyashnum takanitai aina nu. Ashí tikich tudau aina duka iyashnak imatikag pegkegchawk ematsui, tujash nuwá tsanijima duka niina iyashinak tudau takajak nuniawai. ¹⁹ ¿Atumek dekatsjumek atumi iyashmia duka Wakani Pegkeji jega duka? Nunuwai Apajuí amasbau atumin pujugtamjum nu. Nunin asa iyashik atum-dauchui. ²⁰ Wagki atumek Apajuí akikmaka sumakbau ainagme, nuadui atumi iyashmijai Apajuí ememattajum.

7

Corintonmaya aidau nuwenbau pachisa iniibau shiig ujakbau

¹ Jukimjai atum mina papi awetugkujum nuwenbau pachisam intsamujum nunashkam. Nuna pachisnuk dekas imá pegkejak nuwen-mainchau ainawai tajai. ² Tujash puyatjumaina duka kuashat tsanijinaidau asagmatai, makí makichik nuwentin amain ainawai. Nuwashkam nunisag makí makichik aishintin amainai. ³ Aishmag nuwentin aidauk, nuwejai umigdaimain awa nunak dutiksag umimainai; nunisag nuwa aidaushkam aishijaig nunimain ainawai. ⁴ Nuwa aishinna nuna iyashig niinuchui, duka niina aishinui; nunisag aishmag nuwenna nuna iyashishkam niinuchui, duka niina nuwenui. ⁵ Nunin asamtai iyashnum

tsanitnumag pempeentunikjume dakitdaimain ainatsjume. Untsu Apajui mamiksa aajsata tabaunum shiig chichasa machik tupandaimainai. Nuna nunikajash wakegat au asamtai Iwanch pegkegchaunum takamtijusai tuidau asag, wamkes ataktu ijunmain ainawai.

⁶ Wi ashí juna taja nunak ju umiktajum tusan tatsujime, ayatak nunimain ainagme tusan tajime.

⁷ Wika wakegajai ashí aishmag aidautigmek wiya juninuk amainaitjume tusan; tujash makí makichik Apajui don susamu ajuinawai, duka makichik niimtin ajamu ai; tikichik, tikich niimtin ajuinawai.

⁸ Tuja nuwenchau aidaunak, nuwa waje aidaunashkam wiya juninuk nuwenchau amainai tajai. ⁹ Tujash aents iyashí wakega nuna depetuk pujumainchauk, nuwenati. Dekas pegkejai nuwenbauk, senchi wakegaku waitú pujumaina nu.

¹⁰ Untsu nuwenau aidaunak wi tatsujai, Apu Jesús tawai: Nuwak aishinak idaimaitsui. ¹¹ Tuja nuwa aishin ukuakug nematsuk pujustí, nuni-mainchauwaitkug aishijai epegtunia juwakti; nunisag aishmagshakam nuwenak idaimaitsui.

¹² Nuigtú tikich aidaun wi tajai, nunak Apu Jesús tatsui: Makichik yatsut Cristo nemajin, nuwa Apajui nemagchaun ayaakush, nuwa ni-ijaig pujustatus wakeetaig, idaitsuk niijaig pujumainai. ¹³ Tuja nuwa Apajui nemajin, aishi Apajui nemagchaunum detakuk niijaig pujustatus wakeetaik aishinak ukukinmegka. ¹⁴ Wagki aishmag Apajui nemagchauwa duka, niina nuweg Apajui nemajin asamtai, niinash Apajui yaimainai. Nunisag nuwa Apajui nemagchauwa dushakam, aishmag Apajui nemajin asamtai niinashkam Apajui yaimainai, nunin achagtaik dita uchijí aina duka Apajui nemagchau uchijí aina nunin amain asamtai. ¹⁵ Untsu Apajuin dekaskeapi tuchaujai nuwenamu, idaidaisami tusa imatjamak idaimainai, nunik agkan juwamainai, Apajui dekaskeapi tuina nu aishmag nuniachkush nuwa aidushkam, Apajui shiig agkan batsamsatneme tusa unsugmaku asamtai. ¹⁶ Wagki ¿utugsamek dekaatame ame yaigmash nuwemish uwemainashit dusha? Nunisag ¿utusamek dekatame ame yaigmash aishumish uwemainashit dusha?

¹⁷ Nunin asamtai makí makichkitigmin Apu wajak waketan anenjauch amasajuita nunisjume pujustajum. Atum wajak pujautigmina Apajui utsugmakuita duka nunisjume amainaitjume. Junak ashí iglesiamaya aidauk nuniktinme tajai. ¹⁸ Makichik aents pakaji ajapjuamu pujai Apajui untsukbauk, nunisag amainai; antsag pakamatsuk pujai Apajui untsukbaushkam, pakamaktajai tumaitsui. ¹⁹ Pakamamua duka wainkayai, pakamachbaushkam wainkayai. Dekas pegkeja duka, Apajui chicham umiktajum tibauwa nuwai. ²⁰ Makí makichik aentsuk, wajukunak Apajui untsukuita nuninuk amainai. ²¹ Inaku waitkatai pujamin Apajui utsugmakuitkuig uyumakaipa. Untsu ame agkan wemain akuig, duka dekas kakanmamsata jinkitasam. ²² Wagki inaku waitkatai pujaun, Apajui untsukbauk agkan wajas Apu Cristunak umijin weawai. Aantsag agkan pujaun Apajui untsukbaushkam, Apu Cristo inake weawai. ²³ Atumek Apajui sumakbau ainagme; nunin asajum tikich aidau inaku waitkatai atajai tumaitsugme. ²⁴ Yatsug aidauh, atum wajak pujautigmina Apajui utsugmakajuita, duka nuninuk amainaitjume.

²⁵ Untsu aishinchau aidau dita chicham umimainji Apu tujutbauk atsugtawai; tujash wi anentaibaun tajai, Apajui wait anenjuju asamtai

tajim duka kajintsá antugtumain ainagme. ²⁶ Jutiik yamaiya juik tikima utugchatnum pujuinag dui, makí makichkitijum wajuk pujagme duka nunisjumek pujustajum. ²⁷ Ame nuwennaitkumek nuwemik idaisaipa. Nuwem atsakuish nuwenatasamek anentaimtú wekayipa. ²⁸ Tujash ame nuwenkumesh tudau takaakum nuniatsme; nunisag nuwa agkanjam nemakush tudau takaak nuniatsui, nunin aig nuwenawajag utugchatnum jegainak waitmain asagmatai nuna tupanmain ainawai tusan tajai.

²⁹ Yatsug aidauh, juna tita tajime: Tsawantak ujumak juwatjamui, nunin asamtai yamai nagkamsag nuwentin aidauk nuwenchauwa nunis pujumain ainawai. ³⁰ Atum butbaunum pujakjumes, dakujamunum pujumain imaanisjum pujustajum; dakujaku pujautigmeshkam, butbaunum pujumain nunisjum pujustajum; tuja wajijum sumakjumes, atumdauchu anentaimtumain nunisjum pujustajum. ³¹ Aents ju nugka juija waji aina nujai shiig aneas pujuidaush nu aina nujaig shiig aneas pujachua nunis pujustinme; wagki ju nugkanmaya wainainag duka megkaetanum au asamtai.

³² Wika wakegajai duka uyumá pujuigpajum tusan. Wagki nuwenchauwa duka imá Apu takatjiya nunak ni shiig awajkata tabaunak uyumamain asamtai. ³³ Tujash nuwentin aina duka ju nugkanmaya waji aina nuna niina nuwe shiig awajkata tabaunak uyumainawai. ³⁴ Nunisag nuwa aishinna duka agkanjama nujaig betekchawai. Agkanjama duka Apajuí takatjiya nuna imá uyumawai, iyashinish wakaninish pegkejam ata tabaunum; untsu aishinna duka ju nugkanmaya waji aina nunak uyumawai wajuk aishinash shiig awagmamainaita nuna.

³⁵ Wika junak atum shiig juwamainun tajime, nunimaitsugme tatsujime, ayatak shiig imagnis utugchat atsau Apu takajuinak pujustinme tusan tajime.

³⁶ Aishmag, ni nuwenamig tibaujiya nu tsakagmatai, nuwenatjai takug, dekas aaja nuniamu niinish shiig juwamain anentaimkug, nuwenati, nu nuniamush tudauchi. ³⁷ Tuja tikich aents nuwentan dakitau asa, shiig agkan pujusan, wi wakegag nunisnuk Apajuin takagsatjai, tusa anentainish nunisag ebetmamag nuwenashtajai takush, pegkejan nuniawai. ³⁸ Nawanjin aentsnum sujauk pegkejai, tuja ni nawanjin aentsnum sujatsu nu imá pegkejai.

³⁹ Nuwa aishintin aina duka aishi iwaaku pujaigkik, tikichnumag nemamait sui; untsu aishi jakamtai agkan wajas ni wakegamunum nemamainai, tujash Apu Cristo nemagnujai. ⁴⁰ Tujash wi anentaimsanuk nuwa wajameag ataktuk nematsuk imá shiig aneas pujumainai tajai. Wishakam Apajuí Wakaní ajutu asamtai anentaimsan tajai.

8

Apajimtai dakumkamu aidau yutai anagkuamush yumainashit tusa iniimsamu

¹ Apajuimtai dakumkamu anagkuaku kuntin maamun pachisan tajim duka ashí dekainaji. Tujash dekata duka emematnum ejekagtawai, untsu anenka duka eemtanum yaijatui. ² Makichik aentskesh dekauwa iman anenmamuk, eke dekatsui dekas dekamaina nunak. ³ Tujash aents Apajuin anea nunak, Apajuí shiig wainui.

⁴ Apajuimtai dakumkamu anagkuaku kuntin maamu yuwamua nu pachisaik dekainaji, apajimtai dakumkamu aina duka ju nugka juig

wainak aina nu, imá makichki Apajuiya duka, nuigtú tikichik atsawai. ⁵ Ujumak aents aidau; nayaimpinmash, nugkanmash Apajuik ayawai tuinawai (nu tabaunmag kuashat apajuí, kuashat apu aidaush ayawai), ⁶ tujash jutiinuk imá makichki Apajuik, ashí najankamu aina nuna Apají, jutiiskam niinuk ainaji, nuigtush iina Apujig Jesucristua duke, niinig ashí najaneaku ainawai, jutiishkam nigki najanamuitji.

Aneenitajum tawa dusha wajukuita

⁷ Tujash ashí dekainatsui dekaskea nunak. Ujumak apajimtai aina nu ememattan unuimatka ju aajakaju asag, apajuimtai anagkuamu maa-mun dekainayatak yuwinak, ditá anentaimtajin kakaakchau asag ditak tsuwapmamainawai. ⁸ Apajuik ii yuwamua nuna diisag imá pegkejak diigmatsui, tuja yutai yuwakuish nuní pegkejak wemaitsui, yuwachkuish nuní pegkegchawk wemaitsuji. ⁹ Tujash atum agkan anentaimkujum dutikajum nuna, dekaskeapi tabaujin kakaakchau aina nunú yuwak tudau weenum tusajum kuitamankatajum. ¹⁰ Ame nunú dekayatkuum jega apajuimtai ijuntutainum ekeemsam yutaik, makichik yatsut anentaimtajin kakaakchauwa nunú waipak, niish nunú apajuimtai anagkua maamun wakeejuk yumainai. ¹¹ Ame dekayatkuum nuniamin, yatsum Cristun imanis dekatsu nunú megkaemainai, Cristo niinish mantamdau aig. ¹² Aaja yatsum tudau takamtikakjum, imanis dekainatsu nu anentaimtaji emestakjumek, Cristo tudau takagkujum aniagme. ¹³ Nunin asantai wi yuwamujua nu mina yatsujun tudau emamainaitkuig, nejenak ajumaish yumaitsujai.

9

Pablo ni pujutjin Corintonmaya aents aidau iwaintamu

¹ Wika agkantaitjai apóstol asan, iina Apuji Jesusnash wainkauwaitjai, atumek wi chicham etsegbau antukjum Apu Cristui sujumankau aniagme. ² Tikich aidauk apostolchauwai tujutuinaawai; tujash dekas atuminig nuninchauwaitjai, wagki atum Apu Jesusjai ijutkau pujajum nuuwai mina sellojuk nu iwaintawai dekas apostoloitag nunak.

³ Mina chichama patatjuina nuna tajai: ⁴ ¿Jutiik yutsuk, umutsuk batsamsati tibauk ainag? ⁵ ¿Jutiish iina nuwe Jesusa nemajin ayaaku tamainchaukaitag, Cefas nuigtú tikich apóstol aidau, Apu Jesusa yachi aidaujai wajukena nunisaik? ⁶ ¿Wikik, imá Bernabejaig atum yaigchamu amainaitag? ⁷ ¿Yaá suntaja ditak akikmakash yu yujaame? ¿Yaita uva ajakuitak nejen yutsuk idainush? ¿Yaita uwijan kuitamiatak muntsujin umutsuk idainush?

⁸ ¿Junash wiki anentaimsanuk taja? ¿Juna pachis chicham umiktina nuwi tatsuak? ⁹ Chicham umiktin Moisés agagbauwa nuig: “Toro trigon dajag pakak wekaga nuna nujig jigkatuawaipa”,* tawai. ¿Apajuí toron puyatjau asag tiuwait, ¹⁰ jutiin pachipas taku tichaukaih? Nunak jutiin pachipas tu agajui. Wagki aents ajan ajama duka, ajakan juwaa dushakam jukittajapi tusa dakainawai. ¹¹ Jutii, ajak wakannumia atumiin ajakbauwaitag nunin asa, shiig kuashat segamainaitjime jutii atsumamunum yaijatkatajum tusa. ¹² Tikich aidau atsumainakuig yayajume, jutiik aan nagkaemas yaigbau amainaitji.

* 9:9 Dt. 25.4.

Tujash jutiik yainkatajum tutsuk, ashí waitiakuish katsunbaiji, yamajam chichaman Cristo pachisa etsegbauwa nuna shiig antumainchau ainum tabaunum. ¹³ Atumek dekagme jega Apajuí ememattainum takaidauk, nuiyanak yujakaju aina duka, nunisag altarnum takaidaushkam nuiyanak anentang itaamun yuujakú ainawai. ¹⁴ Dutiksag Apu Cristushkam, yamajam chichaman etsejuina nunak, chicham etsegbaun antuina nu yaigtinme tiuwai. ¹⁵ Tujash midaush nunimain ajutaigkish yainkatajum tusanuk segachmajjime, juna agatjim junash sujustajum tusan segakun tatsujime. Wika chicham etsegbaunum eme anentainsan akijuinachkuish wekagag junisnuk jakatasan wakegajai.

¹⁶ Wi yamajam chichama juna etsegekun ememamainjuk atsugtawai, wagki juka dekas atsumamu asamtai umiktá tibau asan. ¡Wait anenmain niimajai yamajam chichama juna etseghaknuk! ¹⁷ Nunin asamtai mina wakeetajui wiki nagkaman takasuikunuk akiam amainaitjai, tujash nu umimain asamtai dutikag nunak Apajuí dutikata tibau asan dutikajai. ¹⁸ Nunin asan wi shiig juwamujua duka, yamajam chicham etsegbaunum akijuinatsaig wekaesá takata nuuwai, wi chicham etsegbaunum nunimain ajuta nunak pachitsuk idaiyu asan.

Yamajam chicham etsegbaunum kakanmabau

¹⁹ Nuadui wika inaku waitkatai achayatkun, ashí aentsun inake wajasjai, kuashat aents Cristun nemagkatnume tabaunum. ²⁰ Judío aidaunum pujaknuk, wishakam judiok wegajai, ditashkam Cristo nemagkatnume tabaunum; nunak Moisés chicham umiktajum tibauwa nuna umiachiatkun chichaman umina nunin wegajai, ditashkam Cristun nemagkatnume tabaunum. ²¹ Aantsanuk Moisés chicham umiktajum tibauwa nu atsugbau aidajui pujaknuk wishakam nuninuk wegajai, Apajuí chicham umiktajum tibauwa nuig agkanchauwaitkun, Cristo chicham umiktá tibauwa nuna umiajai, chicham umiktin atsugbau aidaush Cristo nemagkatnume tabaunum. ²² Aents Cristun imatikas dekaskeapi tuinachujai pujaknush, wishakam nuninuk wegajai, chicham ujakta tabaunum. Ashí nunin aina nujaig wishakam nuninuk wajasjai, aja nuniamunum wajumkesh uwemjatnume tabaunum. ²³ Nunak yamajam chicham etsegekata tabaunum nuniajai, wishakam atak ditajai betek ijunjatasan.

²⁴ Atumek dekagme, dekapdayamunum tupikainakug ashí betek tupikainayatak, makichik wagaktata nu wajinak juwame. Nunin asamtai atumesh jukita takugmek kakaagtajum. ²⁵ Ashí aents tupikamunum dekapdaisatin akug, shiig kuitamamin ainawai, atsejutai besegtina nunú jukita tabaunum; untsu jutii kakanmamainag duka, atsejutai atakesh tuke atina nu jukita tabaunum nuninaji. ²⁶ Nuadui wika mamikjamunum jegantatus tupikauwama imaniajai. Nuniau asan maaniajai, tujash wainkan dasenum iyatsuk. ²⁷ Imatikau asan mina iyashjunak wi depetkin, wi wakegamun takamtikajai. Wi chichaman etsejukuikun, wainka juwakaig tabaunum.

10

Israelnumia pachisa Cristo nemajuidau jintintuamu

¹ Yatsug aidauh, iina muunji aajakajua nunú, ashí yujagmin wakentin ejakam weenak nayants kapantu tutainum katiajua nunú kajimatikijum tusan dakitajai. ² Nunikag ashí nunú aidauk yujagminum, nayantsanmash

yamigbau juwakajui, nunik Moisesjai ijutkau wajasajui. ³ Nunisag ashí yutai wakannumiaya nunash yuwawajui, ⁴ Tuja umutainash wakannumiaya nunak ashí uwajajui, wagki wakannumian kaya muunnumian umujakajua nunú uyunajakui, nunú kaya muunta duka Cristo aajakui. ⁵ Tujash nuiya kuashat aidau Apajuin shiig awajkachajui, nunikaju asag uwegshunum jinaa utsaankajui.

⁶ Ashí nu nunikajua duka jutii iwaintugmak nunikajui, waji pegkegchauwa nunú anentaimtusa wakegá wekaemainchauwa nuna, dita wajukawajua nunikainum tabaunum. ⁷ Nuadui atumek ujumak dita wajukawajua nunikjumek apajimtai dakumkamuk emematmaitsugme. Nuna pachis agagbau tawai: “Ashí aentsuk yuwinak, umuinak pekaamsajui, nunikag wajajag nantsemawajui”. ⁸ Nunin asantai tsanijinachagmi, ujumak dita wajukawajua nunikaik, nuní yujakmá makichik tsawantaik veintitrés mil aents jinawajui. ⁹ Apu Cristo dekapsatasaik wakeechagmi. Ujumak dita nuní yujakmag dapí ijinam asajui. ¹⁰ Apajuish pegkegchau chichajigpajum. Ujumak aents Apajui pegkegchau chichajú yujakmá Apajui awemamu nayaimpinmaya aents ijinam asajui.

¹¹ Nunú iina muunji nunikajua duka, jutiin iwaintugmaji. Nuadui yamai tsawan inagnamunum batsatainag nunú aidautin, ditash nunikainum tusa aneemtijamak agagbauwai. ¹² Nunin asantai ni shiig ebetmamja pujajai tumamushkam kuitamamainai pegkegchau takasaig tabaunum. ¹³ Atum pegkegchau anentaimtakjum waitiajum nunak tikich aents aidaush nunisag waituinawai, tujash Apajui betek umina ibau asa atum katsunmainchaunmag waittsati tusag idaitamsachagtatui, ayatak ame pegkegchau anentaimkum waitiam dusha wajuk katsunjam nagkaemainaitme nuna yaimpaktatui.

¹⁴ Nuadui aneetaig yatsug aidauh, apajuimtai dakumkamu aina duka tujanjatajum. ¹⁵ Junak atumek shiig anentaimkau asagmin tajime, wi tajim juka atum anentaimsajum titajum. ¹⁶ Copanum pegkeg yumig awa nunú ijunja see tusa umuinakuik, ¿Cristo achijam numpen ukajua nunú anentaimtusa nuninatsjik? pag puuká yuwinag dushakam, ¿Cristo jutiini mantamdauwa nunú anentaimtusa nuninatsjik? ¹⁷ Kuashat aentsuitku makichik paagak puuká yuwinag duka, jutiik makichik iyashkea nunin ainaji tusa iwainmamku nuninaji.

¹⁸ Israel aidaushkam anentaimsa diistajum, kuntinun maawag altarnum apeenakug nuiyanak nejen yuujakú ainawai, aatus nuninak Apajuijai ijutkau aajakajui. ¹⁹ Juna apatka taja junak, judiochu aidau kuntinun maawag apajuimtaiji dakumkamun anagkuina nunú imá pegkejai, nuniachkush dakumkamu aina nu imá pegkeg ainawai tusan tatsujai. ²⁰ Judiochu aidau apajuimtaiji aidaun kuntinun maawag anagkuina nunak, iwanchin anagkuinawai, Apajuinak anagkuinatsui. Nunin asantai dakitajai atumesh wakan pegkegchau aina nujai ijunkujum wayawaijum tusan. ²¹ Nuadui atumek copa Apu Cristunua nuiya uwagjum, ajuma dui copa iwanchidau umuu wajamaitsugme; antsagmek Apu Cristo mesajiya nuiya yuwajum, ajuma dui wakan pegkegchau aina nuna mesajin yuu wajamaitsugme.

²² Aaja nuniakuik Apu Cristo ekajeaku nunimainaitji, tujash jutiik ni senchigtina ibau ainatsji.

Ashí ii takaamuk Apajui shiig awajkatasa takamainaitji

²³ Ashí dutikmainaitjai tujash ashí shiijak awajkagtumaitsui, ashí dutikmainaitjai tujash duka ashí pegkegnumak yaijatmaitsui. ²⁴ Nunin asantai makichkish niina pegkeg awagmamaina nuna egatsuk, tikichin pegkegnum yaimaina nuna egamain ainawai.

²⁵ Ashí neje sujutainmaya sumaka yuwakjumes, makichkish iniim-saigpajum, wainka anentaimesajum; ²⁶ wagki, ju nugka juka nuigtú ashí nugkanum ayá dushakam Apu Jesudau ainawai.

²⁷ Makichik aents Cristun nemagchau yuwami tusa ipapamtai je-gaagmesh, ashí yutai amainamuk yuwatajum makichkish iniimtsuk wainka anentaimesajum. ²⁸ Nuniagmin, tikich chichagtamak: Ju nejea juka kuntin maa apajimtai anagkuamai tujamkuig yuwawaigpa, nu etsegkamtai dekau asam wainka anentaimesajum. ²⁹ Junak atumnak tatsujime, tikich wainak anentaimesai tusan tajime.

Wi agkan anentaimesan dutikag nuna tikich aents pegkegchaun aniwai tusa chicham patatam amainchauwaitjai. ³⁰ Wi Apajuin see tusan yuwag nunak tikichik pegkegchaunak chichagtumaitsui Apajuin see tusan yuwau asantai.

³¹ Nuadui yuwakjumes, ashí waji dutikajumes, ashí Apajuí ememattsajum dutikatajum. ³² Makichkish tikichik pegkegchauk iwaintukaigpa, judío aidaukesh, judiochu aina dukesh, iglesia Apajuinu aina dukeshkam. ³³ Wi ashí dutikag nunak ashí tikich aidaunash shiig awajkata tabaunum nuniajai, mina shiig awajta nuna egatsuk, tikichin shiig awagma nuna egajai ditash uwemjatnume tau asan.

11

Nuwa aidaush jega Apajuí ememattainum wainakush wajukmainaita

¹ Wi Cristo pujutin diisan niina nemajag antsagmek, atumshakam mina pujutug diisjum Cristo nemagkatajum.

² Mina yatsug aidaush, eme anentajime, tuke minash kajimatjutsuk wi jintintuabijim dutiksagmek betek umidau asagmin. ³ Tujash ashí aishmag aina duka Cristui sumitkau aina nu dekaatajum tusan wakegajai, nuwa aina dushakam aishin sumitkau ainawai, untsu Cristuwai Apajuiyai sumitkauwa duka. ⁴ Ashí aishmag aidaush Apajuí aujak nuniachkush Apajuí chichamen etsejak buuken dukuauk Cristun eme anentus diyachú asa nuniawai. ⁵ Tuja ashí nuwa aidaush Apajuí aujak nuniachkush Apajuí chichamen etsejak buuken dukuachuk, aishin eme anentus diyachú asa nuniawai, intashin ashí awajú asa wajukmaina numamtuk wajau asa.

⁶ Nuwa buuken dukuachuk, dekas imá pegkeg ashí intashinak awag ajapati. Untsu nuniamu datsan ataik jaanchi dukumakti.

⁷ Aishmag aidaush Apajuí niimejai betek najanamú asa, Apajuí imanjiya nuna iwainawai, nunin asa buukenak dukumaitsui. Untsu nuwak aishmagku imanjiya nuna iwainawai. ⁸ Wagki aishmagnak nuwanmayan jukig najanachui, untsu nuwan aishmagnumian juki najanauwai. ⁹ Aishmagkuk nuwa nigki pujumainchau asantai najanachbauwai, aishmag nigki pujumainchau asantai nuwak najanamui.

¹⁰ Nunin asantai nuwak, ángel aidaush iwaintukta tabaunum Apajuí aukug nuniachkush Apajuí chichamen etsegkug buukenak dukumain ainawai. ¹¹ Tujash Apu Jesús nemagbaunmag aishmagkuk nuwajainchuk amaitsui, antsag nuwashkam aishmagjainchuk amaitsui. ¹² Duka dekaske,

nuwak aishmagnumia najanamui, nunisag aishmagshakam nuwanmag akiinui; tujash duka ashí Apajuí najankamu ainawai.

¹³ ¿Atumesh pegkejai tumainkaitjum nuwa buuken dukutsuk Apajuin aujkuish? ¹⁴ Aishmag wajuku atí tibauwaita duka dekainaji, nuniai aishmag intashin esagman tsakapaina duka datsanmainai. ¹⁵ Untsu nuwa intashí tsakapauk eme anentsá diyam ainawai, ditak buuké jaanchi dukumaina nuna intashí ejatkati tibau asa. ¹⁶ Juna pachis makichik aentskesh jiyantkata tuidauk dekamain ainawai, jutii aidautikesh, nuigtú iglesia Apajuinu aina dukesh tikich nunimain unuimatjamu atsujuina nuna.

Jesucristo mantamnamuji anentaimtusa yuwamu shiig dutikashbau

¹⁷ Juna tajim junak eme anentsan tatsujime, wagki dekas pegkegnun ijunmaina nu, nuní pegkegchau etamainnum ijunu asagmin. ¹⁸ Dekatkauk antukmajai, atum iglesia aidautijum ijunjum anuiyag ditash kanaidau tabaun, nunak dekas nuninap amainaita tajai. ¹⁹ ¡Duka dekas ditash kanaamuk amainai, nuniamunum iwainmamain ainawai, yaita atum ainajum anuiyash dekas Jesusa nemajin aidaush! ²⁰ Aaja tupandaika batsatiatkujum, Apu Jesús kashi yuwak, mina anentaimjuttasajum yuwatajum tiuwa nu dutikami tusajum ijunjum duka dekas nuniatsjume. ²¹ Wagki nu yuwamunmag makí makichik kashi yuwatnujin itauk niíyá eemak yuwinawai, nuniai tikichik yapajuinai, tikichik nampenawai. ²² ¿Atumek jeenchauk ainajum nuwi yuwakjum umumainaitjum duka? nuniachkugmesh ¿iglesia Apajuinu aina nu imanchauch diyau asagmek yumainji atsujuina nu idatsagtasajum nuniatum? ¿Aniatum duish wajin-tajimki? ¿emegash anentaimtitjim? nunak makichkish dutikmaitsujime.

Jesús mina anentaimjuttasajum yuwakjumeke juní dutikatajum tibau (Mt. 26.26-29; Mr. 14.22-25; Lc. 22.14-20)

²³ Wika Apu Jesús tujutbauwa dutiksanuk atumnash jintintuabijime: Apu Jesusak sujam asauwa nunú kashik pagkan juki, ²⁴ Apajuin see tii puuká chichaak: “Jujú jukijum yuwatajum, juka mina iyashjua nuna iwainawai atumiin wi mantamnattag nuna, juka tuke jutiksagmeké atin atajum mina anentaimjuttasajum”, tiuwai. ²⁵ Aikasag, yuwá nagkankamunum copa juki chichaak: “Ju copa juka mina nunpajui yamajam chicham apaamu atata nuna iwainawai, ju copanmaya tuke jutika umakjumeke, mina anentaimjuttasajum jutikatajum”, tiuwai. ²⁶ Nunin asamtai tuke jutika ju pag yuwakjumeke, ju copanmaya umakjumes, ni mantamnamujiya nu etsegtakjum nuniagme Apu Jesús minitin asamtai.

Jesucristo mantamnamuji anentaimtusa yuwamu imanchau diyamu

²⁷ Tuja nuna makichik aentskesh wajuk dutiktaiyaita nuna shiig dutik-tuk pagkan yuwak, umutai Apu Jesusa copajiya nuiyan umauk, Jesusa iyashí, niina numpe anentaimtusa dutikamu asamtai tunaamak nuniawai. ²⁸ Nuadui eke pagkan yutsuk, copanmayanash umutsuk makí makichik anentaimas niimamain ainawai. ²⁹ Wagki Apu Jesusa iyashí tawa nunash wagka tawa nuna shiig dekatsuk yuwauk, umutnash umakug ni suwimak juwaku waitsatnujinak nuniawai. ³⁰ Nuadui atum ainajum anuiya kuashat jaush ainawai, kakaakchau waigkushkam, nuniai ni jauk kuashat jakaje. ³¹ Nuniau asamtai: Iik anentaimsa niimakuik Apajuí suwimak suwamak amaitsuji. ³² Tujash Apu Jesús suwimkan sujamkug jintinjamak

dutijamui, aents Apajuí nemagchau aidau suwimkan jukiagtin aina nujai suwimkan jukiinum tujamu asa.

³³ Nuadui mina yatsug aidauh, Jesús maamua nu anentaimtusjum yuwatasa ijunkugmek dakanistajum. ³⁴ Ni yapajauk niina jeenig yuwati, shiig ijunja takaachbaunum Apajuí suwimkan sujusai tau asa. Tikich tumain awa nunak anui taan ujaktajime.

12

Apajuí don aidau sukagtusbau

¹ Yatsug aidauh, wakannumian Apajuí don sukagta nuna pachis dekat-
nume tusan wakegajai.

² Atumek eke Cristo nemagtsuk batsamsagmek, wainmachujai betek apajuimtai dakunkamu chichachu aina nu emematujakuitjum duka dekagme. ³ Nuadui yamai dekaatajum, makichik aents Apajuí Wakaní chichamtikbauk, Jesusnak pegkegchauk chichagmait sui. Tuja: “¡Jesusak Apui!” taushkam nigki tatsui, Wakaní Pegkeji chichamtikam tawai.

⁴ Kuashat niimtin ainawai don aina duka; tujash Wakaní Pegkejiya duke nunak dutikawai. ⁵ Makí makichik niimtin takamainuk awai; tujash makichik Apua nudauk. ⁶ Apajuiya duke ashí waji aina nunak, ashí aentsun makí makichik niimtinun takamtikmaina duka. ⁷ Apajuik makí makichikitin Wakan takamtikagta nunak sukagtawai, tikich aidaujaish yainikti tabaunum. ⁸ Wakanía duke sukagtawai yachameaja chichatan, nunú Wakanía duke sukagtawai shiig dekaa chichata nunashkam; ⁹ tikichia nuna nu Wakanía duke suwawai dekaskeapi tutan, nunú Wakanía duke anenjauch aents jau etsagaumainnash suwawai, ¹⁰ tikichin aents dutikmainchau iwainaktinun, tikichin Apajuí tabaun etsegtuktinun, tikichin wakan etegja dekatan, tikichin ii chichashtai aidau chichatan, tikichin nunú chichatai etsegtuktinun. ¹¹ Tujash ashí ju aina junak, Wakanía duke nigki dutikawai, ni wajuk wakegawa nunak makí makichik dutiksag suwawai.

¹² Iina iyashí kuashat akanjamu akushkam makichik iyashke, jutiish Cristujaig betekaitji. ¹³ Nuadui ashí judío, griego, inaku waitkatai, agkan batsamin ainakuish makichik Wakanía duik yamigbau ainaji, ashí nunú aidautik Wakan susamu ainaji.

¹⁴ Iyashik makichikchui, kuashat ijutkamuji ajawai; ¹⁵ nuiya dawé tumainai: “Wika uwejchau asan iyashnumiachuitjai”, takush ¿iyashnumi-
achu asag tumainait? ¹⁶ Tuja kuwish tumainai: “Wika jiichu asan iyashn-
umiachuitjai”, takush ¿iyashnumiachu asag tumainait? ¹⁷ Nuniachkush
ashí iyashia nu ayatak jüketkuish ¿utusaya antumainait? Tuja ashí
iyashia nu ayatak antutaiya duke akuish ¿tuwí kugkuasa dekaptaish
amainait? ¹⁸ Tujash Apajuí, ashí ju iyashnum ijutkau aina nunak,
ni wakegamujin diis makí makichik batsakui. ¹⁹ Ayatak iyashnum
ijutkau aina duke agtaish ¿tuwí iyashish amainait? ²⁰ Dekaske, kuashtai
iyashnum ijutkau aina duka, tujash iyashik makichki.

²¹ Jiik, uwegnak: “Wika aminak atsumatsjame” tumaitsui. Aantsag
buukshakam, dawenak: “Wika atumnak atsumatsjime” tumaitsui.

²² Nunin ai iyashnum ijutkau aina nuiya, imanchau diyamua nu imá
senchi atumnawai. ²³ Iyashnum ijutkau aina nuiya imanchau diyamua nu
imá shiig kuitamnawai, tuja iyashnumia paan iwainamainchauwa duka

shiiġ ejaká kuitamnawai, ²⁴ untsu iyash paan iwainamain aidauk dutiknat-sui. Apajuí, iyashnum ijutkau aina nuiya imanchau diyamua nuna dekas puyatjus diistinme tusa aikauwai, ²⁵ nunidau asag iyashnumag kanakag achagti, nuninak makí makichik iyashnum ijutkau aina duka pempeen-tunisag yainiktinme tusa dutikauwai. ²⁶ Aatus asamtai iyashnum ijutkau aina nuiya makichik waitaik, ashí iyashnum ijutkau aina dushakam waituinawai, antsag iyashnum ijutkau aina nuiya makichik puyatjusa kuitamjinig, ashí iyashnum ijutkau aina dushakam shiiġ aneenawai.

²⁷ Nunin asamtai, atumek Cristo iyashí ainagme nunin asajum makí makichik aidautigmek nunú iyashia nuwi ijutkau ainagme. ²⁸ Apajuí iglesianum takasagtinun apusauwai dekatkawk: Apóstol aina nuna, profeta aidau, maestro aidau, aents dutikmainchaun iwainakagtin aidau, aents jaidau etsagagtin aidounash, yaimkatin aidau, takatan diistin aidau, chicham chichashtain chichaktin aidounashkam. ²⁹ Nunin asag ashí apostolak ainatsui, ashí profetakesh ainatsui, ashí maestrok ainatsui, antsag aents dutikmainchaunash ashí iwaidauk ainatsui. ³⁰ Antsag aents jaina nuna etsagagtin aidauk ashí don susamu ainatsui, chicham chichash-tainash ashí chichainatsui, nunú chichataish ashí etsegtin ainatsui. ³¹ Atumek don dekas iman aina nu jukitasajum imá senchi wakeejitajum. Tujash wi dekas shiiġ pegkeja nuna jintintuattajime.

13

Dekas anenka nu

¹ Wi tikich chicham aidau chichatan yacha amainaitjai, ángel aidau chichatain chichau akunush anentak atsugtakuig, jiju nuniachkush platillo awatim ayatak tsantsantuwama numamtuk wajamainaitjai. ² Wi Apajuí tabaujin etsegtin amainaitjai, Apajuinu yaunchuk dekaachbau aajakua nunash ashí dekau, ashí dekamush ajutu, dekaskeapi tabau ajutu asamtai, muja aidounash yajá inagkemain akunush, anentak atsugtakuig wainkayaitjai. ³ Ashí mina wajiig ajutuina nuna ujunauch aidau tinamkunush, mina iyashjun apeatnume tusan sujaknush, anentak atsugtakuig wainkan dutikmainaitjai.

⁴ Anenka duka: Katsunta nuna dekamtijamui, kakagchau atan, tikichdau diisá kajej wekaechatan, ememashatan, iman anenmamchatan; ⁵ tutitjachu atan, imá iinuk anentaimtushtan, kakajus kajeshatan, kajegkagtukbautak pujushtan; ⁶ pegkegchau takat aidaujaig shiiġ aneechui, dekaskea nujai shiiġ aneenai. ⁷ Anentak ajamuk: Ashí waitiawai, ashí dekaskeapi tawai, ashí dakawai, ashí katsuntawai.

⁸ Anenka duka tuke megkaekashtinai, tujash Apajuí tabauji etsegtutak nagkankatnai, chicham chichashtai chichatash megkaekatnai, unuimat aina dushakam nagkankagtin ainawai. ⁹ Wagki machik dekainaji, machik Apajuí tamaush etsegtuinaji. ¹⁰ Tujash shiiġ dekamú atina nu jegatnai, nunikmatai machik dekainag duka megkaejatnai.

¹¹ Wika uchi asanuk, chichaaknush, anentaimkunush, nunimainun takunush uchi wajuknaita nuniyajai. Tujash yamaik muun wajasan, uchi asan nunijakbaugnak ukukiuwaitjai. ¹² Yamaik espejonum tuujin waintayama numamtuk wainji, tujash jegatnai igkunisa wainiaktinaitag nunú. Yamaik machik wainji, tujash jegatnai Apajuí ni mina waitkauwa dutiksanuk wainkatnaitag nu.

¹³ Yamaiya juik jujú kampatum awa juka megkaekashtin ainawai: dekaskeapi tabau, dakamua nu, anenka dushakam; tujash jujú aina nuig dekas wagaakua duka anenka nuuwai.

14

Apajuí chichame chichagkagtuta nu chicham antushtai chichamua nuna nagkaesauwai

¹ Anentak ajuttí tusajum kakanmamsatajum, nuniakjum imá senchi wakeetajum Apajuí anenjauch wakannumian sujustí tusajum, tujash imá senchi Apajuí tabau etsegtuta nunú. ² Chicham chichashtai chichaina nunak, aentsun aujuinatsui Apajuin aujak tawai, nuadui antuinatsui wajina tawa nunak, dekachbaun Wakan tabaun chichau asamtai. ³ Tujash Apajuí tabaun etsejuina duka, aents aidaun aujuí pegkegnum yaigta tabaunum, dutikak pegkegnum wakeemitkak anentainash ichichtawai.

⁴ Chicham chichashtai chichá duka, imá niina yaimaina nunak tawai; untsu Apajuí tabaun etseja duka iglesianash pegkegnum yayawai.

⁵ Wakeemainaitjai ashí atumesh chicham chichashtai chichaktajum tusan, tujash imá senchi wakegajai Apajuí tabaun etsegkatnume tusan. Juuwai dekas chicham chichashtai chichata nuna nagkaesauk. Tikich chichaman chichaina duka atsumainawai nunak taku tawai tusa etseg-tumaina nuna, iglesiashkam pegkegnum yaigbau amain asamtai.

⁶ Yatsug aidauh, wi anuí taan Apajuí iwaintugkamun atum deka-mainun, Apajuí tabau etsegmainun, jintinkagtumain aina nu dutik-mainun, chicham chichashtaiyai augmainaitjim duka atumnak yaim-pamaisui. ⁷ Wagki kantamku umputai flauta nuniachkush arpa aina nunú wainak pachimkamun shiniagtaik, waji kantamtaina makí makichik aina dusha tawa tusag dekamaitsui. ⁸ Nunisag trompetan umpua dushakam, maaniamunum shiyaktin umintsatnume tusa umputaiya nuna umpushtaik, maaniantasag uminmain ainatsui. ⁹ Atumshakam nunisjumek, chicham shiig antumainchaun aujtamkuish ¿wajuk dekaagmek nunek tujutua titagme? Nuniakug wainak chichá wekaemainai. ¹⁰ Kuashat chicham ju nugka jui chichatai ayá duka, ashí ajuinawai wajintu taku tutaimpaya nunú. ¹¹ Tujash mina aujta nu, wajina takug tawa nuna dekachkunuk, tikich nugkanmayaya nunin wantinmainaitjai ya aujtawa nuig, niishkam antsag minaiash tikich nugkanmayaya nunin wantinmainai. ¹² Nuadui atumek, don aidau wakannumia ajuttí tusa imá senchi wakedau asajum, nu aina nujai senchi takastajum iglesian pegkegnum yaimaina nunú.

¹³ Nunin asamtai chicham chichashtain chichauk, Apajuin aujak sega-mainai ni tabajin paan dekamtijuati tusa. ¹⁴ Wi chicham chichashtaiyai Apajuin aujtaik, mina wakanjua duke Apajuinak aujuí, tujash wika dekatsuk juwajai. ¹⁵ ¿Tujash wajukmainaitja? Apajuinak wakanjujai augmainaitjai, tujash antukan augmainaitjai, wakanjujai kantamainaitjai, tujash antukan kantamattajai. ¹⁶ Wagki ame wakanminig Apajuí see tutaish tikich ayatak antak eketa dusha, ame tame nuna dekachush ¿utusaya “aatus atí” tumainaita? ¹⁷ Ame Apajuí see tabauk pegkeg amainai; tujash tikichnak pegkegnamak yaimaisui. ¹⁸ Wika atumin nagkaesau chicham chichashtain chichag dui Apajuinak see tajai. ¹⁹ Tujash iglesianmag ayatak cinco chicham antumain aina nunak chichaktasan

wakegajai, tikich aidaun jintinkunchakam, tikich chichamai diez mil chicham chichamaina nuna dutiktisuk.

²⁰ Yatsug aidauh, uchi anentaimuk wajaigpajum. Dekas uchi anentaimu wajatajum pegkegchau anentaimtushtanum, tujash anentaimtanmag kat-sajau ainayatkujum. ²¹ Chicham umiktinnum: “Ju aents aina junak, aents ditá chichashtain chichaaku aina nuwi ausattajai, dutikamash antugtuchagtagtatu”, tiuwai Apu Apajuí. ²² Nuadui chicham chichash-tai chichamua duka Apajuí nemagchau aina nuna iwaintawai, Jesusai dekaskeapi tuina nudauchui; tujash Apajuí tabau etsegbauwa duka Jesusai dekaskeapi tuina nudauwai, Apajuí nemagchau aina nudauchui. ²³ Iglesia ijunjag ashí chicham chichashtai chichainamunum, Apajuí dekaskeapi tuchau aidau nuniachkush Apajuinun dekachu aina nu wayá antukmag: Imaanak tu batsatajama, tujamainai. ²⁴ Untsu Apajuí tabaun ashí etse-juinamunum, Apajuí dekaskeapi tuchau aidau nuniachkush Apajuinun dekachu aina nu wayá antuinakug, dekaskeap tuwinawa tusa, ditá pujutjinash diimainai. ²⁵ Nuniak ditá anentain uumkau aunash paan wainmamkag tikishmag Apajuin emematuinak, dekas Apajuik atumjai awai tujamainaitjume.

Apajuik niina emematuinak ijunjag wainak pampaamunak dakitnai

²⁶ Nuadui yatsug aidauh, atum ijunbaunmag makí makichik atum aina-um anuiya salmosan kantamai, tikich jintinkagtai, tikich Apajuí iwaintuk-baun etsejai, tikich chicham chichashtain chichai, tikich nu chichakbaun nunak taku tawai tusa etsegtau amainai. Tujash ashí duka Jesusa nemajin aidautijum pempeentunisjumepegkegnum yainikta tabaunum dutikatajum. ²⁷ Nuniamunum chicham chichashtain chichaidauk jimag nuniachkush kumpatum amainai, tujash makí makichik chichak in-agnakmatai chichatnume; nunitai makichik, nunak taku tawai tusa etsegtukti. ²⁸ Tujash nuna taku tawai tusa etsegmain atsutaik, iglesianmag chichamait sui, imá nigki Apajuin aujak chichamainai. ²⁹ Aantsag profeta aidaush jimagchik nuniachkush kumpatumchikesh chichamainai. Nunitai tikich aidauk dekaskeash Apajuí tabaunash etseja tusa kuitamas diimain ainawai. ³⁰ Tuja nuwi aents antak pekaja nuiya, Apajuí dekamtikam makichik wajakí chichataik, nagkamas chichá duka itatkati. ³¹ Wagki Apajuí tabauk makí makichik ashí etsegmain ainagme, makichik niyá ashimkam-tai, duwi tikitchakam chichamainai; nuniamunum ashí tikich aidaush unuimagtinme nuninash ashí ichichmamjatnume tabaunum. ³² Apajuí tabaun etsegkatin don ajuina duka, wajutí tumainaita tuja wajutiya tumainchauwaita nunak dita dekamain ainawai. ³³ Wagki Apajuik, agkan pujuta nuna Apajuijiyai, nunin asa dakitnai pachimdaetanak. Ashí iglesia pegkejama aina duka nuna nunimain ainawai.

³⁴ Iglesia ijunjamunmag, nuwa aidauk bitat amainai, wagki ditak chichakainmegka tibuawai. “Nuwak aishin sumitkau atinme”, chicham umiktinnum tawa nunisag. ³⁵ Nuwa dekaatatus wakegakug, niina jeen aishin iniasti, wagki iglesia ijunjamunum nuwa chichamua duka maakchau asamtai. ³⁶ Ju adeagtajum Apajuí chichame etsegbauk atu-miin nagkamnachui, nuigtush imá atumkechuitjume Apajuí chichame antukutigmek.

³⁷ Makichik aentskesh profeta anenmamuk nuniachkush Wakan dekamtijawai tumamushkam, Apu Jesús umiktajum tibaun wi agatjim

juna dekaati. ³⁸ Tuja juna dekamainchau dekapeauk niishkam nunisag dekaachbau juwakti.

³⁹ Nuadui yatsug aidauh, kakanmamsatajum Apajuí tabau etsejut don ajuttí tusajum. Nuniakjumes chicham chichashtain chichaina duka chichamait sui tiigpajum, ⁴⁰ tujash duka ashí dutikatajum shiig kuitamkajum nuigtush wainak pampautsuk makí makichik titinme.

15

Cristo nantakbau

¹ Yatsug aidauh, aneemtijatasan wakegajime, wi yamajam chicham etsegbau antukuitjum nuig ebetmamjajum batsatjum nuna; ² nunin asajum wi yamajam chichaman etsegkauwaitag nuig ebetmamjau akugmek uwemjattagme; nuniachkugmek dekaskeapi tiuwaitjum duka wainkayai.

³ Wagki nagkamchaknuk wi dekauwaitag dutiksanuk atumnash jintintuauwaitjime, Cristuk iina tudaujin jakauwai, Agagbaunum tawa nunisag; ⁴ dutika ukusam kumpatum tsawanta jui nantakiuwai, Agagbau tawa nunisag; ⁵ nunik Cefasan wantintukui, nuwi pujus ni jintintaiji doce aajakajua nunashkam wantintukui. ⁶ Duwi pujus quinientos inagkeas yatsut aidaun juu tamawaik wantintukui, nuna wainkajuk kuashat yamaikish batsatui, untsu wajumchik jakaje. ⁷ Duwi pujus Santiagon wantintukui, nunik ashí ni apostolji aina nuna wantintukui. ⁸ Nunik inagnamunum minash wantintugkauwai, uchi akiinatín tsawanji jegatsaig akiinama numamtuk wika wajakuitjai.

⁹ Nuadui wika apóstol aina nuig imanchauwaitjai, wagki Apajuinu iglesian aintujakú asan apóstol tamak amaitsujai. ¹⁰ Tujash Apajuí wait anenjajua dui, yamaik wí yaitja nunuwaitjai, ni wait anenjak jutijua wain duka minaig wainkachui, nuadui wika Apajuí yaintsamtai ditá nagkaesau takasjai. ¹¹ Wagki wi etsegbau nuniachkush dita etsegbaukesh antukjum Cristo dekaskeapi tiu ainagme.

Jakau aidau nantajagtin

¹² Tujash Jutii Cristuk maa ukusbau nantakiuwai tusa etsegjinish, ¿wagka atum ainajum anuiyash jakaik nantagchatnaitji taush ainawa?

¹³ Jakau nantagchagtin agtaik, Cristushkam nantakchau amainai. ¹⁴ Cristo nantakchauwaitkuig, ii chicham etsejag juka wainak amainai; antsag atum Cristui dekaskeapi tajum dushakam wainak amainai. ¹⁵ Nu nuninaitkuig, Apajuik wainka tsanumjaku tu yujamainaitji, Apajuik Cristo jakaun inankiuwai tusa etsegtuinag duka, wagki nunikchau aig tuidau asá, dekaskenum jakau aidaush nantakchagtin ainakuig. ¹⁶ Jakau aidau nantagchagtin ainakuig, Cristush nantakchau amainai. ¹⁷ Cristo nantakchauwaitkuig, atum niini dekaskeapi tajum dushakam wainkayai, nunin asajum tudaunumag batsatjume. ¹⁸ Nunin ataik Cristui dekaskeapi tiaju jinawajua duka megkaejauwap ainawa. ¹⁹ Jutii Cristo dakainag nunú, imá jui pujag duik pegkeg amainaitkuig, tikich aents aina nuna nagkaesau shiig aneasaik pujumaitsuji.

²⁰ Tujash dekaskenmag Cristuk nantakiuwai. Niiyai dekas jakau nantashtainmaka nagkamas nantakiuwa duka. ²¹ Wagki makichik aentsua nuig jata wayauwa nunisag makichik aents nantakiuwa dui jakau aidaush nantajagtinai. ²² Adagkaig ashí jainaji nunisaik Cristui ashí iwaaku pujutnaitji.

Nantamuk juní atinai

²³ Tujash juka juní atinai: Nagkamchakug Cristo nantakiuwai; Cristo ataktú jui minitta dui, niina nemajin aidau jinawajua nu nantakiagtinaí.

²⁴ Nuniamunum inagnamu atina duka, Cristo ashí apu aidaun, inamin aidau senchigtin aina nuna senchijin depetuk Apajuin Apajiya nuna ashí idaitustinaí ni inamjati tusa.

²⁵ Cristo Apu wajas inamak pujai, ashí niina shiwaji aidauk depetkamu atinai. ²⁶ Inagnamunum shiwag depetkamu atina duka, jata nuuwai.

²⁷ Wagki Apajuik Cristunak: “Ame ashí diístá”, tusa idaitusui. Juna tiuwa nunak Apajuinash nigki Cristuk inawai tusag tatsui, Apajuí ashí wajiinak Cristun idaitusui. ²⁸ Ashí Cristo idaitusbau atina dui, Cristo Apajuí Uchijiya duke Apajuyai sumimkatnai, ni ashí waji aidauk idaitusbau asa. Nunikmatai Apajuik ashí nigki diistinaí.

²⁹ Nantamu atsutin aish, ¿jakau pachisjum yamimajum dusha waji jukitasagma yamimagme? ¿jakau aidau tuke nantagchagtin aish, ¿wagka dita pachisjumesh yamimagme? ³⁰ ¿Tujash wagka jutiish ashí tsawantaish ishamainnumash yujainaji? ³¹ Yatsug aidauh, wika ashí tsawantai ishamainnum jamainnum wekaejai, nuniaknush atum Cristo Jesús iina Apujiya nu nemajuinajum nuna anentaimtakun shiig anejai. ³² ¿Wajina jukiuwaitja efesonmaya kuntin kajena iman aina nujai maanikuitag duish? ¿Jakau nantagchatnaitkuig: “Kashin jinatin asá, yuwawagmi, uwajagmi”, tumainaitji.

³³ Tsanuamak aigpajum: “Aents pegkegchaujai tsaniamua nu pujut pegkeg unumatjamua nuna emeseawai”. ³⁴ Dekas aneaku pujakjum tudak takasaigpajum, wagki Atum ainajum anuiya ujumak Apajuin dekachush awai, junak datsaagtinme tusan tajime.

Jakau aidaush wajuk nantajagtina ainawa

³⁵ Tujash juna iniimush amainai: “¿Jakau aidaush wajuk nantajagtinuk ainawa? ¿Wajuku iyashimkag midiagtinaita?” ³⁶ Anentainkachuh, jigkai ajaamua duka jaawai nunikmatai nuiya ajak tsapawai. ³⁷ Trigo ajaauk tikich ajak akuishkam dukekgau ajatsuk, jigkayí ajataiyai. ³⁸ Dutikamun Apajuí wajuk wakegawa dutiksag tsapapawai, dutika makí makichik jigkainak waji ajakaita dutiksag suwawai.

³⁹ Nunisag neje aina dushakam betek ainatsui, aents aina nuna nejeesh ai, kuntin aina nuna nejeesh awai, namak aina nuna nejeesh ai, chigki aina nuna nejeesh awai. ⁴⁰ Aantsag nayaimpinmaya iyashish ai, nugkanmaya iyashish awai. Tujash nayaimpinmaya aina nuna shiigmajish ai, nugkanmaya aina nuna shiigmajish awai. ⁴¹ Nunisag etsá etsantajish ai, nantú etsantajishá awai, tuja yaya aidau etsantajish awai; yaya aidaukesh betek etsantuinatsui.

⁴² Numamtuk atinai aents jinaw nantajagtina dushakam. Aents jakauk besegtin asamtai ukunui, untsu nantainakug iyash kaugchatnun iyashimak nantakiagtinaí. ⁴³ Aents jakauk atumnachu asamtai ukunui; nantainakug shiig pegkejan iyashimak nantakiagtinaí, iyash kakaakchau ukusbauwa duka senchigtin waigkag nantakiagtinaí. ⁴⁴ Nugkaa yutuna duka, nugkaya iyashia nuuwai; nantaktina duka, wakannumia iyashia nuuwai. Awai nugkaa pujaku iyashimtai antsag wakannumia iyashimtaish.

⁴⁵ Aatus tawai Agagbaunmashkam: “Nagkamchaku aishmag najanamu Adán aajakua duka, iwaaku wajasui”. Untsu nagkanbaunum Adán

aajakua nu Wakan pujutan sukagtin aajakui. ⁴⁶ Tujash nayaimpinmaya iyashia duchauwai dekatkauk, nugkanmaya iyashia nuuwai; dui atinai nayaimpinum pujustina duka. ⁴⁷ Nagkamchak aishmag aajakua duka, nugka juki najanamu asa nugkaya aajakui, tikich aishmag aajakua duka, Apu Jesús nayaimpinmaya aajakui. ⁴⁸ Nugkaya iyash aina juka, aishmag nugkanmaya najanamua nunú iyash ajutjamainawai; untsu iyash nayaimpinmaya jukitnaitag duka, nayaimpinmaya aishmag aajakua nunú iyash jukitnaitji. ⁴⁹ Nunú aishmag nugka najanamu aajakua nuna niimé jukiwaitag nunisaik, nayaimpinmayaya nuna niimé jukitnaitji.

⁵⁰ Yatsug aidauh, juna tajime: Neje numpajaiya duka Apajuí inam-tajjinig wayashtinai. Iina iyashí besena jushakam, tuke besechu atina nuig waimaitsui. ⁵¹ Tujash Apajuinu yaunchuk dekaachbau aajakua nuna dekaatnume tusan wakegajai: Jutiik ashí jinashtinaitji, tujash ashí yapajinkau agtinaitji, ⁵² waamak piit tsuwisaik niimtayama numamtuk, trompeta inagnamun shinuktina dui. Wagki trompeta shinuktina nu antamuik jakau aidauk nantajagtinai ajumaish jakashtinun iyashimkag, nuniai jutii iwaaku aidautik iyashí yapagtam agtinaitji. ⁵³ Dekas atsum-nawai iyash besena nu, ajumaish besegchatin atinme tusa; iyash jinin aina jushakam, ajumaish tuke jachau atinme tusa.

⁵⁴ Nunik iyash besena nu ajumaish besegchatnun iyashimkamtai, Anisag iyash jauwa jushakam ajumaish jachau atinun iyashimkamtaig, Agagbaunum:

“Jaamua duka depetkamu juwake”, tawa nu uminkatnai.

⁵⁵ “¿Jataiyah, tuwí ajutjamua, ame magkagtutaigmesh? ¿Ukumataiyah, tuwí ajutjamua, ame depetmataigmesh?”

⁵⁶ Jataiya nuna magkagtutaig tudauwa nuuwai, tudau senchijiya duka chicham umiktina nuuwai

⁵⁷ Tujash Apajuiya duke see tiyagmi,

iina Apuji Jesucristui depetmatan amasua dui.

⁵⁸ Nuadui mina yatsug aneetaig aidauwah, ebetmamjajum pujusjum Apu Jesusa takatjig tuke mijattsuk ematajum; wagki atumek dekagme, Cristunu takaajum duka wainkagmek takaatsjume.

16

Jerusalegnumia Cristun nemajuidau susatin kuichik anentag ijumjamu

¹ Jesusa nemajin pegkejam aidau yaigtin kuichik anentag ijumkug-mek, galacianmaya iglesia aidaun jintintuabiag dutiksagmek atumesh dutikatajum. ² Ashí tumigtin makí makichkitijum wajupa kuichkish jikiugme nu akantsajum ukú pujutajum. Dutikamu asamtai wi taattag nuaduik kuichik ijumjata tabauk atsutí. ³ Wi anui taan atum aents etegkawagmin cartan agajan susan Jerusalén awematjai, atum kuichik anenjauch ijumjaujum nuna dekaatnume tusan. ⁴ Nunimainaitkuig, wisha ditajai ijunjan wemainaitjai.

⁵ Wi minaknuk, Macedoniaya atú minittajai, nuwi juakin atumin minittajai. ⁶ Nuniknuk atumjai ujumak tsawan pujusta tajai, nuniachkunush yumi tepeatta nunak anui pujusnukeash inagkeakintag tajai, nunikan weakuish atum yainkamnujum tusan. ⁷ Nuniau asan ayatak nagkaemaku wainká ukutnak dakitajai, dukapech tsawan atumiin pujusta tau asan, Apu Jesusash aatus wakegakuig. ⁸ Tujash Éfeso pujuttajai fiesta Pentecostés

inagkeakta tau asan, ⁹ wagki waiti muun ujani ajutui shiig takamaina nu, kuashat shiwag ajutainigkishkam.

¹⁰ Timoteo anui taakuish atumjai shiig aneas juwamaina nu dutikatajum, niishkam wi Apu Jesucristun takajag nunak takaju asamtai. ¹¹ Nunin asamtai makichkitigmekesh imanchau diisaigpajum; dekas yaigtajum, shiig agkan minash taa waitkati, wagki tikich yatsug aina nujai dakaku pujaji.

¹² Yatsug Apolon kuashtá segajai, tikich yatsug aina nujai atumin ijagtamsati tusan; tujash yamaikk anui minimainjig wakegamuk atsujui, tuwig minimainji ajit dui minittawai.

Inagnaku akatmabau

¹³ Aneaku pujustajum; nuniakjum dekaskeapi tabaugmia nuig ebetmam-jatajum; waji, senchi atajum. ¹⁴ Ashí atum takaajum duka, anenkai takastajum. ¹⁵ Yatsug aidauh atumek deka gme, Acayanmaya Estéfanas niina nuwe, uchiji aidaujai dekatkauk Apajuí nemagkajua duka, nunikaju asag Jesusan dekaskeapi tuidau pegkejam aina nuna senchi yainawai. ¹⁶ Nuadui atumek ju aents yaimainak takainak imaanina junin aina nu tabau antugkatajum.

¹⁷ Shiig aneajai Estéfanas, Fortunato, Acaico aatus tajutuawag atum yainmaina nuna dita kuashat yaintuidau asagmatai. ¹⁸ Dita minak wakanjuish ichichtujajui, aikasag atumnashkam ichichtamjajui. Aents junin aina nu puyatjusum diimain ainagme.

¹⁹ Iglesia asianmaya kumpamjamainawai. Aantsag Aquila ni nuwe Priscilajai ditá jeenig iglesia ijunaina dushakam Apu Jesusa daajin kumpamjamainawai. ²⁰ Ashí yatsug aidau kumpamjamainawai. Antsagmek atumesh makí makichkitijum pempeentunisjumek shiig anendaisajum kumpamdaiyatajum.

²¹ Wi Pablon ju kumpamdaiyamunak mina uwejui agatjime.

²² Makichik aentskesh Apu Jesusan aneachuk, inigki suwimkan jukit-tawai! Wagki Apu Jesusak wamak taattawai.

²³ Atumnash Apu Jesús wait anenjamjatnume. ²⁴ Wika atumnak Cristo Jesusan aneag dutiksanuk aneajime.

Aatus atí.

Pablo awentsaik carta agaja corintonmaya aidau awetimu

Kumpamkagtau

¹ Witjai Pabloitjai, minak Apajuí wakegau asa Cristo Jesusa etsegtukti tusa etegtua awetiuwai, yatsug Timoteojai pujusan atum iglesia Apajuinu aidautijum yaakat Corinto batsatjum nuna, ashí Jesusa nemajin aidautijum Acaya nugkanum batsatjum nunashkam, ² Apajuí iina Apajiya nunú, iina Apuji Jesucristujai wait anenjamag shiig agkan pujutan amastinne.

Pablo waitiamuji

³ Emematiagmi Apajuí, iina Apuji Jesucristo Apajiya nu, iina Apaji wait anenkagtin, Apajuí ashí ichichmamtan sukagtina nunú, ⁴ nigki ichichmamtanash sujamui ashí ii waitiamunmash, ashí tikich waitiagtaish ditashkam ichichkagtugtinme, Apajuí iina ichichmamtan amasua dutiksag tujamu asa. ⁵ Wagki Cristo waittsauwa nunisaik jutiish kuashat waituinaji, nunisaik imá Cristuig kuashat ichichmabaush ajutjamji. ⁶ Jutii waituinag duka, atumesh ichichmamja pujusjum uwemjatajum tabaunum nuninaji; tuja jutii ichichmabau ajutjamaina dushakam, atumesh ii waituinag junisjumek waitiakjumesh, ichichmamja pujusjum emamkesjum katsun-jatajum tabaunum waituinaji. ⁷ Atuminig ebetja dakamu ajutjamji, wagki dekinaji atumek jutii waituinag nunisjumek waitiakjumesh, jutii ichichmamainag nunisjumek ichichmamaidau asagmin.

⁸ Yatsug aidauh, jutii Asia nugkanum batsamsaja kuashat utugchatnum waittsabiag nu dekaatajum tusan wakegajai. Jutiik tikima atsanja nagkaemainchaunum jegantú asaja, iwakuap pujuttaji tusa dakamainuk atsugtamsabi, ⁹ nuniaku chicham dekajuawaja mantamnati tibauwa nunin dekapmabiaji; tujash nu dekamtijamabi iik kajintsá anentaimtumatsuk, Apajuí aents jakaunash inanna nuwi kajintsá anentaimtan; ¹⁰ nuniau asajin Apajuí jutii iman ishamaainnum pujajinish jiiigmaki uwemtijamjabi, nuniau asa yamaishkam dutijamsag agkanmitkagmasagké awai. Dutijamu asantai nigkiap atakea duwish agkanmitkagmatnaita tusa dakamu ajut-jamji; ¹¹ atumesh jutii pachijattsajum Apajuí aujkagtakjuminig. Kuashat jutii pachijattsajum Apajuí segatkagtiagtaik, kuashat Apajuinashkam see tiagtauai anenjauch Apajuí sujabau juinag nuna diisag.

Pablo Corinto wechamu

¹² Wagki jutii eme anenmamag duka juuwai: Iina anentaimtajiya nu ijapaji Apajuí dekaskejiya nujaish jutiish wajuk imagnisaish pujusbaiji ju nugka juish, tuja atumjai ijunja pujusmayag duish. Jutiik aents ditá yachajin iwainmamaina nunikhabiaji, Apajuí wait anenkagta nujai iwainmamkabiaji. ¹³ Wi papiin agatjamjim nuig, tikich waji pachisaik atum aujkugmesh antukchamnukesh agatjachbaijime, nuniau asantai shiig ausampap dekawagtatua tajime, ¹⁴ duka machik dekaugme, jutii aidautik atum eme anentam agtinaitag nunú, atumshakam antsagmek jutii eme anentam agtinaitjume tsawan Apu Jesús minitna dui.

¹⁵ Nuna aaja kajintsá anentaimu asan, dekatkauk atumná taan wainkatjime tusan anentaimsabiagai, aaja nuniakun jimajá ijagsatjime tau

asan; ¹⁶ Macedonia nagkaemakun ijagsau asan, waketkunush awentsanuk ijagsatjime tusan. Nuna nuniakui atum minashkam wi Judea weakuish yainkamnujum tau asan. ¹⁷ Wi nuna aaja nuniktajai tiuwaitag nunash ¿anentainkasnuk tiuwaitag? ¿Nuniachkunush wainak aents dutikachtinaitak dutikatjai tinu aina nuniaknuk taja? ¹⁸ Tujash Apajuí tibaujinak betek umina nu dekgatmaji jutii “dutikatjai tiuwaitku dutikashtajai” tatsug nunak. ¹⁹ Wagki wi, Silvano, Timoteo aaja Jesucristo Apajuí Uchijiya nu pachisaja ujakbaijime. “Jesucristuk dutikatjai ti, ajuma dui dutikashtatjai” tujakchauwai, ni tibaujinak imatiksag betek umijakui. ²⁰ Wagki Apajuí ashí anagagtuamua duka, Cristui ashí uminkauwai. Nuadui Apajuí emematuinakui: “Aatus atí”, tuinaji Cristo Jesús pachisa. ²¹ Jutii aidautin, atumnashkam Apajuí etegtamawag Cristuwai ebetjamkauwai; ²² Nuna dutijama niinu etamak selló awajtamkauwai, dutika eemtikak iina anentain Wakanin sujamsajui, ni anagtamamua nu jukitin asajin ²³ Tujash wi Corinto minichag nunak, anui taan atumin kakaakan chichagkun wake emeskaijim tusan nunikag nunak Apajuí dekgatawai. Nuna wi dekas tuchataik Apajuí suwimkan sujusti tajai. ²⁴ Jutiik atum dekaskeapi tajum duka iinuk emamaitsuji, jutiiik wakegaji atum yaigtasa shiig aneamu ajutjamtinme tusa, dekaskeapi tabauwa nuig ebetmamjajum pujau asagmin.

2

¹ Tau asan, ataktuk wakettsanke ijagsashtajai ditan wake besemag anentaimtiká wekayig tusan juwakbaijai. ² Wagki atumin wi wake besemag anentaimtikaish, ¿yaki minash shiijash aneemtijusti wi atumin wake besemag anentaimtikaish? ³ Nuadui ayatak agatjabiajime, wi anui taamtai atum mina shiig aneemtijumaina nu wake besemag sujusaijum tabaunum; tujash kajintsan anentaibaijai ashí atum aidautigmek wi shiig aneakuig ashí shiig aneemainaitjum nunak; ⁴ wagki senchi wake besemag anentaimkun, anentaijuish waitiakun kuashat negá negajai agajan awetibiaijim nunak wake besemag anentaimjatnume tusanuk dutikachbaijai, ayatak atumin shiig senchi aneamu ajuta nuna dekatnume tabaunum dutikabaijai.

Pablo tsagkugkagtugbau

⁵ Tujash makichig aents mina wake besemag anentaimtijuja nunak imá minakek dutijuache, ashí atumnash imatiksagkeap dutijamawaje taja nunak, nuní uwaekanuk tumaitsujai. ⁶ Atum ainajum anuiya imá kuashtatijum nu aents suwimak susauwaitjum duka maake, anuig atí. ⁷ Yamaik atumek tsagkujajum anentai ichichtugtajum, wake besemag ane anentaimkawa kakaakchaunum jegantai. ⁸ Nuadui atum yaunchuk ni aneejakuitjum dutiksagmek aneamu iwaintuktajum tusan segajime. ⁹ Duik juna pachisan agatjabiajime, dekas wi tabaunash ashí umikagtimpash tusan dekapsatasan. ¹⁰ Atum aidautijum ya tsagkujagme wishakam nunak tsagkujattajai. Nunak tsagkugmain ajusú asamtai tsagkujamjai atumi pachisan Cristo eemtin. ¹¹ Nunú aaja dutikachbaunum Satanás eteentugma tsanugmamaina nu shiig dekaidau asaja.

Pablo yaakat Troas jegá shiig juwakchamu

¹² Yamajam chichaman Cristo pachisan etsegkatasan yaakat Troas jegaa ai, Apu Jesús waitin ujatjimi; ¹³ tujash yatsug Titon wainkachu asan

shiiḡ juwamainchau dekapeakun, ditanak akattsan ukuakun Macedonia nugkanum webajai.

Cristui depetmatak awai

¹⁴ See tajai Apajuin, Cristui tuke depetbau etama dui, jutii chicham etsegbaushkam ashí yantamnum pampaag wegau asamtai, pegkeg kugkuina iman dekapenak kuashat dekaatatus wakegainawai. ¹⁵ Jutii aidautik Cristo Apajuyai iwaintama nuig incienso pegkejan kugkuwama iman ainaji. Nunú kugkuina duka dapampaewai uwemjatin aina nui, megkaejatin aina nuishkam. ¹⁶ Nunin asamtai megkaejagtin aina duka Apajuí chichamenak jakau mejegama iman diinawai; untsu uwemjatin pujuta jukiagtin aina duka Apajuí chichamenak kugkuin pegkeja iman dekapenawai, ¿ya jujú chicham aidau etsegmainnash umintsash awa? ¹⁷ Jutiik tikich aidau kuichkijinatasag Apajuí chichamen yapajiwag waitá etsejuina nuninuk ainatsji, dekaskenum Apajuí awemamu asá, Apajuí eemtin Cristo daajin etsejuinaji.

3

Yamajam chicham apakbauwa nu pachisa etsegbau

¹ Juna pachisan takuish, ataktú nigki chichagmamak tuu wekaewai tujutmain ainatsjume, ¿atsa tikich wajukena nunikaik jutiiin chichamkagtuinak carta agagbau iwaintumainaitjim, nuniachkush atumek carta agajam sukagtumainaitjum? ² Atum ainagme jutii cartaji, iina anentai aina nui agagbau aidautigmek; nunin asagmin ashí aents carta agagbaun wainak augmaina dutika shiiḡ dekagmainawai. ³ Atum ainagme, Cristo papinum paan agagbauwa nunin aidautigmek, nunak tintai agatia dutijamachajui, jutii chicham etsegbau antukuitjum dui, Apajuí tuke pujuuwa nuna Wakanin dutijamawajui, kayanum agagbauwa dutiktasuk iina anentai nejea nuwi dutikauwai.

⁴ Apajuyai kajintsá anentaimaidau asá, Cristo dutikauwa duka dekaskeapi tuinaji. ⁵ Juka iina senchijinig imatika takainaji tumamaitsuji, jutii senchi takainag duka Apajuinumia minawai. ⁶ Nigki unuitamjauwai yamajam chicham apakbauwa nuna etsejuinak yaimkatnume tujamu asa. Duka chicham umiktina duchauwai, Wakan takaamua nuuwai, wagki chicham umiktina duka jatanum ejekagtawai, untsu Wakania duka pujutan sukagtinai.

⁷ Chicham umiktin aidau kayanum agagbau iman aajakua nu takaamu jatanum ejekagtiwa nunú, Moisesa yapiin winchamtin awajtusmatai, Israel aidauk Moisesa yapiinak diimainchau dekapsajui. Duka megkaekatnaitak nunikui. ⁸ ¿Dekas aan nagkaemas iman tsaaptin amainchaukait Wakan jutiiiní takaamua nunú? ⁹ Chicham umiktin takaajakbauwa duka bakujatmainaitak dekas iman aajakui; aan nagkaemas imanai dekas Apajuí aentsun bakumamainchau ema nu etsejuinaku takainag duka. ¹⁰ Yaunchuk iman aajakua duka, yamaik imanchauwai, dekas iman wagaakua duka yamajam chicham apakbauwa nuuwai. ¹¹ Wagki chicham umiktin megkaekatnaitak iman aajakua nuna nagkaesau tuke atinai yamajam chichama juka.

¹² Nuadui nunú dakaidau asaja shiiḡ kajintsá chichagkagtuinaji.

¹³ Moisés yapiin winchamtin wajasú asa, ju megkagun Israel aidau wainkainum tusa, jaanchi yapiin ejakua numamtukek jutiik wajainatsji.

¹⁴ Tujash ditak dekamainchau dekapajui, nuadui yamai tsawanta jui

yaunchuk chicham apakbau aajakua nuna aujuinakush antuinatsui, nunisag jaanch ejatkamua nunin juwatkajui, nunak imá Cristuk jujumainai. ¹⁵ Moisés agagbauwa nuna yamai tsawanta jui aujuinakush, jaanchi ejatkamua nunin ditá anentainig ajuinawai ¹⁶ Tujash Apu Jesusai sujumaniagtaik jaanch ejatkamua nunina nunak jujawai. ¹⁷ Wagki Apu Jesusak Wakani, nunin asa Apu Jesusa Wakani tuwí awa nuwi agkanbaetak awai. ¹⁸ Nunin asa ashí jutii aidautinak, yapi ejatjamu atsau asamtai espejonum wainmantayama numamtuk awajfamji Apu Jesusa imanjiya nunú, nunin asajin yapagtama niiya imanuk etamji Apu Jesús, nunak Wakania nu dutijamji.

4

¹ Jutiinak Apajuí wait anenjamag ju takatan amasú asamtai mijatatsji. ² Nuniaku uuká takaamu datsanmain aina duka ashí idaisau asaja, tsanumsaikish chichatsuk, Apajuí chichamesh yapajia etsegsuk, dekaskea duke paan etseju asá, aents aidash pegkeg anentaimtusa diyam Apajuí emtinish ainaji. ³ Tujash jutii yamajam chicham etsejuinag nu ejakbauwa nuninaitekug, imá megkaejatin aina nuig nuninai. ⁴ Dita dekaskeapi tuinatsu nunak, Iwanch ju nugká apujiya nu antumainchau emamu asag nuninawai. Nuadui yamajam chicham Cristo pachisa etsegbauwa duka tsaaptin winchamtina imanai; duka Apu Apajuí niimega nunú asa. ⁵ Chichagkagtuinag duka iinu pachisaik chichatsji, Jesucristo dekas Apua nu pachisa chichagkagtuinaji; tujash jutii Jesucristo aneamunum, atumi inataigmia nunin ainaji tumamji. ⁶ Wagki Apajuí, suwen tsaaptin wajastí tusa tsaaptin emauwa duke jutii anentainash tsaaptin awajsauwai, Apajuí imanjiya nunú Apu Jesucristo yapiin etsanta nuna tikich aidash tsaaptinun iwaintukti tusa.

Kajintsá anentaibauwai pujamu

⁷ Jutiik, ichinak duwe najanamunum waji akik aidau egketiama dutikamu ainaji, nunak Apajuí niina senchiji muunta nuna iwainaktatus dutikauwai, duka iina senchijichui. ⁸ Nuadui kuashat waitiamu ajutjamainakuish pimpiatsji, uyumamu ajutjamainakuish waugtuinatsji. ⁹ Iina shiwaji aidau waitkagmagtaish imá iinakek Apajuik idaitamtsuji, suwimjamainakush mantamainatsui. ¹⁰ Tuwí wegaji nuig, Jesusan maatatus utujujakú aina imatijamainaji; jutii diigmasag Jesusnash imatiksagkeap waitkajakú ainawa tusag dekatnume tabaunum. ¹¹ Nuadui jutiik, Jesús pachisa etsegbaunum ni mantamdauwa nunisaik mantamnatasa umintsá yujainaji, aaja nuniamunum Jesusa pujutji jutii iyashí jauwa nuish iwainakta tabaunum. ¹² Jutii mantamnamainnum yujasá chicham etseggamunum, atumesh pujut tuke atina nu jukiu ainagme.

¹³ Tujash agagbauwa nuwi: “Dekaskeapi tabau ajutu asamtai chichakmajai” tawai, nuadui jutiishkam nunú wakanik ajutjamu asamtai dutiksaik chichainaji. ¹⁴ Dekainaji Apajuí Apu Jesusan inankiuwa dutiksag jutiinash inantamkiag, atumjai ijupag niina pujutaijin jujamkiagtina duka. ¹⁵ Ju ashí waitiamu ajutjama duka atum aneamunum imanika waituinaji, kuashat aents aidau Apajuí anentag wait anenjamu asag, aan kuashat aents Apajuinash see tuwinak niina imanjiya nunash dekatnume tabaunum.

¹⁶ Nuadui iina iyashí muuntuch weak mijamtaishkam, iina wakaniya nu kashí kashinig senchimeakui mijamtsuji. ¹⁷ Wagki jui waitiamu aina duka

wamak nagkaebau ainawai, Apajuí imanji tuke atinun sujamsatna nuuwai waitiamu aina nuna nagkaesauwa duka. ¹⁸ Nunin asamtai jutiik waji paan wainmain aina duka diischagmi, dekas wainchamu aina nu diisagmi, wagki waji wainainag juka megkaejatin ainawai; tujash wainchamu aina nuuwai tuke atina duka.

5

¹ Jutiik, ju nugka juig jega jegamkam tuke achauwa nunin ainaji; tujash dekeinaji iina iyashi jega mamumaina numamtuk wajataish, Apajuí umigtamkam tuke atin aents jegamkachbau nayaimpinum ajutjama nunú. ² Nuadui senchi wakegamu ajutjamji nayaimpinum yamajam iyashimka pujustinaitag nunú jukita tabaunum; ³ nunika wisú aig tusa jaanch nugkutiana numamtuk wajaktinaitji. ⁴ Dekaskenum jega tuke achauwa nuninum pujusaja senchi waituinaku pimpiki batsatji, dui wisuwa nunin atasaik wakegainatsji, dekas yamajam iyashia nu anugjamu asajin iyash jauwa nunak pujuta nu emegkaktinai; ⁵ nu nuniktinnak Apajuí umikui, nuadui nu jukitin asajin Wakani Pegkejin emtikak amasui.

⁶ Nuadui tuke kajintsá batsatainaji, wagki iina iyashiya jujai pujakuik, Apu Jesusjai atushat pujuinag nu dekaidau asaja. ⁷ Yamaik dekaskeapi tabauwai pujuinaji, wainchayatku; ⁸ tujash kajintsá anentaimji, nuniau asá wakegainaji jujú iyash ukuinaku Apu Jesusjai ijunja pujustasa. ⁹ Nuadui iwaaku pujakuish, nuniachkuish nijai ijunja pujakuishkam ni shiig awajkata tabaunum kakanmamji. ¹⁰ Wagki tsawan jegatnai ashí jutií aidauti Cristo eemtin ijunjatnaitag nunú, nunika ajin makí makichik aents nugká pujusá takasbauji pegkeg ataish, tuja pegkegchau ataishkam dutiksag sujamsatna nu.

Pablo pujutji

¹¹ Nuadui Apu Jesús puyatjusa emematmaina nu dekau asaja, aents aidash niini dekaskeapi titinme tusa imatjuinaji, jutiinak Apajuí shiig dekagtamji, nunin asamtai atumesh nuninuk anentaibau ajutjainaitjume. ¹² Juka ataktú atumiin chichagmamku tatsuji; ayatak jutií eme anenkagtumainaitjum nu pachisa taji, nuniakjum aents aidau pegkeg anentaiyai takaak wajukmaina nuninak ememaina nu, wi dutikag nu ujakminjum tau asan. ¹³ ¿Atumesh jutiik pachimasa chichau asajinig, auk imaankau asag tu yujainawai tukagtuinajum? Imaankau asaja, juka Apajuí ememattasa taji, tujash imaankau asajaik chichagkagtuinatsji, juka atum yaigkagtasaja etsejuinaji. ¹⁴ Cristo senchi anempa nu dekaidau asaja, niina chichameg wakesa etsejuinaji. Nigka ashí aents aidanum mantamdauwa dui, ni nemajuinaku ashí pegkegchau takatak idaisau asá jakaujai betek ainaji. ¹⁵ Cristuk ashí aentsnum mantamdauwai, nunin asamtai aents niina nemajuidauk, dita wakegamun takaa batsamsuk, Cristo ditaí mantamna nantakiuwa nudaun takamain ainawai.

¹⁶ Nuadui jutiik yamai nagkamsaik makichik aentskesh ju nugkayati waininag nuní niimtinuk waintsuji, nuigtú yaunchuk Cristun wainkau aina nuní niimtinuk niish waintsuji. ¹⁷ Nuadui aents Cristun nemajuidauk duik pujutinak idaiyinak, yamajam pujutan jukiaju asag, dekas yamajam aents ainawai. ¹⁸ Ashí nu aina nunak imá Apajuik dutikawai, Cristun awetugma nijai igkumtijamkauwa dui, dutijabau asa jutiinashkam, tikich aents aidash, Apajuikai pujutjum iwajatajum tusa ujaktajum tujabiuwai. ¹⁹ Cristunak ashí aents aidauk Apajuikai epegtuniatnume tusa Apajuik

awemauwai. Dutikamu asa, iina tudauji aidaunash pachitjamtsuk idaitug-masui. Tuja jutiinak: Apajuijai pujutjum iwajatajum, tusa chichagkag-tuktajum tujabiuwai. ²⁰ Nunin asamtai jutiin, Cristo mina chichameg wi tumainaitag dutiksagmek etsegtugkatajum tusa awemamu asaja, Apajui atumin tujaamaina nunak jutiin tujamiu asamtai, Cristo tawa dutiksanuk tajime: Pujutjum Apajuijai iwajatajum. ²¹ Cristuk makichkish tudau aina nunak takaschauwai, nunikunak Apajui juiti tudaujin niinak aents tudaujai betekak emauwai. Ni nunikbaujin iishkam uwemja niijai ijunjau asajin, yamaikish tudau ainajinig, pegkejan takauwa iman diigmaji.

6

¹ Jutiik Apajui chichame etsegbaunum yaimin asaja segajime: Apajui wait anenkagtamun iwaintugmakua nu ayatak antukjum idaisaigpajum tusan. ² Wagki Ni aatus tawai: “Tsawan wi antugmain jegau asamtai untsugkumin aikmajame, dutikan tsawan uwemainjum jegagtamatai yaigmajame”. Nu tsawantak yamaiya juuwai Apajui aigmamainuk. ¡Yamaiya juuwai tsawan uwemaina dushakam!

Pablo waittsamuji

³ Makichkish pegkegchau iwaintuinatsji, ii takainag nuna pegkegchau chichajinum tuidau asaja. ⁴ Ayatak dekas Apajuin inakempap ainawa tusa dekagmatnume tabaunum, waitiakuish emamkesa, atsumakuish, utugchat akuish katsuntuinaji; ⁵ asutamainakuish, achipak egkepainakuish, ijuntugmag jiyapainakuish, imanisaik takainaku, kanutskesh tuke tsawampabijai, yujumkash yutsuk yujabijai, ⁶ nuniaku iwainmabaiji iina pujutinish pegkegchau atsugtabau, ii dekamushkam, wait anenkagtamu, Wakaní Pegkeji jutiini pujau asa dekaskenum anejatbauwa dushakam; ⁷ chicham dekaskea nu etsegtanum nuigtush jutiini Apajui senchiji ajutjama nujai, juiti imagnisa pujuinaku tikich aidau chicham ujaku ii shiwaji aina nui ayamjumatnash sujamji; ⁸ eme anenjamush ainai, dakitjamaidaush ainawai, pegkegchau chichagtamainai, pegkejan chichagtamush ainawai, jutiik wait ainakuish, tujash dekaskenmag dekaskea nu chichau ainaji; ⁹ wainchatai utugmaina dutijamiagtaish tikichik shiig waipainaji, jakat-taku yujakuish iwaaku pujuinaji, suwimkan sujamainakush mantamainat-sui; ¹⁰ diismakek wake besemag ainaji, tujash tuke shiig aneasa pujuinaji, ujunauch ainakuish tikichik wiyakchamitkainaji, jutiinu atsugta-mainakush ashí ajutamainawai.

¹¹ Yatsug corintionmaya aidauwah, jutiik dekaskenum ii anentaibaujiya duka uutsuk ashí ujakbaijime. ¹² Jutiik makichkish atum uugkamuk atsugtami, tujash atumek uuká anentaimjume. ¹³ Nunin asagmin (uchig anentsan tajime), wait anesajum minash atum anentaibau ujatkatajum, wi atumin uutsuk tajim aikasjumek.

Jutiik Apajui jee ainaji

¹⁴ Atumek Jesusa dekaskeapi tuchau aina nujai ijuntsa takata duka wakejumaitsugme, wagki ¿pegkeja dusha pegkegchajush wajuk at-uemainaita? ¿Nuigtush utugsaya tsaaptina dusha suwejaish apat-daimainaita? ¹⁵ Cristuk Iwanchjaig ijunmaitsui. Nunisag Cristun nemajuidaushkam Cristun nemagchau aina nujajig ijunmaitsui. ¹⁶ Jega Apajui ememattaiya duka, apajuiantai dakumkamu aina nujajig makichkish

apaemaitui. Wagki jutiik Apajuí tuke pujuuwa nuna jee ainaji, nuadui Apajuí chichaak:

“Ditai pujustajai, nunikan ditajai wetajai. Dita mina aentsug atinme, nuninakui wi dita Apajuiji atajai”, tiuwai. ¹⁷ Nuadui Apu Apajuí:

“Tupanjatajum pegkegchau takaina duka, nuniakjum kanaktajum pegkegchau aina duka takasaigpajum, nunikagmin wi atumnak jukitjime.

¹⁸ Wi atumin Apa atajai, tuja atum mina uchig, mina nawantug atajum, tiuwai Apu ashí senchigtina nunú”.

7

¹ Nu aatus anagtamamu aidau ajutjamaidau asamtai aneetaig yatsug aidauh, ashí pegkegchau aidau iina iyashin, wakannash pegkegchau etugtamain aina duka idaisagmi. Apajuí ajantusa diinaku, aan nagkaemasa pegketasa kakanmamsagmi.

Pablo shiig aneamu

² Atumi anentaiminish jutiijaish shiig juwaktajum, wagki makichik aentskesh pegkegchau takagsachbaiji, makichkish pegkegchau etamainuk jintintuachbaijime, makichik aentskesh wainka inakuik waitkaschabaiji. ³ Wika junak atumin bakutasan tatsujime, yaunchuk tibaijim dutiksanuk, atumek mina anentaijui pujagme, jaaknush iwaaku pujaknush atumjai pujustasan wakegajai.

⁴ Dekas uutsuk tajime, atumiin ememasa anentaibau ajutui, nuniakun kuashat ichichmamjai, ashí waitiamu ajutjamkuish shiig aneamu ajutui.

⁵ Macedonia taabiag duik iina iyashig ayamtjashbaiji, ashí agaya aidaush waitkagmagmayi; pampanjamainakuí ishankagtakuish waitbaiji.

⁶ Tujash Apajuí aents pimpikiaju aidau ichichmatan suuwa nu, Titon awetugma jutiinash anentain ichichtamjabi. ⁷ Tujash imá ni taa duikik nunikchamjai, ni atumin waipak ichichmamjau asa, atum jutii wajatkatasa wakegamun, nuigtú wi waitiamu antukjum kuashat wake besemag batsatkujum, uyumatjuinajum nuna ujatkamtai antukan, nuní nagkaemasan shiig aneasmajai.

⁸ Tuja wi papí agaja awemabiag nu wainkajum wake besemag anentaimsauwaitjume, nunak wisha waittsabaijai, tujash yamaik waitiatsjai, wagki papiin agatjabaijim nu wainkajum ujumak tsawantai wake besemag pujusú asagmin. ⁹ Yamaik shiig anejai, nunak atum wake besemag batsamsaujum dui nuniatsjai; atum wake besemag batsatkujum Apajuiyai ataktú wakitkijum dui. Duka Apajuí dutijamkui nunikugme, nuadui atumin pegkegchau awagmamaina duka dutikachjiapi taji. ¹⁰ Apajuí wake besemag anentaimtijama nunak pujutjin yapajia uwemjati tusa dutijamui, nuniiau asamtai nu anentaimtaku waitú pujumainuk atsawai. Untsu nugkanmaya wake besemag awa duka jatanum ejekagtawai. ¹¹ Apajuí wake besemjan itagtama duish wajukaugme nu diistajum, iwajuk yapajin-ugme nunú! Atumiin utugchat awa nunú puyatjusum shiig dekaugme nuniakjum minashkam ayamjutkaugme. Kajeamush nuigtú ishamaush ajutjamsaje, nuniakjumesh mina waitkatasajum wakekaugme, nuniiau asajum pegkegchaun takaa dusha suwimak susaugme. Nu ashí dutikaujum dui iwainmamkaugme, atumesh dekas nunú pegkegchau dakituinajum duka. ¹² Wi papiin agagmayag nunak aents pegkegchaun takasua nuna anentaimtusnukesh agagchabaijai. Nuniachkunush aents waitkasbaunakesh agatjachbaijai. Ayatak atum jutii puyatjusum antugkagtajum

nuna Apajuí eemtin iwainaktasan agatjamjime. ¹³ Ashí nu aina duka ichichmantan sujamsauwai, atum ichichmanjauwaitjum nunisag. Tujash nunú ichichmanjamua nuní nagkaemasa shiig aneasmaji, wagki Tito shiig dakujus pujau wainku, ashí dita aidauwap wakanin ichichmantan susaje tusa. ¹⁴ Wi atumin ememattsan anentaimtamun Titonash ujakmajai. Nuna tija nunak pegkegchauk juwakchajai. Ii ashí dekaskea nu pachisa atum ememattsá tibaijim nunisag Titoshkam dekaskenum waipakaje. ¹⁵ Nigka atumnak nuní senchi anempajume, ni atumin segapakuish betek umijujakbau asa, nuigtú puyatjusjum eme anentsá jukiwaitjum nuna aneaku asa. ¹⁶ ¡Shiig aneamu ajutui, atumiin kajinmasan anentaimag dui!

8

Jerusalegnunia Cristun nemajuidau kuichik susatin anentag ijumjamu

¹ Yatsug aidauh, iglesia Macedonia batsata nuna Apajuí wajuk wait anenjae nuna pachisan ujaktasan wakejajime. ² Ditak senchi waitiamunum batsatiatak, shiig aneamunum ujunauch ainayatkush, wiyakuch wajukmaina imanisag wakejus kuashat anentag yaimkaje. ³ Wi wainkau asan etsegjai, dita dutikmainji ajamun diisag wakejus, dita anentaimtusbaujin inagkeasag anenjauch susagmayi; ⁴ ditak nagkabiag, Jesusa nemajuidau pegkejam aina nunú yaigmí taji tusag segatiagmayi. ⁵ Wi anentaimtusbauwa nuna inagkeasag dutikawagmayi. Dekatkauk ashí ditá pujutinak Apu Jesucristun idaitusag, nuadui wi Apajuí wakegamun taja dutiksag umikagmayi. ⁶ Nuadui Tito segaji, ni anui taa, atum tikich wait anenjatin ijumkujum nagkabauwaitjum nuna jukiti tusa. ⁷ Atumek ashí wagaagme, dekaskeapi tutanmash, wamak chicham dekatnumash, unuimatnumash, wakejusa anenkai yaimat jutiini unuimajuitjum dutiksagmek, wait anenkagtusjum yaimjum nuishkam wagatajum.

⁸ Wika ju dekas umiktajum tusan tatsujime. Ayatak tikich aidau wajuk shiig wakejus aikainawa nuna wainkatnume nuninak ditanu dekas anenka nunash iwainaktinme tusan dekapeakun tajime. ⁹ Atumek dekagme iina Apu Jesucristo wait anenkagtamujiya duka, atumin anempamunum ujunauch wajasui wiyakchaitak, ni ujunauch webaunum dekas pegkeja nuna jukitnume tujamu asa.

¹⁰ Wika junak atumin shiig awajtamaina nuna pachisan tajime. Tikich mijan nagkaemakmaya dui nagkamsajum ayatak ijumjata tabauk nagkamachbaijume dekas wakaesa dutikata tabaush ajutjamsagmayi. ¹¹ Yamaishkam atum dutikmain ajutjamaina nu diisjum dutikatajum, nagkamchakjum wakeejusjum dutikami tusajum shiig iwainakuitjum dutiksagmek ematajum. ¹² Wagki, aents dekaskenum wakejus dutikatjai tusa, wajupa ajawa nuna diis anenjauch sukagta nuna shiig anentus Apajuik jujawai, Apajuik aents atsuja nunak segatsui.

¹³ Junak tikich yayamu shiig anenai atum waittsatajum tusan tatsujime, mai betek atsumamu ajutjamtinme tusan tajime. ¹⁴ Yamaik atum dita atsumainakui yaimainuk kuashat ajutjamainawai; tikich tsawantin atum atsumtaish dita yaimpamain ainawai. Junak mai betekak atsumamush ajutjamtinme tusan tajime. ¹⁵ Apajuí chichame chichaakushkam: “Kuashat jukiua nudaush ampinjachui, tuja machik jukiunush tagagchawai”, tawai. ¹⁶ See tajai Apajuin, wi atumin uyumajim dutikajim Titonash anentaimtan susau asantai. ¹⁷ Wi awemag juna juki, niishkam atumiin minitatus wakegau asa, wakejus minawai atumin waipaktatus.

¹⁸ Titojai awemajai makichik yatsutan, ashí iglesia aidaush chicham yamagma juna shiig jintinkagtawai tusag wakejin agma nuna. ¹⁹ Nuigtushkam ju iglesia aina juiyan jutijai miniti tusa etegkawaje, anenjauch yaimkatna nuna ejegati tusag, nuniak Apu Jesús eme anentsá wakejusa takainag nuna yaimkati, nunitai jutii yaimkatasa wakegag nunash dekaawagtinne tuidau asag. ²⁰ Nunú yatsut atsumaidau yaigtinun, anentag kuashat kuichik ijumjamu juinag nuna pachisag, wainak augmatjamsainum tuidau asaja tuke kawemak yujainaji. ²¹ Nuniaku utusaik pegkeja duke takasag tusa kakanmamainaji. Imá Apu Jesusa eemting iwainmamkatasa nunitsuk, aents aidaush jutii shiig takainamun wainkatnume tabaunum.

²² Ditajai awemajai tikich iina yachi ashí wajiinum kuashtá dekapsamua nuna, nigka shiig kuitamas takauwai, yamai atuminish shiig kajinmas anentaimin asa wakegas minawai. ²³ Titon pachisan tajime, nigka mina kumpajui nunin asa wijai atuegak atumi yaimpaktatus takauwai. Tuja tikich yatsug jimaja nunak, iglesia aina nu awemainawai. Ditashkam Apu Cristun emematin ainawai. ²⁴ Iglesia aidau dekaatnume tabaunum, atum dita aneamugmish iwaintuktajum, jutii atum eme anentaimtuidau asaja tajime.

9

Jesusa nemajuidau yaigtasa kuichik ijubau

¹ Nunú pegkejam aidau yaigtin ijumnagti tibauwa nunak, ataktú pataknuak agatmaitsujime. ² Wagki, wika atum wakesajum dutikamuginak shiig dekaagime, nuniau asan Macedonia nugkanmaya aidaun ujaknush, atumi eme anentsan ujainajai. Nuniakun Acaya nugkanmaya aidaush tikich mijanae dui nagkamas, dita yaimkatnuijak umintsaje tajai. Nunú atum wakejusa dutikamun, Macedonianmaya antukag senchi wakekagmayi. ³ Atum imaniagminig yatsug aidaun awetajime, wi atumin ememattsan chichag nuna wainak tu wekaguwa nunin dig-sainum tusan, wi etsegtajim nunisjumek umintsajum asatajum tusan tajime. ⁴ Macedonianmaya aidau wijai anui takamá, wi tajim nuninchaun waipainakuig, atum datsamain aig, ii atumiin kajinmasa chichakú asaja jutii datsamainaitji. ⁵ Nuadui nunin ai tau asan, ju yatsug aidaun, atum emkajum wetajum, nunikjum yaimkatnun dita anagkagtuamun wakejus nagkamawagmaya nuna ijumjatnume yaigtajum tusan segainajai. Ijumja umisjum asatajum sujimayatku dutiktusuk, wakejusampap jutikainawa tumain ati.

⁶ Jushakam adeagtajum: Ajakan machik ajauk machik juwaawai, kuashat ajakmakushkam kuashat juwaawai. ⁷ Makí makichikitijum atum ajauk susatjai tusagmae anentaimsaugme, dutiksagmek susatajum, junik anentaimiatkujum, nuniachkugmesh tikich apusata tujamainakuí dutiktusuk. Apajuik ya wakejus suwawa nuna imá shiig aneawai. ⁸ Apajuik senchigtina ibau asa kuashat ajitnume tujamu asa ashí anenjauch amainai; ditak, imatiksag ajuinamu asag, tikich atsumaina nunash ashí takat pegkeg aina nuwi yaigtinne tau asa. ⁹ Agagbaunum chichaak: “Ujunauch aidaun kuashat susaja nunak,

Apajuik tuke kajimatjukchatnai dita pegkeg dutikamujiya nunak”, tawai. ¹⁰ Apajuiyai ajaka jigkayí ajakmatnun sukagta duka, nuigtú yuwatnunash sukagtinuk. Nunin asa tu atsumatjume ajakmatasagmesh

nunak amastatui, nunik nigki tsapapak kuashat nejepitkak atum wake-sajum yaimjum nunak, nuní nagkaemas kuashat sujamsattagme, tikichin pegkegnum yaigtinme tusa. ¹¹ Dutikamu asajum atumek ashí wajiinum wiyakchamitkamu atatjume, atumi tsagkagminig ashí yaimain ajutjamt-inne tabaunum. Nuadui atum shiig aneasjum yaimat ijumjajum jutiini awemajum nuna, yatsug waituidau aina nunú juinak, Apajuin see tiag-tai. ¹² Wagki jujú atum yaimkatin takaajum duka, ayatak Apajuí aentsji pegkejam aina nunú atsumaina nuigkik achattawai, Apajuí shiig kuashat see tabaunmash yaigtatui. ¹³ Jujú yaibaun jukiag Apajuin emematiagatui, atum yamajum chicham etsegbau antukjum Cristo dekaskeapi takujum iwainmankujum dutikajum dui. Nuninak Apajuinash eme anentus emematiagatui, atum dita wakejusa yayakjum, ashí tikich aidash yayajum nuadui. ¹⁴ Nuninak atumin anempas Apajuin aujtugmagtatui, Apajuí shiig kuashat wait anenkagtamujin atumin iwaintugmakaja dui. ¹⁵ See tajai Apajuin, chichamaikish tumainchaun shiig kuashat anenjauch sujamsauwa nuadui!

10

Pablo ni takaamuji ayamjusa chichaamu

¹ Witjai Pabloitjai, Cristo kakagchauch nuigtú wait anenkagtin aajakua nunisnuk segajime. Mina chichagtuinak: Pablok jutiijai jui pujusag senchi ajankagtinuwe nuninaitak atushat kanaki papi agatjamkug kajeká senchi chichagkagtawai, tujutuinaawai. ² Duwi segajime: Wi atumin wainkatasan taakun, jutií pachijatus aents wakegamun takainawai tukagtuina nuna, shiig titajai tusan umintsan pujajai. ³ Dekaske, jutiik aents ainaji, tujash pegkegchaujai maaninakuik, aents maanina nuninatsji. ⁴ Wagki, maanitai takuinakag duka ju nugkanmaya ainatsui, duka Apajuí senchiji ashí pegkegchaunash tsaina nuuwai. ⁵ Aentsú anentaimesa tutaiji, ememainak Apajuí dekatan shiwagmaina dushakam ashí tsaigkaji, dutikaku ashí aentsti anentaimtajiya duka Cristui sumimtikainaji niina umigkati tusa. ⁶ Jutiik umintsá pujaji ashí chicham umitan dakituina nunú suwimak sutasata, atum dekas betek umittajum nuniakjum.

⁷ Atumek waji paan wainbauwa duke diyagme. Makichik aentskesh dekaskenum Cristunu anenmamuk, ni anentaimtuma nunisag adeagti, dita Cristunu aina nunisaik jutiishkam Cristunu ainag nuna. ⁸ Wagki wi atumin nagkaesau ememasan witjai chicham etsegkata tibaunuk tumamkunush datsamatsjai; nunak Apu Jesús, atum niini dekaskeapi tajum nu megkaekajum tusa yaigtí tujutiu asamtai, minak nu ame emegkatkata tujutchauwai. ⁹ Wi papiin agajan awetajim junak, uwakatasankesh aikasjime. ¹⁰ Tujash awai mina pachittsag: Pablo carta agag awetugmakug najamnun tujamji, tujash taa pujakug chichamesh puyatjusa antugmainchauwe tujutuinaawai. ¹¹ Nuna aents aatus tujutuidaushkam dekaatnume: Wi papinam agakun timayag nunak, atushat pujusan anui taaknushkam imatiksasuk umiktatjai.

Aents pegkejak nigki pachimasag chichachui

¹² Jutiik, aents ditak emematmamas tikich aidaujaish apatuk niimas nu-jai betek ata tuina nuninuk ainatsji. Tujash ditak anentaimes, tikich aina nunin achainjash tusag nunina nunak shiig dekachiatak nuní yujainawai. ¹³ Tujash jutiik, wainkaik imaanikaik emematmamaituji. Apajuiyai

jutiish wajuk dutikmainaitji nuna tujamuk. Nigki jutiinak atum Corinto batsatjum anuish takastí tusa wakejutpaji. ¹⁴ Nuadui yaunchuk atumin taachu asá wajukmaina nunikaik ii nunimaina nu inagkeakik dutikatsji. Jutiiyaitji dekatkau yamajam chicham Cristunua nu etsegku atumiin tautik. ¹⁵ Jutiik ii takaschamu aig, tikich takasbaunmag ememamaitsuji. Ayatak wakeesa dakainaji atumjai aan kuashat takastasa. Atum Cristui dekaskeapi tajum nu aan nagkaemas ajutjamti tusa. Jutiik Apajuí dutikata tujabauwa duka dutiksaik takainaji. ¹⁶ Nuniaku atumi nagkaetamas atushat batsataidaush yamajam chicham ujaktasa wakegaji, tujash tikich chicham etsegkamunum waitsuk, tikich takasbaunum ememaig tuidau asaja.

¹⁷ Makichik aentskesh eme anenmamjatatus wakegauk, Apu Jesús takasbaujiya nuna eme anenmainai. ¹⁸ Wagki Apu Jesusa eemtin pegkeg wantina duka nigki emematmama duchauwai, ni Apu yana eme anentawa nuuwai dekas imanuk.

11

Waitá etsejin aidaun pachis Pablo tibau

¹ Wi imaanag wajukmaina nuniakuish katsuntsajum diigmainaitjume. ² Wagki wika Apajuí akasmataijiya nuna jukiú asan atumnak akaseajime. Atumek, wi makichik aishmagnum nemakti tusa anagmitkamua nunin ainagme, duka Cristui, nuwa aentsun adjkachua iman iwainakta tau asan. ³ Tujash puyatajai, dapi Evan tsanujua dutiksag atumnash anentaim-tagmin dekaskenum imagnisjum Cristun nemagjum nu tsanugmainakui kanakajum tusan. ⁴ Makichik aentskesh atumin tajutjamawag, jutií Jesús pachisa jintintuauwaitjim nuna yapajiwag jintinjamainak, Wakaní Pegkeji jukiúwaitjum nunash, tikich wakan jumainaitjume tujamainak, yamajam chicham etsegkamua nunash yapajia jintinjamainakuish shiig antugkatasajum wakegajume. ⁵ Tujash apóstol ainaji tusag iman anenmamaina nuna nugkaanik anenmamsujai. ⁶ Wi shiig jintiaja chichaachkunush dekatjuig nuninchauwaitjai. Duka ashí ii takaamunum tuke iwaintibiajime.

⁷ Atumin yamajam chichaman Apajuínun pachisan ujaknush akigkata-jum tusanuk segachuitjime, ayatak yaigkan emtikata tau asan. ¿Nuna dutikauwaitag duiká tudau takasag? ⁸ Wika tikich nugkanmaya iglesia aidau akigkagmatai, nunú kuichkia duik atumin yaigtasan wekaeyajai. ⁹ Wi atumiin pujubiag dui atsumaknush makichkitigminakesh waitkasch-abiajime, yatsug macedonianmaya aidau taawag ashí wi atsumamunak sujusagmayi. Atumin waitkasaig tusan kuitamamkabiag nunisnuk kuitamamkattajai atumin waitkasaig tabaunum. ¹⁰ Cristo dekaskejiya nu dekas ajutu asamtai ememasan tajai, Acaya nugkanum batsamin aidaunak makichkish kuichik sujustajum tusanuk segashtinaitjai. ¹¹ ¿Wagka nunash taja? ¿atumin aneachu asanuk taja? Apajuí dekawai atumin anejim nunak.

¹² Tujash wi takaag junak, jutiksasuk emattajai, tikich aents aidau Apajuí awemamu ainaji tusag eme anenmamainak jutiiya imanuk anenmamaina nu imijkata tabaunum. ¹³ Wagki nunú aina duka wait apóstol ainayatak, Cristo apostolji wajukmaina numamtuk wajainawai. ¹⁴ Dita nunia duka anentai jegagchamnuakesh atsui, wagki Satanaschakam tsanumkug Apajuí aentsji nayaimpinmayaya iman weeta wajauwai, ¹⁵ nuadui niina takajin

aina dushakam pegkejan takauwa iman iwainmamainawai. Tujash nunú aidauk dita takasbaujiya dutiksaik suwam agtinai.

Pablo waittsamu

¹⁶ Awentsanuk tajime, imaanjauwa nuninuk anentaimjuttsaigpajum, tujash nunin anentaimjuktugmek ayatak diigsatajum tuke imaanjaujai betek chichaktajai, wisha machik eme anenmamjatjai. ¹⁷ Wi emematmamsan chichag nunak, Apu Jesús titá tujutbaun tatsujai. Nuadui imaanjaujai betek chichaaajai. ¹⁸ Tujash tikich ainawai ditak emematmamas chichaidaush. Nunin asamtai wishakam wiki emematmamsan chichaaajai. ¹⁹ Atumek shiig anentaimkau asajum, tikich anentaimkachu chichaman etsejuinakui shiig antujuinagme. ²⁰ Atumek inak etamaidaush, tsanugmajag jujutjamaidaush, wainak wajiin takagtamainakuish, aentschau chichagtamaidaush, yapimin awatamaidaush shiig antugjume. ²¹ Datsamayatkun tajime, jutiik tikima kakaakchauch asaja nu imanuk nunichabiaji.

Tujash tikich ditak emematmamaina nunisnuk wishakam emematmamjai, imaanjaujai betek chichaakun nunak tajai. ²² Dita hebreo aina wishakam nuninketjai, dita Israel aina wishakam nuninketjai, dita Abraham weantu aina nunisnuk, wishakam nunú weantuitjai. ²³ ¿Ditash Cristo takagnuk aina? Tujash witjai dekas ditan nagkaesaunuk, juna aaja takunuk tuke imaanjaujai betek chichaaajai. Wika ditá nagkaesau takasuitjai, ditá nagkaesau achinkanush egkemaawaitjai, ditá nagkaesau asutnauwaitjai, kuashta imania mantumain awajtukaju ainawai. ²⁴ Cinco imania judío aidau achigkag treinta y nueve imania asutuawaju ainawai. ²⁵ Kampatuma imania numí suwimjuawajui, makichkia kayai tukuujaju ainawai, kempatuma imania lancha wi wegamu tepeauwai, nunikmatai jakemain wajakan, makichkia nayantsa ejapen tsawampajuitjai. ²⁶ Kuasht wekaesauwaitjai, namak ishamainnum, kasa ishamain ayamunmash, mina pataag judío aidau, judiochu aidau kajegtuinakui. Nuigtú ishamain aidau yaaktanun, uwegshunum, nayantsanum weakun, tuja Cristo nemagnaitjai yatsut ainaji tusag tsanumaidaunum wekaekun. ²⁷ Senchi takasan yaweakun, kuashtá kanutsuk tsawaakun, yapajakun kitamakun, kuashtá yujumkan yutsuk wekaekun, tsetsekai waitiakun, jaanch atsugtakuishkam waittsauwaitjai.

²⁸ Juna aaja imaniaknush tikichia duka, kashí kashinig ashí iglesianu uyumamuk tuke ajuta nuuwai. ²⁹ Makichik aentskesh jaakuig, wishakam najaimattsan diyajai. Makichik aentsnakesh pegkegchaun takamtikainakuig, wisha kajeajai.

³⁰ Wi ememamainaitag nunak, mina kakakchamujua nuwi ememamainaitjai. ³¹ Apajui, ii Apuji Jesucristo Apají nigki tuke ememattaya nu dekagtawai wi dekas taja nunak. ³² Damasco jegaa ai, Apu Aretas tutaya nujai takau aidau, ashí yaakta waitjin achijatin aidaun dakamtijagmayi mina achigkagtatus. ³³ Tujash chagkinnum egketuawag, yaakat peegmagbau ventanajin detuawag ajuntuawagmatai, uwemjauwaitjai achigkata tuinamun.

¹ Dekaskenmag iik eme anenmamtak pegkegchauwai, tujash Apu Jesús mina iwaintugbaun wainkauwaitag nuna tajai. ²⁻³ Wainjai makichik aents Cristo nemagnun, catorce mijan nagkaemawai kampatum nayaimpia nuwi iwakbau aajakua nu. Dekatsjai iyashijai jukimuashit atsa wakaninakeash jukiabia, nunak Apajui dekawai. Tujash wainjai nu aentsua duka (iyashijai jukimuashit atsa wakaninakeash jukiabia, nunak Apajui dekawai), ⁴ paraíso iwakam antukui chicham tumainchaun, duka makichik aentskesh ujamainchau aajakui. ⁵ Nu aentsua nuna wika emematmainaitjai, tujash wika emematmamaittujai, ayatak wi kakakhamujua nuwi emematmamjai. ⁶ Tujash wi emematmamtasan wakegaknush anentainkachu wajukmaina nunimaittujai, dekaskea nuna tau asan, nunin aig nunak tatsujai; mina waituinak, chichamjunash antugtuina nuna nagkaesau anentaimjutsainum tabaunum.

⁷ Tuja nu imanun iwaintugkauwa dui eme anenmami tujutu asa, mina iyashjui jagkia imanai ijutiuiwai, tujash nunak Apajui dutikati tima Satanasa inake dutijauwai mina waitkagsatatus. ⁸ Dutijumtai Apu Jesusan kampatumá segajai: “Wi waitiag nuna emegkatjukti”, tusan. ⁹ Tujash Apu Jesús chichagtak: “Amek, mina anenkajua nu ashí atsumame, wagki mina senchijua nunak kakaakchamua nuwi iwainajai”, tujutmayi. Nuadui shiig anejai wi kakakchauwaitag dui, Cristo senchijiya nu minai ajutti tabaunum. ¹⁰ Nuadui shiig anejai kakaakchaw weaknush, pegkegchaun chichagtuinakuish, atsumamu ajutkuish, waitkajuinakuish, utugchat ajutkuish Cristo nemagbaunum waitijai; wagki shiig kakaakchau dekapmamaknuk nuní senchi dekapmamjai.

Pablo Cristo nemajuidau Corintonmaya uyumasa anentaimtamau

¹¹ Wika anentainkachu wajukmaina nunikbaijai wiki emematmamkun; nunak atum wajukeyme nuniakjumin nunikbaijai. Wika atum emematam amain aajakuitjai, wagki wika wainkayaitkunush, apóstol ainaji tusa eme anenmamaina nuna nugkaan achau asan. ¹² Ashí wi waitiamu aidaunak emamkesan katsunjan, wainchatai aidaunash iwaintakun, aents dutikmainchau aidaun dutikakun, puyatjusa diimain aidaunash takasuítag nunú, wi dekaskenum apostoloítag nuna iwaintawai. ¹³ Atumek makichik waji dutikachbaunmag tikich iglesia aina nujaig imanchauch juwakugme, wi yainkatajum tusan segachuitjim dui. Tujash nuna aajan segachuitjim dui tsagkugtugtajum tajime.

Pablo kauptuma junash ijagsatjime tibau

¹⁴ Kauptuma junash ijagsatjime tusan umintsan pujajai, nuniaknush yamaishkam waitkaschattajime. Wika atumin ajutjamaina nunak egatsjai, imá atumnak wainkatasan wakejajime; wagki Aents uchigtin aina nuuwai uchijinu atinun kuichkin ijumaina duka, uchi aina duka apajinu atinnak dutikmaittui. ¹⁵ Nunin asamtai wakesan ashí mina ajuta nujai yaigta tajime, nunisnuk ashí mina iyashjuish waittsattajai atum wakanmin megkaekajum tusa aneamunum, wi atumin senchi anejam nunisjumek minash anenmainaitjume.

¹⁶ Wi atumin waitkaschauwaitjim duka atumesh dekagme. Nuniaig, tikich aidau chichagtuinak, shiig tsanumna dui tsanuak tu wekaewai tujutuinawai. ¹⁷ ¿Wisha tikich yatsug aidau awetibiajim duiká tsanugbaijim? ¹⁸ Titon segabiajai atumiin miniti tusan, dutikakun nijai tikich yatsutan awemabiajai. ¿Titoká tsanugmajagmaya? Titojaig makichik wakania duke ajutjamji, nuniau asa atumin yaimpaktatus wijai betek takaawai.

19 Atum anentaimsagmek, tsagkugtugtinme tusag tuinatsuash tautigmesh amainaitjume, tujash nuninchauwai. Jutiik Apajuí eemtin Cristo nemajin asaja tuinaji, ashí ii dutikainag duka, aneetaig yatsug aidauh, atum yaigta tabaunum dutikainaji. 20 Nuniau asan puyatajai atumin wainkatasan takaman, wi anentaimtag nuninchaun wainkachainjash, tuja atumshakam mina anentaimjutjum nuninchau waitkaijum tusan. Puyatajai jiyaniakjum, tikichdau diisjum kajegkujum, kajeakjum, tupandaikajum, pegkegchau chichagdayakjum, chichaman patatdayinak, ememainak, wainak pachimdaekag batsatbaunum jegashtajash tusan. 21 Nuiqtushkam puyatajai wi ataktú ijagsattajim dui Apajuí atumiin datsamtan sujusmatai buutig tusan, atum ainajum anuiya yaunchuk nagkamas tudau takainak idaitsuk tsanijinainak ayatak tsumain aina nunak tunamatuk batsamtau asamtai.

13

Anemtikaku inagnaku kumpamkagtamu

1 Yamai minittag nuuwai kempatuma juna ijagsattajim nu. Ashí tumain aina duka jimag nuniachkush kempatumkesh etsegtuinakuí nunikti tumainaitjume. 2 Yaunchuk wi jimaja jui ijagsatasan tajuawabaijum dui tibaijime, pegkegchau takaajum duka idaisatajum tusan. Yamai atushat pujusnush nunak agatjime, ataktú ijaaku minittag dui ashí yaunchuk tudau takaak batsabiagmaya nunisag takaa batsatun wainkunuk tsagkujashtajai, 3 wagki atumek Cristo minai chichá nu dekapjustasajum egagme. Cristuk atumin dutijamatta duka kakaakchachui; niina senchijinak atumiin iwainaktatui. 4 Duka dekaske nigka kakaakchau wajasmatai yupichu achijaju ainawai, tujash yamaik Apajuí senchijijai pujawai. Jutiishkam nunisaiak ni kakaakchau aajakua nuninuk ainaji, tujash Apajuí senchijin Cristujai ijunja pujuinaji atum yaigta tabaunum.

5 Atumek niimastajum dekaskeapi tabaunumash ebetmamjagmeash pujajum; atumek dekapmamsatajum. ¿Atumek wainmamtsugmek Jesucristo atumiin puja duka? Apajuí dekapjabaunum megkaechakjumek. 6 Atumesh utusagmek jutií kuashat dekaepam ainakuish megkaetsug nu dekaawajum tusan dakainaji. 7 Nuniau asan Apajuin aujtajime pegkegchau takasajum tusan, nunak dekapkagtamua nuna nagkaikiu asan iwainmamkun nuniatsjai, ditak pegkejan takastinme tabaunum nuniajai, jutiik megkaekauwa nunin ainayatkuish. 8 Jutiik dekaskea nuna shiwagmamainuk makichkish takamaitsuji, dekaskea duke takamainaitji. 9 Jutiik kakaakchau ainakuish shiig anenajai atumek senchi asagmin; nuniaku Apajuí aujtajime shiig magnis pujustinme tusa. 10 Nuniau asan eke atumiin minitsuk juna papiin agajan awetajime, wi atumiin taakun najam tiijim tusan, Apu Jesusak atumin yaigtí tusa senchimtijuauwai, pegkegchau ematnume jututchauwai.

Ashimku akatmabau

11 Yatsug aidauh, inagnakun tajime, dakujusjum pujustajum, imagnisjum pujakjum ichichdaitajum, makichik anentaimkauk atajum, Apajuí shiig agkan pujutan sukagtin anenka nu atumjai atí. 12 Makí makichkitijum pempeentunijumek shiig anendaisajum kumpamdayatajum.

13 Ashí Jesusa nemajin pegkejam aina nu kumpamjamainawai. Apu Jesucristo wait anenkagtamuji, Apajuí anenkajiya nu, Wakaní Pegkejiya dushakam ashí atum aidaujai atí.

Aatus atí.

Pablo carta agaja galacianmaya aidau awetimu

Kumpamkagtamu

¹ Witjai Pablo apóstol, aents aidaukesh etegka awemachbauwaitjai, Jesucristo nuigtú iina Apají Apajuí Jesús jakaunak inankiuwa nujai awetiuwai, ² ashí yatsug wijai batsata nujai, atum iglesia aidautijum Galicia batsatjum nuutigmin kumpamjime. ³ Iina Apají Apajuiya nunú, Apu Jesucristujai wait anenjamag shiig agkan pujutan amastinme. ⁴ Jesucristuk nigki jutii tudaujin mantamnatatus tsagkamankauwai, yamai ju nugka tudaunum batsatainag nuwi agkanmitkagmata tau asa, ii Apají Apajuí wakega nunisag; ⁵ nuadui, ¡Apajuiya duka tuke ememattai atin atí! Aatus atí.

Atsawai tikich chicham uwemtan sukagtumainuk

⁶ Atumnak Apajuí untsugmakajui, Cristo wait anenjamag anentag amaamu jukitajum tusa, nuadui anentai jegatsjai tikich yamajam chichaman yapajia etsejuinakui nu antukjum wamkesjum Apajui idaisaujum dui. ⁷ Dekaskenmag duka tikich yamajam chichamchauwai. Nunin aig tikich aidau pachimjutpainawai yamajam chicham Cristo pachisa etsegbauwa nuna yapajiwag tsuwapaktatus wakegaidau asag. ⁸ Tuja jutiikesh nuniachkush makichik ángel nayaimpinmayagkesh jutii jintintuauwaitjim nuna yapajia tikich chicham yamagman jintinjamaidaunak, Apajuí suwimkan sumainai. ⁹ Duik timajim nunak awentsanuk tajime: Makichik aentskesh yamajam chicham antukuitjum nuna yapajia jintinjamaidaunak, Apajuí suwimkan sumainai.

¹⁰ Wi juna tajim nunak aentsun shiig awajkatasanuk tatsujai, wika Apajuí shiig awajkata tabaunum takaajai. Aents aidaujai shiig juwakta tusanush egatsjai, wi aentsun shiig awajkatasan nuniaknuuk Cristo inakeg amaitsujai.

Pablo takatji

¹¹ Yatsug aidauh, ju shiig dekaatajum: Wi chicham yamagman etsejag junak aents anentaimsa tibaunakesh etsegtsujai. ¹² Wika aentskesh jintinjuamtai antukan dekaachuitjai, aentsnumianakesh unuimagchauwaitjai, minak Jesucristo iwaintugkauwai.

¹³ Atumek antukuitjume mina pujutug wajuku aajakuita judío aidau umitajin umiakun pujusuitag duish, iglesia Apajuiinu aidaun emegkaktasan aintujakuitag nunú. ¹⁴ Wika judío aidau umitajin umiakun pujusnuk mina pataag aidau wijai betek tsakakú aidaunak ashí wagagsan, mina muuntug aidau umitajii aina nunak imatiksasuk betek umijakuitjai. ¹⁵ Tujash Apajuí wisha akiintsag wait anenjug minak etegtuauwai. Dutiujau asa, ¹⁶ niina Uchijin iwaintugkauwai judiochu aidaunum yamajam chichaman etsegkati tujutu asa, dutiujamtaish aents aidaunak, wajukattaja tusanuk iniaschabijai, ¹⁷ Jerusalegkash wechabijai, mina Jesús apóstol etatsaig ditá apóstol emamu aidau batsata nuna wainkatasanuk, nunitsuk wamak Arabia nugkanum wenu wakettsanuk Damasco jegauwaitjai.

¹⁸ Jesús wantintugkamu kumpatum mijan nagkaemai, Jerusalén Cefasan wainkatasan jegaan, niijai quince tsawan pujusuitjai. ¹⁹ Tujash nuig tikich

apóstol aidaunak wainkachbaijai, imá Santiago Apu Jesusa yachiya nunak wainkabajai. ²⁰ Wi agatjim junak, Apajuí eemtinish dekaskea nuna tajai.

²¹ Nunikan Siria nugkanum, Cilicia nugkanmash weuwaitjai. ²² Yatsug iglesia Cristunu aidau Judea nugkanum batsatuk, minak igkuntsag wait-ujakchaju ainawai. ²³ Nunidau asag ayatak antujakajui: “Yaunchuk aintamajakua nu yamaik Jesusai dekaskeapi tabaun pachis eteseji ni emegkaktatus wakegakua nuna” tabaun. ²⁴ Wi nunitai Apajuin emematajui.

2

¹ Catorce mijan inagkeakin, ataktú Jerusalén Bernabejai weakun Titon ayauwaitjai. ² Nunak Apajuí wetá tusa iwaintugkamtai wegabajai. Nunikan wi judiochu aidaunum yamajam chichaman etsegkauwaitag nunash tuja yamai takaag nunash wainkan takatsjash tusan Jesusa nemajin aidau apuji aina nujai kakanan ijunjan chichasbaijai. ³ Tujash Tito wijai wekagunakesh, griego aents aig pakamakti tichajui. ⁴ Ujumak wainak Jesús nemagji tusag uumak jutii batsatbaunum wayawagmayi, jutii Cristo Jesusai agkanmagauwaitag nuna dekamawagtatus, nuigtú chicham umiktajum tusa waitkatai aajakuitag nui ataktú awagtamkitatus. ⁵ Nunú aidauk machikish antugkachbaiji, wagki yamajam chicham dekaskea nu jutii etsegbau antukuitjum nunú atuminish nunisag ajutjamti tuidau asaja.

⁶ Tuja Jesusa nemajin aidau apuji aina duka yamajam chicham umimain-nakesh tujutchagmayi, (dita wajukuk aajakú ainawa nunak puyatjatsjai, wagki Apajuí diismak ashí betekak ainaji). ⁷ Ayatak dekagtuawagmayi Apajuí pakamakchau aidaunum yamajam chicham etsegekata tujutbauwa nuna, Pedron pakamaku aidaunum etsegekati tiuwa dutiksag. ⁸ Apajuí Pedron judío apostolji emauwa duke, minashkam judiochu aidau apostolji etiuwai. ⁹ Santiago, Cefas, Juan, Jesusa nemajin aidau apuji aina nu Apajuí mina wait anenjug sujusbauwa nuna dekagtuawag, mina Bernabejai uwegnum achigmainak, atueka takasagmi, atumek: Judiochu aidaunum takastajum, jutiiik judío aidaunum takasagtatji tujabiagmayi. ¹⁰ Ayatak segapagmayi, Apajuí nemajin Jerusalén ujunauch batsata nu adeagtajum tusag, nunak wishakam shiig kuitamsan takastasan kakanmamsabaijai.

Pablo Antioquía pujus Pedro jiyakbau

¹¹ Tujash Cefas yaakat Antioquía taa yatsut bakumamainun nuni wekaekui, yapinum igkuan jiyakbaijai. ¹² Nagkamchakug judiochu aidaujai ijunag yu pujayatak, Santiago awemamu kaunawagmatai tupautan nagkama, ditajai ijunja yutanak idaisabi, pakamaku aina nuna ishamak. ¹³ Pedro nunitai tikich judío Jesusa nemajin aidaushkam nunisag judiochu aidaujai ijuntuja yutanak idaisajui, nuniagtai Bernabeshkam dita tsanumaina nuninuk wajasmay. ¹⁴ Tujash yamajam chicham dekaskenum etsegna nuna betek umiinachun wainkan, aents tuwakbaunum Pedron chichagkun: “Ame judiowaitkum judiochu wajukmaina nuninum dusha, ¿wagka judiochu aidaush judío wajukena nuninuk emaktasamesh wakejame?”, tibaijai.

Apajuik Jesucristui dekaskeapi tuidaun pegkeja takauwa iman diyawai

¹⁵ Jutiik dekas judío ainaji, nunin asaja judiochu aidau tudaugtin aina nuninchau ainaji. ¹⁶ Dekainaji chicham umiktina nu umiamunum pegkeg ainagme tama amainchauwaitag duka, ayatak Jesucristui dekaskeapi

tabaunum pegkeg ainagme tama amainaitag nunú. Nuadui jutiishkam Jesucristui dekaskeapi tiu ainaji, Apajuí pegkeg ainagme tujamti tabaunum, chicham umiktina nu umiamunmachu; nunin asá makichkish chicham umiamunmag pegkeg ainagme tamak achatnaitji. ¹⁷ Nunin asamtai Cristo pegkejaitme tama atasa egainaku, jutiishkam tudauwaitag nu dekamauwaitji. ¿Duiká Cristo tudau takamtikagtinaí tumainait? Duka makichkish nuninchauwai. ¹⁸ Wagki wi juka umimait sui tiuwaitkun, nunak awaksanuk umimainai takunuk, wiki bakumajai. ¹⁹ Wagki chicham umiktina nuna umiktasa pujaknuk jakaujai betek wenu pujubijai. Tujash yamaik Cristo achigbau aajakua nui mina tudaujuk nagkanjauwai. ²⁰ Nuniku asan wichauwaitjai iwaaku pujag nunak, Cristo minai puja nu minak iwamtijawai. Wi yamai iwaaku pujag nunak, Apajuí Uchijí mina anentu asa, minai mantamdauwa nunú dekaskeapi tabaunum pujajai. ²¹ Apajuí wait anenkagtugbaujiya nunak dakitatsjai; wagki chicham umiktina nu umiamunum pegkeg ainagme tama asauwaitkuik, Cristuk wainak jakau amainai.

3

Wakaní Pegkejiya duka Jesucristui dekaskeapi tabaunum junawai

¹ ¡Galacianmaya anentainkachu aidauwah! Atum jutii Jesucristo achigbauwa nu pachisa etsegjin, paan achigbau wainkajum anentaim-tumainaitjum imatiksajum anentaimtibiujum nunash, ¿yaa chicham dekaskea nuna umikai tusash tsanugmajaje? ² Juna aigkatnume tusan wakegajai: ¿Wakaní Pegkeji jukiwaitjum dusha Moisés chicham umiktajum tibauwa nu umiamunmag jukiwaitjum, atsa Jesucristui dekaskeapi tabaunum jukichukaitjum? ³ ¿Waa imá anentainkachush ainagme? ¿Wakaní Pegkeji yaimpasmatai pegkeg nagkamau ainayatkugmesh, wagka: Jutiik kakanmamainaitji Apajuí wakegamu takastag takuik tajume? ⁴ ¿Kuashat pegkeg takaidau asajum waitkam asauwaitjum duka wainkagmek waittsauwaitjum? Duka wainka waitkasbau ainatsjume. ⁵ Apajuí Wakaní Pegkejin atumin sujamas aents dutikmainchau aidau atumin iwaintugma nunash, ¿Moisés chicham umiktajum tiuwa nu umiamunmag dutika, atsa chicham etsegbau antukjum dekaskeapi tau asamin dutikatsuak?

Apajuí Abrahamjai chicham apakbau

⁶ Nunisag “Abrahamak Apajuyai dekaskeapi tujakua dui, Apajuishkam pegkeg diisui”.^{*} ⁷ Nunin asamtai jujú dekaatajum, Abraham weantu aina duka, Apajuyai dekaskeapi tuina nu ainawai. ⁸ Nuna pachis yaunchuk agagbau aajakua nuna dekau asa, judiochu aidau dekaskeapi tiagtai Apajuí pegkeg ainagme tama agtina nuna emtika Abrahaman yamajam chichaman ujaak: “Ashí nugkanmaya aents aidauk aminí pegkegnum yaigbau agtinai”,[†] tiuwei. ⁹ Nu aatus asamtai Apajuyai dekaskeapi tuina duka, Abraham dekaskeapi tiuwa nujai betek pegkegnum yaigbau ainawai.

¹⁰ Tuja ashí aents chicham umiktina nuwi kajinas anentaimaidauk, bakumatnum batsatainawai. Wagki, agagbaunum: “Chicham umiktin papinum agagbauwa nuna aents imatiksag umiinachuk suwimkan jukitnume”,[‡] tawa dui. ¹¹ Nuadui juka paantai, Apajuik makichik aentsnakesh

* 3:6 Gn. 15.6. † 3:8 Gn. 12.3. ‡ 3:10 Dt. 27.26.

Chicham umiktin aajakua nuna umiau asamtai pegkeg ainagme tatsui. Wagki agagbaunmag: “Pegkejan takaa duka imá dekaskeapi tabauwaik tuke pujutnai”, § tawai. ¹² Chicham umiktina duka Apajuin dekaskeapi tudau tuke pujutnai tatsui, nuadui chicham umiktina nuig, “Aents chicham umiktina nuna imatiksag umiauk, nu umiamua duik tuke pujutnai”,* tawai.

¹³ Cristo jutiinak agkanmitkagbauwai chicham umiktina nu umiachbaunum suwimak jumaina nunak. Ni iina ayamjutpakta tau asa suwimkan juwak mantamdauwai, nunisag agagbaunmashkam: “Aents maamua nu numinum nenam awa duka, Apajuí aents tikima katsek tudaugtin dutikatajum tibau asa dutikam awai”, tawai. ¹⁴ Nunak Apajuí Abrahaman pegkejan anagkuauiwa nunash, judiochu aidaush Cristo Jesús dekaskeapi tabauwai, Apajuí Wakaní Pegkejin anagtamauiwa nunash jukitnume tabaunum nunikui.

Chicham umiktina duka Apajuí anagkagtuamujiya nunak emegkaumait-sui

¹⁵ Yatsug aidaui, aents aidaui nunitaijiya nuna pachisan tajime: Makichik aents tikich aentsjai chichaman apainak papinum agajag nuní atí tusa firmamunak, † makichkish nuna esaktumainuk, nuigtú eketus dutikmainush atsawai. ¹⁶ Apajuí Abrahaman, niini akiinak weagtina nunash kuashat anagkuauiwai. Agagbauwa nuig kuashat taku tumaina dutikag, “akiinkau aidaui” tatsui, ayatak makichkin tawai: “Aminiya akiinau”, jui dekanui makichkin tawa nu, nunak Cristun taku tawai. ¹⁷ Wi tajim duka juuwai: Apajuí Abrahamjai Cristun pachisag chichaman apakú aina nunak dutiksag kuitamkauwai, dutikamu asamtai cuatrocientos treinta mijan nagkaemai chicham umiktin asauwa nuwish Apajuí anagkagtuamua duka nunisag juwakui. ¹⁸ Apajuí anagtamauiwa nunú chicham umiktina nu umiakú jumainaitkuig, ni anagtamauiwa duka wainak amainai. Tujash Apajuik Abrahamnak anenjauch amastatjame tusa anagkuauiwai.

¹⁹ Aatus aish, ¿wajinma atsumnawa chicham umiktina dusha? duka ayatak aents aidaui betek umiachbaujiya nunú iwaintukta tabaunum dutikamu aajakui, nunú nuniai Apajuí Abrahaman “aminiya akiinatnai” tusa anagkuauiwa nu akiinauiwai. Chicham umiktina nunak Apajuí angelan Moisesan awetim ujakuí dutikam niishkam aents aidaun ujakuí. ²⁰ Tujash Apajuí makichkia nu Abrahaman anagkuauiwa nunak tikich titi tusag atsumjachui, nigki igkua amastinaitjame tiuwai.

Chicham umiktina duka Cristo dutikauwa dui nagkankauwai

²¹ ¿Nuna tawa nunash chicham umiktina duka Apajuí anagkagtuamu aina nujag betekchauwai takug tawa? Duka makichkish nuninchauwai; wagki Chicham umiktina nu pujutan sukagtumainaitkuig Chicham umiamunum pegkeg ainagme tama amainaitji. ²² Tujash Agagbaunmag ashí aentsuk tudau achikbauwa nunin ainawai tawai, nunak ya aidauiwa Jesucristun dekaskeapi tuinawa, nu Apajuí uwemat anagkagtuamua nuna jukitnume tujamu asa.

²³ Nu eke dekaskeapi titina nu taatsaigkik, Chicham umiktina duka aentsun achijá chimpia epena numamtuk awajam asauwaitji, jutii dekaskeapi titina nu Cristo dakainaku batsatu asaja. ²⁴ Chicham umiktina

§ 3:11 Hab. 2.4. * 3:12 Lv. 18.5. † 3:15 Chicham firma tawa juka iina chichamenig tumainchau asamtai, nuigtush yapajias tumainchauwa dui jutiksaik ukuaji.

duka, inak uchi aidaun kuitamama numamtuk kuitamjamajakui, Cristo taamtai niini dekaskeapi tuinak pegkejaitme tama agtinme tujamu asa. ²⁵ Tujash yamaik Jesusa dekaskeapi tuidau asaja, Chicham umiktina duka atumnatsui.

²⁶ Cristo Jesús dekaskeapi tabaunum ashí atumek Apajuí uchijí wajasuitjume, ²⁷ wagki ashí Cristui yamimaku ainajum duka Cristunu ainajum nunú iwainmamkata tabaunum nunikuitjume. Nuniku asaja ni wajukea nuninaji. ²⁸ Nuniku asajum juka judiowai, juka griegowai, juka inataiyai, juka inashtaiyai, juka aishmagkui, juka nuwai tabauk atsawai, wagki Cristo Jesús nemagbaunmag ashí atum aidautigmek makichkia nunin ainagme. ²⁹ Atumek Cristunu asajum Abraham weantu ainagme, nunin asajum Apajuí anagkuauwa dushakam imatiksagmek jukitin ainagme.

4

¹⁻² Juna titag tajime: Aents uchigtina nu wi jataik mina wajiignak mina uchig jukitin atí tabauwa nu tsakatuch akug inaka nujai betekak pujawai, dekaskenmag ashí waji aina duka niinu aig; nunin asamtai aents uchin kuitama nu niinu atina nunash kuitamjin ainawai apají tsawan mamik-tugbauwa nu jegatí tusa. ³ Nunisag jutiinash nagkaetamui, yaunchkek judío aidautish Cristo dekachu asaja uchijai betek, ju nugkanmaya unuimatjamu aina nu umiktasa achikbau inaku waitkamaina imatikam aajakuitji. ⁴ Tujash Apajuí tsawan mamikiamujiya nu uminkamtai niina Uchijin awemauwai, dutikam makichik nuwanum akiinawai, nunik chicham umiktina nuna umiak pujusui; ⁵ chicham umiaku batsatutin agkanmitkagma Apajuí uchijí etamkata tujamu asa. ⁶ Nuadui niina uchijí waigkú asajin Apajuí iina anentain niina uchijí Wakaniya nuna sujamsauwai, nunú ichachtamkui: ¡Mina Apajú! tuinaji. ⁷ Nunin asamtai amek inaku waitkataig atsume, Apajuí uchijiyaitme, nunin asam Cristo nemagbaunum Apajuí sujamsatna nu ameshkam jukitnaitme.

Pablo Cristo nemajuidau puyatjusa anentaimtamu

⁸ Atumek yaunchkek Apajuí dekachu asagmek, apajuimtai dekaskechu aina nunú umijujakuitjume. ⁹ Tujash yamaik atumek Apajuí dekaugme, nunisag Apajuí atumnash dekagmainawai, nunin aish, ¿wajukeakjumea atumesh kakaakchau senchigtuchu aina dusha ataktú waketjukjum umigkujum waittsatasagmesh wakegagme? ¹⁰ Atumek Moisés agagbaunum tsawan, nantu, mijan aina nuna pachis tibauwa nu, jutsu Apajuin shiig awagmatai tusa umiktasajum fiestamjume. ¹¹ Nuniakjumin puyatajai wi atumin imatika jintintuauwaitjim nunak wainkanuap takasja tusan.

¹² Yatsug aidauh, wi wajakauwaitag nuniktajum tusan segajime, wisha atum wajukeajum ankauwaitjai Chichaman umiakun pujusan. Nunak atum pegkegchau awajtuku asagmin tatsujime. ¹³ Atumek dekagme, wi yama nagkamchakun yamajam chichaman ujayajim nunak jaayatkun wekaesan ujayajime, ¹⁴ Nunú jata mina iyashjuí ajutujakua nunú atumnak shiig antumainchau awajtabianume, nuniakuish dakitjuja idaitutsuk, ángel nuniachkush Cristo Jesús taamtai kuitamainaitjum imatijusjum kuitamjukuitjume. ¹⁵ ¿Nunú imanika shiig aneejakú ainajum dusha utugkaugme? wagki atum nuniyujum nuna tajime, jiish ukuintaiyaitkujum jiiim ukuinkajum sujumain awatuyujume. ¹⁶ ¿Wi atumin dekaskea nuna ukaitjim duiká atumi shiwajum wajasag?

¹⁷ Nunú aents atumin senchi puyatjutpaina duka pegkeg anentaiyai nuninatsui. Ditak wakegainawai jutiiní datumtamag, dita iina puyatjupaktinme tusag. ¹⁸ Dekas tikich puyatjamua duka pegkejai, tujash pegkeg anentaiyai; nuna nuninuk tuke nuninuk amainai, wi atumjai pujuttag dui nunitsuk.

¹⁹ Mina uchig aidauh, wika nuwa uchin najaimak waitama imanikan ataktú atumiin waitiajai, atumesh Cristua imanuk atinme tabaunum.

²⁰ Wakegajai, utugkanuk yamaiya juik atumiin taan tikichin yapajian ausajim tusan. Utugkajimek tusan kuashat anentaime.

Agar Sarajai augmatbau

²¹ Chicham umiktina nu umiktasajum wakegautijum yamai tujuttajum: ¿Atumek antukchaukaitjum chicham umiktina nui juna tawa duka?

²² Nu agagbaunmag, Abrahamak jimag uchijí ajujakui tawai, makichik uchijiya nu inakenia aajakui, tuja tikich uchijiya duka dekas niina nuwe inakchauwa nuiya aajakui. ²³ Inaka nuwi akiinauwa duka aenstí akiinainag nunisag akiinauwai. Untsu agkanta nuwi akiinauwa duka,

Apajuí anagkuauwa nu uminbaunum akiinauwai. ²⁴ Juka atak nuniktin aajakua nuna iwainawai jimag nuwa aina juka, jimag chicham apakbau aajakua nuna iwainawai: makichkia duka muja sinainumia minawai, duka Agar niina uchijí inak agtin akiinkau aajakajua nuna dukujiyai.

²⁵ Tuja Agarak iwainawai muja Sinaí Arabia nugkanum yamai Jerusalén awa nuwi uchijí aidau batsamas chicham umiktajum tibauwa nuna umiktatus waituinak batsata nuna. ²⁶ Tujash Jerusalén nayaimpinmayaya nunak Sara agkanta nu iwainawai, nuna uchijí aidautik jutií ainaji dekas Apajuí uchijí aidautik. ²⁷ Chicham agagbauwa nuwishkam:

“Nuwa uchin uchigmachuh,
shiig aneasta,
uchijum atsugtamú asamtai.
Shiig aneakum untsumkata,
amek uchi uchigmaku
najaimatash dekapsachu asam.

Nuwa idaisamu aina nunú
imá kuashat uchigtin agtinai,
nuwa aishintin aidaun nagkaesau”, tawai.

²⁸ Aatus asamtai yatsug aidauh, Apajuí Abrahaman Isaacan anagkuamu akiinauwa numamtuk atumesh akiinau asajum, Apajuí uchijí ainagme.

²⁹ Tujash yaunchuk Abraham Sarajai wakegau asamtai, Agarai uchi akiinauwai. Tuja Wakan akiinati tima Isaac Sarai akiinauwa nuna, Agarai akiinauwa nu kajejujakua numamtuk, yamaishkam chicham umiktajum tibaun umiina nu, Jesucristun dekaskeapi tuina nuna kajejuinawai.

³⁰ Tujash ¿wajintua Agagbaunmash? Nuwig: “Nuwa inataiya duka uchijijai jikktá, wagki inataiya nuna uchijig, nuwa agkanta nuna uchijí jukiti tibauwa nunak jumaitsui”, tawai. ³¹ Nunin asamtai yatsug aidauh, jutiik inaku waitkataiya nuna uchijí ainatsji, agkanta nuna uchijí ainaji.

5

Cristo agkan etabiajua nunisjumek pujustajum

¹ Atumek chicham umiktajum tibauwa nu umiktasajum waitú bat-satutigmin, Cristo agkanmitkagmawajua nunisjumek agkan pujustajum. Ataktú chicham umiktin umiktasajum waitium duka waketyukigpajum.

² Antugtuktajum, wi Pablon tajime, atum pakamakjumesch Cristo yaya-mak achattagme. ³ Ataktushkam tajime: Aents pakamauk chicham umiktina nuna ashí umiktatus nuniawai. ⁴ Atum chicham umiktajum tibauwa nu umiinaku pegkeg diyam ata tautigmek, Cristui kanaaku nuniagme. Nuniakjum Apajuí anentag amamaina dusha dakitjaugme. ⁵ Tujash jutiik Wakaní Pegkeji yaimpasmatai, Cristo dekaskeapi tabaunum Apajuí pegkeg ainagme tujamtina nu dakainaji. ⁶ Wagki pakamaku akush, pakamakchau akushkam Cristo Jesusaig wainkayai, dekas Cristo Jesusai dekaskeapi tabaunum anenkai takaamua nuuwai dekas pegkejak.

⁷ Atum shiig pujubiujum nunash, ¿ya chicham dekaskea duka umikaigpa tujabiaje? ⁸ Aannak Apajuí atumí etegtamjauwa nu aikagmachaje. ⁹ Duka levadura ujumak ajuntuamuitak, nanegbauwa nuna ashí wam-pushmitkama dutijamawaje. ¹⁰ Wika atumnak Apu Jesusai kajintsá anentaimtajime, yapajiagmek anentaimainchau ainajum dui, tujash yaki ainta nunin ataish pachimjutpaina nuna Apajuí suwimkan susatnai.

¹¹ Yatsug aidauh, wi pakamaktajum tusan etsegku wekaeyatkunush ¿wagka waitkamash wekaeja? Nuna aatsa etsegku wekaetaik, Cristo cruznum achigbaun etsejag nunash dakittsag diimain ainatsui. ¹² Nunú pachimjutpá yujaina duka dekas juu tamawaik ashí tsupik ajapmain ainawai taji.

¹³ Yatsug aidauh, atumek agkan pujustinme tusa etegjamu ainagme. Tujash nunú agkan pujamu ajutjama dui iyash wakegamu takamtikt-suk, aneenisjum pempeentunisjumeK yainiktajum. ¹⁴ Chicham umiktin agagbauwa duka: “Tikich aidaush amek anenmamsam aneeta”, tawa nu imatiksaik umiamunum ashí chicham umiktinnum awa duka uminui. ¹⁵ Kuitamamkatajum, atumek pempeentunisjumeK shiwagmagajum kajeg-dayakjum pempeentunisjumeK pegkegchau awagdaikajum.

Wakaní Pegkeji wakega nunisaik pujumain

¹⁶ Nuadui tajime: Wakaní Pegkeji wakega nunisjumeK pujakjum, atumi iyashim pegkegchau wakega duka umigkaigpajum. ¹⁷ Wagki iyash wakega nunak Wakaní Pegkejig dakitawai, nunisag Wakaní Pegkeji wakega nunashkam iyashik dakitawai. Aatus dakitjunidau asamtai atum wakegamua duka takamaitugme. ¹⁸ Tujash Wakaní Pegkeji yaimpasmatai pegkeg aina duke takaakjumeK, Moisés chicham umiktajum tibauwa nu umiktasagmek anentaimtumaitugme.

¹⁹ Iyash pegkegchau wakegamu takaamu paan wantina duka ju ainawai: ekagmamu, tsanijinbau, Apajuí pegkegchau diyamu aina nu takaamu, ii pegkegchau wakegamua duke tunamatja pujugbau, ²⁰ apajuimtai dakunkamu emematbau, wawejatbau, shiwagmaga pujamu, tsuwat chichamtin, akasmamu, waa wamak kajeamu, jiyaniumu, datumkagmamu, niish kanaktatus anentaimin, ²¹ pegkejan takaidau kajejamu, nampeamu, yuwa yuwakua wegamu, nuigtú tikich jumamtin aidaunashkam tibaijime. Nunin aina nuna takaa pujuidauk Apajuí inamtaijinig wayachagtin ainawai tusan.

²² Untsu Wakaní Pegkeji pujugbau aidauk: Anejatnai, shiig aneenai, shiig agkan anentaimas pujuwai, wamak kajeakchau, shiig awakagtin, wait anenkagtin, dekaskeapi tinu, ²³ kakagchau, ebetmamag pujú aina nuuwai. Ashí ju aina junak, chicham umiktajum timawa nuwish, nunin amait sui tatsui. ²⁴ Cristo Jesusdau aina duka, ditá iyashí wakegamu nuigtú senchi pegkegchau wakegamu aina nujái Cristo nemajuinak idaisaju

ainawai. ²⁵ Nuadui Wakaní Pegkeji pujugbau aidautik ni wakega dutiksag takamtijusti tusa idaimamain ainají.

²⁶ Emebau achagmi, shiwagmaetash shiwagmaetsuk, tikich pegkejan takainamu diisá pempeentuniki kajegdayá batsamchagmi.

6

Tikich aidaujaish pempeentunikjum yainiktajum

¹ Yatsug aidauh, atum ainajum anuiya tudau takau wainkugmek, atum Wakaní Pegkeji takamtikbautijum yaigtajum esemamati. Nuniakjumesh senchi kuitamamkatajum, atumesh dita pegkegchaun takaina nu takasajum. ² Atumek pempeentunikjum yainiktajum utugchat ajamu wainkugmek, aja dutikdayakjum Cristo tibauwa nu umiktatjume.

³ Makichik aentskesh imanchauwaitak eme anenmamá wegakuk, nigki tsanuumak tu wekaewai. ⁴ Makí makichik dita wajuk pujuinawa nuna niimamain ainawai dekas eme anenmamatus wakegakug, tikichi pujutjin diigtsuk. ⁵ Wagki makí makichik iina utugchatjig ajutjamainawai, nuniau asamtai imá iinuk uyumamainaitji.

⁶ Apajuí chichamen jintinjamuk, atum jintinbautijum ashí wají pegkeg aina nujai yaigtajum.

⁷ Atumek tsanumajaigpajum: makichkish Apajuinak tsanumain ainatsui. Aents ni ajakmamujin juu aina numamtuk, makí makichik dita takasbaujin dutiksag jukiagtinaí. ⁸ Aents ni pegkegchau wakegamujinak takasuk, nuiyanak juwak waittanum wegagtinaí. Untsu Wakaní Pegkeji wakega nuna takasuk, nuiyanak pujut nagkanchaun jukiagtinaí. ⁹ Pegkeg takata duka mijatkachagmi; imaní batsatu asaja tsawan jegakuí Apajuí pegkeg aina nuna sujabau jukitnaitji. ¹⁰ Tsawan eke awa juik ashí aentsuk tutit awagmatsuk pegkegnum yaigtajum, tujash Cristo nemajuina nujai imá senchi yainiktasajum wakeetajum.

Inagnaku ujaniamu

¹¹ Yamaik wi mina uwejuí letra muuntai agatjim ju diistajum. ¹² Aents aidaun shiig awajkatatus wakegaina nunú, pakamaktajum tusag imatjut-painawai, Cristo cruznum achigbauwa nuna etsejai waitkagsainum tuidau asag. ¹³ Tujash pakamaku aina dukesh chicham umiktinnum tawa nunak betek umiinatsui. Nuninayatak wakegainawai atum pakamak-agmin wi tima ankaje tusag ememagtatus. ¹⁴ Tujash wika wiki eme anenmamtanak wakegatsjai, iina Apuji Jesucristo cruznum achigbauwa nunak ememattasan wakegajai. Cristo numinum achijam jakauwa dui nugkanmaya aina nunak uyumatsjai, nuniau asan nugkanmaya aidaunak idaisauwaitjai. ¹⁵ Wagki Cristo diismak pakamaku akush, pakamakchau akushkam wainkayai, dekas imana duka Cristo nemagbaunum yama-jam aents weenag nuuwai. ¹⁶ Atum Apajuinu aidautijum, jujú tawa jutiksagmek batsatutigminak, nuigtú Cristo nemajin mina pataag Israel aidautigminash, Apajuí wait anenjamag shiig agkan anentaímsa pujutan amastinme.

¹⁷ Yamai nagkamsanuk makichkish utugchatan aputugsatnume tusanuk wakegatsjai, wagki Apu Jesusai bakumakun mina iyashjui esamkamug aidau ajutuina dui. ¹⁸ Yatsug aidauh, iina Apuji Jesucristo makí makichik atumi wakanminish ajutjamtinme.

Aatus atí.

Pablo carta agaja efesonmaya aidau awetimu

Kumpamkagtau

¹ Witjai Pablo, Apajuí wakegau asa Jesucristo apostolji etiuwai, atum imagnisjum shiig Cristo Jesús nemajin pegkejam aidautijum Éfeso bat-satutigmin kumpamjime. ² Atumnash Apajuí iina Apajiya nu, ii Apuji Jesucristua nujai wait anenjamaidau asag, shiig agkan pujutan amastinme.

Jesucristo nemagka pegkeg pujut juamu

³ Apajuí emematiagmi, iina Apuji Jesucristun Apajiya nu, nayaimp-inmaya ashí pegkeg wakannumia aina nuna Cristui sujamsau asam-tai. ⁴ Apajuik nugkanash najantsuk Cristui etegtamjauwai pegkejam pegkegchauji atsugbau niina emtinish atinme tusa. Wagki ni anempau asa, ⁵ wi ju aidaunak mina uchig emaktin atajai Jesucristo ditai mantamnamtai tusa yaunchuk emtika niina waketajin etegtamjauwai. ⁶ Nunak niina Uchiji aneetaijiya nuna amasua dui Apajuí wait anenkagtauuji dekas imana dui, emematjtnume tusa dutikauwai. ⁷ Nuna dutikauwa dui Cristo numpe ukaejamunum agkanbaetak ajutjamui nuigtú tudau aidaunum tsagkugnamushkam; shiig kuashat wait anenjamu asa, ⁸ nigki jutiinash shiig kuashat yachametan, dekatnashkam sujamsauwai. ⁹ Duik nagkamas, ni wakegamujin dutikatjai tibau dekaachbau aajakua nuna dekamtijamauwai. Nunak ni wait anenkagtauujin Cristui pegkejan dutikatjai tiuwa nuna iwaintugmakui, ¹⁰ dutikau asa ni tsawan mamikiamuji aina nu uminkamtai, nayaimpinum aina nuna, nugkanum aina nuyashkam ashí Cristui ijumjatnai ni diísti tusa.

¹¹ Ii jukitna duka Cristui ajutjamainaji, nunak yaunchuk Apajuí ni wajuk dutikatatus wakejukaya anentaimtjuita dutiksag dutikatnai. ¹² Nigka wakekauwai dekatkauk juiti aidauti Cristun dakastinme nuninak mina imanja nuna emematjtnume tusa. ¹³ Cristo chichame dekaskea nu etsegku uwemat awai tabau antukjum, atumesh Cristo dekaskeapi tuidau asagmin, Apajuí niinu etamu asa Wakaní Pegkeji anagtabauwa nuna amasajui. Dutijamau asamtai yamaik niinuap ainaji tusa dekeinaji. ¹⁴ Nunú Wakania nuuwai, Apajuí sujabau jukiagtin asajin emtika amas-mauwa duka, jutiin ashí agkanmitkagma niina aentsji etamkatna dui, dutijamamtai ashí juitik Apajuí senchigtin imana nu ememattinaitji.

Pablo Apajuí see tibau

¹⁵ Nuadui atum imá Apu Jesusaig dekaskeapi tusajum ashí Jesusa nema-jin aidaujaish aneniamugmin pachis chichainamun antukan, ¹⁶ mijattsuk Apajuí aukun see tusanké ajai atumin pachisan, ¹⁷ Segajai Apajuin iina Apuji Jesucristo Apají dekas imana nuna, wakan dekatan sukagtina nuna amastinme dutikam nu iwaintugmakui Apajuí shiig dekaatajum tusan. ¹⁸ Nuigtushkam segajai atumi anentaiminish tsaapmitkagmat-ume, dutijamamtai niina aentsji wajasjum nayaimpinum atumdau atin dakainajum dushakam shiig dekamnujum tusan, nuigtú Jesusa nemajin pegkejam aidau wajiin shiig kuashat dekas shiig pegkeg jukitin ajuina dushakam, ¹⁹⁻²⁰ nuigtú niina senchiji nagkanmainchauwa dushakam

jutii ni dekaskeapi tinu aidautin ajutjamji. Nu senchijí imana nunak Apajuí Cristo jakaunak inankiuwa dui iwainakui, dutika nayaimpinum iwaká niina untsujin ekentsauwai, ²¹ ashí wakan senchigtin aina nuna nagkaesau ema, inamin aidau, nugkaya apu aina nunash nagkaesau senchimitikauwai, yamaiya juish atak atina duishkam, ²² dutika ashí najankamu aina nuna nuigtú iglesia aina nunashkam Apuji ema idaisauwai, ashí nigki diistí tusa. ²³ Dutikamu asá ni nemajin aidautik Cristo iyashí ainaji, ni jutiini ashí jajutua awa nunisag ashí najankamu aina nuwish awai.

2

Apajuí anenkajin uwemkau ainaji

¹ Atumek yaunchkek atumi intimtaigminig, atumi tudaugminig jakau aajakuitjume, ² ju nugkanmaya aentsú nunitaiji aina nu dutiksagmek takaakjum, agkajunum wakan senchigtin inama nu wakegamuji umijukuitjume, yamai niina senchijijai Apajuin intimjuina nuwi inama nu. ³ Yaunchuk pujukaitag duik ashí jutiishkam dita pujuina nunisaik pujukaitji, iina iyashí pegkegchaw wakega nujai, ii wakegamua nu takaaku, ii anentaimtamua duke dutikainaku, nunin asaja degakenum tikich aina nujai betek Apajuí suimkajig jumain aajakuitji. ⁴ Tujash Apajuik shiig senchi wait anenkagtina ibau asa, ni anenkajiya nujai shiig senchi anempajui, ⁵ jutiik iina tudauji aina dui jakau batsamnutin Cristujai betekak pujutnak amasui. Dutikamu asajum niina wait anenkagtutinig uwemtikam asauwaitjume. ⁶ Nunika Cristo Jesusjai ijunjau asajin Apajuí niijai betek inantamkiuwei, dutijama nayaimpinum niijai ekepasui. ⁷ Juna jutikauwa nunak atak tsawan atina dui ashí aents aidaun iwaintuktatus dutikauwai, niina shiig kuashat wait anenkagtutaiji niina pegkegjiya nujai jutiinu atinun Cristo Jesusjai dutikauwa nuna.

⁸ Wagki atumek dekaskeapi tabauwai wait anenjá uwemtikjamu ainagme; nunak atum pegkeg takasbauwai dutikachui, Apajuí nigki anenjauch uwemtanak amasajui, ⁹ duka ii pegkeg takasbauwai uwemat jukichu asaja, ii emematmamainuk makichkish atsugtamji. ¹⁰ Wagki jutiik Apajuí najankamu asaja, Cristo Jesusjai ijunbaunum yamajam etamkauwai pegkeg aina nunak takainak pujustinme tusa, Apajuí emtika anentaimtujua dutiksag.

Cristo nemajuinaku agkan pujamu

¹¹ Nunin asamtai atum judiochu aidautigmek, “pakamakchau” ainawai tama aajakuitjume, judío aidau aentsú iyashinian pakaji ajapjuawag, “pakamaku” ainaji tumamaina nunú. ¹² Nunin asamtai nunú tsawan aajakajua duik, Cristo dekachu asajum, Israel aina nujaig kanakú aajakuitjume nuigtush Apajuí ditajai chicham aidaun apakag anagkauwa nuyash jumainchau aajakuitjume, nuní uwemainapita tusa dakamukesh atsugtamaidau asamtai Apajuigtuchu ju nugka juig pujukaitjume. ¹³ Tujash yamaik Cristo Jesusjai ijutkau pujakjum, yaunchuk Apajuikai atushat aajakuitjum duka, Jesús numpen ukajua dui Apajuikai tikijuch wajasuitjume.

¹⁴ Wagki Cristuwei jutiin agkan pujutan sukagtina duka, nunin asa judío aidau judiochu aidaujai shiwag batsamajakbauwa nunak, ni mantamdauwa dui tanish tesá akankamua nunin aajakua nuna tsaiaká makichik

niina aentsji etamkajui, ¹⁵ dutika chicham umiktajum tibauwa nuwi umiktin aina nunashkam inagnakui, judío aidaun judiochu aidaunash niinu emakta tau asa, yamajam aents makichik atinme tusa. Aatus dutika shiig agkan pujatan amasajui. ¹⁶ Jesucristuk cruznum achijam jakauwai, judío aidaun judiochu aidaunai mai Apajuijai epegtuniatnume, nuninak makichik aents atinme yaunchuk shiwag batsamajakbauwa nunak idaiyinak tusa nunikui.

¹⁷ Cristuk tauwai, nunik yamajam chicham shiig agkan pujata nuna, Apajui dekachu aajakuitjum nu aidautigmin, tuja jutii Apajui dekau aidautinash ujakajui. ¹⁸ Aatus Cristo dutikau asamtai judío aidauti, judiochu aidautigmeshkam makichik Wakania duke ajutjama nujaig iina Apaji Apajuiya dusha adigmaitjii.

¹⁹ Nunin asajum atumek tikich nugkanmayagkesh, ijagkesh ainatsjume, duka nunitsuk Jesusa nemajin pegkejam aina nuninuk wajasú asajum Apajui aentsji ainagme. ²⁰ Atumek, apóstol aidaun nuigtú profeta aina nunú, Cristo Jesús kaya jegá ichichna imana nui ekeni jegamaina dutikamu ainagme. ²¹ Ashí Cristo nemajuidauti niijaig ijunainaku kanamainchau waigkaja ayatak kawenaji juga Apu ememattai pegkegma iman wajastag tabaunum. ²² Nunin asamtai atumshakam, ashí niinig ijunainakjum, juga Apajui ememattaiya iman ainagme; Apajui, Wakaní Pegkejiya nuwi pujugtamú asamtai.

3

Pablo Apajuiinu dekaachbau aajakua nu judiochu aidaun dekamtikamu

¹ Nunú aatus asamtai wi, Pablo, Cristo Jesusan takaju asan, atum judiochu aidautigmin pegkeg atina nu etsegbaunum achigkagmatai pujajai. ² Atumek dekau amainaitjume Apajui wait anenkagtamuija nuna mina atumin jintintuati tujutiwa duka. ³ Yaunchuk dekaachbau aajakua nunak Apajui mina iwaintugkau asamtai, atumnashkam nuna pachisan ujumak agatjabiajime. ⁴ Nunú aukujum dekaattagme, yaunchuk dekaachbau aajakun Apajui Cristui dutikauwa nuna mina dekamtijauwa nunú. ⁵ Nunak aents yaunchuk batsamajakua nunakesh dekamtikachui, tujash yamaiya juik, pegkejam apóstol aina nuna nuigtú profeta aidaunash Wakaní Pegkeji dekamtikawaje. ⁶ Nunú yaunchuk dekaachbau aajakua duka, yamajam chicham etsegbauwa nuna antukag, dekaskeapi tuidauk, judío aidaush judiochu aidaushkam betek uwemjatnume, nunikag makichik aents wajasag, Apajui Cristo Jesusan nemajuidaun anagkuaauwa nunash betek jukitnume tibau aajakua nuuwai. ⁷ Nunin asamtai yamajam chichaman etsekatii tusa minak Apajui anenjauch wait anenjug awetiuiwai, dutijua niina senchiji imana nunash sujusui.

⁸ Wika ashí Apajui nemajin pegkejam aina nujai apatkamak wainkayaitjai; tujash nunin aig Apajui minak wait anenjug yamajam chichaman Cristo yainke makichikish shiig tumainchauwa nuna pachis judiochu aidaunash ujakti tusa awetiuiwai. ⁹ Nuigtushkam Apajui ashí waji aidaun najankauwa nunú, yaunchuk nagkamas dutikatjai tibau dekaachbau aajakua nu wajak uminkae, nunú dekamtikata tujutiuiwai. ¹⁰ Nunak Apajui yachaji kuashat niimtina nujai iglesianum dutika nuna yamaik ashí wakan senchigtin aidaun, agkajunum inamin aina dushakam dekatnume tusa dutikauwai. ¹¹ Nunak Apajui tuke atinun dutikatjai tusa anentaimtjua

dutiksag ii Apuji Cristo Jesusai dutikauwai. ¹² Nunin asamtai yamaik Cristo dekaskeapi tabaunum ajankas kajinmasa Apajuyai jegamaina duka agkan ajutjamji. ¹³ Nuadui segajime, wi atumiin waitiag nu diisjum mijakaijum tusan, nunitsuk dekas atumesh eme anenmamjatajum.

Pablo Apajuí segatkagtaku emematbau

¹⁴ Nunú aatus asamtai iina Apajiya nunak tikishmatjan emematjai, ¹⁵ nigka ashí niina aentsji aidau nayaimpinum, nugkanmash batsata nunash Apajiyai. ¹⁶ Nuniakun segatjime, Apajuí wait anenkagtugbau dekas imana nuna amastinne, dutijamawagmatai Wakani Pegkejiya nunú atumi anentaiminish senchintijamatnume, ¹⁷ nunikjum Cristo dekaskeapi tau asagmin atumi anentaiminish Cristo pujustí, nuniakui aneenitnum shiig ebetmamjajum pujakjum kakajus tsujamainchau aminjum tusan, ¹⁸ nu nuniakjum ashí Apajuí aentsji aidautigmek dekamain ainagme ashí ni dutikamu aina duka, nuigtú Cristo anempamuji nagkanmainchauwa dushakam. ¹⁹ Nuigtushkam segajai, nunú Cristo anenkaji makichkish tumainchau ashí tikich aidau nagkaesauwa nuna dekatnume; nuninak ashí Apajuinua dusha ajitnume tusan.

²⁰ Nuadui Apajuí emematiagmi, ii wají dutikatasaya segaji nuniachkuish wají anentaimtaji nuna nagkaegas ashí pegkejan dutikmaina nu, nunak niina senchiji jutiini awa nujai dutikmainai. ²¹ ¡Apajuí emematiagmi iglesia aidautik Cristo Jesusa, sujamsau asamtai, nigki ajumaish tuke ememattai atin atí! Aatus atí.

4

Wakannum ijutkau amaina nu

¹ Wika Apu Jesús takagbaunum achinkan pujusan segajime, wait anejasjum Apajuí wajuk pujusti tusaya untsugmaku ainawa nunisjumek pujustajum tusan. ² Atumek ememachu nuigtush kakagchauch; utugchat akuish aneeniamunum pempeentunisjumek katsunajum emamkesjum iwajin atajum, ³ nuniakjum kakanmamsatajum Wakani Pegkejiya nujai ijutkau pujakjum tikich aidaujaish shiig agkan ijutkau pujustag tabaunum, ⁴ wagki makichik iyash ainaji, tuja Wakani Pegkejiya dushakam makichki, nunin asamtai ashí atum aidautigmesh ni pegkejan yaijata duke dakagme, Apajuik aatus nuniktinme tusa untsugmaku asagmatai. ⁵ Nunisag Apush makichki, dekaskeapi taji dushakam makichki, yamimamush makichki, ⁶ Apajuishkam makichki, ashí niina nemajin aina nuna Apajiya nunú, nunin asa ashí niina nemajuina nuig nigki inamui, nunisag ashí ditaig awai.

⁷ Tujash jutii aidautinak Cristo makí makichik wait anenjamag, don sujamsatatus wakekauwa dutiksag sujamsauwai. ⁸ Nuadui agagbaunum chichaak:

“Nayaimpinum ni shiwajin depetuk achijá yajuak wakae, nunik aents aidaun don aidaun tinamkae”, tawai.

⁹ ¿Wajuk takua nunash depetmak “wakae” tawa? Nunak, nugká taa maam nantaki ataktú wakatin asamtai tiuwai. ¹⁰ Nunú nugká tauwa duke ashí nayaim aidaun nagkaegag wakauwai, nunik Apajuí ashí najankamua nunak imá nigki diyawai. ¹¹ Nigki etegjauwai apóstol agtinun, profeta agtinnash, evangelista agtinnashkam, pastor agtinun nuigtú maestro agtinnashkam, ¹² aatus etegkeg umikui niina aentsji pegkejam aina nuiyan

tikich aidaunash yaigtinme, dutikam Cristo nemajuidaush aan kuashat kawegtinme tusa, ¹³ dutikamu asaja makichik dekaskeapi tabauwa duke ashí ajutjamtinme, nuniaku Apajuí Uchijiya dusha shiig dekamain ainaji, imagnisa pujuinaku Cristujai betek agmi iina anentaimtajinish, aents aidaujaish shiig awagdaiyinaku.

¹⁴ Nuninaku uchi aidau emetug anentaimchau asag waa wamak tibaujin yapajiak, tsanuamash dekaskeapi tuwama numamtuk, aents tsanumtan yacha aidau ashí dekaskechu waitan jintiina nu tsanuamak amaitsuji. ¹⁵ Duka nunitsuk dekaskea duke chichainaku tikich aidaujaish aneenimainai, nu aaja nuninaku ashí ii takaamuji aina nujai Cristuwa imanuk amainaitji. Cristo nemajin aidautinak niyai jutii Apujiya duka. ¹⁶ Cristuwai niina nemajin aina nuna ashí niing ijumag shiig emetuk, makí makichik aina nu shiig ijunas takainak aan nagkaemas aneenitnum emkatnume tusa dutika duka.

Cristo nemagku yamajam pujut juamu

¹⁷ Tuja juna tajim nunak, Apu Jesús tawa dutiksanuk tajime: Atumek Apajuí nemagchau pujuina nunisjumek pujuisaigpajum, wagki ditak wainak anentaimaina nunisag pujuinawai. ¹⁸ Nu aents aidauk dekachu nuigtushkam antakchau ainawai, nunin asag Apajuí pujutan sukagta nunash dekamain dekapenatsui. ¹⁹ Nuninak datsantainchau waigkag, ashí pegkegchau takatnum idaimamsau asag, Apajuí eemtin ashí pegkegchau aina nunash idaimainchau dekapenawai. ²⁰ Tujash atumek Cristui aaja pujutak unuimagchau ainagme, ²¹ atumek dekaskenum Cristo pachisa etsgbau antuku ainagme, nunin asajum ni wajuk pujusti tusaya wakejut-pawa nunisjumek pujakjum, Jesusdau dekaskea dushakam unuimamain ainagme. ²² Nuadui atumek, yaunchuk pujujakuitjum dui pegkegchau wakeeta nu tsanugmakui idaimainchau takaajakuitjum duka idaisatajum, ²³ nunikjum wakannumash anentaimtanmash yapajinau yamajam atajum, ²⁴ nuigtushkam yamajam aents pegkeja nunak takau atajum. Apajuí pegkeja nunak takastinme nuigtushkam dekaskenum pegkejam atinme tibau aidaush wajuku amainaita nunisjumek.

Cristo nemajin aidau nunimain

²⁵ Nunin asantai waitjut aina duka idaisatajum, nuniakjum tikich aidaujaish dekaskea duke chichatajum, wagki ashí jutii aidautik Cristo nemagbaunmag makichik iyash asaja.

²⁶ Kajeakjumesh, tudauk takasaigpa, kajekjumesh tuke etsag akapakig-pajum, ²⁷ iwanch yunumtugmak pegkegchaun takamtijamsainum.

²⁸ Yaunchuk kasamajakú akush, yamaik kasamkaigka, dekas takasti pegkeg aina nuna, nuniak ajiti tikich atsumaidau yaimaina dusha. ²⁹ Pegkegchau aidauk chichakaigpa, dekas chicham pegkeg tikichnash pegkegnum yaimaina nu chichatajum, antuidaunash shiig awagmamaina nunú. ³⁰ Apajuí niina aentsji etamu asa Wakaní Pegkejin amasua nu pegkegchau takaakjum wake besemag anentaimtikaigpajum, tsawan jegatai nuna diis ashí niinu aidaunak tudaunum tuke agkanmitkatna nu.

³¹ Ashí kajeamu aina duka idaisatajum, senchi kajeamu, tsagkugchamin kajeamu, shinamu, pegkegchau chichagkagtamu, nuigtú ashí pegkegchau aina dusha takasaigpa. ³² Nuniakjum pegkeg atajum, tikich aidaujaish

pempeentunisjumek wait anendaiyakjum, pempeentunisjumek tsagkug-daitajum, Apajuí atumin Cristo nemaju asagmin tsagkugtamjajua dutik-sagmek.

5

Apajuí uchijí aidaush wajuk pujumainaita nunisaik pujumain

¹ Atumek Apajuí uchijí aneetai asajum, ni wajukuíta nuninuk atasajum kakanmamsatajum. ² Cristo jutii anempau asa nigki jutiini tsagka-mankauwa nunisjumek tikich aidaush aneetajum, Cristo maamua duka kugkuin pegkejan kugkuwama iman Apajuinak shiig awajkauwai.

³ Atumek Apajuí aentsji pegkejam asajum, ashí pegkegchau iyashnum takanítai aidau, mijamainchau wakegamu aina dushakam, nuigtú ashí pegkegchau aina nu pachisjumkesh chichá yujaigpajum, ⁴ pegkegchau aidau augmatut, wainka anentainkas chichat, pegkegchaunum iwajut aidauk idaisatajum duka pegkegchauwai, nu tu yujatsuk dekas Apajuí see titajum. ⁵ Atumek shiig dekagme, iyashnum tsanítai pegkegchau aina nuna takaa yujajin aidauk, nuniachkush pegkegchau aina nuna takaa pujú aidaushkam, nuniachkush utugsanuk wajiijinawag tusa imá nunak anentaimtú pujú (duka apajuimtai ememattaiya nuninai), aidauk Cristo Apajuíai inamjatna nuig wayachgtinai.

Cristo tsauptinjijai pujaku nunimain

⁶ Makichkish wainak chicham aina nujaig tsanuam aigpajum, wagki nunú timajim nuna takaidauk, Apajuinu suwimak ishamaina nuna juinawai Apajuí intimjuidau asag. ⁷ Nunin asamtai atumek aents nuna takaina nuninuk aigpajum. ⁸ Atumek duikik suwenum pujujukuitjume, tujash yamaik Apu Jesusjai ijutkau pujakjum, tsauptinnum pujagme. Nuniau asajum tsauptinnum pujaush wajuk pujumainaita nunisjumek pujustajum. ⁹ Wagki, nu Wakaní Pegkeji pujugtamú asa: Ashí wait anenkagtutan, pegkeja duke takatan, nuigtú dekaskea duke chichatnash sujamji, ¹⁰ nunin asamtai shiig dekaatajum, Apu Jesusan shiig awagma nunú. ¹¹ Aents Apajuí nemagchau aidau pegkegchaun takaina duka takasaigpajum, dekas dita nuniamuji iwaintuktajum, dutikam dita takaamuji pegkegchauwa nuna dekaatnume. ¹² Dita pegkegchaun uuká takaina nu pachisaik tumaitsui, tikima shiig datsan asamtai, ¹³ tujash ashí nunú aidau dekaamak paan weawai, ¹⁴ wagki ashí paan wega duka tsauptin iwainamu asa nuniawai, nuadui:

“Ame kanam duka shintagta, aents jinawau aidanum pujaumesh nantaktá, nunikamin Cristo tsauptin etamtatui”, tawai.

¹⁵ Nuadui atum wajuk pujagme nu shiig kuitamsa diistajum, anentaimkas batsamtsuk shiig anentaimsa pujustajum. ¹⁶ Tsawan wainka megkayigpa, wagki yamai tsawan batsatag juik, pegkegchau takaamu ayau asamtai. ¹⁷ Anentainkachú wajukmaina nunitsuk, dekas Apu Jesús wakegamua nu dekasatajum kakanmamsatajum. ¹⁸ Nampekaigpajum anentainkachua nunin ekagtau asamtai, dekas Wakaní Pegkeji takamti-justi tusajum idaimamsatajum. ¹⁹ Nuniakjum pempeentunisjumek wakegat egketdaiyatatum salmo aidau, himno, wakannumia aina nu kantamkujum. Nu kantamkujum anentaiminish Apu Jesús ememattajum. ²⁰ Nuniakjum Apajuí iina Apajiya nunú, ashí wají aina nu pachisjum tuke see tusagmeké atajum, iina Apuji Jesucristo pachisjum.

Aishmag nuwentin nuwa aishintin aidau batsamain

²¹ Cristo eme anentamunum, pempeentunisjumek sumimdaikatajum.

²² Nuwa aishintin aidaushkam aishinig sumimain ainawai, Apu Jesusa nemagkaju imá niinig sumimkaju aina nunisag. ²³ Wagki aishmagkui nuwen nunikta tumainuk; Cristo iglesia niina iyashí ainag nunutin tujama nunisag, nunin asa jutiin Uwemtijamnuk niyai. ²⁴ Iglesia Cristui sumima nunisag, aishintin aidaushkam niina aishinish sumitkau amainai ashí wajiinum.

²⁵ Nuwentin aidauh, atumi nuwem aneetajum Cristo iglesia aneau asa niini mantamdauwa nunisjumek, ²⁶ Cristek nunak niina iglesijaiya nu, niina chichamen antukag umiagtai pegkeemtikata tau asa nunikui, ²⁷ dutika niina iglesijain shiig tsaaptin tswatnash antiakchau, makichkish pegkegchauji atsubgau, pegkejam iwainakta tau asa. ²⁸ Nunisag nuwentin aidaushkam nuwenak niina iyashí anentus aneemain ainawai. Ni nuwen aneauk niina iyashinash dutiksag aneawai. ²⁹ Wagki makichkish niina iyashinak kajegchau ainawai. Ayatak shiig kuitamak ayujin ainawai, Cristo iglesian kuitama dutiksag, ³⁰ wagki jutiik niina iyashí ainaji. ³¹ Nunin asamtai: “Aishmag nuwenkug apajin, dukujin ukuak, niina nuwejaig ijunmainai, nuniak nuwejai makichik iyash wegawai”, tawai. ³² Jujú dekaskea nu dekamainchau aajakun taja nunak, Cristo iglesijai makichik wega nuna pachisan tajai. ³³ Aatus asamtai atumshakam, makí makichik nuwentin aidautigmek nuwem aneetajum atumi iyashim anentsajum, tuja nuwashkam niina aishinak eme anentus diísti.

6

¹ Uchi aidauh, apa aidau umigkatajum Apu Jesusan shiig awagma dutiksagmek, nuuwai dekas pegkejak. ² Dekatkau chicham umiktinum anagtamamu awa duka juuwai: “Amina apa dukujai eme anentsam diístá, ³ jujú aaja dutikakum shiig aneasa dukap tsawan nugká pujamush ajutjamti”, tawai.

⁴ Uchigtin aidauh, uchijum kajemainuk chichagkaigpajum, dutiktuk chichagká esegajum jintintua tsakapagtajum, Apu Jesús wakega dutiksagmek.

⁵ Achikbau aidauwah, atumi apujum ju nugkanmayaya nunú umigkatajum puyatjusjum nuigtush ajantusjum shiig anentaiyai, Cristo takagmainaitjum imatiksajum takagsatajum, ⁶ dita wajasá diigmakui shiig awajkata tabaunum nunitsuk, atumek Cristo inake asajum wakejusjum pegkeg anentaiyai Apajuí wakega dutiksagmek takagsatajum, ⁷ Apu Jesusdau anentsajum shiig wakejusjum takastajum, aents aidauun anentsa dutiktuk; ⁸ wagki aents agkan aidau, achikbau aidauwashkam, dita pegkeg takasbauwa dutiksag Apu Jesús akiktina nunú dekau asajum.

⁹ Nunin asamtai inamin aidautigmesh, atumi inakem aina duka awantsagmek chichajigpajum. Adeagtajum atumin inapau, ditanash ina duka, nayaimpinum makichik Apu puja nunú, nigka aentsnak akanjag diyatsui.

Cristo nemajin aidau wakan pegkegchau aidaujai maaniamu

¹⁰ Nuadui yatsug aidauh, Apu Jesusa ijutkau pujakjum niina senchiji dekas imana nujai ichichmamjatajum. ¹¹ Nuniakjum Apajuí maanitain ashí amasajua nujai ejaamaktajum, nunikjum atumshakam tajitkatajum Iwanch tsanugmainakuish. ¹² Wagki jutiik aents nejentin ukunchtin

aina nujai maaniatsji, dekas wakan pegkegchau aina nuna apuji, wakan senchigtin aidau, wakan pegkegchau, aents ju nugkanmaya aidaun pegkegchau takamtikin, agkajunum batsamin aina nujai maaniaji. ¹³ Nuadui ashí maanitain Apajuí amasajua nunú jukitajum, nuniku asajum iwanch jetepakuish tajitkatajum, nu ashí nagkaikiu asajum nunisjumek atajum.

¹⁴ Nunin asamtai tajitkaujum nunisjumek pujakjum, dekaskea nu akachumtaijai beteka nu jukitajum, nuniakjum pegkeg takaamu corazajai* beteka dushakam jukitajum. ¹⁵ Nuniakjum sapat wegamaka shiig uminmaina imanikum umintsatajum, yamajam chicham agkan pujuta nu pachisa etsegekata tabaunum. ¹⁶ Ju aina nuní nagkaemas dekaskeapi tabauwa nu ajutjamtinme, atum ejamaktin tantagjai beteka nu, Iwanch flecha ekeemak aketjamkui ikagnaktin. ¹⁷ Nunisjumek uwemat atsejutaijai beteka nu, nuigtú Apajuí chichame Wakani Pegkeji espadajiya dushakam jukitajum. ¹⁸ Atumek Apajuí aujut idaisaipajum, tuke mijattsuk Apajuí segasjumké atajum Wakani Pegkeji yaimpasmatai. Aneaku pujustajum junik anentaimá pujutsuk ashí Cristo nemagkaju aina nu pachisjumesh Apajuí aultustajum. ¹⁹ Minash Apajuí segatjitajum, wi wajintu tumainaitja nunash Apajuí sujustí, ajankas yamajam chicham Apajuinu yaunchuk dekaachbau aajakua nuna pachisan dekamtikatjai. ²⁰ Apajuí minak ju chicham etsegekata tusa awetiuwai, nunú etsegbaunum yamaik cadenayai jigkatjagmatai pujajai, nuniau asamtai minash Apajuí segatjitajum ishankagtusuk niina pachisan etsekatjai.

Akatmabau

²¹ Tiquico iina yachi anetaiya nu, nuigtú shiig imagnis Apu Jesusa takatjin yaimna nunú, ni anui taa ashí ujpaktatui mina pachitus wajuk pujaja nunashkam. ²² Nuadui ni jutii wajuk pujuinaji nuna pachis ujpakti nuniak anentaimnash ichichtugmagtinme tusan awetajime.

²³ Apajuí iina Apajiya nu nuigtú Apu Jesucristujai shiig agkan pujutan, anenitan, dekaskeapi tutanash yatsug aidaun susatume. ²⁴ Apajuí wait anenkagtamujiya duka dekaskenum ashí iina Apuji Jesucristun aneena nui tuke atinai.

Aatus ati.

* **6:14** Corazak, maaniaku nugkutai jiju nuniachkush duwap najanam aajakajui.

Pablo carta agaja filiposnumia aidau awetimu

Kumpamkagtamu

¹ Witjai Pablo, nuigtú Timoteojai Cristo Jesusa inake aidauti, ashí Apu Jesusai pegkeniu aidautijum obispo aidau, nuigtú diácono aidautijum Filipos batsatjum nuutigmin kumpamjime. ² Atumnash Apajuí ina Apajiya nu, ii Apuji Jesucristua nujai wait anenjamaidau asag, shiig agkan pujatan amastinme.

Pablo Jesucristo nemajuidau Apajuí aujtamu

³ Atumin anentaimtaknuk tuke see tusanké ajai mina Apajuijun. ⁴ Ashí wi Apajuí aujag nuniaknush, ashí atumin pachisan shiig aneasan tuke segatjime; ⁵ wagki, atum nagkamchakjum yamajam chicham antukjum yaintujum dui nagkamsajum, yamaikish tuke yainjum nuadui; ⁶ Apajuí atumiin takat pegkejan nagkabauwa nunak, dutiksagkeap takamtijamá atatua tsawan Jesucristo minamu atina imanuish tajai. ⁷ Wi ashí juna aajan atumin anentaimtajim duka pegkejai, wagki wika atumnak senchi aneajime; wi achinká pujakuish, chichaman dekaagtuatatus apu jujuinakuish, nuigtú yamajam chichaman etsegkati tusagmesh yainjum nuadui. ⁸ Wi atumin ashí aneajim nunak Apajuí shiig dekaagtawai, Cristo Jesús jikamsá anejattaijin suja nujai aneajim nunak. ⁹ Nuniau asan Apajuí aujkunush, atumi anenkajum aina nu aan nagkaemas, nuigtú aan nagkaemas unuimatash, ashí dekata dushakam ajutjabiagti tusan segatjime; ¹⁰ nunikmatai dekas pegkeja nunú etegke dekaatajum tusan. Aaja nuniakjum pujutjuminish pegkeg makichkish tumainchau atajum, Cristo minamu tsawan atina duish; ¹¹ Jesucristo yaimpasagmatai kuashat pegkeg takaagmin tikich aidau Apajuin eme anentus ememattinme tusan.

Minaig pujamua duka Cristuwai

¹² Yatsug aidauh, mina utugchat aidau nagkaetukiaja nu dekaatajum tusan wakegajai, duka dekaskenum yamajam chichama nu aan nagkaemas etsegbaunum yainkaje; ¹³ nuniau asa wi achinkag duka, apú jeen aents batsatbaunmash, nuigtú ashí tikich aina nuish Cristo pachisan paan etsegbaunum yainkae. ¹⁴ Nunin asantai kuashat yatsug aidau, wi achinkamun wainkag Apu Jesusai ichichmamjag ishankagtutsuk chicham etsegta nuna wakekaje.

¹⁵ Duka dekaske, ujumak aents aidau kajegkagtamunum, nuigtush shiwagmagata tabaunum Cristo pachis etsejuinawai, nuniinai tikich aidau pegkeg anentaiyai etsejuinawai. ¹⁶ Nuniinai ujumak aidau Cristo aneamunum etseguinawai, Apajuí yamajam chichama juna ayamjukti tusa mina jui apujtusa nuna dekaagtuidau asag; ¹⁷ tujash tikich aidauk ditanunak anentaimtus nuninawai, wi jui achinkan pujag nuna aan nagkaemas utugchatan apujtugsagtatus. ¹⁸ Tujash nunak puyatjatsjai, dekaskenum pegkeg anentaiyai etsejuinakush, nuniachkush imá Cristunak pachis etsejuina dui shiig aneajai, nuigtush aan nagkaemas shiig aneamuk ajuttatui. ¹⁹ Wagki wika dekajai atum Apajuí aujtugjum dui,

Wakan Jesucristunua nu agkanmitkajuatta nunak. ²⁰ Wi senchi wakegatumug nuigtú dakamu ajuta duka, makichkinmakesh inatsam aig tusan imagnisan pujustag taja nuuwai; yamaishkam nunisnuk pujustag tajai, wi iwaaku pujutaish nuniachkunush jakamtaish minaiyan unuimajag Cristo imanjiya nunash shiig dekaatnume, tusan. ²¹ Wagki minaig iwaku pujuta duka Cristo takagku pujuta nuuwai, untsu jaamua duka Cristujai tuke pujuttag nuuwai. ²² Wi ju nugka jui pujaknuk, pegkeg takat aina nunak takastasan nunimainaitjai, nunin asantai dekatsjai tutsu etegmainait. ²³ Wagki jimaja juiya etegkata tabauk minaig utugchatai: wakegajai jakan Cristujai pujustasan, nunú imá pegkeg asantai; ²⁴ tujash pujusta tabauwa duka atum mina atumjajum dui nunimainai. ²⁵ Nuna aaja dekau asan atumjaiyap pujuttaja tajai, atum dekaskeapi tabaunum shiig aneastina nuna yaigtin asan. ²⁶ Nunikjum wi ataktú atumiin taattag dui Cristo Jesusai dakujamu aan nagkaemas ajutjamtinme tusan.

Yamajam chicham tawa nunisaik pujamu

²⁷ Ayatak, atumi pujutjuminish yamajam chicham Cristunu tawa nunisjumek pujustajum, wi atumin wainkatasan taaknush, tuja atumjai pujachkunush ditak ebetmamjag makichik anentaiyaik shiig ijuntsag yamajam chicham dekaskeapi tabauwa nuna etsejuinak kakantuinawai tabaun antuktajai; ²⁸ makichkish atumi shiwajum aina duka ishamkaig-pajum, nunú atum nuniama nuna Apajuí ditanak suwimkan suwak, atumnak uwemtijamjatna nuna iwaintuinawai. Nunak Apajuí ashí ditukattawai. ²⁹ Wagki Apajuik atumnak ayatak Cristo dekaskeapi titinme tusa wakegatsui, Cristo nemajuinak waittsatnume tusa wakegawai; ³⁰ nuadui atumnash wi waitiamu wainkauwaitjum duke ajutjamainawai, nunisnuk yamai waitiag dusha antugtagme.

2

Shiig aneenisa batsatbau

¹ Cristo atumin tikich wakemitkatan senchijin amasua nujai nuigtú anentak atumiin ajutjamaina nujai tikich aidaush anentai ichichtugtajum, nuniakjum makichik Wakania duke ajutjamaina dui pempeentunisjumek wait anendaitajum; ² nuniakjum minash shiig anemtijustajum ashí ijutkau pujakjum, makichik anenka nuig ijunkujum, makichik anentaimta nuig, takastasa anentaimtama dusha makichik anentaimtakjum. ³ Makichkish shiwagmagata tabauwai takasaigpa, nuniachkugmesh ememamuikish, duka nunitsuk ayatak imanchauch anenmamkujum makí makichkitijum tikich aidaush atumin nagkaetamsau diitajum. ⁴ Makichkish imá ni wakegamujiya nuna egatsuk, ashí tikich aidau wakegamua nuna egaktinme.

Cristo imanchau wajasú ashí nagkaekagtasu awajsamu

⁵ Atumnash Cristo Jesús anentaimajakua nuninuk anentaimtash ajutjamain ainawai;

⁶ nigka Apajuí wajukuita ibau aajakuitak, Apajuikai betek atasag wakekachui;

⁷ ni aajakbauwa nunak idaiyak jutijai betek wajas, ashí aents aidau inataijiya nunin wajasui;

⁸ nunik aentsjai betek wajas nigki imanchauch wajasui, nunik jaakush Apajuí umijak, cruznum jakauwai.

⁹ Nunikmatai Apajuishkam imá niinak ememattai awasauwai,

dutika daajinash ashí tikich aidau daaji aina nuna nagkaesaun susauwai;

¹⁰ nayaim batsamin aidaush, nugkanmayash, nuigtú nugká initkenia aidaushkam imá Jesucristunak tikishmatug ememattinme tusa;

¹¹ nuninak ashí nugkanmaya aidaush Jesucristo Apua nuna dekaatnume, nunikag iina Apají Apajuiya nunak ememattinme tusa.

¹² Nuadui mina aneetaig yatsug aidauh, wi atsakuish tuke umigtin agmaujum nunisjumek, yamai wi atushat pujag juish aan nagkaemasjum umigtuktajum. Atum uwemjamu dekaskea duke puyatjusjum kuitamkatajum; ¹³ wagki Apajuiya nuuwai wakeetan nuigtú ní wakega dutiksaik wakejusa takatan atumin amá duka.

¹⁴ Ashí dutikatajum makichkish augmatnaisuk nuigtush jiyantsuk; ¹⁵ makichkish nuninai tama amainchau, bakumamainjish atsugbau, Apajú uchijí asajum pegkegchaush atsugbau, aents pegkegchau besekú aina nuig, atum agkajunum yaya aidau etsantak nugkan tsaaptin emama numantin atajum. ¹⁶ Chicham pujutan sukagtina nuanuig ebetmamjatajum, nuniau asagmin Cristo minakuish, atumiin ememasan anentaimjatjai, wainkanuk wekaesachuapitja nuigtush wainkanuk takaschauwapitja tusan. ¹⁷ Nuniau asan, dekaskeapi tabauwai atum takaamu ofrenda Apajú sumaina numamtuk wajajum nujai betek atatuí wi mantamnamush, nunikmatai atumjai shiig aneakun dakujamu ajuttatui. ¹⁸ Nunin asantai atumshakam shiig aneakjum wijai dakujustajum.

Timoteo

¹⁹ Apu Jesús wakegakuig, Timoteon wamak atumiin awemata tajai, atum wajuk pujagme nuna dekaan shiig aneasthan. ²⁰ Wagki tikichik wi uyumag imatika atumdaui pegkeg amaina nuna uyumaik atsawai. ²¹ Wagki ashí tikich aidauk, Cristo Jesús wakega nuna egatsuk dita wakegamua nunak egainawai. ²² Tujash atumek dekagme Timoteo pujutji pegkeja duka, nuigtush wajuk wijai takasé yamajam chicham etsegbaunum, mina uchig yainmaina imatika. ²³ Nunin asantai minash wajuk ajuttig nuna dekaan awematag tajai; ²⁴ Apu Jesusai kajintsan anentaimjai nuniau asan wisha waamak minittajai.

Epafrodito

²⁵ Dutiksanuk yatsug Epafrodito awetitag tajime, mina takat atuetutaig, nuigtú yamajam chicham etsegbaunmash senchi takaak, nuigtú wi atsumamunmash yainka nuna.

²⁶ Nigka shiig senchi wakemayi atumin ashí waipakagtatus, nuniyatak shiig senchi waittsabi atum jaawai tabau antukchamkaijum nuna. ²⁷ Dekaskenmag jamayi, jatanum jeganmayi, tujash Apajú niinak wait anenjabi, imá niinakek dutikache, minashkam wait anenjuje, wake besemag pujag nuna, nuní nagkaemas wake besemag pujusai tujutu asa. ²⁸ Nuadui wamkesan awetajime, atumshakam ataktú ní wainkajum shiig aneasthan, nuniakjumin wishakam wake besemjak pujushtajai, tusan. ²⁹ Shiig aneasjum Apu Jesusa daajin jukitajum, nuniakjum tikich niiya junin aidaushkam aneasjum diistajum; ³⁰ wagki Cristo takagbaunum jatanum jeganmayi, niina pujutinak ishamainnum idaisabi atum mina yainmaina nuna ni yainkata tau asa.

3

Dekas imana duka Cristo dekaata

¹ Yatsug aidauh, atumek Apu Jesusjai ijutkau pujakjum shiig aneasjum pujustajum. Wi agatjabiajim nunak awaksanuk tajim duka minaig tutitjakesh atsugatawai, juka dekas atuminish atumnawai. ² Aents aidau yawá pegkegchau tsumaina numamtin yujas: Uwemjata takugmek pakamaktajum, tu yujaina nujaig kuitamamkatajum. ³ Wagki jutii ainaji pakamaku aidautik, Apajuí Wakaní Wakaní yaimpasmatai emematuinag nunuti, jutiiik Cristo Jesusai ememainaji, nuniaku iyashnumiag kajintsá anentaim-tatsji. ⁴ Nunú imá jutiiik kakanmamsa uwemainaitkuig, wi dekas imá mina takatjuig uwemain aajakuitjai. Witjai dekas tikich aidaun nagkaesan ashí chichamnash umikunuk. ⁵ Minak akiinan ocho tsawan wegaig pakagtiu ainawai, wika Israel aentsuitjai, Benjamin weantuitjai, hebreo aina nuig witjai hebreonuk; tuja chicham umitnumag fariseowaitjai; ⁶ Apajuí takatji akasmatkun iglesia aintujakuitjai, chicham umiktinum pegkeg takastajum tawa nu umitnumag makichkish nuninai tumainchau aajakuitjai. ⁷ Tujash ashí ju aidau minai iman aajakajua nunak, Cristo aneamunum wainkan diiyajai. ⁸ Ashí nunú aidaunak idaisauwaitjai, dutikapun pasuamu ukajá ajaptayama nunin anentajai, Cristo Jesús mina Apujua nunú shiig dekaata tabaunum, ⁹ nuigtush niijai ijutkau atag tabaunum, chicham umiktina nu umiamuchui, Cristo dekaskeapi tabauwai, Apajuí pegkejan takauwa iman diigma dui. ¹⁰ Wakegag nunak Cristo dekaatag taja nuuwai, niina senchijin nantakuwa nunash dekapjatasan, ni waittsauwa nunisnuk waittsatasan, nuigtú ni jakauwa nunisnuk jakatasan, ¹¹ jakau aidau nantainakui wisha nantakmig tau asan.

Jegantina nuig jegatsji

¹² Wika ashí dutikajai takun tatsujai, nuigtush iman wajasjai tusanush tatsujai, tujash nui jegantasan wegajai, dekatkauk Cristo Jesús niinu etiu asamtai. ¹³ Yatsug aidauh, wika nui jeganjai tusan tatsujai, ayatak yaunchuk takasbauwa nunak dekaskenum pachitsuk idaikun, jegantasan wegag nuna imá senchi takaajai; ¹⁴ takasa ashimkata tibauwa nui jegantasan weajai, nunikan wají jukitnume tusa Apajuí nayaimpinum pujus Cristo Jesusai untsugmakua nuna jukitasan.

¹⁵ Nunin asamtai, ashí wakannum katsujau aidautik duke anentaimain ainaji, tuja tikich yajá anentaimu ataish nunashkam Apajuí iwaintuktatui. ¹⁶ Untsu nunimainaitag duka jutii dekaawaitag nunisaik umiaku puju-mainaitag nuuwai.

Jutiiik nayaimpinmaya ainaji

¹⁷ Yatsug aidauh, wi wajuokeja duke dakumkatajum, nuniakjum jutii pujuinag nunisag pujuina dusha diistajum. ¹⁸ Wagki anui kuasht yujainawai, nuna pachisan kuashta imania tibaijime, yamaishkam awentsanuk buutkun tajime, aanú aidauk Cristo cruznum jakauwa nuna shiwaji ainawai tusan, ¹⁹ ditak imá nugkanmayanak anentaimtuinawai, ditá apajuijig iyashí wakegamuji aina duke, dita ememamujija duka ditá datsantí atina nuuwai, nunú aidau nagkanbauji atina duka megkaeta nuuwai. ²⁰ Nuninai, jutiiik nayaimpinmaya aents ainaji, nunin asaja nayaimpinmaya Uwemtikagtin Apu Jesucristo taati tusa dakainaji; ²¹ ni jutii iyashí imanchau aina nunak yapagtugmatnai, niina iyashí imana

ibauk etamkatatus. Nunak nigka senchigtina ibau asa, ashí wají aina nunak niinig sumintikata tau asa dutikatnai.

4

¹ Nuadui mina yatsug aneetaig aidauwah, wika atumnak senchi aneajime, wi atumiin shiig aneamu ajuta duka, wají shiig pegkejan jumainaitag imanai. Nunin asantai, atum Apu Jesusai ebetmamjajum pujajum nunisjumek pujustajum.

² Evodia, Sintiquejai segainajai Apu Jesusai nemajuidau asag shiig chichasag pujustinme, tusan. ³ Dutiksanuk aminashkam mina kumpag betek umin asamin segajame, aanú ubag aina nu yaigtá tusan, ditak wijai betek yamajam chicham etsegbaunum senchi takasagmayi Clementejai, nuigtú tikich aina nujai; nunú aidau daajig aents pujuta jukiu papinum agattaiya nui agatkamu ainawai.

Imá Apu Jesusaig tuke dakujustajum

⁴ Tuke Apu Jesusaig dakujitajum. Awaksanuk tajime: ¡Dakujustajum!

⁵ Atumí shiig awajagtuaitagmae dusha ashí aents aidasha wainkamu atí. Apu Jesús taatnuk namput wajaschae.

⁶ Makichkish atumkek uyumá pujuigpajum, nunitsuk Apajuí aujkujum ashí iwaintuktajum nuniakjum see titajum. ⁷ Apajuí agkanji, ashí dekatan nagkaega nunú, atumi anentaimnak nuigtú anentaimtagminash Cristo Jesusai kuitamjutpaktatjume.

⁸ Nuigtushkam yatsug aidauh, ashí dekaseg aina nui, ashí ajantusa diita nui, ashí pegkeg takaamu aina nui, ashí ayatak pegkeg aina nuig, ashí kakagchau ata nui, ashí eme anentsá diyam atanum, nuigtú eme anentam amaina nui anentaimsatajum.

⁹ Ashí wi jitintuauwaitjim nu takastajum, ashí wi takaamu nuigtú antukuitjum dushakam dutikatajum; nuniagmin Apajuí agkan pujutan sengkagtina nu atumjaish atatuí.

Filiposnumia anentag suwamu

¹⁰ Shiig senchi shiig aneajai Apu Jesusai, ataktú mina uyumatjukujum dui, atum mina tuke uyumatjin agmaujum nunak dekajai, nuninaikujum dutikmain atsau asantai ankaugme. ¹¹ Wika junak atsumau asan tatsujai, wika ajuta nujai shiig aneasa pujutan unuimajuitjai. ¹² Wika ujunauch pujutnash dekajai, antsanuk kuashat ajutkagtamunum pujutnashkam dekajai; nunin asan ashí wajuk pujuinjaki nunash unuimajuitjai, shiig yewa pujutnash, yapajayatu pujutnash, kuashat ajutkagtamunum pujutnash, atsumayatku pujutnash. ¹³ Ashí nunak nunimainaitjai, Cristo senchintijau asantai. ¹⁴ Tujash atumek wi waitiamujua nui pegkeg dutikaugme.

¹⁵ Atumshakam degagme filiposnumia aidauwah, nagkamchakun yamajam chichaman etsegkatasan Macedonia pujaun jiinkibiag nuig, makichik iglesiakesh minak yainkachagmayi, imá atumek yainkabiugme; ¹⁶ nuniau asajum wi Tesalónica pujaish awetugbaijume, nuigtush awentsagmekesh wi atumag nuna dutikati tau asajum. ¹⁷ Wika junak anentag sujustinme tusan tatsujai, atumdau aan nagkaemas ajutjantinme tusan tajime. ¹⁸ Atum Epafroditowai awetugbaijum nunak ashí imatiksasuk jukibiajai, yamaik wi atsumaman nagkaegas ajutuí, duka pegkeg kugkuin apeamu Apajuin shiig awagma imanuyi. ¹⁹ Nuadui mina Apajuíjua nu, ashí atumin atsugtamjum nunak, niina wiyakchaji dekas imana nuna imatiksag Cristo

Jesusai amaamu jukitnaitjume. ²⁰ Apajuí iina Apajiya nu, nigki tuke ememattai atí. Aatus atí.

Inagnaku akatmabau

²¹ Ashí yatsug Cristo Jesusai pegkeniaju aina nunú kumpamjutuata. Antsag yatsug wijai batsata dushakam atumnash kumpamjamainawai.

²² Nunisag ashí pegkejam aina dusha kumpamjamainawai, imá senchi Cesara jeenia aina nu.

²³ Iina Apuji Jesucristo wait anenkagtamujiya nu ashí atumi wakanminish ajutjamtinme.

Aatus atí.

Pablo carta agaja colosasmusia aidau awetimu

Kumpamkagtau

¹ Witjai Pablo Apajui wakegau asa Jesucristo apostolji etiuwai, nuniau asamtai yatsug Timoteojai jui pujusan, ² atum yatsug pegkejam, nuigtú imagnisjum Cristo umijin aidautigum Colosas batsatjum nuna kumpamjime; iina Apají Apajui, nuigtú Apu Jesucristua nujai wait anenjamag atumnash shiig agkan pujutan amastinne.

Pablo Apajui see tabau

³ Atum pachisa Apajui aujkuik, tuke see tusaiki aji, iina Apuji Jesucristo Apajiya nunú, ⁴ atum Cristo Jesusai dekaskeapi tuinajum nu, nuigtú ashí Jesusa nemajin pegkejam aidaush aneajum dusha antuku asaja; ⁵ duka atumek yamajam chicham dekaskea nu etsegbaunum atum jukitin nayaimpinum ukugtamsamu ajutjamaina nu dekauwaitjum nu dakaidau asajum nuniagme; ⁶ nunú yamajam chicham atumin tajutjamauwa duke ashí nugkanmash dapampaegak weawai. Ashí yantannum wantinui pujutin yapajinaina dui, atum yama nagkamchakjum Apajui dekaskenum wait anenkagtauuji antukuitjum dui nagkamas pujutjum yapajiau ainajum nunisag; ⁷ junak Epafras iina aneetaiji jutiijai takau, Apu Cristo imajtikas takagna nu atumdaui pegkeg amaina nuna jintinjamawajui. ⁸ Nigki jutiinash, atumin Wakaní Pegkeji aneenitan amainaku aneniamum nunash ujakmami.

⁹ Nuadui jutiishkam, dekaabiag dui nagkamsaik, atumek idaitsuk Apajui tuke aujtajime, nuniaku Apajui segatjime ni wakegamujiya nuna shiig dekamtijamantai ashí yachamet wakannusia aina nunash dekaatajum tusan; ¹⁰ Apu Jesusdau aidaush, wajuk pujumaina ainawa nunisag pujuinak, ashí pegkeg aina nunak takainak shiig awagmainak, Apajuin aan nagkaemas dekaatnime tau asan; ¹¹ nuigtushkam segatjime niina senchiji imana nujai senchintijamatnime tusan, dutikamu asajum ashí katsunjam emamkesjum shiig ichichmamjajum; ¹² shiig anejasjum atumesh iina Apají see titajum, wagki ni umigtamkauwai ni inamtaiji tsaaptina nuiyan, niina aentsji pegkejam aidau susatnun anagkauwa nuna jukitnime tusa.

Jesucristui dekas wagaakuk

¹³ Apajui agkanmitkagmawai wakan senchigtin suwenum inamaina nuiyan, dutijama niina Uchiji anetaijiya nuna inamtaijin jujamkiajui, ¹⁴ niini agkanbaetak ajutjamui nuigtú tudau aidaunum tsagkugnamushkam.

¹⁵ Wagki niyai Apajui wainmainchauwa nuna niimen iwaidauk; niyai iwai, ashí waji aina nu eke najannatsaig pujujaku asa. ¹⁶ Wagki ashí waji aina nunak Apajui niini najankauwai, nayaim aina nui ayá nunash, nuigtú nugkanmayanash, wainmain aina nunash, wainmainchauwaina nunashkam; inamin aidaunash, apu aidaunash, wakan pegkegchauwaina nuna apujinash, wakan senchigtin aidaush, ashí niini najankamu ainawai, niinu atí tusa. ¹⁷ Cristuk ashí waji aina dusha eke atsaig pujujaku, nuniau asa ashí waji aina dushakam ni wajuk dutikamuita nunisag

ainawai; ¹⁸ nuigtushkam nigki, iglesia niina iyashiya nuna Apujishkam. Nigkiyai nagkamtinish pujujukuk, nagkamas jakau aidaunmaya nantakiuwa dushakam, nunin asa ashí nu waji aina nuig niyai dekatkauwa duka; ¹⁹ nuadui Apajuik niina Uchiji Aentsmaga akiinauwa nunak ni senchtina ibauk atí tusa wakekauwai; ²⁰ nunikmatai niini ashí waji aidau nugkanum, nayaimpinum aina nunashkam epegtua, Cristo cruznum numpeen ukajua dui agkanmitkata tau asa.

Cristo Apajuí kumpaji etabiuwai

²¹ Atumshakam yaunchuk tsawan aajakua duik takanchbau Apajuí shiwaji aajakuitjume anentaimtagminish, pegkegchau aina nu takaakjum nuniautigmin yamaik epegtugmawaje; ²² Cristo ju nugka jui pujus waitus jakauwa dui epegtugbauwai, niina pujutainish pegkejam aidau, nuigtush tsuwatjish atsugbau niina emtinish bakumamainush atsugbau iwaintamkata tau asa. ²³ Tujash nuna nuniktag tuinakug Jesusan dekaskeapi tiajua nuig shiig ebetmamjag, nuigtú yamajam chicham Jesusai uwemna nu pachisa etsegbaun antukajua nunak dakainak pujuina nunú iman amain ainawai, nunú chicham ashí nugkanum etsegnakua nunak wihakam etsegjai.

Pablo judiochu aidaunum takaamu

²⁴ Yamaik shiig anejai atumiin waitiakun, nuniakun Cristo niina iyashi iglesiaya nui waittsamu mina iyashjui atsugta nuna umiajai; ²⁵ nuniaw asan niina takajin wajasuitjai, nunikmatai Apajuí atumiin pegkeg amaina nuna yaigtú nuniak ashí yantamnum chichaman etsegkati tusa awetiuwai; ²⁶ yaunchuk nagkamas anentaimtusbau dekaachbau aajakua nuna yamai niina aentsji pegkejam aina nuna iwaintuke; ²⁷ nunú aidaun, Apajuí niina imanji dekas imana nu dekaachbau aajakua nuna judiochu aidaun dekamtikatatus wakekauwai; duka Cristo atumin ajutjama nuuwai, niina imanji dakainajum nunú.

²⁸ Nunú Cristo pachisa etsegtakuish, ashí aents aidauk chichagji, nuniaku jintinji ashí dekamu aina nunú, Cristo eemtinish shiig pegkeg iwainakta tuidau asaja; ²⁹ nuna dutikata tau asan, senchi takaajai niina senchiji minai takaa nujai.

2

¹ Wagki dekatajum tusan wakegajai shiig senchi atumiin takaag nunú, Laodiceanmaya aina nuish, nuigtú ashí tikich mina waitchau aina nuishkam; ² anentainish ichichmamag aneenis ijutkau pujuinak, Apajuinu, nuigtú Cristunu yaunchuk anentaimtusbau dekaachbau aajakú dekas ashí niinu imana nuna shiig dekaatnime tusan; ³ ashí pegkeg yachamet nuigtú dekat aina dushakam imá Cristuig awai.

⁴ Junak, makichkikesh chicham wakemain aidaun tujamainak tsanugmajainum tusan tajime. ⁵ Wagki wi atumjai ijunja pujachkunush, mina wakanjuig atumjaig ijutkajai, nuniaw asan shiig anejai atum Cristui dekaskeapi tusajum niinig ebetmamjajum, imagnisjum pujuinajum nuna waikun.

Yamajam pujut

⁶ Nuadui, atumek Apu Cristo Jesús nemagkau aidautigmek ni wakega nunisjumek pujustajum; ⁷ nuniakjum numi kagkapé initak akajau asa, kakajus katuemainchau wajas aama imanikjum Jesucristo dekaskeapi

tabaunmash tsujamainchau wajasjum atajum, wajuk jintintuabiajime nunisjumek, nuniakjum Apajuish see titajum.

⁸ Kuitamamkatajum, makichkish dita yachameagbauji dekaskea imanun jintinjamainak tsanugmajainum, tujash nunak ditá muunji tujakbauwa nuna jintinawai ju nugkanmaya aina nuna, Cristo tawa nudauchui.

⁹ Wagki, ashí Apajuinua duka Cristui paan wainnawai; ¹⁰ nunin asamtai atumnak niini ashí betek ajutjamjume, wakan pegkegchau aidau apuji, wakan senchigtin aidaun ashí nagkaesauwa nunú. ¹¹ Nuigtush niini pakamaku ainagme, aents dutikin aina nuninchau, nunú pakamamuk iyashnumia tudau idaibauwa nuuwai, nunú pakamamunak Cristo dutikauwai. ¹² Atum yamimaju ainajum dui Cristujai ukuntsau ainagme, nunisjumek niijai nantakiu ainagme, Apajuí ni senchijin jakau aidaunmayan inankiuwa nuanuig dekaskeapi tuidau asajum. ¹³ Atumek tikich tsawan aajakua duik, wakannumag jakau aajakuitjume atum tudau takataijum idaichau asajum, tujash yamaik Apajuí pujutan amasaje, Cristo nemaju asagmin dutijamawag ashí tudaunak tsagkugtamjaje; ¹⁴ dutika chicham umiktin aajakua nu umiachbaunum bakumamain aajakuitag nunak Apajuí juki, Jesucristo cruznum achinjauwa nui esakajui; ¹⁵ dutika Apajuí ashí wakan pegkegchau aidau apujinash, nuigtú wakan senchigtin aina nuna senchijinash atanjauwai, Cristui depetuk imanchau emak achijá ashí wainbaunum iwainakui.

Tikichkesh juu umiktajum tujamain ainatsui tibau

¹⁶ Nuadui makichkish atum yuajum nuna, nuniachkush umajum nunakesh, nuniachkush nantu yamá takamtai, nuigtú tsawan ayamtai fiestamtai aina nuna diisagkesh augmatjamain ainatsui; ¹⁷ ashí nuna dutikajakú aina nunak eke Cristo taachu asamtai ni taatna nuna iwainainak dutikajakú ainawai. ¹⁸ Makichik aentskesh ememachua nunin wajasag uwemjatag takumek ángel aidau ememattajum tujamainakuish antugkaigpajum, nu aidauk wainkachuitak wainkajai tuinawai ememainak, aentsú anentaimtaiji pegkegchau aina nunak anentaimaidau asag; ¹⁹ Cristo niina nemajuidaun Apujiya nujajig ditak ijutkau ainatsui. Ni ashí iyashnak kuitamui ashí niinu aidaun ijumag, dutikau asa Apajuí anentaimtusbauwa dutiksag tsakatnash suawai.

²⁰ Atumesh Cristujai jakau ainayatkugmesh ¿wagka ju nugkanmaya pujuina nunikjumes, ju umitai ati tibau aina nu: ²¹ “Juka yuwawaigpa, apasmesh dekapsaigpa, antitash antigkaipa”, tawa nu umiktasagmesh pujugjume? ²² Ashí nunú umiktin aina duka waji aidau takaa takaam abuegama nuniktinai, aents aidau jujú umiktajum tusa jintiamu asag; ²³ nu aents jintiamu aina duka, jutsukaitai dekas yayajtmainuk tusa puyatjusa umimain ainawai, wagki Apajuí umigkuik, kakagchauch amainai nuigtush iyash senchi waitkamainai tuinawai, tujash duka makichkish iyash pegkegchau wakega nu idaitanmag yayajattsui.

3

¹ Nuadui atumek Cristujai nantakiu asajum, nayaimpinmaya waji aidau egaktajum, Cristo Apajuí untsujin eketa nuiya. ² Nuniakjum nayaimpinmaya waji aina nui anentaimtajum, nugkanmaya aina nui anentaimtsuk; ³ Atumek Cristujai jakau asajum, Cristujai pujau asagmin yamajam pujut ajutjamjum nunak aentsuk wainmain ainatsui. ⁴ Nunin

asamtai, Cristo atumí pujutjumea nu wantinkatna dui, atumshakam niya imanuk wantinkatnaifjume.

Yaunchuk pujujakbau yamaiya nujai

⁵ Ju nugkanmaya ashí atumiin ajutjamaina duka idaisatajum, tsanijinbau, pegkegchau aidau, katsunmainchaw wakejut aidaush, pegkegchaw wakejut, utugsag nu ajutia tusa senchi wakegat, nunin aina duka apajumtai ainawai; ⁶ nunú aidaun takainak intimaina nuanui Apajuí suimkeg minawai; ⁷ yaunchuk pujujakuitjum duik atumshakam ju aidau takaajakú ainagme. ⁸ Tujash yamaik ju aina duka ashí idaisatajum: magkagtu-main kajeamu, kajet, pegkegchaw takaamu, pegkegchaw chichagkagtam, chicham pegkegchaw chichat. ⁹ Pempeentunisjumek tsanunijaigpajum. Yaunchuk takaajakbau aina duka idaisajum, ¹⁰ yamajam aents wajasugme; nuniku asajum atumin najapau niimega ibau weakjum ni shiig dekaatajum. ¹¹ Nunin asamtai judío tabau, griego tabaush, pakamaku, pakamakchaush, tikich nugkanmaya tabaush, unuimagchaw tabaush, inataiyai tabaush, agkantai tabaush atsawai, Cristuwai ashí nuigtú ashí nunú aidaunum awa duka.

¹² Nuadui Apajuí pegkejam atinme tusa anempas etegtamjau asamtai, shiig wait anenkagtin, pegkeg, ememachu, kakagchaw, ebetmamjau atajum; ¹³ pempeentunisjumek tsagkugdajatajum, tikichjai wake beseg-daikamu ajutjamkuish pempeentunisjumek tsagkugdajatajum, iina Apu Cristo tsagkugtamjauwa nunisjumek atumesh tsagkugdajatajum. ¹⁴ Ashí nu waji aina nuig anenka nu ajutjamtinme, nuuwai dekas shiig ijuntas pujutan sukagta duka. ¹⁵ Atumi anentaiminish Cristunu shiig agkan pujuta nu ajutjamtinme, makichik iyash atinme tusa etegtamjauwa nunisag, Apajuk nuna aatus dutijamata tau asa makichik iyashik etamkauwai, nuadui atumek see titajum.

¹⁶ Cristo chichamega nu atuminish shiig kuashat tuke ajutjamtinme, nuniau asamtai pempeentunisjumek jintindaiyajum nuigtú pegkeg wakegat egketdaiyatajum ashí yachamet aina nujai, nuniakjum atumi anentaiminish Apajuí wakesa kantamjuatajum salmo aidau, himno aidau nuigtú Wakaní Pegkeji waketan amá nujaishkam kantamatajum. ¹⁷ Ashí atum dutikajum nu nuigtú chichajum duka Apu Jesusa nemajin asajum nunimaina nu dutikatajum, Apajuí iina apajiya nunú Jesucristo dutikauwa nu pachisjum see takujum.

Jesucristo nemajin aidau nunimainji

¹⁸ Nuwatkamau aidauwah, atumi aishumin sumimkatajum, juwai Apu Jesús nemajin asajum nunimainaitjum duka. ¹⁹ Nuwentin aidauh, atumi nuwem aneetajum, nuniakjum najamnuk chichagkaipajum.

²⁰ Uchi aidauwah, apa dukujai ashí umigkatajum, wagki nuuwai Apu Jesusan shiig awagma nu. ²¹ Uchigtin aidauwah, uchijum kajentiká yujaigpajum, junik anentaimá pujuinum.

²² Inak aidauwah, atumin apujum ju nugkanmaya aina duka ashí umigkatajum, wajas diigmakui shiig awajkata tabaunum takatsuk, dekas shiig anentaiyai Apu Jesús ajantusa diyamunum. ²³ Ashí takaajum duka shiig wakesajum dutikatajum, aentsdau takamaina nunitsuk, Apu Jesús takagku wajukmaina nunisjumek. ²⁴ Atumek dekagme Apu Jesús atum jukitnun amastina duka, wagki atumek Apu Cristo takagjume. ²⁵ Tujash

pegkegchaun takaa duka, ni pegkegchau takasa dutiksaik akiam atatu, wagki aents akanjá diyamuk atsau asantai.

4

¹ Inamin aidauwah, atumi inakem shiig awagmakjum, inamin pegkeg atajum, atumek dekagme nayaimpinum makichik Apu ajutjama duka.

² Apajuí mijattsuk aukjum aneaku batsamsajum, see tusagmeké atajum, ³ nuniakjum jutii pachijattsagmesh Apajuí aukagtustajum, Apu Jesusa chichame agkan etsegtumainnumash yaimpakti, dutijamantai dekantikawagmi Cristo pachisa yaunchuk dekaachbau yamai etsejuinag nu, nunú etsegbaunum achinkan pujajai, ⁴ nuna wajuk tumainaitja dutiksasuk titajai tau asan tajime.

⁵ Yacha pujumaina imagnisa pujakjum Apajuí nemagchau aidauw iwaintuktajum, tsawan wainka megkaetsuk. ⁶ Atum augmabauk tuke pegkeg, wakejusa antumain atí, nuigtushkam dekau amainaitjume makí makichkish wajuk aimainaita dushakam.

Inagnaku kumpamkagtamú

⁷ Tiquico iina yachi aneetaiya nu, shiig imagnis pujus yaimin, jutiijai atuegas Apu Jesusan takagna nu, mina pachittsag ujakpaktajume. ⁸ Duwi niina atumiin awemajai, jutii wajuk pujuinaji nuna ujakainak, anentaime-nash ichichtamjatnume tusan awetajime, ⁹ niijai minawai Onésimo, jutii yachi aneetai shiig imagnis pujuwa nu, dita ujakpaktatui ashí jui wajuk awa nunak.

¹⁰ Aristarco, wijai achikam puja dushakam kumpamjamainawai, nunisag Bernabé iká yachi Marcosa dushakam kumpamjamainawai. Wi niina pachisan dutik jukitajum tibaijim dutiksagmek atumiin minakuish jukitajum. ¹¹ Nuigtú Jesús Justo tutaiya dushakam kumpamjamainawai, jujú judío aina juke Apajuí inantai pachisa etsegbaunmag yaintuinawai, ditak mina anentaime-nash shiig senchi ichichtujagmayi. ¹² Dutiksag Epafras kumpamjamainawai, Cristo Jesusa inakega nu, niig atum aina annuke, nuniak Apajuin senchi aujtugmainawai, imagnis ebetmamag pujuinak, ashí Apajuí wakegamua nunak takagsatnume tujamaidau asag. ¹³ Atumin puyatjutpaina nunak wi wainjai, nuniak Laodicea pujuidaun antsag Hierápolis pujuina nunash uyumawai. ¹⁴ Lucas, ampijatin jutii aneetaiya nunú, Demasjai kumpamjamainawai.

¹⁵ Yatsug Laodicea batsata nunú kumpamjutuatajum, dutiksagmek Ninfas nuigtú iglesia niina jeen ijunaina dushakam kumpamjutuatajum. ¹⁶ Jujú papí ausagmek, iglesia Laodicea awematajum, ditashkam ausatnume. Tuja laodiceanmaya awetimu atumin awetugmainakuish aikasjumek ausatajum. ¹⁷ Arquipo ujaktajum: Takat Apu Jesusdaun jukiwu nuna puyatjus umiktí, tawai tusajum.

¹⁸ Ju kumpamdaiyamunak, wi Pablon mina uwejuí agatjime. Wi achinkan pujag ju anenjatajum. Apajuí wait anenkagtamujiya nu atum-nash ajutjamtinme.

Aatus atí.

Pablo nagkamchaku carta agaja tesalonicanmaya aidau awetimu

Kumpamkagtau

¹ Witjai Pablo, nuigtú Silvano, Timoteo aaja atum iglesiatijum Tesalónica batsamin aidautigmin kumpamjime. Iina Apají Apajuiya nu Apu Jesucristujai wait anenjamag shiig agkan pujutan amastinme.

Tesalonicanmaya aidau pegkegnun iwainmamkagbau

² Ashí atum pachisa Apajuí aujkuik tuke see tusaikí ainaji, ³ nuniaku tuke pachisaikí ainaji iina Apají Apajuiya nuna emtin, atum dekaskeapi tabauwai takaakjum, anenkai takaajum nu, nuigtú mijamtsuk iina Apuji Jesucristo dakaidau asagmin. ⁴ Yatsug Apajuí anetai aidauwah, ni atumnash etegtamjauwa duka dekainaji. ⁵ Jutii yamajam chicham atumiin etsegekabiag duka, ayatak chichamaikik etsegekachbaiji, nunitsuk Apajuí senchijish iwaintukmaijime Wakaní Pegkeji jutiiñi takaa nujai shiig paan dekamtikaku. Atumek shiig dekagme, atumiin pujubiag duik, atumiin pegkeg amaina duke egabiag nunú.

⁶ Atumek jutiiñua nu, nuigtú Apu Jesudauwa nujai dakumjume, nuniau asajum senchi waitiakjumes shiig anejasum chicham etsegebaush antuku ainagme Wakaní Pegkeji dakujutan amaidau asamtai, ⁷ nu nuniakjum ashí macedonianmaya, nuigtú acayanmaya dekaskeapi tiaju aina dusha iwaintukugme. ⁸ Apu Jesusa chichamega duka atumiin nagkamna dapampaekae, nunak imá Macedonia, Acaya aina nuigkik nunikchae, ashí tikich nugkanmash pampagké, nuigtush dekainawai atum Apajuiyai dekaskeapi tajum nunashkam, nunin asamtai jutii anui chichagkagtumainaitag duka makichkish atumnatsui. ⁹ Wagki ditak etsejuinawai atum wajuk jutii jukagtukiwaitijume nuna pachisag, nuigtú Apajuí iwaaku dekaskea nu umigkatasajum apajuimtai idaisaujum nunashkam, ¹⁰ nunikjum Apajuí niina Uchijin Jesusan jakaunmayan inankiuwa nu nayaimpinmaya minitna nu dakasta tuidau asajum, Apajuí suimkaji ishamain atina nui agkanmitkagmatna nunú.

2

Pablo Tesalónica takasbau

¹ Yatsug aidauh, atumek dekagme, jutii atumiin ijasmayag duka wainkag nagkankachmayi. ² Nuigtushkam dekagme Filiposnum pegkegchau chichagkamu nuigtushkam waitkasbau aajakuitag duka, tujash kuashat utugchat ajutjamtaish, Apajuí ichichtamjabi yamajam chichaman etsekat-nume tujamu asa. ³ Wagki jutii chichagkagtukmayag duka dewakaikish, pegkegchau anentaiyaikish, makichik aents tsanugtasaikish tichabaiji. ⁴ Apajuí jutii anentainash ashí diigtamas, yamajam chichaman Cristo pachis etsegtukti tusa sujamsauwa nu etsejuinaji; duka aents shiig awajkata tabaunum nunitsuk, Apajuí iina anentainash shiig dekagtama nu shiig awajkata tabaunum nuninaji. ⁵ Jutii makichkish shiig anenjustinme tabaunum chichachuitag duka atumek dekagme, nuigtush kuichik jujuk-tasaikish chichachuitji. Junak Apajuishkam shiig dekawai. ⁶ Makichkish

eme anenjitnume tusaik egachuitji; atumdaukesh, nuniachkush tikich aidaukesh. ⁷ Cristo apostolji asaja yaijatkatajum tusa atum segamainaitku, nuwa uchiji aidaun shiig anentus kuitamama numamtuk, atumnak shiig anentsan kuitamkabaijime. ⁸ Imatika aneedau asaja, ayatak yamajam chicham Apajuinua duke ujektasaik wakegatsji, atumiin bakumatasaissh wakegainaji wagki jutii aneetai wajasú asagmin.

⁹ Yatsug aidauh, atumek aneakjume, atum aidautijum makichkish waitkat dakitau asaja wajuk takayaji, tsawai kashishkam takai takainakua pimpikajaissh yamajam chicham Apajuinua nu etsejiag duka.

¹⁰ Atum ainagme jutiiinu dekau aidautigmek, nunisag Apajuishkam dekagtamji, atum Apajuí nemagkau aidautigmijai pujubiag duik pegkegchau aidauk takaachu asaja, makichkish nuninaí tumainjish atsugbau pujusbaiji. ¹¹ Jushakam dekagme, uchigtin uchijin utuja numamtuk chichagkun, makí makichkitigmin anentaimnash ichichtuyajime, ¹² dutikakun, Apajuí niina inamtaiji imana nui pujustinme tusa untsukbau aidauush wajuk pujumainaita nunisjume k pujustajum tuyajime.

¹³ Nuadui jutiishkam Apajuik mijattsuk see taji, atum ii chichagkagtamau aentsdauchuapi Apajuí chichamempapi tusajum shiig antuku asagmin. Duka dekas Apajuí chichamegai. Nu chicham atumesh dekaskeapi tau asagmin pujutumnash kuashat yapagtugmawajui. ¹⁴ Yatsug aidauh, atumek iglesia Apajuinu Cristo Jesusdau aidau Judea batsata nu dakumjume, atumi nügkeminia g pempeentugmakiag waitkagmasaju aina dui, judío aidau nunú iglesia aidaun waitkasaju aina dutiksag. ¹⁵ Nunú judío aina duke Apu Jesusnash maawajui, nuigtú profeta aidaunash, nuniak jutiinak jii kí ajapjamawajui, nuniau asag Apajuinak shiig awagmainatsui, nunisag ashí aents aidaunash shiwagmainawai; ¹⁶ judiochu aidau uwemjatnume tusa chicham ujakta tajinish utugtmainawai, nunidau asag nuní nagkaemas tudaunak ikauntumainawai, nunidau asagmatai Apajuí shiig senchi suwimkan susatnai.

Pablo ataktú Tesalónica ijagsatasa wakekamu

¹⁷ Yatsug aidauh, ujumak tsawantai atumjai kanakuitag duik, atum wainchakuish tuke iina anentainig aneaku amaiji, nuniaku atum wainkata-saissh wakeyajai. ¹⁸ Nuniau asan wi Pablon atumin ijagsatasan kuashtá wakekabaijai, tujash Satanás utugtamtamtaí minichbaiji. ¹⁹ ¿Tuwaita jutii dakamush, jutii shiig aneamu, jutii Apuji Jesús wakettsag taatta dui ememamu atinush? Nunú atum achagtaik, tikichik amainchau ainawai. ²⁰ Atumetjume jutii eme anenmamtai, nuigtú iina dakujutai ainajum duka.

3

¹ Nuadui, katsunmainchau dekapeau asaja, Atenas juakmi timaiji, ² nuniaku iina yachi Timoteon awemabaijai, Apajuí takaju asa yamajam chicham Cristo pachisa etsegbaunum yaimpauwa nuna, atum dekaskeapi tajum nuig ebetmamjatajum tusa ichichtamjatnume tusan, ³ makichkikesh nunú waitiamu aina nujai pachimdaekainum tusan. Tujash atumek dekagme nunú waji aina nuig waitmainaitag duka. ⁴ Nuigtushkam atumjai pujuyag dui emtikan ujayajime, jutiik waittsatin ainaji tusan, duka nunisag nagkaetamjume yamai wainjum nunú. ⁵ Nuadui katsunmainchau dekapeau asan, awemabaijai atum dekaskeapi tajum nuna dekaati tusan, pegkegchaunum dekapkagtina nu pegkegchaun takamtikisachajeash tusan, nunikmatai ii takasbauwa nu wainak juakai tabaunum.

⁶ Tujash Timoteo atuminia wakitki jutiini taa, yamajam chicham pegkeg aidaun atum dekaskeapi tajum nuna, nuigtú anentak ajutjamjum nunashkam; jutii shiig anenkagtusjum waijatkatasajum tuke pachijatjum nunash ujakakgmayi, jutii atum wainkatasa wakegag nunisjumek atumesh wakegajum nuna. ⁷ Nuadui yatsug aidauh, ashí atsumamu nuigtú kuashat waitiimu ajutjamaina duka, atum dekaskeapi tabauk nunisjumek pujamu antuka ichichmamjabiaji. ⁸ Atum Apu Jesusaig ebetmamjajum pujamu dekaawaja shiig yantsaptugmaiji. ⁹ Dusha, ¿wajuk Apajuish see tumainaita atum pachisaish, niina eemtin ashí shiig aneamu egketkagtajum dusha? ¹⁰ nuniau asaja tsawai kashijai Apajuí shiig senchi sejai, atumin ataktú igkugkan wainkatasan, nunikan atum dekaskeapi tayatkujum ashí nuniachbau ajutjamkujaish yaigtasan.

¹¹ Wakegainaji Apajuí iina Apají, Apu Jesusajai jutii atumiin minimaina nunash umigtamkati tusaja. ¹² Apu Jesús sujamsatnume aan nagkaemasjum ashí tikich aidaujaish pempeentuniki aneenita nuna, jutii atum anejim aikasag, ¹³ atumi anentaiminish ebetmamjau, makichkish nuninai tumainchau pegkejam iina Apají Apajuiya nuna emtinish atajum, Apu Jesús niina aentsji pegkejam aidaujai minitna duish. Aatus atí.

4

Pujut Apajuin shiig awagma nu

¹ Nuadui yatsug aidauh, Apu Jesusa daajin puyatjusan segajime, Apajuin shiig awagma nunisjumek pujakjum kashí kashinig emtajum jutiinu unuimagbajum nunisjumek.

² Wagki atumek dekgame Apu Jesús dutikata tibaun jintintuabijim nu. ³ Atumnak Apajuik imá midau pegkeg aina nunak takainak, tsanijintsuk pujustinme tusa wakejutpagme. ⁴ Nuigtush makí makichik nuwentin aidauk niina nuwenak eme anentus diyak, pegkegchau takagtsuk pujumainai, ⁵ nuninak aents Apajuí dekachu aidau senchi iyashí wakegamun takau aina nunitsuk, ⁶ makichkish yachinak pegkegchau awajkaigka tsanutnash tsanujaigka; wagki Apu Jesusak ashí nunin aidaunak suwimkan suawai, nunak duikish timaijime. ⁷ Apajuik iinak pegkegchaun takaa pujutnume tujamchauwai, pegkee pujustinme tusa untugmakui. ⁸ Nunin asantai, ju jintinkagtamun dakitauk aentsnakesh dakitak nuniatsui, Apajuí Wakaní Pegkejin sujamsauwa nuna dakitak nuniawai.

⁹ Tujash yatsutjai pempeentuniki aneenita nunak agatjashtatjime; wagki pempeentuniki aneenitnak Apajuí jintinjamawaju asagmatai. ¹⁰ Duka nunisjumek dutikagme, ashí yatsut Macedonia batsata nujaishkam. Tujash yatsug aidauh, segajime aneeniajum aan nagkaemasjum aneenitajum tusan; ¹¹ nuniakjum kakanmamsatajum shiig agkan pujustasajum, nuigtush atum dutikmain aina duke uyumakjum, atumi uwegmin takastajum jutii nuniktajum timaijim dutiksagmek, ¹² aatsa pujau asagmin Apajuí nemagchau aina dusha ajaantus diigmastinme, tikichdau niimjú pujachu asagmin.

Apu Jesús taatnuji

¹³ Yatsug aidauh, jakau aina dusha wajukatna ainawa nunú dekatsuk juwakaijum tusa dakitaji, tikich aidau dakamuji atugbau asag wake

besemag batsataina nunikajjum tusan. ¹⁴ Wagki Jesusak jakauwap nantakuwaita tusa dekaskeapi tuinag nunisag, Apajuishkam Jesusai dekaskeapi tuidau jinawajua nunash inanjatnai.

¹⁵ Nuadui Apu Jesús tiuwa dutiksaik taji, jutii iwaaku batsatutik Apu Jesús minitta nuaduik, jakau aidau ukuakuik emjashtin ainaji. ¹⁶ Apu Jesús nayaimpinmaya minak senchi unsumak akaikitnai, ángel aidau apujishkam arcángel unsumkatnai, Apajuí trompetajinash senchi umpuagtinai, nunitai Cristui dekaskeapi tuidau jinau aidauwá nantajagtinai. ¹⁷ Nuniku ai, iwaaku juwaku aidautik ditajai ijumja juwam agtinaitji yujagminum Apu Jesusjai agkajunum igkuniktasa, nunikaja Apu Jesusjai tuke pujutnaitji. ¹⁸ Nuadui jujú chichama jujai tikich aidaujaish anentai ichichtunigtajum.

5

¹ Yatsug aidauh, tsawan aidaun pachis nuigtú wajutik nuniktinaita nuna agatjuti tusagmek atsumatsjume. ² Atumek shiig dekagme, tsawan Apu Jesús wakitki minamuk, kasa kashi miniyama numamtuk atinai. ³ Wajutiya aents aidau: Yamaik shiig agkan, nuigtush kajintsá batsatainaji, tiagtún ainawa, nuniai atinai dita waittsatnuji minittina duka, nuwa ejamtin uchigmatji jegamtai najaima numamtuk, nunak uwemtugchagtin ainawai.

⁴ Tujash atumek yatsug aidauh, suwenmag batsatsugme, nunin asagmin, nunú tsawan Apu Jesús minamu atina duik, kasan pachiachbau achiká juwajama numamtuk awagmak amaitsugme, ⁵ wagki ashí atumek Jesucristo aentsji asajum pegkeg takaakjum tsaaptinnum pujumaina numamtuk wajagme, jutii Jesucristo dekaskeapi tuidautik iwanchdau aidau pegkegchau takainak suwenum wajukmaina numamtuk wajaina nuninuk ainatsji. ⁶ Nuadui Apajuí nemagchau aidau kashi kajiaku wajukmaina numamtuk wajaina nunitsuk shiig umintsá aneaku batsamsagmi, ⁷ wagki kanuina duka dekainatsui waji nagkaemaktatua nunak, nampena dushakam kashi wajukmaina numamtuk wajainawai; ⁸ tujash jutiik tsawai batsamaina numamtuk batsatu asaja aneaku batsamsagmi; sntag detsepen coraza ejabau aina numamtuk dekaskeapi tabaujai nuigtú anenkajai ejamakagmi nuninaku uwemat jukimu dakainag nujai casco atsejumaina numamtuk wajakagmi. ⁹ Wagki Apajuik iinak suwimkan jukitin atinme tujamchauwai, ayatak Apu Jesucristui uwemtan jukitnume tujabaijai, ¹⁰ ni jutiini jakauwai, iwaaku batsatkush, jakau akushkam wijai ijutkau pujustinme tujamu asa. ¹¹ Nuadui pempeentunisjumeke wakegat egketdayakjum nuigtú yainiktajum, atum takaajum dutiksagmek.

Pablo Cristo nemajin aidau chichagbau

¹² Yatsug aidauh, segajime, atumin takainak Apu Jesús nemagtanum jintinjumaina duka ajantusjum diitajum. ¹³ Dutikakjum eme anentsajum aneetajum, dita takatan dutikaina dui. Pempeentunisjumeke shiig agkan batsamsatajum.

¹⁴ Nuigtushkam yatsug aidauh segajime, daki aidau chichagkatajum, junik dekapedaush wakemitkaktajum, kakaakchau aidauhshkam yaigtajum, nuniakjum ebetmamjajum ashí tikich aidaujaish pujustajum.

¹⁵ Diyaku atajum makichikesh tikichjai pegkegchaunum iikdaikainum; duka nunitsuk, pegkeja duke tuke dutikatasajum kakanmamsatajum atum ainajum nujajish nuigtú ashí tikich aidaujaishkam.

¹⁶ Tuke shiig aneetajum. ¹⁷ Nuniakjum mijamtsuk Apajuish tuke ausagmeké atajum. ¹⁸ Ashí pachisjum Apajuí see titajum, wagki nuuwai ni wakegamuk, atum Cristo Jesusai dekaskeapi tuidautijum nunimainaitjum nu.

¹⁹ Wakaní Pegkeji wakega duka umigtsukek idaisaigpajum. ²⁰ Apajuí tabaun etsegtuina dusha wainkaya nuninuk diisaigpajum, ²¹ ashí shiig kuitamsa antukjum, pegkeja duke ebetjatajum. ²² Ashí pegkegchau aina duka idaisatajum.

²³ Apajuiya duke, shiig agkan pujutan sukagtina nu atumnash pegkeemtijamiagti, ashí atumi wakanmin, anentaibaugmin nuigtú iyashminashkam, Apu Jesucristo taatta duish bakumamainchau atinme tusa.

²⁴ Apajuí dekas betek umina nunú atumnak etegtamjauwai, dutijabau asa nigki nunak umiktatui.

Inagnaku kumpamkagtamú

²⁵ Yatsug aidauh, jutii pachijattsajum Apajuí aujagtustajum.

²⁶ Ashí yatsug aidau shiig aneasjum kumpamatajum.

²⁷ Apu Jesusa daajin tajime, jujú papiik ashí yatsug pegkejam aidau aujtustajum.

²⁸ Iina Apuji Jesucristo wait anenkagtamua nu atumnash ajutjamtinme. Aatus atí.

Pablo awentsaik carta agaja tesalonicanmaya aidau awetimu

Kumpamkagtamu

¹ Witjai Pablo, nuigtú Silvano, Timoteo aajan atum iglesiatijum Tesalónica batsamin aidautijum iina Apají Apajuiya nujai, nuigtú Apu Jesucristujai ijutkau aidautigmin kumpamjime. ² Iina Apají Apajuiya nu, Apu Jesucristujai wait anenjamag shiig agkan pujutan amastinme.

Pablo Tesalonicanmaya aidau Apajuí aujtusbau

³ Yatsug aidauh, jutiik atum pachisa Apajuí tuke see tusaikí ainaji, nuuwai dutikmaina duka, wagki atumek aan nagkaemasjum dekaskeapi tuinakjum, pempeentunisjumek aan nagkaemasjum aneenidau asagmin. ⁴ Nuadui atum pachisa tikich iglesia Apajuinu aina nuish eme anentsá chichainaji, atum dekaskeapi tabaugmin aintamainakuish nuigtú waitiakjumesh emamkesjum katsunjajum nagkaejum dui. ⁵ Nunú iwainawai dekaskenum Apajuí pegkejan takauwa nuna, nunin asa yamai waitiajum dui Apajuí niina inamtaijin awaintamawagtinai.

⁶ Apajuik pegkeja nunak takauwai, nunin asa yamai atumin waitkagmaina nunak suwimkan susatnai, ⁷ tuja atum waitiajum nunak, jutiijai betek ayamtan sujamsatnai. Nunak Apu Jesús nayaimpinmaya niina angelji senchigtin aina nujai, jii kegamunum egketkau minitna dui dutikatnai, ⁸ nuniak suwimkan susatnai Apajuinu dekatan dakitjau aidau, nuigtú yamajam chicham Apu Jesús pachisa etsegbaun antugkachaju aina nunashkam. ⁹ Nunú aidauk waittsagtinai tuke megkaetainum weenak, nuniau asag Apu Jesusjaig tuke kanaak kanakagtinai, nuadui niina imanjinak nuigtú niina senchijinash wainkachagtinai, ¹⁰ ni minitna nunú tsawantinig, niina aentsji pegkejam aidau emematuinam nuigtú ashí dekaskeapi tuidau puyattsá diyam atina nuna. Tuja atumek jutii etsegbau dekaskeapi tiu ainagme.

¹¹ Nuadui atum pachisa tuke Apajuí aujuinaji, atumin untsugmakajua nunisjumek pujamunum yaimpaktinme tusa nuigtú nigki niina senchijinash amastí dekaskeapi tabauwai ashí pegkeg aidau takamaina nuishkam tusaja. ¹² Atum aaja nuniamunum Apu Jesusa daajig eme anentam atatuí, nuadui niishkam atumin eme anenjamsattawai, iina Apajuiji nuigtú apu Jesucristo wait anenjama nunisag.

2

Jesucristo taatnuji

¹ Yatsug aidauh, iina Apuji Jesucristo ataktú wakitki taatnai, nunikmatai jutiik niijai ijunjatnaitji. Nuniktin asamtai segajime, ² kakajus anentain yapajinmainchau atinme tusan, nuigtush makichkish uwakeam aigpajum, “Apu Jesús taatnuk tsawantak jegae” wakan tutjutne, chicham antukji, cartan jutii agagbauwa dutika tujamainakuish. ³ Makichkish tsanuamak aigpajum; wagki eke nunú tsawan jegatsaig Apajuí shiwagmamú atinai, nuniamunum aents tudau takamtikagtin wantinkatnai, megkaekatna nu, ⁴ nunú aentsua duka ashí Apajuin adaiyina nuna shiwajiyai, nuniachkush

ememattai atatus waketinai, nuniau asa jega Apajuí ememattainum wayá ekeemas: “Witjai Apajuinuk”, titinai.

⁵ ¿Aneaksugmek wi atumjai pujusan juna pachisan tibaijim duka? ⁶ Tuja yamaik atumek dekagme, nunú eke tsawan jegatsaig wantinkai tusa emetea duka. ⁷ Wagki ni pegkegchau dutikatnuji dekamainchauwa nunak yamaikish takaawai, nuninaitak nuna yamai emetea nu agkaasti tabaunum awai. ⁸ Nunikmatai aents pegkegchau takauwa nu wantinkatnai, nunittaman Apu Jesús niina wenin wakan jiina nujai maatnai, dutikak ni minamu tsaptin atina nujai tsaitkinai; ⁹ nunú aents pegkegchau takau wantinkatna duka, Satanasan takagsatatus minitnai, niina senchijiji wainchatai aidaun iwainak, nuigtú tsanumak aents dutikmainchau aidaunash dutiktinai. ¹⁰ Nuniak ashí pegkegchau aina nujai tsanutnai megkaejatin aina nunak, wagki ditak anentak dekaskea nu etsegbaun antukag dekaskeapi tuinak uwemaina nuna dakitjaju asgmatai, ¹¹ Nuadui Apajuik nunú tsanumak senchijin iwaina nuna dekaskeapi titinme tusa idaiwai; ¹² nunak ashí aents aidaun, ni chichame dekaskea nuna dekaskeapi tutan dakituinak, pegkegchaunak wakejus takasú aidaun, suwimkan susata tau asa dutikatnai.

Uwemjatnume tusa etegjamu aidaun

¹³ Yatsug Apu Jesusa aneetai aidauwah jutiik atum pachisa tuke Apajuí see tuinaji, wagki yaunchuk nagkamas Apajuí atumnak etegtamjajui, Wakani Pegkeji yayasam chicham dekaskea nuna dekaskeapi tiagtai pegkemtikijam uwemjatin atinme tusa. ¹⁴ Nuadui Apajuí atumnak untusgumakajui jutii yamajam chicham etsekgauwaitag dui, iina Apuji Jesucristo imanjiya nui ditash pachinkatnume tujamu asa.

¹⁵ Nuadui yatsug aidaun, ebetmamjatajum jutii jintiamu unuimajuitjum nuanuig, chichamai tiuwaitjim nu nuigtú cartayai timaijim dushakam. ¹⁶ Iina Apuji Jesucristo, nuigtú iina Apaji Apajuia nujai anempajua nu, wait anenjamag ichichmamat tuke atinun, nuigtú pegkeg dakamu ajut-jamaina nunashkam sujamsajua duke, ¹⁷ anentaim aidaunash ichichtug-magtinme, ashí chichainakush takainakush pegkeg aina nunak takastinme tujamu asa.

3

Apajuí aujkgagtustajum tusa segabau

¹ Inagnamun yatsug aidaun tajime, jutii pachijattsajum Apajuí aujkgagtustajum, Apu Jesusa chichamega nu wamak ashí yantannum dapampaejati, nuigtú shiig wakesa antamu atí atumiin wajukabia nunisag.

² Dutiksagmek Apajuí aujkgagtustajum aents pegkegchau, nuigtú yajau aina nuish agkanmitkagmati, wagki ashí dekaskeapi tuinamu atsujuidau asgmatai. ³ Tujash Apu Jesusak betek uminai, ibau asa nigki ichichtamag, pegkegchaunmash kuitamjamkatnume. ⁴ Apu Jesusaig kajintsá anentaimji atum dutikajum nui, nuigtú ii dutikatajum tibaijim nunash dutiksagkeap takasagtatua tusa. ⁵ Apu Jesús yaimpaktinme Apajuí anejata nunisaik anejattanum, nuigtú Cristo waitiakush katsunjauwa nunisag katsunjatnume tabaunmashkam.

Ashí takamain ainaji

⁶ Yatsug aidaun, iina Apuji Jesucristo daajin tajime, ashí yatsut aidaun takatsuk wainak batsataidaun tupanjatajum, jutii jintintuabaijim nunisag

pujuinatsu nunú aidau. ⁷ Wagki atumek dekagme jutii wajukmaiji nunisjumek pujumainaitjum duka, jutiik atumjai pujubiag duik wainkaik takaskek pujuchbaiji, ⁸ makichik aentskesh akitskek yujuachbaiji. Duka nunitsuk tsawai kashijai ayamtsuk shiig senchi takabiaji atum ainajum anuiya makichkish waitkat dakitau asaja, ⁹ jutiik atum yayam amainchau asa nunishmaiji, ayatak jutii takaamun wainainak ditashkam nunisag takastinme tusa nunibiaji. ¹⁰ Wagki wi atumjai pujubiag duik juna tibaijime: Ni takatan dakitauk yutanash yuwashti, tusan. ¹¹ Tujash antukmaji atum ainajum anuiya ujumak, takatsuk wainak yujasag tikichin waitká yujaidau tabaun. ¹² Nunú aents nunin aidaunak Apu Jesucristo daajin tajai, emetnag batsamas dita yuwatnujin takastinme tusan.

¹³ Tujash atumek yatsug aidauh, pegkeg takata duka yawetjaigpa. ¹⁴ Makichik aentskesh wi cartanum tajim juna umiachuk mamikiatajum, dutikagmek niijaig ijunjaigpa, datsaagti. ¹⁵ Tujash shiwagmá pujusaigpajum, ayatak yatsum anentsam chichagkata.

Inagnaku akatmabau

¹⁶ Apu Jesús shiig agkan pujutan sukagtina duke, tuke shiig agkan pujutan atumnash amastinme ashí tsawan wajuku agtatua nuwishkam. Apu Jesús ashí atumjaish atí.

¹⁷ Witjai Pabloitjai jujú kumpamkagtamunak mina uwejui agatjime, ashí cartan awemaknuk tuke jutikan agajai.

¹⁸ Iina Apuji Jesucristo ashí atumnash wait anenjamjatnume.

Pablo nagkamchaku carta agaja Timoteo awetimu

Kumpamkagtau

¹ Witjai Pablotjai, Cristo Jesusan apostoljiyaitjai, Apajui iina Uwenti-jamna nu nuigtú Cristo Jesús jutii dakainag nujai chichaman etsegkati tusa awetiuwai, ² Timoteoh, dekaskeapi tabaunmag dekas mina uchig asamin kumpamjame; Apajui iina Apajiya nu, nuigtú Cristo Jesús iina Apuji anentag, wait anenjama, nuigtú agkan pujatan amastí.

Waitá jintinkagtin aina nujai kuitamankatajum tibau

³ Wi Macedonia weakun, amek Éfeso juwakam, makichkikesh yapajia jintinkagtuawagpa titá tibiajame, ⁴ wainka augmatbau aidaun, nuigtú ditá muunji aajakú ejechamnun augmatiagtai antujú yujainum. Nunú wái aina duka jiyanita itawai, Apajui takatji dekaskeapi tabauwai emtikmaina nuna.

⁵ Wi ju nuniktajum taja nunak, anenkak anentai pegkegnun najaneati, anentaimtashkam pegkeg, nuigtú dekaskenum dekaskeapi tabauwa dushakam, tusan tajai. ⁶ Tujash ujumak aents nuna idaiyinak, kanakag wainak chichá yujainawai. ⁷ Chicham umiktina nuna jintinkagtin atagtus wakegainawai; tujash dekaskenmag dekainatsui dita chichaina nunakesh, nuigtush antuinachiataka duka nuninai tuinawai.

⁸ Chicham umiktin pegkeja duka dekainaji, tawa dutiksaik umiakui, ⁹ juka dekainaji, chicham umiktina duka pegkejan takaina nudauchi, duka chichaman umichu, yajau, tudau aidau, eme anenkagtuchu, nugkanmayanak anentaimtin, apaji main, dukují main, magkagtin, ¹⁰ tsanijimtan wekaetin, mai aishmagkuk dutikdayin, aentsun kasamak sujín aidaun, wait aidau, dekas umiktatjai tusa tsanumin aidau, dekaskea nu jintiamun dakitin aina nudauwai, ¹¹ junak yamajam chicham imana nu jintinkagtawai, Apajui shiig anenkagtin mina kajitjus idaitugsamua nu.

Pablo takasbau

¹² See tajai mina senchimtijuau Cristo Jesús iina Apujiya nuna, wagki mina betek umimainjun diigtus niina takatjin apujtusui, ¹³ wi yaunchuk pegkegchau chichajujakú, niina nemajuidaunash ain kun waitkajakú aigkish. Tujash Apajui minak wait anenjujui, wagki wika eke dekaskeapi tujakchauwaitjai, nuigtush dekachu asan nunikuitjai. ¹⁴ Tujash iina Apuji anentag wait anenkagta nu minaig imá kuashat ajuttsauwai dekaskeapi tabauwa nujai, nuigtú Cristo Jesusai anentak awa nujai.

¹⁵ Juka chichamak dekaske, ashí dekaskeapi tumain ainawai: Cristo Jesusak ju nugka juig tauwai tudau aidaun uwentikatatus, nunú aina nuyag witjai dekatkauk. ¹⁶ Tujash wi iman aigkish Apajui minak wait anenjujui, Jesucristo minai dekatkauk ashí wait anenkagtutaijiya nuna iwainakta tau asa, nuna wainainak tikichish niina dekaskeapi tuinak pujut nagkanchaun jukitnume tusa. ¹⁷ Nuadui Rey tuke puju, jachau, wainchatai, Apajui makichkiuchia duke eme anentsá ajumaiya duish tuke ememattai atí. Aatus atí.

Pablo Timoteo chichagbau

¹⁸ Uchuchi Timoteoh, jujú chicham umikta tajame: Amina pachipas yaunchuk tujabiu aina nunismek shiig maanikta tajame, ¹⁹ nuniakum ame dekaskeapi tame dutiksamek shiig anentaimsam pujustá, nuna nuninachu asag ujumak dekaskeapi tabaun megkaekaje. ²⁰ Nunak Himeneo, Alejandrojai nunikaje. Nunikmatai ditanak Satanasan idaitusmajai, pegkegchau chichashtan unuimagtinme tusan.

2

Apajuí aujut pachisa tibau

¹ Dekatkauk ju aidau dutikatajum tajime, segatajum, Apajuishkam ausatajum, mijattsuk segakjum, ashí aents aina nu pachisjum Apajuí see titajum, ² nuniakjum rey aidau nuigtú ashí apu aidau pachisjumesh Apajuí aultustajum, shiig agkan, tutitag atsamunum ashí Apajuí puyatjusa umijuinaku imagnisa batsamsagmi tusajum. ³ Wagki juuwai pegkeja duka, nuigtú ina Apajuíji Uwemtikagtina nunash shiig awagma duka, ⁴ nunin asa nigka ashí aents uwemjatnume, nunikag dekaatnume dekaskea nuna tusa wakegawai. ⁵ Wagki makichik Apajuik awai, nunisag Apajuíjai chichaman epegtugbaush makichki, duka Cristo Jesusai aentsmagauwa nunú, ⁶ nunin asa nigki tsagakamankauwai ashí aentsun agkanmitkata tau asa; nunak, nuniktinji tsawan jegamtaí Apajuí iwaintugmakui. ⁷ Nuadui chichagkagtin nuigtú apóstol emamuitjai, (nunak Cristo daajin waitjutsuk tajai) Apajuí minak judiochu aina nuna maestroji etiuwai dekaskenum dekaskeapi tuta nuna jintintuati tusa.

Aishmag aidau nuwa aidau pujutji

⁸ Nuadui, ashí yantannum aishmag aidauk pegkejam anentaiyai, kajegdaitasuk nuigtush jiyanisuk, uwejin nayaimpinum takuidiag Apajuí aujsatnume tusan wakegajai. ⁹ Nunisag nuwa aidaushkam, jaanchjish ajantsá diyam amainun nugkugtinme, datsan amainchaun nuigtú pegkeg iwagmamja iwainmamkata tachamui, wakejumainun temashmatsuk, oro, kaya perla nuigtú jaanch akik aina ibaujai iwagmamtsuk, ¹⁰ ayatak pegkeg aina nunak takainak, iwainmamkatnume nuwa Apajuí puyatjus umignush wajukuita nuna. ¹¹ Nuwak takamtak unuimagti, ashí nu aina nuig sumimak, ¹² nuwanak jintinkagtuati tatsujai, aishmagku wagagkig nunikta tumaitsui, takamtak atinme. ¹³ Apajuik dekatkauk Adagkan najana dui Evan najanauwai; ¹⁴ nuigtush Adagkak tsanuamak asachui, nuwa tsanuam asauwai, dutika tsanujam tudaun takasui. ¹⁵ Tujash nuwak uchi uchigmau asa, ebetmamag dekaskeapi tusa, anenka takaak, pegké pujak uwemjattawai.

3

Wajuku aidauwa obisposh amainaita

¹ Juka chichamak dekaske: Obispo atatus wakega duka, pegkeg takata nuna wakegak nuniawai. ² Tujash obispok amainai makichkish nuninai tuchatai, makichik nuwentin, ebetmamjau, shiig anentaimkau, eme anentsá diitai, jeenish shiig jukagtin, jintinkagtuatasash wakeyin, ³ nampeta wekaetuchu, wainak shinú wekaechau, kuichkinak anentaimtú wekaechau, shiig awajkagtin, kakagchauch amainai, ⁴ nuigtushkam jeenish shiig chichas pujú, uchijí aidaushkam chichama umin nuigtú

pujutish pegkeg amain ainawai, ⁵ wagki niina jeenigkish shiig chichasá pujutan dekachush, ¿utugsaya Apajuinu iglesia aina nunash kuita-mainaita? ⁶ Nunin asantai, nui takastinuk yamá sujumankauk amaitsui, ememakmá Iwanch suwimak jutanum jegantua niish nunikai tabaunum. ⁷ Dui atsumnawai Apajuí nemagchau aidaush pegkegnum chichagtai atí tusa, nuniachkug wainka chichagtai nuigtush Iwanch pegkegchaunum takamtiksai tabaunum.

Wajuku aidauwa Diaconosh amainaita

⁸ Nunisag diácono aidaushkam ajantusa diitai amain ainawai, waitjus chichachu, nampeta wekaetuchu, takat pegkegchau aina nujai kuichk-ijinatus wakegá wekaechau; ⁹ nuigtushkam dekaskenum dekaskeapi tabau dekanauwa nunash pegkeg anentaiyai dekamain ainawai. ¹⁰ Nunú aidauk dekatkauk dekapsamu amain ainawai, dutika makichkish nuninai tumainjish atsujuina nu diácono adaikam takamain ainawai. ¹¹ Nunisag diácono nuwe aidaushkam eme anentai amainai, chichaman tsanumá wekaechau, ebetmamjau, nuigtú ashí wají aidaunmash kajittsá diitai amainai. ¹² Diácono aidauk makichik nuwentin amainai, uchijí aidau-jaishkam shiig chichas pujú nuigtú niina jeenishkam. ¹³ Wagki diácono shiig takaina duka, eme anentsá diitai, nuigtú Cristo Jesusai dekaskeapi tabaun etseja dusha kajittsá antugtai amainai.

Wait anenkagtamú dekaachbau aajakua nu

¹⁴ Junak wamak taan wainkatasan wakegayatkun agatjame, ¹⁵ wi dukap megkaekuish, Apajuí tuke pujuwa nuna aentsji iglesia aina nuanuish wajuk pujumainaita nu dekata tajame. Dita ainawai dekaske nuna etsejuinak ayamjin aina duka. ¹⁶ Juka utujimsaish anentaimtumaitsui, shiig muun wait anenkagtamú dekaachbau aajakua duka:

Nigka aentsmaga wantinkauwai, Wakaní Pegkejishkam pegkegchauji atsujui tiuwai,
 ángel aidaushkam wainkamu,
 judiochu aidaunmash etsegkamu, nugkanmaya aidaush dekaskeapi tibau,
 nayaimpinum jukimu aajakui.

4

Wainka jintinkagtamú

¹ Tujash Wakaní Pegkeji paan tawai, tsawan nagkanbau atina duik ujumak aents aidauk dekaskeapi tabaunak idaisagtinai, wakan tsanujatin aina nuna nuigtú Iwanchdau jintiamu aidaun antujuinak, ² duka tsan-umin, wait aidau, datsaamsash anentaimchau aina nu jintiamu atinai, ³ nuninak nuwentash nuwenawaigpa tiagtinai, nuigtush yutai aidaun Apajuí najankauwa nunash, Apajuí nemajin dekaske nuna dekau aidauk see tusa yumaina nuna. ⁴ Wagki ashí Apajuí najankamua duka pegkejai, makichkish dakitmaitsui see tusa yuinakuik, ⁵ wagki Apajuí chichame nuigtú Apajuí aubauwa nu pegkemtikawai.

Jesucristo shiig takajin ata

⁶ Ju yatsug aidau jintinkumek, Cristo Jesusa inake pegkeg atatme, chicham aina nuiya dekaskeapi tabaush shiig dekau nuigtú pegkeg jintiamu unuimajuítam nunismek atatme.

⁷ Wainka augmattsamu aidau nuigtú jumamtin augmattsamu aina dusha dakitjata, nuniakum Apajuí puyatjusa umigtanum kakanmamjata, ⁸ wagki iyash pegkeg atí tusa takamtikamua duka machik yaijatui, untsu Apajuí puyatjusa umigku takaamua nuuwai ashí wajiinum yaijata duka, wagki anagkagtuamua duka yamai pujag juigkechui atak atina imanuiyai. ⁹ Juka chichamak shiig dekaske, nunin asantai ashí dekaskeapi tumain ainawai. ¹⁰ Nuadui takainaji nuigtush wainak chichagtainakuish kakanmainaji, Apajuí iwaaku ashí aents dekaskeapi tuidaun uwentikna nu dakaidau asaja.

¹¹ Jujú aidau umiktajum tita dutikakum jintintuata. ¹² Datsauch asam makichkish imanchauch diyam aipa, nunitsuk Apajuí nemajin aidau iwaintukta ame chichaamujum, ame wajak pujame nu, ame anejatbaujum, dekaskeapi tabaugmesh, nuigtush tudau antiakchau pujakum. ¹³ Wi eke taatsaig, uyumakta Apajuí chichame augbau, pegkegnum wakemitkagtuta nu nuigtú jintinkagtamu. ¹⁴ Ame don jukiuwaitam nu takamtiksata, juna takastatui tutai anciano aidau buukmin achigmakag Apajuin aujtugmasajua nunú.

¹⁵ Jujú wají aina nu uyumakta, nunú aina duka dutiksamek takastá, ame pegkeg takaam duka ashí wainkamu atí. ¹⁶ Amek kuitamamkata nuigtú jintiamua dushakam, duka dutiksamek dutikata, nu aaja dutikakum ameshkam uwemjattame nuigtú amina antugtamaina dushakam.

5

Tikich aidaujaj nunimaina nu

¹ Muun aidau chichagkumesh jiyakaipa, dutiktsuk apa anentsam wakegat egketuata, dutiksamek datsauch aidauash, yatsum utugmaina dutikata; ² nuwa muunchakam duku utugmainaitam dutikata, tuja muntsujut aidauash, ame umaim anentsam diistá pegkegchau anentaimtutsuk.

Nuwa waje pachisa tibau

³ Nuwa waje aidau dekaskenum ditá yaimainush atsujuina nu yaigtá. ⁴ Tujash nuwa waje uchijí ajuinamuk, nuniachkush tijajigkesh ajuinamuk, nunú uchi ditanak ashí atsumamujinash yaimainai, uchuch asantai ditan kuitamkamu asa. Nunuwai Apajuí emtinish pegkeja duka, nigka nuna dutikatnume tusa wakegawai. ⁵ Tujash nuwa dekaskenum waje nigki juwakua duka, Apajuinak dakawai nuniak mijattsuk tsawai kashishkam Apajuin aujak pujawai. ⁶ Tujash nuwa waje iyashí wakegamun takaa puja duka, iwaaku pujakush jakauwa numamtaina. ⁷ Jujú wají aina nu umiktajum tita, makichkish nuninai tumainchau atinme, ⁸ wagki makichik aentskesh niina patayin yayatsu duka, niina jeenianakesh dutikachuk, dekaskeapi tabaunak megkaewai, nuniau asa Apajuí nemagchauwa nuna nagkaesau pegkegchau weawai.

⁹ Nuwa waje agatbaunmag ayatak sesenta mijan ajamua nu agatjamu amainai, tujash makichik aishintin aajakajua nu, ¹⁰ pegkeg takaamuji aidauash waitujakbau, uchijí aidauash shiig tsakapaku aajakú, jeen minidaunash shiig anentus ju wajakú, Apajuí aentsji pegkejam aina nunash nawen nijatú wajakú, waituidaunash yaijakú nuigtush ashí pegkeg aidauak takajakua nu.

11 Tujash nuwa waje aidau agatbaunmag tsakat wajemeau aina duka agatjaipa, wagki ni wakegamujiya nunú Cristuig datupawai, dutikam nemaktatus wakegainawai, 12 nuniak bakumamainai, ni nagkam dekaskeapi tibauwa nuna megkaegu asa. 13 Nuigtushkam jegá nagkaematú yujainak dakí unuimainawai, imá dakinak unuimainatsui, chichaman yujajuinak, wainak pachiinak chichamainchau chichá yujainawai. 14 Nuadui wakegajai, nuwa tsakat wajemeau aidaunak, nemaktinme nunikag uchijinawag jeenian uyumaktinme, nunidau asag shiwaja nu kakajus pegkegchaunum chichajam amainchau atinme tusan. 15 Wagki ujumak nuwa waje aidauk kanakaje, nunikag yamaik Satanasan umijuinawai.

16 Makichik nuwa Apajuí nemagna nuna patayí waje aidau agtaik, ni yaimainai, iglesiaya nu kuashat takat ají tabaunum, dutikam iglesiak dekaskenum waje, makichkish yaimainji shiig atsujuina nuna yaimainai.

Anciano aidau pachisa tibau

17 Anciano aidau shiig takaina duka eme anentsá diyaku shiig akikbau amainai, imá senchi chichaman etsejuinak nuigtú jintinkagtuina nu, 18 wagki agagbaunum chichaak: “Toro trigon dajag pakak wekaga nuna nu jig jigkatuawaipa”^{*} tawai, nuigtú: “Aents takaa duka, akiam auwai” tau asamtai.

19 Anciano pachis, jimag aentskesh nuniachkush kumpatumkesh, pegkegchau takaamujin etsegtuinachkuig antugkaigpa.

20 Tuja tudau idaitsuk takaa puja duka, ashí tikich aidaush antuinanunum jiyaktá, nuna wainkag tikich aidaush ishankatneme.

21 Juna wi; Apajuí, Cristo Jesús nuigtú ángel etejamu aina nuna emtin tajar ju dutiksamak umiktá, makichkia nu takum tikichia duka pachitsuk idaiyin aipa, nuigtush wait anentamugmekesh idaitsuk ashí dutikata.

22 Makichik aentskesh shiig anentaimtsuk waugtukam uwegmin achikam Apajuí aujtusaipa, tikichi tudauji pachintukaim. Tupanjata ashí pegkegchau aidauk.

23 Amek wakemin beseakum waa wamak jaum nunin asam, yumik umutsuk machik vino uwagta.

24 Ujumak aents aidau tudau takaamuji paan wainmainush awai eke chicham dekagmainnum jegachiatak, nuniai awai tikich pegkegchau takaamuji kakajus dekagmainchaush, tujash nunak pegkegchauji wantintai dekajuinawai. 25 Nunisag pegkeg takaamua nu paan wantinush awai, tuja pegkegchauwa dushakam nunisag uumkag amaitsui.

6

1 Ashí achikbau inam batsataidauk, niina apujin ashí eme anentus diimain ainawai, Apajuí daajin nuigtú jutii jintinkagtamua nuna pegkegchau chichagkainum tabaunum. 2 Tuja apuji aidau Apajuí nemajin agtaik, dekaskeapi tabaunum yachi wajasú asamtai ajantus diitnak idaimainchau ainawai. Nunitsuk, dekas shiig takagmain ainawai, wagki ni pegkeg takaamujin juina duka Apajuí nemajin nuigtú yatsut aneetai aina nu ainawai. Ju jintinkagtakum nuigtush etsegkata.

Waitá jintinkagtin aidau

* 5:18 Dt. 25.4.

³ Tuja makichik aentskesh, tikich waji pachis jintinkagtak, iina Apuji Jesucristo pegkeg jintiamua nujai betek jintiitsuk, nuigtush wait anenkagtamu jintiamua nujais betek tachakug, ⁴ nunu aents nunin aidauk dekachiatak wainak ememainak tu yujainawai. Duka dita anentaisa chichamujin pachisag jiyanitkatatus wakeyin ainawai. Nu jiyanitbaunmag kajegdayamu, shiwagmagamu, pegkegchau chichagdayamu, kajintsá anentaimtuniashbau, ⁵ nuigtushkam inagnamainchaun jiyanitú yujainawai, aents pegkegchaunak anentaimtin dekaskea nuna dekachu asag, Apajui pachisa chichamunum wiyachchameautia nuninun anentaimainawai. Aents nunin aidauk tujanjata. ⁶ Tujash shiig muun juamua duka Apajui puyatjusa umigku iinu ajutkagta nujai shiig aneasa pujamua nuuwai. ⁷ Wagki ju nugka juig makichkish takakuk taachuitji, nunisaik makichkish jukik wechatnaitji. ⁸ Nuadui, ayamjumamain nuigtú ejamamainush ajutjamkuig, nujais shiig aneasa pujumainaitji. ⁹ Wagki wiyachchameatatus wakejuina duka wamak pegkegchau takatnum iyainawai, nuninak kuashat wakegainak waituinawai, nunu imanchau aidau pegkegchau ekagtuina nuna imatika uyumaidau asag, waittanum nuigtú megkaeta nuwi weenawai; ¹⁰ wagki ashí pegkegchau aidau nagkamnamua duka kuichik imá senchi wakegamua nuuwai, nuadui ujumak aidau imanik wakegainak, dekaskeapi tabaun idaisaje; nunikag shiig senchi waituinawai.

Dekaskeapi tau asa maaniamu

¹¹ Tujash amek, Apajui aentsji asam, ashí jujú waji aina duka takasaipa, nuniakum pegkeja duke takastá, Apajui puyatjusa umigta nu, dekaskeapi tabau, anentak, waitiakmesh katsunjá pujakum imagnisa pujustá. ¹² Ame dekaskeapi tame nujai senchi kakaajam maanikta, pujut nagkanchau jukiuwaitam nunismek pujusam; aminak Apajuik aatus nunikti tusa etegtamauwai, nuadui ame dekaskeapi tabaugmia duka shiig etsegtumakuitme kuashat antuinamunum. ¹³ Apajui ashí waji aidaun pujutan suuwa nu nuigtú Jesucristo Poncio Pilato emtinish niinun pegkejan etsegtumakua nuna emtin tajame, ¹⁴ wi tajam ju umiktá, pegkegchauji atsugbau imagnisa pujusam iina Apuji Jesucristo minitta nu dakakum, ¹⁵ Apajui ni tsawan dakamuji uminkamtai ataktú Jesucristun ju nugka ju awematnai. Tuja imá nigkiyai Rey ashí rey aina nuna nagkaesau nuigtushkam nigkiyai Apu ashí apu aidaunash nagkaesauwa nu, imá nigkiyai eme anentsá ememattaiya duka. ¹⁶ Nigkiyai jachauwa dushakam, tsaptin adigmainchaunum pujuwa nu, makichkish wainchatai nuigtush wainmainchauwa nu, niina senchijish, ni inabaujish tuke atina nu ememattai atí. Aatus atí.

¹⁷ Wiyakuch ju nugkanmaya aina dushakam ememachu atajum tita, ni wajiina aina nuiyanak dakasaigka, wagki nu wiyachchameuta duka dekaskechui, Apajui ashí waji aidaun shiig aneas pujustinme tusa kuashat sukagtina nu kajinas anentaimsatnume. ¹⁸ Pegkeg aina duke takastajum tita, pegkeg aidau takatnum wiyakuch atinme, tsagka, nuninak ditanu ajuina nujai yaimkagtatus waketinme, ¹⁹ aatus nuninak, dita atak jukitnujia nuna kuashat ikaugkagtatui, nuigtush pujut nagkanchauwa nunash jukiagtinaí.

²⁰ Timoteoh, takastá tibauwaitam nu shiig kuitamkam takastá. Nuniakum nugkanmaya wájí aidaun wainak augmatuina nu, nuigtú tsanumainak dekaskea nu dekeinaji tuina dushakam antugkaipa, ²¹ wagki nuna antujuinak, ujumak aents dekaskeapi tabaun idaisaje. Apajuí ashí atumnash wait anenjamjatnume.

Pablo awentsaik carta agaja Timoteo awetimu

Kumpamkagtamu

¹ Witjai Pablo Apajuí wakegau asa Jesucristo apostolji etiuwai, Cristo Jesusai pujut anagkagtuamu juwamua nuna etsekgati tusa awetiuwai.

² Timoteoh, mina uchig anetaiju kumpanjame; Apajuí iina Apajiya nunú, Cristo Jesús iina Apuji anentag, wait anenjamag nuigtú agkan pujutan amastí.

Pablo Apajuí see tabau

³ Apajuin see tajai, mina muuntug takajujakajua nunisnuk wishakam pegkeg anentaiyai takajag nuna, nuniau asan tuke pachiajame Apajuin kashi tsawai aujkunchakam, ⁴ nuniakun ii kanaamunum ame buutú wajakbau aina nuna tuke aneaku asan, amina wainkan shiig aneastasan wakegajai, ⁵ wagki dekaskenum dekaskeapi tabau ajutjama nuna aneaku asan. Nunak dekatkauk amina dukuchjum Loida, amina duku Eunicejai ajujakajui, aminash dukeap ajutjamua tajai.

Yamajam chicham etsegbauk datsanmaitisui

⁶ Apajuí don amasbau ajutjama nu paan iwainakta tajame, wi amina buukmin achikan Apajuí segai jukiwaitam nunú. ⁷ Wagki Apajuik wakan sapija nunak sujamsachui; wakan senchigtina nuna, aneenitan, iik kuitamkatnunun sujamsauwai. ⁸ Nuadui, iina Apuji Jesús pachisam nuigtú wi achinkan pujag nu pachisa chichatash datsaamipa. Duka nunitsuk, yamajam chicham etsegbauunum waitiakmesh Apajuí senchin sujama nujai katsunjata, ⁹ ni uwemtijamag nuigtú mina aentsug pegkejam atinme tusa egetamjauwa dui. Nunak ii pegkeg takasbaunmakesh dutijamachui, ayatak ni yaunchuk anentag dutikatnujin anentaimtusua nuna Cristo Jesusai sujamsauwai, ¹⁰ tujash yamaik iina Uwemtijamin Cristo Jesús tauwa dui iwaintugmake, jata nuna senchijin depetek yamajam chichama nujai pujutan tsaptinun susa jachau awajsauwai.

¹¹ Nuadui minak nuna chichaman etsein atí tusa, apóstol, nuigtú maestro etiuwai. ¹² Duwi wika ashí ju aidaunak waitiajai, tujash datsamatsjai; wagki, wi yana dekaskeapi tiuwaitja nuna dekau asan, nuigtush nigkiap senchigtina ibau asa, atak tsawan atina dui midau atinnash kuitamjutua tau asan.

¹³ Chicham dekaseg aidau minaiya antukuitam duke kuitamkata, dekaskeapi tabau nuigtú Cristo Jesusjai ijutkau asá anentak ajutjama nujai. ¹⁴ Wakaní Pegkeji iini pujutama nuna senchijin, kuitamkata pegkeja nuna jintinkagtuati tibauwaitam nu.

¹⁵ Amek dekame, ashí Asia nugkanmaya aidau mina ukugkiaja duka; nunú aina nuiyag Figelo, Hermógenes aina nuuwai. ¹⁶ Apu Jesús wait anenjati Onesíforon patayí aina nunak, wagki ni kwashta imania ichich-tugmayi wi achinkan cadenayai jigkatjagmaitai egketaish datsamtsuk, ¹⁷ nuniau asa Roma taamuik, shiig senchi egá egatkawa waitkabi. ¹⁸ Apu Apajuí yaigtí Apu Jesusa tsawanji atina duish wait anenjamu atí tusa. Amek shiig dekame, ii Éfeso pujajin wajupa yaimpakchabi duka.

2

Waitiakmesh katsunjata

¹ Mina uchiju Timoteoh, amek senchi wajastá, Cristo Jesús anentag uwemtijamu asam. ² Kuashat antuinamunum wi tabau antukuitam nunú, tikich Apajuí nemagkau aidau kajittsá diyamua nu jintintuata, dutikam ditash tikich aidau jintinmainnash unuimagtünme.

³ Amek senchi waittsata, Cristo Jesusa suntaji asam shiig umigbaunum. ⁴ Suntagmagak puja duka, suntagchau pujuina nu pujutnak anentaim-tuchu ainawai, apuji shiig awajkata tabaunum. ⁵ Nunisag wasugkamin aidaushkam, dutik wasugkamata tibuauwa dutiksag wasugkamchakug waji pegkegnak jumaitsui. ⁶ Ajanum takaa duka, ni ajakma nuiya jukita takug, dekatkauk senchi takamainai. ⁷ Juna taja nu anentaimtusta, Apu Jesús ashí dekatan amastí.

⁸ Adeagta, Jesucristo David weantu aajakua nu, jakau aina nuiya nantakiuwa nuna pachisan yamajam chichaman etsegnuweg nunú, ⁹ nu etsegbaunum achigkagmatai pujusan senchi waitiajai, magkagtin utug-maina dutijuawag cadenayai jigkatjagmatai, tujash Apajuí chichamega duka jigkagchamui. ¹⁰ Nuadui ashí katsuntajai Apajuí etejamu aina nu aneamunum, ditashkam uwemat nagkanchau Cristo Jesusa imanjin awa nuna jukitnume tusan.

¹¹ Juka chichamak shiig dekaske:

“Niijai jakau akuik, nunisaik niijaig pujutnaitji.

¹² Waittsau ainakuik, niijai inamjatnaitji.

Ni dakitjau akuik, dutiksaik dakitam atinaitji.

¹³ Betek umichu ainajinish,

nigka betek uminai,

wagki ni tibuajinak betek umina dui”.

Makichik inak shiig takauwa nu

¹⁴ Jujú aidau anemtikjata dutikakum chichagkata Apajuí eemtin, wainak chicham aina duka jiyanitú yujaigpajum tusan, duka makichkish yaijattsui, nuna nunina duka antuina nuna pegkegchau emainak tu yujainawai. ¹⁵ Shiig kuitamka takastasam kakanmamsata, Apajuí eemtin-ish pegkejan takau wantinkatasam, takatan takasú datsamainji atsuja numamtuk, chicham dekaske nu shiig jintinkagtakum. ¹⁶ Tupanjata nugkanmaya aidau wainka chichamjú wekaetai aina duka, wagki nuna tu wekaeguk aan nagkaemas pegkegchaunum wemain asamtai. ¹⁷ Tuja dita jintinkagtamua duka kuchap ayatak wegkag wegama numamtuk wajawai, nunak Himeneo, Filetojai dutikainawai, ¹⁸ dekaskea nuna tupanjag yujasag chichainak, jakau nantagta duka nagkaemakne tuinak, ujumak aents aidau dekaskeapi tabaujin pachimjukaje. ¹⁹ Tujash Apajuí nagkamku tibuauwa duka yapajinmaitsui nunisagke, duka agagbaunmag: “Apu Apajuik wainui niinu aina nunak”. Nuigtushkam: “Ashí aents apu Jesusan umijuidauk, pegkegchau aina nunak tupanjatnume”, tawai.

²⁰ Makichik jega muunta nuig takatai aidauk oro, jiju plata aina nujai najankamukek atsame, numí najanamush, duwé najanamushkam auwai; nuniai ujumak iman dutikatasa takatai ainai, tikich aina duka imanchaunum takatai ainawai. ²¹ Nuadui, makichik aentskesh Jesucristo atsumtai atatus wakegakug ju waji aina nuna shiig idaiyas pujumainai,

takatai aidau pegkeg aina ibau wajasá, nunitai Jesuschakam oro najanamun apu takauwa numamtuk niinashkam takat pegkegnum apusatnai.

²² Datsa asá iyashnumia senchi waketai aina duka ukuktá, nuniakum pegkeja duke takastá, dekaskeapi tabauwa nu, anentak, nuigtú agkan pujuta nu, ashí anentai pegkeg aidau Apu Jesusan umijuina nujai. ²³ Chicham imanchau nuigtú wainak aina duka pampantú wekayipa. Amek dekame nunú tudaibau aidauk jiyanitnum ejekagtina nu. ²⁴ Wagki Apu Jesusa inakeg jiyani wekaenuk amaitsui, nunitsuk ashí shiig awajkagtin, jintinkagtuatatus wakeyin, nuigtú emamkemas dekau amainai, ²⁵ kakagchau anentaiyai antakchau aina nunash esemainai, Apajuiyai atak wakitki dekaskea nunash dekachaintash, ²⁶ nuninak shiig dekawag Iwanch achiká tsanuam ni wakegamujin umiujinak batsata nunash agkanmagachajaintash tau asa.

3

Tsawan nagkanbaunmash aentsush wajukua agtinaita nu pachisa tibau

¹ Nuigtushkam jusha dekamainaitme: Tsawan nagkanbau agtina nuig, tsawan ishamain aidau midiagtinaí. ² Wagki aents aidauk imá nigki anenmamin, imá ninunak anentaimtin, eme anentaimtumin, emebau, pegkegchau chichagkagtin, apajin dukujinash intimjin, see tuchau, Apajuinash anentaimtuchu, ³ anejattsá diijatbaush atsujin, wait anenkagtuchu, kajemtin, chichaman tsanumin, ebetmamjachu, yajau, ashí pegkeg aidau shiwagbau, ⁴ unumkagtin, esekachu, antakchau, Apajuinun nagkaesau niina shiig awagma nunak wekaetiagtin ainawai. ⁵ Apajuin shiig puyatjus umigna iman iwainmabiagtinaí, tujash dita wajuk pujuinawa nu iwainatnai dekaskechua nuna.

Aents nunin aina duka tupanjata. ⁶ Wagki nunú aina nuiyayai jega aidauwayawag, wainak nuwauch aidau tudaunak takainak iyashí ashí pegkegchaun wakega nuna takamtikin aidau tsanu yujajin aina nu. ⁷ Nunú nuwa aidauk tuke unuimasagké ainawai, nuninakush dekaskea nunak tuke dekamainchau ainawai. ⁸ Janes Jambresjai Moisesan utugchatan aputusajua nunisag, nunú aents aidau dekaskea nu etsegbaunum utugchatan apujuinawai. Ditak anentaimtajinig besekú, dekaskeapi tabaujinish tuke megkaegak megkaejau ainawai. ⁹ Tujash nunak nuigtuk emachagtinaí, wagki ashí aents aidauk dita anentainkachu yujas nuní yujainamunak dekajuamu asag, nu jimag wajukawajua nunisag.

Inagnaku Timoteo jintintuamu

¹⁰ Tujash amek mina jintinkagtutaijua nu, mina pujutjua nu, wi takasatan anentaimtutaijua nu, dekaskeapi tutaijua dusha, wi waugtuchuitag nu, mina anenkag, utugchat katsunfanmash senchitag nu imatksamek unuimajuitme, ¹¹ mina waitkajuinamush, nuigtú wi waitiamujush. Nuigtush dekauwaitme wi Antioquia, Iconio, Listra aina nui waittsauwaitag dushakam; waitkajuinakui wajuk waitin ayaja nu, tujash ashí nunú aidauwayawag Apu Jesús agkanmitkajuauwai. ¹² Nunisag, ashí aents imá Cristo Jesunak umiujinak pujustatus wakejuidaushkam, waitkam agtinaí, ¹³ tujash aents pegkegchau aidau, nuigtú tsanumin aina dushakam nuní nagkaemas pegkegchaun takaagtinaí, nuninak tsanubiagtinaí ditash tsanuinamu asag.

14 Tujash amek, ashí unuimajuitam duke takastá, dekas nuninapi tiuwaitam nu. Amek dekame yanauwa unuimajuitme. 15 Amek uchuch asamek Agagbau Pegkegma duka dekauwaitme, nunú aina nuuwai Cristo Jesús dekaskeapi tabaunum uwemna nuna dekamtijamaina nunú. 16 Ashí Agagbauwa duka Apajuí tibauwa nuuwai, nunin asa atsumtaiyai jintinkagtamunum, anentai yapagkagtuata tabaunum, esekagtuata tabaunumash, pegkeg takat aina nui jintinkagtuata tabaunum, 17 Apajuí aentsji imagnis pujú ashí takat pegkeg aina nu takatnash shiig dekau atí tabaunum.

4

1 Apajuí nuigtú Cristo Jesús inamjatatus jui taa, iwaaku aidaun, jakau aidaunash dita takasbaujin diijus titina nuna eemtin puyatjusan tajame, 2 chicham etsekgata tusan; nuniakum ashí tsawantai titá anentai yapa-jiatnume, jiyaktá, pegkegnumash wakemitkakta dutikakum emamkesam jintintuata. 3 Wagki tsawan jegatnai, chicham dekaskea nu jintiamu antutan dakitjagtina nu, nuninak egakagtinaí kuashat maestro aidaun, dita pegkegchau wakegaina nuninun jintinkagtaun igkugkagtatus. 4 Nuniau asag dekaskea nu antutnak idaisagtinaí, nuninak waínka augmatbau aina nuna antujiagtinaí. 5 Tujash amek, shiig ebetmamjam waitiakmesh katsunjata, nuniakum yamajam chicham etsegbauwa duke uyumakta, aajam takatjum umiktá.

6 Wagki wi maam atag duka namput wajaschae, nuigtú tsawan wi wetina dushakam tikijuch wajasé. 7 Wika shiig senchi maanik-jai, mina takatjunash ashimkajai, dekaskeapi tabaunash kuitamkajai. 8 Nuigtushkam wi pegkeg takasbaunum corona jukitnuk kuitamkam ajutui, nunak Apu Jesús juez dekas pegkejan takauwa nu tsawan atina nui sujustinai; tujash imá minakek sujuschatnai, ashí ni minitnun aneas dakasu aina nunash susatnai.

Timoteo ujakbau

9 Waamak taam waitkata, 10 Demasak ju nugkaya wajiin imá senchi wakegau asa Tesalónica weak ukugkine; untsu Crescente Galacia wemae, nuniai Tito Dalmacia wemae. 11 Imá Lucasak wijaig pujawai. Minakum Marcos ayaktá, takatnum yainkati tusan atsumajai. 12 Tiquiconak Éfeso awemamjai. 13 Ame minakum capa* takugtukta, Carpo jeen Troas ukukmayag nu, aiksamek papí aidaush, imá senchi pergamino aina nu.

14 Alejandro jijú takauwe nu minak kuashat tsanumjutjæ; tujash Apu Jesús ni wajuk takasé dutiksag akiktí. 15 Ameshkam aujaig kuitamamkata, wagki jutii chichagkagtamunak shiig senchi dakitmayi.

16 Nagkamchaku wi ayamjumkatasa chichaamunmag makichkish yainkachagmayi, ashí ukugkiagmayi; dita nunikaja nunak Apajuish pachitsuk idaisati tajai. 17 Tujash Apu Jesús wijai au asa senchin sujusmayi, chicham etsegbauwa duka minai uminkati nunitai ashí judiochu aidaush antuktinme tau asa. Aatus agkanmitkajuabi león yuwata takui ayamjumaina numamtuk. 18 Dutiksag Apu Jesús agkanmitkajuattawai ashí takat pegkegchau aina duish, nunik niina inamtaiji nayaimpinum jujukí kuitamjuktatui. Nigki tuke ememattai atin atí. Aatus atí.

Akatmabau

* 4:13 "Capa" tawa duka Lc. 6.29 diistá.

¹⁹ Priscila, Aquila nuigtú Onesíforo ni patayí aidaujai kumpamjutuata.

²⁰ Erastok Corinto juwakmae, untsu Trófimo jau asamtai Mileto ukukmajai.

²¹ Yumi tepeatsaig minisam dekapsata. Eubulo, Pudente, Lino, Claudia, nuigtú ashí yatsut aidaushkam kumpamjamainawai.

²² Apu Jesús amina wakanmijaish atí, ni wait anenkagtamujiya dusha ashí atuminish ajutjamti.

Pablo carta agaja Tito awetimu

Kumpamkagtamu

¹ Witjai Pabloitjai, Apajuí inakegaitjai nuigtush Jesucristo apostoljiyaitjai. Minak Apajuí etegjamu aidau dekaskeapi tuina nuna, Apajuí puyatjus umijin aidaush wajuk pujumaina ainawa nuna pachis chicham dekaskea nuna jintintuati tusa ni awetiuwai. ² Jutii dakamua duka pujut nagkanchauwa nuuwai, nunak Apajuí, waitjuchua nu, nugkanash najantsuk anagtamauwai, ³ nuna yamai ni dutikatnuji tsawan jegau asamtai, ni chichamen iwainake, Apajuí iina Uwentijamna nu mina etsegtugkata tusa idaitugsauwa nuna. ⁴ Titoh, amek wijai betek Apajuí dekaskeapi tau asam tuke mina uchijuitme: Apajuí iina Apajiya nu nuigtú Cristo Jesús jutii uwentijamna nujai anentag wait anenjamag shiig agkan pujutan amasti.

Obispo, anciano aidaush wajuku amainaita

⁵ Wika aminak utugchat iwagmain juwaka ju iwajata, nunikam makí makichik yaakat aina nui iglesia diistin aidau, anciano adajata wi tibaijam dutiksamek tusan Creta ukukbaijame. ⁶ Ancianok, makichkish nuna nunikchama tusaish augmatchatai amainai, makichik nuwentin, uchijí aidaush Apajuí nemajin, intimkichu nuigtú pegkegchau takau agmae tusaish augmatchatai. ⁷ Wagki obispok, Apajuinun kuitamin asa, makichkish nuninai tuchatai amainai; ememachu, kajemtin wajaknuchu, nampetnash nampechu, wainak shinú wekaechau, kuichkinak anentaimitú wekaechau amainai. ⁸ Nunitsuk, jeenish shiig jukagtin, pegkeg takatnak anentaimitin, ebetmamjau, pegkejan takau, pegkejam, shiig kuitamamak pujú, ⁹ chicham dekaskea nu wajuk jintintuamuita nunak shiig dekau amainai, nunin asa chichaman dekaskechua nunin chichajuidaunash shiig jintintua dekaskeapi tumantikmainai.

Waitá jintinkagtin aidau pachisa tibau

¹⁰ Judío aina nuiyag kuashat antumtikmainchau ainawai, nunin asag wait chichaman chichainak aentsun tsanuinawai. ¹¹ Nunú aents aina duka itatmitkaktajum, jintimainchau ainayatak kuichik jukitag tabaunum makichik jeganum ashí batsata nunak, tumainchaun jintintuinak pachimjú yujaidau asamtai.

¹² Cretanmaya aina nuiya makichik profeta chichaak: “Cretanmaya aidauk tuke wait, kuntinjai betek, yuu batsamin, daki aidau” tiuwai. ¹³ Nunú tibauwa duka dekaske; nuadui najam jiyajatkata, dekaskeapi tabauji pegkeja nuna kuitamkatnume, ¹⁴ nunidau asag antugkashtinme judío aidau augmattaijin, aents tibau aidau dekaskea nuwi datumkagtina nunashkam.

¹⁵ Aents pegkeja duka, ashí anentaibaujinish pegkejai; untsu aents besekú aina duka, makichkish pegkejak atsgnai, wagki anentaimitajinigi nuigtú dekatjinish besejú asag. ¹⁶ Apajuinun dekauwa iman chichagma-mainawai, tujash dita takaamujin wainak tuina duka wainnawai; ditak dakittsá diimain, yajau, makichkish pegkegnak takamainchau ainawai.

2

Dekas pegkeg aina nunú pachisa jintinkagtamú

¹ Tujash amek chicham dekas jintinkagtuamua dutiksamek chichagk-
agtukta. ² Anciano aidauk ebetmamjau, shiig anentaimkau; dekaskenum
dekaskeapi tinu, anejatin, waugtuchu amainai. ³ Nunisag anciana
aidaushkam, pegkejam aidau wajuk pujuinawa nunisag pujustinme,
tsanumkagtuchu, umutai nampemain aidaun tunamatjauchu, pegkeja
jintinkagtin agtinme, ⁴ nuninak jintintuatnume nuwa muntsujut aidaun
aishi aneetan, uchijí aidau aneetnash, ⁵ shiig anentaimkau atanum, ayatak
pegkejak atanmash, jega kuitamka pujutnumshakam, aishijaish pegkeg
nuigtú aishinig sumitkau atan, Apajuí chichamega nu pegkegchaunum
chichajam ai tabaunum.

⁶ Aikasmek datsauch aidaush pegkegnum wakemitkakta shiig anen-
taimkau atinme, ⁷ nuniakum ameshkam iwainmamkata ashí takat pegkeg
aina nu takatnum, jintiamu ayatak pegkeg ajantusa diimaina nu, ⁸ chicham
dekaskea nu, dakitmainchau; aaja nuniamin shiwagshakam datsaagti,
nuninak jutiinash makichkish pegkegchau tujamainchau atinme.

⁹ Achikbau aidaushkam jintintuata ditá apujinak ashí umigkatnume,
nuninak shiig awajkatnume, wainak ai aimtau ainum, ¹⁰ nuigtush
kasagkainmegka, nunitsuk ashí kajittsá diyam amainun iwainmamkat-
nume, Apajuí iina Uwemtijamna nudau jintiamua nunash ashí eme
anentus diistinme.

Apajuí anentag wait anenkagtugbauji

¹¹ Apajuí ni jutii wait anenkagtamujinak iwaintugmakui. Nunú ashí
aents aina nunak uwemtikatatus wakejawai. ¹² Nunú, jintinjamji
pegkegchau aina nu, nugkanmaya wakegamu aina dushakam idaisá,
yamaí tsawanta juik shiig anentaimsa, pegkegnum pujuinaku nuigtú wait
anenkagtakú pujumaina nuna, ¹³ jutii shiig aneestinji Apajuinu nuigtú
Jesucristo jutii Uwemtijamna nuna imanji wantinkatna nu dakainaku.
¹⁴ Nigka nigki jutiií mantamnata tus tsagkamankauwai, ashí pegkegchau
aina nuanui agkanmitkagmatatus; dutika pegkemtijami niina aentsji
etamak ashí pegkeg aina nunak takamtijamsatatau asa.

¹⁵ Jujuwai jintinkagtumainaitam duka, wakemitkagkagtakum, ajantsuk
najam chichagkagtukta. Makichkikesh iman Chau diigmaisainum.

3

Apajuí nemajin aidau nunimainji

¹ Aneentikjata apu inamin aina nui nuigtú nunú apu adaijamu aina
nuishkam sumimkatnume, nunik umijuinak ashí pegkeg aina nunak takas-
tatus wakeyin atinme. ² Makichik aentsnakesh pegkegchau chichagkasht-
inme, wainak shinú wekaechau atinme, nunitsuk shiig awajkagtin ashí
aents aidaunash kakagchaujin iwaintuktinme.

³ Wagki jutiishkam yaunchkek anentainkachu, intimkiu, megkaejá
batsamsá, iyash pegkegchau wakega nu inaku waitkatai, nuigtú ashí
pegkegchau aina nuna shiig anentin aajakuitji. Pegkegchaunum batsamsá,
tikichdau pegkeg diigsá kajejuinaku, kajegtamaidaush pempeentunike
kajejuakuitji. ⁴ Tujash Apajuí iina Uwemtijamna nu iwaintugmakui niinu
pegkeja nuna nuigtú ashí aents aneamua nunashkam, ⁵ dutika jutii pegkeg
takasbaush atsugtamaig wait anenjamu asa Jesucristo numpega nujai

nijapak uwemtijamjauwai; dutijama yamajam etamak Wakani Pegkeji pujugtamu asamtai yamajam pujutan sujamsauwai, ⁶ nuna jutii aidautin shuig kuashat amasajua nunak, Jesucristo iina Uwemtijamna nu Wakani Pegkejinash sujamsauwai, ⁷ ni anentag pegkeg ainagme tujamatai pujut tuke atin jukitnun dakastinme tujamu asa.

⁸ Jujú chichama juka dekaske, nuadui jujú jintinkagtamu aina nuna mijattsuk tití tusan wakegajai, ashí aents Apajuyai dekaskeapi tuina duka pegkeg takat aina nuna uyumaktinme tabaunum. Jujú jintinkagtamu aina duka pegkeg ainawai nuigtú ashí aentsnash pegkegnum yaimainai.

⁹ Tujash imanchau aina duka jiyanitú wekayipa, ditá muunji aajakajun pachis tuina dushakam, kajegdaimain aina dushakam, chicham umiktina nu pachismesh jiyanitú wekayipa, wagki duka wainak ainawai nuigtush yaijattsui.

¹⁰ Makichik aentskesh kanamainun chichá wekaekuig, chichagkata, tuja ataktú tamash antugtamchakuig jiiiktajum, ¹¹ dutikagmesh dekaataajum duka pegkegchau unuimatug nuigtush tunamag ni bakumaku suwimak jumainun tu wekaga nu.

¹² Artemasan nuniachkunush Tíquico awetittajame, nunikmataig wamak Nicópolis taam waitkata, yumi tepeatta nunak nuwi pujusan inagkeaktasan pujuttajai. ¹³ Abogado Zenas Apolosjai, anui taa weenakuig, wajuk yaimainaitme dutiksamek yaigtá, makichkish atsumamuji atsugt-inme. ¹⁴ Atum dutikamun jutii yachi aina dushakam wainkag unuimagt-inme pegkeg takat aina nuna, atsumamu aina nui yaimtan, nuninak tuke atsumtai agtinme.

Inagnaku kumpamkagtamu

¹⁵ Ashí wijai batsata nunú kumpamjamainawai. Kumpamjutuata dekaskeapi tabaunum anejatuina nunú. Apajui anentag wait anenkagtamua nu atuminish atí.

Pablo carta agaja Filemón awetimu

Kumpamkagtamu

¹ Witjai Pablotjai, Cristo Jesusan takaju asan achinkan pujusan yatsug Timoteojai kumpamjame anetaiju Filemogkah, jutiijai takatnum atuetai asamin; ² nuigtú iina umayí anetai Apia, Arquipo jutiijai takat atuetai iya nuna, nuigtush iglesia amina jeemin ijunaina nunashkam. ³ Apajuí iina Apajiya nunú, Apu Jesucristujai anentag wait anenjamag agkan pujutan amastinme.

Pablo see tibau

⁴ Mina Apajuijun aujkonuk amina pachisan tuke see tusanké ajai, ⁵ wagki antugkamjame, Apu Jesús aneamugmin nuigtú dekaskeapi tabaugminash, nuniau asam ashí Apajuí aentsji pegkejam aidau aneam nunashkam. ⁶ Apajuin segatjame wi dekaskeapi taja nunismek amesh dekaskeapi tame dui, Cristo aneau asá ashí pegkeg jutiini dutikmain ajutjama nuna dekaati tau asan. ⁷ Shiig aneakun ichichmamjai ame anejatbaun antakun. Yatsujuh, Apajuí aentsji pegkejam aina dushakam aminig anentain ichichmamkaje.

Pablo Onésimo chichamjukbau

⁸ Nuadui, Cristo daajin, ju dutikata tumain ajutaig, ⁹ ayatak anenkai segajame. Wi, Pablo, muun wajasuitkun Cristo Jesusa chichame etsegbaunum achinkan pujusan, ¹⁰ Onésimo, wi cárcel pujusan Cristo pachisan etsejai antuk sujumankau asa mina uchijua imana nu, ataktú amina jeemin mina anú wait aneamam jukita.

¹¹ Yaunchuk tsawantaya duik amesh atsumainchauyi, tujash yamaik ameshkam wishakam atsumtai wajasé, ¹² nuniku asamtai awagkin awetajame, mina utugtumainaitam dutiksag jukiti tusan, ¹³ amina yaimpamaina nuna, jui pujusá mina yainkati, yamajam chicham etsegbaunum achinkan pujag nuna tumainaitkun. ¹⁴ Tujash makichkish ame wakegatsminig dutikatanak wakekashmajai, ame mina yainbau wi takui dutikamu ai, dekas ame wakegamunum dutikamu atí tusan.

¹⁵ Juna juniktasants ujumak tsawantai aminí kanakuitai, nunik ataktú ame jukim amijai tuke pujustatus, ¹⁶ tujash achikbaujai betekchau, achikbauwa aan nagkaemas yatsut aneetai minaig wajasé, tujash aminig aan nagkaemasayai, aentstí nunitaiya nuninchau, Apu Jesús nemagbaunum yatsut wajasú asa.

¹⁷ Nuadui, ame minash kumpag anenjakmek, mina utugtumainaitam dutiksamak jukita. ¹⁸ Amina pegkegchau takagtamsau nuniachkush diwimjamkau akuish, minai idaisata. ¹⁹ Wi Pablón junak mina uwejui agatjame, wi akikmakatjai; ame pujut jukimunum mina diwimjam nuna tumainaitkun. ²⁰ Aajan yatsujuh, iina Apuji nemagbaunum aminian pegkejan wainkatanan wakedajai, nuniakum mina anetai ijuish ichichtuga Cristo nemaju asam.

²¹ Junak, dekas umiktatuapi tabaunum kajittsan agatjame, wagki wi segajam nu inagkeasmesh dutikattam nuna dekau asan. ²² Wi kanagtin

minash umigtukta, wagki atum Apajuí aujtugsagmin, atumjai ataktú wainimainnash sujustata dui.

Inagnaku kumpamkagtau

²³ Epafra kumpamjamui, Cristo Jesús nemagbaunum wijai betek achinak egketa nunú, ²⁴ dutiksag Marcos, Aristarco, Demas, Lucas aatus mina yaintin aina dushakam.

²⁵ Apu Jesucristo anentag wait anenkagtaujiya nu atumí wakanminish ajutjamtinme.

Hebreo aents aidau carta agaja awetimu

Apajuí niina Uchijin awemauwai

¹ Apajuik yaunchuk iina muunji batsamajakajua nunak niina etsegtin aajakajua nuwi kuashtá au aujkawa inibiajui ni wajuk ausata tawa dutiksag.

² Tujash yamaik, ju tsawan inagnamunom batsatag ju tsawantaik niina Uchijin awetugma dui aujtamui, ashí wají aidauk ni najankamu asamtai ashí niinuk atí tusa idaitusua nuna. ³ Niiyai Apajuí imanjiya nuna iwaina duka. Nigka Apajuí wajukuita niishkam imanke. Ni chichame senchigtina dui ashí wají aidauk emetuk awai. Nuigtú iina tudaujinash nijatjamag pegkeg etami nayaimpinum Apajuí ekeemtaijin untsujin ekeemsauwai.

⁴ Niiyai nayaimpinmaya aents aina nuna wagagkauk, nigki dekas Apu wagaaku ashí nayaimpinmaya aents aina nuna nagkaesau eme anentsá adaitaiya dushakam.

Apajuí Uchijiya nuwai nayaimpinmaya aents aidau nagkaesauk

⁵ Apajuik makichkish ángel aina nunakesh:

“Amek mina Uchijuitme, wi yamai aentsnum akiinati tima akiinau asam”,* tichauwai.

Nuigtush nayaimpinmaya aents aidauk:

“Wi niina apají atajai, ni mina uchig atí”,† tichauwai.

⁶ Tikichnumshakam jutiksag, niina Uchijí makichkiuchia nuna pachis nugkanum awemak:

“Apajuí angelji aina duka ashí niinak ememattinme, tiuwai” tawai.

⁷ Ángel aidau pachisag:

“Apajuik niina angelji aidauk tuke dasega nunin weu ainawai;

tuja takagtuinakush tuke jiiya nunin weu ainawai”,‡ tawai.

⁸ Tujash Apajuik niina Uchijin pachisag:

“Apajuiyah, ame ekeemsa inamtaigmek ajumaish tuke atinai pegkeg aina duke takau asam.

⁹ Amek pegkeg aina nu aneakum, pegkegchau aina duka dakitjaume.

Nuadui Apajuí, amina Apajuigma nu etegtama shiig aneemtijamsauwai kumpajum aina nuna nagkaesau”,§ tiuwai.

¹⁰ Junashkam Uchijin tiuwai:

“Apuh, amek yama nagkamtinish nugka najankum nayaimpishkam najankauwaitme.

¹¹ Nunú najankamujum aina duka megkaejatnai

jaanch mamujá megkagama numamtuk, tujash amek tuke pujutnaitme.

¹² Jaanch ninutia numamtuk awajkattame.

Yapajiakmeshkam jaanch yapagmamtayama numamtuk yapajiattame.

Tujash amek imanismek atinaitme, amina pujutjumshakam nagkankashtinai”.*

¹³ Apajuik makichkish ángel aina nunak:

* 1:5 Sal. 2.7. † 1:5 2 S. 7.14; 1 Cr. 17.13. ‡ 1:7 Sal. 104.4. § 1:9 Sal. 45.6-7. * 1:12 Sal. 102.25-27.

“Ekeemsata mina untsujui, nunikamin wi amina shiwajum aidaunak ashí depetuktajame,

dutikan ikaunmamtai dui ame diisminum”,† tichauwai.

¹⁴ Wagki, ashí ángel aina duka wakan Apajuin takajin ainawai, aents uwemjatin aina nuna yaigtí tusa ishimtai ditak ainawai.

2

Uwemat pachisa etsegkamu

¹ Nuadui Cristo chichame antukbauwa duka, puyatjusa shiig aneaku amainaitji, Cristo nemajut tupanjaig tuidau asaja. ² Yaunchuk Apajuí niina angelji aina nuwi chicham umiktinun awetim susauwa duka senchigtin aajakui. Nunin asamtai nuna umitsuk tudaun takaidauk dutiksaik suwimak suujakbauwai. ³ Nunin aish, ¿jutiish wajuk Apajuí suwimkajish uwemtumainaita, uwemat dekas imana nu pachitsuk idaikuish? Nu uwemtanak dekatkauk Apu Jesús etsegkauwai, nunikmatai nuna antuku aidau jutiinash dekaske tusag ujakpakajui. ⁴ Nuigtushkam Apajuí nuna shiig dekamtijamata tau asa, niina chichamen etsejuidaunash yaigkui. Dutikam anentai jegagmainchau, aents dutikmainchau aidaun iwainag takaajakajui. Dutiksag Wakaní Pegkejiya nujai ii yupichu dutikatnun ni wakejamua dutiksag makí makichik jutiinak amasajui.

Cristo ashí apu aina nuna Apuji atinai

⁵ Nugka yamajam atak atin pachisa chichainag nunak, Apajuik ángel aina nunú diísti tusag idaituschauwai. ⁶ Jushakam aatus agagbauwai: ¿Wajimpaya aentsush imatika kajimatmainchau anentaimtinush? nuni-achkush ¿wajuku asamtaiya aentsnum akiinaush ijagsatasamesh wakegame?

⁷ Ujumak tsawantaik ángel aina nuní imanchauch emaume, tujash ataktú imanuk emam eme anentsá diitai awajsaume; ⁸ dutikam ame najankamu aina duka ashí nigki idaitusume.* Nunú ashí idaitusbau asa makichkish Cristo diyachbauk atsawai, nuninaitak eke ashí ni idaituschamuskaitai tumain wajas awai. ⁹ Tujash Jesús ujumak tsawantai ángel aina nuní imanchauch emamuitak, ni waittsa jakamunum eme anentsá diitai wajasua duka wainji. Nunak Apajuí jutiin wait anenjamu asa, ashí aents aidaunum waitus jakati tima nunikui.

¹⁰ Ashí waji ni najankamu ayá duka niinuk ainawai. Nigka wakegawai ashí niina uchiji aidauk nayaimpinum pujustinme tusa. Nuna dutikata tau asa Apajuí Jesucristunak waittsati tiuwai, ni nunikbaunum ashí niina uchiji aidaunak pegkeg emak uwemtikata tau asa. ¹¹ Wagki ashí aents pegkemtikamu aidauk, nuigtú pegkemtikagtina dushakam ashí Apajuinuk ainawai. Nuadui Jesús Apajuí Uchijiya duka, datsamatsui jutii aidautin pachipas, “mina yatsug ainawai” tujamtanmag. ¹² Nuna pachis agagbaunum chichaak:

“Apawah, amina pachisan yatsug aidaun ujaktajai, dutikakun ditajai ijuntsan kantamkun ememattajame”,† tawai.

¹³ Junashkam:

“Wika imá Apajuyiaig kajintsan anentaimtatjai”,‡ ataktushkam:

† 1:13 Sal. 110.1. * 2:8 Sal. 8.4-6. † 2:12 Sal. 22.22. ‡ 2:13 Is. 8.17.

“Wika juig Apajuí uchijí aidaun sujusua nujai pujajai”,§ tiuwai.

¹⁴ Aentstí iyashtin numpentin ainag nuninuk wajas Jesuschakam aki-inauwai, nunik jaak Iwanch niina senchijin jatanum inamajakua nuna depetkata tau asa. ¹⁵ Nunik agkanmitkakui ashí aents iwanchin inake waig batsamas, jaamun ishamá batsamtatman. ¹⁶ Wagki nigka nayaimpinmaya aents aidaun ayamjuktatus minichui, nigka Abraham weantu aina nuna ayamjuktatus miniuwai. ¹⁷ Nunin asa niina yachi aina nuninuk betek wajasui. Nunik ni dekas Sumo Sacerdote wajas Apajuin betek umijak, jutiinash wait anenjamjauwai, ni waitus mantamnamunum Apajuí aents aidau tudaujinash tsagkujati tau asa. ¹⁸ Niishkam Iwanch pegkegchau takamtiksatasa dekapeam asau asa, Iwanch dekapeam waituidaunak senchigtina ibau asa yaigtatui.

3

Cristuk Moisesan nagkaesauwai

¹ Nuadui yatsug aidauh, atum Apajuí mina aentsug pegkejam atinme tusa etejamu aidautigmek, Cristo Jesús Apajuí etegkamu, sumo sacerdoteya duke puyatjusjum anentaimtitajum. See tajai jutiishkam nigki dekaskeapi tuidau asaja ni pachisa etsegtuinag duí. ² Jesusak Apajuí takastá tibaunak imatiksag betek umikui, Moiseschakam antsag Apajuí tibaunak jega Apajuí ememattainum ashí betek umijakui.* ³ Nuadui Moisesa nagkaesau eme anentsá diimaina duka Jesusai, jega jegamkamuk eme anentsá diitsuk, aents jegan jegamkauwa nu eme anentaiya numamtuk. ⁴ Ashí jega aina nunak aents jegamainawai, antsag ashí wájí aina dushakam Apajuí najankamu ainawai. ⁵ Moisesak Apajuí inake asa ashí Apajuí jeega nuig betek imatiksag takasui. Tuja ni takasua nunak Apajuí atak titina nuna iwainaktatus dutikauwai. ⁶ Untsu Cristuk Apajuí Uchijí betek umina ibau asa, jutii Apajuí jee ainag nuwi pujus yaimpaji. Jutii uwemjatnapitja tusa wakesa dakainag nuig ebetmamja pujuinakuik niina aentsji ainaji.

Apajuí chichamen antugkachaju aina nu pachisa tibau

⁷ Nuadui Wakaní Pegkeji tibau agagbaunum tawa ju:
 “Yamai Apajuí tabau antakjumek,
⁸ anentaimin utujimka juwakaigpajum.
 Aents intimkiu aidau Apajuin uwegshunum dekapsajua numamtukek.
⁹ Atumi muunjum aajakajua nunú dekapjusajui, wi ditan cuarenta mijadai yaigkan iniibaun wainainayatak.
¹⁰ Nuninakuí nunú weantu aidaunak kajegkan: ‘Ditak wainak anentaimainawai, nunidau asag wi taja nu dekatnash dakituinawai’.
¹¹ Nunidau asagmatai ditan senchi kajegkan chicham yapajimainchauwai: ‘Ditak wi ayamsatajum tusan nugkan anagkuauwaitag nuig wayachagta-tui’, tijai”.†

¹² Yatsug aidauh, kuitamamkatajum, atum ainajum anuiyatijum pegkegchau anentaibau ajutjamsamtaí utujimsajum anentaimkujum, Apajuí tuke pujuuwa nunú tujanajium. ¹³ Duka nunitsuk kashí kashinig makí makichik pempeentunikjum anentai ichichtunigtajum, “yamai”, tibauwa nu tsawan eke au samtai. Atum ainajum anuiya tudau takainak Apajuí

tupanjag antakchau waigkainum. ¹⁴ Wagki Cristuwai pegkeg jukimu ajutjamaina duka, yama nagkamchaku niini kajintsá anentaimajakuitag nunisaik nagkanbaunmash jégainakuik nunisag ajutjamtinai.

¹⁵ Agagbauwa nuwi chichaak:

“Yamai Apajuí tabau antakjumeK, anentaimin utujimka juwakaigpajum duik intimjukiaju aina nunisjumeK”,[†] tawai.

¹⁶ ¿Ya Apajuí chichaamun antukaju ainayatkush intimjukiaju ainawa? Duka ashí aents Egipto batsatun Moisés jiijá agkanmitkakua nunú nunika-jui. ¹⁷ ¿Ya aidauna Apajuish cuarenta mijadaish kajegkash pujusuita? Nunak aents tudau takasaju uwegshunum jinawajua nuna dutikawajui.

¹⁸ ¿Ya aidauna Apajuish chicham yapajimainchauwaish: Wi ayamsatajum taja nuig wayashtatjume, tiuwaita? Nunak aents chichaman intimkiaju nuna tiuwai.[§] ¹⁹ Dita wayachajua nunak Apajuin dekaskeapi tuinachu asag nunikajua duka wainnawai.

4

¹ Nuadui Apajuí ishamsa diimainaitji, minai wayajum ayamsatajum tusa anagtamamu eke ajutjama dui, atum ainajum anuiyatigmekesh waimainchaunum juwakaig tabaunum. ² Jutii aidautish yamajam chicham etsegbau antukuitji, dita antukajua nunisaik. Tujash ditak antuinakush wainkaya nunin diisajui, wagki Apajuiyai dekaskeapi tuidau chichaman umikajua nunikchaju asag. ³ Tujash jutii Apajuiyai dekaskeapi tuidautik, Apajuí ayamsatajum tibauwa nuwi wayawagtinaitji. Nuna pachis Apajuí chichaak:

“Nunidau asamtai ditan kajegkan chicham yapajimainchauwai, ditak wi ayamsatajum tiuwaitag nuig wayachagtatui tijai”,^{*} tawai.

Nunak Apajuik niina takatjinak yama nagkamas nugkan najanauwa duik inagnakuitak tiuwai.

⁴ Tikich yantamnum agagbauwa nuwi, siete tsawanta nuna pachis:

“Apajuik ashí ni takamainjinak ashimak siete tsawanta jui ayamjauwai”,[†] tawai.

⁵ Tuja agagbaunum awaksag chichaak: “Ditak wi ayamsatajum tiuwaitag nuig wayachagtatui tijai”,[†] tawai. ⁶ Tujash nunú ayamnagtina nuwi eke wayachush ainawai, nagkamchak Apajuí uwemtikagtugta tabaun chichaman antuku aidauk uwemjachajui ditá chicham umishtin.

⁷ Nunikagmatai Apajuí ataktú makichik tsawantan mamikiae, “Yamaiya juna”. Yaunchuk nagkamas au aujtamkawa minimú ai pujus, David agagbau timag nuna awaksag chichaak:

“Yamai Apajuí tabau antakjumeK, anentaiminig utujimkajum juwakaigpajum”,[§] tawa nu.

⁸ Wagki Josué Israel aents aidaun Apajuí ayamsatnume tiuwa nuna susau ataik,^{*} Apajuik tikich tsawannak mamikiachu amainai. ⁹ Nunin asamtai makichik tsawan shiig pegkeg juwawai, Apajuí nemajin aidau ayamjatna nu. ¹⁰ Nuadui Apajuí ayamtan sukagta nuwi wayauk, ditá takataijinak idaiyinaK ayamjaje, Apajuí ni takas ayamjauwa

[†] 3:15 Sal. 95.7-8. [§] 3:18 Nm. 14.1-35. ^{*} 4:3 Sal. 95.11. [†] 4:4 Gn. 2.2. [†] 4:5 Sal. 95.11.

[§] 4:7 Sal. 95.7-8. ^{*} 4:8 Dt. 31.7; Jos. 22.4.

nunisag.† ¹¹ Duwi kakanmamainaitji dekas ayamtainum wayatasaja, makichkitigmekesh chichaman intimkiu wajukawajua numamtuk wajakaig tabaunum.

¹² Apajuí chichamega duka senchigtinai pujutnash sukagtinai, nuigtush espada mai yantamejai etsakamua nuna nagkaesauwai. Iman asa wakannumash, anentaimat aina nunash anentainum shiig wayá pegkeg aunash, pegkegchau aunashkam dekamtijamji. ¹³ Apajuí najanamu aina nuiyag niina uumjumainuk makichkish atsawai. Apajuí eemtinig ashí waji aina duka shiig paan ainawai, nunin asamtai Apajuí eemtinig ashí ii takasbauji tumamtinaitji.

Jesusai Sumo Sacerdote

¹⁴ Jesús Apajuí Uchijiya nuuwai, jutii Sumo sacerdoteji dekas iman nayaimpinum wayauwa duka. Nuadui niini dekaskeapi tuidautik ebetmamja nunisaik pujumainaitji. ¹⁵ Wagki jutii Sumo sacerdotejiya nu, ii kakaakchau wegajinish wait anenjamainai. Nigka jutiijai betek pegkegchau takamtiksatas dekapeam asauwai, tujash nigka makichkish tudaunak takaschauwai. ¹⁶ Nuadui Apajuí anejatin ekeemtaijin eketa nunú kajintsá adijka ausagmi. Ni jutiiinak wait anenjamag ashí ii atsumamunmash yaimpaktatui.

5

¹ Ashí sumo sacerdote aina duka, aents aina nuiya etegka adaikamu aajakui, Apajuí eemtin ni anentag kuntin itaamun maa aentsun tudaujin segattí tusa. ² Tujash sumo sacerdotek nigkishkam pegkegchaun takamain asa, aents Apajuí umigtan shiig dekachu asag, wainak pegkegchaunum yujaidanash wait anentus yaigti, ³ dutikakush niina tudaujiná tsagkugnagtus kuntinun maa apeati, dutika dui aents aidau tudaujin tsagkugnagti tusa kuntinun maa apeati tibau aajakui.* ⁴ Jujú takat ajantusa diimaina junak makichik aentskesh nigki nagkamig takamait sui. Junak Apajuí Aarogkan† etegkauwa dutiksag etegkamu aina nu takamain ainawai.

⁵ Nunisag Cristushkam nigki wi sumo sacerdote atajai tusag naamkachui. Nunak Apajuí eme anentai awajsauwai, dutikak nigki:

“Amek mina Uchijuitme, wi yamai aentsnum akiinati tima akiinau asam”,‡ tiuwai.

⁶ Nuigtushkam tikich agagbaunmashkam tawai:

“Ametme sacerdote dekas tuke atinmek, Melquisedec§ aajakua nujai betek”.

⁷ Cristo ju nugka jui pujusua nuaduik, shiig senchi untsamak buutak negá negajai Apajuin segauwai. Ni jamaina nunak Apajuí senchigtina ibau asa agkanmitkajuati tusa. Nunitai Apajuik ni umigbau asa ayatak antugkauwai. ⁸ Cristuk Apajuí Uchijiyaitak, waitiamunum Apajuí wakegamu umigtanak unuimajui. ⁹ Ni juna imatikas betek umikú asa, uwemat tuke atina nuna sukagtin wajasui ashí niina umijuina nuna. ¹⁰ Tuja Apajuí niinak sumo sacerdote atí tusa adaikauwai, Melquisedec aajakua nujai betek.

Cristo nemajut idaisaijum tusa ujaniamu

† 4:10 Gn. 2.2. * 5:3 Lv. 9.7. † 5:4 Ex. 28.1. ‡ 5:5 Sal. 2.7. § 5:6 Sal. 110.4.

¹¹ Jujú pachisa tumainuk kuashat ajutjamji, tujash juní tawai tusaik shiig tumaitsui, atumek wamak antumainchau asagmin. ¹² Atumek Cristo nemagkajum dukap tsawan pujau asajum, jintinkagtin amainaitkujum, ataktú awagkijum Apajuinun shiig jintias dekas yupichukin jintinja-matnume tusa atsumagme. Nuniau asajum uchi yamá akiintsau yutai katsugman yumainchau asa, muntsunak muntsuwama nunin ainagme. ¹³ Ashí uchi muntsun muntsuaku aina duka, chicham pegkeg aidaunak jintiag chichaakuk amaitsui, wagki uchi asa. ¹⁴ Tujash pegkeg takaamua nuna, pegkegchau takaamua nujai akanag dekatan unuimatjau aina nuuwai, muun yutai katsugman yuwina numamtin aidauk.

6

¹ Nuadui nagkamchaku Cristo pachisa jintiamu aajakua duka ukuaku, nuní nagkaemasa dekamain ainaji. Nunidau asaja pujut yapajita nu pachisa, tudau takaamu jatanum ejekagta nu idaiyat, Apajuiyai dekaskeapi tabauwa nu ataktú awagki dekaatasaik batsamtumaitsui. ² Yamimat pachisa jintinkagtam, Jesusa nemajuidau buuknum achiká Apajuí segatut, jakau aidaun nantajagtin, nuigtú Apajuí suwimak tuke atinun sukagtustina nu pachisa dekatasaischkam batsamtumaitsui. ³ Ju pachisaishkam jintintuattajime Apajuish dutikati tujamkuig.

⁴ Wagki Apajuí chichame anenjauch sukagtusbauwa nuna dekaawaju ainayatak nuigtú Wakani Pegkejinash jukui aidaun, ⁵ nuigtushkam Apajuí chichame shiig pegkeja nunash wakejus antuku, tuja Apajuí niina senchi-jin ju nugka jui inamjatna nunash shiig dekauwaitak, ⁶ Apajuí dekaskeapi tutan idaiyas, ataktú ni pegkegchau takaajakbaujinak waketjuki takaak, Cristo shiwagmaina duka, kakajus ataktú pujutinak yapajimatsui. Wagki dita nuna nuninak, dita dekas Apajuí Uchijin achijagmatai, tikich aidaun Cristun dushikish chichagmaina numamtuk wajaidau asagmatai. ⁷ Yumi yutug nugkan uchupjamtaig ajak tsapakug pegkejan nejeawai, nunikmatai juwaa duka Apajuí yainken juwawai. ⁸ Untsu ayatak jagkik ajanum tsapataik takatsuk idaiyin ainawai tikich tsawantin apea ajapatin asa.

⁹ Tujash aneetaig aidaun, nu aaja takuishkam, atumek aents megkae-mainai taji nuninuk ainatsjume. Wika atumnak shiig degajime, dekas pegkeg atum uwemjamujum ajutjamaina nunak. ¹⁰ Apajuik pegkegchaurak takachua ibau asa, atum ni aneau asajum, ememattsas takagkujum, Apajuí aentsji pegkejam aidaunsh yaigkuitjum nuna nuigtú yamaikish yaimainajum nunash kajimatkishitina. ¹¹ Nuadui makí makichik aidautijum wakesajum takaajum nunak, dutiksag emainak jegantinme tusa wakegaji atum dakainajum nuwi, nuniau asajum duka imatiksagmek jukitin ainagme. ¹² Duwi daki batsamtutsuk, Cristui dekaskeapi tabauwai emamkemas pujuinak, Apajuí anagkagtuamua nuna jukitin aina nunisjumek pujustajum.

Apajuik ni anagkagtuamujinak yapajichui

¹³ Apajuí Abrahaman anagkauwa nunak, niina nagkaesau adaisa tumain atsau asamtai, Apajuí nigki adaimamas, chichajak: ¹⁴ “Dekaskenum kuashat yaigtatjame, dutikakun ame weantu aidaunak shiig kuashat uyujkatnaitjai”, tiuwai. ¹⁵ Tima Abraham emamkemas dakasu asa, Apajuí niina anagkauwa nunak imatiksag jukiuwai. ¹⁶ Aents ni dutikatnujin anagdayinakug, ditá nagkaesauwa nuna adaisag anagdayin ainawai. Nunú iman antamunum tiu asag dekaskenmap dutikattawa

tusag ukú ainawai. ¹⁷ Nuadui Apajuí anagkagtuamujin jukitin aina nuna shiig iwaintuktatus wakekauwai, ni anagkagtamua nunak makichkish yapajitsuk imatiksag umiktin asa, nigki adaimamas dekas umiktatjai tiuwa nuna. ¹⁸ Nu jimajan tiuwa nunak yapajimainchau asamtai Apajuik waitjuchua dui, dekas dutikattawapi tau asaja, shiig senchi ichichmmainaji Apajuí ayamjutpasmatai kajinmasa ni anagkagtuamua nu jukittajapi tusa dakaidau asaja. ¹⁹ Nunú dakamua nuuwai ii Apajuyai kajinmasa anentaibaunum iina wakanin ichichtamuk, jiju ancla lanchan buchitmainchau ema ebetama numamtuk. Nu dakamua dui jega Apajuí ememattainum jaanch ejaamu aajakua nu nagkaiki wayau ainaji. ²⁰ Jesús eemak wayauwa nunak, jutii wayatnun jintan ujatjamtatus nunikui. Nuniau asa niyai sumo sacerdote tuke atin Melquisedec aajakua nujai betek.

7

Jesusak sacerdote Melquisedecjai betekai

¹ Melquisedecak yaakat Salemnumia rey, Apajuí nayaimpinmayaya nuna sacerdoteji aajakui. Nuniau asa Abraham apu aidaujai maania depetmak wakettatman, Melquisedec jiintuki igkug pegkegnum yumigsauwai. ² Dutikam Abrahamak ashí ni maania depetka jukimujiya nuiyan diezmon susauwai. Melquisedec tawa nunak: “Rey pegkejan takau” taku tawai, nuigtú yaakat Salema Apuji aajakui tawa nunashkam: “Shiig agkan pujutan apuji” taku tawai. ³ Melquisedeca apajig, dukujish, ni weganbaujish, akiinamujish, jakamujishkam dekajuachbauwai, duka Apajuí Uchijí tuke sacerdotek pujutna numamtinuk aajakui.

⁴ Anentaimusjum diistajum, Melquisedec dekas iman aajakua nu. Iman asamtai Abrahamak apu aidaujai maania depetmaka, waji yajuakbaujin diezmo susauwai. ⁵ Moisés chicham umiktajum tibauwa nuig, sacerdote Leví weantu aidauwak ditá yachi aina nunú diezmo susati tibau aajakui, ditashkam Abraham weantu ainayatak. ⁶ Tujash Melquisedecak Leví weantuchuitak, Abraham Apajuí anagkuamun jukiwa nunú, diezmo suwamash jukiwai. Dutikam Melquisedecshakam pegkegnum yumigsauwai. ⁷ Juka ashí dekainaji, pegkegnum yumigkagtina duka, pegkegnum yumigsamua nuna nagkaesauwa nunú. ⁸ Yamai jutii diezmo suwinag duka aents jinin aina nu suwinaji. Tujash Apajuí chichamen agagbauwa nuig, Melquisedec eke iwaaku pujauwa nuninun etsegtawai. ⁹ Nunin asamtai Abraham Melquisedecan diezmon susauwa dui, sacerdote Leví weantu aidauwkam diezmon ditashkam susajua nuninai. ¹⁰ Melquisedec Abrahaman igkugtatus jiintukiwa nuaduk Leví weantu eke akiinachu ainayatkush, Abragkai akiinkagtin asag, ditashkam nuig batsatua nunin aajakajui.

Aarón weantu takasbauwa duka pegkejak etamchauwai

¹¹ Israel aidau chicham umiktin susamua duka Leví weantu sacerdote aina nu susamu aajakui aents aidau yaigtinme tusa. Tuja nunú sacerdote aajakajui aina nu aentsun Apajuí eemtin pegkeg emamain agtaik, tikich sacerdotek atsumnamainchau aajakui, nuadui atsumnajui tikich sacerdote Melquisedec aajakua ibauk Aarón weantu nuiyachu. ¹² Wagki sacerdote takataijiya duka yapajiamu asamtai, chicham umiktinum tawa dushakam yapajiamu amainai. ¹³ Tuja agagbaunum iina Apuji Jesucristun pachis tawa duka, tikich Israela uchijí aina nuiya aajakui tawai. Nuiyag

makichkish altarnum takastí tusaik makichkish tichamu aajakui. ¹⁴ Shiig dekanui, iina Apuji Jesusak Judá weantu aajakui, Moisesak sacerdote aidau takastinjin tiuwa nunak Judá weantunmaya takamainnak makichkish tichauwai.

¹⁵ Juka shiig paantai, makichik sacerdote yamajam wantinka duka Melquisedec aajakua imana nu. ¹⁶ Chicham umiktinum Leví weantu aina duke takastin atinme tibauwa nuiyachui, nigka sacerdote senchigtin ajumaish wajukashstin tuke pujuwa nuuwai. ¹⁷ Niina pachis Apajuí etsegtak:

“Ametme sacerdote tuke pujutnumek, Melquisedec aajakua nujai betek”, tiuwai.

¹⁸ Nuadui yaunchuk umiktin aajakua duka idaisamui, aents aidaunak yaimainchau asamtai. ¹⁹ Moisés chicham umiktajum tibauwa duka makichkish aentsnak pegkeg emachui, nunikmatai tikich nuna nagkaesau dekas pegkeg dakamu ajutjamui, nuadui Apajuiyaig jegainaji.

Cristo dutikamua nuuwai tikich sacerdote takasajua nuna nagkaesauk

²⁰ Apajuik ni dutikatjai tibauwa nunak chicham yapajimainchauwai, tiuwai. Tikich sacerdote aidauk imatika chichagkaik adalkachbau ainawai.

²¹ Tujash Cristuk chicham yapajimainchauwai chichagká tibauwa nunú agagbaunum tawai:

“Apu Apajuí nigki adaimas, mina chichamjunak yapajiashttajai, ametme sacerdote tuke pujutnumek”, tiuwai.

²² Nu aatus asamtai Jesús chicham apakbauwa nuuwai nagkamchaku chicham apakbau aajakua nuna nagkaesau dekas pegkeja duka. ²³ Tikich sacerdote aidauk kuashat aajakajui tuke pujuchu asag. ²⁴ Tujash Jesusak tuke jakashtin asa, tikichnakesh ni takaa nunak inagkeatkishtinai. ²⁵ Nuadui niyai tuke atinun uwentikagtumainuk, jutii niini yunumka Apajuiyaish jegajinig. Nigka tuke pujuuwa ibau asa Apajuin segatjamui.

²⁶ Nunin asa dekas sumo sacerdote ii atsumajakuitag duka Jesusai. Nigka pegkegmai, pegkegchaunash antiakchau, tudaugtin aidaujaish ijutkachu, iman asamtai Apajuí niinak dekas nayaimpia nuna yakiin apusauwai.

²⁷ Nigka tikich sumo sacerdote aidau kashí kashinig kuntinun maa apeak, dekatkawk niina tudaujiná tsagkugnag, dui tikich aents aidau tsagkug-nagtinjin apejakua nuninchauwai. Jesusak makichkia mantamdauwai ajumaish tuke jakashtinun, nigki tsagkamankauwai. ²⁸ Moisés chicham umiktinun agajua nuiyan diisag sumo sacerdote atinun adayajakajua duka, aents kakaakchau aajakajui. Chicham umiktina nu nagkaemakiu ai, Apajuí chicham yapajimainchauwai, niina Uchijin sumo sacerdote atí, tusa adaikamua nuuwai dekas tuke pegkejak atinuk.

8

Iina sacerdoteji Cristo nayaimpinum pujawai

¹ Wi dekas imanun titasan tajim duka juuwai: Jutii sumo sacerdotejig, Jesús nayaimpinum Apajuí ekeemtaiji untsujin eketa nuuwai. ² Nigka dekas jega pegkegmanum pujus sacerdotejai betek takaawai Apu Apajuí umikbauwa nuwi, duka aents takaschamui. ³ Ashí sumo sacerdote aajakajua duka, Apajuinu anentag itaamun maa apeati tusa adaikamu ainawai. Nunisag Jesuschakam jutii tudaujin mantamnak niina iyashinak Apajuin anentag susauwai. ⁴ Nigka ju nugka jui pujakush sacerdotek amaitsui, juig kuashat sacerdote ayau asamtai. Nunin asag chicham

umiktinnum Apajú anentag susatajum tibauwa dutiksag takaidau asag-matai. ⁵ Tujash juiya sacerdote aina duka, nayaimpinmaya wájí aina nunú ayatak dakumká najanamunum wayawag takainawai. Dutiksag Moisesnash chichajak: “Ame mujanum pujamin jega Apajú ememattain iwaintukbaijam nuna niimejai betekuch najanata”, tiuwai. ⁶ Untsu jutii sumo sacerdoteji takasbauwa nu imá pegkejai. Nunin asa ni Apajú aents aidaujai chicham apakbauwa duka shiig pegkejai, nuigtush dekas pegkeg aidau anagtamauiwa dui.

⁷ Nagkamchaku chicham apakbauwa nu pegkeg aajakú ataik, ataktú chicham apakmí tabauk atsusú amainai.

⁸ Tujash Apajuiik nunú aents aidau nak pegkejak diischauwai, nuniku asa chichajak:

“Apu tawai: Tsawan jegatnai, Israel aents aidaujai, Judá weantu aidaujai ataktú chichaman apaktinaitag nunú.

⁹ Duka wi ditá muunji aidau Egipto nugka batsatun jiijan, ditajai chichaman apakuitag nuna umikchagmatai idaisauwaitag nuninuk achattawai, tawai Apajú.

¹⁰ Nunú tsawan atina dui, wi Israel aidaujai chichaman apaktatjai, tawai Apu Apajú.

Wi ditá anentaimtajin chicham umiktinnak egketjagtatjai, dutikakun ditá anentainish agatjagtatjai. Wi ditá Apajuiji atajatjai, untsu dita mina aentsug agtatui.

¹¹ Dutikamu asajum atum ijutkamukesh, yatsumkesh Apajú dekaati tusagmek jintintuashtin ainagme.

Wagki ashí piipich, ashí muun aidau nagkamas shiig dekajuawagtin ainawai.

¹² Wika dita pegkegchaun takaina nunak wait anenjan tsagkuujan, tudauji aidau nash ajumaish adeagchatnun kajimatkitnaitjai”, tawai.

¹³ Apajú yamajam chicham apakbaun pachis tawa nunak, nagkamku chicham apakbauwa duka muuntuch wajasú asamtai tawai, muuntuch wajasú asamtai atsumnatsu duka megkaekatin asa nuniawai.

9

Jega Apajú ememattai nugkanmaya nayaimpinmayajai pachisa tibau

¹ Yamai dekaami, nagkamku chicham apakbau aajakua nuig, ju nugka jui jega Apajú ememattai pegkejam jegamkam aajakua nuwish, Apajuish wajuk emematmainaita nu pachisa tibau aajakui. ² Nunú jegak juní umikbau aajakui: Dekatkau tesamua nunak “Pegkejam” tuujakajui, nu-anuig candelabro* jii ekeemaja pekatai, pag Apajú anagkuamu, mesanum patagbau aajakui. ³ Jaanch ejaamua nuna ukuujin tesamu aajakua nunak, “Shiig Pegkejam” tuujakajui. ⁴ Nuanuig altar kugkuin incienso patai apetai ayatak orok najanam aajakui, nuigtú kajun arca Apajuijai chicham apakbau ayatak orok epekbau aajakua nunú. Nunú arcaya nuna initken egkemajakui Aarogka ushujutaiji jeekú aajakua nu, chicham umiktin kayanum agagbauwa dushakam, nuigtú makichik ichinkauch ayatak orok najanamunum maná chimpianu aajakua dushakam. ⁵ Nunú kajun arcaya nuna awanken jimag aents nanamtin nayaimpinmaya dakumkam, Apajú nuwí pujamujiya nuna iwainajakajui. Nunú aidauk

* 9:2 “Candelabro” tachakuish candelero tumainai. Nunak jii ekeemaja pekatain tawai.

ditá nanapen kajun arca tutaiya nuna dukukag aajakajui. Tujash juna pachisnuk imatikanuk shiijak tichattajai.

⁶ Ashí ju imatika umikbaunum sacerdote aidauk, kashí kashinig deatkau tesamu Pegkejam tutainum wajajakajui, dita takastí tibauwa nuna umiktatus. ⁷ Tujash nuna ukuujin tesamu shiig pegkejam tutaia nuig, imá sumo sacerdotek makichik mijantin makichkia wajajakui, kuntinun numpen takus. Nunik nunú numpa nuna Apajuin anagkuak, deatkauk niina tudaujin tsagkugnagtatus segatmami, dui tikich aentsú tudaujinash segatujakui. ⁸ Nuna Wakaní Pegkeji shiig dekamtijamui. Dekatka tesamunum sacerdote takainaigkish, tikich ukuunum tesamu Shiig Pegkejam tuujakbauwa nuig, tikich aents wayati tusaik tichamu aajakui. ⁹ Ashí nuna dutikajakajua nunak, yamai taswanta jui nuniktinun iwainak dutikawajui. Nuniau asag nunú jeganum batsamsag, kuntin Apajuí anentag anagkuamun maa apeenak Apajuin emematuinakush, dita anentaimtajinig agkantak anentaimajakchajui. ¹⁰ Nu jeganum batsamas chicham umiktajum tibaun umiinak, ayatak yutai aidau, umutai aina nuna, Apajuí ememattasag yumin ikigmajakajua nujai takasajui. Ashí nunú aidaunak Apajuí eke yapajiachu asantai dutikajakajui.

Jesucristo waitus mantamnamua nuuwai jutiin bakumamainchau etamuk

¹¹ Tujash Cristo jui tauwa nuuwai yamaik sumo sacerdote, pegkeg aidau tuke atinun sukagtinuk. Ni sacerdotejai betekak jega pegkegmanum wayá takaa nuuwai dekas imá pegkejak. Duka aents aidau jegamkachbauwai, nunin asa ju nugka juiyachui. ¹² Cristuk chivo aidau, toro tsakat aina nuna numpeenakesh jukig wayachui. Nigka niina numpeenak juki Apajuí pujutai dekas shiig pegkegma nuwi makichkia wayauwai tuke atinun, nuniak jutiinash agkanmitkagbauwai tuke atinun. ¹³ Duka dekaske; toro aidau, chivo aina nuna numpen jukiag, nuigtú baka tsakat altarnum apeamu yukuujin jukiag, aentsú yukujakú ainawai pegkegchau iyashin ajamun pegkeeti nunik tsuwatchau wajastí tabaunum. Tujash nunak awankak dutikajakú ainawai. ¹⁴ Aan nagkaemas Cristo numpega duka senchigtinai, nigka Wakan tuke pujuuwa nunú yayasam Apajuí eemtinish makichkish tsuwatji atsugbau nigki tsagkamanak mantamna numpen ukajua dui iina anentain pegkegchau takaaku jatanum jegamaina nunash nijatjamjauwai, Apajuí iwaaku puja nunak umigkatnume tujamu asa.

Cristo yamajam chichaman apakui

¹⁵ Cristuwa nuuwai yamajam chichaman apakua duka, wagki ni untsukbau aidau tuke atinun Apajuí anagkagtuauwa nunash jukitnume tujamu asa, Cristuk nagkamchaku chicham apakbau aajakua nuwi batsamas tudau takasbau aidaujin agkanmitkata tau asa jakauwai. ¹⁶ Aents wi jakamtaig mina wajiignak, nu aents jukitin atí tusa papinum agaja umikbauwa duka, nuna umikua nu dekas jakamtai senchigtin wemainai. ¹⁷ Aaja chicham umikbau aig, nuna umikú iwaaku pujaigkik nu chichama duka wainkayai. Untsu papinum agag umikua nu jakamtai, nu aents jukitin atí tibaujiya duka uminnai. ¹⁸ Nunisag Apajuí yamá nagkamchak chicham apakbau aajakua dusha, numpajaichuk dutikachbau aajakui. ¹⁹ Dutika chicham umiktina nuna ashí aents aidaun Moisés ujaká, nuadui toro tsakat maamu aidau numpen, chivo numpe aidaun yumijai pachimag, uwijá uje kapantaku emamun jukiag numí hisopo kanawen

jigkawag, numpanum uchupig, chicham umiktin agagbaun pegashmatug uchupik, aents aidaunashkam dutiksag dutikauwai. ²⁰ Dutika chichajak: “Ju numpa juka Apajui atumjai chichaman apaa nuuwai”, tiuwai. ²¹ Nuigtushkam Apajui ememattai carpa jegamkamua nuna numpan pegashmatug, dekatkau tesamu Pegkejam tutainum takatai aina nunashkam dutiksag pegashmatjauwai. ²² Chicham umiktina nuig, numpajai ashi pegkeemtikmaina iman tibau aajakui. Numpajaichuk tudauk tsagkugna-mainchau asamtai.

Cristo mantamnamua dui tsagkugnamuk awai

²³ Aatus atumnajui nayaimpinmaya waji aidau dakumja najankamu aina nu pegkeemtikata tabaunum. Tujash nayaimpinmaya waji aina duka, kuntin maamu numpen nagkaesau dekas pegkejan atsumawai. ²⁴ Cristuk jega tesamu Shiig Pegkejam tabaun aents umikajua nuig wayachui, duka dekas nayaimpinum awa nu dakumka najanamua aajakui. Nigka dekas nayaimpinum wayauwai. Yamaik awi Apajuijai pujus, jutiin Apajuin aujtugmaji yaimpakti tusa. ²⁵ Nigka wayachui kuashta maam atasag, sumo sacerdote aidau maki makichik mijantin Apajui ememattai pegkegma nuwi tikichi numpen takus wajakua nunikag. ²⁶ Ju aatus ataik yama nagkamchaku nugka najanamua dui nagkamnas mantamna pujumainai, tujash yamaik tsawan nagkanbau jegau asamtai Jesusak tauwai. Nunik tudaun depetkatatus ajumaish jakashtinun makichkia mantamdauwai. ²⁷ Tuja nunisag aents aidaushkam makichkia jakati tibau ainawai, nunik dui nagkaemmainai Apajuijai dekagmamatus. ²⁸ Nunisag Cristushkam kuasht aents aidau tudaujin utsankatatus makichkia jakauwai, tuja atakti minitta duik tudaunak pachikhattawai, niina dakak batsatun uwemtikatatus minau asa.

10

Yaunchuk chicham umiktin aajakua duka aentsnak yaigchawai

¹ Chicham umiktin Moisés agagbauwa duka Apajui pegkeg aidaun amastina nuna iwainajakui; tujash duka dekaskesh wajukuita nu aajakchawai, nunin asa makichkish aentsnak pegkejak emamainchau aajakui, Apajuin adjikatasag maki makichik mijantin kuntinun maawag apejaku aina nunak dutikainakush. ² Chicham umiktina nu dekaskenum tudaun nijag pegkeg emamu ainakug, nuwi takaina duka kuntin mautnak idaisag nuigtuk tudaunumak bakumamainchau anentaimain ainawai. ³ Tujash nunu kuntin maamua duka ayatak ashi mijantin dita tudaujinak anemtikajakui. ⁴ Wagki toro numpe, chivo numpe aina duka aentsu tudaujinak jujumainchau asamtai.

⁵ Nuadui Cristo nugka taatin asa Apajuin tiuwai: “Kuntin maamu, tuja anentag itaamush dakitame.

Nuniau asam minak aentsu iyashijai betek etiume.

⁶ Kuntin maa apeamu, nuigtu tudau tsagkugnagtasa anentag itaamu aidaushkam dakitame.

⁷ Nuniau asamin wi amina chichagkun:

‘Apajuiyah, mina pachitus papinum agajajua nuna, ame wakegamu umiktasan jui pujajai’, tibaijame”.

⁸ Nuna nagkamas takug: “Apajuiik kuntin maamu, anentag itaamu, tudau tsagkugnagtasa kuntin maa apeamu aina nunak dakitawai, shiig awagmatsui tawai. Chicham umiktina nuwi dutikatum tibauwa nunin

aigkish". ⁹ Ataktú takushkam: "Wi, ame wakegam nuna umiktasan minajai" tiuwai. Nunak yaunchuk kuntin maajakbauwa duka emegkakum, yamagmauchia nu apusata taku tiuwai. ¹⁰ Nuadui jutiinak Apajui pegkemtijabaijai, Jesucristo Apajui wakegamun umiak makichkia mantamna ajumaish jakashtinun nunikua dui.

¹¹ Ashí sacerdote aidauk kuntin maa apeamua nunak kashí kashinig dita dutiktaijinak dutiksag takaajakú ainawai, tudaunash makichkish utsanja-mainchau aig. ¹² Tujash Jesucristuk tudau aidanum tsagkamankauwai, nunik tuke atinun makichkia mantamna Apajui untsujin ekeemsauwai. ¹³ Nuwi yamaik dakak pujawai, "ni shiwaji aidaunak ashí niinig Apajui depetuk ikaunmakti" tusa. ¹⁴ Nuna niina iyashin anentag Apajuin susauwa dui, midau atí tibau aina nunak tuke atinun pegkeemtikiuwai.

¹⁵ Dutiksag Wakaní Pegkejiya dushakam shiig dekamtijamji nuniak:

¹⁶ "Nunú tsawan atina dui wi ditajai chichaman apaktinaitag duka juuwai, tawai Apu Apajui: Wi ditá anentain chicham umiktinnak egketjagatjai, dutikakun ditá anentaimtajinish agatjagatjai.

¹⁷ Ditá pegkegchauji, tudauji aidaunash ajumaish adeagchatnun kajimatknaitjai".

¹⁸ Nuadui iina tudaujinak Apajui tsagkugtamjau asantai, tsagkugnagtasau kuntin mautak atsumnatsui.

Apajuiyai jegamainaitji

¹⁹ Yatsug aidauh, yamaik Jesucristo numpen ukajua dui, Apajui pujutaiji shiig pegkegma nuwi waimainuk agkan ajutjamui, ²⁰ yamajam jintan Jesús ujatjabiuwa nuwi weenaku pujut tuke atinum jegamaina nuna, nunak ni jatai jaanch ejaamu ichiinkau ajakua dui dutikauwai, ²¹ Jesusai juiti sacerdoteji dekas senchigtin Apajui jeen puja duka. ²² Nuadui Apajui dekaskenum, dekaskeapi tabauwai jegaantagmi, dekaskeap nuninaita tusa, iina anentaimtajinish pegkegchau atsau, iyashish yumi dekas pegkejai dijagbau amaina iman wajasá. ²³ Nunin asantai ni anag-agtuamua nu dakaku pujuidautik ebetmamja batsamsagmi, dekaskeap uminkattawa tsajaja, wagki Apajui tabaujinak imatiksag betek umin asantai. ²⁴ Pempeentunisaikish wajuk yainimainaita nu egakagmi. Pegkeg takainaku nuní nagkaemasa aneenimaina nu. ²⁵ Apajui ememattasa ijunbaunmag megkaekachagmi, ujumak taachush ainawai nuní unuimatjau asag, nuna nunin aidaush yaigtajum wakeetan jukitnume, wagki Cristo minitnujiya duka tikiju wajasú asantai.

²⁶ Wagki Apajui chichame dekaskea nunú dekau ainayatku, juiti wa-keetajin pegkegchau takaaku Cristo shiwagmakuik, nuigtú iina tudaujin tsagkugtamjatatus Cristo mantamdauwa nunik tudaunum mantammainuk tikichik atsawai. ²⁷ Ayatak jii shiig ishamainnum Apajui niina shiwaji aidaun suwimkan susatna nunak dakainawai. ²⁸ Nuadui makichik aentskesh Moisés chicham umiktajum tibaun umikchamtaig, jimag aentskesh, nuniachkush kauptumkesh apu aidaun jegajiag, nunú aents chichaman umitsuk wainak takaawai tusag etsegtukagmataig, wait anentug tsagkugsuk maajakú ainawai. ²⁹ Tujash nuna nagkaesau, Apajui Uchi-jiya nuna dakituinak, niina numpe ukajamunum Apajuijai chichaman apak pegkeemtikiuwa nunash pegkegchau diinak, Wakan wait anenk-agtina nunash pegkegchau chichajuidau asag shiig senchi suwimkanak jukiagtina. ³⁰ Apajui chichaak: "Witjai aents tikichin pegkegchau awagbaun suwimkan suwaunuk, nunin asan aents pegkegchaunak wi

suwimkan susattajai”, tawai. Junashkam: “Niina aentsji aidaunak Apajui ni titinai”, tawai. ³¹ ¡Tikima shiig ishainai, Apajui iwaaku tuke pujuuwa nunú suwimak sukagtamuk!

³² Tujash adeagtajum, nagkamchakjum Apajui chichame dekaajum Cristui sujumankajum ashí utugchat, waitiamu akuish, katsunjá ichich-mamajum depetkauwaitjum nunú. ³³ Wagki atum ainajum anuiyatijum, tuwakbaunum pegkegchau chichagku waitkasbautigmesh ainagme, nuni-agmin tikich aidauk aents dutika waitkamu aina nujai ijuntsan waittsatjai tusa anentaimsaush ainawai. ³⁴ Atumek Cristo nemajuidau achikam chimpjush wait anenjauwaitjume. Tuja atumi shiwajum wajiigmin yajutjamkagmataish, atumek shiig aneasjum pujagme, atum jukitnuk nayaimpinum dekas shiig pegkeg tuke atin ajutjamaina nu dekau asajum. ³⁵ Cristui kajintsá anentaimjum nunú megkaekaigpa, wagki atum jukitna duka shiig pegkeg ajutjamu asamtai. ³⁶ Atumek atsumagme waitiakjumesch ichichmamja pujusjum, Apajui wakegamua nu takaakjum, ni anagtama-mua nu jukitasajum. ³⁷ Agagbaunum chichaak: “Minitna duka, megkaetsuk wamak minittawai.

³⁸ Mina aentsug pegkejan takaa duka imá dekaskeapi tabauwaik tuke pujutnai, untsu mina nemagtukuitak ataktú waketuidaunak shiig anentsashtinait-jai”, tawai.

³⁹ Jutiik aents suwimka jukiagtin aidau Cristo nemagkau ainayatak ataktú waketuina nuninuk ainatsji, ayatak dekaskeapi tabauwai uwemtan jukiaju aina nuninuk jutiishkam ainaji.

11

Apajuiyai dekaskeapi tabau

¹ Apajuiyai dekaskeapi tabauwa duka, dekaskenmap jukittaja tusa kajintsá dakamua nuuwai. Nuigtushkam wainchayatku dekas awapita tabauwa nuuwai. ² Jutii muunji aajakajua duka, Apajuiyai dekaskeapi tuidau asag, Apajui eemtinish pegkeg wantinkajui.

³ Apajuiyai dekaskeapi tau asaja dekainaji, nugkanum nuigtú agka-junum ayá duka Apajui chichameniap najaneakuita tusa. Yamai paan wainainag duka, waji wainajakchamu aajakui.

⁴ Apajuiyai dekaskeapi tabauwai, Abelak kuntas dekas pegkejan maa apeak, Apajuin anentang susauwai Caigdaunagkaesau. Dutikau asamtai Apajuiik Abelnak ni dutikamujiya nujai pegkeg diisui. Nunin asamtai Abel jakau aigkish, ni Apajuiyai dekaskeapi tiuwa duka yamaikish etsegtú awai.

⁵ Enocshakam Apajuiyai dekaskeapi tau asamtai, Apajui iwaakunak nayaimpinum jukiuwai, dutikantai aents aidauk nuigtuk wainkachajui. Chicham agagbauwa nuwi: Enocak eke Apajui juwacham pujusag, Apajuinak shiig awajkauwai, tawai. ⁶ Wagki Apajuiyai dekaskeapi tabau atsugkagtaigkik, nigka shiig awagmamait sui, nunin asamtai niina adijkatatus wakegaidauk, dekas Apajui pujawapita tuja niijai ijutkau atatus egaidaunash akiskek idaichauwapita tabaujiya nu ajumainai.

⁷ Apajuiyai dekaskeapi tabauwai Noeshkam, waji nagkaemaktinun eke wainchayatku Apajui ujakam niina umiak arcan najanauwai ni patayí aidaujai uwemjatnun. Nunú Apajuiyai dekaskeapi tau asa Noé uwemai ashí aents dekaskeapi tuinachuk bakumakajui, aatus nunikua dui dekaskeapi tabaujin pegkeg wantinkauwa dui ni jukitnujig ajusui.

⁸ Apajuiyai dekaskeapi tabauwai Abrahamak Apajui untsuam umijak jiinkiuwai, ni nugkan aminu atí tusa suwam atina nuwi weak, tuwí jegattawa nunak dekatsuk. ⁹ Apajuiyai dekaskeapi tabauwai, Abraham Apajui nugka anagkuamua nuwi, tuke ikayajai betek duwapen aakmak pujusui. Nunisag nunikajui Isaac, tuja Jacobshakam, ditan Apajui nugkan amastajame tusa anagkuauwa nuwi batsamsag, ¹⁰ nunak Abrahamak nayaimpinmaya yaakat makichkish wajukmainchau Apajui shiig anentaimtus umikbauwa imanui pujustinun dakak nunikui.

¹¹ Dekaskeapi tabauwai Abrahamshakam muuntuch wajasuitak Sarashkam kaga ai senchin jukiuiwai uchig aidau ajuttinme tabaunum, wagki Apajui anagtuama nunak betekap umiktatua tau asa. ¹² Abrahamak jamainjin jegas pujai ni nuwe makichkiuch uchigmakua nuiya weantu aidau nayaimpinum yaya dekapamainchauwa iman, nayantsa kaamatkaji dekapamainchauwa iman wajasajui.

¹³ Ashí nunú aidauk Apajui anagkuamua nunak jutsuk jinawajui. Tujash ditak Apajuiyai dekaskeapi tabauwai atushtanmaya waintayama numamtuk wainkag shiig anejasajui, ditak ju nugka juig tuke ijagka nunin asajaiyap ukuktinaitku batsatji tusa dekaamaidau asag. ¹⁴ Nuna aatus anentaimajakajua dui shiig dekaji, ditak nugka pujumainun egainakuap nunijakajuita tusa. ¹⁵ Wagki ditá nugkeen ukukiu aina nuna anentaimtú pujuinakug waketmainuk tsawantak ajujakajui. ¹⁶ Tujash ditak nugka dekas pegkeja nuna wakegakajui, duka nayaimpinum awa nuna. Nuadui Apajui dita pujusagtinnak yaakat nayaimpinum awa nuna umigkauwai, dutikau asa Apajui: Juka midau ainawai tutanmak datsamatsui.

¹⁷ Dekaskeapi tabauwai Abrahamak, Apajui dekapsatatus, uchijum Isaac maam emematjita tamash, ni uchiji makichkiuchia nuna maa Apajui ememattatus wakekauwai, Apajui Abrahaman anagkuak: ¹⁸ “Ame weantu aidauk Isaac akiiamua nuiya agtinai”, tibau ayatak. ¹⁹ Abrahamak, Apajui senchigtina ibau asampap aents jakaunash inanmainaita tabaunum, uchiji mauwaitak Apajui ataktú inaantukim jukiuiwa numamtina nuna iwainawai.

²⁰ Apajuiyai dekaskeapi tau asa Isaac, niina uchiji Esaun tuja Jacob-nashkam atak agtina nuna pegkeg pujutnum yumigsauwai.

²¹ Apajuiyai dekaskeapi tabauwai Jacob jakattak pujus, makí makichik José uchiji aidaun ditá pujutjin agtina nuna pegkegnum yumigsauwai, nunik ushujutajin ichichmamas wajas Apajui emematiuwei.

²² Apajuiyai dekaskeapi tabauwai Joseshkam jaak: Israel aidau Egipto batsatu jijnjatnun tiuwei, nuniak: Mina ukunchjuk jujutkitin atajum tiuwei.

²³ Apajuiyai dekaskeapi tabaunum Moisés akiinamtai, apají dukujijai kempatum nantu uukajui uchi pegkejuch asamtai, nuninak rey uchi kajegtajum tibaunash ishambachaju ainawai. ²⁴ Apajuiyai dekaskeapi tabauwai Moisés muun wajasash: Faraogka nawanjin uchijiyaitjai tumantanak dakitujakui. ²⁵ Nigka Apajui aentsji waitkam batsataidaujai waittsatatus wakegau asa, ujumak tsawantai tudaun takaidaujai shiig aneetnak dakitjauwai. ²⁶ Nigka egiptonmaya waji aidaun juki shiig aneastatus wakeetsuk, Cristo atak taa waittsatnujin betek waittsatatus wakekauwai, Apajuiyap dekas pegkejan susjastata tusa dekau asa.

²⁷ Apajuiyai dekaskeapi tabauwai, Moisesak Egipto nugkanmaya jiinkiuwai rey kajektinjinash ishamsuk, ni dutikata tibaujiya nuig ebetmama-jauwai Apajui wainchataiya nunú nijai abaunash dekaeau asa. ²⁸ Moisés

Apajuiyai dekaskeapi tabaunum pascua fiestamauwai. Dutikak uwijá numpeen ditá waitjin numpeajajui. Dutikamu asamtai ángel magkag-taushkam, makichkish Israela uchijí iwai aidaunak mautsuk ukukiuwai.

²⁹ Apajuiyai dekaskeapi tabauwai Israel aidauk nayants kapantu tutaunum bukonum katimaina nunikag katiajajui. Nuniai Egiptonmaya aidaush ditash nunisag katiagtakamag jakekajui.

³⁰ Apajuiyai dekaskeapi tabauwai, yaakat Jericon siete tsawantai Israel aidau tentea apainak, yaakat peegmagbaujin yumpuntua akaketkajui.

³¹ Apajuiyai dekaskeapi tabauwai nuwa Rahab daagtin, akiká takatai aajakua duka, tikich aents intimkiu aina nu jinutaish nigka jakachui, Israel dekamatus yujaunash shiig anentus yajuak kuitamkau asa.

³² ¿Nuigtush wajinak titaja? Gedeogkan, Baracan, Sansogkan, Jefté, David, Samuel, nuigtú tikich profeta aina nuna pachisa tita takunuk tsawantan atsumainaitjai.

³³ Apajuiyai dekaskeapi tabauwai tikich nugkanum inamin aidaunash maania depetuk utsaantuawajui, pegkeg aidaunash takasajui, Apajuí anagkuamua nunash jukiajui, nunisag león aidaunash yukagtumainchau emakajui.

³⁴ Jii senchi kegamunum egkeamush esachaju ainawai. Espadayai maata tamash pisajakajui. Kakaakchau aidaushkam wajuu waigkag shiwajijai maaniawag depetkajui.

³⁵ Nuwa patayí jajukbau ataktú inaantuki suujakbaush ainawai.

Tujash tikitchakam agkan juwatan dakituidau asag senchi waitkasa maamush ainawai, Apajuiyap wi jakamtaish inaantuki dekas pegkeg pujatan sujastatua tuidau asag.

³⁶ Nuigtushkam tikich aidauk, dushiksa chichajuinam, asutiam, jiju cadenajai jigkajam, achiká egkeam waittsajui.

³⁷ Tuja tikich aidauk kayai tukua tukuakua maamush ainai, serruchui tsupika maamu, espadayai kajegbaush ainawai. Ditak jeenchau yujasag, uwijan duwapen, cebra duwapejai nugkujakajui. Nuigtushkam ujunauch, senchi waitkainam wake besemag batsamajakajui.

³⁸ Nunú aents aidauk shiig pegkeg, aents pegkegchau aidaujai ijunag batsaamainchau aajakajui. Nunin asag senchi waitkainam, jünag uwegshunum shiyak, mujanum wajag yujas, kayanum waa ayaunum utsanawag kanuu, nuigtú nugka waanum kanuu wajajakú ainawai.

³⁹ Tujash ashí nunú aina duka Apajuiyai dekaskeapi tuinayatak, Apajuí anagkuawajua nunak jukichaju ainawai.

⁴⁰ Apajuik jutiinun dekas pegkejan umigtamkau asa, ditanak eke susachajui, jutiijai betek pegkeg emakta tau asa.

12

Jesús waittsamu diisá ichichmamin

¹ Nuadui jutiishkam, kuashat aents aidau Apajuiyai dekaskeapi tabaujin iwainmankaju aina dui, ashí iina tutitag awajtama nu, tudau ebetjama awa dushakam idaisagmi, nuniaku ii jegantinum weaku kuitamamsa wetayama numamtuk wajakagmi.

² Jesús diisagmi. Niini nagkamnawai dekaskeapi tabauk, jutii dekaskeapi tabaush niinig nagkatkawai. Jesusak datsantan cruznum achijá maam waitiakush uyumatsuk atsanjauwai, ni shiig aneastinji daka nuna dekau asa, nunik Apajuí ekeemtaiji untsujin ekeemsauwai.

³ Nuadui Jesús nunikbauwa nu anentaimtusjum diistajum, nigki aents tudaugtin aidaunum waittsatjai tumami senchi waittsauwa nunú, nuadui

pimpitash pimpitsuk, mijattsuk nemagkatajum. ⁴ Atumek tudau depetkatasajum maaniajum duka tudaunum mantamnatasajum nuniatsjume. ⁵ Atumek kajimatkiugme Apajuí, uchijí aidaun chichajak agagbaunum:

“Uchijuh, Apu esetamatatus jintinjamkuish dakitjaipa, tuja ni chichagtamkuish mijakaipa,

⁶ wagki Apua duka jintintuí yana ni aneawa nuna, suwimkanash suwawai ni uchijí emamujiya nuna”, tawa nu.

⁷ Nuadui atumek Apajuí jintinjamu asamtai waitiagme, wagki Apajuik ni uchijí asajin nunak dutijamui. ¿Ya aentsua uchijin pegkejan takasti tayatkush jintintsukesh idaimainaita? ⁸ Tujash Apajuí ashí iina uchijí aidaun jintinta dutiksag atumnash jintinjamchakuig dekas shiig uchijig ainatsjume. ⁹ Nuigtushkam jutii uchi aajakuitag duik, iina apají jintinjamu asamtai ajantusa diiakuitji. Nuní nagkaemasa dekas iina Apají nayaimpinmayaya nunú shiig umigmainaitji, pujut jukita tau asá. ¹⁰ Jutii apajig ujumak tsawantai jintinjamajakajui dita anentaibaujiya dutiksag. Tujash Apajuik iina dekas pegkeg etamaina nuna jintinjamji, ni pegkegma ibauk atinme tujamu asa. ¹¹ Dekaskenmag nunú suwimak juwag duikik shiijak aneemaisui wagki najabau asamtai. Tujash nuwi unuimaja inagkeakik, shiig agkan anentaimesa pujuta nunú nuigtú pegkeja duke takatchakam unuimagtatji.

Apajuí wait anenkagtugbaun dakitin aidau

¹² Nunin asamtai, atum pegkeg takatnum pimpikiujum nunú nuigtú jinta pegkeja nu nemagtanum kakaakchau wajasujum dushakam, kakanmamsajum ichichmamjatajum. ¹³ Nuniakjum Cristo wakega duke takaakjum pegkegnum wekaesatajum, pegkeg dutikmain idaijum nu ataktú pegkeg takastajum. ¹⁴ Ashí tikich aidaujaish shiig agkan pujustasajum kakanmamsatajum, nuniakjum pegkee pujustajum, wagki nuna nuniachuk makichkish Apu Jesusnak wainkashtin ainawai. ¹⁵ Nunin asamtai pepeem-tunisjum kuitamdaikatajum makichik aentskesh Apajuí wait anenkagta-mujiya nuna megkaekainum. Wagki aents kajegkagta duka ajak jatai asa kuashat aentsun pegkegchau emamaina numamtuk wajau asamtai. ¹⁶ Makichkitigmekesh nuwa tsanijiintak pujugsaijpajum, Apajuinu pegkeg aina dushakam dakitjaigpa. Esaú ni iwai asa ashí niinu pegkeg jumainjiya nuna yutaijai yapajuawa numamtuk wajakaijum. ¹⁷ Atumek duka dekagme, Esaú dutika sujukuitak Apajin pegkegnum yumigtusti tukamá dakitam asauwai, nunik senchi buttkush ataktú awagki dutikmainuk atsugsauwai.

Yamajam anagkaguamu nayaimpinum jukitnaitag nunú imá pegkejai

¹⁸ Israel aidau muja Sinai antitash antimainnum, jii kegaun, suwe wajasú, ikiyamjau, senchi dasentun adjikajua atumek nunikchaugme, ¹⁹ nuigtushkam trompeta shinamush, Apajuí chichaamush antukchaugme. Nunú chichaamun antukaju aina duka: “Apajuik ataktú awenag chichakaigka”, tusag segaju ainawai, ²⁰ wagki katsunmainchau dekapedau Apajuí chichaak: “Ju muja juna kuntinkesh najakuig kayai tukujum nuniachkugmesh nagkikesh maatajum”, tau asamtai. ²¹ Nunú mujanmag tikima ishamain imaniau asamtai, Moisés chichaak: “Senchi ishamakun kujaajai”, tiuwai.

²² Tujash atumek muja Sión Apajuí tuke pujuuwa nuna yaaktaji nayaimpinmaya Jerusalegka nu adijkaugme, nuig nayaimpinmaya aents aidau shiig kuashat Apajuin emematuinak ijunag ainawai, ²³ nuigtushkam nagkamas iglesia aidau ditá daajig papinum agatkamu nayaimpinum ajuna dushakam, Apajuí ashí aentsú juezjiya nunak ijuntutg batsatui. Nunisag Apajuí nemajin initaik jinawajua nuna wakaní aidaushkam pegkeemtikawajam awig batsatui, ²⁴ Jesús yamajam chichaman apaak chichamkagtukua dushakam jegantaugme, nuigtush Cristo numpeejai pegkeemtikbau ainag nuuwai Abela numpe aajakua nuna nagkaesau tawa nu.

²⁵ Nuadui kuitamamkatajum Apajuí aujtabauwa nu dakitjaijum. Apa-juí jujú nugka jui chicham umiktajum tibaun antugkachaju aidauk, suwimkanak uwemtutskek nagkankachajui. Nuní nagkaemasa jutiik Apajuí nayaimpinum pujus aujtama nu antugchakuik suwimkak pegké uwemtumaitsuji. ²⁶ Nunú tsawantinig Apajuí chichaamujig nugkan pegakui, tujash yamai tujamji: “Ataktuk imá nugkanak pegatsuk, ashí nayaimpinashkam pegaktatjai”, tiuwai. ²⁷ Ju chicham “ataktú” tibauwa dui, ashí tuke achatin najankamu aina juka, tuke atina nujaimpap yapajiam atinaita tusa dekainaji. ²⁸ Tuja Apajuí inamtaijiya nuwi batsamsatnaitag duka makichkish umuchiam achatin asamtai, see tiagmi Apajuí ju pachisa. Nuniaku shiig puyatjusa, eme anentsá emematiagmi, niina shiig awagma dutiksaik. ²⁹ Wagki iina Apajuijiya duka jiijai betek asa, jii apea emegkauwama imanai.

13

Apajuin shiig awagma nunú takaamu

¹ Yatsut anendaisa pempeentuniki aneenita duka idaisaigpajum. ² Aents atumi jeemin minidaush shiig anentsá awaita nunú kajimatgipajum. Aatus nunidauk dekatsuk ángel aidaun shiig anentus jukiajush ainawai.

³ Aents achikam egketaidaush, atumin achigmakagmatai egkeemmainaitam nu anentainsam yaigtajum. Aents waitkam batsataidaushkam, atumshakam dutiksaik waitkam amainaitjum nu anentainsajum yaigtajum.

⁴ Atum nuwenamua duka eme anentsajum diistajum, nuniakjum pegkegchau takagdaitasuk pujustajum; wagki tsanijimtanak yujajuidaun nuigtú nuwennaitak tsanijimtan yujajuidaunash Apajuí suwimkan susatnai.

⁵ Kuashat kuichik ajuttí tusagmek anentaimtú pujuigpa, ajutjamaina nu-jaig shiig aneasjum pujustajum. Wagki Apajuí chichagtamak: “Makichkish idaisashinaitjame”, tujabui asamtai. ⁶ Nuadui jutiik shiig kajintsá: “Apui mina yainta duka dui puyatsatsjai. Aents aidau mina dutijumaina nunak ishamatsjai” tumainaitji.

⁷ Adeagtajum atumin Apajuí chichamen jintinjamajakú aina nu, nuniakjum wajuk pujusaya dekaskeapi tiu ainawa nunisjumek atumshakam ainjatajum. ⁸ Jesucristuk yauwa duish, yamaiya juish, atakea duishkam tuke nuninuk atinai. ⁹ Tikichin antushtain pachimak jintinkagtuidauk antugkaigpajum. Dekas Apajuí wait anenjamjauwa nuanuig anentaimin ichichmamjatajum, yutai pachisa tibauwa nu umiktasa yujagtsuk, wagki nuna nunidauk makichkish pegkegnak jukichaju ainawai.

¹⁰ Jutiik makichik altar ajutjamji, nuiyanak Apajuí ememattasa carpa jegamkamunum takaidauk yumainchau ainawai. ¹¹ Wagki kuntin maa-mua nuna numpeenak sumo sacerdote juki Apajuin anentag suwinak juga pegkejam Apajuí ememattainum wajakui tudaujun tsagkugtugti tusag, dutikawag nejeenak jukiag yaakta ukukí apejakajui. ¹² Nunisag Jesuschakam yaakta ukukí waitus jakauwai, niina numpe ukaejamunum aents aidaun pegkeemtikata tau asa. ¹³ Nuadui Jesusjai weenaku, ukukiagmi, nuniaku aents aidau dakitjag yaakta ukumtikiag waitkasajua nunisaik iishkam waittsagmi.

¹⁴ Jutiinak ju nugka juig makichik yaakat ii dekas tuke pujustinuk atsugtamui. Ayatak egainaji yaakat atak atina nu. ¹⁵ Nuadui Jesucristo yaimpasmatai Apajuí emematiagmi, duka iina wenin niina daaji adaisa ememattkuik iina Apajuuji waji anentag sumaina numamtuk awagmainag nuuwai. ¹⁶ Kajimatkigpajum, pegkeg takaaku tikichjaish pempeentuniki-aja yainita duka. Wagki nunú anenjauch sudaibau aina nuuwai, Apajuin shiig awagmaina duka.

¹⁷ Apajuí chichame etsejin aina nu umigkatatum, nuniakjum ditai sumimkatatum, wagki dita atumin diigmaku asagmatai, ditak Apajuí eemtinish etsegtugmaktin asag, shiig aneas takastinme, nu nuniachbau ataik atumnash shiig yaimpakchagtatui.

¹⁸ Jutii pachijattsajum Apajuí aujkgatustajum, pegkeg anentaibau ajutjamu asamtai kajintsá ashí pegkeg aina duke takaaku pujustasa wakegainaji. ¹⁹ Apajuí mina pachittsajum imá senchi aujtugsatajum, wishakam wamak ataktú atumiin taan wainkatjime. ²⁰ Apajuí shiig agkan pujutan sukagtina nu, iina Apuji Jesús aents uwigjin shiig kuitamna imana nu jakaunak inankiuwai, niina numpeejai ajumaish tuke atinun chichaman apakua nuna, ²¹ nunin asa atumnash pegkeg etamtinme ashí ni wakega duke takasminjum. Nigki ashí jutiinash ni wakega duke takamain etamti, Jesucristo dutikamua duí. ¡Imá Jesucristua duka tuke ememattai atí! Aatus atí.

Inagnamu

²² Yatsug aidauh, segajime ujumak chicham atum ichichmamainun agatjamjim nuna shiig kuitamas antuktinme tusan. ²³ Atumesh dekaata-jum: Yatsug Timoteo achikam egkeemaya duka yamaik jiinkine, wamak taamtaig wi atumin wainkatasan minakun ayaktatjai. ²⁴ Ashí Apajuí chichamen etsejin aina nu, nuigtú ashí Apajuí nemajin pegkejam aina dushakam kumpamjutuatajum. Yatsug Italianmaya aidau atumnash kumpamjamainawai. ²⁵ Apajuí atumnash ashí wait anenjamjatnume.

Santiago carta agagbau

Kumpamkagtau

¹ Witjai Santiagoitjai, Apajuí nuigtú Apu Jesucristo inakegaitjai. Israela uchijí doce aajakua nunú weantutijum pampagjum, ashí nugkanum batsatutigmin kumpamjime.

Yachamet Apajuinumia mina nu

² Mina yatsug aidauh, senchi shiig aneatajum makí makichik dekapkagtau aina nu igkuakjumesh, ³ wagki atumek dekagme, dekaskeapi tabaugmia nu dekapsamu atata dui, emamkesa katsunjá nagkaeta nu unuimajume. ⁴ Tujash kakanmamsatajum emamkesa katsunta nui shiig katsuugtasajum, nuniku asajum imagnisa pujakjum, nuigtú nunimainuk atsugamtinme.

⁵ Atum ainajum anuiya dekaachmin dekapeauk, Apajuin segatí, dutikamak ni susattawai; wagki Apajuik ashí wakejus suwawai makichkish dakittsuk. ⁶ Tujash dekaskeapi tabauwai segatí, makichkish utujimtsuk; wagki utujima duka nayants tsukatak wajukea numamtuk wajawai, nuniau asa dase umpuam mai waket wajama nuniawai. ⁷ Nuna nuniauk, Apu Jesús makichik wají sujmunakesh jukittajapi tusag anentaimaitsui, ⁸ wagki yamai makichik wajiin anentaimtaiwai, nunik kashin tikichin, nunin asa niina pujutjinig ebetmamjauchui.

⁹ Yatsut imanchauch anentamua duka, eme anenmamainai, Apajuí iman emamu asa, ¹⁰ untsu wiyakchak, eme anenmamainai imanchauch emamu asa, wagki wiyakchak, dupá yagkují megkaega numamtuk wajauidau asamtai. ¹¹ Etsa jiiinak senchi sukuam, dupa kagagmataig yagkujig kakegame, nunik niimé pegkejuch aajakuk megkagama numamtuk, wiyakchak ashí ni sujutajji aidaunak megkaekatnai. ¹² Shiig aneastinme aents utugchatan depetuk nagkaeguk, wagki utugchatan depetkau aina duka Apajuí pujut tuke atinun niina aneedau aidaun anagkuauwa nuna jukiagtinaí.

¹³ Makichkitigmekesh pegkegchau wakegamu ajutjamkuig, Apajuuyap jutijawa tiigpajum; wagki Apajuik pegkegchau takastasag anentaimchauwai nuigtush pegkegchau takastí tusash tchauwai. ¹⁴ Makí makichik pegkegchau wakegaina nunak, niina iyashí senchi wakegamua nu waga-jam nuniawai. ¹⁵ Nunú iyash pegkegchaun senchi wakega nui tudauk najaneawai, nunika tudau takasbaunum, jaamu jegawai.

¹⁶ Mina aneetaig yatsug aidauh, tsanumajaigpajum. ¹⁷ Ashí pegkeg wainkauch juamu nuigtú ashí don pegkeja duka yakiya taawai, iina Apaji nayaimpinmaya etsantin aidaun najankauwa nuiya; nunú aidau yapajinin nuigtú bushapau weena nigka nuninchauwai. ¹⁸ Nigka, niina waketajinig, chicham dekaskea dui pujutnak sujamsauwai, ni najankamu aina nuiyag dita dekatkau najankamua nunin agtinme tujamu asa.

Chicham tawa dutiksag takau aidau

¹⁹ Nuadui mina aneetaig yatsug aidauh, ashí aents aidauk chichaman shiig antumainai, nuniak waugtuk aimchau nuigtush wamak kajecheu amainai; ²⁰ wagki kajea duka, Apajuí eemtinig pegkejan takaak nuniatsui.

²¹ Nuadui, ashí pegkegchau nuigtú kuashat pegkegchau ayá duka idaisa-tajum, nuniakjum atum chicham antukuitjum nu emematsuk umiktajum; wagki nuuwai senchigtin atumin uwemtijamaina duka.

²² Tujash chicham tawa dutiksagmek takau atajum, ayatak antin aigpa, atumek pempeentuniki tsanunijaijum. ²³ Tujash chichaman antayatak nuna umiatsu duka, aents espejonum niimama nujai betekai, ²⁴ wagki niimen wainmamkauwaitak, weak kajimatui, wajuku niimtinna wainmamkae nuna. ²⁵ Tujash ni antukbaujin kajimattsuk, chicham umiktin agkanbaetan sukagtin pegkeja nuna shiig wainak dutiksag umiauk, ni dutikamujin shiig aneastinai.

²⁶ Makichkikesh atum ainajum anuiya Apajuí umigna iman anenmabi-atak, chichaman emetuachuk, nigki anentain tsanuak tu wekaewai, nunin asa ni Apajuin umigjai tawa duka wainkayai. ²⁷ Dekas Apajuí puyatjusa umigbau, nuigtú Apajuí iina Apají emtinish pegkegchaujish atsugbau iwainmabauwa duka juuwai: bitaik aidau, nuwa waje aidau waituinakui yayamua nu, nuigtú ju nugkanmaya pegkegchau aina dushakam takatsuk pujamua nunú.

2

Wiyakchash ujunauchish betek diistajum

¹ Mina yatsug aidauh, Jesucristo iina Apuji dekas imana nui dekaskeapi tautigmek, makichkia nu eme anentakjum tikichia duka junik diimait-sugme. ² Anentaimsagmi, atum ijunja batsatjumin makichik wiyakuch jaanch pegkejan iwagmagam anillo oro patakumau wayawaintai, nuniai makichik ujunauch jaanch mamusuchin nugkuaju dushakam wayawaintai, ³ nuniakuig jaanch pegkejan iwagmama nunú eme anentsajum: “Amek, ekeemtai pegkeja jui ekeemsata” takum, ujunauchia duka: “Amek anui wajastá, nuniachkumesh wi eketag jui tantam nugká pujustá” tumainaitjume. ⁴ ¿Nunú atumek etegdaiyajum nu, pegkegchau anentaiyai dutikdaiyatsjumek?

⁵ Mina aneetaig yatsug aidauh, antuktajum: ¿Apajuí etegkachukai ju nugkanmaya ujunauch aina nuna, dekaskeapi tabaunum wiyakuch agtinme, nuninak niina inamtaijiya nuna niina aneen aidaun anagkuauwa nuna jukitnume tusa? ⁶ Tujash atumek ujunauch aina duka inatsagme. ¿Wiyakuch aina duchaukai wainak waitkagmainak nuigtush ditak achig-makag jujamkiag chicham epegtainum etejamaina nu? ⁷ ¿Dita ainatsuak Cristo eme anentsa chichagtai atum nemagjum nuna pegkegchaun chichajuna nu?

⁸ Chicham umiktin dekas iman agagbauwa nu dekaskenum umiakjum: “Tikich aidaush amek anenmamsam aneeta”, tawa nu umiakjumek pegkeg takagme. ⁹ Tujash atum makichik aents eme anentakjum tikich junik diiyakjumek, tudau takaagme, aaja nuniau asajum chicham umiktina nu umichu weagme. ¹⁰ Wagki makichik aentskesh chicham umiktina nuiyan ashí umiyatak, makichkinum dewakug, chicham umiktina nuiyanak ashí umikchauwa nunin weawai. ¹¹ Wagki: “Tsanijinawaipa”, tiuwa duke: “Magkagtuawaipa” tiuwai. Nunin asamtai tsanijimchakmesh magkagtakmek, chicham umiktina nu intimjame. ¹² Atum chichajum dutiksagmek takastajum, chicham umiktin agkanmitkagtina nujai deka-jam atinush wajukmaina ainawa unisjumek. ¹³ Wagki suwimak atina duik, wait anenkagtugchajuk, dutiksaik wait anentam achagtinai; wait anenkagtamua nuuwai suwimak jumaina nuna wagagsauwa duka.

Dekaskeapi tabauk takaamunum iwainamainai

¹⁴ Mina yatsug aidauh, ¿makichik aents dekaskeapi tabau ajutui tayatak, takaamujin iwainatsu dusha wajinma yaimainaita? ¿nunú dekaskeapi tajai tawa duká uwentikmainait? ¹⁵ Makichik yatsug nuniachkush makichik umaakesh nugkumainji atsuju nuigtú tsawantai yuwá puju-mainjish atsujaig, ¹⁶ atum ainajum anuiyatijum chichagkujum: “Shiig aneasam wetá, nunikam jegaam jaanch nugkujam, yujumak shiig yuwata” tumainaitjum dusha, ¿wajinma yaimainaita? ¹⁷ Nunisag dekaskeapi tabauwa dushakam, takaamu atsakug jakauwa numamtinai.

¹⁸ Tujash tikichia nu chichaak: Aminak dekaskeapi tabau ajutjame, nuniai mina takaamu ajutui, iwaintugkacia dekaskeapi tabaugmia nu ame takatsuk, nuniamin wi iwaintuktage mina dekaskeapi tabaujua nuna wi takaamug aina nujai. ¹⁹ Ame Apajuik dekas makichki tame duka, pegkeg tame; nunisag iwanch aidaushkam dekaskeapi tuinawai, nuniayat-atak ishamak kujainawai. ²⁰ Anentainkachuh, ¿dekatsmek dekaskeapi tabauwa nu takaamu atsakug wainkaya duka?

²¹ Iina apají Abraham aajakua nunak Apajuí pegkeg diisui, niina uchijí Isaacan maa ememattatus altarnum patainiyuwa dui ²² ¿Wainjumek dekaskeapi tabauwa nujai dutikauwa nu, nuniku asa dekaskeapi tabaujiya duka ni dutikauwa dui pegkeg diijam asauwa duka? ²³ Aatus uminkauwai Apajuí chichame agagbauwa nui: “Abrahamak Apajuíyai dekaskeapi tujakuí, nuniau asamtai pegkeg diisui”, nuigtush “Apajuí kumpají” tutai aajakui tawa nu.

²⁴ Wainjumek, aentsuk ni dutika dui pegkeg diyam awa nu, ayatak dekaskeapi tabauwa nujaichu. ²⁵ Nunisag nuwa akiká takatai Rahab aajakua dushakam, dekamatus yujaun yajuak ikanag, tikich jintanum ishiakua dui Apajuí pegkeg diyam asauwai. ²⁶ Wagki wakan jiintaik iyashik jaawai, numamtuk jutii dekaskeapi tabaujiya nu, pegkeg aina nuna takamtijamchakuig jakauwa numamtin ainaji.

3

Idai pachisa tibau

¹ Mina yatsug aidauh, atum ainajum anuiyatigmek kuashat jintink-agtin atasgmek wakeyigpajum, wagki aents chichaman jintinkagtayatak betek umikchaju aidau imá senchi suwimkan susatin asamtai. ² Ashí aentstik kuashat dewau ainaji, tuja makichik aentskesh ni tabaujiya nuna dewachuk, nunuwai dekas aents pegkeja duka, ashí niina iyashinash kuitamaina nu. ³ Caballo aidauk itagkatnuji wenin apututaiyai umigtukti tusa, dutika ashí iyashí depetuka emataiyai. ⁴ Nuigtushkam barco aina nu anentaimsa diistajum; shiig muun akushkam dase senchi umpugká juwam auwai, dutiktaish timonji shiig piipich aig anunta nu tuwí wakegawa nui emauwai. ⁵ Antsag iina iyashinishkam idaik piipichi, tujash waji muun aidau kuashat dutikmainun chichauwai. Anentaimsa diistajum ikam muunta nuna jii yantsaji peemtuk ekemamaina imanai. ⁶ Nuigtush idaik makichik jiiya numamtinai, nunin asa ashí pegkegchau ju nugka juiya aina nuna takamtijamji. Iina iyashii aina nuwi awai, nuninaitak ashí iyashnak pegkegchau etugtamji, nuigtush jii apejata numamtuk wajau asa suwimak tuke atina nuwi etejami ashí iina pujutinash emegkaumainai.

⁷ Aents aidauk dekainawai ashí kuntin kajen aidau, chigki aidau, dapi aidau, nuigtú nayantsanmaya kuntin aidau unuinatnak; ⁸ tujash makichik

aentskesh idainak unuinamait sui. Duka makichkish itagmaitsui, tsegas jataiya iman piyak au asa. ⁹ Nunú idaiya duik Apajuí iina Apajiya nu pegkeg chichagji, nuaduik aents aidaush pegkegchau chichajuinaji, Apajuí niina niimejai betek najanamu aina nu. ¹⁰ Makichik wenua duik pegkeg chichagdayamu nuigtú pegkegchau chichagdayamush jiiñui. Yatsug aidauh, duka nuninuk amait sui. ¹¹ ¿Makichik yumi pukuni jiina nuish, yumi pegkejash yapaujaish jiiñmainkaih? ¹² Mina yatsug aidauh, ¿higuerash aceitunanash nejemainkaih nuniachkush uvash higonash nejemainkaih? Nunisag yumi pukuni yapakú jiina nuig yumi pegkejash jiiñmaitsui.

Dekas yachameta nu

¹³ ¿Atum ainajum anuish, yaita yachash nuigtú dekaush? Nuninuk shiig pujak, emematsuk pujus ni yachajin takaamujiya nuna iwainakti. ¹⁴ Tujash atum tikichdau diisá anentaimin kajeakjum shiwagmagata tabaunum waji dutikakjumek, eme anenmamainuk atsugtamjume, nuigtushkam dekaskea dusha atsugtamui. ¹⁵ Wagki nu yachameta duka Apajuinomia minatsui, nu yachametak nugkanmayayai, aentsú anentaimtaijiya nu nuigtú Iwanchdauwa nu. ¹⁶ Tuwí tikichdau diigsá kajejamu nuigtú shiwagmagamu awa, nuwi pachimdaebau nuigtú ashí pegkegchau aidau takaamushkam awai. ¹⁷ Tujash yachamet Apajuinomia ajamu aidauk, dekatkau pujutji ayatak pegkeg, nui tutitag wajachu, shiig awajkagtin, kakagchauch, wait anejatin wajasú, pegkeg aidaun takau, betek anenkagtin, nuigtú waitjuchu ainawai. ¹⁸ Agkan pujutnum kakanmamaina duka, agkan pujusá pegkeg takasbauji jukitnuijin takaak nuniawai.

4

Nugkanmayajai kumpamdaimainchau

¹ ¿Tuwiya maaniamu aina dusha minawa nuigtú atumek pampandayamu aina dusha? Duka atum pegkegchau wakegakjum anentaimin waitiajum duwi aniagme. ² Atumek makichik waji wakegakjumes jiwatsjume, tikichi wajiiji diigsajum kajeagme nuniakjum magkagtagme, nuniakjumes atum wakegamuk jumainchau dekapeakjum jiyaniagme, nuniakjum maaniagme. Tujash jiwatsjume Apajuí segachu asajum. ³ Segakjumes jiwatsjume, wagki pegkegchau anentaiyai segau asajum, atum pegkegchau wakegamu dutikata tau asajum. ⁴ ¡Aents umichu aidauwah! ¿Atumek dekatsjumek ju nugka juiyan imá senchi wakejuidauk Apajuin shiwaji wega duka? Makichik aentskesh nugkanmaya kumpaji atatus wakegauk, Apajuí shiwaji najaneawai. ⁵ ¿Nuniachkugmesh agagbaunum tawa duka wainkag anentaimtajum: “Apajuí Wakanin amasua nu shiig senchi akastamas wakejutpawai tawa duka?” ⁶ Tujash ni anentag sukagtamu imá muuntai. Nuadui agagbaunum: “Apajuik emebau aidaunak dakitus diyawai, tujash imanchauch aina nuna wait anentawai” tawai.

⁷ Apajuiaig suminkatajum; Iwanch tsanugmakuish antugkaigpajum, nuniagminig weak ukugmaktatjume. ⁸ Apajuí adjikatajum, nuniagmin niishkam adjitamkattawai. Tudau aidauwah, tudau takatak idaisatajum; atum Apajuí anentaimtayatkujum nugkanmayash anentaimtu wajautigme, nuninuk idaikujum dekas imá Apajuik umigkatajum. ⁹ Shiig aneasa dushit batsamtutsuk atumi tudaujum tsagkugtugta tusajum Apajuí

segakjum wake besemag batsamsajum senchi buuttajum. ¹⁰ Nuniakjum Apu Jesús wika shiig tudauwaitjai titajum, tajumin ni dekas aents iman etamtatui.

¹¹ Yatsug aidauh, atumek pempeentunisjumek pegkegchau chichag-daikaigpajum. Ni yachin pegkegchaun chichajuk nuigtú yachin chichaman patatak, chicham umiktina nuna pegkegchaun chichajui, nuigtush chicham umiktina nuna chichaman patatak tawai, tujash chicham umiktina nunú chicham patatkumek chicham umiktina nuiya umitsuk juez weakum tame. ¹² Chicham umiktinun sukagtusua nu nuigtú jueza duka makichki, uwemtan sukagtumain nuigtú suwimkan sukagtumaina nu. Tujash amesh, ¿ya asamea tikichish chichamash patatash wekaeme?

Emebau aigpajum

¹³ Yamai atum ju tinu aidautijum antuktajum: “Yamai nuniachkuish kashin nu yaaktanun weagmi, nunika nui makichik mijan pujusá sujaku kuichik jukiagmi” tajume, ¹⁴ kashinish tsawantash wajuku atatua duka dekachiatkujum. Wagki, ¿wajimpaita atumi pujutjumish? Atumek tuke yujagmia nunin ainagme, yamaikik wantinak machik asa megkaegama nunin. ¹⁵ Duka tutsok aaja tumainaitjume: “Apu Apajui wakegaku pu-juinakuik, ju nuniachkuish nunú dutikawagmi” tumain ainagme. ¹⁶ Tujash duka ememasa chichaakjum tu yujagme; ashí nu ememasa tu wekaebauk pegkegchauwai. ¹⁷ Pegkeg takata nuna deokayatak takaatsu duka, tudau takaak nuniawai.

5

Wiyakuch waitkagkagtin aidau

¹ Yamai atum wiyakuch aidautijum antuktajum. Buuttajum nuniakjum senchi untsumtajum, wajiijum megkaejamtai kuashat waittsagtin asajum. ² Atumin wajiigmik mamukaje, jaanchjum aidaunash mamuk amutjamkaje. ³ Atumi orogmik, nuigtú kuichkigmishkam pushugkaje. Nunú pushugkaja nu atum bakumatnunak iwaintugmawai. Nunú atumi iyashminak jiyai apemaina numamtuk awajtugmaktatui, duka tsawan aidau nagkaniagtina dui dutikam atin ijumjau asajum. ⁴ Aents aidau ajaka juwinak atumi ajagmin takasú aidau akikchamu untsumainawai, atum tsanujá akitsuk idaisamu asag; nunú juukaju aidau untsumaina nuna Apu ashí senchigtina nu antawai. ⁵ Atumek ju nugka juig shiig aneasa pujusugme atumin shiig awatama nu takaakjum, nunin asajum tsawan jegakuí kuntin maam atin duwegama imanikugme. ⁶ Atumek aents bakú ainagme, nuigtush utugchatji atsujush main ainagme makichkish ayamjumamainchau aina nu.

Emamkesa dakat

⁷ Nuadui yatsug aidauh, Apu Jesús taatnuji emamkesa dakastajum. Diistajum ajakan ajakbau wajuk dakawa yumi yutugti tusa nuigtushkam nugka pegkejan nejepati tusa. ⁸ Nunisjumek atumshakam ebetmamtajatum, nuniakjum emamkesjum dakastajum Apu Jesús minitnuk tikiju wajasú asantai.

⁹ Yatsug aidauh, pempeentunisjumek tutitag chichagdayá pujuigpajum, bakumaijum. Niyyai jutii juezjig, ni taatnuk namput wajaschae. ¹⁰ Mina yatsug aidauh, atumshakam duik profeta aidau kuashat waituinakush, emamkemas pujusag, Apu Apajui chichamenak etsejajakajua nuniktajum.

¹¹ Nuadui jutiik shiig anentuinaji waituinakush ichichmamag katsuntuina duka. Atumek antukuitjume wajuk Job waitiakush katsunjauwaita nu, nuigtú inagnamunmash Apu Apajuish wajuk dutikauwaita nu, Apu Apajuik wait anenmain diijatak wait anenkagtinai.

Ashí nagkaesauwa nu

¹² Tujash ashí juna nagkaesauwa duka, mina yatsug aidauh, atum dutikatnuk Apajuí adaisagmek tiigpajum, nayaimpikesh, nuggakesh nuigtú tikich waji aina nu adaisagmekesh. Dutikatjai takumek “ehé” tita, nuigtú dutikashtatjai takumesh “atsá” tita, bakumamainnum jegantaijum.

Apajuí augbau

¹³ ¿Atum ainajum anuiyash waitiaush atsuak? Nuninuk Apajuí ausati. ¿Dakujus pujaush atsuak? Nuninuk kantamak Apajuí emematti. ¹⁴ ¿Atum ainajum anuiyash jaush atsuak? Nuninuku iglesianmaya anciano aidau untsuktajum, dutikam Apu Jesusa daajin aceiteyai buuknum ukatuk Apajuí segattinme. ¹⁵ Dekaskeapi tabauwai Apajuí augbauwa nu etsagagtatui jaa nunak, nunikmatai Apu Jesús inankittawai, tudau takasú akush tudauji tsagkujamu atatui. ¹⁶ Nuadui tudaujum aidaush pempeentunisjumek etsegtumaktajum, nunikjum pempeentunisjumek Apajuí aujtunistajum etsagagbau aminjum. Aents pegkejan takauwa nu Apajuí augbau imá senchigtinai nuniau asa kuashat dutikmainai. ¹⁷ Eliasak jutii aents aidauti kakakchamu ajutkagtuina juninuk aajakui. Tujash shiig senchi Apajuin segauwai yumi yutugchati tusa, dutikam kumpatum mijan, nuigtú seis nantu yututsuk asauwai. ¹⁸ Nunitai ataktú Apajuin segauwai, dutikam yumi yutugmatai ajak nugkanum tsapainuk nejekajui.

¹⁹ Mina yatsug aidauh, makichkish atum aina anuiya dekaskea nuna idaiyas wekaegun tikichia nu awakeakug, ²⁰ dekaati nuna tunamajun awakea duka, jamainun uwemtika nuna, nuigtú kuashat tudau aidau tsagkugna nunashkam.

Pedro nagkamchaku carta agagbau

Kumpamkagtau

¹ Witjai Pedro, Jesucristo apostoljiyitjai, atum Apajui etegjamu aidautijum nugkem ukuakjum pampagjum tikich nugkanum Ponto, Galacia, Capadocia, Asia, Bitinia aina nui batsatutigmin kumpamjime, ² atum Apajui iina Apaji duik nagkamsa anentaimtusbauwa dutiksaik etejamu aidautigmin. Atumnak Wakania nujai pegkeemtijabiauui umigtuktinme tusa, nuigtú Jesucristo numpejai pegkeg etamkata tau asa. Anenjauch wait anenkagtau nuigtú agkan pujamu kuashat ajutjamtinme.

Apajui emematiagmi

³ Emematiagmi Apajui, nuigtú iina Apuji Jesucristo Apajiya nu, ni shiig senchi wait anenkagtau asa Jesucristo jakau nantakiuwa dui ataktú akiinuu ainagme, pegkeg ajutjamtina nuna dakastinme tujamu asa, ⁴ nuninak besemainchau, tsuapaemainchau, kagamainchau nayaimpinum jutiinu ukugtamsamu awa nuna jukitnume tujamu asa. ⁵ Atum Apajuiyai dekaskeapi tabau ajutamaina dui niina senchijin kuitamjamui, uwemat umikbau awa nuna jukitnume tujamu asa, nunak tsawan nagkanbau atina dui iwainaktinai.

⁶ Nuadui atumek shiig aneajume, nunimainaitkuig yamai ujumak tsawantai kuashat niimtinai waitkasa dekapsumu amainaitjume. ⁷ Atum aaja waitiamunum Apajuiyai dekaskeapi tusa anentaimainajum nu dekapsumu asantai, Jesucristo taatna duwi dekas eme anentsá diyaaku, nuigtú emematts diyaam atinaitjume. Oronum pegkegchau peetkau ajapna ayatak orok juwakti tusa, jiyai apeamu shiig pegkejama nuna nagkaesau wegawai atum Apajui dekaskeapi tajum duka.

⁸ Atumek Jesucristo wainkachu ayatkujum aneagme; yamaikish wainchayatkujum dekaskeapi tabauwai shiig aneakjum tumainchau imana nui dakujagme; ⁹ wagki atum dekaskeapi tajum nu inagamunum atumi wakanim aidau uwemtijatna duka tikiju awajsau asajum.

¹⁰ Profeta aidau etsegkajui atum anentag jukitnume tibau aajakua nuna, nunin asag shiig kuitamas aujujakajui nunú uwemtan pachis dekawagtas. ¹¹ Cristo Wakaniya nu emtika profeta aidau dekamtikawajui Cristo waittsatna nuna, nuigtú imanji atina nunashkam; dutikam tsawantan dekawagtas nuigtú wajukeamunum nunikitinna Wakaní Pegkeji diti puja dusha mamiktawa nuna dekasag wakegajakajui. ¹² Tujash Apajui dekamtikawajui ditanu achatnun jutiinu atina nuna; nunú aidau etsejujakajua nuna yamai yamajam chichaman nayaimpinmaya Wakaní Pegkeji awemamua nuna senchijin etsejuinawai. Nunú waji aina nuna ángel aidash wainkatatus wakejuinawai.

Pegké pujustinme tusa untsukbau aidau

¹³ Nuadui umintsá pujustajum atum dekaajum nujai, nuniakjum ebetmamjatajum. Nuniakjum Apajui wait anenjamu asa Jesucristo wantintai sujamsatna nunú ashí kajintsá dakastajum. ¹⁴ Uchi shiig umina iman asajum, eke Apajui dekachbaunum pegkegchau wakegamu takajakuitjum nunisjumkek pujusaigpajum. ¹⁵ Duka nunitsuk, atumin untsugmaku pegkegma ibau asantai, atumshakam pegkejam atajum, ashí atum wajuk

pujagme nuishkam, ¹⁶ wagki agagbaunum: “Wi pegkejam asamtai, atumshakam pegkejam atajum”, tawa dui.

¹⁷ Atum Apajuí, Apawah takugmek, makichik aentsun imá senchi wait anentsuk, aents aidau wajuk dutikawaje dutiksag betek suuwa nu, ashí tsawantai ju nugka jui pujuttajum dui puyattusjum umigkatajum.

¹⁸ Atumek atumi muunjum wainak pujujakajua nu pujut jukiú asajum nunisjumek batsatutijum agkanmitkamuitjum duka dekagme, waji besen aidau oro, kuichik aina nujai chu, ¹⁹ Cristo numpe shiig pegkeg uwig makichkish tsuwatji atsugbau nuigtú tunamagchau aajakua imana nu, ²⁰ yaunchuk nugkash najaneatsaig nunikti tibau aajakua, tujash yamai tsawan nagkanbauwa jui atumi anempau asa wantintugmake. ²¹ Cristo nunikbaunum atumek Apajuik dekaskeapi tajume, niina inanki nuigtú ememattai awajsauwa nui, nunin asamtai atumek dekaskeapi takujum Apajuinumagiag dakagme.

²² Yamaik atumek dekaskea nu umidau asajum pegkemtikbau ainagme, yachi aidaujai dekaskenum aneenitnume tabaunum, nuadui atumek pempeentunisjumek anentai pegkejai aneenitajum, ²³ wagki atumek ataktú akinau ainagme, jaka besen aina nujai chu, Apajuí chichame jachau iwaku tuke auwa nujai. ²⁴ Wagki agagbaunum tawai:

“Ashí iyashik tuke dupayai,

nuigtú ashí aentsú imanjiya duka, dupá yagkujijai betekai.

Dupag kagawai, nunitai yagkují iyawai;

²⁵ tujash Apu Apajuí chichamega duka tuke auwai”.

Juuwai yamajam chicham atumin etsegkamua nu.

2

¹ Nuadui idaisatajum ashí pegkegchau aidau, ashí waitjamu aidaush, tsanumat, tikichdau diigsá kajet, ashí wainka tsanumkagtut aidaushkam.

² Nuniakum uchi yamá akiintsau muntsun muntsuatatus senchi wakejuwama numamtuk, Apajuí chichame shiig pegkeja nu wakejitajum. Nujai wakanmin tsakaakjum uwemat jukimnujum. ³ Apu Apajuinu pegkeja nu wakegakjumek.

Kaya iwaku

⁴ Cristo, Kaya tuke pujuwa imana nujai ijutkau atajum, nunú kaya numamtina nuna Apajuí etegka tikichin nagkaesau emauwai, tujash aents aidauk dakitug idaisajui. ⁵ Atumshakam nunisjumek kaya numamtin iwaku ainagme, nunin asagmin wakannumag Apajuí ememattai jega jegamkam pegkegma iman etanjume, Jesucristo jutinií mantamna iina tudauji utsanjamkau asamtai Apajuí shiig awagma dutiksaik iina wakaní susata tabaunum. ⁶ Nuadui Apajuí chichame agagbauwa nui:

“Diistajum, wi yaakat Siognum* apugjai makichik kayan

jegá ichichkatin etejamu, shiig pegkeja nuna;

niinií dekaskeapi tauk makichkish wainkag juwakchatnai”,† tawai.

⁷ Atum dekaskeapi tautigminak, nunú kaya duka shiig pegkejai; tujash niinií dekaskeapi tuinatsu nuanuig:

“Kayá ekeng jegamin aidau, kaya pegkegchauwai tusag dakitajua nunú, kaya dekas jegá ichichkatin apujtutia iman wajasé”.

* 2:6 “Siognum” tawa duka diistá Ro. 9.33. † 2:6 Is. 28.16.

⁸ Nuigtushkam:

“Nunú kaya nunak kuashat aents tukumak iyajagtinai”, tawai. Wagki tukumaina duka chichama umiinachu asag nuninawai, aatus nunikti tibau aina nu.

⁹ Tujash atumek Apajuí niina aentsji atinun etegkauwa nu weantu ainagme, sacerdote rey takajin, Apajuí aentsji pegkejam, Apajuí sumaka jukimu. Jutiinak pegkegchau takainaku suwenum batsatjin tsaaptin dekas imana nuna amasui, Apajuí takasbauji shiig pegkeja nuna etsegkatnume tujamu asa. ¹⁰ Atumek yaunchkek Apajuí aentsji aajakchawaitjume, tujash yamaik Apajuí aentsji wajasugme. Yaunchkek Apajuí wait anen-jachbau aajakuitjume, tujash yamaik wait anenjamjaje.

Apajuí aentsji aidau

¹¹ Anetaig aidauh segajime, ju nugka juig tikich nugkanmaya jeenchauwa numamtin ainajum nuutigmin, iina iyashí pegkegchau wakega duka idaisatajum; nunú aidauk iina wakanijai maaniau asamtai, ¹² Apajuí nemajuinatsu nujaiig shiig kuitamamka pujustajum. Jutii pegkegchau takauwa iman chichagtamaina dusha Apajuí ememattinme, tsawan uwe-mau atina nuaduish atum pegkeg takasbaun diigtamsag.

¹³ Apu Jesús nemaju asajum ashí rey aina nuadui sumimkatajum, ni imá wagaku asamtai, ¹⁴ nuniachkugmesh gubernador aidaun, aents pegkegchau takaidaun suwimkan susati tusa awemamu aina dushakam nuigtú pegkejan takaidaunak eme anentus diísti tibauwa nu. ¹⁵ Wagki juuwai Apajuí wakegamua duka: pegkejan takainak aents dekachu, shiig anentaimkachu aina nunash itatmitkaktinme tawa nu.

¹⁶ Aents agkanmitkamush wajuku amainaita nunin atajum, tujash nunú agkan pujamu ajutjama dui pegkegchau takasta tachamunum, Apajuí inake asajum. ¹⁷ Ashí ajantusjum diístajum. Yatsum aidaush aneetajum. Apajuish eme anentsá diístajum. Reyshkam ajantusjum diístajum.

Cristo waittsauwa nunisaik waitmain

¹⁸ Inak aidauwah, atumi apujum ashí ajantusa diyakjum sumimjukta-jum; ayatak pegkeg nuigtú kakagchauch aina duke dutiktsuk, dakitmain pegkegchau aina dushakam. ¹⁹ Atum pegkegchau takasbauk atsgutamaig waitkagmainakuish, Apajuí nemajin asajum katsunjatajum. Duka Apajuinak shiig awagmawai. ²⁰ ¿Wají imanaita ii pegkegchau takasbaunum suwimak juwayatku katsuntajai tabaush? Pegkeg amainai, ii pegkeg takamunum suwimak juwaku katsuntamuk, nu Apajuin shiig awagbau asamtai. ²¹ Nuna nuniktinme tusa untsukbau ainagme, wagki Cristushkam jutii ní waittsauwai, atumnash ni wajukauwaita nunisag waittsatnume tusa iwaintugmak. ²² Cristuk makichkish tudaunak takaschauwai, makichik aentsnakesh tsanugchauwai, ²³ nigka pegkegchau chichag-mash, pegkegchaunakesh aimkachui. Imatika waitkamash, iikmakagkesh chichakchauwai, ayatak Apajuí dekaskenum pegkejan takauwa nuna idaitujakui. ²⁴ Nigki iina tudaujinash niina iyashin jukiuwai numinin achinjauwa dui, tudau takatnak idaiyinak, pegkeja nuna takastinme tujamu asa; niina iyashí tsupinjauwa dui atumek tsagaju ainagme. ²⁵ Wagki atumek tuke uwig wagakujai betek aajakuitjume, tujash yamaik Jesucristo atumi wakanim aidaun kuitamaina nui wakitkiugme.

3

Nuwenau aidau umimain

¹ Nunisjumek atumshakam, nuwatkamu aidautigmek atumi aishum aina nuig sumimkatajum, Apajuí chichamega nuna dekaskéapi tachau akushkam, chicham ujachmaitak atum pujamun diisag wakekatnume, ²dekaskenum Apajuí umigkujum imagnisa pujamun waipainak. ³Atumek jaanch pegkeg iwajamu aina ibau nugkugjum awantak iwagmamjatasagmek wakemaitugme. Intashmesh tikich pegkeg diigsatnume tusagmek iwagmaitugme, nuigtú oro aina imanjai iwagmamjatasagmesh wakemaitugme. ⁴Dekas iwagmamata shiig pegkeja duka anentainum nuigtú wakannumash kakagchauch shiig anentaimkau ata nuuwai, nuna Apajuik wakegas diyawai. ⁵Nuwa pegkejam duwik batsamajakajua dushakam, Apajuiyaig kajinas anentaimaidau asag, imá aishinig sumimajakú ainawai. ⁶Sarashkam Abrahaman umijak: Mina apug, tujakui. Atumek niina nawanji asajum pegkeja nu takaakjum shiig puyatkas pujumain ainagme. ⁷Aishmag aidautigmeshkam nuwemjaig shiig antugdaikajum pujustajum, nuwak kakaakchau asamtai. Apajuishkam nuwanash wait anentau asa pujut nagkanchaun susauwai. Atum nuwemjai shiig pujushtaik, Apajuishkam ni augmash antugtambachagatatui.

Ashí Cristo nemajuidau nunimainji aidau

⁸Inagamun tajime, ashí atumek shiig anendaisa pujustajum, betek nuninuk anentaimkau, dekaskenum yatsut anendaisajum aneniakjum. Wait anenkagtin, nuigtú imanchauch atajum.

⁹Pegkegchau awajtamainakuish, pegkegchaunmag iikaigpajum, pegkegchau chichagtamainakuish pegkegchau chichagkaigpajum. Duka dutiktuk pegkeg chichagkatajum, nuna nuninak pegkeg yumigkia nuna jukitnume tusa untsukbau ainagme.

¹⁰Wagki: “Ni pujutan aneas diyak, pegkeg tsawantan dakujus inagkeaktatus wakegawk,

pegkegchau chichatnak idaisati, tsanumsá chichat aina nunashkam.

¹¹Pegkegchauk tupanjata nuniakum pegkeja nu takastá, agkan pujuta nu egaktá nuniakum duke wejité.

¹²Wagki Apu Apajuik pegkejan takaina nuna kuitamak, dita Apajuí augbaunash antujui;

untsu aents pegkegchaun takaina nunak Apu Apajuik diitnash dakitawai”.*

¹³¿Yaita dusha pegkegchau etamainush, atum pegkeja duke takagminish? ¹⁴Tujash atum pegkeg takaakjum waitiakjume shiig aneestajum. Makichkish ishamaigpajum nuigtush uwakmamkaigpajum; ¹⁵duka nunitsuk, atumi anentaiminish Cristo atumi Apujum anentsajum eme anentajum, nuniakjum tuke umintsau atajum atum ayamjumaktin, kakagchau nuigtú ajantsá diijatjukum, atum dakamu ajutjamaina nuna pachis tujamainakui ashí ujamaina nu. ¹⁶tujash pegkeg anentaiyai nuigtú eme anentsajum dutikatajum, atum Cristo nemaju asajum shiig pujajum nuna pegkegchau chichagtamainak wainak tsanumjutpaina nu datsagtinme. ¹⁷Wagki pegkeg takaaku waitiamu nu imá pegkejai, Apajuish aatus wakegakuig, pegkegchau takaaku waitmaina nu.

Jesu Cristo iina iwaintugmak waittsamu

* 3:12 Sal. 34.12-16.

¹⁸ Wagki Cristushkam tudau aidaunum makichkia jakauwai, pegkejan takauwa nu pegkegchau takau aidaunum, Apajuiyai jujamkita tau asa. Iyashinig jaak waittsauwai tujash aneantui Wakaní Pegkejiya nuna senchijin, ¹⁹ nunik aents jakau aidau wakaní tuke achikbaujai betek batsatbaunum wee chichaman etsegkauwai, ²⁰ yaunchuk Noé pujusmatai batsamajakú intimkiaju aina nuna, Apajuí waugtutsuk arcan najantai dakajakua dui, nu nuniamunum ujumak aents, ocho yuminmag uwem-jajui. ²¹ Nunú yumia duka yamimainag nuna iwainawai, nu aaja nuniaku yamai uwemat juinag nu. Yamimamuk iyashnak pegkeg ematsui, ayatak anentaimtajuish pegkeg Apajuí emtinish atajai tabauwa nuuwai; duka Jesucristo nantakiuwa dui uwemnawai, ²² nigka nayaim waka, Apajuí untsujin eketui; niinig sumimtikamui ángel aidau, wakan senchigtin aidaush, agkajunum inamin aina dushakam.

4

Apajuí don sujamsamu shiig kuitamka takamain

¹ Cristo jutiiní niina iyashin waittsau asamtai, atumshakam nujai betek nuniktasajum anentaimsatajum; wagki ni iyashin waittsauwa dui tudaunak inagnakui, ² wajupa tsawan pujumain awa nunak, niina iyashí senchi wakegamun takaa pujutsuk, Apajuí wakegamua nunak takastinme tujamu asa. ³ Kuashat tsawantai aents Apajuí anentaimtuchu takaina nu takaaakuitjum duka idaisatajum, pegkegchau tunamatja pujujut aidau, iyash senchi wakegamu aina nu, nampeamu aidau, fiestanum nampeaku yuamu aidau, uma umakua weamu nuigtú apajuimtai dakitmain aina nu emematut aina dushakam. ⁴ Nunú nuniajumin aents atumjai pegkegchau takajakú aidauk, atum ditajai ijunja pegkegchau takat dakitamu waipainak, wagkag aninawa tusag pegkegchaun chichagtamainawai. ⁵ Tujash dita takasbaujinak etseptumakagtin ainawai, iwaku aidaun nuigtú jakau aidaunash titin uminas puja nui. ⁶ Nuadui yamajam chichama duka jakau aina nuish etsegkamui, ashí aents jau aina nunisag jakau ainakush, yamaik wakaninig Apajuijai tuke pujustin atinme tusa.

⁷ Ashí waji aina nu nagkankatnuk tsawantak tikiju wajasé, nuadui atumek shiig ebetmamja pujusjum, puyatjusjum Apajuí aujú batsamtajum. ⁸ Ashí ju aina nuig atumek pempeentunisjumek senchi aneenitajum, wagki anenka nuuwai kuashat tudau aidaunash tsagkugkagta duka. ⁹ Atumi jeeminish pempeentunisjumek judaitajum augmatdaitsuk. ¹⁰ Makí makichkitijum don jukiú ainajum nujai tikichish yaigtajum, shiig kuitamka takastajum Apajuí anentag makí makichik niimtinun amasajua nu. ¹¹ Makichik aentskesh chichaakug Apajuí chichame tawa dutiksag chichaktí, makichik aentskesh takaakug Apajuí senchí suwa nujai takastí, ditikamunum Apajuiya nu eme anentam atí; nuniakjum Jesucristo yaimpasmatai ememattajum, Apajuí senchigtin ajumaish tuke atina nu. Aatus atí.

Cristo waittsauwa nunisaik waitmain

¹² Aneetaig aidaush, utugchat katsunmainchaunum jegakjumes anentai jegagchamnuk anentaimtigpa, makichkish waji nagkaechataiya nunin nagkaetamu diisaigpajum. ¹³ Duka nunitsuk, Cristo waittsauwa nunisjumek waitiau asajum shiig aneatajum, nuniau asajum ni imanjin

wantinkatna duish shiig senchi aneakjum dakujusminjum. ¹⁴ Cristo nema-jin asagmin pegkegchau chichagtamainakuish atumek shiig aneastajum, shiig aneastajum Apajuí Wakaní imana nu atumin tuke pujau asamtai.

¹⁵ Nunin asamtai atum ainajum anuiyag magkagtin, kasa, pegkegchau takau, tikichdaun niimjuinak waitú yujau aina nunikag waittsashti.

¹⁶ Tujash makichkikesh Cristo nemaju asa waitiakug datsamigka, nunitsuk nu waitiamua dui Apajuin ememattinme.

¹⁷ Apajuí aentsji aidaute waittsatnuk yamaik nagkamnae, aatus nu jutiini waitiamu nagkamna aniaish, yamajam chicham Apajuinua nuna umiinatsu dusha, ¿wajuk nagkankatnuk ainawa? ¹⁸ Pegkejan takaukesh tujayatak uwema nuniaish, ¿Apajuí anentaimtuchu nuigtú tudau aidaush wajuk juaktinuk ainawa? ¹⁹ Nunin asamtai, Apajuí wakega dutiksag waituidauk, ditá wakaní aina nunak Apajuí najankagtin betek umina nuna idaitumainai nuninak pegkeja nunak takamainai.

5

Anciano aidau dutikmaina nu

¹ Anciano aidau atumjai pujuina nuna segajai, wishakam dita anciano aina nunin asan, Cristo waittsamu aidaunash wainkauwaitjai, wishakam ni jui taak niina imanjin iwainaktina nuish pachinkatin asan. ² Apajuinu atumjai ijunaina nu kuitamkatajum, atumin idaitugmasua nu, duka shiig wakesajum dutikatajum; dutikata tujamkui nunitsuk, nuigtush kuichik anentaimtusa dutikawaigpa, Apajuí wakega dutiksagmek dutikatajum. ³ Atum kuitamjum nu atumdaus asamtai utugmaina dutikawaigpa, duka nunitsuk dita pegkeg iwaintukta tabaunum kakanmamsatajum. ⁴ Nuniau asajum, pastor ashí nagkaekagtasua nu wantinkatna dui atsejutai duka najanamú kagama nuninchau tuke atina nu jukitnaitjume.

⁵ Nunisjume datsauch aidauwah, anciano aina nui sumitkau atajum; ashí pempeentunisjume sumimdaimain ainagme imanchau anenmam-sajum, wagki:

“Apajuik emebau aidaunak dakitus diyawai, tujash imanchauch aina nuna wait anentawai”, tau asamtai.

⁶ Nuadui imanchauch iwainmamkatajum Apajuí senchigtina nui, nuniag-min tsawan jegatai ni eme anentsá diitai etamti. ⁷ Ashí atum uyumamuk Apajuí idaitustajum, wagki ni atumnak kuitamjamu asamtai.

⁸ Aneaku niimkau atajum, atumi shiwajum iwanchia duka pegkegchaun takamtijamsatatus, ikamyawa kajeak shinuwama imatak teentugmawai;

⁹ nuniau asamtai dekaskeapi tabauwai tajitkatajum, ashí nugkanmaya atumi yatsum aidaush, atum waitiajum nunisag waituina nu dekaidau asajum. ¹⁰ Tujash Apajuí ashí wait anenkagtina nu, niina imanji tuke atina nui Jesucristui etegtamjauwai, dutijamau asa atum ujumak tsawan waittsa inagkeakiagminish Apajuí pegkeg etabiagtatui, dutijama senchijin amastatui ebetmamag niini tsujamainchau atinme tusa. ¹¹ Nigki ajumaish tuke senchigtin atí. Aatus atí.

Inagnaku akatmabau

¹² Junak Silvano, yatsut betek umina nu yaintsamtai ujumak chichaman agatjajime atumesh anentaim ichichiagtajum, nuniakjum Apajuí wait anenkagtamuji dekaskea nuig ebetmamjatajum tusan ujaktasan.

¹³ Iglesia Babilonia awa nu, atumjai betek etejamua nunú nuigtú Marcos mina uchijua imana dushakam kumpamjamainawai. ¹⁴ Makí makichik

pempeentunisjumek aneenisjum kumpamdaiyatajum. Ashí atum Cristunu
aidautigminak shiig agkan anentaimsa pujut ajutjamtinme.
Aatus atí.

Pedro awentsaik carta agagbau

Kumpamkagtau

¹ Witjai Simón Pedro, inakaitjai nuigtush Jesucristo apostoljiyaitjai, iina Apajuiji Uwemtijamin nuigtú Jesucristo pegkejan takauwa nu dekaskeapi tabau shiig pegkeg jutii ajutjama duke ajutjamu asagmin atumnash kumpamjime. ² Iina Apají Apajuí, iina Apuji Jesusjai anenjauch wait anenjamag shiig agkan pujutan amastinme. Atumek ni pachisjumesh shiig dekau asagmin.

Jesusan nemagkaju aidau pujumain

³ Apajuí niina senchijin ashí iina pujutjin atsumamua nuna nuigtú nigki puyatjusa umigta nunash sujamsauwai; nigki niina imanji nuigtú ni takasbauji shiig pegkeja nunash dekatnume tusa etegtamjauwai. ⁴ Nunú senchik ashí pegkeg tikichin nagkaesau aidaun ni anagtamauwa nunash sujamsauwai; dutikamu asag ju nugka jui pegkegchau wakegat aina nunak agkanmagawag Apajuí wajukuíta imanuk atinme tujamu asa. ⁵ Nuadui atumshakam kakanmamainaitjume dekaskeapi tabauwa nu, pegkeg takamua dusha ajití tabaunum; pegkeg takamua nu, dekata dusha ajití; ⁶ dekata nu, iik kuitamamta dusha ajití; iik kuitamamta nu, waugtackchau ata dusha ajití; waugtackchau ata nu, Apajuí puyatjusa umigta dusha ajití; ⁷ Apajuí puyatjusa umigta nu, yatsut anendaisa anenita dusha ajití; yatsut anendaisa anenita nu, aneenit ajití.

⁸ Ashí ju aidau ajutjamainakuig nuigtush takamtikamak, nuní senchi iina Apuji Jesucristo dekatnum yaimpaktatjume, nuniau asajum atsumchataig nuigtú wainkagmek juwakchattagme. ⁹ Tujash juna betek uminachuk aents wainmachujai betekai, nuniachkush atushat wainmachua nuninai, yaunchuk tudauji aajakua nuna Apajuí tsagkujamunash aneachu asa. ¹⁰ Nuadui yatsug aidauh, atumek Apajuí untsukbau nuigtú etegkamu asajum nuig ebetmamata tabaunum kakanmamsatajum; wagki aaja nuniakjumek kakajus tudauk takaschattagme. ¹¹ Nuniau asajum shiig anentsá, iina Apuji Uwemtikagtin Jesucristua nuna inamtaiji tuke atina nu awayam atatjume.

¹² Nuadui junak tuke aneemtiksanké atatjime dekagminkish, nuigtú dekaskea nu atumin ajutjamjum nui ebetmamjau ainagminig. ¹³ Wi iwaaku pujag duik, tuke aneemtiksanké amainaitjim duka pegkejai. ¹⁴ Wagki dekajai dukap pujutsuk jakattag nunak, iina Apuji Jesucristo dekamtijuama nunisnuk. ¹⁵ Tujash ashí wi dutikmainnak dutiksan dekapsatjai, wi jakamtaish nunú aina nunak, tuke aneaku atinme tau asan.

Cristo imanjin wainkaju aidau

¹⁶ Wagki iina Apuji Jesucristo ashí ni senchijijai minitna nu pachisa atum dekamtikauwaitag duka, aents anentaimsa augmattsamu aina nuninchauwai, duka iina jiin niina imanji wainkauwaitag nu tibaiji, ¹⁷ ni Apají Apajuiya nu eme anentus nuigtú tsaaptin ema awajus, nu tsaaptin shiig pegkeja nuiya chichaman akupjak: “Juuwai mina uchig anetaijuk, wi etegkamu”, tiuwa nu. ¹⁸ Nu chicham nayaimpinmayag jutii antukbaiji, nijjai muja pegkegma nui batsamsaja.

¹⁹ Nuigtushkam chicham dekaskea nuna profeta aidau tibauwa nu ajutamji, nunú emamkesjum dekatajum, dita chichakbauwa duka lámpara ekemamak suwen tsaaptin emama numamtinai, nunin asa Cristo yaya etsawamak tsaaptin wegama imana nu atumi anentaiminish tsaaptin etamtatui. ²⁰ Tuja ashí dekatkau dekamainaitjum duka: Atak uminkatin chicham Agagbauwa duka, makichik aentskesh ni wajuk anentaimua nu tichamu ainawai, ²¹ nu atak uminkatin tibauwa duka, makichkish aents wakegak tibau ainatsui, duka aents pegkejam Apajuinu aajakajua nuna, Wakani Pegkejiya nu ujaam tiaju ainawai.

2

Maestro waitá jintin aidau

¹ Israelnumash wait profeta aidau aidau aajakajui, atum ainajum nuish maestro waitá jintin aidau agtina nunisag. Ditak dekamainchaun jintidiagtinai ditá anentai pegkegchauwa nuiyan, aatus nuninak Apu Jesús ditan agkanmitkauwa nunash dakitiagtinai; nuninai pachichbau dita bakumatnuji jegajiagtinai. ² Kuashat saetukagtinai datsanmainun takaina nuna, nuninak dekaskea nunak pegkegchau chichajiagtinai. ³ Kuashat kuichik ajutti tabaunum waitá jintinai jujutjabiagtinai; tujash dita bakumatna duka yaunchuk nagkamas umigkamui, dutikamu asamtai dita megkaekatna duka dakas ajawai.

⁴ Apajuik ángel aidau tunamakajunak tsagkuujachui, ayatak suwimak tuke atin suwea nui achijá utsauwai, tsawan jegatai suwimkan susata tau asa. ⁵ Nuigtushkam Apajuik yaunchuk aents ju nugka jui batsamajakajua nunakesh tsagkugsuk, diluvió awetiujwai aents pegkegchau takau batsamajakajua nuna, dutikak Noé pegkejan chichagkagtujakua nunak, nuigtú siete aents aidaujai uwentijauwai. ⁶ Aikasag yaakat aidau Sodoma nuigtú Gomorra aina nunak suwimkan suwak apekui, dutika yuku awajsauwai, nunak atak aents pegkegchau takaidau batsabiagtina dusha wainkatnume tusa iwainak dutikauwai, ⁷ tujash Lotnak pegkejan takau asamtai uwentijauwai, aents pegkegchaun takagtai anentaimak waitujakua nuna, ⁸ wagki nunú aents pegkejan takau ditajai ijunag pujujakua duka, pegkejan anentaima nunak waitiau kashí kashinig pegkegchau takagtai wainak nuigtush antau asa.

⁹ Apu Apajuik niina puyatjus umijuina nunú utugchatnum jegatai agkanmitkatnak dekawai, dutikak aents pegkegchau takaidaunak ayatak kuitamui tsawan jegatai suwimkan susamig tusa, ¹⁰ nunak iyashí pegkegchau wakega nunak takainak, ni inabaujiya nunash wainkaya nunin diina nuna dutikatnai. Nunú aina duka antumtikmainchau nuigtush emebau asag, senchigtin wagaaku aina nu pegkegchau chichagtanash ishamainatsui, ¹¹ nuninai, ángel ditá nagkaesau dekas senchigtin aina dukesh, dita suwimak jukitnun pachisagkesh pegkegchauk chichajuinatsui Apu Apajuí eemtinish.

¹² Tujash nunú aents aidauk ditakesh antachiatak waji pegkegchau aidau chichainawai; ditak kuntin anentainchau ayatak akiinawag maam megkaega nuniktin ainawai, ¹³ dita pegkegchau takasbaujin suwimkan juinak. Nunú aidauk pegkegchau nuigtú tsuwapaekau ainawai, nunin aidau atumjai ijunag yuinak shiig anenawai ditá pegkegchaujai aina nujai.

¹⁴ Nuwa aidau nash tsanijimat anentaiyai dii yujau ainawai, nunidau asag tudau takatnash yawetuinatsui; nunisag aents imagnis Cristun

nemajuinatsu nunash tsanú yujainawai, pegkegchau aidau wakeeta nunak unuimatjau asag, tikima aents pegkegchau ainawai. ¹⁵ Ditak pegkeg takatnak idaisag, Balaam Bosora uchiji nunikua nuna wejuinak dewakaje, duka pegkegchau takaamujin akiam atatus wakegajakui, ¹⁶ nuniau ni pegkegchaujini jiyankauwai; makichik burro kijin aentsmitkatai, chichachuitak, aentstijai betek chichakui, dutikak profeta anentaimkas nuniamujin idaimitkasui.

¹⁷ Nunú aidauk yumigmat kuyuuauwa nunin ainawai, yujagmin dase umpui juwama numamtin, nunú aidau batsamsati tibauk shiig suwe kanchi wajas awa nuuwai. ¹⁸ Ditak ememas chichainak nuigtush wainak chichau ainawai; nuninak wakegat pegkegchau iyashnum takanitan anentain egketin ainawai, aents yamá pegkegchaujini idaiyas pujuina nuna. ¹⁹ Nuninak anagkuinawai agkan pujuta nuna, pegkegchau takatnum achikbau ainayatak; wagki ashí achikbau aina duka depetkamu asa nuniawai ²⁰ Jutii Apuji Jesucristo Uwemtikagtina nuna nemajak, pegkegchau ju nugkanmaya takatan idaisauwaitak, ataktú dita takajakbaujin waketuinakug, depetkamu weawai, nuniau asa yaunchuk aajakbaun nagkaesau pegkegchau weawai.

²¹ Ditak imá pegkeg takat pegkeja nunak dekamainchaunas dekau aajabiatai, chicham pegkejam umiktin susamua nuna dekauwaitak idaiyina nunitsuk. ²² Tujash ditai proverbionum dekas tawa duka uminui: “Yawak iyakbaujin pempeentinaí, kuchi imaimush kuchan tadaetinaí”, tawa nu.

3

Jesucristo minitnuji

¹ Aneetaig aidauh, juuwai carta awentsanuk agatjim nu. Nunú mai agabauwa nuig wakekajai, shiig anentaimtijatasan taja dui ayatak pegkegnak anentaimainak, ² profeta pegkejam aidau tibauwa nuna adeagtinme, nuigtú chicham umiktinun Apu Uwemtikagtin tibaun apóstol aidau sujamsamua nuna tusan.

³ Dekas dekatkauk ju dekamain ainagme, tsawan nagkantina duik, iyash pegkegchau wakegamujin takamtikin aina nu, dushiktamas chichagta-mainak ⁴ tiagtinaí: “¿Taatnaitjai tusa anagkagtuauwa dusha wajukae? Wagki iina muunji jinawagmataish, ashí waji nagkamsa najankamua duka yamaikish nunisag ainajama” tusag.

⁵ Nunú aents aidauk, yaunchuk tsawan aajakua imanui nagkamas Apajuí nayaimpin najana niina chichamenig nugkan yuminmaya akankamu, yuminmag egketka nunak tuke aneas dekachu wajukmaina nuninawai. ⁶ Yaunchuk Apajuí yumin yutumtikag ashí nugkan amugmatai, aents nui batsamajakui duka ashí jinawajui. ⁷ Tujash nayaim, nugka yamai aina juka, niina chichamenig esaktin kuitamkam awai. Nunú jiiya nu apeatnai aents pegkegchau takau aidau suwimak suwamu tsawan jegatna dui.

⁸ Tujash kajimatigipa aneetaig aidauh, Apu Apajuyiaig makichik tsawantak mil mijana nuninai, tuja mil mijanak makichik tsawanta nuninai. ⁹ Apu Apajuik ni anagkagtuamujinak umitskek idaisashtatui, ujumak aents taashtina nunin anentaimtuina nunak, nuninaitak nigka waugtuk dutikchauwa dui, makichikish megkaekashtinme, ayatak pujutjin yapajiatnume tusa aniwai.

Yamajam nayaim, yamajam nugka

¹⁰ Tujash Apu Jesús minamuk kasa pachiachbau kashi miniyama numamtuk atinai; nu tsawantinig nayaim aidauk shiig ishamainun kedegtuk megkaegainai, nui ayá dushakam esakag yuku waigkagtinai, antasag nugkashkam ashí nui takasbau ayá dushakam esakagtinai.

¹¹ Ashí nunú aidauk aatus utsankagtin asamtai, atumek pegké pujakjum, puyatjusjum umigmainaitjume, ¹² nuniakjum shiig senchi wakejusjum tsawan Apajuí minitnujiya nu dakastajum. Nu tsawantinig nayaim aidauk jiiyai apekbau atinai, tuja nui ayá dushakam jii keetai yumimeakag megkaejagtinai. ¹³ Tujash jutiik, ni anagtamamu yamajam nayaim aidau nuigtú yamajam nugka nu dakainaji, ayatak pegkejak takaamu atina nu.

¹⁴ Nuadui aneetaig aidauh, nunú nuniktina nu dakainakjum, kakanmamsatajum niina emtin shiig agkan pujakjum, pegkegchau atsugbau nuigtú nuninai tusaish tumainchau wantinkamnujum. ¹⁵ Adeagtajum iina Apuji emamkemas dakama nunak, uwemjatnume tabaunum aniaawai. Juna pachis iina aneetaiji yatsug Pabloskam, Apajuí dekat susamua dui agaje, ¹⁶ ashí ni carta agagbauwa nuig juna pachis chichawai, nunú aina nuiya shiig antumainchaush aina nuna, aents dekachu aidau nuigtú ebetmamjachu aina nu yajupenawai, dutiksag tikich agagbau aina nunash dutikaidau asag, dita bakumatnujin umigmamainawai.

¹⁷ Nuadui aneetaig aidauh, atumek emtika dekau asajum kuitamamkatajum, aents pegkegchau aina nu tsanugmajagmatai wejakjum, atum ebetmamja pujamu idaisaijum. ¹⁸ Nunitsuk, dekas tsakagtajum anentag jukimua nui nuigtú iina Apuji Jesucristo Uwemtikagtina nu dekatnum, nigki yamaish nuigtú tuke pujustin tsawan jegatna nuish ememattai atí.

Aatus atí.

Juan nagkamchaku carta agagbau

Chicham pujutan sukagtin

¹ Cristo chicham pujutan sukagtin yama nagkamtin aajakua nunú chichaamu antugkauwaitji, ni iwainaja takaamush iina jiin wainkauwaitji nuigtú ii uwejinish achikaish dekapasau ainaji. ² Nunú pujutan sukagtin aentsmaga akiina wantinkauwai nunikmatai wainkau aidauti juwai pujut tuke atinun sukagtina duka tusa etsegtuinaji, nigka yaunchkek niina Apají Apajuijai pujujukua nunú wantintugmakui. ³ Jutii wainkau aidauti nuigtush antuku aidauti etsejuinaji atumesh jutiijai ijutkau atajum tau asaja; wagki jutiiik iina Apajijai ijutkaji nuigtú niina Uchijí Jesucristujaishkam. ⁴ Jujú aidauinak atumesh jutiijai betek shiig aneasminjum tusan agatjime.

Apajuik tsaaptinai

⁵ Jujuwai chicham Jesucristo jintiamu antukuitag duka, nunú etsejuinaji, Apajuik shiig tsaaptinai iman asantai niinig makichkish suwek atsuwai.

⁶ Jutii niijai ijutkau pujajai tayatku pegkegchau takata duke wekaetakuik, waitjaji, nuigtush dekaskea duke takaachu asa, ⁷ tujash jutiish ni tsaaptinum puja nunisaik pujakuik, niijai betek tikich aidaujaish shiig anendaisa pempeentunisaik ijutkau amainaitji, nuniajin Apajuí niina Uchijí Jesucristo numpega nujai ashí iina tudaujinash nijatjamag esakatjamui.

⁸ Tujash minak tudauk atsugtawai tumamkuik, jutiiik tsanuumaku tumamji, dekaskea nu tumamchau asa. ⁹ Nu tu wekaetsuk jutii tudauji etsegtumajinig, iina tudaujinash tsagkugtamag nuigtú ashí pegkegchau aidauinash esaktugmagtatui, nigka betek umina ibau asa nuigtush pegkegnak takauwa dui, ¹⁰ tuja wika tudauinak takachuitjai tumamkuik Apajuik waita nunin emaji, niina chichame aatus tujamtsaig tau asa.

2

Iina abogadojig Cristui

¹ Mina uchuchig aidauwah, jujú aidauinak tudau takasainum tusan agatjime; tujash dewakjum makichkitigmekesh tudau takaakjumesh dekaatajum Apajuí emtin iinu abogado pujugtamji Jesucristo pegkejan takauwa nunú. ² Niiyai iina tudauji aidauin tsagkugtamjatatus jakauwa duka, tujash imá iinigkik nunikchauwai, ashí nugkanum aents batsata nuna tudaujinish jakauwai.

Chicham umiktina nui aneenitajum tibau

³ Nuadui ni chicham umiktajum tibauwa nu betek umiinakuik, ninuapitja tusa dekamainaitji. ⁴ Tuja makichik aentskesh: “Wika niinak dekajai” tayatak, chicham ni umiktá tibauwa nuna umiachuk waitjak tu wekaewai dekaskenum tachau asa, ⁵ tujash Apajuí chichamen umia nuuwai, dekaskenum aan nagkaemas Apajuí anenkajin deka duka; nuniaku dekamainaitji nijaimpap ijutkaji tusa. ⁶ Aents Apajuijai ijutkau pujajai tauk, Jesús pujujukua nunisag pujumainai. ⁷ Aneetaig aidauh, yamajam chicham umiktinnak agattsujime; yaunchuk chicham umiktin ajutjamajakua nunak agatjime, jujú umiktin yaunchuk aajakua duka,

chicham nagkamchakjum antukuitjum nuuwai. ⁸ Nunin aig yamajam chicham umiktina nuna agatjime, nu chichama duka Cristui dekaseg aajakui nunisag atumnash ajutjamtinme, wagki nunú chicham betek umi-agmin atumi pujutjumin suwe awa duka tsaaptin wetai megkaekattawai.

⁹ Makichik aentskesh tsaaptinnum pujajai tayatak tikich Cristo nemagnun kajejauk, eke suwenum pujau asa nuniawai. ¹⁰ Ni yachi Cristo nemagnun anea duka tsaaptinnum pujawai, nuniau asa niini utugchat igkumainuk atsawai. ¹¹ Untsu niina yachi Cristo nemagnun kajeja duka eke suwenum pujawai, nuigtush suwenum wekaewai, nuniau asa dekatsui tuwi wegawa nunak, wagki suwe aina nu jiin ejatbau asa.

Dekaskenum dekaskeapi tabau

¹² Uchuchig aidauh, atumnak Jesucristo mantamnamunum Apajuí atumi tudaugminak tsagkugtamjaju asagmatai agatjime. ¹³ Atum uchigtin aidautigmin agatjime, wagki nagkamtinish tuke pujujakua nu shiig dekau asagmin. Atum datsauch aidautigminash agatjime, iwanch depetkau asagmin. Uchuchig aidauh atumin agatjime, wagki iina Apají Apajuiya nu dekau asagmin.

¹⁴ Uchigtin aidautigmin agatjamjime, nagkamtinish pujujakua nu dekau asagmin. Atum datsauch aidautigminash agatjamjime, wagki senchi asajum Apajuí chichamega nu umiakjum iwanchish depetkau asagmin.

¹⁵ Pegkegchau takat ju nugkanmaya aidaun, Apajuí nemagchau takaina duka takasaigpa, aents ju nugka juwiya pegkegchau takat aina nuna takaa pujuidak Apajuinak aneatsui. ¹⁶ Wagki ashí nugkanum ayá nu, iyash wakegamu aidau, diisá wakejut aidau, nuigtú wiki iman achainjash tusa anentaimat aina dushakam Apajuinumia ainatsui, nugkanmaya ainawai. ¹⁷ Ju nugka juka, nuigtú wakejumain aina dusha megkaejattawai; tujash Apajuí wakegamun takaina duka, tuke pujutin ainawai.

Anticristo

¹⁸ Uchuchig aidauh, tsawan nagkanbaunum batsatji, nuigtush atum anticristo wantinkatnai tabau antukuitjum nunisag yamaik kuashat anticristo aidau wantinjaje, nuniau asamtaí dekainaji tsawan nagkanbaunmag batsatji tusa. ¹⁹ Duka jutii ainag juiyag jiinjaje, tujash dekaskenmag jutiumia aajakchajui, wagki jutiumia aajakuitkug jutijai batsamain ainawai, tujash jiinjaje jutijaiachu aina nuna iwainmankata tuidau asag.

²⁰ Tujash atumek Cristo Wakaní Pegkejin sujamsamu ajutjamjume, nunin asamtaí ashí waji aidauk dekaeme. ²¹ Junak dekaskea nu dekachu asagmin agattsujime, dekaskea duka dekaeme, wagki makichkish waitnumiag dekaskek jiinmaitsui. ²² ¿Yaita waitash, Jesusak Cristuchui tuina duchaukaih? Nuuwai anticristo, Apajuinash nuigtú niina Uchijinash dakita nu. ²³ Ashí aents Apajuí Uchijin dakitauk, Apajinash dakituinawai. Yaa dekas Jesusak Apajuí Uchijiyai tusa etsegtawa, nuuwai Apajuijai ijutkau aidauk.

²⁴ Atum nagkamchakjum antukuitjum duka nunisag atumnash ajutjamtinme. Atum nagkamchakjum antukuitjum nunú nunisag atumin ajutjamkuig, atumshakam nunisjume Apajuijaish nuigtú niina Uchijijaish ijutkau atatjume. ²⁵ Nunuwai Cristo pujut tuke atinun anagtamamun amasua duka.

²⁶ Junak tsanugmagta tuidau asagmatai agatjime. ²⁷ Tujash atumnak Jesucristo Wakaní Pegkejin sujamsajua nu ajutjamjume, dui atumait-sugme yaki jintinjuawa tusagmek. Wakaní Pegkeji atumin pujugtamjum

nu waitchau dekaskea nuna ashí jintinjamattagme nunin asamtai niijaig ijutkau atajum.

²⁸ Uchuchig aidauh yamaik niinig ijutkau atajum, ni minakuish, kajintsá datsamtsuk puyatkas igkugtag tabaunum. ²⁹ Atumek degagme Jesucristo pegkejan takauwa duka, nuniau asajum dekamainaitjume ashí pegkejan takaina duka Apajuí uchijimpap ainawa tusajum.

3

¹ Diistajum wajupa iina Apajuí anempatsji, imatijamu asa mina uchig aidau tujamji, nuadui jutiik Apajuí uchijí ainaji; tujash Apajuí nema-juinatsu duka dekagmainatsui, wagki niinash dekachajua dui. ² Aneetaig yatsug aidauh, yamaik Apajuí uchijí ainaji, tujash ii wajuku agtinaitji duka eke wantintsuji; nuninayatku dekanaji Jesucristo jui minak wantin-tugmaktina duik niyya imanuk agtinaitag duka, nunikaja ni wajukuita duka imatiksaik shiig wainkatnaitji. ³ Ashí aents Jesucristo dakaidauk, ni pegkegma imanuk atatus kakanmamui.

⁴ Untsu aents tudau takaina duka, Apajuí takasaigpajum tibauwa nuna umiinachu asag nuninawai. Tudau takata duka chicham umiachbaunum nuninui. ⁵ Atumek degagme Jesucristo jutií tudaujin jututjamkita tau asa tajutjabauwa duka, nuigtush niinig tudauk atsawai. ⁶ Ashí aents Jesucristujai ijutkau pujuidauk tudau takaaajakbaujiya nunisagkek takaa pujumaitsui; ashí tudau takaina duka wainkachu asa nuigtush dekachu asa nuniawai. ⁷ Uchuchig aidauh, kuitamamkatajum makichik aentskesh tsanugmajainum. Pegkejan takaa duka pegkeg asa nuniawai, nunú aents aidauk Apajuí emtinish pegkeg ainawai, Jesucristo pegkeja imanuk. ⁸ Tujash tudau takaa wekaga duka Iwanchdau asa nuniawai, wagki Iwanchia duka nagkamtinig tunamajui. Nuadui Apajuí Uchijiya nu Iwanchi takatji aina nuna emegkakta tau asa tauwai.

⁹ Makichkish Apajuí uchijiya duka tudaunak takaa pujumaitsui, wagki Apajuí pujutjiya nunú ajamu asa, tudaunak takaa takakuag wemaitsui, Apajuí uchijí asa. ¹⁰ Aatus iwainmamainawai Apajuí uchijí aina nuna, nuigtú Iwanchi uchijí aina nunashkam. Ashí pegkejan takainatsu duka nuigtush tikich Cristo nemagkau aidounash aneatsu duka Apajuinuchu ainawai.

Chicham umiktina nui aneenitajum tibau

¹¹ Jujuwai chicham etsegbau nagkamchakjum antukuitjum duka: Pempeentunisaik aneenita nu. ¹² Caín wajukauwa nuninuk achagmi, nigka iwanch wakejamun umiau asa yachin mauwai. ¿Wajina dutikau asamtai mauwaita? Caín niina takatjig pegkegchau asamtai, ni yachi imá pegkejan takau asamtai mauwai.

¹³ Yatsug aidauh, aents Apajuí nemagchau aidau kajegtamainakuish, kajegdaichatain nagkami kajegtamaina nuninuk anentaimgtippajum. ¹⁴ Jutiik dekanaji jatanum batsatuti tuke pujutnum inagkeakbauwaitag nu, nuniau asá yatsut aidaujaish aneeninaji. Yachin aneatsu duka, jakaujai betek pujawai. ¹⁵ Ashí aents yachin kajeja duka magkagtinjai betekai; nuigtush magkagtina nudauk, pujut tuke atina duka niinig atsujui. ¹⁶ Jutiik Jesucristo iinií mantamdauwa dui anenkak dekauwaitji, ni jutiinií mantamnak waittsau asamtai jutiishkam nunisaik iina pujutjig tsagkaamainaitji tikich Jesucristo nemajuina nui. ¹⁷ Makichik aents Apajuí nemajin

ju nugkanmaya ashí wají aidau ajamaitak, yachi atsumaun wainiatak yayachush, ¿wajuk Apajuí anenkajish niina anentainish ajumainaita?

¹⁸ Mina uchuchig aidauh, ayatak chichamaik, wenui aneenin achagmi, nunitsuk dekaskenum ii yainiamunum iwaintunikagmi. ¹⁹ Aaja nuniaku dekamainaitji dekaskenum Apajuinuapitja tusa, nuniaku iina anentainish Apajuíajai ijutkajapi tumainaitji, ²⁰ Jutiik iina anentai ii pegkegchau takasbaujin bakumamainun dekamtijamkui waituinaji, tujash Apajuíyai jutií anentai nagkaesau ashí dekagtama duka. ²¹ Aneetaig aidauwah, iina anentain nu aaja anentaibau atsugtamu asamtai, jutií bakumamainuk atsugtamjiapi tusa Apajuíyai kajintsá anentaibau ajutjamui; ²² nuniaku ashí ii segamua duka niiniya jukittaji, wagki ni chicham umiktajum tibauwa nu umiaku, nuigtú niina shiig awagma nu takaidau asaja. ²³ Jujuwai ni chicham umiktajum tibauwa duka: Niina Uchijí Jesucristo daajiya nui dekaskeapi tuinaku, nuigtú pempeentunisaik aneenimaina nu, ni tujabauwa nunisaik. ²⁴ Ni chicham umiktajum tibauwa nuna umiidauk niini pujawai, nuigtú niishkam ditai pujawai. Jui dekeinaji ni jutiini puja nu, Wakanin sujamsauwa dui.

4

Apajuí Wakaní nuigtú anticristo wakaní

¹ Aneetaig yatsug aidauh, ashí aents aidau wakan tujutbaun tajai tuinakuish dekaskeapi tiigpa, nunitsuk dekapsatajum wakan ditai awa dusha Apajuinuash ajá tusajum; wagki kuashat wait profeta aidau nugkanum jijnaju asagmatai. ² Aaja dekamainaitjume yana Apajuí wakanish ajawa duka: ashí aents Jesucristuk aentsmaga tajutjamauiwai tuina nuuwai, Apajuí wakaní ajuina duka, ³ tuja ashí wakan Jesusak aentsmaga taachui tuina duka Apajuinuchui; duka anticristo wakaní ajawai, atum minawai tabau antukuitjum duka yamaik ju nugká jui wantinui.

⁴ Uchuchig aidauh, atumek Apajuinu ainagme, nunin asajum depetmakugme; wagki atumiin puja nuuwai nugká puja nuna nagkaesauk. ⁵ Ditak ju nugkanmaya ainawai; nuadui nugkanmayanak chichainawai, nuigtush nugkanmaya aidauk antujuinawai. ⁶ Jutiik Apajuinu ainaji nunin asajin, Apajuin dekaina duke antugtamainaji; Tujash Apajuinuchu aina duka antugtamtsuji. Aatsa dekamainaitji yaa wakan dekaskea dusha ajawa nuigtú wakan tsanumna dushakam.

Apajuik anenkai

⁷ Aneetaig aidauh, pempeentunisaik aneediagmi, wagki anenkak Apaíjuinu asamtai. Ashí anejatuina duka, Apajuí uchijí ainawai nuniau asa Apajuinash dekeinawai. ⁸ Anejattsu duka, Apajuinak dekatsui, wagki Apajuik anenkai. ⁹ Aatus Apajuik ni anenkajinak jutiinak iwaintugmakui, niina Uchijí makichkiuchia nuna nugká awetugmauwa dui, ni pujutan susati tujamu asa. ¹⁰ Anenkak aatus nagkamnuuwai: duka jutií Apajuí aneamunum nunikchauwai, ni jutiinak anempajui, dutikak niina Uchijin awemauwai ni mantamnamunum jutií tudauji aidaunash tsagkugnagt-tusa.

¹¹ Aneetaig aidauh, Apajuí jutiin aatus anempaju asamtai, jutiishkam pempeentunisaik aneenimainaitji. ¹² Makichik aentskesh Apajuinak tuke wainkachu ainawai, tujash pempeentuniki aneeniajinig Apajuí jutiíjai

awai, nuniau asa ni anenkajinak aan nagkaemas jutiiní iwainakui. ¹³ Aaja dekainaji jutií niijai ijutkau ainag duka, tuja niishkam jutiijai ijutka nu, niina Wakanin sujamsauwa dui. ¹⁴ Jutií waínkauwaitji nuniku asá etsegtuinaji, Apají ni Uchijin nugkanmayan Uwentijatnun awemauwa nunú. ¹⁵ Makichik aentskesh Jesusak Apajuí Uchijiyai tawa nui Apajuik ijutkawai, nuigtú niishkam Apajuinum ijutkawai.

¹⁶ Aaja dekau asaja Apajuí anempamush dekaskeapi tiu ainaji. Apajuik anenkai, nuigtú nu anenka nui pujauk, Apajuikai pujawai, nunisag Apajuí niinish pujawai. ¹⁷ Nunú nuniemunum dekaskenum anenka duka jutiiní awai, tsawan suwimak sukagtau atina dui kajintsá anentaibau ajutjamti tabaunum, wagki ju nugka juig ni pujujakua nuniisaik pujusaju asaja. ¹⁸ Anejatut abaanmag ishamamuk atsuwai. Dekas anejatbauwa nu ishamamunak emegkawai. Apajuí suimkaji ishamaina duka anejatu-inachu asag nuninawai.

¹⁹ Jutiik nig anenaji ni dekatkauk anempaju asamtai. ²⁰ Makichik aentskesh: “Wika Apajuin anejai” tayatak yachin kajejakug, waitjak tawai. Yachin waina nunakesh aneatsu dusha, ¿utugsaya Apajuí waintsu nunash aneemainaita? ²¹ Jutiinak ju chicham umiktin ajutjamji: Apajuin anea duka yachinashkam aneeti tibauwa nu.

5

Dekaskeapi tabau nugkanmayanak depeteawai

¹ Ashí aents Jesusak Cristuí tusa dekaskeapi tuina nuuwai Apajuí uchiji aidauk. Apajuí aneakuik ni uchijí aidaushkam aneaku dutiknawai. ² Apajuí aneaku niina chichamesh betek umiakuik dekanui, tikich Apajuin nemajuina nunash anejapi tusaja. ³ Apajuí aneamuk ni chicham umiktajum timawa nu imatiksaik umiamua nuuwai. Ni chicham umiktajum tujamawa duka kakajus umikchamna nuninchauwai. ⁴ Wagki Apajuí uchijí aina duka nugka juí pegkegchau aina nunak depeteawai, nunú depetmamua duka jutií Apajuíyai dekaskeapi tuinag dui depetmainaji. ⁵ ¿Yaita nugkanmaya pegkegchaun depetea dusha? Duka Jesusak Apajuí Uchijiyai tusa dekaskeapi tuina nuuwai.

⁶ Jesucristuk yuminum yamimajua dui nuigtú cruznum numpen ukajua dui Apajuí Uchijiyai duka dekanauwai. Nunisag Wakaní Pegkeji dekasken chichauwa dushakam: “Jesucristuk Apajuí Uchijiyai” tusa etsegtawai. ⁷ Jujú kempatuma juwai dekaske tusa etsegtuina duka: ⁸ Wakania nu, yumi nuigtú numpa nu; jujú kempatuma juka nunak tuinawai. ⁹ Aents etsegbaush antujuinaji, tujash Apajuí etsegbauwa nuuwai nuna nagkaesau imana duka, wagki duka Apajuí etsegbau asa, niina Uchijin sujamsamua nuna pachis tau asa. ¹⁰ Apajuí Uchijiyai nuna dekaskeapi tauk, nigki nunak etsegtak nuniawai, Apajuíyai nuna dekaskeapi tachauk, wait emawai, wagki Apajuí niina Uchijin pachis etsegtukua nuna dekaskeapi tachau asa. ¹¹ Juuwai etsegtamua duka: Apajuí pujut tuke atinun sujamsamua nu, nunú pujutak niina Uchijin awai. ¹² Apajuí Uchijiyai ijutkau pujuidautik, pujut tuke atina nu ajutjamainaji. Untsu Apajuí Uchijiyai ijutkau pujuinachuk, pujut tuke atina duka atsujuinawai.

Pujut tuke atin dekamú

¹³ Jujú aina junak Apajuí Uchijiyai nu dekaskeapi tuidau asajum, pujut nagkanchau jukiwaitjum nunú aidautigmin dekaatnume tusan agatjime.

¹⁴ Nuadui Apajuiyai kajinmasa anentaimaidau asaja, ni wakega dutiksaik segamak antugkagtawapi tusa dekeinaji. ¹⁵ Ii segamunash antugtawapi tusa dekeinag nunisaik, ii sumamushkam dekas jukittajapi tumainaitji.

¹⁶ Makichik yatsutkesh tudau jatanum ejekagtina nuna takaachu wainkugmek Apajuí segattá, dutikam Apajuí pujutan susattawai. Nunak tudau jatanum ejekagtuchua nuna pachisan fajai, wagki awai tudau jatanum ejekagtin, wika nuna takaidau Apajuí segattajum tusanuk tatsujime. ¹⁷ Ashí pegkegchau takaamua duka tudauwai, tujash tudau jatanum ejekagtachush awai.

¹⁸ Dekainaji ashí aents Apajuí uchijí wajasú aidauk tudaunak takaa pujumaitsu duka, wagki Jesucristo Apajuí Uchijiya nu kuitabau asa, nuniau asamtai Iwanchik pegkegchau takastí tusag inamait sui. ¹⁹ Jutiik Apajuinu ainag duka dekeinaji, untsu ashí aents Apajuí nemagchau aina duka wakan pegkegchau inatai ainawai. ²⁰ Nuigtushkam dekeinaji Apajuí Uchijí ju nugka jui tauwa duka, nunik ni dekamtijabauwai Apajuí dekas tuke pujuwa nuna. Jutiik Jesucristo dekaskea nujai ijuntsa pujuinaji, duka Apajuí dekaskea nuuwai pujut tuke atinun sukagtina nu. ²¹ Uchuchig aidauh, kuitamamkatajum apajuimtai aina nujaig.

Juan awentsaik carta agagbau

Kumpamkagtau

¹ Witjai anciano, ubajuh Apajuí etegkamu asamin nuigtú amina uchijum aidaujai kumpamjame, dekaskenum atumin aneau asan; nunak imá wikik dutikatsjame, ashí dekaskea nuna dekau aina dushakam anempainawai, ² dekaskeapi tabauwa nu jutiiní ajutjamu asamtai, nuigtush jutiinak tuke ajutjamtinai: ³ Anentag sujamsamua nu, wait anenkagtau, nuigtú agkan pujamu Apajuí iina Apajiya nudau, nuigtú Jesucristo iina Apají Uchijiya nudaushkam, dekaskea nu nuigtú anenka dusha jutiinash ajutjamtinme.

Dekaskea nu anenka nujai tibau

⁴ Kuashat shiig aneasmajai ujumak uchijum aina nuiya iina Apají umiktajum tibauwa nunisag dekaskea nunak takaidau wainkan. ⁵ Yamai ubajuh segajame, pempentunisaik aneniagmi tusan; tujash junak yama-jam umiktinun tumainaitjam dutikanuk agattsujame, nagkamchaku tibau ajutjama nunak tajame. ⁶ Jujuwai anenkak, ni umiktajum tibauwa nu umiaku pujamua nu. Juuwai umiktina duka: nagkamchakjum aneenisa pujustajum tabau antukuitjum nu.

⁷ Wagki kuashat tsanumin aidau nugkanmag jijnjaje, Jesucristuk aents-maga akiinachui tuina nu. Nunuwai tsanumin nuigtú anticristo. ⁸ Nuadui atumek kuitamamkatajum, atum takasbaunum jumain megkaekaijum; dekas kakanmamsatajum akigmanu betek jukita tabaunum.

⁹ Makichik aentskesh Cristo jintiamua nuna uwaegak jintinkagtuina nu-jaig Apajuik ijutkau atsui; untsu Cristo jintiamua nuwi nunisag ebetmamag puja nujai, iina Apají nuigtú niina Uchijish ijutkau awai. ¹⁰ Makichik aentskesh atumin ijagtamak taa, nu jintiamua nuna betek tachakuig jeeminig awayawaipa nuigtush: ¡Shiig anentsam! jukipa. ¹¹ Wagki: ¡Shiig anentus! juwauk, ni pegkegchau takaa nui pachinui.

Akatmabau

¹² Kuashat waji aidau pachisa agamainuk ajutui, tujash carta agatnak dakitajai. Dekas atumiin taan igkuasan augsatasan dakajai, nuniamunum jutii shiig aneamu uminkati tusan.

¹³ Wi yamai Apajuí nemajin aidaujai ijunja pujag juka, anuiyatijum Apajuí nemagkujum ijunjum nujai betekai, wi pujag juwiya Apajuí nemajin aidau kumpamjamainawai.

Juan kumpatumá carta agagbau

Kumpamkagtau

¹ Witjai anciano, aneetaiju Gayoh, dekaskenum aneau asan kumpamjame. ² Aneetaijuh, Apajuin segatjame ashí pegkejak ajutjama nunisag wakanminish nuigtú jamamtuchu pujamush ajutjamti tusan. ³ Kuashat shiig aneasmajai, yatsut aidau kaunawag ame betek umiakum dekaskea dusha wajuk takaame nuna ujatkgmatai. ⁴ Mina uchig aidau dekaskea nuna takainawai tabau antakun shiig aneag nuna nagkaesau shiig aneamuk atsugtawai.

Gayo ni jeen jukagtauji eme anentamu

⁵ Aneetaijuh, amek Cristo umikta tibauwa duka betek umikam weame, Cristo nemajin yatsut aidau atsumaidau wajuk yayame nuadui, imá senchi wainchataijum aidau dutikam dui. ⁶ Nunú aidau iglesianum etsejuinawai, ame anejattsam yaimam nuna pachipas. Apajuin shiig awagma dutiksamek tuke yaita aents jintá weak atsumainjinish. ⁷ Ditak Jesucristo aneamunum niina daaji pachisa etsekgagta tabaunum jijnaje, nunú aidauk Apajuí anentaimtuchu aina nunú yaigbau atasag dakituinawai. ⁸ Nuadui jutii ditanuk uyumamainaitji, chicham dekaskea nuna tikich aidanmash etsekgati tabaunum.

Diótrefes dakitkagtau

⁹ Juna pachisan wi iglesian agatjamjai, nuna Diótrefes dakitau asa jutjamchau tabaun antajai, nigka imá mina chichamjunak antugtuktinme tusa wakegau asa. ¹⁰ Nuniau asamtai, wi anui taan wainak chicham pegkegchaun jutiin tujamu tawa nuna titatjai, nuigtú nuna takush shiig juwachu asa, yatsut aidau kaunu jutanash dakitawai, nuna juwaunash aikawaipa tawai, dutikak iglesianmash jiiikí ajapeawai.

¹¹ Aneetaijuh, aents pegkegchaun takaa duka dakumkaipa, dekas pegkeja nunú takastá. Aents pegkejan takaa nuuwai Apajuinuk, tujash aents pegkegchaun takaa duka Apajuinak wainchau asa nuniawai.

¹² Ashí Demetrio pujutji pachisajag pegkejan etsegtuinawai, Apajuí chichame tawa imatiksag umiau asamtai. Jutiishkam dutiksaik etsegtuinaji, tuja atumek degame jutiik dekaskea nu etsejin ainag nu.

Inagnaku kumpamkagtau

¹³ Kuashat juní inagkeasa tumainuk ajutui, tujash nunak jui agakun tutanak dakitajai, ¹⁴ wagki wamak minin wainkata tau asan, nuniaku igkunisa chichasmí. ¹⁵ Shiig agkan pujamu ajutjamti. Kumpajum aidau kumpamjamainawai. Ameshkam jutii kumpají aidau makí makichik kumpamjutuata.

Judas carta agagbau

Kumpamkagtau

¹ Witjai Judas, Jesucristo inake Santiago yachiyaitjai, atum Apajuí iina Apajiya nuna anetaiji etegjamu aidautijum, Jesucristo kuitamsam bat-satjum nuutigmin kumpamjime. ² Atumnash Apajuí wait anenkagtauuji, shiig agkan pujuta nunú, anenka dushakam ajutjamtinne.

Wait jintiamu nuigtú maestro wait aidau

³ Aneetaig yatsug aidauh, shiig senchi wakemajai Apajuí uwemat amasbau betek ajutjama nuna pachisan agatjatasan, tujash yamai dekas atsumamua nuna segatá tajime, Apajuí aentsji pegkejam aidau dekaskeapi tabaun susauwa nu kuitamkatajum tusan. ⁴ Wagki ujumak aents tsanumag wayawaje nunikag tsanugmajaje, duka yaunchuk nagka-mas aatus suwimkan jukitnume tibau aina nu. Nunú aents aidauk pegkegchau ainawai, nunin asag Apajuí anentag amasua dui agkantaitji tusag pegkegchaun takainak Apajuinash dakituinawai nigki imana nuna, nuigtú iina Apuji Jesucristunashkam.

Apajuí suwimak sukagtustin pachisa etsegkamu

⁵ Juka atumek dekagminig aneentikjime, Apu Apajuí niina aentsji Egipto nugkanum batsatun jijjui, ditikauwaitak inií dekaskeapi tuinachunak ijinauwai. ⁶ Tuja ángel aidau ditá imanjin kuitamsuk, ditá batsam-taijinash ukukiaju aidau nak tuke atinun achijá suwenum chimpiauwei, tsawan jegatai suwimkan susatatus. ⁷ Nunú wajukawajua nunisag Sodoma, Gomorra nuigtú yaakat tikiju aina dushakam shiig pegkegchau aina nuna takainak nuigtú mai aishmagkuk dutikdaiyá batsamtaí, Apajuí jii tuke kajinkashtina dui apek utsagkui, nunú dutikamua duka aents tudaun taká batsatuk jii ajubaish kajinkashtina nui suwimkan jukiagtina nuna iwaintugmaji.

⁸ Nunisag nunú aents aidauk kajanum wajukmaina numamtuk, pegkegchau takainak dita iyashinak pegkegchau emainawai. Apajuí senchigtina nunash pachitsuk idaiyinak, nayaimpinmaya senchigtin aina nunash pegkegchau chichajuinawai. ⁹ Tuja arcángel Miguel, Moisesa iyashin jukitatus Iwanchjai maanitkush suwimak jukitnujinak pachit-suk, ayatak: “Apu Apajuí tujamti”, tiuwai. ¹⁰ Tujash nunú aents aidauk dekainachiatuk pegkegchaun chichajuinawai. Ditak kuintin anentaimainachu asag dita wakegamunum pujuina numamtuk, dita pegkegchau wakegamujiya nunak wejuinak, ditak pegkegchau weenawai.

¹¹ ¡Wait anentuinajai ditanak! wagki Caín wajukauwa numamtuk wajaidau asagmatai, nuigtú Balaam wajukauwa nunisag kuichik jukita tabauwei pegkegchau takaina duwishkam, aantsag Coré ni chicham intimtinig jakauwa nuniktin asagmatai. ¹² Nunú aina duka datsanmainun atum Cristo nemajin aidautijum yatsut aneenisa fiestabaunum wayawag yuinak nuigtú umuinak shiig ané yujainawai, makichkish ajanas dii-jattsuk. Ditak pastor imá ditanunak uyumainawai, nunidau asag yumi yutugchatnaitak yujagkim bukusea wajasun dase umpui yajá ajapama numamtuk wajainawai. Ditak ajak nejetinish nejeshtai ajakjintin tegai

ajapama numamtuk ajapeam agtinai. ¹³ Ditak nayants senchi tsukatak ayatak saunak jiiyama nuninawai, dita waji datsanmain takaamunum. Ditak yaya keeká wegau megkagama nuninawai, nunin aidaunuk tuke atin shiig suwea nu umigkamu ainawai.

¹⁴ Ju aents nunikagtinun pachis Enoc tiuwai, Adagkai nagkamas akiinak weamunum siete aajakua nu: “Apu Apajui, dekapamainchau ángel aidaujai midaun wainjai, ¹⁵ ashí aents takasbaujin diijus titatus; nuniak pegkegchau takasú aidaun tuja Apajuinash pegkegchau chichagkau aidaunash suwimkan susatatus”, tiuwai. ¹⁶ Ditak chichaman patá yujau, augmatkagtin, dita wakegamujinak takaa yujajin, ememas chichá yujau, tikich aentsnash imanchau aig igkuawag, amek dekas pegkejaitme tusa anentai egketuawag niinun jujukiaagtatus aujú yujajin ainawai.

Anemtikaku chichagbau

¹⁷ Tujash atumek aneetaig aidauwah, iina Apuji Jesucristo apostolji aidau chichaman etsegkajua nu aneaku atajum, ¹⁸ juna tujabiaju ainawai: “Tsawan nagkanbau atina duik, aents aidauk pegkegchau chichagkagtin aidau agtina, nuninak dita pegkegchau wakegamu aina nuna takaa batsabiagtina”, tusag. ¹⁹ Nunú ainawai atum Jesús nemajin aidautigmin datumtamak akaantamaina nu, nuadui yaunchuk pujujakbaujiya nunisag pujuuidau asag Apajui Wakanig atsujuinawai.

²⁰ Tujash atumek aneetaig aidauwah, atum dekaskeapi tabau pegkegma nuig ebetmamjatajum, nuniakjum Wakaní Pegkeji tujama nunisjumek Apajui aujsatajum. ²¹ Apajui anempajum nuig kuitamamkatajum, iina Apuji Jesucristo wait anenjamu asa pujut tuke atinun amastina nu dakakjum. ²² Dita uwemjauwaitak utujimaidaush wait anentsajum yaigtajum. ²³ Tikich aidauk, jiiinmaya jiiimaina dutikajum yaigtajum uwem-jatnume, tikich aidaush puyatjusjum wait anenjatajum, nuniakjumesh kuitamamkatajum dita iyashin pegkegchau takasú aina duke atumesh takasajum.

Inagnaku Apajui emematbau

²⁴ Apajui senchigtina nuuwai atumnak pegkegchau takasainum tusa kuitamjamainuk. Niina emtin dekas imana nui ijupagtina nunú tsawan-tiníg, atumek shiig aneastinaitjume, atumin bakugmamainuk makichkish atsutin asamtai. ²⁵ Apajui makichkiuch, niina Uchiji iina Apujiya nuna awetugma uwemtijamjauwa duke emematiagmi, imá nigki senchigtinuk, yamaia juishkam, atakea duishkam tuke atina nu.

Aatus atí.

Iwainakbau

¹ Junak Apajuí Jesucristun iwaintukui, wají aidau waamak uminjatta nuna ni inake aidaun iwaintukti tusa. Dutikam Jesucristo angelan awemauwai niina inaken Juagkan iwaintukti tusa; ² dutikamu asa, dekas ni ashí wainkamujin tiuwai, nuigtush Apajuí tibaun Jesucristo tiuwa nunash etsegtawai. ³ Shiig aneasagtinaí ju agagbaun aujus, atak uminkatin tibaauwa juna shiig dekaawag, nui agagbauwa nuna umiidauk; wagki tsawantak tikiju wajasú asamtai.

⁴ Witjai Juagkaitjai, siete iglesia aidau Asia nugkanum awa nui bat-satutigmin kumpamjime. Apajuí tuke pujuu, nuigtush tuke pujujakú, jui taatna nunú, nuigtú siete Wakan ni ekeemtaijin emtin awa nujai; wait anenjamag shiig agkan pujutan amastinme; ⁵ nuigtú Jesucristo dekaskea nuna etsejin, aents jakau aidau nantastain ni nagkamak nantakiuwa nu nuigtú ju nugka juíya rey aina nuna nagkaesau senchigtina dushakam. Cristo jutiinak anempaji nuniau asa niina numpejai iina tudauijinak nijatjamkauwai; ⁶ dutijabau asa jutiinash rey aidau etamak nuigtú Apajuí niina Apajiya nuna sacerdoteji aidau etamkajui; nuadui imá nigki ashí senchigtina nunú, ajumaish tuke ememattai atí. Aatus atí. ⁷ ¡Cristuk yujagminum pachitkau minitnai! Nunitai ashí waínkagtin ainawai nuigtú niina mau aidaushkam waínkagtinai; nunikag ashí aents nugkanmaya aidauk buutiagtinaí. Dekaske, aatus atí. ⁸ Witjai nagkamtinish tuke pujusunuk, atakea duish tuke pujutnunuk tawai Apu Apajuí ashí senchigtin, tuke pujuu, nuigtush tuke pujujakú, jui taatna nunú.

Aentsmaga akiinauwa nu wainkamu

⁹ Witjai Juagkaitjai, Jesusa nemaju asan atumi yatsumitjai, atum waiti-ajum nunisnuk waitiaknush Jesusan nemaju asan emamkesan katsunjau asan atumjai betek Apajuí inamtaijin pujutnaitjai. Wika Apajuí chichame etsegbaunum nuigtú Jesús pachisa etsegtamunum achigkagmatai ajuntai Patmos tutainum pujubiajai. ¹⁰ Apu Jesusa tsawanji tumig tsawagmatai Wakaní Pegkeji minai tajutmatai pujubiajai, nuniai mina ukujui makichik chicham senchi, trompeta umpuam shinuwama imatun antukmaiiai; ¹¹ nuniai chichaak: “Witjai nagkamtinish tuke pujusunuk wikítjai atakea duish tuke pujutnunuk. Agagta makichik papinum ame wainam nunú, dutikam siete iglesia aidau Asia nugkanum batsata nu awetita: Éfeso, Esmirna, Pérgamo, Tiatira, Sardis, Filadelfia, nuigtú Laodicea” tujutmayi. ¹² Tujutkui: Yaki aultawa tusan ayampá diikman, siete candelero oro aidaun waínkabiajai. ¹³ Nunú siete candelero aina nuna ejapen Aentsmaga Akiinau aajakua numamtin, jaanchin esagman nugkuaju dawea aatus nuntumag, akachumtai oron detsepega imaan akachumau wajattaman waínkabiajai. ¹⁴ Intashishkam uwija uje shiig pujua imanuyi, nieveya iman, jiishkam jii kegak wajukeya imanibi; ¹⁵ nawe aidaushkam bronce hononum egkeam dewa wegama imanun etsanmayi, chichameshkam tuna utama imatmayi. ¹⁶ Uwejí untsujin siete yaya aidaun takakuyi, weninia makichik espada mai yantamejai etsakamua iman jiiinmayi nuigtush yapig, etsa shiig senchi etsantama imanik etsanmayi. ¹⁷ Imanun waínkan, ni wajamunum ayaumsan tuke jakaujai betek iyagbaijai, nuniai

ni uwejí untsujin achijak: Ishamkaipa Witjai nagkamtinish tuke pujusunuk, ajumaish tuke pujutnunun; ¹⁸ nuigtush iwaaku pujajai. Jakabijai, tujash yamaik iwaaku pujajai nuniku asan ajumaish tuke pujutnaitjai, aatus atí. Wikitjai jatanash depetkaunuk nuigtush jinau aidaunash nantagtajum titinnuk. ¹⁹ Agagta wáji aidau wainkaum nunú, yamai aina nu, jujú nagkaemagmatai atak atina dushakam. ²⁰ Mina uwejuí untsuja nui siete yaya aidau wainkaum nu, nuigtú siete candelero oro aidau dekamainchau wainkaum duka juu ainawai: siete yaya aina duka ángel aidau, siete iglesia aina nuna diin ainawai, nuigtú siete candelero aidau wainkaum duka, siete iglesia aina nuuwai.

2

Éfeso chicham agatjamu

¹ Agatjata ángel iglesia Éfeso awa nuna diina nunú: Uwejí untsujin siete yaya aidau takaku, candelero oro aina nui ejapena wekaga nunú, juna tawai: ² Atum takaam nunak wainjai, utugchatnum pujakjum senchi waitiajum nunashkam, nuniakjumes emamkesjum nagkaejume. Pegkegchau aidau dakitagme, nuigtush apóstol ainaji tuidaush dekap-sajum waitjamu dekapjum nunashkam; ³ nuniakum senchi waitiakmesh, mina anenta asam nuig ebetmamjam mijakhaume.

⁴ Tujash aminí makichik dakitamu ajutui, nagkamchakum anentium duka idaisaum dui. ⁵ Nuadui adeagta wajuakeakmea nunikume nunú, nunikam yapajinam nagkamchaku takaajakuitam nunú takastá; nuniachkugminig waamak tajuattagme, nunikan yapajinchakminig candelero jujuktajame. ⁶ Tujash pegkeja nu ajutjamui, wi nicolaíta aidau takatjin dakitag nunisjumek atumshakam dakitajum nunú.

⁷ Ni antutaiji ajamuk antukti, Wakan iglesia aidau tawa nuna. Depetmakunak Apajú pujutai paraíso ejapen numi pujutan sukagtin wáji nuna nejeen susattajai yuwati tusan.

Esmirna chicham agatjamu

⁸ Agatjata ángel iglesia Esmirna awa nuna diina nunú:

Nagkamtinish tuke pujusu, ajumaish tuke pujutna nu, nuigtush maamu aajakú ataktú nantakí iwaaku puja nunú, juna tawai: ⁹ Ame waitiamujum aina nunak wainjai, nuigtú ujunayaitam nunashkam, tujash amek wakannumag wiakchaitme, nuigtush judiowaitji tuidau pegkegchau chichagtamaina nunashkam; tujash duka Satanasa jee ainawai. ¹⁰ Waittsattam duka makichkish ishankaipa. Atum ainajum anuiyan, Iwanch wakegamun takau aina nu achigmakag cárcel egkepatjume dekapjamsagtatus, dutijamamtai diez tsawan waittsattagme, mantamainakuish minai dekaskeapi tabauk idaisaipa, nunikamin wi pujut nagkanchauwa nuna amastajame.

¹¹ Antutaiji ajamuk, antukti, Wakan iglesia aidau: Depetmakua duka jiumun pujusag waittsashtinai, tawa nuna antuktinme.

Pérgamo chicham agatjamu

¹² Agatjata ángel iglesia Pérgamo awa nuna diina nunú: Espada mai yantamejai etsakamun takaka nu, aatus tawai. ¹³ Ame takaam nunak wainjai, anuí Satanás ekeemtaijin ekeemas inama nui pujam nunashkam; tujash minak nemagtame. Antipas mina etsegtugna nuna, Satanás inama anuí maawagmataish minai dekaskeapi tabaush idaisachume.

¹⁴ Tujash ujumak waji aidau aminí dakitamu ajutui: Balaam Balacan jintintak: Israel aidau tunamamaina nuna, apajuujimtai kuntin anagkuamu maamu aidaush yumainai, nuwash tsanijimainai tiuwa nuna, atum ainajum anuiya ujumak idaiyinachush ainawa. ¹⁵ Nuigtush ajutjamui Nicolaíta aidau jintiamua nuna idaiyinachu. ¹⁶ Nuadui pujutjum yapajiata, nuniachkugminig waamak tajuan, mina chichameg senchigtina nujai ditajai maaniatajai.

¹⁷ Ni antutaiji ajamuk antukti, Wakan iglesia aidaun tawa nuna: Depetmakunak maná uukbauwa nuna susatnaitjai yuwati tusan, nuigtush kayauch pujuchin yamajam daa agagbaun susatnaitjai, nunak makichkish dekainatsui imá jukiwua duke dekaatnai.

Tiatira chicham agatjamu

¹⁸ Agatjata ángel iglesia Tiatira awa nuna diina nunú:

Apajuú Uchijí, jii keegama imanun jiiimkauwa nu, naweshkam bronce dewa wegama imanun nawemka nunú chichaak, juna tawai: ¹⁹ Atum takaajum nunak wainjai, nuigtú mina anenjum nunashkam, minai dekaskeapi tabaugminash, atsumaidau yayajum nunashkam nuigtushkam waitiakjumes emamkesjum katsunja nagkaejume; nuigtushkam takaa-jum duka nagkamchaku takajakuitjum nu inagkeasjum yamaik takaagme.

²⁰ Tujash ujumak pegkegchau takaajum nu dakitamu ajutui: Aanú nuwa Jezabel profetisayaitjai tusa, mina inakeg aidaun tsanuak, tsanijinmainai nuigtush apajuimtai kuntin anagkuamu maamu aidaush yumainai, tusa jintinkagtakuish ayatak diyagme. ²¹ Nuniakuish tsawantan susajai pujutjin yapajiati tusan. Tujash tsanijinat idaitanak dakitawai.

²² Nuniau asamtai niina pegajinig jata susan aepsattajai, dutikakun niina tsanijibau aidaunash shiig senchi waittan susattajai, ni takaamun takaina nuna idaiyinachkuig. ²³ Nuigtush uchijí aidaunak kajenkat-tajai, dutikamtai ashí iglesia aidaush dekaawagtatui; anentaibaunash, anentainash ashí wiki dekauwaitag nuna, dutikakun makí makichik takasbaujin diigsan susatnaitjai. ²⁴ Tuja atum aidautijum nuigtú tikich aidau Tiatira batsatutigmek, nu nuwa jintinkagtamua duka umiatsjume, nuniau asajum, Satanasdau duikish dekaachbau jintinkagtaji tuina dusha unuimatjachu asagmin, atum tikich umimainnak amaschattajime. ²⁵ Tujash dekaskea nu dekauwaitjum duke kuitamkatajum, nuniagmin taatjai.

²⁶ Depetmakunak, nuigtush wi wakegamugnak takai takainakua nagkanbaunum jegaunak, wi ashí nugkanmaya aidaun apuji emaktatjai, ²⁷ mina Apag Apu etiuwa dutiksanuk. Dutikamu asag, ichinka najanin duwe najanamu jijui awati tsaiyama numamtuk, awajkagtinai aents pegkegchau aidaunak; ²⁸ nuigtush yaya tuke tsawampauwa nuna susatnaitjai. ²⁹ Ni antutaiji ajamuk antukti, Wakan iglesia aidaun tawa nuna.

3

Sardis chicham agatjamu

¹ “Agatjata ángel iglesia Sardis awa nuna diina nunú:

Apajuú Wakaní sieteya imajin aja nunú, nuigtush siete payan takaka nunú juna tawai: Ame takaam nunak wainjai, iwakuí tama ame, tujash jaká pujame. ² Shintaagta, nunikam tikich aidau dutikmain megkaekattak awa nunú inantaita, wagki amina takatjumnak Apajuú

eemtinish pegkegnak wainkachjai. ³ Adeagta pegkeg jintiamu antukuitam nunú; nuniakum umiktá, nuigtush tudau takatash idaisata. Aneaku pujachkuminig, wi kasajai betek minittatjame, tujash waji horatinia minittaja duka dekashtatme.

⁴ Tujash ujamak aents aidau ajutjamui Sardis, jaanchjin tsuwapachaju aidau; nu aidauk jaanch pujun nugkujag wijai yujasagtinaí, Apajui wakegamun takasaju asag. ⁵ Pegkegchau takatan depetkauwa duka jaanch puju anugkuam atinai, nuigtush pujutá jukiú daaji papinum agat-taiya nui, daaji agatjamunash tuke esakagchatnaitjai, ayatak mina Apajú emtin nuigtú ángel aidau antuinamunum juka midauwai, titinaitjai. ⁶ Ni antutaiji ajamuk antukti, Wakan iglesia aidau tawa nuna”.

Filadelfia chicham agatjamu

⁷ Agatjata ángel iglesia Filadelfia awa nuna diina nunú: Junak Pegkejam, Dekaskea nunú, Davita llavejin takaka nu, ni ujaimtaig makichkish epenmainchau, nuigtú epenmataish makichkish ujainchauwa nunú, tawai: ⁸ Ame takaam nunak wainjai, nuniau asan amina eemtimin waitin ujain idaisajai, nunak makichik aentskesh epenmaitsui; wagki atumek wajumchik ainayatkujum, mina chichamjush betek umigtakjum, mina daajush dakitjachugme. ⁹ Nunin asamtai, wisha judiowaitjai tusag anui wait aidau ijunaina duka Satanasdau asamtai, atumi emtimin tikish-mitkaktajai, wi atumin aneajim nuna dekaatnume tusa. ¹⁰ Ashí aents nugkanmaya aidauk utugchat, waitiamu ajiagtinaí. Tujash amek mina chichamjuk betek umikú asamin ayamjuktatjame, waji horak utugchat ju nugká jui aents batsata nu dekaspsata tabaush minit nuniakuish.

¹¹ Wika wamak minittajai, nunin asamtai ashí amina ajutjama duka shiig kuitamkata, ame depetmaku asam corona jumaina nuna tikich atanjamki. ¹² Depetmakunak wi, jega mina Apag ememattaiya nui awayattajai, dutikamu asa nuig tuke pujutnai; dutikan mina Apajuiju daajin, nuigtush mina Apajuiju yaaktaji yamajam Jerusalegka nuna daajin, mina Apajuig nayaimpinum puja nuiya akaikitna nuna, nuigtú mina daag yamagma nunashkam niini agagtinaítjai. ¹³ Ni antutaiji ajamuk antukti, Wakan iglesia aidau tawa nuna.

Laodicea chicham agatjamu

¹⁴ Agatjata ángel iglesia Laodicea awa nuna diina nunú:

Junak ni tibuajinak betek umina nunú, waitjuchu dekaskea nuna etsejin, nuigtú nagkamchakush Apajuijai ashí najankauwa nunú chichaak:

¹⁵ Ame takaam nunak wainjai, bichatnukesh atsume, sukutnukesh atsume. ¡Utusamek bichatin, nuniachkumesh sukutnukesh aam!

¹⁶ Tujash amek papaapatu asamin, nuigtú bichatnukesh achau, sukutnukesh atsum dui iyakan ajapatnaitjame. ¹⁷ Wagki ame chichaakum: Wika wiyakhaitjai makichkish atsumamuk atsugtawai tame; tujash amek Apajú diismak shiig aneas pujuchu, waitin, ujunauch, wainmachu, nuigtú wisú pujam duka dekaamatsme. ¹⁸ Nuadui wi tajame: Minai sumakta oro jinum apea ayatak orok awasamua nunú, nunikam wiakuch wajasminum, nuigtush jaanch puju aidau nugkugminum, ame wisú wetai datsantan dekgawainum, nuigtushkam jiminish colirio egkeeta wainmakminum.

¹⁹ Wika ashí wi aneamug aidauk jiyajai, dutikakun suwimkanash suajai, nunin asamtai pegkegchau idaikum Apajú umigkata. ²⁰ Wika

waitinum wajasan untsunjai; nuniai makichik mina chichamjun antuk waitin ujatjakuig niini wayattajai, nunikan niijai ijunjan agkú yutain yuattajai.

²¹ Depetmakunak, mina inamtaijui ekentsatnaitjai, wi depetmaku asan mina Apajú ekeemsa inamtaijin eketag dutiksanuk. ²² Ni antutaiji ajamuk antukti, Wakan iglesia aidaun tawa nuna.

4

Nayaimpinmaya emematbau

¹ Ju nunikmatai niimkaman, nayaimpinmaya makichik waiti ujani atatman wainkabaijai, nagkamchakun chichaman antukag duka trompeta wajukeya imatuk mina aujtak: “Jui wakata, nunikamin ju nagkaemagmatai atak waji nagkaemagtin aina nuna wi iwaintuktajame”, tujutmayi.

² Nuna taig, Wakaní senchijí minai tajutuabi, nunikmatai diikman nayaimpinum ekeemtai umikbaunum makichik ekeematman wainkabaijai. ³ Nunú ekeemtainum eketa nuna niimeg, kaya jaspe tutai nuigtú cornalina tutai aina nujai betekmamtinuyi; nunú eketa nuna tentea arco iris amayi, kaya esmeralda tutaiya nuna niimejai betekmamtin. ⁴ Nunú ekeemtaiya nuna tentea, veinticuatro ekeemtai aidau agmayi; nuanui veinticuatro anciano aidau jaanch puju aidaun nugkuinaju, corona oro aidaun atsejaku pekabiagmayi. ⁵ Nunú ekeemtai ejapen awa nuiya peem aidau, chaajip aidau, chichamushkam jiiniagmayi, nuigtú ekeemtai eemtin siete jii ekemagbau amayi, duka siete Wakan Apajuinu aina nuuwayi. ⁶ Nuigtushkam ekeemtaiya nuna eemtin nayantsa numamtin vidrio* saawiya iman wajas amayi.

Nuigtú ekeemtai ejapen awa nuna tentea cuatro iwaaku aidau wajagmayi, ukuujin, eemtinish kuashat jii ajamu aidau. ⁷ Dekatkau iwaakua duka león niimtinuyi nuniai tikichia duka toro tsakata nuní niimtinuyi, kampatuma nuna yapig aentsú yapijai betekmamtinuyi, nuniai cuatroa duka ukukui nanamua nuninuyi. ⁸ Nunú cuatro iwaaku aina duka, makí makichik seis nanape ajiagmayi, jiishkam ashí iyashin ajiagmayi; nunú iman aidau tuke itaftsuk tsawai, kashijai:

“¡Pegkegmai, pegkegmai, pegkegmai,†

Apu Apajú ashí senchigtin,

tuke pujuu, nuigtush tuke pujukú, jui taatna nunú!”, awajiagmayi.

⁹ Nunú iwaaku aidau Apajú tuke pujuwa nu, ekeemtainum eketun emematuinak, eme anentus see tuinak ajumaish tuke pujutna nuna imatjiagtai; ¹⁰ veinticuatro apu aidau ekeemtainum eketa nuna emtin tikishmajag ajumaish tuke pujuwa nuna emematuinak, dita coronaji aidaun jukiag niina eemtin apujtuinak:

¹¹ “Apuh, iina Apajújiiya ameketme ememattaim, nuigtush eme anentai, nuigtushkam senchigtinaitam ibau asam.

Wagki ame ashí waji aidauk najankauwaitme,

dutikamu asag ame wakejusam najankauwaitam nunisag, ame wakegamunmag ainawai”, awajiagmayi.

5

Uwig

* ^{4:6} “Vidrio” tawa duka botella saawiyama nuninai. † ^{4:8} Is. 6.2-3.

1 Wainkabiajai ekeemtainum eketa nunú, uwejí untsujin makichik rollo* mai yantamejai agagbau, sieteya imania achiamun takus ekeemtatman. 2 Nuigtú wainkabiajai makichik ángel senchigtin senchi untsamak: “¿Yaita dekás imanush, ju rollo achigbauwa juna kuwajug atimainush?” tusa iniimtatman. 3 Tujash nayaimpinmayagkesh, nugkayagkesh, nugká initkeniagkesh nuna rollo atijá nui agagbauwa nuna diimainuk makichik-ish atsusmayi. 4 Nuniakui wika senchi buutmajai, wagki rollo atimainuk, nuna diisá augmainkesh atsusú asamtai. 5 Nuniai anciano aina nuiya makichik chichagtak: “Buutipa, Judá weantua nuna Leogji, David weantua nu depetmake, nuniku asa niyai rollo sieteya imania achigbauwa nuna ukuitug ujainuk”, tujutmayi.

6 Takui diikman, ekeemtai ejapen cuatro iwaaku aidau, nuigtú anciano aidau ejapeam makichik Uwig maamu aajakua numantin wajattaman wainkabiajai; ajibi siete kachují aidau, nuigtú siete jii aidau, nunú aina duka siete Wakan aidau Apajuinu ashí nugkanum ishiakbau aina nuna iwainawai. 7 Nuniai, ekeemtainum uwejí untsujiin rollo takus eketa nuna Uwig jegantun jujukmayi. 8 Nuna rollo jukimtai, cuatro iwaaku aina nunú, nuigtú veinticuatro anciano aina nujai Uwijá eemtin tikishmajagmayi; ashí nunú aidauk arpa nuigtú copa oro aidanum inciense aimjamu aidanun makí makichik takaku agmayi, duka Apajuí aentsji pegkejam aidau Apajuí augbauwa nu agmayi. 9 Nuninak yamajam kantamtain kantamainak: “Ameketme rollo agagbauwa nu jukim, sello aina dusha atimainmek. Wagki amek maamu aajakuitme, nunin asam amina numpemin, Apajuinu atinme tusam sumajatkauwaitme, ashí aents nugkanmaya aidau, tikich chichaman chichaaku aidau nugka yaignumia nuigtú nugka muun aina nuiyashkam,

10 nuigtushkam ditak rey aidau, sacerdote aidau emakume, Apajuin takagsatnime tusam, dutikamu asag nugkanum inamjagtatui”, wajagmayi.

11 Nuna takui diikman, kuashat ángel aidau, nuigtú iwaaku aidau; anciano aidaushkam, nuigtush dekaapatash dekapamainchau aidau ekeemtaiya nuna tenteawag pampainamun antukbaijai, 12 nuniai senchi jiikag chichainak:

“¿Uwig maamu aajakua, nuuwai dekás wagaaku senchigtinuk, wiyakuch, yacha, senchigtin, eme anentsá diitai, ememattai, tuke kantamjutai atinuk!” wajagmayi.

13 Nuigtú ashí najankamu nayaimpinum, awa nunú, nugkanmaya, nuigtú nugká initkenia aidaush, nayantsanmayashkam, ashí wají aidau nui aina dushakam, senchi chichakag:

“¿Ekeemtainum eketa anú, Uwigjai kantamjuinaku, eme anentsá ememattai senchigtina ibau asamtai ajumaish tuke ememattai atin atí!”, awajuidaun antukbaijai.

14 Imatjiagtai cuatro iwaaku aina nu senchi aiká: “Aatus atí”, tiagmayi; nuniaig anciano aidaushkam tikishmatug, emematiagmayi ajumaish tuke pujutna nuna.

* 5:1 “Rollo” tawa juka, uwijá duwapé, chivo duwapé, asno duwapé aina jui agagbau pempeagbau aajakua nuna tawai.

6

Siete sello aidau

¹ Wainkabaijai siete sello aina nuiyan Uwig makichik ujattaman, nuigtush antukbaijai cuatro iwaaku aina nuiya makichik ipamat wajukeama imatuk: “¡Tantá diístá!”, tujutun. ² Takui diikman makichik caballo pujun wainkabaijai; nui entsatka duka makichik nagkí takakuyi, nuigtush corona susamuyi, nigka depetmaku asa ataktush depetmaktatus jiinkibi.

³ Nunikmatai jimaja juna sellon Uwig ujaibi, nuniai iwaaku aina nuiya jimaja nu chichagtak: “¡Tantá diístá!”, tujutmayi. ⁴ Taig tikich caballo kapantaku jiinkibi; nui entsatka duka senchi susamuyi ashí aents aidaun maanimitkati dutikamu asa pempee pempeentuniki mantamdaitinme nuninak agkan batsatbauk atsúti tusa, nuigtush espada esagman susami.

⁵ Kampatum selloa juna Uwig ujaibi, nuniai iwaaku aina nuiya kampatuma ju untsujuk: “¡Tantá diístá!”, tujutmayi. Tujutkui diikman, caballo bukusean wainkabaijai; nui entsatka duka balanza takakuyi.

⁶ Nuniai cuatro iwaaku aina nuiya ejapenia chichaak: “Makichik tsawan takasbauwai makichik kilo trigon júkiagtinaí, tuja makichik tsawan takasbauwai kampatum kilo cebada suwam agtinaí. Tujash aceite, vino aina duka emeskaipa”, taun antukbaijai.

⁷ Cuatro selloa nuna Uwig ujaibi, nuniai iwaaku aina nuiya cuatro nu untsujuk: ¡Tantá diístá!, tujutmayi. ⁸ Tujutkui diikman caballo yampia wajas wajaun wainkamaijai, nui entsatka nuna daajig Jata tutaiyayi, nunak Hades* pataetakuyi; Caballonum entsatka duka senchi susamuyi, ashí aents nugkanmaya aina nuna jimaitukjiya nuna jimaituken maanimitkaj ijinati, nujantai, jataishkam, kuntin kajen nugká batsata nunashkam tusa.

⁹ Cinco selloa nuna Uwig ujaibi, dutikamtai wainkabaijai, altara wak-entin Apajuí chichame etsegbaunum, nuigtú pegkejan iwainmamaidau asantai waitkasa maamu aidau wakaní ijuntatman. ¹⁰ Nunú aidau senchi untsukag: “Apuh pegkegmah, dekaskenum chichauwah, ¿wajupa asamea nugkanmaya iina mantamawajua dusha ikmatkagtuktatme?” awajiagmayi. ¹¹ Nunú aidaunak jaanch puju aidaun makí makichik susagmayi, dutika: Ujumak tsawan ayamkujum dakastajum, atumin mantamawajua inatiksag yatsum aidaunash Apajuin takajiagtai maawag betek awasatneme, timayi.

¹² Seis selloa nuna Uwig ujaibi, dutikamtai wainkabaijai senchi uugbaun; nuniai etsag bukusea, jakamunum jaanchin bukusea nugkuwajama iman wajasmayi, nantushkam kapantu numpa numamtin wajasmayi; ¹³ nunisag nayaimpinmaya yaya aidaushkam, figuera nejee dase senchi pegam kakegama numamtuk nugká kakeyagmayi. ¹⁴ Nayaimpishkam papí pempeaja jutayama numamtuk megkaekabi, ashí muja aidauk, ajuntai aidaujai pachimdaegak patamsabi. ¹⁵ Imanitai nugkanmaya rey aidau, aents eme anentai aidau, wiakuch aidau, capitán aidau, senchigtin aidau, nuigtú ashí inatai aidau, inashtai aidaushkam, muja kaya waa aidaunum uumkagmayi; ¹⁶ nunikag mujan, untsuinak: “Yutujatuam uujatkakia, Apajuí nayaimpinum ekeemtaijin eketa au waipakai, Uwig suwimkan sujamsai; ¹⁷ wagki ni kakeká suwimak sukagtamuk tsawantak jgae, makichkish yamaik suwimkanak uwemtumain ainatsui”, wajagmayi.

* 6:8 Diístá Mt. 11.23.

7

144 mil nijayin agatkamu aidau

¹ Nunú nagkaemakiau ai, wainkabiajai cuatro ángel aidau, cuatro nugka najatamu aina nui kanajag, cuatro dase aina nunú nugkanum dasentak nayantsan, makichik numinakesh umpuini tusag emetuawag ijuntatman.

² Nuigtushkam wainkabiajai tikich ángel etsá jüintaiya nuiya sello Apajuí tuke pujuwa nudaun takaku minittaman; nuniak cuatro ángel aina nuna senchi untsuká, senchin susami nugka, nayantsajai emeskatna nuna; ³ dutika chichajak: “Yamaikik nugkak, nayantsak, numi aina dushakam emeskaigpajum, iina Apajuiji inake aina nuna nijayin eke selló awagmatsjinkik”, timayi.

⁴ Nuniaig: “Ashí Israela uchijí weantu aidau dekapamak, ciento cuarenta y cuatro mil aidau nijayin selló awakamu ainawai”, tabaun antukbajjai.

Judá weantunmaya doce mil,
Rubén weantunmaya doce mil,
Gad weantunmaya doce mil,

⁶ Aser weantunmaya doce mil,
Neftalí weantunmaya doce mil,
Manasés weantunmaya doce mil,

⁷ Simeón weantunmaya doce mil,
Leví weantunmaya doce mil,
Isacar weantunmaya doce mil,

⁸ Zabulón weantunmaya doce mil,
José weantunmaya doce mil,
Benjamín weantunmaya doce mil.

Pujun nugkuinaju aidau kuashat tuwakbau

⁹ Nunú nagkaemakiau ai diikman, ashí nugkanmaya aents aidau shiig kuashat, makichkish dekaapamainchau ditash chichaaku aidau, ditash niimtin aidau, yaaktanmaya aidaushkam ekeemtai pujá nuna emtin, nuigtú Uwijá emtin, jaanch pujun nugkuaju aidau dukan takuinasua ijunaidaun wainkabiajai. ¹⁰ Nuninak senchi untsumkag:

“¡Uwemta duka ekeemtainum Apajuí eketa nudauwai, nuigtushkam Uwigdauwai!”, wajagmayi.

¹¹ Nuniaí ashí ángel aidau ekeemtaiya nuna, anciano aidaunash, nuigtú cuatro iwaaku aina nunashkam tentea wajagmayi; nunú aina nujai ekeemtai eemtin tikishmajag nijayin nugkan antig pujusag Apajuin emematuinak:

¹² “¡Aatus atí!

Emematbau, niina imanjiya dushakam,
yachajishkam, see tutai, eme anentsá diitash,
senchijish, ichichmamta dushakam imá Apajuinuk atí, ajumaish tuke ememattai atin atí.

¡Aatus atí!”, wajagmayi.

¹³ Nuna tiagmatai, anciano aina nuiya makichik, inintak: “Jaanch pujun nugkuaju aina aush ¿ya ainawa, tuwiya kaunkaje?” tujutmayi. ¹⁴ Tujutkui wi ayaakun: Apuh, ame dekam jama tibajjai. Tai ni chichagtak: Juka shiig senchi waitiamu awa nuiya wakaje, nunú aidau Uwijá numpeen jaanchjin nijakag puju emakaje.

¹⁵ Nuadui Apajuí ekeemtaiya nuna eemtin ijunainawai,

nuigtush jega Apajuí ememattaiya nui kashi tsawaijai takajuinawai; nuniagtai ekeemtainum eketa nunú niina tabernaculojin* batsas kuita-mkattawai.

¹⁶ Dutikamu asag yapajamush atsujagtinaí, kitamamushkam, etsash sukuum achagtinaí, seemakugkesh waittsashtin ainawai.

¹⁷ Wagki Apajuí ekeemtaiji ejapen awa nui Uwig, wajaí nunú kuitamkagta-tui, dutikak yumi pukuni jiinu pujuta sukagtina nuna amitnai, nuig-tushkam Apajuí ashí negaiki aina nunak ujuktuktatui, tujutmayi.

8

Siete sello

¹ Siete sellos nuna Uwig ujaibi, dutikamtai nayaimpik bitat wajas asabi jimaituk hora tumain. ² Nuniamunum wainkabiajai siete ángel aidau Apajuí emtin ijuntatman, nunú aidaun siete trompetan tinamkagmayi.

³ Nuniai tikich ángel, incienso apetaín oro takus, altara eemtin wajasmayi; nunikmatai kuashat incienso susabi, Apajuí aentsji pegkejam aina nu, Apajuí augbaujiya nujai ijumag altar oro, Apajuí ekeemtaijin eketa nuna eemtin awa nui patai apeati tusa. ⁴ Dutikamtai ángel takakbauwa nuiya incienso, Apajuí aentsji pegkejam aidau Apajuí augbauwa nujai ijumnag bukuiti, Apajuí eketbaunum wamayi. ⁵ Nuniai ángel incienso apetaín jukibi, dutika altarnum jii kegá nuna juki aimak nagkimá nugká ajuagmayi; dutikam ipamat, pampaamu aidau, chaajip, nugkashkam uugmayi. ⁶ Imatiagtai siete ángel aidau, siete trompeta takus ijuna dushakam umintsagmayi umpuajagtatus.

⁷ Nagkamchak makichik ángel trompetan umpuagmayi, dutikamtai bicha, nuigtú jii numpajai pachimjamun nugká nagkimá ajuabi; dutikam nugkanak jimaituk amaisattak numi aidaun apekmayi, nuigtush dupa aidaunash apekmayi.

⁸ Nunikmatai jimag angela ju trompetan umpuagmayi, dutikamtai makichik muja muunta numamtinun kegaun nayants nagkimá ajugmayi; dutikam nayantsan jimaitukjin amaisattak numpa wajasmayi. ⁹ Nuniku asamtai nayantsanum iwaaku batsamin aidauk jinawagmayi, barco aidau nui yujaushkam ashí esakgmayi.

¹⁰ Kampatuma nu ángel trompetan umpuagmayi, dutikamtai nayaimp-inmaya makichik yaya muun keeká antorchaya numamtin, namak aidau, yumi pukuni jiiin ain nuna jimaituken amaisattak iyagmayi. ¹¹ Nunú yayak Yapau daagtinuyi, nunin asa yumi aina nuna jimaitukjin amaisattak yapau awasabi; nuniku asamtai kuashat aents nuna uwajajuk yapakag jinawagmayi.

¹² Nu nunikmatai cuatro angela nu trompetan umpuagmayi, nunikmatai etsa, nantu, yaya aina nuna jimaitukjin amaisagtatak emeskabi, besekaja nunisag suwe wajastinme tusa, dutikamu asa tres hora kashi tsawaishkam tsaaptinuk atsumayi.

¹³ Nu nuniku ai wainkabiajai, nuigtush antukbajai makichik ukukui* nayaimpi ejapen nanaak minis, senchi untsamak: “Ae, ae, ae, shiig ishamain atatui nugká batsata nudauk, kampatum ángel aidau trompeta umpuinatsu nunú umputaik” wajattaman.

* **7:15** Diíst Jn. 7.2. * **8:13** “Ukukui” tawa nunak dewakag tiu amain ainawai, nagkamchaku agagbauwa nuig “ángel” tawai, jumamtinun tawai diíst 14.6.

9

Cinco ju trompeta umpuagbau

¹ Cinco angela nu trompetan umpuagmayi, dutikantai nayaimpin-maya makichik yaya nugká iyaittaman wainkabiajai; nuna waa muun ishama in akaga nuna llavejin susabi. ² Dutikam waa muun ishama in akaga nuna ujaibi; dutikam aja tsajutkau apeam bukuituwama imanik bukuiti jijnmayi, imaniak etsanak suwe awasabi, daseshkam waanmaya bukuita ibauk wajasmayi. ³ Nunú bukuita nuiya langosta* aidau titigki ijujattaiya iman aidau senchimitkam jijnag nugkan pampankabi. ⁴ Tujash nugkanmaya dupa aidaukesh, makichik numikesh emesjaigpa, ayatak aents Apajuinuchu aidau nijayin sellachbau aina nu ijutajum; ⁵ tujash maawaigpa, ayatak cinco nantui najaimak waittsatta nu dutikatajum timayi. Tibau asag aentsuk titig ijum najaimama imaniagmayi.

⁶ Imanidau asag nunú tsawantinig aents aidauk jakatagtus egakagtinayi, tujash igkuichagmayi; nuigtush jakatasash wakeyagmayi, tujash dita jamainuk atsusagmayi.

⁷ Langosta† aidauk caballo aidau maanitnum weagtatus uminas aama nujai betek wajas agmayi, buuké aina nuig corona aidau oroa numamtin ajiagmayi; yapi aina duka aentsú yapiya numamtin agmayi; ⁸ intashishkam nuwá intashiya numamtin ajiagmayi, nai aina dushakam leogka naiya numamtin ajiagmayi; ⁹ iyashí aidauk jijua numamtin anugaj-muyi, nanapenishkam caballo aidau maaniamunum shimak kuashat carro aidau japiam tutugtuwama imatmayi; ¹⁰ ujuké aina duka titigki ujukega nunin ajiagmayi, nuigtush ijujattajish ajiagmayi; nunin asag ujukega dui aentsun iju cinco nantui waitkasti tusa senchimitkamuyi. ¹¹ Ditá reyjiya duka, waa muun ishama in akaga nui ángel puja nuuyi; nuna daajig hebreo chichamaik “Abadón” tutaiyai, untsu griego chichamai “Apolión” tutaiyai.

¹² Nagkamchak ¡ae! tibauwa duka nagkaemakmayi, tujash eke miniag-tatui jimag ¡ae! tibauwa nunú.

Seisa ju trompeta umpuagbau

¹³ Seis angela ju trompetan umpuagmayi, dutikantai altar oro cuatro kachují ajamu Apajuí eemtin awa nuiya chichamun antukbaijai; ¹⁴ nuniai ángel trompeta takaka nuna chichajak: “Cuatro ángel aidau, namak muun Éufrates uwet jigkajam ijuna au atiata”, timayi. ¹⁵ Tutai cuatro ángel aidau jigkajam ijuntatman atiwagmayi, ditanu hora, tsawan, nantu, mijan umintai nunikti tibau jegau asamtai, dutikam jimaituk ejesattak aents aidaun ijinati tusa. ¹⁶ Suintag aidau caballonum entsatkau aidauk doscientos millones awai tabaun antukbaijai.

¹⁷ Junak shiig paan wainkabiajai, caballo aidaun, nuigtú entsatkau aidaunash, nu aidauk coraza kapantu jiiya numamtin aidau ajiagmayi, zafrowa numamtin wigka, nuigtú azufreya numamtin yagkú ajiagmayi. Caballo aina nuna buukeg león aidau buukega numamtin agmayi; nuigtush weniya nuiya jii, bukuitamu, azufre aatus jiiniagmayi. ¹⁸ Jujú kempatun jata jii, bukuitamu, azufre aidau, nuna wenin jijnaina dui, aents aidauk jimaitukea nuna amaisattak jinawagmayi. ¹⁹ Caballo aidau

* 9:3 “Langosta” tawa duka diistá Mt. 3.4. † 9:7 “Langosta” tawa duka diistá Mt. 3.4.

senchijig wenin, ujuké aina nui ajibi; wagki ujuké aina nuig dapí buukejai betek ajiagmayi, nunin asamtai aentsnak dui emesiagmayi.

²⁰ Tujash tikich aents aidau nujantai jakachu aidauk, pegkegchau takaa-mujin idaiyas yapajintsuk, Iwanch aidau ememattanash idaitsuk, orojai dakumká najanamu aidau, jiju platayai najanamu, broncejai najanamu, kayajai najanamu, numí aina nujai najankamu aidau emematiagmayi, wainmachu, antutnash antuchu, wekaetanash wekaechau aina nuna; ²¹ nuigtush magkagtutnash, wawejattanash, tsanijimtanash, kasamtanash idaichagmayi.

10

Ángel papí piipich takakbau

¹ Tikich ángel senchigtin nayaimpinmaya yujagminum pachitkau akae-gun wainkabiajai, buukenig arco iris ajamu, yapig etsajai betek etsanmayi, nawe aina duka jii kegak wajukeyama imaniagmayi. ² Papí piipich pempeagbau ujakbaun takakuyi, nawe untsujiya duka nayants najama amayi, nuniak menajiya nunak nugká najama wajabi; ³ nunik senchi untsamak león shinak wajukeyama imatuk nagkanaig, sieteya imania ipamat wajukeya imatuk paan antumainun chichakagmayi. ⁴ Nunú sieteya imania ipamat wajukeya imatuk chichakagmatai agagta timaijai; nuniai nayaimpinmaya chichagtak: “Sieteya imania ipamat wajukeya imatuk tiaja duka idaisata, agajaipa”, tujutmayi.

⁵ Tuja ángel nayantsanum najama, nugkanmash najama wajaun wainkamiag nu, uwejí untsujiya nuna nayaimpinum takuibi; ⁶ nunik, ajumaish tuke pujutin, nayaimpin ashí wájí aidau nui ayá nunash, nugkanash ashí wájí aidau nui ayá nujai, nayantsanash ashí wájí nui ayá nujai najankauwa nuna daajin adaiyak: “Yamaik tsawantak jegae, ⁷ siete angela nu trompetan umputai, Apajuí ni dutikatnujin ii dekaachbaun, niina inake profeta aidau etsegekajua duka uminkattawai”, timayi.

⁸ Nayaimpinmaya chichaamun antukag duke ataktú awentsag aujtak: “Wetá, nunikam ángel nayantsanum, nugkanum najama papí piipich ujakbaun takus waja nu jukita”, tujutmayi. ⁹ Tujutkui angelan jegaantan “Papí piipich pempeagbau sujústá”, tusan segabiajai: Tai ni chichagtak: “Jukita, nunikam yuata; wakeminig yapau awajtamsattawai, tujash weni-minig dapá yumiji yumintska iman dekapjattame”, tujutmayi.

¹⁰ Tujutkui, ángel piipich pempeagbau takakbaun jukin yuabiajai; nunikman dapá yumiji yumintska imanun wenujuí dekapjamiajai, tujash yuwá ai wakejuí yapau awajtusmayi. ¹¹ Nuniai ni chichagtak: “Ataktú awentsamek etsegekata, kuashat aents aina nui, nugka muun aina nuishkam, ditash chichaaku aina nuish, nuigtú rey aidau batsatbaun-mash”, tujutmayi.

11

Jimag aents etsegbau atin

¹ Nuna tujuti, makichik tagkanan dekapatia nuninun sujusmayi, dutika chichagtak: “Wetá, nunikam jega Apajuí ememattaiya nu, altar puja nujai dekapata, nuigtú wajupa aentsua nuish emematuinawa dushakam. ² Tujash jega Apajuí ememattaiya nuna agaajig dekapatsuk idaisata, duka judiochu aina nu idaitusbauwai; dita ju yaakat pegkegma nunak cuarenta

y dos nantui batsamtusag najakag tsai batsamtiagtatui. ³ Nuniakui wi jimag aentsun, jaanch wake besemag pujaku nugkutain nugkug yujasag, mil doscientos sesenta tsawantai mina pachitus etsegkatnun awemattajai”.

⁴ Nunú jimag mina pachitus etsejuina duka, jimag olivo ainawai, nuigtush jimag candelero ashí nugkanmaya Apujiya nuna eemtin ijuna nuuwai. ⁵ Duka makichik aentskesh pegkegchau awajkata tamak, ditá weninia, jii jiinak niina shiwaji aina nunak apeká ijiniagmayi; nunin asagmatai makichik aentskesh niina pegkegchau awajkata tauk, nunisag jiniagmayi. ⁶ Ditá senchijig nayaim epenmainush ajuinawai, chichaman etsejuinak yujagtata dui yumi yutuajai tusag nuigtush yumi numpa emainia dusha senchijig ajiagmayi nuigtú wajupa imania dutikata tuinawa dutiksag nugkanmaya aidaun jatan susa waitkamaina dushakam senchijig ajiagmayi.

⁷ Chicham etsegbaun ashimkamtai, bestia waa muun ishamain akagaunmaya jiinki ditajai maaniattawai, nunik ditanak depetuk maawagtinuyi.

⁸ Nuna iyashí aidauk yaakat muunta nuna ejapen plazanum tepeagmayi, nunú yaaktak ditá pegkegchauji pachittsa “Sodoma”, “Egipto” tutaiya nui, iina Apuji Jesucristo achijag maawajua nui. ⁹ Ashí aents tikich nugkanmaya aidaush, makí makichik ditash niimtin aidau, ditash chichaaku aidau, nuigtú ashí nugkanmaya aidaushkam iyashinak ukutsuk kampfatum tsawan jimaituk dii batsamtiagtinuyi. ¹⁰ Nuninak ashí nugkanmaya aents aidauk nunú jakamtai shiig aneas dakujuinak, pempeentunikiag anentag wajichin sudaiyagtinuyi; wagki nu jimag profeta aina nunú chichagkagtiagtai, shiig tutitag dekapejakú asag.

¹¹ Tujash kampfatum tsawan nuigtú jimaituk nagkaemai, Apajuí mayai awetim ditai egkemtujam nantakí wajantagmayi, nunikagmatai nuna wainkaju aidauk shiig senchi ishamkagmayi. ¹² Imaninai nayaimpinmaya senchi utsuká: “Jui wakatajum”, timayi. Tama mai yujagminum pachinak ditá shiwaji aidaush wainainag wakagmayi. ¹³ Nu nuniaig senchi uugbau asabi, imaniak kuashat jegan yumpuagmayi, nu uugbaunum siete mil aents jinawagmayi; nuniai tikich aidauk senchi ishamkag, Apajuí nayaimpinum pujuuwa nuna emematiagmayi.

¹⁴ Jimaja ju ¡ae! timauwa duka nagkaemakni, waamak kampfatum a ju ¡ae! timauwa dusha minittawai.

Sieteya ju trompeta umpuagbau

¹⁵ Siete angela ju trompeta umpuagmatai, nayaimpinmaya senchi pampajagmayi, nuninak:

“Ashí nugkanmaya inamaina duka yamaik iina Apajujuinu nuigtú Cristunu wajasé. Nigki ajumaish tuke inamin atinai”, wajagmayi.

¹⁶ Imatiagtai veinticuatro anciano aidau ditá ekeemtaiji aina nui Apajuí emtin pekajushkam, tsunsumawag nijayin nugkan antig Apajuí emematiagmayi; ¹⁷ nuninak: See tajame, Apu Apajuí ashí senchigtinuh, ametme tuke pujuu nuigtú tuke pujujukumek, iman asam amina senchigmijai inamjatasam nagkamaume.

¹⁸ Nuniau asamin ashí nugkanmaya aidauk kajekaje, tujash ame kajeamugmik nagkamnae, nuigtú jakau aidau suwimak susattam dushakam tsawantak jegae, nuigtú amina inakem profeta aidau, aentsjum pegkejam aidau,

amina umigtamin aidau, eme anenchatai, eme anentai aidau, akiktinaitam dushakam nuigtú nugkan emesena nu tsaiktinchakam jegae, wajagmayi.

¹⁹ Nuniai juga Apajuí ememattaish ujanmayi nayaimpinum awa nunú; nunikmatai kajun arca tutai chicham apakbau aajakua nu, juga Apajuí ememattain auk paan wainnabi, nui agmayi peem aidau, pampainamu, ipamat aidau, uugbau, nuigtú senchi bicha kakegainamu.

12

Nuwa

¹ Nayaimpinum anentai jegagmainchau wantinkabi: makichik nuwa etsaya imanun nugkuaju, nawe aina nuna wakentin nantu ajibi, buukenchakam corona doce yaya batsakbaun atsejaku. ² Ejamtin asa, uchigmaktatus najaimak waitiak senchi untsumayi.

Dragón

³ Nuigtushkam nayaimpinum tikich wantinkabi: makichik dragón muun kapantaku, ajibi siete buuké aidau, nuigtú diez kachují aidau, makí makichik buuké aina nuig corona ajiagmayi, ⁴ ujuken nayaimpinmaya yaya aidaun jimaitukjin amaisattak amainun tajak juki nugká akakekmayi. Nunik dragón nuwa uchigmaktatus puja nuna eemtin wajanmayi, uchi yamá akiinunak yuatatus. ⁵ Nuniai nuwak aishmagkun uchigmakmayi, ashí nugkanum niina senchijijai inamjatna nuna; tujash uchijinak jujukagi Apajuí ekeemtaijin eketbaunum iwakagmayi. ⁶ Nuwak uwegshunum tupikakmayi, nui pujusmatai mil doscientos sesenta tsawantai yumainun susatnume tusa, Apajuí ni pujustinun umigkauwa nui.

⁷ Nuniku ai nayaimpinum maaniamu asabi, Miguel niina angeli aidaujai dragogjai maaniagmayi. Dragogshakam ashí niina angeli aina nujai ijunag maaniagmayi; ⁸ tujash depetkachmayi nuigtushkam dita pujumainuk nayaimpinmag atsusmayi. ⁹ Nunikmatai dragón yaunchuk dapi tujakbau, Iwanch Satanás tutai, ashí nugkanum tsanumá wekaena nunak, ashí niina angeli aidaujai jiikí nugká ajapawagmayi.

¹⁰ Dutikamtai nayaimpinum senchi pampaidaun antukmaijai: “Yamaik tsawan uwemat jegae, iina Apajuiji niina senchijijai inamjatta nunú, niina Uchijí Cristo inamjatta dushakam; wagki iina yachi aidaun tsawai kashijai iina Apajuiji eemtin tsanumjú wekaenuwe duka jiikí ajapamu asantai.

¹¹ Ditak Uwijá numpejai nuigtú, niina chichame etsegbauwa nujai depetmakaje, nuigtush ditá pujutinash puyatjukchaje jakagtatus uminas yujaidau asag.

¹² ¡Nuadui nayaim batsatutigmek shiig aneastajum! Tujash ¡Wait anentajime nugkanum, nayantsanum batsatainajum nunak! Wagki Iwanch tsawan piipich juwatka nuna dekau asa senchi kajeká atumin akaetugmakiu asantai”, timayi.

Dragón kajek nuwa ainjamu

¹³ Dragón nugkanum ajapamu asa, nuwa uchijin aishmagkun uchigmakua nuna ainmayi. ¹⁴ Dutiktai nuwan, ukukui nanapen shiig muuntan jimajan susabi, dutikam nanaak uwegshunum weak dragognak ukuktí,

nunik nui kampakum mijan jimaituk pujusmatai yutain susatnume tusa. ¹⁵ Nunikmatai dragón, weninian yumin jiki makichik namakan najanabi nuwá amainag tajaká jukiti tusa. ¹⁶ Tujash nuwanak nugka ayamjukmayi, nugka ujani dragón weninian yumin namaka najana awetimunak uwag amukmayi. ¹⁷ Dutikamtaí dragón nuwan senchi kajegkabi, nunik nuwá patayí weantu aidaujai maaniatatus wejibi, Apajuí chicham umiktajum tibaun umiina nujai, nuigtush Jesusan pachis etsegtuina nujaiskam. ¹⁸ Nunik dragokkak nayantsan uwetus wajanmayi.

13

Bestia nayantsanmaya aidau

¹ Wainkabajai makichik bestia siete buuké aidau ajamun, nuigtú diez kachují aidau ajamu nayantsanmaya jiantatman; kachují aina nuig corona ajiagmayi, untsu buuké aina nuig daaji, Apajuí pegkegchau chichajin tabau agatkamuyi. ² Nu bestia wainkag duka ikamyawajai betekmantinuyi, naweg chayú nawega numamtinuyi, untsu wenig leogka weniya nuninuyi. Nuna dragón niina senchijin nuigtú niina ekeemsa inamtaijiya nunash susabi ni inamjati tusa. ³ Wainkabajai buuké aina nuiya makichik, jakati tusa awatbauwa nuninun, tujash awatbauwa duka esamauwayi; nunikmatai aents ashí nugkanmaya aidauk puyatjukagmayi, nunikag bestia nema-jiagmayi; ⁴ nuninak, dragokkan emematiagmayi, bestian senchimitkai asamtai, nuninak bestianash emematiagmayi, nuninak: “¿Yaita bestiaya imajush, ya niijaish maanimainaita?”, awajiagmayi. ⁵ Nuigtushkam idaitusmayi kuashat waji aidau chichakti, nuniak cuarenta y dos nantui pujun Apajuinash pegkegchau chichagkati tusa.

⁶ Tibau asa Apajuinash, daaji pachisash, ni pujutainash, nuigtú ashí nayaimpinum batsamin aina nunash pegkegchau chichagmayi. ⁷ Nuigtushkam Apajuí nemajin aidaujaish maaniati nuniak depetkati tibaui. Nuigtushkam, ditash niimtin aina nuish, yaaktanmash, ditash chichaaku aidau mash nuigtú ashí nugkan mash inamjati tusa idaitusbauyi. ⁸ Dutikamu asamtai ashí nugkanum batsamin aidau, yama nugka najanamua duwi nagkamas, Uwig maamu aajakua nuna papijin pujutan jukitnume tusa, daaji agatkashbau aina nunú aidau emematiagmayi.

⁹ Ni antutaiji ajamu aidauk antukti.

¹⁰ “Ni achiká juwam amainuk, achiká jukimu agtatui, ni espadayai maam amainuk, espadayai maam agtatui”. Ju nuniamunum, Apajuí aentsji pegkejam aidau waitiamu katsuntan, dekaskeapi tutan unuimain ainawai.

Bestia nugkanmaya jinkimu

¹¹ Nu nuniku ai, tikich bestia nugkanmaya jininun wainkabajai, jimag kachují Uwigdaujai betek ajibi, tujash dragón chichau wajabi. ¹² Nuniak nagkamchak bestia inamjati tusa susamua nudaun takabi, nuniau asa nugkanum aents batsamin aidauk, “dekatkau bestia buuken awatbau esamauwa nu ememattajum”, timayi. ¹³ Tusa kuashat wainchatain iwainabi, dutikak ashí aents wainainamunum nayaimpinmayan jinin nugká ajubi. ¹⁴ Nuniak bestia emtin dutikati tibaun asa wainchatai aidau iwainak nugká batsatunak tsanubi, nuniau asa nugká batsatunak bestia niime dakumkajum najanatajum espadayai awatbau aajakú iwaku puja nunú timayi. ¹⁵ Tima niimé dakumak najanawagmatai, bestia

nugkanmaya jiinki nu mayain egketkabi, bestia dakumká najanamua nu chichaktí, nunik ashí aents niina emematuinsatsu nunak kajegtí tusa. ¹⁶ Nunik ashí aents eme anenchatai aidau, eme anentai aidau, wiyakuch aidau, ujunauch aidau, inaku waitkashtai aidaush, inatai aidaushkam nijayinkesh, nuniachkush uwejí untsujinkesh marca apujtustajum; ¹⁷ marca atsugbau aidau nuniachkush bestia daajigkesh atsugbau, daajiya nuna numerojigkesh atsugbau aidauk sumatnash sumamainchau, sujutnash sujumainchau atinme, timayi.

¹⁸ Juka yachameta nujai dekamainai, ya shiijash antawa nu dekapagti bestia numerojiya nuna, juka aentsú numerojiyai. Nunú numerok seiscientos sesenta y seis, tawa juuwai.

14

144 mil aidau kantamawagbau

¹ Wainkabiajai Uwig muja Siognum wajattaman, nuigtú nijai ciento cuarenta y cuatro mil aents aidau, niina daaji, nuigtú niina Apají daaji, dita nijayin agatkamu aidau. ² Nuniamunum nayaimpinmayan antukbaijai, yumi senchi uutama imatak, senchi chaajip wajukeyama imatun, nuigtú pampamua dushakam arpa awatin aidau awatbau wajukeya imatmayi. ³ Nuigtú yamajam kantamtain kantamiagmayi, Apajú ekeemtaijin eketa nuna eemtin cuatro iwaaku aina nu, nuigtú anciano aina nuna emtin wajantag, nunú kantamtai yamagma nunak makichkish tikichik unuimachagmayi, imá ciento cuarenta y cuatro mil uwentikamua duke dekagmayi. ⁴ Nunú aidauk makichkish tsuwapaekachu agmayi nuwa aina nujai antinikchau asag. Jujú aina duka Uwig tuwig wegawa nunitaish nemajin ainawai, jujú aina duka aents nugkanmaya aina nuiya nagkamchaku Apajuinu nuigtú Uwigdau atí tusa uwentikamu ainawai. ⁵ Nuigtushkam ditak pegkegchaujish atsugbau, waitjuamujish atsugbau asag, Apajú eemtin ijuniagmayi.

Kompatum ángel aidau etsejuinamu

⁶ Wainkabiajai tikich ángel, aents nugkaa batsata nui, ashí nugkanmash, makí makichik niimtin aina nuish, makí makichik chichaaku nuigtú yaakat batsata nuishkam yamajam chicham tuke auwa nuna etsegkatatus takaku nayaimpi ejapan nanamtatman; ⁷ nuniak senchi untsumak: “Apajú puyatjusjum ememattajum, wagki suwimak sukagtustina duka hora jegau asamtai; ememattajum nayaimpin, nugkan, nayantsan, yumi pukuni jiiinaina nunash najankauwa nunú”, timayi.

⁸ Tai nuna ukujin tikich ángel patatkau: “¡Tsainkae, Tsainkae yaakat muun Babilonia muunta duka! ¡Ashí nugkanmaya aidaunak vino ni pegkegchau takaamujuiya nuna takamtikak, apajuimtai aina nu umigkatajun tusa jintinkagtuau asamtai!” wajabi.

⁹ Nuniai ángel kompatuma ju patatkau midaushkam senchi untsumak: “Makichik aentskesh bestia emematuk, nuniachkush niime dakumkamua nunakesh emematak nijayinkesh, uwejinkesh marcamu aina nunak, ¹⁰ Apajú kajeká suwimkan susatnai, dutikak niinu ángel pegkejam aina dusha nuigtú Uwijash wainag jii azufrejai pachimjamua nui utsatnai. ¹¹ Dita waituina nuiya bukuii jiiina duka tuke ajumaish bukuii atinai. Bestia emematiaju aidau, niime dakumkamujuiya nunakesh, niina daajiya

nujaigkish marcamu aina duka tsawaish, kashikesh ayamauk atsugtinai". ¹² ¡Nuadui Apajuí nemajin pegkejam aina duka, waituinakush emamkemas katsuntug batsamas, Apajuí chicham umiktajum tibauwa nuna umiinak, Jesusai dekaskeapi tumain ainawai!

¹³ Antukbaijai makichik chichaman nayaimpinmaya tujuttatman: "Agagta: Shiig aneasagtatui yamai nagkamas Apu Jesusjai ijutkau pujus jaina duka". Tutai, Wakani Pegkeji chichaak:

"Ehé, dita takaak waituina nunak ayamsagtatui, wagki ashí dita takasbaunum akiam agtata dui, timayi".

Nugkanmaya yajubau

¹⁴ Niimkaman wainkabiajai makichik yujagkim pujun, nunú yujagmia nui Aentsmaga akiinawuwa numamtin, oro atsejaku, hoz shiig etsakamun takaku ekeematman. ¹⁵ Nuniai jega Apajuí ememattainmaya makichik ángel jiiinkibi, nunik yujagminum eketa nuna senchi untsuká: "Pai, yamaik hora jegae, nugkanmaya ajak tsamak uminkae, hozjumjai tsupijam juuktá" timayi. ¹⁶ Tama yujagminum eketa nunú, hozjijai tsupig ajak nugkanmayanak juukmayi. ¹⁷ Nunikmatai jega Apajuí ememattai nayaimpinum awa nuiya, tikich ángel hoz shiig etsakamun takus jiiinkibi. ¹⁸ Nuniai tikich ángel jii ekemamain senchijí ajamu altarnumia jiiinkibi, nunik hoz etsakamun takaka nuna senchi untsuká: "¡Hoz etsakamu takakam dui nugkanum uva ajakbau tsamakaja aanú tsupijam juuktá!", timayi. ¹⁹ Tama angelchakam hozjijai nugká uva tsamakun tsupig yajuak, uva dajaja ijutainum chimpiabi, duka Apajuí suimkaji ishamaina nuna iwainabi. ²⁰ Dutikamtai uvanak yaaktan ukumtikiag ijujagmayi, tuja uva ijutainmaya numpa jiiinkibi, nunik caballo weniya aatus amugmayi. Nuniak trescientos kilómetros tumain nugkan ukatkabi.

15

Ángel aidau sieteya imajin suwimak sukagtustin aidau

¹ Wainkabiajai nayaimpinum tikich shiig anentai jegagmainchau wantinun: siete ángel aidau, inagnamunum jata atinun takuinakuyi. Nujai Apajuí ni kajekbaujinak inagnaktinuyi. ² Nuigtush wainkabiajai, nayantsa numamtin vidrio saawiya iman jiijai pachimjamu atatman. Nui ijunniagmayi Apajuí arpa susamun takuinaku, bestia niime dakumkamua nunakesh emematchaju aidau, dakumkamunakesh, marcash atsugbau, daaji numerowai agatjashbau aina nunú. ³ Nunú aidau, Moisés Apajuí inake aajakú kantamamua nuna kantabiagmayi nuigtú Uwijá kantamtaijija nujai, nuninak:

"Shiig muuntai, anentai jegagmait sui,

ashí ame takasbau aina duka.

Apu Apajuí Ashí senchigtinuh;

ame takasbau aina duka pegkejai, dekaskenum aikame, amek ashí nugkanmaya aina nuna reyjiyaitme.

⁴ ¿Apuh yaki ishamjamkashti? ¿Yaki emematjamchati?

Ameketme pegkegmamek.

Iman asamin ashí nugkanmaya aidauk kautjamak emematjabiagtatui, wagki ame dekas dutikaum duka ashí wantinjau asamtai", wajagmayi.

⁵ Juna tusa inagnakui, niimkaman nayaimpinum jega Apajuí ememattai ujanatman wainkabiajai. ⁶ Nunú jega Apajuí ememattai ujanmatai siete

ángel aidau, siete jata aidaun takaku jijnjagmayi, jaanch lino tsuwatchau winchamtin aidau nugkuaju, detsepega aatus akachumtai oro akachumau agmayi. ⁷ Nuniai siete iwaaku aina nuiya makichik, siete ángel aina nuna, siete copa oro aidaun susabi, Apajuí tuke pujuwa nuna kajetí aimjamun. ⁸ Jega Apajuí ememattaiya nunak Apajuí imanji, nuigtú senchijiya nu bukuiti akijuabi; imaniau asamtai siete ángel aidau, siete jata aidaun takuinaka nuna ashimtsaigkik makichkish nuig waimainchau agmayi.

16

Apajuí kajetí siete copanum aimjamu aidau

¹ Antukbaijai jega Apajuí ememattainmaya senchi untsamak, siete ángel aina nuna chichajak: “Wetajum nunikjum siete copa aina nui Apajuí kajetí aimjamua nu nugká ukagtajum”, tabaun.

² Tama dekatkauwa nu ángel wee, copanum aimkamua nuna nugká ukagmayi. Dutikamtai aents aidau, bestia marcaji ajamu aidaun nuigtú niime dakumká najanamua nuna emematiaju aidauk kuchap jiiintujam najaimainak senchi waitiagmayi.

³ Nuniai tikich ángel copanum aimkamua nuna nayants ukagmayi. Dutikamtai nayantsak numpa wajasmayi, aents maamu numpega iman. Imanikmatai ashí nayantsanum iwaaku batsamin aina duka jinawagmayi.

⁴ Nuniai ángel kempatuma ju copanum aimkamua nuna, namak aidaunum, yumi pukuni jiiintaiji aina nui ukagmayi, dutikam numpa wajasagmayi. ⁵ Nu ángel yumi dutikmain senchijí ajá nu chichaamun antukbaijai:

“Apuh, amek pegkeg takauwaitme, iman asam juka jutikaume.

Pegkegmah, tuke pujuu nuigtush tuke pujujukaitme,

⁶ wagki ditak amina aentsjum pegkejam aidaun, nuigtú profetajum aidaunash mainak numpen ukajaju asagmatai, ameshkam dutiksamék numpa amame. ¡Dekaskenun ditak aatsa aikam amain ainawai!”

⁷ Nuigtush altar puja nuiya, chichaak: “Apu Apajuí ashí senchigtinuh, amina suimkajum aina juka pegkejai, dekas ainawai”, tabaun antukbaijai.

⁸ Nuniai ángel cuatroa ju, copanum aimkamua nuna etsan ukatjabi, dutikak senchin susabi jii kegama imaniak aents aidaun apeatí tusa.

⁹ Dutikamtai aents aidau sukuinam senchi esagmayi, imaninak Apajuí senchigtin asa jatá dutika nuna adaisag pegkegchau chichajiagmayi, nunidau asag ditá tudaujinash idaiyinak Apajuinak emematchagmayi.

¹⁰ Nuniai ángel cincoa ju, copanum aimkamua nuna bestia keemsa inamtaijin ukagmayi; dutikamtai niina inamtaijig suwe wajasmayi, nunikmatai aents aidauk iyashin najaimainak inayin esagmayi, ¹¹ imanik kuchapjin najaimainak Apajuí nayaimpinum pujuwa nuna pegkegchau chichajiagmayi, tujash pegkegchau takatnak idaichagmayi.

¹² Nuigtú ángel seisa ju copanum aimkamua nuna namak Éufrates muunta nui ukagmayi, dutikamtai namakak buku wajasmayi, rey aidau etsá minitainia aidau suntajijai mininak katiagjtina nunú.

¹³ Nuniai wainkabiajai dragogka weninia, nuigtú bestia weninia, waitá etsegna nuna weniniashkam, kempatum wakan pegkegchau kuwauwa nuní niimtin aidau jiiinaidaun; ¹⁴ duka wakan iwanchdau ainawai, nunin asag aentsush dutikmainchaun iwainag takainak, ashí nugkanmaya rey

aina nuna yujajiagtina ijumjatatus, Apajuí ashí senchigtina nu, suwimak sukagtamú tsawan jegakui maaniami tusag.

¹⁵ Wika kasajai betekmantuk minittajai, shiig aneasagtinaí aneaku batsatuk, nuigtush jaachjin kuitamaidauk, wi minitaish wisú pujuinachu asag datsamamujish atsujiagtina dui. ¹⁶ Dutika rey aidaunak ijumjabi hebreo chichamai nugka Armagedón* tutaya nui.

¹⁷ Nuniai ángel sieteya ju copanum aimkamua nuna dasenum ukagmayi, dutikamtaí jega Apajuí ememattainum ekeemtaí nayaimpinum awa nuiya, senchi untsamak: Ashimdaekae, timayi. ¹⁸ Timatai ipamat, chaajip, peem aidaui senchi pampaidiagmayi, imatbaunum nugkak senchi uugmayi, yama nagkamak aents batsamsauwa dui nagkamsash imanika uugchatain shiig senchi uugmayi. ¹⁹ Imaniau asamtaí yaakat muunta duka kampa-tuma imajin kanakmayi, yaakat aidaú nugka muunnum aina dushakam tsainkabi. Apajuí yaakat Babilonia pegkegchaujín kajimatjukchau asa, kajejúk suwimkan suak imatikabi. ²⁰ Ashí ajuntaik muja aidaui megkaejagmayi. ²¹ Nuigtushkam nayaimpinmaya bicha muun cuarenta kilo tumainun nagkaesau aentsnak kaketiagmayi; Nu suwimak ishamain imanitai, Apajuín pegkegchau chichajiagmayi.

17

Akiká takaaku tuwagtaiya nu suwimak suamu atin

¹ Siete ángel aidaú, siete copa aidaun takaka nuiya makichik tajuntujuín chichagtak: “Jui tantata, nunikamin akiká takaaku tuwagtaiya nu kuashat namak aidaunum eketa nunú suwimak susatnun iwaintuktajame; ² nu nuwajai nugkanmaya rey aina duka pegkegchau takasaje aantsag ashí nugkanum aents batsatana dushakam nujai takaninak nampejaje” tujut-mayi.

³ Nuna Wakan iwaintugkamtaí, ángel uwegshunum jujukmayi, du-tijuamtaí bestia kapantaku, siete buuktin, diez kachují ajamu, ashí iyashin Apajuí pegkegchau chichagbau agatkamunum makichik nuwa ekeemtatman wainkabiajai. ⁴ Nunú nuwak jaanch yamakaitkau kapan-taku pachimjugbaun nugkuajuyi, nuigtush oro, kaya shiig pegkeg aidaú, perla aidaui iwagmamjaui; nuigtushkam makichik copa oronum ashí dakitmain aidaú, tsumain niina takanitaiji aidaú piyakun takakuyi; ⁵ tuja nijayinchakam chicham dekamainchau: “BABILONIA AKIKÁ TAKAAKU TUWAGTAI, AKIKÁ TAKATAI AINA NUNA DUKUJÍ, NUIGTUSH ASHÍ PEGKEGCHAU DAKITMAIN APAJUIMTAI NUGKANUM AYÁ NUNASHKAM”, tusa agatjamuyi. ⁶ Nunikmatai Apajuí aentsji pegkejam aina nuna numpen, Jesusa etsegtin asagmatai maawagbauwa nuna numpejai uwag nampeká ekeemtatman nuwan wainkabiajai.

Nuna wainkan senchi puyatkabiajai. ⁷ Nuniai ángel chichagtak: “¿Wagka imanikmesh puyatame?” “Ju nuwash wajukatnuna aniawa, nunak wi shiig ujaktajame, nuigtú bestia siete buuktin, siete kachují ajamunum entsatka nuna pachisan. ⁸ Bestia wainkaum duka duik pujujakui, tujash yamaik atsawai; nuninaitak waa muun ishamain akaga nuiya jiinkittawai, nunik ni suwimak jukitnujín jegatatus. Ashí nugkanum

* **16:16** “Armagedón” Palestina nugkanum awai, nuanui Apajuí ashí senchigtina nunú inagna-munum Iwanch suntajin ijumjamtaí maaniatnai, tawai Apajuí chichame.

batsatina nunú, yama nugka najannaigkish papí pujutan jukiú agattaiya nuish daaji agatkashbau aidauk, bestia pujujakú, tujash yamaik atsau, ajumaish achatna nuna wainkag senchi puyatkagtin ainawai.

⁹ “Jui wainmainai yaki yachaita, yaki shiiyash antawa nunú: Siete buukega duka, siete mujanum nuwa eketa nuuwai; ¹⁰ nuigtú siete rey aina nuna iwainawai. Cinco rey aina duka megkaejaje, nunikmatai makichik inamui tuja makichik eke minatsui, tujash nu inamkug dukap tsawan pujus inamjashtatui. ¹¹ Bestia pujujakú, jakau asa atsa nunú ataktú rey wajas inamtai ocho rey atatuí, duka siete rey aajakua nuiyagke, nunak suwimak tuke atina nui weak nuniktatui.

¹² “Diez kachují aidau wainkaum duka, diez rey aidau eke inamainatsu nuuwai, tujash nunú aidauk bestiajai ijunag makichik hora inamjagtinai.

¹³ Ditak makichik dutikata tabaunak anentaímtuidau asag, bestia inamjati tusag senchintikawag ditá inamtaijinak idaitusagtatui. ¹⁴ Dutikawajam Uwigjai maaniawagtatui, tujash Uwig ditanak depetkagtatui, wagki imá nigki Apu ashí apu aidau nagkaesauk nuigtushkam nigki Rey ashí rey aina nunash nagkaesauwa ibau asa; ditajai ijuna duka ni untsukbau ainawai, ni etegjamu nuigtush chichamenash betek umijin aidau”.

¹⁵ Nuigtush ángel chichagtak: “Ame namak aidaunum akiká takatai eketu wainkaum duka, ashí aents aidau, ashí nugkanmaya, ditash chichaaku aidau, nugka muunnumia aidau, ashí yaaktanmaya aina nu ainawai. ¹⁶ Bestia diez kachují ajamu wainkaum aanú aidau akiká takataiya nuna kajegkagtinai, dutikawag yaaktan tsaikag ashí wají yajutuk wisú ukukiagtinai; nuna nejenak yuawagtinai dutikainak jiiyai apekagtinai; ¹⁷ wagki nunak, Apajuí ni dutikata tibauwa nuna dutikatnume tusa ditá anentain apujtusajui, dutikamu asag shiig chichasag ditá inamtaijiya nunak, bestia idaitusaju ai, Apajuí tibauwa nunú uminkatnai. ¹⁸ Ame nuwa wainkaum duka yaakat muunta nuuwai, ashí nugkanum rey aina nui inama nunú”, tujtmayi.

18

Babilonia tsaikbau

¹ Juna wainkan, tikich ángel senchigtin, niina tsaptinjinig nugkanak tsawan awajus nayaimpinmaya akaegun wainkabaijai. ² Nuniak shiig senchi untsamak:

“¡Tsainkae, tsainkae yaakat Babilonia muunta duka!
¡Yamaik wakan pegkegchau aina nuna batsamtai,
nuigtú chigki tsumain dakittsá diitai aidau batsamtai wajasé!

³ Wagki ashí nugkanmaya aidauk vino nuwa pegkegchau takaamua nunak uwajaje;

nuigtush rey nugkanmaya aidaush nu nuwajai takanisaje,
wají sujin nugkanmaya aidaushkam nunú nuwa senchi wakejamujiya
nuna

suwinak wiyakchameawaje”, timayi.

⁴ Nuigtú tikichin nayaimpinmaya chichaamun antukbaijai, nuniak:

“Mina aentsug aidautigmek, aanú yaaktanum pujutsuk jijnatajum,
dita tudau takaina nu takaakjum,

jata ditan ishamain minittata nunú atumesh jukijum;

⁵ ditá tudaujig nayaimpinak antigke imaniku asamtai,
Apajuí ditá pegkegchaujin suwimkan susagtatui.

6 Aanú nuwa tikichin pegkegchau awajkauwa dutiksagmek, niishkam pegkegchau awajkatajum. Nuigtush ni pegkegchau takasbaujiya nuna nagkaesau waitkastajum; ni copanum tikich uwagtinun pachimjug umijuk amujakua nuanuig, nigka aan nagkaemasjum senchi pachimjugtajum.

7 Dutikakjum ni ememas shiig aneas pujusua dutiksagmek, ni senchi waitiak buuttinjiya dushakam susatajum, wagki ni anentaimsag: Wika juig reinajai betek wajasan eketjai, nuigtush wajehuitjai, nunin asan tuke waittsashtinaitjai tawai;

8 tau asamtai makichik tsawanta duik ni ashí waitiamujig ajittawai: Jaamuji, buutbauji, yapajamuji, inagnamunum jium apeam atatu; wagki Apu Apaju ashí senchigtina ibau asa, niina suwimkan suwak dutikattawai”.

9 Nugkanmaya rey aidau nunú nuwajai takanisaju aidauk, nijai wakegamun pujusaju asag buutiagtinaí, nuninak senchi niina anentaim-tusag waitiagtinaí, esaak bukuitaun wainaidau asag; ¹⁰ imanik waittai ishamaínak ikaag ijunas:

“¡Wait anentajame, wait anentajame Babilonia ame yaakat muun senchigtin aajakuitkum, makichik horaya duik suwimak juamu ajutjamsa dui!”, awajiagmayi.

¹¹ Wají sujin nugkanmaya aidaush buutiagtinaí, nuninak nuwa nuna anentaimtuínak waitiagtinaí, wagki ditá wajíiji sumagmainuk makichikish atsusú asamtai; ¹² wají sujutajai aidauk oro, jiju plata tutai, kaya pegkeg aidau, perla aidau, lino dekas pegkeg, jaanch yamakaitkau, seda, jaanch kapantaku aidau, ashí numi kugkuín aidau, ashí wají elefante najjai najanamun, ashí wají numi pegkeg aidaujai najankamu, cobre, hierro, nuigtú mármol; ¹³ nuigtú canela, kugkuín aidau, incienso, mirra, olíbano, vino, aceite, harina dekas pegkeg aidau, trigo, bestia aidau, uwig aidau, caballo carro japitai aidau, nuigtú inatai aidau, aents aidaushkam, aajakajui. ¹⁴ Nunin asamtai yaaktan chichajuínak:

“¡Ame wají shiig wakejin aayum duka, yamaik atsugtamsae!

Ashí wajíijum shiig pegkeg aidau ajutjamajakua duka tuke igkugchatnaitme”, awajiagmayi.

¹⁵ Nunú wajíin sujin aidauk, nuna suínak wiyakuch waigkú aina duka, nunú imanik waitiamun wainkag ishamaínak ikaa ijuntsagtinaí, nunik anentain idajuk buutuínak:

¹⁶ “¡Wait anentajai, wait anentajai yaakat muunta nunak!

jaanch lino najanamun,

jaanch kapantu nentetkaun nugkug,

oro, perla, kaya pegkeg aina ibaujai iwagmamnuwe nuna,

¹⁷ ¡wagki makichik horaya duik ibau wiakchameamujiya duka esagkae!” tiagmayi.

Nuigtushkam ashí lanchá anuntin aidau, nui chimpimag yujau aidau, nui takau aidaush, ashí aents nayantsanum takau aina nujai ikaa ijuntsagmayi. ¹⁸ Nunikag esaku bukuitamujin wainkag senchi unsumkag: “¿Tikich yaakat jujú yaakat muunta ibagjai betekmamtinuk atsawapita?”, wajagmayi. ¹⁹ Tusag wake besemag dekapenak nugka yukuukuntun jukiaj, buuken yukuajag senchi unsumak buutuínak: “¡Wait anentajai, wait anentajai yaakat muunta nuna!

Ashí lanchagtin aidautinak nigki wiyakuch etamiajuetak makichik horaya duik esaké”, wajagmayi.

²⁰ “Nayaim batsatutigmesh, Apajuí aentsji pegkejam aidautijum, apóstol aidautigmesh, nuigtú profeta aidautigmeshkam ju nuwa imania jujú diisjum shiig aneastajum.

Wagki Apajuí atumin iikmatjamak suwimkan suwak imatikau asantai”, timayi.

²¹ Nuna timatai, makichik ángel senchigtin, kaya deketai muunta numamtinun jukibi, dutika nayants ajugmayi, nuniak:

“Jujai betekak yaakat Babilonia muunta aushkam ajapeam atatui, nunikmataig ajumaish wainkashtin ainawai.

²² Dutikamu asamin, aminiya arpa awatbauk, pigkui umpuamush, trompeta umpuin aidau umpuamush, aents nui pujus takaush, yutain dekedaukesh tuke antuekashtinai.

²³ Nuigtush aminiya lámpara ekemamukesh wainnakchatnai tuja, nuweniagtai fiestamainak pampainamukesh tuke antuekashtinai, wagki amina wajiigmin sujutjamajakua duka, nugkanmag dita wagaku aajakajui, amina tunchigminig ashí nugkanmaya aents aidauk tsanujakuitme.

²⁴ Nuigtush niini profeta aina nuna numpe nuigtú, aents pegkejam aidaun numpe wainnakui, nuigtú ashí aents Apajuí umijin aidaun nugkanum maawajua nudaushkam”, timayi.

19

Nayaimpinmaya emematbau

¹ Nunú nagkaemakmatai nayaimpinum kuashat ijunjag senchi pampainamun antukbaijai, nuninak:

“¡Yajautsui!

Uwemat, senchi, eme anentut, nuigtú emematut aina duka, imá iina Apujui Apajuiya nudauke,

² wagki Apajuí suwimkan susa duka pegkejai nuigtush dekaske, nuwa akiká takaaku tuwagtaiya nu ashí nugkanmaya aidaun, ni takataijiya nuna jintintua pegkegchau emaku asantai suwimkan susae. Nuigtush niini ikmake niina inaken kajegkú aina nuna”, wajagmayi.

³ Nunikag ataktushkam awentsag:

“¡Yajautsui!

Nuwa akika takaaku tuwagtai esaak bukuita duka ajumaish tuke megkaekashtinai”.

⁴ Timatai veinticuatro anciano aidau cuatro iwaaku aidaujai, Apajuí niina ekeemtaijin eketun tikishmatjag tsunsumawag nijayin nugkan antig pujusag emematuinak: “¡Yajautsui! Aatus ati”, tiagmayi.

⁵ Nuna tiagtai nunú ekeemtaiya nuiya chichaak:

“¡Ashí niina inake aidautigmesh, eme anentsá diitai, eme anentsá diishtai aidautigmesh, iina Apajuijiya nu eme anentsajum ememattajum!” tabaun antukbaijai.

⁶ Nuigtushkam antukbajjai kuashat ijunag chichainak wajukmaina imatak, yumi utama imatak, shiig senchi ipamat kedegtak wajukea imatuinak:

“¡Yajautsui!

Wagki iina Apuji Apajuí ashí senchigtina nunú inabaun nagkamae,

⁷ shiig aneasagmi nuniaku dakujusagmi nuninaku emematiagmi,

wagki Uwig nuwenbau tsawan jegau asamtai,

niina nuweg yamaik umintsae,

⁸ nuniku asamtai lino dekas pegkejan tsuwatchau winchamtinun apegae, wagki lino pegkeja duka, Apajuinu pegkejam aidau pegkeg takasbauji aina nuna iwainawai”, wajaídaun.

⁹ Tutai ángel chichagtak: “Agagta: Shiig aneasagtinaí Uwig nuwenku yuamunum ipaamu aídauk”. Nuigtushkam chichagtak: “Juka chichamak Apajuinu dekaskea nuuwai”, tujutmayi.

¹⁰ Tujutkui ni wajuamunum tikishmagbajjai niina ememattasan, nuniai: “Ankaipa wika Apajuí inakegaitjai. Ame, amina yatsum aídaujai Jesús chichakbau betek umijin ainajum wisha annuketjai. Dekas Apajuí emematta”.

Apajuí tabaun etsejuina duka Jesusa chichamenash etsejuinak nuni-nawai, tujutmayi.

Caballo pujunum entsatkau wainkamu

¹¹ Nuniai nayaim ujanmatai caballo pujan wainkabiajai, nui entsatka duka “Betek Umin” nuigtush “Dekaskea nu” daagtinuyi, nuigtushkam suwimkanash dekas dutiknuyi, aantsag maaniakush dekaskenum maan-inuyi. ¹² Nuna jii aídauk, jii kegak wajukeama imanibi, buukenish kuashat atsejutaiji ajibi; nuigtush daaji agatjamush ajibi, tujash nunak imá nigki dekabi. ¹³ Jaanch numpai numpeagbaun nugkuajuyi, duka: “Apajuí Chichame” daagtinuyi. ¹⁴ Nayaimpinmaya suntag aídauk lino dekas shiig pegkeg puju tsuwatchau aídaun nugkuinaju, caballo puju aídaunum entsatkau saetus miniagmayi. ¹⁵ Niina weninia makichik espada tsakatskatu empek jijnmayi, nuadui ashí nugkanmaya aídaunak kajegká, niina senchijijai inamjatnuyi; Apajuí ashí senchigtina nu kajeká aents aídaun suwimak ishamainun susatta nunash, nigki uva yumiji vino jiiiktasa neje najatia dutika dajagtinuyi. ¹⁶ Ni nugkuagbaujinish, niina bakujinish: “REY ASHÍ REY AINA NUNA NAGKAESAU NUIGTUSHKAM APU ASHÍ APU AIDAUNASH NAGKAESAU”, tabau agatkamuyi.

Bestia achikbau

¹⁷ Nuigtú wainkabiajai makichik ángel etsanum wajas, ashí chigki agkajunum nanaak yujau aídaun senchi untsuak: “Minitajum, nunikjum jui ijunajum, Apajuí yutain kuashat umiká ju yuatajum, ¹⁸ rey aina nuna neje, capitán aídaun neje, senchi aídaun neje, caballo aídaun neje, nui entsamin aina nuna neje, ashí neje aídaun, agkan aídaun nuigtú inatai aídaun, eme anenchatai, eme anentai aina juna neje aídaun”, timayi.

¹⁹ Nuniaiig niimkaman wainkabiajai bestia, nugkanmaya rey aídaun nuigtú nuna suntaji aídaujai, caballonum entsatka nujai nuigtú suntaji aídaujai maaniatatus tuwak ijuntatman. ²⁰ Nunittaman bestianak achikmayi wait profetaya nujai niina eemtin wainchatain iwainak, bestia marcajin jukiu aídaun tsanujua nuna, nuigtush niime dakumkamujinash emematiu aídaun, nu jimaja nunak jii azufrejai pachimjamu kee abaunum iwakunak ajuabi. ²¹ Tikich aina nunak, caballo pujunum entsatka nuna

weninia espada jiina nujai ijinabi, dutikamtai ashí nanamtin aidau nunú neje aina nuna yuawag ejemakgmayi.

20

Mil mijan

¹ Wainkabiajai makichik ángel nayaimpinmaya waa muun ishamain akaga nuna llavejin nuigtú cadena muuntan takus akaegun. ² Nunik dragogkan achikmayi yaunchuk “dapi” tujakbau, Iwanch Satanás* tutaiya nujai, dutika jigkagmayi mil mijadai pujusti tusa; ³ dutika waa muun ishamain akaga nui ajua shiig epeni ukukmayi, jiinki ashí nugkanmaya aina nuna tsanujai tusa, nui pujus mil mijanan ejematai wajumchik tsawanchik atiatnuyi.

⁴ Nuigtú wainkabiajai ekeemtai aidaun, nui pekabiagmayi inamjatnume tusa senchi susamu aidau, nuigtushkam wainkabiajai Jesusan pachis nuigtú Apajuí chichamen etsejiagtai tsupika maamu aidau wakanin; bestianash emematchaju aidau, niime dakumkamunakesh, nuigtú nijayinish, uwejinish marca jukichaju aidau nantajag, Cristujai mil mijan inamjagtinuyi. ⁵ Nunuwai dekatkau nantajú aidauk, tujash tikich jakau aidauk nantachagmayi mil mijan jegamtai nantajagtin asag. ⁶ Shiig aneasagtinai dekatkau nantamu atina dui nantakiu aidauk, ditak Apajuí aentsji pegkejam wajasú asag. Nunú aidauk ataktú jaamu atina nuig waittsachagtinai, ayatak Apajuí, Cristo sacerdoteji waigkagtinai nunikag mil mijadai inamjagtin ainawai.

Satanás depetkamu atina nu

⁷ Nunú mil mijan jegamtai, Satanás achikam puja nuna akupkatnai; ⁸ dutikam jiinki ashí nugkanmaya aidaun tsanuagtinai, Gog Magog aina nuiyan, maaniatnun ijumjatatus; nunú aidauk nayantsa kaamatkaji deka-pamainchauwa ibau atinuyi. ⁹ Nunikag ashí nugkan jamag midiajmayi, nuninak yaakat Jerusalén pegkejam aidau batsamtai Apajuí anetaijiya nuna tenteawagmayi; nuniagtatman Apajuí nayaimpinmaya jiin ajuntug ashí apekmay. ¹⁰ Tuja Iwanch ditan tsanujakua nunak kucha jii azufrejai pachimjamua nui ajuabi, bestia nuigtú wait profeta egketbaunum, dutikam kashi tsawajjai ajumaish tuke waitú batsabiagtinai.

Inagnamunum degagmabau atin

¹¹ Wainkabiajai makichik ekeemtai muuntan pujun, nui makichik ekeematman. Nuna emtinig nuggak nayaimpijai atsusagmayi, nuniku asag makichik yantamnumkesh wainnakchagmayi. ¹² Wainkabiajai jakau aidaun, eme anentsá diitai, eme anentsá diishtai aidaujai Apajuí ekeem-taijin eketa nuna eemtin ijuntatman; nunikmatai papí aidaun ujakmayi, tikich papinash ujakmayi papí pujutan jukiu agattaiya nuna; nunikmatai jakau aidaunak papinum dita takasbauji agakbau aina nuiyan diisá dutiksag suwimkanak sumayi. ¹³ Nayants jakeku aidaush nantajagmayi, jataiya dushakam nuigtú Hadeschakam jakau niini aidaunak susabi. Dutikawagmatai makí makichik dita takasbaujin diijus akanmayi. ¹⁴ Jata nunak, nuigtú Hadesjai kucha jiiya nui ajugmayi. Nuuwai Apajuijai tuke kanaaku kanaamu atina duka. ¹⁵ Aents pujutan jukitin agattaiya nui papinum daaji agatjashbau aidaunak nui utsawagmayi.

* 20:2 “Satanás” diistá Mt. 4.1.

21

Yamajam nugka yamajam nayaim

¹ Wainkabaijai nayaim yamagman, nugka yamagmajai; wagki dekatkau najankamu nayaim, nugka, nayants aina duka atsusagmayi. ² Nuigtush wainkabaijai yaakat pegkejam yamajam Jerusalegka nu nayaimpinmaya Apajui puja nuiya akaetatman, duka nuwa aishinatin shiig iwagmam-jauwa imanuyi. ³ Nuniamunum nayaimpinmaya senchi untsumun antuk-baijai, nuniak: “Juajui aents aina duka Apajuijai ijunag pujustatui, nigka ditajai pujustatui. Nunitai dita niina aentsji agtinai, Apajuiya duke ditá Apajuiji atinai. ⁴ Nuniau asa ashí ditá negaikinak ujguktinai. Nuigtush atsutnai jaamu, buutbau, waitiaku unsubstau, najaimamushkam, wagki nagkamchak waji aajakajua duka atsusaju asagmatai”, timayi.

⁵ Nuniai ekeemtainum eketa nu chichaak: “Wi ashí waji aina nunak yamajam emajai”, nuigtú chichagtak: “Agagta, wagki ju chicham aina juka dekaske nuigtush dekas uminkatin ainawai”, tujutmayi. ⁶ Nuigtú chichaak: “Yamaik ashimnake. Witjai nagkamtinish tuke pujusunuk atakea duish tuke pujutnunuk. Nagkamnamunmash nuigtú nagkanbaunmash wikitjai. Kitamaanak yumi pukuni jiina nu pujutan sukagtina nuna anenjauch susattajai uwagti tusan. ⁷ Depetmakunak ashí waji aina nuna susatnaitjai, nunikan wi ditá Apajuiji atatjai, tuja dita mina uchig agtatui. ⁸ Tujash sapig aidau, dekaskeapi tuchau, kajegkagtin, magkagtin, tsanijimtan wekaetin, wawejatin aidau, apajuijintain emematin, nuigtú ashí wait aidaujai kucha jii azufrejai pachimjamu kee awa nui chimpimawagtinai, Apajuijai tuke kanaaku kanaamu atina nui”, timayi.

⁹ Nuniai siete ángel aidau, siete copanum inagnamunum jata atin aimjamun takuinaku aajakajua nuiya makichik chichagtak: “Wegajai, wi Uwig nuwatkatna nuna iwaintuktajame”, tujutmayi. ¹⁰ Nuniai Wakani Pegkeji makichik muja yakí jiiikaunum jujukmayi, dutika yaakat Jerusalén shiig pegkegma nuna iwaintugkabi, nayaimpinum Apajui puja nuiya akaetatman. ¹¹ Yaaktak Apajui etsantajinig etsanmayi, nunú etsanbaujiya duka makichik kaya shiig pegkeja imanuyi, kaya jaspe, vidrio saawiya iman. ¹² Peegmagbaujig muun yakí jiiikbauyi, nuigtú doce waiti ajibi, nunak doce ángel aidau kuitabiagmayi, nuigtushkam Israelan uchiji doce aajakajua nuna daaji agatkamuyi; ¹³ Makí makichik yaakta yantame aina nuig, kampá kumpatum waiti ajiagmayi. ¹⁴ Yaakat peegmagbauwa duka doce kaya batsatuamuyi, nuig doce apóstol aidau Uwigdauwa nuna daaji agatkamuyi.

¹⁵ Mina aujta duka yaakat peegmagbaujiya nuna ashí waitiji aina nujai dekaapatnun tagkana nuninun oro takakuyi. ¹⁶ Yaaktak ashí yantamejai nuní nuninuk agmayi, esantiya duka wegkantijai betekayi. Ángel yaaktan tagkan takakbauwai dekaapabi, dutikam dos mil doscientos kilómetros* ajibi. Esantí, yakintí, wekantí aina duka betek agmayi. ¹⁷ Nuigtushkam yaakat peegjamua nuna dupantinak sesenta y cinco metros dekaapabi, ángel aentstí dekaapatiamua dutiksag.

¹⁸ Duka jaspeyai peegmagbauyi. Untsu yaaktak ayatak orokeyi, vidrio saawi tsuwatchauwa iman. ¹⁹ Yaakat peegmaku kaya batsatuamua

* **21:16** “Dos mil doscientos kilómetros” tawa duka, versión Lenguaje actual tawa nuiya jukimui, paan antumain atí tusa. Tuja versión Reina-Valera, tikich versión popular aina duka “doce mil estadios” tuinawai.

duka, ashí kaya shiig pegkeg aidauwai iwajamuyi. Nagkamchakuik kaya jaspe apujtuamuyi, jimaja duka zafiro; kempatuma ju ágata, cuatroa ju esmeralda, ²⁰ cincoa ju ónice, seisa ju cornalina, sieteya ju crisólito, ochoa ju berilo, nueveya ju topacio, diez a ju crisopraso, onceya ju jacinto, doceya ju amatista. ²¹ Doce waiti aina duka doce perla agmayi, makí makichik waiti aina duka makichik perlayaik takasbauyi. Untsu yaakta jintiya duka ayatak orokeyi, iman asa vidrio saawiya imanuyi.

²² Nuanuig jega Apajuí ememattainak wainkachbajai, wagki ditá jee Apajuí ememattaiya duka, Apu Apajuí ashí senchigtina nuna Uwigjai emematuidau asagmatai. ²³ Yaakta duka etsanak nantunakesh atsumchabi tsaptin emati tusag; wagki Apajuí tsaptinjiya duke tsaptin emau asantai, nuigtush Uwija nuuyi niina lamparajig. ²⁴ Ashí aents uwemkaju aidauk nunú tsaptina nui yujasagtinaí. Tuja ju nugka juiya rey aidauk ditanu wají shiig pegkeg aidauk niina eme anentsag itajiagtinaí. ²⁵ Waitiji aidauhkam ashí tsawantai ujaimutak atinaí, wagki kashik atsau asantai. ²⁶ Ashí nugkanmaya aidauhkam ditá wiakchajiyi nuiyan, nuigtú wají pegkeg aidauhkam itajiagtinaí. ²⁷ Nunú yaaktanmag aents pegkegchau tsumain aina nuna takau aidauk, wait aina dushakam wayachagtinaí. Uwijá papiijin pujatan jukiú agattaiya nui daaji agatkamu aina duke wayawagtinaí.

22

¹ Nuniku ai, ángel iwaintugkabi makichik namak pujuta sukagtin tsuwachau, vidrio saawiya iman, Apajuí ekeemtaijin Uwigjai eketbaunmaya jiantatman. ² Jintak yaakta ejapen nagkaemakuyi, nuniamunum mai namaka yantamega nui, numi pujuta sukagtin aatú amain makichik wajai tikich yantamen makichik wajabi, duka makichik mijantin doceya imania nejenuyi nantu nantutin nejeau asa; nuigtú numí duke aina duka ashí nugkanmaya aidauk etsagagtasá takataiyayi. ³ Nuigtushkam awig makichikish pegkegchau chichagdaiyamuk atsutnai. Apajuí ekeemtaiji nuigtush Uwijá ekeemtaijiya dushakam nu yaaktanum atinaí, nunin asantai niina inake aidauhkam niinak emematiagtinaí. ⁴ Nunidau asag paan igkua wainiagtinaí, tuja ditá nijayinish Apajuí daaji agatkamu agtinaí. ⁵ Nu yaaktanmag kashik atsutnai. Lámpara ekemaktasaikish atsumnashtinaí, aantsag etsashkam atsumnashtinaí, wagki Apu Apajuí tsaptin emau asantai, nunikmatai nui batsamas tuke inamá batsamtinaí.

Cristo taatnuuk namput wajaschae

⁶ Ángel chichagtak: “Ju chichama juka betek uminkatnai nuigtush juka dekaskea nu ainawai. Apu, Apajuí profeta aidauk Wakani Pegkeji awetim dekamtikajakua nunú niina angeljin awemae, wají aidauk wamak nagkaemagtata nuna ni inake aidauk iwaintukta tau asa”, tujutmayi.

⁷ “¡Waamak minittajai! Shiig aneastinaí jujú papinum chicham tibauwa nuna umia duka”, tawai.

⁸ Witjai Juagkaitjai, jujú wají aina nuna wainkaunuk antutnash antukunuk. Juna antukan tuja wainká wajakan, ángel mina iwaintuja nuna ememattasan tikishmatjabiajai. ⁹ Nuniai ni chichagtak: “Nijah Ankaipa, wagki wishakam ame inakaitam annuketjai, amina yatsum profeta aina nunin, nuigtú ju papinumian chichaman umiina nuninketjai, Apajuí

emematta”, tujutmayi. ¹⁰ Nuigtú chichagtak: “Jujú papinum chicham tibau agagbauwa juka uukmek idaisaipa, wagki tsawantak ashí jegau asamtai.

¹¹ “Pegkegchaun takaa duka nunisag pegkegchaunak takasti; nuigtú tsumain aidaun takaidauk nunisag tsumain aidaunak takasti, tuja pegkejan takaa dushakam nunisag pegkegnak takasti. Pegkeniwa duka nuni senchi pegketi”.

¹² “Nijah, wamak minittajai, nuniakun makí makichik takasaja dutiksaik akiktinun takuktatjai. ¹³ Witjai nagkamtinish tuke pujusunuk ajubaish tuke pujutnunuk, nagkamnamunmash nuigtú nagkatkamunmash wiktjai”, timayi.

¹⁴ Shiig aneasagtatui jaanchjin nijaina duka, numí neje pujutan sukagtina nunash yuwatin, nuigtush yaakta waitiji aina nuish wayatin asag.

¹⁵ Tujash aents besekú aidau, tunchi aidau, tsanijimta yujajin aidau, magkagtin aidau, apajuimtain emematin aidau, nuigtú ashí pegkegchau aidaun wakejus takau aidauk wayachagtinai agag batsamsagtinai.

¹⁶ “Witjai Jesús, mina angeljun awemamjai ashí ju aidaun iglesia aidaun ujaktinme tusan. Witjai dekas atsamunum nagkamdaunuk David weantuitjai, nuigtushkam yaya tsawak etsantama numamtainaitjai”.

¹⁷ Nuniai Wakan nuigtú, Uwijá nuwega nujai: “Minitá”, tuinawai. Ni antaushkam “Minitá”, titi. Ni kitamauk miniti, ni wakegauk yumi pujutan sukagtina nuna anenjauch uwagti.

¹⁸ Ashí aents aidau jujú papinum chicham tibau agagbau antuina nuna ujainajai: Makichik aentskesh, jujú wají aina nuna ekeaunak, Apajúi niinashkam ni waittsatin aina nuna etekattawai jujú papinum agagbauwa dutiksag. ¹⁹ Nuigtushkam makichik aentskesh jujú papinum uminkatin agagbauwa juna emegkakunak, Apajuishkam numi pujutan sukagtina nuna nejenak susashtinai, nuigtushkam yaakat pegkejam jujú papinum pachisa agagbauwa nuishkam awayashtinai. ²⁰ Jujú wají aidaun pachis etseja nunú tawai: “Dekaskenum wamak minittajai”, Aatus atí. “Apu Jesusah, wamak minitá”. ²¹ Apu Jesús wait anenkagtamujiya nu ashí atuminish atí.

Aatus atí.